


Fúka Moodaanaki Kira  
Ufa Afaqínaasa Ufa



Portions of the Holy Bible in the Binumarien language of  
Papua New Guinea

**Fúka Moodaanaki Kira Ufa Afaqínaasa Ufa**  
**Portions of the Holy Bible in the Binumarien language of Papua**  
**New Guinea**  
**Buk Baibel long tokples Binumarien long Niugini**

copyright © 1983, 2001, 2017 Wycliffe Bible Translators, Inc.

Language: Binumarien

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-10

---

PDF generated using Haiola and XeLaTeX on 11 Nov 2022 from source files dated 4 May 2021  
4a891130-f25d-5e30-a81c-882b2e037698

Contents

FRT . . . . .	1
OOSANA . . . . .	2
RAFUDOO AKARAFa . . . . .	66
ESTA . . . . .	117
IDI UFA . . . . .	127
AAQUQIRA UFA . . . . .	237
MATAIOO . . . . .	269
MAREEKOO . . . . .	328
RUKA . . . . .	362
YOOHANEe . . . . .	417
NIQIQOO FASIQAUSA . . . . .	458
ROOMMA . . . . .	511
1 KOORINTI . . . . .	537
2 KOORINTI . . . . .	563
KARATIA . . . . .	579
EEFEESUSA . . . . .	589
FIRIPI . . . . .	598
KOOROOSee . . . . .	604
1 TEESAROONIKA . . . . .	611
2 TEESAROONIKA . . . . .	616
1 TIMOOTI . . . . .	619
2 TIMOOTI . . . . .	626
TITUSA . . . . .	631
FIREEMOONA . . . . .	635
HEEBURU . . . . .	637
YAMEESA . . . . .	657
1 PEETOOROO . . . . .	663
2 PEETOOROO . . . . .	671
1 YOOHANEe . . . . .	675
2 YOOHANEe . . . . .	681
3 YOOHANEe . . . . .	682
YUDEESA . . . . .	683
UQAFIQOO UFafa . . . . .	685

## **Anutuna Ufa**

First Edition of New Testament published 1983 400 copies

This revised edition plus 5 Old Testament books published 2017 450 copies

© 2017 Wycliffe Bible Translators, Inc.

This book is a translation of the New Testament and five Old Testament books into the Binumarien language which is spoken by approximately 1000 people who live 20 nautical miles east of Kainantu in the Eastern Highlands Province of Papua New Guinea.

For this edition, a minor revision was done on the 1983 Binumarien New Testament and the 2003 publication of Genesis, Exodus, and Psalms. Proverbs and Esther, which were translated since then, are also included. In the revision process, tone makers and dashes were removed from most words for easier reading and some long words were broken into shorter words. In addition, the text has undergone minimal revisions of various kinds. New maps, illustrations, and pictures were included to aid understanding. A topical index was included for Bible study.

To date the Binumarien people continue their efforts towards completing their translation of the full Bible.

## **Amuaqira Ufa**

Ooqeennaa tamummaqaraua ufa akara rusa Heebeeru ufakiqari akara riqau. Yisufa aqbee nari ufa Arammaika ufakiqari qimarufaqa Fuka Moodaanaki Kirana akara rusa Kirika ufakiqari akara riqau. Magee kaqi Kirika ufakiqari marifaqa aiqama maqannaasa nari ufakiqari quandasee akara ridaqa. Afaqinnaasa ufakiqari faqa indaaruu akara rumasoonaa 1984 aukuannaki maraqau. Tamummaqaraua ufa moodaannai qisauku (5) buka faqa akara rumaqaafanoo maridanoo. Mifa inni dadaaqinaqa, innee Anutufa Isaraee maqannaasaki auqoo ainainausara amiqimmasee irifaranoo.

Aiqama fookufa taikeenoo, qoodaa kai kaqi uqaqaafanoo maridanoo. Maaqira ququsaki mari ufafa ( ) inni irirana dadaaqianifeera papiqa akara rimariasa uqaidaqa. Kaifaa maaqira ququsaki mari ufafa [ ] ooqai indaaruu maa papiqana akara rusa kooroo ira ufa maaqira ququsaki akara rumaqoofanoo marinau. Kirika ufakiqari sia amiqimmasee koorooina faqa mi ququsanaki koorooidaqa. Maa bukana atinni weesa nambaqa faqa buka auqu qusa uqaqaafanoo maridanoo. Mataioona qusa auqu Mat miqirafauqa faqa piksaauqa faqa Isaraee maqannaasa maqa maaqa faqa inni dadaaqianifeera akara rumaqaafanoo maridanoo.

## OOSANA AROO UFABA

*Maa maqa maaqana faqa faiqi faqa auqu ufafa.*

<sup>1</sup> Oosana kuradoo aukuanna Anutufa sia maru ainainannai mirisinnarunna faqa maa maqana faqa oosana arasee auqinau. <sup>2</sup> Mi aukuanna maa maqafa fifau faafau inoo marufanoo, asukuna firaafa rafaafafinoo marufanoo Anutuna maraquna fannoo nammari amuaqumau ufaira foora uqidanoo oonuree aniree imarinau.

<sup>3</sup> Mi faasaanna Anutufa qinau, kaaqa qaranara mariannee qufanoo kaaqa qarafa kambiqanau. <sup>4</sup> Kambiqafufanoo qafamaseenoo amiqimambinoo qimaseenoo kaaqa qarana faqa asukuna faqa aadu aadu rakeemma quqanau. <sup>5</sup> Rakeemma quqaseenoo qafamaseenoo Anutufa kaaqa qaranara faasaanee qinau, asukunara eendaki fee qinau. Miqi qimasoofanoo mikari indaaruu oosana araseenoo eendirafa naaree anireenoo aiqaroofanoo iaqarafa aniroofanoo mifa mi iaqarafa faqa mi eendirafa faqa indaaruuqaa faasaana marinau.

<sup>6</sup> Mina inaaqianaa faasaana Anutufa kaifaa qinau. Innaaruna kaqi saqanna rainafinoo nammari mirinni faqa mianni faqa aadu aadu rainanoo marianifeera qufanoo miqimminau. <sup>7</sup> Miqi qimaseenoo Anutufa innaaruna kaqi saqanna auqu quqaseenoo nammari raina mianni faqa mirinni faqa quqanau. Quqasoofanoo doo miqinoo marinau. <sup>8</sup> Anutufa mi kaqi saqanna auqureenoo innaarunee qinau. Miqimmasoofanoo eendirafa aiqaroofanoo iaqarafa aniroofanoo mi iaqarafa faqa mi eendirafa faqa inaaqianaa faasaana marinau.

<sup>9</sup> Qaaramoo faasaanaikufanoo Anutufa kaifaa qinau. Maqasaa nammari suqufinoo moodaanaki mandii finanoo maqa aadana koorooianifeera qimasoofanoo miqimminoo marinau. <sup>10</sup> Anutufa aadanaikunara maqa fee qinoo auquranau. Nammari moodaanaki suqunara ooruku nammari fee qinoo auquranau. Miqi qimaseenoo doo andeeqafiifoo qimaseenoo asasinu. <sup>11</sup> Asammaseenoo fuka maqasaara Anutufa qinau. Andanda oosana oosana kambiqaanii, oosana oosana andanda neemaru ainainna aqama faqa kambiqaanii, oosana oosana aqama ireemari saqarisaa faqa kambiqaanee qufanoo miqimminau. <sup>12</sup> Maqa fannoo, oosana oosana andanda faqa saqari faqa maqanau. Maqasoofanoo Anutufa aiqummasheenoo doo amiqimminoo fee qimasee asasinu. <sup>13</sup> Miqimmasoofanoo eendirafa aiqaroofanoo iaqarafa aniroofanoo mi iaqarafa faqa mi eendirafa faqa qaaramookinau.

<sup>14</sup> Anutufa kaifaa qinau. Innaarunai qooma oosana oosana kambiqafinana, suani faqa quqoona faqa fasau faqa iaqarana faqa asukuna faqa rainaanifeera qinau, iaqarafa faqa aukuna faqa amaana suqirana oosana areemariana uqannifiqaani fee qinau. <sup>15</sup> Mi qoomausa innarunaindarii maqasaa kaaqa qamannimaqaani qufanoo miqimminau. <sup>16</sup> Miqi qimaseenoo Anutufa fira qoomatiqara suani faqa quqoona faqa miqanda quqanau. Fira qooma suaniara anee faasaana rakisinnimaqaannee qinau. Kaqikaa qoomara quqoonara anee eendaki rakisinnimaqaannee qinau. Fasau namu faqa auqu quqanau. <sup>17</sup> Anutufa mi qoomausa innaarunaindarii maqasaa kaaqa qaanifeera quqanau. <sup>18</sup> Eendaki faqa faasaana faqa rakisidanoo asukuna faqa kaaqa qarana faqa rainaanifeera quqanau. Anutufa quqaseenoo aiqummasheenoo doo amiqimmafinoo fee qimasee asasinu. <sup>19</sup> Miqimmasoofanoo eendirafa aiqaroofanoo iaqarafa aniroofanoo mi iaqarafa faqa mi eendirafa faqa qaara faqa qaara faqaikinau.

<sup>20</sup> Anutufa kaifaa qinau. Aiqaama nammariiki maria ainainausa oosana oosana kambiqaanii, maqa mirinni kaqi saqanna oosana oosana ufinuqa qumbiqafa maridaqa qaqaqa nuuqa. <sup>21</sup> Miqi qimaseenoo Anutufa ooruku nammariiki maria fira aandausa faqa oosana oosana ainaina faqa auqu quqanau. Ufinuqa oosana oosana faqa auqu quqanau. Auqu quqaseenoo aiqummasheenoo amiqimmiifoo qimasee asasinu. <sup>22</sup> Miqi qimaseenoo Anutufa nari afaaqooqa qimannimaqeenoo qinau. Inni asumu moomoo kambiqafiqa ooruku nammariiki qumbiqafa mariiqa. Mifa ufinuqara faqa moomoo kambiqafi mariagee qinau. <sup>23</sup> Miqi qimasoofanoo eendirafa aiqaroofanoo iaqarafa aniroofanoo mi iaqarafa faqa mi eendirafa faqa moodaannai qisaukukinau.

<sup>24</sup> Miqimma fufanoo Anutufa qinau. Maqa fannoo oosana oosana kasirana faqa aandauga maqaani. Maaqeenaa aadau faqa kaasau aadau faqa firaana faqa kaqikaana faqa maqa fannoo maqaani qufanoo miqimminau. <sup>25</sup> Miqimmasheenoo Anutufa mi aiqaama ainainausa auqu quqaseenoo amiqimmafinoo qimaseenoo asasinu.

<sup>26</sup> Miqimmasheenoo Anutufa kaifaa qinau. Maasa faiqi naanna faqaasa auquanaura, maasa qimana kai maasa qeeqa fooqaana auquanaura. Misa ooruku nammariiki

noodaanna ainaina faqa sandaaqai qaqaamaree nimaria ufinisa faqa maaqeena aandaufa faqa kaasau aandaufa firaanauqa saa faqa kaqikaanauqa saa faqa rakisianifeera auquanaura.

<sup>27</sup> Miqi qimaseenoo Anutufa faiqi nari fooqaa irana kai auqinau. Faiqi faqa anaasee faqa naumoo faqaa qanda auqinau. <sup>28</sup> Auquseenoo Anutufa nifaqooqaa qinoo qinau. Inniqara asumu moomoo kambiqeeqa maa maqa maaqanaki qumbiqafiqa rakisiaqa. Qinee inniqara mareeqee ooruku nammariki noodaanna faqa ufiniuqa faqa aiqama kaasau aandaufa rakisirausaika mannimaqanaura.

<sup>29</sup> Anutufa kaifaa qinoo qinau. Inni narana sakummara foora ireemarina oosana oosana faqa oosana oosana saqari aqama faqa naaqeera nimidaqa. <sup>30</sup> Doo qinee aiqama kaasau aandaufa faqa ufiniuqa faqa andanda faqa nariqa neemaria saqari amaneesa faqa naaqeera qinee nimidaqa. Miqi qimasoofanoo miqimminoo marinau. <sup>31</sup> Doo Anutufa nari auqu quqasoo aiqama ainainauqa qafamaseenoo firaqooqaa asasinu. Miqimaseenoo eendirafa aiqaroofanoo iqaqara aniroofanoo mi iqaqara faqa mi eendirafa faqa moodaannai qisauku taikasee dinni moodaa marasee 6 faasaanaikinau.

## 2

<sup>1</sup> Miqimmaseenoo Anutufa aiqama innaaruna faqa maqa faqa auqu taikanau.

<sup>2</sup> Dinni taikasee dinni oonu qaaraqanda marasee 7 faasaana Anutufa nari ainainirana taikanau. <sup>3</sup> Dinni taikasee dinni oonu qaaraqanda 7 faasaanara Anutufa afaaqooqaa qimasee, aaduma naaquqara faasaanee qinau. Nari kadaapirirana mi faasaanna taikonara mi faasaanara naaquqara faasaanee qimasee idooanau.

*Adamafa faqa Eewafa faqa.*

<sup>4</sup> Miqimmaseenoo Anutufa innaaruna faqa maqa faqa auqinau. <sup>5</sup> Indaaru karaambaiqa Anutufa maa maqana faqa miri innaaruna faqa auqu aukuanu aaku sia maqasaa quqoonara oosana oosana andanda qaqaama sia kambiqanau. Faiqi maqa apaurirafa faqa sia marinau. <sup>6</sup> Mikamuqoo nammari fannoo maqakiqari urureenoo aiqama maqa maaqa uqena amaqanau.

*Eedeena saqama ufa.*

<sup>7</sup> Mikari karaambaiqa Anutufa maqa qumareenoo faiqi minannoo auqinau. Auquseenoo marirana nimi maru aidoona aikaamarai fuqasoofanoo mi fasiqafa kasirana maranau. <sup>8</sup> Mi fasannai Anutufa suani afu oosana Eedeena maqa maaqaki kadiqa firaana auquseenoo nari auquqoo fasiqana minaki quqanau. <sup>9</sup> Anutufa oosana oosana amiqira saqariara qufanoo minaki kambiqafufafa amiqira aqama iraqau. Kadiqa qambaana saqari qaaraqanda marinau. Moo saqari fannoo marirana nimi maru saqarifa marinau. Kafa moo saqari fannoo mandainainara faqa amiqira ainainara faqa irimaria irirana nimimarufa marinau.

<sup>10</sup> Nammari moo fannoo Eedeena maqa maaqakiqari qumureenoo kadiqa qambaana maqa uqena uqena ianifeera qumiqareenoo qaara faqa qaara faqaki raina fufanoo ooqufinau. <sup>11</sup> Moo amara auqu Pisona nammari fee qiqaq. Mifa Qafiraa maqa maaqa atindannai ooqu finau. <sup>12</sup> Miqoo kooru amiqirafa maridanoo, amiqira afundi maru saqari anoonafa faqa miqoo marinau. Firaafu feefauru aqimaria oonifa faqa miqoo marinau. <sup>13</sup> Kafa moo amara auqu Kiqoonu nammari marinau. Mifa Kusa maqa maaqa atindannai qumifi marinau. <sup>14</sup> Kafa moo amara auqu Taikirisa nammari marinau. Mifa Asiria maqa maaqa suani oosana qaannai atindannai qumi marinau. Moo amara auqu Eeufarateesa nammari marinau.

<sup>15</sup> Karaambaiqa Anutufa nari auquqoo fasiqana mareeqee Eedeena kadidakina quqanau. Kadidaki maqa apauridanoo aiqama ainainasaa mi kadidanaki rakisianifeera quqanau. <sup>16</sup> Anutufa quqaseenoo mi fasiqana maaqi qimaseenoo aakapanau. Anee kadidakina aiqama saqari qaqaama diqisee naannee qinau. <sup>17</sup> Moodaa saqariara kai qinee qaoo qidaqa. Manda ainainara irirana faqa amiqira ainainara irirana faqa nimi mari saqarina kai sia naa. Anee namaseenana mikari kai kuqinnaranoo.

<sup>18</sup> Mi fasannai karaambaiqa Anutufa mi fasiqanara qinau, maa fasiqafa nariaraa marifanoo siamma andeeqaidanoo. Qinee mina aqoonnana auqusaananoo mina dadaaqiannoo.

<sup>19</sup> Anutufa maqa qumareenoo minannai aiqama aandaufa faqa ufiniuqa faqa auqinau. Auquseenoo aiqama naarammeeqeenoo faiqi maruqoo nuquraanifeera quqasoofanoo nana ainainee auquroofa doo mi nuquna faqaasa mariqau. <sup>20</sup> Miqimmaseenoo faiqi fannoo kooqikinaa aandaufa faqa kaasau aandaufa faqa ufiniuqa faqa nuqu rama quqanau. Miqiga marufanoo Anutufa mi fasiqana aqoonnanaikiranara misaki randeenoo sia paqurinau. <sup>21</sup> Minara faiqarana faiqi aminau. Faiufanoo Anutufa mina aqaasana

moodaa tatuseenoo mina amaqqinnai minaki ititanau. <sup>22</sup> Ititaseenoo karaambaiqa Anutufa mina aqaasanannoo anaasee auqqinuu. Auquseenoo faiqi maruqoo afiqee finuu. <sup>23</sup> Quqasoofanoo faiqi fannoo qafamaseenoo qinuu.

Doo maqee uqanna qini fooqaaifara uqanna maridanoo, amudaani qini qimudaani kinaafa,

amaqi qini qimaqqinnai auqirafa, qinee minara anaasee fee qimasee auquraanura, mifa faiqi kinaafa marinara miqi qimasee auqu raanura.

<sup>24</sup> Minara kai faiqi nari anoona akoona minnisee nari anaafa faqa moodaanaki mafi moodaara foora maridaqa.

<sup>25</sup> Mi fasiqafa nari aanaaqandiri kaqisamu maruqanda mariqau, sia nariara nariara nisauri mariqau.

### 3

*Faiqi anaasee Anutuna ufa rukiqoo ufafa.*

<sup>1</sup> Karaambaiqa Anutufa aiqama aandaqqakina auquqoonaa qambaanaindari sakani mifa nikaru qira ufa akoofasa marinuu. Mifa anaasee iramirinoo qinuu. Kuqaa fee Anutufa saqariuqqaki aiqama qaoo qinoo fee sia naaqee qinoo fee.

<sup>2</sup> Mi anaaseefa minara iriseenoo qimaminuu. Eeoo aiqama maa afuqqanakiina saqari naaqee qifaqa naidaqa. <sup>3</sup> Kadiqa qambaanai moodaa saqariara sia naaqee sia auqaaqee qifaqa sia naidaqa. Maasa namaseeqa kuqunaauranoo.

<sup>4</sup> Sakani mina ufa iriseenoo anaasee akaru qinoo qinuu. Namasee sia kuqqinnara unnaqqidanoo, anee sia kuqqinnaranoo. <sup>5</sup> Anutufa minara iridanoo qaoo qinoo. Innee mi saqari aqamana namasee Anutufara foora maridaqa manda ainainara faqa amiqira ainainara faqa irifooraa.

<sup>6</sup> Anaasee sakani ufa iriseenoo mi saqarina afu qafamasoofanoo amiqirafa marufanoo aqama faqa qafoofanoo idaqqirafa marufanoo amiqira ainainara iriranara faqa manda ainainara iriranara faqa irufanoo amiqufanoo mi saqari aqamana diqiseenoo neenoo nari afaaqi faqa amufanoo nanuu. <sup>7</sup> Miqanda namasoofanoo mikari miqanda nifusaa irirafa kambiqqooqafa nari nifaafa qafamasee kaqisamu maridee qimaseeqa nisauruseeqa saqari amanee didiqi amanee fooqaana qumaree akunuseeqa nari nifaqqasaa ititaqau.

<sup>8</sup> Mi faasaanna eenaanianna asooaa asooaa imarufanoo Karaambaiqa Anutufa kadidai nimarufafa faiqi faqa anaasee faqa iriqaqara saqariuqqaki nisaurusee kukeeqaqqau. <sup>9</sup> Karaambaiqa Anutufa faiqi aaramasee anee yaiffee qufanoo mifa qinuu.

<sup>10</sup> Anee kadidai nuanaqa qinee iriseeqa kaqisamu mariunaua rufiseeqa saqariuqqaki kukeeqaidafa. <sup>11</sup> Miqi qufanoo Anutufa qinuu, yafee ani kaqisamu mariannara qimaminoo fee. Anee saqari aqama qinee qaoo qunnana neenane. <sup>12</sup> Faiqi iriseenoo nari qimaminoo qinuu. Maa anaaseefa qini faqa marifa anee qimunafa mifa qimifaqa neeqa. <sup>13</sup> Miqi qufanoo karaambaiqa Anutufa mi anaaseena iramirinoo qinuu. Anee nanaree maa oosanna mareenane. Mi anaaseefa iriseenoo qinuu. Sakani fannoo anireenoo qini qikaru qifaqa neeqa.

*Anutufa manda afaaqooqa faiqi faqa anaasee faqa sakani faqa niminuu.*

<sup>14</sup> Karaambaiqa Anutufa mina iriseenoo quandaqqinoo mi sakanina manda afaaqooqa qimamaqqeenoo qinuu.

Anee maa anaaseena akaru qiannanara mina akiqara aiqama aandaqqakiqari anee kai maa manda afaaqooqana mareennaranoo.

Anee maqamau amuaqqandari nidana kookoomma nanuu.

<sup>15</sup> Qinee qianaqa maa anaaseefa faqa anee faqa nariara nariara fidiaqaa ifaranoo.

Inniqara faiqinamuu naaruara namuqaa marifaranoo.

Mi anaaseena asumu kiqari moodaa fannoo ani akiqqa radamuannoo. Anee mina asumu kinaana aiku ataa ukaqa aminnananoo.

<sup>16</sup> Anutufa maaqi qimasee anaasee afaaqooqa qinoo qinuu.

Anee amuaqquqa faqa marinaqa umaara firanaaikamma amaqaanura.

Miqimaseeqa faiqi maqaraqqoo faqa auppurarana amianura. Ani aundura fannoo aneenna afaaqiara rida marinnaranoo.

Ani afaaqi fannoo ani uri aqqararafa marinana anee mina ureeqarafa marinnaranoo.

<sup>17</sup> Miqi qimaseenoo Anutufa quandaqqinoo faiqi afaaqooqa qinoo qinuu.

Anee aneenna anaafa ufa iriseena qinee qaoo qunna saqarina qaqama naananoo.

Minara maa maqana aqurarasannana anee kadaapi ridana arirana rakeeidana maa maqqanaki ummaqqusee naida maria.

<sup>18</sup> Nimmuru faqa amuka faqaa ainaina faqa maqakiqari kambiqaannoo. Anee kaasau andanda neennaranoo.

<sup>19</sup> Anee tooqaamu arimarinana kadaapirumasaidana maa maqanasaa narana kambiqa-saidana nana fiifiinana kuqinana maqaki ani auquafannanaki finnaranoo.

Ani maqannai auquqafaanafa marianafa mariananoo. Anee maqa mariananoo kaifaa maqaikamma finnaranoo.

<sup>20</sup> Faiqi fannoo nari aanaaqara maqasaa qaraa fasiqa anaasee ninoo fee qimaseenoo auqu Eewanee qinau. (Mi auquna oosana aiqama faiqi faiqi ninoo fee qidanoo.)

<sup>21</sup> Karaambaiqa Anutufa aandau apata qumareenoo minannai qamunnara foora auqeeqeenoo Adamana faqa nari anaqa Eewana faqa niminau.

*Anutufa Adamasa Eewasa kadidakiqari niqiqanau.*

<sup>22</sup> Miqimmaseenoo Karaambaiqa Anutufa qinau. Maqee faiqi faiqi maafa maasara foora maridaqa aaqara oosanara faqa andeeqara oosanara faqa iridaqa. Maasa sia miqandara qianaqa naaru marirana nimimari saqari aqamana diqisee neefaranoo. Diqisee namaseeqa naaruara marifooraa. <sup>23</sup> Karaambaiqa Anutufa minara iriseenoo Eedeena kadidakinaana doo miqanda nifaqaseenoo qinau. Inneeqara inni auquafanna maqanasaa maridaqa maqa auqamasaidaqa narana paquriaqa. <sup>24</sup> Anutufa Eedeena kadidakiqari Adamasa Eewasa niqiqoofaqa fufanoo suani oosana qaannai kadida atinni naaru marira saqari fainnai fimaru aannanasaa angirooofaqa quqasooofaqa ida auru arira paipana uaqeedaqa faiqi minni fifooru ruki tataaka imariqau.

## 4

*Kainasa Abeerasa ufa.*

<sup>1</sup> Adamafa nari anaqa Eewana faqa aana numasoofanoo amuaqu qaikinoo faiqi maqaseenoo mina auqu Kainafee qinau. Maqaseenoo Eewafa qinau, Anutufa dadaaqa-faqa qinee faiqi akoonaiqi maqeeqa. <sup>2</sup> Kafaa mariufanoo faiqi moo maqaseenoo mina auqu Abeeranee qinau. Abeerafa innooqafinoo kooqikinaa aandaasaa rakisirafa marinau. Mina afasaafa Kainafa innooqafinoo afuqakina ainaini marufa marinau.

<sup>3</sup> Mariufanoo moo kari Kainafa nari afuqakinaa ainaina maraseeoo Anutuna tatufirana suqa aminau. <sup>4</sup> Abeerafa mifa faqa Anutuna tatufu amiraree qimaseenoo nari firimaru aandausakinaana ooqasaa maqarana afaaqafaana aruseenoo amiqira afaaq kai tatufirana suqa aminau. Abeerana tatufirana Anutufa qafeenoo amiqira fee qimasee asasinu. <sup>5</sup> Kafaa Kainaindi qafamasee minnisanu. Kainafa mina qafoofanoo firaqoo arana qoofanoo oori runinuu.

<sup>6</sup> Anutufa Kainana qafamaseenoo qimaminuu, nanaree ani arana qaidanoo fee. Nanaree ani oori mianni qumidanoo fee. <sup>7</sup> Anee amiqira ainaina auqeenanau asaa mianaiqini. Anee mandainaina auqaannanara numoo fannoo ani kooqiki ani amaara usinoo maridanoo. Mifa ani rafaqa firarinana anee mina uraaqaraa.

<sup>8</sup> Miqi qimasooofanoo Kainafa nari akaqa Abeerana qimaminoo qinau. Aninaqa aana fua. Miqanda moosaa oonureeqa Kainafa nari akaqa Abeerana kuqa arinau.

<sup>9</sup> Arusoofanoo Anutufa Kaina iramirinoo qinau, ani akaqa Abeerafa yaifee maridanoo fee. Qufanoo Kainafa qinau, Abee qinee sia iridaqa, anee qiniara nari akaqasaa rakisimarifee fee qidane.

<sup>10</sup> Anutufa mina iriseenoo qinau. Kaina anee nane mareenee. Anee iria, aneenna akaqa fidika maqasaa teeqiananoo. Mi fidikafa mina akiqara iannee qimasee maqakiqari qini daaraifaqa iriqa. <sup>11</sup> Anee aneenna akaqa fidika maa maqanasaa teeqiananoo maqa qoo raqafinaki ani akaqa fidika minaki keegeenoo. Minara qinee ani aqurara ufa ameemaanai quqaidaqa. Anee sia kaifaa maqaki narana ummaqasaida neennaranoo. <sup>12</sup> Anee narana ummaqasainanoo maqa fannoo sia ani narana amiannoo. Minara anee maaqa siainafa maridana aiku quqirafa maaqa maaqa kaqi ninnaranoo.

<sup>13</sup> Kainafa minara iriseenoo Anutuna qimaminoo qinau. Anee qummaara firaana qini qimiananoo sia qinee amana uqeeraanaura. <sup>14</sup> Qinee maa maqanasaa ani afusaa marunnana anee diqqaanaqa qinee qiku quqiraua aiqamatina nuanaura. Qinee maaqanna maaqanna dapkiqa nuananoo yafee qini qiqafainafa mifa kuqa daruannoo.

<sup>15</sup> Karaambaiqa minara iriseenoo qimaminoo qinau. Sia miqifara, faiqi moo fannoo yafee ani arinnana qinee mina akiqara dinni taikasee dinni ani qaraqanda marasee naruanaura. Miqi qimaseenoo karaambaiqa Kaina afaaqasaa sia aruaqee akara quqanau. <sup>16</sup> Miqooqari Kainafa Anutuna oorisaqari finoo Eedeena kadida aqaqari suani oosana qaannai moo maqa maaqai mina auqu niku quqiraua nua maqusa fee qimarunnai finuu.



*Kainana aiku asauku nuqu.*

<sup>17</sup> Miqoo oonureenoo Kainafa narí anaafa faqa faiqi moo akoonaiqi maqaseenoo mina auqu Eenookanee qinau. Kainafa narí anaafa faiqi maqoo kari maqusa moo auquseenoo mi maqusana auqu narí amaaku amaranaikinoo Eenooka maqusa fee qinau. <sup>18</sup> Eenookafa faiqi kammafinoo akoonaiqi Iradana maqanau. Iradafa faiqi kammafinoo akoonaiqi Meequyaeerana maqanau. Meequyaeerafa faiqi kammafinoo akoonaiqi Metusaererana maqanau. Metusaererafa faiqi kammafinoo akoonaiqi Rameekana maqanau.

<sup>19</sup> Rameekafa faiqi kammafinoo qaara anaasee maranau, moona auqu Adaa nammarifa moona auqu Siraa nammarifa mariqau. (Adaa nammarina auqu oosana amiqira fee qimaqoofa marinau. Siraa nammarina auqu oosana auqaana fee qimaqoofa marinau.)

<sup>20</sup> Indaarugaana anaasee auqu Adaa nammarifa faiqi moo Yabarana maqasoofanoo findifinoo aandau apatannai uiquana maqa usakasaida nimarusa nikoofa marinau. <sup>21</sup> Yabarafa firimaru aandausasa rakisi marusa nikoofa marinau. Yabarana akaqa Yubarafa marinau. Mifa findifinoo qufirena fuaqee marusa faqa piripunna arimarusafa faqa nikoofa marinau. <sup>22</sup> Rameekana inaaqiana anaasee moo Siraa nammarifa marinau. Mifa akoonaiqi Tubarakaina maqasoofanoo findifinoo koopaannai faqa qainnannai faqa ainaina auqimarufa marinau. Tubarakainana auna auqu Naammaa nammarifa marinau.

<sup>23</sup> Rameekafa narí aanaaqaqara maaqi qimasee qimanniminuau.

Adaa nammarisa Siraa nammarisa qini ufa iriaqa, Qinee Rameekausa qini qinaaqaqara ufa qianaqa amiqimmasee iriaqa.

Faiqi moo fannoo kaakadi darifaqa qinee mina kuqamma ariqa.

Asauku samu qini darina akiiqara mi kumaaraana kuqamma ariqa.

<sup>24</sup> Moo fannoo Kainana arinnana akiaqara Anutufa dinni taikasee dinni ani qaara marasee 7 fasiqa naruannoo. Moo fannoo qini Rameekausa darinnana akiaqara Anutufa fiqaramasee 77 fasiqa naruannoo.

*Seetana aiku asauku nuqu.*

<sup>25</sup> Adamafa kaifaa narí anaafa faiqi mara amisoofanoo amuaqu qaikinoo akoonaiqi moo maqaseenoo mina auqu Seetanee qinau. Miqi qimaseenoo mina anoofa qinau. Anutufa qini qimaaku moo qiminoo narí afaasana Abeerana amaafa maqaanifeera qiminoo mifa Kainafa aruna amaafa maqaannoo.

<sup>26</sup> Seetafa innooqafinoo akoonaiqi Eenoosana maqanau. Eenoosafa maru kamuqooqari oosana arasee misa Anutunara innaaru qidaqa minara naaqura Karaambaiqee Yaawee fee qidaqa innaaru qimariqau.

**5***Adamana aiku asauku nuqu.*

(1 Stori 1:1-4)

<sup>1</sup> Adamana aiku asauku misa oosana maaqimmasee akaraki marinau. Anutufa indaaru narí amana kai faiqi anaasee auqinau.

<sup>2</sup> Naumoo faqaa qanda auquseenoo nifaaqooqa qima nimaqaseenoo faiqi anaasee fee qimasee nuqu ranau.

<sup>3</sup> Adamafa aukuaana 130 marasoofanoo mina amaaku Seetafa kambiqaana. Narí akona fooqaafa mina amana kai marinau. <sup>4</sup> Seetana maqookari oosana araseenoo Adamafa 800 aukuaana maranau. Mi kamuqoo akoonaiqi maanaafa faiqi namu moomoo Adamafa maqanau. <sup>5</sup> Adamana aukuaana aiqama 930 maraseenoo kuqinau.

<sup>6</sup> Seetafa 105 aukuaana maraseenoo akoonaiqi Eenoosana maqanau. <sup>7</sup> Eenoosana maqoo kamuqooqari Seetafa 807 aukuaana maraseenoo mi kamuqoo akoonaiqi maanaafa faiqi namu moomoo maqanau. <sup>8</sup> Seetana aiqama aukuaana 912 maraseenoo kuqinau. <sup>9</sup> Eenoosafa 90 aukuaana maraseenoo akoonaiqi Keennana maqanau. <sup>10</sup> Keennana maqoo kamuqooqari Eenoosafa 815 aukuaana maraseenoo mi kamuqoo akoonaiqi maanaafa faiqi namu moomoo maqanau. <sup>11</sup> Eenoosana aukuaana aiqama moodaanaki 905 maraseenoo kuqinau.

<sup>12</sup> Mina amaaku Keennafa 70 aukuaana maraseenoo akoonaiqi Maqarareerana maqanau. <sup>13</sup> Maqarareerana maqoo kamuqooqari Keennafa 840 aukuaana maraseenoo mi kamuqoo akoonaiqi maanaafa faiqi namu moomoo maqanau. <sup>14</sup> Keennana aukuaana aiqama moodaanaki 910 maraseenoo kuqinau.

<sup>15</sup> Mina amaaku Maqarareerafa 65 aukuaana maraseenoo akoonaiqi Yareedana maqanau. <sup>16</sup> Yareedana maqooqooqari 830 aukuaana maraseenoo mi kamuqoo akoonaiqi maanaafa faiqi namu moomoo Yareedafa maqanau. <sup>17</sup> Maqarareerana aukuaana aiqama moodaanaki 895 maraseenoo kuqinau.

<sup>18</sup> Mina amaaku Yaareedafa 162 aukuaana maraseenoo nari amaaku Eennookana maqanau. <sup>19</sup> Eennookana maqooqooqari Yareedafa 800 aukuaana maraseenoo akoonaiqi maanaaqa faiqi namu moomoo maqanau. <sup>20</sup> Yareedana aukuaana aiqama moodaanaki 962 maraseenoo kuqinai.

<sup>21</sup> Mina amaaku Eennookafa 65 aukuaana maraseenoo akoonaiqi Meetuseerana maqanau. <sup>22</sup> Eennookafa 300 aukuaana Anutuna aqoondikiranaki maridanoo akoonaiqi maanaaqa faiqi namu moomoo maqanau. <sup>23</sup> Eennookana aukuaana aiqama moodaanaki 365 aukuaana maranau. <sup>24</sup> Eennookafa sia kuqinai. Kaaqa Anutunara rimarufa marufanoo Anutufa kaqimma afiqasoofanoo sia sia inau.

<sup>25</sup> Eennookana amaaku Meetuseerafa 187 aukuaana maraseenoo akoonaiqi Rameekana amarana maqanau. <sup>26</sup> Rameekana maqooqooqari mina akoofa Meetuseerafa 782 aukuaana maraseenoo akoonaiqi maanaaqa faiqi namu moomoo maqanau. <sup>27</sup> Meetuseerana aukuaana aiqama moodaanaki 969 aukuaana maraseenoo kuqinai.

<sup>28</sup> Meetuseerana amaaku Rameekana amarafa 82 aukuaana maraseenoo akoonaiqi maqaseenoo qinai. <sup>29</sup> Anutufa maa maqa maaqana aquraraqoofaqa maasa kadaapi ridaqa. Maa faiqifa kadaapiriranaki marunnana asoarana qimiannoo fee qimasee mina auqu Nooa nee qinai. <sup>30</sup> Nooana maqooqooqari mina akoofa Rameekafa 595 aukuaana maraseenoo akoonaiqi maanaaqa faiqi namu moomoo maqanau. <sup>31</sup> Rameekana aukuaana aiqama moodaanaki 777 maraseenoo kuqinai.

<sup>32</sup> Mina amaaku Nooafa 500 aukuaana maraseenoo miqooqari akoonaiqi qaaramoo maqanau. Misa nuqu Seemmana faqa Qammana faqa Yafeetana faqa maqanau.

## 6

### *Faiqi anaasee manda ainaina mareeu ufafa.*

<sup>1</sup> Mi fasannai faiqi anaasee moomoo kamambufaqa maqa maaqa itita fiqa maridaqa misa maanaaqaauqa moomoo maqaqau. <sup>2</sup> Maqasaa fasiqauqa Anutuna faiqi namu mi manaqausa nindafoofaqa nifu noori amigirausauqa kai marufaqa nari nidimarusa maree mariqau. <sup>3</sup> Miqi marufanoo Anutufa qinai. Qini marauna naaru naaru sia faiqiki mariannoo. Misa fifau faiqi faiqi marianara kisaqa aukuaana ateeekasee qusa aukuaana nimianauna, 120 aukuaana kai nimianauna.

<sup>4</sup> Mikari faqa kasooqagee faqa maqasaa fasiqauqa Anutuna faiqi namu faiqi niraamuna maraqa ninii soofaqa faiqi maqee mariqau. Mi faiqisa nimudaani faqaasa murusaqa arirausa maa maqanasaa maridaqa nuqu faqaasa mariqau.

<sup>5</sup> Anutufa aiqama maqasaaqaraasa nindafoofaqa misa marirafa faqa irirafa faqa mandaika uqanna inoo marinai. <sup>6</sup> Miqifa marufanoo Anutufa firaqoo misa mi manda oosannara irinai. Mifa faiqi auqu maqasaa quqoonara irufanoo aundura mandaikufanoo akooqoofanoo qinai. <sup>7</sup> Maa oosanausa qinee auquafanausa maa maqanasaa qaraana qinee aiqama ruka aqusaanaura. Faiqi faqa ufini aandaufu faqa aiqama ruka aqusaanaura qinee misa auquafannanara qikooqaidanoo. <sup>8</sup> Anutufa Nooanara kai asasinai.

### *Nooafa firaq sipa auqu ufafa.*

<sup>9-10</sup> Nooana oosana maaqimminoo marinai. Nooafa kai sia aqarana marufa marinai, nari faqa marusakiqari nariara andeeqarafa marinai. Mifa kai Anutuna aqoondikiranaki marinai. Mina amaaku qarammoo namu mariqau. Misa nuqu Seemmana faqa Qammafa faqa Yafeetafa faqa mariqau.

<sup>11</sup> Aiqaumausa Anutuna afusaa mandainainaki mariqau. Faiqi narari nararirafa aiqama maqa maaqaki qumbiqanoo marinai. <sup>12</sup> Anutufa aiqama maqa maaqaki qafoofanoo mandaika uqannaminoo marinai. Faiqi anaasee aiqama mandainainaki kai mariqau. <sup>13</sup> Miqifa marufanoo Anutufa Nooana qimaminoo qinai. Faiqi narari nararirafa qumbiqanoo marianara qinee aiqama fasiqa anaasee naru taikaanauree qidaqa. <sup>14</sup> Nooa, anee amigira saqarinnai firaq sipa auqu. Mina aunduraki moomoo rumma auqu. Aunduraki faqa adisaa faqa koorootaqa qumaree akusainanoo ititaani. <sup>15</sup> Anee sipa maaqimasee auqu. Mina kisaqa fannoo Aarinnoonna nammariqiqari Siara Doona nammariki amanasaa 130 metres mina kisaqa mariani. Mina qusa fannoo 22 metres sia kisaqa uqanna marinai. Mi sipana maqasaqari maaqa akiqa amanasaa 13 metres mariani. <sup>16</sup> Asaana qumeeqarana ameemaana i apootaana kaqi mariani 0.5 metre mariani. Sipa qaqaasanai firaq kooqi auquuseenana sipa aunduraki maqasaa tida rua, mina murufi qambaana mo tida rua, mina maariqoo mo tida rua. <sup>17</sup> Anutufa kaifaa Nooana qimaminoo qinai. Qinee nammari mareeqee quqasaananoo firaqoo aulinoo aiqama kasimari ainainausa naru taikaannoo. Aiqaama maqasaa maria ainainausa faqa kuqu taikeefaranoo. <sup>18</sup> Ani faqa kai moodaanaki kira ufa qianauna. Aneenna anaqa faqa

aneenna faiqi namu faqa misa ninaaqmaaka faqa sipaki keeqafi mariaqa. <sup>19</sup> Anee aanda uosana oosana mareeqee sipaki quqaa. Oosana oosana qaara kai qaara kai akoona faqa anaasee faqa apammasee sipaki quqasainaqa ani faqa asumu mariaqa. <sup>20</sup> Oosana oosana ufini faqa qaara kai qaara kai mara quqasainaqa ani faqa asumu mariaqa. <sup>21</sup> Anee oosana oosana narainaina misaindi faqa aneennaindi faqa mara sipaki quqaa.

<sup>22</sup> Nooafa Anutuna ufa iriseenoo mifa qundee kai inau.

## 7

### *Nammari aufu ufafa.*

<sup>1</sup> Karaambaiqa Nooana maaqi qimasee qimaminau. Anee aneenna aiku asauku faqa sipaki keeqaa. Maqa saagarasakiqari anee kai aneennaraa andeeqarafa mariana qafaidaqa. <sup>2</sup> Innee qini qifusaa anukara aanda ufee qimariana qisauku dinni taikasee dinni oonu qaara marasee 7 akoona faqa anaasee faqa ani faqa sipaki mareeqee quqasainaqa asumu mariaqa. Innee qini qifusaa sia anukara aanda uosana oosana akoona faqa anaasee faqa moodaa kai mareeqee minaki asumu quqasaina mariaqa. <sup>3</sup> Aiqama ufini oosana oosana dinni taikasee dinni oonu qaara marasee 7 akoona faqa anaasee faqa mareeqee sipaki quqaa. Miqimmasainaqa aiqama aanda uufini kaifaa maa maqanasaa moomoo kiaqa. <sup>4</sup> Dinni taikasee dinni oonu qaaraqanda marasee 7 faasaana aiqarainaqa miqoo aaku maqasaa quqaanaura. Qaara fasiqa niku nisauku taikasee 40 faasaana faqa eendaki faqa aaku rida mariannoo. Miqi marinaqa qinee maqasaa aiqama naanna faqaasa qeeqa auqu nisaafanausa taika nisaanaura.

<sup>5</sup> Nooafa aiqama ainaina Anutufa qimamundee kaimminau.

<sup>6</sup> Nooafa 600 aukuna marasoofanoo mi aukuanasaa nammari aufirafa aninai. <sup>7</sup> Nooafa Anutuna mi ufauisa iriseenoo rufiaseenoo nari faqa nari anaqa faqa nari amaaku qaaramoo namu faqa minamusa ninaaqmaaka faqa sipaki keeqaqau. <sup>8-9</sup> Oosana oosana aanda uufini akoona faqa anaasee faqa Anutuna afusaa anukaraisa faqa sia anukaraisa faqa aiqama Nooana faqa sipaki keeqaqau. Anutufa ufa qumau kai keeqaqau. <sup>10</sup> Dinni taikasee dinni oonu qaara marasee 7 faasana marinoo nammari aufinai.

<sup>11</sup> Mi aukuanna Nooafa 600 aukuna maranau. Qaara quqoonasaa qiku dinni taikasee dinni oonu qaaraqanda marasee 17 faasaanasaa mi faasaanasaa kai nammari radiqinai. Mi faasaana kai maqa ameemaaindari nammari radiqisee urureenoo innaaruna kooqiara foora atuqoofanoo aaku firaafa nammariara foora adianau. <sup>12</sup> Qaara fasiqa niku nisauku taikasee 40 eendaki faqa faasaana faqa aaku firaafa nammariara foora adianau.

<sup>13</sup> Nammari radiqu faasaana mi faasaana kai Nooafa nari aanaaqandiri faqa nari amaaku namu Seemafa faqa Qammafa faqa Yafeetafa faqa minamusa nari ninaaqmaaka faqa sipaki keeqafiqa mariqau. <sup>14</sup> Kaasau aanda uosana oosana faqa maaqeenaa aanda uosana oosana faqa ufini oosana oosana faqa firaa aanda ufa faqa kaqikaa aanda ufa faqa Nooana aiku asauku faqa sipaki keeqaqau. <sup>15</sup> Aiqama oosana oosana kasimaru aanda uufinisa akoona faqa anaasee faqa Nooana faqa sipaki keeqaqau. <sup>16</sup> Anutufa Nooana qimamu mau kai keeqa fufanoo Anutufa nari kai kooqi itita nimaqanau.

<sup>17</sup> Qaara fasiqa niku nisauku taikasee 40 faasana aaku nammariara foora adianau. Miqi ufanoo nammari qumbigeenoo sipa uqeereqeenoo murusaqa quqanau.

<sup>18</sup> Nammari fannoo firaqoo innooqoofanoo sipa fannoo mina amuaqumau nimirinai.

<sup>19</sup> Nammari fannoo moo faqa innooqeenoo aiqama kisaqa aqana dukuninai. <sup>20</sup> Kaifaa innooqeenoo kisaqa aqana oori aqaramaseenoo 7 meters amana ooru marinai.

<sup>21</sup> Miqinoo marufanoo maqasaa maru ainainausa aiqama kuqiqau. Aiqama ufini ufa faqa aiqama andauqa faqa aiqama fasiqa anaasee faqa kuqu taikaqau. <sup>22</sup> Aiqama aanda ufa doodaani faqa maa maqanasaa marusa kuqu taikaqau. <sup>23</sup> Karaambaiqa aiqama ainaina maqasaqarara ainaina taika uqanna sanau. Faiqi anaasee faqa aanda ufa ufini faqa taikannisanau. Nooafa kai nari aiku asauku faqa nari sipakinaa ainainauqa faqa misa kai asumu mariqau. <sup>24</sup> Dinni qisauku taikasee dinni oonu qaara fasiqa maraseenoo moodaa fasiqa asaukuqara 150 faasaana nammari kaqi aufinoo marinai.

## 8

### *Nammari aufirafa taikoo ufafa.*

<sup>1</sup> Marufanoo Anutufa Nooanara faqa nari aiku asauku faqa aiqama aanda umina faqa marusara faqa iriseenoo qufanoo ufa uqufanoo nammari fannoo qumi marinai. <sup>2</sup> Maqa ameemaaindari nammari ururee maruna rafaqa finau. Rafaqafuseenoo innaaruna kooqiara foora ititasoofanoo innaarunaindaraa nammari faqa sia quminai. <sup>3</sup> Itita fufanoo maqasaa nammari fannoo ireeda kai ireeda kai ooru maree ooru maree qumiqumii

ufanoo maqa koorooinau. 150 suanisaa nammari qumimarinau. <sup>4</sup> Dinni taikaseenoo dinni oonu qaaraqanda marasee 7 quqoonasaa miqi mandee quqoonna qambaana qisaukuqara faqa dinni qiku taikaseenoo dinni oonu qaara marasee 17 faasaana Nooana sipa fannoo Ararata aaganasaa muqufi quqasoofanoo marinau. <sup>5</sup> Miqooqari nammari uru maree ooqinufanoo qisaukuqara taikasee 10 quqoonasaa indaaruuqaa faasaanasaa aqana atiuqa koorooinau.

<sup>6</sup> Qaara fasiqa niku nisauku taikasee 40 faasaana aiqarroofanoo Nooafa winduaqa atuaseenoo ufini kaammeesa fooqaana mara aqinau. <sup>7</sup> Ufini fannoo sia kaifaa aninau. Kaqi kai qaqaanoo nimirinai. <sup>8</sup> Nooafa mi ufininara rakisusia sia anufanoo nakipuruna mara aquseenoo nammari qafaanifeera aqiqanau. <sup>9</sup> Aqusoofanoo nakipuruna maqara randoosianoo nammari kaqi marufanoo mi eendanaki kai kaifaa Nooafunnai sipaki aninau. Nooafa nari asauku madaana qaqaseenoo qumara sipaki quqanau. <sup>10</sup> Qisauku dinni taikasee dinni oonu qaara marasee 7 faasaana afeesida mariufanoo Nooafa nakipuruna kaiqaa mareeqeenoo madaana aqinau. <sup>11</sup> Eenee marufanoo nakipuruna fannoo oorifa saqari amanees ammunirana rakeemma aaku maree aninau. Nooafa mi saqari amaneena qafamaseenoo doo nammari ooqi maridanoo fee qinau. <sup>12</sup> Miqooqari kaifaa dinni taikasee dinni oonu qaara marasee (7) faasaana aiqaroo fanoo Nooafa nakipuruna kafaara maqaa quqasoofanoo doo funnai fiifinoo doo sia kafa aninau. <sup>13</sup> Nooafa 601 aukuaana marasoofanoo indaaruuqaa quqoonna indaaruuqaa faasaanasaa nammari tukaqnanau. Nooafa sipa ataufakaqaa akuamaqaaqoonna rafaammasee qafoofofanoo maqa aadana usimarinai. <sup>14</sup> Namba 2 quqoonasaa 27 faasaanasaa aiqama nammari tukaqnamafufanoo maqa maaqaa aadana uqanna marinai.

<sup>15</sup> Miqimmafufanoo Anutufa Nooana qimaminoo qinau. <sup>16</sup> Doo sipakiqari anee faqa aneenna anaqa faqa aneenna faiqi namu faqa misa ninaaqmaaka faqa raudaaqa. <sup>17</sup> Aiqama ufiniuqa faqa aandaufa faqa nifiqee raudaaqa. Raudamafiqa maqa maaqaki daraaniqa asumu moomoo kambiaaqa.

<sup>18</sup> Miqi qimasoofofanoo Nooafa faqa nari anaqa faqa nari faiqi namu faqa misa ninaaqmaaka faqa sipakiqari raudaaqau. <sup>19</sup> Aiqama aandaufa faqa ufiniuqa faqa nari oosana nari oosana kai moodaanaki suqufufaqa raudamaki daraaniqa.

#### *Nooafa karaambaiqa tatufirana suqa aminau.*

<sup>20</sup> Nooafa rafudamafufanoo karaambaiqa tatufirana suqarara ooni qumareenoo aaku aakumaseenoo Anutuna afusaa anukara aandaufa ufini faqa maraseenoo muduka Anutuna tatufirana suqa aminau. <sup>21</sup> Suqoofofanoo mina afunda karaambaiqa aiki-ambu ufanoo udirama qafeenoo asasinai. Asammaseenoo maaqi qimasee qimmirinoo qinau. Sia qinee kaifaa faiqi inni mandainaina akiiqara aiqama maqa maaqa niquraraanauranoo. Inneeqa faiqi saqari irirana faqa marirana faqa mandaika kai imarunara sia kaifaa unandee iqa maqa maaqa afaaqasasa maria fasiqa aanaaseesa faqa aandaufa doodaani faqa naru taikaanura.

<sup>22</sup> Anutufa minara maaqi qimasee qinau.

Maa maqafa kaqi marinaqa

qummaqira aukuaana faqa narana nara aukuaana faqa

suara faqa aiqaiqa faqa aaku aukuaana faqa

suani aukuaana faqa faasaana faqa eendaki faqa

sia taika nimaqaanura, kaqi marifaranoo.

## 9

#### *Anutufa Nooana faqa moodaanaki kinau.*

<sup>1</sup> Anutufa Nooana nari faiqi namu faqa nifaaqooqa qinoo qinau. Inni asumu moomoo kambiqafi aiqama maqa maaqa amana kai mariaqa. <sup>2</sup> Aiqama aandaufa faqa ufiniuqa faqa noodaanna faqa inniara rufiaranaki mariaqa. Misa inni afeeka ameemaana mariaqa. <sup>3</sup> Innee maaqooqari sia andanda kai naaqa mi aandausa namu faqa naaqa. Innee naranara foora naaqeera nimidaqa.

<sup>4</sup> Innee moodaa ainaina kai sia naaqa, fidika amaqiqi marinnana kai sia naaqa. Mifa marirana nimimarifa marinara sia naaqa. <sup>5</sup> Faiqi moo fannoo faiqi faiqi fidika ruqiqainaa qinee mina akiqara ummaara amianauranoo. Aandaufa moo fannoo faiqi faiqi kuqa narinaqa qinee mi aandauna kuqa aruanura. <sup>6</sup> Anutufa faiqi faiqi nari fooqaasa auquqoonara yafee moona auqu qimasee kuqa arinnana akaqausa mina akiqara nari arifaranoo.

<sup>7</sup> Innee moomoo faiqi maqasaifaqa aiqama maqa maaqaki amanaikammafi mariaqa.

<sup>8</sup> Anutufa Nooana faqa nari faiqi namu faqa kaifaa qimanniminoo qinau. <sup>9</sup> Maqee qinee inni faqa innisaaqari kasooaqee kambiqainausa faqa moodaanaki kira ufa qidaqa.

<sup>10</sup> Aiqama ainaina ufiniuqa faqa aiqama aandaufa faqa ani faqa sipakiqari anusa faqa moodaanaki kianaaura. <sup>11</sup> Maa ufausannoo qinee moodaanaki kira ufa inni faqa qidaqa. Qinee kuqaa qima afeekaika qidaqa sia kaifaa nammari aufirafa faiqi faqa aiqama ainaina faqa naruannoo. Sia uqanna kafaa nammari aufirafa maa maqa maaqana mandaikiannoo.

<sup>12</sup> Qinee naaru marira moodaanaki kira ufa ani faqa aiqama aandaufa faqa doodaaniuqa faqa qunafa maaqi qimasee uqannifiqaanaura. <sup>13</sup> Qinee qeeqa oondanda oonnamuki quqaanaura. Mifa qinee maa maqanasaaqaraasa faqa moodaanaki kirana uqannifiqaannoo. <sup>14</sup> Yairee fee qinee oonnamunnai innaaruna itita saannoo miqoo oondanda kambiqaannoo. <sup>15</sup> Oonnamuki oondanda rafeeqna finaqa qafeeqa qinee ani faqa aiqama aanda doodaani faqa qima afeekaikira ufara irisee sia kaifaa nammari aufirafa naruannoo. <sup>16</sup> Oondanda oonnamuki rafeeqnainafa qafamaseeqa naaruara qinee inni maqasaaqaraasa faqa naaru marira moodaanaki kira ufa qiafannanara irianaaura.

<sup>17</sup> Minannai qinee aandaufa faqa doodaaniuqa faqa qima afeekaikiafanna ufana kooroo idaqa.

*Nooana faqa nari faiqi namuara faqa qidanoo.*

<sup>18</sup> Nooana faiqi namu sipakiqari anusa nuqu maaqimminoo marinau. Seemmafa faqa Qammafa faqa Yafeetafa faqa mariqau. Qammafa Kannaana akoofa marinau. <sup>19</sup> Nooana mi faiqi qaaramoo namusa aiqama maa maqanasaaqaraasa nikaaku mariqau.

<sup>20</sup> Nooafa afuqaki ainaini marufa marinau. Mifa indaaru oosana arasee afuqa auqusee uainna sanda moomoo ummaqinau. <sup>21</sup> Mifa uainna aqama tatiseenoo moomoo neeneeseenoo furufara maseenoo nari qamunna raipaquseenoo nari uigaana maqaki kaqi samu faiqanau. <sup>22</sup> (Yafeetafa indaaruqaafa Seemafa mina aanaaqianaafa marinau Qammafa inaaqianaafa marinau.) Qammafa Kannaana akoofa maridanoo anireenoo nari akoofa kaqi samu faiqagee ufanoo oonu qafeenoo nari akaqaafasaaqara naaramaseenoo qimanniminu. <sup>23</sup> Seemafa faqa Yafeetafa faqa minara iriseeqa qao qimasee qamunna marasee moo fannoo dinni ati nari aururusaa quqasoofanoo moo fannoo dinni ati nari aururusaa quqaseeqara ninaaqianaindari uigaana maaqaki keeqa fiqaqara nari nikoona afaaqa itita amaqaqau. Miqanda noori kaqinni quqasee nisauruanoo qimasee sia nari nikoona qafaqau.

<sup>24</sup> Nooafa kasoogaqee irirafa kambiqaqafufanoo nari inaaqianaa faiqi mifa auqoo ainainnara irinau. <sup>25</sup> Iriseenoo maaqi qimasee aquraranau. Qinee ani amaaku Kannaanasaa aqurara ufa quqaanaura. Anee aneenna akaqaafasaaqara saika faiqi maria. <sup>26</sup> Miqi qimaseenoo Nooafa quandafinoo Qammana akaqaafasaa qarara maaqi qinau. Karaambaiga Seemana Anutuna amooqirana amia.

Kannaafa Seemana ainainira faiqi mariannoo.

<sup>27</sup> Anutufa qinanoo Yafeetanakiqari moomoo kambiqaqifa mina faiqi namu Seemana faiqi namu faqa moodaanaki marifaranoo.

Miqiqa marifanoo Kannaafa Yafeetana ainainira faiqi mariannoo.

<sup>28</sup> Nammari aufirafa taikoofanoo miqooqari Nooafa 350 aukuaana maraseenoo kuqinau.

<sup>29</sup> Mina aukuaana aiqama moodaanaki 950 aukuaana maraseenoo kuqinau.

## 10

*Nooana faiqi namu ninaiqimara nuqu.*

<sup>1</sup> Nooana faiqi namu nuqu maaqimminoo marinau. Seemmafa faqa Qammafa faqa Yafeetafa faqa mariqau. Nammari aufirafa taikooqooqari misasaaqari kambiqaarasa nuqu maaqimminoo mariqau.

<sup>2</sup> Yafeetana faiqi namu nuqu maaqimminoo marinau. Koommafa faqa Makookafa faqa Madaifa faqa Yafanafafa faqa Tubanafafa faqa Meeseekafa faqa Tirasafa faqa mariqau. Mi fasiqausa ninaiqimara nisaifaqausa nariqa ninaakusa nuqu maree mariqau.

<sup>3</sup> Koommanasaaqari kambiqaoo maqannaasa nuqu Asakeenasa maqannaasa faqa Rifata maqannaasa faqa Tookaramma maqannaasa faqa mariqau. <sup>4</sup> Yafatanasaaqari kambiqaoo maqannaasa nuqu Eerisa maqannaasa faqa Sipainna maqannaasa faqa Sipurusa maqannaasa faqa Roodeesa maqannaasa faqa mariqau. <sup>5</sup> Misa ooruku nammari afaiqara marusa faqa kaqikaa afumaki marusa faqa misa ninaakusa mariqau. Misauqa Yafeetanakiqari kambiqaarasa maridaqa naadu naadu maqa maaqaki maridaqa naadu naadu ufa qimariqau.

<sup>6</sup> Qammana faiqi namu nuqu maaqimminoo marinau. Kusafa faqa Isipafa faqa Ribiafa faqa Kannaafa faqa mariqau. Mi fasiqausa ninaiqimara nisaifaqausa nari ninaakusa nuqu maree mariqau. <sup>7</sup> Kusana faiqi namukiqari kambiqaosa Seebaa maqannaasa faqa

Qafiraa maqannaasa faqa Sabataa maqannaasa faqa Rammaa maqannaasa faqa Sabateeka maqannaasa faqa mariqau. Rammanasaqari kambiyoosa Seebaa maqannaasa faqa Deedana maqannaasa faqa mariqau.

<sup>8</sup> Kusafa akoonaiqi Nimaroodana maqanau. Nimaroodafa findifinoo maa maqa maaqanaki indaarugaa rakira karaambaiqa marinau. <sup>9</sup> Karaambaiqa dadaaqufanoo mifa amudaanai qimasee uaqee marufa marinau. Miqi marunara faiqi anaasee maaqi qimasee akaqausara qimariqau. Karaambaiqa fannoo ani Nimarooda fara foora kaaqa amudaanai qimasee uaqee mari fara foora maisaannoo. <sup>10</sup> Nimaroodafa Baabeera maqusa faqa Eereeka maqusa faqa Akada maqusa faqa mi maqusa namuna indaaru rakisimarinau. Mi maqusa namusa Babiroonia maqa maaqaki mariqau. <sup>11</sup> Miqoo mariufanoo Nimaroodafa Asiria maqa maaqai oonureenoo Ninifee maqusa faqa Reehoo-bootaira maqusa faqa Karaa maqusa faqa Reeseena maqusa faqa auqinai. <sup>12</sup> Reeseena maqusa fannoo Nineefee maqusa dinni marifanoo Karaa firaa taunna dinni marifanoo qambaana maridanoo.

<sup>13</sup> Isipana saaqari arukusa Ridiaa maqannaasa faqa Anamma maqannaasa faqa Reehaba maqannaasa faqa Nafatuqa maqannaasa faqa <sup>14</sup> Patarusa maqannaasa faqa Kasaru maqannaasa faa Kareetee maqannaasa faqa mariqau. Firistia maqannaasa Kareetee maqannaasakiqari kambiyoosa mariqau. <sup>15</sup> Kannaana faiqi namu nuqu maaqimminoo marinau. Indaarugaafa Sidoonafa marinau. Mina aanaaqiannaafa Heetafa marinau. Miqanda nari ninaakusa nuqu marasee mariqau. <sup>16</sup> Kannaafa Yeebusa maqannaasa faqa Amooraa maqannaasa faqa Kirakasa maqannasa faqa ninaakufa marinau. <sup>17</sup> Hifita maqannaasa faqa Akaa maqannaasa faqa Sinita maqannaasa faqa mariqau. <sup>18</sup> Arafada maqannaasa faqa Seemara maqannaasa faqa Qamata maqannaasa faqa mariqau. Kanna maqannaasa moomoo oosana rainafu faqa aiqama maqa maaqaki daraanimambi mariqau. <sup>19</sup> Mariufaqa Kannaana saaqari kambiyoosa misa maru maqana dinni ati Sidoona maqusaki marufanoo suani dinni ataageenni Keeraa maqusa Kasaa maqusa aqaa maruna raquru aminoo marinau. Miqooqari suani oosana qaannai Soodoomma maqusa faqa Koomooraa maqusa faa Adama maqusa faqa Seeboima maqusa Rasaa maqusa aqaa marunnai dinni ati marinau.

<sup>20</sup> Doo Qammana saaqari kambiyoosa naadu naadu maqusakiaqa rainafu faqa naadu naadu ufa qimariqau.

<sup>21</sup> Seemmafa Yafeetana afasaafa Heeburu maqannaasa ninaakufa marinau. <sup>22</sup> Seemana faiqi namu nuqu maaqimminoo marinau. Eerammafa faqa Asurafa faqa Arafakadafa faqa Rudafa faqa Arammafa faqa mariqau. Mi fasiqausa ninaiqimara nari ninaakusa nuqu maree mariqau. <sup>23</sup> Arammana faiqi namu Qusa maqannaasa faqa Huraa maqannaasa faqa Keeteera maqannaasa faqa Meeseekaa maqannaasa faqa mariqau. <sup>24</sup> Arafakadafa Seeraana akoofa marinau. Seeraafa Eebeereena akoofa marinau. <sup>25</sup> Eebeerafa akoonaiqi qaaraganda maqanau. Indaarugaana auqu Peereekafa marinau. Mina auqu oosana rainara fee qinoo marinau. Mifa maru akuuanna maqa maaqa rainanoo marufaqa minara Peereekanee qinai. Peereekana akaqa auqu Yookatanafa marinau. <sup>26-29</sup> Yookatana faiqi namukiqari maaqimmasee maqannaasa mariqau. Aramooda maqannaasa faqa Seereefaa maqannaasa faqa Asammafee maqannaasa faqa Yeeraa maqannaasa faqa Adooramma maqannaasa faqa Qusaraa maqannaasa faqa Dikaraa maqannaasa faqa Oobara maqannaasa faqa Abimaeera maqannaasa faqa Seebaa maqannaasa faqa Oofira maqannaasa faqa Qafiraa maqannaasa faqa Yoobabaa maqannaasa faqa mariqau. Aiqamusa Yookatana anaiqimara mariqau.

<sup>30</sup> Misa maru maqa maaqafa dinni ati fannoo Meesaa maqa maaqaindari Seefaraa maqa maaqai suani oosana qaannai aqana maqa maaqa dinni ati fannoo raquru aminoo marinau.

<sup>31</sup> Seemana faiqi namu miqimmiqa mariqau. Naadu naadu maqa maaqaki maridaqa naadu naadu ufa qimariqau.

<sup>32</sup> Aiqama misauqa Nooanasaqari kambiyoosa mariqau. Moo maqanna mo maqanna nariqa oosana amana kai mariqau. Nammari auffrafa taikafu faqa aiqama maa maqanasaaqaraasa Nooana faiqi namukiqari kai kambiyoofi mariqau.

## 11

*Babiroonia maqusasaa kisaafa maaqa usakoo ufa.*

<sup>1</sup> Indaaru nammari taikoo kamuqoo aiqama maqasaa qaraasa moodaa ufa faqasaa maridaqa moodaa ufa kai qimariqau. Aiqama ainainara moodaa auqu kai ree mariqau.

<sup>2</sup> Misa suani oosana qaannai oonuree aniree iqa ninuufaqa Babiroonia afaasa paqurimasee miqoo mariqau.

<sup>3</sup> Misa miqoo maridaqa maaqi qimasee narí qimami narí qimami qidaqa qiqau. Anifaqa innisaimbaqa maqa qumareeqa atakuseeqa idara saananoo afeekalkamma finaqa minannai maaqa usakaa. Maasa miqimmaseeqa aaku aakummaseeqa koorootaqa mina apootaanaki akusaananoo atukaraani. <sup>4</sup> Miqi qimaseeqa maqee innisaimbaqa fuka maqusa indufusee kisaqa maaqa auqiqa ooru fiinaqa innaaruna amana kai ooruraanaura. Miqimmasee maasa duqu faqaasa moodaanaki maridaqa sia aiqama maqa maaqaki daraanianaura. Miqi qimaseeqa doo miqimmigau.

<sup>5</sup> Mi maqusana auquseeqa kisaqa maaqa faqa usakasoo fanoo Karaambaqa qumu nindafeenoo maaqi qinau. <sup>6</sup> Maqee maasauqa moodaa maqannaasa maridaqa moodaa ufa qidaqa. Misa narí auqararee qia ainainna oosana araidaqa. Qusasaa misa narí nidimari ainainna auqefaranoo. <sup>7</sup> Doo anifaqa inni saimbaqa ooquee misa ufa furufaramma nimaqasaanaqa sia narí ufa narí ufa iriaqa.

<sup>8</sup> Anutufa miqi qimasee misa ufa furufaramma nimaqasoofaqa misa mi maqusana auquane quna minniseeqa maqa maaqaki daraaniqau. <sup>9</sup> Mi maqusana auqu Babiroonia fee qimariqau. Miqoo karaambaqa fannoo misa ufa furufaramma nimaqoonara miqi qimasee auqu raqau. Miqoo maruna Karaambaqa furufaramma nimaqasoofaqa aiqama maqa maaqaki daraaniqau.

*Seemmana aiku asauku nuqu.*

*(1 Stori 1:24-27)*

<sup>10</sup> Seemmana saaqari kambiqaosa maaqimmiqa mariqau. Nammari aafirafa taika fufanoo miqooqari qaara aukuaana aiqarama fufanoo Seemfafa 100 aukuaana maraseenoo akoonaiqi Arafasadana maqanau. <sup>11</sup> Arafasadana maqooqooqari Seemfafa 500 aukuaana marinoo akoonaiqi maanaqa moomoo maqanau.

<sup>12</sup> Arafasadafa 35 aukuaana maraseenoo narí faiqi Seeraana maqanau. <sup>13</sup> Seeraana maqooqooqari Arafasadafa 403 aukuaana maraseenoo akoonaiqi maanaqa moomoo maqanau.

<sup>14</sup> Seeraafa 30 aukuaana maraseenoo narí faiqi Eebeerana maqanau. <sup>15</sup> Eebeerana maqooqooqari Seeraafa 403 aukuaana maraseenoo akoonaiqi maanaqa moomoo maqanau.

<sup>16</sup> Eebeerafa 34 aukuaana maraseenoo narí faiqi Peereekana maqanau. <sup>17</sup> Peereekana maqooqooqari Eebeerafa 430 aukuaana maraseenoo akoonaiqi maanaqa moomoo maqanau.

<sup>18</sup> Peereekafa 30 aukuaana maraseenoo narí faiqi Reeuna maqanau. <sup>19</sup> Reeuna maqooqooqari Peereekafa 209 aukuaana maraseenoo akoonaiqi maanaqa moomoo maqanau.

<sup>20</sup> Reeufa 32 aukuaana maraseenoo narí faiqi Seerukana maqanau. <sup>21</sup> Seerukana maqooqooqari Reeufa 207 aukuaana maraseenoo akoonaiqi maanaqa moomoo maqanau.

<sup>22</sup> Seerukafa 30 aukuaana maraseenoo narí faiqi Naqoorana maqanau. <sup>23</sup> Naqoorana maqooqooqari Seerukafa 200 aukuaana maraseenoo akoonaiqi maanaqa moomoo maqanau.

<sup>24</sup> Naqoorafa 29 aukuaana maraseenoo narí faiqi Teeraana maqanau. <sup>25</sup> Teeraana maqooqooqari Naqoorafa 119 aukuaana maraseenoo akoonaiqi maanaqa moomoo maqanau.

<sup>26</sup> Teeraafa 70 aukuaana maraseenoo Abarammana faqa Naqoorana faqa Qarana faqa maqanau.

*Teeraana aiku asauku nuqu.*

<sup>27</sup> Teeraana faiqi namu mi oosanausa maaqimmiqa mariqau. Teeraafa Abarammana faqa Naqoorana faqa Qarana faqa nikoofa marinau. Qaranafa Rootana akoofa marinau.

\*

<sup>28</sup> Qaranafa Babiroonia maqa maaqaki narí maqusa Uraa maqusaki mina akoofa faqa kaqi marufanoo kuqinau. <sup>29</sup> Abarammafa Sarai nammarina maranau. Naqoorafa Mirakaa nammarina maranau. Mirikaa nammarifa Qarana araamuna maranau. Qaranafa Isakana akoofa marinau. <sup>30</sup> Sarai nammarifa sia faiqi maqoofa aafa anaasee marinau.

<sup>31</sup> Teeraafa narí amaaku Abarammana faqa Qarana amaaku narí anaiqi Rootana faqa Abarammana anaqa narí aanaakuqu Sarai nammarina faqa Babiroonia maqa maaqaki Uraa maqusaindari nifiqeenoo Kannaana maqa maaqai fiqau. Teeraafa narí aiku asauku faqa Kannaana maqa maaqai fuanee qimasee Qarana auqu amarana maqusai oonu aana kasaqai mariqau.

<sup>32</sup> Miqoo mariiufanoo Teeraafa miqoo kuqinau. Teeraana aukuaana aiqama moodaanaki 205 maraseenoo kuqinau.

## 12

*Anutufa Abarammana aaroo ufafa.*

<sup>1</sup> Abarammana akoofa Teeraafa kuqufanoo Karaambaiqa Abarammana qimaminoo qinau. Aneenna maqa faqa aneenna aiku asauku faqa aneenna akoona maqa maaqakinaa ainaina faqa quqasee minniseenana maqa maaqa moo uqafiqaanana miqoo fua.

<sup>2</sup> Miqoo oonu marinaqa ani faiqi moomoo amiananoo maqa maaqa qumbiqafi marifara.

Qinee ani amiqi amiqimma amaqaasaanana anee auqu faqaafa marinnaranoo.

Miqimma finaqa anisaagaraa amiqi amiqirana faiqi anaasee mareefaranoo.

<sup>3</sup> Aniara amiqi amiqi mariasa qinee faqa quandafiqqa misa faqa amiqi amiqi ianaura ani aqurarainausa qinee faqa quandafiqqa misa faqa niquraraanaura.

Aniaroo qimasee misa aiqama maqasaaqaraasa amiqi amiqimma nimaqaanaura.

<sup>4</sup> Abarammafa 75 aukuaana maraseenoo Qarana maqusa minniseenoo Kannaana maqa maaqai Karaambaiqa qimamundee inoo fufanoo Rootafa mina faqa finau. <sup>5</sup> Abarammafa nari anaqa Sarai nammarina faqa nari akaqa faiqi Rootana faqa nari moomoo qumiasana ainainira faiquqa faqa nifiqeenoo Arana maqasaa mariuna nifiqeenoo Kannaana maqa maaqai finau.

<sup>6</sup> Misa Kannaana maqasaa oonuroofanoo Abarammafa oonuree aniree inoo niniufanoo Seekeemna maqa maaqaki naaquqara maqusasaa tatufirana suqee maruqoo Mooree maqa maaqaki naaquqara saqari atukaki aniranau. Mi aukuaana Kannaana maqannaasa mi maqa maaqanaki kaqi mariqau. <sup>7</sup> Abarammafa mi maqusanai oonu marufanoo Karaambaiqa akooqoo mina afusaa kooroomafinoo qimaminau. Qinee maa maqa maaqanara ani qimamunnana ani aiku asauku nimianaura. Miqi qimasoofofanoo Abarammafa miqoo mina afusaa kooroo Karaambaiqana tatufirana suqa amira qainda auqusee tatufirana suqa aminau.

<sup>8</sup> Suqa amiseenoo Abarammafa findifinoo aaqana maqa maaqai ooru finau. Beeteera maqusa fannoo suani keeqoo qaannai marufanoo suani oosana qaannai Ai maqusa marufanoo qambaana nari uiquana maqa usakanau. Usakaseenoo miqoo Karaambaiqa aadau tatufira ooni qainda faqa auquseenoo Anutuna aaramaseenoo innaaru qimarinau. <sup>9</sup> Miqinoo faiqanoo fifiufanoo suani afu dinni ataaqeeni Kannaana maqa maaqa dinni atinni Isipa maqa maaqa oosira qaannai ooquranau. Neekeefa maqasaa ooqu finau.

*Abarammafa Isipa maqa maaqai ooqu fu ufafa.*

<sup>10</sup> Miqoo marufanoo aandaroo firaafa Kannaana maqannaasa narinau. Abarammafa mina qafoofanoo mandaikufanoo nari aiku asauku faqa nari ainaina namu faqa Isipa maqasaa ooqu finau. <sup>11</sup> Isipa maqa maaqa adeedi rama soofanoo Abarammafa nari anaqa Sarai nammarina qimaminoo qinau. Ani afaqa amiqirafa mariananoo. <sup>12</sup> Isipa maqannaasa ani qafamasee, oo mina aanaaqammi maqi qimasee qini darusee ani maree foora. <sup>13</sup> Anee aneennara qiniara auna fee qinaqa sia darifaqa anindiri kaqi marianau.

<sup>14</sup> Abarammafa Isipa maqa maaqai aniroofaqa Isipa maqannaasa Sarai nammarina qafamasee boo amiqira fee qiqau. <sup>15</sup> Isipa maqannaasa rakisirafa Faraona mina faiqi namu Sarai nammarina qafamaseeqa Faraona qimamiqa qiqau, qoo amiqira manaaqa fee qufanoo Faraofa qimannimufaqa Sarai nammarina ani mareeqee Faraona kinna maaqaki quqaqau. <sup>16</sup> Mina akiiqara Faraofa Abarammana amiqi amiqimmaseenoo sipsipauqa faqa mimmiuqa faqa burimakauqa faqa doonkiuqa faqa kammeerauqa faqa ainainira faiquqa faqa maanaaqauqa faqa feefaru Abarammana aminau.

<sup>17</sup> Faraofa Sarai nammarina maroonara Karaambaiqa fannoo oosana oosana manda aurirana Faraona faqa mina maaqaki marusaki faqa quqanau. <sup>18</sup> Faraofa mina qafamaseenoo Abarammana aaramaseenoo aqinoo qinau. Anee qini naqaa fee maqimagenee. Anee nanaree sia qini qinaaqa fee qimasee qimaqiminanee. <sup>19</sup> Anee nanaree qini dauna fee qianaqee qinee qeeqara qinaaqara mareeqee qeeqa maaqaki quqee fee. Maa ani anaqa marinoo, doo ani afiqee fifua. <sup>20</sup> Faraofa miqi qimaseenoo nari sundiauqa niqioqofaqa Abarammana faqa nari anaqa faqa nari aiqama ainaina faqa nifiqa maree nari maqa atinni munusoofaqa fiqa.

## 13

*Abarammasa Rootasa naadu naadu fu ufafa.*

<sup>1</sup> Abarammafa Isipa maqa maaqakiqari suani afu dinni ataaqeedari dinni ataaqeeni Kannaana maqa maaqai qumurandee nari anaqa faqa Rootana faqa nari aiqama qumiasana faqa maree finau. <sup>2</sup> Abarammafa ainaina faqaafa marinau. Sipsipa faqa mimmi faqa burimakau faqa siruaa faqa koora faqa faqaafa marinau.



<sup>3</sup> Mifa miqooqari quqasee fifiufanoo Beeteera maqusa amummaqa fimarinau. Mifa ooqai nari Beeteera maqusa faqa Ai maqusa faqa qambaana uqaana maqa usakaqooqoo ooqu ranau. <sup>4</sup> Ooqai mifa miqoo tatufira qainda auquqoo ooqureenoo Karaambaiqa innaaru qimamaqanau.

<sup>5</sup> Rootafa faqa sipsipauqa faqa mimmiuqa faqa burimakauqa faqa faiqi anaasee faqa nari ainainira faiquqa faqa maanaaqauqa faqa Abarammana faqa nimariqau. <sup>6</sup> Miqanda moomoo aandau ainaina faqaqanda maridaqa aandauqa neemaru andandafa sia amanaikufaqa sia amana moodaanaki mariaqaa inoo marinau. <sup>7</sup> Miqija marufanoo Abarammana aandausaa rakisi marusa faqa Rootana aandausaa rakisi marusa faqa andanda narana saara tinooriqau. Mikari Kannaana maqannaasa faqa Peerisa maqannaasa faqa mi maqanasaa kaqi mariqau. <sup>8</sup> Abarammafa mina qafamaseenoo Rootana qimaminau. Maasa moodaa oosana maridaqa anee faqa qinee faqa sia tinooria, ani faiqi namu faqa qini faiqi namu faqa sia tinooriaqa. <sup>9</sup> Maqa maaqa fraatiamma maridanoo ania, anindiri rainaa, anee ainna aidimari maqana qafamasee utaaqamasee mi tinai finaqa qinee moo tinai fuanaura.

<sup>10</sup> Miqi qimasee qimamufanoo Rootafa afu maqaidanoo Yooradanna noopundu dinni marufanoo Soora maqusa dinni marufanoo mi qambaanna nammari moomoo marinau. Karaambaiqa kadidakiara foora moomoo nammari marinau. Amiqinoo maridanoo Isipa maqa maaqara foora marinau. Mi aukuanai Karaambaiqa Soodoomma maqusa faqa Koomoora maqusa faqa sia naru kammuqoo Rootafa mi maqa maaqana qafanau. <sup>11</sup> Rootafa qafamaseenoo aiqama Yooradanna afaasasaa ooqu mariraree qimaseenoo suani oosana fimarau aatata finau. Miqi mandeegara rainaqau. <sup>12</sup> Abarammafa Kannaana maqa maaqai kaqi marufanoo Rootafa Soodoomma maqusa aqa maqusauqa dinni dinni marufanoo qambaana noopunduki nari uqaana maqa usakanau. <sup>13</sup> Soodooma maqannaasa kaaqa mandainaina maree marusa maridaqa. Karaambaiqa afusaa oosana oosana mandainaina uqanna auqee mariqau.

*Abarammafa Heebaroonna maqa maaqai finau.*

<sup>14</sup> Rootafa fifufanoo Karaambaiqa Abarammana qimaminoo qinau, anee marianaqooqari amiqimmasee aiqama atinai aiuqia. <sup>15</sup> Anee qafaanna maqa maaqana ani faqa anisaaqari kambiqaingausa faqa nimisaananoo naaruara naaruara innindi kamminoo mariannoo. <sup>16</sup> Qinee ani aiku asauku asumu moomoo kambiqa nimaqaanaura. Sia amana moo fannoo asaana rirana amanaikiannoo. Nukuda aiqama amana asaana rifaranoo, ani faiqi namu kai sia amana nisaana rifaranoo. <sup>17</sup> Doo maqee oonuree aiqama maqa maaqa qinee ani amiannana aiuqia.

<sup>18</sup> Abarammafa minara iriseenoo nari uqaana maaqa rapeemma mareenoo Heebaroonna maqa maaqaki Mamareena saqariuqa atukaki ooqureenoo miqoo Karaambaiqa tatufira qainda ooninnai auquseenoo tatufirana suqa aminau.

## 14

*Rootafa namuqaaki marufanoo Abarammafa afiqoo ufafa.*

<sup>1</sup> Mi fasannai Amarafeerafa Babiroonia maqanna karaambaiqa marinau. Mi aukuanai Eerasaa maqanna karaambaiqa Ariookafa faqa Eeramma maqanna karaambaiqa Keedooroomafa faqa Kooimma maqanna karaambaiqa Tidarafa faqa minamusa aiqama nari sundiauqa moodaanaki nifiqeeqa Soodooma maqannaasa narirara fiqau. <sup>2</sup> Misa moodaannai qisauku karaambaiquqa faqa rakiraree qimaseeqa fiqau. Soodooma maqanna karaambaiqa Beerana faqa Koomoora maqanna karaambaiqa Birasana faqa Adama maqanna karaambaiqa Sinabana faqa Seeboyima maqusanaasa karaambaiqa Seemebeerana faqa Beeraa moo auqu Soora maqanna karaambaiqa faqa mi moodaannai qisauku karaambaiqausa faqa rakiraree qimasee qumiqau. <sup>3</sup> Mi moodaannai qisauku karaambaiqausa rufiasee Sidimma noopunduki suqiqau. Maqee mi noopundunaki ooruku nammari rafaqa finoo marifaqa mina auqu raidaqa Kuqira Nammari fee qidaqa. <sup>4</sup> Qisaukuqara taikasee qikunni ooqu qaara marasee 12 aukuanaki Keedooroomana asauku ameemaanai mariqau. Qisaukuqara taikasee qikunni ooqu qaaramoo marasee 13 aukuanaki mina ufa rukiee mariqau.

<sup>5</sup> 14 aukuanasaa Keedooroomafa findifinoo aqoonna karaambaiquqa faqa nari rakira fasiqauqa faqa findifiqa ooqu fiqau. Ooqu fiu faqa moo maqannaasa ooqi naru maree fiqau. Reefaimma maqannaasa Asetaroota Karanaimma maqusaki nariqau. <sup>6</sup> Naruseeqa Susima maqusanaasa Qamma maqa maaqaki faqa nariqau. Naruseeqa Eemimma maqanna faqa Kiriataimma afaasa maqa maaqaki marusa nariqau. Miqooqari ooquree Qoora maqannaasa Eedoonna aqaanasaa marusa nariqau. Misa naru mareeqa Eeraparanna aadana maqa maaqa atinni munu quqaqau. <sup>7</sup> Miqooqari

oonu randeeqa Kadeeasa maqusai ooqeenaa auqu Eenamisapatee qimaru maqusaanaasa faqa nariqau. Amareekana aiku asauku misaqa maru maqusausa aiqama rafaafa fiqau. Rafaafufusee Amoorana aiku asauku Qasasoona Tamara maqusaki marusa faqa rafaafafu nimaqafau.

<sup>8</sup> Miqimmasoofaqa Soodooma maqanna karaambaiqa faqa Koomoora maqanna karaambaiqa faqa Adamma maqanna karaambaiqa faqa Seebooyima maqanna karaambaiqa faqa Beera moo auqu Sooa maqanna karaambaiqa faqa mi maqusa namusa karaambaiqau faqa nari rakira fasiqau faqa moodaaqoo Sidima noopunduki suqiqau. <sup>9</sup> Suqufufaqa Eeramma maqanna karaambaiqa faqa Kooimma maqanna karaambaiqa faqa Babiroonia maqanna karaambaiqa faqa Eerasara maqanna karaambaiqa faqa rakirara deedaqiqau. Moodaanai qisauku karaambaiqau qaara faqa qaara faqa karaambaiqau faqa rakirara deedaqiqau. <sup>10</sup> Sidima noopunduki koorootaqa madika moomoo marinau. Soodooma faqa Koomoora maqanna karaambaiqau rakiranakiqari quqasee sandaani guna mi madikausaki aqufiqau. Qaaromoo karaambaiqau sanda maqaraasiqa aaganai akaraqau. <sup>11</sup> Qaara faqa qaarafaqa karaambaiqau Soodoomma maqannaasa faqa Koomoora maqannaasa faqa aiqama ainaina uqanna maraqau. Afuqakinaa nara ainaina faqa maree fiqau. <sup>12</sup> Rootafa Abarammana akaqa amaaku fannoo Soodooma maqusai maru faqa minna qumiasana faqa maraqau. <sup>13</sup> Faiqi moo fannoo rakiranakiqari sandeenoo Abarammafa Qeeburu maqanna fasiqa fannoo Amooru maqanna fasiqa Mamareena saqariuqa atukaki marufanoo ooru qimaminau. Mamareefa nari akaqafara Eesakooraana faqa Aneerana faqa minamusa Abarammana aqoondi mariqau. <sup>14</sup> Abarammafa Rootana mara maree funara iriseenoo nari ainainira faiqiuqaki nimudaanai qimarusu nari uiqaana maqusakinaasa 318 fasiqa nifiqanau. Nifiqaseenoo qimannimufaqa qaara faqa qaara faqa karaambaiqau nifaqamaree Dannaa maqa maaqai nianai fiqau. <sup>15</sup> Ooruree namuqaa nindafamaseenoo nari faqa fusa rainaseenoo eendaki namuqaa maruqoo oonureeqa naru nindaqaaqa qiqau. Mifa misa nifaqa maree suani afu dinni ataageenni Damasakusa maqusa faaqaree Hoobaa maqusaki munusaqau. <sup>16</sup> Ooru randee qumureeqa Abarammafa Rootana faqa minna qumiasana faqa aiqama aanaaseeuqa faqa rumbee fusauqa faqa aiqama nifiqee aniqau.

*Meerakiseedeekafa Abarammana amiqi amiqira ufa qimamaqanau.*

<sup>17</sup> Abarammafa Keedooroommana faqa minna aqoonna karaambaiqau faqa naruseenoo aniroofanoo Soodooma maqanna karaambaiqa fannoo minna qafarara Saavee noopunduki moo auqu Kinna noopunduki fee qimaruqoo paqurinau.

<sup>18</sup> Sareema maqannaasa karaambaiqa auqu Meerakiseedeekafa uriqarara Anutuna aanaiqikirafa marufa feemu faqa uainna nammari faqa Abarammana mini aminau. <sup>19</sup> Meerakiseedeekafa amiseenoo maaqi qimaseenoo amiqi amiqira ufa qimamaqanau. Uriqarara Anutufa innaaruna faqa maqa faqa auqufa mifa kai Abarammana amiqi amiqiannoo.

<sup>20</sup> Kaaqa uriqarara Anutufa kai namuqaa mareeqee ani asaukuki quqeenoo miqinara Anutuna amoo qiaqa.

Miqi qimasee amiqi amiqira ufa qimasoofanoo Abarammafa namuqaa ainaina maraqoona qisaukuqaraki rainaseenoo moodaaki Meereekiseedeekana aminau.

<sup>21</sup> Amisoofanoo Soodooma maqanna karaambaiqa Abarammana qimaminoo qinuu. Anee rakiranaki maraanna ainainausa aneennara mareenana qini faiqi anaasee kai qimia.

<sup>22</sup> Miqi qufanoo Abarammafa asauku uqeeraseenoo qinuu. Qeeqa qisauku uqeerreeqa, kaaqa uriqarara Anutuna innaaruna faqa maqa faqa auquna afusaa uqeerasee qimamidaqa. <sup>23</sup> Sia uqanna ani ainaina qaiqikaa ainaina maraanaura tiritu faqa niku aanaamu sanda faqa ririmma sia maraanaura. Anee qiniara maasa ainaina maraseenoo moomoo ainaina faqaasee qidanoo mifoo qinoora. Sia uqanna maraanaura. <sup>24</sup> Qinee sia uqanna moo ainaina qeeqara maraanaura. Qini faqa rakiranaki fuusa misa namasaa ainainnara kai doo maree fee qidaqa. Qini qiqoodi namu Aneerafa faqa Eesakoofa faqa Mamareefa faqa misa kai nari nimanasaa maraqa.

## 15

*Anutufa Abarammana faqa moodaanaki kira ufa qinuu.*

<sup>1</sup> Rakirana taikaseenoo marufanoo Yaaweefa Abarammana afu pisipasa mandeenoo qimaminuu.

Abaramma anee sia rufiaa.

Qinee ani saqariara foora anisaa ititafuanoo sia moo fannoo ani aruannoo. Qinee mina akiqara firaa ainaina ani amianauro.

<sup>2</sup> Abarammafa mi ufana iriseenoo nari qimaminoo qinau. Oo uriqarara karaambaiqa anee nana gumiasanee qini qiminnaree qinee faiqi siaisa maridaqa. Maa qini ainainira faiqi auqu Eerieseerafa Damaskusa maqusaindaraafa mifa kai maridanoo qinee kuquanoo qini ainaina maraannoo. <sup>3</sup> Anee faiqi asumu sia qini qimianoo qini ainainira faiqi uqakiqari moo fannoo qini gumiasana maraannoo.

<sup>4</sup> Miqi qimaseenoo Abarammafa irufanoo kafaa Karaambaiqa qimaminoo qinau. Maa ani ainainira faiqi Eerieseerafa sia ani gumiasana ainaina maraannoo. Aninna faiqi uqanna fannoo ani ainaina maraannoo. <sup>5</sup> Miqi qimaseenoo Karaambaiqa Abarammana afiqee madaana muquseenoo qinau. Innaarunai qafamaseenana fasau amanee anee asaana rinnaree. Aniki ani aruakinausa miqimmasee kambiqeefara.

<sup>6</sup> Abarammafa Yaaweena mi ufana iriseenoo nari saqarikirana mi ufanasa rusisee marinau. Miqunara Karaambaiqa اساسammaseenoo Abarammana mareeqee nari aqoondikiranaki quqanau.

<sup>7</sup> Miqi qimasee Karaambaiqa Abarammana qimaminoo qinau, qinee Karaambaiqa ani Ura maqusakinaana Babiroonia maqa maaqaindaraana afiqee minisee maa maqa maqana amiananoo anindikianifee qimasee afiqee aniqiafana.

<sup>8</sup> Miqi qufanoo Abarammafa iramirinoo qinau. Oo uriqarara Karaambaiqa qinee naqi fee masee qinindi kammiannoo fee qimasee irianauree.

<sup>9</sup> Miqi qufanoo Karaambaiqa nari qimaminoo qinau. Anee burimakau faqa mimmi faqa sipsipa faqa qaaramoo aukuaana mararasa faqa nakipuruna faqa kukuma faqa maree mini qimia. <sup>10</sup> Miqi qimasoo fanoo Abarammafa mi aandausa Anutufa maruqoo maree mini quqaseenoo minauqa qambaana kai afoomaseenoo dinni moo afooirana dinni moo afooirana qaaramau irasasaa quqanau. Ufiniqara kai sia afooinau. <sup>11</sup> Meemoonauqa mi aandausa narara aniroofanoo Abarammafa niuqaqinau.

<sup>12</sup> Suani keeqarana namu faqa eenoofanoo Abarammafa afuki qaunduarufanoo faiqaqeaidanoo qaini marufanoo firaa rufiarafa faqa maparaairafa faqa Abarammana afaaqi aqufinau. <sup>13</sup> Miqida rufiee marufanoo Karaambaiqa Abarammana qimaminoo qinau. Anisaaqari kambiqainausa aanaamuruara foora moo maqannaasa maqasaa oonu maridaqa ainainira faiqikiqa marifaqa 400 aukuanaki manda fitiqnarana nimifaranoo. <sup>14</sup> Miqi marifaqa qinee mi maqannaasa mi fitiqnarana nimimariana akiqara aupurarana nimianauro. Misa mi maqa maqana minnisee oonurandee aniq moomoo gumiasana maree anifaranoo. <sup>15</sup> Aniaara maaqi qiqa anee asooaqeenana asooaranaki kuqufinaqa akundaqa. <sup>16</sup> Ani aiku asauku qaara faqa qaara faqa oosana mi rumbaranakiqari oonu randee anifaranoo. Qinee sia Amooraa maqannaasa dauni naru taikaanauro. Misa kaaga mandaika uqanna ifaqa miqoo misa naru nindaqaqa masee ani aiku asauku miqoo quqaanauro.

<sup>17</sup> Suani keeqoofanoo eendirara mammandufanoo Abarammafa qafoo fanoo qafeeki idamuna namu faqa qooma namu faqa akooqoo nari kai kambiqafinoo aanda afoomma dinni dinni quqaqoona qambaana runna finau. <sup>18</sup> Doo aaqee mikari kai Yaaweefa Abarammana faqa moodaanaki kira ufa qinau. Qinee maa maqa maqana ani aiku asauku nimianauro. Isipa maqanna nammari dinni oosirafa ani rameeqeenoo firaa nammari dinni Eufarateesa nammari mariannoo. <sup>19-21</sup> Keenaa maqusanaasa maqa faqa Keennisa maqusanaasa maqa faqa Koodamoona maqusanaasa maqa faqa Qeeta maqusanaasa maqa faqa Peerisa maqusanaasa maqa faqa Reefaimma maqusanaasa maqa faqa Amooraa maqusanaasa maqa faqa Kannaana maqusanaasa maqa faqa Kirakasa maqusanaasa maqa faqa Yeebusa maqusanaasa maqa faqa miqimmasee maqannaasa maqa faqa ani aiku asauku nimianauro.

## 16

*Qakaarafa nari amaaku Isamaeerana faqa ufa qu ufafa.*

<sup>1</sup> Abarammana anaqa Sarai nammarifa mifa qaafa anaasee marinau, sia faiqi maqanau. Mina ainainira maanaqa Isipa maqanna maanaqa marinau. Mina auqu Qakaara nammarifa marinau. <sup>2</sup> Sarai nammarifa nari oosana maraseenoo Abarammana qimaminoo qinau, anee iria, Anutufa sia faiqi qini qiminoo. Minara maa qini ainainira maanaqa mara sainanoo mifa ani faqa finoo aqbee faiqi maqa sainaqa qinee qeeqara maraanauro. Miqi qufanoo Abarammafa eedoo qimaseenoo maranau. <sup>3</sup> Abarammafa qisaukuqara taikasee aukuaana Kannaana maqa maaqai marufanoo Sarai nammarifa nari ainainira maanaqa Qakaara nammarina Abarammana aminau.

<sup>4</sup> Abarammafa Qakaara nammarina faqa aana fufanoo faiqi maranau. Qakaara nammarifa amuaquqaika mafufanoo nasuridanoo nari aqoonnana Sarai nammarina ramoo ramaa ira ufa qimamaqanau. <sup>5</sup> Miqufanoo Sarai nammarifa Abarammana qimaminoo qinai. Ani oosanasaa Qakaara nammarifa qini fidiqaamma qimaqaidanoo. Qinee qeeqa kai mina ani amisaafananoo amuaquqaika mafinoo qini uridaaqa raidanoo. Karaambaiga fannoo kai anindiri ufa rainaannoo. Anee fee, qinee fee andeeqee fee.

<sup>6</sup> Abarammafa kafaa nari qimaminoo qinai. Doo amana ani ainainira maanaaqa ani ameemaanai maridanoo. Naqaamma amaqararee fee qimasee iridanee, doo miqia. Sarai nammarifa Akaara nammarina maqee maqee oofana qaidanoo ari aqimarunara quqasee sandanau.

<sup>7</sup> Qakaara nammarifa amaaqa firaree qimasee Suraa maqa maaqaki fimaru aatata sandee fifiufanoo aadana maqa maaqa qambaana nammari kaqikaafa ururee maruqoo Karaambaiga angiroo fannoo Qakaara nammarina paqurimmasee qimaminoo qinai. <sup>8</sup> Qakaara nammari, Sarai nammarina ainainira maanaaqa, anee yaindari fee anidnee maagooqari yai fee fidanee. Miqi qufanoo Qakaara nammarifa qinai, qeeqa rakisirana Sarai nammarina aaqu ruftee sandaidaqa.

<sup>9</sup> Angiroo fannoo minara iriseenoo maaqi qimasee qimaminai, doo findi finana aneenna rakisira anaasee marinnai kafaa anirandee oonureenana mina ainainira manaqaikia. <sup>10</sup> Angiroo fannoo kafaa qimaminoo qinai. Qinee moomoo asumu ani amianaqa sia amana asaana rifaranoo.

<sup>11</sup> Maqee ani aranandaki faiqi rinoo anee akoonaiqi maqeenaranoo anee mina auqu Isamaeera nee qia.

Karaambaiga fannoo anee apuraranakiqari mina aaramasee faaqa ruannana irinara minara mi faiqina auqu Isamaeera nee qia.

<sup>12</sup> Mi faiqifa kaasau fainiara foori mariannoo.

Mifa aiqamausa namuqaakamma nimaqainaqa misa faqa nari namuqaakamma amaqee-faranoo.

Mifa nari ainaina rakeemasee aaduma mariannoo.

<sup>13</sup> Qakaara nammarifa nari kai qimirinoo qinai. Qinee kuqaa fee Anutuna qafamasee fee sia kuqirai kaqi maridee qimannimianauree. Miqi qimasee mina qimamu karaambaiganara niqafee mari Anutu fee qinai. <sup>14</sup> Miqooqari misa mi nammari dikaandana auqu reeqa kaqi marira Anutufa qini qiqafai nammari dikaanda fee qiqau. Mi nammari dikaandafa Kadeesa maqusa dinni Beereeda maqusa dinni qambaana marinai.

<sup>15</sup> Qakaara nammarifa kafaa anirandee oonureenoo faiqi maqasoofanoo Abarammafa mina auqu Isamaeera nee qinai. <sup>16</sup> Mi aukuanna Abarammafa 86 aukuan faqaafa marufanoo mina faiqi kambiqaanau.

## 17

*Anutufa Isaraee maqannaasara nifaqa ati aukirafa moodaanaki kira ufa kooroo imarifa maridanoo.*

<sup>1</sup> Abarammafa mariufanoo 99 aukuan marasoofanoo Karaambaiga mina afusa kooroo mafi qimaminai. Qinee aiqama afeeka faqaa Anutusa maridaqa. Anee aiqama kari qini ufa qaindusidana andeeqara ainaina kai auqaa. <sup>2</sup> Qinee ani faqa qeeqa moodaanaki kira ufa qimasee anisaqari asumu moomoo kambiqa nimaqaanau.

<sup>3</sup> Abarammafa mi ufana iriseenoo oorindari maqasaa mapamufufanoo Anutufa maaqi qimasee qimaminai. <sup>4</sup> Qinee maa moodaanaki kira ufana ani faqa qidaqa. Qinee kuqaa qima afeekaikidaqa. Anee moomoo maqannaasa ninaakufa marinnaranoo. <sup>5</sup> Doo maqee ani auqu Abarammafa marina maqee fuka auqu amiqa. Abaraqaammanee qiana. Qinee ani moomoo maqanna ninaakufaika maisaannanara ani auqu Abaraqaammanee qiana. <sup>6</sup> Qinee ani faiqi asumu moomoo amianaqa misakiqari akaqausa karaambaiga marifara. Ani asaifaqausa moomoo maridaqa moomoo maqanna marifaranoo.

<sup>7</sup> Qinee qeeqa qima afeekaikira ufa ani faqa ani asaifaqausa naaru kambiqaanau faqa qiafannana naaru marira moodaanaki kira ufara foori rakisiaura. Qinee ani faqa ani asaifaqausa Anutusa mariana. <sup>8</sup> Anee asaqiraa faira foori maa maqanasaa mariannana qinee ani faqa ani asaifaqausa faqa nimianau. Nimianoo aiqama Kannaana maqa maaqa fannoo ani asaifaqausaindi kaminoo naaru marinaqa qinee misa Anutusa mariana.

*Abarammana fuka auqu.*

<sup>9</sup> Miqi qimaseenoo Anutufa kaifaa Abaraqaammana qimaminoo qinai. Anee faqa eedoo qimasee qini qima afeekai kira ufamau aneenna asaifaqausa naaru kambiqaanau faqa fuaqa. <sup>10</sup> Anee faqa ani asaifaqausamara faqa aiqama eedoo qimasee akoonaiqi

faiqiuqa nifaaga ati aukuaqa. <sup>11-12</sup> Maaqooqari aiqama akoonaiqi faiqiuqa maqasaifanoo 8 faasaana aiqaramafinaqa nifaaga ati aukuaqa. Ainainira faiqiuqa inniki mariasa faiqi namu faqa nianaindaraasa feefaurumma quqaqaafaqa inniki mariasa faiqi namu faqa nifaaga ati aukuaqa. Miqimmasaifanoo mifa qinee faqa innee faqa moodaanaki kirana uqannifiqaannoo. <sup>13</sup> Aiqama uqanna nifaaga ati aukuaqa. Aukusaifanoo mifa inni nifaagai qini moodaanaki kira ufa naaruara marianinnanara koorooiannoo. <sup>14</sup> Inniki qari akoonaiqi moo fannoo sia afaaga ati aukinafa marinaqa sia qini faiqi aanaaseeki mariannoo fee qianaara. Mifa qini qima afeekaikira ufamau sia finara sia inniki mariani.

<sup>15</sup> Kafaa Anutufa Abaraqaammama qimaminoo qinau, sia aneenna aanaaqara Sarai nammarinee qia. Maqee mina auqa Saraqa nammarifa mariannoo. <sup>16</sup> Qinee Saraqa nammarina amiqi amiqi maisaanoo faiqi akoonaiqi ani maqa amiannoo. Mifa moomoo maqannaasa ninoofa marinaqa mina faiqi namukiqari akaqausa karaambaiguqa marifarannoo.

<sup>17</sup> Abaraqaammama mi ufana iriseenoo maqasaa mapamu finoo naanaidara qidanoo qinau. Amanee 100 aukuaana marara fasiqa fannoo faiqi maqaannoo fee Saraqa nammarifa faqa 90 aukuaana mararafa amanee faiqi maqaannoo fee. <sup>18</sup> Miqi qimaseenoo Abaraqaammama Anutuna qimaminoo qinau. Naqaa saina Isamaeerafa qini ainaina maraqaana ifanee.

<sup>19</sup> Miqi qufanoo Anutufa qimaminoo qinau. Ani anaaga Saraqa nammarifa ani faiqi akoonaiqi maqasainana mina auqu Isakee nee qia. (Maasa ufaiqari Isakeena auqu naanaidara qirane qimaqoofanoo.) Qinee ani faqa moodaanaki kira ufa quqau-nafa Isakeenasaa faqa minasaqari naaru naaru kambiqainausasaa faqa mariannoo. <sup>20</sup> Isamaeerafa faqa anee qianandee, mina faqa amiqi amiqi ianaura. Mina faiqi namu moomoo uqanna kambiqeefara. Akoonaiqiuqa qisauku qara taikasee qikunni ooqu qaaraqanda 12 marasee uriqararausa marifara. Mina saaqari kambiqainausa firaa maqanna marifarannoo. <sup>21</sup> Moo aukuaana maa quqoonnanasaa kai Saraqa nammarifa ani faiqi Isakeena maqannoo. Qinee qeeqa moodaanaki kira ufa minasaa quqaqaana mariannoo. <sup>22</sup> Anutufa aiqama maa ufana Abaraqaammama qimamiseenoo doo quqasee finau.

<sup>23</sup> Fifufanoo Abaraqaammama Anutuna ufa mau finoo mi faasaana kai nari faqa nari amaaku Isamaeerafa faqa nari ainainira faiqiuqa faqa nari ainainiranaki marida maqaaqoo faigisa faqa aiqama nifaaga ati aukinau. <sup>24-25</sup> Abaraqaammama 99 aukuaana marinoo nari afaaga ati ateeqa aqinau. Isamaeerafa 13 aukuaana marasoofanoo mina afaaga ati ateeqa aqinau. <sup>26-27</sup> Moodaa faasaana kai Abaraqaammama faqa nari amaaku Isamaeerafa faqa nari ainainira faiqiuqa aiqama nifaaga ati ateeqaqau.

## 18

*Anutufa Abaraqaammama faiqi amirara qima afeekaiku ufana.*

<sup>1</sup> Abaraqaammama Mamareena arookasa atukaki suani qambaana aiqaiqa ufanoo nari uqaana maqa kooqiki ooqu faaqee marufanoo karaambaigu maaqimmasee mina afusaa kooroo inau. <sup>2</sup> Ooqufaaqee marufaqa faiqi qaaramoo namu anufanoo Abaraqaammama niqafamaseenoo nari oosana mareenoo findimeeqeenoo misa anuqoo sandee oonureenoo oorindari maqasaa kummarama finoo qimanniminoo qinau.

<sup>3</sup> Oo uriqararausa, qinee inni dadaaqirausa maridaqa sia qini aidaaqa raaqa. <sup>4</sup> Qinee qianaqa nammari minisaifaqa inneeqa niku nammari uqu seeqa maa saqarina atukaki adooaqa. <sup>5</sup> Qinee akaqa narana nimiana namaseeqa afeeka mara mareeqa fuuqa. Qinee inni dadaaqianeera maaqoo aniafanoo. Innee mai anianannai qini duqu uqeeraafanoo. Minara eedoo qifaqa narana nimia. Miqi qufaqa misa qiqau. Dufi dufi doo nimina naanee qiqau.

<sup>6</sup> Abaraqaammama iriseenoo uqaa maaqaki sandeenoo oonureenoo Saraqa nammarina qimaminau. Anee kai kaqi parauaqa amiqirana moodaa beeka marasee feemu suqa.

<sup>7</sup> Miqi qimaseenoo raudamaki sandeenoo burimakau maruqoo oonureenoo burimakau aanaaqi amiqirana amaqi qumooqu kirana mara rumba mareenoo nari ainainira faiqi amisoofanoo kai kaqi ufanoo arusee suqanau. <sup>8</sup> Abaraqaammama burimakau naamma anoona faqa naamma anoona fadameena faqa feemu faqa burimakau suqarana faqa mara maree mini nimufaqa naqau. Abaraqaammama saqari atukaki misa faqa maridanoo narana nimufaqa naqau.

<sup>9</sup> Misa namaseeqa Abaraqaammama maaqi qimasee iraqau. Ani anaaga Saraqa nammarifa yai fee marinoo fee qufanoo mifa qinau. Maa uqaana maqaki maridanoo fee qinau.

<sup>10</sup> Miqi qufanoo misakiqari moo fannoo qinuu. Moo aukuaana maa quqoonnasaa kai qinee kafaa aniraananoo ani anaafa Saraqa nammarifa akoonaiqi faiqi maqaannoo. Miqi qimarufanoo Saraqa nammarifa uiqaana maqa kooqiki mi fasiqana aanaaqian-nai ooqu faaqee idanoo irimarinau. <sup>11</sup> Miqi qufanoo Saraqa nammarisa Abaraqaamaasa asooqa uqanna marufanoo Saraqa nammarifa faqa faiqi maqara aukuaana ooqai taikanau. <sup>12</sup> Saraqa nammarifa minara iriseenoo nari kai naanaidara qidanoo qinuu. Qinee faqa qeeqa nauraiqindiri asooqa marida. Naqimmasee fee qeeqa qifaaqi faqa aana fuanauree.

<sup>13</sup> Miqufanoo karaambaiqa Abaraqaammama qimaminoo qinuu. Naqaa fee ifanoo fee Saraqa nammarifa naanaidara qinoo fee. Maana qinee asooqa maridaqa naqimandee faiqi maqaanauree qinoo fee. <sup>14</sup> Nana ainainee moo ainaina Yaaweefa sia amana auqaannoo fee mifa amana aiqama ainaina auqaannoo. Qinee anoona ufa qidaqa, moo aukuaana maa quqoonnasaa qinee kafaa aniraananoo Saraqa nammarifa akoonaiqi faiqi maqaannoo.

<sup>15</sup> Saraqa nammarifa mina iriseenoo rufia mareenoo unna qimasee qaoo qinuu, Qinee sia naanaidara qiqa. Miqi qufanoo misa uriqararafa Karaambaiqa qimaminoo qinuu. Anee naanaidara qianaqa iriqa.

*Karaambaiqa Soodooma maqusa aruaninnanara qinuu.*

<sup>16-17</sup> Mi fasiqa qaaramoo namusa Abaraqaammama faqa ooqu fiuafaqa Soodooma maqusai qafee maruqoo muqunnisooqanoo Karaambaiqa nari kai qimasee irinau. Qinee auqarree qunna ainaina sia Abaraqaammama umeerama amaqaanaura. <sup>18</sup> Mina saaqari kambiqaainausa firaa maqanna marifaranoo. Aiqama maqannaasa Abaraqaammama saaqaraannai amiqi amiqimma nimaqaanaura. <sup>19</sup> Abaraqaammama nari faiqi namu faqa misasaqari kambiqaainausara faqa andeeqara oosanamau kai fuuqee fuki faaki ianifeera rusandeessummassee maraqiafana. Misa miqi faqa qinee qima afeekaikifanna ainainausa aiqama miqimma nisaanaura.

<sup>20</sup> Miqi qimiriseenoo Yaaweefa Abaraqaammama akooqoo kooroommassee qimaminau. Soodooma maqusanaasa faqa Koomooraa maqusanaasa faqa manda oosana fiqaranoo marifaqa akaqausa minara nikoo uqanna qaiifaqa qimaqimifaafa iriqa. <sup>21</sup> Qinee ooqureeqa mi fasiqa anaaseesa mi oosanna auqee mariana qafaanaura kuqaa fee unna fee maridanoo fee.

<sup>22</sup> Mi qaaramoo fasiqa namusakiqari qaara qanda Soodooma maqusai ooqu fimarfanoo Karaambaiqa Abaraqaammama faqa marinau. <sup>23</sup> Abaraqaammama Karaambaiqa oorinni oonu reenoo iramirino qinuu. Kuqaa fee anee andeeqarusa faqa aqee mariasa faqa aiqamee naru taikennaree. <sup>24</sup> Qaara fasiqa niku nisauku taikasee qini qisauku qara taikasee 50 andeeqarusa mi maqusanaki marifana anee aiqamee naru taikennaree. Kafaa 50 andeeqarusa marifana mi maqusana asumu quqeenaree. <sup>25</sup> Sia amana andeeqarusa faqa mandaikirausa faqa moodaanaki narinnanoo. Mifa sia andeeqanoo maridanoo. Andeeqarusa faqa aqee mariasa faqa sia amana moodaa oosana kai niminnanoo. Aiqama maa maqanasaa mariasa siaasa marianafa andeeqara oosana kai maraa.

<sup>26</sup> Karaambaiqa Abaraqaammama ufa iriseenoo qimaminau. Qinee qaara fasiqa niku nisauku taikasee qini qisauku qara taikasee 50 andeeqarusa mi maqusanaki paquriqa sia mi maqusana kuridianaura.

<sup>27</sup> Abaraqaammama mina iriseenoo kafaa qimaminau. Oo karaambaiqa qinee qifaafa quqasee ani qimamunna ufana mi numoona minni qisaa. Qinee faiqi faiqi maridaqa aqaqammassee ani faqa moomoo kari ufa qidaqa. <sup>28</sup> Amanee 50 sia marifana 45 kai andeeqarusa marifana moodaanai qisauku 5 minaki sia marinnanara irisee narinnaree. Karaambaiqa nari qimaminoo qinuu. 45 andeeqarusa mi maqusanaki marifaqa sia kuridi taikaanaura.

<sup>29</sup> Abaraqaammama mina iriseenoo kafaa qimaminau. Oo karaambaiqa qaara fasiqa niku nisauku taikasee 40 andeeqarusa marifana aiqama narinnaree. Karaambaiqa mina iriseenoo qimaminau. Qinee qaara fasiqa niku nisauku taikasee 40 andeeqarusa paquriqa mi maqusana sia kuridianaura.

<sup>30</sup> Abaraqaammama iriseenoo kafaa Karaambaiqa qimaminau. Qinee kaifaa ani qimamianana anee sia qiniara aanoo qia. Moodaa fasiqa aiku asauku taikasee qini qisauku qara taikasee 30 andeeqarusa marifana naqaa fee innaree. Yaaweefa iriseenoo qinuu. Qinee 30 andeeqarusa paquriqa sia miqianaura.

<sup>31</sup> Abaraqaammama kafaa qimaminau. Qinee qifaafa quqasee ani faqa moomoo ufa qimarunnana mi numoona minni qisaa. Mi maqusanaki moodaa fasiqa 20 kai marifana

naqaa fee innaree. Karaambaifa iriseenoo qinuu. Qinee 20 andeeqarausa paquriqa sia mi maqusana kuridianaura.

<sup>32</sup> Abaraqaammafa kaifaa qinuu. Oo karaambaifa sia aanoo qia. Qinee moo ufa kaffaa qianaura. 10 andeeqarausa paqurimasee naqi fee innaree. Miqi qufanoo Karaambaifa qinuu. Qinee qisauku qara 10 kai andeeqarausa paquri mandee sia kuridi nimaqaanaura.

<sup>33</sup> Karaambaifa Abaraqaammama faqa ufa qimaseenoo doo ooqu finuu. Ooqu fufanoo Abraqaammafa quqasee anirandee amaaqa finuu.

## 19

*Soodoomma faqa Koomoora faqa manda oosanna maraqau.*

<sup>1</sup> Abaraqaammafa muqunnisoo qangirooqanda Soodoomma maqusai ooquee maqusa kooqiki gafoofanoo Rootafa miqoo ooqu faaqee marinuu. Maridanoo Rootafa miqanda nindafeenoo maqeenoo oonu miqanda noorinni oorindari maqasa rupaitama fufanoo maaqi qimasee qimanniminuu. <sup>2</sup> Oo qini uriqarara qanda qinee inniqara dadaaqirara maridaqa. Innee qara qini maaqaki aniree niku nammari uqusee qini maaqaki faiqaaqa. Faiqee duna kananaana findi finaqa inneeqa finnannai fuaqa. Miqi qimasooafa miqanda qaoo qida qiqau. Saina maa qanda maqusa qaambaana faiqaanaura.

<sup>3</sup> Rootafa sandanainai qimaseenoo ufaqa miqanda mina faqa maaqaki keeqaaqu. Ooru roofanoo Rootafa nari ainainira faiqiufara qufaqa misa ooruku anoona sia qai feemuna faqa amiqira narana faqa suqasee nimufaqa naqau. <sup>4</sup> Namaseeqa faiqarara imarufaqa mi maqusaanaasa faiqi kumaaraa nauraiqi aiqama aniree Rootana maaqa fuseemna dati mambufaqa Rootana maaqi qimasee aaraqau. <sup>5</sup> Mi faiqi qanda faasai ani maaqaki keeqaa qanda yai fee maridaqee. Anee miqanda maasa qiminaqa mi qanda manda oosana nimia.

<sup>6</sup> Rootafa misa ufa iriseenoo rauda mafinoo nari aanaaqianaindari kooqi ititasee qimanniminuu. <sup>7</sup> Qinee qaoo qira ufa inni qimannimidaqa. Sia uqanna maa manda oosanna maraaqa. <sup>8</sup> Iriaqa, qeeqa qiraamuna qaara qanda sia faiqi faqa nuaqanda inni nimisaanaqa inneeqa iriranannai kai maraaqa. Maa fasiqa qanda qini maaqaki ani raafaqa aqoondi kammaqauna mariafaqa qinee amiqimmasee miqandasaa rakisidaqa.

<sup>9</sup> Miqi qimasee qimannimisoofaqa misa aiqama maaqi qiqau. Anee moo maqannaafa maasaki ani marianafa. Yafee qifanee anee maasara qaoo qidanee. Anee nimaaraa. Sia nimaarainafa sia ani aqoondiqara kai mandaikamma nimaqaanaura, ani faqa firaqoo mandaikamma amaqaanaura. Miqi qimaseeqa misa Rootana afeeqa aquseeqa mina kooqi rufadaairara iqqau.

<sup>10</sup> Maaqakiqari Rootana aqoondiqara Rootana qumu rarisameeqee maaqaki aqusee kooqi ititaqau. <sup>11</sup> Ititaseeqa mi fasiqausa madaana marusa aiqama nifu qimbasooafa kooqiyara randoosia minnisaaqu.

*Rootafa Soodoomma maqusakiqari finuu.*

<sup>12</sup> Minni soofaqa Rootana aqoondi qara iramiriqa qiqau. Maa anee marianna maqusanaki ani ati akaqausa maridee. Kai kaqi aneenna araamuqmaaka faqa airaamaku oondamara faqa aneenna atiuqa faqa aiqama nifiqee moosaa fua. <sup>13</sup> Maasa maa maqusana damunamma aquanaura. Karaambaifa maa maqusanakina oosana oosana mandainaina kambiqaiqanoo mi ufana iriseenoo maaqanda diqiqaiqaqa maa maqusana kuridirara qumidaqa.

<sup>14</sup> Rootafa iriseenoo nari araamuna qara nifaaqi qarara qutaqaamaqoo fasiqa qanda faqa qimanniminuu. Doo anifaqa innisaimbaqa mootinai fuaqa. Anutufa maa maqusana damunirara qinoo. Miqi qufaqa mina airaamaku qara sia iriqau. Quteeti qidanoo mifoo qimasee kaqi mariqau.

<sup>15</sup> Iaqoo faqa kananaana angirooqara Rootana kaffaa fuki faaki qiqau. Doo kai kaqinana aneenna anaafa faqa aneenna araamuna qara faqa nifiqee fua. Innee faqa maa maqusana namu faqa kuridifaara.

<sup>16</sup> Rootafa iriseenoo oonauqee anauqee imarufanoo mina aqoondiqara mina asaku faqa mina anaafa asaku faqa mina araamunaqara faqa qumaree rarisameeqee aanai ubeekaaqu. Yaaweefa Rootanara amuqusufanoo miqinuu. <sup>17</sup> Nifiqa quqasoofanoo angiroo moo fannoo qimanniminoon qinuu. Innee sandamafuaqa kuqifaara. Fidaqa sia quandafi qafaqaqa. Afaasasaa faqa sia kasooiaqa. Innee kuqifaara, aqaanai sandee ooru fuaqa.

<sup>18</sup> Rootafa iriseenoo maaqi qimasee qimaminuu. Sia aneenna qiannannai diiqa. <sup>19</sup> Anee firaqoo qiniara amuqusifana qini kuqiranakinaana maraanano. Aqaana nianai marifaqa minni fimariananoon mi narirafa qini faqa darinaqa kuqanoora. <sup>20</sup> Anee kaqikaa maqusa muqunni qafaidanee. Mifa adeedi marifaqa amanee qinee minni

sandaanaaree. Kaqikaa maqusa uqanna maridanoo qinee minni oonureeqa asumu marianaara.

<sup>21</sup> Miqi qimasoofanoo angiroo moo fannoo qimaminau. Doo amana qinee minara eedoo qidaqa. Sia qinee mi maqusana kuridianaura. <sup>22</sup> Doo kai kaqi sandaa. Anee oonu rainaqa miqoo qeeqa qunna ainaina auqaanaura. Rootafa mi maqusanara kaqikaa maqusee qunara misa mi maqusana auqu Sooara fee qidaqa.

*Karaambaiqa Soodoomma maqusa faqa Koomoora maqusa faqa kuridinau.*

<sup>23</sup> Mi kananaana suani afu magee uri marufanoo Rootafa Sooara maqusai oonu ranau. <sup>24</sup> Oonuroofanoo Karaambaiqa ida namu faqa koorootaqaasaqari qeemari idanara foora irana namufaqa quqasoofanoo aakuara foora Soodoomma maqusasaa faqa Koomoora maqusasaa faqa aqufinai. <sup>25</sup> Aqufinoo mi arumunaki maru maqusausa faqa aiqama faiqi anaasee faqa andanda faqa naru taikanau. <sup>26</sup> Rootana anaafa nari afaaqi faqa sandee fidanoo oonu quandafinoo afu maqeenoo doo miqoo ooruku kammafi kisaafa saqariara foora rakiqanoo marinai.

<sup>27</sup> Moo kananaana Abaraqaammafa findimeeqeenoo Karaambaiqa faqa ufa quqoo ooqu finau. <sup>28</sup> Miqooqari Abaraqaammafa mara muami qafoofoanoo Soodoomma faqa Koomoora faqa mi afaasanasaa maru maqusausaki ida muna fannoo firaafa uqanna ooru fufanoo qafanau.

<sup>29</sup> Anutufa mi afaasanasaa maru maqusausa faqa maqa maaqa faqa kurididanoo Abaraqaammanara iriseenoo Rootafa mariu maqusausa naridanoo Rootana kai mareeqe kaqinni quqanau.

*Mooabana faqa Amoona faqa niku nisauku kambiqoo ufafa.*

<sup>30</sup> Rootafa Sooara maqusara rufiaseenoo nari araamuna qara nifiqeenoo amuaqu namusaa ooni aamara marunaki ooru marinai. <sup>31</sup> Mariufanoo mina araamuna indaarugaafa inaaqianaana maaqi qimasee qimaminau. Doo maasa qikoofa asooqa maridanoo. Sia maa saqanna anindiri marasee faiqi mara qimifaqa maqara fasiqauqa maridaqa. Aiqaqa faiqi auqeeu oosanafa sia anindiriki maridanoo. <sup>32</sup> Doo aninaqa anindiri uainna nammari auquseeqa nari nikoona amiananoo moomoo namaseenoo furu farinaqa anindiri mina faqa sakasee faiqaa. Miqi masaifanoo anindiri nikoofa anindiri faiqi mara qiminaqa anindiri faiqi namu findifiqa mariaga.

<sup>33</sup> Miqi qimaseeqa mi eendanaki miqanda uainna nammari moomoo nari nikoona amisoofanoo neeneeseenoo furufara masoofanoo anasaafa naaree nari akoona faqa sakasee faiganau. Uainna nammari fannoo mina furu fara masoofanoo nari araamuna auqoo ainainara sia irinai.

<sup>34</sup> Kananaana anasaafa nari auna qimaminoo qinai. Faasai eendaki qinee qeeqa qikoona faqa sakasee faiqeeqa. Doo fafaa eendaki anindiri uainna moomoo kaifaa amiananoo namaseenoo furu farinana anee faqa mina sakasee faiqaa. Miqimasee anindiri qeeqa qikoona faiqi maqasaana faiqi asumu kaqi mariaga. <sup>35</sup> Miqi qimasee doo mi eendanaki miqanda uainna nammari moomoo nari nikoona amisoofanoo furu faramma soofanoo auna fannoo nari akoona faqa sakaseenoo faiganau. Rootafa uainna nammari namseenoo furu faridanoo nari araamuna auqoo ainainara sia irinai.

<sup>36</sup> Miqimasee Rootana araamuna qara nari nikoona faqa faiqoonannai nimuaqu qaikiqau. <sup>37</sup> Miqimasee marufanoo indaarugaa araamana fannoo faiqi akoonaiqi maqaseenoo mina auqu Mooaba nee qinai. Mariu fanoo Mooabafa findifinoo Mooaba maqannaasa nikoofaikamminoo marinai. <sup>38</sup> Auna fannoo mifa faqa faiqi akoonaiqi maqaseenoo mina auqu Beenaami fee qinai. Mariu fanoo Beenaamifa findifinoo Amoona maqannaasa nikoofaikamminoo marinai.

## 20

*Abaraqaammama faqa Abimeereekana faqa ufa.*

<sup>1</sup> Abaraqaammafa Mamareena maqusa minni seenoo Neekeefa maqa maaqakina ooqu finau. Mifa Kadeesa maqusa dinni Sura maqausa dinni qambaana ooqu marinai. Marikinoonoo kafa Keeraara maqusaki ooqu marinai. <sup>2</sup> Keeraara maqusaki kaqi maridanoo Abaraqaammafa nari aanaaqara Saraqa nammarinara qini dauna fee qinai. Keeraara maqannaasa karaambaiqa mina auqu Abimeereekafa marinai. Mifa Abaraqaammama ufa iriseenoo Saraqa nammarinara mina auna fee qimaseenoo nari ainainira faiqiuqa niqiqooafaqa Saraqa nammarina mareeqeeqa Abimeereekana amiqau.

<sup>3</sup> Miqoo marufanoo Anutufa Abimeereekana qaina saa kooroo qimasee qimaminau. Anee kuqinnaranoo maa anaaseena anee maraannana moo fasiqa anaafa maridanoo.



<sup>4</sup> Abimeereekafa Saraqa nammarina sia sakasee faiganau. Minara iriseenoo Anutuna qimaminoo qinau. Oo karaambaiqa qinee andeeqaraua maridaqa anee qini faqa qini faiqi anaasee faqee narinnaree. <sup>5</sup> Abaraqaammafa nari kai Saraqa nammarinara qini dauna fee qifaqa qinee iriqa. Kafaa maa anaaseefa faqa nari afaaqiara qinoo qini qifasaa fee qinoo. Miqi qifaqa qinee mina irunanoo qini daakirafa qimaqiminoo sia aaqarafa aniki mariannoo fee qifaqa maraunanoo sia aaqarafa qiniki maridanoo.

<sup>6</sup> Anutufa iriseenoo kafaa qainasaa qimaminoo qinau. Eeoo qinee iridaqa kuqaa ani aakirafa qimamifana andeeqaananoo. Qinee kai ani qumee rafaqaqafunana anee sia qini mandaikamma qimaqeenana mi anaaseena faqa sakasee faigaananoo. <sup>7</sup> Doo findi finana mi fasiqana anaqa kaifaa nari afaaqinnai aiqainanoo fuani. Abaraqaammafa qini tamummaqara fasiqa maridanoo. Mifa aniara innaaru qinaqa iriseeqa siamma ani aruanauranoo. Anee sia mi anaaseena aiqainaqa ani faqa ani maqannaasa faqa aiqama naruanauranoo.

<sup>8</sup> Abimeereekafa mina iriseenoo Kananaana eendai findifinoo nari maqanna uriqararaua naaramaseenoo Karaambaiqa qu ufana qimannimisoo faqa firaa qoo rufiaqau. <sup>9</sup> Abimeereekafa kafaa Abaraqaammama aaramaseenoo iramirinau. Anee nana oosanee maasa qiminanee. Nana manda ainanee maasa ani amunanee anee qini faqa qini qiku qisauku faqa firaa ummaara qiminanee. Sia auqaqaa ira oosana maasa qimiananoo. <sup>10</sup> Nana irirafee marifanee maq inanee.

<sup>11</sup> Abaraqaammafa mina iriseenoo maaqi qimasee Abimeereekana qimaminoo qinau. Qinee maaqi qimasee qimiriqaa maa maqannaasa sia Anutunara rufiqee mariafaqa qini daruseeqa qini qinaaqa maree maqi qimaseeqa miqi qiga. <sup>12</sup> Qini qinaaqa kuqaa qini dauna maridanoo qini qikoona araamuna maridanoo moo anaasee faiqi marifaqa maraqaunafa maridanoo. <sup>13</sup> Anutufa qiniara aneenna akoona maqusa minnisee anaamurinni nuannee qufaqa qinee Saraqa nammarina qimamiqa maaqi qiqiafana. Anee qiniara qini uriqarara fee qinana qiniara qini qifasaa fee qia.

<sup>14</sup> Miqi qufanoo iriseenoo Abimeereekafa Saraqa nammarina kafaa Abaraqaammama aminau. Mikari mifa sipsipauqa faqa burimakauqa faqa ainainira maanaaqa ku-maaraauqa faqa Abaraqaammama aminau. <sup>15</sup> Amiseenoo maaqi qimasee qimaminau. Qini maqa maaqa maridanoo. Aneenna kai aidinnaqoo maria.

<sup>16</sup> Miqi qimaseenoo quanda finoo Saraqa nammarina maaqi qimaseenoo qimaminau. Doo ani afasaana siruaa munnimma wan tauseenna (1,000) amiqa, maa ummaarafa taikainaqa ani faqa mariasa ani aaqarana sia mariifoo qiaqeera. Kafaa aiqamausa aniara sia mandoosana auqee maqi qiaqa.

<sup>17-18</sup> Yaaweefa Saraqa nammarinaki kambiqoonara iriseenoo Abimeereekana, na aiku asaukukinaa anaaseeuqa faiqi maqara aana ititasoo faqa faiqi maqarara sia amanaikigau. Miqiqa marufanoo Abaraqaammafa Abimeereekanara Anutufinnai innaaru qufanoo Anutufa Abimeereekana faqa nari anaqa faqa nari ainainira maanaaqauqa faqa misa aurirana taikannisoofaqa kafaa faiqi maqarana amanaikigau.

## 21

### *Isakeena maqoo ufafa.*

<sup>1</sup> Karaambaiqa nari qimaqoondoo inoo Saraqa nammarina amiqi amiqimma amaganau. <sup>2</sup> Miqimmasoofanoo Abaraqaammafa nauraiqi marufanoo Saraqa nammarifa amuaqu qaikinoo Abaraqaammama faiqi Anutufa qimaqooqoo maqanau. <sup>3</sup> Maqasoofanoo Abaraqaammafa mina auqu Isakeenee qinau. <sup>4</sup> Auqu ramaseenoo qisauku dinni taikasee dinni ani qaaramoo maraseenoo 8 faasaana aiqarama fufanoo Abaraqaammafa Anutufa qimamundee inoo Isakeena afaqa ati ateeqa aqinuu. <sup>5</sup> Abaraqaammafa uan handeereeta 100 aukuaana faqaafa marufanoo Isakeena maqanau.

<sup>6</sup> Saraqa nammarifa Isakeena maqaseenoo maaqi qinuu. Anutufa asisirana faqa naanaidara qirana faqa qiminoo. Aiqamausa minara irinausa qini faqa naanaidara qifaranoo. <sup>7</sup> Miqi qimaseenoo Saraqa nammarifa maaqi qinuu. Yafee moo fannoo Abaraqaammama qimaminoo Saraqa nammarifa nari faiqi maqasee amana naamma amiannoo fee qiannoo fee, sia amana moo fannoo miqi qiannoo. Miqi qimariafaqa qinee asooqa namuki Abaraqaammama faiqi akoonaiqi maqeeqa. <sup>8</sup> Isakeefa aqoo irinoo naamma minnisoo faasaana Abaraqaammafa qoomaqa firaaqoo suqananau.

### *Abaraqaammafa Qakaarana faqa Isamaerana faqa niqiqoo ufafa.*

<sup>9</sup> Miqimmasee mariufanoo moo kari Isipa maqanna anaasee Akaara nammarina amaaku fannoo Saraqa nammarina amaaku Isakeena faqa sarari marinau.

<sup>10</sup> Sararimarufanoo Saraqa nammarifa mina qafamaseenoo Abaraqaammama qimaminoo qinau. Maa ainainira manaqana faqa nari faiqi faqa niqainaqa fuqa. Maa anaaseena faiqi fannoo sia ani qumiasana qini faiqi mararee qinnana maraannoo.

<sup>11</sup> Isamaerafa faqa Abaraqaammama faiqi marunara Abaraqaammama mi ufana irufanoo aundura ummaara ranau. <sup>12</sup> Miqufanoo Anutufa Abaraqaammama qimaminoo qinau. Sia faiqi aanaqi qisanosara amuqusi. Anee Saraqa nammarifa qimaminde ia. Isakeena saaqari kai qinee qima afeekaikiafannandee inoo moomoo asumu kambiqeefaranoo. <sup>13</sup> Ani ainainira anaasee faiqi faqa qinee dadaqiananoo moomoo faiqi maqasainaqa moo maqannaasara fooru marifaranoo. Mifa faqa ani faiqi kai maridanoo.

<sup>14</sup> Abaraqaammama mi ufana iriseenoo moo kananaana findifinoo feemu aafaqa faqa aandau apata taquki nammari sakaseenoo Akaara nammarina uqaruma amiseenoo faiqi aakuamaqaseenoo aiqanau. Akaara nammarifa nari amaaku afiqeenoo Beeraseeba maqa maaqaki aadana maqa maaqaki ooqu maridanoo oonuree aniree ida marinau.

<sup>15</sup> Aandau apata taqukinaa nammari aiqama taikafufanoo Akaara nammarifa nari faiqi kaqikaa saqari atukaki aisanau. <sup>16</sup> Aisaseenoo kaqikaqoo kisaqasaa oonu ooqufaqqee idanoo nari kai qimirinuu. Qinee sia amana qeeqa faiqi kuqirana qafaanuranoo. Miqi qimaseenoo miqoo ooqufaqqee maridanoo iki raqee marinuu.

<sup>17</sup> Miqi marufanoo Anutufa mi faiqina iki raqarana irufanoo innaarunaindari Anutuna angiroo moo fannoo Akaara nammarina qimaminoo qinau. Akaara nammari anee nanaree ummaara maraidanee. Sia rufiaa. Ani amaaku iki raqarana Anutufa doo irinoo. <sup>18</sup> Doo findi finana oonu faiqi rafususee amiqia. Qinee mina saaqari kambiqainausa fira maqannaasaka mannisaaanau.

<sup>19</sup> Miqi qimaseenoo Anutufa Akaara nammarina afu maqa amufanoo nammari madika qafanau. Qafamaseenoo aandau apata taqu mara mareenoo ooqu saka nari faiqi amufanoo nanau.

<sup>20</sup> Anutufa Isamaerana rakisi amaqqee marufanoo innooqanau. Innooqafufanoo mifa Paraana aadana maqa maaqaki maridanoo uqarana akoofasa marinuu. <sup>21</sup> Paraana aadana maqa maaqaki marufanoo mina anoofa Isipa maqusaindaraa maanaqa mara aminuu.

*Abaraqaammama Abimeereekana faqa moodaanaki kira ufa qinau.*

<sup>22</sup> Mikari Abimeereekafa Pikoora nari rakira fasiqauqa uriqararana afiqeenoo Abaraqaammama maruqoo oonu reeqa maaqi qimasee qimamiqa qiqau. Anee aiqama ainaina auqaannanaki Anutufa dadaqidanoo. <sup>23</sup> Doo maqqee Anutuna afusaa qima afeekaikammasee qini faqa qini faiqi namu faqa qini saaqari naaru kambiqainausa faqa sia mandaikamma nimaqaa. Qinee ani amiqimma amaqaqiafana anee faqa miqi kai inana qima afeekaikammasee qini faqa maa maqa maaqana anee marianna maqa maaqana faqa amiqimma qimaqaa.

<sup>24</sup> Abaraqaammama minara iriseenoo qimaminuu. Qinee miqimmianauree qimasee qima afeekaikainuu.

<sup>25</sup> Miqi qimaseenoo Abaraqaammama Abimeereekana oori kandara ufakiqari qimaminuu. Ani ainainira faiqiuqa qini nammari madika rakirara maseeqa mareea.

<sup>26</sup> Abimeereekafa iriseenoo qimaminuu, Qoo qinee sia mina iridaqa, yafee miqinoo fee. Anee minara sia qima qimunaqa sia iriqiafana. Maqqee kai iridaqa.

<sup>27</sup> Abaraqaammama minara iriseenoo burimakauqa faqa sipsipauqa faqa mareeqee Abimeereekana aminuu. Amisee miqanda moodaanaki kiquu. <sup>28</sup> Abaraqaammama sipsipa aanaaqiuqa dinni taikasee dinni ani qaara marasee 7 naadumasaa raina quqanuu. <sup>29</sup> Abimeereekafa mina qafamaseenoo Abaraqaammama iramirinuu. Anee nanaree miqidanee.

<sup>30</sup> Miqi qimasee iroofanoo Abaraqaammama qinau. Anee maanaqa maraa. Anee marainnanannoo qiniara maa nammari dikaandana indu finafooo qinnaranoo.

<sup>31</sup> Misa miqoo qima afeekaika maseeqa mi maqusana auqureeqa Beeraseeba fee qiqau.

<sup>32</sup> Miqanda Beeraseeba maqa maaqaki moodaanaki kira ufa qimasoofoanoo Abimeereekafa nari rakira fasiqauqa uriqararana Pikoorasandiri nari maqusai Firistia maqa maaqai fiqau. <sup>33</sup> Miqanda fufanoo Abaraqaammama tamarisika saqari Beeraseeba maqusai ummaquseenoo naaru naaru marira Karaambaiqa Anutunara innaaru qimarinau. <sup>34</sup> Mi kamuqoo Abaraqaammama kisaqasaa Firistia maqa maaqakina marinuu.

## 22

*Anutufa Abaraqaammanara aneenna amaaku Isakeena tatufirana suqa qimianne qu ufafa.*

<sup>1</sup> Mariiufanoo Anutufa Abaraqaammama amanammasee qafaanee qimasee innaarunaindari aaramasee qinuu. Oo Abaraqaama qufanoo Abaraqaammama qinuu qinee maaqoo maridaqa. Miqi qufanoo Anutufa qimaminuu.

<sup>2</sup> Aneenna amaaku Isakeena ani amaaku moodaa, kaaqa amuqusa imariannana afiqeenana Moorla maqa maaqai ooru rainaqa qinee aaqana moo uqafiqaanaura. Anee mi aqaannasaa aneenna amaaku arusee qini tatufirana suqa qimia.

<sup>3</sup> Miqi qimasoofoanoo kananaana findifinoo nari dookisaa ida rufariseenoo minasaa quqaseenoo nari ainaini maru faiqi qanda faqa nari amaaku Isakeena faqa nifiqeenoo findimeeqee Anutufa qimamunnai finuu. <sup>4</sup> Qaara afuru aanai fi faiqaqau. Qaaramoo kufanoo Anutufa qimaqoo aqaannafa nianasaa marufanoo qafanuu. <sup>5</sup> Qafamaseenoo Abaraqaammama nari ainaini maru faiqi qanda qimanniminoo qinuu. Inneeqara maaqoo marida doonkisaa rakisiyaqa. Qeeqa qimaakundiri miqoo ooru Anutunara innaaru qimasee inneeqara iannai qumuanaura.

<sup>6</sup> Miqi qimaseenoo Abaraqaammama tatufirana suqaaninna idana mareeqeenoo Isakeenasaa soofanoo marofoanoo nari ida qeemaruna akuru mandeenoo mina qumareenoo musuka faqa qumareenoo doo nari faiqi afiqeenoo Anutufa qimaqoo aqaanna kaaqa ooru finuu. <sup>7</sup> Aanai ooru fimarufanoo Isakeefa nari akoona aaramaseenoo qinuu, Qipoo qufanoo Abaraqaammama maqi qimasee qinuu. Nanaree qidanee qufanoo Isakeefa qinuu. Qinee qafaunana anee idati faqa ida rumarana faqa maree fimarinanoo, yaafee tatufirana suqee fandinna sipsipafa maridanoo fee.

<sup>8</sup> Abaraqaammama maaqi qimasee nari amaaku qimaminuu. Anutufa nari kai sipsipa aanaaqi moodaa qiminaqa tatufirana suqamianaura. Miqi qimaseeqa miqanda moodaanaki ooru fiqau.

<sup>9</sup> Miqanda Anutufa qimaqoo aqaannasaa ooru reeqa Abaraqaammama ooniyaq mareeqee aaku aakummaseenoo ida mina amuaaqa quqaseenoo nari faiqi Isakeena rumbeeqeenoo rafusu idasaa rusinuu. <sup>10</sup> Rusiseenoo musuka qumareenoo nari faiqi kuqa arusaaneera inuu. <sup>11</sup> Karaambaqaa angiroo innaarunaindari aaramaseenoo qinuu, Abaraqaamma, Abaraqaamma, miqi qufanoo Abaraqaammama qinuu. Qinee maa maridaqee qufanoo Karaambaqaa qinuu. <sup>12</sup> Sia faiqi arua, sia mandaikamma amaqa. Sia aneenna asaukukoo aneenna faiqi arua. Doo maqee qinee iridaqa anee Anutuna ufa qaindisidana mina ufa afaqee mariananoo. Anee aneenna amaakuara aneenna amuqusa uqannara sia qaoo qiananoo eedoo kai qiananoo.

<sup>13</sup> Miqi qufanoo Abaraqaammama uqeerafinoo qafoofanoo andandaki sipsipa akoona saqari aanaaqiki aanai rutaqusee marufanoo qafanuu. Qafamaseenoo Abaraqaammama nari amaaku amaqaqaa maqeenoo sipsipa akoona aruseenoo Anutuna tatufirana suqa aminuu. <sup>14</sup> Miqooqari Abaraqaammama mi aqaanna auqu reenoo, Karaambaqaa nimira aqaanee qinuu. Minara maqee mindaraasa maaqi qidaqa, Yaaweeffa nari aqaannasaa nimidanoo fee qidaqa.

<sup>15</sup> Karaambaqaa angiroo innaarunaindari kaifaa Abaraqaammama aaramaseenoo qinuu. <sup>16</sup> Karaambaqaa aniara maqi qidanoo. Qinee qeeqa duqusaa qima afeekaikammasee qidaqa. Qinee firaqoo ani amiqimma amaqaanaura. Anee aneenna amaaku moodaa sia qaoo qiannanara qinee miqianaura. <sup>17</sup> Qinee kuqaa qima afeekaikammasee anisaa ani aruakinausa ani aiku asauku innaarunai fasaura foora moomoo marifaranoo nukudara foora ani amianauranoo. Ani aiku asauku namuqaa rafaqaa fusee misa ainaina maree marifaranoo. <sup>18</sup> Aiqama maqannaasa qiniara ani aiku asauku amiqi amiqimma nimaqaafanandee masee maasa faqa amiqi amiqimma qimaqaannee qifaranoo. Anee qini aakapara ufa qaindusuannanara miqiqaa.

<sup>19</sup> Abaraqaammama miqooqari nari faiqi Isakeesandiri nari ainainira faiqi qara qumi nifiqee nari maru maqusanai Beeraseeba maqusai oogu marinuu.

#### *Naqoorana aiku asauku nuqu.*

<sup>20</sup> Mariiufanoo Abaraqaammama irufanoo Mirikaa nammarifa Naqoorana Abaraqaammama akaqa faiqi qisauku dinni taikasee dinni oonu qaarammoo marasee 8 maqee foo qiqau. <sup>21</sup> Usafa indaaruuqaafa Busafa mina aanaaqiannaafa marinuu, mina aanaaqiannaafa Keemueerafa mifa Arammama akoofa marinuu. <sup>22-23</sup> Mina aanaaqiannaafa Keeseedafa marinuu, mina aanaaqiannaafa Qasoorafa marinuu, mina aanaaqiannaafa Piradasafa marinuu, mina aanaaqiannaafa Didarafa marinuu, misa ninaaqiannaafa Beetueerafa marinuu. Mifa Reebeeka nammarina akoofa marinuu. Mirikaa nammarifa mi faiqi namusa Naqoorana Abaraqaammama akaqasaa maqanuu. <sup>24</sup> Reumma nammarifa Naqoorana inaaqiannaanaasee fannoo Teebana faqa Kaqammama faqa Taqasana faqa Maakaana faqa maqanuu.

## 23

*Saraqa nammariḥa kuḡufanoo Abaraḡaammafa akundara maḡa feefauru uḡafa.*

<sup>1</sup> Saraḡa nammariḥa 127 aukuaḡa marasee kuḡinau. <sup>2</sup> Kannaana maḡa maaḡaki Qeebooroonaa maḡusaki kuḡufufanoo Abaraḡaammafa miḡa kuḡiranara soofaari marinau.

<sup>3</sup> Abaraḡaammafa naḡi anaḡa kuḡirana maḡi kuḡasee Qeetana aiku asauku maruḡoo oonureenoo maaḡi ḡimasee iramirinoo ḡinau. <sup>4</sup> ḡinee moo maḡannaasa inni ḡambaana ani maridaḡa. Amanee ḡini maḡa moo ḡimifaḡa feefauru niḡiseeḡa qeeḡa ḡinaaḡa minaki akundaanauree.

<sup>5</sup> Qeetana aiku asuku irisee Abaraḡaammana ḡimamiḡa ḡiḡau. <sup>6</sup> Anee maasa uḡa iria, maasa ani ḡafaunana anee afeeka rakisirafa marianaḡa mariananoo. Aneenna anaḡa maasa amiḡira madikaki akundaa. Maasa aiḡamausa mi madikanaki akundaranara asasidaḡa.

<sup>7</sup> Miḡi ḡufanoo Abaraḡaammafa miḡa noorinni kumma ramafinoo ḡimanniminoo ḡinau. <sup>8-9</sup> Innee eedoo ḡiafaḡa amanee innee Eefaroonaa, Sooḡarana amaaku iramirifanoo inni niḡusaa Makapeera maḡa maaḡaki naḡi anaadoo atinni ooni aamara marina ḡiminaga feefauru amana kai amiseeḡee mi maḡa maaḡana qeeḡaindi kammasee qeeḡa ḡiku ḡisauku nikundee marianauree.

<sup>10</sup> Eefaroonaa naḡi Qeetana aiku asauku faḡa faandaamura kooḡiki uḡa suḡiranaki maridanoo iriseenoo aiḡamausa iramirufanoo Abaraḡaammana ḡimaminoo ḡinau. <sup>11</sup> Oo uriḡararafa iria, ḡinee aiḡama mi maḡana faḡa ooni aamara minaki marina faḡa ani amianauna. Maaḡoo qeeḡa faḡiḡi anaasee niḡusaa ani amianana aneenna anaḡa minaki akundaa.

<sup>12</sup> Miḡi ḡufanoo Abaraḡaammafa Qeetana aiku asauku noorinni kumma ramafinoo Eefaroonaa aiḡamausa iriaḡeera firaḡoo ḡimaminoo ḡinau. <sup>13</sup> Amanee ḡinee iramiriananee irinnaree. ḡinee mi maḡana atisaa aiḡama feefaurianauna. ḡinee feefauru amianana anee eedoo ḡimasee marinaḡa ḡinee qeeḡa ḡinaaḡa miḡoo akundaanauna.

<sup>14</sup> Eefaroonaa minara iriseenoo maaḡi ḡimasee Abaraḡaammana ḡimaminau. <sup>15</sup> Oo uriḡararafa, maḡa feefauru 400 siruaa maridanoo, mi feefauruna maasa qeeḡa ḡambaana naḡa fee masee rainaanauree. Anee aneenna anaḡa kaḡi minaki akundaa. <sup>16</sup> Abaraḡaammafa iriseenoo eedoo ḡimaseenoo sikeera maraseenoo 400 qummaara ainaina dinni ḡuḡaseenoo siruaa dinni ḡuḡasoofanoo amana kai ufanoo aminau. Eefaroonaa aiḡamausa naḡi maḡannaasa Qeetana aiku asauku niḡusaa ḡufanoo iriseenoo miḡi kai minau. Naḡi sikeera qummaara amana kai Eefaroonaa aminau.

<sup>17</sup> Miḡimasee Abaraḡaammafa Eefaroonaa aiḡama ainaina Makapeera maḡa maaḡaki suani oosana ḡaanna Mammareena maḡusa adeedi maruna feefaurummasoofanoo Abaraḡaammanaindi kinau. Mi feefaurirafa maḡa faḡa ooni aamara minaki maruna faḡa aiḡama saḡariuḡa mi maḡana atisaa maru saḡarisa faḡa aiḡama moodaanaki rafaḡaḡinau. <sup>18</sup> Aiḡama Qeetana aiku asauku miḡoo suḡiranaki mariusa mi maḡa maaḡanara Abaraḡaammanaindi fee ḡiḡau. <sup>19</sup> Miḡimmaseenoo Abaraḡaammafa naḡi anaḡa Saraḡa nammariḥa mi ooni aamaranaki Kannaana maḡa maaḡaki akundanau. <sup>20</sup> Miḡimmasoofanoo mi maḡafa faḡa ooni aamara minaki maruḡa Qeetana aiku asaukundi mariuḡa Abaraḡaammanaindi kufanoo mi maḡana nikundara maḡaikinau.

## 24

*Isakeena anaḡa mara amu uḡafa.*

<sup>1</sup> Doo Abaraḡaammafa kaaḡa nauraiḡi marinau. Karaambaḡa Abaraḡaammafa aiḡama auḡoo ainaina amiḡi amiḡimma amaḡee marinau. <sup>2</sup> Abaraḡaammafa naḡi oosana maraseenoo naḡi ainainiranasaa kisaḡaḡasaa rakisi maruna aaramaseenoo ḡimaminoo ḡinau. Anee aneenna asauku ḡifundana ameemaanaḡi aususee afeekaika masee ḡima afeekaika. <sup>3</sup> ḡinee aniara Karaambaḡa innaaruna faḡa maḡa faḡa auḡu Anutuna auḡusaa ḡima afeekaikamasee sia ḡini ḡimaaku Kannaana maḡannaana anaasee mara amiannee ḡidaḡa. <sup>4</sup> Anee ḡinee kambiaḡafanna maḡusanai oonuree ḡini atikinaa maanaaḡa mara maree Isakeena muḡu amia.

<sup>5</sup> Miḡi ḡimasoofanoo mi rakisirafa maaḡi ḡinau. Doo amana, ooru raanaḡa mindaraa maanaaḡa iraiḡanoo naḡi maḡa maaḡa minnisee mai qumirara ititinaḡa amanee ḡinee ani amaaku aiḡaananoo anee qumunna maḡa maaḡanaḡi ooru fuanno fee.

<sup>6</sup> Miḡi ḡufanoo Abaraḡaammafa ḡinau. Oo sia uḡanna anee ḡini ḡimaaku aiḡainanoo minni oorufuani. <sup>7</sup> Yaaweefa innaarunaindaraa Anutufa qeeḡa ḡikoona maḡusa indaraana faḡa qeeḡa ainaina maḡasaḡaraana faḡa mara mareenoo maa maḡa maaḡanasaa ḡuḡaḡoosa maridaḡa. Miḡa ḡima afeekaikammasee ḡini faḡa ḡini ḡiku ḡisauku faḡa maa maḡa maaḡana niḡianauree ḡinau. Miḡa naḡi angiroo aiḡainanoo ani

afunni finana ooru qini qimaaku anaaga afigee qumi naranoo. <sup>8</sup> Mindaraa maanaaga fannoo sia mai qumiraree qinana miqoo kai qima afeekaika maqaana ufanakiqari idukuananoo. Qini qimaaku sia minni afigee ooru fua. <sup>9</sup> Miqi qimasooфанoo mi ainainira fasiqafa nari asauku Abaraqaammanna nari uriqararana afundana ameemaanai quqaseenoo qinau, doo qinee anee qianandee ianaura.

<sup>10</sup> Miqi qimaseenoo raudama qinoo Abaraqaammanna kammeera, qoosa fooqaana, mina qisauku qara maraseenoo nari uriqararana ainaina amiqirana kai maraseenoo kammeerasaa quqaseenoo mareenoo finau. Abaraqaammanna akaqa Naqoorafa Mesopotamia maqusai suani dinni ataageenni marunnaai ooru finau. <sup>11</sup> Aana faiqanoo fiffiu fanoo eenee marufanoo aanaaseeuqa nammari sakee maruqoo oonu ranau. Oonuree qafoofanoo maqusa adeedi nammari sakee maruqoo oonu reenoo miqoo nari kammeerauqa quqasoofaqa mariqau.

<sup>12</sup> Nari kammeerauqa quqaseenoo mi fasiqafa Yaaweenara innaaru qinoo qinau. Oo Anutu qini uriqararana Abaraqaammanna Anutufa anee qini faqa maridana maqee qini dadaaqa. Anee qini uriqararana Abaraqaammanna faqa qima afeekaika maqoon-afa maqee anoonaikiani. <sup>13</sup> Qinee nammari sakee mariana aqa adeedi marunaqa, aanaaseeuqa nammari ani sakee mariafaqa maridaqa. <sup>14</sup> Moo maanaaga anirainaga qinee maaqi qimasee qimamiana. Amanee aneenna taquki nammari saka qiminaqa naanauree. Mifa qiniara namasainaga ani kammeerauqa faqa nimianauree qinnanara minara aneenna ainainira faiqi Isakeena utaaqama amaqaqaanafee qiana. Mi ainainafa kambiqaanaqa anee qini uriqararanasaa qima afeekaikunna ufanara iri-anaura.

<sup>15</sup> Mifa miqi qimasee innaaru qimarufanoo moo maanaaga Reebeeka nammarifa nammari taqu akumaaga aku maree aniranau. Mifa Abaraqaammanna akaqa Naqoorana faqa mina anaaga Mirikaa nammarina faqa faiqi Betueerana araamuna marinau. <sup>16</sup> Mina oori afiri amiqi irafa sia auqu marufa aniroofanoo qafoofanoo ooqu nammari saka maree urinau.

<sup>17</sup> Ururoofanoo Abaraqaammanna ainainasaa rakisira fasiqa fannoo mi funnai sandee oonureenoo maaqi qimasee qimaminau. Amanee aneenna taqukinaa nammari kaqikaana qini qiminaqee naanauree.

<sup>18</sup> Miqi qufanoo mi manaqafa qinau, eeo faiqi firaafa, doo naa qimaseenoo nammari taqu afiqu quqasoofanoo doo nanau.

<sup>19</sup> Namasoofanoo mi manaqafa nari kai qinau. Qinee nammari moo faqa sakasee ani kammeerauqa nimii saanaqa nama saifanoo nimuaqu iannoo. <sup>20</sup> Miqi qimaseenoo nari nammari taqu kai kaqi difaaniki adiasenoo sandeenoo ooqu moo faqa saka mareenoo muru adia soofaqa kammeerauqa naqau. <sup>21</sup> Kammeerauqa nammari nimi marufanoo Abaraqaammanna ainainira fasiqa fannoo ireeda kai kasooinoo maridanoo qafaidanoo maaqi qimirinuu. Doo fee Yaaweeafa qinee kisaagasaa anunnanara anoonai kidanoo fee.

<sup>22</sup> Kammeerauqa nammari neeneesee nimuaqummasee marufanoo Abaraqaammanna ainainira fasiqa fannoo koorannai auqira qimmusa mi manaqana aikiki qusamaqaseenoo kafa koorannai auqira isaaqama qaaraganda asaukuki usamaqaseenoo iramirinoo qinau. <sup>23</sup> Anee yona araamunee maridane ane anee qini qimaqimia. Amanee maasa namu aneenna akoona maaqa kina nifiqee finaqee faiqanauree.

<sup>24</sup> Reebeeka nammarifa mina iriseenoo nari qimaminoo qinau. Qini qikoofa Beetueer-afa Naqoorana faqa Mirikaa nammarina faqa faiqi maridanoo. <sup>25</sup> Maasa maaqa narana amana maridanoo ani faqa aniasa faqa ani kammeerauqa faqa narana maaqa faqa nimifaranoo.

<sup>26</sup> Miqi qimasoofanoo Abaraqaammanna ainainira fasiqa iriseenoo maqasaa oorindari mapamu finoo Karaambaifa nari uriqararana Abaraqaammanna Anutuna amooqidanoo maaqi qinau. <sup>27</sup> Oo Anutu Abaraqaammanna Anutufa, anee amiqi amiqi uqanna mi-ananoo. Anee Abaraqaammanna amiqi amiqi imariannanara sia taikeenoo kaqi fidanoo. Karaambaifa fannoo qini uriqararana atuuqa iannai andeeqasee qifiqee aninoo.

<sup>28</sup> Miqi qimasee innaaru qimasoofanoo Reebeeka nammarifa sandeenoo nari anoonaa maaqi oonureenoo aiqama mi ufausa qimaminau. <sup>29-30</sup> Reebeeka nammarina afasaafa Rabanafa Reebeeka nammarina ufa iriseenoo koorannai auqira qimmusa qusamaqoona faqa koorannai auqira isaaqama qusamaqoona faqa qafamaseenoo raudamaku fanoo ooqureenoo nammari sakee maru madikana afainni qafoofanoo Abaraqaammanna ainainira fasiqa miqoo nammari afainni nari kammeerauqa naaqa kikiqinoo marinuu. <sup>31</sup> Marufanoo qafamaseenoo qimaminoo qinau. Qini faqa aninaqa maaqai fua. Karaambaifa fannoo ani amiqi amiqimma amaqee marifa mariananoo. Nanaree anee maaqoo maridane. Qinee ani faiqara maaqa doo deedaqummasee ani kammeerauqa marirana faqa deedaqia.

<sup>32</sup> Abaraqaammama ainainira fasiqa fannoo mina iriseenoo nari faqa marusa faqa nari kammeerauqa faqa nifqeenoo doo maaqai finau. Maaqai oonu roofanoo Rabanafa kammeera saaqaraa qumaara mara maqasaa quqaseenoo narana nammari nimiseenoo Abaraqaammama faiqi namu nammari nimufaqa niku nammari uqiqa. <sup>33</sup> Niku nammari uqu soofanoo Rabanafa narana nimirau. Nimufanoo Abaraqaammama ainainira fasiqa fannoo qaoo qimasee qinuu. Sia qinee kaqi naanaura. Qinee qiraree qunna ufana qima nimiseeqa miqoo naanaura. Rabanafa minara iriseenoo qinuu. Doo qinaqa maasa iria.

<sup>34</sup> Miqi qimasoofofannoo Abaraqaammama ainainira fasiqa qima niminoo qinuu. Qinee Abaraqaammama ainainira fasiqa maridaqa. <sup>35</sup> Karaambaiqa firaqoo qini uriqararana amiqi amiqimma amaqaaseenoo ainaina faqaafaikamma amaqaenoo. Karaambaiqa sipsipauqa faqa burimakauqa faqa siruaa faqa kooru faqa ainainira fasiqauqa faqa maanaaqauqa faqa kammeerauqa faqa doonkiuqa faqa moomoo aminoo. <sup>36</sup> Qini uriqararana anaqa Saraqa nammari faqa asooqasaa faiqi akoonaiqi maqasoofannoo qini uriqararafa nari aiqama ainaina mina kai aminoo. <sup>37</sup> Qini uriqararafa qifaqa qinee afeeka ufannai qima afeekaikammaseeqa mina aamuaqira ufa qaindusuaanuree qifafannoo qinuu. Anee maqoo qaraasa Kannaana maqanna kinaa anaasee sia uqanna mareeqe qini qimaaku amia. <sup>38</sup> Anee ooru qini qikoona maqannaasaki qini atikinaa maanaaqaa mara maree muqusee qini faiqi amia.

<sup>39</sup> Qinee mi ufana iriseeqa nari maaqi qimaseeqa qimamiqa. Mi manaqafa sia qini faqa quminaqa naqaa fee ianauree.

<sup>40</sup> Qunanoo mifa qinoo, qinee Karaambaiqa ufa aiqama kari afaqee marunaua maridaqa, mifa nari angiroo aiqainanoo ani faqa fidanoo dadaaqainanoo anoona kambiqaanoo. Anee qini faiqi anaqa qini maqannaasakinaana qini qikoona atikinaana mareennaranoo. <sup>41</sup> Moodaa aana kai anee idukinna aanafa maridanoo. Ooru rainaqa misa maanaaqaa moo sia qimifannoo ani qima afeekaikirafa taikainana idukira fasiqaiqin-naranoo.

<sup>42</sup> Qinee Abaraqaammama mi ufana iriseeqa nammari dikaanda mariqoo ururee maaqi qimasee innaaru qifa. Oo Karaambaiqa qini uriqararana Abaraqaammama Anutufa mariananoo, qinee auqaunna ainaina anoona kambiqaaani. <sup>43</sup> Qinee nammari dikaanda mariqoo marianaura. Mariananoo maanaaqaa moo fannoo nammari sakarara anirainaa qinee nammari innaaru qianaara. <sup>44</sup> Mifa eedoo qimaseenoo qini faqa qini kammeerauqa faqa nammari niminanoo mifa anee qini uriqararana amaaku utaaqama amaqaanana mariananoo. <sup>45</sup> Qinee qireeda kai innaaru qimarunoo Reebeeka nammari maqusaindari nammari taqu akumaqa akumareenoo aiqareenoo nammari sakararee qimasee fifaqa qinee maaqi qimasee qimamiqa. Amanee anee nammari qimina naanauree. <sup>46</sup> Miqi qunanoo mifa kai kaqi nari nammari taqu akumaqa qaraana afaimma quqaseenoo qinoo. Namasainaa ani kammeerauqa faqa nimianaura. Miqi qifaqa qinee namasaunoo mifa kammeerauqa faqa nimifaqa neea. <sup>47</sup> Namaseeqa qinee maaqi qimasee iramiriqa ani akoofa yafee, qunanoo mifa qimaqiminoo qinoo. Qini qikoofa Beetueerafa Naqoorasa Mirikaa nammari faiqi maridanoo. Qinee mi ufana iriseeqa koorannai auqira qimmusa usuamaqaseeqa kafa kooru isaaqama asaukuki usuamaqeeqa. <sup>48</sup> Usuamaqaseeqa doorindari maqasaa kummarama fifaqa qeeqa uriqarana Abaraqaammama karaambaiqa Anutuna amooqiqa. Mifa qini qifiqamareenoo andeeqasee qini uriqararana atiuqa iannai murusaifaqa qinee misa niraamuna qeeqa uriqararana amaaku anaqa mariananna paquriqa. <sup>49</sup> Doo maqee uqanna Rabanna anee qima qiminaqa iria. Anee qini uriqararana andeeqa amaqaaree qinana qima qimia. Anee sia andeeqa amaqaaree qinana minara faqa qima qiminaqa qinee qeeqa ianna ainainara oonu mafi irianaura. <sup>50</sup> Rabanafa faqa mina akoofa Beetueerafa faqa nari qimamiqa qiqau. Maa ufafa Karaambaiqaindani ani marifaqa maasa naqifee masee minara ufa qinauree. <sup>51</sup> Maa Reebeeka nammari marinoo. Afiqamaree fua. Munusainanoo mifa ani uriqararana amaaku aanaaqaikinoo, Karaambaiqa nari qindee iani.

<sup>52</sup> Abaraqaammama ainainira fasiqa mi ufana iriseenoo oorindari maqasaa aqufinoo Karaambaiqa amooqimamaqanau. <sup>53</sup> Amooqimaseenoo findifinoo qamunna faqa siruaa faqa kooru faqa fira feffauru aqimaru oonisa Reebeeka nammari aminau. Mifa fira munnimma aqimaru ainainaua mina afasaana faqa mina anoona faqa nimirau. <sup>54</sup> Nimi seenoo nari faqa anusa saimbaqa narana faqa nammari faqa neenee seeqa faiqaqau. Faiqee iaqoofannoo kananaana Abaraqaammama ainainira fasiqa Reebeeka nammari afasaana faqa anoona faqa qima nimirau. Amanee qinee maqee qeeqa fira finnai fuanauree. <sup>55</sup> Miqi qufafa miqanda qiqau, saina Reebeeka nammari maasa faqa moodaa koraanaki fee, qisauku qara taikaseenoo afuru fee faiqeenoo fuani.

<sup>56</sup> Miqi qufanoo Abaraqaammama ainainira fasiqa fannoo qinau. Doo sia maasa rafaqa fua. Doo qinee maqee fidaqa. Karaambaiqa fannoo qinee kisaqasaa anunna saikana anoona doo kambiqaifaqa qafamaseeqa sainaqa qeeqa uriqarara finnai fua. <sup>57</sup> Miqanda minara iriseeqa qimamiqa qiqau. Saina Reebeeka nammarina aaramasee qifanoo naqaa fee qiannoofee. <sup>58</sup> Miqi qimaseeqa Reebeeka nammarina aaramaseeqa iramiriqa qiqau. Anee maa fasiqana faqa maqee fee finnafee. Miqi qufanoo doo maqee fuanaaree qinau.

<sup>59</sup> Misa mi ufana iriseeqa Reebeeka nammarifa faqa minasaa rakisi maru anaaseefa faqa Abaraqaammama ainainira fasiqa faqa mina faqa anusa faqa doo niqiqoofaqa fiqau. <sup>60</sup> Reebeeka nammarifa firarufaqa maa ufanannoo mina afaaqooqa qiqau. Oo maasa qisooki anikiqari aruakinausa moomoo uqanna firaqoo uqanna kambiqaefara ani aiku asauku marinausa namuqaa nári nifaqaqa mandaida misa maqa maaqa namu faqa misa ainaina faqa maree marifaranoo.

<sup>61</sup> Miqi qimasee afaaqooqa qimasoofoanoo Reebeeka nammarifa faqa ainainira maanaaqauqa faqa kammeerasaa akaree fufaqa Abaraqaammama ainainira fasiqa namu faqa fiqau.

<sup>62</sup> Isakeefa Neekeefa maqa maaqikiqari aadana maqa maaqai nammari dikaanda maruqoo oogu marinau. Mi nammari dikaandana auqu kaqi marirafa qini qiqafaidanoo fee qimariqau. Mifa Kannaana maqa maaqa qaannai suani afu dinni itaaqeeni marinau. <sup>63</sup> Miqoo maridanoo Isakeefa moo eenoonnai aatata nidanoo uqeera fufanoo mirinni qafoofoanoo kammeerauqa qumiqau. <sup>64</sup> Reebeeka nammarifa kammeera saaqari uqeera fino Isakeena qafanau. Reebeeka nammarifa qafamaseenoo nári kammeera saaqari maqasaa aqufinai. <sup>65</sup> Aqufufanoo Abaraqaammama ainainira faiqi iramirinai. Ya fasiqa fee maasa unannai anidanoo fee. Miqi qufanoo Abaraqaammama ainainira fasiqa qinai. Qini uriqararafa anidanoommi qufanoo Reebeeka nammarifa nári oosana mareenoo qamunna mafi oorisaa ititanau.

<sup>66</sup> Isakeefa uru paqurimmasoofoanoo Abaraqaammama ainainira fasiqa fannoo aiqama ainaina auqoonara Isakeena qimaminai. <sup>67</sup> Qimamisoofoanoo Isakeefa Reebeeka nammarina mareeqeenoo nári maaqaki Saraqa nammarifa mariunaki quqasoofoanoo mina aanaaqai kinoo marufanoo Isakeefa Rebeeka nammarinara aidi marufanoo mi aidirafa Isakeefa nári anoofa kuqunara amuqusiufa doo asoanau.

## 25

### *Abaraqaammama moo aanaaseesaa faiqi maqoo ufafa.* (1 Stori 1:32-33)

<sup>1</sup> Abaraqaammama anaasee moo maranau. Mina auqu Keeturaa nammarifa marinai. <sup>2</sup> Minasaa faiqi moomoo maqanau. Faiqi moo indaaruaana auqu Simaramafa marinai mina aanaaqianaafa Yookasanafa marinai mina aanaaqianaafa Meedanafa marinai mina aanaaqianaafa Midianaafa marinai. Mina aanaaqianaafa Isabakafa marinai ninaaqianaafa uqanna Suaafa marinai. <sup>3</sup> Indaaruaana aanaaqianaafa Yookasanafa mifa Seebabana faqa Deedana faqa nikoofa marinai. Deedana aiku asuku Asuraa maqannaasa faqa Reetusimma maqannaasa faqa Reuummimma maqannaasa faqa mariqau. <sup>4</sup> Midiana amaaku indaaruaqa faiqi Eefaafa marinai, mina aanaaqianaafa Eefeefaafa marinai, misa ninaaqianaafa Qannookafa marinai misa ninaaqianaafa Abidafa marinai, misa ninaaqianaafa uqanna Eeradaafa marinai. Minamusa Abaraqaammama anaqa Keeturaa nammarina saaqari kambiqaarusa mariqau.

<sup>5</sup> Abaraqaammama nári aiqama ainaina Isakeena kai aminai. <sup>6</sup> Amiseenoo nári kaqi maridanoo moo anaasee faiqi namu faqa amiqira ainaina oosana oosana Abaraqaammama kaqi nimiseenoo Isakeefa maruqooqari suani oosana qaannai maqa maaqai nianai niqiqoofaqa mitinai oonu mariqau.

### *Abaraqaammama kuqufufaqa akundoo ufafa.*

<sup>7-8</sup> Abaraqaammama asooqaqeenoo kuqinai. <sup>175</sup> aukuaana marasee kuqinai. <sup>9</sup> Kuqufufaqa mina amaaku qara Isakeesa Isamaeerasa miqanda nári nikoona iri mara maree Makapeeraa maqa maaqaki Mamaree maqusa suani oosana qaannai ooni aamaraki akundaqau. Mi maqana Eefaroonna Soogarana amaaku Heetana aiku asukundoo feefaurummaqoonaki Abaraqaammama akundaqau. <sup>10</sup> Abaraqaammama kaqi maridanoo Qeetana aiku asauku feefauru maqoonakina Saraqa nammarina faqa Abaraqaammama faqa nikundaqau. <sup>11</sup> Abaraqaammama kuqufufanoo mina amaaku Isakeena Anutufa amiqi amiqi imarinai. Isakeefa kaqi marira nammari dikaanda qini qiqafaidanoo fee qimaru nammari dikaandana aqa marinai.

*Isamaerana aiku asauku nuqu.*

(1 Stori 1:28-31)

<sup>12</sup> Qakaara nammarifa Saraqa nammarina ainainira maanaaqa Isipa maqanna maanaaqa marufa mifa Abaraqaammana amaaku Isamaerana maqoofa marinau.

<sup>13-15</sup> Isamaerana faiqi namu maaqimmiqa mariqau. Indaarugaafa Neebaiotafa marinau, mina aanaaqianaafa Keedarafa marinau, misa ninaaqianaafa Adabeerafa marinau, misa ninaaqianaafa Mibasamafa marinau, misa ninaaqianaafa Misammafa marinau, misa ninaaqianaafa Dumbaafa marinau, misa ninaaqianaafa Masafa marinau, misa ninaaqianaafa Qadadafa marinau, misa ninaaqianaafa Teemafa marinau, misa ninaaqianaafa Yeeturafa marinau, misa ninaaqianaafa Nafisafa marinau, misa ninaaqianaafa uqanna Keedeemaafa marinau. <sup>16</sup> Misa qisauquqara taikasee qikunooqu qaara marasee maqannaasa nikausaikiqa mariqau. Miqiqa maridaqa nariqa nuqu nariqa maqusa faqa nariqa uiquana maqusa faqa qafaafauree mariqau. <sup>17</sup> Isamaerafa 137 aukuna maraseeno kuqinau. <sup>18</sup> Isamaerana aiku asauku Isipa maqusaindari suani oosana qaannai Sura maqa maaqa faqa, Qafiraa maqa maaqa faqa qambaana Asiria maqa maaqai fimarugo mariqau. Misa Abaraqaammana aiku asauku akaqusa maruqooqari naaduma mariqau.

*Eesausa Yookooboosa maqoo ufafa.*

<sup>19</sup> Moo ufa Abaraqaammana amaaku Isakeena ufa maridanoo.

<sup>20</sup> Isakeefa qaara fasiqa niku nisauku taikasee 40 aukuna maraseeno Beetueerana aramuna Reebeeka nammarina maranau. Rabannana asookina maranau. Beetueerafa Arameeannaindaraafa Meesooootamia maqa maaqaki ani marinau.

<sup>21</sup> Reebeeka nammarifa sia faiqi maqanau aafanaasee marinau. Isakeefa minara iriseeno Yaaweenara innaaru qimarinau. Yaaweefa mina ufa iriseeno dadaqufanoo Reebeeka nammarifa amuaqu qaikinau. <sup>22</sup> Amuaqu qaikufanoo faiqi qaara qanda mina aranandaki maridaqa raki mariqau. Raki marufanoo Reebeeka nammarifa qinau, maa ainainafa nanaree qiniki kambiqaidanoo fee qimaseeno karaambaiqunna oonuree anoonufa qimamianifeera innaaru qinau. <sup>23</sup> Innaaru qufanoo Yaaweefa qimaminoo qinau.

Qaara maqannaasa ani aranandaki maridaqa.

Anee nariara nariara rairai qimariasa nikooqanda maqeenaranoo.

Moo fannoo moo uriqarara afeeka faqaafa marianno.

Akaqa fannoo afaasaana rafaqa fuaninafa mariannoo.

<sup>24</sup> Reebeeka nammarina faiqi maqarafa aniroofanoo qaara qanda maqanau.

<sup>25</sup> Indaarugaana afaqa kaaga taatuqee arinoo marinau, mina afaaqasasa asausi aanaaqi marinau. Mina auqu Eesau nee qiqau. (Mina auqu oosana asausi fee qiqau).

<sup>26</sup> Inaqianaafa indaarugaana aiku ataa rakisisimma uqirafa quminau. Minara mina auqu Yakooboo nee qiqau. (Mina auqu oosana aiku ataa fee qiqau.) Isakeefa qaaramoo fasiqa niku nisauku taikaseeno 60 aukuna maraseeno miqanda maqanau.

*Eesaufa nari indaarugaa faiqi ainaina mina akaqa aminau.*

<sup>27</sup> Miqanda innoqafufaqa Eesaufa uqarana akooofa maridanoo sia oogu marufa kaqi niranara aidimarufa marinau. Miqi marufanoo Yakooboofa sia miqi marinau. Fifirafa maridanoo maqusasaa marufa marinau. <sup>28</sup> Isakeefa Eesaunara aidi marinau. Mifa aandau arusoofanoo nee marunara minara aidi marinau. Reebeeka nammarifa Yakooboonara rimarinau. <sup>29</sup> Moo kari Yakooboofa narana suqasee auqee marufanoo mina afaasaafa nandaki niniuufa aaroorofanoo anireeno qinau.

<sup>30</sup> Anee taatuqee narana auqee mariannana doo mina mara qiminaqa naa daarandee marifaqee qinau. Miqi qimasoofaqa misa minara iriseeqa Eesaunara Eedoomee qimariqau. Mi auquna oosana taatuqee fee qimariqau.

<sup>31</sup> Yakooboofa iriseeno qinau, aninidiri qikoofa anee indaarugaa faiqi marianoo ani afaaqooqa qima amaqee marina qiminaqa narana ani amianauranoo.

<sup>32</sup> Eesaufa qinau. Saa qinee daararai faqa kuqua qaammidaqa qini mi ainainausa sia qini dadaqifaranoo.

<sup>33</sup> Yakooboofa iriseeno qinau, aneenna ufa qima afeekaika mandee qiminaqa qinee narana ani amianaura. Qimasooofanoo Eesaufa Yakooboonara qima afeekaika mandee indaarau mina akooofa qutaqama amaqoo ainainna amiraree qinau.

<sup>34</sup> Miqi qima afeekaika masooofanoo Yakooboofa quanda fufanoo feemu faqa nara ainaina faqa nammari faqa Eesauna amufanoo namasee doo finau. Miqi maseeno Eesaufa nari indaarugaa faiqi marunara akooqoofanoo nari akaqa amisee quqasee finau.



## 26

*Isakeefa Keeraa maqa maaqai faqa Beeraseeba maqa maaqai faqa mariu ufaa.*

<sup>1</sup> Abaraqaammafa maru aukuanna aandaroo firaafa narufanoo Abaraqaammafa Isipa maqa maaqai ooqu finau. Kafaa mina amaaku Isakeefa maru aukuanna aandaroo narufanoo Isakeefa Keeraa maqusai Abimeereekana maqusai finau. Abimeereekafa Firistia maqannaasa uriqararafa Keeraa maqusai marunnai finau. <sup>2</sup> Isakeefa Keeraa maqusai oonu marufanoo Karaambaiqa maaqi qimasee qimaminoo qinau. Anee sia Isipa maqa maaqai ooqu fua. Maaqoo qinee aniara mariannee qunnaqoo kai maria. <sup>3</sup> Maaqoo kai marina qinee ani faqa marida amiqi amiqida dadaaqiana. Maa maqa maaqana faqa anisaa ani aruakinausa faqa nimiana. Qinee minara Abaraqaammama ufa qima afeekaika masee amianauroo qiafannana doo ani faqa qima afeekaika amianauroo. <sup>4</sup> Qinee anisaa ani aruaki kambiqinausa fasaura foora moomoo amiana. Qinee maa maqa maaqana misa nimiana. Aiqama maqannaasa aniree maaqi qimasee innaaru qifaranoo. Oo Anutu anee Isakeena aiku asauku amiqi amiqimma nimaqoonandee inana maasa faqa amiqi amiqimma qimaqaa. <sup>5</sup> Abaraqaammafa ani akoofa qini sandufa faqa aamuqaira ufa faqa afaqee marunara qinee ani amiqi amiqimma amaqaana. <sup>6</sup> Isakeefa Anutuna mi ufana iriseenoo eedoo qimaseenoo Keeraa maqusai maridanoo Isipa maqa maaqai sia ooqu finau.

<sup>7</sup> Keeraa maqanna fasiqauqa mina aanaaqara iramirufanoo Isakeefa qini qisooki fee qinuu. Isakeefa nari anaaga Reebeekaa nammarifa oori amiqirafa marufanoo qini darusee qini qinaaqa mareefoo qimaseenoo rufia mareenoo qini qisooki fee qinuu.

<sup>8</sup> Isakeefa kaqi kaaqoo marinoo moo kari nari anaaga Reebeeka nammarina faqa madaana ooqu faqee narisaa narisaa mundaqa marufanoo mi maqannaasa uriqararafa nari maaqaki ooqufaqee maridanoo qafanau. <sup>9</sup> Qafamaseenoo Abimeereekafa Isakeena aaramaseenoo qinuu. Maa anaaseefa ani anaaga uqanna maridanoo. Anee nanaree qini qisooki fee qinane. Isakeefa qinuu. Qini qinaaqa fee qianaqa darifoora miqi qiga.

<sup>10</sup> Abimeereekafa iriseenoo qinuu. Anee maasa naqaa fee maqimaqenee. Qini maqanna moo fannoo ani anaaga sakasee faiqai fana anee mi ummaarana maasa qimianaiqini.

<sup>11</sup> Miqi qimaseenoo nari maqannaasa aiqama naarama quqaseenoo maaqi qimasee qima niminau. Yafee maa fasiqanee mina aanaaqee mandaikamma nimaqaifaqa qinee kuqa kai mina aruanauroo.

<sup>12</sup> Mi aukuannai Isakeefa narana ummaqusoofanoo kambiqafufanoo amiqimmasee anoona mafufanoo unakira aukuana moomoo uqanna unakinau. Karaambaiqa amiqi amiqimma amaqaasee dadaaqunara miqinau. <sup>13</sup> Karaambaiqa dadaaqufanoo miqinau. <sup>14</sup> Mifa moomoo sipsipa faqa burimakau faqa ainainira faiqiuqa faqa marunara Firistia maqannaasa niranaqee marinau. <sup>15</sup> Ooqai Abaraqammafa kaqi maridanoo indufuqoo nammari dikaandausa Firistia maqannaasa aiqama rafaafa fiqau.

<sup>16</sup> Moo kari Abimeereekafa Isakeena aiqama ainaina tia qafamaseenoo rufia seenoo qimaminuu. Doo anee maasa uridaaqarana mariananoo. Anee maasa maqa maaqa quqasee moosaa fua. <sup>17</sup> Isakeefa mi ufana iriseenoo mi maqa maaqana minniseenoo nari uqaana maaqa Keeraa noopunduki usakasee miqoo kisaqaasaa marinau.

<sup>18</sup> Miqoo ooqu Isakeefa nari akoona nammari madikauqa Firistia maqanna rafaafa fuqoon paqurimmaseenoo kafa indufuseenoo nari akoofa auquroo auquna kai kaifaa auquranau.

<sup>19</sup> Isakeena ainaini maru fasiqausa mi arumunaki fuka madika indufuufaqa nammari paquriqau. <sup>20</sup> Paquri masoofaqa Keeraa maqanna sipsipasaa rakisi marusa mi nammarina qafamasee Isakeena sipsipa rakisirausa faqa rakirarida qiga. Maa nammarifa maasaindi maridanoo. Miqi qufanoo Isakeefa mi nammari madikana auqu Tinoorira nammari madikee qinuu. <sup>21</sup> Miqi qimasoofaqa mina ainainira fasiqa namu kafa moo indufiqau. Keeraa maqannaasa minara faqa miqi kai iqu. Isakeefa mina iriseenoo minara faqa niranaqara nammari fee kai qinuu. <sup>22</sup> Miqi qimaseenoo kafa quqasee moosaa oonureenoo miqi kai minoo moo nammari madika indufinau. Miqoo minara sia tinoo taano rirafa marufanoo mi nammari madikana auqureenoo nifaafa quqasee mana manira nammari madikee qinuu. Maqee Karaambaiqa fannoo mana manirana maasa qimifaqa maridaqa maaqoo aiqama ainaina masaananoo rairaiannoo.

<sup>23</sup> Doo miqoo mariufanoo miqoo minni seenoo Beeraseeba maqa maaqai finau. <sup>24</sup> Miqoo marufanoo moo eendaki akoofoo Karaambaiqa maaqi qimasee qimaminuu. Qinee ani akoona Abaraqaammama Anutusa maridaqa. Sia anee rufia rufiaqia. Qinee ani

faqa nidaqa. Qeeqa ainainira fasiqa Abaraqaammuna faqa qima afeekaikiafannanara iriseeqa ani amiqi amiqi ianaura anisaa ani aruakinausa moomoo kambiqeefaranoo.

<sup>25</sup> Isakeefa Karaambaiqa mi ufana iriseenoo ooninnai qainda auquseenoo Karaambaiqa aandau tatufirana minasaa suqa amiseenoo innaaru qinau. Miqoo Isakeeefa nari uiqaana maqa burimakau apatannoo usakaseenoo marinau. Minaki maridanoo nari ainainira fasiqauqa niqoofaqa moo nammari madika indufiqau.

*Isakeesa Abimeereekasa eedoo qimasee moodsanakiku ufafa.*

<sup>26</sup> Abimeereekafa Keeraa maqa maaqaindari Ausafatana nari irirana amimaru fasiqana faqa nari sundiauqa uriqararana Pikoarana faqa Isakeena qafararee qimasee Beeraseeba maqusai aniqau.

<sup>27</sup> Aniroofanoo Isakeefa iramirinoo qinau. Naqi fee qifaqee qiniara nikoqoofaqa diiqamasoosa marunnannai kafa anidanee. <sup>28</sup> Miqi qufanoo Abimeereekafa faqa mina faqa anusa qiqau. Karaambaiqa ani faqa marinara maqee maasa iridaqa. Ani faqa maasa faqa qambaana kuqaa qima afeekaikirafa marianifeera iridaqa. <sup>29</sup> Maasa aniara qima afeekaikammasee sia maasa mandaikamma qimaqaannee qidaqa. Maasa sia ani mandaikamma amaaqafannandee inana maasa faqa sia mandaikamma qimaqaa. Maasa ani amiqi amiqimma aisaafanana anee asoaranaki finau. Maqee akooqoo uqanna Karaambaiqa fannoo ani amiqi amiqimma amaqaidanoo.

<sup>30</sup> Miqi qimasoofoanoo Isakeefa qoomaqa deedaqinau. Deedaqammasoofaqa misa narana namaseeqa faiqaqau. <sup>31</sup> Kananaana findi fufaqa nari qimami nari qimamimma afeekaikamasee firaa ufannai qima afeekaikamma rafaqaqifiqau. Miqimmasenoo Isakeefa nimandara ufa qimasoofaqa aqoondi kammasee quqasee fiqau. <sup>32</sup> Doo mi faasaana Isakeena ainainira fasiqa namu nammari madika indufu qoonaki nammari paqurimmasee Isakeena qimamiqa qiqau. Doo maasa nammari paqurira. <sup>33</sup> Miqi qimasee qimamufanoo Isakeefa mi nammari madikanara qima afeekaikira madikee qinau. Miqi qimaseenoo nari ufakiqari Beeraseeba maqusa fee qimasee auqu ranau.

*Eesaufa aanaamuru aanaaseeqara maroo ufafa.*

<sup>34</sup> Isakeena faiqi indaarugaafa mina auqu Eesaufa marinau. Mifa qaara fasiqa aiku asauku taikasee 40 aukua maraseenoo Qeetaa maqanna aanaaseeqara maranau. Moo anaasee auqu Yuditi nammarina Beerina araamuna maranau. Moo anaasee auqu Baseemata nammarina Eeroona aramuna maranau. <sup>35</sup> Miqanda nari ninaakuquqara Isaakea Reebeeka nammari sakaqara oosana nimufaqa nikoqanau.

## 27

*Yakooboofa Eesauna afaaqooqa ummuaru ufafa.*

<sup>1</sup> Isakeefa mariufanoo doo asooqaoofanoo afu mandaikinau. Mariufanoo moo kari nari indaarugaa faiqi Eesauna aaroofanoo Eesaufa maqi qinau.

<sup>2</sup> Foo qimasoofoanoo Isakeefa Eesauna qimaminoo qinau. Doo qinee asooqa marida, qeeqa kuqira aukua sia qafaida, minara ani qimamiqa. <sup>3-4</sup> Aneenna duru feefa mareenana nandaki aandau aru maree qini didi marina mini suqa qiminaqa namseeqa ani afaaqooqa qimamaqaseeqa kuqua.

<sup>5-6</sup> Isakeefa Eesauna faqa ufa qiqiisoofoanoo Reebeeka nammari iriseenoo qafoofanoo Eesaufa nandakinai uaqarara fufanoo quanda fufanoo Yakooboona qumee kai qimaminoo qinau. <sup>7</sup> Doo maqee ani akoofa Eesauna maqi qimasee qimaminoo, anee aandau arumaree mini suqa qiminaqa qinee namasee Karaambaiqa afusaa ani afaaqooqa amisee kuqua. <sup>8</sup> Qini qimaaku doo anee qini ufa irisee qinee qianandee ia. <sup>9</sup> Anee doo fua oonu mimmi aanaaqiqa marianakinaana afaaq faqaana qaaraqanda mini sainaa qinee ani akoona aidi marina suqa saanana munu amia. <sup>10</sup> Munu aminano namaseenoo nari afaaqooqa amiseenoo kuquani.

<sup>11</sup> Yakooboofa iriseenoo nari anoona qimaminoo qinau. Qini qifasaafa asausi faqaafa maridanoo asausi aadaiki marifa maridanoo. Qini qifaqa qisausi sia maridanoo umooqu kammidanoo. <sup>12</sup> Abee qini qikoofa qini qifaqa duqama qafamaseenoo iriannoo. Qiniara qikaru qidanoo fee qiannoo. Miqiqqa qinee rairaiqirana qeeqa qifaqai qifaqooqara foora mara quqaanau.

<sup>13</sup> Mina anoofa mi ufana iriseenoo qinau. Ani aqira ufa fannoo qinisaa kai mariannoo, sia anee minara iria, sandeenana oonu mimmi aanaaqi kaqi maree mini qimia.

<sup>14</sup> Miqi qima soofanoo Yaakooboofa eedoo qimasee mara maree mini soofanoo mina anoofa maraseenoo nari afaaqi Isakeena aidira narana suqanau. <sup>15</sup> Reebeeka nammari aandaugaseenoo Eesauna amiqira qamunna nari maqaki quqaqoona maraseenoo Yakooboona afisu amaqaseenoo mimmi aanaaqi apata qumareenoo

Yakooboona afaarinni faqa asauku faqa asaasi sia maruqoo afisu amaqanau. <sup>17</sup> Miqi mandeenoo mi adiafaaira naranna feemu namu faqa suqaqoona amufanoo nari akoo funnai maree finau.

<sup>18</sup> Oonureenoo nari akoona maaqi qimasee qimaminau. Qipoo doo qinee anireeqa, qufanoo Isakeefa qinai. Qini faiqi namuqi qari anee yafee maridanee qinai.

<sup>19</sup> Yakooboofa qinai. Qinee ani indaarugaa faiqi Eesausa maridaqa. Doo anee aanda qianana arusee suqamaree anireeqa doo anee findi finana namasee qifaaqooqa qimia. <sup>20</sup> Miqi qufanoo Isakeefa qinai. Oo qini qimaaku anee naqaa fee maseenane kai kaqi paqurinanee qufanoo Yakoobofa qinai. Karaambaiqa ani Anutufa qini dadaaqi paqurimma qiminoo.

<sup>21</sup> Isakeefa minara iriseenoo Yakoobona aaramaseenoo qinai. Anee qini daaqa adeedi ani rainaqa qinee ani auqama qafaa. Kuqaa anee Eesau fee maridanee.

<sup>22</sup> Miqi qufanoo Yakooboofa nari akoona oorinni oonu kikiqamma fufanoo Isakeefa auqama qafamaseenoo qinai. Qinee irunanoo anee ufa qianafa ani Yakooboona aunda maridanoo ani asauku auqamasee qafaunanoo Eesauna asauku maridanoo. <sup>23-24</sup> Yakooboofa mimmi asaasi afisuqoofanoo Eesauna asaukuara foora asaasi aanaaqi marufanoo Isakeefa sia irinai. Isakeefa nari afaaqooqa mina amirammaseenoo kaifaa irimirinoo qinai. Anee kuqaa Eesau fee maridanee. Miqi qufanoo Yakooboofa qinai. Eeo qinee Eesausa maridaqa.

<sup>25</sup> Miqi qufanoo Isakeefa qinai. Doo aneenna aanda mini qiminaqa namaseeqa afaaqooqa qimamaqaanau. Yakooboofa irinoo aanda aina faqa uainna nammari faqa mini amufanoo nanai. <sup>26</sup> Namaseenoo Yakooboona maaqi qimasee qimaminoo qinai. Qini qimaaku maaqoo adeedi ani reenana qini qimooqaa. <sup>27</sup> Qufanoo Yakooboofa adeedi aaga ani reenoo nari akoona amooqee marufanoo andanda unda afaaqaindara ufanoo udirama qafamaseenoo maaqi qimasee afaaqooqa qinai. Qini qimaaku afaaqi amiqira unda fannoo Karaambaiqa afaaqooqa qimamaqaqai maqana afundara foora idanoo.

<sup>28</sup> Anutufa innaarunaindaraa qifi faramu quqasainanoo ani maqa ainoo ainoom-maseenoo moomoo narana amiani.

<sup>29</sup> Moo aanaamuru marinausa ani ainainira faiqi kammambi faranoo.

Maaqanna maaqanna mariasa misa ani ani qafeeqa noorindara maqasaa kummaree faranoo.

Anee aneenna akaqaafasaaqaa firaafai kina marinnaranoo.

Ani anona faiqi namu ani ani qafeeqa noorindara maqasaa kummaree faranoo.

Moo fannoo ani aqanafa mi ufafa nariki kai mariannoo.

Moo fannoo ani amiqi amiqimma amaqaanafa nariki faqa mariani.

*Eesaufa nari akoona afaaqooqara qiaqee qu ufafa.*

<sup>30</sup> Miqi qimasee Isakeefa Yakooboona afaaqooqa qimami soofanoo Yakooboofa nari akoona maaqakiqari raudamakufanoo dindanai fufanoo doo Eesaufa dindanai uaganoo niniufa aniranau. <sup>31</sup> Eesaufa anireenoo adiafaa ira aanda aina suqa mareenoo nari akoofoqoo oonu reenoo qinai. Qipoo doo findi finana namasee qifaaqooqa qimia.

<sup>32</sup> Mina akoofa qinai. Anee yafee. Miqi qufanoo mifa qinai. Qinee Eesausa indaarugaa faiqi maridaqa.

<sup>33</sup> Isakeefa minara iriseenoo boo qimasee tautu maseenoo aindiri aindiri imarufanoo qinai. Yafee moo fannoo aanda arusee mini qimifaqa, namasaunana anee aniraananoo. Qinee namaseeqa doo qeeqa taikara afaaqooqa qimamaqasauananoo naaru naaru minaindi mariannoo.

<sup>34</sup> Eesaufa mina iriseenoo firaqoo aundurai sukaqoofanoo qinai. Oo qipoo qini faqa qifaaqooqa qimia. <sup>35</sup> Qufanoo Isakeefa qinai. Ani akaqa fannoo qikaru qimaseenoo doo ani afaaqooqa maree ffinoo.

<sup>36</sup> Eesaufa minara irufanoo Yaakooboonara arana qoofanoo qinai. Oo mina auqu Yakooboofa maridanoo nari auqu mau kaimbinoo qini ainaina qaara kari qini qikaru qimasee mareenoo. Indaaru mifa qinee indaarugaa faiqi uriqararasa maraani qiafanna ainaina maroofa maqee miqi kai inoo qini qifaaqooqa qirana doo maree finoo. Miqi qimaseeno Eesaufa nari akoona qimaminoo qinai. Anee afaaqooqa sia fee qini faqa qiseenane.

<sup>37</sup> Miqi qufanoo Isakeefa qinai. Doo qinee ani uriqararafa marianifee afaaqooqa amiseeqa. Kaifa mina ainaina mina ainainira faiqi qiaqee afaaqooqa faqa amiqa. Qinee oosana oosana narana faqa nammari faqa amiqa. Qini qimaaku, maqee sia moo ainaina marinaqa ani amianaaranoo.

<sup>38</sup> Eesaufa narí akoona kafaa kafaa iki raqaidanoo iranau. Moodaa afaaqooqa marinee aminanee sia fee moo qini faqa qiminnaree. <sup>39</sup> Isakeefa minara irinoo maaqi qimasee Eesauna qimaminau.

Sia innaarunaindaraa qifi faramu anindi mariannoo.

Sia ainoo faqaa maqa anindi mariannoo.

<sup>40</sup> Anee duru saamu ugeerasaidana aneenna amiqira marirana paqurinnaranoo.

Miqidana anee aneenna akaqa ainainira faiqikina mariinana rakeemmaki aaduma finnaranoo.

*Isakeefa Yakooboona Qaraana maqusai aqiqoo ufafa.*

<sup>41</sup> Yakooboofa Eesauna afaaqooqa maree fifufanoo Eesaufa narí akaqara akoo qaidanoo fidiqaammi marinau. Miqi marufanoo maaqi qimasee narí kai oonu mafi iriseenoo qinuu. Kaqi kaaqoo maasa qikoofa kuqu finaqa soofaara taikaseeqa mikari qeeqa qikaqa kuqamma aruanaura.

<sup>42</sup> Reebeeka nammarifa mi ufana iriseenoo Yakooboona aaramaseenoo aaqu qima-maqeenoo qinuu. Iria ani afaasaafa Eesaufa afaaqooqara qimammareenoo ani aruannoo.

<sup>43</sup> Qini faiqi qinee qimamianandee ia. Anee quqasee sandeenana Qaraana maqusai qini qisookifa ani anaufa Rabannafa marinnai fua. <sup>44</sup> Anee ooru miqoo marinanoo ani afaasana arana qarafa asoainana qumua. <sup>45</sup> Anee mina mandaikamma amaqaannanara qaanusainaga qinee akaqausa niqaanaqa ani ooru afiqee qumuaqa. Qinee qikoo inneeqara moodaafa kuqiranara irunanoo qaiqaqa doo quqasee fua.

*Isakeefa Yakooboona aiqoofanoo Rabana funnai ooru finau.*

<sup>46</sup> Miqanda ninoofa Reebeeka nammarifa oonu reenoo narí afaaqi Isakeena qimaminoo qinuu. Qinee maa Qeeta maqannaa anaasee qandara Eesauna anaqa qarara qikoo uqanna fidiqaammidaqa. Yakooboofa Qeeta maqannaa anaasee maaqirana moo marainaga qinee kuqanauranoo.

## 28

<sup>1</sup> Isakeefa minara iriseenoo Yakooboona aaramaseenoo amandaidanoo qinuu. Oo Yakooboo sia uqanna Kannaana maqannaa anaasee maraa. <sup>2</sup> Doo findi finana ooru fua. Aneenna aanaakuna Beetueerana maqa maaqa Meesoopootamia maqa maaqaki ooruree aneenna anauna Rabannana araamuna maraa. <sup>3</sup> Aiqama afeeka faqaa Anutufa ani faqa ani anaqa faqa amiqi amiqimma nimaqaseenoo moomoo faiqi nimisainana anee moomoo maqannaasa nikoofa marinnara. <sup>4</sup> Anutufa Abaraqaammana amiqi amiqimma amaqaondee inoo ani faqa amiqi amiqimma aisainana anee aneenna marianna maqa maqana Anutufa Abaraqaammana amiqoonakinaa qumiasana maraa. <sup>5</sup> Miqi qimaseenoo Isakeefa Yakooboona aiqoofanoo findifinoo Meesoopootamia maqa maaqai Rabanafa Beetueerana amaaku Arameea maqannaafa Reebeeka nammarina asookifa marunnai oorufinuu. Rebeekaa nammarifa Yakooboosa Eesauna ninoofa marinuu.

*Eesaufa anaasee moo maranau.*

<sup>6</sup> Isakeefa Yakooboona afaaqooqa amiseenoo Meesoopootamia maqa maaqai anaasee maraanifeera aqiqoonara Eesaufa irinuu. Isakeefa afaaqooqa Yakooboona amiseenoo Kannaana maqanna anaasee sia maraanee qunara faqa irinuu. <sup>7</sup> Yakooboofa narí anaakoo ufa irisee Meesoopootamia maqa maaqai funara faqa Eesaufa irinuu. <sup>8</sup> Isakeefa Kannaana maqannaa anaaseera akooqee marunara Eesaufa irinuu. <sup>9</sup> Iriseenoo Isamaeerafa Abaraqaammanna amaaku marunnai oonuree mina araamuna auqu Maqarata nammarina maranau. Maqarata nammarina asookifa Neebaiootafa marinuu.

*Yakooboofa Beeteeree maqa maaqaki ooni qunu rumasee faiqaqee qaininuu.*

<sup>10</sup> Kaifa Yakooboofa Beeraseeba maqusaindari Qaraana maqusai firaree qimasee faiqanoo ooru fimarinauu. <sup>11</sup> Fimarufanoo eendufanoo moosaa uiqaana araseenoo faiqanuu. Faiqararinoo ooni fraana marasee qunu rumasee miqoo faiqanuu. <sup>12</sup> Faiqaqee idanoo qaina moo inuu. Aana kisaqa maqasaaqari innaarunai ooru marufanoo angirooqaa mimu ooruree qumuree imariqau. <sup>13</sup> Karaambaiqa Yakooboona aakaarinni kikiqinoo maridanoo maaqi qimasee qimaminuu. Qinee Karaambaiqa maridaqa, ani aanaakuna Abaraqaammana Anutusa maridaqa, ani akoona Isakeena faqa Anutusa maridaqa. Qinee maa maqa maqana anee faiqaannana ani faqa ani aiku asaku faqa nimianaura. <sup>14</sup> Ani aiku asaku anisaa ani aruakinausa faqa nukudara foora maa maqanasaa marifaranoo. Misa miqooqari kambiqaamaree suani oosana qaannai finanoo aramareenoo keeqee mari qaannai finanoo dinni dinni ataaqeeni finanoo miqi mambi amana kai marifaranoo. Ani faqa ani aiku asakuaroo qiqa aiqama maqannaasa amiqimma nimaqaanaura. <sup>15</sup> Karaambaiqa kafaa qimaminoo qinuu. Iria,

qinee ani faqa maridaqa aiqamai finnannai anisaa rakisianaura. Rakisidaqa kaifaa ani mareeqee maa maqanasaa quqaanaura. Qinee sia ani minnisaanaura, qinee qeeqa qima afeekaikiafanna ufafa anoona kambiqainaqa quqaanaura.

<sup>16</sup> Miqi qimsoofanoo Yakoofoofa tautinoo findifinoo qinau. Karaambaiqa maaqoo maridanoo. Mifa maaqoo marinara qinee sia iridaqa. <sup>17</sup> Yakoofoofa Anutuna ufa iriseenoo rufia rufia idanoo qinau. Maa maqa maaqafa daaquqara maqa maqaa maridanoo. Abee Anutuna maaqa mariannoo innaarunai fimaria kooqifa uqanna mariannoo.

<sup>18</sup> Kananaana Yakoofoofa findifinoo narí ooni qunu qumareenoo daaqoo auqaanifee qimasee maqasaa rakiqaseenoo Anutunaindi fee qimasee oorifa fadameena aku-maqanau. <sup>19</sup> Akuamaqaseenoo mi maqanara Beeteera fee qinau. (Mi auquna oosana Anutuna maaqa fee qinau.) Ooqai miqoora misa Rusa maqusa fee qimariqau.

<sup>20-21</sup> Yakoofoofa mi maqana auqu ramaseenoo Karaambaiqara qima afeekaikinoo qinau. Qinee fimarianana anee qini faqa marida qinisaa rakisidana nana faqa qamunna faqa qiminaqa qinee amiqimmaseeqa qeeqa qikoona maaqai qumu raanana anee qini Anutufa marinnaranoo. <sup>22</sup> Maa daaqoo auqara oonina rakiqaunnana ani naaru amooqi fandinnaqoo mariannoo. Anee aiqama ainaina qiminaqa qinee qisaukuqaraki-naana aninna amianaura.

## 29

### *Yakoofoofa Rabanana maaqai ooruranau.*

<sup>1</sup> Miqi qimaseenoo innaaru qimaseenoo Yakoofoofa suani oosana qaannai mariasa, misa maqa maaqai oonu ranau. <sup>2</sup> Oonureenoo qafoofanoo nammari madika qusau saqanna marufanoo qaaramooki sipsipauqa mi nammari madikana afainni faiqaqeeu-faqa misasaa rakisirausa miqoo rakisimariqau. Sipsipauqa mi madikanakinaa nammari neemariqau. Firaau ooninnoo mi madikana rafaqaqafuqoofanoo marinau. <sup>3</sup> Sipsipauqa aiqama moodaa qoo aniroofaqa sipsipasaa rakisirausa mi oonina quanda quandamma aqusee nammari nimisee kaifaa mi oonina quanda quandamma mafi rafaqaqafi mariqau.

<sup>4</sup> Yakoofoofa sipsipasaa rakisi marusa oonu nindafeenoo qinau. Qini qikaqaafasaa, innee yaindaraasee maridaqee. Misa qiqau, maasa Qaraana maqusa mindaraasa maridaqa.

<sup>5</sup> Yakoofoofa iriseenoo qinau. Innee Naqoorana anaiqi Rabannanara iridee qufuqa misa qiqau. Eoo maasa minara iridaqa.

<sup>6</sup> Miqi qufanoo Yakoofoofa qinau. Rabannafa amiqisaa fee maridanoo fee. Misa qiqau. Eoo amiqisaa maridanoo. Mina qafaa, doo mina araamuna Raseera nammarifa mina sipsipauqa nifiqee anidanoo.

<sup>7</sup> Yakoofoofa misa sipsipa oosana qafeenoo qinau. Innee naqiffee ifaqee sipsipa suani qambaana mara quqaqaafaqee maridee. Dauni nammari nimiseeqa mara quqasaifaqa misa fida qusau neeqa nifaaqa maraaqa.

<sup>8</sup> Mi maqannaasa iriseeqa qiqau. Maasa sia miqianaura. Aiqama sipsipa maaqoo aniraifaqa ooni quanda quandamma aqusee nammari nimifaranoo.

<sup>9</sup> Yakoofoofa misa faqa ufa qimarufanoo Raseera nammarifa narí akoona Rabanna sipsipauqa nifiqee aniranau. <sup>10</sup> Yakoofoofa narí anoona Reebeeka nammarina asookina araamuna qafamaseenoo Rabanna sipsipa faqa qafamaseenoo findifinoo nammari madikaki rafaqaqafuqoo oonina quanda quandamma mafi quqaseenoo Raseera nammarina sipsipauqa nammari nimirau. <sup>11</sup> Nammari nimiseenoo Raseera nammarina ooriki amooqaidanoo asarafa firaafa minaki marufanoo iki raqanau. <sup>12</sup> Iki raqaseenoo Raseera nammarina qimaminoo qinau. Qinee ani akoona ati Reebeeka nammarina amaaku maridaqa. Raseera nammarifa mina ufa iriseenoo sandeenoo oonuree narí akoona qimaminau.

<sup>13</sup> Rabannafa narí anauqi Yakoofoofa ufa iriseenoo sandeenoo oonu mafi kaqaramma qumareenoo amooqaseenoo sukudaakutamasee afigeenoo narí maaqai aninuu. Miqoo oonu maridanoo Yakoofoofa Rabanna aiqama ainaina kambiqoonara qimaminau. <sup>14</sup> Rabannafa iriseenoo maaqi qimasee qimaminoo qinau. Anee qini moodaa fidika mariananoo. Miqi qimasooofanoo Yakoofoofa moodaa uqoona mina faqa miqoo marinuu.

### *Yakoofoofa Rabannana araamuna qara mararee qimasee mina ainaina imarinuu.*

<sup>15</sup> Rabannafa maaqi qimaseenoo Yakoofoofa qimaminoo qinau. Kuqaa anee qini qinauqi mariananoo, sia fifau qini ainaina kai innaranoo. Maqee oosana araseeqa feefauru amiqambuanaura. Ani naqiffee mandee feefauru amianauree.

<sup>16</sup> Rabanna araamuna qara qaaraqanda mariqau, indaaruuqaafa Reea nammarifa marinuu inaaqianaafa Raseera nammarifa marinuu. <sup>17</sup> Reea nammarifa indaaruuqaafa amiqira oori afiri faqaafa marinuu. Raseera nammarifa mina faqa arusee kaaqa

amiqirafa uqanna marinau. <sup>18</sup> Yakooboona irirafa Raseera nammarinara kai iri marufa marinau. Minara iriseenoo Yakooboofa Rabannana narí ainaini maruna akiqara qimaminoo qinau. Amanee qinee Raseera nammarina maraanauree. Anee eedoo qinaqa qinee mina akiqara qisauku dinni taikasee dinni ani qaara marasee 7 aukwana ani ainaina ianaura.

<sup>19</sup> Qufanoo Rabannafa qimaminau. Qinee amana ani amianaura, moo oosana nimiranara qikooqaidanoo. Doo anee qini faqa maridana ainainia. <sup>20</sup> Rabannafa miqi qimasoofanoo Yakooboofa Raseera nammarina marararee qimaseenoo qisauku dinni taikaseenoo dinni ani qaara maraseenoo 7 aukwana mina ainaina maisee marinau. Yakooboofa Raseera nammarinara aidi marufanoo mi aukwana namufa qaaramoo faasaanara foora aiqaranau. <sup>21</sup> Dinni taikasee dinni ani qaara marasee 7 aukwana taikasooofanoo Yakooboofa Rabanna qimaminoo qinau. Doo qini maanaqa qimiraree qunna aukuanafa aiqareenoo. Doo Raseera nammarina qiminaqa maraa. <sup>22</sup> Rabannafa eedoo qimaseenoo narí araamuna amundaيدا oomaqa sakasee aiqama naaroofofa ani naqau. <sup>23</sup> Mi eendanaki Rabannafa narí araamuna indaarugaana Reea nammarina qumee Yakooboona maqaki quqasoofanoo Yakooboofa auna Raseera nammarifa mifoo qimaseenoo mina faqa sakasee faiqanau. <sup>24</sup> Rabannafa miqoo qaraasa oosana mareeno narí ainainira maanaqa moo minauqu Siripaa nammarina mareeqee narí araamuna Reea nammarina ainaina maisaanifeera aminau. <sup>25</sup> Iaqoofanoo findifinoo Yakooboofa qafamaseenoo, boo Reea nammari fee qinau. Yakooboofa Rabanna funnai oonureenoo aqinoo qinau. Anee naqifee ifanee qini miqimma qimaqeenee. Qinee Raseera nammarina marararee qimasee ani ainaina maiseeqa. Anee nanaree qini qikaru q inanee. <sup>26</sup> Rabannafa qinau. Maasa maqoo qaraasa oosana sia miqinoo maridanoo. Indaarugaana naaree amundaseeqa inaaqiannaana kasooaqee inaaqianna amundaيدا. <sup>27</sup> Anee Reea nammarina faqa kaqi marinanoo mina oomaqirafa 7 faasaana mariannoo. Taikanaqa miqoo kafa nammarina faqa amianaura. Amianana miqooqari mina akiqara anee oosana araseenana kaifaa dinni taikasee dinni ani qaara marasee 7 aukwana qini ainaina innaranoo. <sup>28</sup> Yakooboofa minara iriseenoo eedoo qimaseenoo Reea nammarina faqa mariufanoo qoomaqa narana taikoofanoo Rabannafa narí araamuna Raseera nammarina faqa aminau. <sup>29</sup> Kafa Rabannafa narí ainainira maanaqa mina auqu Biriqaa nammarina mareeqeenoo Raseera nammarina ainainianifeera aminau. <sup>30</sup> Amufanoo Yakooboofa Raseera nammarina faqa sakasee faiqanau. Yakooboofa Raseera nammarinara aidi marufanoo Reea nammarinara sia amiqimma aidi marinau. Miqidanoo Rabannana ainainiranaki kafa qisauku dinni taikasee dinni ani qaara marasee 7 aukwanaki marinau.

### *Yakooboona faiqi namu ufa.*

<sup>31</sup> Yakooboona irirafa Raseera nammarinasaa kai mundinoo marunara Reea nammarinara akoo akaa mimarinau. Miqi marunara Karaambaiqa qafeenoo dadaaqufanoo Reea nammarifa amuaqu qaikinau. <sup>32</sup> Reea nammarifa amuaqu qaikinoo mariiufanoo faiqi akoonaiqi maqanau. Maqaseenoo qinau. Karaambaiqa qiniara qimudao qinara qini qifaaqi fannoo maqee qinisaa atooqeenoo fee qianaara. Mi irirana iriseenoo mi faiqina auqu Reeubeena fee qinau.

<sup>33</sup> Reea nammarifa marikinoo kaifaa amuaqu qaikinoo mariiufanoo faiqi akoonaiqi moo maqanau. Maqaseenoo qinau. Qini qifaaqi qini ameesuqi marinara Karaambaiqa irinoo qiniara qimudao qimaseenoo maa faiqina qiminoo. Minara mina auqu Simeeona fee qinau.

<sup>34</sup> Reea nammarifa marikinoo kafa amuaqu qaikinoo mariiufanoo faiqi akoonaiqi moo maqaseenoo qinau. Doo maqee uqanna qini qifaaqi fannoo doo qinisaa atooqaanoo, qinee qaaramoo akoonaiqi maqaseeqa. Minara iriseeqa mi faiqina auqu Reefi nee qifa.

<sup>35</sup> Reea nammarifa marikinoo kaifaa amuaqu qaikinoo mariiufanoo faiqi akoonaiqi moo maqanau. Maqaseenoo qinau doo maqee qinee Karaambaiqa amooqidaqa, maa faiqina auqu Yuda fee qidaqa. Reea nammarifa Yudana kai maqaseenoo mi kamuqoo kisaqaasaa marinau.

## 30

<sup>1</sup> Raseera nammarifa narí anasaana faiqi namu nindafeenoo Yakooboona aqinoo qinau. Anee faiqi sia qini mara qimianaqa qinee kaqi marianabaqa kuquanauranoo.

<sup>2</sup> Yakooboofa minara irufanoo arana qoofanoo qinau. Qinee Anutusau maridau. Anutufa kai ani itita amaqaaidanoo.

<sup>3</sup> Miqi qimasoofoano Raseera nammarifa qinau. Maa qini ainaini mari manaqafa Biriqaa nammarifa marinoo qinee mina ani amiqa. Anee mina faqa faiqeenana faiqi mara amia. Aminanoo faiqi maqasainanoo qinindi kammiannoo. Miqimasee qinee faqa faiqi anausa marianaura. (Mi aukuanai mi maqannaasa oosana miqi marusa mariqau.)

<sup>4</sup> Raseera nammarifa miqi qimasee nari ainaini maru manaqana mina auqu Biriqaa nammarina Yakooboona amisoofanoo mina faqa sakasee faiqanau. <sup>5</sup> Miqimasoofanoo Biriqaa nammarifa amuaqu qaikinoo mariiufanoo Yakoboona faiqi akoonaiqi maqanau. <sup>6</sup> Maqasoofanoo Raseera nammarifa qafamaseenoo qinau. Doo maqee Anutufa qini oosana andeqara oosana fee qimasee qini innaaru qirana iriseenoo doo akoonaiqi qiminoo. Miqi qimaseenoo Raseera nammarifa mi faiqina auqu Danna n ee qinau.

<sup>7</sup> Mi manaqafa Biriqaa nammarifa marikinoo kaifaa amuaqu qaikinoo mariiufanoo akoonaiqi moo maqanau. <sup>8</sup> Raseera nammarifa mina qafamaseenoo qinau. Qinee qeeqa qinasaana faqa firaqoo rairai qimasee qinee uriaaqareeqee qimaseenoo mi faiqina auqu Napatari fee qinau.

<sup>9</sup> Reea nammarifa faiqi maqarana taikaseenoo nari ainaini maru manaqana auqu Siripaa nammarina nari afaaqi Yakooboona mara aminau. <sup>10</sup> Amufanoo minasaa faiqi akoonaiqi moo maqanau. <sup>11</sup> Reea nammarifa qafamasee qinau. Oo qini amiqimma qisainara mi faiqina auqu Kadafa n ee qinau.

<sup>12</sup> Siripaa nammarifa marikinoo kaffaa akoonaiqi moo Yakooboona faiqi maqanau. <sup>13</sup> Reea nammarifa mina faqa nariara maraseenoo qinau. Doo qinee firaqoo asadaqa. Maqee aanaaseeuqa qiniara asasirafee qimasee duqu reefaranoo. Minara iriseenoo mi faiqina auqu Aseera fee qinau.

<sup>14</sup> Reea nammarina amaaku Reeubeenafa sakumma neemaru kamuqoo andanda kinai nidanoo faiqi maqee maru andandana qaqama paqurinau. Mi aqamana auqu mandareeka marinau. Mina paqurimaseenoo mara mareenoo mini nari anooka Reea nammarina aminau. Raseera nammarifa mina qafamaseenoo Reea nammarina qimaminoo qinau. Amanee mandareeka qaqama akaqana qini faqa qiminnaree.

<sup>15</sup> Miqi qufanoo Reea nammarifa nari qimaminoo qinau. Anee qini qifaaqi marasaanafa kaifaa qini qimaaku mandareeka qaqama marararee fee qidanee. Miqi qufanoo Raseera nammarifa qinau. Ani amaaku marai mandareekana qaqama qini qiminaqa doo Yakooboona ani amiananoo ani faqa faiqaanoo.

<sup>16</sup> Eenee marufanoo Yakooboofa ainainindari aniroofanoo Reea nammarifa aanai oonu afiqeenoo anidanoo qimaminau. Doo qinee mandareeka qaqama Raseera nammarina amiqa. Mifa mina akiqara maqee eendaki anira qini faqa faiqaanee qinoo. Miqi qufanoo Yakooboofa eedoo qimasee Reea nammarina faqa sakasee faiqanau.

<sup>17</sup> Anutufa Reeaana innaaruqirana iriseenoo dadaaqufanoo Reea nammarifa kaffaa amuaqu qaikinoo faiqi akoonaiqi maqanau. Moodaannai qisauku namu Yakooboonaasaa maqanau. <sup>18</sup> Reea nammarifa maqaseenoo qinau. Qinee qeeqa ainainira maanaaqa qeeqa qifaaqi amiafannara maa faiqina Anutufa qini qiminoo. Mifa minara iriseenoo mi faiqina auqu Isakarane qinau.

<sup>19</sup> Reea nammarifa marikinoo kaffaa amuaqu qaikinoo akoonaiqi moo maqanau. Dinni ani moodaa maraseenoo Yakooboonaasaa maqanau. <sup>20</sup> Maqaseenoo qinau. Anutufa idaaqira ainaina kaqi qiminoo. Maqee dinni qisauku taikasee dinni ani moodaa 6 maraunnara qini qifaaqi qiniara aidiannoo. Mifa minara iriseenoo mi faiqina auqu Seeburuna fee qinau.

<sup>21</sup> Mina aanaaqianna Reea nammarifa maanaaqa maqaseenoo Dinnaa nammari fee qinau.

<sup>22</sup> Miqooqari Anutufa Raseera nammarina innaaru qirana iriseenoo dadaaqufanoo faiqi maqarana amanaikinau. <sup>23</sup> Mifa amuaquqaika mafufanoo faiqi akoonaiqi maqaseenoo qinau. Anutufa qini qisaurirana taikkeenoo qini faiqi akoonaiqi qiminoo. <sup>24</sup> Raseera nammarifa minara iriseenoo qinau. Karaambaqqa qini faiqi moo akoonaiqi qimiani. Miqi qimaseenoo mi faiqina auqu Yooseefaa n ee qinau.

*Yakooboofa Rabannana faqa mina ainaini marunara ufaqu ufafa.*

<sup>25</sup> Raseera nammarifa Yooseefaana maqasoo kamuqoo Yakooboofa Rabanna maaqi qimasee qimaminoo qinau. Anee amanee qini quqasainaga qeeqa maaqai fua. <sup>26</sup> Qinee ani ainainammasaunana qimianna anaaseesa nari faiqi namu faqa qiminaqa maree fua. Qinee amiqimasee ani ainaina iunannara anee minara iri mariananoo.

<sup>27</sup> Rabannafa minara iriseenoo qinau. Qini afunee fannoo anira qima qimifaqa iriseeqa anee qini faqa marunnaqoo Anutufa qini ainaina amiqi amiqifanoo firaqoo kambiqaqano maridanoo. <sup>28</sup> Qinee minara iridaqa anee aneenna feefauruara qinaqa qinee ani amianaaura. <sup>29</sup> Yakooboofa mina iriseenoo kaffaa qimaminau. Anee qini

ainainirana oosana amiqimmasee irimariananoo. Qinee ani aanda u ainasaa rakisi mariafananoo qini rakisirana ameemaanai marida moomoo kambiqee irairaa imariqau. <sup>30</sup> Qinee aniafanna kari ani ainaina oodaa kai marinau. Qinee maaqoo ani maridaqa ani ainaina aiqamai auqaunanoo Anutufa dadaaiqifanoo firaanaikinoo maridanoo. Qinee maqee qeeqaree qianna ainainausa maraanaura.

<sup>31</sup> Miqi qima soofanoo Rabannafa irinoo nari qimaminau. Doo anee qiananoo naqifee masee feefauru ani amianauree. Miqi qufanoo Yakooboofa qinuu. Sia anee feefauru munnimma aina qini qimia. Qeeqa qiannana kai qimia. Qinee kaqi ani sipsipasaa rakisi marianana qini maa iriranara anee eedoo qinaqa ani sipsipasaa rakisianaura. <sup>32</sup> Qinee maqee ani sipsipauqa mariannai oonuree aiqama takoosa takoosira sipsipauqa faqa mimmi miqiranauqa faqa sipsipa aanaaqi ruduqariranauqa faqa maraanaura. Mi feerunara kai qini dididanoo. <sup>33</sup> Qinee andeeqasee maraanaura anee kasooaqee aneenna oonu reenana qafaa. Eekara arira sipsipa qinindiki marinana eekara fee dunduqarira mimmi fee qinindiki marinana qiniara qumuura miaanoo qia.

<sup>34</sup> Rabannafa mina iriseenoo asasa mandee qinuu. Eeoo maasa anee qianandeemmi-anaura. <sup>35</sup> Mi faasaana qumee kai mimmi akoona takoosa takoosa iranauqa faqa mimmi anaasee miqiranauqa faqa eekarasai runduqasai irana faqa runduqarira sipsipauqa faqa moodaanaki quqaseenoo nari faiqi namuura qufaqa misasaa rakisiqau. <sup>36</sup> Rabannafa Yakooboona maraandoo qimasee nari mimmi sipsipa mara mareenoo nari faiqi namusaa quqasoofaqa nianai qaaramoo afuru aanai faiqee oonuraaqaa irannai munu quqasee rakisi mariqau. Maree fifufanoo Yakooboofa akaqa sipsipauqa mafisoosasaa kai rakisi marinau.

<sup>37</sup> Rabanna sipsipasaa maqusai rakisida maridanoo saqari amimiuaqa ateeqaseenoo moodaa mau apata ruata aquseenoo eekara ari marutina qandaseenoo sipsipa nammari nee maruqoo rakiqanau. <sup>38</sup> Sipsipa mimmi nammari naidaqa miqoo ani raidaqa naafeeqaambaqaa rimariqau. Yakooboofa mi saqarisa sipsipauqa difaaniki nammari neemaruqoo rakiqaoofanoo marufaqa sipsipauqa nammari narara anireeqa mi saqarina qafaidaqa akoonauqa anaasee naafeeqaambaqaa riqeera rakianau. <sup>39</sup> Mimmiuqaindi miqoo mina qafaidaqa akoonauqa anaasee naafeeqasoofaqa akarakaurira aanaaqiua maqauqa. <sup>40</sup> Yakooboofa sipsipauqa nifiqeenoo akarakaurira mimmiuaqa maruqoo munusaina sipsipa akoonauqa akarakaurirana qafaidaqa anaasee sipsipa naafeeqasai faqa miqirana maqaqeeera nifiqee finau. Miqi marunannoo Yakooboofa akarakaurira aanaaqiua narindiki mareeqaida aaduma quqee marufanoo moomooki marinau. <sup>41</sup> Nifaaqauqa faqaa sipsipa faqa mimmi faqa naafee qaambaqaa rirara ufanoo Yakooboofa mi saqari asaanausa mareeqee nammari neemaruqoo rakiqeesoofaqa minakiaqa nidaqa naafeeqee mariqau. <sup>42</sup> Nimudaani aanaaqi ummooqukiqa nusa naafeeqara rufanoo Yakooboofa sia mi saqarisa rakiqanau. Miqimmasee marufanoo Rabanaindi amudaani aanaaqi ummooqukirafauqa kai marufanoo Yakoobooindi nifaaqauqa faqaasa amiqirauka kai mariqau. <sup>43</sup> Mi oosannanannai Yakooboofa moomoo akinaina faqaafa marinau. Mina sipsipa mimmi moomoo uqanna mariqau. Mina ainainira fasiqauqa faqa aanaaseeuqa faqa kammeeruqa faqa doonkiua faqa moomoo qumbiqauqa mariqau.

## 31

*Yakooboofa Rabanna sia qimamirai sandoo ufafa.*

<sup>1</sup> Yakooboofa irufaqa Rabanna faiqi namu misa Yakooboona ainaina moomoo qafamaseeqa aqidaqa qiqau. Yakooboofa maasa qikoonaindi aiqama mareeqee narinni quqeenoo. Yaindaraanee maa firaa qumiasanna mareenoo fee. Maasa qikoonaindi kai mareenoo. <sup>2</sup> Yakooboofa mi ufana iriseenoo quanda fufanoo Rabanna oori qafuofanoo sia oqai undee oori runinoo marufanoo qafanau.

<sup>3</sup> Mi kamuqoo Karaambaqaa Yakooboona qimaminoo qinuu. Doo findi finana aneenna akoona faqa aneenna ainaina maqai fua. Anee finaqa qinee ani faqa marianaura.

<sup>4</sup> Yakooboofa mi ufana iriseenoo sipsipa rakisi marunaindari Raseera nammarina faqa Reea nammarina faqa naaroo faqa oonu roofanoo qima nimirau. <sup>5</sup> Oqai inni nikoona oori sia runinoo mariufa maqee oori runifaqa qafaidaqa. Sia qiniara amiq amiqidanoo. Miqimmi marifaqa qini qikoona Anutufa qini faqa mariufa maridanoo. <sup>6</sup> Inneeqara irimariafanoo, qinee qeeqa afeekannai inni nikoona ainaini mariqifana. <sup>7</sup> Miqi mariafanano mifa qini qikaru qimaseenoo qisauku qara 10 kari qini feefauru quandaqandinoo. Miqi marifanoo Anutufa qifanoo sia qini mandaikamma qimaqeenoo. <sup>8</sup> Inni nikoona ainaina iafannana feefauru mina sipsipa nifaaqa takoosa takoosa irana kai mi aukuanna maqee marufaqa qinee mareeqee qeeqaindiki quqee mariqifana.



Inni nikoofa qini feefauruara nifaaqa akara kau rirausa kai maraannee qufaqa mina sipsipauqa mi aukuannei miqi ranauqa kai maqee marufaqa mareeqee qeeqara qeeqaindiki quqee mariqiafana. <sup>9</sup> Miqimma saafananoo Anutufa inni nikoona aandau aina mareeqeenoo qinindiki kai quqaqiseenoo.

<sup>10</sup> Mimmi sipsipa nariqa araraiki maru anaana qinee qaina qafaafananoo mimmi akoonauqa aanaaseeuqa naafeeqee marufaqa qafaqiafana. Mi akoonausa aiqama akarakau rirausa faqa nifaaqa takoosa takoosa irausa faqa anaasee naafeeqee mariqau. <sup>11</sup> Qinee qainasaa qafaafananoo Anutuna angiroo moo fannoo qini daaroofaqa qinee maqi qiaqiafana. <sup>12</sup> Foo qiafananoo qinau. Qafaa maa nifaaqa takoosa takoosira akoonauqa naafeeqaidaqa. Qinee Rabanafa ani mandaikamma amaqee marina qafamasee qunanoo maa ainainafa kambiqaidanoo. <sup>13</sup> Qinee ooqai Beeteera maqa maaqai ani afusaa koorooiafanna Anutusa maridaqa. Miqoo anee aaqoo auqara ooni rakiqasee oorifa fadameena minasaa adiasee qiniara qima afeekaikinau. Doo maqee indammamaree aneenna maqusai anirandee anee kambiqoonna maqanasaa fua. <sup>14</sup> Raseera nammarisa Reea nammarisa qimannimi soofaqa Yakooboona ufa iriseeqa qimamiqau. Sia maasa qikoona qumiasana aina kaqi marinaqa maasa maraanaura. <sup>15</sup> Mifa maaqandara aanaamuruara foora midanoo. Doo mifa maaqandasaa feefauru mara mareenoo doo nariki kai taikleenoo. <sup>16</sup> Anutufa maaqanda qikoona kinaana mareeqee maaqanda faqa maaqanda faiqi namu faqa nimifanoo maasaindi kamminoo maridanoo. Anutufa ani qimamindee ia.

<sup>17</sup> Yakooboofa misa ufa iriseenoo nari akoona maqai Kannaana maqasaa firara deedaqinau. Mifa nari aanaaqmaaka faqa nari faiqi namu faqa kammeeruqa saa quqasee ooqu mari fufanoo finau. <sup>18</sup> Yakooboofa nari mimmi sipsipa doonki kammeera aiqama Meesoopootamia maqusai marida maroo ainainausa aiqama mareeqee oorinni quqaseenoo doo nari inaaqianna Kannaana maqa maaqai finau.

<sup>19</sup> Rabannafa nari sipsipa asausi moosaa oonu aukirara fifufanoo Raseera nammarifa nari akoona maaqaki keeqa fufanoo nari akoona afunee ainaina maaqaki quqaqoonna qumee kai mara mareenoo kukeeqa mareenoo Yakooboona faqa sia qimamirai doo mara mareenoo nari afaaqi faqa finau. <sup>20</sup> Yakooboofa Rabannana akaru qimasee sia qimamirai quqasee finau. <sup>21</sup> Yakooboofa nari ainaina namu faqa mareenoo kai kaqi ufanoo finau. Fifi ufanoo Eeufarateesa nammari taqa mareenoo dinni afainni oonu ranau. Doo miqooqari Kiriata aaqana qaannai oori ubeekamafi finau.

#### *Rabannafa Yakooboona afaqeequ ufafa.*

<sup>22</sup> Qaarammoo faasaana aiqaroofanoo Yakooboofa sandoonara Rabanna qimamiqau. <sup>23</sup> Rabannafa minara iriseenoo nari aiku asauku aiqama nifiqee Yakooboona aanaaqiana afaqee finau. Dinni taikasee dinni oonu qaara marasee 7 afuru aanai fi faiqeenoo afaqee finoo oonu Yakooboona paqurinau. Kiriata aaqana moo amuaqu namusaa paqurinau. <sup>24</sup> Rabannafa aanai faiqaqee ufanoo mi eendanaki Anutufa qaina afunnareenoo qimaminau. Anee sia Yakooboona manda ufa amia.

<sup>25</sup> Yakooboofa aqaanasaa nari uiqaana maqa usakaseenoo marufanoo Rabannafa nari ainaina faqa oonu reenoo mifa faqa nari uiqaana maqa Kiriata amuaqu namusaa usakanau. <sup>26</sup> Usakaseenoo Rabannafa oonu reenoo Yakooboona qimaminoo qinau. Naqi fee ifanee qini qikaru qimaseenee qini qiraamuqmaaka rakiranakiara foora rarisammamaree sandeenee. <sup>27</sup> Naqi fee ifanee sia qima qimirai qikaru qimasee qumee quqasee sandeenee. Anee qini qima qiminaqau qinee idi namu faqa asasirana namu faqa piripunna faqa dukaanaa faqa aridaqau aiqani. <sup>28</sup> Anee sia qini qima qimianaqa qeeqa qinaiqi mara faqa qeeqa qiraamuna qara faqa nimooqa saanana nifiqee aniaqaana. Anee furufarira ainaina auqananoo. <sup>29</sup> Qinee ani mandaikamma amaqara afeeka marifaqa marunanoo eenda eendaki ani akoona Anutufa qini rafaqaqafu seenoo qinoo. Anee sia uqanna Yakooboona mandaika mamaqaa qifaqa sia mandaikamma amaqananuara. <sup>30</sup> Qinee iridaqa anee aneenna akoonna maqa maaqara oonu mafi iriananoo aundura dapikifana qini qisee sandaanano. Naqaa fee ifanee qini maaqaki rakisi maria anutusa ummuara mamaree aninane.

<sup>31</sup> Yakooboofa iriseenoo qimaminoo qinau. Qinee aniara nari araamuna qara rafiqaan-doo qimasee rufisee sandeeqa. <sup>32</sup> Ani maaqaki rakisi maria anutusa marainnana paqurimmaseenana kuqa arua. Doo qini qiku qisauku nifusaa qini ainaina moodaa moodaa mara quqaseenana aneenna ainaina paqurimmasee maraa. Yakooboofa Raseera nammarifa nari akoona Rabannana unnaqira anutusa ummuarunara sia irirai miqi qinau.

<sup>33</sup> Rabannafa Yakooboona uiqaana maqaki keeqa fufanoo randoosia sia paqurinau. Miqooqari Rabannafa Reea nammarina uiqaana maqaki keeqafi randoosia. Kafaa

miqooqari ainainira maanaaqagara uiqaana maaqaki faqa keeqafi randasee sia paqurinau. Miqooqari Rabannafa Raseera nammarina uiqaana maaqaki keeqafinoo randanau. <sup>34</sup> Raseera nammarifa Rabannana maaqasaa rakisi maru anutusa mareeqeenoo kammeera saririqa maaqaki quqaqoona uqeeraseenoo minaki kukeeqaseenoo minasaa ooqu faaqee marinou. Rabannafa Raseera nammarina uiqaana maaqaki aiqama ainainaki randasee qafoofanoo sia marinou.

<sup>35</sup> Rabannafa randeemarufanoo Raseera nammarifa nari akoona qimaminoo qinau. Oo qipoo sia qinee findi fuanana sia qini diqia. Qinee qimaaqai qafaidaqa sia findi fidaqa. Miqi qufanoo Rabannafa aiqama ainainaki randoosia sia paqurinau.

<sup>36</sup> Sia paqurufanoo Yakoofofa amambaina qimasee aanoo qidanoo qinau. Qinee nana aagaranee maree fee. Nana sandufee rukiasaunana aranaaqafanee qiniara randamaree qumidanee. <sup>37</sup> Anee qini ainainaki randeese doo fee aneenna ainaina paqurinanee. Doo mina mareeqeenana aneenna faiqi namu nifusaa faqa qini faiqi namu nifusaa faqa quqasee ufa qida qafaa, yafee andeeqeenoo fee.

<sup>38</sup> Qinee moodaa fasiqa aiku asauku taikasee 20 aukuaana ani ainaina imariqiafana. Mi kamuqoo ani sipsipa ani mimmi sia moo fannoo dapi maqee mariqau, amiqi kai mimariqau. Sia ani sipsipa akoona moo arusee naqiafana. <sup>39</sup> Kaasau faini ani sipsipa arusoofaqa qinee mina amudaani apata siamma ani uqafiqee mariqiafana qeeqaindi kai moo mareeqee mina amaaqa maqeeqa anindiki quqee mariqiafana. Ummuara fasiqa eendaki fee faasaana fee ummuara masoofana anee qiniara qunaqa qinee qeeqaindi mareeqee anindiki quqee mari qiafana. <sup>40</sup> Qinee moomoo kari ani ainaina imariafananoo suani darinoo eendaki suara darinoo miqi marufaqa sia faiqee mariqiafana. Miqidaqa ani ainainasaa rakisi mariqiafana. <sup>41</sup> Yakoofofa qimamidanoo qinau. Qinee moodaa fasiqa aiku asauku taikasee 20 aukuaana ani ainaina mariafanaua marida. Qisauku qara taikasee qikunooqu qaara faqa qaara faqa marasee 14 aukuaana ani araamuna qara mararara ani ainainiafaana maridaqa. Dinni taikasee dinni oonu moodaa marasee 6 aukuaana ani sipsipa mimmi mararara kaifaa ainaini qiafana. Miqi mariafanana anee qisauku qara taikasee 10 kari anee qini feefauruara qikaru maakaruu qimarinau. <sup>42</sup> Abaraqaammuna Anutufa qini qikoona Isakeena Anutufa sia qini dadaqinano anee qiniara kaqi samu fua qinaqau qinee kaqi samu fini. Anutufa qini ummaara faqa qini kadaapirirana faqa qiqafamaseenoo eenda eendaki nari ufa irirana ani aminoo.

#### *Yakoofofa Rabannasa moodaanakiku ufaa.*

<sup>43</sup> Rabannafa Yakoofofa mi ufana iriseenoo qinau. Maa ani anaqa qara qini qiraamuna qara maridaqa maa ani faiqi namu qini qinaiqi mara maridaqa maa ani sipsipa qinindi uqanna maridanoo, maa aiqama ainaina anee marana nuanafa aiqama ainaina maaqoo marifa qinindi kai maridanoo. Qinee sia amana qeeqa qiraamuna qara faqa qinaiqi mara faqa rafaqa fuanaura. <sup>44</sup> Doo maqee ani faqa moodaanaki ufa qirara deedaqidaqa. Anindiri ooni aaku aakumasaanoo mifa maasa moodaanaki kira ufara daaqoo auqaannoo.

<sup>45</sup> Yakoofofa minara iriseenoo eedoo qimaseenoo ooni firaatia qumaree kuradama seenoo daaqoo auqara ooni fee qinau. <sup>46</sup> Miqimaseenoo Yakoofofa nari ainainira faiqiuqara qufaqa ooni moomoo suqusee aaku aaku iqau. Miqimasee mi ooni aaku aaku irana aakaarinni oqumarifi narana naqau. <sup>47</sup> Namaseeqa Rabannafa mi oonisa auqureenoo Yageer Sahadutaa fee qimasee nari ufakiqari auqu ramasoofanoo Yakoofofa nari ufakiqari Gareeda fee qinau. (Mi nuquna oosana daaqoo auqara ooni fee qimasee nari ufakiqari auquraqau.) <sup>48</sup> Rabannafa Yakoofofa qimaminoo qinau. Maa ooni aaku aaku irafa anindiri daaqoo auqarafa mariannoo. Minara mi maqusana auqu Gareeda fee qianaura. <sup>49</sup> Rabannafa kafia maaqi qinau. Karaambaiqa fannoo maaqanda daraaniananoo mina afu fannoo maasasaa mariani. Miqi qimaseenoo mi maqusana auqureenoo Misipaa fee qinau. <sup>50</sup> Rabannafa maaqi qinau. Anee qini qiraamuna qara mandaikamma nimaqeenaree moo anaasee fee mareennaree, qinee sia minara iriananoo Anutufa anindirisa rakisidanoo. <sup>51</sup> Maaqoo qinee ooni aaku aaku maqunanoo anindiri qara qambaana maridanoo. Maaqoo daaqoo auqara ooni rakiqarafa faqa maridanoo. <sup>52</sup> Maa ooni aaku aaku irafa faqa rakiqarafa faqa anindiri daaqoo auqarafa maridanoo. Qinee sia mina fiaqaree ani aruanaura. Anee faqa sia mina aiaaqaree qini darua. <sup>53</sup> Abaraqaammuna Anutufa faqa Naqoorana Anutufa faqa maasa qambaana andeeqa qisaannoo. Rabannafa miqi qufanoo Yakoofofa qinau. Qini qikoofa Isakeefa innaaru qimamaqee mari Anutuna auqusaa qimasee afaqaanauree qimasee qima afeekaiquinau. <sup>54</sup> Miqi qimaseenoo Yakoofofa aanda aruseenoo mi aqaannasaa Anutuna aanda tatufusee suqaminou. Suqa amiseenoo Yakoofofa nari aiku asauku naaramasoofaqa moodaaqoo ooqu mari fufaqa mi aandauna ataraasa

naqau. Namasee mi aaqannasaa faiqqaqau. <sup>55</sup> Kananaana findifufanoo Rabannafa nari anaiqimara faqa aramuna qara faqa nimooqa namasee nimandamasee amaaqa finau.

## 32

*Yakooboofa Eesauna oori qafarara deedaqu ufafa.*

<sup>1</sup>Yakooboofa miqooqari findi fufanoo nari anaukoo unnai aanai fimaru fanoo Anutuna angiroouqa aanai ani paquriqau. <sup>2</sup>Yakooboofa nindafamaseenoo qinai. Maa maqa maaqafa Anutuna uigaana maqusa maridanoo. Miqi qimasee mi maqusana maqureenoo Maqannaimmee qinai.

<sup>3</sup>Yakooboofa nari faiqi namu qaaramoo ufa maree nari afasaafa Eesau funnai fuqeera niiqooqafa Eedoomma maqa maaqai fiqau. <sup>4</sup>Miqoo qini qifasaana paqurimmasee qini maa ufana qimamiyaqa. Qinee Yakooboosa ani ainainira faiqi maaqi qimasee ani Eesauna qini uriqararana qimamidaqa. Qinee Rabannana faqa maridaqa anirara masaidaqa marifaqa maqee anidaqa. <sup>5</sup>Qinee burimmakau faqa doonkiuqa faqa sipsipa faqa mimmiuqa faqa ainainira faiqiuqa faqa faqaasa maridaqa. Qinee aniara ufa quqaidaqa qini uriqararafa qini maa ufafa ani asoamamaqaanifeera qidaqa.

<sup>6</sup>Ufa mareefu fasiqausa oonu randee aniree Yakooboona maaqi qimasee qimamiya qiqau. Doo maasa ani afasaana qimamisaunanoo mifa nari ainainira fasiqauqa maqi handareeta 400 namu faqa maasa inaaqianna anidanoo.

<sup>7</sup>Yakooboofa mi ufana irufanoo aaququqoofofanoo moomoo irirana maranau. Miq-ufanoo nari sipsipauqa faqa mimmiuqa faqa burimakauqa faqa kammeeruqa faqa qaaraki raina quqanau. <sup>8</sup>Maaqi qimasee qimirinai. Eesaufa anireenoo moo usiranaki narinaqa moo usiranakiqari amana sandeefaranoo. <sup>9</sup>Miqimmasee Yakooboofa maaqi qimasee innaaru qinai. Oo Anutu, qini qinaakuna Abaraqammana Anutufa qini qikoona Isakeena Anutufa qini innaaru iria. Karaambaiga anee qini qima qimiananoo aneenna maqa maaqai aneenna ainainiannai finaqa qinee aiqama ainaina andeeqa aisaanuranoo fee qinai. <sup>10</sup>Oo Anutu anee qini amiqi amiqimma qisarana faqa ani mapukira dadaaqiranara faqa irunanoo uriqaraifaqa qinee oorudupiqa maridaqa. Qinee ooqai Yooradanna nammari qeeqa saunu kai uqirausa taqaaqiafana doo maqee qinee qaaraki rainarasa faqa anidaqa. <sup>11</sup>Qinee qeeqa qifasaana Eesauna asaukukinaana asumu mara quqaqisaanneera innaaru qidaqa. Qinee minara rufiidaqa. Mifa anireenoo maasa faiqi anaasee faqa aiqama daru taikaandoora rufiidaqa. <sup>12</sup>Anee maaqi qimasee qiniara qima afeekaikinai. Ani aiqama ainaina andeeqamma aisaanuranoo fee qinai. Ani moomoo faiqi asumu amianaqa sia amana moo fannoo asaana ruannoo, nukudara foora sia kasoo uqanna marifaranoo fee qinai.

<sup>13</sup>Yakooboofa miqi qimaseenoo innaaru qimaseenoo mi eendanaki miqoo faiqeenoo iaqoofofanoo nari aandau Eesauna amiraree qimasee raina quqanau. <sup>14</sup>Mifa mimmi anaasee 200 faqa mimmi akoono 20 faqa sipsipa anaasee 200 faqa sipsipa akoono 20 faqa raina aduma quqanau. <sup>15</sup>Miqimmaseenoo kaifaa kammeera anaasee 30 faqa nari aanaaqi naamma neemarsa faqa burimakau anaasee 40 faqa akoono 10 faqa doonki anaasee 20 faqa akoono 10 faqa raina quqanau. <sup>16</sup>Yakooboofa raineeqeenoo aandau oosana oosana naadu naadu kai quqaseenoo nari ainaini maru faiqisa moodaa moodaa mareeqeenoo minauqasaa rakisiaqeera quqanau. Quqaseenoo maaqi qimasee qimannimino qinai. Innee qini qifunni fidaqa adaraika masaidaqa niana niana maridaqa fuqa.

<sup>17-18</sup>Miqi qimaseenoo Yakooboofa indaarufu faiqina qimaminoo qinai. Qini qifasaafa Eesaufa paquri maseenoo irainana yafee ani uriqararafa maridanoo fee yaifee anee fidanee yana aandaqqee anee maree fidanee, qinana anee maaqi qimasee nari qimamia. Maa ainausa ani ainainira faiqi Yakoobooonaindi maridanoo. Mifa nari uriqararana Eesauna amianne qimasee quqasaiifaqa maree anidaqa. Yakooboofa nari inaaqianna anidanoo mifoo qia.

<sup>19</sup>Yakooboofa indaarufu faiqina qimamundee kai minoo mina aanaqiiana fusa faqa miqi kaimmasee qimanniminai. Innee Eesauna paqurimmasee miqi kaimmasee qimamiyaqa. <sup>20</sup>Innee maaqi qiaqa. Eeoo ani ainainira faiqi Yakooboofa inaaqianna anidanoo mifoo qiaqa. Yakooboofa nari kai oonu mafi irinoo qinai. Qinee maa ainainausa amianannanoo mina irirana quandasanaanoo qiniara amiqi amiqiani. Qinee mina paqurimasanaanoo aqbee mifa qini numoo minniqisaannoo. <sup>21</sup>Eesauna amaqqoo ainainausa indaarufu fufanoo doo nari miqoo mi uigaana maqusanaki faiqanau.

*Yakooboofa Peenieera maqa maaqai angiroo faqa nari qumaree nari qumaree qu ufafa.*

<sup>22</sup>Mi eenda amuqusanai Yakooboofa findi fufanoo nari anaqaqara faqa nari ainainira anaasee qanda faqa nari faiqi namu qisaukuqara taikasee qikunni ooqu moodaa marasee

11 nifiqamareenoo Yabooka nammari fitaqamareenoo muqu afainai munu nisanau. <sup>23</sup> Munusee niqamasoofaqa fufanoo nari aiqama aandaufa faqa mara quqasoofaqa misa faqa taqaqau. <sup>24</sup> Taqa nimaqaseenoo narirara dinni afainni kaqi marinau. Marufanoo faiqi moo fannoo anireenoo aitata fufanoo Yakoofoona qumaranau. Uaqeeidanoo nari rudammiqi nari rudammiqi idamarufanoo iaqarafa adeedi ranau. <sup>25</sup> Sia mi fasiqafa Yakoofoona uraaqaranau. Miqi usianoo asauku samu Yakoofoona upisuna aranaiqi arinau. Miqubaqa Yakoofoona upisuna arufanoo amudaani ootuparafa aikatamafufanoo raqee raqee inoo ninau. <sup>26</sup> Iaqoofanoo mi fasiqafa Yakoofoona qimaminau. Doo qini quqasainaqa fua, doo iaqarafa adeedi reenoo. Yakoofoofa iriseenoo qinai. Sia ani quqaanaura. Anee qini qifaqooqa qima qimaqasainaqa quqaanaura.

<sup>27</sup> Mi fasiqafa Yakoofoona qimaminoo qinai. Ani auqu yafee. Aneenna auqu rainaqa iria. Yakoofoofa qinai. Qini duqu Yakoofoosa maridaqa.

<sup>28</sup> Miqi qufanoo mi fasiqafa qinai. Maqee maqooqari Yakoofoofa taikaannoo ani auqu Isaraerara marinnaranoo. Anee Anutuna faqa faiqi faqa aitatafi qumaraannannoo uriqararafa marianaqa minara ani auqu Isaraeera fee qidaqa.

<sup>29</sup> Miqi qimasoofanoo Yakoofoofa mi fasiqana qimaminoo qinai. Aneenna auqu qimaqimia. Miq qufanoo mi fasiqafa qinai. Nanaree anee qini duqu irirara iraidanee. Miqi qimaseenoo Yakoofoona afaqooqa qimama qaseenoo doo quqaseenoo finai. <sup>30</sup> Mi fasiqafa fifufanoo Yakoofoofa qinai. Qinee Anutuna oori qafamaseeqa sia kuqiqa kaqi maridee qimaseenoo miqoo auqureenoo Peenieera fee qinai. <sup>31</sup> Suanu afu ururoofanoo Yakoofoofa Peenieera maqa quqaseenoo upisuna aidafi marufanoo reetaa reetaa qinoo finai. <sup>32</sup> Miqooqari oosana arasee Isaraee maqannaasa sia aanda upisunakinaa amaqi neemariqau. Maqee faqa sia naidaqa. Anutuna angiroo fannoo Yakoofoona upisunaki arunara iridaqa sia naidaqa.

### 33

#### *Yakoofoofa Eesauna paqurinau.*

<sup>1</sup> Yakoofoofa qafoofoano Eesaufa 400 fasiqa faqa aninau. Yakoofoofa mina qafamaseenoo nari faiqi namu rainasee Reea nammarina faqa Raseera nammarina faqa ainainira anaasee qaraqanda faqa niminau. <sup>2</sup> Nimiseenoo indaaruu nari ainainira anaasee qara faqa nari faiqi namu faqa niqoofofa qifau. Misa ninaaqianna Reea nammari faqa nari faiqi namu faqa finai. Inaqianna uqanna Raseera nammari faqa nari faiqi Yooseefaana faqa finai. <sup>3</sup> Yakoofoofa misa noorinni indaaruu finai. Oonu reenoo dinni taikasee dinni oonu qaara marasee kari maqasaa mapaminoo fifufanoo nari afasaafa maruqoo oonuranau.

<sup>4</sup> Eesaufa Yakoofoona oori qafamaseenoo sandamammareenoo ani kaqaramma qumaraseenoo amooqananau. Miqanda aiqama qara qiki raqaqau. <sup>5</sup> Qiki raqaseenoo Eesaufa quanda fufanoo Yakoofoona faiqi anaasee nindafamaseenoo qinai. Maa ani faqa aniasa yausee maridee. Qufanoo Yakoofoofa qinai. Oo uriqararafa maa faiqi anaaseenoo Anutufa qini amiqi amiqimma qimaqeenoo.

<sup>6</sup> Miqi qimarufanoo Yakoofoona ainainira anaaseeqara nari faiqi namu faqa Eesauna oorisaani ninuka tuqu naumoo amisee reendeeniqau. <sup>7</sup> Miqanda ninaaqianna Reea nammari faqa nari faiqi namu faqa anireenoo miqinai. Mina anaqaqanna uqanna Raseera nammari faqa nari faiqi Yooseefaana faqa anireenoo miqikai inau. <sup>8</sup> Miqima soofanoo Eesaufa Yakoofoona maqi qimasee qimaminai. Faasai qafaunna aandausa oosana naqa fee inoo maridano fee qufanoo Yakoofoofa qinai. Ani aqoondikiraree qimasee kaqi ani amidaqa.

<sup>9</sup> Miqi qufanoo Eesaufa nari qimaminoo qinai. Qinindi moomoo maridanoo aneaindi aneenna kai maraa.

<sup>10</sup> Miqi qufanoo Yakoofoofa qinai. Qinee ani aqoondikiqa amunna ainainausa kaqi maraa. Anee qini kaqa aqoondi kiannanara qinee ani oori Anutuna ooriaru foora qafaidaqa. <sup>11</sup> Qinee ani amiraree qimasee maree anunna ainainausa maraa. Anutufa qini amiqi amiqimma qiseenoo qini didimari aiqama ainainausa qiminoo. Yakoofoofa maraanifeera afeekaiki marufanoo Eesaufa maranau.

<sup>12</sup> Eesaufa Yakoofoona qimaminai. Doo uqeeraina anindiri fua qinee ani oorinni fuanana anee qini qinaaqianna ania.

<sup>13</sup> Qufanoo Yakoofoofa qinai. Oo qini uriqararafa anee iria, qini faiqi namu umooqukiqa mariafaqa qinee sipsipa faqa misa anaqaqura faqa iridaqa. Misa moodaa faasaana rarisafa fimarianaqa aiqama aandaufa kuqifaranoo. <sup>14</sup> Anee indaaruu finaqa qinee ani afaqee kasooaqee qeeqa aandaufa faqa faiqi namu faqa fifiinaqa Eedoomma maqa maaqaki ani paqurianaaranoo.

<sup>15</sup> Miqi qufanoo Eesaufa qinau. Doo amana qini faiqi namu akaqausa ani dadaaqqi fifaranoo. Qufanoo Yakooboofa qaoo qinoo qinau. Qinee ani aqoondikunnanara minara kai firaa ainainee qidaqa. Doo amana qeeqa kai fuanauranoo.

<sup>16</sup> Eesaufa mi ufana iriseenoo doo mi faasaana kai anirandee narí maqa maaqai Eedoomma maqa maaqai finau. <sup>17</sup> Miqufanoo Yakooboofa Sukoota maqa maaqai oonureenoo narí maaqa faqa narí aanda ugaana faqa usakanau. Minara mi maqusana augureenoo Sukoota fee qinau.

<sup>18</sup> Yakooboofa Meesoopootamia maqa maaqaindari oonurandee amiqimmaseenoo Kannaana maqa maaqai Seekeemma maqusaki anireenoo narí uiqaana maqa mi maqusana adeedi usakanau. <sup>19</sup> Usakaseenoo Yakooboofa mi maqana Amoorana Seekeemana akoona aiku asauku unnai wan handareeta 100 siruaa munnimmanoo feefaurinau. <sup>20</sup> Feefauru maseenoo tatufirana sugara qainda auguseenoo mi kaqikaa maqusana augureenoo Eeraa fee qinau. Mi auquna oosana Isaraee maqannaasa Anutu fee qinau.

## 34

### *Seekeemmafa Dinnaa nammarina mandaikamma amaqanau.*

<sup>1</sup> Moo kari Dinnaa nammarifa Yakooboosa Reea nammarisa niraamuna fannoo Dinnaa nammarifa Kanna maqanna aanaaseeuqa nindafaanee qimaseenoo finau. <sup>2</sup> Seekeemmafa Amoorana amaaku Qifina aiku asaukukinaafa mi maqa maaqanakinaasa uriqararafa Dinnaa nammarina aanai paqurimaseenoo rarisanau. <sup>3</sup> Mifa qafoofanoo Dinnaa nammarifa kaaqa amiqirafa marufanoo amuqusa mandaikufanoo amiqira ufannoo mi manaqana amuqusa reendenianee qimasee amiqira ufauga qinau. <sup>4</sup> Seekeemmafa narí akoona Qamoorana qimaminau. Anee maa manaqana feefaurumma qiminaga qinaaqara maraa.

<sup>5</sup> Yakooboofa narí araamuna Dinnaa nammarina rarisoona iriseenoo kasoo inoo marinau. Narí faiqi namu narí aandausaa rakisi marusa nianai marufanoo nifeesi marinau.

<sup>6</sup> Seekeemmana akoofa Amoorafa Yakooboona faqa ufa qirara finau. <sup>7</sup> Oonuroofaqa kai Yakooboona faiqi namu aandausaa rakisiusa aniraqau. Misa Dinnaa nammarina rarisoona irufanoo sia faiqi auqaqaa ira ainaina marufaqa kaaqa niranaqeenoo nifai sandurinau. Seekeemmafa Yakooboona araamuna rarisoona Isaraee maqannaasa nuqu mara maree quminau.

<sup>8</sup> Qamoorafa maaqi qimasee Yakooboona qimaminau. Qini qimaaku Seekeemmana irirafa ani araamunara firaagoo aquffifaqa ani qimamidaqa. Amanee mina maraannoo fee. <sup>9</sup> Sainaga maasa moodaanaki kira ufa qimasaanaqa kaqi ani maqanna faqa qini maqanna faqa kaqi narí maree narí maree iaqa. <sup>10</sup> Miqi mandaanaqa innee maa maqanasaa maridaqa kaqi dapi maa maqa maaqanaki oonuree aniree idaqa maqa akaua mariaqa. <sup>11</sup> Seekeemmafa Dinnaa nammarina akoona faqa asoogmaaka faqa qimannimino qinau. Innee qini didi marindee masaifaqa inni nidi mari ainaina nimiana. <sup>12</sup> Inni nidi mari ainainara qimaqimifaqa nimiana. Firaa feefauruara qifaqa nimiana. Innee qiniara mina maraannee qimasee innee irafandinna ainaina kai nimiana.

<sup>13</sup> Miqi qimasooafa Yakooboona faiqi namu narí nisookina rarisoona iriseeqa akaru qira ufa Seekeemmana faqa mina akoona Amoorana faqa qimannimiqa. <sup>14</sup> Maaqi qimasee qimamiqa. Maasa sia amana qeeqa dauna nifaqa ati sia aukiraua nimiana. Miqifa maasa firaagoo qisauroora. <sup>15</sup> Innee maasa daanna reeqa inneeqa faiqi namu nifaqa ati aukusaifaqa minara kai maasa eedoo qianauranoo. <sup>16</sup> Miqimmasaifaqa maasa inniara eedoo qimasee inni faqa narí maree narí maree ifaranoo. Maasa inni qambaana maridaqa inni faqa moodaa maqanna mariana. <sup>17</sup> Innee sia mi ufanara eedoo qimasee nifaqa ati ateekaifaqa maasa qeeqa dauna afiqamaree doo fuanau.

<sup>18</sup> Mi ufasara Qamoorafa faqa mina amaaku Seekeemmafa faqa iriseeqa amanee qiqau. <sup>19</sup> Seekeemmafa kai kaqi uqanna inoo misa qimamundee inau. Mifa Yakooboona araamunara aidi marunara miqinau. Seekeemmafa narí aiku asaukukiqari kaaqa uriqararafa marinau. <sup>20</sup> Amoorafa narí amaaku Seekeemmasandiri ufa suqimaru maqusanasaa faandaaura kooqiki oonuree narí maqusanaki marusa maaqi qimasee qimannimino. <sup>21</sup> Maa fasiqausa aqoondiuga maridaqa. Saifaqa maa maqanasaa maridaqa mana mana iqa nuaqa. Maa maqafa firaafa maridanoo. Misa faqa amana marifaranoo. Maasa misa niraamuqmaaka maraanaqa misa faqa maasaindi mareefaranoo. <sup>22</sup> Maa fasiqausa maasa qambaana marirara eedoo qidaqa moodaa mariranaki mariranara eedoo qidaqa. Maasa misa naanna reeqa qeeqa faiqi namu akoonaiqiuqa

nifaaqa ati ateekaaqeera qidaqa. <sup>23</sup> Maasa miqianaqa misaki sipsipa burimakau aina marifa maasaindi kammiannoo. Anifaqa eedoo qianaqa maasa qambaana mariaqa.

<sup>24</sup> Aiqama mi maqusanakinaasa Qamoorana faqa Seekeemmana faqa ufa iriseeqa eedoo qimasee aiqama akoonaiqi qisakoosa nifaaqa ati auku aqiqau.

<sup>25</sup> Qaarammoo faasaana aiqaroo faqa nifaaqa ati aukuqoosa firaqoo nammuana nidafi maru faqa Yakoo boona amaaku qara Simee onafa faqa Reefifa faqa miqanda Dinnaa nammarina asooki qanda nari faaqaana qara mara maree umee kai Seekeemmana maqusai ooru reeqara aiqama faiqi kumaaraa naru taikaqau. <sup>26</sup> Qamoorana faqa Seekeemmana faqa narusee Dinnaa nammarina Seekeemmana maaqakinaana afiqamaree doo quqasee fiqau. <sup>27</sup> Narusoofaqa Yakoo boona faiqi namu akaqausa inaaqianna oonu reeqa nari nisookina rarisoonaa akiqara mi maqusanakina aiqama ainaina maraqau. <sup>28</sup> Misa sipsipauqa faqa burimmakauqa faqa doonkiuqa faqa aiqama ainaina mi maqusanaki maruna faqa mi maqusana atiqara maru ainainausa aiqama maraqau. <sup>29</sup> Misa aiqama amiqira ainaina kai maraqau. Aiqama faiqi anaasee faqa maraqau. Aiqama maaqakinaa ainainauqa faqa maree fiqau.

<sup>30</sup> Yakoo boofa miqunara irinoo Simee onna faqa Reefina faqa maaqi qimasee qimanniminau. Innee qara qini ummaarakki quqaqisaafanoo. Kanna maqannaasa faqa Peerisaa maqannaasa faqa aiqama maa maqa maaqanaki mariasa qiniara fidiqaammifaranoo. Qini faiqi sia moomoo mariafaqa, misa aiqama moodaanaki aniree qini dariqa aiqama maasa faiqi anaasee kuridi nimaqee faranoo. <sup>31</sup> Yakoo boofa miqi qufaqa miqanda nari qimamiqa qiqau. Maasa sia qeeqa qisookina quqaqaanaqa aanasaa aanaaseera foora kaqi maraqau nifaranoo.

## 35

### *Anutufa Beeteera maqusaki Yakoo boona amiqira afaaqooqa aminau.*

<sup>1</sup> Mi fasannai Anutufa Yakoo boona qimaminoo qinau. Anee doo findi finana Beeteera maqa maaqaki oonu maria. Anee aneenna afaana Eesaunara rufiasee sandoonaga ani afusaa kooroo iafanna Anutusa tatufirana suqaqimira qainda miqoo oonuree auqa.

<sup>2</sup> Yakoo boofa iriseenoo nari aiku asauku faqa nari faqa marusa faqa qimanniminoo qinau. Moo maqannaasa unnaqira anutusa uaqeeianauqa mara aquaqa. Mara aquseeqa inneeqa nifaaqa anukamasee amiqira qamunna afisuaqa. <sup>3</sup> Maasa maaqooqari quqasee Beeteera maqa maaqai oonureeqa qini ummaara aukuna dadaaqi mari Anutuna qinee aiqama atinai nunanoo qini faqa mari Anutuna tatufirana suqara qainda auqanaurano. <sup>4</sup> Miqi qimasoo faqa misa aiqamausa iriseeqa nariqa moosaqaraa unnaqira anutusa maraqa nuna faqa naaqooki quqee maru fidinaanuna faqa Yakoo boona amufanoo umareenoo Seekeemma maqusaki arookasa aqa maqa indufusee minaki akundanau. <sup>5</sup> Akundamaseenoo Yakoo boofa faqa nari faiqi namu faqa doo quqasee fufanoo firaa rufiarafa mi saqanna maru maqusausaki maru fasiqausa rafaqaqafu faqa sia nifaqasee nariqau.

<sup>6</sup> Yakoo boofa aiqama nari faiqi namu faqa fifufanoo Rusa maqusa ki Kannaana maqa maaqaki oonuranau. Maqee mi maqusana auqu Beeteera fee qidaqa. <sup>7</sup> Mifa miqoo oonureenoo tatufirana suqara ooni qainda auquseenoo mi maqusanaki Anutufa uainaina afaafau reenoo Beeteera fee qinau. Yakoo boofa ooqai nari afaaanara rufiasee sandeenoo miqoo aniroofanoo Anutufa miqoo mina afusaa koorooquqoo marunara auqureenoo Beeteera fee qinau.

<sup>8</sup> Miqi qimasee miqoo marufanoo Reebeeka nammarina ainainira maanaaqa Deeboraa nammarifa kuqufu faqa arookasa ameemaanai suani afu ataaqee qaannai Beeteera maqusa dinni atinai akundaqau. Akundamasee mi maqusana auqureenoo ikiragara saqari fee qiqau.

<sup>9</sup> Yakoo boofa Meesoopootamia maqa maaqaindari oonu randee ani marufanoo Anutufa kaifaa mina afunni kooroommafufanoo amiqira afaaqooqa qimamaqanau. <sup>10</sup> Miqimaseenoo Anutufa qimaminau. Ani auqu Yakoo boofa maridanoo, maqee maaqooqari oosana arasee Isaraeerafa marinnaranoo. Miqi qimaseenoo Anutufa mina auqureenoo Isaraeeranee qinau.

<sup>11</sup> Miqi qimaseenoo Anutufa kafa Yakoo boona maaqi qimasee qimaminau. Qinee aiqama afeeka faqaa Anutusa maridaqa qimamidaqa. Anee moomoo faiqi faqaafa maria. Akaqa maqannaasa ani aiku asaukukiqari marifaranoo. Anee karaambaiquqa ninaakufa marinnaranoo. <sup>12</sup> Qinee Abaraqaammanna faqa Isakeena faqa nimiafanna maqa maaqana ani faqa ani aiku asauku kasooqaqee kambiqainausa faqa niminaura. <sup>13</sup> Anutufa miqi qimaseenoo Yakoo boona qimamiseenoo doo quqaseenoo finau.

<sup>14</sup> Yakooboofa mi maqusana Anutufa qimamuqoo miqoo ooni marasee daaqoo auqaanifee qimaseenoo rakiqaseenoo uainna nammari qumareenoo mi oonina adia amaqaaseenoo oorifa fadameena faqa adianau. <sup>15</sup> Miqimasee mi maqusana auqu Beeteera fee qinau.

*Raseera nammarifa eeraqanu ufafa.*

<sup>16</sup> Yakooboofa nari faiqi namu faqa Beeteera maqusa quqasee Eefarataa maqusai fuanee qimasee aanai fimarufanoo Raseera nammarina faiqi maqarafa arinai. Arufanoo firaqoo uqanna aupuranau. <sup>17</sup> Raseera nammarina aidafirafa kaaqa mandaika uqanna ufanoo mina dadaaqa maru aanaaseefa qinai. Raseera sia rufiaa, moo akoonaiqi maqaananoo. <sup>18</sup> Maqaseenoo Raseera nammarifa doo kuqiraridanoo aanna taikee marufanoo mi faiqina auqureenoo Beenooni fee qinai. Mina akoofa auqu reenoo Beensaminna fee qinai.

<sup>19</sup> Raseera nammarifa kuqufufaqa Eefarataa maqusai fimaru aannana afainni akundaqau. Maqee miqoo Eefarataa maqusara Beeteereeqemma maqusa fee qidaqa. <sup>20</sup> Yakooboofa aaqoo auqaanifeera ooni miqoo rakiqanau. Maqee kaqi mi oonifa Raseera nammarina madika mariuqoo maridanoo mi madikanara kooroidanoo.

<sup>21</sup> Miqooqari Isaraeerafa findifinoo moo maqa maaqai Eedeera kisaqa ooni maaqa usakaqona dinni atinni nari uigaana maaqa usakanau.

*Yakooboona faiqi namu nuqu.*

*(1 Stori 2:1-2)*

<sup>22</sup> Isaraeerafa mi maqa maqaanaki marufanoo Reebeennafa nari akoona anaqa Biriqaa nammarina nari ainainira maanaqa maraqona sakasee faiqanau. Isaraeerafa mi ufana irufanoo arana qanau.

Isaraeerana faiqi namu qisauku qara taikasee qikunni ooqu qaara marasee 12 mariqau. <sup>23</sup> Reea nammarina faiqi namu maaqimmiqa mariqau. Reebeennafa indaarugaafa Yakooboona ooga faiqi marinai. Mina aanaaqianaafa Simeeoonafa faqa Reefifa faqa Yudafa faqa Isakaarafa faqa Seeburunafa faqa mariqau. <sup>24</sup> Raseera nammarina faiqi namu Yooseefaasa Beensaminna mariqau. <sup>25</sup> Raseera nammarina ainainira maanaqa Biriqaa nammarina faiqi namu Dannaafa faqa Napatarifa faqa mariqau. <sup>26</sup> Reea nammarina ainainira maanaqa Siripaa nammarina faiqi namu Kadafa faqa Aseerafa faqa mariqau. Mi faiqi namusa aiqama Meesoopotamia maqa maaqai kambijaqau.

*Isakeefa kuqu ufafa.*

<sup>27</sup> Yakooboofa nari akoofa Isakeefa unnai finai, Mamareena maqusaki Qeeboorona maqusa aqa Abaraqaammafa faqa Isakeefa faqa mariuqoo finai. <sup>28</sup> Isakeefa 180 aukuana maranau. <sup>29</sup> Maraseenoo kuqufufaqa mina faiqi qara Eesausa Yakooboosa akundaqau.

## 36

*Eesauna aiku asauku nuqu.*

*(1 Stori 1:34-37)*

<sup>1</sup> Eesauna aiku asauku marusa maaqimmiqa mariqau. Mina moo auqa Eedoomma fee qimariqau.

<sup>2</sup> Eesaufa Kannaana maqannaa aanaaseeuga maranau. Indaaruu maroo anaaseena auqu Adaa nammarifa marinai. Mifa Qeeta maqannaa fasiqa Eeroona araamuna maranau. Mina aanaaqiana maroo anaaseena auqu Ooqooribamma nammarifa maranau. Mifa Qifita maqannaa fasiqa Sibeeoona amaaku Annaana namarina araamuna maranau. <sup>3</sup> Mina aanaaqianna maroo anaaseena auqu Baseemata nammarifa marinai. Mifa Isamaeerana araamuna Neebaiootana asookifa marinai.

<sup>4</sup> Eesauna indaarugaa anaasee Adaa nammarifa faiqi Eerifasana maqanau. Moo anaasee Baseemata nammarifa Reueerana maqanau. <sup>5</sup> Moo anaasee auqu Ooqooribamma nammarifa Yeeusana faqa Yaramana faqa Koorana faqa maqanau. Eesauna mi faiqi namusa miqimmasee Kannaana maqasaa kambijaqau.

<sup>6</sup> Eesaufa nari aanaaqmaaka faqa nari faiqi namu faqa nari araamuqmaaka faqa aiqama mina maaqaki mariusa faqa aiqama nari aandauga faqa aiqama nari qumiasana Kannaana maqusai maridanoo maraqona aiqama mara mareenoo Yakooboofa maruqoo qari nianasaa moo maqa maaqai finai. <sup>7</sup> Eesaufa faqa Yakooboofa faqa maru maqafa sia amana misa dadaaqaqaa qufaqa Eesaufa quqasee moosaa finai. Misa kaaqa moomoo aandau ainaina marufaqa minara sia amana moodaanaki mariqau. <sup>8</sup> Eesaufa Eedoomma maqa maaqakina amuaqu namusaa marinai.

<sup>9</sup> Eesauna aiku asauku maaqimmiga mariqau. Misa Eedoomma maqannaasa ninaakusa marinau.

<sup>10-13</sup> Eesauna anaafa Adaa nammarina amaaku moodaa Eerifasafa marinau. Eerifasafa moodaannai qisauku faiqi maqanau. Teemmanafa faqa Oommarafa faqa Seefoofa faqa Katammafa faqa Keenasafa faqa mariqau. Moo anaasee Timinaa nammarinasaa moodaa akoonaiqi Amareekana maqanau. Eesauna moo anaasee Baseemata nammarifa akoonaiqi moodaa Reeueerana maqanau. Reeueerafa qaara faqa qaara faqa faiqi akoonaiqi maqanau. Naqatana faqa Seeraana faqa Sammaana faqa Misaana faqa maqanau. <sup>14</sup> Eesauna moo anaasee Ooqooribamma nammarifa Anaana aramuna marinau. Anaafa Sibeeoona amaaku marinau. Mi anaaseefa faiqi qaaramoo maqanau. Yeeusana faqa Yarammana faqa Kooraana faqa maqanau.

<sup>15-16</sup> Miqimmasee Eesaunakiqari aruaki kambiqaarusa mariqau. Eesauna ooqa faiqi Eerifasafa maa maqannaasa ninaakufa marinau. Teemanaa maqannaasa faqa Oomaraa maqannaasa faqa Seefoo maqannaasa faqa Keenasaa maqannaasa faqa Koora maqannaasa faqa Katamaa maqannaasa faqa Amareeka maqannaasa faqa ninaakufa marinau. Misa aiqamausa Eesauna anaafa Adaa nammarinakiqari kambiqaarusa mariqau. <sup>17</sup> Eesauna amaaku Reeueerafa maaqimmasee maqannaasa ninaakufa marinau. Naqataa maqannaasa faqa Seeraa maqannaasa faqa Sammaa maqannaasa faqa Misaa maqannaasa faqa ninaakufa marinau. Aiqama misauqa Eesauna anaafa Baseemata nammarinasaaqari kambiqaarusa mariqau. <sup>18</sup> Kaifaa maa maqannaasa Eesauna anaafa Ooqooribamma nammarina aramuna Annaa nammarinasaaqari kambiqaqau. Yeeusa maqannaasa faqa Yaramma maqannaasa faqa Koora maqannaasa faqa mariqau. <sup>19</sup> Aiqama mi maqannaasa Eesaunakiqari kambiaqa mariqau.

*Seirana aiku asauku nuqu.*

*(1 Stori 1:38-42)*

<sup>20-21</sup> Eedoomma maqannaasa miqoo maridaqa rainasee qaara maqannaasaikammiga mariqau. Misa ninaakufa Seirafa Qoora maqannaafa marufafa minasaa aruaki maaqimmasee kambiaqau. Rootanafa faqa Soobarafa faqa Sibeeonafa faqa Annaafa faqa Disoonafa faqa Eeseerafa faqa Disanafa faqa minamusa Eedoomma maqannaasa ninaakusa mariqau. <sup>22</sup> Rootanafa Qoorina oosana faqa Qeemmana oosana faqa ninaakufa marinau. (Rootanana auna Timinaa nammarifa marianau.) <sup>23</sup> Soobarafa Arafana oosana faqa Manaqatana oosana faqa Eebarana oosana faqa Seefoona oosana faqa Oonamana oosana faqa ninaakufa mariqau. <sup>24</sup> Sibeeonnafa akoonaiqi qaraqanda maqanau. Miqanda nuqu Aiaafa faqa Anaafa faqa mariqau. (Anaafa nari akoonaa Sibeeonana doonkiuqa mareenoo andanaa naaqeera kaasau maqa maaqaki munusoofaqa neemarfufanoo rakisidanoo ida qeemaru nammarifa maqakiqari ururee maruna paqurinau.) <sup>25-26</sup> Anaafa Disoona faqa mina auna Ooqooriba nammarina faqa nikoofa marinau. Disoonafa Qeemadana oosana faqa Eesabana oosana faqa Itarana oosana faqa Keerana oosana faqa ninaakufa marinau. <sup>27</sup> Eeseerafa Biriqana oosana faqa Saafana oosana faqa Akana oosana faqa ninaakufa marinau. <sup>28</sup> Disanafa Usana oosana faqa Arana oosana faqa ninaakufa marinau. <sup>29-30</sup> Maaqimmasee Qooranasaaqari kambigoo maqannaasa Eedoomma maqa maaqaki mariqau. Rootanana maqanna faqa Soobara maqanna faqa Sibeeoona maqanna faqa Annaa maqanna faqa Disoona maqanna faqa Eeseera maqanna faqa Disana maqanna faqa mariqau.

*Eedoomma maqanna karaambaiqa nuqu.*

*(1 Stori 1:43-54)*

<sup>31</sup> Isaraee maqanna karaambaiqa sia maru kamuqoo maa fasiqausa Eedoomma maqa maaqaki karaambaiqauqa mariqau. <sup>32</sup> Eedoomma maqannaasa indaaruu rakisi nimaqoo karaambaiqana auqu Beerafa marinau. Beeorana amaaku marinau. Mifa Dinabaa maqusanaasa karaambaiqa marinau. <sup>33</sup> Beerafa kuqufanoo Seeraana amaaku Yoobabafa karaambaiqa marinau. Mifa Boosaraa maqusanaafa marinau. <sup>34</sup> Yoobabafa kuqufanoo Qusamafa Teemana maqa maaqakinaafa karaambaiqaiquinau. <sup>35</sup> Qusamafa kuqufanoo Beedadana amaaku Adadafa karaambaiqaiquinau. Mifa Midianna maqannaasa Mooaba maqa maaqaki naru nifaqaaqa maseenoo Adadafa Afitaa maqusaki karaambaiqa marinau. <sup>36</sup> Adadafa kuqufufanoo Samarafa karaambaiqaiquinau. Mifa Masareekaa maqusakinaafa marinau. <sup>37</sup> Samarafa kuqufufanoo Saurafa Reeqooboota maqusakiqari Eeufarateesa nammari adeedi marufa karaambaiqaiquinau. <sup>38</sup> Saurafa kuqufufanoo miqooqari Akaboonana amaaku Baaraqanafa karaambaiqa marinau. <sup>39</sup> Baaraqanafa kuqufufanoo Qadarafa karaambaiqaiquinau. Mifa Pau maqusanaasa karaambaiqa marinau. Mina anaafa auqu Meeqetabeera nammarifa Maatareeda nammarina aramuna marinau. Maatareeda nammarifa Meesaqabana anaifi marinau.



<sup>40-43</sup> Eesaufa Eedoomma maqa maaqakina maru maqusausa kinaasa ninaakufa marinau. Timina maqannaasa faqa Arafaa maqannaasa faqa Yeeteeta maqannaasa faqa Ooqooribammaa maqannaasa faqa Eeraa maqannaasa faqa Pinoona maqannaasa faqa Keenasa maqannaasa faqa Teemana maqannaasa faqa Mibasara maqannaasa faqa Makadieera maqannaasa faqa Iramma maqannaasa faqa ninaakufa mariqau. Misa maru maqusausa nariqa ninaakusa nuqu nifaafau ramaqoofaqa marinau.

### 37

*Yooseefaana faqa mina afasausamara faqa ufa.*

<sup>1</sup> Yakooboofa nari akoofa Isakeefa mariu maqa maqana Kannaana maqa maaqaki miqoo kai marinau.

<sup>2</sup> Maa ufafa Yakooboona faiqi namu ufa maridanoo. Yooseefaafa kumaaraa maridanoo qisauku qara taikasee qiku dinni taikasee dinni oonu qaara marasee 17 aukuaana faqaafa maridanoo nari afasausa faqa sipsipauqasaa faqa mimmiuqasaa faqa rakisimarinau. Nari akoona ainainira anaasee qara Birigaa nammarisa Siripaa nammarisa faiqi namu faqa nidanoo rakisi marinau. Mina afasausamara manda oosana auqoonara nari akoona qimami marinau.

<sup>3</sup> Yakooboofa aiqama nari faiqi namuara aidimaruna uraaqaramaseenoo Yooseefaana aidi marinau. Mifa asooqa namuki maqoonara kaaqa minara aidi marinau. Mifa kisaafa qamunna kisaafa asauku faqaana auqu aminau. <sup>4</sup> Mina afasausamara qafoofanoo misa nikoofa Yooseefaana aidi marufa uriqaranoo marufaqa misa firaqoo uqanna naundura mandaiki marufaqa mina faqa ufa qimariqau.

<sup>5</sup> Moo eendaki Yooseefaafa qainammaseenoo qafanau. Minara nari afasausa mara qimannimufaqa firaqoo uqanna fidiqaamma amaqaqau. <sup>6</sup> Yooseefaafa maaqi qimasee nari afasausamara qimanniminu. Qini maa qainnana iriaqa. <sup>7</sup> Maasa aiqamausa qafuqaki maridaqa raisa fooqaairana atekasee rumbasee narisaa narisaa mundiqaunanoo innindi fannoo maqasaa aquuffanoo qinindi fannoo andeeqasee kikiqinoo mariinoo. Innindi fannoo qinindi oosanaki aquuffanoo fiqumma datimmafinoo ammuqu namu rambaqaki oosanai quminoo.

<sup>8</sup> Miqi qimasooafaqa mina afasausamara aqiqa qiqau. Kasooaqee anee karaambaiqaika mafi maasa rakisiqimaqeenaree. Miqi qimaseeqa mifa qainunara faqa misara qunara faqa iriseeqa firaqoo fidiqaamma amaqaqau. <sup>9</sup> Moo kari mifa kafia qaina maseenoo nari afasausamara qima niminu. Innee iriaqa qinee qaina moommiqa. Qinee qafaunanoo suani faqa uqoona faqa qisaukuqara taikasee qikunni oogu moodaa marasee 11 fasau namu faqa qini daumooki aniree ninuka tuqu naumoo amisee mariafaqa niqafeeqa.

<sup>10</sup> Mifa nari akoona faqa mi qainufana qimamufanoo mina akoofa aqinoo qinuu. Naqaa ira qaina fee inanee. Anee aneenna anoonara faqa aneenna afasausa marara faqa qinira faqa ani aramandunnai ninuka tuqu naumoo amisee mariaqee fee qidanee. <sup>11</sup> Yooseefaana afasausa mara nari nikaqara nirana qeemarinuu. Miqi marufanoo mina akoofa aiqama ufara kaqi kai irimarinau.

*Yooseefaana Midianna maqannaasa nimisee feefauru maroo ufafa.*

<sup>12</sup> Moo kari Yooseefaana afasausa mara nari nikoona sipsipa mara maree Seekeemma maqusai karasa naaqeera nifiqee fiqau. <sup>13</sup> Oonu marufanoo Yakooboofa Yooseefaana qimaminoo qinuu. Ani afasausa mara Seekeemma maqusai mariannai fua. Miqi qufanoo Yooseefaafa qinuu. Qinee firara deedaqidaqa.

<sup>14</sup> Mina akoofa maaqi qimasee qimaminuu. Anee oonureenana qafaa. Ani afasausa mara kaqi fee maridafee. Aandaufa faqa amiqqa fee maridee. Nindafamasee anireenana qimaqimia. Mina akoofa Heeboorona noopundukiqari aiqoofanoo finuu. Yooseefaafa doo findifufanoo fiftiufanoo Seekeemma maqusai oonuranuu. <sup>15</sup> Oonureenoo nari afasausa mararara randanoo nidanoo oonuree aniree inoo nufanoo faiqi moo fannoo qafamasee mina iramirinoo qinuu. Anee nanaree randaidanee.

<sup>16</sup> Miqi qufanoo Yooseefaafa qinuu. Qinee qeeqa qifasausa mara sipsipasaa rakisi mariasara randaidafa. Amanee anee misa mariannaira qini qima qiminnaree.

<sup>17</sup> Miqi qufanoo mi fasiqafa qinuu. Misa doo quqasee fiqau. Misa Dootana maqa maaqai firaree qufaqa iriqaifana. Yooseefaafa mi ufana iriseenoo nari afasausa ninaaqianna fiftiufanoo Dootana maqa maaqai misa oonu paqurinau. <sup>18</sup> Mifa nianai ani marufaqa mina afasausamara qafamaseeqa mina arirara tipundaariqau.

<sup>19</sup> Misa maaqi qimasee nari qimami nari qimami qimariqau. Doo qaininoo nifa anidanoo. <sup>20</sup> Anifaqa mina aruseeqa mina iri mareeqee maa soorausaki mooki

aqua. Miqimmaseeqa maasa minara kaasau aandau ariifoo qianaara. Maasa miqim-masaanoo mina qaina fannoo naqaa fee iannoo.

<sup>21</sup> Reeubeenafa misa ufa iriseenoo Yooseefaana saa ititaidanoo qinau. <sup>22</sup> Kaqi maa kaasau maqa maaqanaki maa nammari madikanaki aqua. Sia aidafirana amia. Mifa miqi qimasee narí kai qimiriseenoo qumee afiqamaree narí akoofunnai munu aisarara miqi qinau.

<sup>23</sup> Yooseefaafa narí afasausamara maruqoo ururoofaqa qumarasee mina kisaqaq gamunna kisaqaq asauku faqaana raipaqiqau. <sup>24</sup> Miqimmaseeqa nammari aadana usufu madikanaki aqiqau.

<sup>25</sup> Aquseeqa miqoo ooqu faqee narana naidaqa tautummasee qafoofaqa Isamaerana aiku asauku aniqau. Misa Kireeata maqa maaqaindari Isipa maqa maaqai fimariqau. Misa adiafaa imarufaqa neemaru ainainna faqa afundimaru saqari anoonnana faqa mara kammeerasa quceese Isipa maqannaasa feefauriaqera maree fiqau. <sup>26</sup> Yudafa narí akaqaa fasaauqa qimannimino qinau. Inni saimbaqa qeeqa qikaqa arusee mina fidika rafaafusee nana dadaaqirane maraanaaree. <sup>27</sup> Anifaqa Isamaerana aiku asauku maa aniraasa nimianaqa feefauru qimiaqa. Mifa maasa qikaqa maridanoo maasa moodaa fidika marinara sia mina aidafirana amia. Miqi qufaqa misa eedoo qiqau.

<sup>28</sup> Eedoo qimarufaqa Midianna maqusanaasa ainaina feefauru marusa aniroofaqa misa narí nikaqa Yooseefaana madikakinaana qubaqeeqee misa nimisoofaqa siruaa munnimma moodaa fasiqa aiku asauku taikasee 20 nimisee doo Yooseefaana maree Isipa maqa maaqai fiqau.

<sup>29</sup> Misa Yooseefaana nimuna Reeubeenafa sia qafanau. Mifa anireenoo madikaki ooqu qafoofanoo sia marufanoo narí gamunna anaqaana qinau. <sup>30</sup> Miqimmaseenoo Reeubeennafa narí akaqaafasaauqa unnai oonuree qimanniminau. Yooseefaafa sia maridanoo qinee naqi fee ianaaree.

<sup>31</sup> Miqi qufaqa misa mimmi arusee Yooseefaana kisaqaq gamunna mina fidikaki raaraa iqau. <sup>32</sup> Miqimmasee misa mi qamunnana mara maree narí nikoofunnai oonuree qimamiqau. Maasa maa qamunnana moosaa paquriqa, qafaa, ani amaakundi fee maridanoo fee.

<sup>33</sup> Yakooboofa mi qamunnana qafamaseenoo qinau. Qini qimaaku gamunna maridanoo. Kaasau aandau fannoo qini faiqi Yooseefaana arusee rakeekaammaseenoo fee qinau.

<sup>34</sup> Miqi qimaseenoo Yakooboofa narí gamunna anaqana qiiseenoo soofaara gamunna afisuseenoo kisaqaqasaa narí faiqara soofaarida marinau. <sup>35</sup> Marufaqa mina faiqi namu faqa araamuqmaaka faqa anireeqa narí nikoona aundura reendenira ufa qufanoo misa nikoofa qaoo qidanoo qinau. Qinee qeeqa faiqara iki raqaqa fuannaqbaqa kuqqa kuqirausa mariannai fuanaura.

<sup>36</sup> Yakooboofa miqi marufaqa Midianna maqannaasa Yooseefaana afiqamaree Isipa maqa maaqai Pootifaana ainainira faiqi kianifeera amiseeqa feefauru maraqa. Isipa maqanna kinna maaqasaa rakisi marusakiqari Pootifaafa uriqarara oofisaa marufaqa amiqau.

## 38

*Tamaara nammariifa Yudana akaru qinau.*

<sup>1</sup> Mi aukuanna Yudafa narí ainaina minniseenoo Qiraana faqa Aduramma maqasai ooqu marinau. <sup>2</sup> Miqoo Yudafa Kannaana maqanna fasiqa Suana araamuna qafamasee maranau. <sup>3</sup> Mariufanoo mi anaaseefa amuaqu qaikino akoonaiqi maqasoofanoo Yudafa mina auqu Eera fee qinau. <sup>4</sup> Kafaa mariufanoo mi anaaseefa amuaqu qaikino faiqi moo maqaseenoo mina auqu reenoo Oonanee qinau. <sup>5</sup> Kaifaa amuaqu qaikino akoonaiqi moo maqaseeoo mina auqu Seeraa fee qinau. Yudafa Keesiba maqasai marufanoo mina anaqa fannoo Seeraana maqanau.

<sup>6</sup> Yudafa narí indaruqaa faiqi auqu Eerafa innooqa fufanoo anaasee Tammaara nammariina mara aminau. <sup>7</sup> Eerana marirafa Karaambaiqa afusaa mandaika uqanna ufanoo kuqa arinau.

<sup>8</sup> Kuqufanoo Yudafa mina akaqa Oonana qimaminoo qinau. Anee maasa oosana mareenana aneenna afasaana anaqa faqa aana finanoo faiqi maqasainanoo ani afasaana auqu sia taikaani. <sup>9</sup> Oonanafa mina iriseenoo maaqi qimirinau. Qinee faiqi maqasaanoo sia qinindi kiandoo qimaseenoo narí afasaana anaqa faqa aana nidanoo kaqinni kai nammari adiee marinau. Narí afasaana faiqi asumu sia marianifeera miqi marinau. <sup>10</sup> Oonanafa mi oosanna maroofanoo Karaambaiqa qafoofanoo mandaika uqanna ufanoo mina kuqamma arinau.

<sup>11</sup> Kuqufufanoo Yudafa nari aanaakuqu Tammaara nammarina qimaminoo qinau. Aneenna akoona maqa maaqai oonu adeedaana kai marinaqa Seeraafa innooqa finaqa mina faqa ani kai amianauna. Seeraafa faqa nari afasaaqanda undee inoo mi anaaseena marasee kuquandooru mina akoofa miqiqinai. Miqi qufanoo Tammaara nammarifa nari akoona maaqai finau.

<sup>12</sup> Mariufanoo Yudana anaaga Suana araamuna kuqinai. Kuqufufanoo soofaara taikaseeoo Yudafa nari aqoondi Aduramma maqusanaana mina auqu Qiraana faqa Timinaa maqusai nari sipsipa asausi aukimaruna niqafarara ooru finau.

<sup>13</sup> Faiqi moo fannoo Tammaara nammarina qimaminai. Ani aanaakuqu Timinaa maqusai nari sipsipa asausi atekarara ooru fidanoo fee qinai. <sup>14</sup> Tammaara nammarifa mi ufana iriseenoo adeedaana marida afisiu qamunnana raipaquseenoo moo qamunna afisumareenoo nari oori kaqikaa qamunnannai ititaseenoo Eenaimma maqusaki fimaru aannanasaa ooqufaagee marinai. Tammaara nammarifa Seeraafa innooqanoo mari-fanoo sia qimiannoo fee qimasee miqinai.

<sup>15</sup> Yudafa ani qafoofanoo qamunnannai oori rafaqaqafusee marufanoo dapi maraqa nua anaaseefa mifoo qinai. <sup>16</sup> Miqi qimaseenoo aana afainni mi anaaseefa marufanoo oonuree qimaminai. Ani rarisama saana mina akiqara naqumma feefauru fee maridanoo fee. Yudafa mi anaaseenara sia nari aanaakuqu fee qimasee miqi qinai. Miqiqufanoo mi anaaseefa qinai. Mina akiqara nanee qiminnaree.

<sup>17</sup> Miqi qufanoo Yudafa qinai. Qinee mimmi moo timmusa ani amaqaanaura. Miqi qufanoo mi anaaseefa qinai. Anee moo ainaina qimiqaina uaqeeiana kasooaqee mimmi qiminna kari ainna amianauna.

<sup>18</sup> Miqi qufanoo Yudafa qinai. Nana ainainee amianauree. Miqi qufanoo mi aneeseefa qinai. Aneenna asaukukinaa isaaqama faqa aneenna saunu faqa qimia. Miqi qufanoo Yudafa minauqa amiseenoo mi anaaseena faqa aana numasoofanoo amuaqu qaikinau. <sup>19</sup> Tamaara nammarifa findi fufanoo nari maqusai oonureenoo dapi anaasee maraqanu qamunnana raipaqusee adeedaana qamunna kaifaa afisinau.

<sup>20</sup> Yudafa nari qaqoondi Qiraanasaa mimmi aanaaqi timmusa quqaseenoo munu mi anaaseena amisee nari ainaina uaqeeuna oonu mini qimiannee qufanoo oonu randoosiaa sia mi anaaseena paqurinau. <sup>21</sup> Mifa oonureenoo Eenaimma maqusanaa fasiqauqa iramirinoo qinai. Yaifee dapi maraqanua anaaseefa maa aannana afainni ooqufaageeiufa maridanoo fee. Miqi qufaqa misa qiqau. Sia maa maqusanaki dapi maraqanua anaaseefa maridanoo.

<sup>22</sup> Miqi qufanoo mi fasiqafa kafia anirandeenoo Yuda funnai oonureenoo qimaminai. Oo qinee sia mi manaqana paquriqa. Mi maqusanakinaa fasiqauqa faqa qifa, sia ooqaindari maasa maqusaki dapi maraqanua anaaseesa marida miaafoo qia.

<sup>23</sup> Miqi qufanoo Yudafa qinai. Saina mi anaaseefa mi ainainausa uaqee iani. Faiqi maasara naanaidara qifoora qikooqaidanoo. Minara qinee mi anaaseena feefauru amirara qunana anee oonuree sia paquriananoo.

<sup>24</sup> Qaarammoo quqoona aiqaramafufanoo Yudana qimamiqa qiqau. Ani aanaakuqu fannoo dapi maraqanua anaaseesara foora numaseenoo maqee mifa amuaqu qaikinoo maridanoo. Yudafa mi ufana iriseenoo qinai. Mi anaaseena maree munusee idara-saifanoo qaani.

<sup>25</sup> Misa afiqee fimarufanoo nari aanaakuqu Yudanara ufa quqanau. Qinee maa ainainausa faqaa fasiqa faiqi uqa faqa maridaqa. Qafamasee iria, yana ainainauqee maridanoo fee. Maa qisaqaqamafa faqa mina sanda faqa saunu faqa yanaindi fee maridanoo fee.

<sup>26</sup> Yudafa qafamaseenoo qinai. Maa anaaseefa andeeqanoo maridanoo. Qinee kai aaqeeqa. Qinee qeeqa qimaaku Seeraana amiaqaana. Miqi qimaseenoo Yudafa sia kaifaa mi anaaseena faqa aana finau.

<sup>27</sup> Mi anaaseena faiqi maqarafa aniroofaqa qafeeqa qiqau. Maa anaaseefa qaara faiqi maqaannoo fee qiqau. <sup>28</sup> Faiqi maqarara aupuree marufaqa moo fannoo naaree asauku quqasoo qumuroofanoo mina innaammuna afeesu aanaaseefa asauku qumaraseenoo taatuqee sanda rumbaseenoo qinai. Maafa indaarugaafa maridanoo. <sup>29</sup> Miqi qima-soofanoo asauku raqandaamma maroofanoo moo kaiqeena naaree maqanau. Maqasoofanoo innaamunai afeesu aanaaseefa qinai. Anee naqaa fee ifanee kaqinnaindari anee naaree qumidane. Minara mina auqureenoo Peeresanee qinai. <sup>30</sup> Mina inaaqianna mina akaqa taatuqee sanda asaukusaa rumbarana maqanau. Maqaseenoo mina auqu Seeraa fee qinai.

## 39

*Pootifaana anaafa faqa Yooseefaana faqa ufa.*

<sup>1</sup> Isamaerana aiku asauku Yooseefaana afiqamaree Isipa maqa maaqai muqusoofanoo Isipa maqanna karaambaiqa Faraona sundiauqa rakisirafa Pootifaafa Yooseefaana feefaurinai. Pootifaafa Faraofa maruqoo rakisi maru sundiasa uriqararafa marinai.

<sup>2</sup> Karaambaiqa Yooseefaana faqa maridanoo dadaaqi marufanoo aiqama ainaina auqoofanoo anoona kai kambiqee marinai. Mifa nari Isipa maqanna uriqararana maaqaki marinai. <sup>3</sup> Pootifaafa qafuofanoo karaambaiqa Yooseefaana faqa maridanoo aiqama ainaina auqoofa anoona kambiqee marinai. <sup>4</sup> Pootifaafa Yooseefaana arasam-maseenoo uriqarara ainainira faiqikammaqoofanoo marinai. Miqimmaseenoo mifa Yooseefaana mareeqee nari maaqasaa faqa nari aiqama ainainasaa rakisirafaikamma qoofanoo marinai. <sup>5</sup> Miqooqari Yooseefaana kai qidanoo karaambaiqa fannoo Isipa maqanna maaqakinaa aiqama ainaina faqa Pootifaana maaqakinaa ainaina faqa mina maqakinaa nara ainaina faqa amiqi amiqimma nimaqee marinai. <sup>6</sup> Pootifaafa mana mana kaimmi marinai. Sia nari ainainara irimarinau, naranara kai irimarinau. Yooseefaafa amudaani tiafa amiqirafa quanna mariaui.

<sup>7</sup> Kaqi kaqoo marinoo mina uriqararana anaafa fannoo Yooseefaana aidufanoo qimaminai, aniree qini faqa faiqaa.

<sup>8</sup> Miqi qufanoo Yooseefaafa qaoo qimaseenoo qimaminoo qinau. Qini uriqararafa sia maaqaki quqaqai ainainasara iridanoo. Qinee marunanoo sia iridanoo. Mifa nari aiqama ainainasaa qini quqaqai faqa rakisidaqa. <sup>9</sup> Qinee maa maaqanaki rakisira afeeka mifa uaqeindee kai masee uaqee idaqa. Mifa sia moo ainaina qini kukeeqa qimaqa qafanoo maridanoo aiqama ainaina qimiqaifanoo, ani kai sia qimiqaifanoo. Naqi fee mandee fee qinee maa manda oosana auqamasee fee Anutuna mandaikamma amaqaanauree. <sup>10</sup> Pootifaana anaafa fannoo aiqama faasaana Yooseefaana qini faqa faiqaanee qimarufanoo Yooseefaana sia mina faqa faiqanai.

<sup>11</sup> Moo faasaana Yooseefaafa nariara maaqaki ainaina auqanoo nufanoo sia moo ainainira faiqi minaki marinai. <sup>12</sup> Nariaraa marufanoo mi anaasefa mina siuta ani qumareenoo qinau. Doo ania. Aniree qini sakasee faiqaa. Miqi qimaseenoo Yooseefaana siutandauru qumaroofanoo mifa nari siuta kai raipaqueeqee mina asaukuki quqaseenoo rafudamakufanoo madaana sandanai.

<sup>13-15</sup> Madaana sandoofanoo Pootifaana anaafa fannoo qafamaseenoo nari maaqaki ainaini maru faiqisa naaramaseenoo qinau. Innee maana qafaafa. Maa Qeeburu maqanna fasiqana qini qifaafi fannoo maaqaki miniqai fa maasa mandaikamma qima qidanoo. Mifa qini rarisara rifaqa qinee firaqoo faqa runanoo mifa nari siuta qini daafa quqasee sandeenoo.

<sup>16</sup> Mifa miqi qimasee qimannimiseenoo mi siutana kaqi uaqeufanoo Yooseefaana uriqararafa aniranai. <sup>17</sup> Aniroofanoo mi ufana kai qimaminai. Maa Qeeburu maqanna anainira faiqina anee miniqaanafa qini maaqaki keeqafi qini faqa manda oosana auqarara inoo. <sup>18</sup> Miqifaqa qinee faafa runanoo nari siuta qini daafa raipaku quqasee madaana sandeenoo.

<sup>19-20</sup> Yooseefaana uriqararafa mina irufanoo aranaqoofanoo Yooseefaana qumareeqee uriqararasa rumbara fasiqauqa marunaki quqanai. Quqasoofanoo minaki marinai. <sup>21</sup> Marufanoo karaambaiqa Yooseefaana faqa maridanoo dadaaqida amiqi amiqimma amaqee marufanoo karabusasaa rakisi marufa Yooseefaana qafamaseenoo asasinai. <sup>22</sup> Karabusasaa rakisi marufa Yooseefaana mareeqee karabusauqasaa rakisiranai ka minai. Miqimmasoofanoo Yooseefaafa karubusa maaqaki aiqama ainaina auqee maruna rakisirafa marinai. <sup>23</sup> Karabusasaa rakisirafa Yooseefaafa rakisi maru ainainasara sia amiqimmasee iridanoo. Sia rakisi marinai. Karaambaiqa fannoo Yooseefaana faqa marunara aiqama ainaina mifa auqoofa anoona kai kambiqee marinai.

## 40

*Yooseefaafa karafusaki marusa qainuna kooroo qimaru ufafa.*

<sup>1</sup> Kaqikaqoo marinoo Isipa maqanna karaambaiqa uainna anoona tatimaru fasiqafa faqa mina feemu suqee marufa faqa nariqa uriqararana mandaikamma amaqaqau. <sup>2</sup> Mandaikamma amaqasoofanoo mi qandara aranaqoofanoo nari sundiauqara qufaqa qumaraqau. <sup>3</sup> Qumaraseeqa sundiauqa uriqararana karubusa maaqaki Yooseefaafa maru maqanaki quqanai. <sup>4</sup> Mi qanda kisaqasaa karabusaki marufanoo karabusasaa rakisirafa qufanoo Yooseefaafa misasaa rakisi marinai.

<sup>5</sup> Miqoo karabusaki maridaqa moo eendaki uainna tati marufa faqa feemu suqee marufa faqa qainiqau. Uainna tati marufa mina qaina oosana aaduma marinau. Feemu suqee marufa mina qaina oosana aaduma marinau.

<sup>6</sup> Mi kananaanna miqanda noori runusee marufanoo Yooseefaafa ani nindafeenoo iramirinoo qinau. <sup>7</sup> Inneeqara nanaree kaaqa moomoo irira irida maridee. <sup>8</sup> Qufaqa miqanda qiqau. Maqanda qaina maqaqee idaqa qaina oosana qimannimi marifa sia marifaqa maaqanda minara oonu mafi irida maridaqa. Yooseefaafa miqanda ufa iriseenoo qima niminau. Anutufa kai qaina oosana qimannimirana nimidanoo. Inneeqa qaina qima qimifaqa iria. <sup>9</sup> Miqi qimasoofoanoo Faraona uainna nammari tati maru fasiqafa nari qaina maaqi qimasee Yooseefaana qimaminau. Qinee qafau-nanoo uainna sanda qini doorinni marifaqa qafeeqa. <sup>10</sup> Qaarammoo asaana minasaa marifaqa qafeeqa. Amanee ifaqa qafaunanoo afufeenaarifaqa qafaunanoo qaqama irafi akuqeenoo. <sup>11</sup> Qinee karaambaifaqa Faraona kaafa uaqeidaqa akuqamafina minaki anoona tatiisee munu amiqa.

<sup>12</sup> Yooseefaafa mina iriseenoo maaqi qimasee qimaminau. Sanda qaarammoo asaana qafaannana mina amana qaaramoo faasaana marinnara. <sup>13</sup> Qaaramoo faasaana taikainanoo Faraooafa ani iduku aisainana kafaa aneenna saikaki finnaranoo. Anee ooqai mina uainna tatira faiqi maridana mina uainna kaafa amiunnandee inana kaifaa aminnaranoo. <sup>14</sup> Anee miqimma finana qiniara qimudaoo qimasee karaambaifaqa Faraona qimaminanoo qini dadaaqinoo iduku qisaani. <sup>15</sup> Misa ooqai qini Qeeburu maqusaindariana ummuara mamaree aniqau. Qinee maaqoo Isipa maqa maaqaki marida sia moo manda oosana mareeqa. Misa fifau qini karabusaki quqaqafaqa maridaqa.

<sup>16</sup> Feemu suqee marufa nari aqoonnana qaina oosana qimamuna irufanoo amiqufanoo Yooseefaana qimaminoo qinau. Qinee faqa moo qainammiqa. Qinee qaarammoo feemu difaani qumbiqarana qikiiaqa akuqaqee idaqa qafeeqa. <sup>17</sup> Meeraqooqaraa difaaniki oosana oosana feemu ainaina uriqararanaindi marifanoo ufiniuqa nee mariafaqa qafeeqa.

<sup>18</sup> Yooseefaafa mina qaina oosana iriseenoo maaqi qimasee nari qimaminau. Qaaram-moo difaani qafaanafa qaarammoo faasaana maridanoo. <sup>19</sup> Qaaramoo faasaana amana mina qaaramoo feemu difaani marifana qafaananoo. Qaaramoo faasaana aiqarainanoo Faraooafa ani ani qumareenoo munusee anuka atekasee ani iri saqarisaa dirisainaga ufiniuqa ani amaqi neefaranoo.

<sup>20</sup> Miqiqimasee qima nimisoofoanoo miqooqari mi qaaramoo faasaana aiqaroofoanoo mikari Faraona maqoo aukuanafa airoofoanoo narana firaqoo sugaseenoo nari ainainasaa rakisi marusa niminau. Mifa nari uainna tati maruna faqa feemu suqee maru fasiqana faqa idukumaree mini nari ainainasaa rakisi marusa nifusaa quqanau. <sup>21</sup> Idukuseenoo uainna tati maru fasiqana mareeqee ooqai mareeu saikanaki kafaa quqasoofanoo uainna tatimarinau. <sup>22</sup> Feemu suqee maruna idukuseenoo anuka atee-ka-soofaqa sandannai mina qiri saqarisaa diriqau. Aiqama ainaina Yooseefaana ufamau andeeqaseenoo mimau kaimbinau.

<sup>23</sup> Uainna tati marufa kafaa Faraona ainainidanoo Yooseefaana siamma irinau. Qaunusee marinau.

## 41

*Yooseefaafa Faraona qaina oosana kooroo ufafa.*

<sup>1</sup> Qaara aukuaana aiqaroofoanoo moo eendaki Isipa maqanna karaambaifaqa Faraooafa moo qaina maaqimmasee qafee fee qinau. <sup>2</sup> Qinee Niru nammari afainni kikiqifa marida qafaunanoo qisauku dinni taikasee dinni ani qaara marasee 7 burimakau nifaaqa faqaasa urureeqa andanda nee mariafaqa qafeeqa. <sup>3</sup> Neemarufaqa dinni qisauku taikasee dinni oonu qaara marasee 7 nimudaani aanaaqi nammarikiqari urureeqa indaaruu qaasa naaqa nammari afainni kikiqamma fuafaqa qafeeqa. <sup>4</sup> Nimudaani aanaaqiqa nifaaqa faqaasa aiqama nambiqama saafaqa qafeeqa. Mi ainainasaa qainasaa qafamaseenoo karaambaifaqa Faraooafa tauti findifinai.

<sup>5</sup> Mifa kaifaa afuki qaunduarufanoo faifufanoo moo qaininai. Sakumma moodaa oosana saa dinni qisauku taikasee dinni oonu qaara marasee 7 iranoo marufa aiqama anoona qumbi qumbiqirafa marufanoo qafanau. <sup>6</sup> Kafaa mina aanaaqianna moo qaina qafoofanoo dinni taikasee dinni ani qaaraqanda marasee 7 sakumma moodaa oosanasaa iranoo marinai. Anoona siaifa narana maaqina kinaafa mandaikirafa sia anoona marufa, ufai fannoo raudaqoo fara foora marufanoo fifau akee kai marinai. <sup>7</sup> Anoona

siai sakummafa quandaku fannoo anoona faqaa sakumma aiqama namasanau. Mi qainna masenoo Faraofa tauti findi fufanoo Boo moo qainammidaqee qinau.

<sup>8</sup> Mi kananaanna Faraofa findi fufanoo moomoo irirana maroosia Isipa maqannaa irirana faqaasa faqa afunee fasiqauqa faqa naaranau. Naaramaseenoo nari qainuna qimannimufaqa sia moo fannoo amana mina oosana nari qimamiqau.

<sup>9</sup> Minara tutu qidaqa randee marufanoo Faraona uainna tati maru fasiqafa Yooseefaana iriseenoo Faraona qimaminoo qinau. Oo karaambaiqa maqee kai qeeqa furufariafanna oosanna oonu mafi iriseeqa kooroommasee qimamidaqa. <sup>10</sup> Ooqai anee aanoo qimaseenana qini faqa feemu suqee maruna faqa aneenna sundia rakisirana maaqaki quqaqisanau. <sup>11</sup> Moo eendaki maaqanda qaina qiqaafana. Mi qaina qanda naadu naadu oosana faqaa qaina qiqaau. <sup>12</sup> Minakina Qeeburu maqannaa kumaaraa moo fannoo, sundia rakisirana Pootifaana ainainira faiqi marufa maasa faqa marinau. Maasa qeeqa qaina qimamiefananoo mifa mina oosana maasa qimaqiminau. <sup>13</sup> Mifa qundee kaimminau. Anee qini saikaki kaifaa mara quqaqiseenana feemu suqee maruna d irinuu.

<sup>14</sup> Faraofa mi ufana iriseenoo niqiqoofaqa Yooseefaana karabusa kinaana aaqee uqanna afiqee aniqau. Mifa oosau suqaseenoo nari qamunna fuka afisumareenoo Faraona afusaa aniranau.

<sup>15</sup> Aniroofanoo Faraofa qimaminau. Qinee qainammasaunaqa sia moo fannoo mina oosana qimaqimia faqa iriqa. Anee qaina oosana kooroo qimarianafa mariannanara qimaqimifaqa aaraidaqa.

<sup>16</sup> Miqi qufanoo Yooseefaafa qinau. Oo qini uriqararafa amiqirafa qinee qeeqa kai sia amanaikianauranoo. Anutufa kai qaina oosana qimannimirana qiminaqa qimami-  
anau.

<sup>17</sup> Miqi qimasoofanoo Faraofa nari qaina oosana Yooseefaana maaqi qimasee qimaminau. Qainunnana qinee Niru nammari afainni kikiqiqa maridaqa qafeeqa.

<sup>18</sup> Qafaunanoo burimakau nifaqa faqaasa dinni qisauku taikasee dinni oonu qaara marasee 7 nammariqari urureeqa andanda neemariafaqa niqafeeqa. <sup>19</sup> Misa ninaaqianna miqi kaimmaseeqa dinni qisauku taikasee dinni oonu qaara marasee 7 misa nimana kai nimudaani aanaaqi urureeqa kikiqamma fuafaqa nindafeeqa. Miqira mandaikira burimakauqa sia ooqai Isipa maqa maaqaki mootinai mariafaqa qafeeqa. <sup>20</sup> Nimudaani aanaaqi burimakauqa nifaqa faqaasa namataikee. <sup>21</sup> Nambiqamaseeqa sia moo fannoo nifaqa mareea, ooqai mariundee kai miqa mariafaqa qafeeqa. Nindafamaseeqa tauti findi fiqa.

<sup>22</sup> Qinee moo qaina faqa masee qafaunanoo dinni qisauku taikasee dinni oonu qaara maraseenoo 7 sakuma aiqama qumbi qumbiqirafa moodaa saqarisaa marifaqa qafeeqa.

<sup>23</sup> Mina aanaaqianna qafaunanoo kafa moo sakuma saqarisaa dinni qisauku taikasee dinni oonu qaara maraseenoo 7 iranoo marifaqa qafeeqa. Mifa anoona siaifa ufai uqinoo rauda quqaqai fara foora marifaqa qafeeqa. <sup>24</sup> Ira fiifaqa qafaunanoo anoona siaifa indaaru iraina anoona sakumma nambiqamasaafaqa qafeeqa. Qinee mi qainnana afunee fasiqauqa qima nimunaqa sia moo fannoo mina oosana qimaqimia.

<sup>25</sup> Yooseefaafa mina qaina ufa iriseenoo Faraona qimaminoo qinau. Anee qainianana oosana moodaara qaaraqanda qaina inanoo. Anutufa auqaaninna ainainnara qainasaa ani qimaminoo. <sup>26</sup> Dinni qisauku taikasee dinni oonu qaara marasee 7 burimakau afaqa faqaana qafaannana oosana dinni qisauku taikasee dinni oonu qaara marasee 7 aukuaana qafaananoo. Sakumma dinni qisauku taikasee dinni oonu qaara marasee 7 sakuma anoona qumbi qumbiqirana faqa qafaana mifa faqa miqikai inoo dinni qisauku taikasee dinni oonu qaara marasee 7 aukuaana maridanoo. Mi qaina qanda oosana moodaa maridanoo. <sup>27</sup> Dinni qisauku taikasee dinni oonu qaara marasee 7 burimakau nimudaani aanaaqi nammariki ururaasa faqa dinni qisauku taikasee dinni oonu qaara marasee 7 sakuma anoona siaina qafaannana oosana 7 aukuanaki aandaroo firaafa mariannoo.

<sup>28</sup> Qinee qimamunandee kaimmiannoo. Anutufa nari auqaaninnanara ani uqafiqeenoo. <sup>29</sup> Dinni qisauku taikasee dinni oonu qaara marasee 7 aukuanaki Isipa maqa maaqaki narana firaqoo rairaa iannoo. <sup>30</sup> Mina aanaaqianna kafa miqi kai inoo dinni qisauku taikasee dinni oonu qaara marasee 7 aukuaana aandaroo naruannoo. Mi aandaroonaki mi rairaira narannara qaunifaranoo. Aandaroo fannoo maqa maaqa mandaika uqanna masaannoo. <sup>31</sup> Mi aandaroo aukuanai faiqi anaasee doo rairaira aukuanara qaunu uqannaseefaranoo. Aandaroo firaafa mandaika uqanna irafa mariannanara miqifaranoo. <sup>32</sup> Anee kaifaa kaifaa qainiannana oosana Anutufa mi ainainna kasooaqee kuqaa miqiannoo.

<sup>33</sup> Minara anee aneenna maqannaasakina moo qafamaseenana irirana faqaa fasiqa mara quqasainanoo mifa Isipa maqa maaqasaa rakisian. <sup>34</sup> Anee akaqa rakisirausa

quqasainaqa moodaannai qisauku taikasee dinni oonu qaara marasee 7 rairairaa aukuanakina oosana narana moodaannai qisauku namu kinaana moodaa moodaa mara afeediaqa. <sup>35</sup> Anee qimanniminaqa aiqama narana rairairaa aukuanakinaana suqu quqaaqa. Anee afeeka ufa nimisainaqa narana maqusa maqusaki suqu quqasee minasaa rakisiaqa. <sup>36</sup> Mi narannafa dinni qisauku taikasee dinni oonu qaara marasee 7 aukuaana aandaroo firaafa anianinnanaki mi afeediranakinaana neefaranoo. Miqidaqa sia faiqi anaasee kuqifaranoo.

*Yooseefaafa Isipa maqannaasa uriqararafaikinau.*

<sup>37</sup> Faraoofa faqa nari uriqarararusa faqa Yooseefaana iriranara eedoo qiqaau. <sup>38</sup> Miqi qimaseenoo Faraoofa qimanniminoo qinau. Maasa sia amana moo fasiqa Yooseefaana uraaqararana paqurianaura, Anutuna maraquna minaki marifa marinara saifanoo mifa kai mariani.

<sup>39</sup> Miqi qimaseenoo Faraoofa Yooseefaana qimaminoo qinau. Anutufa kai maa aiqama ainainna ani uqafiqeenoo. Anee aiqamausa urinnaaqara masee firaa irirana faqaafa akooqoo mariananoo. <sup>40</sup> Qinee ani quqasaanana qini maqa maaqasaa rakisinnaranoo. Aiqama qini faiqi anaasee ani ufa mau kai fifaranoo. Ani afeeka fannoo qini afeeka ameemaana mariannoo.

<sup>41</sup> Miqi qimaseenoo Faraoofa kafia Yooseefaana qimaminau. Qinee maqee ani maree-qee Isipa maqannaasa uriqararafai kammiaqa. <sup>42</sup> Miqi qimaseenoo Faraoofa nari asauku amukakinaa rinna firaa uriqarararusa rinna maruna raduku Yooseefaana asaukuku quqanau. (Yooseefaafa mi rinnanannai peennakina raaraa maseenoo papigasaa atooqasoofaqa maaqanna maaqanna mina qafeeqa Faraoona rinna akara fee qimaseeqa kaaqa rufieeqa mi papigana saaqaraa ufara eedoo kai qimariqau.) Faraoofa amiqira qamunna afisu amaqaseenoo koorannai auqira kukukakana faqa rufu amaqanau.

<sup>43</sup> Miqimmasoofanoo Faraoofa uriqarararusa nifiqanoo nu qoosa karana Faraoofa Yooseefaana amisoofanoo minasaa rakisira sundiauqa mina afunni fidaqa maaqi qimasee faaqaridaqa qiqaau. Amaaraqa amaaraqa. Mi oosannanannai Yooseefaana aiqama Isipa maqannaasa uriqararanaikinau. <sup>44</sup> Faraoofa kafia Yooseefaana maaqi qimasee qimaminau. Qinee uriqarararusa Faraoosa qimamidaqa. Sia amana Isipa maqannaasa fasiqa moo fannoo nari aidiranannai moo ainaina auqaannoo. Mifa anisaa naaree iraanoo. <sup>45</sup> Miqi qimaseenoo Faraoofa Yooseefaana fuka auqu reenoo Safeenata Paneeanee qinau. Miqi qimasee mifa Yooseefaana anaasee aminau. Mi anaaseena auqu Aseenata nammariifa Pootifeerana araamuna marinau. Pootifeerafa Qeerioopoorisa maqusanaasa suani afuara innaaru qimarusa aanaiqikirafa marinau.

<sup>46</sup> Yooseefaafa moodaa fasiqa faqa moo fasiqa asaukuqara taikasee 30 aukuaana marasee Faraoona ainainirana oosana aranau. Oosana araseenoo Faraoona aiseenoo Isipi maqa maaqaki oonuree aniree idanoo aiqama atinai nimarinau. <sup>47</sup> Qisauku dinni taikasee dinni ani qaara marasee aukuanaki Isipa maqa maaqaki narana moomoo kambiqafi rairaa inau. <sup>48</sup> Mi aukuanna namunakinaa narana irairaa una Yooseefaafa mareeqeenoo maqusakiaqa afeedinau. Mi moodaa moodaa maqusanaki mi maqusana fiq fiqinoo maru maqanakinaa naranna marasee mi maqusanaki afeedinau. <sup>49</sup> Mi naranausa unakiisooofanoo ooruku nammari afaiqaraa nukudara foora moomoo uqanna marufanoo Yooseefaafa asaana rusia minnisanau.

<sup>50</sup> Aandaroo aukuaana sia ani marufanoo Yooseefaana anaqa Aseenata nammariifa akoonaiqi qaara qanda maqanau. <sup>51</sup> Maqasoofanoo Yooseefaafa qinau. Anutufa qini dadaaqifaqa qeeqa aupurarana faqa qeeqa qikoona atiara iriranara faqa auniqa. Miqi qimaseenoo mifa nari indaaruuqaa faiqi auqureenoo Mannasee nee qinau. <sup>52</sup> Kafia Yooseefaafa akoonaiqi moo maqaseenoo qinau. Anutufa maa maqa maaqanaki qinee aupurarana maree marunnanaki faiqi qiminoo. Miqi qimaseenoo mifa nari inaaqiannaai faiqi auqureenoo Eefaraimmanee qinau. <sup>53</sup> Qisauku dinni taikasee dinni oonu qaara marasee 7 aukuanaki narana irairaa imarufaqa Isipa maqannaasa asasiufa taikanau. <sup>54</sup> Yooseefaafa undee kai inoo qisauku dinni taikasee dinni oonu qaara marasee irairaa ira aukuaana aiqarooofanoo aandaroo kambiqanau. Aiqama maqa maaqaki aandaroo narinau. Isipa maqa maaqaki kai narana kaqi marinau. <sup>55</sup> Mariufanoo Isipa maqa maaqaki faqa aandaroo narufaqa faiqi anaasee Faraoo funnai oonuree naranara faaqarida innaaru qufanoo mifa qinau. Innee Yooseefaa finnai oonu raifanoo mifa innandee innandee kai iaqa. <sup>56</sup> Aandaroo firaafa Isipa maqa maaqaki aiqama atinai firaqqoo narufanoo Yooseefaafa aiqama afeedira maqauqa atuqasoofaqa Isipa maqannaasa narana feefauri mariqau. <sup>57</sup> Aiqaama maqa maaqaki maru fasiqa aanaaseesa aandaroo firaafa naru faqa aiqama atinaindari narana feefaurirara Yooseefaa funnai Isipa maqa maaqaki aniqau.

## 42

*Yooseefaana afasausamara narana feefaurirara Isipa maqasai ooqu fu ufa.*

<sup>1</sup> Yakooboofa Isipa maqa maaqai narana moomoo marunara nari faiqi namu qiman-mininoo qinau. Innee naqaa fee ifagee narana minni ooqu maraaqaana maridee. <sup>2</sup> Isipa maqa maaqai narana maridanoo mifoo qiafaqa iriqa. Miqoo ooqureeqa akaqa narana feefaurumma maree murusaifaqa namasee sia kuqa.

<sup>3</sup> Miqi qufaqa Yooseefaana afasausa mara moo anaasee faiqi namu qisauku qara taikasee marusa narana feefaurirara Isipa maqa maaqai ooqu fiqau. <sup>4</sup> Yakooboofa Yooseefaana akaqa uqanna Beensaminna sia aiqanau. Moo ainaina mina afaaqai kambigaandoo qimasee rufiasee sia aiqanau. <sup>5</sup> Aandaroo firaafa Kanna maqa maaqaki nari marunara Yakooboona faiqi namu faqa moomoosa faqa narana feefaurirara ooqu fiqau.

<sup>6</sup> Yooseefaafa Isipa maqa maaqakinaasa uriqararafa maridanoo aiqama maqa maaqak-inaasa feefauriaghee qimasee quqaqoofaqa feefauri mariqau. Yooseefaana afasausa mara oquree Yooseena oorinni noorindari maqasaa kummaraga. <sup>7</sup> Yooseefaafa nari afasausa mara noori nindafoofanoo Yooseefaana irirafa kambiganau. Kambi qoofanoo sia misara iridanoo fooraa aranaiqi iramirinoo qinau. Innee yaindarifee anidee. Qufaqa misa qiqau. Maasa Kannaana maqusaindari narana feefau rirara qumidaqa.

<sup>8</sup> Miqi qufanoo Yooseefaafa misara iri marufaqa mina afasausa mara minara sia iri mariqau. <sup>9</sup> Yooseefaana irirafa kambiga fufanoo mifa oqai nari faiqi saa qainunara oonu mafi irinai. Innee nipuraraa fasiqauqa mariafaqa nindafaida. Innee mai qumuree maasa aandaroo darifaqa ummooqukida mandaiki marunau qumu qiqafararee qimasee qumuafanoo.

<sup>10</sup> Miqi qufaqa misa maaqi qimasee nari qimamiqau. Oo uriqararafa sia maasa miqianaara. Maasa ani ainainira faiqira fooraa narana feefaurirara qumidaqa. <sup>11</sup> Maasa moodaa fasiqa faiqi namu kai maridaqa. Maasa kuqaa ufa kai qimarunau maridaqa. Uriqararafa maasa sia nipuraraa fasiqau maridaqa.

<sup>12</sup> Miqi qimasoofoanoo Yooseefaafa nariqa qima niminoo qinai. Innee unna qimariafanoo. Maasa maqa maaqa mandaikinoo sia afeekaikinoo marina qafarara qumuafanoo.

<sup>13</sup> Misa mi ufana iriseeqa kafa nari qimamiqa qiqau. Uriqararafa, maasa aiqama qisaukuqara taikasee qikunni ooqu qaara marasee 12 maridaqa. Kanna maqa maaqaki moodaa fasiqa faiqi namu mariafannanakiqari moodaafa kuqinai. Maasa ninaaqian-naafa maasa nikoona faqa maqasai kaqi maridanoo.

<sup>14</sup> Yooseefaafa mina iriseenoo kafa qima niminoo qinai. Doo qinee qidaqa, innee nipuraraa fasiqauqa mariafanoo. <sup>15</sup> Qinee maaqimmasee inni nimanammasee qafaanaara. Qinee Faraona auqusa inni qima nimidaqa sia innee ooru fifaranoo maaqoo marifanoo inni nikaqa qumurinaqa oorufifaranoo. <sup>16</sup> Innikiqari moo fannoo ooru inneeqa nikaqa afiqee qumuqa. Innee akaqausa sundiaqa faqa marifaqa innisaa rakisi marifaqa maasa innee qia ufana qimasee qafamasaana oorufifaranoo. Innee unna qifaqa kuqaa Faraona auqusa qimannimidaqa innee nipuraraa fasiqa marifanoo. <sup>17</sup> Miqi qimasee Yooseefaafa qufaqa misauqa rumbeegee karabusa maqaki quqasoofaqa qaaramoo faasaana mariqau.

<sup>18</sup> Qaaramoo faasaanasa marisofoanoo Yooseefaafa maaqi qimasee qima nimanau. Qinee Anutunara rufiee marunna fasiqausa maridaqa. Innee qini ufa mau fiqa amiqim-masee marifanoo. <sup>19</sup> Inniara kuqaa qira fasiqauqee qiaqera innikiqari moodaafa innee maria karabusanaki marinaqa innee akaqausa narana feefauru maqaana muru inneeqa faiqi anaasee nimifaqa naqa. <sup>20</sup> Innee ooruree inneeqa nikaqa innaqianaana afiqeeqa qumuqa. Qumu raifaqa qinee inniara kuqaa ufa kai qimariasee qimasee sia kuqa naruanau. Miqi qufaqa misa aiqamausa mina ufara eedoo qiqau.

<sup>21</sup> Eedoo qimasee nari qimami nari qimami qiqau. Innisaimbaqa kuqaa qeeqa qikaqa mandaikamma amaqa qiafana. Mifa firaa ummaaraki maridanoo dadaaqiaqee qimarufaqa innisaimbaqa sia iriqiafana. Minara maasa maqee maa ummaaranaki maridaqa.

<sup>22</sup> Reeubeenafa misa ufa iriseenoo maaqi qinoo qinai. Qinee qaoo qiafana innee sia iriqa. Mifa kuquna akiqara maasa maqee ummaara maridaqa. <sup>23</sup> Yooseefaafa misa qimaru ufana umee kai irimarinai, miqi marunara misa sia iriqa. Misa Yooseefaana faqa ufa qianee qimasee qimarufanoo moo fasiqa fannoo misa ufa quandee marinai. <sup>24</sup> Yooseefaafa misa ufa iriseenoo quqasee umeenni oonureenoo ikiraqa seenoo oonu randee aninai. Iki raqarafa taikoofanoo ufaqirana amanaikufanoo oonu randee aninai. Anireenoo misakina Simeeonnana qumarasee misa nifusaa rumbanau.



*Yooseefaana afasausa qumumaree Kannaana maqusai ooru fu ufafa.*

<sup>25</sup> Yooseefaana nari ainainira faiqiuqa qimannimufafa narana mina afasausamara uqa umbiqaseeqa misa munnimma kaifaa nariqa uqa adianai uqarumasee nimiaqa, aanai fida neefandinna narana faqa nimiaqa qufafa eedoo qimasee miqimma nimiqau. <sup>26</sup> Mina afasausa mara feefaurummasoo naranna nariqa doonkisa qugasee maree ooru fiqau.

<sup>27</sup> Yooseefaana afasausa mara narana nari doonkisa qugasee maree fifii ufafa eendufafa aanai uqaana arasee faiqarara imarufanoo mina afasaafa moofannoo nari doonki narana amirara nari uqa ooraqasee qafoofofanoo mina munnimma uqa adianai marufanoo qafanau. <sup>28</sup> Qafamasee nari ainaina naaramaseenoo qinuu. Innee aniree qafaaqini munnimma kaifaa qiqqa qimiananoo qini uqaki maridanoo. Miqi qufafa misa nimuqusa mandaikufafa rufiidaqqa qiqqau. Anutufa maasa naqaa feemma qimaqeenoo fee maaqinoo fee.

<sup>29</sup> Miqi qimasee faiqagee mariufafa iaqoo kananaana nari nikoofa Yakoofoofa marunai Kannaana maqusai ooruree aigama mi ainainausa kambiqaonara qimamiqau. <sup>30</sup> Isipa maqanna karaambaiqa fannoo aanoo qira ufa kai maasa qima qimaqeenoo. Mifa maasara innee qini maqa maaqaki nidaqa nipuree mariafanoo fee qimasee rairai qinoo. <sup>31</sup> Miqi qifafa maasa maaqi qimasee nari qimamiqa. Oo maasa sia nipuraraa fasiqau maridaqau. Maasa kuqaa ufa qimarunausa maridaqa. <sup>32</sup> Maasa moodaa fasiqa faiqi namu qisauku qara taikasee qikunnooqqa qaara marasee 12 maridaqa. Maasa qikaqa moo fannoo nari akoona faqa Kannaana maqusai maridanoo, moo fannoo kuqinau.

<sup>33</sup> Maasa miqi qimasee qimamiananoo mifa mina iriseenoo qinoo, qinee maaqi masee inni nimanida qafaanauree qinoo. Innikiqari moodaafa qini faqa marinaqaa innee akaqausa sakumma aina maree muru faiqi anaasee nimiaqa. <sup>34</sup> Nimiseeqa narana taikainaga kafaa qumiqa inneeqa nikaqa faqa afiqee qumuaqa. Muqusaifafa qinee mina qafamaseeqa inniara kuqaa sia nipuraraa fasiqauqee kuqaa ufaki qimariasee qimaseeqa inni faiqi iduku nimiananoo innee maqee narana aina feefaurida ooruree qumuree qiqqa nuqee qinoo. Misa miqi qimasee nari nikoona qimamiqau.

<sup>35</sup> Qimamiseeqa nari uqauqa idukusee ooraqasee qafoofofanoo aigamausa munnimma kaqi marinuu. Misa qafamasee nari nikoona Yakoofoofa faqa rufiaqau. <sup>36</sup> Yakoofoofa rufiidanoo maaqi qimasee nari faiqi namu niqinau. Innee qini faiqi namu mandaika maqimaqee mariafanoo. Yooseefaana doo taika fufafa, Simeoonafa faqa taika fifafa kafaa innee Beensaminna faqa afiqee firaree qidee. Qinee ummaarakai kai maridaqa.

<sup>37</sup> Reeubenafa nari akoona ufa iriseenoo maaqi qimasee nari akoona qimaminuu. Oo qipoo, qinee Beensaminna rakisianaura. Qinee sia mina afiqee uruanaana mina akiiqara qini qimaaku qara narua. Anee qini qisaukuki quqasainaga qinee amiqi masee afiqaga niniinaqa afiqee uruanaura.

<sup>38</sup> Miqi qimasoofofanoo Yakoofoofa qinau. Qini qimaaku sia uqanna inni faqa fuannoo. Mina afasaafa doo kuqu fufafa mifa nariara maridanoo. Aana mandainana paqurinaqa qinee maaqiraua asooqa inni mi ummaarafa darinaqa kuqanoora.

## 43

*Yooseefaana afasausamara Beensaminna uru afiqee kaifaa Isipa maqa maaqai oogu fu ufafa.*

<sup>1</sup> Kannaana maqa maaqaki aandaroo firaafa narinoo mandaika uqanna inuu. <sup>2</sup> Isipa maqa maaqai feefaurummararee murusoo naranna Yakoofoofa aiku asauku nama taikasoofofanoo Yakoofoofa nari faiqi namu qimanniminuu. Kaifaa oogu qeqa kaa narana feefaurumma murusaifafa naa.

<sup>3</sup> Miqi qimasoofofanoo Yudafa qinau. Mindaraa uriqararafa maasa oori runusee qimaqimifafa iriqa. Innee inneeqa nikaqa sia afiqee qumiqa sia qini qifusaa nifaranoo fee qinoo. <sup>4</sup> Anee qini qikaqara eedoo qinaqa maasa afiqee oogu qee ani narana feefaurianaura. <sup>5</sup> Anee sia eedoo qinanoo maasa qikaqa sia oogu finaqa sia amana fifau oogu funaaura. Mi maqannaasa uriqararafa qinoo inni nikaqa sia quminaqa sia qini qifusaa nifaranoo fee qinoo. <sup>6</sup> Yakoofoofa mi ufana iriseenoo qinau. Innee nanaree moomoo ummaara qini qimidee mi uriqararana qimamiqa maasa qikaqa maridanoo fee qifee.

<sup>7</sup> Misa iriseeqa kafaa qimamiqa qiqqau. Mi uriqararafa maasara faqa maasa faiqi aanaaseera faqa ireenoo. Inni nikoofa kaqi fee maridanoo fee qinoo. Kafaa inni nikaqa moo maridanoo fee qinoo. Miqi qimasee maasa iriifaqa qimamiqa. Maasa naqaa fee masee maasa qikaqa afiqee qumuaqee qianinnanara irianauree. Sia maasa iriqa.

<sup>8</sup> Miqi qimasee Yudafa nari akoona maaqi qimasee qimaminuu. Qipoo anee maasa qikaqa qini qisaukuki quqasainaga maasa doo findifi oogu funaauranoo. Miqinaqa

maasa sia daara rainaqa kuqunauranoo. <sup>9</sup> Qinee qeeqa marirana mina amaaqa maqaanaura. Anee minara qini kikiaqa usua. Qinee sia afigee andeeqasee anee iannannai uriqqa qinee ani nifairirana maraanaura. <sup>10</sup> Maasa sia ani faqa kisaaqasaa ufa qifau, maasa amana qaara kari ooquree ururee unaiqini.

<sup>11</sup> Miqi qufanoo misa nikoofa qimanniminau. Doo amana inneeqa miqiga miqiga. Innee maa maqa maqana kinaana amigira ainana inneeqa uqaki rumammareeqa kaqi nimi maria ainainnara foora muqu mi maqannaasa uriqararana amiaqa. Saqari anoona goodaa faqa ookasaasa anoona goodaa faqa adiafaa imari saqari qaqamana anoona faqa oofauna fooqaa ira ainaina anoona faqa kasa fooqaana anoona faqa maree ooqu fuaga. <sup>12</sup> Innee moomoo munnimma qaara kari afaqamaree ooqu fuaga. Innee ooqai munnimma inni uqa adianai marufaqa qafaqau. Abee, aqamasee munnimma inni uqaki kafaa quqaqau. <sup>13</sup> Inneeqa nikaqa afigee ooqurandee kai kaqi uruqa. <sup>14</sup> Aiqama afeeka faqaa Anutufa dadaaqinanoo mi fasiqafa inniara qimudaoo qiani. Qimudaoo qimaseenoo Beensaminna faqa inni nikaqa moo faqa kafaa nimiani. Qinee qini faiqi namu kakasifanoo doo saina kakasiani.

<sup>15</sup> Miqi qimasoo faqa Yakooboona faiqi namu mi saqari anoonausa faqa munnimma moomoo qaara kari mara maree Isipa maqa maaqai Beensaminna faqa afigeeqa ooqu fiqau. Miqoo misa Yooseefaafa maruqoo ooqu kikiqa mambufanoo Yooseefaafa misa nindafanau. <sup>16</sup> Yooseefaafa Beensaminna qafamaseenoo nari maaqakinaa ainainasaa rakisi maru fasiqana qimaminoo qinuu. Anee maa fasiqausa nifiqeenana qini maaqaki munu quqaa. Misa suani qambaana qini faqa narana neefaranoo. Anee aandau aruseenana deedaqia.

<sup>17</sup> Ainainira faiqi fannoo mifa qimamundee inoo misauqa nifiqee Yooseefaana maaqaki munu quqanau. <sup>18</sup> Yooseefaana maaqai nifiqee munu quqarara fimarufaqa misa rufidaqa oonumafi irimariqau. Indaaruu narana feefauriafanna munnimmana maasa mara mareeqa qimaaqai murusee mi munnimmana maasa uqaki paquriafannana akiqara maasa mai qifiqee anidanoo. Misa kai kaqi maasa darusee maasa doonkiuqa marasaifaqa maasa misa ainainira faiqikianaura.

<sup>19</sup> Misa miqi qimiriseeqa mina ainainasaa rakisi maru faiqina maaqa kooqiki oonuree qimamiqau. <sup>20</sup> Oo uriqarara amanee maasa ufa irinnaree. Ooqai maasa qeeqa maaqaindari mai qumuree narana feefauri iqiafana. <sup>21</sup> Maasa nai feefauru mamaree ooru fiufuqa aanai ooru faiqarara uiqaana arasee maasa qeeqa sakuma uqa sanda idukusee qafaafananoo maasa aiqamausa aquafanna munnimmafa aiqama maasa uqauqa adianai marinau. <sup>22</sup> Maasa mi munnimmana fabaqa maasa qeeqaindi moo faqa fiqaramasee narana feefaurirara maree qumidaqa. Yafee moo fannoo maasa uqakiaqa maasa narana feefauriafanna munnimmana kafaa uqarinuu fee.

<sup>23</sup> Miqi qimasoo fanoo Yooseefaana ainainasaa rakisi maru faiqifa iriseenoo qinuu. Doo innee nifaqa quqaqa. Sia rufia rufia iqa. Inni Anutufa inni nikoona Anutufa mifa kai inni munnimma inni uqaki rinuu. Doo qinee inni munnimma mareeqa. Mifa miqi qimaseenoo Simeeonna karabusaki maruna iduku eeqeenoo misaki quqanau.

<sup>24</sup> Quqaseenoo misa nifiqa mareenoo Yooseefaana maaqaki munu quqaseenoo nammari nimufaqa niku nammari uqusee mariqau. Misa doonkiuqa faqa narana nimufaqa naqau. <sup>25</sup> Miqimmasee misa nari maree qumu ainainausa Yooseefaafa suani qambaana anirainaaqaa amiraree qimasee deedaqiaqau. Yooseefaafa suani qambaana inni faqa narana naanauranoo fee qimasee qimannimnara irisee deedaqiaqau. <sup>26</sup> Yooseefaafa maaqai aniroofaqa misa nari maaqaindari maree qumu ainainausa mara maree maaqaki mifa marunai ooree mina oorinni noorindari maqasaa aqufiqau. <sup>27</sup> Miqimmasoo fanoo Yooseefaafa misara amiqi fee masee maridee qimasee irimirinuu. Inneeqa nikoona nauraiqara qima qimufaqa iriafanafa maqee kaqi fee maridanoo fee.

<sup>28</sup> Qufaqa misa iriseeqa qiqau. Eeoo ani ureeqara ainainira faiqi maasa qikoofa kaqi maridanoo. Miqi qimaseeqa misa kafaa Yooseefaana oorinni noorindari maqasaa aqufiqau.

<sup>29</sup> Miqimmasoo fanoo Yooseefaafa nari akaqa Beensaminna qafamaseenoo qinuu. Maana inneeqa nikaqara qima qimufaqa iriafanafee. Qimaseenoo Yooseefaafa qinuu. Qini qimaaku Anutufa ani amiqi amiqimma amaaqani. <sup>30</sup> Miqi qimaseenoo kai kaqi findifufanoo quqasee finuu. Mina amuqusa firaqoo nari akaqara mandaikufanoo finuu. Yooseefaafa misa nifusaa iki raqaqaaqaa ufanoo quqasee nari faiqee maru rummanai oonuree iki raqanau.

<sup>31</sup> Iki raqeseenoo nammariinnai aukunu nammari uquseenoo nari aukunu afeekaika mandeenoo doo misunai qumureenoo nari suqee maruna qimaminuu. Doo narana rakiqaannee qinuu.

<sup>32</sup> Miqi qufanoo suqee marufa narana naadu naadu rakiqanau. Yooseefaana aaduma teeboorasaa rakiqa amaqaanau. Kafaa mina afasausa mara naaduma teeboorasaa rakiqa nimaqaanau. Isipa maqannaasa minaki nee marusa naaduma moo teeboorasaa rakiqa nimaqaanau. Isipa maqannaasa Qeeburu maqannaasa faqa narana narara nikooqee marusa marunara naadu naadu naqau. <sup>33</sup> Yooseefaafa nari narana suqee maru faiqina qumee kai qimamufanoo mi faiqifa misa nifasaana indaaruu mara ooqu mara amaqaaseenoo mina aanaaqiannaana mina muqufi ooqu mara amaqaasee miqimmamaree inaaqiana nikaqa fannoo atinni ooqu marinau. Misa nari ooqufaaqeena qafamasee tautumasee nari qafee nari qafee iqau. <sup>34</sup> Yooseefaafa nari qufanoo mina difaanikinaa narana mareeqaida misa piritakiqa quqa mareenoo Beensaminnaindiki fiqaramasee moodaannai qisauku 5 kari narana quqanau. Quqasoofaqa narana faqa uainna nammari faqa neeneesoofanoo doo nifaaqa iduku fufaqa qufaina qiqa asasiqau.

## 44

### *Yooseefaafa nari kaafara randoo ufa.*

<sup>1</sup> Namasoofanoo Yooseefaafa nari maaqakinaa ainainasaa rakisi maru fasiqana qimaminoo qinuu. Anee misa uqa maraseenana minakiaqa narana uqa ruma qumbiqa-sainaqa maree fuaqa. Moo uqa sia apeeuniani. Amana kai marinaqa maree fuaqa. Misa munnimma faqa narana feefauriana nariqa uqa adianai rumasainaqa maree ooru fuaqa. <sup>2</sup> Miqidana inaaqiannaana uqakina nari munnimma narana feefaurina namufaqa qini siruaa kaafa faqa mina uqa adianai rua. Miqi qimasooofanoo mifa qimamundee inau.

<sup>3</sup> Kananaana keekoo qufaqa doo misa nari doonkiuqa namufaqa niqiqoofaqa ooru-fiqau. <sup>4</sup> Doo mareeqa kaqi kaaqoo maqusa quqasee nianai fufanoo Yooseefaafa nari ainainasaa rakisi maru faiqina aiqeenoo qinuu. Anee kai kaqi misa ninaaqianna fua fidana oonu misa rafaqaqafusee maaqi qimasee qimannimma. Innee naqi fee ifaqee qinee amiqimma nimaqaunnana akiiqara mandaikamma qimaqee fee. Miqi qimasee qimannimma. <sup>5</sup> Nanaree innee qini uriqararana kaafa qummuari fee, mifa minaki kai nammari neemarina. Mifa minaki afunee qafeemari kaafana qummuariafanoo, innee manda ainaina uqanna auqaafanoo fee qia.

<sup>6</sup> Miqi qimasooofanoo mina ainainira faiqi fannoo iriseenoo nifaqee finuu. Misa oonu paquri mandeenoo Yooseefaana ufa kai misa qimanniminuu. <sup>7</sup> Qimannimisoofaqa misa fiqau. Oo uriqarafa maasa ani ufa oosanara randaidaqa. Sia uqanna maasaki maaqira manda oosana maridanoo. <sup>8</sup> Maasa ooqai indaaruu narana feefauriafanna munnimmafa maasa uqaki maruna mina maasa sia qumuariqa mina Kannaana maqusaindari mara maree kafaa muqu ani amiqa. Maasa miqi marunaua maridaqa naqi maseeqee ani uriqararana maaqakinaa siruaa faqa kooru maraanauree. <sup>9</sup> Anee maasa uqa kaaqa randasee qafa. Yana uqakiffee mi ainainafa mariannoo fee doo mifa kai kuquannoo, maasa ani ainainira faiqi kamambi marianaara.

<sup>10</sup> Yooseefaana ainainira fasiqa fannoo misa ufa iriseenoo qima niminuu. Doo amana inni ufa mau kai fuanaara. Ya fasiqana uqaki fee marinafa mifa kai qini ainainira faiqi mariannoo. Innee aiqama nimaqaqa fifaranoo.

<sup>11</sup> Miqi qimasooofaqa misa kai kaqi nari uqauqa afiqa maqasaa quqasee iduq-iqau. <sup>12</sup> Yooseefaana ainainasaa rakisirafa indaaruuqaanaindi naaree qafamaseenoo miqooqaraanaindiki miqoo qafamaseenoo kafa miqoo qaraanaindiki qafamaseenoo miqi kai mamaree aiqamausa uqakiaqa amiqimmasee qafanoo finuu. Miqi mamareenoo misa ninaaqiannaana Beensammina uqaki qafoofanoo kaafa minaki marinuu. <sup>13</sup> Beensaminnana uqaki paquri masooofaqa mina afasausa mara aiqamausa nimuqusu-faqa nari qamunna aiqamausa rakeekaa iqau. Miqooqari nari ainaina doonkisa qaqasee oonu quandakufaqa maqusai aniqa.

<sup>14</sup> Yudafa nari auna akaqa faqa Yooseefaana maaqai oonuree qafoofanoo Yooseefaafa kaqi maaqaki marinuu. Marufaqa misa anireeqa noorindari maqasaa aqufiqau. <sup>15</sup> Aqufuma fufanoo Yooseefaafa qinuu. Innee naqi fee ifee. Innee sia fee iridee, qinee maaqira uriqararansa qeeqa afuneeenoo inni ummuarirana paquriranara, sia fee iriffee.

<sup>16</sup> Miqi qimasooofanoo Yudafa qinuu. Oo uriqararafa maasa nana ufa fee ani qimami-nauree. Maasa naqi mandee fee maasa qeeqa andeeqaranara qianauree. Anee maasa kikiqa qusimariannana naqimmasee fee qaoo qianauree. Anutufa maasa aaqarana koorooinoo. Sia kaafa maraifa kai ani ainainira faiqi mariannoo, maasa aiqamausa ani ainainira faiqi marianaara.

<sup>17</sup> Miqi qimasooofanoo Yooseefaafa nariqa qimanniminoo qinuu. Oo sia uqanna qinee miqianaaranoo. Kaafa maraifa kai qini ainainira faiqi kiannoo. Innee akaqausa nimaqaqa ooree ineeqa nikoona qimamiaqa.

*Yudafa Beensaminna amaaqa maqarariu ufafa.*

<sup>18</sup> Yudafa Yooseefaafa maruqoo oorureenoo qimaminoo qinau. Oo uriqararafa, anee qiniara eedoo qinaqa ani faqa qifaaqa quqasee ufa qia. Anee sia qiniara aanoo qia. Anee Faraona miqirafa mariananoo, uriqararafa mariananoo. <sup>19</sup> Oo uriqararafa, ooqai maasa umuraafanana anee maasa iramirinana inni nikoofa maridanoo fee inni nikaqa maridanoo fee qinau. <sup>20</sup> Miqi qunaqa maasa maaqi qimasee aninna qimamiqiafana. Maasa qikoofa asooqa maridanoo. Maasa qikaqa faqa maridanoo. Mifa asooqa namuki mi faiqina maqeenoo. Mi faiqina afasaafa kuqufufanoo nariara marifanoo maasa qikoofa kaaqa minara amuqusidanoo.

<sup>21</sup> Maasa miqi qimasee indaaruu ani qimamiqiafana. Uriqararafa anee maasara afiqee muqusaifaqa qafaanee qinau. <sup>22</sup> Miqi qunaqa maasa maaqi qimasee aninna qimamiqiafana. Oo mi faiqifa sia amana nari akoona quqaannoo. Mina faiqi fannoo miqinanoo mina akoofa kuqaannoo fee qiqiafana. <sup>23</sup> Maasa miqi qimasee ani qimamiqiafana anee maaqi qinau. Innee inneeqa nikaqa sia afiqee qumiqa sia qini qifusaa anifaranoo fee qinau. <sup>24</sup> Maasa ani ufa iriseeqa qeeqa qikoo finnai oonuree anee qunna ufana qimamiqiafana.

<sup>25</sup> Qimamiseeqa mariafananoo maasa qikoofa maasara kaifaa ooqu narana feefauri-aqee qiqau. <sup>26</sup> Miqi qufaqa maasa maaqi qimasee nari qimamiqiafana. Maasa qikaqa ooqu finaqa maasa ooqu funaura. Sia maasa qeeqaraa uriqararana afusaa ooqu funaura.

<sup>27</sup> Miqi qufanoo maasa qikoofa maaqi qimasee maasa qima qiminau. Innee irimmari-afanoo qini qinaaqa Raseera nammariifa qini faiqi qaarqaanda kai maqanau. <sup>28</sup> Moo fannoo fifufaqa qinee minara kaasau aanda fannoo qini faiqi arusee rakeekaamma namaseefoo qiqiafana. Mi fasannai sia kafa minna qafeeqa. Doo mifa taikafinuu. <sup>29</sup> Innee maana qinee unnannaindaraana afiqee fifanoo moo ainaina minna afaaqai kambiqainaga qini minara qimudaoo qirafa asooqa marunnaqoo qini daruannoo fee qinau.

<sup>30</sup> Yudafa Yooseefaana kaifaa qimamidanoo qinau. Maasa qeeqa qikaqa quqaseeqa oonuraananoo maasa qikoofa maasa qiqafamaseenoo doo nari faiqira amuqusinanoo kuqaannoo. <sup>31</sup> Maasa qikoona amuqusirafa firaqoo maa faiqinaki maridanoo. Mifa asooqa uqanna maridanoo maasa maaqamma saananoo mi ummaarafa minna kuqa aruannoo. <sup>32</sup> Qinee qeeqa qikoona maaqi qimasee qimami qiafana. Qinee qeeqa qikaqa akiiqara ummaara maraanauree qiqiafana. Qinee sia minna afiqee uriqa ani nifairira ufa qinee maraanauranoo fee qiqiafana.

<sup>33</sup> Miqi qimasee qinee qeeqa qikoona qimamiqiafana. Maqee qinee qeeqa qikaqa amaaqa maqeeqa ani ainainira faiqi kiananoo qini qikaqa fannoo nari afasausa faqa ooru fuannoo. <sup>34</sup> Qinee naqimmasee fee maa faiqifa sia qini faqa ooru finaqa qeeqaraa qeeqa qikoo finnai ooru funauree. Qini qikoofa manda ummaara marainaqa qafaananoo sia amiqiannoo, mandaikammianoo.

## 45

*Yooseefaafa nariara kooroo ufafa.*

<sup>1</sup> Yooseefaana aundura dapikufanoo nari ainainira fasiqauqa nifusaa ikiraqararusia minnisee sia amanaikufanoo niqi qamasooafa madaana fiqu. Fifufanoo Yooseefaafa nari ainaina faqa kai maridanoo qimanniminuu. Qinee inni nikaqa Yooseefaasa maridaqa. <sup>2</sup> Yooseefaafa firaqoo iki raqaida qufaqa Isipa maqannaasa madaana maridaqa iriseeqa oonu Faraona qimamiqau.

<sup>3</sup> Yooseefaafa nari afasausa mara maaqi qimasee qimanniminuu. Qinee maana Yooseefaasa maridaa. Kuqaa fee qini qikoofa kaqi fee maridanoo fee. Miqi qufaqa minna afasausa mara tautu maseeqa naaquqooafaqa sia ufa qiqau. <sup>4</sup> Yooseefaafa kafa qimanniminoo qinuu. Doo innee qini daaqa aniaqee qufaqa misa minna aqa aniroofanoo kafa qimanniminoo qinuu. Qinee inni nikaqa mariafanaqa innee feefauruara mamaree qini quqasoofaqa qini qifiqamaree Isipa maqa maaqaki ainainira faiqi kamma qisaqau. <sup>5</sup> Doo maqee innee sia qini qimu oosannara inneeqa kikiqusifanoo nimuqusiani. Anutufa kai qini diiqooafaqa innee kuqi foora indaarunni kamma nimaqasee inni dadaaqianeera qufaqa qumiqiafana. <sup>6</sup> Fira aandaroo narirafa maa maqanasaa qaara aukuna marasee aiqaraifanoo moodaannai qisauku aukuna kaqi maridanoo. Mi kamuqoo fuka narana ummaqirafa faqa unakirafa faqa sia mariannoo. <sup>7</sup> Anutufa kai qini mareeqee inni indaarunni kamma saifaqa inni asumu marasainaqa sia kuquaqeeera, mi mookira oosannanai kuqaa mifa inni faqa inni niku nisauku faqa marasainaqa asumu marifaranoo.

<sup>8</sup>Minara sia innee fau qini diiqoofaau maa maqa maaqanaki ani maridaqau. Anutufa diiqoofaqa ani maridaqa. Mifa kai qini mareeqee Faraona oofsaauqa uriqarau-saikamma qaifaqa maridaqa. Miqimmasaifaqa qinee mina aiqama maqa maaqasaa rakisirausa maridaqa. Aiqama Isipa maqa maaqasaa rakisirausa maridaqa. <sup>9</sup>Innee kai kaqi qini qikoo finnai ooruree ani amaaku Yooseefaafa maaqi qinoofee qimasee qimamiaqa. Anutufa qini mareeqeenoo aiqama Isipa maqa maaqasaa rakisira faika maqaiifaqa maridaqa. Sia kisaaqasaa maria, kai kaqi qinee unnannai qumua. <sup>10</sup>Anee faqa aneenna faiqi namu faqa aneenna anaiqi mara faqa inneeqa sipsipa faqa inneeqa mimmiuqa faqa inneeqa burimakau faqa inneeqa aiqama ainaina faqa indaa mamaree qumuraifaqa Kooseena maqa nimianaqa qini daaqa mariaqa. <sup>11</sup>Innee Kooseena maqa maaqaki innisaa rakisianaura. Moodaannai qisauku aukuaana kaqi maridanoo, mi aukuaana namunaki aandaroo ida mariannoo. Innee faqa inneeqa faiqi anaasee faqa inneeqa aandaufa faqa naararaina kuqifoora qikooqaidanoo.

<sup>12</sup>Yooseefaafa kaifaa nari afasausa mara qima nimidanoo qinau. Innee nifu maqasee qini qiqafaqaq sia moosau maridau qinee Yooseefaasa uqanna maridaqa. Doo qini qikaqa Beensaminnafa mifa faqa qini qiqafaani. <sup>13</sup>Qinee Isipa maqasaa firaqoo uriqararusa marunnanara qini qikoonaa qimamiaqa. Aiqama ainaina qafaanara faqa qimamiaqa. Qimamiseeqa doo dauni dauni afiqee mai qumuuaqa.

<sup>14</sup>Miqi qimaseenoo nari akaqa Beensaminna oonu mafi anukaki difaa difaamma qumareenoo iki raqoofanoo Beensaminnafa faqa iki raqanau. <sup>15</sup>Yooseefaqa quandaku fanoo nari afasausa mara aiqamausa nimooqaseenoo naiki raqanau. Naiki raqasoofaqa mina afasausa mara mina faqa ufa qiqau.

<sup>16</sup>Isipa maqannaasa misa miqi unara oonu Faraona qimamisoofanoo Faraoofa faqa mina uriqarararusa faqa iriseeqa اساسmiiqau. <sup>17</sup>Faraoofa Yooseefaana maaqi qimasee qimaminoo qinau. Anee maaqi qimasee aneenna afasausa qimanniminaqa nari ummaara doonkisaa mara quqasaifaqa maree Kannaana maqasai ooru fuaqa. <sup>18</sup>Miqoo oorureeqa nari nikoona faqa nari faiqi anaasee faqa nifiqee mai qumuuaqa. Qumuraifaqa Isipa maqa maaqaki qafamasee amiqira maqa nimianaqa miqoo narana fiqaranoo moomoo marinaqa marifaranoo.

<sup>19</sup>Faraoofa kafaqa Yooseefaana qimaminau. Anee qinee ufa qunnana qimanniminaqa Isipa maqasaindaraa qoosa rarisee mari karausa faqa daraiwaa faqa mara maree ooru fuaqa. Minakina nari ninaaqmaaka faqa nari faiqi aanaaqiuga faqa nari nikoona faqa mara quqasai ooqu marifiqa qumuuaqa. <sup>20</sup>Misa sia nari umiasana aina mafi quqasee quminnanara oonu mafi iriaqa. Isipa maqa maaqa amiqirafa aiqama misaindikammianoo.

<sup>21</sup>Yakooboona amaaku mara Faraoofa qimannimundee kai iqau. Yooseefaafa Faraona ufa iriseenoo qoosa rarisee maru karausa mara quqasoofaqa daraiwaa namu faqa aatata neefandinna narana faqa nimufaqa maree ooru fiqau. <sup>22</sup>Yooseefaafa nari afasausa mara qamunna moodaa kai moodaa kai nimana nimana kai nininau. Beensaminna moodaana qisauku qamunna faqa siruaa munnimma 300 faqa aminau. <sup>23</sup>Yooseefaafa Isipa maqannaamiqira ainaina suquseenoo qisauku qara taikasee doonkisaa oorufusaa amaqoofaqa mara maree muru mina akoona amiqau. Kafaqa aatata qumidanoo naaninna narana sakumana faqa feemu faqa narana oosana oosana faqa anaasee doonki qisauku qara taikaseesaa oorufusaa quqasoofaqa maree ooru fiqau. <sup>24</sup>Yooseefaafa nari afasausa mara Kannaana maqasai niqamasoofaqa fufanoo qima niminoo qinau. Innee aatata fidaqaq sia qiniara qimasaida nari aqi nari aqiqa fuaqa.

<sup>25</sup>Misa Isipa maqa maaqa quqasee nimaaga nari nikoofa Yakooboofa marunna Kannaana maqa maaqai ooru fiqau. <sup>26</sup>Ooruree nari nikoona qimamiqau. Yooseefaafaq sia kuqinoo kaqi maridanoo, misa miqi qimasee nari nikoona qimamiqau. Mifa Isipa maqannaamiqamausa uriqararafa maridanoo fee qiqau. Yakooboofa mi ufana irufanoo amuqusa kaqinnaindari ufanoo misa ufaraq sia kuqaaq fee qinau. <sup>27</sup>Yooseefaafa qimanimu ufaua nari nikoona qimami marufanoo Yakooboofa qafoofanoo qoosa rarisee maru karausa Yooseefaafa quqasoosa Yakooboona afiqee Isipa maqa maaqai ooqu firara ururaqau. Yakooboofa mi karausa qafoofanoo aundura idukinau. <sup>28</sup>Idukufanoo qinau. Qini qimaaku Yooseefaafa kaqi maridanoo. (Qinee kaqi maridaqaq ooquq mina qafarafa mifa kai aiqama ainaina arusee uriqararafaq maridanoo.) Qinee ooquq mina qafamasee kuquanauree qinau.

<sup>1</sup> Yakooboofa nari ainaina indaaii mareenoo Beeraseeba maqasai ooqureenoo miqoo nari akoono Isakeena Anutuna aandau tatufirana suqaminau.

<sup>2</sup> Miqoo eendaki faiqaqee ufanoo Anutufa qainasaa afu nareenoo qinau. Yakooboo Yakooboo qufanoo Yakooboofa maqi qimaseenoo qinau qinee maagoor maridaqa.

<sup>3</sup> Qufanoo Anutufa qimaminoo qinau. Qinee Anutusa ani akoono Anutusa maridaqa. Anee sia Isipa maqasaa ooqu firanara rufiaa. Mi maqanasaa ooqu marinaqa ani aiku asauku firaa maqanaasaikamma nisaanaura. <sup>4</sup> Qinee ani faqa Isipa maqasaa ooqu fuanaura. Yooseefaafa ani faqa Isipa maqa maqaki marinana mariinana kuqinnarano. Mariinaqa kasooaqee kafia ani aiku asauku mareeqee kafia Kannaana maqasaa quqaanaura.

<sup>5</sup> Beeraseeba maqusa Yakooboofa quqasee Kannaana maqa maaqai ooqufinau. Mina faiqi namu Yakooboona faqa nari faiqi aanaaqiuga faqa nari ninaaqmaaka faqa mareeqee qoosa rarisee maru karana Isipa maqannaak karaambaiqa Faraofa nimaqoonasaa quqasee nifiqee ooqufiqau. <sup>6</sup> Misa nari aandau aina faqa nariqa umiasana faqa Kannaana maqasaa maridaqa maqeeiunauqa aiqama maree ooqu fiqau. Yakooboofa nari aiku asauku aiqama nifiqee ooqu finau. <sup>7</sup> Yakooboofa nari faiqi namu faqa nari anaiqi mara akoonaiqiuga faqa nari araamuqmaaka faqa nari anaiqi mara maanaaqauqa faqa aiqama nifiqee ooqu finau.

<sup>8</sup> Yakooboona faiqi namu Isipa maqasaa ooqu fusa maaqi miqa mariqau. Yakooboona ooqa faiqi Reebeenafa marinau. <sup>9</sup> Reebeena faiqi namu Qanookafa faqa Parufa faqa Qeeseeroonafa faqa Karamifa faqa mariqau. <sup>10</sup> Simeeona faiqi namu Yeemueerafa faqa Yaminafa faqa Ooqadafa faqa Yakifa faqa Soqarafa faqa mariqau, misa aiqamausa moodaa anaasee faiqi namu mariqau. Moo anaasee faiqi Saurafa marinau. Mina anoofa Kannaana maqannaak anaasee marinau.

<sup>11</sup> Reefina faiqi namu Keerasoonafa faqa Kooqafa faqa Meerarifa faqa mariqau.

<sup>12</sup> Yudaana faiqi namu Seeraafa faqa Peeresafa faqa Siraafa faqa mariqau. Yudaana faiqi qaaraqanda Eerafa faqa Oonanafa faqa mariufafa Oonanafa Kannaana maqasaa kuqinau. Peeresana faiqi qara Qeesaroonafa faqa Qamurafa faqa mariqau.

<sup>13</sup> Isakarana faiqi namu Toorafa faqa Puaafa faqa Yasubafa faqa Simaroonafa faqa mariqau.

<sup>14</sup> Seeburuna faiqi namu Seeredafa faqa Eroonafa faqa Yareerafa faqa mariqau.

<sup>15</sup> Miqimmaseenoo Reea nammarifa Yakooboona faiqi namu Meesapotamia maqasai maridanoo maqanoo. Maanaaqqa moodaa auqu Dinna nammarifa mina faqa miqoo maqanau. Doo Reea nammarina faiqi namu maanaaqqa akoonaiqi aiqamausa 33 mariqau.

<sup>16</sup> Kadana faiqi namu Seefoonaa faqa Qakifa faqa Sunifa faqa Eesaboonafa faqa Eerifa faqa Aroodifa faqa Arerifa faqa mariqau. <sup>17</sup> Aseerana faiqi namu Iminaafa faqa Isauaafa faqa Isiffa faqa Beeriaafa faqa misa nisookifa Seera nammarifa faqa mariqau. Beeriaana amaaku qara Qeebeerafa faqa Marakieerafa faqa mariqau. <sup>18</sup> Doo miqimmasee Yakooboona aiku asauku 16 nari ainainira maanaaqqa Rabanafa Reea namarina amuna Siripaa nammarinasaa maqanau.

<sup>19</sup> Yakooboona anaqa Raseera nammarifa faiqi qaaraqanda maqanau. Yooseefaafa faqa Beensaminnafa faqa mariqau. <sup>20</sup> Yooseefaana faiqiqara qaaraqanda Isipa maqasaa kambiaqau. Miqanda nuqu Mannaseefa faqa Eefaraimmafa faqa mariqau. Miqanda ninooqa Aseenata nammarifa marinau. Aseenata nammarina akoono auqu Pootifeerafa marinau. Mi fasiqafa Qeerioporisa maqannaak amaana maqasaa rakisi marufa marinau.

<sup>21</sup> Beenasaminna faiqi namu maaqimmiqa mariqau. Beerafa faqa Beekeerafa faqa Asabeerafa faqa Keerafa faqa Naamanafa faqa Eeqifa faqa Roosafa faqa Mupimafa faqa Qupimafa faqa Aratafa faqa mariqau. <sup>22</sup> Doo miqimmasee 14 Yakooboona aiku asauku Raseera nammarinasaa qari kambiaqau. (Rabanafa Biriqaa nammarina nari ainainira maanaaqqa Raseera nammarina nari araamuna amufanoo mifa mareeqeenoo nari afaaqi Yakooboona amufanoo faiqi maaqi mandee maqanau.) <sup>23</sup> Biriqaa nammarina indaruqaa faiqi Dannafa marinau. Dannana faiqi moodaa marinau mina auqu Qusimafa marinau. <sup>24</sup> Biriqaa nammarina faiqi moo Nafatarifa marinau. Nafatarina faiqi namu maaqi miqa mariqau. Yaqaseerafa faqa Kunifa faqa Yeeseerafa faqa Sireemafa faqa mariqau. <sup>25</sup> Doo miqimmasee Yakooboona aiku asauku 7 nari ainainira manaqa Rabanafa Raseera nammarina amunasaa Biriqaa nammarinasaa maqanau.

<sup>26</sup> Yakooboona aiku asauku uqanna Isipa maqasaa ooqufusaa aiqama moodaanaki 66 mariqau. Misa ninaakuqmaaka sia nisaanariqa. <sup>27</sup> Yooseefaana faiqi qara Isipa maqasaa kambiaqau. Miqanda faqa Yooseefaana faqa Yakooboona faqa moodaanaki ootupamasee 70 fasiqa ooqu fiqau.

*Yakooboofa narí aiku asauku faqa Isipa maqusai maru ufafa.*

<sup>28</sup> Yakooboofa Yudana aiqoofanoo indaaruu ooqu Yooseefaana qimaminanoo Kooseena maqasaa misa paquriani feera aiqanau. <sup>29</sup> Yooseefaafa narí qoosa rarisee maru karanaki akarama fufanoo Kooseena maqa maaqai narí akoona paqurirara finau. Oonu paqurimmaseenoo Yooseefaafa narí akoona anukaki oonu mafi kaqaramma umareenoo kisaaqasaa iki raqee marinau.

<sup>30</sup> Iki raqee marufanoo Yakooboofa Yooseefaana qimaminoo qinuu. Doo qinee kuqiraridaqa qinee maqee ani qafeega anee sia kuqina mariana kaqi mariana.

<sup>31</sup> Yooseefaafa iki raqaseenoo narí afasausa mara faqa narí akoona aiku asauku aiqama faqa qimanniminoo qinuu. Qinee Faraofa mariqoo ooruree inniara qimamianaura. Qini qikoofa faqa qini qifasausa faqa Kannaana maqusaindari qinee marunnannai qumureeaa maqi qianaura. <sup>32</sup> Qinee inniara sipsipasaa rakisi mariasa maridaqa nariqa sipsipa faqa burimakau faqa nariqa aiqama ainaina faqa maree qumiaa maqi qimasee qimamianaura. <sup>33</sup> Qinee miqi qimasee qimamisaananoo Faraofa inni naaramasee innee ainaini marianara irainaga maaqi qimasee qimamiaqa. <sup>34</sup> Oo maasa uriqararafa maasa qikeeku qikaaku ooqai sipsipa kai rakisi marusa marufaqa maasa faqa maqee minasaa kai rakisidaqa. Innee miqi qimasee Faraoona qimamifanoo mifa Kooseena maqa inni nimiannoo. Isipa maqannaasa sipsipa rakisiranara nikoo uqanna qaidanoo. Minara inni naaduma saa Kooseena maqa nimiannoo.

## 47

<sup>1</sup> Yooseefaafa narí afasausa moodaannai qisauku namu nifiqeenoo Faraoo fuqoo ooru finau. Oorureenoo qimaminoo qinuu. Oo Faraoo qini qikoofa faqa qini qifasausa faqa Kannaana maqusaindari narí sipsipa burimakau aiqama faqa narí ainaina faqa maree qumidaqa. Maqee misa Kooseena maqasaa qumu maridaqa. <sup>2</sup> Miqi qimasee narí afasausa mara Faraoona oorinni murusoofanoo niqafanau.

<sup>3</sup> Faraofa Yooseefaana ufa iriseenoo mina afasausa mara iramirinoo qinuu. Innee nana ainaini mariasee. Miqi qufaqa misa iriseeqa qiqau. Uriqararafa, maasa sipsipasaa rakisira ainaina imarunausa maridaqa. Maasa qikeeku qikaaku auqeeu saikana kai maasa faqa maridaqa. <sup>4</sup> Aandaroo firaafa uqanna Kannaana maqasaa darifanoo maasa sipsipauqa nara andanda sia marifaqa maasa maa maqa maaqanaki marirara umidaqa. Amanee eedoo qirana qiminaqa maasa Kooseena maqa maaqaki marianauree.

<sup>5</sup> Faraofa misa ufa iriseenoo Yooseefaana qimaminoo qinuu. Doo ani akoofa faqa ani afasausa faqa ani faqa mariraree qidee. <sup>6</sup> Isipa maqa maaqa misaindi maridanoo. Sainaga Kooseena maqa maaqaki mariaqa. Kooseena maqa maaqa amiqirafa maridanoo. Ani afasausa kinaana moo qafainanoo sipsipa burimakau amiqi mandee rakisi marinana mina mareeqeenana quqasainanoo mifa qini sipsipa burimakausaa rakisiani.

<sup>7</sup> Miqi qimasoofoanoo Yooseefaafa narí akoona afigeenoo Faraoo fuqoo minisoofanoo Yakooboofa miqoo anireenoo Faraoona afaaqooqa qimama qanau. <sup>8</sup> Miqi qimasoofoanoo Faraofa Yakooboona aukuanara iramirinau. Ani aukuaana naqumme maridanoo fee qufanoo Yakooboofa qinuu. <sup>9</sup> Qinee 130 aukuaana kai maa maqanasaa maridaqa. Sia kisaaqasaa fau qinee moomoo ummaara paquriqa. Qini qikeeku qikaaku kisaaqasaa uqanna mariqau. Misa aukuaana fannoo qini aukuaana fiaqarano maridanoo. <sup>10</sup> Yakooboofa miqi qimaseenoo kafa Faraoona afaaqooqa qimama qaseenoo doo raudamaki finau.

<sup>11</sup> Yooseefaafa narí afasausa mara faqa narí akoona faqa Faraofa uqoo Isipa maqa maqaki Rameeseesa maqusa aqa soofaqa mariqau. <sup>12</sup> Miqiqqa miqoo marufanoo Yooseefaafa narí akoona faqa narí afasausa mara faqa narí akoona aiku asauku marusa faqa kaaqa aanaaqi faiqiuqa faqa narana nimi marinau.

*Aandaroo firaafa Isipa maqannaasa naru ufafa.*

<sup>13</sup> Aandaroo firaafa uqanna imarufanoo sia uqanna aiqama tinai narana marinau. Isipa maqannaasi fasiqa anaasee faqa Kannaana maqannaasi fasiqa anaasee faqa naaroofofa ummooquka iqa nimariqau. <sup>14</sup> Misa narana feefauri marufanoo Yooseefaafa mi munnimmana mara maree Faraofa maruqoo munusee mina ami marinau. <sup>15</sup> Isipa maqannaasa faqa Kannaana maqannaasa faqa narana feefaurida aiqama narí munnimma taikaqau. Miqi maseeqa Isipa maqannaasa anireeqa Yooseefaana qimamiqa qiqau. Maasa munnimma doo taikaseeqa anee sia maasa afu kai qiqafaa kuquana faara narana niminaqa naa. Sia maasa narana qiminaqa maasa ani afusaa kuquanaura.

<sup>16</sup> Misa miqi qufanoo Yooseefaafa maaqi qimasee nariqa qimannimau. Inni munnimma taikainaga inneeqa aandau aina maree mini qimidaqa narana mina akiqara maraqa. <sup>17</sup> Miqi qufaqa misa nariqa aandau aina Yooseefaana mini amufanoo

misa qoosauqa faqa sipsipauqa faqa mimmiuqa faqa burimakauqa faqa doonkiuqa faqa mina akiqara narana nimimarinau. Doo mi aukuanna misa nari aandau aina akiqara Yooseefaafa narana nimi marinau.

<sup>18</sup> Mi aukuanna taikoofaqa kafia moo aukuanaki Yooseefaafa fuqoo anireeqa maaqi qimasee qimamiqau. Maasa naqi fee mandee moo ainaina ani afusaa kukeeqaanauree, sia. Doo maasa munnimma taika fifaqa maasa aandau aina faqa anindika kai mambifaqa kaqi maridaqa. Sia ani amira ainaina moo marifaqa. Maasa qiga qifaqa faqa maasa maqa faqa kai maasaki maridanoo. <sup>19</sup> Maasa ani afusaa kuquaqaa midaqa doo saina maasa qeeqa faiqi faqa maqa faqa mina kai amisidaqa feefauru marasidaqa narana naa. Miqimmaseeqa maasa qeeqa faqa Faraona anainira faiqi kakai iqa maria. Maasa moodaa ainainara kai iridaqa. Narana faqa narana asumu faqa niminaqa maasa qummaqa. Narana qummaquseeqa maasa sia kuqa.

<sup>20</sup> Yooseefaafa misa ufa iriseenoo aiqama Isipa maqa maaqa feefaurumma Faraona aminau. Aiqama Isipa maqannaasa aandaroo firaafa uqanna narunara nariqa maqa amisee feefauru marasee minannoo narana feefaurumma neemarufanoo aiqama maqa maaqa Faraonaindika minoo maarinau. <sup>21</sup> Miqi marufanoo Yooseefaafa Isipa maqa maaqa dinni atindari dinni atinni marusa mareeqee ainainira faiqika kai masanau. <sup>22</sup> Isipa maqannaama maasa maqasaa rakisirausa maqa kai Yooseefaafa sia feefaurinau. Faraofa maqee maqee munnimma nimi marufaqa narana feefaurummasaida neemarufaqa sia misa maqa feefauriqa.

<sup>23</sup> Yooseefaafa faiqi anaasee qimannimino qinau. Doo innee qafaidee qinee maqee inni faqa inniqa maqa faqa feefaurumma Faraona amiqa. Maqee narana asumu nimianaqa inneeqa maqa Faraona amu maqanaki kafia qummaqaqa. <sup>24</sup> Narana anoona mambinaqa moodaaqoo unaku quqaseeqa aiqama moodaanna qisaukukinaana moodaa moodaa Faraona amisee akaqana inneeqa faiqi aanaaseera faqa asumuara faqa quqaaqa.

<sup>25</sup> Faqiqi anaasee Yooseefaana maaqi qimasee qimamiqa qiqau. Oo Yooseefaafa anee aneenna kai maasa manda ainainasaa itita qisaanano. Anee kai maasa amiqimma qisaanano. Uriqararafa maasa amana Faraona ainainira faiqi mariana.

<sup>26</sup> Miqoo qari Yooseefaafa afeeka sanda ufa quqanau. Mi sanda ufana oosana maaqi minoo maridanoo. Aiqama Isipa maqa maaqakinaa narana unakusee moodaanna qisauku kinaana moodaa Faraona amiqa. Mi ufafa maqee kaqi afeekaikino maridanoo. Amaana maqasaa rakisi marusa maqa kai sia Faraonaindikino marinau.

*Yakooboofa inaaqianna moodaa ufa iramirinau.*

<sup>27</sup> Isarae maqannaasa Isipa maqasaa Kooseena maqa maaqaki mariqa. Miqoo maridaqa moomoo ainaina faqasa marufanoo misa faiqi namu faqa moomoo kambiqau. <sup>28</sup> Yakooboofa qisauku qara taikaseenoo qiku dinni taikaseenoo dinni oonu qaara maraseenoo 17 aukuaana Isipa maqasaa marinau. Mina aukuaana aiqama moodaana 147 aukuaana marasee kuqinau. <sup>29</sup> Mina kuqirafa adeedi rama fufanoo Yakooboofa Yooseefaana aaramaseenoo qimaminau. Anee aneenna asauku qini qifundana ameemaana qiqaseenana sia Isipa maqasaa akundaanauranoofee qimasee qimafeekaikia. <sup>30</sup> Qini qiga qikausa mara nikundoonaki qikundaa. Qini Isipa maqasaqari mara maree misa nikundooqoo qikundaa. Miqi qufanoo Yooseefaafa nari qimaminoo qinau. Anee qianandee miana.

<sup>31</sup> Yooseefaafa nari akoona ufa iriseenoo eedoo qufanoo mina akoofa qinau. Saa sia kaqi eedoo qia, kuqaa qima afeekai kinana eedoo qia. Miqi qimasoo fanoo kuqaa Yooseefaafa eedoo qima afeekai kinau. Qima afeekai kamasoo fanoo Yakooboofa nari qarisaa ooqu marifi Anutunara dufi dufi qinau. Innaaru qimasoo fanoo Yooseefaafa nari ainaini finau.

## 48

*Yakooboofa Eefaraimana faqa Mannaseena faqa nifaqooqau ufafa.*

<sup>1</sup> Kaqikaqoo mari kufaqa misa Yooseefaana qimamiqau. Ani akoofa doo amiqimma auridanoo. Yooseefaafa mi ufana iriseenoo nari amaaku qara Mannaaseesa Eefaraimana nindiqeenoo nari akoofunnai ooqu finau. <sup>2</sup> Misa Yakooboona qimamiqau ani amaaku Yooseefaafa ani qafarara qumidanoo fee qufanoo Yakooboofa afeekaikammasee findi fufanoo nari qarisaa ooqu marinau.

<sup>3</sup> Ooqu mari fufanoo Yakooboofa Yooseefaana qimaminoo qinau. Ooqai qinee Kannaana maqa maaqaki nuafannana kinai Rusa maqa maaqaki mariafanano Anutufa aiqama afeeka faqaafa akooqoo kooroomma fufanoo qini qifaqooqa qima qimaqanau. <sup>4</sup> Mifa maaqi qimasee qini qima qiminau. Qinee moomoo faiqi asumu amiana anisaqaari



ani aruakinausa moomoo maqannaasaika mifaranoo. Qinee maa maqana ani aiku asauku nimiananoo naaru naaru misaindika minoo mariannoo.

<sup>5</sup> Ani amaaku qara Isipa maqasaa kambiqara qanda qinee Kannaana maqasaa kaqi marunaqa kambiqaa qanda Mannaseesa Eefaraimasa qini faiqi qara Reeubeenasa Simeeoonasara foora marifaranoo. <sup>6</sup> Anee akaqa faiqi namu maqa sainausa misa anindika mambi marifara. Misa nari nifasaa qanda Mannaseesa Eefaraimasakinaa qumiasana ainaina maree faranoo. <sup>7</sup> Qinee ani anoona Raseera nammarinara iriqa miqi qidaqa. Mifa qini firaa qimudaoo qiranaki Kannaana maqa maaqaki kuqinai. Qinee Meesapootamia maqa maaqaindari ani mariafananoo aanai Eefarataa maqusa aqa kuqinai. Qinee mina iri Eefarata maqusai fimaru aanna afainni akundaqafana. (Maqee Eefarataa maqusara Beedeeree maqusee qidaqa)

<sup>8</sup> Yakooboofa miqi qimaseenoo Yooseefaana amaaku qara nindafeenoo qinai. Maaqanda yana faiqi qaree.

<sup>9</sup> Qufanoo Yooseefaafa qinai. Qini faiqi qara Anutufa Isipa maqasaa mariafananoo qimu qanda maridaqa. Yakooboofa mi ufana iriseenoo qinai. Doo miqanda nifigee mai qinee unnaqoo adeedi minisainaqa nifaqooqa qima nimaqaa. <sup>10</sup> Yakooboofa nauraiqi marunara sia amiqimmasee afu maqee marinai. Yooseefaafa nari amaakuqara minisoofanoo oonu mafi kaqaramma qumareenoo nimooganai.

<sup>11</sup> Nimooqa namasee Yakooboofa Yooseefaana qimaminoo qinai. Qinee sia kaifaa ani qafaanauree qunanoo Anutufa kai qifaqa ani faiqi namu niqafaidaqa. <sup>12</sup> Miqi qimasoofoanoo Yooseefaafa nari akoona afundana saaqaraana nari faiqi qara qumareegeenoo nari akoona afunni oorindari maqasaa aqufinai. <sup>13</sup> Yooseefaafa nari akoona afusaa kummarama fufanoo Eefaraimmana mara munu Yakooboona asaaqai quqaseenoo Mannaseena mina asaukuannai quqanai. <sup>14</sup> Quqasoofoanoo Yakooboofa asauku qara figaree aiqaree mambufanoo akaqa Eefaraimana saa asauku uqannai quqeenoo afasaana Mannaseena saa asaaqai asauku quqanai.

<sup>15</sup> Miqi mandeenoo Yooseefaana afaaqooqa qimamaqeenoo qinai. Qini qikausa mara Abaraqaammama faqa Isakeena faqa nikoofa Anutufa maa faiqisa amiqi amiqimma nimaqaani. Qini qifiqamaree maaqoo maqee miniqai faqa marunna Anutufa misa amiqi amiqimma nimaqaani. <sup>16</sup> Qini oosana oosana madainaina kinaana itita qimaqoo qangiroofa misa amiqi amiqimma nimaqaani. Qini duqu faqa qini qikooqanda Abaraqaammama Isakeesa nuqu faqa maa faiqi qandasaa mariani.

Miqanda moomoo faiqi maqasaifanoo moomoo miqanda kiqari kambiqafi mariaqa.

<sup>17</sup> Yooseefaafa nari akoona asauku qafoofoanoo aundura mandai kufanoo nari akoona asauku qumareenoo afasaanasaa asaaqai asauku quqaqoona mareeqee akaqasaa quqasee akaqasaa asaukuannai asauku quqaqoona mareeqee afasaanasaa quqarara qinai. <sup>18</sup> Oo qipoo anee sia andeeqaananoo indaarufaqa mai maridanoo aneenna asauku uqannai asauku mina akiqasaa quqaaqaana.

<sup>19</sup> Miqi qufanoo mina akoofa qaoo qida qinai. Qini qimaaku qinee iridaqa miqidaqa. Indaarufaafa mifa faqa mina aiku asauku moomoo marifaranoo. Inaaqiannaana aiku asaukuqara firaa afeeka maqannaauqanna marifaranoo nari afasaana ooraqaaranoo mariannoo. <sup>20</sup> Miqi qimaseenoo mi faasaana nifaqooqa qima nimaqeenoo qinai.

Isaraee maqannaasa nifaqooqa qiqa anisaa qimasaida qifaranoo.

Misa maaqi qifaranoo Anutufa Eefaraimmana faqa Mannaseena undemma amaqaani. Miqunannai Yakooboofa Eefaraimmana uqeerasee Mannaseena rafaqa finai.

<sup>21</sup> Miqi qimaseenoo Yakooboofa Yooseefaana qimaminoo qinai. Qinee kuqirara midaqa Anutufa ani faqa maridanoo ani afigee aninna akeeku akaaku maqasaa ooru fuannoo. <sup>22</sup> Seekeemba maqa maaqa amiqirafa maridanoo. Qinee ooqai geeqa duru feefannoo Amooru maqannaasa faqa rakusee maraafanna maqana ani amianaura sia ani akaqaa fasaaquqa nimianaura.

## 49

*Yakooboofa nari aiku asauku taikara qafaaqooqa qimannimu ufaa.*

<sup>1</sup> Yakooboofa nari faiqi namu naaramaseenoo qima niminai. Innee aiqama maaqoo anirai faqa kasooaqee inni kina kambigaaaninna ainainara qima nimiana iriaqa.

<sup>2</sup> Innee qini Yakooboosa faiqi namu innee qini fiq fiq mambifaqa inneeqa nikausa qini Isaraeerasa ufa iriaqa. <sup>3</sup> Reeubeenafa anee qini ooqa faiqi mariananoo. Anee qini afeeka indaarufaafa mariananoo.

Anee aiqama qini faiqi namu kiqari uriqararafa kaaqa afeekaiki marianafa mariananoo.

<sup>4</sup> Anee nammari aufindee imarianafa kaaqa afeekaiki marianafa mariananoo.

Anee sia uriqarana marinnaranoo.

Anee qini qaarisa qini ainainira anaasee sakasee faiqaannanara miqinnaranoo.

<sup>5</sup> Simeeoonasa Reefisa innee qara moodaa fidika mariafanoo.

Innee qara inneeqa rakira duru saamunnoo faiqi mandaikamma nimaqaqau. <sup>6</sup> Qini irirafa sia misa kukeeqara ufaki ootupanoo maridanoo.

Qinee sia miqanda ufa suqiranaki marianauro.

Misa nirana qoofaqa faiqi anaasee miqooqari nasuridaqa burimakau akoonauqa naununu ateeqaqau. <sup>7</sup> Innigara aannoo qiranasaa niqirafa mariannoo.

Innee kaqi fifau nari marianara minara niqirafa mariannoo.

Isaraee maqa maaqakina innigara faiqi namu furufaramambuaqa.

<sup>8</sup> Yakooboofa miqanda nifaaqooqa qimaseenoo quandafinoo Yudana afaaqooqa qinuu. Yuda, ani akaqaafasaa ani amooqifara.

Anee aneenna namuqaa ninukasaa reenana rafaqa finafa mariananoo.

Ani akoono faiqi namu ani oorinni niqoori saunu areefaranoo. <sup>9</sup> Yuda anee kaasau aandauro foora faiqi nari marianafa mariananoo.

Anee firaa kaasau ainaina mariana, anee aandau arusee namasee faiqaqee inanoo moo fannoo sia ani afauriannoo, rufiaannoo. <sup>10</sup> Yudafa karaambaiga duru feefa uaqeeiannoo.

Minasaa ani aruakinausa uriqaraqa maridaqa rakisi nimaqeeffaranoo.

Mifa uriqarara auqu marasee rakisi nimaqanoo fiinoo Siroo maqusaki oonuraannoo.

Miqoo maridanoo aiqama maqannaasa mina ameemaana marifanoo rakisinnimaqaannoo

mina aiku oosana maridaqa mina ufa mau kai fifaranoo. <sup>11</sup> Mifa nari doonki timmusa uainna sandasaa rumbeenoo.

Uainnauqakiqari kaaqa amiqiranasaa rumbeenoo.

Mifa nari qamunna fidika arira uainna anoonaki nammuruqinoo. <sup>12</sup> Mifa uainna neemarifanoo mina afu fidikandanda inoo marifanoo mimmi naamma anoono neemarifanoo afai eekara aridanoo.

<sup>13</sup> Miqi qimasee Yudana qimamiseenoo Seeburunana quandafi afaaqooqa qinuu.

Seeburuna, anee ooruku nammari afainni marinaranoo.

Sipauqaindi nammariara rufisee ani mandaqasee marifara.

Ani maqa maaqa oosu Sidoona maqa maaqa ati raquru aminoo mariannoo.

<sup>14</sup> Miqi qimasee Seeburuna qimamiseenoo Yakooboofa quanda finoo Isakaana afaaqooqa qinuu.

Isakaa anee afeeka doonkiara foora mafinana narana uqauqa amuaqa faiqaqeeia.

*Yooseefaafa nari akaqaa fasaauqa aqoondikira ufa niminuu.*

<sup>15</sup> Isakaafa idooara maqusa qafoofanoo amiqinoo marufanoo kummarama fufanoo ataufakaqa firaa ummaara quqasee maranoo nimiranuu. Mifa ainainira faiqira foora ainainannoo.

<sup>16</sup> Yakooboofa Isakaana qimamiseenoo quandafinoo Dannaana afaaqooqa qinuu.

Dannaafa nari maqannaasa uriqararafa mariannoo.

Misa Isaraee maqanna foora marifaranoo. <sup>17</sup> Anee ukadiqara foora aana afainni marinanoo qoosa fannoo aatata finana aiku raquraminanoo maqasaa aqufinanoo faiqi minasaa marina afiqu aqusainanoo aanaaqiannaindari aqufuani.

<sup>18</sup> Yakooboofa Dannaanara miqi qimaseenoo Anutunara innaaru qinoo qinuu.

Oo Yaawee qinee ani dadaqirana afeesidaa.

<sup>19</sup> Miqi qimaseenoo Kadannana afaaqooqa qinuu.

Kada nipuraraa fasiqauqa ani arifaranoo.

Miqifana anee quandaki nariqa nifaqee finnananoo.

<sup>20</sup> Miqi qimaseenoo Yakooboofa Aseeranara qinuu.

Ani maqa maaqaki narana moomoo amiqirafa kai mariannoo.

Anee kinna ami mariandee ira narana kai neemarinnaranoo.

<sup>21</sup> Napatari anee kaasau aandauro fooqaana maridana aneenna aidiranasaa sandana nua.

Anee amiqira faiqi moomoo maqeenanaranoo.

<sup>22</sup> Yooseefaafa anee irumu miqirafa maridana nammari afainni kambiqafi aqama moomoo ireennaranoo. <sup>23</sup> Ani namuqaa nimudaana qimasee nari duru feefannoo ani arirara afaqeeffaranoo. <sup>24</sup> Miqifanoo Yooseefaana duru fannoo sia paruparuqianoo tipu kai qinoo mariannoo. Yakooboona Anutufa aiqama afeeka faqaafa mina afeeka aminanoo mina asauku fannoo afeekaianoo. Mi Anutufa Isaraee maqannaasa

rakisirafa misa afeeka kukeeqara maqusa maridanoo. <sup>25</sup> Ani akoona Anutufa ani dadaaqiannoo.

Aiqama afeeka faqaa Anutufa ani amiqi amiqiani.

Innaarunaindaraa aakunnoo ani amiqi amiqimma amaqaannoo.

Maqakiqari ururainna nammariifa ani amiqi amiqirana amiani.

Ani burimakau aandau faqa faiqi aanaaqiuga faqa amiqi amiqimma nimaqaani.

<sup>26</sup> Moomoo taatuqeenauqa faqa sakummauqannoo faqa ani amiqi amiqimma amaqaani.

Ooqeenaa aqanasaaqaraa amiqi amiqirafa ani amiqi amiqiannoo.

Naarura marira aqanasaaqaraa amiqi amiqirafa ani amiqimma amaqaani.

Oosana oosana ainaina qinee qunna amiqi amiqirafa ani Yooseefaanasaa mariannoo.

Anee aneenna afasausa kiqari uriqararafa marinnanasa mi ainainausa anisaa mariannoo.

<sup>27</sup> Miqi qimasee Yooseefaana qimamisee quandafinoo Beensaminna qimaminau.

Beensaminna anee kaasau fainiara foora marinaranoo.

Anee kananaana faqa eendimarinaana faqa aandau arusee neennaranoo.

<sup>28</sup> Doo miqimasee Yakooboofa nari faiqi namu indaarugaana saa oosana araseenoo aiqama mafi nifaaqooqa qimasanaau. Miqimasooqa misa qisauku qara taikasee qikunoogu qaara marasee oosana faiqi namu Isaraee maqannaau mariqau.

*Yakooboofa kuqufuqaqa akundoo ufafa.*

<sup>29</sup> Yakooboofa nifaaqooqa qimannimaqaseenoo maaqi qimasee nari faiqi namu qimaniminau. Qinee kaqi kaaqoo kuqiqqa qeeqa qikeeku qikaaku marianaki oonu ootupaanaura. Innee sia maaqoo qikundaqa. Ooqi Abaraqaammafa nikundara maqa feefauru maqooqa maridanoo. Qeeta maqannaau Eefaroonaa maqaki qini qikausa nikundoonaki qini faqa qikundaqa.

<sup>30</sup> Kannaana maqa maaqaki Makapeera maqusa Mamareena maqusa suani afu oosana qaanai maridanoo. Abaraqaammafa Eefaroonafa unnai mi maqana feefaurummaseenoo nikundanau. <sup>31</sup> Miqoo misa Abaraqaammama faqa mina anaqa Saraqa nammarina faqa nikundaqa. Minakikai Isakeena faqa mina anaqa Reebeeka nammarina faqa nikundaqa. Qinee minaki inni ninooona Reea nammarina akundeega.

<sup>32</sup> Mi maqana faqa minakinaa ooni aamara faqa Qeeta maqannaasa unnai feefauriqia. Qini minaki qikundaqa. <sup>33</sup> Yakooboofa nari faiqi namu qimannimi taikasee aiku raqandaammasee doo kuqinoo nari akeeku akaaku unnai finau.

## 50

*Yooseefaafa nari afasausamara asoora ufa qimannimu ufafa.*

<sup>1</sup> Yakooboofa kuqu fufanoo Yooseefaafa aundara mandaikufanoo nari akoona qirisaa roofeebaaqa mambufanoo nari akoona oori amooqeenoo qiki raqanau. <sup>2</sup> Qiki raqaseenoo Yooseefaafa Isipa maqannaau oosana mareenoo tutaqausa qimannimufaqa anireeqa sia kai kaqi mandaikianifeera marasinna oosana oosana akuamaqee mariqau. <sup>3</sup> Misa Isipa maqannaasa oosana maraseeqa qaara fasiqa niku nisauku taikasee 40 faasaanasaa marasinna Yakooboona qiri akuamaqau. Isipa maqannaau qaaramoo fasiqa faqa qisaukuqara taikasee 70 faasaanasaa Yakooboona iki raqaida soofaari mariqau.

<sup>4</sup> Soofaarirana taikasoofoano Yooseefaafa Faraona aaqa marusa uriqararaura qimannimino qinau. Innee maa ufana mara maree muni karaambaiqa Faraona qimamiaqa. <sup>5</sup> Qini qikoofa kuqirara idanoo qima afeekaikammasee qini qima qiminoo qinau. Qinee kuquanana qini qiri mara maree Kannaana maqa maaqaki ooni aamara deedaqamma qaafannanaki qikundaa. Minara amanee qinee oorureeqa qeeqa qikoona minaki akundamaseeqa qumunauree.

<sup>6</sup> Minara Faraofa irisee qimaminau. Doo ooruree aneenna qima afeekaikianandee inana aneenna akoona akundamasee qumua. <sup>7</sup> Yooseefaafa nari akoona akundarara oorufuqaqa Faraona aaqa uriqararaura marusa faqa Faraona koota irimarusa uriqararaura faqa Isipa maqannaasa indaarunniki imaru fasiqausa faqa Yooseefaana faqa ooru fiqau. <sup>8</sup> Mina aiku asauku faqa mina afasausa mara faqa mina akoona aiku asauku akaqausa faqa aiqamausa Yooseefaana faqa ooru fiqau. Misa aandau faqa faiqi aanaaqiuga faqa kaqi kai Kooseena maqa maaqaki mariqau. <sup>9</sup> Akaqausa qoosasaa ooru fiqau. Akaqausa qoosa rariseemaru karanaki ooru fiqau. Yooseefaana faqa faiqi tatufuqaqa ooru fiqau.

<sup>10</sup> Misa aiqamausa suani oosana qaanai Yooradana nammari afainni sakuma faqa raisa adiuqa mara qaqimaru maqusanasaa ooruree misa fraaqoo kisaqasaa soofariqau. Yooseefaafa nari akoonara qisauku dinni taikasee dinni ani qaara marasee 7 faasaana soofarinau. <sup>11</sup> Kannaana maqannaasa miqoo marusa iki raqoona qafamasee qiqau.

Nindafaaga Isipa maqannaa firaagoo faaga rumasaida iki raqaida. Miqi qimaseeqa misa mi maqusana auqu Abeera Misaraima fee qimariqau. Mi auquna oosana Isipa maqannaa soofaarira maqusa fee qiqa.

<sup>12</sup> Yakoo boona faiqi namu nari nikoofa qimannimundee iqau. <sup>13</sup> Misa nari nikoona qiri mara maree Kannaana maqa maaqai ooruree Makapeeraa maqa maaqaki Mamaree maqusa suani oosana qaannai marufaqa miqoo ooni aamaraki akundaqau. Qeeta maqanaa fasiqa mina auqu Eefaroonaa Abaraqaammafa feefauru maqoonaki quqaqau. <sup>14</sup> Yooseefaafa nari akoona akundamaseenoo nari faqa fusa nari akaqaafasaauqa faqa moosa faqa kafaa anirandee Isipa maqusai fiqau.

*Yooseefaafa nari akaqaa fasaauqa aqoondikira ufa niminau.*

<sup>15</sup> Yooseefaana akaqaa fasaauqa misa nikoofa kuqufufaqa Yooseefaana rufieeqa nari qimami nari qimami qiqa. Ooqai maasa Yooseefaana mandaika mamaqaafanausa marida. Mina akiiqara iannoofee. <sup>16</sup> Misa miqi qimaseeqa Yooseefa funnai ufa quqaseeqa maaqi qimasee qimamiqau. <sup>17</sup> Oo Yooseefa maasa qikoofa kuqiraridanoo aniaa maaqi qimasee maasa qimaqiminau. Yooseefa ani akaqaafasaa ani mandaika mamaqoonara qaunummasaa siamma iria. Misa ani mandaika mamaqoonara doo qinee mi ufana oosana iriqa. Maasa qikoofa miqi qunara minara maasa ani qimamidaqa. Ani akoona Anutuna ainainira faiqiuqa maasa ani mandaikamma amaqaafanna numoona minni qisaa. Miqi qufanoo Yooseefaafa minara iriseenoo iki raqanau.

<sup>18</sup> Mina akaqaa fasaauqa minara iriseeqa anireeqa nariqa Yooseefaana oorinni maqasaa kummarama fufaqa qiqa. Maasa ani ainainira faiqi kakai mambi mariana. <sup>19</sup> Yooseefaafa iriseenoo qinuu. Innee sia qiniara rufiaaqa. Sia qinee qeeqa qifaaqa Anutuna amaaqa maqaanaura. <sup>20</sup> Kuqaa innee qini mandaikamma qimaqaaneera tipundaarufanoo Anutufa mina mara quandasoofanoo amiqinuu. Moomoo maqee kaqi mariasa marirana dadaaqianifeera miqinuu. <sup>21</sup> Sia rufiaaqa. Qinee inni faqa inni faiqi anaasee faqa narana nimida rakisi nimaqaanaura. Miqi qimasee Yooseefaafa nari ainaina nifaaga quqaqeeera qima niminuu.

*Yooseefaafa kuqu ufafa.*

<sup>22</sup> Miqoo Yooseefaafa Isipa maqannai nari ainaina faqa kaqi marinau. <sup>23</sup> Mifa wan handereeta faqa qisauku qara faqa 110 maraseenoo kuqinuu. Yooseefaafa miqoo maridanoo nari amaaku Eefaraimmana faiqi faqa qafanau nari anaiqi faqa nari afagnausa faqa nindafanuu. Yooseefaafa Mannaaseena faiqi Makirana faiqi namu nari afagnausa marasee f irinau. <sup>24</sup> Kuqiraridanoo Yooseefaafa maaqi qimasee nari ainaina qimanniminau. Qinee kuqirarammidaqa. Qinee kuqu fuananoo Anutufa innisaa rakisidanoo inni indaarunnikinaqa ooqai Abaraqaammama faqa Isakeena faqa Yakoo boona faqa qima afeekaika mandee nimiraa maqanasaa inni nindiqamaree miqoo munu quqaannoo. <sup>25</sup> Yooseefaafa minara kai kafaa qimanniminau. Anutufa inni nifiqee finaqa qini qimudaani faqa mara mareeqa miqoo munu madikama qisaaqa. Innee minara qima afeekai kifaqa qinee iria. Misa irisee qima afeekaikammasoofanoo Yooseefaafa kuqinuu.

<sup>26</sup> Yooseefaafa Isipa maqa maaqaki maridanoo wan handereeta faqa qisauku qara faqa 110 aukuna maraseenoo kuqinuu. Kuqufufaqa misa sia kai kaqi putaa ianifeera mi marasinna aku amaqaaseeqa bukisaki quqaqoofanoo marinau.

## RAFUDOO AKARAFI

*Isipa maqannaasa Isaraee maqannaasa mandaikamma nimaqaqau.*

<sup>1</sup> Yakooboona amaaku oondamara misa faqa Isipa maqusai oogu fusa misa nuqu maaqimminoo maridanoo. <sup>2</sup> Reeebeenafa faqa Simeeoonafa faqa Reefifa faqa Yudafa faqa <sup>3-4</sup> Isakarafa faqa Seeburunaafa faqa Beensaminafa faqa Dannaafa faqa Napatarifa faqa Kadaafa faqa Aseerafa faqa minamusa faqa misa faiqinamu faqa nári nikoona ninaakuna faqa Isipa maqa maaqaki oogu fiqau. <sup>5</sup> Moodaanaki ruqauiga oogu fusa qaaramoo fasiqa niku nisauku taikasee moo fasiqa asaukuqara kai taikasee <sup>70</sup> Isipa maqa maaqaki oogu mariqau. Yooseefaafa oqai miqoo maruqoo marinau.

<sup>6-7</sup> Miqoo mariuafa Yooseefaafa faqa nári afasausamara faqa aiqama mi akiqausa kuqu taikafufaqa misa faiqi namu niku nisauku findifufaqa faiqi moomoo uqanna maqasoofaqa kambiqaqau. Kambiqafifa Isipa maqa maaqa umbiqamma aqifa mariqau. <sup>8</sup> Faraofa Isipa maqanna rakisirafa kuqufufanoo kisaagaasaa marinoo fuka moo Faraofa kambiqanau. Mifa Yooseefaanaafa faqa aandaroo aukuaana rakisiunara faqa mina aiku asaukuara faqa sia irinau. <sup>9</sup> Faraofa nári maqannaasa qimannimino qinau. Isaraee maqannaasa moomoo uqanna maqa maaqa umbiaqa mariafaqa maasa uridaaqaramaseega maasa rafaafafu qimaqeeafaara. <sup>10</sup> Rakirafa kambiqainafa misa maasa namuqaa faqa moodaanaki kammafi maasa darusee quqasee sandee foora. Inni saimbaqa naqiffee mandee oonumafi irisee misa rafaafafusaanaqee misa sia moomoo kambiqeefaree.

<sup>11</sup> Miqi qimasooafa Isipa maqannaasa Isaraee maqannaasa karafusa saika nimiqau. Afeeka rakisirausa misasaa rakisi mariqau. Isaraee maqannaasa karafusaki maridaqa qaara maqusa auqiqau. Moo maqusa auqu Pitoona maqusa auqusee moo maqusa auqu Raqamaseesa maqusa auqiqau. Mi maqusa qanda narana afeedimaru maqusa qanda mariqau. Qafee maqannai kai maaqa usakeemariqau. <sup>12</sup> Isipa maqannaasa Isaraee maqanna kafa kafa kafa ummaara nimufaqa moomoo kambiqafifa maqa maaqa qumbiaqau. Isipa maqanna misa nindafeega kaaqa rufiee mariqau. <sup>13</sup> Miqunara sia moomoo asumu kambiqaaqeeera fira kadaapi uqanna misa nimuaafa quqasoofaqa misa manda marira mariqau. <sup>14</sup> Isipa maqannaasa qufaqa Isaraee maqanna qafee maqa qumaree ausirira onniara foora moomoo auquseega minannai maaqa usakeega kafa afuqaki ainaina faqa imariqau. Miqi marufaqa sia Isipa maqannaasa misara qimudao qimariqau.

<sup>15</sup> Faraofa mi kadaapirirana Isaraee maqanna nimiseenoo quandafino Isaree maqanna anaasee qaaraqanda Sifaraa nammarisa Puaa nammarisa inaamunai fudasaa rakisimaru anaasee qanda qimanniminau. <sup>16</sup> Inneeqara innaamunai fidaqara dadaaqifa faiqi maqaseega akoonaiqi aiqama aqee uqanna rutukuqa, maanaafa kai kaqi mariaqa. <sup>17</sup> Mi anaaseeqanda Faraona ufa iriseeqara Anutuna ufara rufiseeqa sia akoonaiqufa nári mariqau, kaqi mariqau. <sup>18</sup> Faraofa akoonaiqi moomoo kambiqoofanoo nindafamaseenoo innaamunai nifiqaganu anaaseeqanda naaramaseenoo niqinoo qinau. Inneeqara naqaafee ifaqee sia akoonaiqi naridee qini ufa rukiaafanoo. <sup>19</sup> Miqanda mina ufa iriseeqa qiqau. Heeburu anaasee sia Isipa anaasee naannaridaqa misa kaqi kaqi faiqi maqaidaqa. Maqanda oonu raunaqa faasai faiqi maqaqaafaqa oonu nindafaidaqa.

<sup>20</sup> Anutufa mi anaaseeqanda oosana nindafamaseenoo amiqi amiqimasooafa Isaraee maqannaasa moomoo kambiqafifa afeeka maqanna mariqau. <sup>21</sup> Miqanda Anutunara rufioofanoo mina akiqara Anutufa miqanda faqa faiqi asumu niminau.

<sup>22</sup> Faraofa misa nindafeenoo nári maqanna Isipa maqanna aiqamausa naaramaseenoo ufa afeeka ufa qimanniminau. Heeburu anaasee akoonaiqi maqasaifaqa innee mina mareeqee nammari firaana Niru nammariki aqusaifaqa kuquaqa. Aiqama kuquaqeeera maanaaqauqa kai kaqi mariaqeeera qinau. Miqi qimasooafa miqimmi mariqau.

## 2

*Misa sia Mooseena faiqi aanaaqi ariqau.*

<sup>1</sup> Mi kamuqoo mi aukuaana Reefina atikiqari kumaaraa moo fannoo findi fino maanaafa Reefina oosanaki maranau. <sup>2</sup> Maraseenoo faiqi moo akoonaiqi maqaseenoo mina anoofa qafooofanoo amiqira faiqi marufanoo Isipa maqannaasa arifoo qimaseenoo

qaaramoo quqoonasaa kukeeqa amaqaqoofanoo marinau. <sup>3</sup> Qaaramoo quqoona aiqa-roofanoo faiqi aanaaqi kaqikaqoo aqoo irufanoo mina anoofa akoofa rafaqaqfirara oonumafi irusia mina anoofa furaa amanee uqa kisaqaq difaaniara foora auqinau. Mifa koorootaqa qumareenoo furaa uqamau sia nammari ruqiqaki keeqaanifeera akinau. Uqa auquseenoo mina anoofa faiqi aanaaqi uqaki rumaseenoo furaa moomoo nammari ammausai marunaki kukeeqaqaqoofanoo minaki marinau. <sup>4</sup> Nammari marufanoo mi faiqina anasaafa nianaindari kukeeqanoo maridanoo rakisi marinau. Nanee kambiqaanoo qimasaidanoo rakisi marinau.

<sup>5</sup> Faraona araamuna nammari auqaaneera nari rakisimaru manaqausa faqa mi nammarinai quminai. Mifa nammari auqaidanoo furaa qifoofanoo uqa marinau. Marufanoo qafamaseenoo nari ainaini maru manaqana qimamufanoo mi uqana nammarikinaana maranau. <sup>6</sup> Marasoofanoo Faraona araamuna asaukukinaana maraseenoo uqa oo raqasee faiqi aanaaqi qafanau. Faiqi aanaaqi ikiraqoofanoo mina irufanoo amuqusufanoo qinau. Maafa Heeburu maqannaasa faiqi akoonaiqi maridanoo fee qinau. <sup>7</sup> Mifa miqi qimarufanoo mi faiqi anaqina anasaafa anireenoo Faraona araamuna maaqi qimasee qimaminau. Amanee Heeburu anaasee moo ooru afiqee muqusaananoo fee naamma amiannoo fee. <sup>8</sup> Faraona araamuna eedoo qufanoo mi faiqi anaqina anasaafa ooru nari ninoona uqanna afiqee quminau. <sup>9</sup> Qumuroofanoo Faraona araamuna fannoo maaqi qimaseenoo mi anaaseena qimaminau. Anee maa faiqi anaqina naamma amidana rakisi marinaqa qinee maqee maqee feefauru ani ami marianauranoo. Mi anaaseefa eedoo qimaseenoo nari faiqi aanaaqi uqanna nari maaqai munu qaqee idanoo rakisi marinau. <sup>10</sup> Mi faiqi anaqifa kaqi kaqoo innooqafufanoo nari anoofa afiqeenoo Faraona araamuna maruqoo minisoofanoo nari faiqi kamambinau. Fuka anoofa auqu rarara maaqi qinau. Qinee nammarikinaana maraunannara auqu Mooseenee qianaara.

*Mooseefa Midianna maqusai sandanau.*

<sup>11</sup> Mariiufanoo Mooseefa innooqafufanoo moo kari nari maqanna Isaraee maqannaasa oonu nindafoofaqa firaa kadaapi rimariqau. Isipa maqanna mo fannoo Heeburu maqanna Mooseena aqoonnana arimarufanoo Mooseefa qafanau. <sup>12</sup> Aranaqoofanoo faiqiara dinni dinni munu afu maqee mini afu maqee ufanoo faiqi sia marufanoo Isipa maqanna fasiqa Mooseefa kuqa aruseenoo mina iri nukuda afaqaseenoo minaki kukeeqasee akundanau.

<sup>13</sup> Iqaqoofanoo kananaana rafudamakufanoo Mooseefa nari maqanna nindafarara kafaafinau. Oonuree nindafoofaqa Heeburu fasiqa qaaraganda raniqau. Mooseefa aqoonnana arimaruna qimaminoo qinau. Anee naqaafee ifanee aneenna aqoonnana oosana siainaki fifau aridanee. <sup>14</sup> Miqi qufanoo aru fasiqafa qinau. Yafee aniara karaambaqee qifanee anee maasa ufa irisee andeeqaidanee. Eenda anee Isipa maqanna aruanafa kafaaf maqee qini faqa darinnaree qufanoo Mooseefa tautinau. Tautumandee qinau. Doo eenda arunannara aiqama kooroomminoo maridanoommifoo qimaseenoo rufianau.

<sup>15</sup> Faraofa minara iriseenoo Mooseena kuqa aruaneera ufanoo Mooseefa minara rufiamareenoo Isipa maqa maaqa quqasee Midianna maqa maaqai nianai sandanau. <sup>16</sup> Sandee oonureenoo nammari madika afaisaa oogu marinau. Midianna maqanna amaana maqaki aanaiqikirana mina auqu Yeetaroonaa araamuqmaaka dinni qisauku taikasee dinni oonu qaara marasee 7 mariqau. Mooseefa nammari madika afaisaa marufaqa mi manaqausa nari nikoona sipsipauqa faqa mimmiuqa faqa nammari saka nimianee qimasee aniraqau. <sup>17</sup> Faiqi akaqausa nari sipsipasaa rakisimarusaa mi manaqausa niqiqoofaqa anirandee fufaqa misa nari sipsipa naaree nammari nimianeera qufanoo Mooseefa findifinoo misara qaoo qimaseenoo maanaqauqa naarooqafa aniroofanoo Mooseefa nari kai misa sipsipauqa faqa mimmiuqa faqa nammari saka niminai.

<sup>18</sup> Mi manaqausa sipsipauqa nammari neeneesoofaqa nifiqee maaqai fiqau. Oonu roofanoo misa nikoofa iramirinoo qinau. Innee naqifee ifaqee maqee faasaanasaa anidee. <sup>19</sup> Miqi qufaqa misa qiqau. Isipa maqanna fasiqa mo fannoo faiqi sipsipasaa rakisi mariasa oonu raafanoo misara qaoo qimaseenoo maasa sipsipauqa nari kai nammari saka qumaree nimisaifaqa dauni anidaqa. <sup>20</sup> Misa nikoofa mina irinoo qinau. Mi fasiqafa yaifee maridanoo fee. Nanaree innee minni aisee anidee. Doo sandee oonu afiqaiifanoo narana ani naani. Miqi qimasooqafa oonu Mooseena afiqee aniqau. <sup>21</sup> Yeetarooqa Mooseenara qini faqa marianne qufanoo eedoo qimasee marinai. Marufanoo Yeetarooqa nari araamuna Sipooraa nammarina Mooseena amufanoo maranau.

<sup>22</sup> Maraseenoo faiqi akoonaiqi maqanau. Maqaseenoo Mooseefa nari faiqi auqureenoo qinee aanaamuru maqasaki maridee qimaseenoo Keerasoomma nee qinau.

<sup>23</sup> Mooseefa miqoo moomoo aukuanaki marufanoo Isipa maqanna karaambaiqa Faraoofa kuqinau. Kuqufufaqa Isaraee maqannaasa Isipa maqannaasa afeeka rumbarana ameemaanai kaqi kai annadannada qidaqa maridaqa Anutufinnai dadaaqianifeera innaaru qimaraiqau. Misa innaaru qirafa Anutufinnai ooru finau. <sup>24</sup> Anutufa misa qiki raqarara iriseenoo Abarahaamana faqa Isakeena faqa Yakooboona faqa moodaanaki kira ufa qimaqoofa misa faiqinamu faqa dadaaqianifeera oonu mafi irinau. <sup>25</sup> Anutufa misa mandainainaki marufanoo misara oonu mafi irufanoo amuqusinau.

### 3

#### *Anutufa Mooseena aaranau.*

<sup>1</sup> Moo kari Mooseefa nari airaamaku Yeetaroonna Midianna maqanna amaana maqaki aanaiqi kirafa maruna sipsipasaa faqa mimmisaa faqa rakisi marinau. Moo kari Mooseefa nari airaamaku sipsipauqa faqa mimmiuqa faqa nifiqa mareenoo aadana maqa maaqa figareenoo Hooreeba naaquqara aqanasaa muruqoofaqa andanda neemarufanoo rakisi marinau. <sup>2</sup> Miqi marufanoo Anutuna qangiroo Mooseena afusaa tautumma amaqaseenoo kooroomafinoo saqari amimikiqari idauru kambiqaanu. Mooseefa mina qafoofanoo idauru firaafa qaidanoo sia mi saqari amimina qanau. <sup>3</sup> Mooseefa mina qafamaseenoo moo ainainammifoo saina aaqa oonuree qafaa, nanaree saqari amimi sia qaidanoo fee qimasee aaqa finau.

<sup>4</sup> Mooseefa quandakinoo aaqa oonu roofanoo Anutufa minakiqari Mooseena aaraidanoo qinau. Moosee Moosee qufanoo Mooseefa iriseenoo maqi qimaseenoo qinau. Qinee maa maridaqa. <sup>5</sup> Miqi qimasoo fanoo Anutufa kafa qimaminu Moosee sia anee adeedi ania. Aneenna aiku aanaamu raipaqusee miqoo maria. Naquqara maqa maaqa marinara aneenna aiku aanaamu mara aqua. <sup>6</sup> Miqi qimaseenoo Anutufa kafa qimaminau. Qinee ani akoonna Anutusa maridaqa. Abarahaamana faqa Isakeena faqa Yakooboona faqa Anutusa maridaqa. Mooseefa mi ufana iriseenoo Anutuna qafaanoo qimaseenoo rufiaseenoo oorisaa ititanau.

<sup>7</sup> Anutufa kaifaa Mooseena qimaminoo qinau. Qini faiqi anaasee Isaraee maqannaasa Isipa maqasaa fira aapurarana nimi mariafaqa nindafaidaqa. Misa qiniara daara afeeka rakisira rakisi mariaa nisaukukinaana rafia quqaannee qimasee qini daaree mariafaqa iridaqa. Qinee misa aiqama aapurarana maree marianara iridaqa. <sup>8</sup> Qinee innaarunaindari qumuree Isipa maqannaasa nisaukukinaana mareeqee fira maqa maaqa ainoo faqaa maqa aiqama ainaina rairaa imariqoo quqaanaura. Mi maqanasaa Kannaana maqannaasa faqa Heeta maqannaasa faqa Amooraa maqannaasa faqa Peerisita maqannaasa faqa Hifita maqannaasa faqa Yeebusa maqannaasa faqa misauqa mariaqoo quqannisaanaura. <sup>9</sup> Isipa maqanna Heeburu maqanna radami mariafaqa misa qiki raqee mariafa doo qini daaqoosaa rifaqa niqafaidaqa. <sup>10</sup> Qinee ani Isipa maqanna karaambaiqa Faraoo finnai aiqaanana oonureenana qini faiqi anaasee indaarunni kamma nimaqainaqa Faraona maqa maaqakiqari quqasee aiqaa.

<sup>11</sup> Mooseefa mi ufana iriseenoo Anutunara qaoo qidanoo qinau. Akasaa qinee maaqirausa naqimaseeqee Faraoo finnai oonuree fee Isaraee maqannaasa Isipa maqa maaqaki mariana nifiqaanauree. <sup>12</sup> Anutufa iriseenoo qinau. Qinee anifaqa marianana anee Isaraee maqannaasa Isipa maqasaa qaraana nifiqamaree maa aqaannasaa aniree qini qimoo qifaranoo. Miqinna oosanafa qinee ani aiqaafannanara kooroo iannoo.

<sup>13</sup> Mooseefa iriseenoo kafa Anutuna qimaminoo qinau. Anee qini diqiqaanaqa qinee Isaraee maqanna innannai oonu reeqa maaqi qianaura. Inni nisaifaqausa ninaakusa Anutufa qini diqiqaifaqa inni qimannimirara anidaqa. Miqi qianaqa misa maaqi qimasee qini ireefaranoo. Mina auqu yafee maridanoo fee qifaqa qinee naqifee qimasee qimannimianauree. <sup>14</sup> Anutufa iriseenoo Mooseena qimaminoo qinau. Qinee qeeqa marunausa qidaqa. Anee maaqi qimasee qimannimia. Nariara qinee qeeqa marunausee qimarifa diqiqaifaqa innee iannai anidaqa. <sup>15</sup> Maaqi qimasee kafa moo faqa qimannimia. Inni nikausa Abarahaammanna faqa Isakeena faqa Yakooboona faqa Anutusa Yaaweesea maridaqa ani Isaraee maqanna iannai ani aqiqaidaqa. Qini mi duqufa naaruara mariannoo. Kasooaqee kambiqainausa qini mi duquna reefaranoo. <sup>16</sup> Anutufa kaifaa Mooseena qimaminoo qinau. Anee ooquree Isaraee maqanna uriqararusa suqusee maaqi qimasee qimannimia. Yaaweefa inni ninaakusa Abarahaammanna faqa Isakeena faqa Yakooboona faqa Anutusa qini qifusaa kooroo mafinoo qimaqimino. Misa qimannimia, qinee misa iannai aniree qafaunaqa Isipa maqannaasa qumaara moomoo nimimariafaqa qafaidaqa. <sup>17</sup> Qinee Isipa maqa maaqakinaana maraanauree qimasee iridaqa. Misa fira

aupurarana kinaana nifteeqee ainoo faqaa maqasaa irairaa ida reemindeemiri mariqoo Kannaa maqasaa faqa Heeta maqasaa faqa Amoorra maqasaa faqa Peerisita maqasaa faqa Hifita maqasaa faqa Yeebusa maqasaa faqa quqannisaanaura.

<sup>18</sup> Moosee anee Isaraee maqannaasa mi ufana qimanniminafa irifara. Anee Isaraee maqannaasa uriqararauusa faqa nifiqamareenana Isipa maqannaasa karaambaifaq marinnai oonuree maqi qimasee qimamia. Maasa Heeburu maqannaasa Yaaweefa maasa Anutufa maasa qifusaa kooroo mafinoo qimanniminoo. Maqee anee maasara eedoo qinafa qaaramoo faasaana aadana maqa maaqaki oonuree maasa Yaaweena maasa Anutuna tatufirana suqa amianee qia. <sup>19</sup> Qinee iridaqa anee qimaminanoo Isipa maqannaasa karaambaifaq fannoo sia inni niqainafa fifaranoo. Qinee mina aidafirana amiananoo miqoo inni niqaannoo. <sup>20</sup> Qinee qeeqa afeekannai Isipa maqannaasa oosana oosana naaquqara ainainannai fitiqnarana nimianaura. Nimiananoo Faraoofa miqoo inni idukuannoo.

<sup>21</sup> Qinee Isipa maqannaasa inniara naaquqarana nimianaqa innee Isipa maqasaqari sia kaqi fifaranoo. Ainaina nimifaqa maree fifaranoo. <sup>22</sup> Innee firarifaqa inni ninaaqmaaka Isipa maqannaasa aanaaseeufa nari naaqa maria aanaaseesa faqa nariqa maaqaki mariasara faqa qifaqa qamunna faqa koorra faqa siruaa faqa nifaafa auqi maria ainainausa faqa nimifaqa inneeqa faiqi namu niraamuqmaaka Isipa maqannaasa amiqira qamunna ainaina kai afisunnimaqaiifaqa maree fuaqa. Miqinnanannai innee Isipa maqannaasa ainaina maree fiara foora ifaranoo.

## 4

*Anutufa Mooseena oosana oosana kudifaanna auqaani feera afeeka aminau.*

<sup>1</sup> Mooseefa Anutuna ufa iriseenoo kaifaa iramirinoo qinau. Misa Isaraee maqannaasa sia qini ufa qaindusaa, sia qini ufa iria qiniara unna fee qimasee Yaaweefa sia ani afusaa kooroo ifana unna qiaannoo qifaqa qinee naqifee ianauree. Naqifee ianaqee misa qini oosana qafee fee kuqaa fee qifaree. <sup>2</sup> Miqi qufanoo Anutufa qinau. Ani asaukuki anee nanee uqirafa nidanee, qufanoo Mooseefa qinau. Saunu uqirauusa nidaqee qinau. <sup>3</sup> Anutufa iriseenoo qinau. Doo mina maqasaa aqua qufanoo maqasaa aqusoofanoo mi saunufa sakani kambaqa fufanoo Mooseefa mina qafamaseenoo rufiasee sandanau. <sup>4</sup> Anutufa kafaqa qimaminoo qinau. Aneenna asaukunnai mara miami ameesa qumaraa qufanoo qumaroofanoo kafaqa asaukuki saunu kammafinau. <sup>5</sup> Miqooqari Yaaweefa Mooseena qimaminau. Anee ooqu Isaraee maqannaasa nifusaa miqinafa misa qiniara Abarahaamana faqa Isakeena faqa Yakooboona faqa misa Yaaweefa misa Anutufa kuqaa ani afusaa kooroo iifoo qifaranoo.

<sup>6</sup> Yaaweefa kafaqa Mooseena qimaminau. Anee aneenna siutaki asauku upeekaa. Miqi qufanoo Mooseefa miqimminau. Asauku upeekaseenoo radukusee qafoofoanoo asaukumau aiqama namuandaundau inoo marufanoo qafanau. <sup>7</sup> Anutufa kafaqa qinau aneenna asauku kafaqa upeekaa qufanoo upeekaseenoo radukuseenoo qafoofoanoo asauku mau namuandaundau irafa sia marinau. Dinniara foora kai marinau. <sup>8</sup> Anutufa kafaqa Mooseena qimaminoo qinau. Anee indaaru saunu uqannifiqaina sia irifana innaaqiana asauku uqannifiqaina qiafa. <sup>9</sup> Misa ani mi ainaina qanda qafamasee sia ani ufa irifana anee Niru nammari saka qumareenana aadana maqasaa adiasainanoo fidika kai mandifinafa qafaafa.

<sup>10</sup> Mooseefa Yaaweena ufa iriseenoo qimaminau. Oo Yaawee sia qini diiqaa. Qinee ooqaindari sia amiqimmasee faiqi nifusaa ufa qunauusa maridaqa. Maqee anee qini qima qimiannaqooqari sia mifa qini mareeqee ufa qimarunauasakamma qiseenoo. Qinee sia ufa qunauusa ufara mamma qimarunauusa maridaqa. <sup>11</sup> Miqi qufanoo Anutufa Mooseena qimaminoo qinau. Yafee nifauru nimidanoo fee. Yafee sia ufa qiasaika faqa naaqoo qaunirauusaika faqa mannisaidanoo fee. Yafee nifu maqarana faqa nifu dimbarana faqa nimidanoo fee. Qinee Yaaweesa kai miqidaqa. <sup>12</sup> Moosee anee doo fua. Qinee ani ufa dadaaqi aakapaanana qinnaranoo.

<sup>13</sup> Mooseefa kaifaa Yaaweena qimaminoo qinau. Oo Yaawee anee moo aqiqaanoo fuani. <sup>14</sup> Yaaweefa mina iriseenoo aranaqoofoanoo qinau. Doo amana ani afasaafa Aaroonafa Reefina atikinaafa andeeqasee ufa qimarifa marifaqa qinee iridaqa. Mifa maqee aniara randanoo anidanoo. Mifa ani paqurimandee asasiannoo. <sup>15</sup> Anee mina qimaminanoo mifa misa qimannimiani. Qinee inniqara dadaaqiana qiafa qimannimifaranoo. Qinee inneeqara ifandinna ainaina qimannimianaqa auqeeffaranoo. <sup>16</sup> Anutufa kafaqa Mooseena qimaminau. Aaroonafa ani ufa mareeqee faiqi anaasee qimannimiannoo. Mifa ani oora foora marinana anee mina Anutufara foora maridana mifa auqaainna



ainaina anee aakapeennaranoo. <sup>17</sup> Anee aneenna saunu faqa uqirafa fua. Minannai oosana oosana ainaina faiqi sia amana auqaaqaa ira ainaina auqeenaranoo.

*Mooseefa Isipa maqusai kafaa anirandee finau.*

<sup>18</sup> Mooseefa Yaaweena ufa iriseenoo nari airaamaku Yeetaroo funnai oonureenoo qimaminoo qinau. Amanee qinee Isipa maqusai kafaa anirandee oonuree qeeqa ainaina niqafaanauree. Misa kaqi fee maridee doo fee kuqia. Miqiqufanoo Yeetaroofa iriseenoo eedoo qimasee aiqanau.

<sup>19</sup> Mooseefa Midianna maqa maaqai kaqi marufanoo Anutufa kafaa qimaminoo qinau. Doo findi finana kafaa Isipa maqusai fua. Ani arirari marusa doo kuqia. <sup>20</sup> Mooseefa irisee eedoo qimaseenoo nari anaaqa faqa faiqi namu faqa mareeqee doonkisaa quqaseenoo finau. Anutufa maree fuannee qu saununa faqa maree finau.

<sup>21</sup> Anutufa Mooseena qimaminoo qinau. Anee Isipa maqa maaqai oonureenana misa karaambaiga afusaa faiqi sia amana auqaaqaa ira ainaina qinee amiafanna afeekanannoo auqaa. Miqi marinaqa qinee Faraona kaukaata qira irirana amiananoo sia eedoo qinaqa Isaraee maqannaasa fifaranoo. <sup>22</sup> Anee maaqi qimaseenana Faraona qimamia. Yaaweefa maaqi qidanoo. Isaraee maqannaasa qini ooqa faiqira foora maridammiaafoo qia. <sup>23</sup> Qinee ani qimamidaqa. Anee qini ooqa faiqiuqa Isaraee maqannaasa quqasainaqaa misa oonuree qini qimooqiaqa, qunana anee qaoo qianaqa doo maqee ani ooqa faiqi aruanaura.

<sup>24</sup> Mooseefa nari faiqi anaasee faqa fidanoo eendufanoo aanai faiqanau. Eendaki Anutufa anireenoo Mooseena kuqa arirara inau. <sup>25</sup> Miqufanoo Mooseena anaaqa Sipooraa nammariifa ooni raiqarana qumareenoo nari amaaku afaaqa ati aukuseenoo minannoo Mooseena aiku auqamaseenoo maqasaa quqanau. Quqaseenoo qinau. Anee qini qifaafi fidika aanaaqi fasiqa mariananoo fee qinau. <sup>26</sup> Miqimmasoofanoo Yaaweefa Mooseena sia arinau.

<sup>27</sup> Miqi qimarufanoo Yaaweefa Aarona qimaminoo qinau. Anee aadana maqa maaqai fidana Mooseena paquria. Aaronaafa eedoo qimasee Anutuna naaquqara aqaanai ooru Mooseena paqurinau. Paqurimasee amooqa nanau. <sup>28</sup> Amooqasoofanoo Mooseefa Isipa maqa maaqai fuanifeera Yaaweefa qimamuna faqa oosana oosana ainainara faqa Aarona qimaminau. Yaaweefa faiqi sia amana auqaaqaa ira ainaina auqannee quna faqa Aarona qimaminau. <sup>29</sup> Mooseesa Aarona Isipa maqa maaqai ooqueera Isaraee maqannaasa faiqi firaasa naarama quqaaqau. <sup>30</sup> Quqaseega Yaaweefa Mooseena qimamu ufausa aiqama Aarona qimannimisoofoofanoo Mooseefa faiqi sia amana auqaaqaa ira ainainauqa misa nifusaa auqanau. <sup>31</sup> Isaraee maqannaasa Aarona mi ufana iriseega kuqaa mifoo qiqau. Misa Yaaweefa misa unnai anunara nariqa fira aupuraranara irisee kumma ramafuqaqaa innaaru qiqau.

## 5

*Mooseesa Aarona Isipa maqannaasa kinna oonu qafaqau.*

<sup>1</sup> Innaaru qimasoofaqa Mooseesa Aarona Faraoo funnai oonuree qimamiqa qiqau. Oo Faraoo, Yaaweefa maasa Isaraee maqannaasa Anutufa aniara maaqi qinoo. Anee qini faiqi namu idukusainaqaa aadana maqa maaqaki oonureeqa oomaqa mandee qiniara innaaru qidaqa qimooqiaqee qinoo. <sup>2</sup> Faraoofa miqanda ufa iriseenoo qinau. Yaaweefa yafee. Nanaree mina ufara eedoo qimasee Isaraee maqannaasa niqaana fifaree. Sia qinee Yaaweena iridaqa. Minara qinee sia uqanna Isaraee maqannaasa niqaanau.

<sup>3</sup> Mooseesa Aarona kafaa Faraona qimamiqa qiqau. Maasa Heeburu maqannaasa Anutufa maasa qifusaa koorooinoo. Anee maasara eedoo qinaqa qaaramoo faasaana aadana maqa maaqaki oonuree Yaaweena maasa Anutuna tatufirana suqa amianau. Maasa sia miqiananoo mifa firaamanda auriranannai fee firaam dariranannai fee maasa aiqama daruannoo. <sup>4</sup> Faraoofa iriseenoo Mooseesa Aarona qimanniminoo qinau, inneqara nanaree faiqi anaasee qini ainaini mariasa niffee fuafaqee minnisee fidee. Saina kafaa anirandee ainainiranaki fuaqa. <sup>5</sup> Innee Isaraee maqannaasa maqee moomoo kammafi qini ainainirana minnisararee fee qidafee.

<sup>6</sup> Mi faasaana kai Faraoo Isipa maqannaasa karabusasaa rakisi marusa faqa Isaraee maqannaasa niqoonasasaa rakisi marusa faqa qimanninoo qinau. <sup>7</sup> Innee maqee sia kafa uita asaki aatekasee Isaraee maqannaasa nimifaqa minannoo maaqa usakee maria simmeerana auqaqa. Sai faqa nari kai maraqa. <sup>8</sup> Maraseega sia oorudupi masee auqaqa. Aiqaama kari auqi mariana amana kai auqaqa. Misa kudiki mariasa maridaqa qiniara maasa idukusainaqaa maasa oonuree Yaaweena nari Anutuna tatufirana suqa amianee qidaqa. <sup>9</sup> Miqi qidaqifaqa innee firaam kadaapi nimifaqa misa oonauqee anauqee idaqa Mooseesa Aarona qinna unnufausa sia iriaqa.

<sup>10</sup> Miqi qufaqa karabusasaa rakisi marusa faqa Isaraee maqannaasa nári niqoonausasaa rakisi marusa oonuree maaqi qimasee Isaraee maqannaasa qimannimiqa. Faraofa maasara sia uita asaki raraku mini nimiaqee qidanoo. <sup>11</sup> Mifa inniara inneeqa kai minakinai randasee maree miniseeqa ooqai auqiu simmeerana amana kai auquaqee qinoo. <sup>12</sup> Miqi qufaqa misa Isipa maqa maaqaki aiqamatinai nidaqa uita asaki randasee suqimariqa. <sup>13</sup> Isipa maqannaak karabusasaa rakisi marusa fuki faaki qidaqa qiqau. Innee ooqai maasa uita asaki nimiafana auqeeundee masee mina amana kai simmeera auquaqa. <sup>14</sup> Miqi qimaseeqa karabusasaa rakisi maru Isipa maqannaak fasiqausa Isaraee maqannaasa nári niqoonausasaa rakisiaqeeera mara quqaqoosa naruseeqa qiqau. Innee nanaree simmeera ooqai auqiuna amana sia auqidee.

<sup>15</sup> Qufaqa Isaraee maqannaak rakisirausa Faraoo funnai oonuree qimamiqa qiqau. Oo uriqararafa. Anee naqaa fee ifanee maasa maaqimma qimaqaidanee. <sup>16</sup> Misa sia uita asaki nimiseeqa kaqi maasara simmeera auquaqee qidaqa. Mina saara maasa daria. Sia maasa oosanasa fau. Inneeqa oosanasa fifau miqiafanoo.

<sup>17</sup> Faraofa iriseenoo qimanniminuu. Innee kudiki mariasa ainainiranara nikoqaiqaqa qiniara maasa idukuqisainaa Yaaweena tatufirana suqamianee qimariafanoo. <sup>18</sup> Doo kaqi kaqi anirandee inneeqa ainainai fuaqa. Misa sia inni uita asaki nimifaranoo. Inneeqa kai uita asaki maree miniseeqa ooqai iundee kai moomoo simmeera auquaqa. Doo fuaqa.

<sup>19</sup> Isaraee maqannaasa nári niqoonausasaa rakisi marusa Faraofa ooqai auqiundee kai masee auquaqee qunara irisee doo maasa ummaarak maridee qiqau. <sup>20</sup> Faraoo funnaindari quqasee anidaqa Mooseesa Aaroonasa misa nifeesidaqa marufaqa ani paquriqua. <sup>21</sup> Ani paqurimmasee qimannimiqa qiqau. Yaaweefa inniqara oosana qafamaseenoo mina alkiqara nimianoo. Inneeqara oosana arasaafanoo minasaara Faraofa nari rakisirausa faqa maasa daruannoo. Inneeqara Faraofa maasa daruanifeera andaana rumsaafanoo daruannoo.

*Mooseefa aundura ummaara roofanoo Anutu funnai anunu rinuu.*

<sup>22</sup> Mooseefa misa ufa iriseenoo quandakufanoo oonureenoo Yaaweenara innaaru qinuu. Oo Yaawee, anee naqaafee ifanee Isaraee maqannaak maa mandaikana mannimaqaidanee. Anee naqi fee ifanee qini mai diiqeenee. <sup>23</sup> Qinee Faraoo funnai oonureeqa ani ufa qimamianafana qooqari Faraofa Isaraee maqannaasa mandaika kai mannimaqaidanoo. Anee sia uqanna dadaaqira kari marianaroo.

## 6

<sup>1</sup> Yaaweefa Mooseena ufa iriseenoo qimaminuu. Amana doo anee maqee qini oosana qafeennaranoo. Qinee Faraona afeekaikammasee qimamiananoo qini faiqi anaasee idukusainaa fifaranoo. Sia kaqi idukuannoo qinee qiananoo idukuseenoo fuki faaki qinaqa mina maqasaqari quqasee fifaranoo.

*Anutufa kafa Mooseena aaranuu.*

<sup>2</sup> Anutufa kafa Mooseena qimaminoo qinuu. Qinee Yaaweesa maridaqa. <sup>3</sup> Qinee Abarahaamana faqa Isakeena faqa Yakooboona faqa misa nifusaa aiqama afeeka faqaa Anutusa qeeqa duqu kooroo iqiafana. Qinee sia qeeqa fuka naaquqara duqu Yaaweesee qirana qimannimi qiafana. <sup>4</sup> Qinee qeeqa moodaanaki kira ufa misa faqa qidaqa Kannaana maqa maqa misa nimiraree qima afeekaikiqiafana. Misa minaki asaqiraa faira foora mariunaki quqannisaanuranoo fee qiqiafana. <sup>5</sup> Qinee maqee Isaraee maqannaasa Isipa maqanaasa karafusaki maridaqa aupuraida annada annada imarianara iriseeqa qinee qeeqa moodaanaki kira ufara oonu mafi iriqa.

<sup>6</sup> Moosee anee Isaraee maqannaasa maaqi qimasee qini ufa qimannimia, qinee Yaaweesa maridaqa. Innee Isipa maqannaak rumberanaki mariana qinee inni idukeeqee asumu mariranaki quqannisaanura. Qinee afeeka qisaukunna mandaa aupurara Isipa maqannaasasaa quqaanura. Quqaseeqa inni Isaraee maqannaasa asumu maraanura. <sup>7</sup> Qinee inni qeeqa faiqi aanaaseekammaseeqa qinee inni Anutusa marianura. Qinee inni Isipa maqannaak karabusaa kinaana iduku nisaanaqa miqoo innee qini Anutusara irifaranoo. <sup>8</sup> Qinee inni nifeeqee kuqaa qima afeekaikammasee Abarahaammanna faqa Isakeena faqa Yakooboona faqa nimianauree qiafannaqoo quqannisaanura. Qinee inni nimiananoo mi maqafa innindi kammianoo. Qinee Yaaweesa qidaqa. <sup>9</sup> Mooseefa Isaraee maqannaasa qima nimufaqa misa sia mina ufa iriqa. Misa firaa ummaara maree marufa mifa misa naaqoo nifu furufara masoofaqa sia iriqa.

<sup>10</sup> Anutufa kafa Mooseena qimaminoo qinuu. <sup>11</sup> Anee Isipa maqannaak karaambaiqa Faraoo finnai oonuree Isaraee maqannaasara qimamia. Misa karafusaki mariana idukusaina fuaqa. <sup>12</sup> Mooseefa mi ufana iriseenoo Yaaweena qimaminoo qinuu. Isaraee

maqannaasa ririmma sia qini ufa iria naqaa fee masee Faraoofa iriannoo fee. Qinee ufa qirara mamma qimarunaua maridaqa. <sup>13</sup> Yaaweefa Mooseena faqa Aaroonafaa faqa qimannimino qinau. Innee qara Isaraee maqannaasa faqa Faraoonafaa faqa maaqi qimasee qimannimiaqa, qinee ani Mooseenara Isaraee maqannaasa Isipa maqa maaqaindaraana nifiqee fuannee qunnanara qimannimia.

*Mosseesa Aaroonasa niku nisauku nuqu.*

<sup>14</sup> Yakooboona indaaruuqaa faiqi Reeubeenafa qaara faqa qaara faqa 4 faiqi maqanau. Misa nuqu Hanookafa faqa Paruufaa faqa Heesaroonafaa faqa Karamifaa faqa minamusa mariqau. Misa nari nifaafaurara maqa maaqakina marusa ninaakusa mara mariqau. <sup>15</sup> Simeeonafa qisauku dinni taikasee dinni ani moodaa marasee 6 faiqi maqanau. Misa nuqu Yeemueerafa faqa Yaminafa faqa Ooqadafa faqa Yakinafa faqa Sooqarafa faqa Sauroofaa faqa mariqau. Sauroona anoofa Kannaan aanaasee marinuu. Misa nari nifaafau rara maqa maaqakina marusa ninaakusa mara mariqau. <sup>16</sup> Reefiffa qaara moo faiqi maqanau. Misa nuqu Keerasoonafa faqa Kooqatafa faqa Meerariffa faqa mariqau. Misa nikoofa Reefiffa <sup>137</sup> aukuaana maraseenoo kuqinau. Misa nari nifaafaurara maqa maaqakina marusa ninaakusa mara mariqau. <sup>17</sup> Keerasoonafa qaara faiqi maqanau. Miqanda nuqu Ribinifa faqa Simeeiffa faqa mariqau. Miqandasaaqari moomoo kambiaqau. <sup>18</sup> Kooqatafa qaara faqa qaara faqa 4 faiqi maqanau. Misa nuqu Amarammafafa faqa Isaqaranafafa faqa Heebaroonafafa faqa Usieerafa faqa mariqau. Misa nikoofa Kooqatafa <sup>133</sup> aukuaana marasee kuqinau. <sup>19</sup> Meerariffa qaara faiqi maqanau. Miqanda nuqu Maqariffa faqa Musaqiffa faqa mariqau. Reefiffa faiqi namu anaiqi mara miqimmiffa mariqau.

<sup>20</sup> Amarammafafa nari akoona auna nari amaamuna Yookebeeda nammarina maraseenoo Aaroonafaa faqa Mooseenafafa faqa maqanau. Amarammafafa <sup>137</sup> aukuaana maraseenoo kuqinau. <sup>21</sup> Isaqarafa qaaramoo faiqi maqanau. Misa nuqu Kooraaafa faqa Neefeekafa faqa Sikiriffa faqa mariqau. <sup>22</sup> Usieerafa faqa qaaramoo faiqi maqanau. Misa nuqu Misaeerafa faqa Eerasafanafafa faqa Sitiriffa faqa mariqau. <sup>23</sup> Aaroonafafa Aminadafana araamuna Nasoonaa asookina Eeriseepa nammarina maraseenoo minasaa Nadabana faqa Abiquna faqa Eeriasarana faqa Itamarana faqa maqanau. <sup>24</sup> Kooraaafa qaaramoo faiqi maqanau. Misa nuqu Asirafa faqa Eerakanafafa faqa Abiasafa faqa mariqau. Misa Kooraanasaa ani aruaki kambiaqinausa ninaakusa mara mariqau. <sup>25</sup> Aaroonafafa amaaku Eeriasarafa Putieerana araamuna maraseenoo Fineeasana maqanau. Miqimmasee doo Reefinakiqari ani aruaki faiqi oosana oosana mariqau.

<sup>26</sup> Yaaweefa Aaroonasa Mooseesara kai qufaqa Isaraee maqannaasa Isipa maqannaasa rumarana kinaana nifiqa maree aniaqee qimaqoo qanda mariqau. <sup>27</sup> Miqanda kai Isipa maqannaasa karaambaiqa Faraoonafafa Isaraee maqannaasa idukuaniifeera qimamiqau.

*Yaaweefa Mooseena faqa Aaroonafafa faqa ufa nimiraa.*

<sup>28</sup> Yaaweefa Isipa maqa maaqaki maaqi qimasee Mooseena qimaminuu. <sup>29</sup> Qinee Yaaweesa maridaqa. Anee Isipa maqanna kaaraambaiqa Faraoonafafa aiqama qinee qunnuufana qimamia. <sup>30</sup> Mooseeefa iriseenoo Anutuna qimaminoo qinau. Qinee ufa qirara mamma qimarunaua maridaqa. Faraoofa naqifee masee qini ufa iriannoo fee.

## 7

<sup>1</sup> Yaaweefa Mooseena qimaminoo qinau. Qinee ani aiqaanana anee Faraoonafafa afusaa Anutufara foora marinnanoo Aaroonafafa ani afasaafa ani tamummaqara fasiqara foora mariannoo. <sup>2</sup> Qinee aiqama ufa qimamunnana anee Aaroonafafa qimaminanoo mifa Faraoonafafa qimaminanoo Isaraee maqannaasa Isipa maqa maaqaki rumbaqa mariana idukusainafa mi maqa maaqana quqasee fuaqa. <sup>3</sup> Innee qara Faraoonafafa qimami mariffafa qinee kaukaata qimasee qaoo qira irirana amiananoo sia inniqara ufa iriannoo. Qinee moomoo naaquqara ainana Isipa maqa maaqai auqaananoo sia inni ufa iriannoo. <sup>4</sup> Qinee firaa aupurarana uqanna Isipa maqannaasa nimisee qeeqa faiqi anaasee aiqama faiqi oosaa indaarunni kiqa nifiqee fuanaura. <sup>5</sup> Qinee Isipa maqannaasa naruseeqa Isaraee maqannaasa misa maqa maaqaki mariana nifiqee fuanaqa Isipa maqannaasa qinee kai Yaaweesa marunnanara misa irifaranoo.

<sup>6</sup> Mooseesa Aaroonasa Yaaweena ufa iriseeqa doo miqimmiffau. <sup>7</sup> Mooseeefa Faraoonafafa faqa ufa quu kari Mooseeefa <sup>80</sup> aukuaana faqaafa marufannoo Aaroonafafa <sup>83</sup> aukuaana faqaafa marinau.

*Aaroonafafa saunu.*

<sup>8</sup> Yaaweefa Mooseesa Aaroonafafa qimannimino qinau. <sup>9</sup> Faraoofafafa inni qarara moo naaquqara ainana auqamasaiqafa kuqaa anoonee qianee qinaqa Moosee anee Aaroonafafa

qimaminanoo mifa nari asaukukinaa saunu maqasaa Faraona afusaa aqusainanoo sakanikianii.

<sup>10</sup> Mooseesa Aaroonasa Faraoo funnai oonuree Yaaweefa qimannimundee qiqau. Aaroonafa nari saunu Faraona faqa mina uriqarara fasiqauqa faqa nifusaa aqusoofanoo sakani kinau. <sup>11</sup> Faraoofa mina qafamaseenoo nari irirana faqaa fasiqauqa faqa nari afunee fasiqauqa faqa naarooofaqa anireeqa nari afuneennoo Aaroonafa auqoo ainaina auqaqau. <sup>12</sup> Mi afunee fasiqausa faqa nariqa saunu maqasaa aqusoofanoo sakanikinuu. Sakani kamafufanoo Aaroonasa saunu fannoo misaindi nambiqaamasanau. <sup>13</sup> Faraoofa mina qafamaseenoo Yaaweefa gundee inoo kaukaata qira irirafa kaqi minaki marufanoo sia Mooseesa Aaroonasa ufa irinuu.

*Mandainaina Isipa maqannaasaki kambiqaanau.*

<sup>14</sup> Sia irufanoo Yaaweefa kafaa Mooseena qimaminoo qinuu. Faraoofa kaaqa kaukaata qira irirafa minaki marifanoo idukurara akooqaidanoo. <sup>15</sup> Duna kananaana Faraoofa Niru nammari auqarara oofufinaqa inneeqara mina minni ooqu paquriaqa. Sakaniki mari saununa faqa mara maree nammari afainni ooqu marida minara rakisiyaqa. <sup>16</sup> Paquri maseeqa maaqi qimasee qimamiaqa. Yaaweefa Heeburu maqannaana Anutufa maaqanda diqigaifaqa Isaraee maqannaasa anee idukusainaga aadana maqa maaqai oonureeqa qiniara innaaru qiaqee qifaqa ani qimamidaqa. Anee sia iri mariananoo. <sup>17</sup> Maqee Yaaweefa aniaa maaqi qidanoo. Anee qinee auqaana ainaina qafamasee anee qiniara Yaawee fee qimasee irinnaranoo. Anee qafainaga qinee nammari amuaqu maa saununannoo rukamu amiananoo nammari fannoo fidikaika miannoo. <sup>18</sup> Miqinanoo noodaana minakinaafauqa aiqama kuqu taikainanoo nammari faqa manda unda inaga Isipa maqannaasa sia amana mi nammarina neefaranoo. <sup>19</sup> Yaaweefa Mooseena kafaa qimaminoo qinuu. Anee Aaroonasa maaqi qimasee qimaminanoo nari saunu qumaree aiqama nammariuqa faqa oorakinaa nammariuqa faqa akammandira nammariuqa faqa aiqama nammari amummaqa uqeeraani. Nammari fannoo aiqama fidikaika kai mafuannoo. Aiqama Isipa maqa maaqakinaa nammariuqaki fidika kai mariannoo. Difaaniki faqa afeeki faqa sakaqainafa faqa kai fidika aruannoo.

<sup>20</sup> Mooseesa Aaroonasa Yaaweefa qima nimundee iqau. Faraona faqa mina uriqarara rakisirausa faqa nifusaa Aaroonafa nari saunu uqeeraseenoo nammari amuaqu arufanoo aiqama mi nammari fidika kai arinuu. <sup>21</sup> Noodaana aiqama nammariqinaafa kuqu taikafufanoo nammari kaaqa manda undufafa Isipa maqannaasa sia mi nammari nee mariqau. Aiqama Isipa maqa maaqakinaa nammariuqaki fidika kai arinoo marinuu.

<sup>22</sup> Faraona afunee fasiqauqa nariqa afuneennoo Aaroonafa undee iqau. Miqufanoo Faraoofa Yaaweefa gundee inoo kaukaata qinoo Mooseesa Aaroonasa ufa sia irinuu. <sup>23</sup> Faraoofa mina qafamaseenoo nari maaqai oonureenoo sia mi ainainausara irinuu. <sup>24</sup> Isipa maqannaasa nammariara randoosia Niru nammari afaigara nukuda indufusaida amiqira nammari sakasidaqa neemariqau. Anoonaa nammari mandaikinoo marunara sia neemariqau. <sup>25</sup> Qisauku dinni taikasee dinni ani qaara marasee 7 faasaana nammari kaqi fidika arinoo marinuu.

## 8

*Eeqamoosauqa kambiqaqau.*

<sup>1</sup> Yaaweefa kafaa Mooseesa Aaroonasa qimanniminoo qinuu. Inneeqara Faraoo finnai oonuree maaqi qimasee qimamiaqa. Yaaweefa aniaa maaqi qidanoo. Anee qini qiku qisauku idukusainaga misa qiniara innaaru qidaqa qimooqiaqee qinoo. <sup>2</sup> Anee qao qinaqa qinee eeqamoosa moomoora qianaqa anireeqa ani maqa maaqa qumbiqeefaranoo. <sup>3</sup> Niru nammariqi faqa eeqamoosa kai qumbiaqa marifanoo miqooqari anee kooti marianna firaa maaqanaki faqa keeqeefaranoo. Anee faiqee mariannanaki faqa keeqeefara. Ani qaari qamunnasaa faqa qumbiqeefaranoo. Ani faiqi fraasa faqa ani maqannaasa faqa misa oonidaki faqa afeeki faqa qumbiqeefara. <sup>4</sup> Eeqamoosa fannoo urureenoo ani faqa ani ainainausasaa rakisi mariasa faqa ani maqannaasa faqa nifaaqai akareefaranoo. Miqi qufanoo Faraoofa sia mi ufana irinuu.

<sup>5</sup> Yaaweefa kafaa Mooseena qimaminuu. Anee Aaroonasa maaqi qimasee qimamia. Doo aneenna saunu uqeeraseenana aiqama nammari faqa oorakinaa nammari faqa aka mandira nammariuqa faqa uqeera uqafiqasainanoo eeqamoosa fannoo moomoo urureenoo Isipa maqa maaqa rafaqa fuani.

<sup>6</sup> Aaroonafa Mooseena ufa iriseenoo saunu uqeeraseenoo aiqama nammariuqa nimummaqa uqeeranuu. Uqeerasoofanoo eeqamoosauqa moomoo nammariqiqari urureeqa maqa maaqa rafaqa fiqau. <sup>7</sup> Isipa maqannaana afunee fasiqauqa misa faqa

nári afunee auqusoofanoo eeqamoosa moomoo nammarikiqari Isipa maqa maaqaki qumbiqaqau.

<sup>8</sup> Faraofa eeqamoosara akooqoofanoo Mooseena faqa Aaroona faqa naaramasee qimanniminau. Inneeqara oonu Yaaweenara innaaru qimasaifanoo kafaa eeqamoosa niqqaani. Eeqamoosa aiqama niqamasainaqa qinee Isaraee maqanna karabusakinaana idukusaanaqa oonureeqa Yaaweenaa aandau tatufirana suqa amiaqa.

<sup>9</sup> Mooseefa Faraona ufa iriseenoo qimaminau. Qinee inniara innaaru qirara asasammidaqa. Aneenna kai yairee fee innaaru qiannee qinaqa qinee aniara faqa ani ainainirausasa rakisirausara faqa ani maqannaara faqa innaaru qianaara. Mi faasaana kai inni maaqakiaqa qari eeqamoosauqa quqasee Niru nammariki kai oogu marifarannoo.

<sup>10</sup> Faraofa iriseenoo duna kai innaaru qiannee qufanoo Mooseefa iriseenoo qimaminau. Anee qianandee ianaara. Miqianana anee mina qafamaseenana sia moo maqasaa anutufa Yaaweenaa maasa Anutuna fooqaafa maridanoo fee qimasee irinnaranoo. <sup>11</sup> Aniki faqa ani ainainirasasaa rakisirausaki faqa ani maqannaasaki faqa maria eeqamoosausa taika fuannoo. Sia uqanna moodaa faqa kaqi mariannoo. Niru nammariki kai marifarannoo.

<sup>12</sup> Mooseefa faqa Aaroonafa faqa Faraona maaqakiqari raudeeqa oonuroofanoo Mooseefa Yaawee funnai eeqamoosa Faraona faqa nari maqannaasaki faqa quqaqoona taika nisaanifeera innaaru qinau. <sup>13</sup> Yaaweefa Mooseefa iroondee inau. Aiqaama maaqakinaa eeqamoosauqa faqa maaqa naambeeqa qara maru eeqamoosausa faqa maaqa saqama atiqara marusa faqa aiqama qufaa kuqu taikaqau. <sup>14</sup> Isipa maqannaasa mi eeqamoosausa kuqiranauqa mareeqaida moodaanaki quqeesoofa putaa iqa aiqama maqa maaqaki putaa undi marinau. <sup>15</sup> Eeqamoosa kuqu taikafufanoo Faraofa qafamaseenoo Yaaweefa qundee inoo kaukaata qimaseenoo sia Mooseena faqa Aaroona faqa ufa irinau.

#### *Aakukauqa kambiqaqau.*

<sup>16</sup> Yaaweefa Mooseena qimaminoo qinau. Aaroona maaqi qimasee qimamia. Aaroona anee aneenna saunu qumaree maqa rupeemma aminanoo kookooma fannoo quandaki aakukaikamafi Isipa maqa maaqaki umbiqaani. <sup>17</sup> Aaroonafa nari saunu samu kookooma rupeema amufanoo aiqama Isipa maqa maaqakinaa kookoomma fannoo aakukaikinau. Mifa faiqi anaasee faqa aandaqa faqa nifaqaasasa qumbiaqa marida ukaqa nimi mariqau. <sup>18</sup> Isipa maqannaafunee fasiqauqa Aaroona oosana qafamaseeqa misa faqa nari afuneennai aakuka amanammasee qafaanee qimasee amanufanoo sia ufaqa minnisauqa. Minniisofaqa aakukauqa aiqama atinai amanaikiqa mariqau.

<sup>19</sup> Afunee fasiqauqa Faraona qimamiqa qiqa. Anutufa maa ainaina auqaidanoo. Faraofa misa ufa iriseenoo Anutufa qundee inoo kaukaata qimasee Mooseesa Aaroonasa ufa sia irinau.

#### *Faufaariuqa kambiqaqau.*

<sup>20</sup> Yaaweefa Mooseena kafaa qimaminoo qinau. Duna kananaana uqanna Faraofa nammari auqarara oogu fuannoo. Anee kananaana findifinana oogureenana paqurimasee maaqi qimasee qini ufa qimamia. Faraoo Yaaweefa aniara maa ufana qinoo. Anee qini qiku qisauku idukusainaqa qini qimoo qiaqee qinoo. <sup>21</sup> Qinee ani aagu qimama qaidaqa anee sia idukinaqa qinee ani faqa ani ainainirasasaa rakisirausa faqa ani maqannaasa faqa faufaarinnoo aupurarana nimianaara. Isipa maqannaasa maaqauqaki faufaari kai qumbiqaannoo. Aiqaama misa maqa maaqa faqa rafaqa fuannoo.

<sup>22</sup> Miqi mafinaqa qinee Kooseena maqa maaqaki qini faiqi anaasee mariasasaa ititasaana sia faufaari iannoo. Qinee miqianana anee qini Yaaweesara mi maqa maaqanaki maridanoo fee qinnarannoo. <sup>23</sup> Qinee ani faiqi anaasee faqa qeeqa faiqi anaasee faqa rainaanaara. Mi rainarafa naaquqara ainaina duna kambiqaannoo.

<sup>24</sup> Kananaana Yaaweefa qufaa faufaari moomoo uqanna nukudara foora anireeqa Faraona ufa irira maaqaki faqa mina ainainirasasaa rakisirausara maaqakiaqa faqa aiqama Isipa maqa maaqaki faufaari fannoo mandaika uqanna masanau.

<sup>25</sup> Miqimmasoofanoo Faraofa Mooseesa Aaroonasa naaramaseenoo qimanniminau. Innee maaqoo Isipa maqa maaqaki moo atinai inneeqa Anutuna tatufirana suqasee innaaru qiaqa.

<sup>26</sup> Mooseefa nari qimaminoo qinau. Maasa sia amana miqianaara. Isipa maqannaasa Yaaweenaa maasa Anutuna tatufirana suqa amiranara nikooqaandora. Maasa maa aandausannoo tatufirana suqarafa Isipa maqannaasa nikooqarana nimianaqa maasa qiqafamaseeqa oonisamu maasa kuqa darifoora. <sup>27</sup> Maasa qaaramoo faasaana aadana

maqa maaqaki oonuree aandau tatufirana Yaaweena maasa Anutuna narí qiman-nimundee kai iqa suqa amianauna.

<sup>28</sup> Faraofa iriseenoo qinau. Doo amana innee aadana maqa maaqai oonu maridaqa aandau tatufirana suqasee Yaaweena inneeqa Anutuna amiaqa. Sia nianai fuaqa, adeedi maridaqa innaaru qidaqa qiniara faqa innaaru qinau.

<sup>29</sup> Mooseefa Faraona ufa iriseenoo qimaminau. Ani maaqakiqari raudeeqa gumureeqa innaaru qianauna. Duna kananaana faufaari taikaannoo. Ani maaqaki faqa ani ainainirasaa rakisiraua maaqaki faqa ani maqannaasa maaqaki faqa duna kananaana taikaannoo. Faraoo sia kaifaa unna qimaseenana qaoo qia. <sup>30</sup> Miqi qimaseenoo Mooseefa Faraona maaqaki aiseenoo raudamafinoo Yaaweenara innaaru qinau. <sup>31</sup> Yaaweefa Mooseena irara ufa iriseenoo faufaari Faraona maaqakinaana faqa mina ainainirasaa rakisiraua maaqakinaana faqa mina maqannaasa maaqakinaana faqa aiqama taikannisau. Sia moodaa faufaari kaqi marinau. <sup>32</sup> Miqi marufanoo Faraofa kafia kaukaata qimaseenoo sia Isaraee maqannaasa idukusoofaqa fiqau.

## 9

### *Isipa maqannaasa firimaru aandausa kuqia.*

<sup>1</sup> Anutufa kaifaa Mooseena qimaminau. Anee Faraoo finnai oonureenana maaqi qimaseenana qimamia. Oo Faraoo, Yaaweefa Heeburu maqanna Anutufa aniaara maaqi qidanoo. Anee qini qiku qisauku idukusainaqa qiniara innaaru qimaseeqa qimooqiaqee qinoo. <sup>2-3</sup> Anee kaifaa qaoo qimasee Isaraee maqannaasa sia idukinaqa, qinee manda auriranara qiananoo ani aandau qosauqa faqa doonkiuqa faqa kameerauqa faqa burimakauqa faqa sipsipauqa faqa mimmiuqa faqa mi aurirana nimianauranoo. <sup>4</sup> Qinee aandau rainaanauranoo Isipa maqanna aadau aurirana nimianauranoo. Isaraee maqannaasaindi sia aurirana nimianaqa sia misaindi kuqannoo.

<sup>5</sup> Qinee Yaaweesa duna faasaana miqianauranoo fee qidaqa. <sup>6</sup> Iaqoo kananaana Yaaweefa narí qundee inau. Isipa maqannaasa aandau aiqama kuqu taikaqau. Isaraee maqannaasa aandau sia moo kuqinau. Kaqi mariqau. <sup>7</sup> Faraofa minara iriseenoo narí maqannaasa niqiqoofaqa oonu qafamasee aniree Faraona qimamiqau. Isaraee maqannaasa aandau sia uqanna moodaafa kuqinoo. Miqi qufanoo Faraofa kaukaata qimasee sia Isaraee maqannaasa idukusoofaqa fiqau.

### *Isipa maqannaasa nifaaqai abeemauqa kambiqanau.*

<sup>8</sup> Yaaweefa kafia Mooseena faqa Aarona faqa qimannimino qinau. Moosee anee danda goodaa asaukunoo afaqamaree Faraona oorinni oonuree innaarunai aqua. <sup>9</sup> Miqimmasainanoo mi dandafa kookoomara fooru aiqama Isipa maqa maaqakinai aqufinoo aandauga faqa faiqi anaasee faqa niibeema naruani. Naru finoo radiqinoo namuana firaafa kambiqani.

<sup>10</sup> Mooseefa faqa Aaroonafa faqa Yaaweena ufa iriseeqa danda afaqamaree Faraoo funnai fiqau. Faraona oorinni oonu kikiqa mafufaqa Mooseefa mi dandana innaarunai aqinau. Aqusoofanoo maqasaa aqufinoo mi dandafa aandauga faqa faiqi anaasee faqa abeema niminau. Nimisoofanoo mifa radiqinoo namuana firaafa narí marinau. <sup>11</sup> Isipa maqannaafunee fasiqauqa sia amana Mooseena afusaa anirana amanaikiqau. Misa faqa aiqama Isipa maqanna undee kai inoo abeema narí marunara sia Mooseefa maruqoo aniqau. <sup>12</sup> Miqufanoo Yaaweefa qufanoo Faraofa kaukaata qimasee Yaaweefa qundee inoo sia Mooseesa Aaroonasa ufa irinau.

### *Firaa aaku faqa pupusamu faqa aqufinau.*

<sup>13</sup> Yaaweefa mina qafamaseenoo kafia Mooseena qimaminoo qinau. Inneeqara duna kananaana findifiqa oonureeqa Faraona maaqi qimasee qimamiaqa. Heeburu maqanna maasa Anutufa Yaaweefa aniaara maaqi qidanoo. Anee qini faiqi anaasee idukusainaqa misa qini qimooqiaqee qidanoo. <sup>14</sup> Anee sia miqinaqa mikari qinee sia ani ainainirasaa rakisiraua faqa ani maqannaasa faqa kai naruauranoo, ani faqa aupurarana amianaauranoo. Miqianana anee irinnaranoo, sia moo fannoo qini daanna rarafa aiqama maqa maaqaki maridanoo. <sup>15</sup> Qinee ani faqa ani maqannaasa faqa manda auriranannai amana naru taikaunaqini. <sup>16</sup> Qinee inni qeeqa afeeka uqannifiqarara inni minni nisaunaqa kaqi marianara qini afeeka duqu aiqama maqa maaqaki daraaniannoo. <sup>17</sup> Faraoo, anee kaqi kai ramoo ramaa idana sia qini faiqi anaasee idukusaanaqa fidammia. <sup>18</sup> Duna suani afu maa maqee marina amanasaa ururainaqa qinee qiananoo aaku firaafa pupu samu namufaqa aqufuannoo. Miqira pupu samu Isipa maqannaasa ooqai faqa maqee mariaqooqari faqa sia qafoo ainainafa maqee kai kambiqaanoo.

<sup>19</sup> Doo aneenna maqannaasa qimanniminaqa nariqa aandaufa faqa aiqama ainaina madaana'i mari ainainausa faqa mareeqee maaqaki quqaqa. Madaana'i marinna aandausasa faqa faiqi aanaaseesaa faqa firaa pupusamu aqufinoo kuqa naruannoo. <sup>20</sup> Kinna Faraoonaa ainainasaa rakisi marusa uriqararusa akaqausa Karaambaiqa mi ufanara rufiasee nariqa ainainira faiqiuqa faqa aandaufa faqa mareeqee maaqaki uqaqau. <sup>21</sup> Akaqausa Yaaweena ufa irisee nikooqoosa misa nariqa ainainira fasiqauqa faqa nariqa aandaufa faqa kaqi madaana'i quqaqoofaqa mariqau.

<sup>22</sup> Iaqoofanoo Yaaweefa Mooseena qimaminoo qinau. Aneenna asauku innaarunai uqeeraa. Uqeerasainanoo pupu samu aiqama Isipa maqa maaqakinaa fasiqa aanaaseesaa faqa aandaugasaa faqa aiqama afuqakinaa naranagasaa faqa aqufuani. <sup>23</sup> Miqi qufanoo Mooseefa nari saunu innaarunai uqeerasoofanoo Yaaweefa innaarunai qirana faqa aakuasaa faqa pupusamu faqa quqasoofanoo maqasaa quminau. <sup>24</sup> Yaaweefa aaku faqa pupu samu faqa quqaseenoo aakuusaara qufanoo aiqama atinai uqi marinai. <sup>25</sup> Ooqai Isipa maqannaasa miqirana sia qafaqau. Mikari kai firaafa uqanna kambigofaqa qafaqau. <sup>25</sup> Pupu samu fannoo aiqama Isipa maqannaasaa maqusai quqaqoo ainainausa faqa aiqama faiqi anaasee faqa aandaufa faqa narinau. Mifa aiqama afuqakinaa narana faqa saqari qaqama nee marunauqa faqa itairi aqinau. <sup>26</sup> Kooseena maqa maaqaki Isaraee maqannaasa maruqoo kai pupu samu sia aqufinoo narinau.

<sup>27</sup> Faraofa mina qafamaaseenoo Mooseena faqa Aaroonaa faqa naaramaseenoo qimanniminau. Maqee qinee aqaqamma seeqa. Yaaweefa andeeqarafa maridanoo. Qinee faqa qeeqa maqannaasa faqa aqee marunausa maridaqa. <sup>28</sup> Inneeqara oonuree Yaaweenara innaaru qiaqa. Maasa innaarunai qiranara faqa pupu samuara faqa qikoo uqanna qeenoo. Qinee inni idukusaanaqa fifaranoo fee qimasee qima afeekaididaqa. Innee sia maaqoo kisaagasaa marifaranoo.

<sup>29</sup> Miqi qufanoo Mooseefa qimaminau. Qinee ani maqusa naambeeqai oonureeqa qisauku Yaawe finnai uqeerasee innaaru qiananoo innaarunai qirafa faqa pupu samu faqa taikaannoo. Miqimasaanana anee maa maqa maaqanara Yaaweenaindi fee qimasee irinnaranoo. <sup>30</sup> Qinee iridaqa anee faqa ani ainainiranasaa rakisirausa faqa sia Yaaweenaa maasa Anutunara rufiee mariafanoo.

<sup>31</sup> Mikari Isipa maqannaasa reepaa faqa raisa fooqaa ira ainaina baari faqa mandaikinau. Baari fannoo akuqamafufanoo reepaa qaqama irarara deedaqa mafufanoo pupu samu fannoo aqufinoo mandaika masanau. <sup>32</sup> Sia moodaa uita fannoo mandaikinau. Mifa inaaqianna ummaqirafa maridanoo maqee uri marunara sia mifa mandaikinau.

<sup>33</sup> Mooseefa Faraoonaa maaqakiqari raudeenoo naambeeqai qumureenoo asauku innaarunai uqeerasee Yaaweenara innaaru qinau. Innaaru qufanoo innaarunai qirafa faqa pupu samu faqa aaku faqa aiqama taikanau. <sup>34</sup> Taikafufanoo Faraofa qafamaaseenoo kafaa aaganau. Mifa faqa nari ainainiranasaa rakisi marusa faqa kaqi kai kaukaataqiaqa ani mariqau. <sup>35</sup> Ooqai Yaaweefa Mooseena qimamundee kai inoo Faraofa kaukaata qimaseenoo sia Isaraee maqannaasa idukusoofaqa fiqau.

## 10

### *Pandaqauqa moomoo kambiqau.*

<sup>1</sup> Yaaweefa kafaa Mooseena qimaminoo qinau. Anee kafaa Faraoo finnai fua. Qinee Faraoonaa faqa mina ainainiranasaa rakisirausa faqa kaukaataqira irirana nimiseeqa qeeqa faiqi sia auqaqaa ira ainaina misa qambaana auqarara miqianaara. <sup>2</sup> Innee inneeqa faiqi namu faqa ninaiqimara faqa, qinee Isipa maqannaasa faiqi sia auqaqaa ira ainainannai misa mara furufarirusaika mannimaqaafannanara qimannimia. Innee aiqamausa qini Yaaweesara irifaranoo. <sup>3</sup> Mooseefa faqa Aaroonafa faqa Faraoo funnai oonuree maaqi qimasee qimamiqa qiqau. Yaaweefa Qeeburu maqannaasa Anutufa aniara maaqi qidanoo. Kisaagasaa fee anee qaoo qidanee sia fee aneenna auqu mara maree muqfisee qini qimeemaanai marinnaree. Anee qini faiqi anaasee idukusinaqa oonureeqa qiniara innaaru qiaqee qidanoo.

<sup>4</sup> Anee kaqi kai qaoo qimarinaqa qinee duna pandaqa moomoo mara quqasaanaqa ani maqa maaqaki qumbiqaannoo fee qinoo. <sup>5</sup> Pandaqa moomoo uqanna kambiqafi maqa ititafinaqa sia maqa qafeefaranoo. Pupasamu fannoo naridanoo mafisai andandausa aiqama nama taikfeefaranoo. Saqari mafisainauqa faqa neefaranoo. <sup>6</sup> Mi pandaqausa ani ufa irira maaqaki faqa ani ainainiranasaa rakisi mariasa maaqakiaqa faqa ani maqannaasa maaqakiaqa faqa qumbiqeefaranoo. Ani akeeku akaaku maruqooqari faqa maqee anee mariannaqooqari faqa sia qafaa ainainafa mandainaina uqanna mariannoo. Miqi qimaseenoo Mooseefa raudamaki finau.

<sup>7</sup> Faraona ainainirana saa rakisi marusa Faraona qimamiqa qiqau. Maa fasiqafa Moosefa kisaagasaa maasa ummaara qimidanoo. Isaraee maqanna idukusainaga oonuree nári Anutuna Yaaweenara innaaru qiaqa. Anee sia fee qafaidanee Isipa maqa maaqa doo mandaikidanoo.

<sup>8</sup> Miqi qufaga Mooseesa Aaroonasa nifiqee Faraofa maruqoo minisoofanoo Faraofa qimannimino qinau. Innee oonureeqa inni Anutuna Yaaweenara innaaru qiaqa. Inneeqa firanara faqa amiqi masee qimaqimifaqa iria. Yauyausee fifaranoo fee.

<sup>9</sup> Miqi qufanoo Mooseefa narí qimaminoo qinau. Maasa aiqamausa fuanauranoo. Maasa qeeqa faiqi asooqa faqa fuanauranoo. Maasa qeeqa sipsipauqa faqa mimmiuqa faqa burimakauqa faqa aiqama oonuree Yaaweena oomaqa suqamianauranoo.

<sup>10</sup> Miqi qufanoo Faraofa qinau. Qinee Yaaweena auqu ramasee qeeqa qimana aiqamasee maaqi qidaqa. Qinee sia eedoo qianaqa innee inneeqa faiqi anaasee nifiqee fifaranoo. Innee akooqoo maasa mandaikamma qimaqarara tipundaara maqagee miqi mari-afanoo. <sup>11</sup> Minara qinee inniara faiqi kai oonureeqa innee iri mariandee Yaaweenara innaaru qimaseeqa amooqiqa. Miqi qimasee narí sundiuga qufaga Mooseesa Aaroonasa niqooqafa raudee fiqau. <sup>12</sup> Yaaweefa mina qafamaseenoo Mooseena qimaminoo qinau. Aneenna asaku Isipa maqa maaqa amummaqa uqeerasainaga pandaqauqa aniaqa. Anireeqa misa Isipa maqannaasa narana amanee aiqama naqa. Pupu samu aridanoo mafisoona namataikaqa.

<sup>13</sup> Mooseefa iriseenoo narí saunu uqeerasoofanoo Yaaweefa ufaira qufanoo suani oosaindarii mi faasaana faqa mi eendanaki faqa uqinau. Kananaana ufai fannoo pandaqauqa moomoo maree urinau.

<sup>14</sup> Pandaqaa moomoo nukudara foora urureeqa aiqama Isipa maqa maaqaki amanaika qiaqau. Moomoo indaaru oobiqasee urufaqa kafa inaaqiana akaqausa oobiqasee urufaqa, miqi kai masaida moomoosa uru maqa maaqa qumbiaqau. Ooqai sia miqirana qafaqau, naaru faqa sia qafeefaranoo. <sup>15</sup> Mi pandaqausa aiqama maqa rafaafusoofoanoo sia maqa ati faqa kooroo inau. Maqa faqa kai kudima arinoo marinau. Pupu samu fannoo aridanoo mafisoo andandausa faqa aiqama saqari qaqama faqa namasau. Sia saqari amanee arira ainaina, saqarisaa faqa ummaqira ainainasaa faqa Isipa maqa maaqaki marinau.

<sup>16</sup> Faraofa Mooseesa Aaroonasara aniaqee qufaga aniroofanoo qimanniminau. Qinee Yaaweena inni Anutuna faqa inni faqa mandaikamma nimaqeeqa. <sup>17</sup> Inneeqara qini aagarana akiiqara kafa maqee kai minni qisaqa. Minni qiseeqa Yaaweena inneeqa Anutufinnai innaaru qifanoo maa kuquaqa ira aupurarana mara aqu qisaani.

<sup>18</sup> Mooseefa iriseenoo raudamaku fanoo oonureenoo Yaawee funnai innaaru qinau. <sup>19</sup> Yaaweefa qufanoo ufai fannoo suani afu oosana qaannaindarii uriufa mara quandasee suani afu keeqee marunnaindarii afeeka ufai uqanna uqinoo aiqama pandaqauqa fuaqa Taatuqee ooruku nammarinni aqinau. Sia uqanna moodaa pandaqaa Isipa maqa maaqaki kaqi marinau. <sup>20</sup> Yaaweefa qufanoo Faraofa kaukaata qimasee sia Isaraee maqannaasa idukusoofaqa fiqau.

*Asukuna firaafa narinau.*

<sup>21</sup> Yaaweefa kafa Mooseena qimaminoo qinau. Anee aneenna asaku innaarunai uqeerasainanoo asukuna fannoo aiqama Isipa maqa maaqa rafaafuani. Asukuna firaafa misa nifaqai atooqanoo maridanoora foora inoo mariannoo. <sup>22</sup> Mooseefa narí asaku innaarunai uqeerasoofanoo Isipa maqa maaqa asukuna firaafa qaaramoo faasaana ititannimaqanau. <sup>23</sup> Isipa maqannaasa mikari sia narí qafee narí qafee imariqau. Sia aana nimariqau, maaqaki kai mariqau. Isaraee maqannaasa maruqoo kai kaaqa qee marufaqa marinau.

<sup>24</sup> Faraofa Mooseena aaramaseenoo qimaminau. Aneenna maqannaasa faqa doo oonureeqa Yaaweenara innaaru qimaseeqa amooqiqa. Innee inneeqa faiqi anaasee faqa aiqama nifiqee fuaqa. Inneeqa aandauga maaqoo quqasee inneeqa kai fuaqa. <sup>25</sup> Miqi qimasoofoanoo Mooseefa qinau. Maasa nariqa aandauga faqa maree oonureeqa Yaaweena maasa Anutuna tatufirana suqa amianaurea. <sup>26</sup> Maasa qeeqa aandauga maree fuanaura. Sia moodaa maaqoo kaqi mafi quqaanaura. Maasa qeeqa kai nana aandaufee aruseeqa Yaaweena maasa Anutuna tatufirana suqa amianauree. Maasa maqee sia iridaqa. Miqoo oonuree irianaurea. Nana aandaunoo fee tatufirana suqaanauree.

<sup>27</sup> Yaaweefa qufanoo Faraofa kaukaata qira irirana maraseenoo ititamaseenoo Isaraee maqanna sia idukinau. <sup>28</sup> Miqi qimaseenoo Faraofa Mooseena qimaminau. Doo qinee qafee mariana qini qifusaqari fifua. Qinee sia kaifaa ani qafaanaura. Ani qafaana kuqinnaranoo. <sup>29</sup> Mooseefa mina ufa iriseenoo Faraona qimaminau. Anee kuqaa qiananoo. Anee sia kafa qini qiqafeennaranoo.



**11**

*Akoonaiqi ooga faiqiuqa kuqaaqee qiqau.*

<sup>1</sup> Miqi qimasoofoano Yaaweefa Mooseena qimaminoo qinau. Qinee moodaa ummaara kai Isipa maqannaasa karaambaifaqa faqa mina maqannaasa faqa nimiana. Miqim-masaanoo mifa inni idukusainafa fifarano. Kuqaa uqanna mifa sia reendeenasaa inni niqaannoo. Kaukaata qidanoo niqaannoo. <sup>2</sup> Moosee anee aneenna maqannaasa maaqi qimasee qimannimia. Misa aiqama Isipa maqannaasa nari naafa mariasa iramirifaqa nifaafa auqi maria ainainna siruaannoo faqa koorannoo faqa auqirana nimiaqa. <sup>3</sup> Yaaweefa qufaqa Isipa maqannaasa Isaraee maqannaasara uriqararausee qiqau. Isipa maqanna Faraoona ainainiranasaa rakisi marusa faqa aiqama faiqi anaasee faqa Mooseenara kaaqa uriqarara fee qimasee ainaina nimiraree qiqau.

<sup>4</sup> Mooseefa Yaaweena mi ufana iriseenoo oonu Faraoona qimaminoo qinau. Yaaweefa aniaa maaqi qinoo. Eendamusai uqanna qinee Isipa maqa maaqaki nuanaura. <sup>5</sup> Isipa maqanna akoonaiqi ooga faiqiuqa aiqama kuqifaranoo. Ani Faraoona faiqi ani amaqa maqaaninnana saaqari oosana arasee miqooqaraasa ooga faiqiuqa faqa kaaqa ureeqarasa ooga faiqiuqa faqa aiqama naru taikaannoo. Aiqaama burimmakauqa ooga aanaaqiuqa faqa kuqifaranoo. <sup>6</sup> Aiqaama Isipa maqa maaqaki ikifaafa qirafa firaafa mariannoo. Ooqi sia miqira iki raqarafa marinau. Kasooqaaqee faqa sia miqira qikiraqarafa mariannoo. <sup>7</sup> Miqi marifanoo sia uqanna faini fannoo Isaraee maqannaasa faqa misa aandaufa faqa nindafeenoo kau kau qiannoo. Miqinana anee qinee Yaaweesa Isaraee maqannaasa faqa Isipa maqannaasa faqa raine marunnaara irinnanoo. <sup>8</sup> Mooseefa kafa Faraoona qimamidanoo qinau. Ani ainainiranasaa rakisi mariasa aiqama qinee iannannai anireeqa qini doorinni niqoori saunu arafiq qiniara doo aneenna maqannaasa nifiqee fuannee qifaranoo. Miqi qifaqa qinee doo fuanuranoo. Mooseefa miqi qimasee aranaqoofanoo aanoomasenoo raudanau.

<sup>9</sup> Raudamafufanoo Yaaweefa Mooseena qimaminoo qinau. Faroofoa ani ufa sia uqanna iriannoo. Miqi marinaqa qinee faiqi sia auqaaqaa ira ainaina moo faqa moo faqa auqaanaura. <sup>10</sup> Mooseefa faqa Aaroonafa faqa Faraoona oorisaa mi oosana oosanna ainainna auqoofanoo mifa sia irinau. Yaaweefa qufanoo kaukaata qira irirana maraseenoo sia niqiqoofaqa mina maqa maaqakiqari fiqau.

**12**

*Ainnaaqarara qoomaqa oosana arasee naqau.*

<sup>1</sup> Mooseena faqa Aarona faqa Isipa maqa maaqaki Yaaweefa kafa qimanniminoo qinau. <sup>2</sup> Innee aiqama aukuanaki maa quqoonnara maasa indaaruuqa quqoona fee qifaranoo. <sup>3</sup> Anutufa Mooseena qimaminoo qinau. Aiqaama Isaraee maqanna maa ufana qimannimia. Maa quqoonnasaa qisaukuqara taikasee faasaanasaa moodaa moodaa fasiqa oonu sipsipa aanaaqi fee mimmi aanaaqi fee nari maaqaki mariasa naaqeera maraqa. <sup>4</sup> Mi maqanakinaasa ooda maridaqa sia mi aandauna nama taikaqaa inaqa misa naqa marinausa naaramasee misa faqa amana rainasee naqa. Faiqi anaasee nimana nimana kai aukusee niminaqa naifanoo taikaani. <sup>5</sup> Innee sipsipa aanaaqi fee mimmi aanaaqi fee akoona kai moodaa aukuna marasainnana, sia moo nammuaana faqa aurirana faqa marinna maraqa. <sup>6</sup> Mi quqoonnasaa qisaukuqara taikasee qikunni qaara faqa qaara faqa marasee 14 faasaana eenee marinaqa kai aiqama Isaraee maqannaasa mi aandausa aruqa. <sup>7</sup> Sipsipa arusaifaqa mina fidika sakaseeqa maaqa kooqiuqa dinni dinni afaimau faqa mirinni auni riranasaa faqa akuqa. Innee mi aandausa neefandinna maaqana kooqi aku amaqaqa. <sup>8</sup> Mi eendanaki kai mi aandauna amaqi idasaa kasooqammasee sukaqee mari adasana rainasee naqa. Sia innooqee mari pauraqana aqira bereeta suqasee sipsipa amaqi namufaqa naqa. <sup>9</sup> Sia fuka naqa. Namariki faqa sia suqasee naqa. Idaki kai akiqa faqa aiku faqa arada faqa suqasee naqa. <sup>10</sup> Eendaki mina aiqama taikaqa. Mina ataraasa sia kananaana kaqi mariani, ida qarasaanoo taikaani. <sup>11</sup> Innee maaqimmasee mi aandauna naqa. Amunna maraseeqa niku aanaamu afisuseeqa, saunu nisaukuki qumareeqa doo kaqi kaqi naqa. Namaseeqa maaqooqari innee mi narannara Yaaweefa ainnaaqaroo narana fee qiaqa.

<sup>12</sup> Mi eendanaki qinee Isipa maqa maaqa aiqamai oonuree aniree idaqa aiqama ooga akoonaiqi faqa oogasaa andau akoonauqa maqarana faqa kuqa naruaanaura. Qinee Yaaweesa Isipa maqannaasa unna anutusa faqa aupurarana nimianaura. <sup>13</sup> Fidika kooqi afaisaa aku amaqarafa mifa kai innee maria maaqana koorooiannoo. Qinee Isipa maqanna aiqama nariqa fidaqa inni maaqa kooqisaa fidika qafamasee ainaaqaraanaura sia inni naruaanaura.

<sup>14</sup> Innee mi faasaana amaana qoomaqa faasaanara foora marinaqa qinee Yaaweesa auqaafanna ainainara naaqoo auqainaqa irisee asasifaranoo. Innee aiqama kari mi faasaannara asasifaranoo.

*Pauraqa sia quqara bereeta neamaru firaa faasaanafa.*

<sup>15</sup> Yaaweefa kaifaa maaqi qinau. Qisauku dinni taikasee dinni ani qaara marasee 7 faasaana innooqee mari pauraqana aquqaa bereeta sia naaqa. Sia pauraqa aqira bereeta kai naaqa. Oomaqa indaaruuqaa faasaana inneeqa maaqakiaqa aiqama innooqee mari pauraqana mara aqusaaqa. Oomaqaki faiqi moo fannoo innooqee mari pauraqana aqira bereeta nainna fasiqanara sia Isaraee maqannaafaa fee qiaqa. <sup>16</sup> Oomaqa indaaruuqaa faasaana faqa qoomaqa taikara faasaanara faqa naaquqara faasaanee qimasee suqufi innaaru qiaqa. Sia moo ainainirafa mi faasaana qandasaa mariani. Narana deedaqirafa kai mariani.

<sup>17</sup> Innee miqimmasee qoomaqa naida mariaqa. Mi faasaana qinee inni faiqi oosana faiqi oosana Isipa maqa maaqaindaraana nifiqee aniqiafana. Innee aiqama kari mi faasaannasaa qoomaqa sakeera foora mi faasaannara asasiaqa. <sup>18</sup> Indaaruuqaa quqoonasaa 14 faasaanasaa eenee marinaqa oosana arasee fiifinaqa mi quqoonnana 21 faasaanasaa innee sia innooqee mari pauraqana aqira bereeta naaqa. <sup>19</sup> Innee 7 faasaana qoomaqa nara faasaana innooqee mari pauraqafa sia inni maaqakiaqa mariani. Innikiqari faiqi moo fannoo fee moo aanaamuru ani marina fee innooqee mari pauraqana aqira bereeta nainaqa innee sia minara Isaraee maqannaafaa fee qiaqa. <sup>20</sup> Innee yai yai fee maridaqa sia innooqee mari pauraqana aqira bereeta kai naaqa.

*Indaaruuqaa ainnaaqarara qoomaqa.*

<sup>21</sup> Anutufa Mooseena mi ufana qimamisoofanoo Mooseefa Isaraee maqannaasa uriqararasa qimanniminoo qinau. Innee moodaa moodaa sipsipa akoona fee mimmi akoona timmusa fee inneeqa faiqi anaasee nimana kai mara minisee aruseeqa ainnaaqaroo qoomaqaana suqasee naidaqa asasiaqa. <sup>22</sup> Aandau aruseeqa fidika difaaniki sakaqa. Innee hisoopa saqari amanee raudasee minannoo fidika difaaniki raarammasee kooqi afai dinni dinni faqa mirinni faqa akuaqa. Akuseeqa innee sia raudaaqa, maaqaki kai marifanoo iaqaani. <sup>23</sup> Fafaa eendaki Yaaweefa Isipa maqannaasa ooqa faiqi narinoo fidanoo inni kooqi mirinni faqa dinni dinni faqa fidika qafamaseenoo narinoo nimari qangiroonara qinanoo sia mi maqanaki keeqaannoo.

<sup>24</sup> Innee faqa inneeqa faiqi namu faqa naaru naaru maaqi kai iqa fuaqa. <sup>25</sup> Innee Yaaweefa qima afeekaikamasee nimiraree qimaqoo maqannaasa oonureeqa maaqimmiqa fuaqa. <sup>26</sup> Kasooaqee inni faiqi namu mi qoomaqaana qafamaseeqa mina oosanara irafaqa innee maaqi qimasee qimannimiaqa. <sup>27</sup> Maa qoomaqa Yaaweefa ainnaaqaroo qoomaqaafa maridanoo fee qimasee qimannimiaqa. Ooqai mifa Isipa maqa maaqaki maasa ainnaaqareenoo Isipa maqannaasa ooqa faiqiuqa narinoo maasa sia darinau maqi qiaqa. Mooseefa miqi qimasooafa Isaraee maqannaasa iriseeqa aiqama kumma ramafi Anutunara susuiqau. <sup>28</sup> Susummaseeqa misa daraanimafiqa Yaaweefa Mooseesa Aaroonasa nimu ufa mau fiqa aiqama ainaina andeeqasee deedaqiuqau.

*Isipa maqannaasa akoonaiqi ooqa faiqiuqa kuqiuqau.*

<sup>29</sup> Mi eendanaki kai eenda amuqasai Yaaweefa Isipa maqannaafaa ooqa akoonaiqiuqa narinau. Faraona amaaku nari akoona ainaina maraaninnana saqari oosana arasee rumbaranaki mariasa faiqi namu faqa aiqama narinau. Aandau aanaaqiuqa akoona ooqasaa maqaranauqa faqa Yaaweefa narinau. <sup>30</sup> Narusoofaqa mi eendanaki Faraooafa faqa nari ainainasaa rakisi marusa faqa aiqama Isipa maqannaasa faqa aiqama tauti findifiqau. Iki faafau qirafa firafa Isipa maqa maaqaki marinau. Sia moo maqaki kaqi mariqau, aiqama maaqaki kuqirafa marunara iki raqee mariqau.

<sup>31</sup> Mi eendanaki kai Faraooafa Mooseena faqa Aaroonaa faqa naaramaseenoo qimanniminau. Inneeqara faqa inneeqa maqannaasa Isaraee maqannaasa faqa qini maqa maaqakiqari quqaseeqa inneeqa qiannai oonureeqa Yaaweena amooqiaqa. <sup>32</sup> Inneeqa sipsipauqa faqa mimmiuqa faqa burimakauqa faqa doo fuaqa nani. Oonuree qini faqa amiqi amiqimma qimaqaanifeera innaaru qiaqa. <sup>33</sup> Isipa maqannaafaa faiqi anaasee misa faqa Isaraee maqannaasa niqiqeeqa qiqau. Innee kai kaqi fuaqa. Innee kaqi marifaqa maasa aiqama kuqu taikaanoora. Innee doo fuaqa. <sup>34</sup> Miqi qimasooafa Isaraee maqannaasa innooqee maru pauraqana sia aqira bereeta sia suqarana difaaniki qamunnasaa kukuqamma quqasee nikumaqa akumaree fiqau <sup>35</sup> Isaraee maqannaasa Mooseefa gundee kai iqa Isipa maqannaafaa nifaqa auqimaru ainainara siruara faqa koorara faqa qamunnaara faqa iraqau. <sup>36</sup> Yaaweefa qufaqa Isipa maqannaasa Isaraee

maqannaasara uriqararausee qimasee misa iroo ainainna kaqi nimiqau. Miqunannai Isaraee maqannaasa Isipa maqannaasa aqama ainaina maree fiqau.

*Isaraee maqannaasa Isipa maqa maaqa minnisee fiqau.*

<sup>37</sup> Isaraee maqannaasa sandeeqa Ramaseesa maqusa quqasee Sakoota maqusai fiqau. Misa nambaqa maaqimminoo marinau, 600,000 faiqi kai mariqau, sia faiqi anaasee nisaana riqau. <sup>38</sup> Moomoo maqusanaasa Isipa maqa maqaki ani marusa misa faqa nari burimakauqa faqa sipsipauqa faqa mimmiuqa faqa maree fiqau. <sup>39</sup> Misa aanai fidaqa fuka bereeta innooqee mari pauraqana sia aqirana maree funa suqa naqau. Isipa maqannaasa Isaraee maqannaasa nifaqasoonara aqgmuriqa bereeta innooqee maru pauraqana sia aqirana maree fiqau.

<sup>40</sup> Isaraee maqannaasa 430 aukuaana Isipa maqa maaqaki mariqau. <sup>41</sup> 430 aukuaana taikarana namu faqa faiqi aqama oosana Yaaweena aiku asauku Isaraee maqannaasa Isipa maqa maaqa quqasee fiqau. <sup>42</sup> Eendaki Yaaweefa Isaraee maqannaasa qumee rakisidanoo nifiqee finau. Aiqama aukuanaki mi eendiranara kai Yaaweenaindi fee qimasee innaaru qidaqa rakisi mariqau.

*Ainnaaqaroo oomaqana suqara naakaparufa.*

<sup>43</sup> Yaaweefa Mooseena faqa Aaroonu faqa qima niminu. Ainnaaqaraafanna oomaqana suqara naakapara ufa maaqimminoo mariannoo. Moo maqanaindani ani marinafa sia amana mi oomaqana naannoo. <sup>44</sup> Inneeqa munnimmannai feefaurum-maqoo ainainira fasiqausa fainanduqu saifaqa misa amana neefaranoo. <sup>45</sup> Ufaasu ani mariasa faqa feefauruara ainaini mariasa faqa sia neefaranoo. <sup>46</sup> Aiqama mi aandau naranna deedaqa maqanaki kai nama taikaaqa. Sia uqanna madaana maree fuaqa. Sia aandau amudaani itairiaqa. <sup>47</sup> Aiqama Isaraee maqannaasa mi oomaqanara asasiaqa. <sup>48</sup> Sia fainanduqira fasiqa fannoo sia amana naannoo. Anaamuru fasiqa inni qambaana marinafa ainnaaqaroo oomaqanara asaidanoo Yaaweena auqu uqeeraree qinaqa innee mina maaqaki mariasa akoonaiquqa fainanduqu saifaqa misa faqa mi oomaqanara asasiaqa. Miqi masaifanoo mifa Isaraee maqannaasaki kambiqara fara foora maridanoo mifa faqa oomaqa naranaki mariani. <sup>49</sup> Innee faqa moo maqanna inniki ani marinafa faqa moodaa sanda mau kai fuaqa. <sup>50</sup> Yaaweefa Mooseesa Aaroonasa qima nimundee Isaraee maqannaasa iqau. <sup>51</sup> Mi faasaana Yaaweefa Isaraeerana aiku asauku Isipa maqasaa qaraana nifiqee finau.

## 13

*Isaraee maqannaasa akoonaiqi ooqa faiquqara Yaaweena amiqau.*

<sup>1</sup> Yaaweefa Mooseena qimaminu. <sup>2</sup> Innee aqama akoonaiqi ooqa faiquqa qini kai qimia. Aiqama Isaraee maqannaasa ooqa faiquqa faqa aqama aandau ooqasaa maqarana akoonauqa faqa qinindi marinara qini qimiaqa.

*Innooqee maru pauraqana sia aqira bereeta suqoo oomaqafa.*

<sup>3</sup> Mooseefa Isaraee maqannaasa qima niminoo qinau. Innee maa faasaannara iriaqa. Innee karabusakiqari maa faasaana Yaaweefa nari afeekannoo nifiqee anunara innooqee mari pauraqana aqira bereeta sia naaqa. <sup>4</sup> Innee maqee Abiba quqoonu indaruqaa faasaana marifaqa Isipa maqa maaqa quqasee ani mariafanoo. <sup>5</sup> Yaaweefa inni nikaaku nikaaku faqa oori kandamasee qima afeekaika masee Kannaana maqa maaqa faqa Heeta maqa maaqa faqa Amooru maqa maaqa faqa Hifita maqa maaqa faqa Yeebusa maqa maaqa faqa misa maqa maaqa inni nimiraree qinau. Mifa inni nifiqeenoo ainoo faqaa maqa ainaina rairaa imariqoo munu sainaqa innee aqama aukuaana indaruqaa quqoonasaa maa oomaqana sakasee naidaqa asasiaqa. <sup>6</sup> Dinni taikasee dinni ani qaara qanda marasee 7 faasaana innooqee mari pauraqana sia aqira bereeta naaqa. Innee miqimmaseeqa naidaqa mi 7 faasaanafa taikainaqa miqoo innee Yaaweenara uriqarara fee qimasee firaa oomaqa sakasee naaqa. <sup>7</sup> Dinni qisauku taikasee dinni ani qaara qanda marasee 7 faasaana innooqee mari pauraqana sia aqira bereeta kai naaqa. Mi kamuqoo inni maaqaki faqa inni maqa maaqaki faqa innooqee mari pauraqafa faqa innooqee mari pauraqana aqira bereeta faqa sia uqanna mariani. <sup>8</sup> Mi oomaqana nainna kari inneeqa faiqi namu maaqi qimasee qimannimiaqa. Maasa Isipa maqa maaqakinaana Yaaweefa nifiqee anunara maa oomaqana sakasee naidaqee qiaqa. <sup>9</sup> Mooseefa kafa Isaraee maqannaasa qimannimidanoo qinau. Maa oomaqana narafa inni naaqoo auqaannoo. Nisaukuki sanda rumbeera foora faqa niqinaaqa rumbeera foora inoo maridanoo, mifa inni naaqoo auqainaqa innee Yaaweena sandufa qirana faqa mina ufa asaana rumasee irirana faqa naaqoo auqaannoo. Yaaweefa nari afeekannoo

inni Isipa maqa maaqaindaraana nifiqee anunara miqiaqa. <sup>10</sup> Aiqama aukuanaki maa faasaana maa oomaqana sakasee naidaqa asasiaqa.

*Akoonaiqi ooga faiqiuqa.*

<sup>11</sup> Yaaweefa ooqai inni faqa inni nikeeku nikaaku faqa nimirara qima afeekaikam-masee Kannaana maqa maaqa nimianauree qimaqoonnai nifiqee fuannoo. <sup>12</sup> Mifa inni mi maqana niminaqa innee ooga faiqi akoonaiqiuqa Yaaweena amiaqa. Aiqama aandau oogasaa maqarana akoonauqa Yaaweenaindi mariani. <sup>13</sup> Doonki oogasaa maqarana aanaaqi minisee sipsipa aanaaqi moodaa maraseeqa doonki aanaaqi amaqa maqasaifanoo doonki aanaaqi kaqi mariannoo. Innee sia moo andaunnai doonki aanaaqi amaqa maqaani qimasee doonki aanaaqiuqa ninuka qumaree kuridiaqa. Innee inneeqa ooga faiqiuqa faqa Yaaweenaindikinoo marina kafaa inneeqa feefauriaqa. <sup>14</sup> Kasooqaqee inni faiqi namu mi suqanara oosannara inni irifaqa innee maqi qimasee qimannimiaqa. Yaaweefa nari firaa afeekannoo maasa Isipa maqa maaqai rumbaranakinaana qifiqee aninau maqi qiaqa. <sup>15</sup> Faraoofa kaukaata qimasee sia maasa idukiraree qufanoo Yaaweefa ooga faiqiuqa akoonaiqiuqa Isipa maqa maaqakinaana aiqama narinau. Aiqama aandau akoona oogasaa maqarana faqa narinau. Minara maasa aiqama oogasaa maqara aandau Yaaweena tatufirana suqa amiseeqa nari faiqi namu kafaa maraiaqa. <sup>16</sup> Maa oomaqana narafa maasa daaqoo auqaannoo. Nisauku sanda rumbeera foora faqa niqinaaqa rumbeera foora inoo maridanoo, mifa maasa daaqoo auqainaqa Yaaweefa maasa Isipa maqa maaqaindaraana nari firaa afeekannoo nifiqee anunara irianauro.

*Anutufa qasuruki faqa idauruki faqa maridanoo misa nifiqee finau.*

<sup>17</sup> Faraoofa Isaraee maqanna idukusoofaqa fimarufanoo Anutufa Firistianni qusa aatata sia nifiqee finau. Isaraee maqannaasa Firistia maqannaasa faqa rakiqa anirandee kaifaa Isipa maqa maaqai fifoo qimaseenoo nifiqee moo aatata finau.

<sup>18</sup> Minara iriseenoo Anutufa misa nifiqeenoo aadana maqa maaqai fiqinoo taatuqee nammari fimarunnai nifiqee fiqinau. Fidaqa Isaraee maqannaasa rakira ainaina deedaqa muqirausa fiqau. <sup>19</sup> Ooqai Yooseefaafa kaqi maridanoo maaqi qimaseenoo Isaraee maqannaasara qufaaq noori kandamasee mina amudaani maree firara qima afeekaikiqau. Yooseefaafa maaqi qimasee qimanniminau. Kasooqaqee Anutufa inni nifiqee finaqa innee qini qimudaani faqa maa maqusanakinaana maree fuaqa. Mooseefa minara iriseenoo Yooseefaana amudaani faqa mareenoo finau.

<sup>20</sup> Isaraee maqannaasa Sakoota maqusakiqari fifuufaqa aadana maqa maaqa atinni Eetama maqusai oonuree miqoo uiqaana maqauqa usakasee faiqaqau. <sup>21</sup> Yaaweefa faasaana oonnamuki marufanoo oonamu fannoo nifiqee fimarinau. Eendaki mifa idauruki marufanoo idauru fannoo kaqa qamannimaqee marufaqa eendaki faqa faasaana faqa kaqi kai fimaqau. <sup>22</sup> Aiqama faasaana oonnamu misa noorinni fimarinau. Aiqama eendaki idauru faqa miqikai imarinau.

## 14

*Misa Taatuqee ooruku nammari taqaqau.*

<sup>1</sup> Yaaweefa Mooseena qimaminoo qinau. <sup>2</sup> Anee Isaraee maqannaasa qimanniminaqa misa oonurandee quandaki Piqaqiroota maqusa oorinni Mikadoora maqusa dinni taatuqee ooruku nammari dinni mina qambaana Baa Seefoona maqusa aqa uiqaana maqauqa usakaqa. <sup>3</sup> Faraoofa maaqi qimasee iriannoo, Isaraee maqannaasa aadana maqa maaqaki firanara rufiqaidaqa maqa maaqaki oonuree aniree idammiaafoo qianoo. <sup>4</sup> Qinee Yaaweesa kaukaata qira irirana Faraoona amiananoo mifa inni ninaaqiana nifagee fuannoo. Qinee Faraoona faqa mina rakira fasiqaqa faqa irinnaaqarannai firaa duqu maraanaura. Miqimmasaanaqa Isipa maqannaasa qini Yaaweesara irifaranoo. Miqi qimasooafaqa Isaraee maqannaasa Yaaweena ufa mau fiqa anirandee fiqau.

<sup>5</sup> Isipa maqanna karaambaiqa Faraoofa nari ainainiranasaa rakisiraua faqa Isaraee maqanna qaqasee funara kaifaa oonu mafi irufanoo sia andeeqoofanoo qinau. Maasa nana furufaree qimarunaqee Isaraee maqannaasa idukuaki quqasee fidaqee. Maasa Isaraee maqannaasa quqasaafaqa fuafanoo yafee maasa ainainira faiqi kiannoo fee. <sup>6</sup> Miqi qimasooofanoo Faraoofa nari qoosa rarisee maru rakira karana faqa nari rakira fasiqaqa faqa deedaqinau. <sup>7</sup> Faraoofa qoosa rarisee maru rakira karausa amiqiranauqa kai sikis handareeta 600 faqa Isipa maqa maaqaki maru qoosa karausa faqa minasaa rakisi marusa faqa mara quqasoofaqa Isaraee maqannaasa nifagee fiqau. <sup>8</sup> Yaaweefa kaukaataqira irirana Faraoona Isipa maqanna uriqararana amufanoo Isaraee maqannaasa idukuakiqa fidaqa nasuriqa fimarufanoo Faraoofa nifagee finau. <sup>9</sup> Isipa maqanna

sudiauqa nariqa qoosauqa faqa nári qoosa rarisee maru karausa faqa daraiwaauga faqa Isaraee maqannaasa nifaqeeqa Taatuqee ooruku nammari aaga Piqaqiroota maqusa dinni Baaraseefoona maqusa dinni qambaana uigaana maqa usakasee marufaqa oonu paquriqau.

<sup>10</sup> Oonuroofaqa Isaraee maqannaasa Faraona faqa mina rakira fasiqauqa faqa niqafamaseeqa tautumaseeqa rufiadaqa Yaaweefa dadaaqianifeera faaqariqau. <sup>11</sup> Faaqaridaqa Mooseena qimamiqa qiqau. Isipa maqasaa madika sia amanaikifanee anee maasa qifiqeenanee maa aadana maqa maqanaki kuqaneera aninanee. Anee maasa Isipa maqa maaqakinaana qifiqee anianafa quandafina qafaa. <sup>12</sup> Ooqai maasa ani ufa qimamiqiafana maasa Isipa maqa maaqaki kaqi maridaqa maa ainainafa kambaqaannoo fee qiqiafana. Maasa ani qimamiqiafana saina maasa kaqi Isipa maqannaasa ainainira faiqi kiqa marianee qiqiafana. Miqoo maridaqa misa ainainira faiqikirafa amiqirafa mariqini anee maa aadana maqa maqanai fifau qifiqee minisaanaqa kuqanaura.

<sup>13</sup> Mooseefa misa ufa iriseenoo qimannimino qinuu. Innee sia rufiaaqa, kaqi nimatautasee maridaqa Yaaweefa innee asumu mariaqeera itita nimaqainaqa qafeefarano. Maqee innee Isipa maqannaasa amiqimasee nindafaqa. Innee maaqooqari sia kafia nindafeefarano. <sup>14</sup> Yaaweefa inni rakirana nimaqa maqa finoo misa saimbaqa rakuannoo. Miqinaqa innee sia moo ainaina auqaaqa, kaqi kai mariaqa.

<sup>15</sup> Miqi qimasoofoano Yaaweefa Mooseena qimaminuu. Anee nanaree qiniara dadaaqiannee qimasee faaqaridane. Anee Isaraee maqannaasa qimanniminaqa noori munduqaannai fuuqa. <sup>16</sup> Anee aneenna saunu nammari amummaqa uqeeraa. Miqimma sainaqa nammari raina finaqa Isaraee maqannaasa amana aadana maqasaa taqaaqa. <sup>17</sup> Qinee Yaaweesa Isipa maqannaasara qianaqa kaaqa firaqoo kaukaataqira irirana marasee Isaraee maqanna ninaaqianna nifaqee fifarano. Qinee Faraona faqa mina sundiauga faqa mina qoosa rarisee mari karausa faqa daraiwaauga faqa rakirana urinnaaqararanannai firaa duqu maraanaura. <sup>18</sup> Qinee misa urinnaaqarama saanaqa misa qiniara Yaawee fee qifaranoo.

<sup>19</sup> Anutuna qangiuroo fannoo Isaraee maqannaasa noorinni mariuufa aiqareenoo ninaaqiannai finuu. Oonnamu faqa miqi kai inoo aiqaree ninaaqiannai finuu. <sup>20</sup> Mi oonnamufa Isipa maqannaasa dinni Isaraee maqannaasa dinni qambaana marinuu. Mi oonamufa Isipa maqannaasa asukuna nimisee Isaraee maqannaasa kaaqa qamanni-maqanuu. Miqinoo marufaqa mi eendanaki Isipa maqannaasa faqa Isaraee maqannaasa faqa sia nári aaga nári aaga fiqau.

<sup>21</sup> Mooseefa asauku nammari amummaqa uqeerasoofoano Yaaweefa suani afu urimarunnaindaraa afeeka ufainnoo ooruku nammari rainanuu. Mi ufaifa mi eendanaki uqidanoo mariufanoo ooruku nammari rainsoofoano aadana maqa koorooinuu. Miqimmafufanoo nammari rainanuu. <sup>22</sup> Miqimmafufaqa Isaraee maqannaasa ooruku nammari qambaana aadana maqasaa taqaaqa. Dinni dinni nammari fannoo safasara foora inoo marufaqa fiqau.

<sup>23</sup> Isipa maqannaasa misa niqafamaseeqa misa ninaaqianna nifaqeeqa nammari qambaana ni oquraqau. Isipa maqannaasa nariqa qoosauqa faqa nariqa qoosa rarisee maru karausa faqa nariqa daraiwaauga faqa Isaraee maaqanaasa nifaqeeqee nammari oogu raqau. <sup>24</sup> Iaqaarooka Yaaweefa oonnamukiqari faqa idaurukiqari faqa Isipa maqannaasa nindafamaseenoo maparaa irana niminuu. <sup>25</sup> Yaaweefa qufanoo qoosa rarisee maru karausa misa niku utusamafufaqa firara firaqoo anuqi mariqau. Miqufaqa Isipa maqannaasa qiqau. Yaaweefa Isaraee maqannaasa saaroo qinoo maasa daridanoo. Maraifaqa quqasee fuu.

<sup>26</sup> Miqimasoofoano Yaaweefa Mooseena qimaminuu. Aneenna asauku nammari amummaqa uqeerasainanoo kafia nammari fannoo quminoo Isipa maqannaasa nári qoosa rarisee maru karausa faqa daraiwaauga faqa rafaqa fuani. <sup>27</sup> Mooseefa iriseenoo asauku nammari amummaqa uqeeranuu. Miqimma soofanoo iaqaarooka nammari fannoo kafia oonurandeenoo ooqai mariundee kai mafinuu. Isipa maqannaasa sandeeqa fuaneera qufanoo Yaaweefa misa mareeqee nammari qinuu. <sup>28</sup> Nammari fannoo kafia quminoo Faraona rakira fasiqauqa faqa qoosa kara faqa daraiwaauga faqa aiqama Isaraee maqannaasa nifaqeeqee nammari ooquroosa aiqama rafaqa finuu. Sia uqanna moodaafa kaqi marinuu.

<sup>29</sup> Isaraee maqannaasa ooruku nammari qambaana aadana maqasaa taqaaqa. Nammari dinni dinni safasara foora inoo marufaqa fiqau. <sup>30</sup> Mi faasaana Yaaweefa Isaraee maqannaasa Isipa maqannaasa nisaukukinaana maranuu. Marasoofaqa Isaraee maqannaasa quandafi niqafoofoqa Isipa maqannaasa nammari afaiqara kuqieeqeeqee mariqau. <sup>31</sup> Isaraee maqannaasa Yaaweena moo ainaina afeeka eeraarirana rakiranaki Isipa

maqannaasa urinnaaqaroonara irufanoo naaquqoofaqa nári saqarikirana Yaaweenasaa faqa mina ainainira faiqi Mooseenasaa faqa muniqau.

## 15

### *Mooseena Idi.*

<sup>1</sup> Mikari Mooseefa faqa Isaraee maqanna faqa maaqi qimasee Yaaweena amooqira idi raqau.

Qinee Yaaweenara idi raanauranoo.

Mifa rakiranaki uriqarainara miqianaaura.

Mifa qoosauqa faqa qoosasaa marusa faqa ooruku nammariki mara aqinara idi raanaura.

<sup>2</sup> Yaaweefa qini afeeka ititarafa maridanoo.

Mifa qini asumu maroofa maridanoo.

Mifa qini Anutufa marifaqa qinee mina amooqianaaura.

Qini qikoona Anutunafa marifaqa qinee mina afeekara idi raanaura. <sup>3</sup> Yaaweefa afeeka rakira fasiqa maridanoo.

Mina auqu Yaaweefa maridanoo. <sup>4</sup> Mifa Isipa maqanna sundiaufa faqa misa qoosa karauqa faqa rafusu ooruku nammariki aqinoo.

Mina uriqarara sundiaufa Taatuqee Ooruku Nammariki ukuqneea. <sup>5</sup> Ooruku nammari faruma fannoo misa rafaafa fusaifaqa misa ooniara foora meemaqoo maqasaa ooqu maridaqa.

<sup>6</sup> Oo Yaawee ani asauku uqannai asauku fannoo naaquqara afeeka maridanoo.

Mi asaukufa namuqaa naruseenoo utitiqeenoo. <sup>7</sup> Aneenna firaa uriqararanannai aneenna namuqaa rafusu aqunanoo.

Ani aanoo qirafa ida dudaqasaaqari qeera foora mannimaqaananoo. <sup>8</sup> Anee ooruku nammari fannoo aqanara foora ooru finoo.

Nammari dinni dinni innooqa maree safasara foora ooru finoo.

Nammari dinni dinni raina fufanoo maqa meemaqoo afeekaika minoo.

<sup>9</sup> Namuqaauqa maaqi qiqau.

Maasa misa nifaqasee qumaraanauranoo.

Misa qumaraseeqa misa amiqira ainaina maasa didimarina aiqama maraanaura.

Maasa qeeqa rakira paipanannai naruseeqa misa aiqama ainaina mararee qia. <sup>10</sup> Miqi qiafana anee Yaaweefa moodaannai aidoo fuaqasaananoo Isipa maqannaasa ukuqneea.

Miqimma saifaqa misa ooniara foora firaa difukunaki ooqu fia. <sup>11</sup> Yaawee, yafee unna anutusakiqari ani fooqaafa maridanoo fee. Sia moo fannoo.

Yafee ani amana maridanoo kaaqa naaquqara andeeqarafa maridanoo fee.

Yafee faiqi sia amana auqaqaa ira ainaina faqa afeeka ainaina anee imarianandee masee auqaannoo fee. <sup>12</sup> Aneenna asauku uqannannai uqeeera saananoo maqa fannoo namuqaa nambiqeenoo.

<sup>13</sup> Aneenna qima afeekaikiranasaa mapukusee maridana faiqi anaasee mandainainaki mariusa nifiqa maree fimariananoo.

Aneenna afeekannoo misa indaarunni kamma nimaqa maree aneenna naaquqara andeeqara maqasaa quqanni seennaranoo. <sup>14</sup> Anaamuru minara irifanoo naaquqeenoo naindiri raannoo,

Firistia maqannaasa iriafanoo maparaairafa misa qumareenoo. <sup>15</sup> Idooma maqanna karaambaiquafa faqa iriafanoo naaquqeenoo.

Mooapa maqanna afeeka fasiqauqa faqa naindiri raidanoo.

Kannaana maqannaasa afeeka faqa nammari kidanoo. <sup>16</sup> Maparaa irafa faqa firaa rufiarafa faqa misaki maridanoo.

Misa ani Yaaweena afeeka qafamasee naaquqaiqa kaqi muquriqa mariafaqa ani faiqi anaasee karabusakinaana iduku saanausa misa nifusaa fiqaraidaqa. <sup>17</sup> Anee misa nifiqa maree aneenna aqanasaa munuseenana asumu ainainara foora ummaqu saananoo.

Anee Yaaweefa aneennara utaaqama qaanna maqusanaki munusaananoo.

Amaana maqa aneenna usakaqaanna maqusanaki munusaananoo. <sup>18</sup> Anee Yaaweefa naaru naaru uriqarara karaambaiqa marinnaranoo.

### *Miriamma nammarina idi.*

<sup>19</sup> Isaraee maqannaasa ooruku nammari qambaana aadana maqasaa taqaqau. Fitaqa-fufaqa Isipa maqannaasa qoosa kara faqa nári qoosauqa faqa nári daraiwaaufa faqa mi ooruku nammarinaki ooqu roofanoo Yaaweefa kaifaa nammariara qufanoo quminoo

misa rafaafa finau. <sup>20</sup> Aaroonu anasaafa Miriama nammarifa Anutuna tamummaqara anaasee marufa marinau.

Isipa maqannaasa nammariki kuqutaika fufanoo dukaanaa qumareenoo aridanoo idi ranau.

Anaasee aiqama qafamaseeqa nári dukaanaa maree mina faqa oonuree aridaqa niqoori raqee mariqau. <sup>21</sup> Miriamma nammarifa maaqi qimasee idi ranau.

Yaaweenara idi raafa.

Mifa rakirana firaafqoo uraaqareenoo,

mifa qoosauqa faqa qoosasa nimariasa faqa ooruku nammariki rafusu aqinoo.

### *Sukaqee mari nammarifa.*

<sup>22</sup> Mooseefa Isaraee maqanna taatuqee ooruku nammarindaraana nifiqeenoo Suraa aadana maqa maaqaki qaqanau. Qaaramoo faasaanasaa aadana maqa maaqaki fidaqa sia nammari paquriqau. <sup>23</sup> Misa Maraa maqa maaqaki oonureeqa nammari moo paqurimasee noofanoo suka narufaqa sia naqau. Minara mi maqa maqana auqu Maraa fee qiqau. Mi auquna oosana sukaqee mari fee qiqau. <sup>24</sup> Isaraee maqannaasa Mooseena aanoo qimamaqaidaqa qiqau. Maasa nana nammari fee naanauree.

<sup>25</sup> Mooseefa iriseenoo afeekaika maseenoo Yaaweenara innaaru qinuu. Innaaru qufanoo Yaaweeffa Mooseena saqari moo uqafiqoofanoo Mooseefa mi saqarina nammariki aqusoofanoo nammari amiqinuu. Miqoo Yaaweeffa nári sanda ufa mi mau fuaqeeru nimiseenoo miqoo misa nimana masee qafanau. <sup>26</sup> Yaaweeffa qimanniminoon qinuu. Innee qini ufa qaidusiqa qinee andeeqara ainainee qimarunnana auqeeqa kafaa qini sanda ufa mau fifaqa qinee sia manda aupurarana Isipa maqanna nimaafannandee iqa inni nimianauro. Qinee Yaaweesa inni aurirana taikannisee marunasa maridaqa.

<sup>27</sup> Miqooqari Isaraee maqannaasa fiffiufafa Eerimma maqa maaqaki oonuraqau. Miqoo qisaukuqara taikasee qikunni ooqu qaara marasee 12 nammari maqakiqari ururee maruna faqa fasaafana fooqaa ira saqari moomoo 70 marinuu. Miqoo nammari afainni misa uiqaana maqa usakasee mariqau.

## 16

### *Isaraee maqannaasa mannaa faqa ufini faqa mara naqau.*

<sup>1</sup> Isaraee maqannaasa Isipa maqa maaqaindari quqasee anuqooqari inaaqiannaa quqoona 15 faasaanasaa Sinai aqana dinni Eerimma maqa maaqaki dinni qambaana Sinnaa aadana maqa maaqaki oonuraqau. <sup>2</sup> Misa aiqamausa aadana maqa maaqaki funara Mooseesa Aaroonasa kaukaata qimannimaqasee qiqau. <sup>3</sup> Maasa Isipa maqa maaqaki mariafannaqoo Yaaweeffa daruqaana. Miqoo maasa maridaqa aandau faqa akaqa narana maasa didi maruna maasa qimana kai neemariqiafana. Inneeqara miqooqaraana maasa qifiqeeqeeqa maa aadana maqa maaqanaki quqasaafaqa aandaroo darinaqa kuqu taikaanau.

<sup>4</sup> Yaaweeffa misa ufa iriseenoo Mooseena qimaminoo qinuu. Qinee maqee inni aiqamausa naranara qiananoo innaarunaindari aakuara foora aqufina mara neefaranoo. Faasaambaasaana narana quqasaanaqa faiqi anaasee raudamafiq moodaa faasaana amanakai maree marifaranoo. Qinee miqimmasee misa nimanamasee qafaanau. Misa qini ufa irifaree sia fee irifaree. <sup>5</sup> Moodaannai qisauku taikasee dinni ani moodaa marasee 6 faasaana qaara eenda narana amanasaa mara deedaqamma quqaaqa.

<sup>6</sup> Mooseesa Aaroonasa Isaraee maqanna aiqama suqusee qimannimiqa qiqau. Maqee eenee marinaqa innee Yaaweenara Isipa maqa maaqaindari nifiqee anunara irifaranoo. <sup>7</sup> Kananaana innee Yaaweeffa maasaki maridanoo daroo daraa ida kaaqa qeemarina qafeefaranoo. Innee minara aanoo qimariana doo mifa irinoo. Innee sia maqanda rau qimariafanoo fau. Maqanda faiqi faiqi kai maridaqa mina naakapurufa mau fidaqa mina kai qimannimidaqa. <sup>8</sup> Mooseefa kafaa qimanniminoon qinuu. Eendinanoo Yaaweeffa aandau niminaqa neefaranoo. Kananaana bereeta fooqaana inni nimana kai nimiannoo. Innee mina firaafqoo aanoo qimarianara miqiannoo. Innee maasara aanoo qimariana sia maasarau miqi mariafanoo, Yaaweenara aanoo qimariafanoo.

<sup>9</sup> Mooseefa Aaroonu qimaminoo qinuu. Anee Isaraee maqanna aiqama qima nimaqaa Yaaweenara ooninni ani kikiqiaqa. Mifa misa aanooqira ufa irinara miqiaqa.

<sup>10</sup> Aaroofa faiqi anaasee ufa qimannimi marufaqa quandafi aadana maqa maaqaki qafoofanoo oonamuki Yaaweenara daroo daraa ira kaaqa qarafa koorooinuu.

<sup>11</sup> Yaaweeffa Mooseena qimaminoo qinuu. <sup>12</sup> Qinee Isaraee maqanna aanoo qira ufa doo iriqa. Maaqi qimasee qimannimia fafaa eendinoo mammandi marinaqa misa aandau nimianauro duna kananaana uqanna bereeta fooqaana nári narana nimana kai nimianauro. Nimisaanau innee qini Yaaweesa inneeqa Anutusara irifaranoo.

<sup>13</sup> Miqi qimasoofoano eendi marufanoo afidauga moomoo qaqamaraidaqa anirameegee uigaana maqusa amanaikiqau. Kananaana qififaramu uigaana maqa aiqama fiq u fiq inoo marinau. <sup>14</sup> Qififaramu taikafufanoo adamanna ainaina kaqikaafauqa aadana maqa mau marinau. Mi ainainafa pupusamuara foora kaqikaafauqa marinau. <sup>15</sup> Isaraee maqannaasa mina qafamaseeqa mina oosanara randeeqa narí qimami narí qimamiqa qiqau. Maana nana ainaina fee maridanoo fee qiqau. Miqi qufanoo Mooseefa maaqi qimasee qimanniminau. Yaaweefa narana naaqeera nimidannoo. <sup>16</sup> Yaaweefa maaqi qimasee qimanniminau. Innee inneeqa faiqi anaasee faqa inneeqa nimana kai maraaqa. Inneeqa maaqaki mariasa nimana nimana kai susufinna qumbiqa quqaaga. <sup>17</sup> Isaraee maqanna irisee miqimmiqau. Akaqausa moomoo maroofaqa akaqausa qoodaa maraqau.

<sup>18</sup> Aiqamausa suqusee narí amani narí amani masee qafoofanoo akaqausa moomoo suqufanoo akaqausa oodaa suqiqau. Moomoo suqusa namasoofanoo nimuaqumminau. Oodaa suqusa misa faqa namasoofanoo nimuaqu kaimminau. Aiqamausa nári nimana kai suqiqau. <sup>19</sup> Mooseefa qimannimino qinau. Sia ataraasa duna nararee qimasee quqaaga. Aiqama naaqa.

<sup>20</sup> Miqi qufaqa akaqausa Mooseena ufa rukiasee duna kananaana nararee qimasee quqasoofanoo putaa undufanoo qimi kai qumbiqoofanoo Mooseefa aranaqoofanoo aanoomannimaqanau.

<sup>21</sup> Aiqama kananaana nári nimana kai suqusaida neemariqau. Kaqi mafisoofauqa suani urureenoo ididiufanoo nammari nammarimma taikanau. <sup>22</sup> Dinni ani moodaa marasee 6 faasaanasaa qaara kari suqarana amana kai maraqau. Miqi masoofaqa Isaraee maqannaasa uriqararasa aniree mi ainainnara Mooseena qimamiqau. <sup>23</sup> Mooseefa iriseenoo moo ufa maaqi qimasee qimanniminau. Duna Yaaweena naaquqara idooara faasaana mariannoo. Mi faasaana minaindi mariannoo. Innee nana ainainee suqararee qinnana maqee suqaaga. Kaqi marinna narana aaduma quqaqaifanoo marinaqa duna suqa naaqa.

<sup>24</sup> Misa Mooseefa qimannimundee iqa dunaindi kaqi maaqaki quqaqau. Iqaqoofaqa qafoofanoo sia putaa inoo qimi marinau amiqinoo marinau. <sup>25</sup> Mooseefa minara qimannimino qinau. Doo maqee mina naaqa. Maqee Sabata idooara faasaana Yaaweenaindi maridanoo. Minara innee fuka narana uigaana maqusa naambeeqara mararafa sia mariannoo. <sup>26</sup> Innee qisauku dinni taikasee dinni ani moodaa marasee 6 faasaana narana suqu quqaaga. Qisauku dinni taikasee dinni ani qaara marasee 7 faasaana idooara faasaana marinaqa sia miqoo narana mariannoo.

<sup>27</sup> Qisauku dinni taikasee dinni ani qaara marasee 7 faasaanasaa akaqausa narana suqanee qimasee oonu qafoofanoo sia marinau. <sup>28</sup> Anutufa mina qafamasee Mooseena qimaminau. Innee kisaaqasaa fee qini ufa rukiaidaqa sia qini sanda ufa afaqeefaree. <sup>29</sup> Innee iriaqa. Qinee Yaaweena idooara faasaana nimiqa. Miqunnanara qinee dinni taikasee dinni ani moodaa marasee 6 faasaanasaa qinee qaara faasaana narana amana kai nimianaura. Aiqamausa mi faasaana inneeqa mariaqoo kai mariaqa, sia kasiaqa. <sup>30</sup> Faiqi anaasee minara iriseeqa dinni ani qaara marasee 7 faasaanakufafa sia ainaini mariqau. <sup>31</sup> Isaraee maqannaasa mi narannara mannaa fee qimariqau. Mifa ooororana qaqaama fooqaafa eekara arirafa marinau. Mina namasoofanoo mina adiafaa irafa ookasaasa anoonannai auqira biskitara foora imarinau. <sup>32</sup> Mooseefa Yaaweena ufa iriseenoo maaqi qimasee qimanniminau. Yaaweefa inniara maaqi qidanoo, qinee mannaa nimmunnana akaqana afeeki mara quqaqai marinaqa inneeqa ninaiqimara nikeeku nikaaku uqannifiqaidaqa maaqi qimasee qimannimiaqa. Yaaweefa Isipa maqasaaqari maasa aadana maqasaa nifiqee anireenoo qimufaqa naafannanee qimasee uqannifiqaaqa.

<sup>33</sup> Miqi qimasee qimannimiseenoo Mooseefa Aarona qimaminau. Anee qafee moo mara maree mannaa suqeeqee Anutuna afusaa quqasainaqa kasooaqee kambiqainausa gafaaga.

<sup>34</sup> Yaaweefa Mooseena qimamundee inoo Aaroonafa mi naranna mara mareenoo moodaanaki kira bookisa aaqa quqasoofanoo marinau. <sup>35</sup> Isaraee maqannaasa 40 aukuanaki mannaa neemariqau. Mi naranna naqa fifiufaqa Kannaana maqasaa nariqa mariraree quqoo oonuraqau. <sup>36</sup> Mikari misa ummaara amana masee qafee marufa qaaraqanda marinau. Moo fannoo moodaa kaqikaa susufinna amana marinau. Moo fannoo qisaukuqara 10 kaqikaa susufinauqa amana marinau.



## 17

*Oonikiqari nammari quminau.*  
(Namba 20:1-13)

<sup>1</sup> Yaaweena ufa mau fiqa Isaraee maqannaasa Sinnaa aadana maqa maaqakiqari quqasee fiqau. Fidaqa misa maqusa maqusa faiqaqa fimariqau. Misa Reefidimma maqa maaqaki nammari sia maruqoo oonu mariqau. <sup>2</sup> Sia marufaqa misa Mooseenara kaukaata qidaqa qiqau. Anee nammari nimina naanee qufanoo Mooseefa qimanniminoo qinuu. Innee nanaree qini aanoo qima qimaqaidee. Nanaree innee Yaaweena amanamasee qafaidee.

<sup>3</sup> Isaraee maqannaasa nammariara kaaqa nidufaqa Mooseena kaqi kai aanoo qima-maqee mariqau. Misa maqi qiqau. Nanaree anee maasa Isipa maqa maaqaindaraana qifiqee mini saananoo fee nammariara didirafa maasa faqa maasa faiqi namu faqa maasa aandauga namufaqa kuqa daruannoo fee.

<sup>4</sup> Miqi qufanoo Mooseefa afeekai kammaseenoo Yaaweenara innaaru qidanoo qinuu. Oo Yaawee qinee maa fasiqa anaaseesa naqifeemma nimaqaanauree. Misa qusasaa oonisamu qini darifarannoo. <sup>5</sup> Yaaweefa Mooseena qimaminoo qinuu. Moosee anee Isaraee maqannaasa uriqararawsa nifiqee indaaru fua. Ooqai anee Niru nammari arunna saununa faqa maree fua. <sup>6</sup> Qinee Sinai aqanasaa inni noorinni oonisaa kikiqiga marianaara. Aneenna saunu samu ooni arusainanoo nammari minakiqari quminaqa faiqi anaasee naaqa. Miqi qufanoo Mooseefa Isaraee maqanna uriqararawsa nifusaa miqimandoofanoo nammari quminuu. <sup>7</sup> Misa mi maqa maaqana auqu qara auqu raqau. Masaa faqa Meeribaa faqee qiqau. Mi auqu qanda oosana amana masee qafarafa faqa aanoo qirafa faqee qiqau. Aanoo qidaqa qiqau. Yaaweefa maasa faqa maridanoo fee sia fee maridanoo fee. Misa mi ufanannai Yaaweena amana masee qafaqau.

*Isaraee maqannaasa Amareeka maqannaasa faqa rakiqau.*

<sup>8</sup> Isaraee maqanna Reefidimma maqa maaqai marufaqa Amareekana aiku asauku anireeqa misa nariqau. <sup>9</sup> Mooseefa misa nidafamasee Yoosuaana qimaminoo qinuu. Anee akaqa fasiqauqa mara quqasainaga duna kananaana Amareekana aiku asauku faqa oonu rakuuqa. Qinee aqanasaa Anutufa marana nuannee qimasee qimaqimu saununa uqusee kikiqiga marianaara. <sup>10</sup> Yoosuaafa eedoo qimasee kananaana iqaqoofanoo doo Amareekana aiku asauku faqa rakirara nifiqee finuu. Fufaqa Mooseefa faqa Aaroonafa faqa Hurafa faqa aqanai ooru fiqau. <sup>11</sup> Mooseefa aqanasaa kikiqamambufanoo asaukuqara uqeerasoofaqa Isaraee maqannaasa rakiranaki afeekaikiqau. Kafaa nari asauku muqufisoofaqa Amareekana aiku asauku rakiranaki afeekaikiqau. <sup>12</sup> Mooseena asauku anuda qoofaqa Aaroonasa Hurasa ooni ufiqisoofanoo Mooseefa minasaa ooqu marifufanoo Aaroonasa Hurasa Mooseena asaukuqara uqeeufanoo kisaaqasaa marufanoo suani keeqanuu. <sup>13</sup> Miqimmasee uqeeunara Yoosuaafa faqa nari rakira fasiqauqa faqa Amareekana aiku asauku amiqimmasee naruqarasiqau.

<sup>14</sup> Miqimmasoofanoo Yaaweefa Mooseena qimaminuu. Anee papiqaki maa rakiranara akararumma quqaa. Miqinoo marinaqa kaqi iriqa nuuqa. Yoosuaana qimamia. Qinee Yaaweesa Amareekana aiku asauku kuridi taikasaanaara. <sup>15</sup> Rakirafa taikafufanoo Mooseefa ooniuga qumareenoo mi maqa maaqanaki qainda uquseenoo mi qaindana auqureenoo Yaaweefa qini rakira saqari fee qimasee mi qaindana auqu ranuu. <sup>16</sup> Mooseefa kafaa qinuu. Innee Yaaweena rakira saqari uqeeraaqa. Yaaweefa kaqi kai Amareekana aiku asauku faqa naaruara rakida mariannoo.

## 18

*Yeetaroofa Mooseena ani qafanau.*

<sup>1</sup> Yeetaroofa Midianna maqannaasa aanaiqikirafa Mooseena airaamaku marinuu. Aiqaama ainaina Anutufa Mooseena faqa Isaraee maqannaasa faqa dadaaqi marunara faqa Isipa maqa maaqakinaana nifiqee anunara faqa Yeetaroofa irinuu.

<sup>2</sup> Iriseenoo mifa faqa Mooseena anaaga Sipoora nammarina maqusai quqasee anuna afiqee aninuu. <sup>3</sup> Mina faiqigara Keerasoommana faqa Eerieesarana faqa nifiqee aninuu. Mooseefa maaqi qinuu. Qinee anaamuru maqa maaqaki asaqiraafai ani maridee qimasee nari amaaku auqureenoo Keerasoommanee qinuu. <sup>4</sup> Mooseena inaaqianaa faiqi auqu Eerieeseerafa marinuu. Mina anoofa maqasoofanoo Mooseefa qinuu. Qini qikoona Anutufa qini dadaaqinoo Faraona duru feefa ookinaana qini ititaqisainaree qinoo mina auqu Eerieesaranee qinuu.

<sup>5</sup> Yeetaroofa Mooseena anaaga faqa mina faiqi qara faqa nifiqeenoo aadana maqa maaqaki naaquqara aqana aqa Mooseefa uqaana maqa usakasee maruqoo aniranuu.

<sup>6</sup> Yeetaroofta Moosenaarana ufa quqaidanoo qinuu. Oonuree maafi qimasee qimamiya. Ani airaamaku faqa ani faiqi anaasee faqa anidammiaafoo qia.

<sup>7</sup> Mooseefa mi ufana iriseenoo nari airaamaku oonu aanai pagurimaseenoo mina oorinni aqoori saunu arafufanoo mina amooqa nanau. Miqi masoo faqa nari mariranara nari iree nari iree maseeqa doo Moosena uqaana maqaki keeqa qau. <sup>8</sup> Minaki ooru maridanoo Mooseefa nari airaamaku oosana aapurarana Yaaweefa Faraona faqa Isipa maqannaasa faqa nimiseenoo Isaraee maqannaasa maroonara qimaminuu. Mifa Isaraee maqannaasa aanai anidaqa moomoo ummaara maree marufanoo Yaaweefa dadaaqunara faqa qimaminuu. <sup>9</sup> Yeetaroofta mi aiqama ufana iriseenoo asasinuu. <sup>10</sup> Asammaseenoo qinuu. Yaaweefa Faraona asaukukinaana faqa Isipa maqannaasa nisaukukinaana marainara mina amooqia. Yaaweefa nari faiqi anaasee rumbarana kinaana idukunara mina amooqia. <sup>11</sup> Doo maqee qinee iridaqa, Yaaweefa aiqama unna anutusa urinnaaqararafa maridanoo. Isipa maqannaasa inni mandaikamma nimaqee marufanoo inni idaaqamma nisoona mifa aiqama unna anutusa urinnaaqararafa maridanoo. <sup>12</sup> Miqi qimaseenoo Yeetaroofta aanda marasee aruseenoo muduka ida aiqama qama taikara tatufirana Anutuna suqa aminuu. Kafaa mifa akaqa tatufirana faqa Anutuna suqa aminuu. Aaroonafa faqa Isaraee maqannaasa uriqarararusa faqa anireeqa Moosena airaamaku faqa Anutuna amooqidaqa mi naaquqara qoomaqana naqau.

*Misa akaqa siaasa mara quqaqau.*  
(Lo 1:9-18)

<sup>13</sup> Iaqqo kananaana Mooseefa findifinoo nari maqannaasa qambaanaa onureenoo misa kootauqa irinuu. Kananaana oosana arasee kootinoo fiifi ufanoo eenda kai masanuu. <sup>14</sup> Yeetaroofta Moosena kadaapirirana qafamaseenoo maafi qimaseenoo Moosena qimaminuu. Anee nanaree anennaraa maa saikusa auqidanee. Faifi anaasee kananaana kootirara ani marida rakisi mariafanoo eendidanoo.

<sup>15</sup> Mooseefa iriseenoo qimaminoo qinuu. Qinee miqianaqa faifi anaasee qinee unnannai aniree Anutuna aidiranara irifaranoo. <sup>16</sup> Qaara fasiqa qara ufa rainaida nari afu mau nari afu mau maseeqa qinee unnannai aniraafaqa qinee andeeqai fasiqanara maafa andeeqee maqi qimaseeqa Anutuna sanda ufa naakapaidaqa.

<sup>17</sup> Yeetaroofta Moosena qimaminoo qinuu. Anee sia andeeqee mariananoo. <sup>18</sup> Anee miqidana anenna afeeka taikainaga maa fasiqa anaaseesa faqa miqi kai ifaranoo. Aneennaraa sia amanaiki mariananoo. <sup>19</sup> Anee maqee qini ufa iria. Qinee amiqira aakapara ufa ani amianaara. Anee irinanoo Anutufa ani faqa marida dadaaqianoo. Anee andeeqaseenana Anutuna afusaa aanaiqikina maridana faifi anaasee ummaara Anutuna qimami mariananoo. <sup>20</sup> Anee Anutuna sanda ufa qimannimisee andeeqara marirana oosana naamua qimasee misa ifandinna ainainara faqa qimannimia. <sup>21</sup> Qima nimiseenana anee mina amuaaqa irirana faqaa fasiqauqa mara quqasainaga Isaraee maqannaasa uriqarararusaikiqa mariaqa. Akaqausa wan tauseenna (1,000) fasiqa anaaseesa rakisifaqa akaqausa wan handareetasaa 100 rakisifaqa akaqausa fitisaa 50 rakisifaqa akaqausa teennasaa 10 rakisifaqa. Misa Anutunara rufee mariasa maridaqa misa andeeqara oosana faqaasa maridaqa sia umee raqee munnimma maree marinausa mariaqa. <sup>22</sup> Mi fasiqausa aiqama kari faifi anaasee koota ufa irimarinausa mariaqa. Moo afeeka ainaina firaa ainaina kambiqafinaqa maree mini ani amifana anee mina andeeqaa. Kaqikaa ainaina nari kai andeeqaaqa. Misa miqimandee ani qummaara raina maraifanoo ani afaaqa aufadaani. <sup>23</sup> Anutufa eedoo qinana qini ufa mau finana sia kudoosaapeennaranoo. Miqianaqa maa fasiqa anaaseesa aanoo qirafa taikafinaqa quqasee nimaqaq firaranoo.

<sup>24</sup> Mooseefa Yeetaroonaa ufa iriseenoo mi mau kai finuu. <sup>25</sup> Mooseefa irirana faqaasa Isaraee maqannaasa kinaana mara quqasoofaqa uriqarararusaikiqau. 1,000 fasiqasaa rakisirausa faqa 100 fasiqasaa rakisirausa faqa 50 fasiqasaa rakisirausa faqa 10 fasiqasaa rakisirausa faqa mara quqasoofaqa rakisimariqau. <sup>26</sup> Misa aiqama kari siaasara foora naaruara mariqau. Maridaqa kaqikaa kootauqa misa andeeqee mariqau. Fira koota Moosese funnai maree fimariqau.

<sup>27</sup> Miqimmasee Mooseefa Yeetaroonaa amandama soofanoo amaaqa finuu.

## 19

*Isaraee maqannaasa Sinai aaqana aikunni ani mariqau.*

<sup>1-2</sup> Isaraee maqannaasa Isipa maqa maaqakiqari Reefidimma maqa maaqaki ani mariufaqa miqooqari qaaramoo uqoona indaaruuqa faasaanasaa Reefidimma maqa maaqaindari Sinai aadana maqa maaqai oonu mariqau. Miqoo misa Sinai aaqana aikunni uqaana maqa usakasee mariqau.

<sup>3</sup> Mooseefa miqooqari Sinai aaqanasaa Anutuna faqa ufa qiraree qimasee ooru finau. Yaaweefa aaqana saaqari Mooseena aaramaseenoo qimaminau. Anee Yakoooboona aiku asauku Isaraee maqannaasa maaqi qimasee qimannimia. <sup>4</sup> Innee qini oosana qafee mariafanoo. Qinee Isipa maqannaas narunnana innee qafaafanoo. Qinee inni quqaumu aanaaqiara foora itateeqeeqa qiqaosasaa quqaseeqa uqeereeqee qeeqa marunnannai quqaqunaqa mariafanoo. <sup>5</sup> Innee qini ufa iriseeqa qini moodaanaki kira ufa mau fiqa qini faiqi anaasee marifaranoo. Aiqaama maa maqa maaqafa faqa faiqi anaasee faqa qinindi kai maridaqa innee qinee qeeqara utaqaama qaunusa mariafanoo. <sup>6</sup> Innee qinindi uqanna maridaqa qini aanaiqi kirausa mariafanoo.

<sup>7</sup> Mooseefa irisee ooqureenoo Isaree maqanaa uriqararusa suquseenoo aiqama Yaaweefa qimamu ufana qimanniminau. <sup>8</sup> Faiqi anaasee Yaaweena ufa iriseeqa aiqamausa moodaa kari noo raqa maree qiqa. Yaaweefa aiqama ufa qinnana maasa irianauree qiqa. Miqi qufanoo Mooseefa misa ufa iriseenoo Yaaweena qimaminau.

<sup>9</sup> Yaaweefa misa ufa iriseenoo Mooseena qimaminoo qinau. Qinee amatooki arira oonnamukiqari anee iannannai qumuree ani faqa ufa qianaqa faiqi anaasee iriseeqa miqooqari ani ufara kuqaa fee qifaranoo. Miqi qimasoofoano Mooseefa faiqi anaasee quu ufana Yaaweena qimaminau.

<sup>10</sup> Qimamisoofoano Yaaweefa kafa Mooseena qimaminoo qinau. Anee kafa ooquree faiqi anaasee maaqi qimasee qimannimia. Misa aiqama maqee faqa duna faqa nari qamunna nammari uqusee nari nifaqa anukamasee qini qimooqirara deedaqiaqa.

<sup>11</sup> Deeda qimarifaqa duna kaqi mari moona qinee Sinai aaqanasaa qumuraanaqa aiqama faiqi anaasee qini qiqafeefaranoo. <sup>12</sup> Anee aaqana ameemaanai fiqum qumma oosumma sainaaqaa sia faiqi anaasee mina fiaqaraaqa. Miqimmaseenana qimanniminaqa sia aaqanai ooru fuaqa, sia uqanna mina aaqa fuaqa. Minasaa aiku rainafa kuquannoo. <sup>13</sup> Innee miqinna fasiqana sia uqanna nisaukunna aruaqa, ooni samu fee feefannai fee kuqa aruaqa. Maa ufana faiqi faqa aandaqaa faqa qidaqa. Miqinna fasiqa fee aandaqaa fee kuquannoo. Ukeena fuaqifaqa kai faiqi anaasee aaqana aikunni ooru fuaqa.

<sup>14</sup> Mooseefa aqaanaindari qumureenoo faiqi anaasee Yaaweenara deedaqa masee amooqiaqera qimanniminau. Miqi qufaqa faiqi anaasee nariqa qamunna nammari uqiqa. <sup>15</sup> Miqi marufanoo Mooseefa qimanninau. Duna kaqi mari moona deedaqiaqa. Maqee oosana arasee sia anaasee sakasee faqaaqa.

<sup>16</sup> Qaara afuru faisoofoano qaaramookufano kananaana aaqanasaa ukeena firaana fuaqarana namu faqa qamatooki kira oonnamu namu faqa aakuasaa innaarunai namu faqa ufaqa faiqi anaasee uqaana maqaki mariusa aiqama naindiri roofaqa rufiaqa. <sup>17</sup> Mooseefa faiqi anaasee aiqama uqaana maqakinaana nifiqeenoo Yaaweena paqurirara aaqana aikunni oonu kikiqino marinau. <sup>18</sup> Yaaweefa idauruki qari Sinai aaqanasaa qumu marunara ida muna fannoo aaqana aiqama rafaqaqafinoo marinau. Mi munafa firaqaa ida munara foora ooru fufaqa faiqi anaasee qafoofoano firaqoo naindiri ranau. <sup>19</sup> Ukeena feendundaanai qimarinau. Miqi qimarufanoo Mooseefa Yaaweena qimamufanoo Yaaweefa kafa innaarunai darara qiranakiqari nari qimaminau. <sup>20</sup> Yaaweefa Sinai aaqanasaa qumureenoo Mooseena aaroofoano oorufinuu. <sup>21</sup> Ooru roofanoo Yaaweefa Mooseena qimaminoo qinau. Anee ooquree faiqi anaasee qimanniminaqa sia oosu aiaaqaree qini qiqaqarara aniaqa. Misa miqifaqa moomoosa kuqifaranoo.

<sup>22</sup> Aanaiqikirausa faqa qini daaqa aniani qimasee anukamafiqa aniaqa. Sia miqifaqa misa apurarana nimiana. <sup>23</sup> Mooseefa Yaaweena ufa iriseenoo qimaminoo qinau. Faiqi anaasee sia amana Sinai aaqanasaa urifaranoo. Anee aneenna kai maasa daakapama seenana naaquqara aaqana fiqum qumma amusa arasaanaqa sia urifaranoo.

<sup>24</sup> Yaaweefa iriseenoo Mooseena qimaminau. Ooqureenana Aaroonaa faqa afiqee urua. Qini aanaiqikirausa faqa faiqi anaasee faqa sia qini qiqaqararee qimasee amusa rapeemasee uruaqa. Miqifaqa qinee misa ummaara nimiana.

<sup>25</sup> Mooseefa iriseenoo ooqureenoo faiqi anaasee aiqama Yaaweefa quu ufana qimanniminau.

## 20

*Anutuna qisauku qara sandufa.*  
(Lo 5:1-21)

<sup>1</sup> Anutufa maaqi qinoo. <sup>2</sup> Qinee Yaaweesa inni Anutusa maridaqa. Qinee Isipa maqasaa rumbaranaki maruna inni mareeqee mai quqaafanusa maridaqa. <sup>3</sup> Innee sia moo anutuna amooqiaqa, qini kai qimooqiaqa. <sup>4</sup> Innee sia innaarunai mari ainainausa faqa maqasaa mari ainainausa faqa nammari mari ainainausa faqa nimana auqusee maasa anutufee qiaqa. <sup>5</sup> Minara sia moo ainaina amana auqirana oorinni mapamufida innaaru qidaqa amooqiaqa. Qinee Yaaweesa inni Anutusa marunnanara sia mi ainainausa

nimoogiaqa. Qinee sia uqanna moo anutunara qiananoo qini qimaaqa maqaannoo. Faiqi qiniara fidiqaqa inausa aupurarana nimiananoo misasaa faqa misa faiqi namu saa faqa misa ninaiqimara saa faqa nisaifaqausa saa faqa mariannoo. <sup>6</sup> Moomoosa qiniara ridaqa qini sanda ufa mau finausa qinee misa faiqi namu kasooaqee nukudara foora kambiqainausa qeeqa dirirana uqannifiqaanura. <sup>7</sup> Innee sia qini duqunnai manda oosana auqaqa. Qinee Yaaweesa inni Anutusa qini duqa fifau faafau inausa aupurarana nimianaura. <sup>8</sup> Innee Sabata faasaanara naaquqara faasaanee qimasee iriqa fuqa. <sup>9</sup> Dinni taikasee dinni ani moodaa marasee 6 faasaana inni ainainira faasaana mariani. <sup>10</sup> Dinni ani qaara marasee 7 faasaanasaa qini Yaaweesa adoora faasaana maridanoo. Mi faasaannasaa sia uqanna moodaafa faqa ainainiani. Innee faqa inni faiqi namu faqa inni ainainira faiqiuqa faqa inni aandauqa faqa aanaamuru inniki ani mariasa faqa sia uqanna ainainiaqa. <sup>11</sup> Dinni taikasee dinni ani moodaa marasee 6 faasaana qinee Yaaweesa innaaruna faqa maqa faqa ooruku nammari faqa minauqaki mari ainainausa faqa auqi qiafana. Dinni ani qaara marasee 7 faasaanasaa qinee qidooa qiafana. Minara qinee Yaaweesa Sabata faasaana afaaqooqa qimasee naaquqara faasaanee qidaqa. <sup>12</sup> Inneeqa ninausa nikausara qeerairidaqa misa ufa qaindusuaqa. Innee miqiga qinee nimianna maqanasaa kisaqaasaa marifaranoo. <sup>13</sup> Innee sia faiqi anaasee nuqu qimasee naruaqa. <sup>14</sup> Innee faiqi anaasee sia nari ummuari nari umuariaqa. <sup>15</sup> Innee sia moona ainaina umuariaqa. <sup>16</sup> Innee sia akaqausara unna qimasee misa kikiqa ususee ufa nimia. <sup>17</sup> Sia moona maqa umiasanara amugusiani. Sia moona aanaaqara amukaani mina ainainira fasiqa anaaseera faqa misa aandau ainainara faqa mina qigama ainainara faqa sia amukaani.

*Faiqi anaasee Anutunara rufiaqa.*

*(Lo 5:22-23)*

<sup>18</sup> Faiqi anaasee aiqama innaarunai qirana faqa aakuasaa faqa ukeena firaana faqa aqaanasaa idamuna namu faqa qafooqano naindiri reenoo naaquqooqafa nianasaa marida qafee mariqau. <sup>19</sup> Miqi masee misa rufiasee Mooseena qimamiqa qiqau. Anutufa maasa qimaqiminaqa maasa irisee kuqanoora rufiaidaqa anee kai maasa qimaqiminaqa iria.

<sup>20</sup> Mooseefa iriseenoo qimanniminu. Innee sia rufiaqa Anutufa inni nimanamasee qafainaqa aiqama kari minara rufiasee mina ameemaana maridaqa numoo ainaina sia auqaqeeera. <sup>21</sup> Miqi qimasooqafa faiqi anaasee nianai marufanoo Mooseefa kai Anutufa asukuna arira oonamuki maruna aqa finau.

*Aidaraindaraa sandufa.*

<sup>22</sup> Yaaweefa Isaraee maqannaasa qimannimianifeera maqi qimaseenoo Mooseena qimaminu. Qinee innaarunaindari inni faqa ufa qimarunaqa innee inneeqa nifunnai mina qafaafanoo. <sup>23</sup> Innee sia siruaannai faqa koorannai faqa unna anutuna amana auqusee qini Yaaweesa faqbaqa masee amooqiaqa.

<sup>24</sup> Innee maqannai qainda auqusee minasaa inneeqa sipsipa faqa burimakau faqa miniseeqa ida qama taikara tatufirana suqasaifaqa faiqi anaasee qini faqa moodaanaki kiaqa. Aiqama maqusa innee qini qimooqiaqeeera utaaqama qaunna maqusanaki oonureeqa miqifaqa qinee innee iannai qumuree amiqi amiqimma nimaqaanura. <sup>25</sup> Innee ooninnai qini aidara auqiraree qimasee sia faiqi rukamuqaa ooninannai auquaqa. Innee faiqi rukamuqaa ooninannai auquseeqa minasaa tatufirana suqa qimirafa sia amanaikannoo. <sup>26</sup> Innee sia aidara auqusee minni akarara irirasu auquaqa. Innee miqiga umee nifaqa kooroo ifaqa qafeefuqa.

## 21

*Fifau ainainira faiqi kiqa mariasasaa rakisira oosana.*

*(Lo 15:12-18)*

<sup>1</sup> Anutufa Mooseena qimaminoo qinuu. Anee maa sandufana Isaraee maqannaasa qimannimi. <sup>2</sup> Innee Heeburu maqannaasa ainainira faiqi munnimmannai feefaurumasaifanoo mifa inni faqa moodaannai taikasee dinni ani moodaa 6 marasee aukuaana ainaina masainaqa dinni ani qaaraikinaqa 7 doo quqasaifanoo kaqi fuani. Idukinnana akiqara sia feefauriani. <sup>3</sup> Mifa adeedaana maridanoo ani ainainira faiqikinoo mariinafa amaaqa firarinoosaa sia anaasee maree fuannoo. Kafaana anaasee faqaafa inni ainainira faiqi kinoo mariinafa amaaqa finoo amana nari anaqa afiqee fuannoo. <sup>4</sup> Mina feefauru mina rakisiifa anaasee aminanoo mifa faiqi maqaseenoo mariinanoo mina aukuaana taikainanoo anaasee faqa faiqi faqa miqoo quqaseenoo kaqisamu amaaqa fuani. Mi anaaseena faqa mina faiqi faqa rakisiranaindi kai marifaranoo.

<sup>5</sup> Ainainira fasiqa fannoo narí faiqi aanaaseera amuqusinanoo sia amana uqaanauree qimaseenoo <sup>6</sup> qinee qeeqa rakisiranara didimarifaqa qimaseenoo sia qinee taikasee fuanaura kaqi rumberanaki marianauree qimasainanoo mina rakisirafa mina qumareenoo amaana maaqaki munuseenoo quka qumareenoo kooqi mammaaqai aqoo ruqiaani. Ruqiasainanoo mi fasiqafa naaruara ainainira faiqi mariinanoo miqoo kuqunanoo.

<sup>7</sup> Faiqi moo fannoo narí araamuna ainainira maanaaqaijanifeera amisainanoo sia ainainira fasiqauqa iduku nisaandee masee idukusaina fuannoo. <sup>8</sup> Mi manaaqana ainaina faqaafa feefauru meegeenoo narí ainainiranaki quqasee qinaaqara maraanauree qimasee mariinoo akooqaiifanoo sia mareenoo. Miqinannai mi manaaqana mandaikama amaqaaseenoo sia aanaamuru nimisee feefauru maraannoo. Narí akoofa kai kaifaa feefauriannoo. <sup>9</sup> Faiqi moo fannoo narí faiqi amiraree qimaseenoo ainainira maanaaqaa feefauru masenoo narí araamunara foora rakisiani. <sup>10</sup> Faiqi moo fannoo anaasee faqaafa moo maraseenoo indaaruuqana narana faqa qamunna faqa mina ainaina dadaaqirana faqa sia minnisaani, ooqai iundee kai iani. <sup>11</sup> Mi fasiqafa indaaruuqana sia mi ainainausa andeeeqa amaqaenoo mi fasiqafa mi anaaseena aiqainanoo finanoo sia feefauru maraannoo.

*Rakirana andeeqara sandufa.*

<sup>12</sup> Faiqi moo fannoo moo fasiqa kuqarusainaqa narí faqa kai kuqaruqa. <sup>13</sup> Faiqi moo fannoo sia moo fasiqa auqu qimasee arinafa mifa amana qinee inni utaaqama nimaqa qaunna maqusanaki keeqafinoo asumu mariannoo. <sup>14</sup> Yafee moo fannoo moonara aranaqainanoo auqu qimasee arinafa mifa faqa kuquani. Qini aidarai mifa oonu kukeeqafi asumu marianauree qinaqa innee mindaraana rarisamasee kuqa aruaqa. <sup>15</sup> Yafee moo fannoo narí anoona akoonna narinaqa innee mina kuqa aruaqa.

<sup>16</sup> Faiqi moo fannoo moo fasiqa mareeqeenoo narí ainainira faiqi kee iannoo fee moo atinai nimisee feefauru fee marainnana kuqa aruaqa.

<sup>17</sup> Yafee moo fannoo narí anoona akoonna manda ufa qimannimaqainnana mina kuqamna aruaqa.

<sup>18-19</sup> Faiqi misa tinooramamaree fidaqa faiqi moo fannoo moona ooni samu fee saamu samu fee arusainanoo sia kuqirai aurida mariinanoo findifinoo nimarinaqa innee mina akiiqara ari fasiqana sia aupurarana amiaqa. Arinna fasiqafa narí qaarisaa mariinanoo findifinoo madaanaai saunusaa oquree ururee irana amanaikinanoo ari fasiqafa mina feefauru auriranaki mariinna faasaana amana kai feefauru amisee minasaa rakisi marinanoo findi fuani. <sup>20</sup> Faiqi moo fannoo narí feefaurummaqai ainainira fasiqa nee maanaaqaa nee saamu qumaree arusainanoo aaqee kuqinaqa innee mina akiiqara narí faqa moo aupurarana amiaqa. <sup>21</sup> Mi ainainira fasiqa nee manaqa nee sia aaqee kuqirai moodaa eenda fee qaara eenda fee kaqi mariinanoo kuqinaqa innee sia mina uriqararafa mina arinnana akiiqara amiaqa. Narí ainainira faiqiara aupurama amaqaifa narí ariranasaa ititeenoo.

<sup>22</sup> Faiqi rakinnanaki moo fasiqa fannoo amuaqu faqaa anaasee arusainanoo kuqira faiqi maqaaseenoo mina anoofa kaqi marinanoo mi anaaseena afaaqi fannoo nana feefauruaree irainanoo mi fasiqafa feefauriannoo. Siaasauqa eedoo qinna feefauruna kai amiannoo. <sup>23</sup> Mi anaaseefa moo aupurarana marainaqa mina arinna fasiqana faqa mi aupurarana kai amiaqa. Kuqa arinaqa narí faqa kuqa aruaqa. <sup>24</sup> Nifu dimbasainaqa narí afu faqa dimbaaqa. Nifai itairisainaqa narí afai faqa itairiaqa. Nisauku raudasainaqa narí asauku faqa raudaqa. Niku itairisainaqa narí aiku faqa itairiaqa. <sup>25</sup> Idati raquru niminaqa narí faqa idati raquru amiaqa. Kaakadi narinaqa narí faqa kaakadi aruaqa. Saamu narinaqa narí faqa saamu aruaqa.

<sup>26</sup> Faiqi moo fannoo narí ainainira maanaaqaa fee fasiqa fee arumareenoo afu qimbaseenoo mina akiiqara idukusee aiqainanoo amaqa fuani. <sup>27</sup> Kafaa mifa narí ainainira fasiqa fee maanaaqaa fee arumaree afai itairiseenoo mina akiiqara idukusee aiqainanoo amaqa fuani.

*Burimakau fannoo aaqama sainnana andeeqara ufa.*

<sup>28</sup> Burimakau akoonna fannoo faiqi fee anaasee fee kuqa narusainaqa ooni samu mi burimakau akoonna kuqa aruseeqa mina amaqi sia naaqa. Mi burimakau akoonna arusaifanoo mina akoonna aupurarana amirafa sia mariannoo. <sup>29</sup> Mi burimakau akoonnafa ooqai faiqi narí marifa maridanoo kafaa moo fasiqa kuqa arinaqa mina akoofoa sia ququsaki mara quqainanoo kafaa narinaqa mina akiiqara ooni samu mi burimakaua kuqa aruseeqa mina akoonna faqa kuqa aruaqa. <sup>30</sup> Kuqina akiiqara aqira feefauruara ooqai auqu ramaqaana amana kai aquseenoo narí kuqiranasaa ititaannoo. <sup>31</sup> Burimakau akoonna moo fannoo maanaaqaa fee akoonaiqi fee narusainaqa innee ooqai qimaqaa ufa mau kai fuaqa. <sup>32</sup> Burimakau akoonna moo fannoo ainainira kumaaraa

fee maanaaqee narusainaga mi burimakaua akoofa ainainira faiqi uriqararana firaa feefauru amiannoo.

<sup>33-34</sup> Faiqi moo fannoo madika indufuseenoo rafaafu qainanoo moo fannoo oonu mina rafaqamma sainanoo burimakau fee doonki fee minaki aqufiqa kuqifanoo, madika afu rafaqa ifa mi andauna akiqara feefauru maseenoo nariara mi andauna maraannoo. Faiqi moo fannoo madika indufusee sia rafaqa finanoo andauqa minaki aqufiqa kuqifanoo mi fasiqafa andau akoona feefauru amiseenoo nariara mi andauna maraannoo. <sup>35</sup> Moo fasiqa burimakau akoona fannoo moona burimakau akoona arusainaga burimakau akooqanda kaqi mari burimakaua mareeqee moosaa quqasee feefauru marasee miqanda mi munnimmana rainaqaaraasa mandee kuqira burimakau qambaana aukuqaraasa masee moo fannoo dinni maraina moo fannoo dinni maraqa. <sup>36</sup> Mi burimakau akoonafa ooqai nari maru burimakaua marifanoo mina akoofa sia ququsaki quqainanoo moona burimakau kuqa arusainanoo mina akiqara moo kaqi mari burimakaua amiseenoo kuqirana nariara maraannoo.

## 22

### *Aaqarana andeeqara sandufa.*

<sup>1</sup> Faiqi moo fannoo burimakau fee sipsipa fee qummuara mamaree munu moona amisee feefauru maraina fee arusaina fee mi fasiqafa moodaa burimakau akiqara moodaanna qisauku burimakau mina amiannoo. Moodaa sipsipa qummuarinnana akiqara qaara faqa qaara faqa sipsipa amiannoo.

<sup>2-4</sup> Mi fasiqafa nari qummuarirana akiqara feefauriannoo. Moo ainaina sia marinaqa mi fasiqana mareeqee moo maqanna nimisee mina feefauru mareeqee mifa qumuarina akiqara nimiaqa. Mi fasiqafa burimakau fee doonki fee sipsipa fee maraqainafa kaqi riri marinanoo qaraqanda mina akiqara nimiani. Eendakinai qummuarira fasiqa fannoo maqa ruiqasee keeqainaga mina qumarasee kuqa arusainafa sia mina akiqara ufa maraannoo. Faasaana miqi marinaqa kuqa arinna fasiqafa mina akiqara ufa maraannoo.

<sup>5</sup> Faiqi moo fannoo nari burimakau fee sipsipa fee andanda nee marinana sia amiqimmasee rakisinanoo moona afuqaki keeqafi narana nainanoo mina akiqara narana faqaana nari afuqakinaana amiqirana kai unaku maree munu amiannoo.

<sup>6</sup> Faiqi moo fannoo nari afuaki ida arasainanoo qamammareenoo moona afuqa qeenoo narana unaku quqaqainnana qamasainanoo mina akiqara idarai fasiqafa mina amiannoo.

<sup>7</sup> Faiqi moo fannoo munnimma moo fasiqasaa quqasaina marinanoo moo fasiqa fannoo qummuari marinaqa paquri masaifanoo mina akiqara qaara kari feefauru amiannoo. <sup>8</sup> Qummuari fasiqana innee sia paquriqa munnimmasaa rakisii fasiqana afiqamaree innaaru qimaria maqusanaki munusee irai fanoo mifa nari amana aiqamasee kuqa sia qinee maree fee qianoo. <sup>9</sup> Aiqaama ainainara aanoqiranaki burimakaura faqa doonkiuqara faqa sipsipauqa faqa qamunnara faqa akaqa ainainara faqa qinindi kai fee qimasee aanoo qinna fasiqa qanda nifiqamaree innaaru qimariaqoo nifiqee aniaqa. Anutufa yanaree unnaqiifoo qinafa mifa mina akiqara qaara kari feefauru amiannoo.

<sup>10</sup> Faiqi moo fannoo moona doonki fee burimakau fee sipsipa fee moo andau fee rakisi marinanoo moo andau fannoo kuqinoo fee nana afaaqee mandaalkinanoo fee namuqaa fee mara maraafanoo moo fasiqa fannoo sia minauqa qafeenoo. <sup>11</sup> Mi andausa saa rakisirafa innaaru qimariaqoo oonureenoo amana aiqamaseenoo qinee sia uqanna mi andausa ummuari fee qiani. Mi andausa sia ummuarifanoo andau akoofa minara amanamifoo qimasee sia mina akiqara rakiinainnati feefauru maraannoo. <sup>12</sup> Kuqaa mi fasiqafa ummuarino mifa andau akoona mina akiqara feefauru amiannoo. <sup>13</sup> Kaasau faini mi andauna arunennoo fee mina rakisi mari fasiqafa mina asausifee amudaani fee mara mina akoona uqafiqaseenoo sia mina akiqara feefauriannoo.

<sup>14</sup> Faiqi moo fannoo moona andau akaqa ainainirana dadaaqianifeera marasainanoo kuquannoo fee amudaani itairinoo fee mi andauna akoofa uqanna sia marinanoo ufaasu marai fasiqafa feefauriannoo. <sup>15</sup> Mi andauna akoofa uqanna mina afusaa miqifanoo sia mina akiqara feefauru andau akoona amiannoo. Ufaasu feefauru masaafanoo ainainirana dadaqi mari andaufa kuquannoo fee amudaani itairiannoo fee feefauru maqaifa miqiannoo.

### *Akaqa sandufauqa.*

<sup>16</sup> Faiqi moo fannoo maanaqa moo faiqi moo sia utaaqama amaqaarana sararamma amaqaaseenoo mi fasiqafa mararara mina akoona feefauru amiseenoo marasainanoo mina aanaqaikino mariannoo. <sup>17</sup> Mi manaqana akoofa mi fasiqanara akooqainanoo

sia nari araamuna maraannee qinanoo mi fasiqafa fuka maanaaqa feefauri mariana amana kai mina akoona amiannoo.

<sup>18</sup> Aukainaina maraqaana aanaaseesa kuqa naruaqa.

<sup>19</sup> Faiqi moo fannoo aanda amuaaqa akarainnana mina kuqa aruaqa.

<sup>20</sup> Qini Yaaaweesa kai aanda tatufirana suqa qimiaqa. Moo unnaqira anutuna tatufirana suqa aminnana kuqa aruaqa.

<sup>21</sup> Innee ooga Isipa maqasaa aanaamuru marunaki mandainainaki marunnara irisee sia aanaamuru inniki marinausa mandaikamma nimaqaqa.

<sup>22</sup> Innee adeedaana anaasee fee faiqi faiqi fee sia mandaikamma nimaqaqa. <sup>23</sup> Innee miqifaqa misa qini daaraiqa qinee Yaaweesa iriana. <sup>24</sup> Qini qirana qainaqa rakiranaki inni kuqa naruaqa. Narusaanaqa inni ninaaqmaaka adeedaana marifaqa inni faiqi namu faiqi marifanoo.

<sup>25</sup> Inniki qari qini Yaaweesa faiqi anaasee moo fannoo munnimara sarau imarinna ufaasu munnimma aminana sia ufaasu munnimma nimimaria naanna raaqa. Misa nimiseega narindi akiiqara maraseega aabaa faqa maridaqa. Innee innee qandi akiiqara kai maraqa. <sup>26</sup> Innikiqari faiqi moo fannoo ani ainaina ufaasu maraseenoo kafa amianauree qimasee nari suara siuta amiseenoo minannoo nari amianinna ainainara kooroo idanoo kuqa amianauree qidanoo. Miqi qinana anee suani afu sia keeqanoo marinana mina suara siuta kai kaqi nari amia. <sup>27</sup> Mi suara siutafa tootooqirana amianifeera quqaqaina marifanoo nanee moo ainaina akusee faqaannoo. Anee sia aminanoo suara arinanoo qinee unnannai innaaru qinaqa qinee mina ufa iriana. Qinee kaaqa faiqara qimudao qimarunausa maridaqa miqiana. <sup>28</sup> Innee sia qini Anutusa manda ufa qiaqa. Inniqa rakisirusara faqa sia miqi qiaqa.

<sup>29</sup> Innee fuka narana afiana neeqa sakuma faqa uainna faqa oorifa fadameena faqa inneeqa ooga faiqi faqa qini Anutusa naaree qimiaqa. <sup>30</sup> Inneeqa burimakau sipsipa ooga maqarana akoonauqa dinni taikaseenoo dinni oonu qaara marasee 7 faasaana nari anoona faqa mariseenoo dinni oonu qaaramoo 8 faasaanaikinaqa mina arusee tatufirana suqa qimiaqa.

<sup>31</sup> Innee qini faiqi anaasee marianara kaasau faini fannoo aru quqaqainna andauna amaqi sia suqasee naqa. Faini mara nimifaqa naqa.

## 23

*Isarae maqannaasa andeeqara oosana auqaqa.*

<sup>1</sup> Innee aata qaraa unna ufa iriseega sia moona munu qimamia. Innee sia aaqee mari fasiqana unna ufannai mina dadaaqa.

<sup>2</sup> Kootaki oonureega moomoosa unna ufa qifana anee sia misa dadaaqa. Misa ufaki kikiqa mafi andeeqara ufa mara furufarifana sia misa dadaaqa. <sup>3</sup> Kudi fasiqa moo fannoo kootaki kikiqa mafinana sia kudi marinnana roo qimasee dadaaqa. Andeeqara nara kai qiaqa.

<sup>4</sup> Innee inneeqa namuqa burimakau fee doonki fee furufariqa nifaqa innee qafamaseega maree nari akoona munu amiaqa. <sup>5</sup> Mi fasiqana doonki fannoo ummaara mara maree fidanoo aanai saamurinoo marinaqa innee oonu qafee sia fiaqaraaqa dadaaqa uqeeera aisaqa.

<sup>6</sup> Kudi fasiqa fannoo kootaki marinaqa innee sia minara manda fasiqee qimasee andeeqara oosana sia mina amiaqa. <sup>7</sup> Innee sia unna qimasee kootaki aqoonnana kikiqa usua. Sia andeeqarasa numo saisa fifau kuqiranaki mara quqannisa. Qinee Anutusa mi manda ainanna auqainnana kuqa aruanauranoo.

<sup>8</sup> Moo fannoo maqandanai kootaki minasaa roo qiannee munnimma aminana sia uqanna maraa. Miqira munnima fannoo faiqi nifu dimbarausaikamma saifaqa sia andeeqarana qafaidaqa. Andeeqara fasiqa faqa mara furufaramma aisaidanoo.

<sup>9</sup> Innee ooga Isipa maqasaa maridaqa aanaamuru aupurarana qafeeusa mariafanoo minara innee sia quandafi aanaamuru inni faqa marinausa mandaikamma nimaqaqa.

*Qisauku dinni taikasee dinni ani qaara marasee 7 aukuanara faqa sabatara faqa qira sandufa.*

<sup>10</sup> Inneeqa maqa ummaqa nee maria maqanaki minaki dinni qisauku taikasee dinni ani moodaa marasee 6 aukuaana ummaqusaidaqa unakusaidaqa naqa. <sup>11</sup> Miqifaqa fifi inafa qisauku dinni taikasee dinni ani qaara marasee 7 aukuanasaa saifanoo maqa fanoo idooani. Mi maqanasaa moo ainaina kambiqaannana sia unaku naqa. Kudi fasiqauqa mina naqa. Misa naidaqa andaanaqa mafi sainnana kaasau aandaqa naqa. Inneeqa uainna afuqa faqa oorifa saqari faqa miqi kai iaqa.

<sup>12</sup> Innee moodaannai qisauku taikasee dinni ani moodaa marasee 6 faasaana ainainiaqa. Ainainiaqa fiifi inaqa dinni taikasee dinni ani qaara marasee 7 faasaanasaa sia ainainiaqa. Inni ainainira faiqiuqa faqa aanaamuru inni ainaini marinausa faqa inni aandaufa faqa aiqama idooaqa.

<sup>13</sup> Qinee Yaaweese aiqama ufa qimarunnana iriaqa. Innee maa amaana ufausa amiqimasee irimaree fuuqa. Sia unna anutusara innaaru qiaqa. Sia uqanna misa nuqu raaqa.

*Qaaramoo uriqarara faasaana amaana qira faasaana.*

*(Raf 34:18-26; Lo 16:1-17)*

<sup>14</sup> Aiqama aukuanaki qaarammoo kari oomaqa sakasee naidaqa qini Anutusara innaaruqiaqa.

<sup>15</sup> Innee Isipa maqa maaqaindari anu quqoonnana Abiba quqoonasaa qinee qiman-nimifannandee iqa innooqee mari pauraqana sia aqira bereeta naidaqa asasiaqa. Mi oomaqanaki 7 faasaanasaa sia innooqee mari pauraqana aqira bereeta naaqa. Innee qini qimooqiraree qimasee sia kaqi aniaqa. Qini tatufirana suqara ainaina faqa maree aniaqa.

<sup>16</sup> Fukakinaana unakusee oomaqa sakasee asasidaqa namaseeqa inneeqa narana ummaquqaana oosanarasee unaku naaqa. Saqari aqama akuqainafa innee mina tiqisee aqaanai maridaqa moo oomaqa sakasee naida asasiaqa.

<sup>17</sup> Aiqama aukuanami qaaramoo oomaqiranakina aiqama Isaraee maqanna fasiqauqa anireeqa qini Yaaweese inneeqa Anutusa qimooqiaqa.

<sup>18</sup> Innee aandaunoo qini tatufirana suqa qimiraree qimasee sia innooqee mari pauraqana aqira bereeta namu faqa moodaanaki suqaaqa. Tatufira aanda fadameena fannoo sia faiqee kananaana kaqi mariani aaqee kai aiqama idaki aqusaifanoo qama taikafuani.

<sup>19</sup> Aiqama aukuanami innee fukakinaa narana unaku maree qini Yaaweese inneeqa Anutusa amaana maqaki maree aniaqa. Innee sipsipa aanaaqi fee mimmi aanaaqi fee arusee sia narí anoona naamma anoannai suqaaqa.

*Anutufa Isaraee maqannaasa naamuaqira ufa faqa qima afeekaikira ufa faqa nimanau.*

<sup>20</sup> Anutufa kafa qinau. Qinee qeeqa kai qeeqa Qangiuro aqigaananoo mifa qumuree inni indaaru nikidanoo innisaa rakisi marinaqa qinee inni deedaqamma nisaafanna maqa maaqanaki fifaranoo. <sup>21</sup> Innee mi qangiurofa qinnandee iaqa. Sia mina ufa rukiaaqa. Qinee mina aiqaunanoo qumu marinara sia mina ufa rukiaaqa. Mifa sia inni manda oosana akiqara nifauaannoo. <sup>22</sup> Innee mina ufa irisee andeeqasee qinee qunnufa mau kai fifaqa qinee inni namuqaauqa faqa rakuanaura. <sup>23</sup> Qini qangiuro fannoo inni indaaru nikinoo nifiqee Amooru maqa maaqa faqa Heeta maqa maaqa faqa Perisita maqa maaqa faqa Kannaana maqa maaqa faqa Hifitana maqa maaqa faqa Yeebusa maqa maaqaki mariasa faqa naru taikaseenoo inni miqoo quqannisaannoo. <sup>24</sup> Innee miqoo oonu maridaqa sia misa unna qira anutusara niqoori saunu arafi innaaru qiaqa. Sia misa innaaru qimariandee iaqa. Innee misa unna anutusa turi taari maseeqa ooni rakiaaqee minara innaaru qimariana raudaandammeeqee aqusaqa. <sup>25</sup> Innee qini Yaaweese inneeqa Anutusa qimooqifaqa qinee narana faqa nammari faqa inni nimiseeqa inni auriranauqa mara aqunnisaanaura. <sup>26</sup> Innee Yaaweena kai amooqifaqa sia aanaaseeqa eedada faiqi maqee faranoo. Sia moo aafa anaasee mariannoo. Innee sia dauni kuqifara, kisaqaasaa marifaranoo.

<sup>27</sup> Qinee inni nifiqee fidaqa inni namuqaa qiniara rufiarana nimiseeqa inni faqa rakinausa furufarirana nimianaura. Nimiseeqa qianaqa inni namuqaauqa quqasee sandeefara. <sup>28</sup> Qinee ukaqa nimimari doodaanina inni namuqaaki quqasaana ukaqa nimaqa naaqoo nifu furufarinaqa sandee faranoo. Innee fimarifaqa qinee Hifita maqannaasa faqa Kannaana maqannaasa faqa Heeta maqannaasa faqa nifaqasaanafa innee miqoo oonu marifaranoo. <sup>29</sup> Qinee sia moodaa aukuanaki inni namuqaa rapatutuma aquanaura. Qinee miqimma saananoo naakunduka mafinaqa kaasau aandaqa moomoo mi maqa maaqanaki maridaqa inni narifoora. <sup>30</sup> Qinee misara qianaqa misa moodaa kai qaara kai idaqa taikafifaqa innee moomoo kammafi amana mi maqa maaqana maree faranoo.

<sup>31</sup> Qinee inni oosu maaqimasee oosumma nisaanaura. Dinni taatuqee nammari mariannoo. Dinni Firstia ooruku nammari mariannoo, dinni aadana maqa maaqa mariannoo, dinni Eufarateesa nammari mariannoo. Qinee inni afeeka nimianaqa innee mi maqa maaqanaki fimarifaqa qinee inni namuqaa rapatutu iqa fimarinaafa innee misa maqa maaqa mareefaranoo. <sup>32</sup> Innee sia uqanna misa ufara eedoo qimasee moodaanaki kira ufa qiaqa. Misa unna anutusara faqa sia uqanna moodaanaki kiaqa. <sup>33</sup> Mi



maḡannaasa sia inni maḡa maaḡaki mariaḡa. Innee miḡifaḡa misa inni mareeqee qini numookamma ḡimaḡara tinai ḡuḡeefaranoo. Innee misa unna anutusa nimooḡifanoo mifa inni ninuka ufanara foora fuḡinoo mariannoo.

## 24

*Yaaweefa Isaraee maḡannaasa faḡa moodaanaki kinau.*

<sup>1</sup> Anutufa aiḡama ufauḡa Mooseena ḡimamiseenoo kafa maaḡi ḡinau. Moosee anee faḡa Aarona faḡa Nadabana faḡa Abiḡuna faḡa Isaraee maḡanna rakisiraua 70 uriḡararaua faḡa niḡiḡa maree urureeḡa nianasa kummaramafinaḡa ḡiniara innaaru ḡidaḡa ḡimooḡiaḡa. <sup>2</sup> Moosee anee kai adeedi ania. Sia akaḡa rakisiraua ḡini daaḡa aniaḡa. Faiḡi anaasee faḡa sia uḡanna aaḡanai uruaḡa.

<sup>3</sup> Mooseefa ooḡureenoo faiḡi anaasee Yaaweena sandufa aiḡama ḡimannimisoofaḡa misa maaḡi ḡimasee moodaa kari noo raḡamaree ḡiḡau. Yaaweefa ḡindee iḡa maasa aiḡama ainaina auḡanaura. <sup>4</sup> Miḡi ḡimasooḡanoo Mooseefa Yaaweena sanduufa aiḡama akara rinau. Akara rumaseenoo kananaana iaḡoofanoo aaḡana aikunni aandau tutufira ḡainda auḡinau. Auḡuseenoo ooni ḡisaukuḡara taikasee ḡikunni ooḡu ḡaara marasee 12 ooni maraseenoo ḡainda fiḡu fiḡumma Isaraeena faiḡi namu nimana kai rakiḡanau. <sup>5</sup> Rakiḡaseenoo kumaaraaḡa ḡimannimufaḡa burimakau arusee munu Anutuna tatufirana suḡaḡau. Mi tatufira andauna Isaraee maḡannaasa faḡa Anutuna faḡa moodaanaki suḡira tatufiranees ḡiḡau. <sup>6</sup> Misa arusoofanoo Mooseefa burimakau fidika akaḡana difaanikiḡa ḡakaseenoo kaḡi maruna ḡumareenoo aidarai rurufinai. <sup>7</sup> Rurufa maseenoo Akiiseenoo Mooseefa Anutufa moodaanaki kira ufa ḡimaḡoo bukana akara rumaaḡona maree findifinoo aiḡama minakinaa ufa asaana rumasee firaḡoo faiḡi anaasee ḡimanniminai. Misa iriseeḡa ḡiḡau. Maasa Yaaweena mi sandaufana aiḡama irisee aḡaḡanaura.

<sup>8</sup> Mooseefa misa ufa iriseenoo difaanikinana fidika kaḡi maruna indaku faiḡi anaasee kiaḡa aḡidanoo ḡinau. Anutufa maa sanda ufausa nimuḡooḡari maa fidikafa Anutufa inni faḡa moodaanaki kuna afeekaikamma nimaḡaidanoo.

<sup>9</sup> Miḡi ḡimaseenoo Mooseefa Aarona faḡa Nadabana faḡa Abiḡufana faḡa Isaraee maḡanna uriḡararaua 70 faḡa niḡiḡeenoo aaḡanasaa oorufinai. <sup>10</sup> Oorureeḡa miḡoo misa Isaraee maḡanna Anutuna ḡaḡaḡau. Mina aiku ameemaanai innaaruna kudimandara foora ira ooniḡa mina auḡu safiree fee ḡimaru oonisa ausirirafauḡa marinai. <sup>11</sup> Misa Anutuna ḡafoofanoo sia misa narinau. Misa miḡoo moodaanaki suḡufu faḡa narana nammari naḡau.

*Mooseefa Sinai aaḡana saa ooru finau.*

<sup>12</sup> Misa namasooḡanoo Anutufa Mooseena ḡimaminai. Anee aaḡanai ḡinee marunnannai urua. Ururainaḡa ḡinee qeeḡa sandufa anee faiḡi anaasee naakapaanneera ḡaara oonisaa akara ruma amianaura.

<sup>13</sup> Mooseefa mina iriseenoo nari dadaaḡimaruna Yoosuaana faḡa deedaḡamma seeḡa Mooseefa aaḡanai Yaaweefa marunnai ooru finau. <sup>14</sup> Ooru fidanoo Mooseefa Isaraee maḡanna uriḡararaua maaḡi ḡimasee ḡimanniminai. Innee maaḡoo uiaḡana maḡusaki maridaḡa maaḡanda ḡifeesiaḡa. Aaroonafa faḡa Hurafa faḡa inni faḡa maaḡoo marifaranoo. Akaḡausaki ufa rainarafa kambiiḡainaḡa miḡanda andeeḡa nimaḡeefaranoo.

<sup>15</sup> Miḡi ḡimasee ḡimannimiseenoo Mooseefa aaḡanai oorufufanoo ḡasuru fannoo aaḡana rafaḡa finau. <sup>16</sup> Yaaweefa kaaḡa ḡarafa aaḡana aaḡa ḡumuroonara Sinai aaḡana saa ḡasuru ḡuminai. Isaraee maḡannaasa mi kaaḡa ḡaranna ḡafoofanoo aaḡanasaa fira idu qeera foora ḡimarinau. Dinni ani moodaa marasee 6 faasaanna ḡasuru fannoo aaḡana rafaḡa finoo marinai. Dinni ani ḡaara ḡanda marasee 7 faasaanna Yaaweefa ḡasurukiḡari Mooseenara mai uruannee ḡinai. <sup>17</sup> Faiḡi anaasee afaasasaa marusa aaḡana ḡafeeḡa naaḡuḡara kudifaannammiifoo ḡiḡau. Anutuna kaaḡa ḡarafa aaḡana saa firaḡoo idauruara foora imarinau. <sup>18</sup> Mooseefa aaḡanai ooru fidanoo ḡasuruki keeḡakufanoo aaḡanasa ooru ḡaara fasiḡa niku nisauku taikasee 40 eendaki faḡa faasaana faḡa marinai.

## 25

*Faiḡi anaasee Anutuna naaḡuḡara uiaḡana maḡa usakara ainainauḡa amiaḡa.*

*(Raf 35:4-9)*

<sup>1</sup> Mi aaḡannanasaa Yaaweefa Mooseena ḡimaminoo ḡinai. <sup>2</sup> Anee Isaraee maḡannaasa ḡimannimainaḡa misa oosana oosana ainaina ḡini ḡimiani ḡinnana ḡimiaḡa. Faiḡi anaasee ḡini ḡimirara nidinaḡa minisainna ainaina anee mara ḡuḡaa. <sup>3-5</sup> Maa ainainausa

maree anifaranoo. Kooraa faqa siruaa faqa booroosa faqa amiqira qamunna faqa dirindaasi akira sipsipa asaasi faqa pannoonaa akira sipsipa asaasi faqa faeena akira sipsipa asaasi faqa mimmi asausinnai auqira qamunna faqa sipsipa akoona apatasaa faeena akirana faqa ooruku nammariki mari firaa noodaana apata faqa akasia saqari amiqira saqari faqa maree minisaifana mara quqaa. <sup>6</sup> Qooma qumbi maria fadameenna faqa aanaiqikirausa aki maria oosana oosana fadameenna faqa moo pauraqa ida arasaafanoo muninoo amiqira afundi mari pauraqana faqa mini amiaqa. <sup>7</sup> Firaa feefauru aqi maria oonisa faqa aka amiqira ooniuga faqa aanaiqikirausa eefooda qamunnasaa faqa nimuqusasaa rumbee marianasaa faqa atoqaaqa.

<sup>8</sup> Isaraee maqannaasa qimanniminaga qini naaquqara uigaana maqa usakasaifaqa qinee misa qambaana marianura. <sup>9</sup> Innee uigaana maqa faqa minakinaa aiqama ainaina faqa qinee naakapaunandee miqi kai masee auquaqa.

*Innee moodaanaki kira bukisa auquaqa.*

*(Raf 37:1-9)*

<sup>10</sup> Innee akasia saqari marasee minannai moodaanaki kira bukisa auquaqa. Mina kisaaga 110 centimetres amana auquaqa. Mina qusandanai faqa mina kuradarafa faqa amana amana kai 66 centimetres amana auquaqa. <sup>11</sup> Innee amiqira kooraa marasee turimmasai ausi rumafinaqa minannai kai bukisa adisaa faqa aunduray faqa ititaaga. Mi bookisana afaimau koorannai amatookika masee rafaafuuga. <sup>12</sup> Innee koorannai qaindusi fandinnana amaaqa qaara faqa qaara faqa 4 auqusee aiqama aikusaa quqaaqa. Dinni aikusaa qaara qanda dinni aikusaa qaara qanda quqaaqa. <sup>13</sup> Akasia saqari qaindusi fandinna qanda kooraa turimandee ausiruma qumaree minannai kukuqaaqa. <sup>14</sup> Kukuqa maseega dinni dinni amaaqa auquqainnanaki ausuuga. <sup>15</sup> Miqimmaseega sia radukuuga, saifano niqinoo mariani. <sup>16</sup> Miqimma saifaqa kasooaqee qaara oonisaa qeeqa sanda ufa akara ruma nimianaqa minaki quqaaqa.

<sup>17</sup> Bukisa afu faqa koorannai kai auquaqa. Mina kisaaga 110 centimetres amana mariani. Mina qusa 66 centimetres amana mariani. <sup>18</sup> Innee kooraa turimaseega bukisa afu auquseega minannai kai dinni qangiroo qaara qanda nimana auquaqa. <sup>19</sup> Afu dinni atinni moo qangiroo amana auqusee dinni moo qangiroo amana auquaqa. Afu faqa mi qangiroo qanda nimana faqa moodaa koorannai kai auquaqa. <sup>20</sup> Mi qangiroo qanda bukisa afusaa quqasaifaqa noori nari qafee nari qafee iaqa. Miqanda niqoosa uqeerasaifanoo bookisa afusaa ititanoo mariani. <sup>21</sup> Qaara oonisaa sanda ufa marina mi bukisanaki quqasee afu rafaafuuga. <sup>22</sup> Qinee inni faqa miqoo moodaanakika mafiqaa bukisa afusaa qaara qangiroo qambaana maridaqa qeeqa sanda ufa inni Isaraee maqannaasa nimianura.

*Innee aiku faqaa teeboora auqusee Yaaweena aminna feemuna miqoo quqaaqa.*

*(Raf 37:10-16)*

<sup>23</sup> Innee akasia saqarinnoo teeboora auquaqa. Mina kisaaga 88 centimetres mariani. Mina qusandanai 44 centimetres mina kuradarafa 66 centimetres mariani. <sup>24</sup> Innee amiqira kooraa marasee turimmasaifanoo ausiruma finaqa minannai teeboora rafaaga fusee kafa moonnai teeboora atiqara fiqumma rafaaga fuaqa. <sup>25</sup> Innee teeboora atiqara fiqumma 8 centimetres amana ititasee mina afaimau koorannai rafaaga fuaqa. <sup>26</sup> Innee koorannai qaindusifandinnana amaaqa 4 auqusee teeboora aiqama aiku namusaa quqaaqa. <sup>27</sup> Teeboora afai ameemaanandanai qaindusirana amaaqa auquaqa. <sup>28</sup> Qaindusifandinna saqari qanda akasia saqari atekasee koorannai mina kuku iaqa. <sup>29</sup> Ami qira koorannai kai teeboorasaa quqeefandinna pira kaafausa faqa kisaaga kaafauqa faqa uainna adiaara pira ugnaurirana faqa auquaqa. <sup>30</sup> Qini qimifandinna bereetana mi teeboorasaa quqaqai fanoo aiqama kari qini moodaanaki kira bukisa aaga mariani.

*Innee qooma qumbifandinna aikana auquaqa.*

*(Raf 37:17-24)*

<sup>31</sup> Innee qooma qumbifandinna aikana amiqira koorannai auqa. Innee kooraa turiiseega minannai kai qooma aika oosana faqa adaka faqa asaanauga faqa auquaqa. Mi asaanausa saa mi koorannai kai taatuqee aqama afufeenaari marindee maseega auqusaifanoo kaafara foora afisu amaanoo mariani. <sup>32</sup> Mi qooma aikausa qisauku dinni taikasee dinni ani moodaa marasee 6 mariani. Dinni qaaramoo dinni qaaramoo mariani. <sup>33</sup> Ai qama mi asaana namuna atimau koorannai taatuqee aqama afufeenaari marindee masee afaaga auquaqa. Mi afufeenaarirafa teeqnoorina aqamara foora marufaa mi asaana namuna saa auquaqa. <sup>34</sup> Mina adakasaa qaara faqa qaara faqa 4 saa taatuqee aqama teeqnoorina aqamara foora auquaqa. <sup>35</sup> Moodaa aqama indaaruaa asaana qara

ameemaanai mariani. Kafaa mina murufi asaana qara ameemaanai moo aqama mariani. Kafaa mina murufi asaana qara ameemaanai moo mariani. <sup>36</sup> Amiqira kooora turiseeqa minannai kai oosana faqa asaanaufa faqa afufeenaarirana faqa auquaqa.

<sup>37</sup> Miqimmaseenana dinni taikasee dinni ani qaara qanda marasee 7 qooma auqusee mi asaanausa ati mau quqaa. Quqaseenana mara quandasainanoo mi qoomausa kaaqa qarafa sia kaqqinni fuani. Maaqa aundurai kai kaaqa qaani. <sup>38</sup> Mina ufaqa faqa futufita faqa amiqira koorannai kai auquaqa. <sup>39</sup> Qooma quqara aika amiqira koorannai 35 kilogram ummaara amana kai marasee auquaqa. <sup>40</sup> Moossee qinee aaqanasaa ani qimamunandee aiqama ainaina miqikaimmasee andeeqasee auqa.

## 26

### *Innee Anutuna uiquana maqa usakaaqa.*

*(Raf 36:8-38)*

<sup>1</sup> Innee qini naaquqara uiquana maqasaa akifandinna qamunna kisaqa maaqimasee auquaqa. Sipsipa asausi dirindaasi akirana faqa pannoona akirana faqa faena akirana faqa sufusee amiqira qamunna auqusee aqoosa faqaa aandau amana auqusee minasaa atooqasee akuniaqa. Miqimmasee minauqannai innee qisauquqara taikasee 10 fira qamunna auqusee moodaanaki akuniaqa. <sup>2</sup> Mi aiqama qamunnausa amana amana kai 12 metre kisaqa mina qusa 2 metre mariani. <sup>3</sup> Mi qamunnausa moodaannai qisauku 5 marasee moodaanaki ootupamasee akuniaqa. Dinni qisauku taikasee 5 faqa miqi kai iaqa. <sup>4</sup> Miqimmaseeqa mi qamunna qanda atiqara dirindaasi arira qamunnannai anaanu auqusee moodaanaki ootupaaqa. <sup>5</sup> Fira qamunna atimau anaanu 50 auquaqa. Moo qamunna faqa miqi kai iqa moo qamunna saaqaraa aanaanu amummaqa kai auquaqa. <sup>6</sup> Kooora qumaree turimandee qusa tafara foora saaeemna qumaree dinni dinni anaanuki upeekasaifanoo mi qamunna qanda moodaara maqi inoo mariani.

<sup>7</sup> Uiquana maqa saa akira qamunna firaana mimmi asausinnai 11 auquaqa. <sup>8</sup> Innee aiqama moodaa karirana kai auquaqa. Mina kisaqa 13 metres amana mariani. Mina qusa fannoo 2 metres amana mariani. <sup>9</sup> Mi qamunnausa moodaannai qisauku taikasee 5 qamunna akunusainanoo moodaa qamunnaika mafuani. Kafaa moodaannai qisauku taikasee dinni ani moodaa marasee 6 narisaa narisaa akuniisaifanoo firaafaikiani. Miqimma finaqa uiquana maqa kooqindaraana murufi tukaanda quqaaqa. <sup>10</sup> Qamunna atimau anaanu 50 akuniaqa. Moo atimau faqa mina amummaqa kai akuniaqa. <sup>11</sup> Booroosannai tafara foora ati saaeemmasee 50 auqusee minannoo dinni dinni anaanuki aususee ootupama saifanoo moodaa qamunnara foora mariani. <sup>12</sup> Mi fira qamunnana uiquana maqa akuamaqa saifanoo mina ati fiqaramasee akunirafa uruanatinai naambeeqai qumiqaranoo mariani. <sup>13</sup> Aabaa akunira qamunna fannoo uiquana maqa ati fiqaree aiqaree inoo mariani. Dinni dinni amana amana kai 50 centimetre kai mariani. <sup>14</sup> Mina taikasee mina amuaaqa qaara qanda faqa auquaqa. Moo sipsipa akoonaa apata faena akiranannai auquaqa. Auquseeqa moo ooruku nammarikinaa aandau kuara fooqaa irana apatannai auquseeqa minannoo meeraqoo amuaaqa akuaqa.

<sup>15</sup> Innee akasia saqarinnai kai naaquqara uiquana maqa atuna auqusee kuradaaqa. <sup>16</sup> Maaqi mandee maaqa atuna auquaqa. Saqari dinni dinni kuradarafa 4 metres mariani. Mina ausana qusa 66 centimetres amana kai auni ruuqa. <sup>17</sup> Aiqaama atuna maqaki rakiqaranara irisee ati oooqara masee ateekaaqa. Aiqaama maaqa atuna miqi kai masee ateekaaqa. <sup>18</sup> Innee suani afu ataaqeenni south kisaaqandanai maaqa atuna 20 narisaa narisaa apamandee kuradaaqa. <sup>19</sup> Maaqa atuna oosana sia maqaki kaqi rakiaaqa. Siruaannai amaaqa auqusee minaki maaqa atuna kuradaaqa. Siruaannai 40 maaqa atuna oosana amaaqa auqusee minaki kuradaaqa. <sup>20</sup> Uiquana maqa suani dinni ataaqeenni north kisaaqandanai maaqa atuna 20 narisaa narisaa apamandee kuradaaqa. <sup>21</sup> Maaqa atuna sia maqaki kaqi rakiaaqa. Siruaannai 40 amaaqa auqusee minaki maaqa atuna kuradaaqa. <sup>22</sup> Suani keeqee mari qaannai (west) uiquana maaqa uruanatinai maaqa atuna dinni qisauku taikasee dinni ani moodaa marasee 6 narisaa narisaa apamandee auquaqa. <sup>23</sup> Maaqa dinni dinni munu raqaranaki kafaa qaaraqanda auqusee kuradaaqa. <sup>24</sup> Raudaranaki maaqa atuna oosanaki apammasee kuradama saifanoo amiqimasee narisaa narisaa apinoo mariani. Maaqa atuna rakiqarana oosanaki rumba atukarasee miqi kai mamaree mirinni murufisaqa. Dinni dinni munu raqaranaki miqi kaimmiaqa. <sup>25</sup> Miqimmaseeqa maaqa atuna 8 oosanaki siruaannai qaaraqanda qaaraqanda amaaqa auqusaifanoo 16 mariani. <sup>26-27</sup> Innee qauniri fandinnana akasia saqari 15 maraaqa. Uiquana maqa ataaqee dinni dinni faqa uruanai faqa faifa faifannoo auni rumasaifanoo maaqa atukarama qumaraani. <sup>28</sup> Mi maaqa atunna qambaana aunirira saqari fannoo

maaga amana kai dinni dinni ati mariani. <sup>29</sup> Maaqa atuna aiqama koorannai kai rafaafa fuaqa. Maaqa atuna mau aiqama koorannai kai anaanu mamaree fuaqa. Aunirifandinna saqarisa faqa koorannoo rafaafaqafusee mi anaanusaki ausuaqa. <sup>30</sup> Doo Moossee qini uigaana maqa aaganasaa qinee qimamiafanandee masee usakaa. <sup>31</sup> Innee sipsipa asausi dirindaasi akirana faqa pannoona akirana faqa faena akirana faqa sufusee minannai amiqira qamunna auquuqa. Miqimmasee mi qamunnana faqa qamunnaa qaqoosa faqaana amana auquuqa. <sup>32</sup> Akasia saqari qaara faqa qaara faqa 4 marasee koorannai aiqama rafaafa fusee mina atisaa mirinni qamunna dirifandinna amaaqa auquuqa. Miqimmasee mina kuradee fandinnana amaaqa 4 oosanaki siruaannai auqusee minaki kuradaaqa. Kaaqa naaquqara oosirana ititaanifeera kuradaaqa. <sup>33</sup> Miqimmaseeqa mi qamunnana amaaqa auquqaanasaa dirisaifanoo amaaqa auqirana ameemaanaai qamunna ati ooreeqanoo mariani. Miqimmasaifanoo mi qamunnana ititarafa ataufaka ameemaanaai ooreeqanoo mariani. Mi qamunnafa ititaranaki moodaanaki kira bukisaki qaara oonisaa sandufa marina quqaaqa. Mi qamunnafa naaquqara oosirana faqa kaaqa naaquqara oosirana faqa rainaannoo. <sup>34</sup> Moodaanaki kira bukisa kaaqa naaquqara oosiranaki quqasee koorannai mina afu auqusee rafaafa fuaqa, nifauara afu minasaa rafaafa fuaqa. Dirira qamunna fannoo raina nimaqaidanoo kooqi kinaa oosiranara naaquqara maqa fee qimasee kukeeqara oosiranara uriqaramasee naaquqara maqa fee qiaqa. <sup>35</sup> Teeboora mareeqee naaquqara oosirana maaqoo oonumafi kooqiki suani afu dinni ataaqee qaannai (north) mafi quqaaqa. Qooma saqari suani afu dinni ataaqee qaannai (south) mafi quqaaqa. <sup>36</sup> Uigaana maqa kooqiki ititee fandinna qamunnana sipsipa asausi dirindaasi akirana faqa pannoona akirana faqa faena akiranannai faqa marasee auquuqa. Oosana oosana sandannai mooka maakira ainainauqa mi qamunnanasaa auquuqa. <sup>37</sup> Mi qamunnana dirifandinna moodaannai qisauku 5 akasia saqari marasee koorannai mina atimau rafaafaqafusee qamunna dirifandinna anaanu auqusee quqaaqa. Miqimmasee booroosannai moodaannai qisauku 5 atuna oosana amaaqa auqusee minaki kuradaaqa.

## 27

*Innee aandau tatufi fandinna qaindana auquuqa.*  
(Raf 38:1-7)

<sup>1</sup> Innee akasia saqari marasee minannoo tatufirana suqara qainda auquuqa. Mina kisaagandanai faqa qusandanai faqa amana amana kai mariani 2.2 metres. Maqasaagari urirafa qaara faqa qaara faqa aiku 4 amana 1.3 metres mariani. <sup>2</sup> Mina qaara faqa qaara faqa atisaa aanaira foora auqinoo mariani. Tatufira qainda moodaa saqari fannoo kai atimau faqa qambaanaai faqa aanai faqa moodaa saqarinnai kai auqusaifanoo mariani. Mi aiqama ainainausa booroosannai rafaafa fuaqa. <sup>3</sup> Mi tatufirana suqemaria qaindanasaa suqee maria ainainausa booroosannai kai auquuqa. Fadameena dandaki aqufinnana afaqee maria futufitausa faqa savoorauga faqa ugnaurira piritauga faqa tafa fooqaa irana ati saae irana faqa ida auni afaqee maria futufitausa faqa aiqama booroosannai kai auquuqa. <sup>4</sup> Innee fukaa asaana booroosannai auqusee booroosannai kai anaanu faqa auqusee qaara faqa qaara faqa atinni quqaaqa. <sup>5</sup> Mi fukaa asanafa tatufira bukisa aundurasi kasaqai ooreeqanoo qambaanaai mariani. <sup>6</sup> Akasia saqari tatufira qainda qaindusi fandinnana qaaraqanda maraseeqa booroosannai miqanda rafaafaqafuaqa. <sup>7</sup> Mi qaindana maree fuagee qifaqa kai mi saqari qanda dinni dinni anaanuki aususaifaqa maree fuaqa. <sup>8</sup> Tatufira qainda indooira saqarinnai kai aundura faqaana auquuqa. Qinee aaganasaa ani uqafiqa fanandee masee auquuqa.

*Innee Yaaweena uigaana maqa fiq fiqu dapu rakiaaqa.*  
(Raf 38:9-20)

<sup>9</sup> Innee amiqira sanda sufusee auquqaa qamunnanannoo uigaana maqasaa ququsara foora auqu ititaqa. Suani afu dinni ataaqeeni South mina kisaqa 44 metres mariani. <sup>10</sup> Mi qamunnana dirifandinna booroosannai dapu 20 auqusee mina kuradee fandinnana amaaqa miqi kai masee 20 auqusee siruaannai tafara foora mina amana kai auqusee auniri fandinna saqarina faqa minannai kai auquuqa. <sup>11</sup> Suani afu dinni ataaqeeni iandee kai iqa dinni ataaqeeni faqa miqi kai iqa.

<sup>12</sup> Suani keeqee mari qaannai dapu qusandanai 22 metres mariani. Mina dapu saqari 10 faqa mina amaaqa auqirafa faqa 10 kai mariani. <sup>13</sup> Kafaa suani oosana qaannai kooqi maru tinai faqa uruanai inoo marina amana kai 22 metres mariani. <sup>14-15</sup> Suani oosana qaannai East kooqi mariani. Mi kooqina dinni dinni diri fandinna qamunnafa 6.6 metres mariani. Mi kooqina dinni dinni qaarammoo dapu faqa mina amaaqa faqa dinni dinni qaarammoo kai mariani.

<sup>16</sup> Kooqiki dirira qamunna 9 metres kisaaga amiqira sipasipa asausi dirindaasianda faqa pannoonanda faqa faenanda faqa marasee mi qamunnasaa oosana oosana amiqira akara ruaqa. Mi qamunnana quqee fandinna saqarina qaara faqa qaara faqa 4 mariani. Mina rakiqee fandinnana qaara faqa qaara faqa ki mina amaaqa auquuqa. <sup>17</sup> Aiqama dapu fiq fiq qirafa siruaannai rafaaga fuqaa saqarinasaa ootupanoo mariani. Minasaa qamunna diri fandinnana tafara maqi iranauqa siruaannai auquuqa. Mi saqarisa rakiqee fandinnana amaaquqa booroosannai auquuqa. <sup>18</sup> Ququsa afuqai kisaaga kamu 44 metres mariani. Mina qusa kamu 22 metres mariani. Ququsasaa dirira qamunna mina oorufirafa 2.2 metres maqasaaqari oorufuannoo. Mi qamunnana amiqira qamunna kaqikaa sandannai sufirafa afeeka mariani. Mina dapu oosanaki booroosannai amaaqa auqirafa maqaki mariani. <sup>19</sup> Uiqana maqaki oosana oosana ainainira ainainauqa aiqama booroosannai auqirafauqa kai mariani. Uiqana maqa ati mau apupuka arifandinna aikausa booroosannai kai auquuqa. Uiqana maqa dapu rakiqarana qumaraanifee qimasee apupuka aqoosai faqa afuqai faqa arifandinafa aiqama booroosannai auqira apupuka kai mariani.

*Qoomauqasaa rakisira saika.*

*(Wok Pris 24:1-4)*

<sup>20</sup> Moosee anee Isaraee maqannaasa qimanniminaqa oorifa saqari qaqamakinaa fadameena amiqirana kai minisaifana aiqama eendirana minannoo qooma qumbia. <sup>21</sup> Aaroonafa nari faiqi namu faqa qini Anutusa naaquqara uiqana maqaki moodaanaki kira bukisa ititee maria qamunna naaquqara oosiranaki qoomauqa quqaaqa. Miqoo qini qifusaa eendi marinaqa qumbisaifanoo qamammareenoo iaqarana kai raquru amiani. Maa naamuqira ufana Isaraee maqannaasa faqa misasaa ani arua kinausa faqa naaru naaru afaqaaga.

## 28

*Innee aanaiqi kirausa qamunna auquuqa.*

*(Raf 39:1-7)*

<sup>1</sup> Yaaweefa kaifaa Mooseena qimaminoo qinau. Anee aneenna afasaana faqa mina faiqi namu Nadabana faqa Abiuna faqa Eeriasana faqa naara masee Itammarana faqa Isaraee maqannaasa kinaana raina naaduma quqasainaga qini aanaiqi kira saika maraaga. <sup>2</sup> Aneenna afasaana Aaroonaa misakina uriqarara aanaiqikira qamunna auqu amia. Miqimmasainanoo mi qamunnafa amiqirana faqa uriqarausee qirana faqa amiani. <sup>3</sup> Moosee anee Aaroonaa qamunna akunifandinna fasiqausa irirana qiqararusa qinee irirana nimiqaunasa misa kai suqusee qimanniminaqa mina qamunna akuni-aqa. Akunusaifanoo mina afisusee miqooqari qini aanaiqikira saika maraani. <sup>4</sup> Anee qimanniminaqa nimuqusasaa rufi maria ainainna faqa eefooda qamunna faqa kisaaga qamunna aikusaa faqa ititeemari qamunnana faqa akara faqaa siuta faqa akiqqa rafaaga fimari qamunna faqa aranandauqanna rumberana faqa minamuna auquuqa. Misa miqimmaseeqa uriqarara aanaiqikira qamuna ani afasaana faqa mina faiqi namu faqa auqu nimisaifaga misa qini aanaiqi kira saika maraaga. <sup>5</sup> Akunirana akoofasauqaindi sipsipa asausi dirindaasi akirana faqa pannoonaa akirana faqa faeena akirana faqa kooraa tiritanda faqa amiqira tiritanda faqa mi ainainausannai aanaiqikirausa qamunna auquuqa. <sup>6</sup> Misa sipsipa asausi dirindaasi akirana faqa pannoonaa akirana faqa faeena akirana faqa kooraa tiritanda faqa amiqira tiritanda faqa aiqama mi ainainausannai eefooda qamunna auquseeqa minasaa oosana oosana akara ruaqa.

<sup>7</sup> Eefooda qamunna anaanu qaraqanda aururusaa aakandianinnana auqusee eefooda qamunnasaa dinni dinni rumbaaqa. <sup>8</sup> Mina ooiqanda ianinnana amiqira qamunnannai eefooda qamunna auquandee kai masee auquuqa. Mifa eefooda qamunnasaa akunirafa mariani. <sup>9</sup> Eefooda anaanusaa akumaaqa ooni qaraqanda pupuooni marasee dinni anaanusaa moo dinni anaanusaa moo quqasee Yakooboona faiqi namu qisauku qara taikasee qikunni ooqu qaara marasee nuqu mi ooni qandasaa akara ruaqa. <sup>10</sup> Dinni pupu oonisaa dinni taikasee dinni ani moodaa marasee 6 nuqu akara ruani, dinni pupu oonisaa miqikai mandee 6 akara ruani. Aiqaama nari kambiqoonaa amana kai nuqu akara ruaqa. <sup>11</sup> Oonisaa akara rirana akoofasa marina afiqasaifanoo mifa qaara oonisaa Yakooboona faiqi namu nuqu akara ruani. Akara rumaseenoo mi ooni qanda kooraa qambaana quqasainanoo atukaranoo mariani. <sup>12</sup> Miqimmasee aururusaa eefooda qamunna aakandammasainanoo Yakooboona faiqi namu qisauku qaara taikasee qikunni ooqu qaara marasee 12 Isaraee maqannaasa kikiqusinoo mariani. Miqimasaifanoo Aaroonafa misa nuqu nari aururusaa maranoo nimirinaqa qinee Yaaweese qeeqa faiqi aanaaseera aiqama kari irianaura. <sup>13-14</sup> Aururusaa qaara ooni atukaramma qumaree

mari kooranasaa qaara qanda amiqira kooraa sainanda sufirana moo ati moo oonisaa moo ati moo oonisaa ootupaaqa.

*Innee aanaaiqi kirausa uriqararana amuqusa saaqaraa qamunna auquaqa.  
(Raf 39:8-21)*

<sup>15</sup> Innee nimuqusa saa rufi mariana aanaaiqikirausa auqu nimisaifaqa minannoo misa Anutuna iriranara aidiranara irifaranoo. Eefooda qamunna auqu ainainausannoo kai auquseeqa moodaa karira akara kai ruaqa. <sup>16</sup> Qambaana tukaandasaifanoo aiqama ati amana amana kai 22 centimetres mariani. <sup>17</sup> Innee ooni amiqirana firaa feefauru aqi mariana kai marasee qaara faqa qaara faqaki mi qamunnasaa padiaqa. Indaaruaqa padiranaki moo ooni auqu rubi faqa moo ooni toopasa faqa moo ooni ganeeta faqa minamuna padiaqa. <sup>18</sup> Mina aanaaqiannaa padiranaki moo ooni auqu eemeerara faqa moo ooni safairee faqa moo ooni daimanna faqa minamunannai padiaqa. <sup>19</sup> Mina aanaaqiannaa padiranaki moo ooni auqu teerakoosa faqa moo ooni agatee faqa moo ooni auqu ameeetisa faqa minamunannai padiaqa. <sup>20</sup> Mina aanaaqiannaa padiranaki moo ooni auqu beerira faqa moo ooni kanirianna faqa moo ooni yasapaa faqa minamunannai padiaqa. Mi oonisa koorandannai amuqusa saa ititanoo mari qamunnasaa isooqa araqa. <sup>21</sup> Mi oonisa moodaa moodaa ooni fannoo Yakooboona faiqi namu qisauku qara taikasee qikunni oogu qaara marasee 12 Isaraee maqannaasa kikiqa usinoo mariani.

<sup>22</sup> Innee nimuqusaa rufirana anaanu amiqira koorannai auqira sanda seerandara foora auquseeqa afundasee dinni dinni atisaa qusuaqa. <sup>23</sup> Koorannai anaanu qaaraqanda auqusee amuqusa saa rufinna qamunnana mirinni atisaqara qusuaqa. <sup>24</sup> Qaara qanda seennanda koorannoo afundaranannai mi anaanu qandaki qusuaqa. <sup>25</sup> Mi sandana ati qarannai auruusaa koorandannai ooni isooqa aruqaanaki ootupaaqa. Miqimmasaifanoo auruusaa eefooda qamunnasaa rumbaaqa. <sup>26</sup> Kafaa nimuqusa saa rufi mariana anaanu qaara qanda koorannai auqusee aunduraindari ati saa mi anaanuna rumbasaifanoo eefooda qamunna mammaaqai mariani. <sup>27</sup> Kafaa qaaraqanda anaanu koorannai auqusee afunni qumu mari eefooda qamunnana saa aqasanaai amiqira qamunannai sufirana ool qandianinnana aqa rumbaaqa. <sup>28</sup> Nimuqusa saa diri maria qamunnana saa anaanuki dirindaasiandannai sufira sanda qusuaki eefooda qamunna saaqaraa anaanuki qususee rumbaaqa. Miqimmasaifanoo amuqusa saa ititara qamunna sia kasi kasiani. <sup>29</sup> Aaroonafa naaquqara maaqaki keeqafinoo mi qamunnana Isaraee maqannaasa nuqu akara rirana afisusainaa qinee Yaaweessa aiqama kari qeeqa faiqi aanaaseera irianauranoo. <sup>30</sup> Amuqusaa ititara qamunna raqandaamasee uqara foora akunusai mariani. Mi uqanaki ooni qaaraqanda miqanda nuqu Urimma faqa Tumimma faqa Aaroonafa mi uqanaki uqarumasee qini uqaana maaqaki aniani. Miqiraree qimaseenoo aiqama kari nimuqusa saa diri maria qamunnana rufu maree anireenoo mifa qini irirana iriseenoo Isaraee maqannaasa qimannimiannoo.

*Akaqa aanaaiqikirausa qamunna auquaqa.  
(Raf 39:22-31)*

<sup>31</sup> Innee eefooda qamunna meeaaqoo qaraana auqirara dirindaasi akira sipsipa asaasinai kai auquaqa. <sup>32</sup> Anuka aamaqa auquaqa. Qamunna raqandaammasee akunusaifanoo anuka upeekaina sia anaqiani. <sup>33-34</sup> Mina atimau raqandaammasee akunuseeqa saqari aqama faqa kaqikaa biru koorannai auqirana faqa mina atimau qusuaqa. Dirindaasi akira sipsipa asaasinai faqa pannoona akiranannai faqa faeena akiranannai faqa mi saqri aqamana amana auquaqa. Auquseeqa mi saqari aqamana faqa koorannai auqira biru faqa qamunna atimau moo mafi quqee moo mafi quqee iaqa. <sup>35</sup> Aaroonafa aanaaiqikira saika auqararee qimasee mi qamunnana afisusani. Mifa naaquqara maaqaki qinee umee marunnana qifusaa aninanoo fee quqasee finanoo fee mi birusa narisaa narisaa ariqa ufa qifanoo Aaroonafa sia kuquannoo.

<sup>36</sup> Innee amiqira kooraa marasee aqiniandirana auqusee mina saa akara rumaasee Yaaweena ainainira faiqi fee qiaqa. <sup>37</sup> Akiqaa aanaamu qusirana aqini saa quqasee dirindaasiandannoo rumbaaqa. <sup>38</sup> Aaroonafa mina aqinaaqa rumbasainaa qinee Yaaweessa aiqama Isaraee maqannaasa aaduma qini qimiraree qinna ainainausara eedoo qimasee maraanaura. Misa akaqa aqarana auqamasee qimifaqa qinee Aaroonaa mi aqiniandirana irisee sia minni saanaura. Kaqi maraanaura.

<sup>39</sup> Innee amiqira sanda sufuseeqa Aaroonaa siuta auqusee mina akiqaa aanaamu faqa auqusee minannoo kai aranandaqaa rumbarana faqa auquseeqa minasaa oosana oosana akarannoo afaaqa auquaqa. <sup>40</sup> Aaroonaa faiqi namu siutaqaa faqa niranandaqanna rumbee mariana faqa nikiqaa aanaamu faqa kaaqa amiqiranauqa auqu nimaqaa. <sup>41</sup> Moossee anee maa qamunnausa mara maree aneenna afaasana Aaroonaa nari faiqi namu faqa afisu nimaqaa. Oorifa fadameena misa nikiqaa amoondunna adia nimaqasee

naaduma mara quqasee mi saikana nimia. Miqimmasainaqa misa qini aanaiqikira saika maraaqa. <sup>42</sup> Innee qusa karaisa nooiqakiqari nifundana saa ooqeeqarana auqu nimiaqa. Miqimmasaifaqa misa sia nari nifaaqa kooroo iaqeer. <sup>43</sup> Aaroonafa nari faiqi namu faqa qinee umee marunnaaki qini uigaana maqaki keeqafinoo qini qaindasaa naaquqara qoo aanaiqikira ainaina auqararee qimasee aiqama kari mi karaisana afisuaqa. Miqiqqa sia nari nifaaqa kooroo iqa sia kuqifaranoo. Maa ufafa Aarona faqa mina saa ani aruakinausa saa faqa naaruara mariannoo.

## 29

*Aanaiqi kirausa fukasaa mara quqasee naamuaqira ufa.*  
(*Wok Pris 8:1-36*)

<sup>1</sup> Maaqimasee Aarona faqa mina faiqi namu faqa naaduma mara quqasaifaqa qini saikaki aanaiqikirausa mariaqa. Innee burimakau akoona timmusa faqa sipsipa akoona qaraqanda dinee teeroo siaina kai maree aniaqa. <sup>2</sup> Amiqira parauaqa qaindirirana innooqee mari pauraqana sia aqirana oorifa fadameennannai suqaaqa. Akaqana sia oorifa fadameennannai suqaaqa. Akaqana ausirira feemu aqusee oorifa fadameena akusee suqaaqa. <sup>3</sup> Mi ainainausa nafisaa amanee uqa fooqaa iranaki rumaseeqa innee burimakau akoonannoo faqa sipsipa akoona qaara qandannoo qini tatufirana suqa qimiraree qimasee mi ainainausa namufaqa qimiaqa. <sup>4</sup> Moosee anee Aarona nari faiqi namu faqa nifiqamaree qinee umee marunna uigaana maqa kooqiki minisee qimanniminaqa amiqimmasee nammari auqaaqa. <sup>5</sup> Miqimmasaifana anee uriqarara aanaiqikira qamunna Aarona afisumaqaa. Siuta faqa kisaqa qamunna aiku ataa dukunirana faqa eefooda qamunna meeqaoo afisirana faqa mina amuaaqa eefooda faqa nimuqusa saa rufi maria qamunnana faqa nooiqandi mariana faqa aiqama mi ainainausannoo afisu amaqaqa. <sup>6</sup> Nikiqqa aanaamu afisu amaqaasee naaquqara kooroo ira fee qimasee rumbaa. Maaqi qimasee minasaa akara ruaqa. Yaaweena saikaki marifee qimasee akara ruaqa. <sup>7</sup> Rumba amaqaasee Yaaweenaindi fee qimasee utaaqama amaqara fadameena akiiaqa adiaaqa. <sup>8</sup> Anee Aarona faiqi namu nifiqa quqasaina mi siutausa afisuaqa. <sup>9</sup> Niranandaqanna rumbaa mariana rumbasee nikiqqa aanaamu faqa afisu nimaqaqa. Miqimmasaifana Aarona faqa mina faiqi namu faqa mi saikana nimia. Misa faqa misa saa aniaruakinausa qini aanaiqikira saikaki naaru naaru marifaranoo.

<sup>10</sup> Moosee anee Aarona nari faiqi namu faqa qamunna afisu nimaqasainaaq buri-makau akoona timmusa mara qinee umee marunna uigaana maaqana kooqinni minisaifana Aarona nari faiqi namu faqa qimanniminaqa mina akiqasaa nisauku quqaaqa. <sup>11</sup> Miniseeqa mi burimakau akoonnana qinee umee marunna naaquqara uigaana maqana kooqiki aruaqa. <sup>12</sup> Aruseeqa mina fidika marasee aneenna asauku amukasaa raaraammasee qaidara qaara faqa qaara faqa atisaa aanai fooqaa iranasaqa akua. Miqimmasaifana fidika kaqi marinauqa mara maree qaidara qainda oosanaqi adiaaqa. <sup>13</sup> Miqimmasaifana kafaara aradanda saaqaraa ainoo aiqama maraaqa. Mina annaama faqa mina atakisa qara faqa ainoo minasaa marina faqa amaandamoonna saaqaraa karoo karoonna faqa marasee tatufira qaindasaa quqasee suqa qimia. <sup>14</sup> Burimakau akoona amaqi faqa apata faqa arada faqa inneeqa naambeeqai aqoosai ida arasaifanoo qaani. Mifa aanaiqikirausa numoo maraqa niseenoo taika nimaqaannoo.

<sup>15</sup> Sipsipa akoona moodaa marasee Aarona faqa mina faiqi namu faqa qimanniminaqa nisauku mina akiqqa saa quqaaqa. <sup>16</sup> Miqimmasaifana mina arusee mina fidika marasee qaidara qaara faqa qaara faqa atinni mi fidikana adiaa. <sup>17</sup> Miqimmasaifana mi sipsipa akoonnana kaqikaana kaqikaana auku quqasee mina aunduraindaraa ainaina faqa aikuqara faqa nammari uqusee minauqa mareeqee mi sipsipana akiiaqa akaqa aukiranauqa namufaqa quqaaqa. <sup>18</sup> Mi sipsipa akoonna aiqama afaqa qaidara quqasee qini tatufiranara foora ida araaqa. Mina afundara qinee asianaara.

<sup>19</sup> Mina ida arasee sipsipa akoona moo aanaiqikira saikaki quqee mariana mara minisainanoo Aaroonafa nari faiqi namu faqa mina akiqasaa nisauku quqaaqa. Quqasaafana arua. <sup>20</sup> Aruseenana mina fidika afeeriqiseenana Aarona nari faiqi namu faqa nisauku uqannai naaqoosaa akusee nisauku uqannai nisauku akoonnasaa akusee, nisauku uqannai niku akoonnana saa faqa akua. Akusee fidika kaqi marina qumaree qaidara qaara faqa qaara faqa atinni adia aquaqa. <sup>21</sup> Qaindasaaqaraa fidika akaqana qumaree nikiqiki aki maria fadameena namu faqa marasee Aarona nari faiqi namu faqa nifaaqai faqa qamunnasaa faqa rurufida akunnimaqaqa. Miqi masaifaqa Aaroonafa nari faiqi namu faqa misa fuka qamunna faqa qinindi kiani.

<sup>22</sup> Mi sipsipana ainoo ameesa saa qaraana faqa audurakinaa afaqa saa qaraa ainoo faqa annaama ati amiqirana faqa qaara atakisa mina saa ainoo marina faqa asauku

uqannai afundana faqa ateeke aqua. <sup>23</sup> Qini qimia nafisa amanee uqana kinaana oosana oosana narana moodaa moodaa maraaqa. Oorifa fadameenannai suqarana moodaa faqa moo sia oorifa fadameenannoo suqarana moodaa faqa ausirira feemu moodaa faqa maraa. <sup>24</sup> Mi naranaua Aarona faqa mina faiqi namu faqa nisaukuki quqasainaaq uriqarara kaqi nimirafa qini Anutusaindi fee qiaqa. <sup>25</sup> Miqi maseenana kafia nisaukukinaana mareeqeenana qaindasaa sipsipa akoona auka quqaqana amuaqa quqasee ida arasaifanoo qaani. Qini qimira naranara foora ida araaqa. Mina afundara qinee asasianaura. <sup>26</sup> Moosee anee mi sipsipa akoonnana marasee qini Yaaweesa qifu saa uqeerasee qini Yaaweesa uriqarara qimira ainainee qimasee aneenna mi andauna naa.

<sup>27</sup> Innee faiqi aanaiqi kirausaikamma nimaqararee qimasee qini qimia narannakinaana sipsipa akoona ameemmeeqana marasee qini qifu saa uqeeraseeqa mina asaukuqannai afundana uqaqifiqaaqa. Miqimmaseeqa mi andauna aanaiqikirausa naaqa. <sup>28</sup> Mi ufafa qini ufa marinaqa naaruara naaruara qini faiqi anaasee qini faqa moodaanaki suqira tatufirana suqaaqa. Mi andauna ameemmeeqana faqa asaukuqannai afundana faqa aanaiqikirausaindi mariyani. Faqiqi anaasee qini Yaaweesa kaqi qimira ainaina miqimminoo mariannoo.

<sup>29</sup> Aaroonafa kuqinaqa mina uriqarara aanaiqikira qamunna mina faiqi namu maraaqa. Mi saikana oosana arainna faasaana mi qamunna afisusaifaqa fadameena nikiifa amoondunna adiaqa. <sup>30</sup> Aarona amaaku nari akoona amaaqa maqainafa uqaana maqaki qinee umee marunnnanaki keeqafinoo naaquqara oosiranaki ainainiraree qimaseenoo mi uriqarara qaanaiqikira qamunna afisusee moodaannai qisauku taikasee dinni ani qaara marasee 7 faasaana saa mi naaquqara oosiranaki ainainiani.

<sup>31</sup> Yaaweeafa kafia Mooseena qimaminoo qinau. Anee Aarona faqa mina faiqi namu faqa nikiifa amoodunna fadameena adia nimaqaidana suqeenaa sipsipa akoonnana ameemmeeqana faqa asaukuqannai afundana faqa marasee qini naaquqara oosiranaki afeeki quqasee nammari namufaqa suqaaqa. <sup>32</sup> Qinee umee marunna uqaana maqana kooqiki mina naaqa. Nafisa amanee uqaki kaqi mari feemusa namu faqa naaqa. <sup>33</sup> Misa namasafana aanaiqikira saikaki keeqarana fadameena nikiifa amoondunna adiasainoo misa numoo akiqara mininnisarafa mariannoo. Mi narannafa naaquqarafa marinara aanaiqikirausa kai naaqa. <sup>34</sup> Akaqa aanda faqa feemu faqa nimuqaqinaqa sia naifandinnana kananaana kaqi marinaqa ida araseeqa minaki aqusaifanoo amiqimasee qama taikaani. Mi naranafa naaquqarafa marinara sia naaqa.

<sup>35</sup> Aaroonafa nari faiqi namu faqa aanaiqikira saika oosana arainna qooqari qinee ani aamua qunandee iqa moodaannai qisauku taikasee dinni ani qaara marasee 7 faasaana uqanna kai mi ainainausa auqaaqa. <sup>36</sup> Mi moodaa moodaa faasaannasaa anee burimakau akoona tatufirana suqa qiminnanoo aiqama numoo taikaannoo. Miqinannoo qini qaidara fannoo anukarafa mariannoo. Miqimmafina oorifa fadameena qaidarasaa adiasainoo naaquqanoo mariyani. <sup>37</sup> Aiqa kari moodaannai qisauku taikasee dinni ani qaara marasee faasaana saa miqia. Miqinannoo qini qaidara fannoo kaaqa uqanna naaquqarafa mariannoo. Moo fannoo fee moo ainaina fee mina auqainafa mina naaquqara afeeka fannoo aruannoo.

*Aiqama faasaana tatufirana suqara oosana.  
(Namba 28:1-8)*

<sup>38</sup> Yaaweeafa kafia Mooseena qimaminoo qinau. Innee sipsipa aanaaqi qaraqanda moodaa aukua marara qanda marasee qaidarai tatufirana suqaaqa. Naaru naaru aiqama faasaana miqi kaimmiaqa. <sup>39</sup> Moo sipsipa kananaana tatufuaqa moo eendimarina tatufuaqa. <sup>40</sup> Kananaana suqainna sipsipana namu faqa amiqira sakumannoo qaindirira parauaqa mina ummaara fannoo 1 kilogramme oodaa namu faqa amiqira oorifa fadameena namu faqa qandasee suqa qimia. Uainna nammari oodaa 1 litre amana kai qinee Anutusa naannana adiaqa. <sup>41</sup> Eendi marinaqa suqainna tatufirana kananaana suqaandee kai iqa sakuma qaindiriranannoo faqa oorifa fadameenannoo faqa uainna nammarinoo faqa suqaaqa. Mifa qini Yaaweesa qimira narana maridanoo. Mina afunda fannoo qini asasirana qimidanoo.

<sup>42</sup> Naaru naaru kasooaqee maa tatufira suqarafa qinee umee marunna uqaana maqa kooqiki qini qifu saa tatufu qimiaqa. Miqifaqa miqoo qinee inni qeeqa faqiqi anaasee faqa moodaanaki maridaqa ufa qima nimianaura. <sup>43</sup> Miqoo qinee Isaraee maqannaasa faqa marianoo qinee umee marunna maaqanaiqari daroo daraa ira kaaqa qarafa mi saqanna naaquqainaaq sia faqiqi anaasee kaiqeesa miqoo fifaranoo.

<sup>44</sup> Qinee qeeqa uqaana maqa faqa qaidara faqa naaquqara faika masaanaura. Qinee Aarona nari faiqi namu faqa qini ainainirausa mariafaqa naaduma misa aanaiqikira saikaki quqaanaura. <sup>45</sup> Qinee Isaraee maqannaasa qambaana maridaqa misa Anutusa



marianaura. <sup>46</sup> Misa qini Yaaweesa nariqa Anutusa Isipa maqa maaqaindaraana nifiqee aniafannanara iri marifaqa qinee misa qambaana marianaura. Qinee Yaaweesa misa Anutusa marianaura.

## 30

*Amiqira undimari ida munana suqara qinda auquaqa.*

*(Raf 37:25-28)*

<sup>1</sup> Yaaweefa kaifaa Mooseena qimaminoo qinau. Moosee innee akasia saqari marasee amiqira afundi mari ida munana aree fandinna qaidarana auquaqa. <sup>2</sup> Mi qaidarafa dinni dinni amana kai mariani. Mina kisaagandanai 45 centimetres mariani. Mina qusandanai miqi kai inoo 45 centimetres mariani. Maqa saqari ooru firafa 90 centimetres mariani. Mina qaara faqa qaara faqa ati moodaa saqarinnoo kai burimakau aanaira foora auquaqa. <sup>3</sup> Mina afu faqa aanai fooqaana faqa ataaqeeqara faqa amiqira koorannai kai rafaqaqafusee koorannai mina fiqumama auquaqa. <sup>4</sup> Koorannai qaara qanda aanaanu auqusee dinni moo dinni moo ququsaifanoo qaindusi fandinna saqarina atukaramma qumaraani. <sup>5</sup> Mi qaindusira saqari qanda akasia saqarinna auqusee koorannai rafaqa fuaqa. <sup>6</sup> Mi qaidarana mara maree naaquqara oosirana dinni qini moodaanaki kira bukisa marina oorinni quqaqa. Miqoo qinee inni faqa moodaanaki kianaura.

<sup>7</sup> Aiqama kananaana Aroonafa qoomauqa andeeqarara anireenoo mifa mina saa amiqira adiafaa ira afundi marina suqaani. <sup>8</sup> Mifa kaifaa eendi marinanoo qoomauqa qumbiseenoo amiqira adiafaa imari afundana imarina suqaani. Mi oosanafa naaru naaru sia uqanna taikaannoo kaqi kai mariannoo. <sup>9</sup> Innee sia moo mi qaidarana saa qinee qaoqa qima qaunna afundirana suqaqa. Aandau tatufirane sakuma qaindirira tatufirane uainna nammari adiasee suqara tatufirane sia minasaa suqaqa. <sup>10</sup> Aiqama aukuaana moodaa faasaana kai Aroonafa mi qaidaranasaa ainaininanoo qini qifusaa amiqiannoo.

*Yaaweena uiqaana maqanara takisa aqira oosana.*

<sup>11</sup> Yaaweefa kafa Mooseena qimaminau. <sup>12</sup> Moosee anee Israaee maqannaasa nuqu marasainaga moodaa moodaa fasiqa nariqa mariranara qini feefauru qimiaqa. Miqim-masee nuqu maree marinaqa moo ummaara sia misa saa aqufuanoo. <sup>13</sup> Aiqama nuqu akaraki marisa uriqararasa auqu ramaqaa munnimmana amana kai quqaqa. Aiqamausa mi feefauruna aqiqa qini qimira ainaina qimifaranoo. <sup>14</sup> Faiqi moodaa fasiqa aiku asauku taikasee 20 aukuaana faqaasa faqa mina fiqarara aukuaana faqaasa miqimmasee qini feefauru qimiaqa. <sup>15</sup> Misa nariqa marirana maaqimmasee feefauriaqa. Ainaina faqaasa sia fiqaramasee aqifaranoo. Ainaina siaisa sia oorudupi masee aqifaranoo. Aiqama amana amana kai aqifaranoo. <sup>16</sup> Mi munnimmana Israaee maqannaasiannai marasee qinee umee marunna uiqaana maaqafa mandaikinana minannoo itipia. Misa nariqa mariranara mi takisana aqusaifaqa qinee misa saa itita nimaqaranara irianaura.

*Booroosannai firaa difaani auquaqa.*

<sup>17</sup> Yaaweefa Mooseena maaqi qimasee kafa qimaminau. <sup>18</sup> Moosee anee nammari auqemaria difaanina firana auqua. Booroosannai auqusee mina aiku faqa booroosannai kai auqua. Auqusee nammari minaki adiasee qini uiqaana maaqa dinni marinana qaidara dinni marinana qambaana quqaa. <sup>19</sup> Aroona faqa nari faiqi namu faqa minaki niku nisauku nammari uqimarifaranoo. <sup>20</sup> Misa qini ufa suqira maaqaki keeqaane qimasee niku nisauku minaki mafi nammari uqusee qini qimifandinna narana qaidarasaa suqa qimiaqa. Miqiqqa sia kuqifaranoo. <sup>21</sup> Misa nari niku nisauku nammari uquseeqa sia kuqifaranoo. Maa sanda ufana Aroonafa nari faiqi namu faqa kasooqaqee misa saa aniaruakinausa faqa maa sanda ufana afaqee faranoo.

*Aanaiqi kirausa utaaqara fadameena auquaqa.*

<sup>22</sup> Yaaweefa kaifaa Mooseena qimaminoo qinau. <sup>23</sup> Moosee anee makaqa anoona moomoo 6 kilograms faqa isaaqa anoona moomoo 3 kilograms faqa amiqira undi mari innupina anoona moomoo 3 kilograms faqa maraa. <sup>24</sup> Saadapu moomoo 6 kilograms faqa maraa. Aiqama ainaina uiqaana maqa sikeera amana kai mariani. Oorifa fadameena 4 litres amana minaki adiaqa. <sup>25</sup> Mi naaquqara fadameena Yaaweenaindi fee qimasee nikiiqa amoodunna adiee fandinna auqusee amiqira afundi marina namu faqa quandaqa. <sup>26</sup> Anee mi fadameenaua auqu maree qini uiqaana maqasaa akuseenana qini moodaanaki kira ufa mari bookisanasaa faqa akua. <sup>27</sup> Aiku faqaa teeboora faqa minasaa qaraa ainainauqa faqa qooma saqari faqa minasaa qaraa ainainauqa faqa amiqira afundi mari pauraqana ida qee mari qaidarana faqa akuamaqaa. <sup>28</sup> Tatufirana suqee mafia qaidarana faqa minasaaqaraa ainainauqa faqa akuamaqasee nammari difaani faqa mina

aiku faqa akuamaqaa. <sup>29</sup> Miqimmasee mi ainainausa aaduma saa mara quqasainoo kaaga naaquqanoo mariani. Moo fannoo fee moo ainainee mi ainainausa auqainafa mi ainainausa naaquqara afeeka fannoo naruannoo. <sup>30</sup> Miqimmasee Aaroon nari faiqi namu faqa mi fadameenna aku nimaqa sainaqa qini aanaiqikira saikaki mariaqa. <sup>31</sup> Moosee anee Isaraee maqannaasa maaqi qimasee qimannimia. Maa naaquqara fadameenna nikiqqa amoodunna adiee fandinnana qini ainainiranaki naaru naaru quqaaqa. <sup>32</sup> Maa fadameennafa sia kaiqee fasiqa adiannimaqee mariafa maridanoo. Innee sia moo fadameenna miqirana auquaqa. Mifa naaquqara ainaina marinara innee minara naaquqara fee qimasee eerairiaqa. <sup>33</sup> Yafee moo fannoo maa fadameennara foora auqusee moona akiaaqa adainafa qini faiqi aanaaseeki sia mariannoo.

*Amiqira undimari munana auqimaria pauraqana oosana.*

<sup>34</sup> Yaaweefa kaifaa Mooseena qiminoo qinau. Moosee anee oosana oosana amiqira undi mari pauraqana sitakatee pauraqa faqa oonikaa pauraqa faqa karabanumma pauraqa faqa amiqira makaqa anoona faqa aiqama amana amana kai maraa. <sup>35</sup> Maraseenana amiqira afundi marifaqa nifaqaqi aki marianara foora auqamasee ida arasainanoo qeenoo amiqira muna afundiani. Ooruku faqa oodaa quqasainanoo amiqinoo naaquqara faikiani. <sup>36</sup> Anee mina atiuga maraseenana kaada ririisainanoo kookoomaika mafinana mara maree qinee umee marunna maqanaki muruseenana moodaanaki kira bukisa oorinni quqaa. Mi amiqira undana imarinara kaaga naaquqara fee iaqa. <sup>37</sup> Innee sia moo miqira afundimarinana auquaqa. Innee minara naaquqara andeeqara ainaina Yaaweenaindi fee qiaqa. <sup>38</sup> Yafee moo fannoo miqirana amiqira undi marina afaaqai akirree qimasee auqinafa sia qini faiqi aanaaseeki mariannoo.

## 31

*Yaaweefa uiqaana maqa kinaa ainaina auqifandinna fasiqausa mara quqanau.*  
(Raf 35:30–36:1)

<sup>1</sup> Yaaweefa kafa mooseena qimaminoo qinau. <sup>2</sup> Moosee qinee innikinaana Beesareerana utaaqeeqa. Mifa Urina amaaku Hurana anaifi Yudana oosanakinaafa maridanoo. <sup>3</sup> Qinee qeeqa maraqaana afeeka aaku amaqqeeqa. Qinee irirana faqa aiqama ainainirana akoofasaikira saika amiqi. Aiqama amiqira ainaina auqirana akoofasaikirana faqa amiqi. <sup>4</sup> Mifa koorannoo faqa siruaannoo faqa booroosannai faqa oonu mafi irisaidanoo oosana oosana ainaina akoofasauqa akara rimaria irirana faqa auquani feera amiqi. <sup>5</sup> Qinee firaa feefauru aqi maria oonina atekara oosana faqa saqarinnai ainaina amana auqirana akoofasaikirana faqa Basareerana amiqi. <sup>6</sup> Qinee moo fasiqa Ooqooriabana Aqisamakana amaaku Dannana oosanakinaana mara quqasaanoo Beesareerana faqa ainainannoo. Qinee akaqausa faqa firaa irirana oosana oosana ainaina auqirana akoofasaikirana nimiqa. Miqimma saanaqa misa qinee qimannimianna aiqama ainainna auquaqeeqa. <sup>7</sup> Qinee umee marunna uiqaana maqana faqa moodaanaki kira bukisa faqa mina afu numoo taikannisarana faqa aiqama uiqaana maqakinaa ainainauqa faqa auquaqa. <sup>8</sup> Teeboora faqa minasaa mari ainainausa faqa ramma dirirana amiqira koorannoo auqirana faqa minasaa mari aiqama ainainausa faqa amiqira afundi mari tatufirana suqara qainda faqa auquaqa. <sup>9</sup> Tatufirana suqee maria qaindana faqa mina suqee maria ainainausa faqa niku nisauku nammari uqimaria difaanina faqa mina oosana faqa auquaqa. <sup>10</sup> Misa amiqira gamunnauqa Aaroon faqa mina faiqi namundi faqa aanaifi kira saikaki maridafa afisifandinna faqa auquaqa. <sup>11</sup> Qinindi fee qimasee akunnimaqee fandinna fadameenna faqa adiafaa ira amiqira afundimarinana naaquqara oosiranakinaana faqa auqua. Misa auqidaqa qinee qunandee kaimaseeqa auquaqa.

*Sabata idooara faasaana maridanoo.*

<sup>12</sup> Yaaweefa mooseena qimaminoo qinau. <sup>13</sup> Moosee anee maaqi qimasee Isaraee maqanna qimannimia. Sabata qini idooara faasaana amiqimandee ireedakai mariaqa. Mi faasaanafa qini faqa inni faqa qambaana naaru naaru maridanoo qinee Yaaweesa inni mara qeeqa faiqi anaasee kunnanara quqannifiqaannoo.

<sup>14</sup> Innee qini idooara faasaana naaquqarafa marinara ireeda kai mariaqa. Faiqi moo fannoo sia ireeda marirai mi faasaana ainaininnana kuqa aruqaqa. <sup>15</sup> Qisauku dinni taikasee dinni moodaa marasee 6 faasaana innee inneeqa ainainiaqa. Qisauku dinni ani qara marasee 7 faasaana firaa idooara faasaana qini naaquqara faasaana maridanoo. Yafee mi faasaana ainaininnana innee mina kuqa aruqaqa. <sup>16</sup> Isaraee maqannaasa innee faqa qinee faqa moodaanaki kunnanara mi faasaanafa uqannifiqaani. <sup>17</sup> Mi faasaanafa inni Isaraee maqanna faqa qini faqa naaru naaru agoondikirana kooroo mari faasaanafa mariannoo. Qinee Yaaweesa dinni taikasee dinni ani moodaa marasee

6 faasaanasaa maqa faqa innaaruna faqa auqusee dinni ani qaara marasee 7 faasaana ainainirana quqasee idooafannanara mi faasaanafa idooara faasaana mariannoo.

<sup>18</sup> Anutufa aiqama ufa Mooseena Sinai aqanasaa qimami taikaseenoo qaara ooni ausiriranasaa Anutufa nari asaukunnai sanda ufa akara rumaqoona aminau.

## 32

*Faiqi anaasee koorannai burimakau akoona aanaaqi auqiqua.*

*(Lo 9:6-29)*

<sup>1</sup> Mooseefa aqaana kisaaqasaa ooru marufaqa Isaraee maqanna faiqi anaasee Aaroonafa maruqoo suqumaree aniree Aaroonaa maqi qimasee qimamiqau. Maa fasiqafa maasa Isipa maqa maaqaindari qifiqee anufa naqaafee imari faqee maasa sia iridaqa. Minara anee moo anutuna auqusainanoo maasa indaarunnikka nimaqaani.

<sup>2</sup> Aaroonafa misa ufa iriseenoo qinau. Inneeqa faiqi anaasee naaqookinaa koora faqa fidinaanu faqa tatuseeqa mini qimiaqa. <sup>3</sup> Miqi qufaqa aiqama faiqi anaasee nari naaqookinaana raduku maree mini Aaroonaa amiqau. <sup>4</sup> Amisoofoanoo Aaroonafa mina qumareenoo idannai tasirisiri mandeenoo maqasaa burimakau akoona aanaaqi amana auqu qoonaki adiasoofanoo burimakau amana auqinau. Auquseenoo paipanannai mina atiuqa andeeqanau. Miqimmasoofaqa faiqi anaasee qiqau. Isaraee maqannaasa maafa maasa Anutufa maridanoo. Maafa kai maasa Isipa maqannaindari nindiqee anufa maridanoo.

<sup>5</sup> Aaroonafa misa ufa iriseenoo burimakau akoona amana auqirana aqa tatufira qainda auquseenoo faiqi anaasee qimanniminoo qinau. Duna aiqama suqumaree aniraifaqa oomaqa sakasee naidaqa Yaaweena auqa uqeeraa. <sup>6</sup> Miqi qimasoofofa iaaqoo kananaana faiqi anaasee akaqa aandanu mara maree minisee qaindasaa tatufirana faqa Yaaweena faqa moodaanaki kira tatufirana faqa suqaqau. Suqamiseeqa ooqu marifiqa afeeka nammari faqa narana faqa namaseeqa findifiqa aanaaseeqa faqa manda oosana maraqaqau.

<sup>7</sup> Yaaweefa misa nindafeenoo Mooseena qimaminau. Anee kai kaqi ooqufua. Faiqi anaasee anee Isipa maqannaindari nifiqee anianausa qini minnisee aqara oosana maraidammia. <sup>8</sup> Misa doo qinee fuaqee qimasee naamuqiafanna aana minnisee. Misa koorannai burimakau akoona aanaaqi amana auqusee mina tatufirana suqamiseeqa minara innaaru qidaqa. Misa maqi qidaqa Isaraee maqannaasa maasa Anutufa maafa maasa Isipa maqannaindari nifiqee anufa maridanoofee qidaqa.

<sup>9</sup> Minara qinee Yaaweefa Isaraee maqannaasa kaaqa ramoo ramaa imariafaqa iridaqa. <sup>10</sup> Doo firaqoo qini qirana qaiifaqa misa kuridi taikasaanura. Anee sia qiniara qaoo qia. Miqimaseeqa ani faqa anisaa ani aruakinausa faqa kai amiqi amiqimma nisaanaqa firaqa maqanna marifanoo.

<sup>11</sup> Mooseefa irinoo Yaaweena aanoo qiranara innaarukiqari qaoo qidanoo qinau. Oo Yaawee nanaree anee aneenna faiqi aanaaseera arana qaidanoo fee. Anee firaa afeekannai misa Isipa maqannaindari nifiqee anianaafa naqaafanee aanoo qima nimaqaidanee.

<sup>12</sup> Anee miqinaqa Isipa maqannaasa anisara nari kai qimirisee Isaraee maqannaasa nifiqee aqana aikunni munusee naru taikarara nifiqee fiifoo qifaara. Sia arana qaani aneenna arana qara irirana qandasee sia ummaara aneenna faiqi anaasee nimia. <sup>13</sup> Anee aneenna ainainira faiqiuqa Abarahammana faqa Isakeena faqa Yakooboona faqa kuqaa qima afeekaikira ufa qunnaanara oonumafi iria. Anee misara fasaura foora mafifaqa qinee qima afeekaikiafanna maqa maqana inni nimianauree qinau. Nimisaananoo mi maqa maaqafa innindikamminoo naaru naaru mariannoo fee qinau. <sup>14</sup> Mooseefa miqi qufanoo Yaaweefa nari aranaqara irirana qandasee sia ummaara nari faiqi anaasee nininau.

<sup>15</sup> Yaaweefa Mooseena qaara oonisaa akara rumamufanoo mareenoo aqaanaindari afaasai nari maqanna marunnai ooqu finau. Ausirira ooniqandasaa Anutufa sanda ufa dinni dinni akara rumaqoona uqirafa ooqu finau. <sup>16</sup> Anutufa nari kai mi oonina auquseenoo minasaa sanda ufa akara rinau.

<sup>17</sup> Yoosuafa irufaqa faiqi anaasee nariqa uqaana maqusakiqari faafa fuisee qida qufanoo iriseenoo Mooseena qima minoo qinau. Qinee rakidaqia ufana iridaqa. <sup>18</sup> Miqi qufanoo Mooseefa qinau. Sia qufoona rira ufa fau maridanoo fau. Sia qiki faafau qirufa fau maridanoo. Idi rarana kai iridaqa.

<sup>19</sup> Mooseefa uqaana maqusa adeedi ooqureenoo nindafoofaqa burimakau aanaaqi amana auqirana faiqi anaasee fusakidaqa idi ree mariqau. Miqi marufanoo Mooseefa nindafoofanoo aranaqoofanoo akara rira ooniqara aqana aikunni maqasaa aqusoofaqa miqanda rukamiqau. <sup>20</sup> Mooseefa aranaqoofanoo burimakau aanaaqi amana auqirana

qumareeqeenoo idaki aqusoofanoo tasirisiri irinuu. Tasirisiri maseenoo andaana rumeeqee nammariiki aqusee naaqee qufaqa Isaraee maqannaasa mi nammariina naqau.

<sup>21</sup> Miqimandeenoo Mooseefa quandaqufanoo Aaroonaa qimaminuu. Maa fasiqa anaaseesa ani naqi fee mamaqaafanee anee maa manda firaa aaqarana misa nifaqaqi qugeenee.

<sup>22</sup> Miqi qufanoo Aaroonafa Mooseena qimaminuu. Oo qini uriqararafa anee sia qiniara aanoo qia. Anee maa fasiqa anaaseesa oosana irimariananoo. Misa kaaqa mandosana auqarara sandanainai qimariasa maridaqa. <sup>23</sup> Misa qiniara maaqi qia. Maasa maa fasiqafa Mooseefa maasa Isipa maqa maaqaindaraana qifiqee anunaki kambiqai ainainnara sia iridaqa. Anee moo anutuna auqu sainanoo maasa indaarunnikamma qimaqaani. <sup>24</sup> Miqi qiafaqa qinee qimannimiqa kooraa faqaasa qimiaqee qunaqa uaqee iasa akaqana qimia. Qimifaqa idaki aqusaunanoo burimakau aanaaqi kambiqeenoo.

<sup>25</sup> Mooseefa qafooafa Aaroonafa eedoo qufaqa faiqi anaasee nariqa namuqaa nifusaa oosana oosana manda oosana marooafa namuqaa misara uteetiqaau. <sup>26</sup> Minara Mooseefa arana qoofanoo uigaana maqusa kooqiki kikiqamma fufanoo maaqi qimasee nammeera qinau. Aiqaamausa yafee Yaaweenaindi kiani qinafa maaqoo aniaqa. Miqi qufaqa aiqama Reefina aiku asauku kai suqumaree miqoo ani mina fiqumma fiqumma fiqumma.

<sup>27</sup> Aniroofanoo Mooseefa maaqi qimasee qimanniminuu. Isaraeerana Anutufa Yaaweeffa maaqi qimasee aiqaamausa inni naakapaidanoo mifa inneeqa rakira paipana mara maree innee uigaana maqusa dinni kooqindari dinni kooqinni oonuree aniree idaqa unna anutuna amana auqi mariana akiqara inneeqa nikaqaafasaaqaa faqa inneeqa niqoondiqa faqa inni naaqa mariasa faqa aiqama kuqa naru taikaqa.

<sup>28</sup> Miqi qufaqa Reefina aiku asauku eedoo qimasee mi faasaana 3,000 fasiqa nariqau.

<sup>29</sup> Narusoofanoo Mooseefa kafa qimanniminuu. Innee inneeqa faiqi namufaqa inneeqa nikaqaa fasaauqa faqa naruanara innee Yaaweenaa aanaiqikirausai kiqa mariafanoo. Miqi mariafanoo Yaaweeffa nari amiqi amiqirana inni nininoo.

<sup>30</sup> Iaqoofanoo kananaana Mooseefa faiqi anaasee qima nininuu. Innee firaa manda aaqarana marasaafaqa aqbee qinee aqaana kaifaa ooree inniara Yaaweenaa iramiri-ananoo inni aaqarana akiqara minnisaannoo fee. <sup>31</sup> Miqi qimaseenoo Mooseefa Yaawee funnai aqaana ooree qimaminoo qinau. Maa fasiqa anaaseesa firaa manda aaqarara marasee unna qira anutuna koorannai aqusee minara innaaru qiqiaafanoo. <sup>32</sup> Amanee misa aaqarana akiqara minninnisaa. Sia minninniseenana qini duqu ani faiqi anaasee faqa ani bukaki akararinoo marina kai rukaa.

<sup>33</sup> Yaaweeffa iriseenoo qinau. Sia kaiqeesa nuqu qeeqa bukakinaana rukaanaura. Qini ufa rukiee mariasa nuqukai rukaanaura. <sup>34</sup> Doo oonuree faiqi anaasee nifiqamaree qinee qimamifanna maqa maaqana fua. Anee iria, qini qangiroo fannoo inni indaarunni kamma nimaqaannoo. Mi fasiqa anaaseesa aaqarana akiqara ummaara nimianna aukuanafa anidanoo. <sup>35</sup> Miqi qimaseenoo Yaaweeffa manda aurirana mi fasiqa anaaseesa nininuu. Misa Aaroonara qufanoo koorannai burimakau akoona aanaaqi auqunara miqinau.

### 33

*Yaaweeffa Isaraee maqannaasara Sinai aaqana aikunni maruna minnisee fuaqera qimanniminuu.*

<sup>1</sup> Yaaweeffa maaqi qimasee Mooseena qimaminoo qinau. Anee faqa Isipa maqa maaqaindari nifiqee anianna fasiqa anaaseesa faqa maa maqana quqasee qinee qima afeekaikammasee Abarahaamana faqa Isakeena faqa Yakooboona faqa misasaa ani aruaki kambiqainausa faqa nimiraree qiafanna maqanasaa fua. <sup>2</sup> Qinee qeeqa angiroo aiqaananoo inni nifu uqi marinaqa fimarifaqa qinee Kannaa maqannaasa faqa Amooraa maqannaasa faqa Heeta maqannaasa faqa Peerisa maqannaasa faqa Hifita maqannaasa faqa Yeebusa maqannaasa faqa naru nifaqaqa ianaura. <sup>3</sup> Innee ainoo faqaa maqasaa ainaina ummaqasaa fanoo reemindemiri mari maqanasaa fifaranoo. Qinee qeeqa sia inni faqa fuanaura. Innee ramooramaa imariasa mariafaqa qinee inni faqa fidaqa aanai inni naruanoo.

<sup>4</sup> Isaraee maqanna Yaaweenaa mi ufana iriseeqa nifaqa auqira ainaina aiqama raipagu quqasee soofara maridara foora mafiqau. <sup>5</sup> Yaaweeffa maa ainaina auqaqera qimannimufaqa miqiauu. Maaqi qimasee Yaaweeffa Mooseena qimaminuu. Innee kaaqa ramooramaa imariasa mariafanoo. Qinee inni faqa maqee fiqa inni kuridi nimaqaunaiqini. Doo maqee inneeqa nifaqa auqirana raipagu quqasee kaqi marifaqa qinee inni naqaafee mannimaqaannanara oonumafi irianaura. <sup>6</sup> Miqi qimasooafaqa Sinai aaqana quqasee fidaqa Isaraee maqannaasa sia nari nifaqa auqirana afisiqau.

*Yaaweefa Mooseena faqa ufa qimaru uiqaana maqafa.*

<sup>7</sup> Isaraee maqannaasa nariqa uiqaana maqauga usakasoofano Mooseefa naaquqara uiqaana maqa naambeeqai nianasaa usakanau. Usakasee mina auqureenoo Yaaweefa umee mari uiqaana maqa fee qinau. Faiqi anaasee moo fannoo Yaaweena iriranara irianee qimasee mi maqana kooqinni fimariqau. <sup>8</sup> Mooseefa nari uiqaana maaqai fufaqa faiqi anaasee nari uiqaana maqa kooqiaqa kikiqamafi qafee maru fanoo keeqanau. <sup>9</sup> Mooseefa uiqaana maaqaki keeqafufano asuru qumureenoo mi kooqinaki marufano Yaaweefa minakiqari Mooseena faqa ufa qimarinau. <sup>10</sup> Asuru uiqaana maqa kooqiki qumu kasoo inoo marufaqa faiqi anaasee mina qafamasee ninuka tuqu naumoo amisee Yaaweena amooqi mariqau. <sup>11</sup> Yaaweefa Mooseena faqa nari oori nari oori qafaida ufa qimarinau, faiqi nari agoondi faqa ufa qimarindee inau. Ufa taikaseenoo Mooseefa anirandee faiqi anaasee maru uiqaana maqana finau. Kumaaraa moo mina dadaaqi marufa Yoosuafa Nunnaana amaaku naaquqara uiqaana maaqaki kaqi marinau.

*Yaaweefa nari faiqi anaasee faqa marianauree qimasee qima afeekaikinau.*

<sup>12</sup> Mooseefa Yaaweena qimaminoo qinau. Oo Yaawe kuqaa anee qiniara maa fasiqa anaaseesa indaarunnikamma nimaqainaqa mi maqanasaa fuaqee qinau. Anee sia qini faqa fidanoo qini dadaaqianinna fasiqanara qimaqimianano. Anee qiniara amiqimmasee iridana qiniara asasiqadee qianano. <sup>13</sup> Anee kuqaa qiniara miqidana anee qimiriannana qimaqiminana qinee ani ainainiranaki maridqa maqee maqee ani asamma amaqaanau. Anee maanara faqa iria, maa maqannaasa ani faiqi anaasee anee utaaqama qaanausa maridaqa.

<sup>14</sup> Yaaweefa mina iriseenoo Mooseena qimaminau. Qinee ani faqa fidaqa adoarana inni nimianau.

<sup>15</sup> Mooseefa iriseenoo Yaaweena qimaminoo qinau. Anee sia maasa faqa finana sia maasa maaqooqari diqiaa. <sup>16</sup> Anee sia maasa faqa finaqa naqaafee masee akaqausa anee qiniara faqa aneenna faiqi anaaseera faqa rimariannanara irifaranoo fee. Anee maasaki marinaqa maa maqa maqana kinaasakiqari naaduma moo kirausa mari-  
anau.

<sup>17</sup> Yaaweefa Mooseena mi ufana iriseenoo qimaminau. Doo anee qianandee kaimmi-  
anau. Qinee amiqimmasee aniara irimarunnanara faqa aniara asasi marunnanara faqa miqianau.

<sup>18</sup> Mooseefa mi ufana iriseenoo kaifaa Yaaweena iramirino qinau. Amanee aneenna oori daroo daraa irana uqaqifqasainaqa qafaanauree qufano Yaaweefa qinau.

<sup>19</sup> Amana qinee qeeqa amiqira areenarana quqasaananoo ani aiaaqaree afunni fuan-  
noo. Qinee ani afusaa qeeqa naaquqara duquara koorooianau. Qinee Yaaweesa qeeqa nifaurana faqa qeeqa qimudao qirana faqa qinee utaaqama qaanausa nimianau. <sup>20</sup> Moosee anee qini doori sia qafeenaranoo moo fannoo qini qiqafainafa sia amana kaqi marianno kuquanno. <sup>21</sup> Moosee anee qini daakaarinni oonisaa kikiqina maria. <sup>22</sup> Qini doori areenarafa finaqa qinee ani ooni afoo iranaki quqaseeqa qeeqa qisauku anisaa ititaseeqa fiqarama fiqa qisauku maraanau. <sup>23</sup> Qinee qisauku mara maraanana anee qini itaufaka kai qiqafa. Sia doori qiqafeennarano.

## 34

*Mooseefa kafia inaaqianna sandufa maranau.*

(Lo 10:1-5)

<sup>1</sup> Yaaweefa Mooseena qimaminoo qinau. Moosee anee maa aqaannasaqari ooquree ooni ausiqara atekasee maree urua. Anee indaaruga qanda amana kai atekasee maree urua. Murusainaqa indaaru rukamunnaasaa akara ruafannufana kafia akara ruanaura. <sup>2</sup> Anee maqee deedaqamaqai marinana duna kananaana eendai mara maree Sinai aqaanasaa ururee qini paquria. <sup>3</sup> Faiqi moo fannoo sia ani faqa uruanno. Sia uqanna moo fannoo aqana fee aqana aqa fee mariani. Sia misa burimakau sipsipa faqa aqana aikunni andanda naqa.

<sup>4</sup> Mooseefa iriseenoo ooni ausirirana qaara qanda atekamaree kananaana Yaaweefa qimamundee inoo Sinai aqana ooru finau. <sup>5</sup> Yaaweefa asurukina qumureenoo Mooseena faqa kikiqa mafino nari auquara koorooino qinee Yaaweese qinau. <sup>6</sup> Yaaweefa Mooseena oorinni fiqaree oonuree maaqi qimasee firaqoo qinau. Qinee Yaaweesa maridaqa. Qinee qimuqisirana faqa qimudao qirana faqa umbiqarusa maridaqa. Qinee sia kai kaqi aanooqunausa maridaqa, qinee kaaqa faiqi anaaseera qimuqisi marunau mardaqa, qinee ooqi marunnaqoo kai marunau maridaqa. <sup>7</sup> Qinee qeeqa qima afeekaikira ufa kasooaqee nukudara foora kambiqainausara qima

qaafanna ufana kaqi kai iridqa, numoo faqa manda oosana akiqara faqa minnisaanura. Qinee numoo auqainna fasiqa aanaaseesa faiqi namu faqa mina anaifi mara faqa mina asaifaqausa faqa afaqnausa faqa sia sia naruanaura, naruanaura.

<sup>8</sup> Mooseefa mi ufausa iriseenoo kai kaqi maqasaa oorindari mapamufufanoo Yaaweena amooqinau. <sup>9</sup> Amooqidanoo maafi qimasee Yaaweena qimaminau. Yaawee anee kuqaa uqanna qiniara asasadana qinee aniara maasa faqa fuanneera iridaqa. Maa fasiqa aanaaseesa ramooramaa idafa anee maasa numoo akiqara minniqiseenana maasara aneenna faiqi anaasee fee qia.

*Anutufa faiqi anaasee faqa kafaa moodaanaki kinau.*

*(Raf 23:14-19; Lo 7:1-5; 16:1-17)*

<sup>10</sup> Yaaweefa Mooseena qimaminoo qinau. Maqee qinee Isaraee maqannaasa faqa moodaanakikira ufa qidaqa. Qinee misa nifusaa firaa ainainauqa sia maa maqanasaa moo atinai faqa moo maqanna qambaana faqa auqaafanna ainainauqa auqanaura. Aiqama faiqi anaasee qinee Yaaweesa firaa ainaina auqaanaqa qafaifanoo naaqaqanoo. Inni dadaaqianifeera miqianaura. <sup>11</sup> Qinee maqee qimannimianna sandufana amiqimasee irisee mimau fuuqa. Qinee Amooraa maqanna faqa Kannaana maqanna faqa Heeta maqanna faqa Peerisa maqanna faqa Hifita maqanna faqa Yeebusa maqanna faqa inni noorinni fidaqa misa nifaqasaana fifaranoo. <sup>12</sup> Innee fuka maqasaa oonuree sia mi maqannaasa faqa kaqikaa ainaina ree firaa ainaina ree sia misa faqa moodaanaki kira ufa qidaqa. Misa ufaanara foora fufusaifaqa innee minaki arifoora, minara qeerairiqa. <sup>13</sup> Misa tatufirana suqee maria qaidarana misa ooni ateekarana rakiaaqee maasa naaqaqara anutunee qimariana innee mina rukamu aquaqa misa saqari ateeka rakiqasee maasa anaasee anutufa Aseeraafee qimariana minauqa faqa ateekaateekamma aquasaqa. <sup>14</sup> Innee sia moo unna anutunara innaaru qidaqa. Qinee Yaaweesa unna anutufa qini qimaqaqaa maqaranara rairai qimarunaua maridaqa.

<sup>15</sup> Innee fuka maqasaa oonuree sia uqanna misa faqa moo ainainara moodaanaki kira ufa qidaqa. Misa nariga unna anutuna innaaru qidaqa tatufirana suqami mariana inniara naaqee qifaqa nee foora. <sup>16</sup> Inni faiqi namu mi anaamuru anaaseesa maraseeqa qini minnisee moo unna qira anutusara innaaru qifoora. Mi oosanafa qini qifusaa dapi nua anaaseesara foora maridaqa.

<sup>17</sup> Innee sia moo ainaina tasirisiri masee unna anutuna amana auqusee minara innaaru qidaqa.

<sup>18</sup> Ooqai innee Abiba quqoonasaa Isipa maqasaqari anusa mariafanoo. Minara Abiba quqoona anirinaqa maqee innee sia yis mari feemuna oomaqa sakasee maqee maqee naqa. Dinni qisauku taikasee dinni oonu qaara marasee 7 faasaana mi oomaqana sakasee naqa. Isipa maqasaqari anu quqoonafa marinara miqidaqa. <sup>19</sup> Aiqama ainaina ooqasaa aanaaqi qinindi maridanoo. Innikina ooqasaa akoonaiqi maqainafa faqa aiqama maqeenaa andauqa ooqasaa akoonaa maqainafa faqa qinindi kai mariannoo. <sup>20</sup> Innee inni doonki aanaaqi ooqasaa maqarafa kaqi marianifee qimasee sipsipa aanaaqi mina amaqa maqasee tatufirana suqa qimiqa. Innee sia miqiga mina anuka kuridaqa. Innee aiqama inneeqa ooqa faifiuqa feefauru masaifaqa kafaa inniqaindi kidaqa. Sia moo fannoo tatufirana suqara ainaina sia uqirafa qini Yaaweesa qifusaa aniannoo.

<sup>21</sup> Dinni taikasee dinni ani moodaa marasee 6 faasaanasaa inni ainainira faasaana maridanoo. Dinni ani qaara marasee 7 faasaanasaa sia ainainiqa. Umaqira aukuanee aiqira aukuanee anirinaqa sia mi faasaana ainainiqa, idooaqa.

<sup>22</sup> Innee unakirana oosana arasee miqoo afiana nara oomaqa suqaaqa. Innee asumu aiqura quqara oomaqa faqa sakasee naidaqa mina auqu reeqa asumu aiqura quqara oomaqa fee qidaqa. <sup>23</sup> Moodaa aukuanaki qaarammoo kari aiqama Isaraee maqannaasa moodaaqoo suqufi qini Yaaweesa Isaraee maqannaasa Anutusa qimooqidaqa. <sup>24</sup> Qinee anaamuru innee finnatina nifaqaseeqa misa maqa maaqa inni minisee inni mi maqa maaqana firaanaikamma nisaanaqa innee aiqama aukuaana qaaramoo kari moodaaqoo suqufi inneeqa Anutusa qini Yaaweesa qifusaa marifanoo sia moo anaamuru aniree inni maqa maaqa mareefaranoo.

<sup>25</sup> Innee andau arusee tatufirana suqa qimirree qimasee sia innooqeemari paaraqana namufaqa feemu suqaaqa. Ainnaaqarara oomaqaki arusainna andauna ataraasa fannoo sia akaqafa kaqi marinanoo faiqee iaqaani.

<sup>26</sup> Aiqama aukuaana indaruqaa narana afiana nararee qinnana Yaaweena naree maree munu amiaqa. Innee sia mimmi fee sipsipafee arusee nari anoona naamama anoonnaini suqaaqa.

<sup>27</sup> Yaaweefa mi ufanara Mooseena qimaminoo qinau. Anee aiqama maa ufausa akara rua. Maa ufausa qinee ani faqa Isaraee maqannaasa faqa moodaanaki qima afeekai kamma qaunna ufana oosana maridanoo. <sup>28</sup> Miqi qimasoofoano Mooseefa aaqanasaa Yaaweena faqa kisaqasaa marinau. Qaara fasiqa niku nisauku taikasee 40 faasaana faqa eendaki faqa nammari faqa narana faqa sia neemarinau. Yaaweena moodaanaki kira sanda ufa ooni qarasma akara rinau.

*Mooseefa Sinai aaqanaindari quminau.*

<sup>29</sup> Mooseefa Sinai aaqanaindari Yaaweena sanda ufa akara rira ooniqara uqirafa quminau. Mifa Yaaweena faqa ufa qiqiunara mina oori afiri daroo daraa imarufanoo nari sia minara irinau. <sup>30</sup> Aaroonafa Isaraee maqannaasa faqa Mooseena oori afiri daroo daraa imaruna qafamaseeqa rufaida nianasaa mariqau. <sup>31</sup> Mooseefa misa nindafamaseenoo Aarona faqa faiqi firaasa faqa naarama quqasoofaqa aiqama aniroofanoo ufa qima niminau. <sup>32</sup> Adeedi aniroofanoo Yaaweefa Sinai aaqanasaa aiqama sandufa Mooseena qimamu ufana qimanniminau.

<sup>33</sup> Mooseefa qimannimi taikaseenoo karo karoonaikira qamunna qumaree oorisaa rafaafinai. Mina oori qafee rufieefoora miqinai. <sup>34</sup> Mooseefa aqosai kaqikaa uiqaana maqaki keeqafinoo qamunna uturuquseenoo Yaaweena faqa ufa qimarinau. Qimaseenoo madaana raudamafinoo faiqi anaasee Yaaweefa qimamu ufana qima niminai. <sup>35</sup> Qima nimi marufaqa misa mina oori qafoofoanoo daroo daraa ufanoo Mooseefa nari oorisaa qamunnai ititaseenoo qima nimi taikaseenoo quwandaki Yaaweena faqa ufa qiraree qimasee uiqaana maaqaki keeqafinoo kaifaa qamunna uturuqinai.

## 35

*Idoora faasaanara qira sandufa.*

<sup>1</sup> Mooseefa Isaraee maqannaasa faiqi anaasee aiqama suquseenoo qima niminai. Yaaweefa inniara maa ufamau fuagee qidanoo. <sup>2</sup> Qisauku dinni taikasee dinni ani moodaa marasee 6 faasaanasaa ainainiaqee qinoo. Dinni ani qaaraikinoo 7 qini firaa naaquqara idoora faasaana mariannoo. Faiqi moo fannoo mi faasaana ainaininaqa innee mina kuqa aruqa. <sup>3</sup> Innee sia Sabata faasaannasaa inneeqa maaqaki suqa naqa.

*Mooseefa Yaaweena uiqaana maqa usakara ainaina amiaqee qinau.*

*(Raf 25:1-9)*

<sup>4</sup> Mooseefa Isaraee maqannaasa aiqama kafa maaqi qimasee qimanniminai. Yaaweefa maaqi qimasee naamua qidanoo. <sup>5</sup> Innee Anutuna amiraree qimasee nifaqa asasinuusa koora faqa siruua faqa booroosa faqa maree aniaqa. <sup>6</sup> Amiqira qamunna faqa sipsipa asausi dirindaasi akirana faqa pannoonaa akirana faqa faena akirana faqa mimmi asausinnai auqira qamunna faqa maree aniaqa. <sup>7</sup> Sipsipa akoona apata faena akirana faqa ooruku nammarikinna aanda apata faqa akasia saqari faqa maree aniaqa. <sup>8</sup> Qooma qumbi maria fadameena faqa amiqira afundi mari ainaina andaana rirana idaki adiasaafanoo adiafaa ira undi marina faqa mi ainaina kai nikiiqa amoondunna adiee maria fadameenaki quqarara faqa maree aniaqa. <sup>9</sup> Pupu ooniuga faqa akaqa amiqira ooniuga faqa aanaiqi kirausa uriqararaua afisi maria eefooda qamunnanasaa faqa amuqusasaa ititara qamunna saa faqa quqeefindinna oonisa maree aniaqa.

*Mooseefa Anutuna uiqaana maqa kinaa ainaina auquaqeera qimanniminai.*

*(Raf 39:32-43)*

<sup>10</sup> Inni kiqari oosana oosana ainaina auqarana akoofasauqa kai anireeqa Yaaweena uiqaana maaqaki ainaina mifa naamua qimaqaimau kai auqaaqa. <sup>11</sup> Misa uiqaana maqa faqa mina rafaqaifi maria qamunnana faqa mina anaanu faqa mi maqana usakara atunauqa faqa aunirira saqari faqa oosuki faqa kooqiki faqa rakiqee findinna saqarisa faqa saqari maqaki rakiqarana amaaqa auqirana faqa auquqa. <sup>12</sup> Moodaanaki kira bookisa faqa mina qaindusira saqari qara faqa mina afu faqa minasaa ititara qamunna faqa auquqa. <sup>13</sup> Aiku faqaa qainda faqa mina aindusira saqari qara faqa minasaa quqee maria ainaina faqa auquqa, Anutuna amifandinna feemuna faqa uquqa. <sup>14</sup> Qooma saqari faqa mina qoomauqa faqa mina oosana oosana ainaina faqa mina qeemari fadameenna faqa auquqa. <sup>15</sup> Afundi marina andaana rirana suqee maria qaidarana faqa mina qaindusi maria saqari qanda faqa faiqi nikiiqa amoondunna adieemaria fadameenna faqa afundimarina andaana rirana faqa uiqaana maaqa kooqi qamunna faqa auquqa. <sup>16</sup> Aandau tatufirana suqee maria qaidarana faqa mina fukaa asaana booroosannai auqirana faqa mina qaindusira saqari qara faqa mina oosana oosana ainaina faqa nammari auqara difaani faqa mina oosana faqa auquqa. <sup>17</sup> Dapusaa diri maria qamunnana faqa dapu saqari faqa saqari kuradee mariana oosana amaaqa

auqiranauga faqa dapu kooqiki keeqee maria qamunnana faqa auqaaga. <sup>18</sup> Kafa faqa uqaana maaga apupukauqa faqa mina rumbee maria sanda ainaina faqa auqaaga. <sup>19</sup> Aarona idaaqira qamunna faqa mina faiqi namu qamunna faqa uqaana maqaki naaquqara oosiranaki aanaiqikira saika maraidaqa afisifandinna qamunnana faqa mi aiqama ainainna auqaaga.

*Faiqi anaasee Yaawee finnai oosana oosana ainaina maree aniqau.*

<sup>20</sup> Mooseefa mi ufana qima nimisoofaqa faiqi anaasee irisee daraaniqau. <sup>21</sup> Nifaaqa asasusa mi ainainna Yaaweenana mini amisoofaqa mi ainainausannai Yaaweenana uqaana maqa usakaqau. Yaaweenana amooqifandinna ainainna faqa aanaiqikirausa afisifandinna qamunnausa auqifandinna ainainna faqa maree aniqau. <sup>22</sup> Faiqi anaasee Yaaweenana amirara nidimarusaa misa kai nifaaqa auqimaru ainainna nikiqaa asausi rumbee maru pinnana faqa naaqoo kinaa fidinaanu faqa nisaukuki quqee maru isaaga-mana faqa ninukaki rufi maru kukukakana faqa oosana oosana ainaina nifaaqa auqi maruna koorannai auqiranauga mini Yaaweenana amidee qiqa mini quqaqau. <sup>23</sup> Akaqausa amiqira qamunna maqeeusa faqa sipsipa asausi dirindaasi akirane pannoonna akirane faena akirane maqeeusa faqa mimmi asausinnai auqira qamunna maqeeusa faqa sipsipa akoona apata faena akirana maqeeusa faqa ooruku nammariki maru aandauna apata maqeeusa faqa maree aniqau. <sup>24</sup> Siruaa faqa booroosa faqa Yaaweenana amirara amanaikusa maree aniqau. Akaqausa akasia saqari Yaaweenana uqaana maqa usakarana amana maqeeusa maree aniqau. <sup>25</sup> Akoofasa anaasee uqaana oosana oosana amiqira sanda sipsipa asausinnai dirindaasianda faqa faeenanda faqa pannoonna ariranda faqa sufirana mini quqaqau. <sup>26</sup> Misa mimmi asausinnai faqa sufimariqau. <sup>27</sup> Faiqi firaasa aanaiqikirausa uriqarana qamunnasaa faqa amuqusasaa faqa quqaqeeera faraafana ooniqaa faqa fira feefaura auqimaru amiqira oonis faqa maree aniqau. <sup>28</sup> Kafa misa adiafaa imaru ainainna oosana oosana faqa qooma qumbi maru fadameennana faqa nikiqaa amoonnunna adiee maru fadameennana faqa adiafaa ira afudimaru ainaina aindirirana idaki teeqimmasoofano adiafaa ira afundi maruna faqa maree aniqau. <sup>29</sup> Isaraee maqannaasa faiqi anaasee Yaaweenana amirara nidimarusaa Yaaweefa Mooseenara auqaanifeera aakapoo ainainna maree aniqau.

*Yaaweenana uqaana maqa usakaqeeera mara quqanau.*  
(Raf 31:1-11)

<sup>30</sup> Mooseefa kaifaa Isaraee maqannaasa maaqi qimasee qima nimirau. Yaaweefa faiqi moo mina auqu Beesareerana Urina amaaku Hurana anaqi Yudana atikinaana mara quqeenoo. <sup>31</sup> Yaaweefa Beesareerana aiqama amiqira ainaina auqaanifeera nari maraquna afeeka umbiqa amaqeenoo. Aiqaama ainaina auqirana akoofasaikirana faqa amanaikirana faqa oosana oosana ainaina amana auqira irirana faqa aminoo. <sup>32</sup> Yaaweefa Beesareerana oonu mafi irisee auqara irirana amisaifano mifa koorannai faqa siruaannai faqa boroosannai faqa oosana oosana ainaina auqirana akoofasa maridanoo auqaannoo. <sup>33</sup> Kafa mifa amiqira ooni ateekeemaria irirana faqa koorannai mi oonina quqarana amaaga auqira irirana faqa saqarisaa oosana oosana ainaina amana auqira irirana faqa amiqifaano auqaannoo. <sup>34</sup> Ooqooriabana Agisamakana amaaku Dannana oosanakinaana faqa Yaaweefa inniki quqaqifaano mifa faqa Beesareerana dadaaqianifeera maridanoo. Yaaweefa miqanda akaqausa uqannifiqaaqee irirana faqa nimino. <sup>35</sup> Yaaweefa oosana oosana ainaina nisaukunna auqarana akoofasaikirana nimiqifaqa maridaqa. Oonisaa akararirana faqa oosana oosana amiqira akara rira irirana faqa amiqira qamunna afundara irirana faqa sipsipa asausi dirindaasi akiranannoo faqa pannoonna akiranannoo faqa faena akiranannoo faa akaqa qamunna auqira irirana faqa nimino. Nimisaifaqa miqanda oosana oosana ainaina auqira irirana akoofasa qara maridaqa.

## 36

<sup>1</sup> Mooseefa Isaraee maqannaasa qima nimidanoo qinau. Beesareerana faqa Ooqooriabana faqa miqanda dadaaqi marusa oosana oosana ainaina auqirana akoofasaikira irirana Yaaweefa nimiqoosa aiqama ainaina Yaaweefa naamua qundee kai masee naaquqara uqaana maqa auqaaga.

*Faiqi anaasee moomoo ainaina maree aniqau.*

<sup>2</sup> Miqi qimaseenoo Mooseefa Beesareerana faqa Ooqooriabana faqa Yaaweefa aiqama ainaina auqira irirana akoofasaikirana nimirau fasiqausa faqa naarama quqaseenoo qimannimirau. Doo innee oosana arasee auqaaga. <sup>3</sup> Isaraee maqannaasa Yaaweenana amideequu ainainna mini soo fanoo Mooseefa mi ainainna fasiqausa nimufaqa



auqimariqau. Faiqi anaasee eedoo qimasaida aiqama kananaana Anutuna amidee quu ainainausa kaqikai maraidaqa Moosefunnai munu quqee mariqau. <sup>4</sup> Naaquqara maqa usakee marusa moomoo ainaina qafamasee nariqa ainainirana minnisee Moosee finnai oonuree qimamiqa qiqau. <sup>5</sup> Faiqi anaasee moomoo ainaina aabaa faqa maree anidammia. Yaaweefa maasara auqaqee qimaqaina amana minisee aabaa faqa minisaafannoo kaqi fifau mariannoo.

<sup>6</sup> Mooseefa mina iriseenoo ufa quqasoofaqa aiqamausa qimannimiqa qiqau. Faiqi anaasee sia moo fannoo kafaa moo ainaina naaquqara uiqaana maqa usakaaqeera maree aniaqa. Miqi qimasee qimanimufaqa faiqi anaasee mina iriseeqa sia kafaa maree aniaqa. <sup>7</sup> Indaaru mini qoo ainainausa aiqama ainaina taikarana amana faqa fiqaramasee aabaa faqa maree aniaqa.

*Misa Anutuna uiqaana maqa usakaqau.*

*(Raf 26:1-37)*

<sup>8</sup> Irirana kaaqa fiqararusa kai indaaruuqa qamunna uiqaana maqasaa akirana auqiqau. Sipsipa asaasi dirindaasi akirana faqa pannoonaa akirana faqa faena akirana faqa sufusee amiqira qamunna auqusee aqoosa faqaa aandaau amana auqusee minasaa atooqasee akuniqau. Miqimmaseeqa minauqannai qisaukuqara taikasee 10 fira qamunna auqusee moodaanaki akuniqau. <sup>9</sup> Mi aiqama qamunnausa amana amana kai 12 metres kisaaga mina qusa 2 metres mariani. <sup>10</sup> Mi qamunnausa moodaannai qisauku 5 marasee ootupamasee akuniqau. Dinni qisauku taikasee 5 faqa miqikai iqau. <sup>11</sup> Miqimmaseeqa mi qamunna qanda atigara dirindaasi arira qamunnannai anaanu auqusee moodaanaki ootupaqa. <sup>12</sup> Fira qamunna ati mau anaanu 50 auqiqau. Moo qamunna faqa miqi kai iqa moo qamunna saa qaraa anaanu amummaqa kai auqiqau. <sup>13</sup> Koor qumaree turimmandee qusa tafara foora saaeemma qumaree dinni dinni anaanuki upeekasoofannoo mi qamunna qanda moodaaraa maqi inoo marinau.

<sup>14</sup> Uiqana maqasaa akira qamunna firaana mimmi asaasinnai 11 auqiqau. <sup>15</sup> Misa aiqama moodaa karirana kai auqiqau. Mina kisaaga 13 metres amana marianoo mina qusa fannoo 2 metres amana marinau. <sup>16</sup> Mi qamunnausa moodaannai qisauku taikasee 5 qamunna akunusoofannoo moodaa qamunnaika mafinau. Kafaa moodaannai qisauku taikasee dinni ani moodaa marasee 6 narisaa narisaa akunusoofannoo firaanaikinai. <sup>17</sup> Qamunna atimau anaanu 50 akuniqau. Moo atimau faqa mina amummaqa kai akuniqau. <sup>18</sup> Booroosannai tafara foora ati saaeemmasee 50 auqusee minannoo dinni dinni anaanuki auusee ootupamasoofannoo moodaa qamunnara foora marinau. <sup>19</sup> Kafaa misa uiqaana maqa akuamaqara qamunna sipsipa akoona apata faena akiranannai moo auqiqau. Inaqaiana amuaaqa akirana ooruku nammarikinaa aandaau apatannai auqirafa marinau.

<sup>20</sup> Misa akasia saqarinnai kai naaquqara uiqaana maqa atuna auqusee kuradaqau. <sup>21</sup> Maaqi mandee maaqa atuna auqiqau. Saqari dinni dinni kuradarafa 4 metres marinau. Mina ausana qusa 66 centimetres amana kai auniriqau. <sup>22</sup> Aiqaama atuna maqaki rakiqaranara irisee ati ooqiqaramasee ateeqaqau. Aiqaama maaqa atuna miqi kaimasee ateeqaqau. <sup>23</sup> Misa suani afu ataaqeeni south kisaagaqandanai maaqa atuna 20 narisaa narisaa apamandee kuradaqau. <sup>24</sup> Maaqa atuna oosana sia maqaki kaqi rakiqau. Siruaannai amaaqa auqusee minaki kuradaqau. <sup>25</sup> Misa uiqaana maqa suani dinni ataaqeeni north kisaagaqandanai maaqa atuna 20 narisaa narisaa apamandee kuradaqau. <sup>26</sup> Maaqa atuna sia maqaki kaqi rakiqau. Siruaannai 40 amaaqa auqusee minaki maaqa atuna kuradaqau. <sup>27</sup> Suani keeqemari qaannai west uiqaana maqa uruanatinai maaqa atuna dinni qisauku taikasee dinni ani moodaa marasee 6 narisaa narisaa apamandee auqiqau. <sup>28</sup> Maaqa dinni dinni munu raqaranaki kafaa qaaraganda auqusee kuradaqau. <sup>29</sup> Raudaranaki maaqa atuna oosanaki apammasee qaaradama soofannoo amiqimasee narisaa narisaa apinoo marinau. Maaqa atuna rakiqarana oosanaki rumba atukarasee miqi kai mamaree mirinni murufi saqau. Dinni dinni munu raqaranaki miqi kaimmiqau. <sup>30</sup> Miqimmaseeqa maaqa atuna 8 oosanaki siruaannai qaaraganda qaaraganda amaaqa auqusoofannoo 16 marinau.

<sup>31-32</sup> Misa aunirifandinna akasia saqari 15 maraqa. Uiqana maqa dinni dinni ataaqee faqa uruanai faqa faifa faifannoo aunirumasoofannoo maaqa atukarama qumaranau. <sup>33</sup> Mi maaqa atunna aunirira saqari fannoo maaqa amana kai dinni dinni ati marinau. <sup>34</sup> Maaqa atuna aiqama koorannai kai rafaaga fiqau. Maaqa atunamau aiqama koorannai kai anaanu mamaree fiqau. Aunirifandinna saqarisa faqa koorannoo mi anaanusaki rafaaga fiqau.

<sup>35</sup> Misa sipsipa asaasi dirindaasi akirana faqa pannoonaa akirana faqa faena akirana faqa sufusee minannai amiqira qamunna auqiqau. Miqimmasee mi qamunnaasaa

angiroo niqoosa faqaasa nimana auqigau. <sup>36</sup> Mi qamunnana dirianee qimasee qaara faqa qaara faqa 4 atuna akasia saqari ateeekasee koorannai rafaafufusee kuradaqau. Mina atimau koorannai qamunna dirifandinna anaanusa auqigau. Mi saqarisa oosanaki siru-annai amaaqa auqusee minakiaqa kuradaqau. <sup>37</sup> Uuqaana maqa kooqiki ititeefandinna qamunnana sipsipa asausi dirindaasi akirana faqa pannoona akirana faqa faeena akiranannai faqa marasee kooqiki dirifandinna amiqira qamunna auqigau. Oosana oosana sandannai mooka maakira ainainauqa mi qamunnanasaa auqigau. <sup>38</sup> Mi qamunnana dirifandinna moodaannai qisauku 5 akasia saqari marasee koorannai mina atimau rafaafufusee qamunna dirifandinna anaanau auqusee quqaqau. Mi atunana qumaraanifeera koorannai saqari kukuqamasee atimau aunnigau. Miqimmasee booroosannai moodaannai qisauku 5 atuna oosana amaaqa auqusee minaki kuradaqau.

## 37

*Innee moodaanaki kira ufa mari bookisana auqaqa.*

*(Raf 25:10-22)*

<sup>1</sup> Beesarerafa nari dadaaqi marusa faqa akasia saqari marasee minannai moodaanaki kira bookisa auqigau. Mina kisaaga 110 centimetres auqigau. Mina qusandanai faqa mina kuradarafa faqa amana amana kai 66 centimetres amana auqigau. <sup>2</sup> Misa amiqira kooramasee turimmasoofanoo ausirumafuqa minannai kai bookisa adisaa faqa aundurai faqa ititaqau. Mi bookisana afaimau koorannai amatookika masee rafaafuqigau. <sup>3</sup> Misa koorannai qaindusi fandinnana amaaqa qaara faqa qaara faqa 4 auqusee aiqama aikusaa quqaqau. Dinni aikusaa qaara qanda dinni aikusaa qaara qanda quqaqau. <sup>4</sup> Misa akasia saqari qaindusi fandinna qanda kooramasee ausiruma qumaree minannai kukuqigau. <sup>5</sup> Kukuqammaseeqa dinni dinni amaaqa auquqoonaki ausiqau.

<sup>6</sup> Bookisa afu faqa koorannai kai auqigau. Mina kisaaga 110 centimetres amana marinau, mina qusa 66 centimetres amana marinau. <sup>7</sup> Misa kooramasee turimmasoofanoo bookisa afu auquseeqa minannai kai dinni dinni qangiroo qaaraqanda nimana auqigau. <sup>8</sup> Afu dinni atinni moo qangiroo amana auqusee dinni moo qangiroo amana auqigau. Afu faqa mi qangiroo qanda nimana faqa moodaa koorannai kai auqigau. <sup>9</sup> Mi qangiroo qanda bookisa afusaa quqasoofaqa noori nari qafee nari qafee iqa mariqau. Miqanda niqoosa uqerasoofanoo bookisa afusaa ititanoo marinau.

*Misa aiku faqaa teeboora auqusee Yaaweena amiraree qu feemuna miqoo quqaqau.*

*(Raf 25:23-30)*

<sup>10</sup> Beesarerafa akasia saqarinnoo teeboora auqinau. Mina kisaaga 88 centimetres marinau. Mina qusa 44 centimetres marinau. Mina kuradarafa 66 centimetres marinau. <sup>11</sup> Mifa amiqira kooramasee turimmasoofanoo ausiruma fufanoo minannai teeboora rafaafa fufusee kafaamoonnai teeboora atiqara fiqumma rafaafa finau. <sup>12</sup> Mifa teeboora atiqara fiqumma 8 centimetres amana ititasee mina afaimau koorannai rafaafa fiqau. <sup>13</sup> Mifa koorannai qaindusifandinna amaaqa 4 auqusee teeboora aiqama aiku namusaa quqanau. <sup>14</sup> Teeboora afai ameemaandanai qaindusirana amaaqa auqinau. Mifa mi anaanusa afai ameemaana qumasee atukaranau. Atukarasainaga aindusira saqari minaki ausuaqera atukaranau. <sup>15</sup> Mifa akasia saqari qaindusifandinna qanda koorannai kukuqinau. <sup>16</sup> Mifa amiqira koorannai kai teeboorasaa quqefandinna pirita kaafausa faqa kisaaga kaafauqa faqa Yaaweena amifandinna uainna adira pirita uqnaurirana faqa auqigau.

*Misa qooma qumbifandinna aikana auqigau.*

*(Raf 25:31-40)*

<sup>17</sup> Misa qooma qumbira aika amiqira koorannai auqigau. Misa kooramasee turimmasoofanoo minannai kai qooma qumbira aika oosana faqa adaka faqa asaana faqa auqigau. Mi asaanausa saa mi koorannai kai taatuqee aqama afufeenaari marindee maseeqa kaafara foora afisu amaqaqau. <sup>18</sup> Mi qooma aikausa qisauku dinni taikasee dinni ani moodaa marasee 6 marinau. Dinni qaaramoo dinni qaaramoo marinau. <sup>19</sup> Aiqa mi asaana namuna atimau koorannai taatuqee aqama afufeenaari marindee masee afaqa auqigau. Mi afufeenaarirafa teeqnoorina aqamara foora maruqa mi asaana namuna saa auqigau. <sup>20</sup> Mina adaka saa qaara faqa qaara faqa 4 saa taatuqee aqama teeqnoorina aqamara foora auqigau. <sup>21</sup> Moodaa aqama indaarugaa asaana qara ameemaana marinau, kafaamina murufi asaana qara ameemaana moo aqama marinau. Kafaamina murufi asaana qara ameemaana moo marinau. <sup>22</sup> Amiqira kooramasee turimmasoofanoo minannai kai qooma oosana faqa asaana faqa afufeenaarirana faqa auqigau.

<sup>23</sup> Misa amiqira koorannai qoomauqa dinni taikasee dinni ani qaara marasee 7 qooma auquseeqa mi asaanausa atimau quqaqau. Mina ufaqaa faqa danda afaqee mariana faqa auqigau. <sup>24</sup> Qooma quqara aika amiqira koorannai 34 kilogram umaara amana kai marasee auqigau.

*Amiqira undimari munana suqara qainda auqigau.*

*(Raf 30:1-5)*

<sup>25</sup> Misa akasia saqari marasee amiqira afundi mari ida munana areefandinna aidarana auqigau. Mi aidarafa dinni dinni amana kai marinau. Mina kisaqaqandanai 45 centimetres marinau. Mina qusandanai miqi kai inoo 45 centimetres marinau. Maqasaa qari ooru firafa 90 centimetres marinau. Mina qara qaara faqa qaara faqa ati moodaa saqarinnai kai burimakau aanaira foora auqigau. <sup>26</sup> Mina afu faqa aanai fooqaana faqa ataaqee qara faqa amiqira koorannai kai rafaqaqafusee koorannai mina fiqumma auqigau. <sup>27</sup> Koorannai qaaraqanda anaanu auqusee dinni moo dinni moo quqasoofanoo qaindusifandinna saqarina atukaramma qumarana. <sup>28</sup> Mi qaindusira saqari qanda akasia saqarinnai auqusee koorannai rafaqaqafiqau. <sup>29</sup> Misa naaquqara fadameenna Yaaweenaindi fee qimasee nikiqaa amoondunna adiee fandinnana auqigau. Idaki quqasaafanoo adiafaa ira undimari pauraqara amiqira undimari fadameennara foora auqigau.

## 38

*Misa fadameena faqa pauraqa faqa amiqira ida muna undianifeera auqigau.*

*(Raf 27:1-8)*

<sup>1</sup> Beesareerafa akasia saqari marasee minannai tatufirana suqara qainda auqinau. Mina kisaqaqandanai faqa qusandanai faqa amana amanakai 2.2 metres marinau. Maqa saqari kuradarafa qaara faqa qaara faqa 4 amana 1.3 metres marinau. <sup>2</sup> Mina qaara faqa qaara faqa 4 atisaa aanaira foora auquqoofanoo marinau. Tatufira qainda moodaa saqari fannoo kai atimau faqa qambaana faqa aanai faqa moodaa saqarinnai kai auquqoofanoo marinau. Mi aiqama ainainausa booroosannai rafaqaqafinau. <sup>3</sup> Mi tatufirana suqee maria qaindanasaa suqee maria ainainausa booroosannai kai auqinau. Danda afaqara futufitauqa faqa savoorauqa faqa uqnaurira piritauqa faqa tafa fooqaa irana ati saae irana faqa ida qauni afaqee maria futufitauqa faqa aiqama booroosannai kai auqinau. <sup>4</sup> Mifa fukaasaana booroosannai auquseenoo tatufira bookisa aundurai kasaqai ooqeeqasee qambaana quqanau. <sup>5</sup> Tatufira qainda atiqara anaanu qaara faqa qaara faqa 4 auquseeqa bookisa atiuqasaa rumbaqa. Misa aindusi fandinna saqari qanda upeekaqeeera rumbaqa. <sup>6</sup> Mifa akasia saqari tatufira qainda aindusifandinnana qaaraqanda maraseenoo booroosannai miqanda rafaqaqafinau. <sup>7</sup> Mifa akasia saqari marasee anaanu auquqoonaki ausinau. Tatufira qainda indooira saqarinnai kai aundura faqaana auqinau.

*Firaa pirita nammari auqee fandinnana auqinau.*

*(Raf 30:18)*

<sup>8</sup> Uiqana maqa kooqiki dadaaqi maru aanaaseesa nariqa booroosannai auquqoo tanukana Beesareerana amufanoo minannai nammari auqara difaanina faqa mina oosana faqa auqinau.

*Yaaweenau uiqana maqa dapu auqu fiqumma iqu.*

*(Raf 27:9-19)*

<sup>9</sup> Amiqira sanda sufusee auquqaa qamunnanannoo uiqana maqasaa ququsara foora auqu ititanau. Suani afu dinni ataaqeeni (south) mina kisaqaq fannoo 44 metres marinau. <sup>10</sup> Mi qamunnana dirifandinnana booroosannai dapu 20 auqusee mina kuradeefandinnana amaaqa miqi kai masee 20 auquseeqa siruaannai tafara foora mina amana kai auqusee aunirifandinna saqarina faqa minannai kai auqigau. <sup>11</sup> Suani afu dinni ataaqeeni undee kai iqa dinni ataaqeeni faqa miqi kai miqau.

<sup>12</sup> Suani keeqee maru qaannai dapu qusandanai mina kisaqaq 22 metres marinau. Mina dapu saqari 10 faqa mina amaaqa auqirafa faqa 10 kai marinau. Qamunna dirifandinnana tafarafooo iranauqa faqa aunirifandinna saqarisa faqa siruaannai kai auqigau. <sup>13</sup> Suani oosana qaannai kooqi marutina aqa uruanai inoo maruna amana kai 22 metres marinau. <sup>14-15</sup> Mi kooqina dinni dinni dirifandinna qamunnafa 6.6 metres marinau. Mi kooqina dinni dinni qaaramoo dapu faqa mina amaaqa faqa dinni dinni qaaramoo faqa mina amaaqa faqa marinau. <sup>16</sup> Aiqaama qamunna dapusaa dirinoo marufa amiqira qamunna kai auqirafa marinau. <sup>17</sup> Aiqaama dapu fiqumma iqu irafa siruaannai rafaqaqafinau saqarinasaa ootupanoo marinau. Minasaa qamunna

dirifandinnana tafara maqi iranauqa siruaannai kai auqiḡau. Mina dapu atimau faqa siruaannai kai rafaafa fiḡau. Mi saqarisa rakiqeeḡandinnana amaaḡauqa booroosannai auqiḡau.

<sup>18</sup> Kooḡisaa ititara qamunna amiḡirafa marinau. Misa sipsipa asaasi dirindaasi akirana faqa pannoona akirana faqa faeena akiranannai faqa sufusee mi qamunnana auqiḡau. Auḡuseeḡa amiḡira sandannai oosana oosana ainaina amana auqiḡau. Mi qamunnana kisaḡaḡa fannoo 9 metres marinau. Mina qusa fannoo 2.2 metres marinau. Mi kooḡina qamunna dapu rakiḡarana amana kai marinau. <sup>19</sup> Misa mi qamunnana dapu saqari qaara faqa qaara faqa kooḡiki rakiḡaranasaa diriqau. Mi dapusa oosanaki booroosannai amaaḡa auḡusee minaki rakiḡau. Mi dapusa ati rafaḡafirana faqa auni rumaḡaa saqarisaa faqa tafara foora iranauqa faqa siruaannai kai auqiḡau. <sup>20</sup> Uiqana maqa atimau apupuka arifandinna aikausa booroosannai kai auqiḡau. Uiqana maqa dapu rakiḡarana qumaraanifee qimasee apupuka aḡoosai faqa afuḡai faqa aruḡaafa aiqama booroosannai auqira apupuka kai marinau.

*Misa koorā faqa siruaa faqa booroosa faqa marasee Yaaweena uiqana maqaki minannai ainaini mariḡau.*

<sup>21</sup> Yaaweena uiqana maqaki qaara oonisaa qisaukuḡara 10 sanda ufa akara rirafa marinau. Mi maḡanaki ainaini maruna koorā faqa siruaa faqa booroosa faqa marinau. Aanaḡikirana Aaroonā amaaku Itamarafa Reefina aiku asauku qimannimi marufafa misa mi koorā ainainausa asaana rumasee akara rimariḡau. <sup>22</sup> Beesareerafa Urina amaaku Hurana anaḡi Yudana ati marufa mifa aiqama ainaina Yaaweefa Mooseena qimamundee kai masee auḡinau. <sup>23</sup> Mina dadaḡi marufa Ooḡooriabafa marinau. Mifa Aasamakana amaaku Dannana ati marinau. Mifa oonisaa oosana oosana ainaina amana auḡi marufa marinau. Mifa sipsipa asaasi dirindaasi akiranannai faqa pannoona akiranannai faqa faeena akiranannai faqa amiḡira sanda sufusee amiḡira qamunna auḡimarufa marinau. Kafaa mifa oosana oosana ainaina amana auḡirana akoofasa marinau. <sup>24</sup> Aiḡama koorauḡa naaḡuḡara uiqana maqa usakarara Yaaweena amidee qufa mina ummaara uiqana maḡakinaa ainainauḡa amana masee qafee maru sikeerana amana 998 kilogram maree aniḡau.

<sup>25-26</sup> Aiḡama fasiḡauḡa 20 aukuaana faḡaasa nuḡu marasoofaḡa misa nambaḡa 603, 550 fasiḡauḡa takisa munninma aḡi mariḡau. Mi takisana aḡusoofaḡa mi siruaana qumaree uiqana maqa sikeerasaa diriseeḡa qafoofanoo 3,430 kilograms marinau. <sup>27</sup> Maaḡa atuna oosana amaaḡa auḡirafa 100 marinau. Mi siruaana moodaanaki asaana rumasoofanoo 3,400 kilograms marinau. Naaḡuḡara uiqana maaḡaki qamunna diri maru saqarisa rakiḡarana amaaḡa faqa maaḡa atuna rakiḡarana amaaḡa aiḡama moodaa moodaa 34 kilograms kai marinau. <sup>28</sup> Miḡimmaseeḡa akaḡa siruaa 30 kilograms amana kaḡi marunannoo aunirira saqari faqa atuna rakiḡarana ati mau faqa qamunna dirirana tafara maqi irana faqa auqiḡau.

<sup>29</sup> Yaaweena amu booroosana umaara fannoo 2,425 kilograms marinau. <sup>30</sup> Mi booroosanannai Yaaweena uiqana maqa kooḡiki saqari rakiḡarana amaaḡauḡa auqiḡau. Aandau tatufira qainda faqa mina fukaa asaana faqa minaki suḡee maru ainainausa faqa minannai kai auḡinau. <sup>31</sup> Dapu saqari rakiḡarana amaaḡauḡa faqa kooḡi saqari rakiḡarana amaaḡauḡa faqa uiqana maaḡa apupukauḡa faqa dapu fiḡu fiḡu irana apupukauḡa faqa aiḡama mi booroosanannai kai auqiḡau.

## 39

*Aanaḡi kirausa qamunna auqiḡau.*

*(Raf 28:1-14)*

<sup>1</sup> Misa sipsipa asaasi dirindaasi akirana faqa pannoona akirana faqa faeena akirana faqa marasee aanaḡikirausa naaḡuḡara oosiranaki ainainiaḡeera amiḡira qamunna auqiḡau. Aaroonā aanaḡikira qamunna faqa Yaaweefa Mooseena qimamundee masee auqiḡau.

<sup>2</sup> Misa sipsipa asaasi dirindaasi akirana faqa pannoona akirana faqa faeena akirana faqa koorā sanda faqa sufuseeḡa eefooda qamunna auqiḡau. <sup>3</sup> Misa koorā turiisoofanoo adamaḡaḡa mafufaḡa tiritandara foora aukiiseeḡa sipsipa asaasi dirindaasi akirana faqa pannoona akirana faqa faeena akirana namu faqa sufuseeḡa amiḡira qamunna auqiḡau. <sup>4</sup> Eefooda qamunna anaanu qaaraḡanda fannoo aururusaa aakandianinnana auḡusee eefooda qamunnasaa dinni dinni rumbaḡau. <sup>5</sup> Mina ooḡiganda inaninnana amiḡira qamunnannai eefooda qamunna auḡundee kai masee auqiḡau. Mifa eefooda qamunnasaa akunirafa marinau. Yaaweefa Mooseena qimamundee kai iḡau.

<sup>6</sup> Eefooda aanaanusaa akumaaga ooni qaaraganda pupu ooni marasee dinni aanaanusaa moo dinni aanaanusaa moo quqasee Yakoo boona faiqi namu qisaukuqara taikasee qikunni ooqu qaara marasee nuqu mi ooni qandasaa akara riqau. <sup>7</sup> Miqimmasee aururusaa eefooda qammunna aakandammasoofanoo Yakoo boona faiqi namu qisaukuqara taikasee qikunni ooqu qaara marasee 12 Isaraee maqannaasa kikiqa usinoo marinau.

*Nimuqusasaa rumbara qamunna auqiqau.*

*(Raf 28:15-30)*

<sup>8</sup> Eefooda qamunna auqu ainainausannoo kai amuqusasaa rumbara qamunna auquseega moodaa karira akara kai riqau. <sup>9</sup> Mi qamunnana tukaandasoofanoo aiqama ati amana amana kai 22 centimetres marinau. <sup>10</sup> Misa ooni amiqirana firaa feefauru aqimariana kai marasee qaara faqa qaarra faqaki mi qamunnasaa padiqau. Indaaruuqaa padiranaki moo ooni auqu rubi faqa moo ooni toopasa faqa moo ooni ganeeta faqa minamuna padiqau. <sup>11</sup> Mina aanaaqianna padiranaki moo ooni auqu eemeerara faqa moo ooni auqu safairee faqa moo ooni auqu daimanna faqa minamunannai padiqau. <sup>12</sup> Miqanda muqufi padiranaki moo ooni auqu teerakoisa faqa moo ooni auqu agatee faqa moo ooni auqu ameeetisa faqa minamunannai padiqau. <sup>13</sup> Inaaqiana atimau padiranaki moo ooni auqu beerira faqa moo ooni auqu kanirianna faqa moo ooni auqu yasapaa faqa minamunannai padiqau. Mi oonisa koorandannai amuqusasaa maru qamunnasaa isooqa araqa. <sup>14</sup> Mi oonisa moodaa ooni fannoo Yakoo boona faiqi namu qisaukuqara taikasee qikunni ooqu qaara marasee 12 Isaraee maqannaasa kikiqa usinoo marinau.

<sup>15</sup> Misa nimuqusasaa rumbarana aanaanu amiqira koorannai auqira sandannai seenandara foora auquseega moodaanaki quqasee afundasee dinni dinni ati saa qusiqa. <sup>16</sup> Koorannai anaanu qaara qanda auqusee amuqusasaa rufuaninna qamunnana mirinni atisaa qara qusiqa. <sup>17</sup> Qaaraganda seenanda koorannoo afundaranannai mi anaanu qandaki qusiqa. <sup>18</sup> Mi sandana ati qarannai aururusaa koorandannai ooni isooqa aruqaanaki ootupaaqa. Miqimmasoofanoo aururusaa eefooda qamunnasaa rumbanau. <sup>19</sup> Kafaa nimuqusasaa rufimariana anaanu qaara qanda koorannai auqusee aunduraindari atisaa mi anaanuna rumbasoofanoo eefooda qamunna mammaaqai marinau. <sup>20</sup> Kafaa qaaraganda aanaanu koorannai auqusee afunni qumu maru eefooda qamunnasaa aqaasanai amiqira qamunnnannai sufirana ooiqandi maruna aakaariqara rumbaqa. <sup>21</sup> Nimuqusasaa diri maria qamunnasaa anaanuki dirindaasiandannai sufira sanda usuaki eefooda qamunnasaa qaraa anaanuki ususee rumbaqa. Miqimmasoofanoo amuqusasaa ititara qamunna sia kasi kasinau. Yaaweefa Mooseena qimamundee kai iqa.

*Innee akaqa qamunna aanaiqi kirausaindi auquqa.*

*(Raf 28:31-43)*

<sup>22</sup> Misa eefooda qamunna meeaaqoo qaraana auqirara dirindaasi akira sipsipa asausinnai kai qamunna kisaaga auqiqau. <sup>23</sup> Misa anuka amaaqa auqiqau. Qamunna raqandaammasee akunusoofanoo anuka upeekoofanoo sia anaqinau. <sup>24-26</sup> Mina ati mau raqandaammasee akunuseega saqari aqama faqa kaqikaa biru koorannai auqirana faqa mina atimau qusiqa. Dirindaasi akira sipsipa asaasi faqa pannoona akiranannai faqa faeena akiranannai mi saqari aqamana amana auqiqau. Auquseega mi saqari aqamana aaga koorannai auqira biru faqa qamunna atimau moo mafi quqee moo mafi quqee iqa.

<sup>27-29</sup> Misa sipsipa asusi dirindaasi akirana faqa pannoona akirana faqa faeena akirana faqa tirita uqanna namu faqa sufusee Aaroona nari faiqinamu siutauqa faqa Aaroona uriqarara qata faqa mina faiqinamu kaqikaa qatauqa faqa auqiqau. Auqusee ooiqanda ianinnana minannai kai auquseega oosana oosana akarannoo afaaga auqiqau. Miqimmaseega misa taraisa tirita uqannannai auqiqau. Yaaweefa Mooseena qimamundee kai iqa aiqama ainaina auqiqau.

<sup>30</sup> Misa amiqira koorannai niqinaaga rumbeemaru doodapaaninara foora auqusee minasaa Anutunaindi fee qimasee akara riqau. <sup>31</sup> Misa doodapaani dirindaasiandannai auqirana marasee qatasaa quqasee akuniqa. Yaaweefa Mooseena qimamundee kai iqa.

*Doo aiqama saika taikanau.*

*(Raf 35:10-19)*

<sup>32</sup> Miqimasee Yaaweena uiqaana maqa taikaqa. Isaraeena aiku asauku Yaaweefa Mooseena qimamundee kai aiqama ainaina iqa. <sup>33</sup> Misa uiqaana maqa faqa mina rafaaga fimaria qamunnana faqa mina anaanu faqa mi maqana usakara atunauqa faqa

aunirira saqari faqa oosuki faqa kooqiki faqa rakiqee fandinna saqarisa faqa saqari maqaki rakiqarana amaaga auqirana faqa maree Mooseefa marunnai munu quqaqau. <sup>34</sup> Sipsipa akoona apata faeena akirana minannai uqaana maaqasaa akirana faqa ooruku nammarikinaa aandau apata uqaana maqasaa akirana faqa kaaqa naaquqara oosiranaki ititara qamunna faqa maree munu quqaqau. <sup>35</sup> Misa moodaaniki kira bookisa qaara ooni minaki maraana faqa mina afu faqa mina qaindusira saqari qara faqa maree munu Mooseefa unnai quqaqau. <sup>36</sup> Misa aiku faqaa qainda faqa minasaa mari ainainausa faqa Anutuna afusaa quqara feemu faqa maree munu quqaqau. <sup>37</sup> Misa amiqira koorannai auqira qooma saqari faqa mina qoomauqa faqa mina oosana oosana ainainauqa faqa mi qoomausa fadameena faqa maree munu quqaqau. <sup>38</sup> Koorannai auqira aidara faqa Yaaweenaindi fee qimasee utaaqama amaqaasee adia nimaqee maria fadameenna faqa afundi mari pauraqana faqa uqaana maqaki kooqi ititara qamunna faqa maree munu quqaqau. <sup>39</sup> Booroosannai auqira aidara faqa mina fukaa asana booroosannai auqirana faqa mina qaindusira saqari qara faqa mina oosana oosana ainaina faqa nammari adiee maria difaanina faqa mina oosana faqa maree muna Mooseefa unnai quqaqau. <sup>40</sup> Dapu qamunna faqa dapu faqa dapu oosana amaaga auqirana faqa dapu kooqi qamunna faqa dapu sanda faqa apupuka faqa aiqama ainaina naaquqara uqaana maaqa aundurai auqee maria ainainausa faqa maree munu Mooseena uqafiqaqau. <sup>41</sup> Minauqa munu uqafiqaseeqa Aarona naaquqara qamunna faqa nari faiqi namundi faqa naaquqara maqaki ainainidaqa afisifandinna qamunnana amiqirana munu Mooseena uqafiqaqau. <sup>42</sup> Isaree maqannaasa Yaaweefa Mooseena qimamundee kai masee aiqama ainaina auqaqau. <sup>43</sup> Mooseefa aiqama ainaina aiqqu masee qafamaseenoo Yaaweenaa irirana mau kai auqeeaafoo qimaseenoo amiqi amiqimma nimaqanau.

## 40

*Uqaana maqa usakasee Yaaweenaa utaaqama amaqaqaa.*

<sup>1</sup> Yaaweefa Mooseena qimaminoo qinau. <sup>2</sup> Indaaruuqaa quqoonasaa indaaruuqaa faasaana innee qini naaquqara uqaana maqa oosana arasee usakaqaa. <sup>3</sup> Moodaanaki kira bookisaki qisaukuqara taikasee 10 sanda ufa marina kaaqa naaquqara oosiranaki quqasee ititee fandinnana fira qamunna marasee minasaa ititaaqa. <sup>4</sup> Aikufaqa qainda maree mini quqaseeqa minasaa ainainifandinna ainainausa minasaa mini quqaaqa. Qooma saqari faqa mini quqaseeqa mina qoomauqa mina ati mau quqaaqa. <sup>5</sup> Quqaseeqa koorannai auqira aidara amiqira afundi mari pauraqana suqee mariana mareeqee maamiqoo oosiranaki moodaanaki kira bookisa amummaqa quqaaqa. Quqaseeqa kooqiki ititee maria qamunnana maraseeqa kooqiki diriaqa.

<sup>6</sup> Qaidara firaana aandau tatufirana suqee mariana uqaana maaqa kooqi amummaqa ququsaki quqaaqa. <sup>7</sup> Kafaa nammari difaani mareeqee maaqa kooqi dinni fira qaidara dinni qambaana quqasee nammari adia umbiqaqa. <sup>8</sup> Ququsa dapu uqaana maaqa aru fiq fiqumma datimasee kooqiki qamunna diriaqa.

<sup>9</sup> Yaaweefa Mooseena kafa qimaminoo qinau. Qini naaquqara fadameena maraseenana uqaana maaqa faqa minakinaa aiqama ainaina qini utaaqama qimaqaranasaa rurufa masainanoo naaquqanoo mariani. <sup>10</sup> Miqimmaseenana fira aidara aandau tatufirana suqee mariana faqa minasaa qaara ainainauqasaa faqa mi fadameenna rurufa masainanoo kaaqa naaquqanoo mariani. <sup>11</sup> Nammari difaanisaa faqa mina oosanasaa faqa miqi kai iaqa.

<sup>12</sup> Miqi masee Aarona nari faiqi namu faqa nifiqamaree uqaana maqa kooqiki munusainaga nammari auqaqaa. <sup>13</sup> Auqamasaiwana aanaiqikirausa qamunna marasee Aarona afisu amaqaasee qini utaaqama qimaqara fadameena akiqa amoondunna rurufammasainanoo naaquqanoo maridanoo qini aanaiqikira saikaki mariani. <sup>14</sup> Mina faiqi namu nifiqee miniseenana aanaiqikirausa qamunna afisu nimaqaa. <sup>15</sup> Miqi maseenana Aarona ianandee inana mina faiqi namu faqa fadameena nikiqa amoondunna rurufamma nimaqaa. Miqimmasainaga qini aanaiqikira saikaki mariaqa. Mi fadameenafa misa naaruara qini aanaiqikira saikaki marirana nimiannoo. <sup>16</sup> Mooseefa aiqama ainaina Yaaweefa qimamundee kai masee auqanau.

<sup>17</sup> Isipa maqa maaqa kigari anukari moo aukwana aiqarooqaa moo aukwana indaaruuqaa uqoono mina indaaruuqaa faasaanasaa Yaaweenaa naaquqara uqaana maaqa usakaqau. <sup>18</sup> Mooseefa qufaqa uqaana maaqa atuna amaqaqaa maqaki quqaseeqa maaqa atuna minakiaqa kuradamasee ausana auni rumasee kooqindana atuna faqa rakiqau. <sup>19</sup> Rakiqaseeqa indaaruuqaa qamunna qairi akuseeqa mina amuaqa qaaramoo mina rafaqaafuanifeera qairi akiqau. Yaaweenaa ufamau kaimbiqau.

<sup>20</sup> Mooseefa sanda ufa akararira ooniqara bookisaki quqaseenoo mina aindusira aikaqara anaanuki upeekaseenoo mina nifauara afu rafaafafinau. <sup>21</sup> Rafaafafuseenoo mi bookisana mareeqeenoo uiqaana maqaki quqaseenoo qamunna qumareenoo dirisoofanoo minasaa itita amaqaanau. Yaaweena ufamau kai miqinau.

<sup>22</sup> Mooseefa aiku faqaa teeboora mareeqeenoo naaquqara oosiranaki suani afu dinni ataaqenni North quqanau. <sup>23</sup> Quqaseenoo mi teebooranasaa Yaaweena amiraree qu feemuna quqaqoofanoo marinau. Yaaweena ufamau kai finau.

<sup>24</sup> Miqi maseenoo Mooseefa qooma saqari uiqaana maqaki suani afu dinni ataaqenni (South) maaqa atuna mammaaqai quqanau. Dinni taatatai aiku faqaa teeboora quqasee dinni taatatai qooma saqari quqanau. <sup>25</sup> Yaaweefa qumi maru uiqaana maqanaki qooma saqari quqasee qumbisoofanoo qanau. Yaaweefa qimamundee kai inau. <sup>26</sup> Miqi maseenoo Mooseefa koorannai auqira qaidara mareeqeenoo uiqaana maqa maamiqoo oosiranaki ititaqoo qamunnana aaqa quqanau. <sup>27</sup> Quqaseenoo mifa amiqira afundi-maruna andaana rirana quqaseenoo idaranau. Yaaweena ufamau kai finau. <sup>28</sup> Mifa uiqaana maqa kooqiki qamunna d irinau.

<sup>29</sup> Diriseenoo tatufirana suqee maru qaidarana uiqaana maqa kooqi amummaqa madaanai quqanau. Quqaseenoo Mooseefa aandau tatufirana faqa sakuma fooqaa irana qaindi rirana faqa tatufinau. Yaaweena ufamau kai miqinau.

<sup>30</sup> Miqi maseenoo Mooseefa nammari difaani madaanai qaidara mianni marufanoo uiqaana maqa kooqi murunni marufanoo qambaana quqanau. Quqaseenoo nammari minaki adia qumbiqanau. <sup>31</sup> Mi nammarinaki Mooseefa faqa Aaroonafa narí faiqi namu faqa mi nammarinaki niku nisauku nammari uqi mariqau. <sup>32</sup> Misa uiqaana maqaki keeqararee qimasee fee tatufira qaidara aaqa firaree qimasee fee mi nammarinaki niku nisauku nammari uqusee fimariqau. Yaaweena ufamau kai miqi mariqau.

<sup>33</sup> Miqimma taikaseeqa Mooseefa qufaqa uiqaana maqa faqa firaa qaidara faqa ququsa dapu fiq fiqumma rakiqagau. Rakiqaseeqa dapu kooqiki faqa qamunna ititaqau. Miqimmasee misa Mooseena faqa aiqama ainainirana taikaqau.

*Qasuru fannoo Anutuna uiqaana maqa akiiqa amummaqa marinau.  
(Namba 9:15-23)*

<sup>34</sup> Miqi masoofanoo qasuru fannoo uiqaana maqa dukunimambufanoo Yaaweena kaaqa qara daroo daraa irafa uiqaana maqaki qumbiqa finau. <sup>35</sup> Miqimmafuna Mooseefa sia uiqaana maqa keeqanau.

<sup>36</sup> Qasuru fannoo uqeeree fukari kai Isaraee maqannaasa nári uiqaana maqa faqa Yaaweena uiqaana maqa faqa aiqama ainaina faqa tatu maree fiqau. <sup>37</sup> Qasuru fannoo kaqi miqoo marufaqa misa faqa kaqi miqoo mariqau. <sup>38</sup> Isaraee maqannaasa fida marufanoo qasuru fannoo aiqama faasaana Yaaweena uiqaana maqa akiiaaqa marinau. Aiqaama eendaki idauruara foora mina akiiaaqa marufaqa qafee mariqau. Miqinoo marufaqa fifiufaqa Yaaweefa nimiraree qu maqa maaqanaki oonu raqau.

## ESTA Estaana ufa

*Kuinna Wasti nammarifa kinna Serkisisana mandaikamma amaqaanau.*

<sup>1-2</sup> Serkisisafa Peereesia maqa maaqaki kinna maru aukuana mifa Susa maqusaki nari kinna siaqa ufiqiseenoo ooqu marifinoo 127 maqa maaqa rakisi marinau. Suani afu uri maru qaannai India maqa maaqaki oosana araseenoo suanafu keeqee maru qaannai Itiopia maqa maaqaaki dinni ati oonu marinau. <sup>3</sup> Mifa qaarammoo aukuanaki kinna maridanoo aiqama kiapausa faqa kaammanna uriqararawsa faqa aiqama maqa maaqaki marusa faqa firaa oomaqa sakasaida nee marinau. Peereesia maqa maaqaki faqa Midia maqa maaqakinaa ammiuqa faqa mi firaa oomaqaanaki ani mariqau. Rakisirawsa faqa firaa fasiqauqa faqa aiqama maqa maaqaki marusa misa faqa mariqau.

<sup>4</sup> Mi naranafa qisauku dinni taikasee dinni oonu moodaa marasee 6 uqoonaki marinau. Marufanoo kinna fannoo nari aiqama munnimma faqa nari maaqa afaaqa auqirana faiqi anaasee quqannifiqanau. Quqannifiqasoo faqa misa mi ainainausa qafoo fanoo kaaqa amiqirafa uriqaranoo uqanna marinau. <sup>5</sup> Mina anaqiana kinna fanoo moo firaa oomaqa nari uqusaki nari maaqa adeedi sakanau. Mi oomaqafa aiqama Susaa maqusaki maru fasiqausa ainaina faqaasa faqa ainaina siaisa faqa misaindi marinau. Marufafa misa moodaa amaana aundurai naida mariqau. <sup>6</sup> Mitinai misa narana nee marunnai amiqira tida marinau. Ooqai faiqi misa taatuqee ooninnai faqa eekara ooninnai faqa dirindaasi arira ooni faqa kinnaa ooni uqa misa rarai fee qimasee auqu ree maruna mookira ooni tanukaida qeemaruna faqa maqasaa padimmaseeqa minasaa tida auqiqau. Misa mi tidanasaa oomaqa naani qimasee eekara arira qamunnainnai faqa dirindaasi arira qamunnani faqa afaaqa auqusee amiqira sandannai rumbaqaofanoo marinau. Misa mi sandanannai siruaannai auqira rinna amiqira ooni pausasaa rumbaqa. Misa miqoo koorannai faqa siruaannai faqa auqira kisaqaqaa siaqauqa ufiqisaidaqa minasaa ooqu marifidaqa narana nee mariqau. <sup>7</sup> Faiqi misa mooka maakira kooraa kaafaki nammari nee mariqau. Nee marufanoo kinna fannoo moomoo uainna mi fasiqausa nimi marinau. <sup>8</sup> Sia misa neefandinnana asaana riqau. Kinna fannoo nari maaqaki ainaini maru faiqisa qimannimufaqa misa nari nidiranasaa moodaa moodaa fasiqa nammari nimi mariqau.

<sup>9</sup> Mikari Kuinna Wasti nammarifa aiqama anaaseeuqa faqa kinna maaqaki firaa oomaqa sakasee nee mariqau.

<sup>10</sup> Qisauku dinni taikasee dinni oonu qaaraqanda marasee 7 faasanasaa mi firaa oomaqaanaki kinna fannoo kaqi kaaqoo uqanna uainnasaa furufarinau, furufarinoo mifa nari maaqaki ainaini maru faiqisa qisauku dinni taikasee dinni oonu qaaraqanda marasee 7 naaroo faqa aniqau. Misa nuqu maaqimminoo marinau. Meehummafa faqa Bistaafa faqa Aboonnafa faqa Bitaafa faqa abaktaafa faqa Seetarafa faqa Karkasaafa faqa mariqau. <sup>11</sup> Kinna fannoo misara kuinna Wasti nammarina afiqee aniaqee qimaseenoo qimanniminu. Kuinna Wasti nammarifa nari kuinna qafee afisu maree aniani. Kuinna Wasti nammarifa amiqira manaqa uqanna marufanoo minara kinna fannoo kiapausa faqa aiqama mina firaa oomaqaki ani marusa uqannifiqarara aaranau. <sup>12</sup> Mi ainainira faiqisa oonu kuinna Wasti nammarina kinna qu ufana qimamufanoo kuinna fannoo sia anufanoo minara kinna firaqoo uqanna aranaqanau.

<sup>13</sup> Mifa irirana faqaa fasiqauqa naroo faqa anireeqa kuinna faqa auqaaninna ainainara qimamiqau. Kinna fannoo irirana faqaasa iramiriseenoo misa qimamundeemmasee nari sandufaki ainaini maruna faqa faiqi anaasee ooqu marirana faqa andeeqanau. <sup>14</sup> Mi fasiqausa nuqu maaqimminoo marinau. Kareesanafa faqa Seetaraafa faqa Atmataafa faqa Tarasisaafa faqa Meeresafa faqa Maraseenafa faqa Meemukanafa faqa mariqau. Misauqa qisauku dinni taikasee dinni oonu qaaraqanda marasee 7 nikiuqa fasiqauqa Peereesia maqa maaqaki faqa Midia maqa maaqaki faqa aiqama kinna rakisi maru maqa maaqaanaki misa uriqarara kaammanna mariqau.

<sup>15</sup> Mifa mi fasiqausa maaqi qimasee qimanniminu. Qinee kinna Seerkisisasa eeqa maaqaki ainainimaru faiqisa niqaafanaqa oonu kuinna Wasti nammarina qimamifanoo qinee qimamianna ainainausa auqaanifee qiafananoo mifa qini ufa rukioofanoo qirana qanau. Sandufa fannoo minara naqaa fee qidanoo fee. Innisaimbaqa kuinna naqaa feemma amaqaanauree.

<sup>16</sup> Meemukanafa kinna nari oofisaa faqa maaqi qimasee qimanniminu. Rakisirafa anee iria, kuinna Wasti nammarifa sia anikai fau mandaikamma amaqaanoo fau. Mifa aiqama uriqarara fasiqauqa faqa aiqama ani maqa maaqaki maria fasiqausa faqa



mandaikamma nimaqeenoo. <sup>17</sup> Qusasaa uqanna aiqama anaaseeuqa anee rakisi marianna maqa maaqanaki mariasa misa kuinna mi oosanna auqainara irifaranoo. Iriseeqa misa maaqi qifaranoo, kinna Seerkisisafa kuinna Wasti nammarifa oonu mina qafaani-feera qufanoo kuinna fannoo kinna ufa rukiasee sia finau. Miqi kai iqa anaaseeuqa faqa nari nifaaqmaaka ufa rukieefaranoo. <sup>18</sup> Mi faasanna kai uriqarara fasiqauqa Peereesia maqa maaqaki faqa Midia maqa maaqaki faqa marusa ninaaqmaaka kuinna mi oosanna auqoo ufana irisee misa mi ainannara nari nifaaqmaaka qimannimisee mi anaseesa moomoo mandoosana faqa mandufa faqa qifaranoo.

<sup>19</sup> Rakisirafa anee irinanoo amiqinana, anee moo ufa maaqi qimasee faiqi anaasee iannai uqaa. Wasti nammarifa sia kaifaa ani ani qafaani. Mi ufana Peereesia maqa maaqakinaasa faqa Midia maqa maaqakinaasa sandufa mari papiqanaki akara ruqa. Akara rumasaifanoo mi sandufafa sia amana taikaannoo. Minara anee Wasti nammarina mara aqusee moo amiqira manaaqa mara uqasainanoo mifa kuinna mariani. <sup>20</sup> Mikari ani mi ufafa aiqama anee rakisi marianna maqa maaqausaki daraani mafinaqa aiqama anaaseeuqa nari nifaaqmaaka nuqu faqaasa faqa nuqu siaisa faqa misa ufa amiqimmasee irifaranoo.

<sup>21</sup> Kinna nari uriqarara fasiqauqa faqa misa mi ufanara nidufanoo kinna fannoo Meemukanafa gundee inau. <sup>22</sup> Kinna fannoo nari rakisi maru maqa maaqausakiaqa papiqa quqasoofanoo fifainin角度, mifa aiqamausa nari ufakiqari papiqa akara ruma nimaqanau. Akara ruma nimaqaseenoo mifa maaqi qin角度, faiqi fannoo kai nari faiqi anaasee rakisiannoo.

## 2

### *Eestaafa nammarifa kuinnaikin角度.*

<sup>1</sup> Mikari kinna aranaqarafa kaqikaagoo taikoofanoo mifa kaifaa Wasti nammarifa mandaikamma amaqqoo oosannara oonu mafi irin角度. Iriseenoo mifa Wasti nammarina aiqamasainanoo mifa sia kaifaa kuinna mariannoo fee qu ufanara oonumafi irin角度. <sup>2</sup> Akaqa fasiqauqa mina amiqira irirana amimarusa mina aqa ooqufaageeidaqa maaqi qimasee mina qimamiqau, rakisirafa anee akaqa amiqira manaaqauqa sia faiqi faqa faiqama qaasara randaannee qiqau. <sup>3</sup> Anee rakisi marianna maqa maaqanakinna fasiqauqa mara uqasainaga misa amiqira manaaqauqa sia faiqi faqa faiqama qaasa nifiqamaree kaammanna uriqarara taunna Susaa maqusaki minisee anee manaaqauqa suqu uqee marianna maaqanaki misauqa mini uqaqa. Uqasaifanoo Eekaifa ani ainainira faiqi ani anaqqmaakasaa rakisi marifa mifa misasaa rakisiani. Rakisi marinaqa anaaseeuqa misa fadameena akunnimaqaseeqa misa nifaaqa auqusaifaqa misa kaaqa amiqirausa uqanna mariaqa. <sup>4</sup> Marifana anee mi manaaqausa kinaana moodaa ani aidi marinnana mareeqee uqasainanoo mifa kuinnaika mafinanoo kuinna Wasti nammarina amaqa maqaani. Miqi qufanoo kinna fannoo iriseenoo mi ufanara eedoo qimaseenoo afaqanau.

<sup>5</sup> Susaa maqusaki Yuda maqanna fasiqa moo marin角度, minauqu Moodeekaifa marina mina akoona auqu Yairafa marina. Yairafa Kisaana amaaku Simeena anaqi Beensamina atikinaafa marina. <sup>6</sup> Ooqai Babiroonnia maqannaasa kinna Neebukat-neesafa Yuda maqannaasa kinna Yeeoiakina faqa Yuda maqannaasa akaqausa faqa nifiqeenoo Babiroonnia maqusai mariaqeera fin角度. Mifa Moodeekaina aiku asauku faqa nifiqoo faqa misa faqa fiqau. <sup>7</sup> Moodeekaifa moo manaaqa rakisi maruna minauqu Eestaa nammarifa marina. Minauqu Heeburu ufakiqari Adasane qimariqau. Eesta nammarifa Moodeekaina akoona akaqa araamuna marina. Mina akoofa nari anaqa faqa kuqufufanoo Moodeekaifa Eestaa nammarina maraseenoo nari faiqiara fooraa rakisi marina. Rakisi marufanoo Eestaa nammarifa kaaqa amiqira manaaqa uqanna findifi marufaqa qafoofoanoo amiqirafa uqanna marina.

<sup>8</sup> Kinna Seerkisisafa nari oofisauqara moomoo amiqira manaaqauqa nifiqamaree Susaa maqusai aniaqee qimasee ufa quqanau. Ufa uqasoofaqa misa manaaqauqa nifiqee anidaqa misa Eestaa nammarina faqa aqi qee aniqau. Miniseeqa misa Eestaa nammarina kinna uqusaki manaaqauqa maru maaqanaki uqaqa. Uqasoofanoo Eekaifa mi manaaqausasaa rakisi marina. <sup>9</sup> Eekaifa Eesta nammarina qafoofoanoo amiqira manaaqa marufanoo minara aidi marina. Aidufanoo mifa kai kaqi ufanoo Eestaa nammarifa afaqa auquaninna fadameena mainainausa faqa oosana oosana amiqira narana faqa aminau. Amiseenoo mifa kinna maaqaki marusara Eesta nammarinasaa amiqimmasee rakisiaqee qimaseenoo mara uqanau.

<sup>10</sup> Indaaruu Moodeekaifa Eesta nammarina qimamin角度, anee sia aneenara Yuda maqanna manaaqa maridee qimasee koorooianne qu ufana Eesta nammarifa nari rakisi maru akoona mi ufana afaqeenoo sia qimamin角度. <sup>11</sup> Aiqaqa faasaana Moodeekaifa

anaaseeuqa maaqa maru uqusana kooqindanai oonuree aniree inoo nimirinau. Mifa Eesta nammarifa naqaa fee masee marinaqee irianauree misa Eesta nammarina naqi feemma amaqaifaqee irianauree qimasaidanoo oonuree aniree imarinau.

<sup>12</sup> Moodaa aukwana aundurai misa manaaqauqa rakisi marufaqa amiqiraua uqanna kambiqee mariqau. Kambiqee marufaqa misa qisauku dinni taikasee dinni oonu moodaa marasee 6 uqoonaki misa meea saqari anoonnai auquqoo fadameena amiqira afundi maruna mi manaaqausa nifaaqai akunnimaqee mariqau. Akunnimaqasee moo 6 uqoonaki misa fadameena faqa ainoo faqa amiqira afundi maruna akunnimaqee mariqau. Miqimmasee inaaqianna misa aiqama manaaqauqa moodaa moodaa nifiqa maraida kinna Seerkisisafa marunnai fimariqau. <sup>13</sup> Manaaqa moo fannoo kinna maaqai fuani qimaseenoo nari aidiranasaa afaaqa auqu mareenoo fimirinau. <sup>14</sup> Manaaqa fannoo eendi marufanoo kinna marunnai oonu mariinoo iaqee marinau. Iaqafoofaqa kananaana mina afiqamaree anaaseeuqa maaqa mooki munu Saskasana asaukuki uqaqau. Mi moodaa fasiqaa kai kinna inaaqianna anaaseeuqasaa rakisi marinau, rakisi marufaqa mi anaaseesa sia kaifaa kinna oonu qafee mariqau. Kinna fannoo moonara aidinanoo mina auquramasee aarainanoo mifa amana fuannoo, sia moo aana maridanoo.

<sup>15</sup> Eesta nammarifa kinna qafaaninna faasaanafa aniranau. Eesta nammarifa Mood-eekaina akoona akaqa Abiairana araamuna marufanoo Moodeekaifa Eesta nammarina maraseenoo nari araamunara foora rakisi marinau. Rakisi marufaqa aiqama fasiqauqa Eesta nammarifa qafee marufanoo kaaqa uqanna minara nidi marinau. Mikari Eesta nammarifa kinna qafarara finoo sia nari aidiranasaa qamunna afisinau. Manaaqauqa rakisirafa Eekaifa qimamundeemasee qamunna afisinau. <sup>16</sup> Mikari Seerkisisafa qisauku dinni taikasee dinni oonu qaara marasee 7 aukuanaki kinna marinau. Mi aukuananaki qisakuqara taikasee 10 uqoona misa auquree Teebeeta uqoonafee qimariqau. Mi uqoonanaki misa Eesta nammarina afiqee kinna marunnai fiqau.

<sup>17</sup> Munusoofanoo kinna fannoo firaqoo uqanna Eesta nammarinara aidinau. Mifa sia akaqa manaaqauqara aidi marundeemaseenoo Eesta nammarinara aidinau. Mifa Eesta nammarina qafoofanoo akaqa manaaqauqa urinnaqaramaseenoo kaaqa amiqirafa uqanna marinau. Sia moo manaaqa fannoo Eesta nammarifa kinna aqaararana amundee iannoo. Minara kinna fannoo mina akiqiki kinna qafee afisu amqanau. Afisu amaqafoofanoo Eesta nammarifa Wasti nammarina amaaqa maqaseenoo kuinnaikinau. <sup>18</sup> Kinna fannoo Eesta nammarinara asaidanoo fira oomaqa sakaseenoo nanau. Mifa aiqama uriqarara fasiqauqa faqa kiapausa faqa naarooqaqa mi fira oomaqanaki aniqau. Aniroofanoo mifa qinau aiqama fasiqa anaasee qini maqa maaqaki mariasa misa maa faasaana idooaidaqa. Miqi qimaseenoo kinna fannoo moomoo amiqira ainaina faiqi anaasee niminau.

*Moodeekaifa kinna dadaaqufanoo mifa sia kuqinau.*

<sup>19</sup> Mikari kai kinna fannoo Moodeekaina mara uqasoofanoo mina maaqasaa rakisira fasiqai kinna. <sup>20</sup> Ooqai Moodeekaifa Eesta nammarinaa qimaminau, anee sia aneennara Yuda maqannaa manaaqa maridee qimasee faiqi qimannimia. Miqi qimaqoona Eesta nammarifa mi ufana afaqanau. Mina oosana mifa aiqama kari Moodeekaina maaqaki maridanoo mina ufa afaqee marinau.

<sup>21</sup> Mikari Moodeekaifa kinna Seerkisisana saika marooqaqa qaara fasiqa qara kinnara aanoo qimasee miqanda mina kuqa arirara ufa tipundaari mariqau. Mi fasiqa qanda nuqa Biktanafa faqa Teereesaafa faqa marinau. Mi fasiqa qanda kinna faiqee maru maaqana kooqiki rakisimaru qanda mariqau. <sup>22</sup> Moodeekaifa miqanda ufa iriseenoo mifa oonu kinna Eesta nammarina qimaminau. Qimamufnnoo Eesta nammarifa Moodeekaina faqa mi fasiqaqanda faqa ufa iruna kinna qimaminau. <sup>23</sup> Misa mi ufana oosana randaseeqa iriseeqa mi ufanara kuqaa fee qiqau. Kuqaa fee qimaseeqa misa mi fasiqaqanda saqarisaa dirisoofaqa kuqiqau. Kuqufufanoo kinna fannoo nari oofisaauqa qimannimino qinau, mi ainainafa kambiqaina innisaimbaqa kaammanna papiqiki akara rua qufaqa misa miqimmiqau.

### 3

*Amannafa Yuda maqannaasa naru taikarara ufa rumbanau.*

<sup>1</sup> Kaqikaqoo marinoo kinna Seerkisisafa moo fasiqa mina auqu Amaannana mara uqasoofanoo mifa uriqarara kaammanna marinau. Amannafa Hammeedatana amaaaku Akakana anaiqi marinau. <sup>2</sup> Kinna fannoo aiqama kiapausara Amaannanara niqoori saunu arasee mina fira auqu amiaqee qufaqa misa aiqamausa kinna qundee ufanoo Moodeekaifa kai sia miqinau. Moodeekaifa Amannanara aqoori saunu arara akooqanau.

<sup>3</sup> Inaagianna akaqa kiapausa mina qafamasee mina iramiriga qiqau anee nanaree kinna ufamau sia finanee. <sup>4</sup> Moomoo kari Moodeekaina mi oosannanara qimami mariqau. Miqi marufanoo Moodeekaifa misa ufa irirara akooqanau. Miqufanoo Moodeekaifa misa qimannimino qinau, qinee Yuda maqannaasa maridaqa minara qinee Amannanara sia qigoori saunu araidaqa. Miqi qufaqa kiapausa Moodeekaifa qu ufana Amannana qimamiqau. Misa Moodeekaina kaqi mi oosanna maree marinanoo Amannafa qafamasee arana qaannoo fee sia fee arana qaannoo fee qimasee qafee mariqau.

<sup>5</sup> Amannafa qaqfoofanoo Moodeekaifa sia minara aqoori saunu araseenoo mina amooqinai, miqufanoo mifa minara firaqoo aranaqanau. <sup>6</sup> Miqi marufanoo mifa mina paqurimmaseenoo qafooqanoo Moodeekaifa Yuda maqannaasi fasiqa marunara mifa Moodeekaina mandaikamma amaqaqara irinau. Sia Moodeekaina kai fau miqinai. Amannafa Yuda maqannaasa Peereesia maqa maaqaki marusa aiqama naru taikarara oonu mafi irinau.

<sup>7</sup> Qisauqara taikasee qikunni ooqu qaara marasee 12 aukuanaki Seerkisisafa kinna marinau. Indaaruga uqoona auqu nisaanna fee qimarunasaa Amannafa purimma fee qimaru sararana masee qafaqee qinai. Ya uqoonnaki fee ya faasaanee Yuda maqannaasi kuridi nimaqara amiqira faasaana mariannoo fee. Miqi qufaqa misa sarara masee maaqimmasee paquriqau. Adara 12 uqoona fee qimaru uqoonnaki 13 faasaana Amannafa misa kuridi nimaqaannoo.

<sup>8</sup> Amnafa oonureenoo rakisirana qimaminoo qinai. Aiqama anee rakisi marianna maqa maaqaki maria fasiqa anaaseesa akaqausa sia maaqoo mariasa naanna raidaqa, misa mooka uqanna midammia. Minara anee misa afu kai niqafee marinaqa marifanoo mifa sia ani faqa ani maqa maaqa faqa dadaqiannoo. <sup>9</sup> Minara rakisirafa ani aidinana anee aiqama faiqi anaaseera qinaqa mi fasiqa anaaseesa kuqa naruaqa. Anee miqinaqa qinee maqee anira kuqaa idaqa qinee siruaa munnimma moomoo uqanna 50 mirioonna anee munnimma afeedi marianna maaqanaki uqaisaanaura. Miqimmaseenana anee minannai kaamaanna saika mareenaranoo.

<sup>10</sup> Kinna fannoo nari sandufauqa qimasainnana afeekaikiani feera mina rinnasaa mina akara maridanoo. Kinna fannoo mi ufana iriseenoo asaukukinaa rinna radukuseenoo Amannana Ammeedatana amaaku Akakana atikinaana Yuda maqannaasa namuqaa aminai. <sup>11</sup> Amiseenoo kinna fannoo Amannana maaqi qimasee qimaminai sia munnimara iria, anee nana ainainee maa fasiqa anaaseesaki auqaqaree iridane kaqi auqaa.

<sup>12</sup> Indaaruga uqoona 13 faasaana Amannafa kinna kuskusauqa aiqama naarooqaaqaa aniqau. Aniroofanoo mifa nari ufauqa qimanniminaqa akara ruaqera naarooqaaqaa aniqau. Misa anireeqa aiqama moodaa moodaa maqannaasa nari ufakiqari akara ruma nimaqaaqau. Miqimmasoofanoo mifa mi papiqana aiqama rakisirausa faqa aiqama kaammnauqa faqa aiqama kiapausa faqa nimaqanau. Aiqama papiqa Seerkisisana rinna saaqaraa akara marinau. Kinna fannoo nari uqanna papiqa akarariifoo qirana koorooinai. <sup>13</sup> Pasa maraqa nu fasiqausa mi pasausa mara maree kinna maqa maaqakinai aiqama maqannaasi rakisirausa nimaqau. Aiqama pasauqa kuaqa maaqi qinoo marinau Adara uqoona 13 faasaana innee Yuda maqannaasa aiqama kuqa naruaqee qinoo marinau. Kumaara fasiqa anaasee faqa asooqauqa faqa faiqi anaaiqaaqaa faqa aiqama mi faasaana kai naru taikaaqa qiqau. Sia misara qimudaoo qiaqa aiqama naru taikaseeqa misa ainainauqa faqa maraqa. <sup>14</sup> Rakisirausa aiqama oosana oosana fasiqa anaasee aiqama maqa maaqaindari ani mariasa nifusaa mi pasana asaana ruaqa. Asaana rifaqa iriseeqa mi faasaanafa kambiqainqa misa Yuda maqannaasa narirara deedaqiaqa.

<sup>15</sup> Pasa maraqa nu fasiqausa misa kaunna qimasee pasa maree aiqamai fifainiqau. Misa maa ufana faqa Susaa maqusaki faiqi anaasee iriaqera qimannimiqau. Kinna faqa Amannafa faqa miqanda kai nimuqusa amiqi marufaqa ooqu faaqee maridaqa uainna nee mariqau. Miqi marufaqa Susaa maqusakinaa fasiqa anaasee mi ufana irisee tautufanoo misa irirafa furufara uqanna minai.

## 4

*Moodeekaifa Esta nammarinara nari dadaaqianifeera qimaminai.*

<sup>1</sup> Moodeekaifa mi ufana iriseenoo firaqoo qimudaoo qinai. Mina amuqusa ummaara uqanna roofanoo nari qamunna rakeekaammeeqee aqinai. Miqimmaseenoo mifa soofaara qamunnanda rumbaseenoo akiiqaki danda afaqa teeqinai. Mifa miqimmaseenoo maqusaki oorureenoo firaqoo faqa rumasee ikiraqanau. <sup>2</sup> Mifa kinna maaqaki kooqiki oonureenoo mifa sia maaqaki keeqanau. Faiqi kinna maaqaaqki

keeqarree qinausa sia soofaara qamunna afisu mareeqa keeqeefaranoo. <sup>3</sup> Mikari misa kinna ufa aiqama maqa maaqaki qimannimufaqa Yuda maqannaasa irufanoo naundura ummaara roofaqa firaqoo faaqa riqau. Misa sia narana naqau qimudao qira idi ramasaídaqa iki faafau qimariqau. Yuda maqannaasa moomoo soofaara qamunna rakeekaa irana afisuseeqa dandaki noorindari aqufiqa mariqau.

<sup>4</sup> Eesta nammarina ainainira manaqauqa faqa minasaa rakisi maru fasiqausa faqa Moodeekaifa auqoo oosanara qimamufanoo Eesta nammarina amuqusa firaqoo uqanna ummaara ranau. Mifa Moodeekaifa qamunna anaqirana raipaqusee amiqirana afisuani feera amaqanau. Amaqasoofanoo Moodeekaifa akoo marara qanau. <sup>5</sup> Miqufanoo Eesta nammarifa Atakana aaranau. Atakafa manaqauqasaa rakisirafa marufanoo kinna fannoo Eesta nammarina ainainiani feera utaaqama amaqanau. Miqufanoo Eesta nammarifa Moodeekaina oosana paquriani feera nana oosanaree mifa mi ainaina augeenoo fee qimaseenoo Akatana aiqanau.

<sup>6</sup> Akatafa suqira maqusaki keeqafufanoo kinna firaq maaqa kooqiki oonu Modekaina paqurinau. <sup>7</sup> Oonu paqurimma soofanoo Moodeekaifa aiqama ainaina nariki kambiqoonara Akatana qimaminau. Amanafa faiqi Yuda maqannaqa aiqama kuqa naru-saifanoo mina akiiqara kinna fannoo munnimma uqeemaru maaqanaki mifa naqumma munnimnee uqaaninnanara faqa qinau. <sup>8</sup> Moodeekaifa Amannana ufa maru pasausa kinaana moo maraseenoo Akatana aminau. Mi pasanaki faiqi anaasee Yuda maqannaasa aiqama kuqa naruqee qinoo marinau. Moodeekaifa Akatanara mi pasana mara maree Eesta nammarifinnai munusee aiqama ainaina kambiqaaninnara qimamianne qinau. Akatafa Eesta nammarina qimaminanoo Eesta nammarifa kinninnai onureenoo mifa Yuda maqannaara qimudao qimasee amuqusiani feera qimaminau.

<sup>9</sup> Miqi qufanoo Akatafa oonu Eesta nammarina qimaminau. <sup>10</sup> Qimamufanoo Eesta nammarifa Moodeekaina qimamiani feera moo ufa Akatanasaa uqanau. <sup>11</sup> Mifa maaqi qinau sia amana qinee oonu kinna qafaanauranoo. Kinna fannoo faiqi moo aarainanoo mifa amana mina maaqaki keeqaannoo. Sia riri aarainanoo nari iriranasaa keeqainnana misa kuqamma arifaranoo. Moodaa aana kai mi sandufana aiaaqararafa maridanoo. Faiqi moo fannoo kinna innannai kaqi fifau onurainanoo kinna fannoo nari kooraa saununnai mina afaaqai mundusainafa mifa sia kuqanoo. Aiqama kinna ainainira faiqiuqa faqa kinna rakisi maru maqa maaqanaki maru fasiqausa aiqama mi sandufanara iridaqa. Minara moodaa uqoona taikarara imarufanoo kinna fannoo sia qini daaranau.

<sup>12-13</sup> Moodeekaifa Eesta nammarina ufa qimamufanoo iriseenoo mifa nari maaqi qimaseenoo qimaminau. Kuqaa anee kinna maaqaki mariananoo anee sia Yuda maqannaasakiqari aneennara kinna maaqaki marunannara sia ummaraki kuquanaree qimasee iria. <sup>14</sup> Anee miqinna kari aneenna oo qumarainanoo akaqa ainainana innisaimbaqa dadaaqirafa kambiqaanoo. Anee kuqinaqa ani ainaina aiqama kuqu taikeefaranoo. Minara innisaimbaqa sia iridaqa. Manda aukuna innisaimbaqa Yuda maqannaasa dadaaqirara anee kuinnaika mafuananoo.

<sup>15</sup> Eesta nammarifa Moodeekaifunnai kaifaa maaqi qimasee ufa uqanau. <sup>16</sup> Anee oonu Susaa maqusaki aiqama Yuda maqannaasa suqu uqasee qimannimia innee qaarammoo faasaana faqa eendaki faqa narana faqa nammarifaqa auramasee sia naaqa. Kaifa qinee faqa eeqa ainainira manaqauqa faqa miqi kai iqa narana faqa nammari faqa auramasee sia naanauranoo. Miqimmaseeqa inaaqianna qinee kinna innai fuanauranoo. Kaqi qinee sandufa rukiaanauranoo. Qinee miqimmasee kuquananoo sia ufa mariannoo kaqi qinee kuquanaranoo.

<sup>17</sup> Moodeekaifa Eesta nammarina ufa iriseenoo mifa kinna maaqa kooqi uqaseenoo onureenoo Eesta nammarifa qimamundee masenoo auqanau.

## 5

*Eesta nammarifa kinna faqa Amannana faqa firaq oomaqaki aniaqera naaranau.*

<sup>1</sup> Eesta nammarifa qaarammoo faasaana narana auranau. Mifa qaarammoo faasaanasaa kuinna qamunna afisu mareenoo kinna maaqa maru uqusanaki keeqanau. Kinna firaq oosiranaki maruna aqa oorufinau. Kinna fannoo nari siaqasaa ooqu faaqeeidanoo kooqinni afu maqanau. <sup>2</sup> Kinna fannoo Eesta nammarifa maqusai kikiqinoo marufanoo qafoofanoo mina amuqusa fannoo Eesta nammarinara amiqufanoo mifa kooraa saunu uqee mariiu asaukuna afaaqai mundinau. Miqufanoo Eesta nammarifa mina aqa anireenoo mi saununa ati auqanau.

<sup>3</sup> Kinna fannoo qinau, kuinna Eesta nammari ani nanaree aididanoo fee. Qinee ani eeqa firaq maaqa maaqa dinni ati ani amianeera aidi marinaqa qinee ani amianaara.

<sup>4</sup> Miqi qufanoo Eesta nammarifa maaqi qinaw. Rakisirafa amanee anee faqa Amannafa faqa maqee eendaki firaa oomaqaki anifaree.

<sup>5</sup> Miqi qufanoo kinna fannoo mi ufanara eedoo qimaseenoo mifa Amannanara kai kaqi anirainafa anindiri Eesta nammarifinnai fuanee qinaw. Miqi qimaseeqa kinna faqa Amannafa faqa miqanda Eesta nammarina oomaqai fiqau. <sup>6</sup> Misa oonu maridaqa uainna nee marufanoo kinna fannoo Eesta nammarina iramirinoow qinaw. Anee nana ainainaree aidinnanara qinaqa amia. Aiqama ainainara anee irainnanara qinee eedoo qianaura. Anee qini maqa maaqa dinni ati mararee qinaqa qinee ani amianana anee rakisinnaranoo.

<sup>7</sup> Kinna fannoo miqi qufanoo Eesta nammarifa kinna nari qimaminoo qinaw, qinee maaqi qimasee ani iramiridaqa. <sup>8</sup> Anee qiniara firaaqoo asasinana qini irara ufara faqa asainaqa duna qinee moo oomaqa deedaqamma saanaqa anee faqa Amanafa faqa ani naaqa. Nee marifaqa miqoo qinee eeqa didirana ani qimamianauranoo.

*Amannafa Moodeekaina arira ufa tipundaarinaw.*

<sup>9</sup> Amannafa narana neeneeuqooqari amuqusa amiqufanoo firaaqoo asasinaw. Miqimaseenoo oonuree qafoofanoo Moodeekaifa kinna maaqa kooqi aaga oofufaaqee marinau. Moodeekaifa maridanoo Amannana qafamaseenoo sia findifi amandanaw. Miqufanoo Amannana firaaqoo arana qanaw. <sup>10</sup> Amannana aranaqarafa suka uqanna goofanoo mifa nari amuqusa muqufiseenoo mifa sia moo ainana auqanaw.

Mifa nari maaqai oonureenoo nari aqoondiuga naarooqaaq aniroofanoo nari anaqa Seereesa nammarina misa faqa mariani feera qimaminaw. <sup>11</sup> Misa maaqaki aniroofanoo Amannafa misa nifusaa nari auqu uqeeranaw. Mifa nari munnimma moomoo marunara faqa umiasana faqa mina faiqi namu akoonaiqiuqa moomoo marunara faqa qimannim-inaw. Kinna fannoo mina firaa saika faqa firaaq auqu faqa amiqoonara qimannim-inaw. Qimannimufaqa kinna oofisaauqa akaqausa mina ameemaana mariqau. <sup>12</sup> Amannafa kaifaa maaqi qinaw, kinna Eesta nammarifa moo firaa oomaqa qinindi faqa kinnaindi faqa kai suqanaw. Mifa sia moo fasiqa aaranaw. Mifa maaqi qinaw duna maaqandara kaifaa mina faqa oonu narana naaqee qinoo. <sup>13</sup> Qinee Moodeekaina qafauanoo mifa Yuda maqanna fasiqa maridanoo. Mifa kinna kooqiki oofufaaqee marifanoo qini qimuqusa ummaara raifaqa qinee mi amiqira ainainausara fifau ainainee qimasee iridaqa.

<sup>14</sup> Seereesa nammarifa Amannana anaqa mifa nari aqoondiuga faqa misa maaqi qimasee mina qimamiqau. Anee sia minara iria. Faiqi qimannimifaqa misa kisaqa saqari 26 mita amana rakiqasee duna kananaana oonu kinna iramirisee Moodeekaina diriaqa. Anee miqimma sainanoo ani amuqusa amiqinana anee oonu narana naa. Amannafa mi ufanara asammaseenoo faiqi qimannimufaqa misa Moodeekaina dirifandinn a saqarina rakiaqau.

## 6

*Kinna fannoo Moodeekaina uriqarara auqu aminaw.*

<sup>1</sup> Miqo eendanaki kinna fannoo sia faiqanaw. Minara mifa mina maqa maaqaki aiqama ainaina kambiqoonara akara rumaqoo papiqanara maree minisaifaqa misa minaki akara ufa qafaaqee qinaw. <sup>2</sup> Minisoofaqa misa Biktana faqa Teereesaana faqa ufa asaana rumasee qafooqaaq miqanda kinna maaqa oosiranauqaki rakisi mariqau. Mi fasiqa qanda kinna kuqa arira aanara randee mariqau. Rantee marufanoo Moodeekaifa miqanda kukeeqara irirana qafamaseenoo miqanda koota niminaw.

<sup>3</sup> Minara rakisirafa qinaw, innisaimbaqa nanee moo amiqira ainainannai Moodeekaifa auqai oosana akiqara amianauree. Miqi qufaqa faiqi maaqi qimasee mina qimamiqau, innisaimbaqa sia moo ainaina mina amia.

<sup>4</sup> Kinna fannoo misa iramirinoow qinaw, qini oofisaauqa mi maqanaki mariiaafanoo fee sia fee. Maqee Amannafa kinna irara anidanoo, mifa Moodeekaina saqari rakiqasee deedaqamma qaanasaa diriaqee qimamirara anidanoo. Minara Amannafa nari uqanna kinna maaqa mari uqusanaki keeqarara anidanoo.

<sup>5</sup> Ainainira faiqiuqa mina qafamaseeqa kinna qimamiqa qiqau, Amannafa ani maaqai maridanoo ani afeesidanoo. Mifa ani qafarara maridanoo ani afeesidanoo. Miqi qufanoo kinna fannoo qinaw mina afiqee maaqaki uruqee qinaw.

<sup>6</sup> Amannafa maaqaki ooruroofanoo kinna fannoo qimaminoo qinaw, qinee faiqi moo firaa auqu amirara iridaqa. Qinee sia iridaqa nanee moo amiqira ainainannai fee mina andeeqa amaqaanauree. Anee iria, qinee naqaa fee inauree qufanoo Amannafa nariara maaqi qimasee oonu mafi irinaw. Aqbee kinna fannoo yana miqimma amaqraree qidanoo fee sia moo fannoo maridanoo qinee kai maridaqa. <sup>7-8</sup> Amannafa

miqi qimiriseenoo kaifaa rakisirana narí maaqi qimasee qimaminau. Aneenna afisi marianna qamunnana minisee mi fasiqana afisu amaqa. Anee qoosaa uqemaria sandiriqana faqa bakarainna faqa amiqimmasee afaaqa auqusee aneenna qoosaa uqaa. Miqimmaseenana kaifaa qoosa akiqqa faqa afaaqa auqusainanoo mifa kinna qoosa fee qirana koorooiani. <sup>9</sup> Anee aneenna oofisaauqa kinaana moo misa uriqararana mara uqasainanoo mifa ani qamunnannai mina afaaqa auquani. Miqimma sainanoo mi fasiqafa qoosaa oogu marifinanoo oofisaa fannoo mina afiqeenoo firaau suqira maqusaki fuani. Afiqee fidanoo mi oofisaafa maaqi qimasee nammeera qiani, maa fasiqana qafaqa kinna fannoo mina firaau auqu amiseenoo mina amiqimma amaqaenoo.

<sup>10</sup> Kinna fannoo mi ufana iriseenoo Amannana qimaminoo qinau anee kai kaqi oonu qamunna faqa qoosa faqa maraseenana qini saika faiqi Moodeekaina Yuda maqanna fasiqa firaau auqu amia mi fasiqafa qini maaqa kooqiki ainaini marifa maridanoo. Aiqama ainaina maqee aneenna qiannandee masee auqa.

<sup>11</sup> Miqi qufanoo Amannafa iriseenoo qamunna faqa qoosa faqa maraseenoo Moodeekaina afaaqa auqinau. Auqusoofanoo Moodeekaifa qoosaa oogu marifufanoo Amannafa qafamaseenoo suqi maru maqusanai afiqee finau. Afiqee fidanoo Amannafa nammeera qimasee maaqi qimasee faiqi anaasee qimanniminu. Maa fasiqana qafaqa kinna fannoo firaau auqu amiseenoo amiqimma amaqaenoo.

<sup>12</sup> Miqi qimasooofanoo Moodeekaifa kaifaa anirandee kinna kooqinni finau. Fufanoo Amannafa asaairana maraseenoo aundura ummaararofanoo mifa oorisa itita mareenoo kaifaa anirandee narí maaqai finau. <sup>13</sup> Oonureenoo mifa moo anaasee faqa narí aqoondiuqa faqa aiqama ainaina minaki kambiqoonara qimanniminu. Mi anaaseefa faqa mi aqoondisa faqa irirana firaana faqaasa maridaqa misa mina maaqi qimasee qimamiqau. Maqee ani afeeka faqa ani auqu faqa quminanoo Moodeekaifa ani uriaaqaranoo. Mifa Yuda maqannaafa marinara anee sia mina aana titara aana maridanoo, anee ummaara kai mareennaranoo. <sup>14</sup> Misa ufa qida marufanoo kinna ainainira faiqiuqa aniraqau. Misa Amannana kai kaqi afiqee Esta nammarina oomaqai firara aniqau.

## 7

<sup>1-2</sup> Minara kinna faqa Amannafa faqa kaifaa oonu Estaa nammarina faqa narana naqau. Nasmaseeqa misa uainna nammari naida marufanoo kinna fannoo Estaa nammarina iramirinoo qinau, kuinna Esta nammari ani nana ainainaree aididanoo fee anee qinaqa qinee ani amianauranoo. Ani aidinaqa qinee eeqa maqa maaqa faqa ani amianauranoo.

<sup>3</sup> Qufanoo kuinna Estaa nammarifa qimaminoo qinau. Rakisirafa anee kuqaa anee qiniara aidinana qini amiqimma qimaqararee qimaseenana kaqi miqia. Qinee ikoo eeqa faiqi anaasee faqa kuqirara qaidanoo. <sup>4</sup> Faiqi moo fannoo qini faqa qini faiqi anaqasee faqa kuqa nariraree qimasee doo ufa rumbaqaifanoo maridanoo. Misa maasa aiqama mandaikamma qimaqararee qidaqa. Misa maasa mandaikamma qimaqasee rumbara saika maasa qimisee fifau ainainira fasiqa anaaseekiaqee qifaqa qinee sia ufa qianauranoo. Qinee ikoo ani ummaara amirara qaiqaqa misa maasa taikararee qianara minara qinee koorooidaqa.

<sup>5</sup> Kinna Serkisifa mi ufana iriseenoo kuinna Estaa nammarina iramirinoo qinau. Ya manda fasiqafee sia miqirara rufieenoo fee, yaa fee mi fasiqafa maridanoo fee.

<sup>6</sup> Qufanoo Estaa nammarifa narí qimaminoo qinau. Qinee Amannana qidaqa. Mifa manda fasiqa maasa namuqaa maridanoo maasa darirara deedaqidanoo. Qufanoo Amannana firaqoo aindiri roofanoo rufianau. <sup>7</sup> Kinna fannoo mi ufana irufanoo arana qoofanoo uainna neneuna minniseenoo aqoosai narí afuqai ooguqinau. Ooguqufanoo Amannafa kinna ooguquna qafamasee mifa maaqi qimasee irinuu kinna fannoo qini daruannoo, qimaseenoo Amannafa maaqaki maridanoo kuinna Estaa nammarifa minara qimudaoo qimasee kinna qimaminanoo sia mina mandaikamma amaqaanifeera iree marinuu.

<sup>8</sup> Kinna fannoo qafuqaindara kaifaa oonurandee narana nee maruqoo anireenoo mifa Amannana qafuofanoo Estaa nammarifa ooguqumarifida narana nee maru qaindanasaa faiaqee ufano qafamaseenoo tautinau. Faiaqee idanoo Amannafa minara qimudaoo qianifeera iree marinuu. Ire marufanoo kinna mina qafamaseenoo faqa rumasee qinau, aqbee maa fasiqafa kuinna qini maaqaki qini qifusaa mandaikamma amaqararee qidanoo fee, qimaseenoo kinna fannoo qufaqa misa kaunna qufaqa qamunnannai Amannana akiqqa kinna fannoo (faiqi kuqa narirara rumba nimaqee marundeemasee rumba amaqaanau). <sup>9</sup> Ainainira faiqiuqa moo auqu Aboonafa maaqi qinau, iridafee Amannafa narí maaqa adeedi narí rakiaqoo pausafa mina kisaqa fannoo 20 mita

marinau. Mifa Moodeekaina minasaa diriraree qimasee rakiqanau. Kinna Moodeekaifa ooqai ani dadaqufaqa namuqaauqa sia ani kuqa ariqau. Qufanoo kinna fannoo qinai, innee Amannana nari mi pausanasaa dirisaifanoo kuquani. <sup>10</sup> Qufaqa misa Amannafa Moodeekaina diriraree qimaseenoo rakiqoo pausanasaa nari diriqau. Misa miqimmasoofanoo kinna aranaqarafa taikanau.

## 8

*Kinna fannoo Yuda maqannaasa namuqa faqa rakuqaqera qimanniminai.*

<sup>1</sup> Mi faasaana kai kinna Serkisisafa Yuda maqannaasa namuqaa Amannana maaqa faqa aiqama mina ainaina faqa kuinna Estaa nammarina aminau. Amisoofanoo inaaqianna Moodeekaifa qini moodaa fidika maridanoo qufanoo kinna fannoo Moodeekainara qufanoo aqama kari ani kinna qafee marinau. <sup>2</sup> Kinna fannoo Amannafa unnai nari rinna maraseenoo kaifaa nari asaaku amukaki uqaqoona Moodeekaina aminau. Mi rinnafa kinna nambaqa faqaafa marinau. Marufanoo Estaa nammarifa Moodeekaina mara uqasoofanoo Amannana aiqama ainainasaa rakisi marinau.

<sup>3</sup> Rakisi marufanoo inaaqianna Estaa nammarifa kinna marunnai oonureenoo mina aikuki aqufinoo maridanoo iki raqee marinau. Mifa kinna qimaminanoo mifa faiqi mi manda oosanna auqeefoora rafaqaqafu sainaqa Amannafa Akakana atikinaafa Yuda maqannaasaki auqararee qimasee ufa rumboondee sia iaqa. <sup>4</sup> Kinna fannoo nari kooraa saanu Estaa nammarinasaa mundusoofanoo findifinoo qinai.

<sup>5</sup> Rakisirafa anee qiniara aidinana qini ufa irinanoo amiqinana ufa uqasainanoo fifaininaqa misa sia Amannana Ammeedatana amaaku ufa afaqaqa. Amannafa aiqama Yuda maqannaafa fasiqa anaasee ani maqa maaqaki mariasa aiqama naru taikaqee qimaseenoo qimanniminai. <sup>6</sup> Qinee mi mandafa qini faiqi anaaseeki sia kambiqaaniffee qimasee iridaqa. Misa qini moodaa fidikaqa kuqa narusaifaqa qinee naqi fee masee amiqiqa marianauree.

<sup>7</sup> Qufanoo kinna Serkisisafa Estaa nammarina faqa Moodeekaina faqa maaqi qimasee qimanniminai. Iridaqqee qinee iriafananoo Amannafa Yuda maqannaasa mandaikamma nimaqararee qufaqa minara qinee mina saqarisaa diriseeqa mina aiqama ainaina Esta nammarina kai amiqi. <sup>8</sup> Papiqa qini duqusaa akara rumasee qini nambaqa minasaa uqaqaana mina kai sia mara aquanauranoo. Inneeqara nana ufa fee Yuda maqannaasara akara ruani qimasee kaqi akara ruaqa. Akara rumaseeqa inneeqara mi papiqanasaa qini duqu uqasee qini nambaqa faqa uqaqa.

<sup>9</sup> Misa miqimmasee Siwa uqoona 23 faasaana Moodeekaifa aiqama kinna kuskusauqa naarooafaqa aniqau. Aniroofanoo misa ufa qimannimufaqa misa mi ufausa papiqaki akara riqau. Misa mi pasana Yuda maqannaasa uriqararusa faqa kiapausa faqa aiqama oofisaauqa faqa 127 maaqa maaqaki marusa faqa India maqa maaqaki oosana arasee Itioopia maqa maaqai dinni ati oonuroofanoo misa akara ruma nimaqaqau. Misa mi pasana aiqama mi maqa maaqausaki marusa ufakiqari faqa Yuda maqannaasa ufakiqari faqa akara riqau. <sup>10</sup> Moodeekaifa misa kinna Serkisisana auqusaa pasa akara rumasee mina nambaqa faqa mi pasanasaa uqaqaqera qimanniminai. Mi pasana maree firaree qu fasiqausa misa amiqira qoosa kinna ququsakinaana kaaqa sandee maruna maree minisee minasaa ooqu marifufaqa pasauqa maree aiqama maqusakiaqa fifainiqau.

<sup>11</sup> Pasaki maaqi qimasee akara riqau. Kinna fannoo qidanoo, Yuda maqannaasa misa aiqama maqusakiaqa mariasa misa nari faiqi anaasee namufaqa nariraree qu fasiqausa misa ruqaummafi nari faqa naruqa. Moo maqusakinaa fasiqauqee moo maqannaafa fasiqauqee misa mandaikamma nimaqararee qusa, Yuda maqannaasa aiqama ruqaummafi misa naru taikasee misa aiqama ainaina mareefaranoo. <sup>12</sup> Mi faasaana Yuda maqannaasa aiqama Peereesia maqa maaqaki mi ainainasaa auqeeferanoo. Misa 13 faasaana Adara uqoonaki auqeeferanoo. <sup>13</sup> Misa kinna maa sandufa aiqama fasiqauqa aiqama maqa maaqaki mariasa qimannimiaqa. Qimannimi marifaqa Yuda maqannaasa mi faasaanafa anirainafa nari namuqaa faqa rakirara deedaqifaranoo.

<sup>14</sup> Kinna fannoo qufaqa faiqi ufa maree fusa qoosasa ooqumari kai kaqi sandee akaqa maqusakiaqa fiqau. Susa firaa maqusaki mi ufana oosana arasoofanoo aiqamai fifaininau.

<sup>15</sup> Misa kinna qamunna eekara faqa panoona arirana faqa Moodeekaina afisu amaqaqau. Afisu amaqqasee dirindaasi arira qamunna moo marasee mina aku amaqaqau. Aku amaqqasee inaaqianna misa kinna kooraa qafee firaana amiqira afaqa auqirana akiaaqa afisu amaqqasee afaqa auqusoofanoo mifa kinna maaqakiqari raudee maqusai ooqufinai. Ooquroofaqa Susa firaa maqusakinaa fasiqa anasee mina qafamasee firaqoo faaqaridaqa asasiqau. <sup>16</sup> Yuda maqannaasa nimuqusa amiqi uqanna ufaqa

misa nimuqusa asoosana faqa mariqau. Maridaqa misa firaauqo asasiidaqa nariara maaqi qimasee iriqau. Maas doo uriqaramafiqqa sia amana kaifaa oorudupianauranoo. <sup>17</sup> Aiqama maqa maaqaki faqa maqusaki faqa Yuda maqannaasa kinna ufa marasee moodaa faasaana utaaqamasee misa firaanarana naidaqa minara asasi mariqau. Asasi marufaqa moomoosa akaqa fasiqauqa Yuda maqannaasara rufiasee misaki ootupaqau.

## 9

*Yuda maqannaasa nari maqannaasa mandaikamma nimaqaqau.*

<sup>1</sup> Mikari Adara uqoona 13 faasaana aniroofanoo indaaruqaa kinna fannoo qinau, mi faasaana kai namuqaauqa Yuda maqannaasa mandaikamma nimaqasee naru taikkefaranoo. Miqi qufaqa Yuda maqannaasa findifufaqa misa rafaqaqafusee aiqama naru taikaqau. <sup>2</sup> Yuda maqannaasa kinna fannoo rakisi maru maqusausakiqaa faqa maqa maaqanaki marusa misa namuqaauqa misa faqa rakirara anufaqa rakirara deedaqiqau. Aiqama fasiqa anaasee aiqama tinaindaraasa Yuda maqannaasara rufiasee misaki sia moo ainaina augeefaranoo. <sup>3</sup> Aiqama maqa maaqakinaa kiapausa faqa kaammannaauqa faqa aiqama kinna ainainasaa rakisi marusa faqa Yuda maqannaasa dadaaqiqau. Misa Moodeekainara rufiasee miqiqau. <sup>4</sup> Aiqama fasiqauqa kinna rakisi-maru maqa maaqanakinaasa irufanoo kinna fannoo firaafeeqa faqa uriqarara auqu faqa Moodeekaina aminau. Misooofanoo mina afeeka aiqama kari uriqaranoo uqanna marinau.

<sup>5</sup> Marufaqa Yuda maqannaasa nari namuqaauqa nariqau. Misa kisaqa paipanannai rakidaqa nariqa namuqaauqa naru taikaqau. <sup>6</sup> Susa firaafaa maqusaki Yuda maqannaasa 500 fasiqa kuqa nariqau. <sup>7-10</sup> Amannana faiqi namu qisaukuqara taikasee 10 mariqau. Yuda maqannaasa namuqaauqa nuqu maaqimminoo maridanoo. Parasadataafa faqa Darfoonafa faqa Asbatannafa faqa Pooratanafa faqa Adarianafa faqa Aridatanafa faqa Parmastanafa faqa Arisainafa faqa Aridainafa faqa Uaisataanafa faqa minamusa ainaina kai Yuda maqannaasa sia maraqau.

<sup>11</sup> Mi faasaana kai Yuda maqannaasa naqumma fasiqa Susa maqusaki narunara kinna qimamiqau. <sup>12</sup> Marikinoo kinna fannoo kuinna Estaa nammarina qimaminau. Yuda maqannaasa 500 fasiqa Susa maqusakinaasa kuqa nariaafoo qinau. Misa Amannana faiqi namu qisaukuqara 10 faqa kuqa nariqau. Qinee iruna misa akaqa maqa maaqaki moomoo fasiqa faqa kuqa naria. Anee maqee nana ainainee akaqa ainaina mararee qinaqa, qinee amana ani amianauranoo. Esta anee nana ainainaree aidinna ainaina kaqi maraa.

<sup>13</sup> Estaa nammarifa kaifaa kinna qimaminoo qinau. Rakisirafa ani aidinana duna Susa maqusaindaraa Yuda maqannaasara qinaqa namuqaauqaki duna faqa maqee iandee kai iaqa. Misa Amannana faiqi namu qisaukuqara taikasee 10 mariasa mi faakannanasaa diriaqa.

<sup>14</sup> Doo kinna fannoo misara miqiaqee qimaseenoo mifa mi ufana Susaa maqusaindaraa fasiqauqa unnaa afeeqoofanoo fufaqa misa Amannana faiqi namu qisaukuqara taikasee 10 marusa faakana rakiqoonasa dirimarufaqa aiqama fasiqauqa qafaqau. <sup>15</sup> Adara uqoona 14 faasaanasaa Susa maqusai maru Yuda maqannaasa kaifaa ruqumma fufaqa 300 fasiqa mi maqusanaki kuqa nariqau, narusee sia misa ainainauqa maraqau.

<sup>16</sup> Yuda maqannaasa akaqa maqa maaqaki marusa misa faqa moodaanakika mafiqa afeekaika masee misa narusee misa amiqimmasee marifaranoo. Misara nikooqee maru namuqaasa 75,000 fasiqa anaasee kuqa nariqau. Narusee sia misa ainaina maraqau. <sup>17</sup> Mi rakirafa maqa maaqaki 13 faasaana Adara uqoonaki kambiqaqau. Kafa 14 faasaana misa sia nari namuqaau nariqau. Mi faasaana misa idooaidiqa firaafaa qoomaqa sakasee naidaqa firaqoo asasi mariqau.

<sup>18</sup> Misa miqi marufaqa Yuda maqannaasa Susaa maqusaki marusa misa 15 faasaanara idooaidiqa asasira faasaanee qimasee utaaqauqa. Misa namuqaauqa 13 faasaana faqa 14 faasaana faqa narusee 15 faasaana misa sia rakiqau.

<sup>19</sup> Minara kai Yuda maqannaasa kaqikaa maqusauqa uqusa sia auqiranakiaqa mariusa misa Adara uqoona 14 faasaana firaafaa oomaqa naidaqa ainaina narami naramira faasaanee qimasee utaaqauqa.

*Misa firaafaa oomaqa auqureeqa Purimma oomaqa fee qimariqau.*

<sup>20</sup> Moodeekaifa mi faasaana aiqama ainaina auqoo ainaina akara rumaseenoo Yuda maqannaasa nianai marusa faqa adeedi marusa faqa kinna Serkisisaafa rakisi nimaqee maru maqa maaqanakinai marusa nimaqanau. <sup>21</sup> Misa Adara uqoonaki 14 faasaana faqa 15 faasaana faqa aiqama aukuanaki asasira faasaana utaaqaaqee qimaseenoo qimanniminau. <sup>22</sup> Mi qaara faasaana Yuda maqannaasa nari maqannaasa niaqau. Mi



uqoonnanaki kai misa naundura ummaara reereefa faqa aiaaee qiqiufa faqa taikoofaqa Yuda maqannaasa nimuqusa amiqinau. Miqufanoo Moodeekaifa mi qaara faasaanara firaa oomaqa sakasee aqoondiufa faqa kudi fasiqauqa nimiaqeera qimanniminau.

<sup>23</sup> Miqi qimasoofaqa Yuda maqannaasa Moodeekaina ufa afaqeeqa aiqama aukuanaki mi oosannana auqaidaqa asasi mariqau. <sup>24</sup> Ooqai Amannafa Ameetadana amaaku Akaakana faiqi anaiqi maridanoo mifa Yuda maqannaasa namuqaakamma nimaqaseenoo mifa misa aiqama kuqa nariraree qimaseenoo satu sararidanoo misa narira faasaanara randee marinau. Misa Heeburu maqannaasa ufakiqari satura rarisaidanoo fee qimasee auqu ree mariqau. Amannafa aiqama Yuda maqannaasa naru taikaani qimasee ufa rumbee marinau. <sup>25</sup> Ufa rumbee marufanoo Estaa nammarifa kinna unnai oonuroofanoo kinna fannoo maaqi qimasee papiqa akara rinau. Ooqai Amannafa Yuda maqannaasa kuqa nariraree qinau, maqee nari kuqa aruaqa qufaqa misa mina diriseeqa inaaqianna mina faiqi namu faqa misa mi poosanasa kai diriqau. <sup>26</sup> Mi oosannara kai misa mi idooqara faasaana qandara maaqi qimasee auqu raqau. Purimma faasaanee qiqau. Misa purimma fee qimaru auquna oosana satu maridanoo. Misa mi oosanna auqaidaqa mi ainainausa misaki kambiqoonara oonu mafi irimariqau. Irimarufanoo Moodeekaifa misa unnai papiqa afeeqaseenoo misa mi faasaana idooaaqeera qimanniminau. <sup>27</sup> Yuda maqannaasa mina mareeqee nari faqa misa ninaiqi mara inaaqianna kambiqainausa faqa aiqama fasiqa minaki ani keeqainausa faqa sandufaika maqoofanoo marinau. Aiqama aukuanaki misa mi qaara faasaanafa aniroofaqa misa Moodeekaifa qufanoo mi ainainafa kambiqoonara oonu mafi irimariqau. <sup>28</sup> Misa maaqi qiqau aiqama Yuda maqannaasa moodaa moodaa oosana kasooaqee inaaqianna kambiqainausa faqa aiqama maqa maaqaki faqa aiqama maqusaki faqa maru fasiqa anaaseesa misa mi firaa masisa aqira faasaanara oonu mafi irisaidaqa aiqama aukuanaki miqoo kai idooaidaqa asasiyaqa.

<sup>29</sup> Kuinna Estaa nammarifa Abiaina aramuna Moodeekaisandiri miqanda Yuda maqannaqa qanda miqanda moo papiqa mi qaara faasaana masisa sararu ufana akara riqau mi oosannannai kuinna fannoo indaaruaqa papiqa Moodeekaifa nariara akara rumaqoona afeekaikinau. <sup>30</sup> Miqanda mi papiqana uqasoofanoo Peeresiaa maqa maaqaki 127 (provinsaki) Yuda maqannaasa marunakinai papiqa maaqi qimasee akara rumasoofanoo fifaininau. Inni nimuqusa ireeda marinaqa innee amiqira ooqu marirana maraqa sia rakirafa maridanoo. <sup>31</sup> Innee faqa inni ninaiqi mara kasooaqee kambiqainausa faqa innee afeekaikammasee inneeqa mariaqoo mi firaa masisa sararira faasaannana umaraqa. Innee narana aurarana faqa nimuqusa ummaarara oosana afaqararana faqa iki raqarana faqa mi sandufana uaqeefaqa qinee Moodeekaisa kuinna Estaa nammarisandiri maaqanda maa sandufana inni nimiqa. <sup>32</sup> Estaa nammarina mi sandufana masisa sararira sandufaqa afeekaika masoofaqa misa moo papiqasaa akara rumasee uqaqoofanoo marinau.

## 10

*Kinna Serkisisafa faqa Moodeekaifa faqa firaa nuqu faqaa qanda mariqau.*

<sup>1</sup> Kinna Serkisisafa faiqi ooruku nammari afaiqara marusa faqa nari maqa maaqaki marusa faqa nifiqasoofaqa misa mifa rakisi maru maqanasa dadaaqira saika auqee mariqau. <sup>2</sup> Aiqama amiqira ainaina faqa firaa ainaina faqa kinna fannoo auqaidanoo mifa Moodeekaina firaa auqu amimarufaqa aiqama mi oosannara ufa qimariqau. Aiqama mi ufana misa Peeresiaa maqannaasa faqa Midiannaa maqannaasa faqa kinna papiqaki akara riqau. <sup>3</sup> Mi Yuda maqannaqa fasiqafa Moodeekaifa kinna Serkisisana namba 2 marinau. Yuda maqannaasa minara firaqoo uqanna nidimarufaqa misa mina firaa auqu amimariqau. Amimarufanoo mifa misa dadaaqinaqa amiqimmasee ooqu mariaqeera ainaini marinau. Mifa miqimma sainaqa misa niku nisauku kasooaqee kambiqainausa misa sia moo ainainara rufieefaranoo amiqimmasee marifaranoo.

## IDI UFA Samma Papiqa

### 1

*–41 Indaaruaqafa (Book 1)  
Idi Ufa 1–41*

*Kuqaa qira asasirafa.*

- 1 Manda oosana maree mariasa iriranamau sia  
fimariasa faqa Anutuna ufa rukiee mariasa faqa  
sia moodaanaki kimariasa faqa andeeqara  
oosanara fidiqaa imariasa faqa sia ooqu maria  
fasiqausa mi manda oosanausara rufiee  
mariasa misa asasiranaki maridaqa.
- 2 Miqi maria andeeqara fasiqa anaaseesa Anutuna  
sandufamau fuanara asasirana maraidaqa.  
Misa faasaana faqa eendanaki faqa mi sandufana  
asaana rumasee irimaree fidaqa.
- 3 Miqi maria fasiqa anaaseesa saqari nammari aqa  
ummaqirafara foora iqa mariasa maridaqa nari  
qanaa mina aqama amiqimmasee iraidanoo  
mina amanee sia kakasidanoo.
- Miqira fasiqa anaasee nana ainanee auqaafanoo  
anoonaikidanoo.
- 4 Manda oosana maree marisa sia miqidaqa.  
Misa anaqaamarara foora ufai uqinoo fuaqaqidanoo.
- 5 Yaaweena ufa rukiee marisa Anutufa nari ufannai  
rumbannimaqaseenoo nari faiqi anaasee  
mariaqooqari nianai naaduma mara  
quqannisaannoo.
- 6 Yaaweefa andeeqarausa nirana mariranasaa  
rakisidanoo itita nimaqaidanoo.  
Manda oosana maree mariasa kuridiranaki maaniki  
fifaranoo.

### 2

*Anutufa utaaqamaqoo karaambaiqafa.*

- 1 Nanaree aiqama maqannaasa fifau suqufiqa manda  
oosanara tipundaarammasee aanoo qidee.  
Nanaree faiqi anaasee anoona siai ainainara  
tipundaaridee.
- 2 Misa karaambaiqauqa faqa misa rakisi nimaqee  
mariasa faqa Yaaweefa rakisi nimaqee marinakiqari quqasee kaqinni firara tipun-  
daaridaqa.  
Yaaweefa utaaqamaqai rakisirana rakisi nimaqaranakiqari faqa quqasee kaqinni firaree  
qimasee tipundaaridaqa.
- 3 Misa maaqi qidaqa anifaqa maasa misa rakisi nimaqaranakiqari geeqa qifaaqa idukua.  
Anifaqa misa qimaqimira ufa aqusaanee qidaqa.
- 4 Yaaweefa innaarunai marifa naanaidara qimasee misa oosana siai tipundaariranara  
ataasa ataasa qimannimaqaidanoo.
- 5 Miqimmaseenoo nari aanooqiranakiqari aauqima nimaqasee nari idara foaira aanooqi-  
rana kiqari rufiarana nimidanoo.
- 6 Mifa maaqi qidanoo qinee Yaaweesa inni karaambaiqa marianinnana geeqa naaquqara  
aaqana Sioona aaqanasaa quqeeqa.
- 7 Maqasaa karaambaiqa maaqi qinau, qinee Yaaweefa qima qimu ufana kooroo ianauree  
qinau.  
Mifa qiniara maaqi qinau.  
Anee qini qimaaku mariananoo maqee faasaana ani akausaikammaqa.  
8 Anee qini iramirinaqa qinee aiqama maqannaasa ani amianauro.  
Aiqama maqa maaqa anindi kai mariannoo.

<sup>9</sup> Anee qainna samu misa narusee nimudaani itairi nimaqeennaranoo.

Anee qafeera foora misa rukamusee andaana rumaseennaranoo.

<sup>10</sup> Innee maa maqanasaa karaambaigauqa maa auuqira ufana iriaqa.

Maa maqa maqaanakinaa rakisiraua maa irirana maaqimmasee iriaqa.

<sup>11</sup> Innee naaquqee marinaqa Yaaweena ainaina mamaqaqa.

<sup>12</sup> Naindiri ree marinaqa mina oorinni niqoori saunu araaqa.

Innee sia miqifanoo mifa aanoo qinaqa innee kuqifaranoo.

Mifa itita qimaqaanifee qimasee mifinnai fimariasa asasi mariasa maridaqa.

### 3

*Kananaana dadaaqiani fee innaaru.*

<sup>1</sup> Oo Yaawee qini namuqaa moomoo maridaqa, qini qiqaondikiqa mariusa quandaki qini namuqaakidaqa.

<sup>2</sup> Misa qiniara maaqi qidaqa.

Anutufa sia mina dadaaqianoo fee qidaqa.

<sup>3</sup> Miqi qimariafana oo Yaawee anee qini aiqama kari mandainainaki itita qimaqee marianafa mariananoo.

Anee rakiranaki uriqararana qimiseenana qini paasoosirafa taikanoo marina kaifaa qimiananoo.

<sup>4</sup> Qinee Yaaweena dadaaqianifeera aaree marunanoo nari naaquqara aqaanasaaqari iriseenoo dadaaqirana qiminoo.

<sup>5</sup> Qinee maqasaa faiqaqee unaanoo aiqama eendirana Yaaweefa qini itita qimaqaidanoo.

<sup>6</sup> Namuqaauqa nukudara foora qini fiqiu fiqiu iqa marianara sia qinee rufiidaqa.

<sup>7</sup> Qini Anutu, qini Yaawee anireenana qini mandainainaki marunnana dadaaqia.

Anee qini namuqaa aiqama aupurarana nimiseenana misa afeeka siaisaikamma sainaaq maridaqa sia qini daruqa.

<sup>8</sup> Oosana oosana ummaaraki uriqararafa ani Yaawee finaindari anidanoo.

Mifa nari faiqi anaasee amiqi amiqimma nimaqaani.

### 4

*Eneemari dadaaqiani fee innaaru.*

<sup>1</sup> Oo qini itita qimaqee marianna Anutufa qinee innaaru ufakiqari ani aaraanana qini ufa iria.

Qinee manda gumaaraki mariafannana anee dadaaqinau.

Qiniara maqee qimudao qimisee qini innaaru qirana iria. <sup>2</sup> Kisaagasaa fee innee aasaandaana ufa qima qimaqee faree.

Kisaagasaa fee innee anoona siai ainainnara ridaqee unnaqira ainaina afaqaqa fifaree.

<sup>3</sup> Innee iriaqa. Yaaweefa andeeqaraua nariara utaaqama qaifaqa maridaqa.

Qinee mina aaraunanoo qini ufa iridanoo.

<sup>4</sup> Innee naindiri ree marinaqa rufiidaqa aaqee maria oosannana minnisaaqa.

Anee aneenna qaarisa ireeda faiqaqee idana firaqoo minara oonu mafi iria.

<sup>5</sup> Anee Yaaweefa aidimari andeeqara tatufirana kai suqa amia Anutuna suqa amiseenana mina kai saqarikia.

<sup>6</sup> Moomoosa maaqi qimasee innaaru qidaqa.

Oo Yaawee moomoo amiqi amiqirana maasa qimia.

Maasa qiqaqamasee qimudao qimasee qimia.

<sup>7</sup> Misa miqi qimariafana anee qini asasirana qimi marianafa mifa misa mi ainainausa uriqararafa maridanoo.

<sup>8</sup> Oo Yaawee anee kai amiqimmasee ititaqisaanaqa amiqimmasee faiqaidaqa.

Qinee qeeqa qaarisa qifaqa quqasee asoaranaki faiqaidaqa.

### 5

*Manda ainainaki rakisi amaaqaani fee innaaru.*

<sup>1</sup> Oo Yaaweefa qini ufa iria.

Qini innaaru annada annada qiranakiqari qimarunnana iria.

<sup>2</sup> Oo qini Anutufa, qini karaambaigaa qinee dadaaqiannee innaaru qimarunnana iria.

Oo Yaawee qinee aniara innaaru qidaqa.

<sup>3</sup> Oo Yaawee aiqama kananaana kananaana qini ufa iriananoo.

Suani afu ururaifaqa qeeqa innaaru qirana amiseeqa ani dadaaqiranara afeesidaqa.

- <sup>4</sup> Anee aaqara oosanara sia asasimarianna Anutufa mariananoo.  
 Aaqara oosana maree mariasa sia eedoo qinaqa ani afusaa marifaranoo.
- <sup>5</sup> Nári nimoo naamoo qimariasa misa noori niqafarara ani akooqaidanoo.  
 Anee aiqama manda oosana maree mariasara fidiqaaq imariananoo.
- <sup>6</sup> Unnufa qimariasa kuridiranaki anee quqannisee mariananoo.  
 Faiqi fidikanauqara faqa nikaru qimariasara faqa Yaaweefa fidiqaamma nimaqaidanoo.
- <sup>7</sup> Ani firaa amuqusirafa marinara qinee kaqi ani naaquqara maaqaki keeqaanaura.  
 Qinee kaqi ani naaquqara amaana maqaki keeqafi qeeqa mara maree muqusee qiqoori saunarafi innaaru qianaara.
- <sup>8</sup> Oo Yaawee qini namuqaa moomoo maridaqa. Aneenna aidi mari ainainnara kai qimaqiminaqa auqaa.  
 Aneenna aana uqaqifiqainaqa mimau kai fua.
- <sup>9</sup> Qini namuqaa uqa ufa sia anoona mari ufana qidaqa.  
 Misa kuridiranara kai nididanoo.  
 Misa nári ufannai unna qimasee fadameenara foora akusaafanoo faiqi narirafa qumbiqanoo maridanoo.
- <sup>10</sup> Oo Anutu anee misa ufa nimisee aupurarana faqa nimia.  
 Misa nariqa manda tipundaarirafa nári kuridirana nimiannoo.  
 Misa moomoo aaqarafa marinara faqa misa ani ufa afaqaranara ititamasee qaoo qimarianara misa aiqama aneenna afusaqari futeeqeeqee nianai aqusaa.
- <sup>11</sup> Miqimmasainaqa aiqama ani saqariki mariasa asasifaranoo.  
 Misa aiqama kari ani amooqira idi raaqa.  
 Aniara rimariasa ititannimaqaa.  
 Anee mariannanara misa kuqaa uqanna asasidaqa.
- <sup>12</sup> Oo Yaawee ani ufamau fimariasa amiqi amiqimmannimaqaa.  
 Ani amuqusirafa rakira saqariara foora misa itita nimaqaidanoo.

## 6

*Ummaara aukuaana dadaaqiani fee innaaru.*

- <sup>1</sup> Oo Yaawee aneenna aanooqiranaki qari sia qiniara qaoo qimasee minni qisaa.  
 Aneenna aanooqiranannai sia qini aupurarana qimia.
- <sup>2</sup> Oo Yaawee qinee kudoosaapidaqa anee qiniara qimudao qia.  
 Qini afeeka taikee marifaqa kudoosaapida marunnanara anee afeeka qimia.
- <sup>3</sup> Qini marirafa mudukatia firaaqoo ummaarakai maridanoo.  
 Oo Yaawee kisaqasaafee kaqi fifau maridaneer sia qini dadaaqidaneer.
- <sup>4</sup> Oo Yaawee anee aniree mandaki marunnana uqeereeqeena amiqiraqoo quqaqisaa.  
 Aneenna nifauaranakiqari qinee kuqiranaki marunnana dadaaqia.
- <sup>5</sup> Kuqirausa sia aniara iridaqa.  
 Sia moo fannoo amana miqoo ani amooqiannoo.
- <sup>6</sup> Qinee firaa ummaarakai maridaqa firaaqoo qimudaani rimarifaqa kudoosaapidaqa.  
 Aiqama eenda qini qaari faiqee marunnasaa daukunu kai nammariara foora auidanoo.  
 Qiqa daukunu fannoo qini qunusaa aqufidanoo putaa idanoo.
- <sup>7</sup> Qini namuqaa darirari marianara qiki raqee marunanoo firaaqoo qifukaumuqa innooqai faqa qifu maqarara anuqidaqa.
- <sup>8</sup> Innee manda oosana maree mariasa qinee marunnaqooqari nianasaa fifuqa.  
 Yaaweefa qini qiki raqarana iridanoo.
- <sup>9</sup> Mifa qinee dadaaqianifeera nammeera qunnana irisee qini innaaru qirana akiqara dadaaqiannoo.
- <sup>10</sup> Qini namuqaa uqa manda nisaurirafa tautummasee rafaqaqfu nimaqainaqa furufariqa quqasee daraanifara.

## 7

*Andeeqasee raina nimaqaranara innaaru qirufa.*

- <sup>1</sup> Oo Yaawee qini Anutu qinee ititaqimaqaanneera anee iannannai anidaqa.  
 Qini qifaqaqa nimarianakinaana qumareeqee amiqirannai kaqinni quqaqisaa.
- <sup>2</sup> Anee sia qini dadaaqinaqa misa kaasau fainiara foora qini daaku mareeqa fifaranoo.  
 Qini dadaaqirausa sia maria maqa maaqanaki munusee miqoo misa qini qipata anaqifoora.
- <sup>3</sup> Oo Yaawee qini Anutufa qinee moona mandaikamma amaqaasaanoo fee qeeqa qiqoondi oosana siainaki ueeqasaanoo fee.

- 4 Qeeqa namuqaa oosana siainaki aupurarana amiananoo fee qinee mi ainainausa akaqana auqamasaanaqau qini namuqaa qini qifaqasee qumarani.
- 5 Qini qumaraseefau kuqa darusee ateekaateeka masaifaqau kasirana siai ainainnara foora maqasaa qisaifaqau marini.
- 6 Oo Yaawee aneenna aanooqiranakiqari findifua.  
Qini namuqaa aanoo qiranara firaanara irinana findifinana ititaqisaa.  
Anee andeeqaranara rimarianafa mariannanara findifinana qini dadaaqia.
- 7 Aiqama fasiqa anaasee aneenna aaqa moodaanaki suqu quqasee innaarunai mirindari rakisi nimaqaa.
- 8 Anee aiqama fasiqa anaasee ufa andeeqannisee marianafa mariananoo.  
Qinee aaqarana siaisa marunnanara anee irimmariananoo.  
Minara anee qini ufa irisee qiniara andeeqara fee qia.
- 9 Anutu anee andeeqarafa maridana maasa irirana faqa maasa qimuqusa faqa aiqumumasee qafee marianafa mariananoo.  
Anee manda oosana maree mariasa aaqara oosana taikasainaqaa mariaqa.  
Andeeqarusa amiqimasee dadaaqinaqa mapukusee mariaqa.
- 10 Anutufa qini ititaqimaqee marifa maridanoo.  
Mifa nari ufa mau fimariasa dadaaqidanoo.
- 11 Anutufa andeeqara ufasaa rakisirafa maridanoo.  
Aiqama faasaambaasaana nari aanoo qiranara manda oosana maree mariasa qimannimidanoo.
- 12 Misa sia naundura quandaifanoo Anutufa nari rakira faaqaana aaruqiannoo.  
Mifa nari duru fufuseenoo deedaqiannoo.
- 13 Mifa nari kuqa nari maria duru saamuna deedaqammasee maridanoo.  
Nari idaqemari feefana faqa deedaqammasee maridanoo.
- 14 Manda oosana maree mariasa firaqoo aaqara oosana auqarara qimiridaqa.  
Misa unna qimasee ummaara oosana uqeerarara tipundaaridaqa.
- 15 Misa akaqausa nimaara ufaana fufusee nari minaki aridaqa.
- 16 Nariqa aaqara oosaa fannoo nariqa aupurarana nimidanoo.
- 17 Qinee Anutuna andeeqaranara irisee dufi dufi qidaqa.  
Qinee firaqoo uriqarara Anutuna amooqira idi raidaqa.

## 8

*Anutuna qareenaranara faqa faiqi faiqi mariranara faqa qirufa.*

- 1 Oo Yaawee maasa Yaaweefa, ani uriqararana aiqama maa maqa maaqanaki mariasa qafaidaqa.  
Ani amooqirafa innaaruna amana kai ooru maridanoo.
- 2 Miqi qimasee faiqi aanaaqiuqaindi faqa naaqoo iriasa faqa ani amooqira idi raidaqa.  
Anee amiqiranaki marianaqa ani namuqaa sia ani arifanoo.  
Nariara uriqararausee qimariasa anee misa aana ititannimaqee mariananoo.
- 3 Qinee anee auqu quqaqoonnana quqoona faqa fasauqa faqa innaarunai qafaidaqa.
- 4 Qinee mi ainainausa qafaidaqa maaqi qidaqa,  
Faiqi nanee mariafanee anee misara iridanee.  
Fifau kaqikaa ainaina maridanoo.  
Faiqi faiqi faqa nanainainee mariafanee anee misa rakisidanee.
- 5 Anee Yaaweefa faiqi faiqi mareeqee aiqama ainaina urinnaaqaramasee aneenna ameemaanai  
quqaseenana miqoo qareenaranara faqa nuqu firaana faqa qatara foora afisu ni-maqaananoo.
- 6 Anee faiqiara aiqama anee auquqoonna ainainausasaa rakisiaqee qimasee qinau.  
Anee aiqama ainaina auquqoonnana uriqararusa mariaqeera quqanau.
- 7 Sipsipauqasaa faqa burimmakauqasaa faqa kaasau aandausaa faqa rakisiaqeera quqanau.
- 8 Innaarunai qaqaamaree nimaria ufnisa faqa ooruku nammariiki maria noodaannausa faqa minaki  
maria aandausaa oosana oosana saa rakisiaqeera faiqi quqanau.
- 9 Oo Yaawee maasa Yaaweefa ani uriqarara afeeka aiqama maqa maaqaki mariasa qafaidaqa.

## 9

*Anutuna amana amana kai andeeqaranara dufi dufi qirufa.*

- 1 Oo Yaawee qinee qeeqa qimuqusa aiqamannoo ani amooqianaura.  
Anee aiqama naaquqara ainaina auqoonnana qimannimianaura.
- 2 Qinee aniki marunnanara asasiidaqa idi raanaura.  
Aiqama afeeka faqaa Anutunara qinee amooqira idi raanaura.
- 3 Qini namuqaa ani qafamasee quandaki fuani qiana saamuriqa kuqidaqa.
- 4 Ani ufa iriranaki kuqaa qirana faqa amana amana kai ira oosanannoo rainnee marianafa mariananoo.  
Anee qini ufa irisee qiniara andeeqara fee qimariananoo.
- 5 Anee ani ufa rukiee marusa ufa nimiseenana kafaa manda oosana maree marusa kuridi nimaqasoonaga naaru naaru sia kaifaa misara irifaranoo.
- 6 Anee maasa namuqaa aiqama taikaseenana misa maqusauqa faqa kuridi nimaqanau.  
Miqimma soonaga misara kaaqa qaunuqanna saqau.  
Misara irirana faqa kaaqa qaunuqanna seefaranoo.
- 7 Miqiga mariafanoo Yaaweefa kai naaru naaru karaambaiqa maridanoo.  
Nari ufa irira qaari deedaqamma quqaseenoo ufa andeeqa nimaqaranara rakisidanoo.
- 8 Mifa nari andeeqaranannai maa maqa maaqanasaa mariasa rakisinimaqaidanoo.  
Mifa aiqama maqannaasa amana amana kai ufa irinnimaqaidanoo.
- 9 Oorudupirausee qimannimaqee mariasa Yaaweefa misa afeeka ititara maqusara foora maridanoo.  
Ummaara aukuaana kukeeqee maria maqusafa Yaaweefa maridanoo.
- 10 Oo Yaawee ani oosana irimariasa ani saqarikifaranoo.  
Anee sia anee iannannai ani mariasa moonna minnisannafa mariananoo.
- 11 Sioonna maqusai marida rakisinnimaqee mari Yaaweena amooqira idirama amaqaaga.  
Mifa auqoo ainainnara aiqama maqannaasa kooroommasee qimannimiaqa.
- 12 Anutufa aupuraranaki mariasara sia qaunidanoo iridanoo.  
Mifa sia misa nammeera qiranara qaunidanoo.  
Mifa misa mandaikamma nimaqee mariasa aupurarana nimidanoo.
- 13 Oo Yaawee qini namuqaauqa ummaara qimimariana qafamasee qiniara qimudao qia.  
Oo Yaawee qini kuqiranakinaana ititaqisaa.
- 14 Miqimmasainaga qinee Yeerusaree maqanna fasiqa anaasee nifusaa kikiqammafi ani amooqimarunnanara qimannimianaura.  
Anee qini asumu mariranaki quqaqisaannanara asiasanaura.
- 15 Anutunara sia iri mariasa maasa qimaara madika indufusee nari kai minaki aqufidaqa.  
Misa maasa qimaara ufaana fufusee nari kai minaki aridaqa.
- 16 Yaaweefa andeeqasee ufa raina nimaqaranannai nariara kooroo idanoo.  
Manda oosana maree mariasa nari auqee maria ainainafa quandakinoo ufaanara foora nariqa qumaraidanoo.
- 17 Aiqama manda oosana maraqaanuusa faqa aiqama Anutuna ufa minnisee nari irirana mau nimariasa faqa kuqirafa misa maqusara foora maridanoo.
- 18 Kudi fasiqa aanaaseera Anutufa sia aiqama kari qaunuannoo.  
Ainaina siaisa sia kisaqaqasaa rafaqaqafu nimaqaqai faqa marifaranoo.
- 19 Oo Yaawee anee findifua sia faiqi faiqi ani afusaa aanoo qimasee ani ufa rukiaannoo.  
Ani ufa sia irimariasa aneenna afusaa quqasee ufa nimia.
- 20 Oo Yaawee anee misa rufiarana nimia.  
Aiqama maqannaasa nariara faiqi faiqi kai maridee qimasee iriaqa.

## 10

### *Andeeqara oosanara innaaru qirufa.*

- 1 Oo Yaawee anee nanaree nianai maridane.  
Maasa qummaraki marunana anee nanaree kukeeqana maridane.  
2 Aaqee mariasa misa nari nimoo namoo qidaqa ainaina siaisa narunnindaqaa idaqa.  
Misa kai indufuqaa dikaandanaki ainai siaisa aqufidaqa.
- 3 Manda oosana maree mariasa nariqa manda oosana maree marianara nari nimoo naamoo qidaqa.  
Ainainara kaaqa rimarifa Yaaweena aquraraseenoo mina ameesa ubeekama amaqaaidanoo.
- 4 Manda oosana maree mariasa sia Yaaweenara qeerairidaqa.  
Nari nasuriranakiqari Anutunara sia anoonee qidaqa.
- 5 Manda oosana auqee mariasa aiqama ainaina auqaafa anoona kambiqaidanoo.  
Misa sia Anutuna iriranara iridaqa.

Misa nári namuqaa uqmairaauqmairamma nimaqaidaga.

<sup>6</sup> Misa náriara maaqi qidaqa.

Maasa sia aqufuanauree qidaqa.

Sia maasa moo ummaaraki marianauree qidaqa.

<sup>7</sup> Misa ufa qirafa niqurara ufa faqa unna ufa faqa naaquqara ufa faqa kai umbiqanoo maridanoo.

Misa kai kaqi fidaqaa ira manda ufauqa qidaqa.

<sup>8</sup> Misa aiqama maqusakiaqa kukeeqa maridaqa andeeqara fasiqauqa kuqa narirara nimaarusidaqa.

Misa afeeka siaisa nimaara kukeeqaidaga.

<sup>9</sup> Misa kaasau fainiara foora kukeeqa maridaqa rakisidaqa.

Misa miqimandee ainaina siaisara rakisidaqa.

Misa ufaana fufuqaanaki arufuafaqa oonu rarisammamaree fidaqa.

<sup>10</sup> Misasaaroo qirausa sia marisa narusaafaqa maqasaa

aqufuafaqa nikunnai radamuqaafaqara foora maridaqa.

<sup>11</sup> Manda oosana maree mariasa maaqi qimasee nariqakai qidaqa.

Anutufa qini manda oosanara fifau ainainee qidanoo.

Mifa afu tautasee sia qini qiqafaannoo fee qidaqa.

<sup>12</sup> Oo Yaawee, miqira manda oosana maree mariasa aupurarana nimia.

Kafaa aupuraranaki mariasara sia qaunua, misa faqa dadaaqia.

<sup>13</sup> Manda oosana maree mariasa naqimmasee fee Anutunara unnaqimasee maaqi qidee.

Mifa sia maasa aupurana qimiannoo fee qidee.

<sup>14</sup> Oo Anutu anee niqafee mariananoo, anee ummaaraki mariasa faqa aupuraranaki mariasa

faqa niqafaidana aiqama kari dadaaqirara deedaqi marianafa mariananoo.

Misasaaroo qirausa siaisa aniki nári nifaqa quqaidaga.

Anee ooqaindari sarau imariasa dadaaqi marianafa mariananoo.

<sup>15</sup> Manda oosana maree mariasa faqa aaqee mariasa faqa misa afeeka qumaree raqurusa.

Anee misa manda oosana auqaana akiqara aupurarana niminaqa sia kaifaa miqiaqa.

<sup>16</sup> Yaaweefa naaru naaru uriqarara Karaambaiqa maridanoo.

Aiqama unna anutusa nimooqi mariasa mina maqa maaqakiqari taikafifaranoo.

<sup>17</sup> Oo Yaawee anee oorudupirausa innaaru irinnaranoo.

Anee misa paasoosirana niminnaranoo.

<sup>18</sup> Anee fiaiqi faiqi faqa rafaafu nimmaqee mariasa faqa iki raqarana irinnaranoo.

Anee misa ufa irinnisainna kari misa dadaaqinnaranoo.

Miqinaqa maqasaa fasiqa rufiarana firaana nimimariasa sia kafaa miqifaranoo.

## 11

*Yaaweenaki afaqa uqara ufa.*

<sup>1</sup> Qinee Yaaweena saqarikiananoo mifa qini ititaqimaqaannoo.

Anee nana furufaree inanee qiniara ufiniara foora qaqaamaree aqanai ooru fuannee qidanee.

<sup>2</sup> Misa maaqi qimasee kaifaa unna qimasee qima qimidaqa.

Manda oosana maree mariasa nári duru rambaqa fufusee, dindaramasee andeeqarausa qumee kukeeqaindari nariraree qidaqa.

<sup>3</sup> Maa maqanasaa aiqama maasa dadaaqi maria ainainsa mandaikinaqa andeeqara fasiqauqa naqaa fee ifaree.

<sup>4</sup> Yaaweefa nari naaquqara amaana maqaki maridanoo, mina ufirira qaari innaarunai ufiqinoo marifanoo minasaa maridanoo.

Miqooqari mina afu fannoo aiqama fasiqa anaasee aiqamatina nindafaidanoo.

Misa augee marianara iridanoo.

<sup>5</sup> Yaaweefa andeeqee mariasa faqa aaqee mariasa faqa amana amana kai niuqidanoo.

Sia mina sandufa afaqee mariasara Yaaweefa nári amuqusa aiqamannoo misara fidaqaammidanoo.

<sup>6</sup> Mandoosana maree mariasa Yaaweefa ida qauni

namufaqa idauru fasafasi marina namufaqa nammariara foora teeqimma nimaqaidanoo.

Mifa ididimari ufainannoo misa aupurarana nimidanoo.

<sup>7</sup> Yaaweefa andeeqarafa maridanoo.

Mifa andeeqaranara aididanoo.

Miandeeqara oosanna maree mariasa misa Anutuna oorisaa marifaranoo.

## 12

*Dadaaqiani fee innaaru.*

<sup>1</sup> Oo Yaawee maasa dadaaqia, sia uqanna moodaa andeeqara fasiqa maridanoo.

Kuqaa kai qimari fasiqanara randeenana sia paqurinnaranoo.

<sup>2</sup> Misa nári niqoonausara unnufa kai qiganuusa maridaqa.

Misa fadameena akusee nikaru qidaqa.

<sup>3</sup> Oo Yaawee anee fadameena akira ufa qimaria nifauruna ititannisaa.

Nári nimooqida nári nuqu uqeere maria nifauruna faqa ititannisaa.

<sup>4</sup> Misa maaqi qidaqa maasa qeeqa ufannai maasa didimari ainaina maraidaqee qidaqa.

Maasa didimari ufana kaqi qianaara, sia moo fannoo maasa doo ititaannoo fee qidaqa.

<sup>5</sup> Yaaweefa maaqi qidanoo. Kudi fasiqauqa rafaqaqi marianara faqa aupurarana nimiafaqa

anaadannada qimarianara faqa qinee maqee aniree misa dadaaqianauree qidanoo.

Qinee anireeqa nifaaqa quqasee mariranara rakisimariana nimianaara.

<sup>6</sup> Yaaweena qima afeekaikira ufasaa nifaaqa quqee mariafa maridanoo.

Mi ufafa amiqira siruaa qisauku dinni taikasee dinni

ani qaara marasee 7 kari tisirisiri maqaafara foora kaaqa amiqirafa maridanoo.

<sup>7</sup> Oo Yaawee anee maqee maqee maasa itifaqisaa.

Mi manda fasiqausasaa ititasainaqa sia maasa mandaikamma qimaqaqa.

<sup>8</sup> Manda oosana maree mariasa aiqamatinai maridaqa.

Aiqama fasiqa anaasee mandoosanara amiqira ainainee qimasaida asasidaqa.

## 13

*Dadaaqiani fee innaaru.*

<sup>1</sup> Oo Yaawee kisaagasaa fee anee qiniara qauninnaree.

Naaruara naaruara miqi fee imarinnaree.

Anee kisaagasaa fee qini qifusaaqari kukeeqana marinnaree.

<sup>2</sup> Kisaagasaa fee qinee aupurarana uqee maridaqee.

Daunduraki rairai qimari umaaranara oonu mafi irianauree.

Aiqama eendaki faasaana kisaagasaa fee qini aiaaee qirafa mariannoo fee.

Kisaagasaa fee qinee namuqaa nimeemaanai marianuree.

<sup>3</sup> Oo Yaawee qini Anutu anee amiqimasee qini qiqafamasee qini ufa anoona qimaqimia.

Anee kafa qini afeeka qiminaqa sia kuqa.

<sup>4</sup> Oo Yaawee anee sia qini namuqaara qinaqa qiniara mina doo rafaqaqafusee fee qiaqa.

Anee sia qini namuqaara qinaqa qinee saamuruannanara nasuriaqa.

<sup>5</sup> Anee maqee maqee qiniara aidimariannasaa qinee mundidaqa.

Anee qini asumu marainnanara qinee asasianaura.

<sup>6</sup> Oo Yaawee anee qini amiqi amiqimma qimaqoontanara ani amooqira idi raanaura.

## 14

*Faiqi faiqi mandoosanara qirufa.*

<sup>1</sup> Furufari mariasa nári nimuqusakiqari maaqi qidaqa sia Anutufa maridanoo fee qidaqa.

Miqi qimariasa furufarira oosana maraidaqa.

Misa kaaqa aaqara oosana uqanna auqee mariasa maridaqa.

Sia moo fannoo andeeqara oosana maraidanoo.

<sup>2</sup> Yaaweefa innaarunaindari maa maqanasaa faiqi faiqi mariasa niuqidanoo.

Mifa irirana faqaasara randaifaqa sia maridaqa.

Akaqausa qini Anutusara inaaruu qidafee qimasee randaidaqa.

<sup>3</sup> Aiqaqausa quandaki kaqi runna fidaqa.

Misoo maasoo amana amana kai mandaiki marunausa maridaqa.

Sia moo fannoo andeeqarusa maridaqa. Sia uqanna.

<sup>4</sup> Anutufa maaqi qimasee iraidanoo, misa sia fee iridafee.

Aiqama maa aaqara oosanna maree mariasa irirana siaisee maridee.

Misa qini faiqi anaasee feemuara foora nama taikaidaqa.

Misa sia qiniara aiqama kari innaaru qimariasa maridaqa.

<sup>5</sup> Miqi mariasa firaqoo ruftee faranoo.

Anutufa nári ufamau fimariasa faqa maridanoo dadaaqidanoo.

<sup>6</sup> Nári mara maree qumimarifa moo ainaina auqarara



oonu mafi irifaqa aaqemariasa itita amaqaafanoo Yaaweefa mina dadaaqidanoo.  
 7 Qinee maaqi qimasee firaqoo innaaru qidaqa,  
 Isaraee maqannaasa dadaaqirafa Sioonna maqusakiqari anianifee qidaqa.  
 Yaaweefa Isaraee maqannaasa nári maqa maaqa  
 faqa qumiasana faqa kafa rairaamma saina misa firaqoo اساسifaranoo.

## 15

*Anutuna aidi mari marirafa.*

1 Oo Yaawee, yafee ani amaana maqaki keeqaannoo fee.  
 Yafee Sioonna ani naaquqara aaqanasaa marida innaaru qiannoo fee.  
 2 Aiqama ainainaki ani ufa mau fimariasa faqa  
 andeeqara oosana auqee mariasa faqa nári nimuqusa ookiqari anoona ufa kai qimariasa  
 faqa ani naaquqara aaqanasaa marida innaaru qifaranoo.  
 3 Sia aqoonnana manda auqu amifa faqa sia nari  
 aqoondi mandaikamma amaqaifa faqa sia nári  
 niqoonausara munuqi miniqiasa faqa mi  
 naaquqara aaqanasaa marida innaaru qifaranoo.  
 4 Anutufa ameesuqu nimaqaqaisara andeeqarawsa faqa misara fidiqaa idaqa.  
 Yaweena ufa mau fimariasara uriqararausee qidaqa.  
 Moo fannoo narí amana aiqamasee moo ainaina auqararee qimasafanoo mi  
 faasaanna moo  
 ummaara kambiqaiifanoo afai riqiseenoo oonu  
 mi ainainna auqeenoo narí qima afeekaikira ufa taikaidanoo.  
 5 Faiqi moo fannoo narí ufaasu munnimma nimiseenoo  
 aabaa munnimma siaina naríndi amana kai maree  
 marifa faqa, aaqarana siai fasiqana mara ufaki  
 quqaanifee qimasee munnimma amiafanoo  
 qeerairi mari fasiqafa faqa ani naaquqara aaqanasaa marifaranoo.  
 Mi aiqama ainainausa auqee maria fasiqausa misa naaruara mapukusee marifaranoo.

## 16

*Afaaqa uqasee mariranara innaaru qirufa.*

1 Qinee ani saqariki marunnanara ititaqimaqa.  
 Oo Anutu, anee qini ititaqimaqaa.  
 2 Qinee Yaaweena maaqi qimasee qimamiqa. Anee qini Yaaweefa mariananoo.  
 Aiqama ainaina anee iannannaindari kai qiniki anidanoo.  
 3 Faiqi anaasee Yaaweenaki mapukusee mariasa kaaqa andeeqarawsa maridaqa.  
 Qini firaa irirafa misa faqa marirara dididanoo.  
 4 Unna anutusa iannai sandee mariasa oosana ummaara nári nifaaqai mara  
 quqaidafa.  
 Qinee sia misa faqa aandau tatufirana suqaanaura.  
 Qinee sia misa faqa misa unnaqira anutuna amooqianaura.  
 5 Oo Yaawee, anee kai qini aiqama ainainara foora mariananoo.  
 Qini didimari aiqama ainainna anee qimimariananoo.  
 Qini marirafa ani asaukuki maridanoo.  
 6 Anee qimimarianna ainainausa amiqirafa kai maridanoo.  
 Mi ainainausa aiqama kaaqa amiqirafa kai maridanoo.  
 7 Yaaweefa qini aana muquni marinara mina amooqidaqa.  
 Eendaki qini daakirafa daakapaidanoo.  
 8 Qinee aiqama kari Yaaweena afusaa marunnanara iridaqa.  
 Mifa qini faqa marinara sia moo ainaina fannoo qini kasi kasimma qimaqaannoo.  
 9 Minara qinee dufi dufi qidaqa اساسidaqa.  
 Qinee kaaqa amiqiranaki marunnanara miqidaqa.  
 10 Anee kuqira afeeka ameemaanaindaraana ititaqimaqaannanara miqidaqa.  
 Anee aneenna aidimarina sia minnisainanoo mifa kuqufinao putaaianoo.  
 11 Anee kisaqqasaa maa maqanasaa marira aana qini uqafiqeennaranoo.  
 Ani afusaa marunafa اساسirana qumbiqa qimaqaidanoo.  
 Mifa naaru naaru marira اساسirana qimidanoo.

## 17

*Aaqarana siai fasiqana innaaru.*

- 1 Oo Yaawee andeeqaranara innaaru qimarunnana iria.  
Qinee dadaaqianneera innaaru qimarunnana faqa iria.  
Qini kuqaa qira innaaru iria.
- 2 Anee andeeqaranara irimariannanara qini qifairi mariana dadaaqia.
- 3 Yaawee anee qini qimuqusara irimmariananoo.  
Anee eendaki qinee unnannai anireenana qini  
qimanammasee qafaananoo sia manda irirafa qiniki maridanoo.
- 4 Qinee sia akaqausa naannareeqa manda ufa qidaqa.  
Qinee ani naakapara ufa qaindusidaqa sia faiqi narimariasa fimaria aatata fidaqa.
- 5 Qini qiku fannoo ani aatata kai fida sia munuree miniree unausa maridaqa.
- 6 Oo Anutu anee qini inaaruu irimariannanara qinee aniara innaaru qidaqa.  
Minara anee aneenna aaqoo rammatinimambi qini innaaru qirana iria.
- 7 Oo Anutu aneenna firaa amuqusirana maasa uqaqifiqaseenana anee maasa asumu maraqisaa.  
Maasa ani mandaaqaaqaa maridaqa sia namuqaa dariratinai marianaara.
- 8 Anee aneenna afu rakisianandee kai masee qini faqa rakisia.  
Anee aneenna aumooki quqaseenana rakisi qimaqainaqa qini namuqaa sia daruaqa.
- 9 Qini kuqa darirara imariasa qini fiqii fiqii iqa maridaqa.
- 10 Misa qimudaoo qirana siaisa, nari nimoo naamoo kai qimariasa maridaqa.
- 11 Misa qini itita qimaqaaqafaqa qinee firannai anirannaira idaqa.  
Misa qini qumara rudammiqi qaqqeidaqa rakisidaqa.
- 12 Misa kaasau fainiara foora qini qimaara usidaqa.  
Qini qumarasee rakeekaa irara miqiiqa maridaqa.
- 13 Oo Yaawee anireenana qini namuqaa noorisaa oonureenana misa narusee urinnaaqaraa.  
Aneenna rakira paipanannai mandoosana maree mariasa narusee misa nisaukukinaana qini maraa.
- 14 Oo Yaawee maa maqanasaaqaraa aiqama ainaina nariara kai maree mariasa nisaukukinaana qini mara qisaa.  
Anee misa narirara nimaara usuqaanna samu misa narua.  
Naridana mina atisamu kaqi marinana misa faiqi  
namu faqa ninaiqimara faqa kasooqaqee kambiiqifana misa faqa narua.
- 15 Qinee sia aaqara ainaina auqaunnaana qinee ani qafaanura.  
Qinee faiqaqee iinaqa findi fuananoo ani afusaa marira oosana fannoo qini asasirana qumbiqa qimiannoo.

## 18

*Rakirana Uriaaqarara idi Dafidifa ranau.*

- 1 Anee qini itita qimaqee marianafa mariannanara ani Yaaweenara firaaqoo dididanoo.
- 2 Yaaweefa qini itita qimaqee marifa maridanoo.  
Mifa qini afeeka faandaamurara foora maridanoo.  
Qini Anutufa qini itita qimaqee marifa maridanoo.  
Minaki marunnaana asumu maridaqa.  
Mifa qini rakira saqariara foora maridanoo.  
Mifa qinisaa ititaseenoo qini asumu mara quqaqisaidanoo.
- 3 Qinee Yaaweenara innaaru qunanoo qini  
namuqaauqa darirari mariana kinaana asumu mara quqaqiseenoo.  
Minara Yaaweena amooqiaqa.
- 4 Manda kuqirafa qini fiqii fiqii inoo marifanoo,  
darirafa ooruku nammari amakauriara foora inoo qini rafaqaqifidanoo.
- 5 Manda kuqirafa qini fiqii fiqii inoo marifanoo, faiqii  
madika fannoo ufaanara foora qini qimaara fufinoo maridanoo.
- 6 Qeeqa ummaarakiqari Yaaweena aareeqa.  
Qinee qeeqa Anutuna dadaaqianifeera aareeqa.  
Nari amaana maqakiqari qini nammeera qirana irinoo.  
Qinee dadaaqianifeera nammeera qiqaa.
- 7 Anutufa qini namuqaara aranaqainara maqa kasifanoo aaqanauqa doori doorifanoo  
firaa ooniuqa faqa kasi kasidanoo.

<sup>8</sup> Ida muna fannoo Yaaweena aikaamaraindari anifanoo aiqama ainaina qama taikara ida faqa ida qauni namufaqa mina ookiqari anidanoo.

<sup>9</sup> Yaaweefa innaaruna rakeemmafufanoo quminau.

Mina aiku ameemaanai asukuna arira oonnamu marinau.

<sup>10</sup> Yaaweefa aqoosa faqaa ainainasaara foora ooqu marifinoo qaqamaree ufaimau quminau.

<sup>11</sup> Mifa asukunannoo nari kukeeqasoofanoo, amatooki oonnamu aaku suqirafa mina fiqqu fiqqu inoo marinau.

<sup>12</sup> Pupasamu faqa idauru fasafasirafa faqa mina

oorinni aakuasaa iranakiqari qumureenoo asukuna arira oonnamu rakeeinau.

<sup>13</sup> Yaaweefa innaarunaindari innaarunai qiara foora qufaqa kaaqa uriqarara Anutuna ufa iriqa.

<sup>14</sup> Yaaweefa miqi qidanoo nari feefauqa qumaree aquseenoo namuqaa narufaqa daraaniqau.

Mina aakuasaa fannoo feefara foora aqusee narufaqa quqasee sandaqa.

<sup>15</sup> Anee aneenna namuqaauqa niqiseenana aranaqoofana rairai qimannimaqee marinau.

Miqunanoo ooruku nammari ameemaanaindaraa maqa koorooinau.

Maqa ameemaanaindaraa ooniya faqa koorooinau.

<sup>16</sup> Yaaweefa innaarunaindari qini nammari farumakinaanara foora qisauku qumaree uqeera quqanau.

<sup>17</sup> Mifa qini afeeka namuqaauqa nisaukukinaana mara kaqinni quqaqiseenoo, qiniara fidiqaa imariasa

qini uridaaqarara afeeka faqaasa nisaukukinaana faqa mara kaqinni quqaqisanau.

<sup>18</sup> Qinee ummaarakii mariafanaqa qini namuqaauqa qini darirariqau.

Miqufanoo Yaaweefa qini ititaqimaqanau.

<sup>19</sup> Mifa qiniara asasi marunara qini manda ummaarakinaana dadaaqamma qisanau.

<sup>20</sup> Qinee andeeqee marunnana akiiqara amiqi amiqimma qimaqeenoo.

Qiniki sia aaqarafa marinara miqimma qimaqaidanoo.

<sup>21</sup> Qinee Yaaweena sandufamau fimarunausa maridaqa.

Sia qeeqa Anutuna qimeesa uqusee mandoosana maridaqa.

<sup>22</sup> Qinee mina aiqama sandufamau fimarunausa maridaqa.

Qinee sia mina naamuqira ufa rukiqaunausa maridaqa.

<sup>23</sup> Qinee aaqarana siaisa marunnanara mifa iridanoo.

Qinee kaqi runna fuanoo qeeqa mariranasaa rakisidaqa.

<sup>24</sup> Qinee miqunnana akiiqara faqa andeeqara oosana maraunannara faqa mifa amiqimma qimaqaidanoo.

Qinee aaqarana siaisa marunnanara miqimma qimaqaidanoo.

<sup>25</sup> Oo Yaawee aniki mapukusee mariasa anee misa mapukunnimaqee mariananoo.

Kaaqa andeeqee mariasa anee amiqi amiqimma nimaqee mariananoo.

<sup>26</sup> Anee kaaqa anukarausa andeeqa nimaqee mariananoo.

Mandoosana maree mariasa mandaikamma nimaqee mariananoo.

<sup>27</sup> Nari mara maree qumi mariasa anee asumu maree mariananoo.

Nari nuqu uqeeree mariasa anee mara maree qumimariananoo.

<sup>28</sup> Oo Yaawee anee kaaqa qarana qimiananoo asukuna rakeemma qisaidanoo.

<sup>29</sup> Anee qini afeeka qimianaqa qeeqa namuqaauqa naru nindaqaaqa idaqa.

Miqimmaseeqa misa afeeka faandaamura aafeeqaramaki aqufiqa naru nindaqaaqa idaqa.

<sup>30</sup> Mi Anutuna oosana fannoo andeeqanoo maridanoo.

Mina ufasaa faiqi mundimaria ufafa maridanoo.

Mifa nari mandaqee mariasa rakira saqariara foora maridanoo, ititannimaqaidanoo.

<sup>31</sup> Yaaweefa kai Anutufa maridanoo.

Anutufa kai maasa faandaamura maridanoo.

<sup>32</sup> Mi Anutufa kai qini afeeka qimiseenoo, rakisiqimaqee marifaqa qifaaqa quqasee aana nidaqa.

<sup>33</sup> Mifa qini qiku afaidama saifaqa kaasau aandaara foora sandaidaqa.

Qinee aaqanauqakiaqa nimarunanoo mifa qini rakisi qimaqaidanoo.

<sup>34</sup> Mifa qini rakira oosana uqaqifqasaifaqa qinee afeeka duru uqanna rakisidaqa.

<sup>35</sup> Oo Yaawee anee qini itita qimaqaseenana asumu mara quqaqisaananoo.

Ani rakisi qimaqarafa qini duqu uqeereenoo.

Ani afeeka fannoo qini ititaqimaqaseenoo asumu marirana qiminoo.

<sup>36</sup> Anee qini aana amiqimmasaanaqa sandaidaqa sia

qiku qamaki saamurunaqa namuqaa qini qumareea.

- 37 Qinee qeeqa namuqaa sia minniseeqa nifaqaa  
fifiifaqa oonu qumarasee naruseeqa kai seeqa.
- 38 Qinee oonu misa naru quqasaunaqa qini qikuki aqufiqa sia findifirana amanaikidaqa.
- 39 Oo Anutu anee rakira afeeka qini qimiseenana qeeqa namuqaa rakiranaki urinaaqarara afeeka qimianaqa misa urinnaaqareeqa.
- 40 Anee qini namuqaara qianaqa misa qini daaqu rufisee sandeea.  
Sandaafaqa akaqausa qiniara fidiqaa imariasa naru taikeeqa.
- 41 Misa akaqausara dadaaqiaqeeera faaqaruafaqa sia dadaaqirausa maridaqa sia dadaaqia.
- Misa Yaaweenara faqa dadaaqianifeera aaraafanoo sia misa innaaru qirana irinoo.
- 42 Qinee misa radamusauunaqa misa kookoommaika mafuafanoo ufai fannoo misa fuaqa aqinoo.
- Misa aatataqaraa doonara foora mariafaqa qinee misasaa qiku reeqa.
- 43 Anee qini aanoo qimaqimaqee mariasa nisaukukinaana  
asumu mara quqaqiseenana moomoo maqannaasa rakisirusaikamma qisaananoo.  
Miqimma saanaqa qinee sia irunna fasiqa aanaaseesa qini qimeemaanai maridaqa.
- 44 Anaamuru qini qikuki niqoori saunu araidaqa  
Misa qini ufa irisee qini ufamau fidaqa.
- 45 Misa afeeka taikafifaqa nariqa afeeka faandaamura minniseeqa naindiri raifaqa qinee unannai anidaqa.
- 46 Yaaweefa kaqi marifa maridanoo.  
Qini ititaqimaqee marina amooqiaqa.  
Qini namuqaa nisaukukinaana asumu mara quqee mari Anutuna uriqararanara kooroo iaqa.
- 47 Mifa qini namuqaauqa urinnaaqarara afeeka qiminoo.  
Mifa moomoo maqannaasa qini qimeemaanai mara quqeenoo.
- 48 Miqimmaseenoo qini namuqaa nisaukukinaana asumu mara quqaqiseenoo.  
Oo Yaawee, anee qini namuqaa urinnaaqarara afeeka qimiseenana faiqi kuqa narimari-  
asasaa ititaqisaananoo.
- 49 Miqiannanara qinee moomoo maqannaasa qambaaindari ani amooqidaqa.  
Qinee ani amooqira idi raidaqa.
- 50 Anee qini Dafidisa utaqama qaanausa aneenna sia taikaaninna amuqusirana qinisaa faqa naaru  
naaru qinisaa ani aruakinausasaa faqa quqaananoo.  
Minara Anutufa rakira afeeka qini Dafidisasaa quqeenoo.

## 19

*Oosana aroonaki Anutufa auqu quqoo ainainafa mina qareenarana koorooidanoo.*

- 1 Innaaruna fannoo Anutuna qareenaranara firaqoo koorooidanoo.  
Innaaruna fannoo kaifaa Anutufa auqoo ainainausara kooroo idanoo.
- 2 Magee faasaana fannoo Anutuna areenaranara duna faasaana qimamidanoo.  
Eendirafa miqikai qimasee moo eendirana qimamidanoo.
- 3 Iaqarafa faqa eendirafa faqa sia noo mari faqa sia ufa qidaqa.  
Minara maasa misa ufa qirana sia iridaqa.
- 4 Miqinoo marifaqa aiqama maqa maaqaindari misa Anutunara koorooimariana qafaidaqa.  
Maa maqana ati munu taikee mini taikee irannaindari misa ufa iridaqa.  
Innaaruna Yaaweefa uigaana maaqara foora usakasaifanoo suani minaki maridanoo.
- 5 Suani fannoo minakiqari narí fuka anaasee amundara anaasee mararara foora asaidanoo suani qaidanoo.  
Mifa sandaranaki amani mariasara foora sandarara deedaqidanoo.
- 6 Suani fannoo innaaruna atisaaqari urureenoo ffiifanoo meeqai dinni keeqaidanoo.  
Sia moo ainaina fannoo mina ididiranara rufisee kukeeqaanoo.

*Yaaweena sandufara qidanoo.*

- 7 Yaaweena sanda ufa andeeqarafa uqanna maridanoo.  
Mifa fuka afeeka nimidanoo.  
Yaaweena naakaparufa minasaa mudi mariafa maridanoo.  
Mifa irirana siaisa irirana nimidanoo.
- 8 Yaaweena sandufa andeeqarafa marifaqa mi ufamau fimariasa asasidaqa.  
Yaaweena naamuqira ufa fannoo amana amana kai  
andeeqa nimaqaseenoo maasa qitikuraki irirana moo faqa moo faqa qimidanoo.

<sup>9</sup> Yaaweena oorinni nisaurusee madoodoonnara oosana fannoo kaaqa anukarafa maridanoo, naaru naaru kaqi kai mariannoo.

Yaaweena ufa irirafa andeeqarafa marifanoo aiqama kari amana amana kai rainanni-maqaidanoo.

<sup>10</sup> Yaaweena ufa irirafa amiqira koora uqanna uriaaqararafa maridanoo.

Mina adiafaairafa ookasaasa anoona adiafaairana faqa arusee uriaaqaranoo maridanoo.

<sup>11</sup> Mi ufausa qini Dafidisa ani ainainira faiqi irirana qimidanoo.

Qinee mi ufamau fimarunnana akiiqara anee Yaaweefa amiqi amiqimma qimaqaananoo.

<sup>12</sup> Sia moo fannoo nari aqara oosana iridanoo.

Oo Yaawee, qinee kukeeqara aqaranaki marunnana mara kaqinni quqaqisaa.

<sup>13</sup> Qinee iridaqa faqa aqee marunnnasaa ititaqisaa.

Sia mi aqarafa qini rakisi qimaqaani.

Miqimma qisainaga andeeqafuwanoo mandoosana fannoo sia rumba qimaqaani.

<sup>14</sup> Oo Yaawee, anee qini afeeka kukeeqara maqusa faqa qini asumu maree marianafa faqa mariananoo.

Amanee qini ufara faqa qini iriranara faqa amiqira fee qimasee eedoo qia.

## 20

*Rakiranaki uriqarara innaaru.*

<sup>1</sup> Anee ummaaraki maridana Yaaweenara innaaru qinanoo ani dadaaqiani.

Yakooboona Anutufa ani itita amaqaani.

<sup>2</sup> Mifa Sioonna aqanasaa nari naaqqara amaana maqakiqari ani dadaaqiani.

<sup>3</sup> Mifa anee aminna ainainara eedoo qimasee ani aiqama aandau tatufiranara faqa asasiani.

<sup>4</sup> Anutufa ani aidimari ainainna amiani.

Anee oonu mafi irinna ainainafa anoona kambiqaani.

<sup>5</sup> Anee rakiranaki urinnaaqaraannanara asasida faqa ruanaura.

Anee rakiranaki urinnaaqaraannanara maasa qeeqa Anutuna idi raidaqa amooqianaura.

Anee aiqama ainainara irainnana Yaaweefa iriani.

<sup>6</sup> Doo maqee qinee iridaqa Yaaweefa rakirana

uriqarara afeeka nari utaaqamaqai karaambaqana qini Dafidisa qiminoo.

Mifa nari amiqira maqusa innaarunaindari qini innaaru qirana irinoo.

Yaaweena afeeka fannoo firaa rakiranaki uriqarara afeeka qiminoo.

<sup>7</sup> Rakiranaki akaqausa nari qoosa rarisee mari karana saqarikidaqa, akaqausa nari qoosa saqarikidaqa.

Miqi mariafaqa maasa Yaaweena maasa Anutuna mina afeeka saqarikidaqa.

<sup>8</sup> Maasa namuqaa mi rakira ainainausa saqariki

mariasa niku amaki saamurifaqa maasa kaqi afeekaikammasee kikiqiqa mari-  
anaura.

<sup>9</sup> Oo Yaawee anee rakiranaki uriqarara afeeka qini Dafidisa qimia.

Maasa ani aaraanana maasa dadaaqia.

## 21

*Rakirana urinnaaqararanara Yaaweena amooqira idi.*

<sup>1</sup> Oo Yaawee anee Dafidina afeeka amiannanara asasiidanoo.

Anee mina dadaaqiananoo rakirana uriaaqarainara firaaqoo nasuridanoo.

<sup>2</sup> Anee mina amuqusaki aidimari ainainna amiananoo.

Anee mifa irai ainainna faqa amiananoo.

<sup>3</sup> Anee mifinnai anireenana firaaqoo amiqi amiqimma amaqaananoo.

Miqimmasee anee uriqararasa qata koorannai auqirana afisu amaqaananoo.

<sup>4</sup> Mifa mariranara irairana anee amiseenana mina marirana kisaqaikamma  
amaqaananoo.

<sup>5</sup> Anee Yaaweefa dadaaqiannanara mifa uriqarara auqu mareenoo.

Anee mina afeeka faqa uriqarara auqu faqa amiananoo.

<sup>6</sup> Ani amiqi amiqirafa naaru naaru mina faqa mariannoo.

Ani afusaa marirafa mina asasirana qumbiqa amidanoo.

<sup>7</sup> Dafidifa Yaaweena aiqama afeeka faqaana saqarikidanoo.

Yaaweena kaqi marira aidirafa marinara mifa aiqama ainainaki afeekaikammasee  
mariannoo.

<sup>8</sup> Dafidifa nari aiqama namuqaa rumbannimaqaannoo.

Mifa nariara fidiqaa imariasa faqa rumbannimaqaannoo.

<sup>9</sup> Mifa anireenoo idaurunnoo narí namuqaa aiqama kuridi nimaqaannoo.  
Yaaweenaa arana qarafa misa nambiqaamasannoo.

Ida fannoo misa qama taikaannoo.

<sup>10</sup> Sia uqanna misa atikiqari moo fannoo kaqi mariannoo. Dafidifa aiqama naru taikaannoo.

<sup>11</sup> Misa mina ariraree qimasee tipundaaramma saifanoo sia misa tipundaarirafa anoona kambiqaannoo.

<sup>12</sup> Mifa feefa niigamasainaa quqasee sandeefaranoo.

<sup>13</sup> Yaawee maasa ani firaa afeekara amooqidaqa. Maasa idi raidaqa ani afeekara amooqianaara.

## 22

*Ummaara faqaana iki raqarafa faqa Anutuna amooqira idi faqa maridanoo.*

<sup>1</sup> Oo qini Anutu, qini Anutu, naqifee ifanee anee qini minniqiseenanee.

Anee naqaa fee ifanee aadumai nianasaa maridana sia qini dadaaqidanee.

Anee naqaa fee ifanee sia qini ikiraqarana irinanee.

<sup>2</sup> Faasaana ani qeeqa Anutuna aaraunana sia maqi qiananoo.

Eendaki faqa aaraida maridaqa sia idooeeqa.

<sup>3</sup> Anee naaquqarafa andeeqara oosana faqaafa mariananoo.

Isaraee maqannaasa ani amooqi mariafa mariananoo.

<sup>4</sup> Maasa qikeeku qikaaku ani saqariki mariqau.

Misa ani saqari kammasoofana anee misa asumu mariaqeera maranau.

<sup>5</sup> Misa manda ainainakiqari ani auqu roonannai asumu mariqau.

Misa ani saqarikida sia nisaurirana mareea.

<sup>6</sup> Qinee oorudupiraua fifau doodaaniara foora maridaqa.

Qiniara nikooqaiqa fidaqaa midaqa.

<sup>7</sup> Misa qini qiqafeeqa uteeti qimasee nimaakiri rummiqi qimaqaidaqa.

Miqimmasee misa ninuka aqidaqa maqi qidaqa.

<sup>8</sup> Anee Yaaweenasaa mudi mariananoo nanaree mifa sia ani dadaaqidanoo fee.

Yaawee aniaara aidi marifanoo nanaree mifa ani sia itita amaqaidanoo fee.

Nanaree sia ani dadaaqidanoo fee.

<sup>9</sup> Oo Yaawee anee kai qini qinoona aranandakinaana amiqimmasee qini mara akoonnai quqaqisaananoo.

Qinee aanaaqi maridaqa qeeqa qinoona naamma

neemariafanana anee qini amiqimmasee rakisi qimaqee marunaqa mariqiafana.

<sup>10</sup> Qinee qeeqa qinoona aranandakiqari

kambiqaafannaqoo qari anisaa mudiqa maridaqa.

Miqiqa marunana anee qini Anutufa mariananoo.

<sup>11</sup> Ummaara qiniki maridanoo, sia nianai maria. Sia qini dadaaqirausa maridammia.

<sup>12</sup> Namuqaa moomoo kaasau aandaara foora qini fiq fiq iqa maridaqa.

Misa Basaana maqa maqakina afeeka kaasau aandaara foora qini fiq fiq iqa maridaqa.

<sup>13</sup> Misa kaasau fainiara foora nooraqasee qini qipata anaqirara rairai qidaqa.

<sup>14</sup> Nammari maqasaa adiasaafanoo dadasindee inoo qini afeeka taikeenoo.

Qini qimudaani aiqama radukinoo maridanoo.

Qini qimuqusaki daaquqarafa maridanoo.

<sup>15</sup> Qini qimaqaara aadana usidanoo.

Qini qimaakiri qimaqaarai atooqanoo maridanoo. Anee qini kookoommaki rumaqi-maqa qaanaqa kuqirara midaqa.

<sup>16</sup> Manda oosana maree mariasa aanoo qimaria fainisara foora qini fiq fiq iqa maridaqa.

Misa qini qiku qisauku aakumaree rakee iraridaqa.

<sup>17</sup> Qini qimudaani akooqoo marifaqa misa qini kaaqa tataqaidaqa.

<sup>18</sup> Misa qini qammunna marasee rainaidaqa.

Qini siuta raipaqusee kaatara foora sararammasee mareea.

<sup>19</sup> Oo Yaawee sia anee nianai maria qini daaqa ani maria.

Kai kaqi aniree qini rukia qisaa.

<sup>20</sup> Oo Yaawee misa nookinaana qini mareeqee asumu quqaqisaa.

Maa fainisa nookinaana qini mareeqee kaqinni asumu quqaqisaa.

<sup>21</sup> Kaasau fainiuqa nookinaana mara kaqinni quqaqisaa.

Qinee kaasau aandaauqa nifusaa ititarausa sia mariafaqa maridaqa.

- 22 Miqimma sainaqa anee auqaanna ainainnara qinee qeeqa maqannaasa qimannimi-  
anaura.  
Qimannimisee qinee misa suqiranakiqari ani amooqianauna.  
23 Innee Yaaweena ainainira faiqiuqa mina amooqiaqa.  
Innee Yakooboona aiku asaku mariasa mina auqu uqeeraaqa.  
Innee Isaraee maqannaasa mina kai amooqiaqa.  
24 Yaaweefa sia kudi fasiqauqa sarau imarianara irisee ameesuqu nimaqaidanoo.  
Sia oori rafusu kaqinni aqidanoo, mifa misa innaaru qirana iriseenoo dadaaqidanoo.  
25 Qinee firaa suqiranaki anee auqaanna ainainnara ani amooqianauna.  
Ani amooqirara suqiga mariasa nifusaa ani amooqianauna.  
Qinee qima afeekaikammasee suqa amianauree qiafanna tatufirana suqa amianauna.  
26 Sarau iranaki mariasa narana namasafanoo nimuaqu imarina marifaranoo.  
Yaaweeffinnai anirainausa mina amooqifaranoo.  
Miqi mariasa naaru naaru aiqama ainaina amanaikirusa mariaqa.  
27 Aiqama maqannaasa Yaaweena irifaranoo.  
Aiqama maqa maaqakinaasa mifinnai ubeekeefaranoo.  
Aiqama fasiqa anaasee mina amooqifaranoo.  
28 Yaaweefa karaambaiqa maridanoo aiqama maqannaasa rakisinnimaqaidanoo.  
29 Aiqama ramoo ramaa imariasa mina oorinni niqoori saunu areefaranoo.  
Aiqama faiqi faiqi mina oorinni niqoori saunu areefaranoo.  
30 Naaru kambiqainausa mina ainainira faiqiuqa marifaranoo.  
Misa kasooqee kambiqainausa Yaaweenara qimannimifaranoo.  
31 Yaaweefa nari faiqi anaasee maroonara naaru kambiqainausa qimannimifaranoo.

## 23

*Yaaweefa maasasaa sipsipasaara foora rakisirafa maridanoo.*

- col <sup>2</sup> Yaaweefa qini sipsipasaara foora rakisi qimaqee marifaqa qinee sia moo ainainara  
sarau ianauna.  
Mifa qini mareeqeenoo sipsipara foora quqeenara andandaki quqasaifaqa namasee  
faiqaidaqa.  
Mifa qini qifiqeeqee amiqira nammari reendeenamasee ooqu fimarina afaisaa quqaqi-  
saifaqa namasee idooaidaga.  
<sup>3</sup> Mifa qini fuka afeeka qimidanoo.  
Mifa nari qima afeekaika maqoomau finoo qini andeeqara aatata kai qifiqee fidanoo.  
<sup>4</sup> Yaawee anee qini faqa mariannanara qinee kuqira  
ummaaraki asukuna titunaanu qiranakiara foora fidaqa sia moo mandainainara rufi-  
aanauna.  
Ani saunu faqa unnaana samu faqa qini itita qimaqeenoo.  
<sup>5</sup> Anee qini namuqaa nifusaa firaa oomaqa qini qimiananoo.  
Qinee uriqarara fasiqara foora marunana qini daarama quqaananoo.  
Anee amiqi amiqira ainaina namariara foora qini kaafaki adia afairaqaramma qimi-  
ananoo.  
<sup>6</sup> Ani amiqi amiqirafa faqa amuqusirafa faqa qini faqa mariinoo kuquananoo kai  
taikaannoo.  
Ani amaana maqa fannoo qini maaqara foora  
marinaqa qinee minaki keeqee raudee iqa kuquananoo taikaannoo.

## 24

*Uriqarara karaambaiqa.*

- <sup>1</sup> Maa maqa maaqafa faqa aiqama minakinaa ainaina faqa Yaaweenaindi kai maridanoo.  
Maqa faqa minasaa maria fasiqa aanaaseesa faqa minaindi kai maridaqa.  
<sup>2</sup> Mifa maa maqana ameemaana maru nammariina amuaaqa auqu quqanau.  
Quqaseenoo mina faakanauqa maqa ameemaanaindara nammariiki rakiqanau.  
<sup>3</sup> Yafee amana Yaaweena aaganasaa oorufuannoo fee.  
Yafee amana mina naaquqara amaana maqaki keeqaannoo fee.  
<sup>4</sup> Andeeqara oosana auqee marifa faqa amiqira amuqusa faqaafa faqa sia unna anutusa  
nimooqi mariasa  
faqa sia unna qimasee nimana aiqee mariasa kai minaki keeqeefaranoo.  
<sup>5</sup> Yaaweefa misa asumu mara quqasee amiqi amiqimma nimaqaannoo.  
Miqimmaseenoo Anutufa misara aqarana siaisee qiannoo.  
<sup>6</sup> Miqira fasiqauqa Anutufinnai anidaqa.

Misa Yakooboona Anutuna oorinni fidaqa.

<sup>7</sup> Innee faandaamura kooqiuqa firaagoo atua aquaqa.

Innee ooqeenaa amaana maqa kooqiuqa faqa atuasaifanoo uriqarara karaambaiqa keeqaani.

<sup>8</sup> Yafee mi uriqarara karaambaiqafa maridanoo fee.

Mifa Yaaweefa afeeka faqa eeraara faqa faqaafa maridanoo.

Mifa Yaaweefa aiqama rakiranaki uriqaree marifa maridanoo.

<sup>9</sup> Innee faandaamura kooqiuqa firaagoo atua aquaqa.

Innee ooqeenaa amaana maqa kooqiuqa faqa atuasaifanoo uriqarara karaambaiqa keeqaani.

<sup>10</sup> Yafee mi afeeka karaambaiqafa maridanoo fee.

Yaaweefa aiqama maqannaa uriqarara afeeka faqaafa, afeeka karaambaiqa maridanoo.

## 25

*Rakisinnimaqaranara faqa itita nimaqaranara faqa innaaru qirufa.*

<sup>1</sup> Oo Yaawee qeeqa innaaru qirana ani amidaqa.

<sup>2</sup> Oo qini Anutu, qinee ani saqarikidaqa.

Namuqaa darifaqa qisauruanoora anee mi dariranasaa ititaqisaa.

Anee dadaaqinaqa qini namuqaa sia qiniara ataasa ataasa qiqaqa.

<sup>3</sup> Ani saqariki mariasa namuqaa rafaafafu nimaqarafa sia maridanoo.

Qusufa qimasee ani Yaaweenara kaukaata qimariasa namuqaa misa rafaafafu ni-maqaidaqa.

<sup>4</sup> Oo Yaawee anee fimarianna aanna qini uqaqifiqaina fua.

Anee fimarianna aannara qini daamuqinaqa iria.

<sup>5</sup> Anee qini Anutufa qini asumu maree marianafa

mariannanara ani anoona ufa mau firana daakapa.

Qinee aiqama kari ani saqarikidaqa.

<sup>6</sup> Oo Yaawee aneenna qimudaoo qirana faqa aneenna

naaru marira amuqusirana quqannifiqoonnanara oonu mafi iria.

<sup>7</sup> Qinee kumaarasaa auqaafanna aaqarana akiiqara minniqisaa.

Oo Yaawee, aneenna naaru marira amuqusiranannoo

faqa aneenna amiqi amiqirannoo faqa qiniara oonu mafi iriqisaa.

<sup>8</sup> Yaaweefa andeeqara marirana faqaafa marinara aaqee mariasa andeeqara aanara naamua qidanoo.

<sup>9</sup> Nari nifaqaq mara maree qumi mariasa Yaaweefa andeeqara aatata nifqee fidanoo, nari aidiranara qimannimidanoo.

<sup>10</sup> Mina moodaanaki kira ufa faqa mina sandufa faqa afaqee mariasa Yaaweefa nari mapukusee marira

oosanannoo faqa nari amuqusiranannoo faqa nifqee fidanoo.

<sup>11</sup> Oo Yaawee, aneenna qima afeekai kiranara oonumafi irisee qini moomoo aaqarana akiiqara minniqisaa.

<sup>12</sup> Yaaweenara naaquqee marisa mifa amiqira aanara qimannimiannoo.

Qima niminaqa mi mau fifaranoo.

<sup>13</sup> Misa aiqama ainaina amanaikiranaki amiqiranaki marifaranoo.

Misa faiqi namu maqa maaqa mareefaranoo.

<sup>14</sup> Yaaweefa mina ufa qaindusi mariasa niqoondi maridanoo.

Mifa nari moodaanaki kira ufa qimaqoona kafaa qimannimidanoo.

<sup>15</sup> Qinee aiqama kari dadaaqianifeera Yaaweefinnai qifu maqaidaqa.

Miqi marunanoo mifa qini manda ainainakinaana itita qisee marifa maridanoo.

<sup>16</sup> Qinee qeeqaraa marida ummooquki marunnanara Yaawee anee qinnee unnannai quandafi qiniara qimudaoo qia.

<sup>17</sup> Qini qimuqusakina oosana oosana ummaarauqa maraqa qisasee qini oosana oosana ummaarakinaana mara kaqinni quqaqisaa.

<sup>18</sup> Oo Yaawee, qini aiqama aaqarana akiiqara minni qiseenana aupurarana faqa fitin-ranara faqa dadaaqia.

<sup>19</sup> Oo Yaawee anee qafaa qini namuqaa moomoo uqanna maridaqa.

Misa firaagoo uqanna qiniara fidaqaa idaqa.

<sup>20</sup> Qini titaqisaidana qini marirana mara afeedamma qisaa.

Anee itita qimaqaanneera qinee anee iannannai anidaqa.

Namuqaa qini rafaafafu qimaqee marianasaa itita qisaa.

<sup>21</sup> Qinee ani mandaaqee marunnanara qini andeeqarafa



faqa anoona qiramau firafa faqa qini rakisiqimaqaani.

<sup>22</sup> Oo Anutu, Isaraee maqannaa aneenna faiqi anaasee nariqa oosana oosana ummaara kinaana mara kaqinni quqannisaa.

## 26

*Andeeqara fasiqa innaaru qirufa.*

<sup>1</sup> Oo Yaawee qinee andeeqara oosana maree marunnanara faqa firaaqoo ani saqariki marunnanara faqa iriseenana qiniara aaqarana siai fee qinaqa iriaqa.

<sup>2</sup> Oo Yaawee, anee qini diuqummasee qimanammasee qafaa.

Qini didirana faqa qini irirana faqa rainasee iria.

<sup>3</sup> Ani aiqama kari mari amuqusirafa qini indaarunnikamma qimaqaidanoo.

Aniki mapukusee marira oosana fannoo qini dadaaqidanoo.

<sup>4</sup> Qinee sia fifau aatata nimariasa saimbaqa nidaqa.

Qinee sia qaaralki mariasa faqa moodaanaki kianaara.

<sup>5</sup> Qinee aaqee mariasa faqa moodaanaki nirara fidiqaammidanoo.

Manda oosana auqee mariasa finnaaqa raidaqa.

<sup>6</sup> Qinee qeeqa qisauku nammari uqusee qeeqara aaqarana siaisee qidaqa.

Miqimmasee qinee ani aidara fiq u fiq u idaqa ani amooqidaqa.

<sup>7</sup> Qinee aniara dufi dufi qira idi raidaqa anee firaa ainaina auqoonnanara qimannimi-daqa.

<sup>8</sup> Oo Yaawee qinee anee marianna maqaanara firaaqoo dididanoo.

Ani qareenarafa mariqoora firaaqoo dididanoo.

<sup>9</sup> Sia aaqee mariasa namufaqa qini kuridi qimaqaa.

Faiqi nari mariasa darirana kinaana qini mara kaqinni quqaqisaa.

<sup>10</sup> Miqi mariasa aiqama kari manda oosana faqa umeeramaisaaniffee munnimma maqee maqee maree mariasa faqa nariranakinaana qini mara kaqinni quqaqisaa.

<sup>11</sup> Qinee qeeqaraa andeeqara oosana auqaidaqa.

Anee qiniara qimudaoo qimasee qini asumu mara quqaqisaa.

<sup>12</sup> Qinee aiqama manda ainainakiqari kaqinni maridaqa.

Qinee Yaaweena faiqi anaasee suqiranaki mina amooqidaqa.

## 27

*Anutuna amooqira innaaru.*

<sup>1</sup> Yaaweefa qini qoomara foora maridanoo qini asumu

maree marifa marinara qinee yanaree moonara rufiaanauree.

Qini marirana nirana afeeka Yaaweefa kai marinara qinee yanaree maparaa ianauree.

<sup>2</sup> Manda oosana maree mariasa aanaamuru qini

namuqaauqa qini makuruaanee qimasee anireeqa niku amaki saamurifara.

<sup>3</sup> Qini namuqaa moomoo aniree qini maqusa uqusaifaqa sia qinee misara rufiaanaura.

Rakiranaki misa aniree darirarifaqa sia qinee maparaa ianaura qifaafa quqasee mari-  
anaura.

<sup>4</sup> Qinee moodaa ainaina kai Yaaweenasaa qaraana marararee qidaqa, qinee minara kai randaanaura.

Qinee maa maqanasaa marunna kamuqoo Yaaweena uiqaana maqaki marianauree qidaqa.

Minaki maridaqa Yaaweena qareenarana qafamasee asianauree qidaqa.

Mina uiqaana maqaki mina iriranara mariranara randaanauree qidaqa.

<sup>5</sup> Manda aukuaana kambiqaiananoo nari mari maqanaki kukeeqa qimaqaannoo.

Nari uiqaana maqaki qini kukeeqaqisaanoo.

Mifa qini uqeereeqee aaqanasaa oonisaa amiqiraqoo quqaqisaanoo.

<sup>6</sup> Doo miqoo qini namuqaa qini uqusaafanoo Yaaweefa qini mareeqee misa urinnaaqarama saifaqa marianaura.

Miqimmasainaqa qinee nari Yaaweena naaquqara uiqaana maqaki faafa quqasee اساسammasee aanda uqatufirana suqamianaura.

Qinee idi namu faqa ufireena namu faqa Yaaweenara amooqira idi raanaura.

<sup>7</sup> Oo Yaawee qinee qeeqa ufannai aniara nameera qimasee aaraanana iria.

Anee qini qifauarana qimisee kafaa anoona ufa qimaqimia.

<sup>8</sup> Anee qiniara aniree qini qimooqiannee qianaqa Yaawee, qinee eedoo qimasee ani-  
anaura.

<sup>9</sup> Oo Yaawee aneenna oori afiri sia qini kukeeqa qimaqaa.

Sia qiniara arana qaani. Sia aneenna ainainira faiqi qiniara anirandee fuannee qia.

Anee qini dadaaƙi marianafa mariananoo.

Oo qini Manika Anutu anee qini asumu maree marianafa mariananoo,  
sia qini minniqisaa sia qini quƙaqisaa.

<sup>10</sup> Qini qinaukoo qini minniqisaifanoo Yaaweefa qinisaa rakisiannoo.

<sup>11</sup> Oo Yaawee anee qiniara auƙaannee qimarianna ainainnara daamuƙia.

Qini namuƙaa moomoo marianara irisee andeeƙara aatata amiqiraqoo qifiqee fua.

<sup>12</sup> Sia anee qini mareeqee qini namuƙaa marianaki quƙaqisaa.

Misa naaƙuƙara ufannai faƙa unna ufannai faƙa qini daridaƙa.

<sup>13</sup> Qinee maa ainainnara amiqimmasee iridaƙa,

qinee kasooaqee kaƙi mariasa faƙa maridaƙa Yaaweena amiqi amiqirana  
qafaanaura.

<sup>14</sup> Yaaweena saƙarika.

Sia ani amuƙusa ummaara raani, afeekaikammasee mina saƙarika.

## 28

*Dadaaqiani fee innaaru.*

<sup>1</sup> Oo Yaawee anee qini dadaaqida ititaqimaqee  
marianaƙa minakiqari qinee ani aaraanana qini nammeera qirana iria.

Anee sia qini anoona ufa qima qiminaƙa qinee

kuƙira maƙa maaƙaki kuƙufida fimariasa qambaana marianaura.

<sup>2</sup> Qinee qeeƙa qisauku ani naaƙuƙara amaana maƙa

maritinaɪ uqeerasee dadaaqianneera innaaru qianana iria.

<sup>3</sup> Oo Yaawee anee sia manda oosana maree mariasa faƙa aaqee mariasa faƙa amiqira  
adiafaa ira ufa

qimaria fanoo misa nimuƙusaki manda irirafa umbiqaraura namuƙa qini  
rafaaqafu qimaƙaa.

<sup>4</sup> Oo Yaawee misa auqee mariana akiqara aupurarana nimia.

Nisaukunnai manda oosana auqee mariana amana kai aupurarana nimia.

Misa aiqama manda oosana maree mariana amana kai aupurarana nimia.

Misa aƙarana akiqara amanaiƙamma nimia.

<sup>5</sup> Miqi mariasa Yaaweefa auqoo ainainnara sia iridaƙa.

Mifa nari asaukunnai auƙu quqoo ainainnara sia misa

iridaƙa mina akiqara Yaaweefa misa aupurarana nimiseenoo kuridi nimaqannoo.

<sup>6</sup> Yaaweefa qinee dadaaqiani feera nammeera qunnana irinara mina amooqidaƙa.

<sup>7</sup> Yaaweefa qini itita qimaqaseenoo qini dadaaqi marifa maridanoo.

Qinee mina saƙarikidaƙa.

Mifa qini dadaaqirana faƙa asasirana faƙa qimisaiƙaƙa asasidaƙa.

Minara qinee mina amooqidaƙa asasira Idi rama amaƙaƙidaƙa.

<sup>8</sup> Yaaweefa nari faiqi anaasee itita nimaqaidanoo.

Mifa nari utaƙamaƙai karaambaƙana itita

amaqaseenoo mina manda ainainakinaana mara kaqinni quƙaisaidanoo.

<sup>9</sup> Oo Yaawee aneenna faiqi anaasee manda

ainainakinaana mara kaqinni quqasee anindikiƙa mariasa amiqi amiqimma ni-  
maƙaa.

Anee misasaa sipsipasaa rakisirafara foora maridana naaruara misasaa rakisia.

## 29

*Aakuusaa ufai uqirafa Yaaweena ufara foora maridanoo.*

<sup>1</sup> Innee innaarunai mariasa mina amooqiaƙa.

Mina afeekara faƙa qareenaranara faƙa amooqiaƙa.

<sup>2</sup> Yaaweena qareenara auƙu uqeeraaƙa.

Yaaweefa naaƙuƙarafa koorooinaƙa mina oorinni niqoori saunu arafi naaƙuƙamaƙi mina  
amooqiaƙa.

<sup>3</sup> Yaaweefa ufa qifaƙa ooruku nammariki aiqamaindari mina ufa iridaƙa.

Uriqarara qareenarana faƙaa Anutufa innaarunaira

foora darara qifanoo ooruku nammari aiqamai daraanifaƙa iridaƙa.

<sup>4</sup> Yaaweefa aiqama afeeka faƙa eraarirana faƙaana ufa qirana irisee aiqamausa  
rufiaidaƙa.

<sup>5</sup> Yaaweena ufa fannoo firaa saƙari raudee marifa maridanoo.

Yaaweena ufa fannoo Reebanoona maƙa maaƙaki

mari saƙarisa sidaa saƙariuƙa raudee marifa maridanoo.

<sup>6</sup> Yaaweefa qifaqa Reebanoona aaqanauqa kasidaqa aandau aanaaqiara foora rafusaki rafusaki idaqa.

Qeeramoonna aaqana faqa miqi kai idanoo burimakau aanaaqi timmusara foora rafusaki rafusaki idanoo.

<sup>7</sup> Yaaweena ufa fannoo aakuusaara foora pananana qidanoo.

<sup>8</sup> Yaaweena ufa fannoo aadana maqa maaqa kasidanoo.

Mifa qifanoo Kadeesa aadana maqa maaqa faqa kasidanoo.

<sup>9</sup> Yaaweena ufa fannoo aakuusaara foora pananana qinoo saqari amanee rauqu aqidanoo.

Yaaweena maaqaki mariasa firaqoo faaqa rumasee Yaaweefa uriqarara qareenarana faqaafee qidaqa.

<sup>10</sup> Yaaweefa naaruara uriqarara karaambaiqa maridanoo aiqama nammariuqasaa rakisidanoo.

<sup>11</sup> Yaaweefa narí aiku asauku afeeka nimidanoo.

Amiqi amiqimma nimaqasee asooaranaki quqannisaidanoo.

### 30

*Dufi dufi qira innaaru.*

<sup>1</sup> Oo Yaawee, ani auqu qinee uqeeraidaqa.

Qini namuqaauga qini darusee ataasa ataasa qidaqa nasuriraree qianakinaana kaqinni mara quqa qisaannanara ani auqu uqeeraidaqa.

<sup>2</sup> Oo Yaawee qini Anutufa qinee ani dadaaqiranara aaraunana anee qini dadaaqiananoo.

<sup>3</sup> Oo Yaawee anee qini madikakinaana qumbaqi qisaananoo, qinee kuqira madikaki ooqu raunana anee qumbaqisee kaqi marirana qimiananoo.

<sup>4</sup> Oo innee Yaaweenaki mapukusee mariasa, innee mina amooqira idi raaqa.

Innee mifa auqoo ainainara oonu mafi irisee mina dufi dufi qima amaqaqa.

<sup>5</sup> Yaaweena aanooqirafa qusakamu marinoo taikaannoo.

Mina amiqirafa maa maqanasaa kisaagasaa mariannoo.

Eendaki qusasaa qikiraqarafa mariannoo, iaqainanoo kananaana asasirafa mariannoo.

<sup>6</sup> Qinee afeekaikammasee mapukiqa maridaqa qinee aaqamasee qeeqara maaqi qiqifana.

Qinee naaruara naaruara sia kasianauree qiqiafana.

<sup>7</sup> Oo Yaawee anee qini amiqimma qimaqaseenana aaqana saaqaraa maaqara foora mariafanana qinisaa itita qimaqanau.

Anee aneenna oori kaqinni quandoonaqa qinee maparaa iranaki mariqiafana.

<sup>8</sup> Oo Yaawee qinee ani aareeqa anee dadaaqirana qimianneera aareeqa

<sup>9</sup> Qini kuqirafa sia kaqikaagaqoo faqa ani amooqirafa mariannoo.

Qinee madikaki ooquraananoo qini mi kuqirafa sia amana moo ainaina auqaannoo.

Kuqirauasa amanee ani amooqifaree. Sia amana.

Amanee misa anee kisaagasaa amiqimma nimaqee mariannanara kooroo ifaree. Sia amana.

<sup>10</sup> Oo Yaawee, anee qini innaaru irisee qimudao qimasee qini dadaaqia.

<sup>11</sup> Qinee soofarakaki marunnana anee quandasee idi rarana qimiananoo.

Anee qini ikiraqarana mara aquseenana asasirana qini fiqumma datimma qimaqaananoo.

<sup>12</sup> Miqimma qisaannanara qinee sia ufa siaina qireeda marianaura qinee ani amooqira idi raanaura.

Oo Yaawee anee qini Anutufa qinee naaruara naaruara ani dufi dufi qima amaqaanau.

### 31

*Anutuna saqarikira innaaru.*

<sup>1</sup> Oo Yaawee qinee itita qimaqaanneera anee iannannai anidaqa.

Naaruara sia qini qisauriranaki quqaqisaa.

Anee andeeqara Anutufa mariananoo qini kuqiranakinaana mara kaqinni quqaqisaa.

<sup>2</sup> Qini ufa irisee maqee uqanna qini kuqiranakinaana mara kaqinni quqaqisaa.

Anee qini faandaamura ooniara foora maridana qini itita qisaa.

Anee qinisaa ququsara foora auqu ititaseenana qini kuqiranakinaana mara kaqinni quqaqisaa.

<sup>3</sup> Oo Yaawee anee qini faandaamura ooniara foora faqa ququsara foora faqa mariananoo. Aneenna qima afeekaikunadee inana qini qisauku qumaree aana muquninaqa fua.

- 4 Anee qini dadaaqinaqa qini qimaara fufuqaa ufaannanaki sia arua.  
Manda ainainasaa auqaanara foora qinisaa mandaqa qimaqaa.
- 5 Ani asaukuki qeeqa qimana quqaidaqa.  
Oo Yaawee anee qini kuqiranakinaana mara kaqinni quqa qiseennaranoo.  
Anee mapukusee marirana faqaa Anutufa mariananoo.
- 6 Anee unnaqira anutusara innaaru qimariasara fidiaqaa imariananoo.  
Misa miqi mariafaqa qinee ani kai saqarikidaqa.
- 7 Ani maasara kisaqaasaa amuqusiranara qinee asasidaqa nasurianaura.  
Anee qini aupurarana faqa ummaara faqa qafaannanara miqianaura.
- 8 Anee sia qini mareeqee namuqaa nisaukuki quqasaanaqa qini qumareea.  
Qinee qifaqa quqasee qeeqa didimarinnai firana anee qimiananoo.
- 9 Oo Yaawee qinee qummaarakari maridaqa qiniara qimudaao qia.  
Qinee kaaqa moomoo kari iki raqee saunanoo qifukaumu innooqafinoo.  
Qini qimudaani firaqoo ummooqukidanoo.
- 10 Qini ummaara fannoo qini afeeka taikaidanoo.  
Qini iki raqarafa qini marirana qusa raidanoo.  
Qini ummaara fannoo qini afeeka taikasaifanoo qini qimudaani ummooqukidanoo.
- 11 Qini namuqaa faqa qini qiqoonasaa faqa qiniara uteeti amara auqidaqa.  
Minara kai qiniara irimariasaa naaquqaiifaqa qini daaqu rufiqaidaqa.  
Aana qini paquri masee quqasee sandaidaqa.
- 12 Qinee kuqira foora iqa marunaqa qiniara qaunidaqa.  
Qinee rukamuffaqa aqusaa qafeesara foora maridaqa.
- 13 Qini namuqaauqa maqandanai nari qimami nari qimami masaidaqa uteeti qimari-  
afaqa iridaqa.  
Rufiarafa firaafa qini fiqum inoo maridanoo.  
Misa moodaanaki suqufiqa qini marirana taika qimaqaaneera tipundaaridaqa.
- 14 Miqi mariafaqa Oo Yaawee qini Anutu qinee ani kai saqarikidaqa.
- 15 Qinee aiqama kari ani rakisi qimaqaranaki maridaqa.  
Qini namuqaa qini darirara qifaqaqa nuanakinaana qini mareeqee amiqiraqoo quqa  
qisaa.
- 16 Qini aneenna ainainira faiqira qimudaao qidana qifaqaa.  
Aneenna sia takee mari amuqusiranaki qini mara quqa qisaa.
- 17 Oo Yaawee, qinee ani aaraunannara anee qinaqa  
qini namuqaauqa sia qini qisauriranaki quqaqisaaqa.  
Manda oosana maree mariasa kai nisauriranaki mariaqa.  
Misa ufa taikafinaqa madikaki kuqirausa faqa mariaqa.
- 18 Unna ufa qimariasaa noo qummuna mannisaa.  
Misa nari nifaqa uqeerasee akaqasaa mara maree  
qumimariasaa misa andeeqarasara manda ufa qidaqa.
- 19 Ani ameemaanai maridaqa ani ufa mau fimariasaa  
afeedamma nimaqaqaanna ainainasaa kaaqa amiqirafa maridanoo.  
Anee firaqoo amiqimma nimaqee mariannanara aiqamausa iridaqa.  
Ani saqariki mariasa anee firaqoo rakisi nimaqaidana itita nimaqee mariananoo.
- 20 Ani saqariki mariasa narirara tipundaari mariafana  
anee mareeqee aneenna afusaa amiqiranaki quqannisee marianafa mariananoo.  
Misa namuqaa nifairiranakinaana mareeqee amiqira auqaanai quqannisee marianafa  
mariananoo.
- 21 Yaaweena amooqirana amiaqa.  
Qini namuqaa qini fiqum qimma datimmafi  
daruaneerufanoo qiniara firaqoo aidufanoo itita qimaqoonara amooqiaqa.
- 22 Qinee rufiidaqa maqi qimasee iriqa, doo Yaaweefa  
qini nari afusaa marunnana mareeqeenoo kaqinni quqaqee maqi qimasee irunanoo,  
Yaaweefa qini innaaru qirana irisee dadaaqinoo.
- 23 Innee Yaaweena faiqi anaasee innee Yaaweena firaqoo nidiani.  
Yaaweefa nari ufaki mapukusee mariasa itita  
nimaqaseenoo, nari nuqu uqereee mariasa nari manda oosana akiqara nimirifa  
maridanoo.
- 24 Innee Yaaweena mapukusee mariasa inni nimuqasa fannoo aiqama kari afeekaiki-  
noo mariani.

- <sup>1</sup> Inni numoo minninsaisa faqa inni numoo rafaafafu nimaqasaisa faqa asasiyaqa.
- <sup>2</sup> Yaaweena nifairiranaki sia mari fasiqafa اساسيرانaki maridanoo.  
Sia unna qimasee nikaru qimari fasiqafa faqa اساسيرانaki maridanoo.
- <sup>3</sup> Qinee qeeqa numoo sia koorooiqa iki raqaida marunanoo suani afu keeqaidanoo.  
Miqunanoo qini qimudaani ummooqukidanoo.
- <sup>4</sup> Eendaki faqa faasaana faqa Yaaweeneenna  
asaukunnai fannoo qini aupurarana qimimariananoo qini afeeka taikenoo.  
Aiqaiqa aukuaana suani firaafa qeenoo maqa aadana ususaifanoo taadairindee idanoo.
- <sup>5</sup> Qinee miqifa maridaqa qeeqa aaqarana ani Yaaweena afusaa akooqoo koorooiqa.  
Qeeqa manda oosana sia kukeeqeeqa kooroommasee ani qimamiqa.  
Qinee maaqi qifa, qeeqa aaqarana Yaaweena afusaa  
koooro qianauree qimasee kooroomma saunana  
anee Yaaweefa qini mandoosana faqa qini aaqarana akiiqara faqa minniqisaananoo.
- <sup>6</sup> Miqiananara aiqama ani ufamau fimariasa aiqama ainainara randeeqa aniara in-  
naaru qidaqa.
- Firaa ummaara nammari aifiara foora inoo sia misa rafaafa fuannoo.
- <sup>7</sup> Anee qini kukeeqara maqusa mariananoo.  
Anee ummaara aukuaana qinisaa rakisinnaranoo.  
Anee qini maree marianafa mariannanara firaaqoo idi raidaqa.
- <sup>8</sup> Yaaweefa maaqi qidanoo.  
Qinee anee finna aannanara qima amianauna.  
Qinee ani aakapamasee aamuaqianauna.
- <sup>9</sup> Anee sia qoosa doonkiara foora furufaria. Misa irirana siai ainainara foora maridaqa.  
Anee qainna  
misa nooki quqasee rarisee mariandee inaqa irifaranoo.  
Anee nookinaa qainna sia quqainaqa sia ani ufamau fifaranoo.
- <sup>10</sup> Manda oosana maree mariasa moomoo ummaara oosana oosana misaki maridanoo.  
Yaaweena saqariki mariasa mina naaru marira amuqusirafa misa kukuqinoo maridanoo.
- <sup>11</sup> Innee andeeqarasa Yaaweefa auqoo ainainausara اساسida nasuriaqa.  
Innee mina ufa qaindusi mariasa faqa ridaqa asasiyaqa.

### 33

#### *Amooqira Idi.*

- <sup>1</sup> Innee andeeqarasa Yaaweefa auqoo ainainnara faqa ridaqa asasiyaqa.  
Mina ufa mau fimariasa mina amooqiaqa.
- <sup>2</sup> Innee piripuna aridaqa Yaaweena amooqiaqa.  
Qisaukuqara taikasee sandafaqaa piripuna aridaqa Yaaweena amooqira idi raqa.
- <sup>3</sup> Innee Yaaweenara fuka idi raidaqa amooqiaqa.  
Innee amiqimmasee akoofasara foora piripuna aridaqa faqa fuisee qidaqa amooqira idi  
raqa.
- <sup>4</sup> Yaaweena ufa fannoo kuqaa anoona kai maridanoo.  
Aiqama ainaina augee marina mi mau kai uqee marifa maridanoo.
- <sup>5</sup> Yaaweefa andeeqara marirana faqa andeeqasee amana amana kai rainee marianara  
faqa aididanoo.  
Maa maqa maaqanaki Yaaweena sia taikara amuqusirafa qumbiqanoo maridanoo.
- <sup>6</sup> Yaaweefa ufannai qufanoo innaaruna kambiqanau.  
Nari ookinaa aidoonnai qufanoo suani faqa quqoona faqa fasau faqa kambiqanau.
- <sup>7</sup> Yaaweefa ooruku nammari susufinnaki saka quqaandee inoo moodaannai suqu  
quqanau.  
Ooruku nammari faruma meemai uqanna quqasee afeedinau.
- <sup>8</sup> Minara maa maqa maaqanasaaqaraasa aiqama Yaaweenara innaaru qifaqa.  
Maa maqa maaqanasaa mariasa minara naaquqee marina mina ameemaani mariaqa.
- <sup>9</sup> Yaaweefa qufanoo maa maqa maaqafa kambiqanau.  
Mifa afeeka ufa qufanoo aiqama ainaina kambiqanau.
- <sup>10</sup> Yaaweefa maa maqana saaqaraasa manda ufa tipundaariefanoo titannimaqaidanoo.  
Maa maqana saa mariasa auqararee qia ainainna itita nimaqaidanoo.
- <sup>11</sup> Yaaweena qimirirafa miqinoo maridanoo naaruara naaruara afeekaikamminoo mari-  
danoo.  
Mina amuqusakinaa qimirirafa naaruara naaruara mariannoo.
- <sup>12</sup> Aiqama maqannaasa kiqari ya maqannaasee misa Anutufa Yaaweefa maridanoo fee  
asasiyaqa.

Yaaweefa nariaree qimasee utaaqama qaisa asasiaqa.

<sup>13</sup> Yaaweefa innaarunaindari maqasaa mariasa aiqama niuqidanoo.

<sup>14</sup> Nari maridanoo rakisi nimaqee mariqooqari aiqama maqasaa mariasa niqafaidanoo.

<sup>15</sup> Yaaweefa aiqama maqannaasa nimuqusa auqunisaidanoo.

Misa auqee maria aiqama ainainnara iridanoo.

<sup>16</sup> Sia moo karaambiqa fannoo nari rakira fasiqa moomoonnaifau rakiranaki urigaraidanoofau.

Afeeka sundia sia nari amudaanai qiranannai fau rakiranaki namuqaa urinnaaqaraidanoo fau.

<sup>17</sup> Rakiranaki maraqa nua qoosausa sia sundiauqa dadaaqifaqa rakirana urinnaaqaree-faranoo.

Mi qoosausa firaa nimudanai qiranannai sia amana moona kuqirana titaqamaqaannoo.

<sup>18</sup> Yaaweena afu fannoo nariara rufiee mariasa dadaaqirara misasaa maridanoo.

Yaaweena naaru marira amuqusirasasaa

mundimariasa misasaa Yaaweena afu fannoo rusinoo maridanoo.

<sup>19</sup> Mifa kuqiranasaa itita nimaqaidanoo.

Mifa aandaroo aukuaana faqa rakisi nimaqaidanoo.

<sup>20</sup> Maasa qimana Yaaweenaki kai quqaidanoo.

Mifa kai maasa dadaaqirafa maasa saqari maridanoo.

<sup>21</sup> Maasa mina naaquqara andeeqara auqu saqarikunnanara firaaqoo asasidaqa.

<sup>22</sup> Oo Yaawee ani naaru marira amuqusirafa maasa faqa mariani.

Maasa anisaa mudiqa maridaqa.

## 34

### *Anutuna amiqirana amooqira idi.*

<sup>1</sup> Qinee aiqama kari Yaaweenara dufi dufi qianauna.

Qinee sia mina amooqirana munu quqaanauna.

<sup>2</sup> Qinee mifa auqoo ainaina irisee mina amooqianauna.

Ummaaraki mariasa minara irisee asasiaqa.

<sup>3</sup> Innee aniraifaqa maasa Yaaweena auqu qareenaranara koorooia.

Doo aniraifaqa innisaimbaqa mina auqu uqeeraa.

<sup>4</sup> Qinee Yaaweenara innaaru qunanoo mifa qini dadaaqinoo.

Qini rufiaranakinaana iduku qiseenoo.

<sup>5</sup> Ummaaraki mariasa Yaawee finnai ubeekamafuanara misa asasidaqa.

Minara misa saqarikirafa sia kuridiannoo.

<sup>6</sup> Kudi fasiqauqa Yaaweenara innaaru qiafanoo dadaaqidanoo.

Mifa misa aiqama ummaarakinaana mareeqee kaqinni quqannisaidanoo.

<sup>7</sup> Yaaweenara rufiee mariasa mina angiroouqa misa fiqufiquifa maridaqa mandainainakinaana maraqunnisaidafa.

<sup>8</sup> Aneenna kai Yaaweena firaa amiqiranara oonu mafi iria.

Yaaweena itita nimaqaranaki kukeeqa mariasa asasiranaki maridaqa.

<sup>9</sup> Innee Yaaweena faiqi anaasee innee Yaaweena ameemaanai mariaqa.

Mina ameemaanai mariasa sia sarauirafa misaki mariannoo.

<sup>10</sup> Kaasau faini narana sia amanaikianaara naara raifaqa kudoosaapidaqa.

Yaaweena ufa mau fimariasa sia moo amiqira ainainara sarauifaranoo.

<sup>11</sup> Innee qini faiqinamu mai aniree qini ufa irifaqa qinee Yaaweenara rufiara oosanara qimannimianauna.

<sup>12</sup> Yafee moo fasiqa fannoo kaqi mariranara ridanoo fee.

Anee kisaaqasaa maridana asasiranara aididanoo fee.

<sup>13</sup> Aidinana anee sia manda ufa qia.

Anee sia unna ufa qia.

<sup>14</sup> Manda oosana ameesuqusee amiqira oosana maraa.

Aneenna aiqama amuqusannoo asoaranara randasee faiqi anaasee faqa moodaanaki maria.

<sup>15</sup> Yaaweena afu fannoo andeeqarusasaa mundinoo marifanoo rakisi nimaqaidanoo.

Mina aaqoo fannoo misa nammeeraqiana iridanoo.

<sup>16</sup> Yaaweefa manda oosana maree mariasara akooqaidanoo.

Misa kuquafaqa miqoo kai misara qaunidaqa.

<sup>17</sup> Andeeqara oosana maree mariasa Yaaweena aaraafanoo iridanoo.

Mifa misa oosana oosana ummaarakinaana dadaaqidanoo.

<sup>18</sup> Yaaweefa ummaarakii mariasa dadaaqirara naaqa maridanoo.

Mifa kudoosaapee mariasa dadaaqinoo mara amiqiraqoo quqannisaidanoo.

<sup>19</sup> Andeeqara fasiqa anaasee ummaara oosana oosana fannoo aupurarana nimifanoo, Yaaweefa minakinaana aiqama mareeqee amiqiraqoo quqannisaidanoo.

<sup>20</sup> Yaaweefa misa aiqama nimudaanisaa rakisidanoo, sia moodaa nimudaani faqa raqanoo mariannoo.

<sup>21</sup> Manda oosana fannoo manda oosana maree mariasa kuqa naruanoo.

Andeeqara oosana maree mariasara fidiqaa

imariasa Yaaweena narira ufa ameemaana marifaranoo.

<sup>22</sup> Yaaweefa narí ainaini maria fasiqausa feefaurummasee kafaa maraidanoo.

Mifa innai itita qimaqaanifee qimasee fimariasa sia kuridifaranoo.

## 35

### *Dadaaqiani fee innaaru.*

<sup>1</sup> Oo Yaawee qini rairai qimaqimaqee mariasa anee misa faqa rairai qimannimaqaa.

Qini darimariasa nariqa faqa narua.

<sup>2</sup> Aneenna rakira saqari faqa rakira ainainauqa namufaqa maree aniree qini dadaaqia.

<sup>3</sup> Aneenna duru feefa faqa saasuna faqa mara maree aniree qini darirara qifaqaganuasa narua.

Anee qini dadaaqiraree qimasee qima qimia.

<sup>4</sup> Qini darirari mariasa anee rafaafafu nisainaqaa nisauriranaki mariaqa.

Qini mandaikamma qimaqarara tipundaari mariasa mara quanda sainaqa furufari-ranaki mariaqa.

<sup>5</sup> Yaaweena angiroo fannoo misa nifaqaseenoo oofaafanaumuara foora utitiqameeqee aqusaina ufai fannoo aanaaqmaara fuaqa aqindee iannoo.

<sup>6</sup> Misa nimaria aanafa asukuna faqa farindarafa faqa mariani,

Yaaweena angiroo fannoo misa nifaqaani.

<sup>7</sup> Qini namuqaauqa oosana siainaki qini qimaara qufaana fufuseeqa qini qimaarusidaqa.

Misa fifafu qini qimaara madika indufia.

<sup>8</sup> Oo Yaawee anee dadaaqinaqa qini namuqaauqa sia

iri marifanoo ummaara fannoo tautummaki misasaa aqufuani.

Misa nariqa fufuqaa ufaanaki arufi nariqa ummaarakii aqufifaranoo.

<sup>9</sup> Miqimma fifafa qinee Yaaweenara asasianauranoo.

Mifa qini asumu marainara nasurianauranoo.

<sup>10</sup> Qinee qeeqa qimuqusa aiqamannoo Yaaweenara maaqi qianaara.

Sia moo fannoo ani fooqaafaa maridanoo.

Aniara afeeka siaisa afeekaimariasa nisaukukinaana rafiaana fee qianaara.

Kudi fasiqauqa mandaikamma nimaqee mariasa

nisaukukinaana faqa maree marifee qianaara.

<sup>11</sup> Manda fasiqauqa qinee sia qafaanna ainainara faqa

sia irunna ainainnara faqa fifafu qini rairai qima qimaqaidaqa.

<sup>12</sup> Qinee amiqi amiqimmannisaunnana akiqara mandaikamma qimaqee.

Miqiafanoo qini qimuqusa firaqoo ummaarareenoo.

<sup>13</sup> Qini oosana moomau fidanoo.

Qini namuqaauqa auriranaki mariafaqa qinee

misara soofaarira qamunna afisusee qeeqa mara

maree qumureeqa daararee marufaqa misara findifuaqee innaaru qimariqiafana.

Qinee inuka tuqu daumoo amisee findifuaqee innaaru qimariqiafana.

<sup>14</sup> Qini namuqaauqa auriranaki marufaqa qini marirafa maaqimminoo marinau.

Qinee misara qini qiqoondifaqa qini qikaqaafasaa

faqa qini qinoofa faqa kuqira foora iafaqa soofaarida kummaaraqa mariqiafana.

<sup>15</sup> Qini namuqaauqa oosana misa sia qini daanna raidaqa.

Qinee ummaarakii aqufunaqa misa qiqafamaseeqa

asasammasee aiqama qini fiqummafi uteeti qidaqa.

Qinee aanaamuru misara sia irimarunauusa qini dariqa kai maridaqa, sia idooaidaqa.

<sup>16</sup> Qinee qiku qisauku mandaikirausara foora marunaqa misa qiniara uteeti qidaqa.

Misa qiniara fidiqaa imarifaqa qini qiqafaidaqa.

<sup>17</sup> Oo Yaawee, kisaqasaa fee anee kaqi nindafaida marinnaree.

Misa qini kuridi qimaqarara imarianasaa itita qimaqaa.

Anee maa kaasau fainisa nookinaana qini mareeqee amiqiraqoo kaqinni quqaqisaa.

<sup>18</sup> Miqimma sainaqa ani faiqi anaasee moomoosa

suqirana qambaanaindari findifi ani Yaaweenara dufi dufi qianaara.

Moomoo fasiqa anaasee firaa suqiranaki noorrinni oonuree ani amooqianaura.

<sup>19</sup> Fifau unna qimariasa qini namuqaa qini tataqaida asafana Yaawee anee titaqisaa.

Qini qumaara qafamasee fidiqaaidaqa noorrinnai  
nifunnai unnamaanna qimariasa anee misa faqa rafaqaqafunnimaqasaa.

<sup>20</sup> Misa nifauru fannoo sia asoora ufa aqoondikira ufa  
qimarisa, misa oosana oosana unna ufauga faqa ida qai ufana faqa kai qimariasa  
maridaqa, misa

unnamaanna qiranara randasee mareeqee asoaranaki mariasa nimuaaqa aqidaqa.

<sup>21</sup> Qini namuqaauga fifau firaaqoo noo raqasee qini

kikiqususeeqa qiniara eoo eoo maasa qifu  
fannoo mina aaqarana qafee fee qidaqa unnaqidaqa.

<sup>22</sup> Misa miqi qimariafana, oo Yaawee, anee misa unnaqirana qafaanoo.

Anee sia ufa siaina maria, anee sia nianai maria, daaqa ani marida dadaqia.

<sup>23</sup> Oo Yaawee, anee faiqara see findifi qini itita qisaa.

Oo qini Anutu findifinana qini ufa afeekaikamma qimaqaa.

<sup>24</sup> Oo Yaawee, qini Anutu, anee andeeqarafa, anee qiniara sia aaqarana siai fee qia.

Anee qini dadaqinaqa qini namuqaa qiniara ataasa ataasa qiaqa.

<sup>25</sup> Anee qinaqa qini namuqaauga sia nari nimuqusakigari maaqi qimasee qiniara qiaqa.

Eoo maasa qunnandee kai qinoo mina mandainaina doo kambiqeenoo fee qiaqa.

<sup>26</sup> Qini ummaara qafamasee nasuri mariasa anee misa aupuraranaki quqannisaa.

Anee misa nisauriranaki quqasee furufamma nimaqaa.

Anee misa nisauriranannoo faqa noori runiranannoo faqa qamunnara foora dukunimma  
nimaqaa.

<sup>27</sup> Qini andeeqaranara irisee qini iduku qimaqarara

irimariasa kaifaa kaifaa maaqi qimasee faaqaridaqa asasiaqa.

Yaaweefa kaaqa uriqararafa maridanoo.

Yaaweefa qini nari ainainira faiqi qinee auqaunna

ainainafa anoona kambiqainara iriseenoo asaidanoo.

<sup>28</sup> Miqinaqa qinee ani andeeqaranara kananaana

oosana arasee ani amooqianafa eedirana kai raquru amianaaura.

## 36

### *Faiqi faiqi mandoosanara qirufa.*

<sup>1</sup> Numoo fannoo manda oosana maree mariasa

nimuqusaki maridanoo akaqa aaqara oosanara naakapaidanoo.

Anutuna minnisee sia minara rufiee marianara manda oosanara irirafa nimuqusaki  
kambiqaidanoo.

<sup>2</sup> Miqi mariasa nari kai nariara kaaqa uriqararausee qidaqa,

Anutufa maasa aaqarana sia amana qafamasee maasa ufa qimiannoo fee qidaqa.

<sup>3</sup> Misa nookinaa ufa fannoo manda ufa faqa unnufa faqa kai maridanoo.

Misa sia iriqaraasammasee auqara oosanara faqa andeeqara oosana faqa auqaidaqa.

<sup>4</sup> Misa nari qaarisaa faiaqee idaqa manda oosanara oonumafi irida maridaqa.

Misa sia moo andeeqara oosana auqaidaqa, misa manda oosanara faqa sia qaoo qidaqa.

### *Anutuna Andeeqara Oosana.*

<sup>5</sup> Oo Yaawee, ani sia takaanninna amuqusirafa innaaruna amana kai ooru maridanoo.

Ani mapukusee marira oosana fannoo oonnamu amana kai ooru maridanoo.

<sup>6</sup> Ani Yaaweena andeeqarafa firaa aaqananamuara foora uriqaranoo maridanoo.

Anee maasa ufa irisee andeeqasee raina qimaqara

oosana fannoo ooruku nammari farumara foora meemai uqanna maridanoo.

Faiqi faqa aandau faqa ani rakisinnimaqarana ameemaanai maridaqa.

<sup>7</sup> Oo Yaawee ani maasara amuqusirafa firaa feefauru aqimaria ainainnafara foora  
maridanoo.

Maasa ani aqoosa ameemaanai keeqafi mandaaqaidaqa.

<sup>8</sup> Oo Yaawee anee rairaamma nimianna naranna oomaqa sakasee naidaqa.

Anee qinaqa maasa ani andeeqara oosana nammariara foora naa.

<sup>9</sup> Anee aiqama marirana oosana mariananoo.

Anee kaaqa qarafa mariannanara maasa kaaqa qarana qafaidaqa.

<sup>10</sup> Oo Yaawee anee aneenna amuqusirana aniara irimariasa kaifaa kaifaa nimida kai  
maria.

Anee aneenna andeeqarana andeeqara aatata fimariasa nimidana kai maria.

<sup>11</sup> Anee qinaqa nari nimoo naamoo imariasa sia nikunnai qini rafaqafu qimaqaaqa.



Anee qinaqa manda oosana maree mariasa sia qini daru qifaqaaqaa iaqa.

<sup>12</sup> Niqafaa, manda oosana maree mariasa doo saamuriqa maridaqa.

Misa maqasaa agufiqa sia amana kafaa  
findiffaaranoo. Miqoo kai marifaranoo.

### 37

*Andeeqara fasiqa faqa manda fasiqa faqa mariranara qidanoo.*

<sup>1</sup> Anee aaqara oosana maree mariasa nindafamasee

sia minara aiaaqee qimasee sia qinee misa dadaaqunoo sia qia.

Manda oosana maree mariasa nindafamasee sia minara qinee faqa sia maraunoo  
qimasee arana qaani.

<sup>2</sup> Misa miqi marianara amukafaqaa sanda miqirausa

qusasaa ateesa saifaqa qammundeefaranoo, misa

andanda miqirausa maridaqa qusasaa aadanusifaranoo.

<sup>3</sup> Yaaweena saqarikida andeeqara oosana kai maraida maria.

Anee miqidana maa maqa maaqanaki kisaqasaa

kaqi marinanoo sia moo ainaina fannoo ani mandaikamma amaqaannoo.

Anee aneenna maqa maaqaki kai marida asoaranaki maria.

<sup>4</sup> Yaaweenaki asasamasee marinanoo ani amuqusaki aidimari ainainna ani amiannoo.

<sup>5</sup> Anee aneenna marirana nirana Yaaweena amisee

mina saqarikammasainanoo mifa maa ainainna ani amiannoo.

<sup>6</sup> Mifa ani andeeqara oosana dadaaqinanoo suani qambaanara foora amiqimmasee  
kaqa qaano.

<sup>7</sup> Anee Yaaweena oorinni afaaqa quqasee ireeda maria.

Manda oosana maree mariasa aaqara oosanara

tipundaarifanoo anoona kambiqainana sia qeeqara faqa miqianee qia.

Sia moomoo qumiasana faqaasa niqafamasee sia qinee faqa miqiunoo qia.

<sup>8</sup> Anee mina qafamasee sia moomoo irira iria.

Sia aanoo qia.

Mi oosanafa ummaaraki nifiqee fidanoo.

<sup>9</sup> Manda oosana faqaasa Yaaweefa misa aiqama taikannimaqaannoo.

Irirana Yaaweenasaa mundimariasa maa maqanasaa amiqimmasee marifaranoo.

<sup>10</sup> Kaqikaagoo marikinanoo doo miqoo mandoosana maree mariasa taikeefaranoo.

Anee misara randeenana sia paqurinnaranoo.

<sup>11</sup> Nari mara maree qumi mariasa Yaaweefa aiqama maqa nimiannoo.

Misa miqoo aiqama ainaina rairaa imarinaqa asoaranaki maridaqa asasifaranoo.

<sup>12</sup> Manda oosana maraqaanusa andeeqarusa nariraree qimasee tipundaaridaqa.

Miqidaqa misa andeeqarusa fidiqaaira noori nifiri maraidaqa.

<sup>13</sup> Yaaweefa qusasaa misa mandaikamma nimaqaaninnanara iriseenoo naanaidara  
qidanoo.

<sup>14</sup> Manda oosana maree mariasa kudi fasiqa anaasee

faqa sarauiranaki mariasa faqa andeeqara aatata

fimariasa faqa nariraree qimasee nari faaqaana

mai qumaree duru rakisisee nimaarusida maridaqa.

<sup>15</sup> Misa nariqa rakira faaqaana fannoo nari nimuqusa raquru nimiannoo. Misa duru faqa  
raudaannoo.

<sup>16</sup> Andeeqee mari fasiqana ainaina oodaa mariannoo,

Anutuna afusaa uriqaranoo maridanoo.

Manda oosana maree mari fasiqana ainaina moomoo

maridanoo, Anutuna afusaa ureeqanoo maridanoo.

<sup>17</sup> Minara manda oosana maree mariasa Anutufa misa afeeka mara maraannoo.

Andeeqee mariasa Yaaweefa itita nimaqaannoo.

<sup>18</sup> Yaaweena ufa mau fimariasa Yaaweefa misa marirana niranasaa rakisidanoo.

Maa maqa maaqafa misa indikinoo naaruara mariannoo.

<sup>19</sup> Miqi mariasa manda aukua anirainaqa sia aupurarana mareefaranoo.

Aandaroo aukua misa narana moomoo mariannoo.

<sup>20</sup> Mandoosana maree mariasa kuqifaranoo.

Yaaweena namuqaauqa taatuqeenaa kakasindee ifaranoo.

Misa ida muna qusasaa marinoo taikaindee ifaranoo.

<sup>21</sup> Manda oosana maree mariasa moosa ainaina ufaasu maraseeqa sia kafa nimidaqa.

Andeeqarusa oosana moo maridanoo, misa afaarida kaqi nimimariasa maridaqa.

- 22 Yaaweefa amiqi amiqimmanimaqee marisa misa nári maqa maaqaki amiqimmasee marifaranoo.  
Yaaweefa niquraree marisa mina maqasaa mariana mara qaqusainaqa quqasee fifaranoo.
- 23 Andeeqara fasiqa niranara Yaaweefa اساسدانوو دادااقیدانوو.  
Yaaweefa asasi maria fasiqa anaaseesa itita nimaqaidanoo.
- 24 Mi andeeqara fasiqafa saamurinoo maqasaa aqufinoo sia miqinoo mariannoo findi-fuannoo.  
Yaaweefa uqeerainara miqiannoo.
- 25 Qinee kumaaraa mariifanausa doo maqee asooqa maridaqa,  
Yaaweefa andeeqarawsa minninnisoona sia qinee mi kamu qafaqiafana.  
Mina faiqi namu naranara sarauida innaaru qirana faqa sia qafaqiafana.
- 26 Andeeqarawsa aiqama kari afaari mariasa maridaqa.  
Sarau imariasa irafaqa eedooo qimasee kaqi ufaasu  
nimidaqa, misa faiqi namu faqa amiqi amiqiranaki marifaranoo.
- 27 Anee manda oosanaqiari quandakinana andeeqara oosana maraa.  
Miqinaqa ani faiqi namu ani maqasaa naaruara marifaranoo.
- 28 Yaaweefa andeeqara oosana maree mariasara  
aididanoo narí ufamau mapukusee fimariasa faqa  
sia minninnisaannoo, misasaa naaruara titannimaqaannoo.  
Manda oosana maree mariasa faiqi namu mara aqusaannoo.
- 29 Andeeqarawsa nári nikausa ninaakusa maqa maaqa  
umiasanara foora maraseeqa, minaki naaruara marifara.
- 30 Andeeqarawsa nifauru fannoo irirana faqaasa ufa kai qidanoo.  
Mina afauru fannoo qambaana andeeqara ufa kai qidanoo.
- 31 Anutuna sanda ufa andeeqarawsa nimuqusaki maridanoo.  
Minara misa sia quqasee moosaa fifaranoo.
- 32 Manda oosana maree mariasa andeeqarawsa nipuraida narirara nimaarusidaqa.
- 33 Yaaweefa sia andeeqarawsa manda oosana maree mariasa nisaukuki quqasaifaqa naridaqa.  
Manda oosana maree maria fasiqawsa andeeqarawsa  
ufaki quqasaifanoo Yaaweefa misa titannimaqainaqa sia narifaranoo.
- 34 Anee aneenna irirana Yaaweenaki quqasee mina ufa mau kai andeeqasee fua.  
Anee miqimarinanoo Yaaweefa ani firaa auqu  
amiseenoo ani aanaakusa akausa maqa maaqa amiannoo.  
Mifa minaki manda oosana maree mariasa mara aqusaina qafamasee kuqaa fee qinnaranoo.
- 35 Qinee Dafidisa, mandoosana maree mari fasiqana  
qafaafananoo firaa saqari miqirafa Reebanoona  
amiqira maqasaa kambiqafi ititanoo mariara foora inoo marinau.
- 36 Mifa qusasaa marinoo doo taikafifaqa qinee  
qafaunanoo sia marifaqa randeeqa sia uqanna paquriqa.
- 37 Anee ufa siai fasiqana faqa andeeqara aatata fimari fasiqana faqa niuqummasee qafaa.  
Asooara oosanaqi reendeennammasee mariasa maa  
maqanasaa misa saaqari kambiqainausa faqa kisaaqasaa marifaranoo.
- 38 Aaqee mariasa Yaaweefa aiqama uqanna kuridi nimaqaannoo.  
Manda oosana maree mariasa niku nisauku marirana Anutufa ateekasaina sia marifaranoo.
- 39 Ummaara aukwana Yaaweefa andeeqarawsa itita nimaqasee asumu maraidanoo.
- 40 Yaaweefa andeeqarawsa dadaqinoo manda mariranakinaana uqeerannisaidannoo.  
Aaqee mariasa nisaukukinaana asumu mareeqee  
kaqinni quqannisaidannoo. Misa Yaaweena mandaaqee marianara asumu  
maraidanoo.

## 38

### *Ummaaraki mari fasiqana innaaru.*

- 1 Oo Yaawee, aneenna aanooqiranakiqari sia qiniara aanooqia.  
Aneenna aranaqaranakiqari sia qini ummaara qimia.
- 2 Anee feefara foora amiqimmasee qini tapooqaananoo.  
Ani asauku fannoo firaaqoo qini radamimarifaqa ummaara maraidaqa.
- 3 Anee qiniara aanooqiannanara qini qifaqa firaaqoo didafidanoo.  
Qini numoo marinara qini qimudaani umooqukinoo marifaqa sia afeekaikidaqa.

- 4 Qini aaqara ummaara fannoo qini rafaqaqafu qisaidanoo.  
Mifa firaa ummaara maridanoo, sia qinee amana akuanaura.
- 5 Qini furufarirafa marinara qifaafaqaa ateekeeqaafanoo adiara usuffifanoo afundida putaaidanoo.
- 6 Qinee ummaaraki maridaqa maqasaa aqufiqa maridaqa, aiqama faasaana suani afu ururarana namu faqa soofaarida kummarafa maridaqa iki raqaida marunanoo suani afu keegaidanoo.
- 7 Qini qifaafa idara foora qaidanoo.  
Qinee kuqirana adeedi raqa maridaqa.
- 8 Qini qimudaani raqanoo mariara foora qumooqukiqa nidaqa.  
Qini qimuqusa firaaqoo didafi marinara annadannada qida maridaqa.
- 9 Oo Yaawee qini didimari ainainausa ani afusaa akooqoo marifana iri mariananoo.  
Qini didafi marifaqa annadannadirafa ani afusaa sia kukeeganoo maridanoo.
- 10 Qini qimuqusa rundurundi marifanoo qini afeeka taikkeenoo.  
Qini afeeka doo quminoo, qini qifusaa mari kaaqa qarafa doo taikafifanoo asukuna kai titeenoo.
- 11 Qini qigoondiufa faqa qini faqa nimariasa faqa qini nammuana qafeeqa rufiasee niana tatutatuudaqa.
- Qini qigoonauusa faqa miqikaimmidafa rufiqa rufiqa idaqa.
- 12 Qini darirara randee mariasa qufaana fufidaqa.  
Qini mandaikamma qimaqarara ufa qimariasa maridaqa.  
Suani afu ururarana namufaqa tipundaarida mariafanoo suani afu keegaidanoo.
- 13 Qinee daaqoo qaunirusara foora sia misa ufa iriqa doo qummunirusara foora sia qimannimidaqa.
- 14 Qinee sia ufa irimaria fasiqausara foora maridaqa,  
qeeqa dookiqari qimannimirara sia amanaikidaqa.
- 15 Oo Yaawee qinee ani kai saqarikidaqa.  
Oo Yaawee qini Anutufa anee qini ufa qima qiminnaranoo.
- 16 Oo Yaawee qini namuqaa sia qini mandaikamma qimaqasee nasuriaqa.  
Qini qiku farindamaki aqufuanaqa sia nasurida asasiaqa.
- 17 Qinee saamuruqaammidaqa.  
Qini didafirafa kisaqaqasaa qini faqa maridanoo.
- 18 Qinee qeeqa aaqarana akooqoo kooroomasaunanoo,  
qini numoo fannoo qini qummaara qimidanoo.
- 19 Qini namuqaauqa moomoosa nimudaanai qimariasa maridaqa.  
Qiniara fifau fidiqaa imariasa moomoosa maridaqa.
- 20 Qini amiqira oosana akiqara mandaikammaqimaqee  
mariasa misa qinee andeeqaramau fimarunaqa  
misa qini namuqaakamma qimaqaidaqa.
- 21 Oo Yaawee qini Anutu, sia qini minniqisaa, sia nianai maria, daaqaa ania.
- 22 Oo Yaawee qini asumu maree marianafa kai kaqi aniree qini dadaaqia.

## 39

*Ummaaraki mari fasiqana numoo koooroora ufa.*

- 1 Qinee Dafidisa qeeqara maaqi qifa, qinee qeeqa nirana mariranasaa rakisianaura.  
Qini qifauru fannoo sia aaqara ufa qiannoo.  
Manda oosana maree mariasa qini daaqaa marifaqa sia qinee moo manda ufa qianaura.
- 2 Qeeqa ufa rafaafa fusee doo qummunimmasee marunanoo mifa sia dadaaqinoo.  
Doo qummunimmasee sia amiqira ufa faqa  
qimarunanoo qini daundurakinaa ummaara firaanaikinoo.
- 3 Doo qummunimmasee marunanoo qini daundurai qimuqusaki idara foora aurinoo.  
Qinee firaaqoo oonumafi irimarunanoo qini daundurai firaaqoo idaqaenoo.  
Idaqee marifaqa qinee sia doo qummunimmasee marianaura.
- 4 Oo Yaawee qinee taikaanna aukuanara qinaqa iria.  
Yairee fee qinee kuqanauree.  
Qini marirafa munu taikaaninnanara faqa qima qimia.
- 5 Anee qini marirana qusa uqanna ramasaanoo.  
Qini marirafa ani afusaa fifau ainainara foora sia maridanoora foora maridanoo.  
Aiqaama fasiqa fifau naidoora foora kai maridaqa.
- 6 Aiqaama fasiqauqa nimanandara foora marida nidaqa.

- Miqi mariasa aiqama ainaina fifau kai kadaapi ridaqa.  
 Maaqoo maridaqa qumiasana suqu quqaseeqa  
 kuqifanoo yafee maraannoo fee qimasaida sia iridaqa.  
<sup>7</sup> Oo Yaawee qinee nana moo ainainara afeesianauree.  
 Qini irirafa aniki maridanoo.  
<sup>8</sup> Qini aiqama numoo kinaana mareeqee kaqinni quqa qisaa.  
 Miqimma sainaqa furufarirausa sia qiniara naanaidara qiaqeera.  
<sup>9</sup> Anee kai maa aupurarana qimi marianafa  
 mariannanara qinee doo qummunimmasee  
 qireeda kai maridaqa sia ufa qianaara.  
<sup>10</sup> Sia kaifaa qini mandaikamma qimaqaa.  
 Anee qini daruanaqa kuqirara miqidaqa.  
<sup>11</sup> Faiqi aaqara oosana maraasara anee Anutufa  
 afeekaikaqmmasee aanoo qima amaqaasee mina  
 idi mari ainainna kuridi aisee mariananoo.  
 Qumura mandaikindee idanoo.  
 Aiqama fasiqauqa ani afusaa aidoora foora qusasaa fuaqaki taikaidaqa.  
<sup>12</sup> Oo Yaawee qini innaaru qirana iria.  
 Qini dadaaqianneera aaraunnana aaqoo rammatinimmasee irisee qini dadaaqia.  
 Qinee ani dadaaqiranara qiki raqaidaqa nammeera qianana dadaaqia.  
 Qinee qusasaa maa maqanasaa ani faqa mariqa,  
 qeeqa qikeeku qikaaku naanna reeqa qusasaa kai maridaqa.  
<sup>13</sup> Oo Yaawee ani oori afiriara kaaqa daaquqaidanoo  
 anee kaqinni anneenna oori ubeekamasainaqa  
 qinee qusasaa asasiranaki mariqa kuqua.

## 40

### *Anutuna amooqira idi.*

- <sup>1</sup> Qinee Yaaweenara deendeena mandee afeesida  
 marunanoo, mifa quandafi qini nammeera qirana  
 amiqimmasee irisee qimudaao qimasee dadaaqinoo.  
<sup>2</sup> Qinee qeeqa aaqaranaki doona doona imarina kiara  
 foora faqa faurima saara foora faqa farindamaki  
 kuqira madikaki faqa afundimari doonna kiara  
 foora faqa marunanoo minakinaana mifa qini  
 uqeereeqeenoo oonisaa kikiqammaqiseenoo.  
<sup>3</sup> Miqoo mifa fuka idi qini qima qiminoo mi idifa maasa Anutuna amooqira idi maridanoo.  
 Moomoosa mina qafamasee rufiasee Anutuna saqarikifaranoo.  
<sup>4</sup> Yaaweenaa saqariki mariasa asasiaqa.  
 Tumunnai auqira anutufinnai sia ubeekkee mariasa  
 faqa unnaqira anutusa sia nimooqi mariasa faqa asasiaqa.  
<sup>5</sup> Oo Yaawee qini Anutufa anee moomoo afeeka naaquqara ainainannoo maasa  
 dadaaqinuu.  
 Sia moo fannoo ani fooqaafa maridanoo.  
 Anee moomoo amiqira irirausa maasara aneenna iriranaki qimirisaidana dadaaqi  
 mariananoo.  
 Qinee minauqara ufa qianee qimasee sia amana aiqamara ufa qianaara.  
 Mifa moomoo maridanoo.  
<sup>6</sup> Andau tatufirana faqa oosana oosana ani amira ainainara faqa anee akooqananoo.  
 Anee aneenna aidimarianna tatufiranara ani ufamau firana qini daaqooki quqasaana  
 iriaa.  
 Aandau ida tatufirana faiqi aaqarana akiiqara amiranara faqa anee sia qimianne  
 qiananoo.  
<sup>7</sup> Qinee minara iriseeqa maaqi qiqa.  
 Doo qinee anireeqa.  
 Anutuna akarakinaafa qinee aniannanara qifaqa anidaqa.  
<sup>8</sup> Oo qini Anutu, ani aidirana mau firara firaqoo dididanoo.  
 Ani sanda ufa qini qimuqusaki maridanoo.  
<sup>9</sup> Qinee ani faiqi anaasee moomoosa suqiqa mariana  
 gambaana anee maasa asumu maraannanara  
 andeeqara ufa kai qimannimidaqa.

Oo Yaawee qinee sia qeeqa doo qummunianauro, kaqi qimannimianauro.

Anee minara irimmariananoo.

<sup>10</sup> Qinee sia anee qini dadaaqinana qini asumu

maraannanara qeeqa qimuqusaki rafaafa fiqa, kooroomasee qimannimiqa.

Ani mapukusee marira oosanara faqa ani asumu nimirana faqa kooroommasee qimannimiqa.

Faiqi anaasee moomoosaki anee misara amuqusirana

faqa ani kuqaa anoona ufa qirana faqa sia rafaafa fiqa, kaqi qimannimiqa.

<sup>11</sup> Oo Yaawee qinee iridaqa ani qiniara qimudao qirafa sia taikaannoo.

Ani amuqusirafa faqa ani kuqaa anoona ufa qira oosana faqa qini itita qimaqeenoo.

<sup>12</sup> Qini mandoosana moomoo sia asaanarirana amana qini Dafidisa fiq fiq inoo maridanoo.

Qini aaqarafa doo qini rafaafafusaifaqa sia qifu maqaidaqa.

Qini qikiqa qisau si moomoo maridanoo, qini

aaqarafa mina faqa uriaaqaranoo sia asaanarirana amana maridanoo.

Minara qini qimuqusa ummooquki fanoo qini afeeka taikaidanoo.

<sup>13</sup> Oo Yaawee anee qini mandainainakinaana mara quqaqisaa.

Oo Yaawee kai kaqi aniree qini dadaaqia.

<sup>14</sup> Qini marirana taika qimaqarara randeemariasa

rafaafafu nimaqasee mareeqee furufariranaki quqannisaa.

Qini aupuraranara asasimariasa mara

quandasainafa nisaaurusee quqasee sandaafa.

<sup>15</sup> Qiniara uteeti qimariasa misa nariqa nisaurirana firaafa marina qafeeqa firaqqoo tautiaqa.

<sup>16</sup> Oo Yaawee anee iannannai ani mariasa asasida nasuriaqa.

Ani asumu mariranara dufi dufi qimariasa aiqama

kari maaqi qiaqa Yaaweefa kaaqa uriqararafa maridanoo fee qiaqa.

<sup>17</sup> Qinee Dafidisa qimudaani radukiraua sarau

marunna fasiqausa marunnaara oo Yaawee anee sia qiniara qaunuananoo.

Anee qini asumu maree marianafa faqa qini Anutufa

faqa mariannanara kai kaqi aniree qini dadaaqia.

## 41

### *Aurira fasiqa innaaru.*

<sup>1</sup> Kudi fasiqa aanaaseera irisee dadaaqi mariasa asasiqa.

Ummaara aukuanaki Yaaweefa miqimariasa uqeera kaqinni quqannisannoo.

<sup>2</sup> Kudi fasiqa anaasee dadaaqimariasa Yaaweefa

ititannimaqaseenoo misa maa maqanasaa

marirana afeekaika masainafa kisaqasaa marifaranoo.

Maa maqa maaqanasaa marirana mifa amiqi amiqimannimaqaannoo.

Sia mifa misa namuqaa nisaukuki quqaannoo.

<sup>3</sup> Miqi maria fasiqa aanaaseesa auriranaki marifanoo Yaaweefa misa dadaaqiannoo.

Misa aurida marifanoo Yaaweefa misa aurirana taikannimaqaannoo.

<sup>4</sup> Qinee maaqi qidaqa, oo Yaawee qinee ani mandaikamma amaqqeeqa.

Anee qini qifauamasee qini auriranara foora taikaqisaa.

<sup>5</sup> Qini namuqaa qiniara nimuqusa ummaara reemariafa maaqi qidaqa.

Yaireefee mi fasiqafa kuqinaqa maasa minara qaunuanauranoo.

<sup>6</sup> Qinee aurimarunafa akaqausa ani qifafeeqa qisee ufoo qidaqa unnaqidaqa miqidaqa.

Misa unna ufa irisee raudamaki oonuree aiqama tinai qini qifasaasa qidaqa qimannimidaqa.

<sup>7</sup> Aiqaama qiniara fidiqaa imariasa nupiqnupita kiqari nari qimami nari qimami qidaqa.

Qini mandainaina daruani fee qidaqa miqi qidaqa.

<sup>8</sup> Misa qiniara manda aurirafa aukainaina aurirafa mina arifanoo amiqimandee auridanoo mifoo qidaqa.

Doo mifa rinoo maridanoo, sia findifuanoo, kuquannoo fee qidaqa qimatundaidafa.

<sup>9</sup> Qini qifaqasaa qiqoondi, qinee minasaa

mundimarunna fasiqafa, qini faqa neeneeu

fasiqafa, mifa nari aiku qumbaqi uqeera qumaree aiku ataannai qini darinoo.

<sup>10</sup> Oo Yaawee, anee qiniara amuqusinana qini

uqeeraqisee afeeka qiminaqa mina akiqara mannimaqaa.

<sup>11</sup> Oo Yaawee qini namuqaa sia qini uridaaqaree

mariafaqa qinee mina qafamasee oo Yaaweefa  
qiniara aidimarifanoo miqidanoo fee qidaqa qimiridaqa.

<sup>12</sup> Anee qini andeeqara mariranara irisee qini uqeera qisainaga naaru naaru ani oorisaa maria.

<sup>13</sup> Yaaweena Isaraee maqannaasa Anutuna amooqia.  
Maqee faqa naaru naaru faqa amooqima amaqaa.  
Kuqaa uqanna kafaa kuqaa fee qidaqa.

## Mina Anaaqianaa Papiqa (Book 2)

### 42

*Idi Ufa 42–72*

*Asaqi moosaa oonu maru fasiqana innaaru.*

<sup>1</sup> Aandau nammariara aidifanoo maqee maqee aannanai aannanai qidanoo.

Qini maraquna fannoo misa naanna raida maqee  
maqee oo Anutu ani aqa mariranara didimarifaqa  
daannanai daannanai idara foora maridaqa.

<sup>2</sup> Qini nammariara foora kaqi marira Anutunara dididanoo.

Yairee fee qinee oonuree minara innaaru qianaara.

<sup>3</sup> Qini namuqaaqaaqaa moomoo kari qiniara yaqoo fee  
ani Anutufa marifanee qiafaqa qinee mina iriseeqa qikiraqaidaga.

Faasaana faqa eendaki faqa qeeqa daiqunu daukunu naidaga.

<sup>4</sup> Qinee ooqai iafannanara irunanoo qimuqusa mandaikidanoo.

Ooqai qinee moomoo fasiqa anaasee

indaarunnikiafanaqa Anutuna amaana maqaki fimariqau.

Oonuree faaqa fuisse qida asasida Anutunara dufi dufi qira idiuqa reemariqau.

<sup>5</sup> Nanaree qini daundura kaaqa ummaara raidanoo fee, nanaree qinee kaaqa ummaaraki maridee.

Qinee Yaaweenasaa kai irirana mundusee kaifaa mina amooqianaara.

Mifa qini asumu maree marifa faqa qini Anutufa faqa maridanoo.

<sup>6</sup> Oo qini Anutu, qinee ummaaraki maridaqa Yooradanna maqa maaqaki faqa  
Qeeramoonaa aqaanasaa faqa

Misaraa aqaanasaa faqa maridaqa aniara irianaara.

<sup>7</sup> Qini ummaara firaafa ooruku nammariara foora mandinoo maridanoo.

Mi nammarina qamakaurirafa narisaa narisaa arinoo sandaaqai ooru fidanoo ai ai qidaoo.

Mifa innaarunaindari oondaindariara foora aaku

quminoo maqasaa aquqifanoo firaqoo ai ai qidanoo.

Ani mi nammari amakaurirafa qini uridaaqaramafi rafaqaqafu qimaqaidanoo.

<sup>8</sup> Faasaana Yaaweefa narí sia taikara amuqusirana aiqainanoo qinisaa qumuani.

Miqinaqa eendaki qinee minara dufi dufi qira idi raanaara.

Qinee Anutufa qini mariranasaa rakisi marina innaaru qima amaqaanaara.

<sup>9</sup> Anutufa qini itita qimaqee marinara qinee minara maaqi qidaqa.

Nanaree anee qini qaunuqiseenanee.

Naqifee ifaqee qini namuqaa aupurarana qimi mariafaqee oonuree aniree iqa nidee.

<sup>10</sup> Qini namuqaa qini ataasa ataasa ufa qima qimaqee

mariafaqa kuqirafa qusaree marifaqara foora aupuraidaqa.

Faasaambaasaana qiniara ani Anutufa yaiffee maridanoo fee qidaqa.

<sup>11</sup> Nanaree qini daundura kaaqa ummaara raidanoo fee.

Nanaree qinee kaaqa ummaaraki maridee.

Qinee Yaaweenasaa kai irirana mundusee kaifaa mina amooqianaara.

Mifa qini asumu maree marifa faqa qini Anutufa faqa marinara mina amooqianaara.

### 43

*Asaqi moosaa oonu maru fasiqana innaaru.*

<sup>1</sup> Anutu ani ufa sia iri mariasa qini rafaqa fidaqa,

anee qini dadaaqinaqa qifairi mariasa ufa

urinnaaqarama saanaqa qiniara andeeqara oosana faqaafee qiaqa.

Ueeqee mariasa faqa mandoosana faqaasa faqa nisaukukinaana qini maraquqisaa.

<sup>2</sup> Oo Anutu anee qini titaqimaqee marianafa mariananoo.

Nanaree qini minniqiseenanee.

Nanaree qini namuqaa aupurarana qimi mariafaqee oonuree aniree iqa nidee.

<sup>3</sup> Oo Anutu anee aneenna kaaqa qarana faqa anoona ufa qirana faqa niqiqainaqa qini aana muquniyaqa.

Mi irira qanda qini mareeqee Sioona ani naaquqara aaganasaa, mari amaana maqanaki anee mariannaqoo quqaqisaaga.

<sup>4</sup> Qinee miqoo maridaqa Anutuna qaidara mariqoo mina amooqirara fuanaura. Kaaqa asisirana faqa kaaqa nariara didirana faqa qimimari Yaaweefa miqoo maridanoo. Oo Anutu qini Anutufa qinee piripuna aridaqa ani amooqianaura.

<sup>5</sup> Nanaree qinee kaaqa doori runusee maridee.

Qinee Yaaweenasaa kai irirana mundusee kaifaa mina amooqianaura.

Mifa qini asumu maree marifa faqa qini Anutufa faqa marinara mina amooqianaura.

## 44

*Isaraee maqannaasa Anutufa dadaaqianifeera innaaru quu ufafa.*

<sup>1</sup> Oo Anutu, maasa qikeeku qikaaku ooqai anee auquqoonna ainainnara qimaqimiafaqa iridaqa.

Maasa qeeqa daaqoonnai misa marukamuqoo auqoonna firaa ainainnara qima qimi-afaqa iriqa.

<sup>2</sup> Anee aneenna kai aanaamuru niqiqamasoona amaaramafufana maasa qikeeku qikaaku maa maqa maaqanaki mara quqanau.

Anee aanaamuru aupurarana nimisee Isaraee maqannaasa maa maqanasaa mara quqa-soonaqa

faiqi moomoo kambiqafi maa maqa maaqana amanakai maridaqa.

<sup>3</sup> Isaraee maqannaasa sia nári rakiranannaifau maa maqa maaqana maraqaau.

Sia nári afeekannaifau maraqaau.

Anee aneenna afeekannai faqa eeraariranannai faqa oori inaa inaa iranannai maa maqana mara niminau.

Anutu, anee misara ani aidi marunara miqinau.

<sup>4</sup> Anee qini karaambaiqa qini Anutufa mariananoo.

Anee aneenna maqannaasara rakiranaki namuqaa urinnaaqaraaqee qiananoo.

<sup>5</sup> Oo Anutu ani afeekannai maasa qeeqa namuqaa rafaqaafi marunausa maridaqa.

Akaqausa findifi darirariafana anee maasa faqa marianaqa maasa rakirana uraaqa raidaqa.

<sup>6</sup> Qinee sia qeeqa duru saqarikidaqa qini rakira paipana faqa sia qini dadaaqidanoo. Anee kai.

<sup>7</sup> Anee kai maasara fidiqaaimaria namuqaasa nisaukukinaana doo rafiamaree nisaurirana misa nimiananoo.

<sup>8</sup> Maasa aiqama kari Anutuna kai amooqidaqa.

Naaru naaru minara dufi dufi qianaura. Kuqaa.

<sup>9</sup> Anee maasa rakira fasiqauqa faqa nidana dadaaqiunafa maqee sia nidana, sia dadaaqi-mariananoo.

Oo Anutu, anee maasa minniqiseenana maasa ooru muqufi qisaananoo.

<sup>10</sup> Anee miqiannanara namuqaa maasa nifaqasaafaqa sandaunaqa maasa aiqama ainaina mareea.

<sup>11</sup> Anee maasa mareeqee namuqaa nimianaqa misa maasa sipsipara foora kuqa darirara idaqa.

Anee maasa aanaamurukiaqa doo daru qifaqaa qianaqa moodaa moodaa iqa maridaqa.

<sup>12</sup> Oo Anutu anee aneenna faiqi anaasee kaqikaa

munnimma aqusee maree maria ainainnara foora mariafana namuqaa nimiananoo.

Anee nimisee aabaa munnimma sia maree marianara foora nimiananoo.

<sup>13</sup> Anutu anee miqi marianaqa maasa qiqoonausa maasara naanaidara qidaqa.

Maasa daaqa mariasa ataasa ataasa maqimaqaidaqa.

<sup>14</sup> Anee sia maasa dadaaqiannanara aiqama maqannaasa maasa qisaurirana qimidaqa.

Akaqa maqannaasa maasa Isaraee maqannaasa qiqafeeqa uteeti qimasaidaqa ninuka aqidaqa.

<sup>15-16</sup> Qini namuqaa faqa qiniara fidiqaa imariasa qini ataasa ataasa qima qimaqaafaqa qinee aiqama kari ummaaraki maruna qisaurirafa qini rafaqa fidanoo.

<sup>17</sup> Oo Anutu, anee fifau maasa dari mariananoo.

Maasa aniara sia qauniqa sia ani qima afeekaikira ufa rukieeqa sandanainai qidaqa.

Maa manda oosanafa fifau maasa rafaqaafu qimaqaidanoo.

- <sup>18</sup> Maasa nimuqusa sia qikooqai faqa andeedqara  
oosanasaaqari moosaa quandeedqa, kaqi mariaqoo kai maridaqa.  
Maasa qiku faqa maasa firana faqa sia ani minnisee qiku munuree miniree idaqa.
- <sup>19</sup> Anee fifau maasa qimudaani tureeraummasee  
mareeqee kaasau faini ooki quqeenanara foora masaanaqa maridaqa.  
Anee firaa asukunannoo maasa rafaqaqafu  
qimaqaananoo oosana sia marinaki fifau miqiananoo.
- <sup>20</sup> Maasa Isaraee maqannaasa Anutuna auqu qaunusaananoo fau mifa iriqini.  
Maasa unna anutunauqa uqeeraananoofau Anutufa minara faqa iriqini.
- <sup>21</sup> Anutufa maasa qimuqusaki kukeeqara ainainara  
irimarifa marinara mi aiqama ainaina qafaiqini.
- <sup>22</sup> Faasaambaasaana misa ani auqusaara maasa daruqifaqaaidafa.  
Misa maasara kuqifandinna sipsipausee qimasaida maasa daruqifaqaaidafa.
- <sup>23</sup> Oo Yaawee anee findifi maasa minniqisaa.  
Findifua sia kisaaqasaa maasa minniqisaa.
- <sup>24</sup> Anee nanaree aneenna oorisa ititasee sia maasa qiqafaidanee.  
Yaawee anee nanaree maasa aupurarana faqa ummaara qimiranara faqa qaunidanee.
- <sup>25</sup> Maasa maqasaa aqufunaqa nikusamu radamu saafaqa maqasaa riqa maridaqa.
- <sup>26</sup> Oo Yaawee anee findifi maasa dadaaqia.  
Aneenna maasara naaruara aidiranara irisee maasa mareeqee amiqiranaki quqaqisaa.

## 45

### *Maqasaa karaambaiqa amundara idi.*

- <sup>1</sup> Amiqira irirafa qini iriranaki umbiqanoo marifaqa  
karaambaiqa irianifeera maa idi ufana akara ruma amidaqa.  
Qini qifauru fannoo papiqa saiki marina amiqira kirifiara foora maa idina akara ridanoo.
- <sup>2</sup> Oo maasa maqasaa Karaambaiqa ani afaqa aiqama faiqi faiqikiqari amiqirafa mari-  
anoo.  
Ani afauru deepimaseera foora amiqira ufa adiafaa ira ufa kai ani ookiqari ururaidanoo.  
Minara naaruara naaruara Anutufa ani amiqi amiqimma amaqaaidanoo.
- <sup>3</sup> Oo uriqararafa ani afeeka faqa ani qareenarafa faqa  
ani uriqararafa faqa marinara doo aneenna duru feefa deedaqinana rakiranaki fua.
- <sup>4</sup> Anee aneenna uriqararana namu faqa doo rakiranaki finana uriqarara.  
Fimarinaga ani anoona ufa qirana faqa andeedqarana faqa sia rafaqa fuaqeera raki-  
ranaki fua.  
Ani rakirafa afeekaikinaqa manda oosana maree mariasa aniara firaaqoo rufieefaranoo.
- <sup>5</sup> Ani duru feefa aaruqirafa namuqaauqa nimuqusaki kai naruannoo.  
Miqiannannai moomoosa ani aikuki aquffana radamu nimaqeenaranoo.
- <sup>6</sup> Anutufa anee naaru naaru uriqarana maridana  
aneenna faiqi anaasee andeedqara oosanannoo rakisi nimaqaa.
- <sup>7</sup> Ani andeedqaranara aidinoo mandainainara fidiqaaq inoo imarifa mariananoo.  
Minara kai ani Anutufa ani utaaqamaseenoo  
asasirana ani akiqa amoondunna akaqa uriqarararusa adia nimaqaina faqa uraaqa  
ramasee adia amaqeenoo.
- <sup>8</sup> Ani qamunna makaqa mandeefana undidanoo ani  
karaambaiqa amiqira maaqakina aiqama  
ainainauqa eereefanta aanainnai auqira  
ainainauqa kai maridanoo.  
Minaki piripunna oosana oosanannai auqaafana anee اساسimariananoo.
- <sup>9</sup> Akaqa karaambaiqa niraamuqmaaka uriqarara aanaaseeuqa kai ani maaqaki mari-  
daqa.  
Ani karaambaiqa asauku uqannai ani anaqa uriqarara  
anaasee amiqira qamunna afisimarufa Oofiraa  
maqusaindaraa koorannoo afaqa auqusee ani asauku uqannai kikiqinoo mari-  
danoo.
- <sup>10</sup> Oo fuka amundara anaasee anee aneenna aaqoo ramatinimmafi qini ufa iria.  
Aneenna maqanna faqa aneenna ainainara faqa  
qaunuseenana aneenna afaaqi maqa maaqaki kai maria.
- <sup>11</sup> Miqimarinanoo ani afaaqi karaambaiqa ani amiqira oori afiriara firaaqoo aidiannoo.  
Mifa ani karaambaiqa maridanoo anee minara kai qeerairidana mina ufa qaindusua.
- <sup>12</sup> Tisee maqusaindaraasa moo amira ainaina



nisaukuki uqirausa aniree اساسیداقا amifaranoo.

Faiqi aanaaseeqiqari ainaina faqaasa aniree ani aqoondikifaranoo.

<sup>13</sup> Moo maqannaa karaambaiqa araamuna fannoo nari afaaqauqira maqaki maridanoo nari afaaqinnai firiridanoo.

Mi manaqana qamunna koorannai auqirafa idaaqirafa kai maridanoo.

<sup>14</sup> Misa mina afigamaree nari qamunna oosana oosana akararirana namufaqa karaambaiqa munu amiafaqa qafeeqa.

Aqoonna maanaqauqa mina dadaaqi marusa mina afigee fia.

<sup>15</sup> Misa اساسیرانا namufaqa nasu nasurirana namufaqa aana muquniqa karaambaiqa amiqira maqaki keeqaafaqa niqafeeqa.

<sup>16</sup> Maa anaaseena afaaqi karaambaiqa, ani faiqi namu kambiqaainausa ani amaqa maqee findifi karaambaiqaikiqa fifaranoo.

Aneenna faiqi namu anee kaqi maridana aiqama maqa maqaqi uriqararusaika mannimaqasaina rakisi nimaqeeffaranoo.

<sup>17</sup> Qinee ani auqu uqeerasaanaqa naaru naaru aiqama kambiqaeeffandinausa minara irifaranoo.

Miqiannanara faiqi anaasee naaru naaru ani amooqifaranoo.

## 46

*Anutufa maasa faqa maridanoo.*

<sup>1</sup> Anutufa maasa kukeeqara maqusa faqa maasa afeeka faqa maridanoo.

Maasa aiqama kari ummaaraki aqufunanoo dadaaqi marifa maridanoo.

<sup>2</sup> Maasa minara irisee sia rufiaanaura.

Maqa firaaqoo kasinaqa sia maasa minara rufiaanaura.

Aaqana namu mareeqee ooruku nammari qambaana i uqasaina aqufinaqa maasa sia minara maparaa ianaura.

<sup>3</sup> Aiqama nammari aulinoo firaaqoo narisaa narisaa arinoo qaqaara qaqaarinanoo firaaqoo ufaqinaqa sia rufiaanaura.

Aaqana namu kasinaqa nammari fannoo aaqana ammitu ammitu inaqa sia rufiaanaura.

<sup>4</sup> Anutuna maqusa aqa mari nammari qumidanoo raina rainidanoo Anutuna maqusaki mariasa mi nammari fa اساسیرانا nimidanoo.

Mi maqasafa naaquqarafa marifanoo uriqarara Anutufa mi maqusanaki maridanoo.

<sup>5</sup> Anutufa mi maqusanaki marinara sia kasinoo sia aqufunoo.

Namuqaa aniraifanoo mi kananaana kai Anutufa dadaaqiannoo.

<sup>6</sup> Aamina maqannaa tautummasee aanoo qimasee faaqa fuisee qiafaqa akaqa maqannaasa kurididaqa.

Misa miqi mariafanoo Anutufa nari ufa firaaqoo uqeeraifanoo aiqama maqa tasirisirinoo nammari kidanoo.

<sup>7</sup> Karaambaiqa aiqama afeeka faqaafa maasa faqa maridanoo. Yaakooboona Anutufa maasa afeeka kukeeqara maqusa maridanoo.

<sup>8</sup> Oo aiqamausa aniree Yaaweefa auqamasai ainaina qafaa.

Maa maqa maqana aiqama naaquqara ainaina auqaina qafaqa.

<sup>9</sup> Mifa maa maqa maqaanasaa aiqama atiqara mari rakirana taikannimaqaidanoo.

Mifa duru feefa itairaatairidanoo.

Rakira saqari faqa idaki aqusaifanoo qama taikaidanoo.

<sup>10</sup> Oo innee kasoomafinaqa qinee Anutusa marunnanara oonumafi iriaqa.

Qinee moomoo maqannaasa qambaana i uriqaraqa marianaura.

Qinee aiqama maa maqa maqaanaki uriqaramafuanaura.

<sup>11</sup> Karaambaiqa aiqama afeeka faqaafa maasa faqa maridanoo.

Yaakooboona Anutufa maasa afeeka kukeeqara maqusa maridanoo.

## 47

*Anutufa aiqama maqannaasa karaambaiqa maridanoo.*

<sup>1</sup> Oo innee aiqama maqannaasa nisauku aridaqa asasiaqa.

Innee Anutunara idi rama amaqaaidaqa asasiaqa.

<sup>2</sup> Kaaqa uriqarara Yaaweefa naaquqarafa maridanoo, minara rufiaaqa.

Mifa aiqama maqa maqasaa uriqarara karaambaiqa maridanoo rakisi nimaqaidanoo.

<sup>3</sup> Mifa aiqama maqannaa mareeqeenoo maasa Isaraee maqannaa niramandunnai quqanau.

Aiqama maqannaa oonu mafi maasa qiku ameemaana i quqasanau.

<sup>4</sup> Maasa maqa maaqa qimiraree qimasee utaaqama qimaqoona nari kai qiminau.

Anutufa mi amiqira maqa maaqana maasa Isaraee  
 maqanaasa nari aidi marusa qimufaqa maasa mi maqa maaqanara asasiidaqa.  
<sup>5</sup> Anutufa nari ufa irira qaari maruqoo ooru  
 fimarufaqa mina fiq fiqiuqa marusa faaqa ridaqa asasi mariqau.  
 Ukeena fuaqarana namufaqa Yaaweefa ooru finau.  
<sup>6</sup> Amooqira idi Anutuna ramamia. Doo ramamiaqa.  
 Maasa karaambaiqa amooqira idi ramamiaqa. Doo kafaa idi ramamiaqa.  
<sup>7</sup> Anutufa aiqama maa maqanasaa mariasa karaambaiqa maridanoo.  
 Doo innee mina amooqira idi ramamiaqa.  
<sup>8</sup> Mifa nari naaquqara qaarisa oogu marifi aiqama maqannaasasaa rakisi ni-  
 maqaidanoo.  
<sup>9</sup> Aiqama maqannaasa uriqararasa moodaaqoo  
 Abarahaamma Anutuna ufa iri mariasa namufaqa suqidaqa.  
 Misa aiqamausa Anutunaindi maridaqa.  
 Mifa firaqoo uriqarara afeeka faqaafa maridanoo.

## 48

*Sioona Anutuna maqusa maridanoo.*

<sup>1</sup> Yaaweefa firaafa uqanna maridanoo.  
 Maasa Anutuna maqusaki mina naaquqara aqanasaa mari maqusanaki maasa Anutuna  
 amooqidaqa.  
 Mina firaqoo uqanna amooqiaqa.  
<sup>2</sup> Sioona aqana Anutunaindi kaaqa uriqararafa amiqirafa maridanoo.  
 Mifa uriqarara karaambaiqa maqusa maridanoo.  
 Mi aqanafa maa maqa maaqanakinaa fasiqa anaasee asasirana nimidanoo.  
<sup>3</sup> Anutufa mi maqusanaki maridanoo faiqi anaasee  
 dadaaqidanoo, mifa rakira aukuaa faiqi anaasee  
 mi afeeka faandaamura ququsanaki dadaaqidanoo ititannisaidanoo.  
<sup>4-5</sup> Moomoo namuqaa karaambaiqauqa suqufi mi  
 maqusana ooru qafuofano naindiri ree naaquqooafaqa quqasee doo sandamafiqau.  
<sup>6</sup> Naindiri rarafa misa naakufufaqa anaasee innaamunara auruandee miqau.  
<sup>7</sup> Namuqaa nariqa rakira kannuqaki oobiqasee urufano  
 suani oosanaindari ufai firaafa urinoo nammari  
 amakaurufano misa kannuqa Tarasisaa maqusanaasaindi teeqindee mannisanau.  
<sup>8</sup> Maasa oqai Yaaweefa rakisi marunara iriafannana maqee maasa qeeqa qifunoo  
 qafeeqa.  
 Yaaweena aiqama afeeka faqaana maqusa marinara  
 nari Anutufa mi maqusanaki amiqimmasee  
 ititaqifano naaru naaru afeekaikinoo maridanoo.  
<sup>9</sup> Oo Anutu, ani naaquqara amaana maqaki keeqaifiqa  
 ani maasara firaqoo aidi marinara oonumafi iridaqa.  
<sup>10</sup> Oo Anutu, aiqama maqa maaqaki mariasa ani amooqidaqa.  
 Ani firaq auquara aiqama maa maqa maaqanakinaa fasiqa anaasee asasiidaqa.  
 Anee andeeqara oosanannoo rakisi nimaqee maridanoo.  
<sup>11</sup> Oo Anutu, ani rainara ufa andeeqarafa marinara,  
 Sioona aqanasaa mariasa asasiidaqa.  
 Yuda maqa maaqakinnaa maqusakiaqa mariasa faqa nasuriaqa.  
<sup>12</sup> Innee Anutuna faiqi namu Sioona aqana fiq fiqummmasee qafaafa,  
 ooni faandaamura auquqona amiqimasee qafeeqa asaanaruqa.  
<sup>13</sup> Mina faandaamura ooru ree qumuree qiranakiaqa qafamaqarasammasee kasooaqee  
 inaaqianna  
 kambiqainausa mi faandaamuranara qimannimiaqa.  
<sup>14</sup> Maa Anutufa naaru naaru innisaimbaqa Anutufa maridanoo.  
 Mifa naaru naaru maasa qifiqee aana uqaqifiqano fuannoo.

## 49

*Munnimma qumiasana saqarikirafa furufarira oosana maridanoo.*

<sup>1</sup> Maa ufana aiqamausa iriaqa.  
 Aiqama maa maqa maaqanaki mariasa amiqimmasee iriaqa.  
<sup>2</sup> Aiqamausa uriqararasa faqa ureeqarasa faqa  
 ainaina faqaasa faqa kudi fasiqa faqa, aiqama iriaqa.

- <sup>3</sup> Eeqá dookiqari irirana faqaasa ufa kai qianauna.  
Qini daunduraindaraa irirafa andeeqara irirana maree maria irirana nimiannoo.
- <sup>4</sup> Eeqá naamuqaqira ufa quandasee qianauna.  
Qini quandara ufa piripuna aridaqa idinnai qimannimianauna.
- <sup>5</sup> Manda aukuaana aninaqa qinee sia fifau rufiaanauna.  
Mandoosana maree mariasa qini fiqú fiqú iqa  
maridaqa mandaikamma qisararifaqa sia qinee minara rufiaanauna.
- <sup>6</sup> Mi aaqara fasiqausa nári ainainasaa kai mundidaqa,  
nári moomoo munnimma ainaina faqaasa marianara nári nimoo namoo qidaqa.
- <sup>7</sup> Maasa sia amana geeqa maa maqanasaa kisaagasaa marirana feefaurianauna.  
Maasa sia amana Anutuna munnimma amisee geeqa marirana feefaurianauna.
- <sup>8</sup> Faiqí marirana feefaurirafa firaafa fiqaranoo maridanoo.  
Firaa feefauru tia aqinanoo faqa sia kai amanaikiannoo.
- <sup>9</sup> Sia amana feefauru Anutuna amisaifanoo maa  
maqanasaa kisaagasaa marida sia kuquanee qianoo.
- <sup>10</sup> Aiqamausa maa ainainna qafaidaqa.  
Irirana faqaasa misa faqa kaqi kuqifaranoo.  
Irirana siaisa faqa furufarirausa faqa aiqama amana  
amana kai kuqíqa nári ainaina mafi quqasaafaqa akaqausa maraidaqa.
- <sup>11</sup> Ooqai maqa misaindi marinau.  
Maqee faiqí madika fannoo misa maqusa maridanoo.  
Naaruara naaruara misa mi madikanaki kai marifaranoo.
- <sup>12</sup> Maasa uriqarara duqu fannoo sia amana kuqirana itita qimaqaannoo.  
Maasa kaqi aandauna foora kuquanauranoo.
- <sup>13</sup> Faiqí náriara uriqararausee qimasee náriara kai  
irimariasa, miqíra fasiqa irirafa sia andeeqanoo maridanoo.  
Misa fifau nariqa ainainara asasidaqa misa faqa aandauna foora kai kuqidaqa.
- <sup>14</sup> Misa sipsipauqara foora kuqifaranoo.  
Misa kuqu fifanoo kuqirafa misa sipsipasaa rakisirafara foora misa rakisi nimaqaannoo.  
Andeeqara oosana maree mariasa doo misa  
kanaanaanara foora findifiqa manda oosana maree mariasasaa rakisifaranoo.
- Manda oosana maree mariasa kaqi maridaqa amiqira  
maaqaqi mariinaqa kuqíqa sia minaki marifaranoo nianai madikaki maridaqa kai  
kaqi putaa ifaranoo.
- Misa miqíqa mariafaqa qinee sia misa naanna raidaqa.
- <sup>15</sup> Anutufa qini kuqira afeeka ameemaaindaraana feefauru masainaqa asumu mari-  
anauna.
- <sup>16</sup> Faiqí moo fannoo firaaqoo ainaina moomoo faqaafaikinnanara sia minara irinanoo  
amuqusiani.  
Mina maaqa amiqirana firaana usakainara sia anee qinee faqa miqiaqaanee qia.
- <sup>17</sup> Mi ainainna faqaa fasiqa kuqinoo sia moo ainaina maree fuannoo.  
Mina qumiasana sia mina faqa madikaki ooqu fuannoo.
- <sup>18</sup> Mi fasiqafa kaqi maru kamuqoo moomoo amiqira  
ainaina faqaafa maridanoo mifa fifau nariara amiqi amiqiranaki maridee qi-  
marinai.
- Mifa moomoo amiqira ainaina faqaafa marufaqa aiqamausa mina amooqi mariqau.
- <sup>19</sup> Ainaina faqaafa kuqinoo mifa faqa nari akeeku akaaku kuqíqa oonu mariaqoo  
fuannoo.
- Mifa miqoo oonu maridanoo sia kaifaa kaaqa qarana qafaannoo.
- <sup>20</sup> Maasa uriqarara duqu fannoo sia maasa kuqiranasa itita qisaannoo.  
Maasa aandauna foora kaqi kai kuqanauna.

## 50

### *Kuqaa qira innaaru.*

- <sup>1</sup> Afeeka faqaa Anutufa Yaaweefa maa maqa  
maaqanakinaasara nammeera qifaqa suqufufanoo qimannimi marifa maridanoo.  
Suani oosanaindari faqa suani keeqee marinnaindari faqa nammeera qifaqa suqidaqa.
- <sup>2</sup> Sioonna maqusa kaaqa amiqirafa qareenarafa  
marifanoo Anutufa mi maqusanaki maridanoo  
akooqoo kaaqa qaidanoo rupannoo imarifa maridanoo.
- <sup>3</sup> Maasa Anutufa anireenoo sia ufa siaina marifa maridanoo.

Ida fannoo mina afunni fidanoo fasafasimarifanoo fidanoo.

Misaqa mina fiq u fiq inoo mari ainainausa ufai  
aakuasaa innaarunai qirafa mifauqa kai firaaqoo ufa qidanoo.

<sup>4</sup> Anutufa aiqama maqannaa suqu quqaseenoo misa  
ufa andeeqaani qimasee innaaruna faqa maqa faqa naaramasainaa anireeqa  
Anutufa nari

faiqi anaasee raina nimaqaaninna ufana irifaranoo.

<sup>5</sup> Anutufa qidanoo, qiniki mapukusee maria fasiqa anaaseesa suqumaree moodaaqoo  
aniaqa.

Aandau tatufiranannai qini faqa qima afeekaikirana  
qimimariasa misa qinee marunnannai moodaaqoo suqumaree aniaqa.

<sup>6</sup> Innaaruna fannoo Anutunara maaqi qimasee kooroo idanoo.

Anutufa nari kai andeeqarafa ufa raina nimaqee marifa maridanoo.

<sup>7</sup> Anutufa kafaa maaqi qidanoo.

Oo Isaraee maqannaa qini maqannaasa irifaqa inni mandoosanara kooroommasee  
qimannimianaaura.

Qinee Anutusa inni Anutusa maridaqa qimannimianaaura.

<sup>8</sup> Innee qimi maria ainainna faqa aandau tatufi  
mariana faqa maqee maqee qimimariana sia minara aanoo qidaqa.

<sup>9</sup> Qinee sia inni aandauqa kinaana burimmakau akoonara dididanoo.

Sia inni mimmi ququsakinaana moora dididanoo.

<sup>10</sup> Nandaki maria kaasau aandausa aiqama qinindi kai  
maridanoo, maqeeena aandau aiqama aqanasaa  
faqa maqa maaqaki mariasa qinindi kai maridanoo.

<sup>11</sup> Aiqama ufiniuqa faqa qinindi kai maridanoo.

Aiqama maqa maaqaki maria aandausa aiqama qinindi kai maridaqa.

<sup>12</sup> Qinee Anutusa aandaura didi marinaqau sia inni qimannimunaiqini.

Maa maqa maaqana faqa aiqama minaki mari ainainausa qinindi kai maridanoo.

<sup>13</sup> Innee qiniara burimmakau akoona amaqi neemarifee fee qidaqee.

Innee qiniara mimmi fidika faqa neemari fee fee qidaqee.

Sia mina naidaqa.

<sup>14</sup> Innee dufi dufi qirana kai tatufiranara foora qini Anutusa qimiaqa.

Innee qini uriqarara afeeka faqaasara qima afeekaikammaqaa mau kai fuaqa.

<sup>15</sup> Ummaara inniki kambiqaqinaqa qini daaraifaqa qinee inni dadaaqianaqa innee  
quandakina qini qimooqiaqa.

<sup>16</sup> Aaqara oosana maree mariasa Anutufa maaqi qimasee qimannimidanoo.

Innee nanaree qini naamuqaqira ufa nikaru qimasee naakapaidee.

Innee nanaree qini moodaanaki kira ufa unnaqimasee inni nifaurusaaqari uridanoo fee.

<sup>17</sup> Qinee andeeqa nimaqararunaqa nikooqee mariasa.

Aiqama kari qini naamuqaqira ufa rukiee mariasa mariafanoo.

<sup>18</sup> Innee qummuari mari fasiqana qafamasee mina aqoondiki mariafanoo.

Innee faiqi anaasee qummuari mariasa niqafamasee innee faqa minaki ootupee mariasa  
mariafanoo.

<sup>19</sup> Inni noo fannoo manda oosanara qiranara kai rakisidanoo.

Inni nifauru fannoo unna ufa qirara sia marammara ridanoo kaqi qimariafanoo.

<sup>20</sup> Innee inneeqa nikaqaafasaa unnufannai misa ufa nimi mariasa mariafanoo.

Innee oosana siainaki misara manda ufa qimariasa mariafanoo.

<sup>21</sup> Innee mi manda oosana oosanausa auqee mariafaqa

qinee Anutusa kaqi kasooiqa marunaqa innee qiniara Anutufa maasa daanna  
raidanoo manda

oosanara sia ufa qidanoo fee qimariafanoo.

Innee miqi qidaqa aaqee mariafanoo.

Inni nifusaa akooqoo inni aaqaranara kooroomma nimianaaura.

<sup>22</sup> Innee qini Anutusara nikooqee mariasa maana iriaqa.

Qinee inni mandaikamma nimaqaanaura.

Sia moo fannoo amana inni dadaaqiannoo.

<sup>23</sup> Qini Anutusa dufi dufi qirana tatufiranara foora

suqa qimimariasa faqa qini ufamau fimariasa faqa  
qinee Anutusa qeeqa asumu marirana nimianaaura.

## 51

*Numoo akiiqara mininnisaani fee innaaru.*

<sup>1</sup> Oo Anutu aneenna sia taikaaninna amuqisirafa marinara irisee qini qifauama qisaa. Aneenna firaa nifauarafa marinara irisee qini aaqarana akiiqara rukaqisaa.

<sup>2</sup> Qini manda oosana findaukamaqisaa.

Qini aaqarana nammari uqu taika qisaa.

<sup>3</sup> Qinee qeeqa aaqaranara iridaqa.

Qini manda oosana fannoo naaruara doorinni marinaqa sia qaunuanaura.

<sup>4</sup> Oo Anutu qini aaqarafa ani kai mandaikamma amaqqeeqa.

Ani afusaa kai maa manda oosanna auqqeeqa.

Oo Anutu akoogoo ani qimamidaqa.

Anee qini ufa qimiannana anee kuqaa andeeqarafa mariananoo.

Anee ufa qimiannannai qini aaqarana akiiqara iananoo.

<sup>5</sup> Qini qinoofa qini maqa qisoogooqari numoo aanaaqi mariafanausa maridaqa.

Qeeqa qinoona amuaquki mariafananoo aaqarana asumu qiniki marinau.

<sup>6</sup> Oo Anutu faiqi naundarai anoona ufa kai marianifee qimarianafa mariananoo.

Qini daundurairi kukeeqaranaki aneenna irirana daamuqia.

<sup>7</sup> Anee qini anukama qisainaqa qinee anukaqa maria.

Qini nammari uqusainaqa qinee eekara arira qasuruara foora qiqa maria.

<sup>8</sup> Oo Anutu anee qini aaqarana akiiqara qini qimudaani raqeera foora maqaanaqa maridaqa.

Anee qini aaqarana minni qisainanoo qini qimudaani kafaa ootupeera foora inaqa qinee asasianaura.

<sup>9</sup> Aneenna afu tautasee qini aaqarana sia qafaa.

Qini manda oosana aiqama rukaqisaa.

<sup>10</sup> Oo Anutu qini qimuqusa fuka amiqira qimuqusa auqu qisaa.

Qini daundurairi naaruara ani ufamau fira maraquna quqaaqisaa.

<sup>11</sup> Sia qini mareeqee aneenna mariannaqooqari aquqisaa.

Aneenna naaqqara andeeqara maraquna qiniki marina sia maraqa.

<sup>12</sup> Qinee ani اساسira asumu mariranaki mariufaa

kaqinni ubeekaqa marunnana kaifaa mina qiminaqa asasia.

Miqianana anee kaifaa ani ufmau fira didira

maraquna qiminanoo qini dadaaqinaqa ani aidirana mau fua.

<sup>13</sup> Anee miqinaqa qinee aaqee mariasa ani andeeqara aana uqannifiqaanaura.

Manda oosana maree mariasa faqa irisee anee innannai quandaki ubeekkeefaranoo.

<sup>14</sup> Oo Anutu qini asumu marirana qimianna Anutufa mariananoo.

Anee sia qini kuqa darua, anee ititaqisainaqa qinee

firaqoo اساسida ani andeeqaranara idi raanaura.

<sup>15</sup> Oo Yaaweefa anee qini doo raqasainaqa qinee qeeqa

dookiqari ani amooqiranara kai koorooianaura.

<sup>16</sup> Qinee ani Anutuna aandau tatufirana amianee

runana anee sia didiifoo qianaqa minniseeqa.

Qinee tatufirana ani amianee runana anee minara sia asasiananoo.

<sup>17</sup> Anutufa narí amira ainainara akooqaidanoo.

Qini tatufirafa qeeqa mara maree qumirafa maridanoo.

Anee nariqa mara maree qumira oosana faqa faiqi

nári mandainainaiqari quandara oosana faqa sia akooqaidanoo.

<sup>18</sup> Oo Yaawe aneenna amiqira iriranannai Sioona

maqusanaasa amiqi amiqimmannimaqaa.

Anee Yeerusaree faandaamura kafaa auqu uqerasaa.

<sup>19</sup> Auqu uqerasainaqa miqooqari ani aminna ainainafa ani aidimarifa mariannoo.

Aandaau muduka tatufirana suqarafa oosana ani aidirafa kai mariannoo.

Miqoo misa burimmakau akoonauqa arusee tatufirana suqasee ani amifaranoo.

## 52

*Anutuna raina nimaqaranara faqa amiqiranara faqa qidanoo.*

<sup>1</sup> Oo amudaanai qimarianna fasiqa, anee nanaree aneenna manda oosana amooqidanee.

Anee nanaree faasaambaasaana anee Anutufa aidimari fasiqa aanaaseesa mandaikamma nisaidanee.

Anutufa mapukusee marira oosana fannoo naaruara marifa maridanoo.

<sup>2</sup> Manda fasiqa anee mandaikamma nimaqarara kai tipundaari marianafa mariananoo.

Afai keedaira foora raiqarafa unna ainaina kai inuanafa.

<sup>3</sup> Ani manda oosanara rirafa amiqira oosanara rimariannana uriqaranoo maridanoo.

Ani unna ufa qiranara aidirafa anoona ufa qira aidirana uriaaqaranoo maridanoo.

<sup>4</sup> Anee unna ufa qirara kai aidi marifa mariananoo.

Anee faiqí mandaikamma nimaqara ufara kai aidi marianafa mariananoo.

<sup>5</sup> Anutufa kuqaa uqanna anee mariannaqoo qaraana  
ani rarisameegee naaru naaru kuridiranaki quqasaannoo.

Mifa ani maaqakinaana qumara rarisameegee ummaaraki quqaisaannoo.

Mifa maa maqa maaqakinaana ani umareekeenoo kuqiranaki quqaisaannoo.

<sup>6</sup> Anutufa manda fasiqauqa kuridinnimaqainaqa andeegee mariasa qafamasee rufiee-  
faranoo.

Misa mi manda fasiqausara naanaidara qifaranoo.

<sup>7</sup> Misa mi manda fasiqanara maaqi qimasee uteeti qifaranoo.

Maa fasiqafa sia Anutunasaa mundidanoo. Sia mina dadaaqianifee qidaqa.

Nari moomoo ainainasaa mundinoo maridanoo,

mifa nari firaa qumiasanara qini dadaaqiannoo fee qidanoo.

Mifa nari manda oosanara qini itita qimaqaannoo fee qianoo

<sup>8</sup> Qinee Davidisa sia miqimarunaua maridaqa.

Qinee Anutuna amaana maqaki fuka oorifa saqariara foora ammunidaqa.

Qinee naaru naaru Anutuna sia taikaaninna amuqusirana saqarikidaqa.

<sup>9</sup> Qinee anee auquqoonna ainaina oosana qafamasee

naaru naaru ani faiqí anaasee nifusaa dufi qianauro.

Qinee ani andeeqaranara kooroommasee qimannimianauro.

## 53

*Faiqí faiqí manda oosanara qidanoo.*

<sup>1</sup> Rufufari mariasa nari nimuqusakiqari maaqi qidaqa sia Anutufa maridanoo fee qidaqa.

Miqi qimariasa oosana mandaika minoo maridanoo.

Misa manda ainaina kai auqee mariasa maridaqa.

Sia moo fannoo andeeqara oosana maraidanoo.

<sup>2</sup> Yaaweefa innaarunaindari maa maqanasaa faiqí

faiqí mariasa nindafaidanoo maaqi qimasee qimannimidanoo.

Akaqausa amiqira irirana faqaasa maridee sia fee maridee.

Akaqausa qini Anutusara randaidee sia fee randaidee qidanoo.

<sup>3</sup> Aiqaumausa quandaki kaqi runna fidaqa.

Misoo maasoo amana amana kai mandaikiqa maridaqa.

Sia moo fannoo andeeqarafa maridanoo. Sia uqanna.

<sup>4</sup> Anutufa maaqi qimasee iraidanoo.

Manda oosana maree mariasa irirana siasee maridee.

Misa qini faiqí anaasee ainaina qumuaramasaida minasaa maridaqa.

<sup>5</sup> Miqi mariasa firaqoo rufiee faranoo.

Ooqai rufioona arusee maqee firaqoo rufiqeefaranoo.

Anutufa nari faiqí anaasee namuqaauqa naruseenoo

misa nimudaani aiqama tinai modaa moodaa aqusaannoo.

Anutufa mi namuqaasa ameesuqinaqa Isaraee maqannaasa misa naru nifaqaqifara.

<sup>6</sup> Qinee maaqi qimasee innaaru qidaqa Isaraee

maqannaasa asumu marirafa Sioona maqusakiqari aniani.

Anutufa Isaraee maqannaasa nari maqa maaqa faqa

qumiasana faqa kafa rairaamma niminaqa misa asasidaqa idireefaranoo.

## 54

*Namuqaasaa itita amaqaannee innaaru.*

<sup>1</sup> Oo Anutu aneenna afeekannai qini mara amiqiranaki quqaqisaa.

Aneenna firaa afeekannai qini rumbaranakinaana iduku qisaa.

<sup>2</sup> Oo Anutu, qini innaaru qirana iria, qini dookinaa ufa iria.

<sup>3</sup> Ramoo ramaa imariasa aniree qini dariraridaqa.

Faiqí kuqa narimariasa qini marirana taika qimaqarara midaqa.

Anutu ani ufara sia irimariasa qini dariraridammia.

<sup>4</sup> Kuqaa Anutufa qini dadaaqi marifa maridanoo.

Qini mariranasaa rakisi marifa Yaaweefa maridanoo.

<sup>5</sup> Anutufa qini namuqaqa qini mandaikamma qimaqee

maria oosannana quandasee nariqa faqa mandaikamma nimaqaani.  
 Oo Yaawee aneenna mapukusee mariranara irisee misa kuridinnisaa.  
 6 Oo Yaawee qinee aandau tatufirana ani suqa amirara dididanoo.  
 Oo Yaawee ani auqu amiqirafa marinara ani amooqianaura.  
 7 Anee qini dadaaqiananoo aiqama ummaara fannoo sia qini rafaafinoo.  
 Miqimma saanaqa geeqa qifunnai geeqa namuqaa aqufuana niqafeeqa.

## 55

*Faiqi moo fannoo mina aqoondi fannoo ueeqasoofanoo Anutufa dadaaqianifeera innaaru qinau.*

- 1 Oo Anutu qini innaaruqirana iria.  
 Qinee ani iramirianana sia aaqoosaa ititasee kaqinni oori rafusu aqua.  
 2 Anee qini ufa irisee dadaaqinnanara qima qimia.  
 Qini ummaara irirafa qini daruaqaa midanoo.  
 3 Qini namuqaa qini mandaikamma qimaqarara sandanainai qidaqa.  
 Mi manda oosanna maree mariasa qini rafaafu qimaqaidaqa.  
 Misa ummaara mareeqee qinisaa quqaidaqa.  
 Misa qiniara aanoo qimasee fidiqaamaqisaidaqa.  
 4 Qinee firaqoo rufiee marunanoo mi irirafa qini kuqirafa qimaqaa idanoo.  
 Kuquanna daaquarafa firaafa daakinoo maridanoo.  
 5 Firaqoo rufiee marunanoo daindiri raidanoo.  
 Kuqira daaquarafa qini rafaafinoo maridanoo.  
 6 Qinee nakipuruna miqiraua qiqaosa faqaasa  
 maridau qagamaree moosaa oonuree idooaranaki marini.  
 7 Qinee qagamaree nianai faiqi sia mariannai maaqa marunaiqini.  
 8 Ufainamu faqa aakuasaa namuqara foora  
 namuqaa darimariafaqa ufini maridau kai kaqi mooatnai auqaanaira foora  
 asooarannai fini.  
 9 Oo Yaawee anee qini namuqaa ufa qirana furufamma nimaqa.  
 Narirafa faqa aanooqirafa faqa qini maqusaki  
 marinara miqimmannisaaneera qinee ani iraidaqa.  
 10 Eendaki faqa faasaana faqa maqusa faandaamura  
 afaimau oonuree aniree idaqa manda ainaina faqa ummaara faqa uqeeraidaqa.  
 11 Kuridinnimaqara oosana fannoo maasa maqusaki aiqama tinai maridanoo.  
 Narira ufa faqa unna qira ufa faqa maasa maqusaki aiqama tinai qumbiqanoo mari-  
 danoo.  
 12 Qini namuqaa qifasaasa ufa qimi naqau kaqi maraunaiqini.  
 Qini namuqaa darirari faqau qinee miqooqari kukeeqafini.  
 13 Sia qini namuqaa fau miqidau anee qini fooqaa ira  
 fasiqa qini qifaqasaa qiqaondi fannoo qini qiqaonafa qiniara ueeqee mariananoo.  
 14 Maaqanda moomoosa faqa moodaanaki Anutuna  
 amaana maqaki keeqafiqa amiqira ufa nari  
 qimami nari qimami qimari qiafana.  
 15 Kuqirafa qini namuqaauqa tautumasee naruani.  
 Misa kaqi marifaqa misa mareeqee kuqiraua marianaki quqaqaqa.  
 Aaqarafa misa maaqaki faqa misa nimuqusaki faqa marinara miqiaqa.  
 16 Qinee Anutuna aaraanoo mifa qini asumu maraannoo.  
 17 Eeneemarinaqa faqa kananaana faqa faasaana  
 qambaana faqa qinee geeqa aupuraranakiqari aaraanoo mifa qini ufa iriannoo.  
 18 Rakiranaki moomoo namuqaa darirariafanoo  
 Yaaweefa minakinaana amiqimmasee qifiqaiqaqa oonurandee qimaqaqa anianaaura.  
 19 Misauqa nari manda nirana sia minnisee andeeqarannai quandaidaqa.  
 Misa Anutunara rufiarafa sia maridanoo.  
 Anutufa naaru mariranakiqari uriqararafa marifa qini innaaru iriseenoo misa aupu-  
 rarana nimiannoo.  
 20 Qini ooqeenaa qiqaondi fannoo nari aqoondiqa naridanoo.  
 Nari aqoondikira qima afeekaikira ufa rukiasee naridanoo.  
 21 Mina afaurusaa ufa fannoo fadameenara foora amiqi  
 amiqi qimarifanoo mina amuqusaki qari rakirafa kai kambiqee marifa maridanoo.  
 Mina ufa fannoo fadameenara foora farindaidanoo  
 mi ufana anoona aseema miqirafa maridanoo.

- <sup>22</sup> Aneenna ummaara Yaaweenasaa quqasainanoo mifa aufadama amaaqannoo. Yaaweefa andeeqarauusa mandainainaki aquffanoo irinoo siamma mininnisaannoo dadaaqammianoo.
- <sup>23</sup> Oo Anutu anee faiqi kuqa nári mariasa faqa unna ufa qiganuusa faqa sia asooqa qeefaranoo, fukasaa kuqifaranoo. Misa miqifaqa qinee ani kai saqarikinaura.

## 56

### *Anutuna saqarikira innaaru.*

- <sup>1</sup> Oo Anutu, anee qiniara qimudaoo qia. Faiqi moomoo nimudaanai qimasee qini daru qifaqaa qidammia. Qini namuqaa aiqama kari qini qifaqasee dariraridammia.
- <sup>2</sup> Qiniara ataasataasa qimariasa faasaambaasaana qini daru qifaqaa qidammia. Moomoosa qini dariraridaqa.
- <sup>3</sup> Qinee rufiaunna kari Oo Yaawee, qinee ani kai saqarikidaqa.
- <sup>4</sup> Qinee Anutuna saqarikidaqa sia moo ainainara rufiidaqa. Mina qima afeekaikira ufara irisee mina auqu quqeeridaqa. Faiqi faiqi nana mandaikee maqimaqaiifaqa sia qinee rufiaanaura.
- <sup>5</sup> Aiqama faasaana qini namuqaa ummaara qimidaqa. Misa maqee maqee qini mandaikamma qimaqarara kai iridaqa maridaqa.
- <sup>6</sup> Misa qini marirana nirana qiqafamasee qini darirara kukeeafa maridaqa.
- <sup>7</sup> Oo Anutu, anee misa manda oosana akiqara apurarana nimia. Anee aneenna aanooqiranannai mimaqannaasa muqufisee rafaafunnisaa.
- <sup>8</sup> Oo Anutu qini qiki raqarana aneenna papiqaki akararua. Qini daukunu quminara papiqaki padimmasee akara rua.
- <sup>9</sup> Qinee ani aaraanana anee irisee qinaqa namuqaa sandeefaranoo. Anee miqinaqa qini Anutufa qini saaroo qidanoo fee qianaara.
- <sup>10</sup> Qinee Anutuna saqarikidaqa mina qima afeekaikira ufara amooqidaqa.
- <sup>11</sup> Qinee mi Anutunasaa kai qeeqa irirana rusidaqa. Faiqi faiqi nana mandaikee maqimaqaiifaqa sia qinee rufiaanaura.
- <sup>12</sup> Oo Anutu qinee qima afeekaikiafanna ufanara irisee dufi dufi qirana aandau tatufiranara foora suqamianaaura.
- <sup>13</sup> Oo Yaawee, qinee madika afaisaa oonuraunnana uqera qisaannanara dufi dufi qira tatufirana suqamianaaura. Qinee farindamaki saamurirara unana qini mara findifuma qisaananoo. Qinee ani Anutuna afusaa kaqi marira kaaqa qaranasaa nuaneera mara findifuma qisaananoo.

## 57

### *Dadaaqiani fee innaaru.*

- <sup>1</sup> Qiniara qimudaoo qimisee dadaaqianne qidaqa. Oo Anutu qiniara qimudaoo qimasee dadaaqia. Qinee anee iannannai dadaaqianeera animarunnanara irisee qimudaoo qia. Qinee ani aqoosa ameemaanai itita qisaina kuqirafa aiqaramafinaqa akoonnai anianaaura.
- <sup>2</sup> Qinee Anutuna aiqama afeeka faqaana aaridaqa. Qini didimari aiqama ainainna qimimari Anutuna aaridaqa.
- <sup>3</sup> Mifa innaarunaindari qini innaaru qirana iriseenoo qini asumu maraannoo. Mifa qini mandaikamma qimaqee mariasa rafaafidanoo. Anutufa nári sia taikaaninna amuqusirana faqa nári mapukusee marira oosana faqa qini uqaqifiqaidanoo.
- <sup>4</sup> Qinee kaasau aandau raioonnara foora fiq fiq iqa mariana qambaana maridaqa. Misa nifai fannoo feefara foora faqa faaqaanara foora faqa kaaqa aaruqirauusa qambaana maridaqa. Misa nifauru fannoo aseemara foora raiqarafa faiqi ateekee marisa qambaana maridaqa.
- <sup>5</sup> Oo Anutu, aneenna uriqararana innaarunai uqannifiqaa. Aneenna qareenarana aiqama maqa maaqaki mariasa uqannifiqaa.
- <sup>6</sup> Qini namuqaa qini qiku ufana fufidammia. Qini daundurái rufiarafa marinara mapamidaqa.



Misa qini qimaara madika indufuseeqa nariqa sia  
irirai nari indufuqaanaki nari kai doo aqufia.

<sup>7</sup> Oo Anutu miqiga maridaqa aniara irunanoo qini qimuqusa mapukinoo maridanoo.  
Minara qinee idi raidaqa ani amooqianauro.

<sup>8</sup> Qinee findifiqa.

Qinee piripuna faqa ufireena faqa arimariananoo iaqainanoo suani afu uruani.

<sup>9</sup> Oo Yaawee qinee moomoo maqannaasa qambaana kikiqamafi amooqianauro.

Qinee moomoo fasiqa anaasee qambaana idi raida ani amooqianauro.

<sup>10</sup> Oo Yaawee ani maasara amuqusirafa firaatia innaaruna amana kai ooru maridanoo.

Ani mapukusee marira oosana fannoo kudimanda mariqoo ooru maridanoo.

<sup>11</sup> Oo Anutu, aneenna uriqararana innaarunai uqannifiqa.

Aneenna qareenarana aiqama maqa maaqaki mariasa uqannifiqa.

## 58

*Anutufa manda oosana maree mariasa aupurarana nimiani fee innaaru.*

<sup>1</sup> Innee uriqararansa andeeqasee ufa nimidee.

Innee anoona ufannai faiqi amana amana kai fee andeeqannimaqaidee.

<sup>2</sup> Innee sia miqi mariafanoo.

Inni nimuqusaki innee aaqaranara indeeindee imariafanoo.

Innee maa maqa maaqanaki faiqi narira oosana kai nimi mariafanoo.

<sup>3</sup> Aaqee mariasa maqannimaqoona kiqari kaqi runnai ubeekaqa maridaqa.

Misa maqannimaqoona kiqari aaqaranaki kai fidaqa unnufa kai qidaqa.

<sup>4</sup> Misa aaqara oosana fannoo ukadiqara foora faiqi anaasee ukaqa nimifaqa kuqidaqa.

Misa moo sakani sia ufa irimari sakani fara foora ufa sia iridaqa.

<sup>5</sup> (Akaqa maqannaasa sakani rakisi mariasa ufireena fuaqaafaqa misa ninuka aqidaqa.

Davidifa faiqi sia ufa irimariasa mi sakanina kikiqa ususee niqinoo maaqi qinau.)

Innee faiqi sakaniara foora ufireena fuaqaifaqa sia ufa irifaranoo.

Ufireena akoofasa amiqimasee fuaqaifaqa mina faqa siama irifaranoo.

<sup>6</sup> Oo Anutu aaqee mariasa kaasau fainiara foora mariasa anee misa nifai rufidia.

<sup>7</sup> Anee aaqara oosana maree mariasa nammari

akooqoo qumida muqufi dadasindee mannisaa.

Aanasaa mari ainainna nikunnai radamuandeeemma nimaqaa.

<sup>8</sup> Oo Anutu saina aaqee mariasa qoofi kuqufi putaa iandee iaqa.

Kuqira faiqi maqasaasa sia kaaqa qarana qafaandee iaqa.

<sup>9</sup> Faiqi kaqikaa saqari atekaindee inoo kai kaqi Anutufa misa mandaikamma nimaqaanoo.

Misa kaqi marifanoo Anutufa nari fira arana qaranakiqari misa ufaira foora fuaqa aquannoo.

<sup>10</sup> Misa manda oosana akiiqara Anutufa nimaqaa,

andeeqee mariasa mina qafamasee asasammifaranoo.

Andeeqee mariasa misa fidikaki niku nammari uqifaranoo.

<sup>11</sup> Faiqi mina qafamasee maaqi qifaranoo.

Andeeqara marirana maree mariasa mi andeeqarana akiiqara nimirafa kuqaa maridanoo.

Maa maqanasaa qaraasa andeeqasee rainee mari

Anutufa kuqaa maridanoo, sia sia maridanoo.

## 59

*Namuqaa sia mandaikamma amaqaqee innaaru.*

<sup>1</sup> Oo Anutu qini namuqaaqaaqaa nisaukukinaana maraqaqisaa.

Aiqama qini darirari mariasaaqaa ititaqisaa.

<sup>2</sup> Manda fasiqa nisaukukinaana maraqaqisaa.

Faiqi kuqa nari mariasa nisaukukinaana qini soodaqaqamaqisaa.

<sup>3</sup> Oo Anutu anee qafaa.

Misa kukeeqafi qini darirara qipuraidaqa.

Misa kaaqa aanoo qimariasa qini darirara suqidaqa.

Oo Yaawee sia qini manda oosana akiaqarau

dariraridau, kaqi fifau nariqa kai dariraridaqa.

<sup>4</sup> Qinee sia aaqara oosana maree fau.

Misa sia minara irirai kaqi fifau qini darirara deedaqidaqa.

Oo Yaawee, misa kai kaqi qini darirara deedaqidaqa rakisidaqa.

- <sup>5</sup> Oo Yaawee, aiqama afeeka faqaa Anutufa findifinana qini dadaaqia.  
Isaraee maqannaana Anutufa anee qumuree misa manda oosana aneenna afunnai qafaa.  
Findifinana Anutuna ufa sia iriasa ummaara nimia.  
Qini ueeqee mariasara sia qimudaoo qia, kaqi ummaara nimia.
- <sup>6</sup> Misa eendifaqa fainiara foora rairai qidaqa, manda  
ainaina uqeerarara qini maqusamau fiq u faiq u fiqa nidaqa.
- <sup>7</sup> Misa nookiqari nanee fididee.  
Misa nifauru nimaakiri qaseema miqirafa kai maridanoo.  
Misa nári manda ufara maaqi qidaqa. Yafee iriannoo fee qimasaidaqa kaqi fifau qidaqa.
- <sup>8</sup> Oo Yaawee, anee misa ufa irisee misara naanaidara qimariananoo.  
Anee aiqama mi manda maqannaasa ataasa ataasa qira ufa nimimariananoo.
- <sup>9</sup> Oo Yaawee, anee kai qini afeekaikamma qimaqasee rakisi qimaqee mariananoo.  
Anee Anutufa qini kukeeqara maqusara foora mariananoo.
- <sup>10</sup> Qini Anutufa qiniara amuqusi marifa qinee unnannai anireenoo dadaaqiananoo.  
Mifa qini namuqaa rafaafafu nimaqainaqa qeeqa qifunnai niqafaanaura.
- <sup>11</sup> Oo Yaawee maasa ititaqisee marianafa qini maqannaasa mi manda maqannaasara  
qaunifoora minara sia aiqama naru taikaa.  
Aneenna afeekannai mi manda fasiqausa  
narunnifaqaaqa masainaqa auigeera foora aiqama  
maqa maaqakinai oonuree aniree iqa nuaqa.
- <sup>12</sup> Misa nookinaa ufa faqa nifaurusaaqaraa ufa faqa aaqarafa kai maridanoo.  
Misa aaqara ufa faqa unna ufa faqa qimariana akiqara mandaikiyaqa.  
Misa nári noori uqeere maria oosanafa ufaanara misa ninuka qumaraani.
- <sup>13</sup> Oo Anutu aneenna aanooqiranaki qari misa kuridi nimaqaa.  
Amiqimmasee kuridi taikasaa.  
Miqinaqa maa maqa maaqana atinni atinni mariasa  
minara iriseeqa oo Anutufa Isaraee maqannaasa rakisidanoo fee qifaranoo.
- <sup>14</sup> Eendifaqa namuqaa kafaa aniree fainiara foora  
rairai qidaqa mandainaina uqeerarara fiq u faiq u idaqa maqusamau nidaqa.
- <sup>15</sup> Misa nári naranara randaida oonuree aniree iqanida  
sia nimuaqu imarifaqa firaqoo faaqa riqanidaqa.
- <sup>16</sup> Misa miqi mariafaqa qinee ani afeekara irisee idi raanaura.  
Oo Anutu, qinee firaa ummaaraki marunnana anee  
qini afeeka kukeeqara maqusa mariannara  
qinee kananaana findifi ani maasara  
amuqusiranara idi raanaura.
- <sup>17</sup> Qinee qini Anutuna qini itita qimaqee mariannana amooqianaura.  
Anutufa firaqoo qiniara aidi marifa qini afeeka  
kukeeqara maqusa maridanoo.

## 60

*Manda ainainakinaana mara kaqinni quqaqisaannee innaaru.*

- <sup>1</sup> Oo Anutu, anee maasa minniqisaananoo. Anee maasa rafaafafu qimaqaananoo.  
Anee maasa aanoo qima qimaqaananoo.  
Oo Yaawee, kafaa maasa iannai quandafi maasa dadaaqia.
- <sup>2</sup> Anee maqa kasiananoo maqa fannoo oo raqaidanoo.  
Anee maqa oo raqafina kafaa mafi titaa.
- <sup>3</sup> Anee maa aukuanana maasa afeeka ummaara doo uqaqifiqaananoo.  
Mi ummarana manda nammariara foora nimianaqa  
namasaafanoo narifanoo nifuai nifuai inoo.
- <sup>4</sup> Oo Anutu maasa aniara daaquqee marisa namuqaa  
maasa daru qifaqaa ifaqa anee firaka uqeerainnannai sandaifanoo namuqaa duru  
feefa nammari araannoo, miqifaqa maasa sia kuridianaura kaqi marianaura.
- <sup>5</sup> Oo Yaawee maasa innaaru qirana irisee aneenna afeekannai maasa asumu maraqisaa.  
Miqimmaseenana ani aidi maria fasiqa anaaseesa  
mandainaina kinaana asumu mariaqeera maraa.
- <sup>6</sup> Anutufa nari naaquqara uigaana maqakiqari maaqi qinau.  
Qinee ufoona ridaqa Seekeemma maqa maaqa rainasee qeeqa maqannaasa nimianaura.  
Qinee Sukoota noopundu faqa miqi kai iqa qeeqa maqannaasa rainasee nimianauree  
qinau.
- <sup>7</sup> Kireeata maqa maaqa faqa Mannaseena maqa maaqa faqa qinindi maridanoo fee qinau.

Eefaraimma maqa maaqa qeeqa qikiqaa afisi marunna afeeka qafeefara foora maridanoo.

Yuda maqa maaqa fannoo qini uriqarararasara uqannifiqee mari saunu fara foora maridanoo.

<sup>8</sup> Qinee Anutusa Mooaba maqa maaqa mareeqee mammari difaanirara foora masee ooru dupimma nisaanaura.

Qinee Eedooma maqa maaqa qiku aanaamu raipaaqu quqee marunna maqa maaqafa ooreeqarafa mariannoo, miqiannannoo qeeqaindika masaunnana kooroo ianaura.

Qinee Firistia maqannaasa urinnaaqaramasee faaqa rumasee ufoona ruanaura.

<sup>9</sup> Oo Anutu, yafee qini aana muquninaqee Eedooma maqannaasa afeeka faandaamuraki keeqafi narunaanaree.

<sup>10</sup> Oo Anutufa kuqaa fee anee maasa ameesa uquqiseenane.

Anee sia fee ooqai unnandee inana maasa rakira fasiqauqa faqa oonuree dadaqinnaree.

Anee sia maasa rakira fasiqa namufaqa fidana dadaaqi mariananoo.

<sup>11</sup> Anee maasa dadaaqinaqa maasa nari namuqaa narua.

Faiqi faiqi dadaaqirafa sia amanaikiannoo.

<sup>12</sup> Anutufa maasa dadaaqinaqa rakiranaki oonuree uriqaraanaura. Mifa maasa namuqaa rafaqafu nimaqaannoo.

## 61

*Isaraee maqannaasa Anutufa dadaaqianifeera innaaru quu ufafa.*

<sup>1</sup> Oo Anutu, qini iki raqarana iria, qini innaaru qiranara aaqoo rammatinia.

<sup>2</sup> Qinee moo maqa maaqai nianai oonu marunanoo qini qimuqusa mandaikimarifaqa ani aaraidaqa.

Anee qini mareeqee afeeka kukeeqara maqusaki quqaqisaina asumu maria.

<sup>3</sup> Nnaree anee qini faandaamurara foora qini ititaqimaqee marianafa mariananoo.

Anee qini faandaamura marianaqa namuqaa sia amana qini rafaqafifaranoo.

<sup>4</sup> Qinee naaru naaru ani uriqarara naaqqara uiqaana maqaki marirara dididanoo. Ani aqoosa ameemaanaira foora mandaqaanaaree qidaqa.

<sup>5</sup> Oo Anutu, qinee qima afeekaikira ufa ani qimamiafannanara anee irimmariananoo.

Anee iriseenana ani auqura rufiee mariasa nimiraree qianna ainainna qini Dafidisa faqa qimiananoo.

<sup>6</sup> Qinee Isaraee maqannaasa karaambaiqa marunnaasa Anutu anee qini aukuaana moomoo ootupamasainaqa qeeqa qinaiqimara qisaifaqausa nindafaanaura.

<sup>7</sup> Oo Anutu anee qiniara naaruara qini qifusaa maridana Isaraee maqannaasa rakisi nimaqaannee qia.

Anee aneenna amuqisirana faqa aneenna mapukusee marira oosanannoo faqa ititaqimaqaa.

<sup>8</sup> Miqimarinaqa qinee naaru naaru ani auqura amooqira idi raanaura.

Qinee ooqai aiqama faasaana ani amianaaree qimasee qima afeekaika maqaafannamau fuanaura.

## 62

*Anutuna rakisinnimaqaranasaa munduaqa.*

<sup>1</sup> Qinee Anutufa qini asumu maraani feera kai afeesida maridaqa.

Mifa kai qini asumu marirana qimidanoo.

<sup>2</sup> Mifa kai qini itita qimaqaseenoo qini asumu marirana qimidanoo.

Mifa qini afeeka kukeeqara maqusara foora marinara naaru naaru sia qini rakiranaki rafaqa fifaranoo.

<sup>3</sup> Oo qini namuqaauqa, naqumma kari fee qini darida marifaree.

Innee qiniara nauraa ququsa rafaaurinoo fifaiqanoo marindee irafee qimariafanoo.

<sup>4</sup> Innee qinee uriqararaqoo marunnana qifeeqa maqasaa aqirara ufa qimariafanoo.

Inni unufara kai nididanoo.

Inni nooqiari unna qimasee Anutuna amooqira ufa qimariafanoo, inni naunduraki manda niqurara ufa kai umbiqanoo maridanoo.

<sup>5</sup> Qinee Anutuna kai mandaqaidaqa.

Qeeqa irirana minasaa kai munduqaqee maridaqa.

<sup>6</sup> Mifa kai qini itita qimaqaseenoo qini asumu marirana qimidanoo.

Mifa kai qini afeeka kukeeqara maqusara foora

marinara sia qini rakiranaki rafaaga fifaranoo.

<sup>7</sup> Qini asumu marirafa faqa qini uriqarara duqu faqa  
Anutunakiqari kai qiniki anidanoo.

Mifa kai qini itita qimaqee marifa maridanoo, mifa kai qini auqaana maridanoo.

<sup>8</sup> Innee qini qiku qisauku aiqama kari Anutuna kai saqarikiaga.

Inneeqa aiqama ummaarara mina qimamiaga. Maasa mifinnai oonuree kai asumu  
marianaara.

<sup>9</sup> Aiqaama faiqi faiqi fifau naidoora foora maridaqa.

Nuqu faqaasa faqa ooreeqarusa faqa moodaakarirusa fifau ainainara foora maridaqa.  
Anee misa uqaki rumaseenana sikeerasaa dirisee qafa, siara foorammiga maridaqa.

Naidoo ummaara fannoo misa ummaara uraaqaranoo maridanoo.

<sup>10</sup> Innee sia rakirana faqa moona ainaina ummuara mararana faqa saqarikiaga.

Inni ainaina moomoo kinaqa sia irirana minasaa rusiaqa.

<sup>11</sup> Moomoo kari Anutufa maaqi qifaqa iriqa.

Qinee Anutusa firaa afeeka faqaasa maridaqee qinoo.

<sup>12</sup> Kafaa moo ainaina anee Yaaweefa maasara amuqusi marianafa mariananoo.

Oo Yaawee anee kuqaa aiqamausa ainainirana

akiqara feefauru amana kai rainasee nimimarianafa mariananoo.

## 63

*Anutufa dadaaqianifeera indee indee idaqa.*

<sup>1</sup> Oo Anutu, anee qini Anutufa mariananoo.

Qinee doori kandamasee aniara randaia innaaru qidaqa.

Qinee aadana maqa maaqai marunanoo nammariara didiara foora aniara dididanoo.

Miçikaimmasee qini maa qifaqafa faqa aniara nammariara foora aididanoo.

<sup>2</sup> Ani naaquqara uqaana maqaki ani qafaanaura, ani afeeka faqa ani qareenarana faqa  
qafaanaura.

<sup>3</sup> Oo Anutu ani amuqusirafa maa maqee marunna

marirana uriaqaranoo marinara qinee ani auqu uqeeraanaura.

<sup>4</sup> Qinee maaqoo kaqi marianna kamu aniara dufi dufi qianaura.

Qinee qeeqa qisauku uqeerasaqa ani innaaru qima amaqaanaura.

<sup>5</sup> Qeeqa qimuqusannai amiqira naranara foora

namasaananoo qini qimuquq inaga qinee asasira idinnai ani amooqianaura.

<sup>6</sup> Anee ooqaindari qini dadaaqi marianafa

mariannanara qinee qeeqa faiqara qaarisa maridaqa aniara iridaqa.

Eendamuqusai faiqarara andee qumooridaqa aniara kai iridaqa.

<sup>7</sup> Qinee ani aqoosa ameemaanai maridaqa aniara asasira idi raanaura.

<sup>8</sup> Qinee anisaa atooqaidaqa.

Ani asauku uqannai asauku fannoo qini asumu maraidanoo.

<sup>9</sup> Qini kuqa darirara imariasa aiqama kuqufi kuqirusa maria maqa maaqaki fifaranoo.

Misa maqa ameemaanai kuqirusa faqa marifaranoo.

<sup>10</sup> Misa duru feefa ooki keeqaifanoo kaasau aanda misa nipata neefaranoo.

<sup>11</sup> Qinee Isaraee maqannaasa karaambaiga rakiranaki uriqararana qimimarinara. Anu-  
tunara asianaura.

Aiqama Anutuna auqusaa kuqaa qima afeekaiki mariasa mina amooqifaranoo.

Unna ufa qimariasa noo Anutufa itannimaqasainaqa sia ufa qifaranoo.

## 64

*Isaraee maqannaasa Anutufa dadaaqianifeera innaaru quu ufafa.*

<sup>1</sup> Oo Anutu, qinee ummaarakai maridaqa, qini innaaru qirana iria.

Qini namuqaa darinarana rufiadaqa, anee qini marirana dadaaqia.

<sup>2</sup> Manda oosana maree mariasa tipundaari

marisakinaana qini mareeqee kukeeqaqisaa.

Aaqee mariasa faaqa fuisee qida qini darirari marianasaa faqa ititaqisaa.

<sup>3</sup> Mi fasiqausa nari nifauru nimaakiri faaqaanara foora aaruqu maqaafanoo maridanoo.

Misa ufa fannoo feefa dindasaa quqasee rakisiandee qini rakisi qimaqaidaqa.

<sup>4</sup> Miqi maria manda fasiqausa qumee ooqa andeeqara fasiqa naridaqa.

Misa rufiarana siaisa kaqi tautumaki naridaqa.

<sup>5</sup> Misa nariqa suqufifaqa manda oosanara nari pooduqee nari pooduqee idaqa.

Misa kukeeqara ufaana fufira oosanara amiqimmasee

iriqaraasammasee maaqi qidaqa, sia moo fannoo maasa ufaana qafaannoo fee qidaqa.

<sup>6</sup> Misa manda ainaina auqarara tipundaaridaqa.

Misa nariqa tipundaariranara andeedqanoo maridanoo fee qidaqa.

Faiqi faiqi kukeeqara irirafa farumara foora meemai uqnaurinoo maridanoo.

<sup>7</sup> Anutufa mi manda faiqausa nari feefannai naruannoo.

Dauni misa naru quqasaannoo.

<sup>8</sup> Misa manda ufa akiiqara kuridi nimaqaannoo.

Aiqamausa misa mi narirana niqafamasee boo firaa ainaina kambiqee maqi qifaranoo.

<sup>9</sup> Misa aiqamausa misa narirana qafamaseeqa rufieeqa

misa Anutuna ainainiranara iridaqa kooroommasee mina ainainiranara qimannimifaranoo.

<sup>10</sup> Andeedqarausa Yaaweefa auqoo ainainara irisee asasifaranoo.

Misa Yaaweenaki amiqimmasee marirana paqurifaranoo.

Aiqama andeedqarausa mina amooqifaranoo.

## 65

*Anutuna amooqirafa faqa dufi dufi qira innaaru maridanoo.*

<sup>1</sup> Oo Anutu, anee maasa innaaru irimariannanara

maasa Sioonaa maqusaki andeedqasee oonuree ani amianauree qima afeekaika maqaafanna ainainauqa ani amianaura.

<sup>2</sup> Faiqi anaasee aiqama maqa maaqaindari nari manda oosanara iriseeqa anee Anutufa iannannai ani faranoo.

<sup>3</sup> Maasa mandainaina fannoo maasa dukunimma saifana anee Anutufa mina taikaqisaannoo.

<sup>4</sup> Anutu anee rusandeesammasee maraqaanausa ani asasiranaki maridaqa.

Anee aneenna naaquqara maaqaki mariaqeera nifiqa quqasainausa asasiqa.

Maasa mi amaana maqanaki marunanoo ani amiqi

amiqirafa maasaki qumbiqanoo marifaqa maridaqa.

Ani naaquqara amaana maqaki marunanoo ani

amiqi amiqirafa minaki marifa maasaki qumbiqanoo maridanoo.

<sup>5</sup> Oo Anutu, anee maasa asumu qimi marianafa mariananoo.

Anee maasa aneenna naaquqara andeedqara ainaina

auqee mariannannai maasa qimaqimi marianafa mariananoo.

Aiqama maqannaasa nianai atinni atinni mariasa

faqa ooruku nammari dinni afainni mariasa faqa ani kai saqarikidaqa.

<sup>6</sup> Anee aqanauqa aneenna afeekannai auqu eegee nari maqee mariaqoo quqanau.

Miqunnaanannoo aneenna afeeka uqannifiqanau.

<sup>7</sup> Ani afeeka fannoo ooruku nammari kasinoo amakaurirana faqa rafaqaqafusaifanoo mina kasirana faqa ufaqirana faqa daimafinoo.

Faiqi anaasee tutuqirana faqa taikannimaqaannoo.

<sup>8</sup> Aiqama maqannaasa anee auqee marianna ainainna qafaafanoo naaquqaidanoo.

Suani ururee marinnai mariasa faqa suani keeqee

marinnai mariasa faqa aiqama ainaina auqee marianna ainainna qafamasee mi aiqama

maqannaasa naaquqai faqa faaqa rumasee aniara asasidaqa.

<sup>9</sup> Oo Anutu anee maa maqa maaqana rakisidana

uqeena uqeenianifeera aaku firana teeqiananoo.

Anee miqjannannannai maa maqana ainookamma saananoo.

Anutu ani nammariuqa qumbiqanoo maridanoo.

Mi nammari faqa maaqa amiqimma saifanoo amiqira narana faiqi anaasee nimidanoo.

Anee miqimmasee auqinau.

<sup>10</sup> Oo Anutu, anee qiananoo aaku firafa rinoo maqa uqeena uqeena masaifanoo afuqaki narana kambiqaidanoo.

Anee aaku dunoonnannai maqa uqeena saananoo narana kambiqaidanoo.

<sup>11</sup> Ani amiqirafa narana rairaamma qimaqee marifa maridanoo.

Anee finnatina miqikai inoo narana rairaa iannoo.

<sup>12</sup> Andandaki aiqamatina burimakau faqa sipsipa faqa umbiaqa maridaqa.

Aaqanauqa faqa kaqikaa amuqu namuqa faqa aaku rifaqa firaqoo asasidaqa.

<sup>13</sup> Firaa afaasasaa burimakau sipsipa moomoo qumbiqaidanoo.

Noopunduki faqa sakumma ainaina moomoo kambiqeenoo aiqama noopundu titaidanoo.

Aaku rifanoo aiqama ainaina asasiidaqa idi raidaqa.

## 66

*Anutuna amooqira idi faqa dufi dufi qira idi faqa maridanoo.*

<sup>1</sup> Aiqama maqa maaqaki mariasa asasiidaqa firaqoo Anutunara faaqarumasee amooqira.

<sup>2</sup> Idi raidaqa mina auqu qareenaranara kooroo iaqa.

Qareenara amooqirana mina amiaqa.

<sup>3</sup> Innee Anutuna maaqi qimasee qimamiaqa.

Anee auqu quqoonna ainainafa kaaqa naaquqarafa maridanoo.

Ani namuqaauqa ani uriqarara afeeka qafamasee

aniana firaqoo ruffeeqa ani oorinni niqoori saunu araidaqa.

<sup>4</sup> Aiqama maa maqa maqanasa qaraasa ani amooqidaqa.

Misa ani amooqira idi raidaqa ani auqu uqeeraidaqa.

<sup>5</sup> Innee aiqamausa aniree Anutufa auqeeu ainaina qafaaqa.

Mifa naaquqara ainaina faiqi anaasee qambaana auqanau.

<sup>6</sup> Mifa ooruku nammariara qufanoo aadanusufuqa

maasa qikeeku qikaaku maqamau aandanasa funara Anutunara asasiqa.

<sup>7</sup> Anutufa naaru naaru nari afeekannai aiqama maqannaasa rakisinnimaqaidanoo.

Mina afu fannoo aiqama maqannaasa auqee maria ainainna niuqidanoo.

Ufa rukiee mariasa sia Anutuna aana itita amaqaqa.

<sup>8</sup> Innee aiqama maqannaasa maasa Anutuna amooqiaqa.

Innee mina amooqirana firaqoo uqeerifaqa nianaindari faiqi anaasee iriaqa.

<sup>9</sup> Mifa maasa marirana afeedammaqisaiqa kaqi maridaqa.

Mifa maasa mandainainaki aqufuanoo itita qimaqifaqa sia aqufidaqa.

<sup>10</sup> Oo Anutu, anee maasa qimanammasee qafaananoo.

Siruaa tasirisiri masee apaapu maraquandee iananoo.

<sup>11</sup> Oo Anutu, anee maasa mareeqee ufaanaki aruqisasee

firaq ummaara tia maasa qitaufakaqa daaku qimaqaananoo.

<sup>12</sup> Anee namuqaara qianaqa misa nikunnai maasa qikiqa radamia.

Maasa ida qambainaira foora faqa nammari aafi marinakiara foora faqa oosana oosana ummaaraki

fimariafanana anee maasa mareeqee amiqiraqoo quqaqisanau.

<sup>13-14</sup> Qinee ummaaraki maridaqa ani Anutuna oosana

oosana qima afeekaikira ufa qimamiqiafana.

Doo maqee mi qima afeekaikira ufana qimamiamannandee ianaura.

Doo maqee qinee qima afeekaikiafanna ufanara qianaura.

Qinee aandau tatufirana mara maree ani amaana maqaki minisee suqa amianaura.

<sup>15</sup> Qinee sipsipa tatufirana suqamianaura.

Qinee burimmakau akoona faqa mimmi faqa tatufirana suqa amianaura.

Miqiananoo muna fannoo innaarunai ani aikiambu iannoo.

<sup>16</sup> Innee Anutunara qeerairi mariasa mai aniraifaqa qini dadaaqinara qimannimia.

<sup>17</sup> Qeeqa dooqi qara dadaaqianifeera aareeqa, idinnai mina amooqiaqa.

<sup>18</sup> Qinee mandainainara fifau ainainee qimasee kaqi

auqaunanoo Anutufa sia qini innaaru qirana iriqini.

<sup>19</sup> Kuqaa Anutufa qini ufa irinoo, qini innaaru qirana faqa irinoo.

<sup>20</sup> Anutufa sia qini innaaru qirana minniseenoo.

Sia nari aiqama kari amuqusiranara qao qinoo.

Minara mina auqu uqeerasee mina amooqiaqa.

## 67

*Anutuna dufi dufi qimamaqara idi.*

<sup>1</sup> Anutu anee maasara qimudaoo qimasee amiqi amiqimmaqisaa.

Aneenna oori afiri kaaqa qarana maasiannai ubeekamasee dadaaqia.

<sup>2</sup> Miqinaqa ani oosana aiqama maqa maaqakinaasa iriaqa.

Aiqama maqannaasa ani asumu mariranara faqa iriaqa.

<sup>3</sup> Oo Anutu aiqama faiqi anaasee ani amooqiaqa.

Aiqama faiqi anaasee ani amooqiaqa.

- <sup>4</sup> Oo Anutu, anee faiqi anaasee aiqama amana amana kai andeeqasee rakisi mariannana faqa amiqimmasee naamua qimasee nifiqee fimariannanara faqa aiqama maqannaasa اساسمasee idi raidaqa.
- <sup>5</sup> Oo Anutu faiqi anaasee ani amooqiaqa.  
Aiqama faiqi anaasee ani auqu uqeeraaqa.
- <sup>6</sup> Miqifanoo maqakiqari aiqama narana kambiqaano.  
Kambiqainanoo Anutufa maasa Anutufa amiqi amiqimma qimaqaannoo.
- <sup>7</sup> Anutufa maasa amiqi amiqimma qimaqaanau.  
Aiqama maa maqanasaaqaraa fasiqa anaasee minara uriqarara fee qimasee qeerairiaqa.

## 68

### *Isaraee maqannaasa Anutufa misa dadaaqunara asasiqau.*

- <sup>1</sup> Anutufa findifinoo nari namuqaauqa mara furufaramma saifaqa daraania.  
Anutunara fidiqaa imariasa mina oorisaaqari nisaurusee quqasee sandaqa.
- <sup>2</sup> Aneenna namuqaauqa ufai idamuna fuaqa aqindeemma saina fifuaqa.  
Mandainaina maree mariasa ainoo ainaina idaki  
quqasaafanoora foora iqa Anutu ani afusaaqari tasirisirimma taikafuaqa.
- <sup>3</sup> Andeeqee mariasa asasiqaa ani Anutuna afusaa nasuriaqa.  
Misa faaqa rumasee asasiqaa.
- <sup>4</sup> Innee Anutunara idi raida mina auqu amooqirana amiaqa.  
Oonnamusaa oqumarifi nimari Anutuna aana andeeqaa.  
Mina auqu Yaaweefa maridanoo. Mina afusaa asasiqaa.
- <sup>5</sup> Anutufa nari naaquqara amaana maqaki marifa  
faiqi faiqi rakisi nimaqaidanoo, adeedaana aanaaseeuqa faqa ummaaraki itita  
nimaqaidanoo.
- <sup>6</sup> Anutufa nariaraa mariasa mareeqee moo fasiqa anaasee nari faiqi kiaqee nimidanoo.  
Mifa rumberanaki mariasa idukusee niffeegee amiqiranaki quqannisaidanoo.  
Anutuna ufa rukiee mariasa sia miqidaqa, misa manda maqa maaqaki marifaranoo.
- <sup>7</sup> Oo Anutu, anee ooqai Isaraee maqannaasa aadana maqa maaqaki nifiqee finau.
- <sup>8</sup> Sinai aqaanasaa marunna Anutufa, Isaraee maqannaasa  
Anutufa, anee ooqai Isaraee maqannaasa nifiqee funanoo maqa kasinoo aaku  
nammariara foora adianau.
- <sup>9</sup> Oo Anutu anee qunanoo aaku firaafa rufanoo ani maqa Isaraee maqa maaqa mandaikino  
marufa amiqinau.
- <sup>10</sup> Ani maqannaasa mi maqa maaqanaki oonu marufaqa akaqausa kudi marufana Anutu  
anee afaaridana misa narana nimanau.
- <sup>11</sup> Yaaweefa faiqi anaasee naamua qufaqa aanaaseeuqa  
mi ufana mara maree aiqama maaqi qimasee qimannimiqa.
- <sup>12</sup> Kannaa maqannaasa karaambaiquqa faqa sundiauqa faqa anirandee sandama qaraasi-  
dammiaafoo qiqa.
- Miqi qufaqa Isaraee maqannaasa aanaaseeuqa oonu misa rakiranaki maraqoo ainainausa  
marasee rainaqa.
- <sup>13</sup> Mi anaaseesa siruaannnai faqa koorannai faqa nifaaqa auqusoofanoo amiqira ufiniara  
foora inoo marinau.  
Misa nifaaqa fannoo siruaara foora daroo daraa ufanoo misa niqoosara foora kooora  
fannoo kaaqa gee marinau.
- Miqi marufaqa akaqausa nanaree kaqi nariqa sipsipasaa rakisi mariqau.
- <sup>14</sup> Mi rakiranaki aiqama afeeka faqa Anutufa karaambaiquqa Saramoonaa aqaanasaa  
naru nindaqaqa ufaqa fifainufanoo fira oonamuara misaqa aiqamai itita  
aqufinau.
- <sup>15</sup> Basana aqana kaaqa uriqarara aqana maridanoo.  
Miqoo moomoo kaqikaa aqaanaqa mina aqa maridanoo.
- <sup>16</sup> Innee Basana aqaanasaa maria aqaanausa nanaree innee Sioona Anutufa mari  
aaqannara fifau ainainee qidee.  
Yaaweefa nari kai mi aqaannana utaaqamaseenoo naaruara mi aqaannasaa mariannoo.
- <sup>17</sup> Anutufa nari sundiauqa moomoo tauseenna afeeka rakira karauqasaa ooqufaqee  
marusa faqa Sinai aqaanaindari qumuree Sioona aqaanasaa nari uiqaana maaqaki  
keeqanau.
- <sup>18</sup> Anutufa Sioona aqaanasaa ooru fidanoo rumberausa aana muqunufaqa ooru fiqau.  
Mifa miqoo ooru marufaqa faiqi anaasee akaqa ainaina Yaaweena mini amiqau.  
Yaaweena ufa ooqai rukieeusa misa faqa akaqa ainaina amiqau. Mifa miqoo mariannoo.

<sup>19</sup> Yaaweena amooqimamaqaa.

Maasa Anutufa maasa asumu maree marifa marina amooqiaqa.

Mifa aiqama kari maasa ummaara dadaaqa marifa marinara mina amooqiaqa.

<sup>20</sup> Maasa Anutufa asumu marirana qimimari Anutufa maridanoo.

Yaaweefa maasa kuqiranakinaana asumu maree mari Karaambaigafa maridanoo.

<sup>21</sup> Anutufa nari namuqaauqa nikiiaqa kuqaa uqanna radandamumma saannoo.

Nari aagara oosanaki afeekaikammadee fimariasa faqa radandamumma saannoo.

<sup>22</sup> Yaaweefa maaqi qinau, inni namuqaa Basana maqa maaqaki mariana nifiqee anianaura.

Ooruku nammari farumakiara foora mariana oonu nifiqee anianaura.

<sup>23</sup> Innee inneeqa namuqaa narusaifaqa inni maqannaasa misa fidikaki niku reefaranoo.

Fainiuga nari nidiranasaa misa fidika neefaranoo.

<sup>24</sup> Oo Anutu qini karaambaigaa.

Anee moomoo fasiqa anaasee aana muqunimma maree aneenna amaana maqaki keeqararee qimarianaqa doo aiqamausa misa nindafaidaaqa.

<sup>25</sup> Idi ree mariasa indaaru fimarifaqa piripunna ari mariasa inaaqianna fuafaqa qambaana temberinna ari maria manaqausa fidaqa.

<sup>26</sup> Innee Isaraee maqannaqa fasiqa anaasee suqiga marianakiqari Anutuna amooqiaqa.

Innee Yakooboona saaqari kambiqaarusa innee Anutuna amooqiaqa.

<sup>27</sup> Isaraee maqannaasa Beensamina akeeku akaaku qoodaa marusa indaaru fimarufaqa Yudana akeeku akaaku marusakiqari uriqararusa moomoosa faqa Seeburuna akeeku akaaku kiqari faiqi uriqararusa faqa Napatarina akeeku akaaku kiqari faiqi uriqararusa faqa misa ninaaqianna amaana maqai suqirannai ooru fiqau.

<sup>28</sup> Oo Anutu anee aneenna afeeka maasa uqaqifiqaa.

Oo Anutu, anee ooqai aneenna afeeka uqannifiqoonnadee kai inana maqee faqa uqannindiqaa.

<sup>29</sup> Anee aneenna uriqarara amaana maqaki Yeerusaree maqusai mariannanara, moomoo maqanaa karaambaigauqa kaqi nimimaria ainainnaa maree mini ani amifaranoo.

<sup>30</sup> Fira doona aqmauraqmauri marinaki mari kaasau aandaufa Isipa maqannaqa karaambaigaa Faraofa maasa darirarinana Anutu anee minara aanoo qimasee qaoo qia.

Faraaona dadaaqimaria uriqarara fasiqausa aanoo qimaria burimmakau akoonasara foora kaiqeesa qambaana oonuree narirara ifana anee misara faqa aanoo qimasee qaoo qia.

Anee misa mara muqufisainaaqaa misa siruaa mara maree mini ani amiaqa.

Aiqama rakiranara rimaria maqannaasa anee misa naru nindaqaaqa masainaaqaa daraaniaqa.

<sup>31</sup> Isipa maqanaa uriqararusa Anutufinnai ubeekarara anifaranoo,

Eetopia maqannaasa nisauku uqeerasee Anutunara innaaru qifaranoo

<sup>32</sup> Oo innee maa maqanasaa mariasa innee Anutuna idi ramamaqaaqa.

Yaaweena amooqira idi raaqa.

<sup>33</sup> Anutufa ooqaindari mari innaarunasaa nimari Anutunara amooqira idi ramaqaaqa.

Mi Anutuna ufa firaafa innaarunai qiara foora qimarifa maridanoo.

<sup>34</sup> Innee Anutuna afeekara koorooiaqa.

Mina amigira uriqararafa Isaraee maqannaasa rafaqaqafu nimaqaidanoo.

Mina afeeka innaarunai maridanoo.

<sup>35</sup> Isaraee maqannaasa Anutufa nari amaana maaqaki marifa kaaqa naaquarafa marinara rufiaaqa.

Mifa uriqarara afeeka faqa eeraarirana faqa nari faiqi anaasee nimidanoo. Anutuna amooqiaqa.

## 69

*Isaraee maqannaasa Anutufa dadaaqianifeera innaaru qiqau.*

<sup>1</sup> Oo Anutu anee uqeeraqisaa.

Nammariara foora qini ummaara fannoo rafaqaqafino qinukaki ururaifaqa kaqi kaaqoo kuqanaura.

<sup>2</sup> Qinee fira doona poopoo qimarinakiara foora qiku utusaqa maridaqa sia afeeka maqasaa qiku raidaqa.

Qinee nammari difukunaki aniraunanoo nammari aufrafa qini dukuniaqaa idanoo.

<sup>3</sup> Qinee Anutufa dadaaqianifeera aaraida afeesida marunanoo qini daunda aadana usufifanoo qini ufa akieenoo.



Aniara rakisida marida qifuanda rakee iqa.

<sup>4</sup> Qiniara fidiqaa imariasa qini qikiqqa asausi faqa arusee fiqaramasee maridaqa.

Qini kuqa darirari mariasa fifau qini oosana siainaki namuqaakamma qimaqaidaqa.

Misa qiniara moo ainaina fifau unnagimasee ummuariaano qimasee mina akiiqara nimianne qimasee sandanainai qiafaqa rufiaseeqa fifau qeeqa ainaina nimiqa.

<sup>5</sup> Oo Anutu qini furufarira oosanara anee irimmarianano,

qini aaqarafa sia ani afusaa kukeeqanoo maridanoo, akooqoo maridanoo.

<sup>6</sup> Oo Yaawee, anee qini dadaaqinaqa sia moo aaqaranaki aqufuaanaqa ani ufamau fimariasa nisauruaqa.

Oo uriqarara Yaawee aiqama afeeka faqaafa anee qini dadaaqinaqa aniara innaaru qimariasara sia manda ufa qimannimaqaqa.

Oo Isaraee maqanaasa Anutufa miqimma qimaqaa.

<sup>7</sup> Oo Anutu, ani auqu raunnanara aasaandaana ufa qimi mariafaqa qini qisaurirafa qini rafaqafuqaiqa maridaqa.

<sup>8</sup> Qinee ani auqu raunnanara qeeqa qikaqaafasaa nifusaa aanaamuruara foora maridaqa.

Qeeqa qinoona faiqi namu nifusaa moo aanaamuruara foora maridaqa.

<sup>9</sup> Qinee ani Anutuna amaana maqara didirafa firaqoo idara foora qaidanoo.

Ani Anutuna aquraree maria aqurararafa qinisaa faqa aqufnoo marifaqa maridaqa.

<sup>10</sup> Qinee qeeqa mara maree muqusee narana auramasee marunaqa faiqi anaasee qini qiqafamasee aasaandaana ufa qimaqimaqaidaqa.

<sup>11</sup> Qinee manda qammunna soofaara qammunnara foora afisuqaunaqa faiqi anaasee qiqafamaseeqa qiniara ataasa ataasa qimasee naanaidara qima qimaqaidaqa.

<sup>12</sup> Aatata oonuree aniree idaqa qini qiqafee mandufa qidaqa.

Afeeka nammari namasee furufari mariasa faqa qiqafeeqa manda idi qiniara raidaqa.

<sup>13</sup> Qinee sia misa ufa irianaura aniara kai innaaru qianaura.

Oo Yaawee, aneenna qinna kari qini innaaru akiqara kafaa qiya qimaqimia.

Anee qima afeekaikammasee qini asumu maraanauree qunnnara irisee miqia.

Anee sia unna qimarianafa marianano.

<sup>14</sup> Doona poopoo qimarinakiara foora utusaqa maridaqa Oo Anutufa anee qini qumaree tatu qisainaqa sia minaki ooqu keeqafi minaki kuqua.

Qini namuqaa nisaukukinaana maraquqisaa.

Faruma firaanaki uqnauriranakiara foora aqufiqa marunnana umbaqi afainni quqaqisaa.

<sup>15</sup> Oo Anutu anee qinanooo sia nammari qini dukuniani.

Faruma uqnauriranaki sia qinee aqufiqa ukuqnaanaura.

Sia qinee madikakiara foora aqufuaana maqa fannoo mafi titaqisaani.

<sup>16</sup> Oo Yaawee, anee aneenna amiqiranakiqari qini innaaru iria.

Anee aneena fira nifauaranakiqari qinee unnnai oori ubeekaa.

<sup>17</sup> Oo Anutu, qinee ani ainainira faiqi marunnnara sia anee oori rafusu kaqinni aqua.

Qinee fira ummaarak marunnnara dauni dauni qini irara ufa anoona qima qimia.

<sup>18</sup> Oo Anutu, anee qini daaqa aniree qini namuqaa nisaukukinaana mara asumu quqaqisaa.

Qini namuqaauqa darirarifana qini mareeqee kaqinni qisaa.

<sup>19</sup> Oo Anutu, qini namuqaauqa anee niqafee mariana qiniara aasaandaana qirana faqa mandaikamma qimaqarana faqa qisaurirana faqa qimi mariafana anee iri marianano.

<sup>20</sup> Qini aasaandaana ufa qimiafa qini qimuqusa raquruqiminoo marifaqa qini qifaqaki aiqama ummooqukinoo marifanoo qini qifaqa dadaaqirafa sia maridanoo.

Qinee nimuqusiranara randauna sia moo fannoo qiniara amuqusirafa maridanoo. Qinee qimudao qira ufa qima qimaqarausara randauna sia uqanna maridaqa.

<sup>21</sup> Qini daararaifaqa misa qini naranaki qumee adudu fooqaana minaki quqasee qimi-afaqa nauna suka darifaqa minniseeqa.

Qini nammariara didifaqa misa sukaqee mari nammarina qimiafaqa namasee qafeeqa minniseeqa.

<sup>22</sup> Mi manda oosanna qimimariasa nariqa narana difaani fannoo nari quandaki kuridi nimaqaani.

Misa nariqa mi fira naaquqara oomaqafa nikuqamasaina aqufuaqa.

<sup>23</sup> Misa nifu asukunaarusaina mikiqmakiqa nuaqa.

Misa nitaufaka faqa rambaqasaina naaruara miqiyqa mariaqa.

<sup>24</sup> Oo Anutu, aneenna aranaqarana nammariara foora misasaa adiasaa.

Ani aanooqirafa idara foora misa qama taikaani.

<sup>25</sup> Misa maqa maaqa naakundu kai saaeemasaa.

Sia moodaafa faqa nariqa uigaana maaqaki mariaqa, naakundu kai mariani.

<sup>26</sup> Anee Yaawee ani ufa rukiee mariana akiigara anee maasa kaakadi darusaanusa namuqaa anireeqa aaqaidaqa misa kaaqmukaidaqa.

Kaaqmukamaseeqa misa nari maqusai oonureeqa anee Yaawee maasa daruannanara aupuraunaqa atasataasa qidaqa.

<sup>27</sup> Oo Yaawee anee misa aagarana akiigara sia qaunua amiqimmasee iria.

Misa ani Anutuna asumu marirana sia uqanna kaqikaana faqa maraaqa.

<sup>28</sup> Oo Yaawee ani naaru marira papiqaki misa nuqu marina rukaa.

Aaqee mariasa nuqu sia andeeqee mariasa nuqu namu faqa moodaanaki akara rua.

<sup>29</sup> Qinee Dafidisa firaa didafirana faqa ummaara faqa maraidaqa.

Oo Anutu, anee qini uqeerasee asumu marirana qimia.

<sup>30</sup> Qinee dufi dufi qira idinnai mina auqu qareenaranara koorooianara.

<sup>31</sup> Mina mi dufi dufi qirafa burimakau sipsipannoo tatufirana suqami mariana uriaaqaranoo maridanoo.

Muduka burimakau faqa sipsipa faqa aiku namufaqa

aanai namu faqa tatufirana suqarana faqa uriaaqaranoo maridanoo.

<sup>32</sup> Kudi fasiqauqa mina qafamasee asasammifaranoo. Innee Anutunara randeemariasa inni irirana afeekaikamma nimaqaannoo.

<sup>33</sup> Yaawee kudi fasiqauqa innaaru qiana iridanoo.

Isaraee maqannaasa namuqaa rumberanaki mariafanoo Yaawee misara sia qaunidanoo misara faqa iridanoo.

<sup>34</sup> Innaarunai mariasa faqa maqasaa mariasa faqa ooruku nammariki nimaria ainainausa faqa Yaaweena amooqiaqa.

<sup>35</sup> Anutufa Sioona maqusa moo auqu Yeerusaree maqusaki mariasa misa namuqaasaa ititannimaqaannoo.

Yuda maqa maaqakinaa maqusauqa rapeepaa inoo marinauqa kaifaa itipiannoo.

Itipammassainaa faiqi anaasee miqoo kaifaa maridaqa aiqama maqa mareefaranoo.

<sup>36</sup> Isaraee maqannaasa Anutuna ainainira faiqiuqa,

misa faiqi namu kambiqafinaqa mi maqusausa marasaifanoo maasaindi kamminoo marinaqa minaki marifaranoo.

Mina auquara rimariasa faqa minaki marifaranoo.

## 70

*Dadaaqiani fee innaaru.*

<sup>1</sup> Oo Anutu, anee qini mandainainakinaana mara aquqisaa.

Oo Yaawee, kai kaqi aniree qini dadaaqia.

<sup>2</sup> Qini marirana taika qimaqarara randeemariasa rafaqaqafu saina nisauriranaki faqa furufariranaki faqa mariaqa.

Qini ummaarara irisee asamariasa mara quandasainaa nisauruqa

<sup>3</sup> Qiniara uteeti qimariasa nariqa nisaurirana firaafa marina qafaifanoo firaqoo naaqaqaani.

<sup>4</sup> Oo Yaawee anee iannannai ani mariasa asaidaqa nasuriaqa.

Ani asumu mariranara nidimarisa, maaqi qiaqa.

Yaawee uriqararafa maridanoo fee qiaqa.

<sup>5</sup> Qinee Dafidisa qimudaani radukirausa marunusa sarau marunna fasiqausa marunnanara oo Yaawee anee sia qiniara qaunuananoo.

Anee qini asumu maree marianafa faqa qini Anutufa faqa mariannanara kai kaqi aniree qini dadaaqia.

## 71

*Faiqi firaana innaaru.*

<sup>1</sup> Oo Yaawee, anee itita qimaqaanneera anee iannannai anidaqa.

<sup>2</sup> Anee andeeqarafa mariannanara qini dadaaqinana mareeqee kaqinni quqaqisaa.

Aneenna aaqoo qinee iannannai rammatinimmandee irisee qini asumu maraa.

<sup>3</sup> Oo Anutu, anee qini ooni faandaamurara foora faqa auqaanara foora faqa auquqisaina qinee minaki keeqafi asumu maria.

Anee qini ititee marianna oonifa faqa qini afeeka kukeeqara maqusa faqa mariananoo.

Anee qinaqa qinee amiqimmasee mariana.

<sup>4</sup> Oo qini Anutu, manda oosana maree mariasa nisauku kinaana faqa eendaandi mariasa nisauku kinaana faqa fitiqnarana qimimariasa nisauku kinaana faqa maraquisaa.

- 5 Oo uriqarara Yaaweefa, qinee aniara kai aambeembeesida marunausa maridaqa.  
Kumaaraasaa qari ani kai saqarikii aafanausa maridaqa.
- 6 Qini maqoonakiqari qinee anisaa mundaqa mariafanausa maridaqa.  
Qini qinoofa maqaqisooqooqari anee kai qinisaa rakisina aniifana maqee aniraananoo,  
minara qinee maqee maqee ani amooqianausa.
- 7 Moomoosa qini faqa qiniki kambiqoo ainainna faqa qafamasee iriqau.  
Minara anee kai qini afeeka kukeeqara maqusara foora mariananoo.
- 8 Aiqama faasaambaasaana qinee ani amooqidaqa ani qareenaranara koorooidaqa.
- 9 Oo Anutu, qinee asooqa qaanana sia qini maraqqisaa.  
Qini afeeka taikainana sia qini minniqisaa.
- 10 Qini namuqaauqa qini darirarammidaqa.  
Qini dariraree qimasee ufa suqidaqa tipundaaridaqa.
- 11 Misa qinlira maaqi qidaqa.  
Anutufa mina minnisaifanoo sia moo fannoo mina dadaaqirafa maridanoo, anifaqa mina  
afaqaseeqa qumaraanee qidaqa.
- 12 Oo Anutu, sia nianasaa maria.  
Oo qini Anutu dauni aniree qini dadaaqia.
- 13 Qini darirari mariasa anee Yaaweefa misa rafaqaqafu nimaqasee kuridi taikannisaa.  
Qini aupurarana qimirari mariasa nisauriranaki faqa aupuraranaki faqa mariaqa.
- 14 Qini irirafa naaru naaru aniara kai aambeembeesida mariannoo.  
Qinee kaifaa kaifaa ani amooqima amaqaanausa.
- 15 Qini doo fannoo ani Anutuna andeeqarana faqa asumu mariranara faqa faasaam-  
baasaana kooroo ianaura.  
Qinee mi andeeqarafa faqa asumu marirafa faqa fiqaranoo marifaqa ati kai iridaqa mina  
oosana faqa ammuquara faqa sia iridaqa.
- 16 Oo uriqarara Yaaweefa qinee anee amudaana qimasee auqunna ainainausara kooroo  
ianausa.  
Qinee ani andeeqaranara kooroo ianaura. Anindiara kai kooroo ianaura
- 17 Oo Anutu, anee qini kumaaraasaaqari oosana arasee aneenna oosana uqaqifiqana ani  
mariananoo.  
Qinee miqooqari anee firaa ainaina auqoonnara faiqi anaasee kaqi kai qimannimiqa  
fidaqa.
- 18 Oo Anutu maqee qinee nauraiqi aandau aanaaqi maridaqa sia qini minniqisaa.  
Anee qini faqa marinaqa qinee naaru kambiqainausa faqa qimanimia.
- 19 Oo Anutu, ani andeeqarafa maqasaaqari innaaruna auqanoo maridanoo.  
Anee firaa ainaina auqunafa mariananoo.  
Oo Anutu yafee ani fooqaafa maridanoo fee.
- 20 Oo Yaawee, anee oosana oosana ummaara faqa aupurarana faqa qimimariananoo.  
Kasooqaqee anee kaifaa qini marirana ooqai mariundeemma qiseennaranoo.  
Anee qini kuqa dariranasaa itita qimaqeennaranoo.
- 21 Anee qini firaqqoo uqera murufi qiseennaranoo.  
Anee kaifaa qini amiqi amiqimma qima qeennaranoo.
- 22 Oo qini Anutu, ani mapukusee marira oosana piripunna aridaqa ani amooqianausa.  
Oo Isaraee maqannaasa naaqqara Anutufa, qinee piripunna aridaqa ani amooqira idi  
raanausa.
- 23 Qinee piripunna arida ani amooqira idi ridaqa firaqqoo asianausa.  
Anee qini mandainainakinaana kaqinni mara quqaqisaannanara asidaqa.
- 24 Qinee faasaambaasana ani andeeqaranara qimannimianausa.  
Qini didafirana qimirari mariasa anee rafaqaqafu nimaqasee mandaikamma nimaqaan-  
nanara irisee ani andeeqaranara qimannimianausa.

## 72

*Maqasaa karaambaifaq fannoo dadaaqianifeera innaaru qinuu.*

- 1 Oo Anutu anee Isaraee maqanna karaambaifaq aneenna amiqimmasee ufa irira oosana  
amia, aneenna andeeqara oosana faqa mina amia.
- 2 Mifa andeeqaranannai ani Anutuna faiqi anaasee ufa andeeqannisaani.  
Nari maqanna nuqu siai fasiqa anaaseesa faqa amana amana kai andeeqasee ufa raina  
nimaqaani.
- 3 Miqi marinaqa misa maqa maaqa ainoo kinoo aiqama ainaina rairaiiani.  
Mi maqanasaa mariasa andeeqara oosana mareefaranoo.
- 4 Mi karaambaifaqa kudi fasiqa anaasee amana amana kai raina nimaqaani.

Ainaina siaisa faqa ummaaraki marianasaa ititannimaqaani.

Mifa nariara uriqararausee qimasee akaqausa rafaqafi mariasa radamusaani.

<sup>5</sup> Ani faiqi anaasee suani afu kaqi qeemarinaqa ani amooqiaqa.

Quqoona faqa kaqi qeemarinaqa ani amooqiaqa.

<sup>6</sup> Mi karaambaiqafa aakuara foora fuka afuqaki rifanoo aiqama andanda afu amifanoo raambandaarara foora iani.

Mifa aakuara foora rinoo maqa uqeenuqeeniani.

<sup>7</sup> Mi karaambaiqafa marianinna aukuaana faiqi anaasee andeeqara oosana kai maraqa.

Quqoona kaqi qeemarinanoo reemindeemirirafa kai mariannoo.

<sup>8</sup> Mina rakisinnimaqarafa dinni ooruku nammarinni oosanarasee dinni ooruku nammarinni amanasaa rakisinnimaqaani.

Dinni ati fannoo Eeufarateesa nammarindari maqa maaqa atinni amanasaa rakisinnimaqaani.

<sup>9</sup> Aadana maqa maaqaki mariasa karaambaiqa aninaqa mina oorinni kummarama fifaranoo.

Mina namuqaa faqa mina qafamasee maqasaa aqufifaranoo.

<sup>10</sup> Sipeena maqanna karaambaiqauqa faqa kaqikaa afuma kiaqa maria karaambaiqausa faqa amiqira ainaina mara maree Isaraee maqannaasa karaambaiqa mini amifaranoo.

Seebaa faqa Sibaa maqanna karaambaiqauqa faqa amifaranoo.

<sup>11</sup> Aiqama maqanna karaambaiqauqa maasa uriqarara fee qimasee mina oorinni niqoori saunu areefaranoo.

Aiqama maqannaasa mina ainainira faiqikamma fifaranoo.

<sup>12</sup> Mifa kudi fasiqauqa nammeera qiafanoo iriseenoo dadaaqidanoo.

Kudiki mariasa faqa dadaaqirana siaisa faqa misauqa aiqama dadaaqiannoo.

<sup>13</sup> Mifa kudiuqa faqa ainainirana sia amanaiki marifaqa ummooquki mariasara faqa qimudaoo qimasee dadaaqi marifa mariannoo, sarau imariasa nimana faqa kuqiranakinaana maree marifa mariannoo.

<sup>14</sup> Mi karaambaiqafa mi kudi fasiqausa faqa ummooquki maria fasiqausa faqa kuqa narirari maria fasiqausa nisaukukinaana mara kaqinni quqannisaannoo.

Mifa misara uriqarara ainainee qimasee miqidanoo.

<sup>15</sup> Mi karaambaiqafa kisaaqasaa mariani.

Seebaa maqannaasa nariqa kooro mi karaambaiqana amiaqanani.

Aiqamausa maqee maqee Anutufa mi karaambaiqana dadaaqiani feera innaaru qima-maqaaganani.

Aiqama faasaana Anutufa mina amiqimma amaqaani.

<sup>16</sup> Mi karaambaiqafa marinna kamuqoo mi maqa maaqanaki sakuma faqa uita faqa moomoo rairaa inoo mariani, kaqikaa amuaqu namuqasaa faqa narana kai itita fuani.

Mina qaqama fannoo Reebanonna maqa maaqakinaa saqari aanna reenoo moomoo qaqama ireenoo rairaaiani.

Mi maqusausa kiaqa faiqi qumbiaqa mariaqa.

Mi sakummana qaqama faqa uita qaqama faqa andandara foora sia kasoo mariani.

<sup>17</sup> Mi karaambaiqana auquara naaru naaru sia aunuaqa.

Mina uriqararafa aiqama kari suani afuara foora uridaa kai mariani.

Aiqama maqannaasa mi karambaiqana amiqa amiqimma amaqoonandee inana maasa faqa amiqi amiqimma qimaqaannee qimasaidaqa qifaranoo.

<sup>18</sup> Isaraee maqannaasa Anutufa moo auqu Yaaweefa, mina amooqimamaqaqa.

Mifa nariara maa idaaqira ainainausa auqee marifa maridanoo.

<sup>19</sup> Mina areenara auqu naaru naaru amooqiaqa.

Maa maqa maaqanakina aiqamai mina qareenarafa qumbiqanoo mariani.

Kuqaa uqanna.

<sup>20</sup> Qini Dafidisa Yeeseena amaaku marunausa doo qini innaaru qirafa taikeenoo.

### **Mina Anaqianna Papiqa (Book 3)**

## **73**

*Idi Ufa 73–89*

*Anutuna andeeqannimaqarafa.*

<sup>1</sup> Oo kuqaa Anutufa Isaraee maqannaasa amiqi amiqi marifa maridanoo.

Anukara nimuqusa faqaasa amiqi amiqimma nimaqaannoo.

2-3 Manda oosana maree mariasa aiqama ainaina amiqifaqa nári nimoo naamoo qiafaqa qinee qafaunanoo qirana qaiifaqa Yaaweena minnisaaqaa unanoo Yaaweenaki mapukiqa marunafa taikaaqaammidanoo.

4 Miqi mariasa sia nidafrana maraidaqa.

Misa nifaafa afeeka marifaqa sia dinee teeroo maraidaqa.

Amiqirausa maridaqa.

5 Misa sia akaqausa naanna raidaqa, sia ummaara oosana oosana faisa maridaqa.

6 Misa noori uqeerasee ramooramaairafa misa ninukakinaa kukukakanara foora maridanoo.

Faiqi narirana misa qamunnara foora nári nifaacaqai afsuaqee maridaqa.

7 Misa nimuqusa kiqari oosana oosana manda oosana kambiqaidanoo.

Misa iriranaki oosana oosana manda ainainara oonu auqee ani auqee idanoo.

8 Misa akaqausara naanaidara qidaqa mandainainara ufa qidaqa.

Misa nári nimoo naamoo qidaqa akaqausa uriqaramafi rakisi nimaqaanauree qimasee tipundaaridaqa.

9 Misa innaarunai mari Anutuna manda ufa qimamaqaidaqa.

Misa nári ufamau fuaqeeera aanoommasee maqasaa fasiqauqa qimannimidaqa.

10 Minara Anutuna faiqi anaasee misiannai quandaifiqa aqaidaqa misa ufara anoonee qidaqa.

11 Mi manda oosanna maree mariasa maaqi qimasee unnaqidaqa.

Anutufa maasa oosana sia iriannoo.

Uriqarara Anutufa sia manda oosana paquriannoo fee qidaqa.

12 Doo qafaa. Mi manda oosanna maree mariasa oosana miqimminoo maridanoo.

Misa maaqimmiqa maridaqa misa moomoo ainaina faqaasa maridaqa aiqama kari moo faqa moo faqa mara usidaqa.

13 Qinee misa nindafamaseeqa maaqi qimasee manda irirana qiqa.

Fifau qinee andeeqaiidee qidaqa.

Qinee fifau aaqara oosana qeerairi marunaasee qidaqa.

14 Oo Anutu anee faasaambaasaana qini apurarana qimimariananoo.

Aiqama kananaana kananaana ummaara kai daridanoo.

15 Qinee mi manda aaqara ufana qidaqau ani Anutuna faiqi anaasee naanna sia raunaiqini.

16 Qinee mi oosana oosana marirana oosana irianeera oonu mafi irunanoo kadaapi daridanoo.

17 Miqiqa maridaqa ani Anutuna amaana maqaki keeqaifiqa mi manda oosanausa maree mariasa nifaacaqai kambiqaaninna ainainara iriqa.

18 Oo Anutu, anee mi manda oosanna maree mariasa mareeqee farindara maqasaara foora quqeenaranoo.

Anee qinaqa misa mareeqee kuridiranaki aqifaranoo.

19 Misa tautummaki mandainainaki kuridiranaki aqufidaqa.

Miqi mariasa manda kuqiranaki ooqu fidaqa.

20 Aaqee mariasa qainammasee findifinana qaunuannandee inoo misa marirafa kai kaqi taikaanoo.

Oo Yaawee aneenna mariannaqooqari findifuaqa misa mina qafamasee miqooqari doo sia siammafia.

21 Qinee manda oosana maree mariasa moomoo qumiasanara irunanoo qini irirafa suka qaifanoo qini qimuqusa mandaikino.

22 Qinee kaasau aandaara foora ani afusaa irirana siaisa furufarirausa maridaqa.

23 Miqiqa maridaqa ani aaqa aiqama kari marunana, anee qini qisauku uqanni qisauku qumaree qisaadaku imarianafa mariananoo.

24 Anee aneenna aamuaqira ufannai qini daamua qimaseenana qini itita qisammaree munusee kasooaqee innaarunai qifiqa quqaseenana uriqarara duqu qimisainafa ani faqa marianaara.

25 Yafee moo fannoo innaarunai qini qiqoondi maridanoo fee, sia moo fannoo maridanoo, anee kai.

Qinee ani Yaaweena maraafannaqooqari nannee moo maa maqa maaqanasaaqaraa ainainara didiannoo fee.

Aniara didirafa aiqama minauqa uriaaqaranoo maridanoo.

26 Qini irirana faqa qini qifaafa faqa ummooquki marifanoo Anutufa qini afeeka maridanoo.

Mifa qini faqa marifaqa qinee aiqama kari amanaikidaqa.

27 Ani nimeesa uqusee kaqinni fimariasa anee mandaikamma nimaqeenaranoo.

Ani ufaki sia mapukusee kisaagasaa mariasa anee misa aiqama kuridi nimaqeennaranoo.

<sup>28</sup> Qinee sia miqidaga, Anutuna aaga mariranara qinee kaaqa amiqira fee qidaga. Qinee uriqarara Yaaweena mara qeeqa afeeka kukeeqara maqusaikammiqa. Anee auqoonna ainainara aiqama kooroommasee qimannimianura.

## 74

*Anutufa Isaraee maqannaasa manda ainainakinaana dadaaqiani fee innaaru.*

<sup>1</sup> Oo Anutu, anee nanaree maasa maaqi uqanna masee minniqisaidanee.

Anee kisaagasaafee aneenna faiqi aanaaseera aanooqinnaree.

<sup>2</sup> Oo Anutu, anee ooqai Isaraee maqannaasa rusandeesammumasee maroonasara, misara amiqi mandee oonumafi iria.

Anee maasa feefaurummasee aneenna maqannaasaika maqoona marianara oonumafi iria.

Sioona aaganasaa anee marunafa mariananoo, minara faqa oonumafi iria.

<sup>3</sup> Anee mai aniree Yeerusaree maqusa rapeepaa iranauqa qafaa.

Maasa namuqaauqa ani amaana maqa faqa rapeepaammaseea.

<sup>4</sup> Namuqaauqa aniree kaasau fainiara foora faqa ridaqa aiqama ainaina auku usidaqa.

Misa ani biraka raipaqu quqasee nariqa biraka uqeera quqasee nariara uriqararusee qirana kooroo ianifeera miqiqau.

<sup>5</sup> Namuqaa ani Anutuna amaana maqaki anireeqa nandakinaa saqari ateekeera foora ani amaana maqa ateekaateekamma quqaseea.

<sup>6</sup> Misa saasuna qamma firaana faqa mara mareeqa ani amaana maqaki keeqafifaqa aiqama amiqira akara mari saqarisa ateekaa teekamma aquseeqa.

<sup>7</sup> Misa ani naaquqara amaana maqa ida arasaafanoo aiqama qama taikeenoo.

Misa ani Anutuna innaaru qimamaqee mariana faqa, rapeemmasaafanoo mandaika mafino.

<sup>8</sup> Mi manda fasiqausa nariqa maaqi qimasee qimiriqa qiqa.

Doo maasa misa amiqiuqanna masee radamusaanura.

Aiqama maqusa maqusa Anutuna amooqi maria amaana maqausa misa idarasoofanoo gama taikanau.

<sup>9</sup> Maasa Yaaweena daaqoo auqee mari ainainausa aiqama mandaikamma aqusaqau.

Tamummaqara fasiqauqa qima qimirausa faqa sia maridaqa aiqama taikafia.

Minara maasakiqari sia moo fannoo maa manda aukuanafa taikaaninnanara iridanoo.

<sup>10</sup> Oo Anutu, kisaagasaa fee namuqaa aniara naanaidara qifaree.

Naaru naaru namuqaa ani auqara manda ufa kai fee qimarifaree.

<sup>11</sup> Oo Anutu, nanaree anee maasa dadaaqirara akooqaidanoo fee.

Nanaree aneenna asauku raqandaammasee maridane.

<sup>12</sup> Oo Anutu anee maasa ooqeenna karaambaiqa mariananoo.

Anee maa maqa maaqanaki maasa moomoo kari mandainainakinaana mareeqee amiqiraqoo quqaqisee marunafa mariananoo.

<sup>13</sup> Oo Anutu, anee aneenna afeekannai ooruku nammari qambaana rakeeunafa mariananoo.

Ooruku nammari mari firaa aandauna akiqauqa anee rukaminau.

<sup>14</sup> Anee ooruka nammarikinaa firaa aandauna mina auqu Reefiatanee qimaruna mina aiqama akiqauqa rukamuseenana aadana maqa maaqaki maru aandauna mina amaqi nimunaqa naqau.

<sup>15</sup> Anee qunanoo maqakinaa nammari faqa nammariuqa faqa quminau.

Anee aneenna afeekannai firaa nammariuqa aadanusunafa mariananoo.

<sup>16</sup> Asukuna faqa faasaana faqa auqunafa mariananoo.

Suani faqa quqoonna faqa anee kai quqoonafa mariananoo.

<sup>17</sup> Oo Anutu anee maqa maaqaki aiqama oosiranauqa quqanau.

Aiqaiqa dumudumu qira aukuna faqa suara aukuna faqa anee kai auqu quqasoonafa maridanoo.

<sup>18</sup> Oo Yaawee namuqaa aniara uteeti naakada qimarianara iria.

Kisaagasaa furufari mariasa aniara fifau ainaina fee qimasee ani auqu aquraraidaga.

<sup>19</sup> Oo Anutu, aneenna faiqi anaasee namuqaa nimimaria ummaaranaki kisaagasaa mariasara sia misara qaunau.

Aneenna faiqi anaasee namuqaa nimimaria ummaaranaki kisaagasaa mariasara sia misara qaunau.

<sup>20</sup> Aneenna ooqai qima afeekaikunnanara minara maqee irisee maasa dadaaqia.

Maa maqa maaqanaki narari nararirafa aiqama amannaunai faqa asukuna arirannai faqa qumbiqanoo maridanoo.

<sup>21</sup> Oo Anutu anee ummaara ameemaanai mariasa dadaaqinaqa sia nisauriqa oofikiyaqa. Kudi fasiqa anaasee faqa sarau imariasa faqa ani auqu amooqiaqa.

<sup>22</sup> Oo Anutu, findifinana aneenna auqusaa titaa.

Furufari maria fasiqausa faasaambaasaana ani oosanara uteeti naakada qidaqa.

<sup>23</sup> Sia anee aneenna namuqaa ani auqura fidiqaammasee faqa fuisee qimarianara irisee qaunua, amiqimmasee iria.

Ani namuqaauqa aniara tutuqirafa kaqikai fida marinara sia qaunua, amiqimmasee iriaa.

## 75

### *Anutuna raina nimaqarafa.*

<sup>1</sup> Oo Anutu, maasa aniara dufi qidaqa ani auqu uqeeraidaqa.

Maasa anee uriqararafa mariannanara kooroommasee qimannimisee kaifaa anee naaqqura uriqarara ainaina auqoonnanara faqa aiqamausa qimannimidaqa.

<sup>2</sup> Anutufa maaqi qidanoo.

Qinee ufa irira faasaana utaaqamaqaunanoo maridanoo, qinee andeeqasee amana amana kai raina nimaqara oosanannoo raina nimaqaanaura.

<sup>3</sup> Maa maqa maaqanakinna aiqama ainaina rufieeqa naindiri raifanoo maqa faqa kasinaqa qinee Anutusa kai mina oosana atukaramma qumaraananoo sia kaaqa mandaikiannoo.

<sup>4</sup> Qinee manda oosana maree mariasa sia ramoo ramaa iaqera qimannimidaqa.

<sup>5</sup> Qinee maaqi qimasee qimannimidaqa. Innee sia inneeqa nuqu uqeeraseeqa qiniara sia fee qiaqa.

<sup>6</sup> Raina nimaqara oosana fannoo sia suani oosanaindari fau sia suani keeqee marinnaindari fau sia dinni dinni ataaqendari fau anidanoo fau.

Sia moo fannoo suani dinni dinni ataaqendari amana faiqi raina nimaqaannoo.

<sup>7</sup> Anutufa kai faiqi rainee marifa maridanoo.

Mifa kai moo mara maqasaa muqufi quqaidanoo, moo uqerasaifanoo uriqaraidanoo.

<sup>8</sup> Yaaweefa nari asaukuki nari aanooqira nammari taqu uaqee idanoo.

Mi taqufa afeeka wainna mina aanooqirafa qumbiqanoo marina uaqee idanoo.

Mifa mi nammarina adiasaifaqa aiqama manda oosana maree mariasa namaseeqa mandainainaki maridaqa.

Misa aiqama nama taikaidaqa, sia atiti taquki kaqi mariannoo.

<sup>9</sup> Qinee Yakooboona Anutunara naaruara naaruara koorooqia fuanaura.

Qinee Yakooboona Anutunara idi raidaqa amooqianaura.

<sup>10</sup> Mifa manda oosana maree mariasa afeeka aiqama rauda nimaqaannoo.

Andeeqara oosana maree mariasa afeeka moo faqa moo faqa nimiannoo.

## 76

### *Anutufa rakirana uriqaree marifa maridanoo.*

<sup>1</sup> Yuda maqannaasa Anutuna auqura iridaqa,

Isaraee maqa maaqakina mariasa mina auqu uqeeraidaqa.

<sup>2</sup> Anutuna uqaana maqa Yeerusaree maqusaki maridanoo.

Mifa Sioona aaqanasaa maridanoo.

<sup>3</sup> Miqoo Yeerusaree maqusaki Anutufa namuqaa duru feeqa saqari raudaandamma aqinau.

Mifa saqari faqa saamu faqa oosana oosana rakira ainaina faqa aiqama itairaatairamma aqinau.

<sup>4</sup> Oo Anutu, anee firaqqoo qareenarafa mariananoo.

Anee aaqanasaa aneenna namuqaa rafaqqafuseenana aneenna uriqarara rupannoo irana namu faqa oorurandee qumuananoo.

<sup>5</sup> Oo Anutu, anee ufa qunaqa sundiaqqa nimudaanai qimarusa doo kuqufufaqa akaqausa misa aiqama ainaina raipaqu maraqau.

Misa aiqama doo saara faiqaidaqa sia kafaa findi fifara.

Misa aiqamausa rakira afeeka faqa akoofasaikirafa faqa sia nariqa dadaaqufaqa kuqiuqa.

<sup>6</sup> Oo Yakooboona Anutu, anee aanoo qianaqa rakira qoosauqa faqa qoosaa ooqu marifi nimariasa faqa rakira afeeka taikafaqa maqasaa aqumi kuqiuqa maridaqa.

<sup>7</sup> Oo Anutu, aiqamausa aniara rufiee mariafa mariananoo.

Anee aanooqinaqa sia amana moo fannoo ani afusaa kikiqiannoo.

- <sup>8</sup> Oo Yaawee, anee innaarunaindari andeeqa nimaqara ufa qunaqa maqasaa fasiqauqa rufiasee ufa sia qirai madoodoonna fiqau.
- <sup>9</sup> Akaqausa uriqararanannai rafaagafu nimaqaafaqa aiqama maa maqanasaa anee misa dadaaqiraree qimasee findifi andeeqara ufa qunaqa aiqama irisee daimmafiqau.
- <sup>10</sup> Faiqí faiqí aanoo qirafa quandaki ani Yaaweena amooqirana moo faqa moo faqa amidanoo.
- Akaqausa mi rakiranaki sia kuqinausa ani ufa suqiranaki ani amooqifaranoo.
- <sup>11</sup> Innee inneeqa Anutuna Yaaweena amiraree qimasee qima afeekaika maqaa ainaina sia minnisaa, kuqaa mina amia.
- Adeedi maria anaamurusa innee faqa aqoondikira ainaina mina amiaqa.
- Anutufa qifaqa aiqama faiqí anaasee minara rufiadaqa.
- <sup>12</sup> Mifa nári nuqu uqeere maria uriqararansa mara muqufi rafaqaqifidanoo.
- Mifa maa maqanasaa maria uriqarara karaambaiqausa naindiri rarana nimidanoo.

## 77

*Ummaara aukuana Anutuna dadaaqiranara innaaru qirafa.*

- <sup>1</sup> Qinee Anutunara dadaaqiannee qimasee faaqa riqa.
- Qinee faaqa rimarunanoo mifa iridanoo.
- <sup>2</sup> Qinee ummaaraki maridaqa Yaaweenara innaaru qidaqa.
- Eendaki kisaqaasaa qisauku uqeerasee innaaru qidaqa, sia daundura asoarana mareeqa.
- <sup>3</sup> Qinee Anutunara iridaqa aiaaee qidaqa.
- Qinee minara oonu mafi irunanoo qini daundura ummaara reenoo.
- <sup>4</sup> Eendaki Anutufa sia qini faiqarana qimifaqa qinee oonu mafi irunanoo ummaarafaqa sia qini ufa qirafa maridanoo.
- <sup>5</sup> Qinee ooqai mariaafannanara iridaqa, mi aukuanna amiqimmasee mariaafannanara oonu mafi iridaqa.
- <sup>6</sup> Eendaki qinee iriqaraasida maridaqa.
- Qinee maaqi qimasee oonu mafi iriranakiqari qeeqa iradaqa.
- <sup>7</sup> Anutufa naaruaree maasa minniqisaannoo fee.
- Sia fee kafa naaruara mifa maasara aidiannoo fee.
- <sup>8</sup> Kuqaa fee maasara aidirafa taikeenoo fee.
- Mina maasara qima afeekaikirafa doo fee taikeenoo fee.
- <sup>9</sup> Anutufa nari nifauaranara doo fee qaunuseenoo fee.
- Mina aanoo qirafee mina maasara amuqusirana amaaqa maqanoo maridanoo fee.
- <sup>10</sup> Qinee mina iriseeqa maaqi qimiriga.
- Maa ainainafa qini daundura ummaara qimidanoo,
- Yaaweena afeeka doo taikanoo mariifoo qidaqa.
- <sup>11</sup> Anee firaa ainainauqa auqoonnanara qinee oonu mafi irianauro.
- Qinee mifa faiqí sia amana auqaaqaa ira ainaina auqoonara irianauree qidaqa.
- <sup>12</sup> Oo Anutu, qinee anee aiqama ainaina auqoonnanara indee indee ianauranoo.
- Anee amudaanai qimasee auqoonnanara qinee oonumafi irianauro.
- <sup>13</sup> Oo Anutu, ani oosana fannoo kaaqa naaqqarafa andeeqarafa maridanoo.
- Unna anutusa sia maasa uriqarara Anutufara foora uriqarafa maridaqa.
- <sup>14</sup> Oo Anutu, anee faiqí sia amana auqaaqaa ira ainaina auqunafa mariananoo.
- Anee aneenna afeeka aiqama maqannaasaki uqeera akooqoo kooroommasaanaqa qafeea.
- <sup>15</sup> Aneenna afeekannai aneenna aiku asauku ummaarakinaana maraananoo.
- Anee Yakooboosa Yooseefaasa nikeeku nikaaku maraananoo.
- <sup>16</sup> Oo Anutu, nammari fannoo ani qafamaseenoo rufiaseenoo, rakeenoo.
- Ooruku nammari faruma meemai ooqu marifa faqa ani qafamasee aindirireenoo.
- <sup>17</sup> Oonnamu fannoo ani Anutunara rufiasee maqasaa aaku nammariara foora adianau.
- Innaarunai qirafa fraaqoo darara qufanoo aakuasaa fannoo idauruanda kai qifuki munu raqee mini raqee inoo.
- <sup>18</sup> Ufai namufaqa aaku namu faqa ifanoo ani Anutuna innaarunai qirafa minaki kambiqaiqafa iriga.
- Ani aakuasaa fannoo aiqama maqa maaqai kaaqa qamannimaqeenoo, maqa fannoo aindiri raifanoo kasinoo.
- <sup>19</sup> Anutu ani aana firaa nammari ameemaanai maridanoo.
- Ani aana firaa nammari ameemaanai marifana mi aatata fuanaqa sia ani aiku amaaqa qafeeqa.



<sup>20</sup> Mooseesa Aaroonasa rakisiraqanda maridaqa ani  
Anutuna faiqi anaasee sipsipasaa rakisirausara foora iqa nifiqee fiqau.

## 78

*Anutuna faqa nari faiqi aanaaseera faqa qidanoo.*

- <sup>1</sup> Oo qini maqannaasa, innee amiqimmasee qini ufa iriaqa.  
Amiqimmasee naaqoo quqasee qini ufa iriaqa.
- <sup>2</sup> Qinee quandara ufannai inni qimannimianaaura.  
Qinee ooqeennaasa ufa oonukeeqee anikeeqee qirana qimannimianaaura.
- <sup>3</sup> Maasa ooqai iriafanna ufana maasa qikausa qimaqimu ufana qimannimianaaura.
- <sup>4</sup> Yaaweefa amiqira ainaina auqoonara faqa mina afeeka faqa mina naaquqara ainaina auqoona faqa maasa faiqi namu naaru kambiqainausa faqa qimannimianaaura sia kuqeeqaanaura.
- <sup>5</sup> Yaaweefa nari sanda ufa nari faiqi anaasee Isaraee maqannaasa nimisee,  
Yakooboona aiku asauku nari auqira ufa niminau.  
Miqimmaseenoo maasa qiikeeku qikaaku afeekaikammaseenoo qimanniminoos qinau.  
Innee inneeqa faiqi namu sanda ufa qimannimiaqa.
- <sup>6</sup> Innee inneeqa faiqi namu qimannimifaqa misa inaaqiana kambiqainausa quandafi qimannimiaqa, kafaa misa miqi kai iqa nari ninaaqianna kambiqainausa quandafi qimannimifaqa, misa aiqamausa qini sanda ufa iriaqa.
- <sup>7</sup> Miqinnannai nari irirana Anutunasaa kai mundifaranoo, misa Anutufa auquqoo ainainnara sia qaunuaqeera mina sanda ufa kai afaqaqeera.
- <sup>8</sup> Miqidafaqaa sia nari nikausa naanna raaqeera.  
Misa nikausa ufa rukiasee ramoo ramaa imarusa mariqau.  
Sia misa nari irirana Anutunasaa mundiqau.  
Misa sia Anutuna ufaki mapukusee mariqau.
- <sup>9</sup> Miqimarunara Eefaraimmana akeeku akaaku duru feefa mareeqa rakiranaki oonureeqa, fifau rufiasee oonurandee sandaqau.
- <sup>10</sup> Misa Anutuna moodaanaki kira ufamau sia andeeqasee fiqau.  
Mina sanda ufara nikoqoofaqa minnisee kaqi runna fimariqau.
- <sup>11</sup> Anutufa auqoo ainaina qaunuseeqa, mifa naaquqara ainaina uqannifiqoonara faqa qaunusaqau.
- <sup>12</sup> Misa nikeeku nikaaku nikausa noorisaa faiqi sia amana auqaaqaa ira ainaina uqannifiqanau,  
Isipa maqa maaqaki moo maqusa auqu Sooana mi maqusanaki maru afaasanasaa uqannifiqoonara faqa qaunusaqau.
- <sup>13</sup> Anutufa taatuqee ooruku nammari rakeemasee misa nifiqee aadanasaa finau.  
Mifa nammari rakeemandoofanoo, dinni dinni aqaanara foora inau.
- <sup>14</sup> Faasaanasaa mifa asurukiqari misa nifiqee finau.  
Eendaki ida fannoo kaaqa qamannimaqee marufaqa fiqau.
- <sup>15</sup> Misa nammari siaisaqa fimarufanoo Anutufa ooni afoommandeenoo nammari farumakinaanara foora moomoo nimufaqa naqau.
- <sup>16</sup> Anutufa oonikiqari nammariara ooqufuannee qufanoo nammari quminau, firaanammari anoonara foora quminau.
- <sup>17</sup> Misa sia minara irirai kaqi kai aqara oosana Anutuna afusaa maree mariqau.  
Misa aadana maqa maaqaki fidaqa uriqarara Anutuna afusaa ititammasee nari iriranamau mandainainaki kaqi fimariqau.
- <sup>18</sup> Misa Anutuna amanamasee qafaanee qimasee nariqa nidimari naranara innaaru qimariqau.
- <sup>19</sup> Sia mina kai, misa Anutunara firaqoo amanammasee qafaidee qimasee maaqi qiqau.  
Amanee maa aadana maqa maaqanaki Anutufa narana qimiannoo fee.
- <sup>20</sup> Kuqaa Anutufa ooni arufanoo nammari firaafa quminau.  
Mi nammari fa firaanammariara foora quminau.  
Kafaa amanee mifa narana faqa aanda faqa maasa nari maqannaasa qimiannoofee.
- <sup>21</sup> Yaaweefa misa ufa iriseenoo firaqoo aanoo qinau.  
Aanooqidanoos ida radiqisoofoanoos Yakoooboona faiqi namu narinau.  
Mina aanooqirafa firaanaikinau.
- <sup>22</sup> Misa Anutunasaa sia nari irirana rusiqau.  
Misa Anutunara sia amana mandainainakinaana maasa asumu maraannoo fee qiqau.
- <sup>23</sup> Mifa sia minara irinau kaqi qasuru qimamufanoo innaruna kooqi atuanau.

- 24 Atuaseenoo mannaa feemu innaarunaindaraa narana sakuma fooqaana aakuara foora teeqimasoofoaqa naqau.
- 25 Mikari Anutufa angirooüqa neemaru naranna nimufaqa naqau. Anutufa misa sia amana nama taikaaqairra narana nimirau.
- 26 Anutufa narí afeekannai qufanoo suani afu oosanaindari faqa dinni ataaqendari faqa ufai uqinai.
- 27 Mifa ufiniüqa kookoommara foora misa teeqimma nimirau. Ooruku nammari afaigaraa nukudara foora ufini misa nimirau.
- 28 Anutufa qufanoo ufiniüqa misa uiqaana maqusa qambaana faqa naambeeqaqara faqa teeqi teequfaqa naqau.
- 29 Teeqi teeqimmasoofoqa marasee noofanoo moomoo uqanna kaqi marinai. Misa faaqa rimarufanoo Anutufa moomoo uqanna nimufaqa misa namasoofoanoo nimuaqu inau.
- 30-31 Mi ufini naranausa neemarufanoo sia nimuaqu inau, kaqi naida marufanoo Anutuna arana qoofanoo misa afeeka fasiqauqa kuqa narinai. Mifa Isaraee maqanna amiqira kumaaraaüqa narinai.
- 32 Misa mi aiqama ainaina tianaki Anutuna afeeka qafamasee sia mina saqari kiqau, kaqi aaqaranaki fimariqau. Misa Anutufa sia faiqi auqaqaa ira naaquqara ainaina auqoonara irisee sia misa irirana Anutunasaa rusimariqau.
- 33 Mina akiiqara misa maa maqanasaa marirana naidoora foora fuaqasoofaqa kai kaqi taikaqau. Misa mandaikamma nimaqasoofaqa kuqirafa tautummasee misa qumaroofaqa kuqiqau.
- 34 Anutufa misa kuqa narufaqa kaqi marusa misa quandaki Anutufinnai ubeekaqau. Mifa misa kuqa narufaqa kaqi marusa noori runusee mifunnai ubeekamafi innaaru qimariqau.
- 35 Anutufa misa kuqa narufaqa narí oonu mafi iriseeqa, kuqaa Anutufa maasa ititaqi-maqee mari fee qiqau. Uriqarara Anutufa maasa mandainainakinaana feefaurummasee dadaaqi marifammifoo qimariqau.
- 36 Misa sia nimuqusa ookiqarifau miqi qiqau. Misa fifau nookiqari kai Anutuna amiqi amigidaqa miqi qimariqau. Misa narí nifaurunnai unnufa kai qimariqau.
- 37 Misa sia kuqaa uqanna Anutuna ufa afaqee marinai. Misa sia Anutuna faqa moodaanaki kammaqoo ufanasaa mapukusee mariqau.
- 38 Anutufa misa manda oosana qafamaseenoo, mina amuqusirafa qumbiqanoo marunara misa manda oosana akiiqara minnisana, sia narinai. Moomoo kari narí aanooqirana rafaqaqafuseenoo sia narí aanooqirana aiqama uqeer-anau.
- 39 Mifa misara faiqi faiqi kai fee qimaseenoo irinai, misara kaqikaa ufai fuaqaifaqa kai kaqi taikkee mariasee qinai.
- 40 Misa aadana maqa maaqaki naqumma kari fee naakapara ufara nikooqoofaqa aanooqimariqau, moomoo kari miqimariqau. Naqumma kari Anutuna amuqusa mandaikirana amimariqau fee. Moomoo kari miqimariqau.
- 41 Misa moomoo kari Anutuna amanammasee qafaqau. Misa Isaraee maqanna naaquqara andeeqara Anutuna amuqusa mandaikirana kaifaa kaifaa amimariqau.
- 42 Misa Anutuna afeekara qauniqau. Mifa misa firaa ummaara ameemaanai mariuna kinaana maroonara faqa qauniqau.
- 43 Anutufa Isipa maqa maaqaki narí oosana uqannifiqoofaqa qafaqau. Moo maqusa auqu Soona mi maqusanaki maru afaanasasaa faqa narí oosana uqannifiqoofaqa qafaqau.
- 44 Anutufa qufanoo nammari uqanna fannoo quandaki fidikaikinai. Miqimmafufaqa Isipa maqannaasa nammari naranara randoosia minnisaga.
- 45 Mifa qufanoo faufaari oosana oosana kambiqafufaqa Isipa maqannaasa ukaqa nima-daga aupurarana nimirariqau. Mifa eeqamoosara qufaqa anireeqa misa maqa maaqa mandaikamma nimaqaqau.
- 46 Anutufa qufanoo pandaaga moomoo aniree misa ainaina aiqama nama taikaqau. Mifa qufanoo misa kadaapi rirafa aammaadi oo aamarai kaimbinau.
- 47 Anutufa qufanoo pupusamu aqufinoo misa waina sanda afuqakinaana ariisoofoanoo aiqama aadana usu taikanau.

Firaa suara namu faqa pupusamu namu faqa aninoo misa saqari qaqama neemaruna faafisa fooqaa irana aiqama mandaikammasanau.

48 Mifa qufanoo misa burimakau aina pupusamu aqufinoo aiqama narinau.

Kafaa aakuasaa fannoo aiqama firimaru aandausa oosana oosana narinau.

49 Anutufa narí aanoo qirana faqa narí kaukaata qirana faqa narí aranaqaranara faqa faiqí nári maru qaangirooma faqa idara foora niqiqoofaqa qumuree Isipa maqannaasa nariqau.

50 Mifa narí aanoo qirana sia rafaafaq finau.

Misa nimana kuqiranaki firarufanoo sia rafaafaq finau.

Mifa Isipa maqannaasa manda auriranaki quqasoofaqa kuqi mariqau.

51 Mi angiroofa Isipa maqannaasa oofa faiqiuqa aiqama naru raurukanau.

52 Anutufa narí maqannaasa Isaraee maqannaasa sipsipara foora nifiqee finau.

Mifa sipsipara foora aadana maqa maaqaki misa andeeqasee indaarunnikamma ni-maqanau.

53 Anutufa amiqimmasee rakisi nimaqee marufaqa sia narira ainainara rufiaqau.

Taatuqee nammari fannoo misa namuqaa aiqama dukuninau.

54 Anutufa misa nifiqamaree Kannaa maqa maaqai narí naaquqara maqa maaqai nifiqee oonuranau.

Narí afeekannai maroo aqaqannaasa quqannisanau.

55 Mi maqa maaqanakinana aanaamuru damunamma aquseeqa maqa maaqa oosuseeqa Isaraee maqannaasa faiqí oosana faiqí oosana rainannimufaqa maqa maaqa marasee nariqau maqasaa oofu mariqau.

56 Misa mi aiqama ainainna qafamaseeqa quandakiqa uriqarara Anutunara amanam-masee qafaqau.

Misa sia mina naamuaqira ufa afaqaqau.

57 Misa quandaki nári ninaakusa naanna raida ufa rukiee mariqau.

Misa eendaandira feefaraa foora aqusoofanoo fuadakamaki kaqinni fimariqau.

58 Isaraee maqannaasa unnaqira anutusa tatufirana suqa nimidaqa minannai Anutuna uqanna arana fundakiqau.

Náriqau tumunnai auqira unna anutunannai mina arana qarana amiqau.

59 Anutufa misa oosana qafamasee misa aanoomma nimaqasee misa miniseenoo ameesa uqunnisanau.

60 Rakeemmeeqee aquseenoo Anutufa narí naaquqara uiqaana maaqa Siroo maqusaki maruna faqa minnisanau.

Narí maasa qambaana mariu maqana minnisanau.

61 Mifa narí qima afeekaikira bookisa narí afeeka maruna namuqaa nisaukuki quqasoofaqa maree fiqau.

Mifa narí bookisa narí afeeka areenarafa maruna mareeqeenoo namuqaa nisaukuki quqasoofaqa maree fiqau.

62 Mifa narí maqannaasa Isaraee maqannaasa aanoomannimaqaseenoo misa namuqaara qufaqa akaqausa kuqa nariqau.

63 Misa kumaaraauqa rakiranaki kuqufufaqa maanaaqauqa marara fasiqa sia mariqau.

64 Misa amaana maqasaa aanaikirausa duru saamu ookina keeqafufaqa misa ninaaq-maaka rakirafa kaqi kai marufaqa náriara faqa rufiasee sia iki raqee mariqau.

65 Miqooqari Yaaweefa faiqaranakiara foora tautuma findifinai.

Mifa afeeka fasiqa wainna nammari namasee afeeka marasee findi fuandee inau.

66 Findifinoo narí namuqaauqa narunifaqaaqaa masoofaqa fiqau.

Anutufa naru nifaqasoofaqa naaru marira nisaurirana marasee sia kafaa rakiqau.

67 Yaaweefa Yooseefaana narí amaaku Eefaraimmana faqa misa nikaaku nikaaku sia rusandeesamummasee maranau.

68 Yudana akeeku akaaku rusandeesamummasee maranau.

Anutufa misa maqa maaqaki maru aqaqanna misa auqu faqaa aqaqanna Sioona aqaqana narí aidi maru aqaqanna faqa maranau.

69 Miqoo Sioona aqaqanasaa Yaaweefa narí innaarunai maru naaquqara amaana maqana fooqaairana usakanau.

Maa maqanara foora naaruara mapukusee marira maaqa usakanau.

70 Anutufa narí ainainira faiqí Dafidina rusandeesamummasee maranau.

Mifa sipsipasaa rakisi marunakinaana maranau.

71 Anutufa Dafidina sipsipasaa rakisi marunakinaana mareeqeenoo Isaraee maqannaasa karaambaiqaika masanau.

Anutu faiqí aanaaseesa sipsipara foora faqa rakisianifeera mara quqanau.

<sup>72</sup> Miqooqari Dafidifa narí andeeqara iriranannai faqa narí akoofasaikiranannai Isaraee maqannaasa sipsipara foora indaarunnikamma nimaqanau.

## 79

*Anutufa Isaraee maqannaasa manda ainainakinaana dadaaqiani fee innaaru.*

<sup>1</sup> Oo Anutu, aamina maqannaasa aniara sia iri mariasa maasa maqa maaqaki doo aniree maasa ani faiqi anaasee faqa rakidaqa.

Misa ani naaquqara amaana maqa putaammamaqee. Yeerusaree maqusa rapeepaam-maseea.

<sup>2</sup> Misa ani aiku asauku aiqama narusee quqasoofaqa ufiniuqa aniree misa iri naqau.

Kaasau aandaufu faqa ani maqannaasa naru quqasoosa nipata naqau.

<sup>3</sup> Misa fidika Yeerusaree maqusamau nammariara foora umbiqanau.

Misa nikundara fasiqa sia mariqau.

<sup>4</sup> Maasa daaqa mariasa faqa maasa fiqumma mariasa faqa mina qafamasee maasara atasataasa qimaseeqa naanaidara qidaqa.

<sup>5</sup> Oo Yaawee, ani aanoo qirafa naaruaree mariannoo fee.

Ani rairai qirafa naaru idara fooree qaannoo fee.

<sup>6</sup> Oo Yaawee, aneenna aanoo qirana aamina maqannaasa, sia ani auqu amooqi mari-asasaa teeqia.

Akaqa maqannaasa sia aniara innaaru qimariasa misasaa teeqiaqaana.

<sup>7</sup> Misauqa maasa ani faiqi anaasee kuqa daridaqa.

Misa ani maqa maaqa furufaridaqa.

<sup>8</sup> Oo Yaawee, sia maasa qikeeku qikaaku aaqarana akiiqara maasa aupurarana qimia.

Aneenna nifauara reendeeniranannoo kai kaqi maasa dadaaqia.

Maasa oonumafi irirafa oorudupinoo marinara maasa dadaaqia.

<sup>9</sup> Oo Anutu maasa asumu maree marianafa anee aneenna auqu qareenaranara irisee maasa aaqarana akiiqara minniqisainaqaa maasa ani amooqianaura.

<sup>10</sup> Nanaree akaqa maqanaasa maasara yaifee inni Anutufa maridanoo fee qifoora.

Aneenna aiku asauku fidika akiiqara qimasee maasa qifusaa aupurarana niminaqa maasa qafaa.

Misa ani ainainira faiqiuqa naruana akiiqara miqia.

<sup>11</sup> Oo Yaawee, maasa qiku qisauku namuqaa rumbaranaki mariasa faaqari mariana iria.

Namuqaa naruanera ifana anee aneenna afeeka asaukunnai misa ititannimaqasee mara asumu mariranaki quqannisaa.

<sup>12</sup> Oo Yaawee maasa daaqa mariasa ani manda ufa ami mariasa anee mina akiiqara dinni taikasee dinni ni qaaraqanda marasee kari misa nimia.

<sup>13</sup> Anee miqimmasainaqaa maasa ani faiqi namu, ani sipsipara foora aniara naaru naaru dufi dufi qianaura.

Naaru kambiqainausa faqa ani amooqirana amifaranoo.

## 80

*Isaraee maqannaasa kaifaa sooqbaandumma moodaaqoo uqara innaaru.*

<sup>1</sup> Oo Yaawee, anee Isaraee maqannaasa sipsipasaa rakisirafara foora mariannanara maasa ufa iria.

Anee maasa sipsipara foora rakisi marianafa mariannanara maasa ufa iria.

Anee angiroouqa niqoosa faqaasa mariaqoo seerubimma mariaqoo miqoo anee Yaaweeffa ooqu marifi marianafa mariannanara anee maasa ufa iria.

<sup>2</sup> Eefaraimmana akeeku akaaku faqa Beensaminnana akeeku akaaku faqa Mannaseena akeeku akaaku faqa nifusaa koorooia.

Aneenna afeekannai findi finana mai aniree maasa ummaaraki marunnana uqeeraqisaa.

<sup>3</sup> Oo Anutu, anee kafaa maasa uqeera quqaqisaa.

Anee maasara qimudaoo qinaqa maasa kaqi asumu marianaaura.

<sup>4</sup> Oo Yaawee, aiqama afeeka faqaa Anutufa, anee kisaagasaa fee aneenna faiqi anaasee innaaru qiranara aanoo qinnaree.

<sup>5</sup> Anee maasa naukunu kai naranara foora nimianaqa neeqa.

Anee naukunu qumbiqanoo mari difaanina qimianaqa nammariara maqi neeqa.

<sup>6</sup> Anee qianaqa maasa daaqa mariasa faqa maasa maqasaara tinoo taanoo ridaqa.

Maasa namuqaa maasa qiqafeeqa atasataasa qima qimaqaidanoo.

<sup>7</sup> Oo Anutu anee kafaa maasa uqeera quqaqisaa.

Anee maasara qimudaoo qinaqa maasa kaqi asumu marianaaura.

<sup>8</sup> Oo Anutu, anee maasa Isaraee maqannaasa wainna sandara foora Isipa maqa maaqak-inaana maasa asumuanara mamaree anireenana maaqoo aiqama maqannaasa futeeqa aqusee misa maqasaa ummaquqoonausa maridaqa.

<sup>9</sup> Anee saikammasee miqoo ummaqusoona mariifanoo kambiqafinoo maa maqa maaqana amanaikinoo.

Mina atuka fannoo maqaki meemai uqanna keegeenoo.

<sup>10</sup> Mi sandafa firaanaikufanoo amuaqu namuqa faqa mina auqaanai mariqau.

Firaa sidaa saqariuqa faqa mi sandana auqaanai kai mariqau.

<sup>11</sup> Mi sandana dinni asaana fannoo firaa ooruku nammari mediteereena afainni ooqu finau.

Dinni asaana fannoo firaa nammari Eufarateesa nammari afainni amana kai finau.

<sup>12</sup> Oo Anutu, anee nanaree mina ququsa rakeemmasanaaqee aatata fiqaree aiqaree inausa mina qaqama tiqinfaree.

<sup>13</sup> Kaasau kuara fannoo nandakiqari aniree mi sandana nikunnai radamuseea.

Kaasau aandau faqa aniree mina naidaqa.

<sup>14</sup> Oo aiqama afeeka faqaa Anutufa, anee maasa iannannai quanda.

Innaarunaindari maasa qiqafaa. Ani wainna sanda marunausa qiqafamasee dadaaqia.

<sup>15</sup> Anee qummaquqoonna afuqana qumuree qafaa.

Ani wainna sanda anooka aneennara ummaquqoonafa afeekaikinoo maridanoo, qumu qafamasee dadaaqia.

<sup>16</sup> Maasa namuqaa maasa Isaraee maqannaasa ani wainna sanda asanara foora mariafaqa atekasee idara saafanoo doo qamafinoo.

Anutu anee aanoo qimasee misa kuridi nimaqaa.

<sup>17</sup> Anee rusandeesamummasee maraqoonausa aneenna asaukunnai misa ititannimaqaa.

*Isaraee maqannaasa anee afeeka nimisoonaqa namuqaa mandaikamma nimaqasoonaa anee kaifaa uqeerasee afeekaikamma nimaqaa.*

<sup>18</sup> Miqimmandaina sia maasa anikiqari quandaki kaqinni sandaauranoo.

Anee marirana qiminaqa maasa kafaa findifi ani auqu ramasee ani amooqianaura.

<sup>19</sup> Oo Yaawee aiqama afeeka faqaa Anutufa, anee kafaa maasa qifiqee aneenna iannannai ania.

Anee maasara qimudaoo qinaqa maasa sia kuqaa kaqi asumu maria.

## 81

*Asasira qoomaqa sakasee nara idi.*

<sup>1</sup> Anutufa maasa dadaaqi marifa marinara faaqa rumasee asasida idi rama amaqaqa.

Yakooboona Anutuna amooqira idi raaqa.

<sup>2</sup> Idi oosana arasee, temberinna namu faqa piripuna namu faqa ufireena namu faqa marasee aridaqa asasira idi raaqa.

<sup>3</sup> Fuka quqoonna anirainaqaa sipsipa aanainnoolu ufireena fuaqaaqa.

Kafaa mi quqoonafa rufatee fatinaqa oomaqa sakasee naida ukeena fuaqaaqa.

<sup>4</sup> Mi qoomaqa sakarafa Isaraee maqannaasa sanda ufara foora marinaqa aukuaana aukuaana naaru naaru miqifaranoo.

Yakooboona Anutufa maasa qimu sanda ufafa maridanoo.

<sup>5</sup> Anutufa Isipa maqannaasa naruseenoolu mi sandufana Isaraee maqannaasa niminau.

Qinee sia qafeemarunna fasiqana aunda irida.

<sup>6</sup> Mifa maaqi qimasee qimanniminau.

Qinee inni Isaraee maqannaasa nikumaaqa firaa ummaara akunnimaqaaqoonaa afaimее- qee quqeeqa.

Qinee inniara qunaqa inneeqa ummaara maqasaa afaimma quqaafanoo.

<sup>7</sup> Innee manda aupuraranaki maridaqa qini Anutusa daarooafaqa qinee minakinaana inni mareeqee kaqinni quqannisa qiafana.

Qinee qeeqa kukeeqara maqusa oonnamukiqari inni dadaaiqiafana.

Innee Meeribaa nammari maruqoo marufaqa qinee inni nimanammasee qafaqiafana. (Meeribaa mi nammarina auqu oosana tinoo taanoolu rira nammari fee qinau.)

<sup>8</sup> Oo qini maqannaasa qinee inni auqira ufa qimannimianaqa iriaqa.

Oo Isaraee maqannaasa innee qini auqira ufa iriaqa.

<sup>9</sup> Innee sia moo unna anutuna amooqiaqa.

Qini kai qimooqiaqa.

<sup>10</sup> Qinee Yaaweesa inni Anutusa maridaqa.

Qinee inni Isipa maqa maaqaindaraana nifiqee aniafanausa maridaqa.

Innee minara iriseeqa qinee unnannai kai noo raqasaifaqa qinee kai inni narana nimianaara.

<sup>11</sup> Qinee mi ufana amiqimasee qeeqa maqannaasa qimannimiafanaqa sia mi ufana iriqau.

Isaraee maqannaasa sia qini Anutusa ufamau fiqau.

<sup>12</sup> Qinee misa mumuqira oosana qafamaseeqa misa rafuseeqee nári nidimaru mandoosanaki aqiqiafana.

Doo miqooqari misa nári nidimaru manda iriranamau fiqau.

<sup>13</sup> Oo qini maqannaasa naqaa qini ufa iriaqaana.

Isaraee maqannaasa qini aatata fuaqaana.

<sup>14</sup> Misa miqifaqau qinee kai kaqi misa namuqaa rafaafusani.

Misa qini ufa irifaqau misa namuqaauqa narini.

<sup>15</sup> Isaraee maqannaasa qini ufa irifaqau qini Yaaweesara fidiqaa imariasa qini doorinni firaqoo rufiidaqa niqoori saunu araaqini.

Miqoo misa narirafa naaruara mariqini.

<sup>16</sup> Innee Isaraee maqannaasa qini Anutusa ufa amiqimmasee irifaqau qinee amiqira narana sakumma ainaina nimunaigini.

Innee qini ufamau fifaqau qinee oonikinaana ookasaasa anoona adiafaa imarina nimunaigini.

## 82

### *Anutufa uriqarara rakisirafa.*

<sup>1</sup> Anutufa innaarunai suqiranaki uriqaranoo maridanoo misa ufa andeeqanni-maqaidanoo.

Oosana oosana rakisirausa suqiranaki Anutufa nari irirana misa qimannimidanoo.

<sup>2</sup> Innee Isaraee maqannaasa manda rakisirausa innee manda koota masaida sia amiqim-masee ufa rainee maria oosanna miqoo taikaaqa.

Innee sia manda oosana maree mariasa manda oosana auqaaqera fadameena akuaqa, miqi mariana taikaaqa.

<sup>3</sup> Innee sarau imariasa faqa faiqi faiqiuqa faqa ititannimaqaaqa.

Sarau imariasa faqa aupuraranaki mariasa faqa misa amiqimmasee mariaqera dadaaqi-aqa.

<sup>4</sup> Manda oosana maree mariasa nisaukukina mariana mara kaqinni quqannisaqa.

<sup>5</sup> Maa maqanasaa maria siaasausa innee irirana siaisa eendaandirana oosana uqanna maraidaqa asukunakiara foora kai nimariafanoo.

Inni mi manda oosannara andeeqara oosana fannoo maa maqa maaqanaki taikanoo maridanoo.

<sup>6</sup> Qinee Anutusa misara maaqi qidaqa.

Innee faiqi anaaseesaa rakisira saika auqee mariasa Anutusara foora maqasaa uriaraq maridaqa faiqi anaaseesaa rakisi mariafanoo.

Innee aiqamausa qini uriqarara Anutusa faiqi namu mariafanoo.

<sup>7</sup> Innee faiqi faiqi naannaree kaqi kuqifaranoo.

Inni marirafa maqasaa karaambaigauqa faiqi namu kuquafanoo misa marirafa taikaindee inoo inni marirafa taikaannoo.

<sup>8</sup> Oo Anutu, aiqama maqannaasa ani faiqi anaasee marianara anee aniree misasaa rakisi nimaqaa.

## 83

### *Anutufa Isaraee maqannaasa namuqaauqa rafaafu nimaqaani fee innaaru.*

<sup>1</sup> Oo Anutu, sia ufa siaina kasoo ina maria.

Sia anee kaqi muqurina maria.

<sup>2</sup> Qafaa ani namuqaa rakirana uqeeraidaqa.

Aniara fidiqaa imariasa ninuka uqeerasee ani ramoo ramaamma amaqaaidaqa.

<sup>3</sup> Misa umee tipundaarammasee ani faiqi anaasee nariraridaqa.

Anee itita nimaqee marianausa narirara tipundaaridammia.

<sup>4</sup> Misa maaqi qidaqa.

Anifaqa Isaraee maqannaasa naru raurukamasaanaqa sia mariaqa.

Sia moo fannoo misara kaqikaqoo iriaqera doo naaruara misara qaunu saqa.

<sup>5</sup> Misa tipundaarammasee moodaa iriranasaa maridaqa.

Misa ani Anutuna futeeqa aqiraree qimasee moodaanaki kidaqa.

<sup>6-7</sup> Maaqimmasee maqannaasa suqu fifaqa namuqaakidaqa.

Eedooma maqannaasa faqa Isamaeera maqannaasa faqa Mooba maqannaasa faqa Hakari maqannaasa faqa Keebara maqannaasa faqa Amoonna maqannaasa faqa Amareeka maqannaasa faqa Firistia maqannaasa faqa Tiree maqa maaqaki mariasa faqa moodaanaki kammافیفاقا misa Isaraee maqannaasa futeeqararee qidaqa.

<sup>8</sup> Asiria maqannaasa Amoonna maqannaasa faqa Mooba maqannaasa ooqeenaa niqoolndi mariusa aniree misaki ookaammافیفاقا Rootana aiku asauku dadaaqiqa Isaraee maqannaasa namuqaa kamma nimaqaaqau.

<sup>9</sup> Oo Anutu, anee Midianna maqannaasa faqa Siseera maqannaasa faqa Yabina maqannaasa faqa Kisoona nammari afainni narunnandee maseenana misa aiqama naru taikaa.

<sup>10</sup> Misa Eendoora maqa maaqaki fufana anee Isaraee maqannaasara qunaqa nifaqasee narusee sia nikundaqau.

Doo kaqi miqoo quqasoofaqa putaa iqa madaapee kammافیفاقا.

Oo Anutu, maqee maasa darirari mariasa miqi kai mandee narua.

<sup>11</sup> Midianna maqannaasa Isaraee maqannaasa narirarufanoo Gideeonafa misa naru nifaqasee misa karaambaiqaqara Ooreebana faqa Seepana faqa miqanda narundee kai inana maqee maasa darirari mariasa Anutu anee narua.

Mi maqannaasa uriqarara karaambaiqaqara Seepana faqa Saramuna faqa narundee kai masee maasa darirari mariasa narua.

<sup>12</sup> Misa maaqi qimasee manda ufa qiqau.

Maasa Anutuna aiku asauku Isaraee maqannaasa maqa maaqa qeeqara maraanauree qimasee oonuroofana anee misa uriqararawsa narutaikanau.

<sup>13</sup> Oo maasa Anutu, maasa darirara imariasa kookoommara foora fuaqa aqusainaqqa nianai fuaqa. Ufai fannoo andanda fuaqa aqindee masaa.

<sup>14</sup> Ida fannoo nanda qaindee inana maasa darirari mariasa nifaqasaina sandaaqa.

Usau aaqana qumbiaramasaafanoo akara qaindee inana maasa namuqaa nifaqasainaqqa sandaaqa.

<sup>15</sup> Oo Anutu, anee aakuasaa faqa innaarunai darara qirana namu faqa nifaqasaina sandaaqa.

Firaa ufai uqiranannai rufiarana niminaqa rufiasee sandamafuaqa.

<sup>16</sup> Oo Yaawee, anee nisaurirana firaa naaku nimaqainaqqa mina qafamasee quandaki ani afeekara anoonee qiaqa.

<sup>17</sup> Maqee maasa darirari mariasa naaru naaru rafaqaqafu nimaqasee rufiarana misa nimia.

Misa firaa nisauriranaki maridaqa kuquqa.

<sup>18</sup> Oo Yaawee anee miqinaqa maasa darirari mariasa anee kai Yaawee mariannanara iriaqa.

Aniara maa maqa maaqana firaa uriqarara rakisirafa maridanoomifoo qiaqa.

## 84

*Anutuna maaqara indee indee ira innaaru.*

<sup>1</sup> Oo aiqama afeeka faqaa Yaaweeefa, ani amaana maqara kaaqa dididanoo.

<sup>2</sup> Qinee ani Yaaweena amaana maqaki marirara dididanoo.

Qinee Yaaweena amaana maqaki marirara indee indee idaqa.

Qini qimuqusa faqa qifaqa faqa ani kaqi marira Anutunara asasira idi raidaqa.

<sup>3</sup> Oo aiqama afeeka faqaa Yaaweeefa qini karaambaiqa qini Anutufa ufini moo fannoo saanoona fooqaafa ani Anutuna amaana maqaki keeqafinoo ani andau tatufira qainda aqa aanaamu usakaseenoo anaqi maqaidanoo.

<sup>4</sup> Oo Yaawee ani amaana maqaki mariasa firaaqoo asasidaqa aiqama kari ani amooqima amaqaqidaqa.

<sup>5</sup> Oo Anutu, anikinaa afeeka maree maria fasiqa anaseesa asasiranaki maridaqa.

Ani amooqirara Sioonna aaqanai ooru firara nidi marisa misa asasiranaki maridaqa.

<sup>6</sup> Yeerusaree maqusai ooru firaree qimasee afeeka aatata aadana aatata Bakaa noopundu runna ooru fufanoo mi maqa maaqafa moomoo nammari maqakiqari ururee marufaika mafinau.

Aaku dunoonna ufanoo madikaki nammari mandi marinau.

<sup>7</sup> Miqimmasee fimariasa afeekaika mafiqqa Sioonna maqusa moo auqu Yeerusaree maqusai Anutufa aiqama unnaqira anutusa uriqararafa marina qafeefaranoo.

<sup>8</sup> Oo Yaawee Anutufa, aiqama afeeka faqaa Anutufa, qini innaaru qirana iria.

Oo Yakooboona Anutu anee aaqoo quqasee iria.

- <sup>9</sup> Oo Anutu, anee maasa Isaraee maqannaasa karaambaiqa maasa rakiranaki saqariara foora ititaqimaqee mari fasiqana amiqi amiqimma amaqa.  
Anee mina rusandeesamummasee maraqoonafa maridanoo.
- <sup>10</sup> Moodaa faasaana ani amaana maqaki marirafa uriqararafa maridanoo.  
Wan tauseena faasaana kaqinni marirafa oorudupirafa maridanoo.  
Qinee qeeqa Anutuna amaana maqa kooqiki keeqarara dididanoo.  
Manda oosana maree mariasa maaqaki mariranara qikooqaidanoo.
- <sup>11</sup> Yaaweefa qareenara karaambaiqa maasa itita qimaqee marifa maridanoo.  
Mifa narí amiqira dadaaqirana faqa maasa duqu uqeerarana faqa mi qandannai amiqimma qimaqaidanoo.
- Andeeqara aatata fimariasa moo ainainara irafanoo sia amiqira ainaina nimiranara qaoo qiannoo.
- <sup>12</sup> Oo aiqama afeeka faqaa Yaaweefa ani saqariki mariasa firaa asasiranaki maridaqa.

## 85

*Narí maqannaasa rakisinnimaqaani fee innaaru.*

- <sup>1</sup> Oo Yaawee, ani maqa maaqara ani amuda qanau.  
Anee Isaraee maqannaasa kafaa reemindeemirimma nisanau.
- <sup>2</sup> Anee aneenna maqannaasa mandoosana akiqara minninnisanau.  
Misa aaqarana akiqara aiqama rukannisanau.
- <sup>3</sup> Anee ooqai aanoo qiqiunnana faqa aneenna qarana qarana idara foora qeeqeeuna faqa maqee minnisaananoo.
- <sup>4</sup> Oo maasa asumu marirana qimi marianna Anutufa, anee kaifaa maasa sooqbaan-dumeeqee quqaqiseenana aneenna oori runirana maasasaa marina taikaa.
- <sup>5</sup> Anee naaru naaru maasara aanoo qinnaree.  
Ani aanoo qirafa sia fee dauni taikaannoo fee.
- <sup>6</sup> Anee maasa kafaa afeekaikamma qimaqasainaqa maasa ani maqannaasa ani amooqianaara.
- <sup>7</sup> Oo Yaawee, aneenna maasara naaru naaru aidirana uqaqifiqaseenana aneenna dadaaqirana qiminaqa asumu marirana maraa.
- <sup>8</sup> Qinee Yaaweena Anutuna ufa iridaqa.  
Mifa maasa narí aiku asaukuara sia inneeqa ooqeenna furufarira aatata kafaa fifaqa qinee qeeqa asoosana inni nimianauree qidanoo.
- <sup>9</sup> Yaaweefa nariara naaquqai faqa qeerairi mariasa kuqaa asumu mararara deedaqinoo maridanoo.  
Miqinoo marifanoo mina dadaaqira marirafa maasa maqa maaqaki aiqama atinai mariannoo.
- <sup>10</sup> Miqimmafinanoo Anutufa maasara aidirafa faqa maqasaa qaraa fasiqqa mapukusee marira oosana faqa moodaanaki kifaranoo.  
Yaaweena andeeqara oosana faqa maqasaaqaraasa asoosara faqa narí difaa difaa narí difaa difaa ifaranoo.
- <sup>11</sup> Maqasaaqaraasa Anutuna ufasaa nifu mundusee firafa innaarunai ubeekaifanoo innaarunaindari Anutuna andeeqarafa qumuree misa dadaaqinoo.
- <sup>12</sup> Miqimmafinanoo Yaaweefa maasa amiqi amiqimanimaqaannoo.  
Maasa maqa maaqaki nara ainaina rairaa inoo reemindeemiriannoo.
- <sup>13</sup> Andeeqara oosana fannoo faiqi moora foora Yaaweena afunni fidanoo mifa fuaninna aana afisidanoo.

## 86

*Dadaaqiani fee innaaru.*

- <sup>1</sup> Oo Yaawee, qinee afeeka siaisa, dadaaqirana siaisa marunnanara anee qini innaaru qirana irisee dadaaqinnanara anoona ufa qimaqimia.
- <sup>2</sup> Qinee qifu mundusee ani ufamau kai fimarunaua marunnanara kuqiranakinaana mara kaqinni quqaqisaa.  
Qinee ani ainainira faiqi ani saqariki marunnanara qini asumu mara quqaqisaa.
- <sup>3</sup> Anee qini Anutufa mariananoo, anee qini qifauama qimaqa.
- <sup>4</sup> Qinee faasaambaasaana aniara innaaru qimamaqaidaqa.
- <sup>4</sup> Qini innaaru qirafa anee iannannai kai oorufi marinara oo Yaawee, aneenna ainainira faiqi qini asasirana qimia.
- <sup>5</sup> Oo Yaawee, anee maasa amiqimma qisaseenana maasa numoo minni qisee mariananoo.  
Aniara innaaru qimariasara ani misara amuqusirafa firaafa maridanoo.



<sup>6</sup> Oo Yaawee, qini innaaru qirana iria.

Dadaaqianeera nammeera qimarunnana irisee dadaaqia.

<sup>7</sup> Anee qini innaaru iri mariannanara qinee ummaarakii maridaqa ani aaraidaqa.

<sup>8</sup> Anaamuruki unna anutusa moomoosa maridaqa sia moo fannoo misa qambaanaani ani fooqaafa uriqararafa maridanoo.

Sia moo unnaqira anutufa anee auqoonna ainainausa auqaannoo.

<sup>9</sup> Oo Yaawee, aiqama maqannaasa anee auqu quqoonna maqannaasa, aiqamausa aniree ani afusaa niqoori saunu arafi ani amooqifaranoo.

Misa ani auqu qareenarana amooqifaranoo.

<sup>10</sup> Anee kai firaa afeeka faqaafa mariananoo naaquqara ainaina auqee marianafa mariananoo.

Aneennaraa kai Anutufa mariananoo.

<sup>11</sup> Oo Yaawee, anee qiniara auqaannee qimarianna ainainna qima qimia. Miqimma sainaa qinee ani ufamau mapukusee fua.

Qini daamua qinaqa kaaqa andeeqasee ani ainainiranaki maria.

<sup>12</sup> Oo Yaawee, qini Anutufa, qinee qeeqa qimuqusa aiqamannai ani amooqianaura.

Qinee naaru naaru ani auqu qareenarana amianaura.

<sup>13</sup> Anee qiniara amuqisirafa firafa maridanoo.

Anee qini maqa ameemaanaani faiqi madikakinaanara foora marunnana mareeqee kaqi mariranaki quqaqisaananoo.

<sup>14</sup> Oo Anutu, ramooramaa imariasa qini dariraridaqa.

Kaaqa fidika ruqiee mariasa suqufifaqa qini kuqa darirara randaidaqa.

Miqi mariasa sia ani Anutunara iridaqa.

<sup>15</sup> Oo Yaawee, anee kaaqa amuqusi marianna Anutufa faqa kaaqa afaari marianafa faqa mariananoo.

Anee sia dauni aanoo qimarianafa mariananoo. Ani maasara amuqisirafa faqa aniki mapukusee marirafa faqa fiqaranoo maridanoo.

<sup>16</sup> Oo Anutu, qinee unannai quandafi qifauarana qimia.

Qini qinoofa iundee kai iqa qinee faqa ani ainainira faiqi marunnnanara aneenna afeeka faqa asumu marirana faqa qimia.

<sup>17</sup> Oo Yaawee, anee qini amiqi amiqimma qimaqee mariannanara moo ainaina auqainnanannai uqaqifiqainaa qafaa.

Anee qini amiqi amiqirana faqa dadaaqirana faqa qiminaqa qiniara fidiqaa imariasa nisaufifaranoo.

## 87

### *Yeerusaree maqusa amooqiiqau.*

<sup>1</sup> Sioona aqaanasaa naaquqarana saa Yaaweefa nari maqusa auqusee maridanoo.

<sup>2</sup> Yaaweena Yeerusaree maqusara aidirafa aiqama Isaraee maqa maaqakinaa maqusauqara aidirna uriaaqaranoo maridanoo.

<sup>3</sup> Oo Anutuna maqusa iria, mifa aniara amiqira ufa kai qidanoo.

<sup>4</sup> Qinni ufa irimariasa nisaanariqa Firistia maqannaasa faqa Tiree maqannaasa faqa Eetioopia maqannaasa faqa mara Yeerusaree maqannaasa namufaqa moodaanaki quqasee nisaana ruanaura.

<sup>5</sup> Sioona maqusara maaqi qifaranoo.

Aiqama maqannaasara mi maqusaanaasee qifaranoo.

Miqi qifanoo uriqarara afeeka faqaafa mi maqusana afeekaikamma saannoo.

<sup>6</sup> Anutufa aiqama fasiqa anaasee nuqu nari papiqaki akara ruannoo.

Misakiqari akaqusara nari ufa irimariasa Sioona maqusanaasa namufaqa nisaana ruannoo.

<sup>7</sup> Sioona maqusaki maria fasiqa anaaseesa maaqi qimasee idi reefaranoo.

Maasa aiqama amiqi amiqirana oosana Sioona maqusa maridanoo.

## 88

### *Isaraee maqannaasa Anutufa dadaaqianifeera innaaru qiqau.*

<sup>1</sup> Oo Yaawee, anee qini asumu maree marianna Anutufa mariananoo.

Faasaana anee dadaaqianneera innaaru qidaqa iki raqaidaqa. Eendaki faqa aniara innaaru qidaqa.

<sup>2</sup> Qini innaaru qirana iria.

Dadaaqianneera innaaru qimarunnana iria.

<sup>3</sup> Qini oosana oosana ummaara darimarifaqa qusasaa kuqanaura.

4 Qinee kuqirari mariasa naanna raidaqa.

Qini afeeka aiqama taika finoo.

5 Qini kuqirausa namu faqa rarisameeqee quqaqaafaqa maridaqa.

Qinee faiqi kuqa naruqaasara foora madikaki maridaqa.

Anee faiqi kuqufuasara sia iridana sia dadaaqi mariananoo.

Qinee misara foora maridaqa.

Ani rakisi qimaqaranakiqari nianai maridaqa.

6 Oo Anutu, anee qini mareeqeenana meemaqoo maqa ameemaanai madikakiara foora aqu qisaananoo.

Asukunaki meemai uqanna aqu qisaananoo.

7 Ani aanooqirafa firaqoo qini radandamu masaananoo, ooruku nammari amakau rinoora foora qini rafaqaqafinoo.

8 Anutu anee qini daaqa qiqaonduqara qianaqa qini minniqiseea.

Anee qini mandaika uqanna maqisa saanaqa qini qiqaonduqa qiniara rufieea.

Qinee rumberanakiara foora maridaqa sia amana idukuaki sandaanaura.

9 Aupuraidaqa qiki raqee marunanoo qifu mandaikidanoo.

Oo Yaawee, aiqama kari qinee qisauku anee iannannai uqeerasee dadaaqianeera innaaru qidaqa.

10 Oo Anutu, aneenna naaquqara ainaina naqimmasee kuqirausa uqannifiqeenaree.

Kuqirausa amanee findifi ani amooqifaree. Sia miqifaranoo.

11 Madikaki mariasa ani naaru marira amuqusiranara ufa qida fee. Sia ufa qidaqa.

Maaniki mariasa ani mapukusee marira oosana ufa qidee. Sia ufa qidaqa.

12 Ani naaquqara ainaina asukunaki mariasa qafaidee. Sia qafaidaqa.

Kuqiranaki finausa ani andeeqarana qafeefaree. Sia qafeefaranoo.

Minara anee qini titaqisainaqa sia kuqua.

13 Oo Yaawee, anee qini dadaaqianneera aaraidaqa.

Aiqama kananaana qinee aniara innaaru qidaqa.

14 Oo Yaawee nanaree anee qini minni qisaidanee.

Nanaree aneenna oori afiri qini qiqaafanoo qimasee kukeeqaidanee.

15 Qinee kumaaraasaqari manda ummaara darinoo aniifanoo maqee doo kuqirana afaisaa minisaifaqa maridaqa.

Anee moomoo aupurarana qimiananoo mifa qini qimudaani ummooquka maseenoo.

16 Ani firaq aanooqirafa doo qini rafaqaqafinoo.

Ani manda darirafa qini mandaikamma qimaqeenoo.

17 Anee miqi mariana aiqama faasambaasaana manda fasiqauqa qini fiqy fiqy tookusiqa maridaqa nammari mandinoo maridanoora foora iqa maridaqa.

Mi ummaarasa firaq nammari amakauriara foora inoo firaqoo qini rafaqaqafu qimaqeenoo.

18 Qini qifaaqasaa qiqaonduqara anee qianaqa qini minniqisaafanoo asukuna fannoo kai qini daaqa qaraa qikaqaafasaara foora maridanoo.

## 89

*Aiqama maqa maaqaki ummaara kambiqaiifaqa ree maria idifa.*

1 Yaaweena naaru naaru maasara firaq amuqusiranara qinee faqa naaru naaru idi raanaura.

Qinee ani mapukusee marira oosana naaru naaru kooroommasee qimannimianaura.

2 Qinee aniara maaqi qimasee iridaqa.

Ani maasara amuqusirafa naaru naaru afeekaikinoo mariannoo.

Ani mapukusee marira oosana fannoo innaarunara foora atukaranoo marinara qimannimianaauranoo.

3 Anee Anutufa maaqi qinau qinee qeeqa moodaanaki kira ufa qinee rusandeesamu masee maraafanna fasiqanasaa Dafidinasaa quqeefee qinau.

Qinee qeeqa ainainira faiqi Dafidinara qima afeekaikiqa.

4 Mifa maaqi qinau. Qinee anisaqari rakisira saika oosana arasaanaqa naaru naaru ani aiku asuku kambiqainausa miqikai iqa fifaranoo.

Naaru naaru ani aiku asuku kai rakisirausaikamma nimaqaanaura.

5 Oo Yaawee, innaarunai maria angiroosa ani amiqira ainainiranara idi raidaqa amooqi-daq.

Innaarunai naaquqarausa mariasa faqa ani mapukusee marira oosana idi raidaqa amooqidaqa.

6 Sia moo fannoo innaarunai marifa ani Yaaweena fooqaafa maridanoo.

Sia innaarunai mari ainainausaikiqari moo ainaina fannoo ani fooqaafa maridanoo.

<sup>7</sup> Innaarunai suqiranaki mariasa aniara firaqoo rufiidaqa.

Mina fiqumma mariasa firaqoo minara naaquqaiqa rufiidaqa.

<sup>8</sup> Oo Yaawee, aiqama afeeka faqaa Anutufa mariananoo.

Sia moo fannoo ani afeeka fooqaafa maridanoo.

Oo Yaawee anee aiqama ainainaki afu munduqannaqoo kai fimarianafa mariananoo.

<sup>9</sup> Oo Anutu, anee ooruku nammari aanooqira amakaurirana rakisi marianafa mariananoo.

Ooruku nammari firaqoo aanoo qinoo amakaurifana anee Yaaweefa rafaqaafi marianafa mariananoo.

<sup>10</sup> Anee ooruku nammariki mari firaa naaquqara aandauna radamunafa mariananoo.

Anee aneenna afeeka asaukunnai aneenna namuqaa furufara mandaana rakee mafiqaa moodaa moodaa mafia.

<sup>11</sup> Innaaruna anindi maridanoo.

Maa maqa maaqafa faqa anindi kai maridanoo.

Maa maqa maaqafa faqa minaki mari ainainausa faqa anee kai quqaqoonafa maridanoo.

<sup>12</sup> Anee Yaaweefa suani afu dinni dinni ataaqeeni auqu quqaqoonafa maridanoo.

Qeeramoonna aaqana faqa Taboora aaqana faqa faiqira foora ani Yaaweena auqu irisee asasira idi raidaqa.

<sup>13</sup> Oo Anutu, anee firaa afeeka faqaafa marianafa mariananoo.

Anee uriqarara afeeka faqaafa mariananoo.

<sup>14</sup> Ani rakisinnimaqarafa andeeqaranasaa faqa amana amana kai raina nimaqaranasaa faqa mundinoo maridanoo.

Faiqi aanaaseera nimuqusirafa faqa mapukusee marira oosana faqa anee Anutufa auqaana aiqama ainainnaki maridanoo.

<sup>15</sup> Faiqi anaasee ani Yaaweenara idi raranannai ani amooqimariasa misa firaqoo asasiranaki maridaqa.

Oo Yaawee misa ani afusaa ani eedoo qiramau fimariasa misa asasiranaki maridaqa.

<sup>16</sup> Misa faasaambaasaana ani auqara asasidaqa.

Misa ani andeeqaranara irisee firaqoo nasuridaqa.

<sup>17</sup> Anee kai maasa afeeka qimianaqa maasa firaqoo aniara asasidaqa.

Anee aneenna aidiranannai maasa firaa afeeka nimianaqa maasa qeeqa namuqaa urinnaaqareeqa.

<sup>18</sup> Oo Yaawee, anee maasa ititaqimaqaaninna fasiqana rusandeesamummasee mara qiminai.

Anee Isaraee maqannaasa naaquqara andeeqara Anutufa maasa maqasaa karaambaiqa qimunafa mariananoo.

<sup>19</sup> Oo Yaawee ooqai anee qainasaa aniki mapukusee maru ainainira faiqisa maaqi qimasee qimanniminai.

Qinee moo amudaanai qimari rakira fasiqana dadaqirana amiqa.

Qinee mi kumaaraana faiqi anaasee qambaanaindaraana rusandeesamummasee marasee Isaraee maqannaasa rakisira afeeka amiqa.

<sup>20</sup> Qinee qeeqa ainainira faiqi Dafidina naaquqara fadameenannai akiqa amoondunnai adiaunannannai uriqararankaamma amaqqeeqa.

<sup>21</sup> Qini Yaaweesa afeeka fannoo aiqama kari mina faqa mariannoo.

Qini afeeka fannoo mina afeekaikamma amaqaannoo.

<sup>22</sup> Mina namuqaauqa sia uqanna rakiranaki mina rafaqaafu amaqqeeqaranoo.

Manda oosana maree mariasa faqa sia amana mina ooru muqufi seefaranoo.

<sup>23</sup> Qinee Yaaweesa mina namuqaa radamusaanura.

Minara fidiqaa imariasa qinee kuqa kai narusaanura.

<sup>24</sup> Qinee minara didimarinaga mina faqa naaruara marianaaura.

Rakiranaki qinee mina dadaqiananoo uriqaranoo.

<sup>25</sup> Mina maqa maaqa dinni oosu Mediteranea ooruku nammari mariannoo, dinni oosu Eufarateesa firaa nammari mariannoo.

<sup>26</sup> Mifa maaqi qimasee qini Yaaweesa qimaqimiannoo.

Anee qini qikoofa mariananoo.

Qini Anutufa mariananoo, anee qini asumu qimi marianafa, qini ititee marianna ooni faandaamura fara foora mariananoo.

<sup>27</sup> Qinee mi fasiqana Dafidina utaaqama saananoo qini ooqa faiqira foora mariannoo.

Aiqama maa maqa maaqanakinaa karaambaiqaauqa uriqarara karaambaiqa mariannoo.

<sup>28</sup> Qinee qeeqa qima afeekaikira ufa mi fasiqana Dafidinasaa quqasaanoo naaru naaru mariannoo.

Qini moodaanaki kira ufa mina faqa naaruara mariannoo.

<sup>29</sup> Innee Dafidinasaa aruaki oonu marinausa naaruara karaambaiqaiki faranoo.

Misa innaarunara foora naaruara maridaqa Isaraee maqannaasa rakisi nimaqeeffaranoo.

<sup>30-31</sup> Dafidina faiqi namu qini sanda ufa minnisee qini irirana mau sia fiqa misa qini naakapara ufa rukiasee, sia qumaraifaqa aupurarana nimianauro.

<sup>32</sup> Qinee misa aaqarana akiigara aupurarana nimianauro.

Qinee qianaqa misa nari aaqarana akiigara nidafrana mareeffaranoo.

<sup>33</sup> Qinee misa aaqarana akiigara ummaara nimaqa sia qini Dafidinara qimuqusirana taikaanuro, kaqi mariannoo.

Qinee qeeqa qima afeekaikirana sia minnisaanuro kaqi kai mariannoo.

<sup>34</sup> Qinee moodaanaki kira ufa mina faqa qiafannana sia aikatamasee kaqinni fuanauro.

Qeeqa dookiqari qiafanna ufana sia moo mafi quqaanuro, miqoo kai marianauro.

<sup>35</sup> Qinee moodaa kari qeeqa naaquqara andeeqara oosana iriseeqa qinee minara kuqaa fee qimasee maaqi qiqa, sia unnufa Dafidina qimamianauree qiqa.

<sup>36</sup> Miqianaqa Dafidinasaa aru akinausa naaruara marifara.

Qinee misasaa naaruara suaniara foora qaida rakisi nimaqaanuro.

<sup>37</sup> Quqoona fannoo miqoo naaru naaru maridanoo, qinee auquafanna ainainara kooroo imarindee inoo qinee Dafidinara qima afeekaikiafanna ufana miqinoo mariannoo.

<sup>38</sup> Oo Yaawee, anee miqi qimasee qima afeekaikammaseenana kafaan aneenna rusandeesammasee maraqoonna fasiqausa qini Dafidisara arana qaifana minni qisaananoo.

Anee qini firaqoo ameesuqu qimaqaananoo.

<sup>39</sup> Anee aneenna ainainira faiqi qini faqa moodaanaki kira ufa qimaqoonnana ruki-aananoo.

Anee qini uriqarara qafee qimunnana qumareeqee kookoomaki aqusaananoo ikairi reenoo.

<sup>40</sup> Anee qini faandaamura aiqama rakeekaa iananoo.

Anee qini afeeka maaqauqa rapeemma saananoo naakundu kammafinoo.

<sup>41</sup> Akaqausa qinee marunnaqoo aiqaree fidaqa qini ainaina ummuaramamaree fidaqa.

Qini qiqoonnana minara uteeti qidaqa.

<sup>42</sup> Yaawee, anee qini namuqaa dadaaqianaqa misa rakiranaki uriqaree.

Anee namuqaa dadaaqianaqa misa asasidaqa.

<sup>43</sup> Anee qini duru saamu nammari arasaananoo.

Anee qianaqa rakiranaki misa qini rafaqa fia.

<sup>44</sup> Anee qini karaambaiqa duqu marina maraananoo.

Miqimmaseenana anee qini ufa irimarunna qarina maqasaa aquseenana uti-tigaananoo.

<sup>45</sup> Anee qini kumaaraa marirana ateeqa qusaramasaanaqa dauni asooqaikunana qisaurirana qamunnara foora dukunimma qimaqaananoo.

<sup>46</sup> Oo Yaawee, kisaaqasaa fee kukeeqana marinnaree.

Ani aanooqirafa kisaaqasaa fee idarafoora qaida mariannoo fee.

<sup>47</sup> Qini marirafa qusaranoo maridanoo anee minara iria.

Anee maasa aiqama kuquanausa auquqisaannara iria.

<sup>48</sup> Yafasiqa fee sia kuquannoo fee.

Yafasiqa fee kaqi maridanoo nari afeekannai nari madikaki firanara qeerairiannoo fee.

Sia moo fannoo miqirafa mariannoo.

<sup>49</sup> Oo Yaawee, yaafee anee ooqi qiniara aidimariannana kooroo imari ainainafa maridanoo fee.

Anee Dafidinara qima afeekaikammaqoonnafa yaifee maridanoo fee.

<sup>50</sup> Oo Yaawee, ani ainainira faiqi ataasa ataasa qimamaqee marianara anee sia qaunua.

Aiqama maqannaasa manda aasaandaana ufa qimimariafaqa marunnaara, anee minara faqa sia qaunua.

<sup>51</sup> Oo Yaawee anee rusandeesammasee maraqoonna karaambaiqanara aasaandaana ufa qidaqa.

Mifa aiqama tinai nifaqa qafamasee ataasa ataasa qidaqa.

<sup>52</sup> Naaru naaru amooqirafa Yaaweenaindi mariani. Kuqaa kafa kuqaa.

## **Mina Anaqiannaa (Book 4)**

- 1 Oo Yaawee, ooqai uqanna maasa qikeeku qikaaku qifaqnausa faqa maasa faqa maaqara foora ina marunafa mariananoo.
- 2 Ooqai aaqana faqa maa maqa maaqafa faqa sia marufana anee marinau. Anee ooqai mariunna Anutufa kafaa naaru faqa marinna Anutufa mariananoo.
- 3 Anee Yaaweefa faiqi mareeqee kafaa maqaiki marianafa mariananoo.
- 4 Anee qinana faiqi faiqi kafaa quandaki maqaikammaiqee qimarianafa mariananoo.
- 5 Anee wan tauseenna aukuanara moodaa faasaanee qimariananoo. Anee minara eenda faasaana aiqaree maqi qimariananoo.
- 6 Anee Yaaweefa nammari aulinoo faiqi maree findee imariananoo, misa qainasaara foora qusasaa mariqa kai kaqi taikaidaqa. Faiqi nimmuru kananaana amiqi amiqindee iifanoo eendifanoo ammundaidanoo.
- 7 Kananaana kambiqafinoo amiqi amiqidanoo. Eendimarifanoo doo aadanusinoo rooraiqidanoo.
- 8 Ani Anutuna aanooqirafa maasa faiqi faiqi turaurinoo. Ani tikooru maasa firaqoo rufiqaidaqa.
- 9 Maasa aaqarana aneenna afusaa aiqama quqasee qafee marianafa mariananoo. Maasa kukeeqafi maraunna mandoosanafa ani afusaa kaaqa qaranaki akoosaqa maridanoo.
- 10 Ani aanooqirafa maasa marirana qusarama qimaqaidanoo. Maasa qeeqa maa maqanasaa marunna aukuanana moodaannai daannamma neera foora iqa taikaidaqa.
- 11 Maasa marianna aukuanafa qaaramoo fasiqa niku nisauku taikasee qisauquqara taikasee 70 aukuaana kai marianaara. Afeekaikiasa ootupamasee qaara faqa qaara faqa fasiqa niku nisauku taikasee 80 aukuaana maraidaqa. Maasa miqimmasee aukuanaki maridaqa ummaaraki faqa kadaapiki faqa maridaqa. Maasa miqimmasee aukuanaki marunanoo mi aukuanafa kai kaqi taikaifanoo maasa marirafa faqa kai kaqi taikaidanoo.
- 12 Oo Anutu, yafee ani firaa aanoo qira afeekana oosana iriannoo fee. Sia moo fannoo iriannoo. Yafee faiqi anaasee anee aanoo qimariana rufiee marianara iriannoo fee. Sia moo fannoo iriannoo.
- 13 Oo Yaawee, maasa qeeqa maa marirafa qusaranoo marinara qima qiminaqa iria. Miqimmasainaqa maasa irirafa irirana faqaasa iriranara foora mariani.
- 14 Oo Yaawee, anee maasara aanooqirafa kisaqaasaa fee mariannoo fee. Maasa aneenna ainainira faiquqara amuqusiani.
- 15 Oo Yaawee, aneenna naaru naaru marira amuqusirana aiqama kananaana maasa umbiqa nimia. Miqimma niminaqa maasa kaqi marianna aukuaana asasira idi raidaqa nasurianaura.
- 16 Oo Yaawee, anee moomoo aukuaana dariunnana amana kai asasirana maqee qimia. Mandaikamaqimaqee unna aukuaana amana kai asasirana qimia.
- 17 Oo Yaawee anee kaaqa idaaqira ainaina auqu quqoonnana maasa aneenna ainainira fasiqauqa nifusaa koorommasee uqannifqaa. Aneenna areenara afeeka faqa maasa faiqinamu qinaiqi mara uqannifqaa.
- 18 Yaaweefa anee maasa Anutufa, ani amiqi amiqirafa maasaa mariani. Maasa aiqama ainaina auqee marunnana anee anoonaka maqisaa. Eeoo, maasa ainainirana mapukunnisaa.

## 91

*Anutufa maasa itita qimaqee marifa maridanoo.*

- 1 Yafee Yaaweefa itita qimaqaani fee qimasee fimarifa faqa yafee aiqama afeeka faqaa Anutuna itita nimaqaranaki maridafee.
- 2 Misa Yaaweenara maaqi qifaranoo, mifa maasa afeeka kukeeqara maqusa maridanoo fee qidaqa. Mifa maasa Anutufa marifaqa minakai saqarikidaqa.
- 3 Mifa namuqaa umee mandainainakinaana ani asumu maraannoo. Manda kuqira auriranakinaana mareeqee kaqinni quqaannoo.
- 4 Mifa kookooraanara foora nari aqoosannai ani itita amaqaannoo. Anee mina aqoosaki keeqafinana itita amaqarana paqurinnaranoo. Mina mapukusee marira oosana fannoo ani saqari kamma amaqeenoo ani faandaamurara foora mariannoo.

- <sup>5</sup> Anee miqina maridana eendaki rufiee maria ainainausara sia rufieennaranoo.  
 Faasaana tautummasee ani mandaikamma amaqara ainainnara faqa sia rufieennaranoo.
- <sup>6</sup> Eendaki faiqi narimari auriranara faqa sia rufieennaranoo.  
 Faasaana narimari manda ainainnara faqa sia rufieennaranoo.
- <sup>7</sup> Ani aaqa wan tauseenna fasiqa kuqaki aqufifaranoo kafaani asauku uqannai maria fasiqausa ten tauseenna kuqiranaki fifaranoo.  
 Mi narirafa faqa sia uqanna ani aaqa aniannoo.
- <sup>8</sup> Aneenna afunnoo manda oosana maree mariana akiiqara narirana qafeennaranoo.
- <sup>9-10</sup> Anee uriqarara Anutunara itita qimaqee mari fee qiannanara faqa Yaaweenara qini afeeka kukeeqara maqusa fee qimasee keeqafuannanara sia moo manda ainaina anisaa aqufuannoo, sia moo ummaara ani maaqa aaqa aniannoo.
- <sup>11</sup> Anee miqinanoo Anutufa nari qangeerooqara qinaqa misa ani marirana niranasaa rakisi amaqeeffaranoo.
- <sup>12</sup> Mi qangirooma nari nisaukunnei ani qumaraifana sia oonisaa aiku rupaurinnaranoo.
- <sup>13</sup> Anee raioona faqa manda sakani faqa nimuaqa aiku reennaranoo.  
 Raioona firaana faqa ukadiqa faqa aikunnei radamusainafa sia ani arifaranoo.
- <sup>14</sup> Anutufa maaqi qidanoo, qinee qiniara nidimarisa manda ainainakinaana qumareeqee kaqinni quqaanaura.  
 Qiniara karaambaiqee qimasee irimarisa qinee itita nimaanaura.
- <sup>15</sup> Misa qini daaraifaqa maqi qimasee kaifaa qimamianaura.  
 Misa ummaarakari marifaqa misa faqa maridaqa dadaaqammianaura.  
 Qinee misa mandainainakinaana uqerasee uriqarara nuqu nimianaura.
- <sup>16</sup> Qinee misa marirana kisaqaikamma nimaqasee manda ainainakinaana mareeqee kaqinni quqaanaura.

## 92

### *Anutuna amooqira idi.*

- <sup>1</sup> Oo Yaawee ani amooqirafa firaqoo uriqararafa amiqira oosana maridanoo.  
 Ani uriqarara auquara irisee idinnai ani amooqirafa amiqira oosana maridanoo.
- <sup>2</sup> Aiqaama kananaana ani amuqusirana kooroo irafa amiqira oosana maridanoo.  
 Ani mapukusee marira oosana faqa aiqama eendaki kooroo irafa amiqira oosana mariannoo.
- <sup>3</sup> Piri-punnannai ani amooqira idi rarafa amiqirafa maridanoo.  
 Ufireena fuaqaida amiqira naundasaa idi raidaqa ani maasara amuqusirana kooroo idaqa.
- <sup>4</sup> Oo Yaawee, anee auqonna afeeka ainainausa qini asisirana qimidanoo.  
 Qinee anee asaukunnei auqonna ainaina qafamasee ani amooqira idi raidaqa.
- <sup>5</sup> Oo Yaawee, anee auqonna ainainafa firaafa uqanna maridanoo.  
 Ani irirafa firaafa farumara foora meemai maridanoo.
- <sup>6</sup> Irirana siaifa maa ainainnara sia iridanoo.  
 Furufari marifa mifa faqa sia iridanoo.
- <sup>7</sup> Maa ainainnara faqa sia iridaqa. Aqara oosana maree mariasa amiqira andandara foora dauni kambiqaidafa.  
 Manda oosana maree mariasa reemindeemiriranaki maridaqa.  
 Misa miqiga mariinaqa naaru amiqi uqanna masee kuridifaranoo.  
 Irirana siaisa minara sia iridaqa.
- <sup>8</sup> Oo Yaawee anee naaru naaru kaaqa uriqararafa mariannanara kuridi nimaqeenaranoo.
- <sup>9</sup> Oo Yaawee maasa iridaqa ani namuqaauqa kuqaa uqanna kuqifaranoo.  
 Aiqaama manda oosana maree mariasa anee rafaqaqafu nimaqeenaranoo.
- <sup>10</sup> Kaasau burimakau akoona afeeka amana kai qini faqa qimimariananoo.  
 Anee asisirannai qini amiqi amiqimma qimaqaananoo.
- <sup>11</sup> Qini qifu fannoo qini namuqaa rafaqaqafu nimaqarana qafeenoo.  
 Manda oosana maree maria namuqaasa qeeqa daaqoonnai misa faqa rirana iriqa.
- <sup>12</sup> Andeeqee mariasa asumu saqari kambiqeenoo amanee muna munindee idaqa.  
 Misa innooqa fiqa. Rebanonna maqa maaqakina mari sidaa saqariara foora kisaqa marifaranoo.
- <sup>13</sup> Mi andeeqara fasiqausa Yaaweena amaana maqa naambeeqaqaraa saqariara foora amiqimmasee kambiqaidafa.  
 Misa Anutuna amaana maqa naambeeqaira foora kambiqafi moomoo kidaqa.
- <sup>14</sup> Mi andeeqara fasiqa anaaseesa asooaqeeqa saqariara foora kaqi qaama ireffaranoo.

Misa fuka saqariara foora afeekaikiqa maridaqa amanee muna muna ifaranoo.

<sup>15</sup> Miqianannoo Yaaweefa andeeqarafa marinara kooroo idanoo.

Yaaweefa qini afeeka itita qimaqee mari ooni fara foora maridanoo.

Sia moo aaqarafa minaki maridanoo.

## 93

*Anutufa karaambaiqa maridanoo.*

<sup>1</sup> Yaaweefa karaambaiqa maridanoo.

Mina afeeka faqa kaaqa uriqarara andeeqara oosana faqa mina qamunnara foora afisinoo maridanoo.

Maa maqa maaqafa mapukinoo maridanoo sia amana furufariannoo.

<sup>2</sup> Oo Yaawe, ani ufa irira qaari ooqai oosana arooqooqari afeekaikino maridanoo.

Maa maqa maaqafa sia marunaki anee ooqai naaru naaru mariranaki marunafa mariananoo.

<sup>3</sup> Oo Yaaweefa, ooruku nammari fannoo amakauridanoo firaagoo ufa qidanoo.

Mi amakaurirafa firaagoo narisaa narisaa arinoo darara qidanoo.

<sup>4</sup> Uriqarara Yaaweefa fira afeekannoo innaarunaindaraa ainaina rakisidanoo, ooruku nammari amakaurirana faqa arusee uriqararafa uqanna maridanoo.

Ooruku nammari firaagoo amakauri mari afeekana Yaaweefa uraaqarafa maridanoo.

<sup>5</sup> Oo Yaawe, ani sanda ufa naaruara marifa maridanoo.

Ani amaana maqa naaquqarafa naaru naaru marianinafa maridanoo.

## 94

*Anutufa aiqamausa raina nimaqee marifa maridanoo.*

<sup>1</sup> Oo Yaawe, anee manda oosana akiqara imarianna Anutufa mariananoo.

Anee miqi mariannanara aneenna arana qarana kooroommasainaqqa qafaqa.

<sup>2</sup> Oo Yaawe, maasa maa maqa maaqanasaaqaraasa ufa rainee marianafa, anee findi fua.

Doo findi finana nari noori uqereee mariasa miqi mariana akiqara nimia.

<sup>3</sup> Oo Yaawe, kisaqasaa fee manda oosana maree mariasa asasida marifaree.

Kisaqasaa fee misa nasu nasurifaree.

<sup>4</sup> Ummuari mariasa kisaqasaa fee ramoo ramaa ida nari manda oosana maree mariana amoo amoo qifaree.

<sup>5</sup> Oo Yaawe, miqi mariasa ani faiqi anaasee radamidaqa.

Ani aiku asauku mariasa nari uriqararanannai misa rafaqa fidaqa.

<sup>6</sup> Mi manda oosanna faqaasa adeedaana faqa asaqaafai faqa narimariasa maridaqa, faiqi faiqi maasa maqa maaqaki ani mariasa faqa kuqa nari mariasa maridaqa.

<sup>7</sup> Miqi mariasa Yaaweenara quandaki maaqi qidaqa.

Yaaweefa sia maasa qiqafaidanoo.

Isaraee maqannaasa Anutufa sia minara iridanoo, mana mana kai midanoo.

<sup>8</sup> Qini faiqi anaasee naqaa fee ifaqee maa furufarira oosana auqee fee.

Innee furufarira irirana faqaasa mariasa marifanoo.

Yairee fee innee irirana maree faree.

<sup>9</sup> Naaqoo auqu quqoo fasiqanara Anutunara innee minara sia ufa irimarifee fee qidafee.

Inni nifu auqu quqoo fasiqanara Anutunara innee minara sia qafee marifee fee qidafee.

<sup>10</sup> Aiqama maqannaasa Anutufa rakisi nimaqaidanoo innee minara sia misa andeeqaannoo fee fee qidafee.

Mifa irirana uqannifiqee mari fasiqafa maridanoo Anutunara innee minara sia irirana faqaafee fee qidafee.

<sup>11</sup> Yaaweefa aiqamausa umee irirana iridanoo.

Misa irirafa dapikira irirafa kai marinara faqa mifa iridanoo.

<sup>12</sup> Oo Yaawe anee irirana maraanifeera qima ami marianna fasiqafa asasiani.

Anee aneenna sanda ufa uqafiqee marianna fasiqafa mifa faqa asasiani.

<sup>13</sup> Anee misa ummaara maraafana asoosana nimimariananoo.

Miqidana anee manda oosana maree mariasara madika deedaqi mariananoo.

<sup>14</sup> Yaaweefa nari faiqi anaasee sia ameesuqu nimaqaannoo.

Mifa sia uqanna narindikiqa mariasa ameesuqu nimaqaannoo.

<sup>15</sup> Mikari ufa andeeqa nimaqee mariasa kaifaa andeeqa nimaqee faranoo.

Aiqama andeeqara marirana faqaasa misa mi andeeqa nimaqara ufana qafamasee amiqirafee qimasee pooduqee faranoo.

<sup>16</sup> Qinee findifiqa manda oosana mareeusa qini darirarufaqa itita nimaqaaneera iafanaqa yafee moo fannoo qini dadaaqinau. Sia moo fannoo qini dadaaqinau.

- Qinee findifiqa aaqee mariasa qaoo qianee riafanaqa yafee moo fannoo qini dadaaqinau.  
 Sia moo fannoo qini dadaaqinau.  
 17 Yaaweefa sia qini dadaaqinaqau qini darusaifaqau qinee kai kaqi kuqirausa ufa siaisaki marunaqini.  
 18 Qinee aqufuanaaree qunana Yaawee aneenna naaru marira amuqusiranannai qini gumaraanoo.  
 19 Qini daunduraki ummaara darimarifaqa moomoo irirana irimarunana anee Yaaweefa qini daundura uqbiqasee asasirana qimi mariananoo.  
 20 Oo Yaawee anee eendaandira siaasauqa faqa sia amana misa faqa moodaanaki ainaini mariananoo.  
 Misa aaqee maria sandufausa marasee unna qimasee maasa andeeqara sanda ufee qianara aqaqidaqa.  
 21 Miqi maria manda siaasausa moodaanaki suqufiqa andeeqarusa mandaikamma nimaqarara tipundaaridaqa.  
 Mi manda siaasausa aaqarana siaisa mara kuqiranaki quqidaqa.  
 22 Misa miqi marifanoo Yaaweefa qini afeeka kukeeqara maqusa maridanoo.  
 Qini Anutufa qini itita qimaqara ooniara foora marifaqa qinee minaki kukeeqaidaqa.  
 23 Yaaweefa mi manda siaasausa nariqa aaqarana akiqara nimiannoo.  
 Misa aaqarana akiqara Yaaweefa kuridi nimaqaannoo. Yaaweefa maasa Anutufa misa kuridi nimaqaannoo.

## 95

### *Anutuna amooqira idi.*

- 1 Doo aniaqa, aniraifaqa Yaaweena amooqira idi ramamaqaa.  
 Mifa maasasaa ititee marifa marinara firaaqoo asasira idi raqa.  
 2 Doo aniaqa, aniraifaqa dufi dufi qirana namu faqa mina afusaa oonu raa.  
 Asasammasee amooqira idi namu faqa mina afusaa oonu raa.  
 3 Yaaweefa afeeka faqaa Anutufa maridanoo.  
 Mifa aiqama unna anutusa rafaqafu nimaqaseenoo afeeka karaambaiqa maridanoo.  
 4 Mifa aiqama maa maqa maaqana rakisirafa maridanoo.  
 Mifa maqa ameemaanai ooni aamarauqa faqa kisaqa aqaqanaqa faqa rakisi marifa maridanoo.  
 5 Mifa ooruku nammari faqa maqa faqa nari auquqoona minaindi marifanoo minasaa rakisidanoo.  
 6 Doo aniaqa, aniraifaqa mina oorinni kummara mafi amooqia.  
 Yaaweefa maasa auqunara maasa mina oorinni qiqoori saunu arafi mina amooqia.  
 7 Mifa maasa Anutufa maridanoo.  
 Maasa mina sipsipara foora maridaqa.  
 Maasa mina sipsipara foora mina rakisi nimaqaranaki maridaqa.  
 Oo maqee uqanna mina ufa iriaqa.  
 8 Inni nikeeku nikaaku Meeribaa maqasaa undee sia iaqa.  
 Innee sia misa naanna ramasee inneeqa nimuqusaki qini ufara ititiaqa.  
 Inni nikeeku nikaaku Masaa aadana maqasaa qini Anutusa kafaa kafaa qimanammasee qafoondee sia iaqa.  
 9 Misa migoo aadana maqa maaqaki marida qinee firaa ainaina auqaafannana qafamasee sia iriqau, kaqi qimanammasee qafaqau.  
 10 Qaara fasiqa niku nisauku taikasee 40 aukuanaki qinee Isaraee maqannaasara qikoo uqanna qoofaqa qinee Anutusa misara maaqi qiqiafana.  
 Maa maqannaasa kaaqa qaara irirana mau fimarisa maridaqa.  
 Misa qini sanda ufa minnisee moosaa fimariasa maridaqa.  
 11 Minara qinee Anutusa qeeqa aanoo qiranakiqari maaqi qimasee qima afeekaikiqa.  
 Misa qini idooara maqusaki sia uqanna keeqeefaranoo.

## 96

### *Anutufa uriqarara karaambaiqa maridanoo.*

- 1 Innee fuka idi Yaaweena rama amaqaqa.  
 Aiqama maa maqanasaaqaraasa Yaaweena idi rama amaqaqa.  
 2 Innee Yaaweenara idi raqa. Mina auqu amooqiaqa.  
 Mifa maasa kuqiranakinaana asunu marainara aiqama faasaana mi amiqira fasaasa ufana koorooiaqa.  
 3 Mina areenaranara maa maqanasaa mariasa qimannimiaqa.



Mifa firaa afeeka naaquqara ainaina auqoonara aiqama faiqi anaasee qimannimiaqa.

<sup>4</sup> Yaaweefa firaafa uriqararafa marinara mina amooqirafa faqa miqikai masee uriqararafa mariannoo.

Aiqama fasiqa anaasee unnaqira anutusara naaquqee marina minisee Anutuna uqannara firaagoo naaquqaani.

<sup>5</sup> Anaamuru mariasa unnaqira anutusa fifau nariqa auqusee amooqidaqa.

Miqi mariafanoo maasa Yaaweefa innaaruna faqa minakinaa ainaina faqa auqu quqoofa uriqaranoo maridanoo.

<sup>6</sup> Kaaqa qara areenarafa faqa uriqararafa faqa mina fiqy fiqy iqa maridaqa.

Amudaanaiqirafa faqa kaaqa idaaqirafa faqa mina amaana maqaki qumbiqanoo maridanoo.

<sup>7</sup> Innee aiqama maqannaasa Yaaweena afeeka faqa areenarana faqa amooqima amaaqa.

<sup>8</sup> Yaaweena areenara auqu amooqiaqa.

Innee amaana maqaki keeqaani qimasee dufi dufi qima amaqee fandinna ainaina uqirafa keeqaa.

<sup>9</sup> Naaquqara karaambaiqa kooroo inaga aiqama maa maqanasaaqaraasa mina oorinni naindiri reemarinaqaniqoori saunu araaqa.

Aiqama maqannaasa mina afusaa rufaida naindiri raani.

<sup>10</sup> Innee Yaaweefa uriqararafa marinara aiqama maqannaasa qimannimiaqa.

Maa maqa maaqafa afeekaikamma mapukinoo marinara sia amana rundoorundiannoo.

Mifa aiqama maqannaasa andeeqasee amana amana kai andeeqa nimaqaannoo.

<sup>11</sup> Innaarunai maria ainainausa Yaaweenara asasiaqa.

Maqa faqa minakinaa ainainauqa faqa asasiaqa.

Ooruku nammari anee faqa minakinaa noodaanna ainaina faqa Yaaweenara faaqa ridaqa amooqiaqa.

<sup>12</sup> Usau maqa maaqa faqa minaki maria ainainausa faqa aiqama asasiaqa.

Nandaki saqariuqa faqa nasuridaqa asasifaranoo.

<sup>13</sup> Yaaweefa maqasaaqaraasa rakisi nimaqarara anireenoo andeeqaranannai faqa amana amana kai ira oosannannai faqa rakisi nimaqaannoo.

## 97

### *Anutufa uriqarara rakisirafa.*

<sup>1</sup> Yaaweefa karaambaiqa marinara maa maqa maaqafa asiasiani.

Ooruku nammari mari afumausa faqa asasiaqa.

<sup>2</sup> Eekara oonnamu faqa asukuna faqa Yaaweena fiqy fiqy inoo maridanoo mina kukeeqa amaqaaidanoo.

Mifa andeeqaranannai faqa amana amana kai raina nimaqararannai faqa faiqi anaasee rakisi nimaqaaidanoo.

<sup>3</sup> Ida fannoo mina oorinni fidanoo mina namuqaa mina fiqy fiqy imariasa qamataika nimaqaaidanoo.

<sup>4</sup> Mina aakuasaa fannoo aiqama maqa maaqaki kaaqa qamannimaqaifanoo, maa maqafa qafeenoo rufiaifanoo aindiri raidanoo.

<sup>5</sup> Aiyama maqa maaqa quqoo Karaambaiqana Yaaweena afusaa aaqanauqa tasirisirimma taikaidaqa.

<sup>6</sup> Innaaruna fannoo Yaaweena andeeqaranara kooroo ifaqa aiqama maqannaasa mina areenarana qafaidaqa.

<sup>7</sup> Nisaukunnai auqimaria unna anutusa nimoo qimariasa Anutufa uqanna misa mareeqee nisauriranaki quqaaidanoo.

Unna anutusauqa aiqama quandaki Yaaweena oorinni kummarama fuaqa.

<sup>8</sup> Yaaweena andeeqa nimaqara ufa marinara Sioona maqusanaasa faqa Yuda maqannaasa faqa asasidaqa.

<sup>9</sup> Oo Yaawee, anee aiqama afeeka faqaafa aiqama maqa maaqaki mariasa rakisi nimaqee marianafa mariananoo.

Aiqama unnaqira anutusa faqa firaagoo urinnaaqararafa uqanna mariananoo.

<sup>10</sup> Yaaweefa mandoosanaa fidiqaaq imariasara aididanoo.

Mifa nari ufamau fimariasa misa mariranasaa rakisida ititannisaidanoo.

Mifa manda oosana maree mariasa nisaukukinaana mara kaqinni quqannisaidanoo.

<sup>11</sup> Kaaqa qarafa andeeqarausasaa kaaqa qaidanoo.

Andeeqara marirana faqaasaki asasirafa maridanoo.

<sup>12</sup> Innee andeeqaramau fimariasa, Yaaweefa auqoo ainainara irisee asasiaqa.

Naaquqara Anutufa auqoo ainainara oonumafi irisee dufi dufi qima amaaqaqa.

## 98

*Anutufa maa maqa maaqakinaa fasiqa anaasee rakisirafa.*

- <sup>1</sup> Yaaweefa moo kamaakira amiqira ainaina auqoonara innee fuka idi rama amaqaaga. Mifa nari afeekannai faqa kaaqa naaquqara afeekannai faqa nari namuqaauqa naruseenoo urinnaaqarama finau.
- <sup>2</sup> Miqimmaseenoo Yaaweefa rakiranaki nari uriqararana koorooinau. Aiqama maqannaasa nifusaa Yaaweefa mandainainakinaana mara kaqinni quqeemari afeekana kooroo inau.
- <sup>3</sup> Yaaweefa Isaraee maqannaasara sia taikaaninna amuqusirana faqa mapukusee marira oosanara faqa nimianauree qimasee qimaqoona sia qauninau kaqi afu mundusee fimarinau.
- Aiqama maqa maaqa ati ati marusa rakiranaki maasa Anutuna afeeka doo qafaqau.
- <sup>4</sup> Maa maqa maaqanaki mariasa innee aiqama Yaaweena asasira idi ramamaqaaga. Innee firaqoo asasira idi faqa amooqira idi faqa ramamaqaaga.
- <sup>5</sup> Innee amooqira idi Yaaweena ramamaqaaga. Piripunna aridaqa mina amooqiaqa.
- <sup>6</sup> Ufireena faqa sipsipa aanainnai auqira ukeenannoo faqa fuaqaidaqa, Yaaweena maasa karaambaiqa fee qidaqa mina oorinni mi namunannai asasamma amaqaaga.
- <sup>7</sup> Ooruku nammari faqa minakinaa aiqama ainaina faqa Yaaweena irisee faaqaruqa. Maqa maaqa faqa minakina maria fasiqa aanaaseesa faqa aiqama ainainauqa faqa faaqa fuisee iqa asasiaqa.
- <sup>8</sup> Nammari uqanna faqa Yaaweena oorisa nisaaku aridaqa asasiaqa. Amuaqu namuqa faqa moodaanaki kammafi Yaaweena oorisa susummamaqaaga.
- <sup>9</sup> Yaaweefa maa maqa maaqanaki mariasa ufa andeeqa nimaqarara quminara asasamma amaqaaga.
- Nari andeeqaranannai faqa amana amana kai andeeqaranannai faqa maqasaa qaraasa andeeqannisaannoo.

## 99

*Anutufa uriqarara karaambaiqa.*

- <sup>1</sup> Yaaweefa karaambaiqa marifaqa aiqama fasiqa anaasee rufiaafanoo naindiri raidanoo. Mifa angiroouqa oorinnaaqaree meeraqoo nari ufa irira qarisaa oofuqaqee marifanoo maqa kasidanoo.
- <sup>2</sup> Yaweefa Sioona maqusaki afeeka faqaafa maridanoo. Aiqama maqannaasi fasiqa anaasee urinnaaqaramafi maridanoo.
- <sup>3</sup> Minara aiqamausa mina firaa uriqarara auquara amoo qifaranoo. Mifa kaaqa naaquqarafa maridanoo.
- <sup>4</sup> Afeeka faqaa karaambaiqa anee andeeqaranara kai aidimarifa maridanoo. Anee andeeqarana kai Isaraee maqa maaqaki quqaananoo. Anee andeeqarana faqa amana amana kai rainannimaqarana faqa maree mini quqaananoo.
- <sup>5</sup> Yaaweena maasa Anutuna amooqiaqa. Mina ufa irira qaari aqa oonuree minara innaaru qiaqa. Mina andeeqarafa naaquqarafa maridanoo.
- <sup>6</sup> Mooseesa Aaroonasa mina aanaiqikira fasiqaqara mariqau. Samueerafa faqa Anutunara innaaru qimarufa marinau. Minamusa Yaaweena innaaru kiqari aaroonasa iriseenoo nari qimanniminai.
- <sup>7</sup> Yaaweefa onnamuqiqari misa ufa qimanniminai. Misa mina naamuqira ufa faqa sanda ufa faqa iriseeqa mimau kai fimariqua.
- <sup>8</sup> Oo Yaawe maasa Anutu ani faiqi anaasee aniara innaaru qiafana anee qimannimi-ananoo.
- Anee aaqarana akiqara minninnisee marianafa mariannana misa uqannifiqaa. Anee misa aaqarana akiqara apurarana nima mariannana faqa uqannifiqaa.
- <sup>9</sup> Minara innee Yaaweena maasa Anutuna amooqiaqa. Mina naaquqara aaqanasaa mina amooqiaqa. Yaaweefa maasa Anutufa andeeqarafa naaquqarafa maridanoo.

## 100

*Anutuna amooqira idi.*

<sup>1</sup> Aiqama maa maqanasaa mariasa Yaaweenara asasira idi ramamaqaaqa.

<sup>2</sup> Asasirana namufaqa Yaaweenana amooqiaqa.

Innee asasira idi ramammaree mina oorinni aniaqa.

<sup>3</sup> Innee sia Yaaweenara aunuaqa, mifa kai Anutufa maridanoo.

Mifa kai maasa auqinau, maasa minaindi maridaqa.

Maasa mina faiqí anaasee mina sipsipara foora maridaqa.

<sup>4</sup> Innee mina amaana maqa faandaamura kooqiki oonuree dufi dufi qimammareeqa keeqaqa.

Oorureeqa amaana maqa kooqiki faqa dufi dufi qidaqa amooqiaqa.

<sup>5</sup> Yaaweefa andeeqarafa maridanoo, mina faiqí anaaseera amuqusirafa naaru naaru marifa maridanoo.

Mina mapukusee marira oosana naaru naaru marifa maridanoo.

## 101

*Karaambaiqa Dafidina qima afeekaikira ufa.*

<sup>1</sup> Ani sia taikara amuqusira oosanara faqa amana amana kai nimira oosanara faqa idi raidaqa.

Oo Yaawee, ani idi rama amaqaيداqa.

<sup>2</sup> Qini marirafa andeeqasee ufa siaisa marianaura.

Miqiqa marianana oo Yaawee anee yairee fee qinee marunnannai qumuree dadaaqinna-ree.

Qinee anukara marira qeeqa maaqaki marianaura.

<sup>3</sup> Sia qinee naaruura moo manda aaqara oosanara eedoo qianaura.

Anutuna ufara nimeesa uqimariasa oosanara qinee fidaqaammidaqa.

Sia misa manda oosana kaqikaqoo faqa keeqaanaura.

<sup>4</sup> Qinee unna oosana faqaasa futeeqa nianai auqanaura.

Qinee sia manda oosana maree mariana kaqikaqoo faqa dadaaqianaura.

<sup>5</sup> Nári niqoonausara unnufa qimasaida nupiqnupita qimaria fasiqa anaaseesa qinee misa taika nimaqaanaura.

Nári noori uqereee mariasa faqa aanoo masee nári iriranamau fimariasa faqa sia qini daaqa marifara nianasaa futeeqa aquanaura.

<sup>6</sup> Anutuna ufara nifun mundusee fimariasa qinee misara didiannoo.

Misa qini faqa qini maaqaki marifaranoo.

Aaqarana siaisa andeeqara mau kai fimariasa misa qini ainainira fasiqa anaasee marifaranoo.

<sup>7</sup> Unna ufa qimariasa sia uqanna qinee marunnanaki marifaranoo.

Qaara iriramau fimariasa faqa sia qini qifusaa marifaranoo.

<sup>8</sup> Qini maqa maaqaki aaqara oosana maree mariasa qinee aiqama kari randasee misa taika nimaqaanaura.

Anutuna maqusaki manda oosana maree mariasa qinee niqqaanaura.

## 102

*Ummaaraki mari kumaaraana innaaru.*

<sup>1</sup> Oo Yaawee qini innaaru qirana iria.

Qini qikiraqarafa anee dadaaqianneera anee marianannai fimarina iria.

<sup>2</sup> Qinee mandainainaki marianana sia aneenna oori kaqinni rafusu aqua.

Aneenna aaqoo rammatini mambi iria.

Qinee ani aaraanana dauni maqi qimasee qimaqimia.

<sup>3</sup> Qinee auriranaki faqa namuqaa dariranaki faqa marunanoo qini marirafa munara foora dauni taikararidanoo.

Qini qifaqa idara foora muqurinoo maridanoo.

<sup>4</sup> Qinee aadana andanda maqamau faiqeera foora maqasaa aqufiqa, qinee naranara qikooqaiqa daarara fidaqa.

<sup>5</sup> Daarara marunanoo qini qifaqa asaqufifaqa qimudaani aanaaqi maridaqa, firaqoo annadannada qidaqa maridaqa.

<sup>6</sup> Kaasau ufina faiqí sia maria maqa maaqanaki marindee qinee iqa maridaqa.

Qinee karoondara foora ooqeenna naakunduki kukeeqa maridaqa.

<sup>7</sup> Qinee qeeqaraa ufina maaqa ataufakaqa mariara foora iqa ummaaraki maridaqa.

Sia faiqeega kaqi andeequmoorida maridaqa.

<sup>8</sup> Qini namuqaauqa faasaambaasaana manda ufa kai qimidaqa.

Qini ataasa ataasa qima qimaqee mariasa qini duqunnai akaqausa niquraraidaqa.

9-10 Anee qini aanoo qima qimaqee mariananoo qini narana fannoo dandara foora marifaqa naidaqa.

Qeeqa daiquni daukunu namu faqa nammari naidaqa.

Anee qini mareeqee nianai aqu qisaanaqa maridaqa.

11 Qini maqee marirafa nimanandara foora mariifanoo eendifanoo taikeera foora qinee iqa maridaqa.

Qinee nimmuruara foora aadanusiqa rooraiqidaqa.

12 Kafaa anee Yaaweefa, naaruara uriqarara karaambaiqa marianaqa naaru kambiqain-  
ausa kaqi aniara iriqa fifaranoo.

13 Anee findifinana Sioonna maqusanaasara qimudao qinnaranoo.

Mi maqusanara qimudao qira aukuaana doo anireenoo.

Maa maqee uqanna nari aukuaana maridanoo.

14 Ani ainainira fasiqauqa Isaraee maqannaasa Sioonna maqusara ridaqa.

Mandaikinoo naakundukinoo marifaqa kaqi minara qimudao qidaqa.

15 Aiqama maqannaasa Sioonna maqusa dadaaqirana qafamasee Yaaweena auquara rufieefaranoo.

Aiqama maa maqanasaaqaraa karaambiqauqa misa Yaaweena mi areenara afeekanara naaquqaannoo.

16 Yaaweefa Sioonna maqusa kafaa usakasee miqoo nari uriqarara afeeka kooroo iannoo.

17 Mifa qumureenoo Isaraee maqannaasa fasiqa anaasee sarauirusara irinoo misa innaaru qirana faqa iriseenoo dadaaqiannoo.

18 Yaaweefa auqoo ainainara papiqasaa akara rumasainaqa naaru anisaa ani aruaki kambiqainausa qafamasee mina amooqiaqa.

19 Yaaweefa nari sandaaqai naaquqarannai marunnaindari maqasaa mara miami qafanau.

Mifa innaarunaindari maqasaqaraasa mara miami niuqinuu.

20 Kuqiranaki fuaqeeera karabusaki quqaqoosa annadannada qimarufanoo mifa iriseenoo iduku nisanuu.

21 Miqinaqa Sioonna maqusaki misa Yaaweena auqu kooroommasee qimannimifaranoo. Sioonna moo auqu Yeerusaree maqusaki misa mina amooqifaranoo.

22 Moomoo maqannaasa moodaanaki Yeerusaree maqusaki suqufiqa Yaaweena amooqifaranoo.

23 Qinee kumaaraa fasiqa marunanoo Yaaweefa qini afeeka taika qiseenoo qini marirana mara qusa reenoo.

24 Miqimmasaifaqa qinee maaqi qiqa.

Oo qini Anutu qinee kumaaraa fasiqa maridaqa, sia qini mara aquqisaa.

Oo Yaawee, anee naaru naaru marianafa mariannoo.

25 Ooqai kuradoo aukuaana anee maa maqa maaqana poosauqa faakanara foora atukaranau.

Aneenna asaukunnai innaaruna auqu quqoonafa mariananoo.

26 Anee aiqama ainaina auquqoonafa taikafuannoo.

Aneenna kai kaqi marinnaranoo.

Mi aiqama ainainausa nauraa qammunnara foora anaqi anaqiannoo.

Anee mi nauraa ainainausa ooqeenaa qamunnara foora aqusainaqa taikafifaranoo.

27 Anee Yaaweefa naaru naaru miqi kai ina marinanoo ani marirafa sia taikarafa mariannoo.

28 Maasa ani ainainira fasiqauqa marunaqa maasa faiqi namu ani asumu mariranaki marifaranoo.

Misasaa ani aruakinausa ani ititannimaqarafa misa fiq u fiq inoo mariannoo.

## 103

### *Anutuna aidirafa.*

1 Oo qini qimana, Yaaweena amooqia.

Qini daunduraki marianna aiqama ainainafa Yaaweena amooqia.

2 Oo qini maraquna, Yaaweena amooqia.

Mifa paapaa qida qimimarinara sia qaunua.

3 Mifa aiqama qini aaqarana akiqara minni qisee marifa maridanoo.

Mifa qini aurirana aiqama taikaqisee marifa maridanoo.

4 Yaaweefa qini madikakinaana uqeeera qiseemarifa maridanoo.

Mifa amuqusiranannai faqa nari qimudao qiranannai faqa qini amiqi amiqimma qimaqaidanoo.

- <sup>5</sup> Yaaweefa qini mariranaki amiqira ainainannai qumbiqa qimaqaidanoo.  
 Miqimmasaina qini marirafa aneesara foora fuka qisausi kambiqafinaqa kumaaraara foora kafa marianaara. (Dafidifa quqamuara qifaqa maasa ufa sia miqinoo marifaqa aneesara kai qiqqa.)
- <sup>6</sup> Uriqararasa nimeemaanai ummaarakai mariasa Yaaweefa misa ufa irisee dadaaqianoo.  
 Mifa misa nari ainaina andeeqasee nariqa kai nimidanoo.
- <sup>7</sup> Yaaweefa nari qimiruna Mooseena kooroommasee uqa fiqanau.  
 Nari firaa afeeka ainainna auqoona Isaraee maqannaasa uqannifiqasoofaqa qafaqau.
- <sup>8</sup> Yaaweefa qimudaoo qirana faqa amuqusirana faqa faqaafa maridanoo.  
 Mifa sia kai kaqi aanooqidanoo.
- <sup>9</sup> Mina naaru marira amuqusirafa firaafa qumbiqanoo maridanoo.  
<sup>9</sup> Yaaweefa sia kisaacaqasaa inni manda oosanara nifairiannoo.  
 Kafa mina aanooqirafa sia naaruara mariannoo.
- <sup>10</sup> Mifa sia maasa aaqarana amana kai daridanoo, oorudupimasee daridanoo.  
 Sia maasa aaqarana akiqara mina amana kai daridanoo, ureeqasee darinoo.
- <sup>11</sup> Maqasaqari innaarunai kisaacaqasaa marina amana kai Yaaweefa nari amuqusirana nariara rufiee mariasa nimidanoo.
- <sup>12</sup> Suani ururee marina faqa keeqee marina faqa nianasaa marifanoo mina amanasaa Yaaweefa maasa mandainaina mara agu qisaidanoo.
- <sup>13</sup> Faiqi nikausa faiqiara firaaqoo nimuqusidaqa.  
 Miqikai inoo Yaaweefa nariara rufiee mariasara firaaqoo amuqusidanoo.
- <sup>14</sup> Yaaweefa maasa auqunara iridanoo, maasa maqannai taikaaninna ainairannai auqunara iridanoo.
- <sup>15</sup> Maasa faiqi faiqi marirafa maaqimminoo maridanoo.  
 Maasa fifau adandara foora maridanoo.
- <sup>16</sup> Maasa marirafa andandara foora urureenoo afufeedaara maffifanoo amiqi amiqinoo  
<sup>16</sup> marifanoo ufai fuaqasaifanoo kai kaqi taikaidanoo.
- Taikafinana sia kaifaa qafeennaranoo.
- <sup>17</sup> Yaaweenara eerairida mina ufa qaindusi mariasasaa mina amuqusirafa naaru naaru mariannoo.  
 Mina andeeqarafa misaki faqa misa faiqi namuki faqa misa ninaiqimaraki faqa misa nifaqnausaki faqa mariannoo.
- <sup>18</sup> Yaaweena moodaanaki kira ufamau fimariasa faqa sia mina sandaufa minnisee kaqi mi sanda ufamau fimariasa faqa, misasaa faqa mina andeeqa nimaqarafa mariannoo.
- <sup>19</sup> Yaaweefa nari rakisi nimaqara qaari innaarunai quqaqqaifanoo afeekaikinoo maridanoo.  
 Mifa aiqama maqannaasa uriqararafa maridanoo.
- <sup>20</sup> Yaaweena afeeka qangeerooqqa mina ufara eedoo qimariasa innee Yaaweena qimannimira ufa irimariasa innee Yaaweena amooqiaqa.
- <sup>21</sup> Innee innaarunai angeerooqqa moomoo maridaqa mina ainaini mariasa mina aidiramau fimariasa innee aiqamausa Yaaweena amooqiaqa.
- <sup>22</sup> Yaaweefa auqu quqoo ainainausa, mifa aiqama atinai rakisi nimaqee marisa innee faqa mina amooqiaqa.  
 Qini maraquna anee faqa Yaaweena amooqia.

## 104

### *Aiqama ainaina auquna amooqirafa.*

- <sup>1</sup> Oo qini qimana anee Yaaweena amooqia.  
 Oo Yaawee, qini Anutu, anee firaafa uqanna mariananoo.  
 Anee qammunnara foora kaaqa qareenarana faqa uriqararana faqa afisirafa mariannoo.
- <sup>2</sup> Yaaweefa anee kaaqa qarana qumaree qamunnara foora afisi marianafa mariananoo.  
 Kafa anee innaaruna qumareeseera maaqara foora usakaanano.
- <sup>3</sup> Yaawee anee aneenna maaqa innaaruna maarinni mari nammariinasaa usakaanano.  
 Asuru fannoo ani rakira karara foora marifana anee minaki nimariananoo.
- <sup>4</sup> Anee ufai qaqaosasa oogu marifi nimarianafa mariananoo.  
<sup>4</sup> Anutu anee ufai faiqiara foora niqiqanaqa ani ufa mara maree fidanoo.  
 Aakuasaa faqa ani ainainira faiqiara foora maridanoo.
- <sup>5</sup> Yaawee anee maa maqa maaqana maaqa poosara foora rusisoonanoo afeekaikinoo maridanoo naaruara sia kasiannoo.

- 6 Oo Yaawee, oogai anee ooruku nammari quqasoonano aiqama maqa maaqa qa-munnara foora dukuninau.  
 Aiqama aaqanauqa faqa rafaauqa finau.
- 7 Anee aanoo qimasee qaoo qunaqa nammariuqa rufiasee sandaqa.  
 Ani innaarunai qirana iriseeqa doo sandamaqaraasa mafiqau.
- 8 Mi nammalisa anusaa qari qumuree anee mariaqee qimaqoonna noopundunaki kai maridaqa.
- 9 Oo Anutu, anee oosuqoonnamau nammari fannoo marida naaru naaru sia fiaaqararana amana mariannoo.  
 Mi oosirafa nammari ititasainano sia kafa maqa maaqa rafaauqa fuannoo.
- 10 Yaawee anee qunaqa maqakiqari nammari uqa urureeqa noopundu runna qumidaqa.  
 Mi nammalisa aaqana aikundanai fiq u aiqidaqa ooqufidaqa.
- 11 Oosana oosana aandaqa faqa mi nammalisa naaqeera qumidaqa.  
 Kaasau doonkiuqa faqa mi nammalisa nimaqaara aadanusi marina quqeenaqeeera qumidaqa.
- 12 Ufniuuqaindi mi nammarina afaiqara saqariki aanaamu usakasee minaki maridaqa ufa qidaqa.
- 13 Anutu anee aneenna onnamukiqari aaku adiaananoo aaqanauqa saa aqufifanoo ani amiqi amiqirafa maqa maaqaki qumbiqaidanoo.
- 14 Anutu anee aaku adiasaanano aandaqa neefandinna andandausa kambiqaidanoo.  
 Mi aakufa faiqi neemaria narannana afu amifanoo kambiqaidanoo.  
 Miqimasaiqano faiqi nari nara ainaina ummaqaidanoo.
- 15 Faiqi fannoo wainna qaqaama ummaqusee tiqisee tatisee wainna anoona naifanoo mina amuqusa fannoo asaidanoo. Mifa oorifa fadameena ooriki aku usaifanoo oori amiqi amiqidanoo.  
 Mifa feemu uquseenoo naifanoo amuaquinoo afeekaikidanoo.
- 16 Yaaweefa Sidaa saqariuqa Reebanoona maqa maaqaki ummaqusoofanoo marufaqa Yaaweena saqari fee qimariqau.  
 Aaku moomoo mi saqarisasaa aqufifaqa amiqi amiqidaqa.
- 17 Mi saqarisaki ufniuuqa aniraida aanaamu usakaidaqa.  
 Noonaafeesoona fooqaa ira ufi faqa miqoo moo saqari tookuseena fooqaa ira saqariki aanaamu usakaidaqa.
- 18 Kaasau mimmiuqa uriqarara aaqanasaa misa quqaqoo qoo maridaqa.  
 Mi aaqanasaa mataqooma fooqaa ira aandaqa ooni afooiranauqa aundurai maridaqa.
- 19 Anee Yaaweefa quqoonna auqu quqaqoonano aukuaana rainaidanoo.  
 Suani faqa auqu quqaqoonano aiqama kari nari keeqaaninnanara iridanoo mimau kai fidanoo.
- 20 Oo Yaawee, anee eendirafa mariannee qunano eendirafa anifanoo nandakinaa kaasau aandaq aana nidaqa.
- 21 Kaasau aandaq auqu raioona Anutufa amu narannara faaqariqanidaqa randaidaqa.
- 22 Suani ururafaqa mi aandausa oonu maree ani maree nari faiqee mariana kiaqa faiqaidaqa.
- 23 Faiqaafaqa faiqi anaasee kafa findififaqa nari ainainirannai oonuree ainainiqa fima riafanoo eendidano.
- 24 Oo Yaawee, anee moomoo ainainatia auqu quqoonafa marianano.  
 Aneenna amiqira iriranannai kai aiqama ainaina auqu quqoonafa marianano.  
 Anee moomoo kasi mari ainainna auqu quqaqoonafa maa maqa maaqana qumbiqanoo maridanoo.
- 25 Ooruku nammari dinni dinni fiq fiq firaana quqaqoonafa maridanoo.  
 Minakinaa aandaq ainaina kasimarina firaana faqa kaqikaana faqa moomoo uqanna usidaqa sia amana nisaana rirana amana maridanoo.
- 26 Miqiga mariafaqa sipauqa mi nammarina amuaqumau oonuree aniree idaqa.  
 Moo fira aandaq anee auqusee ooruku nammari sararianee qimasee auquqoonafa maridanoo.  
 Mina auqu Reeviatanna maridanoo.
- 27 Mi aiqama ainainausa ani Yaaweenara narana nari nee marianara qiafana nimimarianano.
- 28 Anee Yaaweefa misa narana nimianaqa mara naidaqa.  
 Anee nimianaqa naafanoo nimuaqu idanoo.
- 29 Oo Yaawee anee misa ameesa uqunnimaqasaanaqa misa rufiidaqa.  
 Anee misa naidoo taikannimaqaanaqa misa kuqiqa kafa maqaikidaqa.
- 30 Anee aidoo aiqama ainaina nimianaqa misa kasirana maraidaqa.

Maa maqa maaqanasaa aiqama atinai mari ainainausa fukaikamanimaqee mariananoo.

<sup>31</sup> Yaaweena areenarafa naaru naaru marida kai mariani.

Nari auqu quqoo ainainausara asasiani.

<sup>32</sup> Mifa maqasaa mara miami qafainara maqa fannoo rufiasee kasidanoo.

Asaukunnai aaqana ati auqainara idamuna ururaidanoo.

<sup>33</sup> Qinee Dafidisa kaqi marunna kamuqoo Yaaweena idi raanaura.

Qini daanna kaqi mari kamuqoo qeeqa Anutuna amooqira idi raanaura.

<sup>34</sup> Qini asasirafa Yaaweefa marinnaindari qumi marinara qinee idi raannanara mifa asasiani.

<sup>35</sup> Aaqee marinausa maa maqa maaqanakigari taikaaqanani.

Manda oosana faqaasa sia mariaqanani.

Oo qini maraquna Yaaweena amooqia.

Yaaweena amooqia.

## 105

*Anutunara faqa nari faiqi aanaaseera faqa qidanoo.*

<sup>1</sup> Oo innee, Yaaweena dufi dufi qimamaqaa.

Mina uriqararanara kooroo iaqa.

Innee mifa auqoo ainainnara aiqama maqannaasa kooroomma nimiaqa.

<sup>2</sup> Innee Yaaweena idi ramamaqaida mina amooqia.

Mifa idaaqira ainaina auqoonara qima nimiaqa.

<sup>3</sup> Maasa Yaaweenaindi marunnanara asasiaqa.

Innee minara amooqi mariasa asasiaqa.

<sup>4</sup> Innee dadaaqiranara Yaaweena qafaiфанoo nimiani.

Innee maqee maqee mina amooqiaqa.

<sup>5-6</sup> Innee Yaaweena ainainira fasiqa Abarahaamana akeeku akaaku mariasa mariafanoo.

Anutufa rusandeesamummaqaaisa Yakooboona faiqi namu mariasa, innee mifa amiqira

ainaina auqoonara faqa sia faiqi auqaaqaa ira ainaina auqoonara faqa mina

naamuaqira ufara faqa iriaqa.

<sup>7</sup> Yaaweefa maasa Anutufa maridanoo.

Mina naamuaqira ufa aiqama maqa maaqaki mariasa iriaqeeera maridanoo.

<sup>8</sup> Yaaweefa nari moodaanaki qima afeekaikira ufa sia aunuannoo, kaqi mina naaru naaru irinoo fuanoo.

Wan tauseenna oosana kambiqainausara Yaaweefa nari qima afeekaikira ufa sia aunuannoo naaru naaru misasaa mariannoo.

<sup>9</sup> Yaaweefa nari moodaanaki kira ufa Abarahaamana faqa qimasee amuna sia minnisaannoo mimau kai fuannoo.

Isakeena faqa qima afeekaikira ufa amuna faqa sia minnisaannoo kai mimau fuannoo.

<sup>10</sup> Yaaweefa Yakooboona moo auqu Isaraeerana moodaanaki kira ufa amufa naaru naaru mariannoo.

<sup>11</sup> Yaaweefa misa faqa moodaanaki kira ufa maaqi qinau, qinee Kannaana maqa maaqa ani amiananoo mifa ani faiqi namu anaiqimaraindi kammianoo.

<sup>12</sup> Ooqai Yaaweena aiku asauku Isaraee maqannaasa oodaa maridaqa Kanna maqa maaqaki anaamuruara foora misa qambaana mariqau.

<sup>13</sup> Isaraeerana akeeku akaaku maaqa maaqa aiqama maqusa oonuree aniree iqa nimarigau.

<sup>14</sup> Miqi marufaqa qinee Yaaweesa qumee misa rakisi nimaqee mariafana sia moo fannoo misa ummaara nininau.

Qinee misa saara karaambaiqauqa aanoommasee qaoo qimannimaqaaqiafana.

<sup>15</sup> Qinee Yaweesa maaqi qimasee mi karaambaiqausa qimannimiqa.

Innee sia qini qisauku munduqaunausa nuqaaqa.

Sia qini tamummaqara fasiqauqa faqa mandaikamma nimaqaa.

<sup>16</sup> Yaaweefa qufanoo aandaroo firaafa inoo misa narana aiqama taikanau.

<sup>17</sup> Yaaweefa Isaraeena aiku asaukukinaana mina auqu Yooseefaana misa noorinni aqiqoofanoo Isipa maqa maaqai finau.

Misa Yooseefaana Midianna maqannaasa nimisee feefauru mara maroofaqa mina afitamaree Isipa maqa maaqai quqaqoofanoo moo fasiqa ainainira faiqikinau.

<sup>18</sup> Isipa maqannaasa karabusa maaqaki quqasee sainnandannai aikuqara rumbaqa.

Misa qainnannai faqa mina anukaki rumbaqa.

<sup>19</sup> Yooseefaafa karabusaki kaqi maridanoo qaina oosana qimannimufa anoona kambiqoofaqa qafamasee Yooseefaana idukiqau.

Yaaweena ufa fannoo Yooseefaafa miqunara kuqaa fee qinau.

<sup>20</sup> Isipa maqannaasa uriqararafa qufaqa Yooseefaana idukiqau. Moomoo maqannaasa uriqararafa maridanoo idukinau.

<sup>21</sup> Faraoofa Yooseefaana qumareenoo nari uriqararawsa nikiifa fasiqai kinoo maridanoo mina maqa maaqa faqa rakisianiffee qimasee karaambai qai kinau.

<sup>22</sup> Miqimmaseenoo Faraoofa Yooseefaana anee qini uriqararawsa nikiifa fasiqai kinana maridana qini irirana qimi mariasa anee naakapaa.

<sup>23</sup> Miqimmasoofanoo Yakoofoofa Isipa maqa maaqai oonuree miqoo marinau.

<sup>24</sup> Miqoo marufanoo Anutufa moomoo faiqi asumu nari faiqi anaasee Isaraee maqannaasa nimiseenoo misa nari namuqaa urinaaqarara afeeka faqaasaikamanisanau.

<sup>25</sup> Miqifa marida mikamuqoo Anutufa qumee misa iriranaki naakapoofaqa Isipa maqannaasa Anutuna ainainira faiqiuqa Isaraee maqannaasara fidiqaa daqa nikaru qi mariqau.

<sup>26</sup> Miqifa marufanoo Anutufa nari ainainira fasiqa Mooseena misunnai aiqanau. Anutufa rusandeesamumaqoo fasiqana Aarona mareeqee seenoo Mooseena faqa niqiqoo faqa isipa maqusa fiqau.

<sup>27</sup> Oonuree miqanda Isipa maqa maaqaki maridaqa Anutuna naaquqara uqannifiqara ainaina Isipa maqannaasa Anutuna moo kira ainaina uqannifiqau.

<sup>28</sup> Mikari Anutufa Isipa maqa maaqaki asukuna quqasoofanoo asukuna misa rafaafa finau.

Sia fifau miqinau. Misa mina ufara aanoommasee rukiqoonara miqinau.

<sup>29</sup> Mifa Isipa maqannaasa nammari fidikaikamandoofaqa misa noodaana aiqama kuqu taikaqau.

<sup>30</sup> Misa maqa maaqaki eeqamoosa moomoo misa uriqarawsa maaqakiaqa faqa qumbiqai qau.

<sup>31</sup> Anutufa qufanoo faufaari sia kasoo anireenoo maaqa maqusa ititanau.

Nunuka faqa miqikaimminoo misa maqa maaqa aiqama atinai qumbiqanau.

<sup>32</sup> Anutufa kafaa qufanoo aaku rirara foora mandee pupusamu qumuroofanoo aakuasaa quqasoofanoo aiqama atinai daraaninau.

<sup>33</sup> Mi ainainna qandannai Anutufa Isipa maqannaasa wainna sanda faqa saqari qaqama faqa nee maruna faqa misa fifau saqariuqa faqa aiqama raudaandammasanau.

<sup>34</sup> Yaaweefa kafaa qufanoo aammaadi moomoo nukudara foora teeqimafufaqa sia amana nisaanarirana amana, maqa maaqa umbiqafa mariqau.

<sup>35</sup> Aammaadi misa andanda faqa qafuqakinaa narana faqa aiqama nama taikaqau.

<sup>36</sup> Doo mi ainainausa taikaseenoo Anutufa quandakufanoo Isipa maqannaasa ooqa faiqi akoonai qiuqa aiqama narinau.

<sup>37</sup> Yaaweefa Isipa maqannaasa ooqa faiqi akoonai qiuqa naruseenoo Isaraee maqannaasa nifiqamareenoo misa Isipa maqannaasa kooru siruannai auqira ainainauqa mara maroofanoo Isipa maqa maaqaki qari nifiqee finau.

Sia moo fannoo teeroo quqoo fa mariqau aiqamausa amiqirawsa kai fiqau.

<sup>38</sup> Isipa maqannaasa Isaraee maqannaara rufiarafa firaqoo marunara misa fufaqa Isipa maqannaasa minara asasiqau.

<sup>39</sup> Anutufa Isaraee maqannaasa nifiqee fidanoo asurunnai faasaana auqaana aru ni-maqeenoo eendaki idauru miqirafa kaaqa qamannimaqee marinau.

<sup>40</sup> Nifiqee fimarufaqa Isaraee maqannaasa Anutunara naranara iroofanoo afida faqa innaarunaindaraa narana manna feemu faqa naaqeera nimirau.

<sup>41</sup> Mifa ooni afoomandoofanoo nammari radiqisee firaafa quminau.

Mi nammari fa aadana maqa maaqaki fira nammari foora ooqu finau.

<sup>42</sup> Yaaweefa misa nifiqee fidanoo nari ooqai qima afeeka kaira ufa nari ainainira faiqi Abarahaammama amu ufanara irinau.

<sup>43</sup> Isaraee maqannaasa nari rusandeesamu mandoosa nifiqee fidanoo asisirana nimu-faqa mina namufaqa fidaqa faqa rumasee asasiqa fimarifuqa.

Anutuna rusadeesamu iranaki maridee qimasee idi ramasee fiqau.

<sup>44</sup> Yaaweefa moomoo maqannaasa maqa maaqa Isaraee maqannaasa mara nimisoofaqa misa miqooqaraasa naru nifaqasee misa narana andanda aiqama ainaina neemariqau.

<sup>45</sup> Yaaweefa sia fifau miqinau.

Isaraee maqannaasa mina aamuqira ufa faqa sanda ufa faqa maraaqee qimasee miqinau.

Innee aiqamausa Yaaweena amooqiaqa.



## 106

*Anutufa narí faiqí anaasee amiqimma nimaqaidanoo.*

<sup>1</sup> Yaaweenara amooqiaqa.

Innee Yaaweefa amiqirafa marifanoo mina amuqusirafa naaru naaru marinara mina dufi dufi qimamaqaqa.

<sup>2</sup> Yafee moo fannoo mifa firaa ainaina auqoonara amana kooroommasee qiannoo fee.

Sia moo fannoo amanaikiannoo.

Yafee moo fannoo mina amana kai amooqirana amiannoo fee.

Sia moo fannoo amanaikiannoo.

<sup>3</sup> Mina naamuaqira ufa qaindusi mariasa faqa aiqama kari andeeqara oosana maree mariasa faqa misa asasidaqa.

<sup>4</sup> Oo Yaawee, anee aneenna maqannaasa dadaaqidana qiniara faqa iria.

Anee misa mara niseenana qini faqa mara qisaa.

<sup>5</sup> Miqimasainaqa ani faiqí anaasee ainaina rairaa inaga qinee kaqi maridaqa qafamaseeqa misa saimbaqa asasidaqa ani aiku asauku mariasa faqa nasu nasuriqa nua.

<sup>6</sup> Maasa qeeqa qikeeku qikaaku naannaa reeqa aaqara oosana maree marunausa maridaqa.

Maasa aaqara oosana faqa firaa manda aaqara oosana faqa maree marunausa maridaqa.

<sup>7</sup> Ooqai anee Anutufa Isipa maqa maaqaki naaquqara ainaina auqamasoonaga maasa qikeeku qikaaku qafamasee sia ani oosana iriqau.

Anee misa moomoo kari amuqusamma nimaqoonnana sia misa minara iriqau, qaunuseeqa misa Taatuqee nammari afaisaa oonuree ani aiqama afeeka faqaanara nimeesa uqusee nári nidiramau fimariqau.

<sup>8</sup> Yaaweefa narí amudaanai qimaru afeekanara kooroo ianifeera narí qima afeekaikira ufa mau finoo misa ummaarakinaana uqeera nisanau.

<sup>9</sup> Yaaweefa Taatuqee nammariara qufanoo aadanusinau.

Aadanusufanoo mifa misa aana muqunufaqa aadana maqasaa taqaqau.

<sup>10</sup> Yaaweefa Isaraee maqannaasara fidiqaa imarusa nisaukukinaana rafiqanau.

Mifa namuqaa nisaukukinaana maranau.

<sup>11</sup> Miqimmasoofaqa Taatuqee nammari fannoo misa namuqaa rafaqaqafinau.

Sia moodaa kaqi mariqau, aiqama taikaqau.

<sup>12</sup> Miqimmasoofaqa Isaraee maqannaasa mina qafamaseeqa Yaaweena qima afeekaikiranara kuqaa fee qimasee mina amooqira idi raqau.

<sup>13</sup> Miqidaqa misa Yaaweefa auqoo ainainnara kai kaqi auniqau.

Misa sia mina naakapara ufara afeesiqa.

Nári iriranamau kai fiqau.

<sup>14</sup> Oonureeqa misa aadana maqa maaqaki nidaqa nári Isipa maqa maaqai maru narana ainainausara firaqoo nári nidi maru narannara aiaaee qimariqau.

Miqidaqa misa firaqoo Yaaweena akooqara oosanannai amanammasee qafaqau.

<sup>15</sup> Miqiufoanoo Yaaweefa misa amanira osana iriseenoo akooqoofanoo misa qu ainaina eedoo qimasee nimiseenoo manda aurirana namu faqa nimufaqa auri mariqau.

<sup>16</sup> Misa Isaraee maqannaasa miqoo aadana maqa maaqaki maridaqa Moosenaarai rairai qimariqau.

Misa Aaroonara Yaaweena naaquqara ainainira fasiqara faqa rairai qimariqau.

<sup>17</sup> Misa miqi qimarufanoo Yaaweefa qufanoo maqa fannoo oo raqafufanoo faiqí moo auqu Datannana nambiqanau.

Abirammana faqa mina aiku asauku namu faqa nambiqama rafaqaqafinau.

<sup>18</sup> Rafaqaqafusoofanoo Yaaweefa qufanoo manda oosana auqee mrusa akaqausa kaqi marusa idauru fannoo misakiaqa fasafasufanoo mi manda fasiqa qanda ufa iri marusa idauru fannoo aiqama qama taikasanau.

<sup>19</sup> Isaraee maqannaasa Sinai maqa maaqaki oonureeqa koorannai tasirisirimasee burimakau akoona aanaaqi amana auqiqau.

Misa mina auqu quqaqaqee Yaaweenara foora amooqimamaqee mariqau.

<sup>20</sup> Misa Yaaweena amiqira areenarana faqaana mafi nimeesa uquseeqa fifau andanda neemaru ainaina burimakau akoona aanaaqi amana auqirafa marunnai ubeekamafiqaa amooqi mariqau.

<sup>21</sup> Isaraee maqannaasa Isipa maqa maaqaki marufanoo Yaaweefa naaquqara ainaina firaa ainaina auqamaseenoo Isaraee maqannaasa rafioo Anutunara misa qauniqau.

<sup>22</sup> Misa miqimmasee Isipa maqa maaqaki marufanoo Yaaweefa mookira ainaina firaatika auqamasoofaqa qafaqau.

Taatuqee nammari aaqa marufanoo Yaaweefa kaifaa naaquqara ainaina auqamasoofaqa misa minara faqa qauniqau.

<sup>23</sup> Yaaweefa misa manda oosana nindafamaseenoo qinau.

Qinee misa aiqama kuridi taikasaanauree qinau.

Mooseefa Anutufa qutaaqamaqoofa maridanoo Yaaweefa arana qoofanoo nariraree qunasaa ititasoofanoo sia narinau.

<sup>24</sup> Misa aadana maqa maaqaki kaqi maridaqa Isaraee maqanaasa fuka idaaqira maqa maaqara Kanna maqa maaqaki fifandinnanara fidiqaammasee Yaaweena qima afeekaikira ufara faqa unna fee qiqau.

<sup>25</sup> Nari uqiqaana maqakiaqa maridaqa ninunu ridaqa Yaaweena ufa rukiee mariqau.

<sup>26</sup> Miqufanoo Yaaweefa nari asauku uqeeraseenoo maaqi qimasee qimannimaqanau.

Qinee qianaqa innee aiqama maa aadana maqa maaqanaki kuqu taikeefaranoo.

<sup>27</sup> Misa niku nisauku marinausa naru nindaqaaqa ianaqa aanaamurukinai furufariqa moodaa moodaa iquq mariqau.

Qinee aiqama niana maqa maaqakiaqa quqannisaanaqa miqoo kuqifaranoo.

<sup>28</sup> Isaraee maqannaasa aaqamasee Peeoora maqannaasa unna qira anutuna Baarana amooqi marunaki ootupaqau.

Peeroora maqannaasa andau tatufirana nari unnaqira anutusa suqasee nimisee nariara faqa akaqana neemarufaqa Isaraee maqannaasa aaqamasee misaki ootupaqau.

<sup>29</sup> Misa nari manda aaqara oosannai Yaaweena arana fundakiqau.

Misa miqi marufanoo Yaaweefa qufanoo misaki manda aurirafa kambiqafufaqa moomoosa kuqi mariqau.

<sup>30</sup> Miqiqqa nufanoo misaikiqari faiqi moo andeeqara fasiqa mina auqu Fineeqasafa findifinoo Isaraee maqanaasa manda oosana akiqara narufanoo mi manda aurirafa taikanau.

<sup>31</sup> Doo miqooqari Fineeqasanara andeeqara fasiqa fee qiqau, maqee faqa naaru naaru faqa minara andeeqara fasiqee qifaranoo.

<sup>32</sup> Isaraee maqannaasa Meeriba maqa maaqaki maru nammarinaki maridaqa Yaaweena amanammasee qafaidaqa arana qarana ami mariqau.

Miqiufanoo Mooseefa misa aaqaranasaa qaraana maraseenoo nari faqa moo aaqarana maranau.

<sup>33</sup> Isaraee maqannaasa Mooseena qarana fundakufanoo Mooseena ookiqari aaqara ufa kambiqanau.

<sup>34</sup> Yaaweefa Isaraee maqannaasa qimanniminau.

Innee Kanna maqannaasa manda oosana maree mariasa naru taikaaqee qufaqa sia misa miqiqau.

<sup>35</sup> Misa Yaaweena ufa rukiaseeqa sia narirai misa faqa maanaqa nari ami nari ami idaqqa misa saimbaqa moodaanaki kammafi maridaqa misa manda aaqarana faqa mara nari nifaaqai quqee mariqau.

<sup>36</sup> Anutuna faiqi anaasee unnaqira anutuna amana auquqoonauqa nimooqimannimaqee mariqau.

Misa miqiqqa nidaqa nari ufaanaki ninuka nari nari mariqau.

<sup>37</sup> Misa moo manda oosana maraqau.

Misa nari faiqi namu akoonaiqi faqa manaqa faqa marasaidaqa Kanna maqannaasa unnaqira anutusa noorinni munusaida tatufirana suqa nimimariqau.

<sup>38</sup> Isaraee maqannaasa nari faiqi aanaaqiuqa qikairi nisakadiki sia marusa nariqau.

Narusooofanoo mi fidikafa fifau teeqinoo mi fuka maqa maaqana putaa inoo maridanoo manda afundi marinau.

<sup>39</sup> Misa mi oosanna maroo mandoosanafa nari putaa mannimaqee marinau.

Misa Anutuna uqanna minniseeqa moo unnaqira anutusasaa mundidaqa sia Anutuna uqanna saa mapukusee mariqau.

<sup>40</sup> Miqunara Yaaweefa nari faiqi aanaaseera arana qoofanoo fidiqaa uqannaminau.

<sup>41</sup> Yaaweefa misauqa mareeqee moo maqanna aaqee marusa nisaukuki quqanau.

Quqasoofaqa misa namuqaa misasaa manda rakisi rakisinnimaqee mariqau.

<sup>42</sup> Mi namuqaasa nisaukuki marufaqa misa nariqa uriqaranannai rafaafuqoofofaqa misa niramundunai ummaarakiki mariqau.

<sup>43</sup> Miqi marufanoo Yaaweefa moomoo kari nari faiqi anaasee ummaarakinaana mareeqee kaqinni quqanau.

Miqidaqa nariqa kai qimasee Yaaweena naakaparanara aanoo qimasee ititiqau.

Miqidaqa misa mandainainaki keeqa qaraasaa mafiqau.

<sup>44</sup> Misa mi mandainainaki maridaqa quandaki Yaaweenara iki raqoofanoo Yaaweefa misa iki irinau.

Iriseenoo Yaaweefa misa aupuraranaki maruna amiqimmasee irisee niqafeenoo dadaaqinau.

<sup>45</sup> Niqafamaseenoo misara qimudao qimaseenoo nari moodaanaki kira ufara iriseenoo nari firaa amuqisirafa marunara faqa iriseenoo nari aanooqirana minnisanaau.

<sup>46</sup> Yaaweefa misa rumbannimaqee marusa naundura quandasoo faqa qimudao qimasee reendenammasee rakisinnimaqee mariqau.

<sup>47</sup> Oo Yaawee maasa Anutufa anee maasa ummaara mariranakinaana mara kaqinni quqannisaa.

Maasa aiqama maqannasa qambaana moodaa moodaa iqa marunnana sooqbaandum-meeqee kaifaa qeeqa maqasaa quqaqisaa.

Miqi mannisainaqa maasa kaifaa ani naaquqara andeeqara auquara maasa dufi dufi qimamaqaqeeera miqimma qimaqaa.

Maasa ani amooqimamaqaidaqa maasa daundura areenee marinaqa asianaaura.

<sup>48</sup> Isaraee maqannaasa Anutuna Yaaweena amooqiaqa.

Maqee faqa naaru naaru faqa mina amooqiaqa.

Faiqi anaasee aiqama minara kuqaa fee qiaqa.

Yaaweena amooqiaqa.

## Mina Anaqianna Book 5

### 107

*Idi Ufa 107–150*

*Anutuna amiqira oosana amooqia.*

<sup>1</sup> Yaaweefa andeeqarafa marinara mina dufi dufi qima amaqaqa.

Mifa maasara amuqisirafa naaru naaru marifa maridano.

<sup>2</sup> Yaaweefa inni namuqaa nisaukuki umaaraki marusa maroosa innnee kafaa kafaa dufi dufi qimasee amooqiaqa.

<sup>3</sup> Mifa inni aanaamuru maqa maaqakinaana nifiqee aninau.

Suani afu dinni dinni ataageendari faqa suani ururee marinnaindari faqa keeqee marinnaindari faqa nifiqee aninau.

<sup>4</sup> Akaqausa aadana maqa maaqanaki aana sia marunakinai auiaqa nimariqau.

Misa nariqa marifandinna maqusanara randasee sia paquriqau.

<sup>5</sup> Misa miqiga nimarufanoo naarareenoo nammariara nidufaqa misa nari mariranara sia kaqi marianauree qiqau.

<sup>6</sup> Misa nariqa ummaaraki maridaqa Yaaweena aaraqau.

Aaroo fanoo mifa iriseenoo misa ummaarakinaana mareeqeenoo amiqira qoo uqan-nisanau.

<sup>7</sup> Yaaweefa misa andeeqara aatata nifu uqu mareenoo misa mari fandinna maqusanaki quqannisanau.

<sup>8</sup> Miqi marisa Yaaweena sia taikaaninna amuqisirana dufi dufi qimamaqaqa.

Mifa faiqi sia auqaqaaira ainaina dadaqino auqoonara faqa dufi dufi qimamaqaqa.

<sup>9</sup> Mifa nammariara nidimarisa amanaikamma nimaqaseenoo naararee marisa amiqira nara ainainannai nimuaqumma nimaqainara dufi dufi qimamaqaqa.

<sup>10</sup> Akaqausa rumbaranaki marufaqa niku nisauku sainnandannai rumbaqafofaqa aupu-raidaga asukunaki firaa ninunuriranaki mariqau.

<sup>11</sup> Misa aiqama afeeka faqaa Anutuna ufara aanoommasee ititunara faqa mina naa-muaqira ufa minnisoonara faqa mi mandainainaki mariqau.

<sup>12</sup> Misa minaki marufanoo Anutufa firaa kadaapi rirana nimufanoo misa afeeka taikanau. Minaki maridaqa misa niku amaki saamu rufanoo sia moo fannoo misa uqeerarafa miqoo marinau.

<sup>13</sup> Misa mi aupuraranaki maridaqa misa quandaqqa Yaaweena aaroo fanoo misa aupu-rarana kinaana uqeerannisanau.

<sup>14</sup> Yaaweefa misa niku nisauku rumbara sainnanda rakeemma aanaaqi aanaaqim-maqusee asukunaki faqa firaa ninunuriranaki faqa maruna mareeqee kaaqa garaqoo quqannisanau.

<sup>15</sup> Miqi marisa Yaaweena sia taikaaninna amuqisirana dufi dufi qimamaqaqa.

Mifa faiqi sia auqaqaaira ainaina auqoonara faqa dufi dufi qimamaqaqa.

<sup>16</sup> Yaaweefa namuqaauqa karabusa kooqiuqa kooqaannai auqira kooqiuqa rakeemmasee qainnannai auqira kairi kooqi ititee maruna qumaree itairi andaanandaana rumuqusanau.

<sup>17</sup> Akaqausa nari ufa rukiqaranannai aupuraidaga furufarirusaikiga mariqau. Nariqa aaqarana akiqara mi aupuraranaki mariqau.

- 18 Misa mi apuraranaki maridaqa nikoo nikaaidaqa narana faqa sia neemariqau.  
Misa miqidaqa kuqirana afaisaa mariqau.
- 19 Misa miqiqqa maridaqa nári apuraranakiqari Yaaweena aaramasaidaqa innauru qimariqau.  
Miqi qimarufanoo Yaaweefa nariqa apuraranakinaana uqeereeqee amiqiraqoo quqannisanau.
- 20 Mifa narí ufannai misa aurirana taikannimaqanau.  
Mifa madika afaisaaqaraana uqeereeqee kaqini quqannisanau.
- 21 Miqi marisa Yaweena sia taikaaninna amuqusiranara dufi dufi qimamaqaaqa. Mifa faiqi sia auqaaqaa ira ainaina dadaaqinoo auqoonara faqa dufi dufi qimamaqaaqa.
- 22 Miqidaqa misa Yaaweenara dufi dufi qira aandau tatufirana suqa amiaqa.  
Amiseeqa misa asasira idinnai Yaaweefa amiqira ainaina auqoonara aiqamausa qiman-nimiaqa.
- 23 Doo akaqausa sipaki ooruku nammari amuaqumau nidaqa aanaiqira foora nidaqa ainaina munu nimi mini nimi idaqa feefauru maree mariqau.
- 24 Misa ooruku nammari farumaki fidaqa Yaaweefa faiqi sia auqaaqaa ira ainaina auqamaqoona qafaqau.
- 25 Yaaweefa qufanoo ufai firaafa aniree uqufanoo nammari amakau rinoo aaqanara foora inau.
- 26 Amakaura firaqoo idanoo misa sipa uqeera innaarunai seenoo muqufi maqai rumaseenoo imarinau.  
Miqi marufaqa minaki marusa misa paasosirafa taikafufaqa naaquqeenoo naindiriranau.
- 27 Misa sipa teeqi taaqufaqa minakinaasa firara munari minari idaqa nammari namaqaaqee furufari mariasa naannaree mariqau.  
Misa miqiqqa nufanoo misa sipa akoofasaikirafa sia nimanaikufaqa furufariqau.
- 28 Misa miqiqqa maridaqa nári apuraranakiqari Yaaweena aaramasaidaqa innauru qimariqau.  
Miqi qimarufanoo Yaaweefa nariqa apuraranakinaana uqeereeqeenoo amiqiraqoo quqannisanau.
- 29 Yaaweefa amakauriranara qaoo qufanoo daimafinau.  
Firaa amakaura rirafa taikafufanoo reendeninai.
- 30 Ooruku nammari fannoo kasoo inoo dai qimafufaqa sipaki mariusa nimuqusa uqbiqafufaqa asasiqau.  
Miqi marufanoo Yaaweefa misa mareeqeenoo nári fuanee qunnai ubeekamasoofaqa fiqau.
- 31 Miqi marisa Yaaweena sia taikaaninna amuqusiranara dufi fufi qimamaqaaqa.  
Mifa faiqi sia auqaaqaa ira ainaina dadaaqinoo auqoonara faqa dufi dufi qimamaqaaqa.
- 32 Misa faiqi suqiranaki maridaqa Yaaweena uriqararanara kooroo iaqa.  
Faiqi rakisirausa suqinnanaki mina faqa amooqiaqa.
- 33 Yaaweefa qufanoo nammari amiqimmasee aadanusinai.  
Kaqikaa nammariuqa faqa maqakiqari ururee marifaqa faqa tukaqnanau.
- 34 Mi maqa maaqanaki mariusa mandoosana akiqara Yaaweefa misa maqa ainoo faqaana kafa mara indirí maqaika masanau.
- 35 Kafa Yaaweefa aadana maqa maaqa mareeqeenoo nammari namu faqa uqeena uqeenira maqaikinai.  
Mifa aadana maqa maaqa mareeqeenoo nammari aanaaqi aanaaqi moomoo qumi maru maqanaikinai.
- 36 Miqiufanoo Yaaweefa naranara sarauimarusa nifíeeqeenoo miqoo uqannisanau.  
Misa miqoo maridaqa maqusa indufusee miqoo mariqau.
- 37 Misa miqoo maridaqa oosana oosana narainaina faqa wainna sanda faqa ummaqi-mariqau.  
Ummaqusoofanoo aiqama narainaina fannoo kambiqeenoo, rairaa rairaa inoo didisamu rimarinau.
- 38 Yaaweefa mi fasiqa anaaseesa narí aiku asauku amiqi amiqimma nimaqoofaqa misa miqoo moomoo kambiqeeqa aramaree fimariqau.  
Misa firinee maru aandausa mifa dadaaqufanoo sia oodaa mariqau.  
Misa faqa moomoo kambiqeeqa aramaree fimariqau.
- 39 Misa miqi marufaqa namuqaa manda fitiqnarana nimufaqa firaqoo apuraqau.  
Miqimmasee Yaaweena faiqi anaasee rafaqafusee nisaurirana nimiqau.
- 40 Yaaweefa misa rafaqafu nimaqee marusara fidiqaammaseenoo misa aadana maqa maaqakinai aana sia marunnai aqusoofaqa nimariqau.

<sup>41</sup> Mifa nari aiku asauku ainainara sarau imarusa nari noori runiranakinaana uqeereeqee amiqira qoo quqannisanau.  
 Kaifaa misa faiqi namu kambiqeeqa sipsipara foora moomoo kambiqafi aramaree fiqau.  
<sup>42</sup> Andeeqara oosana maree marusa mina qafamasee asasufaqa manda oosana maree marusa mina qafamaseeqa noo qumunamasee mariqau.  
<sup>43</sup> Naaqoo fainausa Yaaweena mi oosanna qafamasee amiqimasee iriaqa.  
 Yaaweena naaru marira amuqusiranara oonumafi iriaqa.

## 108

*Namuqaa sia dadaaqiani fee innaaru.*

<sup>1</sup> Oo Anutu qini qimuqusa aiqama anisaa mapukusee mundinoo maridanoo.  
 Minara qinee idi raidaqa ani amooqianauro.  
 Qini qimana anee findifua.  
<sup>2</sup> Qini piripunna faqa ufireena faqa findi fifaqa inniqaranai suani afu ooqu findifu-maisaanaura.  
<sup>3</sup> Oo Yaawee qinee aanaamurukiaqa ani dufi dufi qimamaqaanauranoo.  
 Qinee faiqi anaasee qambaana ai amooqianauro.  
<sup>4</sup> Ani aiqama kari amuqusirafa inaaruna ooraqaranoo maridanoo.  
 Ani mapukusee marira oosana fannoo qasuru ooru uqanoo maridanoo.  
<sup>5</sup> Oo Anutu, aneenna uriqararana innaarunaki uqannifiqainaqa maasa qafa.  
 Aneenna areenarana aiqama maqa maaqaki quqasainaqa qafaqa.  
<sup>6</sup> Oo Yaawee qini innaaru qirana irisee aneenna afeekannai maasa asumu maraqisaa.  
 Miqimmaseenana ani aidi maria fasiqa aanaaseesa mandainaina kinaana asumu mari-  
 aqera maraa.  
<sup>7</sup> Anutufa nari naaquqara uiaana maqakiqari maaqi qinau.  
 Qinee ufoona ridaqa Seekeemma maqa maaqa rainasee qeeqa maqannaasa nimianauro.  
 Qinee Sukoota noopundu faqa miqi kai iqa qeeqa maqannaasa rainasee nimianauro.  
<sup>8</sup> Gireeadana maqa maaqa faqa Mannaseena maqa maaqa faqa qiqaindi maridanoo.  
 Eefaraimmana maqa maaqa faqa qeeqa qikiqa itita qimaqee mari ainaina fara foora  
 maridanoo.  
 Yuda maqa maaqa fannoo qini uriqararausara uqannifiqee mari saunu fara foora  
 maridanoo.  
<sup>9</sup> Qinee Anutusa Mooaba maqa maaqa mareeqee qeeqa qiku nammari uqi marunna  
 difaaniara foora masee ooru dupimma nisaanaura.  
 Qinee Eedooma maqa maaqa qiku aanaamu raipagu quqee marunna maqa maaqafa  
 ooreeqarafa mariannoo.  
 Qinee Firistia maqannaasa urinnaaqaramasee faqa rumasee ufoona ruanaura.  
<sup>10</sup> Oo Anutu, yafee qini aana muquninaqee Eedooma maqannaasa afeeka faandaamuraki  
 keeqafi narunauree.  
<sup>11</sup> Oo Anutu kuqaa fee anee maasa ameesa uquqiseenanee.  
 Anee sia fee oogai unnandee inana maasa rakira fasiqauqa faqa oonuree dadaaqinnaree.  
<sup>12</sup> Anee maasa dadaaqinaqa maasa nari namuqaa narua.  
 Faiqi faiqi dadaaqirafa sia amanaikiannoo.  
<sup>13</sup> Oo Anutu anee maasa dadaaqinaqa rakiranaki fuanana aneenna kai maasa namuqaa  
 rafaqafu nimaqaa.

## 109

*Ummaaraki maru fasiqana anunurira ufa.*

<sup>1</sup> Oo Yaawee, qinee ani amooqi marunafa marianano anee sia kaqi muqurina maria.  
<sup>2</sup> Manda oosana maree maria fasiqausa faqa nikaru qimaria fasiqausa faqa qini  
 namuqakamma qiadaqa.  
 Misa qiniara unna ufa qimariasa maridaqa.  
<sup>3</sup> Misa qini fidiqaamma qimaqee maria ufanannai qiniara qidaqa.  
 Misa sia oosana marifaqa kaqi fifau qini namuqaakamma qimaqaidaqa.  
<sup>4</sup> Qinee misara rimarunnana akiiqara misa fifau qini qifairidaqa.  
 Qinee misara innaaru qimarunaqa misa sia minara iridaqa kaqi qifairidaqa.  
<sup>5</sup> Qinee misa amiqi amiqimma nimaqee marunnana akiiqara misa manda oosana qini  
 qimidammia.  
 Qinee misara didi marina akiiqara qini fidiqaamma qimaqaidaqa.  
<sup>6</sup> Oo Yaawee aqee mari siaasana utaaqamasainano qini namuqaa koota amiani.  
 Anee qinanoo mina moo namuqaa fannoo mina kikiqa usuani.

- 7 Mi kootanaki mi fasiqanara aaqee mari fasiqafee qiaqanani.  
Mi manda fasiqana innaaru qiranara faqa aqara oosana fee qiaqanani.
- 8 Mi manda fasiqana marirafa qusasaa taikainanoo moo fannoo mina amaaqa maqafinoo mina saika maraani.
- 9 Mi fasiqana faiqi namu faiqi marifanoo mina anaaqa faqa adeedaana mariani.
- 10 Mina faiqi namu maaqa siaisa naranara aiqama maaqakiaqa innaarumma naqanuusa mariaqanani.  
Misa miqiga nidaqa ooqeenaa naakunduki rambairira maaqaki mariana, nifaqasaifaqa fifuaqanani.
- 11 Mi manda fasiqafa ufaase munnimma marasee mariufa kuqufinanoo ufaasu munnimma amu fasiqafa anireenoo mina ainaina aiqama nariara maraani.  
Moo maqannaasa anireeqa mifa kadaapi ririqoo ainainna nariara maraaqanani.
- 12 Sia moo fannoo mi manda fasiqanara amuqusiani.  
Sia moo fannoo mina faiqi faiqiara amuqusiani.
- 13 Saifaqa mina faiqi namu anaiqiqmara aiqama kuquaqanani.  
Akaqausa faqa sia mina auquara iriaqanani.
- 14 Mi manda fasiqana akeeku akaaku manda oosanara Yaaweefa oonumafi iriani.  
Mi manda fasiqana maqoo aanaaseena aaqarana akiqara naaru naaru sia minnaisaani.
- 15 Mi manda fasiqana akeeku akaaku aaqarana akiqara Yaaweefa aiqama kari iriani.  
Aiqamausa misara qaunuqanna saaqanani.
- 16 Mi manda fasiqafa faiqi anaaseera qimudao ira irirafa sia mina iriranaki maridanoo.  
Mifa ainaina siaisa faqa sarau imariasa faqa naundura ummaara reemariisa faqa oosana oosana ummaara niminoo kuqa narinau.
- 17 Mi manda fasiqafa niqurara ufa qiranara kai aidimarifa marinara anee mina akiqara aqurara ufa kai amia.  
Mi manda fasiqafa amiqi amiqimma nimaqaranara fidiqaa imarinara sia moo fannoo mina amiqi amiqimma amaaqaaqanani.
- 18 Mi manda fasiqafa niqurara ufa afaaqa quqasee qamunnara foora afisirafa nidanoo.  
Mina nari niqurara ufa fannoo nari nammari naindee inoo nariki kai keeqaani.  
Mina niqurara ufa fadameenara foora nifaqasaa akusaafanoo keeqaindee nari mi manda fasiqanaki keeqaani.
- 19 Mi manda fasiqana niqurara ufa fannoo oonurandeenoo qamunnara foora narikai kukuqinoo mariani.  
Pikapara foora mina niqurara ufa fannoo aiqama kari nari kai rumbamaqanoo mariani.
- 20 Oo Yaaweefa qini namuqaa miqimmasee aupurarana nimia.  
Mi namuqaasa qiniara manda ufa qimariasa aupurarana nimia.
- 21 Oo uriqarara Yaaweefa aneenna qima afeekaikiranara iriseenana qini dadaaqia.  
Aneenna sia taikaaninna amiqira amuqusiranannai qini namuqaa nisaukukinaana mara aqugisaa.
- 22 Qinee Dafidisa ainaina siaisa sarau irausa maridaqa.  
Qini qimuqusaki dariara foora aupuraidafa.
- 23 Suani afu keeqaifanoo qini qimananda taikaindee inoo qini marirafa taikararamidanoo.  
Qini marirana aammaadiara foora ufai fuqa aqindee qusasaa taikararidaqa.
- 24 Narana sia naunnanara qini qikuqara indindidanoo doori ummooqukidanoo.  
Qinee qifaqa asaquinoo marifaqa qimudaani aanaaqi maridaqa.
- 25 Faiqi anaasee qini qiqaqamasee uteeti naakada qidaqa.  
Misa qini qiqaqaidafa ninuka aqidaqa ataasataasa qidaqa.
- 26 Oo Yaawee qini Anutufa anee qini dadaaqammaqisa.  
An i sia taikaaninna amuqusirafa marinara qini mareeqee asumu mariranaki quqaqisaa.
- 27 Oo Yaawee anee miqinaqa qini namuqaa iriqa ani Yaaweenara qini dadaaqidanoommifoo qimasee iriqa.
- 28 Qini namuqaauqa qini diqurara ufa qimifana anee amiqi amiqimma qimaqeenranaanoo.  
Qini aupurarana qimimariasa anee misa rafaqafu nimaqaa.  
Miqimmasainaqa qinee ani ainainira faiqi asasianauranoo.
- 29 Qini namuqaa nisaurirana dukunimma nimaqaa.  
Misa nisaurirana qamunnara foora kukuqiaqanani.
- 30 Qinee Dafidisa qeeqa dooqiari Yaweenara firaqoo dufi dufi qianaara.  
Faiqi moomoosa suqi marinnanaki mina amooqimamaqaanaura.
- 31 Yaaweefa mifa ainaina siaina itita amaqaaseenoo mina kuqa arirari mariasa nisaukukinaana marainara dufi dufi qianaara.

**110**

*Yaaweefa faqa mifa utaaqamaqoo karaambaiqafa Dafidifa faqa.*

<sup>1</sup> Yaaweefa maaqi qimasee qini karaambaiqa qimaminau.

Anee qini daaqa qisauku uqannai ooqu mari finaqa qinee ani namuqaauqa mareeqeeqa ani aramandunnai quqasaanaura.

<sup>2</sup> Yaaweefa ani urinnaqarara rakisirana Sioona maqusasaqari fraanaikamasainana aiqamatina rakisi nimaqeennaranoo.

Mifa qinoo anee aneenna namuqaauqa faqa rakisi nimaqeennaranoo.

<sup>3</sup> Anee nammeera qimasee namuqaa faqa rakunaaree qinaqa ani rakira fasiqauqa ani ufara eedoo qimasee afeekaikammasee rakifaranoo.

Kananaana suani oosana qaannaindari ani kumaaraauqa sia kasoo, qifi faramu andandasa mandinoo marindee moomoo aaqana uqasaa suqifaranoo.

<sup>4</sup> Yaaweefa qini karaambaiqara (Yisunara) qima afeekaikuna sia amana kaifaa moosaa fuannoo.

Mifa maaqi qimaseenoo qima afeekaikinau.

Anee naaruara naaruara aanaiqikirafa marinnaranoo.

Anee Meerakiseedeekafara foora maridana naaru naaru aanaiqikina marinnaranoo fee qinuu.

<sup>5</sup> Qini karaambaiqa Yaaweena asaku uqannai maridanoo, mifa aanoo qinanoo maqasaa karaambaiqauqa urinnaaqa raannoo.

<sup>6</sup> Mifa maa maqanasaaqaraasa urinnaaqaramasee moomoo narueeqaida quqaannoo.

Mifa aiqama maa maqanasaa uriqararawsa rafaqafuannoo.

<sup>7</sup> Mifa rakiranaki maridanoo kaqikaa nammari aana afainni qumi marina namasee rakiranaki afeekaikamasee urinaaqaraannoo.

**111**

*Yaaweena amooqia.*

<sup>1</sup> Yaaweena amooqiaqa.

Qinee qeeqa qimuqusanai mina faiqi anaasee suqiranaki Yaaweenara dufi dufi qianaura.

<sup>2</sup> Yaaweefa auqoo ainainausa naaquqarafa maridanoo.

Mifa auquqoo ainainausa qafamasee asasi mariasa mi ainainausa oosanara iriraree qidaqa.

<sup>3</sup> Aiqama ainaina Yaaweefa auqoo ainainafa areenarafa faqa uriqarara amiqi amiqirafa faqa kai maridanoo.

Mina andeeqarafa naaru naaru marifa maridanoo.

<sup>4</sup> Yaaweefa nari naaquqara ainaina auqamasee maasara sia qaunuaqee qidanoo.

Mifa paapaa idanoo nifauee marifa maridanoo.

<sup>5</sup> Yaaweenara qeerairida mina ufa qaindusi mariasa mifa narana nimidanoo.

Mifa nari moodaanaki kira ufa sia qauni marifa naaruara irimarifa maridanoo.

<sup>6</sup> Mifa anaamuru maqa maaqa nari faiqi anaasee nimirannai nari afeeka uqan-nifqanau.

<sup>7</sup> Mina aiqama ainaina auqaranaki mifa nari mapukira oosana faqa Yaaweefa nari asaukunnai auqai ainainafa mapukirafa faqa andeeqarafa amana amana kai rainara oosana faqaafa maridanoo.

Mina aiqama naamuaqira ufa fannoo anoona ufa faiqi minasaa mundufi mariaqee ufa maridanoo.

<sup>8</sup> Mi naamuaqira ufausa anoona ufa qiranasaa faqa andeeqara mariranasaa faqa mundinoo maridanoo, naaru naaru afeekaikinoo mariannoo.

<sup>9</sup> Yaaweefa nari faiqi anaasee rumberarakinaana idukuseenoo naaru marira moodaanaki kira ufa misa faqa qinuu.

Kaqa naaquqara andeeqarafa faqa uriqarara afeeka faqaafa faqa marifa maridanoo.

<sup>10</sup> Irirana faqaafa mariraree qimaseenana Yaaweenara eerairida mina ufa qaindusua.

Mina naamuaqira ufara eedoo qimasee mi mau fimariasa mifa andeeqasee rainara oosana nimidanoo.

Naaru naaru amooqirafa minaindi mariani.

**112**

*Andeeqara fasiqa anaasee asasirafa.*

<sup>1</sup> Yaaweena amooqiaqa.

Yaaweenara eerairammasee mina ufamau fimarifa faqa mina sandufara asasammasee afaqee marifa faqa asasiranaki maridanoo.

<sup>2</sup> Andeeqara fasiqa faiqi namu nariqa maqa maaqaki nimudaanai qimarinausa marifaranoo.

Minasaa aruakinausa amiqi amiqiranaki marifaranoo.

<sup>3</sup> Mi andeeqara fasiqana faiqi namu ainaina faqaasa arifaranoo.

Mina ainaina faqa naaruara rairammida mariannoo.

<sup>4</sup> Andeeqaraura faqa nifauee mariasa faqa qimudao qimariasa faqa asukunaki kaaqa garanakiara foora miqi mariasa maridaqa.

<sup>5</sup> Eedoo qimasee ufaasu munnimma nimimarifa faqa nari bisinisa kuqaa qira irirana mau kai auqee mari fasiqafa faqa asasiranaki maridanoo.

<sup>6</sup> Andeeqee marifa sia kuridiannoo.

Faiqi anaasee minara naaruara irifaranoo.

<sup>7</sup> Mi andeeqara fasiqafa manda ufaugaindi irinoo sia rufiannoo.

Mifa Yaaweena saqarikirafa afeekaikinoo marinara sia rufiannoo.

<sup>8</sup> Miqi marifa sia kaaqa amuqusifanoo rufiaidanoo.

Mifa mariinoo nari namuqaa rafaqaqafu nimaqainnana qafaannoo.

<sup>9</sup> Mi andeeqara fasiqafa afaaridanoo sarauimariasa nimidanoo.

Mina qimudao qirafa sia taikaannoo mi fasiqafa afeeka faqaafa marinaqa mina ufa ameemaanai keeqee faranoo.

<sup>10</sup> Miqi marifaqa manda oosana maree mariasa mina qafaafanoo niranaqaidanoo.

Misa noori kadamasee fidiqaamma amaqasee quqasee fidaqa.

Manda oosana maree mariasa misa mi andeeqara fasiqana andaikamma amaqarara tipundarimariafa naaruara taikafuannoo.

## 113

*Anutuna andeeqara oosanara amooqia.*

<sup>1</sup> Yaaweena amooqiaqa.

Innee Yaaweena ainainira faiqiuqa mina amooqiaqa.

Yaaweena auqu amooqiaqa.

<sup>2</sup> Magee faqa naaru naaru faqa Yaaweena auqu amooqirafa kai mariani.

<sup>3</sup> Suani ururee marinnai mariasa faqa suani keeqee marinnai mariasa faqa aiqamausa Yaaweena auqu amooqimamaqaqa.

<sup>4</sup> Mifa Yaaweefa aiqama maa maqa maaqanaki mariasa urinnaaqaranoo maridanoo rakisi nimaqaidanoo, mina qareenarafa innaaruna uriaaqaranoo maridanoo.

<sup>5</sup> Sia moo fannoo Yaaweena maasa Anutuna fooqaafa maridanoo.

Mifa meerai innaaruna uraqqaranoo maridanoo.

<sup>6</sup> Miqooqari mifa mara miami innaaruna faqa maqa faqa qafaidanoo.

<sup>7</sup> Yaaweefa ainaina siaisa nikuqara madaanai marisa uqereeqeenoo amiqiraqoo quqan-nisaidanoo.

Mifa sarau imariasa nari aupuraranakinaana uqeerrannisaidanoo.

<sup>8</sup> Uqeerasenoo misa mareeqee uriqararaura faiqi namu aqoondikamma nimaqaidanoo.

Uqeerasaifaqa Yaaweena faiqi anaasee (Isaraee maqannaasa) uriqararaura misa aqoondi kidaqa.

<sup>9</sup> Aafaikinoo marinna anaaseena Yaaweefa amiqimma amaqaseenoo.

Faiqi aanaaqi aranandaki rumasaifanoo minara asasidanoo.

Yaaweena amooqiaqa.

## 114

*Ainnaaqarara qoomaqa suqa naidaqa ree maru idifa.*

<sup>1</sup> Isaraee maqannaasa Yakooboona akeeku akaaku aanaamuru maqa maaqa Isipa maqa maaqakiqari quqasee aniqau.

<sup>2</sup> Miqiqqa ani marufanoo Yudana akeeku akaaku Yaaweena naaquqara fasiqa anaasee kammiqa mariqau.

Isaraee maqannaasa Yaaweenaindi kammiqa mariqau.

<sup>3</sup> Yaaweenaindi kiqa marufanoo Taatuqee Nammari misa nindafamasee quqasee sandanau.

Yooradanna nammari faqa misa nindafeenoo kasooinau.

<sup>4</sup> Maqa kasufanoo aaqanauqa faqa mimmi aanaaqiara foora kooripoo kooripoo imariqau. Kaqikaa amuaqu namuqaindi faqa sipsipa aanaaqiuqara maqi rafusaki rafusaki imariqau.



- 5 Oo maa Taatuqee nammari naqaa fee ifanee quqasee sandeenanee.  
 Oo Yooradanna nammari anee faqa naqaa fee ifanee kasoo inanee.  
 6 Oo aaqana namuqa naqaa fee ifaqee mimmi anaqiara foora kooripoo kooripoo ifee.  
 Oo amuaqunamuqaindi innee faqa naqaa fee ifaqee sipsipa aanaqiara foora rafusaki rafusaki ifee.  
 7 Maa maqa maaqafa mina quqoofa qumiranara aindiri raani.  
 Yakooboona Anutufa qumu marinara aindiri aindiri raani.  
 8 Mi Anutufa ooniara qufanoo quandaki nammari farumaikinau.  
 Mifa qufanoo afeeka ooniuga aanaaqi nammariuga kammafi qumi mariqau.

## 115

### *Anutufa kai kuqaa qirafa.*

- 1 Oo Yaawee sia maasa duqusaa qareenarafa mariani.  
 Ani auqusaa kai qareenarafa marani.  
 Ani sia taikaanina amuqisirafa faqa ani mapukusee marira oosana faqa marinara qareenarafa ani auqusaa mariani.  
 2 Aiqama maqannaasa nanaree maasara inni Anutufa yaiffee maridanoo fee qimasee iraaidee.  
 3 Maasa Anutufa innaarunai maridanoo.  
 Mifa nari aidiramau fidanoo nari aidi ainanna auqaidanoo.  
 4 Misa aiqama anaamuru mariasa unnaqira anutusa faiqi faiqi nisaukunna koori faqa siruaannoo faqa auquqaafa maridanoo.  
 5 Misa noo aamara marifaqa sia ufa qidaqa.  
 Misa nifu faqa marifaqa sia qafaidaqa.  
 6 Misa naaqoo faqa marifaqa sia ufa iridaqa.  
 Misa naikaamara faqa marifaqa sia udi ramasee qafaidaqa.  
 7 Misa nisauku faqa marifaqa sia auqama qafaidaqa.  
 Misa niku faqa marifaqa sia nidaqa, sia kasi kasidaqa.  
 Misa nisananda faqa marifaqa minakiqari sia ufa qidammia.  
 8 Mi ainainausa auqusee mina saqariki mariasa nariqa sia kasi mari anutuna aannaraqa mariaqanani.  
 9 Oo Isaraee maqannaasa innee Yaaweena mandaaqaaqa.  
 Mifa inni dadaaqinoo itita nimaqaidanoo.  
 10 Oo Isaree maqannaasa aanaiqikirausa nikaaku mariasa innee Yaaweena mandaaqaaqa.  
 Mifa dadaaqinoo itita nimaqaidanoo.  
 11 Aiqama innee Yaweena amooqi mariasa mina saqarikiqa.  
 Mifa inni dadaaqinoo itita nimaqaidanoo.  
 12 Yaaweefa maasara iridanoo amiqi amiqimma qimaqaannoo.  
 Mifa Isaraee maqannaasa amiqi amiqimma niseennoo.  
 Kafaa mifa aiqama nari aanaiqikirausa faqa amiqi amiqimma nimaqaannoo.  
 13 Yaaweenara naaqqaiifaqa mina ufa ameemaanaa keeqee mariasa mifa amiqi amiqimma nimaqaannoo.  
 Mifa uriqararausa faqa oorudupirausa faqa amana amana kai amiqi amiqimma nimaqaannoo.  
 14 Yaaweefa ani faqa ani akeeku akaaku faqa faiqi asumu nimiani.  
 15 Yaaweefa maa maqa maqana faqa innaarunna faqa auqu quqoofa mifa inni amiqi amiqimma nimaqaani.  
 16 Innaaruna Yaaweenaindi kai maridanoo.  
 Maa maaqana Yaaweefa faiqi faiqnimufa maridanoo.  
 17 Kuqufuusa sia Yaaweena amooqidammia.  
 Ufa taikafifaqa madikaki kuqiqa mariasa sia Yaaweena amooqidaqa.  
 18 Maasa kaqi marunna Yaaweena dufi dufi qimamaqaanura.  
 Maqee faqa naaru naaru faqa miqianaura.  
 Yaaweena amooqiaqa.

## 116

### *Kuqiranakinaana mara asumu quqasoofa Anutuna amooqinau.*

- 1 Yaaweefa qini innaaru qirana iri marinara qinee minara ridaqa.  
 2 Mifa qini ufa aaqoo rammatinimmasee irimarinara qinee kaqi marunna kamu minara innaaru qianaura.

- <sup>3</sup> Kuqirafa qini fiqumma datinoo marinau.  
 Kuqiranara rufiarafa qini qumara kuqiranaki quqararinau.  
 Qini rufiarafa faqa qinunurirafa faqa qumbiqanoo marinau.
- <sup>4</sup> Qinee miqiqqa maridaqa Yaaweena qeeqa qimuqusiranakiqari maaqi qimasee innaarukiqari qimamiqiafana.
- Oo Yaawee anee qini asumu mara quqaannee qidaqa.
- <sup>5</sup> Yaaweefa mifa nifauara oosana faqaafa faqa andeeqara oosana faqaafa faqa maridanoo.  
 Maasa Anutufa faiqi faiqiara amuqusirafa qumbiqanoo marifa maridanoo.
- <sup>6</sup> Soodaa qirausa siaisa Yaaweefa ititannimaqaidanoo.  
 Qinee kuqaqaa ira ummaaraki marunanoo Yaaweefa qini mareeqee amiqiraqoo quqaqiseenoo.
- <sup>7</sup> Yaaweefa qini amiqimma qimaqainara qini qimuqusa anee kafa paasoosida afaqa quqasee maria.
- <sup>8</sup> Yaaweefa qini kuqiranakinaana kaqinni mara quqaqiseenoo qini daukunu aadanusu qimaqaseenoo qini rafaqaqafu qimaqarariana ititaqimaqeenoo.
- <sup>9</sup> Miqimmasainara qini aiqama marirafa maa maqanasaaqaraasaki mariasa faqa maridaqa Yaaweena afusaa kai maridaqa.
- <sup>10</sup> Qinee qeeqara namuqaa kaaqa qini radamuseeafoo qimasee kaqi kai Yaaweena saqarikidaqa.
- <sup>11</sup> Qinee qeeqa rufiaranakiqari maridaqa maaqi qiqa.  
 Sia faiqi faiqi moo saqariki mariafa maridanoo.
- <sup>12</sup> Yaaweefa qini amiqimma qimaqaina akiqara nana ainainee amianauree.
- <sup>13</sup> Yaaweefa qini asumu marainara dufi dufi qimamaqara wainna nammari tatufiranara foora amianauree.
- <sup>14</sup> Mina faiqi anaasee suqirana qambaana qinee amiraree qimasee qima afeekai kammaqaafannana amianauree.
- <sup>15</sup> Yaaweena ufamau fimariasa kuquafanoo Yaaweefa firaqoo aiaaeeqidanoo.
- <sup>16</sup> Oo Yaawee qinee ani ainainira faiqi maridaqa.  
 Qinee qini qinoofa undee kai iqa ani ainainira faiqi maridaqa.  
 Anee qini kuqiranaki quqaqoonaa mara qisoona faqararianoo.
- <sup>17</sup> Qinee dufi dufi qirana faqa qeeqa innaaru qirana faqa aandau tatufiranara foora amianauree.
- <sup>18-19</sup> Ani faiqi anaasee nifusaa ani naaquqara maaqa maqusasaa Yeerusaree maqusa gambaana Yaaweena amirara qima afeekaikiafanna ainaina amianauree.  
 Yaaweena amooqiaqa.

## 117

### *Yaaweena amooqia.*

- <sup>1</sup> Innee aiqama maqannaasa Yaaweena amooqiaqa.  
 Innee aiqama fasiqa anaasee mina amooqiaqa.
- <sup>2</sup> Mina maasara aidirafa afeekaikinoo maridanoo.  
 Mina mapukusee marira oosana naaru naaru marifa maridanoo.  
 Yaaweena amooqiaqa.

## 118

### *Rakirana uriaaqaroonara dufi dufi qira innaaru.*

- <sup>1</sup> Yaaweefa andeeqarafa marinara mina dufi dufi qimamaqaaqa.  
 Mina faiqi aanaaseera aidirafa naaru naaru marifa maridanoo.
- <sup>2</sup> Isaraee maqannaasa maaqi qiqa.  
 Yaaweena faiqi aanaaseera aidirafa naaru naaru marifa maridanoo.
- <sup>3</sup> Anutuna aanaiqirausa mariasa maaqi qiqa.  
 Yaaweena faiqi aanaaseera aidirafa naaru naaru marifa maridanoo.
- <sup>4</sup> Aiqama mina amooqimariasa maaqi qiqa.  
 Yaaweena faiqi aanaaseera aidirafa naaru naaru marifa maridanoo.
- <sup>5</sup> Qeeqa teerookiqari Yaaweena aaraafananoo mifa iriseenoo qini oosana oosana teerookinaana idukuqisanau.
- <sup>6</sup> Yaaweefa qini faqa marinara sia qinee rufiaanauree.  
 Moo fannoo sia amana mandaikamma qimaqaannoo.
- <sup>7</sup> Yaaweefa dadaaqi marifa marinara qinee Yaaweefa qini namuqaauqa rafaqaqafu nimaqee marina qafaanauree.
- <sup>8</sup> Yaaweena saqarikirafa amiqirafa uriqarafa maridanoo.

Faiqi faiqisaa mundirafa ureeqanoo maridanoo.

<sup>9</sup> Yaaweena saqarikirafa amiqirafa uriqararafa maridanoo.

Faiqi faiqi uriqarararasaa mundirafa ureeqanoo maridanoo.

<sup>10</sup> Moomoo namuqaauqa qini darirara fiqumma fufaqa qinee Yaaweena afeekannai misa naru taikaqiafana.

<sup>11</sup> Misa qini fiqumma aiqamai datimma fufaqa qinee Yaaweena afeekannai misa naru taikaqiafana.

<sup>12</sup> Qini namuqaauqa nunukara foora qini fiqumma fiqumma fufaqa qausana qoomara foora fasa fasi marufaqa qinee Yaaweena afeekannai misa naru taikaqiafana.

<sup>13</sup> Qini namuqaauqa qini darusee rafaqa firarufanoo Yaaweefa qini dadaaqi uqeeranau.

<sup>14</sup> Yaaweefa qini afeekaikirana faqa nimudaanai qirana faqa qimidanoo.

Mifa qini mandainaina kinaana uqeerana qiseenoo.

<sup>15</sup> Yaaweena rakira fasiqauqa uqaana maqaki اساسida qufoona rida qiana iriaqa.

Yaaweena uriqarara afeeka fannoo miqidaqinoo iriaqa.

<sup>16</sup> Yaaweena afeeka fannoo rakiranaki uriqararana maasa qiminou.

Mina uriqarara afeeka maasa dadaqifaqa rakirana uriqareeqa.

<sup>17</sup> Qinee sia kuqanaura.

Qinee kaqi maridaqa Yaaweefa dadaaqi oosanara koorooianaura.

<sup>18</sup> Yaaweefa qini firaa ummaara qimiseenoo qini kuqiranasa ititaqiseenoo.

<sup>19</sup> Naaquqara amaana maqa kooqiuqa atuaqisaqa.

Qinee minaki keeqafi Yaaweenara dufi dufi qianaura.

<sup>20</sup> Mi kooqifa Yaaweefinnai fimaria kooqifa maridanoo.

Andeeqarasa kai minaki keeqeefaranoo.

<sup>21</sup> Anee qini innaaru qirana irisee dadaaqi mariannanara ani Yaaweena amooqidaqa.

Anee rakirana uriqararana qimiannanara ani amooqidaqa.

<sup>22</sup> Maaqa usakee mariasa afeeka sabeena minnisooqa innaaqianna aiqama sabeenauqa uriqararafa marinou.

<sup>23</sup> Yaaweefa kai mi ainainna auquqooafa qafaidaqa idaaqira ainainee qidaqa.

<sup>24</sup> Yaaweefa maa faasaanna rakiranaki uriqaree mari faasaanafa maridanoo.

Miqunara maasa اساسidaqa idi raaganani.

<sup>25</sup> Oo Yaawe maasa mareeqee amiqira qoo quqaqisaa.

Anee qiqama ainaina anoonaikamma qimia.

<sup>26</sup> Yaaweena auqusaa animari fasiqana Yaaweefa amiqi amiqimmamaqaani.

Maasa Yaaweena naaquqara amaana maqakiqari inni amiqi amiqimma nimaqaidaqa.

<sup>27</sup> Yaaweefa mifa Anutufa maridanoo.

Mifa maasa amiqimma qisee marinou.

Innee aiqamausa suqufiqa saqari amanee raudasee uqirasa اساسammamaree amaana maqaki keeqafi aidara fiqumma fiqumma iqaqa.

<sup>28</sup> Oo Yaawe anee qini Anutufa marianaqa minara qinee ani dufi dufi qimamaqaidaqa.

Qinee ani uriqararanara kooroo ianaura.

<sup>29</sup> Yaaweefa andeeqarafa marinara mina dufi dufi qimamaqaaqa.

Mina faiqi anaaseera aidirafa naaru naaru marifa maridanoo.

## 119

### *Yaaweena sandufa.*

<sup>1</sup> Aaqara oosana sia mari marirana faqaasa اساسidaqa.

Yaaweena sanda ufamau fimariasa faqa اساسidaqa.

<sup>2</sup> Yaaweefa naamuaqira ufamau fimariasa اساسidaqa.

Nariqa nimuqusannai mina ufa afaqee mariasa اساسidaqa.

<sup>3</sup> Miqi marinausa sia moo aaqara oosana maraidammia.

Misa Yaaweena aatata fimariasa maridammia.

<sup>4</sup> Oo Yaawe anee aneenna sanda ufa maasa qimiseenana mapukusee andeeqasee aiqama afaqaqee qimasee qimanniminou.

<sup>5</sup> Qinee ani naamuaqira ufa afaqaidaqa mapukusee marianauree qidaqa iridaqa.

<sup>6</sup> Qinee ani sanda ufa aiqama kasoommami iriaraasidaqa.

<sup>7</sup> Qinee ani andeeqara rainannimaqaranara iriseeqa qeeqa anukara qimuqusannai ani amooqianauranoo.

<sup>8</sup> Qinee ani naamuaqira ufa mau fuanaura.

Anee Yaaweefa sia qini minniqisaa.

<sup>9</sup> Naqi masee fee kumaaraa fannoo nari marirana maqee maqee anukaida mariannoo fee.

Ani Yaaweena ufamau fimarianannai miqiannoo.

<sup>10</sup> Qinee qeeqa qimuqusannai ani ufa qaindusiraree qidaqa amanidaqa.

Ani sanda ufa rukiaranasaa anee qini ititaqisaa.

<sup>11</sup> Qinee ani naamuaqira ufa qumareeqa qeeqa qimuqusaki quqaseeqa sia ani mandaikamma amaqaanaura.

<sup>12</sup> Oo Yaawee qinee ani amooqidaqa.

Aneenna oosanara qimaqimia.

<sup>13</sup> Anee qimunna sanda ufausa kafaa kafaa firaqoo nameera qidaqa qimannimianaura.

<sup>14</sup> Qinee ani sanda ufamau firanara didimarifaqa asasi marunafa moomoo umiasana ainainara asasimarunnana faqa uraaqaranoo maridanoo.

<sup>15</sup> Ani naakapara ufa qinee aiuqimarunausa maridaqa.

Ani qimannimira ufauqa amiqimmasee asooki rimarunausa maridaqa.

<sup>16</sup> Qinee ani sanda ufara asasidaqa.

Qinee ani naamuaqira ufara sia qaunusee mana mana ianaura.

<sup>17</sup> Qinee kaqi maridaqa ani qimannimira ufamau fuaneera aneenna ainainira faiqi qini amiqimma qisaa.

<sup>18</sup> Oo Yaawee ani naaquara anoona ufa qirana ani sanda ufaki marina irianeera qini irirana atuqasainaqa irianaura.

<sup>19</sup> Qinee maa maqanasaa qusasaa marianauranoo.

Sia aneenna sanda ufa qini kukeeqa qimaqaa.

<sup>20</sup> Qinee qinunu rimarunanoo didafdanoo.

Ani rainannimaqara ufara aiqama kari iriraree qimasee aupuraidaqa.

<sup>21</sup> Oo Yawee nári nimoo naamoo qimariasa anee aanoommasee qaoo qimarianafa mariananoo.

Ani naamuaqira ufa rukiasee kaqi runna fimariasa ani niqurara ufa ameemaanai maridaqa.

<sup>22</sup> Qinee ani sanda ufauqa afaqee marunausa marunannara misa ataasa ataasa qima qimaqaranakinaana faqa aasaandaana ufa qima qimaqaranakinaana faqa iduku qisaa.

<sup>23</sup> Uriqararausa moodaanaki sugufiqa qini mandaikamma qimaqarara tipundaari mari-afafa qinee sia minara irianaura kaqi ani naakapara ufa asaana rumasee irianaura.

<sup>24</sup> Ani naakapara ufauqa qini didirana qimidammia.

Mi ufausa qini daakapee mariasa maridaqa.

<sup>25</sup> Qinee kookoommaki rafaafa fusaafaqa kuqiraridaqa.

Anee aneenna qima afeekaika maqoonandee inana qini uqeera qisaa.

<sup>26</sup> Oo Yawee qinee qeeqa mariranara kooroommasee qimamunana anee iriseenana qima qimiananoo.

Aneenna oosana qima qimia.

<sup>27</sup> Qini dadaaqinaqa ani sanda ufa oosanara amiqimasee iria.

Anee miqinaqa qinee ani naaquqara naakapara ufara indee indee ida marianaura.

<sup>28</sup> Oo Yaawee qiqa qimudao qirafa qiqa rafaafidanoo.

Aneenna qima afeekaikamma qoonandee inana afeeka qimia.

<sup>29</sup> Anee unnaqira aatata fira oosana ititaqisaa.

Aneenna amiqi amiqira nakiqari aneenna sanda ufa daamuaqia.

<sup>30</sup> Qinee andeeqara aatata kai fuanaree qimasee utaaqeeqa.

Qinee ani rainannimaqara ufa amiqimmasee iriqa.

<sup>31</sup> Qinee ani Yaaweena naakapara ufa afaqee marunausa marunannara anee sia qisauri-ranaki quqaqisaa.

<sup>32</sup> Anee irirana moo faqa moo faqa qimiannanara ani naamuaqira ufa mau asasamasee fidaqa.

<sup>33</sup> Oo Yaawee aneenna sanda ufa oosana daamuaqinaqa qinee naaru naaru mi mau kai fuanaura.

<sup>34</sup> Anee irirana qiminaqa ani sanda ufa oosana irisee mi mau fuanaura.

Qeeqa aiqama qimuqusannoo afaqaanaura.

<sup>35</sup> Anee dadaaqinaqa ani sanda ufa kooroo imari aatata fua.

Qinee minaki asisirana paquri marunannara minaki fuanaura.

<sup>36</sup> Anee qini didirana mareeqeenana aneenna sanda ufamau firatinai ubeekama qisaa.

Moomoo qumiasana faqaasaikiqa marira oosanai sia ubeekama qisaa.

<sup>37</sup> Oo Yaawee anee qini dadaaqinaqa anoona siai ainainaki sia fua.

Anee qima afeekaikunandee inana amiqi amiqimma qisaa.

- 38 Oo Yaawee ani ufa mau fimariasara qima afeekaikunandee kai inana qini aneenna ainainira faiqi mi qima afeekaikirana qinisaa faqa quqasainanoo anoonaikiani.
- 39 Qini aasaandaana ufa qimi mariafaqa rufiaqa nimarunnaakinaana anee uqereeqee kaqinni quqaqisaa.  
Ani andeeqara rainannimaqara ufa naaquqarafa maridanoo.
- 40 Oo Yaawee ani naamuaqira ufa mau firara dididanoo.  
Anee andeeqarafa mariannanara fuka marirana qimia.
- 41 Oo Yaawee ani qiniara firaqoo aidi marina uqaqifiqainaqa qafaa.  
Aneenna qima afeekammaqoonandee inana qini mandainainakinaana uqeera amiqi-raqoo quqaqisaa.
- 42 Miqimma sainaqa qini aasaandaana ufa qimimariasaa qimannimianauro.  
Qinee ani ufa saqariki marunnaana qimannimianauro.
- 43 Anee afeeka qiminaqa anoona ufa kai aiqama kari qia.  
Qini irirafa ani rainannimaqara ufasaa mundinoo marinara miqianauro.
- 44 Aiqama kari qinee ani sanda ufamau naaruara naaruara fuanauro.
- 45 Qinee ani naakapara ufamau firara amanamasee qafee marunnaana qinee adaarasaqanna idukiranaki marianauro.
- 46 Qinee ani naamuaqira ufa uriqararusa kooroommasee qimannimianauro.  
Qinee miqi qimasee qimannimidaqa sia qisauruanauranoo.
- 47 Qinee ani naamuaqira ufara didimarinara mimau fidaqa asasirana paquridaqa.
- 48 Qinee ani naamuaqira ufara didi marifaqa qeerairidaqa.  
Qinee miqidaqa ani naakapara ufara maqee maqee indee idaaqa.
- 49 Anee qini aneenna ainainira faiqiara qima afeekaika maqoonnanara oonumafi iria.  
Mi ufafa qini pooduqama qimaqeamarifa maridanoo.
- 50 Ani qima afeekaikira ufa fannoo qini kaqimarirana qimi marinara qeeqa aupuraranaki maridaqa qifaqa asoarana mareeqa.
- 51 Nári nimoo naamoo qimariasaa aiqama kari ataasa ataasa ufa qima qimaqaidammia.  
Miqi mariafaqa qinee ani sandufa sia minnisee moo saa fiqa.
- 52 Oo Yaawee ooqai aneenna rainannimaqara ufara qunaqa kaqi iridaqa.  
Mi ufafa qini qifaqa asoarana qimidanoo.
- 53 Mandoosana maree mariasaa ani sanda ufa rukiaafaqa qinee niqafaunanoo qirana qarafa qiniki qumbiqaidanoo.
- 54 Qeeqa qusasaa maa maqanasaa mariranaki ani naamuaqira ufasaa quandasee idiraidaaqa.
- 55 Oo Yaawee eendaki aniara iridaqa.  
Ani sanda ufara faqa iridaqa.
- 56 Ani naamuaqira ufamau funnanannoo asasirana paquridaqa.
- 57 Oo Yaawee qini aiqama didirafa anee kai mariananoo.  
Qinee ani sanda ufa afaqaanauree qimasee qima afeekaikiqa.
- 58 Qinee qeeqa aiqama qimuqusanoo anee qima afeekaikunandee inana qifauama qimaqaanneera iridaqa.
- 59 Qinee qeeqa marira oosana oonumafi iriseeqa quandaki anee qimannimira ufa mau firaree qimasee qima afeekaikidaqa.
- 60 Qinee ani naamuaqira ufamau firaree qimasee sia manoo maanaa idaaqa kai kaqi idaaqa.
- 61 Manda oosana maree mariasaa qini qiku ufana fufusee qiniara minaki aruanifee qiafaqa qinee ani sanda ufa sia qauniqa mimau kai fidaqa.
- 62 Enda amuqusai qinee findifiqa ani andeeqara rainannimaqara ufara amooqidaqa.
- 63 Qinee ani ainaini mariasaa faqa ani sanda ufamau fimariasaa niqooni maridaqa.
- 64 Oo Yaawee ani sia taikaaninna amuqusirafa maa maqa maaqana qumbiqanoo maridanoo.  
Miqinoo marinara anee aneenna naamuaqira ufa daamuaqia.
- 65 Oo Yaawee anee aneenna qima afeekaikira ufa mau finana qini amiqi amiqimma qimaqaananoo.
- 66 Qinee ani sandufa saqariki marunnaana anee oosana oosana irirana rainara iriqaraasirana faqa oonumafi irirana faqa qimia.
- 67 Qinee indaaru kaqirunna fimariafanana anee Yaawee anee firaa ummaara qimunaqa maqee qinee quandaki ani ufamau fidaqa.
- 68 Anee kaaqa andeeqarafa mariannanara aiqama ainaina imarianna ainainafa faqa kaaqa andeeqarafa mariananoo.  
Aneenna naamuaqira ufa daamuaqia.
- 69 Nári nimoo naamoo qimaria fasiqausa qiniara unna ufa qimariafaqa qinee qeeqa aiqama qimuqusanoo ani qimannimira ufa mau fidaqa.

- 70 Mi fasiqausa irirana siaisa mariafaqa qinee ani sanda ufaki asasirana paquridaqa.
- 71 Oo Yaawee dufi dufi qiqa manda oosana akiqara darimarianafa mifa qini dadaaqinara ani naamuaqira ufa oosana iridaqa.
- 72 Anee qimianna sanda ufanara didirafa oosana firaafa fiqarara fee qidaqa.  
Maa maqanasaa aiqama munnima marina uraaqaranoo maridanoo.
- 73 Anee qini auquseenana qini afeedamma qisaanoo.  
Anee irirana oosana qiminaqa ani sandufa irianauro.
- 74 Qinee ani qima afeekaikira ufa saqariki marunnaara aniara qeerairida ani ufa qaindusi mariasa qini qiqaqamasee asasifaranoo.
- 75 Oo Yaawee ani rainannimaqara ufa andeeqarafa marifaqa qinee iridaqa.  
Anee mapukusee marira oosana faqaafa mariannanara anee aupurarana qini manda oosana akiqara qimiananoo.
- 76 Aneenna ainainira faiqi qinisaa qima afeekaikamma qoonnamau finanoo ani sia taikaaninna amuqusirafa qini qifaqa asooama qimaqaani.
- 77 Qinee ani sanda ufara asasimarunnaara qifauama qimaqaa.
- 78 Nári nimoo naamoo imariasa unna qimasaida qini kiki qusi marianara nisauriranaki mariaqanani.  
Qinee qeeqaraa ani qimannimira ufara indee indee ianaura.
- 79 Ani Yaaweenara qeerairida ani ufa qaindusi mariasa faqa ani naamuaqira ufa irimariasa faqa qinee unnannai aniaqanani.
- 80 Qinee andeeqasee ani naamuaqira ufamau fuaqaana, miqi mariaanoo aqara qisaurirafa sia qini rafaqaqafu qisaani.
- 81 Oo Yaawee qinee ani dadaaqiranara kisaqaqasaa rakisunaisia kudoosaapaidaqa.  
Qinee qeeqa saqarikirana ani ufasaa rusidaqa.
- 82 Ani qima afeekaikiranara qinee rakisida marunanoo qifu anauru idaqaenoo.  
Qinee iraanana anee yairee fee qini dadaaqinnaree.
- 83 Qinee mimi apatannoo nammari sakee mariana auquqaafa anaqinoo mandaikinoo marindee irausa maridaqa.  
Qinee miqiqa maridaqa sia ani naamuaqira ufa aunidaqa kaqi maraqa fidaqa.
- 84 Qinee kisaqaqasaa fee rakisianauree.  
Yairee fee anee qini dari mariana akiqara ummaara niminnaree.
- 85 Nári nimoo naamoo imaria fasiqausa sia ani sanda ufamau fimariasa qini qumararara dikaanda indufidaqa.
- 86 Ani aiqama naamuaqira ufa nifaqa quqee maria afeeka ufafa maridanoo.  
Faiqi misa unna qimasee darirari marianara anee qini dadaqia.
- 87 Misa qini darirara qimeekaidaqa.  
Misa miqi mariafaqa qinee ani naamuaqira ufa sia minnisaidaqa.
- 88 Ani sia taikaaninna amuqusirafa marinara anee amiqi amiqimma qimaqaa.  
Qinee ani sandufamau fuaneera miqimma qimaqa.
- 89 Oo Yaawee ani ufa naaru naaru marifa maridanoo.  
Innaarunai faqa naaru naaru marifa maridanoo.
- 90 Ani mapukusee marira oosana fannoo miqikai inoo naaru naaru mariannoo.  
Anee maa maqa maaqana quqaqoonnaqoo kai maridanoo.
- 91 Ani naamuaqira ufa marinara aiqama ainaina maqee kaqi maridanoo.  
Mi aiqama ainainausa ani ainainira faiqiara foora marianara maqee kaqi maridaqa.
- 92 Ani sanda ufa sia qini asasirana oosana marinaqau qinee qeeqa umaara ameemaanai kuqunaigini.
- 93 Qinee sia ani naakapara ufa qaunuanaura.  
Mi ufafa marinara minannai qini kaqi marirana maa maqanasaa qimiananoo.
- 94 Oo Yaawee qinee anindi maridaqa, qini dadaqia.  
Qinee ani naamuaqira ufamau firaree qidaqa amanidaqa.
- 95 Mandoosana maree maria fasiqausa qini darirara qimaarusidaqa.  
Misa miqi mariafaqa qinee ani sanda ufara kai indee indee idaqa.
- 96 Oosana oosana aiqama ainaina taikaaninafaqa kai marifaqa iridaqa.  
Miqinoo marifanoo ani naamuaqira ufa andeeqarafa sia taikaaninafa marifa maridanoo.
- 97 Oo Yaawee ani sandufara qinee fraqoo ridaqa.  
Qinee faasaambaasaana minara kai iridaqa.
- 98 Ani naamuaqira ufa fannoo qini faqa aiqama kari maridanoo.  
Qini amiqira irirana qimiseenoo qini namuqaa irirana uriqararusaikamma qi-maqaidanoo.
- 99 Qinee ani qimannimira ufa indee indee imarunnaara qeeqa daakapee mariasa faqa urinnaaqaramasee iridaqa.

- 100 Qinee ani Yaaweena naamuaqira ufa mau fimarunnanara qini irirafa faiqí firaasa irirana urinnaaqaraidanoo.
- 101 Qinee ani ufamau firaree qimaseeqa aiqama mandainainara qeerairammasee amaaraidaqa.
- 102 Oo Yaawee anee aneenna kai qini daakapee marianafa mariannanara qinee sia ani naakapara ufa qimeesa uqidaqa.
- 103 Ani naakapara ufa kaaqa adiafaaimarifa maridanoo.  
Mi adiafaairafa ookasaasa anoona kaaqa adiafaa imarina faqa arusee uriqaranoo maridanoo.
- 104 Qinee ani sanda ufa irisee minannai amiqira irirana maraidaqa.  
Mi qinoo marinara aiqama kaqi runna fimaria aanausara qini fidiqaamma qi-maqaidanoo.
- 105 Ani ufa fannoo qini qikuki qoomara foora kaaqa qee marifaqa fidaqa.  
Ani mi ufafa kai qini aana kaaqa gama qimaqee marifaqa fidaqa.
- 106 Qinee ani andeeqara sandufara doori runusee qima afeekaikammasee naaru naaru mimau fuanauree qiafannana, maqee kuqaa mi mau kaimbuanaura.
- 107 Oo Yaawee qinee firaa aupuraranaki maridaqa anee aneenna qima afeekaikunnandee inana maa maqanasaa kaqi marirana qimia.
- 108 Oo Yaawee, qini dufi dufi qira innaaru qiranara eedoo qimasee aneenna naamuaqira ufa qima qimia.
- 109 Qinee aiqama kari kuqirana afaisaa maridaqa taikaranara deedaqidaqa.  
Mi qiqi maridaqa qinee sia ani sanda ufara qaunidaqa.
- 110 Mandoosana maree mariasa misa qini qimaara ufaanara foora fufusaafaqa qinee sia rufiamaree ani naamuaqira ufasaqari kaqini fiqa.
- 111 Ani naamuaqira ufa qini naaru marira qumiasanara foora maridanoo.  
Mi ufausa qini qimuqusa asisirana qimi maria ufausa maridaqa.
- 112 Qinee ani sanda ufa mau fuanauree qimasee iridaqa.  
Ani sandufa mau fifi inaqa qeeqa kuqiranaki munu taikaanura.
- 113 Ani sandufamau sia aiqama kari fimariasara qinee fidiqaammidaqa.  
Mi qidaqa ani sandufara kai qinee ridaqa.
- 114 Oo Yaawee anee qini itita qimaqee marianafa mariananoo.  
Minara qinee qeeqa irirana ani qima afeekaikiranasaa rusisee maridaa.
- 115 Innee mandoosana maree mariasa qini daaqaqari nianasaa fifuqa.  
Qinee qeeqa Anutuna naamuaqira ufamau fuanaura.
- 116 Oo Yaawee anee qima afeekaikunandee qinana afeeka qiminaqa kaqi maa maqanasaa marianaura.  
Anee dadaaqinanoo qini daundura anisaa mundirafa sia taikaannoo.
- 117 Anee qini qumaree uqeera qisainaqa qinee amiqiraqoo marianaura.  
Anee miqimma qisainaqa qinee aiqama kari ani naamuaqira ufasa irirana rusianaura.
- 118 Ani sanda ufa rukiee mariasa anee mininnisee mariananoo.  
Misa ueeqarara tipundaarirafa fifau sia anoona marifa maridanoo.
- 119 Anee maa maqanasaa mandoosana maree mariasa madaapeera foora damunamma aqi marianafa mariananoo.  
Qinee minara ani naakapara ufara dididanoo.
- 120 Qinee aniara rufiidaqa.  
Qinee ani andeeqasee rainannimaqaranara irunanoo rufiarafa qini qumbiqa qi-maqaidanoo.
- 121 Qinee andeeqara oosana faqa amiqira oosana faqa maree marunausa maridaqa.  
Anee minara iriseenana sia qini minni qisainaqa namuqaa qini mandaikamma qi-maqaqa.
- 122 Anee kuqaa qima afeekaikammasee aneenna ainainira faiqi qini dadaqia.  
Ramoo ramaa imariasa sia qini nári uriqaranannai rafaqafu qimaqaqa.
- 123 Oo Yaawee qinee ani asumu mara qimaqaranara kisaqaasaa rakisidaqa marunanoo qifuki qaunduaridanoo.  
Anee qini namuqaa nisaukukinaana rafiaranara qima afeekaikamma qoonnanara afeesi marunanoo qifuki qaunduaridanoo.
- 124 Oo Yaawee aneenna sia taikaaninna amuqusirana amana kai qini amiqimma qi-maqasee aneenna naamuaqira ufa daamua qia.
- 125 Oo Yaawee qinee ani ainainira fasiqa maridaqa anee irirana oosana qiminaqa qinee ani naamuaqira ufa oosana irianaura.
- 126 Oo Yaawee faiqí anaasee ani sandufa rukieemarianara anee oosana uqannifiqara akuwana doo kambiqaidanoo.

- 127 Ani naamuaqira ufara qini didirafa kooru uraaqaranoo maridanoo.  
Kaaqa amiqira kooru uqanna faqa uraaqaranoo maridanoo.
- 128 Minara qinee ani aiqama naakapara ufa afaqaidaqa aiqama aaqara oosanara fidaqaqaa idaqa.
- 129 Ani naakapara ufa kaaqa amiqirafa marifaqa qinee qeeqa qimuqusa aiqamannoo afaqaidaqa.
- 130 Ani naakapara ufa oosana qimannimirafa kaaqa qarana nimidanoo.  
Mi ufafa sia iri mariasa irirana nimidanoo.
- 131 Ani naamuaqira ufa aniranara kisaqasaa rakisidaqa doo raqasee daannanai daannanai qida maridaqa.
- 132 Anee aniara rimamasara misa nifauee marianafa mariananoo.  
Anee qinee unnannai quandafi qini faqa qifauama qisaa.
- 133 Aneenna qima afeekaikunandee qinana qini saamuriranasaa itita qisaa.  
Anee qinanoo aaqara oosana fannoo sia qini rafaqa fu qimaqaani.
- 134 Faiqi misa nari uriqararanannai qini rafaqaqidammia, anee minakinaana qini mara qisaa.
- Miqimma sainaqa qinee ani naamuaqira ufa mau fuanaura.
- 135 Anee aneenna oori afu amiqi amiqiranannai qini miqimma qimaqasee aneenna sanda ufa daamuaqia.
- 136 Faiqi anaasee ani sandufa mau sia fuanara qini daukunu fannoo nammariara foora adiaidanoo.
- 137 Oo Yaawee anee kaaqa andeeqarafa mariananoo.  
Ani sandufa faqa aiqamausa amana amana kai andeeqa nimaqee marifa maridanoo.
- 138 Ani aataata fuqaee ufa fannoo kaaqa amana amana kai andeeqa nimaqee marifa maridanoo.
- 139 Qini namuqaa ani naamuaqira ufa minnisee mana mana imarianara qini aanoo qirafa idara foora qini qitaku qidanoo.
- 140 Ani qima afeekaikira ufa kaaqa mapukirafa maridanoo.  
Minara qini kaaqa dididanoo.
- 141 Qinee oorudupirausa marunaqa misa qiniara fidaqaqaidaqa.  
Miqi mariafaqa qinee sia ani naamuaqira ufara mana manamasee qaunidaqa.
- 142 Oo Yaawee ani andeeqarafa naaru naaru mariannoo.  
Ani sandufa faqa aiqama kari kuqaa anoona maridanoo.
- 143 Ummaara faqa inunurirafa faqa qiniki qumbiqaidanoo.  
Miqi marifanoo ani naamuaqira ufa fannoo asasirana qimidanoo.
- 144 Ani naakapara ufa aiqama kari amana amana kai andeeqannimaqee marifa maridanoo.
- Minara iriseenana anee irirana oosana qiminaqa maa maqanasaa kaqi marianaura.
- 145 Oo Yaawee qinee qeeqa qimuqusannai ani aaraidaqa.  
Qini nammeera qiranara qima qiminaqa qinee ani naamuaqira ufa mau fuanaura.
- 146 Qinee ani aaraidaqa qini mandainainakinaana uqeeera qisainaqa qinee ani sanda ufa afaqaanaura.
- 147 Suani afu maqee urimarinana, anee qini dadaaqianneera aaraidaqa.  
Qinee qeeqa irirana ani qima afeekaikira ufasa qeqasee maridaqa.
- 148 Maqee eendirana namu faqa kaqi marunanoo qifu faqbaqa iaqaqaiqaqa ani naakapara ufaqara oonu mafi iridaqa.
- 149 Oo Yaawee ani sia taikaaninna amuqusirafa marinara qini innaaruqirana iria.  
Aneenna nifauarana uqaqifiqasee qini marirana afeedamma qisaa.
- 150 Nidafirana faqa narirana faqa qimi mariasa adeedi anidaqa.  
Misa ani sanda ufa sia afaqee mariasa maridaqa.
- 151 Miqi mariafana anee Yaaweefa qini daaqa mariananoo.  
Ani aiqama naamuaqira ufaqa naaruara marifa maridanoo.
- 152 Qinee ooqai ani naakapara ufa iriqiafana.  
Mi ufaua anee qunaqa naaru marira ufaquaiqa mafiqua.
- 153 Qini aupurarana qafamasee minakinaana qini maraqisaa.  
Qinee sia ani sandufa qaununnana miqimma qisaa.
- 154 Qinee ufaki marunnana ititaqimaqasee qini idukuqisaa.  
Anee aneenna qima afeekaikunandee inana qini amiqiraqoo mara quqaqisaa.
- 155 Manda oosana maree mariasa misa ani sanda ufa mau sia fimariasa anee sia mareeqee amiqira qoo quqanniseennaranoo.
- 156 Miqi mariafana oo Yaawee anee qiniara amudaao qirafa firaaqoo marinara aneenna nifauarana uqaqifiqasee mareeqee amiqiraqoo quqaqisaa.



- 157 Qini namuqaauga ummaara qimi mariasa moomoo maridaqa.  
Misa miqiga mariafaqa qinee sia ani sandufasaaqari quandaki moosaa fiqa kaqi mi mau kai fidaqa.
- 158 Ani sanda ufa minnisee ueeqee mariasa qinee niqafamasee fidiqaamma ni-maqaidaqa.  
Sia ani naamuqaira ufa mau fimarianara miqidaqa.
- 159 Oo Yaawee doo qafaa, ani naakapara ufara firaqoo dididanoo.  
Ani aidirafa sia moosaa fimarinarara mariqoo kai marinara qini marirana afeedamma qisaa.
- 160 Ani sanda ufa oosana anoona maridanoo.  
Marifanoo ani aiqama andeeqara rainannimaqara ufafa naaru naaru marirafa maridanoo.
- 161 Misa faiqi uriqararawsa misa fifau qini mandaikamma qimaqaidaqa.  
Misa miqi mariafaqa qinee ani sanda ufara kai qeerairammasee qaindusidaqa.
- 162 Qinee ani qima afeekaikira ufara firaqoo asasidaqa.  
Mee faiqi moo fannoo koorara paqurimmasee asasindee qinee faqa miqi kai masee ani ufara asasidaqa.
- 163 Qinee aiqama unna ufara qikooqeenoo fidiqaa uqanna qidaqa.  
Miqi marunanoo ani sanda ufara kai dididanoo.
- 164 Qinee aiqama faasaana moodaanai qisauku taikasee dinni oonu qaaraqanda marasee kari ani andeeqara rainannimaqaranara dufi dufi qimamaqaidaqa.
- 165 Ani sandufara nidi marisa asooaranaki maridaqa.  
Sia moo ainaina fannoo nikuama niminaqa saamurifaranoo.
- 166 Oo Yaawee anee qini asumu mara qisaanneera afeesidaqa anee daamuaqianna mau kai fidaqa.
- 167 Qinee ani naakapara ufa mau fidaqa.  
Qinee qeeqa aiqama qimuqusanoo minara dididanoo.
- 168 Qinee ani naamuqaira ufa faqa ani naakapara ufa mau fidaqa.  
Qinee aiqama ainaina auqee marunnana anee qafee mariananoo.
- 169 Oo Yaawee qini nammeera qirafa anee iannannai oorufuani.  
Aneenna qima afeekaikunandee inana irirana oosana qimia.
- 170 Qini innaaruqirana irisee aneenna qima afeekaikammaqoonnana amana kai mara amiqira qoo quqaqisaa.
- 171 Anee aneenna sanda ufa qima qimiannanara qinee aiqama kari ani amooqianaura.
- 172 Ani naamuqaira ufa aiqamausa andeeqasee raina nimaqee marifa marinara ani sanda ufara idi raanaura.
- 173 Qinee ani naamuqaira ufa afaqee marunnanara aiqama kari qini dadaaqirara deedaqina maria.
- 174 Oo Yaawee qinee ummaarakki marunnanara firaqoo ani afeedamma qimaqaranara rakisidaqa.  
Qinee asagirana ani sandufaki paquridaqa.
- 175 Anee maqee marirana qiminaqa amana qinee ani amooqianaura.  
Ani naakapara ufa fannoo qini dadaaqamma qimaqaani
- 176 Qinee auwara sipsipara foora auiaqa nidaqa.  
Qinee sia ani sandufa qimeesu uqimarunnanara anee aniree qini aneenna ainainira faiqi randasee paquria.

## 120

### *Dadaaqiani fee innaaru.*

- 1 Qinee manda ummaarakki maridaqa Yaaweena aaraunanoo mifa eedoo qimasee dadaaqinoo.
- 2 Oo Yaawee unnaqimariasa faqa ueeqee mariasa faqa nisaukukinaana mareeqee kaqinni quqaqisaa.
- 3 Innee unna qimariasa Anutufa inni naqaa fee mannimaqaannoo.  
Mifa naqimmaseenoo fee inni aupurarana nimianoo fee.
- 4 Sundia rakira feefannoo faqa fidika arira idaurunnai faqa naruannoo.
- 5 Inni qambaana marirafa kaasau maqanna aamina maqannaasa qambaanara foora mandaikiqa maridaqa.
- 6 Qinee asooaranara fidiqaa imariasaki kisaagasaa uqanna mariaafanausa maridaqa.
- 7 Qinee asooaranara qimarunaqa misa rakiranara kai qidaqa.

**121**

*Yaaweefa maasa itita qimaqee marifa.*

<sup>1</sup> Qinee aaganai qifu maqasee, qini dadaaqirafa yaindari fee aniannoo fee qidaqa.

<sup>2</sup> Qini dadaaqirafa Yaawee finaindari kai aniannoo.

Maa maqana faqa innaaruna faqa auqu quqoo finnaindari kai aniannoo.

<sup>3</sup> Mifa sia aniara qinana aqufinnaranoo.

Ani rakisi amaqee marifa aiqama kari afu maqaida maridanoo.

<sup>4</sup> Isaraee maqannaasasaa rakisinnimaqee marifa sia moo kari qaunduarinoo sia faigaidannoo.

<sup>5</sup> Yaaweefa ani rakisi amaqannoo.

Mifa ani itita amaqarara ani aqa maridanoo.

<sup>6</sup> Suani fannoo faasaana sia naruannoo.

Kafaa eendaki quqoona fannoo sia naruannoo.

<sup>7</sup> Yaaweefa aiqama mandainainaki innisaa ititamma nimaqaannoo.

Mifa inni nariranasaa itita nimaqasee innisaa rakisiannoo.

<sup>8</sup> Mifa kai inni firannai anirannaira rakisi nimaqaannoo.

Maqee faqa naaru naaru faqa rakisi nimaqaannoo.

**122**

*Yeerusaree maqusa amooqia.*

<sup>1</sup> Yaaweena amaana maaqai firaree qimasee qimaqimiafaqa qinee asasiqa.

<sup>2</sup> Maqee maasa maaqoo Yeerusaree faandaamura kooqiki keeqafi afuqaki maridaqa.

<sup>3</sup> Yeerusaree maqusa usakasoofoano kaaqa amiqirafa atiuqa amana amana kai inoo maridanoo.

<sup>4</sup> Isaraeena akeeku akaaku miqimmasee aniree Yaaweena naamuaqira ufa amana kai dufi dufi qirana amidaqa.

<sup>5</sup> Maaqoo Yeerusaree maqanna karaambaigauqa nariqa faiqi anaasee ufa andeeqa nimaqararee qimasee ooqu mariqau.

<sup>6</sup> Yeerusaree maqusa asooaranaki marianifeera innaaruqiqa.

Yeerusaree maqusara rimariasa aiqama ainaina rairaa iani

<sup>7</sup> Oo Yeerusaree maqusa ani faandaamura afuqaki asoorafa kai mariani.

Ani karaambaigauqa nari maaqaki amiqimmasee mariaqa.

<sup>8</sup> Qeeqa ainainara faqa qeeqa qiqoondiuqara faqa irisee Yeerusaree maqusara maaqi qidaqa.

Asoorafa aniki mariani.

<sup>9</sup> Yaaweena maasa Anutuna amaana maaqara irisee inni Yeerusaree maqannaasee irairaamma nimaqaranara innaaru qidaqa.

Anutufa qimudaoo qirana amiani fee innaaru.

**123**

<sup>1</sup> Oo Yaawee qinee anee iannannai qifu maqaidaqa.

Innaarunai anee rakisi nimaqee mariannannai qifu maqasee dadaaqianneera innaaru qidaqa.

<sup>2</sup> Ainainira faiqi nariqa rakisirasasaa nifu mudi mariandee iqa kafa faqa ainainira maanaaqa miqikai inoo nari rakisira aanaaseesaa mundidanoo.

Oo Yaawee maasa Anutufa maasa miqi kai iqa ani qafaqa maridaqa anee maasara qimudaoo qirana qimianneera afeesidaqa.

<sup>3</sup> Oo Yaawee maasara qimudaoo qimasee qifauama qimaqaa.

Maasa moomoo aasaandaana ufa qima qimaqaidaqa.

<sup>4</sup> Ainaina faqaasa kisaaqasaa maasara uteeti qidaqa.

Kafaa nari nimoo qimariasa nari mara maree uriranannai maasa rafaqaqafusee ataasa ataasa qima qimaqaidaqa.

**124**

*Anutufa nari faiqi anaasee itita nimaqee marifa maridanoo.*

<sup>1</sup> Yaaweefa maasa sia dadaaqinaqau naqaa fee unaiqini.

Oo Isaraee maqannaasa minara qima qimifaqa iria.

<sup>2-3</sup> Yaaweefa maasa sia dadaaqinaqau namuqaa nari aanoo qiranannai maasa qumarasee kaqi kasi marunaqa nambiqaa qini.

<sup>4</sup> Miqinanooofau nammari aufirafa maasa maree fiqini.

Kaifaa nammari maasa rafaqaafu qisaiqini.

<sup>5</sup> Nammari aufinoo firaqoo ai ai qimarifa maasa ukuqnama qimaqaiqini.

<sup>6</sup> Yaaweefa maasa namuqaara qifaqa sia maasa mandaikamma qimaqaanara maasa mina dufi dufi qimamaqaa.

<sup>7</sup> Maasa ufiniara foora faiqi ufini ufanaki arurudukaki fiara foommiga.

Mi fasiqana ufaana raudafifaqa maasa qifaaga quqasee mana mana idaqa.

<sup>8</sup> Maasa dadaaqirafa Yaawee finnaindari anidanoo.

Maqa faqa innaaruna faqa auqu finnaindari anidanoo.

## 125

*Anutuna faiqi aanaaseesa rakisirafa.*

<sup>1</sup> Yaaweena saqariki mariasa Sioona aaqanara foora maridaqa.

Sia amana kasi annoo sia moo fannoo mina mareeqee moosaa quqaanno.

<sup>2</sup> Aaqanauga Yeerusaree maqusa fiqumma datinoo marindee inoo Yaaweefa nari faiqi anaasee fiqumma ititannimaqasee maqee faqa naaru faqa rakisi nimaqaidanoo.

<sup>3</sup> Mandoosana maree mariasa sia amana andeeqarusa maqasaa aiqama kari rakisifaranoo.

Misa miqifaqa andeeqarusa misasaaqaraa aaqara oosana maree foora.

<sup>4</sup> Oo Yaawee andeeqara oosana maree mariasa amiqi amiqimmannimaqaa.

Ani naamuqaira ufamau fimariasa amiqi amiqimma nimaqaa.

<sup>5</sup> Miqidana anee manda oosana maree mariasa aupurarana nimidana ani ufa minnisee kaqi runna fimariasa faqa aupurarana nimia.

Asoorafa Isaraee maqannaaki mariani.

Manda ainainakinaana mara kaqinni uqannisaani fee innaaru.

## 126

<sup>1</sup> Yaaweefa maasa Yeerusareenni qifiqee anufa qainasaara foora marinau.

<sup>2</sup> Maasa firaqoo naanaidara qida اساسا idiree mariqau.

Miqi mariafanaqa akaqa maqannaasa maasara maaqi qiqau.

Yaaweefa firaa ainaina dadaaqinoo fee qiqau.

<sup>3</sup> Kuqaa mifa firaa ainaina maasa dadaaqufaqa maasa minara firaqoo asasiqafana.

<sup>4</sup> Aadaturunna aaku rifanoo nammari qumi marindee inana kaifaa maasa amiqi amiqimma qimaqaa.

<sup>5</sup> Naukuna namu faqa ummaqi mariasa اساسا idi namu faqa unakuqaanani.

<sup>6</sup> Asumu ainaina ummaqiraree qimasee naukunu namufaqa maree munu ummaqusee mariifaqa nara aukuna unaku maree اساسا idi namu faqa maree anifaranoo.

## 127

*Anutuna amiqira oosana amooqia.*

<sup>1</sup> Yaaweefa sia maaqa usakaifanoo, usakara saika fannoo anoona siaifa mariqini.

Yaaweefa sia maqusasaa ititee marifanoo aufari mari fasiqafa kikiqinoo marida rakisi mari oosanafa sia amanaikiqini.

<sup>2</sup> Fifau kananaana eendai uqanna findifi ainaina kadaapirina fifina eendi mariananoo.

Yaaweefa nari aidi marisa faiqaqee iafanoo narana nimidanoo.

<sup>3</sup> Faiqi asumu Yaaweefa kaqi nimi mari ainainafa maridanoo.

Mifa kaaga afaaramasee amiqi amiqimma qimaqaidanoo.

<sup>4</sup> Kumaaraasaa maqainna faiqisa nari nikoona asaukuki rakira fasiqauqa duru feefara foora maridaqa.

<sup>5</sup> Miqira fasiqa moomoo faiqi duru feefara foora mina asaukuki karariqa mariafanoo اساسانoo.

Mifa ufa iriranaki mina namuqaauqa sia mina rafaqa fifaranoo.

## 128

*Yaaweena ufa qaindusi mariana akiqara nimirafa.*

<sup>1</sup> Yaaweena ufamau fimariasa اساسا daqa.

Mina naamuqaira ufasaa mariasa faqa اساسا daqa.

<sup>2</sup> Anee miqi marianafa aiqama kari ani kadaapirirafa narana ainaina amianno.

Ani ainaina reemindeemirinoo marinana اساسinnarannoo.

- <sup>3</sup> Ani anaqa fannoo wainna sandara foora maaqaki mariranaki moomoo qaqama iraanoo.  
Ani akoonaiqi faiqiuqa oorifa amiqira saqariara foora ani narana nee marianna difaana fiq fiqiuqa marifaranoo.
- <sup>4</sup> Faiqi Yaaweena ufamau fimarifa miqimmaseenoo kaaqa amiqi amiqiannoo.
- <sup>5</sup> Yaaweefa Sioonna maqusakiqari inni amiqi amiqimma nimaqaani.
- <sup>6</sup> Inneeqa kaqi marinna kamu Yeerusaree maqusaki aiqama ainaina reeminddee mirirana qafaqaqanani.
- <sup>6</sup> Innee kisaqaasaa marida inneeqa ninaiqimara niqafaqaqanani.  
Asoorafa Isaraee maqannaasaki mariani.

## 129

*Isaraee maqannaasa nariqa namuqaauqa mandaikamma nimaqaani fee innaaru qiqa.*

- <sup>1</sup> Innee Isaraee maqannaasa innee kumaaraasaa maruqooqari inni namuqa ummaara nimi maree ani marianara qima qimiaqa.
- <sup>2</sup> Qinee kumaaraa mariafannaqooqari qini namuqaauqa niranaqee marufaqa qini mandaikamma qimaqee mariqau.  
Miqidaqa sia qini uridaaqaree mariqau.
- <sup>3</sup> Maqarumasee afuqaki oora ateekee mariandee iqa namuqaauqa qini kaakadi qitaufaka runna oorara foora meemai uqanna ateekee mariqau.
- <sup>4</sup> Miqi marufanoo Yaaweefa andeeqarafa maridanoo rumbaranakinaana iduku qisanau.
- <sup>5</sup> Aiqama Sioonna maqusara fidaqaa imariasa rafaqa fusaifaqa anirandeeqa sandee-farannoo.
- <sup>6</sup> Misa maaqasaa ururee mari andanda fara foora urureenoo aadana usidanoo.
- <sup>7</sup> Sia moo fannoo mina suqu moodaanaki quqaidaqa sia rumbamaree fidaqa.
- <sup>8</sup> Aiqaaree fimariasakiqari sia moo fannoo Yaaweefa amiqi amiqimma amaqaanifee qifaranoo.  
Maasa Yaaweena auqusaa amiqi amiqimma amaqaidee qidaqa.

## 130

*Dadaaqiani fee innaaru.*

- <sup>1</sup> Qini qimuqusa mandaikirafa faruma uqnauriara foora inoo marifaqa oo Yaawee qinee ani innaaru kiqari aaraidaqa.
- <sup>2</sup> Oo Yaawee anee qini nameera qirana iria.  
Anee aaqoo rammatinimmaseenana qini qiki raqarana iriseenana dadaaqia.
- <sup>3</sup> Oo Yaawee anee maasa aaqarana papiqaki kaqi akara rumasaina marinanoo yafee ani ufa nimiranaki fiqaraannoo.
- <sup>4</sup> Maasara aneenna afusaa naaquqamasee mariaqeera maasa manda oosana akiqara minninnisee marianafa mariananoo.
- <sup>5</sup> Qinee Yaaweena dadaaqiranara asasida afeesidaqa. Mina ufa saqarikidaqa.
- <sup>6</sup> Qinee Yaaweena dadaaqiranara asasida afeesi marunafa aufari maria fasiqausa suani afu uriranara rakisi mariana uraaqaranoo maridanoo.
- <sup>7</sup> Yaaweena sia taikaaninna amuqusirafa marinara faqa mifa maasa mandainainakinaana dadaaqirara aidi marinara faqa irisee, Isaraee maqannaasa Yaaweena saqarikiaqa.
- <sup>8</sup> Mifa nari faiqi anaasee Isaraee maqannaasa nari aiqama aaqaranakinaana dadaaqian-noo.

## 131

*Anutuna saqarikammasee innaaru qira oosana.*

- <sup>1</sup> Oo Yaawee qinee qeeqa qimooqirana minniseeqa.  
Qeeqa ramoo ramaa irana faqa minnisee qimeesa uquseeqa.  
Qinee sia firaa ainainauqara oonu mafi iridaqa, qinee sia amanaiki marunna ainainara faqa sia iridaqa.
- <sup>2</sup> Qinee sia miqidaqa, qinee asoaranaki qifaqa quqasee maridaqa.  
Faiqi aanaaqi nari ninausa nifundanasaa ireeda faiqaqee iandee iqa marunanoo qini qimuqusa fannoo ireeda qiniki maridanoo.
- <sup>3</sup> Oo Isaraee maqannaasa maqee faqa naaru faqa Yaaweena kai saqari kiaqa.

**132***Anutuna amaana maqara amooqia.*

- <sup>1</sup> Oo Yaawee anee sia Dafidinara qaunua.  
Mifa oosana oosana aupurarana maroonara faqa sia qaunua.
- <sup>2</sup> Oo Yaawee Dafidifa qima afeekaikunara iria.  
Mifa ani afeeka faqaa Anutuna Yakooboona Anutuna faqa qima afeekaikunara iria.
- <sup>3</sup> Qinee sia qeeqa faiqara maaqai funaura.
- <sup>4</sup> Qinee sia idooeeqa faiqeeqa ianauranoo.
- <sup>5</sup> Qinee afeeka faqaa Anutuna Yakooboona Anutuna maqusa deedaqammaseeqa in-  
aaqianna faiqaanaura.
- <sup>6</sup> Maasa Beeteereeqemma maqusaki maridaqa moodaanaki kira bookisara irisee  
Yeearimma afaasasaa paqurimmasee qafaqiafana.
- <sup>7</sup> Maasa maaqi qiafana. Anifaqa maasa Yaaweena amaana maqai oonuree mina ufa irira  
qaari oorinni oonuree amooqiaqa.
- <sup>8</sup> Oo Yaawee moodaanaki kira bookisa namu faqa mara maree aneenna naaquara  
uiqaana maaqaki ania.  
Mi moodaanaki kira bookisafa ani afeekara kooroo imarina faqa maree aniree maaqoo  
naaruara maria.
- <sup>9</sup> Ani aanaiqikirausa aiqama kari andeeqara ainaina kai auqaaqanani.  
Ani faiqi anaasee faaqa fuisee qidaqa asasiaqanani.
- <sup>10</sup> Oo Yaawee aneenna ainainira faiqi Dafidinara qima afeekaikinau.  
Sia aneenna utaaqamaqaanna karaambaiqana minni aisaa.
- <sup>11</sup> Anee oori kandamasee Dafidinara qima afeekaikinau.  
Sia kaifaa mi qima afeekaikirana rukaanauranoo fee qimasee qima afeekaikamasee  
maaqi qinau.
- Qinee ani faiqi namukinaana moo karaambaiqaika masaananoo anee kuqu finanoo mifa  
Isaraee maqannaasasaa rakisiannoo.
- <sup>12</sup> Ani faiqi namu qini moodaanaki kira ufamau andeeqasee fiqa qini naamuaqira ufa  
nimunnana mau andeeqasee fifanoo misa faiqi namu faqa anee kuqinaqa ani  
amaaqa maqasee karaambaiqa marifaranoo.
- <sup>13</sup> Yaaweefa nari faiqara maaqaikianifeera Sioona maqusa utaaqanau.
- <sup>14</sup> Maaqoo qinee naaruara maridaqa rakisinnimaqaanaura.
- <sup>15</sup> Qinee Sioona maqusanaasa nidi mari ainainausa aiqama nimianaurea.  
Mi maqusanakinaasa kudi mariasa naranannoo amiqimma nimaqaanaura.
- <sup>16</sup> Qinee mi maqusanakina aanaiqikirausa mariasa auqainna aiqama ainainna amiqi  
amiqimma nisaanaqa minakinaa fasiqa anaasee asasira idi raidaqa faaqa fuisee  
qifaranoo.
- <sup>17</sup> Mi maqusanaki qinee Dafidina akeeku akaakukinaana afeeka karaambaiqaika  
masaanaura.
- Mi maqusanaki qinee qeeqa utaaqamaqaunna karaambaiqana rakisinnimaqarana  
afeedamma aisaanaura.
- <sup>18</sup> Qinee mi karaambaiqana namuqaauqa nisaauriranannoo rafaqaqafu nisaanauranoo.  
Mina rakisinnimaqaranaki mariasa amiqiranaki marifanoo aiqama ainaina irairaa  
iannoo.

**133***Akaqaafasaara rira oosana aidia.*

- <sup>1</sup> Anutuna faiqi anaasee moodaanaki marida nari amiqi nari amiqirafa kaaqa amiqirafa  
maridanoo.
- <sup>2</sup> Mi amiqi amiqirafa Aaroonaa akiaaqa oorifa fadameena amiqirana adiasoofanoo qumu  
rameeqee oosaumau qumundee ira amiqi amiqirafa maridanoo.
- <sup>3</sup> Mi amiqi amiqirafa Qeeramoonaa aqaanasaaqaraa qifi faramu Sioona aqaanasaa  
aqufino aiqama ainaina asoosama nimaqaaindee idanoo.  
Yaaweefa miqi qimasee nari amiqi amiqirana nimirree qimasee qima afeekaikinau.  
Mi amiqi amiqirafa kisaqa marirafa maridanoo.

**134***Anutuna amooqira nameera qirafa.*

- <sup>1</sup> Innee Yaaweena naaquqara amaana maqaki eendaki ainaini mariasa innee aiqama  
aniree Yaaweena amooqiaqa.

- <sup>2</sup> Amaana maqaki inneeqa nisauku uqeerasee innaaru qidaqa Yaaweena amooqimma amaqaqa.  
<sup>3</sup> Yaaweefa maa maqana faqa miri innaarunna faqa auqu quqoofa Sioona maqusakiqari inni amiqi amiqimma nimaqaani.

## 135

### *Anutuna amooqira idi.*

- <sup>1</sup> Yaaweena amooqiaqa.  
 Yaaweena auqu mina ainainira faiqiuqa amooqiaqa.  
<sup>2</sup> Innee Yaaweena naaquqara amaana maqaki ainaini mariasa innee Yaaweena amooqiaqa.  
<sup>3</sup> Yaaweefa andeeqarafa marinara mina amooqima amaqaqa.  
 Mifa maasara qimudao qimarinara mina auquara amooqira idi ramamaqaqa.  
<sup>4</sup> Mifa nariara Yakooboona utaaqanau.  
 Mifa mina akeeku akaaku Isaraee maqannaasi fasiqa anaasee narindi kiageera utaaqanau.  
<sup>5</sup> Maasa Yaaweefa aiqama unna qira anutusa firaqoo uriqararafa marinara iridaqa.  
<sup>6</sup> Innaaruna ameemaana faqa maqasaa faqa ooruku nammariki faqa mina aundurari faqa Yaaweefa nari aidiranannai kai imarifa maridanoo.  
<sup>7</sup> Mifa nari kai qifanoo asuru nannamu ira oonamu maqa dinni atindari uridanoo.  
 Asukuna arira oonamuki Yaaweefa aakuasaa quqasaifanoo aaku namu faqa qumidanoo.  
 Mifa nari afeedira maaqaki qariara foora ufaira qifanoo uqidanoo.  
<sup>8</sup> Yaaweefa Isipa maqannaasa ooqa faiqiuqa faqa misa aandau ooqa anaaiqiuqa faqa moodaa karammasee narinau.  
<sup>9</sup> Miqoo mifa misa karaambaifa faqa misa faiqi firaasa faqa aaqarana akiqara aupurarana nimirree qimasee misaki faiqi sia auqaaqaa ira ainaina faqa naaquqara ainaina faqa auqanau.  
<sup>10</sup> Mifa moomoo maqannaasa mandaikamma nimaqasee misa afeeka karaambaifa kuqa narinau.  
<sup>11</sup> Amooru maqannaasa karaambaifa mina auqu Sioonana faqa Basanna maqannaasa karaambaifa mina auqu Ookana faqa Kanna maqannaasa karaambaifa kuqa narinau.  
<sup>12</sup> Naruseenoo misa maqa maaqa rafleeqeenoo nari faiqi anaasee Isaraee maqannaasa niminau.  
<sup>13</sup> Oo Yaaweefa faiqi anaasee aiqama kari aniara Anutu fee qimasee koorooifaranoo.  
 Aiqama naaru kambiqaanausa aniara irifaranoo.  
<sup>14</sup> Yaaweefa nari faiqi anaasee ititannimaqasee nari ainainira faiqiuqara qimudao qiannoo.  
<sup>15</sup> Anaamuru mariasa misa unna qira anutusauqa koorannai faqa siruaannai faqa faiqi nisaukunoo auquqoofauqa maridanoo.  
<sup>16</sup> Misa noo aamara marifaqa sia ufa qidaqa, nifu marifaqa sia qafaidaqa.  
<sup>17</sup> Misa naaqoo marifaqa sia ufa iridaqa.  
 Misa naikaamaraindari sia uqanna kaqi kaaqoo naannamma naidaqa.  
<sup>18</sup> Mi unnaqira anutusa auqu quqoosa faqa mina saqariki mariasa faqa mi sia kasi mari ainainnara foora mariaqanani.  
<sup>19</sup> Oo Isaraee maqannaasa innee Yaaweena amooqiaqa.  
 Innee aanaiqikirausa Aaroonu faiqi namu innee faqa Anutuna amooqiaqa.  
<sup>20</sup> Innee Reefina aiku asauku mariasa Yaaweena amooqiaqa.  
 Aiqama innee minara innaru qimariasa Yaaweena amooqiaqa.  
<sup>21</sup> Sioona maqusakiqari Yaaweena amooqiaqa.  
 Yaaweena amooqiaqa.

## 136

### *Anutuna dufi dufi qimamaqara idi.*

- <sup>1</sup> Yaaweefa andeeqarafa marinara dufi dufi qimamaqaqa.  
 Mina amuqusirafa naaru naaru marifa maridanoo.  
<sup>2</sup> Aiqama unnaqira anutusa uriqararana dufi dufi qimamaqaqa.  
 Mina amuqusirafa naaru naaru marifa maridanoo.  
<sup>3</sup> Aiqama karaambaifa afeeka urinnaaqararana dufi dufi qimamaqaqa.  
 Mina amuqusirafa naaru naaru marifa maridanoo.  
<sup>4</sup> Mifa kai fira naaquqara ainaina auqi marifa maridanoo.  
 Mina amuqusirafa naaru naaru marifa maridanoo.

5 Mifa narí amiqira iriranannai innaaruna auqufa maridanoo.

Mina amuqusirafa naaru naaru marifa maridanoo.

6 Mifa maa maqana auqeeqee nammari faruma amuaaqa quqanau.

Mina amuqusirafa naaru naaru marifa maridanoo.

7 Mifa suani faqa quqoona faqa auqinau.

Mina amuqusirafa naaru naaru marifa maridanoo.

8 Mifa suaniara anee iaqaranasaa rakisiannee qimasee auqinau.

Mina amuqusirafa naaru naaru marifa maridanoo.

9 Mifa quqoona faqa fasauqara faqa eendirana saa rakisiaqee qinau.

Mina amuqusirafa naaru naaru marifa maridanoo.

10 Mifa Isipa maqannaasa ooqa faiqiuqa narinau.

Mina amuqusirafa naaru naaru marifa maridanoo.

11 Mifa Isaraee maqannaasa Isipa maqusaindaraana aana muqunufaqa fiqau.

Mina amuqusirafa naaru naaru marifa maridanoo.

12 Mifa misa narí afeeka asaukunnai nifiqee finau.

Mina amuqusirafa naaru naaru marifa maridanoo.

13 Mifa Taatuqee nammari qambaana rakeeinau.

Mina amuqusirafa naaru naaru marifa maridanoo.

14 Mifa narí faiqí anaasee minaki aana muqunufaqa fiqau.

Mina amuqusirafa naaru naaru marifa maridanoo.

15 Fitaqa fufanoo Isipa maqannaasa karaambaiqa narí rakira fasiqauqa faqa  
oonuroofanoo ukuqnama nimaqanau.

Mina amuqusirafa naaru naaru marifa maridanoo.

16 Mifa narí faiqí anaasee nifu uqufaqa aadana maqa maaqaki fiqau.

Mina amuqusirafa naaru naaru marifa maridanoo.

17 Mifa maqasaa afeeka faqaa karaambaiqauqa narinau.

Mina amuqusirafa naaru naaru marifa maridanoo.

18 Mifa firaa nuqu faqaa karaambaiqauqa narinau.

Mina amuqusirafa naaru naaru marifa maridanoo.

19 Amooro maqannaasa karaambaiqa mina auqu Siqoonnana arinau.

Mina amuqusirafa naaru naaru marifa maridanoo.

20 Basanna maqannaasa karaambaiqa mina auqu Ookana faqa arinau.

Mina amuqusirafa naaru naaru marifa maridanoo.

21 Yaaweefa mi maqannaqanda maqa maaqa rafieeqeenoo narí faiqí anaasee Isaraee  
maqannaasa niminau.

Mina amuqusirafa naaru naaru marifa maridanoo.

22 Nari ainainira faiqiuqa Isaraee maqannaasa niminau.

Mina amuqusirafa naaru naaru marifa maridanoo.

23 Maasa namuqaa rafaqafu qimaqoofanoo mifa maasara sia qauninau.

Mina amuqusirafa naaru naaru marifa maridanoo.

24 Mifa maasa namuqaa rumberanakinaana idukuqisanau.

Mina amuqusirafa naaru naaru marifa maridanoo.

25 Mifa kai faiqí faqa aigama aandau auqu rarana faqa doodaani auqu rarana faqa narana  
nimidanoo.

Mina amuqusirafa naaru naaru marifa maridanoo.

26 Anutufa innaarunai marina dufi dufi qimamaqaaqa.

Mina amuqusirafa naaru naaru marifa maridanoo.

## 137

*Isaraee maqannaasa Babilonia maqa maaqaki maridaqa iki raqoo ufafa.*

1 Maasa Yuda maqannaasa Babiroonia maqannaasa rumberanaki maridaqa Babiroonia  
nammariuqa afainni oqufaaqee idaqa Sioonna maqusara irisaidaqa iki raqee  
mariqafana.

2 Maasa miqoo maridaqa doori runusee nariqa piripunna saqari asaanasaa diri qiafana.

3 Maasa rumbaqiqaqee marusa maasara qidaqa idi raqee qiqau.

Idi raidaqa maasa اساسirana qimiaqee qiqau.

Sioonna maqusara rara idi rama nimiaqee qiqau.

4 Misa miqi qufaqa maasa maaqi qiqiafana.

Maasa naqimasee fee aanaamuru maqa maaqakiaqa Yaaweena amooqira idi raanauree.  
Sia amana.

- <sup>5</sup> Qinee Yeerusaree maqusara qaunuseefau qinee sia kaifaa naaruara piripunna amana aruanaura.
- <sup>6</sup> Qinee ani Yeerusaree maqusara sia aiqama kari irifau sia amana kaifaa naaruara idi raanaura.
- Anee qini uriqarara asasirafa mariannanara qaunusee sia amana kaifaa idi raanaura.
- <sup>7</sup> Babiroonnia maqannaasa Yeerusaree maqusa faandaamura rakeemmasee keeqoo faqa Eedoomma maqannaasa namuqaa fuki faaki qidaqa Yeerusree maqusa rapeepaa iaqera qunara Yaawee anee iriseenana mina akiiqara ia.
- Oo Yaawee anee misufara iriqaraasammasee sia qaunua.
- <sup>8</sup> Oo Babiroonnia maqannaasa innee kuridi fifaranoo.
- Maasa Isaraee maqannaasa saaroo qinana Babiroonnia maqannaasa narinafa asasianoo.
- <sup>9</sup> Inni Babiroonnia maqannaasa faiqi aanaaqiuqa qumaree maasa Isaraee maqannaasa saarooqi oonisaa rutukinafa asasiannoo.

## 138

*Anutunara dufi dufi qira innaaru.*

- <sup>1</sup> Oo Yaawee qinee qeeqa qimuqusa ookiqari dufi dufi qimamaqidaqa. Unna anutusa nifusaa ani Yaaweena amooqira idi raanaura.
- <sup>2</sup> Qinee ani naaquqara amaana maqa maritina'i ubeekamafi qi'qoori saunu arafi ani auqu amooqianaura.
- Ani sia taikaaninna amuqusiranara faqa ani mapukusee marira oosana faqa marinara ani amooqianaura.
- Anee aneenna auqu faqa aneenna naamuqira ufa faqa aiqama ainaina urinnaaqararana uqannifiqoonnanara ani auqu amooqianaura.
- <sup>3</sup> Oo Yaawee qinee aaraunana iriseenana anee qimaqimiananoo. Aneenna afeekannai qini afeekaikamma qimaqaananoo.
- <sup>4</sup> Aiqama maa maqa maaqanaki maria uriqararusa ani Yaaweena ufa irianara ani amooqifaranoo.
- <sup>5</sup> Misa anee auqoonna ainainara faqa ani firaa afeekara faqa irisee idi reefaranoo.
- <sup>6</sup> Anee kaaqa mirinni uriqarana maridana ureeqarausasaa rakisiniamaqee mariananoo. Faiqi nari nimoo naamoo qimariasa sia amana ani afusaqari kukeeqeefaranoo.
- <sup>7</sup> Manda ummaara qini fiqumma datinoo marifana anee minakinaana qini amiqimma qimaqaananoo.
- Qini namuqaauga aanoo qiafana aneenna afeekannai misa nindaqaa qimarianafa mariananoo.
- <sup>8</sup> Anee aiqama ainaina qima afeekaikamma qoonnandee innaranoo. Oo Yaawee ani amuqusirafa naaru naaru marifa maridanoo. Anee maasa Isaraee maqanaasara dadaaqiraree qunnana sia qaunusee minnisaa.

## 139

*Anutufa innisaimbaqara amiqimmasee iriseenoo amiqimmasee rakisidanoo.*

- <sup>1</sup> Oo Yaawee anee qini qimuqusaki diuqummaseenana qiniara irimariananoo.
- <sup>2</sup> Qini ooqu marirana faqa findifirana faqa aiqama ainaina auqee marunnanara faqa anee irimariananoo.
- Anee nianaindari qini
- Anee nianaindari qini qitukurakin
- Anee nianaindari qini qitukurakinaa
- Anee nianaindari qini qitukurakinaa iriranara irimariananoo.
- <sup>3</sup> Anee qinee ainaini marunnana faqa idooee marunnana faqa diuqimariananoo. Anee qinee aiqama ainaina auqee marunnanara irimariananoo.
- <sup>4</sup> Oo Yaawee qinee moo ufa qianeerunana anee faasai mi ufana aiqama irimarianafa mariananoo.
- <sup>5</sup> Anee qini fiqumma ina datina aiqamatina'i mariananoo. Anee aneenna afeekannai qini itita qimaqee mariananoo.
- <sup>6</sup> Ani qiniara irirafa kaaqa firaafa uriqaranoo maridanoo. Ani mi irirafa qini irirana faqa fiaaqaranoo maridanoo.
- <sup>7</sup> Qinee ani Yaaweena maraquna minnisee yaifee moosaa fuanauree. Qinee ani afu saaqari yaifee moosaa fuanauree.
- <sup>8</sup> Qinee innaarunai ooru firaree qianana anee minni faqa marinnaranoo. Qinee kuqirausa mariannai firaree qianana anee minni faqa marinnaranoo.



- <sup>9</sup> Qinee qaɣamaree suani afu ururee marina ooɣiaaɣarama fuanana anee minni faɣa marinnaranoo. Suani keeqee marina fiaaɣaraanana anee miqoo faɣa marinnaranoo.
- <sup>10</sup> Qinee mitinai marianana anee miqoo maridana qini aana muqunimma qisarara faɣa miqoo marinnaranoo.
- <sup>11-12</sup> Qinee asukunara kukeeqa qimaɣaannee qimasee kaaɣa qarafa qini fiɣu fiɣu inoo marifa quandaki asukunaikiannee qiananoo asukuna fannoo sia ani afusaa asukunara foora maridanoo.
- Asukuna fannoo faasaanara foora kaaɣa qaannoo.
- Asukuna faɣa kaaɣa qarafa faɣa ani afusaa amana kai maridanoo.
- <sup>13</sup> Anee Yaaweefa kai qini daundurakinaa ainaina aiɣama auqunafa mariananoo. Anee qini qinoona aranandaki qini qifaaɣa moodaanaki ootupama qisaananoo.
- <sup>14</sup> Aniara ruftee mariafa mariannanara ani amooqidaɣa.
- Anee aiɣama ainaina auqee marianafa mookira ainaina naaɣuɣara ainaina auqee marianafa mariananoo.
- Qinee minara qeeɣa aiɣama qimuɣusannoo iridaɣa.
- <sup>15</sup> Qini qimudaani moodaanaki ootuppee marufana anee ireeda qini qinoona aranandaki moodaanaki quqaqisanau.
- Qinee miqoo kukeeqaranaki innooqee mariafanana anee qinee mariafannanara iri marinau.
- <sup>16</sup> Anee sia kambiqaaɣa mariafana qiqafanau.
- Qinee naaru moodaa moodaa faasaana auqaana ainainara ani papiqaki akara rinoo maridanoo.
- Mi moodaa moodaa faasaanafa sia kambiqanoo marufanoo miqoo ani papiqaki akararinoo maridanoo.
- <sup>17</sup> Oo Anutu ani iriranara irunanoo firaaqoo ummaara darinoo.
- Moomoo uqanna maridanoo.
- <sup>18</sup> Qinee asaana ruananoo nukuda faɣa arusee fiɣaranoo mariannoo.
- Qinee faiɣaqee marii findi fiɣa ani mi iriranara kaqi kai irimaree fidaɣa.
- <sup>19</sup> Oo Anutu anee mandoosana maree mariasa narinnaranoo fee qidaɣa.
- Faiqi fidika ruqiɣee mariasa qini quqasee fififaɣa qeeqaraa marianauree qidaɣa.
- <sup>20</sup> Misa manda ufa ani qimamaqaidaaɣa.
- Misa oosana oosana manda ufa ani auɣuara qidaɣa.
- <sup>21</sup> Oo Yaawee aniara fidaqaa imariasa qinee misa fidiqaaɣamma nimaqaidaaɣa.
- Ani ufamau firanara ititamasee aanoo qimariasara qinee firaaqoo qikooqaidanoo.
- <sup>22</sup> Qinee miqimariasara kaifaa firaaqoo uqanna fidiqaaɣamma nimaqaidaaɣa.
- Qinee misara qini namuqaauqee qidaɣa miqidaɣa.
- <sup>23</sup> Oo Anutu qini diuqummasee qini iriranara iria.
- Anee qini qimanammasee qini irirana oosanara iria.
- <sup>24</sup> Qini daunduraki manda ainaina qafamaseenana naaru marira aanaindari qinisaa rakisiqisaa.

## 140

*Isaraee maqannaasa Anutufa dadaaqiani fee quu ufa.*

- <sup>1</sup> Oo Yaawee mandoosana maree mariasa nisaukukinaana qini maraɣuqisaa.
- Faiqi nariqanuwasaa faɣa ititaqisaa.
- <sup>2</sup> Misa aiɣama kari mandainainara tupundaaridaɣa.
- Misa aiɣama kari aanoo qirana kai uqeeridaɣa.
- <sup>3</sup> Misa nifauru nimaakiri kuqimaria sakanifara foora maridanoo.
- Misa nookinaa ufa fannoo ukadiqa manda marasinnara foora maridanoo.
- <sup>4</sup> Oo Yaawee manda oosana maree mariasa afeeka ameemaaindaraana qini ititaqisaa.
- Faiqi nariqanuasa qini qiku gama qimifaɣa aqufuaneeera misa tipundaridaɣa.
- Minara anee misa saa ititaqisaa.
- <sup>5</sup> Nári nimoo naamoo imariasa qini qimaara ufaanara foora fufidaɣa.
- Misa nári ufaana aatataa qini qimaara fufidaɣa.
- <sup>6</sup> Oo Yaawee qinee maaqi qimasee aniara qidaɣa.
- Anee qini Anutufa mariananoo.
- Oo Yaawee anee qini dadaaqianneera aaree marunnana iria.
- <sup>7</sup> Oo qini uriqarara Yaaweefa, anee qini amudaana qimasee itita qimaqee marianafa mariananoo.
- Rakiranaki anee qini ititaqimaqaananoo.

<sup>8</sup> Oo Yaawee sia anee mandoosana maree mariasa nidi mari ainaina nimia.

Anee misa tipundaarirana ititannisainanoo sia anoonaikiani.

<sup>9</sup> Anee qinaqa qini namuqaauqa sia rakiranaki uriqaraaqa.

Anee qinanoo misa darirari maria ufafa quandaki nariqa naruani.

<sup>10</sup> Miqi mariasasaa fidika arira ida auru adia nimaqaa.

Misa dikaandaki agusaina sia kaifaa minakiqari uruaqa.

<sup>11</sup> Niqoonausara unna qimasee misa kikiqusi mariasa aiqama ainainirafa sia anoon-  
aikiani.

Mandainaina fannoo faiqi kuqa nariqanuusa rafaqaqafuseenoo mandaikamma ni-  
maqaani.

<sup>12</sup> Oo Yaawee anee kudi fasiqa anaasee kootaki itita nimaqaannanara qinee iridaqa.

Anee sarau imariasa amana amana kai itita nimaqaannanara faqa iridaqa.

<sup>13</sup> Andeeqarausa kuqaa uqanna ani amooqifaranoo.

Misa ani afusaa marifaranoo.

## 141

### *Eendaki innaaru.*

<sup>1</sup> Oo Yaawee qinee ani aaraidaqa qini maqee dadaaqia.

Qinee ani aaraanana iria.

<sup>2</sup> Qini innaaru qirana amiqira afundimari ida munanara foora maraa.

Qinee qisauku uqeerasee innaaru qirana eeneemari suqee maria tatufiranara foora  
maraa.

<sup>3</sup> Oo Yaawee anee qini doosaa rakisianinna quqasainanoo rakisi marinanoo qini dook-  
iqari sia manda ufa ururaani.

<sup>4</sup> Qini mandainaina auqarara didi marina ititaqisaa.

Manda fasiqauqaki ootupamafi misa manda oosana mararanasaa ititaqisaa.

Qinee sia misa qoomaqa dadaaqi naanaura.

<sup>5</sup> Andeeqara fasiqa fannoo qini aaqarana akiqara qini dadaaqianifee aupurarana  
qiminaqa qinee minara qini amiqi amiqimmidanoo fee qianaura.

Aaqee mariasa qiniara uriqarara fee qifaqa qimooqirana sia maraanaura.

Qinee maqee maqee misa manda oosannara taikaannee qimasee innaaru qimarunna-  
nara misa qimooqirana sia maraanaura.

<sup>6</sup> Andeeqara uriqararausa manda oosana maree mariasa misa uriqararausa rafuseeqee  
maaninni aqusaifaqa faiqi anaasee qini ufara kuqaa anoonee qifaranoo.

<sup>7</sup> Mi manda uriqararausa nimudaani saqari araira foora moomoo madika afaiqara irairaa  
inoo mariannoo.

<sup>8</sup> Oo Uriqarara Yaawee qinee kaqi ani saqarikidaqa.

Qinee ani itita imaqaranara randaidaqa.

Anee qiniara qaoo qinaqa sia kuquanaura.

<sup>9</sup> Qini qimaara qinukufana fufuqaanasaa ititaqisaa.

Manda oosana maree mariasa qiku ufana fufuqaanasaa ititaqisaa.

<sup>10</sup> Manda oosana maree mariasa nariqa ufaanaki aru fifaqa qinee amiqimmasee fua-  
naura sia minaki aruanaura.

## 142

### *Dadaaqiani fee innaaru.*

<sup>1</sup> Qinee dadaaqianifeera Yaaweena aaraidaqa.

Qinee qiki raqaidaqa minara innaaru qidaqa.

<sup>2</sup> Qinee qeeqa aiqama inunu rira ufauqa mina amidaqa.

Qinee qeeqa aiqama ummaara mina qimamidaqa.

<sup>3</sup> Qinee minnisara runanoo qinee andeeqasee qianna ainnainnara mifa iridanoo.

Qinee fimarunna aannanasaa qini namuqaa qini qimaara kukeeqasee ufaana fufidaqa.

<sup>4</sup> Qinee qeeqa inaaqiannai dadaaqiranara qafaunanoo sia maridanoo.

Sia moo fannoo qini ititaqimaqaaninafa maridanoo.

Sia moo fannoo qiniara qimudao qidanoo.

<sup>5</sup> Oo Yaawee anee dadaaqianneera aaraidaqa.

Anee Yaaweefa qini itita qimaqee marianafa mariananoo.

Maa maqanasaa mariranaki maridaqa aniara kai ridaqa.

<sup>6</sup> Oo Yaawee qinee dadaaqianneera qiki raqee marunnana iria.

Manda ummaara fannoo qini nammariara foora ukuqnama saifaqa kuqiraridaqa.

Qini namuqaa kaaqa afeeka faqaasa marianara qini misa nisaukukinaana mara kaqinni quqaqisaa.

<sup>7</sup> Qini teerookinaana iduku qisainaga ani faiqi anaasee suqiranaki ani amooqianaura. Anee qini amiqimma qimaqaannanara ani amooqianaura.

## 143

*Dadaaqiani fee innaaru.*

<sup>1</sup> Oo Yaawee qini innaaruqirana iria.

Aneenna andeeqaranakiqari qini afeeka innaaruqirana iria.

Aneenna mapukira oosanakiqari qini ufa anoona qima qimia.

<sup>2</sup> Sia moo fannoo maa maqanasaa qaraafa ani afusaa andeeqarafa maridaqa.

Minara anee sia qini aneenna ainainira fasiqa mareeqee aneenna kootaki quqasee qimanammasee qafaa.

<sup>3</sup> Qini namuqaa qini qifaqasee firaqqoo uqanna qini rafaafa fidaqa.

Mifa qini asukuna rumbaranaki quqasaifaqa qinee ooqai kuqusara foora maridaqa.

<sup>4</sup> Miqimmasaifaqa qinee minnisarara deedaqidaqa.

Qini qimuqusa fannoo munara minari marifaqa kaaqa kuquqaa idaqa.

<sup>5</sup> Qinee indaaru mariaafanna mariranara oonu mafi iridaqa.

Qinee anee aiqama ainaina iannanara iridaqa.

Anee aiqama ainaina auqaannanara qeeqa iriranaki minisee iridaqa.

<sup>6</sup> Qinee innaarukiqari qeeqa qisauku anee iannannai uqeeraidaqa.

Aadana maqara foora qini qimana fannoo aniara nammariara foora aididanoo.

<sup>7</sup> Oo Yaawee qini marirafa taikaaqaammidanoo.

Qini ufa irisee mina anoona qimaqimia.

Sia qini qiqafamasee kukeeqaa.

Anee miqinaqa qinee kuqirausa fimariannai fuanaura.

<sup>8</sup> Aiqama kananaana anee daqqoo auqainaga ani sia taikaaninna amuqusiranara irisee qeeqa saqarikirana aniki quqaanaura.

Qini innaaru qirafa anee iannannai ooru fidanoo.

Anee qiniara fuannee qinnaqqoo uqaqifiqainaga fua.

<sup>9</sup> Oo Yaawee ititaqimaqaanneera anee iannannai fidaqa.

Qini namuqaa nisaukukinaana mara kaqinni quqaqisaa.

<sup>10</sup> Anee qini Anutufa mariannanara aneenna aidira ainaina qima qiminaqa auqaa.

Qini amiqimma qisaseenana amiqira aanasaa ititaqimaqainaga fua.

<sup>11</sup> Oo Yaawee aneenna qima afeekaikunandee inana qini namuqaa nisaukukinaana maraqa qisaa.

Aneenna andeeqaranakiqari qini ummaarakinaana mara quqaqisaa.

<sup>12</sup> Anee qiniara aidi mariannanara qini namuqaa kuqa narua.

Qinee ani ainainira fasiqa marunnanara nari uriqararanannai qini rafaqaqafi mariasa aiqama kuridi nimaqaa.

## 144

*Davidifa rakirana uriaaqaroonara Anutunara dufi dufi qinau.*

<sup>1</sup> Qini itita qimaqee marina Yaaweena amooqia.

Mifa rakira oosana uqaqifiqaseenoo qini rakiranaki firana deedaqamma qisaidanoo.

<sup>2</sup> Mifa qini aiqama kari itita qimaqee marifa maridanoo.

Mifa qini auqaanara foora qini asumu maree marifa maridanoo.

Qini amiqimma qisaanifeera mina saqarikidaqa.

Mifa faiqi anaasee mareeqeenoo qini qiramandunnai quqaidanoo.

<sup>3</sup> Oo Yaawee faiqi anaasee nana ainainee mariafanee anee misara iridanee.

Faiqi anaasee nana ainainee fifau ainaina mariafanee anee misa rakisi nimaqaidanee.

<sup>4</sup> Faiqi misa naidoora foora fuaqasaafanoo dauni taikeree foora irausa maridaqa.

Mina marirafa nimanandara foora kaqi kaqi mandaaqee marifa maridanoo.

<sup>5</sup> Oo Yaawee anee innaaruna rakee maseenana qumureenana aqaanauqa auqama-sainanoo ida muna minakiqari ururaani.

<sup>6</sup> Miqimmaseenana aneenna aakuasaa panana qirana quqasainanoo qumureenoo ani namuqaauqa furu faramma nimaqaannoo.

Aakuasaa aneenna feefara foora dindai qinaqa quqasee sandaaqa.

<sup>7</sup> Oo Yaawee anee innaarunaindari qini mara miami anaamuru nisaukuki nammari faruma kiara foora marunnana uqeereeqee kaqinni quqaqisaa.

Anaamuru afeeka ameemaanai marunnana mareeqee kaqinni quqaqisaa.

- <sup>8</sup> Mi anaamurusa nifaurusaa unnufa kai qumbiqanoo marifaqa misa kuqaa ufa qiraree qimasee nimana aiqamasee unna ufa kai qidaqa.
- <sup>9</sup> Oo Anutu qinee aniara fuka idi ramamaqaanaura.  
Qinee piripunna aridaqa ani idi ramama qaanaura.
- <sup>10</sup> Anee kai karaambaiqauqa rakirana uriqarara afeeka nimimarianafa mariananoo.  
Anee aneenna ainainira fasiqa qini Davidisa namuqaa nisaukukinaana maree marianafa mariananoo.
- <sup>11</sup> Anee fitiqnarana qimi maria namuqaasa nisaukuki marunnana anee mara kaqinni quqaqisaa.  
Anaamuru afeeka ameemaanai marunnana mara kaqinni quqaqisaa.  
Mi anaamurusa nifaurusaa unna ufa kai qumbiqanoo maridanoo.  
Misa kuqaa ufa qiraree qimasee nimana aiqamasee unnufa kai qidaqa.
- <sup>12</sup> Maasa faiqi namu aanaaqisaaqari findifiqa ummaqira saqariara foora afeekaikam-masee ururaqa.  
Maasa qiraamuqmaaka faqa maqasaa karaambaiqa maaqakina amiqira afaaqa auqira sapatariara foora maridaqa maasa asasirana qimiqa.
- <sup>13</sup> Maasa afeedira maaqaki oosana oosana nara ainaina qumbiqanoo mariani.  
Maasa maqeeena aandau sia kasoo anaaqiuqa uqanna maqaaqa.
- <sup>14</sup> Maasa maqeeena aandauqa kaifaa moomoo kiqa faiqi maqasaifanoo sia eedadaikinaqa kuquqa.
- Maasa maqusaki sia teeroo faqa qiki raqarafa faqa mariani.
- <sup>15</sup> Miqi maria fasiqa anaaseesa amiqiranaki asasiranaki marifaranoo.  
Yaaweefa maasa Anutufa marifaqee qimaria fasiqa anaaseesa asasiranaki maridaqa.

## 145

### *Anutuna amooqira idi.*

- <sup>1</sup> Qini Anutu qini Karaambaiqa, qinee anee uriqararafa mariannanara kooroo ianaura.  
Qinee ani naaruara naaruara dufi dufi amooqianaura.
- <sup>2</sup> Aiqaama kari ani dufi dufi qimamaqaanaura.  
Qinee naaruara naaruara ani amooqianaura.
- <sup>3</sup> Yaaweefa uriqararafa marifaqa mina uriqaramasee amooqi mariafa maridanoo.  
Mina uriqararafa firaafa irirafa munu taikarana fiqaranoo maridanoo.
- <sup>4</sup> Anee auqoonna ainainnara maqee mariasa faqa naaru kambiqaainausa faqa ani amooqifaranoo.  
Misa anee auqoonna afeeka ainainnara kooroo ifaranoo.
- <sup>5</sup> Misa ani qareenaranara faqa ani afeekara faqa ufa qifaranoo.  
Qinee ani naaquqara ainaina auquqoonnara maqee maqee indee indee iqa fuanaura.
- <sup>6</sup> Faiqi anaasee afeeka ainaina anee auqee mariannanara ufa qimariafaqa qinee ani uriqararanara kooroo ianaura.
- <sup>7</sup> Misa ani andeeqaranara qima nimisee ani amiqi amiqiranara idi reefaranoo.
- <sup>8</sup> Yaaweefa aidi marifanoo nifauaidanoo.  
Mina aranaqarafa kasooaqee kasooaqee qimarifanoo mina sia taikaaninna amuqusirafa qumbiqaidanoo.
- <sup>9</sup> Mifa aiqamausa amiqi amiqimma nimaqaseenoo nari aiqama auqu quqaqoo ainainausara amuqusi marifa maridanoo.
- <sup>10</sup> Oo Yaawee anee aiqama aandau doodaani auquqoonausa ani amooqifaqa aiqama ani faiqi anaasee dufi dufi qirana ani amifaranoo.
- <sup>11</sup> Misa ani karaambaiqa afeeka areenaranara ufa qidaqa ani amudaanai qiranara qifaranoo.
- <sup>12</sup> Miqimmasaifaqa aiqamausa anee afeeka ainaina auqoonnana irifaranoo.  
Misa ani afeeka areenara ququsara faqa irifaranoo.
- <sup>13</sup> Ani rakisi nimaqarafa naaru naaru marifa marifana anee naaruara karaambaiqa mariananoo.  
Yaaweefa nari qima afeekaika maqoo ufanasaa mapukinoo marifa maridanoo.  
Nari aiqama ainaina imarina nifauarana namu faqa idanoo.
- <sup>14</sup> Mifa ummaaraki mariasa dadaaqidanoo.
- <sup>14</sup> Mifa rafaqafu nimaqee mariasa uqeera nisaidanoo.
- <sup>15</sup> Aiqaama kasi maria ainainausa narana nimianneera nifu mundusee ani kai qafaafana narana nimi mariananoo.
- <sup>16</sup> Anee misa nimana kai niminana aiqamausa nidirana amanaikiananoo.
- <sup>17</sup> Yaaweena aiqama ainaina auqaranaki andeeqarafa maridanoo.

Narí aiqama ainaina imarina nifauarana namu faqa idanoo.

<sup>18</sup> Mifa narí aaree mariasa naaqa maridanoo.

Mifa nariqa nimuqusa ookiqari aaree mariasa naaqa faqa maridanoo.

<sup>19</sup> Mifa nariara naaquqee marifaqa mina ufa qaindusi mariasa dadaaqira aininauqa nimidanoo.

Mifa misa qiki raqarana iriseenoo misa ummaarakinaana mara kaqinni quqanni-saidanoo.

<sup>20</sup> Mifa nariara rimariasa itita nimaqasee mandoosana maree mariasa kuridi nimaqaanoo.

<sup>21</sup> Qinee aiqama kari Yaaweena amooqianaura.

Mifa auqu aiqama ainainausa mina naaquqara andeeqara auqu naaru naaru amooqima amaqaaga.

## 146

*Dadaaqira fasiqa Anutuna amooqia.*

<sup>1</sup> Yaaweena amooqia.

Oo qini qimana Yaaweena amooqia.

<sup>2</sup> Qinee kaqi marunna kamuqoo Yaaweena amooqianaura.

Qeeqa aiqama kari maa maqa maaqanasaa mariranaki qeeqa Anutuna idi rama-maqaanaura.

<sup>3</sup> Sia aneenna saqarikirana maqasaa qaraa uriqararausasaa quqaa.

Sia faiqi faiqi amana ani dadaaqianoo.

<sup>4</sup> Maqasaa uriqararausa kuqufiqa kookoommaika mafidaqa.

Mi faasaannasaa misa oosana oosana ainainara tipundaarammaqaafa taikaidanoo.

<sup>5</sup> Yakooboona Anutunara dadaaqirana qimianne qimari fasiqafa faqa Yaaweena nariqa Anutunasaa mundi mariasa faqa asasidaqa.

<sup>6</sup> Innaaruna faqa maqa faqa ooruku nammari faqa minaki maria ainainausa faqa aqunasaa mundi mariasa asasidaqa.

Mifa aiqama kari narí qima afeekaikiranasaa afu rusisee maridanoo.

<sup>7</sup> Mifa uriqararanannai rafaqa fuqaasa narí ufa iriranaki dadaaqidanoo.

Naararee mariasa faa narana nimidanoo.

Yaaweefa fifaw rumberanaki mariasa iduku nisaidanoo.

<sup>8</sup> Iduku nisaseenoo nifu imbarausa nifu maqa nisaidanoo.

Mifa aqufiqa mariasa uqeeera nisaidanoo.

Mifa narí andeeqara fasiqa aanaaseera aididanoo.

<sup>9</sup> Yaaweefa asaqiraafai maasa maqa maaqaki mariasasaa itita nimaqaidanoo.

Mifa adeedaana anaaseeuqa faqa faiqi faiquqa faqa dadaaqidanoo.

Kafaa mifa manda oosana maree mariasa nariqa kuridiranaki quqa nisaidanoo.

<sup>10</sup> Yaaweefa naaruara uriqararafa maridanoo.

Oo Sioona maqusa ani Anutufa aiqama kari rakisi amaqaannoo.

Yaaweena amooqia.

## 147

*Anutuna aiqama afeeka faqaana amooqia.*

<sup>1</sup> Yaaweena amooqia.

Maasa Anutuna amooqira idi rarafa amiqira oosana maridanoo.

Mina amooqirafa andeeqarafa adiafaairafa maridanoo.

<sup>2</sup> Yaaweefa Yeerusaree maqusa kaifaa usakaidanoo.

Isaraee maqannaasa narufaqa anaamurukiaqa moodaa moodaa iqa mariusa Yaaweefa kafaa suqeeqee quqaidanoo.

<sup>3</sup> Mifa nimuqusa mandaiki marusa amiqimma nisaidanoo.

Misa kaakadi narirana rumbannisaidanoo.

<sup>4</sup> Mifa aiqama fasuqara iriseenoo asaana rirana amana kai quqaseenoo naadu naadu nuqu ranau.

<sup>5</sup> Maasa Yaaweefa firaafa marida amudaana qimarifa maridanoo.

Mina amiqira irirafa sia oosana faqa ammuqu faqa marifa maridanoo.

<sup>6</sup> Mifa narí mara maree qumi mariasa uqeerannisaidanoo.

Kafaa mandoosana maree mariasa maqa mammaaqai radamidanoo.

<sup>7</sup> Amooqira idi Yaaweenara rama amaqaaga.

Piripunannai aridaqa maasa Anutuna idi rama amaqaaga.

<sup>8</sup> Mifa onnamu innaarunai rainaidanoo.

Mifa aaku quqasaifanoo rifanoo amuaqu namusaaqaraa andandauqa ururaidanoo.

<sup>9</sup> Mifa aandauga narana nimisee ufini aanaaquiqa naranara qiafanoo misa faqa nimidanoo.

<sup>10</sup> Mifa qoosauqa afeekara sia ridanoo.

Mifa afeeka sundiauga rakiranaki paasoosi mariasa afeekara faqa sia ridanoo.

<sup>11</sup> Mifa nariara naaquaiifaqa rufiee mariasara aididanoo.

Misa nari irirana Yaaweena sia taikaaninna amuqusiranasa rusimariasa misara aididanoo.

<sup>12</sup> Oo Yeerusaree maqusaki mariasa innee Yaaweena amooqiaga.

Oo Sioona maqusaki mariasa inneeqa Anutuna kai amooqiaga.

<sup>13</sup> Mifa inni maqusa faandaamura kooqi afeekaikammasee ititaidanoo.

Mifa minaki maria fasiqa anaaseesa amiqi amiqimma nimaqaidanoo.

<sup>14</sup> Mifa inni Isaraee maqannaa oosusaa rakisidanoo amiqira narana inni nimana kai nimidanoo.

<sup>15</sup> Mifa nari naamuaqira ufa maa maqana qimamisaifanoo mifa qii ainainafa kai kaqi kambigaidanoo.

<sup>16</sup> Mifa qaisara qifanoo aqufinoo qamunnara foora maqasaa rafaaga fidanoo.

<sup>17</sup> Mifa innaarunaindari pupusamu oonisamuara foora aqidanoo.

Sia moo fannoo mifa nimi mari suaranaki amana kikiqianoo.

<sup>18</sup> Mifa pupusamuara qifanoo tasirisirinoo nammarikidanoo.

Kafaa mifa ufaira qufanoo ufai uqufanoo qaisa fannoo firaa nammari kammafi ooqu finau.

<sup>19</sup> Mifa nari ufa nari faiqi anaasee nimidanoo.

Mifa nari sandufa faqa nari naakaparufa faqa Isaraee maqannaasa nimidanoo.

<sup>20</sup> Mifa mi ainainna auqoona sia moo maqannaasa mina sanda ufa sia iri mariasarau auqinoo fau.

Yaaweena amooqia.

## 148

*Aiqama innaarunaindaraa ainaina faqa maqasaaqaraa ainaina faqa Anutuna amooqidaqa.*

<sup>1</sup> Yaaweena amooqia.

Innaarunai mirinni mariasa Yaaweena amooqiaga.

<sup>2</sup> Mina aiqama qangeeroouga mina innaarunaindaraa rakira fasiqauqa mina amooqiaga.

<sup>3</sup> Innee suani faqa quqoona faqa aiqama fasau firaqoo kaaqa qeemariasa faqa aiqama mina amooqiaga.

<sup>4</sup> Innaaruna meerai uqanna marianafa anee faqa Yaaweena amooqia.

Innee mirinni innaarunai maria nammarisa innee faqa mina kai amooqiaga.

<sup>5</sup> Misa aiqamausa Yaaweena amooqiaqanani.

Mifa qufaqa misa kambigaqau.

<sup>6</sup> Mina ufannoo misa kambigafi nariqa mariaqoo naaru naaru maridaqa sia amana Yaaweena ufa rukieefaranoo.

<sup>7-8</sup> Maqasaaqaraa ainainauqa faqa ooruku nammariki maria firaa aandausa faqa nammari ameemaana mariasa faqa aakuasaa faqa pupusamu faqa qaisa faqa oonnamu faqa afeeka ufai Yaaweena naakapara ufa mau fimari ufaira faqa innee aiqamausa Yaaweena amooqiaga.

<sup>9-10</sup> Innee aaqanauqa faqa amuaqu namuqa faqa qaqama iree maria saqarisa faqa aiqama nandauqa faqa aiqama aandau maaqeenaa faqa kaasau faqa nimuaqundari nimariasa faqa qaqamaree nimaria ufinisa faqa innee aiqama mina amooqima amaqaaga.

<sup>11-12</sup> Aiqaama maqasaaqaraa karaambaiqauqa faqa aiqama maqannaasa faqa uriqararusa faiqi namu faqa aiqama maqannaa rakisirausa faqa kumaaraauqa faqa maanaaqauqa faqa asooqa fasiqa anaasee faqa faiqi uqaindi faqa innee aiqamausa Yaaweena amooqiaga.

<sup>13</sup> Misa aiqama misoo maasoo Yaaweena auqu amooqiaga. Mina auqu fannoo aiqamausa nuqu uriqararafa maridanoo.

Mina areenarafa maa maqa maaqana faqa innaaruna faqa urinaaqaranoo maridanoo.

<sup>14</sup> Mifa Yaaweefa nari maqannaasa afeekaikamma nisaiifaqa mina faiqi anaasee mina amooqiaqeera.

Isaraee maqannaasa mina afaaqasaa aqoondiuga maridaqa mina amooqidaqa.

Yaaweena amooqia.

**149***Anutuna amooqira idi.*

<sup>1</sup> Yaaweena amooqia.

Yaaweena fuka idi ramamaqaaqa.

Mina ufa mau fimariasa ufa suqiranaki mina amooqimamaqaaqa.

<sup>2</sup> Isaraee maqannaasa inni auqu nisoona irisee asasiaqa.

Sioona maqusaki mariasa inneeqa karaambaigara susumma amaqaaqa.

<sup>3</sup> Innee idi raida niqoori raqaranannai faqa dukaanaannai faqa piripunnannai faqa mina auqu amooqiaqa.

<sup>4</sup> Yaaweefa nari faiqi aanaaseera asaidanoo.

Nari mara maree qumimariasa rakirana uriqaranannai amiqimma nimaqaidanoo.

<sup>5</sup> Yaaweena faiqi anaasee nariqa rakiranara qufoonaridaqa asasira idi eendaki raqa fifi iaqaaqa.

<sup>6</sup> Misa firaaqoo faaq rumasee Anutuna amooqiaqa.

Misa nisaukuki dinni dinni raiqarana rakira paipana kaqi marinaqa mina namu faqa amooqiaqa.

<sup>7</sup> Kaqi marifaqa misa minannai aanaamuru rafaqa firara uaqee idaqa.

Anaamuru fasiqa anaasee narirara uaqee idaqa.

<sup>8</sup> Misa karaambaigauqa sainandannai rumberana uaqee idaqa.

Misa karaambaigauqa qainna sainandannai rumberara uaqee idaqa.

<sup>9</sup> Anutufa naamuqundee iqa moo maqannaasa narirara uaqee idaqa.

Anutuna faiqi anaasee rakirana uriqararafa miqimmino maridanoo.

Yaaweena amooqia.

**150***Yaaweena amooqia.*

<sup>1</sup> aaweena amooqia.

Anutuna naaquqara amaana maqaki mina amooqiaqa.

Mina uriqarara afeeka innaaru nai marina amooqiaqa.

<sup>2</sup> Mifa afeeka ainaina auqoo nara amooqima amaqaaqa.

Mina amiqira uriqaranara amooqiaqa.

<sup>3</sup> Ukeena fuaqaidaqa minannai mina amooqiaqa.

Kaqikaa piripunnannai faqa firaa piripunnannai faqa mina amooqiaqa.

<sup>4</sup> Dukaanaannai faqa idi raida niqoori raqaranannai faqa mina amooqiaqa.

Piripunnannai faqa ufireenannai faqa mina amooqiaqa.

<sup>5</sup> Innee qumiandau qaqama kaqikaa qanda faqa firaa qanda faqa qumaree narisaa narisaa ramoo ramoo idaqa Yaaweena amooqiaqa.

<sup>6</sup> Aiqama naanna faqaa ainaina Yaaweena amooqiaqa. Yaaweena amooqia.

## AAQUQIRA UFA

<sup>1</sup> Maa aaquqira ufafa Soroomoonna ufa maridanoo. Dafidina amaaku Isaraee maqan-naa karaambaigaa ufa maridanoo.

<sup>2</sup> Maa aaquqira ufafa ani dadaaqinana amiqira irirana faqa andeeqara naamuqira ufa faqa irisee mina oosana farumara foora meemai uqanna marina faqa irinnaranoo.

<sup>3</sup> Irirana faqaa nira marirana uqannifiqara ufa maridanoo. Anoonna ufa kai qira oosana faqa andeeqara oosana amana amana kai raina nimaqara oosana faqa nimianifeera maa ufafa maridanoo.

<sup>4</sup> Maa ufafa irirana siaisa irirana nimidanoo kumaaraa maanaaqa irirana naakapama saina amiqira nira marirana faqaasa mariaqera maa ufafa maridanoo.

<sup>5</sup> Maa aaquqira ufafa irirana faqaasa irirana moo faqa moo faqa nimimarifa maridanoo. Amiqira irira aanara randee mariasa nimimarifa maridanoo.

<sup>6</sup> Uqannifiqaafaqa aaquqira ufa oosana kukeeqarana faqa irirana faqaasa kukeeqara mariranauqa faqa irifara.

<sup>7</sup> Anee irirana faqaafa mariraree qimasee Yaaweena ameemaana mari. Furufari mariasa sia iriranara naaquqaidanoo irirana mararanara faqa nikoqaidanoo.

*Kumaaraa maanaaqa naakapara ufa.*

<sup>8</sup> Qinee qimaaku anoofakoona ufa iria.

<sup>9</sup> Ani anoonna akoona aamuqira ufa fannoo ani amiqira fasiqaikamma amaqaannoo, amiqira sarandaraqara foora aqinaaqa rumbasee kukukakana anukaki rufu amaqera foora masainana amiqirafa marinnaranoo.

<sup>10</sup> Qini qimaaku manda oosana maree mariasa ani amanifana sia misa ufa iria.

<sup>11</sup> Misa anira maaqi qifaranoo. Anee maasa faqa anirinaaqa maasa faiqi kuqa narua. Aninaqa kukeeqafi qeeqa didirana taikeeqa oosana siaisa kuqa narua.

<sup>12</sup> Misa kaqi marida amiqiga marifaranoo maasa misa paqurimmasaanaqa kuqifaranoo. Amiqira fasiqa faqa manda fasiqa faqa dapi naruanauranoo.

<sup>13</sup> Misa naruseeqa misa qumiasana oosana oosana mareeqee maasa nari maaqaki quqasaanoo maasa maaqa qumbiqaani.

<sup>14</sup> Anee maasa faqa aninaqa maasa ummuara masainna aiqama ainaina ani faqa naida amianaara.

<sup>15</sup> Qini qimaaku sia miqira fasiqa faqa fua. Misa mariaqooqari nianai maria.

<sup>16</sup> Misa mandainaina aqarara sia anuqidaqa. Misa aiqama kari fidika ruigarana deedaqiga maridaqa.

<sup>17</sup> Anee ufini ufana fufinana sia aruani qinna ufinina afusaa fufua. Mifa qafamasee rufiaannoo.

<sup>18</sup> Miqi maria fasiqausa nari nimaara ufaana fufidaqa. Nariqa ninuka arusee kuqifandinna ufanna fufidaqa.

<sup>19</sup> Faiqi nari marusa mi oosana nariuundee inoo ummuari mariasa mi ummuarira oosana nari naruanoo.

*Amiqira irirafa naaraidanoo.*

<sup>20</sup> Iriaqa, amiqira irirafa irirana faqaa anaas eera foora aana kindooraki faqa faiqi suqi mariaqoo maridanoo nammeera qidanoo.

<sup>21</sup> Faandaamura ququsa kooqiki faiqi suqi mariaqoo maridanoo firaqoo nammeera qidanoo.

<sup>22</sup> Innee furufarirausa innee kisaagasaa fee furufarida marifaree, innee kisaagasaa fee irirana faqaasa iriranara uteeti qifaree. Sia fee innee minara irifaree.

<sup>23</sup> Innee qini aaquqira ufa amiqimmasee iriaqa. Qinee qeeqa amiqira naakapara ufa faqa qeeqa irirana faqa inni nimianaara.

<sup>24</sup> Inni naarauna sia irimariafanoo. Innaqee qunaqa innee qini ufa irisee mana mana imariafanoo.

<sup>25</sup> Innee qini naamuqira ufa nimeesuqusee qini andeeqa nimaqaranara sia nididanoo.

<sup>26</sup> Qinee irirausa innee umaaraki aqufi saamurifaqa qinee inniara naanidara qianaara. Innee mandainainaki aqufifaqa qinee ataasa ataasa qima nimaqaanaara.

<sup>27</sup> Mandainaina fannoo fira aaku ufaira foora anireenoo inni nifu mara ookeendaanda meegeenoo aqusaannoo. Nidafirafa faqa ummaara faqa inni rafaafafu sainaqa qinee naanidara qianaara.

<sup>28</sup> Innee mi mandainainna kiqari iriranara qini irirana faqaasa daaraifaa qinee sia irianaara. Innee firaqoo qiniara aiqamai randeeqa sia paqurifaranoo.



- <sup>29</sup> Innee iriranara mandainainee qimasee sia Yaaweena ufa qaindusi mariafanoo.
- <sup>30</sup> Innee qini naamuqira ufara sia nididanoo. Qini andeeqa nimaqaranara sia nididanoo.
- <sup>31</sup> Innee inneeqa mandoosana akiqara feefauru marasaifanoo inni auriranara foora nimiannoo.
- <sup>32</sup> Irirana siaisa amiqira irirana nimeesa uqaanara kuqidaqa. Furufari mariasa amiqira irirafa sia marinara mandaikidaqa.
- <sup>33</sup> Yafasiqa fee qini irirausa ufa irinanoo mi ufafa minasaa rakisi amaqaanoo. Mifa asumu marinanoo sia mandainainara rufiara oosana mariannoo.

## 2

- <sup>1</sup> Qini qimaaku iria qinee auqaannee qimasee qimamianna ufana sia qaunua.
- <sup>2</sup> Amiqira ufa amiqimmasee iriseenana minara oonumafi iria.
- <sup>3</sup> Eeoo amiqira irirafa anee iannannai anianinnanara iramirisee iria.
- <sup>4</sup> Amiqira iriranara siruaa maqaki marifaqa randee mariandemmasee randaa. Kukeqara amiqira iriranara akaqa ainaina maqaki kukeeqaqaafaqa randee mariandemmasee randaa.
- <sup>5</sup> Miqinana anee Yaaweenara rufiara oosana iriseenana Anutunara irinnaranoo.
- <sup>6</sup> Yaaweefa kai amiqira irirana nimidanoo. Mifinnaindari kai irirafa faqa oonumafi irirafa faqa anidanoo.
- <sup>7</sup> Kuqaa anoona ufa kai qimariasa faqa andeeqara oosana maree mariasa faqa Anufufa dadaaqida itita nimaqaidanoo.
- <sup>8</sup> Anutufa faiqi amana amana kai amiqimma nimaqee mariasa faqa mina ufa mau maqee maqee fimariasa faqa Anutufa itita nimaqaidanoo.
- <sup>9</sup> Qini qimaaku anee qini ufa irinana amiqira ainainara faqa andeeqara oosana amana amana kai rainara oosana faqa irinnaranoo. Anee aneenna auqainna amiqira oosana faqa irinnaranoo.
- <sup>10</sup> Anee moomoo amiqira irirana marasainanoo mi irirafa ani اساسirana amiannoo.
- <sup>11</sup> Ani amiqimmasee marirafa faqa amiqira irirafa faqa anisaa itita amaqaanoo.
- <sup>12</sup> Mifa kai anee manda ainaina auqaranasaa itita amaqaanoo. Ummaara kambigaa-ifeera qimariasa ufasaa itita amaqaanoo.
- <sup>13</sup> Miqi maria fasiqausa andeeqara marirana minnisee numoo asukunaki maridaqa.
- <sup>14</sup> Oosana oosana manda oosana nidi marisa faqa amiqira irirana sia mari manda oosana اساسimariasa faqa furufara foomboo rimaria fasiqausa ufara faqa eerairiaqa.
- <sup>15</sup> Miqi maria fasiqausa oosana sia andeeqanoo maridanoo. Misa eerairi mariasa maridaqa.
- <sup>16</sup> Anee qini andeeqara ufa irinanoo moo fasiqa anaafa fannoo narí fadameena akira ufannai aniara anirainafa manda oosana auqaanee qinanoo mi amiqira irirafa ani itita amaqaanoo.
- <sup>17</sup> Miqira anaasee fannoo narí afaaqiara sia irirai Anutuna afusaa naaquqara qima afeekai kirufa qimaqoonara qaunuseenoo narí afaaqi minnisaidanoo.
- <sup>18</sup> Anee miqi mari anaaseena maaqai finana anee kuqirannai fimaria aatata finnanoo. Minni finana kuqirausa maria maqa maaqanakiara foora finnanoo.
- <sup>19</sup> Mi anaaseefinnai finafa sia kafa oonurandee aninnaranoo. Anee sia kafa oorurandee kaqi marira aanasaa aninnaranoo.
- <sup>20</sup> Anee amiqira irirana marirana mareenana andeeqara fasiqauqa naanna reenana amiqira marira marinnaranoo.
- <sup>21</sup> Andeeqara fasiqa anaasee faqa oosana siai fasiqa anaaseesa maqa maaqanara maasaindi fee qimasee minaki marifaranoo.
- <sup>22</sup> Miqiga marifanoo Anutufa mi maqa maaqanaki manda oosana maree mariasa ummaqira ainainara foora raraku aquannoo.

## 3

### *Kumaaraa maanaafa naakapara ufa.*

- <sup>1</sup> Qini qimaaku qinee qimamianna ufana sia qaunua. Qinee qimamianna ufana aiqama kari iridana qinee qimamunnandee ia.
- <sup>2</sup> Qinee qimami marunna ufafa ani kuqirana kisaqaqasaa sainana maridana amiqiranaki reemindeemi riranaki marinnaranoo.
- <sup>3</sup> Mapukusee marirana faqa fisoo fisoo irana faqa mi ainainna qanda mareeqee saufauruara foora rumbasaina anukaki mariani, aneena amuqusaki akara rumaqaina mariani.
- <sup>4</sup> Anee miqinnanannai faiqi faqa Anutufa faqa aniara nidifaranoo.

<sup>5</sup> Aneenna amuqusa aiqamannai karaambaiqa saqarikia. Sia anee aneenna iriranara amanammifoo qimasee minasaa mundua.

<sup>6</sup> Anee aiqama ainaina auqeenanana Yaaenara ani aaqooki marinana kai auqaa. Miqimmasee finanoo mifa andeegara aana ani uqafiqaanoo.

<sup>7</sup> Sia anee aneennara irirana faqaasee qimasee mana mania. Karaambaiqa ufa mau fidana manda oosana auqarara qeerairia.

<sup>8</sup> Anee miqinnannai amiqira marasinnara foora ani afaaqai nammuana qunuseenoo aidafirana taika sainana amiqirafa mariannandee ina marinnaranoo.

<sup>9</sup> Anee aneenna nara ainaina amiqirana kai aneenna maqakinaana unakuseenana Anutuna tatufirana suqa amia.

<sup>10</sup> Anee miqinanoo Yaaweefa ani ainaina moomoo afuqaki rairaamma amiannoo. Anee miqinanoo Yaaweefa quandaki ani narana nammari moomoo rairaamma aminana afeedira maqaki quqararee qimasee sia amanai kinnaranoo.

<sup>11</sup> Oo qini qimaaku Yaaweefa ani andeeqainana sia anee minara akooqaani, Yaaweefa aaquqira ufa qimidanoo fee qimasee amiqimmasee iria.

<sup>12</sup> Yaaweefa nari aidi marisa aaqee foora andeeqa nimaqaidanoo. Faiqi anoofa akooqa nari faiqi andeeqaindee inoo miqidanoo.

<sup>13</sup> Amiqira irirana faqaasa faqa andeegara irirana faqaasa faqa asasidaqa.

<sup>14</sup> Irirafa siruaa faqa kooa faqa uriaaqararafa maridanoo.

<sup>15</sup> Mi irirafa firaa feefauru qusee maree maria oonina faqa ani kaaqa aidi mari amiqira ainaina faqa uraaqararafa maridanoo.

<sup>16</sup> Irirafa kisaqasaa marirana ani amidanoo. Mi irirafa ainaina faqaasaikirana faqa uriqarara auqu aniamiannoo.

<sup>17</sup> Amiqira irirafa ani marirana amiqimma amaqaaseenoo ani amiqimmasee afiqee fuannoo.

<sup>18</sup> Amiqira irirana faqaasa asasidaqa, amiqira irirafa misa marirana nimiannoo.

<sup>19</sup> Yaaweefa nari amiqira iriranannai innaruna faqa maqa faqa auqinau. Oonumafi iriranannai innaaruna murufi atukaranau.

<sup>20</sup> Yaaweena amiqira irirafa qufanoo nammari quminau, kafa oonamuara qufanoo aaku suqufufanoo maqasaa aqufinau.

<sup>21</sup> Oo qini qimaaku anoona ufa faqa amiqira irirana faqa sandee foora atukaramma qumarasee sia uqaa.

<sup>22</sup> Anee miqinanoo mi ainaina qanda ani marirana amisee ani amiqira doodapaaniara foora marifaranoo. <sup>23</sup> Anee miqinana aneenna aatata amiqimmasee finnananoo sia aiku rupauraki saamurinnaranoo.

<sup>24</sup> Anee faiqeenana sia rufieennaranoo amiqimmasee afu rirainana faiqeenaranoo.

<sup>25</sup> Manda oosana maree mariasasaa tautummasee kambiqara ummaara firaafa firaa aaku oonnamuara foora kambiqoondede iranara sia rufieennaranoo.

<sup>26</sup> Yaaweefa ani ummaarasaa itita amaqaannoo. Mifa anisaa rakisinaana sia ufaanaki arinnaranoo.

<sup>27</sup> Oo qini qimaaku faiqi moo fannoo moo ainainara dadaaqiannee qinana sia qaoo qia. Mi ainaina marinana kaqi dadaaqia.

<sup>28</sup> Sia aneenna agoonnanara finana duna ani maraannee qia. Aniki marinana aaqee kai amia.

<sup>29</sup> Aneenna agoonnanara sia oonumafi manda irirana iria mifa ani aaqa marifa nari afaaqa aniki quqee marifa marinara sia manda irirana minara iria.

<sup>30</sup> Ani sia mandaikamma amaqaannana sia fifau aanoo qima amaqa.

<sup>31</sup> Anee sia faiqi narimarasa naanna raa. Misa oosana qafammasee sia qinee faqa miqinoo qia.

<sup>32</sup> Manda oosana maree mariasara Yaaweefa fidiqaa midanoo. Andeegara oosna faqaasa Yaweena afaqasaa aqondi mariafanoo misara aididanoo.

<sup>33</sup> Yaaweefa nari manda niqurara ufa manda oosana maree maria fasiqausa maaqasa uqaidanoo. Andeegara oosana maree maria fasiqausa maaqasaa nari amiqi amiqirana uqaidanoo.

<sup>34</sup> Faiqi nari nifaaqa nari nuqu uqeeqee fasiqausa Yaaweefa misara akooqaidanoo. Fisoofisoo idaqa nari mara maree qumi mariasara Yaaweefa aididanoo.

<sup>35</sup> Irirana faqaasa nuqu uqeerarana mareefaranoo. Furufari mariasa nari mi furufarirafa nari nisaurirana nimiannoo.

#### 4

*Amiqira irirafa amiqira dadaaqirara nimidanoo.*

<sup>1</sup> Oo qini faiqi namu inneeqa nikausa qini naamuaqira ufasaa irirana rusisee oonumafi irira oosana mareefaranoo.

<sup>2</sup> Qinee qimannimianna ufafa amiqira ufa maridanoo. Minara aiqama aiqamara iria.

<sup>3</sup> Qinee faqa oogai kaqikaa faiqi mariaafanausa maridaqa. Qinee qeeqa qinaukoo moodaa faiqi mariaafanausa maridaqa.

<sup>4</sup> Qini qikoofa maaqi qimasee qini qimaqiminau. Qinee qimamianna ufana sia qaunua aiqama kari iria. Qinee auqaannee qianna ainaina auqeenana sia kuqinnaranoo.

<sup>5</sup> Anee amiqira iriranara faqa oonumafi iriranara faqa randasee maraa. Qinee qimamianna ufana sia irisee qaunua.

<sup>6</sup> Sia amiqira irirana minnisaa minara rinanoo ani faqa maridanoo mifa anisaa rakisiannoo. Anee minara rinanoo mifa anisaa itita amaqaannoo.

<sup>7</sup> Irirafa kuqaa firaa ainaina maridanoo mina kai randasee maraa. Anee nana oosana oosana ainainee maraseenana oonumafi irirana sia aunua mina faqa maraa.

<sup>8</sup> Anee amiqira iriranara aidinana rakisi qumarainanoo mifa ani firaa auqu amiannoo. Anee irirana oonumafi rakisi qumarainanoo ani auquara naaquqarana faqa qeerairirana faqa nimiannoo.

<sup>9</sup> Anee irirana marasainanoo ani aqinaaqa amiqira faini afaira foora mariannoo. Mifa uriqararasa qafeera foora ani akiqqa afisu amaqaanoo mariannoo.

<sup>10</sup> Oo qini qimaaku anee oori kandamasee qini ufa irisainanoo ani marirafa kisaagasaa mariannoo.

<sup>11</sup> Qinee amiqira iriramau fimaria aanna aamuqaqi marunaua maridaqa.

<sup>12</sup> Anee mimau finanoo sia moo ainaina fannoo ani aana ititaannoo. Anee mimau finana sia aiku rupaurinnaranoo.

<sup>13</sup> Anee aamuqaqira ufa rakisi qumaraa. Sia uqaa. Aneenna ufa minasaa atukarama qaina mariani ani marirafa maridanoo.

<sup>14</sup> Aaqee mariasa fimaria aatata sia fua. Sia manda oosana maree mariasa naanna raa.

<sup>15</sup> Anee misa aatata faqa sia fua. Minniseenana aneenna aatata kai fua.

<sup>16</sup> Mandoosana maree mariasa akaqausa mareeqee sia nari mandoosanaki uqaseeqa sia maqasaa faiqeeffaranoo. Misa akaqausa rarisameeqee minaki uqaseeqa maqasaa faiqeeffaranoo.

<sup>17</sup> Misa manda oosana faqa faiqi kuqa narirafa faqa misa narana nammariara foora maridanoo.

<sup>18</sup> Andeeqarasa nimari aanafa kaaqa qara aana uqanna maridanoo.

<sup>19</sup> Manda oosana maree mariasa aana asukuna miqirafa maridanoo. Misa nanasee fee niku amaki saamrida fee, sia qafaidaqa.

<sup>20</sup> Oo qini qimaaku amiqimmasee qinee qunna ufana iria. Qini ufa amiqimmasee iria.

<sup>21</sup> Sia amiqira irirana minnisaina fuani. Aneenna amuqusaki quqasaina mariani.

<sup>22</sup> Amiqira irirafa faqa oonumafi irirana faqa sia kuqirana faqa nifaaqa amiqi amiqirana faqa nimidanoo.

<sup>23</sup> Maa firaa ainainnara qimamianauro. Aneenna amuqusasaa rakisia. Aiqama marirana oosana amuqusaki qari ururaidanoo minara aneenna amuqusa amiqimmaseenana rakisia.

<sup>24</sup> Sia unna ufa qia. Unna ufa faqa eendaandira oosanrafa faqa sia qia.

<sup>25</sup> Aneenna firaree qinnaqoo amiqimmasee aiuqummasee kuqaa qimaseenana fua. Sia aneenna akiqqa asauriranaki quqaa.

<sup>26</sup> Aneenna nimarianna aannana andeeqasainanoo amiqinoo marinana nua.

<sup>27</sup> Anee aneenna aatata fidana sia dinni quandee dinni quandee ia. Andeeqasee manda oosanara qeerairammasee ani aiku fannoo ani aatata kai fuani.

## 5

### *Sia moona anaaga ummuaria.*

<sup>1</sup> Oo qini qimaaku qini aakapara ufa amiqimmandee aaqoo uqasee iria. Qinee amiqira irirana faqa aakapara ufa faqa ani qimamidaqa.

<sup>2</sup> Anee andeeqara oosana mau finanoo ani aiqama ufaqirafa irirana faqaasa ufara foora mariannoo.

<sup>3</sup> Moo fasiqa anaaga ufa fannoo kaaqa adiafaa iannoo. Ookasaasa anoona adiafaa imarina faqa uriaaqaranoo mariannoo. Mina ookinaa ufa fannoo fadameena miqirafa maridanoo.

<sup>4</sup> Mifa taikainanoo mifa ani quqasee finanoo qisaaqa suka miqirafa faqa aidafirafa faqa mariannoo. Aseema miqirafa afai raiqarafa ani afaaqa ateeqaano.

<sup>5</sup> Mi anaaseefa ani afiqeenoo kuqira maqa maaqaki fidanoo. Mina nira aana kuqirafa maridanoo.

<sup>6</sup> Mifa sia kaqi marira aatatau fidanoo fau. Mifa fimari aanafa eendaandirafa maridanoo sia minara irimarifa kaqi mi aatata fimarifa maridanoo.

<sup>7</sup> Qini faiqi namu qini ufa iria sia qinee qimannimianna ufana qaunuaqa.

<sup>8</sup> Anee mi anaaseefa mariqooqari nianai maria. Sia mina kooqi aaqa faqa fua.

<sup>9</sup> Anee mina kooqi aaqa finana aneenna andeeqaree auqu aiqamausa nifusaa maqasaa uqaminanoo aqufuannoo. Anee nimudao qirana siaisa nisaukuki oonu rainaqa kuqa arifaranoo.

<sup>10</sup> Anaamuru anireeqa ani ainaina kaqi mareefaranoo. Ani kadaapi rirafa moosaindika miannoo.

<sup>11</sup> Anee aneenna faiqara qaarisaa annadannadidana kuqina marinaqa ani amaqi faqa aununu faqa fifau ainainuqa namaseefaranoo.

<sup>12</sup> Miqidana annadannadidana maaqi qinnaranoo. Oo qinee nanaree aaquqira ufasa fidiagaqaa iqiafane. Qini qimuqusa fannoo aamuqira ufara fidiagaqaa imariafanausa maridaqa.

<sup>13</sup> Qinee sia ufa qima qimusa ufa iriafanausa maridaqa. Qinee aaqafana andeeqa qimaqoosa ufa sia iriafanausa maridaqa.

<sup>14</sup> Qinee maqee aiqamausa nifusaa tautummasee qisauriranaki firiridaqa.

<sup>15</sup> Anneenna nammari kai naa. Aneenna taquki kai sakasee naa.

<sup>16</sup> Moomoo aanaaseesaa faiqi maqasainausa sia ani andeeqa amaqeeffaranoo.

<sup>17</sup> Anee moo aanaaseesa maqasainna faiqifa mi anaaseena oosanaki mariannoo. Sia ani faqa mariannoo.

<sup>18</sup> Aneenna anaqa kumaaraasaa maroonnana mina faqa amiqidana اساسammasee maria.

<sup>19</sup> Mina afaqa amiqirafa eeqaku miqirafa ummooqurirafa maridanoo. Mina faqa maqee maqee maria. Anee maqee maqee mina naammara kai aidiyani. Mina aidirafa maqee maqee ani qumaraani.

<sup>20</sup> Oo qini qimaaku nanaree anee moo aanaaseera ridanee. Anee nanaree moo fasiqa anaqa naammara ridanee.

<sup>21</sup> Anee aiqama ainaina auqaannana Yaaweefa qafaidanoo. Anee yaifee fuananoo Yaaaweefa anisaa rakisidanoo.

<sup>22</sup> Manda oosana maree mariasa nári mandainaina fannoo ufaanara foora nári ninuka qumaraidanoo.

<sup>23</sup> Mi fasiqausa sia nariqa nirana mariranasaa rakisira irirafa marinara kuqidaqa.

## 6

<sup>1-2</sup> Oo qini qimaaku akaqausa dinnaa munnimma maraifana misa faqa qima afeekaika maseenana qinee mina akiqra ianauree qimasee sia miqinana aneenna qima afeekaikianna ufanaki ufaana kiara foora aruananoo.

<sup>3</sup> Oo qini qimaaku anee maaqi qimasee mi fasiqana ufaanakinaana aneenna faaqa mara kaqinni quaa. Doo anee aneenna afaqa aneenna aqoonnana asaukuki quqaananoo kai kaqi moodaaqoo oonureenana mi ufana taikasaa.

<sup>4</sup> Anee sia faiqaa sia kisaaqasaa adooaida maria.

<sup>5</sup> Anee kaasau kuara miqirafa maria ufaanaki arufinoo munari minarindee dauni ratoofusee mina faqa ufa qima taikaa. Ufina ufaanaki aiku arindee ia, dauni aruratoofua.

<sup>6</sup> Oo kudi fasiqauqa tarika mariqoo oonuree mina oosana qafaaqa. Innee mina oosana qafamaseeqa oonumafi iriseeqa irirana faqasaikifaranoo.

<sup>7</sup> Sia tarika rakisirafa moo maridanoo sia misa fukifaaki qimarifa moo maridanoo, sia moo fannoo misa aranaiqi qimannimifaqa ainainai fidaqa.

<sup>8</sup> Suani aukwana misa nári kai nári narana moomoo afeedidaqa. Aaku aukwana narana taikainaga nararee qimasee miqidaqa.

<sup>9</sup> Oo kudi fasiqa kisaaqasaa fee innee miqoo faiqaqee ifaree. Yairee fee innee findi fifaree.

<sup>10</sup> Innee maaqi qimariafanoo maasa qusasaa faiqaanauree qimariafanoo. Maasa qeeqa qisauku raqandaammasee kaqikaqoo idooaanauree qimariafanoo.

<sup>11</sup> Innee faiqaafanoo inni faiqarafa ummuara fasiqara foora inni aiqama ainaina ummuara maraanoo.

<sup>12</sup> Mana oosana maree mariasa unnufa qiqa nidaqa.

<sup>13</sup> Nikaru qiraree qimasee nifu quandaqaandi mariasa misa niku munuree miniree imariasa maridaqa.

<sup>14</sup> Misa nimuqusaki nikaruqirafa qumbiqarasa maridaqa. Maqee maqee mandainainara kai ufa qimariasa maridaqa. Misa aiqamatina nidaqa ummaara kambigaanifeera kai andaana riqa nidaqa.

<sup>15</sup> Miqi marianara firaa ummaara sia aaquqima nimaqarai tautummasee misa naruanoo.

<sup>16</sup> Yaaweefa qisauku dinni taikasee dinni oonu qaara marasee ainaina auqaanara kaaqa fidiiaanoo.

<sup>17-19</sup> Maa ainainnara fidiqaa idanoo. Oori uqeeranara faqa unna qimari afaurunara faqa fifau fidika ruigee marinara faqa manda oosanara nari iriranaki tipundaari mariana faqa mandainainaki dauni niku ree mariana faqa kootaki unnufa qimariana faqa nari nikaqaafasaa ummaara nimimaria oosannara faqa Yaaweefa fidiqaa idanoo.

<sup>20</sup> Oo qini qimaaku ani akausa qimamunnandee inana aneenna anoona ufa sia qaunua.

<sup>21</sup> Aiqama kari aneenna anaukoo ufa sia quqaa, aneenna amuqusaki quqasee atukaraa.

<sup>22</sup> Misa qimaminna ufa ani indaarunnikamma amaqaanoo. Eendaki anisaa itita amaqaaseenoo faasaana niranaki ani aakapaanoo.

<sup>23</sup> Ani anaukoo aakapara ufa qoomara foora kaaqaqaidanoo. Misa andeeqara ufa fannoo ani maa maqanasaa marirana andeeqa amaqaaidanoo.

<sup>24</sup> Mi ufafa dapi maraqa nua anaasee finnai firanasaa itita amaqaanoo. Akaqa fasiqauqa ninaaqmaaka fadameena akira ufasaa itito amaqaanoo.

<sup>25</sup> Sia anee misa amiqira nifaaqara rua. Afunnai ani mareeqeenoo ufaanaki aruaneera quqainana sia minara iria.

<sup>26</sup> Dapi maraqa nua anaaseefinnai finana kaqika feefauru narana maree mariana amana kai aqinnaranoo. Faiqi moo anaqa faqa finana firaa feefauru faqa aneenna aiqama ainaina faqa aqinnaranoo.

<sup>27</sup> Amanee anee ida auri marina qumaree amuqusasaa uqasainanoo qamunna sia qaannoo fee. Ani qamunna faqa afaaqa faqa aiqama ida qaannoo.

<sup>28</sup> Amanee anee ida auruki aiku reennaree sia amana reennaranoo. Aiku turuqaanoo.

<sup>29</sup> Doo miqi kai inoo faiqi moo fannoo nari aqoonnana anaqa faqa sia faiqaanoo. Miqinafa aupurarana maraanoo.

<sup>30</sup> Faiqi moo fannoo aararainanoo ummuara masainanoo sia minara firaaqoo ufa qifaranoo.

<sup>31</sup> Akaqausa mifasiqana paqurimmasaifanoo moodaa ainaina ummuarinnana akiiqara dinni taikasee dinni ani qaara marasee 7 ainaina amiannoo. Mifa nari uaqeei ainaina aiqama amiannoo.

<sup>32</sup> Narana ummuari fasiqanara miqimminoo marifanoo anaasee ummuari marinara maaqimminoo maridanoo. Moo fasia anaqa faqa manda oosana auqee marifa nari kai nari kurididanoo.

<sup>33</sup> Mi fasiqafa arirana faqa aqirana faqa maraidanoo. Mi fasiqafa naaruara asauringanaki mariannoo.

<sup>34</sup> Mi anaaseena afaaqi paqurinanoo rairai qirafa idara foora atakuqaanoo. Minara ufa qifanoo sia kaqi irinoo minnisaanoo, arana qarafa kisaagasaa mariannoo. Sia kai kaqi taikaanoo.

<sup>35</sup> Sia mifa feefauruara iriannoo munnimma ainaina oosana oosana aminanoo siamma iriannoo sia doo fee qiannoo.

## 7

<sup>1</sup> Oo qini qimaaku qinee qimamianna ufana iria. Qinee auqaannee qianna ainainnara sia qaunua.

<sup>2</sup> Anee qinee qunnandee inana amiqimmasee marinaranoo. Qini aamuaqiira ufa aneenna afu rakisinnandee amiqimmasee rakisia.

<sup>3</sup> Qini aakapara ufa aiqama kari uaqeeina ani faqa mariani. Aneenna amuqusasaa akara rumasaina mariani.

<sup>4</sup> Oo qini qimaaku anee aiqira iriranara qini qisookifee qia. Oonumafi iriranara qifaaqa saa qiqaonndi fee qia.

<sup>5</sup> Anee miqinanoo mi irirafa moona anaqa faqa firanasaa aitita amaqaanoo. Mi anaaseesa fadameena akira ufasaa itita amaqaanoo.

<sup>6-9</sup> Qinee qeeqa maaqaki ooqufaqee qeeqa kooqirunna qafaunanoo dapi kumaarauqa marianakiqari moo furufarira kumaara fannoo ummuarimari anaaseena maaqa marindanai ubeekaidanoo mina kooqindanai fidanoo doo mina naambeeqandanai finoo suani keeqaifanoo sisisasa qeenoo fee eendaki fee asukunai fee doo mifinnai fidanoo.

<sup>10</sup> Mi anaaseefa doo oonu afiqararee qimasee anidanoo. Aatata nua anaaseesa qamunna afisusee anidanoo.

<sup>11</sup> Mi anaaseefa kambaaramasee ufa qimarifa asaurirana siaifa maridanoo. Mifa aiqama kari fifau aatata oonuree aniree inoo nifa maridanoo.

<sup>12</sup> Anee aanai finana miqoo qafeennaranoo. Anee maqusa qambaanaai finana mina miqoo qafeennaranoo. Mifa aiqama aana kindooraki oonureenoo afu munu maqee mini maqee iannoo.

<sup>13</sup> Mi kummaaraana paqurimandee asauku qaqusee qumaseenoo amooqa namaseenoo afuki kai qafanoo maridanoo qiannoo.

<sup>14</sup> Doo qinee maqee amaana maqaki keeqafiqa tatufirana suqeeqee qiannoo. Doo qinee tatufirana suqaidaqa aandau ati maree mini quqasee anidaqee qiannoo.

<sup>15</sup> Qinee qeeqa maaqakiqari raudamaki aniara randamaree doo ani paquriqa.

<sup>16</sup> Doo qinee qeeqa qaari amiqirana ufiqiseeqa. Isipa maqanna qamunna amiqirananoo minasaa ufiqiseeqa.

<sup>17-18</sup> Qinee minasaa fadameena afundi marina adieesee makaqa anoona faqa saadapu anoona faqa adieeseeqaa doo anee aniraina maaqooqari oosana arasee nariara nariara nidira nammari neenee iaqasaa.

<sup>19-20</sup> Qini qifaaqi sia maridanoo nianai fifinoo mifa munnimma moomoo maree finoo mifa qaara amaana minni maraannoo sia kai kaqi aniannoo.

<sup>21</sup> Mi anaaseefa nari naammannai mina qumaraseenoo ummooqifira ufannai mina rarisaidanoo.

<sup>22</sup> Mi anaaseena ufa fannoo mi kumaaraana afu dapikammasaifanoo aandau miqirafa sia irirai kuqiranaki kaqi fidanoo.

<sup>23</sup> Kaasau kuara ufaanaki arinoo marifanoo faiqi oonu qafeenoo doo amuqusa arifanoo kuqidanoo. Mifa ufiniara foora sia irirai ufini ufanaki keeqafinoo kuquannoo. Mifa nari marirafa manda marinara sia iridanoo.

<sup>24</sup> Oo qini faiqi namu innee amiqimmasee qinee qianna ufana iriaqa.

<sup>25</sup> Inni nimuqusa fannoo sia mi anaaseena faqa firara findifuani. Sia kambaaramasee mi anaaseefa marinnai fuaqa.

<sup>26</sup> Mifa moomoo fasiqa mandaikamma nimaqaseenoo kuqirana niminoo. Sia amana nisaana rirana amana kuqa narimarifa maridanoo.

<sup>27</sup> Anee mi aanaaseena maaqai finana anee kuqira aatata fimariananoo. Mi aanafa kuqirannai fimaria aanafa qusa aana maridanoo.

## 8

<sup>1</sup> Iriaqa, amiqira irirafa irirana faqaa aanaaseera foora nammeera qidanoo. Oonumafi irirafa dadaaqinoo firaqqoo naaraidanoo.

<sup>2</sup> Amiqira irirafa aaqana namusaa fee aanasaa fee aana kindooraki fee kikiqinoo maridanoo nammeera qidanoo.

<sup>3</sup> Maaqusa kooqiki fee maqusa atinni fee kikiqinoo maridanoo maaqi qimasee nammeera qidanoo.

<sup>4</sup> Inni aiqamausa qimannimidaqa, inni aiqama maa maqa maaqana saaqaraasa naaraidaqa.

<sup>5</sup> Innee irirana siaisa irirana maraaqa. Furufarirausa inneeqa furufarirana kiqari nifu maqasaa qafamasee iriaqa.

<sup>6</sup> Qini amiqira ufa iriaqa, aiqama qinee qimannimi marunna ufafa kuqaa kai maridanoo.

<sup>7</sup> Qinee qimarunna ufafa kuqaa anoona maridanoo. Qinee unna ufara fidiqaa midaqa.

<sup>8</sup> Qini aiqama ufa kuqaa kai maridanoo. Sia unna qirafa faqa eendaandirafa faqa minaki maridanoo.

<sup>9</sup> Irirana faqaafa qini ufara aiqama iriannoo kaaqa qara ufa fee qiannoo. Irirana faqaasa qini ufara kuqaa anoonee qifaranoo.

<sup>10</sup> Innee siruaa minnisee qini naakaparanara amiqira ainainee qimasee maraaqa. Innee kooru munnimara rimariana minnisaqa, irirafa mifa naaru naaru marirafa maridanoo mina maraaqa.

<sup>11</sup> Qinee amiqira irirausa maridaqa qinee nifaaqa auqi maria amiqira ainainausa faqa uriaqararausa maridaqa. Sia moo ainaina innee rimariafa qini qimana maridanoo.

<sup>12</sup> Qinee irirausa ufa raina nimaqarana akausa maridaqa. Qinee irirausa akooqoo irirana auqi marunausa maridaqa.

<sup>13</sup> Yaaweenara qeerairida mina ufa qaindusiraree qimasee manda oosanara fidiqaa ia. Qinee ramoo ramaa iranara faqa nari nuqu uqeerara oosanara faqa manda oosanara faqa unnufa qiranara faqa fidiqaamidaga.

<sup>14</sup> Qinee ainaina auqararee qimasee qeeqa iriranaki qima irisee auqaanura. Qinee oonu mafi irirana faqaasa maridaqa qinee afeeka maridaqa.

<sup>15</sup> Qinee uriqararawsa faqa rakisirausa faqa dadaaquanaqa amiqira irirana qimasee maqa maaqaki rakisi nimaqaidaqa.

<sup>16</sup> Aiqama maa maqanasaa qaraa rakisirausa qini dadaaqirananoo rakisi nimaqaidaqa. Uriqararawsa miqi kai idaqa.

<sup>17</sup> Qiniara rimariasara qinee faqa misara ridaqa. Nimudaanai qimasee qiniara randee mariasa misa qini paqurifaranoo.

<sup>18</sup> Qinee moomoo munnimma faqa uriqarara auqu faqa uaqeeidaqa nimianauro. Aiqama ainaina auqainafa anoona kambiqaarana faqa reemindeemirirana faqa nimaanauro.

<sup>19</sup> Qini ainaina maraafa kooru uraaqararafa maridanoo. Mina amiqirafa kaaqa amiqira siruaa faqa uriaqararafa maridanoo.

<sup>20</sup> Qinee andeeqara aatata kai fidaqa. Qinee ufa amana amana kai raina nimaqara aatata fidaqa.

<sup>21</sup> Qiniara rimariasara moomoo qumiasana nimidaqa misa maaqaki qumiasana qumbiqannisaidafa.

<sup>22</sup> Ooqai Yaaweefa aiqama ainaina auquane qimaseenoo qini irirana naaree auqinau.

<sup>23</sup> Ooqai uqanna aiqama ainaina sia auquqoo qini irirawsa naaree auqinau. Maa maqa maqana sia auquaqee idanoo qini naaree auqinau.

<sup>24</sup> Ooqai ooruku nammari sia maruqoo qinee naaree kambiqaafanauro maridaqa. Maqakiqari nammariuqa sia ururee maruafa qinee naaree kambiqaqiafana.

<sup>25</sup> Aaqanauqa faqa amuaqu namuqa faqa sia maruqoo qinee naaree kambiqaafanauro maridaqa.

<sup>26</sup> Yaaweefa maqa maaqa faqa kookoomma faqa sia auqu aukuaana qinee irirawsa naaree mariafanauro maridaqa.

<sup>27</sup> Qinee faqa mariafananoo Yaaweefa innaaruna auqu quqanau. Qinee faqa mariafananoo Yaaweefa ooruku nammari fiqufiqumma auqu quqanau.

<sup>28</sup> Qinee faqa mariafananoo Yaaweefa oonnamu auqu quqanau. Qinee faqa mariafananoo Yaaweefa ooruku nammari maqakiqari ururee maruna auqu quqanau.

<sup>29</sup> Qinee irirawsa Yaaweena faqa mariafananoo Yaaweefa ooruku nammari mandiranara maa oosirana amana kai mandianne qufano miqinninau. Qinee faqa mariafananoo Yaaweefa maa maqana maaqa atunara foora rakiasoofanoo maridanoo.

<sup>30</sup> Yaaweefa mi ainainasa auqi maruafa qinee amiqira irirawsa mina aaqa faiqi aanaaqiara foora mariaafanauro maridaqa. Qinee mina afusaa maridaqa aiqama kari asasirana amimariqiafana.

<sup>31</sup> Aiqama maqa maaqai asasiqa niniaafanauro maridaqa. Qinee faiqi faiqi faqa asasiqa niniaafanauro maridaqa.

<sup>32</sup> Doo maqee kumaaraa fasiqa anaasee qini ufa iriaqa. Qinee qiannandee iqa innee asasifaranoo.

<sup>33</sup> Innee qini naakapara ufa iriaqa, sia minnisaaqa. Iriseeqa irirana faqaasa mariaqa.

<sup>34</sup> Qini ufa irimariasara asasifaranoo. Qini kooqiki aiqama kari mariasa faqa eeqa maaqai fimarunna aanna afainni maridaqa qiniara rakisi mariasa asasifaranoo.

<sup>35</sup> Faiqi moo fannoo qini irirawsa paqurinafa kaqi marirana faqa paquriannoo.

<sup>36</sup> Faiqi qini irirawsara sia randee mariasa nariqa kai nariqa mandaikamma nimaqaidaqa. Qini irirawsara fidiqaa imariasara kuqiranara nididanoo.

## 9

<sup>1</sup> Irirafa nari maaqa atuna qisauku dinni taikasee dinni ani qaara marasee 7 pausasa usakaseenoo.

<sup>2</sup> Irirafa nari aandauro arusee suqeenoo. Narana faqa uainna nammari faqa deedaqamma narana neemaria qainanasaa oomaqa saka quqanau.

<sup>3</sup> Mifa nari ainainira maanaaqauqa niqiqoofaqa maqusasaa aaqanaikiraqoo ooruree nammeera qiaqee niqiqoofaqa fiqau.

<sup>4</sup> Innee ooruree maaqi qimasee nammeera qiaqa. Innee irirana siaisa mai aniree qoomaqa naaqee qiaqa. Furufarirawsara maaqi qimasee nammeera qiaqa.

<sup>5</sup> Mai aniree qini narana nammari naaqee qiaqa.

<sup>6</sup> Inneeqa furufarirana minnisee kisaaqusaa mari faranoo. Amiqira iriranamau fuuqa.

<sup>7</sup> Anee nariara maasa amiqirausee qimaria fasiqausa qaoo qinaqa misa ani namuqaaka mifaranoo. Nariara andeeqarausee qimariasara aaqaranara qaoo qinaqa misa ani arifaranoo.

<sup>8</sup> Anee ufa rukiee maria fasiqausara qaoo qinaqa misa aniaara fidiqaa mifaranoo. Anee irirana faqa fasiqa andeeqa amaqaianoo ani ufara eedoo qimasee ani ameemaanai keeqannoo.

<sup>9</sup> Nana ainainaree irirana faqaana qimaminanoo mifa misa kaaqa firaqoo irirana faqaasaikamma nimaqaannoo. Andeeqara fasiqauqa qimanniminaqa misa moo faqa moo faqa irirana mareefaranoo.

<sup>10</sup> Yaaweenara rufeenana irirana faqaafa mariannaranoo. Anutuna naaquqara ainainara irinanoo mifa ufa irirana oosana amiannoo.

<sup>11</sup> Amiqira irirafa faiqi marirana maa maqanasaa kisaqa kamu rarisama nimaqaidanoo.

<sup>12</sup> Anee irirana faqaafa marinanoo mi irirafa ani moomoo amiqirana amiannoo. Anee mi irirana minnisainanoo aypurarafa aniki mariannoo.

<sup>13</sup> Furufarirafa asaurirana sia anaaseefara foora maridanoo. Firaqoo faaqa quqasee ufa qimari anaaseefara foora maridanoo.

<sup>14</sup> Miqira anaasee fannoo nari maaqa kooqi afaisaa oqumarifinoo aiqama maqusa mirinni urinnaaqaramafa maridanoo.

<sup>15</sup> Akaqausa nari qimaqaannai nari ainainai aiqaree fimariasa misa naarama nari maaqaki quqaidanoo.

<sup>16</sup> Mi anaaseefa maaqi qimasee furufarirauusa qimannimidanoo. Irirana siaisa doo mai aniaqee qidanoo. Furufarirauusara maaqi qidanoo.

<sup>17</sup> Ummuarira nammari adiafaa irafa maridanoo. Ummuarira feemu narafa adiafaa midanoo.

<sup>18</sup> Mi anaaseefinnai fimariasa kuqimarianara furufarirafa fasiqa fannoo sia iridanoo. Mi anaaseena maaqaki keeqoosa maqee kuqira maqa maaqaki maridaqa.

## 10

<sup>1</sup> Maana Sooroomoonnana aaquqira ufa maridanoo. Irirana faqaasa nari rukausa mara asasirana nimidaqa. Furufarirauusa nari ninausa nisaurirana nimidaqa.

<sup>2</sup> Unna qira aatata marainna ainainafa sia ani dadaaqiannoo. Anoonna qira aatata marainna ainainafa ani marirana dadaaqiannoo.

<sup>3</sup> Anutufa sia andeeqara fasiqauqa naarararana nimiannoo. Manda oosana maree mariasa nari nidimari ainainna mararanasaa Anutufa itita nisaidanoo.

<sup>4</sup> Kudoosaaparafa kudikirana amiannoo. Kadaapi rirafa ani ainaina faqaa faikamma aisaidanoo.

<sup>5</sup> Irirana faqaafa narana qaanaakifaqa afeedidaqa. Moo fannoo narana unnakara aukuaana faiaqee idanoo sia narana deedaqafi asauriranaki mariannoo.

<sup>6</sup> Andeeqara fasiqa anaasee amiqi amiqirana mareefaranoo. Manda oosana maree marina ufa fannoo mina manda irirana kukeeqasaifanoo akaqausa mandaikamma nisaidanoo.

<sup>7</sup> Amiqira fasiqa kuqufinaqa amiqira ainainara foora iriranaki kaqi minara oonu mafi irifaranoo. Manda oosana maree mari fasiqafa kuqufinaqa misa mi fasiqanara kai kaqi qaunuseefaranoo.

<sup>8</sup> Irirana faqaasa amiqira naamuaqira ufa iriseeqa nari nimuqusaki mara quqaidaqa. Fifau faafau iqa nuasa kuridifanoo.

<sup>9</sup> Kuqaa qira oosana fannoo faiqi mareeqeenoo andeeqaranaki quqaannoo. Unna qira oosana fannoo faiqi mareeqeenoo maaniki aquannoo.

<sup>10</sup> Noorinnai nifunnai imariasa ummaara kambiqaanifeera miqidaqa. Aiqama nifufsaa paasoosammandee manda oosana qaa qinafa mifa asooarana nimidanoo miqidanoo.

<sup>11</sup> Amiqira fasiqa ufa fannoo nammariara foora, maqakiqari urureenoo kaqi marirana nimidanoo. Mandoosana maree mari fasiqana ufa fannoo nari irirana kukeeqa saifanoo nari aqoonausa mandaikamma nimaqaidanoo.

<sup>12</sup> Faiqi anaaseera fidiqaa ira oosana fannoo ummaara kambiqaidanoo. Faiqi anaaseera nidira oosana fannoo aiqama misa aqarana minninnisaidanoo.

<sup>13</sup> Irirana faqaa fasiqa afaurusaa amiqira ufa kai ururaidanoo. Furufarirafa fasiqa arirafa kai maridanoo.

<sup>14</sup> Irirana faqaasa irirana oosana oosana moodaasaqa maridanoo. Furufarirafa fasiqa ufa qinanoo ummaara sia nianai mariannoo aqa uqanna mariannoo.

<sup>15</sup> Ainaina faqaana nari ainaina fannoo itita amaqaaidanoo. Kudi fasiqa fannoo ainaina sia marinara kuridiannoo.

<sup>16</sup> Amiqira oosana auqaana akiqara kaqi marirafa maridanoo. Numoo fannoo nifiqeenoo firaa numooki kai fidanoo.

<sup>17</sup> Naakapara ufa iri mariasa sia kuqifaranoo. Naakaparanara nikooqee mariasa manda aatata fifaranoo.

<sup>18</sup> Faiqi moo fannoo faiqi anaaseera ookiqari amiqi amiqidanoo umee fidiqaa imarifa unnaqi marifa maridanoo. Munuqi miniqinoo nifa furufari marifa maridanoo.



<sup>19</sup> Ufa moomoo qinana moomoo aqarana mareennaranoo. Anee irirana faqaafa maridana qireeda marinnaranoo.

<sup>20</sup> Amkiqira fasiqa ufa fannoo amiqira siruaara foora maridanoo. Mandoosana maree mari fasiqana irirafa maannukuara foora maridanoo.

<sup>21</sup> Amiqira fasiqa ufa fannoo moomoosa dadaaqidanoo. Furufari marifa narí furufari-rannanai narí kai aridanoo.

<sup>22</sup> Anutuna amiqi amiqiranannai kai ainaina faqaafaikinnaranoo. Ani kadaapirirafa sia amana minaki ookaa iannoo Anutufa kai amiannoo.

<sup>23</sup> Furufarirafa manda oosana auqarara kai asaidanoo. Amiqira irirana faqaafa amiqira oosana auqee marinara kai asaidanoo.

<sup>24</sup> Andeeqarusa narí nidimari ainainna mareefaranoo. Mandoosana maree mariasa kaaqa rufiee maria ainainna mareefaranoo.

<sup>25</sup> Deedeefaa ufai firaafa uqinanoo mandoosana maree mariasa fuaqamma aqusaannoo. Andeeqarusa sia fuaqa aquannoo. Misaki kaqi marifaranoo.

<sup>26</sup> Anee kudoosaapara fasiqa sia aneenna ainainiani feera afiqaa. Afiqasainanoo kudoosapee marinana afai sandurinafaara. Ida muna aninna afuki keeqeenoorra foora iandoora sia afiqaa.

<sup>27</sup> Yaaweena ufa qaindusinana sia dauni kuqinnaranoo kisaqasaa marinnaranoo. Manda oosana maree mariasa kuqirafa kisaqasaa marifaqa kasaagai kuqidaqa.

<sup>28</sup> Andeeqara fasiqa anaasee nidimari ainainafa kuqaa kambiqaínaqa asasifaranoo. Manda oosana maree mariasa sia moo ainaina mareefaranoo.

<sup>29</sup> Kuqaa qira oosana faqaasasaa Anutufa faandaamurara foora misa itita nimaqaidanoo. Miqimmaseenoo quandaki mandoosana maree mariasa kuridi nimaqaidanoo.

<sup>30</sup> Andeeqara oosana maree mariasa sia amana atoosaa ususee kumbaimmaqifaranoo, misa doo miqoo mapukiqa maridaqa. Manda oosana maree mariasa sia mi maqa maqaanaki marifaranoo.

<sup>31</sup> Andeeqara oosana maree mariasa amiqira ufa kai qidaqa. Manda ufa qimari fasiqana afaurusaa ititeefaranoo.

<sup>32</sup> Andeeqarusa ufa qimannimidaqa narí oonu mafi iriseenoo mina ookiqari amiqira ufa kai qidanoo. Manda oosana maree mariasa aiqama kari narira ufa kai qidaqa.

## 11

<sup>1</sup> Sia andeeqara sikeerara foora imariasara Yaawefa fidiyaqa midanoo. Mifa andeeqara sikeerara aidifanoo asaidanoo.

<sup>2</sup> Faiqi moo fannoo narí afaaqa amooqi marifa qusasaa asauriranaki aqufuannoo. Moo fannoo narí afaaqara reendeeni marifa irirana faqaafa mariannoo.

<sup>3</sup> Ainainara kuqaa qimariasa misa narí kuqaa qira oosana fannoo manda ainainasaa itita nisaidanoo. Sia Yaaweena saqarikinausa nariqa unnaqira oosana fannoo nariqa kuridi nimaqaidanoo.

<sup>4</sup> Ani moomoo ainaina fannoo sia ani kuqiranasaa itita amaqaanoo. Aneeqara oosana fannoo ani itita amaqaanoo.

<sup>5</sup> Kuqaa qira oosana fannoo andeeqara fasiqa marirana amanaikamma amaqaidanoo. Sia saqariki mariasa nariqa mi oosanafa narí nikuqama nimifaqa aqufidaqa.

<sup>6</sup> Andeeqarusa narí andeeqarafa idukunnisaidanoo. Sia saqariki mariasa narí mi manda oosanafa narí ufaanara foora ninuka aridanoo.

<sup>7</sup> Manda oosana maree mariasa narí kuqira faasaana narí nidi marifaqa mararee qimaria ainainafa mi faasaanna taikaannoo. Manda oosanannai ainaina marararee qimariasa mi faasaanna narí ainaina mararafa taikaannoo.

<sup>8</sup> Amiqira oosana maree marina mandainaina anifanoo Anutufa itita amaqaifanoo mi mandainainafa aiqareenoo mandainaina maree mariasa nifaaqai aqufidanoo.

<sup>9</sup> Anutunara nikoqee mariasa ufa fannoo ani mareeqee mandaki quqaisaannoo. Andeeqara oosana maree mariasa irirafa ani mareeqee amiqiraqoo quqaannoo.

<sup>10</sup> Andeeqee maria misa aiqama ainaina andeeqaifaqa faiqi anaasee mina qafamasee asasiidaqa. Manda oosana maree mariasa kuridifaqa asasifaranoo.

<sup>11</sup> Andeeqee mariasa maqusa amiqi amiqinoo maridanoo. Manda oosana maree mariasa ufa fannoo narí maqusa naakunduka midanoo.

<sup>12</sup> Irirana siaifa narí aqoonausa raiqara ufa qimannimaqaidanoo. Irirana faqaafa sia miqira ufa qidanoo oo qummunimmasee maridanoo.

<sup>13</sup> Munuqi miniqimarifa aqaqidanoo kukeeqarana kooroo imarifa maridanoo. Amiqi mari fasiqafa mifa kukeeqarana rafaqaqidanoo.

<sup>14</sup> Moomoo irirana faqaasa marinna maqusafa sia aqufuannoo. Irirana sia marinna maqusafa aqufuannoo.

<sup>15</sup> Anee moo maqannaa dinnaakira munnimmara dadaaqianee qinana dadaaqinanoo doo ani munnimma kuridiranaki finanoo ani afaaqa mandaika uqanna iannoo. Anee aanaamuru feefauru dadaaqiranara akooqee marinanoo ani munnimma kaqi mariannoo anee amiqiraqoo kaqi marinnaranoo.

<sup>16</sup> Afaaridanoo fifamari anaaseefa amiqirafa aiqamausa mi anaaseena amooqi mariafa maridanoo. Manda oosana maree mari anaaseenara fidiqaaq midanoo. Kudoosaapee maria fasiqa anaaseesa sia ainaina moomoo mareefaranoo. Nimudaanaa qimaria fasiqa anaaseesa ainaina qumiasana moomoo marisa maridaqa.

<sup>17</sup> Afaarimari fasiqafa nari afaarimarifa nariki kai maridanoo nari dadaaqidanoo. Kaqi narimari fasiqafa mi narirafa quandaki nari aridanoo.

<sup>18</sup> Manda oosana maree mariasa maree maria qumiasana ainainafa sia misa dadaaqidanoo. Andeeqara oosana maree mariasa maree maria ainainafa akooqoo afeeka ainaina mariannoo.

<sup>19</sup> Yafee andeeqara oosana aiqama kari auqaae marifa sia kuquannoo kaqi mariannoo. Manda oosanara sandanainai qimarifa dauni kuqirana paquriannoo.

<sup>20</sup> Yaaweefa manda irirana faqaasara fidiqaaq midanoo. Andeeqee mariasara Anutufa ridanoo.

<sup>21</sup> Anee irimmariananoo manda oosana maree maria fasiqa anaaseesa aupuraranaki fifaranoo. Andeeqara oosana maree mariasa sia mi aupuraranaki marifaranoo.

<sup>22</sup> Amiqira afaaqa faqaa anaasee maridanoo irirana furufari marifa kuara aanna raidanoo. Amiqira afaaqa faqaafa fifau maridanoo.

<sup>23</sup> Andeeqara oosana maree mariasa moo ainainara nidifaqa marasaafanoo amiqirafa maridanoo. Manda oosana maree mariasa nari nidi mari ainainna marasaafaqa aiqamausa aanoo qidaqa.

<sup>24</sup> Faiqi moo fannoo afaarinoo nimi marifanoo mina ainaina marirara kai idanoo. Faiqi moo fannoo manda fasiqa kaaqa ainainara tatamaqidanoo rakisi qumaraifa sia mina ainaina moomoo kidanoo.

<sup>25</sup> Afaarinanoo ani ainaina moomoo mariannoo. Anee aneenna ainaina akaqausa dadaaqinana niminaqa ani faqa dadaaqiqa amifaranoo.

<sup>26</sup> Faiqi moo fannoo aandaroo narimarifanoo nari narana moomoo marifanoo saina munnimma nambaqa meeraqoo auqu ramasaanaqa qimiae qimarinaru faiqi anaasee mi fasiqa anaaseena aquramma araidaqa. Kaqi feefauriaqee qimari fasiqana amooqidaqa.

<sup>27</sup> Fainqi moo fannoo amiqira oosanara afeekaikammasee randainafa mi fasiqafa nari amooqirana faqa paquriannoo. Faiqi moo fannoo manda oosanara randanoo fimarifa mi manda ainaina paquriannoo.

<sup>28</sup> Nari qumiasanasaa mundi mariasa ufai firaafa uqnoo saqari amanee rauqu aqusaifafanoo maqasaa aqufindee mifaranoo. Andeeqara oosana maree mariasa misa sia fuka saqari amanee rafoora amiqi amiqi faranoo.

<sup>29</sup> Faiqi moo fannoo faiqi anaaseera manda ufa qimarinaqa faiqi anaasee findimeeqee daraani mambifanoo nariara quanda quandidanoo. Furufarira fasiqauqa irirana faqaasa ainainira faiqi marifaranoo.

<sup>30</sup> Andeeqee maria oosanafa kaqi marirana nimidanoo. Mandoosana maree mariasa kasaqaanda midaqa.

<sup>31</sup> Amiqi maria fasiqausa maa maqanasaa nari andeeqasee marinnana akiqara mareefaranoo. Manda oosana maree mariasa misa faqa maqee kamuqoo nari manda oosana akiqara firaqoo aupurarana mareefaranoo.

## 12

<sup>1</sup> Faiqi moo fannoo aqamasainanoo moo fannoo qimaminanoo eedoo qimasee irinafa irirana faqaafa mariannoo. Aakapara ufara akooqee marifa furufarira fasiqa maridanoo. <sup>2</sup> Yaaweefa andeeqara fasiqa anaaseera asaidanoo. Manda iriranara tipundaari mariasara akooqidanoo.

<sup>3</sup> Mandoosana fannoo sia amana itita nimaqaannoo. Andeeqarousa sia amana kasi kasifaranoo atuka araqa marifaranoo.

<sup>4</sup> Irirana faqaa anaasee afaaqi fannoo mina amooqida asaidanoo. Manda oosana maree mari anaaseefa nari afaaqi asaurirana amisaiifanoo amudaani rumafifanoo aurinoora foora inoo maridanoo.

<sup>5</sup> Kuqaa anoona ufa qimariasa aiqama ainaina andeeqa nimaqeeffaranoo. Manda oosana maree mariasa inni nikaru qiranara kai iridaqa.

<sup>6</sup> Manda oosana maree mariasa misa ufaana fufidaqa ufannai faiqi naridaqa. Faiqi andeeqee mariasa misa ufaana kinaana andeeqara ufannai idukidaqa.

<sup>7</sup> Manda oosana maree mariasa kuqifanoo misasaa ani aruakinausa sia marifaranoo. Andeeqara fasiqa aiku asauku sia dauni kuqifaranoo kaqi marifaranoo.

<sup>8</sup> Anee irirana faqaafa marinaqa faiqi anaasee ani amooqifaranoo. Anee irirana siaifa marinaqa faiqi anaasee noori runifaranoo.

<sup>9</sup> Kaqi fifau fasiqa nari ainainiranannai narana naidanoo amiqiranaki maridanoo. Moo fannoo nariara unnaqimasee karaambaiqee qimasee oonuree aniree inoo nidanoo naranara sia, marifanoo aarara nidanoo.

<sup>10</sup> Andeeqara fasiqauqa nari aandau kuara faini nimuqusi marifaqa rakisidaqa. Manda oosana maree marifa kuara faini kaukaata qimannimaqaidanoo.

<sup>11</sup> Kaqaq ainaini mari fasiqana narana moomoo marifanoo naidanoo. Fifau unnaqira ainaina auqvanoo nifa narana sia marifa maridanoo.

<sup>12</sup> Manda oosana maree mariasa manda ainainara kai randaidaqa. Andeeqee mariasa misa atukaraqa maridaqa.

<sup>13</sup> Mana oosana maree mariasa nari ufaki ufaanakiara foora aridaqa. Anoona qira oosana maree mariasa misa rakeemmaki kaqinni maridaqa.

<sup>14</sup> Aneenna ufa qimariannana akiiqara faqa aneenna asaukunoo uqee mariannana akiiqara faqa mareennaranoo. Aneenna auqaannana amana kai aiqama ainaina mareennaranoo.

<sup>15</sup> Furufarira fasiqauqa aiqama kari nariara amiqimmidee qidaqa. Irirana faqaasa naamuaqia ufana amiqimmasee iridaqa.

<sup>16</sup> Irirana siaifa kaqikaa ufa iriseenoo tautummeeqeenoo aanoo qidanoo. Irirana faqaafa iriseenoo mafi rafaafufusee mana mana fidanoo.

<sup>17</sup> Faiqi moo fannoo andeeqarafa anoona ufa kai qidanoo andeeqara ainaina uqeeraidanoo. Unnaqi mari fasiqafa unna qira ainaina kai uqeeraidanoo.

<sup>18</sup> Sia irirana irisee qimaria ufafa aseemara foora faiqi atekaidanoo. Irirana faqaasa nifauru fannoo ufaanakuru ununnisaidanoo.

<sup>19</sup> Kuqaa anoona ufa qimari afai afaurufa kisaqasaa maa maqanasaa mariannoo. Unna qimari afai afaurufa qusasaa taikaannoo.

<sup>20</sup> Manda ainainara tipundaari mariasa naundurui suka sanda itaranda maridanoo. Faiqi anaasee amiqiranaki mariaqereee qimasee ainaini mariasa asasifaranoo.

<sup>21</sup> Andeeqara fasiqa afaaqai sia mandainaina auqufuanoo. Mandainaina maree mariasa sia moo ainaina uaqeidaqa misaki ummaara kai qumbiqanoo maridanoo.

<sup>22</sup> Yaaweefa unnaqi maria afauru afainara fidiqaa midanoo. Andeeqara ufa mau fimariasara Yaaweefa asaidanoo.

<sup>23</sup> Irirana faqaasa nari iria ufana rafaafufusee maridaqa. Furufarirauusa nari furufarirana faqa quqasaida nimidaqa.

<sup>24</sup> Kadaapi rumasee ainainirafa ani afeeka amiannoo. Kudoosaaparafa ani moona ainainira faiqika maisaannoo.

<sup>25</sup> Moo ainainara amukee marifa ani asasirana aruannoo. Reedeenira ufa fannoo ani asooama amaqaannoo.

<sup>26</sup> Andeeqee mari fasiqafa nari aqoondiqa amiqira aana uqannifiqaidanoo. Manda oosana maree mariasa nari mandoosana fannoo nari mareeqee kaqirunna ubeekaidanoo.

<sup>27</sup> Anee ainainirara kudoosaapeenana sia aneenna masaree qimarianna ainainna mareennaranoo. Anee amudaanai qimasee ainaininana aneenna aiki mari ainainna mareennaranoo.

<sup>28</sup> Kaqi marirannai fimaria aanafa andeeqara oosana maridanoo. Kuqirannai fimaria aanafa mandoosana maridanoo. Aaquqira Ufa.

## 13

<sup>1</sup> Irirana faqaq faiqiuqa nari ninausa nikausa ufa amiqimmasee iridaqa. Ufa rukiee mariasa sia moo fannoo qaoo qinnana iriannoo.

<sup>2</sup> Amiqira fasiqa fannoo amiqira ufa qinnana akiiqara maraannoo. Kaqi runna fimariasara nariranara kai naararaidanoo.

<sup>3</sup> Aneenna ufasaq rakisina aneenna mariranasaa faqa rakisinna anoo. Fifau faafau ufa qimarifa nari kai nari aridanoo.

<sup>4</sup> Kudiki maria fasiqausa ainainara firaqoo amuqusi marifanoo sia maraannoo. Amudaanai qimasee ainaini marifa aiqama ainaina nari aidi ari ainainausa maraannoo.

<sup>5</sup> Andeeqara fasiqauqa unna ufara fidiqaa midaqa. Mandoosana maree mariasa marirafa nisaurirana faqa manduqarana faqa nimidanoo.

<sup>6</sup> Andeeqara oosana fannoo aaqarana siasa itita nimaqaidanoo. Manda oosana fannoo mandoosana maree mariasa mandaikamma nimaqaidanoo.

<sup>7</sup> Akaqausa ainaina siasa ainaina faqaasa naanna raidaqa sia ainaina marifaqa fifau miqidaqa. Akaqausa ainaina siasa naanna raidaqa noori kandamasee nidaqa misa moomoo ainaina faqaasa maridaqa.

<sup>8</sup> Ainaina faqaafa arirariafanoo narí ainaina moomoo nimifaqa sai aridaqa. Ainaina siasa sia minara rufaidafa manoo manaa idaqa.

<sup>9</sup> Amiqira oosana maree mariasa qoomara foora kaaqa qaidaqa. Manda oosana maree mariasa qimbarari mari qoomafara foora maridaqa.

<sup>10</sup> Narí amoo kai qidanoo mandufa kai ugeeree marifa sia moo ainaina auqaidanoo ummaara kai ugeeraidanoo. Reedeeni mariasa misa irirana nimiaqeera kai iraidafa.

<sup>11</sup> Unna iriranannai maree maria ainainafa kai kaqi taikaannoo. Kadaapi rumasee marainafa moomooka miannoo.

<sup>12</sup> Faiqí mo fannoo moo ainainara kisaagasaa afeesida marifanoo sia anifanoo amuqusa mandaikifanoo akoqaidanoo. Aidi mari ainainnara afeesida mariifanoo anirraifanoo asaidanoo.

<sup>13</sup> Faiqí moo fannoo naamuaqira ufara fidiqaa imarifa mandainaina ummaara aaraidanoo. Naamuaqira ufa reendeena mandee irimari fasiqa anaaseefa asairana maraidanoo.

<sup>14</sup> Irirana faqassa naamuaqira ufa fannoo kaqi marirana nimira nammariara foora maridanoo. Ani kuqiranakinaana dadaaqifana kaqinni ubeekeennaranoo.

<sup>15</sup> Irirana faqaana aqoonausa mina ufa qaindusidaqa minara ridaqa. Unna ufa qida mandaiki mariasa kuridira aatata fidaqa.

<sup>16</sup> Amiqira irirana faqaa fasiqa anaasee andeeqara irirana iriseeqa mimau kai fidaqa. Furufarira fasiqa anaasee faiqí nifusaa nári furufarirana uqeera uqannifiqaidafa.

<sup>17</sup> Aanaiqi fannoo unna ufa aatata qinoo nifa faiqí anaasee manda ummaarakí mara quqaidanoo. Kuqaa ufa qimarina ufa fannoo asoosama nimaqaidanoo.

<sup>18</sup> Aakapara ufa sia irimarifa kudikinoo asuruannoo. Aakapara ufa irimari fasiqafa urigaraidanoo.

<sup>19</sup> Moo ainainara kisaagasaa rakisiinanoo anirainanoo amuqusa amiqiannoo. Irirana siai fasiqa anaaseesa manda ainaina minnisee amiqira ainaina auqarara nikooqaidanoo.

<sup>20</sup> Anee irirana faqaasa faqa finana irirana mareennaranoo. Anee furufarirausa aqoondikinana kuridinnaranoo.

<sup>21</sup> Manda oosana maree mariasa fimariafanoo ummaara fannoo misa nifaqanoo nidanoo. Andeeqara oosana maree mariasa mi andeeqarana akiiqara amiqira ainaina mareefaranoo.

<sup>22</sup> Andeeqara fasiqauqa kuqifaqa misa faiqi namu ninaiqi mara misa qumiasana mareefaranoo. Mandoosana maree mariasa qumiasana andeeqarausa iannai kai fuannoo.

<sup>23</sup> Fuka maqaki kudi fasiqauqa narana ummaqusaafanoo moomoo marifa sia andeeqee mari siaasafa mi kudi fasiqausa ufa sia irinoo sia mina narana andeeqaisaifaqa fifau dapi mara taikaidafa.

<sup>24</sup> Anee sai aneenna faiqi aaqarana akiiqara arinana sia aneenna faiqiara aidinnaranoo. Anee aneenna faiqiara aidinana saamu qumasee arusee andeeqaa.

<sup>25</sup> Andeeqarausa narana moomoo marifaqa naidaqa. Manda oosana maree mariasa aiqama kari naararaidanoo.

## 14

<sup>1</sup> Amiqira irirana faqaa aanaaseeuqa maaqa usakaseenoo amiqimmasee rakisidanoo. Furufari maria anaaseesa mi maaqana rapeepamma aqidaqa.

<sup>2</sup> Andeeqara aatata fimariasa Yaaweenara qeerairidaqa miqidaqa. Manda aatata fimariasa Yaaweenara nikooqeemari faqa miqidaqa.

<sup>3</sup> Narí amoo aanoo qida kaaqa ufa qimarina ufa fannoo saamu kamambi narí aridanoo. Irirana faqaana afauru fannoo narí itita amaqaaidanoo.

<sup>4</sup> Tarakasaa siai fasiqana narana oodaa mariannoo. Taraka faqaasa narana moomoo maridanoo.

<sup>5</sup> Ainaina qafamasai fasiqafa kuqaa anoona ufa qimari fasiqafa kootaki sia nikaru qiannoo. Ainainara unna qimari fasiqafa unna ufa kai mina ookiqari ururaidanoo.

<sup>6</sup> Kaukaata qimaria fasiqausa iriranara randaasia sia paquridaqa. Irirana faqaasa sia kadaapiridaqa dauni paquriqa irifaranoo.

<sup>7</sup> Anee sia furufarira fasiqauqa naaqa maria qeerairamandee nianai maria. Misa sia amiqira irirana ani qimamifaranoo.

<sup>8</sup> Nanaree aiqama ainaina akoofasa fannoo irirana faqaafaikidanoo fee. Mifa ainaina auqarana iri marinara miqidanoo. Nanaree irirana siai fasiqafa furufarira fasiqaikinoo fee. Mifa iridamunoo qinara miqidanoo.

<sup>9</sup> Furufarirausea sia aaqaranara qeerairidaqa. Andeeqarausea aaqamaseeqa mi aaqarafa kai kaqi taikaanifeera oonu mafi iridanoo.

<sup>10</sup> Ani asasirafa anindi kai maridanoo. Ani sukaqarafa anindi kai maridanoo. Sia moo fannoo mina maraannoo.

<sup>11</sup> Manda oosana maree mariasa maaqa rapeemma fuannoo. Andeeqarausea maaqa sia rapeeiannoo kaqi mariannoo.

<sup>12</sup> Faiqi moo aana qafamaseeqa amiqira aanee qimariana aaqaidaqa sia qafaranaki kuqira aana marifaqa miqi qidaqa.

<sup>13</sup> Akaqausea naanaidara qimariafanoo misa naunduraki kaqi rumbanoo maridanoo. Asasirafa taikaifanoo noori runirafa kambiqaaidanoo.

<sup>14</sup> Manda aatata fimariasa miqi mariana akiiqara mareefaranoo. Andeeqara oosana maree mariasa miqianannai nari feefauru mareefaranoo.

<sup>15</sup> Furufari mari fasiqafa unufara faqa anoona ufara faqa kuqaa fee kai qidanoo. Irirana faqaafa sia miqidanoo mifa nari aiku amarususee reemari fa maridanoo.

<sup>16</sup> Irirana faqaafa mandainaina ummaaraki marirara qeerairidanoo. Irirana siaifa mifa furufarinoo aanoommasee kaqi pasoosammasee fidanoo.

<sup>17</sup> Qusa ufa qimaseea kai kaqi aanoo qimarifa furufarira ainaina kai auqaidanoo. Irirana faqaasa qireeda kai maridaqa.

<sup>18</sup> Irirana siaisa misa aiqama ainainirafa furufarirafa kai maridanoo. Irirana akoofasauqa mariana akiiqara feefauru amiqira irirafa maridanoo.

<sup>19</sup> Mandoosana maree mariasa andeeqarausea noorinni kumma ramafi nari mara maree qumuree qimudao qima nimaqaaqeeru iridaqa.

<sup>20</sup> Kudi fasiqa sia aqoondi faifa maridanoo, mina aqoonausea faqa miqi mariasara nikooqaidanoo. Ainaina faqaafa moomoo aqoondi faqaafa maridanoo.

<sup>21</sup> Faiqi moo fannoo moonara akooqainafa aaqaidanoo. Anee asasiraree qimaseenana kudi fasiqa idaaqamma amaqa.

<sup>22</sup> Manda oosana randee marifa aaqaidanoo. Anee amiqiranara randeenana ufa qaindusiranara faqa saqarikirana faqa paqurinnaranoo.

<sup>23</sup> Kadaapi rinana amiqira marirana mareennaranoo. Ufa kai qina nidana fifau ooqumarindundina nidana kudi marinnaranoo.

<sup>24</sup> Irirana faqaasa mariana akiiqara moomoo qumiasa maraidaqa. Irirana siaisa furufarira oosana aiqamausa iridaqa.

<sup>25</sup> Kootaki nari afu qafai ainainara andeeqasee quqaa kai qimarifa faiqi mariranasaa itita nimaqaidanoo. Unna ufa qimarifa faiqi ueeqaidanoo.

<sup>26</sup> Yaaweenana ufara rufiarafa ququsa kiara foora maridaqa. Miqira fasiqa fannoo nari faiqi anaasee faqa ququsaki maridanoo.

<sup>27</sup> Anee kuqirana aiaaqarareefee fee qidane. Yaaweenara rufiarafa kaqi marirana nimi marifa maridanoo.

<sup>28</sup> Karaambaiqa uriqararafa mina aiku asauku moomoo mariafanoo raikisi nimaqee marinara miqidanoo. Mina aiku asauku sia marifanoo mina karaambaiqa auqu fifau mariannoo.

<sup>29</sup> Anee sia dauni aanoo qinana reedeeni marinafa firaa irirana faqaafa marinnaranoo. Qusa ufa qimari fasiqafa nari furufarirana kai uqeera uqannifiqee marifa maridanoo.

<sup>30</sup> Asooara irirafa mina afaaqa amiqirana amidanoo. Rairai qira oosana fannoo manda auriranara foora maridanoo.

<sup>31</sup> Kudi fasiqara kaukaata qinana mina auqu fasiqana Anutunara faqa kaukaata qimariananoo. Kudi fasiqara amuqusinana dadaaqinna anee Anutuna amooqidana mina auqu uqeeree mariananoo.

<sup>32</sup> Manda ainaina kambiqaifaqa mandoosana maree mariasa kuridiranaki fidaqa. Andeeqara fasiqauqa nariqa andeeqarafa misa itita nimaqaidanoo.

<sup>33</sup> Irirana fannoo irirana faqaasa iriranaki maridanoo. Furufarirausea irirafa sia kaifaafa faqa maridanoo.

<sup>34</sup> Andeeqara oosana fannoo mi maqannaasa nuqu uqeera firaanaikidanoo. Nari een-daandira mandoosana fannoo mi maqannaasa mareeqee nari nisauriranaki aqidanoo.

<sup>35</sup> Kaiqee fasiqa irirana faqa fasiqa maridanoo. Karaambaiqa minara aidianoo. Mi kaiqee fasiqafa asaurirana karaambaiqa amimari fasiqafa aanoo qirana kai maraannoo.

## 15

<sup>1</sup> Reedeenira ufa aminanoo aanooqirafa taikaani. Raiqara ufa fannoo aanooqirana uqeeree marifa maridanoo.

<sup>2</sup> Irirana faqaasa ufa qiafaqa akaqausa mina iriseeqa irirafa amiqira ainainee qidaqa. Irirana siaisa nooqiari furufarira ufa kai fididaqa.

<sup>3</sup> Yaaweefa aigamai kambigee mari ainainna qafaidanoo. Maasa andeeqara ainainee mandainainee auqaunanoo mifa maasasaa afu rufisee maridanoo.

<sup>4</sup> Nifaaga amiqianifee ufafa marirana nimidanoo. Aanoo qimaria nifaurufa faiqi naunduraindaraana narimarifa maridanoo.

<sup>5</sup> Nari anoona akoona ufara fidiqaa imaifa furufarirafa maridanoo. Naakaparufa irimarifa irirana faqaafa maridanoo.

<sup>6</sup> Andeeqara fasiqa anaasee maaqaki qumiasana oosana oosana maridanoo. Manda oosana maree mariasa munnimma marasaafanoo mifa misa mareeqee mandainainaki quqaidanoo.

<sup>7</sup> Irirana faqaasa irirana aqamara foora doo aigamai aaqaidaqa. Sia furufari mariasa miqidaqa.

<sup>8</sup> Mandainaina maree mariasa aandau arusee tatufu amiafanoo Yaaweefa qafamaseenoo misa tatufiranara fidiqaa midanoo. Aneeqee maria fasiqa anaaseesa innaaru qiranara Yaaweefa aididanoo.

<sup>9</sup> Yaaweefa manda oosana maree mariasa niqafamasee misa oosanara fidiqaa midanoo. Andeeqara oosanara rimariasara Yaaweefa aididanoo.

<sup>10</sup> Anee aqara ainaina auqeenana afeeka nariranaki finnarano. Anee aakapara ufara qidoo fee qinana kuqinnarano.

<sup>11</sup> Kuqirausa mariannai ririmma Yaaweena afusaa akooqoo maridanoo. Kaqi mariasa naqi fee masee fee Anutuna afusaa nari irirana kukeeqeefaree akooqoo qafaidanoo.

<sup>12</sup> Kaukaata qimari fasiqafa aakapara ufara akooqaanoo. Mifa sia irirana faqaasiannai oonuree iriranara iraanoo.

<sup>13</sup> Faiqi anaasee asasiafanoo noori inaa inaa idanoo. Nimugusa ummaara raifanoo nifaaga faqa rumbaidanoo.

<sup>14</sup> Irirana faqaasa irira ainainara kai randaidaqa. Furufarirausa sia miqidaqa. Nari furufarirana maasa qimana maridanoo fee qidaqa.

<sup>15</sup> Kudi fasiqa marirafa naaruara ummaarakai kai maridanoo. Asasi mariasa aigama kari misa marirafa nasunnasura kai midaqa.

<sup>16</sup> Kudi fasiqa maridana Yaaweenara aaquqee marinana marinafa moomoo qumiasana nari ummaara namu faqa uraaqarana marinnarano.

<sup>17</sup> Ani aidi mariasa saimbaqa aadana adasa naidana anee amiqira aandaara nikooqee marisa saimbaqa neemarina uraaqararafa mariananoo.

<sup>18</sup> Qusufa qimasee aanoo qimari fasiqafa aanoo qirana uqeeraidanoo. Reendeenimari fasiqafa asoosana nimidanoo.

<sup>19</sup> Ainainirara nikoo nikaai imariasaa misa aigama niranaki ummaara paquridaqa. Anee kuqaa qira oosana auqeenana sia ummaara mareennarano.

<sup>20</sup> Irirana faqaa faiqiqa nari nikausa nifaaga asarirana kai nimidaqa. Furufarirausa nari ninausamarana fidiqaammidaqa.

<sup>21</sup> Irirana siaisa nari furufarirana asasa midaqa. Irirana irimari fasiqafa andeeqara ainaina auqaidanoo.

<sup>22</sup> Anee moo ainaina auqararee qimasee aakapara ufa marasee auqainanoo anoona kambigeenoo andeeqaanoo. Aakapara ufa mau sia finana sia mina anoona paqurinnarano.

<sup>23</sup> Moo fannoo ufa qinnanaki anoona ufa irisee qimarifa nari ufara asaidanoo.

<sup>24</sup> Irirana faqaasa ameemaira foora ooru fidaqa naaru marirannai ooru fidaqa. Misa kuqirannai oofufirara nikooqaiifaqa miqidaqa.

<sup>25</sup> Nari nifaaga amooqi mariasa Yaaweefa misa maaqa rapeiannoo. Adeedaana anaasee aigama ainainasaa Yaaweefa rakisi nimaqaidanoo.

<sup>26</sup> Manda oosana maree mariasa oonu mafi iriranara Yaaweefa fidiqaa midanoo. Anukara irirana faqaasara mifa asaidanoo.

<sup>27</sup> Aigama ainaina nariara kai fatusi marifa nari faiqi anaasee ummaarakai quqaidanoo. Manda oosana maraaqee qimasee feefauru nimiafaqa qaoo qimariasaa kisaqaasaa maa maqanasaa marifarano.

<sup>28</sup> Andeeqara oosana maree mariasa moona ufa iriseeqa andeeqara ufara oonu mafi iriseeqa nari qimamidaqa. Manda oosana maree mariasa moona ufa iriseeqa kai kaqi nari qimamidaqa ummaara uqeeridaqa.

<sup>29</sup> Andeeqee mariasa innaaru qirana Yaaweefa iridanoo. Manda oosana maree mariasara Yaaweefa akooqaiifanoo nianasaa maridanoo misa innaaru qirana sia iridanoo.

<sup>30</sup> Moo fannoo ani qafamasee naanaidara qimasee amandaifanoo ani amuqusa amiqidanoo. Moosaqari amiqira ufa aninana irinanoo ani amuqusa amiqi miannoo.

<sup>31</sup> Qaoo qira ufa irisee eedoo qimari fasiqafa irirana faqaafa maridanoo.

<sup>32</sup> Anee aakaparufa irirara akooqainafa aneenna kai aupurarana aneennaki mara quqee mariananoo. Anee faiqi aakapara ufa aminnanara eedoo qimasee qaindusinanoo ani irirafa uriqaraannoo.

<sup>33</sup> Yaaweenara qeerairirafa amiqira irirana ani amiannoo. Reendeenira oosana naaree maraseenana inaaqianna uriqarafaikinnaranoo.

## 16

<sup>1</sup> Faiqi ainaina auqarara tipundaaria fanoo Yaaweefa minara irisaiifaqa kai auqaidaqa.

<sup>2</sup> Faiqi nári mariranara andeeqaiidee qifanoo Yaaweefa aiqamausa naundurái irirana oosana rainasee qafaidanoo.

<sup>3</sup> Aneenna tipundaarianna ufana Yaaweenara amiqi amiqimma qimaqaannee qinanoo anoona kambiqaannoo.

<sup>4</sup> Yaaweefa aiqama ainaina auqufa taikeefandinanara iridanoo. Manda oosana maree mariasa inaaqianna kuqiranaki taikee fandinnanara faqa iridanoo.

<sup>5</sup> Ramoo ramaaida nári nifaaqa mara maree uri mariasara Yaaweefa fidiqaa midanoo. Misa narirafa sia niqaannoo kaqi naruanno.

<sup>6</sup> Anee aiqama kari Yaaweena ufasaa mapukusee marinanoo mifa ani numoo taikaannoo. Yaaweena ufasaa mundufi finanoo sia moo mandainaina aniki kambiqaannoo.

<sup>7</sup> Ani marirafa nirafa andeeqanoo marinanoo Yaaweefa minara asasinoo ani namuqaa aqoondi kamma amaqaannoo.

<sup>8</sup> Anee qoodaa qumiasana andeeqara aatata maraseenana andeeqara oosana mau finanoo ani marirafa firaa qumisana faqaana marirana uriqaranoo mariannoo.

<sup>9</sup> Anee moo ainainara aneenna iriranaki qimirinanoo Yaaweefa nári irimarinnai ani mara ubeekaannoo.

<sup>10</sup> Yaaweefa maqasaa uriqararana dadaaqifanoo andeeqara ufa nimidanoo. Mina ufa qirafa aiqama kari kuqaa kai marirannoo.

<sup>11</sup> Yaaweefa aiqama sikeerara andeeqara sikeera kai marinaqa aiqama feefauru faqa andeeqarafa kai mariani fee qidanoo.

<sup>12</sup> Uriqararansa manda oosanara fidiqaammidaqa. Kaamanna fannoo andeeqara oosana marainnana mi andeeqara oosannanannai mina mapuku amaqaannoo.

<sup>13</sup> Uriqararafa kuqaa anoona ufa qimariasara aididanoo. Kafa mifa anoona uf qimariasara asammasee dadaaqidanoo.

<sup>14</sup> Uriqararafa aanoo qimasee kuqaa naruannoo. Irirana faqaafa narí irira ufannai mina aanooqirana asooama amaqaannoo.

<sup>15</sup> Uriqararafa naanaidara qinanoo aiqamausa nimuqusa amiqimma nimaqaannoo. Uriqararana asarirafa aukuanai aakuara foora aiqama amiqi amiqimma nimaqaidanoo.

<sup>16</sup> Anee amiqira irirana marasainafa mifa koora faqa siruaa faqa uraqaaranoo marianoo.

<sup>17</sup> Andeeqara aatata fimariasasa misa manda oosana maree mariasasa aanara qeeraira midaqa. Niku raanaki qafamasaida nimariasasa misa kaqi marifaranoo.

<sup>18</sup> Nári nifaaqa mara maree uri mariasasa kuridiranaki ooqu fidaqa. Ramoo ramaa imariasasa aqufi marianaki aqú fidaqa.

<sup>19</sup> Sarauidaqa nári mara maree qumi mariasasa misa uriqararanaki maridaqa. Kafa manda oosana maree mariasasa ramoo ramaairana faqa moosa ainaina ummuara marasee raina nimimariasasa ureeqaransa maridaqa.

<sup>20</sup> Ani aakapainna ufana amiqimmasee irinanoo ani marirafa amiqiannoo. Yaaweena saqarikinana anee asainnananoo.

<sup>21</sup> Irirana faqaa fasiqara amiqirafa irirana faqaafee qifaranoo. Irirana faqaa fasiqa ufa fannoo adiafaa inoo irirana pooduqaidanoo.

<sup>22</sup> Faiqi moo fannoo amiqira irirana faqaafa marifanoo mi irirafa maqakaqari ururee mari nammari fara foora amiqira irirana mi fasiqana amidanoo. Furufari mariasasa nári furufarirafa nári naridanoo.

<sup>23</sup> Irirana faqaa fasiqa ufa qirara oonumafi irisee ufa qidanoo. Mi ufana iriafanoo adiafaa inoo iriaqaa kai midanoo.

<sup>24</sup> Amiqira ufa fannoo adiafaa ira ainainara foora faiqi naundurái adiafaa irana faqa amiqi amiqirana faqa nimidanoo.

<sup>25</sup> Faiqí anaasee moo aanara andeeqara aanammifoo qimariafanoo mifa kuqi maria aanafa maridanoo.

<sup>26</sup> Ainaini mari fasiqafa daara raandoo qimasee ainainidanoo. Narí aararanara iriseenoo ainainidanoo.

<sup>27</sup> Manda oosana maree mariasa akaqausa mandaikamma nimaqara aanara kai randaídaqa. Misa ufa fannoo idara foora nitakuqidanoo.

<sup>28</sup> Manda oosana maree mariasakiqari munuqi miniqirafa kambiqafi daraanidanoo. Miqi mariasa mi ufanannai amiqira aqoondi rakeemma aqídaqa.

<sup>29</sup> Faiqí narimari asa nári niqoondi nikaruqimasee rarisameeqeenoo mandainainaki quqaidanoo.

<sup>30</sup> Afu atindari maqee marifa mandoosana kambiqaanifeera miqidanoo. Afauru uqmairí marifa mandainaina kambiqaanifeera miqidanoo.

<sup>31</sup> Aandau akiqqa faqaana akiqqa fannoo uriqararasa qatara foora maridanoo. Andeeqara mariranannai kai mi ainaina paqurídaqa.

<sup>32</sup> Moo fannoo narí aanoo rafaqafusee reendeenira ufa kai qimarifa maqasaa karaambaiga uraaqaranoo maridanoo. Narí mariranasaa rakisi marifa moo maqannaasa narusee misa maqa maaqa maree marina uraaqaranoo maridanoo.

<sup>33</sup> Kaatara foora sarammasee Anutuna aidiranara iriraree qiafanoo Anutufa narí kai akooroomma nimidanoo.

## 17

<sup>1</sup> Aadana narana narí aqoondi faqa reendeenamasee neemarifa uriqararafa maridanoo. Firaa qoomaqa sakasee nári tinoo taanoo rirana namu faqa nee mariasa oorudupirausa marídaqa.

<sup>2</sup> Moo fasiqa ainaina faqaana faiqi fannoo narí akoona asaurirana ami marinanoo mina amiqira ainainira faiqi fannoo mi faiqina iraaqaranoo maridanoo rakisi amaqaannoo. Kaasooaqee mi fasiqana faiqi namu nári nikoona qumiasana rainaídaqa mina andeeqara ainainira faiqi faqa raina amifaranoo.

<sup>3</sup> Koora faqa siruaa faqa tasirisiri mandee qafaandee inoo Yaaweefa faiqi nimuqusa nimanammasee qafaidanoo.

<sup>4</sup> Manda oosana maree mariasa manda ufauqa kai irídaqa. Unnufa qimariasu unnufa kai irídaqa.

<sup>5</sup> Anee kudi fasiqauqara uteeti qinana mi kudi fasiqausa auquna Anutunara faqa uteeti qinnaranoo. Moo fannoo moo mandainainaki aqufinana anee minara naanaidara qinana sia kaqi marinnaranoo Anutufa ani aruannoo.

<sup>6</sup> Ninaaku nitaatoosa nári ninaiqimarara nasuriandee iqa faiqiuqa nári ninausa nikausara nasurídaqa.

<sup>7</sup> Amiqira fasiqa anaasee sia unnufa qídaqa. Kuqaa ufa sia furufarirausaindi maridanoo.

<sup>8</sup> Umee raqera nimimaria feefaurufa fadueera foora dadaaqifaqa auqararee qiana kaqi auqeeferanoo fee qídaqa.

<sup>9</sup> Anee faiqi anaasee aniara ruaqera ani mandaikamma amaqaifana minninnisaa. Misa ani mandaikamma amaqaifana kaqi mina irina fidana anee aqoondikirana rakeem-minnaranoo.

<sup>10</sup> Anee irirana faqaa fasiqa moodaannai qimaminanoo mifa kai kaqi iriannoo. Anee quandakinana furufarira fasiqa saamu qumaree moomoo wan handeereeta kari arusee qimaminanoo mifa siamma qiriannoo.

<sup>11</sup> Kuqirafa faiqi narimari fasiqafara foora aiqama kari mandainaina uqereee maria fasiqa anaaseesa naridanoo.

<sup>12</sup> Anee kaasau faini aanaaqi rausumaree aanai oonu mina anoona paquri masainanoo ani rufiarafa mariannoo. Furufarira fasiqa narí furufarira aatata fimarina paquri maseenana firaa mandainainaki marinnaranoo.

<sup>13</sup> Moo fannoo amiqira ainaina moona amifanoo qumareenoo mina akiqara manda ainaina amifanoo minara mandainaina kai mi fasiqana maaqaki naaruara mariannoo.

<sup>14</sup> Tinoo rira oosana fannoo andaani tatiara foora idanoo. Tinoo rirafa kambiqainana kai kaqi rafaqafu sainanoo sia kambiqaaani.

<sup>15</sup> Manda oosana maree mari fasiqana idukiranara faqa andeeqara fasiqa fifau rumberanara faqa Anutufa mi oosana qandara fidiqaa midanoo.

<sup>16</sup> Faiqí moo fannoo irirana sia maraifa nanaree fifau sukura feefauridanoo fee mina irirafa sia maridanoo.

<sup>17</sup> Amiqira aqoondi fannoo aiqama kari aniara aididanoo. Faiqí ani ainaina sia fifau marídaqa anee unmaaraki aqufinaqa ani dadaqirara marídaqa.



- <sup>18</sup> Akaqausa amiqira irirana siaisa kai moona aaqarana akiqara idaqa.
- <sup>19</sup> Faiqi moo fannoo numoo kambiqaara oosana aidi marifa mifa rakirana kambiqaranara faqa aididanoo. Aneenna afaaqa amooqinana anee ummaarara randaida miqimariananoo.
- <sup>20</sup> Manda irirana faqa mandufa faqa kai qimarifa sia amiqirana paquriannoo kuridirana kai paquriannoo.
- <sup>21</sup> Moo fasiqa faiqi namu furufarira ainaina auqaiifaqa misa ninaukoo naundura ummaara faqa aiaaee qirana faqa kai maraidaqa.
- <sup>22</sup> Anee asasi mariananoo mifa anee marasinna namasaanooora foora maisaidanoo. Faiqi moo fannoo afaaqa rumbanoo marifa aiqamausa nifaafa rumbaidanoo.
- <sup>23</sup> Manda oosana maree mari siaasafa umeenni umeereemaria feefauruna maraseenoo sia amiqimmasee ufa rainaidanoo.
- <sup>24</sup> Irirana faqaa fasiqa fannoo irirana nari oorisa kai quqaqifanoo maridanoo. Irirana siai fasiqafa aiqama aanai afu munu maqee mini maqee ifanoo sia amanaikidanoo.
- <sup>25</sup> Furufarira faiqiuqa nari nikoona oori runirana amidaqa. Nari ninooona sukaqarana amidaqa.
- <sup>26</sup> Andeeqara fasiqa fifau arirana rumberana amiafanoo sia andeeqaidanoo. Andeeqara rakisiraua narirafa aaqara oosana maridanoo.
- <sup>27</sup> Irirana faqaasa moodaa moodaa ufa kai qidaqa. Uqbiqasee mariasa irirana faqaasa maridaqa.
- <sup>28</sup> Furufarira fasiqa nari ooki kadara masainaqa faiqi anaasee minara irirana faqaa fee qifaranoo. Mi fasiqafa nari ooki amiqimmasee ititasaiifaqa misa minara akeepamasee irimari fasiqa fee qifaranoo.

## 18

- <sup>1</sup> Faiqi sia nari niqoonausa faqa moodaanaki kiasa nariara kai iridaqa. Nana ainainaree aiqamausa andeeqarafee qimasee irimarianara mi fasiqausa sia asaidaqa.
- <sup>2</sup> Furufarira fasiqa amiqira oosana sia irinara sia minara iridanoo. Mifa aiqama kari nari amiqirafa marina uqannifiqarara kai aididanoo.
- <sup>3</sup> Numoo faqa nisaurirafa faqa moodaanaki fidaqa. Ummuarira oosana kii qafinara asaurirafa mina afaaqasaa kambiqaaidanoo.
- <sup>4</sup> Faiqi ookinaa ufa faruma firaafara foora mandinoo maridanoo. Mina irirafa qumi mari nammarifara foora asooaidanoo rukukuqnama amaqaaidanoo.
- <sup>5</sup> Manda oosana maree mariasa kootaki dadaaqinana aaqara oosana mareennaranoo. Andeeqara oosana maree marina fifau kootaki quqeenana mina faqa aaqara oosana kai mareennaranoo.
- <sup>6</sup> Furufariraua aanoo qirana oosana arasee nariqa nariranara innaaru qidaqa.
- <sup>7</sup> Furufarira fasiqa ookinaa ufa fannoo nari kuridi amaqaaidanoo. Mifa nari ufaki ufaanakiara foora aridanoo.
- <sup>8</sup> Munuqi miniqira ufa fannoo kaaqa adiafaaira narana miqirafa maridanoo maasa kaaqa mina nambiqarara dididanoo.
- <sup>9</sup> Ainainafanoo raindaani mari fasiqafa ainaina deedeepinoo turitaari marina aanna reemarifa maridanoo.
- <sup>10</sup> Yaaweefa afeeka faandaamurara foora maridanoo. Andeeqara fasiqa anaasee minaki kukeeqafi sia kuridifaranoo.
- <sup>11</sup> Ainaina faqaasa nari qumiasanara maasa kisaafa faandaamura fee qimasee fifau nari ainaina saqarikidaqa.
- <sup>12</sup> Sia kaqi moona ameemaana kii qeefara mifa nari mara maree quminaqa mina ameemaana kii qeefaranoo. Nari nimoo qimariasa kuridira aataa fidaqa.
- <sup>13</sup> Moona ufa amiqimmasee irisee ufa qia, sia miqinana furufariranaki faqa manda asauriranaki aquffinnaranoo.
- <sup>14</sup> Ani kaqi marira aidirafa anee aurinanoo ani pooduqannoo. Anee sia miqinanoo ani mi oosana fa taikafuannoo.
- <sup>15</sup> Irirana faqaasa maqee maqee fuka irirana irirara deedaqidaqa.
- <sup>16</sup> Anee uriqarara fasiqa qafaanee qimasee moo ainaina mina amira ainaina mara maree finanoo amanaika miannoo.
- <sup>17</sup> Faiqi kootaki qimannimisaafaqa irisee kuqaa fee qidaqa. Moo fannoo mi ufana quandaqi qimanniminaqa indaaruuqaa ufara boo nari kai nari amooqidanoo mifoo qifaranoo.
- <sup>18</sup> Afeeka fasiqauqa moo ainainara aanooqidaqa narafumau narafumau idaqa masisara foora quandasee qafeeqa doo dinni dinni asooqaidaqa.

<sup>19</sup> Aneenna akaqaafasauqa dadaaqinaqa misa afeeka faandaamurara foora anisaa itita amaqefaranoo. Anee misara aanoo qinaqa misa nari kooqi itita saifana sia keeqeennaranoo.

<sup>20</sup> Faiqi moo fannoo nari ookinaa ufannai narana paqurinanoo amuaqu ianno. Nari afauru saaqaraa ufa fannoo amuaqu iannoo.

<sup>21</sup> Afai afauru qaaraiki marifa maridanoo mifa kai faiqi narirdanoo kafa faiqi dada qidanoo. Aneena ufa qimaseenana mi ufafa qiqa fawa qumaraannoo fee qimaseenana iria.

<sup>22</sup> Adeedaana kumaara fannoo adeedaana maanaaqa paqurimmasee marainanoo Yaaweefa irinoo asasa miannoo.

<sup>23</sup> Ainaina siaifa kudi fasiqa fifimmasee ufa qimari fasiqafa maridanoo. Qumiasana tiafa kaukaata ufa kai qimarifa maridanoo.

<sup>24</sup> Moomoosa aqoondiki marinafa sia kisaagasaa mi aqoondikirafa mariannoo. Moodaa moodaa miqira aqondi afaagasaa aqoondi marifa mi fasiqana mi amiqira aqoondina oosana fannoo nari moodaa fidika faqa amiqi marina arusee uraaqaranoo maridanoo.

## 19

<sup>1</sup> Kudi fasiqa fannoo andeeqara aatata fimarifa maridanoo mifa uriqararafa maridanoo. Ufa rukiee marifa furufari marifa ureeqanoo maridanoo.

<sup>2</sup> Sia oonu mafi irirana maraifa aagamaki kaqiruna ubeekaidanoo. Kai kaqi fimarifa kaqi runna fiaikatee finoo aqaaidanoo.

<sup>3</sup> Akaqausa sia irirana maraa oosanafa kai nariqa mandaikamma nimaqaifaqa fifau quandaki Anutuna qoomma amaqaidaqa.

<sup>4</sup> Qumiasana faqaana aqoondiuqa moomoo maridaqa. Kudi fasiqa aqoondi moodaafa ani qafeenoo ainaina siai fee qimasee anirandee fuannoo.

<sup>5</sup> Kootaki unna ufa qinana rumberanaki finnarannoo. Unnufa qinana sia ummaara fiaaqareennaranoo.

<sup>6</sup> Aiqamausa uriqarara fasiqa aqoondikiranaki keeqeefaranoo. Ainaina nimi mari fasiqanara aiqamaus minara unna qimasee qini qiqoondi fee qidaqa amooqidaqa.

<sup>7</sup> Kudi fasiqa aiku asauku mina minnisaidaqa mina aqoondiuqa faqa firaqqoo minara nikooqaidanoo. Nari nammeera qimasee naaraifaqa sia iridaqa.

<sup>8</sup> Faiqi moo fannoo irirana maraifa amiqi amiqidanoo. Amiqira iriranara aidi mari fasiqafa aiqama ainaina auqainafa anoonaikammianoo.

<sup>9</sup> Kootaki unnufa qimari fasiqafa sia rumberanaki sia fuannoo fuannoo. Unnufa qimarifa nari kuqirana paquriannoo.

<sup>10</sup> Furufarira fasiqa qumiasana qambaana maridanoo manda marira maridanoo. Faiqi moo fannoo ureeqararafa faiqi firaasa uriqararafaikinoo maridanoo mandaikamminoo maridanoo.

<sup>11</sup> Amiqira irirana faqaafa sia qusufa qimasee aanoo qidanoo nari aanoo qirana rafaafa fidanoo. Miqi mari fasiqafa moo manda ufa qimamifanoo sia irinoora foora inara nari afaafa qareenarane qidanoo iridanoo.

<sup>12</sup> Karaambaiqa fasiqa aanoo fannoo kaasau fainiara foora rairai qifaqa faiqi anaasee rufiidaqa. Mina asasirafa qifi faramuara foora asooama nimaqaaidanoo.

<sup>13</sup> Furufarira fasiqauqa nari ninaukoo nisauriranaki quqannisaidaqa. Anaasee moo fannoo mina aanoo qirafa namudisaa kapatuara foora kapi kapida maridanoo.

<sup>14</sup> Qumiasana saqama nari nikausa saaqaraana maraidaqa. Yaaweefa kai irirana faqaa anaasee faiqi nimidanoo.

<sup>15</sup> Kudoosaapee maria oosanafa faiqarana kai amidanoo. Ainaina sia inafa aandaroo aruannoo.

<sup>16</sup> Anee Anutna aakapara ufa mau finana kisaagasaa marinnaranoo. Anee aakapara ufara qikoofee qinana kuqinnaranoo.

<sup>17</sup> Anee kudi fasiqa anaasee narana aina nimidana Yaaweena amiara foora imarianoo kasooaqee Yaaweefa mina akiqara ani faqa amiannoo.

<sup>18</sup> Aneenna faiqi namu ufa irirana amanasaa marifana miqoo naakapaa anee sia miqinana anee misa dadaaqianaqa mandaki aqufidaqa.

<sup>19</sup> Qusufa qimasee aanoo qimari fasiqafa ariranaki aqufuannoo. Anee minakinaana feefauru masainanoo mifa kafa kai mi ummaarana auqaannoo. <sup>20</sup> Aakapara ufa faqa iria. Anee miqinana kasooaqee irirana faqaafa marinnaranoo.

<sup>21</sup> Faiqi atikuraki irirana oosana oosana marifanoo firannaira iridanoo. Yaaweena irirafa kuqaa anoona kambiqaanoo.

<sup>22</sup> Faiqi moo kaaqa ainainara rimaria oosana faqaafa asaurirana maraidanoo. Qumiasana siaifa andeeqara fasiqa fannoo unna ufa qimari fasiqana uraaqaranoo maridanoo.

<sup>23</sup> Yaaweenara rufieenana maa maqanasaa kisaasaa mainnaranoo. Yaaweenara ruffainanoo sia mandainaina ani afaaqai aqufuannoo.

<sup>24</sup> Akaqausa kaaqa kudoosaapee mariasa difaaniki narana qumaraseeqa nooki quqarara nikooqaidanoo.

<sup>25</sup> Aanoo qimari fasiqana arinanoo irirana siaisa mina qafeeqa irirana mareefaranoo. Irirana faqaana aakapainanoo dauni irirana moo faqa maraannoo.

<sup>26</sup> Manda irirana faqaa faiqi fannoo kai nari akoona mandaikamma amaageenoo nari anoona aiqamasai fanao fi faqa mi oosanausa nisaurirana firaana maridaqa.

<sup>27</sup> Oo qini qimaaku naamuqaira ufa iriseenana akooqafana finana anee irisaanna ufana minnisee furufara minnaranoo.

<sup>28</sup> Ufa qimarianaki unna quandara ufa qimarifa andeeqara koota oosana akooqaidanoo. Manda oosana maree mariasa aqara oosana adiafaa iranara ridaqa.

<sup>29</sup> Andeeqaranara nikooqee marisa sandufa misa nimaarusirafa maridanoo. Qunnaana samu furufari mariasa narirafa maridanoo.

## 20

<sup>1</sup> Moomoo biaqa nammari neemarianafa ani fufufarirana faqa faqaa fuisee qirana faqa amiannoo. Nammari moomoo narana irirana sia marifa maridanoo.

<sup>2</sup> Karaambaiga aanoo qirafa kaasau fainiara foora rairai qidanoo. Faiqi moo fannoo mi karaambaigana aranaqarana amirafa kuquannoo.

<sup>3</sup> Faiqi moo fannoo nari maraunara irisee tinoorirana faqa rakiranara faqa qeerairidanoo. Furufarirana qusufa qimasee rakiranaki faqa aanooqiranaki faqa aqufidaqa.

<sup>4</sup> Kudoosaapee mari fasiqafa saikira aukuaana sia ainainifa aiqira aukuaana naranara randainanoo aararaannoo.

<sup>5</sup> Faiqi irirana faqaana irirafa faruma difukunara foora maridanoo. Faiqi irirana faqaafa kai mi fasiqana irirana meemaindaraana uqera koorooliannoo.

<sup>6</sup> Faiqi moomoosa fifau nariara faiqira nimuqisirana faqaasa maridee qidaqa moodaa moodaa kai miqiraua maridaqa.

<sup>7</sup> Andeeqara fasiqa amiqira oosana auqai faqa mina faiqi namu asidaqa.

<sup>8</sup> Karaambaiga fannoo nari qarisaa oqumarifi faiqi anaasee andeeqa nisaidanoo nari afunnoo kai mandainaina qafaidanoo.

<sup>9</sup> Yafee faiqi moo fannoo kuqaa qinee anukarausee qiannoofee. Yafee faiqi moo fannoo qini mandainaina ruka taikeenoo fee qiannoo fee. Sia moo fannoo kuqaa miqi qiannoo.

<sup>10</sup> Furufarira sikeera faqa furufarira amanira taqu faqa maridanoo. Yaaweefa aiqamaqarara fidiqaa midanoo.

<sup>11</sup> Faiquqaindi nari auqee maria oosnafa nari marirana kooroo idanoo. Anee misa andeeqaranara faqa amiqiranara faqa iri mariananoo.

<sup>12</sup> Aaqoo irimarina faqa afu qafeemarina faqa Yaaweefa maasa auqu nimaqanau.

<sup>13</sup> Anee faiqarafa faiqarafa ina nidana kudi marinnaaranoo. Ainaina inanoo moomoo narana marinana neennaranoo.

<sup>14</sup> Ainaina feefauru firaafa marinara feefauri mariasa moomoo ufa qidaqa. Mifa mi ainaina feefaurummasee doo oonu dupira feefauru aqusee marainara nari amooqidanoo.

<sup>15</sup> Amiqira irirana faiqi anaasee qimannimi marifa koora faqa siruaa faqa uraaqaranoo maridanoo.

<sup>16</sup> Anee moo maqannaana ufaasu ainainee feefauru aminana anee furufarirafa maridana amiananoo. Miqimari fasiqafa moo anaasee aanai paquri masainanoo anianne qinanoo mifa furufarira oosana faqaafa maridanoo kaqi fuannoo.

<sup>17</sup> Qunna qimasee maree mari ainainafa aqee adiafaa irafa mariannoo inaaqianna oommaaniara foora ooki kammu kammu qiannoo.

<sup>18</sup> Anee amiqira aakapara ufa iriseenana ainaina auqainanoo anoona kambiqannoo. Anee rakiranaki finana irirana faqaasa ufa iriseenana fua.

<sup>19</sup> Munuqi miniqi marifa kukeeqara ainainara mandaika midanoo kooroo idanoo. Anee kaaqa ufa qimariasara qeerairia sia misa naaqandandia.

<sup>20</sup> Faiqi moo fannoo nari anoona akoona aqurarainafa qausana qoomara foora dauni dimbaannoo.

<sup>21</sup> Maqa fee qumiasana fee kai kaqi marainafa aqee amiannoo marikinoo doo mandaika miannoo.

<sup>22</sup> Faiqi moo fannoo mandoosana ani aminana anee sia nari miqianauree qia. Ani irirafa Yaaweenasaa mundusainanoo mifa ani dadaqiannoo.

<sup>23</sup> Unnaqira amanira ainainara Yaaweefa fidiqaa midanoo. Unnaqira sikeerara faqa mifa akooqaidanoo.

<sup>24</sup> Yaaweefa maasa qiku amaaga uqafiqaidanoo daamua qidanoo. Faiqi naqimmasee nari aiku amaagara iriannoo fee sia amana.

<sup>25</sup> Faiqi moo sia oonumafi iriranaki moo ainaina Anutuna auqu ramasee asauku uqeerasee tatufirana amianauree qimarifa mandaika midanoo. Kasooaqee irisee nari aaqaranara oonumafi iriseenoo akooqaannoo.

<sup>26</sup> Irirana faqaa karaambaiqa fannoo aiuqummasee yafee aaqainnana qafamasee mina rumbaidanoo sia minasa qimudaoo qidanoo.

<sup>27</sup> Faiqi maraquna Yaaweena qooma maridanoo. Faiqi naundurai qaidanoo nari mariranasa niranara randaidanoo nari amanidanoo.

<sup>28</sup> Uriqararafa faiqi aanaaseera amuqusirana faqa anoona ufa qirana faqa mi oosana qanda fannoo mi uriqararana mapuku amaqaannoo.

<sup>29</sup> Kumaaraauqa nari nimudaanai qiranara nari nimooqidaqa. Nauraiqiuga nari aandaunamu qafaida nari nimooqidaqa.

<sup>30</sup> Aaqee mari fasiqa anaaseena arinana afaaga ateeke seenana aakirana afaimma sainanoo andeeqasee mariani. Ariisainafa mina aunduraki faqa amuqusaki faqa findaukama saannoo.

## 21

<sup>1</sup> Yaaweefa maqasaa karaambaiqa irirana kaikaa nammariara foora ireeda kai minni fua mai ania qifanoo miqidanoo.

<sup>2</sup> Anee aneenna marirana niranara andeeqanoo maridanoo fee qinanoo Yaaweefa ani qafamaseenoo ani amanammasee qafaannoo.

<sup>3</sup> Faiqi anaasee amiqira oosana auqaranafa tatufirana suqa amirana umaqqaranoo maridanoo.

<sup>4</sup> Manda oosana maree mariasa nari noori uqeerarafa faqa nari nimooqirafa faqa misa nifiqee fimarifaqa misa aaqaidaqa.

<sup>5</sup> Manda oosana maree mariasa nari faiqi narirafa nari rarisameeqee nari nariranaki quqaidanoo. Misa amiqira oosana auqarara nikooqaidanoo.

<sup>6</sup> Unnaqira aatata marasainna ainainafa sia kisaagasaa ani faqa mariannoo. Mi ainainafa kai kaqi ani kuqiranaki quqaannoo.

<sup>7</sup> Manda oosana maree mariasa nari faiqi narirafa nari rarisameeqee nari nariranaki quqaidanoo. Misa amiqira oosana auqarara nikooqaidanoo.

<sup>8</sup> Aaqara oosana faqaa fasiqa aana eendaandiraa aana maridanoo. Aaqarana siaisa andeeqara oosana auqaidaqa.

<sup>9</sup> Tiqeera maqaki maridana amana marinnaranoo. Firaa maqa amiqira maqa tiaki rairai qimari anaaseena faqa maridana manda marira marinnaranoo.

<sup>10</sup> Manda oosana maree mariasa aaqara oosana auqarara naararee rafoora idanoo. Akaqausara faqa niqoonausara faqa sia nimudaoo idaqa.

<sup>11</sup> Ufa rukiee mari fasiqana arifaqa irirana siaisa mina qafamasee irirana maree-faranoo. Aamuqaira ufa irirana faqaana qimaminanoo irirana moo faqa moo faqa maraannoo.

<sup>12</sup> Andeeqara Anutufa manda oosana maree mariasa nari maaqaki auqee maria ainainara iridanoo. Mifa manda oosana maree mariasa kuridiranaki quqannisaannoo.

<sup>13</sup> Kudi fasiqa fannoo dadaaqiaqeera nammeera qinana anee sia irinana kasooaqee anee faqa nammeera qinaqa sia moo fannoo iriannoo.

<sup>14</sup> Faiqi moo fannoo ani faqa aanoo qimarinana anee kukeeqasee ainaina amisainanoo mina aanoo qirafa taikaannoo.

<sup>15</sup> Amiqira ainaina kambiiqifaqa andeeqara fasiqa anaasee asaidaqa. Manda fasiqa anaasee mina qafamasee ummaara maraidaqa.

<sup>16</sup> Amiqira irirana minnisee auianoo nifa kuqirafa mina afeesidanoo.

<sup>17</sup> Faiqi moo fannoo amiqira ainaina faqa amiqira mariranara faqa rimarifa sia ainaina marifa mariannoo.

<sup>18</sup> Andeeqara fasiqauqa ummaaraki aqufirara iafaqa manda oosana maree maria fasiqausa misa nimaaga maqaidaqa.

<sup>19</sup> Aadana maqa maaqaki aneennaraa maridana amana marinnaranoo. Aanoo qida rairai qimari anaaseena faqa maridana mandaika minnarannoo.

<sup>20</sup> Irirana faqaasa maaqaki moomoo amiqira ainaina faqa fadameena faqa maridanoo. Irirana siaisa narindi aaqee nama taikasee kaqi maridaqa.

<sup>21</sup> Kuqaa qira oosana faqa amuqusira oosana faqa auqeenana maa maqanasaa kisaagasaa marinnaranoo. Akaqausa aniara andeeqara fee qimasee uriqarara auqu amifaranoo.

<sup>22</sup> Irirana faqaa karaambaiqa fannoo nimudaanai qimariasa faandaamura narisaa ititaqaana ooruree rapeepammasee narunifaqaaqaa iannoo.

<sup>23</sup> Anee sia ummaaraki aqufiraree qimasee aneenna afaurusaa amiqimmasee rakisia.

<sup>24</sup> Aanoo qimarifa faqa ufa itairi marifa faqa faiqi moora uteeti qidaqa. Mifa nari amooqiranara kai afeekaiki marifa maridanoo.

<sup>25</sup> Aininirara raindaani marifa ainainirara akooqaidanoo. Nari mi oosanafa nari kuqaa aridanoo.

<sup>26</sup> Miqira fasiqauqa ainaina qimiaqee kai qimasaida iridaqa. Andeeqarusa sia miqidaqa afaarida kaqi nimidaqa.

<sup>27</sup> Manda oosana maree mariasa tatufirana suqaranara Yaweefa fidiqaaqaa midanoo. Manda iriranannai tatufirana suqaa fanoo Yaaweefa fidiqaaqaa idanoo.

<sup>28</sup> Kootaki unnufa qimarifa nari kuridiannoo. Anoonu ufa kai andeeqasee qimarina ufa asasammasee iridaqa.

<sup>29</sup> Manda oosana maree mariasa fifau andeeqarusa naanna raqa nidaqa. Andeeqarusa nari marirana niranara oonumafi irisee nidaqa.

<sup>30</sup> Faiqi faiqi irirana faqa amiqira irirafa faqa sia ani dadaaqiannoo. Anee Yaaweena namuqaakiannanara sia dadaaqiannoo.

<sup>31</sup> Misa fifau rakiranaki firara qoosauqa deedaqidaqa. Yasaweefa nari kai rakirana uri qararana nimidanoo.

## 22

<sup>1</sup> Andeeqara auqu amirafa moomoo ainaina faqa munnimma faqa uriqararafa maridanoo. Siruaa faqa koorra faqa ureeqarafa maridanoo.

<sup>2</sup> Ainaina faqaafa faqa kudi faqa amanaqarakai maridaqa. Yaweefa miqanda auqu quqanau.

<sup>3</sup> Irirana faqaafa moo ummaara anifanoo qafeenoo amaanaidanoo. Irirana siaifa kaqi minaki fidanoo mi ummaarana maraidanoo.

<sup>4</sup> Yaaweena ufa mau fidana aneenna mara maree quminana moomoo qumiasana munnimma faqa uriqarara auqu maraseenana kisaagasaa marinnaranoo.

<sup>5</sup> Aneenna mariranara amuqusinana anee manda oosana maree mariasa nari aatata fidaqa arimaria ufaannaki aruanoo qimasee rufia.

<sup>6</sup> Faiqi aanaaqisaa amiqira aana aamuqinanoo mifa faiqi firaanaikinoo mimau kai fuani.

<sup>7</sup> Kudi fasiqa fannoo ainaina faqaana ainainira faiqi maridanoo. Dinnaa munnimma maree marifa munnimma nimi marina ainainira faiqi maridanoo.

<sup>8</sup> Anee unnaqira oosana ummaqusainanoo mandainaina minakiqari kambiqa finoo quandaki ani aruannoo. Anee sia kaifaa faiqi mandaikamma nimaqeenanaroo.

<sup>9</sup> Afaarinana aneenna narana kudi fasiqauqa naiad nimia. Miqinana anee amiqi amiqirana mareennaranoo.

<sup>10</sup> Andeeqara oosana fidiqaaqaa imari fasiqana mara aqusainanoo aanooqirafa faqa rairai qirafa faqa taikaannoo.

<sup>11</sup> Anee anukara amuqusara faqa amiqira ufa qiranara faqa rinanoo maqasaa ani uriqarafa ani aqoondi mariannoo.

<sup>12</sup> Yaaweefa amiqira iriranara faqa anoonu ufa qiranara faqa rakisida nindafaida maridanoo. Unna qimariasa ufa Yaaweefa akooqoo kooroomma sainaqa aiqamausa irifaranoo.

<sup>13</sup> Ainainirara raindaani marifa maaqaki ooqufaaqee maridanoo fifau unna qimasee kaasau faini madaanai marida ooquraana daruandoo qimasee maaqaki kai maridanoo.

<sup>14</sup> Aatata nimari anaaseena maraqa nirafa ufaanara foorra maridanoo. Yaaweefa arana qeemarisa mi ufaannanaki aridaqa.

<sup>15</sup> Faiqi aanaaqiuga furufarammasee nari aatata fifana unnaa samu narinanoo misa furufarirafa taikaannoo.

<sup>16</sup> Ani ainaina moomoo kianifeera kudi fasiqauqa mandaikamma nimaqeenana kaffaa ainaina moomoo faqaana munnimma aminana anee faqa kudi marinnaranoo. Moodaa fasiqa aiku asaku taikasee moo fasiqa asaku qara taikasee 30 irirana faqaa ufa.

<sup>17</sup> Irirana faqaasa ufa qimannimiana iriaqa. Misa qimannimira ufa amiqimmasee iriaqa.

<sup>18</sup> Mi ufafa ani iriranaki marinana afaurusaaqari moona qimamidana asasia.

<sup>19</sup> Yaaweena saqarikiqeeera maa ufana inni qimannimidaqa.

<sup>20</sup> Qinee moodaa fasiqa aiku asaku taikasee moo fasiqa asakuqara oonu marasee 30 amiqira naamuaqira ufa faqa irirana faqa akara ruma nimaqeeqa.

<sup>21</sup> Miqimmasee anee anoona ufara amiqimmasee irinnaranoo. Faiqi aniara anoona ufara randaannee qifana anee amiqimmasee paqurimmasee qimanninranoo.

<sup>22</sup> Sia kudi fasiqeee qimasee mina ainaina kaqi maraa. Sia kootaki mina rafaqaqafia.

<sup>23</sup> Yaaweefa kudi fasiqa dadaaqinoo misa ufa iriannoo. Misa mandaikamma nimaqain-  
ausa nariqa faqa mandaikamma nimaqaannoo.

<sup>24</sup> Anee sia qusufa qimasee kai kaqi aanoo qimari fasiqana aqoondikia.

<sup>25</sup> Anee mina oosana irisee sia amana mi oosanna minniseennaranoo, arinnaranoo.

<sup>26</sup> Moo fannoo ufaasu munnimma maraseenoo sia amana mina akiqara feefauru iraree  
qinana sia anee amana aiqamasee mina akiqara ianauree qia.

<sup>27</sup> Anee faqa mina akiqara sia amanaikinana sia feefauru niminaqa misa aniree ani  
aiqama ainaina marasee faiqara qaari faqa mareefaranoo.

<sup>28</sup> Inni nikeeku nikaaku ooqai maqa oosummaqoona sia rapatutumma mafisaa.

<sup>29</sup> Amiqira ainaina imarifa karaambaiqa ainainiranaki mariannoo. Miqira fasiqa  
fannoo sia oorudupira fasiqa auqu siaina ainainira faiqikiannoo.

## 23

<sup>1</sup> Anee uriqarara fasiqa faqa ooqu marifi narana naidana aneenna iriranaki mifa  
narana aminara iria.

<sup>2</sup> Anee moomoo narana neemarianafa maridana aneenna aidirana rafaqaqafia.

<sup>3</sup> Anee sia mina amiqira naranara aqaara raani. Mifa ani akaru qiandoora sia  
irimariananoo.

<sup>4</sup> Anee sia moomoo munnimma ainaina mararee qimasee afeeka taikaa.

<sup>5</sup> Anee moomoo munnima marasainanoo kai kaqi taikaannoo. Mi munnimmafa aqoosa  
arufinanoo uqaumura foora aqamaree sandaannoo.

<sup>6</sup> Anee tatamaqimari fasiqana narana sia naa. Sia mina amiqira naranara amukaani.

<sup>7</sup> Miqira fasiqa fannoo unna qimasee fifau aniara moo faqa moo faqa naannee qidanoo.  
Aunduraki aniara goodaa naannee qidanoo fifau afauru fannoo kai miqi qidanoo.

<sup>8</sup> Anee mina narana namaseenana raudamaki finana fidinnaranoo. Anee fifau mina  
faqa amiqira ufa qiananoo.

<sup>9</sup> Anee sia furufarira fasiqa ufa amia. Mifa ani ufara sia asasiannoo.

<sup>10</sup> Sia maqa ooqai oosu maqoona mafi moosaa quqaa. Fiaiqi faiqi maqa faqa sia maraa.

<sup>11</sup> Yaaweefa misa afeeka itita nimaqarafa maridanoo. Mifa misa saaroo qinoo ani ufa  
amiannoo.

<sup>12</sup> Ani qimami mari fasiqafinnai aaqoo quqasee amiqimmasee iria.

<sup>13</sup> Faiqi aanaaqi ariranara sia amuqusinana minnisaa. Saamunna kaqi arua sia  
kuquannoo.

<sup>14</sup> Miqiannanannai anee misa marirana asumu mara quqaananoo.

<sup>15</sup> Qini qimaaku anee irirana faqaafa marinaqa qinee asasianaura.

<sup>16</sup> Anee irirana faqaasa ufa qinaqa qinee iriqa nasurianauranoo.

<sup>17</sup> Anee sia manda oosana maree mariasa oosanara aidiani. Anee aiqama kari  
Yaaweena ameemaanai kai maria.

<sup>18</sup> Anee miqinana kasooaqee ani marirafa amiqimmiannoo.

<sup>19</sup> Qini qimaaku qini ufa iriseenana irirana faqaafa maria. Aneenna nirana mariranara  
amiqimmasee iria.

<sup>20</sup> Sia moomoo nammari neemariasa faqa moomoo narana neemariasa faqa  
moodaanakikia.

<sup>21</sup> Nammari moomoo neemariasa faqa moomoo narana neemariasa faqa qusasaa  
ainainara sarau ifaranoo. Narana namasee faasaana faiqaqee marifa qusasaa qamunna  
anaqi anaqirana afisusee mariannoo.

<sup>22</sup> Aneenna akoona ufa iria. Sia mina ufa irinana sia amanaikinnaranoo. Ani anoofa  
asooqainana amiqimmasee rakisia, sia akooakaa ia.

<sup>23</sup> Kuqaa anoona qira ufa faqa amiqira irirana faqa afeekaikammasee maraa. Firaa  
ainaina marinara sia uqasaina moo fannoo feefauriani.

<sup>24</sup> Irirana faqaa faiqi anoofa akoofa firaqqoo asasiidaqa. Misa asasirana oosana maifaqa  
asasiidaqa.

<sup>25</sup> Miqinaqa ani anoofa faqa akoofa faqa aniara asasiidaqa. Aneenna anoona afaafa  
amiqirana aminanoo asasiiani.

<sup>26</sup> Qini qimaaku qini ufa amiqimmasee iria. Saina qini marirafa ani quqafiqaaani.

<sup>27</sup> Dapi maraqa nua aanaaseefa faqa moo fasiqa anaafa faqa dikaanda miqirafa  
meemaqqoo maridanoo. Faiqi minaki kuqira ufaanakiara foora aridaqa.

<sup>28</sup> Misa ummuarira fasiqara foora maridaqa aniara rakisiidaqa. Mi anaaseefa moomoo  
fasiqa furufara masaifaqa nariqa faiqi anaasee faqa mariana rakeeidaqa.

<sup>29</sup> Yausee noori runusee marifaree. Yausee aanooqiranaki numudaqee marisa maridee. Yausee muamunda faqaasa maridee. Yausee fidika nifu namu faqa maridee.

<sup>30</sup> Uainna nammari kisaqaasaa neemariasa kai mi ainainausa maraidaqa. Osana oosana nammari amanammasee qafeemariasa mi mandainainausa qafaidaqa.

<sup>31</sup> Sia mi nammarina kaafaki adiasaina taatuqee arinanoo qaqaara raani. Mi nammari faqaqarinnanara sia ani qaqaara raani. Misanandai adiasaina fadameenara foora farindeenoo ooqu finanoo sia qaqaara raani.

<sup>32</sup> Mi nammarina nama taikasainanoo ukadiqara foora ani ukaqa amiannoo.

<sup>33</sup> Anee namasainanoo ani afu mookamma finana sia ainaina amiqimmasee qafeenarananoo. Ani atikuraki irirafa furufara mafinana sia amiqimmasee irirafa aniki kambiqainana sia amiqimmasee ufa qinnaranoo.

<sup>34</sup> Anee namaseenana sipakiara foora ooruku nammari fimariandee idana teeqe taaqimminaranoo. Sipa faakanasaara foora faiqararidana meemai nammari qafainanoo amuqusammiannoo.

<sup>35</sup> Amuqusinana anee maaqi qinnaranoo. Misa qini daruafaqa sia aupuraidaqee qinnaranoo. Misa saamu samu qini daruafanoo sia didafinoofee qinnaranoo. Qinee faisee findifinaqa moo faqa naanauree qinnaranoo.

## 24

<sup>1</sup> Sia manda oosana maree mariasa oosanara rua. Sia misa aqoondikia.

<sup>2</sup> Misa iriranaki faiqi mandaikamma nimaqarara kai randaidaqa. Misa aiqama kari ummaara kambiqaanifeera kai ufa qidaqa.

<sup>3</sup> Amiqira iriranannai faqa oonu mafi iriranannai faqa maaqa atunara foora aruseeqa usakaidaqa.

<sup>4</sup> Amiqira irirafa mari maaqanaki amiqira ainainauqa qumbiqanoo maridanoo.

<sup>5</sup> Irirana faqaa marirafa afeeka faqaa marirana uriaaqaaramasee maridanoo. Amiqira irirafa afeeka faqaasa kaaqa urinnaaqaranoo maridanoo.

<sup>6</sup> Anee moo maqannaasa faqa rakirarinana irirana faqaasiannai irirana mara mareenana rakirannai fua. Moomoo irirana faqaa fasiqa ufa iriseenana rakirana uriqareenaranoo.

<sup>7</sup> Amiqira irirafa firaa farumara foora marifaqa furufarirausa sia iridaqa. Misa firaa ufa suqiranaki oonuree sia ufa qiaqaa ifaqa noo qumunimmasee maridaqa.

<sup>8</sup> Maqee maqee mandainainara randee mari fasiqanara ummaara oosana aree marifee qidaqa.

<sup>9</sup> Furufarirausa mandainaina auqarara kai iridaqa. Aiqama misa auqee maria ainainausa numoo ainaina kai maridanoo. Faiqi ramoo ramaa imari fasiqanra manda fasiqee qimasee qafaidaqa.

<sup>10</sup> Ufarurira aukuaana anee kudoosaapeenana anee afeeka siaifa marinnaranoo.

<sup>11</sup> Kootaki faiqi quqasee fifau kuqa ariraree qifana anee minakinaana mareeqee kaqini quqaa.

<sup>12</sup> Sia ani ainaina marida fee qia. Anutufa iridanoo mifa kai ani marirana rainaannoo fee qia. Mifa anisaa rakisidanoo, mifa iridanoo anee auqee mariannana akiqara mifa amiannoo fee qia.

<sup>13</sup> Oo qini qimaaku anee ookasaasa anoona naa. Mifa amiqirafa maridanoo afaurusaa quqasainanoo adiafaa iannoo.

<sup>14</sup> Anee maana faqa iria. Amiqira irirafa ookasaasa anoonara foora adiafaa irafa maridanoo. Anee mina qumareenana kasooaqee amiqiranaki marinnaranoo.

<sup>15</sup> Sia manda oosana maree mariasa naanna reenana andeeqarasa maaqa rapeemasee minakinaa ainaina ummuariraree qimasee tipundaa ria.

<sup>16</sup> Andeeqarasa moomoo kari aqufiqa misa amana findiffaranoo. Mandainaina fannoo manda oosana maree mariasa narusainaga kuridifaranoo.

<sup>17</sup> Ani namuqaa mandainainaki aqufifana sia asasia. Mifa aiku rupauraki saamurinana sia nasuria.

<sup>18</sup> Anee asasinanoo Yaaweefa ani qafainanoo akooqaannoo nari aranaqarana rafaqaqafusee sia naruannoo.

<sup>19</sup> Anee sia manda oosana maree mariasa marirana qinee faqa miqiraree qimasee iria. Sia misa mariranara rua.

<sup>20</sup> Manda oosana maree mariasa sia misa kasooaqee marirafa mariannoo. Misa qausana qooma dauni maqa raquraminoo dimbaannoo.

<sup>21</sup> Oo qini qimaaku, anee Yaaweena ameemanai faqa (maqasaa karaambaiqa nimeemaanai faqa maria). Ufa rukiee mariasa faqa sia moodaanakikia.

<sup>22</sup> Miqi maria fasiqausa kai kaqi uqanna mandaikifaranoo. Moo mandainaina Anutufa faqa maqasaa rakisirafa faqa misasaa quqefaranoo. Akaqa amiqira ufa maaqoo maridanoo.

<sup>23</sup> Irirana faqaasa maa ufana faqa qimannimiqau. Siaasa fannoo kootaki akaqausa dadaaqinoo akaqausa rafaafaq finanoo sia andeeqaannoo.

<sup>24</sup> Siaasa fannoo aqee mariasara sia aaqarana marisee qinaqa faiqi anaasee aiqamausa mi siaasanara fidiqaa ifaranoo.

<sup>25</sup> Siaasa fannoo aqee mariasara sia rufiarai kaqi ummaara niminafa reemindeemiriranaaki maridanoo amiqira mariranaki اساسida mariannoo.

<sup>26</sup> Kuqaa anoona ufa qimaminafa ani aqoondi uqanna maridanoo.

<sup>27</sup> Anee ququsa auquseenana ainaina masainanoo anoona koorooinana miqoo kai maaqa usakasee maria.

<sup>28</sup> Anee kootaki oonuree sia aaqarana siaisara unna qimasee rafaafaq fua. Sia ani afauru fannoo unnufa qiani.

<sup>29</sup> Sia maaqi qia, mifa ummaara qimindee kai iqa nari faqa ummaara amianee qia. Sia maaqi qia, qinee maa fasiqana nari mandainaina akiqara kai aruannauree qia.

<sup>30</sup> Qinee furufarira fasiqa ainainirara raindaani mari fasiqana afuqaki nidaqa qafeeqa.

<sup>31</sup> Amuka faqaafa faqa firaa andanda faqa mina rafaafaqinoo marifaqa qafeeqa. Ooni faandaamura mi afuqanasee auquqaafa rapeemmaki aqufinoo marifaqa qafeeqa.

<sup>32</sup> Qinee mina qafaيداqa oonu mafi iriqa. Oonu mafi iridaqa irirana mareeqa.

<sup>33</sup> Ainainirara raindaani mariasa maaqi qidaqa. Maasa kaqikaqoo faiqarree qidaqa. Maasa kaqikaqoo idoomasee findifuauree qidaqa.

<sup>34</sup> Doo misa miqianara misa aiqama ainaina fannoo taikafuannoo. Sarau irafa faiqi nari mari fasiqafara foora ani aruannoo.

## 25

<sup>1</sup> Maa aaquqira ufafa Sooroomoonna akaqa aaquqira ufa maridanoo. Yuda maqanna karaambaiga Heeseekaiaafa fuka bukaki akara rumaqoofa maridanoo.

<sup>2</sup> Maasa Anutuna auqu qeere marunafa mifa moomoo ainaina nari iriranaki kukeeqee marinara miqidaqa. Minara maasa mina uriqarara auqu amidaqa. Maqassaa karaambaigaqauqina mina oosana maasa qima qimianara maasa misa firaa nuqu nimidaqa. Miqi kai masee maqasaa karaambaiga irirafa firafa marinara sia amiqimmasee iriranara.

<sup>3</sup> Maasa sia innaarunai mari ainainnara faqa ooruku nammari meemai mari ainainnara faqa irianaara.

<sup>4</sup> Faiqi siraa tasirisirimasee apaapa mara aqusee anoona amiqirana kai uqasaifanoo ainaina akoofasa fannoo mara maree munusee auqidanoo.

<sup>5</sup> Maqasaa karaambaiga manda ufa aakapee mariasa mara aqusaifanoo mina rakisi amaqarafa afeekaikiannoo.

<sup>6</sup> Maa maqasaa karaambaiga afusaa oonuree sia aneennara faiqi firaasee qia. Sia aneennara uriqararasee qia.

<sup>7</sup> Anee sia faiqi firaasa nimaqa maqasee misa qannusaa ooqu maria nari anirainaga ani aiqaifanoo sia andeeqaannoo. Minara anee kaiqeesa faqa marinaqa nariqa kai ani aaraifana oonu faiqi firaasa faqa ooqu maria.

<sup>8</sup> Anee aneenna aqoonnana moo ainaina qafamasee sia aaqmuraaqmura inana kootai munu koorooia. Moo fasiqa mi ainainnara amiqimmasee irimarifa aniree ani ufa rafaafaqafu sainana anee naqaa fee innaree.

<sup>9</sup> Anee aneenna aqoonnana faqa ufa rainaidana kai kaqi mi fasiqafinai oonuree mi ufana andeeqa taikaa. Anee moo kukeeqara ufa iriseenana sia mi ufana koorooia.

<sup>10</sup> Anee minauqa kooroo inanoo mi fasiqafa asaurinaqa faiqi aniara sia umee ufa kukeeqafee qimasee asaurirana amifarahnoo.

<sup>11</sup> Faiqi moo fannoo amiqira ufa qinafa amiqira ainaina koorannai auqusee siruaannai afaafa auquqaafara foora mina ufa maridanoo.

<sup>12</sup> Faiqi moo fannoo irirana faqaa fasiqa auquma nimaqara ufa irisee eedoo qinafa koorannai auqira fidinaanu naaqooki uqee mariana faqa uraaqararafa maridanoo.

<sup>13</sup> Ufa maree fuani feera aiqainafa andeeqasee nari rakisirafa qinna ufana qimanninanoo misa mi ufafa asasirana nimiannoo. Faiqi afuqaki narana unaki marifanoo suani arifanoo fuka nammari naindee iannoo.

<sup>14</sup> Faiqi moo fannoo moo ainaina nimirree qimasee qima afeekaikammaseenoo sia nimifa aadana oonnamuara foora maridanoo. Mifa ufai uqinoo oonnamu rakee ifanoo aaku sia rindee idanoo.



<sup>15</sup> Reendeenira ufa fannoo amudaani raqa ummooquka midanoo, miqimmasainaqa rakisirausa faqa ani ufa irifaranoo.

<sup>16</sup> Anee ookasaasa anoona kaaqa adiafaa imari ainainna paqurimmasee aneenna amana kai naa. Moomoo namasee fidinafaara.

<sup>17</sup> Sia aneenna aqoonana maaqai maqee maqee namummaqaa, miqinanoo mifa aniara akooqainanoo fidiagaammianoo.

<sup>18</sup> Nari aqoonnanara unnufa qimarifa qaseemara foora faqa aaruqira feefannaira foora nari aqoonnana aridanoo.

<sup>19</sup> Anee manda aukuaana unna qimari fasiqanasaa dadaaqiani fee qimasee mundinana anee afai rufidira fara foora narana neemariananoo. Anee aiku pipisaaga usirafara foora aana fimiriananoo.

<sup>20</sup> Oori runusee marina aaga oorureenana asasira idi rainanoo akooqaannoo. Suaraki faiqi moo fannoo qamunna akusee marifana rafaqaamma maraana suara arindee innaranoo. Moona afaaga aurimarinaki ooruku anoona adieera foora iananoo.

<sup>21</sup> Ani namuqaa aararainana narana amia. Nammariara aidinana nammari aminanoo naani.

<sup>22</sup> Anee miqinanoo mina asaurirafa idara foora qaannoo. Yaaweefa mina akiqara ani amiannoo.

<sup>23</sup> Munuqi miniqirafa noori runirana maree anidanoo. Suani ataaqendari ufai fannoo aaku maree anindee idanoo.

<sup>24</sup> Tiqeeru maqaki maridana amana marinnaranoo. Fira maqatiaki rairai qimari manda anaaseena faqa maridana mandainainaki marinnaranoo.

<sup>25</sup> Nianaindari ainna amiqira ufana asooara nammariara foora nainanoo rukukuqama amiaqaannoo.

<sup>26</sup> Manda oosana maree mariasa andeeqara fasiqara anee maa manda oosanna marannee qimasee sandanainai qifanoo eedoo qimasee auqeenoo mifa faqa mandaikammiannoo. Amiqira nammari mookoofa amanee kai randaida qumimarina neemarianaki dumuna kai qumbiqanoo mariannoo andeeqara fasiqa mandaikirausa ufara eedoo irafa miqinoo maridanoo.

<sup>27</sup> Anee adiafaa ira ainaina neeneesainanoo mandaika miannoo. Anee aneennara uriqararanara randainanoo mifa faqa mandaika miannoo.

<sup>28</sup> Faiqi moo fannoo nari aranaqarara sia qumaraifa maqusa faandaamura rapee inoo marifaqa akoosa mariafaqa namuqaa keeqaaqaa inoo mariara foora inoo maridanoo.

## 26

<sup>1</sup> Furufarira fasiqa mareeqee uriqararafaikinanoo sia andeeqaannoo. Suani aukuaana aaku riaru foora midanoo. Nandi aiqira aukuaana aaku rindee midanoo.

<sup>2</sup> Aaqarana siai fasiqafa unna qimasee aqurarainna ufafa sia mina qumaraannoo. Mi ufafa ufniara foora kaqi aqanoo oonuree aniree inoo nidanoo, sia saqariisaa uqaidanoo.

<sup>3</sup> Qoosa sana samu aridaqa. Qainna doonki ooki quqasee mi sanda atina qumaraafanoo nifiqee fidanoo. Miqi kai iqa furufari mari fasiqana unnaanna samu arinanoo iriannoo.

<sup>4</sup> Sia anee furufarira fasiqa fannoo ani manda ufara irainana mina faqa ufa qia. Ani faqa mi furufarirafa aaku finana miqinafaara.

<sup>5</sup> Furufarira fasiqa fannoo furufarira ufa ani qimaminana anee mina ufa rukiasee saa manda ufa qiaanoo qia. Anee sia miqinanoo mifa nariara irirana faqaasee qinoo nari amooqiandoora.

<sup>6</sup> Anee furufarira fasiqa moo ufara aiqeenana aneenna aiku ateekeera foora innaranoo. Anee ummaarara randee mariananoo.

<sup>7</sup> Furufarira fasiqa ookiqari irirausa ufa qinafa sia mi ufafa nari dadaaqiannoo, aiku mandaikirafara foora maridanoo.

<sup>8</sup> Anee futufeetiki ooni quqasee aqusainanoo sia mariannoo fuannoo. Anee furufarira fasiqa mareeqee uriqararanaika masainanoo futufeetikiara foora aqinnaranoo.

<sup>9</sup> Faiqi moo bialqa nammari amiqimma namasainnana amukafaqaa ainaina asaukuki quqasainanoo kaqi qumarainanoo asauku tapooqainanoo sia iriannoo. Anee irirana faqaasa ufa furufarira fasiqa qiaminanoo mifa miqi kai inoo nari afaaga aruannoo.

<sup>10</sup> Faiqi moo fannoo furufarira fasiqa fee kaqi nimari fasiqanee mareeqee nari ainainiranaki quqainafa aiqamausa naridanoora foora idanoo.

<sup>11</sup> Furufarira fasiqa fannoo ooqai furufarira ainaina auqeeundee inoo kaifaa auqaidanoo. Fainiara foora fidisee quandafi kaifaa naidanoo.

<sup>12</sup> Furufarira fasiqa kaqikaqqoo amanaikiano. Nariara irirana faqaasee qimarifa sia amnaikiannoo. Furufarira fasiqa ooreeqarafa uqanna maridanoo.

<sup>13</sup> Ainainirara raindaanimari fasiqana unna irirafa maaqimminoo maridanoo. Kaasau faini aanai maridanoo kaaqa ukaqee marifa marifaqa daruandooree qidanoo sia ainainai fidanoo.

<sup>14</sup> Ainainirara raindaanimarifa nari qaarisa faiaqeeidanoo quanda qaandida maridanoo. Mifa kooqi qainnara foora quanda qaandida maridanoo.

<sup>15</sup> Kudoosaapee marifa narana mareeqee ooki quqarara akoqaidanoo.

<sup>16</sup> Ainainirara raindaani marifa nari iriranara uriqarara fee qidanoo. Qisauku dinni taikasee dinni qaaa marasee (7) irirana faqaasa irirana urinnaaqaraqa maridaqee qidanoo.

<sup>17</sup> Sia tinooriranaki aqufua. Anee miqinana faini aaqoora foora qumarainanoo ukaqa amiannoo.

<sup>18-19</sup> Faiqi moo fannoo unna qinanoo moo fannoo kuqaamifoora mandainainaki aqufuannoo. Aqufifanoo mifa maaqi qiannoo oo qinee fifau unna qiqa uteeti qunannara anee mandainainaki aqufuananoo fee qiannoo. Miqi mari furufarira fasiqafa ida qemari duru feefana indaamma uqirafa nidanoo narinaa nidanoo.

<sup>20</sup> Ida ati taikaifanoo doo ida imbaidanoo. Munuqi miniqirufa miqi kai inoo taikainanoo aanoo qirafa taikaannoo.

<sup>21</sup> Ida kudima idaunisaa quqasainanoo dauni atooqafinoo qaannoo. Ida aadana faqa idaki quqasainanoo firaaqoo qaannoo. Manda ainaina oosana areemarifa ummaara kambigaani feera miqidanoo.

<sup>22</sup> Munuqi miniqirufa fannoo adiafaa ira narana miqirafa mina aranandaki maridanoo.

<sup>23</sup> Amiqira ufa qimari fasiqafa aundurai mandaikirafa maridanoo, mi fasiqafa qafee miqirafa apatasaa anukarafa akara faqaafa aundurai kudima arirafa maridanoo.

<sup>24</sup> Qaara irirana mau fimarina ufa fannoo amiqirafa maridanoo. Aundurakiqari nikaru qidanoo miqidanoo.

<sup>25</sup> Mi fasiqafa amiqira ufa ani qimaminana sia mina ufa iria. Mina aunduraki manda ufa oosana oosana qumbiqanoo maridanoo.

<sup>26</sup> Mi fasiqafa nari fidiqaa ira mandufa amiqira ufannai dadapaani maseenoo mimau amiqi amiqi marinaqa aiqamausa mifa manda ainaina auqee marina qafeearanoo.

<sup>27</sup> Faiqi moo fannoo madika indufuseenoo moo fannoo minaki aqufuani fee qimarifa nari aqufidanoo. Faiqi moo fannoo oonitia umbaqi aminanoo moo fasiqa aruani fee qifanoo oonu aruakinanoo nari aruannoo.

<sup>28</sup> Unna qimari afaurufa kuqaa anoona ufara fidiqaa midanoo. Unna qimasee amiqi amiqi marifa mifa mandaikamma nimaqaidanoo.

## 27

<sup>1</sup> Anee duna auqararee qinna ainainnara sia qimasee aneenna amooqia. Anee maqee kambigaaninna ainainnara sia irimariananoo.

<sup>2</sup> Sia aneenna amooqia, saina moo aanaamuru fannoo ani amooqiani.

<sup>3</sup> Furufarira fasiqa fannoo firaa umaarara ainaina auqaidanoo. Mi ummaarafa ooni umaara faqa nukuda umaara faqa uriaaqaranoo maridanoo.

<sup>4</sup> Aanoo qirafa faqa aranaqarafa faqa mandainaina maridanoo. Aqoonnana rairai qirafa misa firaaqara maridanoo.

<sup>5</sup> Manda ainainaki mari fasiqanara qaoo qirafa minara aidirana uriaaqaranoo maridanoo. Mifa sia ani aidirana qafaani.

<sup>6</sup> Anee aaqamasainanoo ani aqoondi fannoo ufannai aidafuma aminafa mifa ande-qara aqoondi mariannoo. Namuqaa fannoo unnaqimasee amooqira ufa moomoo anisaa quqaannoo.

<sup>7</sup> Faiqi moo fannoo amuaqu inoo marinanoo kaaqa adiafaa imarina ookasaasa anoona aminanoo minnisaannoo. Faiqi moo fannoo aarara marifa sukaqee mari narannara adiafaa irafee qimasee kaqi naannoo.

<sup>8</sup> Faiqi moo fannoo nari maaqa quqasee aiqama tinai nimarifa ufina aanna raidanoo nari aanaamukiqari quqasee furufara inoo aiqamai nidanoo.

<sup>9</sup> Afundimari ainainna afaaqai akusaananoo afunda afaaqai ifanoo aundura asaidanoo. Aneenna aqoondi amiqira aamuaqira ufa qiaminanoo mi aamuaqira ufafa amiqira afundara foora ani rafaafuannoo.

<sup>10</sup> Aneenna aqoondi faqa aneenna akoona aqoondira faqa sia qaunua. Anee umaaraki aqufinana sia aneenna nianai mari akaqaafasaanara dadaaqiannee qia. Aneenna adeedi mari aqoondifinnai oonurainanoo mifa ani dadaaqianoo.

<sup>11</sup> Qini qimaaku anee irirana faqaafa marinaqa qinee asianaaura. Yafee aniara qini diqifaqa ani irirana mau fiqa misa rafaafuanauree qinanee.

<sup>12</sup> Irirana faqaafa mandainaina anifanoo iriseenoo amaaraidanoo. Irirana siaifa kaqi onurama minaki aqufinoo ummaara maraidanoo.

<sup>13</sup> Anaamurundari sia irimarinna fasiqafa aniree qinana munnimma aminana anee furufarirafa mariananoo. Miqimari furufarira fasiqafa dapi maraqa nua aanaaseena munnimma amisee maraanoo.

<sup>14</sup> Anee aneenna aqoondi kanaanana afaurirna findifinana firaqoo faaqa rumasee amandeenana mina aquraree mariananoo.

<sup>15</sup> Aaku rikari kapatu fannoo aqufidanoo sia taikaidanoo. Manda anaasee fannoo mina kaukaata qirafa kapatu aanna raidanoo.

<sup>16</sup> Anee ufai qumaneerafa rafaqa fidanee anee fadameena aki mariana asaukuki qumaraidanee, sia. Miqi kai inana sia amana mi aanaaseena kaukaata qirana rafaqa finnanoo.

<sup>17</sup> Qumi faqa saasuna faqa marasee narisaa anrisaa anainanoo afaidaannoo. Faiqi moo fannoo nari aqoondi faqa moodaaqoo marida nari qimami nari qimamifanoo ufa fannoo nari dadaaqi nari dadaaqinoo andeeqaannoo.

<sup>18</sup> Anee murisaa amiqimmasee rakisinanoo irainana anee tiqisee neennaranoo. Miqi kai inoo ainainira faiqi fannoo nari uriqararana ainainasaa amiqimmasee rakisinafa uriqarafa mariannoo.

<sup>19</sup> Faiqi moo fannoo nammari afainni kikiqammafi nari oori afiri nammariki qafaidanoo. Mifa nari mariranara faqa iriranara faqa iriseenoo miqirafa maridanoo fee qiannoo.

<sup>20</sup> Faiqi moo moo kuqimariafanoo sia kuqira maqa maaqa umbiqaidanoo, kaqi kai kuqida maridaqa. Miqi kai inoo sia amana faiqi nari aidirana aiqama afaqanoo munu taikaannoo.

<sup>21</sup> Idannai kooraa faqa siruaa faqa tasirisirimmasee amanammasee qafaidaqa. Miqi kai iqa faiqi marirafa kai faiqiara kooroo idanoo.

<sup>22</sup> Anee furufarira fasiqa kuqa ariara foora masainanoo sia mina furufarirafa minaki marifa taikaannoo kaqi mariannoo.

<sup>23</sup> Anee aneenna sipsipasaa faqa burimakasaa faqa amiqimmasee rakisaa.

<sup>24</sup> Ani munnimma fannoo sia kisaagasaa mariannoo. Maqasaa karaambaiqa aiku asauku sia kisaagasaa marifaranoo.

<sup>25</sup> Ani andanda kisaagaikinana ateekasainanoo fuka andanda kambiqaaani.

<sup>26</sup> Anee aneenna sipsipa asausinnoo aneenna qamunna auqa. Anee aneenna mimmi akaqana nimisee minasaaqaraa munnimma marasaannanoo maqa feefauria.

<sup>27</sup> Aneeenna mimmi akaqafa kaqi marina naamma anoona tatisee anee faqa aneenna faiqi namu faqa aneenna dadaaqi maria manaqausa faqa naaqa.

## 28

<sup>1</sup> Manda oosana maree marifa sia moo arirafa marifanoo kaqi fifau sandaidanoo. Andeeqara oosana faqaafa kaasau faini raioonnara foora pasooosidanoo.

<sup>2</sup> Ufa rukiee maria maqanaasa misa uriqararaura qusasaa mariqa moo fannoo mina maraqusee kikiqidanoo. Irirana faqaafa irirana rainee marifa mifa andeeqa nimaqaidanoo kisaagasaa mariannoo.

<sup>3</sup> Kudi fasiqauqa manda rakisira rakisii nimaqee marifa aaku firaafara foora rinoonarana aina madaikamma aqimarifa maridanoo.

<sup>4</sup> Andeeqara ufara nikoqee marisa ufa rukiee mariasa dadaaqidaqa. Andeeqara ufa mau fimariasa ufa rukiee mariasa itita nimaqaidanoo.

<sup>5</sup> Manda oosana maree mariasa sia andeeqara oosanara iridaqa. Yaweenara inaaru qimariasa misa andeeqara oosanra amiqimmasee iridaqa.

<sup>6</sup> Moonoo ainaina faqaafa eendaanidira aatata nimarifa ureeqarafa maridanoo. Kudi fasiqa andeeqaraqoo kai nimarifa mina urirarafa maridanoo.

<sup>7</sup> Sanda ufamau fimarifa kumaaraafa iriana faqaafa maridanoo. Moo kumaara fanoo kaqaq narimari fasiqana aqoondiki marifa nari akoona asaurirana amidanoo.

<sup>8</sup> Faiqi moo fannoo nari munnimma ufaasu nimiseenoo mina akiqara firaqoo ootupamasee maree marifa sia mi munnimmana uaqeeiannoo. Mi munnimmafa aiqaree kudi fasiqauqara amuqusi mari fasiqafinnai fuannoo.

<sup>9</sup> Faiqi moo fannoo Yaaweena sandufa ameesuqinafa Yaaweenara inaaru qinanoo Yaaweefaa mina innaaru irinoo fidiqaammianoo.

<sup>10</sup> Andeeqaraura rarisameeqee manda ainaina auqarafaki uqemarifa nari ufaanaki nari aridanoo. Asakadiki ikariri sia marifa Anutufa mina akiqara amianoo.

<sup>11</sup> Ainaina faqaafa unnaqimasee nariara irirana faqaasee qidanoo. Kudi fasaa fannoo kuqaa irirana faqaafa maridanoo mifa misa oosanara amiqimmasee iridanoo.

<sup>12</sup> Andeeqara fasiqa uriqarafaikinaqa faiqi anaasee aiqamausa firaqoo asasifaranoo. Manda oosana maree marifa uriqararafaikifaqa faiqi anaasee rufiaasee kukeeqefaranoo.

<sup>13</sup> Faiqi anaasee moo fannoo nari aaqarana kukeeqee marifa sia amiqirana maraannoo. Kooroommasee minnisainnana Anutufa afuaannoo.

<sup>14</sup> Aiqamakari Yaaweena ufa mau finana asasiranaki marinnaranoo. Ufa rukieenana mandainainaki marinnaranoo.

<sup>15</sup> Manda oosana maree mari karaambaiqafa kudi fasiqa anaasee manda rakisira rakisinnimaqee marifa kaasau kuarara foora faqa kaasau fainiara foora faqa maridanoo.

<sup>16</sup> Nari maqannaqa mandaikamma nimaqee mari urirqararafa irirana oorudupirafa maridanoo. Unna qira oosana akooqee marifa kisaqaasaa rakisi nimaqannoo.

<sup>17</sup> Faiqi kuqa arinafa nari madika indufidanoo. Sia moo fannoo mina dadaaqiannoo.

<sup>18</sup> Kuqaa qira oosana mareenana amiqimmasee marinnaranoo. Sia kuqaa qifa oosana mareenana kai kaqi tautummaki manda ainainaki aquffinnaranoo.

<sup>19</sup> Maqa auqee mari fasiqafa mina narana moomoo maidanoo. Fifau faafau inoo nifa kudi mariannoo.

<sup>20</sup> Kuqaa qira oosana faqaasa Anutufa firaqoo amiqi amiqimma amaqaanoo. Kai kaqi moomoo munnimma ainaina faqaasa mariraree qimariasa aupuraranaki aquffaranoo.

<sup>21</sup> Kootaki moo fasiqa dadaqinara moo fasiqa mandaikamma amaqarafa manda oosana maridanoo. Akaqa siaasauqa noo rafaqaqafia munnimma maraseeqa miqidaqa.

<sup>22</sup> Kaqa ainainara tatamaqi mari fasiqafa kai kaqi moomoo ainaina maranaa qidanoo, miqi marifanoo sia irirai miqi mari kudikirafa doo mina amarusinoo maridanoo.

<sup>23</sup> Anee faiqi moo manda oosana marainara qaoo qinanoo mifa minara kasooqee dufi dufi qinanoo mina dufi dufi qira ufa fannoo fadameena akira ufa uraqaaranoo maridanoo.

<sup>24</sup> Faiqi moo fannoo nari anoofa akoona ainaina ummuarammasee sia manda oosana maree fee qinafa mifaa faiqi ainaina mandaiki mariasa naanna raidanoo.

<sup>25</sup> Ainainara tatamaqi mari fasiqafa ummaara uqeeraidanoo. Yaaweenasaa mundi mari fasiqafa moomoo ainaina faqaafa maridanoo amiqimmasee mariannoo.

<sup>26</sup> Faiqi moo fannoo nari irirana mau fimarifa fufufarirafa maridanoo. Faiqi moo fannoo irirana faqaasa aatata fimarifa asoaranaki maridanoo.

<sup>27</sup> Faiqi moo fannoo kudi fasiqauqa nimimarifa mifa sia sarau iannoo. Kudi fasiqauqa sia nimimarina faiqi aquraraidaqa.

<sup>28</sup> Manda oosana maree mariasa uriqararaisai kiafaqa faiqi anaasee kukeeqaidaqa. Mi manda oosana maree mariasa kuqifanoo andeeqaraisa kaifaa rakisi nimaqeeqefaranoo.

## 29

<sup>1</sup> Kaukaata qimari fasiqana moomoo kari andeeqaafanoo sia irimarifa qusasaa radamu saifanoo mina andeeqara aana sia mariannoo.

<sup>2</sup> Andeeqaraisa rakisirausaikiafaqa aiqama fasiqa anaasee asidaqa. Manda oosana maree mariasa rakisirausaikiafaqa aiqama faiqi anaasee ummaara maraidaqa.

<sup>3</sup> Irirana faqaafa marinanoo ani anoofa akoofa asasiannoo. Dapi maraqa nua aanaaseefinnai fimarifa nari munnimma aiqama aqu taikaidanoo.

<sup>4</sup> Maqasaa karaambaiqafa fannoo andeeqara oosananoo maa maqa maaqana rakisifanoo afeekaikinoo maridanoo. Munnimmara iridanoo rakisifanoo mifa rakisimari maqa maaqafa maaniki aquffidanoo.

<sup>5</sup> Faiqi moo fannoo nari aqoonnana fadameena akira ufa ami marifa nari mina ufaana fufidanoo.

<sup>6</sup> Manda oosana maree mariasa nari aaqarafa nari ufaana fufuffaqa aridaqa. Andeeqee mariasa asasammasee idiana faqa fidaqa.

<sup>7</sup> Amiqira fasiqa fannoo kudi fasiqa ummaarara faqa iridanoo. Manda oosana maree marifa sia miqira ainainara iridanoo.

<sup>8</sup> Ufa rukiee mariasa nari maqannaasa nirana fundakida aanooqirana uqeeera nimaqidaqa. Irirana faqaasa aanooqirana asoama nimaqaidaqa.

<sup>9</sup> Irirana faqaafa furufarirana afiqee kootai munusaifanoo furufarirafa aanooqimasee uteeti qidanoo.

<sup>10</sup> Faiqi fidika ruiqarara rimariasa andeeqara fasiqara fidiqaa midaqa. Andeeqara fasiqauqa misa marinasaa itita nimaqaidaqa.

<sup>11</sup> Irirana siaisa nariqa aanooqirana akooqoo kooroidaqa. Irirana faqaasa nari naundurai kai nari ufa rafaqa fidaqa.

<sup>12</sup> Uriqararafa unna ufa irimarifa marinaqa aiqama mina dadaaqimariasa unna ufa qimariasa kai marifaranoo.

<sup>13</sup> Kudi fasiqa faqa minasaa rakisi marina faqa Yaaweefa kai nifu nimaqifaanoo.

- <sup>14</sup> Uriqararafa kudi fasiqa andeeqaranara qimarifa naaru naaru rakisi nimaqaannoo.
- <sup>15</sup> Faiqi aanaaqi arusee andeeqainafa amiqianoo. Faiqi aanaaqiuqa nári irirana mau fiqa nári ninausa nisaurirana nimifaranoo.
- <sup>16</sup> Manda oosana maree mariasa uriqararaisai kifanoo mandoosana fannoo fi-raafaikiannoo. Andeeqaraisa manda oosana maree mariasa saamurifaqa qafeefaranoo.
- <sup>17</sup> Aneenna faiqi namu andeeqara ufa naakapainaga misa andeeqara atata fifana anee asasinnaranoo.
- <sup>18</sup> Anutuna itita nimaqarafa sia mari maqa maaganaki sia mina sandufa maridanoo. Anutuna sandufa mau fimariasa اساسiranaki maridaqa.
- <sup>19</sup> Anee ufannai kai ainainira faiqi ufa qimaminanoo siamma iriannoo. Mifa ani ufa amiqimmasee irisee sia mimau fuannoo.
- <sup>20</sup> Irirana siaifa kaqikaqoo amana maridanoo. Sia irirana irisee ufa qimarifa mandaika uqanna inoo maridanoo.
- <sup>21</sup> Anee aneenna ainainira faiqi faiqi aanaaqisaaqari aidi maru ainainna amisainanoo kaqi kaqoo marinoo mi ainainira faiqifa ani aiqama ainaina maraannoo.
- <sup>22</sup> Qusufa qimarifa moomoo aanoo qirana faqa ummaara faqa uqeeraidaqa.
- <sup>23</sup> Narí auqu uqeeree marifa asaauriranaki aqufuannoo. Narí mara maree qumi marifa uriqarara auqu maraannoo.
- <sup>24</sup> Ummuarira fasiqa dadaaqinara aneenna kai aneenna namuqaakinnaranoo. Kootaki oonuree anoona ufa qinaqa mina akiqara misa aupurarana amifaranoo. Mifa kukeeqainanoo Anutufa mina aqurara ufa qiannoo.
- <sup>25</sup> Anee faiqjara rufieenana aneenna ufaana fufi mariananoo minaki aneenna arinrananoo. Yaaweena saqariki marifa amiqiranaki maridanoo.
- <sup>26</sup> Aiqamausa maqasaa uriqararana oorisa oonuree andeeqaranara iraidaqa. Sia minannai nári andeeqaranara mareefaranoo Yaawee finnaidaraana mareefaranoo.
- <sup>27</sup> Andeeqaraisa manda oosana maree mariasara fidiqaa midaqa. Manda oosana maree mariasa andeeqaraisara fidiqaa midaqa.

### 30

- <sup>1</sup> Maa ufana Akurafa Yakeena amaaku fannoo Itieerana faqa Ukarana faqa akararuma nimanau. Mifa maaqi qinau, Anutufa sia qini faqa maridanoo, Anutufa sia qini faqa marifaqa sia qini dadaaqiraisa maridaqa.
- <sup>2</sup> Qinee aandaara foora maridaqa. Faiqi irirafa sia qiniki maridanoo.
- <sup>3</sup> Qinee sia amiqira iriranara iridaqa. Qinee sia uqanna Anutunara iridaqa.
- <sup>4</sup> Yafee innaarunai ooreenoo fee uminau. Yafee ufai narí asaukunoo afapita qumareenoo fee. Yafee nammari qamunnasaa sakasee qumaraannoo fee. Yafee aiqama maqa atiuqa auquseenoo fee atukaramma quqanau. Mina auqu yafee. Yafee mina amaaku auqu. Anee iridana qimaqiminaqa iria.
- <sup>5</sup> Anutuna ufa aiqama anoona kai kambiqaidanoo. Mifa qi ufafa anoona kai kambiqaidanoo. Mifinnai fimariasa mifa rakira saqariara foora itita nimaqaidanoo.
- <sup>6</sup> Sia innee mina iriranasaa inneeqa irirana ootupaaqa. Mifa inni ootupara ufara unna fee qimaseenoo niqiannoo.
- <sup>7</sup> Qinee qaara ainainara Anutuna iraidaqa. Qinee kaqi maa maqanasaa marunaqoo qiminaqa marasee kuqua.
- <sup>8</sup> Nikaru qirana faqa unnufa faqa nianai futeeqa quqaa. Kaaqa kudikirana sia qimia, kaaqa moomoo ainaina faqa sia qimia. Qiqa qimana kai qimia.
- <sup>9</sup> Qinee moomoo ainaina faqaasa maridaqa aniara sia irianoora. Qinee ainaina siaisa maridaqa moosa ainaina ummuariqa qeeqa Anutuna auqu rafaqa fuanooora.
- <sup>10</sup> Innee moo fasiqa ainainira faiqjara sia mandufa qiaqa. Mina rakisirafa irisee quandafi inni niqinaqa manda mareefaara.
- <sup>11</sup> Akaqa fasiqa anaasee narí nikausa manda afaaqooqa nimisee narí ninausa sia amiqimma nimaqaidaqa.
- <sup>12</sup> Akaqausa náriara ikairi siaisee qidaqa. Misa numoo marifaqa misa Anutuna afusaa ikairi faqaasa maridaqa.
- <sup>13</sup> Akaqausa náriara amiqirausee qidaqa. Misa náriara kaaqa amiqirausee qidaqa.
- <sup>14</sup> Akaqausa nifauru keedai miqirafa maridanoo. Misa nifauru musuka miqiraisa maridaqa, minannai ainaina siaisa nambiqeefaranoo. Minanna kai kudi mariasa rukeefaranoo.
- <sup>15</sup> Tumooka qaara manaqa faqaafa maridanoo. Aiqama qara moodaa nuqu faqaasa maridaqa. Miqanda nuqu Qini Qimia. Qaara faqa qaara faqa ainaina fannoo sia doo amaneee qidanoo. Kaqi moo faqa moo faqa qimiaqee qidanoo.

<sup>16</sup> Moo kuqiraua maqa maaqara qidanoo, Moo anaasee narí afaaqi faqa moomoo kari faiqeenoo sia faiqi maraidanoo. Moo aadana maqa maaqa fannoo aakuara aididanoo. Moo ida fannoo fifau faafau qaidanoo.

<sup>17</sup> Faiqi moo fannoo narí akoonara uteeti qimaseenoo narí anoona asooqa ufa rukiainafa duee dueena fannoo mina afu qimbaannoo. Mina amaqi meemoonauqa rapeefaranoo.

<sup>18</sup> Qinee qaara faqa qaara faqa ainaina oosanara randaidaqa sia iridaqa.

<sup>19</sup> Moo meemoona fannoo innaarunai qaqanoo nimari oosanna faqa moo sakani fannoo oonimau nimari oosanna faqa moo oosana sipa fannoo nammari amuaqumau nimari oosanna faqa moo faiqi faqa maanaaqa faqa nariara nariara rimaria oosannara sia iridaqa.

<sup>20</sup> Dapi maraqa nua aanaaseesa maaqimidaqa moo ainaina qumee namaseenoo oorindanaindaraana rukaseenoo sia qinee ummuari marunausee qidanoo.

<sup>21</sup> Qaara faqa qaara faqa ainaina maqa fannoo akooqainara maa maqafa kasidanoo.

<sup>22-23</sup> Moo ainainira faiqi fannoo karaambaiqaiki marina faqa moo furufari mariasa moomoo narana neeneesaafanoo nimuaqu imarina faqa moo fidiqaa imaria aanaaseefa faiqi maree marina faqa moo ainainira maanaaqa fannoo narí rakisira aanaaseena uriqararafaikirana mi ainainausara maqa fannoo akooqainoo kasidanoo.

<sup>24</sup> Maa maqanasaa qaara faqa qaara faqa ainaina kaqikaa ainaina maridaqa misa irirafa firaafa maridanoo.

<sup>25</sup> Moo ainaina tarika mifa afeeka siai ainainafa maridanoo. Suani aukuaana narana suqu quqasee aaku aukana mina naidaqa.

<sup>26</sup> Moo ainaina qiroosa maridaqa misa faqa afeeka siaisa maridaqa. Misa nári maaqa firaa ooniuga qambaana usakaidaqa.

<sup>27</sup> Moo ainaina pandaqa maridaqa misa uriqarafa sia maridanoo sia qimannimidanoo misa nariqa kai andeeqasee irasasaa kai fidaqa.

<sup>28</sup> Moo ainaina rufeeka maridaqa. Mifa kaqikaa ainaina maridanoo amana asaukunna qumareennaranoo. Faiqi firaasa uriqararaua maaqaki kaqi nimarifa maridanoo.

<sup>29</sup> Kafaqa qaara faqa qaara faqa ainainausa amiqimmasee nimariasa maridaqa.

<sup>30</sup> Moo raioonna aiqama aandau urinnaaqarara afeeka faqaafa sia moo aandauro rufiee maridanoo.

<sup>31</sup> Moo ainaina kookooraana akoono fannoo anaasee kookooraana qambaana kaqi sumoosumidanoo. Moo ainaina mimmi akoono fannoo moomoo indauro nifiqanoo nidanoo. Moo ainaina maqasaa karaambaiqa fannoo ufa nimi marifa maridanoo.

<sup>32</sup> Anee furufammasee aneenna auqu uqeereenana kafaqa oonu mafi iriseenana aneenna oo rafaafa fua. Anee manda oosanara tipundaarinana aneenna oo rafaafa fua.

<sup>33</sup> Anee burimakau naamma anoona tatisee minannai adiafaa imari ainainna pataqa auqinnaranoo. Anee faiqi aikiru rumasainanoo fidika qumuannoo. Miqi kai masee aanooqirana uqerasainanoo rakirafa kambiqaannoo.

## 31

<sup>1</sup> Maa ufausa karaambaiqa Reemueerana anoofa qimaqoofa maridanoo.

<sup>2</sup> Anee qini didira qimaaku qinee aniara innaaru qiafana kambiqaonafa mariananoo. Qinee nana ufa fee ani qimamianauree.

<sup>3</sup> Sia aneenna afeeka aanaaseesaa taikaa. Sia aneenna munnimma aiqama aanaaseesaa taikaa. Anaaseeuqa karaambaiqauqa faqa narimaria ainainausa maridaqa.

<sup>4</sup> Reemueera maa ufana iria. Karaambaiqauqa sia uainna nammari naaqa. Sia afeeka nammariara indaandi qiaqa.

<sup>5</sup> Misa mina nammasee sandufa qaunifoora. Faiqi nimeemaanai oorudupiqa mariasa ufa sia irisee mandaikamma nimaqeefoora.

<sup>6</sup> Afeeka nammari faiqi qusasaa kuqifaninausa ainaina maridanoo. Firaqa ummaaraki mariasa ainaina maridanoo.

<sup>7</sup> Kuqifandinausa amana namaseeqa narí kudikiranara aunuqaqa. Misa namaseeqa noori runiranara aunuqaqa.

<sup>8</sup> Anee ufa qiranaki ufa mammaqi mariasa aneenna kai dadaaqi andeeqannisaa. Anee dadaaqirana siaisa ufa qiranaki dadaaqiaqa.

<sup>9</sup> Anee ufa qiranaki misa dadaaqira ufa qinana andeeqara rakisirafa marinnaranoo. Anee kudi fasiqauqa faqa ainaina siaisa faqa itita nimaqainaqqa andeeqaranaki mariaqa.

<sup>10</sup> Amiqira anaasee andeeqara irirana faqaa anaasee mararafa kaaqa kadaapi maridanoo. Mina feefauru amiqira oonda faqa uraaqararafa kaaqa firaa feefauru maridanoo.

<sup>11</sup> Mina afaaqi irirafa mi aanaaseenasaa kai mundinoo marifanoo sia moo ainainara sarau iannoo.

- <sup>12</sup> Mi anaaseefa mari kamuqoo narí afaaqi amiqi amiqi kaimma amaqaيدanoo.
- <sup>13</sup> Mi anaaseefa sipsipa asausinnai faqa amiqira sandannai faqa moomoo qamunna auqidanoo.
- <sup>14</sup> Mi anaaseefa sipara foora nianaindaraa narana maree anidanoo.
- <sup>15</sup> Kananaana eendai findinoo narí maaqaki mariasa narana suqasee narí ainainira maanaaqauqa auqee fandinna saikanara qimannimidanoo.
- <sup>16</sup> Mi anaaseefa amiqira maqa qafamasee feefauridanoo. Narí ainaina nimisee maraqai munnimmanannai feefaurummaseenoo narí asaukunnai anukamasee adiafaa ira ainaina uainna ummaqidanoo.
- <sup>17</sup> Mi anaaseefa oori minaki munduseenoo amudaanai qimasee ainainidanoo. Mifa afeeka anaasee kaaqa amudaanai qimarifa maridanoo.
- <sup>18</sup> Mi anaaseefa narí ainainara anoona kai fee qidanoo. Qooma qumbiqaidanoo qeemarifanoo ainaininoo fiifiifanoo eenda amuqusai munu taikaidanoo.
- <sup>19</sup> Mi anaaseefa narí sanda sufuseenoo narí qamunna auqidanoo.
- <sup>20</sup> Mi anaaseefa kudi fasiqauqa faqa ainaina siaisa faqa afaarinoo nimidanoo.
- <sup>21</sup> Suara aaku aukuana mi anaaseefa faasai deedaqammaqaina asausi faqaa qamunna narí maaqaki mariasa aiqama nimifaqa afisusee amiqimmasee maridaqa.
- <sup>22</sup> Mi anaaseefa faiqara qaarisaa ufiqira qamunna auqidanoo. Mifa aakianda amiqira sandannai auqira qamunna kai afisidanoo.
- <sup>23</sup> Aiqama uriqararausa mina afaaqiara uriqararafee qidaqa. Mi fasiqafa maqusa qambaanai faiqi firaasa faqa marida ufa qimarifaqa aiqamausa mina ufa iridaqa.
- <sup>24</sup> Mi anaaseefa qamunna faqa nooiqandi mariana faqa auqi marifaqa ainaina faqaasa ani feefauridaqa.
- <sup>25</sup> Mi anaaseena afeeka faqa andeeqarana faqa mifa qamunnara foora afisinoo maridanoo. Mifa kasooaqee kambiqaaninna mandainainnara sia rufiaidanoo paasoosidanoo.
- <sup>26</sup> Mina ookiqari firaa amiqira irirafa kai uridanoo.
- <sup>27</sup> Mi anaaseefa narí faiqi namu faqa narí afaaqi faqa ainainasaa rakisidanoo. Sia kudoosaapaidanoo.
- <sup>28</sup> Mi anaaseena faiqi namu nári ninoonara asasiafanoo mina afaaqi fannoo faqa mina amooqidanoo idiki keeqaidanoo maaqi qidanoo.
- <sup>29</sup> Moomoo anaasee amiqira ainaina auqee mariasa maridaqa, anee misa narusee uriqararafa mariananoo.
- <sup>30</sup> Moo anaasee fifau reendeenirafa maridanoo. Amiqira afaqa faqaafa mina amiqirafa dauni taikaannoo. Yaaweena ufa mau fimari aanaaseena kai amooqiaqa.
- <sup>31</sup> Mifa auqai ainaina akiqara uriqarara auqu amia. Mifa auqai ainainna fannoo mina auqu uqeerarana amidanoo.

## **MATAIOO**

### **Yisuna amiqira fasaasa ufa Mataioofa akara rinau.**

*Yisuna akeeku akaaku marusa.*

*(Ruk 3:23-38)*

<sup>1</sup> Maa akarafa Anutuna asauku mundirana Abarahaamana ati Yisunara qidanoo. Karaambaiqa Dafidina ati maridanoo. Mina akeeku akaaku mina oosana maaqimminoo maridanoo.

<sup>2</sup> Abarahaamafa Isakeena akoofa marinau. Isakeefa Yakooboona akoofa marinau. Yakooboofa Yudana faqa mina akaqaafasaa faqa nikoofa marinau. <sup>3</sup> Yudafa faqa Peeresana faqa Seeraana faqa nikoofa marinau. Miqanda ninoofa Tamaafa marinau. Peeresafa Qeeseerona akoofa marinau. Qeeseeronafa Aramana akoofa marinau. <sup>4</sup> Aramafa Aminadafana akoofa marinau. Aminadafa Naasoona akoofa marinau. Naasoofa Saramoona akoofa marinau. <sup>5</sup> Saramoonafa Booasina akoofa marinau. Booasina anoofa Raqabafa marinau. Boosifa Oobeetana akoofa marinau. Oobeetana anoofa Rusioofa marinau. Oobeetafa Yeeseena akoofa marinau. <sup>6</sup> Yeeseefa karaambaiqa Dafidina akoofa marinau. Dafidifa Sooroomoona akoofa marinau. Sooroomoona anoofa Quriana anaafa Dafidifa rafiaqoofa marinau. <sup>7</sup> Sooroomonafa Reeqooboamana akoofa marinau. Reeqooboanafa Abisaana akoofa marinau. Abisaafa Asaana akoofa marinau. <sup>8</sup> Asaafa Yeeqoosafatana akoofa marinau. Yeeqoosafatafa Yoramana akoofa marinau.

Yoramafa Usiana akoofa marinau. <sup>9</sup> Usiafa Yootamana akoofa marinau. Yootamafa Aqasana akoofa marinau. Aqasafa Qeeseekiana akoofa marinau. <sup>10</sup> Qeeseekiafa Manaseena akoofa marinau. Manaseefa Amoona akoofa marinau. Amoofa Yoosiana akoofa marinau. <sup>11</sup> Yoosiafa Yeekooniaana faqa mina akaqaafasaa faqa faqa misa nikoofa marinau. Babiroonia karaambaiqa fannoo nari maqusaindari anireenoo nari sundiafa qimannimufaqa Yuda maqannaasa akaqausa naru taikeenoo akaqausa Babiroonia maqa maaqai nifiqasee karabusaki quqasoofaqa Yeekooniaana faqa mina akaqaafasaa faqa faqa karabusa marunaki kambiqaqau. <sup>12</sup> Babiroonia maqusaindaraa karabusa taikaseeqa nari maqusai anireenoo Yeekooniaafa Seearatieena maqanau. Seearatieefa Seerubaabeerana akoofa marinau. <sup>13</sup> Seerubaabeerafa Abiutana akoofa marinau. Abiutafa Eeriakimana akoofa marinau. Eeriakimafa Asoorana akoofa marinau. <sup>14</sup> Asoorafa Sadookana akoofa marinau. Sadookafa Aakimana akoofa marinau. Aakimafa Eeruidana akoofa marinau. <sup>15</sup> Eeruidafa Eeriasarana akoofa marinau. Eeriasarafa Matana akoofa marinau. Matanafa Yakooboona akoofa marinau. (Mi Yakooboofa moo marinau.) <sup>16</sup> Yakooboofa Yooseefaana akoofa marinau. Yooseefaafa Mariana afaaqi marinau. Mariafa Anutuna asauku mundirana Yisuna anoofa marinau.

<sup>17</sup> Maaqimmasee Abarahaanasaqari qisaukuqara taikasee qikunni ooqu qaara faqa qaara faqa marasee oosana kambiqaqafanoo Dafidinaki ootupanoo maridanoo. Dafidifa misa Isaraee maqannaasa karaambaiqa marinau. Karaambaiqa Dafidinasaqari oonu arufufanoo miqi kai inoo qisaukuqara taikasee qikunni ooqu qaara faqa qaara faqa marasee oosana kambiqaqafanoo minakiqari Babiroonia karaambaiqa fannoo karabusa mareenoo narinoo inau. Babiroonia karaambaiqa karabusa oosana raquramifufanoo miqooqari kafa miqikai inoo qisaukuqara taikasee qiku qaara faqa qaara faqa ooqu marasee oosana kambiqaqafanoo misaki Anutuna asauku mundirafa ootupa mafi kambiqaqanau.

(Yisufa kambiqaqoo aukuaana faiqi anaasee siara irannimimarufa maaqimminoo marinau. Kumaaraa maanaafa ninausa nikausa utaaqama nimaqaqoofaqa marida nariara nariara nianasa rufisee mariqau. Miqiqqa maridaqa maanaafa faqa akoonaiqi faqa innoqafufafa misa ninausa nikausa narana suqasee naidaqa susumasee doo firaqoo kooroomasoofaqa miqanda kaqi naadu naadu mariqau. Miqimmasooqooqari doo moodaa aukuaana aqaramafufanoo doo moo aukuanasaa amundeeqee faiqi faqa moodaanaki quqasoofaqa mariqau. Yooseefaasa Mariasa miqimmasee firaqoo kooroomasoofaqa naadu naadu marunakina Anutuna maraqunannai Yisufa Mariana aranandaki kambiqaqanau.)

*Yisufa kambiqaqoo ufafa.*

*(Ruk 2:1-7)*



<sup>18</sup> Ooqai Anutuna asaku mundirafa Yisufa mina maqoo ufafa maqimminoo maridanoo. Mina anoofa Mariafa faqa mina aqoonafa Yooseefaafa faqa qutaqama amaqarafa mariqau. Miqanda naadu naadu mariqau. Miqinoo maridanoo Mariafa amuaquqaikinuu. Anutuna kaaqa areenara maraquna fannoo Mariana aranandakina anoonaukufanoo amuaquqaikinuu.

<sup>19</sup> Yooseefaafa andeeqara faiqi Anutuna ufa irimarufa marinuu. Sia Mariana mifa faiqi mara aminuu. Minara iriseenoo Yooseefaafa Marianara amuqusufanoo ufa fraana qiqa Mooseena sandufamau fiqa Mariana arifoo qimasee qumee kai minnisaree qinuu. <sup>20</sup> Miqi qimaseenoo Yooseefaafa irisee fimarufanoo karaambaigaa qangiroo fannoo qainasaa akooqoo qimaminuu. Yooseefa, anee Dafidina mi oosanafa marianoo. Anee aneenna aqoonnana sia rufia, sia qumuarimari manaaqafa maridanoo mifa amuaquqaiki ainainafa Anutuna kaaqa areenara maraquna fannoo quqasaifanoo anoonaikinoo. Sia minnisaa kaqi maraa. <sup>21</sup> Mariafa mari inanoo faiqi akoonaiqi maqaannoo. Maqasainana anee mina auqu Yisunee qia. Mina auqu oosana maqimminoo mariannoo. Furufariranakinaana qumbaqi uqeerannisaaninafa mariannoo. Mifa kasooqaqee nari maqannaasa nariqa mandainaina numookinaana qumbaeeqeenoo amiqiraqoo quqaannoo. Minara anee Yisu nee qia.

<sup>22</sup> Qangiroo miqi qufanoo ooqai Anutufa tamummaqara fasiqa qimannimu ufafa anoonaikinuu. Mi tamummaqara fasiqafa maaqi qimasee qimaqoofa.

<sup>23</sup> Maanaaqa moo fannoo mari inanoo amuaquqaikiannoo. Amuaquqaikinoo faiqi maqaannoo. Mina auqu Imanueera nee qifaranoo.

Mi auquna oosana maasa ufakiqari maqimminoo maridanoo. Anutufa doo maqee maasa faqa maridanoo.

<sup>24</sup> Miqi qimasoofanoo qainasaa Yooseefaana afunni aroofanoo tautinoo findifinoo karaambaigaa qangiroo ufa kai maranuu. Minara misa amundeeqee nari afaaqi amufanoo doo nari anaukoo maaqaki mara quqanuu. <sup>25</sup> Mara quqaseenoo amuaquqaiku kamuqoo sia ameesaaqusinoo ninuu, kaqi marinuu. Miqi marufanoo Mariafa nari amaaku maqasoofanoo Yooseefaafa mina auqu Yisu nee qinuu.

## 2

### *Suani oosaindarii anu fasiqausa.*

<sup>1</sup> Eeroodeefa rakisimaru aukuanai Yisufa Yuda maqa maaqaki moo maqusaki Beetareeqeemma maqusai kambiqanuu. Yisufa kambiqoofaqa irirana faqaasa fasau asaana rimarusa, fasau asaana rumasoofanoo uqannifiqoofaqa suani afu oosana gaanaindarii nianaindarii faiqaaqaa aniufaqa Yeerusareenni aniqau. Misa aniree Yeerusaree maqannaasa irammiriqaa qiqau. <sup>2</sup> Inni Yuda maqannaara karaambaigai kianinafa kambiqaina, yamaqusanaki fee maridanoo fee maasa qeeqa maqusai nianai maridaqa nari karaambaigaa maqooqoo fasau irafufaqa qafamaseeqa mi faiqinara dufi dufi qimamaqarara anidaqa.

<sup>3</sup> Miqi qufanoo rakisirafa Eeroodeefa mi ufana iriseenoo maa fuka karaambaigafa qini maqa maaqa maraandoo qimaseenoo aranaqoofanoo tautinuu. Tautumasoofaqa Yeerusaree maqannaasa misa aiqama naaquqanuu. Misa Eeroodeenara rufiaqau. Fuka karaambaigaa namufaqa maasa faqa daruandoo qimasoofanoo naaquqanuu.

<sup>4</sup> Eeroodeefa tautumaseenoo aiqama amaana maqasaa rakisimarusa misa uriqararusa kai Anutuna sandufara irimarusa faqa aiqama suqu quqaseenoo irammirinoo qinuu. Tamummaqarusa akarakinaana yamaqusanai fee Anutuna asaku mundirafa kambiqaanoo fee qufaqa misa qiqau. <sup>5</sup> Yuda maqa maaqa Beetareeqeemma maqusaki kambiqaanoo. Anutuna tamummaqara fasiqa ooqai maaqi qimasee qimaqoofa Beetareeqeema maqusara akara rumaqoofa maridanoo.

<sup>6</sup> Inni Yuda maqannaaki kaqikaa maqusa auqu Beetareeqeemma maridanoo kasooqaqee auqu firaa maqusa uriqarara maqusa mariannoo.

Mi kaqikaa maqusanakiqari karaambaigaa firaaqa kambiqafinoo mariannoo.

Mifa qini Anutuna faiqi anaasee Isaraee maqannaasa rakisinnimaqaannoo.

Mi ufana Anutuna tamummaqara fasiqa qimaseenoo akara rinuu.

<sup>7</sup> Eeroodeefa mi ufana iriseenoo fasau asaana rimarusa qumee naaramma quqaseenoo irammirinoo qinuu. Mi fasauna innee indaaru qafoofofanoo kambiqoo kamuqoo mina oosanaara idaaqamasee andeeqasee qimaqimiqee qinuu. <sup>8</sup> Irammiriseenoo misa niqaidanoo unna qimaseenoo qimanniminoo qinuu. Innee Beetareeqeemma maqusai oonu mi faiqinara amiqiuqanna masee randasee paqurimasee oonurandee aniree qini faqa qimaqimifaqa qinee faqa miqi kai iqa oonu amooqianaura. <sup>9</sup> Mifa miqi qufaqa misa findimeeqee Beetareeqeemma maqusai fiqau. Aanai fimarufanoo fasau fannoo aana amummaqa uqannifiqanuu. Mi fasaufa misa nariqa maqusai suani oosaindarii

maridaqa qafoo fasaufa kai mi fasaufa kai nifiqanoo fifufanoo faiqi aanaaqi maruqoo mina amummaqa kasoo inoo marinau. <sup>10</sup> Misa mi fasaufa faiqi aanaaqi maruqoo kasoo inoo marufaqa qafamaseeqa nimuqusa idaaqufaqa nimudaani itairi fufaqa susumamaqau. <sup>11</sup> Misa oonureeqa maaqaki keeqafufaqa faiqi aanaaqi kaqikaqoo afeekaikinoo nari anoona Mariana faqa marufaqa ireeda rufia idaga ooru keeqafi qafau. Mi fasiqusa naaqqooqafa oqumarifufaqa noorindari maqasaa kummara mafufaqa amooqimamaqaida susumamaqau. Misa Yisunara amooqimaseeqa karaambaiga nimimaru ainaina minammamiqau. Sia kaiqeesa nimimaru Yisuna amiqau. Amiqira ainaina idukusee kooora munnimma aabaa kai amiqau. Kaifaa afundimaru saqari anoona makaqa anoona fooqaana misa mina faqa aabaa amiqau nari maqusai firaa feefaurummamaree anuna maree mini aabaa amiqau. Kaifaa moo saqari anoona afundi maruna faqa, mandeefana anoona fooqaafa miqi kai iqa aabaa mina amiqau.

<sup>12</sup> Miqimmasee marufanoo qaina nifu narooqafa Eeroodeefa marinai sia kafaa anirandee fuaga. Anutufa miqi qufaqa misa moo aatata qumee nimaqa fiqau.

*Eeroodeena asaukukiqari Isipa maqusai sandanau.*

<sup>13</sup> Fasau asaana rimarusa misa fufanoo Anutuna qangiroomoo fannoo Yooseefaana qainasaa afunnareenoo qinau. Eeroodeefa faiqi aanaaqiara randasee rutukirara qidaqino. Anee faiqi qisanooisa nifiqeenana Beetareeqemma maqusara rufiasee Isipa maqusai oonu marinaqa kasoqaaqee qinee qianana oqurandee urua. <sup>14</sup> Miqi qufanoo Yooseefaafa findifinoo eendamuuqasai faiqi qisanooisa nifiqeenoo sandeenoo Isipa maqanai oquree marinau. <sup>15</sup> Eeroodeefa kaqi marufanoo minni marinau. Maaqi qimasee Anutuna ooqeenaa ufa nari tamummaqara fasiqasaa qimaqooqa anoona kambiqanau. Maaqi qimasee mi fasiqafa qinau. Qinee qeeqa qimaaku Isipa maqanaindaraana aaraanuranoo qinau.

*Eeroodeefa faiqiuqaindi rutukinau.*

<sup>16</sup> Eeroodeefa fasau asaana rimarusa nifeesida marusianoo akaru qimasee moo aatata fifufanoo Eeroodeefa minara irinoo aranaqeenoo sia kaiufanoo nari frisuaiqauqa niqooqafa misa Beetareeqemma maqusa faqa dinni dinni marusa faqa akoonaiqi aanaaqi kai aiqama rutuku taikanau. Eeroodeefa fasau asaana rimarusara mi fasaunara irammirusara minara oonu mafi iriseenoo faiqi naridaqa Yisuna faqa aruaqera minaramma irinau. Minara irisee qaara aukuaana mararusa faqa qambaana aukuaana mararusa faqa aanaaqi maqee maqarusa faqa minara iriseenoo akoonaiqi kai aiqama rutuku taikanau. <sup>17</sup> Faiqi aanaaqi aiqama rutuku taikasoo fanoo Anutuna tamummaqara fasiqa auqu Yeereemaia mina ufa anoona kambiqanau. Mifa qinau.

<sup>18</sup> Innee iriaqa, Ramma maqusai aanaaseeuqa ufa anoona kambiqanoo. Ikifaafau faqa faaqa fuisse faqa mariannoo. (Yuda maqannaa anaaseera Raseerana araamummaakee qimariqau.)

Raseerana araamummaaka nari faiqi aanaaqiara ikiraqee fara moosa aniree nuqa maseeqa idaaqidaaqa maseeqa misara doo taikaqee qifaqa siamma irifara.

Misa nimuqusa mandaiki marifaqa miqiga maridaqa misa faiqiuqaindi sia mariafaqa miqidaqa.

Tamummaqara fasiqa ufa miqi qimasee akara rinau.

*Isipa maqusaindara oonurandee aninau.*

<sup>19</sup> Yooseefaafa Isipa maqusai kaqi marufanoo Eeroodeefa kuqufufanoo Anutuna qangiroomoo fannoo Yooseefaana qainasaa afunnareenoo akooqoo qimaminau. <sup>20</sup> Findifi doo fua. Faiqi qisanooisa nifiqee kaifaa Isaraee maqusai ooru fua. Ooqi faiqi ariraru fasiqafa doo kuqino. <sup>21</sup> Miqi qufanoo Yooseefaafa irinoo faiqi qisanoosa nifiqeenoo kaifaa anirandeenoo Isaraee maqasaa ooru finau.

(Isaraee firaa maqa maaqa marunaki minaki dinni atinai Yuda maqa maaqa marinau.)

<sup>22</sup> Yuda maqasaa oonureenoo Eeroodeena mina amaaku auqu Aakeerausifa doo mifa nari akoonaa ainaina afapita qumareenoo rakisirafa marinau. Yooseefaafa minara iriseenoo rufiee marinau. Qainasaa afunnaroonoo Isaraee maqa maaqa dinnatinni Kariree maqa maaqaki oonu marinau. <sup>23</sup> Miqoo kaqikaa maqusai Nasareeteenni naaruara marinau. Miqi qunara Anutuna ooqai maru tamummaqara fasiqauqa misa ufa kambiqanau. Yisufa sia kambiqoo kamuqoo ooqai maaqi qimasee minara akara riqau. Misa minara Nasareete fasiqa fee qifaranoo fee qiqau.

### 3

*Yoohaneefa nammari nimimarufa qimannimi ufana.*  
(Mak 1:1-8; Ruk 3:1-18; Yoh 1:19-28)

<sup>1</sup> Yisufa kumaaraa marufanoo mi fasannai Yoohaneefa nammari nimimarufa kooroomafinoo afeekaikamaseenoo Anutuna ufa faiqí anaasee maqusa maqusa qimanniminoonin nau. Yuda maqannaasa aadana maqannai faiqí oodaa marunnai Yoohaneefa miqoo oonureenoo qimannimimarinau. <sup>2</sup> Mifa maaqí qimasee fuki faaki qidanoo qimannimimarinau. Anutuna ququsa qusasaa innisaa ititafuannoo. Minara innee aiqamausa inneeqa mandainainara quqasee quandaafina Anutufinnai noori ubeekaaqa. <sup>3</sup> Yoohaneefa miqí qimasee qimannimimarufanoo ooqai Anutuna tamummaqara fasiqa Eesaia mifa qimaqoo ufafa anoona Yoohaneenaki kambiqanau. Mifa maaqí qimasee akara rinou.

Faiqí moo fannoo faiqí sia marunnaindari aadana maqannaindari ufa fifi qimasee faiqí anaasee maaqí qimasee qimannimidanoo.

Karaambaiga anianifeera mina aana afisuaqa. Aana eendirana andeeqasaifanoo karaambaiga fuani.

Miqí qimasee akara rinou.

<sup>4</sup> Mi fasiqafa Yoohaneefa qamunna sia amiqirana afisimarinau. Aadaika aadaikirafa kammeera kisaaga asausinnai auqirana afisirafa nimirinai. Tamummaqara fasiqa naanna ramasee miqimmasee marinau.

(Kammeera fannoo firaa aandau qoosara foora maridanoo. Asausi kisaagaandauqa maruna mina marasee sufusee qamunna auquqagee afisimariqau.)

Yoohaneefa aandau apatannai qamunanda rafaaga fu rumbanau. Mina narana sia narana uqanna. Ookasaasa anoona faqa kaasau oofaafana faqa mina auqu pandaaga oofaafana mina kai neemarinai. <sup>5</sup> Misa Yeerusaree maqusanaasa faqa Yuda afumakinaasa faqa Yooradanna nammari dinni dinni afainni marusa faqa aiqama Yoohaneefa maruqoo suqíqa marida Yoohaneena ufa irimariqau. <sup>6</sup> Suqumaraidaqa misa nári mandainainara akooroomaseega minnisarara kooroo qimarufanoo Yoohaneefa nammariki rafusu ooqu marinnimaqasee marufaqa rumannimaqoo faqa nammariqiari findifiqau.

<sup>7</sup> Farisai amaana ufa qimariasa faqa Sadikai amaana ufa qimariasa misa faqa nammari mararara aniroofanoo Yoohaneefa niqidanoo qimannimimarinai. Innee sakani faiqí ukadiqa faiqí namuara foora nári nariranara rufiamaree sandee mariafanoo. Yafee innee qumee aaquqima nimaqai faqee innee Anutuna aranaqaranara rufiamareega unna qimasee nammari rumannimaqaannanara qinisaa mandaaqee faree. <sup>8</sup> Innee kuqaa naundura quandarausee maridaqee. Unna qimariafanoo. Andeeqara oosana maraifaqa qafeega inniara kuqaa naundura quandarausee qianaara. <sup>9</sup> Yoohaneefa kaifaa qimannimimarinai. Innee inneeqara maasa Abarahaana aiku asauku maridaqee sia Anutufa daruannoo fee qimariasa. Maasara amiqirausee qimariasee qimariafanoo. Miqí qimaria ufana sia qiaqa. Qini ufa iriaqa Anutufa maa fifau ooniugara qinanoo amana Abarahaana aiku asauku kambiqee faranoo. Nanaree innee fifau maasa Abarahaana aiku asauku maridee qida fee. Fifau faafau ufa dapi ufa qimariafanoo. <sup>10</sup> Doo Anutuna saasunara foora saqari atuka atekarara rauqiaqee idanoo. Sia naundura quandaanausa Anutufa narirafa qusandaannoo. Yasaqari fee sia andeeqasee qaqamma irainafa kudi saqari Anutufa mina ateeke idaraannoo.

<sup>11-12</sup> Kuqaa qinee Yoohaneesa nammari kai inni rumannimaqaida. Inniqa mandainaina minnisee Anutuna ufamau firanara koorooianifeera fifau nammari kai rumannimaqaida. Kasooqagee qini qinaaqiannai moo fannoo kambiqaanoo. Mifa qini uridaaqaraannoo. Qinee ooreeqarusa mina ameemaana marianaura. Naqimmasee fee qinee mina dadaaqianauree mifa firaa qini faqa uridaaqararafa maridanoo. Mifa sia fifau nammariinnai kai inni ooqumarinimaqaannoo. Mifa Anutuna kaaqa areenara mara quna inni naakunnimaqaannoo. Mifa kudimakirana idaqaanifeera idannai faqa inni rumannimaqaannoo Yoohaneefa oofaafana kikiqa usuna maa maqanasaqaraasara qidanoo qinau. Innee Yisuna asaukuki faiqí anaasee oofaafanara foora doo maridaqa. Kaqikaqoo utitiqamanniseenoo mina adi fuuqa aquannoo. Anoona nari mareeqeenoo nari maaqaki quqaseenoo aanaaqmaara mandoosana maree mariasa idaraannoo. Ida firana sia dimbeemari idanaki araannoo.

*Yisufa nammari maroo ufafa.*

*(Mak 1:9-11; Ruk 3:21-22)*

<sup>13</sup> Mi fasannai Yisufa Karidaiaandari qumureenoo Yooradanna nammari afainni Yoohaneefa nammari rumamaqaanifeera quminai. <sup>14</sup> Qumuroofanoo Yoohaneefa saa qimaseenoo Yisuna qimaminai. Qinee ani nammari rumamaqaananoo siamma amanaikiannoo. Anee qini rumaqimaqainanoo amana mariannoo.

<sup>15</sup> Miqi qufanoo Yisufa maaqi qimasee qimaminoo qinau. Maqee kaqi rumaqimaqaa, Anutuna ufamau kai fidaqa maaqanda andeeqaanuranoo. Miqi qufanoo Yoohaneefa irinoo eedoo qimaseenoo Yisuna nammariki ukuqnamaseenoo mara uqeeranau.

<sup>16</sup> Yoohaneefa Yisuna nammariki keeqa amaqasoofanoo findifufanoo mikari kai innaaruna rakeefanoo Anutuna naaquqara andeeqara maraquna fannoo Yoohaneefa qafoofanoo nakipurunara foora mambufanoo qumureenoo Yisunasaa quqanau. <sup>17</sup> Quqamafufanoo innaarunaindaraa ufa maaqi qimaseenoo akooqoo Yisunara qinau. Maa fasiqafa kaaqa qini qimuqusira qimaaku marifaqa minara qini qimuqusa asooaifaqa susuidaqa.

## 4

*Sadannafa Yisuna amanufafa.*  
(Mak 1:12-13; Ruk 4:1-13)

<sup>1</sup> Miqooqari nammari mara mareenoo Anutuna maraquna fannoo Yisuna rarisamee-qeenoo fifau saqanna aadana maqasaa oonikinau quqasoofanoo marinau. Sia fifau-fau. Afaannauqa firaafa amanammasee qafaanifeera quqasoofanoo marinau. Oonu marufanoo afaannauqa firaafa Yisuna amanammasee qafaanee qimaseenoo anireenoo maaqi qimaseenoo amanammasee qafanau. <sup>2</sup> Yisufa sia narana marufanoo, qaara fasiqa niku nisauku taikasee eenda faqa faasaana faqa aiqarooofanoo aarananau. Miqimmasee faasaana taikoofanoo firaqoo aararooofanoo kudoosaapanau. <sup>3</sup> Kudoosaapee marufanoo afaannauqa firaafa mandainainara amanammasee qafarara anireenoo Yisuna qimaminoo qinau. Anee kuqaa Anutuna amaaku mari inana maaqi qimasee kooroo inaqa qafaa, maa oonisara qinanoo feemu kamambinana nainanoo amuaqu inaqa qafaa. <sup>4</sup> Yisufa iriseenoo afaannauqa firaana qimaminau. Anutuna akarakina minara maaqimminoo maridanoo. Faiqi narana kai namasee sia amana marifara. Anutuna ookinaa ufa namufaqa namaseeqa neeqa amana marifaranoo. Qinee mina Anutuna ufamau kai fuanaura. Ani ufa siamma irianaura.

<sup>5</sup> Miqi qufanoo afaannauqa firaafa Yisuna afiqeenoo Yeerusareenni amaana maqa, Isaraee maqannaa naaquqara firaa amaana maqa meeraqoo sandaaqai maruna mina ataufakaaga faakana kisaaga atisaa muru quqasee qimaminau. <sup>6</sup> Kuqaa anee Anutuna faiqi fee sia fee. Kuqaa Anutuna faiqi mari inana maaqooqari rafusakinana maqasaa meemai aqufinaqa aiqamausa ani qafaaqa Anutuna akara moo minara maaqimminoo maridanoo.

Anutufa nari qangiroouqa niqiqainaqa misa nisauku

qufqiisaifana minasaa aqufinaqa rafusifaranoo, sia oonisaa aiku rupaurinnaranoo.

Minara anee maaqooqari rafusaki aqufinaqa misa ani dadaaqifana sia maqasaa arinnaranoo. Faiqi anaasee qafamasee kuqaa anee Anutuna asauku mundira fee qifaranoo.

<sup>7</sup> Afaannauqa firaafa miqi qimasooofanoo Yisufa qimaminau. Anutuna akara kafaa maaqimminoo maridanoo.

Anee anenna karaambaifa Anutuna sia amanammasee qafeennaranoo. Sia uqanna.

<sup>8</sup> Yisufa miqi qimasooofanoo afaannauqa firaafa mina iriseenoo kaqi afeekaikamaseenoo Yisuna kafaa afiqamareenoo aqana kisaagasaa afiqee muruseenoo aiqama maqa maaqa maqusa maqusa misa nari areenaranaki marina Yisuna uqafiqaseenoo qimaminoo qinau. <sup>9</sup> Anee maqasaa oorindari rupaitamafinana qini Anutunara foora qimooqinaqa qinee maa aiqama ainainna uqafiqasaunnana ani kaimmianiaura.

<sup>10</sup> Yisufa mi ufana iriseenoo kaifaa qimaminoo qinau. Sadanna see maree fua. Anee iria. Anutuna akara moo maaqimminoo maridanoo. Innee inneeqa Anutuna kai amooqiaqa. Karaambaifa Anutufa mifa qinnandee kai iaqa. Qinee mina ufa kaimma irianaura.

<sup>11</sup> Yisufa miqi qimasooofanoo Sadannafa quqasee finau. Fufanoo qangiroouqa Yisufinnai qumureeqa narana aina amidaqa amiqi amiqiqau.

*Yisufa nari saika oosana aroo ufafa.*  
(Mak 1:14-15; Ruk 4:14-15)

<sup>12</sup> Mi kumasaqa rakisirafa Eeroodeefa Yoohaneena nammari rumannimaqee maruna karabusakina rumba quqanau. Yisufa minara iriseenoo Karidaia maqusai finau. Miqoo oonureenoo kaqikaa maqusa moo auqu nari maqusai Nasareetee, miqoo oonu marinau.

<sup>13</sup> Kaqikaqoo miqoo marinoo quqaseenoo Kapeeranauma maqusai Karidaia faruma atinni mi maqusanai ooku marinau. Kapeeranauma maqusai Seepuruna maqa maaqa faqa Napatari maqa maaqa faqa miqoo Kapeeranauma maqusa maridanoo. <sup>14</sup> Yisufa

Kapeeranauma maqusai ooqu marufanoo Anutuna tamummaqara fasiqa auqu Eesaia, mina ooqeenaa ufa anoona kambiqaanau. <sup>15-16</sup> Mifa qinau.

Seepuruna maqa maaqaki mariasa faqa Yooradanna nammari dinnafai mariasa faqa faruma dinni, ooruku nammari dinni qambaana maqa maaqaki mariasa faqa Kariree maqa maaqaki aanaamuru oosana oosana mariasa faqa innee aiqama faiqi anaasee asukunaki mariasa maqee kaaqa qarana qafeefaranoo. Kuqiranakiara foora asukunaki mariasa inniki maqee kaaqa qarafa radiqifinoo mariannoo.

Tamummaqara fasiqa miqi qinau.

<sup>17</sup> Yisufa Kapeeranauma maqusai ooqu maridanoo maa ufana oosana arasee faiqi anaasee maaqi qimasee qimannimarinau. Innaaruna ququsa adeediranoo maridanoommi, innee inneeqa mandainaina kiqari quandasee Anutufinnai noori ubeekaaqa.

*Noodaanna maree marusa naaroo ufafa.*

*(Mak 1:16-20; Ruk 5:1-11)*

<sup>18</sup> Yisufa Kapeeranauma maqusai maridanoo moo faasaana Kariree faruma afaiqara fidanoo qaara fasiqa nari qisafasaasa paqurinau. Miqanda nuqu Peetooroosa Andurusa mariqau. Miqanda firaa pateeuqa nammariqi aqimariqau. Misa noodaanna kai arimarusa mariqau. Misa ainaina doo mi ainainna faqaasa mariqau. <sup>19</sup> Yisufa miqanda paqurimasee qimannimino qinau. Innee qara qini faqa aniaqa. Innee qara maqee maqee noodaanna maree mariaqanda mariafanoo qini faqa anireeqa faiqi noodaannara foora mareeqee Anutuna ququsaki quqeeefaranoo. <sup>20</sup> Miqanda mi ufana iriseeqa nari pateeuqa ainaina faqa quqasee findimeeqee Yisuna faqa fiqau.

<sup>21</sup> Yisufa miqanda nifiqeenoo miqooqari faruma afaiqara fidanoo kaifa qaaraiqisa fasasa paqurinau. Miqanda nuqu Yameesa Yoohaneesa miqanda nikoona auqu Seebeedi. Sia nammari nimimaru Yoohaneefa marinau, mina amarafa marinau. Miqanda nari nikoona faqa kanuqaki ooqumaridaqa fafaa eendaki nari pateeuqa nammariqi aqusee noodaanna maraane qidaqa deedaqimariqau. Misauqa faqa noodaanna ainainirana faqaasa mariqau. <sup>22</sup> Yisufa naaramasoo faqa miqanda findifufaqa nari kanuqa faqa nari nikoona faqa minnisee Yisuna faqa fiqau.

*Kariree maqannaasa aurirasa andeeqannisoo ufafa.*

*(Ruk 6:17-19)*

<sup>23</sup> Mifa Karidaia maqa maaqa aiqama fiqau fiqau inoo nidanoo innaaruna ququsara fuka ufa qimannimino ninau. Aurimarusa faqa oosana oosana ainaina maree marusa faqa teerooqee marusa faqa idaaqamannimaqee marianu. <sup>24</sup> Miqi marufanoo mina auqu aiqamai daraaninau. Siria maqannaasa faqa aiqama iriqau. Iriseeqa amiqi marusa misa aiqama oosana oosana aurirana maree marusa faqa kaaqa nidaifi marusa faqa faiqi fueena naundurai keeqeemarusa faqa fuseenasana nari marusa faqa niku nisauku aadanusi marusa faqa aiqama Yisufinnai maraida muni quqee marufanoo Yisufa andeeqannisee marinau. <sup>25</sup> Mifa maqusa maqusa fimarufaqa faiqi anaasee moomoo suqumaree mina faqa fimariqau. Karidaia maqa maaqaindaraasa faqa qisaukuqara taikasee maqusa marunaki marusa faqa Yeerusaree maqannaasa faqa Yuda maqa maaqa afumaki marusa faqa Yooradanna nammari dinnafai marusa faqa suqu maree mina faqa fiqau.

## 5

*Amuaqunamusaa maridanoo qimannimu ufafa.*

<sup>1-2</sup> Mi fasannai mi aukuanu Yisufa faiqi anaasee moomoosa nari faqa fimarusa niqafamaseeno qufaqa kaqikaa amuaqunamusaa ooru nari faiqi namufaqa faiqi anaasee faqa fiqau fiqumma ooqu marifufanoo ufa maa qimaria amaana ufana qimanniminau.

*Anoona asasirafa.*

*(Ruk 6:20-23)*

<sup>3</sup> Faiqi moo fannoo nariara qinee qeeqara sia amanaikidee qimasee dadaaqi marifa dadaaqinaqa minannai kai andeeqasee marianauree qimarifa mifa uqanna anoona asasiranaki maridanoo. Innaaruna ququsara Anutufa amianinnanara asasidanoo.

<sup>4</sup> Noori runusee soofari mariasara foora marifa nari aaqaranara faqa faiqi aanaaseera faqa irisee oori runusee marifa mifa uqanna anoona asasiranaki mariannoo. Anutufa amiqi amiqirana amianinnanara asasidanoo.

<sup>5</sup> Reendeeni mariasa misa uqanna anoona asasiranaki marifaranoo. Anutufa nari innaarunai qumiasana nimianinnanara asasidaqa.

<sup>6</sup> Faiqí anaasee andeeqasee Anutuna iriranamau firaa iriranara aiqama irirana arusee uriqarara iriranee qimasee mi mau fimariasa misa uqanna anoona asasiranaki maridaqa. Anutufa misa dadaaqinaqa mi mau kai fifaranoo. Minara asasidaqa.

<sup>7</sup> Niqoonausara qimudaoo qimasee nifauue mariasa misa uqanna anoona asasiranaki maridaqa. Anutufa misara faqa qimudaoo qimasee nifauama nimaqaaninnanara asasidaqa.

<sup>8</sup> Anaaqí faiqíara foora nisakadiki sia ikairi marisa misa uqanna anoona asasiranaki maridaqa. Anutufa narí oori faqa narí marirana faqa uqannifiqaaninnanara asasidaqa.

<sup>9</sup> Tinoo taanoo rirana uqeerafaqa asoosana nimida fafaa qimariasa misa uqanna anoona asasiranaki marifaranoo. Anutufa misara qini faiqí namu fee qianinnanara asasidaqa.

<sup>10</sup> Anutuna iriranamau firana akiqara narinausa misa firaa asasiranaki marifaranoo. Anutufa narí innaaruna ququsa nimianinnanara asasidaqa.

<sup>11</sup> Faiqí anaasee qini duqu saara inniara fidiqaaidaqa naridaqa mandaikamma nimaqaidaqa oosana oosana mandainanara inniara unna qimarifaranoo. Miqifaqa innee anoona asasiranaki mariaqa. <sup>12</sup> Qini ufa saara arirana akiqara Anutufa innaarunnai firaa feefaurutia quqannimaqaifanoo maridanoo. Minara irisee sia noori runuqa, firaqoo asasiqa. Sia inni kai narirafa maridanoo. Ooqai Anutuna tamummaqara fasiaquqa faqa miqí kaimmidaqa narimariqau.

*Ooruku anoona faqa kaaqa qarana faqa mi ufafa.*

*(Mak 9:50; Ruk 14:34-35)*

<sup>13</sup> Qinee sia fifau inni maa ufana qimannimidaqa. Innee qini ufa irimariasa maa maqa maaqanasaa oorukuara foora mariafanoo faiqí anaasee aiqama adiafaamma nimaqaanifeera. Innee qini maa ufana rukiifaqa faiqí anaasee yai fee adiafaairana paqurifaree. Ooruku indeemariasa amiqira ooruku indasee maaqaki quqaidaqa. Manda ooruku indasee qafaafanoo mandaikifaqa doo aqusaafanoo madaapeekammidanoo. Innee qini maa ufana rukieeqa manda oorukuara foora marifara, manda oorukuara foora madaapeeki aqusaifaqa marifara.

<sup>14</sup> Innee qini ufa irimariasa maa maqa maaqanasaa qoomara foora mariafanoo. Maqusa moo fannoo aqanasaa maridanoo faiqí anaasee aiqamausa arumundari qafaqaq sia kukeeqanoo maridanoo, akooqoo maridanoo. Innee qoomara foora miqikai iqa, kaaqa qaidaqa akooqoo mariafanoo, qaidaqa arumuki faqa kaaqa qeemariafanoo.

<sup>15</sup> Faiqí moo fannoo rambi qumbiseenoo sia kukeeqarannai quqaani, uqeeraraoqoo quqaqainanoo aiqama maaqakinaasa faqa kaaqa qamannimaqaannoo. <sup>16</sup> Innee miqí kai iqa rambi fooqaana niqoonausaki kaaqa qamannimaqaifaqa misa inni andeeqaranara qafamasee quandafinaqa inneeqa innaarunnai nikoonara susuiaqpera.

*Mooseena sandufa kooroo ufa.*

<sup>17</sup> Innee iriaqa. Mooseena sandufa irimariafa faqa nikoonara tamummaqara fasiaquqa ufa irimariana faqa, sia mina rukiararau qumidau. Mi ufafa anoonaikianifeera qinee qumidaqa. <sup>18</sup> Simai, qini ufa iriaqa innaaaruna faqa maqa faqa firaa ainaina maridanoo. Mooseena sandufa faqa firaa ufa maridanoo sia dauni taikaannoo. Ati faqa kaqikaafa faqa sia uqanna taikaannoo kaqi uqanna mariannoo. Mooseena sandufa fifi inoo anoonaikinnagoqoo miqoo innaaruna faqa maqa faqa mi sandufana faqa doo miqoo kai taikaannoo. <sup>19</sup> Faiqí moo fannoo Mooseena sandufa aiqama muduka uqeeraidanoo ati kai rukiainafa faiqí moo aakapeenoo anee faqa miqiianne qinafa mifa innaaruna maqusa ureeqarafa mariannoo. Faiqí moo fannoo Mooseena sandufamau fidanoo naakapainafa mifa innaaruna maqusa uriqararafa mariannoo. <sup>20</sup> Innee iriaqa Mooseena sandufa akoofasauqa faqa Farisai amaana ufa qimariasa faqa misa irirafa sia andeeqanoo maridanoo sia uqanna innaarunnai fifaranoo. Innee faqa inneeqa andeeqara oosana misa nimana kai ooreeqaqa maridaqa sia amana innaarunai fifaranoo. Inni andeeqara marirafa misaindi firaqoo oorinaaqaramasee marinaqa innee amana innaaruna ququsaki fifaranoo.

*Aanoo iranara Yisufa qimannimu ufafa.*

<sup>21</sup> Yisufa kaqi qimannimidanoo qinau. Maasa Yuda maqannaasa qikeeku qikaaku ufa maaqimminoo maridanoo. Sia innee faiqí naruannee qimasee kuqa naruqa. Ya fee faiqí moo fannoo faiqí naruannee qimasee kuqannarinafa kootai maridana ufa mareennaranoo. <sup>22</sup> Mi ufafa miqimminoo marifaqa qinee minara maaqi qidaqa. Ya fee faiqí moo fannoo sia firaa ainaina kaifau koota maridanoofau, fifau narí akaqafasaara aanoo inafa maqusai kootaki ufa maraannoo. Ya fee faiqí moo fannoo fifau narí akaqara furufara midanoo mifoo qinafa mifa firaa kootaki maridanoo ufa maraannoo.

Ya fee faiqí moo fannoo fifau narí akaqara manda ufa qimamaqainafa karaambaiqa marinannai oonuraina ani idaki mara aquandoora. <sup>23</sup> Yisufa moo ufa qimanniminu. Innee inneeqa Anutuna amira ainaina aanda ufa ooni fee nana ainaina fee Anutuna amianauree qimasee amaana maqaki munuseeqa inniqa nikaaku Mooseena sandufa afaqadee qimasee imarundee iqa, Anutuna amianee qimaseenana aneenna akaqaafasaa faqa ani aqiranara irisee sia kaqi Anutuna amiaqa. <sup>24</sup> Aanda aina mina quqaseeqa oonurandee inneeqa nikaqaafasaa faqa moodaaqoo ufa qimaseeqa reendeenamma finaqa doo miqoo kai aanda ufa Anutuna qaindasaa quqaa.

<sup>25</sup> Yisufa moo ufa maaqi qimasee qimannimidanoo qinau. Faiqí moo fannoo aniara mandaikamma qimaqaanee qimasee ani kootai aqicee finana aanai munu dauni andeeqa taikkeenana aqoondikia. Sia andeeqa taikainanoo ani mareeqeenoo kiapana munu amiannoo. <sup>26</sup> Mifa ani mareeqee frisuaiqa aminanoo ani rumbaannoo. Simai, qini ufa iriaqa. Anee rumberanaki marinanoo ani numoo akiaqa aiqama uqanna taikafinana mikari kai misa ani iduku aiseefaranoo.

*Faiqí anaasee ummuarira ufa.*

<sup>27</sup> Maasa Yuda maqannaasa ufa maaqimminoo maridanoo. Innee sia moo fasiqa anaqa ummuariaqa. Mi ufafa miqinoo marifaqa qinee minara maaqi qidaqa Maasa Yuda maqannaasa qikeeku ufa maaqimminoo maridanoo. Innee sia moo fasiqa anaqa ummuariaqa. Mi ufafa miqimminoo marifaqa qinee minara maaqi qidaqa. <sup>28</sup> Qine e kuqaa ufa qimannimidaqa faiqí moo fannoo moo anaasee qafamasee iriranakiqari umee kai mina mararee qinafa anee doo aqamaseenana mina faqa aneenna amuqusakiqari manda o osana auqaananoo. <sup>29</sup> Ani asakuannai afu fannoo ani aaqaranaki quqaisainana mi afuna pitaqima aqua. Moodaa afaqa taikafinanoo amiqirafa mariannoo. Anutufa aiqama afaqa idaki aqusainanoo manda mariannoo. <sup>30</sup> Ani asakuannai asauku fannoo ani aaqaranaki quqaisainana mi asaukuna ateeka aqusaa. Moodaa afaqa taikafinanoo amiqirafa mariannoo. Aiqaama afaqa Anutufa idaki aqusainanoo manda mariannoo.

*Faiqí anaasee minnisara ufa.*

*(Mat 19:9; Mak 10:11-12; Ruk 16:18)*

<sup>31</sup> Maasa Yuda maqannaasa qikeeku qikaaku ufa maaqimminoo maridanoo. Faiqí moo fannoo narí anaqa minnisanauree qimasee sia fifau minnisannoo. Papiqasaa maa anaaseefa qini qinaqa mariuna doo minniseeqa miqi qimaseenoo mi papiqasaa akara rumeeqeenoo mi anaaseena amiannoo. Amiseenoo doo aqiaqanoo. <sup>32</sup> Mi ufafa miqimminoo maridanoo, qinee Yisusa minara maaqi qidaqa. Faiqí moo fannoo narí anaqa aqicee mariana sia ummuari mari anaaseena amiqimari anaaseena fifau aqicee marifa mi fasiqafa narí anaqa mareeqeenoo ummuariranaki quqaidanoo. Quqasaifanoo faiqí moo fannoo mi anaaseena maraifa mifa faqa ummuarammidanoo.

*Ufa rukiarana faqa nimana aqiqaranara faqa mi ufafa.*

<sup>33</sup> Maasa Yuda maqannaasa qikeeku qikaaku ufa maaqimminoo maridanoo. Faiqí moo fannoo Anutuna afusaa ainainiani qinafa kuqaa mi ainainna ia. Sia Anutuna afusaa unna qia. <sup>34</sup> Mi ufafa miqimminoo maridanoo, qinee minara maaqi qidaqa. Sia Anutuna afusaa ufa afeekaikamandee asuku uqeeraaqa. Sia mi oosanna araaqa. <sup>35</sup> Sia innaarunaira qimasee amana aqiqaa. Miqoo Anutufa ufaqira qaari miqoo ufiqinoo maridanoo. Sia maa maqa maqaanara qimasee nimana aqiqaaqa. Maa maqa maqaanakina Anutufa aiku ramaqai maqa maaqafa maridanoo, naaquqaani sia nimana aqiqaaqa. <sup>36</sup> Sia Yeerusareera qimasee nimana aqiqaaqa. Yeerusaree fira karaambaiqa Anutuna maqusa maridanoo, qimasaida qimariana minnisaaqa. Inneeqa nikaqa kikiqa ususaida nimana aqicee mariana sia miqiaqa. Innee amanee inneeqa kai moo fannoo eekara nikaqa auqida fee moo fannoo dunduqarira nikaqa auqida fee, sia amana auqifara. Anutufa kaimmauqinau. Naaquqaani sia nimana aqiqaaqa. <sup>37</sup> Minara innee eedoo qiaqera eedoo kai qiaqa. Innee qaoo qiaqera andeeqasee qaoo kai qiaqa. Anee moo ainaina kikiqa usinana aneenna amuqusa ookiqari mandainaina marinakiqari moo ainaina kikiqa ususee unna qiananoo.

*Akiaqara akiaqara qira ufa.*

*(Ruk 6:29-30)*

<sup>38</sup> Ooqeenaa Mooseena sandufa maaqi qimaqoofa marida qinee iridaqa. Faiqí moo fannoo moona afu dimbaqaiqaqa, faiqí firaasa ufa qimasee mina aru fasiqana narí afu dimbeefara. Kafaa moo fannoo asaukusamu moo oori arifanoo afai rufidifaqa faiqí firaasa ufa qimasee aru fasiqana narí afai rufidifaranoo. <sup>39</sup> Mi ufafa miqimminoo maridanoo, qinee Yisusa minara maaqi qidaqa. Moo fannoo mandaikammamaqainana

anee sia kaifaa quandafi narí mandaikammamaqaa. Moo fannoo ani aapaasa arinara sia aanoo ia, sia qaoo qia, dinni faqa kai quandasainanoo dinni faqa aruani. <sup>40</sup> Faiqí moo fannoo kootai ani afiqee munuseenoo kootammamaqaseenoo ani siuta raipaqu marainnana sia oori runua, moo faqa amiqirana raipaueeqee kaqi aabaa mina faqa amia. <sup>41</sup> Faiqí moo fannoo qafee faqaa fee sundia fee kiapa fee aniara qini faqa qini ainaina faqa sia feefauru amianaura kaqi qifiqeenana moo maqusai munuqisaannee qinana anee oori quqaseenana sia feefauruara iriseenana oori runua, mi maqusana fllaqaree moo maqusai eedoo qimasee munaisaa. <sup>42</sup> Faiqí moo fannoo munnimma fee qamunna fee qinana kaqi amia. Sia qaoo qia. Faiqí moo fannoo ani moo ainaina ufaasu qimiannee qinana sia qaoo qia, kaqimmamia.

*Namuqaara sia fidiagaai, nimuqusiani.*  
(Ruk 6:27-28,32-36)

<sup>43</sup> Misa ufa maaqinoo maruna iridaqa. Inneeqa niqoondiaa nimuqusaki nidiani. Inneeqa namuqaara fidiagaamiani. Misa ufa miqimminoo marifaqa minara qinee iridaqa maaqi qidaqa. <sup>44</sup> Inneeqa namuqaara faqa nimuqusaki nidiani. Innee qini ufa irinausa mina saara narifaqa misara faqa quandafi innaaru qiaqa. Anutufa misa amiqi amiqianifeera innaaru qimannisaaga. <sup>45</sup> Miqiqaa kai Anutufara foora marifaranoo. Mifa Anutufa miqiranara kai mifa qifanoo suani fannoo aiqamausa Anutuna namuqaaki mariasa faqa aqoondiki mariasa faqa aiqamatinai kaaqa qamannimaqaidanoo. Miqiranara kai Anutufa qifanoo aaku ridanoo andeeqarusa faqa sia andeeqarusa faqa ainaina ummaqusaafanoo kambiga nimaqaidanoo. <sup>46</sup> Innee inni nidinausa kai nidinaqa innee naqimmasee Anutufa mina akiaqara maasa feefauru qimiannoo fee qifaree. Sia nimiannoo. Innee miqinaqa unna qira takisa maree mariasa naanna reemariasa mariafanoo. <sup>47</sup> Innee inni nidirausara kai nidinaqa amana amana kai mariafanoo. Innee sia aanaamuru urinaaqaraida. Misa faqa narí aidi narí aidirana amana amana kai mariafaqa minara qinee inni qimannimiga. Inni namuqaara faqa nimuqusaki nidiani sia aqoondiaa kai nidiani. <sup>48</sup> Inni innaarunna nikoofa andeeqarana fiqararafa maridanoo. Sia namuqaa fee qidanoo, sia maana qini qiqoondi fee qidanoo aiqamausa amiqi amiqimannimaqaidanoo. Innee faqa miqi kai iqa mina aanna raaqera qidaqa.

## 6

*Amuqusinana qumee nimira ufa.*

<sup>1</sup> Yisufa narí faiqí namufaqa faiqí anaasee faqa maaqi qimaseenoo qimannimino qinau. Innee qini ufa irimariasa Anutunara iriseeqa moo amaana saika fee aqonausa dadaaqira fee mina auqarara sia aiqamausa nifusaa auqaaqa. Kukeeqasee reendeenamasee auqaaqa. Aiqamausa nifusaa mi ainainna auqainafa minara faiqí anaasee aiqamausa qiqafaqera miqinnaranoo. Miqinana Anutufa siamma innaarunai mina akiaqara ani feefauru amaqaannoo. Qumee kai aiqama ainaina narí Anutuna afusaa kai dadaaqinanoo Anutufa doo narí qafaida mina akiaqara ani feefauru innaarunai quqammamaqaannoo.

<sup>2</sup> Qaaraiki mariasa misa moo amiqira ainaina dadaaqinoo aqoonausee Anutunee nimiani qimaseenoo maqusa qambaana oonuree ukeena fuaqasee faiqí anaasee nifusaa dadaaqinaqa qiqafamaseeqa qimooqiaqera qimariasa doo nariqa miqoo taikaida miqidaqa. Innee sia misa naanna raaqa. <sup>3</sup> Innee moo amiqira ainaina dadaaqammamianeera qumee kai maqandanai amia, faiqí nifusaa qafee foora. <sup>4</sup> Qumee kai amimarinanoo inni nikoofa aiqama qumee ainaina qafee marifa mina akiaqara ani feefauru quqammamaqaannoo.

*Innaaru qira ufa oosana iroo ufafa.*  
(Ruk 11:2-4)

<sup>5</sup> Innee innaaru qidaqa misa qaaraiki mariasa naanna sia raaqa. Misa amaana maqaki kikiqamafidaqa qimariasa maqusa qambaana kikiqama fidaqa qimariasa innaaru qidaqa. Faiqí anaasee aiqama qiqafaqee qidaqa miqidaqa. Qinee anoona ufa uqanna inni qimannimidaqa. Doo misa miqiana akiaqara doo faiqí nimooqirana kai maraídaqa. Miqoo taikaida miqidaqa. <sup>6</sup> Innee innaaru qidaqa inneeqa maaqaki inneeqa kai keeqafinana kooqi ititaseenana qumee kai inneeqa nikoona innaaru qifanoo, aiqama ainaina kukeeqarana faqa qafee marifa ani qafamaseenoo mina akiaqara amaqaannoo.

<sup>7</sup> Innee innaaru qidaqa aanaamuru mariasa naanna sia raaqa. Misa sia ufara randaidaqa ufa fannoo urirara kai urirara kai qidaqa. Misa Anutufa maasara amiqimmasee irianifeera qimasaida miqidaqa. <sup>8</sup> Misa naanna sia raaqa. Inni nikoofa sia innee irammiriqoo kai iridanoo. Ooqai mifa irimarifa maridanoo. Minara fifau ufa urirara



kai urirara kai qidaqa sia innaaru qiaqa. <sup>9</sup> Innee innaaru qirara maaqi qimasee innaaru qiaqa.

Oo innaarunai qikoofa faiqi anaasee aiqama ani auquara uriqaramasee naaquqaani.

<sup>10</sup> Ani innaarunai ququsa maa maqanasaa kambiqaaani, innaarunai ani aiku asaku mariasa ani iriranamau kai andeeqasee fimariasaa maridaqa maasa maa maqanasaa qaraasa misa naanna ramasee mi iriranamau kai fuaqaana.

<sup>11</sup> Anee maqee faasaana maasa qimanasaa narana qimia.

<sup>12</sup> Akaqausa maasa manda ainaina qimimariana maasa minnisaanana miqikai inana anee faqa maasa manda ainaina akiagara maraqa qisa.

<sup>13</sup> Sia anee maasa rarisameeqeenana afeeka nimaniraqoo quqaqisaa. Manda fasiqa asaukuki marunnana anee Anutufa ugeereeqee kaqinni amiqiraqoo quqaqisaa.

<sup>14</sup> Yisufa mi ufanara kaifaa maaqi qimasee qimannimino qinau. Innee inneeqa niqoonausa faqa aanaamuru faqa manda oosana akiagara mininnisaifanoo innaarunai nikoofa inni manda oosana akiagara faqa minnisaanno. <sup>15</sup> Innee inneeqa niqoonausa faqa aanaamuru faqa manda ainaina sia mininnisaifanoo inni nikoofa miqi kai inoo sia innindi faqa mara aqunnisaanno.

*Aararee marina innaaru qira oosana mi ufafa.*

<sup>16</sup> Innee narana minnisee naararee marinaqa innaaru qidaqa qaaraikimariasaa naanna sia raaqa. Misa narana minnisee innaaru qiaqeeera noori runusee doona akiiseeqa maridaqa faiqi anaasee sia narana naidammiafoo qiaqeeera miqidaqa. Qinee anoona ufa uqanna inni qimannimidaga. Misa miqoo kai taikaida miqidaqa. <sup>17-18</sup> Innee narana minnisee innaaru qiaqeeera sia miqi iaqa. Innee nammari auqamasee qamunna amiqirana afisusee nikiaga auqamaseeqa naanaidara qidana faiqi anaasee ani qafamasee maaqi qifara, maafa sia narana minnisaaidanoo innaaru qidanoo miqi qiaqeeera miqinnaranoo. Anutufa kai inni nikoofa aiqama qumeendaraa ainaina faqa qafee marifa mifa kai qafamasee mina akiagara animmamaqaanno.

*Oosana oosana qumiasana innaarunai kai afeedira ufa.*

*(Ruk 12:33-34)*

<sup>19</sup> Innee maa maqa maaqanasaa sia aiqama qumiasana oosana oosana mareeqee quqaseeqa afeediaqa. Taafi aruani, ataku aruani, qooqoosa aukuanu, ummuara fasiqa aniree ummuara mareefaara. <sup>20</sup> Innaarunai kai qumiasana oosana oosana afeedi iseenana miqoo marinanoo sia taafi aruanno sia qooqoosa aukuanoo sia ummuara fasiqa mareefara amiqira qoo kaqi marianno. <sup>21</sup> Inni irirafa inni nimuqusa inniqa qumiasana mariqoo kai miqoo kai irirafa marianno. Minara innaarunai kai qumiasana afeediaqeeera qidaqa. Inni irirafa miqoo kai marianno.

*Afu afaaqa qoomarafaora maridanoo.*

*(Ruk 11:34-36)*

<sup>22-23</sup> Faiqi nifiriki niqafeemarifa afaaqa kaaqa qarafa maridanoo nari ainainara sia tatamaqifa kaqi paapaa idanoo nimimarifa. Faiqi moo fannoo oori akooqarafa nari ainaina kaaqa tatamaqimarifa maridanoo. Inni noori nifu miqifaqa innee asukunakinai mariafanoo.

*Nifaqasaaqaraa ainainara indee indee irana qaoo qira ufa.*

*(Ruk 16:13; 12:22-31)*

<sup>24</sup> Moodaa fasiqa fannoo sia amana qaara rakisiraqanda moodaa kari ainainamma nimaqaanno. Mifa indaaruaa rakisiranara akooqaanno moo rakisiranara aidianoo. Sia miqinoo mifa moo rakisiranasaa atooqaanno moo rakisiranana minnisaanno. Innee miqi kai iqa mariafaqa sia amana Anutunara faqa maqasaa qumiasanara faqa moodaanaki sia amana ainainamma nimaqeenaranoo.

<sup>25</sup> Minara qinee qimannimidaqa. Innee sia inneeqa kaqi mariranara nimuqusiaqa. Inni narana neemariana faqa nammari neemariana faqa qamunna afisimarianara faqa sia minara yai fee maraanau yai fee maraanau qiaqa. Qamunna narana oorudupirafa marinara sia minara irinanoo umaara raani. Anee sia quqimariananoo kaqi mariananara minara kai asasiaqa. Aneenna kaqi mariannanara mina akiagara firaa ainaina maridanoo narana faqa nammari faqa qamunna faqa oorudupirafa maridanoo. <sup>26</sup> Innee kaaqa qamunna naranara rimariasaa qinee nindafaidaqa. Qufini sia narana ummaqi-daga sia aiqidaqa, sia afeedidaqa, kaqi narana naidaqa. Anutufa misa nimidanoo. Anutufa ufini ririmma kaqikaa ainaina dapi ainaina narana nimino inani. Innee faiqi firaa ainaina mariafanoo uriqarafa mariafanoo inni faqa nimianno. <sup>27</sup> Amanee anee aneenna kuqirana amuqusiranannai aneenna marirana firarisamasee kisaqasaa marinnaree. Sia amana. Doo nanaree fifau naranara ummaara raidanoo fee.

<sup>28</sup> Nanaree fifau qamunnara yai fee maraanau yai fee maraanau qidanee. Innee nandaki kaasau taatuqee tamookeena qafamasee minara iriaqa sia ainainidaqa sia qamunna akunusee afisidaqa. Anutufa taatuqee qamunnara foora afisumaqaidanoo. <sup>29</sup> Ooqai Sooroomoonafa mifa amiqira qamunna qauesea reemaru qamunnana afisimarufa, koorā ainaina faqa afisimarufa, sia mifa maa kaasau taatuqeena afufeenaara imarindee sia mina qamunna uriqararafa marināu, mina qamunna ureeqarafa marināu, doo saa qamunnara ummaara raranara doo minnisaqa. <sup>30</sup> Kaasau qusau ainaina Anutufa qamunnara foora nimidanoo. Sia mina kisaqasaa marira ainaināu nimidanoofau. Maqee kasidanoo duna ateekeesee ida araseefandinna ainainafa maridanoo. Innee faiqī sia miqirāusa. Innee kisaqasaa inni aukuana marifara. Anutufa qusau ainaina ririmma qamunna nimidanoo inni faiqī fiqaramasee nimiannoo. Innee faiqī qamunna ainara kai nimuqusimarianara Anutunara kaqikaqoo kai irirana Anutunasaa rusi mariafanoo, aaqaida miqimariafanoo.

<sup>31</sup> Innee sia nimukaina maqiaqa nana qamunnee afisunauree nana naranee naanaree, nana nammari fee naanaree. Sia miqī qiaqa. <sup>32</sup> Anutuna ufa sia irimariasā misa miqī qidaqa. Innee sia misa naanna raqa. Innee inni innaarunai nikoonara kai iriaqa. Mifa faasai inni narana inni qamunna ainainara faasamma iridanoo. <sup>33</sup> Innee Anutuna ququsara faqa inni andeeqarafa Anutuna andeeqara fara foora marināu mi irirafa kai marinānoo niqinaaqa mara quqaseeqa fifanoo maasa narana aina faqa qamunna ainaina faqa Anutufa qimiannoo. <sup>34</sup> Minara qinee inni qimannimidaqa maqēera kai iriaqa. Duna faasaana ainainara sia irinanoo ummaara raani. Duna narī kai narī aiqama kambiqaaninna ainainara rakisiannoo. Faasaambaasaana maqee ainainara kai iriqa fuaqa qidaqa.

## 7

*Niqoonausa fifau nimanira oosana raqa qira ufa.*  
(Ruk 6:37-38,41-42)

<sup>1</sup> Yisufa qinau sia inneeqa niqoonausa aqaranara maqee maqee misa niqiaqa. Anee miqinanoo Anutufa miqī kai inoo ani aqaranara ani faqa aqianoo. <sup>2</sup> Anee mi aikana kai raquru nimanāqa Anutufa mi aikannai kai ani faqa raquru amiannoo. Anee nana aqira ufa faiqī anaasee akaqausa nimanānoo Anutufa mi ufanannai kai ainna rafaqafu amaqaannoo. <sup>3</sup> Anee nanaree aneenna akaqaafasaa afuki saqari arai marifanee ufa qidanee. Mee ani afuki muduka saqari akatia marinara anee sia fee iridanee. <sup>4</sup> Aneenna akaqaafasaa nana oosana maraidanee mai aniraināqa mee ani afuki saqari arai marina mara aquanee qidanee. Aneenna afuki firaa saqari akatia marinara siamma iri marianānoo. <sup>5</sup> Qaaraiki marianafa mandalki marianafa. Aneenna naaree aneenna afukina mee firaa saqari akatia marina mara aquseenana andeeqaseenana afu maqaseenana miqoo quandaqinana aneenna akaqaafasaa afuki kaqika saqari arai marinnana mara aqinanoo andeeqara oosana mariannoo.

<sup>6</sup> Innee amiqira narana faini nimidee. Sia nimimariafanoo. Faini sia mi amiqira naranna aminnanara iriannoo amina namaseenoo kaqī quandaqinoo ani ukaqa amiannoo. Aneenna afaqa auqira ainaina kuaraqa nimidee, sia nimi mariafanoo rakeekaaminoo doona ramasaannoo. Miqī kai masee innee furufarira fasiqa anaasee irimari ainaina sia nimiaqa. Sia irifaranoo. Faini kuara rakeeka inoo doona ramasaani.

*Sarauqimaria ainainara innaaru qinanoo amiannoo mi ufafa.*  
(Ruk 11:9-13)

<sup>7</sup> Anee ainainara sarauqinana Anutunara innaaru qinanoo ani amiannoo. Ainainara sarauqinana Anutufinnai randainānoo mifa uqafiqāni. Ainainara sarauqinana Anutuna kooqī arinanoo mifa kooqī rafaqamasee ani amiani. <sup>8</sup> Aiqa ireemariasā mareefaranoo. Randeemariasā paqurifaranoo. Kooqī arimarifa mifa kai kooqī paqurinoo maaqaki keeqafinoo irai ainaina maraannoo. <sup>9-10</sup> Innee faiqī nikausa qimannimidaqa inneeqa nimaaku aniara narana innaaru qifaqa ooni nimifaree. Sia ooni nimifaranoo inneeqa nimaaku noodaannara innaaru qifaqa amanee innee manda sakani nimifaree. Sia sakani nimifaranoo. <sup>11</sup> Innee manda oosana maree mariasa mariafanoo inneeqa faiqī namu innaaru qifaqa amiqira ainaina kai nimimariafanoo. Innaarunai nikoofa amiqirafa uqanna maridanoo minara innaaru qimarinausa minara narī firaaqoo amiqirana amana kai amiqira ainaina kai nimiannoo.

<sup>12</sup> Anee nana oosanaree aididanoo fee faiqī anaasee ani amifaree, anee amiqira oosana kai qimia qee qimarianānoo. Doo anee naaree miqira amiqira oosana kai faiqī anaasee maqee maqee kaqī nimia. Mooseena sandufa faqa tamummaqarāusa ufa faqa misa ufa anoona mi ufanaki kooroo inoo maridanoo.

*Tiqeera kooqiara faqa firaa kooqiara faqa minara qirafa.*

*(Ruk 13:24)*

<sup>13</sup> Innee innaaruna aatata fiqa tiqeera kooqiki keeqafi fuaqa. Idaki fimaria kooqifa firaa maridanoo. Mi aanafa faqa firaa kai maridanoo. Nianasaa mafi aqirafa firaaqoo maridanoo. Faiqi anaasee moomoosa maqee maqee miqoo fimariaqoo maridanoo. <sup>14</sup> Kaqi marira kooqi tiqeeraikinoo maridanoo, mi aanafa faqa tiqeeraikinoo maridanoo, afeeka aatata maridanoo. Faiqi anaasee moodaa moodaa mi tiqeera kooqina paqurida fimariafa maridanoo. Innee miqoo kai fuaqa.

*Unna amaana ufa qimariasa oosana qira ufa.*

*(Ruk 6:43-44)*

<sup>15</sup> Innee unna qira amaana ufa qimannimira fasiqauqara eerairiaqa. Misa maageena faini reendenira faini apata afisirafa aniraannoo, minara rufaaqa. Aundurai kaasau faini miqirafa maridanoo. Ukaqa nimiaandora minara rufaaqa. <sup>16</sup> Maaqimmasee misa oosana iriaqa. Naqimmasee saqari qafararee. Anee onureenana qaqamma kai qafaa. Moo saqari qafainanoo qaqamma iranoo marinara amiqira fee qinnaranoo. Moo saqari fannoo amiqira amanee maridanoo qaqamma siaifa, adusa maridanoo. Unna amaana ufa qimannimimaria fasiqausara miqi kai inoo saqari kikiqa usirafa maridanoo. Kamukamuna qaqamma fannoo amuka faqa sandasaa iranoo marinanee diqinnaree. Sia miqoo iranoo mariannoo. Faafisa qaqamma fannoo reereeroondaanasaa iranoo marinanee tiqinnaree. Sia miqoo iranoo mariannoo. <sup>17</sup> Amiqira saqari fannoo amiqira qaqamma kai iraidanoo. Mina dinni manda saqari fannoo manda qaqamma kai iraidanoo. <sup>18</sup> Amiqira saqari fannoo sia amana manda qaqamma iraannoo. Kafaa mina dinni manda saqari fannoo sia amana amiqirana iraannoo. <sup>19</sup> Saqari moo fannoo manda qaqamma adusa irifaqa ateeka idaraidaqa. <sup>20</sup> Amaana ufa qimannimimaria fasiqausa saqariara foora mariannoo. Minara qinee inni qimannimida. Amaana ufa qimannimimaria fasiqausa naaqa onuree misa marinna oosana nimarinna oosana qafaa. Qafamasee andeeqee mari fasiqanara amiqira amaana ufa qimari fee qiaqa. Mina dinni aaqee mari fasiqanara manda amaana ufa qimari fee qiaqa.

*Fifau Yisunara karaambaiqee qimariana.*

*(Ruk 13:25-27)*

<sup>21</sup> Yisufa kafaa maaqi qimasee qimanniminau. Faiqi fifau misa nookiqari qiniara karaambaiqee karaambaiqee qimariasa sia innaaruna ququsaki fifaranoo. Qini innaarunai qikoono iriranamau fimariasa misa kai innaaruna ququsaki keeqefaranoo. <sup>22</sup> Innaarunai keeqemaria aukuanafa kambiqafinaqa moomoosa maaqi qimasee qimannimifaranoo. Oo karaambaiga karaambaiga. Maasa maqasaa maridaqa aniara maasa ani amaana ufa qimannimiaafanausa maridaqa. Maasa fueenasana aruna ani auqu ramasaida innaaru qimasee mara aqunniseeunausa maridaqa. Maasa miqi mariafanausa maridaqa. Doo maasa ani auqu ramaseeqa moomoo firaa afeeka ainaina auqimariafanausa maridaqa, doo anee minara irisee maasa faqa innaaruna ququsaki mara quqaqisaa. <sup>23</sup> Misa miqi qifaqa qinee maaqi qimasee misa nifusaa qimannimiana. Qinee sia uganna inniara irimariafanausa. Doo qini qifusaqari fuaqa. Inni oosana eendaandirafa maridanoo. Doo fuaqa.

*Qaara maqara quandara ufa.*

*(Ruk 6:47-49)*

<sup>24</sup> Faiqi moo fannoo qini dookinaa ufa iriseenoo sanafaunaana anoona qinee qimaqau-namau kai andeeqasee fimarifa, mifa nana ainaina fooqaa fee maridanoo fee. Mifa amiqirafa irira fasiqa fooqaafa maridanoo. Nari maaqa atuna meemai ooniki mapukusee arusaifa maridanoo. <sup>25</sup> Mi maqafa marifanoo aaku firaa riri ifanoo nammari maaqa ameemaanai taatarunna mandi maree ooqufinoo ufai firaa uqinoo sia mi maqana rapee inoo. Ooniki maaqa usakaqoonara sia rapeeinou. Faiqi moo fannoo qini ufa irimarifa mi maqana akoofara foora mariannoo. <sup>26</sup> Faiqi moo fannoo maa ufana maa qinee qunufana qini dookinaana iriseenoo minnisee marifa mifa nukudasaa maaqa usakeemari fasiqafara foora maridanoo. <sup>27</sup> Mi maqafa marifanoo aaku firaa riri ifanoo nammari aqunoo maaqa ameemaanai taatarunna mandinoo ooqufinoo ufai firaa uqinoo maaqa arinoo rapeepaa inoo maqasaa pauta qifanoo maa rakeemaseenoo aqunoo. Qini ufa irisee minnisee reereeroondaana arakana aufeena faiqi mariasa mi maqana akoofara foora marifaranoo.

*Yisufa nariara Anutufara foora qimannimi ufafa.*

<sup>28</sup> Yisufa mi ufausa qimaqoosa faiqí anaasee moomoosa irufanoo naaquqee marufaqa qiqau. <sup>29</sup> Maa fasiqafa sia maasa uqannifiqee mari fasiqausara foora maridanoo. Maafa nariara Anutufara foora maridee qidanoo qimannimidanoo.

## 8

*Yisufa karoora arimaru fasiqana andeeqanau.*  
(Mak 1:40-45; Ruk 5:12-16)

<sup>1</sup> Yisufa amuaqu namusaa faiqí anaasee ufa qimannimiseenoo qumuroofaqa faiqí anaasee moomoo anireeqa Yisuna faqa aanaaqiana rumbarausa fimariqau. <sup>2</sup> Fimarufanoo faiqí moo fannoo karoora arimaru faqa Yisuna oorinni ani mapamufufanoo Yisuna qimaminau, oo maasa rakisirafa ani afeeka amana maridanoo qinee minara iridaqa. Aneenna irirafa eedoo qimaseenana qini karoora rukaqisaa.

<sup>3</sup> Yisufa mi ufanara iriseenoo narí asauku minasaa munduseenoo asammasee qinau. Eeoo doo qiananoo amana qíqa irirafa eedoo qidanoo rukammaisaanau.

Miqi qimasoofoano miqoo kai mina karoora taikanau. <sup>4</sup> Mina karoora taikasoofanoo Yisufa qimaminau. Simai sia uqanna moodaa fasiqa qimamia. Findifinana munu amaana maqasaa aanaiqikirana aneenna afaaqa karoora arimaruna uqafiqainanoo aiqumamasainana Moosefa ufa qimaqoomau ainaina mara maree amaana maqaki qaindasaa suqarana tatufinana Anutuna amia. Faiqí anaasee qafamasee doo mina karoora taikkeefoo qimasee sia aniara eeraiqaqeeera.

(Ooqai Moosefa karoora narinausa sia maqusai aniaqee qimaqoofa. Andandakinai kai nuaqee qimaqoofa. Faiqí moo fannoo narí karoora taikaseenoo amaana maqaki ani kikiqamafufanoo amaana maqasaa rakisirausa qafamasoofoano doo maqusai fuannee qufanoo doo kaifaa maqusai finau. Kaqikaa ainaina amaana maqaki Anutunara dufi dufi qimasee nimiseenoo doo maqusai kaifaa finau.)

*Roomma maqannaa Saideena ainainira faiqí andeeqoo ufa.*  
(Ruk 7:1-10)

<sup>5</sup> Yisufa miqooqari Kapeeranauma maqusai finau. Miqoo oonu marufanoo Roomma maqannaa sundia saideena moo fannoo Yisu finnai anireenoo dadaqiranara iramirinau. <sup>6</sup> Oo rakisirafa qini ainainira fasiqa maaqaki faiqaqee aurimarifaqa, minara ani qimamidaqa. Mifa aiku asauku pipisaaqa usufifanoo kuqíara foora inoo marifaqa. Aurirafa firaafa arimarifaqa, aupuree marifaqa. Amanee anee qini ainainira fasiqa idaaqamaqisaa.

<sup>7</sup> Miqi qimasoofoano Yisufa qinau. Amana qinee minni oonureeqa idaaqammianau. <sup>8</sup> Roomma maqannaa sundia saideena fannoo Yisuna findifinoo mina maaqai firanara iriseenoo qaoo qinau. Sia fua. Sia qini manda maaqaki anee keeqaanneera. Qinee aanaamuru fasiqa ooreeqarausa maridaqa. Anee qini uriqararafa qini maaqaki keeqafinaqa qisauruanoora. <sup>9</sup> Qini uriqarara sundia uqa moomoosa mariafaqa qinee misa nimeemaanai maridaqa misa ufamau fidaqa. Qinee akaqa sundia uqa rakisirausa maridaqa. Qinee ufa kai moora fuannee qimarunanoo mifa doo fidanoo. Moora ufannai kai qimamimarunanoo mi ainaina auqaidanoo. Anee Yisufa faqa maqasaa ainaina faqa aurirana oosana oosana ainaina faqa uriqararafa marianaqa qimamidaqa. Minara anee miqooqari kai maridana ufannai kai aurirafa taikaannee qinanoo qini ainainira fasiqa aurirafa taikaanno.

<sup>10</sup> Yisufa mi ufana iriseenoo tautufanoo aaquqoofanoo faiqí anaasee mina faqa rumbarausa fifusa qimanniminu. Qini ufa iriaqa. Maa Roomma maqannaa fasiqafa firaqoo qini saqarikidanoo qinee Isaraee maqannaasaki qeeqa maqannaasaki maqusa maqusa nidaqa sia moo maaqira amiqira fasiqa paquriqa, aanaamuru maridanoommi. <sup>11</sup> Kaifaa minara qianaara qini ufa iriaqa. Suani oosanaindari faqa amuqundari faqa nianaindari faiqí anaasee moomoo aanaamuru aniree innaaruna ququsaki keeqafi Abarahaamana faqa Isakeena faqa Yakooboona faqa ooguamarifi Anutuna qoomaqa sakasee neefaranoo. <sup>12</sup> Maa Isaraee maqannaasa innee Abarahaamana aiku asauku marunasa kaqi innaarunai keeqaanauree qimariasa maqee sia keeqeefaranoo Anutufa inni nifaqeeqeenoo madaana ai asukunaki aqunnisaanno. Miqoo innee niranafaqinaqa firaqoo faaqa quqasee nifai sandurifaranoo. <sup>13</sup> Miqi qimaseenoo Yisufa faiqí anaasee qimanniminoo quandaqinoo sundia saideena qimaminu. Doo aneenna maaqai fua. Aneenna irirana qinisaa rusisaannanara doo ani ainainira faiqí andeeqafinoo. Doo anirandee amaqa fua.

Miqi qimasoofoano mi kamuqoo kai mi aurira fasiqafa moosaa mariufa doo findifinau.

*Yisufa faiqí anaasee moomoo andeeqannimaqoo ufafa.*

*(Mak 1:29-34; Ruk 4:38-41)*

<sup>14</sup> Yisufa miqooqari Peetooroona maaqai finau. Oonuree qafoofanoo Peetooroona airaamaku anaasee aurimarinau. Afaaqa ididi marufanoo aurida faigaqee marufanoo. <sup>15</sup> Yisufa mina qafeenoo asauku qumaranau. Asauku qumaroofanoo aurirafa taikanau. Taikafufanoo mi anaaseefa aaqee findifinoo narana aina Yisuna aminau.

<sup>16</sup> Mi eenonnai mi maqusaanaasa nári aurimarusa faqa fueenaikimarusa moomoosa faqa nifigee Yisufinnai minni quqee mariqau. Minni quqasoofanoo Yisufa ufannai fueena niqiqoofaqa quqasee fiqau. Aurusa Yisufa misa aurirana faqa taikannisanau. <sup>17</sup> Taikaseenoo ooqeenaa tamummaqara fasiqa moo auqu Eesaia mina ufa anoona kambiqanau. Mifa ooqai Yisufa sia kambiqooqoo maaqi qimaseenoo Yisunara akara rinau.

Mifa maasa auriranara faqa maasa kudoosaaparana faqa mara aquannoo. Maasa aurira ummaara nari kai mina uqera qumarannoo.

Miqi qimasee akara rinau.

*Yisuna faqa fifandinausara maa ufana qinau.*

*(Ruk 9:57-62)*

<sup>18</sup> Moo faasaana nammari afainni marufaqa faiqí anaasee aiqama suqu maree Yisuna qafaanee qimasee ani marida qafee mariqau. Yisufa faiqí anaasee moomoo tatusee animarufanoo nindafeenoo nari faiqi namu qimanniminau. Doo uqeraaqa doo inni saimbaqa kanuqaki keeqafi nammariki fitaqa maree muqafainai nianai fida innisaimbaqa kai mariaqa. <sup>19</sup> Misa findifi uqereee marufanoo faiqí moo fannoo Mooseena sandufa irimarufa Yisufuqoo anireenoo qimaminoo qinau. Oo qini karaambaiga anee yatinai fee maqusa maqusa finaqa qinee faqa ani faqa fuanaura, sia minnisaanau.

<sup>20</sup> Miqi qufanoo Yisufa nari maaqi qimasee qimaminau. Anee qiniara amiqira maaqaki faigee mari fee qidanee qini faqa firaree qidanee. Kaasau fainuqa onaamarai faigee mariasa maridaqa ufinuqa aanaamuki faigee mariasa maridaqa. Qinee faiqí nimaaku yai fee qeeqa qikiaqa rumasee fee faigaanauree sia faiqara qoo marisa maridaqa. Doo qini faqa finnaree.

<sup>21</sup> Miqi qimasooofanoo Yisuna faiqi namuqi qari moo fannoo anireenoo qinau. Qinee ani faqa fuanaura kaqikaa qoo mariseeqa qini qikoofa kuqirarammi marifaqa. Mifa kuqufinaqa akundamasee ani faqa fuanaura. Amanee qinee miqianauree. <sup>22</sup> Yisufa mina ufa iriseenoo maaqi qimasee qimaminau. Maqee uqanna qini faqa ania. Naaruara kuqiranaki fifandinausa misa kai nári niqoonnana akundeefaranoo.

*Yisufa ufai faqa nammari faqa qaoo qufanoo taikanau.*

*(Mak 4:35-41; Ruk 8:22-25)*

<sup>23-24</sup> Yisufa miqi qimaseenoo kanuqaki akaramafufaqa mina faiqi namu mina aanaaqiana akaraqau. Akaramafufaqa kanuqaki nammari amuaqumau fimarufanoo Yisufa minaki afaaqa umooqukufanoo faifufanoo nammari qambaanaai oonuroofanoo ufai firaafa uqinoo nammari amakaurinoo kanuqa aundurai keeqanau. Kanuqa teeqi taaqufaqa Yisuna faiqi namu mina qafamasee kanuqa namufaqa nammariki ukuqnaana qimasee kaaqa rufiaqau. Yisufa sia minara irinau mana mana faigaqee marinau. <sup>25</sup> Mina faiqinamu rufiamaree Yisufinnai oonuree afauramasee faaqa ridaqa qimamiqau. Oo maasa karaambaiga maasa nammariki ukuqnaidaqa kuqirarammidaga. Anee maasa qumaree qumbaqqinnisaa.

<sup>26</sup> Yisufa misa ufa iriseenoo qimanniminau. Oo kaaqa innee fifau rufiee mariasa. Sia qinisaa irirana rusimariasa mariafanoo. Miqi qimaseenoo findifufanoo ufai faqa nammariara faqa qaoo qufanoo nammari faqa ufai faqa kasoomafinoo dai qimafinau. <sup>27</sup> Miqi qufaqa ufai faqa nammari faqa firaagoo uqiufa kasoomafufaqa mina faiqinamu naaquoofaqa qiqau. Maa fasiqafa naqira fee maridanoo fee. Ufai faqa nammari faqa mina ufa irisee eedoo qidaqa.

*Faiqí aunduraindaraa afaannauqa niqiqoofaqa kuarauqa naundurai keeqaqau.*

*(Mak 5:1-20; Ruk 8:26-39)*

<sup>28</sup> Miqooqari nammari dinnafainai nianai Kadarenee maqa maaqa munu kanuqa fannoo raquraminau. Maqasaa aqufufaqa mi maqusanaindari faiqí qaaraqanda aniqau. Faafasaaqa fueena miqanda naundurai maruqanda, faiqí madikee marunnai maruqanda, faiqí anaasee aiqama miqandara rufiee maruqanda mariqau. Faiqí nari-maruqanda mariqau. Faiqí anaasee miqanda maruqoo sia fimarusa, kaaqa miqandara rufiee mariqau. <sup>29</sup> Miqanda Yisufunnai aniroofanoo naundurakiqari afaannauqa fannoo maaqi qimasee faaqa rumasee Yisuna qimamiqau. Anee Anutuna amaaku marianafa

anee nanaree anidaneë anee nanaree maasa soodaaidaneë anee nanaree kaqiqoo kasaacaqai anireenaneë maasa idaki aqūqiseennaree.

<sup>30-31</sup> Kaqikaqoo nianai akoosaqa kuarauqa eemani naida moomoosa misaqa naidaqa mariqau. Afaannauqa faiqi naundurakiqari kuarauqara Yisuna qimamiqau. Anee maasa diqiqainaqa amanee kuarauqaki keeqaanauree. <sup>32</sup> Miqi qufanoo Yisufa qinoo. Eeoo amana, doo innee misaki keeqafuaqa. Yisufa niqiqoona iriseeqa aiqamausa mi fasiqaganda naunduraindari rafudamakufaqa doo kuarauqaki keeqafiqau. Keeqafufaqa kuarauqaindi munari minari ufaqa ameemai sandee ooqu fiqa nammari farumaki bururu qufaqa aqūfufaqa aiqama kuqu taikaqau.

<sup>33</sup> Kuarasaa rakisimaru fasiqausa mina qafamaseeqa naaquqoofaqa quqasee sandamaqaraasiqa maqusai kaimbiqau. Maqusai anireeqa Yisunara faqa afaanna naundurari keeqeemaru faiqi qandara faqa kuarauqara faqa faiqi anaasee aiqama qimannimiqau. <sup>34</sup> Misa iriseeqa mi maqusaanaasa faiqi anaasee aiqama tatufaqa nammaraifainni Yisufuqoo ooqueeqa Yisuna qafamaseeqa qiqau. Doo maasa maqa maaqaki sia ania. Doo see moosaa fua. Maasa aniara rufiadaqa.

## 9

*Yisufa aiku asauku pipisaaqa usirana andeeqa aisanau.*

*(Mak 2:1-12; Ruk 5:17-26)*

<sup>1</sup> Miqi qufanoo Yisufa nari faiqi namufaqa sipaki kafa keeqafufanoo nammariki fifufanoo nari maqusai Kapeeranauma nammari amuaqumau oonuranau. <sup>2</sup> Oonuroofaqa faiqi mi maqusainandiri moo auruna aiku asauku pipisaaqa usufufanoo maruna aindusu mareeqa Yisufuqoo maree aniqau. Misa irirafa Yisunaki marunara Yisufa mina qafamaseenoo quandaafinoo aurira faiqi qimaminau. Sia rufiaqa rufiaqa ia. Afaaqa quqaa. Doo qinee ani mandainaina numoo minnaseeqa.

<sup>3</sup> Mooseena sandufa irimarusa miqoo marusa mi ufana iriseeqa maaqi qimasee nari qimami nari qimami qiqau. Maafa nariara Anutusa maridee qidanoo. Akasaa. Maasa faiqi firasaa faiqi miqi qiasa kuqa nari marunasa maridaqa.

<sup>4</sup> Yisufa misa ufa iriseenoo quandaafinoo maaqi qimasee qimanniminau. Naqi fee qifaqee mi manda irirana inneeqa nitikuraki maraqa nidee. <sup>5</sup> Innee qiniara maa fasiqafa sia numoo taikarana amana fee qidee. Qinee moo firaa afeekainaina inni nifusaa iananoo anoona kambiqainaqa qafamaseeqa qiniara kuqaa faiqi numoo taikarana amanammifoo qifaranoo sia kambiqainaqa unnammifoo qiaqa. <sup>6</sup> Anutufa kuqaa uqanna numoo taikarana qini qiminoo. Miqi qimaseenoo quandaafinoo pipisaaqa qusirana qimaminoo qinau. Aneenna gaindasaaqari findifinana aneenna qaari qamunna raqandaammamaareenana doo akumaree amaaqa fua. <sup>7</sup> Miqi qufanoo mi aurira fasiqafa findimaqee nari amaaqai doo finau. <sup>8</sup> Faiqi anaasee misa mina qafamaseeqa niminaandi raqeeqa nisausi kambiqoofaqa nimudaani qumooqūkamambufafa miqoo Anutufa nari afeeka Yisuna amunara minara oonumafi irisee amooqidaqa asasiqau.

*Mataioona aaroofanoo Yisuna faqa finau.*

*(Mak 2:13-17; Ruk 5:27-32)*

<sup>9</sup> Yisufa miqooqari moosaa fimarufanoo faiqi moo fannoo mina auqu Mataioo nari oopisaki marufanoo Yisufa qafanau. Mi oopisana takisa aqimaru oopisaneki marinau. Takisa maree maru fasiqausa ummuari marusa misa moomoo maraseeqa akaqana nariara quqasee dinni ati kaamanna amimariqau. Minara faiqi anaasee kaaqa nikooqee marinau. Mataioofa mi munnimma ainainna maree marufa marinau. Yisufa Mataioona qafeenoo aaramaseenoo qinau. Doo qini faqa ania. Mataioofa Yisuna ufa iriseenoo findimeeqeenoo mina faqa finau.

<sup>10</sup> Yisufa marikinoo Mataioona maaqai mina faqa narana narara finau. Yisufa nari faiqi namufaqa mina maaqaki oqumarifi narana neemarufaqa faiqi maqusa maqusa munnimma takisa maraqanusa faqa oosana oosana mandainaina maraqanusauqa faqa Mataioona faqa ani oqumarifufaqa narana naqau. <sup>11</sup> Oqumarifufaqa narana nee marufanoo Farisai amaana ufa qimarusaqa anirama qafamasee Yisuna faiqi namu qumee naaramasee qimannimiqau. Naqi fee qifanoo fee inni rakisirafa manda fasiqauqa faqa ummuariqanuasa faqa naidanoo fee.

<sup>12</sup> Yisufa misa ufa iriseenoo quandaafinoo maaqi qimaseenoo nari qimanniminau. Sia amiqirausa tutaqa finnai fidaqa aurimariasaa kai tutaqa finnai fidaqa. Maa namusa auruasara foora maridaqa qinee tutaqausara foora maridaqa. <sup>13</sup> Innee tamummaqara fasiqa akara anoonara oonu randasee qafaaqa. Mifa maaqi qimasee akara rinau. Qinee Anutusa sia tatufira aandau aina fee oosana oosana ainaina fee qimiranara dididanoo, faiqi anaasee nariara nariara nimuqusifafa nifau ee mariana minauqara qini dididanoo,

Anutufa miqi qimaqoofaqa qinee Yisusa mimau fidaqa maaqi qidaqa. Sia qinee andeetee mariasa naarararee qimasee qumu maridaqa innee manda fasiqa anaasee fee qimasee nifaqee mariasa misa Anutufinnai ubeekaaqera naarararee qimasee qumuafanausa maridaqa.

*Naarara maridaqa innaaruqira oosanara irammiriqau.*

*(Mak 2:18-22; Ruk 5:33-39)*

<sup>14-15</sup> Mi kamusaqa Yoohaneefa nammari nimimaruna faiqinamu Yisufinnai anireeqa irammiriqa qiqau. Maasa Yoohaneefa nammari nimimaruna faiqi namufaqa Farisai amaana ufa irimariasa misa faiqi namufaqa nari narana minniseeqa naararee marifaqa Anutunara innaaru qidaqa. Ani faiqi namu naqi fee ifaqee sia miqidee kaqi narana naidee qufanoo Yisufa iriseenoo qimanniminu. Amundara fasiqa faqa aqoondi namufaqa maqusai ani marinaqa naqimasee naararee marinee kaqi marifaree, sia miqifaranoo اساسمasee narana suqasee neefaranoo. Minara qini faiqi namu qini faqa amundara fasiqara fooqaasa maridaqa اساسمasee qini faqa naidaqa maridaqa. Kaqikaa qoo mi anaaseena afaaqi qini rumbamaree munu darusaifaqa mikari kuqaa nimuqusa mandaikinaqa naararee marinaqa innaaru qifaranoo. Yisufa Yoohaneena faiqi namu kaqi qimannimidanoo qinau.

<sup>16</sup> Ooqeenaa qamunna anaqinoo marina fuka qamunna ati qumaree sia nauraa qamunnasaa akunirafa maridanoo. Fuka qamunna ati fannoo nauraa qamunna doo firaqoo anaqiannoo.

(Yisufa maqasaa maru aukuaana misa uainna nammari tatisee aandau apatannai auqira taquki adiasee kisaqaqasaa maaqaki quqasoofanoo marinau. Marikinoo amiqinoo marufaqa mina mara maree maqee maqee neemariqau. Uainna nammari misa maqee maqee nee maru nammari faqinuu. Mifa aandau apatannai auqira taquara qufaqa, maasa qeeqa ufakiqari taqu uqannee qidaqa.)

<sup>17</sup> Yafee faiqi moo fannoo nauraa tunda taqu maraseenoo fee fuka nammari adiaannoo fee. Sia miqiannoo. Ruqia finanoo aiqama nammari qumiqaraandoo. Fuka taqu andasee fuka nammari minaki adiasainanoo mina amana mariannoo.

(Yisufa nari fuka ufa fuka taquara faqa qamunnara faqa mina kikiqa usinau. Farisai amaana ufa faqa Yoohaneena amaana ufa faqa amana maridanoo ooreeqanoo maridanoo. Qini fuka ufa uriqararafa maridanoo. Misaindi sia amana qinindi fabaqa irafa mariannoo.)

*Yuda maqannaa uriqararana araaamuna andeeqaisanau. Kisaqaqandaika imaru anaasee Yisuna qamunna ati auqanau.*

*(Mak 5:21-43; Ruk 8:40-56)*

<sup>18</sup> Yisufa Yoohaneena faiqi namu ufa qimannimi marufanoo amaana maqasaa rakisirafa moo fannoo Yisufinnai anireenoo oorindari mapamufufanoo Yisuna qimaminu. Doo qini qiraamuna maqee uqanna doo kuqinoo. Anee anireenana aeenna asauku minasaa mundusainanoo mifa findifuaani. <sup>19</sup> Miqi qufanoo Yisufa findifinoo nari faiqi namufaqa mina faqa finau.

<sup>20</sup> Fimarufanoo anaasee moo fannoo aanaaqianaindari oonureenoo mina qamunna ati ireeda auqanau. Mi anaaseefa kisaqaqandaikufa qisauquqara taikasee qikunni ooqu qaaraqanda aukuaana marasoofa marinau. <sup>21</sup> Mi anaaseefa nari kai qimmirinau. Qinee oonuree mina qamunna atikai umee auqamasanaanoo qini fidika taikaannoo. Miqi qimasoofa maridanoo oonuree mina aanaaqianaindari faiqi anaaseekiaqa qumee oonuree mina qamunna ati kai ireeda auqanau. <sup>22</sup> Mina qamunna auqamasoofanoo Yisufa quandaqinoo qafamaseenoo qinau. Qini qiraamuna sia rufia afaaqi quqasee maria anee aeenna irirana qinisaa rusiranannai kai ani aurirafa doo taikkeenoo, mifa kai. Miqi qimasoofofanoo miqoo kai mi anaaseena aurirafa taikanau.

<sup>23</sup> Taikafufanoo Yisufa miqooqari fifiufanoo amaana maqasaa rakisirana maaqa marunnai mina araaamuna quqinoo maru maqanaki oonureenoo faiqi anaasee moomoosa tutuqidaqa ikifaafau qidaqa ufireena aina fuaqaidaqa iki raqeamarufanoo Yisufa oonu nindafanau. <sup>24</sup> Oonurama nindaqeenoo qimanniminu. Doo raudamaki fuaqa, aiqama fifainiaqa maa manaqafa sia kuqinoofau faiqaqee idanoo. Miqi qimaseenoo quandara ufa qimannimisoofaqa misa quandaqifa naanaidara uteeti qidaqa qiqau. Unna qia. Doo kuqinoo maridanoo. <sup>25</sup> Yisufa misa aiqama niqiqamaseenoo mina maaqaki keeqafinoo mi manaqana asauku qumaroofanoo doo findifinuu. <sup>26</sup> Miqooqari aiqama maqusa maqusa fiq fiq iqa marusa Yisufa mi manaqana findifumasoo ufaqa aiqamai daraanufaqa iriqau.

*Nifu qimbaraqanda andeeqannisanau.*

<sup>27</sup> Mi manaqafa findifufanoo Yisufa moosaa fimarufanoo faiqí qaaraqanda nifu dimbaraqanda aanaaqiana fidaqa faaqariqa fida qiqau. Oo Dafidina ati anee maqanda qiqafainanoo ani amuqusinana maqanda dadaaqia.

<sup>28</sup> Yisufa maaqaki keeqafuafa mi fasiqaqanda mina aanaaqiana keeqaqau. Keeqafufanoo Yisufa irammirinoo qinau. Inneeqara qini afeekara nanee fee qídee. Inniqara nifu andeqaranara qiniara amanefee fee qimasee anídee, sia amanaikiannoo fee qídee qufafa miqanda qiqau. Eeoo maqanda aniara amanafee qidaqa.

<sup>29</sup> Yisufa mi ufana iriseenoo qimanniminau. Inneeqara qiniara amanafee qianara miqí qianara sia nipatiani andeeqannisaanau.

<sup>30</sup> Miqí qufanoo mikari kai miqanda nifu andeeqannisanau. Miqanda nifu maqasoofanoo Yisufa maaqí qimasee qimanniminau. Nimambaina qimaseenoo qimanniminau. Doo inneeqara sia uqanna faiqí anaasee akaqausa qimannimiaqa. Maa ufana kukeeqammasaaqa.

<sup>31</sup> Miqanda mi ufana iriseeqa minufa rukiasee maqusai oonureeqara faiqí anaasee aiqama atinai qimannimiqaniquau.

*Ufa ititarana ufa rakeemma aisanau.*

<sup>32</sup> Miqanda fufanoo mi maqusanaasa moo fasiqa afiqee aniqau. Ufa sia qimaruna aanna apeequnirana afaanna faqa mina aundurái maruna afiqee aniqau.

<sup>33</sup> Minisoofanoo Yisufa mina aundurakinaa afaanna aqigamasoofanoo afaanna fannoo raudamakufanoo mi fasiqafa ufa andeeqasee qinau. Miqíuafaqai faiqí anaasee mina qafamasee nimudaani qumooqukkammafinoo nifaaqa sia qumaroofaqa mina qafeeqa qiqau. Isaraee maqanna sia ooqai maa ainainafa maruna, maqee kai.

<sup>34</sup> Miqí qufafa Farisai amaana ufa irimarusa minara kaukaata qimaseeqa qiqau. Yisufa afaannauqa firaannanai faiqí naundurakinaa afaannauqa niqíaidanoo.

*Maqusa maqusa nidanoo Anutuna ququsara qimanniminau.*

<sup>35</sup> Miqooqari Yisufa maqusa maqusa kaqikaa maqusa firaa maqusa amaana ufa innaaruna ququsaki fimaria ufana qimanniminooninau. Kaqikaa aurirana faqa firaa aurirana faqa andeeqannisanoooninau. <sup>36</sup> Yisufa faiqí anaasee nindafamaseenoo firaqoo amuqusufanoo qinau. Boo faiqí anaasee sia rakisirafa marisa, kaqí fifau tia maridaqa. Sipsipauqa fooqaasa rakisirana siaisa maa fasiqa anaaseesa maridaqa. Kaasau fainiara foora marida, aukuaana aukuaana sia amiqimmasee marida, mi manda kaasau faininara rufiaqa rufiaqa kaimmidaqa, aukuaana aukuaana miqí kaimmida marida, dadaaqirana siaisa rakisirana siaisa maridaqa.

<sup>37</sup> Yisufa mi ufana qimaseenoo quandaqinoo maaqí qimaseenoo ufa qinau. Doo afuqakinaa narana tataqinoo rairainoo maridanoo. Dadaaqí aiqira fasiqa sia amanaiki mariafaqa. <sup>38</sup> Minara innee suana akoofinnai innaaru qiaqa. Innaaru qifanoo Anutufa aiqifandinaua niminauqa dadaaqiqa suana aiquaqeeru. Dadaaqiqaqai innaarunai ufa qimannimifaqa innaaruna ququsaki fuaqeeru suana kikiqa usuqoofanoo maridanoo.

## 10

*Qisaukuqara taikasee qiku qaaraqanda marasee naaramammareembinau.*

*(Mak 3:13-19; Ruk 6:12-16)*

<sup>1</sup> Yisufa narí faiqinamu qisaukuqara taikasee qikunni ooqu qaaraqanda naaramma quqaseenoo Anutuna afeeka nimufaqa faiqí anaasee naunduraki maru afaannausa faqa misa aurirana oosana oosana faqa teeroouqee marusa faqa aiqama aiqaraanifee qimasee afeeka niminau. <sup>2</sup> Mina faiqí namu qisaukuqara taikasee qikunni qaaraqanda ooqu marasee misa nuqu maaqimmasee mariqau. Indaaru Simoona mina auqu moo Peetooroofa faqa mina akaqa Andurufa faqa moo fasiqa Yameesafa faqa mina akaqa Yoohaneefa faqa miqanda nikoofa Seebeedifa marinau. <sup>3-4</sup> Moo fasiqa Firipifa faqa moo fasiqa Paatooroomaiufa faqa, moo fasiqa Toomasifa faqa moo fasiqa Mataioofa faqa mifa takisa maree marufa faqa moo fasiqa Yameesana amarafa mifa Arifaiusana amaaku faqa moo fasiqa Tadiusafa faqa, moo fasiqa Simoonafa sia indaruqaa Simoonafa mina amarafa (mifa nári Isaraee maqanna nári kaamanaikiqaeera qimaru fasiqafa) mifa faqa moo fasiqa Yudasifa faqa, mifa Keerioota maqusaindaraafa mifa kai Yisunara qumee queeqaaninafa maridanoo.

*Yisufa niqiqoofaqa maqusa maqusa qimannimiqa fiqau.*

*(Mak 6:7-13; Ruk 9:1-6)*

<sup>5</sup> Maa namusa qisaukuqara taikasee qikunni ooqu qaaraqanda marasee Yisufa Isaraee maqa maaqaki minakina niqíqeenoo qimanniminau. Anaamuru maqusai sia fuaqa. Samaria maqusai faqa sia fuaqa. <sup>6</sup> Isaraee maqannaaki kai fuaqa. Misa



sipsipara foora fifau faafau qiçanuasa misaki kai fuaqa. <sup>7</sup> Innee fidaqa maaqi qimasee qimannimiaqa. Innaarunai quçusa fannoo adeediranoo maridanoo. <sup>8</sup> Miqi qimasee qimannimiseeqa misa aurirana taikannisaqaq misa kuçirausa findifumannisaqaq ka-roora faqaasa rukannisaqaq afaanna naunduraki marisa afaçannisaqaq. Sia innee feefaurummasee maraasa. Kaqi maraasa. Doo miqi kai iqa kaqi nimiaqa. <sup>9</sup> Munnimma sia aakaugaki rua. Kaqi fua. <sup>10</sup> Sia uqa tafu maree fua. Sia qaara siuta maraqa. Sia niku aanaamu maraqa. Sia saunu maraqa. Ainainira faiçiuqa ainainidaqa minakinaa narana marasee naidaqa. Minara innee ainaini mariafanoo minakinaana naqa. Sia narana ainaina maree innee faqa fuaqa. Kaqi samu fuaqa.

<sup>11</sup> Innee moo maçusai oonureeqa irammiriaqa yafasiqa fee amana maridanoo maasa mina faqa marianauree çiaqa. Misa qimannimifaqa mi maçusanaki marinna kamuçoo mi fasiçana faqa kai mariaqa. <sup>12</sup> Mi fasiçana maqaqi keeqafinana qimamia. Anutuna amiqi amiçira asooarafa inni faqa mariiani. <sup>13</sup> Mi maçanakinaasa amiqi amiçifana ani ufa sainanoo misa faqa mariiani. Sia amiqi amiçifana aenenna afaçoqqa çira ufa oonurandee maree ania. <sup>14</sup> Yamaçusanai fee yamaçannaaki fee sia inni ufa irisee sia inni amiqi amiçifaqa innee mi maçusanakiçari raudamaki fiqa kookooma afaqa qumaree ninaamarasee fuaqa. <sup>15</sup> Qinee mi maçusanaasara anoona ufa qimannimidaqa. Numoo aukuaana aninaqa inni ufa sia irifandinna maçusanaasa Anutufa naridanoo sia nifauaanoo firaçoqo naruanoo. Soodooma maçusa faqa Koomoora maçusa faqa misa naridanoo kaçikaçoqo nifauaanoo narirafa ooreeqanoo mariannoo.

*Yisuna ufasaara narirana faqa rumbarana faqa kambiaçani fee ufa.*

*(Mak 13:9-13; Ruk 12:12-17)*

<sup>16</sup> Iriaga, qinee inni niçiqanaqa innee sipsipara foora kaasau faini çambaana inni niçiqaidaqa. Faiçi oodaa mariafanoo faiçi moomoosa inni narusee naaçaammidammia. Minara innee sakani maaso aanna reeqa reendeenamasee nuaqa. Nakipurunara foora kaqi muçuriqa marida, reendeenamida mariaqa. <sup>17</sup> Innee çini ufa maraqa nidaqa faiçira rufiaqa. Misa çini ufasaara innikinaana akaçusa mara maree Kansooro marinnannai munu quçasee inniara manda fasiqa fee qimaseenoo koota-mannimaçeefara. Akaçausa amaana maçaki inniara Anutuna ufa rukiee mariafaçee qimasee sandasamu moomoo kari inni nifaqa ateekeefaranoo. <sup>18</sup> Misa inni akaçusa kiapafinnai maree fifaranoo, mandaikammida ufa rukiee marifaçee unna qimasee nifiçee kiapafinnai fifaranoo, karaambaiaç marinnai kootara inni maree fifaranoo. Çini duçusaara miçifaranoo. Misa oosana oosana mandainaina çini ufa taikaanifeera miçimma nimaçeefaranoo. Anutufa qumee misa faqa aanaamuru mariasa faqa çiniara iriaçera miçimannimaçaannoo. <sup>19</sup> Misa inni rumbamaree nari mariannai nifiçee fifaqa naçi fee çianau naçi fee çianau sia çiaqa. Mikari kai çini qikoona maraçuna fannoo qimannimina ufana mi ufana kai qimannimiaqa. <sup>20</sup> Nana ufa fee innee miçoqo qifaree sia innindi inni nikoona maraçuna fannoo innikiçari ufa çianoo.

<sup>21</sup> Misa inniara çinisa atooaranara fidiagaammifaranoo. Nari nikaçaafasaaça kuçaqeera nari uqeçee nari uqeçee ifaranoo. Nari çisakoosa faqa nari uqeçee nari uqeçee ifaranoo. Faiçiuçaindi quandasee nari ninausa nikausa kuçaqeera uqeçee ifaranoo. <sup>22</sup> Çini duçura aiçamausa inni fidiagaama nimaçaannoo. Yafa yafee kaqi maraqa fifi iqa taikara aukuaa paçurinausa, qinee mikari misa çumara asumu mariranaki quçaanaura. <sup>23</sup> Misa inni moo maçusaki narifaqa innee moo maçusai sandeeqa çiniara miçoqo qimannimiaqa. Qinee anoona ufa qimannimidaqa. Innee Isaraee maçusa maçusa aiçama çiniara qimannimarifaqa sia aiçama qimannimi taikainnaçoqo qinee faiçi nimaaku kaifaa innaarunaindaru çumuanaura.

<sup>24</sup> Faiçi moo fannoo sia nari uçannifiçeemaria fasiçana amana maridanoo sia mina uriçararafa maridanoo ureeqarafa maridanoo. Ainainira fasiqa faqa sia mina rakisirana uriçaranoo maridanoo ureeqanoo maridanoo. <sup>25</sup> Faiçi qinee uriçararafa ufa qimannimi marunasa daruseeqa miçi kaimmiqa çini faiçi namu çini ureeqarasa inni narifaranoo. Faiçi misa rakisirana arusee mina faiçi namufaqa miçi kai iqa narifara. Misa nikoonara afaannee qimasee faiçi namuara faqa miçi kai iqa afaannee qifaranoo. Misa mi manda ainainna oosana oosana çini qimifara, miçi kai iqa inni faqa nimifaranoo.

*Sia nifaqa arimariasara rufiaçee ufafa.*

*(Ruk 12:2-7)*

<sup>26</sup> Minara sia misara rufiaqa. Aiçama ainaina maçee rafaçaafinoo marifa kasooçaçee Anutufa innaarunai aiçama kooroo iannoo. Aiçama kukeeqara ainaina faqa kasooçaçee Anutufa aiçamausa nifusaa kooroo iannoo. Minara sia maçee faiçi anaasee inniara mandufa qifandinanara rufiaqa. <sup>27</sup> Qinee asukunai kukeeqafi qimannimunnana mi ufana faasaana paasoosamasee qimannimiaqa. Nupinupi qimasee qimannimunnana

findi fiqa mi ufana fifi qimasee firaqoo qimannimiaqa. Sia faiqira rufiaaqa. <sup>28</sup> Faiqí nípata kuqa narifandinausa sia misara rufiaaqa. Misa inni naunduraindaraa nimana sia amana kuqa narifaranoo. Moo fannoo Anutufa inni nípata faqa nimana faqa amana idaki kuqa narirana amanaiki marifa minara kai rufiaaqa. Faiqí nípata kai narifandinnanara sia rufiaaqa. <sup>29</sup> Manda ufini ririmma moomoo maridanoo. Kaqikaa ainaina fifau ainaina maridanoo. Mina feefauru sia maridanoo. Mi kaqikaa ufnifina sia fifaufau maqasaa aqufidanoofau, innaarunai nikoofa irimarifanoo maqasaa aqufidanoo. <sup>30</sup> Innee sia fifau rufiaaqa. Inni nikiqaqaa asaasi ririmma Anutufa nisaana rumaqaisa mariafanoo. <sup>31</sup> Minara sia rufiaaqa. Inni feefauru uriqaranoo maridanoo. Dapi ufini feefauru sia maridanoo.

*Yisunara faiqí nifusaa kooroo imariasara qinau.*

*(Ruk 12:8-9)*

<sup>32</sup> Yafa yafee qini Yisusara faiqí nifusaa sia rufieenoo qinee Yisunaindi fee qinafa qinee minara innaarunnai qikoona afusaa qinindi fee qianaara. <sup>33</sup> Yafa yafee qiniara faiqí anaasee nifusaa asaurusee sia qinee Yisunaindi fee qimasee kukeeqainafa qinee minara faqa innaarunnai qikoona afusaa kukeeqamma amaqaanaara.

*Asooarafa sia mariannoo aanoo irafa mariannoo.*

*(Ruk 12:51-53; 14:26-27)*

<sup>34</sup> Innee qiniara tinoorirana asoarana mara maree maasa maqasaa fasiqa anaasee qimiannoo fee qida fee. Qinee sia tinoorirana asoorarau qumidau duru feefara qumidaqa. <sup>35</sup> Faiqí namu nári nikoona ameesa uqiranara qumidaqa. Fuka aanaaseeuqa nári ninoonara ameesa uqiranara qumidaqa. Fuka anaaseeuqa nári ninaakuquara nimeesa uqiranara qumidaqa. <sup>36</sup> Nari faqa moodaa maqaki mariasa nari mi fasiqana fira namuqaa marifaranoo.

<sup>37</sup> Yafa yafee mina anoona akoonara firaqoo aididanoo fee qiniara ooreeqara fee qidanoo fee, mifa sia qini qimanasaa, sia amana qini faqa fifaranoo. Yafa yafee mina amaaku faqa araamuna faqa firaqoo aididanoo fee qiniara ooreeqara fee, mifa faqa sia qini qimanasaa sia amana qini faqa fifaranoo. <sup>38</sup> Kasooqaaqee misa aunirira saqarisaa qini darifaranoo. Yafee qini ufasaara qini dariranaki paasoosamandee fuaninafa, mifa qini qimanasaa mariannoo, qini faqa fuannoo. Faiqí anaasee moo fannoo qinee kuquannanaki rufiasee sia finafa, mifa sia qini qimanasaa mariannoo sia qini faqa fuannoo. <sup>39</sup> Faiqí anaasee moo fannoo nari kaqi mariranara tatamaqamandeenoo rakisi qumarainafa mi marirafa kai kukupamaki aqufuannoo. Faiqí anaasee moo fannoo qiniara iriseenoo nari maqee marirana aquaninafa nari maqee marirana maraannoo.

*Niqoonausara nimuqusimariana akiaqara Anutufa quqannimaqaannoo.*

*(Mak 9:41)*

<sup>40</sup> Faiqí anaasee yafee moo fannoo inni dadaaqinafa mifa qini faqa qigoondikidanoo. Qini dadaaqinafa qini qikoona qini diqigoona mina faqa aqoondikidanoo. <sup>41</sup> Faiqí anaasee yafee moo amaana ufa nimimarinna fasiqanara oo Anutuna ufa qimannimimari fee qimaseenoo dadaaqinafa Anutufa amaana ufa nimimarinna akiaqara innaarunai feefauru amiannoo. Faiqí anaasee yafee moo fannoo andeeqara fasiqara oo andeeqara fasiqa mari fee qimasee dadaaqinafa Anutufa minara andeeqara fasiqa mina feefauru innaarunai amaqaannoo. <sup>42</sup> Faiqí anaasee yafee moo fannoo maa faiqí anaqaqisa asoora nammari neemariana niminaqa qinisaa atooemariasa minara irisee amiqi amiqimmasee niminaqa, kuqaa anoona ufa qimannimidaqa, mifa sia uqanna mina akiaqara sia maraannoo. Anutufa amiannoo.

## 11

*Yoohaneefa nammari nimimarufa nári faiqí namu Yisufinnai niqiqanau.*

*(Ruk 7:18-35)*

<sup>1</sup> Yisufa mina faiqí namu qisaukuqara taikasee qikunni ooqu qaaraqanda marasee mi ufana oosana oosana qimannimiseenoo miqooqari misa maqusa maqusa nidanoo qimannimimarinau.

<sup>2</sup> Yoohaneefa nammari nimimarufa karabusaki maridanoo asauku mundirana oosana oosana irinau. Iriseenoo amiqimmasee irianau qimaseenoo nari faiqí namu Yisufinnai niqiqanau. <sup>3</sup> Yoohaneena faiqí namu Yisufa maruqoo oonuree irammiriga qiqau. Anee oqai tamummaqara fasiqa kambiqannoo fee qimaqoofa anee mifee maridane. Anee Anutuna asauku mundira fee maridane. Maasa mooree afeesianauree. <sup>4</sup> Qimasoofoano Yisufa qinau. Maaqoo innee animariaqoo ainaina auqaunannara faqa ufa qimannimunnannara faqa minara kai oonuree Yoohaneena qimamifanoo mifa qiniara iriannoo. <sup>5</sup> Nifu dimbarausa maqannisaidaqa, niku eendirausa amiqimmannisaunaqa nidaqa.

Karoora narimariasa rukannisaidaqa. Naaqoo auniraua ufa iridaqa. Kuqimariasa findifumannisaidaqa. Kudi fasiqauqa qinee amiqira fuka ufa innaarunai ququsa ufa misa qimannimidaqa. Mi ufana oonuree Yoohaneena qimamifanoo mifa qiniara iriannoo. <sup>6</sup> Moo fannoo sia qiniara qaara irirana irimarifa mifa asasimarifa mariannoo. Qinisaa mikimmaki marifa sia asasiannoo. Mi ufana faqa Yoohaneena qimamiaqa.

<sup>7</sup> Yoohaneena faiqi namu fifufanoo Yisufa faiqi anaasee Yoohaneena qimannimianu. Fifau maqa maaqa kaasau aadana maqa maaqa innee Yoohaneena qafarara fiqa innee nana qafararee fiqee iqau. Fifau andanda kasinaree fiqee iqau. Sia uqanna minara fiqau. <sup>8</sup> Innee nana qafararee andandai fiqee iqau. Faiqi amiqira qamunna afisimarina mina qafararee fee qimasee fiqee iqau. Oo sia uqanna minara fiqau. Miqiraua sia kaasau maqa maaqaki maridaqa karaambaiqa maaqaki amiqiranaki maridaqa. <sup>9</sup> Nana qafararee innee fiqee iqau. Anutuna tamummaqara fasiqa qafararee fee qimasee fiqee iqau. Kuqaa Yoohaneefa Anutuna tamummaqara fasiqafa marufa ooqu qafaqau. Sia misa kai, Yoohaneefa tamummaqaraua uriqaramasee tamummaqarafa marifaqa innee qafaafanoo. <sup>10</sup> Ooqeenaa akara minara kai qidanoo. Mi akaranaki Anutuna maaqi qimasee Yoohaneenara qidanoo.

Iriaqa. Qinee qini ufa maree marinnana ani Anutuna asaku mundirana ani oorinni aqiqaanauranoo mifa ani aana ani oorinni afisumaree finana anee mi mau fuanneera.

<sup>11</sup> Akarakinaa ufa miqi qinoo marinara qinee Yisusa anoona ufa qimannimidaqa. Anaasee faiqiuqaindi moomoo maridaqa. Yaanaasee fee Yoohaneena uriqararana maqanoofee inau. Sia moo fannoo mina uriqararana maqanau. Innaaruna ququsa mariasa ureeqaraua misa kai Yoohaneena uriqararaua maridaqa. <sup>12</sup> Qinee anoona ufa qimannimidaqa. Yoohaneefa nammari nimimari aukuanaindari faiqi anaasee rakiranannoo maqusa maree mariandee miqi kaimasee nimudaanai qimasee innaaruna ququsaki keeqarara qimasee innaaruna ququsa maree mariasa maridaqa. <sup>13</sup> Anutuna ooqeenaa tamummaqeemaru fasiqausa faqa Mooseena sandufa faqa misa ooqai oosana arasee kasooqagee kambigaaninnanara tamummaqasee fifufanoo Yoohaneenasaa taikaqau. <sup>14</sup> Misa Eeriaafa anirarammifoo qufanoo doo Yoohaneefa mifa ani maridanoo, innee mi ufanara nidinaqee irifaree sia fee nidinaqee sia irifara. <sup>15</sup> Aaqoo fainafa iriaqa, sia aaqoo fainafa sia iriaqa.

<sup>16</sup> Maqee marunaua nanara foora maridaqee fee qianauree. Misa maqusaki faiqi uqaindiara foora maridaqa. Misa moosara maaqi qimasee naraqí naraqí qidaqa. <sup>17</sup> Maasa ukeena fuagaunaqa innee faqa sia dadaaqi idi ree mariafanoo. Kaifaa maasa quandaftiga iki anai fakiki raunaqa sia mina faqa dadaaqi mariafanoo. Innee dapikammí mariafanoo. <sup>18</sup> Misa miqi qimasee miqi qiafaqa qinee Yisusa minara maaqi qidaqa. Maa maqee marunauasaki miqimminoo maridanoo. Yoohaneefa anireenoo uainna nammari faqa narana uqanna faqa sia nanau, dapi narana kai noofaqa innee minara afaanna keeqaffanoo miqidanoommifoo qiqau. <sup>19</sup> Qinee faiqi nimaaku anireeqa narana faqa nammari faqa naunaqa innee qiniara manda fasiqa marida, kaaqa neemariifa, kaaqa nammari neemariifa, kaaqa ummuarimaria takisa munnimma mareemariasa niqiqeemariasa aqoondiki marifa, mandoosana mareemariasa aqoondiki marifa. Innee qiniara miqi qimariafaqa qinee minara maaqi qidaqa. Yoohaneefa nammari nimimarifa faqa qinee faqa maaqanda Anutuna iriramau andeedqasee fimarunanoo mina anoona koorooidanoo. Innee maqee mariasakiqari sia inni ufa fannoo anoonaikidanoo, qaaraikammida miqimariafanoo.

*Qaara maqusanaasa sia ufa irimarunara niqinai.*

*(Ruk 10:13-15)*

<sup>20</sup> Mifa miqi qimaseenoo mi maqusa maqusana misaki nimarufaqa misakina aurirana andeedqannisanoo nidanoo firaa naaquqara ainaina firaa ainaina auqeeamarufaqa qafeemariqau. Qafamasee irisee sia naundura quandaqau. Mi maqusa maqusana maaqi qimasee Yisufa nuqu ramasee niqinai. <sup>21</sup> Koorasinna maqannaasa maqusa maaqa namufaqa qinee inniara qimudaqo qidaqa inni narirafa firaafa mariannoo. Beetasaida maqannaasa maqusa maaqa namufaqa inniara faqa qimudaqo qidaqa. Inni narirafa faqa firaafa mariannoo. Taia maqusa faqa Sidoonna maqusa faqa aanaamuru aamina mariasa qinee misakina miqimandee faiqi sia amanaiki maria ainaina misakina auqanaqau naundura dauni quandaqini. Misa danda doona nifaqai nikaqaki akuseeqa nári mandoosanara ikiraqasee minniseefau dauni quandasee qini ufamau fini. <sup>22</sup> Qinee kuqaa anoona ufa inni qimannimidaqa. Firaa numoo aukuaana anirainanoo Anutuna Taia maqusanaasa faqa Sidoonna maqusanaasa faqa naridanoo kaqikaqoo afuaano. Innee Koorasinna maqusanaasa faqa Beetasaida maqusanaasa faqa sia

afauaannoo firaqqoo inni naruannoo. <sup>23</sup> Kapeeranaumma maqusanaasa innee inneeqara uriqararausee qimasee inni maqusara faqa unna qimasee innaaruna amana kai maridee qimariasa. Kasooqagee Anutufa ani mindari rarisammeeqeenoo idaki aqunnisaannoo. Soodooma maqusanaasa mandoosana maree marufanoo Anutufa narinau. Qinee Soodooma maqusaki faiqi sia amanaiki mari ainaina inni Kapeeranaumma maqusaki auqaafandee iananoofau maqee mi maqusafa kaqi mariqini. <sup>24</sup> Firaq koota aukuaana Soodooma maqusanaasa narirafa mariannoo kaqikaqqoo rauqi nimaqaannoo. Kapeeranaumma maqusanaasa inni narirafa fraatia uqanna sia rauqi nimaqaannoo. Qinee inniki maridaqa qinee qunnufana sia irimarianara inni narirafa firaafa mariannoo.

*Naundura asoarana faqa idoarana faqa nimiraree qinau.*

*(Ruk 10:21-22)*

<sup>25</sup> Mikari Yisufa innaaru qimasee qinau. Qini qikoofa, maa maqana faqa innaaruna faqa rakisirafa dufi dufi ani ufa qinee maqee maqee maa ufana qimannimimarunnaara irirana faqaasa nifusaa rafaafunniseenana kaiqeesa nifusaa kooroo mannimaqee mariannoo. <sup>26</sup> Eedoo dufi dufi anee qini qikoofa ani aidirafa miqimminoo maridanoo.

<sup>27</sup> Aiqama ainaina qini qikoofa qiminau. Yafa yafee amaakuara iridanoo fee sia moo fannoo. Akoofa kai minara iridanoo. Yafa yafee akoonara iridanoo fee, sia moo fannoo amaaku kai minara iridanoo amaaku fannoo nari kai irisee uqannifiqarausa misa minannai qini qikoonara iridaqa. <sup>28</sup> Aiqama kadaapiri mariasa faqa naudura qumaara firaana maree mariasa faqa, qinee unnannai anirifaqa qinee naundura idoarana nimianauranoo.

<sup>29</sup> Qini qumaara qainda dinni qumaree nifaariki rusisee qini dookinaa ufa maraqa. Qinee reendeenirausa qimuqusa muqufi ubiqarausa maridaqa innee qini ufa oosana marasaifaqa naundura asoarana adoarana nimianaura. <sup>30</sup> Qini qumaara qainda siamma akumu aruannoo sia qumaara marinara asoarana adoarana paqurifaranoo.

## 12

*Nari amaanasaa Yisuna faiqi namu sakuma ruqoosasee naqau.*

*(Mak 2:23-28; Ruk 6:1-5)*

<sup>1</sup> Mi aukuanna moo Saririqasaa Yuda maqannaasa amaana faasaanasaa Yisufa nari faiqi namu faqa maqusamau uita ququsa qambaana fimarufanoo mina faiqi namu naararee marusa nari oosana marasee uita ruqoosasee rafarisee fuka naqa fimarigau. Miqunara sia ummuarammidammiafooo qimarigau, aiqamausa nari sandamau fida miqimmi mariqau. <sup>2</sup> Farisai amaana ufa qimarusa misa nindafamasee Yisuna ufa amianneera ufa quandasee qimamiqa qiqaau. Qafaa ani faiqi namu Saririqa sandufa rukiaidaqa narana unaku naidaqa Mooseefa minara qaoo qinau. Naqi fee ifaqee miqi fee.

<sup>3-4</sup> Yisufa iriseenoo qinau. Innee aaqaida miqi qimariafanoo Dafidina akara sia fee asaanari fee. Mifa faqa mina faiqi namufaqa naararooqafaq misa Anutuna amaana maaqaki Nooba maqusai marunaki keeqafufaqa amusarara feemu Anutuna amimaru feemuna naqau. Misa miqi mandee sandufa rukiaqau. Mi feemuna Anutuna maaqaki rakisirausa kai naaqee qimaru feemuna marasee naqau. Innee sia fee mina asaanari fee.

<sup>5</sup> Innee ooqeenaa sandufa moo sia fee asaanari fee. Anutuna maaqaki aanaiqiki mariasa misa Saririqa sandufa maqee maqee rukiaidaqa amaana maqaki ainainidaqa mariasa numoo sia maridaqa miqidaqa. <sup>6</sup> Qineemma ufa qimannimidaqa. Qinee Anutuna amaana maqa uriqararausa maaqqoo maridaqa. Misa qini ufa irisee sakuma ruqoosasee naifanoo amana mariannoo. <sup>7</sup> Akara moo maaqimminoo maridanoo.

Qinee Anutusa inniara inneeqa niqoonausara nimuqusiinaqa nifauaqa minara qini didiannoo. Qaindasaa maqee maqee aandau tatufirana qimiranara qini qikooqaidanoo.

Mi akarana miqi qimasooqafa qinee Yisusa maaqi qidaqa innee mi akarana oosanara irifaqau qeeqa faiqi namuara naararee marinara innee nimuqusifaqaq sia niqini. <sup>8</sup> Qinee faiqi nimaaku amaana faasaanasaa faqa mina sandufausa faqa uriqararausa maridaqa. Qinee amaana faasaanasaa sandufa sia rukiaaqee qunaqa sia rukiaidaqa. Qinee qunaqa naidaqa numoo sia maridanoo.

*Nari amaanasaa asauku sufirana andeeqanau.*

*(Mak 3:1-6; Ruk 6:6-11)*

<sup>9</sup> (Mooseena sandufa nari amaana Saririqa sia kaqikaqqoo ainainiqee qinau. Yisuna aukuaana misa mi mau kai fimarigau.) Yisufa sakumara qimannimiseenoo miqooqari Yisufa misa faqa misa amaana maaqaki keeqanau. <sup>10</sup> Minaki asauku sufirafa misa faqa

keeqafi marinau. Farisai amaana ufa irimarusa mi asauku sufiranara Yisuna irammiriga qiqau. Maasa amaana Saririqa sandufa amanee amaana Saririqasaa faiqí moo fannoo mandaikirana andeeqaanauree aaqaida miqianauree. Misa Yisunara eedoo qinaqa Mooseena sandufa rukiaidanoo fee qimasee qumarasee aruanee qimaseeqa miqí qiqau.

<sup>11</sup> Yisufa minara iriseenoo qimanniminau. Saririqasaa firira aandau madikaki aquffifaqá innee umbaqídee sia fee umbaqídee. Sia amaana irisee kaqi umbaqi mariafanoo. <sup>12</sup> Nana fannoo fee uriqaranoo maridanoo fee. Aandau fee faiqí fee. Aandau sia uriqaranoo maridanoo, faiqí kai uriqaranoo maridanoo. Minara maasa sandufa fannoo mandaiki marifa aurimarifa Saririqa amaanasaa amiqi amiqimannimaqarana amana maridanoo qidanoo. Miqi qimaseenoo asauku sufrana qimaminau. Asauku uqua. <sup>13</sup> Miqi qufanoo mi fasiqafa asauku uqinau. Uqusoofanoo asauku amiqinau, dinni asaukuara foora amiqinau. <sup>14</sup> Farisai amaana ufa qimarusa qafamaseeqa misa aanoomandee raudamafuqaqu suqufi narí qimami narí qimami qiqau. Naqimmandee maasa Yisuna aruanauree qimariga.

*Anutufa rusadeesamasee maroo fasiqanara qidanoo.*

<sup>15</sup> Yisufa mi ufana iriseenoo findimeeqee moosaa finau. Faiqí anaasee aiqama mina faqa fufanoo aurimarusa mandaikimarusa aiqama andeeqannisanau. <sup>16</sup> Andeeqanniseenoo aranaiqí qimaseenoo qimanniminau. Qumee uqannandaqa kukee uqanna saaga sia qinee andeeqasaunnara kooroo qiaqa. <sup>17</sup> Miqi qimasoofoanoo tamummaqara fasiqa Eesaia mina ufa anoona kambiqaanau. <sup>18</sup> Mifa ooqai maqí qimasee Yisunara akara rinau.

Qafaa, qini dadaaqira faiqí, qinee mina utaaqamamaqaunafa. Qinee minara qimuqusidanoo qini daundura minara asaidanoo. Qini maraquna mina aakufuanoo. Mifa aanaamuru mariasa faqa kiapausara foora andeeqannisaanno. Sia Isaraee maqanna kai.

<sup>19</sup> Mifa sia dapi ufa oosana oosana firaqoo qianno. Sia faaqa rumasaida qianno. Maqusaindari sia mina ufa irifanoo.

<sup>20</sup> Mifa eendira saka sia ramooramaa mamaree raudaanno. Amannaikiasa mandainaina rafaaga fimarinaru sia mifa aanoommasee qimannimifa fifimandee reendeenamandee naakapee marifa. Mifa miqimmamaree reendeenamamaree fifi inanoo numoo aukwana raquramiseenoo miqoomma uriqaranoo.

<sup>21</sup> Minaki maqusa maqusa aanaamuru mariasa minaki doo irirana rusifaranoo. Eesaiafa miqí qimasee Yisufa sia qumu maru aukwana Yisunara akara rumaqoofa maridanoo.

*Unnaqimaseeqa Beeraseeburanannai afaanna afaqaidee qiqau.*

*(Mak 3:20-30; Ruk 11:14-23)*

<sup>22</sup> Faiqí moo faafasaaga aundurari marufanoo afu dimbeeqeenoo ufa faqa sia qimaruna faiqí anaasee afieeqa Yisufinnai minisoofanoo andeeqanau. Andeeqasoofanoo mi fasiqafa afu maqeenoo ufa qinau. <sup>23</sup> Faiqí anaasee aiqama qafamasee naaquqoofa qiqau. Maanaree maasa afeesi marunafa mifee. Dafidina atikiqari findifuanina fee qimaqoofa doo maana mifee.

<sup>24</sup> Farisai amaana ufa qimarusa mi ufana iriseeqa qiqau. Maafa afaanna rakisirana Beeraseebura minannai afaanna faiqí naunduraki marina aqiqaidanoo.

<sup>25</sup> Yisufa misa ufa iriseenoo qimanniminau. Moo maqusanaasa furufariqa raina rainirau, doo mi maqa maaqafa dapikammianoo. Moodaa oosana mariasa mi oosanausa rainarainiga maqasaa aquffifanoo. <sup>26</sup> Sia Sadannafa narí kai quandaki narí aqqaanno. Miqidanoofau narí raineenoofau mina afeeka fannoo maqasaa aqufiqini. Miqinanoo naqimmasee mina aiku asauku afeekaikamandee marifaree. Sia afeekaikifara furufariqa dapikammifaranoo. <sup>27</sup> Innee Farisai amaana ufa qimariasa inni faiqinamu Sadannannai fee afaanna aqqaaida fee Anutunannai fee afaanna aqqaaida fee. Anutunannai kai afaanna aqqaemariafanoo. Inni faiqí namu miqianannai inni manda ufa qaoo qidanoo. Qinee Beeraseeburanannai quandafi afaanna nári niqoonausa niqqaananoo siammamanaikianno. Qinee Anutuna maraqunannai kai afaanna aqqaeeqa. <sup>28</sup> Qinee Anutuna maraqunannai afaanna aqqaananoo doo Anutuna amiqira ququsa fannoo doo innisaa radiqiseenoo ititannimaqeenoo.

<sup>29</sup> Naqimandee moo fannoo Sadanna maaqakinna ainaina indaa iraree. Maaqa akoona naaree rumbasee mina ainaina indaa ia. Maa aaqoo afu furufarirana maaqa akoona doo qinee rumbaseeqa mi maqanakinaana doo qinee mareeqa.

<sup>30</sup> Faiqí moo fannoo sia qini qiqoondi marirafa mi fasiqafa qini namuqaa maridanoo. Sia qini dadaaqida oonu suqu ani suqu imarifa mareeqaida aquraaruki marifa maridanoo. Miqi kai inoo faiqí moo fannoo innaaruna ququsara sia faiqí anaasee suqu

quqainafa, mifa furufarammida nifaqanoo nidanoo. Qinee suqu quqaunaqa innee Farisai amaana ufa irimariasa furufaramida nifaqee mariafanoo. <sup>31</sup> Misa Yisunara Sadannanannai afaanna niqiqeefoo qunara, Yisufa minara iriseenoo qimannimidanoo qinau. Oosana oosana manda marirana faqa manda ufa faqa Anutufa amana mina numoo faiqi mininnisaannoo nari maraqunara aqirana minara kai sia mininnisaannoo. <sup>32</sup> Anutuna maraquina aqira ufa mina akiaqara Anutufa sia mininnisaannoo. Maa kamusaqa marira aukuaana faqa naaru kamusaqa marira aukuaana faqa sia uqanna amana Anutufa mina akiaqara mininnisaannoo. Qinee faiqi nimaakuara diqira ufara minara Anutufa amana mininnisaannoo.

*Faiqi ufa fannoo naundurakinaa oosana kooroo idanoo.*

*(Ruk 6:43-45)*

<sup>33</sup> Saqari amiqirafa maridanoo mina qaqamma faqa amiqirafa kai maridanoo. Saqari mandaikirafa maridanoo mina qaqamma faqa mandaikirafa kai maridanoo. Saqari qaqamma fannoo kai saqari anoona kooroo idanoo. Miqi kai iqa inni Farisai amaana ufa qimariasa inni manda ufa oosana manda saqari qaqamara foora maridanoo. <sup>34</sup> Innee sakani faiqi miqiraua inni naundura mandamuqanoo maridanoo. Inni naundurai moomoo ainaina marinakiqari ufa uridanoo. Minara naqi fee mandee inni naundurakiqari amiqira ufa uruannoo fee. Sia amana miqirafa. Faiqi afauru fannoo nari amuqusaki mari ainainara kai ufa qidanoo. <sup>35</sup> Amiqira fasiqa mina amuqusa qumiasanakiqari amiqira ainaina maree uridanoo. Manda fasiqa mina amuqusa ookiqari mandainaina oosana oosana kambiqaidanoo.

<sup>36</sup> Qinee qimannimidaqa numoo aukuaana anirainaqa faiqi misa nariqa aiqama dapi ufa oosana oosana Anutuna afusaa kooroommasaifanoo minara ufa qiannoo. <sup>37</sup> Maqee marira aukuaana ookinaa ufa Anutufa iridanoo. Numoo aukuaana anirainanoo inni maqee maria aukuaana ufa fannoo inni mareeqeenoo amiqiranaki fee quqaannoo fee Anutuna nariranaki fee mara quqaannoo fee.

*Yisunara misa faiqi sia amana auqaaqaa ira ainaina auqaina qafaa.*

*(Mak 8:11-12; Ruk 11:29-32)*

<sup>38</sup> Miqi qimasooafaq Moooseena sandufa irimarusa faqa Farisai amaana ufa qimarusa faqa misa Yisuna akaru qiraree qimasee qimamiqau. Ufasaa rakisirafa anee moo ainainara qinanoo mookinaqa maasa mina qafeeqa aniara kuqaa Anutuna asauku mundira fee qianaura.

<sup>39</sup> Yisufa quandafi qimanniminu. Innee maqee mariasa manda oosana maree mariasa Anutunara nikoqai faqa minnisee mariasa innee kai moo ainainara qifanoo kambiqaina qafaanee qidaqa. Sia qinee moo fuka ainaina auqaana qafeefara. Nauraa ainaina Yoonaafa tamummaqara fasiqa oqai firaa noodaanna aranandaki marunara foora miqirana maqee qafeefaranoo. <sup>40</sup> Yoonaafa firaa noodaanna aranandaki qaaramoo faasaana faqa eendaki faqa marinau. Miqi kai iqa qinee faiqi nimaaku qaaramoo faasaana faqa qaaramoo eendaki faqa maqa aundurai madikaki mariana. <sup>41</sup> Nineefa maqusa marusa numoo aukuaana anirainaqa misa findifi inni maqee mariasa niqifaranoo. Misa Yoonaana ufa iriseeqa nari mandainaina maqasaa quqasee quandafu faqa Anutuna afusaa reendeenammiqau, maqee qinee Yoonaana uriqararasa inniki maridaqa innee sia inneeqa mandainaina minnisaidaqa minara misa inni niqifaranoo. <sup>42</sup> Seebaa maqusaindari anaasee rakisirafa moo fannoo numoo aukuaana anirainanoo mifa faqa Nineefa maqusanaasa faqa findifiqa maqee mariasa niqifaranoo. Mifa nianindari Sooroomoona mina irirana iriannee qimasee aninai. Maqee qinee Sooroomoona uriqararasa animaridaqa innee sia qini ufa irimariafanoo, minasaara mi anaasee rakisirafa numoo aukuaana anirainanoo inni niqiannoo.

*Faiqi naundurakinaa afaanna oonu aqoonausa nifiqamareenoo kaiqaa ani keeqanau.*

*(Ruk 11:24-26)*

<sup>43</sup> Maa maqee mariasa kaifaa maaqimminoo mariannoo. Innee manda faafasaqaq faiqi naunduraki marifara foora marifara. Mi faafasaqaq mi fasiqana aundurakiqari raudamakinoo fifi inoo fiq fiq inoo aadana maqa maaqa oombura maqa maaqaki aakaqaki adoaranara randaisianoo fiq fiq imarinai. <sup>44</sup> Fiq fiq idanoo sia paqurinoo nari kai oonumafi iriseenoo qinau. Qinee qeeqa ooqeenaa maaqaki kaifaa keeqanaura. Qinee qeeqa oqai mariafanna fasiqana aunduraki kafa keeqanaura. Miqi qimaseenoo mi fasiqa finnai anireenoo qafanau. Fifau maaqara foora maridanoo, damunamminoo maridanoo, rapeiranaki ititanoo maridanoo aiqama ainaina andeeqanoo maridanoo. <sup>45</sup> Mifa mina qafamaseenoo oonureenoo afaanna moodannai qisauku dinni oonu qaaraqanda maraseenoo nari manda oosana uriqararasa kai nifiqee

anireenoo mi fasiqana aunduraki aiqama keeqafufoa minaki mariqau. Mi fisiqana inaaqiana manda marirafa fiqaramaseenoo firaqoo mandaikinoo marinau. Ooqai mi fasiqafa moodaa manda faafasaaq maru aukuaana kaqikaqoo mandainainaki marinau. Innee maqee manda marira mariasa miqikai mandee marifaranoo.

*Nari ufa irimarusara qini qinausa qikaqaafasaa fee qinau.*

*(Mak 3:31-35; Ruk 8:19-21)*

<sup>46-47</sup> Yisufa miqikaimmasee faiqi anaasee ufa qimannimi marufaqa Yisuna nari anoofa faqa mina akaqaafasaaq faqa aniree naambeeqi kikiqamafufaqa qimamianee qufanoo faiqi moo fannoo mina irisee maaqaki oonu Yisuna qimaminau. <sup>48</sup> Mifa iriseenoo mi fasiqana qimaminau. Naqi fee ifanee anee qini qinoofa faqa qini qikaqaafasaaq faqa madaana mariiafoo q inanee. <sup>49</sup> Maa mariaa qimaseenoo nari faiqi namu asauku mundinoo qinau. Maaqaimme mariasa misa qini qikaqaafasaa qini qinausara foora maridaqa. <sup>50</sup> Faiqi anaasee yausee innaarunai qini qikoona iriranamau fimariasa misa kai qini qikaqa faqa qini dauna faqa qini qinausa faqa maridaqa.

## 13

*Qaqama aaqasoofanoo kambiqoonara qinau.*

*(Mak 4:1-9; Ruk 8:4-8)*

<sup>1</sup> Mi faasaanna Yisufa mi maqanakiqari raudamakufanoo firaa taatarunna afainni ooqu reenoo miqoo ooqu marinau. <sup>2</sup> Ooqu marifufaqa faiqi anaasee fifau andandara foora ruqufu aqufi ititafufanoo mifa kanuqaki akaramafinoo ooqu marifinoo minakiqari qimannimufaqa faiqi anaasee nammari afainni maridaqa mina ufa irimariqau. <sup>3</sup> Mifa kanuqakiqari oosana oosana quandara ufa qimanniminau. Mifa maaqi qinau. Faiqi moo fannoo Yuda maqannaafa nari oosana maraseenoo raisa fooqaana ummaqirara maqa rumaqoonaki qaqama kaqi aaqee marinau. <sup>4</sup> Mi fasiqafa aaqee marufanoo qaqamma akaqafa aanasaa niku ree maruqoo faqa aaqamaki aqufufanoo ufiniuqa aniree mina kai naqau kaqindaraana sia naqau. <sup>5</sup> Akaqafa aaqamaki oonisaa aqufinau. Maqa sia moomoo marufanoo maqa tootooqi marunara dauni kambiqanau. <sup>6</sup> Kambiqafufanoo suani urureenoo arusoofanoo maqa eraqoo marufanoo atuka sia meemai keeqoonara suani arufanoo aadanusinoo kuqinau. <sup>7</sup> Akaqafa amuka faqaa ainaina marunaki aqufufanoo amuka faqaa ainaina fannoo urureenoo rafaqafinoo arusanau. <sup>8</sup> Akaqafa amiqira maqasaa aqufufanoo qaqamma moomoo iranau. Akaqafa urureenoo qambaana irara iranau. Akaqafa urureenoo oodaa iranau. <sup>9</sup> Aaqoo faqaafa irinana anee kai andeeqasee iria.

*Yisufa nari quandara ufa oosana nari faiqi namu qimanniminau.*

*(Mak 4:10-12; Ruk 8:9-10)*

<sup>10</sup> Yisuna faiqi namu mina ufa iriseeqa mariufaqa mifunnai anireeqa irammiriqau. Naqaafanee quandara ufa kai qimannimidanee, akooqoo kooroomasee qimannimi-aqana. <sup>11</sup> Yisufa iriseenoo qinau, innee innaaruna maqusa qumee irirana iriaqeera, misa sia iriaqeera quandara ufa qimannimidaqa. <sup>12</sup> Faiqi anaasee moo fannoo innaaruna maqusa irirana irinanoo Anutufa moo faqa mina amifanoo minaindi moomoo kammiannoo, faiqi anaasee moo fannoo innaaruna maqusa irirana siaifa moodaa marinnana Anutufa mina aiqama maree finanoo kaqisamu mariannoo. <sup>13</sup> Misa nifu maqaidaqa sia qafaidaqa, misa naaqoo marifaqa sia iridaqa, minara qinee quandara ufa qimannimidaqa sia iriaqeera qimannimidaqa. <sup>14</sup> Misara tamummaqara fasiqa Eesaia mina ufa anoona kuqaa kambiqeenoo. Minara qimasee akara rumaqoonaa anoona kambiqanau. Mifa minara maaqi qimasee qinau.

Kuqaa innee naaqoonnai qini ufa iriseeqa naunduraki sia irifaranoo. Kuqaa innee nifunoo qinee auqee marunna ainaina tataqafi qafamaseeqa naaqoonnai siamma irifaranoo. <sup>15</sup> Maa maqannaasa nimuqusa kudoosaapanoo maridanoo. Misa naaqoo auninoo maridanoo, misa nari nifu nari tautasee maridaqa. Misa nifunnai qafamasee irifooraa misa naaqoonnai irifooraa. Misa naundura iriaraasifooraa. Misa quandaqinaqa qinee ianannai anifaqa qinee misa amiqianoora.

Tamummaqara fasiqa ufa miqimminoo maridanoo. <sup>16</sup> Innee qini faiqi namu inneeqa nifu qafee mariana inniqa naaqoo irimariasa marianara asasiqa, inneeqa kai qafaidaqa, inneeqa asasiranaki mariafanoo inneeqa qini ufa oosana iridaqa. <sup>17</sup> Qinee anoona ufa inni qimannimidaqa. Tamummaqara fasiqaqau faqa reendenirafa andeeqara fasiqauqa faqa misa ooqai maridaqa innee maqee maqee qafeemarianara kaaqa nimuqusufaqa minara qafaqaa kaimmasee sia qafaqau. Misa innee maqee qini ufa irimarianara kaaqa nimuqusifaqa iriraree qimasee iriaqaa kai qimariqau. Sia iriqau.

*Yisufa aaqee maru qaqamara oosana kooroo inau.*

*(Mak 4:13-20; Ruk 8:11-15)*

<sup>18</sup> Qaqamma aaqee mari fasiqana quandara ufa oosana irisaifaqa qimannimianauna. <sup>19</sup> Moo fannoo qini ququsakinaa ufa iriseenoo sia irinoo manoo manaa imarifa, qaqamma mina amuqusaki kakasammasaifanoo manda faiqi fannoo animaree finnoo. Maafa qaqamma fooqaana aanasaa kukupee marifanoo siara fooramridanoo. <sup>20-21</sup> Oonisaa kukupanoo marifa mina oosana maagimminoo maridanoo. Misa Anutuna ufa irisaidaqa اساسمasee mi ufana maraifanoo sia atuka misaki amiqimmasee ausinoo kaqi meeraqoo rusinoo maridanoo, qusasaa qimasee minnisaidaqa. Mi ufanasaara narirafa kambiqaifaqa misa quqasee fuaniqiana saamuridaqa. <sup>22</sup> Amuka faqaanaki aqufu qaqammafa moo fasiqara fooramridanoo. Mifa Anutuna ufa irinoo maqasaa kadaapirirana faqa kaaqa ainainara munnimmara amuqusirana faqa mi ainainafa mi ufana anukaki kukuqinoo sia qaqamma iraidanoo, sia anoona kambiqaiganoo. <sup>23</sup> Qaqamma amiqira maqasaa kakasinoo moo fasiqara fooramridanoo. Mifa mi ufana iridanoo oosana amiqimandee iridanoo. Mifa kuqaa qaqammara fooramridanoo. Moo uriqararafa amiqimma qaqamma irafinoo irairammidanoo. Moo qambaana marifa nari amanasaa iraidanoo. Moo ureeqarafa miqi kaimidanoo nari amanasaa iraidanoo.

*Namuqaa moonu afuqaki manda qaqama aaqee marunara qinau.*

<sup>24</sup> Quandara ufa moo Yisufa faiqi anaasee noorinni mara quqanau. Manda oosana maree marusara faqa amiqira oosana maree marusara faqa misauqara quandasee qimanniminu. Innaaruna maqasai faiqi moora fooramridanoo. Mifa nari ququsaki amiqira qaqamma ummaqinau. <sup>25</sup> Faiqi misa faiqaqeufanoo mina namuqaa fannoo anireenoo kukura asumu sakuma maruqoo ummaquseenoo finau. <sup>26</sup> Sakuma urureenoo uri rupipoosufaqa kukura faqa qafaqau. <sup>27</sup> Mina dadaaqira faiqiqa ququsa akoonu qimamida qiqau. Rakisirafa, anee kuqaa fee ani amiqira qaqamma kaifee ummaqinee. Nanaindari fee kukura kambiqaiganoo fee. <sup>28-29</sup> Mifa iriseenoo qinau. Imboo namuqaa fannoo kai ummaqinoo. Qimasooafaqa mina faiqi namu qiqau. Amanee maasa oonuree rarakuanauree qimasooofano mifa qinau. Sia innee kukura rarakuana, sakuma faqa rarakiifora. <sup>30</sup> Saina kaqi mariani. Miqanda moodaa karammiqa marifaqa. Aiqama akuqamafinaqa qinee qimannimianaqa innee kukura indaaru ateeqa rumbasee ida araaqee. Inaqaqiana sakuma ateeqasee qini maaqaki quqaaqa.

*Yisufa kaqikaa qaqama kikiqammusinau.*

*(Mak 4:30-32; Ruk 13:18-19)*

<sup>31</sup> Yisufa moo quandara ufa misa noorinni quqanau. Innaaruna ququsaki fifandinausa qumini qaqama miqirau maridaqa. Faiqi mina qaqama nari ququsaki ummaqinau. <sup>32</sup> Mina qaqama kaqikaana uqanna maridanoo. Mifa urureenoo qambaana oorufinoo fira saqariara fooramridanoo aqama aakaqakinaa andanda uriqararafa maridanoo. Miqinoo marifaqa ufinauqaindi anireeqa mina asaanai aanaamu usakaidaqa.

*Yisufa ooruku anoona kikiqammusinau.*

*(Ruk 13:20-21)*

<sup>33</sup> Mifa quandara ufa moo qimanniminu, Anutuna ufa aiqamai daraaniranara qimanniminu. Innaaruna ququsaki fimariasa ooruku anoona fooramridanoo. Anaasee mina marasee feemuki adiasaafanoo aiqama ati qaidanoo.

*Yisufa ufa mina kikiqa usira ufa oosana.*

*(Mak 4:33-34)*

<sup>34</sup> Maa ufana faiqi anaasee moomoo marufanoo Yisufa quandara ufakiqari kai qimanniminu. <sup>35</sup> Yisufa maaqi qimannimiseofanoo ooqeenaa tamummaqara fasiqa mina ufa anoona mikari kambiqaana. Tamummaqara fasiqa qinau. Qinee doo raqasee quandara ufa kai qianauna. Maqa quqoo aukua kukeeqoo ufana kukeeqanoo mariifa qinee mi ufana maqee quandara ufakiqari kooroo qimannimianauna.

Tamummaqara fasiqa ufa miqi qimaqoo ufafa maridanoo.

*Yisufa manda qaqama kikiqa usira ufa oosana kooroo inau.*

<sup>36</sup> Yisufa faiqi anaasee qimannimiseenoo minniseenoo maaqaki keeqanau. Mina faiqi namu mifunnai oonureeqa qiqau. Kukurara quandara ufa qimannimianaqa iriaqa.

<sup>37</sup> Miqi qufanoo mifa qinau. Faiqi nimaaku qinee amiqira qaqamma ummaqi marunausa maridaqa. <sup>38</sup> Ququsaki maa maqanasaa mariasa maridaqa. Amiqira qaqamma karaambaiqa aiku asauku mariasa maridaqa. Kukura manda faiqi mina aiku asauku mariasa maridaqa. <sup>39</sup> Namuqaa kukura ummaqinafa Sadannafa kai maridanoo.



Sakuma atekara aukuaana, maa maqee marira kamuqoo taikara aukuaana maridanoo. Sakuma atekara fasiqauqa misa qangirooqa maridaqa. <sup>40</sup> Kukura atekasee rum-beeqee idaki aqifanoo taikara aukuaana miqimminoo mariannoo. <sup>41-42</sup> Mi aukuaana qinee faiqi nimaaku qeeqa qangirooqa niqigaanaqa misa Anutuna ququsakinaana manda findi fira findi fimariasa nari oosana uqannifiqanoonifa faqa manda oosana mariasa faqa maramaree auru firaafa imarinnanaki minaki aqifaranoo. Miqoo faiqi misa qikindaqee fara nifai riqifaranoo. <sup>43</sup> Miqooqari andeeqarasa suaniara foora kaimmifaranoo. Innaarunnai nari nikoona maqusaki maridaqa kaaqa qeefaranoo. Naaqoo faqaasa mariafanoo inneeqa kai andeeqasee iriaqa.

*Koorakinaa maqa feefaurira ufa quandara ufa.*

<sup>44</sup> Innaaruna ququsaki keeqeemaria ufafa kooraa miqirafa maqaki kukeeqanoo maridanoo. Faiqi moo fannoo paqurimasee qafeenoo kaifaa kukeeqaannoo. Kukeeqaseenoo asammaseenoo nari ainaina oosana akaqasa nimiseenoo mina akiqara munnimma maraseenoo quandaki kooraa mari maqa maaqana feefaurummasee mi koorana indufuannoo.

*Oonda feefaurimaruna quandara ufa.*

<sup>45</sup> Kafaa innaaruna ququsaki keeqeemaria ufafa faiqi moora foora maridanoo. Mi fasiqafa kooraa aina feefaurimarifa kooraa maqusamao randanoo nidanoo. <sup>46</sup> Oonda fira feefaurimaria oondana paqurimaseenoo nari ainaina aigama moosa nimiseenoo minasaqaraa munnimma maraseenoo nariara mi fira oondana maraannoo.

*Noodaanna reemaria rainara quandara ufa.*

<sup>47</sup> Kaifaa Yisufa minara qinau. Innaaruna maqusa pateeree maria uqara foora maridanoo. Misa mi pateeuqana nammariiki ramasee noodaanna oosana oosana minaki uqaridanoo. <sup>48</sup> Pateeuqa qumbiqafifaqa uqereeqee afainni quqaidaqa. Quqaseeqa misa oogu marifiga amiqira noodaanna taquki mara upeekasee manda noodaanna mara teeqimmaqidaqa. <sup>49</sup> Maa marira aukuaana taikafinanoo miqimminoo mariannoo. Qangirooqa rafudamafiqa manda oosana maree mariasa faqa amiqira oosana maree mariasa faqa raineefara. <sup>50</sup> Misa mandaikirausa ida fira auru mara aqifara, minaki iki raqaidaqa nifai riqifara.

*Ooqeenaa anoona ufa faqa fuka ufa faqa mina akoofasara qinau.*

<sup>51</sup> Miqi qimaseenoo Yisufa nari faiqi namu irammirinau. Innee maa ufana oosana irida fee. Miqi qufaqa misa eedoo qiqau. <sup>52</sup> Yisufa iriseenoo kaifaa maaqi qimasee qimanniminau. Mooseena sandufa irimari fasiqafa moo fannoo Anutuna ququsaki mariranara irimarifa maridanoo mifa faiqi firaafara foora maridanoo nari maaqikiqari ooqeenaa amiqira irirana faqa fuka amiqira irirana faqa marasee ani uqafiqannoo.

*Nasareete maqannaasa Yisunara nikoqanau.*

*(Mak 6:1-6; Ruk 4:16-30)*

<sup>53-54</sup> Yisufa maa quandara ufausa taikaseenoo mi maqusana minniseenoo nari maqusai uqanna oonureenoo misa amaana maqaki keeqafinoo qimanniminau. Misa mina ufa irisoo fanoo naaquoo faqa qiqau. Yai fee maa fasiqafa maa irirana faqa maa idaqaqam-mannisarana faqa irinoo fee. <sup>55</sup> Maa fasiqafa kamundaa amaaku maridanoo. Mina anoofa Marifa maasa faqa maaqooqaraafa maridanoo. Mina akaqafasaa Yameesana amarafa faqa Yoosefaana nari akoona amarafa faqa, Simoonafa faqa, Yudasina amarafa faqa maasa faqa maridaqa. <sup>56</sup> Mina asooqmaakamara faqa kaqi misa maaqoo maridaqa. Maa fasiqafa yai fee maa amiqira irirana mareenoo fee. Maasa minara qikooqaidanoo.

<sup>57</sup> Miqi qimasoo faqa misa minara oonumafi irisee oimariqau. Yisufa misa ufa iriseenoo qimanniminau. Tamummaqara fasiqa maqusa maqusa mina fidanoo faiqi anaasee minara naaquqai faqa ufa iriaqaa kai idaqa. Nari maqusanaasa uqanna faqa nari ainaina faqa sia irifara nikoo nikaa ifaranoo. <sup>58</sup> Yisufa miqi qimasoo faqa misa sia minaki irirana rusiqoonara Yisufa sia moomoo fira ainaina naaquqara ainaina miqoo auqinau.

## 14

*Eeroodeefa Yoohaneena akiaqa tuqinau.*

*(Mak 6:14-29; Ruk 9:7-9)*

<sup>1</sup> Mi aukuaana Eeroodeefa Karidaia maqanna uqi qararafa firaafa marinau. Roomma maqanna kiapana ameemaanai ureeqanoo marida rakisinoo marinau. Faiqi anaasee

misa Yisuna amooqimammaree anufanoo Eeroodeefa irinoo narí aiku asaku maaqi qimasee qimanniminau. <sup>2</sup> Maafa Yisufa Yoohaneefa nammari nimirufa kuqiranakiqari findifinoo Yisunaikinoo maridanoo, maa afeeka firaa ainainna auqaidaqinoo fee qinau.

<sup>3-4</sup> Eeroodeefa narí akaqa anaqa auqu Eeroodia nammarina maroofa mi anaaseefa qufanoo iriseenoo Yoohaneena rumbeeqeenoo karafusaki quqasoofanoo marinau. Yoohaneefa Eeroodeena narí akaqa anaqa Eeroodia nammarina maroonara aqinoo qinau. Anee sandufa rukieenana mi anaaseena maraananoo. Miqi qufanoo mi ufanara aranaqoofanoo Eeroodia nammarina ufara karafusaki rumba quqanau. <sup>5</sup> Eeroodeefa Yoohaneenara kuqaruani qinaqa faiqi anaasee minara irifoora. Misa aiqama Yoohaneenara Anutuna tamummaqara fasiqa fee qufanoo Eeroodeefa minara oonumafi iriseenoo minara rufieenoo sia arinau minnisee kaqi rumbanau.

<sup>6</sup> Eeroodeena maqoo aukuanafa kindaramambufanoo miqoo faiqi anaasee suqu maree oomaqammanee mariqau. Eeroodia nammarina aramuna fannoo sukuraki maridanoo aaduna idi rama akoofasa quqamaqoofa maridanoo qoomaqammanee maruna qambaanai faiqi anaasee nifusaa findifi idi ranau. Eeroodeefa mi manaqafa idi roona qafoofanoo kaqa amiqi amiqinau. <sup>7</sup> Afaqa amiqi amiqufanoo narí amana aqigeenoo mi manaqana qimaminoo qinau. Anee nanaree aidinana qimaqiminaqa qinee minakaimamianauna idi raannana akiqara amianauna.

<sup>8</sup> Mi manaqafa Eeroodeena ufa iriseenoo sandeenoo narí anoona Eeroodia nammarina oonu qimamisoofanoo irinau. Yoohaneefa Eeroodeena faqa mi anaaseena faqa niqunara mi manaqana anoofa aranaqee marufanoo mariufa mari maridanoo narí aramuna fannoo onuree narí anoona qimamufanoo mina anoofa mikari Yoohaneena arira irirana paqurinau. Oo doo maqee mifa qini diqufa kuquannoo. Miqi qimaseenoo Eeroodia nammari narí aramuna qimaminau. Anee onuree qinanoo Eeroodeefa Yoohaneena akiqafa ituqu piritasaqa saka amiani qufanoo mi manaqafa mi ufana iriseenoo ani randeenoo Eeroodeefinnai onureenoo narí anoona ufa kai qimaminau.

<sup>9-10</sup> Eeroodeefa mi ufana irisoofanoo aundura mandaikinau. Faiqi anaasee nifusaa geeqa qimana aqiqamasauannanara oonumafi iriqa qisauruanoo qimaseenoo eedoo kai qinau. Eedoo qimasee narí frisuaigauqa niqiqanau, onuree Yoohaneena akiqafa tuqumaree mina amiaqee qufaqa firusuaigauqa misa iriseeqa karafusa maqaki keeqaifiqa Yoohaneena akiqafa tuqiqau. <sup>11</sup> (Mi maqannaasa mina fidika maqasaa aqufundoos qimaseeqa piritaki sakaqau sia nararau miqiqau. Kaqi fifau fidika aqufundoos qimasee miqiqau.) Yoohaneena akiqafa misa tuqu piritasaqa sakamaree mi manaqana mina amiqau. Amisoofanoo mifa maree muni narí anoona aminau. <sup>12</sup> Yoohaneena faiqinamu mifa kuqunara iriqa ani karafusa maqakinaana ani mina iri mara mareeqa muni madikaqau. Madikamaseeqa misa Yisufunnai onureeqa mi ufana qimamiqau.

*Yisufa feemu faqa noodaanna faqa moomoosa niminau.*

*(Mak 6:30-44; Ruk 9:10-17; Yoh 6:1-14)*

<sup>13</sup> Yisufa mi ufana Yoohaneenara arunara iriseenoo ummaararoofanoo nammari ooquee kanuqaki narí faiqi namufaqa akaramafufanoo nariara faiqi sia marutinau finau. Faiqi anaasee Yisuna sipa fannoo nammariki fimarufaqa qafamasee faiqi anaasee maqusa maqusa tatufufaqa maqamau afaindanai miqoombiqau. <sup>14</sup> Yisufa kanuqakiqari maqasaa aqufinoo nindafooqafa moomoosa ani marufanoo. Oonureenoo misara amuqusufanoo misaki aurimarusa aurirana taikannisanau.

<sup>15</sup> Eendi marufaqa mina faiqinamu mina ufa irimarusa anireeqa Yisuna qimamiqau. Maa maqa maqanaki faiqi siai maqa maqaki, suani doo keeqaidanoo. Anee faiqi anaasee niqiqainaqa maqusa maqusa narana feefaurummasee namasee faiqaaqa. <sup>16</sup> Yisufa iriseenoo maqi qimasee narí faiqi namu qimanniminau. Innee fifau niqiqeefaara. Inneeqa kai narana nimaqa.

<sup>17</sup> Miqi qimasooqafa misa qiqau. Maasaki feemu rumberafa moodaannai qisauku kai maridanoo. Noodaanna qaaraqanda kai maridanoo. <sup>18</sup> Yisufa iriseenoo qinau. Doo mina kai qini qimiaqa.

<sup>19</sup> Miqi qimaseenoo faiqi anaasee aiqama qimanniminau. Aiqama andanda ra-soonookammasee ooqumariaqa.

Miqi qimaseenoo mifa feemu moodaannai qisaukunamu faqa noodaanna qaaraqanda faqa qumareenoo innaarunnaa oori uqeraseenoo Anutunara dufi dufi qimaseenoo feemu ruqi ruqimaseenoo narí ufa irimarusa nisaukuki quqasoofaqa misa qumareeqa faiqi anaasee nimaqau. <sup>20</sup> Faiqi anaasee aiqama namasooqafa nimuaqufaqa Yisuna ufa irimarusa uqa qumareeqa misa ooqu maruqoo fiq fiq idafa narana andaanuqa uqariqau. Qisauquqara taikasee qikunni qaaraqanda uqa qumbiqasee maraqau. <sup>21</sup> Mi naranna noosa faiqi kai ooni saqari maqusa manda samu muquiqqa mariqau. Faifa

tauseenna mariqau. Anaasee faqa faiqi faqa ootupa mafufaqa maaqa maaqa qumbiqa maqiau.

*Yisufa nammari amuaqumau aiku ramasee finau.*

*(Mak 6:45-52; Yoh 6:15-21)*

<sup>22</sup> Namasoofanoo Yisufa nari ufa irimarusa niqiqeenoo qinai. Innee sipaki qini doorinni nammari dinni afainni fimarifaqa qinee faiqi anaasee niqiqamasee kasoo fuanaura. <sup>23</sup> Mifa faiqi anaasee niqiqamaseenoo nariara aqanai innaaru qiraree qimasee akaramafinoo innaaru qinai. Mi eendanaki aqanai nariara marinai. <sup>24</sup> Yisufa aqanai marufaqa mina faiqi namu sipaki faruma qambaana oonuroofanoo ufa firaafa noorindari uqinoo nammari amakaurinoo mina ufa irimarusa sipaki kadaapirida fimarifaqa.

<sup>25</sup> Iqaqarafa qusaramafufanoo Yisufa nammari amuaqumau aiku ramammaree misa unnai finau. <sup>26-27</sup> Nammari amuaqumau fimarufaqa mina faiqi namu qafamasee afaanna fee qimaseeqa kaqa rufiamaree faaqariqau. Yisufa iriseenoo qimannim-inai. Sia rufiaaqa. Inneeqa nimugusa ubiqaqa. Qinee maridaqa. <sup>28</sup> Peetooroofa Yisuna ufa iriseenoo qinai. Karaambaiqa kuqaa anee maridana qinaqa anee ianannai nammari amuaqumau qinee faqa fuanaura. <sup>29</sup> Yisufa iriseenoo qinai. Doo ania. Peetooroofa iriseenoo sipakiqari raudamakufanoo nammari amuaqumau Yisufunnai finau. <sup>30</sup> Fimarufanoo ufa firaafa uqufanoo rufiamareenoo doo nammari ukuqnanau. Nammari ukuqnanidanoo faaqarumaseenoo Yisuna aaraidanoo qinai. Karaambaiqa qini qumaraa. <sup>31</sup> Yisufa iriseenoo dauni mina asaku qumareenoo qinai. Anee nanaree qaara aundura irinane. Anee sia qinisaa irirana rusi mariananoo.

<sup>32</sup> Miqi qimaseenoo miqanda sipaki akaraqau. Akaramafufanoo ufa taikanau. <sup>33</sup> Sipaki kaqi marusa misa mina qafamaseeqa naaquoofaqa Yisuna oorinni anireeqa noorindari mapamufufaqa Yisuna amooqiqa qiqa. Kuqaa anee Anutuna amaaku mariananoo qiqa.

*Keenesareeta maqannaasa aurirasa andeeqannisanau.*

*(Mak 6:53-56)*

<sup>34</sup> Misa sipaki nammari dinni afainni taqakufaqa Keenesareete maqasai oonu raqau. <sup>35</sup> Mi maqusaanaa fasiqauqa oonuree mina oori qafamaseeqa maafa auruasa andeeqee marifa qimaseeqa ufa quqasoofanoo maaqa maaqa maqusa maqusa ufa finau. Aurimarusa aiqama suqeeqeeqa Yisufunnai quqau. <sup>36</sup> Aurimarusa misa anireeqa maasa moomoosa marida Yisufa sia maasa aiqama andeeqagisaandora qamunna atikai amanee maasa kaqi auqaananoo aurirafa taikaannoo fee qufanoo Yisufa eedoo qimasooofaqa mina qamunna ati auqamasoosa aurirafa aiqama taikkeenoo amiqi uqan-nammannisanau.

## 15

*Sia nisaaqirai narana noonara ufa kambiqanau.*

*(Mak 7:1-13)*

<sup>1</sup> Farisai amaana qimarusa faqa Mooseena sandufa irimarusa faqa Yeerusareendari Yisufa maruqoo irammiriqau. <sup>2</sup> Nanaree ani faiqi namu ooqeenasa faiqi firaasa sandufa rukiee fee sia narana nisaaquusee nee fee.

<sup>3</sup> Yisufa iriseenoo qimannim-inai. Innee faqa nanaree Anutuna sandufa rukiasee fee inneeqa sandufa kai afekaikidee. <sup>4</sup> Anutufa maa sandufana quqanau. Inneeqa ninausa nikausara asasamandee amiqidaqa misa nuqu uqeeraaqa. Kaifaa moo quqanau, faiqi moo fannoo nari anoona akoonara manda ufa qinanoo arusaina kuquannoo. <sup>5</sup> Anutufa mifa miqi qimasooofaqa innee maaqi qimasee mi ufana moomau fimarifaqano. Faiqi moo fannoo mina anoofa akoofa sarauida mandaikida amiqannee qinna sandufanara doo qinee Anutuna amiseeqa sia ani amana amianaura. Miqi qimaria fasiqa aanaaseesara innee doo andeeqaidammiafo qimariafanoo mifa nari anoofa akoona sia dadaaqianifeera qidaqa aaqee mariafanoo. <sup>6</sup> Miqi kai mandee fifau inniqa ufa fannoo Anutuna sandufa arimariafanoo. <sup>7</sup> Innee kaaqa ufa qimannimisaida maqandanai manda oosana maraqanuasa. Anutuna tamummaqara fasiqa Eesaia, kuqaa uqanna inniara qimasee akara rinai. Mifa maaqi qinai.

<sup>8</sup> Maa maqannaasi fasiqa anaaseesa nifauru fannoo kai unnaqimasee qini duqu uqeeremariasa, nimugusa kaqinni ubeekarusa mariafanoo. <sup>9</sup> Misa faiqi qimaria sandufana qumaree unnaqimasee Anutuna sandufammiafo qimaseeqa faiqi anaasee naamuaqidaqa. Miqi qimasaidaqa Anutunara innaaru qifanoo siammiriannoo.

Tamummaqara fasiqa Eesaiaafa inniara miqi qimasee akara rinai.

*Nookiqari urimari mandufafa faiqí putaamma nimaqaidanoo.*  
(Mak 7:14-23)

<sup>10</sup> Miqí qimaseenoo Yisufa faiqí anaasee aiqama naaramaseenoo qimanniminau. Farisai amaana ufa qimariasa nári faiqí namuara sia nisaaqusee neeafooo qunara qimanniminau. Iriaqa, innée maa ufana oosana iriaqa. <sup>11</sup> Nooki fimari naranainainafa sia faiqí putaamma nimaqaidanoo. Nooki qari urimari mandufafa mifa faiqí putaamma nimaqaidanoo.

<sup>12</sup> Miqí qimasoofaqa mina faiqí namu anireeqa qimamiqau. Sia fee iridane. Farisai amaana ufa qimariasa misa ani ufa iriseeqa noori runidammia.

<sup>13</sup> Misa miqí qufanoo Yisufa qimanniminau. Aiqama ainaina innaarunai qikoofa sia ummaqu ainaina moo fannoo qummaquqai fanoo Anutufa rarakuannoo. Sia misara rufaaqa, Anutufa rarakuannoo. <sup>14</sup> Saina misa kaqi mariafa. Misa nifu qimbarausa nisaadaki mariasa. Afu qimbarafa kai afu qimbarana asaadakinoo fifi inoo aiqamaqara kai madikaki aquffaranoo.

<sup>15</sup> Peeteeroofa qinai. Maa quandara ufana qiannana qimaqiminaga irianauro.

<sup>16</sup> Yisufa iriseenoo qimaminau. Aneenna faqa irirana siai fee maridane. <sup>17</sup> Aiqama ainaina ooki quqasaanoo aranandaki ooqureenoo umiqaree fimarinara sia fee iridane. <sup>18</sup> Aiqama ookiqari urimari mandufafa amuqusaiqari uridanoo. Mi mandufausa kai faiqí anaasee putaamma nimaqaidanoo. Mi ufanara qidaqa. <sup>19-20</sup> Amuqusaiqari manda irirana faqa faiqí narirana faqa moona anaasee maree mariafa faqa maanaaqa kumaara rarisee mariafa faqa ummuari mariafa faqa fifau akaru qimasee quandasee qimariafa faqa aqoonnana manduqairanara faqa mifaufa kai faiqí putaamma nimaqaidanoo. Sia nisaaqumaseeqa narana neemariafa sia mifa faiqí anaasee putaamma nimaqaidanoo.

*Anaasee moo fannoo narí araamunara andeeqaiqaanifee qimaseenoo sandanainai qimarinau.*

(Mak 7:24-30)

<sup>21</sup> Yisufa miqooqari Taia maqa maaqa faqa Sidoonna maqa maaqa faqa marutinai finau. <sup>22</sup> Miqooqari Kannaana maqannaa anaasee fannoo aanaamuru anaasee anireenoo Yisuna qimaminau. Anee Dafidina ati karaambaifaq mariananoo. Anee qiniara amuqsi. Qini qiraamuna ooqeena aakinoo marifaqa ooqeena fannoo maqee maqee qini qiraamuna mara furufari marifaqa aurirana amimarifaqa minara ani qimamidaga.

<sup>23</sup> Yisufa iriseenoo sia irinoora foora kaqi finau. Mina faiqí namu anireeqa Yisuna fukifaaki qiqau. Anee mina aqiqaq maqee maqee mifa maasara faaqari marifanoo qikoogaidanoo. <sup>24</sup> Misa maaqi qimasoo fanoo Yisufa qimanniminau. Dapikamambiqa Isaraee maqannaa sipsipara foora mariasa, misara kai dadaaqirara qumidaqa.

<sup>25</sup> Qimasoo fanoo mi anaaseefa mina oorinni ani ooqumarifufanoo qiki raqaida qimaminau. Karaambaifaq anee qini dadaaqa.

<sup>26</sup> Yisufa iriseenoo qimaminoo qinai. Kamaa suqasee faiqiuqaindi nimirree qimasee sia quandaki faini nimia, sia mi oosanafa miqinoo maridanoo.

<sup>27</sup> Qimasoo fanoo mi anaaseefa qinai. Kuqaa qiananoo. Kuqaa ani dadaaqira ainaina Isaraee maqannaasaindi maridanoo. Kuqaa qinee moo maqannaasa fainiara foora maridaqa. Anee iria, faini fannoo narí akoofa kamaa naida kakasamasaina andaana suqunaidaga. Anee andaana kai qiminanoo qini qiraamuna dadaaqiani.

<sup>28</sup> Yisufa mi ufana iriseenoo qimaminau. Imboo maa anaaseeqo Anee qinisaa irirana rusirana firaafa marianafa. Anee aneenna innainaina mifa kai kambiqaannoo. Miqí qimasoo fanoo mi anaaseena araamuna mikari kai nianai marunnaa ooqeena taikasoo fanoo mi manaqafa amiqinoo marinau.

*Yisufa moomoo aurirausa andeeqannisanau.*

<sup>29</sup> Yisufa miqooqari findimeeqeenoo Kariree nammari afaiqara ooru finoo aaganai akaranau. Akaramafufanoo ooqu marinau. <sup>30</sup> Faiqí anaasee qafamasee moomoosa mina afaqee ooru fiqau. Misa niku arirutimarusa faqa misa nifu qimbarausa faqa niku eendirausa faqa sia ufa qusa faqa oosana oosana teeromaree marusa faqa maree oorureeqa Yisuna aikusaqa quqasoofanoo mifa aiqama misa aurirana andeeqa taikannisanau. <sup>31</sup> Faiqí anaasee mina qafamaseeqa naaquqanau. Sia ufa qusa ufa qufaqa niqafamaseeqa arirutimarusa nimarufaqa niqafamaseeqa nifu qimbarausa faqa nifu maqasoofaqa niqafamaseeqa maa faiqí anaaseesa ooqai mandaikimarusa maqee amiqiqara maridaqa misa niqafamaseeqa naaquqoofaqa misa aiqama Isaraee maqannaa Anutunara asasiqau.

*Faiqi anaasee kafa moomoosa narana nimirau.*

*(Mak 8:1-10)*

<sup>32</sup> Yisufa nari faiqi namu naaramasee qimannimirau. Qinee maa maria fasiqa anaaseesara qimuqusifaqa narana sia marifaqa qaaramoo faasaana mariaasa. Qikoo misa fifau niqiqarara aanai kudoosaapee foora.

<sup>33</sup> Mina faiqinamu iriseeqa qimamiqau. Yaqoo fee narana marinaqee misa nimirau-ree andandakinai marifaqa moomoosa marifaqa.

<sup>34</sup> Yisufa iriseenoo irammimirau. Naquma feemu fee innee maqee idee qufaqa misa qiqau. Qisauku dinni taikasee dinni ani qaaraqanda marasee feemu marifaqa noodaanna faqa kaqikaafa qaaraqanda marifaqa.

<sup>35</sup> Mifa iriseenoo faiqi anaasee aiqama maqasaa oqumariaqee qufaqa ooqu mariqau.

<sup>36</sup> Ooqu marifufanoo Yisufa feemu dinni qisauku taikaseenoo dinni ani qaaraqanda maraseenoo (7) mi feemuna faqa noondaana faqa maraseenoo Anutuna dufi dufi qimaseenoo ruqi ruqi maseenoo nari faiqi namu nisauku quqasoofaqa qumareeqa faiqi anaasee niniqau. <sup>37</sup> Faiqi anaasee noofanoo nimuaquqinai. Nimuaqumambufaqa Yisuna faiqi namu andaanauqa suqeeqee uqaki riqau. Dinni qisauku taikasee dinni oonu qaara marasee uqa (7) qumbiqaqau. <sup>38</sup> Faiqi neemarusaa ooni sagari auqiga maqi tauseena (4,000) mariqau. Anaasee faqa faiqi faqa ootupamafufanoo meeraqoo marinai. <sup>39</sup> Yisufa misa niqiqamaseenoo sipaki keeqafinoo Makadana moo maqusanai finau.

## 16

*Yisufa faiqi sia amana auqaaqaa ira ainainara qaoo qinai.*

*(Mak 8:11-13; Ruk 12:54-56)*

<sup>1</sup> Farisai amaana ufa qimarusa faqa Sadikai amaana ufa irimarusaa faqa misa Yisunara kuqaa Anutuna amaaku fee maridanoo fee qianeera uneemaana qimasee amanammasee qafaaneera qiqau. Firaai ainaina mookira ainaina innaarunaindaraa ainaina uqaqifiqasainaa qafamasee kuqaa aniara Anutuna faiqi fee qianaaranoo.

<sup>2</sup> Yisufa minara iriseenoo qimannimirau. Eendifanoo innaaruna taatuqeeendifaqa duna ufidaannoommifoo qidaqa qimariafanoo. <sup>3</sup> Iqaqai fanoo kananaana asukuna arifaqa aaku rirarammifoo qimariafanoo. Innee innaaruna qafaidaqa irimariafanoo maqee maa aukuanne qinee marunna aukuanne innee mina qafamasee sia irimariafanoo. Innee nanaree miqi qimariafaqee. <sup>4</sup> Mandainaina mareemariaasa faqa maqee maqee inneeqa Anutuna minnisee mariaasa miqi mariaasa innaarunaindaraa ainaina faiqi sia amanaiki maria ainaina auqamasee uqaqifiqainaa aniara kuqaa mindaraa fee qianauree qimariafanoo. Qinee fuka innaarunaindaraa ainaina sia uqannifiqaanura. Nauraafa oqai kuqu fasiqafa Yoonaaindi mifa kai kaqi maridanoo mifa qaaramoo faasaana faqa qaaramoo eendaki faqa noodaanna fraana aranandaki marinai. Mi ufana qimaseenoo quqasee finau.

(Yisufa nari kuqufinoo qaaramoo eenda faqa faasaana faqa madikaki marianinnanara quandaseenoo miqi qinai.)

*Unna ufara manda ooruku anoonara foora eerairiaqa.*

*(Mak 8:14-21)*

<sup>5</sup> Yisufa nari faiqi namufaqa nammari faruma dinnafainni kanuqaki oonu raqau. Mina faiqi namu feemuara randoosia qiqau. Oo doo aunusee kaqi samu aniga.

<sup>6</sup> Miqi qimasoo fanoo Yisufa qimannimirau. Innee Farisai amaana ufa qimariaasa faqa Sadikai amaana ufa irimariaasa faqa misa atiqee mari ooruku anoonara foora rufieeqa eerairiaqa.

<sup>7</sup> Misa iriseeqa nari qimami nari qimamimasee qiqau. Oo maasa feemuara randau-nanoo mifa ooruku anoonara qidaqinoo.

<sup>8</sup> Yisufa mi ufana iriseenoo qimannimirau. Innee qinisaa irirana rusirana sia amana maridanoo. Innee nanaree sia feemu maraanara nari qimami nari qimami qidee. <sup>9</sup> Innee sia fee iridee. Moodaannai qisauku (5) feemu faqa faifa tauseena (5,000) fasiqa noonara, doo aunidee sia fee iridee. Mikari naquma ataraasa uqa fee riqau. <sup>10</sup> Kafa mo kari moodaannai qisauku taikasee dinni oonu qaaramarasee (7) feemu faqa maqi tauseena (4,000) fasiqa faqa noonara doo innee mina faqa aunidee sia fee iridee. Mikari naquma ataraasa uqa fee riqau. <sup>11</sup> Innee nanaree sia qini oosanara iridee, sia qinee feemuara qunaqa. Farisai amaana ufa irimariaasa faqa Sadikai amaana ufa qimariaasa faqa misa manda oosanara rufiaaqee qimasee ooruku anoonara qiga.

<sup>12</sup> Misa mi ufana iriseeqa mi ufa oosanna doo naaqooki iriqau. Mifa sia ooruku anoonara eerairiranara qinai. Farisai amaana ufa qimariaasa faqa Sadikai amaana ufa

qimariasa faqa misa manda irirana uqannifiqaranara quandasee ooruku anoona kikiqa usinau.

*Peetooroofa Anutuna asauku mundiranara koorooinau.*  
(Mak 8:27-30; Ruk 9:18-21)

<sup>13</sup> Yisufa Seeseeria Firipai maqa maaqaki oorureenoo nari faiqi namu irammirinau. Faiqi misa faiqi nimaaku qiniara nana fasiqee fee qidee.

<sup>14</sup> Misa iriseeqa qimamiqau. Moo fannoo aniara Yoohaneefa nammari nimimarufa kuqiranakiqari findifinoo marifa maridanoommifoo qidaqa. Moo fannoo tamummaqara fasiqa Eeriaa fee qidaqa. Moo fannoo tamummaqara fasiqa Yeerimaiaa fee qidaqa. Moo fannoo Anutuna tamummaqara fasiqauqakiqari moo fannoo fee qidaqa.

<sup>15-16</sup> Yisufa misa ufa iriseenoo quandafinoo nari faiqi namu irammannimaqanau. Innee qiniara yafasiqanee fee qidee qimasoofoano Simoona moo auqu Peetooroofa Yisuna qimaminau. Anee ooqai Anutuna asauku mundirafa mariananoo anee kaqi marira Anutuna amaaku mariananoo.

<sup>17</sup> Yisufa iriseenoo nari qimaminau. Oo Simoona Yoonaana amarana amaaku, maqasaa fasiqa sia miqi qimasee ani qimamiqini. Innaarunai qini qikoofa mifa kai ani aqoosaa rino. Minara anee asasimarianafa mariananoo ani qimaminoo. <sup>18</sup> Qinee ani qimamidaqa. Anee Peetooroofa ani auqu oosana oonifa mariananoo. Qini qikoofa qiniara uqafiqinasaa mi ufafa firaa ooniarra foora marinara qinee mi firaa ooninasaa qini amaana maqa usakaanaura. Qini saqariki mariasa qumareeqa qeeqa amaana maqaikamandaanaura. Mi ooninasaa qini maaqa usakaanaura. Kuqirafa sia amana mi amaana maqana rafaqa fuannoo. <sup>19</sup> Peetooroofa, qinee innaaruna kooqi atuusee keeqemariana kiqa anoonara foora ani amianaura. Anee maa maqanasaa moo ainainara anee iriseenana mandaikammi ifoo qinaqa qinee faqa innaarunai miqi kai iqa mandaikammiifoo qianaura. Anee amiqi ifoo qinaqa qinee faqa innaarunai miqi kai iqa amiqimmi ifoo qianaura.

<sup>20</sup> Miqi qimaseenoo Yisufa nari faiqinamu qimanniminau. Afeekaikamasee qumee uqannandaqa. Qinee ooqai Anutuna asauku mundira fasiqa marunasa minara sia moosa qimannimidaqa, kukeeqaqa.

*Yisufa nari kuquaninnanara kooroo inau.*  
(Mak 8:31-9:1; Ruk 9:22-27)

<sup>21</sup> Mikari oosarasee miqooqari nari kuquaninnanara qimannimi maree finau. Mifa Yeerusareenni ooru firanara faqa qimanniminau. Faiqi firaasa faqa amaana maqasaa rakisimarusaa faqa Mooseena sandufa uqannifiqee marusa faqa misa firaa dinee miqoo nari Yisuna amiranara qimanniminau. Kuqariranara faqa qaaramoo faasaana findi fuaninnanara faqa qimanniminau.

<sup>22</sup> Peetooroofa maa ufana iriseenoo Yisuna kaqinni mareeqee quqaseenoo aaqooki qaoo qinoo qimaminau. Oo karaambaiqa, saa. Ani kuqiranara Anutufa qaoo qianoo maa ainainausa siamma ani arifaranoo. <sup>23</sup> Yisufa iriseenoo quandaseenoo Peetooroona qimaminau. Sadanna see maree fua, qinaaqianni aigaree fua anisaa qikuamaki aqufuanoora. Anee sia Anutuna irirana maree marianafa, fifau faiqi irirana maree marianafa.

<sup>24</sup> Qinee aunirira saqarisaa kuqanaura. Faiqi anaasee moo fannoo qini iriranamau finafa miqi kai iannoo. Nari marira ainaina mai uturuqu quqaseenoo qiga duqusaara qiga ufasaara, qiga daanna ramasee kaqi kuqariranaki keeqaani. <sup>25</sup> Moo fannoo nari kaqi mariranara tatamaqianinafa nari kaqi marirana taikaannoo. Moo fannoo qiniara nari maaqoo marirana minnisainafa mifa nari kaqi marirana kasoqaqee paquriannoo. <sup>26</sup> Faiqi moo fannoo aiqama maqa maaqa nariara maraseenoo aiqama minaki mari ainaina nariara kai afapitee marifa kuqinoo nari aunduraindaaafa kuridiranaki finanoo nari uriqaraidanoo fee. Oo sia uqanna uriqaraidanoo. Kuqiranakiqari mi fasiqafa nana feefauru Anutuna amiseenoo kaifaa nari ainainannoo fee nari aunduraindaana idakinaana kaifaa maraannoo fee. Sia amana maraannoo. <sup>27</sup> Minara qinee faiqi nimaaku qumuanaura, qini qangiroo namufaqa qini qikoona kaaqa areenaranaki qumuanaura, aiqama faiqi anaasee misa saika auqee mariana akiqara nimirara qumuanaura. <sup>28</sup> Kuqaa anoona ufa qinee qimannimidaqa innikiqari faiqi qaaramoo sia kuqirai kaqi marifaqa qinee faiqi nimaaku qeeqa innaaruna ququsa uriqarara ququsa namufaqa inni nifusaa qumuanaura.

## 17

*Aaqanasaa Yisuna afaaqa mookinoo kaaqa qamaqinau.*

*(Mak 9:2-13; Ruk 9:28-36)*

<sup>1</sup> Miqi qimaseenoo qisaku dinni taikaseenoo dinni oonu moodaa marasee faasaana taikaseenoo Yisufa Peetooroona faqa Yameesana faqa mina akaqa Yoothaneena faqa minamusa nifiqeenoo aqanai nariaraa naadumai ooru fiqau. <sup>2</sup> Miqoo misa ooru roofanoo Yisufa moo afaaqa amiqira afaaqa maranau mina afiri suaniara foora kaaqa amaqinau mina qamunna faqa eekara aruaqinau nifu qafoofanoo nifu faqa daroodaraa inau.

<sup>3</sup> Miqi masoofanoo ooqai taikaseeqa Anutuna faqa innaarunai maruqanda Moosefa faqa Eeriaafa faqa akooqoo maqasaa misa nifusaa anireeqa Yisuna faqa ufa qiqau.

<sup>4</sup> Peetooroofa qafamasee Yisuna qimaminau. Karaambaiga, dufi dufi anee maasa qifiqee adiafaa irrannai mai uruananoo. Anee qinaqa kaqkaa uigaana maqa qaaramoo auqunaaura. Anindi moo, Moosenaindi moo, Eeriaanaindi moo. <sup>5</sup> Peetooroofa kaqi qimarufanoo kaaqa qarana asuru fannoo aiqama rafaafaq finau. Ufa moo, asurukiqari Yisunara qimanniminau. Maafa qini qimaaku qini kaaqa minara qimuqusidanoo. Qini didirafa minasaa maridanoo, mina ufa iriaqa.

<sup>6</sup> Yisuna faiqi namu mi ufana iriseeqa kaaqa rufieeqa noorindari maqasaa aqufiqau. <sup>7</sup> Maqasaa mapamiqa marufanoo Yisufa anireenoo asaku misasaa mundinoo qinau. Findi fuaqa sia rufiaaqa. <sup>8</sup> Miqi qufafaq misa kaqi kaaqoo uqerafufafaq murufi Yisuna kai qafaqau sia faiqi moo marinau.

<sup>9</sup> Misa miqooqari Yisuna saimbaqa aqanaindari qumimarufanoo Yisufa maaqi qimasee afeekaikamasee qimanniminau. Innee aaqanasaa mee qafaa ainaina sia innee moosa qimannimiaqa. Qinee faiqi nimaaku kuqiranakiqari findi fuanaqa miqoo kai qimannimiaqa.

<sup>10-11</sup> Miqi qimasoofaqa mina faiqi namu iraida qiqau. Maasa Mooseena sandufa uqannifiqee mariasa ooqeenaa tamummaqara fasiqauqa akara asaanarumasee moo fasiqara Eeriaana aanna ree marifa Anutuna asaku mundirana afunni aniannoo fee qidaqa. Misa yafasiqanaree miqi qidee qufanoo Yisufa qimanniminoo qinau. Misa kuqaa qidaqa. Eeriaana aanna ree marifa asaku mundiraua qini qifunni aiqama ainaina andeeqaanifeera indaaru aniannoo. <sup>12</sup> Qinee qimannimidaqa, iriaqa. Kuqaa Eeriaana aanna ree marifa qini qifunni doo aninoo. Aniroofaqa misa minara sia irirai nari iriranannai kai dapikamasoofanoo kuqinau. Miqi kai mandee qinee faiqi nimaaku kaqikaqoo misasaa farindamaqi aqufunaaura.

<sup>13</sup> Miqi qimasoofaqa mina faiqi namu iriseeqa Yisufa Yoothaneefa nammari nimirunara Eeriaana kikiqa ususeenoo qidaqinoo qiqau.

*Yisufa qumureenoo kumaaraa aunduraki afaanna maruna afaqanau.*

*(Mak 9:14-29; Ruk 9:37-43a)*

<sup>14</sup> Misa aqanaindari qumureeqa faiqi anaasee suqiga maruqoo qumuroofanoo faiqi moo fannoo Yisuna oorinni rufaidanoo ani aqoori saunara finoo tootoonasaa oogu marifinoo qiki raqaidanoora foora Yisuna qimaminau. <sup>15</sup> Oo karaambaiga, qini qimaakuara amuqusinana dadaaqa. Mifa fuseenasana arimarifaqa amiqimmasee auri marifaqa. Maqee maqee kaqi idaki aqufidanoo maqee maqee nammariki aqufidanoo. <sup>16</sup> Qinee qeeqa qimaaku afiqeeqa ani faiqi namu mariaqoo munusaunaqa sia amana misa mi aurirana taikaafaqa, minara ani qimamidaqa.

<sup>17</sup> Yisufa mina iriseenoo aiqamausa qimanniminau. Innee qini ufasaa irirana rusirafa siaisa mariafanoo kaaqa foomboo rimariasa mariafanoo. Qinee kisaagasaa inniki marunaqa innee sia dauni irimariafaqa. Kisaagasaa fee ubiqafi inni manda oosana ummaara maraqa fuanauree. See mi kumaaraana maree mai aniaqa qufafaq miqimiqau. <sup>18</sup> Yisufa mi afaannana aqiqoofanoo fufanoo mi kumaaraana mikari kai miqoo kai andeeqa aisanau.

<sup>19</sup> Yisuna faiqi namu kaqikaqoo marikiqa oonurandee qumee kai anireeqa Yisuna qimamiqau. Maasa nanaree afaanna aqigaunanoo fee sia finoo fee. <sup>20</sup> Yisufa qinau. Innee qinisaa irirana rusirafa kaqikaafa marinara kai miqiafanoo. Qinee kuqaa anoona ufa qimannimidaqa. Inneeqa irirana rusirafa maqana qaqama miqirafa kaqikaafa marinaqau maa aqannara qifanoofau meeqai fini. Innee miqi marifaqau aiqama ainaina amanammifoo qini.

*Yisufa kafaa nari kuquaninnanara qimanniminau.*

*(Mak 9:30-32; Ruk 9:43b-45)*

<sup>22</sup> Yisuna faiqi namu Kariree maqa maaqai moodaarunna moodaasaa suqiqa maridaqa nimarufanoo Yisufa maaqi qimasee qimanniminau. Faiqi nisaukuara qinee faiqi nimaaku fuanaura. <sup>23</sup> Misa qini kuqa darifaqa qaaramoo faasaana kaqi mariqa findi fuanaura. Miqi qimasooafaqa Yisuna faiqi namu minara oonumafi irufanoo nimuqusa mandaikinau.

*Amaana maqa takisa nimiriana noodaanna ookinaana marasee niminau.*

<sup>24-25</sup> Misa Kapeeranaumma maqusa oonuroofaqa amaana maqa takisa maree marusa misa Yisunara nisauruseeqa Peetooroofa maruqoo oonuree iraidaqa qiqa. Ani fraafa amaana maqa takisa sia fee aqidanoo fee qimasooofanoo Peetooroofa eeo aqidanoo qinuu.

Miqi qimaseenoo kaqikaqoo maaqaki keeqoofanoo Yisufa mina moo auqu ramasee qimaminoo qinuu. Simoona maa maqanasaaqaraasa misa oosana maaqimminoo maridanoo. Moo maqannaasa namuqaa afeekaikamasee narirarammasaida namuqaandi kai fee takisa maraida fee, narindi nari maqannaasaindi fee kai maraidee qufanoo Peetooroofa mina iriseenoo qinuu. <sup>26</sup> Namuqaandi kai maraidaqa. Nari maqannaasa uriqararasa mariafanoo sia uqanna misaki maraidanoo.

Yisufa iriseenoo qinuu. Kuqaa qiananoo, miqi marifaqa uriqararasa niku nisauku nifaafa quqasee maridaqa. Maasa uriqararana Anutuna aiku asauku marunasa marida. Nanaree fifau Anutuna amaana maqa takisianaree. <sup>27</sup> Sia niminaqa maasara noori runifoora. Saina anee tafa mara maree nammariki ooquee aquseenana indaaruga noodaanna rarisameenana oo raqaseenana qafaa. Moodaa munnimma minaki mariannoo. Anee qiniara faqa aneennara faqa mi munnimmana mareeqeena amaana maqa takisa maree mariasa nimiranoo ufa taikaani.

## 18

*Faiqi aanaaqiara maqi reendeenirafa innaaruna ququsaki uriqararafa mariannoo.*  
(Mak 9:33-37; Ruk 9:46-48)

<sup>1</sup> Mi aukunna mina faiqi namu Yisufuqoo aniree irammirida qiqa. Innaaruna ququsaki yafee uriqararafa maridanoo fee. <sup>2</sup> Mifa iriseenoo faiqi aanaaqi moo miqoo maruna aaroofanoo aniroofanoo mareeqeenoo nari faiqi namu gambaana quqaseenoo qimanniminau. <sup>3</sup> Qinee kuqaa anoona ufa inni qimannimida. Innee sia onu quandakinaqa sia kafa aanaaqi aanaaqi kammafinaqa innaaruna ququsaki sia fifaranoo. <sup>4</sup> Moo fannoo nari kai maa kaqikaa faiqiara foora fifmandeenoo marinafa mifa innaaruna ququsaki uriqararafa mariannoo. <sup>5</sup> Yafee moo fannoo qini ufara iriseenoo quandafinoo faiqi aanaaqi maaqairana asasammasee aqoondikinafa mina faqa qini faqa miqi kai inoo qiqaondikiannoo.

*Yisuna mandaaqa saannakinaana faiqi aanaaqi mandainainaki quqasainafa numoo mariannoo.*

(Mak 9:42-48; Ruk 17:1-2)

<sup>6</sup> Faiqi moo fannoo qinisaa atooqee mari kaqikaa faiqina mandoosana uqafiqainanoo mi faiqifa saamurinanoo, mi fasiqana mi mandoosanna uqafiqeemari fasiqana mina numoo uriqaranoo mariannoo mandainainaki maridanoo. Faasai mi fasiqafa ooni fraatia qumareenoo nari anukaki ususeenoo nammariki aqufinoo nari kai nari arinoofau nari numoo oorudupinoo mariqini. Mi faiqi anaagina manda oosanna uqafiqainanoo mi numoofa fraafa mariannoo. <sup>7</sup> Maa maqanasaa manda ainana moomoo minaki mariannoo. Mi manda ainainna aukuna aukuna sia taikaannoo kaqi mariannoo, faiqi mara quqaidanoo. Minara numoo fraatia mari ifoo qidaqa qimudaqo qidaqa. Mandainaina oosana onu rarisainafa mi fasiqanaki faqa fira numoo tia mari ifoo qidaqa. Minara qinee qimudaqo qidaqa.

<sup>8</sup> Ani asauku fannoo fee, aiku fannoo fee ani ani rarisameeqeenoo manda oosanaki quqemarinnana mina ateeqa aqua. Aiku asauku siainafa marira maqaki keeqafinana amana marinnaranoo. Aneenna aiku asaukuara amuqusinana kaqi manda oosana marasee mari inafa mifa naaruara marira idaki rafuseeqee aqusainafa sia amana marinnaranoo. Mandaikamminnaranoo. <sup>9</sup> Ani afu aaqoo fannoo fee ani rarisameeqee manda oosanaki quqaidanoo fee mina diqi aqua. Anee moodaa afu aaqoo faqa kaqi mariranaki keeqarafa amana marinnaranoo. Aiqama afu aaqooqara kaqi maridanoo ani rafuseeqee idaki aqusainana sia andeeqennaranoo. Mandaikamminnaranoo.

*Sipsipa aanaaqi auianoo mari quandara ufa.*  
(Ruk 15:3-7)



<sup>10</sup> Innee auforiaqa. Sia uqanna faiqi aanaaqi moo fannoo maaqirafa akoo uqannaqaani. Innee mi osannara eerairiaqa. Minara qimannimianauna. Innaaruna maqusai qangirooquqa maqasaaqaraa faiqi aanaaqi misa naadu naadu rakisinnimaqara qangirooquqa qini innaarunaindaraa qikoona oorisa kikiqidaqa nari faiqi aanaaqi maa maqanasaqaraasa rakisinnimaqaranara Anutuna qimamidaqa mina oorisa maridaqa. <sup>12</sup> Innee maaqianna ufana nana iranee irifaree. Faiqi moo mina sipsipa moomoo marida moodaanni qisauku fasiqa arusee marufanoo misakiqari moodaa kai auianau. Misasaa rakisi maru fasiqafa aiqama sipsipa anusaa suqu quqaseenoo misakiqari moodaa auianoo marunara randarara finau. Qinee kuqaa ufee qida fee. Kuqaa, aiqama sipsipasaa rakisi mari fasiqausa miqifaranoo. <sup>13</sup> Mi fasiqafa mi sipsipana paqurimaseenoo kaaqa minara asasiannoo. Moomoo sia auianoo mariasara mana maniannoo. <sup>14</sup> Miqi kai mandee qini innaarunai qikoofa faiqi aanaaqi moo kuridiranara akooqaidanoo. Aiqama uqanna kaqi naaruara mariranara innaarunai nikoofa aididanoo.

*Ani akaqaafasaa ani mandaikammamaqaina ufa.*

<sup>15</sup> Ani aqoonafa ani mandaika mamaqainana anee mi finnai oonuree nari mandosannara qimamia. Inneeqara kai mariaqa sia moo fannoo mariani. Mifa ani ufa irisainana doo anee aneenna aqoonnana kafaa aqoondikina marinnaranoo. <sup>16</sup> Mifa ani ufa sia irinana anee Mooseena sandufamau finana faiqi qaara fee moodaa fee nifqeenana aqoonna finnai fua. Misa maasa faqa ani mandainaina qafee fee qiageera, ani dadaaqaqeeera ani ufa anoonaikianifeera. <sup>17</sup> Mifa misa ufa faqa sia irinana amaana maqaki keeqeemariasa qimannimiaqa. Amaana maqaki keeqeemariasa ufa sia irifaqa aamina maqannaara foora mamaqaa sia mina faqa ufa qia, manda takisa maree maria fasiqausara foora fidiqaa mamaqa.

*Moo ainainara Anutunara innaaru qinanoo amiannoo.*

<sup>18</sup> Qinee anoona ufa inni qimannimidaqa. Innee maa maqanasaa moo ainainara iriseenana mandaikammiifoo qiafaqa qinee faqa innaarunai miqi kai iqa mandaikammiifoo qianauna. Innee amiqimmiifoo qiafaqa qinee faqa innaarunai miqi kai iqa amiqimmiifoo qianauna. <sup>19</sup> Qinee kaifaa moo ufa qimannimidaqa. Qaara fasiqa maa maqanasaa maqasaaqaraa nana ainainaree moodaaqoo naundura quqasee irifaano innaarunai qini qikoofa mi ainainna nimiannoo. <sup>20</sup> Yai fee qaaraqanda fee qaaramoo fee qini duquara iriseeqa suqiga misa qambaana qeeqa faqa qumee maridaqa inniki marida dadaaqianauna.

*Mandainainira faiqiara quandara ufa.*

<sup>21</sup> Qimasoofanoo Peetooroofa anireenoo qinau. Oo karaambaiqa naquma kari fee qini qiqoonafa manda oosana qiminaqee mina akiaqara minnaisaanauree. Moodaa qisauku taikasee dinni oonu qaara marasee kari fee minnaisaanauree.

<sup>22</sup> Yisufa qimaminoo qinau. Sia moodaa qisauku taikasee dinni oonu qaara marasee kari fee qidaqa. Moodaa fasiqa aiku asauku taikasee moo fasiqa oonu moodaanni qisauku taikasee fasiqa aiku asauku miqumma kari aqoonnana manda oosana akiaqara minnaisaaneera qidaqa. Figaramasee moomoo kari minnaisaaneera qidaqa.

<sup>23</sup> Minara qinee moo ufa qimamianauna. Innaaruna maqusa maaqimminoo maridanoo. Fira rakisirafa moo marinau. Mi rakisirafa nari dadaaqi maru fasiqausa suqusee ufaasu nimiafanna munnimmana andeeqaanauree qimasee suqinau. <sup>24</sup> Suqusee ireemarufanoo misakiqari moo fannoo nari karaambaiqa munnimma moomoo figaramasee nariara firaa munnimma moomoo rafaqaqinau. <sup>25</sup> Mi fasiqafa sia amana nari karaambaiqa amufanoo nari faiqi namu qimanniminau. Moosa mina anaqa faqa faiqi namufaqa nimisee innee minasaqaraa feefauru mareeqee qimiaqa, mi munnimmana akiaqariani. <sup>26</sup> Mi fasiqafa iriseenoo amuqusufanoo oorindari maqasaa rupaita mafufanoo qiki raqaidanoo iranau. Oo qini karaambaiqa, qiniara kasooinaqa qinee aiqama ani munnimma amianauna. <sup>27</sup> Mina karaambaiqa iriseenoo amuqusufanoo mina aika tatuseenoo idukuseenoo quqaisanau.

<sup>28</sup> Mi dadaaqira fasiqafa raudamakufanoo maqusai ooqureenoo aqoonna dadaaqira fasiqa qafeenoo anukaki qumareenoo qinau. Qinee munnimma kaqikaana amiafannana kaqi kaqi mara qimia. <sup>29-30</sup> Miqi qufanoo mina dadaaqimaru fasiqafa maqasaa aqufino reendenamandee qinau. Oo qiniara kasoo inaqa qinee ani munnimma amianauree qimasoofanoo mina aqoonafa afeekaikamaseenoo mi fasiqana karafusaki quqanau. Qini kaqika munnimma qiminaqa idukuane qinau. <sup>31</sup> Karafusaki quqasoofaqa mina aqoonausa qafoofanoo nimuqusa kaaqa mandaikufaqa misa nari karaambaiqinnai oonuree aiqama mifa auqoo oosana oosanara qimamiqau. <sup>32</sup> Karaambaiqa fannoo

iriseenoo mina dadaaqira fasiqa aaramaseenoo qimaminau. Anee manda dadaaqira fasiqa marianano. Anee qini reendeenamasee qima qimianaqa ani aika aiqama tatu aqiqa. <sup>33</sup> Naqaa fee ifanee sia fee anee miqikai inana aneenna aqoonnanara amuqusinanee. Qinee aniara miqunandee iaqaana. <sup>34</sup> Miqi qimaseenoo aranaqoofanoo arira maqaki quqasee qinau. Misa miqoo ani ariisaifana kaifaa qini firaa munnimma qimianaqa idukuanaura.

<sup>35</sup> Yisufa mi ufana qimaseenoo nari faiqi namu maaqi qimasee qimanniminau. Innee faqa sia inneeqa niqoonausa inneeqa naundurannoo misa nikiagara mi aikana sia tatiqa aunifanoo qini innaarunai qikoofa faqa miqi kai inoo inni aika sia tatuannoo.

## 19

*Yisufa faiqi anaasee nariara nariara minnisaranara qimanniminau.*  
(Mak 10:1-12)

<sup>1</sup> Yisufa maa ufausa taikaseenoo Kariree maqa maaqa minniseenoo Yudeea maqa maaqai oogu finoo Yooradanna nammari dinni afainni marinau. <sup>2</sup> Miqoo oonu marufaqa faiqi anaasee moomoo afaqee oonu roofanoo misa aurirana taikannisanau.

<sup>3</sup> Farisai amaana ufa qimarusa misa miqoo anireeqa Yisuna ueeqasee amanammasee qafarree qimasee qimamiqa qiqa. Amanee faiqi fannoo oosana oosana ainainara qimaseenoo nari anaqa minnisaannoo fee, Mooseena sandufa rukiaseenoo fee miqiannoo fee.

<sup>4</sup> Yisufa iriseenoo qinau. Sia fee innee Mooseena akara asaanaridee. Oosana arooqooqari Anutufa oosana araseenoo misa auqinau. Faiqi faqa anaasee faqa oosana araseenoo auqinau. Sia fee innee mi akaranara iridee. <sup>5</sup> Anutufa minara maaqi qinau, qinee oosana arooqooqari faiqi faqa anaasee faqa auquafannanara faiqi nari anoona akoono minnisee nari anaqa faqa moodaanakikiannoo. Miqoo nariqa miqanda moodaa marifaranoo. <sup>6</sup> Yisufa minara kaifaa qimanniminau. Miqanda sia qaaraqanda marifaqa moodaa amaqiara foora marifaranoo. Anutufa moodaanaki aquminafa sia uqanna faiqi idukuqa.

<sup>7</sup> Farisai amaana ufa qimariasa mina iriseeqa qiqa. Mooseefa sandufa akara ruma quqaqoofa marida. Minnisara papiqa akara rumeeqee anaasee amisee aqiqa. Mooseefa miqi qimaqafana Yisu anee naqi fee qidanee.

<sup>8</sup> Yisufa iriseenoo qinau. Inni irirana mandaikinaro inni nimuqusa sia amaqi marifa afeekaikinoo amatooki marinara minara kai Mooseefa akooqee marufanoo inneeqa ninaaqara minnisaqee qinau. Indaaru kuradoo aukuaana sia miqinoo marinau. Miqoo Anutufa miqandara apiqa mariaqee qinau.

<sup>9</sup> Qinee qimannimidaqa, faiqi yafee nari anaqa sia ummuarimari anaaseena andeegara anaasee kaqi minniseenoo moo anaasee marainafa, mi fasiqafa qumuarammidanoo.

<sup>10</sup> Mina faiqi namu aniree qimamidaqa qiqa. Faiqi anaasee miqiqa maridaqa amana faiqi nariqa kai maridaqa adeedaana mariaqaana. Maasa andeeqaidee sia fee andeeqaidee.

<sup>11</sup> Yisufa misa ufa iriseenoo qimanniminau. Faiqi aiqama maa inni ufa sia amana maraaqeeera. Anutufa miqiannoo qinausa misa kai adeedaana amana marifara, sia aiqama miqifaqa. <sup>12</sup> Nifaandama itirausa misa maqookari kai nifaandama siaisa misa sia amana anaasee maraaqeeera. Kaifaa akaqausa nifaandama itirausa faiqi kai nifaandama itinnimaqasoosa maridaqa. Misa faqa sia amana anaasee maraaqeeera. Kaifaa anaasee siaisa moo, misa innaaruna maqusara kai irisee nariqa kai anaasee siaisa maridaqa. Andeeqasee marianauree qimasee Anutunara kai irisee miqidaqa. Misa faqa sia amana anaasee maraaqeeera. Yafee mi sandufana amana marainafa mifa kai maraani.

*Yisufa faiqi aanaaqiuqa nifaqooqa qinau.*  
(Mak 10:13-16; Ruk 18:15-17)

<sup>13-14</sup> Misa faiqi anaasee, nari faiqi aanaaqiuqa moomoo nifiqee Yisufuqoo aniqau. Yisunara mina asauku misasaa munduseenoo innaaru qianifeera nifiqee aniqau. Yisuna faiqi namu faiqi anaasee nari faiqi aanaaqi farafara qiaafoo qimasee niqiqamasoofanoo Yisufa qinau. Saifaqa maree aniqau. Sia rafaqafunnisaqa. Innaaruna maqusa miqi-rausaindi maridano. <sup>15</sup> Miqi qimaseenoo nari asauku misasaa nikiaqa munduseenoo nifaqooqa qimaseenoo findimeeqeenoo moosaa finau.

*Ainainafaqaa kumaaraa innaaruna aanara iranau.*  
(Mak 10:17-31; Ruk 18:18-30)

<sup>16</sup> Faiqí moo fannoo Yisufinnai anireenoo qimamidanoo qinau. Qufasaa rakisirafa nana amiqira saika auqamamaqaananoo fee Anutufa innaarunai naaruara marirana qimiannoo fee.

<sup>17</sup> Yisufa iriseenoo qimaminau. Anee naqaa ifanee qiniara amiqira ainainara iraidanee. Moodaafa kai Anutufa mifa kai amiqirafa maridanoo. Sia moo amiqirafa maridanoo. Anee naaruara mariranaki keeqarree qidanee. Doo amana, anee Mooseena sandufa asaana rumasee mi mau kai fua.

<sup>18</sup> Miqi qimasoofoo mi fasiqafa iraidanoo qinau. Nana sandufee maraanauree. Yisufa qimaminoo qinau. Innee sia kuqa naruqa, sia faiqí anaasee ummuariaqa, sia ainaina ummuariaqa sia kootaki moosara unna ufa qiaqa. <sup>19</sup> Aneenna anoona akoonu nuqu uqeeraidana nimuqusa idaaqammannisaa. Anee aneennara amuqusianandee kai inana aqoonausara amuqusiani.

<sup>20</sup> Mi kumaaraafa iriseenoo qinau. Anee qianandee mi sandufausa doo aiqama maraqaunasa maridaqa. Nana saika fee moo faqa qinee auqamasaananoo fee Anutufa naaruara marirana qimiannoo fee.

<sup>21</sup> Yisufa iriseenoo qimaminau. Anee innaarunai atisaa kai mariananoo. Anee aiqama maraannee qimaseenana aneenna qumiasana aiqama mara mareenana moo atinai nimiseenana feefauru maraseenana kudifasiqauqa nimisainanoo ani qumiasana ani afeesara innaarunai mariannoo. Miqinana doo ania, qini faqa fua. <sup>22</sup> Mi kumaaraafa mi ufana iriseenoo oori akooqamaseenoo finau. Nari ainaina moomoo marunara minara oonumafi iriseenoo oori akooqamaseenoo finau.

<sup>23</sup> Mifa fifufanoo Yisufa nari faiqi namu maaqi qimasee qimanniminau. Kuqaa ufa anoona ufa qinee qimannimidaqa. Faiqi moo fannoo ainaina faqaafa innaaruna maqa maaqaki keeqaaneera anuqinnara mammaqamminnaranoo. <sup>24</sup> Qinee kafa qianaura. Amanee qoosa fannoo uka aamarai keeqaannoo fee. Sia amana fuannoo titiqiannoo. Doo miqi kai masee ainaina faqaa fasiqa innaaruna kooqiki keeqarara anuqannoo.

<sup>25</sup> Mina faiqi namu mi ufana iriqa tautiqa qiqau. Ani ufa miqinoo marinanoo fee, yafee moo fannoo amana innaarunnai ooru fuannoo fee sia amana fuannoo. <sup>26</sup> Yisufa quandafinoo misa nari nindafamasee qimanniminau. Faiqiki maa ainainnafa sia amana maridanoo. Anutufa aiqama ainaina amana marifa maridanoo.

<sup>27</sup> Peetooroofa iriseenoo qimaminoo qinau. Maasa qiqafa. Maasa aiqama ainaina quqasaunasa ani faqa fidaqa. Minara Anutufa nana ainainee maasa qimiannoo fee.

<sup>28</sup> Yisufa iriseenoo misa qimanniminau. Qinee kuqaa anoona ufa inni qimannimidaqa. Fuka maqa maaqa Anutufa kasooqagee auqusainaga qinee faiqi nimaaku qini firaa kaaqa qara ufirira qaarisaa, qaari ufiqisee minasaa ooqu mari finaga faiqi aanaaseesaa rakisi marianaqa innee qini faqa fimariasaa innee qisaukuqara taikasee qikunni ooqu qaara marasee nari ufirira qaarisaa qini faqa ooqu marififaranoo. Innee miqooqari Isaraee maqanna qikunni ooqu qaara marasee oosana Yakooboona faiqi namu atikiqari kambiqaarusa misa niku nisaukusaa rakisifaranoo. <sup>29</sup> Yafee moo fannoo qini duqara iriseenoo nari maaqa faqa nari akaqaafasaa uqa faqa nari asooqmaaka faqa nari anoona akoonu faqa nari faiqi faqa nari saqamainaina faqa aiqama minnisainaga sia mina akiaqara kai amiana. Fifu faqa amiana innaarunai naaruara marirana faqa amiana. <sup>30</sup> Moomoosa maqee uriqararusa mariasa misa innaarunnai ooruree ureeqarusa marifaranoo. Moomoosa maqee ureeqarusa mariasa misa innaarunai ooruree uriqararusa marifaranoo.

## 20

*Ainaina faqaafa afaaramaseenoo ainainira faiqiuqa nimu quandara ufana.*

<sup>1</sup> Minara Yisufa qimanniminau. Anutufa innaarunai mariasa maaqi qimasee rakisinnisaidanoo maaqoo uriqararusa miqoo ureeqarusa marifaranoo kafa maaqoo ureeqarusa miqoo uriqararusa marifaranoo. Qinee mina rakisira oosana ainaina faqaa fasiqa kikiqa usuanaura. Iriaqa. Faiqi ainaina faqaafa moo fannoo faiqi uainna qaqama ummaqimaru fasiqafa moo fannoo nari uainna qaqama akuqanoo marufanoo iqaqoofanoo raudamafinoo maqusai qumureenoo nari uainna qaqama diqi marusara randanau. Moodaa suanisaa ainainimaru fasiqausara ufaasu ainainimariasara randanau. (Mi akuuanna misa oosana maaqimminoo marinau. Qaqama akuqamafufanoo mi ainainna akoofa kananaana maqusai oonureenoo akaqausa qimanniminau. Innee qini qaqama tiqi qimifaqa maqee faasaanara kai eendi marinaqa moodaa faasaanara mi munnimmana kai nimiana.) <sup>2</sup> Mi fasiqafa paqurimandeenoo ainainira fasiqauqa faqa ufaasu ainainimarunana akiaqara mi munnimmanara ufa qimariqau. Ufa qiqiseeqa andeeqaseeqa doo nari ainaini marunnai niqoofofa fiqau. Misa moodaa faasaana

ainainiuna akiagara moodaa munnimma deenariasee qimarusa minara andeeqaseeqa ainainai fiqau. Kananaana saarisufa namufaqa ainainai fimariqau.

<sup>3</sup> Suani kaqikaqoo urureenoo keekooqufanoo ainaina faqaa fasiqa fannoo maqusai kafaa oonureenoo nindafoofaqa faiqi moomoosa kai oogu faaqee iqau. <sup>4</sup> Nindafamaseenoo qimanniminau. Innee faqa qini uainna ququsaki fifaqa fafaa eeninaqa inni ainainirana akiagara kai nimiana. Qimannimisoofaqa eedoo qimasee fiqau. <sup>5</sup> Suani qambaana aiaina faqaafa kaifaa maqusai oonureenoo akaqausa qimannimisoofaqa misa faqa ainainirannai fiqau. Suani afu muqunni mara ubeekoofanoo kafaa oonureenoo kaifaa miqi kai masee akaqausa qimannimisoofaqa misa faqa fiqau.

<sup>6</sup> Eenoofanoo mi fasiqafa kafaa maqusai oonuree nindafoofaqa faiqi akaqausa kaqi oofaqaqee marufanoo nindafeenoo qinai. Naqaa fee ifaqee innee kaqi kai maa faasaana mariafanoo, doo eeneenoommi. <sup>7</sup> Misa iriseeqa qiqau. Faiqi moo fannoo sia qifafa maasa mareeqa kaqi maridaqa. Miqi qimamufanoo mifa misa faqa nari ainainai nifiqee finau.

<sup>8</sup> Eendufanoo mi fasiqafa nari rakisira fasiqa aaramaseenoo qinai. Anee maqee ainainiasa nifiqee miniseenana ainainiaana akiagara feefauru nimia. Inaaqianna fimariasa misa indaaru nimia. Misa nifunni fimariasa misa ninaaqianna nimia. Kaifaa suani qambaanaikifaqa fuasa misa ninaaqianna nimia. Suani keekooqifaqa fuasa misa ninaaqianna nimia. Maqee iqaqifaqa fuasa misa ninaaqianna uqanna nimiaqee qimasooofanoo miqimminau. <sup>9</sup> Eeneemaru inaaqianna fuasa misa aniroofanoo deenariasa munnimma moodaa moodaa nininau. Miqi kai masee aiqamausa nininau. <sup>10</sup> Maqee iqaqoo fimarusa mina qafamasee misa nariara firaqoo mararara qiqau. Misa aniroofanoo rakisirafa moodaa deenariasa munnimma kai nininau. <sup>11</sup> Misa maraseeqa noori runiqa naundaufa naundaufa qidaqiqau. <sup>12</sup> Maasa maqee iqaqifaqa oonu maridaqa ainaini marunoo suani dari marifaqa kadaapiridaqa qidaqa. Minara maasa munnimma moomoo qimia. Eenee marifaqa fuasa misa ainaina imariana amana oonu dupimasee nimia. <sup>13</sup> Ainaina faqaafa iriseenoo qimanniminau. Qini qigoondiuga sia qinee furufaramannisaida nimidaqa. Andeeqasee nimidaqa. Faasai kananaana innee faqa qinee faqa andeeqagaunaqa innee moodaa deenariasee qiana kai doo mina kai nimidaqa. <sup>14</sup> Doo innee mina kai maraqa, innee qaindi uqanna doo maree fuaqa. Qinee indaaru maqee iqaqai fuasa faqa inaaqiana eeneemari fuasa faqa qeeqa kai irisee amana amana kai nimiqauna. <sup>15</sup> Munnimma qinindi uqanna marifaqa nimidaqa. Sia moonaindifau. Qeeqa kai iriseeqa amana afaaramma nimaqaanaura. Innee qini afaariranara minaree inni nikoo qaidanoo fee.

<sup>16</sup> Yisufa minara nari faiqi namu qimanniminau. Miqi kai masee Anutuna ququsaki indaaru fimariasa misa nari ainainirana akiagara marasee ureeqarusara fooqira marifaranoo. Ninaaqianna fimariasa miqi kai masee nari akiagara mareefaranoo misa urifararaura foora marifaranoo. Aiqaamausa amana amana kai mareefaranoo.

*Yisufa qaaramookufanoo nari kuquaninnanara qimanniminau.*  
(Mak 10:32-34; Ruk 18:31-34)

<sup>17</sup> Yisufa Yeerusaree maqusai oorufinai. Ooru fidanoo nari faiqi namu qisaukuqara taikasee qikunni oogu qaara marasee faiqi namu faqa ooru finau. Faiqi anaasee aana ititafufanoo Yisufa nari faiqi namu nifiqeenoo faiqi anaasee irifoo qimaseenoo aanafaiqara fidanoo nari faiqi namu qimanniminau.

<sup>18</sup> Maaqi qimasee qimanniminau. Innee iriaqa. Maasa Yeerusareenni ooru fidaqa, ooruraananoo faiqi moo fannoo munnimmara mamareenoo qiniara uqeeqasainaqa amaana maqasaa rakisiraua faqa Mooseena sandufa irimariasa faqa qini qumareefaranoo. Misa qini qumareeqee kuqiranaki quqaqimaqefaranoo. <sup>19</sup> Misa qini qumareeqee Roomma maqannaasa kiapafa faqa nari sundiauga faqa qini mara nimifara. Misa qiniara naanaidara qidaqa uteeti qidaqa qiniara amaraa qidaqa raitasaa qainna ateeka rumbeeqoo samunannai amiqimandee daridaqa qifaqaq radiqisaifanoo fidika qumuanoo. Miqimmaseeqa misa qini mara maree aunirira saqarisa quqaseeqa pirimma darusaifaqa kuqanaura. Kuqiranaki qaaramoo faasaana mariqa doo findi fuanaura.

*Yameesa Yoohaneesa ninoofa Yisuna irammirinau.*  
(Mak 10:35-45)

<sup>20</sup> Seebeedina amaakuqara Yameesa Yoohaneesa miqanda ninoofa Yisuna faqa fimarufanoo miqoo anireenoo asaauridanoo reendeenidanoo kaqikaai ainainara qianeera qinai.

<sup>21</sup> Yisufa iriseenoo qinai. Nana ainainee ani amianauree qimasooofanoo mi anaaseefa qinai. Amanee anee firaa karaambaikaikinana qini faiqi qara mareeqeenana aneenna

aaqa moo fannoo dinni moo fannoo dinni quqasainaqara mi qanda ani faqa karaambaikaikiqara marifaqa mi qanda nuqu ugeeranoo mariani.

Miqi qimasooфанoo Yisufa maaqi qimaseenoo nari qimaminau. <sup>22</sup> Anee iraannanara mi oosannara siammiri mariananoo minarammiridaqa.

Miqi qimaseenoo mi fasiqaganda maaqi qimasee irammirinau. Qinee manda namari naannanara qiqa inneeqara faqa amanee namasee inneeqara qini faqa nipatara aupureefaree.

Mi qanda iriseeqa qiqa. Eedoo maa qanda amana naanaura.

<sup>23</sup> Yisufa iriseenoo qimanniminau. Kuqaa inneeqara qinee naanna nammarina neefaranoo minara qinee iridaqa. Qini daaqa quqannimaqee fandinnanara sia qini saika sia qinindi, qini qikoofa mifa kai mi ainainna faqaafa maridanoo. Kasooqanee qinee innaarunai karaambaikaikiqana ya fasiqanaree qini qikoofa qini daaqa marianee qinafa mifa kai qini daaqa mariannoo. Ooqai qini qikoofa nari kai irisee qimaqoosa kai misa kai qini daaqa quqannimaqaanoo.

<sup>24</sup> Qisauquqara taikasee fasiqa kaqi marusa mi ufana irufanoo miqandara niraqanau.

<sup>25</sup> Yisufa minara iriseenoo aiqama naarama quqaseenoo qimanniminau. Anaamuru mariasa nari karaambaikaikiqara nari aanoonnai kaiqeesa rakisinnimaqasaifaqa nari uriqararawsa amiqimmasee misa uriaaqarama nimaqaidaqa. Nari faiqi firaafa ufa nimisaifaqa sia auqaafanoo naridanoo. Ufa nimifaqa misa kaqi ainaina auqemariasa. Anaamuru mariasa miqimmida maridaqa. <sup>26</sup> Inniki sia miqinoo marianifeera qidaqa. Yafasiqa fee inni karaambaikaikiqaree qinafa mifa inni ainainra faiqi kamambinoo mariannoo. <sup>27</sup> Yafasiqa fee inni uriqararafa mariraree qinafa mifa inni dadaqira saika maree marinafa mariani. <sup>28</sup> Innee qini daanna raqa innee qini qiqafaqa. Qinee faiqi nimaaku firaasa maridaqa, sia faiqi anaasee qini ainainamma qisaqeerau qumidau. Qinee inni ureeqarawsa inni ainainamma nimaqararee qimasee qumiqa. Qeeqa kuqiranannai moomoosa aaqarana akiaqara idukiraree qimasee minara faqa qumiqa. Minara innee narinni narinni qini daanna raqa.

*Yisufa qaaraqanda nifu qimbaraqanda andeeqannisanau.*

*(Mak 10:46-52; Ruk 18:35-43)*

<sup>29</sup> Misa Yeerikoo maqusakiqari findifufaqa Yeerusareenni ooru fimarufanoo faiqi anaasee moomoosa mina faqa fimarifaqa. <sup>30</sup> Aana afainni qaara fasiqagara nifu dimbaraqanda ooqu faaqee marufanoo. Yisufa moomoosa faqa mi aatata fimarufaqa miqanda misa nikufa iriseeqa Yisunara faqa rumasee nameera qiqa. Oo, Dafidina ati marianafa maasa mandaikiqara marida maasara ani amuqusinana dadaqia.

<sup>31</sup> Miqi qimasee faqa rumasee nameera qufaqa faiqi anaasee aiqama miqanda aanoo imasee nimambaina qimasee qaoo qiqa. Nimambaina qimasooфаqa miqanda siammiriqau firaqoo uqanna nameera qiqa. Oo Dafidina amaaku faiqi firaafa maasara ani amuqusinana dadaqia. <sup>32</sup> Yisufa misa maruqoo ooru kasoomafinoo iramma nimaqanau. Naqi fee inniqara mannisaanauree.

<sup>33</sup> Qimasooфаqa miqanda qiqa. Faqiqi firaafa anee maaqanda qifu maqannimia.

<sup>34</sup> Miqi qimasooфанoo Yisuna kaaqa amuqusufanoo asauku nifusaa mundinuu. Mikari kai misa nifu maqasoofaqa miqanda Yisuna faqa fiqau.

## 21

*Yisufa doonkisa Yeeusaree maqusai ooru finau.*

*(Mak 11:1-11; Ruk 19:28-40; Yoh 12:12-19)*

<sup>1</sup> Misa Yeerusaree maqusa adeedi ramasoofanoo kaqikaa maqusa moo auqu Beetapaisa mi maqusafa aqanasaa maridanoo, mi aqanna auqu Oorifa aqana, miqoo ooreenoo nari faiqinamukiqari qaaraqanda naaramaseenoo qimanniminau. <sup>2</sup> Inneeqara kaqikaa maqusaki oonureeqa muqutinai mi maqusanaki doonki maridanoo, nari aanaaqindiri maridanoo oonureeqara miqanda ninukaki sanda rumbaqaona idukuseeqa miqanda nifiqeeqa aniaqa. <sup>3-4</sup> Faqiqi moo fannoo inni irainaaq maaqi qimasee qimamiaqa. Karaambaika maa doonkiqanda maraanee qifaqa maaqanda maridaqa. Miqi qimasee qimamifanoo mifa maree fuaqee qiannoo. Mi ufana qufanoo ooqeenaa tamummaqara fasiqa ufa anoona kambiaanifeera miqi qinuu. <sup>5</sup> Mi tamummaqara fasiqafa ooqai Yisufa sia marukamuqoo maaqi qimasee papiqaki akara rinuu.

Sioonna maqusanaasa maa ufana qimannimiaqa. Inni karaambaika innee iannai uridanoommi. Reendeenamasee doonkisa uridanoommi doonki aanaaqi akoonasaa ooqu marifinoo uridanoommi.

Tamummaqara fasiqa akara miqimminoo maridanoo.

<sup>6</sup> Yisuna faiqigara Yisufa qimaqoo doonkina narí faiqi faqa nifiqee Yisufinnai fiqau. <sup>7</sup> Nifiqee munusoofoqa narí qamunna doonki aanaaqi ataufakaqa ufqisoofanoo Yisufa minasaa oqumarifufanoo Yeerusareenni ooru finau. <sup>8</sup> Faiqí anaasee narí karaambaiqa miqi mandaida anianinna oosana marasee misa qamunna qumareeqa aatata ufqimarufafa akaqausa saqari asaana amanee namufaqaana ateesa ufqi maree fiqau. Doonki fanoo mi mau fuanifeera miqigau. <sup>9</sup> Faiqí anaasee moomoo indaaru fufanoo aanaaqiana anufanoo mifa qambaanambinau. Misa aiqama Yisunara fifi faaqariqa kaanina mareeqa maaqi qimasee idi ramamaqagau. Anee Dafidina ati marianafa Anutufa ani amiqi amiqimaisaani. Anutufa qufanoo animarifa Anutufa ani amiqi amiqiani. Innaarunai marinausa faqa ani amiqi amiqiaqa. Miqimmamareenoo Yeerusaree maqusaki Yisufa ooru keeqanau.

<sup>10-11</sup> Yisufa Yeerusaree maqusai ooruroofafa faiqí anaasee mi maqannaasa tutuqida qigau. Maana yafee qufaqa mina faqa ooru fusa qigau, ooqeenaa akara tamummaqara fasiqa maanara qinuu maana mifa maridanoo. Mina auqu Yisufa Nasaretee maqusa-indaraa fasiqa maridanoo. Nasaretee maqusai Kariree maqa maaqaki marifa maridanoo.

*Amaana maqaki keeqafinoo mandainainauqa niqiganau.*  
(Mak 11:15-19; Ruk 19:45-48; Yoh 2:13-22)

<sup>12</sup> Yisufa Yeerusareenni oorureenoo Yeerusaree firaa amaana maqaki keeqanau. Keeqafufanoo aiqamai aiquginau. Ainaina nimidaqa feefauru maree marusa faqa munnimma nimidaqa ainaina maree marusa faqa Yisufa nindafa masee aiqama rapatutu meegeenoo nifaqasoofoqa fiqau. Kaqi munnimma qumareeqee amaana maqasaa munnimma kafaa nimimarusa Yisufa misa nindafamaseenoo misa qainda munnimma namufaqa teeqimma quqanau. Anutuna qaindasaa tatufira nakipuruna mini nimisaida munnimma maree marusa faqa misa ainaina faqa teeqimma quqanau. <sup>13</sup> Miqidanoo maaqi qimasee qimanniminau, ooqeenaa ufa maa amaana maqanara Anutufa maaqi qimasee akara rumaqoofa maridanoo. Qini maaqa faiqí anaasee qiniara innaaruqira maqa marianifee qimaqoofa maridanoo. Anutufa miqi qimaqoofafa innee ummuarira maaqa aannandaafanoo innaaru qira maaqa mara quandeeqee ummuarira maqaikamandaafanoo.

<sup>14</sup> Yisufa amaana maqaki kaqi marufaqa nifu dimbarausa faqa naununu apirirausa faqa Yisufa maruqoo aniree marufanoo nifu maqanniseenoo niku andeeqannimaqeenoo imarinau. <sup>15</sup> Miqi marufaqa faiqiuqaindi anikeeqafufaqa Yisunara maaqi qimasee idi raqau. Dafidina ati Anutu anee amiqi amiqimmanda. <sup>16</sup> Amaana maqasaa rakisi marusa misa Yisuna qafooofanoo, faiqí anaasee amiqi amiqimmanniseenoo faiqiuqaindi idi ramamaqoofanoo minara irufanoo niranaganau. Niranagoofafa Yisuna qimamida qigau. Anee maa idina iridane, sia fee iridane. Miqi qufanoo Yisufa iriseenoo nariqa qimanniminau. Eeoo qinee iridaqa, ooqeenaa akara ufa sia fee innee faqa iridee. Mifa maaqi qinuu.

Anee faiqi aanaaqiuqa narí nimariasa faqa sakasee mariasa faqa narí nookiqari anoona nimooqira ufa uridanoo.

Sia fee innee mi ufana iridee. <sup>17</sup> Mifa miqi qimaseenoo misa faqa Yeerusaree maqusa faqa minniseenoo Beetani maqusai ooqu faiganau.

*Yisufa faafisa fooqaa saqari aqufanoo aadanusinuu.*  
(Mak 11:12-14,20-24)

<sup>18</sup> Iqaqoofanoo aataa ooqurandee kafaa Yeerusaree maqusai urimarufanoo aarananau. <sup>19</sup> Aararofanoo aana afainni saqari misa nee maria saqari faafisa fooqaana qafamaseenoo qaqaamara randoofanoo sia marinau, amanee kai marinau. Qafamaseenoo fifau saqari maaqi qimasee aqinuu. Naaru naaru siamma anisaa qaqaama iraani. Miqi qufanoo mikari kai mi saqarifa aadanusinuu. <sup>20</sup> Mina faiqinamu mina qafamasooofanoo naaquoofafa qigau. Naqi fee mandee kaqi kaqi mandee aadanusinoo fee.

<sup>21</sup> Yisufa minara iriseenoo qimanniminau. Qinee anoona ufa inni qimannimidaqa. Innee Anutunasaa irirana rusiseeqa minara moodaa irirafa marinaqa innee sia oonumafi irifanoo sia qaara irirafa marinanoo, maa faafisana qunnandee kai iqa innee faqa miqi kai ifaranoo firaa ainaina faqa innee miqifaranoo. Maa firaa aaqana oorifa aaqanara faqa qifanoo uqeerakinanoo ooruku nammariki aqufuannoo. <sup>22</sup> Kaifaa anee nanainainaree Anutunara iraidanee anee aneenna irirana Anutunasaa rusisainafa marinana anee moo ainainara innaaru qinanoo mifa mi ainainna kai ani amiannoo.

*Yisunara yafee ani aqiqeenoo fee qimasee irammirinau.*  
(Mak 11:27-33; Ruk 20:1-8)

<sup>23</sup> Miqi qimannimiseenoo mifa Yeerusareenni ooru finau. Oorureenoo amaana maqaki kafa keeqanau. Keeqafinoo faiqi anaasee qimannimarfanoo amaana maqasaa rakisimarusa faqa Yuda maqannaasa faiqi firaasa faqa anireeqa maaqi qimasee quandasee Yisuna irammiriqau. Ya fasiqa fee aniara qifanee maasa ainaina maa amaana maqanakinaa teeqi taaiqi maqi nanee. Yafee ani dadaaqifanee anee faiqi anaasee faqa andeeqannimaqaidanee.

<sup>24</sup> Misa miqi qimasoofanoo Yisufa nariqa qimanniminau. Qinee inni moodaa ufa iranaqa innee mina oosana qimaqimifaqa qinee faqa innee qini iraanara qini diqiqoo oosana inni qimannimiana. <sup>25</sup> Yisufa maaqi qimasee irammannimaqanau. Yoohaneefa nammari nimirufa faiqi anaasee moomoo rumannimaqarana Anutuna ufamau fee rumannimaqeenoo fee faiqi moo ufamau fee rumannimaqeenoo fee innee minara nanee fee qidee.

Misa minara quandafafaqa Yisunara iriandoo qimasee naundaindari nari qimami nari qimami qiqau. Maasa Yoohaneena nammari nimiranara Anutuna ufamau fimaru fee qifanoo Yisufa maasara nanaree innee mina iriaqaanna sia iriqau. Miqi qiandoora. <sup>26</sup> Kafa maasa Yoohaneena nammari nimirari fasiqanara faiqi ufamau fimaru fee qianaqa faiqi anaasee afeeka ufa maasa qimiqa darifoora, Yoohaneenara Anutuna kuqaa tamummaqara fasiqee qimariasa mariafaqa maasa darifoora.

<sup>27</sup> Misa miqi qimaseeqa quandasee akooqoo Yisuna qimamiqa qiqau. Sia maasa ani irarufa iridaqa. Yisufa minara iriseenoo qimanniminau. Qinee iraananara sia innee kooroomasee qini qimaqimifaqa qinee faqa innee iraanara qini diqiqoonara sia kooroomasee inni qimannimiana. *auranoo.*

*Faiqi moo mina amaakuqandara quandarufa.*

<sup>28-29</sup> Yisufa maa ufana kafa faiqi firaasa faqa amaana maqasaa rakisimarusa faqa quandasee qimanniminau. Qinee moo ufa inni qimannimianaqa innee irisee mi oosana qini qimaqimifaqa. Faiqi moo marinau, mina amaaku qaaraqanda mariqau. Mi fasiqafa nari amaaku indaarugaa faiqi qimaminau. Qini uainna qaqama afuqaki aqufinana ainainia qimasoofanoo indaarugaa faiqi fannoo qaoo qimaseenoo minnisee mariufanoo kafa oonumafi iriseenoo doo ainainai finau.

<sup>30</sup> Mina akoofa qufanoo qaoo qufanoo quandafufanoo inaaqianaa faiqi qimaminau. Anee fua, ainainai fua. Miqi qufanoo mifa eedoo kai qimasee aanaa oonureenoo oonumafi iriseenoo minnisana. <sup>31</sup> Mi fasiqaganda indaarugaa fee inaaqianaa fee nari nikooona ufa aindusinoo fee qifaqa qinee iriana. *ura.*

Misa iriseeqa qiqau. Indaarugaafa mifa nari akoona ufa aindusinau inaaqianaafa sia aindusinau.

Yisufa minara iriseenoo maaqi qimasee misara akooqoo qimanniminau. Miqi kaim-maseeqa kaaqa faiqi maraganua anaaseesa faqa ummuarira takisa munnimma maree mariasa faqa misauqa Anutuna ufara eedoo qimasaidaqa inni indaaru kamannisee Anutuna ququsaki keeqaidaqa. <sup>32</sup> Yoohaneefa nammari nimirufa inniara amaana maqasaa rakisirausara inniqa mandainaina ninaaqianna quqasee nimeesuqusee noori Anutufinnai noori ubeekaaqa. Yoohaneefa miqi qimaseenoo inni qimannimisoofaqa innee siamma iriafanoo ummuarira takisa munnimma maree mariasa faqa kaaqa faiqi maraganua anaaseesa faqa misa kaimma Yoohaneefa ufa irisee Anutufinnai quandaqqa andeeqasee fiqau. Kaifaa innee amaana maqasaa rakisirausa misa andeeqasee fuana nikooqaiqa Anutufinnai noori ubeekaranara qaoo qimasee mina ufara nikooqaiqa inneeqa qimaqamau kai fimariafanoo.

*Uainna qaqamasaa ufaasu rakisimariasa quandara ufa.*

*(Mak 12:1-12; Ruk 20:9-19)*

<sup>33</sup> Yisufa mi ufana qimannimiseenoo kafa moo ufa quandafufanoo maaqi qimasee qimanniminau.

(Yisufa nariqa munnimma maree maru saikanara irisee uainna sanda ummaqirana kikiqa ususeenoo nari arifandinanara qimanniminau. Maaqoo maasa sia uainna saikara iridaqa. Maasa munnimma maree maria saikafa koofi kai marinara Yisuna uainna kikiqira ufara maasa quandasee koofi kikiqa usana. *ura.*)

Yisufa qimannimino qinau. Iriaqa, faiqi moo fannoo ainainafaqaqa ququsa auquseenoo koofi asumu ummaquseenoo nari oosana maraseenoo koofi qambaana qaina afeeka meeraqoo sandaaqai auquseenoo minni maridanoo ummuarira fasiqara kaasau aandau ainainara rakisiaqeera qaina auqinau. Koofi nammuruqi maria difaani firaana faqa auqinau. Koofi innooqafufanoo mina akoofa rakisira fasiqausa qufaasu nimino qinau. Innee qini koofisa rakisiqisee marifaqa qinee qambaana oosusanaqa innee dindana rafarisee nimiseeqa ooni maraaqa dindana rafarisee nimiseeqa ooni

mara qini qimaqaaqa qinee moosaa fuanauree qimasee moosaa finau. <sup>34</sup> Aiqaama koofi anona mafufanoo ainaina akoofa nianaindari nari ainainira faiqiuqa niqiqeenoo qinuu. Innee ooquree qini oosukinaa koofi qini oondaraana tiqisee maree mini qimiaqa. <sup>35</sup> Mina ainainira faiqiuqa ooquroofaqa ququsasaa rakisimarusa mandoosana marasee misa nariqau. Moo saamu samu ariqau moo ooni samu ariqau moo kuqa ariqau. <sup>36</sup> Ainaina akoofa minara iriseenoo moomoo niqiqamasee qimanniminau. Innee oogu qini oondaraa koofi itiqimaree mini qimiaqa qufaqa misa ooquroofaqa kaifaa narinau.

<sup>37-38</sup> Koofi akoofa naqi fee masee qianaqee qini koofi mareefaree minara irusianoo. Inaaqiana uqanna nari amaaku uqannara iriseenoo qimaminuu. Anee oogu maree mini qimia. Misa aniaara rufaaqee qimasoo fanoo mina amaaku oogu roofaqa ququsasaa rakisimarufa faqa mina aiku asauku faqa mina amaaku qafamasee qiqau. Maafa maa koofina akoona amaaku anireenoo marai mina faqa kuqarusaa, fafaa mifa maa maqana maraandora mina arusee maasa kai maraanaura. <sup>39</sup> Misa miqi qimaseeqa mi faiqina qumareeqa rariseeqa aqoosai munusee kuqamma ariqau. Yisufa nari arifandinanara qidanoo koofi akoona amaakuara qinoo.

<sup>40</sup> Yisufa mi ufana qimannimiseenoo amaana maqasaa rakisirausa irammirinoo qinuu. Ququsa akoofa miqoo ooqurainna kari naqi fee masee ainainira rakisirausara iannoo fee. <sup>41</sup> Misa minara iriseeqa qiqau. Mifa qumureenoo mi fasiqausa rairai qimannimiaqeenoo aanoo imannimaqeenoo kuqannaruannoo. Kafaa randaseenoo moo amiqira fasiqa mara quqasainanoo mifa ququsasaa andeeqasee rakisiannoo. Qaqama ireenoo akuqainna kari, ququsa akoofa nari oosaqaqaraanara nari qinoo maramaree mini qimia qinanoo tiqisee mara maree munu amianoo. <sup>42</sup> Misa miqi qimasoo fanoo Yisufa mina iriseenoo misa nari arifandinanara iriseenoo kafaa quandaseenoo nariqa qimanniminau. Ooqeenaa akara maaqi qimasee qimaqoofa marida.

Faandaamura auqi maria fasiqausa sabeena moo marasee qafamasee mandaikira fee qimasee minnisaaqau, moo faandaamura auqimarusa mi sabeenna kai mara maree amiqira fee qimaseeqa faandaamura afeekaikamma umaraaninnana rakiqau. Boo qafaqaa, Anutufa amiqira ainaina auquseenoo.

Ooqeenaa akara miqimminoo maridanoo sia fee innee asaana ridee. Doo aunidee.

<sup>43</sup> Miqi kai inoo Anutufa nari ququsa inni Isaraee maqannaakinaana mara maree moo maqannaaki quqasaifaqa mi maqannaasa amiqimmasee Anutuna ufamau fifaranoo. [<sup>44</sup> Maa ufana 44 qusa kamu sia ooqeenaa papiqaki marunara sia maaqoo akara riqa.]

<sup>45-46</sup> Amaana maqasaa rakisimarusa faqa Farisai amaana ufa irimarusa faqa iriseeqa maasara quandaidanoommifoo qimaseeqa niraanaqee marufaqa Yisunara rumbaara ufa qimarigau. Faiqi anaasee moomoosa mina aqa marufaqa misa minara Anutuna tamummaqara fasiqa maridanoo maasa minara rumbaanaqa faiqi anaasee maasa diqiqaa tutuqi foora. Miqi qimasee minnisee sia Yisuna rumbaqaau.

## 22

*Faiqi uriqararafa nari amaaku amundara qoomaqa quandara ufa.*  
(Ruk 14:15-24)

<sup>1</sup> Yisufa kafaa faiqi anaasee qimanniminau. Quandara ufa kai maaqi qimasee qimanniminau. <sup>2</sup> Anutufa nari ququsakinaasara maaqi qimasee rakisidanoo. Firaa karaambaifaqa moo kikiqa usanaura. Mi firaa karaambaifaqa mina amaaku amundara qimasee firaa qoomaqa suqanau. <sup>3</sup> Suqaseenoo nari faiqi namu niqiqeenoo qinuu. Maqusa maqusa fifainiqa eenda qimannimunausa nifiqee minisaifaqa narana naaqa. Qimasoo faqa fifainiqa. Faiqi oonu naaramasoofaqa misa qaoo qimasee minnisaaqau. <sup>4</sup> Karaambaifaqa fannoo mina iriseenoo kafaa akaqausa niqiqeenoo qinuu. Eenda qimannimunausa innee oonu nifiqaaqa. Narana faqa oosana oosana aandaau faqa oonidakinaana faqa doo aiquaqa. Kaqi kaqi iaqa. Doo aiqama deedaqinoo maridanoo.

<sup>5</sup> Qimannimunausa maqusa maqusa mariasa qimannimisoofaqa iriseeqa naanaidara qimasee minnisaaqau. Moo fannoo nari ainainnai finuu. Moo fannoo nari burimakau ququsa auqiraree qimasee finuu. Moo fannoo nari situqaqi finuu. <sup>6</sup> Moo maqusaanaasa mina faiqinamu saamu samu nariqau, manda oosana nimiqaau, kuqa nariqau. <sup>7</sup> Karaambaifaqa fannoo minara iriseenoo nari faiqi namu maaqi qimasee qimanniminau. Innee findifuaqa, maqusa maqusa qini faiqi namu narimariasa aiqama naru taikasee misa maaqa idaraaqa miqi qufaqa misa miqimmiqau.

<sup>8</sup> Miqimmasee aniroofanoo karaambaifaqa qimanniminau. Amundarana qoomaqa deedaqinoo marida. Faiqi anaasee qinee indaaruu naaraunaqa misa oosana sia andeeqanoo marifaqa sia ania. <sup>9</sup> Doo innee kaifaa fuaqa. Aana kindooraki mariasa faqa aana fimariasa faqa uiquaana mariasa eenda sia qimannimunausa kai nifiqee aniaqa.



<sup>10</sup> Mina faiqi namu minara iriseeqa faiqira randarara fifainiqau. Amiqiraua faqa mandaikirausa faqa paqurinausa misa nifiqee aniaqa. Miqi qufaqa misa fiqau. Miqi kai iqa karaambaiqa maqusai faiqi anaasee qumbiaqa mariqau. (Mi aukunna amundara qoomaqa sakaseenoo amundara qamunna kooqikinaana maraseenoo nimufaqa afsusee keeqafufaqa neemariqau.)

<sup>11</sup> Faiqi anaasee mi qoomaganaki ooqu marifufanoo karaambaiqa fannoo anireenoo faiqi anaasee nimandanoo fidanoo oonu qafuofanoo moo fannoo sia karaambaiqa qamunna afisirafa kooqisaa amu qamunna sia afisirafa kaqi ooqu marinau. <sup>12</sup> Oonurama qafeenoo qinau. Qini qiqoondi, naqi fee ifanee sia qinee qamunna kooqiki qamunna amunnana sia afis inanee. Naqi fee ifanee sia amundara qamunna afis inanee. Nanaree fifau ooqu marinanee. Miqi qufanoo mi fasiqafa kaqi kasoomafinau, sia ufa qinau. <sup>13</sup> Minara karaambaiqa fannoo qafamaseenoo aranaqoofanoo quandafinoo nari faiqi namu qimanniminau. Innee sanda qumaree maana aiku asauku ruumbeegee aqosai asukunai aqauqa. Aqosai minni asukunai aqusaifanoo minni oqumaridanoo iki raqaidanoo afai riqidanoo aupuraidanoo mariani. Aiqama aqosai mariasa miqi kaimmidaga. <sup>14</sup> Yisufa mi ufana maaqi qimasee rafaqafinoo qinau. Anutufa moomoo naaramasai faqa. Misa anirafanoo Anutufa misakinaana moodaa kai moodaa kai nariara maraidanoo. Moomoosa sia amanaikidaqa.

*Takisa munnimma kaamanna nimira ufa.*

*(Mak 12:13-17; Ruk 20:20-26)*

<sup>15</sup> Yisufa mi ufana faiqi anaasee qimannimisoofaqa Farisai amaana ufa irimarusa nari faiqi namu naaramaseeqa suqu quqaseenoo Yisuna rumbara ufa maaqi qimasee oonumafi irimariqau. Maasa irarufara fuseemmasee umaraanaura, oosana oosana ufara mina irammirifanoo mifa moo kaqikaa ufa manda ufa qinaqa doo miqoo tautumandee rumbaanauree qiqau. <sup>16</sup> Miqi qimaseeqa misa nari faiqi namu faqa Eeroodeena aqoondi mariasa faqa moodaanaki Yisufinnai oonu reeqa unna qimasee amiqira aqoondiaru foora mafufaqa noori quqasee reendenamaseeqa maaqi qimasee irammiriqau. Oo ufasa rakisirafa, anee andeeqara ufa qimarianafa, sia unnufa qimarianafa anee sia moonara amiqira fee qimasee amiqira ufa qimamianafa, sia moonara mandaikira fee qimasee mandufa qimamianafa, aiqamaqara anoona ufa kai qimannimimarianafa andeeqarafa mariananoo. <sup>17</sup> Maasa iraanana anee iriseenana mina oosana maasa qimaqimia. Maasa maqee maqee Roomma maqannaa kaamanna takisa munnimma amimarunaua maridaqa. Maasa miqidaqa Moosena sandufa rukiadee sia fee rukiadee.

<sup>18</sup> Misa Yisuna ufa iriseeqa mina rumbaaneera qufanoo Yisufa nari faasai misa mandosana iriseenoo maaqi qimasee niqinoo qinau. Innee qaara ufa qimariasa mariafanoo mandaiki mariasa mariafanoo. Faiqi anaasee innee naamua qimasee quandafi mandosana maree mariasa mariafanoo. Innee nanaree fifau qini qifusaa ititadee qinee inni nindafaida. <sup>19</sup> Inneeqa takisa munnimma mini qini qimifaqa qafaa. Miqi qimasoo faqa misa takisa munnimma marasee amiqau. <sup>20</sup> Misa takisa munnimma amufanoo Yisufa mi munnimmana maraseenoo amiqi maseenoo aiqumaseenoo qinau. Maanasaa yana oori amanee maridanoo fee. Yana auqu fee mina amana ameemaanai akara rinoo maridanoo fee qufaqa misa qiqau. <sup>21</sup> Roomma maqannaa rakisirafa mina auqu Sisaa mina amana faqa mina auqu faqa maridanoo. Miqi qufanoo Yisufa qimanniminau. Doo Sisaana auqu minasaa akara rinoo marinara minaindi uqanna maridanoo doo nari ainaina doo nari amiaqa amisee quandafiqa Anutuna ainaina doo mina faqa nari amiaqa. <sup>22</sup> Miqi qufaqa misa tautumaseeqa mi ufana oosanara randasee quqasee fiqau.

*Kuqiranaiqari findifanninanara iraqau.*

*(Mak 12:18-27; Ruk 20:27-40)*

<sup>23</sup> Mi faasaanna Sadikai amaana ufa irimarusa anireeqa Yisuna irammiriqau. Misa maaqi qimasee qimarusa. Faiqi kuqidanoo sia minaiqari findifidanoo, akundamasaafanoo doo minaki taikaidanoo. Sadikai amaana ufa irimarusa miqiqau marunara maaqi qimasee Yisuna irammiriqau. <sup>24</sup> Oo maasa uqannifiqara fasiqa. Mooseefa maaqi qimasee faiqira akara rinau. Faiqi moo fannoo faiqi sia maqarai kuqinanoo mina akaqa fannoo mina anaqa maraanoo. Maraseenoo minasaa faiqi maqasainafa findifinoo indaarugaa akoonu qumiasana maraseenoo mina maqa maaqaki fuannoo. Mooseefa miqimmasee maasara akara rumaqoonu maridanoo anee minara irinaqa maasa moo ufa ani qimamianaura. <sup>25</sup> Faiqi moo fannoo qisauku dinni taikasee dinni oonu qaara marasee faiqi namu maqasoofanoo indaarugaafa innooqafinoo aanaaseesaa amundasoofanoo sia faiqi maqarai kuqinau. Kuqufufanoo mina aanaaqianaafa mi anaaseena kai kafaa maranau. <sup>26</sup> Mifa faqa mi anaaseena maraseenoo sia faiqi maqarai kuqinau. Kuqufufanoo misa ninaaqianaafa mi anaaseena kai maraseenoo sia faiqi

mağarai kuqinau. Miqi kai inoo fifufanoo faiqi qisauku dinni aiqama taikasee dinni oonu qaara maraseenoo mi anaaseenasaa sia faiqi mağarai kuqiquau. <sup>27</sup> Kuqufanoo mi anaaseefa faqa kuqinau. <sup>28</sup> Aiqaama fasiqa anaasee kuqiranaiqari findifira aukuaana findifinanoo mi fasiqausa faqa mi anaaseefa faqa findifinanoo yana aanaaqee mariannoo fee. Qisauku dinni taikasee dinni oonu qaara marasee mi anaaseena maroosa mariqau. Yana aanaaqee mi anaaseefa mariannoo fee.

<sup>29</sup> Yisufa mi ufana iriseenoo niqidanoo qimanniminuau. Innee Sadikai amaana ufa irimariasa aaqee mariafanoo. Innee ooqeenaa tamummağarausa akarakinaa ufa faqa Anutuna afeeka faqa sia irisaidafa aaqee mariafanoo. <sup>30</sup> Aiqaama findififandinna aukuaana findififa faiqi afaafa faqa anaasee afaafa faqa taikaannoo aiqamağara amana-mana kai qangiroora foora kai afeeka marifaranoo. Qangirooqfa sia faiqi faqa anaasee faqara foora marifaranoo mookirausa idaaqirausa maridafa faiqi anaasee kuqufifa innaarunai oorureeqa qangiroora foora mafifa sia amana nari maree nari maree ifaranoo.

(Ooqai Abarahaafa faqa Isakeefa faqa Yakooboofa faqa maa mağanasaa maru kamuqoo Anutuna ufamau fimarunara Anutufa nariara minamusara Anutusee qinau. Minamusa kuqufifa findififa doo Anutuna faqa innaarunnai ooru mariqau. Innaarunai Anutuna faqa kisaagasaa marikufanoo Anutuna tamummağara fasiqa moo fannoo Anutuna ufa minamusara quna iriseenoo akara rinoo qinau. Qinee minamusa Anutusa maridafee qinau.)

<sup>31</sup> Yisufa mi tamummağarana aufakiana iriseenoo Sadikai amaana ufa qimariasa kaifaa maaqi qimaseenoo qimanniminoo qinau. Innee aqamasee kuqiranaiqari sia findifiraree qiasa. Minara Anutufa inni qimannimiqoona sia fee innee mi akarana asaana rida fee. <sup>32</sup> Mifa kuqufusa findifi mina faqa marianara maaqi qinau. Qinee Abarahaana faqa Isakeena faqa Yakooboona faqa misa Anutusa qinee marunausa maridafa. Anutufa sia ooqai misa maaqoo maru kamuqoo misa Anutusa mariafannaqee qinau. Ooqai kuqufusa doo findififa Anutuna faqa maqee marianara mi ufana misa Anutusa marunausa maridafee qinau. Minara Abarahaana faqa Isakeena faqa Yakooboona faqa sia misara kuqifa mariaafo qiaqa. Kaqi Anutuna faqa innaarunai maridammiafo qiaqa. Anutufa sia kuqirausa Anutufa maridanoo. Kaqi mariasa misa Anutufa maridanoo. Innee minara sia fee asaana rumasee irida fee.

<sup>33</sup> Minara faiqi moomoosa iriseeqa mi ufanara anoona ufa fee qimasoofoanoo naaquqanau.

*Aiqama sandufaiqari uriqarara sandufa kooroo inau.*

*(Mak 12:28-34; Ruk 10:25-28)*

<sup>34</sup> Yisufa Sadikai amaana ufa irimarusa ufa arusoofafa Farisai amaana ufa irimarusa minara iriseeqa minara ufa suquseeqa anireeqa Yisuna irammiriane qiqau. <sup>35</sup> Misaiqari sandufa oosana irimaru fasiqafa anireenoo Yisuna amanammasee qafaa-nee qimasee ufa quqanau. <sup>36</sup> Faiqi uqannifiqee marianna fasiqafa, Mooseena sandufa oosana oosana maridanoo. Nana sandufafee aiqama sandufa narusee urinaaqaranoo maridanoo fee.

<sup>37</sup> Yisufa iriseenoo qinau. Uriqarara ufa maaqaamminoo maridanoo. Inni faakana Anutufa innee minara inneeqa nimuqusa nimana irirana mudukannoo minara nidinaqa minara ruaqa. <sup>38</sup> Mi ufafa aiqamufausa urinaaqaranoo maridanoo. <sup>39</sup> Mina aanaaqiana mina fooqaafa maaqimminoo maridanoo. Innee inneeqa nipatasaa amiqimmasee rakisidafa rimariafanoo doo innee miqi kai iqa niqoonausara faqa rakisidafa ruaqanani. <sup>40</sup> Mi ufaqandasaa aiqama ufa oosana oosana mi qandasaa mundidanoo. Ooqai Mooseena sandufa faqa Anutuna tamummağarausa ufa faqa mi qandasaa faakana fooqaafa maridanoo mi qandasaa mundinoo maridanoo.

*Asauku mundirafa Dafidina ati marunara qimanniminuau.*

*(Mak 12:35-37; Ruk 20:41-44)*

<sup>41</sup> Farisai amaana ufa irimarusa miqoo suqifa marufanoo, Yisufa misa nikiaafa maa ufana qinau. <sup>42</sup> Ooqai asauku mundiranara innee minara nanee fee qida fee. Yana ati fee qidee. Miqi qimasoofaqa misa qiqau. <sup>43</sup> Dafidina ati fee qidaqa qufanoo Yisufa iriseenoo quandafinoo misa qimanniminoo qinau. Innee kuqaa Dafidinara Anutuna tamummağara fasiqa fee qimariafanoo Anutuna maraquina fannoo Dafidina aakufufanoo maaqi qimasee akara rinau.

<sup>44</sup> Anutufa maaqi qimasee qini karaambaiqa qimaminuau. Anee qini Anutusa qisauku uqannai qini daafa ooqumarifi marinaqa qinee ani namuqaauqa naru taikaseeqa ani aramandunna quqasaanana maria. Miqi qimasee Dafidifa akara rinau.

<sup>45</sup> Yisufa mi ufana qimannimiseeno kaifaa maaqi qimasee irammirinau, Dafidifa Anutuna asauku mundiranara qini karaambaiqa fee qunara naqimmasee asauku mundirafa moodaanaki Dafidina karaambaiqa faqa mina ati faqa mariannoo. Dafidifa andeeqaidano fee innee fee andeeqaidaqee aiqamaqara innee andeeqaidede. <sup>46</sup> Yisufa mi ufana qimannimufaqa sia mi ufana ati raqeeqee nari qimamiqau. Miqooqari nisaurusee sia kaifaa moo ufa Yisunara irammiriqau.

## 23

*Mooseena sandufa akoofasauqa mandoosanara eerairiaqee qinau.*

*(Mak 12:38-39; Ruk 11:43,46; 20:45-46)*

<sup>1</sup> Miqi qukari Yisufa nari faiqi namufaqa faiqi anaasee moomoo faqa maaqi qimasee qimanniminau. <sup>2-3</sup> Mooseena sandufa akoofasauqa faqa Farisai amaana ufa qimarusa faqa Mooseena sandufa qimannimiranara qutaagama nimaqarasa marida. Innee minara misa ufa amiqimandee iriseeqa mi mau kai andeeqasee fidaqa misa iandee kai sia iaqa. Misa nookiqari faiqi anaasee aana quqannifiqaidaqa quandafi moomau fimariana mi mau innee sia fuaqa. <sup>4</sup> Farisai amaana ufa qimariasa faqa Mooseena sandufa akoofasauqa faqa misa amusufa moomoo firaa qumaarara fooqira arapeeda arueeqeenoo faiqi anaasee nimidanoo nariara sia kaqikaqoo nari nisauku amukannoo dadaaqidaqa misa iandee innee sia miqi iaqa.

(Mi aukuanna Isaraee maqannaasa Mooseena sandufamau fidaqa qisaagamara foora ususeeqa minaki Mooseena sandufa papiqasaa akara rumasee ummauruara foora ususee nuaaqee imariqau. Nariqa qamunna atisaa faqa faakasaa peepeenaana auquandee masee usuqirasa nimariqau. Kaqigeesa faqa aiqamausa faqa miqimandee nimariqau. Farisai amaana ufa qimarusa firaatia auqusee qiqafaqee qimasee qisaagamasa faqa qamunnasaa faqa firaatia auqu qirasa nimariqau. Miqi marunara Yisufa maaqi qimasee niqinoo qinau.)

<sup>5</sup> Misa faiqi aiqamausa nifusaa aiqama ainaina auqaidanoo fifau tasimiramandaia auqaidaqa. Qisaagamara firaana ususee Mooseena sandufa akara minaki usuqirasa nidaqa qamunna kisaagamaseeqa faiqi nifusaa tasimiramandaia fidaqa. <sup>6</sup> Faiqi qoomaqa sakasee naidaqa Mooseena sandufa akoofasauqa faqa Farisai amaana ufa qimariasa faqa misa amiqira qoo kai oogu marifidaqa naidaqa. Amaana maqaki faqa amiqira qoo kai faiqi nifusaa oogu maridaqa faiqi anaasee qiqafaqee qimasee miqimidaqa. <sup>7</sup> Faiqi anaasee suqidaqa makeeti marunakina nari anufaqa uqera qafeeqa, Oo maasa faiqi firaafa anee fee andanee miqi qufanoo nari fifau sumoo summidanoo. Misa aatata fidaqa maqusa maqusa nimarufaqa faiqi misa nindafeeqa, oo maasa ufasa rakisirafa misa miqi qunara kaaqa nidufaqa asammidaqa. Misa iandee innee sia miqi iaqa. <sup>8</sup> Faiqi anaasee inniara maasa uqannifiqara fasiqa fee qifaqa qao qimasee qiaqa. Innisaimbaqa amanamana kai maridee qiaqa ooreeqarasa nikaqafasaa kai maridee qiaqa. Anutufa kai innisaimbaqa uqannifiqara fasiqa maridanoo fee qiaqa. <sup>9</sup> Miqi kai iqa sia maqasaagarasara qikoo fee qimasee nimandaqa. Innaarunai Anutunara innisaimbaqa aiqamausa qikoo fee kai qiaqa. Miqiqqa innee amanaika kaimmifaranoo. <sup>10</sup> Inni saimbaqaki sia moonara karaambaqee qiaqa minara minnisaaqa. Inni karaambaiqa moodaa Anutuna asauku mundirafa mifa kai maridanoo. <sup>11</sup> Moo fannoo inniki uriqararafa marinafa nari kai eedoo qimaseenoo misa dadaaqira ainainira fasiqa mariannoo. <sup>12</sup> Faiqi anaasee nariara uriqararausee qimariasa Anutufa misa farindamaki saamuriqa nisauriranaki quqaanno. Faiqi anaasee nariara oorudupirausee qimariasa misa faakanaikamma nimaqaanno.

*Mooseena sandufa akoofasauqa aaraikira ufa oosanara niqinau.*

*(Mak 12:40; Ruk 11:39-42,44,52; 20:47)*

<sup>13</sup> Yisufa kaifaa misa qimanniminoo qinau. Innee Farisai amaana ufa qimariasa faqa innee Mooseena sandufa akoofasauqa faqa inni narirafa firaafa marinara qinee oonumafi iriqa qimudago qidaqa. Innee faiqi amaana ufa qimannimisaidaqa maqandanai inneeqa kaqi ummuari mariasa. Faiqi anaasee akaqausa innaaruna ququsaki keeqarariafaqa innee rafaqafunnimaqaida innee faqa sia keeqeefaranoo.

<sup>15</sup> Inni narirana firaafa marinara minara qinee firaqoo qimudago qidaqa. Innee amaana ufa qimannimisaidaqa maqandanai mandainaina oosana oosana maree mariana. Innee mandoosana maree mariasa. Innee maqusa maqusa faiqira randaidaqa inni ufa iriaqaainnana mina paqurimasee inneeqa ufa oosana qimamisafanoo irinoo mi fasiqana mandoosana inni mandoosana uraqaaranoo maridanoo.

<sup>16</sup> Nifu dimbarausa maasa aana quqannifiqee marunausee qimasee innee faqa nifu dimbarausa kai mariafanoo. Inni narirana firaafa marinara inniara firaqoo qimudago

qidaqa. Innee maaqi qimasee aaqamasee qimariasa. Faiqi moo fannoo nari amana Yeerusaree amaana maqasaa qimasee aqicaqamasee moo ainaina auqararee qinafa mifa fifau ufa fee qimasee, siamma auqaannoo. Innee minara aaqee mariafanoo. Faiqi moo fannoo nari amana amaana maqaki koora marinanaki aqicqamasee moo ainaina auqararee qinafa kooru uriqarara ainaina marifaqee qimasee kaqi auqaannoo, sia minnisaannoo. Minara faqa innee aaqee maqi qimariasa. <sup>17</sup> Innee nifu qimbarausa maridaqa furufari mariafanoo. Innee amaana maqakinaa koorara uriqarara ainainee qimariasa aaqee mariafanoo. Kooru fee amaana maqa fee uriqararafa maridanoo fee. Amaana maqa naaquqara amaana maqa marinara fifau kooru minaki marifa naaquqarafa maridanoo. Anee amaana maqasaa qimasee aneenna amana aqicqainafa kaqi auqa naaquqarafa amaana maqa maridanoo. <sup>18</sup> Innee kaifaa maqi qimasee aaqamasee qimariasa. Faiqi moo fannoo amaana maqakinaa qaindasaa qimasee nari amana aqicqamasee moo ainainara auqararee qinafa kaqi fifau dapi qainda fee qimasee sia auqaannoo. Faiqi moo fannoo amaana maqakinaa qaindasaa quqemarinanaki nari amana aqicqamasee moo ainaina auqararee qinafa kuqaa mi ainainna auqaannoo. Innee miqi qidaqa aaqee mariafanoo. <sup>19</sup> Innee nifu dimbarausa naaqoo nifu furufariraua miqi qimariafanoo. Qini ufa iriaqa. Nana ainainee uriqararafa maridanoo fee qainda fee minasaa Anutuna amianinna ainaina quqemaria fee uriqararafa maridanoo fee. Innee qaindasaa Anutuna amida quqee mari ainainara uriqarara fee qimariasa aaqee mariafanoo. Qainda naaquqara ainaina marinara minasaa quqee mari ainainafa faqa naaquqaidanoo. Minara qainda uriqararafa maridanoo. Anee amaana maqakinaa qaindasaa aneenna amana aqicqamasee moo ainaina auqararee qinanoo mifa kuqaa ani afaaqa rumbasaannoo. Innee aqaqida sia rumbaidanoo fee qimariafanoo. <sup>20</sup> Faiqi moo fannoo amaana maqakinaa qaindasaa nari amana aqicqainafa sia fifau qaindara kai qidanoo. Aiqama ainaina qaindasaa marinnanara faqa minara faqa qidanoo. <sup>21</sup> Faiqi moo fannoo Yeerusaree amaana maqaki nari amana aqicqainafa sia fifau amaana maqara kaifau qidanoofau. Mi amaana maqanaki marifa Anutunara faqa qidanoo. <sup>22</sup> Faiqi moo fannoo innaarunai nari amana aqicqemarinafa sia innaarunaira kai qidanoo. Anutuna maqusa maridanoo. Miqoo Anutufa karaambaqaa qaari ufiqiraqoo ooqu marifi maridanoo naaquqara maqusa maridanoo, sia fifau maqusa Anutufa nari mari maqusafa maridanoo.

<sup>23</sup> Innee Mooseena sandufa akoofasauqa faqa Farisai amaana ufa qimariasa faqa inni Anutufa narirana firaanara qinee qimudao qimannimaqaidaqa. Innee faiqi anaasee uqannifiqaidaqa kaffaa quandafi maqandanai maremarisa. Innee inneeqa qafuqakinaana oosana oosana adiafaaira ainaina, kaqikaa fifau ainaina maqee maqee raineeqee ati Anutuna amimariasa, innee mi kaqikaa ainainnara fifau munari minarida, firaa ainaina Mooseena sandufakinaa anoona ainaina innee minnisaidafa. Andeeqara oosana faqa faiqi aanaaseera nimudao qira oosana faqa anoona ufa kai qira oosana faqa mi firaa akoofasauqaraa ainainnana innee minnisaidafa. Innee mi firaa ainainnatia namufaqa iaqaana, kaqikaa ainaina namufaqa iaqaana. <sup>24</sup> Innee nifu dimbarausa nisauku gumaree aana uqannifiqaiddee qimariasa, innee faqa nifu dimbarausa mariafanoo. Innee kaqikaa fifau ainainara fifau munari minaridaqa nammariki nunuka fooqaafa marifaqa naandoo qimasee mara aquseeqa kaifaa quandafifaqa firaa ainaina akoofoo ainaina qoosara foora firaa aandau tia sia irirai kaqi nambiqee mariasa.

<sup>25</sup> Farisai amaana ufa qimariasa faqa Mooseena sandufa akoofasauqa faqa inni Anutuna narirana firafa marifaqa minara qinee inniara qimudao qidaqa. Inni marirana kaafara foora maridanoo, innee kaafara foora adisaa kai findaukaraua aunduraki madaapee usiraua mariafanoo. Innee faiqi nariranannai misa ainaina maree mariafanoo. Innee inneeqa fanandiranannai minannai inneeqara kaaqa moomoo ainaina afaqa usimarianara inni naunduraki madaapee usiraua mariafanoo. <sup>26</sup> Farisai amaana ufa qimariasa nifu dimbarausa kai mariafanoo. Innee naaree kaafa aunduraira foora findaukamasee mariaqaana. Miqi qimasaiqaqu aqama kaafa aundura faqa adisaa faqa findaukaraua mariaqaana. Innee sia miqifaqa.

<sup>27</sup> Farisai amaana ufa qimariasa faqa Mooseena sandufa akoofasauqa faqa inni narirana firafa marifaqa qinee inniara qimudao qidaqa. Innee faiqi madikara fooqaana mariafanoo aunirira saqariara fooqaana apatasaa amiqira qumisa akusaafaqa faiqi misa mina qafamasee boo amiqira fee qidaqa. Innee miqi mariafanoo faiqi nifusaa amiqiraua mariafanoo inni naundura madikaki faiqi putainoo nimudaani fannoo mandaikinoo maridanoo, kudi makirana oosana oosana inniki maridanoo. <sup>28</sup> Innee miqiraua marifaqa faiqi inni niqafamasee maasauqa andeeqaraua maridammiafoo qidaqa inneeqa naundurai sia qafee mariafanoo, naunduraki putainoo maridanoo, maqandanai maree maria oosana faqa ufa rukiarana oosana faqa doo afai raqarammino maridanoo.

*Mooseena sandufa akoofasauqa naruaninnanara koorooinau.*

*(Ruk 11:47-51)*

<sup>29</sup> Farisai amaana ufa qimariasa faqa papiqa akara rimariasa faqa inni narirana firaafa maridanoo minara qinee inniara qimudago qidaqa. Inni nikeeku nikaaku nisaifaqausa Anutuna tamummaqara fasiqauqa narusee nikundaqau. Kaifaa innee misa faiqi namu quandaifaqa misa madikamaqoosa rukiseeqa qumisa qumaree saqarisaa fee oonisaa fee maqee maqee akusee amiqimariafanoo. Innee akidaqa maqi qimasee qimariafanoo. <sup>30</sup> Maasa qiikeeku qikaaku maru aukuaana maridaqau sia maasa tamummaqara fasiqa naruafanaiqini misa fidika sia mariqini. <sup>31</sup> Oo innee miqi qidaqa inneeqa nikeeku nikaaku Anutuna tamummaqara faiqi nariusu misa faiqinamu maridee qimariafanoo. <sup>32</sup> Doo amana, inneeqa nikeeku nikaaku naanna raaqanani. Misa maroo mandainaina innee firaanaika masaqaanani. <sup>33</sup> Innee sakani faiqi namu mariafanoo ukadiqa faiqi namu mariafanoo Anutufa inni idaki aqiraree qinoo. Innee naqi fee masee umbaqaki fifaree. Sia amana miqifaranoo. <sup>34-35</sup> Yisufa kafa Farisai amaana ufa qimarusu qimanniminau. Qinee tamummaqara fasiqauqa faqa Anutuna ufa irimariasa faqa Anutuna ufa uqanifigeemariasa faqa qinee marunannai mariasa innee iannai niqiqaanaura. Innee misa nindafamaseeqa akaqausa aunirira saqarisaa narifaranoo. Akaqausa innee inni amaana maqaki raitasaa qainna atekasaida rumbeeqoo samunannai nitaufakaqa nariisaifanoo fidika radiqinoo qumuannoo. Akaqausa maqusa maqusa nifaqasaifaqa sandeefaranoo misa fidika faqa inni nikeeku nikaaku narusa misa fidika faqa inniki marianifeera, ooqai indaaruu Abeerana fidika fifau kaqinni adianau. Miqooqari anidanoo moomoosa fidika fifausaqa adianoo ani ifanoo Seekariaafa Barakiana amaaku Yeerusaree amaana maqaki Anutuna naaqqara oosirana dinni marufanoo dinni qainda marufanoo, mi qambaana fifau arusoofanoo kuqinuu. Mi kamusaqa fidika moomoo fifau adianoo maridanoo. <sup>36</sup> Mi fidikafa inniki kai mariannoo inni nikeeku nikaaku nisaifaqausa misa maru kamuqoo numoo fifau faiqi nariu numoofa innee maa kamu saqa mariasaki mi numoofa inniki qumaara ramafuannoo.

*Yisufa Yeerusaree maqannaasara amuqusimarinuu.*

*(Ruk 13:34-35)*

<sup>37</sup> Oo Yeerusaree Yeerusaree firaa maqusa aniki mariasa Anutuna tamummaqara fasiqauqa narusa mariafanoo. Anutufa faiqi faiqi niqiqoosa ooni saamu narimarusa. Moomoo kari sia asaanarida qinee kookooraanara fooqara qiqoosa qairisee Yeerusareenni faiqi namu mafi sakaanee runaqa misa rukiee mariasa. <sup>38</sup> Doo mina akiaqara kasooqaaqee inniqa maqusa faqa amaana maqa faqa sia faiqi mari maqa maaqafa naakundu maqa maaqafa mariannoo. <sup>39</sup> Innee qini ufa iriaqa. Doo sia kafa qini qiqafeefaranoo. Innee naaru kasooqaaqee qiniara, Oo amiqirafa Anutunakinaafa maasaki qumidanoo fee qifaranoo. Mi aukuaana kai kafa innee qini qiqafeefaranoo.

## 24

*Yisufa Yeerusaree amaana maqa rapee ianinmanara qimanniminuu.*

*(Mak 13:1-2; Ruk 21:5-6)*

<sup>1</sup> Yisufa Yeerusareenni naaqqara amaana maqakiqari raudamakufanoo moosaa fimarufaqa mina faiqi namu Yeerusaree amaana maqa ooni maqa minakinaa amiqira usakara usakaqoona oosana oosana uqafiqee mariqau. <sup>2</sup> Yisufa misa ufa iriseenoo quandaqinoo qimanniminuu. Innee maa ooninannai afeeka usakara usakaqoona qafaidee, innee qini ufa iriaqa. Kaqikaqoo sia uqanna maa oniuqa aaku aaku irafa maqee marindee iannoo sia moodaa kaqi mariannoo aiqama qumbaqi aquseefaranoo. Miqi qimasee quqasee moosaa nifiqee finuu.

*Kasooqaaqee kambiqaaninna deedeepa oosanara qimanniminuu.*

*(Mak 13:3-13; Ruk 21:7-19)*

<sup>3</sup> Yisufa Oorifa aaganasaa ooru ooqu marifufaqa mina faiqi namu oorureeqa nariara marufaqa ooru irammiriqau. Anee faasai amaana maqara qiannana yairee fee miqianoo fee. Maasa anee qumira aukuaana nana ainainee qafamasee fee oo Yisufa qumira aukuaana doo adeedi reenoo fee qianauree. Maasa maa aukuaana naqi fee inaqqee maasa miqoo qafee fee maa marunna aukuanafa taikaannoo fee qianauree.

<sup>4-5</sup> Yisufa iriseenoo maqi qimasee qimanniminuu. Innee rufiaqaa moo fannoo unna ufa inni qimannimisee kaqi runna mara quqaani. Moomoosa anireeqa unna qimasee maasa asaku mundirusa maridee qifaranoo. Faiqi anaasee moomoosa misa ufa iriseeqa eedoo qimaseeqa fifaqa rarisameeqee kaqitinau ubeekeefaranoo. <sup>6</sup> Innee nainandaraa rakira ufa irifaranoo adeedi rainnaqoo rakirana tutuqirana innee irifaranoo.

Mi ufana iriseeqa siamma qiniara qumira aukuaana doo aiqaree maqi qiaqa. Rakirafa kuqaa maqusa maqusa kambiaanifeera qidaqa. Maa marira aukuanafa sia dauni taikaannoo kaqikaagoo kisaagasaa mariannoo. <sup>7</sup> Maqusa maqusa firaa maqusa faqa kaqikaa maqusa faqa findifinaqa narari narari ifaranoo. Maqusa maqusa aandaroo naruannoo kasoogaqee maqusa maqusa maqa kasiannoo. <sup>8</sup> Mi ainainausa mandaukuana oorisa ka mariannoo kasoogaqee firaafa mariannoo.

<sup>9</sup> Mina aanaaqiana faiqi anaasee maqusa maqusa inniara Yisuna faiqi namu fee qimasaida fidiagaamma nimaqeeffaranoo. Aiqama maa maqa maaqanaki mariasa inni nidafirana nimisee inni kuqannarifaranoo. <sup>10</sup> Moomoosa mina qafamasee rufisee qini Yisusaki mariasa quqasee minniseefaranoo. Moomoosa nari ueeqee nari ueeqee qifaranoo nari akooqee nari akooqee ifaranoo. <sup>11</sup> Faiqi moomoo misa nariara Anutuna tamummaqara fasiqa fee qimariasa misa findifiqa faiqi anaasee qumareeqee kaqitina ubeekeefaranoo. <sup>12</sup> Aiqama ainaina qumuarirana oosana oosana deedeepirana oosana oosana kambiqafinoo qumbiqeenoo maqa maaqa amana kai mariannoo. Miqi kai inoo moomoosa nariara nariara amuqusirana minniseeqa quandafinaqa nari ueeqee nari ueeqee ifaranoo. <sup>13</sup> Yafa uqannee nari akoona faiqi uqanna mi manda aukuanna aiqama ainaina kambiqainanaki finnaaqara maseenoo fifi inoo taikara kooqi uqanna raquramisainafa mina akoofa Anutufa qumareeqeenoo asumu mariranaki quqaannoo. <sup>14</sup> Maa amiqira fasaasa ufana qini innaaruna ququsa ufa maqusa maqusa faiqi anaasee aiqama qimannimisaifaqa misa aiqama irisaiifanoo mi kamuqoo taikara aukuaana anianoo.

*Kaaqa fidiagaa imari manda ainainara Yeerusaree amaana maqaki kambiqaaninnana aaquqimannimaqanau.*

*(Mak 13:14-23; Ruk 21:20-24)*

<sup>15-16</sup> Misa kaaqa fidiagaa imaria manda ainaina qumareeqeeqa Yeerusaree naaquqara amaana maqakina quqasaifaqa Anutuna tamummaqara fasiqa auqu Danieerafa mifa minara akara rinau. Innee mina asaana rumasee amiqimmasee iriaqa. Misa mi mandainainna quqasaifaqa innee Yuda maqa maaqaki mariasa quqasee sandamaqarasamasee aaqana aaqana daraaniaqa. <sup>17</sup> Faiqi maqusasaa mariasa sia nari maaqaki keeqafinaqa nari ainaina mareefaranoo nariara kai quqasee sandeefaranoo. <sup>18</sup> Afuqaki mariasa sia nari uqainara randasee maraaqa. Kaqi quqasee sandaaqa. <sup>19</sup> Nimuaqu uqafaqaa anaaseeuqa faiqi aanaaqi faqaasa faqa misa mi aukuanna mandaikammifaranoo. Naqimmasee amiqimmasee sandeefaree. <sup>20</sup> Innee maaqi qimasee innaaru qiaqa. Oo Anutufa sia mi sandara aukuanafa amaanasaa kambigaani. Aaku aukuaana faqa sia kambigaani. <sup>21</sup> Yisufa mi aukuanara qimanniminoo qinau. Mi manda aukuanafa ainna aukuaana apurarana inaakufa kambigaannoo. Ooqai apurara aukuaana faqa kasoogaqee apurara aukuaana faqa sia mi manda apurarana amana mariannoo, ooreeganoo mariannoo mifa uriqaranoo firaagoo rafaagafusee mariannoo. <sup>22</sup> Doo Anutufa mi manda apurara aukuanna doo qusa mariannoo fee qinau. Sia qusaikinanoo faiqi anaasee sia amana kaqi marifara, aiqama kuqifara. Anutufa nari qutaagamaqoosara nari ufamau fimariasara irinoo, misa sia kuquaqeera qusa kamu ramannisaannoo.

<sup>23</sup> Mi aukuanna faiqi moo fannoo inniara mai qafaaqa Anutuna asauku mundirafa miqinni mari mirinni mari fee qinana siamma iriaqa, mina unnaqiannoo. <sup>24</sup> Mi aukuanna unna nisauku mundirafa maaqoo kukeeqanoo mari ifoo qinana sia uqanna oonu qafa. Anee minara unna qiifoo qia. <sup>27</sup> Qinee faiqi nimaaku sia kukeeqasee qumuanaura. Aakuasara foora aiqamai innaarufa rakeemamaree fifaininanoo qinee faiqi nimaaku miqirafa tautumasee kaifaa qumuanaura, aiqama qiqafaqeeera.

<sup>26</sup> Faiqi moo fannoo maaqi qimaseenoo ani qimaminoo. Asauku mundirafa aadana maqusa maridanoo, qinana siamma oonu qafaaqa minnimasaaqa, unna qidanoo. Faiqi moo fannoo asauku mundirafa maaqoo kukeeqanoo mari ifoo qinana sia uqanna oonu qafa. Anee minara unna qiifoo qia. <sup>27</sup> Qinee faiqi nimaaku sia kukeeqasee qumuanaura. Aakuasara foora aiqamai innaarufa rakeemamaree fifaininanoo qinee faiqi nimaaku miqirafa tautumasee kaifaa qumuanaura, aiqama qiqafaqeeera.

<sup>28</sup> Aandau kuqinoo maridanoo afundifaqa meemoonauqa sia minniseefara kuqaa uqanna dauni uqanna qumureeqa mi andauna naidaqa.

(Qini ufa irimariasaa maqusa maqusa yatinai fee marifaree sia qiniara randeefaranoo. Qinee qumidaqa misa marifandinaqoo qeeqa kai irisee tautumasee akooqoo qumuree misa uqeeraanaura.)

*Faiqi nimaaku innaarunaindari qumuaninnanara qimanniminau.*

*(Mak 13:24-27; Ruk 21:25-28)*

<sup>29</sup> Nimoosau maasau ira aukuaana mi aukuanna taikasainanoo suani qimbafinanoo asukuna aruannoo. Quqoona faqa asukuna aruamaqaannoo. Fasau aiqama innaarunaindari kakasammifaranoo. Fasau faqa quqoona faqa maruqoo ooqeenaa marirafa rapikamafuannoo. <sup>30</sup> Mi kamu qoo qinee qumuanna kari innaarunai moo kira ainaina uqannifiqara ainaina quqasaanaqa mina naaree qafaifaqa qumuanaura. Faiqi anaasee aiqama maqasaa fasiqa anaasee aiqama qafamaseeqa nisaurusee ikifaafau qimarifaranoo. Mikari qinee asuruki qeeqa kaaqa qarananamu faqa qeeqa afeeka firaana faqa qumuanaga faiqi anaasee maqusa maqusa aiqama qini qiqafamasee qiniara rufiasee ikiraqeeffaranoo. <sup>31</sup> Mikari qinee ukeena firaa qoo fuaqaanaqa qini qangirooqqa daraanifara, aiqama maa maqa maaqana afaaqasasa qini qiku qisauku qinee qutaqama nimaqaafanausa suqeeqeeqa moodaa saqa qinee marianannai suqu quqeeffaranoo.

*Saqari amanee ammuni quandara ufa.*

*(Mak 13:28-31; Ruk 21:29-33)*

<sup>32</sup> Yisufa kaifaa minara qimanniminoo qinau. Innee faafisa ammuni marina qafaafa sia qaqqini ammunidanoo, nari aukuaana narana aukuaana ammunidanoo. <sup>33</sup> Aiqama ainaina qinee qimannimiqaunandee faafisa fooqaafa aiqama ainaina kambiqainaqa doo qinee kaifaa qumira aukuaana adeedi afaisaammifoo qiaqa. <sup>34</sup> Maqee maria fasiqa anaasee akaqausa kaqi maridaqa aiqama ainaina qinee qimannimifannandee kai inoo kambiqaanoo. <sup>35</sup> Innaaruna faqa innaarunakinaa ainaina faqa maqa faqa maqasaaqaraa ainaina faqa aiqama taikafuannoo. Qini dookinaafa sia taikarana amana naaru naaru anoona uqanna mariannoo miqi kaimminoo mariannoo.

*Sia moo fannoo mifa qumuaninna faasaanara iridanoo.*

*(Mak 13:32-37; Ruk 17:26-30,34-36)*

<sup>36</sup> Qinee qumira aukuaanee qinee qumira faasaanee sia uqanna faiqi moo fannoo irimariafanoo. Innaarunai qangirooqqa faqa Anutuna amaaku qinee faqa siamma iridaqa, qini qikoofa nari kaimma qinee qumira aukuaana iridanoo. <sup>37</sup> Qinee faiqi nimaaku qumira aukuaana Nooana aukuaana fooqaasa marianaura. <sup>38</sup> Nammari samu naruna ataufakai mina maariqoo faiqi anaasee qoomaqandauru uqi mariqau. Miqida faiqi anaasee naramundee naramundee ida mariqau. Misa miqimmamaree fubaqa Nooana firaa sipaki keeqeemaru faasaana misa miqikaimmimariqau. <sup>39</sup> Misa mana mana idaqa amiqi miqidaqa marufanoo nammari radiqinoo ooqi misa fatikaneenoo ooqufinau. Qinee qumuanna aukuaana miqimmifaranoo. Mana mana imarifaqa kaqi qinee tautummannimaqaanaura. <sup>40</sup> Mikari moodaa afuqaki qaara fasiqa ainainimarifaranoo qinee tautummannimaqasee moo qumaree innaarunai ooru fuanaura moo quqasaanaura. <sup>41</sup> Qaara anaasee sana qaindi rimarifaqa qinee tautummannimaqasee moo qumaree innaarunai ooru fuanaura moo quqasaanaura. <sup>42</sup> Minara qinee inni qimannimidaqa. Deedaqida mariaqa. Sia kaqi mariaqa. Qinee inni karaambaiqa qumira aukuanara sia irimariafanoo. Minara innee deedaqiaqera qidaqa. <sup>43</sup> Ummuari mari fasiqafa maaqa kooqi atuaseenoo ainaina ummuaramammaree fidanoo. Maaqa akoofa mifa ummuarira aukuaana iriseenoofau rakisini. Sia irisaifanoo tautummamaqasee doo ummuaramammaree fifinoo. <sup>44</sup> Innee minara iriseeqa rakisida mariaqa. Innee qiniara faiqi nimaaku sia qumirammifoo qimasee manoo manaa imarifaqa qinee tautumasee qumuanaura.

*Andeeqasee ainainasaa rakisimari fasiqanara quandara ufa.*

*(Ruk 12:41-48)*

<sup>45</sup> Ainaini mariasasaa rakisirafa amiqira fasiqa oosana maaqimminoo maridanoo. Mina firaafa minara qinoo. Anee qini ainainira faiqiuqasaa rakisida narana ainaina andeeqasee amiqimmasee nimisee rakisini marinaqa qinee moosaa fuanaura. <sup>46</sup> Mi ainainira fasiqausasaa rakisirafa nari firaana ufamau andeeqasee fimarinanoo mina firaafa ani paqurinanoo sia mina afusaa asauruannoo asasiannoo. <sup>47</sup> Iriaqa qinee anoona qimamidaqa mi fasiqana firaafa mina andeeqarana qafamaseenoo, nari aiqama ainainasaa rakisira saika mina amiannoo. <sup>48-49</sup> Ainaini mariasasaa rakisirafa moo manda fasiqa nari firaafa moosaa finanoo mifa minara sia dauni aiannoo fee qimasee nari

ainainira faiqi namu sia amiqimmasee narana niminoo, misa narinoo misa kaukaata qimannimaqaidanoo quandafinanoo nariara qoomaqanduquseenoo faiqi akaqausa naaramaseenoo misauqa faqa namafinoo afeeka nammari moomoo misa saimbaqa namafidanoo furufaramma qafeenoo. <sup>50</sup> Miqi marinanoo sia rakisi marinna aukuaana mina firaafa tautummamaqaseenoo anirama qafeenoo arusee ateeke ateeamma aqusaannoo. <sup>51</sup> Mi manda ainainira fasiqafa qaaraike mariasa namufaqa mandainainaki mariannoo. Mifa miqoo misa faqa maridanoo ikifaafau qidaqa nifai rigidaqa marifaranoo. Qinee Yisusa qumira aukuaana miqimminoo mariannoo. Tautumannimaqaanaura.

## 25

*Qisaukuqara taikasee maanaaqauqa misara quandara ufa.*

(Yisufa maru aukuaana maanaqa moo amundararee qimasee kaqi aqoonnanaikam-maqoo fasiqafa mina aqoonafa nari maqusai kaqi marufanoo mi fasiqafa nari akoona maqusai nariara maaga usaka taikaseenoo nari aqoonnana maqusai tautumannimaqararee qimasee oonureenoo nari anaaga afigeenoo doo nari maqaqi afigee finau. Misa oosana miqinoo marunara Yisufa iriseenoo maa ufana qimanniminou.)

<sup>1</sup> Qinee qumuanna aukuaana anirainanoo innaaruna ququsa maaqimminoo mariannoo. Qisaukuqara taikasee maanaqa mariqau. Misa nari rambi uqirausa maqusasaa asukuna rakisi marufanoo amundara fasiqa anufaqa misa faqa fira maqaki narana naani qimasee afeesimariqau. <sup>2-3</sup> Moodaannai qisaukunamu furufari marusa maridaqa nari rambi kai uqusee marida afeesimariqau. <sup>4</sup> Moodaannai qisaukunamu irirana faqaasa rambi faqa minaki adiee maria nammarina faqa uqusee maridaqa afeesimariqau. <sup>5</sup> Amundara fasiqa sia dauni ani marufaqa, afeesimarufanoo nifuki aunduarufaqa mandaike mariqau.

<sup>6</sup> Eenda amuqusaikufanoo faiqi moo fannoo fifi qimaseenoo qimanniminou. Doo amundarafa ani ifoo. <sup>7</sup> Doo deedaqiaqee qufaqa, mi manaqausa findifufaqa qooma quumbeegee rambisaa muqurusoofanoo qanau. <sup>8</sup> Rambi nammari siaisa quandafiqi nammari faqaasara innauru qiqau. Maasa faqa adia qimia, maasa qooma qimbatifaqa nammari sia marifaqa. <sup>9</sup> Nammari faqaasa misa qaoo qimasee qiqau. Sia amana inni adia nimianaura inni adia nimiseega maasa faqa randaanora innee sandeeqa sutuqaqi oonu feefauriqa. Miqi qufaqa misa eedoo qimasee sutuqaqi nammariara fiqau. <sup>10</sup> Misa fufanoo amundara fasiqa irirana faqaasa maruqoo anireenoo ai misa nifiqeenoo fira maqaki keeqaqau. Keeqafufaqa misa kooqi ititaseega narana neemariqau.

<sup>11</sup> Neemarufaqa furufari maru manaqausa anireega naaraqau. Oo karaambaika kooqi atuasainaga maasa faqa keeqafi naanaura. <sup>12</sup> Miqi qufanoo mifa iriseenoo qimanniminou. Sia qinee inniara iridaqa innee yai mariaasee, doo see fuaqa doo kooqi ititaseega. <sup>13</sup> Yisufa maanaaqauqa kikiqa qususeenoo nari faiqi namu qimanniminou. Innee sia qinee qumira aukuanara irimariafanoo sia deedaqifoora. Minara inni qimannimidaqa innee iridaqa qiniara rakisiaqa.

*Qaararoo ainainira fasiqauqa misa quandara ufa.*

*(Ruk 19:11-27)*

<sup>14</sup> Mi ufana taikaseenoo Yisufa innaaruna ququsara moo ufa kikiqa usinoo qinau. Innaaruna ququsa maaqimminoo maridanoo. Ainaina faqaafa moo atinai fuani qimaseenoo nari ainainira fasiqauqa suquseenoo ufaasu nari ainaina faqa maqa maaga faqa misasaa quqaseenoo rakisiaqee qinau. <sup>15</sup> Moo fasiqa nari ainainirana amana moodaannai qisaku koondaa amanee firaana aminau. Moo fasiqa nari ainainirana amana qaraqanda koondaa amanee oorudupirana aminau. Moo fasiqa oorudupimasee nari ainainirana amana moodaa koondaa amanee amiseenoo qimanniminou. Innee maa munnimna qumareega minannai inneeqa ainainirana uqeeragaqanai. Kasooqagee aniraanaqa mina anoona munnimma faqa mina ati munnimma faqa qimiannee qimasee moo saa finau. <sup>16</sup> Moodaannai qisaku koondaa amanee qumaroofa minannai aigama ainainirana nimisaidanoo nimimarufanoo dinni qisaku amanee mi ainainiranasaa aniranau. Moodaanakikufanoo qisukuqara amanee marasee marinai. <sup>17</sup> Qaara koondaa amanee maroofa miqi kai inoo kafaqa qaara faqa qaara faqa aniranau. <sup>18</sup> Moodaa koondaa amanee maroofa mifa siamma ainaininai. Mifa madika indufuseenoo munnimma minaki quqasee kukeeqasanau sia furufarianifeera idaaqinoo marianifeera kukeeqanau.

<sup>19</sup> Naaru kasooqagee misa rakisirafa anireenoo naaramaseenoo munnimma oosana oosanara irammirinau. <sup>20</sup> Moodaannai qisaku koondaa maroofa anireenoo nari rakisirana maaqi qimasee qimaminou. Oo qini rakisirafa anee moodaannai qisaku koondaa kai qimunnana. Minannai ainainammasaunanoo dinni qisaku faqa mina ati munnimma faqa aniraifaqa doo qisaukuqara animmamidaqa.



<sup>21</sup> Mina rakisirafa minara iriseenoo doo qimaseenoo irinau. Iriseenoo maaqi qimasee narí ainainira fasiqa qimaminau. Oo anee amiqira fasiqa oori runuseenana ainaini marianafa andeegara fasiqa uqanna, anee kaqikaa ainainasaa faqa andeegasee rakisi-marianafa mariananoo. Minara qinee firaa ainaina aiqama ainainasaa rakisirana anisaa kai quqaanaura. Sia anee kaqi ainainira faiqifau marinnandia. Anee qini faiqiara foora marinnaranoo. Anee faqa qinee faqa moodaanaki asarisaua marianaura.

<sup>22</sup> Miqi qimasoofanoo qaara koondaa amanee maroofa anireenoo narí rakisirana maaqi qimasee qimaminau. Oo rakisirafa anee qaara amanee qimunaqa minannai ainainammasaanoo qaara faqa qaara faqaikamafifaqa, doo animmamiqa. <sup>23</sup> Narí rakisirafa mina ufa iriseenoo qimaminau. Oo anee faqa amiqira fasiqa oori runusee ainaini marianafa andeegara fasiqa uqanna, anee kaqikaa ainainasaa faqa andeegasee rakisi marianafa mariananoo. Minara qinee firaa ainaina aiqama ainainasaa rakisirana anisaa kai quqaanaura. Sia anee kaqi ainainira fasiqafau marinnandia. Anee qini faiqiara foora marinnaranoo.

<sup>24</sup> Miqi qimasoofanoo moodaa koondaa amanee maroofa anireenoo narí rakisirana maaqi qimasee qimaminau. Oo rakisirafa qinee ani oosana iridaqa. Kaaqa anee munnimmara rimarianaqa qinee qafamaqaunaua. <sup>25</sup> Qinee ani koondaa amaneennai ainainammasaanoo ani munnimma furufariandoo qimasee minara rufiasee madika indufuseeqa minaki quqaqaunoo mariina doo mina kai anamiqa.

<sup>26</sup> Mina rakisirafa mina ufa iriseenoo raigasee qimaminau. Anee manda fasiqa uqanna mariananoo, kudi uqanna aarara marianafa mariananoo. Anee qiniara kaaqa munnimmara rimariana fee q inanee. <sup>27</sup> Anee qini oosana miqinoo marinana anee qini munnimma naqaa fee ifanee qini munnimma beenaki quqaqaana. Anee beenaki quqasainanoofau qini munnimma faqa ati munnimma faqa marinaqau qeeqa marani. Anee madikaki kai akundoonnana kudi uqanna mariananoo.

<sup>28</sup> Rakisirafa miqi qimaseenoo ainainimaru fasiqa namusa qimanniminau. Innee mina moodaa koondaa amanee mareeqee qisaukuqara mareemari fasiqana mina amiqa. <sup>29</sup> Moo fannoo ainaina uaqee innana moo faqa amifanoo rairaa inoo mariani. Ainaina siainnana sia akaqa ainaina amifara, minaki oodaa marinnana mina raffa maraifanoo kaqi mariani. <sup>30</sup> Doo maa manda kudi fasiqana rarisameeqeenoo madaanaí asukunaki aqusaqa. Mi asukunaki maridanoo ikiraqaidanoo afai riqidanoo mariani.

*Taikara faasaana ufa irira faasaana mi ufana.*

<sup>31</sup> Qinee faiqi nimaaku qumuanna kari qeeqa rakisira afeeka namufaqa qeeqa qangiroo namufaqa maa maqanasaa qumuanaura. Qumureeqa ufaqira qaari amiqira qaari ufiqisee eekara ariranasaa oogu marifinaqa maqasaqaraasa ufa irisee andeeganni-maqaanaura. <sup>32</sup> Qinee ooqumari fuaqa maqusa maqusa aiqama suqeeqee qeeqa doorisaa quqasee nindafeeqa qeeqa iriranannai inni rainannimaqaanaura. Qinee sipsipasaa rakisirausa fooqaasa marida. Misa sipsipa raineeqee aaduma quqaidaqa mimmi raineeqee aaduma quqaidaqa. Qinee qumuanna aukuanna qinee miqianaura. <sup>33</sup> Qinee sipsipa fooqaasa raineeqee qisauku uqanna quqaanaura. Mimmi fooqaasa qisaaqai raineeqee quqaanaura.

<sup>34</sup> Rainannimaqaseeqa qinee firaa karaambaiga quandaqinaqa qisauku uqannaindaraasa maaqi qimasee qimannimianaura. Qini qikoona amaakummara mariasa aniaqa anireeqa aigaree mina amiqira ququsaki keeqafi mariaqa. Ooqi maa maq maaqafa sia marufanoo mi ququsana iniara quqaqoofa maridanoo. <sup>35</sup> Qini daaroroofaqa narana qimusa mariafanoo. Qini nammariara didimarufaqa nammari qimusa mariafanoo. Qinee anaamuru fooqaasa mariafana innee qini agoondikiusa mariafanoo. <sup>36</sup> Qinee kaqisamu mariafana innee qamunna qimusa mariafanoo. Qinee aurimariafana innee aniree qini qiqafee sukudaakutiqa, qimudaoo qimaqimaqeeusa mariafanoo. Qinee karafusaki mariafana innee qini undara anireeqa aiaaee qimaqimaqoosa mariafanoo. Qinee minara iriseeqa iniara Anutuna amiqira ququsaki fuaqee qidaqa.

<sup>37</sup> Miqi qianaqa misa qisauku uqannaindaraasa maaqi qimasee ufa qini qimaqimifaranoo. Oo karaambaiga mina anee fee yairee fee ani aararee marufaqee narana amiqiafana. Nammariara aidufaqa yairee fee ani amiqiafana. Maasa sia ani qafaqiafana. <sup>38</sup> Yairee fee anee anaamuru fooqaafa marunaqee ani agoondikiqiafana. Yakari fee kaqisamu marunaqa qamunna ani amiafannanara qidanee. <sup>39</sup> Yairee fee aurimarunaqee maasa oonu ani qafaqiafana. Yakari fee anee karafusaki marunaqee maasa oonu ani qafaqiafana. Anee qinaqa maasa iriaqa. <sup>40</sup> Qinee misa ufa iriseeqa quandaqina kooroo qimannimianaura, maa qini qikaqaafasauqa misaki ureeqarausa innee misa amiqimannimaqaidaqa qini faqa amiqimmaqimaqee marusa mariafanoo minara amiqira ququsaki keeqaaqeeera qimannimidaqa.

<sup>41</sup> Qinee misa qimannimiseeqa quandafinaqa qisaaqaindaraasa maaqi qimasee qimanniana. Innee Anutuna aqira ufa innisaa marisa innee idaki aqufuaqa. Anutufa Sadannanara faqa nari manda qangiroouqa faqa afaannauqa faqa ida aqufuanifeera auquqoofa maridanoo naaru naaru qeemari idafa sia qimbeemari idafa, innee minaki aqufuaqa. <sup>42</sup> Qini daararee marufana naranara qaoo qimasee sia qimusa mariafanoo. Qini nammariara didufuqa qaoo qimasee sia qimusa mariafanoo. <sup>43</sup> Qinee aanaamuru fooqaasa mariafana innee qini aqoondikiranara qaoo qusa mariafanoo. Qinee kaqisamu mariafana, qaoo qimasee sia qini qamunanda qimusa mariafanoo. Qinee aurida mariafana innee sia oonu qini qifafoosa mariafanoo.

<sup>44</sup> Qinee miqi qimasee misa qimannimianaqa misa quandasee maaqi qimasee qini qimaqimifaranoo. Oo karaambaiqa yakari fee naranara aararanoofee inau nammariara aidinoo fee inau. Yairee fee aanaamuru fooqaafa marunaqee kaqi samu marinee inau. Yairee fee aurimarinee inau. Yairee fee anee karafusaki marinee inau. Anee yakari fee miqunaqee maasa sia amiqi amiqiafana. Anee qinaqa maasa iriana. <sup>45</sup> Qinee misa ufa iriseeqa maaqi qimasee kooroommasee qimannimiana. Maa qini qikaqaafasauqa misaki ureeqaraua sia innee amiqimannimaqaidafa qaoo qunara mi fasannai qini faqa sia amiqimannimaqoonara, qaoo qunara minara qinee inniara idaki fuaqee qidaqa. <sup>46</sup> Miqi qimasaina misa naaru naaru nariranaki keeqafina marifaranoo. Andeeqee mariasa misa naaru naaru mariranaki keeqafi marifaranoo.

## 26

*Yisuna ariraree qimasee ufa tipundaariqau.*

*(Mak 14:1-2; Ruk 22:1-2; Yoh 11:45-53)*

<sup>1</sup> Yisufa maa ufana oosana oosana qimannimi taikaseenoo maaqi qimasee nari faiqi-namu qimanniminu. <sup>2</sup> Qaara faasaana taikainanoo maasa Yeerusaree maqusai ooruree ainnaaqarara qoomaqa sakasee naanara. Anutufa maasa qifaqnausa qikeeku qikaaku Isipa maqa maaqai marufanoo sia narinu ainnaaqaramasee Isipa maqannaasa kai narinau. Minara maasa Yeerusaree maqusai ooruree afaarurumaanaana. Miqoo faiqi moo fannoo qini uqeeqainafa aunirira saqarisaa pirimannoo qini darifaranoo. <sup>3</sup> Yisufa mi ufana nari faiqi namu qimannimimarufafa amaana maqasaa rakisimarusa faqa Yuda maqanna faiqi fraasa faqa moo atinai Kaiafasana maaqaki ufa suqidaqa Yisuna arira ufa suqidaqa qimmiriqau. <sup>4</sup> Ireeda qumee kai Yisuna qumaree ariraree qimmiriqau. <sup>5</sup> Maaqoo Yeerusaree maqusai ainnaaqara qoomaqa suqa neemarinnana qambaana sia Yisuna qumaraanara. Faqiqi anaasee moomoo suqiga mariasa qifaqamaseeqa ufa fraana qidaqa tutu qifoora.

*Anaasee moo fannoo Yisuna fadameena adiamaqanau.*

*(Mak 14:3-9; Yoh 12:1-8)*

<sup>6</sup> Mikari Yisufa Beetani maqusai Simoona amarafa karoora arimarufanoo Yisufa taikaisoona mina faqa naidanoo mina maaqaki marinau. <sup>7</sup> Maridanoo Yisufa misauqa faqa narana neemarufanoo anaasee moo fannoo mifa maru maqanaki keeqafinoo fraa munnimma aqimaru fadameena idaaqira taqukinaana amiqira afundimaruna Yisufa narana nee marufanoo akiaqa amoondunna kaqi adiamaqanau. <sup>8</sup> Yisuna faiqi namu mina qafeeqa tautufanoo niranaqoofaqa qiqau. Maa fifau faafau ira anaaseefa naqi fee ifanee fifaunni rairaa inanee. <sup>9</sup> Naqi fee ifanee munnimma fainausa nimiseenana mina akiaqara fraa munnimma maraseenana kudi fasiqa anaaseeqa nimiaqaana. <sup>10</sup> Yisufa misa ufa iriseenoo quandafinoo nari faiqi namu qaoo qimannimaqaidanoo qinuu. Nanaree mi anaaseenara qaoo qida fee. Qifaqa idaaqa uqannamma qimaqaanifeera adiaqimaqeenoo. <sup>11</sup> Inniki kudi fasiqa anaaseeqa naaru naaru marifandia. Innee amana moomoo kari misa amiqi amiqifaranoo qinee sia kisaqasaa inniki mariana, kaqikaa qoo funaura minara mifa qini adiaqimaqeenoo. <sup>12</sup> Qini qifaqa madikaki fuaninnanara minara mifa maasa faqiqi kuqirana oosana mareenoo qini qifaqa kuquaninnanara deedaqidanoo fadameena adiaqimaqeenoo. <sup>13</sup> Mi anaaseenara Yisufa kaifaa qimannimianu. Naaru naaru maqusa maqusa maaqa maaqa maa qinee marunna kamuqooqaraa ufa, amiqira ufa, faqiqi anaasee qimannimidaqa maa anaaseenara fadameena adiaqimaqoonna sia aunifara mina faqa qimannimifaranoo. Minara faqa qimannimidaqa sia fafaa qiaqa, sia qaoo qiaqa.

*Yudasifa munnimara rumammareenoo Yisuna uqeeqararee qinuu.*

*(Mak 14:10-11; Ruk 22:3-6)*

<sup>14</sup> Yudasi Keeroota maqusaindaraafa, Yisuna faiqi namuki marufa, mi fasannai amaana maqasaa rakisi marusunnai oorureenoo irammirinoo qinuu. <sup>15</sup> Innee naqi

fee mandee feefauru qimifaqee Yisunara ueeqaanauree. Irammirisoofaqa misa ooni amiqau. Moodaa fasiqa aiku asauku taikasee moo fasiqa asaukuqara taikasee miqi mandee ooni amiqau. <sup>16</sup> Miqooqari faasaambaasaana Yudasifa Yisuna qumee misa nisaukuki quqaanifeera apuree marinau. Fiqu faiqu fidanoo apuranoo nimirinai.

*Ainnaaqarara qoomaqa sakasee naqau.*

*(Mak 14:12-21; Ruk 22:7-14,21-23; Yoh 13:21-30)*

<sup>17</sup> Yuda maqannaasa misa aiqama Yeerusaree maqusai suqumaree Anutuna qangiroo misa nikeeku nikaaku ainnaaqarara qoomaqa afaarurumasaida qaaramoo faasaana mi feemuna neemariqau. Ooruku siai feemuara fooqaana neemariqau. Mi indaaru faasaana Yisuna faiqi namu Yisufuqoo anireeqa irammiriqau. Ya maqanaki fee maasa Anutuna qangiroo ainaaqaroo afaarurira naranna ooruku siai feemu suqaanauree.

<sup>18</sup> Yisufa iriseenoo qimanniminai. Innee Yeerusaree maqusai oorureeqa muqutinai moo fasiqa oonu paqurimasee maaqi qimasee qimamiaqa. Ufasaa rakisira fasiqa ani maaqaki ainnaaqarara qoomaqa suqasee naannoo. Nari aukuaana adeediraiifanoo ani maaqaki nari faiqinamu faqa narana naanee qinoo. Miqi qimasee qimamifanoo nari maaqa inni nimiani. <sup>19</sup> Mina faiqi namu iriseeqa miqimmiqau, miqoo ooru qoomaqirara deeda iqau.

<sup>20</sup> Mi eendanaki Yisufa faqa nari faiqi namufaqa mi maqanaki ooqu marifufaqa eendaki narana neemariqau. <sup>21</sup> Misa neemarufanoo Yisufa maaqi qimasee qimanniminai. Qinee anoona ufa inni qimannimidaqa innikiqari faiqi moo fannoo qini ueeqaaninafa maridanoo.

<sup>22</sup> Misa minara irisoofanoo suara naakinai. Suara naakufaqa moodaa moodaa Yisuna irammiriqa qiqau. Moo fannoo Yisu qinee fee mi ufana qiffee. Moo fannoo miqi qinoo qinee fee qiffee. Miqi qimasee aiqamausa Yisuna irammiriqau. <sup>23</sup> Yisufa iriseenoo kaifaa nariqa qimanniminai. Innikiqari moo fannoo maa difaaninakina asauku agusee mara neemarifa qini ueeqaannoo. <sup>24</sup> Tamummaqara fasiqauqa akara fannoo qiniara faiqi nimaakuara doo kuquani fee qinoo maridanoo. Kuqaa qinee kaqikaa qoo kuquanaura ueeqasainaqa kuquanaura. Qini ueeqaaninna fasiqafa kuqaa maaqi qimasee nariara iriannoo. Nanaree qini qinoofa qini maqaqisoofaqee maridee. Qini numoo firaafa maridanoo fee qiannoo. <sup>25</sup> Miqi qimasooofanoo Yudasifa Yisunara irammirinoo qinai. Oo qini qafee faqaafa qiniaree ueeqee maqi qidanee qimasooofanoo Yisufa qinai. Aneenna kai qiananoo.

*Yisufa aafaqa oosana arasee noo ufafa.*

*(Mak 14:22-26; Ruk 22:14-20; 1Kor 11:23-25)*

<sup>26</sup> Misa nee marufanoo Yisufa feemu maraseenoo Anutunara dufi dufi qimaseenoo ruqiruruq maseenoo nari faiqi namu niminoo qinai. Maana marasee naaqa. Maana qini qifaqa qimaqi kikiqisira feemu maridanoo. <sup>27</sup> Nimiseenoo uainna nammari mara mareenoo miqooqaraasa maqee maqee neemaru nammari Yisufa mi uainna kaafana uainna minaki qumbiqarana maraseenoo Anutunara dufi dufi qimaseenoo nari faiqi namu niminoo qinai. Innee aiqama maanaki marasee naaqa. <sup>28</sup> Maa uainnafa qini fidika kikiqisira uainna nammari maridanoo. Qini fidikannai uqanna Anutufa moomoosa numoo aununnisaanifeera maa qini fidika raannoo. Maana qini fidika fannoo Anutuna nariara faqa faiqi aanaaseera faqa noori runiranaki marunara fukasaa moodaanaki kira ufa mapukueeqeenoo doo rafaafusai fidikafa maridanoo. <sup>29</sup> Innee iriaqa. Qinee anoona ufa uqanna inni qimannimidaqa. Sia maa marunna aukuaana maa uainnana kaifaa naanaura. Kasooqae qini qikoona ququsaki innaarunai innee faqa qinee faqa moodaanaki maridaqa fuka uainnara foora ququfiqa naanaura. <sup>30</sup> Yisufa miqi qimasee qimannimisoofaqa misa namaseeqa Anutunara idi ramaseeqa raudamakufaqa asukunai Oorifa aqaanai ooru fiqau.

*Yisufa Peetooroofa qaoo qianinnanara qinai.*

*(Mak 14:27-31; Ruk 22:31-34; Yoh 13:36-38)*

<sup>31</sup> Miqoo ooru maridanoo Yisufa nari faiqi namu qimanniminai. Fafaa eendaki qini qumaraiifandinanara innee rufiasee quqasee sandeefaranoo. Anutuna tamummaqara fasiqa ooqai minara maaqi qimaqoofa maridanoo.

Anutufa sipsipa rakisirana arinaqa sipsipa aiqama quqasee furufarifaranoo qimaqoofa maridanoo.

<sup>32</sup> Yisufa minara kaifaa qimanniminai. Qinee kuqiranakiqari findimeeqee Kariree maqusai inni nifunni fuanaura. Innee qini qinaaqiana oonurifaqa miqoo inni nindafaanaura. <sup>33</sup> Yisufa innee quqasee furufarifandia maqi qimaqoona Peetooroofa minara iriseenoo qinai. Qinee sia sandaanaura. Misa aiqama quqasee sandaifaqa

qinee sia sandaanaura, ani faqa apamma fuaanaura. <sup>34</sup> Yisufa mi ufana iriseenoo qimaminau. Fafaa eendaki kookooraana sia ufa qinana anee qaaramookinana irafana qiniara sia qinee mina qafaidee qinnaranoo. Miqi qinanoo kookooraana ufa qiannoo. <sup>35</sup> Peetooroofa minara iriseenoo qinai. Qaoo, sia qinee aniara sia qafaidee qianaura ani faqa kuqanaura. Yisuna faiqi namufaqa misa aiqama miqi kai qiqa.

*Yisufa Keetaseemane saqamaki innaaru qinai.*

*(Mak 14:32-42; Ruk 22:39-46)*

<sup>36</sup> Miqooqari Yisufa nindiqeenoo saqamai asukunaki finau. Mi saqamana auqu Keetaseemane saqama marinai. Miqoo mifa nari faiqi namuara oqumarifi rakisiaqee qimaseenoo nariara kaqikaa qoo finoo nariara innaaru qiraree qinai. <sup>37</sup> Qimaseenoo mifa Peetooroona faqa Seebeedina amaakuqara Yameesa Yoohaneesa minamusa faqa kaqikaa qoo saqamaki nifiqamaree fidanoo nari kuquaninnanara irimarufanoo aundura mandaikimarufanoo akoo akaa imarufanoo miqi marinai. <sup>38</sup> Miqidanoo minamusa qimanniminai. Innee maqoo saqama qambaana marida nifu maqaidaqa qinisaa faqa rakisi qimaqaqa. Qini qikoofa qini minniqisaaninnanara fira qoo qimuqusimarifaqa, mi qimuqusirafa daruannoo fee qidaqa. <sup>39</sup> Miqi qimaseenoo mifa kaqikaa qoo nariara oonu oorindari mi saqamanaki maqasaa aqufufanoo innaaru qinoo qinai. Oo qini qikoofa amanee anee sia qini minniqisainaqee sia kuqanauree. Sia qeeqa didiranara iridaqa ani aidiranara dididanoo, anee qinaqa kuqanaura.

<sup>40</sup> Miqi qimasee innaaru qimaseenoo doo findifinoo qaaramoo namu maruqoo anireenoo nindafoofanoo misa nisuku kaaqa faiqaqau. Ani nindafamaseenoo Peetooroona aaramaseenoo qinai. Peetooroo anee sia fee kaqikaa qoo qiniara rakisinee. <sup>41</sup> Rakisidana innaaru qidana maria sia kaqi maria. Aneenna iriranannai kai qini dadaaqi marianafa, aneenna uqanna sia amanaiki mariananoo miqi marifana kudoosaapee marianaqa qafaidaqa.

<sup>42</sup> Miqi qimaseenoo Yisufa kaifaa kaqikaa qoo oonureenoo innaaru qinoo qinai. Oo qini qikoofa anee amanee sia kuqana nammarina qiminnaree anee sia minniqisainaqee sia kuqanauree. Sia qeeqa iriranannaifau qidau anee qinandee, qinaqa miqimmiqa kuqanaura. <sup>43</sup> Miqi qimaseenoo kaifaa nari faiqi namu unnai oonu nindafoofaqa misa kafaa nisuku faiqee mariqau. Misa nifuki aunduari marufaqa faiqaqee mariqau.

<sup>44</sup> Nindafamaseenoo ani quandakufanoo kafaa oonureenoo kafaa qaaramookinoo innaaru qinai. Indaaru qundee kai kaifaa miqi kai inoo innaaru qinai. <sup>45</sup> Innaaru qimaseenoo findimeegeenoo nari faiqi namu maruqoo anireenoo nindafeenoo qimanniminai. Innee faiqaqee maridee idooaidee. Qini mareeqee manda oosana maree mariasa nisaukuki quqaaninna eendirafa doo anireenoo. <sup>46</sup> Doo findifi qafaqa. Qini ueeqee mari fasiqafa doo ani maridanoo.

*Misa Yisuna qumaraqau.*

*(Mak 14:43-50; Ruk 22:47-53; Yoh 18:3-12)*

<sup>47</sup> Mikari kai mi ufana qimarufanoo eendufanoo asukunai nari faiqi namuqiari faiqi moo auqu Yudasifa ainai. Faiqi moomoo mina saimbaqa duru feefa saamu faaqaana indaai maree aniraqau. Yuda maqannaasa faiqi firaasa rakisirausa niqoofofaqa Yudasina faqa aniraqau. <sup>48</sup> Faasai Yudasifa qimannimiseenoo innee asukunai aaqee foora qinee oonuree amooqaanaqa qafeeqa innee mina kai qumaraqau. <sup>49</sup> Doo maqeeufanoo Yisufuqoo oonu reenoo oo qini qafee faqaafee qimaseenoo Yudasifa Yisuna amooqanau.

<sup>50</sup> Miqi marufanoo Yisufa maaqi qimasee qimaminai. Oo qini qigoondi anee nanaree aninane. Miqi qimasoofofaqa faiqi Yudasina faqa anusa aniree doo Yisuna amiqimmasee rakisissimma qumaraqau. <sup>51</sup> Qumaree marufanoo Yisuna faiqi namuqiari moo fannoo nariqa rakira kisaqa paipana moo qumareenoo nariraree qimaseenoo moo fasiqa aaqoo dindanai aiqama ateeqa aqinau. Amaana maqasaa rakisirana ainainira faiqi mina aaqoo ateekanau.

<sup>52</sup> Yisufa mina qafamaseenoo qinai. Doo rakira paipana quqaa. Aiqaqa rakira ainainannai narimarias minannai kai nari narifaranoo. Minara rakira paipana quqaa saina qini kai daruaqa. <sup>53</sup> Qinee qeeqa qikoonara iraananoo qangirooqa nukudara foora qiminaqa dadaaqifaqa sia kuqanaura. Anee minara sia fee iridane. Doo aneenna rakira paipana quqasaa. <sup>54</sup> Qini qikoofa nari qangirooqa qiminaqa dadaaqifaqa naqi fee masee qinee kuqananoo Anutuna tamummaqara fasiqa ufa kambiqaannoo fee.

<sup>55</sup> Yisufa miqi qimasee nari faiqara qaoo qimaseenoo quandafinoo nari qumaree marusa qimanniminoo qinai. Qinee maqee maqee inni amaana maqaki qimannimi mariafannaqoo innee mikari miqoo qini qumaraqaana. Maqee eendaki innee qumee kai duru saamu namufaqa qini qumaree mariafanoo. Qinee qumuari maruna fasiqausara maqi marunaqa innee asukunaki qini qumaree mariafanoo. <sup>56</sup> Misa

mi oosana oosana ainainna Yisunara amisooofanoo ooqeenaa Anutuna tamummaqara fasiqauqa ufa anoona kambiqanau. Yudasina faqa anusa Yisuna qumarooafaqa mina faiqi namu aiqama mina qafamasee quqasee daraaniqa sandaqau.

*Kaiafasana maaqaki misauqa Yisuna iree mariqau.*

*(Mak 14:53-65; Ruk 22:54-55,63-71; Yoh 18:13-14,19-24)*

<sup>57</sup> Sandamafuafaqa Yisuna qumaree marusa kaqi qumareeqa Kaiafasana maqusai maree fiqau. Kaiafasafa amaana maqasaa rakisirafa firaafa marunnai maree fiqau. Yuda maqannaasa faiqi firaasa misa faqa Kaiafasana maaqaki faasai suqimarugo miqoo maree fiqau. <sup>58</sup> Misa Yisuna afiqee fimarufanoo Peetooroofa ninaaquianna rufieenoo asukunai nifaaqmee nifaaqmee inoo finau. Misa Kaiafasana maaqaki Yisuna afiqee keeqafufanoo Peetooroofa naambeeqai aadumasaa sundiauca saimbaqa oqumarifi maridanoo Yisunara iridanoo imarinau. Misa arifaree naqi fee ifaree rumbeefaree, miqi qidanoo nindafee marinau.

<sup>59</sup> Miqi maruafaqa amaana maqasaa rakisimarusa firaasauqa faqa Yuda maqannaasoorauqa faqa miqoo suqiqa marida unna ufara randee mariqau. Miqidaqa qiqau. Ya fasiqa fee moo ufa oosana arasinaqee mina maree fee munu kiapana qimamifanoo fee aruanno fee.

(Mooseena sandufa maaqi qimaqoofa, moodaa fasiqa fannoo qinnufafa sia anoonaianni. Qaara fasiqa fannoo kikiqamafi qinafa mifa anoonaianni. Misa minara iriseeqa faiqi qaaraganda mi ufana qifaqa Yisuna ariraree qiqau.)

<sup>60</sup> Faiqi moomoosa maridaqa unna ufa oosana oosana qimariqau. Miqidaqa Yisuna ufara randee mariqau. <sup>61</sup> Randee marufanoo qaara fasiqa moodaa ufa andeeqau. Miqanda maaqi qimasee qimannimiqau. Yisufa maaqi qimasee qufaqa maqanda iriqiafana. Qinee Anutuna amaana maqa Yeerusaree naaquqara amaana maqa aiqama rambairi aqusee qaaramoo faasaana amana qinee kaifaa usakaanuree qufaqa iriafanaganda maridaqa.

<sup>62</sup> Amaana maqasaa aanaiqirausa misa uriqararafa mi ufana iriseenoo findifinoo Yisuna aaramaseenoo irammirinau. Anee miqanda ufa iridane. Miqanda kuqaa fee qida fee. <sup>63</sup> Miqi qimasooofanoo Yisufa kaqi kasooينو marinu. Amaana maqasaa aanaiqirausa misa uriqararafa Yisuna qafamaseenoo nari afusaa qimaminoo qinau. Kuqaa maqanda Anutuna afusaa marunaua marida. Anee anoona ufa kai qini qimaqimia. Kuqaa fee anee Anutuna asauku mundirafa uqannee maridane, Anutuna amaaku uqannee maridane.

<sup>64</sup> Miqi qimasooofanoo Yisufa qinau. Anee qiniara qiannana, qini ufa iria, maa maqee innee qini qiqafee mariafanoo. Kasooqagee sia maa qirausau marianau qiqafeefarau. Uriqararana Anutuna asauku uqannai mina aaqa oqumarifi mariana, mari inaqa kasooqagee asurukina qumuanau. Innee miqimaseeqa qini faiqi nimaaku qiqafeefaranoo. <sup>65-66</sup> Amaana maqasaa rakisimarusa firaafa Yisufa miqi qufanoo irufanoo niraqee marusa oosana maraseenoo nari qamunna parara qinoo anaqi aquseenoo aiqama suqiqa marusa darara qimasee qimanniminoo qinau. Doo innee aiqamausa mina manda ufa iridee. Nariara Anutuna amaaku fee qinoo iridee. Sia maasa kafa arira ufara randaanau. Doo aneenna qimannimianaqa innee minara nanee fee qidaqee. Misa aiqamausa doo kuqanifee ufa kai qima afeekaikiqau.

<sup>67</sup> Misa mi ufana qimaseeqa Yisuna oorinni anireeqa niqaara fidamaqau. Fidiamaqaseeqa asukunaiqari misa nisauku samu oori aridaqa qiqau. <sup>68</sup> Anee tamummaqara fasiqa mari inana aneenna kai tamummaqasee qinaqa iria, yafee ani arinoo fee.

*Peetooroofa Yisunara qaoo ufa.*

*(Mak 14:66-72; Ruk 22:56-62; Yoh 18:15-18,25-27)*

<sup>69</sup> Amaana maqasaa rakisimarusa uriqararafa Kaiafasafa nari maqa ainainirafa firaafa marunara ainainira maanaaqauqa akaqausa nifqa quqasoofaqa ainainimariqau. Peetooroofa aadumai sukinni ooqufaaqeeufanoo ainainira maanaqa moo fannoo Peetooroona paqurimaseenoo qimaminoo qinau. Anee faqa mi kariree fasiqana Yisuna faqa nimarianafa marianau.

<sup>70-71</sup> Miqi qufanoo, Peetooroofa iriseenoo aiqamausa nifusaa mi manaqana qimaminoo qinau. Sia ani ufa oosana iridaqa. Qinee sia mina faqa nunausee qimaseenoo naambeeqai ququsa kooqi marunnai ooquroofanoo maanaqa moo fannoo kooqisaa rakisimarufa qafeenoo miqoo marusa qimanniminu. Maa fasiqafa Yisuna Nasareeteendaraana faqa marifaqa qafee marunafa.

<sup>72</sup> Peetooroofa mi ufana iriseenoo kaukaata qimasee qaoo qinoo qinau. Sia qinee mi fasiqanara iridaqa. <sup>73</sup> Kafa kaqikaa qoo marikamasooafaqai faiqi miqoo marusa anireeqa

Peetooroona qimamiqa qiqau. Kuqaa anee mi fasiqana faiqi namuki mariananoo. Anee faqa mifa faqa kuqaa moodaa ufa qimariaqanda mariafanoo.

<sup>74</sup> Peetooroofa mi ufana iriseenoo kaukaata qimaseenoo darara qimaseenoo niqinoo qinai. Sia uqanna qinee mi fasiqanara iridaqa. Nanaree unna qida fee. Miqi qimasoofoano kookooraana ufa qinai. <sup>75</sup> Kookooraana ufa qimasoofoano Peetooroofa Yisufa ufa qimamunara irinai. Yisufa qinoo. Qaaramoo kari ani irarifana anee qiniara sia fee qinanoo kookooraana ufa qiannoo. Peetooroofa mi ufanara oonumafi iriseenoo oo doo Yisuna ufa qiniara qifa anoona koorooinoo, qimaseenoo raudamakufanoo asauruseenoo firaqoo ikiraqa mareenoo finau.

## 27

*Yisuna afitqammaree Piratoofunai fiqau.*

(Mak 15:1; Ruk 23:1-2; Yoh 18:28-32)

<sup>1</sup> Mi eendanaki iqaqoofofa amaana maqasaa aanaiqikirausa misa uriqararusa faqa Yuda maqanna faiqi firaasa faqa suqusee Yisuna arira ufa qiqau. <sup>2</sup> Arira ufa andeeqaseeqa unna qimasee fifau sainanda qumarasee Yisuna asauku rumbamaree Roomma maqanna kiapafa Piratoofa marunnai afiqee fiqau. (Firaqoo mandoosana maraidanoo uriaqee marufa marufaqa fooro sainandannai rumbamaree afiqee kiapafinnai fiqau.)

*Yudasifa nari ataakiroo ufana.*

(NiFa 1:18-19)

<sup>3</sup> Piratoo finnai maree firari marufanoo Yudasifa Yisufa kuquaninnanara irufanoo nari afaaqakina akooqoofanoo Yisuna akiaqara munnimma amaana maqasaa rakisimarusa faqa faiqi firaasa faqa marunnai Yudasifa moodaa fasiqa aiku asauku taikasee moo fasiqa asaukuqara taikasee ooni mareenoo kafia nimiraree qimaseenoo qinai. <sup>4</sup> Oo qinee furufaramaseeqa. Andeeqara fasiqara asakadiki sia ikairi marinara kuquanifeera qinee dapikamandeeqa oosana arannanara. Minara qinee kafia inni munnimma nimidaqa. Miqi qufaqa misa qiqau. Anee kai qianaqa maasa amiqa, aneenna kai minara iria. <sup>5</sup> Miqi qufanoo Yudasina aundura dapikufanoo munnimma mareenoo amaana maqakina aranaiqi teeqimmaquseenoo sandanau. Sandeufanoo moosaa nari sanda anukaki ataakireenoo doo kuqinai.

<sup>6</sup> Amaana maqasaa rakisimarusa Yudasina munnimma maraseeqa minaramma ufa qimariqau. Maasa maa munnimmana sia amaana maqaki quqaanaura, Mooseena sandufa miqimminoo maridanoo, fidika munnimma marifaqa. <sup>7</sup> Misa minara ufa qiqi andeeqaseeqa mi munnimmana qumareeqee nammari sakasee nee maru qafeena auqimaru fasiqana kaqikaa maqa maaqa minaindi feefauriqau. Amisee nariara mi maqana maraseeqa misa moo maqannaasa maasaki kuqifaqa mi maqanaki nikundaanee qimasee maraqau. <sup>8</sup> Minara miqimasooqooqari mi maqanara fidika maqa fee qimariqau.

<sup>9-10</sup> Miqimaseeqa ooqeenaa tamummaqara fasiqa moo mina auqu Yeereemaia mina ooqeenaa ufa anoona kafia maqee kambiqanau. Mifa maaqi qimasee akara rinoo qinai. Isaraee maqannaasa faiqi akiaqara munnimma maraseeqa qafee auqimaru fasiqana maqa maaqa feefaurumasee mareefara. Moo fasiqa taikasee moo fasiqa asaukuqara taikasee agusee mareefara. Qinee Anutuna ufa irisee maraunaqa misa miqiqau. Yeereemaiafa ooqai akara rumaqoo ufafa miqinoo marufaqa sia irirai misa mi mau kai fidaqa mi maqana maraqau.

*Piratoofa Yisuna iroo ufafa.*

(Mak 15:2-5; Ruk 23:3-5; Yoh 18:33-38)

<sup>11</sup> Misausai maree fiqau. Yisufa Piratoona koota maqaki kikiqinoo marufanoo Piratoofa anireenoo Yisuna irammirino qinai. Anee kuqaa Yuda maqanna karaambaiqa fee maridane. Miqi qufanoo Yisufa anee qiannana qinee miqimmiqa maridaqee qinai. <sup>12</sup> Amaana maqasaa aanaiqikirausa misa uriqararusa faqa Yuda maqanna faiqi firaasa faqa minara iriseeqa Yisunara ufa oosana oosana qidaqa kiapana qimami mariqau. Miqi qimarufanoo sia Yisufa ufa qimarinau, kaqi kasoo inoo marinau. <sup>13</sup> Piratoofa minara mina qafamaseenoo qimaminau. Misa oosana oosana ufa aniara qimariafana anee naqi fee imarifanee sia ufa qidane. <sup>14</sup> Miqi qimarufanoo Yisufa sia uqanna misa ufa itairiseenoo rukianau. Ufa sia qinai kaqi kasoo inoo marufanoo kiapafa qafeenoo aauqoofoano qafanau.

*Piratoofa innee Yisuna aruaqee qu ufafa.*

(Mak 15:6-15; Ruk 23:13-25; Yoh 18:39-19:16)

<sup>15</sup> Mi kamusaqa kiapausa faiqi anaasee Anutuna qangiroo ainnaaqarara qoomaqa neemarufanoo karafusa fasiqa moo idukusoofaqa minara faqa asasiaqeera. Kiapausa

oosana mi oosanna maqee maqee miqimmimariqau. <sup>16</sup> Mikari faiqí moo fannoo karafusaki marinau. Mina auqu Barabasifa. Sia kai fifaufau mina karafusa quqaqau. Faiqí akooqooqaraafa auqufaqaafa marufa karafusinau. <sup>17</sup> Piratoofa minara faqa iriseenoo Yuda maqannaasa miqoo suqíqa marusa naaramasoofaqa suqumaree moodaqqoo aniroofanoo qimanniminoo qinau. Qinee maa kari Barabasinee idukunauree, Yisuna inni karaambaigee idukunauree. <sup>18</sup> Yuda maqannaasa uriqararasa Yisunara sia anoona marunara fifau mina afairíqa nimarusa marunara Piratoofa misa miqí qimaruna iridanoo Yisunara idukuane qinau.

<sup>19</sup> Piratoofa ufa irira maqaki oqumarifi marufanoo narí anaaga fannoo narí maaqak-iqari pasa akara rumaseenoo moo fasiqasaa quqasoofanoo minisoofanoo Piratoofa asaana rumaseenoo qafanau. Nari anaaga fannoo qinoo. Sia Yisuna arua. Asauku raqandaamasee ireeda maria. Qaina daaquqara qaina qini qifunnareenoo. Mi andeeqara fasiqanara qainammaqaunanoo daunduraki mandaiki marifaqa. Sia anee mina aruane qimasee akara rinau.

<sup>20</sup> Amaana maqasaa aanaiqikirausa faqa Yuda maqanna faiqí firaasa faqa Piratoofa Yisuna idukiraree quna iriseeqa quandafufaqa faiqí anaasee fukifaaki qíqa Piratoona qimamiaqera qíqau. Barabasina kai idukuani Yisufa kuquani. <sup>21</sup> Piratoofa kaifaa faiqí anaasee aiqama irammirinoo qinau. Miqandakina yanee qinee idukunauree. Miqí qimasoofaqa misa aiqama qíqau. Barabasina kai idukua.

<sup>22</sup> Piratoofa minara iriseenoo kaifaa qimanniminoo qinau. Qinee Barabasina idukiqa asauku mundirana Yisunara nanee fee qianauree. Qimasoofaqa misa aiqamausa aunirira saqarisaa aruane qíqau. <sup>23</sup> Piratoofa kaifaa misa irammirinoo qinau. Nana mandainanee marinaqee qinee aruanauree qimasoofaqa misa aiqamausa darara qimasee qíqau. Aunirira saqarisaa arua. <sup>24</sup> Misa ufa firaqqoo qidaqa tutuqimarufanoo Piratoofa misa sia qini ufa iriafaqammu qimaseenoo qafee maraseenoo nammari saka uqeera mareenoo misa nifusaa quqaseenoo asauku nammari uqinoo qinau. Maa fasiqana aruannanara doo qisauku nammari uqíqa. Mina fidika sia qini qisakadiki mariani. Doo innikina mariannoo doo.

<sup>25</sup> Miqí qimasoofaqa faiqí anaasee moodaa kari faqa quqasee qimamiqau. Doo mina fidika maasaki faqa maasa faiqí namuki faqa mariannoo. <sup>26</sup> Piratoofa minara iriseenoo Barabasina idukueeqeenoo niminoo Yisuna mareeqeenoo narí sundiauqa nimufaqa misa miqoo nariqa maqusasaa quqasee raitasaa qainna rumbeeqoo samuna ataufakaqa aru ummooqukamaseeqa doo afiqee aunirira saqarisaa ariraree qimasee deedaqíqau.

*Sundiauqa Yisuna amukafaqaa qa fee afisumaqaqau.*

*(Mak 15:16-20; Yoh 19:2-3)*

<sup>27-29</sup> Piratoona sundiauqa miqoo naambeeqai Yisuna ariiseeqa kafia anirandee kiana maaqaki munuseeqa aiqama sundiauqa niqoonausa naaroofoqa moodaqqoo anireeqa maridaqa Yisuna qamunna raipaqusee moo qamunna Roomma maqanna sundia qamunna taatuqee qamunna afisumaqasee saatunanda fooqaana maraseeqa saaeemma qumaree Roomma maqanna rakisirana qafeera foora saaeemma qumaree Yisuna akiaqasaa aranaiqí afisu amaqqoofanoo akiaqa tapooqaanifeera miqíqau. Afisu amaqqaseeqa Roomma karaambaigqa qunaana fooqaana Yisuna asauku uqanna quqamaqqaseeqa noorindari fataafimafufaqa ataasataasa qidaqa qíqau. Oo Yuda maqanna karaambaigqa. Maasa uriqararafa. <sup>30</sup> Miqí qimaseeqa firaqqoo ataasa ataasa qidaqa misa niqara fidamaqqaseeqa mina qunaana asaukuki naana rafa qumaree akiaqakinai ariqau. <sup>31</sup> Ataasataasa qíqí amaqqaseeqa mina taikaseeqa taatuqee qamunna kaifaa raipaquseeqa kafia narí qamunna afisu amaqqaseeqa aunirira saqarisaa arifandinaqqoo afiqee fiqau.

*Yisuna aunirira saqarisaa ariqau.*

*(Mak 15:21-32; Ruk 23:26-43; Yoh 19:17-27)*

<sup>32</sup> Afíqammaree aanai fidaqa sundiauqa Sireenee maqusanaindaraa fasiqa mina auqu Simoona amarana moo Simoona aanai paqurufaqa misa nári oosana mareeqa nári faaqaana uqafiqaseeqa Yisuna aunirira saqari aku amaqqeeqa afeekaikamasee qíqau. Maree maasa faqa ania. Miqí qufanoo misa faaqaanara rufamareenoo Yisuna aunirira saqari akumaree finau. <sup>33</sup> Yisuna afiqee fifiufaqa Koorookata maqa maaqaki ooru fiqau. Koorookata mi ufana oosana faiqí akiaqa amudaani aqana maridanoo.

<sup>34-35</sup> Sundiauqa miqoo oorureeqa misa uainna nammariki sukaqeamaru saqari anoona afaqa iri quqaanifeera uainna nammariki adiaseeqa Yisunara maana marasee naanee qufanoo Yisufa afaurusaa kai quqaseenoo qumboomasee qafeenoo minniseenoo

sia noofaqa misa mina qumarasee aunirira saqarisaa rummamaqasee pirimma aru-atukarasee uqeera rakiqaseeqa mina qamunnanda faasai rapaqa quqaqoona qumaree kaatara foora sararamandeeqa doo náriara náriara mi qamunnausa maraqa. <sup>36</sup> Qamunna mara taikaseeqa misa ooqu marifufaqa rakisimariqau. <sup>37</sup> Misa Yisuna arira ufa raufiqira saqarisaa akara rumaseeqa Yisuna akiaqai aunirira saqarisaa quqaseeqa pirimmannai ariqau. Maaqi qimasee akara riqau. Maa fasiqafa Yuda maqannaa karaambaiga maridanoo fee qinau. <sup>38</sup> Moo qumuarimaru fasiqana Yisuna dinni atinni narí aunirira saqarisaa pirimmannoo aruseeqa uqeera rakiqaqau. Kafaa moo qumuari maruna narí aunirira saqarisaa Yisuna dinni atinai pirimmannoo aruseeqa uqeera rakiqaqau.

<sup>39</sup> Faiqi anaasee mina aaga fiqaree aiqaree imarusa misa Yisuna murufi qafaidaqa ataasataasa idaqa qufoonaridaqa qiqau. Anee fee amaana maqa moodaa faasaana rapeemasee qaaramoo faasaana kafaa usakararee qimariana fee. <sup>40</sup> Anee kuqaa fee Anutuna amaaku maridane. Mina amaaku maridana aneenna kai tatuakinana quminaqa maasa aniara kuqaa Anutuna amaaku fee qianauna. <sup>41</sup> Amaana maqasaa aanaiqikirausa uriqararusa faqa Mooseena sandufa akoofasauqa faqa Yuda maqannaa faiqi firaasa faqa misauqa faqa miqi kai masee ataasataasidaqa qufoonaridaqa qiqau. <sup>42</sup> Maafa faiqi anaasee mareeqee Anutuna asumu mariranaki mara quqannisaanee qimarifa nariara sia amanaikino. Kuqaa fee anee Isaraee maqannaa karaambaigee maridane. Kuqaa miqinana anee karaambaiga maridana maqee maqasaa tatuaki aqufinaqa maasa aniara kuqaa karaambaigee qianauna. <sup>43</sup> Mifa nariara Anutuna amaaku fee qimarifa Anutunasaa afaaqa quqarafa marifano Anutufa minari iridanoo fee sia fee iridanoo fee. Iridanoofau qumureenoo mina dadaaqinoofau asumu mariranaki quqani. <sup>44</sup> Qumuari maru fasiqaqanda dinni dinni narí aunirira saqarisaa maruqanda miqi kai qimaseeqa Yisuna ataasa ataasa qimamaqee mariqau.

*Yisufa kuqu ufa.*

*(Mak 15:33-41; Ruk 23:44-49; Yoh 19:28-30)*

<sup>45</sup> Mi faasaana kai asukuna firaafa aiqama maqa maaqa ititannimaqanau. Suani afu urureenoo uriufanoo mina akiaqa amummaqa qambaana ururoofanoo asukuna arunnimaqanau. Suani muqunni qubeekoofanoo asukuna taikoofanoo suani fannoo kafaa kaaqa qanau. <sup>46</sup> Suani afu muqunni qubeekoofanoo asukuna kaqi marufanoo Yisufa firaaf kari faaqarinoo qinau narí ufakiqari qinau. Eeri eeri rama sabakatani. Mina oosana maaqimminoo maridanoo. Qini Anutu, qini Anutu, naqi fee ifanee anee qiniara minniseenane. <sup>47-48</sup> Miqi qufaqa faiqi anaasee mi saqa marusa Eeriaana aaraidanoommi maqi qimasoofoano moo fannoo paadura au fooqaana atekamareenoo maara maaqanufasiqausa manda uainna nammariki raaraamaseenoo aika maraseenoo gundaqiseenoo minaki rutaquseenoo mara muru Yisuna ooki aakuamaqanau. Qumbifiqamma naanifeera afaurusaa quqasoofanoo qumbifiqamma nanau. <sup>49</sup> Miqi marufaqa akaqausa qiqau. Saa. Eeriaafa qumureenoo dadaaqinoo fee. Kaqi kasooiqa marida qafaqa. <sup>50</sup> Mikari Yisufa firaaf kari faaqa quqaseenoo kuquqaraasinau.

<sup>51</sup> Mifa kuqufanoo aaqee kai Yeerusaree amaana maqakina ititaqoo qamunnafa naaquqara maqasaa ititaqoo qamunnafa mirindari aiqama raqumareenoo muqufi aqinau. Firaafa maqa kasinau, firaaf oniuqa afoofaafinau. <sup>52</sup> Faiqi madika faqa oo raqanau. Oo raqasoofanoo ooqai kuqusa Anutuna ufa irimaru fasiqa anaaseesa maqee kuqiranakiqari findifumafi miqoo mariqau. <sup>53</sup> Yisuna kuqiranakiqari findifufaqa mi kuqirausa akoqoo Yeerusaree maqusai oonuroofaqa faiqi anaasee moomoosa nindafaqa.

<sup>54</sup> Maara maaqanu fasiqausa Yisunasaa rakisidaqa ooqumari fufaqa rakisiusa asukuna qoofaqa maqa kasufaqa qafamasoofoqa nimuqusufaqa kaaqa rufiaqau. Rufieemarufaqa qiqau. Oo kuqaa uqanna maafa Anutuna amaaku uqanna mariifa kuqino. <sup>55</sup> Yisufa aunirira saqarisaa marufaqa Kariree maqa maaqaindaraa anaaseeqa ururee Yisunara dadaaqianne qimasee uru anaaseesa nianai uru kikiqiga marida qafee mariqau. <sup>56</sup> Misakiqari Yisuna anoona amaraqanda mariqau, moo amarafa Makadara maqusa indaraafa faqa moo amarafa qaara kumaaraqara Yooseefaasa Yameesasa ninoofa faqa (Maa Yooseefaafa sia Yisuna akoofau mina amarafa kumaaraa marinau) moo anaasee Seebeedina anaqa faqa mi anaaseesa faqa miqoo ani kikiqiga maridaqa Yisuna kuqirana qafee mariqau.

*Yisuna ooni aamaraki akundoo ufa.*

*(Mak 15:42-47; Ruk 23:50-56; Yoh 19:38-42)*

(Yisuna aukuaana narí maqannaasa maaqimmasee madika indufusaida kuqufusa nikundee mariqau. Misa ooni firaana kasaqa aamara auquseeqa minaki keeqafufaqa



dinni dinni moomoo aamara auqiiseega kuqusa minakiaqa naadu naadu nikundee mariqau. Moodaa kai moo kari akundeeqa mina afunda taikoofanoo kaifaa moo fannoo kuqufaqa miqikai imariqau. Sia moodaa karifau nikundee mariqau. Moo kari moo kari nikundee mariqau.)

<sup>57</sup> Mi eenoonnai Aramatia maqusanaafa Yooseefaana amarana mifa faiqi firaafa ainaina faqaafa. Mifa Yisuna ufa irira faiqi kammafinoo kukeeganoo marufa marinau. <sup>58</sup> Mifa Piratoona oopisai oonureenoo Yisuna iriara oonureenoo Piratoona irammirinau. Amanee Yisuna iri qinee marasee fee akundaanauree qufanoo Piratoofa irinoo nari maara maaganu fasiqausa qimanniminoo qinau. Innee maa fasiqana Yisuna iri mara amifanoo akundaani. <sup>59</sup> Yooseefaana amarafa iriseenoo oorureenoo Yisuna iri auniranasaa aruqoona tatuseenoo fuka qamunnasaa kukuqinau. <sup>60</sup> Kukuqamaseenoo Yuda maqannaasa oosana mareenoo nari ooni aamarakina quqanau. Yooseefaana nariara kuquana misa qini iri minaki akundamaqisaaqeeera ooni aamara auquqoonaki Yisuna iri minaki quqanau. Quqaseenoo firaafaa ooni quanda quandammeeqee aamarasaa ititaqau. <sup>61</sup> Miqi marufaqa aanaaseeqara oonaamara adeedi ooqu marida qafee mariqau. Miqanda nuqu moodaa nuqufaqaqanda Mariana amaraqanda kai maruqanda mariqau. Miqanda madikee marufaqa ooqumarida qafeeufaqa eendufaqa maqusai fiqau.

*Firisuaiquauqa Yisuna madikasaa rakisiu ufafa.*

<sup>62</sup> Yuda maqannaasa narana ainaina deedaqamaqoo faasaana taikoofaqa mi eenoonnai amaana maqasaa aanaiqikirausa uriqararausa faqa Farisai amaana ufa irimarusa faqa suqufufaqa rumbarausa Piratoo finnai nari oopisai oorureeqa irammiriga qiqau. <sup>63</sup> Oo amiqirafa mi unna fasiqafa kaqi maridanoo qaaramoo faasaana mariqa findifuaqee qinoo. <sup>64</sup> Amanee aneenna maara fasiqausa niqiqainaqa ooni aamarasaa qaaramoo faasaana rakisiaqa. Mina faiqi namu ani qummuarammeeqee quqaseeqa unna qifoora. Doo findimmeeqee Anutufinnai fiifoo qimasee faiqi anaasee unna qimasee qimannimi foora. Indaaruu unnaqimarifa mariqafa minara Yisuna faiqi namu kaffaa unnufa qifanoo mi ufafa firaafaikiandoora. Minara ani qimamidaqa misa rakisiaqeeera.

<sup>65</sup> Piratoofa minara iriseenoo quandaqinoo aanoomasee qimanniminau. Innee qini Roomma maqannaasa rakisimaria maara fasiqausa maraaqa. Misa kai amiqimmasee rakisiaqa. <sup>66</sup> Miqi qufaqa amaana maqasaa aanaiqikirausa ooni aamara maruqoo oonureeqa qima ainaina qumaree ooni kooqisaa faqa kooqi afainni faqa atukaraseeqa ititaqau. Moo fannoo mi ooni kooqina mara aquqaiifaqa qafaanee qiqaa mi qimana quqaqau. Miqimaseeqa maara fasiqausa miqoo quqasee amaana maqasaa aanaiqikirausa doo nimaqa fiqau.

## 28

*Yisufa kuqiranakiqari findifu ufafa.*

*(Mak 16:1-10; Ruk 24:1-12; Yoh 20:1-10)*

<sup>1</sup> Nariqa amaana faasaana saririqa taikoofanoo iqaqoo kananaana amaanasaa eendai qaara anaaseeqanda moodaa nuqu faqaqanda Mariana amaraqanda miqanda sia Yisuna aanoqanda moo fannoo Makadana maqusaindaraafa moo fannoo moo maqusaindaraafa miqanda Yisuna akundoo ooni aamara qafaanee qimasee fiqau. <sup>2</sup> Oonuree qafoofanoo miqoo kai maqa firaafa kasufanoo innaarunaindari Anutuna qangiroo moo fannoo qumureenoo ooni kooqi ititaqoona quanda quandammeeqeenoo kaqini quqaseenoo nari minasaa ooqu marifi marinau. <sup>3</sup> Mina oori afri aakuusaa idauru miqirafa marinau. Mina qamunna kaaqa eekara kaaqa qarafa marinau. <sup>4</sup> Maara fasiqausa rakisiusa Anutuna qangiroo qafeeqa kaaqa rufiseeqa aiqama naindiri rooafaqa noorindari maqasaa kuqira foora mambiqau.

<sup>5</sup> Maqasaa noorindari faiqaqeeufanoo qangiroo fannoo anaasee oonuroosa maaqi qimasee qimanniminoo qinau. Innee sia rufia rufiaqiaqa. Innee Yisuna aunirira saqarisaa pirimmannoo aruqaanara randaqanda qinee iridaqa. <sup>6</sup> Kaqi maridanoo inni qimannimi undemmoo maridanoo. Sia maaqoo maridanoo. Doo kuqiranakiqari findifinoo doo finoo. Innee mai anireeqa mifa mariiqoo qafaafa. Sia maridanoo. <sup>7</sup> Innee qafamaseeqa sandee oonu mina faiqinamu maaqi qimaseeqa qimannimiaqa. Yisufa kuqiranakiqari findifinoo doo Kariree maqa maaqai inni noorinni fidanoo innee miqoo qafeefaranoo miqoo mariannoo. Doo mi ufana kai inni qimannimiqa doo fuaqa. <sup>8</sup> Anaaseeqanda qangiroo qafeeqa mina ufa iriseeqa kaaqa naaquqanau. Yisunara kuqiranakiqari findifu ufana irufanoo naundurui asasinoo naaquqooafaqa mi anaaseeqanda mina faiqi namu ufa qimannimianee qimasee fidaqa.

<sup>9</sup> Yisufa aanai mi anaaseeqanda tautummannimaqasee kikiqinoo marida nimandanau. Miqi qimasee qimannimisoofaqa misa naaquqooafaqa mina aiku qumaree noorindari

maqasaa faifufaqa qimudago qidaqa amooqira ufa qimamiqau. <sup>10</sup> Miqi marufanoo Yisufa maaqi qimasee qimannimianau. Innee sia rufiaaqa. Sandee oonu qini faiqi namu qimannimifaqa Kariree maqasai ooru fiqa miqoo qiqafeefaranoo.

*Yisuna madikasaa rakisiusa findifunara qumeeraqau.*

<sup>11</sup> Mi anaaseesa Yisuna ufa iriseeqa fiqau. Misa fimarufaqa maara fasiqausa ooni aamaraki rakisimarusa misa faqa rufiseeqa kuqara foora iqa mariusa findimeeqee Yeerusaree maqasai oorureeqa amaana maqasaa aanaiqikirausa aiqama ufa qimannimiqau. Qangiroora ooni kooqi ititarana rafaqaunara qimannimiqau.

<sup>12</sup> Amaana maqasaa aanaiqikirausa misa Yuda maqannaa faiqi firaasa faqa suquf-ufaqa minara ufa qimasee iriqau. Ufa qiqa andeeqaseeqa misa mi maara fasiqausa naaramaseeqa munnimma firaatia uqanna nimiseeqa maaqi qimasee qimannimiqau. <sup>13</sup> Faiqi anaasee inniara Yisunara irifaqa innee maaqi qimasee qimannimiaqa. Maasa eendakina kaaqa faiqaqeeunaqa Yisuna faiqi namu anireeqa ooni kooqi atuaseeqa Yisuna iri qaindusu mareeqa doo kukeeqamaseeqa. Miqi mandaafaqa iqaqalfafa amaaqa kai qafeeqa. <sup>14</sup> Miqi qimasee qimannimiaqa. Kipafa firaafa Piratoofa mifa irisainaqa maasa oonureeqa andeeqaanaura sia mifa inni naruannoo. <sup>15</sup> Mi maara fasiqausa misa eedoo qimaseeqa munnimma mara maree miqi qimasee faiqi anaasee qimannimi maree fiqau. Yuda maqannaa faiqi anaasee mi ufana kai Yisunara qimariqau.

*Yisufa nari faiqi namu nifusaa kooroo inau.*

*(Mak 16:14-18; Ruk 24:36-49; Yoh 20:19-23; NiFa 1:6-8)*

<sup>16</sup> Yisuna faiqi namu qisaukuqara taikasee qikunni ooqu moodaa marasee Kariree maqa maaqai fiqau. Yisufa kaqi maridanoo mi aqaannara qimannimiqoonara mi aqaannasaa ooru fiqau. <sup>17</sup> Miqoo oorureeqa Yisuna qafeeqa reendeenamasee amooqira ufa qimamiqau. Moodaa moodaa qaara irirana iri mariqau. Miffee, yafee, afaanna fee. <sup>18</sup> Mina faiqi namu miqoo ooru miqiqa marufanoo Yisufa adeedi anireenoo maaqi qimasee qimannimianau. Innaaruna faqa maqa faqa fira uriqararana Anutufa qini qiminoo. Moo fannoo sia qini uriqarafa mariannoo. Doo qinee kai. <sup>19</sup> Innee minara irisee maqusa maqusa aiqama daraani mafifa qimannimifaqa misa faqa qini qiku qisauku kammafi mariaqeera. Misa qini qiku qisauku kammafi marifaqa innee misa nammari auqamannimaqaqa. Nammari auqamannimaqaseeqa maaqi qimasee qiqaqa. Akoona faqa amaaku faqa Anutuna naaquqara andeeqara maraquna faqa misa nuqusaa nammari auqamannimaqaidaga. Innee Yisuna aiku asauku kammafuanara minara mapuku nimaqaanifeera nammari auqamannimaqaidaga. Doo miqi qiqaqa. <sup>20</sup> Aiqaqa ufa qimannimifannana misa faqa mi ufana aiqamausa uqanna qimannimifaqa iriseeqa mi ufana qumaraaqeera, mi ufanamau kai fuaqa. Innee maqusa maqusa fifaqa qinee faqa qumee inni faqa fuanaura. Innee miqi marifaqa qinee qumee kai inni faqa nuanaura. Sia inni mininnisaanaura kasoo innaaruna faqa maqa faqa taikara aukuaana inniqa saimbaqa moodaanaki kianaura.

## **MAREEKOOFA**

### **Yisuna amiqira fasaasa ufa Mareekoofa akara rinau.**

*Yoohaneefa nammari nimirufa Yisuna aana afisufa.*  
(*Mat 3:1-2; Ruk 3:1-18; Yoh 1:19-28*)

<sup>1</sup> Maa akarafa asauku mundirana Yisunara Anutuna amaakuara amiqira fasaasa ufa qidanoo. <sup>2</sup> Anutuna ooqeenaa tamummaqara fasiqa auqu Eesaiaafa Yoohaneefa nammari nimarunara maaqi qimaseenoo akara rinau. Iriaqa qinee qini ufa maree marinnana qini Anutusa qisauku mundirana ani oorinni aqigaananoo fidanoo ani aana afisuannoo. <sup>3</sup> Aadana maqa maaqakiqari moo fannoo maaqi qimasee fi fi qinoo faaqaridanoo faiqi anaasee qimamidanoo. Innee karaambaiqa fuaninna aanna afisuaqa, andeeqara qoo kai karaambaiqa nuani.

<sup>4</sup> Mi tamummaqara fasiqana ufamau kai maaqimasee oosana araqu. Yoohaneefa nammari nimi marufa aadana maqa maaqakiqari findifinoo faiqi anaasee nammari rumannimaqaidanoo maa ufana qimanniminau. Inneeqa mandainainakiqari quandaki nammari marasaifanoo Anutufa inni mandainaina akiaqara mininniseenoo sia naruanoo. <sup>5</sup> Yudeea maqa maaqaki marusa faqa Yeerusaree maqusaki marusa faqa mi saqa marusa moomoosa Yoohaneefa marunnai Yooradanna nammari afainni marunni oqu reeqa nari mandainainara kooroomasoofanoo Yoohaneefa Yooradana nammari mara quqasee keeqamannimaqasee uqerasoofaqa findifiqa miqooqari fifainiqau.

<sup>6</sup> Yoohaneefa sia amiqira qamunna afisinau tamummaqara fasiqa naanna ramasee aadaika aadaikirafa, kameera asausinnai auqira qamunna afisusee aandau apatannai auqira pikapa qamunna rafaafufuseenoo marinau. (Kameera qoosa fooqaa ira aandau maridanoo.) Yoohaneena narana naafaa oofaafana nariqa minara pandaafa oofaafanee qimaruna faqa ookasaasa anoona faqa kai nee marinau. <sup>7</sup> Yoohaneefa maaqi qimasee faiqi anaasee qimanniminoo qinau. Qini qinaaqiannai kambigaaninna qini firaqqoo uriqararafa mariannoo. Qinee Yoohaneesa kasooqaqee kambigaaninna fasiqana mina kaaqa ureeqarasa maridaqa. Naqimasee fee qinee mina dadaaqianauree ureeqara ainainira fasiqauqakiqari ureeqararasa maridaqa sia amana mina dadaaqianauree. <sup>8</sup> Qinee nammariinnai kai rumannima qaidaqa mifa naaquqara maraqunannai inni ruma nimaqaannoo.

*Yisufa nammari maroofa. Sadanafa Yisuna amanufa.*  
(*Mat 3:13-4:11; Ruk 3:21-22; 4:1-13*)

<sup>9</sup> Yoohaneefa miqimmasee kaqikaqqoo marikufanoo Yisufa Kariree maqa maaqakiqari Nasareete maqusaindari Yoohaneefa maruqoo ooquroofanoo Yooradana nammari Yisuna nammariki tupamamaqanau. <sup>10</sup> Yisufa nammariqari findifinoo qafoofanoo innaaruna rakeemafufanoo Anutuna maraquna fannoo nakipurunara foora Yisunasaa qumu quqanau. <sup>11</sup> Quqamafufanoo innaarunaindaraa ufa moo maaqi qimasee Yisunara qinau. Anee qiqaindi uqanna qimuqusira qimaaku marianafa qinee aniara amiqimasee qiqaa raaidanoo. <sup>12</sup> Doo miqooqari uqanna Anutuna maraquna fannoo Yisuna aqigeenoo aadana maqa maaqaki kaasau maqa maaqaki sia faiqi marunnai nianai fuannee qufanoo finau. <sup>13</sup> Mifa miqoo oonu maridanoo qaara fasiqa niku nisauku faasaana marisoofanoo Sadanafa anireenoo manda oosana maraanifee qimaseenoo amanamasee qafoosianoo. Kaasau aandaqqa miqoo marufanoo Yisufa marikufanoo aararoofanoo kudoosaapoofaqa qangirooqqa qumureeqa dadaaqiqau.

*Yisufa aaqee eera siamma faiqi namu niftanau.*  
(*Mat 4:12-22; Ruk 4:14-15; 5:1-11*)

<sup>14</sup> Yuda maqannaasa karaambaiqa Eeroodeefa Yoohaneena nammari nimiruna karafusaki rumbasoofanoo miqooqari Yisufa Kariree maqa maaqaki oonuree faiqi anaasee Anutuna amiqira fasaasa ufa qimannimida maaqi qimasee qimannimi marinau. <sup>15</sup> Andeeqara kamu doo ani maridanoo Anutuna rakisira ququsa doo adeedi ranoo maridanoo. Innee inneeqa mandainainakiqari quandakinaga amiqira fasaasa ufa irisee inni irirana minasaa rusiaqa.

<sup>16</sup> Moo kari Yisufa nammari farumma firaana Kariree maqa maaqaki maru nammariina afaimau fidanoo noodaanna mi nammariinaki maree maru fasiqaqanda nari qisafasaasa nindafanau. Miqanda nari oosana maridaqa fira pateuqa nammariki aqusa nodaannauqa rumafi marufaqa maree mariqau. Moo fasiqa auqu Simoonafa marinau, mina akaqa mina faqa maruna auqu Andurufa marinau.

<sup>17-18</sup> Yisufa miqanda nindafamasee qimanniminoo qinau, inneeqara qini faqa ani-raifaqa faiqi anaasee noodaannara foora mareeqee Anutuna ququsaki quqeeffaranoo fee qufaqa miqanda nari pateeuqa miqoo quqasee Yisuna faqa fiqau. <sup>19</sup> Yisufa miqooqari kaqikaqoo nammari afaiqara fidanoo qaraqanda qisafasaasa paqurinau, miqanda Seebeedina amaakuqara mariqau. Miqanda nuqu Yameesana faqa nari akaqa Yoohaneesandiri mariqau. Sia nammari nimimaru Yoohaneefa marinau, mina amarafa marinau. Miqanda nari kanuqaki oogu maridaqa fafaa eendaki nari pateeuqa nammariki aqusee noodaanna maraane qidaqa deedaqi mariqau. <sup>20</sup> Yisufa miqanda niqafamasee naaroofoqa nari nikoonna Seebeedina faqa nari ainainimarusa faqa quqanniseeqara Yisuna fi afaqee fiqau.

*Yisufa faiqi aundurai afaanna afaqanau.*  
(Ruk 4:31-37)

<sup>21</sup> Minamusa Yisuna faqa fi fiufaqa Kapeeranaumma maqusai oonu raqau. Yuda maqannaasa amaana saririqa sabatee qimarunasaa Yisufa nariqa amaana maqaki keeqafinoo faiqi anaasee amaana ufara naakapanau. <sup>22</sup> Mina ufa irimarusa firaqoo naaquqanau. Sia Mooseena sandufa akoofasauqara foora qimanniminau, nari Anutufara foora qimannisoofanoo naaquqanau.

<sup>23-24</sup> Yisufa qimannimi marufanoo faiqi moo aundurai faafasaaqa marufa amaana maqaki keeqafi faaqa quqasee Yisuna qimaminau, Yisu anee Nasareetee maqusanaafa anee nanaree maasa soodaaqidane, anee maasa daru taikararee anidane, qinee aniara iridaqa anee Anutuna naaquqara ufa maree marianafa mariananoo. <sup>25-26</sup> Yisufa mina aundurakinaa afaanna amambaina qimasee qimaminau anee ufaseenana mi fasiqanakiqari rafudamaki fua, qufanoo mi faafasaaqafa mi fasiqana qumaree udamudami firaqoo masee firaa kari aqnaakinakiqari faaqa quqaseenoo rafudamaki sandanau. <sup>27</sup> Faiqi anaasee mina qafamasoofanoo naaquqoofoqa nari qimami nari qimamiqa qiqau. Maa fasiqafa Yisufa nanee maridanoo, nana fuka naakaparufa qinoo fee. Maa fasiqafa nari Anutufara foora nari afeeka ufanni kaasau afaannauqa qimannimifaqa eedoo kai qimasee rafudamaki fiqa. <sup>28</sup> Miqunara Kariree maqa maqaki Yisuna aufakiana fannoo kaqi kaqi ufanoo aiqamai daraaninau.

*Yisufa oosana oosana aurirana taikannisanau.*  
(Mat 8:14-17; Ruk 4:38-41)

<sup>29</sup> Misa mi amaana maqanakiqari rafudamakufaqa Simoonasa Andurusa maaqaki fiqau. Yameesa Yoohaneesa misa faqa fiqau. Yoohaneefa nammari nimimaruna amarafa Yisuna aiku asaukukirafa marufa misa faqa finau. <sup>30</sup> Simoonna airaamaku anaasee aidafi marufanoo afaqa ididi marufanoo faiqaqee marinau. Yisufa maaqaki keeqafufaqa mi anaaseenara Yisuna qimamiqau. <sup>31</sup> Yisufa iriseenoo mifa marunnai oonureenoo asaku qumareenoo uqeroofanoo mina afaqa ididiufa taikoofanoo aqee findifinoo narana ainaina niminau.

<sup>32</sup> Eeneemarufanoo suani keeqoofanoo miqoo marusa nari faiqi anaasee auri marusa faqa fueena faafasaaqa marusa faqa aiqama nifiqee <sup>33</sup> Yisufinnai minisoofanoo aiqama mi maqusanaki marusa mi maqannaasa ani mara uqusee miqoo suqi mariqau. <sup>34</sup> Yisufa moomoo aurirana oosana oosana aurirana andeeqanniseenoo faafasaaqa marusa moomoosa miqimma quqannimifaqa rafudamaki sandaqa. Misakina faafasaaqauqa Yisufa Anutuna amaaku marunara irisee kooroo iandoo qimasoofanoo Yisufa misa ufara qao qufaqa sia ufa qirai kaqi rafudamakidaqa sandaqa.

*Yisufa Kariree maqa maaqaki nimarinau.*  
(Ruk 4:42-44)

<sup>35</sup> Mi eendanaki faiqee kananaana uqanna eendai Yisufa findifinoo maaqakiqari raudamakinoo maqusai oqureenoo ooqiqaqee faiqi sia maru maqa maaqanai oonu maridanoo Anutunara innaaru qimarinau. <sup>36-38</sup> Simoonafa faqa mina agoondiuqa faqa randaqa nida Yisuna paqurimasee qimamiqa qiqau, aiqamausa aniara randaqaaqee qufanoo Yisufa qinau, maasa maa maqa maaqanaki maqusa maqusa moo maqusai fuanauranoo. Anutufa misauqaki faqa qimannimianee qimasee diqiqaisa maridaqa. <sup>39</sup> Miqi qimaseenoo Yisufa Kariree maqa maaqaki onuree aniree idanoo nari amaana maaqakiaqa keeqafida qimannimidanoo naundurari faafasaaqa marusa niqiqee marufaqa rafudamakida fimariqau.

*Yisufa karoora arimaru fasiqana ruukaisanau.*  
(Mat 8:1-4; Ruk 5:12-16)

<sup>40</sup> Manda namuana karoora ari maru fasiqafa moo fannoo Yisuna oorini aqoori saunara fufanoo firaqoo innaaru qinoo qinau. Oo karaambaiqa anee aidinana

qini karoora darimarina rukaqisaina taikaani. (Mi aukuanna misa mi auriranara firaqoo rufiasee mina narimarusana naadumasaa nianasaa quqee mariqau.)<sup>41-42</sup> Yisufa mi fasiqana qafoofanoo amuqusa mandaikufanoo asauku uqeerasee mina afaaqasaa munduseenoo qinau, eeoo qini dididanoo doo rukafua qufanoo doo miqoo uqanna aaqee miqi qumufanoo karoora ruka taikanau.

<sup>43-44</sup> Ruka taikafufanoo Yisufa amambaina qimasee qimaminau, aniki kai taikafuani, sia moo fasiqa qimamia. Anee andeeqasee amaana maaqaki mari aanaiqikirana uqafiqasainanoo ani afaaqa karoora arimarina aiqumumaseenoo aniara anukanoo mariaanoo qiannoo. Miqi qinana anee karoora nári marisa taikaraua aanda uqafufirana Mooseena sandufamau fidana Anutuna tatufirana suqa amia. Suqamisainaa aiqamausa ani karoora rukarana qafamasee sia aniara eerairiaqeeru. Miqi qimasee Yisufa mi fasiqana aiqofoofanoo finau.<sup>45</sup> Mi fasiqafa karoora taikafufa sia Yisuna ufa irisee umee ranau miqooqari fidanoo aiqamai qimanniminoo finau. Firaqoo qimannimi marufaqa moomoosa umbiqoofanoo Yisufa aadumai marufaqa faiqi anaasee moomoosa mifunnai fimariqau.

## 2

*Yisufa aiku asauku pipisaaqa usirana andeeqaisanau.*

*(Mat 9:1-8; Ruk 5:17-26)*

<sup>1-2</sup> Qaaraqanda fee qaaramoo faasaanee aiqaroofanoo Yisufa nári maqusai Kapeer-  
anaumma maqusai anireenoo nári maaqaki keeqafufaqa faiqi anaasee minara  
iriseeqa mi maqanaki moomoo keeqee qumbiqafufanoo kooqiki faqa naambeeqai  
faqa qumbiqafufanoo Yisufa maaqaki maridanoo Anutuna ufa qimannimi marinau.  
<sup>3</sup> Qimannimaruufaqa faiqi qaara faqa qaara faqa moo fasiqa aiku asauku kuqirana  
qaindusumaree mina ainaina faqa aniree Yisuna uqafiqaneerufafa faiqi ititafufaqa  
keeqarara anuqusia misa maaqamau akaramafiqa.<sup>4</sup> Yisuna akiaga amummaqa nári  
eefeeda maaqa asaana rapeemandeeqa mi fasiqana nári qainda namufaqa minaki  
upeekasee quiqa quiqa ufanoo meemai Yisuna aaqa quqaqau.

<sup>5</sup> Misa irirafa firaqoo Yisunasaa atooqoonara Yisufa qafamasee aiku asauku kuqirana  
qimaminoo qinau. Qini qimaaku ani mandainaina akiaga minnaisaidaqa.<sup>6</sup> Mooseena  
sandufa akoofasauqa miqoo oqumarifi irufanoo nikoqoofaqa nári naunduraki oonu  
mafi iriqa qiqau.<sup>7</sup> Maa fasiqafa naqifeemasee unna qimasee paasoosidanoo Anutuna  
amaaqa maqaidanoo fee mi ufana qidanoo fee. Sia faiqi moo fannoo amana faiqi  
mandainaina taikannisaannoo Anutufa kai amana miqiannoo.<sup>8</sup> Miqi qimasoofoanoo  
Yisufa aaqee uqanna misa naundurakinaana iriseenoo quandaki qimanniminoo. Innee  
naqi fee qifagee inneeqa naaqookinaana mi mandufana qidee.<sup>9-10</sup> Qinee maa fasiqanara  
mandainaina numoo minnaisaidee qunnana innee qiniara sia amanaikianoo fee qidee,  
qinee faiqi nimaaku maa maqanasaa maridaqa faiqi mandainaina taikarana qini  
afeeka marinara kooroomma nimaqaanaura maa firaa afeeka ainainannai kooroomma  
nimaqaanaura qinee maa fasiqanara aneenna qaindasaagari findifinana mi qaindanara  
maree amaaqa fua qianaqa qinee mandainaina taikannisaana afeeka qafeefara. Miqi  
qimannimiseenoo quandaki mi aiku asauku kuqirana qimaminoo qinau.<sup>11</sup> Ani qimami-  
daqa anee findifinana aneenna qainda mara maree amaaqa doo fua.

<sup>12</sup> Miqi qimasoofoanoo aiqamausa nifusaaqari mi fasiqafa findifinoo nári qainda mara  
qumareenoo doo amaaqa kaqi kaqi finau. Misa qafamasoofoanoo firaqoo naaqoqoofaqa  
Anutuna amooqidaqa qiqau. Maasa sia uqanna maaqira ainaina qafaunaua maridaqa.

*Yisufa Reefina afiqanau.*

*(Mat 9:9-13; Ruk 5:27-32)*

<sup>13</sup> Yisufa kafia anirandee Kariree firaa farumma maruqoo fufaqa faiqi anaasee  
moomoo mina afaqee oonuroofanoo Anutuna ufa qimannimimarinau.<sup>14</sup> Mifa mi  
saqa oonuree aniree idanoo faiqi moo nári maqannaasa takisa munnimma maree-  
qeenoo Roomma maqanna nimimaruna paqurinau. Mi fasiqana auqu Reefifa mina  
akoofa Arafaiusafa marinau. Reefifa nári oopisaki oqumarifi marufanoo Yisufa mina  
qafamasee aniree qimaminoo qinau. Anee qini faqa fua qufanoo, Reefifa iriseenoo aaqee  
findifinoo Yisuna faqa finau.

<sup>15</sup> Yisufa marikinoo moo kari Reefina maaqaki keeqafi narana nee marufanoo manda  
oosana maree marusa faqa takisa munnimma maree marusa faqa Yisuna faqa nimarusa  
misakiqari akaqausa Yisufa nári faiqinamu faqa Reefina maaqaki ooqu marifi narana  
nee mariqau.<sup>16</sup> Mooseena sandufa akoofasauqa Farisai amaana ufa qimarusa anirama  
qafamaseeqa Yisufa manda oosana maree mariasa faqa takisa munnimma maree  
mariasa faqa naidanoo fee qimasee Yisuna faiqi namu umee irammiriqa qiqau. Naqaa

fee qifanoo fee takisa munnimma maree mariasa faqa manda oosana maree mariasa faqa narana naidanoo fee asaurirana sia fee marifanoo. <sup>17</sup> Miqi qufanoo Yisufa misa ufa irisee qimanniminau. Faiqi anaasee amiqimasee mariafaqa sia tutaqausiannai fidaqa, aurimariasa kai tutaqa finnai fidaqa. Sia qinee andeeqaransa naararara qumuafanusa maridaqa, faiqi anaasee innee manda oosana maree mariasee qimasee nifaqee mariasa misara Anutufinnai ubeekaaqera naaraaqeera qinee qumuafanusa maridaqa.

*Narana auramasee innaaru qufa.*

*(Mat 9:14-17; Ruk 5:33-39)*

<sup>18</sup> Moo kari Yoohaneefa nammari nimimaruna aiku asauku faqa Farisai amaana ufa qimarusa niku nisauku faqa Anutufa maasa ufa irianifee qimasee narana marufafa mina minniseega naararee marufafa innaaru saika kai qimariqau. Akaqausa Yisufunna oonuree irammiriqu, naqi fee qifaqee ani aiku asauku sia misa naanna raida Yoohaneena aiku asauku faqa Farisai amaana ufa qimariasa niku nisauku faqa narana sia narai naararee marifaqa innaaru qidaqa, ani aiku asauku nanaree sia miqidee qufanoo <sup>19</sup> Yisufa qimannimino qinau, nimundara qoomaqa sakasee naidaqa suqimariasa naararee maridee miqidee. Oo sia uqanna miqifara. Amundara fasiqa miqoo maridaqa اساسira faasaana marifaqa narana naida maridaqa. <sup>20</sup> Kasooqaqee moo aukuaana misa amundara fasiqa qini misakinaana rumbamaree munu darusaifaqa mikari qini qiku qisauku narana minniseega naarara maridaqa innaaruqifaranoo.

<sup>21</sup> (Yisufa Farisai amaana ufa qimarusa faqa Yoohaneena nammari mareemarusu faqa misara ooqeenaa Mooseena sandufa nari niku nisauku qimannimi marunakinara kikiqusussee qamunnara faqa uainna nammariara faqa mina kikiqammusinau. Kafaa nari qumu fuka ufana nari faqa nimarusa qimannimunara fuka uainna faqa fuka qamunna faqa kikiqusino maaqi qimasee qimanniminau.)

Sia faiqi moo fannoo fuka qamunna ati ateekearana marasee nauraa qamunnasaa itaane qimasee akunuannoo. Miqinanoo fuka qamunna ati fannoo ooqeenaa qamunna afauqagarafa rakeeinoo firaqoo anaqianoo. <sup>22</sup> Yafee faiqi moo fannoo nauraa tunda taqu maraseenoo fee fuka nammari adiaannoo fee. Sia miqianoo. Ruqia finanoo aiqama nammari qumiqaraandoora. Fuka taqu andasee fuka nammari minaki adiasainanoo mina amana mariannoo.

(Yisufa maqasaa maru aukuaana misa uainna nammari tatisee aandau apatannai auqira taquki adiaasee kisaaqasaa maaqaki quqasoofanoo marinau. Marikinoo amiqinoo marufafa mina mara maree maqee maqee neemariqau. Uainna nammari misa maqee maqee nee maru nammariara marinau. Mifa aandau apatannai auqira taquara qufaqa, maasa qeeqa ufakiqari taqu uqannee qidaqa.)

*Sabatasaa sakuma ruqoosa noofa.*

*(Mat 12:1-8; Ruk 6:1-5)*

<sup>23-24</sup> Yisufa moo faasaana Saririqasaa Yuda maqannaasa amaana faasaana nari faiqi namufafa maqusamau nidanoo sakuma ummaqoo ququsanaki fidanoo mina faiqi namu fi sakuma rasau fu maree naqafufanoo Farisai amaana ufa qimarusa nindafamasee Yisuna qimamiqau. Ani faiqi namu Mooseena sandufa, Saririqa sandufa rukiidaqa sakuma ruqoosaidaqa ainainidaqa.

<sup>25-26</sup> Yisufa mina iriseenoo quandafi maaqi qimasee qimanniminau. Innee Dafidina oosana sia fee innee asaana ridee. Ooqai Saurooofa mina arirarufanoo sandeenoo aararee marufanoo Anutuna amaana maqaki Nooba maqasai marunaki keeqafinoo Anutuna amimaru feemuna marasee namasee akaqana marasee nari faiqi namufafa nimufafa naqau. Mooseena sandufa rukiasee nanau, aanaiqikirausa kai nee maria feemuna marufanoo sandufa rukiasee kaqigeefa nanau. Mi aukuaana Abiatarafa aanaiqikirausa uriqararafa marinau. Innee moomoo kari mina asaana rimariafa mina oosana innee sia fee minara iridee. <sup>27</sup> Anutufa narinaidari faiqi dadaqi mari ainainee qimasee Saririqa amaana faasaana auqeeqeenoo faiqi niminau. Sia kaqinaidari Saririqa amaana faasaanara irisee faiqi auqeeqeenoo amaana faasaana aminau. <sup>28</sup> Minara qinee faiqi nimaaku amaana faasaana faqa mina sandufausa faqa uriqararausa marunasa maridaqa qinee misara naaqee qunaga miqi marifanoo sia numoo mariannoo.

### 3

*Yisufa asauku sufirana andeeqoofa.*

*(Mat 12:9-14; Ruk 6:6-11)*

<sup>1</sup> Yisufa moo faasaana kafa mi amaana maqanaki keeqafi qafuofanoo faiqi moo asauku sufirafa faiqi anaasee moomoo namufafa keeqafi marinau. <sup>2</sup> Akaqa fasiqa

anaasee Yisunara ufa qianee qimasee amarusidaqa asauku sufirana faqa Yisuna faqa amiqimasee ninda fee mariqau. Yisufa Saririqasaa fee faiqi asauku sufirana andeeqaannoo fee Mooseena sandufa rukiaannoo fee qidaqa qafee mariqau. <sup>3-4</sup> Yisufa amaana maqaki faiqi anaasee amaana ufa qimannimidanoo asauku sufirana aaramasee qinau anee mai aniree aiqamausa nifusaa kikiqia qimaseenoo quandaki faiqi anaasee irammirinoo qinau. Mooseena sandufa Saririqa faasaana sandufa fannoo maasara naqi fee qidanoo maasa minasaa faiqi anaasee dadaaqafee ianauree kuridianauree maasa faiqi marirana asumufee marannimianauree kuridi taikannimaqaanauree miqi qufafaq misa sia ufa qiqau kaqi kasoomafiqau.

<sup>5</sup> Yisufa mina qafamasee raiqara oori maraseenoo faiqi anaasee aiqama munu ninda fee mini ninda fee maseenoo misa aaqarana afeeka irirana nindafa masoofanoo misara amuqusinau. Amuqusufanoo mi asauku sufira fasiqana qimaminoo qinau aneenna asauku ratutaa qufanoo asauku ratutasoofanoo mina asauku amiqinau. <sup>6</sup> Farisai amaana ufa qimarusa minaki marusa qafamaseeqa amaana maqakiqari rauda makufafaqa Eeroodeena ufa irimarusa faqa suqufufafaq Yisuna arira ufa qimariqau.

*Yisufa kanuqakiqari aiqama maqannaasa ufa qimanniminau.*

<sup>7-8</sup> Miqooqari Yisufa Kariree farumma firaa farumma tia marunnaai ooqfufafaq faiqi anaasee moomoosa afaqa maree ooqu fiqau. Akaqausa Kariree maqa maaqakiqari aniqau, akaqausa Yudeea maqa maaqakiqari aniqau akaqausa Yeerusaree maqusakiqari aniqau akaqausa Idumeea maqa maaqakiqari aniqau akaqausa Yooradana nammari dinni afainni marusa aniqau, akaqausa Tiree maqusakiqari faqa Sidoonna maqusakiqari faqa misaqa marusa faqa aniqau. Doo mi fasiqa anaaseesa moomoosufanna tatufufafaq Yisufa imaru ainainausara iriseeqa qafararee qimasee ani suqiqau. Faiqi anaasee moomoosa Yisuna auqaidaqa radamuqaammimariqau.

<sup>9-10</sup> Yisufa misakinaana moomoo aurimarusa andeeqannisee marunara faiqi anaasee aiqama oosana oosana aurirana maraqanusa nisaukukoo Yisuna auqaananoo maasa aurirana taikaanifee qimasaida Yisuna auqaidaqa radamuqaqa imariqau. Yisufa minara iriseenoo nari faiqinamu qimanniminau innee kanuqa rarisama daqa nammariqi quqaqaq misa qini radamifaqa kanuaki akaraanagaq sia radamuqaq qufafaq misa miqim-miqau. <sup>11-12</sup> Faiqi anaasee faafasaqaq naunduraki marusa Yisuna qafamasoofafaq naunduraki maru faafasaaqausa faasai misa Yisuna qafamaseeqa faaqa quqasee koorooiq qiqau. Anee Anutuna amaaku mariana fee qufanoo Yisufa nimambaina qimasee qaoo qinoo qinau sia innee afaannauqaq qiniara kooroo laqa.

*Yisufa qikuni ooqu qaara marasee fasiqa nari faiqi namukiaqeera maranau.*

*(Mat 10:1-4; Ruk 6:12-16)*

<sup>13-14</sup> Mi fasannai Yisufa amuaqu namusa oorureenoo nari aiku asauku mariane qimarusa naara masoofafaq aniroofanoo Yisufa misakinaana qisaukuqara faqa qiku ooqu qaara marasee nuqu reenoo qini faqa mariaqee qimasee nuqu reenoo niqiqoo fasiqausee qimasee qimanniminoo qinau, qinee inniara rusandeesamumasee mareeqa qinee inni niqigaanaqa maqusa maqusa nidaqa qimannimiaqa. <sup>15</sup> Faiqi anaasee faafasaqaq naunduraki marina aqiqee marunna afeekana nimianaqa aqiqeeqaranoo. <sup>16-17</sup> Maanamusa Yisufa rusandeesamumandeeq maranau.

Simoona Yisufa moo auqundanau Peetooronee qimasee rusandeesamumandeeq mina faqa nari faiqi namuki quqanau.

Seebeedina amaakuqara Yameesafa faqa nari akaqa Yoohaneena faqa miqanda Yisufa moo nuquranau Booaneeraqeesafa mi nuquna oosana innaarunai qimarina fooqaqandee qimasee miqanda faqa rusandeesamumasee nari faiqi namuki quqanau.

<sup>18</sup> Andurufa faqa

Firipifa faqa

Baratooromeeufa faqa

Mataioofa faqa

Toomasifa faqa

moo Yameesafa Arafaiusana amaaku maruna faqa

Tadeusafa faqa

moo Simoonafa nari kaamannaikiaqeera qimarufa.

<sup>19</sup> Yudasifa Keerioota maqusaindaraafa Yisunara kasooqaqee uqeeqaaninafa mina faqa misauqaq faqa mareeqeenoo nari faiqi namuki quqanau.

*Beeraseeburanannai afaanna aqiqaidee qiqau.*

*(Mat 12:22-32; Ruk 11:14-23, 12:10)*

<sup>20</sup> Miqooqari Yisufa narí maaqai Kapeeranaumma maqusai maaqaki keeqafufaqa faiqí anaasee moomoo uqanna maaqaki ani umbiqafufanoo narana naani guna minniseenoo narí faiqí namufaqa sia nanau. <sup>21</sup> Faiqí anaasee Yisunara doo furufara mandeaafoo qufaqa mina atiuqa niranagoofaqa Yisuna oonu rarisee anirara deedaqíqau.

<sup>22</sup> Mooseena sandufa akoofasauqa akaqausa Yeerusaree maqusaindari qumusa Yisunara maaqí qimasee qimaríqau. Mifa afaannauqa uriqararafa Beeraseburafa mina aundurái marífa maridanoo fee qíqau. Akaqausa Yisunara afaanna uriqararausa afeeka amimariafanoo minannai afaannauqa niqíqaidanoo fee qimaríqau. <sup>23</sup> Yisufa minara iriseenoo faiqí anaasee naaramma quqasoofaqa aniroofanoo moo ainaina kikiqa ususeenoo quandara ufa kai qimanniminoo qínau. Naqimasee Sadannafa quandaki Sadannana aqíqaannoo fee sia amanaikianoo. <sup>24</sup> Moo maqannaasa narinni narinni rakiqa rakeekaa íqa doo mi maqannaasa taikee kuridifaranoo. <sup>25</sup> Moodaa oosana moodaa maaqaki mariasa rakuakiqa doo misa faqa taikeefaranoo. <sup>26</sup> Sadannafa narí ququsakinaasa faqa miqíkai inoo rakuakinanoo sia amana kisaqasaa mariannoo moodaa moodaa inoo taikaannoo.

<sup>27</sup> Ummuarimari fasiqafa naqimandee afeeka fasiqa maaqa rapeemaseenoo mina ainaina ummuariannoo fee sia amanaikianoo. Mi ummuari mari fasiqafa anireenoo sanda qumareenoo mi afeeka fasiqana rumba quqaseeno miqoo mina maaqaki keeqafi mina ainaina ummuariannoo. Qínee Anutuna afeekannai Sadannana rumba quqaseeqa mina afaannauqa faiqí nauduraki mariasa niqíqaidaqa. <sup>30</sup> Misa Yisunara afaanna mina aundurái maridanoo mifoo qimarunara mi ufana qínau.

<sup>28</sup> Maa ainainara kai iriaqa sia aunuqaqa. Faiqí anaasee oosana oosana mandainaina faqa oosana oosana manda ufa qirana faqa moomoo kari qimariana faqa Anut-ufa minauqa akiqara amana mininnisaannoo. <sup>29</sup> Moo fannoo Anutuna naaquqara maraqunara manda ufa qínanoo Anutufa mina akiqara sia uqanna minnaisaannoo mi ufana qimarífa naaru naaru fimaria idanaki aaqarana marasaifanoo sia uqanna Anutufa minnaisaannoo.

*Anutuna ufamaq fimariasa qini ainaina maridaqa.*

*(Mat 12:46-50; Ruk 8:19-21)*

<sup>31</sup> Yisufa miqída maaqaki ufa qimannimimarufanoo mina akaqaafasaa mina anoona saimbaqa naambeeqai ani kikiqíqa maridaqa Yisuna qimamianeerufanoo sia amanaik-ufaqa faiqí moo aqíqee oonu Yisuna qimaminanoo aniani fee qíqau. <sup>32-35</sup> Maaqaki Yisuna fiqí fiqíqaa oogu mariqa marusa mi ufana irisee qimamiqau ani anoofa faqa ani akaqaafasaa faqa madaanaí maridaqa ani aareeaa maqí qufanoo Yisufa iriseenoo miqoo marusa irammirinoo qínau. Yafee qini qinoo fee yafee qini qikaqaafasaa fee qimaseenoo narí faqa marusa munu ninda fee mini ninda fee maseenoo qínau. Qafaqaqa, maaqoo qini qinausa qini qikaqaafasauqa maridaqa, qini qikoona iriranamau fimariasa misa kai qini qikaqaafasaa qini dauna qikaqa qini qinausa maridaqa.

## 4

*Qaqama aaqee mari ufafa.*

*(Mat 13:1-9; Ruk 8:4-8)*

<sup>1</sup> Yisufa kaifaa Kariree nammari afainni oogu maridanoo Anutuna ufa miqoo suqí marusa qimannimi marinau. Faiqí anaasee moomoo mina ufa iriraree qimasee aiqama anireeqa Yisuna ititasoonara mifa kanuqaki akaramafufanoo nammariqi afiqa quqaqoofanoo munu kasoomasee maridanoo minakiqari nammari afaisaa faiqí anaasee marusa Anutuna fasaasa ufa qimannimarinau. <sup>2</sup> Yisufa sia akooqoo qimanniminau, quandara ufakiqari qimannimidanoo maaqí qimasee qimanninai.

<sup>3</sup> Innee amiqímmasee iriaqa faiqí moo fannoo maasa Yuda maqannaasa oosana mareenoo maqa rumaseenoo raisa fooqaana ummaqirara mina qaqama marasee minaki aaqasoofanoo ururanau. <sup>4</sup> Mifa miqoo aaqaidanoo akaqa qaqama fannoo aatata niku ree mariaqoo faqa aqufufaqa ufiniúqa aniree mina kai namasaqau. <sup>5-6</sup> Akaqa qaqama ooni meemai maqaki marufanoo minasaa maqa oodaa marunasaa aaqasoofaqa sia moomoo maqa marunara maqa tootooqi marunara dauni ururamafi marufanoo suani fraafa qoofanoo mina atuka sia meemai keeqoonara suani arufanoo aadanusinau. <sup>7</sup> Aaqasoofanoo akaqa qaqama amuka faqaafa marunaki aqaqamakinoo aqufinoo kambiqafufanoo amuka faqaa ainaina fannoo mina arusaifanoo mandaikinoo marida sia qaqama ireenoo. <sup>8</sup> Akaqa qaqama fannoo amiqíra maqasaa aqufufanoo maqakiqari urureenoo kambiqafinoo doo qaqama ireenoo, akaqafa oodaa ireenoo akaqafa amiqimasee ireenoo akaqafa fiqaramasee ireenoo.



<sup>9</sup> Yisufa mi ufana qimannimidanoo maaqi qinau. Innee naaqoofaqaasa kai maa ufana qimannimunnana iriaqa.

*Yisufa quandarufa qimanniminau.*  
(Mat 13:10-17; Ruk 8:9-10)

<sup>10</sup> Qimannisoofaqa fufaqa Yisufa nariara marufaqa akaqausa mina faiqi namu qisauku gara taikasee qikunni ooqu qaara mararaua faqa aniree quandara ufa oosanara iroofanoo qimanniminoo qinau. <sup>11</sup> Anutufa nari ququsakinaa qumee irirana qimannimianne qimasai faqa qimannimidaqa akaqausa agoosai mariasa quandara ufa kai qimannimunaqa iridaqa. <sup>12</sup> Tamummaqara fasiqauqa misara maaqi qimasee akara riqau. Misa maqee maqee qafaidaqa sia qafeefaranoo.

Misa iriqaraasamasee siamma irifaranoo. Misa irifau Anutufinnai ubeekama fifanoofau misa mandainaina akiaqara minninnisani.

Minara qinee Yisusa quandara ufa kai qimannimidaqa.

*Qaqama aaqara ufa oosana kooroofa.*  
(Mat 13:18-23; Ruk 8:11-15)

<sup>13</sup> Yisufa nari faiqi namufaqa faiqi akaqausa faqa qaqama aaqaranara irammirufanoo maaqi qimaseenoo akooqoo kooroomasee qimanniminau. Innee sia fee mi quandara ufana oosana iridee. Innee sia mina iriqa naqi fee mandee aiqama quandara ufa irifaree. <sup>14</sup> Qaqama aaqee mari fasiqafa Anutuna ufa qaqamara foora aaqaidanoo. <sup>15</sup> Moo kari akaqa ufa faiqi naunduraki aanasaara foora aaqasaafanoo iriafanoo Sadannafa ufiniara foora mina aaqee uqanna aakueeqee aqidanoo. <sup>16-17</sup> Akaqa fasiqa anaasee naunduraki ooni maqasaara foora qaqama fannoo aqufidanoora foora mi ufana irisee asasamasee marasaafanoo sia meemai anoona ooqu finara sia kisaaqasaa maridanoo, mi ufana saara ummaara fee, arirane, kambiqaqifaqa dauni minnisaidaqa. <sup>18-19</sup> Akaqa fasiqa anaasee amuka faqaa ainainaki aaqee maria qaqamara fooqaana maridaqa. Misa Anutuna ufa iriseeqa maaqoo maria ummaara kadaapirirafa faqa munnimara rimariafa faqa oosana oosana ainainara rimariafa faqa mi ufausa kai Anutuna ufa radamusai fanoo sia qaqama iraidanoo. <sup>20</sup> Akaqa fasiqa anaasee amiqira maqasaa aaqee maria fara foora maridaqa, misa Anutuna ufa irisee maraanara qaqammara foora iraidanoo akaqafa oodaa iraidanoo akaqafa amiqimasee iraidanoo akaqafa fiqaramasee iraidanoo.

*Qooma qumbirana quandarana kikiqa usirafa.*  
(Ruk 8:16-18)

<sup>21</sup> Yisufa kaqi qimannimidanoo qinau. Faiqi moo fannoo qooma qumbimaree difaani ameemaanai sia minni quqaidanoo beeta ameemaanai sia minni quqaidanoo akooqoo quqaaqafanoo kaaqa qaanifeera. <sup>22</sup> Miqikaimmasee kasooqaaqee aiqama kukeeqee mari ainaina oosana Anutufa mareeqee akooqoo quqaanno aiqama rafaafa fimari ainaina faqa akooqoo quqaanno. <sup>23</sup> Innee naaqoo faqaasa iriaqa.

<sup>24</sup> Yisufa kafa maaqi qimasee qimanniminau, innee naaqoo irimari ufanara amiqimandee rakisiaqa. Anee nana ufa fee faiqi anaasee nimanoo Anutufa mi ufanannai kai ainna rafaafafu amaqaanno sia aneenna qinnana amana kaifau ani rafaafafu amaqaanno fau fiqaramasee ani rafaafafuamaqaanno. <sup>25</sup> Faiqi moo ainaina uqaqee marinnana moo faqa Anutufa amianno. Faiqi moo fannoo ainaina siainna kaqikaa ainaina marinnana Anutufa mara marainanoo kaqi samu uqanna marianno.

*Qaqama nari kai kambiqarana kikiqa usirafa.*

<sup>26</sup> Yisufa kaifaa qimanniminoo qinau. Anutuna ququsa maqasaa fasiqa anaaseeki sia akooqoo kambiqaidanoo kukeeqanoo mari ifa kambiqeenoo akooroo idanoo, mifa faiqi moo fannoo nari afuqaki qaqama aaqaidanoora foora kambiqaidanoo. <sup>27</sup> Mi fasiqafa qaqama aaqasee eendaki faiqeenoo faasaana nari ainainai oonuree aniree miqi marifanoo doo qaqama aaqaaqafa doo kambiqafinoo. Mi fasiqafa sia kambiqarana oosana irifanoo nari kai doo kambiqafinoo. <sup>28</sup> Maqa fannoo naamma amifanoo kambiqafinoo qaqama iraidanoo. Indaaruu ummaqasainanoo radiqifinoo afumu kambiqafinoo doo urureenoo afuenaarinoo doo qaqama ireenoo qaqama anoona kambiqaidanoo. <sup>29</sup> Qaqama akuqamafifanoo mi fasiqafa paipana qumaree ateeke maree munu maaqaki quqaidanoo.

*Qumini qaqamara foora radiqifinoo firaafaikidanoo.*  
(Mat 13:31-32, 34; Ruk 13:18-19)

<sup>30</sup> Yisufa kaqi qimannimidanoo moo quandara ufa qimannimidanoo irammirinoo qinau. Anutuna maqasaa ququsakina faiqi anaasee mariasa nanara fooree maridee.

Nana quandara ufannai fee kooroo ianauree. <sup>31-32</sup> Qinee maaqi qimasee qimannimi-anaura, qumini qaqama fooqaana kaqikaana faiqi moo fannoo mina maramareenoo ummaqusainanoo kambiqafinoo firaa tia saqariara foora aiqama aakaqaqakinaa andanda uriqararafa maridanoo. Mina asaana firaanaikinanoo ufini aniree mina asaana auqaanai aanaamu usakaidaqa.

<sup>33</sup> Yisufa nari ufa oosana oosana quandara ufakiqari faiqi anaasee nari irirana amana kai qimanniminu. <sup>34</sup> Sia sia quandara ufakiqari qimanniminu quandara ufakiqari kai qimannimi marinau. Mifa nari faiqi namufaqa naaduma marunna minni mi quandara ufana oosana kooroommanniminu, maqee maqee miqimmi marinau.

*Yisufa ufannai ufa amakaura taikanau.*

*(Mat 8:23-27; Ruk 8:22-25)*

<sup>35</sup> Mi faasaana eenoofanoo Yisufa nari faiqi namu qimanniminoo qinau. Doo anifaqa sipaki akaramafinaqa Kariree farummaki fitaqamareeqa muqafainni nianai fuaqa. <sup>36</sup> Misa eedoo qimasee faiqi anaasee minnisee Yisufa ooqu marunaki akaramafufaqa Yisuna afigee farumaki fiqau, akaqausa mariqa kanuqaki misa saimbaqa fiqau. <sup>37</sup> Misa faruma qambaanai fimarufanoo ufa firaafa uqinoo nammari amakaurufanoo sipaki nammari teeqinoo qumbiqararinau. <sup>38</sup> Yisufa kanuqa atinni akiaqa qunusaa rumasee faiqaqeeufaqa mina faiqi namu rufiasee aniree afaurida qiqau ufasa rakisirafa findifua maasa kaqi kaaqoo nammari ukuqnaidaqa kuqirammidaqa anee sia fee maasara iridane. <sup>39</sup> Yisufa findifinoo ufaara doo saa qimasee nammari amakaura doo taikaa qufanoo ufa uqirafa taikeneo nammari amakaurirafa taikafinoo doo firaqoo dai qimafinau. <sup>40-41</sup> Dai qimafufanoo Yisufa quandakinoo nari faiqi namu niqidanoo qimanniminoo qinau Innee nanaree rufiadee. Innee qini saqarikirafa siaisee maridee qufaqa misa firaqoo rufiasee naaquqoofaqa nari qimami nari qimami qiqau. Maa fasiqafa nane, sia faiqi faqa afaannauqa faqa kai mina ufara eedoo qidaqa, ufa faqa nammari faqa mina ufara eedoo kai qidaqa.

## 5

*Faiqi aunduraindaraa afaannauqa kuara aundurai keeqaqau.*

*(Mat 8:28-34; Ruk 8:26-39)*

<sup>1</sup> Doo miqooqari kanuqa fannoo Kariree farummaki fifufanoo nammari dinnafai nianai Keerasa maqannaasa maqa maaqa munu raquru aminau. <sup>2</sup> Yisufa kanuqakiqari maqasaa aqufufanoo faiqi moo faafasaqa aunduraki marufa Yisufinnai aniranau. <sup>3-5</sup> Mi fasiqana maqannaasa faiqi iri mara maraida ooni aamarai akundee mariqau. Mi fasiqafa mi ooni aamaranaki faigee marufa marinau. Moomoo kari misa mina qumareeqa sainandannai mina aiku asaaku rumba quqasoofanoo afeekaikamandeenoo asakusaaqarara sainanda rakeemma aquuseenoo aiku rumbaqaqoo sainanda turi mandee mina rakeemma aqusoofaqa sia amana mina qumaree mariqau. Mina afeeka uriqaranoo marunara misa sia amanaiqiqa minnisoofanoo faiqi madikamaqoonakiqa faqa aaqana aaqanakiqa faqa faqa quqanoo nidanoo oonisamu qumaraidanoo nari afaqaq ateeakanoufa marinau.

<sup>6-7</sup> Yisufa kanuqakiqari aniroofanoo mi fasiqafa ooni aamaraki nianaindari Yisuna qafamaseenoo sandee anireenoo Yisuna oorinni aqoori saunara fino oorindari firaa kari firaqa quqaseenoo Yisuna aaramaseenoo qinau. Oo Yisufa anee firaqoo uriqarara Anutuna amaaku mariananoo. Anee nanaree maasa soodaa qidane. Qinee afeekaikamandee ani qimamidaqa. Anee Anutunara irisee sia qini darua. <sup>8</sup> Mi fasiqafa sia fifau miqi qinau. Yisufa mina aundurakinaa afaannara anee manda afaanna maa fasiqana aundurakiqari rafudamaki fua qunara mi fasiqafa miqi qinau. <sup>9</sup> Yisufa mina ufa iriseenoo irammirinau ani auqu yafee qufanoo mi fasiqana aunduraindari afaanna fannoo qinau. Maasa moomoosa qusidaqa marunnanara maasa duqu qusirausee qidaqa.

<sup>10-13</sup> Miqi qimasoofoanoo afaannauqa faqaa fasiqa fannoo nari aundurakinaa afaannauqara kaffaa kaffaa Yisuna qimaminu. Sia maa maqa maaqaqanakiqari misa niqiqaa. Miqi qimaseenoo Yisuna qimamimarufanoo. Mi nammari afainni ameemai adeedi kuara moomoo andanda neemariqau. Mi fasiqana aundurakimari afaannauqa kuaraqara Yisunara afeekaikiqa qiqau maasa diqiqaanee qimasee diqiqaanaqa kuaraqa naunduraki fua qufanoo Yisufa doo fuaqee qufaqa mi afaannaasa mi fasiqana aundurakiqari rafudamakufaqa kuaraqa naunduraki keeqaqau. Kuaraqa naunduraki keeqoofaqa mi ameemanaindari sandamaqarasaufafa farummaki bururu qufaqa aiqama kuqu taikaqau. Mi kuarausa tu tauseenna (2,000) kuara mariqau ooni saqari auqiqa mariqau nukudara foora mariqau.

<sup>14-15</sup> Mi kuaraasaa rakisi maru fasiqausa mi kuarausa nindafamasee quqasee sandamaqarasamasee maqusai marusa faqa uiaqana maaqakiaqa marusa faqa qiman-nimiqa. Qimannimisoofaqa aiqama qafararee qimasee aniree qafoofanoo moomoo afaanna aundurai mariu fasiqafa andeeqasee qamunna afisusee irirana marasee miqoo ooqumari fi marufaqa ani qafoofanoo naaquqee naindiri ranau. <sup>16-17</sup> Faasai mariusa Yisufa afaanna niqifoona faqa kuara nammariki aqufunara faqa qafosa misa maqusain-dari aniroosa aiqama ainainara qimannimisoofaqa misa iriseeqa Yisunara rufaseeqa mifinnai ooguree kafa kafa irammiridaqa qiqau maasa maqa maaqakiqari amanee anee finnaree qiqau.

<sup>18</sup> Yisufa eedoo qimasee kanuaki akareemarufanoo afaanna aundurai mariu fasiqafa Yisunara afeekaikamaseenoo irammirino qinau amanee qinee ani faqa funauree qimasee fuki faaki qinau. <sup>19</sup> Yisufa irisee qaoo qimasee qimaminoo qinau. Anee aneenna maaqai anirandee oonureenana aneenna anoona akona atiuqa qinee karaambaiga ani firaqoo dadaaqunannara faqa firaqoo aniara amuqusunnara faqa qimannimia. <sup>20</sup> Miqi qimasoo fanoo anirandee nari maqa maaqai oonuree qisaukuqara taikasee maqusaasee qimarusa aiqama qimannimimaree fiq fiq qidanoo Yisufa dadaaqunara qimanniminoo nimirinau. Aiqamausa mi ufana irimarusa firaqoo naaquqoo faqa naindiri roofaqa oo kuqaa fee miqinoo fee qiqau.

*Kisaqaqandaikimaru aanaaseena andeeqanau. Yisufa qufanoo Iairusana araamuna findifinau.*

(Mat 9:18-26; Ruk 8:40-56)

<sup>21</sup> Yisufa miqooqari kanuqaki akaramafufanoo nammari taqamaree dindanai kafaan-nai finau. Miqoo oonuroofaqa faiqi anaasee moomoosa Yisuna ani mara ititasaqau. <sup>22</sup> Mi maqusanaki amaana maqasaa rakisimaru fasiqafa mina auqu Iairusafa anireenoo Yisuna oorini maqasaa aqufufanoo afeekaikamandee fuki faaki qinoo irammirinau. <sup>23-24</sup> Qini qiraamuna kaqikaa qiraamuna aurimarifaqa amanee anee anireenana aneenna asauku minasaa quqasainanoo findifuani kuquandoora qufanoo Yisufa mina faqa findifi finau. Fimarufaqa moomoosa titiqimafufaqa fidanoo misa rusadeesamumandee fimirinau.

<sup>25-26</sup> Miqoo misaki anaasee moo marinau. Qisaukuqara taikasee qikuni ooqu qaara marasee aukuaana kisaqaqandaikimaru anaaseefa marinau, mifa moomoo tutaqausun-nai fimarufanoo sia andeeqoo fanoo fira teeroo quqaranaki marinau. Mi anaaseefa tutaqausunnai nari munnimma maqee maqee aqii taikasoo fanoo sia mina aurirafa taikanau maqee maqee firaanaikinai. <sup>27-29</sup> Mi anaaseefa Yisuna afeekara iriseenoo faiqi aanaaseekiaqa qumee mina aanaaqiannai oonuree maaqi qimasee irinau, qinee oonuree mina qamunna kai auqamasanaanoo mina afeeka fannoo qini aurirana taikaqisaanoo.

Miqi qimasee faiqi anaasee titiqimafufanoo aanaaqianaindari misakiaqa rusandeesamu mandeenoo ani mina qamunna ati kai auqamasoo fanoo nari aundurakiqari fidika reereufa taikanau, nari aurirafa taikaranara nari irinau. <sup>30-31</sup> Yisufa nari faiqi andeeqara afeeka narisaaqari funara iriseenoo faiqi anaasee qambaanai quandafi irammirinau yafee qini qamunna auqeenoo fee qufaqa nari faiqi namu qimamiqa qiqau, moomoosa ani ititafuanakina nanaree anee yafee qini qamunna auqee maqi qidanee moomoosa ititafuanaki fimirinanoo. <sup>32</sup> Yisufa sia misa ufa irinau kaqi randee marinau. <sup>33</sup> Mi anaaseefa nari aurirafa taikoonara iriseenoo aindireenoo aaquqoo fanoo Yisuna aikuki oorindari ani kummaramafufanoo aiqama anoona ufa kai qimaminai. <sup>34-35</sup> Yisufa iriseenoo qimaminoo qinau Oo qini qiraamuna aneenna irirana qinisaa rusimarianafa mifa kai ani andeeqeenoo doo asooaranaki fua ani aurirafa doo taikkeenoo.

Miqi qimarufanoo Iairusana maaqaki marusa aniree Iairusana qimamiqau sia ufasaa rakisirana kadaapi arua doo ani araamuna kuqufinoo. <sup>36-37</sup> Yisufa sia misa ufa irinau. Iairusana qimaminoo qinau, Sia rufiaa, qinisaa kai aneenna irirana mundua qima-soofaqa aiqama mina faqa anusa aiqama Iairusana maaqaki keeqararufanoo Yisufa qaoo qimaseenoo nari faqa Peetooroona faqa Yameesafa faqa mina akaqa Yohaneefa faqa doo minamusa kai Iairusana faqa nifiqamareenoo Iairusana maaqaki ooru fiqau. <sup>38-39</sup> Misa Iairusana maaqai oonuroofanoo Yisufa faiqi anaasee ikifaafau qirana faqa faaqa fuisee qirana faqa munari minari qirana faqa nindafamaseenoo maaqaki keeqafino qimanniminoo qinau. Nanaree munari minari ida fee qikiraqaid ee maa faiqifa sia kuqinoo maridanoo faiqaqee idanoo.

<sup>40</sup> Misa minara irisee Yisunara naanaidara qimasee uteeti qufanoo Yisufa aiqama niqiqamaseenoo faiqi anaukoo faqa mina aiku asauku qaaramoo faqa maanaqa kuqiraqoo nifiqee keeqanau. <sup>41-42</sup> Yisufa mi kuqira manaqaana asauku qumareenoo

nári ufakiqari kaqikaa manaaga qínee ani qimamidaqa doo findi fua qimasoofofanoo mifa aaqee findifinoo doo ninau. Minaki marusa mina qafamasoofofanoo naaqugeenoo naindiri ranau. Mi manaqaqafa qisaukuqara taikasee qíkunni ooqu qaara aukuaana marasoo maanaqaqafa marunara naaquqanau. <sup>43</sup>Yisufa afeekaikamasee qimanniminu innee maa manaqana andeeqaqaunnufana umeeraaqee qimasee quandaki maanaqara qinau maa manaqana narana amifanoo naani qimasoofoqa miqimmiqau.

## 6

*Yisufa nári maqusai Nasareeteenni namummaqanau.*  
(Mat 13:53-58; Ruk 4:16-30)

<sup>1</sup> Yisufa mi manaqana mara findifummaseenoo miqooqari findifinoo nári maqusai Nasareetinni finau, nári faiqi namufaqa mina faqa fiqau. <sup>2</sup> Nasareete maqusai Yuda maqanna marunara nariqa amaana Saririqasaa amaana maqaki keeqafufanoo Yisufa Anutuna ufa qimannimi marufaqa misa irisee tautumasee qiqau. Maafa maa amiqira iriranna yai fee mareenoo fee, yafee maa irirana aminoo fee naqimasee faiqi sia auqaqaa ira ainaina auqidanoo fee. <sup>3</sup> Maasaki kamundaa mariifa mifa kai maridanoo, mina anoofa Mariafa maridanoo maaqooqaraa anaasee faiqi maridanoo, mina akaqaafasaaqaa Yameesana amarafa faqa Yooseesa faqa Yudasina amarafa faqa Simoona amarafa faqa maaqooqaraasa marifanoo Yisufa misakinaafa maridanoo. Mina asooqmaaka faqa maaqookai maridaqa. Misa minara miqi qimasee nikoo fee qiqau.

<sup>4</sup> Yisufa mina iriseenoo maaqi qimasee qimanniminu. Tamummaqara fasiqa moo fannoo maqusa maqusa fidanoo qimanniminaqa misa iriseeqa mina ufara kuqaa fee qifaranoo nári maqannaasa faqa nári ainaina faqa nári moodaa fasiqa anaasee faiqi faqa mina ufa siamma irifaranoo. <sup>5-6</sup> Yisufa nári maqannaasara miqimmidammia maqi qimasee sia amana moo fasiqa anaasee mandaikirusa andeeqannimaqararee qinau. Qaaramoo aurusa kai asauku quqasoofaqa findifiqau. Nári maqannaasa nári irirana sia minasaa mundunara irisee firaqoo tautinuu.

*Yisufa nári faiqi namu niqiqoofaqa qimannimiqau.*  
(Mat 10:5-15; Ruk 9:1-6)

Yisufa miqoo nári maqusai Nasareeteendari dinni dinni fiqumma marusa misa qimannimimarinuu. <sup>7-9</sup> Qimannimiseenoo nári faiqi namu naarama quqaseenoo manda afaanna faiqi anaasee naundurui marusa misa niqiqara afeeka nimiseenoo qaaraqanda qapamandee qaaraqanda qapamandeenoo qimanniminoo qinuu, Sia moo ainaina maree fuaqa saunu kai qara maree fuaqa, feemu faqa uqa faqa munnimma faqa sia maree fuaqa, niku aanaamu afisumareeqa siuta moodaa afisumaree sia aabaa moo maraqa. <sup>10</sup> Innee maqusa maqusa fidaqa moo maqusaki oonu raifanoo mara quqainna maaqanaki quqasaina sia namummaqara nuaqa minaki kai faiqaida nuaqa, minakiqari moo maqusa fiqa fuaqa. <sup>11-12</sup> Innee moo maqusai fiqaq misa sia inni mara quqeeqa sia inni ufa irifaqa innee fidaqa kookoomma afaqa ninaamarasee fuaqa. Innee miqiga Anutuna naruaninnanara misa aaquqima nimaqee faranoo. Yisufa miqi qimaseenoo niqiqoofaqa maqusa maqusa fidaqa faiqi anaaseera nári mandainainara nimeesuqaqee qimannimiqau. <sup>13</sup> Qimannimidaqa moomoosa naunduraki afaanna faafasaqa marusa niqiqamannimi marufaqa rafudamakida fimariqau. Miqiga fidaqa aurusa nikiaqaqaa sauna fadameenara fooqaana adiasoofaqa findifi mariqau.

*Eeroodeefa Yoohanee nammari nimimaruna akiqa tuqinuu.*  
(Mat 14:1-12; Ruk 9:7-9)

<sup>14-15</sup> Yisuna aufakiana ufa fannoo aiqama atinai daraanimambunara Eeroodeefa mi ufana faqa iriseenoo tautinuu. Akaqausa Yisunara Yoohaneefa nammari nimimarufa kuqiranakiqari findifinoo firaa ainaina auqemari fee qufaqa akaqausa Yisunara Eeriaafa ooqeenaa tamummaqara fasiqa mifa kaifaa kambiqanoo maridanoo fee qufaqa akaqausa ooqeenaa tamummaqara fasiqa fooqaafa kambiqanoo maridanoo fee qiqau.

<sup>16</sup> Eeroodeefa mi ufasa iriseenoo nári qinuu, Qínee ooqai Yoohaneena nammari nimimaruna anuka atee kasaafanafa mifa kai kuqiranakiqari anida qinoo.

<sup>17</sup> Ooqai Eeroodeefa nári kai qimannimufaqa sundiaqaa Yoohaneena nammari nimimaruna rumbamaree karabusa maaqaki quqaseeqa firaa sainanda qumareeqa rumba quqasoofanoo marinuu. Eeroodeefa sia fifau Yoohaneena mareeqee rumbanaki quqanuu. <sup>18</sup> Yoohaneefa nammari nimimarufa maqee maqee anaasee qummuarunasaara aqunara rumba quqanuu. Eeroodeefa nári akaqa Firipina anaqa Eeroodia nammarina kaqi nári afaaqi faqa marufanoo qummuarunara Yoohaneefa qimaminoo qinuu Anee aneenna akaqa anaqa Eeroodia nammarina qummuaramminana

maraananoo Anutuna ufa rukiasee miqiananoo. <sup>19</sup> Eeroodia nammarifa Yoohaneena ufa irisoofoo afaaqai kaqi ati qanoo marufanoo maridanoo mina ariranara randee marufanoo Eeroodeefa qaoo qufanoo sia arinau. <sup>20</sup> Eeroodeefa Yoohaneenara irirana andeeqara qikairi siai fasiqa fee qimasee minara rufiaseenoo karafusaki seenoo itita-soofanoo sia Eeroodia nammarifa arinau. Eeroodeefa maqee maqee Yoohaneena faqa ufa qiranara aidi marufanoo maqee maqee Yoohaneena aaramasee ufa qimamimarinau. Yoohaneena ufa fannoo Eeroodeefa maqee maqee Yoohaneena faqa ufa qufanoo Yoohaneena ufa fannoo Eeroodeena raquramufanoo aqu ufafa afaaqai ati qanoo marunara siamma irimarinau kaqi maqee maqee Yoohaneena karabusaki marunna aaramasaida ufa nari qimami nari qimami qimarigau.

<sup>21</sup> Doo anaasee Eeroodia nammarifa rakisinoo fiifufanoo aruaninna faasaana paqurinau. Mi fasaanna faiqi Eeroodeefa Eeroodia nammarina afaaqi nari anoofa nari maqoo faasaannara iriseenoo qoomaqa firaana sugaseeno kaamanna uriqararawsa faqa sundiaqqa uriqararawsa faqa Kariree maqa maaqaki faiqi firaasa faqa naaramasoofaqa anireeqa nee mariqau.

<sup>22-25</sup> Misa nee marufanoo anaasee Eeroodia nammarina araamuna fannoo anireenoo misa noorinni idi amiqirana raidanoo aqoori raqee marinau. Aqoori raqee marufafaq misa irufanoo adiafaa qufanoo Eeroodeefa qoomaqa nimiufa mi manaqana aaramasee aiqamausa nifusaa qimaminau, ani amiqira idi akiqara nana ainainee qinaqee amianauree qinau. Sia kai ufa kai qinau nari amana naaree aqiqamaseenoo qimaminau, Anee nana ainainaree aidaanoo fee anee qinaqa mi ainainna ani amianaura. Anee Kariree maqa maaqa dinni rakisianee qinaqa qinee qambaana oosusee dinni ani amianana anee misasaa rakisaa qufanoo nari anoofinai onureenoo qinau, nanaree qimamianauree qufanoo mina anoofa maqee Yoohaneefa nammari nimi marifa kuquanifee qimasee Eeroodeenara qikaru qiandoo qimaseenoo akiqaa tupumma maree minisaifaqa geeqa qifunnoo mina qafamasee kuqaa kuqiifoo qianauree qimasee qimasee saqari difaaniki akiqaa quqasee mini qimiannee qufanoo Eeroodeefa firaqoo uqanna akooqamafinau. <sup>26-28</sup> Akooqoofanoo sia amana qaoo qinau. Aiqamausa nifusaa nari amana aqiqamasoonara asauruseenoo nari sundia moo aqiqoofanoo karafusa marunaki onureenoo Yoohaneena anuka ateeqaseenoo saqari difaaniki mina akiqaa quqaseenoo maree mini Eeroodia nammarina araamuna amufanoo mifa mareeqeenoo nari anoona aminau.

<sup>29</sup> Yoohaneefa nammari nimimaruna faiqi namu mifa kuqunara irisee ani mina iri maree munu akundaqau.

*Yisufa feemu namufaqa noodaanna faqa nimufa.*  
(Mat 14:13-21; Ruk 9:10-17; Yoh 6:1-14)

<sup>30</sup> Yisufa nari faiqi namu niqiqoofaqa maqusa maqusa nidaqa qimannimunara faqa auqoonara faqa Yisuna mini qimamiqau. <sup>31-32</sup> Qimamimarufaqa faiqi anaasee moomoosa aniree qumbiqafunara narana narafa sia amanaikufanoo Yisufa nari faiqi namu maaqi qimasee qimanniminau. Aniaqa innisaimbaqa faiqi sia mariannai onuree idooaqa. Miqi qimaseenoo nari faiqi namufaqa nammari afainni ooquree kanuqaki akaramafufaqa nammari amuqumau fiqau.

<sup>33</sup> Faiqi anaasee moomoosa nindafamaseeqa oo Yisufammi maqi qimasee nari maqusaki nari maqusakiqari oonu maree ani mareeufaqa Yisuna kanuqa fannoo munu maqanamu raquru amufanoo nindafoofaqa faiqi anaasee moomoosa faasai afainni qusi mariqau. <sup>34</sup> Yisufa kanuqakiqari maqasaa aqufinoo faiqi anaasee moomoo nindafamasoofoo firaqoo amuqusufanoo qinau. Oo maqoo mariasa sipsipa aandaurofoora rakisirafa saisa mariafanoo fee qimaseenoo Anutuna ufa oosana oosana ainainara qimanniminau. <sup>35-38</sup> Eenoofaqa Yisuna faiqi namu Yisuna qimamiqau, doo eendidanoo anee niqiqainaqa kaqikaa maqusakiaqa narana feefauriaqa maaqoo faiqi siaiqoo maridanoo fee qufanoo Yisufa qinau inneeqa kai narana nimiaqa qufafaq misa qigau, maasa sia amanaikianaura maasa moomoo ooni mareeqa oonu moomoo feemu feefaurumasee minisee nimianaqa naifanoo sia amanaikiannoo, maasa sia amanaikidaqa qufanoo Yisufa qinau. Inni feemu naqumme maridanoo oonu qafaafa qufafaq misa oonu qafamaseeqa aniree qimamiqau, maasa feemu moodaanai qisaukunamu, noodaanna qaaraqanda faqa maridanoo fee qufanoo.

<sup>39-40</sup> Yisufa qimannimino qinau. Innee faiqi aanaaseera qifaqa misa raina rainama-finaqa naadu naadu ruumbaku finaqa qusau rasoonookamasee ooqumari maree fuaqa qufaqa faiqi anaasee eedoo qimasee ruumbakiranakiqari padimambufafa ooqu mari-fiqau. Akaqa ruumbakiranakiqari wan handareeta mariqau akaqa ruumbakiranakiqari qaara fasiqa niku nisauku taikasee qisaukuqara taikasee fasiqa anaasee mariqau. <sup>41-42</sup> Ooqu marifufanoo Yisufa mi moodaannai qisauku feemuna qumaree noodaannaqara faqa qumaree sandaaqai oori uqeerasee Anutunara dufi dufi qimaseenoo mi feemuna ruqi ruqi mandeenoo nari faiqi namu nisaukuki quqasooafaqa faiqi anaasee ooqu mariranakiaqa nimi maree fimariqau. Yisufa miqikai inoo noodaanna faqa ruqi ruqi mannimufaqa mina faqa nimi maree fufaqa noofanoo nimuaqufaqa akaqana kaqi quqaaqau. <sup>43</sup> Yisuna faiqi namu mina ataraasa qumaree qisaukuqara taikasee qikunni ooqu qaara marasee uqa qumbiqaqau. <sup>44</sup> Mi naranna nee marusa faifa tauseenna fasiqa mariqau, anaasee faqa faiqiuqaindi faqa mariqau. Ooni saqari auqusee moomoo uqanna mariunara faifa tauseenna fee qinoo maridanoo.

*Yisufa nammari amuaqumau finau.*

*(Mat 14:22-23; Yoh 6:15-21)*

<sup>45</sup> Yisuna faiqi namu narana ataraasa mara maroofanoo Yisufa nari faiqi namuara afeekaikamandee fuki faaki qinoo niqiqoofafa misa mina afunni kanuqaki akaramafi Beetasaida maqasai nammari dinni afainni fiqau. <sup>46</sup> Misa fimarufanoo Yisufa faiqi anaasee niqiqamasooafaqa fufanoo mifa nari faiqi namu nimanda maseenoo nariara amuaqunamusaa ooru maridanoo Anutunara innaaru qimarinau.

<sup>47-49</sup> Eendufanoo Yisuna faiqi namu kanuqaki nammari qambaana nimarufanoo Yisufa nariara maqasaa maridanoo misa nindafoofanoo ufai fannoo misa noorindari anidanoo kanuqa mara furufarimarufaqa purannai puridaqa kadaapindi mariqau. Inaaqiana kookooraana ufaqi maru kamuqoo Yisufa misunnai fidanoo nammari amuaqumau aiku ramasee finau. Mifa kanuqakinaasa finnaaqareera foora fimarufaqa Yisuna faiqi namu afaanna fee qimasee rufiasee faaqariqau. <sup>50-51</sup> Misa faaqaruma-soofanoo Yisufa qimannimino qinau. Sia maparaa iaqa nifaqa quqasee kasooiaqa qineemma anidaqa. Yisufa miqi qimaseenoo misa faqa kanuqaki akaramafufanoo misaki ooqumari fufanoo ufai fannoo taikafinau. Taikafufaqa Yisuna faiqi namu maparaa iqa naundura faqa furufariqau. <sup>52</sup> Yisufa moodaana qisauku feemu ruqi ruqi mandee nimufaqa noofanoo amanaikunara mina faiqi namu sia mina anoonara andeeqasee irusa maridaqa nammari amuaqumau anunara faqa sia iriqau.

*Yisufa Keenesareeta maqusanaasa aurirana taikannisanau.*

*(Mat 14:34-36)*

<sup>53-55</sup> Misa miqooqari kanuqaki nammari amuaqumau fiqa munu maqa raquramu-fafa fitaqa mareeqa mafi kanuqa qususeeqa doo Keenesareeta maqa maaqammifoo qimaseeqa kanuqakiqari aqufiqa maqasaa oorufufaqa misaqa marusa miqooqaraasa Yisufammifoo qimaseeqa sandeeqa maqusa maqusa qimannimufaqa nariqa aurimarusaa qaarisa rumba maraidaqa yatinnai fee Yisufa fuannoo fee qimasaida aurimariasa qaarisa rumba maraidaqa Yisuna oorinni mini quqee mariqau.

<sup>56</sup> Yisufa ya maqusanai fee ya taunnaki fee ya ainaini marunaki fee finau nari aurimarusaa nifiqa maraidaqa mifa funnai munu makeetaki firaa saqa marunaki quqasee Yisunara nari nimuqusa ookiqari firaaqoo qimamiqau. Maasa sia kadaapi amirara qimamidaqa aurimariasa ani qamunna ati kai auqamasaida findififara qidaqee qufanoo Yisufa eedoo qufaqa mina qamunna auqee marusa amiqi mandee findifi mariqau.

## 7

*Yisufa Farisai amaana ufa qimarusa niqinau.*

*(Mat 15:1-9)*

<sup>1-2</sup> Farisai amaana ufa qimarusa faqa Mooseena sandufa akoofasauqa faqa faiqi anaasee narana nararee qimasaida nisauku nammari uqidaqa miqi fee maaqi fee qimasaidaqa fifau sandufa oosana oosana quqee mariasa mariqau. Misa Yeerusaree maqusaindari qumuree ani mara Yisuna uqufufaqa nindafoofafa Yisuna faiqi namu narana neemariqau sia Farisai amaana ufa qimarusa nisauku nammari uqirainni kaqi nee mariqau.

<sup>3</sup> Farisai amaana ufa irimarusaa faqa Yuda maqanna aigamausa faqa nari ninaaku ni-taatoosa naanna raidaqa aigama kari nisaagusaida narana nee mariqau, sia nisaququsee sia narana nee mariqau. <sup>4</sup> Makeetaki maree maru ainaina nammari uqusee suqasee nee mariqau, misa sia minara kaifau miqi qimariqau oosana oosana ainainara miqi

qimariqau. Misa kaafauqa faqa susufinauqa faqa disauqa faqa faiqara qaari faqa nisauku faqa miqimasee maaqimasee nammari uquaqee qimarufuqa miqiqu fidaqa akeekamasaida miqi mariqau.

<sup>5-6</sup> Farisai amaana ufa qimarusa faqa Mooseena sandufa akoofasauqa faqa kaaqa firaqqoo minauqara fuki faaki qimarusa marunaki Yisuna faiqi namu sia nisaaquqirai kaqi narana noofaqa qafamasee Yisuna aqiga qiqau. Naqee fee qifaqee ani faiqi namu maasa qikeeku qikaaku oosana minnisee sia nisaaquqirai kaqi narana naida fee qufanoo Yisufa qimanniminoo qinau. Ooqeenaa tamummaqara fasiqa Esaiiafa andeeqasee inniara tamummaqaseenoo inniara manda qaara irirana maree mariasee qinau.

Mifa inniara maaqi qimasee Anutuna ufa akara rinau. Maa fasiqa anaasee nifauru fannoo kai unnaqimasee qini duqu uqeeree mariasa, nimusa kaqinni ubeekarusa mariafanoo.

<sup>7</sup> Misa faiqi qimaria sandufana qumaree unnaqimasee Anutuna sandufammifoo qimasee faiqi anaasee naamuqidaqa. Miqi qimasaidaqa Anutunara innaaru qifanoo siammiriannoo.

<sup>8</sup> Yisufa mi tamummaqara fasiqana ufa qimannimiseenoo nari maaqi qimasee qimanniminu. Innee Anutuna ufa mafi quqaseeqa faiqi aaquqira ufamau kai fimariasa mariafanoo.

<sup>9</sup> Innee inneeqa kaaqa iriqaraasamandee iriranannai inneeqa faiqi faiqi ufa faiqi anaasee qimannimianee qimaseeqa Anutuna ufa mareeqee ninaaqiannai quqaseeqa. <sup>10</sup> Mooseefa Anutuna ufa qimannimidanoo maaqi qimasee qimanniminu. Inneeqa ninaukooa asammandee amiqida misa nuqu uqeeraaqa. Faiqi moo fannoo nari anoona akoonara manda ufa qinnana mi fasiqana kuqammarusaaqa. <sup>11-13</sup> Innee minara maqee maaqi qimasee aaqee mariafanoo faiqi moo fannoo nari anoona akoonara dadaaqimarina nimianauree qimasee kafaaf oonu mafi irisee sia nimidanoo amaana maqaki quqasee Anutuna amidee qimaria fasiqanara sia aqaqida andeeqadee qimariafanoo. Miqidaqa Anutuna ufa mafi quqaseeqa inneeqa ufa kai uqeeree mariafanoo. Doo innee Farisai amaana ufa qimariasa miqira aqara ainaina moomoo uqeeree mariafanoo.

*Faiqi naunduraindaraafa faiqi putaa idanoo.*  
(Mat 15:10-20)

<sup>14</sup> Yisufa miqi qimaseenoo Farisai amaana ufa qimarusa niqiseenoo miqoo faiqi anaasee moomoo marusa kafaaf naaramaseenoo aniaqee qufaqa aniroofanoo qimanniminoo qinau. Innee aiqamausa qini ufa irisee amiqimmasee iriaraasiqa. <sup>15</sup> Sia moo ainaina fannoo faiqi anaasee ooki namasainanoo mifa maaqinaki putaamma amaqaannoo faiqi anaasee naunduraindari urimari manda ufafa mifa faiqi putaamma nimaqaaidanoo. <sup>16</sup> Innee naaqoo faqaasa kai naaqoo iriani.

<sup>17</sup> Doo miqooqari Yisufa nari faiqi namu faqa faiqi anaasee mininniseenoo maqaki keeqafuqa mina faiqi namu ooruree mi ufana qimannimunna oosanara iraqau. <sup>18-19</sup> Iroofanoo Yisufa qimanniminu. Inni irirafa faiqi anaasee irirafa oorudupiraua mariafanoo. Sia fee innee mi ufa oosanna iri fee sia moo ainaina ooki quqasaananoo aundurai oqufi marifa sia mifa faiqi putaamma nimaqaannoo, sia aunduraki oqureenoo amuqusakifau keeqaidanoofau sia miqidanoo aranandaki oqureenoo umiqaraidanoo. Mi ufana qunannai Yisufa aigama naranara idaaqira fee kai qinau.

<sup>20</sup> Yisufa minara kafaaf nari faiqi namu qimannimidanoo qinau. Faiqi nari naundurakiqari urimari manda ufafa kai faiqi putaamma nimaqaaidanoo. <sup>21-23</sup> Faiqi aunduraki amuqusa ookiqari manda irirafa kambiqaidanoo faiqi rarisameeqeenoo mandainaina mararanaki quqannisaidanoo, mifa kai rarisameeqeenoo aqaranaki faqa ainaina ummuariranaki faqa faiqi kuqa nariranaki faqa faiqi anaasee nari ummuari nari ummuariranaki faqa moosa ainainara rirana faqa oosana oosana mandoosana faqa nari nikaruqirana faqa nari nifaqa kooroo irana faqa nariara nariara rairai qirana faqa nariara nariara munuqi miniqirana faqa nari afaqa amooqirana faqa furufarira oosana faqa mifauqaindi faiqi naundurakiqari ururee marifa mifauqa kai faiqi anaasee putaamma nimaqaaidanoo.

*Yisufa aamina maqanna anaasee araamuna findifufa.*  
(Mat 15:21-28)

<sup>24-25</sup> Yisufa mi maqa maaqana minniseenoo moo maqa maaqa Tiree maqa maaqaki oonureenoo moo maqaki faiqi anaasee maqee maqee qinee funnanai anunannai ititee mariafaqa sia qiqafaqee qimasee qumee ireeda keeqanau. Sia mifa amana kukeeqaranaki marinau. Anaasee moo fannoo nari araamuna aundurai qooqeenaa faafasaaqa marufanoo Yisufa ani marunara iriseenoo aniree Yisuna amuqusa ookiqari dadaaqirana dadaaqinanoo findifuanifeera mina aikuki maqasaa rumafinau. <sup>26</sup> Mi anaaseefa

Siria maqa maqaqiqari Fooeenisia maqusaki kambiqarafa aanaamuru anaasee marufa anireenoo Yisunara qini qiraamuna aunduraki mari qooqeenaa faafasaqa aqiqainanoo rafudamaki fuani fee qufanoo Yisufa qimaminoo qinau. <sup>27</sup> Maasa Isaraee maqannaa Anutuna faiqi namuara foora mariasa misa naaree narana nimirafa andeeqanoo maridanoo. Faiquqaindi narana marasee fainiuqa aqu niminafa sia andeeqanoo maridanoo fee qufanoo mi anaaseefa qinau. <sup>28</sup> Oo maa fasiqa faiquqaindi naidaqa ataraasa fainiuqa aniree neemariasa maridaqa. Kuqaa qinee aanaamuru fainiara foora maridaqa ataraasara kai qinee innaaru qidaqa. <sup>29-30</sup> Miqi qufanoo Yisufa qimaminoo qinau anee mi ufana qiannana akiaqara doo ani maaqai fua. Doo ani faiqi aunduraindari doo faafasaqa rafudamaki finoo qufanoo mi anaaseefa narí maaqai oonuree qafoofanoo doo mina araamuna qaarisa faiqaqee marufanoo kuqaa faafasaqa rafudamaki fifinau.

*Yisufa aaqoo aunirana andeeqanau.*

<sup>31-32</sup> Miqooqari Yisufa Tiree maqa maaqaki minniseenoo Sidoona maqusai keeqafi fiqummakufanoo Kariree farumma afainni ooqu ranau. Ooqu fidanoo qisaukuqara taikasee maqusa misaqa marusa finnaaqareenoo fimarufaqa akaqausa faiqi moo aaqoo aunirana ufa qirara mammaqi maruna afiqamaree mini Yisufa maruqoo mini quqasee aranaiqi qimamiqau. Anee maa fasiqanasaa aneenna asauku mundusainanoo andeeqaani. <sup>33-34</sup> Miqi qimasoofoanoo Yisufa mi fasiqana mareeqeenoo faiqi anaasee moomoo marunara iriseenoo kaqi atinai quqaseenoo narí asauku amuka faiqi aaqoo aamarai upeekaseenoo qaqaara fidiseenoo mi fasiqana amaakiri asaukunnaí auqamaseenoo oori innaarunai uqeeraseenoo nupi nupi qimaseenoo narí ufakiqari qimaminoo qinau eefafata maasa ufakiqari doo ruiqaannee qinau. <sup>35</sup> Miqi qimasoofoanoo aaqee kai mina aaqoo ititarafa ruqiafufanoo mina amaakiri rumbarafa idukufufanoo andeeqasee ufa qinau. <sup>36</sup> Ufa qimasoofoanoo Yisufa aiqamausa aranaiqi qimanniminoo qinau, sia maanara moosa qimannimiqa qinau. Yisufa kafaa kafaa qaoo qimarufaqa misa moo faqa moo faqa qimannimiqa fimariqau. <sup>37</sup> Aiqamausa mi fasiqana andeeqoonara irufanoo naaquqamasoofoqa maaqi qiqau. Doo qafaqa mifa amiqimandee idaaqamandee aiqama ainaina oosana aaurirana aurirana andeeqaidanoo. Mifa naaqoo auni mariasa faqa andeeqannisaidanoo ufa sia qiasa faqa ufa qirana nimidanoo.

## 8

*Yisufa kaifaa feemu ruisee nimufa.*  
(Mat 15:32-39)

<sup>1</sup> Yisufa Kariree nammari afainni kaqikaqoo ooqu marikufaqa faiqi anaasee suqumaree miqoo ani Yisufa maruqoo usufufanoo ufa qimannimimarufanoo qaaramoo faasaanikufanoo misa narana taikafufanoo Yisufa narí faiqi namu naarama qimanniminoo qinau. <sup>2</sup> Qinee maa fasiqa anaaseesara qimuqusammidaqa qaaramoo faasaana qini faqa mariafanoo maqee doo narana misaindi sia maridanoo. <sup>3-5</sup> Qinee sia narana nimirai kaqi niqiquanaqa fidaqa aanai kudoosaapee foora, akaqausa nianaindari ani maridaqa qufaqa mina faiqi namu irammiriqa qiqau. Maa aadana maqa maaqanaki maridaqa yai fee narana paqurimandee maa moomoo fasiqa anaaseesa nimana nimianauree qufanoo Yisufa irammirinoo qinau inni feemu naqumnee maridanoo fee qufaqa misa moodaannai qisauku dinni ani qaara marasee feemu maridanoo fee qiqau.

<sup>6-7</sup> Yisufa faiqi aanaaseera maqasaa aiqama ooqu mariaqee qufaqa aiqama ooqu marifufanoo mi feemuna dinni qisauku taikaseenoo dinni ani qaarqaqanda marasee feemu (7) maraseenoo Anutunara dufi dufi qimaseenoo ruqi ruqi maseenoo narí faiqi namu nisaukuki quqasoofaqa aiqama fasiqa anaasee amana kai nimimaree fiqau. Noodaanna kaqikaanaqa akaqana marasee dufi dufi qimaseenoo mina faqa narí faiqi namu nimisoofaqa nimiqau. <sup>8</sup> Aiqamausa neeneesoofanoo nimuaqumminau. Foo tauseenna (4,000) fasiqa anaasee nukudara foora miqoo mariuso nimuaqu inau. <sup>9-10</sup> Misa namammaree soona ataraasa Yisuna faiqi namu dinni taikasee dinni ani qaarqaqanda (7) marasee uqa rumasoofanoo Yisufa faiqi anaasee niqiqoofaqa daraanimambufanoo Yisufa narí faiqi namufaqa sipaki akaramafufanoo nammari amuaqumau moo maqa maaqai Daramanuta maqa maaqai finau.

*Innaarunai firaa ainaina uqaqifiqaanee qirufa.*  
(Mat 16:1-4)

<sup>11</sup> Miqoo Farisai amaana ufa qimarusa Yisuna faqa raiqara ufa oosana araqaq. Misa Yisuna ufaanara foora fufusee aruanifeera qimasee Yisunara faiqi sia auqaqaaqaa ira ainaina auqamasainaqaa maasa aniara kuqaa Anutuna faiqifee qianaara. <sup>12</sup> Miqi qimasoofoanoo Yisufa narí aundurai qimiridanoo qinau. Akasaa yairee fee inni manda



oosana taikaannoo fee, qimaseenoo akooqoo qimanniminoo qinau, nanaree maqee mariasa mookira ainainara maqee maqee findifinaqa qafaanee qida fee, doo qinee qimannimidaqa sia qinee miqimandee Anutuna afeekara kooroomasee uqannifiqaanau-ranoo.

*Ooruku anoona kikiqa usiranara rufiaaqa.*

*(Mat 16:5-12)*

<sup>13-14</sup> Miqi qimasee Yisufa kanuqaki akaramafinoo Kariree nammari amuaqumau dinni afainai fidaqa kaqi kaaqoo nammari qambaana oonuree mina faiqi namu aafaqara aunusoonara moodaa feemu kai marufaqa aiaaee qiqau. <sup>15-16</sup> Yisufa naranara aiaaee qunara iriseenoo moo ainaina kikiqa ususeenoo qimanniminu. Innee amiqimmasee au-fariaqa, Farisai amaana ufa qimariasa faqa Eeroodeena faqa minauqa feemu ooruku ati qaranara rufeeqaa auforiaqee qufaqa mina faiqi namu iriseeqa tautumasee nari qimami nari qimamiqa qiqau maasa aafaqa sia maree anunnanara mi ufanara Yisufa qidaqinoo fee qiqau. <sup>17</sup> Yisufa faasai misa ufa iriseenoo qimanniminoo qinau. Innee nanaree aafaqa sia marinara nari qimami nari qimami qidee Innee sia fee iridaqee. Inni irirafa kaqi fee ummaara raidanoo fee <sup>18</sup> Innee nifu faqaasa sia fee qafaadee, innee naaqoo faqaasa sia fee iridee. <sup>19</sup> Qinee moodaannai qisauku (5) feemu ruqi ruqimmasee faifa tauseenna (5,000) fasiqa anaasee nimiafannanara sia fee innee naaqooki oonumafi iridee, innee mikari naqumma uqee ataraasa uqariqee iqau, qufaqa misa qiqau qisauquqara taikasee qikunni oogu qaara marasee (12) uqa riqiafana. <sup>20</sup> Miqi qimasoofanoo Yisufa kafaa irammirinoo qinau kafaa qinee dinni taikasee dinni ani qaara marasee (7) feemu ruqi ruqimmasee maqi tauseenna fasiqa (4,000) sia kasoo fasiqa moomoo fasiqa uqanna nimiafanaqa naqumma uqee mina ataraasa rigee iqau qufaqa misa qiqau dinni taikasee dinni ani qaara marasee (7) uqa riqiafana. <sup>21</sup> Miqi qimasoofanoo Yisufa qimanniminoo qinau. Innee mina qafamasee sia fee qini afeekara iridee. Moodaa feemu marifa doo mina mandee nimiana amanaikammianoo.

*Beetasaida maqanna Yisufa afu maqaisanau.*

<sup>22-25</sup> Misa Beetasaida maqusai aniroofaqa faiqi moo afu dimbarana afiqee anireeqa Yisuna aaramaseeqa qiqau, amaneef afu dimbarana auqainanoo fee afu maqaannoo fee qufanoo Yisufa mi afu dimbara fasiqana asauku qumareenoo rarisameeqeenoo maqusa aqoosai quqaseenoo aqaara afuki fidiseenoo asaukuqara minasaa rusiseenoo irammiridanoo qinau, anee akaqa ainaina qafaidanee qufanoo mi fasiqafa oori uqeeraseenoo qinau faiqi qini qifusaa saqariara foor nidaqee qufanoo Yisufa kafaa nari asaukuqara mina afusaa quqasoofanoo mi fasiqafa afu maqasoofanoo mina afu amiqufanoo aiqama ainaina amiqimasee qafanau. <sup>26</sup> Yisufa qimaminu doo aneenna maqaai fua sia maqusai faiqi anaasee moomoo mariaqoo fua kaqinni andandandanai fua qufanoo doo finau.

*Peetooroofa Yisunara Anutuna asauku mundira fee qinau.*

*(Mat 16:13-20; Ruk 9:18-21)*

<sup>27-28</sup> Yisufa nari faiqi namu faqa miqooqari Seesareea Firipi maqusa, mina maqa maaqaki maru maqusanakiaqa finau. Aanai fidanoo nari faiqi namu iranau, innee iriaqa faiqi anaasee qiniara ya fasiqanee fee qidee qufaqa misa qiqau akaqausa aniara Yoothaneefa nammari nimi mari fee qidaqa akaqausa aniara ooqeenaa tamummaqara fasiqa Eeriaa fee qidaqa, akaqausa aniara ooqeenaa tamummaqarasakiqari moo fannoo kuqiranakiqari findifinoo maridanoo fee qidaqa. <sup>29</sup> Miqi qufanoo Yisufa nariara qinau innee qiniara naneef fee qidee qufanoo Peetooroofa qinau anee Anutuna asauku mundirafa mariananoo. <sup>30</sup> Miqi qufanoo Yisufa afeekaikamandee qimanniminu. Doo kuqaa uqanna qiananoo. Sia innee minara qiniara akaqausa qimannimiaqa, umeendaqa.

*Yisufa nari kuquaninnanara qimanniminu.*

*(Mat 16:21-28; Ruk 9:22-27)*

<sup>31</sup> Miqi quqooqari nari kuquaninnanara oosana arasee nari faiqi namu qimannimidanoo maaqi qinau. Qinee faiqi nimaaku firaa aupurarana maraanaura. Faiqi firasaa aanaigikirausa uriqararausa faqa Mooseena sandufa akoofasauqa faqa misa qini minniqisee nikooqaannoo. Misa qini kuqa darusaifanoo qaaramoo faasaana aiqarainanoo Anutufa mara qini findifumaqisaannoo. <sup>32-33</sup> Yisufa akooqoo uqanna nari kuqiranara qimannimunara Peetooroofa irufanoo akooqoonara Yisuna mareeqee aaduma quqaseenoo qaoqo qunara Yisufa quandaki nari faiqinamu nindafamaseenoo Peetooroona aqinoo qinau. Oo Peetooroo anee Sadannafa anee see fua, ani irirafa faiqindi maridanoo sia Anutunaindi.

<sup>34</sup> Miqi qimaseenoo nari faiqinamu faqa naarama quqaseenoo qimanniminoo qinau, moo fannoo qini faqa fuani qinafa nari maaqoo mariranara minniseenoo qini ufa saara

qini daanna ramasee eedoo qimasee kuqiranaki fuannoo. <sup>35</sup> Moo fannoo narí marirana amiqimasee rakisianee qinafa mifa narí marirana kakasiannoo moo fannoo qini saara qini amiqira fasaasa ufa saara kuqarinafa mifa narí marirana asumu maraannoo. <sup>36</sup> Moo fannoo aiqama maqa maqa rakisiranatia kammafinanoo nariara minakinaa aiqama ainaina maraseenoo narí aunduraindaraana kuridiranaki finoo nana ureeqara fasiqa mariannoo sia uriqararafa mariannoo. <sup>37</sup> Faiqí anaasee kuquffifaqa nana maqasaa taikaaninna ainaina Anutuna amisee naundurakinaana kuridiranakinaana mareeqee asumu mariranakina quqaannoo fee sia amana kaifaa maraannoo. <sup>38</sup> Faiqí anaasee moo fannoo maa maqee maria manda aukuanasaa qiniara faqa qini ufara faqa faiqí nifusaa asaurusee nikooqainausa qinee faiqí nimaaku qeeqa qikoona areenrana nam-ufafa naaquqara andeeqara qangiroouqa faqa innaarunaindari qumureeqa mi fasiqa anaaseesara faqa qisaurusee qikooqaannoo.

## 9

<sup>1</sup> Yisufa kaqi qimannimidanoo maa ufana faqa qimanniminoo qinau, innee iriaqa innee maaqoo mariasakiqari akaqausa sia kuqirai kaqi marina kamuqoo Anutuna ququsa afeekaikamandee qumirana innee mina qafeefaranoo. Sia taikara faasaanara qidaqa kaqi kasaqaindari qumiranara qidaqa.

*Aqaanasaa Yisufa innaaruna afiri maranau.*  
(Mat 17:1-13; Ruk 9:28-36)

<sup>2</sup> Doo miqooqari dinni qisauku taikasee dinni ani moodaa marasee afuru faiqeenoo doo findimeeqeenoo Yisufa Peetooroona faqa Yameesana faqa Yoothaneena faqa doo minamusa faqa aqana kisaagasaa nifiqamaree oorureenoo aadumasaa sia faiqí maruqoo oorureenoo miqoo misa nifusaa Yisuna afaaqa qamunna moo kammafinau. <sup>3</sup> Mina qamunna aiqama dupuqa aruaqufufanoo aiqama eekara aruaqufufanoo nifu faqa daroo daraa inau. Sia maqasaaqaraa fasiqa amana qamunna miqimandeeqa namhari uqusaifanoo eekara arinoo dupuqara maqi aruaquannoo. <sup>4</sup> Eeriaasa faqa Mooseesa faqa ooqai tamummaqara fasiqaqanda maridaqa kuqifa ooru fuqanda miqoo aqaanasaa Yisuna faiqinamu nifusaa kooroomafuafa Yisuna faqa ufa qimarufaqa Yisuna faiqinamu nindafaqau. <sup>5-7</sup> Nindafaidaqa firaqoo maparaaida rufiaidaqa ufa qiranara randee marufanoo Peetooroofa Yisuna aaramaseenoo qinau Oo ufasaa rakisira maasa maaqoo marunanoo amiqimminoo amanee maasa maaqoo uqiqaana maqa qaaramoo auqunaaree, aniara moo Mooseenara moo Eerianara moo usakaanaaree. Rufiaqa rufiaqidanoo ufa qiranara randoosia miqi qinau. Miqi qimasooqanoo asuru fannoo anireenoo aiqama misa dukunimaqasoofanoo asurukiqari ufa moo kambiqeenoo maaqi qinau. Maafa qini qimuqusira qimaaku marifa, innee mina ufa kai iriaqa. <sup>8</sup> Yisuna faiqinamu mi ufana iriseeqa kaqi kaqi miqoo munu randee mini randee ufanoo, sia faiqí miqoo marufanoo Yisufa kai miqoo misa faqa marinau.

<sup>9</sup> Mi ainainafa taikooafaqa misa Yisuna saimbaqa mi aqaannasaqari ooqu fimarufanoo Yisufa maaqi qimasee afeekaikamandee qimanniminau. Innee meerai aqaanasaa qafaanara ooquree sia uqanna qimannimiaqa. Qinee faiqí nimaaku kuqiranakiqari findi fuannaqoo miqoo kai qimannimiaqa. <sup>10-11</sup> Mi faiqinamusa eedoo qimasee sia qimannimigau, Yisufa kuqiranakiqari findifuaninnara minara kai narí qimami narí qimami umee kai qimariqau. Misa miqi qidaqa Yisuna iramiriqa qiqau, Mooseena sandufa akoofasauqa minakiqari maaqi qidaqa. Faiqí moo fannoo Eeriaafarafo qira fasiqa mifa naaree findifumafinanoo miqooqari Anutuna asaaku mundirafa kambiqaanoo fee qidaqa. Misa miqi qidaqa nanee fee qidee miqi qidee qufanoo Yisufa maaqi qimasee qimanniminoo qinau. <sup>12-13</sup> Kuqaa Eeriaafara maqi kambiqafinoo asauku mundirausa qinee aniannara deedaqinoo. Doo qinee inni qimannimidaqa. Doo Eeriaafara maqi moo auqu Yoothaneefa namhari nimimarufa doo ooqai kambiqafi marufaqa faiqí anaasee akaqausa sia irirai tamummaqarausa ufamau fiqa narí manda nidiranakoo mareeqee mina kuqarusaqau. Qinee kafa innimma irammirianaura tamummaqara fasiqauqa nanaree misa faiqí nimaakuara aupurarana firaana amiseeqa mareeqee aquseefaree.

*Yisufa kumaaraa aundurai afaanna aqiqanau.*  
(Mat 17:14-21; Ruk 9:37-43)

<sup>14</sup> Misa miqi qimammaree aqaannasaqari ooqu fiufaqa Yisuna faiqí namu akaqausa sia ooru fusa maruqoo ooqu paqurimasee faiqí anaasee moomoosa suqimarufaqa ooqu nindafaqau. Mooseena sandufasaa rakisimarusa akaqausa miqoo faqa maridaqa Yisuna faiqí namu faqa ufa rainnee mariqau. <sup>15</sup> Faiqí anaasee Yisuna qafamasee tautumasee

sandee mifunnai oonureeqa amandaqau. <sup>16-17</sup> Yisufa anireenoo narí faiqi namu qi-mannimino qinau, nana ufaree innee Mooseena sandufasaa rakisi mariasa faqa ufa rainaidee qufanoo faiqi moo fannoo faiqi aanaaseekiqari Yisuna qimaminau. Qinee qeeqa qimaaku afiqee anee ianannai anidaqa. Manda afaanna fannoo mina aunduraki keeqafi marifanoo siamma ufa qidanoo. <sup>18</sup> Mi afaannafa mi faiqina arifanoo maqasaa kuqaki kuqaki aquffanoo aiku asauku pipisaaqa qusuffanoo amaqqini datimambifanoo ookiqari qaqaara kai aniraidanoo. Qinee ani faiqi namu maaqoo mariasara afaanna afaqaqee qunaqa misa miqiafanoo sia amanaikifaqa ani qimamidaqa.

<sup>19-20</sup> Yisufa iriseenoo aiqama faiqi anaasee qimanniminau. Inni firaqoo uqanna sia irirana qinisaa rusimarifanoo qinee kisaagasaa fee inni manda furufarira ummaara dadaaqqia nuanauree. Mi kumaaraana aqqamaree mai aniaqa qufaqa misa mi kumaaraana afiqee munusoofanoo minakinaa afaanna fannoo Yisuna qafamaseenoo mi kumaaraana mareeqeenoo fuseenasana aaku amaqaseenoo maqasaa rutuku quqasoofanoo mi kumaaraafa maqasaa aqufinoo quanda qaandi marufanoo qaqaara ookiqari ururama teeqinau. <sup>21</sup> Yisufa mina akoona irammirino qinau maafa kisaagasaa maaqqinoo mari fee qufanoo mina akoofa qinau Eeoo faiqi aanaaqisaaqari miqi marinau. <sup>22</sup> Moomoo kari mi afaannafa mina kuqaruane qimaseenoo idaki fee nammariki fee kaqi mara aqi marufa maridanoo. Anee amanaikinana maasara amuqusinana dadaaqqia. <sup>23</sup> Yisufa iriseenoo qinau sia qiniara amanaikiannee qia aneenna kai qinisaa irirana rusiranara kai iria. Faiqi Anutunasaa irirana rusimarifa aiqama ainaina amanaikammianoo.

<sup>24-26</sup> Mi kumaaraana akoofa mina iriseenoo faaqa quqaseenoo Yisuna qimaminoo qinau eeoo qinee anisaa irirana rusimarunasa maridaqa sia amanaikidaqa anee dadaaqqia qufanoo Yisufa faiqi anaasee dindari dindari ani usufufanoo nindafanoo misa qini ititaqimaqeefoo qimaseenoo mi kumaaraana aundurakinaa afaanna amambaina qimamiseenoo qinau. Qinee ani qimamidaqa mi kumaaraana aundurakiqari rafudamaki sandamafinana sia uqanna kafaana ni keeqaa qufanoo mi afaannafa faaqa quqaseenoo fira fuseena sana mi kumaaraana aaku amaqaseenoo maqasaa rutuku quqaseenoo doo raudamaki sandamafufanoo mi kumaaraafa kuqiaara foora maqasaa rumafufanoo aiku asauku pipisaaqa qususeenoo kuqiaara foora mambinau. Miqi mambufaqa faiqi ani qafee doo kuqiifoo qiqau. <sup>27</sup> Miqi qufanoo Yisufa mina asauku qumaroofanoo doo findi finau.

<sup>28-29</sup> Miqooqari Yisufa moo maqaki keeqafufaqa mina faiqi namu kukeeqasee aniree irammiriqa qiqau. Maasa nanaree mi kumaaraana aundurakinaa afaanna aqiqarara anuqi fee qufanoo Yisufa qinau Anutunara innaaruqirafa kai miqira afaannauqa niqiqaina fifaranoo sia moo ainainannai niqiqeefaranoo.

*Yisufa narí kuquaninnanara qimanniminau.*

*(Mat 17:22-23; Ruk 9:43-45)*

<sup>30-31</sup> Misa mi maqusanaindari quqasee Kariree maqa maaqaki narí faiqi namu faqa faiqi anaasee sia iriaqee qimasee narí faiqi namu oosana oosana ufa qimannimiani qimaseenoo fidanoo Kariree maqa maaqakiqaa fidanoo qimannimino finau. Mifa maaqi qimasee qimanniminau. Faiqi misa qini faiqi nimaaku qumareqee faiqi nisaukuki quqaqisafaqa misa qini kuqa darusaifanoo qaaramoo faasaana aiqarainanoo Anutufa kuqiranakiqari qini mara findifumaqisaannoo. <sup>32</sup> Mina faiqi namu mi ufana iriseeqa sia mina oosanara iriqau irammirirana faqa sia irammiriqau rufiasee kaqi mariqau.

*Yisuna faiqi namu yafee maasaki uriqararafa maridanoo fee.*

*(Mat 18:1-5; Ruk 9:46-48)*

<sup>33-34</sup> Misa Kapeeranaumma maqusai anireeqa maaqaki keeqafufanoo Yisufa narí faiqi namu irammirino qinau. Maasa aanai animarunaqa innee nana raigara ufee qifee misa nisaurusee sia qimamiqau. Misa narikiqari yafee uriqararafa mariannoo qimasee minara raieqaa nisaurusee sia Yisuna ufa qimamiqau. <sup>35</sup> Yisufa oogu marifinoo narí faiqi namu aiqama naaramasee mai aniaqee qimasee maaqi qimasee qimanniminau. Faiqi moo fannoo maqasaa mariasaki uriqararafaikinafa mifa narí kai ureeqaranaki fuannoo mifa aiqamausa dadaaqidanoo amiqira saika faqa nikoqeeemari saikana faqa dadaaqqianoo. <sup>36</sup> Yisufa miqi qimaseenoo faiqi aanaaqi moodaa mareeqee misa noorinni kikiqamaseenoo asaukunnai mina kaqaramma qumareenoo qimannimino qinau. <sup>37</sup> Faiqi anaasee moo fannoo maaqira kaqikaa faiqi qini ufara irisee oonu asasamasee aqoondikinafa sia irirainni qini Yisusa faqa qiqoondikidanoo. Yafee moo fannoo qini oonu qifiqainafa sia qini kai qifiqaannoo qini diqiqoona faqa oonu aqqaidanoo.

*Moo fannoo Yisuna auqusaa afaanna aqiqanau.*

*(Ruk 9:49-50)*

<sup>38</sup> Yoothaneefa Yisuna qimaminoo qinau, Oo ufasaa rakisirafa faiqi moo fannoo moosaa manda faafasaaga naundurai mariasa ani auqusaa qimasee niqigeemaru qafaqiafana, mifa sia maasaki nimarufa marunara qaoo qiafana. <sup>39</sup> Yisufa mina iriseenoo maaqi qinau sia minara qaoo qia. Mifa qini duqusaa moo firaa ainaina auqamaseenoo sia amana quandaki qini diqiannoo. <sup>40</sup> Maasa aana ititee mariasa maasa namuqaa maridaqa. Sia maasa aana ititee mariasa sia namuqaa maridaqa maasa qifeegaree mariasa maridaqa minara sia mi fasiqanara qaoo qia. <sup>41</sup> Innee maa ufana iriaqa Innee nammariara nidinaqa innaaru qifanoo faiqi moo fannoo inniara asauku mundirana faiqi namu mariafanoo fee qimaseenoo nammari inni nimiranoo Anutufa mina akiaqara mi fasiqana innaarunai quqamaqaannoo.

*Kaqa runna mareeqee quqarafa mina akiaqara uriqararafa.*  
(Mat 18:6-9; Ruk 17:1-2)

<sup>42</sup> Miqi qimaseenoo Yisufa mi kaqikaa faiqina faasai misa noorinni kikiqunara kafa qimanniminoo qinau, maaqira kaqikaa faiqi irirana qinisaa rusimarinafa moo fannoo mina mandoosana uqafiqainafa mi fasiqafa Anutuna firaa aqurararana ameeamanai mariannoo. Misa miqinna fasiqana qumaree firaa oonitaa anukaki quqasee rumbasee afeega amifanoo ooruku nammari kaqifinoo kuqinoo oonu dupira arirafa mariannoo. Kaqikaa faiqi qinisaaqaraa irirana moosaa ubeekke marinafa firaa arirafa mariannoo. <sup>43</sup> Aninna asauku fannoo anirarisameegeenoo mandoosanaki ubeekke marina mina ateeqa aqua. Moodaa asauku faqaafa naaru asumu mariranaki firafa amana maridanoo. Aiqaama asaukuqara faqaafa naaru naaru sia qimbeemari idanaki firafa mandaikirafa maridanoo. [<sup>44</sup> Miqoo naaru naaru kadiaru sia kuqidanoo kaqi maridanoo ida faqa sia dimbee marifa kaqi qaida mariannoo.] <sup>45</sup> Aninna aiku fannoo ani rarisameegeenoo mandoosanaki ubeekainnana mi aikuna ateeqa aqua. Anee moodaa aiku faqaafa naaru asumu mariranaki firafa amana maria. Aiqaama aikuqara faqaafa idaki aquifirafa sia andeeqanoo mariani. [<sup>46</sup> Mi idanaki faiqi neemaria kadiarusa sia kuqidaqa ida fannoo faqa sia qimbaidanoo.] <sup>47</sup> Aninna afu aaqoo fannoo ani mareeqee Anutuna ufamau firanakiqari kaqinni ubeekke marina mina imbasaa. Anee moodaa afu aaqoo faqaafa Anutuna ququsaki keeqarana amana maria. Qaara afu aaqoo faqaafa idaki aquifirafa sia andeeqanoo mariani. <sup>48</sup> Miqoo faiqi neemaria kadiarusa naaru naaru sia kuqidaqa ida faqa naaru naaru sia dimbaida kaqi qaida maridanoo. <sup>49</sup> Anutufa ida qumareenoo nimanamandee qafarana ooruku anoonara foora aiqama qusasaa adia nimaqainafa Anutuna ufasaa mapukufi mariaqeeru nimiranoo. <sup>50</sup> Ooruku amiqira ainaina maridanoo mina adiafaa irafa taikafinanoo naqimmasee adiafaairana maraannoo fee sia amanaikiannoo. Innee inneeqa naunduraki narinni narinni ooruku faqaasara foora maridaqa narinni narinni asoaranaki mariaqa.

## 10

*Faiqi anaasee nariara nariara minnisarana qaoo qirafa.*  
(Mat 19:1-12; Ruk 16:18)

<sup>1</sup> Yisufa mariu maqusana minniseenoo Yudeeaa maqa maaqaki ooqu finau. Yooradanna nammari taqamareenoo dinni afainni fufaqa faiqi anaasee moomoosa mifa maruqoo aniroofanoo nari oosana maraseenoo ooqu marifinoo Anutuna fasaasa ufa qimannimiranau.

<sup>2</sup> Farisai amaana ufa qimarusa akaqausa Yisufa maruqoo aniree ufaanara foora fufusee Yisunara minaki aruanifeera maaqi qimasee narikai nari qimami nari qimami qiqau, Maasa faiqi nari anaqa minnisarana irammirifanoo Yisufa minara aaqara ufa qinaqa mina ummarasee aruanaura. Miqi qimasee akoqoo Yisuna qimamiqau, Oo Yisu maasa Mooseena sandufa faiqi moo fannoo nari anaqa minnisaranara eedoo qidanoo fee sia fee eedoo qidanoo. <sup>3-4</sup> Miqi qufanoo Yisufa iriseenoo irara ufa kai qimanniminoo qinau Mooseefa minara nana aaquqira ufa qimanniminoo fee qufaqa misa qiqau, Mooseefa nari ninaaqmaaka aqiqara papiqa akara rumeeqee nimiseega niqiqaaqee qidanoo. <sup>5</sup> Yisufa mina iriseenoo maaqi qimasee qimanniminoo Mooseefa inni irirafa mandaikinaru inni ni muqusa sia amaqi marifa ooni miqirafa amatooki marunara iriseenoo akoo akaa maseenoo inniara inneeqa ninaaqmaaka minnisaaqee qinau. <sup>6-8</sup> Ooqai indaaru Anutufa aiqama ainaina auqu quqaqoo aukuaana sia miqinoo marinau. Miqoo akee faqaana faqa afaamu faqaana faqa auqu quqanau, miqi maqoonara kai faiqi aiqama nari anoofa akoonu minniseenoo nari aanaaqasaa atooqafinanoo moodaafaikamambi marifaranoo minara sia kafa misa qaaraikamambi marifaranoo moodaafaikamambi marifaranoo. <sup>9</sup> Miqinoo marinaru Anutufa atooqaqoo ainaina sia uqanna faiqi rakeeiaqa.

<sup>10</sup> Yisufa maaqaki keeqafufaqa mina faiqi namu aniree anaasee minnisaranara qunara iroofanoo mifa qimanniminoo qinau. <sup>11</sup> Faiqi moo fannoo nari anaaga minnisee moo anaasee marainafa mi indaaruaa anaaseena mandaikammamaqeenoo nari mi fasiqafa ummuariranaki mariannoo. <sup>12</sup> Miqi kai inoo anaasee moo fannoo nari afaaqi minnisee moo fasiqa marainafa ummuarirana mareenoo miqiannoo.

*Yisufa faiqiuqaindi nifaaqooqa qinau.*

*(Mat 19:13-15; Ruk 18:15-17)*

<sup>13</sup> Faiqi anaasee akaqausa nari faiqi aanaaqiuqa nifiqee Yisufa nari asauku faiqi nikaqasaa quqasee nifaaqooqa nimianifeera nifiqee aniroofaqa Yisuna faiqi namu misa farafara qifoo qimasee niqigau. <sup>14</sup> Yisufa miquna qafamaseenoo nari faiqi namu aanoommasee qimanniminou. Saina faiqi aanaaqiuqa qinee marunannai aniaqa. Sia misara qaoo qiaqa Anutuna ququsa miqirausaindi marinara sia qaoo qiaqa. <sup>15</sup> Innee maa ainainnara kai irisee sia aunuqa, faiqi anaasee moo fannoo sia kaqikaa faiqi naanna ramasee Anutuna ququsa marainafa naaru naaru mariranaki sia uqanna keeqefaranoo. <sup>16</sup> Yisufa miqi qimasee nari faiqi namu qimannimiseenoo faiqi aanaaqiuqa oonumafi aripinna qumareenoo aiqamausasaa asauku quqaseenoo nifaaqooqa qinau.

*Ainaina faqaa kumaaraa Yisuna faqa ufa qinau.*

*(Mat 19:16-30; Ruk 18:18-30)*

<sup>17</sup> Yisufa moosaa fidanoo aanai fimarufanoo faiqi moo fannoo afaqanoo fiufufanoo aanai oonu Yisuna paqurimandeenoo mina oorinni oonu aqoori saunara fufanoo qimaminou Oo amiqira andeeqara ufasaa rakisirafa nana kadaapi fee Anutuna rumamaqaananoo fee naaru marirana qimiannoo fee. <sup>18</sup> Miqi qufanoo Yisufa qinau anee nanaree qiniara amiqira fee qidanee. Sia moo andeeqarafa maridanoo Anutufa kai andeeqarafa maridanoo. <sup>19</sup> Anee Mooseena sandufa irimariananoo mi sandufafa maaqi qidanoo sia anee faiqi anaasee moodaa faqa kuqarua sia anaasee ummuaria sia ainaina ummuaria sia siaasinnai oonu moonara unufa qia, sia moosa ainainara amuqusinana unnaqimasee maraa, aneenna anoofa akoonara amiqimasee ufa qimasee misa nuqu uqeeraa. <sup>20</sup> Miqi qimasoo fanoo mi fasiqafa Yisuna qimaminoo qinau, Oo ufasaa rakisirafa qinee ooqi faiqisaa mi ufana iriisee mi mau fimarunaua maridaqa.

<sup>21-22</sup> Mi fasiqafa miqi qufanoo Yisufa minara aidufanoo andeeqasee mi fasiqana oori qafamasee qinau. Anee moodaa ainainara kai sia auqaananoo. Anee aneenna ainaina aiqama marasee faiqi akaqausa nimisee minasaa munnimma maraseenana kudi fasiqausa nimisainanoo ani qumiasana ani afeesara innaarunai mariannoo, miqinana doo ania, doo qini faqa aniree fua qufanoo mi fasiqafa mina iriseenoo nari moomoo ainaina marunara amuqusufanoo oori runusee finau.

<sup>23</sup> Mifa fufanoo Yisufa quandakinoo nari faiqi namu qimanniminoo qinau, ainaina moomoo faqaasa Anutuna ququsaki keeqaranara anuqifaranoo. <sup>24</sup> Yisuna faiqi namu ainaina faqaasa innaarunai fifarannoo fee qiqiusa mi ufana iriseeqa tautufanoo Yisufa kafia qimanniminoo qinau. Oo qini faiqi namu Anutuna ququsaki keeqaranara kadaapiri marifa maridanoo. <sup>25</sup> Kameera qoosa fooqaa aandau uka aamarai keeqarara anuquannoo, ainaina faqaasa Anutuna ququsaki keeqaranara fiqaramasee anuqaa mareefaranoo. <sup>26</sup> Yisuna faiqi namu mina irisee firaqoo tautumafufaqa naaquooqafa nari qimami nari qimamiqau, Ainaina faqaasa sia innaarunai fifaqa yafee asumu mariranaki fuannoo fee sia moo fannoo amanaikiannoo. <sup>27</sup> Yisufa mina iriseenoo andeeqasee misa noori qafamaseenoo qimanniminoo qinau. Mi ainainna sia faiqi amanaikimari ainainafa maridanoo Anutufa kai amana aiqama ainaina amanaiki marifa maridanoo.

<sup>28</sup> Peetooroofa mina iriseenoo Yisuna qimaminou. Qafa, maasa aiqama ainaina quqaseeqa kaqi samu uqanna ani faqa fidaqa qufanoo Yisufa nari qimaminoo qinau. <sup>29-30</sup> Kuqaa qiananoo, qinee maa ainainnara faqa qimannimidaqa moo fannoo qiniara faqa qini amiqira fasaasufara faqa nari maaqa fee nari akaqaafasaa fee nari asooki-nee nari anoonee nari akoonee nari faiqi namu fee nari maqa maaqa fee minauqa minnisainafa mifa maqee maria kamuqoo moomoo maraannoo. Maaqauqa faqa akaqaafasaa faqa asoommaaka faqa anausa faqa faiqi namu faqa maqa maaqa faqa moomoo fiqaramasee firaqoo maraannoo, qini ufasaara arirana faqa maraannoo. Maqee kamu miqimasee maraannoo naaru anianinna kamuqoo naaru asumu marirana faqa maraannoo. <sup>31</sup> Maqee maria kamuqoo moomoo uriqararaua kasooqaqee innaarunai ureeqaraua marifaranoo. Maqee maria kamuqoo moomoo ureeqaraua misa kasooqaqee innaarunai uriqararauai kifaranoo.

*Yisufa kaiqaa nari kuquaninnanara qimanniminou.*

*(Mat 20:17-19; Ruk 18:31-34)*

<sup>32</sup> Yisufa nari faiqi namu faqa Yeerusareenni ooru fidanoo indaaru fufaqa mina faiqi namu mina aanaaqiana ooru fidaqa Yeerusareenni faiqi firaasa Yisuna ariraree qimaru ufana nari iriaqeida rufia rufiammiqa ooru fimariqau. Faiqi anaasee namufaqa ooru fusa misa faqa nimukee marufaqa ooru fiqau. Ooru fidanoo nari faiqi namu qisaukuqara taikasee qikunni ooqu qaara mararausa naaduma mara quqasee nariki kambigaaninna oosannara nari kuquaninnanara qimannimino qinau. <sup>33</sup> Innee iriaqa maasa Yeerusaree maqusai ooru raanaqa faiqi misa faiqi nimaaku qini qumareeqeeqa amaana maqasaa aanaiqikirausa uriqararausa faqa Mooseena sandufa akoofasauqa faqa misauqa nisaukuki qini quqeeffaranoo. Misauqa qiniara ufa qimaseeqa kuqiranaki qini mara quqaseeqa miqooqari mareeqee aanaamuru nisaukuki quqeeffaranoo. <sup>34</sup> Anaamuru qini mara quqaseeqa ataasa ataasa qima qimaqaidaqa niqaara qini qifaaqai fidisaida qini qummairi qima qasaida, uiaqa samu qumaree qini firaqoo qini qifaaqa ateekeesse kuqa darifaranoo. Qaaramoo faasaana aiqarainanoo Anutufa qini mara findi fuanno.

*Seebeedina amaakuqara innaarunai uriqarara qiqau.*

*(Mat 20:20-28)*

<sup>35-37</sup> Seebeedina amaakuqara Yameesasa Yoohaneesa Yisufa maruqoo anireeqa qiqau. Oo ufasaa rakisirafa moodaa ainaina maasa aniara qimianne qianauree qufanoo Yisufa nana ainanee qufaqa misa qiqau, anee aneenna areenarana innaaruna ququsaki keeqafina aneenna qaraisaa ooqumari finaqa maqanda ani aaqa moo fannoo dinni moo fannoo dinni amanee ani aaqa uqanna ani afaagasaa aqoondi kammafi fee maqanda faqa uriqararusaikiqa marianauree, qufanoo Yisufa qimannimino qinau. <sup>38</sup> Innee inneeqa iraa ainanara sia irimariafanoo fifau fafaummi mariafanoo. Qinee manda nammari naannana innee faqa amanee neefaree. Qinee kuqira nammari ruanaga innee faqee amanee rifaree qufaqa miqanda qiqau amana maqanda ruanauree qufanoo <sup>39</sup> Yisufa qinau Inneeqara kuqaa qini manda kuqira nammari neefaranoo, qini kuqira nammari rumaqimaqee fandinnana inneeqara faqa rifaranoo. <sup>40</sup> Qini daaqa uqanna qini qifaagasaa qiqoondi innaaruna ququsaki dinni dinni ooqu marirafa sia qinindi, Anutufa akaqausaree qimasee deedaqamaqoosa mifa kai misa nimianno.

<sup>41</sup> Yameesasa Yoohaneesa mi ufana ooru Yisunara iroonara akaqausa qisaukuqara fasiqa mina iriseeqa miqandara aanoo iqau. <sup>42</sup> Yisufa mina iriseenoo aiqamausa naarama nari unnai quqaseenoo qimanniminu, innee maa maqasaaqarasa oosana irimariafanoo faiqi misara uriqararausee qimariasa nari aanoonai faiqi anaasee kaiqeesara rakisi nimaqee mariasa. Misa uriqararausa ureeqararusa amiqimmasee misa uriaaqarama nimaqaidaqa. <sup>43</sup> Misa oosana miqimminoo maridanoo Inniki sia miqinoo marianno, Inniki moo fannoo uriqararafaikiraree qimarifa mifa aiqamausa dadaaqidanoo amiqira saika faqa nikooqeemari saikana faqa dadaaqamannimaqee marifa marianno. <sup>44</sup> Innikiqari moo fannoo nari kai indaaru nikaqaikianee qinafa mifa nari kai eedoo qimasee aiqamausa dadaaqira karabusa saiki marifara foora aiqamausa dadaaqidanoo miqi marifa marianno. <sup>45</sup> Innee qini qifaqaaqa, qinee faiqi nimaaku sia faiqi anaasee qini ainaina maqimaqaqeeru qumuafanausau maridaqau, qinee faiqi anaasee moomoosa ainainamma nimaqaseeqa misa Anutuna nariranakiqari feefauriraree qimasee qeeqa marirana misara kuqiranaki quqarara qumidaqa.

*Yeerikoo maqanna afu qimbarana andeeqanau.*

*(Mat 20:29-34; Ruk 18:35-43)*

<sup>46</sup> Yeerikoo maqusa Yooradanna nammari dinni afainni afaasaa maridanoo. Yisufa Yeerusaree maqusai ooru fidanoo fiqakufanoo Yeerikoo maqusai aniranau. Miqooqari findifi nari faiqi namufaqa faiqi anaasee moomoosa faqa ooru fida maqusa atinni aanasaa ooru qafoofoanoo aanai faiqi moo afu qimbarana mina auqu Baratimaeusafa Timaeusana amaaku fannoo nari oosana marasee miqimarusa aanasaa maridanoo faiqi anaasee fiqaree aiqaree imarusara narana maree maria munnimmara innaaru qimarufa marinau.

<sup>47-50</sup> Mi afu imbara fasiqafa Yisunara Nasareeteendaraa fasiqa animariifoo qufanoo kafa kafa faqa quqasaida nammeera maaqi qimasaida nammeera qimarinau. Oo Yisufa Dafidina ati marianafa anee qiniara irinanoo amuqusinana dadaaqia qufaqa moomoosa mina aqia qiqau doo ufasaa farafara qia qufanoo mi fasiqafa misa quna irinoo sia minnisanau misa aqurareeqee firaqoo ambufuamufanoo firaqoo faqa quqaidanoo maaqi qinau, Oo Yisufa Dafidina ati marianafa anee qiniara irinanoo amuqusinana dadaaqia. Yisufa mina iriseenoo aanasaa kasoomambino qinau aaraifanoo aniani qufaqa misa qimamiqa qiqau. Doo asasia Yisufa aniara anianne qidanoo qufanoo afu qimbarafa mina iriseenoo nari qamunna akuqoona mi saqanna

afaqimma aquseenoo doo findi finoo Yisufinnai finau. <sup>51-52</sup> Oonuroofanoo Yisufa irammirinoo qinau. Anee qiniara naqimaqisaanifee fee q inanee qufanoo afu qimbarafa qinau. Oo ufasaa rakisirafa anee kaifaa qifu maqa qisaanneera qidaqa qufanoo Yisufa qimaminoo qinau. Doo fua ani aundura qinisaa rusirafa doo ani andeeqamaqanoo maridanoo. Miqi qufanoo doo aaqee uqanna mi fasiqana afu qimbarafa maqafufanoo doo Yisuna faqa aanai finau.

## 11

*Yisufa doonkisa Yeerusaree maqusai ooru finau.*

*(Mat 21:1-11; Ruk 19:28-40; Yoh 12:12-19)*

<sup>1</sup> Yisufa nari faiqi namufaqa faiqi anaasee faqa Yeerusaree maqusa aqa ooree qaara kaqikaa maqusa nuqu Beetapaisa faqa Beetani faqa mi maqusa qanda naaqa ooree Oorifa aqana aqa ooru raqau. Ooreenoo nari faiqi namukinaana qaaraqanda Yisufa nari niqqeenoo indaaru fuaqee qimasee qimannimino. <sup>2</sup> Inneqara fimaria maqusafa marinaki oonureeqa fuka doonki akoona afaandama itirana saqarisaa sandannai anukaki qususee saqarisaa qusuqaafanoo marina paqurifaranoo. Sia faiqi moo fannoo mina ataufakasa oogu marifi fia kaqi maridanoo, innee mina sanda idukusee mi doonkina maree aniaqa. <sup>3</sup> Faiqi moo fannoo inniqarara naqi fee ida fee miqida fee qifaqa inneqara maaqi qimasee qimamiaqa, maasa uriqararafa maa doonkina saika maridanoo taikasainanoo aaqee uqanna muqu nimianoo fee qifaqa ani maraidaqa.

<sup>4-5</sup> Yisufa miqi qimasee qimannimufaqa miqanda oonuree qafoofanoo doonki akoona afaandama itirana paquriqau, mifa maqusasaa moo maaqa kooqiki mari saqarinasaa qusuqoofanoo marinau. Miqanda oonu qafee iduki marufanoo akaqausa maqusasaa marusa aniree qiqau, <sup>6</sup> Naqiraree maraidee qifaqa miqanda Yisuna ufa kai qimannimufaqa doo maree fuaqee qiqau. <sup>7</sup> Miqanda mi doonkina mara maree Yisufuqoo miniseeqa nari oosana marasee nari qamunna mina ataufakaqa ufiqisoofanoo Yisufa minasaa oogu marifinoo Yeerusareenni ooru finau. <sup>8-9</sup> Faiqi anaasee moomoosa Yisuna qafamaseeqa nari karaambaiga imaru oosanna mareeqa nari siuta raipaqueeqee aanasaa ufiqimarufaqa akaqausa saqari asaana amanee namufaqaana dinni dinni anaadookina saqari ateekeeqee aanasaa ufiqisoofanoo mi mau doonki fannoo finau. Fimarufaqa moomoosa inaaqinnai faqa oorinni faqa fidaqa maaqi qimasee faaqaridaqa asasidaqa qiqau Anutuna firaqoo amooqiaqa. <sup>10</sup> Maasa qikooni Dafidina ququsaki marianinna karaambaigana Anutufa amiqi amiqiani. Karaambaiga Anutuna auqusaa Yisufa uridanoo. Anutuna firaqoo amooqiaqa.

<sup>11</sup> Miqi qidaqa afaqa ooru fiufaqa Yeerusaree taunnaki keeqafufanoo Yisufa misa amaana maqa firaanaki keeqafufanoo aigama ainaina aiqqiiseenoo doo rafudamaku-fanoo doo eendidanoommifoo qimaseenoo nari faiqi namu qisaukuqara taikasee qikunni oogu qaara marasee nifiqamareenoo kafa Beetani maqusai oogu finau.

*Yisufa faafisa fooqaa saqari aqinau.*

*(Mat 21:18-19)*

<sup>12-13</sup> Misa faiqee iqaqoofaqa Beetani maqusaindari Yisufa Yeerusareenni ooru fidanoo aararoofanoo Yisufa qafoofanoo faafisa fooqaa ira saqari nianai marufanoo qaqaama iranoo fee marinoo sia fee marinoo qimaseenoo aqa oonuree qafoofanoo amanee kai marufanoo qaqaama iree maru aukuaana sia marunara sia iranau. <sup>14</sup> Yisufa mina qafamaseenoo mi faafisana aqinau anee maqee maaqooqari naaru naaru anisaaqaraana sia faiqi moo fannoo ani qaqaama naannoo. Miqi qu ufana Yisuna faiqi namu iriqa.

*Yisufa amaana maqaki makeeti marusa niqianau.*

*(Mat 21:13-17; Ruk 19:45-48; Yoh 2:13-22)*

<sup>15</sup> Misa kafa Yeerusaree maqusai ooru keeqafufanoo Yisufa misa amaana maqa fiqumma ququsa auquqoonaki keeqafufanoo minaki faiqi ummuari maru makeeti marusa ooru rapatutummeeqeenoo nifaqasoofaqa rafudamaki fifainiqau. Minaki marusa faiqi anaasee kaqi munnimma marasaida amaana maqakinna munnimma faiqi anaasee nimisaidaqa minasaa qaraana ati munnimma ookaa mandee ummuaramasee maraaneera miqi mariqau. Yisufa misa qaındauqa faqa misa munnimma minasaa quqaqoonauqa faqa aigama ooru qumaree teeqi taqqimaseenoo nakipuruna faiqi anaasee bisinisaike marusa faqa misa ooqumari maru siaqausa faqa mareeqee teeqi taqqi maqinau. <sup>16</sup> Akaqausa ummaara maree mariasa amaana maqa fiqum fiqum auqira ququsa firuqiaki fimarusa faqa qaoo qifaqa minaki sia fiqau.

<sup>17</sup> Miqqimaseenoo Yisufa quandakinoo miqoo marusa maaqi qimasee qimannimino qinau. Ooqeenaa tamummaqara fasiqauqa akaraki Anutufa maa maqanara maaqi

qimasee qimaqoofa maridanoo. Qinee faiqí anaasee qini maaqara innaaru qira maqa fee qiaqee qidaqa. Anutufa miqí qimaqoofa qinee mimau maaqí qidaqa, innee maqee mariasa maa amaana maqana qumareeqa ummuari mariasa kukeeqara maqaikammi mariafanoo.

<sup>18</sup> Amaana maqakina aanaiqikirausa uriqararasa faqa Mooseena sandufa iriqaraasi marusa faqa Yisufa miqí qunara aanoomasee iriseeqa Yisuna kuqarira aanara randee mariqau. Faiqí anaasee muduka uqanna moomoosa Yisuna ufa irufanoo naaquqoonara aanaiqikirausa Yisunara rufiee marunara ariranara randaqau.

<sup>19</sup> Mi eenaaniannai Yisufa Yeerusaree maqusaqaqari narí faiqí namu nifiqee moosaa finau.

*Faafisa fooqaaira saqari aadanusinau.*  
(Mat 21:20-22)

<sup>20</sup> Faiqee iqaqoofaqa fidaqa misa kafa mi faafisana fooqaaira saqari aqa fidaqa qafoofanoo ammuqundari aiqama muqufi oosana amisee aiqama aadanusinoo marinau. <sup>21-22</sup> Peetooroofa mina qafamasee tautumasee Yisufa mi saqarina aqunara iriseenoo Yisuna aaramaseenoo qimaminoo qinuu. Oo ufasaa rakisirafa anee qafaa anee aqisaananoo doo kuqinoo marinoo qufanoo Yisufa narí faiqí namu qimanniminoo qinuu. <sup>23</sup> Innee maa ufana irisee sia aunuqaqaa inni irirafa Anutunasaa rusinoo marinaqa innee qifandinna ainainara kuqaa kambigaanoo fee qíqa sia naunduraki qaara irirana iridaqa innee maa amuaqunamunara rafauruaki ooruku nammariki aqufua qifanoo Anutufa kuqaa aniara miqianoo. <sup>24</sup> Minara qinee inni maa ufana faqa qimannimidaqa innee moo ainainara innaaru qidaqa inni irirafa doo mareera foora miqinoo qimasee irirana Anutunasaa rusisaifanoo aiqama innaaru qimariana Anutufa inni nimianoo. <sup>25-26</sup> Innee inneeqa mandoosana Anutunara minniqisaannee innaaru qidaqa inni mandaikamanni-maqaasa misa ummaara aniki marina minnisee aunusaifanoo inni innaarunai nikoofa inni manda oosana akiqara faqa mininnisaani. [Inni niqoonausa inni mandaikamma nimaqaiqaa inni mina irisee sia mina minnisee kaqí irimaree fifanoo Anutufa faqa innindi faqa miqí kaimmiannoo.]

*Yisunara yafee qifanee afeekaikidane qiqau.*  
(Mat 21:23-27; Ruk 20:1-8)

<sup>27</sup> Yisufa kafa narí faiqí namu faqa Yeerusareenni oorureenoo firaa amaana maqa fiqú fiqúra ququsaki keeqafinoo nimarufaqa minakinaana aanaiqikirausa uriqararasa faqa Mooseena sandufa akoofasauqa faqa aniree irammiriga qiqau. <sup>28</sup> Oo Yisu anee maa maqanaki bisinisaiki mariasa nifaqasaana fuanara anee uriqarara fee maridane miqidanee. Yafee aniara qifanee maanaki mariasa nifaqeenee qufanoo Yisufa narí qimanniminoo qinuu. <sup>29</sup> Qinee faqa inniara modaa ufa iramannimaqaanara. Innee qimaqimifaqa qiniara iraaufana faqa qimannimianauranoo. <sup>30</sup> Yoohaneefa nammari nimimarufa yafee minara nammari nimianee qufanoo nimimarinau, Anutu fee faiqí fee qufanoo nimimarinau. <sup>31</sup> Yisufa miqí qimasooafaq narinni narinni raiqara ufa narí qimami narí qimami qiqau. Maasa naqí fee qianauree. Maasa Yoohaneenara Anutufa qimamiifoo qiananoo mifa maasara nanaree innee Yoohaneena ufara Anutuna ufa fee qimasee mi mau fuaqaana miqidee qiandoora. <sup>32-33</sup> Maasa Yoohaneenara faiqí kai qimamiaafoo qianaqa faiqí anaasee kaqiqeesa maasa darifoora misa Yoohaneenara Anutuna tamummaqara fasiqee qimariafa marifaqee qimasee Yisuna qimamiqa qiqau, maasa sia ani ufa anoona irida fee qiqau. Miqí qimasoofanoo Yisufa kafa narí qimanniminuu, Doo amana innee qinindiara sia qimaqimifaqa qinee faqa innee qiniara yafee qimaminoo fee qianara sia qimannimianauro.

## 12

*Ainainasaa manda rakisira rakisunara quandara ufa.*  
(Mat 21:33-46; Ruk 20:9-19)

<sup>1</sup> Yisufa miqí qimaseenoo quandara ufakiqari qimanniminoo qinuu.

(Yisufa Yuda maqannaasa mandoosana qimanniminnaree qimasee narí munnimma maree marianara uainna qaqaqama qimanniminuu. Maasakina sia uainna qaqaqama maridanoo koofi kai marinara mina kikiqusuanaura.)

Faiqí moo fannoo koofi asumu ummaquseenoo ququsa auqu ititaseenoo koofi nammari uqimaria difaaninai firaana auquseenoo kisaqa qainda auquseenoo aufarira fasiqa fannoo mi qaindanasaa akaramafifanoo maridanoo rakisida aufaridanoo. Mi saikafa taikaifanoo ququsa akoofa moo maqusai niannai firaree qimaseenoo akaqa fasiqauqasaa narí koofi ququsa niqiqamaseenoo maaqí qimasee qimanniminuu. Innee qini koofi



ququsa rakisidaqa qaqama irainna aukuaana innee akaqana inneeqara mareeqa qini koofi akausa akaqana qimiaqee qimasee doo quqasee moosaa finau. <sup>2-3</sup> Koofi qaqama tiqi maru aukuaana aniroofanoo koofi akoofa nari ainainira faiqi nianaindari aqigoofanoo anireenoo koofi ququsasaa rakisi marusa qimanniminau. Innee uriqararana oondaraa koofi qaqama diqisee qimia qufaqa misa mandoosana marasee mina qumaree saamu samu ari ariiseeqa aqigoofanoo kafaannai anirandee kaqisamu finau. <sup>4</sup> Kaqi samu oonuroofanoo afuqakoona qafamasee moo ainainira fasiqa aqigoofanoo kafia aninau. Aniroofaqa mina faqa miqi kai mandee ariisee saamu qumaree akiqa rukamusee mina afaaqasaa asaurirana mara amufanoo anirandee maree nari akoofinnai finau. <sup>5</sup> Oonuroofanoo qafeenoo moo aqigoofanoo aniroofaqa mina kuqammariqau. Ququsa akoofa mina iriseenoo akaqausa kafia niqiganau. Aniroofaqa akaqausa kaakadi nariqau akaqausa kuqa nariqau. <sup>6</sup> Mi fasiqana ainainira faiqiuqa doo taikasooofanoo nari amaaku uqanna doo moodaa nari amuqusimarufa mifa kai kaqi marinau. Ququsa akoofa maaqi qinuu misa qini qimaakuara iriseeqa rufiasee koofi amifaranoo qimaseenoo mina aqiganau. <sup>7-8</sup> Mina amaaku fannoo oonuroofaqa koofisaa rakisi marusa mina qafamasee maaqi qimasee nari qimami nari qimami qiqau, maafa ququsa akoonaa amaaku maridanoo doo aniaqa anifaqa arusaananoo maa ququsafa maasaindi kai mariani qimasee mina amaaku qumareeqa kuqaruseeqa rafuseeqee ququsa aqoosai aqusaqau.

<sup>9</sup> Yisufa kaqi qimannimidanoo qinuu, mi ququsana akoofa aniree naqi fee iannoo fee mifa aniree mi manda fasiqausa kuqa naruseenoo andeeqara fasiqauqasaa mi ququsana mara quqasee kafia anirandee fuannoo. <sup>10</sup> Innee maqooqo mariasa tamummaqara fasiqauqa akara sia fee innee asaana ridee misa maaqi qimasee qiniara qidaqa sabeena kikiqususeeqa maaqi qimasee akara riqau.

Faandaamura auqimaria fasiqausa sabeena moo marasee qafamasee manda saqari fee qimasee aqusoofanoo Anutufa mina kai urinnaaqarara fee qimasee faakanaikinoo maridanoo.

<sup>11</sup> Karaambaiqa minnisoo sabeena marasee faakanaikinuu. Oo amiqira faakana maridanoo.

<sup>12</sup> Yuda maqannaasa Yisuna mi ufana iriseeqa oo maasara quandaidaqinoo manda koofi ququsasaa rakisirausara maasara qidaqinoo qimasee aanoommasee Yisufa mifa maasara amiqira sabeena aqusoosa maridee qidaqinoo, qimasee Yisuna rumbara ufa qidaqa faiqi aanaaseera rufiasee Yisuna minnisee moosaa fiqau.

*Takisa munnimmaro iroofanoo qimanniminuu.*

*(Mat 22:15-22; Ruk 20:20-26)*

<sup>13</sup> Farisai amaana ufa qimarusa akaqausa faqa Eeroodeena ufa irimarusa akaqausa faqa aniree irarufara fusee ianee qimasee qimamiqa qiqau. <sup>14</sup> Oo ufasaa rakisirafa maasa aniara andeeqara ufa qimarianna fasiqa fee qidaqa sia anee faiqi ufara eerairamasee misiannai fimirianafa, anee sia faiqi nindafamaseenana miqimmiqafaaqee maaqimmiqafaaqee qimarianafa mariananoo anee Anutuna anoona ufamao firanara paasoosimarianafa mariananoo. Doo anee maasa qimaqimia maasa Roomma maqannaa uriqararana takisa munnimma aukuaana aukuaana amidaqa. Mooseena sandufamau fee fidee miqidee, aqaidee miqidee. Maasa aquanauree sia fee aquanauree qufanoo Yisufa misa akaru qira oosana qafamaseenoo qimanniminoo qinuu, <sup>15-17</sup> Innee nanaree qini fusee irara idee siruaa munnimma moo marasaifaqa qafaa qufaqa misa siruaa munnimma moo maree mini uqafiqaqau. Mifa qafamaseenoo qinuu, yana oori amana faqa yana auqu amana faqee maa munnimmanasaa akara rinoo maridanoo fee qufaqa misa qiqau. Roomma maqannaa uriqararanaindi maridanoo fee qufanoo Yisufa qinuu, doo amana qiafanoo mina auqu faqa mina oori faqa maa munnimmanasaa maridanoo sia moo naindi maridanoo narindi uqanna akooorooidanoo minara doo narindi maridanoo doo mifa qimiaqee qinaqa mina amiaqa Anutunaindi faqa doo nari Anutuna faqa amiaqa qufaqa misa mina iriseeqa kuqaa qimaseeqa firaqooqoo Yisunara naaqqe marinau.

*Kuqiranakiqari findifiranara iroofanoo qimanniminuu.*

*(Mat 22:23-33; Ruk 20:27-40)*

<sup>18</sup> Sadikai amaana ufa qimarusa akaqausa Yisufinnai aniraqau. Sadikai amaana ufa qimarusa faiqi anaasee kuqufiqa sia findi fifandiafao putaammifandiafao qimarusa mariqau. Miqi qimarunara misauqa akaqausa Yisufinnai aniree irammirida qiqau, <sup>19</sup> Oo ufasaa rakisirafa Mooseefa maa sandufana akara rinoo qinuu, faiqi moo fannoo anaasee maraseenoo sia faiqi maqarai kuqufinanoo mina akaqa fannoo mi anaaseena maraseenoo faiqi maqasainanoo findifinoo indaaru akoofa kuquna qumiasana saqamasaa rakisiannoo. <sup>20</sup> Moo aukuaana moo fasiqa faiqi namu qisauku dinni taikasee dinni

ani qaara marasee mariqau. Nifasaafa anaasee marasee sia faiqi maqarai kuqinau. <sup>21</sup> Kuqufufanoo mina aanaaqianaafa mi anaaseena marasee mifa faqa sia faiqi maqarai kuqinau. Miqanda ninaaqianaafa kafa mi anaaseena marasee miqikai inoo sia faiqi maqarai kuqinau. <sup>22</sup> Kafa miqooqaraasa mina marasaida kuqi kuqi taikafufanoo doo mi anaaseefa faqa doo kuqinau. <sup>23</sup> Doo kuqirausa findifandinna aukua mi faasaannasaa aiqama dinni taikasee dinni ani qaara marasee mi anaaseena afaammaaka maridaqa yanaindikee iannoo fee qufanoo.

<sup>24</sup> Yisufa maaqi qimasee qimanniminau. Innee firaqqoo aaqee mariasa inneeqa aaqee mariana oosana iridee sia fee iridee. Innee maanara aaqee mariafanoo, tamummaqarausa akarakinaa ufa faqa Anutuna afeeka faqa sia irimarianara aaqee mariafanoo. <sup>25</sup> Faiqi anaasee findifandinna aukua mi misa faiqi anaasee naanna ramasee nari maree nari maree mandee marifaranoo. Faiqi afaqa faqa anaasee afaqa faqa taikaseenoo gangiroora foora mambiqa idaaqirausa marifaranoo. <sup>26</sup> Kuqirausa findifirana sia fee innee Mooseena sandufa asaana rumasee iridee. Mooseefa ooqi sipsipasaa rakisi maru aukua mi moo ainaina minaki qafoofoanoo ida fannoo sasamimiki qeemarufoanoo qafamaseenoo ooruroofanoo Anutufa minakiqari ooqi kuqusara Mooseena qimaminoo qinau.

Qinee Anutusa maridaqa Abarahaamana faqa Isakeena faqa Yakooboona faqa Anutusa maridaqa.

Akarakinaa ufa ooqi kuqufusara miqi qinoo marinara sia fee innee amiqimandee asaana ridee. <sup>27</sup> Mi ufana oosana maaqimminoo maridanoo Abarahaamafa faqa Isakeena faqa Yakooboona faqa ooqi kuqufusara Anutufa mi ufannoo misa naunduraindaraanara sia taikae maqi kaqi maridaqa qini faqa mariaafoo qidanoo, qinee misa Anutusa maridee qidanoo. Naqimasee kaaqa taikafuusa misa Anutusa maridee qianoo fee. Sia amana miqi qianoo. Kaqi mariasa Anutusa maridee qidanoo. Minara innee Sadikai amaana ufa qimariasa firaqqoo uqanna aqaqidaqa kuqimariasara kaaqa taikambiaafoo sia findifidammia maqi qimariafanoo.

*Sanda ufakinaana uriqarara sanda ufa qara kooroo inau.*  
(Mat 22:34-40; Ruk 10:25-28)

<sup>28</sup> Mooseena sandufa uqannifiqee marifa moo fannoo Yisufa Sadikai amaana ufa qimariasa faqa ufaqi marufanoo Mooseena sandufa akoofasa fannoo faasai irinau. Yisufa Sadikai amaana ufa qimarusa nari ufannai misa ufa amiqimasee rafaqaqafusoonara qafamaseenoo oo amiqira fee qimaseenoo nari faqa moo ufa Yisuna qimamianaaree qimaseenoo qimaminau. Oo Yisu Mooseena sandufa moomoo kinaana nana sanda ufee uriqaranoo maridanoo fee qufanoo Yisufa qinau, <sup>29</sup> Maa ufa aiqamausa urinnaaqararafa maridanoo. Isaraee maqannaasa iriaqa Karaambaiqa maasa Anutufa moodaa Karaambaiqa nariara maridanoo. <sup>30</sup> Innee faiqi faiqi inneeqa karaambaiqa inneeqa Anutunara inneeqa nimuqusa nimana nitukura irirana afeeka mudukannoo Anutunara nididaqa ruaqa. Mi ufafa uriqararafa maridanoo. <sup>31</sup> Mina aanaaqianaafa maaqimminoo maridanoo. Anee aneenna aqoonnana aninna afaaqara foora aidindee aidiani. Sia sandufa moo miqanda uriqaranoo maridanoo miqanda kai.

<sup>32</sup> Mi fasiqafa Mooseena sandufa akoofasa fannoo Yisuna mi ufana iriseenoo qinau. Oo ufasa rakisirafa amiqimandee andeeqasee qiananoo anee qianandee kuqaa karaambaiqa mifa kai Anutufa maridanoo, sia moo Anutufa maridanoo mifa kai maridanoo. <sup>33</sup> Minara nari amuqusa aiqamannai faqa nari irirana aiqamannai faqa nari afeeka aiqamannai faqa Anutunara aidiani, nari aqoonnana faqa nari afaaqara foora aidindee aidiani. Mi ufa qandannai finanoo uriqararafa mariannoo, tatufira aanda qaindasaa Anutuna suqamirafa faqa oosana oosana ainaina amimariafa faqa oorudupirafa mariannoo. <sup>34</sup> Yisufa mi fasiqana ufa iriseenoo oo irirana faqaa fasiqa fee qimasee qimaminoo qinau. Anee Anutuna ququsa adeedirana atisaa mariananoo. Miqooqari Yisunara naaqqoofoqa sia moo ufa iriaqa.

*Naqimaseenoo fee asauku mundirafa Dafidina amaaku faqa mina karaambaiqa faqa mariannoo fee.*

(Mat 22:41-46; Ruk 20:41-44)

<sup>35</sup> Yisufa Yeerusaree fira amaana maqaki faiqi anaasee amaana ufa qimannimidanoo moo ainainara irammirinoo qinau. Mooseena sandufa akoofasauqa asauku mundirana Dafidina ati maridanoo fee qimariafaqa qinee minara, naqimandee Dafidina ati mariannoo fee qidaqa. <sup>36</sup> Anutuna naaqqara andeeqara maraquna fannoo Dafidina dadaqqufanoo maaqi qimasee akara rinau.

Firaa karaambaiqa fannoo qini karaambaiqara maaqi qimasee qimaminau. Anee maaqoo qini Anutusa qini daaqa qini qisauku qimansi oogu marifinaqa ani namuqaauqa narueeqee ani aramandunnai quqaanaura.

<sup>37</sup> Dafidifa mi akaranaki asauku mundiranara qini karaambaiqee qinau, naqi fee masee Dafidina karaambaiqa faqa mina ati faqa aiqamaqara moodaa karinoo mariannoo fee. Innee minara irida naqi fee qidee.

*Yisufa sandufa akoofasauqa oosana kooroomandee niqinau.*  
(*Mat 23:1-36; Ruk 20:45-47*)

<sup>38</sup> Faiqi anaasee moomoo uqanna aniree asasamandee Yisuna ufa iriqa. Yisufa ufa qimannimidano maaqi qimasee moo ufa qimanniminu. Innee Moosena sandufa akoofasauqa misa mandoosanara auforiaqa. Misa kisaaga qamunna afisuseeqa maqusamau fee makeetaki fee nimarifaqa faiqi anaasee amiqimandee nimandaranara randaqa nidaqa kisaaga qamunna afisuqiraua nidaqa. <sup>39</sup> Misa amaana maqaki keeqafidaqa naadumasaa amiqira siaqasaa oogu mariasi maridaqa, oomaqaki faqa amiqira qoo kai oogu mariasi maridaqa. <sup>40</sup> Misa adeedaana anaasee uqara faiqi siaisa marifaqee qimasaida misa maaqa maqusa saqama naopundu maqa aiqama ummuaramasee umarasee quandakiqa faiqi nifusaa faiqi qiqafaqee qimasee kisaagasaa innaaru qimariasi maridaqa. Mina akiaqara misa narirafa naaru fiqaramasee mariannoo.

*Adeedaana anaasee nari kaqikaa munnimma Anutunara quqanau.*  
(*Ruk 21:1-4*)

<sup>41-42</sup> Yeerusaree firaa amaana maqakinaa difaani moo marufaqa faiqi anaasee minaki Anutuna amidee qimasaida munnimma minaki aqi mariqau. Yisufa mi difaanina aqa oogu marifi rakisi marufaqa faiqi anaasee minaki munnimma moomoo aqi mariqau. Ainana faqasa aniree nari munnimma moomoo minaki aqiiqau, miqoo adeedaana anaasee moo ainana siaifa kudi anaasee fannoo anireenoo nari munnimma qaaraqanda ida qara munnimma ataaqana fooqaana mi difaaninaki aqinau. Mi munnimma qanda fannoo moodaa tooeaa amana kai ooda uqanna marinau. <sup>43-44</sup> Yisufa nari faiqi namu naarama moodaaqoo quqasee qimanniminoo qinau. Qinee mi kudi anaaseenara qimannimianaura, mifa aiqamausa urinnaaqaramasee munnimma aqinoo. Akaqusa nari moomoo munnimakinaana ati ati aqia, maa kudi anaaseefa ainana siaifa marifa nari aiqama munnimma narana aina feefaurianee qi munnimmana faqa aiqama aqinoo. Minara qinee mi anaaseenara firaaqoo aiqamausa naruseenoo aqinoo qidaqa.

## 13

*Yeerusaree amaana maqa rapee ianinnanara qinau.*  
(*Mat 24:1-2; Ruk 21:5-6*)

<sup>1</sup> Yisufa amaana maqakiqari rafudamaki fufanoo mina faiqi namukiqari moo fannoo Yisuna qimaminoo qinau. Oo ufasaa rakisirafa maa maqana qafaa, amiqira ooninnai auquqaa maqafa maridanoo. <sup>2</sup> Yisufa irisee qimaminoo qinau. Innee maa firaa amiqira maaqana usakarana qafaidee, kasooqaaqee aiqama rapeepamma furufaramambuannoo sia moo ooni nari amuaaqa nari amuaaqa maqee marindee inoo mariannoo.

*Yisuna ufa irimarusara nikooqaranara qinau.*  
(*Mat 24:3-14; Ruk 21:7-19*)

<sup>3</sup> Yisufa Yeerusaree firaa amaana maqakiqari raudamaki Oorifa aqana amaana maqa adeedi marufanoo miqoo ooru oogu marinau. Oogu marifufaqa mina faiqi namukiqari Peetooroofa faqa Yameesafa faqa Yoohaneefa faqa Andurufa faqa minamusa qumee kukeeqaku nari maruqoo aniree qimamiqau. <sup>4-5</sup> Oo Yisu anee amaana maqa rapee ianinnanara anee qiannana yairee fee amaana maqa rapeepaa iannoo fee nana ainana kambiqaafina qafee fee oo doo mina rapeeia aukuanafa adeedi ree maqi qianauree qufanoo Yisufa minara naamuaqira ufa oosana arasee qimanniminu. Innee auforia marifaqa, sia moo fannoo inni nikaruqiani. <sup>6</sup> Moomoosa aniree nariara unnaqimasee moo fannoo qinee asauku mundirauree qifanoo moo fannoo anireenoo qinee asauku mundirauree qimasee moomoosa misa nikaruqifaranoo. <sup>7</sup> Innee rakira daambeenda adeedi iriqa nianai marinara ufa kai iriqa sia munari minari furufari iaga. Miqira ainana kuqaa kambiqannoo, kambiqafinaqa sia taikara aukuaana aiqaree maqi qiaqa. <sup>8</sup> Moo maqannaasa nianaindari aniree moo maqannaasa faqa rakifaranoo, moo karaambaiqa fannoo adeediqari ani mara moo karaambaiqa aruannoo. Maqa kasirafa aiqamai mariannoo aandaroo faqa mariannoo. Mi ainainausa manda marira aurirana oorisa kai mariannoo anaasee faiqi maqarara innaamunai aupuraandee mmiannoo.

<sup>9</sup> Innee qini ufa irimariasa aifarida mariaqa, faiqi misa poorisa ufa qimannimifaqa inni ruumbeeqee kootaki quqeeffaranoo. Misa inni mareeqee amaana maqaki quqasee saamusamu narifaranoo. Innee qini amiqira fasaasa ufa qimannimiaqeera qini ufasaara karaambaiguuqa faqa faiqi firaasa rakisirausa faqa nifusaa innee kikiqifaranoo. <sup>10</sup> Qini amiqira fasaasa ufa aiqama maqannaasaki naaree kooroo inoo marinanoo taikarafa inaaqianna kambijaannoo. <sup>11</sup> Misa inni rumbasee mareeqee kootaki quqasainaga innee sia naqi fee qianau naqi fee qianau naaree qiaqa. Koota kambiqafina Anutufa qimannimu ufana mina kai qimannimiaqa. Ani ookinaa ufa sia anindi mariannoo Anutuna naaquqara maraana fannoo nari ufa inni niminaqa mina kai qifaranoo. <sup>12</sup> Faiqi misa nari nikaqaafasaauqa mareeqee kuqiranaki quqeeffaranoo. Faiqi misa nari niku nisauku faqa mareeqee kuqiranaki quqeeffaranoo faiqiuqaindi quandakiqa nari ninausa nikausa mareeqee kuqiranaki quqeeffaranoo. <sup>13</sup> Aiqama maqannaasa inniara Yisunaindi fee qimasee fidiagaqaa mannimaqeeffaranoo. Innee minaki maridaqa fidaqa qini uaqee ida fifi inafa kuqira fee Yisufa qumira aukuanee paqurinafa asumu marirana maraannoo.

*Yeerusaree maqusai narirafa kambijaaninnanara qinau.*  
(Mat 24:15-28; Ruk 21:20-24)

<sup>14</sup> Kasooqaqee innee naaquqara fidiagaaimari mandainaina qafeeffaranoo mifa sia mariaqaa iraqoo Yeerusaree amaana maqaki kikiqinoo marina qafeeffaranoo. Innee maa ufana asaana rimariasa mi ufana oosana amiqimandee iriaqa. Mi naaquqara mandainainafa kikiqa mambinaqa innee Yudeeaa maqa maaqaki mariasa quqasee aaqana aaqana sandamafuqa. <sup>15</sup> Mi kamuqoo faiqi moo fannoo maqa kooqi oorisaa mariinafa mi ainainafa kambiqafinana sia aneenna ainana maaqaki maraane qia doo miqooqari afiaki sandaa. <sup>16</sup> Faiqi moo fannoo afuqaki mariinana sia maaqai aniree aneenna qamunna aakauga maraannee qia doo miqooqari kai quqasee ququsa rakeemandee sandaa. <sup>17</sup> Mi manda aukuanna nimuqa uqa faqaa aanaaseeuqa faqa faiqi aanaaqi faqaasa faqa mandaiki marifaranoo sandaranara anuqifaranoo. <sup>18</sup> Innee maaqi qimasee innaaru qiaqa Oo Anutu sia mi manda aukuanafa suara aukuaana kambijaani qiaqa sandaranara anuqi foora. <sup>19</sup> Mi manda aukuanafa anirainaga aiqamausa aupuraranaki firaanaki marifaranoo. Ooqai indaaru Anutufa aiqama ainaina auqunakiqari kaqigaa aupurara oosana oosana marinau, maqee faqa miqikai idanoo kaqigaa aupurara maridanoo. Kasooqaqee firaafa uqanna kambijaannoo. Mifa taikainna kari sia miqirafa kambijaannoo. <sup>20</sup> Mi manda aupurara aukuanna Anutufa qusandaannoo, sia qusarainanoo aiqama kuqu taikee foora. Anutufa nari rusandeesamumasee maroosara iriseenoo mi aukuanna qusaramannisaannoo.

<sup>21</sup> Mi manda aukuanna faiqi moo fannoo inniara mai qafaqa, asauku mundirafa mai marinoo moo fannoo asauku mundirafa muanni marinoo qinnana sia mi fasiqana ufa iriaqa mina unnaqidanoo. <sup>22</sup> Unnaqimaria asauku mundirafa faqa unnaqi maria tamumaqara fasiqausa faqa miqira aukuaana moomoo kambiqeeffaranoo. Misa Anutuna rusandeesamumandee maraqoo fasiqa anaaseesa nikaru qiani qimaseenoo naaquqara ainaina faqa sia faiqi amanaikimari ainaina faqa auqusaifanoo kambijaannoo. Mi ainainannai nikaruqiani qimasaifanoo sia amanaikiannoo. <sup>23</sup> Qinee inniqa qini faiqi namu mi ainainna sia kambiooqoo qimannimiqa minara aifarida kai mariaqa.

*Yisufa nari innaarunaindari qumuaninnanara qimanniminau.*  
(Mat 24:29-31; Ruk 21:25-28)

<sup>24-25</sup> Mi manda aupurara aukuanafa taikafinoo asukuna fannoo suani aruannoo aiqamai asukuna kai arufuannoo quqoona faqa sia kafa kaaqa qaannoo fasauga faqa inaarunaindari aiqama kapikeeffaranoo. Innaarunai fasau faqa quqoona faqa nimari anaafa dapikammafuannoo. <sup>26</sup> Miqoo qinee faiqi nimaaku asuruki kooroo ianaura, qinee firaafafeeka namufaga fira areenarana namufaga minaki kooroo ianaura. <sup>27</sup> Mikari qinee qeeqa qangiroouqa niqigaanaqa misa aiqama maqa maaqa ati atinni oonuree aniree mandeeqa Anutuna rusandeesamumandee maroosa maramaree qinee mariananai nifiqee anifaranoo.

*Nari qummuarinnanara saqari ammu ni kikiqa usinau.*  
(Mat 24:32-35; Ruk 21:29-33)

<sup>28</sup> Yisufa kaqi qimannimidanoo nari faiqi namu qimanniminoo qinau. Innee faafisa fooqaa ira saqari qafamasee mina oosana iriaqa, mi saqarifa ammu ni mambinaqa innee minara saika aukuanee qifaranoo. <sup>29</sup> Innee miqi kai masee mi oosana oosana ainainnara qunafa kambiqainaga taikara aukuaana adeedi afaisaammi maqi qiaqa. <sup>30</sup> Innee maana faqa irisee sia aunuqaqaa maa ainainnausara aiqama qunafa maa maqee

maria fasiqa anaaseesa akaqausa kaqi maria kamuqoo kambigaannoo. <sup>31</sup> Innaaruna faqa maqa faqa aiqama fatikamafi aqusaannoo qini dookinaa ufa fannoo kai naaru naaru sia taikaannoo, kaqi mariannoo.

*Nari qummuannanara afu maqaida rakisianee qinau.*  
(Mat 24:36-44)

<sup>32</sup> Mi taikara aukuannafa anianinnanara sia moo fannoo iridanoo mi faasaannara faqa suani yaqoo kamuqoo marinanoo fee kambigaannoo fee, innaarunaindaraa qangirooqaa faqa qinee Anutuna amaaku faqa siamma iridaqa qini qikoofa nari kai mina iridanoo. Innee mi faasaannara sia irimariafanoo. <sup>33</sup> Innee minara augaridaqa rakisidaqa qafaaga. <sup>34</sup> Mi faasaanna faiqi moora foora ainaina faqaafara foora mariannoo. Mi fasiqafa nari ainainirana oosana oosana nari ainainira faiqiuga aadu aadu nisaukuki quqaseenoo eendaki augarira fasiqa qimaminoo anee aiqama ainainasaa amiqimasee rakisia qinee moosaa fidaqa qimasee finau. <sup>35</sup> Innee miqikai mandee amiqimandee augarida mariaga. Inni uriqararafa kaigaa anianinnanara sia iri mariafanoo mifa eendaki aniannoo fee eenda amugusai fee maqee kaari maqarana namufaqee aniraannoo fee suani maqee ururainanoo fee aniraannoo fee. <sup>36</sup> Mifa tautummamaqasee ainainimarinna kamuqoo faiqaqee innanaki qumurainana mandaikamminnaranoo. <sup>37</sup> Minara maqee qinee inni qimannimidaqa aiqamausa qimannimidaqa innee aiqamausara augariaqee qidaqa qinee qumiranara rakisida mariaga.

## 14

*Yisuna ariraree qimasee tipundaarimaria.*  
(Mat 26:1-5; Ruk 22:1-2; Yoh 11:45-53)

<sup>1</sup> Yuda maqannaasa firaa qoomaqa suqarara qaaraganda ainnaaqarara qoomaqaana faqa ooruku siai feemu qoomaqaana faqa suqarafa adeedi ramafinau. Qaara faasaana kaqi mariqa qaaramookufanoo qoomaqa suqarafa qusaramafuqa suqagau. Mi qoomaqaafa adeedi ramafuqa aanaiqikirausa uriqararasa faqa Mooseena sandufa akoofasauqa faqa suqufufuqa maasa naqimasee qumee faiqi anaasee sia irifaqee Yisuna umarasee aruanaaree qiqau. <sup>2</sup> Misa qiqau maasa sia qoomaqaki Yisuna aruanaura faiqi anaasee aanoo mandee maasa faqa dari foora.

*Afundimaru fadameena Yisuna akiaqa adianau.*  
(Mat 26:6-13; Yoh 12:1-8)

<sup>3</sup> Yisufa Beetani maqusai Yeerusaree maqusa adeedi marufaqa manda namuana karoora arimaru fasiqana maaqaki marinau. Mi fasiqana auqu Simoona amarafa marinau. Yisufa mina karoora rukasoofanoo amiqimasee marinau. Yisufa mi maqanaki narana nee marufanoo anaasee moo mi maqanaki keeqanau. Mifa amiqira afundi maru fadameenna, moo sanda minauqu narada mifa atuka rarakusee fadameena tatiqoofa afundimaruna firaa munnimma aqimaria fadameenna mi sandana anoona kai kaaqa amiqirafa maruna mina idaaqira ooninnai andina fooqaana auquqoonaki maru fadameenna uqirafa Yisufa maru maqanaki keeqafinoo mi fadameena taquna oosaa raudaseenoo mi fadameennana Yisuna akiaqa amoondunnaqa adianau.

<sup>4-5</sup> Faqiqi anaasee akaqausa miqoo mariusa mi anaaseena qafamasee aanoommasee nari qimami nari qimami qiqau, nanaree maa fadameenna amiqira afundi marinna fifau rairaa inoo fee. Mifa mi fadameenna mareeqee moo fasiqa amiseenooafu tiri handareeta munnimma maraseenooafu kudi fasiqa anaasee ninimi. Miqi qimasee afeekaikamandee mi anaaseena aqiqau. <sup>6</sup> Yisufa mi ufana iriseenoo qinau, See innee minnisaaga, nanaree innee fifau mi anaaseena aqidee. Mifa amiqira idaaqira ainaina adia qimaqeenoo. <sup>7</sup> Kudi fasiqa anaasee naaru naaru inniki moomoo marifaranoo, innee inneeqa kai onnu mafi irisee mi kudi fasiqa anaaseesa dadaaqiaqa, qinee sia kisaagasaa marianaura. <sup>8</sup> Maa anaaseefa kaqikaqoo nari amanasaa qini dadaaqinoo. Mifa mi fadameenna qini qikundarana oorisaa qini irisaa adiaqimaqeenoo. <sup>9</sup> Maa ainainnara qimannimianaga iriaqa sia aunuqa, maa amiqira fasaasa ufana faiqi anaasee aiqama maa maqana afaaqasasa fidaqa qimannimidaqa maa anaaseefa maqee fadameenna qini adia qimaqainara qimannimifaqa sia maa anaaseenara aunifaranoo.

*Yudasifa Yisuna ueeqaaninna munnimmana maranau.*  
(Mat 26:14-16; Ruk 22:3-6)

<sup>10</sup> Yisuna faiqi namu qisaukuqara taikasee qikunni ooqu qaara marasee faiqi namu misaikiqari moo fannoo mina auqu Yudasifa Isakarioota maqusaindaraafa Yisuna mareeqee misa nisaukuki quqararee qimaseenoo raudamaki aanaiqikirausa uriqarararusunnai

qumee kukeeqaki finau. <sup>11</sup> Misa Yudasina ufa iriseeqa اساسامasee munnimma amiraree qufanoo Yudasifa miqooqari Yisuna ueeqaaninna faasaanara rakisinau.

*Yisufa nari faiqi namukinaana ueeqaaninnanara qumee kai qimannimisee rafaafa-finau.*

*(Mat 26:17-25; Ruk 22:7-14, 21-23; Yoh 13:21-30)*

<sup>12</sup> Yuda maqannaasa ooruku siai feemu qoomaqa aniroofaqa misa ainnaaqarara sip-sipa aanaaqiuqa aruaninna faasaanasaa Yisuna faiqi namu aniree Yisuna irammiriqau, Maasa yamaqanaki yatinai fee ainnaaqarara qoomaqa deedaqianauree qufanoo Yisufa maaqi qimasee naamuaqinuu <sup>13-14</sup> Innee Yeerusaree maqusai oorureeqa qafaifanoo faiqi moo fannoo qafeeki nammari qumbiqasee aku maree finaqa mina faqa finaqa mifa keeqainna maqanaki mina faqa mi maqanaki keeqaqa. Keeqafiqi mi maqana akoona maaqi qimasee irammiriqau, Ufasaa rakisirafa aniara maaqi qinoo, moo rumma qinee faqa qeeqa faiqi namu faqa ainnaaqarara qoomaqa naanna rummafa yai fee maridanoo fee qifanoo qinaqamma iriaqa. <sup>15</sup> Mi fasiqafa firaa rumma maaqa meeraqoo maru rummana firaa rummana narana quqee maru qaindafa faqa oqunari maru siaqausa faqa deedaqira rumma inni uqannifiqaannoo. Innee minaki aiqama ainaina maasara deedaqamma qimaqaaqa qufaqa miqanda <sup>16</sup> Yeerusaree maqusai ooruree Yisuna ufa anoona kai kambiqaqafuqa mimau kai fiqau.

<sup>17-18</sup> Mi eenonnai Yisufa nari faiqi namu faqa qisaukuqara taikasee qikunni ooqu qaara marasee faiqi namu faqa ooru keeqafi nee mariqau. Nee marufanoo Yisufa maaqi qimasee nari faiqi namu qimanniminuu, Qinee maa ainainnara qimannimianauranoo, innikiqari moo fannoo qiniara ueeqaaninafa qini faqa naidanoo. <sup>19</sup> Mina faiqi namu mina irisoofanoo misa naundura furufarufafa naadu naadu Yisuna irammiri mariqau, moo fannoo qinoo anee qiniaree q inanee qinee fee qifee moo fannoo moo fannoo miqi kai qimariqau. <sup>20</sup> Yisufa misa irarufa iriseenoo qinuu, Innikiqari qisauku taikasee qikunni ooqu qaara mararusaqiqari maa qini difaanikinaana asauku aqusee feemu marasee nee marifa mifa kai qiniara ueeqaanoo. <sup>21</sup> Qinee faiqi nimaaku tamummaqarusa akara ufamau qinee kuqanaura qini ueeqaaninna fasiqana numoo firafa mariannoo. Mi fasiqafa sia kambiqaqainooofau amana marini.

*Yisufa aafaqa neemariana oosana aranau.*

*(Mat 26:26-30; Ruk 22:15-20; 1Kor 11:23-25)*

<sup>22</sup> Misa ooqumarifi nee marufanoo Yisufa nariqa maqee maqee neemaru feemuna moo marasee dufi dufi qimaseenoo ruqi ruqi maseenoo nari faiqi namu niminoo maaqi qimanniminuu. Innee maana marasee naaqa, qini qimaqi kikiqusira feemu maridanoo. <sup>23</sup> Miqi qimaseenoo kaafa moo maqee maqee nee maru uainna nammarina maruna maraseenoo minara Anutunara dufi dufi qimaseenoo nari faiqi namu nimuqafa aiqamausa mina qumaree minakinaana naqau. Yisufa nari faiqi namu mi uainna nammarina nimidanoo maaqi qimasee qimanniminuu, <sup>24</sup> Maafa qini fidika kikiqusira nammarifa moomoosa adia nimaqeeqandinafa maridanoo, qini fidika maafa Anutuna faqa faiqi anaasee faqa moodaanakikira ufa mapukunnimaqaqaninafa maa fidikafa maridanoo. <sup>25</sup> Qinee qimannimidaqa sia kafa uainna maaqoo maqasaa naanauranoo Anutuna ququsaki innaarunai ooru fidaqa fuka uainna amiqirana naanauranoo. <sup>26</sup> Miqi qimaseeqa misa moo amaana idi ramaseeqa maaqakiqari raudamaki asukunaki fiqa Oorifa aqana ameeamaanai ooru mariqau.

*Peetooroofa Yisunara sia qafaidee qianinnanara kooroo inau.*

*(Mat 26:31-35; Ruk 22:31-34; Yoh 13:36-38)*

<sup>27</sup> Misa miqoo oonuroofanoo Yisufa qimanniminoo qinuu. Tamummaqarusa akara ufa fannoo maaqi qimasee qiniara qidanoo, Anutufa sipsipa rakisirana arusaifaqa mina sipasipauqaindi miqooqari quqasee daraan-ifaranoo.

(Minara inni qimannimidaqa innee qini quqaqisee aiqama sandamaffaranoo.)

<sup>28</sup> Qinee kuqiranakiqari findifiqa inni noorinni Kariree maqa maaqai fuanauranoo.

<sup>29-30</sup> Peetooroofa Yisuna ufa iriseenoo qinuu, Qinee sia uqanna ani minnisaanau. Aiqamausa ani minnisaifaqa qinee sia minnisaanuree qufanoo Yisufa nari qimaminoo qinuu. Oo Peetooroo anee iria, Fafaa eendaki irafana anee qaaramoo kari qiniara siamma iri fee qinnaranoo. Miqi mandainanoo kookooraana qaara kari ufa qiannoo.

<sup>31</sup> Peetooroofa mina iriseenoo Yisuna afeekaikamandee qimaminoo qinuu, Qinee sia uqanna aniara sia iridee qianaua ani faqa kuqanaura. Miqi qimasooafa aiqama Yisuna faiqi namu miqikai qiqau.

*Yisufa nari kuquaninnanara ummaara arufanoo saqamaki innaaru qinau.*

*(Mat 26:36-46; Ruk 22:39-46)*

<sup>32-33</sup> Miqooqari misa Keeseemanee maqa maaqaki Oorifa aaqana ameemaanai marunaki asukunaki aniroofanoo Yisufa nari faiqi namu qimanniminoo qinau. Innee maaqoo oogu marifi marifaqa qinee saqamaki oorureega innaaru qianauree qimaseenoo minamusara innee kaqi maaqoo marifaqa maa namusa kai qini faqa ooru fuaqa. Miqi qimaseenoo mifa Peetooroona faqa Yameesana faqa Yoohaneena faqa nifiqeenoo saqamai ooru fidanoo nari afaaqasaa quqefandinna ainainara irimarufanoo firaqoo amuqusimarufanoo aundura fifau faafau ufanoo minamusa qimanniminoo qinau. <sup>34</sup> Qini qimuqusaki qimuqusirafa firaqoo maridanoo mi qimuqusirafa daruannoo fee qidaqa innee maaqoo maridaqa rakisiaqa.

<sup>35</sup> Miqi qimasee Yisufa kaqikaqoo oonureenoo nari kai maqasaa aqufinoo nari afaaqai anianinna aupuraranara sia keekaaniffee qimasee maa innaaruna qinau. <sup>36</sup> Oo qini qikoofa qini qikoofa, anee aiqama ainaina amanaikimarianafa mariananoo, qinee manda nammari naannanara anee qinisaqaraana mareeqee kaqinni aqusa. Sia qeeqa didiranara iria, aneenna aidinna ainaina kai qifaqai quqaa.

<sup>37-38</sup> Yisufa miqi qimasee innaaru qimaseenoo kafaannai aniree nari faiqi namu qaaramoo marunnai aniree nindafoofaqa misa nisuku kaaqa faiqageeqau. Yisufa Peetooroona moo auqu Simoona auqamasee qimaminau Simoona anee faiqagee idanee anee sia fee amana qusasaa kai afu tautasee rakisinnaree. Innee aufaridaqa innaaru qida mariaqa innee miqidaqa sia nimaniranaki aquffaranoo, inni irirafa kai afeeka marifaqa inneeqa uqanna kudoosaapee marifanoo.

<sup>39-40</sup> Yisufa miqi qimasee qimannimiseenoo kafaa anirandeenoo indaaru qundee kai inoo innaaru qinau. Innaaru qimaseenoo oonu nindafoofaqa mina faiqi namu kafaa nisuku faiqageeqau misa nifu fannoo ummaarareenoo sia findi fuaqaa ufaqa findifi Yisuna kafaa qafamaseeqa nari faiqaranara nisaurusee ufara randaqau.

<sup>41</sup> Yisufa kafaa oonu innaaru qimasee anireenoo nari faiqi namu qimanniminoo qinau. Innee kaqi fee faiqadee kaqi fee idooaidee. Doo saa doo aupurara aukuaana doo anireenoo, doo qafaqaqanda manda oosana maree mariasa nisaukuki ueqaaninna fasiqafa qini mara quqaannoo. <sup>42</sup> Doo findi fifaqa fua. Doo qafaqaqanda qini ueqee mari fasiqafa doo anidanoo.

*Misa Yisuna qumaraqau.*

*(Mat 26:47-56; Ruk 22:47-53; Yoh 18:3-12)*

<sup>43</sup> Yisufa kaqi misa faqa ufa qimarufanoo Yisuna faiqi namuqi qisaukuqara taikasee qikunni oogu qaara mararanakiqari mina auqu Yudasifa aniranau. Amaana maqa aanaiqikirausa uriqararusa faqa Mooseena sandufa akoofasauqa faqa Yuda maqannaasa faiqi firaasa faqa maqusai kaqi maridaqa faiqi moomoo Yudasina faqa niqigoofaqa rakira duru saamu qumareeqa Yudasina faqa asukunaki aniqau. <sup>44</sup> Faasai Yudasifa qimanniminoo, asukunaki innee aaqee foora qinee oonureeqa mi fasiqana amooqaanamma qafaqaqanda, mee innee randeemaria fasiqana amooqaanau. Innee mina rumbamaree amiqimandee rakisisee maree fuaqa.

<sup>45</sup> Yudasifa anireenoo Yisufinnai oonureenoo oo ufasa rakisira fee qimasee amooqaanau. <sup>46</sup> Amooqoofaqa mina faqa anusa mina qafamaseeqa qumarasee rumbamaree amiqimmasee rakisi qumara maree maree fiqau. <sup>47</sup> Faiqi moo fannoo miqoo kikiqinoo mariufa mina qafamaseenoo nari rakira paipana qumareenoo nariraree qimaseenoo moo fasiqa aanaiqikirausa uriqararana ainainira faiqi aaqoo ateeqa aqusanau. Yisufa qimanniminoo qinau. <sup>48</sup> Innee qiniara mandaikamma nimaqee mari fasiqa fee qimasee duru saamu indaaiqa aniree qini qumaraidee. <sup>49</sup> Faasaambaasaana moomoo kari akoogoo amaana maqaki keeqaidaqa faiqi anaasee ufa qimannimimarunau maridaqa naqaa innee miqoo qini qumaraqaana mariaasee. Tamummaqara fasiqauqa akara anooa doo mimau kambiqaaani. Doo qini qumaree fuaqa. <sup>50</sup> Yisuna faiqi namu mina qafamasee quandaki miqooqari sandama qaraasa mambiqau.

<sup>51-52</sup> Misa Yisuna mara maree fufanoo moo kumaaraa fannoo qamunna kai nari afaaqaa ititaseenoo misa ninaaqiana fimarfuaqa misa mina qafamasee mina faqa rumbaane qimasee qumararufanoo mi kumaaraafa mafi nari qamunna rakeemma aquseenoo kaqisamu sandamaqaraasaminau.

*Misa Yisuna ufa suqiranaki quqasee iraqau.*

*(Mat 26:57-68; Ruk 22:54-55, 63-71; Yoh 18:13-14,19-24)*

<sup>53</sup> Misa Yisuna mara mareeqa aanaiqikirausa uriqararana maaqaki quqaqau. Mi maqanaki aanaiqikirausa uriqararusa faqa Mooseena sandufa akoofasauqa faqa Yuda maqannaasa faiqi firaasa faqa minaki faasai eendaki suqiqa mariqau. <sup>54</sup> Peetooroofa

misa ninaaqiana nianasaa qumee oonureenoo aanaiqikirausa uriqararana maaqa naambeeqai ooru keeqafinoo rakisimaru fasiqausa faqa ida aaga ooqu marifi qaani marinau. <sup>55</sup> Aanaiqikirausa uriqararansa maaqaki maridaqa Yisuna kuqaruaneera mina ummaarara randoosia sia paquriqau.

(Mooseena sandufa maaqi qimaqoofa, moodaa fasiqa fannoo qinnufafa sia anoon-aikiannoo. Qaara fasiqa fannoo kikiqamafi qinafa mifa anoonaikiannoo. Misa minara iriseeqa faiqi qaaraganda mi ufana qifaqa Yisuna ariraree qiqau.)

<sup>56</sup> Moomoosa aniree Yisunara unnufa qufanoo sia misa ufa fannoo moodaa karinoo marinau. Misa ufa fannoo naadu naadu qufanoo sia amanaikinoo marinau.

<sup>57-59</sup> Migoo akaqausa findi fufaqa Yisunara unnufa maaqi qimasee qiqau, mifa maaqi qimasee qifaqa maasa iriqa qinee firaa amaana maqa faiqi usakaqoona aiqama rapeep-amma aquseeqa qaaramoo faasaana aiqarainaga sia faiqi nisaukunnai usakaqairana usakasaanauree qifaqa iriqa qufaqa misauqa faqa sia amana amana kai mi ufana qiqau.

<sup>60-62</sup> Misa miqi qimasoofanoo aanaiqikirausa misa uriqararafa aiqamausa nifusaa findifinoo Yisuna iranau. Misa ufa oosana oosana aniara maridaqa, kasooqagee innee maridanoo fee qinaga iriqa qufanoo Yisufa sia ufa qinuu, kaqi kasooinoo marinau, Miqi masoofanoo aanaiqikirausa misa uriqararafa qimaminuu, anee kuqaa fee Anutuna asaku mundirafa maridane, anee kuqaa Anutuna amaaku amooqimaria fee maridane qufanoo Yisufa qinuu eoo qinee mina amaaku marunaua qamunna qifana mi qufaseenoo qini faiqi nimaaku qiqafeefaranoo, qinee uriqararana Anutuna aaga asaku uqannai ooqufaaqee mariana qiqafeefaranoo mari inaga kasooqagee innaarunaindari asuru namufaqa qumunaqoo mikamuqoo faqa innee qini qiqafeefaranoo. <sup>63-64</sup> Aanaiqikirausa uriqararafa misa iriseenoo aanoommaseenoo nari qamunna parara qina qufaseenoo qinuu, maasa fifau faiqi ufara randaidaqa, doo mina manda ufa iriafanoo innee minara naqi fee qidee qufaqa misa aiqama qiqau mifa manda oosana fiqararafa maridanoo nariara Anutuna amaaku fee qidanoo, kuqiranaki kai fuani.

<sup>65</sup> Miqi qimasoofaqa akaqausa Yisuna niqaara fida amaqaaseeqa qamunnannai afu ruumbamaqaaseeqa nisaukusamu oori aruseeqa iraqau, mina yafee ani arinoo fee qinaga iria. Miqi qimasoofaqa minasaa rakisimaru maara fasiqausa mina mara mareeqa nisaukusamu oori ariqau.

*Peetooroofa Yisuna sia qafaidee qinuu.*

*(Mat 26:69-75; Ruk 22:56-62; Yoh 18:15-18, 25-27)*

<sup>66-67</sup> Misa maaqaki Yisuna arira ufa qimarufanoo Peetooroofa maaqa kooqinni sundi-  
auqa faqa idaki ooqufaaqee ufanoo aanaiqikirausa uriqararana ainainimaru manaaqafa aniree Peetooroona miqoo ida qaani marufanoo qafamaseenoo mi manaaqafa mina oori aiqumumaseenoo qimaminoo qinuu anee Nasareeteendaraafa Yisuna faqa nuana mariananoo. <sup>68</sup> Peetooroofa mina iriseenoo qaoo qinoo qinuu, qinee sia minara iridaqa sia anee qiannufana oosana iridaqee qimaseenoo findufumakufanoo mi maaqana ququsa kooqi marunnai fufanoo kookooraana ufa qinuu.

<sup>69-70</sup> Ufa qufanoo mi ainainira manaaqafa Peetooroona kafa ooqu qafamaseenoo miqoo marusa qimannimau Innee maana qafaqa Yisuna faqa nimarifa maridanoo fee qufanoo Peetooroofa kaifaa qaoo qinuu. Kaqikaqoo marikufaqa miqoo mi fasiqausa marusa Peetooroona afeekaikamasee qimamiqa qiqau. Anee Yisuna faiqi namu marianafa mariananoo, anee naqi fee mandee qaoo qidane, ani ufa fannoo ani kooroomaqaifaqa iridaqa, anee Yisuna maqannaafa Kariree maqanna marianafa mariananoo. <sup>71-72</sup> Peetooroofa mina irisee nari amana aiqamasee qinuu, qinee sia anoona ufa qimamiananoo Anutufa daruani. Qinee anee qiannanara sia uqanna minara iridaqee qufanoo miqi quqoo kai kookooraana kafa ufa qinuu. Peetooroofa mina ufa irisoofooo aqoo ruqianuu Yisufa maaqi qimaqoo ufanara oonumafi irinuu. Fafaa eendaki anee qaaramoo kari qiniara sia fee qinanoo kookooraana qaara kari ufaqiannoo. Peetooroofa mina iriseenoo asauruseenoo ikiraqamaree quqasee finuu.

## 15

*Misa Yisuna qumaree munu Piratoona ufaki quqaqau.*

*(Mat 27:1-2, 11-14; Ruk 23:1-5; Yoh 18:28-38)*

(Oqai Mooseena sandufa fannoo sia asukunai ufa oosana oosana qinnufafa sia anoona kambiqaannoo fee qimaqoofa marufaqa misa mina rukiaseeqa asukunai ufa qiqau.)

<sup>1</sup> Iqaqoo kananaana aanaiqikirausa misa uriqararansa faqa Yuda maqannaasa faiqi firaasa faqa Mooseena sandufa akoofasauqa faqa aiqama uriqararansa faqa maasa asukunai qunnufafa sia anoonaiqidanoo fee qimaseeqa iqaqoofaqa Yisuna kaqi kaqi



ufa suquseeqa nariqa Yisuna arifandinna ufana kaifaa andeeqaseeqa. Misa ufa andeeqaseeqa Yisuna mara maree sainandannai rumbamareeqa afiga mareeqa Roomma maqanna kiapana Piratoona amiqau. <sup>2</sup> Amisoofanoo Piratoofa Yisuna irammirinau. Anee kuqaa fee Yuda maqannaa karaambaiqa fee maridane qufanoo Yisufa qinau anee qianandeemmiqa maridaqa. <sup>3</sup> Aanaiqikirausa uriqararaisa aniree moomoo unnufa Yisunara qimariqau. <sup>4-5</sup> Piratoofa mina iriseenoo Yisuna kaffa irammirinoo qinoo, misa moomoo mandainainara aniara qidaqa, ani ufa sia fee marifanee anee sia fee qinnaree qufanoo Yisufa sia ufa qufanoo Piratoona aaquqanau.

*Misa Yisuna Piratoona kootaki quqaqau.*

*(Mat 27:15-26; Ruk 23:13-25; Yoh 18:39-19:16)*

<sup>6-7</sup> Aukuana aukuaana aiqama aukuaana Piratoofa ainnaaqarara qoomaqa saara moo adiafaaira ainana Yuda maqannaasa nimianauree qimasee rumbaranakinaana moo iduku niminau. Nari nidimaruna uqanna idukunniminau. <sup>8</sup> Mi aukuaana Yisuna ufa irimaria faasaana faiqi anaasee moomoo Piratoona oopisaki aniree qiqau. Anee ooqai aukuaana aukuanasaa faiqi moo idukusee qimariannana maqee maa aukuaana faqa moo idukusee qimia. Karafusa marina moo iduku qimianee qimasaida farafara imariqau. <sup>9</sup> Piratoofa qinau, Amanee qinee Yuda maqannaa karaambaiqa Yisuna iduku nimianauree qinau.

<sup>10</sup> Piratoofa aanaiqikirausa uriqararaisa sia anoona marunara fifau rairai qidaqa Yisuna mareeqee Piratoona amunara irinau. Minara kai Piratoona amanee qinee Yisuna iduku nimianauree qinau. <sup>11</sup> Aanaiqikirausa minara iriseeqa faiqi anaasee fuki faaki qufaqa misa Barabasinara iduku nimiannee qiqau. Mi aukuaana faiqi moo auqu Barabasifa karabusaki marinau. Mifa akaqausa saimbaqa rakiranaki faiqi moo kuqannarusoofofa karafusaki quqaqau. <sup>12-15</sup> Misa Barabasinara qufanoo Piratoofa kaffa aiqamausa qimannimino qinau. Yuda maqannaasa karaambaiqa qimariana minara naqi fee ianauree qufaqa misa moomoosa kaffa faaqa quqasee qimamiqa qiqau, pirimmannai aunirira saqarisaa aruannee qufanoo Piratoofa misa irammirinoo qinau mifa nana manda oosana maraifagee aruanauree qufaqa misa firaagoo uqanna faaqa quqasee qiqau, pirimmannai aunirira saqarisaa aruaqee qufanoo Piratoofa faiqi anaasee moomoosa nidirana nimianee qimaseenoo Barabasinara iduku nimiseenoo Piratoofa nari maara fasiqauqa nimisee maasa Roomma maqannaasa oosana marasee raitasaa qainna rumbeeqoo samu mina ataufakaqa aru umooqukamasee afiqamareeqa muru aun irina saqarisaa pirimmannoo aruaqee qinau.

*Amuka faqaa qafee auqusee afisumaqaqau.*

*(Mat 27:27-31; Yoh 19:2-3)*

<sup>16-18</sup> Piratoofa miqi qimasoofofa sundiaufa iriseeqa Yisuna afiqamareeqa koota maqakiqari rafudamakufaqa miqoo Piratoona firaa amiqira maqa naambeeqai raitasaa qainna rumbeeqoo samuna Yisuna ataufakaqa aru umooqukamaseeqa ataasa ataasa naaree qimasee fafaa aunirira saqarisaa aruanauree qimasee kiapana firaa maaqa naambeeqai munusee aiqama sundiaufa naaramasoofofa anireeqa qamunna moo maara fasiqa misa qamunna taatuqee arirana afisumaqasee amuka faqaa sanda saatunanda fooqaana mara maree karaambaiqa qafee fee qimasee Yisuna akiaqa aranaiqi afisumaqasee nisauku niqinaaqa quqasee kiapana amandee mariandee mandee amandamasee qimamiqau, Oo Yuda maqannaa karaambaiqa sia dauni kuqinnaranoo kisaagasaa marinnaranoo. <sup>19</sup> Miqi qidaqa sasamimi atee karasamu qumaree mina akiaqa rupeemma amidaqa firaagoo ataasa ataasidaqa mina afaaqai niqaara fidiamaqasee mina oorinni niqoori saunarafufaqa ataasa ataasa qimariqau. <sup>20</sup> Misa ataasa ataasa qirana taikafufaqa misa saasaakoona arira qamunna raipaqusee nari qamunna afisumaqasee aunirira saqarisaa firimmannai arifandinnaqoo afiqee fiqau.

*Misa Yisuna afiqee Koorookata aaqanai fiqau.*

*(Mat 27:32-44; Ruk 23:26-43; Yoh 19:17-27)*

<sup>21</sup> Maqusai ari iseeqa Yisuna doo afiqee fimarufanoo kudoosaapeenoo nari aunirira saqari sia amanikufaqa maara fasiqauqa faiqi moo nari maaqaindari aniroona aanai paqurimasee mina auqu Simoona amarafa. Sia Yisuna faiqi namukinaafau mina amarafa moo fannoo mifa Sireenee maqusaindaraafa Areekasandeerana faqa Rufusana faqa nikoofa marinau. Sundiaufa minara Yisuna aunirira saqari aku maree fua qimasee arirarufanoo mifa misa faqaanara rufisee aku maree finau.

<sup>22</sup> Miqimasee misa Yisuna afiga maree fifi ufaqa Koorookata amuaqunamusaa afiqee fiqau. Mi maqa maaqana auqu faiqi nikiaqa amudaani fee qiqau. <sup>23</sup> Yisuna miqoo munu

quqasee uainna nammari marasee moo marasinna minaki quqasee minara naanneera fuki faaki qufanoo qaoo qimasee sia nanau.

(Mi marasinnana nári ufakiqári meerafee qimariqau. Mi marasinnafa namasainaqá sia afaaqá aidafuanifeera amufanoo aidafirana maraaneé qimaseenoo sia mi marasinna nanau.)

<sup>24</sup> Marasinnara qaoo qimasooafaqa misa mina qumaree aunirira saqarisaa rumma-maqasee pirimmannai aruseeqa uqeereeqeega rakiqau. Rakiaseeqa mina qamunnauqa faasai raipagu quqaqoona mara maree kaatara foora sararamandee yafee maraannoo yafee maraannoo qimasaida maraqau. <sup>25</sup> Suani maqee ururoofaqa naina kirooka aunirira saqarisaa ariqau. <sup>26</sup> Yisuna arira oosana raufiqira saqarisaa akara rumasee aunirira saqari akiaqai aiqama qafaaqeera atukaraqau. Maaqi masee akara rinau. Maa fasiqafa Yuda maqannaasa karaambaiqa maridanoommi qimasee akararinau. <sup>27</sup> Maara fasiqauqa karafusakinnaana faiqi mandaikamannimaqee maruqanda ruumba quqaqoona minakiqari mara maree Yisuna aaga minisee nariqa auniriranasaa arusee Yisunaindi qambaanaí rakiqasee miqanda aunirirana dinni dinni rakiqau. [<sup>28</sup> Miqimasoofoanoo ooqeenaa tamummaqara fasiqauqa akara anoona kambiqanau, misa qiqau, misa mina mareeqee manda oosana maree mariasaki quqeeffaranoo.]

<sup>29</sup> Yisufa aunirira saqarisaa dirinoo marufaqa faiqi anaasee moomoosa fiqaree aiqaree idaqa qufoonaridaqa ataasa ataasa qimasee manda ufa qida qiqau, anee maasa firaa amaana maqa rapeemasee qaaramoo faasaana kafaá usakeennaree. <sup>30-31</sup> Amana maqee aneenna kai tatuakinana maqasaa aqufinana asumu maria qimaru faqa aanaiqikirausa uriqararusa faqa Mooseena sandufa akoofasauqa faqa ataasa ataasa qidaqa nari qimami nari qimami qiqau, Mifa moomoosa asumu marirana nimirimarifa nariara sia asumu mariannoo. <sup>32</sup> Doo maqee Anutuna asauku mundirafa maasa Isaraee maqannaasa karaambaiqa auniriranasaaqari tatuaki aqufinaqa maasa irirana minasaa rusisee kuqaa Anutuna amaaku fee qianaura. Manda fasiqauqara dinni dinni nári saqarisaa aruaqanda miqanda faqa Yisunara ataasa ataasa qimariqau.

*Yisufa kuqinau.*

*(Mat 27:45-56; Ruk 23:44-49; Yoh 19:28-30)*

<sup>33</sup> Suani qambaana akiaqa amummaqa ururoofanoo mi maqa maaqana aiqamai asukuna rafaqaqafinau. Suani afu safasasaa mundufanoo asukuna taikafufanoo kafaá suani qanau. <sup>34-36</sup> Asukuna taikararimarufanoo Yisufa faqa rumasee Eeburu ufakiqari qináu Eeri Eeri rama sabakatani maasa ufakiqari qini Anutu qini Anutu, naqaa fee ifanee qini minni qiiseenée qimasooafaqa akaqa fasiqa anaasee miqoo marusa mandirira iriseeqa qiqau, Doo iriaqa mifa Eeriana aaraidaqinoo qufanoo faiqi moo fannoo Yisuna aunirira saqari atukaki sandee oonureenoo paadura au fooqaana maraseenoo maara fasiqauqa nári maqee maqee neemaru uainna nammarinaki raaramaseenoo aika maraseenoo minasaa rufaquseenoo Yisuna nammari naanifee qimasee uqeereeqee Yisuna afaurusaa quqasoofanoo qumbifiqamma namasoofanoo amu fasiqafa qináu, Doo maasa rakisia, Eeriaafa anireenoo aunirira saqarisaaqaraana tatuannoo fee sia fee tatuannoo. <sup>37</sup> Yisufa mi nammarina qumbifiqamma namaseenoo firaa kari faqa rumaseenoo doo kuquaraasináu.

<sup>38</sup> Kuqufanoo aagee kai Yeerusaree firaa amaana maqakinaa qamunna dirirafa ammuqundari qambaana kai raqumaree muqufi aqusanau. Mi qamunnafa naaquqara maaqasaa ititara qamunna marináu. Minaki faiqi sia keeqeemaria maqa marináu. Aukuana aukuana Anutuna aanaiqikirausa uriqararafa kai minaki sipsipa anaqa fidika mara maree mi maqanaki raaraa imarináu. Doo maqee qamunna anaqinoo marifaqa faiqi anaasee Anutuna aaga fimaria aana ititee marifa doo maqee atuannoo maridanoo. <sup>39</sup> Maara fasiqauqa uriqararafa aunirira saqarisaa rakisimarufa Yisufa faaqaruna faqa kuquna faqa qafamaseenoo aaquqoofanoo qináu, kuqaa maa fasiqafa Anutuna amaaku maridanoo. <sup>40</sup> Yisufa aunirira saqarisaa marufaqa anaasee akaqasaa miqoo maridaqa nianasaa maridaqa rakisi mariqau. Misakiqari Saroomeefa faqa Mariana amarafa Makadara maqusaindari anufa faqa, Mariana moo amarana faqa mifa kumaaraa Yameesa Yooseesa ninoofoa marufa marináu. <sup>41</sup> Mi anaaseenamusa Kariree maqusaindari Yisuna dadaaqimarusa mina faqa afaqaqa aniusa mariqau. Sia misa kai, moomoo aanaaseeuqa faqa Yisuna faqa Yeerusaree maqusai aniroosa ani marida aunirira saqarisaa rakisi mariqau.

*Yisuna ooni aamarai akundaqau.*

*(Mat 27:57-61; Ruk 23:50-56; Yoh 19:38-42)*

(Yisuna aukuana nari maqannaasa maaqimmasee madika indufusaida kuqufusa nikundee mariqau. Misa ooni firana kasaqa aamara auquseeqa minaki keeqafufaqa

dinni dinni moomoo aamara auqiiseeqa kuqusa minakiaga naadu naadu nikundee mariqau. Moodaa kai moo kari akundeeqa mina afunda taikoofanoo kaifaa moo fannoo kuqufaqa miqikai imariqau. Sia moodaa karifau nikundee mariqau. Moo kari moo kari nikundee mariqau.)

<sup>42</sup> Yisufa kuqufufanoo suani dupufanoo Arimatea maqusaindaraafa mina auqu Yooseefaana amarafa aniranau. <sup>43-45</sup> Mi fasiqafa Yuda maqannaaf ufa suqiranaki keeqeemarufa marinau, aiqamausa minara kaaqa andeeqara fasiqa fee qimarufa marinau, magee maqee Anutuna ququsa innaarunaidari maqasaa kambiqaaninnanara rakisi marufa marinau. Yisufa kuqu faasaana sabata deedaqira faasaanee qimarunasaa Yooseefaafa Yisuna iri duna sabata faasaana aunirira saqarisaa kaqi dirinoo mariandoo qimaseenoo anireenoo paasoosamasee Piratoona maaqaki kaqi keeqa finoo Yisuna iriara qufanoo Piratoofa Yisufa dauni kuqunara tautumasee maara fasiqauqa misa uriqararana aaramaseenoo iranau. Yisufa kisaagaasaa fee kuqinoo fee qimaseenoo mi sundiana ufa iriseenoo Yooseefaana doo maraannee qufanoo <sup>46</sup> Yooseefaafa raudamaki qamunna fraana moo feefaurumamaree oonuree Yisuna iri saqarisaaqaraana tatu quqaseenoo qamunnasaa kukuqa mandee aku mareenoo ooni aamara auquqoo madikanaki Yisuna iri quqaseenoo ooni fraana quanda quandammeeqeenoo ooni aamarasaa ititanau. <sup>47</sup> Mariana amarafa Makadara maqusaindaraa anaaseefa faqa Mariana moo amarafa faqa Yoosesana anoofa miqoo rakisida iri quqaranara qafee mariqau.

## 16

*Anaaseeqa madikaki oonu qafaqau.*

*(Mat 28:1-8; Ruk 24:1-12; Yoh 20:1-10)*

<sup>1</sup> Yisuna iri kaqi ooni aamaraki marufaqa Mariana amarafa Makadara maqusaindaraafa faqa Mariana moo amarafa Yameesana anoofa faqa moo anaasee Saroomesaa faqa Sabata faasaana aiqaroofaqa kuqimariasa akunnimaqee maria marasinna feefaurumamaree Yisuna irisaa akuanee qimasee mi eendanaki deedaqiau.

<sup>2</sup> Kananaana iqaqoofanoo suani maqee ururoofaqa mi anaaseesa Yisuna akundoo ooni aamaranaki fiqau. <sup>3-4</sup> Aanai fidaqa misa narí qimami narí qimami qiqau, firaa oonitia fannoo ooni aamara ititanoo marifaqa yafee dadaaqinaqee umbaqi quqasee fee marasinna aku amaqqeefaree qimasee oonu qafooofanoo ooni faasai quanda quandammeeqee mafi aquqoofanoo marinau. <sup>5</sup> Misa ooni qafamasee ooni aamaraki keeqafi qafooofanoo asauku uqannai kumaaraa moo fannoo qamunna eekara arirana afisusee oogu marifufaqa qafamasee tautumasee kaaqa rufiaqau. <sup>6-7</sup> Tautumasee rufioofanoo mi kumaaraafa qimanniminoo qinau sia tautumasee rufiaaqa. Innee Yisu Nasareete maqusaindaraana aunirira saqarisaa pirimmannai aruanara randee mariafanoo, mifa sia maqoo maridanoo findi finoo maridanoo. Doo qafaafa, maqoo misa mina iri quqeeaa. Doo fuuqa maa ufana narí faiqi namufaqa Peetoorona faqa qimannimiqa. Yisufa inni noorinni Kariree maqa maaqai finoo, innee miqoo oonureeqa narí qundee kai iqa mina qafeefaranoo.

<sup>8</sup> Mi anaaseeqa mina iriseeqa ooni aamarakiqari rafudamakufaqa sandamaqaraasammiiqau. Kaaqa rufiarana faqa naindiri roofaqa sandaqau. Misa maqusai oonureeqa kaaqa rufiasee sia moosa qimannimiqa. <sup>9</sup> Yuda maqannaasa Saririqara amaanasaa fee qimasee amaanasaa indaaruuqaa faasaanee qimariqau. Mi indaaruuqaa faasaana sandoo anaasee namusa anu faasaanasaa Mariafa Makadara maqusaindaraafa naaree Yisufa findifuna qafanau. Ooqai Yisufa kaqi maru kamuqoo faafasaaqa narí anoona amarana mi Mariana aunduraki faafasaaqa qisauku dinni taikasee dinni ani qaara marasee marufanoo Yisufa kaqi maruqoo mina aunduraindaraa faafasaaqa niqiqoofaqa rafudamakii sandamafiqau. Yisufa mi anaaseena afusaa narí kuqiranakiqari findifuna indaaruu kooroo inau. <sup>10</sup> Yisufa mi anaaseena afusaa kooroomambunara Yisuna aiku asauku oonu maaqi qimasee qimanniminau, <sup>11</sup> Yisufa kuqiranakiqari findifinoo marifaqa qinee qafeeqee qufaqa misa kaqi minara soofaaridaqa ikiraqee maruqoo marufaqa mi anaaseenara unna qiifoo qiqau.

*Yisufa kuqiranakiqari findifinoo narí faiqi namukiqari qaaraqanda kooroo inau.*

*(Ruk 24:13-35)*

<sup>12-13</sup> Yisufa kafaa moo oosana maraseenoo narí faiqi namukina qaaraqanda nifusaa kooroo inau. Miqanda Yeerusaree maqusaindari moo maqusa kaqikaa maqusai fimarufanoo Yisufa aanai nifusaa kooroomambufaqa miqanda oonurandee aniree Yisuna aiku asauku qimannimufaqa unna fee qiqau.

*Yisufa narí faiqinamuki kooroo inau.*

*(Mat 28:16-20; Ruk 24:36-49; Yoh 20:19-23; NiFa 1:6-8)*

<sup>14</sup> Yisufa mina inaaqiana narí faiqi namu qisaukuqara taikasee qikunni ooqu moodaa mararusa narana nee marufanoo kooroo inau. Kooroomafinoo misa mina qafee marusa unna fee qunara niqinoo qinau, inni irirafa ufa rukiee marisa mariafanoo sia qiqafee mariasa ufara innee irimariafanoo.

<sup>15</sup> Yisufa miqi qimasee qimannimiseenoo kafaa maaqi qimasee qimanniminau. Innee maa maqa maaqana afaaqasasa aiqama maqannaa iannai uqanna oonureeqa qini amiqira fasaasa ufa qimannimiyaqa <sup>16</sup> Qinisaa irirana rusimariasa irirana rusidaqa nammari maree mariasa misa innaarunai naaru marira asumu mareefaranoo. Qinisaa sia irirana rusimariasa misa nariranaki fifaranoo. <sup>17</sup> Qinisaa irirana rusimariasa maa afeeka ainainna misaki marinaqa qafeefaranoo, misa faiqi naundurakinaa faafasaqa qini duqusaa niqiqaefaranoo misa moo maqannaasa ufa sia nári iri marianakiqari qifaranoo. <sup>18</sup> Faiqi kuqannarimari sakanifa uqaqanimisainaqa sia mandaikifaranoo. Misa ufaaqa namasee sia kuqifaranoo. Misa nári nisauku aurimariasasaa rusisaifaqa findi fifaranoo.

*Yisufa innaarunai ooru fu ufafa.*

*(Ruk 24:50-53; NiFa 1:9-11)*

<sup>19</sup> Yisufa narí faiqi namu faqa ufa qiqisoofanoo Anutufa mina uqeereeqeenoo innaarunai narí aqa asauku uqannai quqasoofanoo miqoo ooqu marinau. <sup>20</sup> Yisufa innaarunai ooru fufaqa mina faiqi namu aiqamai fifainidaqa Yisuna amiqira fasaasa ufa qimannimiya niqau. Misa miqi marufanoo Karaambaiqa qumee dadaaqufanoo faiqi anaasee misa ufara kuqaa fee qiaqeera faiqi sia auqaaqaa ira afeeka nimufaqa auqoofanoo anoona kambiqee marinau.

## **RUKA** **Yisuna amiqira fasaasa ufa Rukaafa akara rinau.**

*Rukaafa akara oosana aranau.*

<sup>1-2</sup> Oo maa fasiqa Tioofirusa maasaki Yisunasaqari kambiḡoo ainainara moomoo fasiḡauqa amanamasee akara riḡau, Yisufa kambiḡooḡoḡari minara ḡimannimi-marusa misa ḡimannimufaqa akara riḡau. <sup>3</sup> Oo Tioofirusa ḡinee Rukaasa Yisufa kambiḡooḡoḡari mifa niniunara randoorandaamasee amiḡimasee iriseeḡa ḡinee faqa padimasee akara ruanauree ḡimaseeḡa akara rummamaḡaidaḡa. <sup>4</sup> Anee kuḡaa anoona ufa tia irianneera akara rumamaḡaidaḡa.

*Yooḡanee nammari nimi maruna maḡaaninna ufafa.*

<sup>5</sup> Mi ufana oosana maaḡimminoo marinau, Eeroodeefa Yudeeaa maḡa maaḡaki karaambaḡiḡa maru kamuḡoo Yisufa kambiḡanau, mi aukuanḡa Yeerusaree amaana maḡasaa rakisirafa moo mina auḡu Seekariafa marinau. Amaana maḡasaa rakisi marusa faiḡi oosana oosanakiḡari mariḡau, nuḡufaḡaasa mariḡau, Seekariafa Abiaana oosanakiḡari marinau. Mina anaḡa Aaroonaa akeeku akaaku mina auḡu Eerisabeeta nammariḡa marinau. <sup>6</sup> Mi ḡafaḡiḡanda Seekariafa Eerisabeetasa andeeḡasee Anutuna ufamau fimaruḡanda mariḡau. Aiḡama karaambaḡiḡa Anutuna aauḡiḡa ufa faqa na-muaḡiḡa ufa faqa mi mau fimaruḡanda mariḡau. <sup>7</sup> Eerisabeeta nammariḡa aafanaasee marunara miḡanda asooḡaḡeeḡa faiḡi siaḡanda mariḡau.

<sup>8</sup> Moo kari narḡ saika faasaana Seekariafa Yeerusaree amaana maḡaki keeḡafinoo narḡ amaana maḡasaa rakisira saika Anutuna afusaa mina saika ḡimari fee ḡimarufanoo maree marinau. Amaana maḡasaa rakisi marusa misakiḡari yafee amiḡira unda imari nammariḡa amaana maḡaki suḡeemaria ḡaindanasaa suḡaanoo fee ḡimasee masisa rutukiara foorammasee Seekariafa uḡannifiḡasoofanoo findifinoo mi amiḡira undana imaru nammariḡa idaa ḡumbiaramasooḡanoo ḡeemarufaḡa mikari faiḡi anaasee moomoo amaana maḡa naambeḡai maḡasai suḡufufaḡa innaaru ḡimariḡau. Amiḡira unda imari nammariḡa ḡumbiaramasaaḡanoo ḡaidanoo mina muna fannoo faiḡi anaasee innaaru ḡimariḡa mi idaa munnara foora ooru fidanoo Anutuna aiki ambuidanoo misa innaaru kooroodanoo.

<sup>9-11</sup> Seekariafa mi nammariḡa idaa ḡumbi marufaḡa faiḡi anaasee madaanaa innaaru ḡimarufanoo Seekariafa nariḡara amaana maḡaki marifanoo mi nammariḡa ḡeemaru ḡaindanaa aḡa Karaambaḡiḡa Anutuna ḡangiḡoo moo fannoo miḡoo kai kambiḡafufanoo Seekariafa miḡoo marufanoo ḡafanau.

<sup>12-13</sup> Seekariafa mina ḡafeenoo tautinoo rufianau. Tataḡanoo marufanoo mi ḡangiḡooḡa Seekariafa ḡimaminoo ḡinuu. Seekariafa sia rufiaa, Anutufa ani innaaru ḡirana irinoo ani anaḡa Eerisabeetana dadaḡinanoo ani amaaku maḡaanoo, Maḡasainana anee mina auḡu Yooḡaneenee ḡia. <sup>14</sup> Mi faiḡina maḡasainaa ani faqa moomoosa asafaranoo. <sup>15</sup> Anutufa minara amiḡira fasiḡa auḡufaḡaa fee ḡiannoo, uainna nammari fee afeeka nammari fee sia naannoo mina maḡainnaḡooḡari Anutuna naaḡuḡara maraḡuna fannoo aakufi mariannoo. <sup>16</sup> Mifa Isaraee maḡanna moomoosa Anutuna ufa minnisee kaḡirunna fimariasa kafa naarameeḡee nariḡa karaambaḡiḡa Anutuna aramandunnai ḡuḡaanoo. <sup>17</sup> Mifa Anutuna ufa marasee ḡimannimariḡa mifa maḡasaa fasiḡa uriḡararafa afeeka Anutuna tamummaḡara fasiḡa ooḡai maruna Eeriaana fooḡaafa afeeka mariannoo. Mifa faiḡi nikausamara faiḡi minnisee furufari mariasa quandaḡina nari faiḡi namuara nimuḡusinaḡa moodaanaki kifaranoo. Ufa rukiee mariasa faqa mareeḡeenoo andeeḡee mariasa mariranaki ḡuḡaanoo. Miḡi marifanoo mi fasiḡafa faiḡi anaasee mareeḡee karaambaḡiḡa ḡumiranaki amanaikianno.

<sup>18</sup> Mi ḡangiḡooḡa miḡi ḡufanoo Seekariafa aauḡooḡanoo mi ḡangiḡooḡa ḡimaminoo ḡinuu, naḡimasee mi ainainafa kambiḡaanoo fee, Sia amana, ḡinee nauraiḡi maridaḡa, ḡini ḡinaaḡa faqa asooḡa maridanoo. <sup>19</sup> Mi ḡangiḡooḡa mina ufa iriseenoo quandaḡi ḡimaminoo ḡinuu, ḡinee Kabarieerasa maridaḡa Anutuna afusaa kiki iḡa marunaua maridaḡa. Mifa kai ḡini diḡiḡaiḡa maa amiḡira ufana ani faiḡi asumu faiḡi aanaḡi maḡeemaria faasaana kambiḡaanoo fee ḡunana sia iriananoo. <sup>20</sup> Anee ḡini ufa sia irianana akiḡara ani ufa akia finana mariḡana maa ḡimamunna ainainafa kooroomafinanoo ani ufa rakeeianoo.

<sup>21</sup> Seekariafa faqa ḡangiḡooḡa faqa Yeerusaree amaana maḡaki mi ufana narḡ ḡimami narḡ ḡimamidaḡa marufaḡa faiḡi anaasee maḡasai Seekariafa kisaḡasaa afeesida marusia ḡiḡau nanaree kisaḡasaa amaana maaḡaki maridanoo fee ḡimarufanoo Seekariafa

amaana maqakiqari raudeenoo qimannimirara oo raqoofanoo sia amanufanoo asaukun-  
noo qimanniminau. <sup>22</sup> Faiqi anaasee mina ufa akiafuna qafamasee oo amaana maqaki  
Anutuna kooroo irana moo qafeenoo fee qiqa.

<sup>23</sup> Miqoofari Seekariafa amaana maqaki ainainirana taikafoofanoo moo fannoo mina  
amaaqaki aniroofanoo Seekariafa doo amaaqa finau. <sup>24</sup> Miqoo marufanoo mina  
anaaqa Eerisabeeta nammarifa amuaqu uqaikufanoo moodaannai qisauku quqoonasaa  
maaqaiki kai marinau. <sup>25</sup> Eerisabeeta nammarifa qinuu, doo maqee Anutufa faiqi anaasee  
nifusaa qinee kisaagasaa marunna sia faiqi maqaunna qisaurirana taikaqiseenoo.

*Kabarieerafa Yisuna maqaaninnanara kooroo inau.*

<sup>26</sup> Eerisabeeta nammarifa amuaqu uqaikinoo marufanoo dinni taikasee dinni ani  
moodaa quqoona aiqaroofanoo Anutufa nari qangiroomoo auqu Kabarieerana  
aiqoofanoo Kariree maqa maaqaiki kaqikaa maqusa Nasareetee maqusai oofufinuu.  
<sup>27</sup> Mifa maanaaqa uqanna ufa qimamiraree qimaseenoo oofufinuu. Mi manaqana auqu  
Mariafa. Yooseefaafa karaambaiaqa Dafidina ati maraanifeera utaaqama amaaqoofanoo  
maru manaqana Mariana qimamiraree qimasee oofufinuu. <sup>28</sup> Mi qangirooma Mariafa  
maruqoo anireenoo amandeenoo qinuu. Asoorafa aniki mariani, karaambaiaqa ani faqa  
kukeeqanoo maridanoo dadaaqidanoo doo firaqoo ani amiqi amiqinoo. <sup>29</sup> Mariafa  
mina ufa iriseenoo tautinoo mina ufa anoonara firaqoo randanuu. <sup>30</sup> Miqufanoo  
qangiroomoo fannoo qimaminoo qinuu, Oo Maria sia rufiaa doo Anutufa nari afaarirana  
anisaa quqeenoo. <sup>31</sup> Anee amuaqu uqaikinana akoonaiqi maqaseenana mina auqu  
Yisunee qinnaranoo. <sup>32-33</sup> Mifa uriqararafaikinaga misa minara firaqoo uriqarara  
Anutuna amaaku fee qifaranoo. Karaambaiaqa Anutufa Yisuna mareeqeenoo mina  
akeeku akaaku Dafidina aanna ramasee uriqarara karaambaiaqaiqianoo. Yakooboona  
atiuqa Isaraee maqannaasa naaru naaru misa karaambaiaqaiqianoo, naaru naaru sia  
taikaannoo miqinoo mariannoo.

<sup>34</sup> Mariafa mi qangirooma ufa iriseenoo qinuu, Qinee maanaaqa uqanna maridaqa  
naqimasee anee qianandee faiqi maqaanauree. <sup>35</sup> Qangiroomoo fannoo iriseenoo qimaminoo  
qinuu, Anutuna naaquqara andeeqara maraquina fannoo ani aakufinanoo Anutuna  
afeeka anisaa mariannoo, minara misa mi naaquqara faiqi anaqinara Anutuna amaaku  
fee qifaranoo. <sup>36-37</sup> Maria aneenna ati Eerisabeetanara iria asooqa faiqi maqarana  
sia amana marifa doo maqee dinni taikasee dinni ani moodaa quqoona aundurari  
amuaqu uqaikinoo maridanoo, minara ririmma miqinoo Anutufa sia moodaa ainaina  
sia amanaikiannoo doo aniara faqa qunnana amanaikiannoo. <sup>38</sup> Mariafa qangiroomoo ufa  
iriseenoo qimaminoo qinuu. Qinee Anutuna ufamau fimarunausa maridaqa anee qianna  
ainainafa amana qiniki kambiqaannoo, miqi qufanoo qangiroomoo quqasee finuu.

*Mariafa Eerisabeeta nammarifa marunna fu ufafa.*

<sup>39</sup> Mariafa miqoo kaqikaaqoo marinoonaa maammareenoo Nasareetee maqu-  
saindarii Yudeeaa maqamaaqai Seekariana maqusai kisaagasaa faiganoo fiifufanoo  
oorureenoo <sup>40</sup> Seekariana maaqaiki keeqafinoo Eerisabeeta nammarina amandanuu.  
<sup>41</sup> Eerisabeeta nammarifa Mariana amandarana irufanoo mina aranandakinaa faiqi  
fannoo kasinuu. Kasufanoo Anutuna naaquqara maraquina fannoo Eerisabeetana  
aakufufanoo nari Mariana amuaqu uqaikianinnanara sia irufanoo maraquina fannoo  
mina qimamufanoo firaqoo Mariana qimaminoo qinuu. <sup>42</sup> Aiqama anaaseekina  
Anutuna firaqoo amiqi amiqi ianinafa mariananoo, anee maqeenaa faiqi anaqana  
Anutufa amiqi amiqi ianinafa mariannoo. <sup>43</sup> Oo qini karaambaiaqa anoofa uriqarafa  
nanaree anee qini qiqafarara aninane qinee oorudupirausa maridaqa. <sup>44</sup> Anee qini  
qimandaananoo qini faiqi qiranandakiqari asasinoo kooripoo inoo. <sup>45</sup> Karaambaiaqa ani  
qimamu ufana irisee kuqaa fee qimasee iriannana akiaqara mifa ani amiqi amiqianoo.

*Mariana asasira ufa.*

<sup>46-47</sup> Mariafa mi ufana iriseenoo asasammaseenoo qinuu,

Qini qimuqusa karaambaiaqa amooqidanoo,

qini daunduraindarii Anutunara asasiidanoo innaarunai asumu marirana qimimari-  
fammi.

<sup>48-49</sup> Qinee oorudupimasee mina ufa irimarunausa marunanoo kaqi qiniara irinoo,

firaa afeeka faqaa Anutufa firaa ainaina qiniki qinara,

maafoofari aiqama maqasaa fasiqa anaasee qiniara amiqi amiqi qifaranoo.

Mifa naaquqara andeeqara auqu faqaafa maridanoo, mina ufara rufiee mariasa ni-  
fauarana nimidanoo.

<sup>50</sup> Maqee mariasa faqa miqoo kambiqaainausa faqa naaru kambiqaainausa faqa nifauarana  
nimianoo.

<sup>51</sup> Narí amudaanaiqimari asaukuna uqeeraseenoo aanoo imaria fasiqa anaaseesa nári firannaira irimariasa raurukamasanau.

<sup>52</sup> Mifa uriqaree maria karaambaiqausa qumara muqufi quqaseenoo ureeqarousa qumaree uqeeranau.

<sup>53</sup> Mifa naararee mariasa amiqira narana ainaina nimuaqu mannimaqaseenoo moomoo narana faqaasa kaqisamu fuaqeera niqiganau.

<sup>54</sup> Mifa maasa Isaraee maqanna nikaaku ufa qimannimuna anoonaikamma nimaqanau,

Mifa narí ainainira faiqi Isaraee maqannaasa dadaaqinau.

<sup>55</sup> Abarahaamanara faqa iriseenoo amuqusufanoo dadaaqinoo mina aiku asauku faqa naaru naaru dadaaqianoo.

<sup>56</sup> Mariafa mi ufana qimaseenoo qima taikaseenoo qaarammoo quqoona miqoo Eerisabeeta nammarina faqa marinoo quqasee narí maqusai Nasareeteenni finau.

*Nammari nimimaru Yoohaneena maqoo ufafa.*

<sup>57</sup> Mariafa narí maqusai fufanoo Eerisabeeta nammarifa marikinoo innaamunai oonureenoo akoonaiqi maqanau. <sup>58</sup> Maqasoofanoo mina maqusanaasa faqa mina ainaina faqa iriseeqa oo Anutufa maa asooqana amiqi amiqi inoo fee qimasee mina faqa asasiqau.

<sup>59</sup> Maqasoofanoo mi faiqifa moodaa amaana marasoofaqa misa anireeqa Yuda maqannaasa oosana mareeqa nári fainanduidaga nipata aukuannee qimasee mi faiqi anaqina apata aukusee narí akoona amaranaikiraree qimasee aniusufiqau. <sup>60</sup> Miqi qufanoo mina anoofa Eerisabeeta nammarifa qinai, sia narí akoona amaranaikiaqa mina auqu Yoohaneefa mariannoo. <sup>61-63</sup> Misa iriseeqa qiqau, Oo ani atiuqaki sia mi nuqufa maridanoo, naqimasee fee mina auqu raanuree qimaseeqa faiqi aanaaqi akoona Seekariana ufa akiarana nisaukunoo iramirufanoo Seekariafa papiqa faqa kirifi faqa asaukunoo qimiqee qufaga amufanoo maa faiqina auqu Yoohaneefa mariannoo fee qimasee akara rinai. Akara rumasoofaqa aiqamausa qafamasee tautiqau. <sup>64-65</sup> Miqimaseenoo Seekariana ufa akiarafa rakeeinai. Rakeemafufanoo Anutuna amooqira ufa aiqamausa nifusaa qimarufaqa aiqamausa qafamasee rufieeqa niqoonausa qimannimufanoo miqooqari aiqamai Yudeeaa aaqana maqa maaqaki daraaninai. <sup>66</sup> Aiqa mi ufana irusa mi faiqi anaqinara innooqafinoo nana firaa saikee maraanoo fee qimasee randaqau, karaambaiqa afeeka minaki akooqoo marifaqa qafaidaqa.

*Seekariana maraquna aakufufanoo ufa qimanniminai.*

<sup>67</sup> Seekariana ufa rakeemafufanoo Anutuna naaquqara maraquna fannoo mina aakufufanoo tamummaqaseenoo ufa qinai.

<sup>68</sup> Isaraee maqanna Anutufa anireenoo narí faiqi anaasee idukunnisainara minara karaambaiqara dufi dufi qianaara.

<sup>69</sup> Mifa amudaanai qimasee asumu maraaninnana narí ainainira faiqi Dafidina atikiqari uqeereeqeenoo.

<sup>70</sup> Minara ooqai narí naaquqara tamummaqara fasiqauqannai maasa maa ainainnara qimanniminai.

<sup>71</sup> Mifa maasa namuqaasaa ititannimaqasee aiqama maasara fidiqaa imariasa afeeka rafaqa fuannoo.

<sup>72-75</sup> Mifa narí qimaqoo ufanara irianauree qeeqa naaquqara moodaanaki kira ufa iriseeqa mimau dadaaqianauree qinai.

Mifa oori runusee Abarahaamana qimaminai, minaki mifa maasa namuqaa nisaukukinaana mareeqee paasoosiranaki quqaqisainaqa maasa kaqi marianna kamuqoo mina naaquqara andeeqara fasiqa anaasee mariannanara qimaminai.

<sup>76</sup> Oo qini faiqi aanaaqi misa aniaa firaa uriqarara Anutuna tamummaqara fasiqa fee qifaranoo.

Anee karaambaiqa afunni fidana mina aana afisinnaranoo.

<sup>77-79</sup> Anutufa maasara amuqusi marifa nifauee marifa maridanoo maasa innaarunai marira asumu mararafa doo suani qamannimaqeenoo foora inoo maridanoo innaarunaindarii maasa kuqiranakiqara foora asukunaki

mariasasaa qannoo maasa asoora aatata niku raannanara qaannoo.

Qini faiqi minara anee karaambaiqa faiqi anaasee qimannimia, nariqa mandainaina ikairi karaambaiqinnai maree aniraifanoo mininnisaannoo, minannai Anutufa innaarunai asumu marirana nimianoo, Seekariafa doo mi tamummaqara ufana taikanau.

<sup>80</sup> Seekariasa Eerisabeeta nammarisa faiqi aanaaqi fannoo innooqeenoo uriqarara maraqaana faqaafa findifinai, Isaraee maqanna nifusaa kikiqiranara deedaqidanoo kumaaraasaa kaasau maqa maaqaki kai marinai.

## 2

*Yisufa kambiyoqo ufafa.*

*(Mat 1:18-25)*

(Mi aukuanna Roomma maqannaasa aiqama aanaamuru rafaqaafusee misa kai maaqanna maaqanna kaqikaa kiapausaikammafi rakisi nimaqee mariqau, aiqama kaqikaa kiapausa uriqarara kiapafa Roomma maqusai maridanoo miqooqari mifa aiqamai rakisi nimaqee marinai.)

<sup>1</sup> Mi aukuanna mi uriqarara kiapana auqu Aukustusafa marufaqa mina asauku ameemaanai aiqama aanaamuru mariqau, Aukustusafa nari asauku ameemaanai marusara nariqa nikaaku maqusaki suqufiqa Roomma maqanna kiapana papiqaki nuqu akararuane qufaqa miqimmiqau. <sup>2</sup> Roomma maqannaasa indaaru nuqu maroo kari Kiriniusafa Siria maqa maaqaki kaqikaa kiapafa marinai. <sup>3</sup> Aiqaama maqannaasa Aukustusana ufa iriseeqa andeeqasee nariqa nikaaku maqusai nuqu maraageera suqi mariqau.

<sup>4</sup> Yooseefaafa ooqeenaa Isaraee maqanna karaambaiqa Dafidina ati marufa Kariree maqa maaqakiqari kaqikaa maqusa Nasaretee marufa miqooqari Yudeeaa maqa maaqaki kaqikaa maqusa Beetareeqeemma maqusai Dafidifa mariu maqusanaki auqu maraanifeera ooqu finau. <sup>5</sup> Mariafa Yooseefaana utaaqama amaqaqarafa amuaqu uqafaqa maridanoo Yooseefaana faqa ooqufinai. <sup>6</sup> Miqanda ooqu Beetareeqeemma maqusai ooquroofanoo Mariafa innaamunai firafa kambiyoofanoo nari ooqa faiqi akoonaiqi maaqimaseenoo maqanau. <sup>7</sup> Miqanda Beetareeqeemma maqusai ooquree faiqara maaqara randoosia faiqi anaasee moomoo suqufufaqa aiqamaki qumbiqafunara burimakau faiqee maru maqana qafamaseenoo Mariafa nari faiqi minaki maqanau, maqaseenoo suara aruandoo qimaseenoo qamunna kisaqaq anaqiranannai kukuqam-meeqeenoo burimakau difaaniki faiqamaqanau.

*Qangiroouqa sipsipasaa rakisimarusa kooroomannimiqau.*

<sup>8-9</sup> Mi eendanaki faiqi akaqausa maqusa dinni atinai nariqa sipsipasaa rakisida marufanoo karaambaiqa qangiroo misa maruqoo kooroomafufanoo karaambaiqa kaaqa qarafa qoomara foora misa maruqoo rupannoo ufaqa firaqoo rufioofanoo mi qangiroofa qimannimino qinai. <sup>10</sup> Sia rufiaaqa, amiqira fasaasa ufa aiqama maqa maaqakinaasa firaqaa asasira ufatia qimannimirara qumidaqa. <sup>11</sup> Maqee eendaki, inni innaarunai mareefandinnana asumu maraaninafa Anutuna asauku mundirafa karaambaiqa fannoo Dafidina maqusaki kambiqeenoo. <sup>12</sup> Maaqimasee paquriqa mifammifoo qiaqa, burimakau faiqeemaria maqanaki faiqi aanaaqi mina anoofa qamunna kisaqaq anaqiranannai kukuqammeeqeenoo burimakau narana amimaru difaaniki faiqama amaqaqaiqanoo innee oonuree qafeefaranoo.

<sup>13</sup> Miqi qufaqa innaarunaindaraa qangiroo moomoosa uqanna tautumasee kooroomafufaqa Anutunara asasira idi raidaqa maaqi qiqau.

<sup>14</sup> Innaarunai sandaaqaindaraa Anutuna amooqirana amia, maqasaqaraasakiqari Anutufa aidimarisaki naundura asooarafa misaki mariani.

<sup>15-18</sup> Qangiroouqa mi idina ramaseeqa innaarunai oorufufaqa sipsipasaa rakisiraua nari qimami nari qimamiqa qiqau, doo maree Beetareeqeemma maqusai oonuree karaambaiqa fannoo qimannimi ainainara qafaa, qimasee sandee oonuree Yooseefaana faqa Mariana faqa faiqi aanaaqi burimakauqa difaaniki faiqaqee maruna faqa paquriqau, paqurimasee Yooseefaana Mariasa qangiroo maa faiqinara qimannimu ufana qimannimufaqa akaqausa mi ufana ati irimarusa irufanoo naaquqanau. <sup>19</sup> Mariafa mi ufana iriseenoo aundura quqaseenoo minara firaqoo iridanoo randanau. <sup>20</sup> Sipsipasaa rakisiraua anirandee fidaqa nariqa irunara faqa qafoonara faqa qangiroo ufamau fiqa paqurunara faqa asasira idi raqau.

*Yisuna fainanduqu ufafa.*

<sup>21</sup> Dinni taikasee dinni ani qaaramoo faasaana aiqarooqafa Yuda maqannaasa nari fainanduqira oosana marasee akoonaiqi aanaaqi afaaqa ati auku aqusee auqu raqau. Misa Yisuna faqa miqiraree qimasee miqimasee auqu rararee qiqau, sia kaqi auqu raqau, Mariafa kaqi marukamuqoo qangiroo fannoo qimamu auquna Yisunee qiqau.

*Amana maqaki Yisuna asai neeqa aandau tatufunaqau.*



<sup>22</sup> Ooqai Mooseena sandufa akara maaqi qimasee qimarinau. Aiqama anaasee faiqi maqasee innaamuna unda taqafufaqa amaana maqai ooruraida Anutuna aandau tatufirana suqa amiaqee qiqau. Aiqama ooqa faiqi akoonaiqiuqara faqa karaambaifaq uaaqama amaqaasee amaana maqaki muru amiaqee qinau. <sup>23-24</sup> Mariana afaaqai innaamuna unda taikafufanoo Yooseefaasa Mariasa Anutuna sandufamau fidaqa Anutuna aandau tatufirana sia amanaikifaqa kudi fasiqauqa tatufirana qaara nakipuruna maramaree Yeerusaree amaana maqaki ooruree Mariana tatufirana suqamisee mikari kai faiqi aanaaqi Anutuna amiraree qimasee ooruree keeqaqau.

<sup>25</sup> Moo nauraiqi auqu Simeeoonafa mi aukuanna Yeerusaree maqusai amaana maqaki ainainimarufa maridanoo kaaqa Anutuna ufara rimarufa Isaraee maqannaasumu maraaninnanara afeesara marinau. <sup>26</sup> Anutuna naaquqara maraquna fannoo mina aakufufanoo qimaminau. Anee karaambaifaq Anutuna asaku mundirafa kambiqainana anee qafamaseenana kuqinnaranoo, sia kaqi kuqinnaranoo. <sup>27</sup> Moo faasaana mi maraqunafa Simeeoonafa aakapoofofanoo amaana maqaki keeganau, mikari kai Yooseefaasa Mariasa Yisuna rafusu maree amaana maqaki keeqafiqa Mooseena ufamau firaree qimasee keeqaqau. <sup>28</sup> Keeqafufanoo Simeeoonafa anireenoo mi faiqina rafususeenoo Anutunara asasira ufa qinoo qinau.

<sup>29</sup> Oo karaambaifaq maqee anee qimaqimunna ufafa anoona kambiqeenoo maqee amana qinee ani ainainira faiqi marunausa asooaranaki kuqunaaura.

<sup>30-31</sup> Maqee qini qifu fannoo maqasaaqaraasa asumu maraaninnana qafeenoo maasa asumu maraaninnana anee aiqama maqannaas qafaaqeeera deedaqiannana qini qifu doo qafeenoo.

<sup>32</sup> Mifa ani maqannaas Isaraee maqannaasa ani areenarana nimianinafa maridanoo, qoomara foora qeenoo aanaamuru ani aana uqannifiqaaninafa marifaqa qeeqa qifunnai qafeeqa.

<sup>33</sup> Yisuna anaakoo Simeeoonafa ufa iriseeqa tautiqa nari qafee nari qafee iqau. <sup>34-35</sup> Simeeoonafa Yisuna afaaqooqa qira ufa qimamiseenoo quandaki mina anoona Mariana qimaminoo qinau.

Anutufa maa faiqi anaqina nari kambiqaaninna ainaina uqannifiqaanifeera uqeereeqeenoo quqeenoo.

Moomoo Isaraee maqannaasa mina qafamasee nikooqaiifaqa maaniki aqu fifaranoo kaifaa moomoosa mina qafamasee findifiqa asumu marirana mareefaranoo.

Akaqausa mina qafamasee nikoo qaiifaqa minara aqira ufa qimasaifanoo doo minannai nari naunduraindaraa manda irirana kooroo iannoo.

<sup>36-37</sup> Mi faasaana anaasee asooqa moo mina auqu Anaa nammarifa Yakooboona amaaku Aseerana atikiqari kambiqarana Fanueerana araamuna marinau. Mifa maanaaqasaaqari faiqi marasee dinni taikasee dinni ani qaaraqanda marasee aukuaana marinoo mina afaaqi kuqufufanoo miqooqari aukuaana qaara faqa qaara faqa fasiqa arusee moo fasiqa qaara faqa qaara faqa moomoo aukuaana adeedaana marinau. Mifa amaana maqakiqari sia raudee finau, eendaki faasaana minaki kai maridanoo Anutuna amooqira ufa qimamidanoo aarara maridanoo innaaru qimarinau. <sup>38</sup> Simeeoonafa Mariana qimamimarufanoo Anaa nammarifa anireenoo Yisunara Anutunai dufi dufi qimasee doo miqooqari mi faiqi anaqina Anutufa asumu marirana nimianinafa ani maridanoo fee qimasee aiqama Yeerusaree maqannaasaka akaqausa Anutuna asumu marirana afeesimariasa qimanniminoo ninau.

*Nasareete kaifaa ani mariqau.*

<sup>39</sup> Yooseefaasa Mariasa Yeerusaree amaana maqaki aiqama Karaambaifaq sandufa taikasee Kariree maqa maaqai nari maqusa Nasareete maqusai anirandee fiqau.

<sup>40</sup> Miqoo marufanoo Yisufa innooqeenoo nari nidanoo amudaani afeekaikufanoo Anutuna amiqi amiqirafa minasaa marufanoo irirana fiqararafa marinau.

*Yisufa amaana maqaki maruifaqa randaqau.*

<sup>41</sup> Ooqai Isaraee maqannaasa Isipa maqasaa mandainainaki marufanoo Anutufa nari qangiroo moo aqiqoofanoo Isaraee maqannaas ainnaaqareenoo Isipa maqannaas ooqa faiqi aiqama naru taikanau. Isaraee maqannaasa minara irisee miqooqari aukuaana aukuaana ainnaaqarara qoomaqa sakasaidaqa neemariqau. Aukuaana aukuaana Yisuna anoofa akoofofaqa Yeerusaree maqusai ooruree ainnaaqarara qoomaqa sakasee neemariqau. <sup>42</sup> Yisufa (12) qisaukuqara taikasee qikunni ooqu qaara marasee aukuaana marasoofaqa mina anaakoo Isaraee maqannaasa oosana marararee qimasee mina faqa aqiqaqa Yeerusaree maqusai ooru fiqau. <sup>43</sup> Misa miqoo ooruree moomoo afuru faiqaidaqa qoomaqa sakasee neemariqau. Qoomaqa taikaseeqa miqanda Yooseefaasa

Mariasa nari aqoonausa faqa Yisunara doo fiifoo qimasee findimaqee nariqa maqusai fiqau. Yisufa Yeerusaree maqusai kaqi mariufanoo amaana maqaki kafiaa keeqanau. <sup>44</sup> Yisuna anaukoo moodaa faasaana fimarufanoo eenoofaqa nari ainainaki faqa niqoonausaki faqa Yisunara randee mariqau. <sup>45</sup> Randoosia sia marufaqa kafiaa anirandee Yeerusaree maqusai randararee qimasee ooru fiqau.

<sup>46</sup> Qaara faasaana miqoo randaqa niniufaqa qaaramoo faasaana amaana maqaki keeqafi paquriqau, mifa Yuda maqannaasa amaana ufa akoofasauqa faqa minaki maridanoo misa ufa iriseenoo quandafi oosana oosana ufara misasaa irammiri marinau.

<sup>47</sup> Irammiri marufaqa miqoo marusa oo irirana fiqararafammifoo qimasee ruftaqa. <sup>48</sup> Mina anaukoo qafeeqa tautiqa qiqau, maaqanda qimaaku anee nanaree maaqanda mandaikamma qimaqeenanee ani akoosandiri qimuqusimarifaqa aniara randaqa niniifaqa paquriqa. <sup>49</sup> Yisufa iriseenoo qinau, oo inneeqara sia fee iridee qinee naqimasee moosaa marianauree sia amana, qinee qeeqa qikoona maaqaki kai marianausa mari-daqa. Inneeqara minara iriaqaana. <sup>50</sup> Miqi qufaqa miqanda sia mi ufana oosana iriqau.

<sup>51</sup> Miqooqari Yisufa nari anaukoo faqa Nasareetee maqusai oogu maridanoo nari anoona akoona ufa ameemaanai marufanoo mina anoofa Mariafa mi ufausa aundurai kai iridanoo marinau. <sup>52</sup> Yisufa miqoo marufanoo mina irirafa faqa amudaani faqa innooqee marufanoo Anutufa faqa faiqi anaasee faqa Yisunara nidi marinau.

### 3

*Nammari nimimaru Yoohaneefa Anutuna ufa qimanniminau.*

*(Mat 3:1-12; Mak 1:1-8; Yoh 1:19-28)*

<sup>1</sup> Tibeeriusafa Roomma maqannaasa firaa kiapafa (15) qisaukuqara taikasee qikunni oogu moodaannai qiku taikasee aukuaana maru kamuqoo mi fasannai Yudeeaa maqannaasa kaqikaa kiapafa qaara auqu faqaafa marinau, Poontiusafa moo auqu Piratooafa marinau, Mi fasannai Kariree maqannaasa kaqikaa kiapafa Eeroodeefa marinau, Itureea maqannaasa faqa Tarakoonitisa maqannaasa faqa misa kaqikaa kiapafa Firipina amarafa Eeroodeena akaqa marinau, Abireenee maqannaasa kaqikaa kiapafa Risaniasafa marinau. <sup>2</sup> Yeerusaree maqusai Anutuna aanaiqikiraqanda Annasafa faqa Kaiafasafa faqa mariqau. Mi aukuaana Seekariana amaaku Yoohaneefa kaasau aadana maqa maaqaki marufanoo Anutuna ufa fannoo Yoohaneena aakufufanoo findifinoo Yooradana nammari afaiqara marusaki oonuree aniree idanoo Anutuna ufa faiqi anaasee qimanniminoo nidanoo qinau. <sup>3</sup> Inneeqa manda marirana minnisee Anutufinnai ubeekai faqa nammari ruma nimaqaanaura miqi masaifanoo Anutufa inni mandainaina mininnisee sia naruannoo. <sup>4</sup> Yoohaneefa nauraa tamummaqara fasiqa akara rumaqoona ufamaa finoo miqi marinau, mi tamummaqara fasiqafa maaqi qimasee akara rinau.

Kaasau maqa maaqakiqari faiqi moo maaqi qimasee nammeera qidanoo faiqi anaasee qimannidanoo karaambaifqa anianinna aana afsuaqa mina aana eendaandirana andeeqaa.

<sup>5</sup> Arumukiranaki maqa apauru quqaina qumbiqaani amuaqunamu faqa aaqana faqa apaurinanoo afaasaikiani.

<sup>6</sup> Eendaandira aana aiqama andeeqaa mandaikiranaki anukamasaina raununukaani miqimasai faqa aiqama anaamuru Anutufa asumu maraaninna qafeefaranoo.

<sup>7</sup> Miqi qimasee tamummaqara fasiqa ooqai qimasee akararinau. Faiqi anaasee moomoosa uqanna Yoohane finnai Yooradana nammari marunnai ooguqreeqa nammari mararara oogu fiqau. Yoohaneefa rumannimaqararee qimaseenoo misa nikaruqiranara irisee qimannimidanoo qinau, Innee ukadiqa faiqinamuara foora Anutufa narinarana rufiasee inneeqa manda oosanakiqari kambaaramasee asukaki qinee marunnaqoo aniree fee unna qimasee nammari marararee qidee. Anutuna aanoo irana innisaa aqufuaninafa yafee inni aaquqima nimaqai faqee minakiqari sandee qinee unnaqoo aniree nammari nimirarunnana mandaqaidee. <sup>8</sup> Innee maasa Abarahaamana atiuqa marunausa maridee qimasaida Anutufa asumu marirana kaqi qimianifee qimariafanoo, aaqaida miqi qimariafanoo. Inneeqa mandoosana minnisee andeeqara oosana maraifaqa qafeeqa inniara kuqaa naundura quandarasee qimasee amiqira saqari qaqaamara foora iradaqee qianaara. Innee fifau Abarahaamana ati fee qimariasa, mifa fifau ainaina maridanoo, iriaqa Anutufa amana qifanoo maa fifau ooniqasaaqari faiqikammafi Abarahaamana atiuqasaa amana ootupaqa mariannoo. Innee Abarahaamana ati fee qimariana fifau ufa kai qimariafanoo. <sup>9</sup> Anutufa saasunara foora ateeqarana doo rauqisee maridanoo, sia naundura quandainausa Anutufa narirafa qusandaannoo aiqamausa saqariara foora sia amiqira qaqaama irai fanoo ateeka idaki aqunannoo.

<sup>10</sup> Faiqí anaasee Yoohaneena aaquqira ufa iriseeqa qiqau. <sup>11</sup> Oo Yoohanee maasa ani ufara naqi fee ianauree qufanoo Yoohaneefa qimannimino qinau, qaara siuta faqaafa siuta siaina moo amia narana faqaafa rainasee narana siaina amia. <sup>12</sup> Roomma maqannaa takisa munnimma maree mariasa faqa Yoohaneefa marunnai anireeqa iramiriqau, oo ufasaa rakisirafa maasa naqi fee ianauree qufanoo Yoohaneefa qinau. <sup>13</sup> Innee andeeqasee takisa munnimma kai maraaqa sia qummuarirana ootupamasee maraaqa. <sup>14</sup> Miqi qimasee qimannimisoofaqa Roomma maqannaa sundiauqa aniree iramiriqau, maasa faqa naqi fee ianauree anee maasara nanee fee qinnaree qufanoo Yoohaneefa qinau, Innee sia aanoo iranannai moosa munnimma qummuariaqa, sia unnufannai kootamasee moosa munnimma aina qummuariaqa. Inneeqa saika akiqara feefauru marasee sia minara manda ufa qimasee ninunu ruaqa. Minara amana fee qimasee nifaqa quqaqa.

<sup>15</sup> Faiqí anaasee moomoosa Isaraee maqannaasa Yoohaneenara iriseeqa qiqau, ooqai Anutuna tamummaqara fasiqauqa Anutuna asauku mundirafa kambiqaanoommifoo qimaqoofa mifee qimasee misa naundura uqeeraqau. <sup>16</sup> Yoohaneefa minara iriseenoo qimannimino qinau, qinee fifau nammarinnai inni rumannimaqaidaga, moo fannoo firaqoo qini uriqararafa aniannoo, naqimasee fee qinee mina dadaaqianauree. Qinee fifau ainainara foora marianauro, mifa kaaqa uridaqaqarumasee uriqararafa mariannoo. Mifa Anutuna maraqunannai faqa idannai faqa rumannimaqannoo. <sup>17</sup> Maraqunannai rumannimaqarafa faqa kudimakirana qaaninna idannai rumannimaqarafa faqa minara oofaafana anoona faqa aanaaqmaara faqa kikiqa usidanoo. Mifa faiqí anaasee oofaafanara foora asaukunnoo utitiqa maseenoo aanaaqmaara fuaqa aquseenoo anoona mara maaqaki quqeenoo aanaaqmaara ida firaafa sia dimbeemari idanaki araannoo.

<sup>18</sup> Yoohaneefa amiqira fasaasa ufa faiqí anaasee qimannimidanoo oosana oosana ufannai misa fuki faaki qimarinau, Anutuna ufamau fuaqeera qimannimimarinau. <sup>19-20</sup> Kariree maqa maaqaki kaqikaa kiapafa Eroodeefa nari akaqa anaqa mina auqu Eeroodiasa nammarina ummuara maraseenoo oosana oosana mandainaina faqa maree marinau. Yoohaneefa Eeroodiasa nammarina maroonara qaoo qufanoo Eroodeefa nari mandainaina oosana fannoo uriqaroonara Yoohaneena rumbaranaki quqanau.

*Yoohaneefa Yisuna nammari rumamaqanau.*

*(Mat 3:13-17; Mak 1:9-11)*

<sup>21-22</sup> Yoohaneefa kaqi maru aukuana faiqí anaasee moomoosa nammari mareesoofanoo Yisufa faqa aniroofanoo Yoohaneefa mina faqa nammariki mara keegaseenoo Yisufa nammarikiqari findifinoo innaaru qimarufanoo innaaruna rakeemafufanoo Anutuna naaquqara andeeqara marauna fannoo nakipurunaika mafinoo Yisunasaa aqufufanoo innaarunaindarii ufa moo kambiqeenoo qinau. Anee qini qimuqusimarianna qimaakufa mariananoo firaqoo aniara dididanoo.

*Yisuna akeeku akaaku nuqu.*

*(Mat 1:1-17)*

<sup>23</sup> Yisufa (30) qini qiku qisauku taikasee moo fasiqa asaukuqara taikasee aukuana maraseenoo nari saika oosana aranau. Aiqama fasiqa anaasee sia mina oosana irirai minara Yooseefaana amaaku fee qimariqau. Yooseefaafa Eerina amaaku marinau. <sup>24-26</sup> Eerifa Matatana amaaku marinau.

Matatafa Reefina amaaku marinau.

Reefifa Meerakina amaaku marinau.

Meerakifa Yanaina amaaku marinau.

Yanaifa moo Yooseefaana amaaku marinau.

Yooseefaafa Matataiasana amaaku marinau.

Matataiasafa Amoosana amaaku marinau.

Amoosafa Naqummana amaaku marinau.

Naqummafa Eesirina amaaku marinau.

Eesirifa Nakaina amaaku marinau.

Nakaifa Maatana amaaku marinau.

Maatafa moo Matataiasana amaaku marinau.

Matataiasafa Seemeena amaaku marinau.

Seemeenafa Yooseekana amaaku marinau.

Yooseekafa Yoodana amaaku marinau.

Yoodafa Yooannana amaaku marinau.

<sup>27</sup> Yooannafa Reesana amaaku marinau.

Reesafa Seerubabeerana amaaku marinau.

Seerubabeerafa Seearatieerana amaaku marinau.

Seearatieerafa Neerina amaaku marinau.  
<sup>28</sup> Neerifa Meerakina amaaku marinau.  
 Meerakifa Adina amaaku marinau.  
 Adifa Koosamana amaaku marinau.  
 Koosamafa Eeramadamana amaaku marinau.  
<sup>29</sup> Eeramadamafa Yoosuana amarana amaaku marinau.  
 Yoosuafa Eerieeseerana amaaku marinau.  
 Eerieeseerafa Yoorimana amaaku marinau.  
 Yoorimafa Matatana amarana amaaku marinau.  
 Matatafa Reefina amarana amaaku marinau.  
 Reefifa Simeeoonana amarana amaaku marinau.  
<sup>30</sup> Simeeoonafa Yudana amarana amaaku marinau.  
 Yudafa Yooseefaana amarana amaaku marinau.  
 Yooseefaafa Yoonamana amaaku marinau.  
 Yoonamafa Eeriakimana amaaku marinau.  
<sup>31</sup> Eeriakimafa Meereena amaaku marinau.  
 Meereenafa Meennana amaaku marinau. Meennafa moo Matatana amaaku marinau.  
 Matatafa Natannana amaaku marinau.  
 Natannafa Dafidina amaaku marinau.  
<sup>32</sup> Dafidifa Yeeseena amaaku marinau.  
 Yeeseefa Oobeedana amaaku marinau.  
 Oobeedafa Boosina amaaku marinau.  
 Boosifa Seeraana amarana amaaku marinau.  
 Seeraafa Naasoona amaaku marinau.  
 Naasoofa Aminadabana amaaku marinau.  
 Aminadabafa Adimina amaaku marinau.  
<sup>33</sup> Adiminafa Aranina amaaku marinau.  
 Aranifa Qeesaroonana amaaku marinau.  
 Qeesarooka Peereesana amaaku marinau.  
 Peereesafa Yudana amaaku marinau.  
<sup>34</sup> Yudafa Yakooboona amaaku marinau.  
 Yakooboofa Isakeena amaaku marinau.  
 Isakeefa Abarahaamana amaaku marinau.  
 Abarahaamafa Teeraana amaaku marinau.  
 Teeraafa Naqoorana amaaku marinau.  
 Naqoorafa Seerukana amaaku marinau.  
<sup>35</sup> Seerukafa Reeuna amaaku marinau.  
 Reeufa Peereekana amaaku marinau.  
 Peereekanafa Eebeerana amaaku marinau.  
 Eebeerafa Seeraana amaaku marinau.  
 Seeraafa Kainnana amarana amaaku marinau.  
<sup>36</sup> Kainnafa Arafadana amaaku marinau.  
 Arafadafa Seemana amaaku marinau.  
 Seemanafa Nooana amaaku marinau.  
 Nooafa Rameekana amarana amaaku marinau.  
 Rameekafa Meetuseerana amaaku marinau.  
<sup>37</sup> Meetuseerafa Eenookana amaaku marinau.  
 Eenookafa Yareedana amaaku marinau.  
 Yareedafa Maqarareena amaaku marinau.  
 Maqarareefa moo Kainnana amaaku marinau.  
 Kainnafa Eenooosana amaaku marinau.  
<sup>38</sup> Eenooosafa Seetana amaaku marinau. Seetafa Adamana amaaku marinau.  
 Adamafa Anutuna amaaku marinau.  
 (Anutufa nari kambiqarafa marinau.)

**4**

*Sadannafa Yisuna amanufa.*  
 (Mat 4:1-11; Mak 1:12-13)

<sup>1</sup> Yoohaneefa Yisuna nammariiki tupamasoofanoo findifufanoo Anutuna andeeqara naaquqara maraquna Yisunaki qumbiqafufanoo mi maraqunafa Yisuna rarisameeqeenoo kaasau aadana maqa maaqaki quqasoofanoo miqoo afaannaufa firaafa qaara

fasiqa niku nisauku taikasee faasaana Yisunara mandainainaki aaqaranaki fuanifee qimaseenoo maara maqaseenoo amanamasee qafosianoo. <sup>2</sup> Qaara fasiqa niku nisauku taikasee faasaana mikari Yisufa narana sia nanau, mi moomoo faasaanafa aiqarroofanoo Yisuna firaqoo aararanau.

<sup>3</sup> Firaqoo aararofanoo afaannauqa firaafa mina qafamasee Yisuna qimaminoo qinau. Anee kuqaa Anutuna amaaku maridana mee aqaq mari oonisara qinaqa feemu kammafinana naa. <sup>4</sup> Yisufa iriseenoo qimaminau, Anutuna akarakinaa ufa maaqi qinoo maridanoo faiqi sia narana kai namasee amana mariannoo. Anutuna ufamau fimariafa mifa kai naranara foora maridanoo, qinee sia ani ufamau fiqa ooniara qiananoo feemu kiannoo.

<sup>5</sup> Miqi qufanoo afaannauqa firaafa Yisuna uqeeraseenoo maa maqa maaqanasaqaraana aiqama karaambaiqauqa faqa misa ququsakinaasa faqa dauni uqafiqaseenoo qimaminoo qinau. <sup>6</sup> Maa aiqama afeeka ainaina faqaasa maqasaa faqa misa fira qumiasana faqa Anutufa qini qimiqaifanoo qinindi maridanoo, qeeqa kai irisee moo fasiqa amana amianauro. <sup>7</sup> Anee qini doorinni aqoori saunarafi deendeenamafi qini Anutusara foora qimooqinaqa maa aiqama adiafaa ira qumiasana aiqama ani amianauro. <sup>8</sup> Yisufa mina ufa iriseenoo kaifaa qimaminoo qinau, Anutuna akarakinaa ufa maaqi qidanoo, anee karaambaiqa aneenna Anutuna kai amooqimasee mina ainaina kaimmamaqaa. Minara irisee sia ani ufamau fuanaura.

<sup>9</sup> Miqi qufanoo afaannauqa firaafa kafa Yisuna qumareeqeenoo Yeerusaree fira amaana maqa ataufakai faakana kisaqaq atisaa quqaseenoo qimaminoo qinau, anee Anutuna amaaku maridana maqooqari rafusaki meemai maqasaa aqufua sia mina amaaku maridana sia aqufua. <sup>10</sup> Anutuna akarakinaa ufa fannoo minara maaqi qidanoo Anutufa nari qangiroouqa niqiqainaqa anisaa rakisifaranoo. <sup>11</sup> Kafa moo akaraki maaqi qidanoo misa nari nisaukunoo qumaraifana sia oonisaa anee aiku rupaurinanoo aidafuannoo. <sup>12</sup> Yisufa qafeenoo iriseenoo afaannauqa firaana qimaminoo qinau, Anutuna akarakinaa ufa fannoo minara maaqi qidanoo anee sia karaambaiqa aneenna Anutuna amanamasee qafaannee qidanoo. Minara irisee sia maaqooqari aqufuanaura. <sup>13</sup> Afaannauqa firaafa aiqama karidanoo Yisuna akari maqaseenoo, Yisuna mafi quqaseenoo minnaseenoo doo finau.

*Yisufa Anutuna ufa qimannimirana oosana aranau.*  
(Mat 4:12-17; Mak 1:14-15)

<sup>14</sup> Yisufa Kariree maqa maaqai kafa aniroofanoo Anutuna naaquqara maraquna fannoo mina faqa afeekaikamasee maridanoo dadaaqunara, mina aufakiana fannoo Kariree maqa maaqaki aiqamai daraaninau. <sup>15</sup> Yisufa misa amaana maqakiqaa maqasa maqusa fiq fiq inoo nidanoo qimannimimarufaqa aiqamausa mina amooqi mariqau.

*Nasareete amaana maqaki amaana ufa qimanniminau.*  
(Mat 13:53-58; Mak 6:1-6)

<sup>16-17</sup> Yisufa Kariree maqa maaqaki niniufanoo Nasareete maqusai nari aanaaqisaa mariu maqusanaki oonureenoo Isaraee maqannaasa amaana Saririqasaa nari oosana maraseenoo amaana maqaki keeqanau. Keeqafinoo Anutuna ufa asaanniraree qimaseenoo findifufaqa misa Anutuna tamummaqara fasiqa Eesaiaana nauraa akara amifanoo airiseenoo maa ufana paqurimasee asaannarinau.

(Ooqi misa papiqa akara rumasee qaara aikasaa kukuqa maqoona Yisufa duku dukumasee minaki maa ufana paqurimasee asaana rinau.)

<sup>18-19</sup> Karaambaiqa maraquna fannoo qini daakinoo maridanoo, mifa kudi fasiqauqa amiqira fasaasa ufa qimannimiannee qimasee asauku qinisaa mundinau,

rumbaqa mariasa idukuaki fuaqeera qini diqiqanau,  
nifu dimbarausa faqa nifu maqannisaaneera faqa qini diqiqanau,  
moo maqannaasa ani mara moo maqannaasa aupurarana nimimariana minakinaana idukuaneera faqa qini diqiqanau,  
karaambaiqa nari maqannaasa mandainainakinaasa maraaninna aukuanara qimannimirara qini diqiqaiqaaqani maridaqa.

<sup>20</sup> Yisufa mi ufana asaana rumasee papiqa qaara aikannoo kukuqamasee rakisi maru fasiqana amiseenoo ufa qimannimirara qimasee ooqu marinau, mi amaana maqanaki Nasareete maqusai marusa aiqamausa nifu Yisuna kai tataqa fiqau. <sup>21</sup> Yisufa maqee asaana rumasee qimannimi ufanasaqaraana qimanniminoo qinau, maa ufana akarakinaana asaana rumasee qimannimimaruna mina anoona doo maqee uqanna kambiqeenoo. <sup>22</sup> Misa mina adiafaaira ufausa iriseeqa tautumasee nari qimami nari qimami qiqau, maafa Yooseefaana amaaku kai maridanoo fe qimasee nikooqanau.

<sup>23</sup> Yisufa irisee qimanniminoo qinau, innee ooqeenaaasa naamuaqira ufa qimaqim-  
iqa maaqi qifaranoo oo tutaqafa anee aneenna aurirana aneenna marasinnanai kai  
aneenna aurirana taikaa kafaa qiniara maaqi qifaranoo anee Kapeeranaumma maqusai  
oosana oosana ainaina faiqi sia amanaike mari ainaina auqaananara maasa iridaqa  
maqee aneenna maqusaki maasa qifusaa mi ainainna auqaa. <sup>24</sup> Qinee minara maaqi  
qimasee inni qimannimidaqa, Anutuna tumummaqara fasiqauqa sia moo fannoo nari  
maqusanaasa nifusaa uriqarara fasiqa mariannoo moo maqusanaasa minara uriqarara  
fasiqa fee qimasee mina ufa irifaranoo. <sup>25</sup> Innee qini ufa iriaqa ooqai Eeriaafa  
maru aukuaana qaaramoo aukuaana faqa (6) qisauku dinni taikasee dinni ani moodaa  
marasee quqoona faqa aaku sia uqanna rufanoo aandaroo firaafa aiqamai nari marinau,  
<sup>26</sup> Mi aukuaana Isaraee maqannaadeedaana anaasee moomoo marufanoo sia misa  
dadaaqinau Sidoona maqa maaqaki Sareefata maqusaki maru aanaamuru adeedaana  
anaaseena kai Anutufa Eeriaana aqioqoofanoo dadaaqinau, <sup>27</sup> Anutuna tumummaqara  
fasiqa Eeriaafa maru aukuaana nari maqannaasa Isaraee maqa maaqaki karoora nari  
marusa moomoo mariqau, Eeriaafa sia misa karoora taikannisanau, aanaamuru Siria  
maqusanaasa uriqararana auqu Naamana mina karoora kai taikamaqanau. Innee  
qiniara sia tumummaqara fasiqa fee qimariafanoo qiniara nikoqee mariafanoo qinee  
faqa miqi kai iqa qeeqa maqusanaasa inni sia amana dadaaqianauro.

<sup>28-30</sup> Misa Nasareetee maqusai amaana maqaki marusa mi ufana iriseeqa aanoomasee  
Yisuna rarisamammaree Nasareetee maru aqanasaa afiqeeqa rarisqa ooruree  
ameemai aquaneerufanoo kuquani fee qimasoofofanoo Yisufa misa qambaana kaqi fiqa-  
reenoo nari saikai finau.

*Kapeeranaumma maqusai faiqi aundurakinaa afaanna aqiqanau.*  
(Mak 1:21-28)

<sup>31</sup> Yisufa Kariree maqa maaqaki Kapeeranauma maqusai ooqureenoo Saririqasaa  
amaana maqaki faiqi anaasee Anutunara naamuaqinau. <sup>32</sup> Mina ufa irimariasa mina  
ufara naaquqanau, mifa nari Anutufara foora maridanoo qimannimufaqa doo tautiqa  
minara nidinau. <sup>33</sup> Qimannimi marufanoo mi amaana maqanaki faiqi moo kaasau  
afaanna aunduraki marufa Yisuna ufa irisee firaq kari faqa rumasee qimannimoo  
qinau. <sup>34</sup> Oo Yisufa Nasareetee maqusanaafa anee nanaree maasa soodaa qidanee,  
maasa daru taikararee anidanee qinee aniara iridaqa anee Anutuna naaquqara ufa  
maree marianafa mariananoo. <sup>35</sup> Yisufa iriseenoo amambaina qimaseenoo qinau, anee  
ufaseenana mi fasiqana aundurakiqari raudamaki see fua, miqi qufanoo mi afaannafa  
aiqamausa nifusaa mi fasiqana maqasaa mafi aqusee sandeenoo sia aupurarana aminau.  
<sup>36</sup> Aiqamausa mina qafeeqa tautumasee nari qimami nari qimami qiqa qiqa, maa  
fasiqana ufa nana ufa fee maridanoo nari Anutufara foora afeekufannai kaasau afaanna  
qimannimifaqa eedoo kai qimasee raudee sandaafanoo naaquqaidanoo. <sup>37</sup> Miqooqari mi  
ufana munuqi miniqi ufanoo aiqamai daraaninau.

*Yisufa oosana oosana aurirana andeeqannisanau.*  
(Mat 8:14-17; Mak 1:29-34)

<sup>38</sup> Yisufa amaana maqakiqari raudamaki Simoona maaqaki keeqanau. (Simoonafa  
Yisuna ufa irira fasiqa mina faqa nimarufa marinau.) Simoona mina airaamaku anaasee  
auri marufanoo afaqa firaqoo ididimarufaqa minara Yisuna qimamiqau. <sup>39</sup> Mifa  
iriseenoo mina qaari aqa oonureenoo mi aurirana qaoo qufanoo taikoofanoo mi  
anaaseefa aqee findifinoo narana deedaqamasee niminau.

<sup>40</sup> Suani afu keeqoofanoo asooaa asooaa imarufaqa mi maqusaanaasa nariqa niqoondi-  
uqa aurira fasiqa anaaseeuqa maraida minisee marufanoo Yisufa asauku aiqamausa  
nifaqaqi quqasoofanoo aurirafa taikanau. <sup>41</sup> Afaannauqa faqa niqiqee marufaqa  
moomoosa naunduraindari raudamaki faaqana faqa sandaidaga qiqaq, anee Anutuna  
amaaku mariananoo fee qufanoo Yisufa miqooqari qaoo qinoo sia ufa qiaqee qinau, mi  
afaannausa Yisuna Anutuna asauku mundirafa marunara irimarusa marunara, minara  
mifa misa nimambaina qinau, innee ufaseeqa qufaqa misa sandamafiqa.

*Yisufa Yudeeaa maqa maaqai qimanniminoo ninau.*  
(Mak 1:35-39)

<sup>42</sup> Mi eendanaki Yisufa faiqee iqaqoofanoo kananaana mi maqusanakiqari findimaqee  
faiqi sia marunnai Anutu finnai innaaru qirara finau, faiqi anaasee findifi minara yai  
fee finoo fee qimasee randamaree oonu paqurimasee sia moosaa fuannee qufanoo  
Yisufa qimanniminoo qinau. <sup>43</sup> Qinee Anutuna innaaruna ququsakinaa fasaasa ufa  
sia maaqoo kai qimannimirara, Anutufa qiniara aiqamai qimannimiannee qimasee

digiqamaqoosa maridaqa. <sup>44</sup> Miqi qimaseenoo mifa Yudeeaa maqa maaqai ooqureenoo aiqama maqusakiaqa fifainidanoo Anutuna ququsara qimannimi marinau.

## 5

*Yisufa nari indaaruaqa faiqi namu nifiqanau.*

*(Mat 4:18-22; Mak 1:16-20)*

<sup>1</sup> Moo kari Yisufa Keeneesareeta farumma afainni kikiqinoo maridanoo Anutuna ufa qimannimi marufaqa faiqi anaasee moomoosa aniree irirara nari futeegee nari futeegee imariqau, <sup>2-3</sup> Noodaanna reemaru fasiqaganda nariqa noodaanna reemaru kanuqaganda mafi nammari afainni quqasee nariqa pateeuqa mareeqa moosaa oonu maridaqa akuni mariqau, Yisufa faiqi anaasee moomoosa niqafaidanoo kanuqa qafamaseenoo Simoonaindiki akaramafinoo qimamufaqa kaqi kaaqoo afeeqoofanoo nammari amuaqusaa oonuroofanoo Yisufa minaki ooqumarifinoo faiqi anaasee aiqamausa mina oorinni ani usufufanoo naamua qimarinau.

<sup>4</sup> Ufa qimannimi taikaseenoo Yisufa Simoona qimaminoo qinau, kanuqa maree farummaki oonuree pateeuqa ramasee noodaanna umbaqia. <sup>5</sup> Miqi qufanoo Simoonafa qinoo akasaa maasa uriqararafa, maasa maqee eendaki nammariki patee moomoo kari ramasee sia uqanna moodaa noodaanna mareeqa anee qiannanara kaifaa raanau. <sup>6</sup> Misa nariqa pateeuqa nammariki ramasoofanoo noodaanna moomoo mi pateeuqanaki umbiqafinoo pateeuqa rakeekaa inau. <sup>7</sup> Miqufaqa misa qafeeqa moo kanuqaki marusara nisauku aqufaqa misa aniree dadaaqiqa noodaanna mareeqee kanuqaki umbiqasoofanoo kanuqagara faqa nammariki ukuqnaaqaa imariqau. <sup>8</sup> Simoona moo auqu Peetooroofa mina qafamasee Yisunara rufieenoo mina oorinni aqoori saunarafinoo qinau, oo karaambaiqa sia qini faqa maria qinee mandainaina maree marunau maridaqa. <sup>9</sup> Yoohaneefa faqa Yameesafa faqa miqanda Seebeedeena amaakuqara miqanda Simoona dadaaqidaqa noodaanna reemaruqanda maridaqa noodaanna moomoo ramasoona qafoofanoo naaquqanau. <sup>10</sup> Naquqoofanoo Yisufa Simoona qimaminau, anee sia rufiaa maaqooqari anee sia noodaanna reemarinanoo anee faiqi anaasee kai Anutuna quqosaki pateeuqakiara foora mara quqee marinnaranoo. <sup>11</sup> Miqooqari misa nariqa kanuqa rarisameegee afainni quqasee nariqa noodaanna saika maree maruna aiqama ainaina minnisee Yisuna faqa fiqau.

*Yisufa karoora arimaru fasiqana andeeqanau.*

*(Mat 8:1-4; Mak 1:40-45)*

<sup>12</sup> Moo kari Yisufa moo maqasai marufanoo karoora aiqama afaaqai arimaru fasiqafa moo fannoo anireenoo maqasaa aqufinoo irammirinoo qinau, oo maa fasiqa ani aidirafa qinana amana anee qini karoora ruqaqimaqeenaranoo. <sup>13</sup> Yisufa iriseenoo nari asauku uqeerasee minasaa munduseenoo qinai, Eoo qini irirafa ani dadaaqiraree qidaqa, doo rukafinana maria qufanoo aaqee kai mina karoora rukafinai. <sup>14</sup> Yisufa mi fasiqana amambaina qimaseenoo qinai, anee sia maa ainainnara moona qimamia andeeqasee amaana maqaki aanaiqikirana aqa oonu rainanoo mifa ani afaaqai aiqumaseenoo aniara anukanoo mariaanoo qiannoo, miqi qinana anee karoora narimarisa taikaraua aandau tatufirana Mooseena sandufamau fidana Anutuna suqamia, miqimasainaga aiqamausa ani anukarana qafamasee sia aniara eerairifaranoo. <sup>15</sup> Minara Yisuna afeeka aufakiana sia taikanau, firaqqoo fifainufaqa faiqi anaasee moomoosa suqu maree Yisufunnai anireeqa mina ufa irufanoo misa aurirafa taikaanifeera aniqau. <sup>16</sup> Yisufa moodaakari moodaakari faiqi sia maruqoo oonureenoo Anutunara kisaqqasaa innaaru qimarinau.

*Yisufa aiku asauku pipisaaqa usirana andeeqanau.*

*(Mat 9:1-8; Mak 2:1-12)*

<sup>17</sup> Moo faasaana Yisuna moo maaqaki maridanoo faiqi anaasee Anutunara naamuaqida marufanoo Farisai amaana ufa qimarusa faqa Mooseena sandufasaa rakisiraua faqa mi maqanaki ooqu marifiqa irimariqau, Kariree maqa maaqakiqari faqa Yudeeaa maqa maaqakiqari faqa Yeerusaree maqusaindari faqa moomoosa ani maridaqa iri mariqau. Aurirana taikara afeeka karaambaiqa Anutufinnaindari Yisunasaa marufanoo aurusa andeeqannimaqee marinau. <sup>18-19</sup> Yisufa maaqaki qimannimi marufaqa faiqi anaasee akaqausa nari niqoonnana aiku asauku pipisaaqa qusirana qaindusu maree aniree maaqaki keeqafi Yisuna aqa quqararee qimasee qafoofanoo faiqi anaasee moomoosa ititafufaqa sia amanaiqiqa, quandaki naammaraaqa akaramafufaqa namudi rainasee mi fasiqana nari qaindasaa quqasee sanda quiqqa quiqqa ufanoo maaqaki faiqi anaasee qambaana Yisuna aqa quqaaqau.

<sup>20</sup> Yisufa misa irirana narisaa firaqoo mundunara iriseenoo mi pipisaaqa qusira fasiqana qimaminoo qinau, qini qiqoondi ani mandainaina numoo doo minnaisidaqa. <sup>21</sup> Miqi qufaqa Mooseena sandufa akoofasauqa faqa Farisai amaana ufa qimarusa faqa nariqa naunduraindari kai qidaqa qiqau, maa fifau fasiqafa unnaqi masaidanoo nari ufannoo Anutuna amaaqa maqaidanoo faiqi sia amana moona mandainaina numoo taikarana amana maridanoo Anutufa kai amana miqianoo. <sup>22</sup> Yisufa misa naunduraindaraa ufa iriseenoo qimanniminoo qinau, innee naqi fee qifaqee mi mandirirana inneeqa naunduraki iridee. <sup>23-24</sup> Qinee maa fasiqanara ani mandainaina numoo minnaisaidee qunnana innee qiniara sia amanaikiaano fee qidee qinee faiqi nimaaku maa maqanasaa maridaqa faiqi aaqarana akiaqara mininnisara afeeka faqaasa marunasa marinara maa firaa afeeka ainainannai kooroomma nimaqaanaura qinee maa fasiqanara aneenna qaindasaaqari findifinana mi qaindana maree amaaqa fua qiananoo miqinaqa qini mandainaina numoo minnaisara afeeka qafeefara. Miqi qimannimiseenoo quandaki mi aiku asaku kuqirana qimaminoo qinau. Doo findifi aneenna qaari mareenaa amaaqa fua. <sup>25</sup> Miqi qufanoo mi fasiqafa findifinoo aiqamausa nifusaa nari faiqee maru qaarina mareenoo Anutunara dufi dufi qimammareenoo amaaqa fina. <sup>26</sup> Aiqamausa minaki marusa mina qafamasee firaqoo tautiqa maaqi qimasee Anutuna asasiqau, maqee faasaana maasa maa fasiqana qafaunanoo nifaaqa qumooqukinoo.

*Yisufa Reefina afaqanau.*

*(Mat 9:9-13; Mak 2:13-17)*

<sup>27-28</sup> Miqooqari Yisufa raudamaki moosaa fidanoo Roomma maqannaa kiapana takisa munnimma maree maru kuskusafa mina auqu Reefina amarafa nari oopisaki marufanoo Yisufa mina qafamaseenoo qimaminoo qinau, aniree qini faqa fua qufanoo Reefifa findifinoo aiqama ainaina minniseenoo mina faqa fina.

<sup>29</sup> Moo kari Reefifa Yisuna narana suuqamiraree qimaseenoo Yisuna faqa nari aqoonausa takisa munnimma maree marusa faqa faiqi anaasee akaqausa faqa naarama-soofaqa mina maaqaki anireeqa firaa qoomaqa sakasee nee mariqau. <sup>30</sup> Neemarufanoo Farisai amaana ufa qimarusa faqa nari niqoonausa Mooseena sandufa akoofasauqa faqa Yisuna faiqi namu niqifa qiqau, innee nanaree ummuara takisa munnimma maree mariasa faqa manda oosana maree mariasa faqa narana nammari naidee, nisauru-aqa. <sup>31</sup> Yisufa mina iriseenoo qimanniminoo qinau, amiqimaria fasiqa anaaseesa sia tutaqafinnai fidaqa, aurimariasa kai tutaqafinnai fidaqa. <sup>32</sup> Qinee sia amiqimaria fasiqa aanaaseesara nariqa mandainaina minnisee Anutufinnai ubeekaaqera qumu maridaqa, innee manda fasiqa anaasee fee qimasee nifaqee mariasa misara kai Anutufinnai ubeekaaqera naarararee qimasee qinee qumuafanousa maridaqa.

*Naararee maru innaaruqira oosanara iraqau.*

*(Mat 9:14-17; Mak 2:18-22)*

<sup>33</sup> Akaqausa Yisuna qimamiqa qiqau, Yoohaneefa nammari nimimaruna ufa irimariasa moomoo kari narana maridanoo mina minnisee naarara innaaru qidaqa, Farisai amaana ufa qimariasa misa ufa irimariasa faqa miqidaqa ani ufa irimariasa sia uqanna miqidaqa, narana nammari naida maridaqa. <sup>34</sup> Yisufa iriseenoo qimanniminau, maanaaqa amundara qoomaqaqi suqimaria fasiqa anaaseesara naarara mariaqee qifaqa sia ani ufa irifaranoo amundara fasiqa marinara qoomaqa sakasee neefaranoo. <sup>35</sup> Misa mi anaaseena afaaqi qini rumbamaree munu darusaifaqa mikari kuqaa nimuqasa mandaikinaqa narana minnisee naarara innaaru qifaranoo. (Yisufa nari kuquaninnanara maanaaqa amundarana afaaqi kikiqa usinau. Yisufa nari kuqinanoo mina faiqi namu nimuqusa mandaikinaqa naarara maridaqa innaaru qifaranoo fee qinau.)

<sup>36</sup> Yisufa moo quandara ufa qimanniminau, faiqi nauraa siuta akunirara sia amana fuka qamunnasaaqaraa ati anaqisee minasaa akunuannoo miqinanoo nauraa qamunna faqa fuka qamunna faqa mandaikiandoora, mina nauraa qamunna maridanoo minnisaa. (Nauraa qamunnara Yisufa Mooseena sandufara mina kikiqa ususee qimanniminau. Fuka qamunnara nari fuka ufara qinau.)

<sup>37</sup> (Yisufa maqasaa maru aukuana misa uainna nammari tatisee aandau apatannai auqira taquki adiaasee kisaqasaa maqaki quqasoofanoo marinau. Marikinoo amiqinoo marufaqa mina mara maree maqee maqee neemariqau. Uainna nammari misa maqee maqee nee maru nammari faqarinau. Mifa aandau apatannai auqira taquara qufaqa, maasa qeeqa ufakiqari taqu uqannee qidaqa.)

Yisufa minara iriseenoo quandara ufa moo qimanniminau, faiqi fuka nammari sia amana nauraa taquki adiaannoo, rukamufinanoo aiqama nammari rairaa iandoora. <sup>38</sup> Fuka nammari fuka taquki adiainanoo amanaikiannoo. <sup>39</sup> Faiqi nauraa uainna nammari namasee sia amana fuka uainna nammari naannoo. (Yisufa faiqi aanaaseera



Mooseena sandufa ooqueena uainnara foora mina akoofasa mariafaqa qini ufa fuka uainnara foora marifaqa nikoqoqefaranoo.) Ooqueenaana adiafaairafa uriqaranoo maridanoo fuka adiafaairafa oorudupinoo maridanoo.

## 6

*Amaanasaa sakuma ruqoosoo ufa.*

*(Mat 12:1-8; Mak 2:23-28)*

<sup>1</sup> Moo kari Yuda maqannaasa Saririqa amaanasaa Yisufa nari faiqi namufaqa maqusamau nidanoo sakuma ummaqiranaki fimarufaqa mina faiqi namu sakuma ruqoosasee rafarisaidaqa neemariqau. <sup>2-4</sup> Farisai amaana ufa irimarusa maridaqa niqafeeqa niqidaqa qimannimiqau, innee nanaree Mooseena sandufa rukiadee maasa amaana Saririqasaa ainainidee qufanoo Yisufa qimanniminoo qinau. Innee sia fee karaambaifa Dafidina oosana iridee mifa aararoofanoo Mooseena sandufa rukiasee Anutuna naaquqara amaana maqaki keeqafinoo Anutuna amaqee maru feemuna mara namaseenoo nari faiqi namufaqa akaqana maree muqu niminau, Mooseena sandufaki mi feemunara kaqiqeesa sia naaqee qidanoo aanaiqikirausa kai naaqee qu feemufa marinau. <sup>5</sup> Yisufa misa qimanniminoo qinau, qinee faiqi nimaaku uqanna amaana faasaana faqa mina sandufauqa faqa mina uriqarararusa maridaqa. Qinee qeeqa faiqi namuara sakuma ruqoosa naaqee qiana amana misa neefaranoo.

*Yisufa asauku pipisaaqa usirana amaanasaa andeeqoo ufafa.*

*(Mat 12:9-14; Mak 3:1-6)*

<sup>6</sup> Moo kari Isaraee maqannaasa Saririqa amaanasaa faasaana moo maqusai amaana maqaki keeqafi Anutuna ufa qimannimi marufanoo faiqi moo asauku uqannai asauku karaaduqarafa faiqi anaasee faqa maridanoo Yisuna ufa irimarinau. <sup>7</sup> Mooseena sandufasaa rakisirausa faqa Farisai amaana ufa qimariasa faqa misa faqa maridaqa Yisuna arirara aiqumi mariqau, mi fasiqana asauku karaaduqarana andeeqasainaga Mooseena sandufa rukiasee saikidanoo fee qimasee uneemaana qimasee mina rumbarara qimarufanoo.

<sup>8</sup> Yisufa misa naundurakinaa manda irirana iriseenoo mi asauku karaaduqarana aaramaseenoo qinau, anee findifi mai aniree aiqamausa nifusaa kikiqia qufanoo miqiminu. <sup>9</sup> Kikiqia mafufanoo Yisufa misa qimanniminu, qinee moodaa ainainara inni irammirianaara, innisaimbaqa sandufa Saririqa amaana nari fee qidanoo, maasara faiqi dadaaqaqee qidanoo fee faiqi kuridiaqee qidanoo fee, maasa faiqi mariaqera asumu mara nimaqaanauree faiqi sia mariaqera naru taikannimaqaanauree. <sup>10</sup> Miqi qimasee Yisufa aiqamausa nifuki nifuki idanoo mi fasiqana asauku karaaduqarana qimaminoo qinau, anee aneenna asauku uqua qufanoo mi fasiqafa miqufanoo mina asauku amiqinau. <sup>11</sup> Amiqufanoo farisai amaana ufa qimarusa faqa Mooseena sandufa irimarusa faqa firaqoo aanoo qimasee Yisuna uneemaana qimasee ariranara randaqau.

*Yisufa qikunni ooqu qaara marasee fasiqa nifiqanau.*

*(Mat 10:1-4; Mak 3:13-19)*

<sup>12</sup> Mi fasannai Yisufa innaaru qirara amuaqu namusa ooruree mi eendanaki innaaru saika imarufanoo iqaqanau. <sup>13</sup> Iqaqoofanoo misaki rusandeesamumasee (12) qisauqara taikasee qikunni ooqu qaara marasee fasiqa nifiqaseenoo misa nuqu niqiqara fasiqauqee qinau. <sup>14</sup> Misa nuqu moo Simoonafa moo auqu Peetooroofa faqa mina akaqa Andurufa faqa Yameesafa faqa Yoothaneefa faqa Firipifa faqa Baratooromeeufa faqa, <sup>15</sup> Mataioofa faqa Toomasifa faqa moo Yameesafa Arafaiusana amaaku faqa Simoona amarafa kaaqa nari kaamannara rimarufa faqa Yudasina amarafa Yameesana amaaku faqa moo Yudasifa <sup>16</sup> Keerioota maqusaindaraafa kasooqagee Yisuna uqeeqaaninafa faqa mariqau.

*Faiqi anaasee moomoosa Yisuna afaqee fiqau.*

*(Mat 4:23-25)*

<sup>17</sup> Yisufa misa nifiqa quqaseenoo niqiqara fasiqauqee qimaseenoo mina ufa irimarusa moomoosa faqa amuaqu namusaaqari qumureenoo afaasai marufaqa faiqi anaasee moomoosa ani mariqau. <sup>18</sup> Yisuna ufa iriananoo aurirafa taikaanifee qimasee Yudeeaa maqa maqaaindari faqa Yeerusaree maqusaindari faqa Tiree maqusaindari faqa Sidoona maqusaindari faqa moomoosa aniree usufufanoo Yisufa ufa qimannimidanoo aurirana taikannisee marinau. Faafasaaqa naundurari marusauqa aniroofanoo afaqa niseemarinau. <sup>19</sup> Anutuna afeeka fannoo Yisuna afaqaaindari fidanoo faiqi anaasee andeeqannisee marufaqa aiqamausa nisaukunna Yisuna afaqa auqamasoofanoo aurirafa taikanau.

*Yisufa asisirana oosana uqannifiqanau.*

*(Mat 5:1-12)*

<sup>20</sup> Yisufa narí faiqi namu nindafamasee qimanniminoo qinau.

Innee kudimariasana Anutufa firaasasirana inni nimidanoo Anutuna innaaruna ququsa innindi maridanoommi.

<sup>21</sup> Innee maqee aandaroo narí marisa Anutufa asisirana inni nimidanoo Anutufa inni nimuaquirana nimiannoommi.

Innee maqee ikiraqee mariasana Anutufa firaasasirana nimidanoo, Anutufa naanaidara qirana inni nimiannoo.

<sup>22</sup> Faiqi akaqausa faiqi nimaaku uqanna qinisaara inniara fidiqaa iqa nifeeqeeqa aasaandaana ufa faqa oosana oosana manda ufauqa faqa inni qima nimifanoo Anutufa firaasasirana inni nimiannoommi.

<sup>23</sup> Misa miqimmannimiqaifaqa innee minara asasammaseeqa idi raidaqa nasuriaqa, mina akiaqara innaarunai firaa qumiasana innindi afeediranaki maridanoommi, maasa qiikeeku qikaaku ooqai maru tamumaqara fasiqara mi manda oosana nimiuisa maqee faqa miqi kai iqa inni faqa nimifaranoo.

*Yisufa noori runira oosanara qinau.*

<sup>24</sup> Innee maqee qumiasana faqaasa mariasana inni aupurarafa firaafa mariannoo, innee adiafaaira marirafa doo aiqaraannoo.

<sup>25</sup> Innee maqee nimuaqu imariasana inni aupurarafa firaafa mariannoo, inni aandaroo naruannoo, innee maqee naanaidara qimariasana inni aupurarafa firaafa mariannoo, innee noori runirafa faqa qikifaafau qirafa faqa mariannoo.

<sup>26</sup> Faiqi anaasee aiqamausa inni amiqi amiqira ufa qimannimi mariasana faqa nimooqi mariasana faqa inni aupurarana firaana Anutufa nimiannoo ooqai maasa qiikeeku qikaaku unnaqira tamumaqara fasiqauqara miqi kai idaqqa nimooqimarufanoo Anutufa aupurarana nimirana.

*Yisufa inneeqa namuqaara nimuqusinaqa ruaqa.*

*(Mat 5:38-48; 7:12)*

<sup>27</sup> Innee qini ufa irimariasana qimannimidaqa innee inneeqa namuqaara nimuqusi marinaqa misara ruaqa, inniara nikoqee mariasana amiqimmasee misara amiqi amiqimmannimaqaqa. <sup>28</sup> Inni niquraree mariasana misa nimooqira ufa qimannimidaqa inni mandaikamma nimaqee mariasana Anutufa idaqqamanisaanifeera innaaru qiaqa.

<sup>29</sup> Moo fannoo ani aapaasa arinana dinni faqa quandasainanoo aruani, faiqi moo fannoo ani saketa maree finana siuta faqa mina amia, <sup>30</sup> Faiqi moo fannoo nana ainainaree ani iramirinana anee mina amia, moo fannoo ani ainaina ummuaramamaree finana sia kafa oonu maraa. <sup>31</sup> Anee nana oosanaree aididanoo fee faiqi anaasee ani amifaree, anee amiqira oosana kai qimiaqee qimariananoo. Doo anee naaree misa ani amira aidira oosana kai faiqi anaasee maqee kaqi nimia.

<sup>32</sup> Faiqi anaasee aniara aidimariasana kai nidinanoo nanaree fifau Anutunara mina akiaqara qini qimiannoo fee, sia ani amiannoo manda oosana maree mariasana naanna reemariananoo misa miqimmididaqa nariara nariara nididanoo. <sup>33</sup> Ani amiqi amiqi imariasana kai amiqi amiqinanoo Anutufa mina akiaqara sia ani amiannoo, manda oosana maree mariasana naanna reemariananoo misa miqi kai idaqqa nariara nariara amiqi amiqidaqa.

<sup>34</sup> Ani amimariasana kai ainaina nimiranoo Anutufa mina akiaqara sia ani amiannoo, anee miqinana sia manda oosana maree mariasana urinnaqa reennaranoo misa kasooqagee mina akiaqara mina amana kai qimiaqee qimasee niminnaranoo.

<sup>35</sup> Innee sia misa naanna raqa, inneeqa namuqaara nimuqusi marinaqa misa amiqimmannimaqaqa ufaasu ainainara innaaru qimariasana nimiseeqa sia mina akiaqara nifu maqaqaqa innee miqidaqa firaasasirana Anutuna faiqi namu marifaranoo mina akiaqara firaasasirana Anutufa inni nimaqaannoo. Anutufa miqi marifa manda oosana maree mariasana faqa minara auni mariasana faqa amiqi amiqimmannimaqee marifa maridanoo, innee mina aanna raqa.

<sup>36</sup> Inni nikoofa aiqamausara amuqusi marifanoo nifauaidanoo innee faqa miqi kai iqa faiqi aanaaseera nimuqusinaqa nifauaqa.

*Yisufa nimuqusiranara faqa afaariranara faqa qinau.*

*(Mat 7:1-5)*

<sup>37</sup> Innee niqoonausa sia niqurara ufa nimiaqa miqifanoo Anutufa inni faqa sia niquraraannoo, inneeqa niqoonausa kaukaata sia qimannimaqaqa miqifanoo Anutufa inniara faqa sia kaukaata qiannoo, innee inneeqa niqoonausa inni mandaikamma nimaqee mariana minnisaifanoo Anutufa innindi faqa minnisaannoo. <sup>38</sup> Innee faiqi anaasee kaqi nimifanoo Anutufa inni faqa kaqi nimiannoo, mifa firaqoo qumbiqasee

rairamasee inni nimiannoo, innee faiqi anaasee niminnandee kai maseenoo Anutufa inni faqa nimiannoo. Anee faiqi anaasee nimira oosana Anutufa qafamasee mi nimira oosanamau kai inni nimiannoo.

<sup>39</sup> Yisufa quandara ufa moo maaqi qimasee faiqi anaasee qimanniminu, afu dimbarafa sia amana aqoonnana afu dimbarana asaadakinoo aana fuannoo, afiqee fuani innana aiqamaqara madikaki aquffaranoo. <sup>40</sup> Akara maqaki keeqemari kumaarafa sia amana nari uqafiqee marina uraaqaraannoo, akara maaqaki keeqarafa taikaseenoo mikari nari uqafiqemari fasiqana amanasaa mariannoo.

<sup>41</sup> Yisufa kaqi qimannimidanoo qinau, anee nanaree aneenna akaqaafasaa afuki mari saqari arafa marifanee ufa qidanee. Mee ani afuki muduka saqari akatia marinara anee sia iridanee. <sup>42</sup> Anee naqimasee aneenna akaqaafasara mai anirainafa mee ani afuki saqari arai marina maraqaanauree qidanee, ani afuki muduka saqari akatia maridanoo anee nikaru qimarianafa aneenna afuki naaree firaa saqari akatia marina maraquseenana andeeqasee afu maqeenana aneenna akaqaafasaa afuki kaqikaa saqari arai marina mara aqua. (Innee sia moo fannoo manda ainaina marainafa aquraraafa maqasaa fasiqa anaasee aiqamausa innisaimbaqaindi firaa saqari akatiara foora maridanoo.)

*Yisufa andeeqara oosanara saqari qaqama kikiqa usinau.*

*(Mat 7:16-20; 12:33-35)*

<sup>43</sup> Amiqira saqari fannoo sia manda qaqama iraanoo, kafa minna dinni manda saqari fannoo sia amiqira qaqama iraanoo. <sup>44</sup> Saqari qaqama fannoo saqari oosanara koorooinana anee irinnaranoo aiqama saqari qaqama irafinoo oosanara koorooidanoo. Anee naqi fee masee reereeroondaana sandasaagaraana faafisa qaqama tiqinnaree sia minasaa iraanoo. Kaifaa naqi fee masee kaakuna sandasaa kamukamuna qaqama tiqinnaree sia minasaa iraanoo. <sup>45</sup> Faiqi faqa saqari faqa moodaa karidaqa amiqira fasiqa fannoo nari amuqusakinaa amiqira afeediranakiqari amiqira ufa qimannimianoo, manda fasiqa fannoo nari mandamuqusa afeediranakinaana manda ufa qimannimianoo, faiqi nari amuqusakimari ainainara kai ufa qidanoo.

*Yisufa nari ufamau fimarusara maaqa kikiqa usinau.*

*(Mat 7:24-27)*

<sup>46-47</sup> Innee nanaree qini Yisunara karaambaiqee karaambaiqee qidaqa qini ufa sia irida fee, faiqi moo fannoo qinee marunannai anireenoo qini ufa irimarifa minna oosana maaqimminoo marida. <sup>48</sup> Mi fasiqafa maaqa akoona fooqaafa maridanoo, mi fasiqafa maqa amiqimasee meemaqoo indufuseenoo faakana oonisaa munduseenoo minasaa maaqa afeekaikamasee usakanau, nammari auginoo mi maaqana arufanoo sia kasinau, faakana amiqimasee afeekaikinoo marinau. <sup>49</sup> Faiqi moo fannoo qini ufa iriseenoo mimau sia finafa moo maqa akoofera maqi maridanoo mi furufarira fasiqafa aanda maqasaa maaqa usakeenoo sia faakana afeekaikinau, nammari auginoo mi maqana arufanoo rafaaraki maqasaa aquginoo firaaqoo kurusinau.

## 7

*Saideena ainainira faiqi Yisufa andeeqanau.*

*(Mat 8:5-13)*

<sup>1</sup> Yisufa mi ufausa aiqama faiqi anaasee qimannimiseenoo findimaqee Kapeer-anaumma maqusai finau. <sup>2</sup> Ooquroofanoo Roomma maqannaa sundiaufa uriqararana ainainira fasiqa kaaqa aidi maru fasiqafa kuqira aurira aurimarinau. <sup>3</sup> Sundia uriqararafa Yisufa anunara iriseenoo Yuda maqannaa uriqararasa niqiqeenoo qinau. <sup>4-5</sup> Innee oonuree Yisuna iramiriqaa mifa amanee mai aniree qini ainainira fasiqa andeeqaannoo fee qufaqa misa Yisufinnai oonuree reendeenamasee fuki faaki qiqau, maasa diqiqafasiqa Roomma maqannaa fasiqa kaaqa maasa Yuda maqannaara rimarifa amaana maqa maasa usakaqimufa ani dadaaqirana amana marifa amanee dadaaqinna-ree.

<sup>6-7</sup> Yisufa misa ufa iriseenoo eedoo qimaseenoo misa faqa sundia maaqai finau, aatata fitufanoo maaqa adeedi ramasoofanoo mi fasiqafa nari aqoondiufa niqiqeenoo qinau, innee oonuree maaqi qimasee Yisuna qimamiaqa, oo uriqararafa anee fifau aiku rurina mai ani mariananoo, nanaree anee firaa uriqararafa mai aniree qini manda maaqaki keeqafinaqa qisauruanoora, qinee ani afusaa firanara faqa sia amanaikidaqa qinee oorudupirausa maridaqa. <sup>8</sup> Qini uriqarara sundiaufa moomoosa mariafaqa qinee misa nimeemaanai maridaqa misa ufamau fidaqa, qini qimeemaanai moomoo sundiaufa faqa mariafaqa qinee moonara fuannee qunanoo fidanoo moonara anianne qunanoo

anidanoo qeeqa ainainira fasiqara maa ainaina auqaa qunanoo auqaidanoo, anee Yisufa uriqararafa mariananoo anee miqooqari kai aurirafa taikaannee qinanoo qini ainainira fasiqa fannoo findifuani. <sup>9</sup> Misa mi ufana Yisuna qimamufanoo tautumaseenoo faiqi anaasee moomoosa mina faqa anusa quandaki qimanniminau. Maa Roomma maqannaa fasiqafa firaqoo qini saqarikidanoo Isaraee maqannaa qeeqa maqannaasa maqusa maqusa nidaqa sia miqira amiqira fasiqa qafeeqa, aanaamuru maridanoommi. <sup>10</sup> Miqi qufaqa misauqaindi niqigoosa anirandee nariqa uriqararana maaqaki keeqafi qafoofoanoo mi fasiqana ainainira fasiqa findifinoo amiqimasee marinau.

*Yisufa adeedaana anaasee amaaku kuqiranakinaana mara findifinau.*

<sup>11-12</sup> Marikinoo Yisufa moo maqusai mina auqu Nainna maqusai nari faiqi namufaqa faiqi anaasee moomoosa mina faqa finau, maqusa naambeeqi oonuree qafoofoqa mi maqusaanaasa faiqi kuqirana qaindusu maree akundarara ikifaafuna faqa aniqau, adeedaana anaasee amaaku moodaa marufa kuqufufaqa faiqi anaasee moomoosa faqa mina anoofa faqa akundarara maree anufanoo Yisufa niqafoofoanoo firaqoo amuqusufanoo mina anoona qimaminoo qinuu. Sia ikiraqaaqee qimaseenoo asakunnonoo oonu mi qaindana auqoofoqa maree aniusa kasoomafufanoo Yisufa kuqira kumaaraa qimaminuu. <sup>13</sup> Oo maa kumaaraa qinee ani qimamidaqa doo findifua qufanoo mi kuqira kumaaraafa rutaqinoo findifinoo ufa qinuu. <sup>14-16</sup> Yisufa mina afiqamareenoo nari anoofinnai munaisoofaqa faiqi anaasee firaqoo naaquqoofoqa Anutuna amooqidaqa qiqau. Uriqarara tamummaqara fasiqa doo maasaki akooqoo kooroomafinoo maridanoo fee qufaqa akaqausa maaqi qiqau. Anutufa doo nari maqannaasa ooqai qimaqoo dadaaqianinafa doo ani maridanoo. <sup>17</sup> Mi ufana Yisuna aufakiana fannoo miqooqari Yudeeaa maqa maaqaki mariasaki faqa mina atiqara mariasaki faqa fifaininuu.

*Nammari nimimaru Yoohaneena faiqi namu Yisuna irammiriqau.*

*(Mat 11:2-19)*

<sup>18</sup> Yoohaneefa nammari nimimaruna faiqi namu Yisuna naaquqara aufakiana Yoohaneena qimamufanoo iriseenoo nari ainainira faiqi qaarafaanda naaramasee qimanniminoonoo qinuu. <sup>19</sup> Inneeqara karaambaiqinnai oonuree maaqi qimasee iramiriqaa Qinee anianinnanara qiafanafa anee mifee maridane moonaree rakisianaree, miqi qimasee qimannimisee niqigoofaqa miqanda Yisufinnai oonuree iramiriqa qiqau. <sup>20-21</sup> Yoohaneefa nammari nimimarufa maasa diqiqaiqafa ani iraidaqa mifa asaku mundirafa aniannoomifoo qimaqoofoqa anee mifee maridane moonaree maasa rakisianaree qufanoo, Yisufa mikari faiqi anaasee moomoosa aurimara faqa oosana oosana teeroo maree marusa faqa faafasaaqa naundurari marusa faqa nifu dimbarausa faqa andeeqanniseenoo Yoohaneena faiqiqara qimanniminoonoo qinuu. <sup>22</sup> Inneeqara Yoohaneefinnai anirandee oonuree maqee maaqoo qafaida maria ainaina qinee Yisusa auqaunannara qimaniaqa, nifu dimbarausa maqanniseeqa niku eendirausa andeeqannisaunaqa nidaqa karoora narimarisa rukanniseeqa naaqoo aunirausa ruiqanniseeqa kuqirausa findifumanniseeqa, kudi fasiqa anaaseeuqa amiqira fasaasa ufa innaarunaira qimannimiqa mi ainainausara oonuree aiqama Yoohaneena qimamifanoo mifa qiniara iriannoo, ooqai aniraree qimaqoofoosa doo misamma ani maridaqa. <sup>23</sup> Maa ufana faqa qimaniaqa, qiniara sia qaara irira irimariasa Anutufa asasirana nimiannoo.

<sup>24</sup> Miqi qufaqa miqanda irisee fufanoo Yisufa faiqi anaasee moomoosa miqoo mariusa qimanniminoonoo qinuu, Yoohaneefa nammari nimimarufa kaasau aadana maqa maaqanaki marufaqa innee mina ufa iriraree qimasee nana ainaina qafararee fee qimasee ooqu fi fee iqau, fifau andanda ufai fannoo kasimarina qafararee fee qimasee ooqu fi fee iqau. Yoohaneefa sia miqimarifa marinuu. <sup>25</sup> Innee nana qafararee fee qimasee ooqu fi fee iqau, faiqi moo amiqira qamunna afisimarina qafararee fee qimasee ooqu fi fee iqau. Yoohaneefa sia miqimarifa, amiqira qamunna afisimariasa sia kaasau maqa maaqaki maridaqa uriqarara karaambaiqa maaqaki maridaqa. <sup>26</sup> Innee Anutuna tamummaqara fasiqa qafararee fee qimasee ooqu fiqau. Eoo innee tamummaqara fasiqa ooqu qafaqau, sia kaqi tamummaqara fasiqafau ooqu qafaqau, tamummaqara fasiqauqa uriqararafa marunara oonu qafaqau. <sup>27</sup> Ooqeenaa akaraki Yoohaneenara maaqi qimasee akara rinoo maridanoo.

Iriaqa, qinee qini ufa qimannimianinafa ani oorinni aqiiqaananoo ani oorinni fidanoo ani aana afisuannoo.

<sup>28</sup> Yoohaneenara miqi qimaqoofoqa qinee Yisusa minara maaqi qidaqa maa maqanasaa kambigoosakiqari mifa uriqaranoo marifa maridanoo, mina dinni innaaruna ququsaki mariasa ureeqarausa misa Yoohaneena uriqararausa maridaqa.

<sup>29</sup> Faiqi anaasee kaiqeesa faqa ummuarimari takisa munnimmana maree mariasa faqa Yisuna ufa Yoohaneenara quna amiqimasee iriqau, misa ooqai Anutuna andeeqara

ufamau fidaqa, Yoohaneefinnai nammari maree marusa maridaqa Yisuna ufa amiqimasee iriqau. <sup>30</sup> Farisai amaana ufa qimariasa faqa Mooseena sandufasaa rakisirausa faqa misara Anutufa andeeqara aana naamua qufaqa misa rukiasee sia Yoohaneena nammari maroosa maridaqa Yisuna ufa faqa sia iriqau.

<sup>31-32</sup> Yisufa misara iriseenoo maaqi qimasee faiqi anaasee qimanniminoo qinau, maa fasannai mariasa nana fooqaasee maridee, misa faiqiuqa maqusa qambaani sararida mariasa fooqaasa maridaqa misa maaqi qimasee nari aqi nari aqidaqa maasa asasira idi raunaqa innee sia dadaaqa idi ree mariafanoo maasa quandaki qiki anai fakiki raunaqa innee mina faqa sia dadaaqaifanoo innee furufari mariasa mariafanoo. <sup>33</sup> Yoohaneefa nammari nimimarufa anireenoo uainna nammari sia nanau narana uqanna faqa sia nanau. Ookasaasa anoona faqa pandaqa oofaafana faqa kai noofaqa innee minara qafamasee afaana aundurari keeqaffinoo miqidanoommifoo qiqau. <sup>34</sup> Qinee faiqi nimaaku uqanna aniree uainna nammari faqa narana faqa naunaqa innee qiniara maa fasiqana qafaa kaaqa narana nammari namufaqa neemarifa maridanoo, ummuarimaria takisa munnimma maree mariasa faqa maasa qikooqafaqa niqiqee mariasa faqa niqoondiki marifa maridanoo qiniara miqi mari fee qimariafanoo. <sup>35</sup> Irirana faqaasa irira ufa kai qimariafaqa innee ufa qaara ufa qimariasa marianara innee irirana siaisa mariafanoo.

*Yisuna aikusaa fadameena adianau.*

<sup>36</sup> Farisai amaana ufa irimarufa moo fannoo narana suqaseenoo Yisuna aaramasee aniree qini maaqaki narana naannee qufanoo Yisufa eedoo qimaseenoo mina maaqaki keeqafinoo ooqu marifinoo narana neemarinau. (Mi aukuanna mi maqusaanaasa narana quqee maru qaindana qambaana marufaqa misa mina fiqum qumma taatata afuru faiqaqee idaga narana nee mariqau. Niku uquseeqa faiqaqee nee mariqau.) <sup>37</sup> Mi maqusanakiqari moo anaasee kisaqaasaa mandainaina maree marufa Yisufa Farisai amaana ufa irimaruna maaqaki narana neemarinaki marufanoo mi anaaseefa minara iriseenoo amiqira afundimaru fadameenna idaaqira taquki maruna mareenoo minaki anireenoo Yisuna aanaaqiannai anireenoo mifa aiku uquqoonnai kikiqinau. <sup>38</sup> Kikiqammafinoo qikiraqee marufanoo mina aukunu fannoo Yisuna aikusaa aqufufanoo nari akiaqa asaasi kisaqaannai mina aikusaqaraa aukunu rukaseenoo mina aiku amooqaseenoo afundi maru fadameena mi taqunakinaana mina aikusaa adianau. <sup>39</sup> Farisai amaana ufa irimarufa Yisuna aarofa mina qafamaseenoo nari aundurari kai Yisunara maaqi qimasee qimminau, maa fasiqafa kuqaa Anutuna tamummaqara fasiqa maridanoofau maa anaaseefa mina aiku amooqainara iriqini, mifa kisaqaasaa manda oosana maree marunara iriseenoofau qaoo qini.

<sup>40</sup> Yisufa mina irirana iriseenoo mina aaramasee qimaminoo qinau, Simoono qinee moo ainainara ani qimamidaqa, Simoonafa iriseenoo qinau, eedoo ufasaa rakisirafa doo qinaqa iria qufanoo Yisufa qinau, faiqi moo fannoo moomoo munnimma faqaafa maridanoo maqee maqee ufaasu munnimma akaqausa nimisaidanoo mina akiaqara faqa aabaa faqa maree marifa marinau. Mi fasiqafa faiqi qaaraqanda ufaasu munnimma nininau. <sup>41</sup> Moo fasiqa 500 munnimma moomoo aminau, kafaa moo fasiqa 50 munnimma oodaa kai aminau, nimufaqa maraqa niniufaqa aukuna aiqaramafufaqa kaifaa mi munnimmana nari amiraree qimasee sia amanaiqufanoo mi munnimmana akoofa iriseenoo miqandara amuqusufanoo mina akiaqara sia maranau minnisanau. <sup>42</sup> Simoono anee miqandara nanees fee qidanee miqandakiqari yafee firaqoo mi munnimmana akoonara aidiannoo fee firaa munnimma aabaa maroo fee kaqikaa munnimma aabaa maroo fee.

<sup>43</sup> Simoonafa mina iriseenoo Yisuna qimaminoo qinau, abee firaa munnimma aabaa maroofa mifa kai minara aidiannoo fee qufanoo Yisufa qinau, anee andeeqasee qiananoo qimaseenoo quandafi mi manda anaaseefinnai oori ubeekamaseenoo qinau, Simoono anee maa anaaseena qafaidanee, qinee anoona ufa ani qimamidaqa maa anaaseena firaa mandainaina akiaqara doo minnisannanara koorooidanoo firaqoo qiniara aidimari-fanoo amiqi amiqimmaqiamaqidanoo kaqikaa aaqarana akiaqara minni aisainafa minni aisainanoo mi kaqikaa aaqara fasiqafa kaqikaa qoo minni aisainna fasiqanara aidiannoo.

<sup>44</sup> Qinee ani maaqaki aniraunnana anee sia maasa oosana mareenana nammari-nai qiku nammari uquananoo, maa anaaseefa nari aukununnai qini qiku nammari uquseenoo nari akiaqa asaasi kisaqaannai rukeenoo. <sup>45</sup> Qinee ani maaqaki aniraunnana anee sia maasa oosana mareenana qimooqaananoo maa anaaseefa aniree qini qiku qimooqaifa maridanoo. <sup>46</sup> Qinee aniraunnana anee sia maasa oosana mareenana makaqa anoona qikiqaki adiaananoo maa anaaseefa amiqira afundimaru makaqa anoona qini qikusaa adiaifanoo qikusaa adiaqimaqeenoo. <sup>47</sup> Ani kaqikaa mandainaina

akiaqara sia rukaananoo sia qiniara aidinana sia amiqi amiqimma qimaqaananoo maa anaaseena firaa mandainaina tia rukaunanoo firaaqoo qiniara aidifanoo amiqi amiqimmaqimaqaidanoo. <sup>48</sup> Yisufa miqi qimaseenoo quandafi mi anaaseena qimaminoo qinau, Oo anaasee ani mandainaina akiaqara arirana doo qinee minni aiseeqa qufaqa akaqausa miqoo mariusa nariqa naundurai qimiriqau.

<sup>49</sup> Maana yafasiqa fee nariara faiqi mandainaina akiaqara arirana minnisee marunausee qidanoo fee. <sup>50</sup> Yisufa mi anaaseena kafaa qimaminoo qinau, oo maa anaasee anee aneenna aunduraindari qinisaa rusimarianafa mifa kai ani innaarunai marira asumu aminoo doo asoaranaki fua.

## 8

### *Anaaseeuqa Yisuna dadaaqiqau.*

<sup>1</sup> Kaqikaaqoo marikinoo Yisufa kaqikaa maqusakiaqa faqa firaa maqusakiaqa faqa oonuree aniree inoo nidanoo Anutuna innaaruna ququsara amiqira fasaasa ufa qimanniminoo ninau. Mina faiqi namu qisaukuqara taikasee qikunnooqu qaara marasee fasiqa faqa anaasee akaqausa faqa mina faqa fiqau. <sup>2</sup> Sia fifau anaaseeuqa mina faqa fiqau. Yisufa aurirana taikannisoosa faqa faafasaaqa faqaasa maraqunnisoo anaaseesa kai mina faqa fidaqa nariqa narana faqa munnimma faqa minannai Yisuna faqa mina faiqi namufaqa fidaqa dadaaqimariqau. <sup>3</sup> Mi anaaseesa nuqu Yisuna anoona amarafa Mari-afa Makadara maqusaindaraafa Yisufa mina aundurakinaana dinni qisauku taikasee dinni ani qaaraqanda faafasaaqa nifaqoofa faqa moo anaasee Eeroodeena maaqasaa rakisirana Tusaana anaqa mina auqu Yooanna nammarifa faqa moo anaasee Susaanna nammarifa faqa moomoo anaaseeuqa mina faqa fiqau.

### *Qaqama aaqee maruna kikiqa usirana.*

*(Mat 13:1-9; Mak 4:1-9)*

<sup>4</sup> Yisufa fimarufaqa faiqi anaasee aiqamaindari moomoosa ani usufufanoo Yisufa quandara ufa qimanniminoo qinau.

<sup>5</sup> Innee amiqimasee iriaqa faiqi moo fannoo maasa Yuda maqannaasa oosana maareenoo maqa rumaseenoo raisa fooqaana ummaqirara mina qaqama marasee minaki aaqasoofanoo ururanau. Mifa miqoo aaqaidanoo akaqa qaqama fannoo aatata niku ree mariaqoo faqa aqufufaqa ufiniuga aniree mina kai namasaqau. <sup>6</sup> Akaqafa ooni amuaaqa maqa oodaa marunasaa aqufufanoo kambigeenoo dauni aadanusinai, maqa afeekasaa nammari siainasaa kambigeenoo aadanusinai. <sup>7</sup> Akaqafa reereeroondaana marunaki aqufufanoo reereeroondaana namufaqa kambigoofanoo reereeroondaana fannoo rafaqaqafu fufanoo aadanusinai. <sup>8</sup> Akaqafa amiqira maqasaa aqufinoo firaa kambigeenoo qaqama moomoo uqanna iranau, Yisufa kafaa qimanniminoo qinau, naaqoo faqaasa amiqimasee qini ufa iriaqa.

(Mi aukuanu mi maqannaasa kaqikaa ainaina qaqama raisa fooqaana neemariqau, mina auqu uita, misa maqa rumasee nisaukunoo mi qaqamana afaqa qumaraida aaqasoofanoo kambigeenoo marinau, qaqama irafufaqa atekamaree munusee aindirumasee feemu uqusaidaqa neemariqau. Misaindi uita, raisa fooqaafa maasaindi sakuma maridanoo.)

### *Yisufa quandara ufa faiqi anaasee qimanniminau.*

*(Mat 13:10-17; Mak 4:10-12)*

<sup>9</sup> Yisufa faiqi anaasee qimannimufaqa mina faiqi namu nariqa kai iramiriqa qiqau, sakuma fooqaana qaqamara quandara ufa qimannimiannana mina oosana maasa sia iridaqa qimaqiminaqa iria. <sup>10</sup> Yisufa iriseenoo qinau, Anutuna ququsakinaa qumee irirana Anutufa inniara qimannimianee qinau, faiqi anaasee sia kooroomasee qimannimia quandasee qimanniminaqa nifu qafamasee sia paqurifara naaqoonnai irisee sia naundurai quqeefera.

### *Qaqama aaqee maru ufana oosana kooroo inau.*

*(Mat 13:18-23; Mak 4:13-20)*

<sup>11</sup> Raisa fooqaana qaqamasaa quandara ufa oosana maaqimminoo maridanoo, raisa fooqaana qaqama Anutuna ufa maridanoo. <sup>12</sup> Raisa qaqama niku reemariqoo aqufifa maaqimmidanoo, Anutuna ufa irisaafanoo manda afaanna fannoo misa naunduraindaraana ufiniarafuu ani namammaree fifaqa qini saqarikirana faqa asumu mariranasaa faqa ititaanifeera. <sup>13</sup> Raisa qaqama ooni amuaaqa maqasaa aqufifa maaqimmidanoo, faiqi anaasee akaqausa Anutuna ufa irisee sia naundurai meemaqoo iriaraasidaqa aaqee kai irisee nimanamasee qafara aukuaana kambiqafifaqa misa minnisaidaqa. <sup>14</sup> Raisa

qaqama amuka faqaa ainainaki aqufifa maaqimmidanoo, faiqí anaasee akaqausa Anutuna ufa iriseeqa maqasaa adiafaaimari ainainara faqa oosana oosana qumiasana faqa munnimma maree mariana faqa ummaara narimari ainaina faqa amuka faqaa ainainara foora minasaa kukuqammafinoo radamifanoo adusa qaqama iraidanoo. <sup>15</sup> Raisa qaqama amiqira maqasaa aqufifa maaqimmidanoo, faiqí anaasee akaqausa Anutuna ufa irisee qumareeqa nári amiqira nimuqusaki ufa irisee eedoo qiranaki quqasee minaki maqeeiafanoo mariifa qaqama iraidanoo. Faiqí moo fannoo Anutuna ufa iriseenoo faiqí anaasee qimannimidanoo nári marirana faqa kooroo imarifa qaqama iraidanoo.

*Yisufa quandara ufa qooma kikiqa usinau.*

*(Mak 4:21-25)*

<sup>16-17</sup> Yisufa kafa qimannimidanoo qinau, faiqí moo fannoo qooma qumbiseenoo sia difaaninnai rafaafa fuannoo, sia beeta ameemaanai quqaidanoo, faiqí anaasee mina maaqaki keeqafiqá amiqimasee qafaqee qimasee qaindasaa diridanoo. Kasooqagee faqa aigama kukeeqara ainaina Anutufa kooroo iannoo aigama rafaqaqfira ainaina faqa Anutufa paqurimasee mareeqee akooqoo quqaannoo. <sup>18</sup> Innee Anutuna ufa irimariasa amiqimasee irisee maraqa aigama kaqikaa irirainaina faqaasa Anutufa moo faqa nimiannoo, irirainaina siaisa ati marina Anutufa rafiqá mara marinaqa kaqí marifaranoo. Innee minara Anutuna ufa iriseeqa rakisi qumaraqa.

*Yisufa nári anoona uqanna kikiqammusinau.*

*(Mat 12:46-50; Mak 3:31-35)*

<sup>19</sup> Yisufa miqoo faiqí anaasee qimannimmarufaqa mina anoofa faqa mina ainaina faqa aniree Yisuna faqa ufa qiraree qimasee qafoofofanoo faiqí anaasee moomoo maaqaki umbiqafufafaqaa sia amana keeqaqau. <sup>20</sup> Faiqí moo fannoo mina qafamasee Yisuna qimaminau, ani anoofa faqa ani akaqaafasaaufa faqa misa ani faqa ufa qiraree qimasee madaanaí kikiqíqa maridammia. <sup>21</sup> Yisufa mina iriseenoo aigamausa qimannimau, Anutuna ufa irisee eedoo qimasee mi mau fimariasa misa qini qinaukoo qikaqaafasaa uqanna mariafanoo.

*Yisufa nammari faqa ufai faqa qaoo qufanoo kasoomminau.*

*(Mat 8:23-27; Mak 4:35-41)*

<sup>22</sup> Moo kari Yisufa nári faiqí namufaqa nammari afainni noodaanna reemaru kanuqanaki akaramafinoo qimannimau, innisaimbaqa maa nammariina muqu afainai nianai fuanaura miqí qufaqa misauqa aikannai furufanoo kanuqa fannoo finau. <sup>23</sup> Misa fimarufanoo Yisufa kanuqaki faiqagee marinau, faiqagee marufanoo ufai firaafa uqufanoo nammari amakaurinoo nammari fannoo kanuqaki qumbiqeenoo ukuqnaaqaa ufaqa ruftee mariqau. <sup>24</sup> Yisuna faiqí namu Yisufinnai oonuree afauriqa qíqau, oo uriqararafa, uriqararafa, maasa doo ukuqnaidaqa kuqirarammidagee qufanoo Yisufa findifinoo ufaira faqa nammariara faqa qaoo qufanoo kasooinoo firaqoo dai qimafinau.

<sup>25</sup> Miqí qimaseenoo Yisufa quandafí nári faiqí namu niqinoo qinau, innee qini saqarikirana yai fee quqee fee sia marifaqa ruftee mariafanoo qufaqa misa aigamausa naaquqoofaqa rufiaidaqa nári qimami nári qimami qidaqa qíqau. Maana yafasiqa fee maridanoo mifa ufaira faqa nammari amakauriranara faqa qimannimifaqa mina ufa irisee eedoo qimasee kasoomafia.

*Faiqí aundurakinaa afaannauqa kuaraki fiqau.*

*(Mat 8:28-34; Mak 5:1-20)*

<sup>26</sup> Misa miqooqari kanuqaki nammari amuaqumau fiufafaqa muqafainai nianai Keerasa maqannaasa maruqoo oonuraquraminau, mi maqannaasa Kariree maqa maaqa dinni atinai mariqau. <sup>27</sup> Yisufa kanuqakiqari maqasaa aqufufanoo faiqí moo fannoo faafasaaqaa mina aundurái marufa aniranau, mi fasiqafa kisaqaasaa kaqisamu nimirinai, sia nári maaqai marufa faiqí madikai marufa aniranau. <sup>28-29</sup> Faiqí anaasee moomoo kari sainnadannai mi fasiqana aiku asauku rumbasoofofanoo faafasaaqaa fannoo mi fasiqana afeekaikufanoo mi sainandana rakeemasoofofanoo sandeenoo kaasau aadana maqa maaqai fimirinai. Mi fasiqafa Yisuna qafamasoofofanoo faafasaaqaa afaanna mina aundurái marufa faaqarinai. Yisufa mi faafasaaqana aqíqaaninnanara iriseenoo faqa rumasee Yisuna oorinni maqasaa aqufinoo aranaíqi qimaminai, Yisu anee firaqoo uriqarara Anutuna amaaku mariananoo anee nanaree maasa soodaa idanee, qinee firaqoo ani iraidaqa, sia qini ambufuqaa. <sup>30</sup> Yisufa mi faafasaaqana irimirinoo qinau, ani auqu yafee qufanoo mi faafasaaqafa qinau, maasa moomoosa maa fasiqana aundurái marunaua marunannara maasa duqu qusirausee qidaqa.

<sup>31-33</sup> Miqí qimasee Yisuna aranaíqi iramiriqa qíqau, anee sia maasa idaki niqíqaa qimasee qafoofofanoo ameemai kuarauqa andanda naidaqa marufaqa Yisunara afeekaiqíqa

qigau amanee maasa kuarauqa naundurai keeqaanauree qufanoo Yisufa doo fuaqee qufaqa mi fasiqana aundurakiqari raudamaki kuarauqa naunduraki keeqafufaqa mi kuaraua tautumaki ameemindari sandaqa nammari afainni ooquree rafusaki nammariki aqufiqa ukuqnamafiqa kuqu taikaqau.

<sup>34</sup> Kuarasaa rakisimarusa mina qafeeqa sandee ooruree maqusai marusa faqa uigaana maaqakiqara marusa faqa qimannimiqa fiqau. <sup>35</sup> Faiqi anaasee moomoosa maasa faqa qafararee qimasee Yisufinnai nammari afainni sandee ooqu fiqau, ooquree qafooфанoo faafasaaqauqa aundurakiqari fifu fasiqafa irirana maraseenoo qamunna rumbaseenoo Yisuna aikuki ooqufaaqee marufaqa qafooфанoo naaqufanau. <sup>36-37</sup> Keerakeeseenee maqannaasa maqusauqakiqari moomoosa sugumaree aniroofanoo Yisufa faafasaaqauqa niqiqoofaqa qafeeusa misauqa qimannimufaqa iriseeqa firaqoo naaquqoofaqa Yisuna ireeda kai ireeda kai fuki faaki qida irammiriqa qigau, amanee anee maaqooqari moosaa finnaree qufanoo Yisufa kanuqaki akaramafinoo mootinai finau. <sup>38-39</sup> Yisufa firarufanoo faafasaaqau aundurai mariu fasiqafa Yisuna aranaiqi irammirinoo qinai, amanee qinee ani faqa fuanaree qimasee fuki faaki qufanoo Yisufa mina aqiqeenoo qinai, aneenna maaqai oonuree Anutufa ani andeeqainara misa qimannimia miqi qufanoo mi fasiqafa nari maqusai oonureenoo Yisufa mina andeeqoonara aiqamai qimanniminoo ninai.

*Kisaaqandaikimaru anaaseefa Yisuna qamunna auqanau.*

*(Mat 9:18-26; Mak 5:21-43)*

<sup>40-42</sup> Yisufa anirandee kafaannai oonuroofaqa faiqi anaasee moomoosa minara rakisida mariusa asasammasee Yisuna afiqaqau, Yisufa kanuqakiqari maqai aqufufanoo miqoo amaana maqasaa rakisirafa mina auqu lairusafa anireenoo Yisuna aikuki maqasaa aqufinoo aranaiqi irammirinoo qinai, amanee anee qini maaqai aniree dadaqia, qini qiraamuna moodaa qisaukuqara taikasee qikunni ooqu qaara aukuaana kai marasaifa kuqiraridanoo. Yisufa eedoo qimasee fimarufaqa faiqi anaasee moomoosa fidaqa nari afeeqee nari afeeqee idaqa Yisuna faqa fiqau.

<sup>43</sup> Anaasee moo fannoo qisauku taikasee qikunni ooqu qaraqanda aukuaana kisaqaqandaiki marufa tutaqausa moomoosa feefauru masaida mareemaru marasinna amufanoo sia taikanau, miqi marufanoo mina munnimma taikafufanoo kaqi marinai.

<sup>44</sup> Yisufa faiqi anaasee namufaqa fimarufanoo mi anaaseefa Yisuna aanaaqiannai moomoosa itatafunakiaqa aniree qumee kai mina qamunna ati qumee auqamasoofanoo mina kisaqaqandaikirafa aaqee uqanna taikanau. <sup>45</sup> Yisufa irammirinoo qinai, yafee qini duqeenoo fee qufaqa aiqamausa qaoo qufanoo Peetooroofa qinai, uriqararafa faiqi anaasee moomoosa ani afeeqaidammia qufanoo Yisufa kafaa qinai, <sup>46</sup> Moo fannoo qini duqai fanoo faiqi andeeqara afeeka qinikiqari fifaqa iriqammunani qinai. <sup>47</sup> Miqi qufanoo mi anaaseefa oo doo qini qiqafeenoommifoo qimaseenoo aindiri aindiri ufanoo Yisuna aikuki maqasaa aqufinoo aiqamausa nifusaa nari auriranara faqa mina qamunna auqoonara faqa aurirafa aaqee kai taikoonara faqa kooroo inau. <sup>48</sup> Yisufa mina ufa iriseenoo qinai, oo qini qiraamuna anee irirana qinisaa rusiannanara ani aurirafa taikkeenoo, doo asoaranaki fua.

*Yisufa lairusana araamuna andeeqanau.*

<sup>49</sup> Yisufa miqi qimasee mi anaaseena qimamimarufanoo amaana maqasaa rakisirana maaqaindari faiqi moo fannoo anireenoo lairusana qimaminai, anee Yisuna sia kadaapi amia, ani araamuna doo kuqufinoo. <sup>50</sup> Yisufa mina iriseenoo Yairusana qimaminai lairusa anee sia rufiaa, qinisaa kai ani irirana mundinanoo ani araamuna amanaikiannoo. <sup>51</sup> Yisufa Yairusana maaqai oonureenoo aiqamausa keeqararufanoo qaoo qimaseenoo Peetooroona faqa Yoothaneena faqa Yameesana faqa mi manaqana anoona akoona faqa minamusa kai nifiqeenoo maaqaki keeqanau. <sup>52-53</sup> Keeqafufanoo niqafoofaqa mi maqanaki moomoosa maridaqa ikifaafau qimarufanoo Yisufa qimanniminai, Sia ikiraqaaqa maanaaqa sia kuqinoo faiqaqee maridanoo qufaqa aiqamausa mi manaqanara kuqaa kuqinoo fee qimasee Yisunara naanaidaraqiaqa uteeti qigau. <sup>54</sup> Yisufa mi manaqafa rinoo marunnai oonureenoo mina asauku qumareenoo qimaminai, qini qiraamuna findi fua. <sup>55</sup> Miqi qufanoo aunduraindaraafa oonurandee ani keeqafufanoo aaqee uqanna findifufanoo Yisufa mina anaukoo qimanniminoo qinai, narana ani araamuna amiaqee qufaqa amufanoo nanau. <sup>56</sup> Mina anaukoo firaqoo naaquqoofanoo Yisufa qimanniminai. Sia uqanna maa ainannara moona qimamiaqa, kukeeqaaqa.



## 9

*Yisufa narí faiqi namu niqiqoofaqa innaarunaira qimannimiqau.*

*(Mat 10:5-15; Mak 6:7-13)*

<sup>1</sup> Yisufa narí faiqi namu (12) qisaukuqara taikasee qikunni ooqu qaara marasee naarama moodaaqoo quqaseenoo Anutuna afeeka faafasaaqa afaqara afeeka faqa aurirana oosana oosana taikara afeeka faqa niminau. <sup>2-3</sup> Nimiseenoo maaqanna maaqanna niqiqamaseenoo qimanniminai, innee Anutuna innaaruna ququsara faiqi anaasee qimannimidaqa misa aurirana taika nimaqaaqa, innee sia moo ainaina maree fuaqa saunu faqa aakauqa faqa narana faqa munnimma faqa aabaa qamunna faqa sia maree fuaqa kaqi fuaqa. <sup>4</sup> Maqusaki oonuraifaqa moo fannoo aqoondi kamannisainaga mina maaqaki kai mariiqa minakiqari kai fuaqa. <sup>5</sup> Yamaqusanaasee inniara qaoo qifaqa Anutufa naruaninnanara aaquqimannimaqasee kookoomma afaqa ninaamarasee fuaqa. <sup>6</sup> Yisuna faiqi namu maqusa maqusa fidaqa amiqira fasaasa ufa faiqi anaasee qimannimisaidaqa aiqamai aurusa faqa taikannisee mariqau.

*Eeroodeefa Yisunara Yoohaneefee qinau.*

*(Mat 14:1-12; Mak 6:14-29)*

<sup>7</sup> Eeroodeefa Kariree maqa maaqaki uriqarara kiapafa mi ainainnara iriseenoo firaqoo randeenoo furufarinai. Akaqausa qiqau, Yoohaneefa nammari nimimarufa Eeroodeefa arusoofa kuqiranakiqari findifinoo mi naaquqara ainainna auqaidanoommi maqi qufanoo Eeroodeefa mi ufana iriseenoo randanau. <sup>8</sup> Ooqeenaa tamummaqara fasiqauqakiqari Eeriaa fee moo fannoo fee kafa findi finoo fee akaqausa qufanoo Eeroodeefa qinau, <sup>9</sup> Yoohaneefa nammari nimimaruna akiaqa qinee atekasaafananoo kuqinoo maridanoo. Maa fasiqafa Yisuna oosana oosana ainainnara iridaqa mina yafee maridanoo. Miqi qimaseenoo Eeroodeefa Yisuna qafarara randanau.

*Yisufa noodaanna faqa feemu faqa moomoosa niminai.*

*(Mat 14:13-21; Mak 6:30-44; Yoh 6:1-14)*

<sup>10</sup> Yisuna faiqi namu maqusa maqusa niniufaqa anireeqa nariqa nidaqa auqoo ainainnara Yisuna qimamiqau. Yisufa misa nifiqeenoo faiqi sia marunnai Beetasaida maqusa aaqa fiqau. <sup>11</sup> Faiqi anaasee moomoosa iriseeqa afaqee minni oonu paquriqau. Yisufa misa naaramaseenoo Anutuna innaaruna ququsara qimannimiseenoo misaki aurusa andeeqannisanau.

<sup>12</sup> Eenoofaqa Yisuna faiqi namu qisaukuqara taikasee qikunni ooqu qaaraqanda marasee aniree Yisuna qimamidaqa qiqau, anee faiqi anaasee niqiqainaga maqusa maqusa uigaana maqakiaqa fifainidaqa narana feefaurumasee naaqa, maana faiqi sia mariasaqa maridaqa. <sup>13</sup> Miqi qufanoo Yisufa qimanniminai, inneeqa kai narana nimifaqa naaqa, qufaqa misa qiqau, Maasa feemu moodaannai qisauku faqa noodaanna qaaraqanda faqa maqeeidaqa, faiqi anaasee moomoosa uqanna maridaqa amanee maasa situaqai oonuree narana moomoo feeraurianauree. <sup>14-15</sup> Miqi qufanoo Yisufa narí faiqi namu qimanniminoo, innee faiqi anaasee qimannimifaqa raina raina mafi qaara faqa qaara faqa fasiqa niku nisauku taikasee qisaukuqara faqa (50) moosaqa ooqu mariaqa kafaqa qaara faqa qaara faqa fasiqa niku nisauku taikasee qisaukuqara faqa (50) moosaqa ooqu mariaqa miqi kai mafi oqumari maree fuaqa qufaqa mina faiqi namu qimannimifaqa faiqi anaasee miqi mafi oqumari maree fiqau. Misakiqari faiqi kai (5,000) faifa tauseenna mariqau, ooni saqari auqiqa mariqau. <sup>16</sup> Ooqu mari fufanoo Yisufa feemu moodaannai qisauku faqa noodaanna qaaraqanda faqa qumareenoo innaarunai oori uqeeraseenoo Anutufinnai dufi dufi qimasee asaukunnoo feemu faqa noodaanna faqa ruqi ruqimasee narí faiqi namusaa soofaqa misa qumareeqa faiqi anaasee nimiqa. <sup>17</sup> Nimufaqa noofanoo nimuaqufaqa ataraasa minnisooofaqa Yisuna faiqi namu minauqa sugusee uqaki rufanoo qisaukuqara taikasee qikunni ooqu qaaraqanda (12) uqa qumbiqanau.

*Peetooroofa Yisunara Anutuna asauku mundiranara qinau. Yisufa narí kuquaninnanara qimanniminai.*

*(Mat 16:13-28; Mak 8:27-9:1)*

<sup>18-19</sup> Moo kari Yisufa nariara oonuree innaaru qimarufaqa mina faiqi namu oonuroofanoo irammirinoo qinau, faiqi anaasee qiniara nana fasiqa fee gidee qufaqa misa qiqau, akaqausa Yoohaneefa nammari nimimarufa kuqiranakiqari findifinoo fee qidaqa, akaqausa aniara ooqai kuqufufa Eeriaafa findifinoo fee qidaqa, akaqausa Anutuna ooqeenaa tamummaqara fasiqauqakiqari moo fannoo kuqiranakiqari findi finoo fee qidaqa. <sup>20-22</sup> Yisufa mina iriseenoo irammirinoo qinau misa miqi qiafaqa innee qiniara nanee fee qidee qufanoo Peetooroofa qinau, anee Anutuna asauku

mudirafa mariananoommi qufanoo Yisufa aranaiqi qimannimainau innee mi ufana sia moo fasiqa qimamiaqa qinee faiqi nimaaku uqanna marunasa marianaqa faiqi firaasa faqa Anutuna aanaiqikirausa uriqararasa faqa Mooseena sandufasaa rakisirausa faqa fira aapurarana qimiseeqa qiniara nikooqamasee kuqa darusai faqa qaaramoo faasaana aiqarainanoo Anutufa qini mara findifu masee kaqi marirana qimiannoo.

<sup>23</sup> Yisufa quandaki aiqamausa qimannimidanoo qinau, faiqi moo fannoo qini faqa firaree qimasee qini ufamau finafa nari marirana minniseenoo faasaambaasaana qini ufasaara kuqa dariranara amanakidee qinafa qini faqa fidanoora foora qini ufamau fuannoo. <sup>24</sup> Qinee minara maaqi qimasee qimannimidaqa. Faiqi moo fannoo qinisaara kuqiranara amuqusi marinanoo nari marirana afeedi inafa nari marirana kakasiannoo. Moo fannoo qiniara nari marirana maqoo minnisainafa nari marirana asumu maraannoo. <sup>25</sup> Faiqi moo fannoo maa maqanasaa uriqarara faikamafinoo aiqama ainaina maqee idanoo mari inafa marikinoo kuqinoo nari aunduraindaraana kuridiranaki finanoo mi qumiasanafa fifau kadaapirumasee maroofa mariannoo. <sup>26</sup> Faiqi anaasee moo fannoo qiniara faqa qini ufara faqa faiqi nifusaa asaurse aqooqainafa marinaqa qinee faiqi nimaaku naaru inaarunaidari qeeqa areenarana faqa qeeqa qikooona areenarana faqa naaquqara andeeqara qangiroouqa faqa misa areenarana faqa minauqa namufaga qumureeqa mi fasiqa anaaseesara faqa qisaurusee qikooqaannoo. <sup>27</sup> Innee maa ainainnara faqa iriaqa innee maqee mariasakiqari akaqausa sia kuqirai kaqimarifanoo Anutuna innaarunaidaraa ququsa qafeefaranoo.

*Aaqanasaa Yisufa innaaruna afiri maranau.*  
(Mat 17:1-8; Mak 9:2-8)

<sup>28</sup> Yisufa mi ufana qimannimiseenoo dinni qisauku taikasee dinni ani qaaramoo faasaana aiqaroofanoo Yisufa Peetooroona faqa Yoohaneena faqa Yameesana faqa nifiqeenoo moo aqanai innaaru qirara ooru fiqau. Yisufa nariara innaaru qimarufaga mina faiqi namu kaqi faiqagee ufanoo. <sup>29-31</sup> Yisufa miqoo innaaru qidanoo moo oori afiri maroofanoo mina qamunna kaaqa eekara rinoo nifu daroodaraa inau. Qaara fasiqa tautumaki kooroomafufaga Yisuna faqa ufa qimariqau. Miqanda Mooseesa Eeriaasa ooga kuquqanda tautumaki miqoo maqasaa misa nifusaa innaaruna areenaranaki kooroomafiq Yisufa qusasaa Anutuna ufamau finoo Yeerusaree maqusai kuqaninnana Yisuna faqa ufa qimariqau. <sup>32</sup> Peetooroofa nari faqa maruqanda faqa faiqagee mariufanoo findifiqa Yisuna kaaqa qarana faqa mi fasiqaganda faqa niqa fee mariqau.

<sup>33</sup> Mi fasiqaganda Yisuna aisee firarufanoo Peetooroofa nari oosana sia irirai Yisuna qimaminoo qinau. Ufasaa rakisirafa, maasa maqoo marunanoo amiqidanoo. Maasa qaaramoo uigaana maaqa maqoo usakaanaura, aniara moo Mooseenara moo Eeriaanara moo usakaanaura. <sup>34-35</sup> Peetooroofa kaqi ufa qimarufanoo oonamu fannoo anireenoo misa ititannimaqasoo faqa rufiaqau. Rufioofanoo oonamukiqari ufa moo maaqi qinau. Maana qini qimaaku maridanoo qinee rusandeesamumasee maraafanafa, innee mina ufa kai iriaqa. <sup>36</sup> Mi ufafa taikafufanoo misa qafuofanoo Yisufa nariara kai miqoo marinau. Miqooqari Yisuna faiqi namu miqoo mariusa mi ainainna qafoonara sia uqanna kooroo iqau. Kaaqa umeeraqau.

*Yisufa kumaaraa aundurai afaanna maruna aqiqanau.*  
(Mat 17:14-18; Mak 9:14-27)

<sup>37-38</sup> Faiqee iqaqoofaqa minamusa aqanasaaqari ooquroofaqa faiqi anaasee moomoosa Yisuna ani paqurimasoo fanoo misakiqari faiqi moo fannoo faqa rumasee Yisuna qimaminoo qinau. Ufasaa rakisirafa qinee qeeqa qimuqusanai ani irammiridaqa anee anireenana qini qimaaku moodaa kai maqagaunnana qafaa. <sup>39-40</sup> Faafasaaqa moo fannoo maqee maqee faqa rumasee mina aakuffinoo rafuseeqee maqasaa aqusaifanoo teendaaroni marifanoo ookiqari qaqaara faka fakidanoo, maqee maqee miqidanoo sia adooaidanoo. Qinee ani faiqi namu maqoo mariasasaa qeeqa qimuqusanai irammirunaqa amaniafanoo sia amana afaqee. <sup>41-42</sup> Yisufa iriseenoo qimaminau, innee qini ufara sia anoonee qimariasa kaqi runna fimariasa mariafanoo. Qinee kisaagasaa fee inni faqa mariauree kisaagasaa fee inni ummaarara foora akuqee ianauree. Miqi qimasee mi fasiqana qimaminau, anenna amaaku maree mai ania qufanoo mi kumaaraafa ani marufanoo faafasaaqa fannoo mina arurutukueeqeenoo maqasaa aqusoofanoo teendaaroninoo qaqaara faka fakinau. Yisufa mi faafasaaqana amambaina qufanoo fifufanoo Yisufa mi faiqina andeeqaseenoo nari akoona kafa amina. <sup>43</sup> Faiqi anaasee mina qafamasee Anutuna naaquqara afeeka qafamasee rufiaqau.

*Yisufa nari kuquaninnanara kafa qimanniminau.*

*(Mat 17:22-23; Mak 9:30-32,44-45)*

<sup>44-45</sup> Faiqi anaasee Yisufa auqoo ainainara naaquoofaqa nari qimami nari qimami masoofano, Yisufa quandaki nari faiqi namu qimanniminoo qinau, innee maa qimannimianaqa sia aunuaqa amiqimasee iriaqa. Qinee faiqi nimaaku uqanna Anutufa qini mareeqee faiqi faiqi nisaukuki quqaqisainaqa darifarano fee qufaqa sia mi ufana oosana iriqau, Anutufa misa irirana ititasoofaqa sia iriqau, Yisuna irammirianeerusia minnisaqau.

*Yisuna faiqi namuki yafee uriqararafa maridanoo fee qiqau.*

*(Mat 18:1-5; Mak 9:33-37)*

<sup>46</sup> Moo kari Yisuna faiqi namu maasakiqari yafee uriqararafa maridanoo qimasee narinni narinni ufa rainaqa. <sup>47-48</sup> Yisufa narikai misa ufa iriseenoo akooqoofano faiqi aanaaqi moo maraseenoo nari aqa kikiqamasee mina kikiqa ususeenoo nari faiqi namu qimanniminau. Yafee moo fannoo qiniara irisee maa kaqika faiqina oonudupirana oonu asammasee amiqi amiqimma aisainafa qini uqanna qiqoondikidanoo, kafa yafee moo fannoo qini oonu asammasee qiqoondikinafa qini diqigoona Anutuna aqoondikidanoo. Innikiqari oorudupirafa mifa inni uriqararafa maridanoo.

*Moo fannoo Yisuna auqusaa faafasaaqa aqiqanau.*

*(Mak 9:38-40)*

<sup>49</sup> Yoohaneefa mi ufana akiaqara Yisuna qimaminoo qinau. Oo maasa uriqararafa, innau moo fasiqa fannoo moosaa ani auqunnai manda faafasaaqa faiqi aundurakinaana aqiqee marufaqa maasa qafamasee qaoo qiqiafana, mifa sia maasa faqa nimarunara qaoo qiqiafana. <sup>50</sup> Yisufa mina iriseenoo qimaminau sia minara qaoo qiaqa, sia namuqaa maridanoofau miqini maasa qiqoondi maridanoo miqidanoo.

*Moo Samaria maqannaasa Yisunara moosa fuannee qiqau.*

<sup>51</sup> Yisufa Kariree maqa maaqaki niuufano innaarunai oorufuaninna aukuaana adeedi roofano Yeerusareenni oori quandanau. <sup>52</sup> Samaria maqa maaqaki faiqanoo fidanoo faiqi akaqausa niqiqoofaqa indaaru Samaria moo maqusaki faiqaaninnanara deedaqiaqera qimannimirara niqiqanau. <sup>53</sup> Oonuree mi maqusaanaasa qimannimufaqa misa qiqau maasa namuqaa maqusai Yeerusaree maqusai fidanoo fee qimasee qaoo sia maaqoo faiqaannee qiqau. <sup>54-56</sup> Mina faiqiqara Yameesasa Yoohaneesa miqanda minara iriseeqa niraanoofaqa Yisuna qimamiqau, Karaambaiqa amanee maasa innaarunaindaraa idara qinanoo qumuree misa qama taikaanno fee qufanoo Yisufa quandaki miqanda nimambaina qimasee qaoo qimaseenoo aiqareenoo moo maqusai finau.

*Yisufa nariara qinau, qinee qinaamu siaisee qinau.*

*(Mat 8:19-22)*

<sup>57</sup> Misa aanai fimarufanoo faiqi moo fannoo Yisuna qimaminoo qinau. Anee yai fee maqusa maqusa finaqa qinee ani faqa fuanaura. <sup>58-60</sup> Yisufa iriseenoo qimaminoo qinau. Kaasau fainiuga oonaamarai faiqaasa maridaqa ufniuga faqa fuanaura amanee qinee maridaqa, qinee faiqi nimaaku yai fee qeeqa qikiqa rumasee fee faiqaanauree, faiqara maqa siaisa maridaqa, qini faqa finnaree. Miqi qimasee qimamiseenoo Yisufa fidanoo moo fasiqa aaranau, anee aniree qini faqa fuannee qufanoo mi fasiqafa qinoo qini kikoofa kuqirarammi marifaqa mifa kuqufinaqa akundamasee ani faqa fuanaura amanee qinee miqianauree qufanoo Yisufa qinau. Saina naaruara kuqiranaki fifandinausa kai nariqa kuqinausa nikundaqa. Anee Anutuna ququsaki keeqara ufa faiqi anaasee qimanniminanua. <sup>61</sup> Faiqi moo fannoo Yisuna qimaminau uriqararafa qinee ani faqa firaridaqa qeeqa maqusai naaree oonuree qeeqa qikaqaafasaa nimanda masee anianauree qufanoo Yisufa qimaminau. <sup>62</sup> Faiqi moo fannoo saunu qumareenoo nandi aumuru arumaree munu kasaqai quqemarifa miqimaria fasiqausa sia amana innaaruna ququsa saika amana mareefaranoo.

## 10

*Yisufa nari fuaninna maqusa maqusanai niqiqoofaqa fiqau.*

<sup>1-2</sup> Marikinoo Yisufa faiqi moomoosa rusandeesamumaseenoo qaara kai qaara kai niqiqeenoo maaqanna maaqanna Yisufa nari fuaninnannai indaaru fuaqera niqiqamaseenoo qimanniminau afuqakinaa nandi aiqi marianara foora tatafinoo rairainoo maridanoo moomoo fasiqa anaasee maridaqa aiq innaarunai quqemariasa oodaa maridaqa. Innee suana akoofinnai innaaru qifanoo aiqifandinausa niminaqa dadaaqiqa suana aiqaaqera. <sup>3</sup> Doo fuaqa, qinee qini sipsipa aanaaqi kaaqa reendeenimariasa

kaasau faini qambaanai inni niqiqaidaga. <sup>4</sup> Innee afunee uqa aakauqa fee niku aanaamu fee sia maree fuaga, aanai fidaqa faiqi sia nimandaaga. Innee maqusai oonuree faiqi moona maaqaki keeqarara maaqi qiaqa Anutuna asoofara maa maqanaki mariani. <sup>5-6</sup> Asooaranara rimari fasiqafa minaki marinana ani afaaqooqa qirana minasaa mariani, sia asooaranara rimari fasiqafa minaki marinana anee afaaqooqa qira ufa qimami-annana kafia maraa. <sup>7</sup> Innee maqusa maqusa fidaqa yaqoo maaqaki fee keeqafiga minaki maridaqa mifa niminna narana nammarina kaqi naaga. Innee inniqa saika imari fasiqana kadaapirirana akiqara amimariafanoo, doo innee faqa saika fasiqauqa mariafanoo, misa narana nimifaqa kaqi naaga inni kadaapirirana akiqara maridanoo. Sia aiqama maaqakiaqa keeqafida naqa nuaqa, moodaa maaqaki kai mariaqa. <sup>8-9</sup> Innee maqusa maqusa oonuraifaqa misa inni niqoondikidaqa narana nammari nimifaqa kaqi naaga, namasee mi maqusanakina aurinausa andeeqannimaqasee maaqi qimasee qimannimiaqa. Anutuna innaaruna ququsa fannoo inni rafusu quqarirara adeedi ranoo maridanoo. <sup>10</sup> Innee moo maqusaki oonuraifaqa misa sia inni amiqi-ammannimaqifaqa innee maqusa qambaanai maridaqa maaqi qimasee qimannimiaqa. <sup>11</sup> Inni maqusa kookoomma fannoo maasa qifaqai atooqafifaqa maasa rukeeqee inniqa nifaqai aqia, maa ufana amiqimasee iriaqa Anutuna innaaruna ququsa fannoo inni naaga ani marifaqa minnisaafannoo. <sup>12</sup> Qini faiqi namu qinee Yisusa inni qimannimidaqa kasooqae Anutufa faiqi anaasee ufa irira faasaana anirainanoo innee kookoomma nimaqaoosa Anutufa sia rauqi nimaqaannoo Soodooma maqusanasa manda oosana maree maruna akiqara Anutufa kaqikaqoo rauqi nimaqaannoo kookoomma akunni-maqaasa sia rauqi nimaqaannoo, kuqa naruannoo.

*Yisufa qaara maqusanasa niqiqanau.*

*(Mat 11:20-24)*

<sup>13-14</sup> Oo Koorasinna maqannaasa maqusa maaqa namufaqa qinee inniara qimudaoo qidaqa inni narirafa firaafa mariannoo. Beetasaida maqannaasa maqusa maaqa namufaqa inni narirafa faqa firaafa mariannoo. Tiree maqusanasa faqa Sidoona maqusanasa faqa aanaamuru aamina mariaa qinee mi maqusaqandaki faiqi sia amanaikimari ainaina moo misaki auqaanaqau misa dauni dauni iriseeqau misa doona danda kookoomma afaqa nariqa nifaqai akusee ikifaafau qifau nariqa manda oosana minnisee dauni quandasee qini ufamau nni. Kooroosinna maqusanasa faqa Beetasaida maqusanasa faqa inniki moomoo naaquqemari ainaina auqaafannaqa sia inneeqa manda oosana minnisaga. Fira ufa irira aukuaana anirainanoo Anutufa Tiree maqusanasa faqa Sidoona maqusanasa faqa naridanoo kaqikaqoo nifuaannoo. Innee Kooroosinna maqusanasa faqa Beetasaida maqusanasa faqa sia nifuaannoo firaqoo inni naruannoo. <sup>15</sup> Kapeeranaumma maqusanasa inniara faqa qianaura inneeqa nifaqara mara maree urimariana inni maqusara faqa unnaqimasee innaaruna maqusa fooqaa fee qimariafanoo mina akiqara Anutufa inni maqusa namufaqa mindari rarisameeqeenoo idaki aqumisaannoo.

<sup>16</sup> Yisufa quandafi nari faiqi namu qimanniminoo qinuu. Ya fasiqa anaasee fee inni ufa irianinafa qini ufa uqanna iriannoo. Ya fasiqa anaasee fee inni ufa rukiainafa qini futeeqaannoo, ya fasiqa anaasee fee qini ufa sia irinafa qini diqiqaina Anutuna futeeqaannoo.

*Sia afaannauqara asiasaqa innaarunai fifandinnanara asiasaqa.*

<sup>17-19</sup> Yisufa niqiqoo fasiqausa maqusa maqusa niniufaqa anireeqa firaqoo asasamasee Yisuna qimamiqau. Oo karaambaiga fira ainaina faafasaqa maasa ani auqu ramasee niqiqanaqa doo faiqi naunduraindari raudamaki sandee. Yisufa irisee qimanniminuu eoo qinee Sadanna qafeeqa mifa innaarunaindari aakuasaara foora maqasaa aqufnau. Innee iriaqa qinee afeeka inni nimunaqa sakanisaa fee farukasaa fee niku ramasaifanoo sia ukaqa nimianoo inni namuqaa Sadannana oosana oosana afeeka fannoo sia inni naruannoo. <sup>20</sup> Doo miqinoo marifaqa maa anoona ainaina qimannimidaqa, faafasaqa inni ufa irisee eedoo qimarianara sia minara asiasaqa maa ainannara asiasaqa, inni nuqu innaaruna ququsaki mari papiqanaki akararinoo maridanoo, minara kai asiasaqa.

*Irirana faqaasa ititannimaqasee kaiqeesa kooroo inau.*

*(Mat 11:25-27; 13:16-17)*

<sup>21</sup> Yisufa mi ufana qimannimisoofoanoo Anutuna naaquqara maraqa fannoo Yisuna asasirana amufanoo Anutunara maaqi qimasee innaaru qinuu. Oo qini qikoofa innaaruna faqa maa maqana faqa karaambaiga dufi dufi anee qinee maqee maqee qimannimunnufana irirana faqaasa nifusaa rafaqafunniseenana irirana siaisa qini faiqi namu kooroomannimaqee mariananoo. Eeoo qini qikoofa aneenna aidirafa

miqimminoo maridanoo. <sup>22-23</sup> Yisufa kaqi innaaru qidanoo nari akoona qimaminau, qini qikoofa aiqama ainaina qini kai qimiqaifa maridanoo, faiqi moo fannoo sia ani amaakura amiqimasee iridanoo anee qini qikoofa kai amiqimasee qiniara irimariananoo kafaa faiqi moo fannoo sia qini qikoonara iridanoo amaaku fannoo kai aniara iridanoo qinee qeeqakai irisee quqannifiqee marunaua faqa aniara irifaranoo. Miqi qidanoo innaaru qimasee quandafi nari faiqi namu umaenni qimanniminau. Inni aiqama amiqira ainaina faiqi sia amanaikimari ainainauqa uqannifiqaunaqa qafamasaafanoo inni asasirafa firaafa maridanoo. <sup>24</sup> Qinee inni qimannimidaqa oqai tamummaqara fasiqauqa faqa karaambaiquqa faqa innee maqee qafeemaria ainainausa faiqi sia amanaikimaria ainainausa faqa qafaqaa imarufaqa sia qafaqau, misa innee maqee qini ufa irimaria ufausa iriaqaa imarufaqa sia iriqau.

*Aiqama sandufauqa uriqaranara qimanniminau.*

<sup>25-26</sup> Yisufa miqi qimarufanoo Mooseena sandufa akoofasa fannoo anireenoo Yisuna akari maqarree qimasee qimaminoo qinuu. Ufasaa rakisirafa qinee nana saika fee marasee naaru naaru mariranaki fuanauree qufanoo Yisufa qimaminau, oqai tamummaqara fasiqauqa akarakinaa ufa anee asaana rumasee nana ufa fee irinane. <sup>27</sup> Mi fasiqafa iriseenoo Yisuna qimaminau, maa ufana asaana riqa, innee inneeqa nimuqusa nimana afeeka faqa irirana faqa mi tiana aiqamannai iriranannai faqa karaambaiqa Anutunara nidimarinaga nimuqusiani. Kafaa maaqi qimasee moo asaana riqa anee aneenna aqoonausara aninna afaaqara foora misara aidinoo amuqusiani. <sup>28</sup> Yisufa mi ufana iriseenoo mi fasiqana qimaminau, doo ani ufa anoona maridanoo mi ufamau kai fidana naaru naaru marirana paqurinnaranoo.

<sup>29-30</sup> Mi ufana Yisuna qimamufa mi fasiqana Mooseena sandufa akoofasa asaurirana amiseenoo nariara andeeqaranaki marianauree qimaseenoo nari amoo qimaseenoo Yisuna kafaa irammirinau. Yafee qini qigoonafa maridanoo fee qufanoo Yisufa qimaminau faiqi moo fannoo Yeerusareendari Yeerikoo maqusai oogu fimarufanoo ummuarimaria fasiqausa aanai mina paqurimasee doo aru quqasee mina afaqa ainaina maree fifufanoo kuqjara foora miqoo rinoo marinau. <sup>31</sup> Mi faasaana amaana maqasaa aanaiqikirafa mi aatata oogu fidanoo aru quqaqoo fasiqana qafeenoo dinni aana afaindaqa fiqa ranau. <sup>32</sup> Miqi kai inoo amaana maqaki ainainimarifa moo Reefina ati fannoo mi aatata oogu fidanoo ooguqama qafamasee dinni aana afaindanai oqiaaqaree finau.

<sup>33-34</sup> Mina aanaaqiana faiqi moo fannoo Isaraee maqannaasa namuqaa marufa Samaria maqannaafa mi aatata oogu fidanoo aru quqaqoo fasiqana misa namuqaa Isaraee maqannaana qafamaseenoo firaqoo amuqusufanoo uainna namari faqa fadameena faqa mina afaqa atekaranaki akuseenoo banisannai rumbaseenoo mi fasiqana rauseeqeenoo nari doonkisa qugaseenoo afiqeenoo maqusai oonureenoo pasindiaqa maaqaki quqaseenoo minaki maridanoo rakisi marinau. <sup>35</sup> Faiqee iqaqoofanoo mi fasiqafa maaqasaa rakisirana qaraqanda munnimma amiseenoo qimaminau anee maa munnimmana maraseenani maanasaa rakisimarinanoo munnimma sia amanaikinaqa anireeqa moo faqa ani amianauree qimaseenoo quqasee finau.

<sup>36-37</sup> Yisufa mi ufana Reefina ati maru fasiqana qimamiseenoo irammirinau yafee aru fasiqana aqoonafa maridanoo fee qufanoo Reefina ati fannoo qinuu, minara amuqusimari fasiqafa kai, qufanoo Yisufa qinuu doo anee faqa fidana miqikai ia.

*Maratafa moomoo narana suqeenoo oonu auqee ani auqee kaukaata qinuu.*

<sup>38</sup> Miqooqari Yisufa nari faiqi namu faqa fidanoo moo maqusai oonuroofanoo anaasee moo mina auqu Maratafa Yisuna afiqeenoo nari maaqaki munuseenoo amiqi amiqimamaqanau. <sup>39</sup> Maratana anasaafa Yisuna anoona amarafa Mariafa mifa faqa maridanoo Yisufa Anutuna ufa qimannimarfanoo Mariafa Yisuna aaga oqufaqqeeidanoo mina ufa irimarinau. <sup>40-41</sup> Yisufa faqa mina faiqi namufaqa marunara Maratafa nariara narana suqeenoo deedaqinoo imarufanoo aundura dapikufanoo Yisuna qimaminau karaambaiqa qini qinasaafa aiqama saika kadaapi qini kai qiminoo sia fee minara iridane, qimaminanoo aniree dadaaqiani qufanoo Yisufa qimaminau oo Marata, Marata, ani oosana oosana narana suqaranara amuqusimarifanoo aundura dapiki marifana aaqee mariananoo. <sup>42</sup> Anee moodaa narana suqaaqana mifa amanaikinoo maridanoo ani anasaafa Mariafa andeeqara ainaina mareenoo Anutuna ufa reendenamafinoo iridanoo, qinee sia mi ainainna minasaqaraana rafiaanaura.

## 11

*Yisufa innaaru firaana uqannifiqanau.*  
(Mat 6:9-13; 7:7-11)

<sup>1-2</sup> Moo kari Yisufa moo atinai maridanoo innaaru qimarufanoo mina faiqi namuk-igari moo fannoo oonureenoo qimaminau, Karaambaiga Yoothaneefa nammari nimi marufa nari faiqi namu innaaru qira oosana uqannifiqoond ee inana anee faqa maasa uqannifiqaa qufanoo Yisufa eedoo qimasee qinau, innee innaaru qirara maaqi qimasee qiaqanani.

Qipoo ani auqu naaquqarafa uriqararafa mariani,  
Ani innaarunai ququsa maa maqanasaa kambijaani

<sup>3-4</sup> Maasa maqee maqee naanna narana qimia.

Aiqamausa manda oosana maasa nimiafaqa mina akiaqara mininnisaidaqa minara anee maasa naanna ramasee mina amana kai maasa manda ainaina akiaqara mini qisaa,

Anee sia maasa mareeqeenana afeeka nimaniranaki quqannisaa.

<sup>5-6</sup> Miqi qimaseenoo Yisufa kafaa nari faiqi namu qimanniminau faiqi moo fannoo eenda amuqusai nari aqoondi maaqai oonuree qimamiannoo, Oo qini qigoondi anee qaaramoo feemu qiminaqa qinee maree munu qeeqa qigoondi amia, mifa nianaindari ani marifanoo qini narana sia marifaqa. <sup>7</sup> Miqi qinanoo mina aqoondi fannoo maaqi qiannoo Oo naqimasee findi fuanauree faiqi anaasee namufaqa faigaqee idaqa kooqi ititanoo maridanoo. <sup>8</sup> Mi fasiqafa naqi fee iannoo narana amiranara akooqaidanoo mina aqoondi marianinnara faqa sia amana findifi mara amiannoo. Anee faqa ani aqoondi marinana sia asaurinnaranoo fuki faaki qimarinanoo ani fuki faaki qirana taikaanifeera findifi mara amiannoo.

<sup>9</sup> Qinee minara irisee inni qimannimidaqa innee faqa miqikai iqa Anutunara innaaru qifanoo innee sarauinna ainaina inni nimiannoo, innee Anutufinnai randeeqa anoona paqurifara innee Anutuna kooqi arifanoo atuasee nimiannoo. <sup>10</sup> Aiqama innaaru qimariasa mareefaranoo randee mariasa paqurifaranoo kooqisaa kukusimariasa kukusifanoo atuaannoo. <sup>11</sup> Qinee faiqi nikausa inni qimannimidaqa inneeqa nimaaku noodaannara qifaqa manda sakani nimifaree, sia nimifara noodaanna nimifara. <sup>12</sup> Misa kookooraana aurua qifaqa innee faruka nimifaree sia nimifara. <sup>13</sup> Innee manda oosana maree mariasa marifanoo inneeqa faiqi namu innaaru qifaqa amiqira ainaina kai nimimariafanoo. Innaarunai nikoofa amiqirafa uqanna maridanoo minara innaaru qimarinausa minara firaqqoo amiqirana amana kai nari naaquqara andeeqara maraquna nimiannoo.

*Beeraseeburanannai afaanna aqiqarana oosana qimanniminau.*  
(Mat 12:22-30; Mak 3:20-27)

<sup>14-15</sup> Moo kari Yisufa faiqi aundurakinaa faafasaaqa aqiqarara imarufanoo, mi faafasaaqa mi faiqina ufa rafaqaqufanoo sia ufa qimarinau. Yisufa faafasaaqa aqiqamasoofanoo mi fasiqafa ufa qinau. Faiqi anaasee mina qafamasee naaquqoofaqa rufiasee akaqausa Yisuna aqidaqa qiqau, afaannaqa uriqararafa mina auqu Beeraseeburafa afeeka Yisuna amifanoo quandaki faafasaaqa nifaqaidanoo. <sup>16</sup> Akaqausa mina ueeqararee qimasee qiqau Yisunara faiqi sia amanaikimari ainaina augusainaqa maasa aniara kuqaa Anutufinaindari qumu fee qianaara. <sup>17-18</sup> Yisufa faasai misa naundurakinaa irirana iriseenoo nari afaannaqa afeekannai faafasaaqa aqiqoonara akooqoofanoo niqinoo qinau. Moo maqannaasa nariqa maqannaasa faqa oonu rakee ani rakeemafi rakidaqa sia kisaqasaa marifara, dauni kuqifaranoo. Moodaa maqaki mariasa faqa oonu rakee ani rakee iqa qusasaa moodaa moodaa makidaqa furufarifaranoo. Sadannana ququsakinaasa miqikai iqa oonu rakee ani rakeemafiqaa naqimasee afeekaikifaree. Innee qiniara afaannaqa uriqararana mina auqu Beeraseeburanannai faafasaaqa aqiqeenoo fee qimasaida unna qimariafanoo. <sup>19</sup> Qinee minannai faafasaaqa nifaqanaqa innee yanee auqu ramaasidaqa faafasaaqa nifaqaid ee, innee sia Beeraseeburana auqu ramasee miqi mariafanoo innee andeeqasee Anutuna auqu ramasee afaanna nifaqee marifanoo. Miqi marianara inniqa faafasaaqa nifaqee mariafa inni ufa fannoo qini diqira ufa qimariana atekaidanoo. <sup>20</sup> Qinee sia Beeraseeburana afeekannaifau faafasaaqa nifaqaidau Anutuna naaquqara afeekannai nifaqee marunaua marunannara akooqoo maridanoo. Miqi marunannara Anutuna ququsa inniki doo animarinara kooroo idanoo.

<sup>21-22</sup> Afeeka fasiqa Sadannafa amudaanaiqi marifa duru saamu deedaqamasee marifanoo mina aqama ainaina amiqinoo mariannoo, sia moo fannoo ummuariannoo. Afeeka fasiqa Sadannana uriqararafa uqanna qinee Yisusa anireeqa mi fasiqana

radamuseeqa mina faakana duru saamu ainaina mareeqeeqa qeeqa qiku qisauku nimi-anauranoo. <sup>23</sup> Faiqi moo fannoo sia qini qiqoondi marinafa qini namuqaa maridanoo sia qini dadaaqida oonu suqu ani suqu imarifa, mareeqaida aquraaruki marifa maridanoo.

*Afaanna nari aqoonausa nifiqeenoo nari marunaki keeqarana kikiqa usinoo marida.*  
(Mat 12:43-45)

<sup>24-26</sup> Yisufa kaqi qimannimidanoo qinau. Manda faafasaaqa faiqi aundurakigari maaqakigariara fooru raudee aadana maqa maaqa oombura maqa maaqaki aakaqaki oonuree aniree inoo nidanoo adooaranara randaisianoo maaqi qimasee oonumafi irinoo qinau sainaqa qinee qeeqa quqasee aniafanna fasiqana aunduraki kafaafua, qimaseenoo oonuree qafoofoanoo mi fasiqana aunduraki maaqara fooru damuninoo maridanoo andeeqanoo marufanoo qafamasee oooo qimasee kafaafu oonurandee ani aqoonna faafasaaqauqa aiqamausa misa mandainaina uriqararauusa kai dinni qisauku taikasee dinni ani qaaraqanda marasee (7) nifiqamareenoo mi fasiqana aunduraki keeqafi mariqau. Marufanoo ooqai moodaa faafasaaqa marufanoo mi fasiqafa kaqikaqoo mandainainaki marinuu, maqee firaqoo mandaikuqanna inoo maridanoo.

*Anutuna ufamau fimariasa anoona asasirausa maridaqa.*

<sup>27</sup> Yisufa mi ufana qimannimufanoo anaasee moo fannoo faiqi anaasee qambaanindari findifi qimaminoo qinau. Ani maqaseenoo naamma amimari anaaseefa aniara amiqira qimaaku fee qimaseenoo firaqoo asasira anaasee maridanoo. <sup>28</sup> Miqi qufanoo Yisufa quandafi mi ufana qaoo qinoo qinau, abee Anutuna ufa irisee mi mau fimariasa misa kai firaqoo asasirausa maridaqa.

*Yisufa nari kuquaninnanara Yoonnaana kikiqa usinau.*  
(Mat 12:38-42)

<sup>29</sup> Faiqi anaasee moomoosa Yisuna rafusu quqarumafufanoo Yisufa kaqi qimanniminoonoo qinau, Maa maqee aukuaana maria fasiqa anaaseesa firaqoo manda oosana maree mariasa misa Anutufinnaindari qiniara faiqi sia amanaikimari ainaina auquanaqa kuqaa Anutufinnaindari anifeeqianauro fifau miqi qimariasa misa mi irirafa manda oosana nimidanoo. <sup>30</sup> Sia innaarunai kooroo ira ainaina fuka uqannifiqaanaura nauraafa Yoonaanaindi mifa kai kaqi maridanoo, Yoonaaafa ooqai Nineefee maqusanaasa Anutuna ufa kooroomannimainu, miqi kai iqa qinee faiqi nimaaku uqanna maqee mariasa Anutuna ufa kooroomma nimaqaanaura. <sup>31</sup> Kasooqagee naaru Anutufa faiqi anaasee ufa irira faasaanasaa Seebaa maqannaasa uriqarara anaasee fannoo findifi maa maqee mariasa inni niquraraannoo. Mi anaaseefa nianaindari Sooroomoonnana irirana faqaa ufa iriraree qimasee aninuu. Doo maqee faasaana qinee Sooroomoonnana uriqararauusa animaridaqa innee sia qini ufa irimariafanoo minasaara mi anaaseefa inni niquraraannoo. <sup>32</sup> Kasooqagee naaru Anutufa faiqi anaasee ufa irira faasaanasaa Nineefee maqusanaasa findifi maqee mariasa inni niqurareefaranoo, misa ooqai Yoonaanakigari Anutuna ufa iriseeqa nariqa manda ainaina maqasaa quqasee Anutuna afusaa reendenammiquu. Maqee qinee Yoonnaana uriqararauusa animarunaqa innee sia qini ufa irimariafanoo minasaara Nineefee maqusanaasa inni niqura reefaranoo.

*Yisufa rambiara quandara ufa kafaafu qimanniminuu.*  
(Mat 5:15; 6:22-23)

<sup>33</sup> Yisufa kaqi qimannimidanoo qinau, faiqi moo fannoo qooma qumbisee difaaninnai sia rafaafuannoo akooqoo quqasainanoo kaaqa qeemarinaga faiqi anaasee maaqaki keeqafi amiqimasee qafaqee qimasee akooqoo quqaidanoo. <sup>34</sup> Anee paapaaira oosana faqaafa mariananoo afu aundura kaaqa qarafa marifa mariananoo. Anee tatamaqira oosana faqaafa mariananoo afu aundura asukuna arinoo maridanoo. <sup>35-36</sup> Inneeqa kai minara rakisiaqa inni nifu naunduraki kaaqa qarana tatamaqira oosana fannoo rafaafuandoora, inni nifu naunduraki tatamaqira oosana kaqikaafa faqa sia marinaga inni naunduraki marifa faqa innee nimaria oosana faqa kaaqa areenaannoo.

*Yisufa Farisai amaana ufa qimarusa niqiqanuu.*  
(Mat 23:1-36; Mak 12:38-40)

<sup>37</sup> Yisufa ufa qimannimi taikasoofoanoo Farisai amaana ufa qimarufa Yisunara aniree qini maaqaki oonuree narana naannee qufanoo eedoo qimasee mina maaqaki mina faqa oonuree oogu marifi narana nanuu. <sup>38</sup> Farisai amaana ufa qimarufa Yisuna oosana qafamasee tautinoo qinau, maa fasiqafa sia maasa oosana mareenoo asaaquirai naidanoo kaqi naidanoo ufa rukiee marifa maridanoo. <sup>39</sup> Karaambaiqa nari kai mina irirana iriseenoo qimaminoo qinau, Qini ufa iria, innee Farisai amaana qimariasa

inni marirana pirita kaafa fooqaafa mariafaqa adisaa kai findaukee mariafanoo aunduraki faiqi narirana faqa mandainaina oosana oosana faqa ikairi faqa inni naundura qumbiqanoo maridanoo. <sup>40</sup> Innee furufari mariafanoo innee Anutunara pirita kaafa adi kai auqimarifee fee qidee aundura sia auqifee fee qidee mifa aundura faqa auqusee qafee marifa maridanoo <sup>41</sup> Innee inneeqa naundura anukamasaifanoo inni nifaafa aiqama anukanoo mariannoo.

<sup>42</sup> Oo Farisai amaana ufamau fimariasa inni narirafa firaafa mariannoo, innee innee-qara maasa Anutuna ufamau fidaqa afuqakinaana oosana oosana adiafaaira ainaina rainasee akaqana Anutuna amidaqee qimasee quandaki andeeqara marirana faqa Anutunara riranara faqa minnisee mariasa mariafanoo.

<sup>43</sup> Oo Farisai amaana ufa qimariasa inni narirafa firaafa mariannoo inni mandoosana maaqimminoo maridanoo. Innee amaana maaqaki keeqaidaqa noorisaa ooqu marirana firaafaa rimariasa mariafanoo, innee makeetakiqa fimariafaqa faiqi anaasee inni nooriara rufiasee amiqimasee nimandanara rimariasa mariafanoo. <sup>44</sup> Inni nariranara irifanoo naaqaqaani, innee faiqi madika sia qafosara foora mariafanoo faiqi sia qafarai kaqi mi mau fidaqa inniara amiqira fasiqafee qimasaidaqa inni naunduraki putaa iranara sia irimariasa.

<sup>45</sup> Yisufa miqi qifanoo Mooseena sandufa akoofasa moo fannoo qimaminoo qinau, Oo ufasaa rakisirafa anee mi ufanannai maasa faqa mandaikamma qimaqaananoo. <sup>46</sup> Yisufa iriseenoo mina faqa qimaminau, innee Mooseena sandufasaa rakisirausa inni narirafa faqa firaafa maridanoo naaqaqaani. Innee inneeqa faiqi faiqi maqasaa sanda ufana oosana oosanannai niqoonasee ummaara narimari ummaara faiqi anaasee nifaariki nimisee sia kaqikaaroo dadaqidaqa inneeqa nisauku amuka faqa sia quqasee minannai ummaara kaqikaaroo dadaqi mariasa mariafanoo. <sup>47</sup> Inneeqa nariranara irifanoo naaqaqaani, inni nikausa Anutuna tamummaqara fasiqauqa kuqa narusee nikundee marufaqa, innee misa faiqi namu oonuree inni nikausamara nirusa madikasaa amiqira ooni fee saqari fee taatuqee andanda faqa ummaqi mariasa mariafanoo. <sup>48</sup> Innee inneeqa nikausa mandoosanara amiqira oosanee qimasee miqi mariafanoo misa tamummaqara fasiqauqa narusoofa innee misa madikai amiqi amiqimariasa mariafanoo. <sup>49</sup> Anutufa minara iriseenoo nari iriranannai maa ufana qinau, qini tamummaqara fasiqauqa faqa qini ufa mara nimimariasa faqa Isaraee maqannaasa mariannai niqiqaiifaqa misa akaqausa kuqa narusee akaqausa auppurarana nimifaranoo. <sup>50</sup> Ooqai Abeerana ariranasaaqari nariqa aniifaqa Seekariana ariranasaa naaqaqara amaana maqaki tatufira qainda dinni naaqaqara oosirafa dinni qambaana Seekariana ariaau. <sup>51</sup> Mi aiqama kuqannarirana akiaqara qinee aiqama mareeqee maqee mariasasaa quqaanaura.

<sup>52</sup> Innee Mooseena sandufa akoofasauqa inni narirafa firaafa marirana naaqaqaani, innee innaarunai fimaria irirafa kooqi kiqara foora inneeqa rafaqaqafusee sia atuasee keeqeefaranoo faiqi anaasee mi kooqinaki keeqarara imariafaqa innee rafaqaqafi mariasa mariafanoo.

<sup>53</sup> Yisufa mi maqusana minnisooifaqa Mooseena sandufa akoofasauqa faqa Farisai amaana ufa qimariasa faqa Yisuna ariraree qimasee oosana oosana ufannai ufaanara foora fufi mariqau. <sup>54</sup> Misa aranaiqi oosana oosana ainainara irammiriana aaqainaqa rumbaanauree qimariqau.

## 12

*Yisufa aaquqira ufa faqa pooduqara ufa faqa qimanniminau.*

*(Mat 10:26-27)*

<sup>1</sup> Mikari faiqi anaasee moomoosa uqanna Yisufinnai ani suqufufaqa narisaa narisaa faqa niku ree mariqau. Yisufa ufa qimannimiraree qimaseenoo nari faiqi namu naaree qimanniminoo qinau. Innee Farisai amaana ufa qimariasa misa atiqeemari ooruku anoonara foora rufiieqa eerairiaqa misa ooruku maaqimmidanoo misa faiqi anaasee amaana ufa qimannimisaida nariqa maqandanai mandainaina maraidaqa misa miqimaria ooruku anoonara foora innee eerairiaqee qidaqa. <sup>2</sup> Aiqama rafaqaqafira ainaina kasooqagee Anutufa aiqusaina akooqoo mariannoo aiqama kukeeqara ainaina faqa kasooqagee kooroomafinoo akooqoo mariannoo. Farisai amaana ufa qimariasa qaaraikirana faqa kooroo iannoo. <sup>3</sup> Inni faqa qimannimidaqa innee asukunaki faiqi anaasee qimannimira ufa kasooqagee Anutufa aiqamausa nifusaa faasaana kooroo inaqa irifaranoo. Nana ufa fee maaqaki moona aaqooki qimaminna ufana maaqa ataufakaqara foora miqooqari fi fi qimasee aiqamausa qimannimifaranoo.

*Sia nifaafa arimariasara rufiaaqee ufafa.*

*(Mat 10:28-31)*



<sup>4</sup> Qini qigoondiqa inni qimannimidaqa inni nipata kai kuqa narusee miqooqari moo mandainaina sia amana niminausara misara sia innee rufiaaqa. <sup>5</sup> Innee rufieefandinanara qimannimiana qini ufa iriaqa, Anutunara innee rufiaaqa. Mifa amana inni nipata naruseenoo naunduraindaraa nimana faqa amana mareeqeenoo idaki aqirana amanaiki marifa, eeo qinee minara qimannimidaqa minara kai innee rufiaaqa.

<sup>6</sup> Kaqikaa ufni ririmma fifau ainaina sia feefauru imariafa maridanoo, mi fifau ainannara Anutufa sia moodaa aunidanoo aiqamausara iridanoo rakisidanoo. <sup>7</sup> Inni nikiaga asaasi faqa Anutufa aiqamara iridanoo nisaana rumaqaisa mariafanoo ufni faqa inni nikiaga asaasi faqa fifau ainaina marifanoo rakisidanoo innee firaatia anoona ainaina mariafanoo inni feefauru uriqaranoo maridanoo amiqimasee innisaa rakisianoo, minara sia rufia qifaqa.

*Yisunara faiqi nifusaa kooroo imariasara qinau.*  
(Mat 10:32-33; 12:32; 10:19-20)

<sup>8</sup> Qinee maanara faqa inni qimannimidaqa yafasiqa anaasee fee moo fannoo faiqi anaasee nifusaa paasoosamasee nariara qinee Yisunaindi fee qinafa qinee faiqi nimaaku mi fasiqa anaaseesara Anutuna qangirooqa nifusaa misara faqa qinindi fee qianauro. <sup>9</sup> Yafasiqa anaasee fee moo fannoo faiqi anaasee nifusaa asaurusee sia qinee Yisunaindi fee qinafa qinee faiqi nimaaku mi fasiqa anaaseenara Anutuna qangirooqa nifusaa minara faqa sia qinindi fee qianauro.

<sup>10</sup> Faiqi anaasee moo fannoo faiqi nimaaku qini manda ufa qimaqiminafa qinee mi ufana akiqara minnaisaanauro. Faiqi anaasee moo fannoo Anutuna naaquqara maraqunara manda ufa qinafa Anutufa sia mina minnaisaannoo.

<sup>11-12</sup> Kasooqaqee misa qini ufasaara inni qini ufa irimariasaa rumbamaree amaana maaqaki fee siaasinnai fee nariqa uriqarara finnai fee munusaifaqa inni ufa iriraree qifaqa inneeqa nifaaga ititara ufara faqa qimannimira ufara faqa sia randaqa. Anutuna naaquqara maraquna fannoo qimanniminna ufana miqoo kai inni naakapaannoo.

*Yisufa maaqoo ainaina afeediranara qaoo qinau.*

<sup>13</sup> Faiqi moo fannoo faiqi anaasee qambaaindari findifinoo Yisuna qimaminoo qinau, Oo ufasa rakisirafa maaqanda qikoofa nari ainaina maaqandasaa quqasee kuqifanoo qini qifasaafa nariara maraidanoo anee qini qifasaana qimaminanoo andeeqasee raina qimiani. <sup>14</sup> Yisufa mina ufa iriseenoo qimaminau, oo maa fasiqa yafee qiniara siaasa saika maraannee qinaqee qinee inniqara ainaina rainaanauree. <sup>15</sup> Miqi qimaseenoo quandafi faiqi anaasee minara qimanniminoo qinau, innee aiqama ainainara fanandiranara eerairiaqa. Faiqi anoona marirafa sia qumiasanasaa mundinoo maridanoommi. <sup>16</sup> Yisufa kaqi qimannimidanoo maa ufana quandara ufa qimanniminau. Faiqi moo fannoo moomoo ququsa faqaafa narana amiqimasee moomoo kambiganau, mi fasiqafa mina qafamaseenoo nari kai qimirinoo qinau. <sup>17</sup> Qini narana moomoo uqanna marifaqa yai fee quqaanauree qimasee qimmiriseenoo qinau. <sup>18</sup> Qinee maaqianauro, narana unaku quqasee afeedimaria maaqafa kaqikaafa marifaqa qinee mina rapeemasee firaana usakaanaura. <sup>19</sup> Usakaseeqa qeeqa narana faqa qumiasana faqa minaki quqaseeqa qeeqaraa maaqi qianauro, Oo qinee maqee amiqiranaki maridaqa, qini amiqira ainaina moomoo aukuana amanaikinoo maridanoo, qinee narana nammari namasee amiqimasee aufadaranaki marianauro. <sup>20</sup> Miqi qufanoo Anutufa mi fasiqanara maaqi qinau, anee furufari marianafa maqee eendaki anee kuqinanoo ani marirafa taikaannoo. Miqooqari yafee ani firaa qumiasana maraannoo fee.

<sup>21</sup> Yisufa mi ufana rafaqafinoo qinau, maqasaa moomoo ainaina suqimariasaa innaarunai naaru naaru marirana siaisa mi fasiqana aanna raida moomoo ainaina fifau suqidaqa furufaridaqa.

*Qamunnara naranara sia indee indee ida maria.*  
(Mat 6:25-34)

<sup>22</sup> Yisufa nari faiqi namu kaqi qimannimidanoo qinau, qinee faasai qimannimunna ufanara irisee maaqi qidaqa innee kaqi marira naranara sia nimuqusiani inneeqa nifaqai afisimaria qamunnanara faqa sia nimuqusiani. <sup>23</sup> Inni marirafa uriqarara ainaina maridanoo narana oorudupirafa maridanoo. Inni nifaaga uriqarara ainaina maridanoo qamunna oorudupirafa maridanoo. <sup>24</sup> Kaammeesa qafaqa mifa sia narana asumu ummaqidanoo sia narana aiqifa sia maaqa usakasee minaki afeedifa, Anutufa kai narana misa nimidanoo. Innee sia ufniara foorau mariafanoo uriqarara ainaina mariafanoo inni faqa nimiannoo. <sup>25</sup> Innikiqari moo fannoo nari kuqiranara amuqusiranannai amanee nari marirana firarisamasee kisaqaasaa mariannoo fee, sia

amanaikinaranoo. <sup>26</sup> Innee mi kaqikaa ainainnara sia amanaikiqa nanaree naranara qamunnara nimuqusidanoo fee.

<sup>27</sup> Innee nandaki kaasau taatuqee tamookeena qafamasee minara iriaqa, mifa sia ainainidanoo sia narí qamunna akunusee afsidanoo qinee minara qimannimidaqa ooqai karaambaiga Dafidina amaaku Sooroomoonafa kaaqa ainaina faqa munnimma faqa moomoo maree marufa sia tamookeena amanasaa marinau mina qamunna amiqirafa uqanna sia tamookeena qamunnara foora idaaqirafa marinau, oorudupirafa marinau.

<sup>28</sup> Kaasau usau Anutufa kai misa qamunnara foora nimidanoo maqee kasidanoo duna atekasee ida aremaria ainainafa maridanoo. Anutufa misa nimidanoo sia fee firaa ainaina tia inni faqa nimianoo fee, nimiannoo. Innee Anutuna mandaagarafa kaqikaafa kai maridanoo, fifau narana qamunnara nimuqusi mariafanoo. <sup>29</sup> Minara irisee maasa nana narana fee nammari fee maqee maqee naanauree qimasee minara sia nimuqusiani.

<sup>30</sup> Maa maqanasaa Anutuna ufa sia irimariasaa misa mi ainainausara kai maqee maqee randaidaqa, inni nikoofa inni narana qamunna ainainara faasai iridanoo nimiannoo. <sup>31</sup> Innee Anutuna ququsakinaa marirana irirana niqiniandamasee mi mau firanara naaree irifanoo Anutufa inni marira ainaina nimiannoo.

*Oosana oosana qumiasana innaarunai kai afeedira ufa.*

*(Mat 6:19-21)*

<sup>32</sup> Oo innee qini faiqi namu, innee qini aanda uanaaqi firimariasara foora mariafanoo sia rufiaqa inni innaarunai nikoofa اساسasee innaaruna ququsa inni nimiraree qidanoo. <sup>33</sup> Innee inneeqa qumiasana moosa nimisee feefauru maraseeqa kudi fasiqa anaasee nimiseeqa, mi andeeqaranannai innee sia afauqaqaaninna munnimmara foora maraseeqa afeediaqa inneeqa aiqama qumiasana innaarunai kai afeediaqa, miqoo sia oorudupiannoo sia ummuara fasiqa fannoo maraannoo sia qooqoosa aukuanoo. <sup>34</sup> Inni qumiasana mariqoo kai miqoo kai inni nimuqusa ubeekanoo mariannoo. Innaarunai kai qumiasana afeediaqa.

*Yisufa qumiranara aambeembesidaqa maria.*

<sup>35</sup> Innee deedaqiqa mariaqeera qimannimidaqa, inneeqa qamunna atukarasee nooiqandamaseera foora qooma qumbinoo maridanoora foora deedaqiqa mariaqa.

<sup>36</sup> Innee ainaina faqaana ainainira faiqiara foora deedaqiqa mariaqa. Misa uriqararafa amundara qoomaqara fifinoo mindari oonurandee anianinnanara rakisida marifara, mifa anireenoo kooqi arinaqa dauni atuasaifanoo keeqaannoo, innee misa naanna ramasee deedaqiqa mariaqa. <sup>37</sup> Amiqaamasee afeesimariasaa اساسifaranoo misa uriqararafa anireenoo amiqimasee ainaini mariasee qimaseenoo narí qamunanda atukaramaseenoo narana suqaseenoo rakiqa nimiannoo. <sup>38</sup> Misa uriqararafa eenda amuqusai fee iqaqarooka fee anirinaqa amiqimasee rakisi inausa firaqoo اساسifaranoo. <sup>39</sup> Innee maa ufana faqa iriaqa, maaqa akoofa ummuarira fasiqa anianinnanara iriseenooofau rakisinanoofau sia kooqi rakeemasee ainaina maraiqini. <sup>40</sup> Qinee inni faqa qimannimidaqa, innee faqa deedaqiqa mariaqa, qinee faiqi nimaaku innee sia qiniara aniannoo fee qimarifandinna kamuqoo aniraanara.

*Qinee rainarara qumuafanausa maridaqa.*

*(Mat 24:45-51)*

<sup>41</sup> Yisufa miqi qufanoo Peetooroofa qinau. Oo karaambaiga anee mi quandara ufana aiqamausaree qidane maasara kai fee qidane. <sup>42</sup> Karaambaiga fannoo iriseenoo ainainimaru fasiqana kikiqusinoo qimaminau, ainaina faqaana ainainira faiqi irirana faqaafa andeeqasee rakisimarifa marinau. <sup>43</sup> Ainaina faqaafa mi andeeqara ainainira fasiqanara qimaminau anee qini maaqakinaa ainainasaa rakisisee ainainira faiqiqa narana aanda andeeqasee nimiannoo qimaseenoo moosaa finau. <sup>44</sup> Mi ainainira fasiqafa narí uriqararafa anianinna kamuqoo andeeqasee maridanoo firaqoo اساسianoo. Qinee Yisusa qimannimiana iriaqa, mi ainainna faqaafa narí amiqira ainainira fasiqa andeeqarana qafamasee amiqira fasiqa fee qimaseenoo narí aiqama ainainatiasaa rakisiranaiqamama qaannoo. <sup>45-46</sup> Moo kari ainaina faqaafa narí ainainira fasiqara qini ainainasaa rakisi marinaqa namummaqarara fuanee qimasee fifanoo mi ainainira fasiqafa quandaki narana faqa afeeka nammari faqa neeneeseenoo furufarinoo narí aqoonna ainainira fasiqa anaaseeqa narinoo furufarinoo nimarinanoo mina uriqararafa sia aniannoommifoo qimaru kamuqoo sia irirai mana mana imarinanoo anirama qafeenoo ufa rukiee mariasaa narí mariandemaseenoo mina ateeqa ateeka-masaannoo.

<sup>47</sup> Ainainira faiqi fannoo narí uriqararana ufa iriseenoo sia findifinoo mina ufamau finafa miqinna fasiqana saamu samu amudaani tureeraumasaannoo. <sup>48</sup> Ainainira faiqi

moo fannoo narí uriqararana ufa sia irirai aruaninna manda ainaina marainanoo mina arirafa aufadarafa mariannoo, maqasaa fasiqauqa moomoo ainaina amimari fasiqanara minasaaqari moomoo ainaina mareefaranoo, Anutufa faqa miqikai iannoo, maqasaa fasiqauqa uriqarara ainaina amimari fasiqanara minasaaqari uriqarara ainaina aabaa faqa mareefaranoo, Anutufa faqa miqikai iannoo.

*Qinee rainarara qumuafanausa maridaqa.*

*(Mat 10:34-36)*

<sup>49</sup> Yisufa faiqí anaasee qimannimidanoo qinau. Qinee maa maqanasaa mariasaki idara foora ufa raiqeeqa namuqaakirana oosana araanauree qimasee qumiqiafana, doo faasai ida arasaanoo qaida mariaqana. <sup>50</sup> Qinee kuqira manda nammariara foora marasee naanaura, mina afeesara marunanoo qifaaqa rumbanoo maridanoo. <sup>51</sup> Innee qiniara tinoorimarianaki maa asoarana mara maree maqasaa fasiqa anaasee nimiannee fee qida fee, sia uqanna miqinaura, qinee maqasaa fasiqa anaasee ufa rainarara nimirara qumidaqa. <sup>52</sup> Maagoogari qini ufasaara moodaa maqaki moodaanai qisauku marin- ausa rainaki qaarammoo dinni fiqa namuqaakifara qaaraqanda miqikai iqa dinni fiqa namuqaakifara. <sup>53</sup> Qini ufasaara nikausa nári faiqí namu namuqaakamma nimaqeeefara kafaa dinni kumaaraauqa nári nikausa namuqaakamma nimaqeeefaranoo. Ninausa nári niraamuqmaaka namuqaakamma nimaqeeefara kafaa dinni fuka anaaseeuqa nári ninausa namuqaakamma nimaqeeefaranoo. Anaaseeuqa nariqa ninaakuqmaaka faqa rainafi namuqaakamma nimaqeeefara kafaa dinni fuka anaaseeuqa nári ninaakuqmaaka anaaseeuqa namuqaakamma nimaqeeefaranoo.

*Innee qinee kambiquana kamunara sia irimariafanoo.*

*(Mat 16:2-3)*

<sup>54</sup> Yisufa faiqí anaasee qimannimidanoo qinau, innee aaku qonnamu suani kee- qeemari qaannaindari urinaqa qafeeqa oo aaku ruannoo fee qifanoo doo aaku ruannoo. <sup>55</sup> Maarooosa ookeesa ufai uqifaqa innee minara aiqaiqimari aukuannee qimariafanoo doo kuqaa qimariafanoo. <sup>56</sup> Innee mandaikirausa qaara irirana maree mariasa, innee innaaruna faqa maqa faqa qafamasee andeeqasee kambiquaninna ainainara andeeqasee iri mariafanoo, maqee qinee qumimarunna kamuqoora nanaree sia iridee qida fee.

*Ani kootai afiqee fimari fasiqana faqa dauni mina faqa moodaa ufa qia.*

*(Mat 5:25-26)*

<sup>57</sup> Innee sia inneeqa kai andeeqara ufa irisee mi mau fuafanoo nanaree miqidee. <sup>58</sup> Faiqí moo fannoo ani afiqeenoo kootai finana anee aanai fidana mi ufana aanai taikaaqee qia, sia miqinanoo mi fasiqafa ani afiqeenoo siaasa aminanoo mifa maree- qeenoo foorisa aminanoo mifa mareeqeenoo rumbaranaki quqaannoo. <sup>59</sup> Anee minaki marinanoo ani mandainaina akiaqara taikafinana mikari kai raudeennaranoo. (Innee minara irisee qunuu marunna kamuqoo inneeqa mandainainara qini faqa ufa qidaqa mi ufana andeeqa taikaaqa, sia miqiiqa Anutufinnai ifaranoo.)12|59|RUKA

## 13

*Innee sia quandafi Anutufinnai ubeekaaqa kuridifara.*

<sup>1</sup> Mi fasannai faiqí anaasee akaqausa anireeqa Yisuna qimamiqa qiqau, akaqa Kariree maqannaasa Anutuna tatufira aandaau suqa amimarufanoo Piratoofa narí sundiauga niqiiqoo faqa anireeqa misa naru taikaqau. Miqimasooofanoo aandaau fidika faqa faiqí fidika faqa moodaanaki quminau. <sup>2</sup> Yisufa mi ufana iriseenoo qimanniminoo qinau, innee mi Kariree maqannaasa akaqausa kuquanara nári maqannaasa urinnaaqaramasee manda oosana maroona akiaqara kuqiaa maqi fee qida fee. <sup>3</sup> Sia minarau kuqiaa, qinee minara inni qimannimidaqa, Innee faqa inneeqa manda oosana minnisee Anutufinnai ubeekaaqa, sia miqiiqa innee faqa miqi kai iqa kuqifaranoo. <sup>4</sup> Qinee Yeerusaree maqusanaasara faqa qimannimidaqa, miqoo ooni maqa kisaaga Siroomma ooni maqa fee qimariana fannoo rapeemaki aqufinoo faiqí (18) qisaukuqara taikasee qikunni ooqu dinni taikasee dinni ani qaaramoo marasee fasiqa kuqa narinau. Innee mi fasiqausara Yeerusaree mariasa nári niqoonausa manda oosana urinnaaqaramasee maroona aki- aqara kuqiaa maqi fee qida fee. <sup>5</sup> Sia minarau kuqiaa, Qinee inni qimannimidaqa, innee sia inneeqa manda oosana minnisee Anutufinnai ubeekaaqa innee faqa miqi kai ifaranoo.

*Faafisa fooqaa saqariara quandara ufa qinau.*

(Anutufa sia manda oosana akiaqara aqee uqanna naridanoo, kisaagaasaa naaraidanoo mai andeeqara aatata aniaqee qidanoo, sia irifanoo miqoo naruannoo.)

<sup>6</sup> Yisufa kafa maa quandara ufana qimannimino qinau, faiqi moo fannoo nari afuqaki faafisara foora qaqama tiqisaidaqa neemaria saqarifa marinau, moo faasaana mi fasiqafa mina qaqama tiqi nararee qimasee oonuree qafoofofanoo sia qaqama iroofofanoo oori runuseenoo nari ainainira fasiqa qimaminoo qinau, <sup>7</sup> Qinee qaarammoo aukuaana maa saqarina qafaunanoo sia qaqama ireenoo mifa fifau maqa ainoo naidanoo doo ateeqa aqua qufanoo mi ainainira fasiqafa qinau. <sup>8</sup> Saina kaqi marinaqa moodaa aukuaana qinee mina atukaki oora indufusee madaapee quqasee miqoo qafaanee qinau. <sup>9</sup> Sia irainaqa mikari kai ateeqa aquanaura.

*Ataufaka anidira anaasee Yisufa andeeqaisanau.*

<sup>10-11</sup> Moo Saririqa Yuda maqannaasa amaana qimaru faasaana Yisufa ufa suqira maqaki keeqafi Anutuna ufa qimannimimarufanoo moo anaasee fannoo faafasaqa mina aunduraki marufanoo (18) qisaukuqara taikasee qiku dinni taikasee dinni oonu qaaramoo marasee aukuaana kummaranoo kai marufa ataufaka rakisirara sia amanaiki-marufa miqoo amaana maqaki ani marinau. <sup>12</sup> Yisufa mi anaaseena qafamasee aaramaseenoo qimaminoo qinau. Oo maa anaasee doo aneenna teeroo quqaranaiqari amiqina maria. <sup>13</sup> Miqi qimaseenoo Yisufa nari asauku minasaa quqasofofanoo aaqee kai ataufaka rakisufanoo findifinoo Anutunara dufi dufi qimarinau. <sup>14</sup> Amaana maqasaa rakisi marufa mina qafamaseenoo Yisufa amaanasaa mi anaaseena andeeqoonara aanoomaseenoo faiqi anaasee qimanniminu. Mooseena sandufaki maasara 6 faasaana ainainiaqee qinau, doo innee mikari kai aniree inneeqa aurirana taikaaga, maasa amaanasaa sia aurirana taikaaga.

<sup>15</sup> Miqi qufanoo karaambaiga fannoo quandafi qimaminoo qinau, innee unna qimasaidaqa qaaraiki mariasa, amaanasaa innee inneeqa mimmi burimakau sipsipa ainaina nifiqaidaqa nammariini muqusee mariafaqa nammari naidaqa. <sup>16</sup> Maa anaaseefa Abarahaamana ati marifanoo Sadannafa kisaagaasaa (18) aukuaana karabusaki quqaqafanoo aupuraranaki marina, burimakau mimmi sipsipa uriqarara ainaina fee maridanoo fee mina kai amaanasaa idukirafa andeeqanoo maridanoo fee. <sup>17</sup> Miqi qufaqa Yisuna aqi marusa mi ufana iriseeqa nisauro marufaqa faiqi anaasee kaiqeasa Yisufa oosana oosana amiqira ainaina auqoonara asasiqariqau.

*Qumini fooqaa saqari qaqama quandara ufa.*

*(Mat 13:31-32; Mak 4:30-32)*

<sup>18</sup> Yisufa faiqi anaasee qimannimino qinau, Anutuna maqasaa ququsaki faiqi anaasee mariasa nana ainaina fooqaa fee maridanoo fee, qinee minara nana kikiqee usunauree. <sup>19</sup> Qinee maaqi qimasee mina kikiqusuanaura. Mifa qumini qaqaama marianoo, faiqi moo fannoo qaqaama mara mareenoo nari ququsaki ummaqusainanoo fraafa saqariara foora kambiqaqafanoo ufiniuga mina asaanasaa ninaamu usakeefaranoo. Anutuna ququsaki keeqafuasa miqidaqa mi saqarina fooqaana auqaanao idooaaidaqa.

*Ooruku anoona ati qeemarina quandara ufa.*

*(Mat 13:33)*

<sup>20</sup> Yisufa kafa qimannimino qinau, qinee Anutuna innaaruna ququsaki keeqafuasa nana ainaina kikiqa usunauree, misa ooruku anoona fooqaasa maridanoo. <sup>21</sup> Anaasee moo fannoo sana qaindi anasee ooruku anoona minaki adiasainanoo aiqamai amiqimasee ati qaanno.

*Innee tiqeera kooqiki keeqaaga.*

*(Mat 7:13-14,21-23)*

<sup>22</sup> Yisufa Yeerusaree maqusai oorufidanoo kaqikaa maqusauqakiaqa Anutuna ufa qimannimino oorufinau. <sup>23</sup> Ooru fimarufanoo faiqi moo fannoo irammirino qinau, Oo uriqararafa faiqi anaasee moodaa kai moodaa kai innaarunai asumu mariranaki keeqeefaree, qufanoo Yisufa qimaminu. <sup>24</sup> Anee tiqeera kooqiki afeekaikamasee amanammasee keeqaa, qinee minara qimannimidaqa iriaqa, faiqi anaasee moomoo amanidaqa sia amana keeqeefaranoo.

<sup>25</sup> Mi maqana akoofa findifinoo kooqi atukarasainaqa misa madaanaidari kooqi aridaqa maaqi qifaranoo, kooqi atuqisainaqa keeqaane qifanoo maaqa akoofa maaqi qimasee qimannimianno. <sup>26</sup> Innee yaindaraasee qinee inniara sia iridaqa qinaqa misa maaqi qifara, anee maasa maqusai Anutuna ufa qimannimimarianafa mariananoo maasa ani faqa narana nammari nee marunasa maridaqa maasara irimarianafa mariananoo. <sup>27</sup> Maaqa akoofa mina iriseenoo kafa qimannimianno, innee yaindaraasee maridee, innee manda oosana maree mariasa mariafanoo innee qini daqa mariaqooqari moosaa fifuaqa. Yisufa mi ufanannai innaaruna kooqi kikiqa usinoo kafa maa ufana miqoo marusa qimanniminu. <sup>28</sup> Qinee inniara maqee mariasara

qidaqa kasooqaaqee innee Abarahaamana faqa Isakeena faqa Yakooboona faqa Anutuna tamummaqara fasiqauqa aigamausa faqa Anutuna innaaruna ququsaki marifaqa innee maqee qini faqa narana nammari nee marinausa aqoosai maridaqa niqafamasee innee firaqoo nifai sandurinaqa ikiraqeeffaranoo. <sup>29</sup> Faiqi anaasee suani oosanaindari faqa amuqundari faqa dinni dinni ataaqeedari faqa aniree Anutuna innaaruna ququsaki ooqu marifi moodaanaki mina qoomaqa sakasee neefaranoo. <sup>30</sup> Mikari maqee maqasaa inaaqianna mariasa mikari misa uriqararawsa marifaranoo, maqee aukwana uriqaraga marinausa mikari ureeqararawsa marifaranoo.

*Yisufa Eeroodeenara kaasau faini fee qinau.*

<sup>31</sup> Mikari Farisai amaana ufa qimarusa Yisufinnai aniree qimamiqa qiqau, anee maaqooqari findimmaqee moosaa fua, karaambaiqa Eeroodeefa ani kuqa ariraree qinoommi. <sup>32</sup> Yisufa iriseenoo qinau. Eeroodeefa faiqi nikaruqimasaida ueeqasaida narimarifa maridanoo innee maaqi qimasee qiniara qimamiqa, qinee maqee faqa duna faqa faiqi anaasee naunduraki faafasaaqa nifaqeeqa aurinausa andeeqannisee ianaura, moona qeeqa saika taikaanara, miqi qimasee Eeroodeena qimamiqa. <sup>33</sup> Maqee fi fi inaga duna faqa fi fi iqa Yeerusaree maqusai ooruraanara Anutuna tamummaqara fasiqauqa aigama Yeerusaree maqusaki kai narusee marufaqa kuqi mariqau, qinee nanaree minakiqari radukaki moosaa kuqunaaree sia amana, qinee faqa Yeerusaree maqusaki kai oonuraanaqa misa narundee kai masee qini faqa darifaranoo.

*Yisufa Yeerusaree maqannaasara qimudaoo qinau.*

*(Mat 23:37-39)*

<sup>34</sup> Oo Yeerusaree, Yeerusaree innee Anutuna tamummaqara fasiqauqa kuqa narusee mifa niqiqoosa oonisamu qumaree narimariasa. Qinee moomoo kari ani faiqi anaasee marasee kookooraanara foora sakarara imarunaqa innee qaoo qiafanoo. <sup>35</sup> Doo qusasaa inni maqusa faqa amaana maqa faqa faiqi anaasee sia marifanoo naakundo mariannoo, qinee kuqaa inni qimannimidaqa innee maaqooqari sia kafaa qini qiqafeefaranoo kasooqaaqee innee qiniara maafa karaambaiqa aqiqaifanoo anidanoo fee Anutufa mina amiqi amiqianinafa qimasaidaqa mikari kai qini qiqafeefaranoo.

## 14

*Yisufa autura arimaru fasiqana sabbatasaa andeeqanau.*

<sup>1</sup> Yuda maqannaasa amaana faasaana moo Saririqa Farisai amaana ufa qimarusa misa uriqararana maaqaki Yisufa mina faqa narana nararee qimasee keeqafufaqa aqoonna Farisai amaana ufa qimarusa Yisuna qumarararee qimasee amiqimasee apuree mariqau. <sup>2</sup> Yisufa mi maqanaki ooqu marifufanoo aurimaru fasiqafa afaaqa autura ari maru fasiqafa Yisuna oorinni marinau. <sup>3</sup> Yisufa mina qafamasee miqoo marusa Farisai amaana ufa qimarusa faqa Mooseena sandufa akoofasauqa miqoo marusa faqa irammirinoo qinau, Qinee inni iraidaga Mooseena sandufa fannoo inni amaanasaa faasaana faiqi aurinausa andeeqaranara eedoo qidanoo fee, qaoo qidanoo fee. <sup>4</sup> Misa mi ufana iriseeqa sia ufa qiqau, kaqi Yisuna kai tataqaaqaa mariqau, miqiqa marufanoo Yisufa mi aurira fasiqana qumareenoo mina aurirana taika amaqaaseenoo aqiqoofanoo mifa fufanoo quandafi miqoo marusa qimanniminu. <sup>5</sup> Yafee moo fannoo innikiqari mina amaaku fee burimakau fee madikaki aqufinoo marinanoo amaanasammifoo qimasee sia fee qumbaqiannoo fee. Sia uqanna amaana irisee minnisee fara kaqi minakinaana qumbaqifaranoo. Doo qinee faqa maa aurira fasiqana madikakinaanara foora amaanasaa qumbaqiara maqi idagaqaa. <sup>6</sup> Misa Yisuna ufa irisee kuqaammifoo qimasee ufa qirara irusia sia ufa qiqau.

*Sia amiqira qoo naaree ooqumaria.*

<sup>7</sup> Mi Farisai amaana qimarufa narana firaqoo suqaseenoo moomoosa naaroofaqa mina maaqaki ani keeqafufaqa amiqiraqoo ooqu mariranara randee marufanoo Yisufa niqafamasee misa aigamausara qinau ufa see qini ufa iriaqa qimaseenoo akooqoo ufa maaqi qimasee qimanniminu. <sup>8</sup> Faiqi moo fannoo amundara qoomaqa suqasee ani aarainana oonu reenana sia aaqee oonuree amiqiraqoo kai ooqu maria. <sup>9</sup> Ani uriqararafa anirainanoo qoomaqa akoofa ani qafeenoo aqiqamasee uriqarara fasiqara miqoo ooqu marianne qinana anee asauriranaki maridana mandaikiraqoo kai ooqu marinnaranoo. <sup>10</sup> Innee sia amiqira qoora randaaga, faiqi moo fannoo inni naarainaga maaqimmiaqa, Innee mina qoomaqa keeqafiqa kaiqeesa ooqumari mariaqoo kai ooqumariaqa, Qoomaqa akoofa anirama ani qafeenoo aniara oo qini qiqoondi mai ururee amiqiraqoo ooqumaria, Miqi qinana anee aigamausa nifusaa uriqararafaikinana asannaranoo. <sup>11</sup> Nariqa kai qinee uriqararausee qimariasa Anutufa nisauriranaki

quqaannoo, nariqa kai qinee ureeqararausee qimariasa Anutufa misa uriqararanaki quqaannoo.

<sup>12</sup> Miqi qimasee Yisufa quandaki mina aaroo fasiqana qimaminoo qinau, anee qoomaqa suqaseenana sia aneenna aqoondiuga faqa akaqaafasaa faqa aneenna ainaina faqa aneenna ainainafaqaa aqoondiuga faqa misauqa sia naaraa. Anee misa naarainaga misa faqa miqi kai iqa ani faqa aaramasee amana kai amifaranoo. <sup>13</sup> Anee qoomaqa suqaseenana kudi fasiqauqa faqa niku nisauku mandaikirausa faqa arirutiga nimariasa faqa nifu dimbarausa faqa misauqa kai naarama quqasainanoo Anutufa mina akiqara inni amiqi amiqi iannoo. <sup>14</sup> Misa sia amana kafaa mina akiqara ani amifaranoo minara kasooqaqee Anutufa amiqira oosana maremaria fasiqa anaaseesa kuqiranakiqari mara findifu maseenoo mikari mina akiqara ani faqa amiannoo.

*Qoomaqa sakararee qimasee mandaikirausa naara.*  
(Mat 22:1-10)

<sup>15</sup> Faiqi moo fannoo mi qoomaqanaki maridanoo Yisuna ufa iriseenoo qimaminau, Anutuna innaaruna ququsaki keeqafi minaki narana nee mariasa firaqoo اساسifaranoo. <sup>16</sup> Yisufa mina ufa iriseenoo kafaa quandara ufa qimaminau, faiqi moo fannoo qoomaqa firaana suqarara deedaqamaseenoo faiqi anaasee moomoosa naaranau. <sup>17</sup> Suqaidanoo nari ainainira faiqi aqiqaenoo anee fiq fiq idana faiqi anaasee qinee naaraunausa nifiqee minisainaga qoomaqa naaqa doo aiqama ainaina deedaqinoo maridanoo. <sup>18</sup> Mina ainainira faiqi fannoo qimanniminoo nufanoo moo fannoo qinau, Qinee maqa doo feefaurumaqaqee idaqa mina qafarara fidaqa sia amana fuanaura. <sup>19</sup> Miqi qufanoo moo fannoo qinau, qinee qisaukuqara (10) purimakau ummaara rarisee marina feefaurumaqaqee idaqa mina amanamasee qafarara fidaqa sia amana fuanaura.

<sup>20</sup> Miqi qufanoo moo fannoo qinau, qinee maqee kai anaasee amunda qimiqaafaqa sia amana fuanaree qufanoo ainainira faiqi fannoo misa ufa iriseenoo nari firaafinnai oonuree qimaminau. Mifa iriseenoo firaqoo aanoommaseenoo qimaminau. <sup>21</sup> Anee dauni dauni sandeenana firaqaa aatata faqa kaqikaa aatata faqa maqusa gambaana faqa oonureenana kudi fasiqa anaasee faqa mataammataakiqa nimariasa faqa nifu dimbarausa faqa arirutiga nimariasa faqa mandaikirausa aiqama nifiqee qini qoomaqai ania qufanoo mina ainainira faiqi fannoo miqimminau. Misa nifiqee mini quqaseenoo nari firaafinnai oonureenoo qimaminau. <sup>22</sup> Doo ani ufamau fiqa nifiqamaree mini quqasaunanoo narana moomoo maridanoo faiqi anaasee sia amanaikidammia qufanoo qoomaqa akooqa qinau. <sup>23</sup> Doo findimmaqee oonuree nianai afuqakiaqa mariasa nifiqamaree qini quqanna amana kai minisainaga naaqanani. <sup>24</sup> Innau, enda naarauna sia aniasa sia uqanna qini narana kaqikaaqoo nifaurusaa quqefaranoo.

*Yisuna ufara kuqiraree qimarusa kai mina faiqi namu kifaranoo.*  
(Mat 10:37-38)

<sup>25</sup> Yisufa moosaa fimarufaqa faiqi anaasee moomoosa mina faqa fidaqa maasa faqa Yisuna faiqi namukiraree qufanoo Yisufa quandafi qimanniminau. <sup>26</sup> Faiqi moo fannoo qini faqa firaree qinna fasiqafa nari anoona akoona faqa faiqi anaasee faqa nari akaqaafasaa faqa asoommaaka faqa nariara faqa fidiqaa maseenoora foomaseenoo qini faqa aniani. <sup>27</sup> Faiqi moo fannoo qini ufasaara sia eedoo qimasee nari aunirira saqari akumareenoora foora sia eedoo qimasee qini ufasaara kuqiranaki finafa sia mifa amana qini faiqi namuki keeqaannoo. <sup>28</sup> Faiqi moo fannoo maaqa usakararee qimaseenoo maaqa usakara ainainauqara naaree amiqimasee irinanoo sia amanaikina sia usakaani. <sup>29</sup> Mifa maaqa atuna faqa faakana faqa kai rakiqasainanoo aiqama ainaina sia amanaikina mina aqoonausa qafamasee naanaidara qimasee maaqi qifoora. <sup>30</sup> Maa fasiqafa maaqa usakarana oosana araseenoo mafi taikarana sia amanaikino. <sup>31-32</sup> Namuqaa karaambaifa moo fannoo nari rakira fasiqauqa moomoosa faqa aniree narinarana iriseenoo maaqoo qaraa karaambaifa fannoo mina moomoo rakira fasiqauqara iriseenoo narindi oodaa marinara irinoo amanaikkee ianauree sia amanaikkee ianauree sia amanaikinaqa narirara imari karaambaifana faqa ooguqumari fi ufa qimasee reendeeniananoo asoorafaa mariyani. <sup>33</sup> Miqi qimaseenoo Yisufa minara qimanniminau, miqi kai masee innee faqa qini faqa firanara amiqimasee iriaraasamaseeqa inneeqa aiqama ainaina minniseeqa qini faqa aniaqa. Sia miqifaqaa sia amana qini faiqi namukifaranoo.

*Innee inneeqa ainaina minniseeqa qini faiqi namukiaqa.*  
(Mat 5:13; Mak 9:50)

<sup>34</sup> Miqi qimaseenoo Yisufa kafaa maa ufana qimanniminau, innee ooruku indee mariana sia adiafaa inaqa naqi fee masee kafaa adiafaairana quqeenaree, sia amanaikin-naranoo. <sup>35</sup> Sia adiafaa inna ooruku andanda atukaki teeqimasainanoo mi andandafa faqa mandaikammianoo. Innee kaqinni aquaqaana. Mandainaina maridanoo. Innee qini faqa fifandinausa sia amiqimasee mi kadaapi oosanna irirainni kaqi firarianara qaoo qidaqa kasaagai kudoosaapee marifanoo maaqa usakaaninafa misa faakana rakiasainafa sia amanaiki foora, innee ooruku adiafaa siaina aanna ree foora kaqinni aqua noora. Innee naaqoofaqaasa mi ufana iriaqa.

## 15

*Manda oosana maree marusa suqusee Yisuna ufa iriqau.*  
(Mat 18:12-14)

<sup>1</sup> Moo kari ummuarira takisa munnimma maree marusa faqa Yuda maqannaasa nikooqee marufaqa nifaqasoosa faqa Yisufunnai anireeqa mina ufa iriraree qimasee mina aaga ani usimariqau. <sup>2</sup> Farisai amaana ufa qimarusa faqa Moosena sandufa akoofasauqa faqa misa niqafamasee noori runusee muquriqa maridaqa naundaufa naundaufa qidaqa qiqau. Maa fasiqafa Yisufa maasa nifaqasoosa aniraafanoo misa faqa amiqi amiqi idanoo, sia miqikai idanoo misa faqa narana naidanoo miqidanoo.

<sup>3</sup> Yisufa misa ufa iriseenoo quandara ufa moo maaqi qimasee qimanniminau. <sup>4</sup> Faiqi moo fannoo moodaannai qisauku fasiqa namu niku nisauku taikasee (100) sipsipa rakisi marinanoo moodaafa kai auia mafinanoo naqi fee iannoo, mi fasiqafa aiqama sipsipa kaqi quqaseenoo moodaara randaannoo. <sup>5-6</sup> Randanoo nini inoo paqurimaseenoo asamaseenoo rafusu akumareenoo mini maqusai quqaseenoo nari aqoonausa naaramasee qimannimiannoo, aniree qini faqa asasiaqee qiannoo. Aiqama sipsipasaa rakisimari fasiqausa miqifaranoo. <sup>7</sup> Innaarunai mariasa mi fasiqana aanna reefaranoo moomoo (99) andeeqara fasiqa anaaseera sia asafifaranoo moodaafa furufaridanoo mandainaina maranoo nini inafa quandaki Anutufinnai ubeekainnana minara firaqoo asafifaranoo. <sup>8</sup> Moo anaasee fannoo qisaukuqara taikasee siruaa munnimma firaana maqee inanoo moodaafa maaqaki furufaramafinanoo mi anaaseefa naqi fee iannoo, mi anaaseefa qooma qumbisee damuna maraseenoo maaqaki aiqamai damunidanoo aiqama atinai amiqimasee randanoo ni ni inanoo paqurimaseenoo maraannoo. <sup>9</sup> Maraseenoo nari aqoonausa faqa aqoondiuga faqa naaramaseenoo qimannimianoo. Innee aniree qini faqa asasiaqa, qini siruaa munnimma furufaramambina doo paquriqa. <sup>10</sup> Qinee qimannimidaqa, Anutuna qangiroomuqa mi anaaseena aanna reefaranoo moodaafa mandainaina maranoo ni ni inafa quandaki Anutufinnai ubeekainafa minara firaqoo asafifaranoo.

*Auianoo nu kumaaraana quandara ufa.*

<sup>11</sup> Yisufa kaqi qimannimidanoo qinau. Faiqi moo fannoo qaara faiqi faqaafa marinau, inaaqiannaafa nari akoona qimaminoo qinau. <sup>12</sup> Oo qipoo kuqiraridancee aneenna aiqama ainaina rainasee maaqanda qiminnaree doo maqee kai rainasee qiminaqa maree fuannee qufanoo mina akoofa eedoo qimaseenoo nari aiqama ainaina rainasee miqanda niminu. <sup>13</sup> Nimisoofanoo indaaruaqafa kaqi maqee inau inaaqiannaafa narindi makeeta maseenoo munnimma kai mara mareenoo doo quqaseenoo niana maqusai oonu reenoo furufariranaki maridanoo nari munnimma aiqama fifaunni aqu taikanau. <sup>14</sup> Agu taikasooofanoo mi aukuanna aandaroo firaafa mi maqa maaqanaki aiqamatina nari marufanoo mi fasiqana munnimma faqa narana faqa sia marufanoo aararee marinau. <sup>15</sup> Mifa mi maqusanakinaa fasiqasaa atooqafufanoo mi fasiqafa mina aqiqeenoo anee qini kuarauqasaa rakisiannee qimasee narana sia amufanoo aararee marufanoo mi kuarasasaa rakisidanoo kuarauqa kunda nimidanoo nariara faqa nararee qimasee irufanoo sia Yuda maqannaasa nee marunee qimasee asauruseenoo minniseenoo aarara marinau.

<sup>16</sup> Miqi marufanoo mi fasiqana irirafa kambiqoofanoo nari kai qimirinoo qinau. <sup>17</sup> Oo qini qikoona ainainira faiqiuqa misa nariqa nimana kai narana neemariafaqa qinee maaqoo daarara maridaqa kuqiraridaqa. <sup>18</sup> Qinee findifi qeeqa qikoofinnai oonureeqa maaqi qimasee qimamianaara oo qipoo qinee Anutuna ufa faqa ani ufa faqa rukiee marunausa maridaqa. <sup>19</sup> Qinee sia amana ani amaakuura foora marianaara, amanee ani ainainira faiqi kammafi marianauree.

<sup>20</sup> Miqi qimaseenoo mi fasiqafa findifinoo aanai aqufufanoo nari akoofinnai finau, aanai meeagoo ani marufanoo mina akoofa maqusasaqari mara meeqa qafamaseenoo amuqusufanoo sandeenoo oonu mara nari amaaku qumareenoo amooqanau.

<sup>21</sup> Miqufanoo mina amaaku fannoo maaqi qimasee narí akoona qimamidanoo reendeen-inau. Qinee Anutuna ufa faqa ani ufa faqa rukiee marunausa maridaqa sia maqee amana ani amaaku marianauro. <sup>22</sup> Mina akoofa quandañi narí ainainira faiqiuqa naaramaseenoo qimanniminoo qinau, sia ainainira fasiqa qamunna ainaina amia, qini qimaaku marianifeera qamunna ainaina kai amia, dauni dauni amiqira qamunna mara mareeqa mini afisuumaqaaqa, rinna faqa asaukuki upeekasee aiku aanaamu faqa afisuumaqaaqa. <sup>23</sup> Miqimaseeqa oonu amiqira burimakau aanaaqi ainoo faqaana arusee deedaqamasee qoomaqa suqaaqa. <sup>24</sup> Qini faiqi maafa kuqi noora foora mafifa kaqi maridanoo anireenoo auiqanoo mariifa anireenoo. Miqi qufaqa qoomaqa sakasee neemariqau.

<sup>25</sup> Miqi marufanoo indaaruuqaa amaaku fannoo suanai mariufa maqusa naambeeqi anireenoo piripunna ufa faqa idi faqa irinoo narí akoona ainainira faiqi moo aaramasee irammirinau. <sup>26</sup> Mina naqi fee qidaqia qufanoo mifa qimaminau. <sup>27</sup> Ani akaqa fannoo narí akoona maaqaki aniraifanoo ani akoofa minara qini faiqi doo andeeqasee ani maridanoo fee qimasee purimakau aanaaqi amiqirana aruseenoo suqasee afaaru ridanoo. <sup>28</sup> Indaaruuqaa amaaku fannoo mi ufana iriseenoo aanoommaseenoo marufaqa aarofanoo ititinau. Ititammaseenoo marufanoo mina akoofa qumureenoo aaranau, aniree maaqaki keeqaa qufanoo mifa qinau. <sup>29</sup> Iria qinee moomoo aukuna karabusara foora ani ainaini marunausa maridaqa sia moodaa kari ani ufa rukiaunau, anee miqi marunana nana ainainee qiminanee sia burimakau aanaaqi amiqira ainaina aruseenana sia fifau mimmi aanaaqi qimianaqa arusee qeeqa qifoondiuga faqa qoomaqa sakasee naunau. <sup>30</sup> Ani manda faiqi fannoo ani aiqama ainaina mara mareenoo munu dapi maraqaana anaaseesaa aqú taikaseenoo, aniraifana anee purimakau aanaaqi amiqirana arusee suqasee amiananoo. <sup>31</sup> Miqi qufanoo mina akoofa qimaminoo qinau, oo qini faiqi anee aiqama kari qini faqa mariananoo aiqama ainaina anindi maridanoo anee aneenna ainainaki ainaini mariananoo. <sup>32</sup> Ani akaqa fannoo kuqi noora foora inoo mariifa kaqi maridanoo auiqanoo mariifa aniraifaqa minara maqee maasa qoomaqa sakasee asasiidaqa naunanoo amanaikinoo. Yisufa miqi qimaseenoo kafa maaqi qimasee qimanniminau. Doo maa ufana anoona faasai qunnana maaqimminoo maridanoo. Innaarunni mariasa ni kumaaraana akoona aanna reefaranoo. Moomoo andeeqara fasiqa aanaaseera sia asasiifaranoo, moodaafa mandainaina maranoo ni ni inoo quandañi Anutufinnai ubeekainnara asasiifaranoo.

## 16

### *Irirana faqaa manda ainainira faiqi mina quandara ufa.*

<sup>1</sup> Yisufa narí faiqi namu qimanniminoo qinau, faiqi moo fannoo ainaina faqaafa narí ainainasaa rakisianinnana moo mareeqee quqasoofaqa misa mi fasiqana ainaina faqaana qimamiqau. <sup>2</sup> Ainainasaa rakisirafa ani munnimma fifau rairaa idanoo fee qufanoo ainaina faqaafa mi fasiqana aareenoo anee munnimma aqi mariannana amiqi masee papiqasaa akara rumasee qiminaqa qafamasee ani aqiqaanauro anee sia kafa ainainasaa rakisinnaranoo. <sup>3</sup> Miqi qufanoo mina ainainasaa rakisirafa marufa narí kai qimirinoo qinau, qini uriqararafa qini diqararara qimarifaqa nana ainainee ianauree qinee afeeka siaisa maridaqa madika indufirana sia amanaikidaqa kudi fasiqa maridaqa qifoonausiannai narana innaaru qiranara qisauridaqa sia amana ni oosanna maraanauro. <sup>4</sup> Doo iridaqa qini qifoondi moomoosaikiqeeera maa saikana taikasee misiannai firara maaqimmianauro. <sup>5</sup> Qinee qeeqa uriqararana faqa bisinisaikida marusara moo deedeepianauree qimaseenoo maaqimminau. <sup>6-7</sup> Mifa moo fasiqa aaramasee irammirinau, anee qini uriqararana ufaasu munnimma naqumme maqee idanee qufanoo mifa qinau, qinee moodaannai qisauku fasiqa niku nisauku taikasee (100) firaa tinna oorifa fadameena (sauna anoona fooqaana) mina akiqara sia amiqiafana, kaqi maqee idaqa, miqi qufanoo ainainasaa rakisirafa qimaminau, anee qaara fasiqa niku nisauku taikasee qini qisauquqara taikasee (50) munnimma kai qiminaqa ani munnimma akiqara taikaseenoo fee qimasee bukaki ateekaanauree qimaseenoo kafa moona aaramasee irammirinoo qinau, anee qini uriqararana ufaasu munnimma naqumme maqee idanee qufanoo mifa qinau, qinee moodaannai qisauku fasiqa niku nisauku taikasee (100) raisa beeka akiqara sia amiqiafana kaqi maqee idaqa, miqi qufanoo ainainasaa rakisirafa qimaminau, anee qaara faqa qaara faqa fasiqa niku nisauku taikasee (80) akiqara kai qiminaqa ani munnimma akiqara taikaseenoo fee qimasee bukaki ateekaanauree qinau, miqunannai mi fasiqafa narí firana akaru qiranannai misa aqoondikinau.



<sup>8</sup> Ainaina faqaafa mina unnaqira oosana qafamaseenoo oo irirana faqaa fee qinau, minara Yisufa qimannimidanoo qinau, maa maqanasaqaraa fasiqa aanaaseeuqa nariqa munnimma ainaina maree mariana irirana faqaasa mariafanoo Anutuna ufa qoomasaa andeeqasee nimariasa irirana oordupirausa sia misa irirana amanasaa maridaqa.

<sup>9</sup> Qinee inni qimannimidaqa, maa maqanasaqaraasa nari afeeka iriranannai kaaqa afeekaikamasee maaqoo mariranara iridaqa munnimma aina afeediqa. Innee faqa misa naanna ramasee kaaqa afeekaikamasee naaru marira afeedira ainainakiara munari minari masee inneeqa maaqooqaraa manda munnimmannai sarau imariasa dadaaqiqa innaarunai asumu mariranaki moomoo ainaina afeediqa. <sup>10</sup> Yafee moo fannoo kaqikaa fifau ainainasaa amiqimasee rakisinafa firaa ainainatiasaa faqa amiqimasee rakisianoo, yafee moo fannoo kaqikaa ainainara unnaqi marifa firaa ainainatiara faqa unna qiannoo. <sup>11</sup> Anee maa maqanasaqaraa munnimma qumiasana furufaramasee rakisinanoo naqi fee masee innaarunai finanoo Anutufa innaarunai mari firaa qumiasana munnimma anisaa quqasee rakisiannee qiannoo fee. <sup>12</sup> Anee moona ainaina furufara masee rakisinanoo yafee anindi amisee rakisiannee qiannoo fee.

<sup>13</sup> Ainainira fasiqa moo fannoo sia amana qaara rakisiraqanda moodaa kari ainainamma nimaqaannoo, sia amana. Mifa indaaruaanara akooqaannoo moo rakisirirana aidiannoo. Mifa moo rakisiranasaa atooqeenoo inaaqianaana minnisannoo, miqi kai iqa innee faqa Anutunara faqa maqasaa qumiasanara faqa moodaanaki sia amana ainainamma nimaqeenrananoo.

*Farisai amaana ufa qimarusa munnimmara runara niqinau.*

*(Mat 11:12-13; 5:31-32; Mak 10:11-12)*

<sup>14</sup> Farisai amaana ufa qimarusa mi ufana iriseeqa misa kaaqa munnimmara rimarusa maridaqa Yisunara uteeti qimariqa. <sup>15</sup> Yisufa iriseenoo qimanniminu, innee inneeqa kai maqasaa fasiqauqa nifusaa andeeqarausee qimariasa mariafanoo, Anutufa inni naunduraki qafee marifa maqasaa fasiqauqa amiqira ainainee qimarianara Anutufa mandainainee qidanoo.

<sup>16</sup> Mooseena sandufa faqa tamummaqara fasiqauqa akarakinaa ufa faqa oosana arooqooqari misa ufa afeeka fannoo aiqamausa rafaqafusee fi fi inoo Yoohaneefa nammari nimimaru aukuanu mini raquramiqoo taikanau. Miqooqari innaaruna ququsakinaana Anutuna amiqira fasaasaa ufa fannoo kai misa qimanniminoo fi-faini marifaqa aiqamausa innaaruna ququsaki nimudaanai qimasaida keegaridaqa. <sup>17</sup> Innaaruna faqa maqa faqa tautumaki taikarafa amana mariannoo, Mooseena sandufa faqa tamummaqara fasiqauqa ufa faqa kaqikaa ati kai sia amana taikaannoo afeeka mariannoo.

<sup>18</sup> Faiqi moo fannoo nari anaqaq minnisee moo anaasee marainafa qummuarimari fasiqafa mariannoo, faiqi moo fannoo minnisainna aanaaseena marainafa mifa faqa qummuarimari fasiqafa mariannoo.

*Ainainafaqaafa faqa ainaina siaifasiqafa faqa miqandara quandara ufa.*

<sup>19</sup> Yisufa Farisai amaana ufa qimarusa oosana kaaqa munnimma qamunna amiqiranara rimarusa marunara iriseenoo maa ufana qimanniminoo qinau, faiqi moo fannoo ainaina fiqararafa maridanoo moomoo munnimma aqimaria qamunnana kai afisimarifa maridanoo, aiqama kari amiqiranaki kai marinau. <sup>20</sup> Kudi fasiqa moo fannoo mina auqu Rasarusana amarafa afaaqa namuana aanaaqi maqee maqee ainaina faqaana kooqiki ani raidanoo mina narana ataraasa tidaamarai aqufuna suqu nararee qimasee ani maridanoo mandainainaki marufanoo fainiuqa anireeqa mina namuana umboomasoofanoo marinoo kuqinau. <sup>21</sup> Mi kudi fasiqafa kuqufufaqa qangiroouqa mina afiqa maree innaarunai Abarahaamana aqa quqasoofanoo firaa qoomaqa sakasee neemarinau.

<sup>22-23</sup> Ainaina faqaq fasiqa faqa kuqufufaqa akundamasoofanoo idaki finau. (Mi idana auqu Aadeesaa ida fee qidaqa, kuqimariasa maqa maaqa taikara aukuanara afeesimaria idafa maridanoo fee qidaqa.) Ainaina faqaafa firaa aupuraranaki maridanoo afu murufi maqaseenoo nianai Abarahaamana faqa Rasarusana amarana faqa amiqiranaki oofaqaqee marufanoo niqafanau. <sup>24</sup> Niqafamasee nammeera qimaseenoo qinau, oo qini qikoofa Abarahaama anee Rasarusana qimaminanoo nari asauku amukannai nammariki raaramasee maree muqu qini qimaakiri qifaurusaa quqasainanoo asooaani qinee idaki firaa aupuraranaki maridaqa.

<sup>25-26</sup> Abarahaamafa iriseenoo qimaminau, oo qini qimaaku anee maqasaa marunna kamuqoo amiqira ainainaki marunanoo Rasarusafa mandainainaki marinau, maqee Rasarusafa maaqoo asahiranaki marinana anee aupuraranaki mariananoo, innisaimbaqa qambaana maani firaafa maridanoo, maaqoo marinausa sia amana minni fi-faranoo mindari faqa sia amana mai anifaranoo. <sup>27-28</sup> Ainaina faqaafa Abarahaamana

ufa iriseenoo qimaminau, qinee fifmasee ani qimamidaqa, amanee anee Rasarusana aqiqainanoo qini qikoona maaqai oorureenoo qini qikaqaafasaauga moodaanai qisauku (5) maridammia, misa aaquqimannimaqainaqa sia maa aupurara maqusanaki aniaqa. <sup>29</sup> Abarahaamafa iriseenoo qimaminau, Mooseena akara faqa tamummaqara fasiqauqa akara faqa ani akaqaafasaauga aaquqima nimiqaidanoo misa minaki kai iriaqa. <sup>30</sup> Ainaina faqaafa mi ufana iriseenoo Abarahaamana qimaminau, oo qini qikoofa Abarahaama, mi akarafa sia amanaikidanoo moo fannoo kuqiranakiqari findifinoo qimanniminaqa misa nariqa manda oosana minnisee sia maa aupurara maqusanaki anifaranoo. <sup>31</sup> Abarahaamafa qinai, ani akaqaafasaauga Mooseena faqa tamummaqara fasiqauqa ufa faqa sia iriqa kuqiranakiqari findi finna fasiqana ufa faqa sia irifaranoo.

## 17

*Faiqi aanaaqi Yisuna ufamau fimarina mareeqee kaqi runna ubeekee mariana mi ufana. (Mat 18:6-7, 21-22; Mak 9:42)*

<sup>1-2</sup> Moo kari Yisufa nari faiqi namu maaqi qimasee qimanniminai. Faiqi anaasee mandoosanaki mara quqannimaqee fandinausa kuqaa uqanna kambiqeefaranoo mi manda oosanna uqeerainna fasiqana arirafa firaqoo uqanna mariifoo qidaqa qimudaoo qidaqa. Ooruku nammariki faiqi rafusu aqirafa firaqoonisanda rumbaseeqa anukaki ususee minaki aqirafa kaqikaa aupurara mariannoo, mi fasiqafa qini ufa irimari kaqikaa faiqina afiqasee manda aana uqafiqainafa mina arirafa firaafa uqanna mariannoo. <sup>3</sup> Minara innee amiqimasee inneeqa mariranasaa rakisiaqa. Ani akaqa fannoo manda oosana marainana anee qaoo qinanoo mifa aundura quandasee andeeqaraqoo finana anee mina manda oosana sia kafaqaa aqia. <sup>4</sup> Mifa dinni taikasee dinni ani qaraqanda (7) kari ani mandaikammamaqasee quandakinoo aniara qini mandainaina minnisaanee qinana eedoo qimasee minnisa.

*Maasa anisaa naundura mundirana afeekaikiaqa.*

<sup>5</sup> Yisufa niqiqoo fasiqausa minara Yisuna qimamiqa qiqau, oo karaambaika maasa daundurannai anisaa mundirana firaanaikamaqisaa qufanoo karaambaika fannoo maaqi qinai. <sup>6</sup> Innee qinisaa mundirana sia maridanoora foora maridanoo kaqikaa ainaina maqana qaama miqirafa kaqikaafa kai marinaqau, innee minannai firaqaa ainaina auqini. Innee firaqaa saqari keefaadiara foora aneenna kai rafauru akinana ooruku nammariki aqifi kambiqaanee qifanoo mifa eedoo qimasee miqini. Innee qinisaa mundirana siara foora maridanoo sia amanaikifaranoo.

*Innee inneeqara maasa ainainira faiqi fee qiaqa.*

<sup>7</sup> Yisufa nari miqoo qaraasa oosana iriseenoo ufa qimannimidanoo qinai, Innikiqari moo fannoo mina ainainira fasiqa fannoo ani afuqai ainainiinoo fee firimaria aandausaa fee rakisiinanoo fee eendimarinanoo anirainana anee sia minara kaqi kaqi aniree aneenna narana naannee qinnaranoo. <sup>8</sup> Maaqi qinnaranoo, anee narana suqarara afisimaria qamunnana afisusee qini narana suqasainqa qinee narana faqa nammari faqa namasaanana anee inaaqianna suqasee aneennara naa. <sup>9</sup> Ani ainainira faiqi fannoo ani ufamau finana anee sia minara dufi dufi qinnaranoo mi fasiqafa faqa dufi dufi qira ufara sia randaannoo nari feefauru saikoo qinnaranoo. <sup>10</sup> Innee faqa miqikai iqa mina aanna raaqa, aiqama qinee Yisusa qimannimunna ufana afaqaaqaa fi fi iqa mafi taikasee sia qini dufi dufi qira ufara randaqa, maaqi qiaqa maasa fifau ainainira fasiqauqa maridaqa feefauru mararara foora ainaini marunaua maridaqa.

*Qisaukuqara taikasee (10) karoora nari marusa ufa.*

<sup>11-13</sup> Yisufa Yeerusaree maqasai firara Kariree maqa maaqa dinni marufanoo Samaria maqa maaqa dinni marufanoo Yisufa qambaana fidanoo moo maqusaki firaree qimasai fimarufanoo karoora narimaru fasiqausa qisaukuqara taikasee (10) karoora nari mariasa naannareeqa naadumasaqa kikiqanmafiqa nammeera qimasee Yisuna qimamiqa qiqau, oo Yisu maasa uriqararafa anee maasara amudaqaani.

<sup>14-16</sup> Yisufa misa niqafamasee qimanniminai, innee amaana maaqaki Anutuna aanaiqiki mariasa inneeqa nifaaqa ooruree uqannifiqai faqa inni nifaaqa aiqummaseseenoo inniara anukarausee qifaranoo, miqi qinaqa innee aiqamausa nifusaa anukaqa maridee qifaranoo. Miqi qufaqa misa eedoo qimasee aana fimarufanoo misa karoora taikafu faqa nariqa nifaaqa qafamaseeqa fufanoo moodaafa quandaki firaqoo Anutunara dufi dufi qimammaree anireenoo Yisuna aikuki maqasaa aqufufanoo Yisunara dufi dufi qimamaqanau, mi fasiqafa Yuda maqanna namuqaa, Samaria maqanna marinau. <sup>17-18</sup> Yisufa mi fasiqana asasirana iriseenoo miqoo marusa qimanniminai. Qisaukuqara fasiqa karoora nari marisa rukanniseeqa, dinni taikasee dinni ani

qaara faqa qaara faqa marasee fasiqauqa yai fee fiaa, sia fee misa faqa aniree Anutunara dufi dufi qifaree sia Yuda maqannaasa ania Samaria maqannaafa kai aniree dufi dufi qidanoo. <sup>19</sup> Miqi qimasee Yisufa mi fasiqana qimaminau, doo findifi fua, anee qini saqarikiannanannai kai amiqiananoo.

*Anutuna ququsa sia akooqoo marina.*

*(Mat 24:23-28, 37-41)*

<sup>20-21</sup> Farisai amaana ufa qimarusa Yisuna iramiriqa qiqau, Anutuna ququsa yairee fee maqasaa kambiqafinoo faiqi aanaaseesaa Anutufa rakisiannoo fee qufanoo Yisufa qimanniminau, Anutuna ququsa fannoo sia akooqoo ainainara foora kambiqaanoo, sia moo fannoo maaqi qiannoo doo qafaa maaqoo kambiqeenoo doo qafaa meeqai kambiqeenoo Anutuna ququsa fannoo inni naundurai mari ainainafa maridanoo.

<sup>22</sup> Miqoo Yisufa nari faiqi namu qimanniminau, kasooqaaqee innee qinee anianna faasaanasaa qafaaqaa idafa sia qafeefaranoo. <sup>23</sup> Akaqausa qini ququsa kambiqaanin-nanara maaqi qifaranoo, meerai qafaa miqoo maridanoo, maaminni qafaa minni maridanoo misa miqi qifaqa siamma oonu qafaaqaa. <sup>24</sup> Qini ququsa sia qumee kambiqaanoo aakuasaa uqinanoo innaaruna aiqama atinai kaaqa gamaquannoo, qinee faiqi nimaaku qumuanna faasaana aakuasaa aanna ramasee qumuanaga tautumaki aiqamai daraaninaga qifaqeeefara. <sup>25</sup> Maqee mariasa firaa aupurarana qimisee diqi qee-faranoo. <sup>26</sup> Qinee faiqi nimaaku qumuanna faasaanafa Nooana aukuanara fooqaafa mariannoo. <sup>27</sup> Mi aukuanna faiqi anaasee idoo faakoo idafa maanaaga amundaidafa narana nammari naidafa mana mana imarufanoo Nooafa nari sipa fraanaki keeqaf-ufanoo nammari fannoo tautumannimaqaseenoo faiqi anaasee aiqama naru taikanau. <sup>28-29</sup> Qinee qumuanna faasaana Rootana aukuanara foora mariannoo, mi aukuanna faiqi anaasee aiqamaasa sia Rootana ufa iriqa narana nammari naidafa makeetidaqa feefauru narami narami idafa maaqa usakeeqa suana ummaqiqa mana mana idafa marufanoo Rootafa Soodooma maqusakiqari findimaqee sandoofanoo innaarunaindari idauru fasafasimarufa qumureenoo aiqama naru taikanau. <sup>30</sup> Qinee faiqi nimaaku qumira faasaana maqasaa fasiqa anaasee mi furufara irirana maree marifaqa tautu-masee qumuanaura.

<sup>31</sup> Mi faasaana akaqausa nariqa kooqi mariinausa sia naamuki keeqafi ainaina indaaifaranoo, miqi kaimmasee akaqausa anaadoonni mariinausa sia maqusai aniree nari ainaina mareefaranoo. <sup>32</sup> Rootana anaaga fannoo asumu marirannai sandanoo fidanoo oonu kasoo mafinoo quandafi aanaaqiannai afu maqaidanoo kuqinai. <sup>33</sup> Yafee moo fannoo nari mariranara amuqusinafa mina marirafa taikaannoo, yafee moo fannoo nari marirana minnisainafa mina marirana maraannoo. <sup>34</sup> Qinee qimannimidaqa, mi eendanaki faiqi qaaraganda moodaanaki faiqaqee marifaqa qinee tautumasee moo innaarunai uqeerasee moo minnisaanaura. <sup>35</sup> Anaasee qaaraganda sana aindi anee marifanoo tautumasee moo mareenoo moo minnisaannoo. [<sup>36</sup> Faiqi qaaraganda anaadooki marifaqa tautumasee moo mareenoo moo minnisaannoo.] <sup>37</sup> Yisuna faiqi namu mina ufa iriseeqa iramiriqa qiqau, yatinaai fee anee qianna ainainafa kambiqaanoo fee qufanoo Yisufa quandara ufa qimanniminau, aandau kuqinoo mariqoo kai ququmu moomoosa minaki usidaqa.

(Qini ufa irimariasa yai yai fee maridaqa sia qiniara randeefaranoo. Qinee qumiqa innee marifandinnaqoo irisee akooqoo tautumasee qumuree inni uqeeranaura.)

## 18

*Anaasee maqee maqee siaasa qimamimaru quandara ufana.*

<sup>1</sup> Yisufa nari faiqi namuara sia nikoo nika masee innaaru qiranara minnisaqee maqee maqee afeekaikamasee innaaru qiaqeeera quandara ufa qimanniminau.

<sup>2</sup> Moo maqusaki siaasa marinau, mifa manda fasiqa maridanoo sia Anutunara aaquqamasee andeeqara siaasa saika maranau, sia faiqi aanaaseera amuqusa imarinau. <sup>3</sup> Mi maqusanaki kai adeedaana anaasee moo marinau, mina afaaqi kuqufufa nariara kadaapiriranaki marinau, mifa maqee maqee siaasinnai oonuraidanoo sandanainai qimarinau, oo siaasa anee dadaaqinana qini mandaikamaqimaqee mariasara qaoo qia. <sup>4</sup> Siaasa fannoo kisaagasaa mi adeedaana anaaseena ufa irinoo fidanoo nari kai qimirinoo qinai, Qinee sia Anutunara rufiqaunasa faiqi aanaaseera sia qimuqusimarisa maridaqa. <sup>5</sup> Maa anaaseefa nari ainaina ummuari mariafanoo nari ainainara qini daruqaqamminoo saina dadaaqiananoo taikaani.

<sup>6</sup> Karaambaiqa Yisufa mi manda fasiqanara nari faiqi namu qimanniminoo qinai, Innee mi manda siaasana ufa irida fee. <sup>7</sup> Anutufa sia miqi marifa, amiqirafa maridanoo mifa nari faiqi anaasee eendaki faasaana misa ikiraqarana iriseenoo sia anuquannoo

qinee qimannimida dauni dauni dadaa qiannoo. <sup>8</sup> Minara sia innaaru qiranara nikoo nika masee minnisaaqa, afeekaikamasee innaaru qiaqa, qinee faiqi nimaaku kafa qumuree qafaanaqa faiqi anaasee Anutuna saqarikidaqa innaaru kaqi fee ida marifaree sia fee ida marifaree.

*Nari amooqimaruna faqa nari reendenimarufa faqa miqandufa.*

<sup>9</sup> Faiqi anaasee akaqausa nariara andeeqarausee qimasaidaqa niqoonasara mandaikiraasee qimasaidaqa fidiqaa imarianara Yisufa niqafamasee maa quandara ufana qimanniminau. <sup>10</sup> Faiqi qaraqanda Yeerusaree niqusai naaçuqara amaana maaqaki innaaru qiraree qimasee keeqaqau, moo fannoo Farisai amaana ufa qimarufa moo fannoo qummuarira takisa munnimma maree marufa miqanda keeqaqau. <sup>11-12</sup> Farisai amaana ufa qimarufa innaaru qiraree qimaseenoo nari kai nari amoo qidanoo qinau, oo Anutuna qinee sia ainainara rimarunausa maridaqa sia unna ufa qinausa sia anaasee qummuarunausa sia aiqamausa naanna raunasa maridaqa. Oo dufi dufi sia maa umuarira takisa munnimmana maree marina aanna raunasa maridaqa, aiqama amaana aundurai qaara faasaana narana minnisee daarara innaaru qimarunausa maridaqa qeeqa munnimma aiqama rainasee dinni qisauku taikasee dinni ani qaara faqa qaara faqa (9) munnimma qeeqara maridaqa moodaa munnimma ani amidaqa, oo Anutu dufi dufi qinee miqi marunausa maridaqa. <sup>13</sup> Ummuarira takisa munnimma maree marufa innaaru qirara firaqoo asauridanoo aadumasaa kikiqamafinoo sia innaarunai oori uqeereenoo kummaramafinoo nari aqaranara aiaaee qidanoo asauku rootee rootee kidanoo nari aqaranara asauruseenoo qinau, oo Anutufa qinee aaqee marunausa maridaqa anee qiniara amuqusia.

<sup>14</sup> Yisufa mi fasiqaqandara nari faiqi namu qimannimino qinau, ummuarira takisa munnimma maree maruna mandainaina Anutufa taika aisoofanoo andeeqasee finau, Farisai amaana ufa qimarufa sia andeeqanau kaqi finau, nariara uriqararausee qimariasa Anutufa asauriranaki quqaannoo, nariara ureeqararausee qimariasa Anutufa uriqararanaikama nimaqaannoo.

*Yisufa faiqi aanaaqiuqa nifaqooqa qinau.*

*(Mat 19:13-15; Mak 10:13-16)*

<sup>15</sup> Faiqi anaasee akaqausa nariqa faiqi namu nifiqamaree Yisufinnai munusaana misa nifaqai nari asauku quqasee nifaqooqa qimannimaqaanifeera nifiqee aiqau. Aniroofaqa Yisuna faiqi namu misa farafara qifoo qimasee niqiqau. <sup>16</sup> Yisufa misa niqira ufa iriseenoo qaoo qimasee faiqi qaindi naaraifaqa mai aniaqee qimasee nari ufa irimariasa qimanniminau, faiqi aanaaqiuqa sia rafaqa fuqa, saifaqa mai aniaqa Anutuna ququsa miqirausaindi maridanoo. <sup>17</sup> Innee maanara kai irisee sia aunuqa yafee moo fannoo sia kaqikaa faiqi naanna ramasee Anutuna ququsa marainafa sia uqanna minaki keeqaannoo, faiqi aanaaqi naanna ramasee Anutuna ququsa marainausa misa kai minaki keeqefaranoo.

*Qumiasana faqaafa naaru mariranara iranau.*

*(Mat 19:16-30; Mak 10:17-31)*

<sup>18-19</sup> Moo kari Yuda maqannaasa uriqararusaqiqari moo fannoo Yisuna irammirino qinau, Oo ufasaa rakisirafa andeeqarafa nana saikkee auqamamaqaananoo fee Anutufa naaru naaru marirana qimiannoo fee qufanoo Yisufa qinau, anee nanaree qiniara andeeqara fee qidane sia moo fannoo andeeqarafa maridanoo Anutufa kai andeeqarafa maridanoo. <sup>20</sup> Anee sandufa akara irimariananoo mimau finana maaqimmi anee sia anaasee ummuaria, anee sia faiqi anaasee kuqannarua anee sia ainaina ummuaria anee sia unna ufa qia aneenna anoona akoonara aidimarinana miqanda nuqu uqeeraidana amiqimasee rakisinnimaqaa qufanoo mi fasiqafa iriseenoo qinau. <sup>21</sup> Qinee mi ufusa kumaaraasaqari aiqama mi ufamau fuafanausa maridaqa. <sup>22</sup> Yisufa iriseenoo qimaminau, moodaa ainaina kai anee sia amanaikiano anee aneenna qumiasana moomoo marina makeetamasee munnimma maraseenana kudi fasiqa aanaasee quqa nimisainanoo ani qumiasana ani afeesara innaarunai mariani, miqimaseenana anee qini faqa ania. <sup>23</sup> Qufanoo mi fasiqafa iriseenoo mina qumiasana moomoo marunara firaqoo oori runusee finau.

<sup>24</sup> Yisufa mina oori runirana qafamaseenoo qimanniminau, qumiasana moomoo faqaasa Anutuna ququsaki keeqarara firaqoo anuqidaqa. <sup>25</sup> Qoosa fannoo ukaamaraki ruqiqaki firafa sia amanaikiannoo, qumiasana moomoo faqaafa innaaruna ququsaki firara miqi kai inoo sia amanaikiannoo. <sup>26-27</sup> Miqoo marusa mi ufana irisee tautumasee Yisuna iramiriqa qiaqa, anee qianandee ainaina faqaasa sia innaarunai fifaqa yafee moo fannoo innaarunai asumu mariranaki amana keeqaannoo fee sia moo fannoo

amanaikinnanoo, qufanoo Yisufa qinau, maqasaa fasiqa anaasee sia amanaikimaria ainaina Anutufa amanaiki marifa maridanoo.

<sup>28</sup> Peetooroofa iriseenoo Yisuna qimaminau, maasa qeeqa maqusaina minnisee ani faqa nidaqa anee maasara naqi fee qidanee. <sup>29-30</sup> Yisufa qimanniminau, qinee maa ufana ani qimamidaqa, moo fannoo nari maaqa fee nari anaqa fee akaqaafasaa fee nari anoona akoonnee nari faiqi namu fee Anutuna ququsa saikaramamaree minnisainafa mifa maqee maria kamuqoo aabaa faqa maraannoo kasooqaqee anianinna aukuaana naaru asumu marirana maraannoo.

*Yisufa nari kuquaninnanara qimanniminau.*  
(Mat 20:17-19; Mak 10:32-34)

<sup>31</sup> Yisufa nari faiqi namu nifiqamaree aadumai oonureenoo qimanniminau, Innee iriaqa innisaimbaqa Yeerusareenni ooru fidaqa, miqoo marianaqa oogai mariu tamum-maqara fasiqauqa faiqi nimaaku qiniara akara rumaqoo ufafa anoonaikinnanoo. <sup>32</sup> Qini maqannaasa qini mareeqee aanaamuru nisaukuki quqaqisaifaqa qiniara ataasa ataasa ufa faqa manda ufa faqa qidaqa niqaara fidi qimaqeeferanoo. <sup>33</sup> Misa qini uaiyaqa samu firaqoo qifaqa ateeqaseeqa munu kuqa darifaranoo, darusaifanoo qaarammoo faasaana aiqarainanoo Anutufa qini mara findifuma qimaqaannoo. <sup>34</sup> Yisuna faiqi namu mi ufana iriseeqa sia minara iriqau. Mi ufana anoona Anutufa kukeeqama nimaqaqaiifaqa sia iriqau.

*Afu qimbarana Yisufa afu maqaisanau.*  
(Mat 20:29-34; Mak 10:46-52)

<sup>35</sup> Yisufa faiqi anaasee moomoosa faqa Yeerikoo maqusaki firaree qimaseenoo aanasaa fimarufanoo naambeeqai aana afainni faiqi moo afu qimbarafa oofuafaqee maridanoo faiqi anaasee fiqaree aiqaree imarufanoo narana mara nefe maru munnimmanara innaaru qimarufa marinau. <sup>36</sup> Mifa faiqi anaasee moomoosa fiqaree marufanoo niku ai iriseenoo iramirinoo qinuu, maana nana ainainee kambiqaaidanoo fee qufaqa misa qiqau. <sup>37</sup> Yisufa Nasareetee maqusaindaraafa doo aiqaraidanoommifoo qufanoo mi fasiqafa iriseenoo faaqa rumasee qinuu. <sup>38</sup> Oo Yisu Dafidina ati marianafa anee qiniara amuqusinana qini dadaaqa. <sup>39</sup> Faiqi anaasee indaaru fusa mina faaqarirana irisee mina aqiqa qiqau, anee ufasaa qufanoo mifa firaqoo fi fi qimasee qinuu, oo Dafidina ati marianafa anee qiniara amuqusinana dadaaqa qufanoo.

<sup>40</sup> Yisufa kasoomafinoo mi fasiqana maree mai aniaqee qufaqa afiqamaree mini Yisuna aqa quqasoofanoo Yisufa iramirinuu, <sup>41</sup> Anee qiniara naqimma aisaanauree qidanee qufanoo mi fasiqafa qinuu. Oo uriqararafa anee qini qifu maqaqisaanneera qidaqa qufanoo <sup>42</sup> Yisufa qimaminuu, doo aneenna afu irirana qinisaa rusiananannoo amiqianano.

<sup>43</sup> Miqi qimarufanoo aqee kai mi fasiqana afu amiqimafufanoo Yisuna faqa fidanoo Anutunara dufi dufi qimammaree finuu. Faiqi anaasee moomoosa Yisuna faqa fiffiisa mina qafamasee misa faqa Anutuna amooqimamaqaqau.

## 19

*Sakiusana ufa.*

<sup>1-2</sup> Yisufa Yeerikoo maqusamau fiqaree marufanoo faiqi moo ummuarira takisa munnimma maree marusa uriqararafa firaa qumiasana faqaafa mina auqu Sakiusafa Yeerikoo maqusaki marinuu. <sup>3-4</sup> Mifa Yisuna qafarara kikiqufanoo sia amanaikinnau, qusa fasiqa maridanoo faiqi anaasee ititafunara sia qafaanauree qimaseenoo faiqi anaasee finnaaqareenoo sandeenoo Yisufa fuaninna aannai oonureenoo saqariki akaramafinoo rakisi marinuu. <sup>5</sup> Yisufa saqari atukaki oonureenoo murufi afu maqaseenoo Sakiusana qafamasee qimaminoo qinuu, Sakiusa dauni dauni qumurainafa maqee ani maaqaki oonuree ani faqa marianauro. <sup>6</sup> Sakiusafa maqai qumureenoo firaqoo asasamaseenoo Yisuna afiqeenoo nari maaqai munusoofanoo marinuu.

<sup>7</sup> Yisufa mina maaqaki marufaqa faiqi anaasee aiqamausa noori runusee ninunuridaqa qiqau, maa fasiqafa manda oosana mareemari fasiqana maaqaki keeqafinoo adooaidanoo. <sup>8</sup> Sakiusafa nari maaqaki maridanoo findifinoo karaambaqa Yisuna qimaminuu Oo uriqararafa qini ufa iria, qinee qeeqa aiqama qumiasana qambaana rainasee dinni kudi fasiqa anaasee nimianauro, qinee faiqi anaasee nikaru qimasee misa munnimma ummuarira takisa maraafannana akiaqara kafa nimisee aabaa qaara faqa qaara faqa kari nimianauro. <sup>9</sup> Yisufa irisee qimaminuu, maqee faasaana naaru naaru asumu marirafa ani maaqaki ani maridanoo anee faqa Abarahaamana ati mariananoo.

<sup>10</sup> Qinee faiqí nimaaku miqíqa auiqáqa nuasara randasee nifiqa quqasee asumu marirana nimiraree qimasee qumu maridaqa.

*Yisufa ainainira munnimma kikiqa usuqoofa.*  
(*Mat 25:14-30*)

<sup>11</sup> Sakiusana maaqáki mariiusa Yisufa Sakiusana qimamu ufana iriseeqa mina faqa Yeerusaree maqusaí ooru fidaqa maaqi qimasee unna qimasee qíqau. Anutuna innaaruna ququsa maqee uqanna maqasaa Yeerusaree maqusaí kambigaañnoo fee qimarufanoo Yisufa misa aqara irirana iriseenoo qimannimínau. <sup>12-13</sup> Faiqí moo fannoo uriqararafa maridanoo niana maqusaí firaa karaambaiqa marinnai oonurañnoo ooru dupira karaambaiqa qafee qimináqa qeeqa ququsakinaasa rakisinnimaqaanee qimaseenoo firiridanoo narí ainainira faiqíuqa qisaukuqara taikasee (10) naaramasee koorá munnimma naadu naadu nimiseenoo qimannimínau, qínee oonu marianna kamuqoo innee maa munnimmanñnai ainaini marifaqa anireeqa maraanaura.

<sup>14-16</sup> Mi fasiqafa fufaqa mina maqannaasa minara fidiqaa imarusa faiqí moo aqíqeeqa anee inaaqiana oonuree firaa karaambaiqa qimamia mifa maasa rakisi qimaqararara maasa qikooqaidanoo, miqí qimasee qimamíseeno oonurandee ani marifanoo mi uriqararafa fasiqafa karaambaiqa qafee mara mareenoo oonurandee anireenoo narí ainainira faiqíuqa munnimma nimusa naaramaseenoo qimannimínau, innee mai anireeqa qini munnimmanñnai saikiaanara qima qimiáqa qufanoo indaarúqafa anireenoo qimamínau. Anee moodaa koorá munnimma qimunaqa qínee minannai ainaina maseeqa qisaukuqara taikasee munnimma mareeqa doo amidaqa maraa. <sup>17</sup> Miqí qufanoo mina uriqararafa qimamínau. Oo amiqirafa anee amiqira ainainimarianafa mariananoo anee kaqíkkaa ainaina amiqimasee rakisiannana akiaqara qínee qisaukuqara taikasee maqusa ani amianana misasaa rakisinnaranoo.

<sup>18-19</sup> Mifa fufanoo mina aanaaqiannaafa anireenoo uriqararana qimamínau, oo uriqararafa anee moodaa munnimma qimunaqa qínee minannai ainainamasee moodaannai qisauku munnimma mareeqa doo aninna amidaqa maraa, qufanoo mina uriqararafa qínau, anee aneenna saika akiaqara moodaannai qisauku maqusaí rakisinnaranoo.

<sup>20</sup> Ainainira faiqí moo fannoo anireenoo uriqararana qimamínau. Oo uriqararafa anee moodaa munnimma qimunnana kaqi maridanoo qínee mina kai aninna amidaqa qínee qamunnasaa sakasee raqandaamma kukeeqaqaunnana aninna amidaqa qínee sia minannai ainainiqa anee afeeka fasiqa marianaqa aniara rufieeqa kaqi quqaqaunnana.

<sup>21</sup> Anee sia aneenna ainaina maree marianafa anee sia ummaqira ainaina aiqimarianafa moosaindi ummuari marianafa. <sup>22-24</sup> Miqí qufanoo mina uriqararafa qimamínau, anee mandainainimarianafa fasiqafa mariananoo, qínee aninna ufasamu aninna aruanaura, anee qiniara afeeka fasiqa fee qimarianausa qínee moosaindi ummuari maruanausa moosa ummaquqaana aiqi maruanausa maridaqa anee miqí qimarianafa nanaree sia qini munnimma mareeqee beenaki quqeeñanee anee miqimasaanaqa qínee aniree qeeqa munnimma faqa mina ati faqa maraunaqini qimasee uriqarara fasiqa fannoo miqoo marusa qimannimínau, innee mina moodaa munnimma mara maree qisaukuqara taikasee munnimma maqeeina munu amiaqa qufaqa misa qíqau. <sup>25</sup> Oo uriqararafa mifa moomoo faqaafa maridanoo qufanoo mifa qínau.

<sup>26</sup> Qínee anoona ufa qimannimiana iriaqa, aiqama ainaina moomoo faqaasa moo faqa ootupama nimifara, ainaina siainindi oodaa maqeeina rafiqeeffaranoo. <sup>27</sup> Maqee qiniara fidiqaa imariasa qiniara sia mifa maasa rakisirafa marianifee qimariasa mareeqee qini qifusaa quqasee kuqa naruqa.

(Maa ufana Yisufa nariara quandasee qimaqoofa maridanoo, narí uriqararara karaambaiqa kasoqaqee marianinnanara mi ufana qínau. Yisufa sia aaqee uqanna Isaraee maqannaasa uriqararafaikiñnoo kasoqaqee innaarunaindari qumureenoo maasa saiki marunnana qafamaseenoo mina akiaqara maasa qimiseenoo quandafi minara fidiqaa imariasa naru taikañnoo.)

*Yisufa doonkísaa Yeerusareenni ooru finau.*  
(*Mat 21:1-11; Mak 11:1-11; Yoh 12:12-19*)

<sup>28</sup> Yisufa mi ufana qimannimiseenoo nariara moomoosa noorinni indaarú Yeerusaree maqusaí ooru finau. <sup>29</sup> Beetapaisa maqusa faqa Beetani maqusa faqa mi maqusa qanda moodaaqoo maruqanda Yeerusaree aqa maríqau, Yisufa ooru fidanoo mi maqusa qanda adeedi ramaseenoo narí faiqí namuqiqari qaaraqanda naaramasee qimannimínau. <sup>30</sup> Inneeqa noorinni mari maqusanaki ooreeqa maqusaí firuqiaki ooreeqa doonki aanaaqi asaandarú quqaqaana, faiqí sia minasaa oogu mariana paqurimasee mina iduku

maree muqu qimiyaqa. <sup>31</sup> Faiqi moo fannoo inniqarara nanaree idukidee qinaqa maaqi qimasee qimamiyaqa, maasa uriqararafa minasaa ainainirara qidanoo.

<sup>32-33</sup> Miqi qufaqa miqanda oorureeqa Yisuna ufamau kai fiqa paqurimasee iduki marufanoo mi doonkina akausa niqafamasee irammiriqa qiqau, inneeqara naqiraree idukidee qufaqa miqanda qiqau. <sup>34</sup> Maasa uriqararafa minasaa ainainirara qifaqa idukidaqa qimasee idukumaree Yisufinnai munuseeqa nariqa qamunna minasaa ufiqisee <sup>35</sup> Yisuna dadaaqufanoo minasaa oogu marifinoo Yeerusaree maqusai ooru finau.

<sup>36</sup> Aatata ooru fimarufaqa faiqi anaasee karaambaiga miqi mandaida afiqee marundeemasee nariqa siuta raipaqusaida aatata ufiqisoofanoo doonki fannoo mi mau ooru finau. <sup>37</sup> Yeerusaree maqusa adeedi ramaseenoo Oorifa aaganai ooru fimariaqooqari Yisuna faiqi namu faqa faiqi anaasee moomoosa faqa Yisufa aiqama ainaina firaa ainaina auqee marufaqa qafeeusa firaqoo kaanina mareeqa Anutuna amooqidaqa minara dufi dufi qidaqa qiqau. <sup>38</sup> Karaambaiga ufara animari uriqararana Anutufa amiqi amiqi iani. Innaarunai asoofarafa mariani. Anutuna amooqirafa faqa mariani.

<sup>39</sup> Farisai amaana ufa qimarusa faiqi aanaaseekiaqa fidaqa faiqi anaasee amooqira ufa iriseeqa Yisuna qimamiya qiqau. Ufasaa rakisirafa aneenna faiqi namuara qaoo qinaqa ufa saaga qufanoo <sup>40</sup> Yisufa qimanniminau, Qinee qaoo qianaqa tamummaqara fasiqauqa akara misa miqifandiafoo qimaqoona misa ufa taikainanoo maa aatata mari oonisaa faiqira foora kaanina mareefaranoo.

*Yisufa Yeerusaree maqusara qimudaoo qinau.*

<sup>41</sup> Yisufa Yeerusaree maqusa adeedi ramaseenoo mi maqusanara faqa faiqi anaasee minaki mariasara faqa ikiraqanau. <sup>42</sup> Misa kuridifandinanara iriseenoo ikiraqeenoo qinau, Oo Yeerusaree anee maqee asoofaranaki marinna oosana iriaqaana, doo maqee anee sia amana qafeennaranoo. <sup>43</sup> Qusasaa ani namuqa anireeqa maara maqaseeqa ani aana kooqi ititaseeqa ani faandaamurasaa saqari kuradamaseeqa minasaa akara mafiqa maqusai aquffaranoo. <sup>44</sup> Misa ani maqusa faqa faiqi anaasee faqa aiqama naru taikaseeqa ooni maqa moomoo marina rapeepaamaseefaranoo, sia moo ooni narisaa narisaa mariannoo. Qinee marunna kamuqoo Anutuna inni asumu marirana nimiraree qifaqa innee sia irirai mana mana imarianara inni narirafa kambigaanoo.

*Yisufa amaana maqaki feefaurimarusa niqiqanau.*

*(Mat 21:12-17; Mak 11:15-19; Yoh 2:13-22)*

<sup>45</sup> Yisufa Yeerusaree maqusaki oorureenoo misa naaquqara amaana maqaki keeqafinoo minaki ummuarira bisinisa auqee marusa rapatutummeeqee quqaseenoo qimanniminau. <sup>46</sup> Anutuna tamummaqara fasiqauqa ooqeenaa akaraki maa maqanara maaqi qimaqoofoa maridanoo. Anutufa qinau maa maqafa qini maaqa maridanoo, qinee minara innaaruqira maaqa mariannoo fee qidaqa. Anutufa miqi qimaqoofoqa qinee mi mau fidaqa maaqi qidaqa, innee mi amaana maqana qumareeqa ummuarimaria fasiqausa kukeeqara maqaikamaqaafanoo maridanoo. Miqi qimaseenoo Yisufa niqiqanau.

<sup>47</sup> Miqooqari Yisufa maqee maqee mi amaana maqanaki faiqi anaasee naamua qinau. <sup>48</sup> Miqi marufaqa mi amaana maqanaki aanaiqikirausa faqa Mooseena sandufa akoofasauqa faqa faiqi firaasauqa faqa Yisuna kuqarira aanara randoofanoo sia amanaikufafa, faiqi anaasee aiqamausa maqee maqee Yisuna ufasaa kai naundura quqaseeqa moodaa ufa sia irianoo qimasee kaaqa irimariqau.

## 20

*Rakisirausa Yisuna iraqau, yafee qifanee maaq inanee.*

*(Mat 21:23-27; Mak 11:27-33)*

<sup>1</sup> Moo kari Yisufa faiqi anaasee mi amaana maqanaki Anutuna amiqira fasaasa ufa faiqi aanaaseeqa qimannimimarufaqa amaana maqasaa aanaiqikirausa misa uriqararasa faqa Mooseena sandufa akoofasauqa faqa suqumaree Yisufinnai aniree iramiriqa qiqau. <sup>2</sup> Anee maa maqanaki bisinisaika imariasa nifaqaannana faqa aiqama oosana oosana ainaina auqimariannana faqa yana ufaree miqidanee yafee miqiannee qinoo fee. <sup>3-5</sup> Yisufa misa ufa iriseenoo qimanniminoo qinau, Qinee faqa innisaa moo ufara irammiriana, Yoohaneefa nammari nimianifeera aqiqarana yaindari fee aninoo fee Anutufinnaindari fee aninoo fee maqasaa fasiqakiqari fee aninoo fee qufaqa misa narinni narinni ufa raineeqa qiqau, maasa Anutufinnaindari fee qifanoo Yisufa maaqi qiannoo innee nanaree sia mina ufa iri fee qiannoo. <sup>6</sup> Maasa Yoohaneenara maqasaa fasiqakiqari fee qianaqa faiqi anaasee Anutuna tamummaqara fasiqa fee qimasee oonisamu maasa kuqa darifoora. <sup>7</sup> Misa miqi qimasee qumee maqandanai qi qiseeqa quandafi akooqoo Yisuna qimamiya qiqau, Yoohaneena aqiqoo fasiqanara maasa sia

iridaqee qiqau. <sup>8</sup> Yisufa iriseenoo mina akiaqara qimanniminau, qinee yana ufasaa maa ainainna auqaidee minara faqa sia inni qimannimianauro.

*Yisufa mandainainira faiqi kikiqammusinau.  
(Mat 21:33-36; Mak 12:1-12)*

(Yisuna aukuaana nari maqannaasa munnimma saika maraaqee qimasee uainna sanda ummaquseeqa mina qaqaama tiqisee anoona tatisaidaqa minasaa munnimma maree mariqau. Mi oosannara maasa sia iridaqa koofi oosana maasa iridaqa. Mina aanna ramaseeqa koofisaa maasa munnimma maraaidaqa. Maa ufana Yisufa uainna kikiqusuqoona mifa maasaki sia marinara maasa minara koofi fee qidaqa.)

<sup>9</sup> Miqoo Yisufa faiqi anaasee quandara ufa moo maaqi qimasee qimanniminau. Faiqi moo fannoo koofi asumu moomoo ummaquseenoo marikufaqa nari maqannaasa akaqausa ufaasu nimisee qimanniminau. Innee qini koofisaa rakisiqisee marifaqa qinee qambaana oosusee inni dinni qeeqaraa dinni maraanauro. Mi ququsana akoofa miqi qimannimiseenoo doo nianai oonureenoo kisaqaqasaa marinau. <sup>10</sup> Koofi qaqaama akuqee maru kamuqoo mi ququsana akoofa nianaindarii ainainira faiqi moo aqiqeenoo qinau, anee oonuree qini koofi qaqaamasaa rakisimariasara qinaqa qiqa oosaqgaraana qimaqafana maree ania mini qimia qimasee aqiqoofanoo oonuroofaqa mi ququsanasaa rakisimarusa mandoosana maraseeqa mi ainainira fasiqana qumareeqa unnaana samu ariisee aqiqoofanoo kaqisamu anirandee finau. <sup>11</sup> Ququsa akoofa mina qafamaseenoo kafa moofa moofa aqiqoofanoo oonuroofaqa ququsaa rakisimarusa miqi kai iqa mina faqa ari iseeqa mandaikammamaqasee asaurirana amiseeqa aqiqoofanoo kaqisamu anirandee finau. <sup>12</sup> Ququsa akoofa mina qafamaseenoo kafa ainainira faiqi moo aqiqoofanoo oonu roofaqa misa mina faqa ariiseeqa rarisama aqiaq. <sup>13</sup> Ququsa akoofa mina qafamasee anunurumaseenoo qinau, qinee naqi fee ianaaree, qinee qeeqa didira qimaaku aqigaananoo oonu rainaqa minara rufisee koofi qaqaama amifaranoo. <sup>14</sup> Miqi qimaseenoo nari amaaku aqiqoofanoo oonu roofaqa misa qafamasee nari qimami nari qimami qiqau, maafa ququsa akoona amaaku maridanoo, doo maree mina kuqa arusaananoo maa ququsafa innisaimbaqaindi mariani.

<sup>15</sup> Miqi qimaseeqa misa mina rafuseeqee aqosai aquseeqa kuqa ariqau, Yisufa mi ufana qimannimiseenoo kafa qimannimino qinau, mina amaaku arusaifanoo mi ququsana akoofa naqa fee iannoo. <sup>16</sup> Mifa sia kaqi mariannoo oonu reenoo mi fasiqausa kuqa naruseenoo amiqira fasiqauqaindi mi ququsana nimiannoo. Faiqi anaasee mi ufana irufanoo naaquqoofaqa qiqau, oo mi mandoosannafa sia kambiqaani.

<sup>17-18</sup> Yisufa iriseenoo misa niqafamaseenoo qinau, tamummaqara fasiqauqaindi ufa akara maaqi qinoo maridanoo, minoosanara randasee qafaqa mi mandoosannara kai qidanoo, mifa maaqi qidanoo. Faandaamura auqi mariaa sabeena moo marasee qafamasee manda sabeena fee qimasee aqusoofanoo Anutufa mi sabeennana quandaki amiqira afeeka faakana fee qimaseenoo uriqarara faakanaikinoo marianifeera rakanau. Mi tamummaqara fasiqafa qiniara miqi qimaqoofaqa qinee minara maaqi qidaqa yafee moo fannoo mi sabeennanasaa turuqaki aqufinafa mi sabeennafa mi fasiqana atekaa teeka masainanoo kuquannoo. Mi sabeena samufa moonasaa aqufinoo kuqa arusainanoo kookoomaikamafuannoo.

*Sisaafa takisa munnimmara innaaru qinana kaqi amia.  
(Mat 22:15-22; Mak 12:13-17)*

<sup>19</sup> Mooseena sandufa irimarusa faqa amaana maqasaa aanaiqikirausa faqa Yisufa maasara mi ufana qidanoo fee qimasee miqoo kai qumaree rumberaree qimasee faiqi anaaseera rufisee kaqi kasoomafiga mina qumararanara rakisi mariqau. <sup>20</sup> Rakisidaqa faiqi akaqausa feefauru nimiseeqa qimannimiqau, innee oonuree amiqira fasiqauqara foora oosana oosana ufara irifaanoo aqara ufa qinaqa maasa ruumbeeqee Roomma maqanna kiapana asaukuki quqaanauro.

<sup>21</sup> Miqi qufaqa mi fasiqausa oonuree Yisuna maaqi qimasee qimamiqau, Oo ufasaa rakisirafa ani ufara iridaqa ani naamuqaira ufa andeeqaaidana qima nimimarianafa mariananoo anee sia faiqi nifaqa niqafamasee oosana oosana ufa qimarianafa, anee Anutuna aanai fimaria ufana anoona kai qimarianafa mariananoo. <sup>22</sup> Anee maa ainainnara qimaqimia maasa maqee maqee takisa munnimma Roomma maqanna uriqararana amidaqa, maasa Mooseena sandufa rukiidaqee miqidee qufanoo, <sup>23</sup> Yisufa misa ueeqaranara iriseenoo qimanniminau. <sup>24</sup> Innee maasa siruaa munnimma moo mara uqaqifiqaaqa qufaqa uqafiqaqau, Yisufa qafamasee qinau, ya fasiqana oori amanee maanasaa maridanoo fee yana auqu fee maanasaa akara rinoo maridanoo fee qufaqa misa qiqau. <sup>25</sup> Roomma maqanna uriqararanaindi fee qufanoo Yisufa qinau, faiqi moo fannoo sia moona ainainasaa nari auqu akara ridanoo ainaina faqaafa nari ainainasaa



narí auqu kai quqaidanoo maa munnimmana Roomma maqannaa karaambaiqaindi maridanoo mina amana faqa mina auqu faqa maanasaa maridanoo doo mifa qimianne qinaqa innee naríndi narí kai amiaqa kaifaa Anutunaindi faqa narí kai amiaqa. <sup>26</sup> Misa mina ufa irufanoo naaquqoofaqa kaqi kasoomafiqau, sia miqoo faiqi nifusaa ufanna kai ueeqasee qumarararee qiqau.

*Yisufa kuqiranakiqari findifinausara qangiroora maqi marifara.*  
(Mat 22:23-33; Mak 12:18-27)

<sup>27</sup> Sadikai amaana ufa qimarusa faiqi kuqiranakiqari sia findiffaranoo fee qimarusa mariqau. Miqiqa marunara misakiqari akaqausa Yisufinnai anireeqa ueeqararee qimasee iramiriqa qiqau. <sup>28</sup> Oo ufasaa rakisirafa Mooseena sandufa fannoo maaqi qimasee maasa qimaqimidanoo. Faiqi moo fannoo sia faiqi maqarai kuqifanoo mina akaqa fannoo mina anaqa maraseenoo faiqi maqasainanoo indaaruuqaa fasiqa qumiasana maraannoo. <sup>29-30</sup> Mooseefa miqi qimaqoofaqa minara maasa ani iraidaqa. Moodaa fasiqa faiqi namu dinni qisauku taikasee dinni oonu qaaraqanda (7) mariqau, indaaruuqaafa anaasee marasee sia faiqi maqarai kuqufufanoo mina aanaaqiannaafa mi anaaseena maraseenoo doo mifa faqa sia faiqi maqarai kuqinau. <sup>31</sup> Mina aanaaqiannaafa miqikaimasee mi anaaseena maraseenoo kuqinau. <sup>32</sup> Miqooqari mi oosanausa aiqamausa mi anaaseenasaa sia faiqi maqarai kuqutaikaqau, inaaqiannaafa uqanna mi anaaseena faqa kuqinau. <sup>33</sup> Oo Yisu faiqi anaasee kuqiranakiqari findiffandinna faasaana mi anaaseefa ya fasiqana anaqa fee mariannoo fee, mi oosanausa aiqama mi anaaseena kai maraqa.

<sup>34</sup> Yisufa iriseenoo qimanniminu, maqee mariaqoo maa aukuanu kai faiqi anaasee narí maree narí maree idaqa. <sup>35</sup> Anutufa faiqi anaasee qini faqa innaarunai amanaiki mariasee qimariasa kuqiranakiqari mara findifu mannimaqasee innarunai quqasaifaqa sia kuqifaranoo naaru marifandinnausa marinara sia narí maree narí maree ifaranoo. <sup>36</sup> Misa faiqi nifaaqa faqa anaasee nifaaqa faqa taikaseenoo qangiroora fooqaasa indaaqirausa maridaqa kuqiranakiqari findifi mariasa marianara Anutuna amaakuqmara maridaqa. <sup>37</sup> Mooseefa faqa akooqoo faiqi anaasee kuqiranakiqari findifi mariranara qimanniminu, ooqai Mooseefa kaasau maqa maaqaki marufanoo sasamimiki ida qee marufanoo Mooseefa oonu qafamasoofanoo Anutufa minakiqari ooqai kuqusara Mooseena qimaminu, Qinee Abarahaamana faqa Isakeena faqa Yakooboona faqa misa Anutusa maridaqee qufanoo Mooseefa mi ufana iriseenoo kasooqagee akara rinau. <sup>38</sup> Anutufa sia kaaqa kuqi mariasa nikoofau maridanoofau Anutufa kuqi mariasa faqa kuqiranakiqari findifi mina faqa mariasa nikoofa maridanoo. Anutufa kuqufusara faqa kaqi mariasara faqa kaqi mariaafoo qidanoo. Minara Anutufa Abarahaamana faqa Isakeena faqa Yakooboona faqa nikoo fee qidanoo minamusa ooqai kuqusa kuqiranakiqari findifi qini faqa mariaafoo qimasee mi ufana qinau. Qinee Yisusa minara inni qimannimidaqa, kuqiranakiqari sia sia findifidammia, findifidaqa. <sup>39</sup> Mooseena sandufa akoofasauqa akaqausa mi ufana iriseeqa Yisuna amooqiqa qiqau, Oo ufasaa rakisirafa amiqira ufa qiananoo. <sup>40</sup> Misa kafaa miqooqari Yisuna irammiriranara rufisee kaqi kasooiqau.

*Naqimasee Dafidifa narí atiara qini karaambaiqee qiannoo.*  
(Mat 22:41-46; Mak 12:35-37)

<sup>41</sup> Kasoomafufanoo Yisufa misasaa ufa moora iramirinoo qinau. Tamummaqara fasiqauqa akara fannoo Anutuna asauku mundiranara kasooqagee kambiqaqafinoo Dafidina atikiqari kambiqaqannoo fee qidanoo mifa naqi fee masee andeeqaannoo fee. <sup>42</sup> Dafidifa narí idi papiqaki minara maaqi qimasee akara rinau.

Karaambaqa Anutufa qini karaambaqa maaqi qimasee qimaminu. Anee aniree qini daaqa qini qisauku uqannai ooqumaria.

<sup>43</sup> Maaqoo marinaqa qinee ani namuqaa mareeqee ani aramandunnai quqasaanana anee misasaa rakisia.

<sup>44</sup> Dafidifa mi idi papiqanaki Anutuna asauku mundiranara qini karaambaiqee qidanoo minara iriseeqa iraidaqa, Anutuna asauku mundirafa naqi fee masee Dafidina karaambaqa faqa mina ati faqa aiqamaqara moodaa kari noo mariannoo fee.

*Yisufa Mooseena sanda akoofasuqara qaaraiki mariasee qinau.*  
(Mat 23:1-36; Mak 12:38-40)

<sup>45</sup> Yisufa mi ufana qimannimarufafa faiqi anaasee moomoo iri marufanoo Yisufa misa nifusaa quandafinoo narí faiqi namu qimanniminu, <sup>46</sup> Innee Mooseena sandufa akoofasuqara rakisi marifaqa anirifaqa misa oosana afaridaqa eerairiqa misa

gamunna amiqirana kisaaga afisusee faiqi nifumau nasuridaqa aatata fee faiqi suqiranaki fee faiqi anaasee misa reendeenamasee nimandaranara rimariasa maridaqa, misa amaana maqaki fee qoomaqaanduqiranaki fee faiqi anaasee noorisaa kai ooqu marifi nari nifaaga mara maree urimariasa maridaqa. <sup>47</sup> Misa faiqi anaasee nifusaa kisaagasaa innaaru qidaqa maqandanai adeedaana anaasee saqama fee maqa fee maaqa fee ummuari mariasa mariafanoo mina akiaqara narirafa figaramasee mariannoo.

## 21

*Adeedaana anaasee ataaqana munnimma aqinau.*

*(Mak 12:41-44)*

<sup>1-3</sup> Yisufa Yeerusaree firaa amaana maqaki maridanoo nindafoofaqa faiqi anaasee Anutuna ataaka munnimma quqee mariqau. Ainaina moomoo faqaasa firaa munnimma aqimarufanoo qafee marufanoo misakiqari adeedaana anaasee moo fannoo ainaina siaifa kudi uqanna marufa anireenoo idaqarana ataaqana munnimma qaaraqanda kaqikaana agusoofanoo Yisufa qafamaseenoo nari faiqi namu qimanniminoo qinau, Oo innee qafaaga, maa kudi adeedaana anaaseefa aiqamausa urinnaqara maseenoo mi anaaseefa aqinooi. <sup>4</sup> Ainaina faqaasa nari munnimma moomoo marunakinaana qumaree aqiga, maa adeedaana anaaseefa kaaqa kudi uqanna marifa nari narana feaurira munnimma aiqama uqanna moodaa marina doo aqinoo miqinara qinee urinnaqaramasee aqinoommifoo qidaqa.

*Yeerusaree maqusa furufarianinnanara Yisufa qinau.*

*(Mat 24:1-2; Mak 13:1-2)*

<sup>5</sup> Yisufa nari faiqi namu faqa Yeerusaree firaa amaana maaqaki nimarufaqa misa aiqama ainaina firaa ainaina Anutuna amimaru ainainausa faqa amiqira ooninnai usakaqoona minauqa qafaqa nidaqa nari qimami nari qimami qimariqau. <sup>6</sup> Miqi qimarufanoo Yisufa qimanniminoo qinau, Innee maa amiqira ainainausa qafaidee, moo aukuaana anirainanoo moomoosa anireeqa maa oonisa aaku aaku irana aiqama rapeemeeqee maqasaa kai aqifaranoo sia moo ooni moonasaa aakinoo maqee marindee inoo mariannoo, aiqama maqasaa kaimmaqufuanoo.

*Taikaaninna aukuanara Yisufa qimanniminau.*

*(Mat 24:3-14; Mak 13:3-13)*

<sup>7-9</sup> Miqi qufaqa Yisuna faiqi namu irammiriqa qiqau, Oo ufasaa rakisirafa yairee fee mi ainainafa kambigaannoo fee, nana ainainee mi aukuaana kooroo ira ainaina qafamasee fee oo mi ainainna kambigaannoo fee qianauree.

Miqi qufanoo Yisufa qimanniminoo qinau. Innee amiqimandee aiquciqaqa, moo fannoo nikaru qiandoo qimasee minasaa rakisiaqa. Moomoosa anireeqa qinee asaku mundirausa Yisusee qifaranoo, akaqausa doo Anutuna aukuaana ani mariifoo qifaranoo. Innee mina irisee sia mi mau fuaqa. Innee firaa rakiranara faqa maqusa maqa maaqa furufarirana faqa qafamasee sia minara rufiaaga sia minara iriaqa sia doo maqa taikarafa anireefoo qiaqa, miqira ainaina mi oosana oosanafa naaree kambigaaninnanara siamma rufiaaga. <sup>10-11</sup> Moo maqannaasa findifi moo maqanna faqa rakifaranoo, moo karaambaiqa findifi moo karaambaiqa faqa rakuannoo maqa kasirafa firafa moomoo naaquqara kambigaannoo aandaroo aurirana oosana oosana maqa afaagasasa kambigaannoo naaquqara ainaina faqa maqa taikaaninna ainaina kudifaanara maqi asurukiqari kooroo iannoo.

<sup>12-13</sup> Misa inni naaree qini ufasaara ruumbeeqee apuraranaki quqefaranoo. Misa qini ufasaara inni mareeqee firaa uriqararasa nifusaa faqa kaqikaa uriqararasa nifusaa faqa quqasaifaqa mikari inni ufa qimannimimari aukuaana mariannoo. <sup>14</sup> Misa miqifaqa innee maqi qiaqa oo maqee misa faqa amiqira fasaasa ufa Yisunara qimannimianauree qiaqa. Misa inni mara maree uriqararasa nifusaa quqasaifaqa sia innee minara oonumafi irisee firaqoo naqi fee qianau naqi fee qianau qiaqa. <sup>15</sup> Mikari qinee qeeqa kai qumee dadaqianaqa innee irirana faqaasa ufara foora qimannimifaqa inni namuqaakiqari moo fannoo sia amana inni ufa rukiasee qaoo qifara. <sup>16</sup> Mi aukuaana qini ufasaara inniqa ninausa nikausee inniqa nikaqafasaa fee inni ati fee inni niqooni fee misa inni uneemaana qimasee mareeqee kuqiranaki quqannimaqefaranoo. <sup>17-18</sup> Qiniara aiqamausa inni fidiqaa mannimaqefaranoo. Miqi marifaqa minaki fimarifanoo inni nikaqa asausi sia moodaa fannoo kakasiannoo Anutufa inni nifaagasaa faqa rakisianoo. <sup>19</sup> Innee mi mandainainaki maridaqa sia aquraranara rufiasee qini duqu minnisaaqa, kaqi finnanannai kai inni marirana afeedifaranoo.

*Rakira fasiqauqa Yeerusaree maqusa fuseemasaiifaqa aaqana aaqana akareefara.*

*(Mat 24:15-21; Mak 13:14-19)*

<sup>20-21</sup> Innee moo maqanna rakira fasiqauqa moomoosa anireeqa Yeerusaree maqusa puseemaffaqa innee irirana maaqi qiaqa oo maqee Yeerusaree maqusa taikarafa anireenoo fee qimasee Yudeeaa maqa maaqaki mariasa aqaanaaqana akareeqa sandeefaranoo, maqusai marinausa qafeeqa quqasee sandeefaranoo, ainainai finausa sia kafa maqusai anifaranoo, doo mindari kai sandeefaranoo. <sup>22</sup> Anutuna ooqeenaa tamummaqara fasiqauqa ufa anoona kambiqaanifeera Anutufa narimari aukuaana kambiqanoo maridanoo fee qiaqa. <sup>23</sup> Mi aukuaana nimuaqu uqafaqaa anaaseeuqa naaquqaranaki mandainainaki marifaranoo, sandaranara anuqifaranoo faiqi aanaaqifaqaa anaaseeuqa miqikaimasee naaquqaranaki kadaapiriranaki marifaranoo. Anutuna aranaqarafa maa maqa maaqanaki marianara naaquqarafa aupurarafa fraaqoo mariannoo. <sup>24</sup> Moo maqannaasa sundiauqa anireeqa maa maqannaasa aseemannai naruseeqa akaqausa ruumbeeqee aiqama maqa maaqai quqasaifaqa daraanimambifaqa Anutunara sia irimariasa aniree Yeerusaree maqusa maqee maqee nikunoo radamuseefaranoo Anutufa qumee eedoo qira aukuaana kai miqifaranoo Anutufa taikaannee qinaqa doo miqoo taikeefaranoo.

*Yisufa nari qumuaninmanara oosana kooroo inau.*

*(Mat 24:29-31; Mak 13:24-27)*

<sup>25-26</sup> Mi aukuaana suanafusaa faqa quqoona fasau nifusaa faqa maqa taikara ainaina kudifaanna kooroo irafa kooroomma nimaqasaanaqa qafeefaranoo. Mi aukuaana maqasaa fasiqa anaasee aiqama maqannaasa ooruku nammari ufa qiranara faqa firaa nammari amakauriranara faqa irisee rufiaseeqa maa maqa maqana afaaqasasa kambiqaaninna aupuraranara faqa afeesidaqa rufiaqa ruflaqa idaga kuquuaqaa imarina marifara. Quqoona fasau mariqoo ooga mari marirafa furufaramambinoo moo kamaakinaqa mina qafaifanoo maqasaa kambiqaaninna mandainainara afeesidaqa rufiaqa rufiaqa idaga nari nimuqusa kuqifaqa kuqifaranoo. <sup>27-28</sup> Mi ainainausa oosana arasee kooroomambinaqa innee findifiqa ninuka uqeerasee qafaqaa inni innaarunai asumu marirafa adeedi ramafuannoo. Mikari qinee faiqi nimaaku innaarunaindari asuruki firaa afeeka faqa firaa areenarana faqa kooroomambi qumuanaura.

*Yisufa nari qumuaninmanara faafisa kikiqa usinau.*

*(Mat 24:32-35; Mak 13:28-31)*

<sup>29-30</sup> Yisufa mi ufana qimaseenoo maa quandara ufana qimannimainau, innee faafisa faqa aiqama saqari faqa ammunni faqa qafeeqa oo doo aukuanai aniree maqi qimari-afanoo. <sup>31</sup> Innee miqikai iqa maa qimannimuna ainainafa kooroo mambinaqa maaqi qiaqa, oo Anutuna innaaruna ququsa adeedi ramafiifoo qiaqa. <sup>32-33</sup> Doo innee maa ufana faqa iriaqa maaqoo mariasa kaqi marifanoo mi aiqama ainainausa kambiqeefaranoo. Maqa faqa innaaruna faqa doo aiqama taikafuannoo qiqa dookinaa ufa sia taikaannoo kaqi mariannoo.

*Yisufa nari qumuaninmanara indee indeeida mariaqee qinau.*

<sup>34</sup> Innee minara irisee inneeqa mariranara rakisiqaa. Inni aaquqimannimaqidaqa. Sia maqee maqee qoomaqamasaida naidaqa sia nammari namasee furufariaqa sia maaqoo maria ummaarana faqa minara kai mammaree fimarifaqa qinee innaarunaindari qumira aukuaana tautuma nimaqaanafaara. <sup>35</sup> Mi faasaanna maa maqa maqana afaaqasasa maria fasiqa anaaseesa tautuma nimaqaanaqa ufaanara foora naruanaranoo. <sup>36</sup> Innee maqee maqee aifarida maridaqa innaaru qimasaida mariaqa. Innee inneeqa afeeka afeekaikamasee qimannimunna mandainainausaki afeekaikamandee fiqaree qini faiqi nimaaku qifusaa amiqimandee kikiqiaqera innaaru qiaqera qidaqa. <sup>37</sup> Mi fasannai Yisufa faasaambaasaana firaa amaana maqaki faiqi anaasee minaki qimannimiiseenoo eenoofanoo rafudamakufanoo Oorifa aqaanasaa akara mafufanoo miqoo faiqanau. <sup>38</sup> Aiqaana kananaana faiqi anaasee aiqama suqumaree firaa amaana maqaki Yisuna ufa irianee qimasaida keeqee mariqau.

## 22

*Yudasifa Yisuna ueeqaaninna munnimmana maranau.*

*(Mat 26:1-5; Mak 14:1-2; Yoh 11:45-53)*

<sup>1</sup> Yisufa miqi marufanoo qoomaqa Yuda maqannaasa firaa qoomaqa ainnaaqarara qoomaqa adeedi ranau. Mi qoomaqana auqu moo sia ooruku qai feemuna qoomaqa nee imariqau. (Mi qoomaqanaki moomoo fasiqa anaasee aukuaana aukuaana suqumareeqa Yeerusareenni mi qoomaqana suqa nee mariqau.) <sup>2</sup> Amaana maqasaa aanaiqikirausa

misa uriqararaura faqa Mooseena sandufa akoofasauqa faqa Yisuna kuqa ariranara qumee randee marufafa faiqi anaasee Yisunara amiqira fasiqee qufaqa minara rufieeqa sia ariqau.

*Yudasifa munnimmaru qufiqamareenoo Yisuna ueeqararee qinau.*  
(Mat 26:14-16; Mak 14:10-11)

<sup>3-5</sup> Misa miqida randee marufanoo Yudasifa Keerioota maqusaindaraafa Yisuna faiqi namukina qisaukuqara taikasee qikunni oogu qaara marasee misaki marufa, mina aunduraki kai Sadannafa keeqafufanoo qumee oonureenoo amaana maqasaa aanaiqiki-rausa uriqararaura faqa amaana maqasaa rakisiraura faqa qumee suqinau. Yisuna ueeqa nimianinnanara moodaanaki ufa qimannimimarufafa uneemaana munnimma amifandinanara qimamiqau. <sup>6</sup> Yudasifa eedoo qimaseenoo miqooqari faiqi anaasee nifusaa qumee ramaseenoo kukeeqaseenoo Yisuna misa nisaukuki quqararee qimasee ueeqarara randanau.

*Ainnaaqarara qoomaqa deedaqiau.*  
(Mat 26:17-25; Mak 14:12-21; Yoh 13:21-30)

<sup>7-8</sup> Sia ooruku qai feemuna neemaru faasaana ainnaaqarara qoomaqa sipsipa aanaaqi aru faasaanasaa Yisufa Peetoorona faqa Yoohaneena faqa niqiqamasee qimannimino qinau. Inneeqara Yeerusaree maqusai ooruree maasara faqa ainnaaqarara qoomaqa deedaqifaqa ooru naanau. <sup>9-12</sup> Miqi qufaqa miqanda qiqau yai fee ya maqanaki fee maqanda deedaqianauree qufanoo Yisufa qinau, doo amiqimasee iriaqa, inneeqara Yeerusaree maqusaki ooruree fidaqa qafaiqanoo faiqi moo fannoo nammari qafee maree keeqainnanaki keeqafi mi maqana akoonu maaqi qimasee qimamia ufasaa rakisirafa aniara maaqi qinoo, moo rumma qinee faqa qini faiqinamu faqa ainnaaqarara qoomaqa naanna rummafa yai fee maridanoo fee qifanoo qinamma iriaqa. Miqi qimasee qimamifanoo mina sandaaqai moo rummaki uqannifiqainaqa minaki deedaqamasifaqa innisaimbaqa fafaa eendaki minaki naanau. <sup>13</sup> Miqanda iriseeqa Yeerusaree maqusai oorureeqa Yisufa qimaqoondee kai mi fasiqana faqa maaqa akoonu faqa nindafamaseeqa Yisufa qundee kai maseeqa aiqama ainaina deedaqamaqaafanoo.

*Yisufa aafaqa oosana aranau.*  
(Mat 26:26-30; Mak 14:22-26; 1Kor 11:23-25)

<sup>14</sup> Doo eendufafa Yisufa nari faiqi namu faqa keeqafufafa qainda firaana fiqumma oogu marifiqau. (Nari oosana marasee aiqamausa qainda fiqumma fufaqa nisaataa saunu areefufafa ainnaaqarara aafaqa naqau.) <sup>15</sup> Misa miqi mambufanoo Yisufa nari faiqi namu maaqi qimasee qimanniminu. Maa ainnaaqarara qoomaqa inni faqa narara firaqoo dididanoo aupurarana oorisa maridaqa. <sup>16</sup> Qinee sia maqee inni faqa kafa naanau, Anutuna innaaruna ququsa kambiqafinaqa maa ainnaaqarara qoomaqa anoona oosana uqanna kambiqafinaqa miqoo kafa naanau.

<sup>17-18</sup> Miqi qimaseenoo Yisufa fira kaafa maraseenoo nariq maqee maqee neemaru uainna nammariina umbiqarana nari faiqi namu nimino qinau, Maana maraseeqa namataikaqa qinee anoona ufa qimannimidafa, qinee sia kafa maqee inni faqa naanau, Anutuna ququsa kambiqafinaqa mikari miqoo innaarunai naanau.

<sup>19</sup> Miqi qimaseenoo feemu moo maraseenoo Anutunara dufi dufi qimaseenoo ruqi ruqi maseenoo nari faiqi namu nimino qinau. Maa feemufa qini qifaqa kikiqasira feemufa maridanoo kuqiranaki inniara quqannimaqaanau. Innee maqee maqee naidaqa qiniara naaqoo iridaqa naqa. <sup>20</sup> Namasoofanoo Yisufa miqi kai inoo uainna adiaru nafisa maraseenoo nari faiqi namu nimiseenoo qinau. Maa nafisanakinaa nammari qini fidika maridanoo. Anutufa inniara noori runiranaki marunara nari fuka moodaanaki kira ufa quqaidanoo, qini fidika inni adiannimaqaranaki maridanoo.

<sup>21</sup> Yisufa kafa qimannimino qinau innee doo gafaqa maa qaindana fiqumma fiqumma iranaki inniki qiniara ueeqe marifa maridanoo. <sup>22</sup> Anutufa ooga qumau kai qinee faiqi nimaaku kuqanaura, qini ueeqemari fasiqafa fira numoo minasaa aqufuanoo. <sup>23</sup> Yisufa miqi qimasooafaqa mina faiqi namu nari iree nari iree qiqau yafee miqiannoo yafee miqiannoo, qiqau.

*Yisuna faiqi namuqiari yafee maasa uriqararafa mariannoo fee qiqau.*

<sup>24-25</sup> Miqidaqa maaqi qiqau, yafee maasaki uriqararafa mariannoo fee mi ufana qidaqa raiqara ufa qiqau, miqi qimarufanoo Yisufa qimannimino qinau, maa maqasasaqarara karaambaqauqa nari maqannaasa urinaaqara maseenoo fifau nariara faiqi anaasee dadaaqi marunausee qidanoo. <sup>26</sup> Innee, qini faiqi namuki sia mi oosana mariannoo, inniki uriqararafa innaaqianaafara foora mariannoo, inniqa karaambaqau fannoo inni ainainira faiqiara foora mariannoo. <sup>27</sup> Yafee uriqaranoo maridanoo fee, qoomaqaqi

ooqumarifi neemari fasiqa fee, narana rakiqasee nimimari fasiqa fee uriqaranoo maridanoo fee. Narana rakiqasee nimimarifa mifa kai uriqarara fasiqa maridanoo, doo qinee narana nammari rakiqasee nimimarunausa maridaqa sia inni rafaqaqafu nimaqasee uriqararausai kidaqa inni ainainira faiqiara maqi maridaqa inni dadaaqidaqa. Doo innee qini daanna raaga.

<sup>28</sup> Innee qini faiqi namu qini moomoo ummaara kadaapirana dadaaqi mariasa mariafanoo. <sup>29</sup> Doo mina akiaqara qini qikoofa qiniara uriqarara karaambaiqee qimarindee kai iqa qinee faqa inniara qinee qeeqa karaambaiqa ququsaki keeqafinaqa narana faqa nammari faqa inniara qini saimbaqa neefandiafoo qidaqa. <sup>30</sup> Miqoo innee qini faiqi namu Isaraee maqanna ufa irira qaindasaa ooqu marifi qisaukuqara taikasee qikunni ooqu qaara marasee Yakooboona faiqi namu atikiqari kambiqaarasa Isaraee maqannaasa misasaa innee andeeqefaranoo.

*Peetooroofa Yisunara qaoo qianinnanara kooroo inau.*

*(Mat 26:31-35; Mak 14:27-31; Yoh 13:36-38)*

<sup>31</sup> Miqi qimaseenoo Yisufa Simoona moo auqa Peetooroona qimaminoo qinau. Simoona anee qini ufa iria, Sadannafa aniara sandanainai qidanoo ani mareeqeenoo nari manda ququsaki quqararee qidanoo ani rarisamasee amanamasee qafaidanoo. <sup>32</sup> Oo Simoona qinee aniara innaaru qimaseeqa anee qini saqarikirafa sia taikaani. Anee kaqirunna oonureenana oonu quandakinana aneenna akaqaafasaaqu pooduamannisaa, qufanoo Peetooroofa qinau. <sup>33-34</sup> Oo karaambaiqa anee rumberanaki fee kuqiranaki fee finaqa qinee faqa minaki fuanaree qufanoo Yisufa qimaminoo qinau Oo Peetooroo qinee anoonufa ani qimamidaqa fafaa eendamuqusai anee qaaramoo kari qiniara asaurusee sia qiniara Yisusara iridee qinanoo doo miqoo kai kookooraana ufa qiannoo.

*Misa rakira paipana mara maree Oorifa aaqanasaa ooru fiqau.*

<sup>35-36</sup> Yisufa miqi qimaseenoo quandaufanoo aiqama qimanniminoo qinau, Ooqai qinee inni niqiqamasaafanaqa innee munnimma fee rusaka fee niku aanaamu fee sia maree fiqau, innee mikari moo ainainara sarau fee iquu qufaqa misa qiqau, Oo sia moodaa ainainara sarauqimariafanausa maridaqee qufanoo Yisufa qimanniminoo qinau, munnimma pausa marina mina maqee maraqaq rusaka marina mina maqee maraqaq, rakira paipana siainafa nari asaasi faqaa siuta moona amisee mina akiaqara rakira paipana maraqaq. <sup>37</sup> Qinee maa ufana faqa qimannimidaqa. Anutuna tamummaqara fasiqauqa qiniara akara rumaqoofa doo maqee kambiqaaidanoo. Doo maa akarafa faqa kambiqaannoo. Misa qiniara maaqi qidaqa misa mina mara maree manda oosana maree mariasa namufaqa aruannee qidaqa. <sup>38</sup> Miqi qimasooafaqa Yisuna faiqi namu maaqi qimasee qimamiqau, Oo karaambaiqa qafaa, rakira paipana qaaraqanda maqoo maridanoo fee qufanoo Yisufa qinau doo ufa quqasee uqeraaqa.

*Yisufa innaaru qidaqa.*

*(Mat 26:36-46; Mak 14:32-42)*

<sup>39</sup> Yisufa miqi qimaseenoo doo nari faiqi namu faqa findifinoo nari maqee maqee fimaruqoo Oorifa aaqanasaa ooru finau. <sup>40</sup> Oorureenoo nari faiqi namu maaqi qimasee qimanniminu, innee maqoo maridaqa innaaru qidaqa sia manda nimaniranaki keeqaqaq. <sup>41-42</sup> Miqi qimaseenoo mifa fiqareenoo aambaaka aqinoora foora nariara fiqaree Anutunara aqoori saunara finoo nari kuqirafa adeedi roofanoo minara innaaru qinoo qinau, Oo qini qikoofa anee eedoo qinaqa qinee manda nammari naannana mara aqusainaqa sia naa, sia qeeqa iriranamau fuanara, aninna iriranamau kai fuanara. [<sup>43-44</sup> Miqi qimaseenoo Yisufa afeekaikamandee innaaru qimasooafanoo tooqaamu fannoo fidikara foora aqinaqa anireenoo maqai aqufufanoo kuquqaqamminau. Aqufufanoo innaarunaindari qangiroo moo fannoo akooqoo qumureenoo afeeka amufanoo afeekaikinau.]

<sup>45-46</sup> Yisufa miqi qimasee innaaru qimaseenoo findifinoo nari faiqi namu qaaramoo marunnai oonu nindafoofaqa nimudaani rumafufaqa nisuku kaaqa faiqaaqee mariqau. Yisufa oonu nindafamaseenoo qimanniminoo qinau, Innee naqaa fee ifaqee faiqaidee findi fiqa innaaru qiaqa, manda nimaniranaki aquffifaara.

*Yisuna umaroo ufafa.*

*(Mat 26:47-56; Mak 14:43-50; Yoh 18:3-11)*

<sup>47-50</sup> Yisufa miqi qimaseenoo nari faiqi namu qimannimimarufanoo misakiqari Yudasifa faiqi moomoo asukunai nifiqeenoo anireenoo Yisuna amooqara rufanoo Yisufa qimaminu, Yudasifa qini faiqi nimaakuara qimooqaranannai fee ueeqaidanee qufaqa Yisuna faiqi namu Yisuna qumarararufanoo qafamasee Oo karaambaiqa maasa rakira

paipanannoo naruanauree qimasoofoanoo misa qiqari moo fannoo Yisufa qu ufana sia irirai rakira paipana qumareenoo moona akiaqa aqaqamakufanoo asauku uqannai aqoo ateeqa aqinau. Mi fasiqafa amaana maaqaki aanaiqikirausa uriqararana uqanna ainainimaruna aqoo ateeqa aqinau. <sup>51</sup>Ateekasoofoanoo Yisufa qafamaseenoo qinau, Doo amana, doo saa qimasee mi fasiqana aqoo auqamasoofoanoo andeeqamma amaganau.

<sup>52-53</sup> Andeeqaseenoo Yisufa quandaqinoo, aanaiqikirausa uriqararansa faqa amaana maqasaa uriqararansa faqa misa poorisauqa faqa faiqi firaasa faqa aiqama Yudasina faqa anusa aiqama qimanniminoo qinau, nanaree innee rakira paipana saamu indaam-mamareeqa manda oosana mareemari fasiqanara foora qiniara qumararara anidee, qinee faasaambaasaana inni faqa firaama maqaki marunau marunaqa innee sia miqoo qumararai. Doo maqee eendaki innindi faqa asukunaki nimari afaanausaindi faqa maa eendafa innindi mandoosana maraaninafa maridanoo.

*Peetooroofa Yisunara qaoo qu ufafa.*

*(Mat 26:57-58, 69-75; Mak 14:53-54, 66-72; Yoh 18:12-18, 25-27)*

<sup>54-55</sup> Miqi qimasoofofa misa mina qumareeqa afaqa maree aanaiqikirausa uriqararana maaqaki quqaqau. Misa Yisuna maree fufanoo Peetooroofa rufiasee inaaqiana nifaamme nifaammee inoo fufufanoo Yisuna quqoo maaqana naambee qai faiqi akaqausa idarasee aani marufanoo mifa minaki oonuree aaninau. <sup>56</sup> Aani marufanoo mi maqanaki ainainimaru manaqafa aniree andeeqasee Peetooroona oori qafamaseenoo oo maafa Yisuna faqa nimarifammi qimaseenoo quandaqinoo miqoo marusa qimanniminu, maa fasiqafa Yisuna faqa marifa maridanoo mina faqa qumaraaqa. <sup>57</sup> Peetooroofa iriseenoo qaoo qinoo qinau, Oo maa manaqaa sia qinee minara iridaqa. <sup>58-60</sup> Kaqikaqoo marikufanoo faiqi moo fannoo qafamaseenoo qinau anee Yisuna faiqinamuki mariana fee qufanoo Peetooroofa qaoo qimaseenoo qinau. Oo maa fasiqa qinee sia minakinaasau maridau qufanoo kaifaa marikufanoo faiqi moo fannoo anireenoo afeekaikamandeenoo qinau. Maa fasiqafa kuqaa Yisuna faqa marifa, Kariree maqanna moodaa maqannaafa maridanoo fee qufanoo Peetooroofa qimaminoo qinau, Oo maa fasiqa sia ani ufa anoonara iridaqa. Miqi qimarufanoo kai kookoorana ufa qinau.

<sup>61-62</sup> Ufa qufanoo Yisufa nari maruqooqari maaqakiqari quandaqini Peetooroona qafoofoanoo Yisuna nari Peetooroonara anee maqee eendaki qaaramoo kari qiniara sia iridee qinannoo kookoorana ufa qianoo qimaqoona kookoorana ufa qufanoo Peetooroofa iriseenoo firaqoo asauruseenoo rauda makufannoo aundurai sukaqoofoanoo firaqoo ikiraqa maree finau.

*Yisuna umaroosa ataasa ataasa imariqau.*

*(Mat 26:67-68; Mak 14:65)*

<sup>63-65</sup> Mi eendanaki Yisunasaa rakisi marusa ataasa ataasa qimasaida ari mariqau. Aridaqa qamunna qumaree mina afusaa ititasee ariqa qiqau, yafee ani aridanoo fee qiqau. Misa oosana oosana manda ufa faqa qimamaqee mariqau.

*Yuda maqanna uriqararansa Yisuna ufa iriqau.*

*(Mat 26:59-66; Mak 14:55-64; Yoh 18:19-24)*

<sup>66-68</sup> Iqaqoo kananaana Yuda maqannaasa uriqararansa faqa aanaiqikirausa uriqararansa faqa Mooseena sandufa akoofasauqa faqa moodaanaki suqufufaqa Yisuna mareeqe misa suqiranaki quqaseeqa irammiriqa qiqau, anee maasa qimaqimia, kuqaa anee Anutuna asauku mundira fee maridane qufanoo mifa qinau qinee qimannimianaqa sia innee qini ufa irifara qinee faqa moo ufara inni iraanaga sia qimaqimifaranoo. <sup>69</sup> Doo maqee maaqooqari qinee faiqi nimaaku uriqarara Anutuna asauku uqannai mina aqa ooqu marifi marianauree qufaqa misa aiqamausa qiqau. <sup>70-71</sup> Doo kuqaa fee anee Anutuna amaaku fee maridane qufanoo Yisufa qinau Innee qimariandee qimarunausee qufaqa misa qiqau, doo maqee maaqooqari sia maa fasiqana manda ufa irimarusa randaanara, doo maqee uqanna nari ookinaa manda ufa maasa daaqooki keeqaifaqa iriqa.

## 23

*Misa Yisuna afaqa Piratoona kootaki quqaqau.*

*(Mat 27:1-2, 11-14; Mak 15:1-5; Yoh 18:28-38)*

<sup>1-2</sup> Miqi qimasoofofa misa aiqama findifiqa Yisuna afaqa Roomma maqanna kiapafa Piratoofunna afaqa munusee Yisuna arira ufa maaqi qimasee qimamiqau, Maa fasiqafa faiqi anaasee kaqi runna mara quqee marifa Roomma maqanna karaambaiqa takisa munnimma sia aquaqee qimarifa nariara unnaqimaseenoo Anutuna asauku mundirafa qeeqaraa karaambaiqa maridee qimarifaqa irisee afaqa anidaqa. <sup>3</sup> Piratoofa

misa ufa iriseenoo quandafi Yisuna qafamaseenoo irammirinoo qinau, Kuqaa fee anee maa maqannaasa karaambaiqa maridanee qufanoo Yisufa qinau, anee doo qimari-ananoo. <sup>4</sup> Piratoofa mina iriseenoo kafaa aanaiqikirausa misa uriqararaua faqa faiqi anaasee moomoosa faqa qimanniminoo qinau. Qinee maa fasiqanaki qafauna sia mina ummaara marifaqa iridaqa. <sup>5</sup> Yuda maqannaasa mina iriseeqa afeekaikamasee Piratoona qimamiqa qiqau, mifa qimannimu ufanannai rakirana uqeraidanoo, mifa Kariree maqa maaqaindari oosana arasee mindari anufa aiqama Yudeeaa maqa maaqaki miqimmamaree aniufa maqee maasaki Yeerusaree maqusai anireenoo miqikai idanoo.

*Misa Yisuna afiqee Eeroodeena kootaki quqaqau.*

<sup>6-7</sup> Piratoofa mina iriseenoo qinau, kuqaa fee maa fasiqafa Kariree maqanna fee anidanoo fee qufaqa misa eedoo qufanoo Piratoofa oo Eeroodeena quqasikiqari ani maridanoo qimaseenoo Eeroodeefa maa kari Yeerusareenni animarinoo qimaseenoo Yisuna aqiqoofanoo mina sundiauqa afiqee Eeroodeefunnai fiqau. <sup>8</sup> Eeroodeefa Yisuna qafamasee asasinau. Ooqai kisaqasaa Yisuna aufakiana kai iriufa kisaqasaa mina qafaaneerufa, saina kasooqagee sia faiqi amanaikimari ainaina qini qifusaa auqainaqa qinee faqa qafaa, qimasee Yisuna qafamasee asasinau. <sup>9-10</sup> Yisufa oonuroofanoo Eeroodeefa oosana oosana ainainara iroofanoo sia ufa qinau, kaqi marinau. Amaana maqasaa aanaiqikirausa faqa Mooseena sandufa akoofasauqa faqa Eeroodeena aaga anireeqa unna ufa afeekaikamandee Yisunara Eeroodeena qimamiqau. <sup>11</sup> Eeroodeefa faqa nari sundiauqa faqa ataasa ataasa qimasee mandufa qimamaqagaqau. Misa ataasa ataasa qimamaqaidaqa karaambaiqa qamunna afisuamaqasee afiqee Piratoofinnai kafaa anirandee finau. <sup>12</sup> Ooqai Piratoosa Eeroodeesa namuqaqara mariuqanda mikari Yisuna aqiqoofanoo Eeroodeefinnai fu kamuqoo miqanda naraqoondi naraqoondi kiqau.

*Misa kafaa Yisuna Piratoona kootaki quqaqau.*

*(Mat 27:15-26; Mak 15:6-15; Yoh 18:39-19:16)*

<sup>13-14</sup> Yisuna kaifaa afiqee anirandeeqa Piratoofinnai oonuroofanoo Piratoofa aanaiqiki-rausa uriqararaua faqa faiqi firaasa faqa faiqi anaasee moomoosa faqa naarama quqaseenoo qimanniminau, innee maa fasiqana afiqee qinee unannai aniana, faiqi anaasee kaqirunna mara ubeekke marifaqee qimasee afiqee anianara qimannimidaqa, qinee inni nifusaa oosana oosana ainainara irammirinoo manda oosana oosana qiana sia paquriqa. <sup>15-16</sup> Eeroodeefa faqa iramasee qafaifanoo sia mandainaina minaki marifanoo kaifaa aqiqaifanoo aninoo, qinee faqa minara maa fasiqanara sia moo numoo minaki maridanoo fee qidaqa, minara qinee sundiauqara akumbau auqira uaiqa uaiqa samu qumaree amiqimma firaqqoo ari ari isaifaqa idukuane qidaqa. [<sup>17</sup> Piratoofa nari oosana mareenoo ainnaaqarara qoomaqaki aiqama aukuaana karabusaki moo maruna iduku nimiseenoo kafaa maa aukuaana Yisunara miqi kai ianaaree qimasee mi ufana qinau.] <sup>18</sup> Faiqi anaasee minara iriseeqa aiqamausa faqa rumasee qiqau. Mina kuqaruqaqa, Barabasina kai iduku qimia. <sup>19</sup> Barabasifa Yeerusaree maqusaki rakirana uqeeroonara faiqi kuqa narunara faqa karabusa mariufa marinau, minara idukuqagee qiqau. <sup>20-21</sup> Piratoofa Yisuna idukuqageera faiqi anaasee kafaa naarooqafa misa irisee faqa quqasee qiqau. Mi fasiqana aunirira saqari saa arua, aunirira saqari marinnai fuani. <sup>22</sup> Piratoofa kafaa qaarannoo kinoo qimanniminau. Maa fasiqafa nana manda oosana mareenoo fee. Qinee sia kuqira ainaina minaki paquriqa, <sup>23-25</sup> Qinee akumbau akumbau auqira uaiqa samu firaqqoo arusee idukuanaaree qufaqa faiqi anaasee firaqqoo faqa quqasee qiqau. Yisuna aunirira saqarisaa pirimmannai aruannee qimarufanoo misa ufa fannoo Piratoona rafaqaqafusoofanoo Yisuna aruqageera eedoo qimaseenoo Barabasina idukinau. Barabasifa rakiranara faqa faiqi narunara faqa rumbaranaki maruna idukinoo Yisuna mareeqee misa nari iriranamau fuaqee qimasee nari sundiauqa nimuqaqaa doo arirara, maree fiqau.

*Yisuna afiqee Koorookata aqaanai fimarufaqa aanaaseeuqa ikiraqoofa.*

*(Mat 27:32-44; Mak 15:21-32; Yoh 19:17-27)*

<sup>26</sup> Misa arirara maree fidaqa faiqi moo auqu Simoonaa amarafa mifa nianaindari ani marufa Sireenee maqusaindaraafa mindari Yeerusaree maqusa aatata animaru-faqa sundiauqa paquri mandee mina aranaiqi qumareeqa Yisuna aunirira saqari aku amaqqoofanoo Yisuna aanaaqiana maree finau. Sia amana mi fasiqafa qaoo qiannoo misa faaqana qafeenoo kuqiranara rufiasee aruqaquufanoo kaqi eedoo qimasee doo maranau.

(Yisuna faiqi namuqi qari Peetooroofa marufa mina moo auqu Simoonafa sia mifau Yisuna aunirirana aku maranau, mina amarafa moo fasiqa fannoo Sireenee maqusaindaraafa aku maranau.)

<sup>27-28</sup> Sundiaūga Yisuna afiga maree fimarufanoo Yeerusareendaraa aanaaseeuqa Yisuna ufa irimarusa moomoosa mina aanaaqiana oobiqasee ikifaaga quqasee ikiraqaga fimarigau. Miqi mamaree fimarufanoo Yisufa quandafi ninda fee kasoomambinoo qimanniminau. Sia qiniara ikiraqaga inneeqara faqa inneeqa faiqi namuara faqa ikiraqaga. <sup>29</sup> Kasooqagee naaru anianinna aukuanafa innisaa firaa narirafa aupurafa mariannoo. Faiqi siaisa amiqirafa marifaranoo. Faiqi aanaaqi siaisa sia naamma nimimariasa misa amiqimasee aufadamasee sandeefaranoo fee qifaranoo, faiqi faqaasa qumaara reeqa manda kuqira kuqifaranoo. <sup>30</sup> Mi firaa narirafa kambiqafinaqa aqana ameemaanai oonuree aqana qimamiqa anee maasa rafaqafusainaqa kuqufuananoo sia maa mandainainafa daruani fee qifandinousa. <sup>31</sup> Innee iriāga, Roomma maqannaasa maqee qinee sia aqee marunousa, fuka saqariara maqi marunousa, maqi mandee darusaifaqa kasooqagee Yuda maqannaasa manda oosana aqarafa fraatia marinara inaakuna manda narirafa Roomma maqannaasa inni narifaranoo, minara qinee qimannimidaqa innee inneeqara kai ikiraqaga. <sup>32</sup> Sundiaūga mandainaina maree maruqanda qaraqanda Yisuna faqa moodaakari nariraree qimasee miqanda Yisuna faqa nifiqee fiqau. <sup>33</sup> Nifiqee fifufuqa kaqikaa amuaqu namusaa faiqi nimudaani fee qimarūqoo munuseeqa Yisuna pirimmannai aunirira saqarisaa aruseeqa uqeereeqeeqa kuradaqau, faiqi manda oosana maree maruqanda asaku uqannai aakaarinni moo nari aunirirasaa arusee uqeereeqee kuradaqau. Asaaqaitinnai moo miqikaimasee nari aunirirasaa ariqau. <sup>34</sup> Misa Yisuna arimarufanoo Yisufa innaaru qinoo qinau, Oo qini qikoofa misa mandainaina qini qimimariana minninnisaa sia mina akiaqara ia, misa nari irianara sia iridaqa. Sundiaūga Yisuna aruseeqa kaatara foora sararamaseeqa mina qamunna raina rainisee maraqau.

*Misa Yisuna ataasa ataasa qiqau.*

<sup>35</sup> Miqi marufaqa faiqi anaasee kikiqiga mafufaqa qafaidaqa misa uriqararousa Yisuna ataasa ataasa nari qimami nari qimami qiqau, Oo maa fasiqafa faiqi anaasee asumu nimimari fee qimarifa maana mifee doo maqee aneennarousa asumu marainna qafa. Mifa Anutuna asaku mundirafa rusandeesamu mandee maroofa maridanoofau doo maqee nariara asumu maraiqini. <sup>36-37</sup> Sundiaūga faqa ataasa qimamaqasee Yisuna uainna nammari amianee qimasee qiqau, anee kuqaa Yuda maqanna karaambaiqa maridana minasaqari asumu maria. <sup>38</sup> Yisuna aunirira saqarisaa akiaqai akara moo akara rinoo marinou, maqi qimasee akara rinoo marinou, maa fasiqafa Yuda maqanna karaambaiqa maridanoo.

*Qumuarimaru fasiqafa Yisuna faqa innaarunai fuaninna ufana qinau.*

<sup>39-41</sup> Manda ainaina maree maruqanda nari aunirirasanaa Yisuna aqa maridaqa moo fannoo maqi qimasee Yisuna aqinau, kuqaa fee anee Anutuna asaku mundira fee maridane doo amana anee aneenna faqa maaqanda faqa mara aquqisainaqa asumu maria, qufanoo moo fannoo nari aunirira saqarisaaqari mina aqinoo qinau. Qusasaa anee faqa mifa faqa Anutuna afusaa kikiqifara anee sia fee Anutunara rufaidanee mi manda ufana q inanee doo maasa namu Roomma maqanna moodaa ufa ameemaanai maridaqa, maqee kuqanoura. Maaqanda kuqirafa andeeqanoo maridanoo, anindiri qeeqa ummaarara kuqanoura maa fasiqafa mandainaina siafa kuquannoo. <sup>42-43</sup> Miqi qimaseenoo mi fasiqafa quandaki Yisuna qimaminoo qinau, Oo Yisu, anee aneenna qusasaki karaambaiqaikinana sia qiniara aunua, iria, qufanoo Yisufa qimaminoo qinau, Doo ani qimamidaqa maqee faasaana anee qini faqa innaarunai marinnaranoo.

*Yisuna kuqira ufa.*

*(Mat 27:45-56; Mak 15:33-41; Yoh 19:28-30)*

<sup>44</sup> Suani qambaana akiaqa amummaqa suani qarafa taikafufanoo aiqama maqa maaqai asukuna arufanoo suani afu fannoo amannauna arufufanoo asukuna taikafufanoo suanifannoo kafia qanau. <sup>45</sup> Asukuna kaqi marufanoo Yeerusaree naaquqara amaana maqaki ititara qamunna firaa qambaana nari kai anaqinau. <sup>46</sup> Yisufa faqa miqoo kai firaa kari faaqa quqasee qinoo qinau, Oo qipoo qeeqa qimana ani asaukuki quqeeqa qimasee doo kaqa kuqinau. <sup>47</sup> Sundiaūga rakisirafa miqoo maridanoo mi aiqama ainaina qafamaseenoo Anutuna amooqidanoo qinau, Oo maa fasiqafa amiqira fasiqa mariifa kuqinoo. <sup>48</sup> Faiqi anaasee moomoosa ani qafaida mariusa Yisufa kuquna qafamaseeqa anirandee nimaqai fidaqa nimuqusi marufaqa ikifaafau iqa fidaqa mandaikammiqu. <sup>49</sup> Moomoosa Yisunara amiqi mandee irimarusa faqa aanaaseeuqa Kariree maqa maaqaindari Yisuna faqa anusa faqa sia dauni fifainiqu kaqi marida nianai marida qafee mariqau.



*Yisuna akundoo ufafa.*

*(Mat 27:57-61; Mak 15:42-47; Yoh 19:38-42)*

<sup>50</sup> Faiqí moo Arimateea maqusaíndaraafa Yeerusareenni animarufa mina auqu Yooseefaafa, sia Yisuna akoofau, mina amarafa. <sup>51-53</sup> Mifa amiqíra fasiqa kaaqa andeegara fasiqa, Anutuna ququsa innaarunaindari maqasaa kambiqaaninnanara afeesara marufa marinau. Mifa Yuda maqannaaf ufa suqíranaki keegeamarufa Yisuna arirara qufanoo qaoo qimarufa marinau. Yisufa kuqufanoo mi fasiqafa andeegasee Piratoona oopisaki keeqafínoo irammirínoo qínau, amanee qínee Yisuna iri mara quqaanauree qufanoo Piratoofa irisee eedoo qínau.

(Yisuna aukuaana narí maqannaasa maaqímase madika indufusaida kuqufusa níkundee mariqau. Misa ooni fíraana kasaafa aamara auquseega minaki keeqafufafa dinni dinni moomoo aamara auqíseeqa kuqusa minakiaqa naadu naadu níkundee mariqau. Moodaa kai moo kari akundeega mina afunda taikoofanoo kaifaa moo fannoo kuqufafa miqí kai imariqau; Sia moodaa karifau níkundee mariqau. Moo kari moo kari níkundee mariqau.)

Piratoofa eedoo qufanoo narí akoona amarafa oonuree Yisuna iri aunirira saqarisaaqaraana maraseenoo qamunnannai kukuqamaseenoo mara maree ooni aamara indufirafa fuka marunaki sia moo minaki akundarafa marunaki minaki Yisuna iri quqanau. <sup>54</sup> Mooseena sandufa faiqí aunirira saqarisaa dirirara amaana faasaanara qaoo qínoo marunara mi eenoonnai naríqa amaana faasaana adeedi ranoo marufanoo dauni dauni Yisuna iri mareeqeenoo ooni aamaraki quqanau.

<sup>55-56</sup> Karireendaraa anaaseeuqa Yisuna faqa anusa Yooseefaana amarana faqa ooni aamaraki quqemarufaqa qafamaseega oonurandee aniree nári oosana mareeqa nári marasinna fadameena oosana oosana Yisuna irisaa aku amaqarara anirandee oonu deedaqíqau. Saririqasaa misa Mooseena sandufamau fiqa nári amaana fee qímasee adooaqau.

## 24

*Yisufa findimaqee fifufaqa fifau madikakai qafoo ufafa.*

*(Mat 28:1-10; Mak 16:1-8; Yoh 20:1-10)*

<sup>1</sup> Mi anaaseesa nári maqannaasa amaana faasaana Saririqa adoomaseega faiqee duna kananaana maasa amaanasaa kananaana eendai mi fadameenna marasinna ainaina deedaqamaqoona mareeqa Yisuna akundoo oonina aamaraki keeqarara fiqau. <sup>2-5</sup> Oonureega qafoofanoo narí kai ooni fíraatia kooqísa ititaqoofa quanda quandammeeqee kaqínni quqaqoofaqa qafamaseega kaqí keeqafi Yisuna írara randoosia qafoofanoo sia marufaqa kaqí kikiqíqa maridaqa naqí fee íanaura naqí fee íanauree qídaqa tautu masee qafoofanoo qaara fasiqa kaaqa areenee maru qamunna afisira qanda misa naaqa kambiqafíqa kikiqíqau. Kikiqamafufaqa nindafeega qífu qafaanoo qímaseega nínuqa tuqu naumoo amisoofaqa mi faiqíqanda qímannimíqa qíqau, innee nanaree findifimari fasiqanara kuqírausakiaqa randaidee. <sup>6-7</sup> Mifa sia maaqoo maridanoo, mifa findifínoo doo mifa fífinoo maridanoo. Mifa ooqai Kariree maqa maaqaki maridanoo inni qímannimimarufaqa innee iríusa sia fee irídee minara randaidee. Mifa maaqí qímasee inni qímannimínau, qínee faiqí nímaaku qíni mareeqee manda fasiqa nísaakuki quqeefanoo. Quqasaifaqa aunirira saqarisaa pírimmannai darusaifanoo qaaramoo faasaana inanoo Anutufa qíni uqeera qísaannoo fee qufaqa innee sia írusee. <sup>8-9</sup> Miqí qímasee qímannimíufaqa misa Yisuna ufara íriseega oonurandee maqusai anireega Yisuna faiqí namu qísaakuqara taikasee qíkunni ooqu moodaa marasee marusa faqa faiqí anaasee akaqusa faqa mi ainaina ooni aamaraki oonu qafoonara qímannimíqau. <sup>10-11</sup> Mi anaaseesa nuqu Mariana amarafa Makadara maqusaíndaraafa faqa, Yoannafa faqa Mariana amarafa moo Yameesana anoofa faqa akaqausa mi ainainasara Yisuna faiqí namu qímannimíufaqa furufarufa maasa qímaqímíaafoo qímasee sia amiqímasee íríqau. <sup>12</sup> Peetooroofa misa ufa íriseenoo findimeeqee quqasee sandeenoo ooni aamaraki kummaramafufanoo mara meera qafoofanoo Yisuna iri kukuqu qamunnafa kai minaki marufanoo qafamaseenoo oonurandee aatata narí amaqaí fidanoo mínauqáíndiara írínoo fínanu.

*Eemausa maqusai fímaru aanaki Yisufa paqurínanu.*

*(Mak 16:12-13)*

<sup>13-14</sup> Mi faasaannakai Yisuna faiqí namuqíqari Yeerusareendari Eemausa maqusai fidaqara Yisuna arusoofanoo sia madikaki marunara narí qímami narí qímami qíqa fiqau. <sup>15-16</sup> Miqí qíqa fidaqa narí qímami narí qímami qimarufanoo Yisufa narí uqanna anireenoo míqanda faqa fímarufaqa míqanda qafamasee sia naaqoo írínanu. <sup>17-20</sup> Yisufa

qimanniminoo qinau, inneeqara aatata fidaqa nanaree narí qimami narí qimami qiga fidee qufaqa miqanda irisee kasoomambufaqa noori runusee moo fannoo Kareeopasafa Yisuna qimaminoo qinau, maa eenda ufana Yeerusaree maqusai ufa firaafa kambiqaína anee kai fee sia irinee qufanoo Yisufa qinau, nana ainaine kambiqaíeenoo fee qufaqa miqanda qiqau Yisuna Nasareetee maqusaindaraana arunara maaqanda qidaqa. Mi fasiqafa Anutuna tumummaqara fasiqa marufaqa Anutufa faqa faiqí anaasee faqa mina ufara faqa mifa auqoo ainainara faqa uriqararafa afeeka fee qimarufa marufaqa maasa aanaiqikirausa uriqararauusa faqa maasa faiqí firaasa faqa Roomma maqannaara aruaqee qufaqa aunirira saqarisaa pirimmannai ariqau. <sup>21</sup> Mi fasiqafa maasa Isaraee maqannaa karaambaiqa Roomma maqannaa nisaukukinaana maasa qumaraaninna fee qidaqa اساسimariafannana marufaqa kuqa ariqau, Maqee faasaanaqari mifa kuquqoo qaaramookifaqa maridaqa. <sup>22-24</sup> Maasakiqari anaasee akaqausa narí akundoo ooni aamaranai oonu qafaafanoo sia mina iri mari qafeeqa nifu pisipasa mandoofaqa qangiroo kai qafaafanoo qimanniminoo qinoo Yisufa kuqiranaki findifinoo qifaqa maasakiqari akaqausa ooni aamarai oonu qafaifanoo anaasee indee kai inoo Yisuna kai sia qafeeqa.

<sup>25</sup> Yisufa miqi quna iriseenoo kafaa miqanda maaqi qimasee qimanniminau. Oo furufarira qanda mariafanoo Innee sia dauni Anutuna tumummaqara fasiqa ufa iri mariafanoo kaaqa inneeqara anuqi mariafanoo. <sup>26-27</sup> Anutuna tumummaqara fasiqauqa asauku mundiranara mi oosana oosana aupurararana marasee miqooqari narí arenenaranki keeqaannoo fee qimaqoofanoo naqimasee fee sia kambiqaarara, kambiqaannoo. Miqi qimaseenoo Yisufa Mooseena sandufa akarakinaanasaa oosana araseenoo tumummaqara fasiqa aiqama akarakinaana nariara akara rumaqoonara miqanda qimanniminoo aatata fimarinau. <sup>28</sup> Miqinoo ufa qinoo fiufufanoo Eemausa maqusa adeedi ramaseenoo Yisufa kaqi finoora foora ufaqa miqanda rafaafa fidaqa qiqau. <sup>29</sup> Doo suani keeqaifanoo asukunaikidanoo anee maasa faqa ani maria qufanoo Yisufa eedoo qimasee misa faqa oonu marinau. <sup>30-31</sup> Miqanda narana deedaqi isee ooqu marifi naaneerufanoo Yisufa feemu maraseenoo Anutunara dufi dufi qimaseenoo ruqi ruqi maseenoo nimufaqa misa irirafa misa nifu faqa kambiqaoofaqa oo Yisufammifoo qufanoo Yisufa doo miqooqari taikafinau. <sup>32</sup> Taikafufaqa miqanda narí qimami narí qimami qiqau qiqau maaqanda aanai ani marunanoo mifa maaqanda faqa anidanoo akarakinaana maaqanda qimaqimimarifanoo maaqanda daundurari idara foora qamafi qimbafi imarifafa maaqanda sia minara iriqau. <sup>33</sup> Miqi qimaseenoo miqanda aaqee quqasee Yeerusareenni kafaa fiqau. <sup>34-35</sup> Oonureeqa miqanda Yisuna faiqi namu qisaukuqara taikasee qikunni ooqu moodaa marasee marusa akaqausa namufaqa moodaaqoo marunaki miqanda oonureeqa mina faiqi namu qimannimiqa qiqau. Doo karaambaiqa kuqiranakiqari findifinoo Simoonafa doo qafeenoo qufaqa miqanda nariqa aanai fi paquri funara faqa feemu marasee ruqi ruqi mandee nimufanoo nifu faqa naaqoo faqa irunara narí qimannimiqa.

*Yisufa narí faiqi namu kooroomannimaqanau.*

*(Mat 28:16-20; Mak 16:14-18; Yoh 20:19-23; NiFa 1:6-8)*

<sup>36-37</sup> Miqanda narí qafoonara qimannimimarufanoo karaambaiqa narí uqanna tautummannimaqasee nifusaa kikiqamambinoo qinau, innikina asoofarafa mariani qufaqa aiqamausa tautumandee afaannee qimasee firaqoo rufiaqau. <sup>38-39</sup> Yisufa nindafamaseenoo qimanniminau. Naqi fee ifaqee qaara irirafa inni naaqoosaa rinoo fee qini qisauku faqa qiku faqa pirimma daruqoonaa qafaafa qinee qeeqa uqanna maridaqa. Innee aniree qini duqamasee qafaafa qimaqi faqa qimudaani faqa kaqi maridanoo afaanna fannoo sia miqirafa maridanoo. <sup>40-43</sup> Miqi qimasoofaqa firaqoo اساسamasee oo doo kuqaa narimmifoo qimasee kafaa afaannasaaqari ani maridanoo fee qimasaida quqasaida rufee mariqau. Miqi marufanoo Yisufa uqannifiqararee qimaseenoo irammirinoo qinuu inni narana moo marinaqa qimifaqa naa qufaqa misa noodaanna aafaqa mareeqee amufanoo aiqamausa nifusaa qumaree nanau.

<sup>44</sup> Namaseenoo maaqi qimasee qimanniminau qinee inni faqa kaqi maridaqa maa dariranara kuqiranara findifiranara qimannimiaafanausa maridaqa. Mooseena sandufa faqa tumummaqara fasiqauqa ufa faqa Dafidina idi akaraki faqa qiniara akara rumaqoo ufafa naqimasee sia kambiqaararee doo mina anoona kambiqaarana qafaafanoo. <sup>45-47</sup> Miqi qimasee Yisufa misa tumummaqara fasiqa ooqeenaa akara iriaqeeru misa irirana quandaseenoo qimanniminoo qinau maaqimminoo akara oosana maridanoo, Anutuna asauku mundirafa aupurarana maraseenoo qaaramoo faasaana marinoo kuqiranakiqari findifinoo miqooqari Yisuna ufa irimariasa faiqi anaasee fuki faaki qimasee qimannimimarifaqa narí mandainainara nikooqamaseeqa Anutufinnai quandaki narí mandainaina akiqara asauku mundirana auquara qimamifanoo minninnisaani, miqiqa

ufa qimannimirafa faqa mandainaina minnisarafa faqa Yeerusaree maqusai oosana araseenoo aiqama maqa maaqai qimannimirafa daraanianno. <sup>48</sup> Innee qini qiigoondiuga mi ainainausa qafee marusa mariafanoo. <sup>49</sup> Qini qikoofa Anutufa nari maraquina afeeka nimimari maraquina inni nimiraree qimasoon qeeqa kai oorureeqa niqigaanaqa qumuree inni afeekaikamma nimaqaannoo. Innee sia Yeerusaree maqusa minnisaaga maaqoo kai marifanoo naakufinaqa fifainiaqa.

*Yisufa innaarunai ooru fu ufafa.*

*(Mak 16:19-20; NiFa 1:9-11)*

<sup>50-51</sup> Yisufa nari faiqi namu faqa nari agoondiuga faqa Yeerusaree maqusaindari nifiqeenoo Beetani maqusa amummaqa oonureenoo nari asaukuqara uqeeraseenoo nifaaqooqa qimannimaqaidanoo nari faiqi namu minniseenoo uqeerakinoo innaarunai ooru finau. <sup>52-53</sup> Miqoo marusa mina qafamasee Anutuna amooqimasee quandaki nimuqusaki asasirafa qumbiqafufaqa Yeerusareenni kafaa oonu maridaqa faasaambaasaana naaquqara amaana maqaki keeqafidaqa Anutunara dufi dufi qimamaqee mariqau.

## **YOOHANEE** **Amiqira Fasaasa Ufa Yoohaneefa Akararinau.**

*Naaru nauru marira ufa.*

<sup>1</sup> Ooqai maa maqa maaqafa sia marunakinai Anutuna afeeka ufara foora Yisufa marinau. Mi afeeka ufara foora Yisufa Anutuna faqa marinau. Mi afeeka ufafa Anutufa kai marinau. <sup>2</sup> Oosana aroonakina mi ufafara foora Yisufa Anutuna faqa marufa marinau. <sup>3</sup> Mi ufanannai Yisunannai aiqama ainaina kambiqaqoofanoo maridanoo. Sia moo ainaina sia minannai kambiqanau. Aiqama ainaina mina Yisunannai kai kambiqanau. <sup>4</sup> Aiqama kambiqoo ainaina mina Yisunasaaqaraa marirana maraseenoo doo maridanoo. Mi marirafa maa maqanasaaqaraa fasiqa anaasee naundurai qoomara foora aurau rimarifa maridanoo. <sup>5</sup> Mi aurau rirafa asukunaki qaidanoo. Mi aurau rira qoomana asukuna fannoo sia amana qumaree rafaqa fuannoo.

<sup>6</sup> Anutufa qumee dadaaqufanoo maqasaa fasiqa moo nammari nimimaru Yoohaneefa kambiqafufanoo Anutufa qini saikaki fuannee qufanoo nari saikaki ani marinau. <sup>7</sup> Yoohaneefa kooroo irafa animarinau. Mi qoomana Yisunara kooroo irara aninau. Aiqama fasiqa anaasee mina ufa irisee Yisunara kuqaa anoonee qiageera aninau. <sup>8</sup> Mifa Yoohaneefa sia mi qoomafau marinau. Kaqi mi qoomanara kooroo ianifeera animarinau. <sup>9</sup> Anutuna ufa fannoo Yisufa anoona aurau rirafa marinau. Mi aurau rirafa faiqi aiqamausa naunduraki qeemarufa maridanoo maqasaa faiqi aanaaqi kammafinoo maa maqa maaqanaki quminau.

<sup>10</sup> Mifa maa maqa maaqanaki ani marinau. Anutufa mi ufana Yisunannai maa maqa maaqanakinana fasiqa anaasee auqu quqasoofanoo misaki akooqoo qumu marufafa sia minara iriqau. <sup>11</sup> Mifa nari auqu maqa maaqanaki aniroofaqa mina maqannaasa minaki mariasa mina mareeqee aqusee minnisagaqau. <sup>12</sup> Akaqausa asasammasee maroosa Anutuna ufa Yisufa misara innee Anutuna faiqi kamambi mariaqee qira ufa niminau. Minara kuqaa Anutunee qimasee naundura amimarusa mina faiqi kamambi mariaqee qira ufa niminau. <sup>13</sup> Anutuna faiqi miqimariasa kambiqafi mariasa sia maa maqa maaqanaki mariasakiqari kambiqaqau. Sia faiqi faiqi imariandeeqau mafi kambiqaqau. Sia faiqi nari iriranannaifau Anutuna faiqi kammani kambiqaqau. Anutuna iriranannai kai kambiqafufafa mina faiqi namuqiqau.

<sup>14</sup> Mi ufafa Anutuna anoona ufa Yisufa faiqi faiqi kamambinoo maasaki qumu marinau. Qumumarufafa mina afeeka eeraarirana maasa mina faiqi namu kuqaa qafaqau. Mifa nari akoona amaaku moodaa marunara nari akoonasaaqaraa afeeka eeraarirana faqa kaqi afaarirana faqa kuqaa anoona ufa qirana faqa maraseenoo qumbiqanoo maruna qafaqau. <sup>15</sup> Yoohaneefa nammari nimimarufa minara Yisunara kooroo inau. Mifa maaqi qimasee faiqi anaasee qimanniminoo qinai. Ooqai qinee qimannimiqia. Moo fannoo qini qinaaqianna aniannoo. Qinee kambiqaafannaqoo mifa ooqai mariufa marifaqa qini uriqarara fee qiafanafa maana Yisufa mifa maridanoo. Yoohaneefa miqi qimaseenoo minara qimanniminai.

<sup>16</sup> Yisufa maaqoo qumu maridanoo narisaaqaraa amiqi amiqirana amuaqa amuaqa moomoo maasa aiqamausa qimufafa mareemariqifana. <sup>17</sup> Anutufa Moosenannai nari sandufa nari amusufa maasa qiminai. Asauku mundirana Yisunannai nari kaqi asasamandee nimirufa faqa kuqaa anoona ufa qirana faqa maasa qiminai. <sup>18</sup> Sia moo fannoo Anutuna qafee marufa marinai. Nari amaaku moodaa nari akoona amuqusa uqanna mifa kai nari akoona faqa marida qafamaseenoo maa maqanasaa maasa qimannimirara quminai.

*Yoohaneefa nammari nimimaru ufafa.*

*(Mat 3:1-12; Mak 1:1-8; Ruk 3:1-18)*

<sup>19</sup> Yoohaneefa Yisunara kooroo qu ufafa maaqimasee animarinau. Yuda maqannaasa amaana maqa aanaiqikirausa faqa amaana maqaki dapi saika maree marusa misara Reefina aiku asauku fee qimarusa misa faqa Yeerusareenni suqufufafa ufa qimaseeqa faiqi akaqausa nifeeqasee niqiqoofafa Yoohaneenara irarara oofuqau. Yoohaneefa nammari nimimarufunnai Yooradanna nammariinni ooqureeqa maaqi qimasee iraqau.

Oo Yoohane, Anutuna tamummaqara fasiqauqa kambiqaaninna tamummaqara fasiqanara akara rumaqoofa anee maana miffee yafee. <sup>20</sup> Yoohaneefa misa ufa iriseenoo sia kaqi ufa qinai akooqoo kooroo qimasee qimanniminai. Qinee sia asauku mundi-rausau maridau. <sup>21</sup> Misa minara iriseeqa kafa iraqaqau. Anee Eeriaafee maridane. Maasa

qimaqimia. Miqi qufanoo Yoohaneefa qinau sia qinee misau. Miqi qufaqa misa iraqau. Anee mi tamummaqara fasiqanara akara rumaqoo fee maridane.

Miqi qufanoo Yoohaneefa sia fee qinau. <sup>22</sup> Sia fee qimasooafaqa misa quandaki qiqa. Maasa niqiqaasa nana ufa fee aniara qimannimianauree. Anee yafee. Anee aneennara naqi fee qidane. <sup>23</sup> Yoohaneefa misa ufa iriseenoo maaqi qimaseenoo qimanniminau. Anutuna tamummaqara fasiqa Eesaiaafa ooga maaqi qimasee qiniara akara rinau.

Qinee karaambaqara nammeera qimasee qimannimira fasiqausa maridaqa. Kaasau maqa maaqakiqari maaqi qimasee nammeeraqidaqa. Innee karaambaqara anianinna aanna andeeqaseeqa afisuaqa.

<sup>24</sup> Yeerusarendari niqiqaasa misa Farisai amaana ufa qimarusa misa mina iriseeqa kafa irammiriqau. <sup>25</sup> Oo Yoohanee, anee sia asauku mundirafa maridana. Anee sia Eeriafa maridana sia anee mi tamummaqara fasiqafa maridana. Anee sia misa maridana naqi fee idanee nammariki keeqannimaqaidanee. <sup>26</sup> Yoohaneefa misa ufa iriseenoo maaqi qimasee qimanniminau. Qinee nammariki faiqi anaasee keeqannimaqaidaga. Inni qambaana mo fannoo maridanoo innee minara sia irimariafanoo. <sup>27</sup> Mifa qini qinaaqianna anianinafa qini uriqararafa mariannoo. Naqimasee fee qinee mina dadaaqianauree. Qinee kuqaa ooreeqararasa uqanna maridaqa.

<sup>28</sup> Yoohaneefa Yooradanna nammariki Beetani maqusai dinni nammariki keeqannimaqee marufaqa misa aniree miqi qimasee iree mariqau.

*Anutufa auiqaaninna sipsipa anaaqina ufa.*

<sup>29</sup> Iqaqoofanoo kananaana Yisufa Yoohaneefunnai oogu fimarufanoo Yoohaneefa qafeenoo nari faqa marusa maaqi qimasee qimanniminoo qinau. Innee qafaqa maa fasiqafa Anutufa nifaeemari aanda aanaaqi nari qaindasaa kuquaninna aandaufa maasa aigamausa maa maqanasaagaaraasa mandainana minannai maraqqiseenoo Anutufa darira ufa ateeqaqisaaninafa maridanoo. <sup>30</sup> Eenda qinee minara maaqi qunafa maafa qinee sia mariafanna kamuqoo marunara qini uriqararafa maridanoo qini qinaaqianna kambiqaqi aniraannoo qunafa maana mifa maridanoo. <sup>31</sup> Qinee minara sia irimariafanausa maridaqa. Isaraee maqanna nifusaa kooroo qiaqera nammaria auqamannimaqaga anidaqa.

<sup>32</sup> Yoohaneefa maaqi qimasee Yisunara qinau. Qinee Anutuna maraquna qafau-nanoo mifa nakipurunaika mafino innaarunaindari qumureenoo Yisunasaa quqeenoo. <sup>33</sup> Qinee qeeqa kai asauku mundiranara sia amana mifee qianaara. Maa saikana-nara diqiqaofa Anutufa maaqi qimasee qimaqiminau. Anee faiqi moo qafainanoo qini maraquna fannoo akooqoo minasaa mundufinnanara minara faiqi anaasee qini naaqugara maraqunannai rumannimaqaanina fee qinnaranoo. <sup>34</sup> Maafa Anutufa rusandeesamu masee maroofa nari amaaku uqanna maridanoo. Qinee qeeqa qifunnai qafeeqa inni kooroomannimaqaidaga.

*Yisufa indaaru oogasaa nifiqoo faiqi namusa.*

<sup>35</sup> Kananaana iqaqoofanoo Yoohaneefa nammaria afainni nari ufa irimaru fasiqa qanda faqa marufanoo Yisufa aiqaranau. <sup>36</sup> Aiqaaroofoanoo Yoohaneefa amiqi mandee aiqumummaseenoo qinau. Innee maana qafaqa Anutuna aanda aanaaqiara foora qaindasaa maasara kuqaninafa aiqaqaidanoo. <sup>37</sup> Yoohaneena ufa irimaruqanda mi ufana irisee Yisuna doo afaqee fiqau. <sup>38</sup> Afaqee fimarufanoo Yisufa quandafi nindafeenoo qinau. Inneeqara nanaree qini qifaqee anidee qufaqa miqanda qiqa. Ufasaa rakisira anee yai fee maridane. <sup>39</sup> Yisufa iriseenoo qimanniminau doo aniree qafaqa qufaqa miqanda mina faqa oonu mina maaqa qafamasee eenaanianna oonu qafamaseeqa mina faqa kaqi kaaqoo mariqau.

<sup>40</sup> Mi fasiqaqanda Yisuna maaqa oonu qafamasee mina faqa maruqanda miqandakiqari moo fannoo Andurufa marinau. Mifa Simoona moo auqu Peetooroona akaqa marinau. <sup>41</sup> Andurufa narafasaana Simoona moo auqu Peetooroona kaqi kaqi paqurimaseenoo qimaminoo qinau. Maasa Anutuna asauku mundira fasiqa kambiqaanoo fee qimaqoofa doo maasa paquriqa qimaseenoo mina afiqammaree Yisufinnai finau. <sup>42</sup> Oonuroofanoo Yisufa Simoona aiqumummaseenoo qinau. Anee Yoohaneena amaaku Simoonafa mariananoo. Qinee aniara Keefasane qianauree qinau. Mi auqu oosanna ooni fee qinoo maridanoo.

*Yisufa Firipina faqa Natanaeerana faqa naaroo ufafa.*

<sup>43</sup> Moo kananaana Yisufa Kariree maqamaaqai fuaneera aanai Firipina paqurimandeenoo qimaminoo qinau. Doo Firipi qini faqa doo aniannee qinau. <sup>44</sup> Firipifa faqa Andurufa faqa Peetooroona faqa Beetasaida maqusaindari moodaa maqusanaasa mariqau. <sup>45</sup> Firipifa Natanaeeranara randasee paqurimaseenoo qimaminau. Mooseefa

Anutuna sandufasaa faqa tamummaqara fasiqausa faqa kambiqaaninna fasiqanara ooqai akara rumaqoona maasa paquriqa. Mifa Yisufa Yooseefaana amaaku Nasareetee maqusaindaraafa maridanoo. <sup>46</sup> Natanaeerafa qinau, Akasaa naqimasee amiqira ainaina Nasareetee maqusaindari kambiqaarree, sia kambiqaannoo. Miqi qufanoo Firipifa qinau aniree doo oonu qafa.

<sup>47</sup> Firipifa mina afiqeenoo oonu roofanoo Yisufa Natanaeerana qafamaseenoo qimaminoo qinau. Oo maafa Isaraee maqannaa faiqi uqanna anidanoo. Sia qunna ufa minaki marifa andeeqarafa kai marifa maridanoo. <sup>48</sup> Natanaeerafa minara iriseenoo tautumaseenoo maaqi qimasee Yisuna qimaminau, anee naqi fee masee qiniara iridanee. Yisufa iriseenoo maaqi qimasee qimaminau. Natanaeera faasai Firipifa sia ani paquriqoo anee aneenna maqusai aneenna faafisa atukaki nianai marianaqa qinee ani aundurakinaa oosana faasai qafeeqa. <sup>49</sup> Natanaeerafa iriseenoo tautumakufanoo qinau. Ufasaa rakisirafa anee Anutuna amaaku marianafa. Anee Isaraee maqannaa karaambaiqa marianafa mariananoo. <sup>50</sup> Miqi qimasooфанoo Yisufa qinau. Qinee faasai faafisa atukaki mariana qafaunannara minara qunнанara anee minaree qiniara Anutuna amaaku fee qidanee. Qini ufa iria. Maqee kaqikaqoo uqafiqaunana qafaanano. Kasooqafee anoona firaqoo uqannifiqaanura. <sup>51</sup> Miqi qimasee mina faqa marusa qimanniminoo qinau. Qinee anoona ufa qimannimidaqa kasooqafee inne innaarunai kudimanda rakee inaqa qafaifanoo qangirooqaa faiqi nimaaku qini qimummaqa ooraini qumaini imarifaqa nindafeefaranoo.

## 2

*Kannaana maqusai faiqi faqa anaasee faqa nimundoo ufafa.*

<sup>1-2</sup> Qaara faasaana aiqarroofanoo Kannaana maqusai Kariree maqa maaqaki moo maqusaki maanaaqa amundarafa marinau. Yisuna anoofa Mariafa mi qoomaqanaki dadaaqidanoo marinau. Qoomaqa suqoosa Yisuna faqa nari faiqi namu faqa naarooqaa fiqau. <sup>3</sup> Mi maqannaasa oosana maaqimminoo maridanoo. Maanaaqa nimundararee qimasaidaqa narana faqa uainna nammari nari maqee maqee nee maria nammari faqa namammaree munusaida nimundee mariqau. Mi qoomaqanaki uainna nammari namammaree kasaqa munu taikasooфанoo Mariafa nari amaaku Yisuna qimaminoo qinau. Qini qimaaku doo uainna nammari taikanoo maridanoo. <sup>4</sup> Yisufa mi ufana iriseenoo nari afeeka kooroomma nimaqaaninnanara iriseenoo qimaminoo qinau. Oo qinnaqeefoo nanaree anee qini iraidanee. Kasooqafee qinee firaq ainaina oosana oosana faiqi sia auqee mariana auqanaura anee maqee kasaqai qimariananoo. <sup>5</sup> Yisuna anoofa mina iriseenoo quandafinoo qoomaqa dadaaqimaru fasiqausa mara quqaqoosa maaqi qimasee Yisunara qimanniminau. Nana ainainaree maafa qinaqa mifa qinandee kai iaqa.

<sup>6</sup> Mi maqanaki ooni qafee firaafauqa dinni qisauku taikasee dinni ani moodaa marasee marinau. Yuda maqannaasa nari imarudeemasee minakina nammari marasee nisaaqumasaida narana neemariqau. Aiqama ooni qafee tintaramma miqirafa firaafauqa marinau. Nammari moomoo saka adiee marusauqa mariqau. <sup>7</sup> Yisufa qoomaqa suqara faiqiuga mara quqaqoosa qimanniminoo qinau. Innee nammari sakasee maa ooni qafeesaki adiee marifanoo afaisaa kai uruani. Yisufa miqi qimasooqaa misa aiqama mi ooni qafeesaki saka adioofanoo afaisaa qumbiqaqau. <sup>8</sup> Saka adia qumbiqaasoofanoo Yisufa qimanniminoo qinau. Innee minakinaana sakamaree qoomaqasaa rakisimarina amifanoo namasee qafaani. <sup>9</sup> Miqi qimasooqaa misa miqimmiqau. Qoomaqasaa rakisirafa mi nammari fa uainnaikamafuna oosana siamma irinau. Qoomaqa suqemaru ainainira fasiqausa misa kai iriqau. Qoomaqasaa rakisirafa namasee qafooфанoo amundoo aanaaseena afaaqi aaramaseenoo qinau. <sup>10</sup> Aiqama qoomaqa suqee mariasa amiqira uainna naaree indaaruu nimiafaqa naidaqa. Neeneesaafaqa inaaqianna manda uainna nimidaqa. Anee sia miqiananoo amiqira uainna uqanna kai inaaqianna nimananoo.

<sup>11</sup> Miqinoo Kariree maqa maaqaki Kannaana maqusai Yisufa nari saika oosana araseenoo faiqi sia auqoo ainaina amiqira oosana auqamasooqaa faiqi anaasee qafaqau. Mifa mikari nari afeeka firaana uqannifiqooqaa mina ufa irimaruu fasiqausa Yisunara kuqaa Anutuna amiqira afeeka uqannifiqee mari fee qiqau.

<sup>12</sup> Miqooqari Yisufa nari anoona faqa nari akaqaafasaa faqa nari ufa irimarusa faqa Kaperanaumma maqusai ooqu fiqau. Miqoo ooquee qaaramoo faasaana kaqi marinau.

*Yisufa Yeerusaree naaquqara amaana maqaki keeqoo ufafa.*  
(Mat 21:12-13; Mak 11:15-17; Ruk 19:45-46)

(Ooqai Anutuna qangiroo moo fannoo Isaraee maqannaasa ainnaaqareenoo Isipa maqannaasa ooqa faiqiuqa kuqa narufaqa Isaraee maqannaasa quqasee sandaqa.)

<sup>13</sup> Isaraee maqannaasa mi ainnaaqarara qoomaqa suqarara deedaqufanoo Yisufa minni Yeerusaree maqusai ooru fina. <sup>14</sup> Oorureenoo Yisufa naaquqara amaana maqaki keeqafinoo oonurama nindafoofaqa faiqi mi naambeeqanai marida Anutuna tatufirana suqararee qidaqa burimakusa sipsipa nakipuruna narinni narinni feefaurimariqau. Miqidaqa firaa munnimma maraiddaqa qummuaraikammi mariqau. Faiqi anaasee kaamanna munnimma mara maree munu nimufaqa misa naaquqara maqakinaa munnimma nari nimimariqau. Mina faqa amaana maqasaa rakisiraua nari faqa qummuaraikammi mariqau. <sup>15</sup> Yisufa anirama nindafeenoo sanda kukuqamma qumareenoo mi samuna burimakusa sipsipa faiqi naru nifaqaaufaqa quqasee sandaqa. Munnimma kukuqimaru qaindausa ani qumareenoo teeqi maqusoofanoo mi munnimmausa maqandanandanaminau. <sup>16</sup> Mina miqimaseeno nakipuruna feefauru maree marusa maaqi qimasee qimanniminau. Maa ufnisa maanakinanaa maanakiqari kai doo maree fifuqa, sia mariaqa. Qini qikoona maaqa maa maqafa maridanoo. Innee sia mina marasee dapi feefaurira maqa fee qiaqa.

<sup>17</sup> Miqi qimasooafaqa Yisuna faqa nimarusa ooqeenaa Anutuna tamummaqara fasiqaua akarakinaa ufara oonumafi irisee qiaqa. Ani maqara qiaqa didirafa idara foora qaidanoo fee qiaqa. Yisuna faiqi namu minara iriqa maaqi qiaqa. Ooqeenaa ufa anoona doo maqee Yisunaki kambiqaenoo fee qiaqa.

<sup>18</sup> Yisufa aandaufa amaana maqa naambeeqaindaraana niqimamasooafaqa Yuda maqannaa uriqararaua quandafi Yisuna aqidaqa qiaqa. Anee kuqaa karaambaiqa maridana faiqi sia amana auqemaria ainaina firaa ainaina moo uqaqifiqainaqa maasa kuqaa aniara karaambaiqammifoo qianaura. <sup>19</sup> Yisufa mi ufana iriseenoo qinau. Amana, innee maa amaana maqana rapeemasai faqa qinee qaaramoo faasaana kafia uqera kuradaura. <sup>20</sup> Yuda maqannaasa uriqararauasa minara iriseeqa qiaqa. Akasaa maa maqana ooninnai auqimariafa firaa maridanoo. Maasa qikeeku qikaaku (46) qaara fasiqa niku nisauku taikasee dinni taikasee dinni ani moodaa marasee aukuaana aundurai maa afeeka maqana auquqoofa maridanoo. Anee naqimasee qaaramoo faasaana uqera kuradarara qidane. <sup>21</sup> Yisufa sia naaquqara maqara irinau. Nari afaaqara Anutuna naaquqara maqa fee qufaqa misa sia iriqa. <sup>22</sup> Yisuna faiqi namu faqa sia aaqee mi ufana oosana iriqa. Kasooqaqee Yisufa kuqiranakiqari findifufaqa miqoo Yisuna ufa irisee miqoo anoona oonumafi iriqa. Miqoo faqa misa tamummaqara fasiqa akarara faqa Yisunara faqa kuqaa fee qiaqa.

*Yisufa aiqama fasiqa naundurari nindafoo ufa.*

<sup>23</sup> Mi fasannai ainnaaqarara qoomaqa kamuqoo Yisufa Yeerusareenni marufaqa moomoosa mina sia faiqi amana auqemaria ainaina qafamasee kuqaa Anutuna asauku mundira fee qimariqau. Maa fasiqafa Anutuna afeeka eeraarirana kooroo imarifa maridanoo fee qimariqau. <sup>24</sup> Yisufa minara irinoo sia misaki paasoosandee afaqa quqanau. Mifa faiqi naunduraki irufanoo sia amanaikufanoo. <sup>25</sup> Sia moo fannoo faiqi naundurakinaana qimamiqau. Nari kai amiqimandee aiqamausa naundura mandirirana niqafamaseenoo misaki sia afaqa quqanau.

### 3

*Yisufa Nikoodeemusandiri ufaqa ufa.*

<sup>1</sup> Farisai amaana ufa qimarusaqi faiqi moo auqu Nikoodeemusafa Yuda maqannaasa uriqararafa moo fannoo marinau. <sup>2</sup> Mi fasiqafa moo eenda asukunaki kukeeqakufanoo Yisufa maruqoo anireenoo qimaminoo qinau. Oo ufasa rakisirafa anee Anutufinaindari anianafa ufasa rakisirafa marianaqa maasa minara iridaqa. Sia fifau fasiqa narikai qinanoo faiqi teeroo ainaina aaqee taikaannoo, anee ianandee qinanoo taikaannoo. Anutufinaindari anianafa mariannara mi afeeka ainaina auqimarianaqa maasa iridaqa. Anee nanufa fee maasa qimaqiminnaree.

<sup>3</sup> Yisufa iriseenoo nari qimaminoo qinau. Qinee anoona ufa ani qimamiana. Faiqi Anutufinaindari kafia fukasaa aanaaqi aanaaqi kamafinausa kai Anutuna ququsaki keeqeefaranoo. Kaqi marinausa sia amana fifaranoo.

<sup>4</sup> Nikoodeemusafa mi ufana iriseenoo kafia Yisuna irammirinoo qinau. Naqimasee faiqi firaa kafia aanaaqi kamaminoo fee, nari anoona aranandaki keeqafinanoo fee kafia maqaannoo fee. Yisu sia amana, sia minara qimariananoo.

<sup>5</sup> Yisufa iriseenoo qimaminoo qinau. Qinee anoona ufa ani qimamidaqa. Faiqi kaqimarinausa sia uqanna Anutuna ququsaki keeqeefaranoo. Anaasee aranandaki kambiqainausa quandafi Anutuna maraqunannai faqa fukasaa aanaaqi kamafinausa

kai Anutuna ququsaki keeqeefaranoo. <sup>6</sup> Faiqí nimaqifaqaasa quandaki nimaqifaqaasa maqefaranoo. Anutuna maraquina fannoo quandaki maraquina faqaasa Anutunara irirana faqaasa maqaannoo. <sup>7</sup> Qinee aniara kafa fukasaa aanaaqikinana kambiaqannee qunana sia anee minara irisee tautia. <sup>8</sup> Ufai oosana iria. Yaindari anidanoo fee. Yai fee fidanoo fee. Nari iriranamau fifana anee ufa kai irimariananoo. Anutuna maraquinannai faiqí moo fukasaa aanaaqí kirausa miqí kai idaqa. Anee sia mina oosana qafeennaranoo.

<sup>9</sup> Nikoodeemusafa mi ufana iriseenoo Yisuna qimaminau. Naqimasee maa ainainnafa anee qianandee iannoo fee. Sia qinee minara iridaqa.

<sup>10</sup> Yisufa iriseenoo maaqí qimasee nari qimaminau. Anee Isaraee maqannaa rakisirafa firaafa moo fannoo marianafa mariananoo anee naqimaseenee maa ufana oosana sia iridane. <sup>11-13</sup> Qinee kaifaa anoona ufa ani qimamidaqa. Maasa irunna ufana kai ani qimamidaqa. Maasa qafee marunna ainainara kai inni qimannimifaqa innikina moo fannoo sia maasa ufa irimariafanoo. Sia moo fannoo innaarunai ooru fimariasa maridaqa. Qinee faiqí nimaaku kai innaarunaindari qumuafanusa mindaraa ainainara irida maridaqa. Qinee maa maqanasaaqaraa ainainara ani qimamianana sia irinana naqimasee innaarunai ainainara qimamianana irinnaree.

<sup>14-15</sup> Yisufa kafa Nikoodeemusana qimamidanoo qinuu. Ooqai aadana maqa maaqaki sakaniugaindi Isaraee maqannaa moomoo ukaqannimisoofaqa kuqimariqau. Mooseefa mina qafamasee koopaa saunu naaree auquseenoo mina aanaaqianna minannai kai sakani auquseenoo mi saununasaa kukukukuqamaseenoo doo uqerasoofaqa kuqirarimarusaa mina qafamaseeqa sia kuqiqau findifiqau. Qini faiqí nimaaku miqí kai masee qini darusee aunirira saqarisaa uqera quqeeefaranoo. Qinee miqoo airiqa marianaqa aigamasa qini qiqafamasee irirana qinisaa rusirausa Anutufa nari naaru marirana nimiannoo. <sup>16</sup> Anutufa maa maqanasaa mariasara amuqusa firaqoo qunara nari amaaku moodaa uqanna amiqirana maqasaaqaraasa nimuna mina saqarikinausa sia kuridiranaki fifaranoo Anutuna naaru mariranaki fuageera nari amaaku nininuu. <sup>17</sup> Anutufa sia maa maqanasaaqaraa fasiqa anaasee nari ufa firaanaki mara aquanifeeruu nari amaaku maa maqanasaa quqannisanuu. Mifa faiqí anaasee nariranakinaana qumbaqqeeqee naaru asumu mariranaki quqannisaanifeera Yisuna quqanuu.

<sup>18</sup> Maqasaa fasiqa anaasee Anutuna faiqí namukinausa mina saqarikinausa Anutuna narirafa sia misasaa maridanoo. Sia Anutuna faiqí namukinausa sia mina saqarikinausa doo ooqai Anutuna narirafa misasaa maridanoo. Misa Anutuna moodaa faiqira sia misa nari irirana minasaa rusirai Anutuna narirafa minarakai doo misasaa maridanoo. <sup>19</sup> Anutuna narira oosana maaqimminoo maridanoo. Anutuna kaaqa qara qoomara foora Yisufa maa maqanasaa doo ani maridanoo. Faiqí nari oosana mandainaina maree marifanoo minara irinoo kaaqa qara qoomara Yisunara akooqai fanoo asukunara ridanoo. <sup>20</sup> Faiqí moo fannoo mandainaina maree marifa mifa kaaqa qaranara fidiqaa imarifa sia faasaana kooroo iannoo. Nari manda oosana kooroo qianoo qimasee asukunaki kaqi maridanoo. <sup>21</sup> Yafa yafee moo fannoo anoona oosana marainafa mifa suanisaa qooma mariqoo aninafa nari Anutuna ufamau fimari oosanna akooqoo kooroo ianifeera akoosaqa anidanoo.

*Yisufa Yoohaneena nammari nimimaruna faqa ufaqu ufafa.*

<sup>22</sup> Mi aukuanai Yisufa nari faiqí namufaqa Yudeeaa maqa maaqaki ooquree marikinoo Yisufa qufaqa mina faiqí namu faiqí anaasee nammariki keeqamannimaqee mariqau. <sup>23</sup> Yoohaneefa nammari nimimarufa mifa faqa mi aukuanna moosaa faiqí anaasee nammariki keeqamannimaqee marinuu. Mifa Saarimma maqusa aqa Aeenoonaa nammariki keeqamannimaqee marinuu. Miqoo nammari moomoo mandinoo marunara faiqí anaasee moomoo suqíqa marufanoo Yoohaneefa nammari auqamannimaqee marinuu. <sup>24</sup> Yoohaneefa mi kamuqoo kaqi maru kamuqoo nammariki keeqamannimaqee marinuu. Eeroodeefa sia karabusaki quqoo kamuqoo miqí marinuu.

<sup>25</sup> Yoohaneena faiqí namu faqa Yuda maqannaa fasiqa moo fannoo faqa Yuda maqannaa nammari keeqannimaqee maru oosannara ufa rainaqa. <sup>26</sup> Miqidaqa Yoohaneefe funnai oonuree qimamiqa qiqau. Oo ufasaa rakisirafa. Ooqai anee Yooradanna nammari dinni afainni qimannimuna fasiqafa Yisufa doo Yeerusareendari qumureenoo faiqí anaasee nammari auqamannimaqee marifaqa minni faiqí anaasee moomoo fidaqa.

<sup>27</sup> Yoohaneefa mina iriseenoo maaqí qimasee qimanniminuu. Sia moo fannoo kaqi iannoo. Anutufa aminafa kai miqiannoo. <sup>28</sup> Innee mi fasiqanara qini ufa qiafannanara irimariusa mariafanoo. Qinee minara maaqí qiafanafa. Qinee sia asaku mundirausa maridaqa. Qinee mina oorinni aniafanusa kai maridaqa. <sup>29</sup> Aqoondi fannoo amundara fasiqa aqa maridanoo mina ufa iriseenoo asasidanoo. Nari aqoondi anaasee maree marinara asasidanoo. Qinee Yoohaneesa Yisunara iriseeqa asasidaqa. Mifa amundara



fasiqara foora marifaqa qinee mina aqoondiara foora maridaqa mina ufa iriseega qini asasirafa firaafa maridanoo. <sup>30</sup> Mifa maqee maa fasannai uriqararafaikamambi mariannoo. Qinee qeeqa ooru dupirasaikamafi marianauro.

*Innaarunaidari qumu fasiqana ufa.*

(Yoohaneefa nammari nimimarufa mi ufana Yisunara qimasoofofanoo maa papiqana akara rimarufa mina amarafa Yisuna faiqi namukinaa moo Yoohaneefa nari amarana ufa iriseenoo akara rumaseenoo kafaa nari ufa Yisunara maaqi qimasee akara rinoo qinuu.)

<sup>31</sup> Mirindari qumifa mifa aiqamausa uriqararafa maridanoo. Maa maqanasaa qaraafa maa maqanasaa qaraanara kai qidanoo. Innaarunaidari qumifa mifa aiqamausa uriqararafa maridanoo. <sup>32</sup> Yisufa innaarunaidari qumifa minni maridanoo mindaraa ainainara nari afu qafainara nari aaqoo irinara qimannimimarifaqa sia irimariafanoo. <sup>33</sup> Mi ainainna qimannimina irisee kuqaa anoonnee qimasee marainna fasiqa aanaaseesa Anutunara kuqaa fee qimariasa maridaqa. <sup>34</sup> Anutufa innaarunaidari aiqamasaifa Anutuna ookinaa ufa kai qimannimidanoo Anutufa nari maraquna muduka amiqaifanoo miqidanoo. <sup>35</sup> Yisuna akoofa Anutufa nari amaakuara amuqusifanoo minara ridanoo aiqama ainaina mina aramandunnai quqaidanoo. <sup>36</sup> Anutuna amaaku ufa irisee mara mina saqarikinafa doo mifa Anutuna naaru marirana marasee minaki maridanoo. Anutuna amaaku ufa irisee rukiainafa Anutuna firaqoo aanooqirafa minasaa naaru mariannoo.

## 4

*Yisufa Samaria maqannaa anaasee faqa ufaqu ufafa.*

<sup>1</sup> Faiqi anaasee moomoosa Yisufunnai fimariafanoo nammariki keeqamannimaqee marinau. <sup>2-3</sup> Yisufa sia narifau keeqamannimaqee marinau. Mina faiqi namu mina ufasaa kai keeqamannimaqee mariqau. Yisufunnai moomoosa marufanoo Yoohaneefunnai moodaa moodaa kai fimariqau. Farisai amaana ufa qimarusa mi ufana iriseega munuqi miniqira ufa uqeraaqaa ufanoo Yisufa iriseenoo Yudeeaa maqa maaqa mminniseenoo Kariree maqa maaqaki kafaa finuu. <sup>4</sup> Yudeeaa maqa maaqa minnisee Kariree maqa maaqaki fidanoo Samaria maqa maaqa namuqaa maruna qambaani onuranau.

<sup>5</sup> Miqoo fidanoo Yisufa moo maqusa auqu Sikara mi maqusana paqurinau. Ooqai Yakooboofa miqoo maridanoo nammari sia marufanoo madika indufuseenoo minakinaa nammari neeneefanoo nari amaaku Yooshefaana amu nammari marifa marinau. Meemai uqana indufu maree nammari paqurinau. Sikara maqusa mi nammari madikana aqa marinau. <sup>6</sup> Yisufa kisaqa aataa fifi isoofoanoo amudaani rufanoo miqoo Yakooboona nammari madika paqurimaseenoo mina afainni ooqu marinau. Suani qambaanaikufanoo madika afainni ooqu marinau.

<sup>7</sup> Yisufa ooqu marifi marufanoo Samaria anaasee moo fannoo Yakooboona madikaki nammari sakarara ooqu finuu. Ooquree nammari madikaki sakeemarufanoo Yisufa innaaruqinoo qinuu. Maa anaasee anee nammari qini qimina naa. <sup>8-9</sup> Yisuna faiqi namu narana feefauriraree qimasee maqusa oorufufanoo Yisufa nariara mi nammari afainni ooqufaaqee marida qafoofanoo mi anaaseefa nammari sakararee qimasee quminuu. Qumuroofanoo Yisufa nammariara qufanoo mi samaria maqannaa anaaseefa tautinoo qinuu.

<sup>10</sup> Akasaa Yuda maqannaafammia. Sia Yuda maqannaasa Samaria maqannaasa kaafa piritaki naidammia. Qinee Samaria maqannaa maridaqammu. Anee naqi fee qidane nammariara qiniara innaaru qidane. Yisufa minara iriseenoo maaqi qimasee nari qimaminuu. Anee Anutuna nimira ainainara faqa qiniara faqa irimarinafa maridanoo qiniara irinaqau naaru marira nammari ani amini. <sup>11</sup> Mi anaaseefa mi ufana iriseenoo kafaa qimaminoo qinuu. Oo maa fasiqa ani nammariandanaa faqa nammari rarisara sanda faqa sia maridanoo. Maa madikafa meemai kisaagasaa maridanoo. Anee qianandee yaindaraanee naaru marira nammari mareennaree. <sup>12</sup> Maasa qisaifaqafa Yakooboofa ooqai maa madikana maasa indufu qisoona marifaqa maasa sakaidaqa. Nari faqa nari faiqi namu faqa nari sipsipauqa faqa maa madikanakinaa nammari neeneeusa mariqau. Anee aneennaraa Yakooboona uriqararasee qidane.

<sup>13</sup> Yisufa mi ufana iriseenoo kafaa qimaminoo qinuu. Aiqamausa maa madikanakinaa nammari nasaifanoo kaifaa kaifaa sakasaida neemarifanoo. Qinee nimianna nammari naifandinausa sia kaifaa nammariara nidiannoo. <sup>14</sup> Qinee nimianna nammari nasaifanoo maa aunduraindara naaru marira nammari maqee maqee uridanoo naaru marirana amiannoo.

<sup>15</sup> Mi anaaseefa mi ufana iriseenoo Yisuna qimaminoo qinau. Maa fasiqa maqee kai mi nammarina qimina namasaanoo taikafinaqa sia maqee maqee qumu nammari saka, ireeda maria.

<sup>16</sup> Yisufa mi ufana iriseenoo maaqi qimasee mi anaaseena qimaminau. Anee ooru aneenna afaaqi afiqee qumua.

<sup>17</sup> Miqi qufanoo mi anaaseefa qinau, qinee faiqi siaisa maridaqa.

<sup>18</sup> Miqi qufanoo Yisufa kafa qimaminoo qinau. Oo doo anee ooqai moodannai qisauku fasiqa maroonafa mariananoo. Maqee maraqaanna fasiqafa sia ani afaaqifau maridanoo moona afaaqi maridanoo. Anee kuqaa anoona ufa kai qimaqimiananoo.

<sup>19</sup> Mi anaaseefa mi ufana iriseenoo tautumaseenoo qinau Boo anee Anutuna tamummaqara fasiqa mariananoo qinee qafaidaqa. <sup>20</sup> Maasa Samaria maqannaasa maa aqaqannasaa Anutunara innaaru qidaqa amooqidaqa. Innee Yuda maqannaasa Yeerusa-reenniara Anutuna amooqimaria maqusa fee qidaqa. <sup>21-22</sup> Mi anaaseefa miqi qufanoo Yisufa qimaminoo qinau. Innee Samaria maqannaasa fifau amooqi mariafanoo sia minara irimariafanoo. Maasa Yuda maqannaasa Anutuna amooqimarianara irimarunaua maridaqa. Anutufa Yuda maqannaannai aiqama aanaamuru Anutuna nari-ranakinanaa uqeerreeqeenoo nari aqoondikiranaki quqannisaanoo. Oo maa anaasee amiqimasee qini ufa iria. Qusasaa anira aukuaana faiqi anaasee sia maa aqaqannasaa fee Yeerusareenni fee Anutunara innaaru qifaranoo, fifau aiqamatinai qini qikoona amooqifaranoo. <sup>23</sup> Qusasaa anira aukuaana doo maqee animaridanoo, faiqi anaasee kuqaa anoona Anutuna amooqimariasaa kuqaa nari maraqauna namufaqa kuqaa anoona ufa namufaqa amooqifaranoo. Anutufa miqiasara kai nariara qimooqidammiafoo qimaseenoo aididanoo. <sup>24</sup> Anutufa maraqauna oosana faqaafa maridanoo. Minara Anutuna amooqimariasaa nari maraqunannai faqa nari nimuqusa ookiqari faqa Anutuna amooqifaranoo.

<sup>25</sup> Yisufa mi ufana mi anaaseena qimamufanoo mi anaaseefa quandaqinoo Yisuna maaqi qimasee qimaminau. Anutuna asauku mundirafa mifa qumureenoo aiqama ainainara maasa qimaqiminaqa irianaura, qinee iridaqa. <sup>26</sup> Miqi qufanoo Yisufa qinau. Qinee misa maridaqa. Qinee ani faqa ufa qimarunaua misa maridaqa.

<sup>27</sup> Yisufa miqi qimarufanoo doo mina faiqi namu Sikara maqusaindari qumuraqau. Qumuree qafoofanoo Yisufa Samaria anaasee faqa ufa qimarufaqa tautumaseeqa qumee kai qafee mariqau. Misa Yisunara nanaree randaidanee mina faqa ufa qidanee qianeerusia minnisaga.

<sup>28</sup> Yisuna faiqi namu maqusaindari qumufanoo mi anaaseefa nari nammariana miqoo quqaseenoo kaqisamu maqusai ooruree nari maqannaaka qaqausa qimanniminoo qinau. <sup>29</sup> Innee qumuraifaqa muqusaanaqa qafaqa. Ooqai aiqama ainaina qinee maree mariafanna ainainara kooroo ifaqa irunna fasiqafa Anutuna asauku mundira fee maridanoo fee. Doo mai qumuree qafaqa. <sup>30</sup> Misa mina irisee doo nari maqusaindari ooqu Yisuna qafararee qimasee ooqu fiqau.

<sup>31-32</sup> Mi anaaseefa maqusai oorufufaqa Yisuna faiqi namu Yisuna qimamiqau ufasaa rakisira doo narana naa qufanoo mifa nariqa qimanniminau. Qini narana moo maridanoo innee minara sia irimariafanoo.

<sup>33-34</sup> Miqi qufaqa misa nari qimami nari qimami qiqau. Moo fannoo narana mina aminoo fee qufanoo Yisufa qinau. Qini narana narafa qini diqiqoonna Anutuna ufamau firafa maridanoo. Mina saika taikarafa qini narana maridanoo.

<sup>35</sup> Innee maaqi qimariafanoo. Quqoona qaara faqa qaara faqa aiqarainaga suana aiqunaaree qidaqa. Qinee minara maaqi qidaqa. Innee oonu afuqaki qafaqa doo maqee narana ana maridanoo. Aiqira aukuaana doo ani maridanoo.

(Yisufa miqooqaraa fasiqa anaasee Anutuna ufa qimannimifaqa irifandinnanara aiqirana kikiqusinoo maridanoo.)

<sup>36</sup> Yisufa minara kaifaa nari faiqinamu qimanniminoo qinau. Faiqi moo fannoo narana aiqimarifa mifa mina akiaqara maraidanoo. Naranara foora faiqi anaasee suqeerqeenoo innaarunai quqasainaga naaruara marirana maraqaqera. Misa naaruara marirana marasafanoo ummaqimarifa faqa aiqimarifa faqa moodaanaki asasifaranoo. <sup>37</sup> Maasa ufaiqari maaqi qidaqa. Moo fannoo ummaqidanoo moo fannoo aiqidanoo. <sup>38</sup> Qinee Yisusa inniara faiqi anaasee aiqaqera foora innaarunannai ubeekaqera niqiqeeqa. Mi afuqanaki innee sia mina ummaqimariafanoo. Akaa fasiqa anaasee Anutuna naaru marira asumu mi afuqanaki ummaqooofaqa innee kaqi unakusee misa kadaapisaa innee fifau faiqi anaasee mareeqee naaru mariranaki quqannisaafaqa fifau feefauru mareefaranoo.

<sup>39</sup> Yisufa nari faiqi namu faqa ufa qimarufanoo mi Samaria anaaseefa nari maqusai oorureenoo aqoonausa maaqi qimasee Yisunara qimanniminau. Mifa qinee ooqai

marafanna ainainara qimaqimifaqa iriqa. Miqi qufaqa mi maqannaasa moomoosa Yisunara kuqaa Anutuna asauku mundira fee qiqa. <sup>40</sup> Miqi qimasee oogureeqa Yisunara maasa faqa ani marianneera afeekaika mandee fuki faaki qimasoofanoo Yisufa misa faqa qaara faasaana marinau.

<sup>41-42</sup> Miqoo moomoosa Yisuna ookinaa ufa iriseeqa kuqaa anoonee qimasee quandaf-ufaqa mi anaaseena qimamiqa qiqa. Doo maqee maasa sia ani ufara kaifau anoonee qifarau. Nari ookinaa ufa iriseeqa minara kuqaa aiqama maa maqa maaqanakinaasa mandainainakinaana mareeqee asumu mariranaki quqannisaanina fee qidaqa.

*Yisufa uriqarara fasiqa faiqi andeeqaisoo ufafa.*

<sup>43</sup> Yisufa Sikaa maqanna faqa qaara faasaana marinoo quqaseenoo Kariree maqa maaqai nari maqa maaqai finau. <sup>44</sup> Yisufa nari maqa maaqara maaqi qinau. Tamum-maqara fasiqa maqusa maqusa fidanoo faiqi anaasee minara aaquqaifanoo mina ufa iriaqaifarano. Nari mina maqusanaasa nikoo nikaa masee sia minufa irifarano. <sup>45</sup> Yisufa Kariree maqa maaqai oonuroofaqa miqooqaraasa qafamaseeqa asasidaqamma minufa iriqa. Kariree maqannaasa akaqausa faqa Yeerusaree maqusai oorureeqa ainaaqarara qoomaqaki miqoo Yisuna qafamaqoosa faiqi sia auqaaqaa ira ainaina auqusoofaqa qafamaseeqa oorurandee qumu marufanoo Yisufa Kariree maqa maaqai qumuroofaqa asamasee uru afiqee muquseeqa faiqi anaasee amiqimaseeqa minufa iriqa.

<sup>46</sup> Yisufa Kariree maqa maaqakinaa kaqikaa maqusa auqu Kannaana maqusai oqai nari uainna nammari taikafufanoo nammarinnai auqu maqusanaki oonuranau. Mi maqusanaki faiqi firaafa uriqararafa moo marinau. Mina amaaku kuqira aurira auridano Kapeeranaumma maqusai maridano kuqirari marinau. <sup>47</sup> Mi fasiqafa Yisunara Yudeea maqa maaqaindari Kariree maqa maaqaki animarunara iriseenoo miqoo oonureenoo Yisuna irammirino qinau. Oo ufasaa rakisirafa amanee anee qini faqa Kapeeranaumma maqusai oonuree qini qimaaku kuqira aurira aurimarina andeeqaisaa. <sup>48</sup> Yisufa mina iriseenoo maaqi qimaseenoo nari qimaminau. Inniki sia moo fannoo qiniara kaqi kuqaa fee qimasee qinikina irifarano. Innee firaa ainaina faiqi sia amana auqaaqaa ira ainaina auqamasaanaqa qafeeqa kai qinikina irifarano.

<sup>49</sup> Mi uriqarara fasiqafa minara iriseenoo qinau. Oo qini karaambaiqa qini faiqi kuqirarammidano doo qini faqa ania.

<sup>50-51</sup> Yisufa iriseenoo maaqi qimasee qimaminoo qinau. Doo findifi fua ani maqusai doo ani amaaku findifuannoo. Mi fasiqafa mi ufana iriseenoo doo kuqaa fee qimasee doo quqaseenoo quandakufanoo aatata fidanoo qafoofaqa mi uriqarara fasiqana saika faiqiuqa aanai ani paqurimandee qimamiqa qiqa. Doo ani amaaku findifinoo, sia kuquannoo.

<sup>52</sup> Mina akoofa mina iriseenoo findifuna oosanara irammirufafa misa qiqa. Eenda suani gambaana mariifanoo miqinni qumifanoo doo ani faiqi afaqa doo asoosenoo. <sup>53</sup> Mina akoofa Yisunara onumafi iriseenoo qinau. Oo mi kamu qoo kai ani faiqi findifuannoo fee qifaqa irunna qoo kai doo findifinoo. Doo mi uriqarara fasiqafa nari faiqi anaasee faqa nari aiku asauku faqa Yisunara kuqaa Anutuna amaaku fee qimasee kuqaa mina saqarikiqua.

<sup>54</sup> Doo Yisufa qaara kari Yudeea maqa maaqaindari anireenoo Kariree maqasaa qaara ainaina firaa ainaina kooroomasooqafa qafaqau.

## 5

*Yisufa farumma afainni faiqi moo andeeqaisoo ufafa.*

<sup>1</sup> Yisufa Kariree maqamaaqai kaqikaqoo marinoo doo miqooqari findimaqeenoo Yuda maqannaasa amaanaa qoomaqirafa firaafa kambaqaaninnanara qufanoo Yisufa irisee minni ooru finau. <sup>2</sup> Yeerusaree maqusa faandaamura kooqi sipsipa kooqi fee qimarufa marinau. Mi kooqina aqa nammari farumma firaafa marinau. Mi farummana afainni aana fiqumarunnai qaindaira moodaanai qisauku qaindaira marinau. Mi farummana auqu Beetasata farummaa qimariqau. <sup>3</sup> Mi qaindairana ameemaana auqaana aurirana oosana oosana maree marusa misa mina ameemaana oqumari maree mi farummana afaiqara figummambi mariqau. [<sup>4</sup> Karaambaiqa qangiroo moo fannoo inaarunaindari nari kai iriseenoo moodaa kari moodaa kari aqufufanoo mi nammarina auqeesoofanoo indaaruu mi nammarinaki keeqoofa mifa keeqafufanoo nari aurirana taikasee fimarinau. Miqi marunara misa aurimarusa moomoosa Beetasata nammari afainni rakisida mariqau.] <sup>5</sup> Faiqi moo kisaagasaa aurimarufa misaki marinau. Moo fasiqa aiku asauku taikasee moo fasiqa asaukuqara taikasee dinni aiku taikasee dinni oonu qaaramoo marasee (38) aukuaana dinee uqee marufa marinau. <sup>6</sup> Yisufa mi

fasiqana qafoofanoo maqasaa faiqaqee ufanoo Oo kisaaqasaa aurimari fee qimaseenoo mi fasiqana maaqi qimasee irammirinau. Anee findifirara aididanoo fee.

<sup>7</sup> Mi dinee fasiqafa mina iriseenoo maaqi qimasee qimaminau. Oo rakisirafa, Anutuna qangiroo maa nammarina auqamasai faqa yafee qini mareeqee minaki quqaannoo fee qinee anuqi marunaqa moo fannoo kai kaqi kaqi aqufida taikasaida fidaqa.

<sup>8</sup> Yisufa mina iriseenoo quandaki qimaminoo qinau. Doo findi finana aneenna qaari raqandaamamareena doo fua. <sup>9</sup> Doo mi fasiqafa aqee uqanna doo mikari kai doo findi finoo nari qaari maramaree finau. Mi faasaana Yisufa andeeqasoo faasaana Yuda maqannaasa Sarirqa misa amaana faasaana marinau.

<sup>10</sup> Yuda maqannaasa uriqararusa mi fasiqana aurimaruna qafamasee aqiqa qiqau. Maana amaana faasaana maridanoo maasa sandufa rukieenana aneenna qaari aakai maqeenana nanaree sandufa rukiaidanee.

<sup>11</sup> Mi fasiqafa qinau, qini andeeqaqisaifa aneenna qaari raqandaamamaree fuannee qifaqa qeeqa qaari daakai maqa maree fidaqa.

<sup>12-13</sup> Misa mina iriseeqa irammiriqau. Yafee aniara aneenna qaari raqandaainana fuannee qifanee mi fasiqafa sia Yisuna auqu irinau. Faiqi anaasee moomoo marufanoo misaki kukeeqafufanoo mi fasiqafa sia amiqimasee qafanau.

<sup>14</sup> Kasooqaqee marikinoo amaana maqaki mi fasiqana paqurimandee Yisufa maaqi qimaseenoo qimaminau. Doo fee maqee qafeenee Doo findifuananoo doo maqee aneenna mandainaina minnimasaa. Sia miqinanoo kafa mandainaina firaafa uqanna anisaa aqufuannoo.

<sup>15</sup> Mi fasiqafa mina iriseenoo oonuree Yuda maqanna rakisirausa paqurimaseenoo qimannimino qinau. Yisufa kai qini amiqi mandai faqa findi fiqa. <sup>16</sup> Rakisirausa mina iriseeqa doo miqooqari Yisuna arira ufa qimariqau. Yuda maqanna amaana faasaana andeeqaisoonara arirariqau. <sup>17</sup> Yisufa mina iriseenoo rakisirausa maaqi qimasee qimannimino. Qini qikoofa sia moo faasaana minnisaidanoo aiqama faasaana ainainidanoo. Qinee faqa miqikaimmianauroo.

<sup>18</sup> Yuda maqannaasa mi ufana iriseeqa doo kuqa ariraree qiqau. Misa Yisunara amaana faasaana sandufa rukiasai faqee qimariqau. Sia minara kai mifa Anutunara nari akoo fee qunara minara faqa arirari mariqau. Mifa Anutunara qini qikoo fee qunara misa nanaree maqasaa fasiqa fannoo unna qidana Anutuna amanakai maridee qidanee qimasee arirariqau.

*Anutufa nari amaaku Yisuna aiqama ainaina afeeka amu ufafa.*

<sup>19</sup> Yisufa kafa qimannimino. Qinee kuqaa anoona ufa inni qimannimidaqa. Qinee sia moo ainaina qeeqaraa auqaidaqa qeeqa qikoona qafamasee mifa indeekai idaqa. Akoofa moo ainaina auqafanoo amaaku miqikaimmidanoo. <sup>20</sup> Qini qikoofa nari amaaku qiniara kaaqa amuqusifanoo minara qiniara ridanoo nari aiqama ainaina auqaina qini faqa kai uqaqifiqaidanoo. Maqee maa fasiqafa fira teeroo maraidanoo aukuaana aukuaana apatara aupuree marifanoo qini qikoofa dadaaqifaqa andeeqasana innee mina qafee fee. Kasooqaqee qini qikoofa fira ainaina dadaaqinaqa auqaanaqa qafee tautifanoo naaqqeeneo nimudaani faqa kai qumooqukamasaannoo. <sup>21</sup> Qini qikoofa kuqira fasiqauqa findifumannisaidanoo. Qinee faqa miqikai iqa qeeqa didiranannoo kai kaqi marirana akaqausa nimianauro. <sup>22</sup> Qini qikoofa sia maa maqanasaaqaraasa mandufa irisee andeeqannisannoo. Nari amaaku qini qimiqaifaqa qeeqa qikoona Anutuna iriramau misa manda ufa andeeqannisanauro. <sup>23</sup> Aiqaamausa qini qikoona Anutunara naaqqaanifeera miqinau. Qiniara naaqqaindee kai iqa qini qikoonara naaqqaanifeera miqinau. Faiqi moo fannoo moona amaaku sia mina aqoondikinana mina akoonna faqa miqikai inana miqanda qisakoosa sia niqoondikinnaranoo.

<sup>24</sup> Yisufa Yuda maqanna rakisirausa qini qimannimidanoo qinau. Qinee kuqaa anoona ufa inni qimannimidaqa faiqi moo fannoo qini ufa irisee qini diqiqamaqoona saqarikinana mifa doo naaru mariranaki maridanoo. Miqinna fasiqafa sia Anutuna arirufaki mariannoo. Anutuna narirana doo maa maqee aiqaqareenoo kaqi mariranaki doo keeqanoo maridanoo. <sup>25</sup> Qinee anoona ufa inni qimannimidaqa. Moo aukuaana doo adeedi ranoo marida doo animaridanoo maa maqanasaa kaqi maridaqa Anutuna nariranaki mariusa kuqufusa Anutuna amaaku qinaqa iriseeqa doo narirafa ainaaqarainaga kaqi mariranaki keeqeefaranoo. <sup>26</sup> Kaqi marira oosana qini qikoonaki kai marifanoo faiqi anaasee nimidanoo. Miqikai inoo naramaaku qini faqa kai kaqi marira nimira oosana doo qini qimiqaaisa maridaqa. <sup>27</sup> Mifa Anutufa nari amaaku faiqi nimaaku fee qimasee faiqi anaasee mandainaina andeeqannisarana nari amaaku qinisaa quqaqaisa maridaqa. <sup>28</sup> Innee qini mi ufana irisee sia tautiaqa. Kasooqaqee moo aukuaana anirainaga aiqama madikaki kuqirausa mariasa misa faqa Anutuna amaaku qini ufa iriseeqa madikakiqari

findi fifaranoo. <sup>29</sup> Akaqausa andeeqara oosana maree marusa findifi kaqi mariranaki fifaranoo. Akaqausa manda oosana maree mariusa misa findi fiqa Anutuna ufa firaanaki aquffifaranoo.

*Yisuna oosana akooroou ufafa.*

<sup>30</sup> Yisufa kaqi qimannimidanoo qinau. Sia qeeqaraa moo ainainianauro. Anutufa dadaqiinaqa faiqi anaasee ufa irisee andeeqannisaanauro. Sia qeeqa iriranamau afeekaikamandee fidaqa. Qini qikoofa qini diqiqamaqaimau kai fidaqa.

<sup>31</sup> Qinee qeeqaraa ufa qimannimianaqa siamma irifaranoo narikai qidaqinoo unna qidaqiifoo qifaranoo. <sup>32-33</sup> Anutufa qini dadaaqimarifa maridanoo mifa anoona ufa kai qiniara qimarifa maridanoo, sia qeeqa kai qianauro mifa dadaaqianno. Innee Yuda maqannaa rakisirausa ufa anoona iriannee qimasee faiqi niqiqaiqaqa Yoohaneefa nammari nimimarifunnai ooquree iriqau. <sup>34</sup> Qinee sia maqasaa fasiqa moo qini dadaaqiranara randaidaqa Yoohaneenara qidaqa. Innee naaru mariranaki fuaqee qimasee maa ufana qimannimidaqa. <sup>35</sup> Yoohaneefa nammari nimimarifa qoomara fooqaana marinoo kaaqa qaidanoo rupannoo inau. Innee mina kaaqa qaranaki qusasaa kai keeqafiqa asasida mariqau. <sup>36</sup> Yoohaneefa nammari nimimarifunna ufa anoona maru fanoo qinindi minaindi arusee uriqaranoo maridanoo. Qinee aniree faiqi sia amana auquaqa ira ainaina qini qikoofa qimuna auqaqa fimarunna ainaina fannoo qini duqu firaqoo uqeeranno. Uqeerinaqa qafamasee qiniara Anutufinaidari qumu fee qifaranoo. <sup>37</sup> Sia qinee auqee marunafa kai qini duqu uqeeraidano. Qini qikoofa qini diqiqamaqaifa mifa faqa qiniara ufa qidanoo dadaaqidanoo. Innee Yuda maqannaa uriqararusa ooqaindari sia mina ufa irimariafanoo. Innee sia mina afiri qafaanara sia uqanna mina iriranamau firanara irimariafanoo. <sup>38</sup> Innee qini qikoofa diqiqoonara sia mina irimariafanoo minara inniki sia mina ufa maridanoo. <sup>39</sup> Innee Mooseena sandufa faqa Anutuna tamummaqara fasiqauqa akarakinaa ufa asaana ridaqa naaru marira aanara randaidaqa mi sandufafa kai qiniara qimannimimarifaqa sia irimariafanoo. <sup>40</sup> Innee minara iridaqa sia qinee unnannai aniree naaru marirana maree mariafanoo.

<sup>41</sup> Yisufa Yuda maqannaa rakisirausa kaqi qimannimidanoo qinau. Qinee sia inni naanna raida faiqi qimooqiaqee qirainainara randaidaqa. <sup>42</sup> Qinee inni irirana amiqimasee iridaqa niqafauna inni naundura nimuqusaki Anutunara rirafa sia maridanoo <sup>43</sup> Qini qikoofa Anutufa qini diqiqoofaqa qumu marunafa sia innee qiniara irisee asasamasee qifqeeqee animariafanoo. Moo fannoo kasooqaqee nari manda aidiranaqafaqa anirainafaqa innee mina asasamasee oonu afiqee anifaranoo. <sup>44</sup> Innee kaaqa naramooqirana naramooqiranara ridaqa Anutuna amooqiranara sia rimariafanoo. <sup>45</sup> Innee qiniaree quandaqinoo Anutufinnai maasa darira ufa qiannoofee fee qidee sia qianauro. Mooseefa mifa kai inniara nimaarusirufa qiannoo. Innee maasa minasaa kai mundimariasee qimariafanoo. <sup>46</sup> Innee Mooseena sandufa fifau asaana rimariafanoo mina ufa iridaqau qiniara irini, qiniara akara rumaqoofa maridanoo. <sup>47</sup> Innee mina ufa ririmma sia irimariafanoo naqimasee qini ufa irifaree. Sia amana irifaranoo.

## 6

*Yisufa faifa tauseenna fasiqa narana nimu ufafa.*

*(Mat 14:13-21; Mak 6:30-44; Ruk 9:10-17)*

<sup>1</sup> Yisufa Yuda maqannaa rakisirausa mi ufana qimannimiseenoo miqooqari Kariree firaarumma dinni afainni finau. Mi farummana auqu moo marinau, Tibeeriasa farumme qiqau. <sup>2</sup> Faiqi anaasee Yisufa amiqi amiqiunara aurimarusa findifunara iriseeqa moomoosa uqanna afaqee fiqau. <sup>3</sup> Yisufa nammari afainni kaqikaa amuaqunamusaa nari faiqi namu faqa ooruree ooguqarinau.

(Ooqai Isaraee maqannaa nikaaku Isipa maqannaa karafusaki marufanoo Mooseefa qufaqa sipsipa aanaaqiuqa arusee mina fidikauqa tatiiseeqa nari kooqimau raaramasoofanoo Anutuna qangiroo fannoo narirara anireenoo fidika qafamasee ainaaqareenno Isipa maqannaasa kai ooqa faiqiuqa narinau. Miqooqari Isaraee maqannaasa oosana arasee Anutuna qangiroo ainqaaro qoomaqana sakasaida neemariqau.)

<sup>4</sup> Mi ainqaara qoomaqana Yeerusaree maqusai qusasaa kambiqararee qimarufanoo mi fasannai Yisufa Kariree nammari afainni marinau. <sup>5-6</sup> Yisufa nindafoofaqa faiqi anaasee moomoo nari marunnai amuaqunamusaa urimarufanoo nindafeenoo Firipina irammirinoo qinau. Yisufa faasai Firipifa ininnanara iriseenoo Firipina kaqi amana-masee qafarara maaqi qimasee iranau. Firipi faiqi anaasee moomoo nianaindari uri mariafaqa yayi fee misa narana feefauru mandee nimianauree.

<sup>7</sup> Firipifa mi ufana iriseenoo maaqi qimasee qimaminoo qinau. Faiqi anaasee muduka moomoo mariafaqa moomoo ooni maramaree oonu feemu moomoo feefauru mamaree

minisaifanoo sia misa nimana mariannoo. Moodaa moodaakai namasee naarara fifaranoo.

<sup>8</sup> Yisuna faiqi namukiqari moo mina auqu Andurufa, Simoona moo auqu Peetooroona akaqa marufa mifa mina iriseenoo qinau. <sup>9</sup> Kumaaraa moo kaqikaafa mai maridanoo nari sakuma feemu moodaanai qisauku faqa noodaanna gaaraqanda faqa uaqee idanoo. Amanee mina mareennaree. Oodaa sia amanaikiannoo.

<sup>10</sup> Yisufa mina iriseenoo qinau. Innee faiqi anaasee qimannimifaqa qusau ra-sooqnookamasee ooqumariyaqa. Qusau moomoo misaqa marinau. Faiqi anaasee mina iriseeqa aiqama ooqumariyaqa. Faifa tauseenna fasiqa mariyaqa. Ooni saqarimma auqiga mariyaqa. <sup>11</sup> Ooqu marifufanoo Yisufa mi kumaaraana sakuma feemu qumareenoo Anutunara dufi dufi qimaseenoo doo ruqi ruqimneegeenoo faiqi anaasee niminau. Noodaanna qaara faqa miqikaimasee niminau. Nimisoofaqa namasoofoanoo aiqama nimuaqau inau. <sup>12</sup> Aiqama nimuaqumasoofoanoo Yisufa nari faiqi namu qimanniminoo qinau. Ataraasa mareeqee uqa ruaqa sia kaqikaana rairaaiani. <sup>13</sup> Misa irisee eedoo qimasee ataraasa rumasee asaana rumasee qisaukuqara taikasee qikunni ooqu gaaraqanda marasee uqa qumbiqanoo marinau. Mi ataraasana moodaanai qisauku sakuma feemusaagaaraana uqariyaqa.

<sup>14</sup> Mi fasiqa anaasee mina qafoofanoo sia faiqi undeefanoo naaquqanau. Naaquqamasoofoaqa qiqau ooqai tamummaqara fasiqauqa moo tamummaqara fasiqa kambiqaaninnanara akara rumaqoofa doo maana narimma animaridanoo. <sup>15</sup> Yisufa misa irirana iriseenoo misa afeekaikamasee qini qumareeqee maa maqana saagaaraa karaambaigaika maqimaqee foora qimasee quqaseenoo doo nariara quqasee aaqanai ooruree miqoo marinau.

*Yisufa nammari amuaqumafu ufafa.*  
(Mat 14:22-23; Mak 6:45-52)

<sup>16-17</sup> Yisufa aaqanai fufaqa mi eendanaki sia kafaqa qumunara mina faiqi namu Kariree nammari afainni ooqureeqa sipaki akaramafiqa nammari dinni afainai Kapeeranaumma maqusai nammari amuaqumau fitaqararee qiqau. <sup>18-19</sup> Misa afainai fidaqa aikannai nammari ruakairisaidaqa fimarufaqa qaara maqusa fiaaqarana amanasaa kaiqaaqoo kisaagasaa oonuroofanoo ufai fraafa uqinoo nammari faqa misa kanuqa faqa amakaurinau. Amakaurufaqa qafoofanoo Yisufa nariara misunnai kanuqaqa animarinau nammari amuaqumau aiku ramaasida aninau. Misa mina qafamasee tautumasee kaaqa naaquqoofoaqa rufiaqa. <sup>20</sup> Rufioofanoo Yisufa nindafeenoo qinau. Sia rufiaqa, qinee maridaqa. <sup>21</sup> Misa Yisuna mareeqee sipaki quqasee firaree qu maqusanai aaqee kai dauni oonuraqau.

*Faiqi anaasee Yisunara randoo ufafa.*

<sup>22</sup> Yisufa nimu feemuna noosa nimuqoo kai faigaqa. Kananaana iqaqoofoaqa findifi sipara randoosia moodaakai miqoo maruna. <sup>23-24</sup> Yisuna faiqinamu moo kanuqaki fufaqa Yisunara sia misa faqa fiifoo qimasee Tibeeriasa maqusai maqee maqee nimiru kanuqausa aniroofaqa doo minauqaki akaramafufaqa Kapeeranaumma maqusai Yisunara randarara minauqaki fiqau.

*Yisufa nariara naaru naaru naranara maqi mariranara qimaqoo ufafa.*

<sup>25</sup> Misa Kariree nammari fitaqee muqu afainai onnureeqa Yisuna paqurimasee maaqi qiqau. Oo ufasa rakisirafa anee yairee fee mai anireenee.

<sup>26</sup> Yisufa iriseenoo quandaki qimanniminoo qinau. Qinee kuqaa anoona ufa inni qimannimidaqa. Qinee qeeqa afeeka uqannifqaunannara innee sia minara kai irisee qiniara randaidaqa. Innee feemu namasaafanoo nimuaquinoo maqee qumiqaraininna ainainara innee minara kai qiniara randee mariafanoo. Yisufa kaifaa quandaufanoo qimanniminoo qinau. <sup>27</sup> Innee sia dauni putaa ira naranara ainainiaqa. Naaru marirana nimira naranara minara ainainiaqa. Qinee maa naranna qinee faiqi nimaaku inni nimianaura. Qini qikoofa Anutufa qiniara aidimarifanoo nari aiqama ainaina qini daaku qimaqasaina inni amana mi naaru marira naranna nimianaura.

<sup>28</sup> Misa minara iriseeqa Yisuna irammiriqa qiqau. Nanee qimasee Anutuna ainaini-anauree.

<sup>29</sup> Yisufa iriseenoo maaqi qimasee qimanniminau. Innee maaqimasee Anutuna ainainamaisaqa. Nari aqigainna fasiqana mina saqarikiqa minasaa naundura rusiaqa. Anutuna ainainirafa miqimminoo maridanoo.

<sup>30</sup> Misa mi ufana iriseeqa kaifaa irammiriqa qiqau. Anee nana moo ainaina firaa ainaina auqainaqa maasa qafamasee aniara kuqaa Anutuna asauku mundira fee qianuree anee nana ainainee auqinnaree. <sup>31</sup> Maasa qisaifaqausa aadana maqa maaqaki

pupusamuara foora aqufuna narana neemariqau. Mooseena akara minara maaqi qinau. Innaarunaidaraa feemu narana mifa niminau maqi qinau. <sup>32</sup> Miqi qimasoofoano Yisufa kafaa qimanniminoo qinau. Mooseefa maru aukuanna pupusamuara maqi ira narana sia mifau nimimarinau. Anutufa innaarunaidari nimimarinau. Sia anoona narana nimimarinau. Doo maa aukuanna qinee qumu marunnaqoo qinisaaqari anoona naranara foora inni nimidanoo. <sup>33</sup> Anutufa nimunnaranna innaarunaidari qumu maridanoo maa maqanasaa mariasa naaruara marirana nimidanoo.

<sup>34</sup> Mi fasiqa anaaseesa iriseeqa qiqau mi feemuna naaru naaru maasa qiminaqa naa.

<sup>35</sup> Yisufa kaifaa qimanniminu. Qinee kaqi marira nimirana narana marunaua mari-daqa. Faiqi moo fannoo qinee marunnai anireenoo qini saqarikinafa mifa sia kafaa naranara foora aararaannoo sia kafaa nammariara foora aidiannoo. <sup>36</sup> Faasai inni qimannimundee kai innee imariafanoo innee qini qiqafaidaqa sia anoonee qimasee qinisaa naundura rusimariafanoo. <sup>37</sup> Qini qikoofa eedoo qira irirana niminausa misa qinee unnannai nari naundura ubeekama qimaqeeferanoo. Miqi mariasa qinee ianannai animariasa sia niqifaanaqa fifaranoo. <sup>38</sup> Qinee qeeqa qikoona iriranamau innaarunaidari sia qinee qeeqa qumiqa, qipaqeenau ufara mina ainainirara qumiqa minara qinee sia moona aqifaananoo fuannoo. <sup>39</sup> Mina ainaina auqarafa maaqinoo marina qini qiminau. Aiqama qini qikoofa qini qutaqama qimaqaaqaisa kai sia moo fannoo kaqinni fuannoo. Aiqama uqanna taikara faasaana qinee misa uqereeqee qeeqa naaru mariranaki quqaanau. <sup>40</sup> Qini qikoofa maanara ridanoo. Mina amaaku qiqafee mariasa minasaa irirana rusimariasa mi kamuqoo kai naaru marirana mareferanoo. Taikara faasaana qinee misa uqereeqee naaru mariranaki quqannisaanau.

<sup>41</sup> Yuda maqannaasa uriqararaua mi fasiqa anaaseesaki mariasa misa Yisuna ufa irisee mifa nariara innaarunaidari qumuafanaua maridee qidanoo. Miqi qimasee dapi dapi ufa qimariqau. <sup>42</sup> Misa maaqi qiqau maafa Yisufa Yooseefaana amaaku maridanoo. Mina anausa akausara maasa iridaqa. Naqi fee qidanoo fee nariara innaarunaidaraasee qidanoo fee. Akoqooqaraafa maridanoo.

<sup>43</sup> Yisufa iriseenoo qinau sia innee narinni narinni qiniara manda ufa qiaqa. <sup>44</sup> Sia faiqi moo fannoo kaqi qinee ianannai anifaranoo. Qini qikoofa rarisameeqee quqainna fasiqa aanaaseesa misa kai qini naundura ubeekama qimaqeeferanoo. Misa miqifaqa taikara faasaana misa uqereeqee naaru mariranaki quqannisaanau. <sup>45</sup> Ooqai tamummaqara fasiqa maaqi qimasee akara riqau. Anutufa aiqamausa naamuqira ufa qimanniminnoo. Qinee mi ufana iridaqa maaqi qimasee inni qimannimidaqa. Aiqamausa qini qikoona ufa iriseeqa mina aamua qira ufa irimariasa qinee ianannai anidaqa. <sup>46</sup> Sia moo fannoo qini qikoona qafeenoo. Anutufnaindari qumufa kai mifa kai qini qikoona qafeenoo.

<sup>47</sup> Qinee anoona ufa uqanna qimannimidaqa faiqi moo fannoo irirana qinisaa rusimarinafa naaru marirana doo mareenoo. <sup>48</sup> Qinee kaqi marira feemuara foora marunaua maridaqa. <sup>49</sup> Ooqai inni nikaaku nikaaku Mooseena faqa kaasau maqa maaqakina nimarau aukuanna innaarunaidaraa feemu minauqa manna fee qimariqau. Mi feemufa ufaasu marifandinna feemuna namasaida kisaqasaa moomoo aukuan mariufaqa kaqi kuqimariqau. <sup>50</sup> Maa qinee kaqi marira feemuara foora maridee qimarunaua faiqi namasee sia kuqifandinna feemusa maridaqa. <sup>51</sup> Qinee kaqi marira feemu innaarunaidari qumu marunaua maridaqa. Faiqi anaasee moo fannoo qinee amianna feemuna namasainafa naaru naaru mariannoo. Qinee nimianna feemufa qini qimaqi maridanoo. Maa maqa maaqana afaaqasasa mariasa kaqi mariaqeera nimidaqa.

<sup>52</sup> Yisufa miqi qimasoofaqa Yuda maqannaasa nari afumau nari afumau aanoo qidaqa qiqau. Naqimasee maa fasiqafa nari amaqi maasa qiminaqa naanauree qidaqinoo fee.

<sup>53</sup> Yisufa iriseenoo qimanniminoo qinau. Qinee kuqaa anoona ufa qimannimidaqa. Innee qini faiqi nimaaku qimaqi fidika sia naifanoo sia kaqi marirafa inniki mariannoo. <sup>54</sup> Moo fasiqa anaasee fannoo qini qimaqi faqa qini fidika faqa namasainafa naaru marirana doo mareenoo, marainara taikara faasaana mina uqereaanau. <sup>55</sup> Qini qimaqi narana uqanna maridanoo qini fidika nammari uqanna maridanoo. <sup>56</sup> Faiqi anaasee moo fannoo qini qimaqi fidika neemarifa qiniki maridanoo qinee minaki faqa maridaqa. <sup>57</sup> Qini qikoofa Anutufa kaqi marira oosana faqaafa qini diqifoofaqa maaqoo maridaqa minasaaqaraa marirana maridaqa. Miqi kai inoo qini namasainafa qinisaaqaraa marirana maraannoo. <sup>58</sup> Doo qinee innaarunaidaraa naranara foora maridaqa. Sia inni nisaifaqausa neemaru naranasara foora maridaqa. Misa mina namasee mariiqa aiqama faiqi faiqi oosanamau fiqa kuqimariqau. Maa naranna namaseeqa naaru naaru kaqi marifaranoo.

<sup>59</sup> Yisufa mi ufana Kapeperanaumma maqusai ufa suqira maqaki qimanniminu.

*Naaru naaru mariranaki fifandinna ufausa akiaqa.*

<sup>60</sup> Yisuna faiqi namu akaqausa mi ufana iriseeqa qiqau. Oo yafee maa ufana amana iriannoo fee. Irisee sia auqaaqaa ira ufa maridanoo.

<sup>61</sup> Misa miqi qimasee noori runusee randoofanoo Yisufa narí kai iriseenoo qimanniminoon qinau. Innee qini amiqira afeeka ufara rufiasee qini minnisarree qidee. <sup>62</sup> Qinee kafa uqeeree qumuafannannai ooru fuañaqa innee mina qafamasee naqi fee ifaree. Mikari qini ufara kuqaa anoonee qimasee firaqoo rufieefaranoo. <sup>63</sup> Amaqiaara qunnana amaqi fifau ainaina maridanoo sia mina naaqee qíqa maraquna fannoo kai anoona maridanoo mifa kaqi marirana nimidanoo. Qinee qeeqa dookinaa ufa qimannimimarunafa mifa maraquna maridanoo kaqi marirana anoona maridanoo. <sup>64</sup> Doo qinee akoqoo kooroomasee qimannimunaqa innee akaqausa siamma irimariafanoo. Yisufa narí faiqi namu oosana faasai irinau. Misaki akaqausa mina ufa sia irusa faasai Yisufa nindafanau. Misaki moodaa fannoo ueeqaaninnana faasai qafanau. <sup>65</sup> Yisufa minara maa ufana atiki kafa qimanniminau. Qinee minara faasai qunnana sia amana moo fannoo narí kai qinee ianannai aniannoo. Qini qikoofa dadaaqinanoo kai qinee ianannai aniannoo.

<sup>66</sup> Miqi qimasoofaqa Yisuna faiqi namu moomoo Yisuna minnisee sia kafa mina faqa firara qíqau. <sup>67</sup> Yisufa miquna nindafamasee quandaqi narí faiqi namu (12) qisaukuqara taikasee qikunnoo ooqu qaara marasee faiqi namu maaqi qimasee qimanniminoon qinau. Innee faqa misa naanna reefaree qini minniqiseeqa fifaree.

<sup>68</sup> Simoona moo auqu Peetooroofa mina iriseenoo Yisuna qimaminoo qinau. Oo karaambaíqa ani minnisee yanasaa fee atooqaanauree. Naaru marirana nimira ufa anee kai marananuananoo. <sup>69</sup> Doo maqee maasa aniara kuqaa anoonee qidaqa aniara Anutufinaidari naaquqarafa mariifoo qidaqa.

<sup>70</sup> Yisufa iriseenoo kafa qimanniminoon qinau qinee qeeqa kai qisaukuqara taikasee qikuqara marasee fasiqa naarauna qini faqa nimariafanoo. Moo fannoo inniki afaanna maridanoo. <sup>71</sup> Yisufa afaannee quna Yudasinaara narí qumee qimirinau. Yudasifa Keeroota maqusaanaafa moo fasiqa Simoona amaaku marinau. Yudasifa Yisuna (12) qisaukuqara taikasee qikunni ooqu qaara marasee faiqinamu misaki marufa marinau. Kasooqaqee mi fasiqafa Yisuna uqeeqasainaqa aunirira saqarisaa arifandinanara Yisufa minara oonu mafi iriseenoo afaanna fee qinau.

## 7

*Yisufa narí ainaina faqa ufaqu ufafa.*

<sup>1</sup> Miqooqari Yisufa Kariree maqa maaqaki nimirinau. Sia Yudeeaa maqa maaqai finau. Yuda maqannaasa miqoo mina arira ufa qimarunara sia finau.

(Ooqai Isaraee maqannaasa Isipa maqusaindari qaara fasiqa niku nisauku taikasee aukuaana nifuru faiqaqa uqiqaana maaqaki fimarufanoo Anutufa innaarunai maridanoo narí afeekannai Isaraee maqannaasa maqasaqaraasa qumee dadaaqidanoo aandau narana nimimarufaqa naqafimariqau. Kaasau maqa maaqai nini iusa oonu randee nári maqasaa Isaraee maqasaa animaridaqa aukuaana aukuaana Yeerusareenni suqufidaqa uqiqaanarasaida faigeeunara iriseeqa minara afaarurumanaida nári naambeeqa nári naambeeqa uqiqaana maqa usakasaida dinni qisauku taikasee dinni ani qaara marasaida (7) faasaana minaki faiqaida qoomaqa sakasaida namasaida minara susu imariqau.)

<sup>2</sup> Yuda maqannaasa qoomaqa firaafa uqiqaana maqa qoomaqa adeedi roofaqa Yisuna akaqaafasaa Yisuna qimamiqa qíqau. <sup>3</sup> Maa Kariree maqa maaqa minniseenana Yudeeaa maqa maaqaki fua. Oonurinaqa miqoo ani ufa irimariasa firaaf ainaina uqeeqee marianana misa faqa uqannifiqaa. <sup>4</sup> Faiqi moo fannoo narí auqu uqeeraanee qimasee sia moo ainaina uqeeqee mariana kukeeqaidanoo aigama ainaina kooroomasainaqa aigamausa mina qafaqa, anee faqa miqiaqaana. [<sup>5</sup> Yisuna akaqaafasaa sia Yisunara irimariqau. Fifau maqasaa fasiqa fee qimariqau.]

<sup>6-7</sup> Yisufa iriseenoo qimanniminoon qinau. Qini anoona aukuaana sia adeedi ranoo maridanoo. Innee faiqi faiqi aigama faasaanara maasa aukuaanee qimariasa mariafanoo. Maa maqa maqanasaqaraasa sia inniara fidiqaaidanoo. Qiniara kai fidiqaaidanoo. Qinee maqee maqee misa manda ainainara kooroomannimaqaunaqa minara kai qiniara fidiqaamaqimaqee mariafanoo. <sup>8</sup> Yisufa narí akaqaafasaa kaqi qimanniminau. Innee kai Yeerusareenni ooru fuaqa. Qinee sia mi qoomaqanara inni naanna ree akoqooqoo ooru fuanauara qini anoona aukuaana sia qusa raidanoo. <sup>9</sup> Yisufa miqi qimaseenoo miqoo Kariree maqa maaqaki kaqi marinau.

*Yisufa uiqaana maqaki qoomaqa neemaru ufafa.*



<sup>10</sup> Mina akaqaafasaa Yeerusaree qoomaqai ooru fufanoo Yisufa inaaqianna qumee moo aatata ooru finau. <sup>11</sup> Yeerusaree maqusa qoomaqaki Yuda maqannaa rakisirausa Yisunara randoosia narí qimami narí qimami qidaqa qiqau. Mifa yai fee marinoo fee.

<sup>12</sup> Qimasoofaqa faiqí anaasee Yisuna aufakiana qumee narí qimami narí qimami qimariqau. Akaqausa Yisunara amiqira fasiqee qimariqau. Akaqausa faiqí anaasee nikaru qimari fee qimariqau. <sup>13</sup> Sia moo fannoo Yisunara akooqoo qimariqau. Narí Yuda maqannaa uriqararausara rufiasee qumee kai qimariqau.

<sup>14</sup> Qoomaqa taikarara imarufanoo Yisufa Yeerusaree amaana maqaki keeqafinoo faiqí anaasee ufa qimanniminu. <sup>15</sup> Yuda maqannaa faiqí firaasa mina qafamasee firaqoo tautiqa qiqau. Maa fasiqafa sia sukuraki keeqemarifa. Naqi fee mandeenoo firaq irirana iridanoo fee.

<sup>16</sup> Yisufa minara iriseenoo aiqamausa qimanniminoo qinau. Qinee qimannimira ufa sia qeeqaindi maridanoo qini diqiqoofa Anutufa mina ufa qimannimidaqa. <sup>17</sup> Qini ufa Anutunaindi fee qinee qeeqa fee qidee. Faiqí moo fannoo Anutuna iriranamau firarimarifa qini ufara Anutufa fee qiannoo. <sup>18</sup> Faiqí moo fannoo narí ufa kai qidanoo narí auqu kai ugeeraidanoo. Faiqí moo fannoo narí aqiqainna fasiqana auqu ugeeraree qimarifa mifa kuqaa ufa qidanoo, sia nikaruqirafa minaki maridanoo. <sup>19</sup> Mooseefa sandufa akara rumaqoona inni nimufaaqee innee mina qumaree mi mau fimarunausee qimasaidafa fifau qidaqa inniki moo fannoo sia mi mau fimariafanoo. Innee moo mau fidaqa qini kuqa darirara qimariafanoo.

<sup>20</sup> Yisufa miqi qimasoofaqa misa aiqama maaqi qimasee narí qimamiqau. Ani aunduraki faaana marifana anee miqi qimariananoo. Yafee moo fannoo ani kuqaruannoo fee sia moo fannoo.

<sup>21</sup> Miqi qimasoofanoo Yisufa maaqi qimasee narí qimanniminu. Qinee faiqí sia auqaaqaa ira ainainna moodaa auqanaqa innee aiqama tautiafanoo. <sup>22</sup> Mooseefa faiqí aanaaqiuga nipata aukimarunara fainanduqu nisaqee qimarinau, innee minara irisee maasa amaana Saririqasaa miqimariafanoo. Sia Mooseefau mi oosanna aranau. Narí akeeku akaakundi mareenoo miqi qinau. <sup>23</sup> Innee Mooseena sandufa rukiaanoo qimasee faiqí aanaaqiuga maasa amaana Saririqasaa fainanduqidaqa nipata aukimariafanoo innee amaana Saririqasaa kaqi faiqí nipata aukidaqa nanaree Saririqasaa aurimari fasiqana idaaqamasannanara innee aanoo qida fee. <sup>24</sup> Innee fifau dapi iriranasaa faiqí ufa nimimarifanoo mina minnisaaqa. Kuqaa anoona iriranannai kai faiqí andeeqaaqa.

*Faiqí anaasee Yisunara asauku mundira fee qimasee iroo ufafa.*

<sup>25</sup> Yeerusaree maqusanaasa Yisuna qafamasee mina ufa iriqa maaqi qiqau. Maana misa kuqarirree qidaqa. <sup>26</sup> Qafaa mifa faiqí qambaana faiqí nifusaa kikiqamambi ufa qimannimimarifaqa sia misa mina qumaraannee qidaqa. Abee maasa uriqararausa faqa minara kuqaa Anutuna asauku mundirafee fee qidee. <sup>27</sup> Anutuna asauku mundirana oosana maasa siamma iriranaura. Kaqi tautumannimaqaannoo. Maasa maa fasiqana oosana iridaqa, Nasareeteendaraafa maridanoo.

<sup>28</sup> Yisufa firaq amaana maqaki faiqí anaasee qimannimidanoo mi ufana iriseenoo maaqi qimasee firaqoo qimanniminu. Kuqaa fee innee qiniara iridee. Qinee yaindaraasee marunaqee innee kuqaa qiniara irida fee. Sia qinee qeeqa kai animaridaqa qini diqiqaiifa mifa kuqaa anoona maridanoo. Innee kuqaa minara sia irimariafanoo. <sup>29</sup> Qinee minara iridaqa qinee mindari qumuafanausa mifa qini diqiqoofaqa qumumaridaqa.

<sup>30</sup> Yuda maqannaa uriqararausa mi ufana irisee qumarararee qimasooosa minnisaaqa. Yisuna kuqira aukuaana sia adeedi roofanoo Anutufa qumee misa ititannisonara minnisaaqa. <sup>31</sup> Faiqí anaasee moomooosa Yisuna kuqaa Anutuna asauku mundira fee qiqau. Misa maaqi qimasee narí qimami narí qimami qidaqa qiqau. Asauku mundirafa anireenoo naqi fee mandeenoo maa fasiqana uraaqarainanoo fee moomoo faiqí dadaaqimari firaq ainainna uqannifiqaannoo fee. Sia amana. Doo maana mifa uqanna maridanoo.

*Amana maqasaa rakisimarusa narí firisuaiqauqa Yisuna rumbaaqera niqiqoo ufafa.*

<sup>32</sup> Faiqí anaasee miqi qimasee narí qimami narí qimami qimarufaqa Farisai amaana ufa qimarusa iriseeqa tautumasee amaana maqasaa rakisimarusunnai oonuree qimannimiqa qiqau. Qimannimisoofaqa misa amaana maqasaa rakisimaru poorisauusa qimannimiqa. Innee ooru Yisuna rumbasee maree aniaqa. <sup>33</sup> Misa oonuroofanoo Yisufa maaqi qimasee faiqí anaasee qimannimimarinau. Qinee qusasaa inni faqa marianaura. Quqaseeqa qusasaa qini diqiqoofinnai fuanaura. <sup>34</sup> Innee qiniara randee sia paqurifaranoo qinee fuanannai sia innee amana fifaranoo.

<sup>35</sup> Yuda maqannaa uriqararausa mi ufana iriseeqa narí qimami narí qimami qiqau. Mifa yai fee finaqa maasa sia amana fuanauree. Mifa aanaamuru Kirisa maqannaa

mariannai fee fuannoo fee. Yuda maqannaasa miqoo mariasa faqa maridaqa Kirisa maqannaasa nari ufa qimannimiraree fidanoo fee qida qinoo fee. <sup>36</sup> Mifa qinoo innee qiniara randasee sia paqurifaranoo. Qinee fuanannai innee sia fifaranoo. Mina ufoosana sia maasa iridaqa.

*Arumufaqa nammariara maqi qumirarakai imarina mina ufa.*

<sup>37-38</sup> Uqiqaana maqa qoomaqa taikara faasaana uriqarara faasaanee qiqau. Mi faasaana Yisufa findifinoo faiqi anaasee firaa kari qimanniminau. Yafasiqa anaasee fee nammariara aididanoo fee qinee iannaqoo nammari uqanna ani naa Anutuna tamummaqara fasiqa moo ooqai maaqi qimasee akara rinau. Kaqi marirana nimira nammari misa nimuqusa ookiqari ururee fuannoo fee qinau. Yafasiqa anaasee fee qiniara kuqaa anoonee qinafa misa nimuqusa ookiqari mi nammari ururee fuannoo. <sup>39</sup> Yisufa nammariara quna Anutuna maraqunara nammari kikiqa usinau. Kasooqagee Yisunara kuqaa Anutuna faiqi fee qifandinausa misa mi maraqunna mareefaranoo. Mi aukuanna Yisufa kaqi maru aukuanna sia maraquna nimirafa marinau. Yisufa kuqiranakiqari findifinoo afaqa areenainanoo miqoo nari afeeka maraquna nimiannoo fee qinau.

*Faiqi anaasee mina Yisunara ufa rainoo ufafa.*

<sup>40</sup> Faiqi anaasee Yisuna ufa iriseeqa qiqau. Maafa Anutuna tamummaqara fasiqa kambiqaannoo fee qufa maafa mifa maridanoo. <sup>41</sup> Akaqausa minara maafa Anutuna asauku mundira fee qiqau. Akaqausa maaqi qimasee furufaramasee qiqau. Anutuna asauku mundirafa sia Kariree maqusakiqari kambiqaannoo. <sup>42</sup> Tamummaqara fasiqa akara minara Anutuna asauku mundirafa Dafidina ati mariannoo. Dafidina ooqeenaa maqusaki Beetareeqeemna miqoo kambiqaannoo fee qiqau. <sup>43</sup> Faiqi anaasee misa rainafufaqa akaqausa moo ufa qufaqa akaqausa moo ufa qufaqa qimariqau. <sup>44</sup> Akaqausa doo Yisuna qumarasee rumbaannee qimasee sia qumaree rumbaqaau.

*Yuda maqanna faiqi fraasa Yisunara sia Anutuna faiqi fee qu ufafa.*

<sup>45</sup> Amaana maqasaa rakisira poorisauqa Yisuna ufa kaqi irisee amaana maqasaa rakisirausa faqa Farisai amaana ufa qimariasa faqa maruqoo oonuroofaqa iridaqa qiqau. Naqaa fee ifaqee sia rumbasee maree anidee.

<sup>46</sup> Poorisauqa qiqau, sia moo fasiqa ufa fannoo maa fasiqana aanna raidanoo.

<sup>47-48</sup> Farisai amaana ufa qimarusa mina iriseeqa niqidaqa qiqau. Doo mi fasiqafa inni faqa nikaruqinoo fee. Maasa uriqararausakiqari moo fannoo mina ufa irinoo fee. Farisai amaana ufa qimarifa moo fannoo irinoo fee. Sia uqanna iria. Maasa Mooseena sandufa irimarunau maridaqa. <sup>49</sup> Maaqooqaraasa kaqiqee fasiqa anaasee Mooseena sandufa sia irianara Yisunara anoonee qidaqa. Anutuna aqira ufa misasaa maridanoo.

<sup>50</sup> Nikoodeemusafa mifa faqa misaki marinau. Mifa ooqai qumee Yisufinnai fimarufa marinau. <sup>51</sup> Mifa misa Yisuna aqira ufa iriseenoo Yisuna saaroo qinau. Mooseena sandufa maaqimminoo maridanoo. Sia fifau faiqi moo arirafa maridanoo. Mina ufa naaree irisee mina mandainaina marinaqa minara qimasee aruananoo amana mariannoo qinau.

<sup>52</sup> Misa mi ufana iriseeqa Nikoodeemusana aqidaqa qiqau. Anee faqa Kariree maqanna fee maridane. Anee tamummaqara fasiqauqa akarauqakiaqa asaanarumasee iria. Sia moo tamummaqarafa Kariree maqasaa kambiqaannoo. Miqi qimasee aiqama daraani mambufanoo Yisufa amaana maqakiqari raudamakufanoo Oorifa aaganai oorufinau.

## 8

*Anaasee moo fannoo ummuarimaruna paquru ufafa.*

<sup>1-2</sup> Oorifa aaganai kaqimma ooru faiqeenoo iqaqoofanoo Yisufa Yeerusaree firaa amaana maqaki kaifaa ooquree keeqafufaqa faiqi anaasee moomoosa suqufufaqa mina fiqumma marufanoo ooqumarifi Anutuna ufa qimannimimarinau. <sup>3</sup> Mooseena sandufa akoofasauqa faqa Farisai amaana ufa qimarusa faqa anaasee moo fasiqa qummuari marufaqa aqee oonu qafamasee qumaree doo maree aniqau. Yisufa maruqoo mini quqaseeqa maaqi qimasee qimamiqau.

<sup>4</sup> Oo ufasaa rakisira maa anaaseefa qummuari marifaqa maasa qafamasee qumaree anidaqa. <sup>5</sup> Mooseena sandufa miqasara oonisamu kai nariqa nini iqa kuqa narusaqee qinoo maridanoo. Anee minara nana ufee qidane.

<sup>6</sup> Misa mi ufanannai puteera foora fufidaqa qiqau. Yisufa aruanifeera qimasaida miqi marufanoo Yisufa nari iriseenoo fifau kummaramafufanoo asaukunoo maqa akara rinau. <sup>7</sup> Mifa maqa fifau akara rimarufaqa misa fuki faaki qidaqa mi anaaseena oonisamu aruanauree sia fee aruanauree ritidaqa ireemariqau. Kaqikaqoo marikino Yisufa findifi qimanniminau. Yafee inniki moo fannoo numoo siainafa mifa kai oonisamu

indaaru auna atufinoo maa anaaseena aruannoo fee. <sup>8-9</sup> Yisufa miqi qimaseenoo kafaa kummaramafinoo maqa akara rimarufaqa doo misa moodaa kai qaara kai idaqa nari aaqaranara nisaurusee findimeeqaida doo fifainimariqau. Faiqi firaasa naaree fufaqa kafaa miqoo oorudupiraua fufaqa kumaaraa inaaqianna doo fifiqau. Misa fifufanoo mi anaaseefa kai miqoo kikiqinoo marinau. <sup>10</sup> Yisufa findifinoo mi anaaseena irammirinau, misa yai fee fifee. Sia fee moo fannoo ani kuqira ufa amianinafa maridanoo fee. Aiqama fifee.

<sup>11</sup> Mi anaaseefa qinau. Oo rakisira sia kuqira ufa moo fannoo qimimarifa maridanoo. Yisufa iriseenoo qinau. Doo qinee faqa sia kuqira ufa ani amiana. Doo fua, sia kafaa manda oosana maraa.]

*Yisufa maa maqa maaqanaki qoomara foora qu ufafa.*

<sup>12</sup> Moo kari Yisufa Yeerusaree amaana maqaki faiqi anaasee maaqi qimasee qimanniminu. Qinee maqasaaqaraasa qooma maridaqa. Yafasiqa anaaseesa qini faqa finausa misa kaqi marira qooma mareefaranoo sia uqanna asukunaki fifaranoo.

<sup>13</sup> Farisai amaana ufa qimarusa mina iriseeqa qimamiqa qiqau. Anee aneennara kai ufa qidana aneenna auqu uqeeree mariananoo. Miqianna ufafa sia anonaikidanoo. Fifau ufa kai qimariananoo.

<sup>14</sup> Yisufa mina iriseenoo qinau. Kuqaa qinee qeeqaraa ufa qidaqa. Qinee miqi qidaqa anoona ufa kai qidaqa. Qinee qeeqa kambiqafi aniafannanara iridaqa qeeqa fuannanara iridaqa. Innee sia qinee kambiqaaafannanara irimariafanoo. <sup>15</sup> Innee faiqi faiqi ufa irisee dapi iriranannai faiqi anaasee rainannimaqee mariafanoo. Sia qinee moo fasiqa anaaseera rainannimaqee marunaua maridaqa. <sup>16</sup> Qinee akaqausara rainannimaqidaqau andeeqasee rainannisaunaiqini. Sia qeeqaraafau maridaqau ufa nimidaqau. Qeeqa qikoofa qini diqiqamaqoona faqa maridaqa dadaaqi marifaqa ufa qimannimidaqa. <sup>17</sup> Inni sandufa akara ufa moo maaqimminoo maridanoo. Qaara fasiqa moo ainana nari nifunnai qafamasee munu kooroo qimasaiifaqa aiqamausa minara anoona ufa fee qifaranoo. <sup>18</sup> Qinee qeeqaraa ufa qidaqa qini qikoofa qini diqiqoofa mifa faqa qini dadaaqifaqa anoona ufa tia qimannimidaqa.

<sup>19</sup> Miqi qimasooifaqa Farisai amaana ufa qimarusa maaqi qimasee irammiriqau. Ani akoofo yai fee maridanoo ani dadaaqidanoo fee qufanoo Yisufa qinau. Innee qiniara faqa qini qikoonara faqa sia irimariafanoo. Innee qiniara irifau qini qikoonara faqa irini. Innee sia maagandara irimariafanoo.

<sup>20</sup> Yisufa maa ufausa Yeerusaree firaa amaana maqaki qimannimarinu. Mi amaana maqanaki oosirafa moo marinau. Amaana maqaki quqee maru munnimma difaanifa minaki marufanoo mi oosiranaki Yisufa maridanoo mi ufausa qimanniminu. Misa Yisuna qumaraanee qimasee sia qumaraqau. Sia mina kuqira aukuaana adeedi ranoo marunara Anutufa qumee rafaqaqafusoofaqa sia qumaraqau.

*Yisufa qinau, qinee fuanannai innee sia fifaranoo qimaqoo ufafa.*

<sup>21</sup> Moo kari Yisufa maaqi qimasee Yuda maqanna uriqararaua qimanniminu. Qinee moosaa fuanaqa qiniara randainaisia inneeqa mandainainaki kuqifaranoo. Qinee fuannaqoo innee sia amana fifaranoo.

<sup>22</sup> Yuda maqannaasa uriqararaua mi ufana iriseeqa nari qimami nari qimami qiqau. Mifa maasara sia nari innai fuqeera qidaqinoo. Maasa sia mina ufa iridaqa. Mifa nari fee nari aruannoo fee miqi qidanoo fee.

<sup>23</sup> Yisufa iriseenoo qimanniminu. Innee maindaraasa mariafanoo qinee mirindaraasa maridaqa. Innee maa maqanasaqaraasa mariafanoo qinee sia maa maqanasaqaraasau maridau. <sup>24</sup> Qinee minara qunnana innee inneeqa mandainainaki kuqifaranoo. Innee sia qinee marunannara anoonee qimariafanoo minara kuqaa innee inneeqa mandainainaki kuridifaranoo.

<sup>25</sup> Misa uriqararaua mina iriseeqa qiqau. Anee yafee maridane qufanoo Yisufa qinau. Indaaru qimannimianausa misa kai maridaqa. <sup>26</sup> Qinee moomoo ainainara inniara qimannimianau. Qini diqiqamaqoofa mifa anoona ufa kai qimarifa mifinaindaraana kai inni maa maqanasaa mariasa qimannimidaqa.

<sup>27</sup> Yisufa nari akoona aufakiana qimannimimarufaqa siamma irimariqau. Minara Yisufa kaifaa maaqi qimasee qimanniminu. <sup>28</sup> Kasooqaqee innee qini faiqi nimaaku uqeereeqee aunirira saqarisaa quqaqisaseeqa mikamuqoo qinee mariaafannanara irifaranoo. Qini qikoofa qimaqimiqoo ufana kai inni qimannimidaqa. Mikari innee minara faqa amiqimasee irifaranoo. <sup>29</sup> Qini diqiqoofa qini faqa maridanoo. Qinee mina aidira oosanamau kai fidaqa minara sia minniqisaifaqa qeeqaraafau maridaqau. Mifa qini faqa maridanoo. <sup>30</sup> Faiqi anaasee moomoosa mi ufana iriseeqa Oo kuqaa mifa Anutuna asauku mundira fee qimasee minasaa mundiqau.

*Rumbarausara faqa idukirausara faqa qimaqoo ufafa.*

<sup>31</sup> Yisufa minara iriseenoo qimanniminau. Innee qini ufa qimannimunnana irisee mi mau maqee maqee fifaqa kuqaa qini faiqi namu marifaranoo. <sup>32</sup> Innee kuqaa anoona ufa kai irifaranoo. Anoona ufa fannoo inniqa mandainainakiqari inni idukuannoo.

<sup>33</sup> Misa mi ufana iriseeqa qiqau. Maasa Abarahaamana ati maridaqa, sia moona rumbaranaki maridaqa. Nanaree anee maasara idukuqaee qidanee.

<sup>34</sup> Miqi qufanoo Yisufa kaffaa qimanniminoo qinau. Qinee kuqaa anoona ufa inni qimannimidaqa. Faiqi moo fannoo mandoosana maree marifa mi manda oosanafa mina rumbaqaifa maridanoo. <sup>35</sup> Faiqi moo fannoo moona ainaina iinoo oosana oosana ainaina narindiaro foora iinoo. Kasooqaqee doo ainaini taikaseenoo mi aiqama ainainna nari amiseenoo doo kaqisamu fuannoo. Mi ainaina faqaana faiqi fannoo sia amana taikaannoo kaqi nari akoona amaaku mariannoo kaqi nari akoona amaqa maqa finoo mina qumiasana maraseenoo sia ainainira faiqi naanna reenoo taikaannoo, kaqi miqoo mariannoo. <sup>36</sup> Qinee Anutuna amaaku maridaqa. Qinee inniqa manda oosanakiqari idukusaanaqa innee kuqaa iduqiqa marifaranoo. <sup>37</sup> Innee Abarahaamana ati mariafaqa qinee minara iridaqa sia innee mina aanna reemariafaqa, qini ufa sia marararee qidaqa qini dariraree qimariafanoo. Abarahaamafa sia miqi marufa minara innee sia Abarahaamana faiqi namu uqanna mariafanoo. <sup>38</sup> Qini qikoofa qini uqaqifiqoona kai inni qimannimidaqa. Innee mina minniseeqa inneeqa nikoona moo Sadannana ufa irimariafanoo. <sup>39</sup> Misa mi ufana iriseeqa maaqi qiqau. Maasa qikoofa Abarahaamafa maridanoo. Yisufa minara qinau. Innee Abarahaamana faiqi namu maridaqau mina ufamau fini. <sup>40</sup> Qinee qeeqa qikoonasaqarara ufa kai inni qimannimimarunaqa innee quandaqifa qini darirara qimariafanoo Abarahaamafa sia mi oosana maranau. <sup>41</sup> Innee inneeqa nikoona uqanna oosana maraiddaqa miqi mariafanoo. Misa mi ufana iriseeqa qiqau. Maasa sia qummuara faiqifau maridaqau. Maasa moodaa fasiqa faiqi Anutufa nari uqanna maasa qikoofa maridanoo.

<sup>42</sup> Yisufa misa ufa iriseenoo maaqi qimasee qimanniminau. Anutufa inni nikoofa marinaqau kuqaa innee qiniara rini. Qinee Anutufinaindari maaqoo qumumaridaqa. Qinee sia qeeqafau qumiqau mifa diqiqoofaqa qumiqifana. <sup>43</sup> Innee naqaa fee ifaqee sia qini ufa oosana iridee. Innee qini ufa iriafanoo nikoofaidanoo miqidaqa sia irimariafanoo. <sup>44</sup> Afaanna nikoofa Sadannafa maridanoo. Innee mina faiqi namu maridaqa mina aanna ree mariafanoo. Ooqaindari faiqi kuqannarimarufa maridanoo. Sia anoonufakifau mapukinoo maridanoofau. Anoona ufa sia uqanna minaki marifa maridanoo. Mifa unna ufa qinoo nari oosana kai fidanoo. Mifa unna ufa qimarifa maridanoo unna ufa qimariasa nikoofa maridanoo. <sup>45</sup> Qinee kuqaa anoona ufa kai qimannimi marunnaara innee sia irimariafanoo. <sup>46</sup> Qini manda oosana moodaa maridanoo fee sia fee maridanoo. Innee qafee qiqa qimaqimiqa. Qinee kuqaa anoona ufa kai inni qimannimunaqa naqi fee ifaqee innee sia minara anoonee qidee. <sup>47</sup> Anutufa dadaaqifaqa mina faiqi namu aramuqmaakaiki mariasa kai Anutuna ufa irifaranoo. Innee sia Anutunaindaraasau mariafanoo ufa sia qini ufa irimariafanoo.

*Yisufa Abarahaamanara qimannimu ufafa.*

<sup>48</sup> Yuda maqannaa uriqararasa Yisuna ufa iriseeqa aqiqa qiqau. Anee manda Samaria maqannaa mariananoo afaanna moo ani aunduraki marifa mariananoo. Maasa kuqaa fee qidee, sia fee.

<sup>49</sup> Yisufa iriseenoo qinau. Afaanna sia qiniki maridanoo. Qinee qeeqa qikoona auqu uqeeraidaqa innee qini duqu maqasaa quqemariafanoo. <sup>50</sup> Qinee sia qeeqa duqu uqeeraranara randaiddaqa. Moo fannoo qini duqu uqeerara maridanoo. Innee qini duqu maqasaa quqemariafanoo Anutufa kai qini dadaaqinoo inni rafaqa fuannoo. <sup>51</sup> Yafasiqa anaasee fee qini dookinaa ufa irisee marainafa mifa sia kuquannoo naaru mariannoo.

<sup>52</sup> Yuda maqannaa uriqararasa mi ufana iriseeqa qiqau. Doo maasa ani oosana iriseeqa anee kuqaa afaanna faqaafa mariananoo, Abarahaamafa maasa qikoofa doo ooqai kuqinau. Anutuna tamummaqara fasiqauqa doo kuqiqau. Anee naqi fee masee maa ufana qidanee qini ufa irimariasa sia kuqifaree qidanee. <sup>53</sup> Maasa qikoofa Abarahaamafa kuqinau. Anee mina uriqarara fee maridane qidanee. Anutuna tamummaqara fasiqauqa maqasaa fasiqauqa kuqufufana anee aneennara naqira fasiqee maridee qidanee. <sup>54</sup> Miqi qimasooфанoo Yisufa qimanniminau. Qinee qeeqa duqu fifau uqeerasaana sia anoonaikiannoo, fifau mariannoo. Qini qikoofa Anutufa qini duqu uqeeraidanoo dadaaqidanoo, innee unna qimasee minara maasa Anutunee qimariafanoo. <sup>55</sup> Innee ooqaindari sia mina auqu irimariafanoo. Qinee mina auqu iridaqa. Qinee minara sia iridau inni naanna reemarunusa unna ufa qimarunausee qini. Qinee qeeqa qikoona

iridaqa mina ufamau fimarunausa maridaqa. <sup>56</sup> Inni nikoofa Abarahaamafa ooqai kaqi maridanoo qinee maqee marunnanara kaaqa qafaaqaa imarufu marinau. Doo qiqafamaseenoo asasinau. <sup>57</sup> Yuda maqanna uriqararauusa mi ufana iriseeqa maaqi qiqau. Anee kumaaraa mariananoo. Anee naqimasee Abarahaamana qafanee inau, ooqai mariufa maridanoo. <sup>58</sup> Yisufa minara maaqi qimasee qimannimino qinuu. Abarahaamafa sia kambiqoo aukuanna qinee maa marunaua mikamuqoo mariqafana. <sup>59</sup> Yuda maqannaasa mina iriseeqa oo maa fasiqafa nariara Yaawee fee qidaqinoo qimasee aanoomasee oonisamu qumaree aruaneerufanoo mifa kukeeqakinoo amaana maqakiqari raudamaki moosaa finau.

## 9

*Yisufa innaamunaidari afu qimbarana afu maqaisoo ufafa.*

<sup>1</sup> Yisufa aatata fidanoo moo fasiqa mina anoofa innaamunai afu dimbarana maqaqoona qafanau.

(Mi aukuanna nifu niku mandaikirausauqa mai mariandee sia amana ainainamasee naaqaa imariqau. Faasaana kaqi marida narana feefaurira munnimmara ireemarufafa nimimarufafa marasaida neemariqau misa nuqu iramasaida neemariasee qiqau.)

<sup>2</sup> Yisuna faiqinamu mi afu qimbarana qafamasee Yisuna irammiriqa qiqau. Oo ufasaa rakisirafa maa fasiqafa yana mandaininasaa fee maqinoo afu dimbanoo maridanoo fee. Nari akoona anoona mandaininasaa fee narindisaa fee miqinoo maridanoo fee.

<sup>3</sup> Yisufa iriseenoo qimannimino qinuu. Sia nari anoona akoonasaa qaraanau, sia narindisaafuu afu dimbanoo maridanoofuu. Anutuna afeeka kasirana qinikiqari kooroo ianifeera mina afu dimbanoo maridanoo. <sup>4</sup> Qini diqiqoofa qini qimiqoo ainainirana sia amana asukunaki auqaanaua maasa faasaana auqaanaua. Doo kaqikaqoo eendinaqa sia miqoo faiqi moo fannoo auqaannoo. <sup>5</sup> Qinee maa maqa maaqanaki maridaqa misa qooma maridaqa, kaaqa qamannimaqaanaua.

<sup>6</sup> Miqi qimasee Yisufa maqasaa aqaara fidaquseenoo asaukukoo doonaikamaseenoo afu dimbara fasiqa afusaa akuseenoo qimaminoo qinuu. <sup>7</sup> Doo fua. Doo oonu Sirooamma farummaki aneenna oori afuakai ruquanee qinuu. Sirooamma farumma auqu oosana niqiqamaqai farumma fee qinoo marinuu. Mi afu qimbara fasiqafa eedoo qimasee oonu nari oori afuakai ruqufanoo afu aiqamaqara amiqimasee qoofanoo oonu quandakufanoo sandee kafaa aninuu.

<sup>8</sup> Mi fasiqana aqoonausa mina qafamasee moomoosa mina qafeemarusu mina qafamasee qiqau. Maa fasiqafa maaqoo maridanoo narana munnimmara ireemari fasiqa fee mifee.

<sup>9</sup> Akaqausa doo mifa kai fee qiqau, akaqausa moo fannoo mina fooqaa fee qiqau. Mi fasiqafa nari irisee qinuu. Qinee qifu dimbarausa maaqoo marunaua maridaqa.

<sup>10</sup> Misa mina iriseeqa iraqau. Naqimasee afu maqeenee qufanoo mifa qinuu.

<sup>11</sup> Faiqi moo mina auqu Yisufa qaqaara fidiseenoo doonaikamaseenoo qini qifuki akuseenoo doo fua Sirooamma farummaki oori nammari uqaa qufaqa miqi qifaqa nammari uqusaunanoo doo qifu maqeenoo.

<sup>12</sup> Miqi qimaasoofaqa misa qiqau. Miqimasaiqa yai fee finoo fee qufanoo mifa sia qinee irida fee qinuu.

*Farisai amaana qimarusa Yisufa afu qimbarana afu maqaisoonara randoo ufafa.*

<sup>13</sup> Miqi qimasooofaqa misa mi fasiqana afiqeeqa Farisai amaana ufa qimarusa uqanifiqanau. <sup>14</sup> Mi faasaana Yisufa mi fasiqana afu maqoo faasaana misa amaana Saririqa marunara Farisai amaana ufa qimarusa marunna afiqee fiqau. <sup>15</sup> Farisai amaana ufa qimarusa mi fasiqana afu maqoonara iroofanoo qinuu. Mifa doona qini qifusaa akusaifaqa doori nammari uqunano qifu maqeenoo.

<sup>16</sup> Farisai amaana ufa qimariasa akaqausa Yisunara maaqi qiqau. Maa fasiqana afu maqaiqa sia Anutunaidarifu amaanasaa ainainimarifa manda fasiqa maridanoo. Akaqausa mina iriseeqa qiqau. Naqimasee mandainina maree marinafa maa firaa ainanna amiqira ainaina auqararee sia amana fee qimasee mi ufanannai rainaqau.

<sup>17</sup> Miqi qimasee Farisai amaana ufa qimarusa afu dimbarana irammiriqa qiqau. Anee mi fasiqana ani afu maqainaree qidanee. Anee minara nana ufee qidanee. Afu dimbarafa mina iriseenoo qinuu. Mifa Anutuna tumummaqara fasiqa maridanoo fee qinuu.

<sup>18-20</sup> Yuda maqannaasa uriqararauusa mina iriseeqa maaqi qiqau. Maana sia afu dimbarafuu moo fasiqa maridanoo qimaseeqa misa mina anoona akoona naaramasee irammiriqa qiqau. Maa fasiqafa inniqara faiqi fee. Kuqaa fee anee mina maqoonna kari afu dimbaranee maqanau. Naqimasee maqee afu maqeenoo fee qufaqa mina anoofa akoofa uriqararauusa amaana maqaki keeqemariana qaoo qimaqiseefoo qimasee

rufieeqa qimannimiqa qiqau. Maa fasiqafa maasa qimaaku maridanoo maasa minara iridaqa. Ooqai aanaaqisaa innaamunai miqirana maqaafanafa maridanoo maasa minara faqa iridaqa. <sup>21</sup> Mina afu maqainara yafasiqa fee mina afu maqeenoo fee siamma iridaqa faiqi maridanoo irammirifanoo qimannimiannoo. <sup>22</sup> Yuda maqanna uqirararasa Yisunara faasa maaqi qimariqau. Faiqi moo fannoo Yisunara Anutuna asaku mundira fee qinnana maasa amaana maqakiqari aqqaananoo raudamaki aqoosai finoo sia kaifaa keeqaannoo. <sup>23</sup> Mi ufanara afu dimbarana anoofa akoofa doo faiqimmifoo nari iraaqee qiqau. Misara rufisee miqi qiqau.

<sup>24</sup> Yuda maqanna uqirararasa mina iriseeqa afu dimbarana kafa aaramasee qiqau. Anee Anutuna afusaa kuqaa anoona ufa kai maasa qimannimia. Ani afu maqaiqa mifa mandainaina maree marifa maridanoo.

<sup>25</sup> Afu dimbarafa mina iriseenoo qimanniminu. Mi fasiqafa mandainaina maree mari fee sia qinee mina oosana iridaqa. Moodaa ainainara kai qinee iridaqa qinee qifu dimbarausa mariafanaua maqee qini qifu maqee marifaqa maridaqa minara kai qinee amiqimasee iridaqa.

<sup>26</sup> Misa mina iriseeqa kaifaa irammiriqa qiqau. Mi fasiqafa nana ainainee auqu amifanoo ani afu maqeenoo fee.

<sup>27</sup> Afu qimbarafa niqinoo qinuu. Doo faasai qimannimisaunaqa sia irimariafanoo. Nanaree innee kaifaa qiana irifaree innee faqee mina faiqinamukifaree.

<sup>28</sup> Misa mina iriseeqa aanoomasee mina aqqa qiqau. Anee mi fasiqana ufa irimarianafa mariananoo. Maasa Mooseena ufa irimarunaua maridaqa. <sup>29</sup> Anutufa Moosenannai maasa qimaqimufafa maasa iridaqa. Mi fasiqafa Yisunara maasa sia mina oosana iridaqa.

<sup>30</sup> Afu dimbarafa mina iriseenoo niqinoo qinuu. Innee moo irirana maree mariafanoo mifa qini qifu maqaqisafafa innee nanaree mi fasiqana yaindari fee anidanoo fee qidee. <sup>31</sup> Anutufa sia manda oosana maree mariafa dadaaqidanoo. Faiqi anasee minara rimariafa ufa irimariafa misa kai Anutufa dadaaqidanoo. <sup>32</sup> Ooqai oosana aroo aukuanasaaqari sia faiqi moo fannoo afu dimbarana nifu maqannisanuu, maqee kai. <sup>33</sup> Maa fasiqafa sia Anutufinaindari aninaqau naqimandee maa firaa ainainna auqararee, siamma amanaikiannoo.

<sup>34</sup> Yuda maqanna uqirararasa mina iriseeqa qimamiqa qiqau. Anee mandainainaki kambiqoonafa mandoosanaki findifuanafa doo see fifuannee qimaseeqa misa amaana maqakiqari aqiqoofanoo raudamaki finuu, sia kafa anianifeera doo ateeqaqau.

*Faiqi naundura nifu qimbaranara Yisufa qimaqoo ufafa.*

<sup>35</sup> Misa afu qimbarana aqiqoonara Yisufa iriseenoo paqurimasee irammirinuu. Anee faiqi nimaakuara Anutuna asaku mundira fee fee qidanee minasaa irirana rusedanee.

<sup>36</sup> Mi fasiqafa Yisuna sia qafoofa maridanoo maaqi qinuu. Doo mina uqaqifiqainaaq minara anoonee qimasee minasaa atooqaanaua.

<sup>37</sup> Yisufa qinuu doo anee qafaananoo doo mina faqa ufa qimariananoo.

<sup>38</sup> Mi fasiqafa mina iriseenoo qinuu. Oo Karaambaqaa aniara kuqaa Anutuna amaaku fee qidaqa qeeqa qimuqusa irirana aniki rusedaqa qimuqusanoo ani amooqima-maqaidaqa. Miqi qimaseenoo mi fasiqafa Yisuna oorinni maqasaa kummaramafinoo amooqinuu.

<sup>39</sup> Yisufa mina qafamasee miqoo marusa qimanniminoo qinuu. Qinee maa maqanasaqarasaa rainannimaqarara qumuafanausa maridaqa. Qinee nifu dimbarausa maqaaneera qumuafanausa nifu maqarausa dimbaaneera qumuafanausa maridaqa.

<sup>40</sup> Farisai amaana ufa irimarusa miqoo marusa mina iriseeqa iramiriqa qiqau anee maasara faqee nifu dimbarausee qidanee. <sup>41</sup> Yisufa qinuu. Inni nifu dimbanoo marinaqau inni numoo sia marini innee unna qimasee maasa qifu kaqi marifaqee qimarianara inni numoo kaqi maridanoo nifu dimbarausara foora mariafanoo.

## 10

(Yuda maqannaasa firi maru aandaufa sipsipa marinuu. Misa akaqana arusaida neemarufa marinuu. Moomoo rakisidaqa asaasi aukusaidaqa minannai qamunnaina auqimariqau. Sipsipa reendeenimarufa sia aanoo imarufa marinuu. Anee mina asaasi aukidaneer minna kuqarinanoo fee sia ufa qiannoo kaqi muqurinoo mariannoo. Mi aukuanna sipsipasaa rakisimarufa nifunni fufafa aiqama sipsipa mina afaqee fiqau. Isaraee maqannaasa sipsipa kaqi miqidaqa. Misasaa rakisimarifa indaaru fifaqa sipsipauqa mina aanaaqianna fidaqa.

Sipsipasaa rakisirafa ooni moomoo marasee aaku aaku maseenoo ququsa auqusee eendaki sipsipa minaki quqasee kooqisaa nari faiqaidanoo. Kaasau faini fee qumnuarimari

fasiqa fee arunaandooraa rakisidanoo. Sipsipa nikoofa nuqu ramaqaisa kai maridaqa. Kananaana findifnnoo nuqu raifaqa kai anireeqa andandara randaidaqa.

Sipsipa rakisimariasa nári sipsipara ridaqa rakisidaqa nári sipsipasaara kuqifaranoo. Sipsipauqa faqa nári rakisimariasa ufa iridaqa minara ridaqa. Akaqausa moodaanaki ooni ququsa auqusee minaki nári sipsipa aigama eendaki quqasaafanoo faiqi moo fannoo kooqisaa rakisidanoo. Kananaana iqaqaiifanoo sipsipasaa rakisirafa moo fannoo aniraifanoo kooqisaa rakisirafa atuasaifanoo sipsipa akoofa nári sipsipa nuqu famasaifaqa nári sipsipauqa kai iriqa raudamaki andanda narara fidaqa.)

*Sipsipa faiqee mariana mina kikiqisira ufa.*

<sup>1</sup> Yisufa kaffaa miqooqaraasaa qimannimidanoo sipsipara qinoo faiqira qinau. Qinee anoona ufa qimannimidaqa. Faiqi moo fannoo sia sipsipa ququsa kooqiki keeqemarifa kaqinaindari ququsasaa akareemarifa mifa qummuarimari fasiqafa mariannoo. <sup>2</sup> Sipsipa kooqiki keeqee marifa mifa sipsipasaa rakisimarifa maridanoo. <sup>3</sup> Sipsipa nikoofa moo fannoo anirainanoo kooqisaa rakisirafa kooqi atuasaifanoo sipsipa akoofa nári sipsipa nuqu ramasee naarainaqa mina ufa iriseeqa raudamaki nári faqa nifiqainaqa andanda narara fifaranoo. <sup>4</sup> Sipsipauqa nári rakisimarina ufa iriqa raudee qumuraifanoo mifa indaaru fifaqa misa mina aanaaqianna fidaqa. <sup>5</sup> Sipsipa sia moo fasiqa afaqee fifaranoo mina ufa irisee moo fannoo fee qimasee sandeefaranoo.

<sup>6</sup> Yisufa mi quandara ufana qimannimufaqa siamma iriqau.

*Yisufa amiqira sipsipasaa rakisirafa mi ufafa.*

<sup>7</sup> Minara iriseenoo kaffaa kooroomasee qimanniminoo qinau. Qinee kuqaa anoona ufa qimannimidaqa qinee qeeqa kai sipsipa kooqi maridaqa. <sup>8</sup> Ooqai qini doorini indaaru anusa qummuari maru fasiqausa kai animariqau. Sipsipauqa sia misa ufa iriqau. <sup>9</sup> Qinee Anutuna ququsa kooqi maridaqa yafasiqa aanaaseefee kooqisaarafoo qinisaa keeqee marinafa Anutufa mi fasiqanaaseesa kuqiranakinaana marasee innaaruna asumu mariranaki quqaannoo. Mi fasiqanaaseesa Anutuna ququsaki sipsipara foora keeqee raudeida narana neemarifaranoo. <sup>10</sup> Qummuarimari fasiqafa qummuaramasaina taikaanifeera fifau faafau qummuarianifeera faqa kuqannaruanifeera faqa kuridi nimaqaanifeera faqa aniannoo. Qinee faiqi anaasee asumu marirana nimianeera anidaqa. Sia kaqi dapi mariranara qidau. Asumu marirana amiqirana moo faqa moo faqa rairairana nimirara mina kai nimiraree qimasee qumidaqa.

<sup>11</sup> Qinee sipsipasaa amiqimasee rakisimarunaua maridaqa. Sipsipasaa amiqimasee rakisimarifa nári sipsipasaara kuquannoo. <sup>12</sup> Feefauruara ainainimarifa sia miqiannoo kaasau faini anirainanoo rufasee sandaannoo. Sandamafinanoo kaasau faini anireenoo sipsipa qumarainaqa daraanifaranoo. <sup>13</sup> Feefauruara ainainimarifa sia sipsipara amuqusiannoo feefauruara kai rakisidanoo. <sup>14</sup> Qinee sipsipasaa amiqira rakisirausa maridaqa. Qini qikoofa qiniara iridanoo. Qinee miqi kai iqa qeeqa qikoonaara faqa iridaqa. <sup>15</sup> Miqi kai iqa qeeqa sipsipara iridaqa misa faqa qiniara faqa iridaqa. Qinee qeeqa sipsipasaara amana kuquanaaree qidaqa. <sup>16</sup> Sia maqooqaraasa kai qini ququsaki mariaqeera. Qini ququsa fannoo moomoo maqusanaasaki faqa maridanoo. Minakinaasauqa faqa nifiqa quqaanaura. Misa faqa qini ufa irisee eedoo qifaranoo. Miqoo moodaanaki marifaranoo moodaa rakisirafa misasaa mariannoo.

<sup>17</sup> Qeeqa sipsipara qimuqusina qeeqa marirana misa nimaqaqa maqaseeqa kuqirinaki quqasee kaifaa qeeqa marirana minakiqari maraanaura. Qinee miqiraree qunnaara qini qikoofa qiniara ridanoo asadanoo. <sup>18</sup> Sia moo fannoo nári afeekannai qini marirana maraannoo. Qinee qeeqakai qeeqaraa irisee qeeqa marirana kuqiranaki quqaanaura. Qini qikoofa qinaqa qeeqa marirana kuqiranaki quqararee qimasee quqaanaura. Quqasee kaffaa marararee qimasee maraanauranoo. Qini qikoofa miqi qimasee ufa qimaqimifaqa iridaqa.

<sup>19-20</sup> Yuda maqannaasa miqooqaraasa Yisuna mi ufana iriseeqa rainafufaqa akaqausa qiqau. Maa fasiqana audurai afaanna maridanoo, marifanoo dapi dapi ufa qidanoo, nanaree innee mina ufa iridee.

<sup>21</sup> Miqi qimasooafaqa akaqausa misa qimannimiqa qiqau. Akasaa afaanna aunduraki marinafa sia maa fasiqafa indeemasee ufa qiannoo. Afaanna fannoo amanee afu dimbarana maqaiseenoo fee sia amanaikiannoo.

*Yuda maqannaasa Yisuna minnisoo ufafa.*

<sup>22</sup> Mookari Yuda maqannaasa Yeerusaree maqusai suqufufaqa amaana maqara qoomaqammasaida neemariqau. (Ooqai namuqaa amaana maqaki mini madaapee quqasoofaqa mina anukamaquseeqa doo miqooqari aukuaana aukuaana anukara qoomaqaqee qimasaida sakasaida neemariqau.) Suara aukuaana mi qoomaqana

imariqau Yeerusaree maqusai. <sup>23-24</sup> Yisufa Yeerusaree maqusai oorureenoo amaana maqa atisaa tida auquqoonasaa aakuara rufiasee minaki nimarinau. (Faiqi anaasee moomoo aaku suarara rufiaseeqa minaki kai mariqau.) Amaana maqa atimau tidasaa kisaaga firaqoo marinau. Yisufa Sooroomoona amarana maqa atimau tidasaa nimarufaqa Yuda maqanna uriqararousa ititaseeqa irammiriqa qiqau. Anee sia quandaqaandia, amiqimandee akooroomasee maasa qimaqimia, kuqaa fee Anutuna asauku mundira fee maridane.

<sup>25</sup> Yisufa maaqi qimasee qimanniminau. Doo qimannimuna siamma irimariafanoo. Qinee moomoo qeeqa qikoofinaindaraa ainaina auquseeqa minannoo inni uqannifiqau-nausa maridaqa. <sup>26</sup> Innee sia qinee firimarunna aandau sipsipauqau mariafanoo minara sia qiniara anoonee qimariafanoo. <sup>27</sup> Qini sipsipauqa qini ufa iridaqa qinee misara faqa iridaqa, misa minara aiqama qini faqa fidaqa. <sup>28</sup> Qinee naaru naaru marirana nimidaqa sia kuqifaranoo. Sia amana moo fannoo qini qisaukukinaana rafieefaranoo. <sup>29</sup> Qini qikoofa qini sipsipauqa qimufa aiqamausa uriqararousa maridanoo, sia moo fannoo mina asaukukinaana rafieefaranoo. <sup>30</sup> Qini qikoofa faqa qinee faqa moodaa marunnanara sia amana rafieefaranoo.

<sup>31</sup> Yuda maqannaasa mi ufana iriseeqa aanoomasee oonisamu qumaree Yisuna arirarufanoo qinau. <sup>32</sup> Qinee moomoo amiqira ainaina auqaidaqa qini qikoofa qimu ainaina auqaidaqa innee nana amiqira ainainara irisee fee minasaara oonisamu qini darirara qidee.

<sup>33</sup> Yuda maqanna uriqararousa mina iriseeqa kafaa aranaiqi qimamiqa qiqau. Sia amiqira dadaqira ainaina auqaananarau ariraridau. Aneenaraa Anutuna mandaikammaqaaidana anee enennaraa maqasaa fasiqa marianafa anee Anutufaikina mariananara ariraridaqa.

<sup>34</sup> Yisufa mina iriseenoo qinau. Inni sandufa akaraki Anutufa qinau. Innee faiqi faiqi Anutunaikammida mariafanoo. <sup>35</sup> Sandufa andeeqanoo maridanoo naaru naaru sia aagee mariafanoo, innisaimbaqa minara iridaqa. Anutufa narí ufa misasaa quqaseenoo misara Anutu fee qinau. <sup>36</sup> Anutufa qini maraseenoo maa maqa maaqanaki diqimaqoonaki maridaqa. Qinee qeeqaraa Anutuna amaaku fee qunnanara naqimasee fee minannai Anutuna mandaikamma amaqaanaaree sia amanaikannoo. <sup>37</sup> Qinee qini qikoofa auqamaqai ainaina auqaanaqa qafamasee kuqaa anoanammifoo qiaqaana. Qini qikoofa sia auqamaqai ainainna auqaanaqa qafamasee unnammifoo qiaqaana. <sup>38</sup> Innee qeeqaraa ufa qunnanara unna fee qimasaida qinee faiqi sia auqaqaa ira ainainna auqaanaqa qafamasee qiniara kuqaa anoona fee qimasee kuqaa mina akoofa minaki marinara miqidanoo fee qiaqaana kaifaa mifa faqa nariki marinara miqidanoo fee qiaqaana.

<sup>39</sup> Yisufa miqi qimasooqaa misa qumaraaneerufanoo kaqimbinau.

<sup>40</sup> Yisufa Yooradanna nammariinni ooqureenoo ooqitaqa mareenoo ooqai Yoohaneefa maridanoo nammari nimiuqoo miqoo ooqu marinau. <sup>41</sup> Faiqi anaasee moomoosa suqufufaqa Yisufa maruqoo maridaqa narí qimami narí qimami maaqi qiqau. Yoohaneefa nammari nimimarufa sia moo ainaina firaqaa ainaina auqanau. Yoohaneefa maa fasiqanara qufa doo aiqamainaina anoonaikidanoo. <sup>42</sup> Miqoo faiqi anaasee moomoosa Yisunara kuqaa Anutuna faiqi fee qimasee mina saqarikiqau.

## 11

### *Rasarusafa kuqu ufafa.*

<sup>1</sup> Faiqi moo auqu Rasarusafa mifa Beetani maqusaindaraafa aurida marinau. Rasarusafa narí asookiqanda Mariana amarana faqa Maratana faqa misa Beetani maqusaindaraasa mariqau. <sup>2</sup> Mariafa maafa kasooqagee amiqira afundimaru fadameena Yisuna aikusaa adiaseenoo narí akiaqa asaasi kisaqaannai rukaaninafa maana mi Mariafa maridanoo. Sia Yisuna anoofau mina amarafa marinau. <sup>3</sup> Mi Mariana afasaafa Rasarusafa kuqira aurira marooqaaqaa mina asookiqanda qafamaseeqa faiqi moo aiqeeqa anee Yisuna ooqu afiqee urannee qufanoo ooqu finau. Mifa maaqi qinau ani afaaqasaa aqoondi Rasarusafa kuqira aurirana maraidanoo.

<sup>4</sup> Yisufa mi ufana iriseenoo narí faiqi namu qimanniminau. Rasarusafa aurida maridanoo. Sia kuqiranaki firarau Rasarusafa mi aurirana maraidanoofau mina auriranannai Anutufa narí amaaku qini duqu uqeeranifeera mi aurirana maraidanoo.

<sup>5</sup> Yisufa miqanda qisanasaasa faqa misa nisookinara faqa kaaqa misara rimarinau. Yisuna afaaqasaa aqoondi marunara rimarinau. <sup>6</sup> Rasarusana auriranara iriseenoo sia dauni finau qaara afuru faiqanau. <sup>7</sup> Qaara afuru faiqee iqaqoofanoo narí faiqi namu



qimanniminau. Uqeerai faqa innisaimbaqa kafaa qumurandee Yudeea maqa maaqai Rasarusafa aurida qina ooru qafa.

<sup>8</sup> Miqi qufaqa misa tautumandee maaqi qiqau, Oo ufasaa rakisirafa innau kai Yuda maqanna uriqararusa onisamu ani arirara qufana kafaa fee miqoo fidanee.

<sup>9</sup> Yisufa iriseenoo qinau, iqaqafanoo kai suani urureenoo kaaqa qaidanoo. Faiqi miqi mariqoo nidaqa sia saamuridaqa. Misa maa maqanasaa kaaqa qarafa marifaqa qafaida sia saamuridaqa. <sup>10</sup> Faiqi moo fannoo asukunai nidanoo oonisa aikuamaki saamuridanoo, sia kaaqa qarafa minaki marinara miqidanoo Anutufa qi faasaana ooru fiqa sia saamurua naura kaaqa qeemarina ooru fuanaura. <sup>11</sup> Yisufa maaqi qimasee qimanniminau. Rasarusafa maasa qi qoondi doo faiqaqee ifaqa qinee oorureeqa afauriana naura.

<sup>12</sup> Mina faiqi namu mina iriseeqa qiqau. Oo karaambaiqa mifa fifau faiqaqee idanoo findifuanoo amiqirafa.

<sup>13</sup> Yisufa kuqiranara faiqefoo qimasoo faqa misa sia iriqau. <sup>14</sup> Minara Yisufa kooroo qimasee qinau. Rasarusafa doo kuqaraasino maridanoo. <sup>15</sup> Dufi dufi sia qinee miqoo maridaqa inniara iridaqa kasooqagee Anutuna afeeka qafeeqa kuqaa qiniara Anutuna amaaku fee qifaranoo doo uqeerai faqa fua Rasarusafinnai.

<sup>16</sup> Toomasina auqu qaara auqu marinau. Moo auqu Qaaraqanda maqara fee qimariqau. Toomasifa Yisufa Yudeea maqa maaqai ooru firanara iriseenoo qinau. Doo uqeerai faqa maasa ufasaa rakisirana faqa Yeerusareenni oorureeqa moodaanaki kuqanauree qimasoo faqa misa aiqama Yisuna faqa Yooradanna nammarindari ooru fiqau.

*Yisufa kuqiranakiqari findifirana faqa kaqi marirana faqa faqaafa maridanoo mi ufafa.*

<sup>17</sup> Nari Yisufa iriseenoo Beetani maqusai ooruroofaqa qimamiqau Rasarusafa doo innau kuqufu faqa akundamaqaafanoo qaara faqa qaara faqa eenda madikaki faiqaqee idanoo. <sup>18</sup> Beetani maqusa Yeerusaree aaga uqanna maridanoo. (Beetani maqusa Ubandeenara foora marida Yeerusaree maqusa Faarumaqaira foora marinau.) <sup>19</sup> Yeerusaree adeedi marunara moomoo mindaraasa qumuree Maratasa Mariasa dadaaqi ikifaafau qida rooipee mariqau. Nari nifasaafa Rasarusafa kuqunara ikiraqee mariqau.

<sup>20</sup> Maratafa Yisufa ani qu ufana iriseenoo raudamakufanoo oonu afigaidanoo minara qimamirara fufanoo Mariafa kaqi maaqaki marinau. <sup>21</sup> Maratafa Yisuna qafamasee qimaminoo qinau, Oo Karaambaiqa anee anirainanoofau sia qini qifasaafa kuqiqini. Qaara faqa qaara faqa faasaana doo kuqufifaqa akundamasee maridaqa. <sup>22</sup> Miqinoo marifaqa maridaqa, aneenna kai maqee nana ainainaree Anutufinnai nana ainainaree innaaru qinanoo ani amiannoo.

<sup>23</sup> Maratafa nari asookifa kuqunara iridanoo miqi qimasee qimaminau. Yisufa irisee qimaminoo qinau, Anutufa ani afasaana kaifaa mara findifumaiseenoo kaqi marirana amiannoo.

<sup>24</sup> Maratafa mina iriseenoo qinau maa maqa maaqafa taikara faasaana Anutufa qini qisookina uqeerasee kaqi marirana amiannoo qinee minara iridaqa.

<sup>25</sup> Yisufa qimaminau, kuqiranakiqari mara findifirafa qiniki maridanoo. Kaqi marirana marirafa qiniki maridanoo. Yafasiqa anaasee fee qini saqarikinoo kuqinoo kaqi marianoo kuqiranakiqari findifirafa qiniki marinara kaqi mariannoo. <sup>26</sup> Yafasiqa anaasee fee kaqi maridanoo qini saqarikinoo naaru sia kuquannoo kaqi marirana marirafa qiniki marinara naaru naaru sia kuquannoo. Marata anee minara kuqaa fee qidane.

<sup>27</sup> Maratafa iriseenoo qinau, eoo karaambaiqa anee ooqai maa maqa maaqanaki qumuaneera asaku mundirafa Anutuna amaaku uqanna marianafa marianaqa qinee minara kuqaa iridaqa.

*Yisufa ikiraqoo ufafa.*

<sup>28</sup> Maratafa miqi qimaseenoo quandaki maqusai oonureenoo qumee kai Mariana aaramasee qimaminau. Ufasaa rakisirafa anidanoo ani aaraidanoo. <sup>29</sup> Mariafa mi ufana iriseenoo kaqi kaqi findimeeqee kaqi unnaqufanoo oonu afiqarara finau. <sup>30</sup> Yisufa sia maqusai aninau. Aana Maratafa paquruqoo miqoo kai kaqi marinau. <sup>31</sup> Mariafa raudamaki kaqi unnaqufanoo fufaqa Yuda maqannaasaa mina faqa mariusa mina qafamasee minara madikai ikiraqarara fidanoommifoo qimasee afaqee fiqau.

<sup>32</sup> Mariafa Yisufa marunni oonu qafeenoo oorindari maqasaa aqufinoo ufa qimaminau. Oo karaambaiqa anee animariananoofau sia qini qifasaafa kuqiqini.

<sup>33</sup> Yisufa Mariana ikiraqarana qafoofanoo amuqusufanoo Yeerusaree maqannaasaa faqa ikiraqoona qafoofanoo amuqusinoo mina aunduraki mandaikinau.

<sup>34</sup> Miqimasee Yisufa irammirino qinau. Innee yai fee Rasarusana akundee fee qufaqa misa qiqau Karaambaiqa doo mai aniree qafa. <sup>35</sup> Miqi qufanoo Yisufa faqa ikiraqanau.

<sup>36</sup> Yeerusaree maqusanaasa miqoo mariusa mina ikiraqarana qafeeqa qiqau. Oo qafa mifa minara kaaqa rimarifa ikiraqaidanoo. <sup>37</sup> Miqi qufaqa akaqausa niqira ufa qiqau. Mifa nifu dimbarausa amiqimannisee marifa nanaree Rasarusana qaoo qinanoo sia kuquaqaana.

*Yisufa Rasarusana kuqiranakinaana uqeeroo ufafa.*

<sup>38</sup> Yisufa nari kai misa miqi qu ufanara akoogoo fanoo nari aunduraki mandaikufanoo mi ufanara aiaaee qimaseenoo madikai oonuranau. Rasarusana iri ooni aamaraki quqasee ooni firaatia qumaree ititaqoofanoo marinau. <sup>39</sup> Yisufa qimanniminoo qinuu. Innee maa oonina rafaqaameeqeeqa quanda quandamma aquaqa. Miqi qimasoo faqa Maratafa Rasarusana auna qinuu, Oo karaambaiqa mifa qaara faqa qaara faqa afuru faififa marifaqa afunda mandaikammimarifaqa.

<sup>40</sup> Yisufa iriseenoo qimaminuu. Qinee faasai qimamunnana anee qini saqarikinana anee Anutuna afeeka eeraarirana qafeennaranoo. <sup>41</sup> Misa mina iriseeqa ooni firaatia afeeqeeqee mafi quqasoofanoo Yisufa nari oori uqeeraseenoo Anutunara akoogoo innaaru qinoo qinuu, Oo qini qikoofa dufi dufi anee qini ufa irimarianafa mariananoo. <sup>42</sup> Anee maqee maqee qini innaaru qirana irimarianafa marianaqa. Maaqoo mariasa iriaqeeera innaaru qidaqa. Maaqoo mariasa anee qini diqiqamaqoonnanara iriaqeeera innaaru qidaqa. <sup>43</sup> Yisufa miqi qimaseenoo innaaru qimaseenoo fira kari kuqirana aareenoo qinuu. Rasarusana minakiqari rauda. <sup>44</sup> Miqi qimasoo fanoo qamunna afaaqa kukuqamaqoo fa kaqi marufanoo Rasarusafa findifinoo raudee qumuranuu. Mina akiaqa faqa qamunna rumbaqoonarirandee qumuranuu. Yisufa qimanniminoo qinuu. Doo qamunna idukusaifanoo fuani, qimasoo faqa miqimandoofanoo andeeqasoofanoo finuu.

*Yisuna arirara tipundaaru ufafa.*

*(Mat 26:1-5; Mak 14:1-2; Ruk 22:1-2)*

<sup>45</sup> Yeerusaree maqusanaasa moomoosa Rasarusana ikiraqeeusa misa Yisufa Rasarusana findifumasoona qafeeqa kuqaa Anutuna faiqi fee qimasee minasaa mundiqaa mariqau. <sup>46</sup> Misakiqari akaqausa Farisai amaana ufa qimarusa nimaqaqi Yeerusareenni ooruree Yisufa Rasarusana findifunara niraqaqarufa qimannimiqau. <sup>47</sup> Misa mina iriseeqa Farisai amaana ufa qimarusa faqa amaana maqasaa rakisimarusa faqa aiqama faiqi firaasa rakisirausa faqa moodaa qoo suqufi ufa qidaqa qiqau. Maasa naqi fee masee mina Yisuna rafaqaqafuanauree. Maa fasiqafa Yisufa moomoo fira ainaina naaquqara ainaina auqaidanoo. <sup>48</sup> Maasa mina afauaidaga faiqi anaasee maasa minnisee minasaa kai atoqeefoora. Miqifanoo Roomma maqannaana sundiauqa anireeqa maasa faiqi anaasee faqa daru taikidaqa maasa naaquqara amaana maqa faqa rapeepaamma aqifaranoo. Miqifaqa maasa Yuda maqanna kuridianaura.

<sup>49</sup> Misakina uriqararana auqu Kaiafasafa mifa qimanniminoo qinuu. Inniki moo fannoo sia irirana faisa mariafanoo. <sup>50</sup> Faiqi anaasee maasa aiqama kuqanoora moodaa fannoo aiqamausara kuqifaqa amana maasa amiqimandee marianaaura. [<sup>51-52</sup> Kaiafasafa sia nari kaifau mi ufana qimanniminuu. Anutufa qimamunara kai mi ufana qimanniminuu. Kaiafasafa Yisunara Yuda maqannaasa nikiqara kuquannoo Anutuna faiqi namu mina ufa irimarinausara faqa moodaa iriranasaa mariaqeeera kuquannoo fee qinuu.]

<sup>53</sup> Doo mi faasaannasaqari Yuda maqanna uriqararusa Yisuna arira ufa oosarasee deedaqiqau. <sup>54</sup> Yisufa mina iriseenoo miqooqari sia Yudeeaa maqa maaqaki akoogoo nimiranuu. Maqusa moo auqu Eefaraimma maqusai nari faiqi namufaqa oogu marinuu. Eefaraimma aadana maqa maaqa atisaa marinuu.

<sup>55</sup> Yisufa Eefaraimma maqa maaqaki marufanoo Yuda maqanna qoomaqa fira qoomaqa ainnaaqarara qoomaqa adeedi ranau. Aukuana aukuaana Yuda maqanna oosana ainnaaqarara qoomaqa adeedi ramafufaqa faiqi anaasee aiqama suqumaree miqoo Yeerusaree maqusai ooruraidaqa nari mandainaina findaukee mariqau. Aukuana aukuaana miqimariqau. <sup>57</sup> Amaana maqasaa rakisimarusa faqa Farisai amaana ufa qimarusa faqa Yisunara faiqi anaasee qimannimiqau. Innee ninnabaqa Yisuna paqurimasee dadi oonurandee mini qimaqimifaqa maasa mina qumaraanura. <sup>56</sup> Faiqi anaasee fira amaana maqaki Yeerusareenni suqufufaqa Yisunara randaidaqa maaqi qimasee nari qimami nari qimami qiqau. Yisufa fira qoomaqaqi anifeeraannoo sia fee aniraannoo. Innee minara nana iriree iridee.

## 12

*Beetani maqusai anaasee moo fannoo Yisuna aikusaa amiqira afundimaru fadameena adia amaqoo ufafa.*

*(Mat 26:6-13; Mak 14:3-9)*

<sup>1</sup> Mi ainnaaqarara qoomaqafa Yeerusaree maqusai adeedi reeno dinni qisauku taikasee dinni ani moodaa faasaana aiqaqainanoo mi qoomaqafa kambiqarara imarufanoo Yisufa Beetani maqusai oonuranau. Yisufa Rasarusana kuqiranakinaana findifu maqusanaki aniranau. <sup>2</sup> Yisufa aniroofaqa (Rasarusana mara findifunara iriseeqa mina akiaqara qoomaqa firaana suqasee naida amiqau.) Maratafa qoomaqa sakeeqaida nimimarufanoo Rasarusafa Yisuna faqa ooqumarifi narana nanau.

(Misa oosana maaqimminoo marinau. Misa qaindasaa fifandirifiga nisaataa saunarsaida niku uqusaida neemarus marida miqimandee neemariqau.) <sup>3</sup> Neemarufanoo Rasarusana asookifa Mariafa Yisuna anoonaa amarafa fadameena taqu firaana firaaf faafauru aqusaide mareemaruna qumareenoo amiqira afundimaru fadameena mina auqu narada fadameena Yisuna aikumau adia amaqaanau. Adia amaqaaseenoo nari akiaqa asausi kisaqa qumareenoo minannai utitiqanau. Miqimasoo fanoo afunda firaafa misa maru maqanaki qumbiqanau. <sup>4</sup> Yisuna faiqi namuqi qari moo fanoo mina auqu Yudasifa Keerioota maqannaafa Yisuna uqeegaaninna fasiqafa marinau. Mi fasiqafa Yudasifa amiqira afundimaru fadameena moomoo qafamaseenoo maaqi qinuu. <sup>5</sup> Maa fadameenna firaaf faafauru mareemaria fadameenafa. Nanaree fifau adieenee. Saina marinana qumiasana faqaana amiseenana moomoo munnimma 300 maraqaana. Maraseenana kudi fasiqa anaaseeqa kaqi nimiaqaana. (Mi aukuanna Yuda maqannaasa Moosena ufa qaindusidaqa kudi fasiqauqa aiqama ainaina dadaaqiga nimimariqau.) <sup>6</sup> Yudasifa sia kudi fasiqara irimarufa kaqi fifau ufa marunara miqi qinuu. Mifa ummuarimarufa marinau Yisuna faiqi namu pausakinaana kaqi ummuarimarufa mifa maridanoo miqi qinuu.

<sup>7</sup> Yisufa mina iriseenoo nari maaqi qimasee qimaminuu. Marianara sia miqi qia. Saina miqiani. Afundi fadameenna ataa kaqi marina qinee kuquanoo qini qifaaqai akuqimaqaani. <sup>8</sup> Anee kudi fasiqa anaaseeqara qianandee. Kudi fasiqa anaaseeqa naaru naaru inniki marifanoo. Qinee sia kisaqasaa mariana qusasa taikaanara. Saina fadameena adiaqimaqaani.

*Rasarusana arirara tipundaaru ufafa.*

<sup>9</sup> Yisufa Beetani maqusai animarufaqa Yeerusaree maqusaindarii moomoosa qafarara ooqu fiqau. Kuqiranakiqari findifuna Rasarusana faqa qafararee qimasee ooqu fiqau. <sup>10-11</sup> Faiqi anaasee moomoosa Yeerusareendarii Yisunasaa atooqaidaqa moomoo ooqu fiqau. Miqiuufaqa amaana maqasaa rakisimarusa oommasee qiqau. Rasarusafa kuqiranakiqari findifunara irisee misa Yisunasaa atooqarara ooqu fimarifaqa saina Rasarusana faqa arunaaree qimasee deedaqiau.

*Yisufa Karaambaiqa iundee toonkisa Yeerusaree maqusai keeqoo ufafa.*

(Mat 21:1-11; Mak 11:1-11; Ruk 19:28-40)

<sup>12</sup> Faiqi anaasee ainnaaqarara oomaqara maqusa maqusaindarii Yeerusaree maqusai suqasee mariusa Yisufa aanai urufaqa afiqarara moomoosa ooqu fiqau. <sup>13</sup> Ooqu afiqarara ooqu fidaqa koopeena amanee fooqaana moomoo atekamaree ooqu fiqau. (Misa nariqa qimiria Yisunara maaqi qiqau. Ooqai Anutuna asauku mundirafa kambiganoo marifa uridanoo. Mifa maasa qiga karaambaiqakirara uridanoo.) Misa ooqu fidaqa maaqi qimasee firaaf kari faaqariqau. Anutuna amooqia mina auqu uqeeraa. Anutufa qufanoo kambiqarafa uridanoo, Anutufa mina amiqi amiqiani, Anutufa Isaraee maqanna Karaambaiqa amiqi amiqiani.

<sup>14</sup> Yisufa doonki moo maqee innooqee marunnasaa paqurimasee minasaa akaramafi ooqumarii finoo Yeerusareenni ooru finuu. Miqiuuna ooqai tamummaqara fasiqa akara rumaqoomau ooru finuu. <sup>15</sup> Yeerusaree maqusa moo auqu Sioona maqusee qimarinau. Minara ooqeenaa tamummaqara fasiqafa maaqi qimasee akara rinau.

Innee Sioona maqusanaasa sia rufaaqa. Inni karaambaiqa innee iannai uridanoommi, doonkisa ooqu marifi uridanoo.

<sup>16</sup> Yisuna faiqi namu faiqi anaasee qambaana Yisuna faqa ooru fiqau. Misa tamummaqara fasiqa akara iridaqa anoonara sia iridaqa fiqau. Kasooqagee Yisufa kuqiranakiqari findifufaqa misa oonumafi iriseeqa qiqau. Maasa ooqai akara rumaqoomau Yisuna faqa Yeerusareenni ooru fiqafana.

<sup>17</sup> Yisufa Rasarusana aaroofanoo findifuna qafeeusa Yeerusaree maqusaki suqiga marusa Rasarusanara qimannimiqau. <sup>18</sup> Faiqi anaasee moomoo mi ufana iriseeqa maaqi qiqau. Firaaf ainaina auqemarina ooqu afiqamaree uruqaqee qimasee ooqu afiqee uriqau. <sup>19</sup> Farisai amaana ufa qimarusa oomasee maaqi qiqau. Qafaa doo maasa kadiqaidaqa faiqi anaasee minnikai quandaqidaqa.

*Kirisa maqannaasa Yisuna qafararee qu ufafa.*

<sup>20</sup>Yeerusareenni ainaaqarara qoomaqara suqimarusak Kirisa maqannaasa nianai nari maqusaindari anusa faqa miqoo Yuda maqannaasa faqa animariqau. Misa faqa Anutuna qoomaqa sakasee namasee Anutuna amooqiraree qimasee animariqau. <sup>21</sup>Kirisa maqannaasa aniree Firipina irammiriqa qiqau. Oo maa fasiqa, Yisuna qafararee qidaqa amanee maasa qifiqee finaqa qafaanauree. Firipifa Beetasaida maqusaindari Karaa maqakinaafa marufa.

<sup>22</sup>Firipifa Anduruna paqurimasee misandiri Yisufuqoo oonuree Kirisa maqannaasara qimamiqau. <sup>23</sup>Yisufa misara iriseenoo qimannimino qinau. Anutufa faiqi nimaaku qini duqu firaaqoo uqeerara aukuaana doo animaridanoo. Sia maa maqee imariasa imariandee faq maseenoofau qini duqu uqeerannoofau. Qini firaa aupurara kuqiranannai qini duqu uqeerainoo areenaanno. <sup>24</sup>Qinee anoona ufa inni qimannimidaqa. Nandi asumu nariara kaqi maridanoo aaduma maridanoo. (Yisufa nari kuqiranara qidanoo nandi asumu kikiqa usinau.) Mifa maqaki ummaqusaifanoo putaa inoo moomoo kambigaanno sia nariraa marianno. <sup>25</sup>Yafasiqa anaasee fee maqoo nari mariranara rimarifa nandi asumuara foora sia kafa kambigaanno mifa nari marirana kuku-paanno. Yafasiqa anaasee fee maqoo maa maqanasaa nari mariranara akoogainafa maqaki ummaqusaifanoo nari marirana afeediiseenoo naaru marirana maraanno. <sup>26</sup>Innee Kirisa maqannaasa qimannimia. Yafasiqa anaasee fee qini ainainira faiqikiraree qimaseenoo aufadeemariifa mifa nari maqoo marirana quqasee qini faqa finafa qinee fuannannai mifa faqa miqoo oonu marida qini dadaaqianno. Yafasiqa anaasee fee qini duqu uqeeranno mina auqu faqa qini qikoofa uqeeranno.

*Yisufa nari kuquaninna ufana qimannimu ufafa.*

<sup>27</sup>Yisufa Yeerusareenni oorufidanoo nari aqa marusa qimanniminau. Maqee qini daundura fifau fafau inoo marifaqa nana ufee qianauree. Qinee naqimasee qeeqa qikoona qiana qini kuqiranara qaoo qianno fee. Qinee firaa aupurana marasee maa marunandee fuka kuqanauree qimasee qumuafanausa maridaqa doo qusasaa maridaqa naqimasee qaoo qiraree sia qaoo qianauree. <sup>28</sup>Miqi qimasee nari aqa marusa qimannimiseenoo Yisufa quandaqinoo nari akoonara Anutunara innaaru qinoo qinau. Oo qipoo, aneenna auqu amooqirana uqeeraa. Miqi qimasoo fanoo Anutuna ufa inaaruindari qumino qinau. Doo qinee qeeqa duqu amooqirana uqeerreeqa doo kafa uqeeranauree qinau.

<sup>29</sup>Miqi qimasoo faqa faiqi anaasee moomoo Yisuna faqa Yeerusareenni ooru fimarusa mi ufana iriseeqa qiqau. Innaarunai qiifoo qufaqa akaqausa qiqau. Qangiroo moo fannoo mina faqa ufa qidanoommi.

<sup>30</sup>Yisufa misa ufa iriseenoo qimannimino qinau. Sia qiniarau qidaqinoo inniara qidaqinoo. <sup>31</sup>Doo maqee Anutufa maa maqa maqanakinaasa qini darifandinanara nari aanoqira ufa ninianno. Doo maqee maa maqa maqanaki uriqararafa Sadannafa taikaanno. <sup>32</sup>Qini daruseeqa auniranasaa quqaseeqa maqaki rakiqasee uqeer-qaqisaifaqa maqasaa aiqamatinaidaraasa suqu moodaaqoo qeeqa daaqa quqaanauree. <sup>33</sup>Miqimasee Yisufa nari kuquaninna oosana qimanniminau.

<sup>34</sup>Qimannimufaqa misa qiqau. Maasa sanda akarakinaa ufa asauku mundiranara naaru naaru marianno fee qidaqa. Anee faiqi nimaaku aunirana saqarisaa kuqiraree qimariannana, naqi fee qidane miqi qidane. Faqiqi nimaakuara anee qiana fafee mifa maridanoo fee.

<sup>35</sup>Miqi qimasoo fanoo Yisufa mina iriseenoo qinau. Kaaqa qarafa inniki qusasaa marianno. Kaaqa qarafa mariqoo mi kaaqa qaranasaa kai mariaqa. Miqimasee marifanoo asukuna fannoo sia rafaqaqafuanno. Asukunaki nimarifa sia aana qafaidanoo kaqimbidanoo. <sup>36</sup>Kaaqa qarafa mariqoo innee minara riqa anoonee qimasee mi mau fuaqa miqiqa innee kaaqa qaranafaqaasa mariaqa.

*Yuda maqanna faiqi fraasa Yisunara sia Anutuna faiqi fee qu ufafa.*

Miqi qinoo qimannimiseenoo nariara moosaa finau. Miqoo oonu kukeeqanau. <sup>37</sup>Yisufa oosana oosana firaa ainaina faiqi anaasee nifusaa auqemarinau. Sia misa minara oonumafi iriqau. <sup>38</sup>Ooqai Anutuna tamummaqara fasiqa moo auqu Eesaia mifa misa oosana akara rumaqoofa maridanoo. Mifa maqaki qimasee akara Rinau.

Oo karaambaifaqa, yafee moo fannoo maasa ufa irinoofeeinau sia moo fannoo. Karaambaifaqa nari afeeka yau yausee uqannifiqoo faqee anoonee qidee. Sia moo fannoo kuqaa fee qinau.

<sup>39</sup>Miqi qimasee ooqai akara rumaqoofa marufaqa umimmaqidaqa sia Yisunara anoonee qiqau. Eesaiafa misara kaifaa maaqi qimasee akara rumaqoofa maridanoo.

<sup>40</sup> Anutufa misa nifu dimbaqai faqa maridaqa. Mifa misa nitikura ititaquqai faqa mariaqera. Misa nifu sia qafaqera misa naaqoo sia iriaqera. Qinee unnannai faqa sia quanda fifaqa sia amiqimannisaqera.

<sup>41</sup> Eesaiafa sia fifaufau maa ufana qimasee akara rumaqoofau maridanoofau. Mifa oogaindari Yisufa sia kambi qooqoo afu pisipasamafino Yisuna afeeka eeraarirana gafaidanoo akara rimarufa maridanoo.

<sup>42</sup> Kuqaa moomoosa Anutuna tamummaqaraisa ufamau fidaqa Yisunara sia iriqau. Miqidaqa Yuda maqannaa uriqararaisa akaqausa moomoosa Anutuna tamummaqaraisa ufamau fidaqa Yisunara sia iriqau. Miqidaqa Yuda maqannaa uriqararaisa akaqausa kukeeqasee Yisunara iri mariqau. Farisai amaana ufa qimarusa amaana maqakiqari maasa diqigamasai faqa sia kaifaa keeqaanauroo qimasaida qumeeree mariqau. <sup>43</sup> Misa sia Anutuna afusaa eedoo qiranara rimariqau. Faiqi nifusaa eedoo qiranara kai kaaqa rimarunara Yisunara kukeeqee mariqau.

*Taikara aukuaana Yisuna ufa fannoo faiqi anaasee rainanimaqara ufa qimariannoo.*

<sup>44</sup> Yisufa kafa moo kari faiqi anaasee qimannimino qinau. Yafasiqa anaasee qini saqarikidanoo fee. Mifa sia qini kai, qini diqigamaqona mina faqa saqarikidanoo. <sup>45</sup> Yafasiqa anaasee fee qini qigafaidanoo fee mifa qini diqigamaqona mina faqa gafaidanoo. <sup>46</sup> Qinee kaaqa qaraisa maa maqa maaqanaki animaridaqa. Qiniki mariasa sia asukunaki mariaqera animaridaqa. <sup>47</sup> Yafee moo fannoo qini ufa irisee sia auqainnana sia qinee qeeqa ufa amiana. Sia qinee doori runira ufa nimirree qimasee qumuafanausa maridaqa. Qinee faiqi anaasee Anutuna nifairanakinana qumarasee asumu marirana nimianeera qumuafanausa maridaqa. <sup>48</sup> Yafee moo fannoo qini minnisainafa qinee ufa qimarunnana minnisainafa sia qeeqa ufa mina amiana. Kasoo taikara faasaana Anutufa qini dookina ufa maqee qimannimimarunnana maraseenoo minnanno naruannoo. <sup>49</sup> Qinee sia qeeqa iriranannai ufa qimannimidaqa qini diqigamaqona qini qikoona uqaqifigoo ainaina kai qimannimidaqa uqannifiqaidafa. <sup>50</sup> Qinee qeeqa qikoona ufa iridaqa mina ufa fannoo kai naaru naaru marirana nimidanoo. Qinee minara iridaqa qeeqa qikoona ufa kai qimannimidaqa.

## 13

*Yisufa nari faiqi namu niku namari uqu ufafa.*

<sup>1</sup> Anutuna ainnaaqarara qoomaqa adeedi ramafufanoo Yisufa maa maqana quqasee doo nari akoofinai firafa adeedi reemarufanoo minara Yisufa irimarinau. Maa maqa maaqanakinana narisaa atooqemariasara amuqusufanoo ridanoo kaqi misara aidimarufanoo fidanoo kasaqai munu kuqinau.

<sup>2</sup> Yisufa narana eendaki sakasaida nari faiqi namufaqa neemarinau. Yudasifa Keerioota maqusaindaraafa indaruqaa Simoona amarana amaaku mifa Yisuna faiqi namufaqa miqoo marufa faasai Sadannafa mina dadaaqufanoo Yisunara ueeqararee qidanoo deedaqimarinau. <sup>3</sup> Anutufa aigama afeeka innaaruna faqa maqa faqa Yisuna aramandunnai quqaqoofanoo marufanoo Yisufa mina irida marinau. Nari Anutu-finaindari qumufa iridanoo marinau. Nari kaifaa Anutufinnai ooru firafa adeedi ranoo marufanoo minara faqa irida marinau. <sup>4,5</sup> Yisufa nari faiqi namufaqa narana namaseenoo findifinoo nari siuta raipaqusee taura qumareenoo nari aranandauqanna rumbaseenoo difaani maraseenoo nammari minaki adiasseenoo nari faiqi namu niku nammaruqusaiddanoo taurannai rukannimaqemarinau.

(Yisufa maru aukuaana mina maqannaa oosana maaqimminoo marinau. Faiqi moo fannoo moo maqusaindari nari aqooni qafararee qimasee ani mina maaqaki keeqafinoo maaqa akoofa mi fasiqana qafeenoo nari ainainira fasiqa ureeqarana aaramasee qimaminoo anee maa fasiqana aiku nammaruquseenana taura qumaree rukasainanoo ooqumariani. Mi oosanna niku nammaruqira saika sia uriqararaisa maree mariqau ureeqaraisa faaqa fasiqa fooqaasa miqimariqau.)

<sup>6</sup> Yisufa Simoona moo auqu Peetooroona aiku nammaruqirarufanoo Simoona moo auqu Peetooroofa qinau. Oo Karaambaiga kuqaa fee anee qini qiku nammaruqiraree qidane. Sia miqia, anee uriqararafa mariananoo.

<sup>7</sup> Yisufa qinau, Eeo nammari uquanara anee maqee sia qini oosana irimariananoo kasooqaqee irinnaranoo.

<sup>8</sup> Peetooroofa qinau, anee maasa uriqararafa mariananoo naaru naaru sia uqanna qini manda qiku nammaruqaa.

Yisufa mina iriseenoo qinau. Qinee ani aiku sia nammari uquanana maaqooqari anee sia qini faiqikinnaranoo.

<sup>9</sup> Simoona moo auqu Peetooroofa mi ufana iriseenoo qinau. Oo karaambaifaq sia qiku kai nammuruqaa qisauku faqa qikiyaq faqa aiqama nammari uqaa.

<sup>10</sup> Yisufa mina iriseenoo qinau. Faiqi nammari auqemariasa aiqama nifaqaa amiqinoo maridanoo niku kai doona kookoomma akinoo maridanoo. Innee aiqama amiqifaq mari-afanoo moodaa fannoo mandaikinoo marifaqaa qafaidaqa. <sup>11</sup> Yisufa faasai nari ueeqee maruna qafaidanoo miqi qinau. Inni nifaqaa aiqama nammari uqinoo maridanoo. Moodaa fannoo kai sia nammari auqara fee qinau. Nari ueeqaaninnanara iriseenoo miqi qinau.

<sup>12</sup> Yisufa nari faiqi namu niku nammari uquseenoo kafaa nari siuta afisumaree kafaa misa faqa oqumari finoo qimanniminoos qinau. Qinee inni niku nammari uqunannara iridee sia fee iridee. <sup>13</sup> Doo maqee mina nammari uqunnana oosana kooroo ianaura. Innee qiniara ufasaa rakisira fee karaambaifqee qimariafanoo. Doo mina kuqaa qimariafanoo qinee miqiraua maridaqa. <sup>14</sup> Qinee inni ufasaa rakisirausa inni karaambaifaq maridaqa ureeqaraua saika mareemariana misa naanna raidaqa inni niku nammari uqidaqa innee miqi kai iqa qini daanna reeqa ureeqara fasiqa anaaseera foora nari dadaaqi nari dadaaqiaqa. <sup>15</sup> Qinee uqannifiqauannana qafeeqa qinee unandee kai iaqanani. <sup>16</sup> Qinee kuqaa anoona ufa inni qimannimidaqa. Ainainira fasiqa fannoo sia nari rakisira uqirarafa maridanoo. Ufa maree fimari fasiqafa sia aqiqeemarina uraaqararafa maridanoo. <sup>17</sup> Innee maqee maa ufana anoona naaqooki irimariafanoo. Innee maa ufana irisee auqaifanoo asasirafa mariannoo.

<sup>18</sup> Yisufa kaifaa nari faiqi namu maaqi qimasee qimanniminu. Anutuna tamum-maqara fasiqauqa oqeenaa akara oosana maaqimminoo maridanoo. Innikiqari moodaa fannoo qini narana qini faqa neemarifa mifa qini namuqaakinoo aranaiqi daruannoo.

Maa akarana oosana inniki kambiqaanoo, sia inni aiqamara qidaqa. Qinee oonu mareeqee qeeqaindika maqaunaua mariafanoo moodaa fannoo kai. <sup>19</sup> Qinee maqeesaa qimannimidaqa sia kambiqai kamuqoo qimannimidaqa. Kambiqainafaq innee qiniara irifaranoos. Qinee qeeqaraa ufa qunaua doo misaki maridaqa. <sup>20</sup> Qinee anoona ufa kuqaa qimannimidaqa. Faiqi anaasee moo fannoo qinee inni niqiqamaqaunaua niqoondik-inafa qini faqa qiqoondikidanoo. Faiqi anaasee moo fannoo qini qiqoondikamma qimaqainafa qini diqiqamaqoona faqa kai aqoondikidanoo.

*Yisufa nari uqeeqeeqandinna ufana kooroo u ufafa.*  
(Mat 26:20-25; Mak 14:17-21; Ruk 22:21-23)

<sup>21</sup> Yisufa minara qimanniminsoofanoo nari aunduraki oonumafi irufanoo amuqusu-fanoo kafaa kooroomasee qimanniminu. Qinee anoona ufa qimannimidaqa innikiqari moo fannoo qiniara ueeqaanoo.

<sup>22</sup> Yisuna faiqi namu mi ufana iriseeqa tautumakufafaq nari qafee nari qafee idafaq randaqau. <sup>23</sup> Yisuna afaaqasaa aqoondi fannoo mina aqa oqumarifi marinau. <sup>24</sup> Simoona moo auqu Peetooroofa mi fasiqana auqamaseenoo qinau anee karaambaifaq irammirisee iria. Yafasiqanaree qidanoo fee yafee ani ueeqaanoo fee.

<sup>25</sup> Miqi qufanoo mi fasiqafa Yisuna aqa firambaqafufanoo maqandanai irammirinau Karaambaifaq yafee ani ueeqaanoo fee. <sup>26</sup> Yisufa qinau, qinee feemu rakeemandeeqa sauna anoona fooqaanaki raaraamandee amianana qafa. Mifa kai qini ueeqaanoo. Miqi qimasee Yisufa feemu rakeemaseenoo sauna anoona fooqaanaki raaraameeqeenoo Yudasifa Keerioota maqannaa Simoona amarana amaaku aminau. <sup>27</sup> Yudasifa mi feemuna qumarasee namasoofanoo doo Sadannafa mina aunduraki keeqanau. Miqufanoo Yisufa Yudasina qimaminoo qinau. Doo anee aneenna inna ainaina doo dauni dauni ia. <sup>28</sup> Miqoo marusa sia Yisuna ufa oosana iriqau. <sup>29</sup> Yudasifa Yisuna faiqi namu munnimmasaa rakisimarufa marufanoo Yisufa aqiqoofafaq misa narana aina fi fi maraanifeera aqiqee maqi qiqau. Kudi fasiqauqa munnimma nimianoo fee qiqau.

<sup>30</sup> Yudasifa mi feemuna mara namaseenoo findimeeqeenoo aqee kai eendaki rau-damaki finau.

*Yisufa fuka aaquqira ufa qimannimu ufafa.*

<sup>31</sup> Yudasifa fufanoo Yisufa kaifaa nari faiqi namu qimanniminoos qinau. Doo maqee faiqi nimaaku qini amiqi amiqira afeeka eeraarirafa doo kooroo inoo maridanoo. <sup>32</sup> Anutuna afeeka eeraarirafa qinisaa kooroo inoo maridanoo, Anutufa nari uqanna quandaki qini qifaaqa firaqoo areenaannoo, qusasaa maqee uqanna miqianoo. <sup>33</sup> Qini faiqi namu sia kisaqasaa inniki marianaura. Yuda maqannaa qimannimianandee kai inni qimannimidaqa. Innee qiniara randee sia paqurifaranoos. Qinee fuannaqoo sia innee amana fifaranaoos. <sup>34</sup> Doo maqee qinee fuka aaquqira ufa qimannimidaqa. Innee nariara nariara nimuqusidaqa nariara nariara ruaqa. Qinee inniara qimuqusufafaq

inniara rimariqia innee faqa qini daanna raaqa nariara nariara ruaqa. <sup>35</sup> Innee nariara nariara rimarifaqa aiqamausa inni nindafeeqa inniara boo Yisuna faiqi namu miqidammiafoo qiaqa.

*Yisufa Peetooroofa nariara qaoo qianinna ufana kooroou ufafa.*  
(Mat 26:31-35; Mak 14:27-31; Ruk 22:31-34)

<sup>36</sup> Yisufa miqi qimasoofanoo Simoona moo auqu Peetooroofa irammirinoo qinau, Oo Karaambaiga anee yai fee finaqqee maasa sia ani faqa fuanauree.

Yisufa iriseenoo qinau, Qinee maqee fuanannai anee sia amana qini faqa finnaranoo, kasooqaqee anee qini faqa finnaranoo.

<sup>37</sup> Simoona moo auqu Peetooroofa iriseenoo qimaminau, Karaambaiga anee naqi naqee qinee sia ani faqa fuanauree. Qinee aniara kuquanauranoo. <sup>38</sup> Yisufa mi ufana iriseenoo qimaminoo qinau, Kuqaa fee anee maqee qiniara kuqinnaree, qinee anoona ufa ani qimamidaqa fafaa eendaki kookooraana sia ufa qinnakamuqoo anee kuqiranara rufiaseenana qaaramoo kari qiniara sia qafaunausee qinanoo kookooraana ufa qiannoo.

## 14

*Yisufa nariara nari akoofa marinnai fimaria aanausa qinee maridee qu ufafa.*

<sup>1</sup> Yisufa miqi qimaseenoo aiqama qimannimino qinau. Innee sia nimukee marinaqa maparaaiaqa. Innee Anutuna saqariki mariafanoo doo qini faqa saqarikiqa. <sup>2</sup> Qini qikoona innaaruna maqusaki moomoo maqa nari aqa nari aqa maridanoo. Qinee maindari ooruree innee ooru fifandinna maqana auqirara ooru fidaqa. Minara qinee kuqaa anoona ufa kai inni qimannimidaqa. Sia anoona marinaqau sia qimannimunaiqini. Kuqaa anoona marifaqa qimannimidaqa. <sup>3</sup> Qinee innaarunai oorureeqa innee ooru fifandinna maqusana deedaqamasee qumu nifqee minni murunnisaanara. Innee qini faqa mariaqera miqianaura. <sup>4</sup> Innee qinee marunnannai fimaria aanara irimariafanoo.

<sup>5</sup> Toomasifa mi ufana iriseenoo qinau, Anee fimariannanara maasa sia iridaqa. Naqimasee fee mi aannara irianauree.

<sup>6</sup> Yisufa iriseenoo maaqi qimaseenoo qimaminoo qinau, qinee mi aanausa maridaqa. Qinee kuqaa anoona ufa maridaqa. Naaru naaru marirafa qiniki maridanoo qinee misa maridaqa. Sia moo fannoo kaqi qini qikoofinnai fidanoo qinimau kai fifaranoo. <sup>7</sup> Innee qiniara irifau qini qikoonara faqa irini. Maqee mariaqooqari qini qikoonara iriqa qini qikoona qafee mariafanoo.

<sup>8</sup> Firipifa mi ufana iriseenoo Yisuna qimaminoo qinau, Oo karaambaiga aneenna akoonu uqaqifiqainaqa qafamasee doo fee qianaura.

<sup>9</sup> Yisufa mina iriseenoo akooqoofanoo raiqaseenoo qinau. Firipi qinee kisaqaqasaa inni faqa mariafanaua marunana anee sia irirana irimariananoo. Yafasiqa anaasee fee qini qifafainafa doo qini qikoona qafaidanoo. Anee nanaree qiniara aneenna akoonu uqaqifiqaannee q inanee. <sup>10</sup> Firipi anee sia fee qini ufara anoonee qidanee. Qinee qipaqqeenaki faqa maridaqa mifa qiniki faqa maridanoo sia fee anee mi ufana iridanee. Yisufa kafa nari faiqi namu aiqama qimannimino qinau. Qinee inni ufa qimannimimarunafa sia qeeqa daundurakinaana qimannimidaqa. Qini qikoofa qiniki marifa nari irirana iriseenoo qifaqa nari qimau kai fidaqa qimannimidaqa. <sup>11</sup> Innee maa ufana irisee anoonee qiaqa. Qinee qeeqa qikoonaki maridaqa mifa qiniki faqa maridanoo. Innee qini ufara sia fee qimasee qinee auqaannainana faiqi sia auqaqaa ira ainaina nifunnoo qafamasee Anutufa mina faqa maridanoo fee qiaqa. <sup>12</sup> Qinee anoona ufa qimannimidaqa faiqi anaasee moo fannoo qini saqarikinafa qinee ianandee iannoo. Qinee qeeqa qikoofinnai fuannanara qini saqarikinafa sia qini daanna kai raanoo qini saika uraaqaranoo mariannoo. Mina oosana maaqimminoo maridanoo. <sup>13</sup> Innee innaaru qidaqa qini duqusaa qimasee innaaru qifaqa nimianaura. Sia moo ainaina sia nimianaura innaaru qifaqa nimianaura. Qini qikoona afaqa areenarafa qinisaaqari faqa areenaanifeera nimianaura. <sup>14</sup> Innee qini duqusaa qimasee innaaru qifaqa qinee mi ainanna miqimannisaanauranoo.

*Yisufa naaquqara maraquna nimiraree qu ufafa.*

<sup>15</sup> Yisufa nari faiqi namu kaqi qimannimidano qinau. Innee qiniara riqa qinee qimannimifannufana andeeqasee qumareefaranoo. Sia qiniara riqa sia qinee qifannufana qumareefaranoo. <sup>16</sup> Qinee inni minnisee ooru fiqa qeeqa qikoona irammiriananoo Anutuna dadaaqira afeeka maraquna nimiannoo. Mifa kuqaa anoona ufa qiroosana maraquna qumu mariannoo, mi maraqunafa naaru naaru inni faqa mariannoo. <sup>17</sup> Maa

maqanasaa mariasa sia qini Yisusa mandaaqee marinausa sia amana mi maraqqunna mareefaranoo. Misa sia mina qafaidaqa sia minara irimariafanoo minara sia mareefaranoo. Mifa inni faqa mapukusee maridanoo kuqaa inni naunduray anoona mariannoo. Mifa inni faqa marifaqa innee mi maraqqunna oosana irimariafanoo.

<sup>18</sup> Qinee sia inni mininnisaanaura qinee oorureeqa Anutuna maraqquna aqiiqaanoo qumuree inni faqa marida dadaaqqannoo. <sup>19</sup> Kaqikaagoo maa maqanasaaqaraa irirana faqaasa sia qini qiqafeefaranoo. Innee kai qini qiqafeefaranoo. Qinee kaqi mariraua maridaqa minara innee kaqi marirana mareefaranoo. <sup>20</sup> Qinee qeeqa qikoonaki maridaqa kafaaf innee qiniki mariafanoo qinee inniki maridaqa. Anutuna maraqquna qumuaninna faasaana mi faasaanna mi ufana oosana amiqqimandee irifaranoo.

<sup>21</sup> Yafasiqa anaasee fee qinee qimannimafanna ufana irisee maree marifandinausa misa kai qiniara rifandinausa marifara. Qiniara rimarina fasiqa anaaseesara qini qikoofa misara faqa ruannoo qinee faqa mi fasiqa anaaseesara ruanaura qeeqaindi anoona afeeka uqannifiqaanaura.

<sup>22</sup> Yudasina amarafa Yisuna irammirinoo qinuu, Oo Karaambaiqa naqimaseenanee anee maasa qifusaa kai kooroo innaree maa maqa maaqanasaaqaraa irirana faqaasa nifusaa kukeqqararee qidanee.

<sup>23</sup> Yisufa iriseenoo qinuu. Yafasiqa anaasee fee qiniara rimarinafa qini ufa maree mari fasiqa anaaseefa mifa qiniara rimarifa mariannoo. Miqqinna fasiqa anaaseena qini qikoofa Anutufa minara faqa ruannoo. Mifa faqa qinee faqa mi fasiqa anaaseesa innannai oonuree umee mina faqa mariaanaura, miqqimaseeqa maasa inni nifusaa kai koorooianaura. Maqasaqaraa irirana faqaasa nifusaa kukeqqaanaura. <sup>24</sup> Yafasiqa aanaaseesee sia qiniara rinausa misa qini ufa sia irifara. Qinee qimannimira ufa innee irimariafanoo, sia qinindi maridanoo, qini qikoofa qini diqqimaqqainaindi minaindi maridanoo.

<sup>25</sup> Qinee maa ufausa inni faqa kaqi maridaqa qimannimidaqa. <sup>26</sup> Inni fuka dadaaqqirafa naaqqara maraqquna qini qikoofa kasooqaaqee nimianinnafa mifa aiqama ainainara qimannimiannoo. Qinee faqa aiqama ufa qimannimifannana mifa minara inni naqqoo auqainaaqaa oonumafi irifaranoo.

<sup>27</sup> Qinee naandura asoarana inni nimidaqa. Qinee qiniki mari naandura asoarana inni nimidaqa. Maa maqanasaa mariasa sia misa naanna ramasee inni nimidau. Amiqimandee qeeqa asoarana nimianaura. Sia inni naandura rapikiani sia rufiaqa rufiaqaa. <sup>28</sup> Qinee maqee maaqqooqari kafaaf ooru fuanaura oorureeqa marikaqa oorurandee qumureeqa inni faqa mariaanaura. Sia qinee ooru fuannanara innee minara rufiaqaa. Innee kuqaa qiniara ridau qinee qeeqa qikoofinnai fuannanara susummaqqimaqqani. Qini qikoofa qini uriqqararafa maridanoo minara susummaqqimaqqani. <sup>29</sup> Qinee maqee sia kambiqauna kamuqqoo aiqama ainainara qimannimidaqa. Kambiqaafinaqa innee qiniara iriaqera qimannimidaqa. <sup>30</sup> Qinee sia amana inni faqa kisaqqasaa ufa qianaura. Maa maqanasaa rakisirafa Sadannafa doo anidanoo qini afeeka fannoo mina afeeka uraaqqaranoo maridanoo. <sup>31</sup> Maa maqanasaaqaraasa qinee qeeqa qikoonara rimarunnana minara iriaqeraa mina ufamau andeeqqasee fidaqa qinee qeeqa kai irisee Sadanna asaaku ameemaanai oonuree kuqanaura. Miqqi qimaseenoo Yisufa narí faiqi namuura doo uqeraifaqa maaqqooqari moosaa fuane qimasee uqereenoo moosaa finau.

## 15

*Yisufa nariara qinee uainna sanda anoonanda maridee qu ufafa.*

<sup>1</sup> Yisufa fidanoo maa ufana narí faiqi namu qimanniminuu. Qinee saunara foora qinee marunna saqarina maridaqa. Qini qikoofa sauna saqamasaa rakisimarifa maridanoo. <sup>2</sup> Qini qikoofa Anutufa mi sauna saqarina sia irainanoo ateeqa idaraannoo. Ireemari oosanna amiqqimandee iraanii fee qimasee anukamasaidanoo amiqqimasee rakisidanoo. <sup>3</sup> Qinee qimannimimarunnufana innee irisee maraifanoo doo inni mandainaina rukannisaifaqa anukaraqoo mariafanoo. <sup>4</sup> Innee saqari asaanaara foora qinisaa ariqa mariaqa. Innee sia qinisaa ariqa maridaqa sia qini amiqqira marira nirana mareefaranoo.

<sup>5</sup> Qinee saqari anoona maridaqa. Innee asaana miqqiraua mariafanoo sia anoonasaa arufinafa sia sauna iraanoo. Qiniki marinausa qinee faqa misaki mariafanoo saunara foora moomoo ireefaranoo. Innee inneeqaraa marinausa kudi marifaranoo qini faqa marinausa sauna amiqqimasee ireemarifaranoo. Innee minara iriseeqa amiqqimasee qinisaa atooqaiifaqa qinee faqa inniki mariaanaura. <sup>6</sup> Faiqí moo fannoo sia qiniki marinafa sauna asaana miqqirafa aadanusidanoo marinanoo saunasaa rakisimarifa asaana qafamasee aadanusinausa aiqama ateeqasee suqeeqqeenoo idaki aqusainanoo qamataikaannoo. <sup>7</sup> Innee qiniki marirara kai idaqa marifaqa qinee qimannimunna



ufafa inniki marirara kai imarinaqa innee nana ainainaree qiniara irafaqa nimianauro. <sup>8</sup> Innee andeeqara marirana qaqqammara foora moomoo irafanoo minannai qini qikoona amiqira afeeka eeraarira areenarana kooroomannimaqaannoo. Miqiuqanna iqa qini faiqinamuka maffaranoo. <sup>9</sup> Qini qikoofa qiniara firaqoo ridanoo qinee faqa miqikai iqa inniara fira qoo ridaqa doo sia innee moo fannoo minaqiqari aiaki fuuqa. Kaqi kai qini didiranaki mariaqa. <sup>10</sup> Innee qinee qimannimuna ufana irisee qumareeqa qini didiranaki marifaranoo. Qinee miqikaimasee qeeqa qikoona ufa iriseeqa qumareeqa mina aidiranaki maridaqa.

<sup>11</sup> Qinee sia kaqi qimannimidaqa qini susuirafa inniki marianifeera inni susuirafa anoonaikianifeera qimannimidaqa. <sup>12</sup> Qinee ufa moo aaquqira ufa qimannianauro iriaqa Innee qini daanna ramasee nariara nariara ridaqa nidiani. <sup>13</sup> Faiqi moo fannoo nari aqoondi amaaqa maqasee kuqinna fasiqafa mina aidirafa aiqama nidirana arusee uriqaramaqaaraasa uqanna inoo mariannoo. <sup>14</sup> Maqee maqee qini aaquqira ufa irisee mi mau fimariasa misa kai qini qiqoondiqa maridaqa. <sup>15</sup> Qinee sia maaqooqari inniara qini ainainira faiqi fee qianauro. Rakisirafa nari fuaninnanara faqa auqaaninnanara faqa maraaninnanara faqa sia ainainira faiqiuqa qimannimidanoo miqimmianauree maaqimmianauree qidanoo nari kai. Ainainiaqee ufa kai qimannimidanoo. Qinee sia fifau saikira faiqi fee qidaqa inniara qini qiqoondi fee qimasaidaqa qinee qini qikoofa auqaaninna saika ufanara aiqama inni kooroomannimidaqa. <sup>16</sup> Sia innee qini rusandeesamumandee qini qumaraafanoo. Qinee naaree inniara rusandeesamumandee inni qumareeqa. Inni marirafa nirafa qini daanna ramasee mariaqera qinindikiaqera qimasee inni mareeqa. Mi marira oosanafa sia putaa iannoo afeeka kai mariannoo. Innee minara irisee nana sarauimari ainainaree qini qikoofinnai innaaru qimasee qini duqusaa innaaru qimasafanoo nimiannoo. <sup>17</sup> Doo qeeqa aaquqira ufa maaqi qimasee qimannimidaqa. Innee nariara nariara ridaqa nidaqa.

*Maa maqanasaaqaraasa Yisuna ufa irimarinausa fidiqaamannimaqee fandinnanara qimaqoo ufafa.*

<sup>18</sup> Maa maqanasaaqaraasa inniara fidiqaammifaranoo maanara iriaqa indaaru qini Yisusara fidiqaqaaiaasa mariafanoo innindi inaaqianna fidiqaairafa mariannoo. <sup>19</sup> Innee qini faiqi namu maa maqa maaqanasaaqaraasa faqa moodaa irirana faqaasa marifaqau misa inniara maasaindi fee qimaseefau inniara rini. Qinee inni maa maqa maaqanakinaasa rusandeesamumasee qumaraqaunausa mariafaqa maqee sia misaindi marianara minara kaukaata qimannimaqaidaqa. <sup>20</sup> Maa ufana qimannimunnana kaifaa iriaqa ainainira fasiqa sia nari rakisirana uriqararafa maridanoo. Misa qini inni rakisirana dariqa quandaki inni faqa qini ufa irimariasa faqa narifaranoo, misa qini ufa iriqa quandaki inni ufa faqa irifaranoo. <sup>21</sup> Innee qinindi marianara oosana oosana mandainaina maa maqanasaaqaraasa inni nimifaranoo. Misa sia qini diqiqoonara Anutunara iridaqa miqifaranoo. <sup>22</sup> Qinee maa maqanasaaqaraasa mandainainara sia kooroomma nimaqaannoo fau sia misa manda numoo mariqini. Doo qinee misa mandooanara kooroomasee misa qimannimiqaua iridaqa Anutuna narira ufa ameemaanai maridaqa sia amana unnufannai mina ititeefaranoo, narirafa kaqi naruannoo. <sup>23</sup> Faiqi moo fannoo qiniara fidiqaammidanoo qini qikoonara faqa fidiqaammidanoo. <sup>24</sup> Qinee misa nifusaa faiqi sia auqaqaa ira ainaina auqaafannana sia maqasaa fasiqa moo fannoo mi ainainna auqoofanoo anoona kambiganau. Qinee sia miqimaseeqa mi ainainna auqaananoofau misa numoo sia mariqini. Qinee oosana oosana ainaina auqaunaqa misa sia amiqimasee maaqanda qisakoosara irirai maaqandara fidiqaamma qimaqaidaqa. <sup>25</sup> Mooseena sandufa ooqai misara akara rumaqoofa maridanoo. Mifa maaqi qimasee akara rinau.

Misa kaqi fifau miqidaqa qiniara fidiqaaida marifara.

Anutuna ufa miqinoo maridanoo naqimasee moosaa fifaree. Minara misa qiniara fidiqaaidaqa.

<sup>26</sup> Yisufa kaqi nari faiqi namu qimannimidanoo qinau. Qinee ooru fuananoo fuka dadaqirafa qumuannoo. Mifa kuqaa anoona ufa qira oosana maraquna mariannoo qini qikoofinaindaraafa mariannoo. Qinee qeeqa qikoofinaindaraana aqiqaananoo qumureenoo mifa qiniara qimannimiannoo. <sup>27</sup> Mifa inni naakinaqa innee faqa qiniara ufa qifaranoo. Innee oosanaqiqari qini faqa niniaasa maridaqa qiniara ufa qifaranoo.

## 16

<sup>1</sup> Innee aanai fiqa niku rupauraki saamuriqa qini minnisee foora minara naamua qimarunaua maridaqa. <sup>2</sup> Kasooqaqee faiqi misa nariqa amaana maqakiqarifee ufa suqira maqakiqarifee aanoommasee inni niqiqeefaranoo. Kasooqaqee nariqa aaqamasee kuqaa

Anutuna dadaaqidee qiqa inni kuqa narifaranoo. <sup>3</sup> Misa qini qikoona Anutunara faqa qiniara faqa sia iridaqa miqifaranoo. <sup>4</sup> Maqee maa kamuqoo qinee marunnaqoo maa ainainnausara qimannimimariana irimarifanoo kasooqaqee kambiqaqinaqa inneeqa naaqqoonnai oonumafi iriaqeeera qidaqa. Qinee indaaruu sia qimannimiqa qinee inni faqa kaqi maridaqara qiqa sia qimannimifanausa qinee qusasa firaridaqa qimannimidaqa.

*Naaquqara maraquna fannoo qumureenoo auqaaninna ainainara kooroo qimaqoo ufafa.*

<sup>5</sup> Maqee qini qikoofa qini diqiqamaqqoonnai ooru firaridaqa innikiqari moo fannoo sia qini iraidanoo anee yai fee fidanee miqidanee. <sup>6</sup> Doo qinee firara inni qimannimunaqa inni naundura qumaara raifaqa noori runusee mariafanoo. <sup>7</sup> Qinee anoona ufa qimannimidaqa qinee ooru fuaanaq innee amiqiranaki mariaqeeera ooru fuaana. Qinee sia ooru fuananoo fuka dadaaqirafa sia qumuree inni dadaaqiannoo. Qinee ooree fuka dadaaqirana aqigaananoo qumu inni faqa maridanoo dadaaqiannoo. <sup>8</sup> Fuka dadaaqirafa qumu maridanoo inni maqasaaqaraasa irirana aqaqidanoo fee qiannoo inni andeeqaranara faqa manda oosanara faqa Anutuna narira ufa nimianinnanara faqa aqee mariafanoommifoo qimasee qimannimiannoo. <sup>9</sup> Maqasaa fasiqauqa qiniara sia irifaqee qidaqa minara nari manda oosanara amiqira oosana fee qimasaidaqa aqaqidaqa. <sup>10</sup> Qinee qeeqa qikoofinai ooru firaridaqa maqasaaqaraasa sia kaifaa qini qiqaqeeffaranoo, minara fuka dadaaqirafa maqasaaqaraasa andeeqara oosanara aqee mariafanoo fee qiannoo. <sup>11</sup> Maa maqanasaqaraa rakisirana aakaqaqindaraa fasiqa doo Anutuna arira ufa doo mi manda fasiqanasaa maridanoo. Minara Anutuna narira ufa fannoo maa maqanasaqaraa fasiqa aanaaseesaa faqa maridanoo minara faqa misa sia andeeqasee iridaqa aqaqidaqa.

<sup>12</sup> Qinee moomoo ainainara qimannimianaqa qumaara rainaqa siamma irifaranoo. <sup>13</sup> Miqimarianara kuqaa anoona ufa qira maraquna fannoo qumureenoo inni mareeqeenoo anoona ufa mariranaki mara quqaannoo. Sia mi maraqunafa nari kai ufa qimannimiannoo qini dookanaa kai irinoo inni qimannimiannoo. Mifa kasooqaqee kambiqaaninna ainainara tamummaqasee iriseenoo inni qimannimiannoo. <sup>14</sup> Mifa qini irira ufa mareeqee inni niminaqa minannai qini Yisuna asasirana qimimarifaranoo. <sup>15</sup> Qini qikoona Anutuna ainaina aiqama qinindi kai maridanoo. Minara qinee inni maana qimannimiqa kafia qimannimidaqa. Qinee qeeqa irirana marasee anoona ufa qira maraquna qimamiananoo mifa quandaki inni qimannimiannoo.

*Noori runira ufa faqa asasira ufa faqa qimaqoo ufafa.*

<sup>16</sup> Yisufa nari faiqinamu kaqi qimannimidanoo qinau. Kaqikaqoo innee sia qini qiqaqeeffaranoo kaqikaqoo marikiqa kaifaa qini qiqaqeeffaranoo. <sup>17</sup> Yisuna faiqi namu mina irisee akaqausa maaqi qiqau. Maa ufana nanaree qidanoo fee. Mifa nariara kaqikaa qoo sia qini qiqaqeeffaranoo fee qidanoo. Kaifaa kaqikaqoo marikiqa qini qiqaqeeffaranoo fee qidanoo. Kaifaa nariara qeeqa qikoofinai firaree qidaqee qidaqinoo. <sup>18</sup> Mifa kaqikaa qoo fee qidaqinoo mi ufana oosanara maasa randaidaqa. Maasa sia mina ufa oosanara iridaqa naqi fee qidaqinoo fee.

<sup>19</sup> Yisufa misa randaranara irisee maaqi qimasee qimanniminuu. Qinee qiqa. Kaqikaqoo sia qini qiqaqeeffaranoo. Kaqikaqoo marikiqa qini qiqaqeeffaranoo. Innee minaree nari qimami nari qimami qidee. <sup>20</sup> Qinee anoona ufa qimannimianaaura. Qinee kuquanna kamuqoo innee ikifaafuu qifaranoo. Innee miqimariafaqa maqasaaqaraasa qiniara sia irimariasa susuifaranoo. Innee noori runusee marifaranoo qinee kuqiranakiqari findi fuaanaq kafia mi noori runirana minnisee quandaqinaqa asasifaranoo. <sup>21</sup> Anaasee moo fannoo amuaqu uqafaqa maridanoo oori runusee maridanoo, doo aupurarafa aidafirafa minaki marinara miqidanoo. Miqidanoo mariifanoo faiqi maqasaifanoo doo aupurarafa faqa aidafirafa faqa taikееfoo qimaseenoo doo qini faiqi kambiqaifaqee qimasee aidafiranaa aunusee asidanoo. <sup>22</sup> Innee mina aanna reefaranoo. Maqee kamuqoo noori runusee marifaranoo. Kasooqaqee qini qiqaqamasaiifanoo miqoo inni nimuqusaki asasirafa fraaqqoo qumbiqanoo mariannoo. Mi asasirana sia moo fannoo mareemaria asasirafa mariannoo. Afeeka asasirafa amiqirafa kaqi mariannoo.

<sup>23</sup> Qinee kuqiranakiqari findifiqa qeeqa qikoofinai ooru mariaanaq innee sia kafia qiniara moo ainainara irammirifaranoo. Qinee anoona ufa qimannimidaqa. Innee qiniara faiqi namu maridee qimasee qini qikoona irammirifaranoo iraidandinna ainaina oosana oosana nimiannoo. <sup>24</sup> Maa maria kamu sia moo ainainara qiniara aqoondi fee qimasee Anutufinni innaaru qimariananoo. Irammiriaqa. Irammirifaranoo nimianni. Innee asasirafa anoonaikianifeera Anutufa nimiannoo.

*Yisuna ufa irimariasa maa maqanaasa marirana uriqaranara qimaqoo ufafa.*

<sup>25</sup> Qinee kukeeqara ufannai inni qimannimi mariafannana. Qusasaa sia qinee kukeeqaanaura kooroomandee qeeqa qikoona Anutunara akoqoo qimannimiana. <sup>26</sup> Mi faasaanna anirainaqa qini duqusaa Anutunara innaaru qifaranoo. Innee innaaru qifaqa qinee sia qeeqa qikoona afusaa oonuree mi ainannara inni fifau dadaaqiana. <sup>27</sup> Qini qikoofa nari kai inniara aidimarifanoo iriafindinna ainaina eedoo qimasee nimianoo. Innee qiniara nidimarinaga Anutuna faiqi fee qifanoo inniara faqa Anutufa aididanoo iriafindinna ainaina nimianoo. <sup>28</sup> Qinee qeeqa qikoofinaidari maqasaa qumuafanusa maridaqa doo maqasaa taikееqa qeeqa qikoofinai ooru fuanaura. <sup>29</sup> Yisuna faiqi namu mi ufana iriseeqa qiqau. Doo iria, doo maqee maasa kooroomasee qimaqimimariananoo. <sup>30</sup> Doo maqee maasa aniara aiqama ainaina irimariana fee qidaqa. Anee ufa qiananoo moo fannoo sia ani dadaaqimarifana aneennaraa kai qimannimimarianaga maasa minara irisee kuqaa aniara Anutufinaidari qumi fee qidaqa. <sup>31</sup> Yisufa mi ufana iriseenoo kaffaa qimannimianu. Doo innee maqee fee iriqaraasidee. <sup>32</sup> Doo moo aukuaana adeedi ranoo maridanoo misa kai inni mara furufaramma nimaqee-faranoo. Innee inneeqa maaga maaga daraanimambifaqa qinee qeeqakai mariana. Sia qinee kaaga qeeqaraa maridaqa. Qini qikoofa qini faqa maridanoo. <sup>33</sup> Innee qinisaa atooaga marifandinannai asooraanaki marifanoo. Maa maqanasaaqaraa irirana maremariasa aupurarana oosana oosana nimianinnara maa ufana qimannimidaqa. Sia rufiaqa rufiaqiaqa doo qinee maa maqanasaaqarasa doo rafaqaqafuseeqa, minara kaqi paasoosiaqa.

## 17

*Yisufa nari faiqi namuara Anutunara rakisinnimaqaannee qu ufafa.*

<sup>1</sup> Yisufa mi ufaua nari faiqi namu qimannimianu. Qimannimiseeno oori innaarunai uqeeraseenoo nari akoona Anutuna innaaruqino qinau. Oo qipoo doo qini kuqira aukuaana adeedi ranoo maridanoo. Anee aneenna amaaku qini qifaqa areenarana qimia. <sup>2</sup> Oo Anutu, anee aiqamausa rakisianneera afeeka eeraarira maraqa qiniki quqaqaananoo. Anee faiqi anaasee qumee rarisameeqaidana qimimariannana qinee misa naaru naaru marirana nimianeera mi afeekana qimiqaananoo maridanoo. <sup>3</sup> Naaru naaru marirafa maqim-minoo maridanoo. Maqasaa fasiqa anaasee misa ani moodaa kuqaa Anutunara irisee mi iriranamau firafa kaffaa qini Yisusa ani asauku mundirausara anee diqiqoonasara miqikaimasee irisee mi iriranamau firafa, mifa kai naaru naaru marirafa maridanoo. <sup>4</sup> Qinee maa maqanasaaqaraasa doo ani afaqa areenarana uqannifiteeqa. Anee ainainirana qimiannana doo qinee taikaseeqa. <sup>5</sup> Oo qipoo qini mareeqeenana aneenna marianaqoo mara quqaqisee qifaqa areenarana qimia. Ooqai oosana aroo aukuaana maa maqa maqafa sia marunaki qifaqa areenarana qimunnana mina kai kaffaa qimia. <sup>6</sup> Anee maa fasiqausa qini faiqi namu maqasaaqaraa sakinaana qimimarianaga aniara kooroomannimiqa. Misa anindi maridaqa. Anee misa qimimarianafa mariananoo. Misa ani ufa irisee eedoo qimarias maridaqa. <sup>7</sup> Doo maqee misa qini aiqama ainaina anisaaqaraana doo iriqa. <sup>8</sup> Anee qimunna ufana qimannimunaqa irisee doo mareea. Qinee anikiqari qumuafannanara faqa misa kuqaa fee qidaqa. Anee qini diqiqoonanara faqa anoonee qidaqa. <sup>9</sup> Qinee anee ianannai misara dadaaqianeera innaaru qidaqa, sia kaqi qeesa maqasaaqaraasarau innaaru qidaqau. Anee qimianausara kai anindi maridaqara innaaru qidaqa. <sup>10</sup> Oo qipoo qini aiqama ainaina anindi maridanoo. Kaffaa ani aiqama ainaina qinindi maridanoo. Qini qifaqa areenarafa qini faiqi namusaaqari kooroo idanoo. <sup>11</sup> Doo maqee qinee anee marianaqoo ooru firiridaqa doo qinee maa maqanasaa taikasee minni ooru fuanauranoo. Misa kaqi maa maqanasaa marifanoo. Oo naaquqara qikoofa. Ani auqu afeeka eeraarirana misasaa ititannimaqaani. Anee mi auquna afeeka eeraarirana qini qimunafa mifa misasaa ititaani. Ititannimaqasanaqa maqanda daanna ramasee moodaanakikiqa mariaqera. <sup>12</sup> Ani auqu afeeka eeraarirana qimiannana minannai maa kamuqoo misa faqa maridaqa amiqimandee qeeqa faiqi namu rakisidaqa marunaga maridaqa. Qinee misa ititannimaqeeqa, sia moo fannoo dapikiaqera. Maaniki fimari fasiqafa Yudasifa mifa kai dapikinoo maridanoo. Sia kaqi dapikinoo, ani ooqeenaa akara anoona kooroo ianifeera dapikinoo. <sup>13</sup> Doo qinee anee ianannai ooru firiridaqa. Qinee maqoo kaqi marunnaqoo ufa oosana oosana qimannimidaqa qimannimianaqa misa nimuqusakina asasirafa qumbiqanoo marianifeera qimannimidaqa. <sup>14</sup> Qinee ani aufakiana qeeqa faiqi namu qimannimunaqa qimannimifaqa maa maqanasaaqaraasa akaqausa sia qini ufa irimarias misa

iriseeqa qini faiqi namu fidiqaamma nimaqaidaqa. Qini faiqi namu ani ufa irisee maqasaaqaraasakinaa iriranara nikooqaidanoo innaarunaindaraa irirana marasaafaqa maqasaaqaraasa minara misa fidiqaamma nimaqaidanoo. Misa qini daanna raidaqa sia maqooqaraasau maridau. <sup>15</sup> Oo qipoo qinee aniara sia qini faiqinamu mareeqee moosaa quqaanneera qidaqa. Maqoo maqasaa mariaqoo kai rakisianeera qimamidaqa, aakaaqaindaraa fasiqa fannoo misa qumaraandora qimamidaqa. <sup>16</sup> Qinee sia maa maqanasaaqaraasaindi maridaqa, misa faqa qini daanna reeqa sia maa maqanasaaqaraasaindiara foora maridaqa. <sup>17</sup> Oo qipoo aneenna anoona ufannai misa mareeqee aneaindikia. Ani ufa fannoo andeeqara ufa anoona maridanoo. <sup>18</sup> Anee qini maqasaa diqiqoonnana qinee faqa miqikai iqa quandaki misa maqaqanna maqaqanna niqiqaidaqa. <sup>19</sup> Qinee misaroo qifa qeeqa qifaqaqaa ani amidaqa. Misa faqa nari marirana nirana kuqaa anindi fee qiaqeeera miqidaqa anindi mariaqeeera miqidaqa.

<sup>20</sup> Sia qinee qeeqa faiqi namu maa mariasara kaifau innaaru qidau, maqaqanna maqaqanna aiqamai misa ufa irisee qiniara irifandinausa misara faqa innaaru qidaqa. <sup>21</sup> Anee faqa qinee faqa moodaanaki marunandee misa faqa maqaqanda faqa moodaanaki mariaqeeera innaaru qidaqa. <sup>22</sup> Maa maqanasaaqaraasa mina qafamaseeqa qiniara oo kuqaa innaarunaindaraa fee qiaqeeera. Anee qifaqa areenara eeraarirana qimiannana qinee mina maramaree misa faqa nimunaqa misa faqa anindiri qisakoosa daanna reeqa moodaanaki mariaqeeera. <sup>23</sup> Qinee misaki marianneera anee qiniki maria, miqimasainaqa kuqaa uqanna moodaanaki mariaqa. Miqimasaanaqa maa maqanasaaqaraasa niqafamasee Oo kuqaa Anutufa Yisuna aqiganau foo qiaqeeera, nari amaaku Yisunara faqa mina faiqi namudurai faqa amanamana kai amuqusinoo aididanoommifoo qiaqeeera.

<sup>24</sup> Yisufa kaqi nari akoonara innaaru qidanoo qinau. Oo qipoo, maa qini faiqi namu anee qimunausa kasooqaqee qini faqa mariaqoo kai mariaqeeera didifaqa innaaru qidaqa. Ooqai maa maqaqanna maqaqanna maru aukunna anee qiniara aidunara anee qifaqa areenara eeraarirana qimunnana qini faiqi namu kasooqaqee nari iqa oorureeqa qafaqeeera innaaru qidaqa. <sup>25</sup> Oo andeeqara qikoofa maa maqanasaaqaraasa ani ufa sia irimariasa sia aniara iridaqa. Qinee kai aniara iridaqa maa qini faiqi namu anee qini diqiqamaqoonnana misa iridaqa. <sup>26</sup> Anee qiniara amuqusidana aidimarina qini faiqi namu naundurai faqa marianifeera qimasee aniara maqee kooroo qimasaida qimannimiaafanausa maqee kafa kafa qimannimianaura. Maqee qinee faqa misa naundurai marianinnanara innaaru qidaqa.

## 18

*Yisuna qumaroo ufafa.*

*(Mat 26:47-56; Mak 14:43-50; Ruk 22:47-53)*

<sup>1</sup> Yisufa miqi qimasee innaaru qimaseenoo nari faiqi namu asukunai Yeerusaree maqasaindari nifiqeenoo Kidaroono noopundu fitaqeenoo dinni afainni saqamakina auqaana andanda ummaqiranaki idooararee qimasee nari faiqi namu faqa oonu marinau. <sup>2-3</sup> Ooqai moomoo kari Yisufa Yeerusaree maqasaindari fimaruqoo fiqau. Yudasifa minni fimarunara irimarufa maridanoo Yisuna ueeqaaninafa mi saqamanara faqa irimarufa miqoo finoo fee qimasee sundiauqa faqa amaana maqasaa rakisimaria frisuaiqauqa faqa Yudasifa eendaki nifiqee finau. Misa uriqararauusa faqa, Farisai amaana ufa qimarusa faqa niqiqoofaqa saamu faqaana indaaiqa asukuna marufaqa gooma qumaroofanoo Yudasifa mi saqamanaki Yisuna qumaraaqee qimaseenoo nifiqee finau. <sup>4</sup> Yisufa aiqama ainaina nariki kambiqaaninnanara irimarufa marufaqa misa oonuroofanoo Yisufa misa noorinni anireenoo iranau. Innee yafasiqanaree randaidee, qufaqa misa qiqau.

<sup>5</sup> Yisuna Nasareetee maqannaanara randaidaqa qufanoo Yisufa qinau. Maa qinee misa maridaqa. Yudasifa Yisuna ueeqaaninafa misaki kikiqinoo marinau. <sup>6</sup> Yisufa miqi qimasee nariara kooroomasoonara misa tautumasee rufaseeqa ninaaqianaindari oonurandeeqa maqasaa aqufiqau. <sup>7</sup> Yisufa kafa irammirinoo qinau, innee yanaree randaidee qufaqa misa qiqau Yisuna Nasareetee maqannaanara randaidaqa.

<sup>8</sup> Miqi qufanoo Yisufa kafa qinau doo qinee kooroo iqa maana misa maridaqa. Innee qiniara kai randeaaafanoo, maa qini faiqi namu mariasa minnisaifaqa fuaqa. <sup>9</sup> Yisufa nari innaaru qimaru ufafa anoona kambiqaanifeera mi ufana qimanniminu. Mifa maqi qimasee faasasaa innaaru qinau. Oo qipoo aiqamausa anee qimimarinauusa sia misakiqari moo fannoo furufarianifeera. Faasasaa mi innaarunna qinau doo maqee mina anoona kambiqaina misa minnisee qini kai maraaqee qinau.

<sup>10</sup> Simoono moo auqu Peetooroofa misa saamu faqaana qafamaseenoo darifoo qimaseenoo mifa nari rakira paipana kisaqa qumareenoo amaana maqasaa rakisirana

ainainira faiqi aaqamasee asaku uqannai aaqoo aiqama atufu aqinau. Mi ainainira fasiqana auqu Marakusafa marinau. <sup>11</sup> Yisufa mina qafeenoo Peetooroona qimaminoo qinau. Saa, aneenna paipana nari aanaamuki upeekaa. Qini qikoofa manda nammari naannee qimaqoosa anee qiniara sia naannee fee qidanee. Qinee naanaura.

*Yisufa Annasana oorini kikiqu ufafa.*

<sup>12</sup> Yisufa miqi qimasoofaqa Roomma maqannaa sundiaufa faqa misa uriqararafa faqa Yuda maqannaa frisuaiqauqa faqa anireeqa Yisuna qumareeqa sandannai asaku rumbasee afiqeeqa. <sup>13</sup> Kaiafasana maaqaki quqaqau. Kaiafasafa mi aukuannai amaana maqasaa Anutuna aanaiqiki marusa uriqararafa marinau. Annasafa Kaiafasana airaamaku mina maaqaki marunaki munu minaki quqasoofanoo Annasafa ufa indaaru irinau. <sup>14</sup> Ooqai Kaiafasafa narikai tamunmaqaseenoo Yuda maqannaasa qimanniminoo qinau Yuda maqannaasa maasakina moodaa fannoo maasa aiqamausa misa nikiqara kuqinaqa amiqianauree qinau. Mina maaqaki Yisuna quqasoofanoo Annasafa naaree mina ufa irinau.

*Peetooroofa Yisunara sia qinee qafaidee qu ufafa.*

*(Mat 26:69-70; Mak 14:66-68; Ruk 22:55-57)*

<sup>15</sup> Misa Yisuna rumbamaree fufanoo Simoona moo auqu Peetooroofa faqa Yisuna faiqi namuqiari faiqi moo fannoo faqa misa ninaaqiana nifaqee fiqau. <sup>16</sup> Misa Yisuna afiqee amaana maqasaa aanaiqikirana maaqaki keeqoofanoo nifaqee anu fasiqafa amaana maqasaa aanaiqikirana aqoondi maridanoo kaqi mi maaqanaki keeqanau. Misa Yisuna afiqee mi maqanaki munuseeqa mi sandana idukuseeqa kaqi quqasoofanoo marinau. Peetooroofa maqusai kooqi afainni aqoosai marinau. Nifaqee anu fasiqafa kafia raudamakinoo kooqisaa rakisimaru manaqana qimamufanoo kooqi atuasooofanoo Peetooroofa faqa keeqanau. Keeqafufanoo maaqa kooqi adeedi ooru maridanoo qafeemarinau. <sup>17</sup> Maqusa kooqisaa rakisiu manaqafa Peetooroona qafamaseenoo irammirinoo qinau. Anee Yisuna aqoondi fee qufanoo Peetooroofa qaoo qimasee sia fee qinau.

<sup>18</sup> Suara narufaqa ainainimaru fasiqausa faqa frisuaiqauqa faqa Kaiafasana maaqa kooqinni maqusa saqanna idarasee fiqumma ida tookusiqa marufanoo Peetooroofa misaki oonu keeqafinoo ida qaani marinau.

*Annasafa Yisuna irammiru ufafa.*

*(Mat 26:59-66; Mak 14:55-64; Ruk 22:66-71)*

<sup>19</sup> Amaana maqasaa Anutuna aanaiqiki marusa uriqararafa Annasafa mifa Yisuna faiqi namuara faqa Yisufa faiqi anaasee qimannimira ufausara faqa mi ufanaramma Annasafa maaqaki Yisuna iree marinau. <sup>20</sup> Yisufa mina ufa iriseenoo maaqi qimasee Annasana qimaminau. Qinee faiqi anaasee moomoo suqimarugoos kai ufa qimannimimariqia. Suqira maaqaki fee naaqqara amaana maqaki fee faiqi anaasee moodaaqoo suqiraqoo fee miqoo kai qinee naamuqira ufa aiqama ufa qimannimimariqia. Sia qinee moo ufa kukeqaranaki qimannimiqiafana. (Innee aaqamasee qini kukeqaranaki irama qimaqee mariafanoo.) <sup>21</sup> Annasa anee nanaree qini iraidanee. Qini ufa irimariasa irammirinaqa qimamiqia. Misa qini ufa oosana iridaqa. <sup>22</sup> Miqi qimasooofanoo poorisa moo fannoo asakusamu Yisuna oori arinoo qinau. Anee nanaree amaana maqasaa rakisirana miqi qimasee qimamidanee. <sup>23-24</sup> Miqi qimasooofanoo Yisufa qimaminoo qinau. Qinee aqara ufa moo qianana maaqoo mariasa aiqama kooroomasee qimannimia. Qinee andeeqara ufa qunnanara nanaree qini daridanee. Miqi qimasooofanoo Annasafa qinau, innee maana kafia rumbamaree Kaiafasafinnai afiqee fuaqa. Kaiafasafa amaana maqasaa Anutuna aanaiqikirafa marufaqa mifa maruqoo moo maaqaki minni Yisuna afiqee fiqau.

*Peetooroofa kaifaa Yisunara sia qinee qafaidee qu ufafa.*

*(Mat 26:71-75; Mak 14:69-72; Ruk 22:58-62)*

<sup>25</sup> Peetooroofa naambeeqai kaqi ida qaanimarufanoo faiqi moo fannoo mina irammirinau. Anee Yisuna faiqi namuqiari marianafee kuqaa fee. Miqi qufanoo Peetooroofa sia fee qinau.

<sup>26</sup> Amaana maqasaa aanaiqikirana ainainira faiqi Peetooroofa Marakusana aaqoo atekoona mina ati fannoo Peetooroona qafamaseenoo qimaminau. Faasai anee saqamai Yisuna faqa marianaqa ani qafaunau.

<sup>27</sup> Peetooroofa mina iriseenoo kafia qaoo kai qinau. Qaoo qimasooofanoo kookooraana ufa qinau.

*Yisufa Piratoona oorinni kikiq ufafa.*  
(*Mat 27:1-2, 11-14; Mak 15:1-5; Ruk 23:1-5*)

<sup>28</sup> Kananaana iqaqoofanoo saarisufa namufaqa misa Yisuna Kaiafasana maaqakinaana afiqee Roomma maqanna kiapana maaqaki munu quqaqau. Yuda maqannaasaa sia kiapana maaqaki keeqaqau. Duna iqaqainaga maasa Anutuna qangiroo ainnaaqarara qoomaqa naannaqoo fee qimasee kiapafa moo maqannaafa marufaqa afaaqasaaqarara aisoora maasa qifaaqasaa aqufinaqa qifaaqa mandaikinaqa sia naannoo qimasee ruftee sia mina maaqaki keeqaqau, kaqi naambeeqai madaanai kai mariqau. <sup>29</sup> Roomma maqanna kiapafa Piratoofa misa nindafeenoo rauda mafufanoo Yisunara irammirinau. Innee nanaree fee qimasaidee maa fasiqanara ufa qidee.

<sup>30</sup> Yuda maqannaasa iriseeqa qiqau, mifa sia manda oosana marainaqau sia maree mini ani amiaqini.

<sup>31</sup> Miqi qufanoo Piratoofa qimannimino qinau, innee inneeqa kai inneeqa sandufamau mina maramaree fuaqa. Yuda maqannaasa mina iriseeqa qiqau, maasa sandufa fannoo maaqinna fasiqasaa kuqannaruqee qinoo maridanoo. Aunirira saqarisaa faiqi nariranara innee Roomma maqannaasa maasara qaoo qimasaidaga inneeqa kai miqi mariafanoo. Minara maasa Yisuna Piratoo anisaa quqaidaqa. <sup>32</sup> Indaaruu Yisufa nari kuqiranara nari faiqi namu qimannimuna mina anoona maqee kambiqeenoo.

<sup>33</sup> Piratoofa misa ufa iriseenoo nari koota maqaki kaifaa keeqeenoo Yisunara mai uruannee qimasoofoanoo Yisufa Piratoona koota maqaki keeqafufanoo Piratoofa Yisuna irammirinau. Kuqaa fee anee Yuda maqannaasa Karaambaiqee maridanee.

<sup>34</sup> Yisufa iriseenoo qimaminoo qinau. Anee aneenna kai fee mi ufana qidanee moo fannoo ani qimamifanee qidanee.

<sup>35</sup> Piratoofa minara Yisuna qimaminoo qinau. Anee qiniara Yuda maqanna fee qimaqimidanee. Sia qinee inni oosana iridaqa. Ani maqannaasa Anutuna aanaiqikirausa urigararasa misa kai qini maaqaki quqasaafana mariananoo. Anee nana mandoosana maraanaqee miqi fee.

<sup>36</sup> Yisufa qinau, qini ququsa sia maa maqa maaqanasaaqarara ququsa maridanoo. Qini ququsa maa maqanasaa marinaqau qini faiqinamu rakifaqau qini mareeqeefau idukuqisani. Sia qini ququsa maa maqanasaaqaraafa maridanoo.

<sup>37</sup> Piratoofa mina iriseenoo kafaqa Yisuna irammirinoo qinau, Kuqaa fee anee karaambaiga moo maridanee. Yisufa mina irisee maaqi qinau. Anee qianandee kuqaa qinee Karaambaiqa maridaqa. Kuqaa anoona ufa kai qimannimirara qinee maa maqanasaa kambiqafi maridaqa. Kuqaa anoona ufara randeemaria fasiqa anaaseesa misa qini ufa iridaqa.

<sup>38</sup> Piratoofa mina iriseenoo maaqi qinau, kuqaa anoona ufa qirafa mifa nanee maridanoo. Miqi qimaseenoo Piraatoofa raudamakufanoo Yuda maqannaasa naaramasee maaqi qimasee qimanniminu. Maa fasiqanaki sia arira ainaina moo marifaqa iridaqa.

*Piratoofa Yisuna arifandinna ufana eedoo qu ufafa.*  
(*Mat 27:15-31; Mak 15:6-20; Ruk 23:13-25*)

<sup>39-40</sup> Piratoofa kaqi qimannimidanoo qinau. Aukuana aukuana Anutuna qangiroo ainnaaqarara qoomaqa faasaana qini rumberanaki mariasa aukuana aukuana moodaakai moodaakai karabusakinaana iduku nimmirunaua maridaqa. Maa aukuana Yuda maqanna karaambaiga idukunnimianauree qufaqa firaa kari faaqarumasee qimamiqa qiqau, sia maana idukua. Barabasina kai idukua. Barabasifa faiqi narinoo rakinoo imarifa karabusaki maridanoo. Mina kai idukua.

(Roomma maqannaasa faiqi narirana oosana maaqimminoo marinau. Sanda moomoo saamu atisaa qusi iqoona marufanoo mi sandana atinni arooqa aandau amudaani rukamirana raigaranaqaa qususee rumbaqoosamuna mi samunannai aiqamausa rumbosa narimaruna. Misamuna naaree Yisuna ari isoofanoo inaaqianna Piratoofa nari maaqaki mara quqasee mina ufara iranau.)<sup>18</sup> | 39-40 | YOOHANEE

## 19

<sup>1</sup> Piratoofa Yuda maqannaasa ufa irisee Yisuna mareeqee nari sundia niminoo qimanniminu. Innee saamu atisaa sanda qusiranannai afaqa turii umooqukamasaqa qufaqa eedoo qimasee miqoo kai miqiqau. <sup>2</sup> Afaqa turii qumooqumaseeqa saatananda fooqaana aukuseeqa saaeemma qumaree kukuqamasee Yisuna karaambaiga qafee fee qimasee afisuamaqau. Qafee afisusee misa saasaakoona arira qamunna sundia qamunna fee qimasee afisuamaqau. <sup>3</sup> Sundiauqa nariqa sundia qamunna afisuamaqaseeqa anireeqa ataasa ataasa qimamaqee maaqi qiqau. Yuda maqanna

karaambaiqa afeeka anee mariana sia dauni kuqua miqidaqa ataasa ataasa qimariqau. Miqi qimasee misa nisaukusamu oori ariqau.

<sup>4</sup> Misa miqi isoofanoo Piratoofa raudamakufanoo nari naambeeqai Yuda maqanna moomoo marunnai qumureenoo qinau. Qinee Yisuna mareeqee inni nifusaa quqaanaura. Kuqira ainaina sia moo minaki marifaqa qinee qafaidaqa. <sup>5</sup> Miqi qima-soofanoo Yisufa saatoonanda qafee afisirafa saasaakoono arira qamunanda rumberafa raudamaki misa nifusaa kikiqinau. Piratoofa aiqama naaramasee qimanniminau. Innee qafaaqa. Doo mi fasiqafa maridanoo.

<sup>6</sup> Amaana maqasaa Anutuna aanaiqikirausa uriqararawsa faqa misa poorisauqa faqa Yisuna qafamasee firaakari faaqariga qiqau, aunnirira saqarisaa pirimma aruaqee qidaqa moomoo kari qimariqau. Piratoofa mina iriseenoo maaqi qimasee qimanniminau. Doo inneeqa kai mara maree aunnirira saqarisaa pirimmannai aruaqa. Qinee mina qafaanoo sia moo numoo minaki marifaqa qafaidaqa.

<sup>7</sup> Yuda maqannaasa Piratoona ufa iriseeqa maaqi qimasee qimamiqau. Maasa sandufa maaqinna fasiqafa kuquanoo fee qidaqa. Mifa nariara Anutuna amaaku fee qimarifa marifaqa mina akiaqara arusaifanoo kuquanoo.

<sup>8</sup> Piratoofa Yisunara Anutuna amaaku maridanoommi qimaseenoo firaqoo rufianau. <sup>9</sup> Mifa kaifaa Yisuna afigeenoo nari maaqaki oorureenoo irammirinau. Anee yaindari anuna fee qimaseenoo iroofanoo Yisufa sia ufa qimaminau. <sup>10</sup> Piratoofa mina qafamasee Yisuna kaifaa qimaminoo qinau. Anee sia fee qini qimaqiminnaree. Firimmannai aunnirira saqarisaa arira aanoo qinindi maridanoo. Ani idukira aanoo irafa qinindi maridanoo. Anee sia fee minara iridane.

<sup>11</sup> Yisufa mina iriseenoo maaqi qimasee Piratoona qimaminau. Anee qiniara aanoo iannana sia aneennafau, Anutufa qinara kai maqee ani ufa ameemaanai quqaqisaifaqa maridaqa. Qinee minara maaqi qidaqa, qini qumareeqee ani asaukuki quqemariasa misa numoo firaafa maridanoo anindi kaqikaafa.

<sup>12</sup> Piratoofa Yisuna ufa iriseenoo firaqoo mina aunduraki Yisuna idukiraree qimasee irinau. Yuda maqannaasa mina iriseeqa firaqoo faaqarumasee qiqau. Anee maa fasiqana idukinaqa maasa aniara Roomma maqanna karaambaiqinnai oonureeqa qimamiana. Faiqi moo fannoo nariara karaambaiqee qimarifa Roomma maqanna karaambaiqa namuqaa mariannoo. <sup>13</sup> Piratoofa misa ufa iriseenoo Yisuna afigee madaanai ufa irimaru qaindanasaa oqumarifinoo ufa irimaru qaindana aaqa ooni ausirirafa moomoo maruqoo qumu oqumarifi ufa irimarinau. Yuda maqannaasa minara Kabatee qimariqau. Maasa ufakiqari ooni padirane qidaqa.

<sup>14</sup> Duna Anutuna qangiroo ainnaaqarara qoomaqa suqarafa mariannoo. Maqee suani qambaana marufanoo Piratoofa ufa irira qaindasaa oqumarifi Yuda maqanna qimanniminau. Doo maafa inni karaambaiqa maaqoo maridanoo.

<sup>15</sup> Misa irisee faaqa quqasee kuqariraree kai qiqau. Aunnirira saqarisaa firimmannai ariraree qiqau. Piratoofa mina iriseenoo Yisuna ariraree qusa qimannimino qinau. Innee kuqaa inneeqa karaambaiqa aunnirira saqarisaa pirimmannai ariraree fee qidee. Miqi qufaqa amaana maqasaa Anutuna aanaiqikirausa uriqararawsa Piratoona ufa irisee faaqa quqasee qiqau, maa fasiqafa sia maasa karaambaiqa maridanoo. Maasa karaambaiqa Roomma maqanna karaambaiqa moodaa maridanoo mina auqu Sisaafa.

<sup>16</sup> Piratoofa mina iriseenoo Yuda maqannaasa nisaukuki Yisuna quqanau. Inneeqa maree munusaifaqa sundiauqa aunnirira saqarisaa pirimmannai aruaqa. Miqi qimasooafaqa misa Yisuna maree fiqau.

*Misa Yisuna pirimmannai aunnirira saqarisaa aru ufafa.*

*(Mat 27:32-44; Mak 15:21-32; Ruk 23:26-43)*

<sup>17</sup> Yisufa Yeerusaree maqusaindari nari aunnirira saqari akumaree fimarinau. <sup>18</sup> Fifiufanoo Eeburu ufakiqari faiqi nikiqa amudaani fee qimaru amuaqunamusaa Koorookata amuaqunamusaa ooruree aunnirira saqari maqai rumasee minasaa Yisuna mara airisee firimmannai Yisuna nari aunnirira saqarisaa aruqapiriqau. Aruseeqa faiqi qaaraqanda mandainaina maraqanqanda miqanda faqa nari aunnirira saqarisaa dinni dinni naruaqapiriqau. Naruseeqa uqereeqeeqa maqa aamara auquqoonaki rakiqaaqau. Qaaraqanda dinni dinni Yisuna qambaana rakiqaaqau. <sup>19</sup> Piratoofa moo raufiqira saqarisaa ufa akara rumeeqeenoo nari rakira fasiqa moo amufanoo oorureenoo Yisuna akiaqa aunnirira saqarisaa pirimmannai arinau. Mina akara oosana maaqimminoo marinau.

Maa fasiqafa Yisufa Nasareeteendaraafa Yuda maqannaasa karaambaiqa maridanoo.

<sup>20</sup> Yisuna aru maqa maaqafa Yeerusaree aaqa adeedi marufaqa faiqi anaasee moomoo mina akara qafaida asaana rimariqau. Mi akarafa Yuda maqannaasa ufa moo auqu

Eeburu ufakiqari faqa Roomma maqannaasa ufa moo auqu Ratinna ufakiqari faqa Kirisa maqannaasa ufakiqari faqa akara rinoo marufaqa asaana rimariqau. <sup>21</sup> Yuda maqannaasa amaana maqasaa Anutuna aanaiqikirausa uriqarararusa mi akarana asaana rumasee Piratoona maqusai oorureeqa maaqi qimasee aagara ufa qimamiqau, saa sia Yuda maqannaasa karaambaiga fee qimasee akara rua. Kaqi nari kai Yuda maqannaasa karaambaigee qimari fee qimasee akara ruaqaana.

<sup>22</sup> Piratoofa irisee maaqi qimasee kaukaataqimasee qimanniminau. Qinee akara runafa doo saina mifa kai mariani.

<sup>23-24</sup> Roomma maqannaasa sundia qaara faqa qaara faqa Yisuna aunirira saqarisaa aruseeqa mina qamunna anaqi anaqi iseeqa nimana kai rainaqau. Yuda maqannaasa kisaaga qamunna moodaa afisirana sia afu aina marufa marufaqa kaqi ugara foora amiqimasee auqirafa marufaqa sundiauga mina qafeeqa doo amiqirafa marifaqa sia anaqia, kaqi kaatara foora sararamasee uriqarainafa maraani. Miqi qimasoofoanoo ooqeenaa tamummaqarusa akara anoona mikari kambiqaana. Mi ooqeenaa akarafa minara maaqi qimaqoofa.

Misa qini qamunna raina rainamasee nariara nariara mareefaranoo. Kisaaga qamunna moodaa mina sararamasee mareefaranoo.

<sup>25</sup> Yisufa aunirira saqarisaa kuqirarifanoo mina aunirira saqari atukaki mina anoofa faqa nari auna qini qinoona faqa moo anaasee Karoopasana anaaga Mariana amarafa Mariafa faqa moo anaasee Makadara maqusaindaraa Mariana amarafa Mariafa faqa minamusa miqoo kikiqiga mariqau. (Qaramoo anaasee Mariana amarausa kikiqiga mariqau.) <sup>26</sup> Mirindari Yisufa qafoofanoo nari Yisuna faiqi namukiqari nari afaaqasaa aqoondi faqa qaaramoo anaasee mina anoona amarausa faqa kikiqiga mariqau. Yisufa kuqiraridanoo nari anoona qafamaseenoo qimaminoo qinau. Oo qinnaqeefoo maa fasiqafa Yoohaneefa ani amaaku marianno qinee kuqunanoo anisaa rakisiani.

<sup>27</sup> Miqi qimaseenoo Yisufa qandakinoo nari afaaqasaa aqoondi maaqi qimasee qimaminau. Maafa ani anoofaikinoo marinana qinee kuqunanoo anee minasaa rakisia. Doo miqooqari mi fasiqafa Yisuna anoona afiqeenoo nari maaqaki soofanoo marinau.

*Yisufa kuqu ufafa.*

*(Mat 27:45-56; Mak 15:33-41; Ruk 23:44-49)*

<sup>28</sup> Yisufa nariara irufanoo aiqama ainaina doo maqee anoonaikufanoo moodaa ooqeenaa akara nammariara qimaqoofa mifa kai sia anoona kambiqaifaqee qimasee minara maaqi qinau.

<sup>29-30</sup> Qinee nammariara didimarifaqee qufanoo miqoo uainna nammari taqu sundiauga misa manda uainna nammari sukaqee maru nammari faiqi miqoo maruna faiqi moo fannoo eeqafoofaana atekasee minaki raaramasee qisoopa saqari asaana undaqiseenoo minasaa rutaqeeqeeqee mara muru Yisuna afaurusaa mundusofoanoo qumbifiqia namaseenoo qinau. Doo qini ainainirafa taikkeenoo qimasee aunirira saqarisaa anuka rooraiqinoo doo kuqararasinau.

*Faaqaana atoofeesaqaanda Yisuna aqaasanaki raquramu ufafa.*

<sup>31</sup> Kuqufufanoo Yuda maqannaasa uriqarararusa Piratoofa nari maaqai marunnai oonuree maaqi qimasee qimamiqau. Duna sabata naaqaqara sabata marianno. Maqee kai aunirira saqarisaa mariasa niku itairisaana dauni kuquffaqa nikundamasee duna amiqimandee sabata maraanaura. <sup>32</sup> Piratoofa eedoo qufaqa sundiauga oonureeqa Yisuna aaga dinni marunna aiku itairisee moo dinni maruna Yisuna faqa kuquna aiku itairisaqau. <sup>33</sup> Yisuna aiku itairiane qimasee qafoofanoo doo kaaga kuqinoo marufaqa sia aiku itairiqau. <sup>34</sup> Sundia moo fannoo faaqaana qumareenoo Yisuna aqaasanasa raquraminau. Raquru amufanoo fidika faqa nammari faqa minakiqari aniranau. <sup>35</sup> Aniroofanoo mi ainainna qafee marufa minara akara rinau. Mifa nari ufara kuqaa anoonee qidanoo innee faqa kuqaa anoonee qiaqeeera akara rinau. Yoohaneefa afaqanoo nidanoo miqaa maaqaa imarufanoo qafeemarinau. (Yoohaneefa maa akarana akara rumaseenoo nari auqu sia kooroo iraree qimaseenoo maa akaranaki nariara Yisuna afaaqasaa aqoondi maridee qinau.) <sup>36</sup> Maa ainainnausa Yisuna arunara ooqeenaa akara anoonaikianifeera kambiqaana. Mi ooqeenaa akarafa maaqi qimaqoofa maridanoo.

Sia mina amudaani moo fannoo raqaanno. Sia uqanna moodaa raqaanno. Miqi qimaqoo ufafa anoonaikufaqa sia mina aiku raqaqau.

<sup>37</sup> Ooqeenaa akara moo maaqimminoo maridanoo.

Faiqi moo fannoo faaqaanannai asauku mundirana raquramisainaqa faiqi anaasee kikiqamambinaqa qafeefaranoo.

Mi ufafa faqa aunirira saqarisaa kambiqaana.



*Yisuna akundoo ufaa.*

*(Mat 27:57-61; Mak 15:42-47; Ruk 23:50-56)*

<sup>38</sup> Sundiauga Yisuna raquramisoofoanoo Yooseefaana amarafa Arimateea maqusaindaraafa Piratoona maagai oonureenoo Yisuna iri aunirira saqarisaaqaraana innaaru qinau. Mi Yooseefaafa Yisuna ufa irimarufa maridanoo nari aundurai kai iriseenoo sia faiqi nifusaa kooroo inau, kaqi marinau. Yuda maqanna uriqararusa irifoo qimasee rufiamaree kukeeqakufanoo Yisuna iriara Piratoofunnai nariara oonureenoo innaaru qinau. Amanee qiminaqa maree munu akundaanaree qinau. Miqi qufanoo Piratoofa eedoo qimaseenoo aqigoofanoo Yooseefaafa Yisuna iri aunirira saqarisaaqaraana tatumareenoo finau. <sup>39</sup> Nikoodeemusafa ooqai indaaruu asukunaki Yisuna faqa ufa qiqiufa maridanoo mifa Yooseefaana dadaaqinau. <sup>40</sup> Mifa faiqi akunnimaqasaida nikundee maru marasinna moomoo uqanna maraseenoo qamunnasaa adieeseenoo minannai Yisuna afaaqa kukuqigau. Miqanda nari maqannaasa oosana maraseeqa kukuqamasee akundaqau. <sup>41</sup> Yisuna aruqoo mina aaga saqama marinau.

(Yisuna aukuaana nari maqannaasa maaqimasee madika indufusaida kuqufusa nikundee mariqau. Misa ooni fraana kasaaga aamara auquseeqa minaki keeqafuufa qinni dinni moomoo aamara auqiiseeqa kuqusa minakiaqa naadu naadu nikundee mariqau. Moodaa kai moo kari akundeeqa mina afunda taikoofoanoo kaifaa moo fannoo kuqufaqa miqikai imariqau. Sia moodaa karifau nikundee mariqau. Moo kari moo kari nikundee mariqau.)

<sup>42</sup> Mi saqamanaki ooni aamara fuka marunaki sia moo akundoonaki. Mi ooni aamarafa adeedi marufaqa duna maasa Yuda maqannaasa sabata naaquqarafa mariannoo qimasee kaqi kaqi ufaqa Yisuna iri ooni aamaraki munu akundaqau.

## 20

*Yisufa findimaqee fufuufaqa fifau madikakai qafoo ufaa.*

*(Mat 28:1-8; Mak 16:1-8; Ruk 24:1-12)*

<sup>1</sup> Akundamasoofoqa mariqaa amaanasaa kananaana eendai Mariana amarafa Makadara maqusaindaraafa Yisuna ooni aamaraki akundamaqoona qafaanee qimasee finau. Oonuree qafoofoanoo mina aamaraki ititaqoo oonina fraana mareeqe kaqinni quqaqoofanoo marida qafanau. <sup>2</sup> Mariafa mina qafamaseenoo anirandeenoo sandeenoo oonureenoo Simoona moo auqu Peetooroona faqa Yisuna afaaqasaa aqoondi qini faqa qimanniminoo qinau. Misa Karaambaiga iri ooni aamarakinaana mara maree moosaa fifa. Sia maasa qafeeqa.

<sup>3</sup> Yisuna faiqi namuqiari Peetooroofa faqa qinee Yoohaneesa faqa mina iriseeqa qafaanee qimasee sandaqaifana. <sup>4</sup> Maaqanda sandaidaqa qinee Yoohaneesa kaaqa sandeeqa Yisuna madika kooqinni oonuraqaifana. <sup>5</sup> Qinee sia keeqaqaifana kaqi oonu maridaqa aamaraki qafeemariafana. Miqoo maridaqa Yisuna kukuqamaqoo qamunnana mina kai qafee mariqafana. <sup>6</sup> Simoona moo auqu Peetooroofa aidaqaareenoo kaqi oonaamarai keeqanau. Mifa Yisuna kukuqamaqoo qamunna miqoo quqaqoona qafamaseenoo. <sup>7</sup> Mina akiaga rumbaqa qamunnana uturuqeeqeenoo aaduma kukuameeqee quqaqoofanoo marinau. <sup>8</sup> Qinee Yoohaneesa Peetooroona aanaaqiana keeqafi qafamaseeqa doo kuqaa findifiifoo qiqiafana. [<sup>9</sup> Yisufa kuqiranakiqari findifuaninna akanarana sia amiqimandee iriqaifana. Mana manammimariqiafana.] <sup>10</sup> Maaqanda qafamasee doo nimaaga anirandee qiqiafana.

*Yisufa Makadara maqanna anaasee kooroomamaqoo ufaa.*

*(Mat 28:9-10; Mak 16:9-11)*

<sup>11-12</sup> Mariana amarafa Makadara maqusaindaraafa ninaaqiana kafa ooni aamara kooqinni oonu kikiqinoo marida ikiraqee marinau. Miqidanoo ooni aamaraki kummaramafi qafoofoanoo qaara qangirooqara eekara qamunna afisiraqanda moo fannoo Yisuna akiaga maruqoo ooqufaaqee marufanoo moo fannoo Yisuna aiku maruqoo ooqufaaqee marufanoo nindafanau.

<sup>13</sup> Nindafoofaqa miqanda qiqau. Oo maa anaasee anee nanaree ikiraqaidanee. Mariana amarafa qinau. Misa qini karaambaiga mara maraafaqa sia misa quqaqoona iridaqa ikiraqaidada.

<sup>14</sup> Mariana amarafa miqi qimaseenoo quandaki qafoofoanoo Yisufa mina aanaaqiannai kikiqinoo marufanoo mifa sia Yisunee qinau. <sup>15</sup> Yisufa maaqi qimasee Mariana amarana qimaminoo qinau, Oo maa anaasee anee nanaree ikiraqaidanee, yanaree randaidanee. Mariana amarafa Yisunara maa saqamanasaa rakisirafammifoo qimasee qimaminoo qinau, Oo maa fasiqa anee yai fee iri maanakinana mara quqeenee. Anee qimaqiminaqa qinee mina maramaree fua.

<sup>16</sup> Yisufa mina iriseenoo mina auqu ramaseenoo qinau, Maria, qufanoo Mariana amarafa tautumma quandaki qafeenoo Oo ufasaa rakisirafee qinau. Eeburu maqannaasa ufakiqari qinau, Rabooni, maasa ufakiqari ufasaa rakisira fee qinau.

<sup>17</sup> Miqi qimasoo fanoo Yisufa qinau, sia qeeqa qikoofinnai ooru fiqa minara anee sia qini qifaaqa qumaraa. Anee oonuree qini qikaqaafasaa uqa qimannimia. Qinee qeeqa qikoofinnai faqa inni nikoofinnai faqa qeeqa Anutufinnai faqa inni Anutufinnai faqa ooru fidaqa. <sup>18</sup> Mariana amarafa mina iriseenoo sandee oonureenoo mina faiqi namu maaqi qimisee qimanniminau. Doo qinee karaambaiqa qafaunanoo mifa mi ufana qini qimaqiminoo.

*Yisufa nari faiqi namu kooroomannimaqoo ufafa.*

*(Mat 28:16-20; Mak 16:14-18; Ruk 24:36-49)*

<sup>19</sup> Ni faasaanna mi eendanaki Yisuna faiqi namu maasa moo maaqaki keeqafu-faqa Yuda maqannaasa doo Yisuna ariqa maasa faqa darifoo qimasee maasa misara rufasee kooqi amiqimasee ititasee marufanoo Yisufa tautumannimaqeenoo maasa qambaana kooroomafinoo qimannimino qinau. Sia rufaaqa asoarafa inniki mariani. <sup>20-21</sup> Miqi qimaseenoo Yisufa nari asauku aqumusaa pirimma aruna kai fidika reemaruna uqannifiqeenoo aqaasanasaa faaqaana raquru amuna afaaqa ateeqaqoono faqa uqannifiqoofaqa maasa qafamasee doo kuqiranakiqari findifuananoo fee qimasee kaaqamma asasiqiafana Yisufa kafia qimannimino qinau, inni sia maparaa iaqa asoarafa inniki mariani. Qini qikoofa maa maqanasaa qini diqifamaqoosa qinee miqikai iqa innee maaqanna maaqanna qini ufa qimannimiaqeeera inni faqa niqifaidaga. <sup>22</sup> Miqi qimaseenoo Yisufa aidoo maasa fuaqaqimaqaseenoo qinau doo innee naaquqara Anutuna maraquina maraqa. <sup>23</sup> Innee faiqi mandainaina numoo mininnisaifanoo Anutufa faqa mininnisaifanoo. Sia mininnisaifanoo Anutufa faqa sia mininnisaifanoo.

*Yisufa Toomasina kooroomamaqoo ufafa.*

<sup>24</sup> Yisuna faiqi namukiqari Toomasifa mifa qaara qapirafa maqaqoofa marufa moosaa mi eendanaki maridanoo sia Yisufa tautumasee maasaki kooroo una sia mifa qafanau.

<sup>25</sup> Maasa Yisuna qafaafanausa Toomasina qimamiqiaqiafana maasa Karaambaiqa qafau-nausa maridaqa. Miqi qufanoo Toomasifa qinau, innee unna qimariafanoo qinee mina asaukusaaqaraa pirimma aamaraki fidika reemarinaki auqama qafeeqa mina aqaasanasaqaraana faqa auqama qafeeqa kuqaa fee qianauna sia auqama qafeeqa unna fee qianauna.

<sup>26</sup> Mi amaanafa aiqaroonoo moo amaana eendaki maasa Yisuna faiqi namu faqa Toomasina faqa maaqaki keeqafi kooqi mundusee ititasee Yuda maqannaasa maasa dari maqi qimasee mariqiafana. Marufanoo Yisufa kafia maasaki kambiqanau. Anireenoo qinau, sia rufaaqa asoarafa inniki mariani. <sup>27</sup> Miqi qimaseenoo quandaki Toomasina qimaminoo qinau, aneenna asauku qini qisauku aqumusaa maaqoo quqasee pirimma aamara auqamma qafa. Aneenna asauku qini qikaasanasaa faqa quqasee auqama qafa, aneenna maparaairana taikaa, kuqaa fee kai qia.

<sup>28</sup> Toomasifa mina qafamaseenoo qinau. Qini karaambaiqa qini Anutufa. <sup>29</sup> Yisufa kafia Toomasina qimaminoo qinau. Anee qini qiqafamaseenana kai qiniara kuqaa fee qidanee. Akaqausa sia qini qiqafaidaga qini ufara kuqaa fee qifanoo Anutuna asafirafa misasaa mariannoo.

*Maapapiqanaki akara oosana kooroo qu ufafa.*

<sup>30</sup> Yisufa moomoo firaa ainaina nari faiqi namu nifusaa kooroomasoo faqa sia maa papiqanasaa akara riqa. Akaqana kai akara riqa. <sup>31</sup> Maa ainainnausara akara rumaseeqa inneeqa Yisunara kuqaa asauku mundira fee qimasee Anutuna amaaku fee qimasee mi iriranannai mina auqunnai innee naaru naaru marirana maraaqeeera akara rumannimaqeeqa.

## 21

*Yisufa nari faiqi namu qisauku dinni taikasee dinni qaaraqanda marasee misa nifusaa kooroomannimaqoo ufafa.*

<sup>1</sup> Inaaqiana moo kari Yisufa kooroomambufafa maasa mina faiqi namu qafaqau. Tibeeriasa nammari mandirana afainni maaqimandee kooroomandee uqannifiqanau.

<sup>2</sup> Simoono moo auqu Peetooroofa faqa Toomasifa qaara qapirafa faqa Natanaeerafa Kannaana maqusa Kariree maqa maaqaindaraafa qini qikoona Seebeedeena amaakuqara faqa moodaanaki mariqiafana.

<sup>3</sup> Marufanoo Simoono moo auqu Peetooroofa nariara qinee noodaanna pateeraanauree qufaqa maasa ani faqa funauree qimasee mina faqa fiqiafana. Maasa miqi qimasee

kanuqaki akaramafi nammari qambaana oonuree pateeuqa quqasaida uqeerasaida qafeemarufanoo iqaqanau. Sia uqanna moodaa noodaanna uqarinau.

<sup>4-5</sup> Kananaana suani maqee ururoofanoo Yisufa nammari afainni kikiqinoo marufaqa maasa sia minara irisee Yisu fee qiqau. Yisufa maasa nammeera qimasee qimannim-inau, Oo kumaaraauqa noodaanna maraidee qufaqa maasa qiqau, sia uqanna moodaa maraidaqa.

<sup>6</sup> Yisufa iriseenoo maaqi qimasee qimannim-inau, innee nisauku uqannai pateeuqa quqaseeqa noodaanna paqurifaranoo. Misa mina iriseeqa nariqa firaa pateeuqa nisaukuqannaindari aqusoofanoo noodaanna moomoo minaki qumbiqafufaqa rarisarara anuqimariqiafana. <sup>7</sup> Yisuna afaaqasaa aqoondi qinee Yoohaneesa Peetooroona qimamiqa qiqiafana Karaambaiga muqufa maasa qimaqimifa maridanoo. Simoona moo auqu Peetooroofa mina iriseenoo nari qamunna quqaqoona qumareenoo aranandauqanna rumbamareenoo nammariki oqurama aqufufanoo immapamamaree Yisufunni finau. <sup>8-9</sup> Maasa Yisuna faiqi namu kanuqaki kaqimariaafanausa pateeuqaki noodaanna qumbiqanoo marufaqa rarisaqa aniufaqa afainni anireeqa. Maasa sia nianai marufaqa aambaaka maaqooqari aqimariana amanasaa marufaqa miqoo oonureeqa maasa sipakiqari maqasaa aqufufaqa miqoo idaraqoona qafaafannaqoo idarasee noodaanna suqaida feemu kaqi quqaqooqafa qafaqiafana. <sup>10</sup> Yisufa maasa qimannim-inau, noodaanna maqee maree anianakinaana akaqana maree aniaqa.

<sup>11</sup> Simoona moo auqu Peetooroofa sipaki akaramafinoo noodaanna pateeuqa rarisama maqasaa quqanau. Quqasoofaqa maasa noodaanna asaana rumasee (153) moomoo uqanna firaafa kai marufanoo sia pateeuqa rakeeinau. <sup>12</sup> Yisufa maasa nari faiqi namu naaranau, doo aniree narana naaqa. Maasa minara yafee qianneerusia. Doo karaambaiga akooqoo maridanoo qimasee sia iraqau, kaqimbiqiafana. <sup>13</sup> Maasa aniraafananoo Yisufa feemu faqa noodaanna faqa mareeqee niminau.

<sup>14</sup> Yisufa kuqiranakiqari findifooqoqari qaara kari maasa nari faiqi namu kooroomanimaqanau. Doo qaaramookufanoo noodaanna qumbaqira faasaanasaa fee qimasee kooroo inau.

*Yisufa Peetooroona faqa ufa qu ufa.*

<sup>15</sup> Maasa miqoo namasaafananoo Yisufa Simoona moo auqu Peetooroona qimaminoo qinau, Simoona, Yoohaneena amarana amaaku, anee qiniara aneenna amuqusakiqari fee aididanoo fee qini faiqi namu qiniara nidimarina ani qiniara aidirafa urinnaaqaranoo fee maridanoo fee. Peetooroofa iriseenoo maaqi qimasee qimaminoo qinau, eeo Karaambaiga qinee aniara dididanoo anee minara irimarianoo. Yisufa iriseenoo kaifaa qimaminoo qinau, anee qini faiqi namusaa asumu aandaara foora naranara foora nimia.

<sup>16</sup> Miqi qimaseenoo Yisufa kaifaa Simoona moo auqu Peetooroona qimaminoo qinau. Simoona Yoohaneena amarana amaaku, kuqaa fee anee qiniara aneenna amuqusakiqari fee aididanoo fee. Simoona moo auqu Peetooroofa qinau, Eeo Karaambaiga aniara didimarifana anee minara irimarianoo. Miqi qimasoofoano Yisufa qinau, anee qini ufa irimariasaa sipsipara foora rakisinnimaqaa. <sup>17</sup> Miqi qimasee Yisufa qaaramookufanoo Peetooroona irammirinoo qinau, Simoona Yoohaneena amarana amaaku kuqaa fee anee qiniara aidinoo fee. Peetooroofa Yisufa qaaramoo kari iroonara aundura rapikufanoo maaqi qimasee qimaminau, Oo Karaambaiga anee aiqama ainainara irimarianafa qinee aniara didimarinara anee irimarianoo. Yisufa iriseenoo qinau, anee qini ufa irimariasasaa naranara foora nimia. <sup>18</sup> Qinee anoona ufa kai ani qimamidaqa. Anee kumaaraa maridana qamunanda anee rumbasee aneenna aidiranasaa nimarianoo, kasooqaqee anee nauraiqi quqainanoo faiqi moo fannoo ani asauku dinni dinni ratutasee rumbasee afiqee sia fuaqaannai ani akooqainnannai kuqinnanara afiqee fuanno. <sup>19</sup> Yisufa mi ufanannai Peetooroofa aunirira saqarisaa kuquaninnana Peetooroofa mi kuqiranaki afaqa areenarana Anutuna amiannoo. Yisufa Peetooroona qimami taikaseenoo mifa findifi fidanoo Peetooronara doo anee qini qinaaqianna aniannee qimasee indaaru Yisufa finau.

*Yisufa nari afaaqasaa aqoondi faqa ufa qu ufa.*

<sup>20</sup> Peetooroofa Yisuna faqa fidanoo quandaki Yisuna afaaqasaa aqoondi qini Yoohaneesa qiqafanau. Ooqai Yudasifa ueeqoo eendanaki narana neemarufanoo Yisuna aaga marufa ueeqaaninnanara iroo fasiqafa qinee Yoohaneesa mi fasiqafa Peetooroona aanaaqiana fimariafananoo. <sup>21</sup> Peetooroona Yisuna iraidanoo qinau, Oo Karaambaiga maa fasiqafa Yoohaneefa naqifeemasee kuquanno fee.

<sup>22</sup> Yisufa qimaminoo qinau, Peetooroo sia mi fasiqana ainainirafa ani saikafau maridanoofau, qinindi maridanoo. Qinee mi fasiqanara sia dauni kuqua, kasooqaqee qinee kafaa qumuanna aukuaana ani paqurianauree qiananoofau miqimmiqini. Peetooroo sia

ani saika maridanoo. Ani saika maafa maridanoo. Anee qini faqa fuannee qidaqa. <sup>23</sup> Yisufa miqi qimasooafa mina faiqi namu maaqi qimasee qini Yoothaneenara nari qimami nari qimami aagamasee qiqau. Oo mi fasiqafa Yoohaneefa sia kuquannoo afeeka fee mariannoo. Yisufa sia minara sia kuquannoo fee qinau. Yisufa maaqi qinau, qinee mi fasiqanara kaqi marinaqa qinee qumuanna aukuanna qumu paquriananoofau miqimmiqini misaikana sia anindi, qinindi fee qinau.

<sup>24</sup> Mi fasiqafa maa ainainna ufana qidaqa akara rimarunausa maridaqa. Maasa mina ufara kuqaa fee qimasee iridaqa.

*Maa papiqanakinaa akara rafaafu ufafa.*

<sup>25</sup> Yisufa kuqaa moomoo ainaina auqinau, sia maa akaranakinaana kaifau auqinau. Maasa sia Yisufa auqoo ainaina aiqama akara riqa. Papiqa maa maqa maaqana qumbiqaandoora, oodaa kai akara riqa.

## YISUFA NIQIQOO FASIQAUSA

### Yisufa narí faiqinamu Yuda maqasaaqari niqiqoofaqa daraanimafufaqa auqoo ainainafa.

<sup>1</sup> Oo qini qifasaafa Teeoofirusafa, Yisufa indaarun narí saika oosana araseenoo miqooqari mina ufa oosana oosana faqa mifa auqu ainaina faqa Anutufa mareegee innaarunai quqoonara faqa qinee indaarugaa papiqaki qinee Rukaasa akara ruma-maqaafanafa maridanoo. Maqee maanaki dinnatinnai fuka akara rumamaqaidaqa. <sup>2</sup> Anutufa Yisuna mareegee innaarunai quqoo kamuqoo mi indaarugaa akarana taikaqifafana. Yisufa kaqi maridanoo Yeerusaree maqusa naaquqara maraqqunnarai narí rusandeesamumasee maroo fasiqausa naamuqaira ufa oosana oosana qimanniminu. <sup>3</sup> Yisufa narí kuqiranakiqari findifinoo miqooqari qaara fasiqa niku nisauku taikasee faasaana maridanoo narí faiqi namu maruqoo moomoo kari kooroomambinoo misa faqa ufa qidanoo Anutuna innaarunai ququsakinaa mariranara ufa qimannimarinu. Miqimandeenoo narí kuqiranakiqari findifinoo akooqoo mariranara uqannifiqanau. <sup>4</sup> Mi fasannai mi kamuqoo mina faiqi namu mina ufa irimarusa moodaanaki suqufufanoo Yisufa misa faqa maridanoo maaqi qimasee ufa qimanniminu. Qinee innaarunai ooru fuanaga innee maa maqusana Yeerusaree maqusa sia quqasee fifainiqa kaqi mariaqa. Qini qikoofa moo afeeka nimianinnanara qinee qimannimafannana minara maaqoo kai marida rakisiaqa. <sup>5</sup> Yoohaneefa nammari rumannimaqee marifa kaqi fifau nammari uqannaki moomoosa rumannimaqee marinu. Anutufa qusasa anoona ainainaki narí naaquqara andeegara maraqqunaki inni rumannimaqqanoo.

*Yisufa innaarunai ooru finau.*

<sup>6</sup> Yisuna afaaqasaa aqoondiuga mina faqa nimarusa misara niqiqoo fasiqausee qimariqau. (Yisufa maru aukuanu Roomma maqannaa kaamanna faqa sundiauga faqa rakisinnimaqee marufanoo Yuda maqannaasa nikoqqanau. Naqimasee Roomma maqannaa niqiqamasee fee maasa qeeqa rakisianauree qimariqau.)

Minara Yisuna afaaqasaa aqoondiuga Yisuna faqa suqufiqa irammiriqa qiqau. Oo Karaambaiga maa aukuannee yairee fee anee Roomma maqannaa kaamanna aqiqamaseenee Isaraee maqannaa maasa narí kaamanna quqeenaree. <sup>7</sup> Yisufa mi ufana iriseenoo qimanniminoo qinuu. Oosana oosana ainaina naaru kambigaaninna aukuanai sia innindifau maridanoo. Qini qikoofa narí afeeka rakisirana quqaseenoo, sia inniara iriaqee qinuu. <sup>8</sup> Maanara kai iriaqee qinuu, qini qikoona naaquqara andeegara maraqquna fannoo qumuree inni naakufinaqa innee qini qiqafara fasiqauqa qiniara aiqamai qimannimimaree fifaranoo Yeerusaree maqusaki mariasa faqa Yudeeaa maqa maaqaki mariasaki faqa Samaria maqa maaqaki mariasaki faqa nianai aiqama atinnai mariasaki faqa qini qiqafara fasiqauqa qiniara kooroo ifaranoo. <sup>9</sup> Yisufa miqi qimaseenoo misa nifusaa miqooqari Anutufa kukeeqaranakiqari Yisuna akooqoo uqeerasoofanoo innaarunai oorufimarufanoo asuru fannoo qumu dukunimaseenoo misa nifusaa kai qumu afiqee ooru finuu.

<sup>10</sup> Misa miqookai tataaqa marufanoo qaara fasiqa eekara qamunna afisiraqanda miqoo misaki dadi findifufaqqara kikiqiqau. <sup>11</sup> Miqanda maaqi qimasee aiqamausa qimannimiqau. Oo Kariree maqannaasa Innee nanaree innaarunai noori uqeerasee tataaqa maridee, innee fifau miqi mariafanoo. Anutufa Yisuna maqee inni nifusaa uqeerreeqeenoo innaarunai muru quqeenoo doo Yisufa maqee innaarunai ooru findee kai miqikai inoo kasoqaaqee kafa qumuanoo.

*Mataiasafa Yudasina amana kambiqanau.*

<sup>12</sup> Miqanda miqi qimasooafa Yisuna faiqi namu quqasee Oorifa aqqanasaaqari Yeerusaree maqusai kafa ooqu keeqaqa. Oorifa aqana sia nianai maridanoo.

(Moodaa kirometera maaqiraqoo maridanoo dinni Qufoorai miqiraqoo Yeerusaree maqusa maridanoo.)

<sup>13</sup> Misa kafa Yeerusaree maqusaki keeqafiqa maqee maqee nariqa kai suqimaru maqanaki keeqaqa. Maarinni sandaaqai rummaki suqiuqa. Misa nuqu Peetooroofa faqa Yoohaneefa faqa narí afaasaafa Yameesafa faqa Peetooroona akaqa Andurufa faqa Firipifa faqa Toomasifa faqa Baratooroomeeufa faqa Mataioofa faqa Yameesana amarafa Arafaeusana amaaku faqa Simoona amarafa moo misa minara nariqa kaamanaiqi qeera sandanainai qimaru fee qimariqau. Mifa faqa moo Yudasina amarafa faqa nifa Yameesana amaaku. <sup>14</sup> Minamusa anaasee namufaqa Yisuna anoona Mariana

faqa Yisuna akaqaafasaa namufaqa maqee maqee suqufida moodaa naundurasa fidaqa innaaru qimarusa mariqau.

<sup>15</sup> Qaaramoo faasaana aiqaroofaqa Yisuna ufa irimarusa suqufufaqa ufa suqirara qiqau. Misa nisaanarirafa maaqinoo maridanoo. Qisauku dinni taikasee dinni ani moodaa marasee fasiqa niku nisauku taikasee fasiqa anaasee suqimariqau. Misa suqimarufanoo Peetooroofa misakiqari findifinoo maaqi qimasee qimanniminau. <sup>16</sup> Oo qini qiqoonausa. Ooqeenaa akara anoona maasaki doo anoonaikinoo Yudasifa sundia mareeqeenoo soofaqa Yisuna arunara anoonaikinoo. Ooqai naaquqara andeeqara maraquina fannoo Dafidina qimamifanoo Yudasinara akara rumaqoofa doo maqee mina anoona maasaki kambiqaenoo. <sup>17</sup> Yisufa Yudasina saraandeesamumandee maasa faqa ainainianifeera mareeqee maasaki quqasoofanoo marinau.

[<sup>18</sup> Yudasifa Yisuna qumaraseenoo Yuda maqannaasa nisaukuki quqasoofaqa misa mina akiqara feefauru amiqau. Amufanoo mifa mi feefaurana mara mareenoo moo maqa feefaurumandeenoo miqoo saamurufanoo amuaqu radifufanoo arana kukupamafufanoo kuqinuu. <sup>19</sup> Yeerusaree maqannaasa minara iriseeqa mi maqanara fidika maqa maaqee qidaqa. Yeerusaree maqannaasa nari ufakiqari mi maqanara Akeeradama fee qidaqa.] <sup>20</sup> Dafidifa nari idi papiqaki maaqi qimasee Yudasinara ooqai Yudasifa sia kambiqaooqoo maaqi qimasee akara rinau.

Mina maqa maaqa kaqi mariannoo

Moo fannoo sia amana minaki marinnaranoo.

Kafaa Dafidifa moosaa maaqi qimasee Yudasinara akara rinau.

Moo fannoo mina amanasaa findifinafa mina amaaqa maqafi mariannoo.

<sup>21-22</sup> Peetooroofa Dafidina ooqeenaa ufa kikiqa ususeenoo maaqi qimasee nari aqoonausa miqoo suqifa marusa qimannimidanoo qinuu. Maasaki qisaukuqara taikasee qiku nooqu qaara marasee mariafanausa maridaqa. Yudasifa doo kuqinoo moo fannoo mina amaaqaki kambiqaqa. Sia kai fifau fasiqa fannoo miqiannoo. Ooqai oosanaree Yoohanee nammari nimimarufa marunaki maru fasiqafa miqooqari Yisuna faqa maasa faqa fifufanoo Karaambaifa Yisufa innaarunai ooru funa irufa fafoo fasiqafa kai Yudasina amaaqaki kambiqaannoo. <sup>23</sup> Peetooroofa miqi qimasooofaqa misa qaara fasiqa utaaqau. Miqanda nuqu Yooseefaana amarafa faqa Matiasafa faqa Yooseefaana amarafo moo auqu Barasabasifa kafaa moo auqu Yustusafa marinuu. <sup>24-25</sup> Miqoo suqimarusa miqanda nuqurama quqaseeqa minee maraanuu maanee maraanuu qidaqa Anutunara maaqi qimasee innaaru qimariqau. Oo Karaambaifa Yudasifa ani ufa irimariasaki mariifa doo nari manda nammari namaseenoo nari sanda arinoo maridanoo. Oo Karaambaifa maasa qaaraqanda mareeqee quqaseeqa, anee miqandakinaana yafasiqa fee ani aididanoo fee Yudasina aikuki kambiqaannoo fee. Anee aiqama fasiqa naundurairimarianafa minara maasa uqaqifiqa. <sup>26</sup> Miqi qimasee innaaru qimaseeqa masisa quandeera foora ufanoo Matiasana uqannifiqanuu. Uqannifiqasoofaqa Matiasana mareeqee Yudasina aikukina mara quqaqau.

## 2

### *Anutuna naaquqara andeeqara maraquina qumuree naakinuu.*

(Ooqai Sinai aqaanasaa Anutufa Mooseena aamua qimaqoo suqirafa marinuu. Yuda maqannaasa faqa Yuda maqannaasa aanaamuruki oonu marusa faqa aukuaana aukuaana mi fasannai suqira qoomaqammandaida Yeerusareenni suqu maree ururee neemariqau. Misa mi qoomaqanara aiq quqara qoomaqa fee qiqau. Anutufa nari sandufa Sinai aqaanasaa Mooseena amu ufanara faqa mi qoomaqana sakasee namaseeqa nari ufakiqari Peendeekoosoo qimariqau.)

<sup>1</sup> Yisufa innaarunai oorufu kamuqoo mina faiqi namu moomoo Peendeekoosa qoomaqira faasaanasaa misa aiqama Yeerusaree maqusai moodaa maaqaki nariqa kai keeqafimariqau. <sup>2</sup> Marufanoo kaqi kaqi ufanoo innaarunaidari firaa ufai uqidanoora foora qumureenoo mi maqanaki qumbiqa aqinuu. <sup>3</sup> Uqimarufanoo idauru miqirafa qumureenoo raina rainamaki aiqamausa nikiaaqa aqufufaqa qafaqau. <sup>4</sup> Idauru miqirafa Yisuna ufa iri marusasa aqufufanoo Anutuna naaquqara andeeqara maraquina naaku-fufaqa naundura qumbiqanoo marinuu. Qumbiqafinoo Anutuna maraquina fannoo anoonaikufaqa moo maqannaasa ufa nari sia irimaru ufausa qimariqau.

<sup>5</sup> Mi fasannai Yuda maqannaasa kaaqa Anutunara rimarusa aanaamurunni daraaniga mariusa oonurandee anireeqa Yeerusaree maqusai qoomaqa suqanarara qumariqau. <sup>6</sup> Yeerusareenni suqimarusa ufai uqira ufa iriseeqa moomoosa Yisuna faiqi namu maruqoo suqifa mariqau. Anaamurukiqari ani marusa Yisuna faiqi namu ufa iriseeqa

akasaa qeeqa maqannaa ufa qidee qimasoofanoo naaquqanau. <sup>7</sup> Naaquqoofaqa ran-deega nari qimami nari qimami qiqau, Maa ufa qimaria fasiqausa Kariree maqannaasa kai maridaqa. <sup>8</sup> Misa maasa ufakiqari andeeqasee kai qida qiafaqa iridaqa. Naqi fee mandee maasa ufa iridee, sia maasa maqusai mariaasa maasa ufauqa qidaqa. Maasa moomoo maqa maaqaindari anunausa maridaqa. <sup>9</sup> Maasa akaqausa Paratia maqusaindari anunausa.

Akaqausa Meedia maqa maaqaindari anunausa.

Akaqausa Eeramma maqa maaqaindari anunausa.

Akaqausa Meesoopootamia maqa maaqaindari anunausa.

Akaqausa Yudeeaa maqa maaqaindari anunausa.

Akaqausa Kapadoosia maqa maaqaindari anunausa.

Akaqausa Poontiusa maqa maaqaindari anunausa.

Akaqausa Asia maqa maaqaindari anunausa.

<sup>10</sup> Akaqausa Firikia maqa maaqaindari anunausa.

Akaqausa Pamafiria maqa maaqaindari anunausa.

Akaqausa Isipa maqusaindari faqa,

Ribia maqa maaqa Sireenee aaqa mariasakiqari faqa aniqa.

Akaqausa Roomma maqusaindari anunausa.

<sup>11</sup> Yuda maqannaasa faqa aanaamuru Yuda amaana ufa irimariasa faqa anunausa. Akaqausa Kareete maqa maaqaindari anunausa.

Akaqausa Arabia maqa maaqaindari aniqa.

Maasa moomoo maqusaindari daadu daadu ufa qimarunaua ani maridaqa nari ufakiqari andeeqasee qiafaqa iridaqa. Misa Anutuna firaa ainaina auqunara qiafaqa iridaqa. <sup>12</sup> Misa aiqama naaqqeenoo naundura dapikufaqa nari qimami nari qimami qiqau. Maana nana oosanee kambiqaiddanoo maaqiddanoo fee. Maasa mina oosanara randaidaqa. <sup>13</sup> Akaqausa Yisuna faiqinamuara naakada qiqau. Maa fasiqausa nammari moomoo neeneesee furufarida fifau faafau aiqama maqannaa ufa qidaqa sia misa ufa iriaqa.

*Peetooroofa findifinoo amiqimasee aiqamausa qimanniminau.*

<sup>14</sup> Peetooroofa mina iriseenoo Yisuna faiqi namusaimbaqa qisaukuqara taikasee qiku nooqu qaara marasee qirausasaimbaqa findifufanoo firaaqoo nammeera qimasee maaqi qimasee suqiqa marusa qimanniminau. Qini maqannaa Yuda maqannaasa innee aiqama Yeerusareenni ani mariaasa qini ufa iriaqa. Qinee maqee qimannimianaga amiqimandee iriaqa. <sup>15</sup> Maa fasiqausa sia nammarifau namasee furufaridau. Innee qafaafa kananaana maridanoo suani maqee ururaidanoo. Minara sia amana nammarifau namaqqee miqidaqau ia. <sup>16</sup> Maa amiqira fuka ainainafa kambiqaiddanoo Anutuna tamummaqara fasiqa Yooerafa ooqai akara rumaqoofa mina anoona doo maqee inni nifusaa kambiqaenoo. Yooerafa maaqi qimasee ooqai akara rumaqoofa.

<sup>17</sup> Anutufa qinau, Taikainna faasaana maa ainainna quqaanaura.

Qinee qeeqa maraquina faiqi aiqamausa nifaaqai nammariara foora teeqimanni-maqaanaura.

Mi afeekanannai inni faiqinamu niraamuqmaaka naaru kambiqaaninna ainainara maqee qimasainanoo naaru kambiqaanoo.

Inni kumaaraauqa faqa qaina anoona qaina qafeefaranoo.

Faiqi asooqa nauraasa qaina misa nifunni areefaranoo.

<sup>18</sup> Mi fasannai qinee Anutusa kaiqeesa ainainimariasa faiqi faqa aanaaseeuqa faqa nifaaqasaa qini maraquina adiana nimaqasanaqa misa tamummaqeeffaranoo.

<sup>19</sup> Qinee mirinni innaarunni moo ainaina oosana oosana uqannifiqasanaqa maqasaaqari qafeefaranoo.

Maa maqanasaa moo naaqqara firaa ainaina auqusaanaqa qafamasee qini afeeka oosana qafeefaranoo.

Fidika faqa ida faqa ida muna firana faqa mariannoo.

<sup>20</sup> Asukuna fannoo suani afu aruannoo.

Fidika andandirafa quqoonna ititaannoo.

Karaambaiga firaa kaaqa qara faasaana radiqisee qumuraannee qinna kamuqoo maa ainainnausa kambiqaanoo.

<sup>21</sup> Mi fasannai yafa yafee Karaambaiga auquara fiffimasee aaree mariasa misa kai Karaambaiga asumu mareefaranoo.

Yooerafa mi ufausa akara rumaqoofa maridanoo.

<sup>22</sup> Peetooroofa Yooerana ufa qimannimiseenoo maaqi qimasee aiqamausa suqiqa marusa qimanniminau. Innee Isaraee maqannaa fasiqauqa aiqama qini ufa iriaqa.

Anutufa Yisuna Nasareetee maqannaana narí asauku mundirana inni nifusaa utaaqamaqoofa maridanoo. Anutufa dadaaqufanoo Yisufa faiqí inni qambaana maridanoo inni nifusaa afeeka ainaina faqa naaquqara ainaina faqa uqannifiqara ainainauqa faqa auqusoofanoo minannai innee Yisunara innaarunaindaraa fee qiaqeera uqannifiqanau. <sup>23</sup> Anutufa faasai iriqarasaamaseenoo narí amaaku maqasaa mariasa nisaukuki quqasaanaqa misa mina arifaranoo fee qimaseenoo misa miqimmasee maaqimmasee aruaqee qimasee narí qimiriqoomau kai fuaqeera qimaseenoo inni nisaukuki Yisuna quqasoofaqa sia irirai mifa aamua qimaqoomau kai fidaqa mina mara maree kuqammariqau. Innee mina qumaree manda oosana maree maru fasiqausa nimisoofaqa misa qumareeqa aunirira saqarisaa pirimmannai arusoofanoo kuqinau. <sup>24-25</sup> Kuqufufanoo Anutufa sia minnisana, kuqiranakinaana uqeera quqanau, kuqira aupuraranakinaana rakeemaseenoo uqeera quqanau. Kuqirana uriqararafa marunara kuqirafa sia amiqimasee amana kisaaqasaa qumaraannoo Dafidifa minara maaqi qimasee akara rumasoofanoo maridanoo.

Karaambaiqa qini qifusaa faasaambaasaana marufaqa qafeemariqia.

Mifa qini daaqa qini qisauku uqannai marinara sia qinee rufiaanaura.

<sup>26</sup> Qinee minara irunanoo qini ufa asasirafa kai maridanoo qeeqa daunduraki asasirafa qumbiqanoo maridanoo.

Qini qifaaqa faqa sia maparaa iannoo, Karaambaiqa afeesidanoo asasiannoo.

<sup>27</sup> Anee sia qini qimana kuqiranaki minniqiseennara qifaaqa quqaidaqa sia maparaa ianaura.

Aneenna naaquqara andeeqara fasiqa afaqa madikaki akundamasainana anee qaoo qinanoo mina amaqi sia putaa iannoo.

<sup>28</sup> Anee kaqi marira aana doo uqaqifiqeennaranoo.

Anee qini faqa marinarannai qini daunduraki asasirana qumbiqa qiminnaranoo.

<sup>29</sup> Peetooroofa Dafidina ufa qimannimiseenoo maaqi qimasee narí qimanniminau. Oo qini qiqoonausa iriaqa. Dafidifa sia nariarau akara rinau, narí ati Yisunara akara rinau. Dafidifa maasa qiikeeku qikaaku marifaqa minara innee amiqimasee iridaqa marianara qifaaqa quqasee amiqimasee maaqi qimasee qimannimianaura. Dafidifa kuqufufaqa akundaqau. Mina madika kaqi maridanoo maasa faqa. <sup>30</sup> Dafidifa Anutuna tamummaqara fasiqa marufa marinau. Anutufa maaqi qima afeekaikamandee qimaminau. Qinee Anutusa, anatikiqari kasooqaqee moo amiananoo Karaambaiqaikiannoo, ani aanna reenoo karaambaiqaikiannoo. <sup>31</sup> Dafidifa Anutufa kasooqaqee auquaninna ainainara iriseenoo narati asauku mundirafa kuqiranakiqari findifuaninnanara maaqi qimasee akara rinau.

Anutufa sia suqiraua marianaki minninnisaannoo.

Sia mina amaqi putaa iannoo.

<sup>32</sup> Anutufa Dafidina ufamau maa Yisuna kuqiranakinaana findifumasaiqa maasa maqee inni nifusaa kikiqimariasa mina qafeemarusa maridaqa. <sup>33</sup> Anutufa Yisuna uqeereeqeenoo narí aqa asauku uqannai quqaseenoo narí naaquqara maraquna ooqai utaaqa amaaqoonaa Yisuna amifanoo mifa kafaa quandaqinoo maasa adiana qimaqifaqa maa maqee kambiqeemari ainaina innisaimbaqa qafaifaqa. <sup>34</sup> Dafidifa sia innaarunai ooru finau narí ati Yisufa ooru funara maaqi qimasee akara rinoo qinau.

Anutufa qini Karaambaiqa qini atiaru maaqi qimasee qimaminoo qinau. <sup>35</sup> Anee qini daaqa ooqu marifinaqa qinee ani namuqaa mareeqee ani aramandunnai quqasaanana anee rafaqaqafusaa.

<sup>36</sup> Minara innee aiqama Isaraee maqannaasa maa ainainnara aiqama amiqimasee iriaqeera qidaqa. Maa Yisuna innee aunirira saqarisaa aruna Anutufa mina kai mareeqeenoo Karaambaiqa asauku mundiranai kamandaifanoo maridanoo.

<sup>37</sup> Miqoo suqufi mariasa aiqamausa mi ufana iriseeqa Oo maasa firaqoo aaqeeqa qimasooofanoo naundura dapikufaqa Peetooroona faqa Yisuna faiqi namu faqa iramiriqa qiqau. Oo qi qoonausa naqi fee maasa ianauree. <sup>38</sup> Peetooroofa iriseenoo qimannimino qinau. Inni aiqamausa uqanna inneeqa mandainaina nimeesa uqusee Yisuna asauku mundiranaki keeqafiq nammari rumannimaqaaqa. Miqi mandaifanoo Anutufa inni mandainainara minninnisaannoo narí naaquqara andeeqara maraquna inni nimiannoo. Sia feefauru qirafa kaqi nimirafa maridanoo. <sup>39</sup> Anutuna ooqai qima afeekaikamaqoonara narí maraquna inni faqa inni niku nisaukuara faqa aanaamuru mariasa faqa aiqama Anutufa naarainaqa aniannee qinausa faqa narí maraquna nimaanauroo qinau.

<sup>40</sup> Peetooroofa mi ufausa faqa ufa oosana oosana ufa faqa miqoo suqimarusa aaquqima nimaqaidanoo qimanniminau. Maa maqee mariasa mandoosanara narirara qumuannoo inni faqa naruani rufasee Yisuna saqarikaqa. <sup>41</sup> Miqi qimasooofaqa mi suaninasaakai



faiqi anaasee moomoosa Peetooroona ufara kuqaa anoonee qimasee Yisunaindi kamambi nammari maraqau. Qaaramoo tauseenna fasiqa anaasee mi suaninasaa kai nammari marasee Yisuna faiqi namuki atooqaaqau. <sup>42</sup> Miqoo miqimandee nammari maroosa Yisuna afaaqasaa indaaruaqaa faiqi namu ufa maqee maqee irisee mi mau fimariqau. Misa maqee maqee Yisuna faiqi namu faqa moodaanaki kamambi maridaqa moodaa maqaki nariqa narana suqaqoona namaseeqa Yisuna afaqa namaseeqa raudamaki firaa amaana maqaki keeqa fidaqa Anutunara innaaru qimariqau.

*Yisuna faiqi namu amiqimasee moodaanaki mariranara qimariqau.*

<sup>43</sup> Yisuna afaaqasaa faiqi namu moo nuqu Yisufa niqiqoo fasiqausee qimariqau. Anutufa Yisufa niqiqoo fasiqausannai sia amana faiqi auqaqaa ira ainaina naaquqara ainaina auqusoofaqa faiqi anaasee qafamasee Anutuna afeekara firaa ainainee qimaseeqa naaquqanau. <sup>44</sup> Yisuna ufa irimarusa aiqamausa faasaambaasaana moodaanaki marida aqoondikai mariqau. Misa miqidaqa nari qumiasana nari ami nari ami imariqau. <sup>45</sup> Misa maqa faqa nari ainaina oosana oosana faqa mootinai nimisee feefauru marasee nariki faiqi akaqausa ainaina siaisa marusa misa sarau imaru ainaina doo nimimariqau. <sup>46-47</sup> Faasaambaasaana Yeerusaree naaquqara amaana maqaki keeqafida innaaru qimariqau. Nari maaqakiaqa faqa maqee maqee suqufida narana neemariqau. Misa afaaramasee narana naida nimisee moodaanaki suqusee naidaqa Anutunara asasidaqa dufi dufi qidaqa aiqama faiqi anaasee amiqi amiqiman-nimaqaranara irisee asasimariqau. Maqee maqee faiqi anaasee akaqausa misa faqa Yisunara kuqaa anoonee qimariasa Anutufa qumee misa mareeqee ooqeenasaa faqa moodaanaki kamannimaqaidano.

### 3

*Peetooroosa Yoohaneesa aiku mandaikirana andeeqaisaqau.*

<sup>1</sup> Misa miqi marufanoo moo faasaana Peetooroosa Yoohaneesa Yeerusaree naaquqara amaana maqaki innaaru qirara ooru fiqau. Yeerusaree maqannaasa eeneemaru faqa amaana maqaki keeqafi innaaru qimariqau. <sup>2</sup> Peetooroosa Yoohaneesa eeneemaru innaaru qiraree qimasee kooqiki ooru keeqafi faiqi moo qafaqau. Ooqai maqasoonakiqari aiku mandaikirafa sia ainainirana amana marufaqa naratiuqa aindusumaraidaqa maqee maqee amaana maqa kooqiki quqasee marufanoo miqoo maridanoo munnimara innaaru qimarufaqa akaqausa moodaa moodaa amimariqau. Qimudaoo qusa gaaraqanda amisoofanoo minannai naranaina feefaurumma neemarinau. Amaana maqa kooqiura moomoo marinau. Nuqufaqa kooqiura mariqau. Mi fasiqana quqee maru kooqinara amiqira kooqi fee qimariqau. <sup>3</sup> Mi aiku mandaikirafa mi amiqira kooqinaki ooqu marifufanoo Peetooroosa Yoohaneesa minaki keeqafufanoo mi fasiqafa miqandara munnimara qimiaqee qinuu. <sup>4-5</sup> Innaaru qufaqa miqanda mi fasiqana ooriki qafamaseeqa Peetooroofa qinuu. Anee maaqanda dooriki qiqafaa qufanoo mifa ainaina qimidaqiaafoo qimaseenoo miqanda nooriki nindafanau. <sup>6</sup> Nindafamasoofanoo Peetooroofa kafa qimaminoo qinuu. Sia qinee munnimma marisa maridaqa. Qinee moodaa ainaina marisa mina kai ani amiana. Yisufa asauku mundirafa Nasaretee maqasaindaraafa qini qimuna mina ani amidaqa mina auqusaa ani qimamidaqa anee findimeeqee fua.

<sup>7</sup> Peetooroofa miqi qidano mi fasiqana asauku uqannai asauku qumareenoo dadaqufanoo aqee uqanna mina aiku faqa mina aiku aummeena faqa afeekaikufanoo rutaqinoo findifumakufanoo oonuree aniree inau. <sup>8</sup> Miqimakufanoo Peetooroosa Yoohaneesa faqa amaana maqaki keeqaidano Anutunara susuqira idi raidano rafusaki rafusaki idano nidano keeqeemarinau.

<sup>9-10</sup> Faiqi anaasee miqoo moomoosa mariusa mi fasiqana qafamaseeqa mina nirana faqa Anutunara susuqira idi rarana faqa qafamaseeqa qiqau, Oo amiqira kooqiki ooqufaqqee munnimara innaaru qimari fasiqafa doo findifinoo amiqimasee nidano. Miqi qimasee tautufanoo naaquqoofaqa mina andeeqara oosana randaqau.

*Peetooroofa mi fasiqana andeeqaisoo oosana qimannimau.*

<sup>11</sup> Mi fasiqafa Yoohaneesa Peetooroosa firaaqoo dufi dufi qimaseenoo miqanda qumareenoo miqanda faqa maaqa tida atimau Sooroomoonaindi fee qimaru maqana atimau akaraqau. Faiqi anaasee moomoosa mina qafamasee sandeeqa oonu mi atimau rafusu uqarumasee mina qafeemaruqanau.

<sup>12</sup> Peetooroofa moomoosa nindafamasee maaqi qimasee qimannimau. Isaraee maqanna fasiqauqa. Innee maa ainaina qafamasee nanaree tautiqa maasa tataqaidde.

Innee maasara nariqa afeekannai fee nariqa andeeqaranannai fee maa fasiqana findifumaseafoo qidee. Oo sia uqanna. <sup>13-16</sup> Abarahaamana faqa Isakeena faqa Yakooboona faqa misa Anutufa maasa qiikeeku qikaaku Anutufa maa fasiqana uqeereeqeenoo nari afaaqa areenarana nari ainainira faiqi Yisuna amifa maridanoo. Innee mina mareeqee maasa faiqi firaasa nimufaqa maa mareeqee Piratoona amufaqa innee miqoo aruaqee qiqau. Piratoofa idukiraree qifaqa innee afeekaikamasee aruaqee qiqau. Yisufa mifa aaduma amiqimandee andeeqarafa uqanna marufaqa innee faiqi narimarunara Piratoonara iduku qimiseenana Yisunara kaqi kuquanifee qusa. Innee miqi qimasee asumu marira oosana faqaana arusaqau. Anutufa mina kuqiranakinaana uqeera quqasoona maasa qafeemarunasa maridaqa. Maa Yisuna auqu afeeka fannoo kai maa fasiqana afeeka amifanoo findifinoo nidanoo. Innee maqee qafeemaria ainaina Yisuna auqu faqa nari auqusaa irirana rusiranannai faqa kambiqaenoo. Yisunasaa irirana rusiranannai maa fasiqana andeeqasaifanoo aiqamausa nifusaa findimeeqee nidanoo.

<sup>17</sup> Qini qiifoonausa innee faqa inni faiqi firaasa faqa sia irirana iriqa Yisuna ariqau. <sup>18</sup> Ooqai uqanna Anutufa nari tamummaqara fasiqauqa ufannai nari asauku mundirana kasoogaqee apuraannoo fee qimaqoona doo inni nisaukuki quqasoofaqa mina ufa anoonaiqiqa Yisuna ariqau. <sup>19-20</sup> Innee minara irisee inneeqa mandaininara nimeesuqasee Anutufinni noori ubeekaifanoo inni mandainaina numoo rukannisainaqa innaarunaindaraa asoorana Karaambaiqa afusaqaraana inni nimiannoo. Ooqai Anutufa inniara iriseenoo nari asauku mundirana Yisuna mareenoo kaifaa kasoogaqee innee ianna aqiqainanoo qumuannoo. <sup>21</sup> Mifa Yisufa asauku mundirafa kaqi innaarunai mariannoo. Kasoogaqee Anutufa aiqama ainaina fuka kambiqaaninna aukuanai mi kamuqoo Anutuna tamummaqara fasiqauqa ooqai qimaqoomau kai asauku mundirafa kafa qumuannoo. <sup>22</sup> Ooqai Mooseefa maaqi qimasee qimaqoofa maridanoo.

Karaambaiqa inni Anutufa inni tamummaqara fasiqa moo nimiannoo. Qini Mooseesa daanna reenoo innikiqari kai moo fannoo kambiqaannoo. Kambiqaanaqa innee mina ufara eedoo kai qiaqa. <sup>23</sup> Innikiqari moo fannoo sia mi tamummaqara fasiqana ufa irifanoo faiqi aanaaseekinaana qumaree kaqinni quqasee miqoo kuqaruannoo.

Peetooroofa Mooseena ufa miqi qimannimiseenoo nariara quandafinoo maaqi qinau. <sup>24</sup> Ooqai Anutuna tamummaqara fasiqauqa moomoo marufaqa naaru kambiqaaninna ainainara tamummaqasee akara riqau. Misakinaana moo tamummaqara fasiqa Samueerafa faqa marufanoo, nari faqa naraanaaqiana kambiqaosa faqa moodaa kari ufa qunannai maa maqee kambiqaemari ainainara kooroo inau. <sup>25</sup> Anutufa nari tamummaqaranauqannai maasa qiikeeku qikaaku qima afeekaikirana oosana oosana nimiqoofa maridanoo. Sia misara kaifau quqanau. Maasa faqa naida qimidanoo. Anutufa maaqi qimaseenoo Abarahaamanasaa qima afeekaikinoo qinau. Ani aiku asauku misannai maa maqa maaqanaki maamaqanasaaqaraasa misannai amiqi amiqimannisaanaura.

<sup>26</sup> Miqi qimasee Anutufa Abarahaamana faqa qimafeekaikunara irinoo nari ainainira faiqi Yisuna mara mareenoo inni maqanniminai. Aiqama maqasaaqaraasakina inniki naaree quqasee inneeqa mandainaina nimeesuqaqee amiqi amiqirana faqa nimianifeera.

## 4

*Peetooroosa Yoohaneesa Kansoorauqa nifusaa kikiqamafuqa mi ufanara iram-miriqau.*

<sup>1</sup> Peetooroosa Yoohaneesa faiqi anaasee miqi qimasee Sooroomoona tida atinni firaamaana maqaki maruna qimannimarufaqa amaana maqasaa anaaiqikirausa faqa amaana maqa poorisauqa faqa Sadikai amaana ufa irimarusa faqa anireeqa irimariqau. <sup>2-3</sup> Peetooroosa Yoohaneesa Yisufa kuqiranaiqari findifunara faqa faiqi anaasee faqa findiffandinnanara faqa amiqimasee faiqi anaasee qimannimarufaqa Yuda maqanna rakisirausa aniree iriseeqa tautumaseeqa qiqau, faiqi anaasee Yisuna kuqiranaiqari findifunara iriseeqa maasa dari foora qimaseeqa aanoomasee Peetooroosa Yoohaneesa rumbeeqee karabusa maqaki quqaqau. Eeneemarufaqa doo suani atisaa marufanoo duna ufa irianee qimasee mareeqee karafusaki quqaqau. <sup>4</sup> Faiqi anaasee moomoosa sia rakisirausa ufara eedoo qiqau. Peetooroona ufa iriseeqa moomoosa uqanna Yisunasaa irirana rusisoosa minasaa atooqau. Faifa tauseenna nukudara foora ira fasiqa anaasee mikari minasaa atooqau.

<sup>5</sup> Faiqee iqaqoo kananaana Isaraee maqanna faiqi uriqararusa faqa faiqi firaasa faqa Mooseena sandufa akoofasauqa faqa Yeerusaree maqusaki ufa suqimaru maqanaki

suqimariqau. <sup>6</sup> Annasafa aanaiqikirausa uriqararafa faqa Kaiafasafa faqa Annasana aiku asauku faqa indaarufaa Yoohaneena amarana faqa Areekasadeerafa faqa misa aiqama Yuda maqanna faiqi firaasa faqa miqoo suqimariqau. <sup>7</sup> Misa miqanda Yisufa niqiqoo fasiqaqanda karafusakinaana mareeqee nari noorinni quqaqoofaqa aanoo imasee iram-miridaqa qiqau. Innee qara naqi mandaafanoo fee aiku mandaikirafa findifinoo fee. Nana afeekannai fee miqi fee, ya fasiqana ufa fee iri fee maqi fee.

<sup>8</sup> Peetooroofa naaquqara maraquna minaki qumbiqafunara findifinoo paasoosamandee maaqi qimasee misa qimannimainau. Oo maa fasiqausa faiqi firaasa faqa rakisirausa faqa qini ufa iriaqa. <sup>9</sup> Innee maasa aiku mandaikirana dadaaqi findifumasaunnara innee minaree maasa iraidee. <sup>10</sup> Innee faqa Isaraee maqannaasa aiqama irifaqa mina oosana qimannimianauro. Maa fasiqafa kisaagasaa aiku mandaikinoo marufa marifaqa maqee amiqirafa inni nifusaa kikiqinoo maridanoo. Yisufa Anutuna asauku mundirafa Nasareeteendaraa fasiqa innee aunirira saqarisaa pirimannai arusoofanoo Anutufa mina kuqiranakinaana uqera quqasoofa mina auqu afeekannai maa fasiqafa findifinoo maridanoo. <sup>11</sup> Tamummaqara fasiqa akara Yisunara maaqi qimasee akara rumaqoofa maridanoo. Innee maaqa usakeemarusaa faakanara fidiqaamasee tatu aqusoofa Nari kai sabeena afeeka faakana fannoo findifinoo rakiqanoo maridanoo.

Tamummaqara fasiqa ufa miqimasee Yisunara akara rumaqoona innee sia irirai mi mau kai fidaqa mina arusoofanoo nari findifinoo maridanoo. (Mi aukuanna ooninnai kai usakee mariqau. Maasa sabeenannai maaqa usakee maruna marifaqa ooniara sabeena kikiqusidaqa.) <sup>12</sup> Innaarunai firana Yisuna moodaa nariara minannai kai innaarunai firafa maridanoo. Anutufa sia moo fasiqa maa maqanasaa quqaseenoo minannai innaarunai ooru fuagee qinau. Sia uqanna, Yisufa kai.

<sup>13</sup> Miqoo suqimarusa faiqi firaasa Peetooroosa Yoohaneesa ufa irisooofanoo naaquqoofaqa tautumaseeqa qiqau maqanda sia sukuraki keeqeemaruqanda kaqi maruqanda maridaqa kaaqa paasoosamandee ufa qimariqanda maridaqa Yisuna faqa nimariaqanda miqidammia maqi qiqau. <sup>14</sup> Faiqi aiku mandaikirafa miqoo Peetooroona faqa Yoohaneena faqa amiqimasee kikiqinoo marufaqa faiqi ufa qimarusa mina qafeeqa naqi fee qimasee qaoo qianau qimasee ufara randeemariqau. <sup>15</sup> Mi rakisirausa suqimarusa Peetooroosa Yoohaneesa niqiqamasooofaqa moosaa fufaqa nari miqoo maridaqa narinni narinni ufa qimariqau. <sup>16</sup> Misa maaqi qiqau, Maasa maa fasiqaqandara naqimasee fee miqandara qaoo qianauree. Yeerusaree maqusanasa faqa aanaamuru misaki ani mariasa faqa aiqama maa moo ainaina firaa ainaina auqunara iridaqa maasa faqa sia amana mi ufanara qaoo qianauro akooqoo marifaqa. <sup>17</sup> Maasa miqanda sia kaqi idukuanauranoo aaquqimannimaqasee idukuanaura maasa miqanda naaramaseeqa qumeeraqee qianauro maa ufana sia fifainianifeera qianauro maaqoo kai kaaqa taikaanifee qianauro. <sup>18</sup> Miqi qimasee misa Yoohaneesa Peetooroosa naaramaseeqa qaoo qiqau. Sia uqanna Yisuna auquara faqa mina ufara faqa sia kafaa kooroo qiaqa. Qumee uqanna raaqee qiqau.

<sup>19</sup> Peetooroosa Yoohaneesa misa ufa iriseeqa qiqau. Innee inneeqa kai Anutuna afusaa andeeqara ainanara irimariasa mariafanoo. Maaqanda inni ufamau fee fuanauree mina ufamau fee fuanauree. Maasa inni ufamau sia fuanaura Anutuna ufamau fuanaura. <sup>20</sup> Maasa Yisunara qafee marunna ainainara daaqoo iri marunna ainainara naqi fee masee kukeeqaanauree sia kukeeqaaqaa ira ainaina maridanoo.

<sup>21</sup> Miqi qimasooofaqa miqoo suqimaru rakisirausa afeekaikamandee qaoo qimasee idukiqu. Misa naqimandee miqanda nariraree, sia amana. Faiqi anaasee aiqama qafamaseeqa Anutunara asasidaqa idi reemariqau. <sup>22</sup> Mi moo ainainna auqaisoo fasiqafa aiku mandaikirafa sia kumaaraafau qaara fasiqa niku nisauku taikasee aukuanu aiqaroofaqa andeeqaqau, faiqi firaana andeeqoonara asasidaqa minara idi reemariqau.

*Yisuna faiqi namu suquftqa paasoosiranara Anutunai innaaru qimariqau.*

<sup>23</sup> Misa miqanda idukusoofaqa Peetooroosa Yoohaneesa nari niqoondunna Yisuna ufa irimarusa marunnai fidaqa faiqi firaasa faqa rakisirausa faqa misa qaoo qirufa oosana oosana qimannimiqa. <sup>24-26</sup> Miqoo marusa irisee aiqamausa moodaanaki Anutunara asasamandee innaaru qiaqa qiqau. Oo Karaambaiqa, Anee innaaruna faqa maqa faqa ooruku nammari faqa minaki mari ainaina oosana oosana faqa quqoonafa mariananoo. Anee aneenna naaquqara andeeqara maraqannai aneenna ainainara faiqi Dafidinannai ani namuqara qimannimiqoonna Dafidifa oqai minara maaqi qimasee akara rinau.

Naqi fee qidee aanaamuru aanoo idee,

Naqi fee qidee faiqi anaasee unnamaana qidee,

Maa maqanasaa karaambaigauqa irirana deedaqidaqa.

Rakisiraua suqufi Anutuna faqa nari asaku mundirana faqa kuridiraree qidaqa.

Dafidifa miqi qimasee ani Anutuna namuqaara akara rinau.

<sup>27</sup> Kuqaa maa maqusanai Yeerusareenni Eroodeesa Piraatoosa aanaamuru faqa Isaraee maqanna faqa suquffifaqa Anutufa ani aaduma amiqira ainainira faiqi ani asaku mundirana ariraree qiqau. <sup>28</sup> Anee ooqeenana aneenna afeekannai aneenna iriranannai kambigaaninannara qunafa misa sia irirai anee qimaqoonna ufama kai deedaqamandee ariqau. <sup>29</sup> Oo Karaambaiga misa maasara sia faiqi anaasee aniara qimannimianee qia. Anee misa aaquqirufa maasa qimaqimimarifana anee faqa iri-ananoo. Anee maasa dadaaqinaqa maasa ani ainainira fasiqausa paasosamandee Yisunara faiqi anaasee qimannimianaqa iriaqeera. <sup>30</sup> Oo Anutu aneenna asaku maasa qifaqai quqaseenana aneenna naaquqara faiqi Yisuna auqunnai maasa naaquqara ainaina faqa faiqi aurinausa andeeqannisarana faqa auqusaanaqa qafamasee aniara anonee qifaranoo. <sup>31</sup> Misa miqi qimasee innaaru qimasoo fanoo misa maru maqafa faqa kasinau. Kasunakina Anutuna naaquqara maraquna fannoo miqoo marusa naunduraki qumbiqafunara paasosamandee Anutuna ufa faiqi anaasee qimannimariqau.

*Yisuna ufa irimarusa nari ainaina narami narami imariqau.*

<sup>32</sup> Yisuna ufa irimarusa moodaa iriranasaa moodaa naundurasa mariqau. Sia moo fannoo moo ainainara qinindi fee qinau. Kaqi aiqama ainaina aiqamausaindi fee qinoo marinau. <sup>33</sup> Yisuna afaaqasaa aqoondi namu amiqimandee afeekaika uqannamandee Yisufa kuqiranakiqari findifuna aufakiana qimannimariqau. Miqimarunara Anutufa dadaaqufaqa misa nariara nariara amiqi amiqidaqa afaarimarufaqa faiqi anaasee misara amiqimariasee qidaqa eedoo qimariqau. <sup>34-35</sup> Sia moo fannoo misaki narainaina sarauimarufa marinau. Faiqi akaqasaa maqa fee maqa fee moosa nimisee minasaa feefauru maraseeqa Yisufa niqiqoo fasiqausa nimufaqa misa miniseeqa raina rainamasee sarauimarusa nimana kai nimimariqau.

<sup>36</sup> Miqi marufanoo faiqi moo auqu Yooseefaafa Yisuna akoona amarafa mifa ooqeenaa fasiqa Yakooboona amaaku Reefina nianasaaqaraa ati marinau. Mifa Sipurusa afumaki kambiqoofa marinau. Yisufa niqiqoo faiqi namusa mi fasiqanara moo auqu Baranabasi fee qimariqau. Mi auquna oosana faiqi anaasee pooduqara fasiqee qimariqau. <sup>37</sup> Baranabasifa nari maqa moona amiseenoo minasaa feefauru maraseenoo Yisufa niqiqoo fasiqausa nimufaqa misa narana maremaria munnimmana saisa qumaree rainasee nimiqau.

## 5

*Aniasafa faqa Safiraa nammarifa faqa nari munnimmana unna qimasee kuqiqau.*

<sup>1-2</sup> Yisuna ufa iri marusakiqari faiqi moo auqu Aniasafa marinau. Mina anaqa auqu Safiraa nammarifa marinau. Aniasafa nari maqa moosa nimiseenoo feefauru minasaa maraseenoo nariara qumee dinni raina quqaseenoo dinni mareenoo Yisuna faiqi namu niqiqoosa nimida maqi qimasee unna ufa qinau, aiqama munnimma nimidaqee qianau. Nari aanaaqandira moodaa ufa qimasee miqi qinau.

<sup>3</sup> Anutufa dadaaqufanoo Peetooroofa faasai iriseenoo mi munnimmana qafamaseenoo qinau Aniasa nanaree anee eedoo qiananoo fee Sadannafa ani amuqusa qumarafanee unna ufa qidane. Anee Anutuna naaquqara maraquna unna ufa qimamiananoo aneenna munnimma ati unna qimaseenana kukeeqasannanara. <sup>4</sup> Mi maqafa anindi maruna nimunanoo kafa mi munnimmafa anindi kai maridanoo. Anee aneennara munnimma ati rafaqafinanoo amana andeeqanoo maridanoo. Aneenna aaqeenana anee unna ufa qimasee aiqama nimi fee qiannana, nanaree aneenna aunduraki mandainainara irinane. Anee sia faiqifau unna ufa qimannimiananoofau. Anutuna unna ufa qimamiananoo. <sup>5</sup> Aniasafa mi ufana irinoo doo miqookai tautumasee kuqinau. Moomoosa mi ufana iriga kaaqa rufafaqa. <sup>6</sup> Kumaaraauqa mi maqanaki keeqafufaqa qamunannai Aniasana iri kukuqamamaree mara maree maqaki akundaqa.

<sup>7</sup> Kaqikaqoo marinoo Aniasana anaqa Safiraa nammarifa Peetooroofa maru maqanaki urureenoo sia nari afaaqi kuqunara irinau. <sup>8</sup> Maqaki ururoofanoo Peetooroofa iramaseenoo qinau. Kuqaa fee ani maqasaa munnimma ani afaaqi aiqamee qiminoo fee. Miqi qufanoo Safiraa nammarifa mifa faqa kai unna qinoo qinau eeo aiqama uqanna inni nininoo. <sup>9</sup> Peetooroofa mina iriseenoo qinau. Naqaa fee ifanee aneenna afaaqi faqa moodaa ufa qimasee fee unna qimasee Anutuna maraquna amanidane. Miqiannanara doo kumaaraauqa uru maridaqa. Ani afaaqi doo maqee kuquffifaqa doo muqu akundamaseeqa anee faqa maqee kuqinaqa miqoo mina aqa akundeefara.

<sup>10</sup> Miqi qimasoofoano Safiraa nammarifa Peetooroona aikunni doo tautumasee kuqinau. Mi kumaaraasa miqoo urureeqa uru mina qafeeqa mara mareeqa nari afaaqi aaqqa kai akundaqau. <sup>11</sup> Miqimasoofaqa Yisuna faiqi namu faqa akaqausa namufaqa minara iriufanoo kaaqa naaquqee marinau.

*Yisuna faiqi namu faiqi anaasee amiqimannisaqau.*

<sup>12</sup> Yisuna afaaqasaa aqoondiuga niqiqoo fasiqausa misa moomoo ainaina mookira mookira ainaina faiqi dadaaqira ainaina kai auqimarufaqa misa qafeemariqau. Yisuna ufa irimarusa moodaqaqoo naaquqara amaana maqa aqqa Sooroomoona tida atinni magee maqee innaaru qirara suqimariqau. Sooroomoona tida atinni kisaqaq marunara faiqi moomoo suqimariqau.

(Sooroomoonafa oofai kuqufinau. Yeerusaree amaana maqakina mina auqu quqaqoo tida atinni kaqi marufaqa minaki keeqafi qusimariqau.)

<sup>13</sup> Yeerusaree maqusanaasa faiqi anaasee kaiqeesa Yisuna ufa irimarusa amiqirausee qimasaidaga Yuda maqanna uriqararusa rufaisaida maasa faqa dari maqi qimasee sia Yisuna ufa irimarusunai misa maruqoo animariqau. <sup>14</sup> Faiqi faqa anaasee faqa moomoosa faasaambaasaana Yisunasaa irirana rusisoosa sia uriqararusa rufiaqau nifaqa quqaseeqa niqiqoo fasiqausasaa atooqafi nimariqau. <sup>15</sup> Yisufa niqiqoo fasiqausa moomoo faiqi dadaaqira ainaina auqee marufaqa faiqi anaasee mina qafamasee nariqa maaqakiaqa faiqi arusa faqa mandaikusa faqa dinee quqoosa faqa qaindusumaree aanasaa qaari qamunna ufqiiseeqa miqoo quqee mariqau. Miqimasoofano Peetooroofa aatata fimarufanoo mina amana fannoo misa mandaqoofaqa aurirafa teeroo taikaani fee qimasee mini quqee mariqau. Peetooroofa moomoo andeeqannisaidanoo oonaquqee anaquqee maasaindi sia amanaikiandoora qimasee aanasaa quqee mariqau. <sup>16</sup> Faiqi anaasee Yeerusaree dinni dinni marufaqa nari auri marusa faqa fueenaiki marusa faqa nifiqaida niqiqoosa maruqoo quqasoofaqa aiqama uqanna idaaqamannisee mariqau.

*Amaana maqasaa rakisiraua Yisuna faiqi namu unnaanasamu nariqau.*

<sup>17</sup> Amaana maqasaa aanaiqikirafa uriqararafa Sadikai amaana ufa qimarufa nari aqoonausa faqa Yisufa niqiqoo fasiqausa auqu ainainara kaaqa rairaa qidaqa misa maaqi qiqau faiqi anaasee maasa minnisee misiannai atooqaidaqa. Sainaaqaa maasa misa rumbaanaura. <sup>18</sup> Miqi qimaseeqa misa Yisuna faiqi namu niqiqoo fasiqausa mareeqee karabusaki quqaqau.

<sup>19</sup> Miqimasoofano eendakina Anutuna qangiroo moo fannoo qumureenoo ireeda karabusa kooqi atuaseenoo niqiqoo fasiqausa aiqama mareegeenoo madaana qunanau.

<sup>20</sup> Quqaseenoo maaqi qimasee qimanniminau. Innee fafaa iqaqainaga naaquqara firaamaana maqaki keeqafi kikiqiaqa. Miqi mambiqa maa fuka mariranara Yisuna ufamau firanara faiqi anaasee naamuqimannimiaqa. <sup>21</sup> Niqiqoo fasiqausa iriseeqa eedoo qimasee iqaqoofaqa amaana maqaki keeqafuafaqa faiqi anaasee Yisuna fasaasa qimannimiaqa. Qimannimarufanoo amaana maqasaa rakisirafa aanaiqiki marufa mifa faiqi firaasa kanasoorauqa faqa moomoo aiqama suqu quqaseenoo Yisuna faiqi namu karabusaki kaqi mariaa maqi qimasee amaana maqasaa rakisi maru poorisaua niqiqeenoo innee karabusakinaasa Yisuna faiqi namu niqiqoo fasiqauqa idukusee nifiqee uruaqa. <sup>22</sup> Poorisa karabusa maaqai oofuree randasee qafuofanoo sia mariqau. Ooqurandee kansoorauqa suqimarunaki keeqafinoo qimanniminau. <sup>23</sup> Maasa karafusa maaqaki oofuree amiqimasee qafaunanoo kooqi amiqimandee mundinoo mariinoo kooqiki maria poorisaua faqa kikiqiaqa maridaqa rakisidaqa. Maasa kooqi atuasee qafaunanoo sia faiqi moo fannoo minaki maridanoo. <sup>24</sup> Amaana maqa poorisauqa rakisirafa faqa aanaiqiki marusa faqa mina iriseeqa misara oonu mafi iriseeqa randaqau. <sup>25</sup> Misa miqimasee randee marufanoo faiqi moo fannoo anireenoo qimanniminau. Innee iriaqa eenda karabusa maaqaki quqaasa misa amaana maqaki kikiqiaqa maridaqa faiqi anaasee naamuqira ufa qimannimidaqa.

<sup>26</sup> Miqi qimasoofaqa poorisa rakisirafa nari poorisauqa faqa amaana maqaki oonuree oonu ireeda kai niqiqoo fasiqauqa amaana maqakinaana nifiqee aniqau. Aranaiqi oonu misa nifiqee anianaqa faiqi anaasee minaki marusa oonisamu ainnasamu qumaree darifoo qimasee ireeda kai oonu nifiqee aniqau.

<sup>27</sup> Nifiqamaree mini suqimaru kansoorausa nifusaa kikiqamasagaqa. Amaana maqasaa aanaiqiki marusa uriqararafa misa mara quqasee qimanniminau. <sup>28</sup> Maasa amiqimandee andeeqasee inni qimannimunaqa sia mi fasiqafa Yisufa kuqunara qimannimi-qqee qunaqa doo innee maasa ufa rukiaseeqa aiqama qimannimifaqa. Innee Yeerusaree maqannaasa aiqama qimannimisaafaqa misa aiqamausa quandaqika mi fasiqana aruana akiaqara mina numoo maasaki quqararee qimariafaqa. <sup>29</sup> Peetooroofa mi ufana iriseenoo maaqi qimasee qimanniminau. Inni faiqi ufamau sia funaaura. Maasa

Anutuna ufamau kai fidaqa faiqi anaasee qimannimiana. <sup>30</sup> Innee Yisuna aunirira saqarisaa pirimmannai kuqarusoofofanoo maasa qikeeku qikaaku misa Anutufa mina kuqiranakinaana mara findifumasoofofanoo maridanoo. <sup>31</sup> Anutufa miqooqaraana mareegeenoo nari aaga innaarunai quqasoofanoo maasa Isaraee maqanna rakisirana faqa asumu mareemarina faqa maridanoo. Anutufa Isaraee maqanna nari mandainainara nimeesuqusee rukaageera miqinau. <sup>32</sup> Anutuna ufa irisee mi mau fimariasa Anutufa nari naaquqara andeeqara mara quna kaqi misa nimidanoo. Mi naaquqara andeeqara mara qunna faqa maasa faqa Yisuna findifuna qafaafanausa maridaqa qimannimidaqa.

<sup>33-34</sup> Ufa suqimarusa faiqi firaasa misa Peetooroona ufa iriseeqa fira aanoommaseeqa naruaneera ufanoo misakiqari moo fannoo Mooseena sandufa akoofasa fasiqa mina auqu Kamarieerafa faiqi anaasee minara kaaqa irirana faqaa fee qimariqau. Mi fasiqafa ufa suqimarunakiqari findifinoo narirana qaoo qimaseenoo maasa nari kai ufa qianauree qimasee Yisuna faiqi namu niqiqoo faqa moosaa fiqau. <sup>35</sup> Misa fufanoo Kamarieerafa ufa suqimarusa maaqi qimasee qimannimiana.

Isaraee maqanna fasiqauqa innee iriaqa. Maa fasiqausa sia aaqee narirariaqa iriseeqa miqoo andeeqaaqa. Moomoo ufa rukiee mariasa maasaki mariusa marufaqa innee misa oosana irimarusa mariafanoo. <sup>36</sup> Ooqai faiqi moo auqu Teeudasafa mifa nariara firaasee qimasoo faqa 400 (maqi handareeta) fasiqa moomoo fasiqa minasaa atooqau. Rakiranaki mi fasiqafa taikoo faqa mina aiku asauku miqooqari daraanimambufanoo taikanau. <sup>37</sup> Miqooqari Roomma maqannaasa aiqamausa nuqu maroo aukuaana faiqi moo auqu Yudasifa Yudasina amarafa Kariree maqannaafa mifa faiqi moomoo maraseenoo Roomma maqanna kaamannara qikooqai faqee qimasee misakinaana rakeeianauree qimaseenoo, rakiranaki kuqufaqa mina aiku asauku miqooqari daraanimambiqau. <sup>38</sup> Kafa maqera inni qimannimidaqa. Sia maa fasiqausa naruaqa. Saifaqa kaqi mariaqa. Misa ufa misa marirafa misa nirafa fifau faiqi ufa marinoo nari kai taikaani. <sup>39</sup> Anutuna ufa marinoo innisaimbaqa sia mina amana rafaqa fuanaura. Innee Anutuna faqa rakifoora.

<sup>40</sup> Misa aiqamausa Kamarieerana ufa iriseeqa mi maukaimbiqau. Misa Yisuna faiqi namu kafa naaroo faqa aniroo faqa Yisuna aufakiana qimannimiranara qaoo qimasee unnaana samu moomoo kari nariiseeqa idukusoofaqa fiqau. <sup>41</sup> Yisufa niqiqoo fasiqausa nidafimarufaqa fidaqa sia noori runiqau asasammiqau. Misa Yisuna aruandeeemasee maasa faqa daruafanoo Anutufa minannai maasa mareegeenoo Yisuna amanakai mundusaifaqa minara maasa asasi daqa. Yisunasaara maasa daruafaqa asasi daqa. <sup>42</sup> Miqooqari Yisufa niqiqoo fasiqausa sia taikeeqa faasaambaasa fira amaana maqaki faqa maaqakiaqa faqa Yisuna asauku mundirana Yisuna aufakina amiqira fasaasa ufa suqusa da qimannimimariqau.

## 6

*Dinni qisauku taikasee dinni qaaraqanda ani marasee fasiqa Yisuna faiqinamu dadaa qiqau.*

<sup>1</sup> Miqooqari kaqikaqoo kisaqasaa maridaqa faiqi anaasee moomoo uqanna Yisuna ufasa atooqau. Misakiqari Kirisa ufa qimaru Yuda maqannaasa faqa nari Yuda maqannaasa faqa tino taanoo rida mariqau. Niqiqoo fasiqausa maqee maqee munnimma rainasee sarauimarusa nimidaqa Kirisa ufa irimarusa nari adeedaana aanaaseeuqa sia andeeqasee munnimma nimunara ufa qiqau. Maqee maqee munnimma rainasee nimunnara ufa qiqau. <sup>2</sup> Qisaukuqara taikasee qikunni ooqu qaara marasee Yisufa niqiqoo fasiqausa ooqee naasa Yisuna ufa irimarusa aiqama suqusee qimannimiqa qiqau. Maasa Anutuna ufa qimannimira saika minnisee quandaki munnimma raina nimira saika mararafa sia andeeqanoo mariannoo. <sup>3</sup> Oo maasa qiqoonasa inniki qisauku dinni taikasee dinni ani qaara marasee fasiqara randaqa. Irirana faqaasa, andeeqara fasiqausa Anutuna naaquqara mara quna qumbiqarasa kai mara mini qimifaqa maasa munnimma rainara saika misasaa quqaanaura. <sup>4</sup> Maasa qeeqa Anutuna ufa nimirana faqa innaaru qirana faqa mi moodaa saikana maasaindi mariannoo. <sup>5</sup> Aiqamausa mi ufana iriseeqa amiqira fee qimaseeqa nari rusandeesamumandeeqa qisauku dinni taikasee dinni qaara marasee fasiqa quqasaqau. Misa nuqu moo fasiqa auqu Satefeenafa firaqoo Yisunasa irirana rusimari fasiqafa naaquqara andeeqara mara quna qumbiqarafa marufa marinau. Moo fasiqa auqu Firipafa, moo fasiqa auqu Parookoorusafa, moo fasiqa auqu Nikanoorafa, moo fasiqa auqu Timoonafa moo fasiqa auqu Parameenasafa moo fasiqa auqu Nikoorausifa Antiooka maqusa indaraafa aanaa muru fasiqa misaki animarufa marinau. <sup>6</sup> Miqimandee fasiqa namu maree mini niqiqoo fasiqausa naqa mini quqasoofaqa misa innaaru qimasee nisauku nikiaqa quqaseeqa

nifaaqooqa qimasoofaqa nariqa saika munnimma raineer maru saikanai fufaqa niqiqoo fasiqausa nári saika Anutuna ufa qimannimira saikai fiqau. <sup>7</sup> Miqimandoofanoo doo Anutuna ufa aiqamai daraaninau. Yeerusaree maqusai Anutuna ufa irimarusa moomoo kamambiqa fimariqau. Amaana maqasaa aanaiqikirausa faqa moomoo Yisuna ufara kuqaa anoonee qimasee minasaa atooqee mariqau.

*Satefeenana rumboo ufana.*

<sup>8</sup> Satefeenafa naaqqara andeeqara marauna fannoo minaki qumbiqafunara Anut- ufa firaqoo dadaaqufanoo faiqi aanaaseeki oosana oosana amiqimannimaqara ainaina naaqqeere maru ainaina faiqi aanaaseeki auqee marufaqa qafeemariqau. <sup>9</sup> Yuda maqannaasa Yeerusaree maqusaki akaqausa aaduma sukuraki keeqeemariasa náriara maasa aafadara irirana faqaasee qimariqau. Misa akaqausa Yuda maqannaasa Sireenee maqa maaqaindari mi sukuranaaki keeqeemariqau akaqausa Areekasandiria maqusaindari ani keeqeemariqau. Akaqa Yuda maqannaasa kaiqeesa Sirisia maqusaindari anusa faqa akaqausa Asia maqannaindari anusa faqa moodaaqoo suqufufaqa Satefeenana ufara qaoo qimasee ufa raineer mariqau. <sup>10</sup> Anutuna marauna fannoo Satefeenana ufa irira dadaaqunara sia mina ufa rafaqaqafirana amana. <sup>11</sup> Mi aafadara irira fasiqausa mina qafamaseeqa minafasaasa qimaseeqa qumee fira munnimma auqusee ummuarira fasiqausa nimiqa qiqau. Satefeenara innee unna ufa oosana oosana uqeeraaqa qufaqa misa Satefeenana unna qimasee maaqi qiqau. Mifa Mooseena sandufara faqa Anutuna ufara faqa qaoo qidaqa qifaqa maasa iridaqa.

<sup>12</sup> Miqunara faiqi anaasee faqa faiqi firaasa faqa Mooseena sandufa irimarusa faqa niranaqoofofaqa aanoomasee Satefeena oonu qumareeqa amaana maqa rakisirrausa ufa suqimarunakina mini quqaqau. <sup>13</sup> Quqasoofaqa unna ufa qimaru fasiqausa nifiqee aniroofaqa maaqi qimasee Satefeenara unna qiqau. Maa fasiqafa maasa naaqqara amaana maqara faqa Mooseena sandufara faqa maqee maqee manda ufa qimarifa maridanoo. <sup>14</sup> Mifa maaqi qufaqa maasa iriafanafa maridanoo. Mifa maaqi qinuu. Maa Yisufa Nasaretee maqusaindaraafa maa amaana maqana rapeepamma aqusee Mooseena sandufa oosana oosana maasa qimu ufana mareeqee aadumai quqasainqa maasa moomau fuanoo qidaqa. <sup>15</sup> Aiqamausa suqiqamarunakiqari noori Satefeena funnai kai ubeekamafi qafaqau. Mina oori aiki qangiroo ooriara foora kaqa qeemarufaqa qafaqau.

## 7

*Satefeenafa faiqi firaasa aiqamausa qimannimu ufafa.*

<sup>1</sup> Amaana maqasaa aanaiqikirafa uriqararafa Satefeena irammamaqeenoo qinuu. Maa ufana kuqaa anoonee qidaqia.

<sup>2-3</sup> Satefeenafa misa aiqamausa qimanniminoo qinuu. Oo qini qikausa qifasausa qini ufa iriaqa. Ooqai Abarahaamafa sia Qarana maqa maaqai oorufunaki kaqi Meesoopootamia maqusai marufanoo Anutufa kooroomambinoo qimaminuu. Aneenna aiku asauku faqa aneenna maqa maaqa faqa minniseenana qinee aamua qianna maqanasaa fua. <sup>4</sup> Abarahaamafa mina iriseenoo eedoo qimasee Karadee maqa maaqa minniseenoo Qarana maqusai oorureenoo miqoo marinuu. Abarahaamana akoofa miqoo kuqufufanoo Anutufa qufanoo Abarahaamafa maa maasa marunna maqa maaqanaki Yuda maqa maaqai aninuu. <sup>5</sup> Anutufa mi aukuanu sia maa maqa maqana aminuu. Sia kaqikaqoo faqa aminuu. Kaqi kasoogaqee qima afeekaikamasee ani faqa ani aiku asauku ani atiuqa nimianauree qinuu. Qima afeekaikira aukuanu Abarahaamana faiqi siaifa marufanoo mina aiku asaukuara qimaminuu. <sup>6</sup> Anutufa maaqi qimasee qimaminuu. Ani aiku asauku aanaamuru maqusai karafusaki marifanoo, (400) maqi handareeta aukuanu kisaqa aukuanu karafusaki marifanoo. Mi anaamurusa fira ummaara manda saika ani aiku asauku nimimarifanoo. <sup>7</sup> Miqi marifaqa qinee Anutusa mi anaamurusa naruanauree qinuu. Naruseeqa ani aiku asauku Isaraee maqannaasa niffeeqee maa maqa maaqanaki quqasaanaqa maridaqa maa maqa maaqanakiqari Isaraee maqa maaqakiqari qini Anutusa qimooqifanoo. <sup>8</sup> Miqooqari Anutufa nári fainanduqira oosana Abarahaamana uqafiqanuu. Abarahaamafa minara irisooqoo Isakeena anoofa maqasoofanoo dinni qisauku taikasee dinni ani qaaramoo marasee faasaana aiqaroorofanoo mina akoofa mina fainanduqinuu. Isakeefa faiqi kamafinoo Yakooboona maqaseenoo doo mina faqa fainanduqinuu. Yakooboofa faiqi kamambinoo qisaukuqara taikasee qiku qaaraqanda ooqu maraseenoo faiqi namu maasa qikeeku maqaseenoo misa faqa fainanduqu nimaqanuu.

<sup>9-10</sup> Yakooboona faiqi namu nári nikaqa Yooseefaanara rairai qimamaqasee qumaraseeqa rumbbeegeeqa Miidiana maqanna nimiseeqa feefauru munnimma

marasoofaqa Midianna maqannaasa afiqamaree Isipi maqannaasa munnimmara muqu niniqau. Miqoo Yooseefaafa karafusaki marufanoo Anutufa dadaqunara aiqama kadaapirirana oosana oosanaki fidanoo andeeqasee fimarinau. Yooseefaafa Isipa maqannaasa karaambaiqa Faraoona oorisaa kikiqamafuafanoo Anutufa Yooseefaana irirana faqa mina afaaqa oori faqa amiqirana aminau. Faraoofa Yooseefaana andeeqara fasiqee qimasee mareeqeenoo nari maqa maqa faqa Isipa maqa maqa aiqama faqa nari aiqama ainainasaa minauqasaa Yooseefaana anee rakisiannee qinau. <sup>11</sup> Miqoo aandaroo firaafa Isipa maqannaasa faqa Kannaana maqannaasa moo auqu Isaraee maqannaasa faqa narinau. Maasa qikeeku qikaaku naranara randee mariqau. <sup>12</sup> Isipa maqusai sakuma moomoo marufanoo Yakoofoofa Yooseefaana akoofa Yooseefaana sia uqanna irirai naranara kai iriseenoo nari faiqi namu maasa qikeeku qikaaku niqiqooofaqa indaaru oquree sakuma maraseeqa nari nikaqa Yooseefaana qafamasee sia mina ooriara iriqau. <sup>13</sup> Innaaqianna oogu fu kari Yooseefaafa nari afasusanamuara nariara kooroomanniminu. Miqimasoofanoo Faraoofa faqa Yooseefaana aiku asaukuara miqoo irinai. <sup>14</sup> Isipa maqusaindari Yooseefaafa nari akoofa Kannaana maqa maaqaki maruna ufa quqasoofanoo aiqamausa Isipa maqusai oogu fiqau. Qaaramoo fasiqa niku nisauku taikasee moo fasiqa qisauquqara taikasee moodaanai qiku oogu marasee fasiqa anaasee Isipa maqusai oogu fiqau. <sup>15</sup> Yakoofoofa Isipa maqusai oogu marinoo kaqikaqoo marikinoo kuqinau. Mina faiqi namu maasa qikeeku qikaaku miqoo mari maree fiqa kuqiqau. <sup>16</sup> Misa kuqufiqa niqoonausa misa iri mara mareeqa nari maqa maqa Kannaana maqa maaqai Seekeemma maqusa aaqa nikundee mariqau. Ooqai Abarahaamafa munnimmannai Qamoorana aiku asauku feefauru amiqoonaki mi maqa maaqanaki misa iri nikundee mariqau Sateefeenafa kaqi ufa suqunakiaqa ufa qimanniminoo ninau.

<sup>17</sup> Anutufa ooqai Abarahaamana Kannaana maqa amiraree qimasee qima afeekaikamasooofanoo doo mina aiku asauku amira aukuaana adeedi roofanoo maasa qikeeku qikaaku Isipa maqasaa moomoo kamambaiqa fimariqau. <sup>18</sup> Misa miqiqqa maridaqa moomoo marufanoo Isipa maqannaasa karaambaiqa moo kambiqanau. Mifa Yooseefaafa aandaroo aukuaana Isipa maqannaasa firaqoo dadaaqi marunara sia irimarufanoo Isipa maqannaasa karaambaiqa kambiqanau. <sup>19</sup> Mi fuka karaambaiqafa minauqu Faraoofa maasa qikeeku qikaaku nikaru qimasee firaqoo mandaikamannimaqee marinau. Mi karaambaiqafa qufaqa maasa qikeeku qikaaku nari faiqi aanaaqi maqasee maaqakiqari aqusee marufafa kuqi mariqau. <sup>20-21</sup> Miqimaru aukuaana Mooseefa kambiqanau. Mifa faiqi aanaaqi amiqirafa kambiqanau. Mina anaukoo qaaramoo quqoonasaa nari maaqaki rakisiisee kaqinni andandai quqasoofanoo Faraoona araamuna paqurimasee nariara maraseenoo nari amaakuara foora f irinai. <sup>22</sup> Firimarufafa Isipa maqannaasa irirana aiqama qimamisoofanoo irinoo innooqafinoo irirana faqaafa maridanoo aiqama ainaina oosana oosana uqereee marufa maridanoo afeeka ufa qimarufa marinau.

<sup>23</sup> Mooseefa qaara fasiqa niku nisauku aukuaana maraseenoo faiqi firaafaikamafinoo nari maqannaasa Isaraee maqannaasa miqoo Isipa maqannaasa karabusaki marusa niqafaa-nee qimasee finau. <sup>24</sup> Misaki nidanoo nindafoofanoo Isipa maqannaasa moo fannoo Isaraee maqannaasa nari aqoonnana mandaikamma maqooofanoo Mooseefa nari maqannaasa dadaaqianee qimasee mi Isipa maqannaasa fasiqana kuqammarinai. <sup>25</sup> Isaraee maqannaasa qini qiqafamaseeqa oo Anutufa maa fasiqanannai maasa maqee Isipa maqannaasa karabusaki mariasa idukuannoo fee qimasee qini Mooseesara nidianifeera. Sia Isaraee maqannaasa mina iriqau. Mana manammimariqau. <sup>26</sup> Faiqee iqaqooofanoo kananaana Mooseefa nari maqannaasa Isaraee maqannaasa nindafaida qafoofanoo Isaraee maqannaasa qaaraqanda moodaa maqannaagaqanda rakimariqau. Rakimarufanoo Mooseefa soodaa qianee qimaseenoo qinau. Inneeqara moodaa maqannaasa mariafanoo nanaree rakidee. <sup>27-28</sup> Isaraee maqannaasa nari aqoonnana arimarufa Mooseena afeeqaseenoo aqinoo qinau. Yafee aniara maasa karaambaiqa ufa irimari fee qinoo fee. Eenda anee Isipa maqannaasa kuqaruanafa miqi kai inana qini faqa darinnaree. <sup>29</sup> Mooseefa mi ufana iriseenoo doo kooroo qinoo maridanoo Faraoofa mina akiaqara qini faqa daruandoo qimasee rufiasee quqasee sandeenoo Midianna maqa maaqai nianai onuu kisaqaqasaa marikinoo anaasee marasee qaara faiqi maqanau.

<sup>30</sup> Miqoo onuu maridanoo qaara fasiqa niku nisauku taikasee aukuaana moomoo aukuaana aiqarooofanoo Mooseefa faiqi firaafa marufanoo Anutufa qangiroo moo fannoo qumee sasamimiki idaqqee marunakiqari ufa kai Mooseena qimamufanoo irinai. Sinai aaqana aaqa aadana maqa maaqai qee marinai. <sup>31</sup> Mooseefa tautumasee mi idauruna qafanau. Aaqa oonuroofanoo idaurukiqari Anutufa ufa moo qimaminoo qinau. <sup>32</sup> Oo Moosee qinee ani aanaakuna asaifaqana Abarahaamafa faqa Isakeefa faqa Yakoofoofa faqa misa Anutusa maridaqa. Mooseefa Anutuna ufa iriseenoo aindiri aindiri ufanoo



qafarara faqa eeraira eerairinau. Miqi marufanoo Anutufa kafiaa qimaminoo qinau.<sup>33</sup> Aneenna aiku aanaamu uturuqu quqaa. Maa maqafa naaquqara maqa maaqa maridanoo. Ani aiku aanaamu maa maqana putaaidanoo.<sup>34</sup> Anee qini Anutusa ufa iria. Qinee qini faiqi namu Isarae maqannaasa Isipa maqasaa mariasa misa mandainainaki mariana faqa misa aupurarana faqa qafamasee misa qikiraqarana iriseeqa qumu misa nifqaannanara irisee ani qimamidaqa. Doo findifi fua ani aqidaqa Isipa maqusai kafaannai fua.

<sup>35</sup> Sateefeenafa kaqi suqunakiqa ufa qimanniminoo nidanoo qinau. Isaraee maqannaasa nari maqannaara Mooseenara akoqoofanoo nianai afeeqa qidaqa qiqau. Yafee aniara maasa Karaambaiqa ufa irimari fee qinoo fee qiqau. Anutufa nari qangiroo sasamimiki ida qeemaruna aqiqoofanoo mi Mooseena dadaaqufanoo nari maqannaasa Isipa maqanna nausaukukiqari rafia qumaraseenoo moo maqasaa rakisinnimaqee marinau.<sup>36</sup> Mifa nari maqanna Isipa maqa maaqakinaana amiqimasee nifqeeqeenoo Sinai aadana maqa maaqaki finau. Nifqee fidanoo Isipa maqa maaqaki faqa Taatuqee nammariki faqa aadana maqa maaqasaa faqa moo kamaakira oosana oosana ainaina uqannifqanoo fimarinau. Qaara fasiqa niku nisauku taikasee aukuaana kisaqasaa miqimminoo fimarinau.<sup>37</sup> Maa Mooseefa Anutuna tumummaqara fasiqa kasooqaaqee kambiqaaninnanara maaqi qinoo qimanniminu. Anutufa nari tumummaqara fasiqa moo inni nimiannoo. Mifa qinee Moosesara foora inniqakiqari kambiqafi mariannoo, inni dadaaqiannoo.<sup>38</sup> Maa fasiqafa Mooseefa aadana maqa maaqaki Isaraee maqannaasa oobiqasee fimarunaki Mooseefa misa saimbaqa fimarinau. Misa Sinai aqana aaga marufanoo misa faqa nimarinau. Qangiroo fannoo Mooseena faqa aqanasaa ufa qimarinau. Mooseefa kai Anutuna naaru marira ufa iriseenoo maasa qimaqimimarinau.

<sup>39</sup> Maasa qikeeku qikaaku Mooseena ufa sia iriqa ruki aquseeqa Mooseena mafi aqusee kafiaa Isipa maqasaa fuaneera qimariqau.<sup>40</sup> Mooseefa Sinai aqanasaa ooru maruqaqa misa Mooseena afaanaa Aarona aaramaseeqa qiqau. Mi fasiqafa Mooseefa maasa qifqee anifa yai fee finoo fee. Anee Anutuna fooqaira ainaina auqusainanoo mifa maasa indaaru fida aana uqannifqaina fua.<sup>41</sup> Aaroonafa misa ufa iriseenoo mi fasannai kai burimakau aanaaqi koorannai auqusoofaqa minara maasa Anutu fee qimasee innaaru qimasee qoomaqamasee tatufirana suqamisee nari nisaukunoo auquqoonara asamasee qoomaqa sakasee naqau.<sup>42</sup> Anutufa mi manda oosanna qafeenoo misa marunnaimeesa uquseenoo qinau. Saina misa innaarunaindaraa fifau fasau ainara innaaru qiaqee qimasee mininnisanau. Miqi qimasoofoanoo tumummaqara fasiqa ufa kooroo inau. Tumummaqara fasiqa maaqi qimasee akara rinau.

Oo Isaraee maqannaasa

Innee qaara fasiqa niku nisauku taikasee aukuaana kisaqasaa aadana maqasaa niniunara sia qiniarau innaaru qiqau. Unna innaaru qimariqau. Sia qiniarau tatufira aanda uqaqau.

<sup>43</sup> Sia innee qini naaquqara uqiqaana maqa maree fimarunara irimariafanoo. Innee moo unna anutuna minauqu Moorookanara unna qimasee irimaree fidaqa unna qimasee qini kikiqa usimariafanoo. Innee inneeqa moo unna Anutuna minauqu Reefanna fee qimariafanoo. Mina fasau innaarunai maridanoo mina amana inneeqa nisaukunoo auqufa maqasaa mari Reefanafa marifaqa innee minara innaaru qimariafanoo. Miqiana akiaqara qinee Anutusa doo inni futeeqeeqee Babiroonia maqa maaqa meemai misa nisaukuki quqaanaura.

Tumummaqara fasiqa ufa miqi qinoo maruna mina kooroo qinau.

<sup>44</sup> Sateefeenafa ufa suqunaki kai qimanniminoo ninau. Ooqi maasa qikeeku qikaaku aadana maqasaa nidaqa Anutuna sandufa qimannimira uqiqaana maqa misaki marinau. Mi uqiqaana maqafa Anutufa Mooseena qimamundee kai mi uqiqaana maqana usakee mariqau.<sup>45</sup> Mina maariqoo aukuaana maasa qikeeku qikaaku taikafuqaqa misa faiqi namu findifufaqa mi uqiqaana maqana kaqi maraqa nimarigaqa. Anutufa Yoosuna dadaaqufanoo Isaraee maqanna maasa qikeeku qikaaku faqa mi uqiqaana maqana faqa mareeqee Kannaana maqa maaqi oqureeqa naru nifaqaseeqa nari uqiqaana maqa miqoo usakaqau. Miqoo marikinoo Dafidifa kambiqafinoo karaambaiqaikinau.<sup>46</sup> Anutufa Dafidina andeeqara oosana qafamaseenoo minara rufanoo Dafidifa Anutunara irammirinoo qinau. Oo Yakooboona Anutu, ani maqa uqiqaana maqa kai maridanoo. Amanee qinee ani afeeka maaqa usakaqaanane minaki marinnaree.<sup>47</sup> Anutufa sia Dafidinara qinau. Mina amaaku Sooroomonara qufanoo mifa afeeka maqa usakanau.

<sup>48</sup> Innee aigama iriqa firaqoo uqanna uriqarara Anutufa maridanoo. Sia amana faiqi nisaukunoo usakara maqaki amana mariannoo. Tumummaqara fasiqa Anutuna ufa minara maaqi qimaqoofa maridanoo fee qinau.

<sup>49</sup> Innaarunai qini maaqa maridanoo qinee rakisinnimaqara maqusa maridanoo. Maqasaa innee mariafa qini qiku reemarunafa kaqikaa ainaina fifaw ainaina maridanoo.

Innee nana maqee qiniara usakeefaree. Qini qimana idooara maqusa yai fee maridanoo fee.

<sup>50</sup> Aiqama maaqa auqimaria ainaina qeeqa kai auquafanausa maridaqa.

<sup>51</sup> Sateefeena tamummaqara fasiqa ufa qimannimiseenoo niqidanoo qinau. Innee maaqoo suqimariasa qini ufa iriaqa. Innee aamina fasiqa miqiraua mariafanoo ooni mariafanoo naaqoo auniraua sia Anutuna ufa irimariafanoo. Inneeqa nikeeku nikaaku ninaakusa miqiraua mariafanoo Anutuna maraqa fannoo inniki anirarimarifaqa inneeqa qaoo qimariasa mariafanoo. <sup>52</sup> Inni nikeeku naaku sia moodaa tamummaqara fasiqa sia mandaikamannimaqanau. Aiqama mandaikamannimaqee mariqau. Ooqai Anutuna andeeqara ainainira faiqi Yisunara kooroo imaru tamummaqara fasiqauqa faqa nari mariqau. Doo maqee faqa innee mina uqanna ueeqasee kuqa nari mariasa mariafanoo. <sup>53</sup> Innee Anutuna sandufa qangiroo asaukukinaana maree mariasa sia minara irimariafanoo kaqirunna fimariafanoo.

*Faiqi firaasa Sateefeena ufa irisee oonisamu ariqau.*

<sup>54</sup> Miqi qimasoofaqa faiqi suqimarusa mina Sateefeena ufa irufanoo minara niraqaenoo nifai sandurinau. <sup>55</sup> Anutuna naaquqara andeeqara maraqa Sateefeena aaku funara oori uqeeriseenoo qafoo fanoo innaaruna rakeufanoo Anutuna kaqa qarana afaqa areenarana akoqoo marufanoo qafanau. Yisufa Anutuna aqa mina asauku uqannai kiiqinoo marufanoo qafanau. <sup>56</sup> Sateefeena qafaidanoo naaramaseenoo qinau. Innee qafaqa innaaruna rakeemambifaqa faiqi nimaaku Anutuna aqa asauku uqannai kiiqinoo marifaqa qafaidaqa.

<sup>57-58</sup> Misa miqoo marusa aiqamausa mina iriseeqa irianoo qimasee firaakari faqa rumaseeqa nisauku naaqoo aamara upeekaseeqa aiqamausa findimeeqee sandeeqa Sateefeena qumareeqa rarisammareeqa mina rafusu qumaree aqoosai aqiqu. Aqoosai aqiseeqa faasai kootaki Sateefeena unna qimarusa misa kai oonisamu oonu qumaree ani qumaree ufaqa mi samuna mina arimariqau. Misa nari siuta qamunna nisauku rakisi qumaraandoo qimaseeqa raipaqueegee moo kumaara Sauroona aikusaa aqusee Sateefeena arimariqau. <sup>59</sup> Misa oonisamu arimarufanoo Sateefeena karaambaqara innaaru qimasee faqa ridanoo qinau. Oo Karaambaqai Yisufa qinee kuquanana anee qini qimana qumareeqee aneenna marianannai quqaa.

<sup>60</sup> Miqi qimaseenoo Sateefeena aqoorisaa oorindari kummaramafufanoo firaa kari faqa quqeenoo qinau. Oo karaambaqai misa mandainaina qimiana sia misaki mi numoofa mariani, anee aunasaa. Doo miqi qidanoo kuqinau. Sauroofa misa qamunnasaa qummuarifoora rakisidanoo Sateefeena arunara eedoo qimasee marinau.

## 8

*Sauroofa Yisuna ufa qimarusa narinooninau.*

<sup>1</sup> Mi faasaana kai oosana araseenoo Yeerusaree maqusaki amaanasaa rakisimarusa uriqararusa Yisuna ufa irimarusaki narunnifaqaairana uqeraqau. Yisuna afaaqasaa aqoondiqa qisaukuqara taikasee qikunni ooqu qaara mararusara niqiqoo fasiqausee qimariqau. Miqimandee fasiqa Yeerusareenni kaqi mariqau. Kaiqeesa moomoosa rufiasee miqooqari daraaniqau. Akaqausa Yudeeaa maqa maaqai fiqa akaqausa Samaria maqa maaqai sandaqa. <sup>2</sup> Anutunara irimarusa andeeqarusa akaqausa Sateefeena iri ani mareeqa munu akundamaseeqa firaqoo uqanna ikiraqaseeqa soofaari mariqau.

<sup>3</sup> Miqooqari Sauroofa oosana areenoo Yisuna ufa taikaani fee qimaseenoo Yisuna ufa irimarusa narirara aanoommasee manda ufa qidanoo rairai qimarinau. Miqidanoo maqasaa oorureenoo aiqama maaqakiaqa keeqafidanoo Yisuna ufasaara narirara-masaidanoo nisauku qumaraidanoo maqamau rarisaidanoo munu karafusa maaqaki quqemarinau. Sia faiqi kai anaasee faqa qumaree rarisameeqaidanoo karafusa maqaki quqemarinau.

*Firipifa Samaria maqa maaqaki Yisuna ufa qimannimarinu.*

<sup>4</sup> Miqufaqa Yisuna ufa irimarusa mina irisee miqooqari quqasee moo maqusa moo maqusa daraaniqa mariqau. Miqunna fidaqa Yisuna aurfakiana qimannimariqau. <sup>5</sup> Firipifa Yeerusaree maqusaindari sandoonaindari aanaamuru maqannaasaki ooqu finoo Samaria maqannaasa firaa maqusai ooqureenoo Anutuna asauku mundira fasiqara Yisunara qimanniminu. <sup>6</sup> Samaria maqannaasa moomoosa Firipina ufa andeeqasee iriqau. Mifa moo ainaina faiqi dadaaqimari ainaina auqamasoofaqa mina qafamaseeqa

amiqimmasee mina ufa irimariqau. <sup>7</sup> Firipifa qufanoo afaannauqa faiqi naunduraki marusauqa faaqrumasee rafudamaki sandee mariqau. Kaqi niku nisauku uqiranauqa faqa ariruti marusa faqa andeeqannisee marinau. <sup>8</sup> Miqimmasoofaqa Samaria maqannaasa firaqoo asasimariqau.

<sup>9-10</sup> Mi maqusaanaana auqu moo Simoonaa amarafa mifa Samaria maqannaafa marinau. Mifa afunee ainana faqaa fasiqa marinau. Moomoo aukuaana afuneennai nari maqannaasa uqannifiqasoofaqa misa mina qafamasoofanoo naaquqee marinau. Simoonafa miqimarunara nariara uriqararausee qimasooofaqa aigama tia uqanna minara kuqaa irirana faqaa fee qimasee minara kaaqa rimariqau. Miqidaqa mina maqannaasa minara Anutunaindaraa fira afeekainainee qimariqau. <sup>11</sup> Mifa kisaagaasaa nari afuneennai nari maqannaasa unna qimasee qimannimisoofaqa kaaqa mina ufa irimariqau. <sup>12</sup> Miqi marufanoo Firipifa qumureenoo Anutuna ququsara amiqira fasaasa ufa faqa Yisuna Anutuna asauku mundiranara qimannimufaqa faiqi anaasee iriseeqa kuqaa fee qimasee mina rumaraku. Qumarofanoo nammari rumannimaqee marinau. Faiqi faqa anaasee faqa rumannimaqee marinau. <sup>13</sup> Simoonafa nari faqa Yisunara iriseenoo kuqaa fee qimaseenoo nammari maranau. Nammari maraseenoo Simoonafa Firipina aaga maridanoo mina faqa oonuree aniree imarinau. Firipifa oosana oosana fira ainana faiqi sia auqaaqaa ira ainana faiqi anaasee dadaaqimaria ainana auqufanoo Simoonafa mina qafoofanoo aaquqoofanoo marinau.

<sup>14</sup> Yisuna afaaqasaa aqoondiqa moo nuqu niqiqoo fasiqausa misa Yeerusaree maqusai maridaqa Samaria maqannaasara Anutuna ufara irida fee qimasee Peetooroona faqa Yoohaneena faqa niqiqamasooofaqa Yeerusaree maqusaindara Samaria maqannaasunnai oofuqau. <sup>15</sup> Ooqureeqa Samaria maqannaasa Yisuna aufakiana fukasaa irimarusara innaaru qimariqau. Naaquqara andeeqara maraquna fannoo misa faqa naakuanifeera qimasee innaaru qimariqau. <sup>16</sup> Samaria maqannaasa Karaambaiqa Yisuna auqusaa kai nammari maraseeqa sia naaquqara andeeqara maraquna maraqau. Minara naaquqara maraquna fannoo sia misaki marinau. <sup>17</sup> Peetooroosa Yoohaneesa minara iriseeqa innaaru qimasee misa faiqi anaasee nikumu qumaree mapuku nimaqasoofanoo naaquqara andeeqara maraquna naakimarinau.

<sup>18-20</sup> Simoonafa afunee fasiqa fannoo miqanda oosana nindafamasee qinee faqa marasee miqianee qimaseenoo munnimma maraseenoo Peetooroosa Yoohaneesa nimaanaqa naaquqara maraquna qimifaqa qeeqa maqannaasa miqimannisaanee qimasooofanoo Peetooroofa maaqi qimasee aqinoo qinau. Anee anee faqa aneenna munnimma namufaqa ida aqufua. Anee Anutuna kaqi nimira ainainara feefauru qiannanara minara aneenna munnimma namufaqa ida aqufua. <sup>21</sup> Maasa funnaqoo anee sia maasa faqa moodaa runna fuananoo. Ani irirafa ani amuqusaki Anutufa qafaifanoo sia andeeqanoo maridanoo. <sup>22</sup> Anee aneenna manda iriranakiqari quandakinana Anutunara innaaru qinanoo maa ani maa manda irirana akiqara minnaisaani. <sup>23</sup> Qinee ani aundurain oosana qafaidaqa tuka amaneeera foora sukaqarafa maridanoo. Aninna mandainana fannoo naaqanara foora ani rumbanoo maridanoo. <sup>24</sup> Simoonafa mi ufana iriseenoo tautumaseenoo Peetooroosa Yoohaneesa minara qimanniminoo qinau. Oo inneeqara amanee inneeqara Anutunara innaaru qifanoo sia mandainana oosana oosana innee qiandee sia qinisaa kambiraani.

<sup>25</sup> Peetooroosa Yoohaneesa Karaambaiqa aufakiana qimannimiseenoo qumurandee Yeerusareenni kafa ooru fiqau. Ooru fidaqara Samaria maqusa kaqikaa kaqikaa maqusakiaqa Yisuna amiqira fasaasa ufa qimannimimaree ooru fiqau.

### *Firipifa Eetioopia maqannaasa uriqararana Yisuna ufa qimaminau.*

<sup>26-27</sup> Anutuna qangiroo moo fannoo Firipina qimaminoo qinau. Anee doo deedaqaa. Aana moo Yeerusaree maqusaindara aadana maqa maaqa aana fannoo gambaana fidanoo Kaasa maqusai oogu fimari aana. Anee oonuree mi aannara randasee paquria. Doo uqeraa qufanoo Firipifa mina iriseenoo deedaqi imaree doo miqoo fina. Firipifa fiifufanoo mi aanna paqurimaseenoo Eetioopia maqusaindaraa fasiqa moo mi aannai fimarufanoo paqurinau. Mi Eetioopia maqusaanaa fasiqa dunduqarirafa marinau. Nari maqannaasa anaasee rakisirana uriqararana munnimma aina rakisimarufa uriqararafa marinau.

(Afaandama itirafa marinau. Ooqai uqanna anaasee rakisirausa uriqararausa akaqausa nari ainana dadaaqimarusa nifaandama itimariqau. Maqee sia mi oosanafa maridanoo. Ooqai uqanna marinau.)

<sup>28</sup> Eetioopia maqannaasa anaasee rakisirana auqu Kandaseenammarifa marinau. Minasaa rakisimaru fasiqafa afaandama itirafa kaaqa Anutunara rimaru fasiqafa, mifa

Yeerusaree maqasai narí qoosa rarisee maru karanaki Yeerusareenni ooru Anutunara innaaru qimaseenoo ooru randeenoo amaaqai qumimarufano Firipifa paqurinau.

<sup>29</sup> Naaquqara andeeqara maraquna fannoo Firipina qimaminoo qinau. Anee mina kara fimariqoo oonuraina qafaa. Eetioopia fasiqafa narí qoosa rarisee maru karanaki fidanoo ooga tamummaqara fasiqa Eesaiaafa akara rumaqoona asaana rinoo fimarinau. <sup>30</sup> Fimarufano Firipifa sandee oonureenoo mina kara asakunnai qumareenoo mi karana uqirafa aakaariqara sandanoo fidanoo iriseenoo irammirinau. Oo maa fasiqa, anee asaana rimariannana oosana iridanee sia fee iridanee. <sup>31</sup> Miqi qufanoo mi Eetioopia fasiqafa qinau. Moo fannoo kooroo inagau irini siammiridaqa. Miqi qimasee Firipinara qini faqa uru ooqumariannee qimasoo fano Firipifa mina qoosa rarisee maru karanaki kaqi fimarufano akaramafufano mi fasiqana aqa ooqumarinau. <sup>32</sup> Mi Eetioopia fasiqafa Eesaiaana maa akarana asaana rimarinau.

Misa mina qumareeqee sipsipa aandaara foora mareeqee ariranaki quqaqau.

Misa sipsipa aanaaqi asaasi aukimarufano sia dudeepenoo faaqarimarifa maridanoo sipsipa aanaaqi qummaarumuaa fooqaana ari marufano kai mumuqida marinau.

Anutuna sipsipa aanaaqi arimarufano mumuqida marinau. Sia moodaakari ufa qinoo faaqarinau. <sup>33</sup> Misa firaqqoo asaurirana amiqau. Mina andeeqara ufa siamma iriqau. Doo mifa nariara kuqufinau.

Mina anaiki mina aiku asauku sia mariafa maridanoo sia minara ufa qifaranoo. Doo narí kai marufa doo kuqinau.

<sup>34-35</sup> Mi Eetioopia fasiqafa mi ufana asaana rumaseenoo Firipina irammirinau. Tamummaqara fasiqa fannoo kuqu ufana qimaruna nariaree qimarinau fee moonaree qimarinau fee, qinaqa iria qufanoo Firipifa mi tamummaqara fasiqana ufasaa oosana araseenoo miqooqari finau. Miqooqari finoo Yisuna amiqira fasaasa ufa qimaminau. <sup>36</sup> Doo miqi qida narí qimami narí qimami aatata oogu fidanoo Firipina qimaminau. Doo maana nammari adeedi maridanoo. Amanee anee Yisuna auqusaa qini nammari keeqaqimaqeenaree. [<sup>37</sup> Firipifa mi ufana iriseenoo qinau. Anee aneenna amuqusa ookiqari Yisunara kuqaa anoonee qianaqa amana ani keeqamaqaanura. Mi Eetioopia fasiqafa qinau. Qinee Anutuna asauku mundiranara Yisunara kuqaa Anutuna faiqifee qidaqa. Anee kaqi keeqaqimaqaa.]

<sup>38</sup> Miqi qimasoo fano qoosa rarisee maru karana daraiuaana qimamifano kara rafaafusoo faqa Firipifa faqa mi Eetioopia fasiqafa uriqararafa faqa nammari qambaana oqureenoo Firipifa mi fasiqana qumareeqeenoo nammari keeqamaqasaanau. Keeqamaqaseenoo asauku qumareenoo uqeerasanau. <sup>39</sup> Miqanda nammariqari afainni uru akaramafufano Anutuna maraquna fannoo Firipina afiqamaroo fano sia miqoo mina faqa marinau. Mi eetioopia fasiqafa uriqararafa sia kafa Firipina qafanau, asamandeenoo narí karaki akaramafufano doo amaaqa finau. <sup>40</sup> Anutuna maraquna fannoo Firipina mareeqeenoo Asadooda maqasai munu quqasoofano miqooqari Yisuna amiqira fasaasa ufa qimannimino maqusa maqusa fifufano Seesaree maqasai finau.

## 9

*Sauroofa Damasakusa maqasai fimarufano kaaqa qarafa rafaafa finau.*

<sup>1</sup> Yisuna faiqi namu mina ufa qimannimiqa nimarufafa minasaara Sauroofa firaqqoo aanoo idanoo narirara rumbarara qidamarinau. Miqidanoo Sauroofa amaana maqasaa aanaiqikirausa misa uriqararana oonu qimaminoo qinau. <sup>2</sup> Anee papiqa akara rumaqiminaqa qinee Damasakusa maqasai ooree Yuda maqanna ufa suqinnanaki keeqafi Yisuna aatata fimariasa paqurimasee sia faiqi kai faiqi faqa anaasee faqa rumbamaree Yeerusaree maqasai karafusaki muqu quqaanaree qimasoo fano eedoo qimaseenoo mi eedoo qira papiqana akara rumaminau.

<sup>3</sup> Sauroofa Damasakusa maqasai mi papiqana uqirafa fidanoo narí sundia namufafa fidanoo Damasakusa maqusa adeedi ramasoo fano innaarunaindari kaaqa qarana amananda fannoo tautumma amaqaseenoo Sauroona fiqumafinau. <sup>4</sup> Sauroofa kaaqa rufiaseenoo maqasaa aqufumafufano irufano innaarunaindaraa ufa moo qinau Sauroo Sauroo anee nanaree qini daridanee. <sup>5</sup> Miqi qufanoo Sauroofa maaqi qinau. Oo Karaambaqa anee yafee maridane qufano maaqi qimasee qimaminau. Qinee Yisuna anee qini darimarianausa maridaqa. <sup>6</sup> Doo maqasaqari findifinana fua maqusaki ooru rainanoo miqoo moo fannoo maridanoo, mifa ani aanara aamua qinana fua. <sup>7</sup> Sauroona faqa fusa sundiaqqa Sauroofa maqasaa aqufufafa qafamasee innaarunaindaraa ufa iriseeqa sia moo ainana qafoofano naaquqoo faqa nimuqusamafufa sia ufa qiqau kaqi kasoomambiqau. <sup>8</sup> Sauroofa maqasaqari findifufano afu dimbafufano sia moo

ainaina qafanau. Mina sundiauga mina asauku qumaree rarisameeqee Damasakusa maqusai quqaqau. <sup>9</sup> Sauroofa nari afu dimboonara faqa innaarunaindaraa ufa irunara faqa irufanoo aundura mandaikufanoo qaaramoo faasaana sia narana nanau sia namari nanau sia afu maqanau.

<sup>10-11</sup> Damasakusa maqusai Yisuna ufa irimarufa moo fannoo marinau. Mina auqu Ananiasafa marinau. (Sia Yeerusaree maqannaa Ananiasafau. Damasakusa maqusaindaraafa mina amarafa.) Mi fasannai qaina Ananiasana afunnaranau. Karaambaiqa fannoo mi qainnaki Ananiasana aarofanoo qinai. Ananiasa qufanoo Ananiasafa qinai Oo Karaambaiqa maa qinee maridaqa qufanoo Karaambaiqa maaqi qimasee qimaminai. Ananiasa doo deedaqi fua. Anee andeeqara aatatee qimariana mi mau oonuree Yudasina maaqara randasee qafa. (Sia Yisuna ueeqoofau. Damasakusa maqusaindaraafa mina amarafa.) Mina maaqaki Tarasusa maqusaindaraafa Sauroofa maridanoo. <sup>12</sup> Doo mifa qainamaseenoo maridanoo. Mifa ani Ananiasana qafeenoo maridanoo. Qainasaa qafaifana anee oonureenana mina akiqasa asauku munduseenana mina afu maqarana amiananoo irisee innaaru qidanoo maridanoo.

<sup>13</sup> Ananiasafa mi ufana iriseenoo rufaseenoo qinai. Oo Karaambaiqa faiqi moomoosa mi fasiqanara qini qimaqimifaqa iridaqa. Mifa Yeerusaree maqusai ani aiku asauku anufa irimariana mandoosana maranoo nifa maridanoo. <sup>14</sup> Mifa Yeerusaree amaana maaqa aanaiqikirausa misa uriqararana papiqa maramaree Damasakusa maqusai maasa aniaara innaaru qimariasara rumbamaree Yeerusareenni ooqu fuanee qimasee urifa maridanoo. <sup>15</sup> Karaambaiqa mina ufa iriseenoo Ananiasana qimaminoo qinai. Sia anee minara rufiaa anee kaqi fua. Qinee mi fasiqanara rusandeesamumandee mareeqa. Mifa qini ainainira faiqi kamambi mariannoo. Mifa qini duqura qini daufakiana aanaamuru maqannaasa faqa nari karaambaiqauqa faqa Isaraee maqannaasa faqa qimanniminoo nuannoo. <sup>16</sup> Qinee qeeqa oosana uqafiqaanara. Qini ufasaara kasooqaaqee arirana faqa dinee faqa maraannoo.

<sup>17</sup> Ananiasafa mi ufana iriseenoo maaqa paqurimandee qafofanoo Sauroofa minaki marufanoo keeqafinoo asauku mina akiasaa munduseenoo qinai. Sauroo qini qikaqaafasaa Karaambaiqa Yisufa nari uqanna anee aanai uridana anee qafaananoo mifa kai qini qimaqimifaqa anee ianannai anidaqa. Afu kafa maaqaaneera faqa naaquqara andeeqara maraquna aniki qumbiqaaninnanara faqa diqifaifaqa anidaqa. <sup>18</sup> Ananiasafa miqi qimasoofanoo Sauroona afusaa ititanoo mariufa saqari apata fooqaafa rafoomakufanoo maqai aqufufanoo doo mina afu maqanau. Afu maqafufanoo nammariki keeqammamaqanau. <sup>19</sup> Keeqamma amaqasoofanoo Sauroofa narana namaseenoo doo afaqa amiqufanoo Yisuna faiqi namu faqa qaaramoo faasaana Damasakusa maqusai maridanoo misa dadaaqinai.

<sup>20</sup> (Damasakusa maqusanaasa misa moo unna Anutunara qimarusa mariqau.) Yuda maqannaa akaqausa mi maqusanaki faqa mariqau. Minaki maridaqa naaduma amaana maqa usakasee minaki keeqafi Mooseena sandufa asaana rumasaidaqa anoona Anutunara innaaru qidaqa Yisunara sia iriqau. Sauroofa findifinoo andeeqaseenoo Yuda maqannaa amaana maqaki keeqafinoo Yisunara kuqaa Anutuna amaaku fee qinoo naamuaqufaqa iriqau. <sup>21</sup> Irisoofanoo naaquqoofaqa qiqau. Maa fasiqafa Yeerusaree maqusaki Yisuna aiku asauku narinoonufa maridanoo, miqooqari aanaiqikirausa uriqararana papiqa akara rumasoofanoo mareenoo maasa maqusai urufa Yisuna ufa irimarusa rumbamaree Yeerusareenni muqu quqaannee qufa maa mi fasiqafa ani maridanoo Yisuna ufara uqeeranaaree qidaqinoo. Misa Sauroonara naqaa fee fanoo fee qaara iriranamau fidaqinoo qimasee misa mi ufana qiqau. <sup>22</sup> Sauroofa faasaambaasaana andeeqaseenoo faiqi anaasee Yisunara qimannimidanoo nari irirana faqa maqee maqee firaanaikinau. Mifa Yisufa kuqaa Anutuna asauku mundirafa maridanoo fee qimaseenoo quandakinoo ooqeenaa tamummaqara fasiqauqa akarakinanaa amiqimasee akooqoo kooroomasee uqannifiqoofaqa qafeeqa misa irirafa dapikufaqa misa qaara iriranamau fiqau.

<sup>23</sup> Sauroofa moomoo faasaana Yisuna ufa qimannimimarufaqa Yuda maqannaa miqoo Damasakusa maqusanaasa misa Yisuna ufara nikooqeeamarufaqa aanoomasee moodaanaki suqufiqa Sauroona arira ufa qiqau. <sup>24</sup> Damasakusa maqusa ooni faandaamura firaafa ititanoo marinai. Kooqiki kai fimariqau. Yuda maqannaasa Sauroonara kooqiki rakismariqau. Eendaki faqa faasaana faqa rakismarufanoo miqoo onuraina qumarasee aruanaaree qidaqa rakismariqau. Moo fannoo Sauroona aqoondi misa ufa irinoo Sauroona kooroo qimasee qimaminai.

(Mi maqusanasaa faandaamura fiqau fiqunoo marufaqa mi faandaamurana afuqaindari maaqa mi faandaamuranasaa rusisaida usakee mariqau. Sauroona aqoondi maaqa faqa minaki marufanoo mi maqafa faandaamura atisaa kaqikaaqoo ruqianoo marinai.)

Faiqi minaki keeqarana amana marinau. Aqoosaindari sia amana anifara. Afuqaindari amana fifara.)

<sup>25</sup> Sauroona aqoondiuqa mina ufa irimarusa eendaki qumee Sauroona mareeqeeqa faandaamura afuqaki maru maqanakiqari meerai mi ruqiaranakiqari firaa afeeka uqaki rumaseeqa mi aamaranaki ruqieeqee maaminni quqaseeqa sanda quiqua quiqua ufanoo oqufufanoo maqasaa ooqueenoo uqeekekufanoo quqasee Yeerusareenni sandee fidanoo faiqanoo oorufufanoo ooruranau.

*Sauroofa Yeerusaree maqusai ooru finau.*

<sup>26</sup> Yeerusareenni oorureenoo Yisuna aiku asauku marunaki oonu keeqafufanoo dadaaqineerufuqaq misa mina qafeeqa maasa darimari fee qimasee rufiasee daraaniqau. Mifa Yisuna ufa doo irida fee qufaqa misa minara unna qimaseenoo maasa qumaraandoo qimasee rufiasee sandaqaq. <sup>27</sup> Baranabasifa anireenoo Sauroona dadaaqinoo aniqumareeqeenoo Yisuna afaaqasaa aqoondiuqa niqiqoo fasiqasee qimarusaki quqanau. Baranabasifa Sauroonara aanai ooru fimarufanoo karaambaiqa Yisufa mina afusaa kooroo inoo qu ufana faqa qimannimau. Sauroofa Damasakusa maqusai Yisuna aufakiana afeekaikamandee andeeqasee qimannimuna minara faqa qimannimisoofaqa kuqaa fee qiqau. <sup>28</sup> Miqooqari Sauroofa Yisuna faiqi namu faqa Yeerusaree maqusai marinau. Miqooqari maridanoo paasoosamandeenoo Karaambaiqa aufakiana misaqa marusa qimanniminoonau. <sup>29</sup> Kirisa maqannaasa ufa qimaru Yuda maqannaasa Mooseena sandufa qimarusa irirana faqaasa Yeerusareenni animarufanoo Sauroofa Yisunara misasaimbaqa nari qimami nari qimami qidaqa afeekaikimariqau. <sup>30</sup> Miqidaqa misa aanoomasee Sauroona arirarufuqaq Yisuna faiqi namu mina iriseeqa Sauroona mareeqee Seesaree maqusai quqasoofanoo doo miqooqari nariara Tarasusa maqusai nari maqusai finau.

<sup>31</sup> Doo miqooqari Yisuna ufa irimarusa Yudeeaa maqa maaqaki marusa faqa Kariree maqa maaqaki marusa faqa Samaria maqa maaqaki marusa faqa asoaranaki mariqau. Faiqi anaasee moomoosa Yisuna ufa eedooqimasee minasaa atooqaq. Anutuna naaqqara andeeqara maraqqana fannoo dadaaqunara misa nimana mapukinai. Misa aiqamausa Karaambaiqara naaqqooqafaq mina ufamau fimarigaq.

*Peetooroofa Rida maqusaindaraa fasiqa aiku mandaikirana andeeqaisanau.*

<sup>32</sup> Mi aukuanna Peetooroofa aiqama atinnai Anutuna faiqi namu marusa fiqqu fiqqu nindafee marinau. Moo kari Rida maqusai Yisuna faiqi namu nindafarara oqufufinai. <sup>33</sup> Miqooqari moo auqu Aeeniasafa aiku asauku kaqi uqirafa doo miqooqari naaruara faikaisee marufa marinau. Qisauku dinni taikasee dinni ani qaaramoo marasee aukuanna marinau. <sup>34</sup> Peetooroofa mi fasiqana qafamaseenoo qimaminoo qinai. Aeeniasa Yisufa asaku mundirafa ani amiqimaisaidanoo. Doo anee findifinana qaari raqandaaisa. Miqi qimasooqanoo Aeeniasafa findifinoo qaari raqandaainai. <sup>35</sup> Rida maqusanaasa faqa Saroonna maqusanaasa faqa aiqamausa ani mina uqufufuqaq qafamasee Oo qimasee quandaki Karaambaiqasaa kai atooqafiqau.

<sup>36</sup> Moo maqusa auqu Yoopa mi maqusafa Rida maqusa aqa maridanoo. Yoopa maqusai anaasee moo mina auqu Tabitaa nammarifa maridanoo. Yisuna ufa irimarufa marinau. Kirisa ufakiqari mi anaaseena auqu Doorakasa nammarifa marinau. Mi auquna oosana aandaq fee qimariqau. Mi anaaseefa kaqa kudi fasiqa anaasee afaarida nimirufa aiqama kari maqee maqee misa nimirufa marinau.

<sup>37</sup> Miqimarufa maridanoo aurirana marasee kuqinai. (Misa maaqaki tida moo maqasaa marinau kafa tida moo sandaaqai afeekaikirafa marufanoo minasaa faiqee mariqau. Ooninnai irirasu auquqoonasaa akaramafufuqaq sandaaqai tida afeeka auquqoonnai ooru fiqqau.) Tabitaa nammarifa kuqufufuqaq aanaaseeuqaq mina iri marasee nammari rumamaqasee sandaaqai tidasaa quqasee kasooqaqee akundararee qimasee quqaqau. <sup>38</sup> Yoopa maqusa faqa Rida maqusa faqa naraaqa naraaqa adeedi mariqau. Yoopa maqannaasa Yisuna aiku asauku Peetooroofa Rida maqusai qumumarufuqaq iriseeqa qaara fasiqa niqiqooqafaq qiqau. Oo Peetooroo maasa unnanai kaqi kaqi qumua.

<sup>39</sup> Peetooroofa eedoo qimasee deedaqamamaree miqanda faqa oqu finau. Yoopa maqusai oquroofuqaq mina afiqee maaqaki mirinni sandaaqa tidasaa muruquqasoofanoo nindafamaseenoo adeedaana anaasee moomoosa ikiraqeeusa findufufuqaq Peetooroona uqusee mi anaaseefa auqu nimu siutana faqa asausi faqaa siuta faqa auqu nimuna Peetooroona uqafiqaida ikiraqee mariqau.

<sup>40</sup> Peetooroofa mina iriiseenoo aiqama sufafuqaq aqusoofuqaq madaanaa oqufufuqaq. Oqufufanoo Peetooroofa tidasaa aqoorisaunara fufanoo Anutunara innaaru qinai. Innaaru qiqiseenoo Tabitaa nammarina iri marutinaa quandafinoo qinai. Tabitaa nammari doo anee findifinai. Miqi qimaseenoo Tabitaafa afu maqaseenoo Peetooroona

qafamaseenoo rutaqinoo findifinuu. <sup>41</sup> Peetooroofa mina asauku qumareenoo dadaaқи findifumasanau. Findifumasooфанoo Peetooroofa Yisuna ufa irimarusa faqa adeedaana anaaseeuqa faqa naaramasee uqannifiqanau. <sup>42</sup> Doorakasa nammarina findifumasoo ufana Yoopa maqusai aiqamai daraanufaqa iriqa moomoosa karaambaigara kuqaa fee qimasee minasaa mudiqau.

<sup>43</sup> Peetooroofa moomoo faasaana Yoopa maqusai marinau. Peetooroona moo auqu Simoonafa marinau. Mifa Yoopa maqusai moo fasiqa nari amarana Simoona mina faqa marinau. Simoonafa sipsipa burimakau mimmi minamusa narusaidanoo nipata asukusaidanoo aurumma afeekaikamasaidanoo nimisaidanoo feefauru maree marinau.

## 10

*Kooraneeriusafa qainamasee Peetooroonara qufaqa afiqaaqu.*

<sup>1</sup> Mi aukuanna mi fasanna Seesareea maqusai faiqi moo uriqararafa mina auqu Kooraneeriusafa marinau. Mifa Roomma maqanna ammi kiateena marinau. Nari faqa nari sundiauqa faqa Itari maqanna sundia fee qimariqau. <sup>2</sup> Kooraneeriusafa kaaqa Anutunara rimaru fasiqafa marinau nari faqa nari faiqi anaasee faqa Anutunara innaaru qimarusa mariqau. Mifa Yuda maqanna kudi fasiqauqa maqee maqee dadaaqidanoo narana ainaina nimirufa marinau. <sup>3-4</sup> Moo faasaana mariufanoo eenoofanoo Kooraneeriusana afu kai pisipasamandoofanoo Anutuna qangiroo moo amiqimandee qafanau. Qangiroo mifa maaqaki anireenoo auquramasee aaranau Kooraneeriusa qufanoo tautumandeenoo rufaseenoo mina kai tataqafinoo qinuu. Oo qini uriqararafa nanaree randaidee. Qangiroo mina iriseenoo maaqi qimasee qimaminuu. Anutufa ani innaaruqirana faqa anee kudi fasiqauqara qimudaoo qimariannana faqa qafaidanoo iridanoo aniara aididanoo. <sup>5-6</sup> Kooraneeriusa anee faiqi akaqausa niqiqainaqa Yoopa maqusai oogu fuuqa faiqi moo oogu afiqaa. Mina auqu Simoona moo auqu Peetooroofa ooruku namhari afaiqaannai faiqi moo aandau apata aurimari fasiqana nari amarana Simoona faqa maridanoo.

<sup>7-8</sup> Qangiroo fannoo miqi qimasee qimamisee doo finuu. Doo fufanoo Kooraneeriusafa mina ufamuu finoo nari maaqai ainainimaru faiqiqanda faqa nari sundia moo faqa Anutuna ufa irimaruna nari ureeqarana naaramasee qangiroo qu ufana qimannimiseenoo Yoopa maqusai niqiqoofaqa Peetooroona afigarara oogu fiqau.

(Miqooqaraasa maaqa usakasaidaqa maaqa tida aaku aakummasee qaaramoo tida marinuu. Maqasaa moo tida marinuu, mina maariqoo moo tida marinuu. Meeraqoo maaqa ataufakaaqa moo tida annuara maqi auquqoonasaa oqumarifi asoarana faqa suara faqa mareemarufa marinuu.)

<sup>9</sup> Kooraneeriusana sundia faqa ainainira faiqiqara faqa Yoopa maqusai fidaqa aanai fi faiqee fimarufanoo suani qambaanaikinau. Mikari Peetooroofa suani qambaana maaqa ataufakaaqa innaaru qiane qimasee oorufinuu. <sup>10</sup> Peetooroofa innaaru qimarufanoo aararoofanoo misa narana suqee marufanoo afu pisipasamandoofanoo moo ainaina qafanuu. <sup>11-12</sup> Innaaruna rakeemambufanoo seera firaana dinni dinni sanda qusuqona mi seerana aandau sakani ufini oosana oosana minaki uquramaseenoo innaarunaindari mi seera sandana quqa quqaufanoo. <sup>13-14</sup> Peetooroona aqa qumuroofanoo innaarunaindaraa ufa moo maaqi qinoo qimaminuu, Peetooroo findifina maa seerakinana aandausa narusee naa, qufanoo Peetooroofa qafamaseenoo qinuu. Oo Karaambaigara akasaa. Maasa Yuda maqannaasa sia neemaru ainainafa kai maridanoo. Sia anukarafauqa maridanoo. Sia qinee amana naanau. <sup>15</sup> Miqi qimasooфанoo innaarunaindaraa ufa moo maaqi qimasee qimaminuu. Anutufa anukamaqai ainainara sia sia anukara fee qia. <sup>16</sup> Maa ainainara qaaramoo kari qufanoo sia irufanoo kaffaa qumu aiqama rarisameeqee innaarunai kafaannai quqanau.

<sup>17</sup> Peetooroofa mi qainna oosana randee marufanoo aundura mandaikinau. Randee marufanoo Kooraneeriusana faiqi namu Yoopa maqusai aniree Simoona maaqa paqurimasee kooqisaa aniree nammeera qiqau. <sup>18-19</sup> Simoona moo auqu Peetooroofa mai maridanoo fee qufanoo, Peetooroofa maaqa ataufakaaqa kaqi maridanoo qaina oosana randee marufanoo Anutuna maraquna fannoo qimaminuu. Anee iria. Qaaramoo fasiqa aniara randaidaqa. <sup>20</sup> Anee findifi ooqi deedaqinana misa faqa fua. Sia oonumafi iria kaqi afaaqa quqasee fua. Qinee misa niqiqaunasa ani afigarara anidaqa. <sup>21-22</sup> Peetooroofa ooqureenoo qimanniminnuu. Innee qiniara randee mariasa maana misa maridaqa. Innee nanaree qiniara randaidee qufaqa misa qiqau, Roomma maqanna sundia kiateena maasa uriqararafa mina auqu Kooraneeriusafa maasa diqiqaiqaqa anidaqa. Mifa andeeqara fasiqa Anutuna amooqimarifa amiqira fasiqa maridanoo. Yuda maqannaasa aiqama kaaqa minara rimariafa maridanoo. Anutuna qangiroo moo fannoo aniara oonu afigee nari maaqakiara anirainafa ufa moo qimamianee qifaqa anidaqa. <sup>23</sup> Peetooroofa

misa ufa iriseenoo mareeqee maaqaki quqasoofaqa faiqeenoo iqaqoofanoo Peetooroofa faqa Yoopa maqanna qaaromoo namu Yisuna ufa irimarusa Kooraneeriusana faiqi namu faqa fiqau.

<sup>24</sup> Minamusa fiufu faqa aanai fifaiqee fiufu faqa Seesareea maqusa oonuraqau. Kooraneeriusafa nari atiuqa nari akaqaafasaa faqa nari maaqaki suqu quqasoofaqa marida faqa Peetooroona afeesimariqau. <sup>25-26</sup> Peetooroofa Kooraneeriusana kooqiki oonuree keeqararufanoo Kooraneeriusafa rafudamakufanoo mina aikuki gumi maree oorindari rumafinoo Anutufara maqi miqimaseenoo innaaru qiraree qufanoo Peetooroofa mina asauku qumaree uqeereenoo qinai, Doo findifua, qinee faqa sia Anutusa maridaqa faiqi faiqi maridaqa.

<sup>27</sup> Peetooroofa Kooraneeriusana qimamidanoo maaqaki keeqanau. Keeqafi qafoofanoo faiqi anaasee aanaamuru moomoosa minaki mariqau. Minaki ooruree misa faqa maaqi qimasee qimanniminai. <sup>28</sup> Innee aiqamausa maasa Yuda maqannaasa oosana irimariafanoo. Maasa Yuda maqanna aanaamuru maaqaki sia uqanna keeqafi misa faqa aqoondiki mariasa. Maasa amaana ufa minara firaqoo qao qinoo maridanoo. Sia anukarausee qidaqa. Doo maqee Anutufa qiniara sia moo aanaamuruara sia anukara fee qimasee rufaa, kaqi aqoondi kiannee qidanoo. <sup>29</sup> Qinee mina ufa irisaunnana anee qiniara aniannee qianaqa qinee sia inniara rufieeqa kaqi aniqa. Anee nanaree qini daareenane.

<sup>30</sup> Kooraneeriusafa mina iriseenoo qinai. Inna qinee qeeqa maaqaki eeneemarufaqa innaaru qimariafananoo faiqi moo fannoo mina qamunna kaaqa arenara qamunna faqaafa qini qifusaa kikiqamambinoo qimaqiminai. <sup>31</sup> Kooraneeriusa Anutufa ani innaaruqirana irinoo ani kudi fasiqauqa qimudao qimasee dadaaqimariannanara irinoo qafeenoo aniara aididanoo. <sup>32</sup> Doo anee faiqi niqiqainaqa Yoopa maqusai fuaga. Faiqi miqoo mina auqu uqanna Simoona moo auqu Peetooroofa maridanoo. Mifa nari amarana Simoona faqa aanda apata aurimari fasiqana faqa maridanoo, ooruku nammari afai qaanna miina maaqa maridanoo fee qinai. <sup>33</sup> Qinee mi ufana iriseeqa aaqee uqanna aniara oonu afiqee aniaqee qija. Anee amiqimminana andeeqasee aniananoo. Doo maasa aiqama maa maqanaki oqumarifi marunanoo doo Anutufa qiqafaidanoo. Karaambaqai ani qimami ufana irianeera anidaqa.

*Peetooroofa Kooraneeriusana aiku asauku qimanniminai.*

<sup>34</sup> Kooraneeriusafa miqi qimasee Peetooroona qimamisoofanoo mifa maaqi qimasee misa qimanniminai. Doo qinee maqee maa ainainna oosanara iridaqa. Anutufa sia maasa Yuda maqannaasara kai aididanoo kuqa aiqama maqannaasa amanamana kai iaqera aididanoo. <sup>35</sup> Aiqamausa Anutunara naaquqee mariinqa andeeqara oosana maridaqa miqimarifandinausara qinindi fee qiannoo. Aiqama maqusanaasa amanamana kai iaqera qidanoo. <sup>36</sup> Anutufa Isaraee maqanna amiqira fasaasa ufa asoora ufa asauku mundirana Yisunannai qimanniminai. Mifa aiqama maqanna Karaambaqai. <sup>37</sup> Yudeea maqa maaqai firaqoo kambiqoo ainainara Yoohaneefa nammari nimimaru aukuaana oosanaraseenoo kambiqanoo maridanoo. Kariree maqa maaqaki oosanaraseenoo miqooqari aiqama Yudeea maqa maaqakina fifaininai. Innee maaqoo mariasa minara Yisunara doo irimariafanoo.

<sup>38</sup> Anutufa nari naaquqara maraquina Yisuna Nasareetee maqusaindaraanasaa adia-maqasoofanoo Anutuna afeeka mareenoo aiqamai oonuree aniree inoo qimudao qinoo Sadannana auraarai mariusa qumareenoo aurimarusa faqa kaqi marusa faqa aiqamausa idaaqamannisanau. Anutufa qumee mina faqa nidanoo dadaaqufanoo mi oosanna oosanna ainainna auqeamarinai. Innee minara faqa doo irimariafanoo. <sup>39</sup> Yuda maqanna maqusa faqa Yeerusaree maqusaki faqa Yisuna auqoo ainaina qinee faqa akaqausa faqa qifunnai qafaafanausa maridaqa. Misa mina mara maree pirimmannai aunirira saqarisaa ariqau. <sup>40</sup> Qaaromoo faasaana aiqaroofanoo Anutufa kuqiranakinaana mina uqeera findifinai. Findifinoo maasa qifusaa kooroomambinai. <sup>41</sup> Sia aiqamausa nifusaa kooroo inau. Anutufa maasa rusandeesamumandee maroosa maasa qifusaa kai kooroo inau. Anutufa kuqiranakiqari uqeerasoofaqa maasa mina faqa narana nammari naafanausa maridaqa.

<sup>42</sup> Mikamuqoo maaqi qimasee maasa naamuqinoo qinai. Innee qiniara maana faiqi anaasee noori kandamasee qimannimiaqa. Anutufa qini Yisusara kaqi mariasa faqa kuqirausa faqa misa rainasee idaki fee innaarunai fee quqannisaanausee qinai. Minara faqa inni aiqamausa maa maqee mariasa faqa qimannimidaqa. <sup>43</sup> Peetooroofa mi ufana Kooraneeriusana aiku asauku qimannimiseenoo maaqi qinai. Anutuna tamummaqara fasiqausa aiqama Yisunara qidaqa akara rimariqau. Maaqi qimariqau.



Aiqamausa mina saqarikinausa Anutufa mina auqu afeekannai misa mandainaina numoo mininnisaanoo.

*Anutuna maraƒuna fannoo Kooraneeriusana aiku asauku naakinau.*

<sup>44</sup> Peetooroofa miqi qimarufanoo Anutuna naaquqara andeedqara maraƒuna fannoo innaarunaindari qumureenoo aiqamausa Peetooroona ufa irimarusasaa rafaafu man-imaqanau. <sup>46</sup> Maraƒuna fannoo naakufufaƒa dadaqufaƒa moo maƒanna ufa sia irimaru ufausa qimariqau. Anutuna firaanaikiranara faƒa firaqoo amooqimariqau. <sup>45</sup> Yuda maƒannaasa qaaramoonamu Peetooroona faƒa Yoopa maƒusaindari qumusa mi ainainna qafamaseeqa naaquqoofaƒa qiƒau. Oo Anutufa nari naaquqara maraƒuna aanaamuru faƒa nimidanoo. Sia Yuda maƒannaasa kai nimidanoo.

<sup>47</sup> Peetooroofa miquna nindafamaseenoo Yuda maƒannaasa nari faƒa anusa qiman-niminoo qinuu. Maa fasiqausa Anutuna naaquqara andeedqara maraƒuna doo mareea, maasa Yuda maƒannaasa iafanandemmiafanoo. Yafasiƒa fee moo fannoo nammari nimiranara qaoo qiannoo fee sia amana moo fannoo qaoo qiannoo. Doo nimia. <sup>48</sup> Miqi qimasooƒaƒa Anutuna asauku mundirana Yisuna auƒusaa nammari maraƒau. Miqimasooƒanoo Kooraneeriusafa asasidanoo Peetooroonara kaƒiqaqoo mariannee qufanoo eedoo qimaseenoo misa faƒa qaaramoo faasaana marinuu.

## 11

*Peetooroofa Kooraneeriusana qimamufanara nari aqoonausa Yeerusareenni ooru qi-manniminuu.*

(Isaraee maƒannaasa aiqama Anutuna ufara maasaindi fee kai qimariqau. Anaamuru mariasara sia misaindi maridanoo fee qimariqau. Anaamuruuara sia anukarafauƒa marinara sia misa maaƒaki keeqaa, sia misa narana naaqee qimariqau.)

<sup>1</sup> Yisufa niqiqoo fasiqausa Yeerusareenni marusa faƒa Yisuna ufa irimarusa Yudeeaa maƒa maaƒai marusa faƒa aanaamuru marusa misa faƒa Anutuna ufa mareeaa maƒi qiƒau. <sup>2</sup> Peetooroofa Seesareea maƒusaindari Kooraneeriusana maƒusaindari Yeerusareenni ooru fufaƒa miqooqaraasa Yuda maƒannaasa Yisuna ufa irimarusa Mooseena sandufara rimarusa misa aiqama Peetooroona aqidaƒa qiƒau. <sup>3</sup> Anee aanaamuru maaƒaki misa faƒa mariaanafa misa faƒa neeneaanafa animariananoo. Sia Yuda maƒanna fainanduqirasa faƒa mariaananoo. Naqaa fee ifanee miqinane. Maasa Yuda maƒannaasa sandufa rukieenana miqiananoo. <sup>4</sup> Peetooroofa mina iriseenoo oosanaindari aiqama ainainara qimanniminoo qinuu.

<sup>5-6</sup> Fira seera moo dinni atinai moo dinni atinai qaara faƒa qaara faƒa atinai sanda rumbanoo marufanoo innaarunaindari moo fannoo mi sandausa quaqee idanoo quqaaqaa imarufanoo qini daaƒa quqasoofaƒa minakinaa ainaina amiqimasee qafaqi-afana. <sup>7-9</sup> Innaarunaindaraa ufa moo qimaqiminoo qinuu. Peetooroo doo findifi arusee naa qufaƒa qinee maaƒi qiƒa. Oo Karaambaiƒa sia uqanna. Sia sia anukara aandau qinee moo neemariqia. Maqee maana sia naanauree qimasauananoo innaarunaindaraafa qinoo, Anutufa maa ainainnara anukarafauƒa maridanoo fee qimasaifana anee sia minara sia anukara fee qia. <sup>10</sup> Mi ainainnara qaaramoo kari qaoo qunanoo doo qumu rarisama innaarunai quqeenoo.

<sup>11</sup> Miqi marunanoo kai Seesareea maƒusaindari qaaramoo fasiƒa niqiqaa aniree qinee marunna maƒana kooqiki aniree qiniara randeeaa. <sup>12</sup> Anutuna maraƒuna fannoo qiniara kaƒi rakeemasee misa faƒa fuannee qinoo. Maa mariasa qiƒaqaafasaa qisauku dinni taikasee dinni ani moodaa marasee qini faƒa Seesareea maƒusai ooqu fiƒau. Maasa aiqama ooquree Kooraneeriusana maaƒaki keeqaƒau. <sup>13</sup> Keeqafufanoo Kooraneeriusafa Anutuna qangiroo qafoonara maasa qimaqiminuu. Mi qangiroofa mina maaƒaki kikiqamambi qimaminoo qinuu. Kooraneeriusa anee faiƒi akaqausa niqiqainaƒa Yoopa maƒusai ooquree faiƒi moo mina auqu uqanna Simoonaa moo auqu Peetooroo mina ooqu afiqee uruaƒa. <sup>14</sup> Mifa urureenoo ufa qimannimisainnaƒa anee faƒa ani aiku asauku faƒa innaaruna asumu marirana oosana irifaranoo fee qinuu. <sup>15</sup> Mi qangiroofa fufanoo Kooraneeriusafa nari ainainra faiƒi qiaƒa qiqooƒaƒa qini qifiqee Kooraneeriusana maaƒaki quqaqisoofaƒa qinee Peetooroosa ufa qimannimirara oosana arasaunanoo naaquqara andeedqara maraƒuna fannoo ooqai indaaruu maasa daakinoo mariufa maasa undee Kooraneeriusana maaƒaki mariasa naakinuu. <sup>16</sup> Miqi marufaƒa qinee oonumafi iriseeqa Karaambaiƒa maasa faƒa maasaki maridanoo maasa qimaqiminoo qinuu. Yoohaneefa nammariki keeqannimaqaidanoo kasooqaqee qinee maraqunaki keeqannimaqaanaura qufaƒa iriafannana. Qinee mi ufana iriseeqa Kooraneeriusana maaƒaki naakirana qafamaseeqa iriseeqa minara inni qimannimidaƒa. <sup>17</sup> Maasa Yisuna asauku mundirana saqarikiafanoo Anutufa nari kaƒi nimira ainaina nari naaquqara andeedqara maraƒuna

maasa qiminau. Miqi kai masee Seesareea maqusai aanaamuru faqa kaqi niminoo. Qinee yaasee maridee Anutunara qaoo qianauree. Sia amana.

<sup>18</sup> Yeerusaree maqannaas Yisuna ufa irimarusa mi ufana iriseega doo ufa Peetooroona aqimaruna taikasee quandaki Anutunara asasiidaqa qiqau. Oo Anutufa aanaamuru naundura quandarana faqa naaru naaru marirana faqa doo misa faqa niminoo. Sia maasa Yuda maqannaasaindi kaifau. Miqi qufanoo mi ufafa doo taikanau.

*Antiooka maqusaindaraasa Yisuna ufa irimarusa mi ufana.*

<sup>19</sup> Mi ufa suqirana sia kambiqooqoo Sateefeenana arukari doo miqooqari Yisuna ufa irimarusa quqasee aanaamuru maaqa maaqa daraanimambiqau. Akaqausa Fooeenisia maqa maaqai fiqau. Akaqausa Antiooka maqusai fiqau. Akaqausa Sipurusa maqa maaqai fiqau. (Sipurusa ooruku nammari qambaana amuaqunamu maridanoo. Faiqi anaasee moomoo miqoo mariqau.) Miqimasee aanaamuru maqusa marufaqa Yuda maqannaas misaki animarusa misakai Yisunara qimannimariqau. <sup>20</sup> Akaqausa Sipurusa maqannaasa faqa Sireenee maqannaasa faqa Antiooka maqusai onu maridafa aanaamuru marusa asauku mundirana Yisuna amiqira fasaasa ufa aanaamuru qimannimariqau. <sup>21</sup> Karaambaifa afeeka dadaaqunara Antiooka maqannaasa aanaamuru moomoosa uqanna Karaambaifa ufara asamasee iriqa aiqamausa minasaa kaimma atooqau.

<sup>22</sup> Antiooka maqannaas ufa fannoo Yeerusareenni ooruroofaqa misa irisee Baranabasina aqiqoofanoo Antiooka maqusai ooqu finau. <sup>23</sup> Ooqureenoo niqafafanoo Anutufa mimaqusaanaasa dadaaqimarunara ooqu niqafamaseenoo asasinoo qimannimidanoo qinai. Innee inneega nimuqusa ookiqari kuqaa karaambaifasaa mundufuqa naaru naaru miqookai noori runuseega fuaqa. <sup>24</sup> Baranabasifa andeeqara fasiqa marinai. Naaquqara andeeqara marauna minaki qumbiqarafa marufa. Yisunasaa kaaqa mundirafa marinai. Mi fasanna faiqi anaasee Antiooka maqusanaasa moomoo karaambaifasaa atooqemariqau.

<sup>25</sup> Baranabasifa Antiooka maqusaindari Tarasusa maqusai ooruree Sauroonara randarara finau. <sup>26</sup> Paqurimaseenoo afigeenoo Antiooka maqusai animaridafara faiqi anaasee moomoo Anutuna fasaasa ufa qimannimariqau. Moodaa aukwana miqoo maraqa. Antiooka maqannaasa miqooqari oosana araseega Yisuna ufa irimarusa fuka nuqu Kristiannee qimariqau. (Maasa ufakiqari asauku mundirana aiku asauku kamambiqaa mariasee qimariqau.)

<sup>27</sup> Mi aukwana Yeerusaree maqusaindari fuka tamumqara fasiqauqa Antiooka maqusai ooqu fiqau. <sup>28</sup> Miqoo maridafa misakiqari moo fasiqa auqu Akabusafa findifinoo Anutuna maraqunannai maaqi qimasee qimannimino qinai. Kasooqagee aandroo aiqama maqa maaqaki naruannoo. (Kasooqagee Karaudiusafa Roomma maqannaas uriqarara kiapafa maru aukwana mi aandarofa kambiqafinoo narinau.) <sup>29-30</sup> Antiooka marauna Yisuna aiku asauku nari niqoonausa Yudeeaa maqusai marusa aandroo narunara dadaaqiaqera qiqau. Aiqamausa nari nimana nimana kai munnimma qumaree Baranabasina faqa Sauroona faqa nimufaqa Yudeeaa maqa maaqai nimirara ooruu fiqau.

## 12

*Eeroodeefa Yameesana kuqaruseena Yoohaneena karabusaki quqanau.*

<sup>1</sup> Mi aukunnai mi fasanna Eeroodeefa Yudeeaa maqa maaqai faqa Kariree maqa maaqai faqa Peereea maqa maaqai faqa Samaria maqa maaqai faqa misa kiapafa firaafa Eeroodeefa maridanoo Yisuna ufa irimarusa narirana oosana arasee narimarinau. <sup>2</sup> Eeroodeefa Yoohaneena afaasana Yameesana qumaree rumbaseenoo rakinoo nu paipanannai anuka ateeka aqinoo kuqammarinau. Yuda maqannaasa Yisuna ufara nikoqeamarusa miqunna qafamasee asammiiqau. <sup>3</sup> Minara asufanoo Eeroodeefa miqooqoo fee qimasaida kafa miqianauree qimaseenoo Peetooroona faqa qumarararee qimarinau. Ooruku siai feemu qoomaqunaki Peetooroona maaqimasee qumaranau.

<sup>4</sup> Yameesana aruseenoo Eeroodeefa kafa miqooqari ooruku siai feemu qoomaqunaki Peetooroona qumaraseenoo rumbeeqeenoo karafusa maqaki quqasoofaqa sundiaufa moomoo rakisimariqau. Qisauqara taikasee qiku dinni taikasee dinni ani moodaa marasee sundiaufa eendaki faqa faasaana faqa rakisimariqau. Ainnaaqarara qoomaqa taikafnaqa mina maariqoo aiqamausa nifusaa arunauree qinai. <sup>5</sup> Yisuna ufa irimarusa minara iriseega Anutunara maqee maqee firaqoo Anutunara innaaru qimariqau. Peetooroona sia aruanifeera miqimariqau.

*Qangiroo eendaki qumureenoo Peetooroona karafusakinaana mareeqeenoo kaqinni quqanau.*

<sup>6</sup> Moo faasaana Eeroodeefa duna iqaqaranasaa faiqi nifusaa Peetooroona afiqaseeqa faiqi nifusaa aruanaaree qimasoofoo mi eendanakina Peetooroofa sandaandoo qimaseenoo firaa sainanda qaaragandannai rumbaseenoo karabusa maqaki quqanau. Sundia qaaraganda minasaa rakisimarufanoo Peetooroofa miqanda dinni dinni qambaanaai faiqanau. Moo fannoo Peetooroona dinni asauku namu faqa nari asauku namufaqa moo sainanda rumbanau. Kafaa dinni asauku namufaqa moo sundia asauku namufaqa moo sainandannai rumbanau. Akaqa sundiauga kooqiki rakisimariqau.

<sup>7</sup> Mi eendana qambaanaai miqiga marufanoo karafusa maaqaki qangiroo moo kikiqinoo marufannoo kaaqa qarafa firaafa qeemarufanoo qangiroo fannoo Peetooroona afaurinoo findifua qufanoo tautumma uqeera qafoofoo sainanda asaukuqarasaaqarara sainanda nari kai idukuaki maqasaa aqufiqau. <sup>8</sup> Aqufufanoo qimaminau, aneenna pikapa atukarasee aneenna aiku aanaamu upeekasee rumbasee aneenna asausi faqaa siuta afisumaree findifi doo qini faqa ania.

<sup>9</sup> Peetooroofa mina iriseenoo aiqama ainaina mifa undee undeemamareenoo doo mina faqa maqusai raudanau. Peetooroofa qangiroo faqa fidanoo qainasaa miqidee qinau. <sup>10</sup> Misa kooqi afaisaa rakisimarugo qumureenoo quminnaaqareenoo doo miqoo madaanaai marusakiqaa qumureenoo doo miqoo firaa kooqi qainnannai ititara kooqiki madaanaai kooqiki qumuroofanoo narikai mi qainna kooqifa atuafufanoo miqanda maqusai raudamaki fiqau. Aatata ooqufidaqa kaqlkaaqqoo kisaagaasaa ooqufimarufanoo qangiroo fannoo mafi aisaseenoo tautumakinoo taikafufanoo Peetooroofa nariara kai kikiqinoo marinau.

<sup>11</sup> Doo nari kai kikiqinoo maridanoo nari aundurannai kai irinoo qinau. Doo qinee maqee oonumafi iridaqa sia qainau. Anutuna qangiroo fannoo qini mareeqee Eeroodeena asaukukinaana mareeqee karafusakinaana idukueeqeenoo madaanaai quqeenoo. Yuda maqannaasa qiniara kuqunifeera asasiaanakinaana mareeqee kaqinni quqaqiseenoo.

<sup>12-15</sup> Miqi qimaseenoo Peetooroofa nari marianinnanara iriseenoo Yoohaneena amara faqa moo auqu Marakafa mina anoona Mariana amarana maaqai finau. Sia Yisuna anoofau mina anoona amarana mina maaqai finau. Yisuna ufa irimarusa moomoosa suqiga marida Peetooroofa sia kuqunifeera innaaru qimarufanoo Peetooroofa madaanaai aniree asukunai kooqi arinau. Arimarufanoo ainaini maru manaaqafa mina auqu Roodanamarifa kooqi atuararee qimasee ooquroofanoo Peetooroofa faandaamura kooqiki aqoosaindari kooqi arinoo kooqi atuaanee qufanoo mi manaqafa Peetooroona ufa kai iriseenoo firaaqoo asasamaseenoo sia kooqi atuanau, kaqi quqasee sandeenoo faiqi marunnai sandee oorureenoo qimanniminau. Oo Peetooroofa madaanaai kikiqinoo maridanoo fee qufaqa misa qiqau saa anee furufarida qira saa mifa karabusaki maridanoo.

Miqi qufanoo Rooda nammarifa asaidanoo kooripoo kooripoo qidanoo qimannimufaqa misa qiqau. Saa mina amana mina qangiroo maridanoo fee qiqau. (Ooqai mi kamuqoo Yuda maqannaasa nari faiqi anaasee faiqi namu mai marufanoo misa qangiroo innaarunaindaraasa rakisi nimaqee mariafaqee qimariqau.) <sup>16</sup> Misa miqi qidaqa nari qimami nari qimami marufanoo Peetooroofa kaqi aqoosai maridanoo kooqi arimarinau. Miqidaqa qumu kooqi atuasee Peetooroona qafoofoo kaaqa naaquqanau. <sup>17</sup> Peetooroofa ururee asakunnaai misa ufara qaoo qimaseenoo Anutufa nari karabusakinaana maroo ufana qimannimiseenoo moo Yameasana faqa nari aiku asauku Yisuna ufa irimarusa faqa qimannimiaqee qimasee uriqaree Eeroodeefa maaqoo paqurimasee daruandoo qimasee moosaa kukeeqarannai finau.

<sup>18</sup> Iqaqooafaqa kananaana Peetooroonasaa sundiauga rakisiusa qafoofoo sia marufaqa firaaqoo tutuqida randee mariqau. <sup>19</sup> Eeroodeefa minara iriseenoo randaqee qufaqa randaqanusia sia paquriqau. Eeroodeena aranaqoofoo nari sundiauga rakisiusa minara ireeseenoo aiqama misa naru taikanau. Miqooqari Eeroodeefa Yudeeaa maqa maaqaindari Seesareea maqusai ooqu marinau.

*Eeroodeefa kuqu ufana.*

<sup>20</sup> Tiree maqusanaasa faqa Sidoona maqusanaasa faqa mi maqusaqanda Eeroodeena ququsaki maridaqa Eeroodeena maqasaaqarara narana marasaida neemariqau. Nari maqa mandaikunara miqi mariqau. Eeroodeefa mi maqusaqanda rairai qimannimaqee marufaqa misa naranara irisee maasa naranara fimarunna aana ititaandoo qimasee moodaanaki suqufufaqa Eeroodeena faqa asoora ufa qianee qimasee qumiqau. Ooqureeqa Eeroodeena maaqasaa rakisimaru fasiqana mina auqu Baratasa

mina aqoondikamasee munnimmaina amisee anee maasara amiqira ufa kai oquree qimami marinaqa maasa innaaqiana oquree mina faqa ufa qianauree qimasee mina aanaaqiana oqureeqa Eeroodeena faqa ufa qiqau. <sup>21</sup> Ufa qu faasaana Eeroodeefa nari kiapausa qammunna amiqirana afisuseenoo amiqira siaqa kiapausaindi mina muqu quqasee minasaa marida ufa qimannimimarinau. <sup>22</sup> Ufa qimannimisoofaqa mi maqusaanaaqanda fifau unna qidaqa amooqidaqa faaqa quqasaida qimariqau. Maa fasiqafa Eeroodeefa sia faiqi faiqifau moo anutufa maridanoo.

<sup>23</sup> Miqi qimarufanoo Anutuna qangiroo fannoo qumee Eeroodeena kuqammarusanau Eeroodeefa misa amooqira ufa irisee sia qaoo qimasee Anutuna amooqiaqee qira ufa sia qimannimuna akiqara doo mina kuqammarinau. Mina aundurai qimi moomoo neeneesoofanoo kuqinau.

<sup>24</sup> Eeroodeefa kaqi maru aukuana Yisuna ufa taikaanifee qimasaidanoo mina ufa irimariusa narinoo rumbeenoo imarinau. Anutuna ufa fannoo sia taikeenoo sia kaqi maruqoo kai marinau. Firaqoo daraaninoo doo fifainau.

<sup>25</sup> Baranabasifa faqa Sauroofa faqa Antiooka maqusanaasa Yisuna ufa irimariusa munnimma auqusoona muru Yeerusaree maqannaasa nimisee Yeerusaree maqusaindari kafa ururandee Antiooka maqusai kafa oqu fiqau. Miqanda moo kumaaraa qaara auqufaqaana moo auqu Yoohaneena amarafa moo auqu Maraka mi kumaaraana faqa afiqee Antiooka maqusai oqu fiqau.

## 13

*Baranabasisa Sauroosa Yisuna ufa qimannimirara niqiqoofaqa fiqau.*

<sup>1</sup> Antiooka maqusai Yisuna ufa irimarusaki Anutuna tamummaqara fasiqa akaqausa mariqau. Anutuna ufara qimannimimarusa akaqausa mariqau. Misa nuqu Baranabasifa faqa Simeeonara dunduqarira fee qimarufa faqa mariqau. Rukiusafa Sireenee maqusaindaraafa moo fannoo marinau. Manaenafa Eeroodeefa nari maqaki firimarufa moo fannoo marinau. Sauroofa faqa marinau. <sup>2-3</sup> Mi namusa moodaanaki marufaqa maridaqa qusasaa narana minnisee naarara maridaqa Anutunara innaaru kai qida mariqau. Miqi marufanoo naaquqara andeeqara maraquna fannoo qimanniminoo qinau. Innee Baranabasina faqa Sauroona faqa mara quqasai naaduma quqasaifaqa miqanda naaduma qinee moo saika nimianauranoo qufaqa misa mi ufana irisee sia narana narai kaqi innaaru qimariqau. Innaaru qimasee Sauroona faqa Baranabasina faqa nisauku misasaa quqasee doo niqiqaqau.

*Baranabasisa Sauroosa Sipurusa qafumaki fiqau.*

<sup>4</sup> Baranabasifa faqa Sauroofa faqa naaquqara maraquna fannoo niqiqoofaqa Seereeu-sia maqusai oquree sipaki akaramafufaqa Sipurusa maqa maaqai fiqau.

(Sipurusa maqannaasa aanaamuru naaduma ufa qimarusa mariqau. Yuda maqannaakaqausa misaki oonu mariqau. Baranabasifa mindaraa Yuda maqannaafa maridanoo nari maaqai finau.)

<sup>5</sup> Sipa fannoo Sipurusa maqusa moo auqu Saramisa maqusai munu quqasoofaqa miqanda sipakiqari maqasaa aqufufaqa Yuda maqannaaka miqoo marusa ufa suqira maqaki keeqafufaqa Anutuna fasaasa qira ufa miqoo Yuda maqannaasa qimannimimariqau. Mi kumaaraafa moo fannoo misa faqa fufa Yoohaneena amarafa moo auqu Marakafa mifa faqa dadaaqidanoo qimannimimarinau.

<sup>6</sup> Sipurusa maqa maaqa ooruko nammari fiq fiq inoo marufanoo firaa afuma marufaqa faiqi anaasee maqusa moomoo marinau. Sauroona faqa Baranabasi faqa, misa Saramisa maqusaindari maqamau fifufaqa mi maqa maaqana dinni ati Paafosa mi maqusanai fiqau. Mi maqusanaki afunee fasiqa moo paquriquu Yuda maqannaafa marufa marinau. Mina auqu Barayisunee qimariqau. Mifa narara tamummaqara fasiqa fee qimarufa unna qirafa marinau. <sup>7-8</sup> Mi maqa maaqanaki maru kiapana auqu qaara auqu faqaafa marinau. Moo auqu Seerakiusafa moo auqu Paurusafa marufanoo uriqarara kiapafa marufanoo mi afunee fasiqafa mina aqoondi marinau. Mi kiapafa irirana faqaafa marufa mifa Baranabasina faqa Sauroona faqa naaramasee qinau. Aniree Anutuna ufa qifaqa iria qufanoo afunee fasiqa fannoo minasaa ititeemarinau. Kiapafa sia Yisunara irianifeera miqi marinau. Mi afunee fasiqana moo auqu Kirisa ufakiqari Eerimasana marinau.

<sup>9</sup> Sauroona moo auqu Pauroonee qimariqau. Pauroofa Eerimasana rafaqaqafirana qafamasoofanoo naaquqara maraquna fannoo aakufunanoo afunee fasiqa ooriki qafamaseenoo qimaminau. <sup>10</sup> Anee Sadannana amaaku marianafa mariananoo anee aiqama ainaina andeeqara ainaina namuqaa marianafa mariananoo. Anee mandainaina nikaru qira ainaina aniki qumbiqanoo marifa mariananoo. Anee maqee maqee

Anutuna kuqaa anoonufa qumareenana uigaa iqammeeqeenana nimimarihana fasiqafa marianano. <sup>11</sup> Doo maqee Anutuna asauku fannoo ani rafaafa fuannoo. Ani afuqara dimbafinana sia suani kaaqa qarana qafeennaranoo. Miqi qimasoo fanoo afu aiqamaqara dimbanau asukuna arufufanoo miqoo miki makammindu. Yafee qini qisauku qumareenoo aana uqaqifiqaanoofee qinuu.

<sup>12</sup> Kiapafa mi fasiqana afu dimbarana qafamaseenoo Karaambaiqa fasaasa ufa irisoo fanoo aaquqoofanoo kuqaa anona fee qimasee irinuu.

*Baranabasisa Sauroosa Antiooka maqusa amarana maqusai fiqa Yisuna ufa qimannimiqau.*

<sup>13</sup> Pauroofa nari aqoonausa faqa Paatoosa maqusaindarii maqamau ooruku nammari afainni ooqureenoo sipaki akara mafufanoo nammari amuaqumau Pamafiria maqa maaqaki Peeraka maqusai mi sipanaki finuu. Miqoo oonureenoo Yoohanee moo auqu Marakafa akooqoofanoo quqaseenoo Yeerusareenni anirandee kafaa moo sipaki finuu.

<sup>14</sup> Baranabasisa faqa Pauroosa faqa Peereeka maqusaindarii Pisidia maqa maaqai moo Antiooka maru maqusai maqamau fiqau. Miqoo oonuree marikiya Yuda maqannaa misaki animarusa ufa suqira maqaki keeqafi ooqumariqau. Saririqasaa nari amaanasaa keeqafi ooqu mariqau. <sup>15</sup> Yuda maqannaa amaana maqasaa rakisirausa Mooseena sandufa faqa tamummaqara fasiqau faqa ufa faqa asaana rumaseeqa Baranabasisa faqa Pauroosa faqa qafamasee qimannimidaqa qiqau. Oo maasa qikaqaa fasaa inneeqara aamua qira ufa inniqaraki marinaqa faiqi anaasee qimannimifaqa maasa iriaqa. <sup>16</sup> Pauroofa findifinoo asaukunna misa rafaafa finoo qinuu. Doo qinee qimannimianaura. Miqi qimaseenoo findifi maaqi qimasee qimannimindu. Oo qini qiqoonausa Israaee maqannaa faqa aanaamuru mariasa faqa maa maqanaki Anutunara innaaru qimariasa qini ufa iriaqa.

<sup>17-18</sup> Israaee maqannaasa Anutufa maasa qikeeku qikaaku rusandeesamu mandeenoo nari maqusa minnisee Isipa maqa maaqai ooqureeqa faiqi asumu areeqa moomoosa kambiqaqau. Anutufa nari afeekannai nifiqeeqeenoo aadana maqasaa quqaseenoo qaara fasiqa niku nisauku taikasee aukuanasaa misa faiqi anaasee qummaara Anutuna arufanoo sia narinuu, faiqiara maqi aakuseenoo rakisi nimaqee marinduu. <sup>19-20</sup> Miqooqari Kannaana maqa maaqaki marusa qisauku taikasee dinni ani qaara marasee maqannaasa naru taikaseenoo Israaee maqannaa mi maqana Anutufa nimisoo faqa 450 kuqannaa kisaqasaa moomoo aukuaana minaki mariqau. Doo miqooqari faiqi anaasee rakisi qeera Anutufa faiqi moomoo saika mafufaqa maridaqa rakisinnimaqee mariqau. Misa marikufanoo tamummaqara fasiqa Samueerafa kambiqanuu. Siaasai uqa fifiufaqa doo Samueeranasaa munu taikanuu doo miqooqari tamummaqara fasiqau mariqau. <sup>21</sup> Maasa qikeeku qikaaku moo karaambaiqaikamma sainaqa maasaki mariani fee qufanoo Anutufa Beesaminna ati Sauroona amarana Kisana amaaku mina nimindu. Sauroona amarafa qaara fasiqa niku nisauku taikasee aukuaana rakisinnimaqee marinduu.

<sup>22</sup> Anutufa mina mafi afeeqasee Dafidina karaambaiqaikindu. Karaambaiqaika maseenoo Anutufa maaqi qimasee Dafidina qinuu. Dafidifa Yeeseena amaaku marifa qinee minara dididanoo. Mifa qini iriranamuu fimarifa maridanoo naaru miqikai inoo qini iriramuu fuannoo. <sup>23</sup> Dafidina ati moo fannoo Yisuna Anutufa mareeqeenoo Israaee maqannaa asumu maree marianinnanara quqanuu. Nari tamummaqara ufamuu kai Yisuna quqanuu. <sup>24</sup> Yisufa aniree qimannimira aukuaana adeedi roofanoo Yoohaneefa nammari nimimarufa aiqama Israaee maqannaasa maaqi qimasee qimannimindu. Inneeqa mandainana minnisee Anutunai ubeekamafiqa mina ufa irisee nammari marasee mariaqa. <sup>25</sup> Yoohaneefa nammari nimimarufa mina saika aukuaana taikaidanoo maaqi qimasee faiqi anaasee qimannimindu. Innee qiniara yafasiqanee fee qidaqee. Sia qinee innee afeesimaria fasiqausuu mariduu. Doo mifa qini qinaaqianna qusasaa aniraannoo. Mifa andeeqarafa mariannoo. Qinee mina ureeqarasa uqanna maridaqa, sia amana mina kaqikaqoo dadaqianaura.

<sup>26</sup> Oo qini qiqoonausa Abaraamaana akeeku akaaku mariasa aanaamurundarii aniree innaaru qimariasa faqa Anutufa maasa qumaraaninna ufana qiqaki quqeenoo. <sup>27</sup> Yeerusaree maqusanaasa tamummaqara fasiqa ufa asaana rumasee sia mina oosana amiqimandee irisee Yisuna qafamasee sia maasa asumu qumaraaninna fee qimasee tamummaqara fasiqa ufamuu Yisuna arirariqau. <sup>28-29</sup> Misa mina arirufara randoosia Piratoofunnai afiqee munusoo fanoo qufaqa ariqau. Aruseeqa tamummaqara fasiqa ufa undee undee kaimma taikaseeqa doo mina iri aunarira saqarisaa qaraana tatusee doo akundaqau. <sup>30</sup> Qaaramoo suanisaa marinoo Anutufa mina kafaa mara findifinuu. <sup>31</sup> Findifumasoo faqa faiqi anaasee moomoosa kaqi maru kamuqoora mina faqa Kariree

maqa maaqaindari Yeerusareenni nidaqa qafamaqoosa findi funa qafamaseeqa mifa findifunara Isaraee maqannaa qimannimidaqa kooroo idaqa.

<sup>32</sup> Maasa mi amiqira fasaasa ufana mai aniree inni qimannimirara anidaqa. Ooqai maasa qiikeeku qikaaku qima afeekaikamaqoona anoona kuqiranakinaana uqeera findi finannai maasa kooroomaqimino. <sup>33</sup> Dafidina idi akara firaa kamu 2 Anutuna ufara maaqi qinau.

Anee qini qimaaku mariananoo

Maqee qinee ani akausaikidaqa.

<sup>34</sup> Kafaa Anutufa Yisunara kuqiranakiqari findifuaninnanara faqa sia putaaianinnanara faqa maaqi qinau.

Qinee oosana oosana naaquqara amiqi amiqirana Dafidinasaa qima afeekaikamma qaafannana mina anisaa quqaanaura.

<sup>35</sup> Minara Anutufa kafaa maaqi qidanoo.

Anee aneenna kaaqa andeeqara fasiqa sia mina amaqi putaa irana amaqeenrananoo.

<sup>36</sup> Dafidifa nari maru aukuanai Anutuna ainainirafa marinoo doo kuqinau. Kuqufufaqa mina iri mareeqee nari akeeku akaaku marunaki akundaqau. Miqimasoofanoo amaqi putaa inau. <sup>37</sup> Moo fannoo kuqiranakinaana Anutufa mara findifumasainafa mina amaqi sia putaa iannoo. Dafidifa minara akara rumaqoofa maridanoo.

<sup>38-39</sup> Maa qini qikaqaafasaa Antiooka maqusai mariasa maa ufana amiqimandee iriaqa Innindi maridanoo. Inni numoo arirana minninnisarafa Yisufa maridanoo minara marifaqa maasa inni qimannimidaqa. Mooseena sandufa sia faiqi anaasee amana nari mandainaina sandara foora rumbannimaqoqoofa sia amana idukifaranoo. Aiqamatia Yisunara irirana rusiranannai kai minannai kai inni numoo akiaqa taikannisaannoo inni mandainaina sandara foora rumberana idukunnisaannoo. <sup>40</sup> Innee maqee amiqimandee rakisiaqa ooqai Anutuna tamummaqara fasiqa moo fannoo aaquqimannimaqoqoofa innisaa kambiqaandoora. Mifa maaqi qimasee akara rumasee qinau.

<sup>41</sup> Innee iriaqa, inni kuqaa naruainna ainainara qimannimafiaqa innee mafi uteeti qimasaidaqa amarau qimariasa. Mi ainainna inni nifusaa kambigainaqa qafamasee tautumasee kuqifaranoo. Innee maria kamuqoo qinee moo ainaina firaa ainaina aqusaananoo moo fannoo minara qimanniminaqa innee minara unna fee qifaranoo.

(Pauroofa mi tamummaqara fasiqana ufannai aaquqimanniminoo qinau. Innee maqee ooqeenasa naana ramasee Anutuna ufara unna fee qifoora. Innee maqee aukuna Yisunara unna fee qifoora.)

<sup>42</sup> Pauroosa Baranabasisa Antiooka maqusai ufa suqira maqakiqari raudoofaqa faiqi anaasee maaqi qimasee qimannimiqau. Amanee inneeqara kafaa oonurandee moo Saririqa kafaa aniree qimannimiaqa. <sup>43-44</sup> Eedoo qimasee miqanda fufaqa Yuda maqannaa faiqi anaasee moomoosa faqa aanaamuru Yuda maqannaa amaana ufa irimarusa misa faqa miqanda nifaqee fimariqau. Mi niqiqoo fasiqaqanda mi fasiqa anaaseesa fuki faaki qimasee qimannimiqau. Innee maqee maqee Anutuna kaqi nimiranaki mariaqee qimasee marikinoo moo Saririqasaa Yuda maqannaa amaana maqaki keeqafufaqa mi maqusaanaasa aiqama Anutuna ufa iriraree qimasee keeqaqau.

<sup>45</sup> Yuda maqannaasa moomoo aanaamuru nindafamaseeqa misa naundurai kaukaataqirafa qumbiqafufaqa Pauroona ufa rukiaidaqa manda ufa sukufa kai qimariqau.

<sup>46</sup> Pauroosa Baranabasisa mina iriseeqa paasoosamandee ufa qimannimiqau. Anutufa nari ufara Yuda maqannaasa naaree qimannimiaqee qimaqoona doo inni qimannimiqunaqa innee minara qaoo qimasee ititee mariafanoo. Innee inneeqara sia amana naaru naaru marirana maraanauree qidaqee miqidaqa ititeemariafanoo. Innee miqianara inni minniseeqa quandaki aanaamuru qimannimianaura. <sup>47</sup> Karaambaiqa fannoo maasa maa ufana qimaqimifaqa mai anidaqa aanaamuru qimannimianaura.

Qinee inni niqiqeeqa aanaamurukiaqa qoomaikiaqeera kaaqa qararana qimannimia. Aiqama aanaamuru maqa maaqaki mariasa innee misa innaarunai fimaria aannanara qimannimiaqeera niqiqaidaqa.

<sup>48</sup> Miqoo aanaamuru marusa mi ufana iriseeqa اساسammaseeqa karaambaiqa fasaasa ufara dufi dufi qidaqa amiqira ufa fee qimariqau. Misakina Anutufa rusandeesamumandoosa doo Yisuna saqarikiqa naaru mariranaki keeqaranara oosana araqa.

<sup>49</sup> Miqimasoofanoo miqooqari misaqa dinni dinni marusakina doo karaambaiqa ufa fannoo daraaninau. <sup>50-51</sup> Yuda maqannaasa miquna qafamaseeqa aanoomaseeqa mi maqusanai faiqi firaasauqa faqa aanaamurukina Yuda maqannaa amaana ufa irimaru anaasee uriqararusa faqa nirana fundakusoofaqa Baranabasisa faqa Pauroona faqa

mareeqee aqoosai aqusaqau. Aqusoofaqa miqanda findifufaqa kookoomma afaqa qumareeqa misa ninaamu rareeqe quqasee Antiooka maqusaindari Ikooniumma maqusai fiqau. <sup>52</sup> Miqanda fufaqa mi maqusaanaasa Antiooka maqusaanaasa Yisuna ufa irimarusa naaqqara maraqauna fannoo naakinoo qumbiqafufaqa اساسimariqau.

## 14

### *Baranabasisa Sauroosa Ikooniumma maqusai fiqau.*

<sup>1</sup> Pauroosa Baranabasisa Ikooniumma maqusai oonuroofanoo Antiooka maqusai kambiqoo ainainafa mina amana kai Ikooniumma maqusai faqa kambiqanau. Miqanda Yuda maqannaama amaana maqaki keeqaqa. Keeqafiqa amiqimasee qimannimunara Yuda maqannaasa faqa aanaamuru marusa faqa moomoo uqanna Yisunasaa mundiqau.

<sup>2</sup> Yuda maqannaama akaqausa ufa rukiaseeqa aanaamuru qimannimidaqa ueeqsoofaqa iriseeqa misa faqa Pauroosa Baranabasisa ufara manda ufa fee qumaseeqa ufa rukiqaqa.

<sup>3</sup> Miqunara miqanda kisaagasaa mi maqusanaki maridaqa paasoosamandee karaambaifa dadaaqunara afeeka nimufaqa faiqi sia auqaaqaa ira ainaina faiqi anaasee dadaaqi maru ainaina oosana oosana auqusoofaqa faiqi anaasee qafeeqa tautumasee qiqau. Oo kuqaa uqanna miqandakina karaambaifa kaqi nimira ufa kuqaa maqusai maridanoo fee qiqau. <sup>4</sup> Mi maqusaanaasa qambaana rainaqa. Rainafiqa akaqafa Yuda maqannaasasaa atooqqaqa. Akaqafa niqiqoo fasiqausasaa atooqqaqa.

<sup>5-6</sup> Anaamuru ufa rukiee marusa faqa Yuda maqannaasa faqa nari faiqi firaasa faqa moodaanaki suqufufaqa ufa qi qisee oonisamu Pauroosa Baranabasisa naruane qufanoo moo fannoo aaquqimannimaqoofaqa miqanda mi ufana iriseeqa quqaseeqa rufiamareeqa Rikaoonia maqa maaqai sandaqa. Rikaoonia maqa maaqaki maqusaqa moomoo marufaqa qaara maqusa moodaaqoo maruqanda moo maqusa auqu Ristara, moo maqusa auqu Deerabee marufaqa doo miqanda Ristara maqusai maridanoo fee qiqau. <sup>7</sup> Miqoo oonu maridaqa Ristara maqusaki faqa Deerabee maqusaki faqa misaqa maru maqusausakiqa faqa amiqira fasaasa ufa misa faqa qimannimimariqau.

<sup>8</sup> Ristara maqusaki faiqi moo aiku mandaikirafa marinau. Maqookari mi kamuqooqari miqinoo marufa marinau, sia aana nufa. <sup>9-10</sup> Mi fasiqafa Pauroona ufa kaaqa irimarufanoo Pauroofa oonurama qafanau. Qafamasee maaqi qimirinai. Maa fasiqana irirafa Yisunasaa rusinoo marifa amanaikirafa maridanoo amana findifuannoo qimaseenoo mi fasiqana oori qafamaseenoo firaa kari maaqi qimasee qimaminoo qinau. Anee findifufa. Andeeqaseenana rutaqina findi fua. Miqi qufanoo mi fasiqafa rutaqi findifinoo doo maqusamau oonuree aniree inau.

<sup>11</sup> Faiqi anaasee mina qafamaseeqa faqa fuisee qidaqa tutuqidaqa nari ufakiqari Rikaoonia ufakiqari maaqi qiqau. Anutuqanda faiqikamambi doo maasaki qumu maridaqa nidaqa, Yisufa niqiqoo fasiqaqandara Anutuqandee qiqau. <sup>12</sup> Mi maqusaanaasa Anutufara maqi unnaqira anutuqanda nimana auquqoofa misaki mariqau. Moo fannoo ureeqarafa ufa akoofasa mina auqu Eerameesafa marinai. Mi maqusaanaasa aiku mandaikirafa findifirana qafamaseeqa Pauroosa Baranabasisara maasa anutuqanda qumu maridammia maqi qimasee Baranabasinara anee maasa uriqarara anutufa ani auqu Seeusane qiqau. Pauroonara anee ufa akoofasa maridana maasa ureeqara anutufa ani auqu Eerameesane qiqau.

<sup>13-16</sup> Misa firaa Anutuna Seeusana amaana maqa mi maqusana naambeeqai marinai. Mi amaana maqanasaa aanaikikirafa Baranabasisa Pauroosa niqafamaseenoo tatufira aanda uqasee nimisee innaaru qiaqee qimaseenoo burimakau akoonauqa rarisamammaree minisee mina anukaki kukuqamma quqasee rarisamammareeqa faandaamura kooqiki munusoofaqa faiqi anaasee aiqama suqusee aniroofanoo Baranabasisa Pauroosa misa tatufirana suqaqimidee qimasoofanoo nikoqoofanoo kakeenna qaoo qiqau. Kakeenna qaoo qufaqa sia irufaqa miqanda nari qamunna qumaree rakeemmaqusee faiqiki oonuree aniree faqa quqasee qimannimiqau. Maaqanda faiqi faiqi maridaqa. Inni fooqaasa maridaqa, sia anutusa maridaqa. Maasa anoona Anutuna amiqira fasaasa ufa qimannimirara anidaqa. Innee maa maaqiana fifau dapi ainaina maridanoo mina minnisee quandakinaqa kaqi marira Anutunara iriaqeeera anidaqa. Mi kaqi marira Anutufa mifa kai innaaruna faqa maqa faqa ooruku nammari faqa minakimari ainaina oosana oosana faqa auqu quqanau. Ooqai mifa faiqi aanaaseera inneeqa manda iriramau kaqi fuaqee qimarinau. <sup>17-18</sup> Mi kaqi marira Anutufa innaarunaindaraa aaku faqa narana oosana oosana nari aukuanasaa moo narana nari aukuanasaa moo narana nimimarifa maridanoo. Innee mina qafamaseeqa innee faqa maraseeqa minara kai اساسimariqanoo. Mi ainaina miqimarianannai nari marina kooroomannimidanoo. Innee mina qafeeqa minara kai asiaqaa. Faiqi anaasee mi ufana iriseeqa kaqikaqoo

indee indee qidaqa kafaa kaqikaaqoo mara mara ridaqa tatufira aandau nimianeera qimariqau.

<sup>19</sup> Antiooka maqusa amarafa Pisidia maqa maaqaki moo Antiooka maqusa marinau. Mindaraa Yuda maqannaa akaqausa faqa Ikooniumma maqusaindari akaqausa faqa moodaanaki suqufufaqa Ristara maqusai oonureeqa miqooqaraasa faqa ufa qi qiseeqa Pauroona qumaree maqamau rarisaaq faanduamura aqoosai aquseeqa oonisamu suqu qumaree misamuna Pauroona arimariqau. <sup>20</sup> Doo kuqinoommifoo qimasee quqasee fufanoo Pauroofa Yisunara ufa qimannimimarufaqa Yisuna ufa irimarusa mina aaga anifiqqu fiqqu mambufanoo Pauroofa nari kai misa qambaanaa findifinoo doo quqasee maqusai kafaa keeqanau. Iqaqoofanoo kananaana Pauroosa Baranabasisa findimaqee Deerabeera maqusai fiqau.

*Baranabasisa Sauroosa oonurandeeqara Antiooka maqusa uqannai aniqau.*

<sup>21</sup> Miqoo Deerabeera maqusai oonu maridanoo amiqira fasaasa ufa qimannimi marufaqa moomoosa Yisuna aiku asauku kamambiqau. Deerabeera maqusanaindari Pauroosa Baranabasisa oonurandee aniree kafaa Ristara maqusai oonisamu aru maqusanai kafaa ani kaqikaaqoo marikiqa quqasee Ikooniumma maqusai kafaa oogu fiqau. Miqoo faqa kaqikaaqoo mariqa quqasee Pisidia maqa maaqaki moo Antiooka maqusai kafaa fiqau.

<sup>22</sup> Mi maqusausakiaqa nidaqa Yisuna ufa irimarusa fuki faaki qimaseeqa qiqau. Innee Yisuna ufasa mundufiqa kuqaa anoonaikiaqa. Maasa aiqama moomoo mandainainaki maraqa kadaapiriqa fifi iqa Anutuna ququsaki keeqaanauree qidaqa. Minara innee faqa sia minnisaaga kaqikai fuaqa. <sup>23</sup> Aiqaqa maqusakiaqa nidaqa Pauroosa Baranabasisa Yisuna ufa irimariasakinaana qumareeqaida rakisirausaiki mariqau. Quqasaida narana minnisee innaarukai qiagee qimasaida maqee nariqa fukasaa karaambaiqasaa irirana rusimariasara misara rakisiaqee qimasee quqaqau.

<sup>24</sup> Pauroosa Baranabasisa Pisidia maqa maaqaki oonuree aniree maseeqa Pamafria maqa maaqai kafaa anirandee fiqau. <sup>25</sup> Miqoo miqanda Peeraka maqusai Yisuna fasaasa ufa qimannimiseeqa ooruku nammarinni Ataria maqusai oogu fiqau. <sup>26</sup> Ataria maqusaindari sipaki akaramafufaqa Antiooka maqusai kafaa fiqau. Ooqai indaar Antiooka maqusai oosana araqa. Miqoo Yisuna aiku asauku miqanda raineeqee Anutuna asaukuki quqasoofaqa Inneeqara karaambaiqa ufa maraqa nuaqee qimasoofoqa mi saikana maraqa nimariqau.

<sup>27</sup> Baranabasisa Pauroosa Antiooka maqusai anireeqa Yisuna ufa iri marusa aiqama suqu quqaseenoo Anutufa miqandannai aiqama ainaina naamuqaqinoo uqannifiqeenoo qimaseenoo Anutufa miqandannai aanaamuru kooqi atuasoofoqa misa faqa Yisunara iridaqa. <sup>28</sup> Miqi qimannimiseeqa miqoo Antiooka maqusai kisaqasaa mariqau.

## 15

*Pauroosa Baranabasisa Yeerusareenni ooruree Yisuna aiku asauku irammirirara ooru fiqau.*

<sup>1</sup> Yudeeaa maqa maaqakinaasa Yisuna ufa irimarusa akaqausa Antiooka maqusai ooguureeqa Yisuna ufa irimarusa maaqi qimasee unna qidaqa naamua qiqau. Innee Yisuna ufamau kai fidaqa sia Mooseena sandamau fimariafanoo sia fainanduqirausa sia innaarunai asumu mareefaranoo fee qiqau. <sup>2</sup> Pauroosa Baranabasisa mi Yudeeaa maqannaa fasiqausara qaoo qimasee mi ufanara firaqoo ufa qi qisee ufa rainaqa. Miqi qimaseeqa misa moodaa ufa qimaseeqa qiqau Pauroosa Baranabasisa akaqausa maaqooqaraasa saimbaqa Yeerusareenni ooru fuaqa. Oorureeqa Yisuna afaaqasaa aqoondiuqa qimannimifaqa maa ufanara naqaa naqaa fee qifaqa oorurandee qumuree qifaqa iria.

<sup>3</sup> Antiooka maqusanaasa Yisuna ufa irimarusa misa niqiqamasoofoqa Yeerusareenni ooru fidaqa ooriqaree Foeenisia maqa maaqai faqa Samaria maqa maaqai faqa Pauroosa Baranabasisa nariqa ninunara faqa aanaamuru moomoosa quandaki Anutufinnai ubeekoonara faqa qimannimiqa fimariqau. Yisuna ufa irimarusa minara iriseeqa firaqoo asasiqau.

<sup>4</sup> Yeerusareenni minamusa ooruroofaqa Yisuna ufa irimarusa miqoo marusa faqa nari faiqi firaasa faqa Yisuna afaaqasaa aqoondiuqa minamusa oogu nifiqeeqee quqasoofaqa maridaqa Baranabasisa Pauroosa nari niniuna oosana oosana aamina maqannaa moomoosa Yisunasaa atooqeeuna mi fasaasausa qimannimimariqau. <sup>5</sup> Farisai amaana ufa qimarusa akaqausa Yisuna ufa irisee mina aiku asauku faqa miqoo Yeerusareenni mariqau. Misa faqa Baranabasisa faqa Pauroona faqa ufa irisee findifiqa maaqi qiqau.



Anaamuru mariasa Yisuna ufara eedoo qidaqa sia kaqi mariaqa maasa Yuda maqanna fainanduquseeqa Mooseena sandamau fidaqa innaaruna aana mareefaranoo.

<sup>6</sup> Yisuna faiqi namu niqiqoo fasiqausa moomoosa misa faiqi firaasa faqa minara iriseeqa moodaanaki suqufufaqa ufa qimariqau.

<sup>7</sup> Kisaagasaa mi ufana qida mariqau. Miqi marufanoo nindafoosia Peetooroofa findifi maaqi qimasee qimanniminoo mi ufana rafaagafinau. Qini qikaqaafasaa Anutufa sia maasa kaifau, aanaamuru faqa amiqira fasaasa ufa irisee eedoo qiaqee qimaseenoo innikinaana qini qumareenoo, anee oosana areenana aanaamuru qimannimia qufaqa miqimmiqiafana. <sup>8</sup> Anutufa faiqi aigama nimuqusa naundura irimarifa maridanoo. Mifa aanaamuruara faqa eedoo qimaseenoo naaquqara maraqa maasa undee miqikai inoo misa faqa niminau. <sup>9</sup> Sia maasa faqa misa faqa raineenoo faqa qinau, amanamana kai fee qimasee mi mandainaina numoo nariqa Yisuna saqarikiranannai mininnisanau. <sup>10</sup> Anutufa miqimmaqaifaqa inne nanaree fira qumaara mareeqee fifau misa nifaariki quqaidde. Mooseena sandufa qaaraiqinoo maridanoo amiqirafa faqa ummaara nimarifa faqa marinara maasa qikeeku qikaaku maasa faqa qumaara tafirana sia amanaiki mariafanausa maridaqa. <sup>11</sup> Innee sia miqiaqa. Maasa Yisuna saqarikamasoofanoo Karaambaiga Yisufa nari afaariranannai maasa utaaqeenoo. Anaamuru miqi kai masaa fanoo doo misa faqa miqikaimminoo utaaqamannimaqeenoo.

<sup>12</sup> Peetooroofa miqi qimasoo faqa aigama daimambi irimarufanoo Baranabasisa Pauroosa nari niniunara oosana oosana qimannimufaqa iriqau. Miqanda aanaamurukiqaq nimarufanoo Anutufa miqandannai faiqi sia auqaaqaa ira ainaina auqusoofaqa faiqi anaasee qafoonara mi ufana niqoo Yeerusareenni suqimariasa qimannimimariqau. <sup>13</sup> Baranabasisa Pauroosa ufa taikasoo fanoo Yameesafa findifinoo ufa moo qimanniminau. Oo qini qikaqaafasaa qini ufa iriaqa. <sup>14</sup> Anutufa aanaamuruara amuqusufanoo misakinaana akaqausa mareeqeenoo nariara narindikiaqera maranau. Mi ainainna oosana Peetooroofa faasai maasa doo qimaqiminoo. <sup>15</sup> Doo miqunaki ooqai tamumaqara fasiqa akara kooroo inau. Minara maaqi qimaqoona.

<sup>16</sup> Qinee kasoogaqee kafia qumuanaree qinau.

Qumureeqa Dafidina aiku asaaku maaqa rapeelara maqi inoo marifaqa kafia qumuree usakaanaura.

Mina maqusa urisinoo marifaqa mina faqa rukianaaura.

<sup>17</sup> Miqianaqa maaqanna maaqanna karaambaigara randaaqera.

Aiqama qaannaasa naaraanasa qini ufara anifaranoo.

<sup>18</sup> Qinee karaambaiga ooqai maa ufausa kooroo qiafanausa maridaqa.

<sup>19</sup> Yameesafa mi tamummaqara ufana qimannimiseenoo nariara qinau. Qinee maa ainainnara irunafa maaqimminoo maridanoo. Anaamuru mariasa moo maqannaasa quandaki Anutufinnai ubeekemariasa sia kadaapi fifau ruanaura. <sup>20</sup> Sia misa miqifaqa maasa akara kai rumeeqee misa nimianaaura. Akaqa ufa maa ufausa kai uqan-nifiqaanaura. Faiqi moo fannoo narana maraseenoo moo unnaqira Anutunara innaaru qimasee aminana miqira narana sia naaqa. Faiqi anaasee nari ummuari nari ummuarinnanara sia mina maraqa. Aandau moo anukaki ataakirana fidika kaqi maaqinaki marinnana siamma naaqa. Fidika kaqinni tati aqusee amaqi kai naaqa, fidika sia mina naaqa. Doo miqi kai qimasee qimannimiaqa. <sup>21</sup> Aiqaqa maaqanna maaqanna mariasa aigama Saririqa Yuda maqanna amaana maqakina Mooseena sandufa ooqindari aukuaana aukuaana aanaamuru asaana rumasaidaqa qimannimimariafaqa Mooseena sandufa oosana oosana amana irifaranoo. Maasa miqi kai iqa anoona ainaina kai qimannimianaaura.

*Yisufa niqiqoo fasiqausa pasa akara rumeeqee maqusa maqusa nimaqanau.*

<sup>22</sup> Yisuna ufa irimarusa aigama Yeerusaree maqusakinaasa Yisuna faiqi namu niqiqoosa faqa faiqi firaasa faqa Yameesana ufa irisee eedoo qimaseeqa qiqau. Maasa qeeqakina akaqausa suqumareeqa Baranabasina faqa Pauroona faqa Antiooka maqusa niqifaifaqa ooqureeqa mi ufana qimannimiaqera. Miqi qimaseeqa faiqi moo auqu Yudasifa mina moo auqu Barasabasi mina faqa Sirasina faqa mara quqaaqau. Aiqaqausa miqandara amiqira fasiqa andeeqaraqandee qimarusa mariqau. Misa miqanda mareeqee Sauroosa Baranabasisa nimiseeqa papiqa akara rumeeqee nimiqaq.

<sup>23</sup> Mi papiqanaki ufa maaqimminoo marinau.

Innee Antiooka maqanna faqa Siria maqanna faqa Sirisia maqanna faqa sia innee Yuda maqannaafau mariafanoo, aanaamuru mini maqaaqoosa mariafanoo maasa Yisuna faiqi namu mifa niqiqoosa faqa faiqi firaasa faqa maasa inni nikaqaafasaa nifausamara inni nimandaidaqa. <sup>24</sup> Maasakiqari faiqi akaqausa nari kai innee unna ooqureeqa fainanduqira ufa faqa Yuda maqannaasa sandufa oosana oosana faqa qimannimufaqa

iriseeqa qaara irirana maraqau. Sia maasa niqigaafanau ooqu fiqau. Nári iriranannai ooqu fiqau. <sup>25</sup>Maasa minara iriseeqa moodaanaki suqufiqa ufa qimaseeqa Baranabasina faqa Pauroona faqa qaara fasiqa mara quqasaafaqa miqanda faqa innee iannai oqufi-faranoo. Minamusa inni ufa qimannimiaqeera. <sup>26</sup>Baranabasisa Pauroosa sia kuqiranara rufieemariasa kai paasoosamasee Karaambaiga Yisuna asauku mundirafa mina saika uqeere mariasa maridaqa. <sup>27</sup>Maasa indaaruaa Yudasina amarana faqa Sirasina faqa innee iannai niqigaanaqa oqureeqa papiqakinaa ufa nookiqari qimannimifaqa iriaqa. <sup>28</sup>Anutuna naaquqara maraquna fannoo maasa faqa moodaa karakaimmidanoo. Sia maasa moomoo sandufa innisaa quqaanaura. Maa qaaramoo sandufana kai innisaa quqaanaura. Maa qaaramoo firaa ufa namuna kai inni nimianaura. <sup>29</sup>Faiqi moo fannoo narana maraseenoo nari moo unnaqira anutunara dufi dufi qimaseenoo inni niminafa sia mina naaqa minnisaaqa. Innee aiqama aanda fidika sia naaqa. Ataakirara aanda sia mina amaqi naaqa. Faiqi anaasee narinni narinni ummuarirana sia maraaqa. Innee maa qinee qunnainaina sia mareeqa amiqiranaki marifaranoo. Doo maa ufana taikeenoo.

<sup>30-31</sup>Yisuna faiqi namu Yeerusaree marusa mi akarana rumeeqee ufa maree marusa nimufaqa mareeqa Antiooka maqusai ooqu fiqau. Antiooka maqusai oqureeqa Yisuna ufa irimarusa suquseeqa papiqakinaa ufa asaana rufaqa irufanoo amiqikaimminau. Mina iriseeqa firaqoo asamasaseeqa qiqau. Maa ufafa maasa pooduqara ufa maridanoo fee qiqau. <sup>32</sup>Yisuna ufa irimarusa nariara nariara qikaqaafasaa fee kai qimariqau. Yudasina amarafa faqa Sirasafa faqa Anutuna tamummaqara fasiqaqara maruqanda. Miqanda kisaqaasaa nari nikaqaafasaa faqa maridaqa pooduqara ufa faqa qimannimimariqau. <sup>33</sup>Yeerusareendari qumusa mariufaqa Antiooka maqanna Yisuna ufa irimarusa susummasee nimandamasoofaqa Yeerusareenni kafaannai ooru fiqau. <sup>35</sup>Pauroosa Baranabasisa miqanda sia Yeerusaree maqusai ooru fiqau kaqikaqoo kisaqaasaa Antiooka maqusai mariqau. Miqanda faqa akaqusa namufaqa karaambaiga ufa oosana oosana ufa asaana rumasee naamua qimannimimariqau.

*Pauroosa Baranabasisa rainaikiqa naadu naadu fiqau.*

<sup>36</sup>Mariufanoo Pauroofa Baranabasina qimaminoo qinuu. Doo findifinaqa anindiri ooqai niniaafannakinai maqaanna maqaanna nidaqa niuqia.

<sup>37</sup>Baranabasifa eedoo qimaseenoo Yoohanee amarana moo auqu Maraka kafa afiqararee qimasoofanoo Pauroofa qaoo qinuu. <sup>38</sup>Ooqai maasa faqa finoo Pamafria maqusaindari oonurandee anufa saina kaqi mariani. Sia maasa faqa aiqamai ninoo kasaqaaindari oonurandee anufa. <sup>39</sup>Miqi qinoo Baranabasisandiri ufa rainaqa. Ufa rainasee rakeemaki naadu naadu fiqau. Baranabasifa Marakana afiqamaree sipaki akaramafufanoo Sipurusa afumai nari maqa maqaqi finuu. <sup>40</sup>Antiooka maqanna nikaqaafasaa marusa Pauroosa Sirasisa mara quqasee innaaru qimasee qiqau. Anutuna afaarirafa inneeqara Anutuna saika maree marifanoo inniqara rakisinnimaqaani.

<sup>41</sup>Qimasoofaqa miqanda Siria maqa maqaqi faqa Sirisia maqa maqaqi faqa oonuree aniree idaga Yisuna ufa irimarusa afeekaika mannimaqee mariqau.

## 16

*Pauroosa Sirasisa Timootina afiqasee nimariqau.*

<sup>1</sup>Pauroosa miqooqari Deerabee maqusai faqa Ristara maqusai faqa finuu. Mi maqusa ganda nari aqa nari aqa adeedi marinuu. Miqoo Pauroofa Yisuna ufa irimaruu kumaaraana moo paqurinau. Mina auqu Timootifa. Mina anoofa Yuda maqanna anaasee marinuu mina akoofa Kirisa maqusaindaraafa aanaamuru marinuu. <sup>2</sup>Ristara maqusai nikaqaafasaa marusa faqa Ikooniumma maqusai nikaqaafasaa marusa faqa aiqama Timootinara amiqira kumaaraa fee qimariqau.

(Yuda maqannaasa aiqama Mooseena sandufamau fidaqa Isaraee maqanna feeqa qeera fainanduqimariqau. Miqunara fainandammuidee qimariqau.)

<sup>3</sup>Pauroofa Yisuna ufa maqusa maqusa qimannimiraree qimaseenoo Timooti anirainaga innisaimbaqa fidaqa Yisuna ufa qimannimiqi fiqau fiqau. Misaqa fiqau fiqumma marusa Yuda maqannaasa aiqama Timootina akoonara aanaamurufee qida irimarusa mariqau. Pauroofa Yuda maqannaasa Timootinara qaoo qifoo qimasee Yuda maqannaasa fainanduquamaqaseeqa afiqee fimariqau.

<sup>4-5</sup>Misa maqusakiqaa oonuree aniree maseeqa Yeerusareenni maru niqiqoo fasiqausa faqa faiqi firaasa faqa misa sandufa suquseeqa papiqasaa akara rumaqoonu mi ufana qimannimidaqa qiqau. Innee sia Yuda maqannaasa sandufa oosana oosana irisee qumaara naruani. Yisuna faiqi namu niqigamaqoo fasiqausa misa sandufauqa minamuna kai rakisi qumaraaqee qufaqa miqimmimariqau. Miqi marufanoo maqusa

maqusa Yisuna ufa irimarusa afeekaikamandee mapukusee mariqau. Faiqí moomoosa faasaambaasaana iriseeqa doo misasaa atooaqau.

*Pauroofa qainasaa Maseedoonia fasiqa ufa irinau.*

<sup>6</sup> Pauroosa Sirasasa miqooqari Firikia maqa maaqaki faqa Karatia maqa maaqaki faqa oonuree aniree idaqa qimannimimariqau. Miqooqari misa Asia maqa maaqai fuaneerufanoo naaquqara maraquna fannoo misa rafaafufusoofaqa oonurandaqau. Sia minaki qimannimianneera miqinau. <sup>7-8</sup> Misa miqooqari Misia maqa maaqaindari oosirana fllaqaree Bitinia maqa maaqa firaree qufanoo Yisuna maraquna fannoo rafaafufufaqa oorurandee Misia maqa maaqa qambaana ai aikatee Tarooasa maqusai ooruku nammari atinni mariqau. <sup>9</sup> Misa miqoo Tarooasa maqusaki marufanoo Pauroona qaina afu naranau. Qainaki Maseedoonia maqanna fasiqa qafanau. Mi fasiqafa Pauroona fuki faaki qidaqa qainasaa aaramasee qinau. Anee mai Maseedoonia maqa maaqai aniree maasa dadaaqia.

<sup>10</sup> Miqi qufanoo Pauroofa maasa qimaqimufaqa maasa minara Anutufa maasa Maseedoonia maqa maaqai amiqira fasaasa ufa qimannimiqeera qidaqi qimasee doo deedaqiafannana.

*Firipi maqusai Ridia nammari Yisuna ufa irinau.*

<sup>11</sup> Maasa Tarooasa maqusaindari sipaki akaramafi andeeqasee Samootarakee maqusai oonuraafannana iqaqoofanoo kananaana Neeapoorisa maqusai Maseedoonia maqa maaqaki maru maqusana mi sipanaki fiqiafana. <sup>12</sup> Miqoo maasa sipakiqari maqasaa aqufufaqa Firipi maqusai adeedi maru maqusai maqamau fiqiafana. Firipi maqusa Maseedoonia maqa maaqakinaa maqusauqa moomoo marinau. Aiqama maqusauqa aruseenoo Firipi maqusa mifa uriqarara maqusa firaafa marinau. Roomma maqanna kiapausa kaamanna fira taunna marinau. Roomma maqanna sundiauqa kiapausa faiqí anaasee miqoo moomoo ani mariqau.

<sup>13</sup> Moomoo taunnakiaqa Yuda maqannaasa miqoo asaqi ani marusa nári amaana maqa usakee mariqau. Akaqa taunnakiaqa sia usakee mariqau. Saririqasaa Yuda maqannaasa raudamakufaqa nammari afainni ooqu ooqumarifufaqa miqoo nariara amaana qima-saidaqa ooqu randee maqusai urimariqau. Maasa Firipi maqusai ani marikammasee Yuda maqannaasa innaaru qirana oosana iriseeqa Saririqasaa Firipi maqusaindari raudamakiaqa nammari afainni Yuda maqannaasara ooqu randaqiafana. Paqurimasee Yuda maqanna aanaaseeuqa kai marufafa misa faqa ooqu marifi ufa qimannimiqiafana. <sup>14</sup> Mi anaaseesakiqari moo fannoo mina auqu Ridia nammari Yisuna ufa maqanna anaasee Tiatira maqanna anaasee marinau. Mifa qamunnasaa akimaru qumisana mi ainainiranaki maru anaaseefa maridanoo Yuda maqannaasa amaana ufa qimarufa marinau. Pannoona arira qumisa ainainiranaki marufa maridanoo fira munnimma aqimaru ainainasaa rakisimaru anaaseefa marinau. Mi anaaseefa Anutunara rimarufa marinau. Anutufa kukeeqasee dadaqunara Pauroona ufa amiqimasee irinau. <sup>15</sup> Mi anaaseefa faqa mina maaqaki akaqausa marusa faqa iriseeqa nammari maraqau. Nammari maraseenoo maaqi qimasee sandanainai qidanoo maasa qimaqiminu. Innee qiniara kuqaa Karaambaiqa saqarikidanoo fee qimasee innee aigamausa qini maaqaki ani amiqimasee mariaqae qafaqa doo maasa miqimniqiafana.

*Pauroosa Sirasisa maanaaqaa aundurakinaa faafasaaqaa aqianau.*

<sup>16</sup> Moo faasaana kafa innaaru qiraree qimasee nammari afainni ooqumariafanano moo maanaaqaa fannoo maasa aanai paqurinau. Mi manaqafa faafasaaqaa aakimarufa marufanoo mi faafasaaqafa dadaaqufanoo mi manaqafa kasooqagee kambiqaaninna ainainara maqee tamummaqaseenoo doo mifa quqoo kai mina anoona kambiqee marinau. Moomoosa mi manaqaa funnai oonureeqa qimamidaqa qiqau. Feefaurum-saifana maasaki kasooqagee kambiqaaninna ainainara akooroomasee qimanniminaqa mina akiaqara feefauru amianauree qufaqa mi manaqanasaa rakisimarusu miqi qufaqa fira munnimma auqu ramasaida maree mariqau. <sup>17</sup> Maasa Pauroona faqa fufanoo mi manaqafa maasa faqa fimarinau. Fidanoo faafasaaqaa dadaaqufanoo fira kari faaqarumaseenoo maaqi qimasee nári tamummaqasee misaqanna marusa aigamausa qimanniminu. Maa fasiqa namusa fira Anutuna uriqararana saika faiqi namu maridaqa innaarunai fimari aana uqannifiqarara ani mariasa maridaqa. <sup>18</sup> Faasaambaasaana moomoo kari mi ufana qimanniminoo nimarinau.

Miqi marufanoo Pauroofa qafuofanoo akooqoofanoo quandaki minakinaa faafasaaqaa qimaminoo qinau. Yisufa Anutuna asaku mundirafa qimaqimifaqa qimamidaqa anee maa manaqana aunduraindari rafudamaki fua.

Miqi qufanoo miqookai mi faafasaaqafa raudamaki sandanau.

*Mi maqannaasa Pauroosa Sirasisa rumbaqa.*

<sup>19</sup> Mi manaqana rakisirausa mina qafamasee boo qimasee naqimasee maasa minasaqaraana munnimma firaana maraanauree. Miqi qimasee aanoomasee Pauroona faqa Sirasina faqa qumareeqa rarisamammaree kiapana oopisaki quqaqau. Mi oopisafa sia kaqinni marinau, makeeta qambaana marufafaq misa Pauroosa Sirasisa rarisamasee mi oopisanaki quqasee aiqama kiapausa naaramasee unna qimasee qiqau. <sup>20</sup> Maa fasiqanda Yuda maqannaaganda maasa taunnaki anireeqa mandainaina oosana oosana ugeeraidaqa. <sup>21</sup> Misa nari sandufa qimaqimiafaqa kaqi runna kai ubeekamaqi-maqaidaqa. Maasa Roomma maqanna sandufa ameemaana maridaqa nanaree kaqi runna ubeekamaqimaqida fee.

<sup>22</sup> Faiqi anaasee aiqama minara kuqaa kuqaa qufaqa kiapausa iriseeqa niranaqoofaqa Pauroosa Sirasisa qamunna uturuqusee miqanda mara quqasee sundiaufa qimannim-ufaqa unnana samu naruqee qufaqa amiqimandee firaqoo nariqau. <sup>23</sup> Naruseeqa karabusa maqaki quqasee minasaa rakisimaruna qimamiqau. <sup>24</sup> Anee amiqimasee maqanda rumbaa qufanoo mifa karabusa qambaana oosiranaki quqaseenoo niku nisauku saqari mammaaqai quqasee rumbanau. (Miqanda quqasee sandaifanoo misasaa rakisiinafa mifa kuquannoo. Karabusa rakisirafa nari kuqiranara rufiaseenoo amiqi-masee ummarasee rumbanau.)

<sup>25</sup> Eendamugusai Pauroosa Sirasisa nifaaqa nidaqimaruqafa aupuraidaqa sia mi aupurarannara iriqau kaqi innaaru qidaqa Anutunara amooqidaqa minasaa asasira idi reemarufafa karabusauqaindi moomoosa irimariqau. <sup>26</sup> Miqi marufanoo firaqoo tautu-mafufanoo maqa inaakufa kasi kasinau. Mi maqafa kasinoo karabusa maqa faqa aiqama kasi kasimma quqasoofanoo karabusa kooqiuqa narikai atuafufanoo karabusa rumbee-qoo sainandausa faqa nari kai idukuakidanoo nari kai maqasaa aqufinau. <sup>27-28</sup> Karabusa rakisirafa kaqa kai tiqinoo mariufa tautinoo findifinoo qafoofanoo karabusa kooqi atuanoo marufanoo qafeenoo Oo aiqama karabusa fasiqa doo sandamambi misa miqiana akiaqara firaasauqa qini darifoora saina qeeqa kai qeeqa darusee kuquanee qimaseenoo nari rakimaru paipana qumareenoo minannai nari raquru amianeerufanoo Pauroofa rumbara maqakiqari mina qafamaseenoo firaakari faafa rumasee qimaminau. Sia anee anenna asumu kuridia, maasa aiqama kaqi maridaqa.

<sup>29</sup> Karabusa rakisirafa mina iriseenoo qoomara nameeraqufaqa qooma qumbi amufanoo qumareenoo sandeenoo rumbara maqaki Pauroosa Sirasisa kuqaa anonaufa qimariaqandee qimasee aqugeenoo aindiriroofanoo miqanda nikukina ooqi mareenoo maqasaa aqufinau. <sup>30</sup> Miqooqari findifinoo miqanda mi maqanakinaana nifqeenoo madaanao oqureenoo irammirino qinau. Inneeqara qini naqimasaifaqee innaarunai asumu marianauree.

<sup>31</sup> Miqi qufaqa miqanda qiqau karaambaiqa Yisunasaa munduseenana doo minaki keeqaa. Miqinana innaarunai asumu marinnarano. Anee faqa ani maqaki mariasa faqa miqinaqa miqiaqa.

<sup>32</sup> Miqi qimasee Karaambaiqa ufa oosana oosana mi fasiqana faqa mina maqaki marusa faqa qimannimiqau. <sup>33</sup> Karabusasaa rakisirafa miqanda ufa iri iseenoo mi eendamugusanaki Pauroona faqa Sirasina faqa maramareenoo saamu nariiqoonammarinnai fidika augeeseenoo nari faqa nari aiku asauku faqa aiqamausa amaana nammari maraqau. <sup>34</sup> Miqooqari karabusa rakisirafa Pauroona faqa Sirasina faqa nifiqee nari maqaki murusee narana nimisoofaqa naqau. Karabusasaa rakisimarufa nari aiku asauku faqa doo maqee Anutunaki keeqafuafanoo maasaki asasirafa uriqaranoo maridanoo fee qiqau.

<sup>35</sup> Iqaqoofanoo kananaana Roomma maqanna kiapafa poorisa niqifoofaqa Innee oonuree qifanoo karabusasaa rakisirafa eenda rumbaqaqiganda idukisainaqa fuaqa.

<sup>36</sup> Karabusasaa rakisirafa mina iriseenoo Pauroona qimaminoo qinau. Maasa kiapausa ani faqa Sirasina faqa idukuqee qiafaqa doo inneeqara amanammi doo fuaqa. Kaqi ireeda kai amiqimasee fuaqa.

<sup>37</sup> Miqi qufanoo Pauroofa mina iriseenoo maaqi qimasee Poorisa qimanniminau. Maqanda Roomma maqannaasa ququsaki marunasa maridaqa. Misa nariqa sandufa rukiaasa. Sia andeeqasee maqanda fuanaura. Iria, kaqi fifau sia ufa iriranaki aiqamausa nifusaa maqanda dariisee karabusaki maqanda quqaannanara. Doo maqee fee misa maqandara ireeda kukeeqaki qumee fuaqee qida fee, sia fuanaura. Misa nariqa kai akooqoo aniree maqanda idukusaifaqa fuanaura. <sup>38</sup> Poorisa mi ufana maree munu kiapausa qimannimufaqa iriseeqa Roomma maqanna ququsaki maruqandara iriseeqa Roomma maqanna firaa kiapafa minara iriseenoo maasa daruandoo qimasee kaaqa rufiaqa. <sup>39</sup> Rufiaseeqa misa karabusa maqaki oonureeqa Pauroosa Sirasisa

qimudaoo qimasee reendeenamasee nifeeqeenoo madaana qugasee qimannimiqa. Doo inneqara raudamakiq Firipi maqusaindari moosaa fuqa.

<sup>40</sup> Miqi qimasoofaqa Pauroosa Sirasisa eedoo qimasee raudamaki Ridia nammarina maaqaki keeqaqa. Miqoo misa Yisuna ufa irimarusa paqurimasee pooduqara ufa oosana oosana qimannimiseeqa doo qugasee moosaa fiqau.

## 17

*Pauroosa Sirasisa Teesaronika maqusai fiqau.*

<sup>1</sup> Pauroosa Sirasisa Firipi maqusaindari findifi fidaqa Amafipoorisa maqusa faqa Apooroonia maqusa faqa fi aikateeqa Teesaronika maqusai oonuraqa. Mi maqusanaki Yuda maqanna amaana maqa marinau. <sup>2</sup> Pauroofa narooosana mareenoo minaki keeqafinoo misa faqa ufa qinau. Tamummaqara fasiqauqa akarakinaana asaana rumaseenoo minakinaa ufa qimannimufafa nari qimami nari qimami qimariqau. Qaaramoo Saririqasaa miqimarinau. <sup>3</sup> Pauroofa tamummaqara ufakinaana qumareenoo asauku mundirafa aupuramasee kuqunara faqa Anutufa mina kafa mara findifunara faqa qimannimarinau. Miqidanoo Pauroofa qimannimino qinau Maa fasiqafa Yisufa qinee qimannimunafa mifa kai oogai Anutuna asauku mundirafa maridanoo. <sup>4</sup> Yuda maqanna iriseeqa akaqausa Pauroofunnai fiqau. Kirisa maqannaasa Anutunara rimarusa moomosa iriseeqa misa faqa misasaa atooqau. Uriqarara aanaaseeqa moomosa faqa iriseeqa kuqaa fee qimasee misa faqa atooqau.

<sup>5-7</sup> Yuda maqanna akaqausa nikoqee marusa rairai qimasee aanaamuru moomoo nifiqaidanoommifoo qimasee manda fasiqauqa kudi fasiqauqa naaramasoo faqa moodaanaki suqufiqa taunna qambaanaai oonuree aniree masee aanoo fraana uqeeraqa. Misa suqufufafa Yasoon maaqa oonu upukamaseeqa Pauroosa Sirasisara maridammiafoo qimasee rapeemasee nindafoo faqa sia marufafa Yasoon faqa Yisuna ufa irimarusa akaqausa kai mi maqanakinaana paqurimasee maqamau rarisee kiapausunna munuseeqa maaqi qiqau. Nindafa maa fasiqausa aiqama maqusa maqusa mandufa uqeeraqa niniaasa ifafa maa maqusanaki faqa aniraafanoo Yasoonafa mareeqeenoo nari maaqaki quqasaifaqa faiqeeqa. Misa maasa Roomma maqanna karaambaiqa sandufa aiqama rukiidaqa misa maasa Roomma maqanna karaambaiqa minauqu Sisaana arusee nari karaambaiqa moo mina auqu Yisufa mina auqu uqeeraidaqa miqidaqa.

<sup>8</sup> Miqi qimasoofaqa faiqi anaasee aiqamausa kiapausa faqa mi fuka karaambaiqafa kambiqafinano maasa Roomma maqanna qeeqa karaambaiqa namufafa daruandoo qimasee fraaqoo tautiqau. <sup>9</sup> Kiapausa Yasoon saimbaqa Yisuna ufa irimarusa faqa aiqama munnimmara qufafa nimisoo faqa idukiqau.

*Pauroosa Sirasisa Beereea maqusai fiqau.*

<sup>10</sup> Yisuna ufa irimarusa marufanoo eendufafa Pauroosa Sirasisa nifiqa quqasoofafa asukunai Beereea maqusai fiqau. Mi maqusanai oonureeqa Yuda maqannaasa amaana maqaki keeqaqa. <sup>11</sup> Beereea maqusanaasa sia Teesaronika maqanna naanna ree marusa misa irirana irimarusa mariqau. Misa faasaambaasaana afeekaikamandee karaambaiqa fasaasa ufa iriqau. Misa tamummaqara fasiqauqa ufa akarakinaana randasee qafee mariqau Pauroona ufara kuqaa anoonee sia fee anoonee qimasee akarakinaa ufauqara randaqa. <sup>12</sup> Miqidaqa Yuda maqannaasa faqa Kirisa maqannaasa faiqi fraasa moomoo faqa Kirisa maqanna aanaaseeqa moomoo faqa misa aiqama Yisunara kuqaa anoonee qimasee irimarqau. <sup>13-14</sup> Teesaronikai maru Yuda maqannaasa minara iriseeqa Beereea maqusai oonuree faiqi anaasee aiqama nirana fundakusoofafa Yisuna ufa irimarusa faiqi fraasa nifasausaikirausa Pauroona umee aqiqoofanoo ooruku nammari afainni finau. Sirasifa faqa Timootifa faqa kaqi miqoo mariqau. <sup>15</sup> Pauroona afiqee fusa Ateensa maqusai munu aiseeqa oonurandee anireeqa Sirasisa Timootisa qimannimiqa qiqau. Pauroofa inniqara naaraidanoo doo Ateensa maqusai fuqa.

*Pauroofa Ateensa maqusai finau.*

<sup>16</sup> Pauroofa Ateensa maqusai Timootisa Sirasisa nifeesidanoo nindafoofafa Ateensa maqusanaasa maqannaai faqa ooninnai faqa saqarinnoo faqa oosana oosana ainaina ninaana auqusee maasa Anutu fee qimasee innaaru qimariqau. Pauroofa mina qafamasoo fanoo akooqanau. <sup>17</sup> Firaqoo akooqoofanoo akooqeenoo apatufanoo Yuda maqanna amaana maqaki keeqafufanoo Yuda maqannaasa faqa aanaamuru minaki anikeeqeemarusa faqa Yisunara ufa qimarinau. Maqusa qambaanaai faqa faiqi anaasee faqa aiqamai ufa qinoo ninau.

<sup>18</sup> Ateensa maqusai irirana fiqararawsa maqee maqee suqida marunaki suqimariqau. Oosana oosana sukuraki keeqeusa Ateensa maqusai maqee maqee suqimariqau. Eepikurianna sukura tisaaquqaa moo iriranamau fimariasa faqa Sitookika sukura tisaaquqaa misa moo iriranamau fimariasa faqa Pauroona ufa atikai iriseeqa noori uqeeraseeqa Pauroonara maaqi qimasee uteeti qidaqa qiqau. Maa iriranna siai fasiqafa nari afaafa fifau amooqida nana ufee qidanoo fee. Akaqausa maaqi qiqau. Mifa aanaamuru Anutusara qidanoo. Pauroofa Yisufa kuqiranakiqari findifunara qimannimufaqa misa tautumasee dapi ufa qidaqa uteeti qimariqau. <sup>19</sup> Misa miqi qimasee Pauroona afaqamaree firaa akara maaqa mina auqu Areeoopakusa mi maqanaki fiqau. Firaa irirana faqaasa kai minaki suqimarunaki afaqee fiqau. Minaki suquseeqa Pauroonara irammiriqa qiqau. Anee fuka ufa qimannimianaqa maasa mina irirara suqidaqa. <sup>20</sup> Mi ufana qiannanaki maasa akaqainainara randaidaqa. [<sup>21</sup> Ateensa maqusanasa faqa aanaamuru animarusa faqa oosana oosana fuka irirana irianee qidaqa minara kai irimaree fimariqau. Misa minara Pauroona irammiri mariqau.]

<sup>22</sup> Pauroofa mina iriseenoo misa noorinni findifinoo qimanniminoo qinau. Oo innee Ateensa maqusanasa qinee mai anidaqa inni oosana qafaidaqa iridaqa kaaqa innee Anutuna oosana oosana ainainannai nimana auquseeqa maasa Anutusee qimasaidaqa innaaru qiganuusa. <sup>23</sup> Qinee inni maqusai oonuree aniree niniiqa inneeqa aanda arusee tatufimari qaindausa qafeeqa. Innee moomoo Anutusara oosana oosana innaaru qimariasa marifaqa qinee qafeeqa. Aiqama qaindaugasaa mi anutusa nuqu akara rinoo marifaqa qafeeqa. Mooqaindasaa akara kai rinoo marifaqa qafeeqa. Sia maasa irunna Anutune qimasee akara kai rumaqaafaqa qafeeqa. Mee innee sia irimaria Anutuna minara innaaru qimarianara mina auqu oosana koorooianaara.

<sup>24</sup> Anutufa innaaruna faqa maqa faqa aundurakinaa ainaina marina minauqa auqu Anutufa maridanoo. Mifa innaaruna faqa maqa faqa auqafa mi ainaina karaambaqa maridanoo. Sia faiqi nisaukunnai auqeeqee amaana maqaki quqaqaafau maridanoofau. <sup>25</sup> Mifa nari kai naanna faqa marirana faqa faiqi faiqi nimimarifa maridanoo. Mifa nana ainainaree sarauimarifa marinaqee maasa qeeqa iriranannai kadaapirumeeqee amianauree, sia amana. Aiqama ainana nari kai auquqoofa kai maridanoo. <sup>26</sup> Mifa kai moodaa fasiqa auquqoonasaaqari kai aiqama maqanna kambiaqa maridaqa. Mifa narikai oosana aroonakiqari aiqama aanaamuru quqannisaqoosa kai maridaqa. Mifa qufaqa misa marirana oosumma nimaqoonakiqa kai marimaree fimariafanoo. <sup>27</sup> Sia fifau, ooqai Anutufa miqinau. Asukunaki maridaqa Anutunara mikimakidaqa randaidaqa paqurinafa paquriaqee qimaqonna miqimaqonna miqi mariafanoo. Sia Anutufa faiqi nianai marifa maridanoo. Faiqi naaqa maridanoo. <sup>28</sup> Mina mariranaki kasiranaki maasa maridaqa. Inni ufasaa rakisirawsa misa faqa minara maaqi qimariafanoo maasa faqa nana faiqi namu kai maridaqee qidaqa.

<sup>29</sup> Misa miqi qimaqonna qinee minara minakina ookaamasee qinee maaqi qidaqa. Maasa Anutuna faiqi namu maridaqa naqimasee maasa quandakina qeeqa qikoona amana koorannai siruaannai ooninnai mina ammeemee rianauree. Sia andeeqanoo maridanoo.

<sup>30</sup> Ooqai faiqi misa Anutunara randaidaqa asukunakinai mikimaki anidaqa mariqau. Anutufa mi kamuqoora doo aunuseenoo sia misa furufarirana akiaqara narinau maqee maa kamuqoo aiqama aanaamuru nari mandainainakiqari quandakiqa Anutufinai ubeekaaqee qidanoo. <sup>31</sup> Mifa aiqama maqannaasa moodaa faasaana ufa irisee nari andeeqaranannai andeeqannisaannoo. Doo mifa utaqaqamaqifanoo mi faasaannafa maridanoo. Ufa irimari fasiqafa faqa utaqaqamaqifa maridanoo. Mi ufana irimari fasiqana Anutufa kuqiranakinaana mara findifunannai kooroo inoo maridanoo.

<sup>32</sup> Irirana faqaasa suqimarusa kuqiranakiqari findifunara qimannimufaqa akaqausa naanaidara qimariqau. Akaqausa kafaa moo kari irianee qiqau. <sup>33</sup> Miqi qimasoofoano Pauroofa raudamakinoo finau. <sup>34</sup> Fufanoo faiqi akaqausa minasaa atooqafi mina ufa irimariqau. Moo fasiqa auqu Dioonisiusafa ufa suqira maqa Areeoopakusa suqira maqaki keeqee marufa marinau. Anaasee moo auqu Damariasa nammarifa mifa faqa faiqi anaasee akaqausa misa faqa Pauroona ufara kuqaa fee qimasee minasaa atooqauqau.

## 18

### *Pauroofa Ateensa maqusaindara Koorinti maqusai finau.*

<sup>1</sup> Pauroofa Sirasina faqa Timootina faqa nifeesu sianoo Ateensa maqusa quqaseenoo Koorinti maqusai finau. <sup>2</sup> Koorinti maqusai qiqoo adeedi marufanoo oonureenoo faiqi moo paqurinau. Mina auqu Akuiraafa marinau. Akuiraafa Poontiusa maqa maaqai kambiqoofa Itari maqa maaqai oonu marinau. (Itari maqa maaqaki Roomma maqasaa

firaa kiapafa miqoo marufanoo mina maqusa marinau.) Itari maqa maaqai mariufanoo firaa kiapafa minauqu Karaudiusafa Yuda maqannaa aiqama asaquunimaqasoofaqa quqasee daraaniqau. Akuiraafa Yuda maqannaa marufanoo asaqusoofanoo nari anaqaq Pirisira nammari sandiri Koorinti maqasai finau. <sup>3</sup> Oonu marufanoo Pauroofa mina paqurimaseenoo mina faqa maridanoo dadaaqidanoo burimakau apatannai uqiqaana maaqa usakee marinau. Akuiraaasa Pauroosa mi ainainnirana akoofasaqara marida usakeemariqau.

<sup>4</sup> Pauroofa aiqama kari Saririqasaa Yuda maqannaa ufa suqira maaqaki keeqafidanoo naamuaqira ufa Yisunara qimannimarinau. Yuda maqannaa faqa Kirisa maqannaa faqa qimannimarinau.

<sup>5</sup> Sirasisa Timootisa Maseedoonia maqusaindari aniroofanoo Pauroofa sia Saririqa kai aiqama faasaambaasaana Anutuna asauku mundirana Yisunara Yuda maqannaasa naamuaqima nimaqee marinau.

<sup>6</sup> Miqimarufanoo nikoqoofaqa Yuda maqannaa Pauroona mandufa sukufa qima-maqaqau. Miqi qufanoo Pauroofa rutaqi findifinoo doo nari asaukunnai nari afaaqain-daraa kookoomma aisooru fatikeeqee Yuda maqannaa ninaamu aranau. Inneeamma dapikirana oosana araafanoo. Qinee amiqirannai inni mara quqaunaqa inneeqa kai mandaatata fimariafanoo doo innindi kai, sia qinindifau maridanoo. Doo maqee maqooqari doo qinee inni Yuda maqannaa minnisee aanaamuru qimannimianaura.

<sup>7</sup> Pauroofa miqi qimaseenoo misa minniseenoo aanaamuru fasiqa maaqaki oonu marinau. Mi fasiqana auqu Titiusa moo auqu Yusatusafa maridanoo mina maaqa Yuda maqannaa ufa suqira maaqa adeedi marufanoo Pauroofa minaki marinau. Titiusafa moo auqu Yusatusafa Anutunara innaaru qimaru fasiqafa aanaamuru maridanoo Yuda maqannaasa amaana ufa irifa maqee Yisuna ufa irimarufa marufanoo Pauroofa mina faqa oonu marinau. <sup>8</sup> Yuda maqannaa ufa suqira maqasaa rakisirafa minauqu Kirisipusafa maridanoo Yisuna ufara kuqaa fee qimarufa nari faiqi anaasee faqa Koorinti maqannaasa moomoosa faqa kuqaa fee qimasee nammari maraqau.

<sup>9</sup> Pauroofa moo eendaki faiqagee ufanoo qainasaa maaqimasee afunnaranau. Qainaki Anutufa Pauroona qimaminoo qinau. Pauroo sia anee maaqooqarasaara rufiaa. Anee kaqi ufa qida maria. Sia anee minnisaa. <sup>10</sup> Qinee ani faqa kukeeqai maridaqa dadaaqidaqa. Maa Koorinti maqusanakina faiqi anaasee moomoo qinindi maridaqa qinee ani namuqaaki mariasa rafaqa fuaqaq sia misa aidafirana ani amifaranoo. <sup>11</sup> Pauroofa mina iriseenoo afaqa quqasee miqoo marinau. Maridanoo Anutuna ufa qimannimarinau. Miqidanoo aukuaana moodaa maraseenoo moo aukuaana qam-baanasaa finoo taikanau.

<sup>12-13</sup> Pauroofa miqoo Koorinti maqasai kaqi marufanoo Kirisa maqasaa rakisimaru kiapafa taikafufanoo Roomma maqannaa kiapafa fraafaikirafa moo fuka kiapafa aqioqoofanoo ooqeenana amaqaaki animarinau. Mi kiapana auqu Karioofa marinau. Miqoo maria Yuda maqannaasa Pauroona namuqaa fuka kiapafa animariqoo fee qimasee Pauroona qumaree rariseeqa fuka kiapafinai munuseeqa maaqi qimasee unna qimasee qimamiqau. Kiapa, maa fasiqafa maasara Roomma maqannaa sandufa rukiaranaki maasa qifeeqaidanoo. Mifa maasara inneeqa naaruqaa oosana minniseeqa maqee qini fuka oosana qimannimunnana mi mau fidaqa Anutunara innaaru qiaqee qidanoo ufa rukiaranaki maasa qifeeqaidanoo.

<sup>14</sup> Miqi qufanoo Pauroofa ufa qianeerufanoo Karioofa Yuda maqannaasa maaqi qimasee qimanniminu. Maa ufana sia sandufa rukiarafa maridanoo sia moo mandainana maraidanoo. Miqinoo marinaqau inni ufa andeeqaseefau irini. <sup>15</sup> Maa ufana fifau ufa kai oosana oosana ufa faqa nuqu faqa inni sandufa kai maridanoo. Qinee miqira fifau ainaina sia qinee irianaura inneeqa kai.

<sup>16-17</sup> Miqi qimaseenoo kiapafa aanoomasee fukifaakiufaqa koota maqakiqari Yuda maqannaasa raudamakufaqa miqooqaraasa, Yuda maqannaa amaana maqasaa rakisirana mina auqu Soosateeneesana qumara maree mini kiapana kooqiki quqasee unnaanasamu fraaqoo uqafiqaqau. Karioofa mina qafooofanoo akooqoofanoo sia minara irinoo mana manaminuau.

*Pauroofa Koorinti maqusaindari Antiooka maqasai sipaki finau.*

<sup>18</sup> Miqooqari Pauroofa Koorinti maqasai faiqi firasaa nifasausaikirausa misa saimbaqa kaqikaqoo kisaqaqasaa marinau. Koorinti maqasai kaqi maridanoo minniseenoo mina dinatinni Keenakareea maqasai oonu mi maqusanaki maridanoo Yuda maqannaa naanna raanee qimaseenoo moo ainainara qima afeekaikamandeenoo akiaqa maqanamua faqa indufu aquseenoo quqaseenoo sipaki akaramafufanoo Pirisira nammarina faqa Akuiraaana faqa miqanda qisafaaqi faqa Siria maqa maaqai finau. <sup>19-21</sup> Sipa

fannoo ooruku nammari taqamareenoo Siria maqa maaqai fidanoo Efeesusaa maqusai naaree oonuranau. Oonureenoo Pauroofa Yuda maqannaaf ufa suqira maqaki keeqa-fufanoo Yisunara naamuqimasoofofaqaa misa qiqau anee kisaagasaa maridana maasa qimaqimia qufanoo Pauroofa maaqi qimasee nari qimanniminu. Anutufa qiniara kafaa aniannee qinnanara kafaa oonurandee anianaara. Miqi qimaseenoo Piriisira nammarina faqa Akuirana faqa miqoo Efeesusaa maqusai quqanniseenoo sipaki akaramafufanoo Isaraee maqa maaqai Seesareea maqusai finau.

<sup>22</sup> Sipa fannoo Pauroona afiqee Seesareea maqusai munaisoofanoo afuqakufanoo maqamau Yeerusareenni ooru finau. Oorureenoo nari Yisuna ufa irimariisa nari akaqaafasaakiraua nindafeenoo kaqikaagoo misa faqa marinoo oorurandee Antiooka maqusai indaaru mariunnai kafaa finau. <sup>23</sup> Antiooka maqusai kaqikaagoo marinoo kafaa findifinoo Karatia maqa maaqaki faqa Firikia maqa maaqaki faqa oonuree anireenoo Yisuna ufa irimarusa pooduqara ufa qimanniminoo nufaqa Yisuna ufara afeekaikiqau.

*Apooroosafa Efeesusaa maqusai Yisuna ufa irimarusa dadaaqinuu.*

<sup>24</sup> Yuda maqannaaf fasiqaa moo auqu Apooroosafa Areekasandiria maqusai kambiqoofa mi fasiqafa Efeesusaa maqusai ani marinuu. Mifa amiqimandee kaaqa ufa qimarufa. Mooseena sandufara faqa tamummaqara ufa akara faqa kaaqa mi ufausa amiqimandee irimarufa marinuu. <sup>25</sup> Yisuna ufa irimarusa mi fasiqana Yisuna ufa amiqimasee qimamisoofanoo irimarufa marinuu. Mifa maqee maqee andeeqasee Yisunara faiqi anaasee qimannimidanoo kaaqa fuki faaki qimarufa marinuu. Mifa ooqai Yoohaneefa nammari nimiru nammarina maroofa Yisuna nammariara sia irinuu. <sup>26</sup> Apooroosafa mifa Efeesusaa maqusai anireenoo Yuda maqannaaf ufa sugira maqaki paasoosamandaada qimannimamarufanoo Akuirafa faqa Piriisira nammarifa faqa mina ufa iriseeqa nari maaqaki mara quqaseeqa andeeqasee Anutuna aanara mariranara Apooroosana aamua qimariqau.

<sup>27</sup> Apooroosafa Kirisa maqa maaqai firaree qimasoofofa Efeesusaa maqusannaasa Yisuna ufa irimarusa mina akaqaafasaakiraua dadaaqira ufa pasaki maaqi qimasee akarariqau. Innee Kirisa maqannaasa innee amiqimasee mara fasiqana oonu afiqee-qee quqaaga. Miqimasee akara rummamufanoo mareefinuu. Kirisa maqa maaqai maridanoo Apooroosafa Yisuna ufa irimarusa firaagoo dadaaqinuu moomoosa Anutufa kukeeqasee dadaaqufafa Yisunara irisee minasaa mundimariqau. Miqiraua Apooroosafa dadaaqimarinuu. <sup>28</sup> Yuda maqannaasa faqa akooqoo maqusa qambaanaa Apooroosafa oori runuseenoo Yuda maqannaasa Yisunara afeekaikamasee qimannim-ufafa moomoosa Yisunara doo kuqaa anoonee qimariqau. Apooroosafa Mooseena sandufakinaana tamummaqara fasiqa akarakinaana Anutuna asaku mundirafa kuqaa Yisufa marinara uqannifiqasoofafa moomoosa iriqa kuqaa Yisufa Anutuna asaku mundira fee qimariqau. Apooroosafa mi maqusanaki maridanoo Yisuna ufa irimarusa pooduqamannimaqanuu.

## 19

*Pauroofa Efeesusaa maqusai Yisunara amiqimasee qimanniminuu.*

<sup>1</sup> Apooroosafa Koorinti maqusai marufanoo Pauroofa Asia maqa maaqai anireenoo maqusa maqusa maqamau oonuree aniree Yisuna aufakiana qimanniminoo ninuu. Miqidanoo Efeesusaa firaa taunnakina oogu finuu. Ooqureenoo Yisuna ufa irimarusa akaqausa paqurimasee irammirinoo qinuu. <sup>2</sup> Innee indaaru Yisunasaa mundiqaq, mikari naaqqara andeeqara maraquna maraqeeiqau. Misa mi ufana iriseeqa qiqau. Maasa sia naaqqara maraqunara iridaqa. Maridanoo fee sia fee maridanoo fee, sia maasa minara iridaqa. <sup>3</sup> Pauroofa minara iriseenoo kaifaa irammirinoo qinuu. Innee indaaru nana nammari fee maraqau. Qufafa misa qiqau. Maasa Yoohaneefa nammari nimiruna nammarina maraafanausa maridaqa. <sup>4</sup> Pauroofa mina iriseenoo maaqi qimasee qimanniminuu. Yoohaneena nammari fannoo nari mandainainasaqari quandee marifa maridanoo. Yoohaneefa nammari nimirufafa kaqi maru aukuaana Isaraee maqannaasa maaqi qimasee qimanniminoo qinuu. Qini qinaaqianna kambiiqainna fasiqafa minasaa kuqaa mundufuqaa. Yoohaneefa miqi qinoo Yisunara qinuu.

<sup>5</sup> Mi Efeesusaa maqannaasa Pauroona mi ufana iriseeqa doo Karaambaiqa Yisuna nammari maraqau. <sup>6</sup> Nammari marasoofanoo Pauroofa misasaa asaku mundusoofanoo naaqqara maraquna fannoo misa naakufufafa aanaamuru ufa sia irimarufana qimariqau. Misa Anutuna ufara faqa qimariqau.

<sup>7-8</sup> Miqi qimarusa qisaku taikasee qikunni oogu qaara marasee Efeesusaa maqannaaf ufa oosana qimarusa mariqau. Naaqqara maraquna fannoo misaki aqufufanoo Pauroofa maridanoo qaaramoo quqoonasaa Yuda maqannaasa Efeesusaa maqusai ani misa



faqa mariasa nári naaduma ufa suqira maqaki keeqafi paasoosamasee Anutuna ququsara naamuqima nimaqee marinau. <sup>9</sup> Akaqausa Pauroona ufa iriseeqa karaambaiqa Yisuna ufamau firanara nikooqoofaqa sukufa manda ufa kai aiqamatia qiqau. Pauroofa miqi quna iriseenoo Yisuna ufa irimarusa nári akaqaafasaaakirausa nifiqamareenoo misa Yuda maqannaasa rakeemma quqaseenoo raudamaku fanoo mi taunnanaki kai moo ufa suqira maqaki keeqanau, mi ufa suqira maqana akoofa minauqu Tiranusafa marinau. Aiqama faasambaasaana Pauroofa mi ufa suqira maqanaki faiqi anaasee nifiqamareenoo minaki murusaidanoo Yisuna aufakiana nári qimami nári qimami qimariqau.

<sup>10</sup> Pauroofa miqimammaree fimarufanoo qaara aukwana aiqaroonara Asia maqa maqaki marusa Yuda maqanna faqa Asia maqanna faqa misaqa marusa faqa aiqama Karaambaiqa ufa iriqau.

*Faiqi naunduraki maru faafasaaqana aqiqoosakai nári isoofaqa quqasee sandaqau.*

<sup>11</sup> Anutufa Pauroonakinaana faiqi sia amana auqaaqaa ira ainaina faiqi nifaafa andeeqee mariana naaquqara ainaina misa nifusaa auqusoofaqa qafeeqa Yisunara kuqaa anoona fee qiqau. <sup>12</sup> Faiqi anaasee aurimarusa nikaqaafasaa Pauroona ankisa fee qamunna fee ani mara maree aurimarusa nimufanoo aurirafa taikee marinau, faafasaaqa naakirafa rafudamaki sandeemarinau. <sup>13</sup> Yuda maqannaasa akaqausa misa faqa faafasaaqa naakimarusa niqiqeemarusu mariqau. Miqi qimasee aanoomasee Pauroona faqa Sirasina faqa qumareeqa rarisamammaree kiapana oopisaki quqaqau. Mi oopisafa sia kaqinni marinau, makeeta qambaana marufaqa misa Pauroosa Sirasina rarisamasee mi oopisanaki quqasee aiqama kiapausa naaramasee unna qimasee qiqau. Moodaa fasiqa faiqinamu qisauku dinni taikasee dinni ani qaraqanda marasee faafasaaqa niqiqee marusa mariqau.

<sup>14-15</sup> Misa nikoona auqu Sikefaafa marinau Yuda maqannaasa Anutuna aanaiqiki-rausa uriqararafa marinau. Mi fasiqana faiqi namu Pauroona oosana qafeeqa maasa faqa mina oosana amanamasee qafaanauree qimaseeqa, faiqi moo faafasaaqa aakimaruna oonuree auqamaseeqa qiqau. Anee Yisuna auqu Pauroofa qimannimimarina irisee anee raudamaki see fifua qufanoo faafasaaqa fannoo maaqi qimasee nári mi fasiqana aunduraindari misa qimanniminau. Ee, maa, qinee Yisunara iridaqa Pauroonara faqa iridaqa innee yau yausee maridee qinee sia inniara iridaqa. <sup>16</sup> Miqi qimaseenoo faiqi nári aqoondiki maru fasiqana dadaaqufanoo findifinoo firaqoo uqanna misa nári nári iseenoo misa qamunna anaqi maroofaqa kaqisamu maaqikiqari rafudamaki quqasee sandaqau.

<sup>17</sup> Efeesusa maqusa marusa faqa Yuda maqanna animarusu faqa mi ufana irisooofanoo kaaqa naaquqoofaqa Karaambaiqa Yisuna auqu firaqoo uqeeraqau. <sup>18</sup> Yisuna ufa irimarusa miquna iriseeqa Pauroofunnai suqumaree anireeqa nariqa mandainaina oosana oosana kooroo iqau. <sup>19</sup> Yisuna ufa irimarusakiqari aukainaina mandainaina afunee ainaina maraqa nusauqa nariqa manda ufa akaraki quqaqoona moodaanaki suguseeqa aiqamausa nifusaa firaqoo idaraqau. Idaqoo papiqana feefaurimaruna moodaanaki asaana rumasoofanoo maaqimminau. Fira munnimma tia (K50,000) aqimaruna ida raqau.

<sup>20</sup> Doo miqimasooofanoo Karaambaiqa ufa aiqama atinai daraanimambufanoo doo afeekaikamafinoo atukaramafinau.

*Deemeetirusafa Efeesusa maqusai firaqoo tutuqirana uqeranau.*

<sup>21</sup> Mi ainaina taikasooofanoo mina maariqoo Pauroofa qinau. Qinee maaqooqari Maseedoonia maqa maaqai faqa Kirisa maqa maaqai faqa oonuree anireemaseeqa Yeerusareenni kafiaa ooru fuaana. Miqoo ooru maridaqa Roomma maqusa oonu qafaanaura. <sup>22</sup> Miqi qimaseenoo Pauroofa Timootina faqa Eerasatusana faqa niqiqoofaqa Maseedoonia maqa maaqai indaaru fiqau. Pauroofa Asia maqa maaqai kaqi mariufanoo ninaaqiana finau.

<sup>23</sup> Efeesusa maqusai kaqi marufanoo moo mandainaina Karaambaiqa ufamau fimarusaki kambiganau. Mi aukunna misa Yisuna ufara Karaambaiqa aana fee qimariqau.

<sup>24</sup> Asia maqannaasa nári moo unna anutunara anaasee anutufa marinau maqi qimariqau. Mi anaaseena auqu Arateemisa nammarifa marinau. Mi anaasee anutuna amana Efeesusa maqusa fira amaana maqaki marinau. Ooninnai auqira amaana maqa firaatia amiqirafa uqanna marinau. Efeesusa maqusai faiqi moo auqu Deemeetirusafa maridanoo mi amaana maqana qafaidanoo mina amana kai siruauuqa maraseenoo idaki tasirisirimaseenoo moomoo kaqikaanauqa auqiiseenoo faiqi anaasee nimufaqa feefaurummasaidaqa maraaidaqa nári maaqaki munu quqasaidaqa innaaru qimariqau.

Deemeetirusafa siruaa auqimarusa uriqararafa marufaqa misa aiqama mi saikanan-nai munnimma maree mariqau. <sup>25</sup> Deemeetirusafa siruaa auqimarusa naarama moodaanaki quqaseenoo qimanniminoo qinau.

Oo maa fasiqausa maasa saikasaqari munnimma kambiqaidanoo. <sup>26</sup> Innee mi fasiqana Pauroonara iridaqa mina oosana irimariafanoo. Maasa qisaukunni auqimarunnana sia Anutufa uqannee qidanoo. Mifa Efeesusu maa maqusanaki faqa Asia maqa maaqaki aiqamai faqa Yisunara qimannimifaqa misa kuqaa fee qimasee maasa Arateemisa nammarina minnisaidaqa. <sup>27</sup> Miqidaqa maasa saika munnimma maree marunnana qusasaa mandaikiannoo. Maasa uriqarara anaasee anutuna Arateemisa nammarina amaana maqa faqa mandaikiannoo. Maasa anutufa Arateemisa nammarifa mifa faqa ureeqaannoo. Asia maqannaasa faqa aiqama maqannaasa faqa Arateemisa nammarinara innaaru qimariana doo taikeefaranoo.

<sup>28</sup> Faiqi anaasee mi ufana irisooфанoo niranaqoofaqa firaqoo faaqa fuisee qimaseeqa qiqau. Efeesusu maqanna Arateemisa nammarifa firaatia uriqararafa maridanoofee qiqau. <sup>29</sup> Mi ufafa aiqama atinnai daraanufaqa faiqi anaasee suqu fiqa dadaaqaqee qimasee Maseedooniandaraa qanda Pauroona aqoondiqa Kaiusana faqa Aristarakusana faqa Pauroona faqa Efeesusu maqusai animaruqanda qumareeqa rarisamammaree sandeeqa fira ufa suqira maqaki keeqafi minaki mi fasiqanda quqau.

<sup>30-31</sup> Pauroofa misa nindafamaseenoo minaki keeqaaneerufaqa Yisuna ufa irimarusa mina rafaafusaqau. Asia maqa maaqaki marusa uriqararusa Pauroona aqoondiqa ufa moonasaa quqasoofanoo mini qimaminoo qinau anee sia minaki keeqaa, kuqinafaara. <sup>32</sup> Faiqi anaasee moomoo uqanna fira ufa suqimara maqanaki keeqafufaqa firaqoo faaqa fuisee qimariqau. Akaqausa moo faaqariqau akaqausa moo ainaina faaqariqau. Muduka tia nanaree maasa fifau faaqarida fee qimasee siamma iriqau, kaqi fifau faaqarimariqau. <sup>33-34</sup> Yuda maqannaasa Areekasandeeranara anee findifi qimannimianee qufaqa faiqi anaasee mina qafamaseeqa oo mifee manda fasiqa marifaqee minaree faaqa fuisee qiqi ifee. Areekasandeerafa findifinoo asaukunnoo ufa rafaafafinoo qao qimasooфаqa misa aiqama mina qafamasee Yuda maqanna mo anutunafaqa fee qimasee faaqa rida qiqau. Efeesusu maqanna Arateemisa nammarifa uriqarara Anutufa maridanoo. Misa mi ufana kai firaqoo faaqa fuisee qidaqa mari mariufaqa kisaqasaa uqanna faaqa quqaida mariqau.

<sup>35</sup> Efeesusu maqusa uriqararafa moo fannoo rafaafafinoo miqinoo fubaqa rafaafafuseenoo qimanniminu.

Efeesusu maqanna fasiqauqa qini ufa iriaqa. Efeesusu maqusa Arateemisa nammarifa rakisimari maqusafa maridanoo. Sia moo fannoo minara qao qinoo maridanoo. Mina naaquqara ooni innaarunaindari aqufuna maasa mina faqa mina amaana maqa faqa rakisidaqa. <sup>36</sup> Sia moo fannoo amana mi ainainnara qao qiannoo. Minara innee doo asooaqa sia furufaramasee moo ainaina auqaqa. <sup>37</sup> Maa fasiqa qanda innee maramaree aniana sia moo amaana maqakinana qummuari mariaqanda sia maasa anaasee anutunara moo ufa qia. Nanaree fifau nifiqee ani fee. <sup>38</sup> Deemeetirusafa faqa nari moodaa saika faqaasa faqa moo fasiqa ufa amiraree qinanoo maasa ufa irira suqirafa maridanoo ufa andeeqee maria fasiqausa miqoo maridaqa misa miqookai nari ufa andeeqaaqa. <sup>39</sup> Ufa andeeqee mariafa sia amanaikifanoo faiqi anaasee ufa suqirafa nari qaanaa kai ufa suqaaqa. <sup>40</sup> Roomma maqannaasa maa fifau tutuqirana iriseeqa maasa diqifaara, misa maasara irifaqa nana ufa fee qimannimianuree sia ufa oosana maridanoo.

<sup>41</sup> Miqi qimaseenoo aiqamausa niqiqoofaqa fifainiqau.

## 20

*Pauroofa Maseedoonia maqa maaqai faqa Akaia maqa maaqai faqa finau.*

<sup>1</sup> Efeesusu maqusaki fira tutuqirafa taikoofanoo Pauroofa Yisuna ufa irimarusa suqu quqaseenoo pooduqara ufa qimannimiseenoo nimandamaseenoo doo quqasee Maseedoonia maqa maaqai finau.

<sup>2</sup> Maseedoonia maqa maaqaki oonuree aniree idanoo Yisuna ufa irimarusa pooduqara ufa maqee maqee qimannimarinu. Miqoo qaraasa pooduqama nimaqaseenoo quqasee Kirisa maqa maaqai oqureenoo miqooqari moo quqoona maranau. <sup>3</sup> Pauroofa Kirisa maqa maaqaindari sipaki akaramafufanoo Asia maqa maaqai firaree qufaqa Yuda maqannaasa irisee mina arirarufanoo moo fannoo iriseenoo Pauroona qimamufanoo rufaseenoo kafa Maseedoonia maqa maaqakinai fiqummakufanoo Tarooasa maqusai firaree qinau. <sup>4</sup> Soopateerafa Piriqusana amaaku Beereea maqusaindaraafa Pauroona faqa finau. Aristarakusafa faqa Seekundurafa faqa Maseedoonia maqannaqaqanda

Pauroona faqa fiqau. Deerabee maqusaindariafa Kaiusafa faqa finau. Tikikusafa faqa Tarooofimusafa faqa Asia maqannaqanda Timootifa faqa minamusa Pauroona faqa fiqau. <sup>5</sup> Minamusa indaaruu sipaki akaramafufaqa Tarooosa maqusai oonu marida maasara qifeesimariqau.

<sup>6</sup> Maasa Firipi maqusai ooruku siai feemu qoomaqamasee namammaree Tarooosa maqusai Pauroona faqa fiqiafana. Maasa moodaannai qisauku afuru sipaki faiqee fifiufaqa Tarooosa maqusai oonuree maasara qifeesimarusa oonu paquriqiafana. Miqoo Tarooosa maqusai maasa aiqamausa qisauku dinni taikasee dinni oonu qaara marasee faasaana mariqiafana.

*Pauroofa Tarooosa maqusai eendaki Yisuna ufa qimannimimarufanoo kumaaraa aqufinau.*

<sup>7-8</sup> Saririqa eendaki maasa faqa Yisuna ufa irimarusa aiqamausa faqa moo maaqaki suqufiqa Yisunara afaarurira narana naqau. Pauroofa kananaana fuane qe eendanaki kisaagasaa qimannimimarinau. Mi maqanaki tida moo maqasaa marinoo kafa tida moo sandaaqai auquqoofa maridanoo efeeda mirinni akinoo maridanoo. Mi maqanaki suqimarunaki eendaki qooma moomoo qeemarinau.

<sup>9</sup> Faiqi anaasee sandaaqai tidasaa suqimarufanoo Pauroofa mi eenda amuqusanaki ufa kisaagasaa qimarufanoo kumaaraa moo fannoo uinduaqa parangasaa akaramafinoo ooqufaageeida ufa irimarinau. Mi kumaaraana auqu Eeutikusafa marinau. Pauroofa kisaagasaa ufa qimarufanoo Eeutikusafa afu aunduarufanoo kaaqa faifinoo sia ufa iridanoo uinduaqasaaqari aunduaramakufanoo saamurinoo maqasaa pautaqinoo aqufinau. Aqufufaqa misa ooqu mina uqeerasee qafoofoanoo doo kaaqa kuqinoo marinau.

<sup>10</sup> Pauroofa ooqurama mi kumaaraana amuaaqa aakufufanoo oonumafi kaqaramma qumareenoo qinau sia qisee qufoo qiaqa kaqi maridanoo. <sup>11-12</sup> Miqi qimasooafaq misa qumurandee ooruree Yisunara afaaruruma naqau. Afaaruruma namasoofoanoo Pauroofa kafa qimanniminoo fifufanoo iqaqoofanoo quqasee Asoosaa maqusai maqamau finau. Fufaqa misa mi kumaaraana doo kasi marufaqa afiqamaree maaqaki munu quqasoofoanoo misa nifaaqa asasinoo amiqi amiqinau.

*Pauroofa Efeesusa maqusanaasa naarooafaqa aniroofanoo naamuaqinau.*

<sup>13</sup> Maasa Pauroona faqa nimarusa Pauroona mi maqusanai aiseeqa faasai sipaki akaramafufaqa Tarooosa maqusaindari Asoosaa maqusai nammari amuaqumau fiqvakifaqa miqoo oonureeqa Pauroona afiqarara fiqummakufaqa fiqiafana. Pauroofa nariara faiqi anaasee qimannimisee kananaana maqamau Asoosaa maqusa oonuree inni faqa sipaki fuanauranoo maasara qimasooafaqa maasa miqiqau. <sup>14</sup> Maasa sipa fannoo Asoosaa maqusai oonuroofaqa Pauroona fi afiqeeqa Mitireena maqusai fiqiafana. <sup>15</sup> Miqooqari findimeeqee sipaki fifiufaqa kananaana Kioosa maqusai oonu raqiafana. Oonu miqoo mariqa quqaseeqa kafa eendaki sipaki fifiufaqa kananaana Samoosa maqusai oonu raqiafana. Doo miqooqari figaree eendaki sipaki fifiufaqa kananaana Mireetusa maqusai oonu raqiafana. <sup>16</sup> Pauroofa sia Asia maqa maaqai kisaagasaa kasooiraree qinau. Sia Efeesusa maqusai kasooqianee qimasee figaree Yeerusareenni kaqi kaqi firaree qimasee miqoo Peendeekoosa qoomaqa nararee qimasee kaqi fiqarararee qinau.

*Pauroofa Efeesusa maqannaasa naamua qufa.*

<sup>17</sup> Sipa fannoo Mireetusa maqusai oonuroofanoo Pauroofa moo fasiqasaa ufa quqaseenoo anee maqamau oonuree Efeesusa maqusanaasa Yisuna ufa irimariasa qini qikaqaafasakiraua rakisiraua mai qumu Mireetusa maqusai qumu irisaiifaqa fuanauree qufanoo finau. <sup>18-19</sup> Efeesusa maqusanaasa mi ufana iriseeqa Mireetusa maqusai ooquroofanoo Pauroofa maaqi qimasee qimanniminoo qinau.

Ooqu indaaruu qinee Asia maqa maaqai oosana arasaafannaqooqari innee qini oosana qafeemarusu mariafanoo qinee reendeenamandee inniki Anutuna saika faiqi maridaqa inniki saikimariqiafana. Yuda maqannaasa misa qini qimaarusiranannai qikiraqarana faqa daukunu rarana faqa inniki saiki mariafannanara qini qimimariqau. <sup>20</sup> Qinee inniqa maaqakiaqa faqa maqusa qambaana faqa Yisunara qimannimi mariafanaua maridaqa. Qimannimidaqa sia moo dadaaqira ufa qeeqa daundurui sia kaqi maridanoo aiqama qimannimiqiafana. <sup>21</sup> Qinee Yuda maqannaqa faqa aanaamuru faqa amanamana kai doori runusee qimannimimariqiafana. Inneeqa mandainainara rufisee quandakinaqa Anutufinnai noori ubeekamaseeqa Karaambaiqa Yisuna asauku mundirana saqarikiqa. Miqi qimasee aauqimannimaqee mariqiafana. Innee minara faqa irimariasa mariafanoo.

<sup>22</sup> Doo maqee qinee Yeerusareenni oorufidaqa nana ainanee qiniki kambiqaanno fee, sia qinee mina iridaqa. <sup>23</sup> Qinee maqusa maqusa nimarunanoo naaquqara maraquina

fannoo miqooqaraasa qimannimisoofaqa misa quandaki qini qimaqimufaqa. Anee Yeerusareenni ooru rainaqa rumberana faqa qini qifaqaqi ifitiqnarana faqa qimifaranoo fee qimarinau. <sup>24</sup> Qinee minara iriseeqa qeeqa mariranara fifau ainainee qimaseeqa Karaambaqa Yisufa qimu saikanara mina taikarara kai kuqaa anoonee qidaqa qeeqa mariranara siamma iridaqa. Anutuna afaarira amiqira fasaasa ufa faiqi anaasee kooroomannimirana mina kai Yisufa qimu saikafa maridanoo.

<sup>25</sup> Qinee innikiaga Anutuna ququsaki marira firaanara qimannimiqa niniaafanausa marida. Maqee sia innee kafaa qini doori qiqafeefaranoo. <sup>26</sup> Doo qinee maqee maa suaninasaa doori runusee inni qimannimidaga. Innikiqari moo fannoo Yisuna ufara dapikinafa narindikai mariannoo sia qinindi. <sup>27</sup> Anutuna irirana aiqama uqanna qimannimiseeqa sia kaqikaana qeeqa qumareeqa aiqama nimiseeqa. <sup>28</sup> Innee faiqi anaasee Yisuna ufa iri mariasaa rakisimariasaa mariafanoo. Innee asumu aandaara fooqana rakisimariasaa mariafanoo Innee inneeqa marirana amiqimasee rakisiinaqa inneeqa asumu firira aandaara foora amiqimasee faiqi anaasee rakisiaqa. Anutuna naaquqara andeeqara maraqaana fannoo inni nisaukuki rakisirana quqaranara amiqimasee rakisiaqa. Anutufa nari amaaku uqanna fidikannai maqee maa maqanasaa adiaseenoo minannai Yisuna ufa irimariasaa feefaurummaseenoo doo narindikinoo, innee mi asumu aandauna firidaqa reendenamandee rakisiaqa.

<sup>29</sup> Qinee fuanaqa kaasau fainiara foora kaaqa afaidee mariasa aniree asumu aandau sia rauqi nimaqeeferanoo kaqi naruneeferanoo. <sup>30</sup> Inneeqa rakisirausakinaana akaqausa unnufa qimasee inneeqa nikaqaafasaa mareeqee kaqirunna ubeekeefaara. <sup>31</sup> Innee amiqimasee mi ainainnara rakisiaqa. Qinee qaaramoo aukuna faasaana eendaki daukunu reemarufaqa inni aiqama amiqimasee naamua qimariafanausa maridaqa.

<sup>32</sup> Doo qinee maqee Anutuna asaukuki mina afaarira ufaki mara inni quqeeqa. Mi ufana afeeka fannoo amana innisaa rakisinnimaqaidanoo afeekaikirana nimiseenoo inni mareeqeenoo Yisunaindikiga mariasaka misa saimbaqa ookaamaseenoo Yisufa misa nimira saqama qumiasana mirinni innaarunai inni faqa misa faqa nimianoo. <sup>33</sup> Qinee inniki maridaqa sia qinee moona amiqira qamunnafee siruaa fee akaqainainafee sia qini qimuqusimarusa maridaqa. <sup>34</sup> Qinee maa qeeqa qisaukunnai ainaina masaidaga narana mareemaria munnimmana marasaidaga qiqaa faqa nusa rakisinnimaqaidaga maasa sia innindi maraqafana. Innee minara amiqimasee irimarifanoo. <sup>35</sup> Qinee unandee kadaapiriranannai mandaikimarusa amiqi amiqiafana Yisufa minara maaqi qinau. Amiqira asasirafa sia ainaina maree marianakifau maridanoo. Ainaina dadaaqirana nimiranaki anoona asasirafa minaki maridanoo. Innee sia aunuaqa moosa dadaaqirara kai iaqa.

<sup>36</sup> Pauroofa mi ufana qimanniminoo maqasaa niqoori saunaraaqee qufaqa aiqamausa miqimafufanoo Anutunara innaaru qinau. <sup>37</sup> Innaaru qimasoofoqa aiqamausa ikiraqeeqa Pauroona oonumafi kaqaramma qumareeqa amooqaaqau. <sup>38</sup> Pauroofa sia qini kafaa qiqafeefaree qunara firaqqoo noori kandeeqa ikiraqaaqau. Misa miqidaqa Pauroona afiqeeqeeqa sipaki quqaaqau.

## 21

*Pauroofa Mireetusa maqusaindari quqasee Yeerusareenni finau.*

<sup>1</sup> Pauroofa maasa faqa sipaki akaramafufaqa maasa Efeesusa maqannaasara nimudaoqqidaqa nimandamaseeqa doo mafi rakeemma quqasee sipaki fiqiafana. Maasa andeeqasee fifiufaqa Koosa maqusai oonu kasoommasee miqoo faiqeeqa. Iqaqoofanoo kananaana kafaa fifiufaqa Roodeesa maqa maaqai oonuree kaqi fiqareeqa Patara maqusai fiqiafana. <sup>2</sup> Patara maqusai maasa sipa moo paqurimasee Fooenisia fimaru sipana paqurimasee minaki akaramafi fiqau. <sup>3-4</sup> Patara maqusaindari fifiufaqa Sipurusa afuma qafamaseeqa mina aikundanai fiaikateeqa andeeqasee Siria maqa maaqai fiqiafana. Siria maqa maaqai fidaqa misa maa ummaara ainainna Tiree maqusai quqaaqee quna fidaqa doo mi Tiree maqusana paqurimasee miqoo kasooiqau. Miqoo sipa maree fu ummarana minakinaana mareeqee maqasaa quqeeamarufaqa maasa Tiree maqusai Yisuna ufa irimarusa randasee paqurimasee amaana moodaa misa faqa mariqia. Misa faqa marufaqa miqooqaraasa maraqaana fannoo qimannimufaqa Pauroonara sia Yeerusareenni ooru fuannee qimariqau.

<sup>5-6</sup> Doo misa faqa marikiqa findifi sipaki aniafanaqa faiqi anaasee faqa nari faiqi namufaqa moomoosa aniree ooruku nammari afainni oondaanisaa niqoori saunarafufaqa innaaru qimasoofoqa misa nimandamaseeqa sipaki akaramafufaqa misa nari maqusai ooru fiqau.

<sup>7</sup> Sipaki Tiree maqusindari maasa Tooreemaisa maqusai oonu raqiafana. Miqoo oonuree Yisuna ufa irimarusa miqoo marusa niqafamasee moodaa faasaana misa faqa mariqiafana. <sup>8</sup> Miqooqari sipaki fiqa kananaana Seesareea maqusai oonu raqiafana. Oonureeqa Firipina maaqa maru qaannai ooru mina faqa mariqiafana. Firipifa Yisuna fasaasa qimanniminoo nufa marinau. Ooqai Yeerusareenni marufaqa niqiqoo fasiqausaki maridanoo mina mareeqee quqasoofanoo qisauku dinni taikasee dinni ani qaara marasee marusaki maridanoo munnimmaina raina nimimarufaqa mariufa Firipifa marinau. <sup>9</sup> Firipina aramuna qaara faqa qaara faqa maanaqa mariqau. Anutuna maraqaana fannoo mi manaqausa naakufufaqa Anutuna ufa faiqi anaasee qimannimirana akoofasaiqiqa maridaqa qimannimimariqau.

<sup>10</sup> Maasa Firipina faqa qaaramoo faasaana mariafananoo Yudeeaa tamummaqara fasiqa moo fannoo mina auqu Akabusafa Yudeeaa maqa maaqaindari qumuranau. <sup>11</sup> Mifa maasunnai anireenoo Pauroona pikapandauru ani qumareenoo minannai nari aiku asauku kukuqamma rumbaseenoo qinuu. Anutuna naaqqara maraqaana fannoo maaqi qimasee qidanoo. Maa pikapana akoofa Yeerusareenni ooru rainaqa maaqimmasee rumbeeqee aanaamuru nimifaranoo. <sup>12</sup> Maasa mi ufana iriseeqa maasa aiqama miqoo mariafanausa afeekaikamaseeqa sia uqanna Yeerusareenni oorufuani arifaranoo fee qiaqiafana. <sup>13</sup> Pauroofa mi ufana iriseenoo qinuu. Innee nanaree miqimasee ikiraqaidee miqi qiafanoo qini qimuqusa mandaikamma qimaqaidee. Qinee Yeerusareenni ooru raanaqa Karaambaiqa Yisunara qini rumbarana faqa qini darirana faqa doo qinee sia rufaiidaqa minara deedaqamma uqiraua nidaqa.

<sup>14</sup> Pauroofa miqi qimasooafaqa maasa qaooqirana minniseeqa maasa faqa Anutuna iriramau kai fidaqa sia ititaanaura sai kai fuanifee qiaqiafana.

<sup>15</sup> Maasa miqoo Seesareea maqusai kaqikaagoo mariqa maasa qeeqa ainaina deedaqamamaree Yeerusareenni maqamau ooru fiqiafana. <sup>16</sup> Seesareea maqusindari maasa qikaqaafasaa kirausa akaqausa maasa faqa ooru fiqau. Misa maasa ooruree marianna maqana uqaqifiqarara maasa faqa ooru fiqau. Maasa Masoona maaqaki marifaree qiaqau. Masoonafa ooqai indaaruu Yisuna ufa irimarufa marufaqa Sipurusa maqusaindaraafa marinau.

*Pauroofa Yeerusaree maqusai maridanoo Yameesana faqa ufa qinuu.*

<sup>17</sup> Maasa Yeerusareenni ooruraafannanoo Yisuna aiku asauku qumu amiqi amiqimandee qumu qifiqee ooru fiqau.

<sup>18-19</sup> Maasa miqoo ooru faqaafananoo iqaqoofanoo Pauroofa Yameesana qafarara finuu. Yisuna ufa irimarusa aiqama miqoo marufanoo Pauroofa nimandamaseenoo nari aanaamuru maaqa maaqa nimarufanoo Anutufa nari Pauroonannai aiqama ainaina auqeeunara qimanniminnau.

<sup>20</sup> Misa aiqamausa Pauroona ufa iriseeqa Anutunara aiqamausa dufi dufi qimasee asasiqau. Asamasee Pauroona qimamiqa qiaqau. Oo maasa ati, maaqoo Yuda maqannaasa Yeerusareenni mariasa misa fasaasa ufa qimamianaura. Yuda maqannaasa moomoo tauseenna doo Yeerusareenniara ridaqa. Misa Mooseena sandufasaa kaqa minara faqa Yisunara faqa ridaqa. (Yuda maqannaasa Mooseena sandufa iridaqa maasa fainanduqirane qidaqa.) <sup>21-22</sup> Pauroo misa aniara maaqi qidaqa, anee aanaamuru maqusa maqusa nidana Yuda maqanna minakiqa mariasauqa anee misara Mooseena sandufa minniseeqa maasa fainanduqirana minnisaaqee qimariannanara Yuda maqanna oosana minnisaaqee qidanoommifoo qidaqiafaqa maasa iridaqa. Aniara Yeerusareenni aniifoo qifaqa misa aniara iriseeqa aanoo qifaranoo. <sup>23</sup> Minara iriseeqa maasa qimamiannaqoo kai fua. Maaqoo qaara faqa qaara faqa fasiqa maridaqa. Misa maasa Yuda maqanna oosana marasee doo qima afeekaikamasee nikiqa maqa namufafa indufu aqiranara nisauku uqeeraseeqa Anutuna afusaa qima afeekaikamandee maridaqa. <sup>24</sup> Misa firaa amaana maqaki keeqafi nari aanaamuru mandainaina nipatasaa marina rukaseenana anee misa faqa keeqafi aneenaindi faqa rukasainanoo Anutuna afusaa anukanoo marinnaranoo. Finaukamasee anee aneenna munnimma faqa misa munnimma faqa aqua. Agusaifana anee minamusa faqa nari nikiqa asausi maqanamuu faqa indufu aquaqa. Miqi masainaaqaa aiqamausa ani qafamaseeqa anee Mooseena sandufa rukiarana aniara qunara unna qiaafoo qiaqeera. Misa aniara kuqaa Mooseena sandufamau fimarifa maridanoo qiaqeera ani aruannee qinausa sia ani arifara. <sup>25</sup> Yisuna ufa irimarusa uriqararaua Yameesana maaqaki Pauroonara qimaseeqa maaqi qiaqau. Maasa aanaamuruqa mariasa Yisuna aiku asauku kamambuusa pasa akara rumasee maaqi qimasee qimannimiqa. Innee narana moo unna anutunaree afaannaree misara dufi dufi qimariana mina minnisaaqa. Aandau fidika faqa sia naaqa. Ufaanaki arira

aandau fidikana qusinoo marina mina faqa minnisaaqa faiqí anaasee narí ummuari narí ummuarimariana faqa minnisaaqa.

<sup>26</sup> Pauroofa misa ufa iriseenoo qaara faqa qaara faqa fasiqa namu nifiqamareenoo iqaqoofanoo kananaana amaana maqaki keeqafinoo misa saimbaqa Mooseena sandufa andeeqasee finoo aanaamuru mandainaina narí apatasaa maruna rukanau. Miqimaseenoo Pauroofa amaana maqaki keeqafinoo Anutuna aanaiqikirausa qimanniminau. Qisauku moodaannai taikasee dinni ani qaaraqanda marasee faasaana maasa qifaaqasaa mandainaina anukee mariana. Mina maariqoo mina taikasaanaqa mina maariqoo miqoo innee aanaiqikirausa aandau aruseeqa Anutunara tatufirana suqaifanoo maasa rukasaunnana taikaani.

*Pauroofa amaana maqaki Yeerusareenni marufaqa qumaree arirariqau.*

<sup>27</sup> Pauroofa mi fasiqa namusa faqa amaana maqaki dinni qisauku taikasee dinni ani qaara marasee faasaana amaana maqaki marinoo taikoqookari Asia maqasaa Yuda maqanna marusa amaana maqaki Pauroona qafamasee aiqamausa nirana fundakuseeqa faqa fuisse qiga Pauroona kari qufaqa aniqumaraseeqa qigau. <sup>28</sup> Isaraee maqannaasi fasiqauqa anidadaa qigau. Maa fasiqafa maaqa maaqa maqusa maqusa nidanoo unnaqi noo nifa maridanoo. Isaraee maqannaara manda ufa qimarifa, Mooseena sandufara qaoo qimarifa maa amaana maqanara faqa ufa manda qimarifa maridanoo. Doo mifa maqee aanaamuru maree maa amaana maqanaki mini quqasaifanoo doo maa amaana maqafa putaa inoo maridanoo.

<sup>29</sup> Misa Efeesusa maqannaasi aanaamuru fasiqa Tarooqimusan Pauroona faqa madaana maqasai marufaqa qafamasee mina faqa amaana maqaki mari ifoo qimasee sia qafarainni faqa rumasee Pauroona arirara qigau. <sup>30</sup> Mi ufafa amaana maqakiqari radiqifufanoo dinni dinni daraaninuu. Aiqaama dindari dindari moodaanaki anireeqa Pauroona amaana maqakiqari qumaree maqamau rarisameeqee kooqinni aqusoofaqa amaana maqasaa aanaiqikirausa amaana maqaki mandakiandoo qimasee kaqi kaqi ufafa amaana maqa kooqi ititasaqau. Faiqí anaasee moomoosa usufufaqa Pauroona saamu uqafiqee mariqau. Kuqa aruane qimasaida miqi mariqau.

<sup>31-32</sup> Moo fannoo sandee oonureenoo Roomma maqannaasi saideena qimaminoo qinau Yeerusaree maqannaasi aiqama suqiga tinoorirafa firaafa maridanoo fee qimasoo fanoo Saideena fannoo narí sundiauqa namufaqa sandamaqarasinoo misa usi marunakina aniramasoo faqa Pauroona ariuna minnisee náriara kai rakeeqau. <sup>33-34</sup> Saideena fannoo Pauroofuqoo anireenoo ani mina qumaraseenoo narí sundiara qaara sainandannai rumbaane qimaseenoo ariusa irammirinuu. Maa fasiqafa nana ainaina mandainainee maraqai faqee innee arii fee qufaqa moo fannoo moo ufa qufanoo moo fannoo moo ufa qufanoo Roomma maqannaasi Saideena dindari dindari ufa fifau faafau ufa kai qufanoo Saideena fannoo sia ufa anoona irinoo Pauroona mareenoo narí ququsaki munu quqasoofanoo marinau. <sup>35-36</sup> Roomma maqannaasi sundiauqa Pauroona afiqee fimarufaqa Yuda maqannaasi aanoomaseeqa Pauroona kooqi aqa ooruroofaqa aruanneerufaqa sundiauqa mina aindusueeqe qe qeereeqe qe maarrinni ququsa qambaana quqaqau. Faiqí anaasee sandee fidaqa Pauroonara doo kuqarua kuqarua qimariqau.

*Pauroofa narí ufannai narí afaaqasaa ititanau.*

<sup>37-38</sup> Sundiauqa nári ququsaki quqaanneerufanoo Pauroofa Saideena irammirinoo qinau. Amanee faiqí anaasee qimannimianauree qufanoo Saideena fannoo tautumaseenoo qinau. Anee Kirisa maqannaasi ufa irimariana fee. Qinee ooqai aniara Isipa maqannaafa rakirana uqeeraseenoo 4,000 fasiqauqa Kaammanna faqa ufa rainee marusa nifiqee munu aadana maqa maaqai faiqí sia marunnai uqoona fee maridane.

Miqi qufanoo Pauroofa qaoo qimasee qinau. <sup>39</sup> Qinee Yuda maqannaasi maridaqa. Qinee Sirisia maqa maaqaki Tarasusa maqasai uriqarara maqasai kambiqarusa maridaqa. Amanee qinee faiqí anaasee qimannimia. <sup>40</sup> Saideena fannoo mina iriseenoo eedoo qufanoo Pauroofa kooqi irirasusaa akaramafufanoo asaukunna misa ufa quna qaoo qimasoo faqa misa mina iriseeqa kasoomafufanoo Pauroofa nári Yuda maqannaasi ufakiqari qimanniminoo qinau.

## 22

<sup>1</sup> Pauroofa narí maqannaasi qimannidanoo narí afaaqasaa ititeenoo maaqi qimasee qimanniminuu. Oo maa fasiqausa qini qikaqaafasaa qini qikausamara. Innee qini ufa irisai faqa qeeqa irirana nimia. <sup>2</sup> Qaara auqu, moo auqu Heeburu maqannaasi ufa moo auqu Yuda maqannaasi ufa marinau. Misa Pauroonara Heeburu maqannaasi ufa nári ufa qidaqinoo fee qimasee aiqama dai qimafiqau. Miqimambufanoo Pauroofa qimanniminoo qinau.

<sup>3</sup> Qinee Yuda maqannaas fasiqa maridaqa Sirisia maqa maqaki Tarasusa maqusai kambiqafanausa maridaqa. Ooqai qinee kumaaraasaa maridaqa maa maqusanaki Yeerusaree maqusaki Kamarieerana sukuraki kisaqaasaa mariaafanausa maridaqa. Qinee Kamarieerana sukuraki maridaqa maasa qikeeku qikaaku sandufa amiqimasee aiqama iriaraasiafanausa maridaqa. Innee maqee Anutunara afeekaikamandee minara rimariafaqa qinee maqee nindafaidafa. Qinee inni naanna reereea fanausa maridaqa. <sup>4</sup> Ooqai Yisunasaa atooqeemarusa kuqa kai nari mariafanausa maridaqa. Qinee faiqi faqa anaasee faqa rumbasee karabusaki aqimarifanausa maridaqa. <sup>5</sup> Amaana maqasaa aanaiqikirausa misa uriqararafa mifa qini ufa anoona iridanoo. Amaana maqa kansoorauqa faqa qini ufara kuqaa fee qifaranoo. Misa kai pasa akara rumasee Damasakusa maqusai maria Yuda maqannaasa nimiannee qufaqa qinee mi pasana maramaree Damasakusa maqusai ooru Yisuna ufa irimarusa rumbamaree nifqee muqu Yeerusareenni quqaaneera ooru fuafanausa maridaqa.

*Pauroofa nari Yisuna qafoonara qimanniminau.*

*(NiFa 9:1-19; 26:12-18)*

<sup>6-9</sup> Qinee mi pasana mara maree Damasakusa maqusa adeedi ramasaafanoo suani qambaana marufanoo innaarunaindari idauru kaaqa qarafa qumureenoo qini fiqumma aiqama rafaafuqisoofoqa qinee maqasaa aqufiqiafana. Innaarunaindari ufa moo qufaqa iriqa. Sauroo Sauroo anee nanaree qini dariraridane qufafa qinee Oo Karaambaiga anee yafee qiafanoo mifa qinau. Qinee Yisusa Nasareetendaraasa maridaqa. Anee darunaua maridaqa. Mina ufa fannoo miqi qimasee qini qimaqimufafa qini faqa fimarusa kaaqa qarana qafaqau ufa sia iriqa.

<sup>10</sup> Qinee mina irammiriga qiqiafana Oo Karaambaiga qinee naqi fee ianauree qifafanoo Karaambaiga innaarunaindari qinau. Anee findifinana Damasakusa maqusaki fua. Miqoo oonu rainanoo faiqi moo fannoo Anutufa qinara ani qimamiani. <sup>11</sup> Kaaqa qarana fannoo qini qifu dimbasoofoqa qini faqa fusa qisauku qumaroofaqa Damasakusa maqusai fiqiafana.

<sup>12</sup> Damasakusa maqusaki faiqi moo auqu Ananiasa Mooseena sandufamau fimarufa Yuda maqannaas miqoo marusa minara andeegara fasiqa fee qimarufa.

<sup>13</sup> Mifa qinee mariafannaqoo anikikiqamambufanoo Oo Sauroo, qini qikaqa, anee afu maqaa, qufanoo kai qifu maqasee mina qafaqiafana. <sup>14</sup> Maasa qikeeku qikaaku Anutufa aniara rusandeesamumandee aniara mina iriranama fuanneera mina ainainira faiqi andeegarana Yisuna qafaanneera mina Yisuna ufa irianeera qinoo. <sup>15</sup> Pauroo anee Yisuna afunnai qafoonafa mariananoo minara afu qafoonnanara aiqamausa qimannimia aqoo irunnara aiqamausa qimannimia. <sup>16</sup> Nanaree kaqi maridane doo findifinana nammari maraa. Yisuna aaramasee irammirinanoo ani mandainaina rukaannoo.

<sup>17-18</sup> Ananiasafa miqi qimasoofoqa qinee Damasakusa maqusaindari maqoo Yeerusareenni ani maridaqa amaana maqaki innaaru qimariafanoo qifu kai pisipasamandee Karaambaiga akooqoo qimaqiminoo qinau. Doo kaqi kaqi maa Yeerusaree maqusaindari quqasee moosaa fua. Anee maqooqaraasa qiniara qimanniminaqa sia irifaqa. <sup>19</sup> Miqi qimaqoofoqa qinee maaqi qimamiqia. Oo Karaambaiga qinee ani ufa irimarusa ufa suqira maaqakiqa keeqafida rarisamasee nariisee karabusaki quqee mariafanausa maridaqa. Maaqooqaraasa minara amiqimasee qini oosana iridaqa. <sup>20</sup> Misa Seeteefeena arimarufafa qinee faqa miqoo maridaqa dufiaree aridee qimasee arimaru fasiqausa qamunnasaa rakisi mariafanausa maridaqa. <sup>21</sup> Karaambaiga qini mi ufana iriseenoo qimaqiminoo qinau. Doo anee findifua maaqooqari aanaamuru nianai mariasaki ani aqigaidafa.

<sup>22</sup> Pauroofa Yeerusaree maqannaasa nari saamu uqafiqee marusa qimannimidanoo aanaamuru nuquroofaqa misa mina iriseeqa aanoomaseeqa fifau faafau ufa qiqaa faqaa quqasee mi ufana qima rukiaqau. Misa maaqi qiqau doo maree munusee mina aru aquaqa. Mina marirafa sia amana maridanoo. <sup>23</sup> Miqi qidaqa Yuda maqannaasa faqa rumaseeqa niranaqoofoqa nari qamunna qumareeqa minannai rutatidaqa kookoomma afaqeeqee mina aanaamu raqau.

<sup>24</sup> Roomma maqannaas kiateenna fannoo nari sundiaufa maaqi qimasee qimanniminu, innee maa fasiqana inneeqa ququsaki quqasee uaiyaqa samu ariisaifanoo nari mandainaina kooroo iani. Yuda maqannaas faaqaaruana oosana kooroo iani.

(Roomma maqannaasa maqa maaqi kambiqoosa mi ququsanaki marunausee qimarunara sia moo sundia fee firisuaiqa fee amana kai rumbarana, arirana sia amana mina rumbeefaree arifaree. Moo maqannaasa Roomma maqannaasa rakisinnimaqee mariasa kaqi rumbeefaree kaqi arifaree. Moo maqannaafa firaa feefaurumasee Roomma maqannaasa ququsaki keeqaifanoo mi sandufana mina afaqaasaa ititaamoo.)

<sup>25</sup> Sundiauga Pauroona rumbasoofano uaiqaasamu arirara deedaqufanoo Pauroofa kuboor qimaminoo qinau Innee amanee Roomma maqannaa ququsakinaa fasiqa arifaree, sia amana arifaree kootaki qini ufa sia amiqimasee rainasee iriafanoo kaqi fifau darirari mariafanoo. <sup>26-27</sup> Kuboor fannoo iriseenoo Saideena oonu qimamidanoo qinau. Anee sia mi fasiqana arua. Roomma maqannaa ququsakinaafa maridanoo, qufanoo, Saideena iriseenoo rufieenoo Pauroo finnai oonuree iranau. Kuqaa fee anee Roomma maqannaa ququsakinaa fee maridane. Pauroofa eedoo qinau. <sup>28</sup> Saideena kaifaa qinau. Qinee firaa munnimma aquseeqa Roomma maqannaa ququsaki fuafanausa maridaqee qufanoo Pauroofa qinau. Sia qinee munnimma aquafanausa maridaqa qini qikoofa minaki marunara qinee Roomma maqannaa ququsaki kambiqaarusa maridaqa.

<sup>29</sup> Sundiauga mi ufana iriseeqa nisauku raqandaa mamaragaau. Saideena faqa mi ufana iriseenoo Oo qinee Roomma maqannaa sandufa rukisee sia ufa irirainni sainandannai rumbaafanausee qimasee qini uriqararafa minara irisee qini faqa daruandoo qimasee nariara rufianau.

*Pauroofa Yuda maqannaasa uriqararusa nifusaa kikiqinau.*

<sup>30</sup> Saideena fannoo Yuda maqannaasa firaaqoo amoosau maqaranara oosana iri-nee qimasee iqaqoofanoo kananaana Pauroona sainanda idukuseenoo amaana maqa aanaiqiki marusa uriqararusa faqa misa kansoorauqa faqa naarama quqaseenoo Pauroona mareeqee misa noorinni quqanau.

## 23

<sup>1</sup> Saideena fannoo Pauroona mareeqeenoo misaki quqasoofanoo misa noori andee-gasee nindafamasee qimannimino. Qini maqooqooqari sia mandainaina fannoo qini qumaraidanoo Anutuna afusaa maridaqa.

<sup>2</sup> Aanaiqikirausa misa uriqararafa Ananiasafa mina iriseenoo Pauroona aaga marusara nisaukusamu oori itairi amifanoo unna ufa taikaani qufanoo aaga mariufa oori rukam-inau. <sup>3</sup> Arufanoo Pauroofa Ananiasana kafa qimaminau. Anutufa ani faqa aruannoo anee qaaraiki marianafa marianano. Anee qini ufa iriseenana Mooseena sandufa qaannai qini qimani marianano Mooseena sandufa faiqi sia ufa irirai sia aruannee qimarifana anee Mooseena sandufa ammuqundari fidana mi fasiqanara qini daruannee qimarianano.

<sup>4</sup> Pauroofa miqi qimasooofanoo Pauroona aaga marusa qiqaau. Anee nanaree Anutuna aanaiqikirausa misa uriqararana manda ufa qimamidane qufanoo Pauroofa qinau. <sup>5</sup> Oo qini qikaqaafasaa mifa aanaiqikirausa uriqararanara siamma iridaqa. Tamummaqara akara fannoo maqi qinoo maridanoo Innee sia inneeqa maqannaasa uriqararusa manda ufa qimannimaqaaga.

<sup>6</sup> Miqi qimasee qimannimidanoo miqoo suqiusa nindafaidanoo narikai oonumafi irinau, maa suqimariasa qaarasaa fimariasa nariara nariara rairai qimariagaanda, dinni mariasa Farisai amaana ufa qimariasa maridaqa dinni mariasa Sadikai amaana ufa qimariasa mariafanoo. Minara iriseenoo kaifaa firaa kari qimannimino qinau. Oo qini qikaqaafasaa qini qikoofa Farisai amaana ufa qimarufa marifaqa qinee faqa minaki qidaqa. Faiqi moo kuqiranaki findifunara qinee minara kai maa kootanaki maridaqa.

<sup>7</sup> Miqi qimasooofa Farisai amaana ufa qimarusa faqa Sadikai amaana ufa qimarusa faqa ufa rainagaau. <sup>8</sup> Sadikai amaana ufa qimarusa faqa kuqirausa findifidammiafoo qimarusa qangiroora faqa sia maridanoo fee qimarusa faiqi nimana faqa sia maridanoo fee qimariqau. Farisai amaana ufa qimarusa mi ainainanamunara kuqaa maridanoo fee qimarusa mariqau.

<sup>9</sup> Misa Pauroofa Farisai amaana qunara iriseeqa suqidaqa miqoo kai firaaqoo nari aqi nari aqimariqau. Farisai amaana ufa qimarusa sandufa akoofasauqa findifiqa afeekaikamandee maqi qiqaau. Maasa sia moo mandainaina maa fasiqa anasaa marifaqa paquriqa. Qangiroofee amanafee qimamifanoo fee maqi qidanoo fee.

<sup>10</sup> Miqi qimasooofa Sadikai amaana ufa qimarusa faqa Farisai amaana ufa qimarusa faqa firaaqoo ufa rainarafa kambiganau. Miqi marufanoo Roomma maqannaa Saideena fannoo nari sundiauga qimannimino, innee Pauroona mareeqee inneeqa ququsaki quqasaaga, misa mina qambaana rammisiseefaara, qufaqa misa nari sundia ququsaki quqasee rakisimariqau.

<sup>11</sup> Miqi qimasooofanoo mi eendanaki Karaambaiqa qangiroo moo fannoo qumureenoo Pauroona oorisa akooqoo kikiqinoo maridanoo ufa qimaminoo qinau. Pauroo sia rufiaa, paasoosia, anee maqoo Yeerusarenni qiniara kooroo qianandee Roomma maqasai miqikai innarano. Qangiroo miqi qimaseenoo Pauroona qimamisooofano taikanau.

*Yuda maqannaa akaqausa Pauroona arirara ueeqoo ufana.*



<sup>12</sup> Iqaqoo kananaana Yuda maqannaa akaqausa Pauroona arira ufa narí qimami narí qimami suqigau. Ufa andeeqaseeqa qima afeekaikamasee nammari faqa narana faqa auramasee Pauroona aruanee qigau. Aruseeqa mikari kai narana nammari naanee qigau. <sup>13</sup> Qaara fasiqa niku nisauku taikasee Yuda maqannaa fasiqauqa kai narana auramasee Pauroona ariraree qigau. <sup>14</sup> Auramaseeqa misa nári amaana maqa aanaaiqikirausa faqa uriqararauusa faqa unnai oonuree qimannimiqa qigau. Maasa narana auramasee Pauroona aruseeqa innaaqiana narana naanauranoo. <sup>15</sup> Innee faqa kansoorauqa faqa Roomma maqannaa Saideena maaqi qimasee uaqee iaqa anee Pauroona mara maree kansoorauqa maaqaki quqasainaqa maasa Yuda maqannaasa amiqimasee Pauroona oosana irianauna. Innee miqi qifanoo Saideena fannoo afiqee finaqa maasa aanai maara maqaseeqa Pauroona aruanauna.

<sup>16</sup> Miqi qimarufanoo Pauroona anauqi mina auna faiqi fannoo qumee iriseenoo sundia ququsaki keeqafinoo Pauroona qimaminau. <sup>17-19</sup> Pauroofa narí arifandinna ufana iriseenoo kuboora qimaminau. Anee maa kumaaraana afgamaree Saideeninnai munusainanoo ufa qimamiani. Miqi qufanoo kuboora fannoo afiqeenoo Saideenunnai munu quqaseenoo qinau Pauroofa qiniara maa kumaaraana afiqee munusainanoo moo ufa qimamianifee qifaqa afiqee anidaqa qufanoo Saideena fannoo mi kumaaraana afiqeenoo umeeni munuseenoo irammirinau. Nana ufaree anidanee.

<sup>20</sup> Miqi qufanoo mi kumaaraafa qimaminau. Yuda maqannaasa duna Pauroonara amiqimandee mina ufa oosana iriraree qia. Misa aniara afiqee munu quqararammifoo qidaqa. <sup>21</sup> Anee sia misa ufa iria, qaara fasiqa niku nisauku taikasee fasiqa aanai maara maqafiqa Pauroona arirara qia. Misa qima afeekaikamandeeqa doo narana auramaseeqa aruseeqa nararee qia. Doo misa maqee deedaqidaqa ani ufaramma afeesida maria. <sup>22</sup> Saideena fannoo mina iriseenoo maaqi qimasee narí qimaminau. Anee maa ufana qini qimaqimiannanara sia moo qimamia saina anikikai mariani. Miqi qimaseenoo mi saideennafa ni kumaaraana aqiganau.

*Roomma maqannaa sundia fannoo Pauroona Seesaree maqusai aqiganau.*

<sup>23-25</sup> Aqiqamaseenoo Saideena fannoo quandakinoo qaara kubooraqanda mara quqaseenoo qimanniminau. Inneeqara maaqimandee sundiafa deedaqiaqa. Sundia maqamau fifandinausa qisaukuqara fasiqa niku nisauku taikasee fasiqa (200) minamusa deedaqiaqa. Qoosasaa akaramafi fifandinausa qaaramoo niku nisauku taikasee moo fasiqa asaukuqara taikasee fasiqa (70) faqa qoosauqa faqa deedaqiaqa. Qisaukuqara fasiqa niku nisauku taikasee (200) faqaana faqaasa maqamau fifandinausa faqa deedaqiaqa. Doo maqee eendakina doo Seesaree maqusai Pauroona afiqee ooqu fuaqa. Qaaramoo qoosa deedaqiaqa Pauroofa fuaninnana. Innee andeeqasee maasa firaa kiapafa Feerisafa marinnai Seesaree maqusai Pauroona afiqee fuaqa. Miqi qimasooafaqa misa mina iriseeqa deedaqiaqa.

<sup>26-28</sup> Miqi qimaseenoo Saideena fannoo Feerisana maaqi qimasee Pauroonara pasaki amaqanau. Oo maasa amiqira kiapafa Feerisafa, Qinee Karaudiusasa moo duqu Risiasasa ani amandaidaqa. Yuda maqannaasa maa fasiqana qumaree ariraree qiafaqa qinee minara Roomma maqannaa ququsakinaa fee qimasee ooqu rafiaeeqee qeeqa sundiafa ququsaki quqeeqa. <sup>29</sup> Qinee misa mina amosau maqaana oosana randeeqa misa kansoorakina quqasunanoo sia rumarafa arira ainaina marifaqa Yuda maqannaa nári oosana maridanoo miqianannai kai mina arirara qidaqa. <sup>30</sup> Misa qumee maara maqasee mina arirara qiafanoo moo fannoo qumee qimaqimifaqa anee ianannai aqiqaidaqa. Qinee mina amosau maqaasara ani afusaa innee faqa mifa faqa andeeqaaqeeera qidaqa.

<sup>31</sup> Saideena fannoo mi ufana akara rumaseeqa sundiafa nimisooafa Pauroona afiqeeqa qoosasaa akaramafufaqa mi eendanaki Antipatiriasa maqusai ooqu fiqau. <sup>32</sup> Iqaqoofanoo kananaana nikumau fusa ooqurandee Yeerusareenni uriqau. Qoosasaa fusa Pauroona afiqeeqa Seesaree maqusai ooqu fiqau. <sup>33</sup> Misa Seesaree maqusai ooquree Saideena papiqanamu faqa Pauroona faqa firaa Kiapana amiqau. <sup>34</sup> Firaa kiapafa mi papiqana asaana rumaseenoo Pauroona irammirinau anee yaindaraa fee qufanoo mifa qinau. Qinee Sirisia maqasaa kambiqaafanausa maridaqa. <sup>35</sup> Firaa Kiapafa mi ufana iriseenoo Pauroona qimaminau. Ani amosau maqaasa qumuraifaqa ani ufa irianauna. Miqi qimaseenoo poorisa qimaminoo qinau. Maa fasiqana mareeqee Eeroodeena firaa maaqaki quqasaifanoo marinaqa eendaki faasaana rakisiaqa.

## 24

*Aniasafa Seesaree maqusai ooquree Pauroona arirufa qinau.*

<sup>1</sup> Pauroofa moodaannai qisauku namu faasaana narí ufa afeesara marufanoo doo amaana maqa aanaaiqikirausa misa uriqararafa Aniasafa Yuda maqannaa faiqi firaa

faqa moo fasiqa Roomma maqanna sandufa faqa ufoosana faqa amiqimasee irimarufa mina auqu Teeraturusafa misa aiqamausa Seesareea maqusai Yeerusaree maqusaindari ooqu fiqau.

<sup>2</sup> Ooqureeqa firaa kiapana afusaa Pauroona amoosau maqoo ufana qimamiqau. Misa Teeraturusana aarofanoo firaa kiapana afusaa kikiqamambinoo maaqi qimasee Pauroonara qinau.

Oo Feerisafa anee idaaqirafa amiqirafa uqanna mariananoo. Anee aneenna iriranannai maasa rakisimariannanara maasa amiqimandee maridaqa. Anee fuka sandufa moomoo quqaidana maasara amiqimasee mariaqeera miqimariananoo. <sup>3</sup> Maasa maqee maqee ani irirana qumareeqa dufi dufi qidaqa. <sup>4</sup> Qinee kisaagasaa ufa qiananoo ufa aukuaana aiqaraandoora qusasaa qidaqa. Amanee anee maasa ufa kaqikaana iria. <sup>5</sup> Maa fasiqana manda oosana fannoo sabeena aada miqirafa maasa raquru qimimarifaqa fataidaqa. Pauroofa aiqama maqusa maqusa fidanoo Yuda maqannaasa nirana fundakinoo nidanoo. Nasareete maqusanaa fasiqa irirana uriqarafa maridanoo. <sup>6-7</sup> Sia minara kaifau, maa fasiqafa Pauroofa maasa naaquqara amaana maqa Yeerusareenni putaifaqa maasa mina qumareeqa maasa sandufannai andeeqee marunanoo Roomma maqanna Saideena fannoo firaa aanoo iranannai maasa qisaukukinaana rafieenoo. <sup>8</sup> Saideena fannoo mina auqu Risiasafa maasara ani afusara mi kootana andeeqaqee qifaqa qumu qimamidaqa. Anee maa fasiqana irammirinanoo mifa maasa ufa anoona qiannoo.

<sup>9</sup> Teeraturusafa miqi qufaqa Yuda maqannaasa aiqama kuqaa anoonee qiqau.

*Pauroofa Feerisana oorisa nari afaaqasaa titanau.*

<sup>10</sup> Firaa kiapafa Teeraturusana ufa iriseenoo doo Pauroona asaukunnaa aaranau. Doo anee findifi aneenna ufa qia qufanoo Pauroofa findifi Feerisana qimaminoo qinau.

Oo Feerisafa anee kisaagasaa qini maqanna Yuda maqanna ufa andeeqee marianafa mariannanara qinee dufi dufi ani afusaa qidaqa. <sup>11</sup> Innaunni kai qinee Yeerusaree maqusai Anutunara innaaru qiraree qimasee ooru fiqiafana. <sup>12</sup> Qinee amaana maqaki sia aanoo ufa moo qimannimiqiafana. Faiqi nirana sia qinee fundakiqiafana. Amaana maqaki fee nari faiqi suqunaki fee sia qinee Yuda maqannaasa nirana fundakunaqa misa qifaqeeaa. <sup>13</sup> Misa maqee ani mariasa qini qimoosau maqee mariana sia mina anoona paqurimasee kooroo ifana irinnanoo. <sup>14</sup> Qinee moodaa ainainara kai kooroomasee ani qimamianaara. Qinee maa fuka aatatamau fidaqa minannaikai maasa qiikeeku qikaaku Anutunara innaaru qidaqa. Mi aannara Yuda maqannaasa mi aannara kaqirunna fiaanoo qidaqa qini qimoosau maqaidaqa dariraridaqa. Qinee Mooseena sandufa akara aiqama iridaqa mi mau fidaqa tamummaqara fasiqauqa akara faqa iridaqa mi mau fidaqa. <sup>15</sup> Maa Yuda maqannaasa faqa qinee faqa maasa moodaa iriranamau fidaqa kasooqagee Anutufa aiqama fasiqauqa andeeqarasa faqa mandaikirausa faqa kuqiranakinaasa faqa mara findifumanniseenoo misa ufa iriannoo. <sup>16</sup> Qinee Pauroosa Yuda maqannaasa naanna raida moodaa ainainara afekaikidaqa, Anutuna afusaa faqa faiqi nifusaa faqa aiqama kari mandoosana maraqaqaa imarifaqa eerairidaqa sia mi mandoosanna ummaarafa qini daakuanifeera aufadara maraqauna kai aiqamausa nifusaa qini daakuanifeera.

<sup>17-19</sup> Pauroofa Feerisana kaqi qimamidanoo qinau. Qinee moomoo anaamuru maqusai niniifaqa moomoo aukuaana maraseeqa qinee munnimma maramaree Yeerusaree maqusai ooruree qeeqa maqannaasa nimiraree qimasee aandau tatufirana suqasee Anutuna amiraree qimasee amaana maqaki keeqafi mariqiafana. Sia moomoosa faqa mariqia, sia aanoo iranaki mariqia amiqimasee mariafanoo Asia maqanna Yuda maqannaasa mi maqanaki qini qiaqafamaseeqa unnaqimasee maa manda oosanna uqeeraqau. Misa kai mai qumureeqa ani afusaa qini qimoosau maqoo ufana qiaqaana. <sup>20</sup> Qinee Yeerusaree maqanna kansooru nifusaa kikiqiafannana maa qumu mariasa maridaqa qini ufa iriqau. Misa qini manda oosana kooroo iaqaana. <sup>21</sup> Qinee kansoorauqa nifusaa kikiqamafufaqa moodaa ufa kai qinee qiafanaqa misa qini darirariqau. Kuqiranakiqari findifandiafo qiafannanara qini darirariqau.

<sup>22-23</sup> Feerisafa Yisuna aanara irimarufa maridanoo Pauroona ufa iriseenoo maaqi qimasee qimaminu. Anee kaqi marinanoo Saideena Risiasafa qimurinaqa ani ufa andeeqaanaura. Miqi qimaseenoo mi kootana rafaqa finoo Poorisa qimaminoo qinau, Anee Pauroona afiqeeqee rumberanaki quqasee rakisia. Mina qimaminoo qinau, Anee Pauroona rakisimarinaqa mina aqoondi fee akaqaafasaa fee kaqi anireeqa mina faqa ufa qiaqa narana amiaqa sia qaoo qia.

*Feerisafa faqa nari anaqa Durusira nammariifa faqa Pauroona ufa irufanoo naaquqanau.*

<sup>24</sup> Feerisana anaafa mina auqu Durusi nammarifa Yuda maqanna anaasee marinau. Qaaramoo faasaana aiqaroofano Feerisafa narí anaafaqandiri anireenoo Pauroona aaramasee asauku mundirana Yisuna ufara iroofano amiqimandee qimaminau.

<sup>25</sup> Pauroofa faiqí anaasee aiqamausa andeeqasee niroosanara faqa mandoosana fannoo dindari oonu rarisee anirarisee ifaqa minniseeqa maasa qíqa qímanara iriseeqa mi mau kai firanara faqa oonumafi irisee minnisaaninnanara Anutuna koota fraafa marianinnanara faqa qimamimarufano Feerisafa narí mandoosana firaanara iriseenoo Anutunara rufiammaree qaoo qinau. Saina kaqímarinaqa saika sia marinaqa aniraanana qimaqímia. <sup>26</sup> Feerisafa Pauroonara narí qumee kai qimirinoo qinau. Pauroofa munnimma qiminaga idukuanauree qimaseenoo maqee maqee karabusakinaana aaramasaida ufaqímarufano Pauroofa sia amufanoo kaqí karabusaki marinau.

<sup>27</sup> Miqí marufano qaara aukuaana aiqaroofano Roomma maqanna kiapafa Feerisana anee moosaa finanoo moo kiapafa ani amaafa maqaanno. Feerisafa minara iriseenoo Yuda maqannaasa maaqoo qaraasa qiniara misa niqoondi fee qiaqera Pauroona narí maaqa uqannakinaana mara maree karabusaki rumbaseenoo quqasee fufanoo fuka kiapafa Poorakiusafa moo auqu Feestusafa mifa anireenoo Pauroona rumbaranaki paqurinau.

## 25

*Fuka kiapafa Feestusafa kafa Pauroona ufa irinau.*

<sup>1</sup> Fuka kiapafa Feestusafa qaaramoo eenda faiqeenoo Seesaree maqusaindari Yeerusaaree maqusai oori quqarara ooru finau. <sup>2-3</sup> Yeerusareenni ooru marufaqa amaana maqasaa aanaiqikirausa firaasa faqa Yuda maqannaasa faiqí firaasa faqa Pauroona ufa oosana amoosau maqeeunara qimamiqau. Miqí qimasee maaqí qimasee Feestusana qimamiqau, Oo maasa kiapafa amanee anee Pauroona mareeqee Yeerusareenni quqasainaga ufa irinauree. Misa aanai maara maqasee aruanneera quandasee miqí qimasee qimamiqau. <sup>4</sup> Feestusafa misa ufa iriseenoo qinau. Pauroofa Seesaree maqusai karabusaki maridanoo. Qínee qusasaa ooqu fuanaura. <sup>5</sup> Inni faiqí firaasa qini faqa ooquraifaqa migookai Pauroona nana mandoosana maraqainaqa misa qifaqa qínee irianauree.

<sup>6-7</sup> Feestusafa miqí qimaseenoo qisaukuqara taikasee afuru faiqeenoo doo Seesaree maqusai kaifaa ururandee ooqu finau. Iqaqoofano kananaana ufa irimaruna maaqaki keeqafi narí qaindasaa ooqu marifinoo Pauroona aaroofano aniroofaqa Yeerusaree maqannaasa Pauroona figu figu mambufaqa mandufa uqanna oosana oosana Pauroonara qimasee sia mina anooa paquríqau. <sup>8</sup> Misa taikoofano Pauroofa narí oosanara Feestusana qimaminau. Oo fira kiapafa qínee sia Yuda maqannaasa sandufa rukieeqa. Sia naaquqara amaana maqa putaa manniseeqa maasa Roomma maqanna fira kiapana sandufa sia rukieeqa.

<sup>9</sup> Feestusafa mina iriseenoo nariara Yuda maqanna aqoondikíanee qimaseenoo Pauroona irammirinoo qinau. Amanee anee Yeerusareenni ooreenana Yuda maqanna faqa qini qifusaa misa ani amoosau maqeeaanara andeeqeenaree. <sup>10-11</sup> Pauroofa mina iriseenoo Feestusana qimaminau. Maa ufa irimaria maqafa sia anindi kai Roomma maqanna firaana ufa irira maqa maaqoo maridanoo mina sandufa maaqoora qidanoo maaqoo andeeqaaqaana. Qínee sia Yuda maqanna mandaikamma nisaunasa maridaqa anee mi ufana amiqimasee irimarianano. Qínee moo sandufa rukiaanaqau moo mandainaina auqeeafau sia qínee kuqiranara rufiaunaqini. Misa qini qimoosau maqara ufa oosana sia maridanoo sia moo fannoo qini mareeqee misa nisaukuki quqaanno. Qínee Roomma maqusai mari kiapana firaana minauqu Sisaanaa mina afusaa oonuree qianauree.

<sup>12</sup> Miqí qimasooofano Feestusafa quandaki narí ufa irimarusa faqa ufa qí qiseenoo Pauroona qimaminoo qinau. Anee Sisaana afusaa ufa andeeqararee qianano. Anee Sisaana afusaa ufa andeeqararee qiannanara, doo qínee aqíqaanana minni finnanano.

*Karaambaiqa Akaripafa faqa Beeranisa nammarifa faqa Pauroona ufa iriqau.*

(Mi aukuaana Seesaree maqusaindari sipaki akaramafufaqa fifiufaqa Itari maqa maaqai Roomma maqusai fimariqau.)

<sup>13</sup> Ufa taikaseenoo Pauroofa karabusaki maridanoo sipa afeesara marinau. Marikufano moo kiapafa narí anasaasandiri fuka kiapana auqu Akaripaafa marufa aninau, mina anasaana auqu Beeranisa nammarifa marinau. <sup>14</sup> Miqanda ani marikufano Feestusafa Pauroona ufa oosana oosana qimaminoo qinau.

Indaaruu mariu kiapafa Feerisafa maaqoo marufano moo fasiqa karabusa marufaqa karabusa rumbaqaqa kaqí maridanoo. <sup>15</sup> Qínee Yeerusareenni oonuraafanaqa amaana

maqa aanaiqikirausa misa uriqararausa faqa faiqi firaasa faqa mi fasiqanara mandufa oosana oosana qimaqimisee mina aruannee qiqau. <sup>16</sup> Qinee mina iriseeqa Roomma maqannaasa sanda sia miqinoo maridanoo. Nari amosau maqainnana sia fifau nimianaqa arifara. Maasa Roomma maqannaasa sandama fidaqa miqanda moodaaqoo kikiqamambi ufa dinni dinni andeeqasee iriseeqa miqoo aaqarana marinaqa nimianaqa arifara sia marinaqa sia nimianauranoo. <sup>17-19</sup> Misa mai Seesaree maqasai qumuraafaqa qinee sia furufariqa iqaqai faqa kananaana mi fasiqana karabusakinaana aaraafananoo aniroofaqa mina amosau maqoosa findifiqa dapi dapi ufa qiqau. Qinee minara moo ainaina mandaikammannimaqee foora irunanoo sia marifaqa. Misa nari amaana sandufara kai iridaqa maana amosau maqaidaqa arirara qidaqa. Misa faiqi moo mina auqu Yisufa minara kuqinau maqi qiafanoo Pauroofa minara doo findifiqoo qifaqa mina saara mina arirara qidaqa.

<sup>20-21</sup> Miqi qiafaqa qinee Pauroonara amanee ani faqa Yeerusareenni afiqee murasaanaqa mi ufana qini qifusaa andeeqefaree qunanoo Pauroofa Sisaana afusaa iraree qimaseenoo maqoo qinee rumbaranaki mariiqa kasooqaaqee Sisa finnai qeeqa ufa mina afusaa andeeqararee qifaqa eedoo qimasaunanoo kaqi karabusaki maridanoo. <sup>22</sup> Akaripaafa Feestusana ufa iriseenoo qinau amanee qinee mina ufa irianauree. Miqi qufanoo Feestusafa qinau, Oo amana duna kananaana iria.

<sup>23</sup> Iqaqoofanoo kananaana Akaripa faqa nari anasaana Beeranisa nammarifa faqa aniree maqi qimasee miqooqaraasa faiqi firaasa faqa sundiaufa faqa nammari auqamasee nifaqa anukamasee amiqira ainaina nifaqa nifaqa iiseeqa aiqama aniree padi mafufanoo mi qambaana miqanda rafudamakufaqa ufa irimaru maqanaki keeqaqa. Keeqafufanoo Feestusafa sundia moo aqiqoofanoo Pauroona karabusa maqakinaana afiqee mini quqanau.

<sup>24-25</sup> Quqasoofanoo Feestusafa aiqama maqi qimasee qimanniminu, Oo Karaambaifa Akaripa innee aiqamausa maqoo ani mariasa qini ufa iria. Maa fasiqanara ufa qidaqa. Yuda maqannaasa maqooqaraasa faqa Yeerusaree mariasa faqa aiqama maa fasiqana amosau maqee mariafanoo. Misa minara kuquanifeera firaqoo faqa quqaida mariadaqa. Qinee mina iriseeqa kuqannaruaninna ainainara randauna sia maridanoo narikai Roomma maqusanaa firaana mina auqu Sisaana auquraifaqa qinee doo amana fee qiga.

<sup>26</sup> Qinee mina aqiqeeqa nana ufa fee pasakina akara rumamina maree fuanoo fee, sia marifaqa, randaunaisia. Qinee minara mina mareeqee inni nifusaa maqoo quqeeqa Karaambaifa Akaripa ani faqa afusaa quqasaanana anee mina ufa irisee qimaqiminaqa qinee mina ufa oosana irisee akara rumma fira Kipana Sisaana amaqaanura. <sup>27</sup> Naqi fee mandee qinee fifau aqigaanauree. Qinee Yuda maqannaasa Pauroona amosau maqemaria ufana andeeqasee akooqoo papiqasaa akara rumasaanoo andeeqaanoo.

## 26

*Pauroofa Akaripana faqa Beeranisa nammarina faqa nifusaa ufa qinau.*

<sup>1</sup> Karaambaifa Akaripaafa iriseenoo quandaki Pauroona qimaminu, Aneenna ufa qinaqa iria. Pauroofa mina iriseenoo asauku uqeeraseenoo maqi qimasee narufa qinoonunara qinau.

<sup>2</sup> Oo Karaambaifa Akaripa, ani afusaa ufa qiannanara dufi dufi qidaqa. Yuda maqannaasa qimoosau maqee maria ufana qimamiana. <sup>3</sup> Anee Yuda maqanna mariana faqa misa oosana oosana ufa qimariana faqa anee irimarianafa marianaqa qinee minara ani ufa qimamirara dufi dufi fee qidaqa. Amanee anee qini ufa iria. Aiqama Yuda maqannaasa qinee kumaaraasaqari findifuafannana irimariafanoo.

<sup>4</sup> Qinee sia kaqi nimarunsausau maridau qeeqa maqusaki faqa Yeerusaree maqusaki faqa mariafanausa marunaqa Yuda maqanna minara faqa iridaqa. <sup>5</sup> Qinee Farisai amaana ufa qimariafanausa marunaqa Yuda maqannaasa misa minara iridaqa qumee raidaqa. Farisai amaana ufa qimariasa misa kaaqa Anutuna ufara afeekaikimariasa maridaqa. <sup>6-8</sup> Qinee naaru kasooqaaqee kambigaaninna ainainara irimaree fidaqa. Ooqai Anutufa maasa qikeeku qikaakusaa qimafeekaikunara qini maqannaasa eendaki faqa faasaana faqa Anutunara innaaru qidaqa maridaqa. Kasooqaaqee kambigaaninna ainainara Anutufa qimafeekaikunara maasa irimaree fidaqa. Mi ainainafa inaaqiana kambigaaninnanara minara Yuda maqannaasa qini qimoosau maqaidaqa. Mi ainainafa Anutufa kuqiranakinaana mara findifira ainaina mina maridanoo. Yuda maqannaasa nanaree sia iridee unna fee qidee.

<sup>9</sup> Ooqai qinee faqa Yisuna Nasareetee maqusaindaraana auqu taikaanifee qimasee qaini qainiqa imariqiafana. <sup>10</sup> Minara Yeerusaree maqusai ooruree aanaiqikirausa misa uriqararana ufa irisee Anutuna faiqi namu moomoo rumbannisee mariafanausa

maridaqa. Miqimaqoosa akaqausa narufaqa qinee faqa dufi amiqimmiaafoo qiafanaua maridaqa. <sup>11</sup> Qinee Yuda maqannaa ufa suqira maaqaki keeqafufaqa Yisuna ufasaara narimariafanaua maridaqa. Misa qumareeqa Yisuna ufara minnisaqee qimasee narimariqiafana. Qinee misa minara firaqoo aanoomaseeqa moo maqusai nianai fimariafanaua maridaqa.

*Pauroofa nari Yisuna ufa iru oosannara qimanniminau.*

*(NiFa 9:19; 22:6-16)*

<sup>12-13</sup> Qinee Yeerusareenni ooruree aanaiqikirausa misa uriqararana pasa mara mareeqa Damasakusa maqusai ooruree Yisuna ufa irimarusa rumbarara ooru fimari-afananoo suani gambaanai innaarunaindari idauru miqirafa suaniara foora firaatia qini faqa fusa aiqama rafaqaufusanau.

<sup>14</sup> Miqimasooafa maqasaa aqufuafananoo minakiqari ufa moo Heeburu ufakiqari maaqi qinau. Sauroo Sauroo anee nanaree qini darina nidanee. Qinee faqaanannai ani kaqikaqoo ani afaaqai mundunara anee aneenna kai faqaana aaru pooduqaani qiannana arumaraanoo firaqoo aidafidanoo. <sup>15</sup> Qinee miqi qufaqa irammiriqa qiafana. Oo Karaambaqa anee yafee qiafananoo mifa qinau.

Qinee Yisusa anee darunaua maridaqa. <sup>16</sup> Doo anee findifinana fua. Qinee aniara qini ainainira faiqikianneera ani afusaa kooroo iqa. Anee maqee qafaannanara faqa kasoogaqee kambiqaaninnanara faqa aiqamai qimannimianeera ani afusaa kooroo idaga. <sup>17</sup> Qinee Yuda maqannaasaki faqa aanaamuru maqannaasaki faqa ani aqiaanaura. Misa ani arirarifaqa rafaqa fuanauranoo. <sup>18</sup> Anee misa nifu maqannimaqeeera foora asukunakinaana mareeqeenana kaaqa qaranaki quqannisaneera, anee misa Sadannana rafaqaqafiranaana mareeqee Anutunaindi kianneera, misa qini saqarikiranannai misa numoo taikannisaanoo Anutufa nari rusandeesamu masainausaki quqasainaqqa misa faqa minaki marifaranoo.

*Pauroofa nari qimannimu ufana oosannara Akaripana qimaminau.*

<sup>19</sup> Oo Karaambaqa Akaripa qinee aanasaa qifu pisipasamandai innaarunaindaraa ainana qafaafanna ainana sia mi ufana rukiaafanausa maridaqa. <sup>20</sup> Indaaru Damasakusa maqusai oosana arasee Anutuna fasaasa ufa qimannimiqiafana. Miqooqari Yeerusaree maqusai faqa Yudeeaa maqa maaqai faqa aanaamuru marusa faqa qimannimidaqa maaqi qimasee qimannimiqa. Inneeqa manda nirana marirana nimeesuqusee quandakina Anutufinai ubeekamafifaqa Anutufinnai marirana nirana marasainafa kuqaa Anutuna aanai ubeekamafiaafoo qiaqeeera. <sup>21</sup> Minara kai qinee Yeerusaree naaqqara amaana maqaki marunaqa dariraridaqa. <sup>22</sup> Anutufa qini dadaaqimarinarana maqee inni nifusaa kikiqiqa maridaqa uriqararaua faqa ureeqaraua faqa nifusaa Yisunara kooroomannimidaqa. Ooqi tamummaqara fasiqauqa faqa Mooseefa faqa qimarundee kaimmidaqa misa maaqqimmiqau. Anutuna asauku mundirafa Yisufa teeroo firaana mareefanoo kuqinoo mi kuqiranakiqari findifinoo findifirana indaaru nikamannisaanoo. <sup>23</sup> Miqinnanannai asauku mundirana Yuda maqannaa faqa aanaamuru maqannaa faqa maa anutuna ufa fannoo qoomara fooqaana doo innikina doo anireenoo. Misa miqi qimaqoona marifaqa qinee faqa minara kai qidaqa.

<sup>24</sup> Pauroofa miqi qimasee nariara ufa qimarufanoo Feestusafa quandakufanoo faqa quqaseenoo qimaminau. Akasaa doo anee furufarammiananoo. Ani irirana firaafa ani mandainainaki afeeqamifana aqufuananoo.

<sup>25</sup> Pauroofa mina iriseenoo maaqi qimasee qimaminau Oo Feestusa uriqararafa, qinee sia furufarau qidau miqidau. Noori runusee kuqaa anoonainaina qimaria ufana qidaqa. <sup>26</sup> Oo Karaambaqa Akaripa qinee ani afusaa paasoosamasee maa ainainnara kooroo idaga anee sia sia irimarianafa mariananoo, irimarianafa mariananoo. Anee maa ainainna qafaidana oonumafi irimarianafa mariananoo. Sia kukeeqaranaki maa ainainnafa marifa akooqoo marifa maridanoo. <sup>27</sup> Oo Karaambaqa Akaripa anee tamummaqaraua ufa irisee kuqaa anoona fee qidanee anee miqi qimarianafa qinee iridaqa.

<sup>28</sup> Akaripaafa mi ufana iriseenoo Pauroona qimaminoo qinau. Anee maa qusa ufanannoo qiniara Yisuna faiqiki quqee fee qidanee.

<sup>29</sup> Pauroofa mina iriseenoo Akaripaana qimaminoo qinau. Qusa ufa fee kisaqa ufa fee sia qinee minara iridaqa. Qinee aniara faqa maa qoo maridaqa qini ufa irimariasara faqa innaaru qidaqa aiqamausara qinee imarundee iqa Yisuna saqari kiaqeeera qidaqa, sainandannoo rumbaqqamarafa kai sia.

<sup>30-31</sup> Pauroofa miqi qufaqa Akaripaafa faqa fira kiapafa faqa Beeranisa nammarifa faqa findimeeqee raudamaki fiqau. Fidaqa nari qimami nari qimami maaqi qiqau. Maa fasiqafa sia karabusa ainana qafeemarifa sia kuqannarira ainana qafeemarifa

maridanoo. <sup>32</sup> Akaripaafa minara maaqi qinau Pauroofa narí sia Sisaana auqureenooofau doo idukiqini, Sisaana auquramaseenoo saina minni fuani.

## 27

*Pauroofa kaqi rumbaranaki maridanoo Roomma maqusai sipaki finau.*

(Itari firaa maqusa auqu Roomma. Miqoo kiapafa firaafa marinau. Mina auqu Sisaafa Roomma maqanna kiapausa uriqararafa firaafa marinau. Pauroofa Roomma maqusai Sisa finnai firaree qufanoo Feestusafa karabusaki quqasee minni fimaru sipanara afeesimarinau.)

<sup>1</sup> Sipa Itari maqusai fimaru sipafa moo fannoo aniroofanoo Feestusafa narí sundiaugara ufaqa misauqa Pauroona faqa karabusa akaqausa faqa mi sipanasaa quqanau. Saideena auqu Yuriusafa narí sundiauga namufaqa mi sipanaki Pauroona saimbaqa nifiqee finau. Mi saideenna aiku asaukuara Augustoona ammi suqira fee qimariqau.

<sup>2</sup> Maasa Pauroona faqa fuanna sipafa Adaramitiuma maqusaindaraa sipa marinau. Mi sipafa narí qumaara ainaina deedaqamaseenoo Asia maqa maaqandanaí firaree qufaqa doo maasa akaramafuafananoo qifiqee finau. Faiqí moo Aristarakusafa Maseedoonia maqa maaqaindaraafa Teesaroonika maqusaindaraafa doo maasa faqa finau. <sup>3</sup> Fifiufaqa eendaki faqa fimariqau. Iqaqoofanoo Sidoona maqusai oonuraqau. Saideena Yuriusafa reendeenidanoo Pauroona amiqimasee qimaminau. Anee Sidoona maqusai ani aqoondi-uqa marifana misa faqa oonu faiqainaqa naranaina amifana sipaki akaramafi maree fua qufanoo doo miqimminau.

<sup>4</sup> Sidoona maqusai mariqa sipaki akaramafufaqa fufanoo ufai kaqinaindari anufanoo sipa sia andeeqasee fuaqaufaqa Sipurusa afuma qaannaí ooru fiqumaki fiqiafana. <sup>5</sup> Maasa Sirisia maqa maaqikundanai fifiufaqa Risia maqa maaqaki firaa taunna auqu Miraa miqoo oonuraqiafana. <sup>6</sup> Oonuroofanoo Saideena fannoo sipa moo paqurinau. Arekasandiria maqusaindaraa sipa Itari maqa maaqai fimaru sipafa marufanoo Saideena maasa aiqama mara quqasoofaqa fiqau.

<sup>7-8</sup> Miraa maqusaindari moomoo faasaana eendaki mi sipanaki anuqiqa fimariqau. Fidaqa Nidusa maqusa amummaqa oonuraafananoo ufai kaqinaindari aimaree anufaqa quandakufaqa ooruku nammari amuaqumau Kareetee afuma ooqueere mina auqaanaí sia ufai uqunnaí mindanaí fiqiafana. Miqoo Saramoonee maqa Iroosa Oorikiraqoo fee qimaruuqoo fiqumakufaqa anuquseeqa Raseea maqusa amummaqa oonuraqau. Oonuree firaa farumma qafamasee minaki kiateenna fannoo narí sipa maree minaki keeqafi marufanoo ufai faqa ooruku nammari faqa sia arinau. Miqunara mi farummana auqu mandaaqa farummee qiqau.

<sup>9</sup> Ufai fannoo kaqinaindari anufaqa maasa kisaaqasaa miqoo maridaqa Itarinni fuanee qu aukuana taikanau. Anutuna faqa moodaanaki qoomaqa suqaani qu aukuanafa doo ainnaaqaramafinoo sia amana fifaranoo. Pauroofa mina qafeenoo maaqi qimasee naamuaqinau. <sup>10</sup> Oo maa fasiqausa maasa maaqooqari fuananoo mandaikammianoo. Sipa faqa sipakinaa qumiasana faqa maasa faqa kuridi taikaanaura. <sup>11</sup> Saideena fannoo sia Pauroona ufa irinau sipa akoona faqa kiateenna faqa misa ufa kai irinau. <sup>12</sup> Misa maru farummafa sia kisaaqasaa qaaramoo quqoona amana marufaqee qimasee saina maasa sipaki moo farumma Kareetee maqa maaqaindaraa farumma moo mina auqu Finisa miqoo amanamasee qafaanaura. Miqoo fuaninna farummafa amiqirafa marifaqa ufai sia ani marunnai amiqimasee mandaaqai kisaaqasaa mariannee qiqau. Aiqaumasa eedoo qufaqa moodaa moodaa maramarariqau.

*Sipaki fimarufanoo ufai faqa aaku faqa narinau.*

<sup>13-14</sup> Misa Finisa farummaki fuanee qufanoo ufai fannoo mitinaí ubeekoofaqa misa asamaseeqa ankaqa oomu rarisameeqee sipaki quqasee Kareetee maqa mammaaqandanaí fiqau. Misa fimarufanoo fimarunaindari ufai firaa tia uqanna maqamau aninau. <sup>15</sup> Mi ufai faqa sipa ooru arufaqa mara ubeekoofanoo sia amanaikufanoo quqaseeqa ufai namufaqa kaqi fiqau. <sup>16-17</sup> Sipa fannoo kaqikaa maqanamu mina auqu Kauda mina fiqumarufaqa mina mandaaqa maridaqa kaqikaa kanuqa sandannai rarisee maruna kadaapi rumeeqee sipasaa amuaqundari fataafimamaqasee rumbaqa. Misa sipa nammari kasi kasinoo qambaana afooiandoora qimasee sanda firaana qumaraida qambaana qambaana rumbee mariqau. Misa ufai fannoo fuaqa aminanoo Ribia maqasaa aruandoo qimasee seera sandaaqai maruna idukueeqeeqa sipaki quqasee doo kaqi ufai namufaqa fiqau.

<sup>18-19</sup> Ufai firaafa uqinoo nammari amakaurufanoo sipa teeqi taaqufaqa rufiasee sipa ummaara maridanoo ukuqnaandoo qimasee sipakinaa ummaara aiqama nammariki aqusoofanoo sipa fannoo aufadanau. Iqaqoofanoo kananaana kai sipa ummaara

raidanoo qimasee minakinaa ainaina oosana oosana aiqama mareeqee ooruku nammariki aqusaqau. <sup>20</sup> Moomoo eendaki faasaana sia suani fasau qafaqau minara misa firanara randoosia. Ufai firaafa uqanna uqimarufaqa maasa qeeqa marirafa doo taikeefoo qiafannana.

<sup>21-23</sup> Sipakinaasa moomoo eendaki faasaana sia narana neemariqau, naarara kai mariqau. Minara Pauroofa misa qambaana findifinoo qimanniminoo qinau. Innee qini ufa iriaqaana Kareetee maqusaki kai mariaqaana. Miqimaseefau sipakinaa ainaina firaa feefauru aqimariana sia aqunaiqini kaqi mariqini. Doo maqee qinee inni fuki faaki qidaqa doo paasoosiaqa. Sia inneeqa moodaa kuqifaranoo, sipa kai kuquanno. Qinee Anutunaindi maridaqa mina ainainira faiqi maridaqa. Eenda eendaki Anutuna qangiroo moo fannoo qinee marunannai aniree qimaqiminoo qinau. <sup>24</sup> Pauroo sia rufaa, anee kuqaa Roomma maqanna firaa kiapana oorisaa kikiqinnaranoo. Anutufa nar i amiqira oosana uqeereeqeenoo aiqama sipakimariasa ani aminoo, sia moo fannoo kuquanno. <sup>25</sup> Doo maa faiqisa sia nimuqusa tiakiaqa, paasoosiaqa. Anutufa qimaqimindee kai iannoo. Qinee mina irisee mina saqarikidaqa. <sup>26</sup> Kaqikaa qoo ufai fannoo maasa sipa maramaree kaqikaa maqanamu raquramianno.

<sup>27-28</sup> Maasa qisaukuqara taikasee qikunni ooqu qaara faqa qaara faqa eendaki faasaana Meediteeraneena ooruku nammari amuaqumau fimarufaqa booskurauqa oonumafi iri iseeqa eenda amuqsai Oo maasa moo maqa maaqa adeedi anireeqa qimaseeqa sanda kisaqaq marasee ummaararoo ainaina mina atisaa qususee nammariki aqusee qafaqau. Nammari 120 amana meemai faruma difukunaki marufaqa qafaqau. Kafaa moosaa oonuree kafaa aquseeqa qafaqau. Nammari 90 amana kaqikaa faruma ausaanaikiranaki kai marinau. <sup>29</sup> Booskurauqa mina qafamasee eendaki oonisaa aruani qimaseeqa sipa araqemusaaqari qaara faqa qaara faqa qankaqa quqasoofanoo maqa qumarooafaqa misa iqaqaranara innaaru qimariqau. <sup>30-32</sup> Booskurauqa maasa sipa oorinni qankaqa quqadee unna qimasee kanuqa mareeqeeqa nammariqi quqasee minaki aqufi quqasee sandaaneera imarufanoo Pauroofa qafamasee Saideena faqa sundiauqa faqa qimanniminoo qinau booskurauqa sia marifaqa innisaimbaqa aiqama kuquanauranoo. Booskurauqa kanuqaki quqasee fidamia qufanoo sundiauqa kanuqa sanda atekamufanoo kanuqa nammariki pautaqi aqufinoo kaqisamu finau.

<sup>33</sup> Iqaqarara kaarimaqoofanoo Pauroofa fuki faaki qidanoo qinau. Innee qisaukuqara taikasee qikunni ooqu qaara faqa qaara faqa eendaki faasaana sia nee mariasa marifanoo. Kisaqaq kamusaqa innee sia moodaa ainaina naafanoo. <sup>34</sup> Qinee inni fuki faaki qidaqa doo narana marasee namasee sia kuqaa. Sia inniki moo fannoo abandiakaanno. Innee kaqi rumbaqa marifanoo.

<sup>35-36</sup> Pauroofa miqi qimaseenoo feemu maraseenoo ruqi ruqimaseenoo innaaru qimaseenoo noofaqa tautumma qafeeqa amiqimmi ifoo qimaseeqa maasa faqa aiqamausa naqau. <sup>37</sup> Maasa mi sipanaki marusa nisaanarirafa maaqimminoo marinau 276 fasiqa moomoo uqanna mariqau. <sup>38</sup> Aiqama namasee nimuqau mambufaqa raisa fooqaaira narana mina auqu uita misa mina mareeqee ooruku nammariki teeqimasoofoanoo sipa aufadanau.

*Sipa fannoo Marata maqa munu raquru amufanoo sipa rakeekaa inau.*

<sup>39</sup> Iqaqoo kananaana maqa afaisaa maridaqa yamaqa maaqanai fee marida fee qida sia irimariqau. Booskurauqu qafoofoanoo nammari muqufi rainee maruqoo oonureeqa dinni kaqi ooqu fimarunna minniseeqa dinni farumma oonu mandi marunaki keeqarree qimasee amanamandee qafaanee qiqau. <sup>40</sup> Miqi qimasee ankaqa sanda atekasoofanoo aiqama nammariki aqufiqau. Sipa sitiqaq ainaina rafaqaq fimarua sandana aukusoofanoo akaqausa mina ati qumaroofoanoo seera sipa oorisaa uqeerasoofoanoo ufai fannoo mina arinoo rariseenoo oorindari finoo mi farummanaki keeqafiqa maqa raquramianee qiqau. <sup>41</sup> Sipa fuaneera maseenoo aaqamakufanoo nukuda raquraminoo oorindari utusamafi kasooinoo marinau. Araqeemu nammari fannoo firaqoo aridanoo rukakamumasana.

<sup>42-44</sup> Sundiauqa karabusa fasiqauqara nammari amuaqumau fimariasa quqasee sandee maqi qimasee aiqama naru taikaaneerufanoo Saideena fannoo Pauroonara amuqsufanoo qao qimaseenoo qinau. Nammari amuaqumau fimariasa sipasaaqari nammariki aqufi nammari amuaqumau maqee fuaqa. Sia nammari amuaqumau fimariasa sipa rufadaairana ati aina qumareeqa minasaa ooqu marifi fuaqa. Doo maasa miqimandeeqa aiqamausa maqasaa fiqau.

<sup>1</sup> Maasa aiqama nammarikiqari afainni akaramafufaqa qafaafana aiqama amiqimandee mariqiafana. Miqooqaraasa iroofaqa mi maqana auqu Marata fee qiqau. <sup>2</sup> Marata maqannaasa maasa amiqi amiqimaqisaqau. Aaku rufaqa suara darufaqa misa idaraseeqa mara quqaseeqa maasa qiqaondikiqau.

<sup>3</sup> Pauroofa ida asaida maramareenoo idaki aqusoofanoo sakani minaki kukeeqanoo mariufa asauku aakusee miqoo dirinoo marinau. <sup>4</sup> Marata maqannaasa mina qafeeqa maaqi qimasee unna ufa qiqau, maa fasiqafa faiqi narimarifa marifanoo. Misa nimana fannoo mi sakanina aundurai keeqafifanoo nararidanoo. Ooruku nammariki sia kuqunara sakani fannoo mina aridanoo. <sup>5</sup> Pauroofa asauku rutatufanoo sakani idaki aqufufanoo Pauroofa sia aurinuu.

<sup>6</sup> Marata maqannaasa mina qafamasee qiqau kaqi kasooiqa maridaqa qafa mifa innooqaannoo fee maqasaa aqufinao kuquannoo fee qimasee kisaaqasaa fifau qafee mariqau.

<sup>7</sup> Pauroofa sia kuqufaqa misa minara moo anutu fee qiqau. Maasa sipa maqasaa raquru amuqoo karaambaiqa auqu Pubariusafa mina afuqa anaadoo aqa raquraminuu. Pubariusafa Marata maqannaasa karaambaiqa marinuu. Mifa maasa qumu qifiqeenoo murusoofaqa qaaramoo faasaana mina faqa mariqiafana. <sup>8</sup> Pubariusana akoofa aurinoo marinuu. Mina aurirafa afaqa idididanoo aratootooki marinuu. Pauroofa minara iriseenoo mina maaqaki keeqafinoo innaaru qimaseenoo nari asauku mina afaaqasaa mundusoofanoo aurirafa taikanuu.

<sup>9</sup> Miqimasooofaqa qafamaseeqa mi maqannaasa mi saqanna marusa nari aurirausauqa naakidaqa minisee marufanoo aurirana taikannisee marinuu.

*Marata maqa maaqaindari moo sipaki Roomma maqusai fiqau.*

<sup>10-11</sup> Maasa qaaramoo quqoona Marata maqasaa mariqiafana maasa sipa moo mina auqu Moodaa Karira Anutuqanda maasa mina paquriqiafana. Areekasandiria maqannaasa sipa fannoo Itari fimaru sipafa ufaira rufisee Marata maqasaa faasai ani kukeeqanoo marinuu. Maasa mi sipanaki akaramafufanaqa Marata maqannaasa narana faqa oosana oosana ainaina faqa aanasaa naaqee qimasee quqasoofaqa maasa mareeqa Itari maqa maaqai fiqiafana. <sup>12</sup> Fifiufaqa Sisiri afuma firaannai oonuree fira taunnaki Sirakusee maqusai raquramisee qaaramoo afuru miqoo faiqiaqiafana.

<sup>13</sup> Doo miqooqari sipaki nammari amuaqumau fifufaqa Itari maqa maaqa atisaa fira taunna Reekiumma maqusai kasooiqaafana. Iqaqoo kananaana ufa maasa ina-aqianaindari uqinoo seera fuqaofanoo dadaaqufaqa kaqi kaqiuufaqa qaara faasaana kai Puteeoori maqusai sipa kasooinuu. Puteeoori maqusa Roomma maqusa Kaamanna maqusai marinuu. Aiqa sipauqa Puteeoori maqusasaa munu afiqusee marufaqa maqamau Roomma maqusai fimariqau. <sup>14</sup> Puteeoori maqusaki Yisuna ufa irimarusa paqurimasee misa faqa moodaa amaana mariqiafana. Doo miqooqari andeeqasee Roomma maqusa andeeqasee maqamau fiqiafana.

<sup>15</sup> Roomma maqusai Yisuna ufa irimarusa akaqausa marusa ooqai Pauroofa animarunara iriseeqa aanai kaqikaa maqusa Apiusana makeeta faqa qaaramoo pasindiaqa maqa maqusa faqa maruqoo Yisuna ufa irimarusa qumu qifiqee Roomma maqusai ooru fiqau. Pauroofa misa nindafoofanoo amuqusaki idaaqufanoo Anutunara dufi dufi qimasee doo misa faqa Roomma maqusai oorufinuu.

*Pauroofa Roomma maqusai kisaaqasaa maru ufana.*

<sup>16</sup> Maasa Roomma maqusai ooruroofanoo Kiapafa Pauroonara aaduma moo maqaki marinanoo sundia kai rakisianifee qinuu.

<sup>17</sup> Pauroofa mi maqanaki qaaramoo afuru faiqeenoo Roomma maqusai maru Yuda maqannaasa uriqararusa naaramasooofaqa suqumaree Pauroona maaqaki aniroofanoo Pauroofa ufa qimanniminoo qinuu.

Oo qini qikaqaafasaa, sia qinee moo ainaina qeeqa maqannaasaindi mareeqa sia maasa qeeqa qikeeku qikaaku sandufa rukiaafanausa maridaqa Yeerusaree maqannaasa qini ruumbeeqeeqa Roomma maqannaasa nimia. <sup>18-19</sup> Kiapausa Seesaree maqusai qini mandainainara randoosia sia moo kuqira ainaina qiniki marinuu. Minara misa qini idukuane qufaqa Yuda maqannaasa afeekaikamandee aanoo ufaqa qinee quandaki Sisaana aqureeqa sia qeeqa maqannaasa ufa nimiraree qimaseefau maa ufana oosana areefau nariqa kai. <sup>20</sup> Minara qinee inni qimannimianeera naaraida. Anutuna asauku mundirafa anianinnanara Isaraee maqannaasa irimaree fidaqa minara kai qini qisauku maa sainandafa rumbanoo maridanoo. <sup>21-22</sup> Yuda maqannaasa uriqararusa mi ufana iriseeqa Pauroona qimamiqa qiqau. Maasa sia Yudeeaa maqannaasa ufa moo aniara iriqa, sia moo fannoo pasa akara ruma aniara maasa qimaqeenoo. Sia moo fannoo mindari



aniree aniara manda ufa qia. Maa fuka ufana Yisunara aiqama maqa maaqaki mariasa nikoo fee qidaqa, maasa minara ani ufa irianauree qidaqa.

<sup>23</sup> Miqi qimaseeqa moo suaniara utaaqamasoofanoo mi faasaannasaa Yuda maqanna moomoo aniree Pauroona maaqaki keeqafufanoo Pauroofa Anutuna ququsa ufara naamua qimarinau. Kananaana oosana araseenoo eendirana paqurinau. Pauroofa tamummaqara fasiqausa akarakinaa ufa faqa Mooseena sandufa faqa minakinaanannai Yisunara naamua qinau. <sup>24</sup> Akaqausa Pauroona ufa irisee kuqaa anoonee qimasee iriqau. Akaqausa sia iriqau. <sup>25</sup> Pauroofa mina qafamaseenoo qimanniminoo qinau. Anutuna naaqqara marauna fannoo tamummaqara fasiqa Eesaiaana ooqai aakufinoo dadaaqufanoo inni nikeeku nikaaku naaru kambiqaaninna ainainara qimanniminau. <sup>26</sup> Mifa maaqi qinau.

Eesaiaa anee oonureena Isaraee maqannaasa maaqi qimasee qini ufa qimannimia. Innee kisaqaasaa qini Anutusa ufa iridaqa sia ufa irifaranoo. Innee kisaqaasaa qini ufa nifunnai qafee marifanoo sia mina anoona paqurifaranoo.

<sup>27</sup> Innee maa maqannaasa nitikura ummaarandanoo maridanoo ooni miqirafa maridanoo. Misa nariqa naaqoo nisaukunnai ititeemariasa maridaqa. Misa narikai nári nifu dimbeemariasa maridaqa. Misa nári nifunnai qafeefoora naaqoonnai irifoora nitikurannai oonumafi irifoora. Misa qini Anutu finnai quandeefoora, qinee misa amiqimannisaannoora.

<sup>28-29</sup> Pauroofa miqimasee qimannimiseenoo maa ufanannai rafaqaqafinoo qinau. Anut- ufa inniara maa ufana iriaqee qinau. Doo Anutuna faiqi mareeqee nári asumu mariranaki quqemaruru ufafa doo aanaamuru maaqa maaqai daraaninoo. Misa irifara innee sia irimariafanoo. Miqi qimasooafaqa Yuda maqannaasa Pauroona maaqakiqari raudamaki fidaqa narinni narinni ufa rainaqa fiqau. <sup>30-31</sup> Pauroofa maru maqana ufaasu maqaki marinau maqee maqee munnimma aqusaída marinau. Qaara aukwana mi maqanaki marufaqa moomoosa aniree marufanoo naarama quqasaidanoo Anutuna ququsara qimannidanoo Karaambaiqa Yisufa asauku mundiranara faqa paasoosamasee naamua qimarinau. Sia moo fannoo qaoo qimarinau. Eedoo kai qimariqau.

## **ROOMMA**

### **Pauroofa Roomma maqannaA akaranimaqoo ufafa.**

<sup>1</sup> Qinee Pauroosa Anutuna asauku mundirana Yisufa mara friqai faiqisa maridaqa mina ainaina dadaaqimaruna faiqisa maridaqa. Anutufa qini maqasaa fasiqa Anutufa faiqi aanaaseekinaana rusandeesamumasee narí amiqira fasaasa ufara qimannimianne qimaqoosa maridaqa.

<sup>2</sup> Mi amiqira fasaasa ufana naaru kambiqaaninnanara Anutufa oqai uqanna narí tamummaqara fasiqauqa narí ookiqari qimannimisoofaqa quandaifiqa faiqi anaasee qimannimisee quandakiqa naaquqara akaraki quqaqoofa maridanoo. <sup>3-4</sup> Mi amiqira fasaasa ufana narí amaaku narí asauku mundirana Yisunara maasa karaambaiqara qidanoo. Mifa Dafidinakiqari kambiqaanara maasa maqasaa fasiqee qidaqa. Anutufa narí firaa afeekannai kuqiranakinaana Yisuna mara findifumaseenoo minannai uqan-nifiqasooofaqa iriseeqa misa minara Anutuna amaaku innaarunaindaraafa naaquqarafee qidaqa. <sup>5</sup> Yisuna minannai Anutufa qini amiqi amiqinoo qimannimira fasiqaikamambi maridana aiqama maqanna naarama minisee Yisuna amiqira fasaasa ufa qimannimi-sainaqa iriseeqa mi mau fiqa Yisuna auqu uqeeraaqeeera qiniara qimaqoosa maridaqa. <sup>6</sup> Aiqama maqannaasara qidaqa inni Roomma maqannaasara faqa qidaqa Anutufa inniara narí asauku mundirana Yisunaindi kiaqera qimaqoofa maridanoo.

<sup>7</sup> Anutufa inni Roomma maqannaasa faqa naarameeqeenoo qini qiku qisauku kiaqera qimaqoosa mariafaqa. Qinee Pauroosa minara iriseeqa inni akara rumannimaqaunafa maridanoo. Anutufa maasa qikoofa faqa narí asauku mundirana Yisuna maasa karaambaiqa faqa narí amiqi amiqira oosana faqa narí aundura asoarana faqa inni nimiani.

*Pauroofa Roomma maqannaasara Anutu finnai dufi dufi qidanoo.*

<sup>8</sup> Maa ufanannai inni qimannimiranara qianaara Anutuna asauku mundirana minan-nai qinee Pauroosa inni Roomma maqannaasara Anutu finnai dufi dufi qimamaqaidaqa. Aiqaama maqannaasa innee Yisuna saqarikiranara irimarifaqa minara qinee Pauroosa innaaru qimamaqaidaqa dufi dufi qidaqa. <sup>9</sup> Qinee aiqama kari maqee maqee inni Roomma maqannaasara iridaqa Anutufinnai maqee maqee innaaru qimarunannara minara Anutufa iridanoo. Qinee qeeqa qimuqusa ookiqari qeeqa iriranannai Anutunara eedoo qira dadaaqira ainainiranaqina maridaqa. Maridaqa narí amaaku amiqira fasaasa ufa faiqi anaasee qimannimidaqa. Qinee inniara Roomma maqanna faiqi aanaaseera innaaru qidee qunanoo Anutufa kuqaa fee qiannoo. <sup>10</sup> Qinee oqqaindari inni maqusai oonuree inni nindafarara irida marunannara maqee Anutufa qini dadaaqinaqa inni maqusai oonu mariannanara minara faqa innaaru qidaqa.

<sup>11</sup> Qinee firaqoo inni nindafarara qidaqa innaarunaindaraa amiqi amiqirana moo inni naida nimianaqa innee Anutunaki afeekaikamafi mariaqera iridaqa. <sup>12</sup> Qinee minara maaqi qidaqa qinee faqa innee faqa narí dadaaqi narí dadaaqirara innee Yisuna saqarikirana faqa qinee faqa Yisuna saqarikirana faqa narí dadaaqi narí dadaaqiaqa.

<sup>13</sup> Innee Roomma maqannaasa maa ufana iriaqa. Qinee inni maqusai moomoo kari firari mariafananoo moo ainaina rafaqaafinau. Qinee moomoo maqusanaasaki sia Yuda maqannaasaki nimariafanausa miqidaqa misakinaana oonu rarisameeqee Yisunaki quqeeamarunausa inniki faqa oqqaindari miqianee qidaqa. <sup>14</sup> Aamina maqanna faqa irirana faqaasa faqa aikara foora daruqoofanoo maridanoo. Misa aiqama Yisunufa qimannimianaqa irifanoo mi aikana darirafa tatinoo qifaafa ufadaannoo. <sup>15</sup> Mi aikana tatiranara irisee qinee inni Roomma maqannaasa faqa Anutuna amiqira fasaasa ufa qimannimiraree qidaqa.

*Anutuna afeeka ufa asumu mariranaki quqannisee marifa.*

<sup>16</sup> Anutuna amiqira fasaasa ufa Anutufa faiqi mareeqee asumu mariranaki quqeevari afeekafa maridanoo minannai Yuda maqanna naaree aanaamuru mariasa innaaqiana irisee mi mau finaasa Anutufa asumu mareeqee quqaannoo. Minara qinee mi amiqira fasaasa ufanaki qeeqa daundura firaqoo mara quqaidaqa. <sup>17</sup> Anutufa faiqi anaasee aaqeevariasa narí namuqaaki mariasa sia naruseenoo mareeqeenoo narí aqoondiki-danoo narí amiqira fasaasa ufa minara kooroo idanoo. Maasa Yisuna saqarikirana mifa kai Anutunara aqoondikirana nimidanoo. Ooqeenaa tamummaqara fasiqauqa akara minara maaqi qinoo maridanoo. Faiqi anaasee Anutuna saqarikiranannai mina aqoondikinausa misa kai naaru naaru marirana mareefaranoo.

*Faiqi faiqi mandoosana fannoo Anutufa nariranaki quqannisaidanoo.*

<sup>18</sup> Faiqí anaasee mandainaina faqa kudimakirana faqa miqanda Anutuna anoona ufa rafaqaifaqa sia irida maridaqa, minara Anutuna aanoo qirana narirafa inaaruaindari akooqoo misasaa qumu maridanoo. <sup>19</sup> Maanara Anutufa misa naridanoo. Faiqí faiqí Anutunara irimari ainainafa akooqoo maridanoo. Anutufa nari kai uqannifqasoofoanoo marifaqa sia irimariafanoo.

<sup>20</sup> Ooqai Anutufa maa maqa maqana auquqooqari mina kukeeqarana idaaqirana faqa mina naaru naaru marira afeeka faqa innaarunaindaraa andeeqara marirana faqa nari auqu quqoo ainainaki akooqoo marufa maridanoo. Faiqí faiqí Anutufa auqu quqoo ainainaki qafamasee sia Anutunara irida fee qifaranoo. Miqí qimasaidaqa unna qimarifanoo Anutufa mi ufana sia iriannoo kaqi naruanoo. <sup>21</sup> Misa Anutunara iridaqa sia minara dufi dufi qidaqa, kafaa sia mina auqu uqeeraidaqa. Misa quandaki nari irirafa firaqoo furufariranaki kai maridaqa misa nitikura fifau maridanoo asukuna kai qumbiqanoo maridanoo. <sup>22</sup> Misa nariara irirana faqaasee qimasaida unna qimasaidaqa furufariranaki maridaqa. <sup>23</sup> Misa Anutuna naaru naaru marira areenarana mafi quqasee Anutuna innaaruqirana faqa amooqirana faqa mafi quqasee fifau faiqí faiqí amanauqirana faqa ufina amanauqirana faqa aandau amanauqirana faqa amuaqundari maqamau nimarina amanauqirana faqa marasee maasa Anutu fee qimasee minara innaaru qidaqa amooqidaqa.

<sup>24</sup> Faiqí misa nari furufarirafa miqinoo firaafa marifanoo Anutufa misa mareeqeenoo nariqa nimuqusimari mandainainaki quqasaifaqa faiqí narinni narinni ira ainainara nisaurira ainaina kai maraidaqa. <sup>25</sup> Misa Anutuna anoona ufa mareeqee kaqinni quqaseeqa unna ufa mareeqee nifusaa quqasee minara kuqaa fee qidaqa. Naaru naaru amooqimaria Anutuna aiqama ainaina auqu quqoo Anutunara minnisee quandaki Anutufa auqu quqoo ainainara fifau ainainara innaaru qimasee maasa Anutu fee qimasee mi mau fidaqa.

<sup>26</sup> Anutufa faiqí anaasee nari manda niranara qafamasai fanoo akooqai fanoo kaqi minaki nifeeqaidanoo. Minara aanaaseeuqa faqa nari nifaaqmaaka minnisee andeeqara oosana minnisee narinni narinni oosana oosana manda marirana maraidaqa. <sup>27</sup> Faiqí miqí kai iqa nari ninaaqmaaka faqa amiqira oosana minnisee nariara nariara ridaqa idara foora nitakuqidanoo. Faiqí misa narinni narinni nisaurira ainaina maraseeqa mina akiqara nari nifaaqasaa aurirana aidaqirana marasee aupuraidaqa.

<sup>28-31</sup> Faiqí anaasee Anutuna anoona ufara nikooqai fanoo Anutufa misa mareeqeenoo mandainainakina sia fuaqaa ira mandainainakina quqasaifaqa minaki fidaqa. Miqianara maa manda ainaina oosana oosanafa qumbiqaidanoo, manda oosana faqa, kaaqa ainainara rimarina faqa nariara nariara fidiqaa imariana faqa nariara nariara rairai qirana faqa faiqí kuqannarirana faqa nari afumau nari afumau irafa faqa nari ueeqee nari ueeqee imariana faqa manda oosana oosana faqa nariara nariara munuqi miniqi imariana faqa misa Anutunara fidiqaa imariana faqa kaukaata qimariana faqa nari nifaaqa nimoqirana faqa nariara kai firaqoo ufaqi marina faqa maqee maqee mandoosana randeemariana faqa nari ninaukoo ufa rukiee mariana faqa sia nari andeeqaramau firanara uriqararane qimariasaa, faqa nariqa qimannimira ufa rukiee mariana faqa sia nari nikaqafasaara amuqusirana faqa mi manda ainainnausaki fimariasaa maridaqa. <sup>32</sup> Anutufa minaki fimarinasara kuqiranaki fimarinaa maqi qida qifaqa iridaqa kaqi minaki fidaqa. Sia minakaifau miqidau fira manda oosana marasee akaqausa mi mandainainaki dadaaqimariasara misara faqa eedoo qimaseeqa asaidaqa.

## 2

### *Aiqamausa Anutufa narira ufa ameemaanai maridaqa.*

<sup>1</sup> Oo qini qiqoondi sia anee akaqausara aaqeeaafoo qinana anee faqa mi aaqarana maree marianafa mariananoo. Anee faqa naqimasee Anutuna arirana eerairinnaree, Anee akaqausara miqinana anee faqa mi manda oosana kai maree mariananoo ainina qaoo qira ufa fannoo ainina aruanoo. <sup>2</sup> Faiqí anaasee mi manda oosana maree marifanoo Anutufa kai misara narira ufa qiannoo. Anutufa sia aaqaidanoo andeeqaidanoo misa narira ufa ameemaanai quqannisaanoo. <sup>3</sup> Qini qiqoondi anee sia amana akaqausara qaoo qinnaranoo, anee qaoo qidee qidana anenna faqa minaki fimarianafa mariananoo. Anee miqi mariannanara naqimandeenee Anutuna ariranara eerairinnaree, sia amana eerairinnaranoo. <sup>4</sup> Inniara Anutufa anenna mandainainakiqari mifinnai ubeekkeefandinnanara reendeenamasee rakisidanoo maridanoo. Innee minara Anutufa reendeenira oosana marainara innee minara furufarira oosana fee fee qimaseeqee kaqi mi mandoosannaki marida fee. Anutufa inniara reendeenira oosana fannoo sia

furufarira oosanafau maridanoofau. Inneeqa mandainaina minnisee quandaki narinnai ubeekaaqee qimari oosanafa maridanoo innee sia fee minara iridaqee.

<sup>5</sup> Inni naaqooki ooni ititanoo marifaqara foora sia ufa irimariafanoo. Miqianara Anutuna andeeqara ufa faqa mandainaina akiaqara narira ufa faqa kooroo inna faasaana mikari inniqa mandainaina fannoo inniqa narira ufa firaqoo uriqaramafuannoo. <sup>6</sup> Mi faasaana Anutufa aiqama fasiqa anaasee nári maree mariana akiaqara kai nimiannoo. <sup>7-8</sup> Akaqa fasiqa anaasee amiqira oosana kai maraqa nidaqa innaarunai areenarana faqa innaarunai nuqu uqeerarana faqa naaru naaru mariranara faqa randaidaqa. Miqi mariasa Anutufa naaru marirana nimiannoo. Akaqausa nári nifaaqara kai ridaqa andeeqarana futeeqaidaqa aaqaranaki kai fidaqa. Misasa Anutufa nári aanoo qirana faqa nári aranaqarana faqa nammariara foora adiannimaqaannoo. <sup>9-10</sup> Nidafrana faqa aupuranara faqa Anutufa aiqama mandoosana maree mariasa misa nimiannoo. Yuda maqannaasa naaree nimiseenoo innaaqiana aanaamuruqa nimiannoo. Anutufa miqi kai inoo aiqama andeeqara oosana maree mariasa nimooqirana faqa nuqu uqeerarana faqa nimuqusaki asoosana faqa nimiannoo. Yuda maqannaasa naaree nimisee innaaqiana aanaamuru mariasa nimiannoo. <sup>11</sup> Miqimasee Anutufa aiqama maqannaara amana amana kai nári maree mariana akiaqara nimimarifa maridanoo nimiannoo.

<sup>12</sup> Anutufa nári sandufa Mooseena qimamufanoo mifa quandasee Yuda maqannaasa qimannimisoofaqa misa mi sandufana qumarasee marusa maridaqa, misa mandoosana maraifanoo Anutufa Mooseena sandufannai misa qumaree naruannoo. Anaamuru mariasa Anutufa Mooseena amu sanda ufana sia mina ameemaana maridaqa kaqinni maridaqa, misa mandainaina oosana minni kaqinni marinannai naruannoo. <sup>13</sup> Sia Mooseena sandufa naaqoonnai irimariana sia minau Anutufa narafusaa andeeqaranaki faiqi anaasee quqaidanoofau, mi sandufana marasee imariana andeeqasee auqee mariannai kai Anutufa nári andeeqaranaki quqannisaannoo.

<sup>14-15</sup> Misa Yuda maqannaasa Mooseena sandufa maree mariasa maridaqa aanaamuru mariasa Mooseena sandufa siaisa mariasa maridaqa misa nári iriranannai Mooseena sandufara sia irirai kaqi mi mau fidaqa, doo Anutuna ufamau fimariasa maridaqa. Mi oosanafa Anutuna sandufa naunduraki akara rinoo marifaqara foora kooroo ifaqa miqidaqa. Anaamuru mariasa Anutuna ufa sia irimariasa nariqa kai moo oosana manda oosanee qimasee moo oosana amiqira oosanee qimasee qimariafa mifa kai Anutuna sandufa oogai kukeeqasee quqagoofa naundurakiqari kooroo idanoo. <sup>16</sup> Kasooqaaqee anianinna faasaana Anutufa nári asauku mundirana Yisunannai faiqi anaasee aiqama naunduraki kukeeqarana kooroomaseenoo rainannimaqaannoo, Qinee Pauroosa Anutuna amiqira fasaasufa faiqi anaasee qimannimiqa nidaqa minara qimannimidaqa.

*Yuda maqannaasa Mooseena sandufa afeekaikidaqa.*

<sup>17-20</sup> Innee Yuda maqannaara qidaqa anee Yuda maqanna mariananoo anee Mooseena sandufa saqariki marianafa mariananoo, anee Anutunara fifau iridee qimasee firaqoo ufa qidana aneenna auqu uqeerree marianafa mariananoo, anee Anutuna andeeqara aanara irimarianafa mariananoo. Anee Mooseena sandufakinaana amiqira aanara faqa manda aanara faqa rainasee irimarianafa mariananoo, anee aneennara nifu dimbarausa aana uqannifiqee marunaasee qimarianafa mariananoo anee aneennara asukunaki mariasa misa qooma maridee qimarianafa mariananoo, anee aneennara furufarirausa irirana nimimarunaua qimarianafa mariananoo faiqiuqaindi amiqira aana uqannifiqee marunaasee qimarianafa mariananoo. Anee Mooseena sandufa minakiqari aiqama irirana faqa anoona ufara faqa qinee irida fee qimarianafa mariananoo.

<sup>21</sup> Doo qinee aniara qianaara, anee uqannifiqee marianafa mariananoo, nanaree sia aneennara faqa mina mareenee. Anee misara sia ummuariaqee qimaseenana doo aneenna ummuari marianafa mariananoo.

<sup>22</sup> Anee misara sia faiqi anaasee nári ummuari nári ummuari iaqee qidana, anee faqa sia fee ummuaridane. Ooninnai saqarinnai unna qira Anutunara foora mina amana auqimarianara fidaqaa imariananoo fee anee fee mi unnaqira anutuna amaana maqakina keeqafida minakinaa amiqira ainainara fifau ainainee qimaseenane kaqi maraidanee.

<sup>23</sup> Anee aneennara Anutuna sandufa qumaree marunaasee qidana aneenna auqu firaqoo uqeerree marinafa, aneefee Anutuna ufa rukiaseenane asaurirana amidanee.

<sup>24</sup> Ooqeenaa tamummaqarusa akarakina inniara maaqi qidanoo. Anaamuru inni Yuda maqanna mandoosana qafamasee quandaki Anutunara manda ufa qidaqa.

<sup>25</sup> Innee Yuda maqannaasa inneeqara fainanduqirausee qidaqa miqianara Anutuna faiqi namufee qimariafanoo. Qinee Pauroosa minara maa ufana qidaqa. Innee miqi mariasa Mooseena sandufamau amiqimandee fidaqa inni fainanduqirafa amiqira

ainaina mariannoo, mina ufa rukiaseeqa fifau nipata aukirafa, sia Anutuna faiqi namu mariafanoo aamina aanaamurara foora marifaranoo. <sup>26</sup> Aamina aanaamuru mariasa sia Yuda maqannaasa fainanduqimarusa misa nári kai sia irirai Mooseena sandufamau andeeqaramau fimarifanoo Anutufa mina qafamaseenoo Yuda maqannaara foora mariaafoo qiannoo.

<sup>27</sup> Anaamuru mariasa sia Yuda maqannaasa fainanduqimarusa misa andeeqaseeqa Anutuna ufamau fifaqa innee Yuda maqannaasa fainanduqimarusa Mooseena sandufa inni ufakiqari akara rirana rukiasaifanoo aanaamuru aamina maqannaasa nári andeeqarafa inni Yuda maqannaasa mariranara mandainainee qiannoo. <sup>28</sup> Yafee Yuda maqannaasa uqanna Anutuna aiku asauku uqanna maridanoo fee, apatasaa kooroo irafa mifee anoona maridanoo fee. Anutuna ufamau fimariasa mi fee anoona maridanoo fee. <sup>29</sup> Sia apatasaafau anoona maridanoo naundura nimuqusakiqari Anutuna ufamau fimariasa misa anoona maridanoo fainanduqirausara foora maridaqa. Sia Mooseena sandufa irirana irirafa mifau Anutuna aiku asauku kamannimaqaidanoofau. Anutuna maraquna naundurái saikisa misa kai Yuda maqannaasa uqannara foora Anutuna aiku asauku maridaqa. Miqifandinna fasiqausa sia faiqi nimooqiranafau maraidau, Anutuna amooqiranara ridaqa randasee maraidau.

### 3

<sup>1</sup> Qinee minara irammirisee qimannimianaura Yuda maqannaasa aanaamuru urinnaaqaraqa maridee kaqi fifau fee miqiqa marida fee. Misa fainanduqirausa misee aanaamuru urinnaaqaraidee kaqi fifau fee miqi qida fee.

<sup>2</sup> Oo sia fifau miqi qidaqa misa uriqararafa firaafa maridanoo. Doo qinee oosantarasee maaqi qimasee qimannimianaura, Anutufa nari ufa Yuda maqannaasasaa quqaqoofanoo marinau. <sup>3</sup> Akaqausa sia narisasa quqaqoonara irisee andeeqaramau fiqa rukiasee kaqi runnambiqau. Anutufa misa furufarirana qafamaseenoo qinee faqa misa qima afeekaikamma nimiafanna ufana qinee faqa misa naanna reeqa rukiianaaree qianaree.

<sup>4</sup> Qinee Pauroosa minara maaqi qidaqa. Oo sia uqanna Anutufa mi mandoosanna maraannoo anoona ufa kai qimarifa maridanoo. Faiqi anaasee unnufa kai qimariasa kai mariafanoo sia Anutufa miqiannoo andeeqasee anoona kai qiannoo. Ooqeenaa akara Anutunara maaqi qinoo maridanoo.

Ani ookinaa ufara aiqamausa anoona ufa fee qifaranoo. Misa ani ufara amanamandee irifanoo anoonaikammianoo.

Dafidina akarakinaa ufa Anutunara miqimminoo maridanoo.

<sup>5</sup> Misa faiqi faiqi unna qimasee maaqi qimasee Anutuna andeeqaranara qidaqa. Maasa faiqi faiqi qiqqa aaqarafa quandaki Anutuna andeeqarana mara maree kooroomeeqeenoo uqeerainaga maasa qeeqa aaqaranara amiqira ainainee qianauree. Miqooqari maasa maaqi qianauree mandainaina akiqara maasa Anutufa darinaqa maasa maaqi qianauree Anutufa aaqaidanoo daridanoo fee qianauree. <sup>6</sup> Qinee Pauroosa minara maaqi qidaqa. Oo sia uqanna Anutufa aaqaidanoo. Anutufa sia uqanna aaqaidanoo, nari andeeqarafa marinara maasa andeeqaqisaannoo mina andeeqarafa sia marinanoofau sia amana maasa aiqama maqannaasa ufa iriseenoo andeeqaisaiqini.

<sup>7</sup> Misa faiqi faiqi unna qimasee maaqi qimasee Anutuna anoona ufara qidaqa, maasa qiqqa unna ufa fannoo Anutuna anoona ufa kooroomafi uqeerainanoo qiqqa unna ufa amiqirafa maridanoo nanaree Anutufa qiqqa unna ufa akiqara qiqqa daruannoo fee. <sup>8</sup> Qinee mi manda ufanara eedoo qaanaqau maaqi qiaqini, Doo aniaqa maasa manda marirana uqeeraseeqa minannai amiqira marirana kambiqasaanee qiaqa. Mi manda ufana uqeeremaria fasiqausa Anutufa misa mara mareenoo nári nariranaki quqaannoo. Sia aaqaidanoo miqidanoo, andeeqaidanoo miqidanoo. Mi aaqara ufana qimariasa qini Pauroosara faqa unna qimasee Pauroofa maasara manda marirana uqeerasee minannai amiqira marirana kambiqaanifeera qimasee minannai qini diqidaqa aaqee mariafanoo.

*Aiqamausa nári mandainaina ameemaanai maridaqa.*

<sup>9</sup> Doo qinee kafa Pauroosa minara maaqi qimasee iraidaga, Anutufa maasa Yuda maqannaasee, aanaamuru mariasee, uriqaraida fee qidanoo amana amana kai fee maridee qidanoo. Qinee Pauroosa oo sia moo uriqarara fee qidanoo doo qinee faasai qimannimiqa sia moo fannoo uriqararafa mariaafoo qidaqa aanaamuru faqa maasa Yuda maqannaasa faqa nári mandainaina ameemaanai ureeqaqa mariaafoo qidaqa. <sup>10-11</sup> Ooqeenaa tamummaqara fasiqausa akara minara maaqi qinoo maridanoo.

Aiqama maa maqa maaqanaki mariasakiqari moodaa fasiqa sia uqanna andeeqarafa maridanoo, aiqamausa miqiraua kai maridaqa. Misakiqari sia moodaa fasiqa Anutuna aanara randaidanoo.

<sup>12</sup> Aiqama fasiqa anaasee uqanna Anutuna afusaqari quandaki kaqi runnamma ubeekamasee aqaranaki fimariafanoo. Sia moodaa fannoo amiqira oosana maraidaqa sia uqanna.

<sup>13</sup> Misa noo aamara faiqi madikara foora oo raqanoo marifaqa faiqi kurididaqa. Misa ufa fannoo sakani ukaqa

nimiranara foora inoo maridanoo faiqi kuqannaruqaqa ufa kai qimariasa.

<sup>14</sup> Misa nooqiari sukufa kai qidaqa niquraree mariasa.

<sup>15</sup> Misa dauni faiqi kuqannarirana aupurarana nimimariasa.

<sup>16</sup> Miqi mariasa fimariaqoo kai faaqa fuisee qirana faqa aiqama ainaina kuridi kaaridiga turi taariqa fidaqa.

<sup>17-18</sup> Misa sia asoora aana qafeeqa sia Anutunara naaquqaranara irimariasa maridaqa.

Ooqeenaa tamummaqara fasiqauqa akara Yuda maqannaara faqa aanaamuru mariasara faqa amana amana kai miqi mariasee qimaqoofa maridanoo.

<sup>19</sup> Mooseena sandufakina mina ameemaana mariasara qidanoo qimarifaqa maasa minara iridaqa. Faiqi anaasee aiqama maa maqannaasa nariara andeeqarausee qimaria ufana oosana oosanaqa aruseeqa aiqamausa mareeqee Anutuna narira ufa ameemaana quqaqeeera Mooseena sandufa ani maridanoo. <sup>20</sup> Sia faiqi anaasee moo fannoo Mooseena sandufannai andeeqara fasiqaikamambi Anutuna afusaa mariannoo. Sia minarau Mooseena sandufa ani maridanoofau. Faiqi anaasee maasa aaqee marunausee qiaqeeera Mooseena sandufa ani maridanoo.

*Anutuna afusaa andeeqasee marirafa kooroo inoo maridanoo.*

<sup>21</sup> Doo maqee kamuqoo Anutuna afusaa andeeqafi marira oosana doo kooroo inoo maridanoo. Sia Mooseena sandufarau qidau, aaduma moo ufara qidaqa. Mooseena sandufa faqa tamummaqaraua ufa faqa doo minara kooroomasee maaqimminoo maridanoo.

<sup>22-23</sup> Faiqi anaasee nari Anutuna asauku mundirana saqarikiranannai Anutufa mareeqee nari afusaa andeeqaranaki quqaidanoo. Aiqamausa asauku mundirana Yisuna ufa irisee minasaa rusimariasa miqi qimariasa aiqama maqannaasa Anutufa mareeqee nari afusaa andeeqaranaki quqaidanoo sia raina rainiannoo. <sup>24</sup> Aiqama maqannaafasiqa anaasee aqoonara Anutuna innaaruna asumu mariranasaaqari nianai mariafanoo minara Anutufa nari afaariranakiqari kaqi nimira ainaina nari asauku mundirana Yisunannai misa mareeqeenoo nari afusaa andeeqaranaki quqanniseenoo nari mandainainakinaana idukunnisanau.

<sup>25</sup> Anutufa Yisunannai faiqi anaasee mandainaina akiaqara mininnisaaninafa kambiqanifee qimasee Yisuna adiqamasee nimufaqa aunirira saqarisaa ariqau. Mi fasiqa anaaseesa nariqa Anutuna andeeqaranaki sia amanaikiqa Yisuna saqarikidaqa. Minaki keeqaranannai Anutufa misa mandainaina taikannisaidanoo. Anutufa nari andeeqara oosana kooroo ianifeera qimaseenoo nari asauku mundirana aunirira saqarisaa quqaseenoo minannai faiqi anaasee mandainaina akiaqara nari maranau. Ooqi maru arukuana Anutufa faiqi anaasee sia mandainainara narimarinau kisaqaqasaa kasooinoo marida nifauee marinau. <sup>26</sup> Maqee mari aukuna dauni ufa qimasee andeeqannisaidanoo nari andeeqarana kooroo ianifeera faiqi anaasee mareeqee nari afusaa innaaruna andeeqaranaki quqaidanoo. Anutufa Yisuna mareeqeenoo aunirira saqarisaa aruseenoo minannai maasa mandainaina taikaqisanau. Miqiranannai Anutufa qaara ainaina kooroo idanoo, nari andeeqarana faqa Yisuna ufasaa irirana rusisee mi mau fimariasa mareeqee nari afusaa andeeqaranaki quqannisarana faqa kooroo idanoo.

<sup>27</sup> Yuda maqannaasa Mooseena sandufamau fidaqa nariara andeeqaraua maridee qimasee nari nipatara nimoqida maridaqa. Sia sandufa miqinoo maridanoo Anutuna ufasaa irirana mundinoo marifa nari mina mandaqee marinafa mifa kai andeeqarafa maridanoo. Mifa kai Anutuna innaaruna andeeqaranaki quqaqaisaidanoo. <sup>28</sup> Minara maasa maaqi qidaqa Yisuna saqarikiranannai kai Anutuna innaaruna andeeqaranaki keeqafi mariannoo, sia Mooseena sandufamau finnanannai innaaruna andeeqaranaki keeqefaranoo. <sup>29</sup> Anutufa Yuda maqannaafasiqa Anutufa kai fee maridanoo, aanaamuru mariasa Anutufa faqa maridanoo fee. Doo Yuda maqannaafasiqa aanaamuru aiqamausa faqa Anutufa maridanoo.

<sup>30</sup> Anutufa moodaa maridanoo, moodaamau fimarifa maridanoo. Yuda maqannaasa Yisuna saqarikiranannai Anutufa mareeqeenoo nari afusaa andeeqaranaki quqannisaannoo aanaamuru faqa nari afusaa andeeqaranaki quqannisaannoo aanaamuru mariasa faqa miqi kai masee Yisuna saqarikinnannai nari andeeqaranaki quqaannoo.

<sup>31</sup> Miqunannai maasa Yisuna saqarikidaqa sia minannai Mooseena sandufa mareeqee aqidaqa, sia miqidaqa maasa minannai Mooseena sandufa uqeeraidaqa mi mau fidaqa, minara mi sandufana anoona paquridaqa.

## 4

*Abarahaamafa Anutunasaa nari irirana rusinau.*

<sup>1-3</sup> Innee Roomma maqannaasaki Yuda maqannaaka akaqausa maridaqa. Maasa Yuda maqannaqa qikeeku qikaaku Abarahaamafa naqaafeinau. Mifa andeeqara mariranannai fee Anutuna afusaa andeeqarafa maridanoofeeinau. Sia minannaifau miqinuu Abarahaamafa miqinoo maridanoofau Anutuna afusaa nari andeeqaranara asasini. Sia amana nari asasirafa marinau, Mooseena akarakinaa ufa minara maaqi qinoo maridanoo.

Anutufa Abarahaamanara qinuu anee moomoosa nikausaikina marinnaranoo.

Miqi qunara Abarahaamafa iriseenoo oo kuqaa kambigaannoo fee qimasee nari irirana Anutuna mi ufanasaa rusiseenoo afaaqa quqasee kisaqaasaa rakisi marinau. Anutufa mina qafamaseenoo Abarahaamanara oo Abarahaamafa qini ufasaa ani irirana rusimarianafa mariananoo andeeqarafa mariananoo fee qinuu, minara Abarahaamafa sia nari andeeqaranara narasasirafa marinau.

<sup>4-5</sup> Faiqi moo fannoo moo fasiqa ainainama isainanoo ainaina akoofa mina feefauru amiannoo. Aminanoo sia kaqi fifau qimiifoo qiannoo, nari mina ainaina kadaapirina akiaqara aminoo. Faiqi moo fannoo sia nari kadaapirinasaa andeeqarana maraidanoo kaqi nari irirana Anutuna ufasaa mundimarina Anutufa miqi mari fasiqana kaqi mareeqeenoo nari afusaa andeeqaranaki quqaidanoo. Anutufa faiqi faiqi aaqee mariasara andeeqarusee qimarifa maridanoo faiqi aanaaseeuqa sia nariqa kadaapirifa, kaqi mi ufanasaa nari irirana rusisainna fasiqa anaaseesa Anutufa nari andeeqaranaki mara quqannisaannoo. <sup>6</sup> Anutufa aaqee maru fasiqa anaaseesa sia narinuu, misara andeeqara fasiqa anaaseera foora kaqi mareeqee nari andeeqaranaki quqanau. Dafidifa minara maaqi qimasee akara rinuu.

<sup>7</sup> Anutufa mandainaina akiaqara mininnisoo fasiqa anaaseesa firaqoo asasidaqa. Nari mandainaina Anutufa rafaqafusoonara asasidaqa.

<sup>8</sup> Anutufa nari mandainaina akiaqara sia irisee naruannoo, mina akiaqara aunusee sia kafa minara ufa qiannoo. Miqira fasiqa anaaseeuqa minara irisee asasidaqa. Doo Dafidifa miqimmasee akara rinuu.

<sup>9</sup> Dafidifa mi asasirausara Yuda maqannaasara kai fee fee qinuu. Sia miqinoo maridanoo. Anaamuru mariasa faqa asasifandi maqi qinuu. Qinee Pauroosa faasai Mooseena akarakinaana Abarahaamanara qunafa maaqimminoo maridanoo. Abarahaamafa Anutuna ufa irisee nari irirana minasaa rusisoonara Anutufa minara kai irisee mina mareeqeenoo nari andeeqaranaki quqanau. <sup>10-11</sup> Yairee fee Anutufa nari andeeqaranaki quqanoo fee inuu. Abarahaamana fainanduqiru soogoo fee miqinuu sia fainanduqiraaqoo fee miqinuu. Sia fainanduqira qoo mi fasannai mareeqee quqanuu. Abarahaamafa Anutuna ufasaa nari irirana rusisoonara Anutufa mareeqeenoo nari andeeqaranaki quqaseenoo mina kooroo ianifeera Abarahaamanara fainanduqannee qufanoo miqinuu. Miqi kai inoo Abarahaamafa aiqama Anutuna ufasaa irirana rusiranannai Anutuna andeeqaranaki keeqee marusa nikoofaikinoo marinau. Miqi kai inoo sia fainanduqiraausa nari irirana Anutuna ufasaa rusisoosa Abarahaamafa misa nikoofaikinuu.

<sup>12</sup> Sia fainanduqiraausa faqa fainanduqiraausa faqa nikoofaikinoo marinau. Fainanduqiraausa Yuda maqannaasaa sia minara irisee Anutuna andeeqaranaki keeqaidaqa, misa nari nikaaku nikaaku Abarahaamafa mariundee kai iqa sia nari fainanduqiranara iriseeqa nari irirana Anutuna ufasaa rusisoosa Anutuna andeeqaranaki keeqefaranoo. Abarahaamafa sia fainanduqiraqoo nari irirana Anutuna ufasaa rusinau. Maqee fainanduqirafa mifa mariundeemiaqa.

*Abarahaamafa nari irirana Anutuna saa rusisoonara qima afeekaikiranana maranau.*

<sup>13</sup> Anutufa maa maqa maaqanara Abarahaamafa nari aiku asauku saimbaqa maqa maaqa fee qinoo qimafeekaikinuu. Sia Abarahaamafa Anutuna sandufamau andeeqasee finoofau mina akiaqara maqa maaqara qima afeekaikiranana marangofauinuu. Mifa Anutufa ufasaa nari irirana rusisoonara minara kai Anutufa mina mareeqeenoo nari afusaa andeeqaranaki quqaseenoo maqara qimafeekaikinuu. <sup>14</sup> Anutufa nari nimaninna ainaina Kannaana maqa maaqa faqa asumu marirana faqa nari sandufamau kadaapirumasee fimariasa kai nimananoofau faiqi nari irirafa mina ufasaa mundirafa fifau kamambuannoo Anutuna ufa qima afeekaikira ufa faqa fifau maridanoo

sia dadaaqiannoo. <sup>15</sup> Sandufa fannoo Anutuna aranaqarana mareeqeenoo faiqisaa quqaidanoo. Sandufa marinnaqoo kai sandufa rukiarafa mariannoo. Sandufa sia marinnaqoo mina rukiarafa faqa sia miqoo mariannoo.

<sup>16</sup> Qinee Pauroosa Abaraamaanara kafaa qidaqa. Anutufa nimianinna ainainara Kannaana maqa maaqa faqa asumu marirana faqa qima afeekaikirafa Abaraamafa Anutuna ufasaa irirana rusisoonara minasaa mundinoo maridanoo. Miqunara Anutufa nimianinna ainaina maa maqana faqa asuma marifandinnana faqa Abaraamana nari aiku asauku faqa misasaa oonu aruakinausa faqa kaqi nimiru ainainara fooru mariannoo. Sia Anutuna ufaki kadaapirumasee fimariasaindi kai mi ainainausa marifaranoo Abaraamana aanna ree mariasa, Anutuna ufasaa kaqi irirana rusimariasa misaindi faqa mi ainainausa mariannoo. Maasa Anutuna ufasaa rusimariasa nikoofa Abaraamafa maridanoo. Maasa mina aanna ree mariasa kai mina aiku asauku maridaqa.

<sup>17</sup> Anutuna ooqeenaa akara minara faqa maaqi qinoo maridanoo. Qinee ani Abaraamana mareeqeeqa moomoo maqannaasa nikoofaikianeera quqeeqa.

Doo maasa mi ufana iriseeqa maaqimmidaqa, Abaraamafa nari irirana rusisoo Anutufa nari qimafeekaikunara anoonee qidanoo. Mi Anutufa kuqirausakinaana mareeqee kaqi mariranaki quqee marifa maridanoo mina ufa fannoo qufanoo sia maru ainainafa kambiqaanau. <sup>18</sup> Abaraamafa nauraiqi kuqjara fooru inoo marufanoo Anutufa moomoo maqanna nikoofaikianeera qimamufanoo Abaraamafa mina ufasaa irirana rusiseenoo sia asasiyaqaa iraqoo asammaseenoo afeesinau.

Minara mifa kuqaa moomoo maqanna nikoofaikamambinau.

Ooqeenaa akara minara maaqimminoo maridanoo.

Anisaa aniaruakinausa moomoo marifaranoo.

<sup>19</sup> Anutufa mi ufana Abaraamana qimamu aukuna kuqirana adeedi ramasee wan handeereeta aukuna adeedi ramasee marinoo nari anaaga Saraqana faqa faiqi maqara aukuna ooqai uqanna taikafufanoo marunara amiqimasee iriseenoo, Anutufa faiqi aanaaqiara qimamunara iriseenoo sia Anutuna ufa afaimma quqanau, kaqi mina irirafa mina ufasaa irirana rusisee kuqaa kambiqaannoo fee qimaseenoo marinau. <sup>20</sup> Abaraamafa nari Anutunasaa nari irirana rusiqoofa sia quqasee finau, sia mifa Anutuna ufara qaara aundura irinau. Abaraamafa nari irirana Anutunasaa rusisooqanoo quandakinoo Abaraamana afeeka amufanoo faiqi kambiqaaninnanara Anutunara asasinu. <sup>21-22</sup> Anutufa qimamu ufanara Abaraamafa afeekaikamandeenoo Anutunara kuqaa afeeka maridanoo qimiannoo fee qimasee asasinu. Anutufa Abaraamana mi irirana qafamaseenoo doo minara Abaraamana mareeqeenoo andeeqara fasiqa fee qinuu, Abaraamafa nari irirana Anutunasaa rusisoonara minara andeeqarafee qinuu.

<sup>23-24</sup> Andeeqara fee qu ufafa sia Abaraamaanara kaifau miqi qimasee akara rinuu, maasara faqa akara rinuu. Maasa Karaambaiga Yisufa kuqiranakinaana uqeroonasaa irirana rusimarinuu maasara faqa akara rinuu. Maasa Anutufa mareeqeenoo andeeqara fasiqa anaasee kianinausa maasarammakara rinuu. <sup>25</sup> Anutufa Yisuna mareeqeenoo maasa aaqee marunnaara faiqi nisaukuki nimisooqafa kuqariqau. Maasa Anutuna afusaa andeeqarawsa mariaqee qimasee kuqiranakinaana Yisuna uqeeranuu.

## 5

### *Anutuna ufusaa andeeqaranaki marirafa.*

<sup>1</sup> Maasa qeeqa irirana Anutunasaa rusiseeqa marianara doo maqee sia Anutuna aranaqaranaki aanoo iranaki maridaqa Anutufa nari andeeqaranaki quqaqisooqafa minara doo maqee mina asooraanaki amiqiranaki maridaqa. Anutuna asauku mundirana maasa karaambaiga Yisufa minannai kai mi asooraanaki maridaqa. <sup>2</sup> Yisufa maasara kuqiranannai faqa maasa qeeqa Yisuna ufasaa irirana rusisaunnaannai faqa Yisufa maasa mareeqee Anutuna kaqi afaariranaki quqasai faqa maasa maqee minaki kikiqiqa maridaqa. Minaki maridaqa, kasooqaaqee innaarunai areenarana naida qimiannoo minara iridaqa asasiyaqaa afeesidaqa susuidaqa.

<sup>3</sup> Sia minara kai asasiyaqaa maqee marianaki ummaara oosana oosanakina maridaqa minaki faqa asasiyaqaa. Mandainaina ummaara darinaqa mi ummaarafa sia amiqimasee daruannoo minasaqari afeeka marasee sia dauni Anutuna ufamau firarana kudoosaa paanaura. <sup>4</sup> Maasa oosana oosana ummaarakina sia umooqukida kaqi fimariananoo Anutufa mina qiqafamaseenoo eedoo qianoo. Mina eedoo qira ufa fannoo quandaki maasa qifeeqarainaa maasa Anutuna nari areenarana qimianinnanara asammasee afeesidaqa maridaqa. <sup>5</sup> Mi asasirana afeesirafa sia qisaurirana qimiannoo Anutufa nari naaquqara maraqquna kaqi qimimarifa maridanoo. Anutufa nari naaquqara



maraqunannai maasa naunduraki nammariara foora narí aidirana maasa naunduraki adiaqimaqeenoo narí areenarana naida qimiannoo.

<sup>6</sup> Ooqai maasa Anutuna andeeqaranara sia amanaikiqa oorudupiqa mariafanoo Anutuna andeeqara aukuanasaa Yisufa maasa mandoosana maree mariafanausara maasara kuqunnimaqanau. <sup>7</sup> Faiqi moo fannoo sia moo fasiqara qimudaoo qimasee mina amaaga maqasee fifau kuqunoo, abee sia fee faiqi moo fannoo moo fasiqara amiqira fasiqara qimudaoo qimasee mina amaaga maqasee kuqunoo fee. <sup>8</sup> Yisufa sia maasara amiqirausee qimaseenoo maasa qimaaga maqaseenoo kuqinau. Maasa qeega mandainainaki kaqi mariafanoo asauku mundirafa maasara kuqunnimaqanau. Miqunannai Anutufa narí kaaqa maasara amuqisirana aidirana kooroomaseenoo maasa uqaqifiqanau. <sup>9</sup> Asauku mundirafa maasa mandainaina nariara mareenoo kuqinoo narí fidika teeqinoo maasa mandainaina akiaqara taikoonannoo Anutufa minannai maasa daundurakinaana mareeqee narí andeeqaranaki innaaruna mara quqaqisanau. Anutufa mina kuqiranara irisee taikara faasaana narí aranaqaranakinaana kuqaa uqanna asumu mareeqeenoo quqaqisaannoo.

<sup>10</sup> Maasa Anutuna namuqaa marufanoo mifa narí amaaku maasa mandainaina arirana maroonara iriseenoo mina kuqiranannai aqoondi kamma quqaqisaifaqa maridaqa. Asauku mundirafa kuqunannai Anutuna aqoondi kamambi maridaqa kafaq Yisuna kaqi mariranannai mifa taikara aukuaana Anutuna aranaqaranakinaana kuqaa uqanna maasa mina aqoondiuga mareeqee asumu mariranaki quqaqisaannoo. <sup>11</sup> Sia mina kai, Anutufa maasa aqoondi kamma qimaqoonara irisee Anutunara dufi dufi qidaqa asasidaqa. Anutuna asauku mundirafa Yisufa maasa karaambaiqa minannai maasa Anutuna aqoondi kiqa asasidaqa.

*Adamanasaaqaraafa kuqirafa Yisunasaaqaraafa findifirafa.*

<sup>12</sup> Ooqai indaaru moodaa fasiqasaaqaraafa Adamanasaaqaraafa maa maqa maaqanaki aaqarafa aninau. Doo mi aaqarana akiaqara kuqirafa moodaa kari ani marinau. Moodaa fasiqa Adamanasaaqari aiqama maa maqana afaaqasasa maria fasiqa anaaseesa mifa aaqona akiaqara misasaa faqa kuqirafa rafaaga finoo marufa maridanoo. <sup>13</sup> Aiqamausa aaqoonara rafaqaqafinoo maridanoo Mooseena sandufa sia ani marukamuqoo aaqarafa doo ani marufa maridanoo. Mi aukuanna mi fasannai sandufa akara rirana sia marunara Anutufa sia misa rukiaranara irinau. <sup>14</sup> Indaaruuqa fasiqa Adamana saaqari mi kamusaga kuqirafa aniufanoo mini Mooseena raquraminau. Mi kamusaga misa aaqarana Anutufa sia irinau, kuqirafa kaqi kai aiqama maqannaa kaqi kai rafaqaqafunnimaqanoo marinau. Sia aiqamausa Adamana aanna ramasee Anutuna ookinaa ufa rukiaqau. Nariki moo aaqarafa kaqi marunara kuqirafa kaqi kai rafaqaqafunnimaqanoo marinau. Adamafa kasoqaqee kambijaanina fasiqana Yisuna kikiqusirafa marinau.

<sup>15</sup> Miqanda sia amana amana kai maridaqa Anutuna kaqi nimira ainaina Yisufa sia Adamana aaqarafara foora maridanoo, mifa aaduma maridanoo. Dinni kuqaa faiqi moomoosa mi moodaa fasiqana Adamana aaqaranaki kuqigau. Mina dinni Anutuna kaqi afaarirafa Adamana aaqarana uraaqaranoo maridanoo. Anutuna kaqi nimira naaru marirafa moomoosa nimufa moodaa fasiqannai afaaramandee naaru marirana nimufa mifa faqa Adamana aaqarana uraaqararafa maridanoo. Mi moodaa fasiqafa Anutuna asauku mundirafa Yisufa maridanoo.

<sup>16</sup> Anutufa afaaramandee naaru marirana nimianinnafa moodaa fasiqa Adamana mina aaqarana uraaqaranoo maridanoo. Mi ooreeqarana faqa mi uriqarafa faqa miqanda rainarafa maaqimminoo maridanoo, dinni mi moodaa fasiqana narí moodaa kari aqaamasoona akiaqara Anutufa nimaarusira ufa quqaqoofa maridanoo mina dinni faiqi anaasee moomoosaki aaqarafa kambiqafi marufanoo Anutufa sia minara narinau, kaqi narí afaarinoo nininoo qinau, doo andeeqarasa mariafanoo nimaarusira ufa doo taikoenoo fee qinau. <sup>17</sup> Qinee kuqaa anoona ufa qimannimiana. Kuqaa moodaa fasiqa faiqi Adamana mina aaqarana akiaqara kuqirafa kambiqeenoo aiqama maa maqa maqana afaaqasasa mariasa kuqirafa oosana araseenoo manda rakisira rakisinnimaqaidanoo marifa maridanoo. Mi ufana dinni kuqaa moodaa fasiqasaaqaraa ainainirafa asauku mundirafa Yisufa mina ainainirafa Adamana uraaqaranoo maridanoo. Faiqi anaasee Anutuna rairairafa afaarirana faqa mina kaqi nimira andeeqarana faqa maree mariasa misa Yisufa asauku mundiranannai sia Adamana kuqiranaki marifaranoo innaarunai kaqi mariranaki afeekaikirusa marifaranoo.

<sup>18</sup> Dinni moodaa fasiqa Adamana oosana maaqimminoo maridanoo, mi moodaa fasiqana aaqaranasaa faiqi anaasee aiqamausa kuqira ufa ameemaanai maridaqa. Mina dinni miqi kai masee moo fasiqa Yisuna moodaa kari andeeqaina akiaqara kuqira ufakinaana idukueeqeenoo kaqi mariranaki quqaidanoo. <sup>19</sup> Dinni moodaa fasiqa ufa

rukiarana akiaqara faiqí anaasee moomoo aaqaranaki aqufiqau. Mina dinni miqí kai masee moodaa fasiqa Yisufa Anutuna ufamau firana akiaqara moomoo fasiqa anaasee Anutuna andeeqarusaikiqa marifaranoo. Minara qinee Pauroosa qíqa, (Yisufa ooqeenaa Adamana kikiqusirafa marinau maqí qidaqa.)

(Mooseefa sia kambiqoo kamuqoo mina sandufa sia marufanoo faiqí anaasee nári mandainanara mana mana imariqau.)

<sup>20</sup> Anutufa nári sandufa nimaarusira ufa Mooseenasaa nimufaqa nári mandainanara irufanoo firaanaikinau, miqínoo firaanaikianifeera Anutufa aminau. Faiqí anaasee mandainaina firaagoo ooru fimarufanoo Anutuna afaarirafa mina aakaarinni ooraaga-reenoo ooriqaranoo marinau. <sup>21</sup> Dinni aaqarafa kuqiranannai aiqama maasa rafaqa fidanoo mina dinni miqí kai masee Anutuna afaarirafa Yisuna andeeqaranannai maasa rakisiqimaqaidanoo qifiqeeqeenoo innaaruna asumu mariranaki quqaqsaidanoo. Anutuna asaku mundirana maasa karaambaíqa Yisunannai qifiqeeqee quqaidanoo.

## 6

### *Mandainainakiqari kuqíara foorammidaqa.*

<sup>1</sup> Anutufa nári afaarirana maasa qimunara minara naqí fee qianauree. Maasa maaqí qimasee aaqamasee qianauree, maasa mandainaina aaqaranaki kaqí mariananoo Anutufa mina minnisaina afaarirafa firaanaikée iannoo fee qianauree. <sup>2</sup> Oo sia uqanna maasa miqí qianaúra Yisufa aunirira saqarisaa kuqinau, maasa mina faqa kuqíira foora iqa marunnanara magee maria mandainainakiqari kuqíira foora iqa maridaqa. Naqimasee maqee mari mandainainaki fuauree doo kuqíara foora iqa maridaqa.

<sup>3</sup> Innee maa ainannara amiqimasee iridee sia fee iridee. Maasa Asaku mundirana Yisuna auqusaa nammari maraafannaqoo maasa Yisuna saimbaqa nári kuqíranaki keeqeeqa nammari mina kikiqa ususeeqa mareeqa. <sup>4-5</sup> Maasa nammari maraafannanannai maasa Yisuna namufaqa qikundeera foora iqa nári kuqírana naida qimidanoora foora qinoo, mina akoofa nári kaaqa arenara afeekannai nári asaku mundirana kuqíranakinaana mara findifuna, maasa miqí kai masee maasa fuka mariranaki mari-aqeeera qinoo maasa kuqíranakiqariara foora findifumaqisanau. Maasa Yisuna faqa kuqíqa moodaanaki kammidaqa miqikaimasee mina faqa findi fiqa mina moodaa kaqí mariranaki marianaura. <sup>6</sup> Maasa maa ainanna iridaqa, maasa manda marira nirana ameemaanai maridaqa. Doo maasa minakiqari idukuaniifeera Anutufa maasa mareeqeenoo asaku mundirana faqa aunirira saqarisaa kuqannarinau. Maasa sia kaifaa ooqeenaa marirana maraqa nuaqeerau miqinau. <sup>7</sup> Miqínoo marifaqa maasa minara maaqí qidaqa, faiqí moo fannoo kuqínoo mina manda marira nirana mina afaaqasaaqaraafa idukuannoo sia kafa amana minaki nuannoo. Maasa Yisunasaimbaqa kuquafannanara miqí qidaqa. <sup>8</sup> Maasa Yisuna faqa kuqíranaki keeqaafanausee qidaqa maasa mina faqa findifi mariraree qidaqa.

<sup>9</sup> Maasa asaku mundirana doo kuqíranakiqari findifinoo sia kafa kuquannoo miqunara kuqírana afeke sia kaifaa rafaqafuannoo fee qidaqa. <sup>10</sup> Mina kuqírafa mandainaina akiaqara arirafa moodaa kari kuqunara sia kaifaa maa maqanasaaqaraa mandainaina fannoo mina rafaqafuannoo. Doo maasa mandainaina mina rafaqafirana faqa, kuqírana faqa doo taikenoo. Doo maqee findififa mina marirafa Anutuna faqa maridanoo. <sup>11</sup> Innee mi irirana marasee maaqimandee iriaqa. Maasa mandainainaki maridaqa kuqufiqa doo sia minaki maridaqa maasa faqa kuqírausa maridaqa doo maqee asaku mundirana Yisuna faqa kuqíranakiqari findi fiqa mina faqa Anutuna kaqí mariranaki maridaqee qidaqa.

<sup>12</sup> Minara maqee manda marira nirana fannoo sia maasa qifaqa rakisiqimaqaannoo, qaoo qiaqa. Sia maasa faiqí faiqí manda nidiranamau fuaqa. <sup>13</sup> Manda oosana moo inni qumarinaqa sia inniqa nifaqa minakina eedoo qimasee quqaqa. Sia miqíqaqaa maaqíqa, innee kuqíranakiqari findifi mariasara foora aiqama nifaqa eedoo qimasee Anutuna aramandunnai rumaffanoo mina inni nifaqa mareeqeenoo nári andeeqara saikaki quqaanifeera mina aramandunnai inneeqa nifaqa quqaqa. <sup>14</sup> Maqee innee sia Mooseena sandufa nimaarusira ufa ameemaanai mariafanoo innee Anutuna afaarirana ameemaanai mariafanoo minara mandainaina fannoo sia inni rafaqa fuannoo.

### *Andeeqara oosanaki rumbaqa maridaqa.*

<sup>15</sup> Maasa sia Mooseena sandufa nimaarusira ufa ameemaanai maridaqa Anutuna mandainaina minnisara afaarirana ameemaanai maridaqara qíqa manda oosanaki kaqí qifaqa quqasee maraanauree. Oo sia uqanna. <sup>16</sup> Innee maanara iridaqa maasa Yuda maqannaa ooqeenaa oosana irimariafanoo, maasa akaqausa karafusara foora moo fasiqa qeeqa qifaqa amisee mina ainana auqamaisaídaqa. Yafasiqanee ainaina

maisanauree, mi fasiqana qeeqa qifaaqa mina aramandunnai quqasaanoo mifa qini rakisi qimaqainaaqaa mina ufara eedoo kai qianaara. Qinee manda oosana faqa Anutuna ufa iriranara faqa miqandara qidaqa. Inneeqa nifaaqa mara maree manda oosana ameemaanai quqasaifanoo inni mareegeenoo kuqiranaki quqannisaannoo, miqoqari mina dinni Anutunai ubeekamafi minufara eedoo qimasaiifanoo mifa narí andeeqaranaki quqannisaannoo.

<sup>17-18</sup> Oo Anutunara dufi dufi qiaqa. Innee oqai mandainaina ufa ameemaanai marusa mariafanoo maqee innee inneeqa aiqamausa naundurannai qinee Pauroosa qimannimuna naamuaqira anoona ufa ameemaanai mariafanoo minara innee manda rumbaranaki marufanoo Anutufa idukunnisoofaqa mina andeeqara rumbaranaki fuafanoo. <sup>19</sup> Inneeqa faiqí faiqi sia afeeka irirana faqaasa mariasa mariafaqa qinee Pauroosa kaqi maa ufana inneeqa irimariana amana kai qimannimianaqa iriaqeera qimannimidaqa. Ooqai innee inneeqa nifaaqa faiqí faqa anaasee faqa nariara nariara fanandirana faqa oosana oosana mandainaina faqa moo faqa aaku aakumaffifaqa mariafanoo mina aramandunnai kai inneeqa nifaaqa quqasaafanoo doo maqee miqi kai iqa inneeqa nifaaqa aiqama andeeqara oosanaamau fimariana aramandunnai quqasee maqeeidaqa naaqugara andeeqara mariranaki mariaqeera.

<sup>20</sup> Ooqai innee manda oosana rumbaranaki maridaqa sia andeeqara ummaara ameemaanai mariqau sia minara irimariafanoo. <sup>21</sup> Mi manda ummarafa ooqai mariunara maqee nisauri mariafanoo. Innee mi mandainainaki maridaqa minakiqari nanee moo amiqira ainaina mareeusee. Maqee minara iriseeqa ooqai maraafannainainara nisaurirainaina maraqiafanoo qidaqa. Mi manda oosanaamau fiffiufa kuqiranai kai ubeekke marinau. <sup>22</sup> Doo maqee innee mandainainakiqari idukiqa mariafanoo Anutuna rumbaranaki keeqafi mariafanoo. Doo innee miqunara inni marirafa aiqama doo minaindi kakai mafi mariinaqa taikara aukwana innaarunai marirana inni nimiannoo. <sup>23</sup> Dinni manda oosana fannoo narí ainainimariasaa naarama quqaseenoo narí ainainirana akiaqara feefauru nimidanoo mi feefaurufa kuqirafa kai maridanoo. Kafaa mina dinni Anutuna kaqi nimira ainaina innaarunai naaru marirafa sia ainainirana akiaqara maridanoo, mina asaku mundirafa maasa karaambaiqa Yisufa mina faqa moodaanaki kiqa maridaqa mina namufaqa innaarunai naaru marirana kaqi nimirafa mariannoo.

## 7

### *Mandoosanakiqari maqee Yisuna findifranaki maridaqa.*

<sup>1</sup> Oo qini qikaqaafasaa Roomma maqanna mariasa qinee Pauroosa maqee ufa qimannimirara innee amiqimasee irimaru ufana qimannianaara. Faiqí anaasee sandufa faqa Mooseena sandufa faqa faiqí anaasee kuqiqa mi sandufana sia irifaranoo. Kaqi maru kamuqoo misa mina irisee mina ameemaanai maridaqa. <sup>2</sup> Nimundara fasiqa anaaseera foora sanda ufa ameemaanai maridaqa. Mi anaaseena afaaqi kaqi marinanoo mi anaaseefa narí afaaqindiri sanda ufa ameemaanai maridanoo narí afaaqisaa atooqanoo mariannoo, afaaqi kuqu finanoo mina anaqa fannoo kaqi fifau mariannoo sia sandufa ameemaanai mariannoo sia narí afaaqisaa atooannoo. <sup>3</sup> Mi anaaseena afaaqi kaqi marinanoo quandaki moo fasiqa marainnanara qummuarimari anaasee fee qifaranoo. Mina afaaqi kuqufinanoo sandufasaqaraafa doo idukinoo maridanoo, quandakinoo moo fasiqa marainnanara sia minara ummuarimari anaasee fee qifaranoo.

<sup>4</sup> Doo innee qini qikaqaafasaa innee faqa Mooseena sandufa ameemaanai mariasa doo innisaimbaqa qifaaqa fannoo Yisuna saimbaqa kuqinau. Doo mi kuqiranakiqari mina Yisuna namufaqa findifiqa minaindikia Anutuna ainainirana andeeqasee anoona ainaina imarinakina mariaqeera mariafanoo. <sup>5</sup> Ooqai marusa qeeqa faiqí faiqi iriranamau manoo manaa iqa fimariafananoo Mooseena sandufa anireenoo maasa manda oosana afaurammeeqee mara uqeera kikiqa maseenoo quandakinoo mareegeenoo kuqirana ameemaanai quqaqisanau. Minara Mooseena sandufa nimaarusira ufa fannoo maasa karafusara foora rumbaqaqimaqanau.

<sup>6</sup> Doo maqee iriaqa, maasa Yisuna faqa kuqiara foora iqa maridaqa maasa karafusa rumbaqa marianasaaqari idukuaki maridaqa sia kafaa ooqeenaa mariranaki fuanaura. Maasa Mooseena sandufamau fuannana mifa maasa mandainaina mara uqeera quqaannoo minara mi mau sia fuanaura, fukamau Anutuna maraqina aataa fuanaura.

### *Sandufa fannoo paqurimma qimifaqa qeeqa mandainaina kaqi maridaqa.*

<sup>7</sup> Minara maasa Mooseena sandufara mandainainafee qianauree. Oo sia miqinoo maridanoo. Mooseena sandufa innee moosa ainainara sia nimuqusanifee qidanoo sia miqinoo marinaqa qinee moosa ainainara qimuqusimarina mina aaqee unoo qunara sia irini mana mana kaimmunaiqini. Minara Mooseena sandufakinaafa doo kooroomandee

mandainainara qimaqimifaqa qisauriqa. <sup>8</sup> Mooseena sandufa fannoo moosa ainainara sia nimuqusiagee qinoo marifanoo qini manda irirafa irisee quandakinoo firaagoo moosa ainainara amuqusidanoo. Minara sandufa sia maru kamuqoo mandoosanara oonumafi irirafa kuqinoo marufaqa mana mana imariafannana.

<sup>9-10</sup> Mooseena sandufa sia maru aukwana sia faiqi anaasee narufaqa sia kujiara foora imariqau kaqi maridaqara foora imariqau. Mooseena sandufa nimaarusira ufa kambiqafufaqa misa naundurari manda oosana uqeera niminoo narinau. Miqimandaifanoo Anutuna kaqi marira nimira ufa fannoo kuqirana kai niminoo. <sup>11</sup> Misa naunduraki mari mandainaina fannoo misa narirara rakisinoo marifanoo Anutuna sandufa aniraifanoo mina qumareenoo minannai misa naru quqeenoo.

<sup>12</sup> Mooseena sandufa faqa Anutuna naamuaqira ufa faqa andeeqarafa naaquqarafa amiqirafa maridanoo. <sup>13</sup> Amiqira ainaina fannoo fee misa kuqa narinoo fee qianauree. Oo sia miqinoo maridanoo. Misa naundurakinaa mandainaina fannoo kai amiqira ainaina mara mareenoo minannai misa narinoo. Miqi mandainanoo misa naundurakinaa anoona mandainaina akooqoo kooroo ianifeera miqinoo. Doo mi mandainainafa Mooseena sandufa saaqari innooqeenoo firaanaikinoo maridanoo.

*Maasa qiqa daunduraindaraa irirafa oonu rarisee ani rarisee idanoo.*

<sup>14</sup> Qinee Mooseena sandufara kuqaa innaarunaindaraa ainainee qidaqa. Qini daundurakinaa mandainaina fannoo ainainira fasiqara foora qini feefaurummeeqeenoo nararamandunna quqaqisaqaisa mina rumbara saikaki maridaqa. <sup>15</sup> Qinee mi saikanaki maridaqa qeeqa auqee marunna saikoosanara faqa sia iridaqa. Qinee amiqira oosanara didimarina marararee qidaqa sia maraidaqa. Qinee dapi manda oosana fidaqaaira oosana kai maraidaqa. <sup>16</sup> Qini irirafa qikooqemari mandoosanna maraidaqa Mooseena sandufa fannoo qiniara aaqee mariifoo qimasaifanoo qini irirafa faqa mina irirafa faqa moodaagoo apinoo marifaqa. Oo Mooseena sandufara anoona mariifoo qidaqa.

<sup>17</sup> Miqidaqa sia qeeqa maraquanafau mi manda oosanna maraidau. Mandainaina fannoo qini daundurari marifa mifa qini qifeeqarifaqa mi manda ainainna maraidaqa. <sup>18</sup> Qeeqa daundurakinaafa amiqira oosanna maraannee qifaqa qini irirafa anuqidanoo sia amanaikidanoo. Mina iridaqa maaqi qidaqa qiqa faiqi faiqi qimuqusaki amiqiroosanna sia minaki marifanoo fee qidaqa. <sup>19</sup> Amiqiroosanna auqararee qimasaidaga miqooqari quandakifaqa qikooqemari mandoosanna kai auqaidaqa. <sup>20</sup> Qinee qini qikooqemari mandainaina auqaananoo sia qeeqafau auqaidau qini daundurakinaa mandainaina fannoo mina auqaidanoo.

<sup>21</sup> Qinee amiqira ainaina iraree qunanoo mandainaina kai qini doorinni aniraifaqa mina kaimma auqaidaqa. Mi sandafa kai qini daundurari irirana qimidanoo. <sup>22-23</sup> Qini qimuqusa ookina Anutuna sandufara asaidanoo qiqa qifaqaqi mari manda ainaina mifa kai qini raineeqeenoo nari rumbaranaki quqaidanoo. <sup>24</sup> Qiqa manda qifaqa fannoo qiqa daundura mareeqeenoo kuqiranaki quqaidanoo. Oo qinee nanaree kaqa mandainainaki maridee firaagoo doori runidee. Qeeqa qifaqa qimana namufaqa kuqiranaki fuananoo yafee aniree minakinaana qini qimana mareeqee kaqi naaru mariranaki quqaqisaannoo fee.

<sup>25</sup> Oo dufi dufi Anutufa nari asauku mundirana Yisuna maasa karaambaiqannai qini mareeqeenoo naaru mariranaki quqaqisaannoo. Doo maqee qinee minara maaqi qidaqa. Qini marirafa maaqimminoo maridanoo qeeqa qimuqusa daundurakinaa irirafa Yisunannai kai Anutuna sandufamau fidaqa qeeqa faiqi faiqi manda nirana marirana mandainaina sandamau fidaqa.

## 8

*Anutuna maraquna fannoo maasa daunduraki dadaaqifaqa andeeqasee maridaqa.*

<sup>1-2</sup> Maasa Anutuna asauku mundirana Yisuna faqa moodaanaki marifanoo Anutuna maraquna fannoo kaqi marirana niminoo kuqirana manda sanda faqa manda oosana faqa minaki marunnana idukuqisaifaqa maridaqa. Minara maqee asauku mundirana Yisuna faqa moodaanaki mariasa sia Anutuna kuqira ufa ameemaanai maridaqa.

<sup>3</sup> Mooseena sandufa nimaarusira ufa sia amana maasa uqeereeqeenoo maasa faiqi faiqi maasa marirafa kudoosaapaunanoo minara sia maasa uqeeraqiseenoo. Mooseena sandufa kadiqoofanoo miqoo Anutufa moo oosanannai anoonaikinau. Mifa nari amaaku aqiqoonannai maasa faiqi faiqi naundurakinaa mandainaina arinau. Yisufa faiqi faiqi naundurakinaa manda ainaina maraquanifeera nari faiqi faiqi fooqaanaikamasee aqiqoofanoo quminau.

<sup>4</sup> Maasakiqari akaqausa sia faiqi faiqi iriranamau fimariasa Anutuna maraquna sandufamau fimariasa maasara Anutufa qifaqeenoo sia maasa andeeqarafa Mooseena

sandufa amana ooru maridanoo, ooreeqanoo maridanoo. Anutufa mina qafamaseenoo maasa andeeqarafa Mooseena sandufa amana kai ooru fuaniffee qimasee nari amaaku aqiqoofanoo quminau. <sup>5</sup> Faiqi faiqi naundurakinaa manda iriranamau fimariasa nari naundurakinaa irirafa nariqa rafaqaqafunnisaifaqa mi mau fidaqa. Anutuna maraquina ufamau fimariasa maraquina aidimari ainainafa misa nitikuraki keeqafi rakisi qumaraifaqa mi mau fidaqa.

<sup>6</sup> Faiqi faiqi nidimari manda ainainafa ani atikuraki rakisinana kuqirannai ubeekanoo maridanoo kafaa mina dinni Anutuna maraquina fannoo nari aidirafa ani atikuraki rakisinana mifa ani mareeqeenoo kaqi mariranaki faqa asoaranaki faqa ubeekama amaqaannoo. <sup>7</sup> Faiqi faiqi manda nidirafa nitikuraki rakisimariasa Anutuna namugaakammiga maridaqa, sia Anutuna sandufamau fidaqa, fidaqau sia amanaikiqini.

<sup>8</sup> Nari faiqi faiqi iriranamau fimariasa sia amana Anutuna aidiramau fifaranoo.

<sup>9</sup> Innee Roomma maqusai mariasa qini qikaqaafasaauga innee sia miqimariasa Anutuna maraquina fannoo innikina marifaqa innee sia faiqi iriranamau fimariasa marifanoo innee maraquina ufamau fimariasa mariafanoo. Asauku mundirana maraquina siaifa sia minaindi maridanoo.

<sup>10</sup> Asauku mundirafa inni naundurari namummaqainaqa mina maraquina fannoo inni nifaqaq mandainaina fannoo narinoo marinnana sia minara iridanoo qafaidanoo Yisuna kuqiranara iriseenoo kaqi marirana inni nimana kaqi nimidanoo. <sup>11</sup> Anutuna maraquina fannoo Yisufa kuqiranakinaana marafindifinau. Yisuna mara findifu maraqunafa kai inni faiqi nifaqaq kuqiga marifanoo kasooqagee mi kuqirana uqereeqeenoo kaqi marirana nimiannoo, nari maraquina inniki marinnanai miqianoo.

<sup>12</sup> Oo qini qikaqaafasaauga maasa moo ummaara ameemaanai maridaqa maasa faiqi faiqi manda nidirana ameemaanai sia maridaqa. Yisuna maraquina ummaara ameemaanai maridaqa. <sup>13</sup> Innee maqee faiqi faiqi iriranamau figa doo kuqifaranoo. Anutuna maraquina ufa irisee minannai innee inneeqa manda oosana kuqaruseeqa innee sia kuqifaranoo kaqi marifaranoo. <sup>14</sup> Anutuna maraquina fannoo nifiqee fimariasa Anutuna faiqi namu maridaqa. <sup>15</sup> Anutufa nari nimimari maraqunafa sia inni manda rumberanaki quqaseenoo ruflarana nimiannoo, mifa sia miqidanoo maagimmiannoo inni mareeqeenoo inni Anutuna faiqi namu kammassainaqa mina afeekannai kai qifaqaq quqasee maasa Anutunara maasa qikoonee qidaqa. <sup>16</sup> Anutuna maraquina fannoo aniree maasa qeeqa maraquina minasaa ootupamasaannanara maasa maraquina qimamida maaqi qidanoo innee Anutuna faiqi namu mariafanoo fee qidanoo.

<sup>17</sup> Anutufa nari faiqi aanaaseera amiqi amiqira ainaina afeeda maqimaqaina maasa mina faiqi namu marianara minara maasa mifa innaarunai quqannimaqagai qumiasana kasooqagee maraanaura. Anutufa nari asauku mundirana amaqaqai qumiasana faqa maridanoo mifa mina faqa maasa mirinni innaarunai naida qimiannoo. Maqee maria aukuaana asauku mundirana kuqira aupurana dadaaqi maraananoo innaarunai mina kaaqa areenarana faqa naida qimiannoo.

*Maasa aupuraranaki maridaqa Yisuna kaaqa qarana afeesida maridaqa.*

<sup>18</sup> Maqee mari aukuaana Yisuna kuqu aupurana dadaaqi marainafa faqa maasa oosana oosana ummaara marainnana faqa kaqikaafa maridanoo, kasooqagee innaarunai nari areenarana naida qimianinafa qafaananoo firaafa uqanna mariannoo sia maqee aupuraranara qianaara fifau ainainara foora maridanoo.

<sup>19</sup> Anutufa auqu quqoo ainainasa innaarunaindaraana faqa maqasaaqaraana faqa mi ainainasa aiqama moodaanaki kaaqa aupurana maridaqa Anutuna faiqi namu faiqi faiqi misa kuqiranakiqari findifiranara afeesidaqa. Misa kaaqa firaqoo minara afeesida maridaqa. Maasa Anutuna faiqi namu saimbaqa putaa iranakiqari idukuqagee qimasee kaaqa afeesidaqa. <sup>20</sup> Innaarunai faqa maqasaa faqa mari ainainafa aiqama putaa inoo mandaikinoo rakeeinoo madaapeekamidanoo. Sia nari kai miqidanoo Anutufa nari qimaqoomau fidanoo miqidanoo. Anutufa minauqa faqa faiqi narira ufa ameemaanai quqaqoosa maridaqa madaapeekidaqa. Mi putaira marirafa qumaarandanoo maridanoo mina aufadara ufa faqa maridanoo maagimminoo maridanoo. <sup>21</sup> Aiqama mari ainainafa nari putaa kiqari kasooqagee idukufuannoo. Idukufinoo Anutuna faiqi namu nari idukiranaki faqa idaaqira areenaranaki faqa keeqafi moodaanaki marifaranoo.

<sup>22</sup> Oosanasaqari aiqama Anutufa auquqoo ainainafa anaasee inaanunai aupuraida ikiraqee marianara foora maqee putaa irafa ummaarandanoo maridanoo. <sup>23</sup> Sia auquqoo ainainafa kai aupuraidanoo maasa faqa qeeqa faiqi faiqi manda marira nirana aupurana aupuraidaqa, kasooqagee Anutufa fira qumiasana maasa innaarunai qimiannoo, maqee oosana arasee nimira ainaina nari maraquina nimiqoosa maridaqa. Maasa Anutunara afeesidaqa aupuraidaqa mifa maasa aiqama qipatasaa marirana

iriranakinaana idukusainaqa narí faiqi namu kamambiqa innaaruna ququsaki mariageera minara qeeqa faiqi faiqi manda marira nirana aupuraranara aupurada afeesida maridaqa.

<sup>24</sup> Maasa Yisunasaa irirana rusiseega minara asasammasee afeesidaqa minannai innaaruna asumu marirana mareega. Asasamandee afeesimaria ainainafa anirainaqa qafamasee maasa sia afeesianaura. Sia moo fannoo narí qafeemari ainainara afeesidanoo, doo ani maridanoo. <sup>25</sup> Maasa sia qafaa ainaina kambiqaannoommifoo qidaqa ubiqafi reendenamandee asasamasee afeesidaqa.

<sup>26</sup> Miqikai inoo Anutuna maraqauna fannoo anireenoo maasa Yisuna saqarikiranara kudoosaapee mariasa dadaaqidanoo. Maasa nana innaaru fee qianauree qimasaidaqa nana ainaina kikiqususaidaqee innaaru qianauree qimarufanoo Anutuna maraqauna fannoo maasa ooreegara innaaru qirana qafeenoo innaarunai ooru maasara Anutunai firaqoo dadaaqidanoo piseopisoo mandee innaaru qidanoo, faiqi faiqi ufa sia amanaikifanoo ammaqasaidanoo firaqoo Anutufinnai maasara innaaru qidanoo. <sup>27</sup> Anutuna maraqauna fannoo Anutuna faiqi aanaaseera Anutunnai firaqoo piseopisoo mandee innaaru qidanoo, sia fifau, Anutuna iriramau kai misara innaaru qidanoo. Anutufa faiqi nimugusaki mari ainainara faasai qafee marifa marinara maraqauna ireefandinna ainainara faqa faasai iridanoo moodaa irirana marinara maraqauna maasara ireemari ainainara iridanoo.

<sup>28</sup> Maasa maa iriranna iridaqa faiqi faiqikinaana narí asumu mariaqeera qimasee narí rusandeesamumandee maroosa Anutunara nidimarisara Anutufa misasaa rakisidanoo oosana oosana ummaara mandainainna misasaa quqeemarina misa dadaaqida fee qidanoo misasaa quqaidanoo. <sup>29</sup> Anutufa faiqi faiqikinaana rusandeesamumandee maroosa sia fifaufau maranau. Misa narí amaaku Yisunaikamambi mifara foora mariaqeera misa rusandeesamumasee mareeqeenoo utaaqama nimaqasoofaqa mariqau. Miqimaisainanoo Anutuna amaaku fannoo moomoosa maqasaqaraasa mina akaqaafasaara foora maridaqa mifa misa ooqu faiqi nifasaafara foora mafinoo marianifeera utaaqamma amaqaanau. <sup>30</sup> Anutufa narí maraqaosa naaramasoofaqa aniroofanoo mareeqeenoo narí mariranaki quqanau. Anutufa sia fifau naarama quqanau, naaramasee narí afusaa andeeqaranaki quqanau, minaki quqaseenoo innaarunai kaqa areenarana faqa naida ninanau.

*Sia moo ainaina maasa Yisunasaaqaraana amana rakee iannoo.*

<sup>31</sup> Maasa maa ufana aiqama irisee Anutunara naqi fee qianauree. Anutufa maasa dadaaqimarifa marinanoo yafee maasa amana rafaqa fuannoo. Sia amana moo fannoo maasa amana rafaqa fuannoo. <sup>32</sup> Anutufa sia narí amaakuara irinuu kaqi maasara qimudaoo qimasee kuqiranaki quqanau. Mifa narí amaaku uqanna ririmma kaqi qiminuu nana ainainee moo ainaina sia qimiannoo, aiqama ainaina kaqi afaarida qimiannoo.

<sup>33</sup> Yafee Anutufa rusandeesamumasee maroo fasiqa aanaaseera mandainainara qimammaree nifairiannoo fee sia moo fannoo miqiannoo Anutufa narí uqanna misara mandainaina siaisee qidanoo.

<sup>34</sup> Yafee moo fannoo mina faiqi namu kuqira ufa nimiannoo fee. Sia moo fannoo amana miqiannoo. Anutuna asauku mundirafa Yisufa doo kuqufufanoo Anutufa kuqiranakinaana mara findifumasee kaqi mariranaki quqasaifanoo doo maqee Anutuna aaga asauku uqannai maridanoo maasara Anutuna oorisa innaaru qidanoo.

<sup>35</sup> Yafee moo fannoo asauku mundirana amuqusiranakinaana maasa rakeemasee kaqinni quqaannoo fee. Sia uqanna moo fannoo amanaikiannoo. Amanee mandainaina oosana oosana fannoo mina amuqusiranakinaana rakee iannoo fee qimuqusimari ummaara fee amanee Yisuna amuqusiranakinaana rakee iannoo fee Yisuna ufasaara narirafa mifee amana rakee iannoo fee. Aararee marinee amanee rakee iannoo fee kudikira fee rakee ianno fee ariranara deedaqirafa amanee rakee iannoo fee kuqirafa amanee mina amuqusiranakinaana rakee iannoo fee. Sia moo ainaina amana rakee iannoo. <sup>36</sup> Tamummaqara fasiqa akaraki minara maaqi qidanoo.

Maasa Anutuna ufamau fimariasa faasaambaasaana aiqama kari Anutunasaara darirana eerairidaqa. Anutuna ufa siaisa misa maasa kuqiranaki fimaria sipsipausara foora maasa maaqimma qidaqa, kuqa dariridaqa.

<sup>37</sup> Tamummaqara fasiqauqa miqi qimaqoofaqa qinee Pauroosa mi aiqama ainainausara qinee maaqi qidaqa. Sia moo manda ainaina fannoo Yisufa maasara amuqusiranakinaana ani mara rakee iannoo mi mandainaina oosanna oosannafa maasa darirari marifanoo mi dariranna sia rafaqafuannoo. Maasara amuqusimarifa asauku mundirafa maasa mareeqee uriqararanaki quqaqaisa maridaqa.

<sup>38</sup> Qinee Pauroosa maa ainainnara amiqimandee mapukusee iridaqa, sia moo innaarunaindaraa rakisira fee moo afeeka fee maqee mari ainaina fee kasooqagee kambigaaaninna ainaina fee kuqa dariranee kaqi mariranee. <sup>39</sup> Innaarunai mari ainaina fee maa maqanasaa mari ainaina fee, Anutufa auqu quqaqoo ainainakiqari sia amana moo ainaina fannoo Anutuna amuqusiranakinaana ani qumaree rakee iannoo. Anutuna asauku mundirafa Yisufa maasa karaambaiqa fannoo maasa mareeqeenoo minaki quqaqaisa maridaqa sia moo ainaina fannoo minakinaana ani qumaree rakee iannoo.

## 9

*Pauroofa Isaraee maqannaasara qimudaao qidanoo naiki raqeenoo qimanimu ufafa.*

<sup>1</sup> Qinee Pauroosa anoona ufa kai qimannimidaqa. Qinee asauku mundiranaindi maridaqa sia unna ufa qimarunaua maridaqa. Qini daakirafa Anutuna naaquqara andeeqara maraquna fannoo mifa rakisimarifaqa sia qinee unna ufa qianaara. Qinee qeeqa maqannaasa Isaraee maqannaara qimannimianaara. <sup>2</sup> Misara firaqoo qimuqumarifaqa qikiraqaidaqa qeeqa maqannaasa qeeqa moodaa qimaqi moodaa fidika rainarusaara miqidaqa. Misa Yisunara sia fee qimasee arunara oonumafi iriqa ikiraqaidaqa. <sup>3</sup> Misa Isaraee maqannaasa asauku mundiranasaaqaraana rakeemmiqa maridaqa. Anutuna narira ufa ameemaanai marianara qinee rakeemaseeqa minni misa nimaqa maqaanaqa misa aiqaree asauku mundiranasaa atooqafiqa naaru kaqi mariranaki mariaqaana.

<sup>4</sup> Misa Isaraee maqannaasa Anutufa aiqama maqannaasakinaana rusandeesamumandee Isaraee maqannaasa maroosa mariafanoo, Anutufa misa mareeqeenoo nari faiqi-namukamasee nari areenarana raina nimigoosa mariafanoo. Anutufa nari moodaanaki kira ufa oosana oosana moomoo nimiseenoo nari sandufa faqa Mooseenasaa quqasoona faqa niminau, misa Anutuna amooqirafa anoonamau fimariasa, misa Anutuna qima afeekaikira ufa moomoo maree marusa. <sup>5</sup> Misa ooqeenasaa faiqi nuqufaqaasa Abarahaamana faqa Isakeena faqa Yakooboona faqa misauqa faiqi namu niku nisauku mariasa, misa asauku mundirafa mi maqannaasaki qumu kambiqafufaqa moodaa maqannaasa marusa maridaqa. Anutufa aiqamausara rakisidanoo, naaru naaru mina amooqiaqa. Kuqaa.

<sup>6</sup> Qinee Isaraee maqannaasara irisee sia Anutuna qima afeekaikira ufara kadiqee maqi qidaqa. Anutufa sia aiqama Isaraee maqannaasa rusandeesamumandee nari faiqi namu mariaqee qimasee maranau. <sup>7</sup> Abarahaamana aiku asauku atiuqa faqa sia aiqama Anutuna aiku asaukukiqau. Minara qidaqa, Anutufa maqi qimasee Abarahaamana qimaminau. Ani faiqi namukinaana Isakeena aiku asauku kai ani aiku asauku fee qianaara. <sup>8</sup> Mi ufana Anutuna qimamira ufara qinee maqi qidaqa. Abarahaamana dapi anaasee Qakaarana kaqi fifau maroona faiqi namu sia Abarahaamana aiku asauku fee qinoo maridanoo. Anutufa qima afeekaikiranannai maqoo faiqina mina aiku asaukuara Abarahaamana aiku asauku anoona uqannee qidaqa. <sup>9</sup> Anutuna qima afeekaikira ufa maaqimminoo marinau. Qinee qeeqa andeeqara aukuaana aniree Saraqana dadaaqiananoo faiqi maqaannoo.

<sup>10</sup> Sia mifa kai, maana faqa Reebeekanara faqa qimannimianaara, Reebeekafa qaara faiqifaqaafa marinau, miqanda nikoofa maasa qikeeku qikaaku Isakeefa marinau. <sup>11-12</sup> Reebeekafa faiqi maqaaninnaqanda mi faiqiqanda nuqu indaarugaa faiqi auqu Eesaufa mariannoo fee qinuu. Mina innaaqianna maqaaninna faiqina auqu Yakooboonee qinuu. Miqanda sia kambiqaraqoo Anutufa indaarugaa faiqiara innaaqianaa faiqi mina ainainamma aisaaninna fee qimasee afaaqooqa qinuu. Sia miqanda kambiqara maridaqau mandoosana fee amiqira oosana fee maraidammiafoo qimaseenooqau mi ufana quqanau. Anutufa moodaa maroo oosanafa Anutufa miqandara afaaqooqa quna sia nariqara oosanasara afaaqooqa qinuu, nari irirana aidiranasaa mundu-anifeera indaarugaafa Eesaufa quandaki innaaqianaana mina ainaina maisaannoo fee qinuu. <sup>13</sup> Ooqeenaa akarakinaa ufa maaqimminoo minara maridanoo.

Qinee Yakooboona dididanoo Eesaunara qikooqaidanoo fee qinuu.

<sup>14-15</sup> Miqandara irisee Anutunara naqi fee qianauree Anutunara sia andeeqee maqi qianauree. Oo sia uqanna miqi qianaara andeeqanoo marifa Anutufa maqi qimasee Mooseena qimaminau.

Qinee qeeqa iriranannai kai faiqi anaasee akaqausa narusee akaqausa nifauaanaara, qeeqa iriranannai kai

akaqausara qimuqusianaqa marasee amiqi amiqianaara.

<sup>16</sup> Minara aiqama ainaina sia faiqi nidiranasaa mundinoo maridanoo Anutuna amuqsuranasaa mundinoo maridanoo. <sup>17</sup> Ooqeenaa akaraki Mooseefa Faraona maaqi qimasee qimaminau.

Qinee Anutusa ani Faraona mareeqee Isipa maqanna karambaiqai kianneera quqaqifana, qinee Anutusa ani Faraofa qini ufa rukioonara ani kuqaruanaura. Minannai qinee qeeqa afeeka faqa qeeqa duqu faqa aiqama maqa maaqa afaaqasasa mariasa iriaqee qimasee ani quqaqifana.

<sup>18</sup> Doo maqee maasa mi ufana iriseeqa Anutunara maaqi qidaqa. Anutufa nari kai irisee akaqasara amuqusifanoo amiqi amiqimmidanoo kafa Anutufa nari kai iriseenoo akaqasara ufa rukiara oosana nimidanoo.

*Anutufa maqa qafeera foora maasa auquqisanau.*

<sup>19</sup> Innee mina iriseeqa quandaki maaqi qimasee aqamasee qini qimaqimifaranoo. Ani ufa miqinoo marinaqa maasa mandoosana maraanoo naqimasee Anutufa maasara aqeeqee mariasee qianoo fee. Naqimasee maasa Anutufa auquqisoo mandoosanara iriseeqa rakeemaki amiqira oosanamau fuanauree. <sup>20</sup> Qinee mina iriseeqa maaqi qimasee ani qimamiana, Anutufa aniara aqeeqee mariaano qimasee afairirana anee yafee maridane quandaki nari qimaminnaree anee kaqikaafa marianoo. Qafee auqiranara iria. Faiqi moo fannoo maqa maraseenoo qafee auqimarifanoo mi qafeefa sia quandakinoo mi fasiqanara aqidanoo anee nanaree qini maaqimasee auqidane, sia qafee fannoo miqi qidanoo. <sup>21</sup> Mi fasiqafa qafee auqimarifa nari iriranannai kai maqa qumaree turi iseenoo atakuseenoo mi maqana rainasee akaqana qumareenoo nari iriranannai kai amiqirana akara rirana auqidanoo kafa mina dinni ati quqaqoono raina qumareenoo nari iriranannai kai moo kaqi dapi qafee kai auqidanoo.

<sup>22</sup> Anutufa miqika maseenoo maasa auquqimaqanau. Maasaka akaqasara manda qafeera foora maasa akaqasara auquqimaqaseenoo idaki fifandinausee qidanoo. Sia aqeeqee kai minara naruannoo naaru kasooqeeqee mina akiaqara naruannoo. Kisaqasasa nari aanoo irana rafaqafusee mari inano naaru naruannoo. Miqoo nari aanoonnai faqa nari afeekannai faqa miqoo mandoosana maree mariasa kuridi nimaqanoo. <sup>23</sup> Kafa mina dinni amiqira qafeera foora kasooqeeqee maasa mina kaqa areenarana mareefandinausa akaqasara auquqisanau, mina amuqusa maasa ubeekanoo marisa maasasa kai mina idaaqira moomoo areenarafa kooroo ianifeera maasasa nammariara foora nari areenarana adiannimaqanau.

<sup>24</sup> Doo maasa daaree mariasa doo misa kai doo maa maridaqa sia Yuda maqannaasakiqari kaifau, aanaamurukiqari faqa Anutufa daaree marisa maridaqa. <sup>25</sup> Ooqai tamummaqara fasiqa moo auquqisee mifa minara maaqi qimaqoofa.

Sia qeeqa maqannaasa naarama quqasee qini faiqi anaasee fee qiana. Qini qikooqemari maqannaasara qinee quandaki misara qini didimariasee qiana.

<sup>26</sup> Akaqasara innee sia qini faiqi namu fee qimaria maqusakinaasa doo qimaria maqusanasaara kai misara kaqi marira Anutuna faiqi namu fee qifaranoo.

Doo Qooseeana ufa miqinoo maridanoo.

<sup>27</sup> Isaiaafa Isaraee maqannaara maaqi qimasee akara rinau.

Isaraee maqannaasa nukuda moomoora foora iqa mariafanoo misakinaana Anutufa ooda kai mareeqeenoo asumu mariranaki quqaannoo. <sup>28</sup> Mi aukuanna mikari Anutufa dauni dauni mandainaina akiaqara marasee aiqama maqannaasa minannai naruannoo Anutufa faiqi aanaaseera kisaqasasa nifeesida mariranasaa doo taikfoo qimasee aiqamausa tautumasee naruannoo. Minara Isaraee maqannaasa ooda kai Anutuna saqarikamandainanoo ooda kai asumu mariranaki mara quqaannoo.

<sup>29</sup> Isaiaafa kafa Isaraee maqannaara maaqi qimasee akara rinau.

Karambaiqa uriqararafa sia maasa ati ooda mara quqasainanoofau Soodooma maqusa faqa Koomoora

maqusa faqa naana ramaseenooofau aiqama taikasani, daridanoo ooda mafi quqasoosa qaaramoo maridaqa.

*Isaraee maqannaasa Yisunasaa faandi ooniaru maqi farindamaki aqum fiqau.*

<sup>30</sup> Doo minara maasa naqi fee qianauree. Maana kai qiana. Anaamuru mariasa sia Anutuna afusaa andeeqaranaki keeqararee qidaqa sia amani mariasa doo misa nari irirana Yisunasaa rusisee minannai mina andeeqaranaki keeqafi maridaqa. <sup>31</sup> Misa miqika marifanoo Anutufa rusandeesamumasee maroo fasiqanaaseesa Isaraee maqannaasaa misa Mooseena sandufakiaqa randasee mi iriranannai Anutuna andeeqaranaki fuanauree qidaqa aana sia minaki marinara sia irirai munari minaridaqa aqamaki kaqi runnambiqau. <sup>32</sup> Naqi fee mandee sia paquriqau. Misa Anutufinnai firana



nári kadaapiranasaa kai mundinoo maridanoo sia saqarikirafa minasaa mundinoo maridanoo. Misa anoona aana Yisunamau fimarianara qaoo qimasee Yisunara oonisaara foora niku amaki saamuriqau. <sup>33</sup> Ooqeenaa tamummaqara fasiqa akarauqa mi ooninara maaqi qiqau.

Qinee Anutusa mi oonina Sioona maqusai quqaqaanaqa faiqi anaasee mi ooninasaa niku rupaurifaranoo. Faandi ooni miqirana qinee mi oonina quqasaanaqa minasaa farindamaki saamurifaranoo. Moo fannoo narí irirana minasaa rusiqainafa sia kadooparaannoo.

Tamummaqaraua Yisunara miqimmasee ooqai akara riqau.

## 10

<sup>1</sup> Oo qini qikaqaafasaaauqa Roomma maqusai mariasa. Qeeqa qimuqusa ookiqari qeeqa maqannaasa Isaraee maqannaasara Yisufinnai aniree mina asumu marirana maraaqeraa firaqoo qimuqusidanoo. Qinee Pauroosa misara Anutufinnai firaqoo innaaru qidaqa. <sup>2</sup> Misa Anutunara aidiranaki keeqaranara rirafa firaqoo marifaqa qinee nindafaunaqa sia anoona iriranamau fida Anutunara ridaqa, kaqi runnambidaqa. <sup>3</sup> Misa Anutufa faiqi mareegeenoo narí afusaa andeeqara oosanaki quqaranara sia irimariafaqa nariqa kai nári firoosana nariqa kai uqeerasee mi mau fidaqa, sia Anutuna andeeqaranaki fimaria oosana iriseega sia mina ameemaanai keeqaidaqa.

<sup>4</sup> Anutuna asauku mundirafa Mooseena sandufamau Anutuna andeeqaranaki amani-mariana aru taikeenoo narí Yisunasaa naaqoo rusimariasa kai Anutuna andeeqaranaki keeqaidaqa.

*Asumu marira ufa sia nianai maridanoo, daaqa maridanoo.*

<sup>5</sup> Anutuna andeeqara oosanaki faiqi finara maaqi qimasee Mooseefa akara rinau. Faiqi moo fannoo aanaaqisaa findifunakiqari andeeqasee Mooseena sandufamau fidanoo sia moo kari aaqainafa amiqisaa finafa kuqinoo innaaruna asumu marirana maraannoo. <sup>6-7</sup> Kafaa mina dinni asauku mundirana saqarikiranannai asumu marirafa maaqimminoo maridanoo. Mooseefa kafaa minara maaqi qidanoo. Innee Mooseena sandufamau fimariasa fifau firaqoo munari minari mariasa innaarunai asumu mariranaki firaree qimariasa. Innee innaarunai ooruree asauku mundiranara randasee paqurimasee afiqee qumu dadaaqianifee qimariana fifau sia amanaikimari ainainara fifau kadaapirumasee maree mariafanoo. Asauku mundirafa doo qumu marinoo. Innee fifau maqa ameemaanai ooqu keeqafi asauku mundiranara paqurimandee afiqee murusaifanoo mifa dadaaqianifee qimariafanoo fifau sia amanaikimari ainainara fifau kadaapiri mariafanoo. Asauku mundirafa doo kuqiranakiqari findifinoo maridanoo.

<sup>8</sup> Akara fannoo maasa inni qimannimira ufara maaqi qidanoo. Anutuna qimannimira ufa inni naaqa maridanoo inni nifaurusaa maridanoo inni nimuqusaki maridanoo. Miqimmasee Mooseefa maasa faiqi anaasee qimannimimari ufanara Yisunasaa irirana mundiranara qidanoo. <sup>9</sup> Maaqi qimasee qimannimidaqa, anee aneenna afaurunnai Yisufa kuqaa karaambaiqa maridanoo fee qimasee, aneenna amuqusa ookiqari kuqaa Anutufa Yisuna kuqiranakinaana uqeeranau maqi qimasainanoo Anutufa narí asumu mariranaki ani mara quqaannoo.

<sup>10</sup> Maasa qeeqa qimuqusannai Anutuna andeeqaranaki fidaqa qeeqa qifaurunnai mina kooroo iranannai Anutuna asumu mariranaki fidaqa. <sup>11</sup> Tamummaqaraua ufa minara maaqi qidanoo.

Anutunasaa irirana rusirafa sia mi rusiranarau kadooparaannoo.

<sup>12</sup> Mi ufana aiqamausara qidanoo Yuda maqannaafaa qaqa aanaamuru faqa sia rainarafa maridanoo Anutufa aiqamausa narí aaree mariasa dadaaqirafa maridanoo. Aiqamausa amana amana kai Anutufa narí aaree mariasa firaqoo naundura marirana amiqi amiqimannimaqaannoo. <sup>13</sup> Tamummaqara fasiqa akarakinaafa minara maaqi qidanoo. Aiqamausa karaambaiqa dadaaqianifeera aareemariasa misa Anutuna asumu mariranaki fifaranoo.

<sup>14</sup> Naqimasee faiqi anaasee karaambaiqara sia irirana minasaa rusimarinausa aareefaree sia amana aareefaranoo. Sia karaambaiqara irimariasa naqimandee fee irirana minasaa rusifaree. Moo fannoo oonu qimanniminaqa irifaranoo sia oonuree qimannimifaqa sia irifaranoo. <sup>15</sup> Naqi fee maseenoo fee moo fannoo oonu qimannimiannoo fee moo afeeqaseeqa mina ati uaqeeifanoo amana oonu maridanoo qimannimiannoo. Tamummaqara fasiqa minara maaqi qimasee akara rumaqoofa maridanoo.

Amiqira fasaasa ufa maree animariasa anirafa amiqirafa maridanoo.

Tamummaqara fasiqa miqi qimaqoofa maridanoo.

<sup>16-17</sup> Misa amiqira fasaasa ufa mini qimannimisoofaqa sia aiqamausa iriqau akaqausa kai iriqau. Eesiaaafa minara maaqi qimasee akara rinau. Oo karaambaiqa maasa qimannimira ufa yausee iriaa, akaqausa moodaa kai iriaa. Eesiaaafa miqi qimasoofoqa qinee Pauroosa minara maaqi qidaqa. Faiqi anaasee sia fifau kaqi Yisuna saqarikidaqa, mina aufakiana naaree irisee miqoo Yisuna saqarikidaqa, Yisuna aufakiana sia fifau naaqooki kambiqaannoo, faiqi qimannimiafanoo naaqooki kambiqaafifaqa saqarikidaqa.

<sup>18</sup> Qinee Pauroosa minara iraidaqa Yuda maqannaasa ooqaindari sia fee Anutuna ufa irideeaa. Eeoo kuqaa misa iriaa, akarakinaafa misara maaqi qidanoo.

Misa ufa fannoo aiqama maqa afaaqasasa Yuda maqannaafimarugo daraaninau. Misa ufa fannoo maqa dinni dinni ati munu raquraminau.

<sup>19</sup> Qinee Pauroosa kafaa iraidaqa, Isaraee maqannaaf Anutuna ufa iriqee iqau sia fee iriqau. Mooseena ooqai akarakinaa ufa dauni qimaqimida maaqi qidanoo.

Qinee Anutusa qumee Isaraee maqannaasa naundurairai saikiqafanaqa fifau moo maqannaasara Anutuna ufa iridammiafoo qimasaidaqa rairai qimannimaqidaqa. Qinee Anutusa qumee fuki faaki qunaqa furufarira maqannaasa qini ufa irisaifaqa qini faiqi namu Yuda maqannaasa mina qafamasee mi maqannaasara rairai qimasee doo mi rairai qiranannai nari faqa qini ufa irifaranoo.

<sup>20</sup> Mooseefa miqi qimasoofoano Eesiaaafa aranaiqi kooroomasee mi furufarira maqannaasa aanaamuruara maaqi qinau.

Qinee eedoo qimasaunaqa sia qiniara randeemaria fasiqa anaaseesa qini Anutusa paquriqa. Sia qini daaree mariasa nifusaa qinee oonu kikiqifa.

<sup>21</sup> Miqi qimaseenoo Isaraee maqannaasara maaqi qinau.

Qinee faasaambaasaana inni rafusira runaqa innee ufa rukieeqa kaqirunna fimaria maqannaasa maridaqa rafusiranara rufiee mariafanoo.

## 11

*Anutufa Isaraee maqannaaf asumu mariaqeera akaqausa kai maraannoo.*

<sup>1-2</sup> Qinee Pauroosa kafaa Isaraee maqannaaf iraidaqa, kuqaa fee Anutufa Isaraee maqannaasara qaoo qimasee mininnisanau. Oo sia uqanna minnisanau. Qinee Pauroosa Isaraee maqannaaf faqa maridaqa qinee Abarahaamana aiku asauku marunausa maridaqa, qinee Yakooboona amaaku Beesamina ati maridaqa marunnanara Anutufa sia nari Isaraee maqannaaf qaoo qimasee minnisanau. Ooqai oosanaraseenoo maa maqa maaganakina rusandeesamumandee maroosa mariafanoo. Ooqeenaa tamummaqarusa akarakinaana Eeriaafa Isaraee maqannaasara nifairidanoo niqidanoo afeekaikamandee Anutunara innaaru qinoo qinau.

<sup>3</sup> Oo karaambaiqa Isaraee maqannaasa ani ufara minniseeqa furufariqa ani tamummaqara fasiqauqa kuqa naruseeqa ani aandaufatufira ooni qaindauqa rapeepamma aqifa. Qinee Eeriaasa qeeqaraa kai ani ufamau fimarunaqa misa minara irisee qini faqa kuqa dariraree qimariafaqa ani qimamidaqa.

<sup>4</sup> Eeriaafa miqi qimasoofoano Anutufa qimaminoo qinau, Oo sia aneennara kai qini ufamau fimarianafa mariananoo. Qinee qisauku dinni taikasee dinni oonu qaaraqanda tauseenna fasiqa anaasee moomoosa uqanna utaaqamaqaunasa maridaqa sia unna Anutuna Baaranara innaaru qimariasa qiniara kai innaaru qimariasa maridaqa.

<sup>5</sup> Eeriaana aukuaa miqinoo marinau maqee aukuaa Isaraee maqannaasaki miqiminoo maridanoo, Anutufa misakinaana akaqausa utaaqamasoofoano nari amuqusiranannai utaaqamasoosa maridaqa. <sup>6</sup> Minamusa Anutufa sia misa nirana marirana oosana qafamasee amiqira fee qimasee utaaqamannimaqanau, nari amuqusiranannai kai misa utaaqamannimaqanau. Anutufa faiqi utaaqamannimaqara oosana fannoo misa nimariana misa mariranasaa mundinoo marinanoofau sia anoona amuqusiranasa mundinoo marini, minasaa kai mundinoo maridanoo.

<sup>7</sup> Isaraee maqannaasara nane fee qianauree, maaqi qianauree, Isaraee maqannaasakinaana akaqausa Anutufa utaaqama nimaqaqoosa kai Anutufa naaroo ufana irisee mifinnai fiqau. Aiqa taa naaqooki ooni ititarausa maridaqa sia nari randee maru aanna paquriqau. <sup>8</sup> Tamummaqara fasiqausa misara maaqi qiqau.

Anutuna nimuqusaki faqa nitikuraki faqa ummaarararana nimisoofaqa mi kamuqooqari aunduaridaqa kudoosaapaida maridaqa nifu qafaida sia qafaidaqa, naaqooki faqa sia iridanoo.

<sup>9</sup> Dafidifa faqa maaqi qimasee misara akara rinau.

Misa qoomaqa sakasee ooqu marifanoo namuqaa anireeqa misa ititaannoo. Misa miqoo kuridiqa nari mandainaina akiaqara mareefara. <sup>10</sup> Misa sia qafaaqee

qimasee Anutufa misa nifusaa ititaannoo. Nári ummaara fannoo aiqama kari nári nitaufakaaga mariraiika kai idanoo nitaufaka saaeemminoo maridanoo.

Miqimasee Dafidifa misara akarinanau.

<sup>11</sup> Qinee Pauroosa Isaraee maqannaara maaqi qimasee iraidaqa, Yuda maqannaasa Yisunasa farindamaki saamuriqa kuridiranaki taikaranaki aqufiqee iqau. Sia uqanna miqiquu. Isaraee maqannaa aaqoonara Anutuna asumu marirafa aanaamurusaa aqufinau, Yuda maqannaasa aanaamuruara rairaiqiagaqera miqinuu. <sup>12</sup> Yuda maqannaasa aqaranara Anutuna firaa amiqi amiqirana aanaamuru aiqama maqa afaaqasasa mariasa nimiranau. Yuda maqannaasasaqaraana aanaamuru amiqi amiqirana maraqaau, kasoogaqee taikara aukuaana Yuda maqannaasa Anutufa aiqama mareeqeenoo aanaamuru nimuna akiqara firaa amiqi amiqiranaki uriqarananaki Yuda maqannaasa quqaannoo.

*Anutufa Isaraee maqannaasa minniseenoo aanaamuru anireeqa Anutuna aqoondikiqau.*

<sup>13</sup> Qinee Pauroosa Yuda maqannaara inni qimannimiseeqa kafa maqee inniara aanaamuru qimannimidaqa, Anutufa aanaamuru qimannimiranara diqiqoosa maridaqa inniki ainainamarunannara asasiidaqa. <sup>14</sup> Anaamuru qimannimi marunaqa Yuda maqannaa inniara Anutuna ufara iridammiafoo qimasee rairai qimasee misa faqa irisee irirana mi ufanasaa rusiaqera asasiidaqa. <sup>15</sup> Yuda maqannaasa Anutufa mininnisoofoqa aanaamuru aniree Anutuna aqoondikiqau. Kasooqaqee Anutufa quandaki Yuda maqannaa kafa marainaa kuqiranakiqari findifara foora ifaranoo.

<sup>16</sup> Maasa Yuda maqannaasa Anutuna amira ainainara maaqi qidaqa. Innee feemu adiana kai raqeeqee Anutuna amifanoo mi feemufa aiqama minaindikakaimminoo mariannoo, kafa innee saqari oosana amifanoo mi saqarifa minaindikai mariannoo. <sup>17-18</sup> Doo qinee mi iriranamau fidaqa minara maaqi qidaqa. Oorifa saqari asumu saunara foora maridanoo. Asumu saqari ammuqu akaqafa raqanoo marifanoo kaasau oorifa saqari asaana raqeeqee minakina mini ookaamandee ummaqusainanoo minakiqari kambigaannoo. Innee aanaamuruuura kaasau oorifara foora mariafanoo. Yuda maqannaasa oorifa saqari asumu oosana maridaqa. Anutufa inni aanaamuru mariasa kaasau oorifa asaana foora asumu oorifa minaki ookaamasaifanoo kambigaqifaqa innee maqee Yuda maqannaa akaqausa faqa misaindi oosana amiqi amiqiranasaqaraana animaree mariafanoo. Innee aanaamuru mariasa asumu oorifa ammuqu raqaranaki innee ookaairausa mariafanoo, sia misara raqara asaana rafa fidiqaa iqau. Innee naqimaseeqee noori uqeeraseeqa inneeqara amiqirausee qidee innee ammuqu marifanoo, sia ammuqu fannoo saqari oosana pooduqaidanoo, oosana fannoo ammuqu pooduqaidanoo, minara sia innee oosana mariasara Yuda maqannaasara fidiqaa iqau.

<sup>19</sup> Innee minara irisee maaqi qifaranoo Anutufa maasa aanaamuara iriseenoo asumu saqari ammuqu raqafufanoo maasara kai iridanoo fee qifaranoo. <sup>20</sup> Qinee Pauroosa minara maaqi qidaqa Innee doo kuqaa qiafanoo, Anutufa Isaraee maqannaa sia irirana mina ufasaa rusimarufanoo aadana asaana foora raqanau, innee irirana mina ufasaa rusimarunara inni mareeqee minaki ookaa inau. Innee minara irisee sia noori uqeer-aaqa, rufiaaqa.

<sup>21</sup> Anutufa mi saqarina narindi Yuda maqannaasara sia amuqusinuu sia Yisunara irisoonara kaqi atekaanuu innee faqa rufiaaqa kaqinni faqa atekaanoo, kaasaumminoo.

<sup>22</sup> Maanara amiqimasee iria sia aunuqa Anutufa nari qaara oosana maqimminoo maridanoo mina dinni kaaqa faiqi anaaseera amuqusirafa maridanoo kafa mina dinni manda ainainara aanoo irafa maridanoo. Mifa mandainainaki saamurimariasara aanoo irafa kai maridanoo, innee kaqi mina afaariranaki maqee maqee fimarifanoo mifa inni nifauamaseenoo amiqi amiqiannoo, minnisaifanoo inni faqa Yuda maqannaara foora aadana asaana foora inni rauda aqusaannoo. <sup>23</sup> Yuda maqannaasa nariqa dapi nirana minnisee quandaki kafa aniraifanoo Anutufa misa qumaree nari nimaqaqaki kafa ookaa iannoo, Anutufa mina faqa amanakiamiannoo.

<sup>24</sup> Asumu saqari asaana atekasee nari amaaqakina ookaamandainanoo dauni uru- raannoo, mi oosanafa sia kadaapirirafa maridanoo. Kaasau saqari asaana atekasee asumu maraqa nua oosana ookaa inannoo sia dauni dauni kambigaannoo kadaapiru- annoo. Minara irisee Anutufa Yuda maqannaasa oorifa saqari asaana foora raqaa mariasa amana mareeqee nari amaaqakina kaifaa ookaa inoo sia kadaapiruannoo. Innee aanaamuru mariasa kaasau oorifa saqari foora mariafanoo asumu saqarikina innee ookaamaqifaqa mariafanoo. Innee sia Anutufa kafa Yuda maqannaa ookaa ianinnanara sia amanee qiaqa, doo Anutufa amana sia kadaapi maridanoo, kaqimma ookaa iannoo.

*Anutufa aanaamuru naaree marasee miqoo Yuda maqannaa naundura quandaannoo.*

<sup>25</sup> Oo qini qikaqaafasaa uqa moo kukeeqara ufa inniara iriaqera qimannimiana, innee maa ufana iriseeqa inneeqa noori uqeerana mara maqaruseeqa miqooqari reendeenamandee marifaranoo. Mi anoona ufafa maaqimminoo maridanoo. Isaraee maqannaasa naaqooki ooni ititarafa sia naaruara miqinoo mariannoo. Anutufa qinoo aanaamuru marinausakiqari qinee qeeqa qiafanausa misa kai Yisufinna irirana ubeekaifaqa Yuda maqannaasa naaqooki ooni ititarana tatusaanqa misa faqa anifaranoo.

<sup>26</sup> Maaqimmasee aiqama Isaraee maqannaasa Anutuna asumu marirana mareefaranoo. Tamummaqara fasiqauqa maa ufamau mareefaranoo.

Asumu maree marifa Sioonaa maqusai moo auqu Yeerusaree mi maqusanaindari aniree asumu marirana

nimiannoo. Mifa Yakooboona aiku asaku mina atiuqa mariasa mandainaina aiqama rukannisaannoo.

<sup>27</sup> Mikari qinee Anutusa Yuda maqannaasa aqarana akiaqara mara aqunniseeqa qinee Anutusa qeeqa moodaanakikirafa ufa Abarahaamana faqa Isakeena faqa Yakooboona faqa ufa qiafannana mikari mi ufana anoona doo anoonaiannoo.

Tamummaqarauusa ufa miqinoo marinara qinee Pauroosa maaqi qidaqa.

<sup>28</sup> Yuda maqannaasa Yisuna amiqira faasa ufa minnisoonara Anutuna ufaasu namuqaa kammiga maridaqa. Sia fifau, inni aanaamuru mariasara iriseenoo Anutufa miqimma nimaqasoofaqa miqidaqa. Anutufa Abarahaamana Isakeena Yakooboona iriseenoo, aiqama aanaamurukinaana rusandeesamumandee maroonara iriseenoo misa aruakinausa misa amiqi amiqimma nimaqoonara iriseenoo Isaraee maqannaasara qini qiqoondi fee qidanoo. <sup>29</sup> Anutufa nari rusandeesamumasee maree mariasara faqa nari amiqi amiqimma nimaqee mariasara faqa sia qaara iriranaikidanoo andeeqaidanoo sia kaaqa Isaraee maqannaasa namuqaakinoo, ufaasu kai.

<sup>30</sup> Innee aanaamuru marusa ooqai ufa rukiee marusa mariafanoo doo maqee Yuda maqannaasa ufa rukioonara faqa innee mina ufa irunara Anutuna nifauarana maree mariasa mariafanoo. <sup>31</sup> Miqi kaimmasee innee aanaamuru Anutuna nifauarana maree mariafanoo Yuda maqannaasa faqa Anutuna nifauarana maraaqera ufa rukiaranaki quqasoofaqa mariafanoo. <sup>32</sup> Anutufa aiqama maqannaasa nari nifauara oosana uqan-nifiqaanifeera aiqama maqannaasa ufa rukiarana ameemaana mara quqasoofaqa Anutuna nifauarana oosana qafaaqera.

*Pauroofa Anutuna amooqu ufafa.*

<sup>33</sup> Oo Anutuna irirafa ainaina faifa firaqqoo maridanoo. Mina irirafa faqa auqarafa faqa firaqqoo farummara foora meemai unaurinoo maridanoo. Mina naamuqira ufa oosana yafee mina iriannoo fee, sia amanaikidaqa. Mina nirana yafee iriannoo fee.

<sup>34</sup> Tamummaqara fasiqauqa minara maaqi qiqau.

Yafee karaambaiqa irirana faasai iriannoo fee yafee fuki faaki iannoo fee.

<sup>35</sup> Yafee moo ainainara qufiqeenoo qimianifee qimasee amiannoo fee. Sia moo fannoo amanaikiannoo.

Doo tamummaqara fasiqa ufa miqimminoo maridanoo qinee Pauroosa minara maaqi qidaqa.

<sup>36</sup> Naqimasee moo fannoo Anutuna moo ainaina amiannoo fee nari kai aiqama ainaina auqufa minaindi kai maridanoo. Aiqama ainaina minasaa qaraafa kai afeekaikino maridanoo. Aiqama areenarafa naaru naaru Anutunaindi kai mariannoo. Kuqaa.

## 12

*Pauroofa andeeqasee nirana mariranara naamuqinau.*

<sup>1</sup> Oo qini qikaqaafasaa uqa, Anutufa inniara amuqisirana faqa amiqi amiqirana faqa firaqqoo marinara afeekaikamandee qeeqa qimuqusa ookiqari inni qimannimidaqa innee inneeqa marirana nipata aandai tatufiranara foora Anutuna amiaqa, Anutuna ufamau fidaqa mina aidira ainaina andeeqasee marirana mina mina amiaqa. Miqiga inniqa Anutunara innaaru qirafa amooqirafa anoonaiannoo. <sup>2</sup> Minara irisee maaqimmiqa sia maa maqa maaqanasaa mariasa naanna raaqa. Innee eedoo qifanoo Anutufa inni nitikura amiqimmasee firaqqoo quandanniseenoo naunduraki nirana faqa quandannisaannoo. Innee miqimmaseeqa Anutuna irirana faqa Anutuna aidirana faqa amiqirane qimariana faqa idaaqirane qimariana faqa amiqimandee irifaranoo.

<sup>3</sup> Qinee Pauroosa Anutufa afaarida nimirari ainainara irisee maaqi qidaqa. Innee sia inneeqara amiqirausee qimasee firaqqoo inneeqa nimooqiaqa innee andeeqasee reendeenamaseeqa inneeqa nimana kai irirana iriaqa. Aiqausa nariara qidaqa Anutufa faiqi anaasee dadaaqira nimirana irisee mina amana kai nariqa kai iriaqa, sia noori uqeerasee inneeqara firaqqoo irirana faqaasee qiaqa.

<sup>4</sup> Maasa qipata moomoo ati ootupanoo maridanoo. Mi ootupara atisa naadu naadu ainaina qūqee mariasa maridaqa. <sup>5</sup> Maasa miqiraua maridaqa asauku mundiranasa ootupaqa marunaua moomoosa naadu naadu nipata atiara foora mariasa moodaa qipata foora mafiqā Yisunaindi maridaqa narisaa narisaa atooaqa maridaqa narisaa narisaa mundaqa mariaqeera.

<sup>6</sup> Minara maasa aiqamausa irisee nariara nariara aadu aadu akoofasaiki marinna ainaina marasee minannai Anutufa nimuna akoofasaikirana amana kai minannai kai aiqamausa narī dadaaqi narī dadaaqiaqa. Anee Anutunaindaraa ufa irisee faiqi anaasee ufa qimannimi marianafa maridana, Anutufa narī saqarikirana amuna mina amana kai qimannimia. <sup>7</sup> Anee dadaaqimarianafa akoofasa maridana doo misa dadaaqia. Anee ufa akoofasa maridana doo mina ati qimannimia. <sup>8</sup> Anee reendeenamandee fuki faaki qirana akoofasa maridana doo miqimmia. Faiqi anaasee moo fannoo narī akaqa nimira ainaina akaqausa raina nimidanoo sia akoo akaa ida nimia, oori inaa inaa ida nimia. Anee faiqi anaasee rakisi marinafa maridana anee faqa eraaramasee ainaina. Faiqi aanaaseera qimudao qimasee dadaaqi mariasa sia nikoo nikaa mandeeqa miqia, asasamandee oori inaa inaa idana dadaaqiaqa.

<sup>9</sup> Inniki nariara nariara nimuqusirafa inniqa nimuqusannai kai nariara nariara nimuqusiaqa. Innee aiqama manda mariranara fidiagaamasee amiqira marirana kai rakisisimma qumaraqa.

<sup>10</sup> Innee aiqama asauku mundirana mandaqaqa mariasa minara irisee nariara nariara qikaqaafasaa fee qimasee nariara nariara nifaagasaa aqoondiara foora nariara nariara andeeqasee ridaqa asasiaqa. Inneeqa niqoonnana maasa uriqarane qimasee maqee maqee mina auqu kooroo qia.

<sup>11</sup> Innee inneeqa oosana oosana ainainiranaki maridaqa nimudaanai qimaseeqa kadaapiruaqa sia kudoosaapaqa. Inniqa nimuqusaki karaambaiqara nidirafa qumbiqanoo marinaqa mina ainainammidee qidaqa asasamandee mi kadaapina riqa fuaqa.

<sup>12</sup> Innee Yisufa gumuaninnanara afeesidaqa asasidaqa kai mariaqa, maqee maria kadaapirira ummaarafa rafaqaqinaqa naundura asooamasee kasooqaqee ubiqafiqā reendeenamasee kaqi kai minaki fuaqa, maqee maqee innee aiqamausara faqa aiqama ainainara faqa innaaru qimannisaqa.

<sup>13</sup> Innee niqoonaua Yisuna ufa irimariasa nana ainainaree sarau imariasa inneeqa indi misa faqa rainasee naida nimiaqa. Sia qafee marinna aanaamurufa faqa anirainana amiqi amiqimandee maaqa aminanoo tootooqiranaki fuani.

<sup>14</sup> Faiqi anaasee akaqausa Yisuna ufasaara narī niqifafa innee quandakinaqa sia minara iriaqa amiqi amiqira afaaqooqa kai qimannisaqa, sia niquraraqa amiqi amiqima nisaqa.

<sup>15</sup> Faiqi anaasee akaqausa asasifaqa innee faqa dadaqiaqa asasiaqa. Faiqi anaasee akaqausa ummaara narinaqa ikiraqafafaqa innee faqa dadaqiaqa ikiraqaqaqa.

<sup>16</sup> Aiqama narinni narinni maridaqa moodaanaki kiqa maridaqa aqoondikidaqa mariaqa. Sia innee inneeqara uriqarausee amiqirausee qimasee noori uqeeraqa. Kaqi qeesa ooreeqararaua faqa aqoondi kiaqa. Sia misa ooreeqarararusara noori runusee noori uqeeraqa.

<sup>17</sup> Moo fasiqa anaasee fannoo ani mandaikammamaqainana sia anee mina akiqara mina mandaikammamaqa, aiqama fasiqanaasee amiqira oosanee qimariana, mi oosana amanamasee mi oosanamau kai fuaqa.

<sup>18</sup> Anee aiqama fasiqa anaasee faqa asooaranaki kai mariaqa, misa sia amanaikifana aneennakai kafa kafa amanida qafaa.

<sup>19</sup> Moo fannoo ani arinoo mandaikammamaqainana sia anee mina akiqara arua, Taikara aukuaana Anutuna aanoo irafa minasaa mariannoo fee qimasee miqoo minnisaa. Tamummaqara fasiqa akara minara maaqi qinoo maridanoo.

Karaambaiqa maaqi qinoo qinee mandainaina akiqara nimianaura, ani arifaqa qeeqa kai mina akiqara qianaura.

<sup>20</sup> Kafa moo fannoo maaqi qinoo.

Ani namuqaqa fannoo aararee marirana narana kaqi amia.

Nammariara mifa aidinana kaqi amia. Anee miqinana aneenna amiqira iriranannai asaurirana mina aminnananoo.

Qinee Pauroosa minara mi tamummaqara fasiqana ufamau fuaqeera qimannimidaqa.

<sup>21</sup> Faiqi anaasee mandainaina fannoo sia inni rafaqa fuani, inneeqa amiqira oosanannai misa mandoosana rafaqaqafuqa.

## 13

*Aiqama uriqararausa Anutufa kai quqaqoosa maridaqa.*

<sup>1</sup> Aiqama kaamanauqa faqa uriqararausa faqa Anutufa kai quqaidanoo. Sia moo fannoo nari kambiqaidanoo, Anutufa eedoo qinara kai kambiqafi maridaqa. Minara irisee innee aiqamausa misa ufamau kai fuaqa. <sup>2</sup> Faiqi anaasee moo fannoo kaamanauqa ufa rukiee marinafa Anutufa quqaqai fasiqausa ufa rukiee mariafa marinnarannoo. Anutufa quqaqoo fasiqausa ufa rukiainafa mi fasiqausa saaqaraa aanoo irana aneenna kai mareeqeena aneenna afaariki rusimariananoo.

<sup>3</sup> Manda oosana maree mariasa kai kaamanna rakisirausara rufiaaqa, amiqira oosana mareemariasa sia misara rufiaaqa. Anee kaamanna fasiqa fee uriqarara fee misa nifusaa mana mana kai iraree fee qidanee doo amana andeeqara oosana marasee miqia. Miqinanoo mifa amooqira ufa kai ani amiannoo. <sup>4</sup> Kaamanna uriqararafa Anutuna saikira fasiqa maridanoo ani amiqimmasee marianneera ainainidanoo, anee manda oosana mareenana minara rufiaa mina akiaqara ani arirasamu doo asakuki uaqeeidanoo. Mifa mandoosana maree mariasasaa Anutuna aanoo irana mareeqeenoo misasaa quqeeimarifa maridanoo.

<sup>5</sup> Innee minara irisee uriqararausa ufara aiqama eedoo eedoo kai qiaqa, sia Anutuna aanoo iranara kai iriseeqa eedoo qiaqa, aneenna aakiranara andeeqanoo marifaqee qimasee eedoo qiaqa.

<sup>6</sup> Kaamanna fasiqauqee kansoorauqee uriqararausee, misa aiqama Anutuna ainainiranaki maridaqa faiqi anaasee andeeqannisaida maridaqa minara inneeqa takisa munnimma nimirana eedoo qimasee nimiaqa, minannoo ainainidammia. <sup>7</sup> Inneeqa takisa munnimma aiqama aquaqa, kaqikaa takisa kansooraa takisa faqa kaamanna firaa takisa faqa aquaqa, aiqama uriqararausara amiqira fasiqee qimasee misa noorinni rufiaqa rufiaqa idaqa fuaqa.

*Nariara nariara amiqira oosana kai maraaqee qirufa.*

<sup>8</sup> Sia moona ummaara ameemaanai keeqana maria aufadaranaki kai maria. Moodaa ummaara ameemaanaki kai keeqaqa mariaqa. Nariara nariara nidimarinaqa mi moodaa ummaaranaki kai keeqaqa mariaqa. Faiqi anaasee moo fannoo nari aqoonna fasiqanaaseera amuqusinanoo Mooseena sandufa doo qumareenoo mi sandufana anoona paqurinoo kooroo idanoo.

<sup>9</sup> Mooseena sandufakinaafa akaqafa maaqimminoo maridanoo.

Sia faiqi anaasee nari ummuari nari ummuariaqa.

Faiqi faqa anaasee faqa faiqi faqa sia kuqannaruqa misa fidika sia ruqiaaqa.

Sia nari ainaina nari ainaina ummuariaqa.

Sia moona ainainara amuqusinana marara aaqoo iria. Mi sandufausa faqa akaqa sandufauqa faqa moodaa ufa fannoo mi sandufausa aiqama rafaqaafinoo maridanoo mi moodaa ufafa maaqimminoo maridanoo.

Anee aneennara amuqusi marianandee maseenana mi amuqusirafa kai aqoonnanara amuqusiani. Mi ufafa aiqama sandufa aruseenoo mifa anoonaidanoo. <sup>10</sup> Faiqi anaasee moo fannoo aqoonna fasiqa anaaseera amuqusi marinafa naqimaseenoo moona mandaikammamaqaannoo fee, sia miqiannoo. Minara qinee qiaqa, aqoonnanara amuqusi marifa aiqama Mooseena sandufamau fimarifa maridanoo.

<sup>11</sup> Innee mi fasiqana aanna raqa. Doo maa aukuanna iqaqara aukuana maridanoo faiqaranakiqari findifira aukuana doo ani maridanoo. Ooqai innee inneeqa irirana Yisufa ufasa rusisoofa doo ani anifanoo doo inneeqa asumu marira aukuana doo adeedi ramasee ani maridanoo. Minara faiqaranakiqari findi fira aukuee qidaqa.

<sup>12</sup> Doo asukuna taikararidanoo, iqaqarafa qusasaa aniannoo, maasa asukunaki ni-mariafana manda oosana oosanna mafi taikaseeqa faasaana amiqira oosana amiqira marirana duru feefara foora indamma qumaraqa. <sup>13</sup> Maasa faasaanasaa nidara foora aiqamausa nifusaa andeeqarausaikakai mambi mariaqa. Sia mandainaina maraani qimasee moodaanaki suqaaqa. Sia nammari namasee furufariaqa, sia faiqi faqa anaasee faqa narinni narinni ummuariaqa. Faiqi faqa anaasee faqa sia nari afaaqa nari afaaqa kooroo iaqa. Sia rakuqaqa, sia nariara nariara rairai qiaqa. <sup>14</sup> Innee inneeqa faiqi faiqi manda iriranamau fidaqa fanandimariana minniseeqa mi aanausa oonu ititee ani ititeemma atukaraseeqa quandaki Anutuna asauku mundirafa Yisufa maasa karaambaqa mina andeeqaranaki fimariana mina qumareeqa mi duru saamunnai maasa faiqi faiqi manda marirana manda nirana faqa rakuqaqa.

## 14

*Unna Anutunara dufi dufi qimaria narana ufafa.*

<sup>1</sup> Qinee Pauroosa Roomma maqusanaasa Yisuna ufa irimariasa qimannimidaqa. Innikina oosana osana fasiqa anaasee mariafanoo. Akaqausa afeekaikamasee Yisuna mandaaqaqa maridaqa irirana minasaa kai mundusee fimariasa maridaqa, akaqausa irirafa sia Yisunasaa mapukimariasa mi fasiqausa irirafa oorudupirausa maridaqa. Innee sia amiqira irirana faqaasa kai mara maree inni sugiranaki quqaaga irirana oorudupirausa faqa mareeqee kaqi moodaanaki quqaaga. <sup>2</sup> Sia misa moo irirana rairaiqiaqee mareeqee quqaaga. Misa faqa Yisuna ufa irimariasa mariafaqa kaqi quqannisaqa.

(Ooqai Pauroofa maru aukuanna aanda aruseeqa unna Anutunara tumunnai auqira afaannara dufi dufi qimaseeqa makeetimariqau. Yisuna ufa irimarusa namasafanoo unna Anutuna maraquna kafa daakuandoo qimasee rufieemariqau.)

<sup>2</sup> Faiqi moo fannoo nari iriranannai sia minara iridanoo kai aiqama narana aanda naidanoo, sia Anutuna ufa rukiaida miqidanoo. Faiqi moo fannoo irirana oorudupirafa aanda namasee qeeqa irirana kuridianoo qimasee narana kai naidanoo. <sup>3</sup> Innikina aiqama aanda narana neemarifa sia quandaki aanda sia nainnara fidiqaamasee qinee qeeqaraa ani uriqararausee sia qia, Kafa aanda sia nainnafa sia quandaki kaqi neemarinara qaoo qimannisaqa.

<sup>4</sup> Innee aiqamausa Yisuna ainainimariasa mariafanoo. Innee naqi fee mandee moo fasiqa ainainirana aqifaree. Mi fasiqafa moo fasiqa Yisuna ainainirafa maridanoo, mina uriqararafa kai mina oosana irisee mara uqeereeqee nari andeeqarana amanakai kikiqammaisannoo karaambaiaqa fannoo amana mina dadaqinanoo anoonakianno.

<sup>5</sup> Faiqi moo fannoo moo faasaanara uriqarara faasaanee qidanoo. Faiqi moo fannoo aiqama faasaanara amanamana kai fee qidanoo. Aiqamausa naadu nari irirana mapukusee irisee doo mi mau fuaqa. <sup>6</sup> Moo fannoo moo faasaanara uriqarara faasaanee qimarifa karaambaiaqa auqu uqeeraidanoo miqi qidanoo. Moo fannoo aiqama aanda narana neemarifa karaambaiaqa auqu uqeeraidee qidanoo miqidanoo, Anutunara dufi dufi qidee qida neemarifa miqidanoo. Akaqa ainaina sia neemari fasiqafa mifa faqa minannai Anutuna auqu uqeeraidee qidanoo miqidanoo, Anutunara dufi dufi qida sia neemarifa miqidanoo.

<sup>7-8</sup> Maasa qeeqa mariranaki maridaqa sia qeeqa qeeqa rakisida maridaqa, maasa kuqirana faqa sia qeeqa rakisidaqa karaambaiaqa fannoo kai rakisidanoo, maasa kaqi maridaqa karaambaiaqa ainainiranaki maridaqa maasa kuqiqa karaambaiaqaindi maridaqa mifinnai fidaqa. Doo qinee minara kooroo idaqa maasa kaqi maridee kuqidee karaambaiaqaindi maridaqa. <sup>9</sup> Asauku mundirafa kuqirausa faqa kaqi mariasa faqa karaambaiaqa marianifeera auniranasaa kuqinoo minakiqari findifinno. <sup>10</sup> Qinee Pauroosa minara irisee iridaqa. Anee yafee maridane qoonnana oosana qafamaseenee aqinane. Anee yafee maridane qoonnana akoqaidanoo fee. Maasa aiqamausa Anutuna afusaa kikiqammafuananoo mifa maasa oosana qafammaseenoo raina qimaqaannoo, minara sia qoonnana aqisee akoqaani, anee ureeqarafa mariananoo.

<sup>11</sup> Ooqeenaa tamummaqara fasiqausa minara maaqi qidaqa. Anutufa qinau. Qinee kaqi marira Anutusa uriqararausa marunnanara qini ufa amiqimasee iriaqa. Aiqamausa qini doorisaa noorindari aqufiqa qimoqifaranoo. Aiqamausa qiniara Anutu fee qifaranoo.

<sup>12</sup> Doo qinee Pauroosa minara maaqi qidaqa. Maasa aiqamausa qeeqa nirana, marirana, qirana Anutuna afusaa kooroo ianura. Minara iridaqa qoonnana ireeda kai qiaqa.

*Ani akaqaafasaa fannoo anee imarianna ainainasaa farindamaki saamuruandoo qia.*

<sup>13</sup> Nariara nariara ireeda kai marida sia munuqi miniqi qidaqa sia aqara ufa nariara nariara qiaqa, sia maasa miqiaqa, maaqiaqa, maasa Yisuna ufa irimarunusakina maridaqa moo ainaina maraananoo qini qiqoonafa qiqafamaseenoo doo nari faqa mareenoo aqaranaki aqufinaqa doo qinee mi ainainnara sia maraanura rufiaanura. <sup>14</sup> Qinee Pauroosa Karaambaiaqa Yisunasaa atooqa marunnanannai aiqama naranara anukara fee kai qimasee naidaqa. Faiqi anaasee moo fannoo moo ainainara sia anukara fee qinafa mina amuqusakinaafa mi ainainnara rufiaanoo.

<sup>15-16</sup> Anee moo narana amiqira narane qimasee namasainanoo ani akaqaafasaa ani qafamaseenoo mifa faqa neenoo minasaa farindamakinoo moo mandainainaki aqufinana anee mina afaasuaa qiananoo mifa mandainaina numooki aqufinoo. Anee miqinana sia aneenna akaqaafasaa amuqusinana dadaaqiananoo. Asauku mundirafa

akaqaafasaara minara faqa kuqinaw anee nanaree fifau amiqira naranara neemari-anannoo mandoosanaki quqeenanee. Anee miqinaqa faiqi anaasee ani oosana oosana naranara kaqi nifaqa quqasee neefandinanara mandoosanee qifaranoo.

<sup>17-18</sup> Anutuna ququsaki mariasa maasa nirana marirana sia narana nammariisaafau mundinoo maridanoofau. Anutuna naaquqara maraquina nimimari ainainausa andeeqarana faqa asoarana faqa asasirana faqa minamusasaa maasa marirana nirana mundinoo maridanoo. Faiqi anaasee moo fannoo asauku mundirana ainainidanoo nari akaqaafasaaqara amuqusimarifanoo dadaaqinoo rakisinanoo Anutuna amooqirafa faqa faiqi faiqi eedoo qirana faqa maraannoo.

<sup>19</sup> Maasa minara irisee Yisuna aiku asaukuki nidaqa maasaki asoarana faqa nari afeekaiki nari afeekaikiqa Anutuna ufamau fuaqee qimasee mi mau fuaqa. <sup>20</sup> Anutufa maasa moomoosa Yisuna moodaanaki quqaqoofaqa maasa sia mina kuridiqa furufariaqa. Aiqama narana amana nee mariafa maridanoo maasa moo amiqira narana namasaanoo maasa qikaqaafasaa moo fannoo qiqafamasee quandaki aaqaranaki aqufinanoo maasa mi naranna nunnanara aaqarafa maridanoo fee qianaara.

<sup>21</sup> Andeeqasee nimariaanafa maaqimminoo maridanoo akaqa narana nammari fee namasaanoo qini qikaqaafasaa moo fannoo fee qini qiqafamaseenoo minasaa aiku amakinanoo kuridiranaki aqufuandoora mi narana nammari narara rufiaanaura. Nana ainainasaa fee qini qikaqaafasaa aiku amaki kuridiranaki aqufuannoo fee qimasee mi ainainara rufiaanaura.

<sup>22</sup> Aninna irirafa narana nammariara sia faiqi aanaaseeki kooroomandee minasaa aano irafa raiqarafa kambiqani Anutusandiri kai kukeeqasee iriaqa. Faiqi moo fannoo narana nammari nainara mina aakirafa sia qaoo qinafa mifa amiqira fasiqa asasiranaki mariannoo. <sup>23</sup> Kafaa mi fasiqafa moo ainaina namaseenoo oonumafi iridanoo Anutufa minara andeeqeefoo qiannoo fee sia andeeqeefoo qiannoo fee qimasee qaara aundura irirafa mi fasiqafa mi narana nammari namasainnara Anutufa aaqee maqi qiannoo, sia Yisuna saqarikiranara irisee neenoo irirana furufaramandee neenoo, miqinnanara Anutufa aaqeenoo fee qiannoo. Maasa moo ainainana andeeqara fee mariannoo fee aqara fee mariannoo qimasee qaara daundura irisee kaqi oonu qumarainafa aaqarafa maridanoo.

## 15

### *Sia aneenna aidiramau fua.*

<sup>1</sup> Maasa Yisuna saqarikiranaki afeekaiki mariasa quandaki ureeqarusa qumaara dinni ati dadaaqi akumaraa, sia maasa qeeqa didiranamau kai fua. <sup>2</sup> Maasa naadu naadu qeeqa qikaqaafasaa nari Yisuna saqarikirana dadaaqiananoo afeekaikiani. Sia aneennara iria, aneenna akaqaafasaa amiqi amiqianifeera minara irisee dadaaqia. <sup>3</sup> Asauku mundirafa ririmma, sia nari aidiramau finoo, nari akoona Anutuna aidiramau finoo tamummaqara fasiqa minara maaqi qimasee akara rinaw.

Faiqi anaasee Anutuna aqira ufa mandufa qimarifa qinisaa aqufinoo.

Tamummaqara fasiqa mi ufana qimasee akara rinaw.

<sup>4</sup> Aiqama tamummaqara fasiqauqa akarakinaw ufa sia fifau akara riqau maasa naamuqidee qimasee akara riqau, maasa mi akaranakinaw ufa dadaaqidaqa fuki faaki qirana faqa ubiqafi marirana faqa marasee miqandannai Yisunara asasammasee afeesirana maraaqera akara riqau. <sup>5-6</sup> Anutufa ubiqafi marirana akoofa faqa dadaaqira fuki faaki qirana akoofa faqa maridanoo. Miqi mari Anutufa inni dadaaqinaqa innee asauku mundirana Yisuna aanna ramaseeqa innikina sia aanoo irafa mariannoo moodaa irirafa mariannoo. Moodaa irirafa innikina marinaqa aiqamausa moodaa ufa kai qimasee asauku mundirana maasa karaambaiqa Yisuna akoona Anutuna amooqiaqa.

### *Anaamuru misa Isaraee maqanna faqa Anutunara dufi dufi qifaranoo.*

<sup>7-9</sup> Asauku mundirafa inni qumaroonara irisee innee nariara nariara aqoondikifaqa faiqi anaasee inni nindafamasee amiqira oosana maraidammiafoo qimaseeqa inni Anutuna amooqiaqera. Anutufa nari qimaqoo ufamau fuanifee qimasee asauku mundirafa Yuda maqanna mara firira faiqira foora ainainammannimaqara faiqi kamambinoo marinaw. Anutufa Abarahaamana aiku asauku faqa qima afeekaikammasoonara kambiqanifeera qimasoofoanoo asauku mundirafa Yuda maqannaasa ainainammannimaqara faiqi kamambinaw. Anaamuru mariasa anireeqa Anutufa misara amuqusufanoo nifauaranara faqa Anutuna auqu uqeerasee amooqiaqera asauku mundirafa minara faqa Yuda maqannaasa ainainammannimaqara faiqi kinaw. Tamummaqarusa akarakinaw minara maaqi qinaw.

Qinee aanaamuru namufaqa maridaqa misa saimbaqa aniara dufi dufi qianaara.



Miḡooḡari anauḡu uḡeeraseeḡa idi raida ani amooḡianaura.

<sup>10</sup> Tamummaḡarauḡa akarakinaaḡa moo maaḡi ḡidanoo.

Innee aanaamuru mariaḡa Anutufa utaaḡama nimaḡee marisa Yuda maḡannaasa saim-  
baḡa duḡi duḡi ḡimasee asiaḡaḡa.

<sup>11</sup> Moo tamummaḡarafa maaḡi ḡinau.

Aiḡama aanaamuru mariaḡa karaambaḡa amooḡiaḡa.

Aiḡama maḡannaasa firaḡoo miḡa amooḡiaḡa.

<sup>12</sup> Kafaḡa moo tamummaḡarafa maaḡi ḡinau.

Yeeseena atiki moo kambḡaḡannoo, miḡa findifinoo aanaamuru rakisiannoo, miḡa ḡuan-  
daki nari irirana minaki rusifarannoo.

Tamummaḡarauḡa uḡa Yisunara miḡimmḡiḡau.

<sup>13</sup> Anutufa maasa innaarunaira afeesirana oosanaḡaḡaḡa maridanoo, miḡa kai innee  
miḡa saḡarikiranannai aiḡama asasirana ḡaḡa asooarana ḡaḡa innikina ḡumbḡiḡanni-  
maḡaḡannoo, Anutuna naaḡuḡara andeeḡara maraḡuna afeeka fannoo inni dadaḡiḡi-  
nannoo innaarunaira asammasee afeesirafa mi asasirafa ḡumbḡiḡeenoo teeḡiḡannoo.

*Paurooḡa afeeka uḡa Roomma maḡannaasa akara rumannimaḡoonara ḡinau.*

<sup>14</sup> Oo ḡini ḡikaḡaḡafasaḡaḡa ḡinee Pauroosa inni Roomma maḡusai mariaḡara ḡidaḡa.  
ḡinee inniara amiḡiraḡa ḡaḡa irirana ḡaḡa ḡumbḡiḡaraḡee ḡidaḡa innee Roomma maḡu-  
sanaasa amiḡira irirana nari uḡaḡiḡee nari uḡaḡiḡee ḡimariaḡa amana mariaḡannoo.

<sup>15</sup> Innee miḡi marifaḡa ḡinee maa pasanakina sia reendeenamandee inni naaḡoo  
auḡeeḡa oosana oosana ainainara inni naaḡoo firaḡoo auḡeeḡa. <sup>16</sup> Anutufa amiḡira  
ainainirana ḡini ḡiminau. ḡinee asaku mundirana Yisuna saikaki ḡuḡaḡisaḡaḡa  
maridaḡa aanaamuru ḡimannimiranaki maridaḡa.

(Mooseena uḡiḡaḡana maaḡakina Anutuna aanaḡiḡikira fasiḡaḡa sipsipa aanaḡi  
amiḡirana kai faiḡi aanaaseendi mara maree mini ooninnai auḡira ḡaindasaa ḡuḡasee  
arusee aandaḡu tatufirana Anutuna suḡa amimariḡau.)

ḡinee aanaamuru ḡaḡa Anutuna ḡaḡa aanaḡiḡikiraḡusara foora marunnanara maa  
akaranaki afeeka uḡa inni nimḡaḡa, kaḡiḡeesa marifaḡau sia afeeka uḡa ḡimannimini  
ireeda kai ḡimannimini inni aanaḡiḡikiraḡusa maridaḡara afeeka uḡa ḡimannimidaḡa.  
Anutuna naaḡuḡara andeeḡara maraḡuna fannoo aanaamuru mariaḡara Anutunaindi  
ḡee ḡimasee miḡauḡa marirana nirana Anutuna aidirana amana kai mariaḡeeera minara  
kai Anutunai aanaḡiḡi kiraḡusaikidaḡa maridaḡa. <sup>17</sup> ḡinee asaku mundirana Yisunasaa  
moodaanaki kamambi maridaḡa maḡasaa mi saikanaki marunanoo didimarifaḡa asasi-  
daḡa. <sup>18-19</sup> Asaku mundirafa naaḡuḡara maraḡuna ḡimifannoo dadaḡiḡiḡaḡa ḡeeḡa  
ufannai ḡaḡa ḡeeḡa kadaapiriranannai ḡaḡa sia faiḡi maraḡaa ira ainainannai ḡaḡa  
miḡauḡannai ḡinee aanaamuru Anutuna uḡa ḡimannimimariaḡanaḡa iriḡa mi mau  
fidaḡa, asaku mundirafa dadaḡiḡinara firaḡoo ḡifaḡaḡa ḡuḡasee afeekaikamandee  
ḡimannimianaḡa. ḡinee miḡidaḡa amiḡira fasaasa uḡa asaku mundiranara aiḡama  
ufatia ḡimannimiḡa Yeerusaree maḡusa dinni Iririkumma maḡusa dinni mi ḡambaana  
saḡanna mariaḡa aiḡamaḡa ḡimannimimaree fifainidaḡa.

<sup>20</sup> Asaku mundirana aḡafakiana sia irimariaḡa kai ḡimannimiḡa, ḡeeḡa uḡa moona uḡa  
amuaḡaḡa rusianoora saina sia irimariaḡa kai ḡimannimiḡa, ooḡai indaaru doo ḡinee mi  
iriramaḡu fidaḡa. Mi mau fidaḡa tamummaḡara fasiḡa ufamaḡu fidee ḡidaḡa. <sup>21</sup> Ooḡai mi  
tamummaḡara fasiḡana uḡa minara maaḡi ḡinoo maridanoo.

Sia minara ḡimannimusa miḡa ḡafeefarannoo.

Sia irusa minara naaḡoo irifarannoo.

*Paurooḡa Roomma maḡusai firaree ḡimasee ḡimaḡoo ufafa.*

<sup>22-24</sup> ḡinee Pauroosa moomoo kari inni Roomma maḡusai fuaneerunannoo oosana  
oosana ainainirafa rafaḡaḡafuḡaḡa doo maḡee maa saḡa saika taikasee moomoo aukuaḡa  
innee iannai fuaneḡe ḡimarunauḡa doo maḡee ḡusasaa firaridaḡa. ḡinee Sipeena maḡu-  
sai fidaḡa inni Roomma maḡusanaasa ḡaḡa namummaḡeeḡa inni ḡaḡa asammasee  
marikammaḡanaḡa innee Sipeena maḡusai fuannana ḡiku auḡirana dadaḡiḡiḡee  
ḡidaḡa.

<sup>25</sup> Inni maḡusai fuani ḡunauḡa doo maḡee Yeerusaree maḡusai fuanaḡa oonureeḡa  
oonurandee aiḡareeḡa inni maḡusai fuanaḡannoo. Yeerusaree maḡusai ooru fidaḡa  
miḡoo Anutuna uḡa irimariaḡa dadaḡiḡianaḡa. <sup>26</sup> Maseedoonia maḡa maaḡakinaasa ḡaḡa  
Kirisa maḡa maaḡakinaasa ḡaḡa Yisuna uḡa irimariaḡa nariḡa munnimma aiḡamaḡa  
ruaunmasaḡaḡa Yeerusareenni Anutuna uḡa irimarusa ainaina naranara sarauiraḡa  
mi munnimmana nimiraree ḡimasee ḡinisaa saḡaḡa maree ooru firarammidaḡa.  
<sup>27</sup> Maseedoonia maḡa maaḡaki mariaḡa ḡaḡa Kirisa maḡa maaḡaki mariaḡa ḡaḡa nariḡa

kai ruuummasee Yeerusaree maqusanaasa nimiraree qidaqa, sia qineefau qiqau. Indaaru Yuda maqannaasa nári innaarunai fira amiqira ufa Yisuna ufara aanaamuru naida nimisoonara mi aikana narinoo marina mi aikana tatiqa maqasaa amiqi amiqira ainanara munnimma nimifaranoo. Anaamuru mariasa miqiaqaana andeegara oosana maridanoo.

<sup>28</sup> Qinee maaqooqaraasa suquseeqa nimira munnimma mareeqa Yeerusaree maqannaasa aiqama uqanna munnimma nimiseeqa oorurandeeqa inni Roomma maqannaafaqa qumu maridaqa asasiidaqa amiqidaqa mariana, doo marikiqa Sipeena maqa maaqaki oonuree misa faqa Yisunara qimannimianaoranoo. <sup>29</sup> Qinee inni Roomma maqannaaiannai oonuree maa ainainnara iridaqa. Qinee asauku mundirana afaaqooqa qiranasa fidaqa mina amiqi amiqirana inni nimiana. <sup>30</sup> Oo qini qikaqaafasaa qinee Pauroosa afeekaikamasee inni qimannimidaqa. Innee qiniara Anutufinnai innaaru qiranannai qini dadaaqaqa, Inneeqa nimuqusa ookiqari afeekaikamandee qiniara innaaruqiaqa. Innee faqa qinee faqa asauku mundirafa Yisufa maasa karaambaiqa minasaa atooqafi marunasa maridaqa minara irisee qiniara innaaru qiaqa. Anutuna naaqqara andeegara marauna fannoo nariara náriara nimuqusirana maasa firaqoo qimuna innee minara faqa iriseeqa qiniara innaaru qiaqa.

<sup>31</sup> Qinee maindri Yeerusareenni ooree misa nimiraree qia munnimmana nimianaqa Anutuna ufa irimariasa minara asasiqeeera innaaru qiaqa. Miqoo Yeerusareenni qinee marianaqa innee Anutunara innaaru qimaqimaqaqa Yeerusareenni mariasa Anutuna ufa sia irimariasa qini darirarammidammia. Innee misara innaaru qiaqa qini sia daruaqee innaaru qiaqa. <sup>32</sup> Qinee Yeerusaree maqusaindari amiqimandee oorurandee qumuraananoo Anutufa qinnanara inni Roomma maqannaasa faqa kaqikaqoo idooamaseeqa asammaseeqa aiqaree fuanara. <sup>33</sup> Anutufa maasa asooara oosana fannoo inni aiqama Roomma maqannaafaqa mariani. Kuqaa.

## 16

*Pauroofa nári aqoondiuqa nimandaidanoo.*

<sup>1</sup> Oo qini qiqoondiuqa Roomma maqusa mariasa anaasee moo fannoo Keenakaree maqusa Yisuna ufa irimariasa dadaaqimari anaaseefa maasa nisookifa mina auqu Foeebeee nammarifa qusasaa innee iannai Roomma maqusa fuannoo. <sup>2</sup> Mifa andeegara anaasee marinoo oonurainaga innee Anutuna faiqi namu naana ramasee karaambaiqa ufa irimari anaasee fee qimasee amiqimandee qumaree rakisidaqa mi anaaseefa moo ainaina ummaara moo bisinisa Roomma maqusa auqainaga innee kaqi dadaaqaqa. Mi anaaseefa moomoo fasiqa anaasee dadaaqirafa qini faqa dadaaqira qiqoondi maridanoo.

<sup>3-4</sup> Inni Roomma maqusa maria fasiqa anaaseeqanda, anaasee auqu Piriisikaa nammarifa maridanoo afaaqi auqu Akuiraafa mi qafaqiganda qini dadaaqirana nári kuqiranara paasosamandee moomoo kari nimeekaranaki fidaqa qini dadaaqimariasa maridaqa, asauku mundirana Yisuna ainainirana dadaaqi mariaqanda maridaqa. Sia qini kai dadaaqimariaqanda aiqama aanaamuru Yisuna ufara suqufi qimariasa misa faqa dadaaqimariaqanda marianara misa faqa qinee faqa miqandara dufi dufi qidaqa. Qinee maa pasanaki mi qafaqisa nimandaida.

<sup>5</sup> Mi qafaqisa maaqaki Yisuna ufara suqufi qimariasa amaana maqa sia mariana suqufida qimariasa misa faqa maa pasanaki nimandaidaqa. Qini qifaagasaa qiqoondi auqu Epeaneetusafa aiqama Asia maqannaakina indaaru asauku mundirana aqoondikufa, qinee maa pasanaki mina faqa amandaidaqa.

<sup>6</sup> Moo anaasee auqu Maria nammarifa (sia Yisuna anoofau mina amarafa) firaqoo inni Roomma maqusaanasara kadaapirufa maridanoo qinee mina faqa amandaidaqa.

<sup>7</sup> Qini maqannaasa Yuda maqannaafaqa anaasee qini faqa karabusaki maruqanda nuqu Andaroonikusafa faqa Iunia nammarifa faqa mi qafaqisa naaree Yisuna saqariki maruqanda maridaqa qinee innaaqianna. Yisufa niqiqoo fasiqausa amiqimandee miqandara iri mariqau. Qinee miqandara faqa maa pasanaki nimandaidaqa.

<sup>8</sup> Qini qifaagasaa qiqoondi moo auqu Ampariatusafa mifa faqa maasa faqa karaambaiqa ufaki maasa faqa moodaanaki mariufa inni faqa marifaqa mina faqa maa akaranakiqari amandaidaqa.

<sup>9</sup> Asauku mundirana ainainiranakina maasa faqa moodaanaki mariufa. Urabanusana faqa inni faqa marina amandaidaqa, Qini qifaagasaa qiqoondi moo auqu Sarakisafa inni faqa marina amandaidaqa.

<sup>10</sup> Apeeresana faqa amandaidaqa, mifa aukuaana aukuaana asauku mundiranasaa atooqafinoo mina ainainirana faakanaikirafa marifa. Aristoborusana faqa mina aiku asauku faqa nimandaidaqa.

<sup>11</sup> Qini qigoonna Yuda maqanna Eeroodioonana mina faqa amandaidaga. Narakisusana nari aiku asaukukiqari Yisuna ufa iri mariasa nimandaidaga.

<sup>12</sup> Anaasee qaaraqanda asauku mundirana ainainiranaki maru aanaaseeqanda nuqu Tirifae nammari faqa Tirifoosa nammari faqa miqanda faqa nimandaidaga. Anaasee moo qini qifaqasaa qigoondi Karaambaiqa saika firaqoo uqanna maree marifa mina auqu Peerasisa nammari faqa amandaidaga.

<sup>13</sup> Karaambaiqa saikaki mariasakiqari amiqirafa mina auqu Rufusafa mina anoofa faqa qinee faqa mina amaakuara foora marunnanara miqanda qisanosara nimandaidaga.

<sup>14</sup> Maa fasiqa namusa nuqu raanura. Asinakaritusafa faqa Fareekoonafa faqa Qeerameesafa faqa Pataroobasafa faqa Qeeramasafa faqa minamusa faqa aiqama Yisuna ufa irimariasa faqa misa nimandaidaga.

<sup>15</sup> Firoorookusafa faqa Iuriafa faqa Neereeusafa nari asookisandiri faqa Oorimpasafa faqa aiqama Anutuna ufa irimariasa faqa misa faqa mariasa faqa nimandaidaga.

<sup>16</sup> Innee suqidaqa nariara nariara nikaqafasaara foora nari sukukee nari sukukee iaqa. Aiqama maqusa maqusa asauku mundirana ufara suqufi qimariasa misa faqa inni Roomma maqanna nimandaidaga.

*Akaqausa rainee mariasa mi ufanara eerairiqa.*

<sup>17</sup> Oo qini qikaqaafasauqa qeeqa qimuqusa ookiqara afeekaikamandee inni qiman-nimidaqa. Akaqausa rainara ufa oosana aremarisara eerairiqa. Misa Yisuna saqariki mariasa akaqausa kuridi nimaqaidaga innee maroo andeeqara ufana atekaidaga, misara rufiasee nianai mariqa. <sup>18</sup> Miqi mariasa sia maasa karaambaiqa asauku mundirana ainainau idau, misa nari nidimari mandainainara kai randaida iridaqa. Misa nari nimanira ufannai faqa nari nifaurunnai kai susumma nimaqaranannai faqa amiqira fasiqa anaasee iriranara uneemaana qidaqa. <sup>19</sup> Aiqama maqannaasa inni Roomma maqannaasara iridaqa innee Yisunasaa atooqa marianara irimariafaqa qinee faqa iridaqa asasidaqa. Qinee inniara oosana oosana amiqira oosana akoofasauqa mariagee qidaqa, oosana oosana mandoosanara aaminaikiagee qidaqa. <sup>20</sup> Anutufa maasa asoosana oosana faqaafa qusasaa Sadannana inni niku ameemaanaira foora mareegeeno quqasee radamusaannoo. Karaambaiqa Yisuna afaarirafa inni faqa mariannoo.

<sup>21</sup> Maaqoo qini faqa mariasa nari nimandarana inni nimidaqa misa nuqu Timootifa qini moodaa ainainirana dadaaqi marifa inni nimandaidanoo Rukiysafa faqa Iasoonafa faqa Soosipateerafa faqa misa aiqamausa qini maqanna Yuda maqanna mariasa misa faqa inni nimandaidaga.

<sup>22</sup> Qinee Teeratiusausa Puroona ookinaana iridaqa maa pasana akara rimarunusa maridaqa, maqee qinee faqa Yisuna ufa irimarunusa maridaqa inni nimandaidaga.

<sup>23</sup> Yisuna ufara suqufi qimariasa Kaiusana maaqaki maqee maqee suqidaqa, qinee Puroosa faqa mina maaqaki marunanoo mi fasiqafa Kaiusafa inni Roomma maqannaasa nimandaidanoo. Qeeqa maqee marunna maqusanaasa munnimma kansooru munnimma rakisimarifa mina auqu Eerasatusafa faqa maasa qikaqaafasaa Kuaratusafa faqa inni nimandaidaga. <sup>24</sup> Maasa karaambaiqa asauku mundirafa Yisufa mina afaarinoo kaqi nimira oosana inni aiqamausa faqa mariani.

*Ufati taikarufa.*

<sup>25</sup> Doo maasa Anutuna areenarana amia, Ooqai oosana aroonakiqari kukeeqara anoona ufa Isaraee maqannaasa faqa aanaamuru maqannaasa faqa Anutufa asumu mariranaki quqaaninna ufana kukeeqanoo mariufa maqee Yisunaki koorooinoo maridanoo. Mi kooroo ira ufafa inni Yisuna saqariki mariana minaki inni amana mapuku nimaqaannoo. Amiqira fasaasa ufa asauku mundirana Yisunara qinee qimannimiqa nunnana, inni Yisuna saqarikirana mi ufanasaa mundinoo maridanoo. Amana Anutufa inni Yisunaki saqarikirana mapukusee quqannisaano. <sup>26</sup> Ooqai mi kukeeqara anoona ufafa maqee naaru naaru marira Anutufa ufa qufanoo mi kukeeqara ufafa aiqamausakina akoosaqa kooroomaffanoo marifaqa qafaidaga iridaqa. Anutufa ufa qufanoo Yisufa sia kambiqooqoo tamummara fasiqauqa Yisuna aufakiana kooroo iqau. Maqee faqa aiqama maqanna qimannimifaqa mi ufanasaa irirafa rusiffaqa iridaqa eedoo qimasee mi mau fuageera.

<sup>27</sup> Moodaa mari Anutufa nariara aiqama ainainara irimarifa, mina asauku mundirana Yisunnai naaru naaru areenarafa minaindi mariani. Kuqaa.

## 1 KOORINTI

### Pauroofa Koorinti maqanna akararumannimaqoo ufa.

<sup>1</sup> Qinee Pauroosa maa pasana akara rumannimaqaidaqa Anutufa nari iriranannai qini maqasaa fasiqa daaramaseenoo nari asauku mundirana Yisufa niqiqoo fasiqausaki qini quqaqoosa maridaqa maa pasana akara rumannimaqaidaqa. Maasa qikaqafasaa Soosateeneesafa maa pasanaki mifa faqa qinee faqa nianaindari inni nimandaidaga.

<sup>2</sup> Innee Koorinti maqasai Anutuna ufara suqimariasa akara rumannimaqaidaqa Anutufa inniara nari aiku asauku mariaqeera utaaqamaqaisa mariafanoo, innee mina asauku mundirana Yisunasaa atooqaanara Anutunaindi kammiga mariafanoo, Anutufa nari faiqi namu mariaqeera nari innai fuaqeera inni naareenoo, sia innee kai minaindi mariafanoo, aiqama maqanaa maasa karaambaiga asauku mundirana Yisuna aaree mariasa misa faqa innee faqa minaindi mariafanoo. Yisufa misa faqa maasa faqa karaambaiga maridanoo.

<sup>3</sup> Maasa qikoofa Anutufa faqa maasa karaambaiga asauku mundirafa Yisufa faqa miqanda kaqi afaarirana faqa naundura asoarana faqa inni Koorinti maqannaasa nimiani.

*Pauroofa Roomma maqannaasara dufi dufi qidanoo.*

<sup>4</sup> Anutufa innee mina asauku mundirana Yisuna saqarikianara nari afaarirana inni nininoo. <sup>5</sup> Innee Yisunaki marianara Anutufa oosana oosana amiqira ufa qirana faqa oosana oosana amiqira irirana faqa mi ainainaqanda moomoo nimunara qinee Pauroosa minara iriqa qeeqa Anutunara inniara maqee maqee dufi dufi qidaqa. <sup>6-7</sup> Innee maasa karaambaiga asauku mundirana Yisunara innaarunaindaraafa kooroo iranara afeesimariafanoo asauku mundirana amiqi amiqirana aufakiana inni naunduraki mapukusee marinara Anutufa moomoo nari dadaaqi nari dadaaqirana akoofasaikirana nimirana. <sup>8</sup> Anutufa maa mariaqooqari amiqimmandee rakisinoo fifi inaqa sia kasaqai kuridifaranoo taikara aukuna andeeqasee paqurifaranoo. Miqunara mikari maasa karaambaiga asauku mundirana Yisufa qumira faasaana Anutufa maasa niuqummasee moo aaqarana sia paquriranoo.

<sup>9</sup> Anutufa inniara nari amaaku nari asauku mundirana maasa karaambaiga Yisuna faqa aqoondikaqeera inni naaree marifa marinara sia inni nikaruqimasee kasaqai mininnisaannoo innee minasaa nifaaqa quqemariafa maridanoo.

*Pauroofa misaki raiqaranara aaqee mariafanoo fee qinau.*

<sup>10</sup> Qini qikaqafasaa Koorinti maqanna mariasa, maasa karaambaiga asauku mundirafa Yisufa inni qimannimira saika qimunara irisee inni reendeenamandee kai qimannimidaqa, inneeqa sia raina rainida furufariaqee qimasee moodaa ufa qimasee moodaanaki mariaqa kuqaa uqanna moodaanaki mariasa maridaqa moodaa irirana faqa moodaannai firana faqa mariaqa. <sup>11</sup> Moo anaasee auqu Karooeena nammarifa mina aiku asauku innikina manda ainaina, raiqara ainaina qafamasee akooqoo qimaqimiafaqa iriqa.

<sup>12</sup> Misa akooqoo qimaqimiafaqa doo qinee akooqoo inni qimannimianara. Inniki naadu naadu moona ufa iriqa moona ufa iriqa ufa moo qimariana gambaana raiqarafa aqarafa maridanoo. Moo fannoo qinee Pauroona aiku asauku marunaasee qiafanoo moo fannoo qinee Apooroosana aiku asauku marunaasee qiafanoo moo fannoo Peetooroona aiku asauku marunaasee qiafanoo moo fannoo asauku mundirana aiku asauku maridee qimasaida miqira raiqara ufa aqarafa maridanoo. <sup>13</sup> Qinee Pauroosa minara maaiqi qidaqa asauku mundirafa nari apata aiku moodaa moodaa maqisee maridee sia aukaakinoo marunara innee faqa sia rakeekaa iaqa. Qinee Pauroosee inniara aunirira saqarisaa kuqi fee qiqiafana. Sia kuquafannanara sia qini kikiqisuqa. Innee nammari maraqaq qini Pauroosa duqusaa fee nammari maroossee maridee. Asauku mundirana auqusaa qimasee nammari maroonara mina aiku asauku kai mariaqa.

<sup>14</sup> Qinee sia innikina nammari moomoo rumannimaqafiafana minara Anutunara dufi dufi qidaqa. <sup>15-16</sup> Qinee Kirisipusana faqa Kaiusana faqa nammari rumannimaqaafannana. Doo daaqoo irifaqa Sateefanasana faqa nari aiku asauku faqa inamusa kai nammari keeqannimaqafiafana. Akaqausa faqee nammari keeqannimaqaafannee doo maqee aunusee sia iridaqa, minara sia moo fannoo qiniara aiku asauku kammambi nammari mareeunoo qifaranoo. <sup>17</sup> Asauku mundirafa sia qiniara nammari keeqannimaqaannee qimasee diqiqeenoo amiqira fasaasa ufa qimannimiannee qimasee qini diqiqeenoo sia faiqi faiqi iriranamau qimannimiannee qinoofau qini diqiqeenooofau.

Qinee faiqí faiqí iriranamau qimannimiqa asauku mundirafa auniriranasaa kuqu afeeka ufana ureeganoo marina sia irifoora.

*Anutuna irirafa aadumamaumbidanoo, maqasaa fasiqa irirafa moomau fidanoo.*

<sup>18</sup> Asauku mundirafa aunirira saqarisaa kuqu ufana kuridiranaki fimariasa irisee furufarira ufa fee qidaqa. Maasa asumu mariranaki fimariasa sia miqí qidaqa mi ufanara Anutuna afeeka mi ufanara kai mari ifoo qidaqa. <sup>19</sup> Ooqai tamummaqara fasiqauqa minara maaqí qimasee akara riqau.

Irirana faqaasa Anutunara sia irimaria irirana qinee qeeqa Anutusa kuridinni-maqaanaura. Aiqama firaa irirana irimariasa aiqama misa maa maqanasaaqaraa irirana rukasaanauranoo.

Tamummaqarasa ufa oosana miqiminoo maridanoo. <sup>20</sup> Qinee Pauroosa minara kafa maaqí qidaqa. Irirana faqaasa iriranara minara naqí fee qianauree. Uriqarara sukuraki keeqee mariasara naqí fee qianauree. Maa maqa maaqanasaaqaraa ufa akoofasauqa iriranara naqí fee qianauree. Misara maaqí qianauree, doo Anutufa ooqai uqannifaqoofa kooroo inoo maridanoo qimaqiminoo. Maa maqa maaqanakinaasa irirafa Anutunara furufarirafa maridanoo.

<sup>21</sup> Anutufa nari firaa iriranaki maridanoo quandakinoo sia misa nari iriranannai qiniara iriaqee qimaseenoo faiqí auqu quqanau. Miqooqari maasara Yisuna aufakiana qimannimifaqa, misa minara furufarira ufa qimariafa, qimannimifaqa iriseeqa misa irirana minasaa rusimariasa asumu marirana Anutufa nimianifee qinau. <sup>22</sup> Yuda maqannaasa faiqí sia amana auqaaqaa ira ainaina uqaqifiqasainaqa ani ufara kuqaa fee qiraree qimariasa. Anaamuru Kirisa maqannaasa firaa iriranakinaa irirana qimaqimifaqa kuqaa fee qianauranoo. <sup>23</sup> Maasa sia mi maqannaqaqanda naanna raidaqa, maasa asauku mundirafa aunirira saqarisaa kuqunara minara kai qimannimifaqa Yuda maqannaasa mina irisee aanoo qiafaqa aanaamuru irisee furufarira ufee qimariafanoo. <sup>24</sup> Anutufa utaaqamannimaqaisa mi ufana iriseeqa Yuda maqannaasakiqari faqa aanaamurukiqari faqa mi ufanara asauku mundirana kuqirafa Anutuna firaa irirana faqa mina uriqarara afeeka faqa maridanoo fee qidaqa.

<sup>25</sup> Anee Anutuna irirana iriseenana minara furufarammi ifoo qinanoo Anutuna mi irirafa faiqí irirana urinaaqaranoo maridanoo. Anee Anutuna moo ainainara sia afeeka ainainammiifoo qinanoo Anutuna mi sia afeeka ainainafa faiqí afeeka urinaaqaranoo maridanoo.

<sup>26</sup> Oo Koorinti maqannaasa, maanara naaqooki iriaqa inni Anutufa naaroo aukuanana Yisuna saqariku aukuanafa innee mikari irirana faqaasa moomoosee mariqee iqau. Faiqí faiqí irirana faqaasa sia moomoo inniki mariqau. Faiqí faiqí afeeka faqaasa sia moomoo inniki mariqau, sia faiqí uriqararasa moomoo inniki mariqau. <sup>27</sup> Anutufa faiqí faiqí irirana faqaasa nisauriranaki quqaannee qimasee misakiaqa furufari mariasee qimariasa Anutufa mi furufarira fasiqa anaaseesara faqa nari irirana faqa gumareenoo minara qini amiqira irirana faqaasee qidanoo. Anutufa maqasaaqaraa afeeka faqaasa nisauruaqee qimasee faiqí faiqí akaqausara sia afeekke qimariasa Anutufa mi sia afeeka fasiqa anaaseesa faqa nari irirana namufaqa gumareenoo minara qini afeeka faqaasee qinau. <sup>28</sup> Anutufa faiqí faiqí uriqarara fasiqa anaasee fee qimariasa kuridianifeera misa nikoqee maria fasiqa anaaseesee qimariasa faqa misa fidiqaa imaria fasiqa anaaseesee qimariasa faqa nari irirana namufaqa misakinaana nariara rusandeesamumasee gumareenoo uriqarara ainainee qidanoo. <sup>29</sup> Miqunara sia faiqí moo fannoo Anutuna oorisaa nari irirana amooqiannoo.

<sup>30-31</sup> Anutufa inni mareeqeenoo asauku mundirana Yisunasaa atooqaseenoo asauku mundirana gumareenoo maasa irirane qimaseenoo maasa mareeqeenoo nari andeeqaranaki qiseenoo nari aiku asauku uqannaikamma qimaqeenoo maasa manda ainainakinaana idukuqisoofaqa marunnanara maasa tamummaqara fasiqa ufamau kai fuannanara minara maaqí qimasee mifa akararinau.

Faiqí moo fannoo nana ainainaree moo ainaina amooqianauree qimasee sia nari amooqirana uqeeraani karaambaiqara kai amooqiani.

## 2

*Asauku mundirafa auniriranasaa kuqunara minara kai qimanniminau.*

<sup>1</sup> Oo qini qikaqaafasaaqaa qinee Pauroosa Koorinti maqusai oonuree Anutuna anoona ufa sia ooqai irirana faqaasa ufannai faqa sia uriqarara iriranannai faqa qimannimiqifafana. <sup>2</sup> Qinee qeeqa maaqí qimasee qimiriqaa, qinee Koorinti maqannaasa qimannimidaqa qeeqa irirana aunusee asauku mundirana Yisunara kai qimannimianauree, mifa auniriranasaa kuqunara fraaqoo qimannimianauree qiaqa. <sup>3-4</sup> Qinee minara iriseeqa

innee ianna onureeqa qeeqa ummoqukiranara iriseeqa maparaa idaqa daindiri ree marinaqa sia faiqi faiqi irirana faqaasa ufa faqa naufakiana faqa Yisunara qimannimi-afannana. Qimannimi mariafananoo Anutuna maraquina afeeka fannoo amiqimasee qini ufa anoona uqannifiqanau. <sup>5</sup> Innee minara iriqa inneeqa Yisuna saqarikirana sia irirana faqaasa iriranasaa fau mundinoo marinau. Anutuna afeekasaa mundinoo maridanoo.

*Anutuna maraquina fannoo Pauroona dadaaqufanoo qimanniminau.*

<sup>6</sup> Qinee sia faiqi irirana marasee aiqamausa qimannimidaqa, akaqausa Anutunara firaqoo mapukusee irimariasa kuqaa qinee irira ufa misa qimannimidaqa. Sia maa maqanasaaqaraasa iriranau misa qimannimidaqa, sia maa maqanasaa rakisimari afeekausa iriranau qimannimidaqa doo misa afeeka taikaidanoo. <sup>7</sup> Qinee qimannimi marunna irirafa Anutuna ooqai kukeeqara irirana innaarunai asumu nimimarina qimannimidaqa mi irirana faiqi sia nifu qafaafa. Maa maqa maqafa sia maru kamuqoo Anutufa mi irirana utaaqamaseenoo minannai maasa nari areenaranaki innaaruna ququsaki keeqaageera utaaqanau. Qinee mi irirana misa qimannimidaqa. <sup>8</sup> Ooqai maa maqa maqanasaa rakisirausa sia mi irirana iriqa. Iriqau innaaruna areenaranakinaa karaambaiga sia qumareefau aunirira saqarisaa arini. <sup>9</sup> Ooqai tamummaqara fasiqa minara maaqi qimasee akara rinau.

Faiqi sia qafee maru ainannara sia iri maru ainainara sia faiqi moo fannoo minara kambiqaanoo fee qimaru ainannara, miqira ainaina kai Anutufa deedaqamaseenoo nariara rimariasa kai nimiannoo.

<sup>10</sup> Qinee Pauroosa minara maaqi qidaqa. Maasa inni saimbaqa Roomma maqannaasa namufaqa Anutufa nari maraquinannai nari ooqai kukeeqara irirana qiminu. Anutuna maraquina fannoo aiqama ainainara randasee aiqumumasee qafaidanoo. Sia akooqoo ainaina kai qafaidanoo Anutufa naaru kambiqaaninna kukeeqara ainaina farumara foora unaurinoo marina mina faqa aiqumumasee irimarifa marunara Anutufa nari ooqai kukeeqaoo irirana inni saimbaqa qiminu. <sup>11</sup> Faiqi naundurakinaa maraquina fannoo mi fasiqana aundurakinaa irirana aiqama iridanoo. Miqi kai inoo Anutuna maraquina fannoo Anutuna aundurakinaa ainainara aiqama iridanoo. <sup>12</sup> Inni saimbaqa sia maa maqa maqanasaaqaraa maraquina maroosa maridaqa. Inni saimbaqa Anutufa niqiqoo maraquina maroosa maridaqa Anutufa minannai innaarunai asumu mareemariana faqa minasaqaraa naundura adiafaairana faqa niminu.

<sup>13</sup> Qinee minara irisee maaqi qimasee qimannimidaqa, maasa sia faiqi irirana uqannifiqee maria iriranau qimannimidaqa, Anutuna maraquina maasa uqaqifiqoo ufana inni qimannimidaqa. Maasa innaarunaidaraa ainainara Anutuna maraquina maroo fasiqa anaaseesa qimannimidaqa mi ufana kai inni qimannimidaqa. <sup>14</sup> Anutuna maraquina siai fasiqa anaaseesa sia amana Anutuna maraquina faiqi anaasee dadaaqimari afeekana nimimarina sia amana mareefaranoo. Misa mi ainainna qafamaseeqa sia minara iridaqa furufara ainainee qidaqa. Sia mina oosana iridaqa maraquina maree mariasa kai amana mina oosana aiqumumaseeqa irifaranoo. <sup>15</sup> Maraquina maree maria fasiqanaaseesa innaarunaidaraa ufa aina aiqama raina raina masee irimarifaranoo. Maraquina siaisa kaiqeesa sia amana maraquina faqaasa maree mariana oosana irifaranoo. <sup>16</sup> Ooqeenaa tamummaqara fasiqa minara maaqi qimasee akara rinau.

Yafee moo fannoo Karaambaiga iriranakinaana iriannoo fee. Yafee moo fannoo Karaambaiga aamuaqira ufa amana amiannoo fee, sia amana moo fannoo miqiannoo.

Tamummaqara fasiqa ufara qinee Pauroosa minara maaqi qidaqa. Sia moo fannoo amana aamuaqira ufa Anutuna amiannoo mifa nimimarifa marinara. Maasa kai asauku mundirana irirana doo mareeqa.

### 3

*Aiqamausa Anutunaindi kai maridaqa.*

<sup>1</sup> Oo Koorinti maqannaasa qini qikaqaafasaa ooqai qinee inni maqusai mariaafanausa, innee sia maraquina faqaasara foora faiqi faiqi iriranamau fimarufaqa qinee sia maraquina iriramau inni qimannimiqiafana. Inni irirafa maa maqa maqanasaaqaraa irirafa inniki marinara Yisuna saqarikiranaki innee sia faiqiara foora mariafanoo faiqi aanaaqiara foora aamina mariafanoo. <sup>2</sup> Innee sia faiqiara foora mariafanoo faiqi aanaaqiara irirana fooqaasa marufaqa qinee sia narana uqanna nimiqiafana naammara foora inni nimiqiafana, innee narana uqanna sia amanaikufaqa ninuqiafana. Doo maqee aukuaana faqa sia amana innee narana naqaa inoo maridanoo. <sup>3</sup> Innee maa maqa maqanasaaqaraasa naanna ree mariasa aaqaida miqimarifanoo, innee nariara nariara rairai qidaqa ufa rainee marianannai maa maqa maqanasaaqaraasa naanna

ree mariana aaqarafa kooroo idanoo. <sup>4</sup> Innikiqari Koorinti maqasanaa Yisuna ufara suqimariasakiqari moo fannoo qinee Pauroona aiku asauku marida mina ufamau fida fee qidanoo kafa moo fannoo qinee Apooroosana aiku asauku marida mina ufamau fidee qimasaida aqaqida miqi qimariafanoo sia fee mi oosanafa innikina maqasaaqarasa naanaa ree mariana kooroo idanoo fee. Doo kooroo idanoo.

<sup>5</sup> Apooroosa faqa Pauroosa faqa maaqanda uriqararaqandee maridee sia uriqararaqanda marisa maridaqa. Maaqanda fifau Anutuna ainainira fasiqaqara kai maridaqa, inni rarisameeqee Yisuna saqarikiranaki quqee mariaqanda kai maridaqa. Maaqanda karaambaiqa saika aadu aadu nimirunnaqanda kai maridaqa.

<sup>6</sup> Qinee Koorinti maqasai inni iriranaki qaqqammara foora aqasaafanoo Apooroosafa aniree nammariara foora adiasoofanoo Anutufa kambiqaarana aminau. <sup>7</sup> Aaqee mari fasiqafa faqa nammari adiee mari fasiqafa faqa kai fifau maridanoo, Anutufa kambiqaarana amufa mifa anoona maridanoo.

<sup>8-9</sup> Aaqee mari fasiqana saika faqa nammari adiee mari fasiqana saika faqa amana amana kai maridanoo. Anutufa naadu naadu nari ainaini marina akiaqara feefauru kasooqagee nimiannoo. Maaqanda moodaanaki Anutuna ainainiranaki maridaqa ainainidaqa innee afuqa qambaana Anutuna ainainirafa mariafanoo. Qinee Pauroosa moo ainaina kikiqa usuanaura, innee Koorinti maqannaasa Anutuna maaqa mariafanoo.

<sup>10</sup> Anutufa maaqa usakee maria iriranna qini qimusa maridaqa maaqa usakarana akoofasa qinee faakana faqa maaqa atuna faqa arusaunoo moo fannoo asaaniidanoo. Qinee andeeqasee maaqa atuna arusaunoo moo fannoo sia fifau maaqa asaaniannoo andeeqee mari fasiqafa ireeda amiqimaseenoo kai maaqa asaaniannoo. <sup>11</sup> Anutufa nari asauku mundirana Yisuna doo moodaa faakana nari maaqaki rakiqeenoo, sia amana moo faakana rakiarafa mariannoo doo mifa kai mariannoo. <sup>12</sup> Oosana oosana maaqa usakee mariasara foora maridaqa akaqausa amiqimasee faiqi anaasee dadaaqidaqa mapuku nimaqaidaqa, akaqausa sia amiqimasee mapuku nimaqaidaqa moo fannoo kooro fooqaa iranannai maaqa asaanimarifa amiqirafa maaqa asaanimarifa maridanoo, moo fannoo mina oorudupirana siruaannai maaqa asaanimarifa maridanoo. Moo fannoo mina oorudupirana firaa munnimma aqimaria ooninannai asaanimarifa maridanoo. Moo fannoo mina oorudupirana saqarinnai asaanimarifa maridanoo. Moo fannoo mina oorudupirana efeedannai maaqa asaanimarifa maridanoo. Moo fannoo misa oorudupirafa fiarunnai maaqa asaanimarifa maridanoo. Inni Koorinti maqanna Yisunara qimannimiqa maaqa atuna rakiqannimaqaannee qiafanausa mariafanoo maaqa asaana imariasara qunnana misa miqooqari innikina ookaamandee maaqa asaana foora moo faqa moo faqa qidaqa. <sup>13</sup> Asauku mundirafa qumuaninna aukuanannai maaqa asaannira oosana aiqamausa nifusaa kooroo iannoo. Mi faasaannana Anutuna ida fannoo aiqama fasiqa ainainirana qamafinoo kooroo iannoo. Mi idafa aiqamausa ainainirana amanamandainanoo mina anoona kooroo iannoo. <sup>14</sup> Faiqi moo fannoo maaqa atunasaa ookaamandee usakee marina ida sia qama taikasainanoo Anutufa mina qafamaseenoo mi fasiqanara amiqimmandee usakee maqi qimasee feefauru amiannoo. <sup>15</sup> Faiqi moo fannoo mandainainanoo usakee marina, ida qama taikasainanoo sia feefauru amiannoo. Mi fasiqafa mifa kaqisamu innaarunai asumu mariranaki fuannoo maaqakiqari raudamakinoo idauru aanaaqi ainaina sia uqirafa kaqi sandaannoo.

<sup>16</sup> Innee maana iridee sia fee iridee innee Yisuna ufara suqimariasaa Anutuna amaana maqara foora mariafanoo, Anutuna maraquna fannoo nari maaqara foora inniki maridanoo. <sup>17</sup> Moo fannoo Yisuna ufa suqimarinanaki misa raiqara ufee oosana oosana manda ufa niminaqa raindaanifanoo Anutuna maaqara foora rapee inanoo Anutufa mi fasiqana kuridisaannoo. Anutuna amaana maqa naaquqarafa anukarafa maridanoo innee misa mi maqafa mariafanoo.

<sup>18</sup> Sia moo fannoo nari nari akaru qiannoo. Inniki moo fannoo nariara maqasaa fasiqaki irirana faqasee qimarifa nari maqasaa irirana amooidanoo sia anoona irirana faifa, mi fasiqafa nariara ureeqafinoo reendeenamafinanoo miqoo amana anoona irirana oosana araannoo. <sup>19</sup> Maqasaa fasiqauqa irirane qimariana Anutufa minara furufara qidammiafoo qidanoo. Ooqeenaa tumummaqara fasiqa minara maaqi qimasee akara rinuu.

Anutufa irirana faqaasa qumaree nari firaa iriranaki ufaanakiara foora naridanoo.

<sup>20</sup> Tamummaqarafa moo fannoo minara maaqi qimasee akara rinuu.

Karaambaiqa firaa irirana faqaasa iriranara fifau ainaina maridanoo fee qidanoo.

<sup>21-23</sup> Innee Koorinti maqannaasa minara irisee sia moo fannoo faiqi irirafa afeekainainara irisee amooqiannoo. Innee Koorinti maqanna Yisuna ufara suqimariasaa kaaqa rakeekaamasee akaqausa Pauroosanaindifee qidaqa akaqausa Apooroosanaindi fee qidaqa akaqausa Peetooroonaindi fee qidaqa aqaqida miqi qimariafanoo. Innee

sia misaindi mariafanoo mida innindi maridaqa. AiƷama maa ainainna inni dadaaƷi mari ainainausa maridanoo. Pauroona faƷa Apooroosana faƷa Peetooroona faƷa maa maƷa maaƷa faƷa kaƷi marirana faƷa kuƷirana faƷa maƷee mariana faƷa naaru marinnana faƷa aiƷama maa ainainausa inni dadaaƷi mari ainainausa maridaqa innee asauku mundiranaindi mariafanoo kafaa asauku mundirafa Anutunaindi maridanoo. Innee minara irisee fifau ammuundari Ʒidaqa Pauroonaindi fee Apooroosaindi fee Peetooronaindi fee Ʒimariefanoo Anutunaindi maridammia.

#### 4

*Pauroofa nariara asauku mundirana ainainira fasiqee qinau.*

<sup>1</sup> Innee Koorinti maƷannaasa maasara maaƷi ƷiaƷa. Asauku mundirafa Yisufa maasa mina ainainira faiqiƷa Anutuna ooƷai kukeeƷara anoona uƷara rakisiaqee ƷimaƷoosa maridaqa. <sup>2</sup> Ainaina faƷaafa narí ainainasaa rakisi mari fasiƷanara akooƷoo andeeƷara fasiƷa kai maraannoo. Narí ainainasaa amiƷimasee rakisi marina kai narí ufa irimari faiqina kai mara ƷuƷaannoo. (Ʒinee Pauroosa Anutuna rakisira faiqiara foora maridaqa. Ʒinee inniki ainainidaqa qeeƷa irirana qeeƷa uriƷararasana rusisee inniki ainaini mariƷafana.)

<sup>3</sup> Ʒinee inniki ainaini marunaƷa innee Ʒini ainainirana amanifaƷa sia inni Ʒimanagerana irianaura uriƷararafa Anutuna ufa kai irianaura maƷasaa fasiƷa moo fannoo iriranannai Ʒini ainainirana amanifaƷa qeeƷa uriƷararana andeeƷaida fee sia fee andeeƷaida fee Ʒimasee sia qeeƷa iriranara irianaura Ʒini ainainirana andeeƷee mari uriƷararafa kai mina iriranara kai irianaura. <sup>4</sup> Innee Ʒiniara Ʒiafanoo ƷiƷa daakirafa sia ummaara darifaƷa kaƷimbidaqa. Ʒini daakirafa Ʒini darinoo fee sia fee darinoo sia Ʒiniara andeeƷara ainainira fee ƷidanooƷu KaraambaƷi mifa kai Ʒini saikara iridanoo ufa Ʒiannoo. <sup>5</sup> Innee minara irisee sia maasara kasaƷaindari ufa ƷiaƷa. KaraambaƷi innaarunaidari Ʒuminna faasaana kai taikara ufa Ʒimannimirafa mariannoo. Mikari karaambaƷi sia ooƷai akooƷoo mariu irirana kukeeƷara irirana oosana oosana irirana minakinaana uƷeereƷeenoo aiƷamausa nifusaa kooroomannimaƷaannoo. AiƷama fasiƷa anaasee naundurakinaa oosana auƷeefandiannana deedaƷirana akooƷoo aiƷamausa nifusaa mara ƷuƷasainaqa Ʒafeefaranoo. Mikari aiƷama fasiƷa anaasee narí maƷasaa andeeƷara nirana marirana amana kai Anutuna amooƷirana mareefaranoo. Mikari Anutufa maasa saika oosana aiƷuƷummasee minara ufa Ʒiannoo. Maasa mina ufamau fimariafanaua marunnanara innee sia ufannai maasa saika kasaƷaindari aruƷa.

<sup>6</sup> Oo Ʒini ƷikaƷafasaa mariasa innee aiƷamausa andeeƷasee Anutuna akara ufamau fuaqee Ʒimasee Apooroosasandiri maaƷanda kikiƷusee ƷimannimaƷeera maƷanda Ʒimannimirana ƷiƷa. Anutuna ufa inni indaarunnikamma nimaqee mariasara sia moora amiƷira fee Ʒimasee moora manda fee Ʒimasee rairaiƷiƷa sia miƷiƷa. <sup>7</sup> Inniki akaƷausa naríara uriƷararausee Ʒimariana unna Ʒimariasaa mariafanoo. Yafee mi uriƷararana niminoo fee, Inniki mari ainainna aiƷama Anutufa kai niminau. Innee minara iriaƷa, naqaa fee Ʒifaqee qeeƷa kai maraafanausa firaƷoo uriƷaraƷa maridee Ʒidee. Anutufa kai aiƷama ainaina niminau.

<sup>8</sup> Innee Koorinti maƷannaasa unna Ʒimasee aiƷama ainaina maraafanausee Ʒimariafanoo, innee inneeƷara unna Ʒimasee ainaina faqaaŷee Ʒimariafanoo, doo innee unna Ʒimasee karaambaƷiara foora mariafaƷa maasa sia. Innee Koorinti maƷannaasa karaambaƷi mariaƷaana. Innee kuqaa karaambaƷi marifaƷuu maasa maqee mandainainaki marunnana taikaseefau inni faƷa kuqaa karaambaƷiƷiƷa marini.

<sup>9</sup> Maasa Yisufa niƷiƷoo fasiƷausa Anutufa ureeƷarana nimaƷoosammia maƷi Ʒimasee qeeƷa kai onnu maƷi iridaqa nimaƷiƷa maasa minaki maridaqa. Maasa namuqaa nisaukukiara foora marianaqa aiƷamausa faiqi faƷa Ʒangiroo faƷa nifusaa ataasa ataasa Ʒidaqa darifandinausa miƷirausa maasa maridaqa. <sup>10</sup> Maasa niƷiƷoo fasiƷausa asauku mundirana ufaŷaara fufurirausee ƷimariafaƷa innee Koorinti maƷanna Yisuna ufa ŷuƷimariasaa asauku mundirana ufakina innee inneeƷara irirana faqaaŷee Ʒimariafanoo. Maasa Yisuna ufa Ʒimannimi marinausa kudoosaapeera foora unaqaa innee nimudaanai Ʒidaqa afeeka mariafanoo. Maasa faiqi nifusaa fidaqaa imariasara foora maridaqa innee mida nifusaa uriƷararaua mariafanoo. <sup>11</sup> Maasa Yisufa niƷiƷoo fasiƷausa ooƷai faƷa maqee marunnana faƷa daara raidanoo nammariara sia amanaikidanoo maasa manda Ʒamunna rakeekaa irana afisidaqa, mida maqee maqee unnaanasamu oonisamu saamusamu maasa daridaqa maasa maaƷa ŷiaŷa kaƷi maƷusamau faiqiƷa nidaqa. <sup>12</sup> Maasa qeeƷa kadaapiriranannai tooqamu dariranai minannai ainainamasee naidaqa. Faiki maasa diƷuraraafaqa maasa amiƷi amiƷimannimaƷaidaqa. Misa



mandaikamma qimaqaafaqa maasa kaqi kai mina maraqa fidaqa. <sup>13</sup> Misa mandufa maasara qiafaqa maasa amiqira ufa kai misa qimannimidaqa. Maasa maa maqa maaqanakinaasa madaapeera foora maridaqa ooqai miqiqqa aniusa maqee faqa aiqama maqannaasa madaapee aqi maria madikara foora marisa maridaqa.

<sup>14</sup> Qinee Pauroosa inni Koorinti maqusanaasa sia nisaurirana nimiaqeera mi ufana qimannimisee akara ridaqa, qeeqa qimuqusa qeeqa faiqi namu mariafaqara foora naamua qidaqa. <sup>15</sup> Innee asauku mundirana ufamau fidaqa inni ufasa rakisirausa fuki faaki qimariasa nukudara foora mariafaqa qinee moodaa inni nikausara foora maridaqa. Ooqai indaaruu qinee amiqira fasaasa ufa maree aniree inni Koorinti maqanna nimirafana qirisee asauku mundirana Yisuna ufamau fimariafaqa miqiafannanara inniqa nikausaikiqa maridaqa.

<sup>16</sup> Qinee minara irisee qeeqa qimuqusa ookiqari reendeenamandee inni qimannimidaqa innee inni nikausa qini daanna raaqa. <sup>17</sup> Innee qini daanna raanee qimasee Timootina aqigaananoo innee iannai fannoo. Maaqanda karaambaiqa ainainiranki maridaqa mifa qini qimuqusa andeeqara qimaakuara foora maridanoo. Mifa innee iannai oonuree qini fuka marirana asauku mundirana Yisunaki marira oosana qimannimianoo. Aiqaama maqusa maqusa nidaqa Yisuna ufa irimariasa suqusaida naamuqaqimaqafannana Timootifa mi ufana inni naaqoo auqaannoo.

<sup>18</sup> Innikiqari akaqusa qini Pauroosara sia kafaa mai aniree maasa qiqafaannoo qifoo qimasee noori uqeerarausa nimariafanoo. <sup>19</sup> Karaambaiqa eedoo qinaqa innee iannai oonu nindafaanura. Oonureeqa innikina noori uqeeree mariasa sia misa nariara firaa ufa qinnanara oonu qafaanura misa auqi maria ainainna kai marinaqa qafaanura. Anutuna afeeka misaki marinaqa uqemarinna kai qafaanura Anutuna afeeka sia misaki mari ifoo qidaqa. <sup>20</sup> Anutuna innaarunai ququsaki fimariana maa maqanasaa marirana sia fifau ufasa mundinoo maridanoo Anutuna afeeka dadaaqinoo auqiranasa mundinoo maridanoo. <sup>21</sup> Oo Koorinti maqannaasa Yisuna ufa irimariasa aqemariana inneeqa kai iriaqa, unnaanasamuara foora uqirausee anianauree inniara qimuqisirana faqa reendeenirana faqa miqandee uqirausee anianauree. Inneeqa kai irisee inneeqa marirana andeeqasee mariaqa.

## 5

### *Yisuna ufara suqimarunakina mandoosana kambiqanau.*

<sup>1</sup> Oo Koorinti maqanna Yisuna ufara suqimariasa inni ufa moo iriqa firaa manda oosana inniki marifa aamina maqannaasa firaqoo mandoosana maree mariasa faqa sia maree maria oosana mareenoo inniki Yisuna ufa irimariasaki moo fannoo nari anoona aqoonnana nari akoona anaqa mareenoo. <sup>2</sup> Mi ainainafa inniki marifaqa naqi fee mandee noori uqeerasee inneeqa nifaqa amooqidee minara innee nisauruqa, inni naunduraki soofaaraikinoo mariani, mi fasiqana inneeqakinaana naqiraree kaqi maridanoo, innee suqimarunakiqari mi fasiqana aqiqaaqa. <sup>3</sup> Qinee qeeqara qianara kuqaa qinee moosaa nianai marida qini maraquina inni faqa maridanoo miqoo marifaqa karaambaiqa Yisuna auqusaa doo mandoosana marai fasiqana aqiqara ufa qiqa qinee inni faqa maridaqara foora doo aqiqara ufa qiqa.

<sup>4-5</sup> Innee moodaanaki suqimarifanoo qini maraquina faqa inni saimbaqa suqaannoo, Karaambaiqa Yisuna afeeka miqoo maasa faqa marinaqa innee mi manda fasiqana mareeqee inni suqiranakiqari aqiqai fanoo mi aiqaranannai Sadannana amifanoo mina apata kuridinanoo karaambaiqa quminna faasaana mina aundurakinaana kai asumu maraannoo.

<sup>6</sup> Oo Koorinti maqusanaasa innee inneeqara kaaqa andeeqarusee qimasaida inni noori uqeerara oosana sia andeeqanoo maridanoo. Innee maa ooqeenaa ufana iridaqa maaqimminoo maridanoo. Narana moodaa qoo suqu quqasainanoo kaqikaafa moodaa putaa inanoo aiqamafa minasaqaraana putaa iannoo. <sup>7</sup> Inneeqakinaana mi manda fasiqana maraquisaifanoo aiqama andeeqanoo mariani. Miqoo innee amiqira naranara foora mariaqa. Mi manda fasiqana aqiqaranara qidaqa ooqai Mooseena aukuaana ainnaaqarara qoomaqa maruna kikiqususee sipsipa aanaaqi Anutuna suqa amisee nariqa ooruku fooqaa ira ainaina nariqa maaqakinaana aiqama doo maraquuseeqa ainnaaqarara qoomaqa sakasee neemariqau. Doo maqee maria aukuaana asauku mundirana aunirira saqarisaa sipsipa aanaaqiara foora doo kuqa arusee Anutuna amisaafanoo doo maasa mandoosana taikaqiseenoo maasa marirana faqa andeeqa qiseenoo maasa putaira oosana taikaqisaifanoo aidaaqareenoo minara maasa aidaaqarara qoomaqa deedaqinoo marifoo qidaqa.

(Isaraee maqannaasa ooqai ainnaaqarara qoomaki ooruku siai feemu kai neemariqau. Maasa ooruku moo maqee maridanoo misaindi moo marinau.)

<sup>8</sup> Doo maqee maasa ainnaaqarara qoomaqara foora suqufi naannana suqufi ooruku siai feemuara foora naanaura. Naranaki mari oorukufa manda oosnara faqa faiqi anaasee nari ummuari nari ummuari imariana faqa kikiqusidanoo. Ooruku siai feemu kikiqusimariafa Yisuna ufamau fidaqa nisakadiki ikairi sia marirana faqa anoona ufa qimariana faqa minara qidanoo. Maasa putaaira oosana taikaqisoofofa maqee amiqira naranara foora putaaira oosana faqa aqara oosana faqa taikasee nisakadiki ikairi siaisa anoona ufa qimariasa naanna ramafi marianaura.

<sup>9</sup> Qinee Pauroosa ooqai inni Koorinti maqannaasa Yisuna ufara suqimarusa pasa akara rumannimaqaafannana. Mi pasanaki inniara faiqi anaasee nari ummuari nari ummuari mariasa faqa sia aqoondikamma nimaqararee qimasee misara eerairiaqee qimasee akara rumannimaqaqiafana. <sup>10</sup> Innee akaqausa qini mi ufana irisee aqaafanoo maqee qinee qiafannufana kafa kooroo ianaura. Innee Koorinti maqanasasaki sia Yisuna ufa irimariasa kai maridaqa aaminauqaindi faqa moomoosa maridaqa. Qinee sia inniara aamina fasiqa anaasee nari ummuari nari ummuariqimaria fasiqa anaaseeuqa faqa kaaqa ainainara rimaria fasiqa anaaseesa faqa unna ufa qimasaida ummuari maria fasiqa anaaseeuqa faqa tumunna auqi maria afaannara innaaru qimaria fasiqanaaseeuqa faqa sia mi aiqama ainainna maree mariasara eerairiaqee qifa, innee eerairiani qinnana moomoosa maa maqa maqanasaa marianara fasauki fee quqoonasaa fee ooru atooqafi foora. <sup>11</sup> Sia qinee miqi qiafana maaiqi qiafana. Inniki moo fannoo nariara Yisuna ufa irimarinafa inni nikaqaafasaa maridee qinafa faiqi anaasee ummuari mari fee kaaqa ainainara rimari fee tumunna auqira afaannara innaaru qimari fee mandufa qidanoo faiqi anaasee niqi mari fee nammari namasee furufari mari fee unna qimasaida ummuari mari fee miqira fasiqa aanaaseera Yisuna ufa iri marianaki maria fasiqa anaaseesara eerairidaqa misa faqa sia oogu marifi narana naaqa, misasaaqaraafa innisaa aqufuandoora.

<sup>12-13</sup> Yisuna ufa sia irimariasa aqoosai mariasa sia narira ufa qinee nimmianaura mi saikafa sia qini saika maridanoo. Anutufa kai misa narira ufa niamiannoo. Inneeqa kai inneeqa nikaqaafasaa kimariana Yisuna ufara suqimariasa aqaiqafa ufa nimirafa innindi mariannoo. Ooqai tamummaqara fasiqa moo fannoo minara maaiqi qimasee akara rinau.

Inniqa suqiranakiqari mandoosana maree marina aaduma mara quqaqee qidanoo.

Qinee Pauroosa minara inniki mandoosana maree mari fasiqana aqiaqee qidaqa.

## 6

*Yisuna ufa irimarusaa kaaqiee siaasinnai fimariqau.*

<sup>1</sup> Innee Koorinti maqannaasa Yisuna ufa irimariasa inneeqa nikaqaafasaa kimariana mara maree kaiqee siaasinnai mara maree fimariafanoo. Inneeqakiqari aneenna akaqaafasaa kimariannana faqa ufa raineenana, Yisunara sia irimarinna siaasi finnai sia maree fua, sia uqanna miqiaqa aqaaida miqi mariafanoo. Anutuna ufa irimariasa kai mina andeeqaqaana.

<sup>2</sup> Kasooqaqee Yisufa qumuaninna aukuaana maqee mariaqoo Anutuna faiqi namu mi aukuaana aiqama maa maqa maaqanakinaasa siaasiuqa marifaranoo sia fee minara innee iridee. Mi aukuaana innee Yisuna ufa irimariasa aiqama maa maqa maaqanasaaqaraasa aqarana oosana oosana aqarana andeeqanniseefaranoo, doo maqee inni ufa suqiranaki aqarana marasaifaqa aiqama maa maqa maaqanasaaqaraasa andeeqannisee fandinausa mariafanoo inneeqa kai amana andeeqefaranoo. <sup>3</sup> Mi aukuaana maasa siaasa maridaqa qangiroo ufa faqa irianaura, sia fee innee minara iridee. Doo maasa miqidaqa maqee marunna aukuaana aqarana marasaifaqa amana irianaura. <sup>4</sup> Innee miqi mariana inniki moo mandufa kambiqafinaqa innee mina mareeqee aqoosai mariasa nimifaree. <sup>5</sup> Nisauruqa, sia fee inni Yisuna ufara suqiranaki moodaa ufa andeeqarana akoofasa maridanoo fee, inniki maridanoo sia fee mi fasiqafa amana ufa rainee mariaqanda ufa andeeqaannoo fee maridanoo amana andeeqannisaannoo. <sup>6</sup> Innee Yisuna ufara iri mariasa sia andeeqannisee mariafanoo, inneeqa nikaqaafasaa kimariasa mara maree sia Anutuna ufa iriasaki quqee mariafanoo aqaaida miqi mariafanoo.

<sup>7</sup> Inniki koota ufa marinaqa kaqi siaasinnai maree fimariafa innee Yisuna ufamau fimariana minasaqari aikatamaki kaqinni aqufuanara kooroo idanoo. Yisuna ufa irimarifa moo fanoo mandufa aminana kaqi iriaqaana Yisuna ufa moo fannoo irimarifa ani ainaina ummuarinnana kaqi minnisaaqaana. <sup>8</sup> Inni sia andeeqasee maridaqa

kaqi maree mariafanoo narinni narinni aagamannimaqee mariafanoo narinni narinni ainainamma ummuaramasaidaqa siaasinnai maree fidaqa, innee kaiqeese miqimannimaqee marifanoofau mifa faqa aqaqarafa marini, inneeqa nikaqaafasaa kimariasa kai miqimannimaqee mariafanoo firaqoo aqaqaida miqimariafanoo.

*Mandoosana maree mariasa sia uqanna innaarunai fifaranoo.*

<sup>9-10</sup> Anutufa narí ququsaki naaru marirana sia mandoosana maree mariasa nimianno sia fee innee minara iridee. Innee sia inneeqa nikaruqimasee mandoosana maraqa nidaqa innaarunai firaree qiaqa. Dapi maraqa nua fasiqa anaaseesa faqa tumunnai auqira afaannara innaaru qimariasa faqa moona afaaqi anaqa narí ummuari narí ummuari mariasa faqa faiqi anaasee aqoonna fasiqa anaasee aafeeqaidanoo mi oosanna maree mariasa faqa ainaina ummuari mariasa faqa kaaqa ainainara rimariasa faqa nammari namasaida magee magee furufari mariasa faqa manda ufa qimariasa faqa unna qimasaida ummuari mariasa faqa mi oosanausa maraqa nuasa faqa sia uqanna Anutuna innaaruna ququsaki keeqefaranoo. <sup>11</sup> Koorinti maqannaasa innee akaqausa miqi marusa marufanoo inni mi manda ainainafa doo rukanoo maridanoo, narí nifaqara Anutuna amidee qimariasa mariafanoo. Asauku mundirafa Yisufa maasa karaambaiga minasaa rusiranannai faqa Anutuna naaquqara andeeqara maraquinannai faqa miqandannai innee Anutuna afusaa andeeqaranaki mariafanoo.

*Inni nifaqa fannoo Anutuna amooqiranaki andeeqaranaki mariani.*

<sup>12</sup> Moo fannoo nariara maaqi qiannoo qinee amana maridaqa aiqama ainaina mandaininee qimariana faqa amana maraanaura, anee miqi qianaqa qinee minara maaqi qidaqa kuqaa anee aiqama ainaina mareennaranoo moomoo ainaina sia ani dadaaqiannoo ani kuridiannoo. Qinee qiqa irirafa maaqi qimasee qimmiridaqa qinee akooqoo marida aiqama ainaina amana maraanauree qimmiridaqa qinee minara maaqi qianaura. Moo mandainaina fannoo qini mareeqee narí marinaki quqaqisaifanoo mi maraquinafa daakufuandoora rufiee sia mina maraanaura. <sup>13</sup> Faiqi moo fannoo anaasee ummuarianeera qimasee mina kikiqa maaqi qimasee usuanoo narana fannoo aranaqumundi maridanoo. Kafaa arana fannoo naranaindi maridanoo. Mi ufana saaqari mifa unna qimasee maaqi qimasee ookaa iannoo, anaasee faiqindi marifaqa kaqi maraanauree qiannoo. Qinee Pauroosa minara maaqi qidaqa Anutufa narana faqa arananda faqa naríndi naríndi quqasoofa kasooqagee miqanda kuridiannoo maasa faiqi qifaqa sia ummuariranaindi maridanoo Karaambaigaindi andeeqaranaindi maridanoo kafaa karaambaiga maasa qipatasaa rakisiqimaqeenoo amiqimmaqimaqaidanoo andeeqara marirana nimimarifa marinara andeeqara oosana kai maraqa.

<sup>14</sup> Anutufa narí afeekannai maasa karaambaiga kuqiranakinaana uqeera quqoofa mifa kai maasa qifaqa faqa kuqiranakinaana uqeera quqaaninnanara inniqa nifaqaki andeeqara oosana kai maraqa.

<sup>15</sup> Inniqa nifaqa asauku mundirana afaqa atiuqa maridanoo. Amanee asauku mundirana afaqa ati mareeqee dapi maraqa nua anaaseena afaqasaa quqaanauree oo sia uqanna amana miqianaura. <sup>16</sup> Faiqi moo fannoo narí afaqa mareenoo dapi maraqa nua anaasee finnai finanoo mi fasiqana afaqa fannoo mi anaaseena afaqandiri moodaanaki atoqafuannoo. Oo innee sia minara irimariafanoo. Ooqeenaa akara minara maaqi qimasee akooqoo qidanoo Miqanda moodaa nifaqaqikamambi maruqanda marifanoo.

<sup>17</sup> Qinee Pauroosa minara maaqi qidaqa moo fannoo karaambaigasaa apamambi marinafa karaambaiga amuqusandiri moodaanaki apainoo mariannoo.

<sup>18</sup> Faiqi anaasee narummuari narummuariranara eerairiaqa. Moo fannoo oosana oosana mandainaina marainafa mi manda ainainafa sia narí afaqa mandaikammamaqaannoo. Faiqi moo fannoo moo anaasee ummuarinoo narí afaqa uqanna mandaikamma maqaidanoo. <sup>19</sup> Innee sia fee maanara iridee, innee doo irimariafaqa qimannimidaqa inni nifaqa Anutuna naaquqara andeeqara maraquina amaana maqa miqirafa maridanoo. Anutufa narí maraquina innikina quqasoofanoo marinara innee inneeqa nifaqa Anutuna amooqira mariranaki quqasaifanoo mariani. Inni nifaqa sia innindi maridanoo. <sup>20</sup> Anutunaindi mariafanoo. Mifa narí amaakunnai firaq feefaurumasee inni marasee nariara quqaqoosa mariafanoo minara innee inniqa nifaqa Anutuna amooqira mariranaki quqasaifanoo mariani.

## 7

*Faiqi faqa anaasee faqa sia narí minnisee narí minnisee iaqa.*

<sup>1</sup> Innee Koorinti maqannaasa pasa akara rumasee oosana oosana ainaina qiniara iree mariafanoo. Maqee innee akaraki iree maria ufana qinee inniqa qimannimianaura.

Inneeqa faiqí anaasee nimundaranara qiafaqa maaqi qimannimianaura. Faiqí nariara adeedaana maridanoo andeedarafa mariannoo. <sup>2</sup> Kafaa mina atiki maaqi qianaura. Faiqí anaasee narí ummuiri narí ummuarirafa moomoo marinara aiqama fasiqauqa narí ninaaqa maraaqa, aiqama aanaaseeuqa narí nifaqmaaka marasee andeedqasee mariaqa. <sup>3</sup> Afaaqi fannoo narí anaaga aidimarina amiani miqikai inoo anaasee fannoo narí afaaqi aidimarina amiani. Aiqamaqara nariara nariara nidimari ainainna narí ami narí ami iaqa. <sup>4</sup> Anaasee fannoo sia narí afaaqi rakisirafa maridanoo narí afaaqi fannoo mina afaaqasaa rakisidanoo, miqi kai masee faiqí fannoo sia narí afaaqara rakisirafa maridanoo narí anaaga fannoo mina afaaqasaa rakisidanoo minara qinee qidaqa nariara nariara nidimari ainainna narami narami iaqa. <sup>5</sup> Minara irisee sia innee nariara nariara qaoo qiaqa. Anutunara kisaqaasaa amiqimasee innaaru qiannee qimasee faiqí faqa anaasee faqa moodaaqooqara ufa qimaseenana naquma amaanee marasee akeeka masee aura masee maraanauree qimaseenana aadu aadu mambinana Anutunara kisaqaasaa innaaru qiaqa. Innaaru qimaseenana kafaa moodaanaki kiaqa kisaqaasaa aadu aadu ina mariannanara Sadannafa nimanamandee qafaina sia afeeka marina eedoo qifoora minara kafaa moodaanaki kiaqa.

<sup>6</sup> Faiqí narí ninaaqa mararanara faqa anaasee narí nifaqmaaka mararanara faqa qunana sia aranaiqi afeekaikamandee qiqa kaqi qimannimidaqa marararee qimaseenana doo maraa. <sup>7</sup> Qiqa irirafa maaqimminoo maridanoo. Aiqamausa qini daanna ree adeedaana mariaqana. Anutufa narí iriranani naadu naadu marirana nimifaqa maridaqa faiqí moo adeedaana marinanee, faiqí moo anaasee faqaafa marinanee Anutufa kai nimidanoo.

<sup>8</sup> Doo maqee maanaaqa kumaaraa uruna mariasa faqa faiqí anaasee kuqufuafaqa adeedaana mariasa faqa inni qimannimidaqa innee qini daanna ree adeedaana mariqa amiqirafa marifanoo. <sup>9</sup> Innee sia adeedaana amanaikiqa doo amundaqa. Anaaseera faiqíara ani aundurái idara foora atakuqinana doo sia amanaikinoo amundarafa idara foora atakuqirana uriqararafa maridanoo.

<sup>10</sup> Qinee nimundaraura naamuqira ufa qimannimianaura sia qeeqaindifau karaambaqaindi qimannimianaura. Amundara anaasee moo fannoo sia amana narí afaaqi minnisarafa maridanoo. <sup>11</sup> Minniseenoo adeedaana kai mariani. Adeedaana mari naisia quandaki narí afaaqi kai kaifaa maraannoo. Faiqí faqa miqikai inoo sia narí anaaga minnisaani.

<sup>12</sup> Doo adeedaana ufa qimaseeqa doo akaqausa qimannimianaura, sia karaambaqa ufafau qimannimianaura qeeqa ufa qimannimianaura. Faiqí moo fannoo Yisuna ufa irimarifa mina anaaga sia Yisuna ufa irimarifa maridanoo mi anaaseefa narí afaaqi faqa amiqimasee marinanoo sia mina afaaqi fannoo aqiaqannoo mina faqa mariannoo. <sup>13</sup> Anaasee moo fannoo Yisuna ufa irimarinafa marinanoo mina afaaqi sia Yisuna ufa irinafa maridanoo kaqi narí anaaga faqa amiqimasee maridanoo mi anaaseefa sia narí afaaqi aqiaqannoo. <sup>14</sup> Yisuna ufa irimari anaaseefa narí afaaqindiri moodaa fara maqi mafuanara mi anaaseefa narí afaaqi mareeqeenoo Anutuna aqoondikiranaki quqaidanoo miqidanoo. Kafaa Yisuna ufa irimari fasiqafa narí aanaaqandiri moodaa fara foora mafuanara narí anaaga sia amaana ufa irimarina maramareenoo Anutuna aqoondikiranaki quqaidanoo miqidanoo. Sia miqinoo marinanoofau miqanda faiqí namu aamina maqannaara foora mariaqini, maqee Anutufa misa faqa aqoondi kiannoo.

<sup>15</sup> Faiqí fee anaasee fee sia Yisuna ufa irinafa narí kai minnisee finafa amana saina fuani, sanda moo fannoo sia inniara sia rakisisimma umaraaqee qidanoo. Anutufa inniara sia kaukaataqiranaki mariaqee qidanoo asooraanaki mariaqeeera naarameeqee narí ququsaki quqaqaiqaqa minara qimannimidaqa, saifanoo fuani marinoo mariani. <sup>16</sup> Yisuna ufa irimari anaaseefa ani afaaqi ani faqa maridanoo mifa faqa innaaruna asumu marirana paquriannoo fee sia fee paquriannoo. Kafaa Yisuna ufa irimari fasiqafa ani anaaga ani faqa maridanoo mifa faqa innaaruna asumu marirana paquriannoo fee sia fee paquriannoo.

*Innee Yisuna ufa iriraree qimasee anukamuqooqari doo minaki kai mariaqa.*

<sup>17</sup> Qinee Pauroosa aiqama maqusa maqusa nidaqa maa ufana Yisuna ufara suqimariasa qimannimidaqa. Innee aiqamausa sia moo saika auqaqa Karaambaqa inniara mariaqee inna saikana kai maraaqa, Anutufa inni naarooqafa Yisuna ufa irirara anukamuqoo maroo saikana kai maraaqa sia moo kiaqa mi saikanaki kai mariaqa, sia maqee moo kiaqa. <sup>18</sup> Yuda maqannaasi fasiqa fannoo Anutuna ufa irisee Yisufinnai anirainafa sia mini narí Yuda maqannaasa fainanduqirana sia asauruani saina kaqi mariani. Anaamuru

fasiqa moo fannoo Yuda maqannaasa fainanduqirana siaifa Anutuna ufa irisee aninafa sia quandaki fainanduqarani saina kaqi mariani. <sup>19</sup> Fainanduqira fee sia fainanduqira fee mina fifau ainaina mariannoo. Anutuna naamuaqira ufamau eedoo qimasee finafa mifa anoona maridanoo.

<sup>20</sup> Aiqama fasiqa Anutufa naarooafa eedoo qu kamuqoo maru marirafa mifa doo sai kaqi minaki mariani.

(Pauroona aukuaana akaqausa faaflu fasiqausa nari ainainirana sia amanaiqiqa ainaina faqaana karabusara foora ainaina maisee mariqau. Sia feefauru maree mariqau. Kadaapirumasee narana faqa maaqa faqa kai maree mariqau. Misa nuqu ainainira fasiqee qimariqau. Mi aukuaana ainaina faqaasa akaqausa faqa faaflu fasiqauqa faqa Yisuna ufa iriqau. Pauroofa minara irisee maa ufana qimanniminau.)

<sup>21</sup> Anutufa ani aaroo kamuqoo anee moona ainainira fasiqa marunafa saina kaqi maria, sia quqasee moosaa fua kasooqaqee idukirafa kambiqainana miqoo kai idukusainana fua. <sup>22</sup> Faiqi moo fannoo ainainirarinafa marinanoo karaambaiqa arainanoo mi ainainiranaki kaqi maria Karaambaiqa idukira fasiqara foora mariananoo. Miqikai masee asauku mundirafa idukira fasiqa aaraifanoo kaqi nari ainainiranaki mariani asauku mundirana ainainira fasiqara foora mina ainainiranaki mariananoo. <sup>23</sup> Innee Yisuna ufa irimariasa Anutufa fira feefauru aqusee inni maroonara irisee sia moo fasiqa ainainiranakiara foora keeqafinaqa mandoosana ufa ameemaanai mariaqa kaqi idukiqa mariara maqi idaqa Anutuna ufamau fuaqanani.

<sup>24</sup> Oo qini qikaqafasaa innee aiqama Yisuna ufa irirara anukamuqoo marirana minaki kai maridaqa Anutuna aqoondikiranaki maqee maqee mariaqa.

*Kumaaraa maanaaqa adeedaana misa nimundaranara qidanoo.*

<sup>25</sup> Doo maqee anaasee siaisa faqa faiqi siaisa faqa qimamianaura. Qinee Karaambaiqa amuqisirana maree marunasa marunnanara qini ufa irisee minasaa munduaqa, sia qinee karaambaiqa ufara inni qimannimidaqa qeeqa ufa qimannimidaqa.

<sup>26</sup> Innee Koorinti maqanna Yisuna ufa irimariasa innee maqee aukuaana Yisuna ufasaara fira mandainaina nariranaki mariafaqa minara irisee qimannimidaqa, aiqama fasiqa maqee maria mariranaki kai mariaqa. <sup>27</sup> Ani anaqa maridanoo fee sia mina minnisaa, anee adeedaana maridaneesia aanaaseera randasee maraa. <sup>28</sup> Anee anaasee maraseenana sia aqaananoo. Maanaaqa moo fannoo kumaaraa mareenoo sia aqaananoo. Maqee maria deedeepira aukuaana Yisuna ufasaara faiqi anaasee faqaasa fira ummaaraki mariafanoo minara irisee innee maqee Koorinti maqusai mari ummaarana sia maraaqee kaqi kasooiqa mariaqee qidaqa.

<sup>29</sup> Oo qini qikaqafasaa qinee ufa qunnana anoona maqqimminoo maridanoo. Innee Koorinti maqusai ummaaraki marianara moomoo faasaana sia kaqi marifaranoo sia moomoo kari Anutuna ainainiranaki marifaranoo. Innee minara irisee anaasee faqaasa adeedaanara foora mariaqa kaqi kai ainainamamaree fuaqa. <sup>30</sup> Innee iki raqee mariasa sia iki raqera maqi iaqa kaqi kai Anutuna ainainirana ainainiqa fuaqa. Innee naanaindara qimariasa sia naanaindara qidara maqi mariaqa kaqi kai Anutuna ainainirana ainainiqa fuaqa. Innee ainaina feefauri mariasa faqa sia anindiyara foora mariani. <sup>31</sup> Innee maqasaa ainaina feefauru nimisaida ainaina maree mariasa sia kaaqa minara afeekaiqiqa, mana mana imariasara foora mariaqa. Maa maqa maaqafa maaqoo marinafa sia kisaqasaa mariannoo. Qusasaa taikaannoo.

<sup>32</sup> Innee ummaara siaisa mariaqera qimannimidaqa. Anaasee siaifa karaambaiqa ainainiranara kai irimaree fidanoo karaambaiqa eedoo qiranara kai irinoo fidanoo. <sup>33-34</sup> Anaasee faqaafa maa maqanasaaqarara ainainara kai irimaree fidanoo maqee maqee nari aanaaqara aidimari iriramau fidanoo, qaara irirana faqaafa maqasaaqarara irirana faqa Karaambaiqa irirana faqa minaki maridanoo. Adeedaana aanaasee uqa faqa maanaaqauqa faqa karaambaiqa saikara kai irimaree fidaqa. Misa nari naundura faqa nifaqara faqa karaambaiqaindi fee kai qimasee karaambaiqa saikara kai iridaqa. Faiqifaqa anaasee fannoo nari afaaqi aidimari iriramau fidanoo maqasaa ainainara kai iridanoo.

<sup>35</sup> Sia qinee sandannaifau inni rumbaidau. Maa manda deedeepa aukuaannara iridaqa. Inni dadaaqiraree qidaqa maa ufana qidaqa. Qinee inniara andeeqara aatata ufamau fuaqera kai qidaqa naakapaidafa. Innee sia kaqikaana raina quqaqera muduka uqanna karaambaiqa saikaki mariaqera qimannimidaqa. <sup>36</sup> Kumaaraa maanaaqa utaaqaraqanda nimundaranara qaoo qimasee mi kumaaraafa kafa quandakinoo aanaaseera aidirafa afeekaiqifanoo mi kumaaraafa doo maraanauree qimaseenoo doo amana maraannoo sia aqaqidanoo fua miqidanoo. <sup>37</sup> Faiqi moo fannoo Yisuna ufasaara nariranara irisee miqinafa sia moo fannoo qaoo qinoo kai nari uqanna sia qini

utaaga maqimaqarana maraanauree qinafa mina irirafa kuqaa afeekaikinafa narí aundurakiqari amiqimmandee qaoo qinafa sia mi manaaqana maraannoo andeeqaidanoo miqiannoo. <sup>38</sup> Kumaaraa narí utaaqamamaqara manaaqana marainafa andeeqaidanoo miqiannoo. Moo kumaaraa fannoo mina narí utaaqamamaqara manaaqana sia marara-ree qifa mifa firaqoomma uriqareenoo.

<sup>39</sup> Anaaseeuqa nári nifaaqmaaka faqa kaqi marianara sia oonuree aniree iqanuaqa. Nári nifaaqmaaka kuqufuafaqa miqoo nári nidimari fasiqana amana mareefara. Moodaa ainaina kai mariannoo, Yisuna ufa irimarinna anaaseefa Yisuna ufa irinnana kai maraannoo. <sup>40</sup> Mi anaaseefa kaqi adeedaana maridanoo aufadaranaki mariannoo. Qinee mi ufana qunnana qeeqaindi qeeqa irirana maaqi qidaqa Anutuna maraquina fannoo dadaaqaidanoo fee qidaqa.

## 8

*Unna tumunnai auqira afaannara dufi dufi qimasee narana aandaara qidanoo.*

<sup>1</sup> Innee Koorinti maqusanaa Yisuna ufara suqimariasa unnaqira afaanna naranara iriifaqa inni minara qimannimianaura.

(Inni maqannaasa Yisuna ufa sia irimariasa misa tumunnai auqira afaanna amaana maqaki aanda arusee suqasee unnaqira afaanna amaana maqaki qoomaqa naida tumunnai auqira afaannara dufi dufi qimasee animma amidaqee qimasee nári neemari-afaqa innee akaqausa misa dadaaqidaqa mi oosannara qini iree mariafanoo. Innee Yisuna ufa irimariasa akaqausaki náriara maasa aqaqidaqa miqira aanda naida fee qimari-afaqa, mi aandaufa maasa daundurakinaana kuridiandoo qimasaidafa qimiridaqa naida fee qimari-afaqa. Akaqausa náriara maasa irirana faqaasa noori uqeerasee fifau tumunnai auqira afaanna marifaqa kaqi naanauree qimari-afaqa.)

Qinee Pauroosa minara kuqaa fee qidaqa moo irirana minasaa ookaaidafa maaqi qidaqa. Miqira irirafa narí aidirafa narí aundurái umbiqafinara oori uqeeraidanoo nasuridanoo narí kai narí kurididanoo. Moo irirafa amiqirafa maaqi qidanoo. Faiqi nariara nariara amuqusira irirafa mi irirafa sia kurididanoo faiqi anaasee nifeeqareenoo pooduqafanoo anoonikidanoo. <sup>2</sup> Moo fannoo nariara aiqama ainainara irimarunausee qimarifa sia anoonikira irirana irimarifanoo Anutufa mi iriranara akooqaidanoo. <sup>3</sup> Faiqi anaasee moo fannoo Anutunara aidimarifanoo Anutufa amiqimmandee misara iridanoo aidanoo.

<sup>4</sup> Yisuna ufa sia irimariasa tumunnai auqira afaannara innaaru qimasee aanda narana neemari-afaqa innee Yisuna ufa irimariasa mi naranna naanara iriifaqa qinee Pauroosa minara maaqi qidaqa. Tumunnai auqira afaanna oosana innisaimbaqa iridaqa mifa sia mari ainaina kikiqusirafa maridanoo fifau ainaina kai maridanoo. Maasa moodaa Anutufa marinarana minara kai amiqimmandee iridaqa. <sup>5</sup> Maa maqa maaqanaki faqa innaarunai faqa moomoo oosana oosana afaannee qimari-afaqa maridanoo. Mi afaanausa misa uriqararansa faqa Karaambaqauqa faqa unna qimasee maridammiafoo qidaqa.

<sup>6-7</sup> Sia maasa misauqara iridaqa maasa Yisuna ufa irimariasa Anutufa aiqamausa nikoofa moodaa kai marifaqee qidaqa, aiqama ainaina auqu quqoo fee qidaqa maasa mi Anutuna ainainammaisaranara maridaqa. Sia moo karaambaqaa maridanoo maasa karaambaqaa, asaku mundirafa Yisufa mifa kai marifaqee qidaqa. Minannai Anutufa sia maru ainainanna aiqama ainaina auquqooofa maridanoo, maasa minasaqaraa mariranasaa maridaqa. Minara maasa aiqama narana amana naanaura. Kaqi narana faqa fifau afaanna aanda faqa aiqamaqara namasee mina neemari-afaqa sia aqarafa maridanoo. Moo ainaina aqarafa maaqimminoo maridanoo. Aiqama Yisuna ufa irimariasa sia maa qunnanara iridaqa. Akaqausa oooqaindi sia Yisunara iru aukua-naindari mi fifau afaanna amaana maqanaki maqee maqee keeqafiqa narana namasee mi narannara mi afaannaindi fee qimari-afaqa, kafa maqee faqa Yisuna ufa iridaqa sia afaannara innaaru qidaqa kaqi keeqafi namasaidafa unna qimasaida afaanna marifaqee qimasaidafa kaqi mi narannara Anutuna namuqaandi fee qimasee boo Anutuna namuqaa aqoondikidaqa aqaidee qimasaidafa nári maraquina nári naakirafa ummaara nimifaqa maasa daunduraki putaairana qimifaqee qidaqa. <sup>8</sup> Qinee Pauroosa minara maaqi qidaqa. Sia fifau narana fannoo maasa mareeqee Anutuna aqoondikiannoo. Maasa sia neeqa sia Anutuna oorudupianaura kaqi neeqa sia ooraaqaraanaura. Narana fifau ainaina maridanoo maasa iridaqa.

<sup>9</sup> Innee afaanna amaana maqakinaa naranara mana mana imariasa minara eerairi-afaqa. Mi narannara akaqausa rufiee mariasa irirana oorudupimariasa ani mana mana iranasaaqari arufarindamaki mandainainaki aquffaara. <sup>10</sup> Anee irirana afeeka faqaafa

tumunna augira afaanna amaana maqaki keeqafi mana mana mandee narana nainanoo ani akaqafasaa moo fannoo irirana amannaikimarifa fukasaa Yisuna ufa irimarifa ani qafamaseenoo afaanna amaana maqaki keeqafi narana nainanoo mina aundurakinaana akamummasainanoo mi fifau afaanna finnai kaifaa minni ubekeenoo aqoondikian-dooraa. <sup>11</sup> Oorudupimasee iri mari fasiqafa afaanna naranara rufiee mari fasiqafa maridanoo. Mi fasiqafa afaanna narana mana mamaree neemaria fasiqausa oosana qafamaseenoo nari faqa namaseenoo minasaa arufarindamaki kuridiranaki aqufidanoo. Fifau kuridiranaki aqufuannoo asauku mundirafa minara faqa kuqufammi.

<sup>12</sup> Innee mana mana irirana faqaasa inneeqa nikaqaafasaa oorudupira irirana ari-mariafanoo, miqi marianannai inneeqa nikaqaafasaa mandaikamma nimaqaidaqa, miqianannai asauku mundirana faqa mandaikammamaqee mariafanoo. <sup>13</sup> Qinee Pauroosa minara maaqi qidaqa qinee afaannara dufi dufi qira narana aandau namasaanoo qini qikaqaafasaa qini qifaqeenoo minasaaqaraana mandainainaki aqufinaqa qinee naaru naaru sia uqanna afaanna aandau naanaura qini qikaqaafasaa sia aqufuanifee qimasee sia naanaura.

## 9

*Pauroofa nari kadaapisaaqaraa narana kai neemarinau.*

<sup>1</sup> Qinee Pauroosa kuqaa Yisufa diqigoo fasiqausa maridaqa kuqaa qinee Yisuna maasa karaambaiga qafaafanausa maridaqa qinee sia moona karabusaki maridaqa qinee qeeqa iriranannoo maa saikana maraيداqa. Qinee Karaambaiga saika inniki maraafannana mina anoona innee Yisuna ufa ugeeraafanoo. <sup>2</sup> Akaqausa qini Pauroosara sia Yisufa aqigoo fasiqafee qimariafaqa innee Koorinti maqusanaasa sia qiniara miqi qimariafanoo. Innee Karaambaiga ufa irisee mi mau fimariafanoo mifa kai Yisufa qini diqigoonara kooroidanoo.

<sup>3</sup> Faiqi anaasee akaqausa qini saikoosanara diqiafaqa maaqi qimasee qeeqasaa ititaidaqa misa qimannimidaqa. <sup>4</sup> Qinee Yisuna ufa maqusa maqusa oonuree aniree idaqa Yisunara qimannimimarunnana akiaqara mi maqannaasa narana nammari kaqi qimifanoofau andeqarafa mariqini.

<sup>5-6</sup> Yisuna niqigoo fasiqausa Yisuna akaqaafasaa ufa faqa Peetooroona faqa nari ninaaqmaaka Yisuna ufa irimaria anaasee ufa nindiamaree misa faqa maqusa maqusa nidaqa. Yisuna ufa qimannimiafaqa neeqa kaqi narana nimiafaqa naidaqa. Qini Pauroosa miqifau andeqaragoo marini, sia miqidaqa Baranabasisandiri maaqanda kai fee ainainammasaida naidee. Maaqanda qeeqa ainainammasaida feefauru marasaidaqa naidaqa Yisuna ufa qimannimiqanidaqa. <sup>7</sup> Sundia moo fannoo fee ammi fee rakiranaki fidaqa ainainammasaida naidee sia fee. Sia uqanna miqidaqa. Uainna qaqamma ummaqimari fasiqafa nari naaree diqisee namaseenoo inaaqianna moosa nimidanoo. Sipsipasaa rakisimarifa nari kadaapiriranasaa mina naamma anoona naidanoo. Doo qinee faqa maqusa maqusa nidaqa Yisunara qimannimimarunnana narana nammari kaqi qimifanoofau qeeqa kadaapi akiaqara nani, sia miqidaqa.

<sup>8</sup> Sia qinee faiqi faiqi ufamau kai fidaqa Yisuna ufa qimannimimarunnana akiaqara narana narara qimannimidaqa. <sup>9</sup> Mooseena sandufa miqinoo marifaqa qidaqa. Mifa maaqi qimasee akara rinoo maridanoo.

Inneeqa sakuma maqusasaa teeqimasee burimakau mareeqee miqoo quqasaifanoo burimakau fannoo oonuree aniree idanoo aikunnai rafarimarinaqa sia mina oori arooriaqa, sia mina oori rumbaaqa, saifanoo akaqana naidanoo rafariani.

Qinee Pauroosa minara maaqi qidaqa. Anutufa burimakaura kai fee iridanoo fee miqi qinuu, maasara faqee miqi qinuu. <sup>10</sup> Oo sia misaruu miqi qinuu, maasara irinoo miqi qinuu. Ummaqimariifa faqa aiqi marifa faqa minakinaana nararee qidanoo ainainidanoo. <sup>11</sup> Baranabasisandiri inni Koorinti maqusanaasa naunduraki innaarunain-daraa asumu ummaqusaafananoo kambiqaaidanoo. Sia fee maqee mi kadaapirirana akiaqara maqasaa narana kaqi qimifaqee naanaaree. <sup>12</sup> Akaqausa inniki kaqikaqoo kadaapii maruna akiaqara kaqi narana nimiafaqa naidaqa, maasa fiqaramasee inniki kadaapii marunnana akiaqara inni narana marasee naunaiqini sia kaqi marasee naidaqa. Anutufa amanammifoo qifaqa maasa sia miqidaqa. Asauku mundirana Yisuna amiqira fasaasa ufa inni naundurai sia keeqaandoo qimasee daara rarana faqa kadaapirirana faqa oosana oosana saika auqee marunnanara faqa qimannimiqiafana.

<sup>13</sup> Anutuna firaa amaana maqa Yeerusaree maqusa marinaki ainaini mariasa misa minakinaana nariqa narana maraيداqa. Faiqi anaasee sipsipa arusee aandau tatufu Anutuna amaana maqaki amimariana minaki ainainimariasa aanaiqiki mariasa nariara akaqana marasee naidaqa innee minara amiqimasee irimariafanoo. <sup>14</sup> Karaambaiga

Yisufa miqi kai masee narí ufa qimannimi mariasara qimannimiqa fidaqa misakinaana narana marasee naaqee qinuu.

<sup>15</sup> Mi andeeqara oosanafa marifaqa qinee sia miqíqa maa pasana akara runnana innee narana sia kaqi qimiaqee qidaqa akara rumannimaqaidaqa. Akaqausa qini maa ufanara fifau dapi ufammifoo qifoora sia inni narana marasee kaqi naanaura kuqiranaki fuanaura, qeeqa kadaapinnoo feefaurirafa amana. Miqi marifaqa Anutuna ufamau figaramasee funnanara qeeqa qimooqidaqa. Sia moo fannoo mi ainainniannanara qimooqirana aruannoo. Ainainamaseeqa feefaurumasee naanaura.

<sup>16</sup> Kuqaa qinee Pauroosa Yisuna amiqira fasaasa ufa oonuree aniree idaga qimannimi marunasa maridaqa, sia miqiannanara qeeqa qimooqidaqa qeeqa duqu uqeeraanaura. Yisufa qimaqimunara miqidaqa. Sia miqianaqau mandainaina qambaanaí mariaqini.

<sup>17</sup> Qinee qeeqa kai qimannimira saika mareefau feefauruara qunaiqini. Anutufa daakapainara ainainidaqa mina akiaqara sia feefauruara innaaru qidaqa qimira saika marifaqa kaqi maridaqa. <sup>18</sup> Qeeqa saika akiaqara nana feefauru fee maraídee, Anutufa amana kadaapi akiaqara narana marasee naannee qifaqa qinee sia miqidaqa amiqira fasaasa ufa sia feefauruara irisee kaqi didifaqa qimannimunafa mifa qini feefaurirafa maridanoo. Kaqi qimamidaqa qeeqa andeeqara kadaapirirana akiaqara sia maraída kaqi qimannimira asasirafa mifa qini amiqira feefauru maridanoo.

<sup>19</sup> Qinee sia moo fasiqa ainaini marunausara foora maridaqa kaqi fasiqara foora maridaqa Yisufinnai moomoosa aniaqeeera aiqamausa ainainira faiqi kammambi maridaqa. <sup>20</sup> Qinee Yuda maqannaasaki Mooseena sandufa ameemaanai mariasaki ainainidaqa misa naanna ramafi misa marirana maridaqa. Qinee sia Mooseena sandufa ameemaanai maridaqa, misa sandufa ameemaanai mariasa moomoosa Yisuna ufara aniaqeeera qinee faqa mina ameemaanai maridara foora naaraidaqa.

<sup>21</sup> Miqi kai iqa aanaamuruki ainainidaqa aanaamuru moomoosa Yisuna ufara aniaqeeera aanaamuara foora Yuda maqannaasa sandufara nianasaa tatiaga maridaqa qimannimidaqa. Miqunnanannai sia Anutuna sandufa rukiada miqidaqa. Qinee asauku mundirana sandufa ameemaanai qinee kuqaa maridaqa. <sup>22</sup> Qinee Yisuna ufara sia andeeqasee saqariki mariasaki ainainidaqa misa faqa moomoosa aniaqee qimasee misa naanna ramafi maridaqa. Qinee oosana oosana qaini qaini qiranannai faiqi anaasee maraane qimasee aiqama fasiqa anaasee naanna ramafiqa misa naaraidaqa.

<sup>23</sup> Qinee maa ainainniranaki maridaqa moomoo oosana oosana ummaara kaqi maraída qinee faqa innee faqa mi amiqira fasaasa ufanasaqarara naundurakina adifaairana maraannanara miqidaqa. <sup>24</sup> Inni maqusai Koorinti maqusai faiqi moomoosa suqufiqa narí amani narí amani sandeemariana maqee maqee kambiqee marifaqa qafeemariafanoo. Sandee mariasaki moomoo sandaídaqa moodaa fannoo kai urinaaqareenoo qafee maraídaano. Innee faqa misa naanna ramasee Yisuna aatata sandee fidaqa uriqarara qafee marararee qimasee sandaaqa.

<sup>25</sup> Aiqama sandee maria fasiqausa ooqaindari amanidaqa kaqíqoo afeekaikamandee mariíqa sandara aukuaana anirainaga kaqi sandeefaranoo. Misa sia mi kadaapiriranara iridaqa, uriqarara qafeeroo kai qimasaida kaqíqoo afeekaikamasee nimanida sandaídaqa. Misa dauni afauqaqee mari qafeenara kisaqasaa kadaapiridaqa. Maasa misa naanna ramasee kisaqasaa kadaapiridaqa, sia afauqaqee mari qafeenaranoo fadu idau miqidau, naaru naaru marira qafeeroo qidaqa kadaapiridaqa andeeqaidaqa.

<sup>26</sup> Minara iriseeqa sandeeqa taikee aniaqoo andeeqasee fidaqa. Qinee bookseena akoofasa fasiqara foora sia fifau faafau qisauku aqidaqa andeeqasee kai qisauku aqira foora idaga. <sup>27</sup> Qeeqa qifaqa qini ufa amiqimmandee iriaqeeera firaqoo qeeqa qifaqa dariara foora idaga, qeeqa qimudaani faasasaa afeekaikidaqa. Qinee aiqamausa naaramasee aniree bookseena foora amaniaqee qimaseeqa qeeqa faqa amanianee qimasee oorudupianano Anutufa manda saikammiaanoo qimasee diqíqandoo qimasaidaqa faasasaa afeekaikidaqa.

## 10

*Tumunnai auqira afaanna iriranara aaquqirafa.*

<sup>1</sup> Oo Koorinti maqusanaasa qini qikaqaafasaaqaa ooqai Mooseefa Isipa maqusaindari maasa Yuda maqannaasa qikeeku qikaaku nifiqee narí maaqai fiqau. Qinee minara qimannimianaura. Misa Isipa maqusaindari sandeemarufanoo namuqaa narí maaqi qimasee Anutufa qufanoo qoonnamu fannoo misa ninaaqiannai aiqamausa ititafufaga amiqimasee aniree Taatuqee nammari taqamareeqa fiqau.

<sup>2</sup> Mi qoonnamunaki faqa mi nammarina Taatuqee nammari taqoonara amaana nammari kikiqusidanoo faqa Mooseefa mi nammarinaki misa aiqama ukuqnamaseenoo



uqeeraseenoora foora masoofaqa aiqamausa Moosenaindi kammambiqau. <sup>3-4</sup> (Misa miqooqari kaasau maqa maaqaki fimarufanoo Anutufa aiqama kananaana kananaana narana maqasaa quqasoofaqa marasaidaqa neemariqau. Nammariara nidufanoo Anutufa Moosenara qufanoo oonikiqari nammari qumufaqa naqau.) Qinee Pauroosa minara maaqi qidaqa. Misa aiqamausa innaarunaindaraana moodaa feemu naqau, aiqamausa innaarunaindaraa nammari moodaa naqau. Mi nammari innaarunaindaraa oonikiqariara foora qumimarufaqa naqau. Mi oonifa asauku mundirafa misa faqa kukeeqasee nimarufa marinau. <sup>5</sup> Misa miqiga fidaqa sia minara irirai moomoosa uqanna mandosana marasoofanoo Anutufa qufaqa misa kuqufanoo misa iri fannoo mi adana maqa maaqanaki furufaramminau.

<sup>6-7</sup> Mi aiqama ainainausa maasa aaquqimaqimaqarafa maridanoo, maasa faqa mina irisee sia misa naanna raanaura, sia manda nidi mari ainainnara randaanuranoo sia misa naanna reeqa tumunnai auqira afaannara faqa innaaru qianaura. Mooseena akara minara maaqi qimasee qidanoo.

Faiqi anaasee ooqumari fi narana neeneesee nammari moomoo neeneesee mandidi raanauree qimasee findi fiqa idi ree mariqau.

<sup>8</sup> Qinee Pauroosa miqunara qimannimianaura maasa sia misa naanna ramasee faiqi anaasee nari ummuara nari ummuarianaura. Misa miqimarunara moodaa faasaana (tuenti tiri tauseena) nukudara foora teeqigau moomoosa uqanna raurukaqau. <sup>9</sup> Maasa sia misa naanna reeqa karaambaiqa amanamandee qafaanuranoo. Misa akaqausa miqimarunara sakani fannoo narimarufaqa kuqimariqau. <sup>10</sup> Innee sia misa naanna reeqa Anutunara ninunuruuqa. Misa miqi marunara kuqira qangiroo fannoo aniree moomoo narinau.

<sup>11</sup> Mi aiqama ainainausa akaqausa aaquqima nimaqaaqeeera misasaa kambiqaanu. Maasa maqee mariaasa aaquqimaqimaqaaqeeera Anutufa qumee dadaaqufaqa miqooqaraafa moo fannoo akararinau. Maasa taikara aukuana adeedi rainaqa marinara aaqaranara rufiaaqeeera aaquqidaqa.

<sup>12</sup> Faiqi moo fannoo nariara qeeqa afeekaikiranannai kikiqiga maridee qinafa rufiaa, anee Isaraee maqannaasa naanna ramasee aqufinafaara. <sup>13</sup> Aiqama nimanirafa innisaa aqufinafa aiqama maqannaaki maqee maqee kambiqee mari ainainafa maridanoo. Anutufa minara iridanoo nari dadaqaira ufara kai iriannoo. Iridanoo firaa nimanirafa anireenoo inni urinaaqareenoo rafaqaqafinafa anirainanoo Anutufa afeeka niminaqa innee amana mi nimariranaki mari inaqa mina uriaaqaree faranoo. Anutufa ititaseenoo fimariaana uqafiqainana fi ruiqakinana finnarano.

<sup>14</sup> Oo qifaaqasaa qini qigoondiuga tumunnai auqira afaannara innaaruqiranara nianasaa rufiaaqa. <sup>15</sup> Innee Koorinti maqusanaasa ooqeenasaa irirana faqaasa mariafanoo. Inneeqa kai qini ufa irisee oonumafi rainasee iriaqa. <sup>16</sup> Maasa aafaqa naidaqa kaafakinaa nammariara Anutunara dufi dufi qimasaidaqa mi kaafanakinaana naidaqa asauku mundirana fidika naida fee qimasaidaqa maasa kaqikaa feemu faqa ruqi ruqimasee naidaqa maasa asauku mundirana amaqi naida qimifaqa naidee qidaqa mi feemuna naidaqa. <sup>17</sup> Moodaa feemu kai marina maasa moomoosa ruqi ruqimasee neemarianara moodaara foora maridaqa.

<sup>18</sup> Qeeburu maqannaasa moo nuqu Isaraee maqannaasa nariqa aandau tatufira oosanara iriaqa. Faiqi anaasee moo fannoo aandau maramaree Anutuna aanaiqiki maru fasiqana amisoofanoo aandau tatufinoo nariara akaqana marasee neemarufoanoo aandau akoofa nari aiku asauku faqa muduka nanau. Misa qiqau, maasa Anutuna tatufira qaindasaa qaraana naida qimifaqa naidaqa mina faqa moodaanaki maridee qimariqau.

<sup>19</sup> Doo qini ufa oosana naqi fee inoo maridanoo fee doo maqee mi ufana koorooianaura. Inni maqusanaasa narana maraseeqa tumunnai auqira afaanna amidee qimasee tatufimariafanoo. Mi tumunannai auqimaria afaannana amana sia anoonau kaqi fifau tumu kai maridanoo. Mi narana tatufirafa faqa sia anoonau, kaqi narana kai maridanoo. <sup>20</sup> Sia Yisunara irimaria fasiqauqa mi fifau naranna marasee sia Anutunau amisee dufi dufi qidau, afaannauqa nimisee dufi dufi qidaqa miqidaqa. Innee Yisuna ufa irimariaasa afaanna naida nimimaria naranara innee sia mina naaqeeera qidaqa qikooqaidanoo.

<sup>21</sup> Innee karaambaiqa aafaqa naidaqa Yisuna kaafakinaana nammari namasee sia amana quandakina afaannauqa kaafakinaa nammari neefaranoo, innee Yisuna aafaqa naidaqa karaambaiqa qaindasaaqaraa feemu namasee sia quandaki afaannauqa qaindasaaqaraa feemu neefaranoo. <sup>22</sup> Innee Yisuna aafaqa namasee quandaki afaannauqa aafaqa namasai fanoo karaambaiqa Yisuna qafamaseenoo rairaiqiannoo. Innee Yisufa inniara rairaiqianifee qimasaida fata fata idee miqidee, innee maasara karaambaiqa uraaqaraidee qida fee miqidee, sia amana karaambaiqa uriqareefaranoo firaa nariranaki aqufifoor.

<sup>23</sup> Akaqausa minara maaqi qidaqa. Maasa amana aiqama oosana amiqirana faqa mandaikirana faqa minauqa maraanauree qiafaqa qinee Pauroosa minara maaqi qidaqa. Kuqaa aiqama nana ainaina amana maraanaura, sia aiqama ainaina amiqirafa maridanoo. Akaqausa maaqi qidaqa aiqama oosana amana maasa maraanauree qiafaqa qinee minara aiqama oosana sia faiqi anaasee dadaaqimaria oosanafa marifanoo fee qidaqa akaqana kuridirafa maridanoo. <sup>24</sup> Sia moo fannoo nari aidi mari ainaina nari iriranaki uriqaranoo mariani aqoonausa nidimari ainaina kai nari iriranaki uriqaranoo mariani.

<sup>25</sup> Innee Koorinti maqusanaasa aandau maree makeetai fimariana akaqaandau arusee aukusee tumunnai auqira afaannara dufi dufi qimasee makeetaki quqasaafa feefauridaqa. Akaqaandau kaqi arusee auku quqasaafa feefauridaqa. Innee Yisuna ufa irimariasa makeetaki keeqafi inneeqa aandau marararee qimasee oonuree sia tumunnai auqira afaannara dufi dufi qinannara iramasee eerairiaqa kaqi mana mana maraaqa. Aninna karaambaiga saqarikiananoo aninna aakirafa marina sia minara irisee eerairiaqa, kaqi maraaqa. <sup>26</sup> Ooqeenaa tamummaqara fasiqauqa akara minara maaqi qinoo maridanoo. Maa maqa maaqafa faqa minaki aiqama ainaina marifa faqa karaambaigaindi kai maridanoo.

<sup>27</sup> Qinee Pauroosa minara aiqama ainaina kaqi naaqee qidaqa. Inni Koorinti maqusanaasaki Yisunara sia irimariasa moomoo maridaqa. Misakiqari moo fannoo aniara mai aniree qini faqa narana naannee qinana aidinana kaqi mina faqa oonuree mina faqa narana naa. Anee mi naranna aandauna naaneera aneenna aakiranara kaqi kaaqoo oonumafi irinana sia eerairia kaqi naa. <sup>28</sup> Anee mi naranna naanee qinanoo moo fasiqa fannoo qimaminoo tumunnai auqira afaannara dufi dufi qira narana maridanoo qinana anee ani qimami fasiqana aakiranara irisee sia naa. <sup>29</sup> Sia aninna aakiranarau qidau ani qimami fasiqana aakiranara qidaqa. Innikiqari moo fannoo maa qunnufana irisee maaqi qianoo, nanaree qinee moona aakiranara irinanoo fee mifa qini ititaqimaqaannoo fee. <sup>30</sup> Doo qinee qeeqa naranara Anutunara dufi dufi qimaseeqa nanaree moo fannoo aniree qini narana aandauree qaoo qianoo fee.

<sup>31</sup> Qinee Pauroosa minara maaqi qidaqa Innee narana nammari aiqama ainaina neemarianara sia fee naanauree, naanauree, nana ainaina innaree, Anutuna amooqira ufa kambiqee marimau kai fuuqa. <sup>32</sup> Inni marirafa kaqi mana manifaqa nindafamaseeqa Yuda maqannaasee aanaamuru fee Yisuna ufa iri mariasee inni niqafamasee noori runifaara. Innee minara irisee mi oosannara eerairiaqa. <sup>33</sup> Innee qini daanna raqaqaa sia qinee qeeqa didirana qeeqa qifaafa amiqi amiqiranara iridaqa aiqamausara iriseeqa misa nidiranamau fidaqa, aiqamausana innaaruna asumu maraaqera miqidaqa.

## 11

*Amaana maqaki keeqee maru anaaseesa nikiyaqa rumbarausa keeqee maria ufana.*

<sup>1</sup> Qinee asauku mundirana Yisuna aanna raidaqa innee miqikai iqa qini daanna raqa. <sup>2</sup> Oo Koorinti maqannaasa innee qiniara maqee maqee irisee Yisuna ufa irimariasa sandufa qinee qimamifanna ufamau fimarianara inni nimoqidaqa. <sup>3</sup> Qinee maa moodaa ainainnara kai inniara iriaqee qimannimidaqa, aiqama fasiqa nari ninaaqmaaka urinaaqararaua maridaqa kafa asauku mundirafa aiqama fasiqa urinaaqararafa maridanoo. Anutufa asauku mundirana uraaqararafa maridanoo.

(Pauroofa nari maqannaasa anaasee oosana qimaqoofa sia maasaki maridanoo. Anaaseeqa nariqa andeeqara oosana marasee nari nifaqmaaka nimeemaanai oorudupi mambunara kooroo ianifeera qamunnannai nikiyaqa rumbarausa amaana maqaki keeqee mariqau. Sia nikiyaqa rumbasaidaqa keeqee marusa nisaurirana mara nimimariqau. Ummuari mari anaaseena paqurimasee asaurirana maraanifee qimasaida akiqa maqa namuqaa indufu aqimariqau.)

<sup>4</sup> Qinee Pauroosa faiqi nari anaqa uraaqararanara irisee maaqi qidaqa. Faiqi moo fannoo akiqa rumbarafa amaana maqaki keeqafi aiqamausana nifusaa innaaru qina fee Anutuna ufa qimannimina fee asauku mundirana asaurirana amiannoo.

<sup>5</sup> Anaasee moo fannoo amaana maqaki keeqafi Anutuna ufa qimannimiannoo fee innaaru qianoo fee akiqaqaa sia rumbarafa mi anaaseefa nari afaaqi asaurirana amidanoo ummuari mari anaaseena amanakai maridanoo, akiqaqaa maqa faqa indufira anaasee amana amana kai maridaqa. Saina akiqaqaa qamunnannoo rumbasee amaana maqaki keeqafinoo innaaru qianoo fee Anutuna ufafee qimannimiannoo fee, andeeqanoo mariani. <sup>6</sup> Anaasee moo fannoo sia akiqaqaa rumbarafa amaana maqaki keeqaina see munusee akiqaqaa maqa faqa indufu aqusaa. Anaasee akiqaqaa maqa faqa indufirafa asaurinoo akiqaqaa qamunnannai rumbarafa amaana maqaki sia asaurirainni kaqi keeqaannoo. <sup>8</sup> Indaaru

Anutufa sia aanaaseesaa qaraana faiqí auqínau, faiqísaqaraana anaasee auqínau.<sup>9</sup> Anutufa sia anaasee dadaaqianiffee qimasee faiqí auqínau, faiqiara iriseenoo anaasee auqínau.

<sup>7</sup> Faiqí Anutuna amana faqa Anutuna areenarafa faqa minaki marifa marinara sia akiqa rumberafa amaana maqaki keeqaannoo. Anaasee faiqí areenarafa minaki marifa marinara akiqa rumberafa mariani.<sup>10</sup> Qangirooma maasa qiqafaidammiaafoo qimasee nári nifaaqmaaka ureeqarusa marianara koorooianifeera nikiyaq rumbera anaasee amaana maqaki keeqaqa.<sup>11</sup> Maasa karaambaiqa ufamau fidaqa maa irirafa kai mariani, anaasee nariara aadumai marianinafa fifau mariani, faiqí miqikái masee aadumai marianinafa fifau mariani.

<sup>12-15</sup> Indaaruu anaasee faiqísaqari kambiqanau miqikái inoo miqooqari faiqí fannoo aanaaseeqiqari kai kambiqaidanoo doo mi aigama ainainaqanda Anutunakiqari kai kambiqanoo maridanoo. Faiqí fannoo akiqa asausi kisaqa marinaqa faiqí anaasee nári kai nariara nariara irisee mandainanee qimasee nisaurifaranoo. Anaasee kisaqa akiqa asausifaqaanara sia miqidaqa amiqirane qidaqa mi anaaseefa minara firaqqoo nasuridanoo. Anutufa anaasee kisaqa akiqa asausi inni nikiyaq paranna rafaqaqfuanifeera niminau. Inneeqa kai iriaqa, anaasee sia akiqa rumbera anaasee fannoo aigamausa nifusaa amaana maqaki innaaru qirafa andeeqaidanoo fee sia fee andeeqaidanoo. Sia andeeqaidanoo. Innee minara irimariafanoo.

<sup>16</sup> Faiqí moo fannoo yafee ufa rainaani qimasinaqa maa ufana kai qimamianaara, maasa maaqooqaraasa faqa Anutuna ufara maqusa maqusa suqimariasa faqa mi ufamau kai fidaqa sia moo oosana maraídaqa.

*Karaambaiqa aafaqa neemaria naamaqirafa.*

<sup>17</sup> Innee Koorinti maqusanasa Anutuna ufara suqidaqa sia amiqimmandee suqimariafanoo mandainana kai kambiqaidanoo, minara maa ufana sia nimooqidaqau qimannimidaqau.<sup>18</sup> Innee Anutuna ufara suqidaqa raina rainidaqa aanooqimariafaqa qimaqimifaqa qinee iriqa akaqanara kuqaa fee qidaqa. [<sup>19</sup> Aaqarusa faqa andeeqarusa faqa moodaanaki marifanoo kuqaa rainarafa kambiqaanoo. Miqimasainanoo aaqee mariasa faqa andeeqarusa faqa kooroo ifaranoo.]

(Pauroona akara rumannimu aukuaana Yisuna ufa irimarusa sia maqee maasa imarunandee aafaqa neemariqau, misa nári ainainirana taikasee eendaki aafaqa nararee qimasee nári narana deedaqammamaree mara maree moodaa maqaki mini quqasee qoomaqa sakasee namasee inaaqianna feemu marasee ruqi masee uainna nammari misa maqee maqee neemaru nammari namufaqa innaaru qimasee namasee fifaini mariqau. Faiqí anaasee oosana oosana suqiqau. Ainaina faqaasa faqa kudi fasiqa faqa oosana oosana ainaini mariasa faqa nariqa ainainirana taikasee eendaki ainiree moodaanaki suqiqau. Akaqausa furufara maseeqa narana moomoo namataikasoonara ninnaaqiana anusa naaranau. Akaqausa uainna nammari moomoo neeneesee sipa-kiqa furufariqau, Pauroofa minara iriseenoo maaqi qimasee akara rumannimaqanau.)

<sup>20</sup> Innee Koorinti maqannaasa Karaambaiqa qoomaqa suqufi naani qimasee innee sia kuqaa suqufi mina nararee kaseeafau aniafanoofau furufaridaqa naidaqa moosaindi faqa neemariafanoo.<sup>21</sup> Akaqausa nári maree ania naranna sia naida nimidaqa nariqa kai naafaqa akaqausa naarara maridaqa, akaqausa uainna nammari moomoo naida furufarida. Miqiafanoo mi qoomaqa faqa sia karaambaiqaindi maridanoo.<sup>22</sup> Innee maaqa siaisee maqee maqee neemaria narana nammari sia minaki naidee, innee Anutuna ufara suqimariasa fidiqaamma nimaqaidee miqidee, innee nara ainaina siaisa nisaurirana nimianee fee qidee miqidee. Innee minara irisee qiniara nana ufee qimaqimiannoo fee qidee. Abee nimoofee qianauree. Oo sia uqanna nimooqianaara.

<sup>23-24</sup> Ooqai qinee karaambaiqa ufa irisee qimannimiafanna sandufana maqee faqa kafa qimannimianaara, karaambaiqa Yisufa Yudasifa ueeqoo eendanaki feemu asaukunnai qumareenoo Anutunara dufi dufi qimaseenoo, ruqi ruqi maseenoo maaqi qimasee nári faiqi namu qimanniminau. Maa feemufa qini qimaqi kikiqa usinoo maridanoo innimma kuqiranaki quqannimaqanaara. Qinee kuqannanara aunifoora oonumafi iridaqa feemu maqee maqee naqafuaqa.

<sup>25</sup> Misa mi feemuna namaseeqa kaifaa miqoo narana namasoofanoo Yisufa uainna maru kaafana nariqa maqee maqee neemaru nammari qumareenoo maaqi qimasee qimanniminau. Maa kaafanaki mari uainna qini fidika kikuqusinoo maridanoo. Anutufa maqasaa fasiqa anaaseera qini faqa moodaanaki kira ufa marifanoo qini fidika fannoo mi ufana mapukira fidika maridanoo. Innee mina naqa fidaqa qiniara irisaidaga naqa fuaqa. Yisuna ufa miqiminoo marifaqa qinee Pauroosa minara maaqi qianaara.<sup>26</sup> Maa maqee kamuqoo Karaambaiqa sia kafa qumi mari kamuqoo innee mina yakamuqoo

fee maa feemuna faqa maa uainnana faqa naqa fidaqa innee Karaambaiqa kuqiranara kooroo idaqa.

<sup>27</sup> Qinee minara irisee maaqi qidaqa faiqi moo fannoo mina oosana furufarira fasiqa fannoo Karaambaiqa feemu fee mina kaafakinaa uainna fee furufara mandee namaseenoo karaambaiqa amaqi faqa fidika faqa mara maree furufara mamaqaidanoo naannoo. <sup>28</sup> Aiqama fasiqa anaasee nariqa kai nari naundura marirana irirana aiqumumasee oonumafi irirana iriseeqa feemu faqa kaafakinaa uainna faqa naqa. <sup>29</sup> Karaambaiqa afaaqa oosana sia irimarifa kaqi fifau feemu faqa uainna faqa neemarifa Anutufa aruaninna ufana nari naidanoo nari afaaqai mafi quqaidanoo. <sup>30</sup> Innee Koorinti maqannaasa miqianara moomoosa aurimariafanoo kudoosaapee mariafanoo akaqausa doo kuqiqa maridaqa. <sup>31</sup> Maasa indaaru qeeqa daundura marirana qimanammandee andeeqasee naananooofau sia Anutuna darira ufa ameemaanai marunaiqini. <sup>32</sup> Maa maqanasaaraqaraasa Yisuna ufa sia irimariasa kuridiranaki fidaqa maasa misa faqa fuanooa maqee kamuqoo karaambaiqa niuqummasee naridanoo.

<sup>33</sup> Qini qikaqaafasaauqa maa ufana iriseeqa karaambaiqa qoomaqa naani qimaseeqa qinaaqiana aninausara nifeesamasai faqa aniraifaqa doo moodaa kari oonuree naqa. <sup>34</sup> Moo fannoo aararainafa aneenna maaqaki oonu namasee ania. Miqimandee moodaanaki keeqaifanoo Anutuna narira ufa fannoo sia innisaa mariani. Doo qina kai qimannimiqa qinee innee iannai fiqa akaqa ufa qimaqimuna andeeqaanura.

## 12

*Anutuna naaquqara andeeqara maraquana oosana oosana dadaaqiranara qimannimidanoo.*

<sup>1</sup> Doo maqee qinee Anutuna naaquqara andeeqara maraquana nimimari ainainnara qimannimianura. Qini qikaqaafasaauqa qinee minara anoona ufa iriaqee qidaqa qimannimidaqa. <sup>2</sup> Ooqai innee aamina maru kamuqoo manda fasiqa fannoo ini rarisameeqee sia ufa qimaru tumunannai auqira afaannunni ubeekee marufaqa mina ufa ameemaanai fimariqau. <sup>3</sup> Doo maqee innee maanara irimariafanoo Anutuna maraquana fannoo rakisimari fasiqafa sia amana Yisuna aqurarara ufa amiannoo kafa minna dinni kai Yisufa karaambaiqa maridanoo fee qimariasa Anutuna naaquqara andeeqara maraquana fannoo misa dadaaqinara miqi qidaqa.

<sup>4</sup> Oosana oosana innaarunaindaraa ainaina faiqi anaasee dadaaqianifeera nimirafa marifanoo moodaa maraquana fannoo kai aiqama mi aiqama ainainna maqasaa fasiqa anaasee nimidanoo. <sup>5</sup> Maasa Anutuna ainainirafa oosana oosana ainainirafa maridanoo moodaa karaambaiqa ainainamidaqa. <sup>6</sup> Anutuna ufara suqimariasa dadaaqirafa oosana oosana maridanoo moodaa Anutufa kai aiqama aadu aadu akoofasaikirana faiqi anaasee nimifaqa minannai quandaki nari dadaaqi nari dadaaqiaqeeera. <sup>7</sup> Anutufa Yisuna ufa irimariasaqi aiqama fasiqa anaasee naadu naadu nari maraquana koorooianifee afeekana nimufaqa quandaki minannai nari dadaaqi nari dadaaqiaqeeera nimidanoo.

<sup>8</sup> Anutuna maraquana fannoo moo fasiqa irirana faqaana ufa qimannimimarina amidanoo kafa mi maraqunafa moo fasiqa aiqama ainainnara irirana amidanoo. <sup>9</sup> Mi moodaa maraqunafa kai Yisuna mandaqarana moo fasiqa amidanoo, moo fasiqa mi maraqunafa faiqi anaasee aurirana taikannisara afeeka amidanoo. <sup>10</sup> Anutuna maraquana fannoo faiqi sia amana auquaqaa ira ainaina afeeka moo fasiqa amifanoo mi fasiqafa afeeka ainaina auqaidanoo, moo fasiqa Anutuna afeeka amifanoo Anutuna ufa afeekaikamandee qimannimidanoo. Mi maraqunafa moo fasiqa afeeka amifanoo maraquana nimimariasa faqa moo unna qira maraquana nimimarina faqa mi fasiqafa kai rainasee nindafaidanoo. Mi maraqunafa moo fasiqa afeeka amifanoo aanaamura ufakiqari sia nari iri maru ufanakiqari amaana maqaki ufa qimannimidanoo. Mi maraqunafa kai faiqi moo afeekaikamma amifanoo aanaamura ufakiqari nari sia iri mari ufanakiqari faiqi anaasee qimannimisaifanoo moo fasiqa fannoo sia mi ufana oosana irirainni maraquana fannoo kai mina qimamifanoo mifa indee kai idanoo mina oosana qimannimidanoo. <sup>11</sup> Mi oosana oosana ainainna nimimarifa moodaa maraquana kai maridanoo. Mifa nari kai nari aidiramau raina raina mandaida aadu aadu dadaaqira akoofasaikirana nimidanoo.

*Maasa Yisuna atiki marunausara qidanoo.*

<sup>12</sup> Asauku mundirana afaaqa moodaara foora maridanoo mina atiuqa moomoo maridaqa afaaqa sia rainanoo maridanoo moodaa maridanoo. <sup>13</sup> Miqikai masee maasa aiqama Yuda maqannaasa faqa aanaamuru moomoo maqanna mariasa faqa karabusaki ainainimariasa faqa iduki mariasa faqa maasa aiqama moodaa maraqunanai nammari marasee moomoo atiuqa moodaana apataika kai iqa mariasa Yisuna

apata mariafanoo Anutufa moodaa maraquna nammariara foora nimifaqa naunnanara miqidaqa.

<sup>14</sup> Faiqi moo adaka sia muduka maridanoo moomoo afaaqa ootupanoo maridanoo. <sup>15</sup> Mi fasiqana aiku fannoo qinoo sia qinee asauku mariaqaana minara qinee sia maa fasiqana afaaqau maridau. Qinee Pauroosa minara maaqi qiqa kuqaa aiku fannoo sia asauku kinoo sia mi ufana qinnanannai moona afaaqaikin nau kaqi mi fasiqana afaaqa mariannoo. <sup>16</sup> Mi fasiqana aaqoo fannoo qinoo qinee sia maa fasiqana afu marunnanara sia mina afaaqau maridau. Qinee Pauroosa minara maaqi qidaqa kaqi mi aaqoofa sia afukinoo sia mi ufana qinnanannai moona afaaqai kiannoo kaqi mi fasiqana afaaqa mariannoo, sia sia miqianoo. <sup>17</sup> Mi fasiqana aiqama afaaqa afu kai marinanoofau naqi fee mandee ufa iriannoo fee. Mina afaaqa aaqoo kai marinanoofau naqi fee mandee udiraannoo fee. <sup>18</sup> Anutufa kai nari iriseenoo nari aidiranannai faiqi afaaqa aiqama ainaina afaaqa quqaqoofa maridanoo. <sup>19</sup> Aiqama ainaina moodaa ainaina kai marinanoofau sia faiqi afaaqa marini. <sup>20</sup> Doo miqinoo moomoo afaaqa atiuqa moodaa afaaqara foora ootupanoo maridanoo.

<sup>21</sup> Faiqi afaaqindaraa afu fannoo sia amana asaukuara anee fua sia qini dadaaqa marianna ainainafa mariannoo, sia qiannoo. Kafaa akiqa fannoo sia aikuara anee fua sia qini dadaaqa marianna ainainafa mariannoo. Sia miqi qiannoo. <sup>22</sup> Maasa qeeqa qifaaqa ati dauni nidafidanoo ummooquki mari atiuqara fifau ainainee qiananoo sia marinaqa naqi fee inauree. <sup>23</sup> Maasa qeeqa qifaaqa atiuqa ureeqara atiuqee qimariana maasa misasaa firaaqoo amiqimmandee misasaa rakisidaqa. Nifu qafaafaqa nisaurimaria atiuqa maasa amiqimmandee rakisidaqa qamunnannai ititaidaga. <sup>24</sup> Nifu qafaafanoo nidi mari atisa sia amiqimmandee ititaidaga kai akooqoo maridanoo. Anutufa kai nari iriranannai maasa qifaaqasaa atiuqa maaqimasee ootupanau, Ureeqara atiuqa uriqarara rakisirana maraane qimasee ootupanau. <sup>25</sup> Miqi marianara sia maasa qifaaqa rainarafa maridanoo aiqama aadu aadu qifaaqa ati fannoo nariara nariara amanamana kai amuqusidanoo narinni narinni rakisidanoo. <sup>26</sup> Moodaa qifaaqa ati didafifanoo aiqama qifaaqa didafidanoo, kafaa mina dinni moodaa qifaaqa amooqifanoo aiqama qifaaqa asaidanoo.

<sup>27</sup> Qinee Pauroosa inni Koorinti maqannaara qidaqa inne Yisuna ufara suqimariasa aiqama asauku mundirana afaaqara foora mariafaqa aiqama mina afaaqasaa afaaqa fannoo nari amaafa nari amaaqaki kai mariafanoo. <sup>28</sup> Innee Yisuna ufa iridaqa nuasa suqiranaki Anutufa miqikai inoo inni faiqi anaasee mareeqeenoo maaqimasee quqanisoofaqa mariafanoo. Anutufa Yisufa niqiqoo fasiqausa inniki uriqararausaikinau, miqooqari misa ureeqarusa Anutuna ufa faiqi anaasee maqusa maqusa qimannimmarusa faqa inniki quqanau. Doo misa ureeqarusa ufasaa rakisirausa maqusaki qimannimmarusa Anutufa inniki quqanau. Kafaa miqooqari faiqi anaasee oosana oosana ainainirausa quqanau.

Akaqausa faiqi sia amana auqaaqaa ira ainaina auqimariasa quqanau.

Akaqausa aurirausa andeeqee marusa quqanau.

Akaqausa faiqi anaasee nari dadaaqa nari dadaaqa marusa quqanau.

Akaqausa ufa suqirausasaa amiqimmandee rakisirausa quqanau.

Akaqausa aanaamuru ufakiqari nari sia irimaru ufanakiqari Yisuna ufa suqiranaki qimannimmarusa Anutufa quqanau.

<sup>29</sup> Innikiqari sia aiqamausa Yisufa niqiqoo fasiqausa mariafanoo, sia aiqamausa maqusa maqusa qimannimiqanusa maridaqa. Sia aiqamausa maqusai naamuqiira ufa qimannimmariasa maridaqa. Sia aiqamausa faiqi sia amana auqaaqaa ira ainaina auqimariasa maridaqa. <sup>30</sup> Sia aiqamausa aurirana taikanniseemaria fasiqausa maridaqa. Sia aiqamausa aanaamuru ufakiqari nari sia irimaria ufanakiqari qimannimmariasa maridaqa. Mi anaamuru ufanakiqari nari sia irimariafanoo maraquna afeeka fannoo dadaaqifaqa mi ufana oosana sia aiqamausa irimaria kooroo ifaranoo.

<sup>31</sup> Innee inneeqa irirana Anutuna afeekannai nari nimira afeeka oosana oosana faqa akoofasaikirana oosana oosana faqa misauqakinaana uriqararana kai ummararree qimasee afeekaikaqa. Doo qinee mi firaa uriqarara oosana uqanna maaqoo kooroo ianaura.

## 13

*Nariara nariara nimuqusira oosanara qidanoo.*

<sup>1</sup> Mi firaaqoo uriqarara oosana koorooirafa maaqimminoo maridanoo, faiqi anaasee aiqamausa nariara nariara uriqarara ainainee qimasee misara nimuqusirafa mifa mina maridanoo. Qinee qeeqa Anutuna maraquna afeekannai aanaamuru moomoo maqannaafakiqari sia iria maria ufanakiqari faqa qangiroo ufakiqari faqa Yisuna ufara

suqiranaki qimannimunanoo qeeqa qimuqusaki faiqí aanaaseera uriqarara ainainee qimasee misara nimuqusirafa sia marifaqa qeeqa kai qeeqa firaafatia fifau kammee kamme qidaqa.

<sup>2</sup> Anutuna maraquna fannoo oosana oosana afeeka qiminaqa qinee qeeqa kai Anutuna ufa amiqimasee qimannimianaqee qinee aiqama ainainara irisee aiqama kukeeqara ainainara irisee fee, qinee qeeqa Yisuna saqarikirafa afeeka marinaqee aaqana moo mafi moosaa quqaanauree, mi aiqama ainaina afeekafa qiqa daundurái afeekaikifanoo faiqí aanaaseera uriqarara ainainee qimasee misara qimuqusirafa sia marifaqa qinee sia maridara foora maridaqa.

<sup>3</sup> Qinee qeeqa aiqama ainainatia mareeqee ainaina siaisa kaqí nimiqee qeeqa qifaafa faqa mareeqee idaki aqanauree miqidaqa faiqí aanaaseera uriqarara ainainee qimasee misara qimuqusirafa sia qini daundurái marifaqa mi ainainaqanda sia qini dadaaqianara miqidaqa.

<sup>4</sup> Faiqí aanaaseera uriqarara ainainee qimasee misara qimuqusirana qinee Pauroosa kooroo ianaura. Faiqí aanaaseera nimuqusirafa maaqimminoo mariannoo, reendeenamandee ubiqafi misa ufa irirafa mariannoo, fifimmasee faiqí aanaaseera qimannimirafa mariannoo. Faiqí aanaaseera nimuqusirafa sia rairaiqirafa mariannoo, sia nariara oori ugeerasee mariannoo, sia nari amooqirafa mariannoo. <sup>5</sup> Faiqí aanaaseera nimuqusirafa sia adi namufaqa marifa maridanoo sia nariara kai irimarifa maridanoo, sia dauni kaukaatufa qimarifa maridanoo, sia akaqausa mandaikammamaqaanara irimaree fimarifa maridanoo. <sup>6</sup> Faiqí aanaaseera nimuqusirafa sia mandooanara asaidanoo kuqaa anoona ufa qiranara asaidanoo. <sup>7</sup> Faiqí aanaaseera nimuqusirafa sia minnisee finanoo akooqaidanoo, misa mina mandaikamma maqaafanoo kaqí kai irisee minni saidanoo, faiqí aanaaseera amiqira irirana irimaree fimarinafa faqa aqaainausakiara sia misara taikee maqí qirafa faqa oosana oosana ainaina amiafanoo reendeenamambi ubiqafi kaqí mi manda oosana fee amiqira oosana fee kaqí mara maree fimarifanoo amuqusirafa miqiminoo maridanoo.

<sup>8</sup> Faiqí aanaaseera nimuqusirafa naaru naaru marira ainaina maridanoo sia taikarafa maridanoo. Maqee kamuqoo Anutuna maraquna akaqausa naakifaqa amiqimasee qimannimirafa maqee maridanoo ufaasu ainaina kai maridanoo. Akaqausa sia nari irimarifa ufana qimannimirafa maridanoo mifa faqa taikaannoo, amiqira irirafa maridanoo marinoo aiqaraannoo. <sup>9</sup> Anutufa maqee qimimari irirafa faqa qimimarifaqa faiqí anaasee qimannimira ufa faqa maqee atisaa maridanoo. <sup>10</sup> Kasooqaqee Yisufa qumira aukuaana firaafa anirainanoo maqee atisaa marirafa taikafuannoo.

<sup>11</sup> Qinee Pauroosa faiqí aanaaqi mariafanna kamuqoo qini ufa faqa qini didirafa faqa qini irirafa faqa faiqí aanaaqindi marinau, maqee faiqí kammambunanoo faiqí aanaaqi irirafa doo taikafinoo. Yisufa qumuaninna aukuaana miqikai iannoo. <sup>12</sup> (Pauroofa maru aukuaana manda tanuka kai marinau. Mi manda tanukana kikiqusidanoo maa ufana qinuu.) Maasa tanukaki qeeqa doori qafaidaqa sia amiqimmandee qeeqa qimana qafaidaqa. Maasa maqee qafee marunafa miqirana ati kai qafaidaqa, Yisufa quminna aukuaana maasa mina faqa nari oori nari oori andeeqasee qafaanaura. Maqee marunna irirafa ati kai maridanoo, Yisufa quminna aukuaana maasa irirafa anoona mariannoo. Miqoo maasa irirafa Anutufa maasara amiqimasee irindee kai inoo anoona irirafa maasaki faqa mariannoo.

<sup>13</sup> Doo maqee kamuqoo maa qaaramoo ainainna kai maridanoo. Yisunasaa irirana rusirana faqa naaru kambiqaaninnanara asasamandee afeesirana faqa faiqí aanaaseera faqa Anutunara faqa uriqarara ainainee qimasee misara nimuqusirana miqamufa kai maqee kamuqoo kaqí maridaqa misakiqari nimuqusirafa kai uriqararafa maridanoo.

## 14

*Kafaa amiqimmasee Anutuna maraquna dadaaqiranara qidanoo.*

<sup>1</sup> Faiqí aanaaseera nimuqusirafa uriqararafa maridanoo fee qidaqa minara inni Koorinti maqannaasa qimannimidaqa, Innee minara irisee faiqí aanaaseera nimuqusirafa maraanauree qimaseeqa mina mararara kai kadaapiruaqa. Anutuna maraquna nimi mari afeeka oosana oosana faqa akoofasaikirana oosana oosana faqa, minauqa faqa innee inneeqa irirana ummararee qimasee afeekaikiaqa. Miqidaqa faiqí anaasee Anutuna ufa qimannimira afeeka minara uriqarara fee qimasee firaqoo randasee maraaqa. <sup>2</sup> Faiqí moo fannoo nari sia irinna aanaamurusa ufakiqari qimannimimarifa sia faiqifau qimannimidanoofau Anutuna faqa ufa qidanoo. Faiqí sia mina ufa iridaqa moosa ufa marifaqa. Mifa Anutuna maraquna afeekannai kukeeqara anoona ufa qidanoo. <sup>3</sup> Faiqí moo fannoo Anutuna maraquna fannoo dadaaqifanoo Anutuna ufa

narí ufakiqari qimannimifanoo nimuqusaki mandaikisa mina ufa iriafanoo dadaaqirana faqa pooduqarana faqa amiqi amiqirana faqa maraidaqa. <sup>4</sup> Moosa ufakiqari narí sia iri maria ufanakiqari qimannimimari fasiqafa narí kai narí dadaaqidanoo, Anutuna ufa nári ufakiqari qimannimimarifa aiqama Yisuna ufara suqimariasaa dadaaqidanoo uqeeraidanoo.

<sup>5</sup> Qinee inniara aanaamuru ufakiqari sia irianakiqari aiqamausa minakiqari ufa qiaqee qidaqa. Mi oosanna uriqararafa maaqimminoo maridanoo Anutuna ufa nári ufakiqari qimannimirafa Anutuna maraquna nimimarifa qinee inniara minara firaagoo qiaqee qidaqa ridaqa. Anutuna ufa nári ufakiqari qimannimimarifa uriqararafa maridanoo, aanaamuru ufakiqari sia iria ufanakiqari qimarifa ureeqarafa maridanoo, mi moo ufanakiqari qimarinnana faiqi moo fannoo aniree nári ufakiqari mi ufana qimannim-inanoo andeeqasee irifanoo amana mariannoo miqimasee Yisuna ufara suqimariasaa dadaaqirana mareefaranoo.

<sup>6</sup> Oo qini qikaqaafasaa kasooqaqee innee iannai oonureeqa aanaamuru ufakiqari qimannimisee naqimandee dadaaqianauree. Sia dadaaqirafa mariannoo. Anutuna maraquna fannoo aamuqaira ufa qimannimira fee, qimannimiranee, irira ufa fee Anutuna maraquna dadaaqira ufa qimannira fee naamuqaira ufa fee nári ufakiqari qimannimianaqa aiqamausa dadaaqirana mareefaranoo. Moosa ufakiqari sia dadaaqirana mareefaranoo.

<sup>7</sup> Fifau sia kasi mari ainainna ufireena faqa kookaanauru faqa piripunna faqa marifaqa sia minauqakiqari amiqimmandee fuaqaidaqa minakiqari idi sia amiqim-mandee fuaqaiqanoo idirainna fasiqa anaaseesa naqi fee mandee irifaree, sia irifara.

<sup>8</sup> Rakira karaambaqaa fannoo sia amiqimandee kaanina uqeeraifaqa naqimandee raki-rana aiqamausa uqeereefaree, sia uqeeree faranoo. <sup>9</sup> Innee miqikai iqa maraquna fannoo naakinaqa aanaamuru ufakiqari sia irianakiqari ufa qifaqa naqimasee ani ufa oosana irifaree sia uqanna irifanoo. Ani ufa fannoo fifau ufaira foora uqidanoo. <sup>10</sup> Maa maqa maaqanakina moomoosa ufa maridanoo aiqamausakina misa ufa anoona maridanoo. <sup>11</sup> Anaamuru moo fannoo findifi nári ufakiqari qini qimaqimifaqa qinee siamma irianaara. Qinee mi fasiqanara aanaamuru fee qiana mifa qiniara aanaamuru fee qiannoo. <sup>12</sup> Innee Koorinti maqannaasa kaaqa Anutuna maraquna fannoo nimimari afeekanara kai firaagoo rimariasaa mariafanoo. Mi afeeka iriranakiqari maanara kai afeekaikaqa. Yisuna ufara suqimariasaa misara dadaaqiqa firaagoo uqeeree maria ainainnara kai nidinaqa uqeeraaqeera qidaqa.

<sup>13</sup> Faiqi moo fannoo maraqunannai aanaamuru ufakiqari qimannimidanoo narí faqa faiqi anaasee faqa sia irifanoo kafaqa Anutunara innaaru qinanoo moo afeeka aminanoo sia irimaria ufanakiqari qimarina anoona irisee quandasee kooroommasee kafaqa nári ufakiqari qimannimianaqa doo iriaqeera. <sup>14</sup> Maraquna fannoo dadaaqinaqa sia iria ufanakiqari innaaru qinanoo qini qimana fannoo kai kuqaa innaaru qiannoo qifa irirafa sia innaaru qiannoo. <sup>15</sup> Qinee minara naqi fee qianauree qinee maaqimminanura, qinee qeeqa qimana faqa qeeqa iriranannai faqa innaaru qianaara. Qinee Anutunara idi raidaqa qeeqa qimanannai faqa qeeqa iriranannai faqa Anutunara idi raanaara. <sup>16</sup> Innee Yisuna ufara suqimariasaa suqimarifanoo moo fannoo Anutuna maraquna fannoo aakinanoo narí amana fannoo kai aanaamuru ufakiqari innaaru qinanoo moo kaqiqee fasiqa fannoo ani marida iridanoo naqimasee mifa iriseenoo Anutunara mifa faqa eedoo qiannoo fee. Mifa ufa uqanna amana ani ufa oosanara iriannoo. <sup>17</sup> Ani Anutunara dufi dufi qira ufa amiqimasee qinanoo moo fasiqa fannoo sia amiqimasee irinanoo ani ufa fannoo sia mina dadaaqiannoo.

<sup>18</sup> Qinee Pauroosa maanara Anutunara dufi dufi qidaqa, qinee firaagoo moomoo kari inni fiqaramasee aanaamuru ufakiqari daadumai maridaqa innaaru qidaqa. <sup>19</sup> Yisuna ufara suqimariasaki suqidaqa qinee sia miqidaqa. Misaki maridaqa nári ufakiqari misa naamuqianee qidaqa moodaannai qisauku ufa kai amana kai qusa qimannimiranara dididanoo. Moosa ufakiqari misa sia iri maria ufanakiqari kisaqaqasaa qimannimianaqa sia irifoora qikooqaidanoo.

<sup>20</sup> Oo qini qikaqaafasaa sia inni irirafa faiqi aanaaqi iriranara foora mariani, faiqi firaasa iriranara foora mariani. Oosana oosana mandainainara minara kai inni irirafa faiqi aanaaqindiara foora nisakadiki qikairi siaisa mariaqa. <sup>21</sup> Tamummaqara fasiqauqa minara maaqi qimasee akara riqau.

Karaambaqaa qinoo qinee maa maqannaasa qimannimianaara.

Qinee aanaamuru ufa qimariasaa niqqaanaqa qimannimifaranoo.

Qinee aanaamuru nifaurunnai qimannimianaara.

Qini qiku qisauku aiqama mi ufana irisee nikooqainaqa sia irifaranoo.

Tamummaqara fasiqa ufa miqimminoo marifaqa qinee Pauroosa minara maaqi qidaqa.

<sup>22</sup> Qinee maraqunannai aanaamuru ufa qiranara maaqi qidaqa Yisunara sia irimariasa irisee minara kuqaa fee qiaqee qimasee náriara Anutuna narira ufa ameemaanai marianara iriaqera mi ufafa maridanoo. Yisunara doo irimariasara sia misarau maridanoo, doo misa iridaqa. Maraqunannai Anutuna ufa nári ufakiqari qimannimirafa Yisuna ufa irimariasa iriaqee ainaina maridanoo, mina ufa sia irimarinausa sia mina irifaranoo mina anoonara randee faranoo.

<sup>23</sup> Yisuna ufara suqimariasa aiqama suqusee maridaqa aiqamausa moodaa kari aanaamuru ufakiqari dapi dapi ufa qimarifanoo kaiqee fasiqa fee aamina fasiqa fee minaki ani keeqafiqa inniara furufari mariasee qimasee sandaannoo. <sup>24</sup> Aiqamausa suqidaqa Anutuna ufa nári ufakiqari nari qimami nari qimami qimarifanoo kaiqee fasiqa fee aamina fasiqa fee inniki keeqafinoo irinoo nari mandoosanara aundurai oonumafi iriannoo. Nari irinnufafa nari raquru amiannoo. <sup>25</sup> Nari mandirirafa aundurai kukeeqanoo marinafa aiqama kooroomambinanoo mifa anuka kummarammafinoo Anutuna amooqidanoo maaqi qiannoo kuqaa Anutufa maaqoo inni faqa maridanoo fee qiannoo.

*Yisunara suqiranaki andeeqaaqera qidanoo.*

<sup>26</sup> Oo qini qikaqaafasaaqaa, maa qinee gunna ufana anoona koorooianaura. Innee innaaru qiraree qimasee suqidaqa moo fannoo idi moo oosana araannoo moo fannoo naamuqaira ufa oosana araannoo, moo fannoo Anutunaindaraa ufa irisee qimannimianoo moo fannoo aanaamuru ufakiqari qimannimisainanoo moo fasiqa maraquna fannoo dadaaqinanoo mi ufana anoona kooroomannimianoo. Aiqama ainaina Yisuna ufara suqimariasa dadaaqirafa kai mariani. <sup>27</sup> Misa aanaamuru ufakiqari qimannimiani qimasee qaaraqanda kai fee qaaramoo kai findifinana moodaa moodaa fannoo kai qimannimiaqa, miqooqari moo fannoo misa ufa anoona nári ufakiqari kooroommasee qimannimiani. <sup>28</sup> Yisuna ufara suqiranaki koorooimarinna fasiqafa sia marinana sia aanaamuru ufakiqari qimannimiani. Nari kai nari aundurakiqari Anutuna faqa ufa qinafa amana nari kai qiani. <sup>29</sup> Qaaraqanda fee qaaramoo fee Anutufa ufa niminnana qifaqa aiqamausa suqimariasa irisee misa ufa raina rainmasee iriaqa. <sup>30</sup> Inni ufa suqiranaki faiqi moo fannoo ooqu marinafa Anutunaindaraa ufa marasainanoo ufa qimanniminnana fasiqafa ooqu marinanoo mifa findifi qimannimianoo.

<sup>31</sup> Innee aiqama amana Anutuna ufa qimannimiaqa moodaa kai moodaa kai findifidaqa amana qimannimifaranoo. Miqimandaifaqa aiqamausa misa irirana iriseeqa dadaaqirana mareefaranoo.

<sup>32</sup> Maraquna fannoo inni naakifaqa Anutuna ufa qimannimirana dadaaqirana nima-faqa sia dapi dapi furufariaqa innee inneeqa kai inneeqa nifauru naundurasa rakisi-mariasa marianara amiqimasee rakisiaqa. <sup>33</sup> Anutufa sia maasara dapi dapi furufari-ranaki mariaqera daarama quqeenoo asoaranaki andeeqasee mariaqera daarama nari ufa iriranaki quqeenoo. Anutuna ufara suqimariasa maaqanna maqana moodaa oosana qimannimifanaqa maree mariafaqa inni faqa qimannimidaqa. <sup>34</sup> Yisuna ufara suqiranaki anaasee sia findifi ufa qimannimiaqa, kaqi ooqufaqqee mariaqa. Yuda maqannaasa sandufamau kai fiqa faiqi ufa ameemaanai kai mariaqa. <sup>35</sup> Anaasee moo ainainara irararee qimaseenoo sia paamma qimasee iraannoo, kasooqaqeenoo maaqaki oonureenoo nari afaaqisaa iraannoo. Yisuna ufara suqiranaki anaasee findifi ufa qinafa asaurirafa mariannoo.

(Koorinti maqannaasa akaqausa Pauroona ufara sia anoona ufa fee qimasee nári iriranamau fimarufanoo Pauroofa minara maaqi qimasee qimanniminoo qinau.)

<sup>36</sup> Oo Koorinti maqannaasa Anutuna ufa fannoo innikiqari fee indaaru kambiqeenoo fee innee inneeqara maasa kai mareeunoo fee qidee. <sup>37-38</sup> Innikiqari moo fasiqa fannoo nariara Anutuna tamummaqara fasiqaqasee qimaseenoo fee maraquna qimimari afeekana faqaasee qimaseenoo fee mi fasiqafa qinee Pauroosa akara rumannimunnufanara kuqaa Anutuna naamuqaira ufa fee qinafa anoona mariannoo. Qini maa ufanara sia iridee qinafa innee minara unna qira fasiqa maridanoo fee qimasee mina ufa faqa sia iriaqa.

<sup>39</sup> Oo qini qikaqaafasaa Koorinti maqannaasa inneeqa Anutuna ufa faiqi anaasee qimannimiranara maraanauree qimasee afeekaikida mina mararara kai kadaapiruaqa, akaqausa sia irimaria ufanakiqari maraqunannai qimannimifaqa sia qaoo qiaqa. <sup>40</sup> Innee ufa suqiranaki iriranamau kai andeeqasee maqee maqee fuuqa.



## 15

*Yisufa kuqiranakiqari findifunara koorooidanoo.*

<sup>1</sup> Oo qini qikaqaafasaa ooqai qinee Pauroosa Yisuna amiqira fasaasa ufa qimannimi-afannana, innee mina irisee maqeeifanoo inni irirafa minasaa rusisoofa mapukinoo marinara inni naaqoo auqaidaqa. <sup>2</sup> Yisuna amiqira fasaasa ufa qimannimifannana, innee mina rakisi mapuku qumareeqa innaarunai asumu marirana maree mariafanoo. Abee innee indaaru kuqaa fee iri qee iqau unna qimasee iridee qifaara.

<sup>3</sup> Qinee sia qinee qeeqa ufa kaifau qimannimifannanau. Yisuna aiku asauku mariannaindari anu ufana firaagoo uriqarara ufa qimannimifannana. Mi ufana oosana maaqimminoo maridanoo. Asauku mundirafa tamummaqara fasiqauqa akarakinaa ufamau finoo maasa mandainanara kuquqimaqanau. <sup>4</sup> Kuqufufaqa misa mina iri akundamasoofanoo qaaramoo faasaana marinoo tamummaqara fasiqa akarakinaa ufamau finoo kuqiranakiqari findifinuu. <sup>5</sup> Findifufanoo Peetooroona afusaa koorooinoo miqooqari qisaukuqara taikaseenoo qikunni ooqu qaaraqanda mareenoo niqqaaninna fasiqausa aiqama nifusaa kooroofuqa qafaqau. <sup>6</sup> Qafamasoofanoo miqooqari nari ufa irimarusa faifa handareeta fasiqa anaasee moomoo uqanna nifusaa moodaa kari kai kooroo inau. Misauqakiqari akaqausa asooqaqee kuqufufaqa, moomoosa kaqi maridaqa. <sup>7</sup> Miqooqari Yisufa Yameesana afusaa kooroomambinoo miqooqari niqqaaninna fasiqausa nifusaa kooroomambinoo qimanniminuu.

<sup>8</sup> Inaaqianna uqanna qini Pauroosa qifusaa faqa koorooinuu. Qinee daaduma uqanna moo oosanaqari amaneendaraasa eedadara foora mariafanausa maridaqa Yisufa qini qifusaa kambiqooofaqa qafaqiafana. <sup>9</sup> Qinee Yisufa niqiqoo fasiqausakina ureeqarusa maridaqa. Qinee Anutuna ufara suqimariasa apurarana nimiafanausa marunnanara naqi fee ifaqee misa qiniara Yisufa niqiqoo fasiqafee qida fee, sia qinee misa nimana maridaqa. <sup>10</sup> Anutufa sia qini ureeqaranara irinoo kaqi nari afauaranannai qini mareeqeenoo nari niqiqoo fasiqausaki quqaqiseenoo ufa qimannimiannee afeeka qimufanoo sia qiniki mandaikinau. Qinee aiqama niqiqoo fasiqausa urinaaqaramasee faiqi aanaaseeki maqusa maqusa kadaapiriqa, sia qeeqa kaifau miqidau Anutufa qimu afeekafa qiniki kasinara miqidaqa. <sup>11</sup> Yisufa maasara kuqinoo findifunara qimannimunnufana akaqa niqiqoo fasiqausa nookinaanee iridee qini dookinaanee iridee, mi ufana kai maasa qimannimisaafanaqa minasaa inni irirafa rusinoo maridanoo.

*Maasa kuqiranakinaana findifuannanara qidanoo.*

<sup>12</sup> Maasa asauku mundirafa kuqiranakiqari findifunara maasa qimannimifanaqa innikiqari akaqausa naqimasee kuqirausara sia findififaranoo fee qida fee. <sup>13</sup> Kuqirausa kasooqaqee sia kuqiranakiqari findifirarifanoofau asauku mundirafa miqi kai inoofau sia findifu qini. <sup>14</sup> Ooqai asauku mundirafa kuqiranakiqari sia findifinaqau maasa qimannimira ufafa sia marinaqau sia qimannimunaqini, innee inneeqa irirana rusimiri ainainafa sia mariqini. <sup>15</sup> Kuqirausa kuqiranakiqari sia findififanoofau asauku mundirafa faqa sia findi fiqini. Anutunara asauku mundirana kuqiranakiqari uqeere maqi qiafannanara kuqirausa kuqiranakiqari sia findififaqau maasa qimannimifanna ufanara unna ufa fee qini. <sup>16</sup> Kuqirausa sia findi fifaqau asauku mundirafa faqa sia findifiqini. <sup>17</sup> Asauku mundirafa kuqiranakiqari sia findifinaqau inniqa saqarikirafa kai fifau ainanara foora sia mari ainainnaki faqa innee inneeqa mandainainaki kaqi auiamakifau furufarammiqini. <sup>18</sup> Kuqirausa kuqiranakiqari sia findififaqau moomoosa asauku mundiranasaa irirana rusisaida kuqimariasa sia innaarunai fini auiamakifau furufariaqini. <sup>19</sup> Maasa maaqoo marunna kamuqoora kai iriseefau asauku mundirana minasaa irirana rusidau, maasa mandainaina firaafa mariqini, aiqama maqannaasa maqa afaaqasasa mariasakiqari maasa dinee teeroo uriqaranoo mariqini.

<sup>20</sup> Anoonu ufa maaqimminoo maridanoo. Doo kuqaa asauku mundirafa kuqiranakiqari findi finuu, mina findifirafa maasa kuqirausa findifirana qima afeekaikidanoo mapukidanoo. Doo kuqaa maridanoo. <sup>21</sup> Ooqai indaaru moodaa fasiqannai kai kuqirana kambiqanau, miqi kai inoo moodaa fasiqannai kuqiranakiqari findifirafa kambiqanau. <sup>22</sup> Maasa aiqama fasiqa anaasee Adamana faiqi namu marunnanara kuqidaqa, miqikai inoo asauku mundirana faiqi namu marianara Anutufa misa kuqiranakinaana uqeera quqaannoo. <sup>23</sup> Sia dapi dapi Anutufa kuqiranaki uqeeraanoo andeeqaseenoo mara findifuannoo, asauku mundirana naaree doo mara findifumaqoofanoo maridanoo miqooqari mifa quminna aukunaa mina aiku asauku mareeqee findifuma nimaqaannoo. <sup>25</sup> Anutufa nari asauku mundirana mapuku amaqaaseenoo qimaminuu. Anee aiqama ainainasaa rakisimaree fimarinaqa qinee Anutusa aiqama namuqaa afaannainaina mareeqeeqa ani asauku mundirana aramandunnai quqasaanana anee maqa mammaaqai radamusainaaqaa kaifaa rakisianaaranoo. <sup>26</sup> Inaaqianna radamuaninna namuqaafa

kuqirafa maridanoo mina faqa radamuannoo. <sup>24</sup> Miqoo taikarafa kambiqaannoo Asaaku mundirafa afaannauqa uriqararasa faqa misa faiqi firaasa faqa misa afeeka fasiqauqa aiqama mareeqeenoo nari aramandunnai quqaseenoo radamuseenoo nari ququsakinaasa aiqamausa mareeqeenoo nari akoona amianoo.

<sup>27</sup> Tamummaqara fasiqausa akarakinaafa minara maaqimminoo maridanoo. Anutufa aiqama ainaina mina aramandunnai kai quqaannoo fee qidanoo.

Tamummaqara fasiqa minara miqi qimasooafa qinee minara maaqi qidaqa. Anutufa aiqama ainaina mina aramandunnai quqararee qidanoo sia nariarau mina aramandunnai quqararee qidaqinoofau. <sup>28</sup> Anutufa aiqama ainaina mareeqeenoo asaaku mundirana rakisirana ameemaanaai quqasainanoo asaaku mundirafa mina amaaku fannoo quandaki Anutuna aramandunnai nari keeqaannoo, aiqama ainaina quqoona aramandunnai keeqafinanoo miqooqari Anutufa aiqama ainainatia uqanna uriqararafa mariannoo.

(Pauroofa maru aukuanna faiqi moo fannoo Yisuna ufa irimarufa sia nammari mararai kuqufufanoo moo fannoo qaara kari nammari maree marinau. Mifa nariara faqa kuqunara faqa maree marinau. Mi aukuanna mi oosannara Pauroofa qimannimirara maaqi qinau.)

<sup>29</sup> Inni Koorinti maqannaasaki kuqirausara nammari maree marusara misara naqi fee qianauree. Kuqirausa kuqiranaki sia findifuafa qinee nanaree fifau misaree qimasaida fifau nammari maraidee. Innee yanee dadaaqidee miqidee. <sup>30</sup> Maasara faqa iriaqa maasa Yisuna ufa saara aiqama faasaana moomoo kari aupurarana narirana eerairirana maraيداqa. <sup>31</sup> Qini qikaqaafasaa, qinee aiqama faasaana kuqiranara aniraannoo qidaqa eerairidaqa. Qinee sia kaiqeesa maana kooroidaqa. Innee maasa karaambaqa asaaku mundirana Yisunaki fimiranara nimooيداqa minara kai kooroomannimidaqa.

(Pauroona aukuana Roomma maqannaasa sia Yisuna ufa irimariasa nari oosana maraيداqa faiqi anaasee qafaifanoo adiafaa ianifee qimasee ooni faandamuraki faiqi faqa kaasau aanda faqa mara quqasoofaqa rakimariqau. Yisuna ufa irimaru ufafa taikaanifeera mara quqasoofanoo kaasau aanda naru neemarinau. Pauroofa minara iriseenoo Koorinti maqannaasa qimannimidanoo mina kikiqusimarinau. Koorinti maqusanaasa maa ufana qimanniminoo qinau.)

<sup>32</sup> Qinee Pauroosa Efeesusa maqusai kaasau aanda foora marufaqa misa faqa rakimariqiafana. Kuqirausa sia kuqiranakiqari findiffaqa qinee maaqoo Efeesusa maqusai mi fasiqausa faqa rakidaqa nana ainainee maraanauree qimasee misa faqa rakiqiafana, fifau maaqoo maria fasiqaanaaseesa qiqafaqee qimasee fee rakiqiafana. Oo sia miqi qiafana. Kuqaa kuqiranakiqari findi fuanauree qidaqa miqi qiafana. Faqiqi firaasa unna ufa moo minara maaqimminoo maridanoo. Duna maasa kuquannanara maqee narana nammari moomoo naa. Qinee Pauroosa minara maaqi qidaqa. Kuqirausa kuqiranakiqari sia findiffaqaqau anoonammifooqini, findiffaranoo unna qimariafanoo.

<sup>33</sup> Innee sia mi unna ufana iriaqa,

Moo amaana ufa minara maaqi qidanoo, Mandoosana maree maria agoondisa inni marirana putaamma nimaqefaranoo.

<sup>34</sup> Innee Koorinti maqannaasaki akaqausa kuqirausa sia findifi maria ufana qimariasa inni putaamma nimaqaiifaqa innee misa mandoosana maraseeqa furufarirana maree mariafanoo. Innee mina minnisee kafia andeeqara irirana marasee inneeqa mandoosana quqasee andeeqaramau fuuqa. Inneeqa nisauruqaqau innikiqari akaqausa Anutuna afeekara sia amiqimasee iri marifanoo kaqi meeramau irirana irimariafanoo.

*Maasa kuqiranakiqari findifuanna qifaaqanara qidanoo.*

<sup>35</sup> Inniki moo fannoo kuqirausa findi firanara maaqi qianoo, kuqirausa doo putaaminoo maridanoo naqimasee fee findi fifaree, nana afaaqee findi fuannoo fee. <sup>36</sup> Anee furufarimarianafa mi ufana qimariananoo. Anee nandi ummaqusainanoo sia aqee kambiqaannoo mifa putaa mambinanoo mina uapaqi fannoo inaaqiana kambiqaannoo. <sup>37</sup> Innee sakuma qaqama fee moo narana qaqama fee ummaqidaqa sia narana faqa amanee faqa ummaqi mariafanoo qaqama kai ummaqi mariafanoo. Ummaqusaafanoo sia qaqama kai kambiqaaidanoo narana anoona namufaqa amanee namufaqa kambiqaifaqa qafee mariafanoo. <sup>38</sup> Anutufa nari iriranannai aiqama aadu aadu qaqama nari aadu aadu kambiqaaninnana anoona namufaqa amanee namufaqa nimidanoo. Anutufa aiqama qaqama andeeqasee nari kai anoona amidanoo.

<sup>39</sup> Kasimari ainaina nimaqi miqi kai idanoo sia aiqama moodaa nimaqi faqaasa maridaqa. Faqiqi moo nimaqi faqaasa maridaqa aanda moo nimaqi faqaasa maridaqa, ufini moo nimaqi faqaasa maridaqa, noodaanna moo nimaqi faqaasa maridaqa.

<sup>40</sup> Innaarunaindaraa nifaafa faqaasa faqa maqasaaqaraa nifaafa faqaasa faqa aaduma maridaqa. Innaarunaindaraa nifaafa areenarafa moo maridanoo maqasaa qaraasa nifaafa areenarafa moo maridanoo. <sup>41</sup> Suani afu narí areenarafa aaduma moo maridanoo, quqoona narí areenarafa aaduma moo maridanoo, fasau narí areenarafa aaduma moo maridanoo, fasau misaki faqa aadu aadu areenarafa maridaqa.

<sup>42</sup> Kasooqaqee kuqirausa kuqiranakiqari findiffanoo miqiminoo mariannoo. Faiqí anaasee kuquffifanoo mina iri akundee mariafa maqasaaqaraafa maqa maridanoo. Kuqiranakiqari Anutufa uqeerasainanoo mi afaaqafa naaru naaru marira afaafa mariannoo. <sup>43</sup> Nikundee mari nifaafafa ummooqukidanoo mandaikidanoo, kasooqaqee kuqiranakiqari Anutufa uqeerasainanoo afu qafainanoo idaaqirafa amiqirafa afeeka mariannoo. <sup>44</sup> Nikundee maria nifaafafa maqasaaqaraa nifaafa ufaasu marifa maridanoo. Anutufa uqeerasainanoo naaru marianinna innaarunai nifaafa mariannoo. Maqasaa nifaafa ufaasu nifaafa maqoo mariana amana kai marifa maridanoo. Mifa marinanoo innaaruna naarara marira nifaafa amana kai marifa kuqaa mariannoo.

<sup>45</sup> Tamummaqara fasiqauqa akara minara maaqimminoo maridanoo. Indaarugaa fasiqa Adamafa kasimaruna auquqoofa marinau.

Qinee Pauroosa minara maaqí qidaqa. Adamana aanaaqiannaa fasiqa Yisufa maqee marirana faqa naaru marirana faqa nimimari maraqunafa maridanoo. <sup>46</sup> Sia naaru marirafa naaru kambiqaaidanoo maqasaaqaraafa naaree kambiqaaidanoo, miqooqari kai naaru marirafa kambiqaaidanoo. <sup>47</sup> Indaarugaa Adamafa maqasaaqaraa kookoomanai auqirafa marinau. Inaaqianna Adamafa Yisufa innaarunaindari quminau. <sup>48</sup> Maqasaaqaraasa nári nikoona Adamana fooqaasa maqa nifaafafaqaasa maridaqa. Innaarunai fimariasa innaarunaindaraa fasiqa Yisuna afaaqaikirausa marifaranoo. <sup>49</sup> Maqee maasa maqannai auqira fasiqa afaafa afisiqa moodaa karammiqa maridaqa kasooqaqee maasa miqikai masee innaarunaindaraa fasiqa afaafa afisusee miqí kai iqa moodaa karakaimmianaura.

<sup>50</sup> Oo qini qikaqaafasaa qini Pauroosa ufa anoona maaqimminoo maridanoo. Faiqí nimaqí faqaasa faqa fidika faqaasa faqa sia Anutuna ququsaki keeqafifanoo naida nimiannoo. Ufaasu maqasaa ainaina faqa sia amana naaru marirana maraannoo.

<sup>51</sup> Innee amiqimmandee iriaqa, kukeeqara ufa qimannimianaura, maasa sia aiqama kuqanaura. Qusasaa uqanna Anutufa tautumaqimmaqaseenoo maasa moo kamaakamma qimaqaannoo. <sup>52</sup> Nifu tasunduna tasunduna kaqí kaqí idanoo miqirafa kai inaaqianna ufireena fannoo fuuqaainanoo Anutufa maasa moo kamaakamma qimaqaannoo. Mi ufireenna fuuqaainanoo kuqirausa minakiqari naaru marira nifaafa faqaasa findiffanoo maasa aiqama moo kamma qimaqaannoo. <sup>53</sup> Ufaasu maqasaa nifaafa faqa sia kaqí ooru fifaranoo naaru marirana naaree afisumareeqa ooru fifaranoo. Kaqí mariasa kuqifandinausa misa afeeka nipata naaree afisumaree amana innaarunai ooru fifaranoo. <sup>54</sup> Ufaasu maqasaaqaraa nipata faqaasa kuqifandinausa naaru marira nifaafa sia kuqimaria nifaafana afisumareeqa doo miqoo ooqeenaa akara anoona kambiqaannoo. Misa maaqí qiqau.

Anutufa doo kuqirana aiqama nambiqama taikaseenoo mina uraaqaranoo maridanoo. Kuqirana rafaafafirafa doo taikkeenoo.

Kafaa moo akarakinaa ufa minara maaqí qidanoo.

<sup>55</sup> Oo kuqirafa maasa rafaafafimarianafa ani uriqarara afeeka yaifee maridanoo. Doo taikkeenoo.

Oo kuqirafa ani aupurara afeeka maasa qimimarianafa yaifee maridanoo. Doo taikkeenoo.

<sup>56</sup> Akara miqinoo marifaqa qinee Pauroosa minara maaqí qidaqa. Maasa aiqamausa mandoosana fannoo kai aupurara afeeka kuqirana amifanoo doo kuqirafa maasa daridanoo. Kafaa mandainaina fannoo mina narira afeeka Anutuna nimaarusira sandufakiqari kambiqaaidanoo. <sup>57</sup> Oo Anutufinnai dufi dufi qidaqa. Maasa inni saimbaqa karaambaiga asauku mundirana Yisunannai kuqirana faqa mandainaina faqa maasa uriqaraqa maridaqa.

<sup>58</sup> Oo qini qikaqaafasaa doo minara iriseeqa sia kasi kasiqa mapukuseeqa atukaraqa mariaqa. Karaambaiga marirana nirana mariana maqee maqee minaki kai noori runusee mariaqa. Karaambaiga marirana niranaki marianara aiqama saika naaru marira anoona marifa maridanoo karaambaiga marirana nirana sia moo fannoo anoona siaifa maridanoo. Anoona marifa kai maridanoo.

## 16

*Anutuna ufa irimariasa sarauqinana dadaaqiranara qidanoo.*

<sup>1</sup> Oo Koorinti maqannaasa innee Yudeea maqa maaqaki Anutuna saika maree mariasa narana sarauqi marianara munnimma kaqi nimiranara qini irafaqa minara inni qimannimidaqa. Qinee Karatia maqa maaqaki Yisuna ufara suqimarusa qimannimafannaqoo miqoo kai fuaqa.

<sup>2</sup> Aiqama amaana faasaanasaa aiqama fasiqa anaasee akaqa munnimma aaduma raina quqaqa. Nari ainainirana akiqara munnimma fraana marainafa mina amana kai kaqikaana quqaani kaqikaana marainafa doo nari maraina amana kai kaqikaana quqaani, qambaana amana marainafa doo mina amana kai quqaani, innee aiqama amaanasaa amaanasaa miqikai idafa raina quqeesaifanoo innooqafinaqa qinee inni maqsai oonuraanna kari munnimma suqirana sia mariani doo faasai suqinoo mariani. <sup>3</sup> Innee maqee andeeqara fasiqauqa mara quqasaifaqa qinee oonuraanaqa mi munnimmana faqa pasakina akara rumasaanaqa misa mi pasana faqa mi munnimmana faqa mareeqa Yeerusareenni muru kaqi nimiaqa. <sup>4</sup> Innee qiniara faqa ooru fuannee qifaqa qini faqammooru fifaranoo.

*Pauroofa nari fuaninnanara tipundaaridanoo qimannimidanoo.*

<sup>5</sup> Qinee maaqooqari Maseedoonia maqa maaqakina oonuree aniree iqa ninii taikasee innee mariannai fuanaura. <sup>6</sup> Inni maqsai oonureeqa kaqi kaaqoo kisaagasaa inni faqa marianauree, aukuaana aiqaramafinaqa qambaanasaga suara aukuaana qaaramoo quqoono inni faqa marianauree. Doo miqooqari moosaa fuanaura yaifee fuaauree maqee sia iridaqa. <sup>7</sup> Karaambaiga eedoo qinnanara kaqikaqoo kisaagasaa inni faqa marianauree qidaqa. Miqoo inni fi inni nindafee firanara qidaqa.

<sup>8</sup> Qinee maqee Efeesusaa maqsai kaqi marianauree. Yeerusareenni Yuda maqannaasa qoomaqa suganee maru quqoonafa anirainafa qinee minasaa Efeesusaa maqsaindari Maseedoonia maqa maaqaki ooree minni oonuree aniree masee miqooqari innee iannai Koorinti maqsai fuaauree qidaqa. <sup>9</sup> Maqee Efeesusaa maqsai maaqoo firaa saika anoona saika maridanoo, moomoosa qini ufa ititee mariasa mariafaqa saikidaqa.

<sup>10</sup> Qinee Timootinara qimannimianaura, mifa inni maqsai oonurainafa innee mina amiqi amiqimasaifanoo afaaqa quqaani, mifa qini daanna ree marifa karaambaiga ainainiranaki marifa maridanoo. <sup>11</sup> Timootifa Yisuna ufa irimariasa qini qikaqaafasaa uqa saimbaqa mootinai aiqugaqi mai aniraree qimasee inni maqsai naaree anireenoo mai qinee minara rakisi marunnannai Efeesusaa maqsai anianifeera qidaqa. Innee Timootinara kumaaraa fee qimaseeqa sia minara nikoo nikaq iqaq amiqimmandee dadaaqifanoo asoaranakiqari findifinoo mai aniani.

<sup>12</sup> Doo maqee maasa qikaqa Apooroosana qianauroo. Qinee innee iannai qikaqaafasaa uqa faqa namummaqee fiqa anianneera qidaqa fuki faaki qunanoo sia fidanoo ititammasee kaqi maridanoo maqee sia fuaauree sia andeeqara aukuanee qidanoo. Kasooqaqee andeeqara aukuaana kambiqafinanoo fuannoo.

*Pauroona taikarana ufa.*

<sup>13</sup> Inni Koorinti maqsanaasa maqee maa ufana qimannimianaura. Innee maqee maqee afarida mariaqa, innee Yisuna saqarikiranaki minaki mapukufina kikiqam-mambuaqa innee maqee maqee paasoosida mariaqa, afeekaiqiqa mariaqa. <sup>14</sup> Inneeqa maridaqa aiqama nirana marirana nimuqusi marinaqa nari dadaaqi nari dadaaqi qiqanuaqa.

<sup>15-16</sup> Innee Sateefanasana faiqi anaasee aiku asukuara irimariafanoo, misa Akaia maqa maaqakiqari oosanasaa Yisuna saqarikusa mariasa maridaqa. Misa Anutuna ufa irimariasa ainainamma nisee mariasa maridaqa, nari faiqi anaasee faqa nari marirana minaki kai nifaqa quqasee auqaidaqa. Oo qini qikaqaafasaa uqa inni qimannimidaqa. Miqinna fasiqana aanna reeqa mina ufamau fuaqa, akaqausa misa dadaaqimariasa misa ufamau faqa fuaqa.

<sup>17</sup> Mi fasiqafa Sateefanasafa faqa Fooratunatusafa faqa Akaikusafa faqa misa mai aniroofaqa nindafaida asasiqafana, misara inni Koorinti maqsanaasa ani ani anireera foora qufaqa asasiqafana. <sup>18</sup> Misa inni asarana nimimariandee kai iqa qini qimiqau. Miqira fasiqauqara aiqamausa iriaqaana.

<sup>19</sup> Asia maqa maaqaki Yisuna ufara suqimariasa misa inni nimandaidafa. Maaqoo Akuirafa faqa nari anaqa Pisisikira nammarifa faqa nari maaqaki Yisuna ufara suqimariasa faqa inni firaqoo amiqimmandee Yisuna ufa irimariasara foora inni nimandaidafa. <sup>20</sup> Maaqoo mariasa Yisuna ufa irimaria qikaqaafasaa uqa faqa inni nimandaidafa. Innee nariara nariara nikaqafasaa fee qimasee nari amooqee nari amooqee iqa.

<sup>21</sup> Faiqi moo fannoo qini dookinaana iriseenoo maa pasana akara rinau, maa qusa ufana atisaa qeeqa qisaukunna akara ruanaura. Qinee Pauroosa inni nimandaidafa.

<sup>22</sup> Karaambaiqara sia amuqusimarinafa aqurarara ufa minasaa mariannoo. Nári ufakiqari maranata, maasa ufakiqari maasa karaambaiqa qumuannee qidaqa.

<sup>23</sup> Karaambaiqa Yisufa narí afaarira oosana inni faqa nimiani.

<sup>24</sup> Maasa aiqamausa asauku mundirana Yisunaki mariasara irisee qini qimuqusirafa inniki mariani.

## 2 KOORINTI

### Pauroofa Koorinti maqannaa inaaqiannaa ufa akara rumannimaqoo ufafa.

<sup>1</sup> Anutufa qufafa qinee Pauroosa asaku mundirana Yisufa niqiqoo fasiqausaika-mambi marunausa maridaqa. Qinee qeeqa qikaqaafasaa Timootisandiri maa akarana rumannimaqeeqa. Innee Koorinti maqannaa Anutuna ufara suqimariasa faqa aiqama Akaiia maqa maaqaki Anutuna ufa irimariasa faqa inni aiqama nimandaidaqa.

<sup>2</sup> Anutuna asaku mundirana maasa karaambaiqa Yisuna faqa nari akoonaa Anutuna faqa miqanda amiqi amiqira afaarirana faqa naundura asoosarana faqa inniki mariani.

*Pauroofa Anutuna dufi dufi qimamaqaaidanoo.*

<sup>3</sup> Asaku mundirana innisaimbaqa karaambaiqa Yisuna akoofa Anutufa minara maasa aiqamausa dufi dufi qimamaqaaga, innisaimbaqara amuqusimari qikoofa innisaimbaqa qifaueemarifa maridanoo, aiqama dadaaqirafa mifinnaindari qumimarifa maridanoo innisaimbaqa mina kai dufi dufi qimamaqaaga. <sup>4</sup> Innisaimbaqa qeeqa daundura ummaarakai marunnana Anutufa mi ummaaranaki dadaaidanoo. Innisaimbaqa oosana oosana ummaarakai mariasa Anutufa innisaimbaqara misa dadaaqiaqee qimaseenoo innisaimbaqa naaree dadaaqinau. Misa dadaaqidaqa Anutufa innisaimbaqa dadaaqirana qimuna mina kai maasa qumaree quandaki minannai dadaaqidaqa. <sup>5</sup> Asaku mundirana moomoo apuraranaki marufafa maasa faqa minaki marunanoo apurarana maasa faqa naida qiminoo. Miqi kai inoo asaku mundirafa nari dadaaqirana faqa firaqoo maasa naida qimifaqa.

<sup>6</sup> Maasa Yisuna ufaasara apurarana maraيداqa sia fifaufau maraidau, inni dadaaqirana faqa innaarunai asumu marirana maraaqeeru apurarana maraيداqa. Asaku mundirafa maasa dadaaqifaqa maasa minasaqaraana qumaree inni faqa dadaaqidaqa. Innee maasa maroo apurarana maraseeqa minaki ubiqafiqi maraqa fuaqeeru dadaaqidaqa. <sup>7</sup> Innee maasa apurarana ati maroondee kai iqa maasa Yisufinnaindaraa dadaaqirana ati faqa mareefaranoo. Maasa minara iriseeqa maasa irirafa innisaa mundinoo maridanoo sia minnisanaanoo maqasaa aqufuanoo.

<sup>8</sup> Maasa Asia maqa maaqaki fiqii fiqii imariafananoo firaa apurarana qimufaqa minara inni naaqoo auqaida qimannimidaqa. Mi apurara firaqoo ummaara qimufaqa maasa doo maqee kuqirarammidaqee qiafannana. <sup>9</sup> Maasa misara kuqa darira ufa doo qima afeekaikiaafoo qunaqa sia daria. Mi qimaarusirafa sia fifau kambiqeenoo Anutufa qumee dadaaqunara miqimmasoofaqa sia qinee qeeqara afeeka fasiqafee qianura qeeqa iriranara Anutunasaa kai munduanifee qimaseenoo qumee mi qimaarusiranara kambiqaanifee qufanoo kambiqanau, kuqiranakinaana uqeeree marifa dadaaqufaqa minakiqari maridaqa. <sup>10</sup> Mifa firaa qimeekaranakinaana maasa uqeereeqee qisaifaqa maridaqa kaffaa miqi kaimmiannoo. Mifa kaffaa maasa minakinaana uqeereeqeenoo quqaqisaifaqa sia rufaida minara irirafa minasaa rusinoo maridanoo. <sup>11</sup> Miqi marinara innee moomoosa maasara innaaru qifanoo Anutufa maasa amiqi amiqima qisainaaqqa moomoosa mina qafamasee quandaki Anutufinnai dufi dufi qifaranoo.

*Pauroofa Koorinti maqusai fuanee qimasee tipundaaramaseenoo minnisanaau.*

<sup>12</sup> Oo Koorinti maqannaasa maasa maqusa maqusa nidaqa inni faqa mariafananoo qini daakirafa irirafa maaqimandee qimaqimidanoo. Maasa inni faqa mariafananoo sia faiqi irirafa maasa uqaqifiqanau. Anutufa dadaaqufaqa narikinaana akoofaa anoona ufa faqa noori runusee auqarafa faqa, Anutuna afaarira amiqi amiqira afeeka faqa mifauga kai rakisiqimaqee marifaqa inni faqa maridaqa minara maasa irisee nasuridaqa. <sup>13</sup> Maasa innee asaana rimariana faqa irimariana faqa amana kai akara rumannimaqidaqa. <sup>14</sup> Maqee innee akaqainaina innee sia amiqimmasee irimariafanoo. Mi ainainasara amiqimasee iriaqeeru dididanoo. Innee mi ainainasara amiqimasee iriseeqa, karaambaiqa Yisufa qumuaninna faasaannasaa maasa inniara nasurifandinandee kai iqa innee maasara nasurifaranoo.

<sup>15</sup> Qinee minara iriseeqa kuqaa kambiqannoommifoo qimasee qaara kari inni maqusai oonuree qaara kari idaaqamannisararee qimasee sia fiqa. <sup>16</sup> Qinee maindari Maseedoonia maqa maaqai fidaqa innee iannai fi ninda fee firaree qiqa kaffaa mindari anidaqa ai nindafararee qimaseeqa sia fiqa sia nindafeeqa. Yudeea maqa maaqai ooru fidaqa inni dadaaqirana maraanaaree qimaseeqa innee iannai sia fiqa. <sup>17</sup> Qinee firara qunnanara innee qiniara furufarirafee fee qidee, innee qiniara nari aidiramau kai fidanoofee fee

qidee qinee innee iannai firara gunnanara innee qiniara qaaraiki marifee fee qidee.  
<sup>18</sup> Anutuna afusaa marida innee iannai firara sia qaara irirafa qiniki maridanoo.

<sup>19</sup> Asaaku mundirafa Yisufa Anutuna amaakuara Sirasifa faqa Timootifa faqa qinee Pauroosa faqa qimannimimarunnana sia mifa qaara irirana faqaafa maridanoo, mifa Yisufa maqasaa fasiqa maasara sia qaara ufa qimarifa eedoo kai qimarifa maridanoo.  
<sup>20</sup> Mifa kai Anutuna moomoo ufa maasara qima afeekaikamasee mapukirafa maridanoo. Minara faiqi anaasee Anutunara amooqida innaaru qidaqa asaaku mundirana Yisunannai maasa Yisuna ufa irimariasa aiqamausa eedoo qimasee inni dadaaqidaqa.  
<sup>21-22</sup> Anutufa narí uqanna inni saimbaqa asaaku mundiranaki marinara dadaaqifaqa innisaimbaqa minara kuqaa anoonee qidaqa. Mifa innisaimbaqa narí saikaki mara quqararee qimaseenoo narí asaaku innisaimbaqasaa munduseenoo utaaqamaseenoo naríndi fee qimaseenoo narí naaquqara andeeqara mara quna maasa qimuqusa ooki quqaseenoo kasooqaaqee innaarunai nimira ainaina ati kai maqee uqannifiqaidanoo kasooqaaqee innaarunai anoona firaana nimianoo.

<sup>23</sup> Qinee Anutuna afusaa maridaqa mifa qini qimuqusaki irimarifa marifaqa sia unna qimasee maaqi qimasee qimannimianaura. Qinee Asia maqa maaqai oonuree aniree masee inni Koorinti maqannaasaki sia fiqa. Nisaurirana nimianoo qimasee qeeqa kai sia fiqa. <sup>24</sup> Maasa sia inniara miqimmasee maaqimmasee qiaqee qidaqa doo innee mapukusee Yisuna saqarikiranaki mariafanoo, innee sia nisaurirana maraaqera asasiranaki mariaqera dadaaqidaqa.

## 2

*Pauroofa Koorinti maqannaasa noori runifoo qimasee sia finau.*

<sup>1</sup> Qeeqa irirana maaqi qimasee iriqa. Sia qinee nisaurirana nimiga misiannai kaifaa fuannee qiga. <sup>2</sup> Qinee nisaurirana nimiananoo yafee quandafi asasirana qini qimiannoo fee sia moo fannoo asasirana qimiannoo qiga ufasaara noori runimariasa kai maridaqa aigama noori runusee marifoora.

<sup>3</sup> Minara qinee mi pasana akara rumannimaqeeqa. Qinee qini asasamma qisainausian-nai oonureeqa noori runirana nimianoo qimasee pasa kai akara rumannimaqasanaqa innee inneeqa aqara oosana andeeqasaifaqa qinee ooruraanaqa innee asasiranaki marifanoo innee qini qifaqa faqa asasifaranoo. <sup>4</sup> Qini qimuqusa firaqqoo uqanna inniara qimuqusifaqa ikiraqaidaqa akara rumannimaqeeqa, sia inni nifaqa rumbaani-ifeera akara rumannimaqeeqa qeeqa firaqqoo inniara qimuqusinara iriaqera akara rumannimaqeeqa.

*Koorinti maqusai Yisuna ufara suqimariasaki moo fannoo firaqqoo mandoosana maroonara Pauroofa mina mandainaina numoo minnisaanee qinau.*

<sup>5</sup> Inni Yisuna ufa irimariasakiqari faiqi moo fannoo narí aqaranannai inniki moomoosa nifaqa rumberana niminau sia qifaqa rumberana qini qiminoo inni nifaqa rumberana nimaqifaqa qinee nisaurirana firaana nimianoora minara sia nifaqa ritianauranoo. <sup>6-7</sup> Doo innee moomoosa aqaqqoo fasiqana Yisuna ufara suqiranakiqari aiqamasoonaa arirafa doo amanaikamambinoo doo narí mandainaina minniseenoo doo innee mina mandainaina akiaqara minni aisasee idaaqamaqaaqa, innee sia miqifanoo firaqqoo akooqainanoo Yisuna ufa minni uqannaseenoo kaasau uqaandoora. <sup>8</sup> Inneeqa mi fasiqanara kuqaa nimuqusianara oonu qimamifanoo iriani.

<sup>9</sup> Minara kai qinee mi akarana rumannimaqeeqa. Qinee inniara naamua qunna ufana irifaree sia fee irifaree qimasee nimanamandee qafarara pasa akara rumannimaqeeqa. <sup>10</sup> Innee Koorinti maqannaasa mi fasiqana mandainaina akiaqara minnisee moodaanaki kifaqa qinee faqa mina mandainaina minnisee mina faqa moodaanaki kianaura. Innee moo mandainaina mandaikamma qimaqqoonara qinee inni minniseeqa, mikari moo mandaikamma qimaqqau fee sia fee miqimma qimaqqau fee minara qinee asaaku mundirana afusaa marunausa inniara irisee minnisaidafaqa. <sup>11</sup> Maasa Sadannana mandiriranara iridaqa mifa maasa uridaaqaraandoora mandainaina maraana akiaqara minniseeqa kafa moodaanaki kifaqa.

*Pauroofa Taroosa maqusai Tisananara oonu mafi iridanoo afeesimarinau.*

<sup>12</sup> Qinee Pauroosa Asia maqa maaqaki fiqo fiqo idaqa Taroosa maqusai oonureeqa asaaku mundirana amiqira fasaasa ufa qimannimiraree qiafananoo Karaambaqaa faasai kooqi atuqqeenoo maqi inoo marufaqa mi maqusanaki saika amiqimasee firaqqoo uqeraqiafana. <sup>13</sup> Miqqoo maridaqa maasa qikaqaafasaa Titusafa inni maqusain-dari ani ifoo qimaseeqa randaqafa sia paquriafananara qimuqusa mandaikufafa miqqoqaraasa nimandamasee Maseedoonia maqa maaqaki minara randarara fiqiafana.

*Asauku mundiranannai maasa rakiranara foora uriqararawsa maridaqa.*

<sup>14</sup> Oo Anutunara dufi dufi qiaqa. Innisaimbaqa asauku mundirana faqa moodaanaki kamambi maridaqa minaqiqari Anutufa narí narunakinaana Anutuna asumu firira foora innisaimbaqa nifiqee asauku mundiranara kaanina mareeqa idireeqa maree maqusaira foora miniqaasa rakiranara foora uriqararawsa maridaqa. Miqooqari innisaimbaqa Anutufa mareeqeenoo asauku mundirana ufa amiqira afundara foora nimifaqa aiqama aanaamurunni daraaniga qimannimiga nidaqa.

(Ooqai Pauroona aukwana Roomma maqannaasa sundiauga faqa misa karaambaiguqa faqa namuqaa maqusi oonureeqa misa naruseeqa misa ainaina faqa faiqi kaakadi narirawsa rumbamareeqa nariqa maqusi nifiqamaree fiqau. Nariqa maqusa adeedi oonureeqa padi mafufaqa nári indaaru fiqa rumbaqaosa ootupa ootupa rumbara rumbaseeqa nifiqee narirara maqusa qambaana narirara nifiqee fiqau. Rumbarawsa ninaaqiana afundi maru ainaina ida muquru mareeqa fimarufanoo mi afundafa misa qambaanama afundi marinau. Mina anaqiana sundia firaafa Karaambaigu misa sufafaqa maree finau. Rumbaqaosa mi afundanara maasa kuqunna afundafa qidanoo fee qiqau. Sundiauga faqa kaiqeesa faqa mi afundiranara amiqira afunda fee qiqau.)

<sup>15</sup> Pauroofa minara iriseenoo Koorinti maqannaasa nariara maaqi qimasee qimanniminau. Maasa faiqi anaasee qambaana fidaqa asauku mundirana ufa amiqira afundara foora uqirawsa nidaqa akaqausa mi ufana irimariasa asumu mariranaki fifaranoo, akaqausa mi ufana sia irimariasa kuridiranaki fifaranoo. <sup>16</sup> Kuridiranaki fifandinausa mi ufana mi afundirana udiramasee faiqi kuqa narimaria manda afundanafee qidaqa. Asumu mariranaki fifandinausa mi afundana udiramasee naaru marirana maree maria afundane qidaqa. Minara irisee nana irirana faqaa fee maa saikana amanaikiannoo fee. <sup>17</sup> Maasa amana mi saikana maraanaura. Akaqausa Anutuna ufara fifau oorudupira ainanee qimasee minasaqaraana manda munnimma maraidaqa. Miqi qimariasa sia mi saikana amana mareefaranoo. Maasa sia misa naanna raidaqa. Anutufa maasa mi saikanaki diqiqoosa marunnaara mina afusaara foora maridaqa asauku mundirana ainainira faiqi maridaqa noori runusee faiqi anaasee qimannimidaqa.

### 3

*Pauroofa Koorinti maqannaasara narí papiqa akarara foora mariafanoo.*

(Ooqai Pauroona aukwana Yisuna ufara suqimaru fasiqafa mootinai suqimarunnai firarinoo fufaqa misa akara rumbeeqee amufanoo mara maree moo atinai suqimarusunai oonuree munu nimufaqa misa qafeeqa mina mareeqa nári suqimarunaki quqasoofanoo maridanoo misa faqa Yisuna ufara suqimariqau. Akaqausa unna amana ufa qimarusa nariqa kai unnaqira pasa akara rumammaree moo atinai fiqa mi pasanannai fifau narana maaqa ueeqasee maraqau. Pauroofa minara iriseenoo Koorinti maqannaasa maaqi qimasee qimanniminau.)

<sup>1</sup> Maasa sia qeeqa qimoogidaqa anoona ufa kai qimannimidaqa. Maasa innee inannai fiqa sia akaqausa naanna reeqa moona akara mara maree inni munu uqannifiqasee inni faqa suqanaura. Maasa inni maqusaindari moosaa fiqa sia inniara pasa akara rumaqimifaqa maree fuanauree qianaura. <sup>2</sup> Innee Koorinti maqannaasa maasa akarara foora sia papiqasaa akara rinoo maasa qimuqusasaa akara rira foora iqa mariafanoo, aiqamausa asaana rumasee iriaqeera akara rinau akoogoo maridanoo. <sup>3</sup> Asauku mundirafa narí uqanna mi pasana akara rumbeeqee maasa qisaukuki quqasaifaqa inni nimiga. Sia Mooseefa maru kamuqoo iundee kai idafa sia kirifinnai oonisaa akara rinoo maridanoo. Kaqi marira Anutufa narí maraqunannai faiqi faiqi maasa qimuqusasaa akara rinoo maridanoo. <sup>4</sup> Maasa irirafa asauku mundiranasaqari Anutunasaa mundinoo marinara mi ufana qiaqa.

*Pauroofa maasara faqa Anutunara faqa moodaanakikira ufara qidanoo.*

<sup>5</sup> Sia maasaki moo afeeka marifaqa maasa maa saikana amana maridaqa, maasa afeeka Anutufinnaindari kai qumuree maasa uqeeraidanoo. <sup>6</sup> Mifa mi ainainirana amanaikirana qimifaqa kai narí fuka moodaanaki kira ufa mi saikanaki maridaqa. Mina fuka moodaanaki kira ufa sia nimaarusira ufa akara riranasaa mundinoo maridanoo. Anutuna naaquqara andeeqara maraquna faiqi naunduraki marina minasaa mundinoo maridanoo. Mooseena sandufa akararufa mifa kuqirana kai nimidanoo, Anutuna maraquna fannoo kaqi marirana nimidanoo.

<sup>7-8</sup> Ooqai Anutufa Sinai aqanasaa narí sandufa Mooseena qimamidanoo qaara ooni marasee minasaa akara rumaminau. Akara rumamidanoo narí Anutuna kaaqa areenarana kooroomambufanoo Mooseena oori afiri faqa kaaqa qamafufaqa Isaraee maqannaasa mina oori qafoofanoo nifu daroo daraa ufaqa rufiaqau. Marinoo Mooseena



ooriki kaaqa qarafa kasooqaqee taikamaree muqufi taikanau. Ooqai Mooseena sandufa faiqi kuqirana nimimarifa kaaqa areenaranakina ani ufa marufanoo maqee kamu Anutuna naaqqara andeeqara maraqauna fannoo kaqi marirana nimimarifa mina kaaqa areenarafa fraaqqoo uriqararafa maridanoo. <sup>9</sup> Narira ufa ameemaanai quqemariafa firaq kaaqa areenaranaki ani ufa marinanoo Anutuna andeeqaranaki quqee marifa mina kaaqa areenarana amana kai fee mariannoo fee sia amana kai fraaqqoo uriqaranoo maridanoo. <sup>10</sup> Maqee maasa Mooseena sandufara maaqi qidaqa. Maqee maria kaaqa areenara ainaina fannoo fraaqqoo daroo daraa idanoo doo nauraa areenarana rafaqaafusaifanoo doo mifa aiqareenoo. <sup>11</sup> Mooseena sandufa qusasaa maru ainainafa mina areenarafa fraaqa marinanoo naaru naaru marira ainaina areenarafa fraaqqoo uriqaranoo maridanoo.

<sup>12-13</sup> Maasa mi naaru marirafa anianinnanara asasamandee afeesidaqa paasoosamandee Yisuna ufa qimannimidaqa. Maasa sia Mooseena aanna reeqa qamunna qummaree nikiqasaa afisusee oorisaa areenarana rafaqaafidaqa. Mooseefa qamunna qumareenoo Isaraee maqannaara nari ooriki takukanda rimarina mina taikee marina qafeefoo qimasee qamunna oori afisinau.

<sup>14</sup> Mi aukuanna Isaraee maqanna irirafa doo ititanoo maruafaqaa sia Anutuna ufa oosana iriqau. Mi kamuqqoqari ani ani ufaqa maqee kamuqoo kaqi mi qamunnafara foora misa irirafa ititanoo marifaqa ooqeenaa moodaanaki kira ufa asaana ridaqa sia mina oosana iridaqa. Faiqi asaku mundiranasaa atooqafinanoo kai miqoo kai mi qamunnana fooqaana rafaqaa iannoo. <sup>15</sup> Isaraee maqanna doo maqee kai Mooseena sandufa asaana ruafanoo mi qamunnafa kai misa irirana ititannimaqaidanoo. <sup>16</sup> Mi qamunnana rafaqaairafa tamummaqara fasiqa ufamau kai kambiqaaidanoo. (Ooqai Mooseefa Isaraee maqannaasa Isipa maqusaindari nifiqamaree Sinai aqana ameemaanai oonureenoo Anutuna uqaana maqa usakanau. Mooseefa mi uqaana maqana usakanau. Mooseefa mi uqaana maqanaki keeqafinoo Anutuna faqa ufa qi qiufanoo rafudamafufanoo maqusai faiqi anaasee maruqoo misa faqa ufa qirara ufannoo ooriki qafoofanoo oori takukandaari marinau. Ufa takaseenoo kaqinni fufanoo ooriki takukandaarirafa ireeda kai rukeemarinau. Faiqi anaasee mina rukarana qafee maqi qimasee qamunna oori akuamaqee marinau. Kaifaa uqaana maqaki Anutuna faqa ufa qirara keeqafinoo rafaqaa imarinau.) Mi tamummaqara fasiqafa minara maaqi qinau. Mooseefa kaqinni marufanoo qamunna oori rafaqaafinoo marinau. Anutuna uqaana maqaki keeqeenoo karaambaiga innai oori ubeekkeenoo mi qamunnana rafaqaa inau.

<sup>17</sup> Akara fannoo karaambaigara qidanoo Anutuna maraqaunara karaambaigee qidanoo. Karaambaiga maraqauna mariqoo sia ititarafa maridanoo idukirafa maridanoo. <sup>18</sup> Doo maasa aiqamausa doorisaa qamunna rafaqaa irausara foora maridaqa karaambaiga kaaqa qareenarafa innisaimbaqa doorisaara foora kaaqa gameeqeenoo aiqamai daroo daraa idanoo. Innisaimbaqa miqimmamaree fidaqa Anutuna maraqauna fannoo innisaimbaqa karaambaiga fooqaanaikamma qimaqanoo fidanoo fimarifanoo innisaimbaqa areenarafa fraanaikinoo fidanoo. Karaambaiga Anutuna maraqauna saika maridanoo.

## 4

### *Anutufa nari amiqira ufa maqannoo auqira fasiqaki quqanau.*

<sup>1</sup> Anutufa maasa mandoosana akiaqara dariraru sianoo nari nifauarana qimisai fanoo marinara maasa namu Yisuna aufakiana qimannimiranaki quqaqaisaifaqa nidaqa sia nikoonikaa idaqa sia kudoosaapidaqa. <sup>2</sup> Maasa namu asukunaki nimaria oosana nisaurira oosana faqa doo mareeqee ninaaqiannai aqusee nimeesuqusee sia unnamanna qidaqa sia nikaruqiranaki nidaqa kaqi akoomau faiqi nifusaa nidaqa. Maasa Anutuna ufa qumaree sia munu eendi mini eendidaqa anoona ufa qirana kai uqereeqee akooqoo nifusaa quqaidaqa. Maasa miqi kaimmaseeqa qeeqa nirana marirana Anutuna afusaara foora miqi kaimmaseeqa aiqama maqannaasa nifusaa andeeqaanaqa misa naakirafa qigafamasee sia qaoo qifarannoo.

<sup>3-4</sup> Maasa amiqira fasaasa ufa qimannimunaqa akaqausa sia iriasa innaaruna aanara randaidaqa auqeera foora iasa marianara naaqqooki ooni ititanoo maridanoo. Mi naaqqoonaki ooni ititaraua maa maqanasaa manda afaanna Sadannafa misa naaqqoo nifu ititaqaifanoo Anutufara foora moodaa karirafa asaku mundirafa mina kaaqa areenarana amiqira fasaasa ufa qoomara foora aninaqa misara sia qafaaqee qimasee naaqqoo nifu ititeenoo. <sup>5</sup> Maasa namu sia qeeqara qidaqa faiqi anaasee qimannimidaqa, maasa asaku mundirana karaambaiga Yisuna minara kai kooroomannimidaqa. Maasa namu Yisuna auqu uqeeraidaqa Yisunara inni qimannimidaqa inniki rumbara fasiqara

foora ainaina mannisaidaqa. <sup>6</sup> Ooqai indaaru Anutufa asukunakiqari kaaqa qaranara qaani fee ufa mi moodaa Anutufa kai narí areenarana maqee maasa qitikuraki qoomara foora qeenoo. Anutuna areenarafa narí asauku mundirana oorisa areenaidanoo mi areenarana aufakiana innisaimbaqa iriaqee qimasee Anutufa innisaimba maasa qitikuraki qoomara foora qaidanoo.

<sup>7</sup> Mi areenarana aufakiana fira munnimma aqimari ainaina fara foora marifa maasaki fifau maqannai auqira qafeera foora maasaki quqaqafaqa sia faiqi faiqi ainainimariana amanasaa ainainidaqa, fiqararafa marunara ainainidaqa. Anutufa mi fiqaramasee ainainirana narindikai marinara akoooro ianifeera narí areenara aufakiana maasaki fifau maqannai auqimaria ainainaki quqanau. <sup>8-9</sup> Maasa Yisunara qimannimmarunaqa minara nikooqee mariasa dindari dindari fuseidaqa sia amiqimandee ititaafanoo Anutufa sandara apootaana quqasaifaqa miqoo quqasee sandeeqa maasa yaiffee fuanau yaiffee fuanau qimasee sia kaaqa quqasee minniseeqa, misa maasa qifaqamaree fiqa sia Anutufa kuqaa minniqiseenoo. Misa daru quqasaafaqa sia kaaqa kuqiga.

<sup>10</sup> Yisuna arundee dari dari isoofaqa qini qifaqaq ufaanakuru moomoo marifaqa maraqa nidaqa maaqi qidaqa. Mi ufaana kurunannai Yisuna marirana maasa qifaqasaa aiqamausa nifusaa kooroo ianifeera mina kuqirafa faqa ufaanakuru fannoo maasa qifaqasaa marina mina kuqirana akoooro ianifeera maridanoo. <sup>11</sup> Maasa kaqi marunaga Yisuna naaru marirana maasa faiqi faiqi qifaqasaa koorooianifeera mina ufasaara kuqiranaki maqee maqee fidaqa. <sup>12</sup> Minara maasaki kuqirafa kasinara inni Koorinti maqanaaki naaru marirafa kasidanoo. <sup>13</sup> Tamummaqara fasiqa minara maaqi qimasee akara rinau.

Qinee qeeqa irirana Anutuna ufasaa rusisaafannanara qimannimiqiafana.

Qinee Pauroosa mi mau fidaqa qinee minara maaqi qidaqa. Maasa faqa irirana rusirafa marinara qimannimidaqa. <sup>14</sup> Maasa maana faqa iridaqa, karaambaiqa Yisuna kuqiranakinaana uqeeroofa maasa innisaimbaqa Yisuna faqa uqeera narí oorisa quqaqisaanoo. <sup>15</sup> Maa aiqama ainainausa inni dadaaqirafa kambiqaidanoo Anutuna afaarirafa moomoo fasiqa anaasee iannai fiqaqa iriseeqa misa dufi Anutunara qirafa firaqoo kambiqafinoo mina amooqirafa firaanaikiannoo.

#### *Maasa maqee uiqaana maqakiara foora maridaqa.*

<sup>16</sup> Maasa minara iriseeqa sia kudoosaapidaqa minnisaidaqa. Maasa faiqi qifaqa kuqaa qumidaqa doo kuqirannai ubeekaidaqa daundurakinaafa faasaambaasaana fukaikakai iqa maridaqa. <sup>17</sup> Kuqaa maasa maqee marunnanaki ufaasu unmaara darirafa maridanoo doo mifa kai fira areenarana naaru marira areenarana sia amaniaqaairana doo kaaqa firaatia qimiannoo. <sup>18</sup> Sia maasa maqee qafee marunna ainainausa maasa irirafa mundidanoo, maasa sia qafee marunna ainainara kai iridaqa. Akooqoo qafee maria ainainafa qusasa taikaidanoo, sia akooqoo qafee mari ainainafa naaru naaru mariannoo.

## 5

<sup>1</sup> Maasa maqee maa maqanasaa marunna qifaqafa uiqaana maaqa miqirafa rapeemambinanoo Anutufa innaarunnai maaqara foora narí moo usakaannoo, naaru marira maqa usakaqisaanoo. <sup>2</sup> Doo maqee kamuqoo maasa qifaqa uiqaana maaqara foora afisinoo marifaqa maridaqa innaarunai mari maqana afisiranara firaqoo ridaqa ikiraqaidaqa. <sup>3</sup> Innaarunai mari maqana afisiga sia kaqisamu akooqoora foora mari-anaura. <sup>4</sup> Maasa qeeqa uiqaana maaqakiara foora qeeqa qifaqaki maridaqa maasa qeeqa ummaara ameemaanai maridaqa faaqaridaqa. Maasa sia qeeqa maqasaa qifaqa minnisarree qidaqa, maaqoo marunna qifaqafa kaqi marinaga naaru marira qifaqa mina amuaaqa afisunauree qidaqa. Miqimmasainanoo ufaasu marinna ainaina naaru mariranakina keeqeenoo kuqeefafuanifeera qidaqa. <sup>5</sup> Anutufa kai maasa deedaqamaqiseenoo mi ainainna kambiqainaga maasa deedaqamaseenoo innaarunai oosana oosana aiqama ainaina qimianinnana mina ati maqee maria kamuqoo narí maraquna qimidanoo.

<sup>6</sup> Maasa maqee maqee paasoosirafa maasaki qumbiqanoo maridanoo, maana maasa maqee iridaqa, maasa maa uiqaana maqanaki maqee maridaqa sia karaambaiqa maaqaki mirinni maridaqa. <sup>7</sup> Maasa maqee marunafa sia qafee marunna aanafa maridanoo kaqi Yisunasaa kaqi mundufi sia qafarai fidaqa. <sup>8</sup> Paasoosirafa maasaki qumbiqanoo maridanoo maa uiqaana maqafa maasa qifaqa minnisee karaambaiqa faqa narí maaqara faqa minni f irinara faqa minara kai iridaqa ridaqa. <sup>9</sup> Maasa moo uriqarara ainainara dididanoo maaqoo maaqaki fee maridee, meerai maaqaki fee mariauree, mina aidiramau firanara firaqoo ridaqa. <sup>10</sup> Asauku mundirafa ufa qiminna faasaana maasa aiqamausa mina afusaa kikiqianaura. Kikiqamambuananoo

nari kai maasa maa maqanasaa marunnana akiaqara amiqira ainainee mandainainee mina akiaqara aadu aadu qimiannoo.

*Asauku mundiranannai maasa Anutuna faqa moodaanaki kidaqa.*

<sup>11</sup> Maasa karaambaiqara rufiaranara iridaqa faiqi anaasee aaquqimannimaqaidaqa. Anutufa maasa anoona mariranara akooqoo iridanoo innee Koorinti maqannaasa maasa anoona marirana faqa amiqimasee abee iridee sia fee iridee. <sup>12</sup> Maasa sia maa ufanannai maasa nuqu uqeeraidaqa maasa innee maasara nifaaqa amiqianifeera qimannimidaqa. Akaqausa faiqi afaqa qafeemarianara kai asasimariasa sia aundurakinaa ainaina asasimariasa misa maasa diqifaqa innee irisee mi ufanannai rafaafa fuaqa. <sup>13</sup> Akaqausa maasara furufarirausa maridammiafoo qiafaqa, mi furufariara foora qiranannai maasa Anutuna auqu uqeeraidaqa miqidaqa. Akaqausa maasara sia furufarirausa andeeqarasa maridammiafoo qiafaqa mi andeeqaranannai inni dadaaqiqanidaqa. <sup>14</sup> Asauku mundirana amuqusirafa maasa rakisi qimaqaidanoo. Maqee maasa maanara iridaqa moodaa fasiqa fannoo aiqama fasiqa anaaseera kuquqimaqanau, minara faqa maasa maaqi qidaqa aiqama fasiqa anaasee mandoosana mariranakiqari kuqira foora iqa maridaqa. <sup>15</sup> Mifa aiqamausara kuqunnimaqasoonara kaqi mariasa minara irisee sia nariaraa kai irisee mana mana ifaranoo minara iriseeqa mina ufamau fidaqa andeeqefaranoo. Misara irisee kuqunnimaqeenoo findifunara mina ufamau fidaqa andeeqasee marifaranoo.

<sup>16-17</sup> Doo maqee maaqooqari maasa sia faiqi faiqi iriranannai faiqi anaaseera irianauranoo maqee maaqooqari oosanaraseeqa misara qimuqusianauranoo. Ooqai maasa asauku mundiranara faqa faiqi faiqi iriranannai minara iriafannana doo maqee sia miqidaqa doo maqee minara uriqarara fee qidaqa. Faiqi anaasee moo fannoo asauku mundiranaki atooqanoo marinanoo Anutufa mi fasiqa anaaseena ooqeenaa manda irirana doo taikeneo fuka irirana aqoonna fasiqa anaaseera amuqusirana niminoo. Doo minannai Anutufa faiqi anaasee fukaikamaqai faqa maridaqa. <sup>18</sup> Mi aiqama anainausa Anutufinaidari kai anidanoo, maasa namuqaakiqa mariafannana nari asauku mundiranannai maasa mareeqeenoo nari faqa moodaanaki quqeenoo kafa maasara innee quandaki faiqi anaasee oonu mareeqee qini faqa moodaanaki quqaqee qinoo. <sup>19</sup> Maasa qimannimira ufa maaqimminoo maridanoo Anutufa nari asauku mundiranannai aiqama maa maqa maaqana afaaqasasa mariasa oonu mareeqee nari aqoondikiranaki quqanau. Anutufa faiqi anaasee aaqarana sia qafaida sia irida mara quqannimiqaaidanoo. Mifa nari moodaanaki kira ufa maasasaa quqaseenoo innee faiqi anaasee mareeqee qini faqa moodaanakikirana inni nimida fee qinoo.

<sup>20</sup> Doo maqee maasa asauku mundirana aanaiqikirausara foora maridaqa maasasaqari Anutufa aiqamausara nameera qidanoo. Maasa asauku mundirana ufa inni Koorinti maqusanasa fuki faaki qidaqa innee Anutunara eedoo qifanoo mifa inni namuqaakiranakiqari quandakinoo inni aqoondikamma nimaqaani. <sup>21</sup> Anutufa nari andeeqarana innisaimbaqa naida qimianifeera nari amaaku qimamiseenoo maasa mandainaina aiqama qumareeqeenoo minasaa quqasoofanoo mina akiaqara kuqinoo taikannimaqanau. Asauku mundirafa mandoosana siaifa miqinuu.

## 6

<sup>1</sup> Qinee Pauroosa qini faqa maria namusa maasa Anutuna aanaiqikirausara foora maridaqa Anutuna faqa moodaanaki ainainidaqa inni Koorinti maqannaasa fuki faaki idaqa doo innee Anutuna kaaqa afaarira anoona doo maraafanoo sia quqasaifanoo maqasaa aqafi rairaaiani. <sup>2</sup> Anutufa minara maaqi qimasee tamummaqara fasiqa qimannimufaqa akara riqau.

Qinee qeeqa didira aukuna innee qiniara dadaaqianifee qinna nameeraqirana iriqa. Qinee asumu marirana nimira aukuna inni ufa irisee dadaaqiqa.

Qinee Pauroosa minara maaqi qidaqa. Maa kamuqoo kai Anutuna dadaaqirana maree maria kamuqoo maridanoo. Maqee faasaana Anutufa innaaruna asumu nimifaqa mareemaria faasaanafa maridanoo.

<sup>3</sup> Akaqausa maasa inniki saikiranara aaqeeaafoo qifoora maasa qeeqa rakisidaqa inni niku nimaarusirafa mariandoo qimasee eerairidaqa. <sup>4</sup> Maasa qeeqa aiqama ainainaki maasa Anutuna ainainira faiqi namu marunnanara kooroo iaqera qimasee firaqoo reendeenamandee ummaara faqa kadaapirirana faqa tooqaamu darirana faqa aupurarana oosana oosana maraidaqa. <sup>5</sup> Maasa maa namusa darirana faqa karabusaki rumbaqimaqarana faqa moomoo fasiqa aanoomandee aniree dari dariisoona faqa maqee miqidaqa. Maasa daararee marifaqa sia faiqarana mareeqa kisaaqasaa kadaapiriri ifaqa nifaaqa ummooqukamandee maridaqa ainainidaqa. <sup>6-7</sup> Maasa qisakadiki qikairi

saisa amiqimandee andeeqasee marunnanannai faqa maasa iriranannai faqa reen-deenamasee ubiasee mariranannai faqa qimuqusi faqa dadaqunnanannai faqa maasa qeeqara Anutuna ainainira faiqi marunnanara koorooidaqa. Maasa Anutuna naaquqara maraqunannai faqa maasa anoona ufa kai qimarunnanannai faqa Anutuna afeekannai faqa maasa qeeqara Anutuna ainainira faiqi marunnanara koorooidaqa. Andeeqara osana nimirafa maasa duru saamuara foora marifaqa akaqausa maasa daruafaqa misamunannai qeeqasaa rukiqasee misa naruani qimasee misamunannai misa narirara foora idaqa. <sup>8</sup> Akaqausa maasara amiqira ufa qidaqa akaqausa manda ufa qidaqa, akaqausa maasara sukufa qidaqa akaqausa qimooqidaqa akaqausa maasara unnufa qidammiafoo qimariafaqa maasa anoona ufa kai qidaqa. <sup>9</sup> Faiqi anaasee maasara fifau fasiqee qimariafaqa akaqausa maasara Anutuna ufa maraqa nuasee qimasee amiqimmasee maasara iridaqa. Akaqausa maasara kuqirusara foora mariaa maqi qiafaqa innee qiqafaidee maasa kaqi maridaqa sia kuqiga maridaqa. Misa daruafaqa maasa sia kuqidaqa kaqi maridaqa. <sup>10</sup> Maasa maqee maqee qifaqa kudoosaapanoo marifaqa Anutunara oonu mafi irisaidaqa maqee maqee asasidaqa. Maasa kudi fasiqara foora maridaqa moomoo fasiqa anaasee innaarunai ainaina faqaasaikamma nisaidaqa. Maasa maa maqanasaa ainaina saisaa maridaqa aiqama innaarunaindaraa ainaina maasaindi maridanoo. Mi aiqama ainainannoo maasa Anutuna amiqira ainainira faiqiuqaindi marunnanara akoorooidaqa.

<sup>11</sup> Oo qini qiqoondiqa Koorinti maqusai mariasa. Maasa inni akooqoo kooroommasee inni qimannimiqa qimuqusa oo raqafimarufaqa qeeqa daunurakinaana nimuqusira irirana inni qimannimiqa. <sup>12</sup> Maasa inniara sia qeeqa qimuqusa rafaqa fusee kaqikaqoo ummeereeqa akooqoo aiqama qimannimiqa innee inneeqa kai inneeqa nimuqusa mandaikammida rafaqafusee sia maasara nimuqusi mariafanoo. <sup>13</sup> Innee qini faiqinamuara foora mariafaqa maqee qimannimianaura. Innee maasa daanna reeqa innee maasara nimuqusinaga akooqoo maasa faqa ufa qiaqa.

*Sia Anutuna ufara nikooqee mariasa namufaqa moodaanaki ainainiaqa.*

<sup>14</sup> Oo Koorinti maqusanaasa innee Yisuna ufa irimariasa faqa sia irimariasa faqa sia moodaanaki qaindusira saqariara foora ainainiaqa, sia amana amana kai inni faqa fifaranoo. Naqimmasee andeeqarana faqa aaqarafa faqa naqimandee moodaanaki qaindusu maree fifaree, sia amana. Naqimmasee kaqa qarafa faqa asukuna faqa moodaanaki mariannoo, sia amana. <sup>15</sup> Naqimmasee asauku mundirafa faqa kudi fasiqa Sadannafa faqa moodaa ufara eedoo qifaree sia amana, namuqaa maridanoo. Yisuna ufa irimarifa faqa sia Yisuna ufa irimarifa faqa naqimmasee fee moodaanaki kifaree. <sup>16</sup> Naqimmasee Anutuna amaana maqaki mariasa faqa tumunna auqira afaanna faqaasa faqa moodaanaki kifaree, sia amana. Maasa kaqi marira Anutuna amaana maqara foora maridaqa. Anutufa minara maa anoonufana tamummaqara fasiqa qimamufanoo akara rinau.

Qinee qeeqa maaqa misaki usakasee marianaura. Qinee misa Anutusa marianaqa misa qini qiku qisauku marifaranoo.

<sup>17-18</sup> Minara karaambaqa maaqi qimasee qimannimidanoo.

Mandoosana maree mariasa faqa moodaa maqusaki maridaqa misa mandoosanara eerairiaqa.

Innee mandainaina maree mariasa mandoosanara rufiasee sia mina umaraaqa. Innee miqidaqa anukaranaki marifaqa qinee aiqama ainaina uriqarara karaambaqa fannoo inniara qinindi fee qinaqa innee qini faiqinamu qini qiraamummaaka marifaranoo.

## 7

<sup>1</sup> Oo qini qiqoondiqa, mi qimafeekaikira ufaasa tamummaqarausanai qimaqoo ufaasa maasara qinuu. Minara irisee innisaimbaqa oosana oosana qikairi qifaqasaaqaraanee daunuraindaraanee aiqama findaukamaqusee Anutunara rufiada daaquqee marinaga andeeqasee anukaranaki mariaqa.

*Pauroofa Koorinti maqannaasara asasidanoo.*

<sup>2</sup> Oo Koorinti maqusanaasa qini qiqoondiqa, innikinaana maasa siamma moo fasiqa mandaikamma amaqaafanausa, maasa sia moo fasiqa mandoosanaki quqaafanausa maasa sia moona rafaqafu amaqasee moainaina umaraafanausa, innee minara nimuqusinaga maasa umaraaqa. <sup>3</sup> Qinee sia inni niqirara miqidaqa ooqai qimannimianandee kai qidaqa qimannimidaqa. Maasa inni Koorinti maqannaara kaqa qimuqusidanoo nididanoo innisaimbaqa kaqi maridee innisaimbaqa Yisuna ufaasara kuqi fee inni faqa moodaanaki marianaura. <sup>4</sup> Qinee inniara kuqaa Yisuna ufa irimariasee

qidaqa qinee inniara nimoogidaqa asasiidaqa. Maasa oosana oosana ummaaraki maridaqa inniara iriseeqa paasoosidaqa asasirafa qumbigeenoo rairaidanoo.

(Pauroofa Koorinti maqannaasa akara ruma Titusana amufanoo munu nimisee oonurandee Pauroofinai aninau. Pauroofa Koorinti maqannaara qini akarakinaa ufara nanee fee qiaafoo qimasee maa ufana akara rumannimaqanau.)

<sup>5</sup> Maasa Maseedoonia maqa maaqai oonu Titusafa inni maqusaindari aniranara afeesida maridaqa sia qifaaqa quqeeqa. Yisuna ufa qimannimi marunaqa moomoosa dindari dindari anireeqa aanooqidaqa kaukaata qimarufaqa qeeqa daundurui rufiarafa marifaqa innee Koorinti maqannaasara maasa akarakinaa ufara faqa maasara ruffeefoo qifoora qinee rufiidaqa. <sup>6</sup> Maasa miqi mariafanoo Titusafa inni maqusaindari mai aniree maasa paqurinau. Mifa anunnai qifaaqa rumboosa amiqimarufa Anutufa maasa qifaaqa amiqinau. <sup>7</sup> Sia Titusafa anirafa kai maasa qifaaqa amiqinau. Mifa inni maqusai oonuroofaqa innee mina idaaqammamaqoonara qimaqimufaqa firaa dufi dufi qiqa qifaaqa asasinu. Titusafa inni Koorinti maqannaasara qini Pauroosara kaaqa qafaaqaa imariasee qinau. Mifa inniara nari mandainainara kuqaa mandainainee qimasee noori runusee amiqira qoo fidaqa qiniara manda ufa qimariasara saaqee qimasee qini dadaaqidaqa. Doo mi ufana iriseeqa qinee Pauroosa firaqoo inniara asasiidaqa.

<sup>8</sup> Qinee moo akara rumannimaqaafanafa mi ufafa inni qumaroofaqa innee mina qafamasee innee noori runusee inniqa mandoosana minnisagaqau. Qinee iriseeqa sia inni noori runiranara qaara daundura iriqa. Qinee inni noori runiranara iriseeqa sia kisaagaasaa qimudao qiqi qusasaa kai qimudao qiqi. <sup>9</sup> Doo maqee qinee firaqoo asasiidaqa qeeqa akara rumma inni nimiafannana minarau asasiidu. Inni nifaaqa ummaara reemarifa inni mandainainakinaana mareeqeenoo amiqirannai ubeekainara minara qinee asasiidaqa. Inni nifaaqa ummaara rarana sia inni narinoo Anutufa mina mareenoo inni dadaaqinoo. <sup>10</sup> Nifaaqa ummaara rarafa Anutufa minannai inni maramareenoo faiqi nimuqusakinaana mara quandeeqeenoo innaaruna asumu mariranaki quqemarifa mi nifaaqa ummaara rarafa amiqirafa maridanoo kai fifau maqasaa nifaaqa ummaara rarafa mifa kuqimariafa maridanoo. <sup>11</sup> Qinee Pauroosa pasa akara rumasee inni mandoosana akoooro qiafanaqa noori runiusa mariafanoo. Inni noori runirana Anutufa qumareenoo minannai oosana oosana amiqira oosanauga inniki auqinau. Maqee innee sia furufari mariafanoo noori runusee amiqimandee fimariafanoo. Innee inneeqa andeqaranara koorooianifeera kaaqa andeqasee fimariafanoo. Innee mandoosana maqee firaqoo nikoqaidanoo. Qinee Pauroosa inniki mandoosana kikiqusunaga innee irisee qini Pauroosara faqa Anutunara faqa dari maqi qimasee dauni mi manda oosanna andeqee mariafanoo. Innee qini akara maraseeqa qiniara noori runida mariafanoo maqee innee qiniara nimuqusidaqa qiniara amiqira irirana irimariafanoo. Innee firaqoo Anutunara faqa irimariafanoo. Maqee moo fannoo inniki mandoosana marainaga innee kaqi kaqi oonu qaoo qimasee afiqee mariafanoo. Ooqai qinee minara qimannimifanaqa innee sia maroofanoo mi nifaaqa ummaarararafa inni nisakadiki sia ikairi marina kooroo idanoo.

<sup>12</sup> Qinee akaraki afeeka ufa rumaqaafannana sia inniki aaqee mari fasiqanara qimasee akara riqiafana, sia nari mandaikammamaqoonara qimasee akariqiafanoo. Qinee Anutuna afusaa maridaqa, maa ufanara akara riqa, innee maasasaa atooarana faqa rirana faqa mina firaafa inni nifusaa akoooroianifeera akara riqa.

<sup>13</sup> Minara maasa Titusana ufa irunanoo nifaaqa amiqimminoo. Sia maasa qifaaqa kaifau amiqinoofau Titusana afaqa faqa amiqikaimminoo. Innee Koorinti maqusanaasa idaaqamasoofanoo mina afaqa inniara amiqufaqa maasa qafamasee asasiqifana.

<sup>14</sup> Qinee inniara firaqoo inni nuqu uqereeqa Titusana qimamifannana, innee miqoo kai mina amana kai mariafanoo. Titusafa nidafammaseenoo asasinoo. Maasa maqee maqee ooqai anoona ufa kai inni qimannimi mariqifana. Miqi kai iqa inniara Titusana qimamifannufafa doo anoonaikinoo. <sup>15</sup> Titusafa inni maqusai oonuroofaqa innee inneeqa mandoosana irisee Pauroofa ufa firaana qiandoo qimasee rufiaaqa rufiaaqa iranannai faqa naindiriranannai faqa afieeqee inneeqa maqusai quqasee qini ufa minasaqaraana irisee eedoo qimasee maroonara Titusafa qafamaseenoo qimaqimidanoo inniara rirafa maqee maqee firaanaikidanoo. <sup>16</sup> Doo maqee qinee Pauroosa mina iridaqa maaqi qidaqa. Qinee sia inniara maqee qaara daundura marifaqa qinee qeeqa qifaaqa firaqoo innisaa quqaidaqa asasiidaqa.

## 8

*Yisuna ufa irimariasaa akaqasaa dadaaqira oosana qidanoo.*

<sup>1</sup> Oo Koorinti maqusai maasa qikaqaafasaa mariasa. Yisuna ufara suqimariasa Maseedoonia maqa maaqaki mariasa Anutuna amiqi amiqirafa misaki saiknara innee iriaqeera qimannimidaqa. <sup>2</sup> Firaa ummaarararafa misa kadaapi rirana niminau. Marufanoo mi kadaapirirafa Yisunasaa atooqee marusa firaqoo nimanamandee qafanau. Misa miqifa maridaqa minakiqari firaqoo اساسamandee nariqa munnimma afaaramandee Yudeea maqannaasa Anutuna ufara suqimarusa dadaaqi naida nimiqa. Misa nari kudikiranara siamma iriqa kaqi nimiqa. <sup>3</sup> Qinee maa ainannara amiqimandee iridaqa qimannimidaqa, misa nari munnimma marunna amanakai nimiqa sia mina amana kai nimiqa kai fiqarammasee aabaa faqa nimiqa. <sup>4</sup> Misa nari iriranannai aniree aranaqi afeekaikamasee maasa irammiriqa qiqau. Amanee maasa faqa Yudeea maqa maaqaki Anutuna ufara suqimariasa naararee mariasa maasa munnimma nimiqee dadaaqianauree. Nariqa mi dadaaqiranara sia ummaara fee qiqau adiafaairana qimarianara maasa nimianauree qiqau. <sup>5</sup> Maasa mi ufana iriseeqa اساسasee tautiqa oo sia mi amiqira irirafa kammbiqeefoo qunaqa misaki kambiqeenoo. Maseedooni maqannaasa nariqa naundura irirana faqa nari ainaina faqa karaambaqa naaree amisee quandaki Anutuna iriranamau nari marirana maasa faqa qimiqa.

<sup>6</sup> Maseedoonia maqannaasa oosana miqinoo marinara innee Koorinti maqannaasa faqa miqiaqeera Titusana fuki faaki qiafanoo inni qimannimidano. Ooqai Titusafa inni faqa maridanoo Yudeea maqannaasa nimianinna munnimmanara oosana arasee qimanniminau. Doo maqee Titusafa mi nimuqisira saikana kaifaa uqeerarara fuki faaki qidaqa. <sup>7</sup> Innee Koorinti maqannaasa oosana oosana ainaina moomoo faqaasa mariafanoo. Innee Anutuna saqarikirafa faqa Anutuna ufa qimannimirana faqa irirafa faqa oosana oosana dadaaqira saika eedoo qimasee kasida uqeere mariana faqa maasara faqa nimuqisimariana faqa mi ainainausa innindi moomoo maridanoo. Doo maasa inniara Yudeea maqannaasa nimiaqeera faqa qidaqa inni afaararifa minaki faqa moomoo mariani, mi nimuqisira saikafa mariannoo.

<sup>8</sup> Qinee Pauroosa sia naamuqira ufa inni qimannimidaqa naakapara ufa inni qimannimidaqa. Anaamuru dadaaqiranara naakapaidaqa minanna inni nikaqaafasara nimuqisirana nimanamandee qafaidaqa inni Koorinti maqannaasa nimuqisirafa Maseedoonia maqannaasa nimuqisirana amanafee maridanoo fee qimaseeqa nimanamandee qafaidaqa. <sup>9</sup> Innee asauku mundirana Yisuna maasa karaambaqa amuqisira dadaaqiranara amiqimandee irimariafanoo mifa innaarunai ainainafaqaafa uriqararafa marinoo inniara irisee maa maqanasaa qumu ainaina siaifara maqi mafinoo marinau. Yisufa nari ainaina siaifara maqi iranannai innaarunai ainaina faqaasa mariaqeera miqi marinau.

<sup>10</sup> Yudeea maqannaasa narana feefaurira munnimma nimiranara qinee Pauroosa qini irirafa minara maaqi qidanoo. Innee ooqai aiqaqoo aukuanna Yudeea maqannaasa munnimma nimirree qimasee suququqoo munnimmana narana feefauri maraaqee qimasee suqu quqasee minnisoonaa maqee kaifaa uqeerasaifanoo fifi inanoo taikaannoo. Innee aiqama maqannaasakiqari innee naaree iriseeqa mi saikana oosana uqeeree mariasa mariafanoo. <sup>11</sup> Doo maqee findifiqa mi saikana auqaiifanoo taikaani. Indaaru innee minara ufa suqee nimudaanai qimasee ufa qifa fifaana maqee miqi kai iqa nimudaanai qimasee munnimma nimirafa taikafuani sia kisaaqasaa mariani. Innee aiqama munnimma nimiseeqa innee quridifaara, qinee sia minarau inni qimannimida. Innee inni munnimma aabaa marina mina nimiaqa sia marinafa sia aquaqa. <sup>12</sup> Inni munnimma amanakinna qimisainanoo Anutufa narindari foora dufi dufi qianoo. Sia amanaikinana aqusainanoo Anutufa sia minara dufi dufi qianoo. Sia amanaikinana sia aqua.

<sup>13-14</sup> Qinee sia moo maqannaasa aufadarana nimirara inni Koorinti maqannaasa ummaara firana nimidaqa, sia miqidaqa. Maqee aukuanna inni narana firafa mari kamugoo narana siaisa dadaaqiqa, kasooqagee moo aukuanna innee mandainainaki marifaqa misa inni dadaqifaranoo. Miqidaqa aiqama amana kai mariaqa. <sup>15</sup> Ooqai tamummaqara fasiqauqa minara maaqi qimasee akara riqa. Ooqai maqasaa narana moomoo suqimaru fasiqausa sia rairaa iqa. Maqasaa narana oodaa suqimaru fasiqausa sia naararee marinau, nimana kai marinau.

*Pauroofa Titusana faqa nari aqoonausara faqa qidanoo.*

<sup>16</sup> Qinee Pauroosa Titusana oosana qafamasee Anutunara dufi dufi qidaqa, maasa daanna raidanoo firaqoo inni Koorinti maqusanaasa dadaaqirree qidanoo. <sup>17</sup> Maasa minara Koorinti maqusai inni maqusai fuannee qunanoo mifa sia kai eedoo kai qinoo nari iriranannai اساسammaseenoo innee iannai kafa fuannoo. <sup>18</sup> Maasa moo fasiqa faqa mina faqa aqiqaanauranoo mi moo fasiqafa aiqamai Yisuna amiqira fasaasa

ufa qimanninoonufa marunara Yisuna ufara suqimariasa minara amiqira fasiqafee qidaqa. <sup>19</sup> Sia mifa kai, aiqama Yisuna ufara suqimariasa mi fasiqanara inni Yuda maqannaasa nimianinna narana feefaurira munnimmana utaaqammasee anee Koorinti maqannaasa munnimma faqa akaqa maqannaasa munnimma faqa mara maree Pauroona saimbaqa Yudeea maqannaasa muru nimia. Miqinnanannai maasa nimuqusira saika marasee karaambaiqa areenarana faqa maasa eedoo qimasee dadaaqirana faqa kooroomambuannoo.

<sup>20</sup> Akaqausa raiqara ufa qifoora maasa amiqimandee inni moomoo afaaramandee nimifandinna munnimmana maasa rakisianauro. <sup>21</sup> Maasa irirafa minara maqimminoo maridanoo. Maasa Karaambaiqa Anutuna afusaa faqa maqasaa fasiqa nifusaa faqa andeegaramau fidaqa rakisianauro.

<sup>22</sup> Titusana faqa moo fasiqa faqa indaaru fuagee qiaqa maqee maasa qikaqa moo faqa miqandasaa mara quqaanaura miqanda faqa fuannoo, maasa moomoo kari mina amanamandee qafaunoo amiqimarifa maqee maqee eedoo qimasee dadaaqimarifa maridanoo. Doo maqee mifa inni Koorinti maqannaasara irisee mina irirafa inniki mundinoo marinara firaqoo اساسammasee inni faqa dadaaqiannoo. <sup>23</sup> Titusafa qini faqa moodaanaki inniara dadaaqimarifa maridanoo. Maasa qikaqaafasaa Titusana faqa innee iannai fimariaqanda maridaqa Yisuna ufara suqimariasa miqanda utaaqamaqaaqanda maridaqa, asauku mundirana areenarana maree mariaqanda maridaqa. <sup>24</sup> Minamusa oonu raifaqa innee misara nimuqusimarinaqa rakisinnimaqaaqa. Miqinnanara Yisuna ufara maqusa maqusa suqimarinausa Pauroofa Koorinti maqusanaasa nimooqiranara anoona ufa fee qiaqera.

## 9

*Pauroofa Koorinti maqannaara narana mareefandinna munnimmana suquaqee qi-maqoofa maridanoo.*

<sup>1</sup> Anutuna ufa irimariasa Yudeea maqannaasa munnimma nimirara qianara innee doo irimariafanoo qinee fifau akara rumannimaqeeqa. <sup>2</sup> Innee eedoo qimasee dadaaqimariasa mariafaqa qinee iridaqa, qinee inni nimooqimasee Maseedoonia maqannaasa qimannimiqa. Qinee inniara maaqi qimasee qimannimiqa, Kirisa maqa maqaki mariasa Koorinti maqusanaasa misa naaree maa eenda aiqarai aukwana eedoo qimasee deedaqigau. Qinee miqi qimasee Maseedoonia maqannaasa inni Koorinti maqannaasara qimannimifanaqa doo misa faqa mi ufana irisee maasa faqa dadaaqiraree qimasee findifia akaqa maqannaasa kai sia findi fia. <sup>3</sup> Qinee inniara ufa qiafannana fifau ufa kai qianoora qeeqa qikaqaafasaa uqa mareeqee inniki quqeeqa misa oonuree inni munnimma suqu moodaaqoo quqaqeeera qini ufa anoonaikianifeera inniki quqaqee qidaqa.

<sup>4</sup> Qinee faqa Maseedoonia maqannaaka akaqausa qini faqa inni Koorinti maqusai oquraifaqa sia deedaqiranaki maasa oquraana innee nisaurifaqa maasa faqa Maseedoonia maqannaasa qini faqa ooqu fifandinausa nisaurifoora qinee inniara qifaqa quqasee inniara ufa qiaqa. <sup>5</sup> Qinee minara iriseeqa qeeqa qikaqaafasaa uqa niqiqamasanaqa indaaru oqureeqa inni nimifandinna munnimmarara deedaqamandaifaqa qinee innaqianna oquraanaqa innee inneeqa iriranannai kai nimira oosana koorooiaqa sia qinee qimannimiana nimiaqa inniqa nidirafa kai qinaqa kaqi nimiaqa. Ooqeenaa irirafa maqimminoo maridanoo.

<sup>6</sup> Moodaa asumu ummaqimarifa moodaa kai aiquannoo moomoo ummaqimarifa moomoo aiquannoo. Qinee Pauroosa minasaqari inni dadaaqira oosanara maaqi qidaqa. <sup>7</sup> Innee minara irisee inneeqa iriranannai kai munnimma aquaqa, sia mina aqusee ufaqirafa mariani sia moonara daakapaifaqa aqi fee qia Anutufa اساسmandee aqimari fasiqanara aididanoo minara اساسammasee aquaqa. <sup>8</sup> Inniqa nimana kai narana maraaqee munnimma Anutufa amana nimiannoo sia inni munnimma amana kaifau nimmiannoo aabaa faqa niminaqa minannai nana ainainaree dadaaqirafa kambigaannoo fee innee faqa amana minainnai dadaaqiaqa. <sup>9</sup> Ooqai tamummaqara fasiqauqa minara maaqi qimasee akara rumaqoofa maridanoo.

Amiqira fasiqauqaindi kudi fasiqauqa afaaridaqa nimidaqa.

Misa amiqi amiqirafa sia taikaannoo naaru naaru mariannoo.

<sup>10</sup> Anutufa inni Koorinti maqannaaka faqa dadaaqammianoo. Mifa asumu faqa neemaria narana faqa nimimarifa maridanoo inni nimana asumu inni nimisainaqa ummaqusaifanoo Anutufa kambiqarana nimiannoo innee afaaramandee moo maqannaaka narana dadaaqifanoo innee kafaa kafaa miqiaqee qimasee inni Anutufa irairairana nimiannoo. <sup>11</sup> Anutufa maqee maqee narana ainaina moomoo niminaqa innee mina

qafeeqa amana maqee maqee akaqausa dadaaqaqa. Innee maasasaqari dadaaqimaria maqannaasa inni dadaaqiranara quandaki Anutunara dufi dufi firaqoo qifaranoo.

<sup>12</sup> Inni dadaaqira saika fannoo sia Anutuna ufara suqimariasa kai dadaaqidanoo Anutunara dufi dufi qirana faqa oondainni nammariara foora aqufidanoo. <sup>13</sup> Inni dadaaqira ainainirafa innee Anutuna ufamau firana kooroo iannoo. Moomoosa mina qafammasee Anutuna amooqifaranoo misa inni afaaramasee naida nimirana qafammasee kafaa innee asauku mundirana fasaasa ufasaa atooqafi mudiqa marinnana faqa qafammasee sia ufa kai qimasee anoonee qimasee Anutuna amooqifaranoo. <sup>14</sup> Innee dadaaqimariasa inniara nidimarinaqa inni amiqi amiqiranara innaaru qifaranoo. Anutufa mookira afaarirana inni nimunara Anutufinnai inniara nidimarinaqa inni amiqi amiqiranara innaaru qifaranoo. <sup>15</sup> Anutufa nari afaarinoo maasa qimunara mina uriqararafa aiqama ainaina arusee firaafa maridanoo minara maasa aiqamausa dufi dufi qimamaqaqa.

## 10

*Akaqausa Pauroona saikara ufa qufanoo ititoo ufafa.*

<sup>1-2</sup> Qinee Pauroosa maa ufana reendeenamandee qimannimidaqa. Akaqausa qiniara nianai maridanoo aanoo ufa kai qimari fee inni faqa maridanoo reendeenidanoo fee qidaqa. Qinee miqi qianara maaqi qidaqa. Qinee asauku mundirana amiqi amiqirana faqa ireeda marira oosana faqa mina afusaa maridaqa reendeenamasee qimannimidaqa qinee innee iannai onuranaqaaqaa sia qini qirana fundakuqaqaa maasara maqasaaqaraa irirana irisee qimariaafooo qimariasa amana aanoomannimaqaanura, sia sia amana mariannoo, amana mariannoo.

<sup>3</sup> Kuqaa maasa maa maqa maaqanaki maridaqa sia minakinaa irirana marasee rakiara foora idaaqa. <sup>4</sup> Maasa rakimaria duru saamu sia maa maqa maaqanakinaa duru saamuaraa qidau. Maasa Anutuna afeeka ufa marina minannai duru saamuara foora rakidaqa. Minannai maasa Sadannana faandaamura rapeepamma aqidaqa. <sup>5</sup> Maasa mi duru saamunannai unnufa qimariana doo kuqaridaqa. Minannai faqa Anutunara kooroo ira ufara qaoo qimasee noori uqeerasee maasa minara uriqararusee qimariasa minannai misa faqa naridanoo. Maasa mi unna ufana qimariasa uriqaranoo marina Anutuna duru saamuara foora qumareeqa ooru rarisameeqee maqasaa muqufi rudammiqi quqaidaqa. Maasa qeeqa qitikurakinaa mandirirana aiqama oosana oosana mandirirana rakiranannai naruseeqa aiqama oonu qumaree ani qumareemeeqee karaambaiga asauku mundirana aramandunnai quqasainaga qeeqa qitikurakinaa irirana mina ufamau fuaqera. <sup>6</sup> Innee Koorinti maqusanaasa miqirausa mariafanoo maasa inni mareeqee asauku mundirana aramandunnai quqasoofaqa mina iriranaki fimariafanoo innee minakiqari kaqi runnai fifaqa qini qirana fundakusaiifaqa maasa inni nariara fooramasee quqasaanura, sia misa qiandee reendeena kai ianura aanoommasee qianura.

<sup>7</sup> Innee faiqi nifusaa akooqoo ainaina faiqi nipata kai qafamasee eedoo qimariasa aaqee mariasa mariafanoo sia naunduraki qafee mariasa mariafanoo. Inniki moo fannoo asauku mundirana ainainira fasiqee qimarifa sia nariara kai miqi marunausee qianoo maasara nipata mandaikirausee qimariana maasa faqa asauku mundirana ainainira fasiqa maridaqa. <sup>8</sup> Asauku mundirafa maasara qinee niqqaafanna fasiqausee qimasee mi uriqarara afeekana qimufaqa minara firaqoo ufa qufaqa innee irisee qiniara firaqoo nari amooqimari fee qiafaqa iriseeqa sia minara qisauridaqa, sia qini afeeka inni rakeemma aqirafa maridanoo inni dadaaqirafa pooduqammannisarafa maridanoo. <sup>9</sup> Qinee sia qeeqa pasannai inni rufiarana nimirree qidaqa. <sup>10</sup> Akaqausa maaqi qifaranoo Pauroofa nari akara riranaki afeekaikamandee qimaqimidanoo, nari uqanna anireenoo reendeenidanoo nari ufa faqa fifa mariannoo. <sup>11</sup> Miqi qimariasa maa ufana iriaqa, maasa nianai maridaqa akaraki qianna ufafa faqa naaqaqari marida qimariannufafa faqa amanamana kai mariannoo.

<sup>12</sup> Miqi qimaria fasiqausa nariara uriqararausee qidaqa miqi qimariafanoo. Maasa sia miqi qimariasasaa qeeqa qimanianaara. Misa furufari mariasa maridaqa. Misa nanasaa fee nari amani nari amani idee nari iriranannai kai nariqa uriqarara ainainee qimasee minannai kai nari nimanidaqa. Sia Yisuna iriranannai nari amani nari amanidaqa. <sup>13</sup> Maasa qeeqara qianura maasa qeeqa qimooqira oosirana sia fi-alkataanura miqooqari kai oorurandanoo mariannoo. Qinee sia akaqausa naanna ree moona oosiranaki mariasara qeeqa qimooqianauranoo qiqa qoosuki marinausara kai qeeqa qimooqianura. Anutufa maasa saika maree marunna oosirana nari kai quqaqaifanoo maridanoo minaki kai maridaqa innee faqa minaki kai mariafanoo. <sup>14</sup> Innee minaki marianara iriseeqa inniki oonureeqa sia finnaaqaraidaqa. Maasa asauku



mundirana amiqira fasaasa ufa mara mareeqa sia mi oosirana fiaikateeqa minaki kai maridaqa innisaimbaqa mariqiafana.

<sup>15</sup> Maasa Anutufa qimu oosiranaki kai inniki ainainidaqa, akaqausa fiaikatammasee ainainidaqa maasa sia misa fuaqoo fidaqa qeeqa ainainiranara qeeqa qimooqidaqa. Maasa Anutufa qimu oosiranaki maqee maqee miqoo kai minaki kai ainainidaqa maasa inniara maaqi qidaqa, Koorinti maqannaasa Anutunasa atoofara fraanaikinoo maasa saika mi oosiranaki firaanaikiannoo. <sup>16</sup> Inniki ainainirana taikasee miqooqari kai inni finnaaqareeqa moo atinai moo fannoo sia ainainimarinaki oonuree minaki amiqira fasaasa ufa qimannimiana. Miqimmasee sia qinee akaqausa naanna reeqa misa moosaa afuqaki ainainamasee nari nimoqidaqa. Qinee sia miqiana qeeqara fukasaa moo afuqakiara foora ainainianauroo.

<sup>17</sup> Ooqeenaa tamummaqara fasiqauqa minara maaqi qimasee akara riqau.

Faiqi moo fannoo sia nari amooqirafa mariani.

Karaambaqa auquqoo ainainara kai amooqiaqa.

<sup>18</sup> Qinee Pauroosa minara maaqi qidaqa. Karaambaqa fannoo moo fasiqara amiqira fee qinafa kai amiqira fasiqa mariannoo, nari kai nariara amiqira fasiqee qinafa sia anoona marina fifau mariannoo.

## 11

*Pauroofa unna amaana ufa qimariasara aaquqima nimaqaidanoo.*

<sup>1</sup> Inni Koorinti maqunnaasa qinee Pauroosa furufaramandee qimannimiana qirisee sia minnisaaga kaqi minara irisee sia minnisaaga kaqi minara irisee mariaqa. <sup>2</sup> Qinee inni Koorinti maqannaasara qeeqa qiraamunara foora mareeqeeqa asaku mundirana utaaqama amaqaqaunano minaindikiqa mariaqeeru minara rairaiqidaqa. Innee andeeqara maanaaqara foommafiqa mina faqa mariaqa. Maqasaa qaraa rairaiqiranau nimidau. Anutunaindaraa rairaiqirana nimidaqa. <sup>3</sup> Ooqai sakani fannoo nari kaaqa irira unufannai Eeuana akaru qundee kai inni irirafa faqa landoora. Asaku mundiranasa kai inni irirafa amiqimandee andeeqasee mundinoo mari inanoo kaqi runna fifoora minara qinee inniara rufiidaqa.

<sup>4</sup> Ooqai indaaru maasa Yisunara qimannimifaana. Miqooqari maasa fuafanaqa akaqausa innee unnai oonurandee inniki aniree inni unna amaana ufa qimannimiqau. Akaqausa dapi fasiqauqa anireeqa Yisunara moomau qimannimufaqa innee aqa-maseeqa asasammasee misa mara quqaseeqa misa manda ufamau fimariafanoo. Misa maraquna faqa misa unna fasaasa ufa faqa sia maasa qiafannamau qimannimifaqa nariara moomau qimannimifaqa innee kaqi maraafanoo.

<sup>5</sup> Mi unnaqira fasiqausa nariara Yisufa niqiqoo fasiqausa uriqararasee qidaqa. Qinee Pauroosa sia misa ureeqarasau maridau misa uriqararasa maridaqa. <sup>6</sup> Misa ufa akoofasauqa mariafaqa sia qinee amiqimandee misa naanna raunasa mammaqidaqa kasooqaqee ufa qimannimidaqa, iriranara amiqimandee iriseeqa misa oorinaaqaramasee qimannimiqiafana. Maasa aiqama kari oosana oosana ufannai maasa amiqira irirana akooqoo kooroommasee qimannimiqiafana.

<sup>7</sup> Qinee sia unnaqi maria fasiqausa naanna reeqa qinee Anutuna amiqira fasaasa ufa inni qimannimidaqa kaqi kaaqoo mina akiqara munnimma moodaa faqa sia uqanna maraqiafana. Innee Anutuna afusaa uriqararasa mariaqee qimasee qinee reendeenamafiqa oorudupi mafifaqa qeeqa ainainiranannai qeeqa narana ainaina mara naidaqa sia inni narana mareeqa. Qinee aqaidee miqi mari qiafana. <sup>8</sup> Qinee inniki ainaini marunaqa moo maqannaasa Yisuna ufara suqimariasaa misa nari narana marara munnimma qimifaqa qeeqa narainaina minannai maraqiafana. Qinee inni dadaaqidaqa misa munnimma ummuariara foora maraqiafana. <sup>9</sup> Qinee inniki mariafaana kamuqoo qeeqa narana munnimma sia marufaqa sia inni munnimma moodaa marasee narana mara naqiafana. Qini qikaqaafasaaqa Maseedonia maqannaasa nariqa munnimma mareeqee qini qimana kai qimufaqa marasee narana mara nee mariqiafana. Ooqai miqi mariafannana kafaqa maqee maaqoo marunnaqooqari sia inni maraanauroo. Innee aqarana marasaifaqa naqimmasee fee inni aqara ufannai andeeqannisaanauree inni narana munnimma qimunara irisee qisauruanoora. Qinee Pauroosa minara inni qimannimidaqa.

<sup>10</sup> Qinee asaku mundirana anoona ufa oorisa maridaqa qima afeekaikira ufa qimannimidaqa sia uqanna inni narana ainaina maraanauroo aiqama Kirisa maqa maaqaki mariafa narana ainaina sia uqanna maraanauroo, sia moo fannoo qini ufa aruannoo. <sup>11</sup> Qinee nanaree maa ufana inni qimannimidee. Qinee inniara qimuqisirana siasee maridee maa ufana qimannimidee. Qinee inniara qimuqisimarunnana Anutufa doo iridanoo.

<sup>12</sup> Ooqai ifanandee kai iqa maqee sia inni narana munnimma maraanaura. Unaqira niqiqoo fasiqausa inniki ani mariasa inni narana munnimma maraidaqa nariara Pauroona ainaini marina aana raidee qimasee maasa faqa niqiqoo fasiqausa maridee qifoora sia qinee misa naanna ramasee inni narana munnimma maraanaura. Sia qinee nari nifaaqa mara maree urimaria oosana dadaaqiana. <sup>13</sup> Mi fasiqausa sia kuqaa niqiqoo fasiqausau maridau misa nikaru qira niqiqoo fasiqausa maridaqa, nariqa ainainiranara unna ufa qimasee asauku mundirafa anoona niqiqoo fasiqausara foora quandakiqa misa nimammana usufiqa nikaru qidaqa. <sup>14</sup> Sia minara tautiaqa, Sadannafa faqa miqi kai imarifa maridanoo, mina aanandaidaqa miqidaqa, mifa kaaqa qara qangiroo nimammana usufinoo marifa marifaqa misa mina aanandaidaqa miqidaqa. <sup>15</sup> Sadannana ainaini maria fasiqausa andeeqara fasiqauqa nimammana usufiqa ainainirafa sia firaa ainaina, narinidi maridanoo. Kasooqaqee taikara aukuaana andeeqasee mi manda oosana amana kai mareefaranoo.

*Pauroofa Yisuna ufasaara aupurana maree marunara kooroo inau.*

<sup>16</sup> Qinee kafia inni qimannimidaqa sia moo fannoo qiniara furufarira fasiqee qiannoo. Inniki unna ufa qimaria fasiqausa furufariraua firaaqoo nari nuqu uqeeraidaqa nari nimoqimariasa maridaqa. Innee qiniara furufarira fasiqee qifaqa qinee faqa furufarimasee misa naanna raanara.

<sup>17</sup> Karaambaiqa sia maasara miqiaqee qifaqa qinee kaqikaqoo furufarammasee misa naannaree qeeqa qimooqianaqa innee mi unna qimaria fasiqausa ufa iriandee iqa qini ufa faqa iriaqee. <sup>18</sup> Moomoo unna ufa qimariasa faiqi faiqi irirana marasee nari nuqu uqeeraidaqa nari nimoqidaqa. Doo qinee faqa miqimianaura. <sup>19</sup> Innee Koorinti maqannaasa inni irirafa firaaqoo marisa mariafanoo furufarira fasiqauqa ufa qimariasa innee asasammasee misa marasee misa ufa irimariafanoo. <sup>20</sup> Misa inni nikaruqimasee inni ainaina ummuari mariasa maridaqa, misa innikinaa uriqararara foora maridaqa inniara miqiaqa maaqiaqa qimariafaqa misa ufaanara foora fufusee inni rarisameeqee minaki mara aridaqa. Misa nariara uriqararasee qidaqa inniara ureeqarasee qidaqa. Misa nisaukusamu inni noori rukamidaqa. Misa miqi mandee inni nimiafaqa innee aqamasee kaqi misa mareeqee inneeqa ufa suqiranaki quqasee innee misa ufa amiqimmasee irimariafanoo. <sup>21</sup> Qinee Pauroosa innikina mariafanooqoo misa oosana maraaqaana qinee qisauridaqa qimannimidaqa qinee maparaa imarunaua sia misa oosana maraqiafana. Inniki unnaqira niqiqoo fasiqausa nariqa nuqu uqeerasee nari nimoqidaqa qinee misa furufarirana amana kai qeeqa furufariannana qimooqianaqa iriaqa.

<sup>22</sup> Misa nariara sia Kirisa maqannaasa ufa kai qidaqa maasa qiikeeku qikaaku Heeburu ufa qimarunausee qifaqa qinee faqa miqi kai qimarunaua maridaqa. Misa nariara Isaraee maqannaasa Anutuna utaaqa maqoosa maridee qifaqa qinee faqa misa kai maridaqa. Misa nariara Abarahaamana aiku asauku Anutuna qima afeekakira ainaina maraanausee qifaqa, qinee faqa misa kai maridaqa. <sup>23</sup> Misa nariara asauku mundirana aiku asauku maridee qifaqa qinee faqa furufarira fasiqara foora qidaqa qinee misaki misa uriqarararara maridaqa. Qini asauku mundirana mi ainainnara irunnana misaindi ooraqaranoo maridanoo. Qinee Yisuna ufa saara karabusaki misa urinnaaqarammasee moomoo kari rumbeeqa. Raitasamunai qifaqa ateekeufa moomoo kari misa narirana urinnaaqaramasee qini qifaqa ateeqaqau. Qinee kuqirara madikakiqari moomoo kari misa narirana urinnaaqaramasee findi fiqa. <sup>24</sup> Moodaannai qisaukunamu kari Yuda maqannaasa raitasamu darimariqau, moodaa fasiqa aiku asauku taikasee moo fasiqa qisaukuqara faqa moodaannai qiku faqa dinni qiku era kai muqu quqasee kari minannai dariqau. Sia moodaannai miqimandee dariqau, moodaannai qisauku amanasaa miqimandee daru qimaqau. <sup>25</sup> Roomma maqannaasa faqa qaaramoo kari miqi uqannamandee dariqau. Moodaa kari misa oonisamu misa daru qimaqau. Qaaramoo kari ooruku nammariki sipaki moo maqusai Yisuna ufa qimannimirara fidaqa sipa fannoo mandaikufaqa ooruku nammariki ukunnaqa mariqiafana sia kuqiafana. Moo kari miqi mambufaqa eendaki faqa faasaana faqa ooruku nammari qambaana qimmapiqa afainni aniqiafana.

<sup>26</sup> Qinee Yisuna ufa qimannimiga nimariafanaga moomoo aukuaana maqusa maqusa nuafannanakina qinee moomoo kari qimeeke mariqiafana nammari aufunaki faqa nipuraraa fasiqauqaki faqa Yuda maqannaasaki faqa aanaamuru mariasaki faqa firaa taunaki faqa kaasau maqa maaqa oombura maqa maaqaki faqa ooruku nammari firaa farumaki faqa qikaru qimaru aqoondisa faqa misauqakina moomookari kuqirara qimeekeqa.

<sup>27</sup> Qinee minaki fidaqa kadaapirirana faqa tooqaamu darirana faqa maraidaqa moomoo kari sia faiqeeqa, qinee daararee marufaqa nammariara didimarufaqa n-mariqiafana, qinee moomoo kari qini maaqa faqa narana faqa qamunna faqa sia marufaqa kaqi qisukunni faiqaqa n-mariqiafana. <sup>28</sup> Moomoo ainaina ummaara maraqa nuafannana kigari moodaa ainainara kai qianaura. Maqusa maqusa Yisuna ufara suqimarianara kai qinee oonumafi iriqa nidaqa. <sup>29</sup> Moo fannoo misakiqari ummoquki-noo kudoosaapaifaqa qinee faqa mina aanna raidaqa kudoosaapaidaqa. Moo fannoo misakiqari mandainainaki aqufifaqa qini daundura faqa rapikifaqa mi ummaarana maraidaqa.

<sup>30</sup> Qinee qeeqa qimooqiqa qeeqa ummoqukiranara qimooqianaura. <sup>31</sup> Anutufa maasa karaambaifa Yisuna akoofa naaru naaru mina auqu amiqi amiqirafa kai mariani, mifa kai qiniara sia unnaqi mari fee qidanoo, iridanoo. <sup>32</sup> Ooqai qinee Damasakusa maqusai mariafananoo misa karaambaifaq mina auqu Areetasafa nari ureeqarana aqigoofanoo nari sundia namufaqa maqusa kooqi ititafufaqa qini qumaraanee qimasee maqusa kooqikiaqa rakisimariqau. <sup>33</sup> Qini qiqoondiuga minara irisee kaqitina qini mareeqee firaa pateeuqaki rumasee sanda minasaa qususee faandaamura meera marufaqa miriqoo qambaanaqari kaqikaa kooqi auqiranakiqari qini ruqiaeeqeeqa quifa quifa quufaqa maqasaa aqufufaqa quqasee sandaqiafana.

## 12

*Pauroona afu pisipasamandee uqafiqoo ufa.*

<sup>1</sup> Qinee qeeqara qimooqianafa sia anoonaikiannoo, kaqi fifau qeeqa qimooqianaura. Karaambaifa qifu pisipasamandeenoo kukeeqara ainaina kooroomma qimunara qimannimianauranoo.

(Anutufa Pauroona uqeereenoo innaarunai quqasoofanoo innaaruna ququsakinaa ainaina qafoonara nari auqu kukeeqasee Koorinti maqannaasa qimannimidanoo moo fasiqa fee qidanoo.)

<sup>2</sup> Ooqai qinee Yisuna ufa irimaru fasiqanara iriqa. Karaambaifa Anutufa kaqi kai mina uqeereeqeenoo qaara innaaruna ooraagareenoo qaaramoo kiranaki Anutufa marunaki quqanau. Mifa kuqaa fee afiqa miqoo quqanoo fee inau kai afu pisipasamaseenoo mina amana mara uqeereeqeenoo innaarunai quqanau fee inau. Qinee sia iridaqa Anutufa kai iridanoo. <sup>3</sup> Qinee kafia qimannimiqa mi fasiqana uqeereeqeenoo innaarunaki moo auqu Paradisee minaki quqanau. Kuqaa fee miqinoo fee afu kai fee pisipasinoo fee Anutufa kai iridanoo. <sup>4</sup> Mi fasiqana miqoo quqasoofanoo maridanoo oosana oosana ainainara irinau sia faiqi ufa amana qimari ainaina irinau naaquqara ainainara Anutufa qaoo qinuu sia faiqi minara qimannimianne qinuu. Sia faiqi qira ainainara irinau.

<sup>5</sup> Miqinna fasiqanara qinee amooqianaura sia qeeqara qimooqianaura qeeqa ummoqukiannanara qimooqianauranoo. <sup>6</sup> Qinee qeeqa qimooqifau sia furufarirafa mariqini kuqaa anoona ufa kai mariqini. Qinee sia qeeqara qeeqa qimooqianaura. Faiqi anaasee qini dooki qiqafamasee qini dookinaa ufa irisee nariqa kai qiniara iriqa. Qinee qeeqa duqu uqeerearanannai misa fifau qini duqu firaaqoo uqeere foora.

<sup>7</sup> Qinee amiqira ainaina naaquqara amiqira ainaina qafaafannanara qiqa duqura firaaqoo uqeeraifaqa aqaranaki fuanooora Anutufa Sadannanara kaqikaaqoo eedoo qufanoo qifaagasaa moo aupurarana qimiqoofanoo maqee maqee darimariafaqa sia qeeqa duqu uqeereeqe kaqi qumee kai andeeqasee marianifee qimasaida darimariafaqa maridaqa qidaqa. <sup>8</sup> Qinee qaaramoo kari karaambaifainna innaaru qiqa ane maa aurirana maraquqisaannee qiafananoo mifa qaoo qimasee qinuu. Qeeqa kaqi nimira dadaaqirana amiafanafa doo mifa kai doo ani amana mariannoo, qiqa afeeka fannoo kudoosaapee mariasaki amiqi mandee kambiqaidanoo. <sup>9</sup> Qinee Pauroosa mina iriseeqa maaqi qidaqa qinee qeeqa kudoosaapee marunnanara asammasee amooqidaqa. Asaku mundirana afeeka fannoo qini rafaqa fuanifeera qeeqa ummoqukiannanara amooqidaqa. <sup>10</sup> Asaku mundirana ufasaara mandufa faqa kudoosaaparana faqa kadaapirirana faqa, Yisuna ufasaara darirana faqa tinoo taanoo rirana faqa tinaakurirana faqa qiminaqa mareeqe doo amana amiqira fee qianaura. Qinee qeeqa kudoosaapee marunna kamuqoo mi kamuqoo kai afeekaikidaqa.

*Pauroofa nari urinaaqarara ufa qimaqoofa.*

<sup>11</sup> Qinee inniki ani maria fasiqausa unnaqira niqiqoo fasiqausa naannaraqa maridaqa furufarira fasiqara foora maa ufana qimannimidaqa. Inneeqa kai inni oosana fannoo qini mara furufariranaki quqaqisaidanoo. Innee Koorinti maqannaasa qiniara Yisuna anoona ufa qimaqimi mari fasiqa fee qiaqaana. Innee inniki ani maria unnaqira niqiqoo

fasiqausara fifau unna qidaqa uriqararausee qimariafaqa misa qiniara ureeqara fasiqee qidaqa. Kuqaa qinee kaqi fifau fasiqa maridau qinee sia misa ureeqarause marunaiqini, misa urinaaqararause maridaqa.

<sup>12</sup> Qinee kuqaa Yisufa diqiqoo fasiqausa maridaqa aiqama ainaina kooroomannimaqee mariafanaqa qafee mariqau. Innee sia irufaqa qinee kaqi reendeenamandee uqannifiqee mariafana. Faiqi sia amana auqaqairi ainaina faqa naaqudee maru ainaina faqa Anutunara faqa kooroomannimaqee maru ainainna faqa reendeenamandee uqannifiqaafannana. Minannai kai qinee niqqaafanna fasiqausa marunnanara kooroomma nimaqaqiafana. <sup>13</sup> Qinee maqusa maqusa Yisuna ufara suqimarusa faqa inni saimbaqa faqa amana amana kai inniki maridaqa qimannimafannana. Sia misa amiqimannimaqasee inni mandaikamma nimaqasee qimariqiafana. Moodaa ainaina kai inniki moo kiciafanafa mifa kai qeeqa narana munnimma sia amanaikufaqa qinee sia inni narana munnimma irammirisee mareeqa. Mi moodaa ainainnara kai iridaqa qinee aaqeefee miqi fee qidaqa. Innee moo ainaina akiaqara minni qisaqa.

<sup>14</sup> Qinee ooqai inni maqusai qaara kari fuafanausa kafia maqee qaaramoo kifaqa doo qusasa fuanaurano, fidaqa sia inni narana munnimma ainaina maraanaura. Faiqi aanaaqiuqa sia nari ninaukoo narana munnimma ainaina nimidaqa, misa kai nari faiqi namu nimidaqa qinee inni nikausara foora maridaqa qeeqa narana munnimma aiqama faqa qeeqa marirana faqa inni asasamandee nimirarammidaga. <sup>15</sup> Qinee inni nikausara foora maridaqa firaqoo inniara qimuqusufaqa innee qini faiqiara foora quandakina firaqoo qiniara faqa nimuqusiaqaana. Qinee kai inniara firaqoo qimuqusidanoo.

<sup>16</sup> Innee maa ufanara eedoo qifarano. Qinee inniki maridaqa sia narana munnimma mi ummaarana inni nimaqiafana. Innikiqari moo fannoo qiniara maaqi qiannoo Pauroofa nikaruqimasee unufannai maasa mara quqasoofaqa maasa mina ufaanakiara foora nifuanano maasa narana munnimma maraando qifoora. <sup>17</sup> Doo qinee naqifeemasee fee inni miqi qiqiafana. Qinee maindari qeeqa ufa maraqa nuasa niqqaafanaqa sia inni maqusai ooqureeqa sia qini duqusaafau inni munnimma narana mara mareeqau muru qimifau. <sup>18</sup> Qinee Titusana irafananoo eedoo qimasee innee unnai finau, moo fasiqa Yisuna ufa irimarufa qini qikaqaafasaa mina faqa aqikaafananoo Titusana faqa finau. Innee minara Titusafa maasa qikaru qimaseenoo fee maasa ainaina mareefoo qida fee. Sia fee qinee Pauroosa faqa Titusafa faqa moodaa irirana maraseeqara moodamau fimarunnanara irida fee.

<sup>19</sup> Innee mi ufana iriseeqa qiniara maaqi qifarano. Pauroofa narisaa faqa nari faqa marinausa faqa misasaa faqa ititaidano miqidano fee qifarano. Maasa sia miqianaura, asaku mundirafa maasara qundee kaimmidaga. Qini qifaqasaa qidoondiuqa maasa Anutuna afusaa maridaqa aiqama ainaina auqemaria ainaina inni dadaaqidee qidaqa auqidaqa.

<sup>20</sup> Qinee inni maqusai oonureeqa moo ainainara rufiaanaura. Inni marirafa sia amiqirafa oorudupirafa mariandoora qinee qidaqa. Koorinti maqannaasa innee qiniara mookamaseenoo qiga qimiifoo qifoora anee sia reendeenamandee maasa qimaqiminnaranoo aanommasee maasa qimaqimiifoo, qifoora. Qinee inni maqusai oonureeqa maa ainainasara rufiaidaqa, ufa rainarafa aanooqirafa mariandoora nariara nariara rairaiqifoora nariara nariara idara foora qeefoora, kaaqa ainainara rimariasa narifoora, nariara nariara mandufa qifoora munuqi miniqira ufa qifoora nari nuqu uqeerasee nimooqifoora dapi dapi qifoora. <sup>21</sup> Qinee innee unnai onu raananoo Anutufa qini mareeqeenoo qisauriranaki quqaannoo. Qinee inni mandoosanaaki ooreeqa inni nifusaa ikiraqasee soofaariara foora iqa qisauruanoo. Inniki moomoosa ooqindari mandoosana marasee sia minara oonumafi irisee nisaurusee minnisaqau. Akaqausa faiqi faqa anaasee faqa nari ummuari nari ummuarirana minannai furufaridaqa akaqausa faiqi anaasee dapi maraqanua fasiqa anaasee faqa akaqausa ufa rukiasee nari mandoosana manda iriranamau fimariasa mariafaqa sia minara oonumafi irisee nisaurusee minnisaqau.

## 13

*Pauroofa ufa taikenenoo atisaa aaquqira ufa qimaqoona.*

<sup>1</sup> Doo maqee qaaramoo kifaqa inni Koorinti maqanna nindafarara fuanaura. Qinee oonuraanaqa moodaa fasiqa aniree inniki mandoosanara qinnana siamma iriana nara tamummaqara fasiqa akara ufamau fiqa qaara fasiqafee qaaramoo fasiqafee mi mandainaina qafee marianara kooroo qifaqa qinee minara anoonee qimasee ufa qiana nara. <sup>2</sup> Qinee ooqai indaaru innee unnai fiqiafana inaaqiana kafia fiqa maa

ainainara qimannimiqiafana, maqee moosaa marunannaindari kafaa mi ufana kai qimannimiana. Maqee oonureeqa sia qiaafannandee ireeda qimannimianura, maqee sia moo fannoo qinee ufannai náriara foora qiananoo rufiaki sandaannoo. <sup>3</sup>Innee qiniara randee mariafanoo. Asauku mundirafa Pauroonasaqari kuqaa fee ufa qidanoo fee unna qidanoo fee qiniara qimariafanoo. Qinee innee iannai oonuraana kari asauku mundirafa qinisaaqari qimannimirana firaaqoo qimannimiannoo. Asauku mundirafa inni ufa iridanoo sia kudoosaapaannoo narí afeeka inni uqannifiqaannoo. <sup>4</sup>Mifa kudoosaaparanaki aunirira saqarisaa kuqufa marifa Anutuna afeekannai findufumafinoo mi afeekaikiranaki maridanoo. Maasa Yisuna faqa moodaanaki maridaqa kudoosaapaqa maridaqa maasa inni Koorinti maqannaasaki oonuree ufa qidaqa maasa Anutuna afeekannai asauku mundirana faqa kuqiranakiqari findifidaqara foora afeekaikamandee maridaqa qimannimiana.

<sup>5</sup>Inneeqa kai inneeqa marirana nimanamandee qafaaqa, kuqaa fee Yisuna mandaqara oosanamau fidee. Asauku mundirafa inni naunduraki marifaqa innee minara iridee sia fee iridee innee kaaqa uqanna kadiqaaqa maridee. <sup>6</sup>Maasa innee iannai oonuraanaqa innee maasa sia kadiqaaqa maridee qifaranoo. <sup>7</sup>Maasa inniara Anutunara innaaru qidaqa sia inniara mandoosanaki aqufuaqee qidaqa. Sia maasa saika inniki anoonaikianifee qimasaidau innaaruqidaqau, inniara andeeqaramau fuaqee kai qimasee innaaru qimannisaidaga. Maasa kadiqarana amana, inni andeeqaranara kai iridaqa. <sup>8</sup>Sia maasa amana Anutuna anoona ufa ititaanura mina dadaaqirana kai amanaikirafa maridanoo. <sup>9</sup>Maasa qeeqa kudoosaapaida inneeqa afeekaikifaqa maasa mina qafammasee asiana. Innee amiqimandee andeeqarusaikamambi mariaqeeru innaaru qidaqa. <sup>10</sup>Karaambaqa afeeka uriqararana qimuna, sia inni rapeepamma aqira uriqararana qiminu, inni pooduqarana qiminu. Qinee innee iannai oonureeqa karaambaqa uriqararana qimuna mara maree aanoomandee inni ufa sia nimianoo qimasee moo atinai marunaqooqari maa akarana rumannimaqaanaqa inneeqa kai andeeqasee marifaqamma oonu nindafa.

<sup>11</sup>Qini qikaqaafasaa doo maqee akara taikaanura. Innee kaaqa andeeqaranara afeekaikamasee marararee qimariasa mariafanoo, qini ufa qunnana amiqimasee iriaqa, sia nariara nariara rairaiqaaqa, moodaanaki maridaqa asoaranaki mariaqa. Faiqí aanaaseera nimuqusirana nimimari Anutufa faqa naundura asoaranara nimimari Anutufa faqa inni faqa mariani.

<sup>12</sup>Anutuna ufa irimaria fasiqa anaaseesa aiqama inni nimandaidaqa.

<sup>13</sup>Asauku mundirafa Yisufa maasa karaambaqa mina asasamasee dadaaqira oosana faqa Anutufa faiqí aanaaseera nimuqusirana faqa naaquqara andeeqara maraqa moodaanaki kirana faqa inni aiqamausaki faqa mariani.

## **KARATIA**

### **Karatia maqusanaasa Pauroofa akara rumannimufa maridanoo.**

<sup>1</sup> Qinee Pauroosa Yisufa diqiqoo fasiqausa maridaqa maa pasana akara ruman-nimaqaidaqa. Sia faiqi faiqi moo fannoo qini mareeqee Yisufa niqiqoo saikanaki quqaqoosa maridaqa, sia Anutufa moo fasiqara qufanoo qini mara quqanau. Anutuna asauku mundirafa Yisufa faqa nari akoona Anutuna faqa Yisuna kuqiranakinaana uqeera quqoofa miqandakai qini rafaafusee mara quqaqoosa maridaqa maa saikana qidaqa. <sup>2</sup> Maaqoo maria nikaqaafasaasa dadaaqida inni Karatia maqannaasa nimandaidaqa, Karatia maqa maaqaki Yisuna ufara suqimariasa inni nimandaidaqa.

<sup>3</sup> Maasa aiqamausa qikoofa Anutufa faqa mina asauku mundirafa Yisufa maasa Karaambaiqa faqa Anutuna idaaqira amiqi amiqirana faqa naundura asoarana faqa inni nimiani.

<sup>4</sup> Maasa qikoofa Anutufa qufanoo asauku mundirafa iriseenoo eedoo qimaseenoo mi mau finau maqee kamuqoo marunna mandainaina afeekaikiranakinaana maasa idukuqeera narafaqa maasa mandainaina akiaqara aunirira saqarisaa paasoomasee quqanau. <sup>5</sup> Anutuna areenarana faqa amooqirufa faqa naaru naaru amimariani, doo miqiani.

*Sia moo amiqira fasaasa ufa maridanoo moodaa kai.*

<sup>6</sup> Oo Karatia maqannaasa qinee inni oosana tautummiqa. Innee dauni aaqee uqanna Anutuna minnisaafaqa qinee minara iriseeqa tautiqa, mifa narasauku mundirana idaaqirana kaqi nimirannai inni naarama quqasoofaqa innee aaqee uqanna quqasee sandeeqa moo amiqira fasaasa ufara foora randoofaqa iriseeqa tautiqa. <sup>7</sup> Sia moo amiqira fasaasa ufa maridanoo moodaa kai maridanoo, faiqi anaasee akaqausa asauku mundirana amiqira fasaasa ufa qumaree mareeqee kaqinni ubeekkeqa minannai furufarana inni nimimariafanoo.

<sup>8</sup> Indaaru maasa Yisuna amiqira fasaasa ufa inni qimannimafannana doo maqee maasee moo fannoo fee innaarunaindaraa qangiroo moo fannoo fee moo fuka aaqee maria fasaasa ufana qimannimufaqee Anutuna aqurarara ufa misasaa mariannoo. <sup>9</sup> Maasa ooqai qimannimafannanasaa kafaa maqee qimannimidafa, moo fannoo maasa ooqai qimannimafannana moosaa qimasee qimannimafana mifa Anutuna aqurarara ufa ameemaana mariannoo.

<sup>10</sup> Faiqi nifusaa qeeqa qimoofee qida fee nasurida fee miqi qidaqee oo sia uqanna qinee miqianauro. Anutuna kuqaa eedoo qira ufara qinee randaidaqa. Qinee faiqi nifusaa fifau nasuridaqa miqi qidafau sia asauku mundirana ainainiranaki marini maqee maqee qini darirara kai qiafaqa moo ainainiranaki funaiqini.

*Pauroofa Yisufa niqiqoo fasiqausaikammafi oosana aroo ufafa.*

<sup>11</sup> Oo qini qikaqaafasauqa qinee maa ainainnara qimannimianauro. Qinee qimannimianna fasaasa ufana sia faiqi auquqoofa maridanoo. <sup>12</sup> Sia faiqikinaana qinee mareeqa, sia moo fannoo qimaqimifaqa iriqa asauku mundirafa Yisufa nari uqanna kooroomambi qimaqiminau.

<sup>13-14</sup> Qinee ooqai kumaaraa mariafana Yuda maqannaamaana ufa amiqimandee firaqoo qimariqifana. Qinee Yuda maqannaamaana ufara qeeqa qikiaqauqa urinnaaqaramasee mi ainainna qiaqifana. Qinee misa urinnaaarammasee firaqoo maasa qikeeku qikaaku oosana maraqifana. Qinee minaki fidaqa Anutuna ufara faqa Yisuna ufara faqa suqimarusa sia nifauqiafana afeekaikamandee misa mandaikamma nimaqiaqifana. Qinee minara amiqimandee taikaanee qidaqa mandaikamma nimaqiaqifana.

<sup>15</sup> Anutufa sia qini mandoosanara irinoo nari idaaqira amiqi amiqira mariranaki marinoo qini qinoofa sia qini maqoo kamuqoo nari ainainnara saikaki marianifeera ooqai indaaru qini daarama mi saikanaki quqaqisoofaqa kisaaqasaa sia iriqaqifana, mana mana kai qiaqifana. <sup>16-17</sup> Anutufa qiniara nari amiqira fasaasa ufa aanaamuru qimannimiannee qimaseenoo Damasakusa maqusai fimariafanna aanasaa nari amaaku qini uqaqifiqanau. Uqaqifiqasoofaqa sia moo fasiqunnai oonureeqa Yisuna aufakiana iriqa, nari amaaku uqaqifiqaannee qimaseenoo sia Yisufa niqiqoo fasiqusakina ooqai marusakina Yeerusaarenni sia ooruree iraaqanaqa qimaqimiqau. Sia qinee miqi qiafana qinee andeeqasee quandaki Arabia maqa maaqai oonu marikiqa oonu

randeeqa anireeqa kafaa Damasakusa maqusai fiqiafana. <sup>18</sup> Yisufa indaaruu kooroom-maqqooqoqari qaararamoo aukuaana aiqarammafufaqa Yeerusaree maqusai ooruree Peetooroo funnai mina qafamasee aqoondikianauree qimaseeqa mina faqa qaara amaana maraqaafana. <sup>19</sup> Mi kamuqoo sia Yisufa niqiqoo fasiqausa nindafaqiafana misa qiqari Yisuna akaqa Yameesana mina kai qafaqiafana.

<sup>20</sup> Qinee maa akaranakinaa ufa anoona kai qidaqa sia unna ufa qidaqa. Faiqi sia Yisuna fasaasa ufa qimaqimiqau, Yisufa nari kai qimaqiminau. Anutuna afusaa maridaqa anoona ufa kai qidaqa.

<sup>21</sup> Qinee Yeerusareenni qaara amaana maraseeqa Siria maqa maaqaki faqa Sirisia maqa maaqaki faqa oonu kisaagasaa mariqiafana. <sup>22</sup> Mi aukuaana mi kamuqoo Yudee maqa maaqaki maridaqa Yisuna ufara suqimarusa sia qini qiqafaqau. <sup>23</sup> Akaqausa qiniara qimannimunara irimarusa kai mariqau. Misa maaqimandee qiniara qimannimiqau. Maasa mandaikamma qimiqeamaru fasiqafa doo maqee quandaki nari naru taikee maru ufana qimannimidanoo. <sup>24</sup> Misa mi ufana iriseeqa Anutufinnai qiniara dufi dufi qimariqau.

## 2

### *Pauroofa niqiqoo fasiqausaki sia qinee oorudupirausee qidanoo.*

<sup>1</sup> Qinee Pauroosa Siria maqa maaqaki faqa Sirisia maqa maaqaki faqa kisaagasaa qisaukuqara taikasee qikunni qaara faqa qaara faqa oogu marasee aukuaana maraseeqa Baranabasina faqa Titusana faqa nifiqamareeqa Yeerusareenni ooru fiqiafana. <sup>2</sup> Anutufa nari maraqqannai kukeeqasee qimaqimunara ooru fiqiafana. Miqoo ooruree Yisuna ufara suqimarusa misa uriqararusa faqa kai ufa qidaqa, aanaamuru Yisunara qimannimianufana oosana oosana qimannimiqiafana. Misa sia irifaqa qini saika oqai faqa maqee faqa sia amiqimandee qini dooki iriranaki qaoo qifooru minara qinee qimannimiqaa.

<sup>3</sup> Qini qiqoondi Titusafa aanaamuru Kirisa maqusaindari qini faqa Yeerusaree maqusai ooru marufaqa Yuda maqannaasa Yisuna ufa irimarusa minara maasa sia Yuda maqanna naanna ramasee Titusana fainanduqaneera qiqau, kaqi mana mana imariqau.

<sup>4</sup> Faiqi akaqausa Yuda maqannaasa unna qimasee Yisuna ufara suqimarunaasee qimasee maasaki umee ani keeqafufuqa Titusana qafammasee mina fainanduqaaqee qufaqa maasa qaoo qiqiafana. Misa nipuraraa fasiqara foora kukeeqasee maasaki ani keeqee mariqau. Maasa Yuda maqannaasa faqa aanaamuru faqa asauku mundirana Yisunaki marunara sia nariara nariara rufieeqa amiqi mandee moodaanaki Mooseena sandufaqiqari idukiara foora marunara nipuraraa fasiqara foora minaki ani keeqafufuqa maasa mareeqee Mooseena sandufaki rumberanakiara foora kafaa quqaaneera nipuraqau.

<sup>5</sup> Maasa sia misa ufara eedoo qiqiafana. Inni aanaamuru mariasara iriseeqa sia eedoo qimasee Titusana fainanduqiqiafana. Yisuna amiqira fasaasa ufa anoona ufara kai innee aanaamuru mapukusee maraqqee qimasee sia misa ufa fainanduqirufa iriqaafana.

<sup>6</sup> Qinee Pauroosa Yeerusareenni ufa qimarunaki maridaqa Yisuna ufara suqimarusa maridaqa faiqi misara uriqararausee qimarusa faqa ufa qimarufaqa iriafanaqa sia moomau fiqau qinee fimariafannamau mi mau kai fiqau. Qinee faiqi misara uriqararausee qiqaa, Anutufa sia faiqi nifaqa qafamaseenoo uriqararausee ureeqarausee qidanoo minara qinee sia uriqararausee qiqaa sia ureeqarausee qiqaa amana amana kai mariaa maqi qimasee qeeqa aanaamuru faiqi aanaaseeki saika maree marunnana kooroomasee paasoosamandee kaqi qimannimiqiafana. Qimannimianafaqa uriqararausee qimariasa sia qaoo qimasee moosaa fiaanoo qiqau. <sup>7</sup> Misa qiniara maaqi qiqau, oqai Yisuna amiqira fasaasa ufa Yuda maqannaasa qimannimirafa Peetooroonasaa Anutufa quqanau, doo maqee kamuqoo mifa aanaamuru mi ufanakai qimannimirafa qini Pauroonasaa quqee maqi qimasee maanara faqa irimariqau. <sup>8</sup> Anutuna afeeka fannoo kai Peetooroonaa mara quqa amufanoo Yuda maqannaasaki fidanoo qimannimianau, miqi kai inoo Anutuna afeeka fannoo qini Pauroosa mareeqeenoo aanaamurukina mara quqasoo faqa fuafannaqa minara faqa irimariqau.

<sup>9-10</sup> Yisuna ufa irimariasa uriqarararasara foora mariasa Yameesafa faqa Peetooroonaa faqa Yoohaneefa faqa qini ufa iriseeqa maaqi qiqau. Oo kuqaa Anutufa ani mareeqeenoo kuqaa aanaamuruki quqeenoo, anee aanaamuruki ainaininaqa maasa Yuda maqannaasaki ainainianauree qimasee qini faqa Baranabasina faqa nisauku ruqunnaseeqa doo fuqqee qimasee moodaa ufa kai maaqi kai qimasee qimaqimiqau. Innee qara Pauroosa faqa Baranabasina faqa Yudee maqa maaqaki maria kudi fasiqausara Yisuna ufa irimariasa maqee maqee iridaqa dadaa qiaqa. Miqi qufaqa qinee iriseeqa maaqi

qiqiafana, qinee minara kai afeekaikianaورانoo fee qiqā. Mi ufa suqirana Yeerusareenni maridaqa qimaqimiqau.

*Pauroofa Antiooka maqusai maridanoo Peetooroona aqinau.*

<sup>11</sup> Doo miqooqari moo aukuna ai randoofaqa Peetooroofa Antiooka maqusai qinee mariafannaqoo aniroofaqa qinee aigamausa nifusaa Peetooroona afusaa aqiqiafana, akooqoo mifa aqamasoonara afusaa aqiqiafana. <sup>12</sup> Yuda maqannaasa nāri sandufa qiqā aanaamuru mariasa faqa sia moodaanaki misa saimbaqa narana naanaaree qiqau. Peetooroofa Antiooka maqusai maridanoo misa Yuda maqannaasa sandufa rukiaseenoo miqooqaraa aanaamuru Yisuna ufa irimariasee qimaseenoo maqee maqee misa saimbaqa moodaaqoo ooqu marifidanoo narana nee marinau. Miqinoo marufanoo Yameesafa Yeerusaree maqusai maridanoo akaqa Yuda maqannaasa niqiqoofofaqa Antiooka maqusai ooqu fiqau. Misa ooquroofanoo Peetooroofa nindafamaseenoo rufamareenoo aadumai nianasaa oonu ooqu marifufanoo qimminirinoo qinau. Maa fuka Yuda maqannaasa Yeerusareendari qumuraasa qiniara sia fainanduqiraua faqa narana naidanoommifoo qifoo qimasee rakeemasee aadumai ooqu marifinoo nari narana nanau. Yuda maqannaasa Yisuna ufa irimarusa misa qiqari akaqausa aanaamuru marusara maaqi qiqau.

<sup>13</sup> Yuda maqannaasa qikaqaafasaaqau Peetooroona faqa miqoo marusa Peetooroona oosana qafamasee misa faqa miqi kai iqa Yeerusareendari qumusara rufamareeqa Peetooroofa ooqu marutinau ooqu marifiqa nāri narana naqau. Misa sandeeqa Baranabasina faqa firarisameeqee nāri manda maparaa iranaki quqasoofanoo aadumai ooqu marifi nanau. <sup>14</sup> Qinee misa miqiu oosanna qafamaseeqa maaqi qiqiafana, misa sia amiqira fasaasa ufa anoona ufamau andeeqasee fidaqa eendaandammida miqi mariafanoo, miqi qimasee Peetooroona aigamausa nifusaa afusaa aqiqiafana, anee Yuda maqannaafa mariananoo aanaamuru oosana marasee aanaamuru faqa moodaanaki mariananoo, anee nanaree maqee aanaamuruara asaurusee rakeemasee aadumasaa ooqu marinanee. Anee miqiannana aanaamuruara sia fee amanaikinane miqinane. Anee aanaamuru mareeqeenana Yuda maqannaasaki quqasainaqa innaarunai firana amanaikidee miqidanee.

*Yuda maqannaasa faqa aanaamuru faqa Yisunasaaqaraana asumu mareefaranoo.*

<sup>15</sup> Qinee miqi qimasee Peetooroona aqisee maaqi qimasee aigamausa qimannimiga. Kuqaa maasa Yuda maqannaaki kambiqaraua maridaqa. Maasa sia aanaamuru mariasa, misa Anutuna ufara sia irirai mana mana imariasa. <sup>16</sup> Sia maasa Mooseena sandufasaaqari firannai Anutuna innaarunai firana amanaikiranaki keeqaanaura, asauku mundirana Yisunasaa rusiranannai kai Anutuna innaarunai firana amanaikiranaki keeqaanaura. Sia faiqi moo fannoo Yuda maqannaasa sandufannai Anutuna innaarunai amanaikiranaki keeqaannoo.

<sup>17</sup> Maasa Yuda maqannaasa Anutuna innaarunai amanaikiranaki keeqararee qimasee asauku mundiranasaa atooqafiqa quandakiqa boo aanaamuru mariasa naanna ramafiqa mandoosana maree marunasee qianaoranoo. Maasa miqidaqa asauku mundira fee maasa mareeqee mandainainaki quqeenoo fee qianauree. <sup>18</sup> Oo sia uqanna miqinoo maridanoo. Qinee Pauroosa Mooseena sandufannai Anutuna innaarunai amanaikiranaki keeqaranara qaoo qimarunasa maridaqa, qinee maqee quandaki minara eedoo qiqā Mooseena sandufa rukiaanaura. <sup>19-20</sup> Mooseena sandufara qinee maaqi qianaura doo mifa qini aqarana qimaqiminoo darusaifaqa kuqia maridee qidaqa. Qinee Anutuna saikara findifi minaki mariaqeera qini darusaifaqa kuqia foora iqa maridaqa. Asauku mundirafa auniranasaa kuqinoo qinee faqa minandiri kuqia foora iqa maridaqa doo maqee sia qeeqaraa kasida maridaqa, asauku mundirafa qini daundurari marinara kasida maridaqa. Qinee maa maqee kasira marirafa Anutuna amaaku maqee maqee saqarikidaqa maridaqa, mifa qiniara amuqusinoo nari marirana quqanau. <sup>21</sup> Qinee Anutuna idaaqira kaqi nimirana qimifaqa sia qaoo qimasee minnisaanaura, faiqi moo fannoo Mooseena sandufasaaqari Anutuna innaarunai amanaikiranaki keeqainanara asauku mundirafa fifau kuqinau maqi qidaqa.

### 3

*Nimaarusiranara faqa Yisunasaa rusiranara faqa Pauroofa mi ufa qandara qidanoo.*

<sup>1-2</sup> Oo Karatia maqannasa innee furufari mariasa yafee inni mandirirana naakuni-maqeenoo fee Yisunasaa rusirana afainoo fee. Qinee Pauroosa inni Karatia maqannaasa nifusaa asauku mundirafa aunirira saqarisaa kuqunara amiqimasee kooroomasee inni



nifusaa qimannimiafanaqa inni nifusaa kuqinoora fooqaana innee amiqimasee irimari-afanoo, doo maa moodaa ainainara kai irammirianaqa qimaqimiyaqa, innee Mooseena sandufa maraqa nuana minannai fee Anutuna maraqa maraaqee iqau, Yisuna amiqira fasaasa ufa irisee irirana minasaa rusiranannai fee Anutuna maraqa maraaqee iqau, minasaa irirana rusiranannai kai maraqa.

<sup>3</sup> Innee naqiaqooqari fee firaa furufariranaki fi fee, innee Anutuna maraqa naakusee minannai oosana arasee andeeqasee fidaqa kafaa maqee mariaqooqari nanaree innee mina afaimma quqasee faiqi faiqi iriranamau maqee maaqooqari fidee.

<sup>4</sup> Indaaru Anutuna maraqa inni naakufufaqa amiqira oosana inniki kambiqafinaw doo maqee innee minara fifau ainainee fee qidaqee. Sia fee innee minara iriafanoo nimuqusidanoo fee. <sup>5</sup> Anutufa nari maraqa afaaramasee inni maqee maqee nimidanoo faiqi sia auquaqaa ira ainaina auqimarifaqa innee qafee mariafanoo. Innee Mooseena sandufamau fimarianara Anutufa nari maraqa inni nimidanoo fee amiqira fasaasa ufa iriqa irirana minasaa rusimarianara Anutufa nari maraqa inni nimidanoo fee. Minannai kai nari maraqa inni nimidanoo.

<sup>6</sup> Oosana aroo ufafa irirana rusimarianara maaqi qidanoo Abarahaamana auqu ramasee mina kikiqusinoo maaqi qidanoo. Ooqai Anutufa Abarahaamana nauraiqi marufanoo qimaminaw.

Abarahaama anee faiqi siaifa mariananoo anee moomoo maqusanaasa nikoofa marinaranoo.

Abarahaamafa mina iriseenoo oo kuqaa kambiqaanoo qimaseenoo nari irirana Anutuna ufasaa rusisee afaqa quqasee marinaw. Anutufa Abarahaamafa nari irirana Anutunasaa rusisoona qafamaseenoo minara maaqi qinaw. Oo doo Abarahaamafa qini Anutufa innaarunai firana amana kai mari fasiqafa maridanoofee qinaw. <sup>7</sup> Qinee Pauroosa minara maaqi qidaqa innee Karatia maqannaasa amiqimandee maana iriaqa. Kuqaa Yuda maqannaasa Abarahaamana maqasaqarara ati mina moodaa maqannaasa mariafanoo Anutufa Abarahaamana atiara moosee qidanoo maaqi qidanoo. Abarahaamana aanna reemariasa Anutuna ufasaa irirana rusimariasa misa kai Abarahaamana aiku asauku anona uqanna maridaqa. <sup>8</sup> Anutufa ooqai indaaru aanaamuru maqannaara nari irirana Anutunasaa rusinausa Anutuna innaarunai firana amana keeqeefandiafoo qimasee akara rumaqoofa maaqi qinaw.

Anutufa ani Abarahaamanasaaqari aruruki akinanoo aiqama maa maqa maaqana afaaqasasa mariasa amiqi amiqimma nimaqaanoo fee qimaqoofa maridanoo.

<sup>9</sup> Anutufa qufanoo Abarahaamafa mi ufana nariara irisee doo kuqaa fee qunara Anutufa Abarahaamana amiqi amiqinaw. Doo maqee aukuaana miqi kai iqa aiqama irirana Anutunasaa rusimariasa Abarahaamanasaaqarara amiqi amiqirana Anutufa raina nimidanoo.

<sup>10</sup> Aiqama maqannaasa Mooseena sandufamau fidaqa minannai Anutuna innaarunai firana amanaikidaqa keeqaanauree qimariasa aqamaki Anutuna niqurararufa ni-maarusrirufa ameemaanai maridaqa. <sup>11</sup> Tamummaqara fasiqauqa akara minara maaqi qinoo maridanoo,

Anutunasaa irirana rusimarianannai Anutuna innaarunai firana amanaikiranaki keeqemariasa misa kai maqee oosana arasee naaru marirana mareefaranoo.

Maasa mina irisee maa ufanara kooroo ifoo qidaqa sia faiqi moo fannoo Mooseena sandufa mararanannai Anutuna innaarunai amanaikiranaki keeqaanoo. <sup>12</sup> Mooseena sandufa sia Anutuna saqarikirafa minasaa mundinoo maridanoo. Mooseena sandufa fannoo faiqi minasaa kaaqa andeeqasee firafa minasaa mundinoo maridanoo. Tamummaqarasa akara minara maaqi qidanoo,

Mooseena sandufamau kaaqa andeeqasee fimarifa kai naaru mariranaki keeqaanoo fee qimasooqaa maasa sia amanaikidaqa sia keeqaanaura.

<sup>13</sup> Asauku mundirafa Mooseena sandufamau fimariasa Anutuna niqurararufa ameemaanai rumbaqa marunara iriseenoo asauku mundirafa nari kai Anutuna niqurara ufaikamambinoo maasa daaqa qumureenoo minaki rumbaqa marusa idukuqisanaw. Tamummaqara fasiqauqa akara minara maaqimminoo maridanoo.

Saqarisaa dirifi kuqimariasa aiqamausa Anutuna niqurararufa ameemaanai mariasa maridaqee qidanoo.

<sup>14</sup> Asauku mundirafa saqarisaa dirifi kuqinaw. Anutufa ooqai Abarahaamanasaaqarara amiqi amiqirana aanaamuru mariasa nimianifee qimasooqanoo asauku mundirafa saqarisaa dirifi kuqinaw. Asauku mundirana Yisunannai aanaamuru mariasa Anutufa Abarahaamanasaa qima afeekaikira amiqi amiqirana misa faqa raina mareefaranoo. Maasa faqa qeeqa Yisuna saqarikiranannai Anutufa nari maraqa nimiraree quna faqa maraanaura.

*Nimaarusira ufara faqa qima afeekaikira ufara faqa Pauroofa qidanoo.*

<sup>15</sup> Oo qini qiqaqafasaaauqa maasaki mari ainaina kikiqusussee qianaورانoo. Faiqi qaaraqanda moo ainainara qimasee qima afeekaikamasee mi ainainna papiqasaa akara rumasee nariqara nuqu minasaa akara rumasee sia amana mi ufana minniseefara, mi mau kai fifaranoo.

<sup>16</sup> Miqi kaimmasee Anutufa nari qima afeekaikira ufa Abarahaamanasaa faqa mina atisaa faqa quqaseenoo akara rinau. Ooqeenaa akara fannoo sia nari atiuqa moomoo fasiqa anaaseera qidanoo. Mifa maaqi qidanoo, ani ati kaimma qima afeekaikirana amianauree qidanoo asauku mundiranara moodaara qinau. <sup>17</sup> Qinee Pauroosa minara maaqi qidaqa Anutufa Abarahaamana narufa amiseenoo doo qinee mi mau kai fua-naureeqimasee qimafeekaikinau. Migooqari (430 aukuaana) aukuaana moomoo uqanna aiqara mafufanoo Mooseena sandufa fannoo kasooqagee innaaqiana kambiqafinoo sia amana Abarahaamana qimamu ufana rafaqaqufannoo kaqi mariannoo. <sup>18</sup> Anutufa Abarahaamanara Kannaa maqa maqakinaa saqama namufaqa faiqi namufaqa aiku asauku namufaqa amiraree qimasee Anutufa mi maqa maaqa saqamana Abarahaamafa nari sandufamau funara sia irirai ooqai nari qima afeekaikammaqoo iriranasaa nari afaarinoo aminau.

<sup>19</sup> Maasa minara irisee Anutufa naqiraree sandufa Mooseena aminoo fee inau. Mooseenakiqari fiftufanoo Anutufa qima afeekaikira ufa qimamufa Abarahaamana ati anooa uqanna kambiqaaninanaki Mooseena sandufa taikaannoo. Mi qambaana kamusaqanna aaqarana kooroomma nimaqaanifeera Anutufa mi sandufana quqanau. Anutuna qangiroouqa mina sandufa Mooseena amufanoo Mooseefa Anutuna faqa maqasaa fasiqa faqa aanaiqikinoo maridanoo maqasaa nari aqoonausa niminau. <sup>20</sup> Anutufa sandufa quqeeamarufa faqa faiqi anaasee mi ufamau fimariasa faqa marianara aanaiqikirafa Mooseefa mina qambaana maridanoo. Abarahaamana qima afeekaikirana amaukuunafa sia miqinoo maridanoo. Abarahaamafa sandufamau firafa sia marunara aanaiqikirafa faqa sia marinau. Anutufa nariara qima afeekaikira ufannoo Abarahaamana qimaminau. Maasa minara uriqarara oosanee qidaqa.

*Nimaarusira ufa oosana kooroo idanoo.*

<sup>21</sup> Maasa minara iridaqa Mooseena sandufa fannoo Anutuna ufara qima afeekaikirufa Abarahaamana amunafa rafaqaqidanoo fee qianauree. Sia amana rafaqa fuannoo. Mooseena sandufa oosana maaqimminoo maridanoo. Faiqi anaasee Mooseena sandufamau fidaqa mina aiqarara sia amana naaru marirana mareefara. Miqira sandufa Anutufa sia niminau. Niminaqau mi sandufana mareefau innaarunai fini. <sup>22</sup> Ooqeenaa akara fannoo aiqama maqannaasara nari mandoosana afeeka ameemaanai kuridiranaki maridaqee qidanoo. Qinee Pauroosa minara maaqi qidaqa Yisunasaa irirana rusimariasa Anutufa nari qima afeekaikamandee maqee oosana arasee naaru marirana nimianoo fee qidaqa, mi nimirafa asauku mundirana Yisunasaa rusimarianasaa mundinoo maridanoo. Aiqama ainaina nari mandoosana afeeka ameemaanai marianara Yisunasaa irirana rusimarianannoo kai aikaquannoo.

<sup>23</sup> Yisuna saqarikira aukuaana sia maruqoo Mooseena sandufa fannoo mina afeesidanoo maasa karabusara foora rumbaseenoo maramareenoo Yisuna saqarikira aukuaana kooroomambufanoo minaki quqaqisanau. <sup>24</sup> Asauku mundirafa gumuaninna aukuanasaa Mooseena sandufa fannoo maasa uqannifiqara fasiqara foora marinoo maasa Yisuna saqarikiranannai Anutuna finnai innaarunai firana amanaikiranaki keeqaaqeeera maasa nifiqamaree asauku mundirana aaga muna qisanau. <sup>25</sup> Doo maqee Yisunasaa rusirafa ani maridanoo ooqai uqaqifiqee marufa Mooseena sandufa sia maqee rakisi nimaqaidanoo.

<sup>26-27</sup> Innee aiqama Yisuna saqarikiranannai asauku mundiranaki keeqafi marianara Anutuna amaaku kamambi marianara innee inneeqa nammari maroonannai innee asauku mundirana andeeqara marirana qamunnara foora akumaree minaki fuaqa. <sup>28</sup> Doo minakiqari sia Yuda maqannaasaa faqa aanaamuru faqa naaduma moo kiqa maridaqa sia karabusa ainaini mariasa faqa idukirausa faqa moo kiqa mariafanoo sia faiqi faqa anaasee faqa mookiqa mariafanoo amana amana kai mariafanoo. Innee aiqama asauku mundirana Yisuna faqa moodaanaki maridaqa aiqamausa amana amana kai moodaa mariafanoo. <sup>29</sup> Innee asauku mundiranaindi marianara Abarahaamana ati mariafanoo. Abarahaamana atiuqa marianara Anutufa Abarahaamana amiqi amiqirana qima afeekaikuna mi amiqi amiqira ainainna kasooqagee innaarunai inni faqa nimianoo.

## 4

(Ooqai Pauroofa maru aukuaana ainaina faqaasa faqa pisinisa faqaasa faqa munnim-mara ainainimariasa faqa kudiuqa faqa mariqau. Ainaina faqaasa faqa pisinisa faqaasa faqa nari ainainirana moomoo marifaqa sia amanaikifaqa akaqa fasiqauqa nifiqee nari ainainiranaki quqasee mina akiqara munnimma nimimariqau. Moo oosana faqa misaki marinau. Kudi fasiqauqa akaqausa kaaqa kudiki mariasa naararee marifaqa marianara ainaina faqaasiannai oonuree irafanoo ainaina faqaafa ainaina siaina karabusara foora ira saikiranaki quqaseenoo sia feefauru aminau. Kaqi narana faqa faiqarana faqa mina ainainirana akiqara amiseenoo feefauru uqanna sia aminau. Misa minara karabusa saika imarusee qimariqau. Mi karabusa saikanaki maru fasiqana ati mina ainaina kafaa mi fasiqana idukiraree qimaseenoo munnimma firaatia aqusee idukumaree fimariqau.)

<sup>1</sup> Mi ufanasa ootupammasee maa ufana ainainafaqaafa faqa nari amaakuara faqa qimannimianaura. Faiqi moo fannoo kuqufinanoo mina faiqi mina aiqama ainaina maraanoo. Mina akoofa kaqi maru kamuqoo mina faiqi sia innooqanoo marufanoo kaqi nari akoono ainainira faiqara foora maridanoo. Nari akoofa nari amaakuara nari ainainira faiqara foora marifanoo saika ummaqirana dadaqi marinara narana aandau amidanoo. Nari akoono aiqama ainaina maraaninafa maridanoo kaqi fifau ainainira faiqara foora nari akoono faqa maridanoo. <sup>2</sup> Mina faiqi kumaara marifaqa mina akoono ainainira faiqau mi faiqina faqa mina akoono ainaina faqa rakisiqua fifi ifaqa mina akoofo doo innooqee maqi qimasafanoo mi faiqifa ainainasaa rakisidanoo. <sup>3-5</sup> Miqi kai iqa maasa sia innooqeera fooqaa ira kamuqoo maasa maa maqa maaqanasaaqaraa irira sandufa ameemaanai mariqifana. Anutufa maa aukuanara audeeqara aukua-nee qimaseenoo nari amaaku aqiqanau. Aqiqamaseenoo maasa Mooseena sandufa ameemaanai mina rumbaranaki mariusa minakigari feefauru aquseenoo idukusoofaqa findifiqa Anutuna amaaku kamambi mariaqeera Yisufa maa maqa maaqanasaaqaraa anaasee aranandaki rumafufanoo maqasoofanoo Mooseena sandufa ameemaanai maa maqanasaa kambiqafi marinau.

<sup>6</sup> Anutufa inniara mina amaaku fee qiqaqeera qimaseenoo nari amaaku maraquna inni nimuqusaki aqiqoofanoo keeqafi maridanoo, mi maraqunafa inni dadaqifaqa innee faiqi aanaaqira fooqana Anutunara qini qikoo fee qimariafanoo. <sup>7</sup> Miqinara innee sia maqee fifau ainainira faiqi marifaranoo, innee faiqi faqa anaasee faqa kuqaa Anutuna faiqi araamuqmaakaikammafi mariafanoo. Doo marifanoo nari amaaku amianinnana innaarunai mari saqamana mareefandinasa mariafanoo. Anutufa nari kai qifaqa innee mina amaaku araamuqmaaka mina innaarunai mareefandinasa mariafanoo.

*Pauroofa Karatia maqannaasara kaaqammimirarinau.*

<sup>8</sup> Ooqai innee Karatia maqa maaqaki marusa sia Anutuna aqa oonuree amiqimasee irimariqau afaanna ainaina sia Anutunaki maru ainaina innee mina rumbaranaki mariusa mariqau. <sup>9</sup> Doo maqee uqanna Anutunara irimariafanoo, Anutufa faqa doo inniara faqa iridanoo. Doo nanaree innee miqooqari kafaa quandaki kafaa manda umooqukira kuquqaaira maqasaa irirana innai faqa inniqa nauraa manda sandufa innai faqa quandee fee. Innee Anutuna faiqikiranakigari quandaki fifau maqasaa irirana rumbaranaki fidee miqidaqee. Saina Yisunasaa rusirafa kai mariaqaana. <sup>10</sup> Innee Karatia maqannaasa kaaqa Yuda maqannaasa oosana oosana sabata faasaanara rimariasa mari-afanoo aaqaida miqi mariafanoo. Kaaqa inni moo quqoonara naaquqaiifaqa Anutunara iri maria quqoono fee qimasaida minara kai irimariasa mariafanoo. Aukuanara faqa gambaana saqannara faqa kaaqa minara ridaqa minannai innaaruna aana maraanauree qidaqa aaqee mariasa mariafanoo. <sup>11</sup> Qinee Pauroosa inniki marunasa inniara rufaidafa. Inniki ainainiafanafa fifaunni maqasaa rairaa idanoommi maqi qidaqa.

<sup>12</sup> Oo qini qikaqafasaa mariasa inniara afeekaikamandee qimannimidaqa. Qinee Pau-roosa Yuda maqannaasa mariaafanusa maridaqa misa oosana faqa Mooseena sandufa faqa minnisee aanaamuru naanna ramasee Yisuna saqarikammasee mina ameemaanai maridaqa. Innee faqa miqi kai iqa qini daanna reeqa Mooseena faqa Yuda maqannaasa faqa sandufa minnisee Yisuna kai saqarikiaqa. <sup>13</sup> Qinee aaqee indaaruu amiqira fasaasa ufa inni qimannimifanna oosannara irimariafanoo, qinee aurida mariafannanara inni maqa maaqaki kisaqaasaa maridaqa qimannimiqifana.

<sup>14</sup> Qinee aurufanaqa qiqafee sia qiniara nikoqooofaqa qini mandaikamaqisasee minniqisaqau. Qini aurirafa firaqoo inni narufaqa minniqisaaneerusia sia minniqisaqau. Idaaqa kai maqisee marufaqa mariqifana. Innee qiniara Anutuna qangiroora foora mari ifoo qimasee qini qumaraqau. Innee asauku mundirana Yisuna qumaroondeem- miqa qini qumarasee amiqi amiqimmaqisaqau. <sup>15</sup> Mi fasannai innee firaqoo qiniara asasimariqau, maqee naqi fee ifaqee sia miqidee. Inni ooqai mariranara maaqi qidaqa

innee firaagoo qiniara qimudao qimasee qini dadaqianee qimasee inneeqa fira uriqarara ainaina kaqi qimuqini inneeqa nifu faqa pitaqimeeqee kaqi qini qimuqini. <sup>16</sup> Doo maqee Yisuna anoona ufa qimannimunnannai fee qini namuqaa kamambi maridee. Oo sia miqifanoo andeeqaanno.

<sup>17</sup> Akaqa fasiqa anaasee aqee mariasa inni faqa ani maridaqa moo unna ufa qimannimi mariasa inniara unna qimasee firaagoo ridaqa amiqi amiqidaqa ueeqaidaqa sia amiqira iriranarau miqidaqau, misa inni mara mareeqa qini Pauroosaa qaraana rakee iaqee miqidaqa, misa irirafa innee iannai ubeekanoo marifaqa inni iriranara nari iannai ubeekamasee misa ufa iriaqee miqidaqa. <sup>18</sup> Akaqasa inni rarisamaseeqa inneeqa irirana misasaa atooqara oosanafa qaaraikamminoo maridanoo. Moo mandoosana moo amiqira oosana maaqimminoo maridanoo. Misa inni rarisamasee misa manda oosana maraaqee qira oosanafa mandoosana maridanoo. Misa inni rarisamasee amiqira oosana maraaqee qira oosanafa amiqira oosanafa maridanoo. Ooqai qinee Pauroosa inni faqa mariafanaga inni irirafa qinisaa atooqafi innee qiniara ridaqa mariusa mariafanoo maqee nianai marunaqa innee qiniara minnisee unna ufa qimariasara kai misara kai rimariafanoo. <sup>19</sup> Qini faiqi namu qini qimuqusimaria faiqi namusa mariafanoo. Anaasee moo fannoo faiqi aanaaqi maqaidanoo aupuraidanoo maqaidanoo. Qinee miqikaimmasee amiqira fasaasa ufa inni qimannimisee asauku mundirana andeeqara oosana marirana nirana inniki kambigaanifeera inniara aupuraidaqa qimannimidaqa.

<sup>20</sup> Oo qinee maqee nianai maridaqa inni faqa mariaqana nianai maridaqa inniara amiqira irirana iriaqana kaaqa inniara daunduraki umaara raidanoo.

*Pauroofa Abaraahamana aanaaqara kikiqusufa.*

<sup>21</sup> Innee indaaru Mooseena sandufakiqari idukufi Yisuna ufasaa atooqafi mariaasa maqee Mooseena sandufa unmaara ameemaani munari minari kafa keeqararee qimariasaria mariafanoo. Innee sia fee mi sandufana iridaqee minaki kaifaa keeqaidee.

<sup>22</sup> Mifa maaqi qidanoo, Abaraahamafa qaara faiqi maqoofa maridanoo, moo indaaruqaa faiqi anoofa ainainira anaasee rumarafa marinau, moo faiqi inaaqiannaana anoofa idukira anaasee Abaraahamana anaqa uqanna marinau. <sup>23</sup> Abaraahamana amaaku Isamaerafa rumbara anaasee faiqi marinau, faiqi anaasee imarundee inoo kai faiqi maqanau. Idukira anaasee Saraqana faiqi aadumasaa kambiganau Anutufa qima afeekaikamasoofanoo Saraqafa qaafa anaasee asooqa maridanoo Abaraahamana faiqi maqanau.

<sup>24</sup> Mi anaasee ganda qaara irirana kikiqammusiqa maridaqa. Moo Qakaarafa Sinai aaganasaa kambiqara anaasee marifa marifaqaa mina faiqi namu Mooseena sandufa ameemaani rumbaranaki kambiqarasa maridaqa. <sup>25</sup> Qakaarafa Arabia maqa maaqaki mari aqanna kikiqammusinoo maridanoo maqee maria Yeerusaree maqusa kikiqa faqa usinoo maridanoo mi maqusana faqa mi maqusanaki maria fasiqa anaaseesa faqa rumbaranaki Mooseena sandufa nimaarusira rumbaranaki maridaqa. <sup>26</sup> Abaraahamana moo anaasee Saraqafa sia rumbara ainainira anaasee, sia Mooseena sandufa rumbaranaki marifa idukira anaasee marifa maasa Yisunasaa rusimariasaria ninoofa uqanna maridanoo. Mifa innaarunai fuka Yeerusaree maqusara foora Yisunasaa rusimariasaria fira maqusa misa ninoofa uqanna maridanoo.

<sup>27</sup> Ooqeenaa akarakinnaa idi fannoo Saraqanara maaqi qidanoo, Innee faiqi siai anaaseesa asasiyaqa, faiqi siai anaaseeuqa sia aupurarana faaqarimariasaria, doo maqee innee asasiranara kai faaqaruqa. Afaaqi minnisai asooqa adeedaana, nifaqi faqaasa uraaqaramasee moomoo faiqi maqaanno.

(Abaraahamafa Isamaerana anoona mifinnai oori ukeekenoona nari anaqa uqanna Saraqana mafi ameesuqsoofanoo mariufanoo mifa faqa asooqanamuki Abaraahamana faiqi uqanna Isakeena maqanau. Minara faiqi minnisainna anaaseefa faiqi moomoo maqeenooraa foora firaagoo asasianno fee qinuu.)

<sup>28</sup> Qinee Pauroosa minara maaqi qidaqa. Saraqana amaaku Isakeefa Anutuna qima afeekaikira ufasaa kambiganoo marinau, doo maqee innee qini qikaqafasaa miqi kaimmasee Anutuna ufasaa mina faiqi namu kammambiqa mariafanoo. <sup>29</sup> Mi aukuanna Isakeena aukuanna faiqi anaasee undee mandoofanoo kambiqoofa Isamaerafa quandakinoo Anutuna maraunannai kambiqoona Isakeena mandaikammamaqanau, doo maqee faqa mi oosanafa miqikaimminoo maridanoo. Mooseena sandufa ameemaani mariasa inni aana ititaidaqa. <sup>30</sup> Ooqeenaa tamummaqara akara fannoo minara maaqi qidanoo, Rumbara anaasee faqa nari faiqi faqa aqiqamasaina moosaa fifuani. Rumbara anaasee amaaku Isamaerafa idukira anaasee amaaku Isakeena faqa sia mina akoona ainaina moodaanaki maraani.

<sup>31</sup> Doo minara qini qikaqaafasaa uqa inniqasaimbaqa sia rumbara anaasee faiqi namu maridaqa idukira anaasee faiqi namu maridaqa, Yisuna idukiranaki maridaqa.

## 5

*Pauroofa idukiranaki mariasara amiqimasee rakisi qumaraaqee qufa.*

<sup>1</sup> Asauku mundirafa Mooseena sandufakinaana idukueeqee narí idukiranaki quqaqai faqa maasa minaki maridaqa, doo minara iriseeqa idukira fasiqara foora doo minaki mapukusee maridaqa sia kafa sandufa oosana oosana rumberanaki firaree qiaqa.

<sup>2</sup> Innee maana iriaqa qinee Pauroosa qimannimidaqa, indaaruu innee asauku mundirana saqarikiqau. Kafa maqee moo fannoo inniara Yuda maqannaasa fainanduquseeqa Yisunasaa ookaammbiqa innaarunai fuaqee qinaqa innee miqifanoo Yisufa sia amana inni dadaaqiannoo fifau ainainara foora firaridanoo. <sup>3</sup> Qinee kafa qimannimianaura afeekaikkammasee qimannimianaura moo fannoo inniara Yuda maqannaasa fainanduquseeqa qinaqa fainanduquseeqa Mooseena sandufa ameemaana doo minaki oonuraafanoo sia Yisuna namufaqa fuaqa mi mau kai fuaqa. <sup>4</sup> Mooseena sandufannai Anutuna innarunai amanaikiranaki firaree qimariasa doo Yisunasaaqaraana doo inneeqa atekaseeqa mariafanoo Anutuna kaqi afaarinoo nimiranasaaqaraana aqoosai mariafanoo. <sup>5</sup> Maasa sia miqidaqa sia sandufasaa ookaaidaqa, maasa irirafa Anutunasaa kai mundiqa maridaqa mifa narí kai maasa mareeqeenoo narí innaaruna amanaikiranaki quqaqiseenoo fee qimasee irirana minasaa kai rusisee maridaqa. Inniqasaimbaqa Yisuna saqariki marunanoo Anutuna mara quna fannoo minasaaqari maasa dadaaqifaqa maasa Anutuna innaarunai keeqaannanara asasamandee afeesidaqa. <sup>6</sup> Maasa asauku mundirana Yisuna faqa moodaanaki maridaqa Yuda maqannaasa fainanduqirana faqa sia fainanduqirana faqa miqanda fifau ainaina maridaqa. Anooa ainaina maqimminoo maridanoo. Nariara nariara uriqarara ainainee qimasee nariara nariara amuqusirafa inni Yisunasaa rusirana akoooro imarifa mi ainainafa anoona uqanna maridanoo.

<sup>7</sup> Oo Karatia maqa maaqaki mariasa innee amiqimasee mi mau fimarusa mariafanoo, nanaree innee maqee anoona ufa minnisee mandoosana maree fee. <sup>8</sup> Anutufa inni naarammeeqee Yisunaki quqee marifa mifau inni mareeqee kaqi runna quqeenooofau. <sup>9</sup> Faiqi moo fannoo adudu fooqaafa inni qambaana moodaa mari ifa mifa kai aiqamausa radiqifinoo inni nifaqaqi sukaqamannimaqai faqa aiqamausa kaqirunna firaridaqa. <sup>10</sup> Qinee Pauroosa inni Karatia maqa maaqaki mariasara andeeqara aatata firanara iridaqa, maridaqa. Maasa inni faqa karaambaiqasaa atooqa marirafa qini qifaqa quqarana qimidanoo, inniara sia moo iriranamau fifaranoo fee qidaqa inni mara moo aatata ubeekee mari fasiqausara qinee sia iridaqa, Anutufa misa naruanoo fee qidaqa.

<sup>11</sup> Oo qini qikaqaafasaa uqa qeeqara qimannimianauranoo qinee Yuda maqannaasa fainanduqira ufa asauku mundiranasa ookaammasee minannai innaarunai firaree qimariana mi ufana maqusa maqusa qinee qimannimi marianaqau misa sia maqee maqee qini darimariqini. Fainanduqira ufa Yisunasaa ookaairafa anoona marinoofau qinee asauku mundirana aunirira saqarisaa arunara qimannimianaqatua sia daruqini. Yisunasaa mundiranara kai qimannimiarunaga iridaqa darimariafanoo.

(Misa mi aukuanna faina kafaqanda uqidee qimasaida Yuda maqannaasa maasa Anutuna faiqi namu fee qimariqau. Nifaandama itirausara inni nianasaa naadumasaa mariaqee qimariqau. Pauroofa minara irisee maa ufana qimannimianau.)

<sup>12</sup> Inni Karatia maqannaasa mareeqee moo aatata quqee mariasara qidaqa misa narí fainanduqiranara kai qidaqa narí nifaandama itirana faqa minaki ookaammaseeqa doo naadumasaaqanna maridaqa sia aqaranaki inni fuki faaki qima quqaqeeera.

<sup>13</sup> Oo qini qikaqaafasaa uqa inniara qinee qiana. Innee inneeqa mandainaina rumberanaki mariafanoo Anutufa minakinaana inni naarammeeqeenoo Yisuna idukiranaki quqeenoo. Doo innee minaki maridaqa inni nifaqa manda nidimari ainainafa sia quandakinoo innisaa rakisidanoo inni nikaruqiranannai minni ubeekamannimaqaani. Sia miqiaqa maaqiaqa inneeqa nariara nariara rirafa nimudao qirafa inni nifiqeeqeenoo nariara nariara dadaaqiranaki quqaani. <sup>14</sup> Mooseena sandufa aiqamatua maa moodaa ufanaki anoona kambiqaidanoo, mi ufafa maaqimminoo maridanoo. Innee inneeqa niqoonausara inniqa nifaqara foora nidinaqa dadaaqiaqa. <sup>15</sup> Innee aandaara foora narí aidafirana narí aidafirana narí ukaqami narí ukaqami irana narí ami narí ami idaqa rufiaqa qusaasa innee narinni narinni naru taikaseefaara, minara nariara nariara nidiranara qidaqa.

*Pauroofa maqasaaqaraa irirana faqa mara quna irirana faqa miqandara qimaqoo ufafa.*

<sup>16</sup> Qinee Pauroosa minara inni qimannimidaqa. Sia innee inniqa maqasaa irirannai ubeekaqa. Anutuna maraḡuna fannoo inni naakinoo marifa maḡee innee nnaaqooki amiḡira oosana maraḡeera qimaseenoo mandoosanara aaquḡidanoo. Innee mi ufamau fiḡa sia uḡanna inneeqa maqasaa iriranamau fifaranoo. <sup>17</sup> Maqasaa fasiḡa anaasee maqasaa irirafa faḡa Anutuna maraḡuna aidimari ainainafa faḡa maasa naunduraki naḡi maḡauruamaḡee naḡi maḡauruamaḡee idaḡa miḡanda namuḡaa mariranara innee firaree qimariaḡoo sia amana fifaranoo. Minara innee Anutuna maraḡuna ufamau fuḡa. <sup>18</sup> Anutuna maraḡuna fannoo inni rakisiḡa innee sia Mooseena sandufa ameemaanaḡi mariafanoo.

<sup>19-21</sup> Faiḡi faiḡi maḡasaa irirana oosana kaḡi akoḡoo maridanoo. Mina oosana maaḡimmasee koorooḡidanoo, faiḡi anaasee naḡi ummuari naḡi ummuarirana faḡa adi namuḡaḡira oosana oosana faḡa irirana siaisa furufarida kaḡi mandainaina maraḡanuana faḡa saḡarinnai unnaḡira Anutuna amana auḡusee irirana mina amimariana faḡa aukainaina ufaḡa afaannainaina maraḡanuana faḡa, faiḡi anaasee namuḡaa kirana faḡa rakirana faḡa rairaiḡirana faḡa qusufa qimasee aanoḡirana faḡa, aiḡama ainaina naḡirara kai fatuḡimariana faḡa, naadu naadu rakeekaammasee nariḡa kai naadu naadu suḡimariana faḡa, nariara nariara rairai qimariana faḡa nammari namasee furufarirana faḡa, misa suḡuffiḡa oosana oosana mandoosana uḡeeree mariana faḡa oosana oosana mandoosana maraḡidaqa. Qinee ooḡai aaquḡima nimaḡaafanausa kafa maḡee faḡa aaquḡimannimaḡaḡidaqa, mi oosanna maree mariasa sia uḡanna Anutuna quḡusaki keeḡefaranoo.

<sup>22-23</sup> Anutuna maraḡuna fannoo sia miḡi maria mandoosanakina uḡannifiḡaidanoo. Innee mina ufamau fifanoo inni mareeḡee amiḡira saḡari ḡaḡammara foora ireefaranoo. Maa amiḡira oosanausa ireefaranoo, nariara nariara uriḡarara ainaina maridee qimasee nariara nariara rirana faḡa Anutunara asarirana faḡa naunduraki asoosana faḡa faiḡi anaasee reendenira irirana faḡa amiḡimandee dadaḡi mariana faḡa afaarirana faḡa amiḡira ainaina afaarirana faḡa sia minnisee firafa miḡookai marida auḡainna ainaina auḡaida marirana faḡa fiḡooḡisoommasee ufa ḡirana faḡa naḡi mandoosanara akoḡamasee andeeḡasee fimarina faḡa Anutuna maraḡuna fannoo mi ainainausa kai uḡannifiḡaidanoo, sia moo sandufa fannoo mi amiḡira ainainausara ḡaoo ḡiannoo. <sup>24</sup> Asauku mundirana Yisunaindi mariasa misa nariḡa faiḡi faiḡi irirana marirana faḡa naḡi maḡasaa irirana faḡa auniḡira saḡarisaa Yisuna namuḡaḡa kuḡa kai aru quḡee mariasa maridaḡa. <sup>25</sup> Anutuna maraḡuna fannoo maḡee oosana arasee naaru marirana qimimarifa marirana mifa kai maasa marirana nirana rakisiani.

<sup>26</sup> Sia maasa ḡeeḡara doori uḡeeraseeḡa amiḡiraḡusee qimasee ḡeeḡa ḡimooḡia sia nariara nariara sukufa ḡia sia nariara nariara rairai ḡiaḡa.

## 6

*Pauroofa naḡi dadaḡaḡi naḡi dadaḡaḡaḡee qimaḡoo ufaḡa.*

<sup>1</sup> Qini ḡikaḡaafasaaḡu inniki moo fannoo mandainainaki aḡufinaḡa ḡafeeḡa Anutuna oosana irimariasa mina mareeḡee andeeḡaranaki quḡaaḡa, sia aanoomasee miḡi iaḡa reendenamandee miḡi iaḡa anee mi fasiḡana dadaḡaḡidana aneenna marirana faḡa rakisia, anee faḡa minaki aḡufinafaara. <sup>2</sup> Innee naḡi ummaara naḡi ummaara dadaḡaḡaḡa, miḡiḡa innee asauku mundirana sandufamau kaaḡa andeeḡasee fimariafanoo. <sup>3</sup> Faiḡi moo fannoo ureeḡarafa nariara uriḡararasee qimasee sia qinee oorudupirausa dadaḡaḡianauranoo fee qimarifa naḡi kai naḡi akaruḡidanoo miḡi qidanoo. <sup>4</sup> Aiḡama fasiḡa anaasee nariḡa kai naḡi marirana nirana naḡi kai amanamasee ḡafaḡaḡa, sia moo naindisaa amanamasee ḡafaḡaḡa narikai naḡi marirana auḡarana amiḡirafa marinanoo naḡi kai ḡafamasee asaiannoo. <sup>5</sup> Aiḡamausa naḡi umaara naḡi kai marasee quandaḡi aḡoonausa faḡa dadaḡaḡaḡa.

<sup>6</sup> Akaḡa fasiḡaḡuḡa Yisuna ufa inni qimannimifaḡa innee misa ufa irimariana akiḡara quandaḡi narana munnimma, maaḡa, ainaina naḡi nimaḡaḡa. Miḡidaḡa innee misa ummaara dadaḡaḡifaranoo.

<sup>7</sup> Innee sia inneeḡa nikaru ḡiaḡa, sia innee amana Anutuna afusaa ititasee furufariranaḡi quḡeeḡefaranoo, mifa maasa oosana iridanoo. Anee narana asumu ummaḡinana mina kai unakinnaranoo, anee nana mandoosana niminana anee mina kai mareennaranoo. <sup>8</sup> Faiḡi moo fannoo naḡi faiḡi faiḡi manda nidiranannai manda maḡaki ummaḡuseenoo minakinaana kuḡirana kai unakuannoo. Mifa Anutuna maraḡuna oosana marasee Anutuna afuḡaki ummaḡuseenoo minakinaana naaru marirana kai unakuannoo. <sup>9</sup> Minara iriseeḡa amiḡira mariranara sia kudoosaḡeeḡa minnisaḡaḡa maasa sia minniseeḡa kaḡi mi mau fidaḡa kasoḡaḡee unnakirana paḡuriana. <sup>10</sup> Minara

irisee maana qimannimidaqa maasa aiqamausa amiqira dadaaqirana dadaaqiaqa sia moodaakari kai, maqee maqee dadaaqirafa kambiqafinana dadaaqiaqa. Aiqamausa dadaaqidana niqoonausa Yisuna saqariki mariasa firaqoo dadaaqiaqa.

*Pauroofa taikara aaquqirufa faqa nimandara ufa faqa qimaqoo ufafa.*

<sup>11</sup> Doo qinee Pauroosa moo fasiqa qimami marunanoo mifa akara ridanoo doo maqee qeeqa kai kirifi qumaree ati rafaqaqafira ufa qeeqa kai firaqoo akara ridaqa.

<sup>12</sup> Inniki nipatasaa akoogoo mari ainainara kai darara qimasee nimoqimariasari nariqa nimoqiaqee qimasaidaqa inni fainanduqiranara sandanainai qida miqiaqee qimariasari maridaqa. Misa sia kuqaa anoonainainau auqaidau fainanduqiaqee qidau, misa asauku mundirana aunirira saqarisaa arunara qimannimiafaqa mina akiqara Yuda maqannaasa darifoo qimasee fainanduqira oosana Yisuna kuqiranasa ootupamasaifaqa Yuda maqannaasa niraqaqarafa asooaifanoo sia daruaqeeru. <sup>13</sup> Misa inniara Yuda maqannaasa fainanduqira oosana maraqee qimariasari nari sia Mooseena sandufamau fimariasari misa inni Karatia maqannaasa fainanduqira oosana eedoo qianara kai nari nimoqiaqeeru qimasaidaqa inni fuki faaki qidaqa.

<sup>14</sup> Qinee qeeqara qidaqa qinee maasa karaambaiqa, asauku mundirafa, Yisufa aunirira saqarisaa kuqunara minara kai qinee ugeerese amooqianauranoo. Mi auniriranasaa kuqunannai maa maqa maaqanasaqarara ainaina kuqinoo mari ifoo qidaqa sia kasidanoo minannai faqa qinee faqa kuqiaru foora qimarunasa marunanoo maa maqa maaqanakinaa mandainaina sia qini qumaraidanoo. <sup>15</sup> Fainanduqira fee, sia fainanduqira fee, sia mifa anoonu ainaina maridanoo. Anoonu ainaina faiqi anaasee kuqaa naundurakinaafa fukaikamambinaqa andeeqasee marirafa mifamma anoonu maridanoo. <sup>16</sup> Innee mi iriranamau fimariasari qimannimianaura Anutufa naundurari asoosana faqa Anutufa aidira nifauarana inniki faqa aiqama Anutuna faiqi anaasee maqasaa mariasari faqa mariani.

<sup>17</sup> Qini Pauroosa rafaqaqafira ufa maaqimminoo maridanoo. Sia moo fannoo kafa qiniara Yisuna ufara sia andeeqasee qimannimimari fee qifaranoo. Qinee kuqaa uqanna Yisuna karabusa ainainira fasiqa maridaqa Yisuna ufa andeeqasee qimannimiafannana akiqara qini darufa qifaqasaa qufaanakuru aanaaqi marifa mifa qiniara kuqaa Yisunaindi fee qimasee akoorooidanoo. Misa qini darusaafaqa mi ufaanakurunara Yisuna akarara foora maridanoo, aiqamausa qini qiqafamasee Yisunaindi fee qiaqeeru.

<sup>18</sup> Maasa karaambaiqa asauku mundirana Yisuna afaarirafa inniki mariani. Kuqaa.

## EEFEESUSA

### Efeesusa maqusanaasa Pauroofa akara rumannimaqoo ufafa.

<sup>1</sup> Qinee Pauroosa Anutuna iriranannai asauku mundirana Yisunaindi maridaqa, mifa diqiqoo fasiqausa maridaqa. Anutuna maqasaa fasiqa anaasee Efeesusa maqusai mariasa asauku mundirana Yisuna ufamau andeeqasee maqee maqee fimariasa inni maa akarana rumannimaqaidaqa.

<sup>2</sup> Maasa qikoofa Anutufa faqa maasa karaambaifa asauku mundirafa Yisufa faqa nari afaarirana faqa nari asoarana faqa inni nimiani.

*Pauroofa asauku mundiranaki mariasa innaarunai amiqi amiqirana mararufa.*

<sup>3</sup> Maasa dufi dufi qirana maasa qikoona Anutuna faqa maasa karaambaifa Yisuna faqa nimiaqa. Maasa asauku mundiranaki keeqafufanoo mina akoofa Anutufa amiqi amiqirana maasa Yisuna namufaqa qiminau. Mifa innaarunaindaraa amiqira dadaqirana qimaqifanoo miqoo innaarunai maridanoo, minara maasa dufi dufi qimamaqaidaqa.

<sup>4</sup> Ooqai maa maqa maaqana sia auqu kamuqoo faiqi faqa sia maru kamuqoo Anutufa moomoosa kambiaqa marifandinausa kinaana maasa rusandeesamumandee marararee qimaqoosa maraqaisa maridaqa. Nari asauku mundirana Yisunannai maasa maraqoosa sia aagarausa mariaqera noori kadamasee andeeqarusa mariaqee qimasee maasa rusandeesamumasee maraqoosa maridaqa. <sup>5</sup> Sia faiqi maru kamuqoo Anutufa nari aidirannai maasara maaqimminau, qeeqa qisauku mundiranannai misa qini faiqi namu qiraamuqmaakai kammambifaqa qeeqa unnannai misa mara quqaanauree qinau. Anutuna aidirafa fuaninnana miqiminoo maridanoo. <sup>6</sup> Anutufa nari kaaqa qara areenara afaarirana nari amuqusira amaaku kaqi nimimari ainainnara foora kaqi nimirau. Minara maasa qimuqusa ookiqari idaaqira ainaina uqannee qiaqera kaqi nimirau.

<sup>7</sup> Anutufa nari asauku mundirana kuqiranannai maasa mandainainkinaana idukuqiseenoo maasa mandoosana akiaqara minniqisainafa mariana. Maasa minara irisee Anutuna firaa afaariranara akooqoo uqanna marifaqa qafamasee irisee naqimasee maraanauree minara rufiida furufaridaqa. <sup>8-9</sup> Anutufa nari irirana firana faqa qafeemariana faqa maraseenoo minannai ooqai marararee qimaqoona maraseenoo nari kukeeqara irirana asauku mundiranannai aiqama qimaqoo ainaina anoonaikianifeera qimasee mina maa kamuqoo kooroomasee nari faiqi namu araamuqmmaakai kiranara maasa qimaqiminau. <sup>10</sup> Anutufa nari kai irinoo andeeqara aukuanee qimasee nari ooqai kambijaaninna ainainara qimarufa taikaannoo minara qimarufa maaqimmiannoo Anutufa aiqama ainainna auquqoo ainainafa innaarunai mari ainaina faqa maaqoo mari ainaina faqa oonu maree ani mareeqeenoo moodaanaki quqaseenoo asauku mundirafa misa nikiqasaa mariannoo.

<sup>11</sup> Anutufa mi aiqama ainainna nari ooqai fuanee qimaqoomau fidanoo miqidanoo. Anutufa nari ooqai fuanee qimaqoomau fidanoo maasa nari aiku asauku mariaqee qimasee faiqi aanaaseeki rusandeesamumandee maasa maranau. Sia kaqi miqinuu, asauku mundiranannai kai mina aiku asauku mariafanausa maridaqa. Ooqai indaaruu oosana aroo aukuanna mi irirana maraqoomau fidanoo asauku mundiranannai maasa maraidanoo. <sup>12</sup> Maasa asauku mundirana irirana naaree indaaruu irisee minara afeesimariasa maasa Anutuna kaaqa areenaranara dufi dufi qidaqa.

<sup>13</sup> Innee Efeesusa maqannaasa faqa miqikai iqa mariafanoo. Amiqira fasaasa ufa innaaruna asumu marirana nimi maria ufana innee iriseeqa kuqaa anoonufee qufanoo Anutufa nari naaquqara maraquna nimiani qimasoofo inni niminoo minannai nariara utaaqanau. <sup>14</sup> Anutuna maraquna nimirafa Anutufa innaarunai qimianinna ainainnara qima afeekaikamma utaaqamaqoofo maridanoo, mifa Anutufa kuqaa mandainaina akiaqara rumberanakinaana idukirana qimiannoo fee qimarifa maridanoo, maasa minara irisee Anutuna kuqaa areenaranara dufi dufi qidaqa.

*Pauroofa Efeesusa maqannaasara innaaru qidanoo.*

<sup>15-16</sup> Qinee Pauroosa minara iriseeqa innee Efeesusa maqannaasa Karaambaifa Yisuna saqarikiranara irisee faiqi aanaaseera Anutuna ufa irimariasara ridaqa dadaqidaqa minara iriseeqa iriafanooqari qinee Pauroosa inniara Anutufinnai dufi dufi qidaqa. Qinee maqee maqee inniara innaaru qidaqa, maasa karaambaifa asauku mundirana Yisuna kaaqa areenarana akoofa <sup>17</sup> Anutufa nari maraquna inni niminannoo mifa irirana faqa Anutuna oosana faqa kooroomannimaqainaqa innee minara iriaqera innaaru qidaqa.



<sup>18</sup> Anutufa inni naaramasee narí areenaranara afeesiaqee qimarianara innee iriaqee qimasee inniara innaaru qimasaanaqa inni nifu nitikura quandasainaqa areenarana nimianinnanara afeesiaqeeera innaaru qidaqa. Naaquqara amiqi amiqirafa idaaqirafa moomoo uqanna narí maqasaa fasiqa anaasee innaarunai nimirara qima afeekaikidanoo nimiannoo minauqara faqa inniara iriaqeeera innaaru qidaqa. <sup>19-20</sup> Maasaki mina ufasa irirana rusimariaqooqari Anutuna afeeka fannoo maasaki ainaini marinara faqa innee iriaqeeera qinee Pauroosa inniara innaaru qidaqa. Anutufa asauku mundirana kuqiranakinaana uqeerassee innaarunai narí aaqa narí asauku uqannai oqumaruuqoo firaa afeeka faqa maasaki ainainimarifa faqa amana amana kai moodaa firaa afeeka maridanoo.

<sup>21</sup> Miqoo innaarunai asauku mundirafa aiqama ainainasaa uriqaramafi rakisidanoo, aiqama innaarunai uriqararaua faqa faiqí fraasa faqa afeekafaqaasa faqa karaambaigauqa faqa misauqa faqa urinaaqaramafi rakisidanoo. Mifa aiqama afeeka nuqu faqaasa maa maqa maaqanaki mariasa faqa innaarunai mariasa faqa urinaaqaramafi rakisidanoo. <sup>22</sup> Anutufa aiqama ainaina mareeqeenoo asauku mundirana aramandunnai quqaseenoo mina mareeqeenoo Yisuna ufara suqimariasa nikaqasaa quqasaifanoo aiqama ainaina uriqarara karaambaiga maridanoo. <sup>23</sup> Yisuna ufara suqimariasa Yisuna adakara foora maridaqa, aiqamai mariainainafa qumbiqeemarifa narí adakaki Yisuna ufara suqimariasaki firaqoo maridanoo.

## 2

*Ooqai kuqiranaki ubeekoofaqa maqee asumu mariranaki ubeekaqa maridaqa.*

<sup>1-2</sup> Qinee Pauroosa sia Yuda maqannaara qidaqa innee aanaamuru mariasara qidaqa, ooqai inniqa ufa rukiarana faqa aaqarana faqa miqiunna akiqara kuqiranaki mariusa mariqau, mi aukuanma maa maqa maaqana mandoosanamau kai fimariqau. Anutuna ufa rukiee mariasa maqee rakisi mari afaannafa Anutuna innaaruna meerai marifanoo mina ameemaanaí marina, mina ufara eedoo kai qimarusa mariqau. <sup>3</sup> Maasa faqa aiqamusa aanaamuru Anutuna ufa rukiee mariasa naanna ramasee maasa qeeqa faiqí faiqí mandiriranamau fidaqa qeeqa qifaqa irirana afaariqa kaqi qeeqa manda didiramau kai fiqifafana. Maasa Yuda maqannaasa aanaamuru naanna ramasee qeeqa qifaqa afaaramasee mina akiqara Anutuna aranaqaranaki firidaqa.

<sup>4-5</sup> Anutufa mina qafamaseenoo maasara amuqusirana faqa nifauarafa faqa firaatia marifanoo asauku mundirana saimbaqa maasa faqa kuqiranakinaana uqeera qiseenoo sia moo ainaina, Anutuna afaarirafa kai innaaruna asumu mariranaki quqanniseenoo. <sup>6</sup> Anutufa maasa asauku mundirana Yisunasaa atooarana qafamaseenoo mina namufaqa kuqiranakinaana uqeeraqiseenoo Yisuna namufaqa Anutuna innaaruna mariasasaa rakisi nimaqaqee qifaqa miqoo rakisirusaikiga marianaara. <sup>7</sup> Sia Anutufa fifau miqinai, narí firaa afaarirana faqa, maasa asauku mundirana Yisunaki keeqarana qafamaseenoo narí firaa aidirana amuqusirana faqa naaru kambiqainausa uqannifqarara miqinai. <sup>8</sup> Sia moo ainainannai Anutufa narí afaariranannai kai inni innaarunai asumu mariranaki quqannisaidanoo, innee Yisuna saqarikiranannai afaaramma nimaqaidanoo. Inni asumu nimirafa sia innee andeeqasee fimarianasaafau mundidanooofau, sia innee amiqira oosana marasaida kadaapiridee qimarianasaafau mundidanooofau, Anutuna kaqi nimiranasaa kai innaarunai asumu marirana maasa qimirana uqeereenoo.

<sup>9</sup> Sia maasa qeeqa kadaapiriranannai innaaruna asumu maraanaura minara sia fifau maasa qeeqa qimooqira ufa mariannoo. <sup>10</sup> Anutufa maasa auqufa maridanoo sia fifau maasa auqinai, maasa asauku mundirana Yisunasaa atooqaranasaagari andeeqasee nirana marirana mariagee qimasee maasa auqinai. Doo ooqai mi andeeqara nirana marirana maasara deedaqammaqoofa maridanoo.

*Yuda maqannaasa faqa aanaamuru faqa asauku mundiranaki moodaanaki maridaqa.*

<sup>11</sup> Yuda maqannaasa ooqaindari nariara kai Yuda maqannaasa fainanduqiraua Anutunaindi maridee qimasaida inni aanaamuruara sia maasa fainanduqiraua marunnana aqoosai mariasa maridee qimariqau. Misa fifau nári fainanduqiranara qidaqa miqi qimariqau. Innee aanaamuru mariasa innee ooqai mariunara iriaqa. <sup>12</sup> Innee Efeesusa maqusanaasa asauku mundiranasaaqari naaduma nianasaa mariusa mariafanoo, innee aanaamuru Anutufa maqasaaqaraasaki sia rusandeesamumandee nariara maroosa mariafanoo, aanaamuru nianasaa mariusa mariafanoo. Anutufa Yuda maqannaasa faqa moodaanakikira ufa oosana oosana qima afeekaikiranasaa mundaqa mariusa mariafaqa innee aanaamuru sia minaki marusa naaduma nianasaa marusa mariafanoo. Innee Efeesusa maqusanaasa maa maqa maaqanaki maridaqa sia Anutunara faqa moo ainainara faqa irimariqau kaqi furufara kaimniqaniqau, Anutuna siaisa mariqau.

<sup>13</sup> Doo maqee innee asauku mundirana Yisunasaa atooqaana akiaqara inni ooqaindari nianai mariusa maqee Anutufa inni rarisameeqeenoo afeedi qugeenoo, asauku mundirafa aunirira saqarisaa kuqunannai kai miqinoo. <sup>14</sup> Anaamuru faqa Yuda maqannaasa faqa namuqaara foora niana niana rakee iqa mariaasa asauku mundirafa nari kai mareeqee moodaanaki quqaseenoo asoosarana maasa qiminou. Yuda maqannaasa faqa aanaamuru faqa namuqaakiqa marufanoo qambaana faandamura ititanoo maruna asauku mundirafa nari afaaqannai faandaamura rakee mandoofaqa moodaanaki kiqau. <sup>15</sup> Mooseena sandufakina oosanoosana ainainara nimaarusirana mifa faandaamurara foora Yuda maqannaasa faqa aanaamuru faqa aiqamaqara rakeemaqoofaqa mariqau. Asauku mundirafa doo mina ruka taikasooafaqa mi atiqanda onu maree ani maree asauku mundirana faqa moodaanaki kiqa asoosaranaki maridaqa.

<sup>16</sup> Asauku mundirafa nari aunirira saqarisaa kuqunannai Yuda maqannaasa faqa aanaamuru faqa nariara nariara fidiqaa imaruna aru taikanau, nari aunirira saqarisaa kuqunannai Yuda maqannaasa faqa aanaamuru faqa rakimaruna taikaseenoo Yisufa mareeqeenoo mafi moodaanaki quqaseenoo mareeqeenoo Anutuna aanooqirana taikaseenoo nari akoona Anutunaki asoosaranaki quqanau. <sup>17</sup> Miqi marunara asauku mundirafa nari amiqira asoosara fasaasa ufa maree qumureenoo innee Anutunasaaqari nianai maria anaamurusa faqa Yuda maqannaasa Anutuna aafaqaa mariaasa faqa qimanniminau. <sup>18</sup> Maasa aiqamaqara Yuda maqannaasa faqa aanaamuru faqa asauku mundiranannai kai amana maasa moodaa maraqunaki anireeqa maasa qikoona Anutuna afusaa kikiqianaura.

<sup>19</sup> Ooqai innee moo maqannaara foora aanaamuruara foora mariaasa mariafanoo doo maqee sia miqiqaa mariafanoo innee doo maqee Anutuna aiku asauku mariaasa Yuda maqannaasaki moodaa maqannaasa kammambi innee mariafanoo. <sup>20</sup> Doo maqee sia Yuda maqannaasa kai, innee faqa maaqara foora usakafifanoo asauku mundirafa Yisufa nari uqanna faakana miqirafa marinanoo Yisufa niqiqoo fasiqausa faqa Anutuna tamummaqara fasiqauqa faqa maaqa atunara foora marifanoo innee faqa maaqa asaanara foora misasaa faqa Yisunasaa faqa atukaramambiqa mariafanoo. <sup>21</sup> Yisufa uqanna faakanara foora maridanoo aiqama maaqa asaana afapita qumarasaifaqa afeekaiqiqa mariafanoo karaambaifiqa naaquqara amaana maqara foora usakaidanoo fimaree aimaree innooqaidanoo. <sup>22</sup> Innee aanaamuru asauku mundirana saqariki mariaasa faqa aiqamausa Yisunaki mariaasa faqa Anutufa inni qumareeqeenoo maaqara foora usakaseenoo nari maraqunannai mi maqanaki inniki mari maqafa maridanoo.

### 3

#### *Pauroofa nari aanaamuruki saikiranara qidanoo.*

<sup>1</sup> Qinee Pauroosa minara iriseeqa inni Efeesusa maqannara Anutuffinnai innaaru qidaqa. Qinee inni aanaamuruara qimannimunnana akiaqara asauku mundirana Yisuna rumberanara foora Roomma maqannaasa rumberanaki marunausa maridaqa inniara innaaru qidaqa. <sup>2</sup> Anutufa nari afaariranannai inni aanaamuru dadaaqiaqee qimasee qimunara innee amiqimmandee minara irimariafanoo. <sup>3-4</sup> Anutufa Yisunara ooqaindari kukeeqanoo marunara maqee aukuaana qini kooroomaqimaqeenoo. Qinee maa pasanaki kaqikaqoo minara inni qimannimiqa, innee mina asaana rumaseeqa iriqa qiniara asauku mundirana kukeeqara irirana amiqimmandee iridanoommifoo qifaranoo.

<sup>5</sup> Ooqai nari kukeeqara irirana Anutufa sia kooroo inau, doo maqee nari maraqunannai amiqira niqiqoo fasiqausa faqa tamummaqara fasiqauqasaa faqa qimannimino. <sup>6</sup> Mina kukeeqara ufa maaqimminoo maridanoo. Yuda maqannaasa Anutuna amiqi amiqiranaki maridaqa, Yisuna amiqira fasaasa ufa fannoo inni aanaamuru faqa onnu mareeqeenoo Yuda maqannaasa amiqi amiqiranaki quqannisaidanoo. Innee aanaamuru mariaasa maqee Yuda maqannaasa saimbaqa moodaa nifaaqara foora maridaqa asauku mundirana Yisunakiqari Yuda maqannaasa qima afeekaiqammaqoofa innee aanaamuru misa saimbaqa minaki marida maree mariafanoo.

<sup>7</sup> Anutufa nari afeekannai naakaparana akoofasaikirana moo qimufafa qinee minannai Yisuna amiqira fasaasa ufa saikira faiqikiqa maridaqa. <sup>8</sup> Qinee Anutuna aiku asauku maqasaa fasiqaki oordupirauusa marunanoo Anutufa sia minara irinoo kaqi mi naakaparana qiminoo diqiqamaqimaqeenoo asauku mundirana, innaarunai nimira amiqi amiqira ainaina mootoo ainaina sia amana asaana rirana amana mi ufanara aanaamuru qimannimiranaki qini quqaqisaiifaqa maridaqa. <sup>9</sup> Anutuna ooqai kukeeqara irirafa maqee kooroommasee faiqi anaasee amiqimmandee iriaqeeera faqa qini minaki faqa quqaqisaiifaqa maridaqa. Anutufa aiqama ainaina auquqoofanoo marufa miqooqari mootoo aukuaana nari kukeeqara irirana Yisunara kisaqaasaa rafaqafuqoofanoo

marinau. <sup>10</sup> Maqee aukuaana kooroo ianifeera qimasee Yisuna ufara suqimariasa misannai Anutufa nari irirana quandaqaandidanoo uqannifiqai faqa qafaidaqa mina amiqi amiqiranara innaarunai ameemaanai mariasa misa uriqararaua faqa rakisirausa faqa maqee uqannifiqaanifeera Yisuna kooroo idanoo.

<sup>11</sup> Anutufa nari naaru naaru mariranaki maridanoo mi ainainna auqanauree qimaqoona maqee auqinau, nari asauku mundirana Yisunannai mi ainainna, nari ufara suqimariasa nari irirana kooroo ianifeera auqinau. <sup>12</sup> Maasa Yisunasaa atooqa marianannai faqa maasa mina saqarikiranannai faqa sia maasa nisaurida rufaanaura, paasosamasee Anutuna afusaa fuannanara mi eedoo qirafa maasaindi maridanoo. <sup>13</sup> Qinee Pauroosa minara irisee inni afeekaikamanda da qimannimidaqa. Qinee Yisuna ufa qimannimunaqa misa minara fifau qini karabusaki quqeeqa. Inni Efeesusa maqannaasa qinee karabusaki marunna aupuraranara iriseega sia Yisuna ufa minniseega kudoosaapaqa, innee minara maaqi qiaqa Pauroona karabusaki marirana maasa Efeesusa maqusanaasa amiqimaqimaqaidanoo fee qimasee asasiqa.

*Innee nariara nariara nimuqusiranaki mariaqera qidanoo.*

<sup>14</sup> Qinee minara iriqa maasa qikoona Anutunara iriseega qigoori saunara fiqa kumara mafi inniara qeeqa qimuqusannoo innaaru qidaqa. <sup>15</sup> Innaarunai mariasa faqa maqasaa mariasa faqa aigamatia Anutunasaqaraana nariqa nuqu uqanna maraidaqa. <sup>16-18</sup> Mi Anutunara inniara innaaru qidaqa, asauku mundirana innee saqarikiranannai mifa anireenoo inni naunduraki maaqakiara foora ani keegaanifeera. Mifa nari maraqqunannai nari areenarana firaanakiqari inni naunduraki afeeka niminaqa mapukusee mariaqa. Qinee inniara maaqi qidaqa innaaru qidaqa, innee inneeqa atukara foora faqa faakanara foora faqa nariara nariara nimuqusiranaki mapukusaqa, innee Efeesusa maqannaasa faqa Anutuna aiku asauku moo maqanna mariasa saimbaqa afeeka marinaqa minannai asauku mundirana inniara amuqusinoo aidirana firaana iriaqera innaaru qidaqa. Mifa inniara amuqusinoo aidirana mina kisaqasaa aidirana faqa mina qusa kamu faqa mina meerai sandaaqaira faqa mina meemai farumara foora marirana faqa mina firaatiara iriaqera qinee innaaru qidaqa. <sup>19</sup> Eeoo innee mina inniara amuqusirana firaanara iriaqera innaaru qidaqa, sia amana moo fannoo firaqoo iriannoo, firaafa maridanoo, mina amuqusirana firaafa maridanoo, innee mina amuqusirana firaana iriseega Anutuna umbiqarafa innikina umbiqaanifeera inniara innaaru qidaqa.

<sup>20</sup> Anutuna afeeka fannoo maasaki saikiranannai naunduraki amiqi amiqirana nimiannoo, mina naunduraki dadaaqirafa maasa sia amana minara iramasee qimianne qianaara sia amana maasa minara irianaara fira ainainatia maridanoo. <sup>21</sup> Yisuna ufara suqimariasa nariqa asauku mundiranasa atooaranannai Anutuna amooqirafa maqee kamuqoo faqa naaru naaru faqa mariani.

## 4

*Maasa Yisuna adaka atiara foora maridaqa.*

<sup>1</sup> Qinee Pauroosa karaambaqa Yisuna ainaini marunnana akiaqara Roomma maqanna karabusaki maridaqa. Qinee karabusaki maridaqa inniara afeekaikamandee qimannimidaqa. Anutufa inni naaramasoofaqa innee asauku mundirana saqariki maru kamuqooqari inneeqa nirana mariranara andeeqasee marianifee qimasee inni naarama minaki quqeenoo. Inneeqa marirafa mina amanakai marianifeera qinee qeeqa qimuqusa ookiqari afeekaikamandee qimannimidaqa.

<sup>2</sup> Sia Anutufa quqaqoo andeeqarana minnisee moomau fuaqa, innee maqee maqee sia urinaaqaraqa oorudupimasee mariaqa, sia aanooiaqa, ireeda kai piseopiseomandee mariaqa sia faiqi aanaaseera qusa ufa qimasee aanooiaqa kisaqasaa ireeda kai idaaqamannimaqaaqa. Innee faiqi aanaaseera nimuqusinanoo nidimarinaqa mifa kooroo ianifee qimasee narinni narinni dadaaqifanoo mifa kooroo iani.

<sup>3</sup> Anutuna maraquina fannoo inni moodaanaki mara quqasaifaqa mariafanoo innikina asooarafa inni moodaanaki afapita qumaraifaqa mariafanoo innee mina moodaanaki marirana amiqimasee rakisiaqa, rakee iani. <sup>4</sup> Maasa Yisuna ufa irimariasa moodaa nifaqara foora maridaqa, Anutuna maraquina faqa moodaa maridanoo Anutufa moodaa ainainara afeesiranaki inni rarisama quqeenoo. <sup>5-6</sup> Karaambaqa moodaa kai maridanoo, Yisuna saqarikirafa moodaa kai maridanoo, amaana nammari moodaa Yisuna auqusaa kai rumannimaqarafa maridanoo maasa aigama maqa maaqakinaasa nikoofa Anutufa moodaa kai maridanoo, aigamausa karaambaqa mifa kai maridanoo mifa nari ufara suqimariasa aigama naunduraki maridanoo aigamausakiaqa ainainidanoo.

<sup>7</sup> Asaaku mundirafa nimira dadaaqira afeeka maasa aiqamausa qiminau narí moomoo dadaaqiranakinaana qiminau. Moo dadaaqira afeeka moo fasiqa aminau, moo dadaaqira afeeka moo fasiqa anaasee niminau. Nimisoofaqa minannai Yisuna saika maraaqera niminau. <sup>8</sup> Ooqeenaa tamummaqara fasiqa asaaku mundirafa dadaaqira afeeka qimian-innanara maaqi qimasee akara rinau.

Mifa rakira karaambaiqara foora maridanoo namuqaa maqusaki ititasee misa narusee faiqi moomoo karabusa rumbasee misa ainaina faqa indaa mamaree nifiqamaree meerai narí maqusai oorureenoo narí maqannaasa qimannimifaqa mina amooqifanoo ainaina raina niminau.

<sup>9</sup> Mi tamummaqara fasiqana ufa kooroo irafa Yisunara maaqimminoo maridanoo. <sup>10</sup> Mifa narí maqusai meerai ooru funara maaqi qidanoo, mifa naaree meemai maqa ameemaanai ooqureenoo miqooqari mifa kai innaaruna maarini aiqama innaaruna maarinni oorureenoo narí marirana narí auqu amana kai marianifeera aiqama atinai narí irirana narí auqu amana kai quqasanau.

<sup>11</sup> Mifa kaqi nimira dadaaqira afeeka faiqi anaasee niminau, mi dadaaqira afeekafa ainainirana akoofasaikiqee qimasee akaqausee niqigoo fasiqausa akoofasaikirana niminau, akaqausa faiqi anaasee qimannimirana akoofasaikirana niminau, akaqausa aamina maqannaasa qimannirana akoofasaikirana faqa paatoo saika akoofasaikirana faqa ufasaa rakisirana akoofasaikirana faqa niminau. <sup>12</sup> Anutufa sia fifaufau mi dadaaqira afeekana niminau, faiqi anaasee Yisuna ufara suqimariasa Yisuna afaaqara foora afeekaikamasee mariaqera mi dadaaqira afeekana oosana oosana maasa qiminoonoo qinuu, innee maa dadaaqira afeekana marasee minannai qini ufara suqimariasa afeekaikamannisaqee qinuu. <sup>13</sup> Maasa miqimamaree fidaqa maasa kasooqaaqee moodaanaki kianaara. Anutuna amaakuara irirana faqaa irirana minasaa rusirana faqa miqiananannai mi moodaanaki kirafa amana kambiqaanoo, mikari maasa faiqi firaasa iriranara foora maraanauranoo maraseeqa asaaku mundirana firaq irirana amana kai ooru mundufuanauranoo. <sup>14</sup> Mikari maasa sia faiqi aanaaqiara foora aiqama oosana oosana amaana ufa iriseeqa munari minari ianaura unna ufa qimaria fasiqausa narí nikaruqira finnai akaqausa aqaranaki rarisama quqaidafa maasa misa ufa iriseeqa sia ufaira foora aiqama saqari udammii udammianaara. <sup>15</sup> Maasa sia miqiaqaa, maaqiaqaa, nariara nariara qimudaoo qimasee ridaqa minaki maridaqa nariara nariara sia unnufa qiaqaa, anoona ufa kai qidaqa maasa miqianannai faiqi aanaaqiara foora asaaku mundirana maasa qikiaqaa amanakai innooqamaree ooru mundufuanaura.

<sup>16</sup> Asaaku mundirafa narí ufa ameemaanai mariasa rakisimarifaqa misa minara maasa qikiaqaa fee qidaqa. Faiqi afaaqaa qina moodaa ainaina maridanoo oosana oosana afaaqaa ati fannoo aadu aadu ainaina akoofasaikirana moodaanaki ootupamafifanoo moodaa fasiqa maridanoo. Asaaku mundirafa maasa qikiaqaa marifa maasa rakisimarifaqa maasa faqa miqi kai iqa faiqi afaaqaa fooqaana aadu aadu akoofasaikirausa moodaanaki ootupanoo marifaqa maasa qikiaqaa Yisunasaa atooqaa maridaqa mina afaaqaiqiqa maridaqa. Maasaki aiqamausa naadu naadu nariqa saikirana andeeqasee maridaqa sia nariara nariara nikooqaani nariara nariara rinnanannai moodaanaki innooqafinoo amiqimmandee kambiqafi fuanno.

*Asaaku mundiranaki mariasa asukunakinaa oosana taikafinanoo kaaqa qarafa aniani.*

<sup>17</sup> Miqi marianara qinee Pauroosa Karaambaiqa auqusaa inni qimannimidaqa afeekaikamandee kafaa kafaa qimannimidaqa, sia Anutunara aamina maqannaasa naanna raaqa. Misa irirafa fifau faafaumminoo maridanoo. Innee andeeqasee mariaqa. <sup>18</sup> Misa nitikurakinnaa irirafa asukunaki maridanoo Anutufa nimirari marirana sia misa kaqikaqoo maraidaqa aanaamurura foora sia maraidaqa, misa kaaqa irirana siaisa furufari mariasa narí qimaqaamau kai fimariasa, minara kai asukunaki maridaqa. <sup>19</sup> Misa nisaurirana taikarusa maridaqa narí nifaaqa marirana mandoosana kai ubeekaidafa oosana oosana nisaurimaria ainaina sia nisauridaqa fanandidaqa kaqi umaridaqa.

<sup>20-21</sup> Innee Efeesusa maqannaasa miqira mandoosana sia asaaku mundirana saaqaaraana iriafanoo, innee minara irisee Yisuna aiku asaaku kambiqafufafa andeeqara irirana faqaasa inni mina anoona ufa inni qimannimifaqa irimariafanoo. <sup>22</sup> Minara innee inneeqa ooqeenaa marirana nirana fatika aqusaqaa inni ooqeenaa marirafa inniqa mareeqeenoo inniqa manda nikaruqira nidiranaki quqasoofaqa miqoo innee inneeqa kai kuridimariafanoo. <sup>23</sup> Inni nimuqusaki manda nidira nidimarina faqa nitikura mandirira irimariana faqa taikasee innaarunaindaraana fuka amiqirafa kai mariani. <sup>24</sup> Inni innaarunaindaraa fuka marirafa Anutuna narí miqirafa maridanoo, mina anoona ufaki andeeqasee marirana faqa Anutuna ufa ameemaanai marirana faqa mina amooqirana

faqa mi fuka marirafa anoona maridanoo, innee mi marirana kai qamunnara foora afisusee minaki maraqa nuaqa.

<sup>25</sup> Doo minara maaqooqari sia unna ufa kafaa mariani, taikaani, aiqama narinni narinni anoona ufa kai nari qimami nari qimami qiaqa, maasa aiqamausa moodaa nifaqara foora kai marunnnara narindi narindi marunnnara unna ufa sia qiaqa anoona ufa kai qiaqa.

<sup>26-27</sup> Ani aanooirafa kambiqafinoo sia ani rarisameeqee mandainainaki quqaani, anee aanoo qinana doo mi faasaanasaa mi suanina keeqarana namuafa taikaseena faiqaa sia kisaqaasaa aanooida maria, dauni taikaa, Sadannafa minaki keekafinoo mandainaina ugeeraandoora.

<sup>28</sup> Ainaina ummuari mari fasiqafa ummuarirana taikaani, taikasee quandaki andeeqasee nari ainainamasee nari narana namasee kudi fasiqauqa faqa naida niminaqa naaqa.

<sup>29</sup> Sia putaa ainaina afunda ainainara ufa qiaqa, faiqi anaasee pooduqamannimaqaida dadaaqimaria ufana kai qimasaifaqa misa iriseeqa amiqirana adiafaairana mareefaranoo.

<sup>30</sup> Manda ufa qinanoo Anutuna naaquqara maraqa fannoo iriseenoo akooqaanoo. Anutuna maraqa fannoo inni faqa marifa Anutuna akarara foora narindi fee qidanoo inniki akara rinoo maridanoo. Mi maraqa akarafa maaqi qimasee inniara qima afeekaikidanoo kasooqaqee Anutufa qinanoo Yisufa qumuree inniara qinindi fee qimasee maraannoo.

<sup>31</sup> Doo maqee aukuaana aiqama sukaqara ufa faqa qusufa qimasee darara qirafa faqa naunduraki mari aanooirafa faqa fatika aquaqa. Nariara nariara firaa kari nameera ufasaa niqimariafa faqa aquraree mariannana faqa sia kafaa mariani naundurakinaa nariara nariara fidiqaa ira irirafa faqa taikaani.

<sup>32</sup> Sia miqiaqa, maaqiaqa, nariara nariara ireeda kai nimuqusa reendeenirafa faqa dadaaqirafa faqa mariani, narinni narinni mandainaina minnisaqa. Maasa oosana oosana ainainannai Anutuna mandaikamma amaqaafanausa marifanoo Anutufa asauku mundiranannai maasa darirana minniqisanau. Doo innee minara iriseeqa mina amana kai doo inniqa niqoonausa mandaikamma nimaqarana nari minnisee nari minnisee iaqa.

## 5

### *Anutufa maasara rirana ammeemmeriaqa kaaqa qarana maraqa.*

<sup>1-2</sup> Innee Efeesusa maqusanaasara Anutuna amuqusira aiku asauku marianara mina ammeemmeriaqa asauku mundirafa maasara rinoo amuqusinoo nari marirana maasa qimaqa maqasee kuqiranaki quqasoofanoo tatufira aanda sugara fara foora Anutuna aikiambu inau, innee faqa miqi kai iqa asauku mundirafa maasara rirana ameemmeerida nariara nariara ruaqa. Inni nariara nariara rirafa maqee maqee inniqa marirana rakisinnimaqaani.

<sup>3</sup> Innee Anutuna maqasaa aiku asauku marianara inniki faiqi anaasee nari ummuari nari ummuari maria ufana faqa ikairi irirana faqa ainainara faqa aanaaseera faqa kaaqa fanandi mariana faqa sia mi oosanna maraqa minara ufa qimariafa faqa doo taikaaqa.

<sup>4</sup> Ikairi putaa ufa faqa furufarira ufa faqa uteeti qimasee naanaindara qimaria ufana faqa aiqama sia andeeqara ufa sia inniki amanaikinoo maridanoo Anutuna maqasaa aiku asauku mariafanoo. Innee sia miqaa miqaa iaqa, maaqiaqa innee maqee maqee Anutunara dufi dufi qirafa kai inniki mariani. <sup>5</sup> Innee maa moodaa ainainnara kai amiqimmandee iriaqa, faiqi anaasee nari ummuari nari ummuari mariafa faqa ikairi faqaasa faqa kaaqa ainainara rimariafa faqa miqaa qiganuasauqa, asauku mundirana ququsaki faqa Anutuna ququsaki faqa sia uqanna kaqikaqoo mareefaranoo. Kaaqa ainainara rimaria oosanafa mifa moo unna anutunara innaaru qimaria fara foora mina ufa iri maria fara foora maridanoo.

<sup>6</sup> Minara moo fannoo mi oosana oosana manda ainainnara aufadamasee ufa qimasee nari furufarira ufannai inni nikaruqimasee mandainainaki fuaqee qinaqa sia uqanna innee mina iriaqa. <sup>7</sup> Maqee maqee Anutufa mi manda oosannara kai qaoo qimarifaqa sia irianannai kai Anutuna aanoo qirafa misasaa aqufidanoo. Minara qinee inni qimannimidaqa miqinna fasiqa anaaseesa sia misa faqa mariaqa, nianasaa rufiasee mariaqa. Minara qinee maaqi qimasee qimannimidaqa.

<sup>8</sup> Ooqai innee Efeesusa maqusanaasa faqa asukunaki mariusa mariafanoo doo maqee karaambaiaqa Anutuna faiqi anaasee aiku asauku kamambi mariafanoo kaaqa qarana fooqaasa mariafanoo, doo minara iriseeqa kaaqa qaranaki mariasara foora ida mariaqa. <sup>9</sup> Kaaqa qarafa qafuqakinaa ainaina amiqi amiqifanoo kambiqaidanoo Anutuna kaaqa

qaranaki mariasa miqi kai iqa kaaqa qaranaki maridaqa misaki amiqirana faqa andeeqarana faqa anoona ufa qirana faqa misaki kambiqaidanoo, <sup>10</sup> Innee karaambaiqa aidi mari mariranara randasee maraaqa. <sup>12</sup> Asukunaki mariasa kukeeqaranaki maridaqa oosana oosana manda nisauri maria ainainna maraifaqa maasa misara qisauruanoo qimasee sia misa oosana kaqikaagoo ufa qianaura. <sup>11</sup> Minara innee furufarira marirana maree mariasara faqa asukunakinaa oosana maree mariasara faqa rufiasee innee nianasaa mariaqa innee misa manda asukuna mareeqee aiqamausa nifusaa kaaqa gara qoo quqasaifaqa mi manda asukunaki mariasa nisaurirana marasee minnisaaqera. <sup>13</sup> Mi manda ainainausa mareeqee aiqamausa nifusaa kaaqa gara qoo quqasaifanoo mi manda ainainausa oosana uqanna kaaqa kooroomambuannoo. <sup>14</sup> Aiqama ainaina asukunakinaana mareeqee kaaqa gara qoo aiqamausa nifusaa quqasaifanoo mi ainainausa faqa kaaqa qaranaiqiannoo. Minara maasa idi moo maaqi qinoo maridanoo.

Anee faiqee marianafa findi fua.

Kuqiranakiqari findi finanoo

asauku mundirafa suaniara foora anisaa qaani.

<sup>15</sup> Mi ufafa miqinoo marinara innee Efeesusa maqannaasa inneeqa mariranasaa amiqimmandee rakisiaqa. Sia aamina fasiqara foora mariaqa irirana faqaasara foora mariaqa. <sup>16</sup> Maa kamuqoo manda marira kamu marinara sia fifau suani afu afeesimarina kaqinni aiqaraani, aiqama faasaanara ainainira faasaanee qiaqa. <sup>17</sup> Minara innee sia furufariaqa Karaambaiqa inniara fuaqee qinaqa fifandinnanara faqa auqefandinna-nara faqa ooqai iridanoo innee mi iriranara randasee paqurimandee mi mau afeekaikamandee fidaqa qafaqa.

<sup>18</sup> Innee nammari namasee furufarirana sia maraaqa mifa inni kuridimarifa maridanoo Anutuna maraquna fannoo kai inni naakufinoo naundurai qumbiqafinaqa mariaqa. <sup>19</sup> Innee nari qimami nari qimamidaqa Anutunara amooqirafa inni naundurai qumbiqafina maridaqa Dafidina idi faqa amaana idi faqa Anutunara rara idi faqa mi idinanni nari qimami nari qimami qiaqa. <sup>20</sup> Maasa karaambaiqa asauku mundirana Yisuna auqusaa maqee maqee aiqama ainainara maasa qikoona Anutunara dufi dufi qiaqa.

*Faiqi aanaaseera qidanoo.*

<sup>21</sup> Innee asauku mundirana naaquqee marinara nariara nariara ureeqafi maridaqa reendeena mandee mariaqa.

<sup>22</sup> Innee aanaaseeuqa faiqi ninaaqmaaka qimannimidaqa, innee faqa karaambaiqa aramandunnai maridaqara foora inneeqa nifaaqmaaka ufa ameemaanai miqimandee mariaqa. <sup>23</sup> Asauku mundirafa nari ufara suqimariasa innaaruna asumu nimimarifa maridanoo, misa uriqararafa maridanoo, anaasee nifaaqmaaka miqikai iqa nari ninaaqmaaka uriqara mafi marianara inneeqa nifaaqmaaka nimeemaanai ureeqaqa mariaqa. <sup>24</sup> Asauku mundirana ufara suqimariasa eedoo qimasee mina aramandunnai ooqu mari fidaqa mariandee kai iqa aanaaseeuqa nari nifaaqmaaka aiqama ufa ameemaanai mariaqa.

<sup>25</sup> Faiqi inni faqa qimannimidaqa innee aanaaseeuqa nifaaqmaaka inni qimannimidaqa, innee faqa asauku mundirana aanna raaqa, Yisufa nari ufara suqimariasa nari aanaaqara foora misara kaaqa amuqusufanoo misa naaru mariaqera qimasee nari marirana misara kuqiranaki paasoosamandee quqanau. Innee inneeqa ninaaqmakara miqi kai iqa uriqarara ainainee qimasee nimuqusiinaqa ruaqa. <sup>26-27</sup> Fuka anaasee nari afaaqinnai fuane qimaseenoo afaqa anukamaseenoo amiqira siara gamunna afisumareenoo nari afaqa akumbau fee namuana fee qikairi fee sia marifanoo andeeqa mareenoo nari afaaqinnai fidanoo. Asauku mundirafa nari ufara suqimariasa fuka anaaseera foora nammariara foora ruma nimaqaseenoo andeeqara amiqiranaki faqa nifaaqa idaaqiranaki faqa mareeqeenoo narinnai amiqiranaki quqaani fee qimaseenoo maasa nari ufannai nammariara foora ruma qimaqasaidanoo nariara kai mara quqeenoo, minara Yisufa nari ufara suqimariasara amuqusufanoo nari marirana misara kuqiranaki quqanau maqi qidaqa. <sup>28</sup> Faiqi nari ninaaqmaakara miqi kai mandee nari nifaaqara foora nimuqusiani, nari aanaaqara uriqarara ainainee qimasee amuqusi-mariafa nari kai nariara faqa uriqarara ainainee qidanoo amuqusidanoo. <sup>29-30</sup> Sia moo fannoo nari afaaqara akooqaidanoo amiqimmandee rakisidanoo narana amidanoo asauku mundirafa Yisufa nari ufa suqimariasara nari afaaqafee qimaseenoo rakisidanoo, innee faqa miqikai iqa inneeqa ninaaqmaakara qini qifaqa fee qimasee amiqimasee rakisiaqa. <sup>31</sup> Ooqeenaa tamummaqara fasiqauqa akara mina maaqimminoo maridanoo, Anutufa qunara faiqi moo fannoo nari anoofa akoona minniseenoo nari aanaaqasaa atooqafinoo miqanda moodaa kara mafifaranoo.

<sup>32</sup> Mi ufana maa ainainnara kikiqusidanoo anoona amiqirafa maridanoo asaku mundirafa faqa nari ufara suqimarias faqa faiqi nari aanaaqara faqara foora inoo maridanoo moodaa kara mafuannoo. <sup>33</sup> Mi ufana inni faiqirafa faqa qidanoo aiqama fasiqa nari ninaaqmaakara nari nifaqara foora nari nimuqusiani, anaasee faqa nari nifaqmaaka ufa ameemaanai eedoo qimasee mariaqa.

## 6

*Faiqiuqaindiara faqa nari ninaukoora faqa qidanoo.*

<sup>1</sup> Faiqiuqaindi inniara qidaqa, inneeqa ninausa nikausa ufara eedoo kai qiaqa. Innee Yisuna ufara suqimariasaki marianara andeeqarafa mifa maridanoo. <sup>2</sup> Mooseena sandufara innee irimariafanoo minakinaafa aaquqira ufa qisaukuqara taikasee maridanoo. Minakinaana moo sandufa maasa mi mau fuanoo Anutufa moo ainaina maaqoo maa maqanasaa maasa qimirara qima afeekaikammaqoofa maaqimminoo maridanoo, inniqa ninausa nikausara naaquqaina misa ufamau fuqa. <sup>3</sup> Fifanoo Anutufa inniara kisaagasaa inneeqa maqa maaqaki maridaqa amiqiranaki mariaqee qimasee maasara qimafeekaikinuu. Maasa mi ufanara uriqarara ufee qidaqa. Doo innee faiqiuqaindi mi mau fuqa.

<sup>4</sup> Faiqi nikausamara inni qimannimidaqa sia inneeqa faiqi fifau nirana fundakifaqa aanoo iaqa, sia miqiaqa, maaqiaqa, Yisuna ufamau inni faiqiuqa andeeqee andeeqasaifaqa Yisuna ufasaa innooqaqa.

*Ainainimariasara faqa misa uriqararawsa faqa misara qidanoo.*

<sup>5</sup> Qinee Pauroosa innee moosa ainainimarias qimannimidaqa. Inneeqa feefauru marara saikaki keeqafinaqa amiqimasee mina ainainammaisaaqa. Sia nifaqa quqasee mana mana iaqa. Innee naaquqee marinaga ainaina akoona anainammaisaaqa, innee asaku mundirana ainainidee qidaqa maqasaa ainaina akoona amiqimasee nimuqusannai ainainammaisaaqa. <sup>6</sup> Sia misa eedoo qira ufara kai irisee misa nifusaa kai ainainiaqa, inneeqa nimuqusannai Anutuna ufamau asaku mundirana ainainidara foora amiqimasee ainainamannimaqaqa. <sup>7</sup> Sia fifau faiqi ainainamaiseera fooriaqa, karaambaiqa ainainammidee qimasee amiqimasee ainainamaisaa. <sup>8</sup> Innee miqidaqa maanara iriaqa, Karaambaiqa aiqama fasiqa amana amana kai nimidanoo moosa rumbara saikaki mariasee nari ainainira saikaki mariasee nari amiqira ainainirana akiqara amana amana kai innaarunai nimiannoo.

<sup>9</sup> Qinee ainainimariasara innee inneeqa ainaina akoona amiqimasee ainainammaisaa qee qimaseeqa innee ainaina akawsa faqa qimannimidaqa innee faqa miqikai mandee inniqa ainainimariasasaa amiqimmandee rakisiaqa, amiqimasee ainainiaqee qimasee aanoo irana faqa narirari mariana faqa taikaqa. Innee faqa maanara iriaqa, innee faqa inni ainainimarias faqa moodaa rakisirafa innaarunai marifa, sia mifa ainainimariasara ureeqarausee qimasee kafia quandaki rakisi nimaqee marisara uriqararausee qimasee qaara irirana maraidanoo, moodaa irirana marasee amana amana kai rakisi nimaqaidanoo.

*Roomma maqannaa sundiara foora afaaqa ititamareena Sadannana faqa rakuqa.*

<sup>10</sup> Maa ufana taikara ufa maaqimminoo maridanoo, innee karaambaiqa faqa maridaqa moodaanaki nimarifaqa mina fira afeekannai inni faqa moodaanakikirana firaqoo afeekaikamma mapukuqa. <sup>11</sup> Sadannafa oosana nari manda nikaru qiranannai inni naruannoo, innee minara rufiasee Anutufa niminna saqari duru saamunnai inneeqa nifaqa ititaqa. <sup>12</sup> Maasa Yisuna ufa irimariasaa sia faiqi faqa rakidaqa maasa meera Anutuna innaaruna ameemaanai maria manda afaanawsa faqa rakidaqa, maa asukunaki maria kamuqoo mirindari rakimarias faqa misa uriqararawsa faqa misa faiqi firaasa faqa meeraindari maasa daruafaqa maasa misa faqa rakidaqa. <sup>13</sup> Innee minara iriseeqa Anutufa niminna duru saamu saqarina gumareeqa deedaqida mariaqa. Sadannafa mi manda faasaana narirara anirinaqa innee amanaikiqa mariafanoo nari faqa aruafaqaammasee miqoo kai eeraaramasee ititaqa mariaqa, sia amana ainnaaqaraani.

<sup>14</sup> Minara qimannimidaqa. Innee findifi deedaqida mariaqa Sadannafa inni mandosana nimisee naruandoora. Roomma maqannaa sundia nifaqa rafaqafimariana kikiqususee inniara qianauranoo. Inneeqa fausanda niranauqumuki rumbee maria fara foora mifa inni anoona ufa kai qirafa mifa mariannoo. Inni nimuqusasaa ititee maria afeeka ainainara foora inni andeeqara oosana mariannoo. <sup>15</sup> Inni niku ititee mariafa niku aanaamuara foora mifa Anutufa faqa mari asoora amiqira fasaasa ufa maqee maqee aamina maqannaa qimannimiraafa mifa inni niku aanaamuara foora itirafa mariannoo. Mi andeeqara oosannawsa marasaifanoo Sadannafa sia amana inni naruani.

<sup>16</sup> Inniqa saqari ukeeqirira fara foora Yisuna saqarikirafa maridanoo. Innee Roomma maqannaa sundiauga foora maqee maqee mi saqarina ukeeqirisee maraqa nifanoo Sadannafa nari feefa ida muquru qumaree inniara oosana oosana furufarira irirana minannai inni nifaqa naqusee nariraree qimasee aqusainaga innee Yisuna saqarikiranannai mina mafi ruki aquaqa.

<sup>17</sup> Roomma maqannaa sundiauga rakiranaki fidaqa qafee nikiaga afisusee nikiaga rukamifooraa afisimariqau. Inneeqa nikiagaki ititee maria qafeenara foora Anutufa innaarunai asumu marirana nimufa maridanoo. Sadannafa inni kuridiranaki maqee maqee mara quqararinaga innee mi qafeena afisusee asumu mariaqa. Roomma maqannaa sundiauga rakira paipana dinni dinni afaifaqaannai faiqi ateekeega raquru nimiqa imariqau. Inni raqara paipana aseema fooqaafa marina Anutuna ufa maridanoo mina maraquina fannoo mi ufana nimu ufafa maridanoo. Sadannafa inni faqa rakinaga mi samuna qumaree mina aruqa. <sup>18</sup> Innee mi ainainausa maridaqa innaaru qidaqa maqee maqee Anutuna dadaaqiranara faqa innaaru qiaqa. Anutuna maraquina afeekannai maqee maqee eendaki faqa faasaana faqa Anutuna maqasaa fasiqa anaaseera Anutufa amiqi amiqimma nimaqaanifeera innaaruqiaqa. Sia kudoosaapaaga afeekaikamandee innaaruqiaqa. <sup>19</sup> Qini Pauroosara faqa innaaru qiaqa Anutufa oosana qimasainaga qinee faiqi anaasee Yisunara qimannimianauree qimasee paasoosamandee qimannimianauree, Yisuna amiqira fasaasa ufa ooqi kukeeqanoo marifa maqee aukwana Anutufa faiqi anaasee kooroomannimaqeenoo.

<sup>20</sup> Qinee Pauroosa mi amiqira fasaasa ufana aanaiqikirausa maridaqa. Kuqaa Roomma maqanna karabusaki maridaqa kuqaa aanaiqikirausa maridaqa. Anutufa qiniara paasoosamandee faiqi anaasee qimannimianne qifaqa innee qiniara innaaru qifaqa paasoosamandee qimannimianauree.

*Pauroona akara taikara akara.*

<sup>21</sup> Qinee Tikikusana aqiqaanaroo qini daufakiana inni qimannimiannoo. Mifa maasa qimuqusi mari qikaqaafasaafa maridanoo, karaambaiqa saikaki amiqi amiqira ainainimarifa maridanoo. Mifa qini fasaasa ufa inni qimanniminaga innee qini mariranara iriaqera. <sup>22</sup> Mina qimannimianifeera aqiqaanara inni nimugusa pooduqaanifeera aqiqaanarano. <sup>23</sup> Maasa qikoofa Anutufa faqa maasa karaambaiqa asauku mundirana Yisuna faqa naunduraki asoosana faqa nariara nariara uriqarara ainainee qimasee nimuqusirana faqa Yisuna saqarikirana faqa inni aiqama qini qikaqaafasaauga nimiani. <sup>24</sup> Innee aiqamausa maasa karaambaiqa asauku mundirana Yisunara sia taikee maria rirana rimariasa, Anutuna afaarirafa inni faqa mariani.



## FIRIPI

### Firipi maqusanaasa Pauroofa akara rumannimaqoofa.

<sup>1</sup> Qinee Pauroosa Timootisandiri asauku mundirana Yisuna rumbara ainainira fasiqagara maridaqa maa akarana rumannimaqeeqa. Innee Firipi maqusai maria Anutuna aiku asauku maria fasiqa anaaseesa innee faqa innee ufa suqimariana rakisirausa faqa inni niqoonausa inni dadaaqaq mariasa faqa, innee aiqamausa inneeqa irirana asauku mundirana Yisunasaa rusimariasa, inni akara rumannimaqaidaga. <sup>2</sup> Maasa qikoofa Anutufa faqa mina asauku mundirafa maasa karaambaiqa Yisufa faqa nari afaarirana faqa nari naunduraki asooarana faqa nimiani.

*Pauroofa Firipi maqannaasara innaaru qu ufafa.*

<sup>3-4</sup> Qinee inni Firipi maqannaasara daaqoo irifaqa Anutufinnai dufi dufi qimasee asasammasee inniara innaaru qidaqa. <sup>5</sup> Ooqai indaaru inni maqusai anireeqa Yisuna amiqira fasaasa ufa qimannimifanaqa amiqimmandee dadaaqammamaree ani maru-faqa nindafaafannara inniara daaqoo iriseeqa Anutunara asasammamaqaidaga.

<sup>6</sup> Qinee maa ainainnara amiqimasee iridaqa Anutufa inniki amiqira saika uqeeroofa kaqi inniki mi saikana kai uqeeranoo fifi inoo taikara aukuaana asauku mundirafa Yisufa quminna faasaana miqoo kai taikaannoo. <sup>7</sup> Anutufa nari saika Yisunara qimannimira saika adiafaa imari saikana qimufaqa innee aiqama minaki marida dadaaqaq marusa mariafanoo, minara inniara asasirafa andeeqarafa kai maridanoo. Ooqai sia qinee karabusaki mariafanna kamu qoo qinee Yisuna aufakiana faiqi anaasee kaqi nidaqa qimannimiseeqa naunduraki mapuku nisasee mariqiafana, akaqausa minasaa ootu-peeqa aaqaranaki quqasoofaqa qinee oonuree mina ateekaafanaqa innee faqa dadaaqaq marusa mariqau. Doo maqee faqa Roomma maqanna karabusaki maridaqa innee faiqi anaasee mapukunnisee mariana qini dadaaqaq mariasa marianara inniara Anutufinnai asasirafa andeeqanoo maridanoo. <sup>8</sup> Anutufa iridanoo qinee kuqaa anoona ufa inni qimannimidaqa. Inniara qini qimudaoo qirafa firaafa marina asauku mundirana Yisuna amuqusa ookiqari kambiqaqa qimudaoo qirafa maridanoo.

<sup>9</sup> Innee amiqira oosana kai irisee maraaqee qidaqa maaqi qimasee inniara Anutufinnai innaaru qidaqa, Oo Anutu Firipi maqusanaasa nariara nariara rirafa maqee maqee innooqaidanoo kambiqaani mina sia aagara irirafa anoona irirafa faqa rainasee akoofa-saikira irirana faqa maasaki innooqeenoo uqannifiqainaga uriqarara aana kai umaree fuaqeeera qidaqa. <sup>10-11</sup> Anutufa miqinoo inni dadaaqinaqa asauku mundirafa qumira faasaanasaa innee ikairi saisa, ufa saisa maridaqa asauku mundirafa nimira amiqira anoonakira marirafa inniki marifanoo aiqamausa mina qafammasee Anutunara dufi dufi qimasee amooqifaranoo.

*Pauroofa kuqirane kaqi marirane asauku mundiranaindi marianauree qinau.*

<sup>12</sup> Qinee Pauroosa Yisuna ufa maqusa maqusa qimannimi marunnana akaqara karabusa rumbasaafaqa maridaqa. Nariqa qini rumbaqaafanoo Yisuna ufa aru rafaqaq firaree qimasee qinee rumbaqaq maruna sia misa Yisuna ufa rafaqaq fia, qini rumbaranannai misa sia irirai mina muru pooduqaafanoo. <sup>13</sup> Qinee Roomma maqusai firaa uriqarara kiapana maaqa amiqira maaqa aaga rumbara maqaki maridaqa mi firaa maqanasaa rakisi maria sundiauga faqa rumkatasaa faqa qinisaa faqa rakisimaria poorisaua faqa aiqama maaqoo mariasa faqa qinee asauku mundirana ainainira faiqi mina ufasaara rumbaqa marunannara irimarusa maridaqa sia qinee moo mudoosana maraafannanara iridaqa. <sup>14</sup> Qini qikaqaafasaauga, maqusa maqusa Yisuna ufa irimari-asa qinee karabusaki marunannara iriseeqa misa paasoosirafa firaaqoo innooqamaree fidaqa faiqi anaasee Yisunara qimannimidaqa sia rufiidaqa.

<sup>15</sup> Misakiqari akaqausa nariara nariara rairaiqidaqa raiqaidaga asauku mundirana auqu uqeeraidaqa, akaqausa moomoosa sia miqidaqa amiqira irirana iridaqa qimannimidaqa. <sup>16</sup> Miqi mariasa nimuqusa ookiqari qini Pauroosara ridaqa Yisunara amiqimaseeqa faiqi anaasee qimannimidaqa. Akaqausa Yisuna ufara kaukaata qidaqa mareeqee kaqirunna ubeekaidaga, Anutufa qiniara anee minasaa ititaanee qifaqa ititaidaga, qini dadaaqaq mariasa miqi marunaua marunannara irisee amiqimmandee qiniara ridaqa dadaaqidaqa. <sup>17</sup> Akaqausa rairaiqidaqa qimannimi mariasa sia nimuqusa ookiqarifau asauku mundirana saikara qimannimidaq nariara nari nuqu uqeerararee qimasee miqi qidaqa. Misa Yisunara miqi qimasee qimannimifaqa Roomma maqannaasa mina irisee kafia kafia qini karabusaki amiqimma daruaqeeera miqi qidaqa.

<sup>18</sup> Qinee misa oosanara iridaqa sia firaqoo misa oosanara oonumafi iridaqa. Qinee minara maaqi qidaqa. Akaqausa amiqira irirana marasee asauku mundiranara kooroo iafaqa asasidaqa, akaqausa aqara irirana marasee asauku mundiranara qimannimi-afaqa minara faqa asasidaqa, misa oosana oosana iriranannai asauku mundiranara kooroo ida fee qidaqamma asasidaqa. Sia qinee maqee kai asasianaura naaru naaru asasianaura. <sup>19</sup> Inni innaaru qirafa faqa asauku mundirana Yisuna maraquna faqa Roomma maqannaasa qumee dadaaqinaqa nari karabusakinaana qini iduku qimaqee-faranoo, qinee minara iriseeqa maqee maqee asasidaqa.

<sup>20</sup> Qeeqa qimuqusa ookinaa didira irirafa maaqimminoo maridanoo. Qinee qeeqa saika Anutufa qimu saikana sia kudoosaapee minnisaanuranoo aigama aukuna faqa maqee Roomma maqannaasa karabusaki marunnanara faqa qiniki qini paasoosirafa qumbiqafinaqa qeeqa Roomma maqannaasa darifaqa kuqiranannai fee qeeqa kaqi mariranannai fee qeeqa marirana aigamannai asauku mundirana auqu uqeerarana qiniki marianifeera dididanoo. <sup>21</sup> Kaqi marirafa nana ainanee maridanoo fee, qini marirafa asauku mundiranara kooroo imarifa kai maridanoo, Roomma maqannaasa darifaqa kuqifa amiqiranaki uriqararanaki marianauranoo fee qimasee minara dididanoo. <sup>22</sup> Qinee minara iridaqa kafa maaqi qidaqa qinee sia darifaqa kaqi maridaqa amiqira anoona saika amana maraanauree qimasee minara faqa dididanoo. <sup>23</sup> Qaara irirafa qini daundurai maridanoo dinni dinni oonurisee ani rarisee imariafaqa maridaqa. Roomma maqannaasa qini kuqa kai darifaqa qinee maa marirana minnisee asauku mundirafa marinnai firara firaqoo dididanoo amiqira ainaina maridanoo. <sup>24</sup> Misa sia qini darifaqa kaqi marida qinee inni Firipi maqannaasa dadaaqirana uriqara ainaina mariannoo. <sup>25</sup> Qinee minara iridaqa kaqi marianauree qidaqa. Qinee inni faqa maridaqa inni dadaaqianaga inneeqa saqarikiranaki nidaqa inneeqa saqarikirana firaanaikidaqa inni asasirafa faqa firaanaikianifeera kaqi maridaqa dadaaqianaura. <sup>26</sup> Qinee Pauroosa karabusaki maridaqa innee qiniara irisee asasidaqa nasanasu rida mariaqa. Misa qini karabusakinaana idukifaqa innee iannai fuaqa qini qiqaqamasee asauku mundirana Yisunaki fidaqa qiniara fiqaramasee asasidaqa qimooqifaranoo.

<sup>27</sup> Misa qini darifaree idukifaree inni irirana moodaa maaqimminoo mariani, innikina narinni narinni rirafa asauku mundirana amiqira fasaasa ufa irimariasa misa naanna ramafi mariaqa. Innee miqidaqa marifaqa qinee inni oonu nindafaanauree sia fee oonu nindafaanauree miqidaqa inni amiqira oosanara nianaindari irianauree, inni irirafa Yisuna amiqira fasaasa ufa saqarikirana faqa mi mau firana faqa minara kai iridaqa aigama innee moodaa irirana faqa moodaa firanamau faqa moodaanaki ruumbakiqa maridaqa rakimariasa naanna ramasee mapukiqa marifaqa irianauree.

<sup>28</sup> Yisuna ufara namuqaaki mariasara sia rufiaaqa, paasoosiaqa. Innee sia rufiafaqa misa nari kuridifandinnanara irifaranoo. Inni innaarunai asumu marifandinnanara faqa irifaranoo. Anutufa nari kai uqannifiqaannoo. <sup>29</sup> Anutufa inni firaqoo adiafaairanaki quqannisennoo asauku mundirana ainainiranaki quqannisifaqa innee minaki maridaqa sia inni irirana minasaa rusiranara kaifau inni niminoofau mina ufasaara nidafirana maree fandinnanara faqa inni niminoo. <sup>30</sup> Doo maqee innee Firipi maqannaasa qini Pauroosa rakimariasa naanna ramasee dadaaqiaqa. Ooqi innee qini qiqafoonakinaa rakirafara foora faqa maqee kaqi mari rakirafara foora faqa innee minara qiqaqamasee irimariafaqa amana maqee dadaaqiaqeeera qimannimidaqa.

## 2

### *Asauku mundirana reendeenirana ammeemmeeriga.*

<sup>1</sup> Innee asauku mundiranaki nimariafanoo inni pooduqara afeekaikirana nimidanoo fee. Asauku mundirafa inniara rirana naunduraki amiqi amiqirana nimidanoo, innee Anutuna maraquna faqa moodaanaki maridaqa quandafi nariara nariara rirana naunduraki amiqi amiqirana nimidanoo, innee Anutuna maraquna faqa moodaanaki maridaqa quandafi nariara nariara idaaqidaaqida mariafanoo. Innee nariara nariara nimuqusi marifaqa idaaqidaaqida mariafanoo.

<sup>2</sup> Qinee inni fuki faaki qidaqa afeekaikidaqa innee maaqimasifaqa qinee amiqimasee inniara asasianaura. Innee moodaa irirana maraqa, innee moodaa nidirana nari ami nari ami iaqa. Innee moodaa amiqira irirana faqa maraquna faqa maraqa.

<sup>3</sup> Sia moo ainaina qimianifee qimasee aundurai oonu mafi irisee aqoonnana oonu dadaaqiaqa. Sia manda fifau nifaaqa mara maree ooru firafa maraanifee qimasee aundurai oonumafi irisee aqoonnana dadaaqiaqa, innee sia miqiaqa, maqiaqa, narinni narinni reendeenida mariaqa. Sia anee moosara mandaikira fee qimasee aneennara

amiqira fee qia. Maqee maqee aqoonausara qini uriqararausee qimasee qinee misa ureeqarusa maridee qiaqa.

<sup>4</sup> Sia innee inneeqa ainainara kai irimaree fuaqa, niqoonausa faqa amiqiranaki mariaqera minara faqa iri maree fuaqa. <sup>5</sup> Innee inniqa nariara nariara irirafa asauku mundirana Yisunaindi miqirafa reendeenirafa amiqirafa marindee kai iaqa. Mina irirafa maaqimminoo marinau.

<sup>6</sup> Mifa ooqaindari Anutufara foora marufa maridanoo. Sia narí afeekannai rakirara maqi mandee Anutuna amana ooru fuaauree qinau.

<sup>7</sup> Narí kai iriseenoo narí uriqararana minniseenoo ureeqara ainainira faiqi irirana marasee marinau.

Mifa faiqiara fooqaana mambinoo faiqi afaaqaki maa maqanasaa kooroomafinoo marinau.

<sup>8</sup> Mifa reendeenirafa marinoo Anutuna ufara eedoo qimammaree finoo doo kuqiranara faqa eedoo qimasee kuqinau, manda kuqirana aunirira saqarisaa kuqinau.

<sup>9</sup> Anutufa mina qafoofanoo afaaqa asasinoo aidufanoo mina akiaqara kuqiranakinaana uqereeeqeenoo innaaruna maarinni uriqararanaki quqaseenoo aiqama nuqu uriqarara auqu faqaana quqanau.

<sup>10-11</sup> Aiqamausa uqanna innaarunaidaraasa faqa maqasaaqaraasa faqa maqa ameemaanaidaraasa kuqiraua faqa Yisuna auquara naaquqainaqa reendeenamasee niqoori saunaraifiqa aiqamausa akooqoo asauku mundirana Yisunara maasa karaambaifqee qimasee mina akoona Anutuna amooqifaranoo.

Minara qinee Pauroosa inni Firipi maqannaasa qimannimidaqa inni irirafa asauku mundirana Yisuna aanna kai reeqa nariara nariara fifimmaseeqa idaaqiaqa.

*Innee aaqee mariasaki maridaqa andeeqarusa mariaqera qinau.*

<sup>12</sup> Oo qini qiqoondiuga Firipi maqannaasa qinee ooqai inni faqa mariafanaqa innee qini ufa irisee eedoo kai imariqau. Doo qinee maqee innikiqari nianai maridaqa innee qini ufa irisee eedoo qinafa uriqarara ainaina mariannoo innee innaaruna asumu marirana doo marasee mariafanoo aqamaki saamuruanoo qimasee rufiaqa rufiaqa irirana faqa naindiri naindirirana faqa mara maree fidaqa anoonakirana mareefara. <sup>13</sup> Anutufa minara irisee inni naunduraki mina ufara eedoo qira aidirana faqa mi mau fira afeeka faqa inni naunduraki kambigaaifeera maqee maqee ainainidanoo.

<sup>14-16</sup> Innee maa maqa maaqanaki eendaandirausa faqa aaqee mariasa faqa gambaana mariafanoo Anutuna andeeqara faiqi namu qikairi siaisa anukarusa mariaqera qidaqa innee aiqama ainainirana idaga sia nikoo nika idaga ninunuridaqa raiqaaqa, miqidaqa sia Anutuna andeeqara faiqi namu marifaranoo. Kaqi eedoo qimasee kadaapirirana maraqa. Innee mi eendaandira fasiqa anaaseesaki maridaqa inni andeeqara nirana marirana fasau innaarunaki eendaki qeemarindee idaga kaaqa qaida maridaqa naaru naaru marira fasaasa ufa qimannimiqaa. Innee miqidaqa marifanoo asauku mundirafa qumuaninna faasaana qinee inniara qini saika anoonaiki ifoo qimasee asasianaura qini kadaapi faqa tooqaamu faqa sia fifau irairainoo mariannoo anoonaiquinaqa asasianaura.

<sup>17</sup> Innee Yisunasaa irirana rusimariafa Anutuna tatufira aandau miqirafa maridanoo. Roomma maqannaasa qini qusasaa darusaifanoo qini fidika fannoo inni tatufira aandausaara foora adia finoo aiqamaqara moodaanaki Anutuna amaqaifanoo eedoo qimasee asasammasee maraannoo. Misa darifandinanara qinee maqee asasammidaqa qinee asasammasee qeeqa nasurirana inni faqa naida nimianauranoo. <sup>18</sup> Innee faqa miqi kai iqa asasiqa qini asisirana dadaaqiaqa.

*Pauroofa Timootinara faqa Eepafarooditusanara faqa qidanoo.*

<sup>19</sup> Qinee qusasaa Timootina aqiaqaanoo innee Firipi maqanna iannai fuanifee qidaqa karaambaifqa Yisufa dadaaqinaqa aqiaqaanura. Mifa innee iannai oonuree aniree qimaqimananoo inni ufa fannoo qini daundurai pooduqama qimaqaanoo. <sup>20</sup> Timootifa kai qini daanna reenoo moodaa irirana inniara iridanoo amiqimasee inniara amuqusidanoo. <sup>21</sup> Maqanna maaqanna moodaa modaa Yisuna saikara iridaqa. Aiqamatia sia asauku mundirana Yisuna saikara iridaqa nariqa ainainiranara kai iridaqa. <sup>22</sup> Timootifa narí ainainiranara narí amiqira oosana kooroo ifaqa innee minara irimariafanoo mifa faqa qinee faqa nariqa qisakoosara foora maridaqa moodaanaki Yisuna amiqira fasaasa ufa saikaki marunausa maridaqa. <sup>23-24</sup> Roomma maqannaasa qiniara naqi fee ifaree qinee minara iriseeqa innee iannai Timootina aqiaqaanoo fuanoo. Qini qiga irirafa karaambaifgasaa mundinoo maridanoo mifa dadaqinaqa qini idukusaifafa qinee faqa innee iannai fuanauranoo.

<sup>25</sup> Maa akara rirana Eepafarooditusanasaa rumasaanoo maree innee iannai fuanoo mi fasiqafa qini daaqa ainainida dadaaqidanoo rakiranara foora dadaaqimarifa ooqai

innee ooqai qini dadaaqira munnimma minasaa quqasee aqiqoofanoo mai anireenoo mai qini faqa ani maridanoo amiqimasee qini dadaaqidanoo. <sup>26</sup> Mifa firaqoo inniara ridanoo inni nindafaqaa idanoo innee mifa anunara aiaaee qunara mifa irufanoo amuqusunara innee iannai kaifaa fuannoo. <sup>27</sup> Kuqaa mifa firaqoo aurinoo kuqirara amekamaseenoo Anutufa minara amuqusufanoo dadaaqufanoo findifinuu, sia minara kaifaa amuqusinuu, qini Pauroosara faqa amuqusufanoo Eepafarooditusana firaau- riranakinaana mara findifinoo firaau ikiraqarana sia qiminuu. <sup>28</sup> Minara qinee innee iannai firaqoo aqiqararee qidaqa, innee mina qafamasee asasiqeeera aqiqaidaga innee miqifanoo qini ikiraqarafa faqa taikaannoo. <sup>29</sup> Innee mina qafamaseeqa karaambaiqaki maru qikaqaafasaa fee qimasee asasammasee mina amiqi amiqiaqa, innee miqirusara aiqama naaqqamasee dadaaqiaqa. <sup>30</sup> Qinee asaku mundirana saikaki marufaga Roomma maqannaa Poorisauqa qini qumareeqa rumberanaki quqaqisaafaqa innee nianai marida sia amana dadaaqufanoo Eepafarooditusafa qini daadaaqiraree qimasee nari marunara paasoosamandeenoo kuqirana ameekeenoo, minara qinee miqirusara naaqqamasee dadaaqiaqee qidaqa.

### 3

#### *Anoona andeeqaranara qidanoo.*

<sup>1</sup> Qini ufa taikarafa maaqimminoo maridanoo. Ooqai qinee akara rumannimaqaafanna ufanara sia rufiidaqa mi ufa inni ititannimaqee mari ufana kafaqa qimannimidaqa minara maaqi qianaara. <sup>2</sup> Innee mandoosana maree mariasara eerairida aufariaqa misa kaasau fainiara foora maridaqa misa Yuda maqannaa oosana marida fainanduqiranara afeekaiki mariasara maridaqa. Misa fainanduqirana nariqa faina kafaqianda uqiranara anoona ainainee qimasaidaqa miqidaqa aqaqidaqa miqidaqa, maasa kai anoona faina kafaqianda uqimarunausara foora maree marunausa maridaqa.

<sup>3</sup> Maasa Anutuna maraqunannai Anutunara innaaru qidaqa minannai kai maasa asaku mundirana Yisunaki marunannara asaidaqa, maasa sia misa naanna ramasee nifaaqasaa akooqoo mari ainainnara anoonee qidaqa. <sup>4</sup> Akaqausa akooqoo faiqi nifusaa mari ainainnasaa mundusee minaki nifaaqa quqaida aqaqidaqa. Qini akooqoo qifaaqasaa amooqira ainaina moomoo maridanoo qinee minara fifau ainainee qidaqa minasaa mundufiqa qifaaqa quqarafa sia mariannoo.

<sup>5</sup> Qini akooqoo qifaaqasaa amooqira ainaina maaqimminoo maridanoo qini Pauroosa maqooqooqari qisauku dinni ani qaara marasee qaaramooku faasaana marasoofaqa qini faina kafaqianduqi mariqau. Qinee Isaraee maqannaa kambiqaransa maridaqa Yakooboona amaaku Beensaminna ati maridaqa, Qeeburu maqannaa uqanna mara maqaransa maridaqa. <sup>6</sup> Qinee firaqoo Yuda maqannaa sandufamau fimariafanansa marunannara firaqoo sandainai qimasee Yisuna ufara suqmarusa nari mari-afanansa maridaqa. Mooseena sandufannai Anutuna andeeqarana amanaikarafa sia amanaikiannoo. Mooseena sandufannai andeeqarana marararee qimarusaqiqari qinee misa uriqararansa Farisai amana ufa qimarunansa mariafannaa.

<sup>7</sup> Ooqai qinee Yuda maqannaa Anutufinnai firaree qimaruu ainainausara uriqarara ainaina anoona ainainee qimariqiafana doo maqee asaku mundiranara irisee mi aiqama ainainausara aqarafa fifau ainainee qidaqa. <sup>8-9</sup> Sia mi ainainausara kai miqi qidaqa aiqama ainainara kaaqa fifau sia mari ainainee qimasee quandaki anoona ainaina tia firaau ainaina, asaku mundirana Yisuna maasa karaambaiqara irimariana minara kai anoona ainaina fee qimasee minakai qumareeqa. Minara maraanee qimasee aiqama ainaina doo aquseeqa asaku mundirana maraani qimaseeqa mina faqa moodaanaki marianauree qimaseeqa aiqama ainainara fifau madaapee ainainee qimasee aquseeqa quandaki Yisuna qumareeqa. Doo maqee qinee sia qeeqa andeeqarana maraqa nidaqa sia Mooseena sandufannai mi andeeqarana maraqa nidaqa. Qinee maqee moo andeeqarana asaku mundirana saqarikiarfannannai Anutufa andeeqarana qimuna mina kai maqee maraqa nidaqa. Mi andeeqarafa Anutunaindari anifa Yisuna saqarikiranasaa mundinoo marifa marifaqa maraqa nidaqa.

<sup>10</sup> Qinee sia moo ainainara irianauree qidaqa, asaku mundiranara faqa Anutufa mifa kuqiranakiqari findifu afeekanara faqa iriraree qidaqa. <sup>11</sup> Yisufa kuqiranaki keeqafinoo minaiqari findifufa qinee faqa kuqiranakiqari findifiqa naaru mariranaki fuanee qimasee maqee kamuqoo Yisuna aquraranara faqa mifa kuqu aidafirana faqa qinee faqa qeeqa qifaaqasaa maraqaqa.

*Pauroofa innaarunai feefauru marararee qimaseenoo sandaidanoora foora qinau.*

<sup>12</sup> Yisuna aupurarana faqa kuqu aidafirana faqa qeeqa qifaaqasaa maree marunnana qinee sia minannai amanaiqiqa sia minannai kaaqa andeegaidaga. Qinee maqee maqee andeegarana marararee qimasee sandaidara maqi qiara maqi idaga. Asauku mundirafa Yisufa qiniara andeegarafa marianifee qimaseenoo qini qumareeqeenoo narindi kam-maqai faqa maridaqa. <sup>13</sup> Oo qini qikaqaafasaa uqa qinee sia anoonaikamandee maridaqee qidaqa, sia amana miqianaura. Qinee maa moodaa ainanna kaimmidaqa qinee aiqaree inaaqiannai mari ainainara qeeqa aageeafanna ainainnara aunumasee doorinni mari ainainna andeegara oosana marirana kai qifu munduseeqa qumararee qimasee fidaqa sandaidaga.

<sup>14</sup> Qinee nari amani nari amanira sandaranara foora taikaranasaa kai doori munduseeqa mi runna kai andeegasee fidaqa miqoo feefauru marararee qimasaida sandaidaga qini feefauru mararafa maaqimminoo maridanoo. Anutufa nari asauku mundirana Yisunannai maasa daarama sandaranara foora quqaqiseenoo maaqoo nari andeegara mariranaki faqa nauru marirana faqa mariaqera qifaqa mina mararara kai sandaidara foora masee fidaqa.

<sup>15</sup> Maasa aiqamausa Yisuna ufa akoofasaikirusa mi irirana kai maraqa nuqa. Innikiqari akaqausa moo irirafa marinanoo Anutufa inni minara qimannimiannoo. <sup>16</sup> Saina miqinoo mariani innsaimbaqa sia moo ufa irisee mi mau fuanaura maasa ooqai fuafannamau kai fuanaura.

<sup>17</sup> Oo qini qikaqaafasaa uqa innee aiqamausa qini kai qifaqee qini qimeemmeriaqa, maasa inniara iriqa andeegara aana uqannifiqaafanaqa doo maqee innee akaqausa innikiqari mi mau fimariasa niqafamasee innee faqa nifaqee mi mau fuqa. <sup>18</sup> Qinee Pauroosa maa ufana ooqai moomoo kari inni qimannimifanaqa doo maqee daukunu ree marifaqa inni qimannimidaqa, moomoosa asauku mundirana kuqirana mandaagasee andeegara oosana marasee fimaru faqa doo maqee quandaki mandoosana maraidaga minannai asauku mundirafa aunirira saqarisaa kuqirana namuqa kiga mina kuqirana namuqa kammamaqaidaga. <sup>19</sup> Miqi mariasa maaqiga fifi iqa idaki kai fifaranoo, nariqa aqee maria nidirafa mifa misa Anutufara foora maridanoo, misa nisauri maria ainainnara kai amooqimasee noori uqeraida nasuridaqa, misa maa maqanasaaqaraa ainainara kai iri mariasa maridaqa.

<sup>20</sup> Innisaimbaqa sia miqirusa maridaqa maasa moo maqannaasara foora maridaqa innaaruna maqusanaasa marunannara maasa karaambaiqa asauku mundirana Yisuna maasa asumu marirana qimimarifaqa innaarunaindari qumuaninnanara asasammasee afeesida maridaqa. <sup>21</sup> Mifa miqoo maasa ummooqukira maqasaaqaraa qifaqa mareeqeenoo quandaseenoo nari kaaqa areenara afaqa fooqaanaikammianoo. Mifa aiqama ainaina mareeqeenoo nari aramandunnai quqara afeekannai maasa maqasaa qifaqaqara mara quandaqisaannoo.

## 4

### *Pauroofa amiqira oosanara naamuaqidanoo.*

<sup>1</sup> Oo qini qikaqaafasaa Firipi maqannaasara firaqoo inniara qini qimuqusifaqa inniara daundurannoo oonu mafi iridaqa inniara dididanoo. Innee firaqoo asasirana qimi mariasa mariafaqa innee qini moodaa fidikara foora marida qini asasirana qimimari-afanoo. Minara inni qimannimidaqa Yisufa innaarunaindari qumuaninnanara asasammasee afeesida mariaqera faasai qimannimiqa inni marifa miqimandee karaambaiqaki mapukusee mariaqa.

<sup>2</sup> Oo anaaseeqara Eeuoodiasa nammarifa faqa Sindikeesa nammarifa faqa inneeqara maqee maqee rairaiqirana minniseeqa aneenna aunannaasandiriara foora maridaqara karaambaiqaki amiqi amiqimasee moodaanaki mariaqa. <sup>3</sup> Oo qini Firipi maqanna qifaqasaa qiqoondi moodaanaki qini qifaqasaa ainaini marianafa ani faqa qimamidaqa anee mi anaaseeqanda andeegasaifaqa moodaanaki mariaqera. Miqanda ooqai Yisuna fasaasa ufa maqusa maqusa nidaqa qini dadaqidaqa qimannimi maruqanda maridaqarammia anee miqanda andeegannisaa. Miqanda faqa Kareemeendana faqa aiqamausa qini faqa moodaanaki ainainimariasa faqa misauqa aiqamausa nuqu Anutuna nauru mariranaki fimariana bukaki misauqa nuqu maridanoo.

<sup>4</sup> Innee Karaambaiqaki marianara maqee maqee asasida kai mariaqa, kafa qimannimidaqa, asasiaqa.

<sup>5</sup> Innee aiqamausa sia ramoo ramaaiaqa ireeda kai nirana marirana aiqamausa nimiaqa. Karaambaiqa qusasaa qumuanoommi. <sup>6</sup> Inneeqa oosana oosana sarauqira ainainara sia oonumafi irifanoo nimuqusiani, innee Anutunara innaaru qidaqa miqoo kai inneeqa sarauqi maria oosana oosana ainainara innaaruqiaqa. Innaaru qidaqa

Anutunara dufi dufi qirana namufaqa innaaru qiaqa. <sup>7</sup> Innee miqifanoo Anutuna aundura asoarafa fraa ainaina tia maridanoo faiqi faiqi irirafa sia mina amana maridanoo, mi asoarafa inni nimuqusa faqa irirana faqa asauku mundirana Yisunakina mariafanoo miqoo inni rakisinnimaqaannoo.

<sup>8</sup> Oo qini qikaqaafasaauga qini taikara ufa maaqimminoo maridanoo, inni iriranara qimannimidaqa, innee inneeqa kai amiqira ainainara irirafa faqa uriqarara ainaina faiqi amooqimaria ainainnara irirafa faqa minauqara kai maqee maqee naaqoo nitikuraki inni irirafa qumbiqaani. Kuqaa qimaria ufana faqa naaquqara amiqira ainaina faqa andeeqarana faqa anukara ainaina irirana faqa idaaqira ainainara irirana faqa amiqira oosana ainaina Anutufa amana iriaqaa ira ainaina faqa mi ainainausara kai nitikuraki qumbiqanoo mariani. <sup>9</sup> Innee qini Pauroosasaqarara amiqira oosana qafeeusa mariafanoo minauqa maqee maqee qinee iafanandee kai iaqa. Qini ufakinaana faqa qinee iafanandee inafa mi mau kai fimarifanoo Anutufa naundura asoaranana nimimarifa inni faqa nuani.

*Pauroofa Firipi maqannaasa munnimma amunara dufi dufi qidanoo.*

<sup>10</sup> Qinee Pauroosa karaambaigaki fidaqa maqee maqee firaqoo inniara oonumafi iridaqa asisida maridaqa. Innee Firipi maqusanaasa ooqai narana feefaurira munnimma dadaaqiqa qimiqa. Doo miqoo kisaaqasaa marikisa doo maqee kafa qiniara iridaqa dadaaqi mariafanoo. Innee sia qiniara kaaqa aunusee mana mana imariafaqa minara qidaqa inneeqa maqusaindari nianaindari dadaaqirana sia amana maree animariafaqa minara innee sia qini dadaaqusa mariaasa maqee kaifaa dadaaqimariafanoo. <sup>11</sup> Sia qinee geeqa daunduraki inniara minniqiseeaafoo qimasee ikiraqaidaqa, geeqa marunnanaki marunnanara doo marida fee qimasee qifaqa quqaidaqa doo mi ainainnara akoofasaikammidaqa. <sup>12</sup> Qinee sarauqiranaki marunnanara doo akoofasaikammiga maridaqa, rairaa irinaki marunnanara faqa akoofasaikammiga maridaqa. Qinee mi oosanna iridaqa doo irimarunauusa maridaqa, qinee yai yai fee yaqoo aukuanee qimuaqu qumbiqanoo fee maridanoo fee daararee maridee, rairaa iranaki fee maridee sarauqiranaki fee maridee mi aiqama ainainausaki maridaqa sia munari minari idaga doo qifaqa quqasee mariranara akoofasaikammiga maridaqa. <sup>13</sup> Asauku mundirafa nari afeeka qimufaqa minannai amiqiranee mandaikiranee kaqi maraidaqa.

<sup>14</sup> Innee Firipi maqannaasa qini dadaaqianara dufi dufi qidaqa. <sup>15</sup> Ooqai indaaruu inni maqa maaqa Maseedoonia minnisee amiqira fasaasa ufa maqusa maqusa qimannimiga niniufaqa innee Firipi maqannaasa Yisuna ufara suqimarusa kai sia moo maqannaasa inneeqa kai dadaaqiusa mariafanoo. Inneeqa kai narana munnimma qimufaqa minannai geeqa narana aina maraseeqa namasaida ainainiqiafana. <sup>16</sup> Qinee Teesaronika maqusi mariafanaqa innee moomoo kari qinee mandainainaki mariafanaqa innee dadaaqidaqa narana maree maria munnimmana qimaqee mariqau. <sup>17</sup> Qinee sia narana maree maria munnimma moo faqa moo faqa maraanauree qidaqa maa ufana qimannimidaqa, qinee inni nuqara afeedira ainaina innaarunai nimaqaanifee qidaqa maaqoo munnimma qimianara qidaqa. <sup>18</sup> Eepafarooditusafa inni maqusaindari inni maqannaafa maqee qunnanara inneeqa narana maree maria munnimmana minasaa soofanoo mini qimifaqa doo aiqama maraannanara inni qimannimidaqa doo qini qimana kai maridanoo fiqaramasee faqa maridanoo. Mi munnimmana qimaqaafa tatufira aandau Anutuna suqa ami mariafara foora amiqira afunda aikiambu imarifara foora Anutufa asasammasee maree mari ainainna maridanoo.

<sup>19</sup> Sia meerai kai inni afeedamma nimaqaannoo maaqoo faqa innee sarauqi maria ainainna inni nimana kai nimiannoo, nari innaarunai mari qumiasana moomoo marina nari asauku mundirana Yisunaki marina innee sarauqi maria narana ainainna inni nimana kai nimiannoo. <sup>20</sup> Maasa Anutufa maasa qikoofa mina amooqirafa naaru naaru mariani. Kuqaa.

*Pauroofa nimandaidanoo.*

<sup>21</sup> Anutuna faiqi namu mina ufa irimariasa asauku mundirana Yisunaindi mariasa Firipi maqannaasa inni aiqamausa nimandaidaga. Yisuna ufa iri maria qikaqaafasasa qini faqa mariasa inni nimandaidaga. <sup>22</sup> Maaqoo Anutuna ufa irimariasa aiqamausa inni Firipi maqannaasa nimandaidaga, Roomma maqannaasa uriqarara fasiqa Sisaana maaqaki ainainimariasa misaqiqari akaqausa Yisuna ufa irimariasa misa faqa inni firaqoo nimandaidaga. <sup>23</sup> Asauku mundirana Yisuna maasa karaambaigaa afaarirafa inniki aiqamausaki mariani.

## KOOROOSSE

### Kooroosee maqusanaasa Pauroofa akara rumannimaqoofa.

<sup>1-2</sup> Innee Kooroosee maqannaakiqari akaqausa Anutuna faiqinamu mariafanoo innee faqa maasa faqa asauku mundiranaki maridaqa mina ufa iridaqa moodaa fidikara foora maridaqa asauku mundiranasaa atooqaraua mariafanoo qinee Pauroosa qeeqa qikaqaafasaa Timootinandiri inni Kooroosee maqannaa nimandaidaqa.

Anutufa qufanoo asauku mundirana Yisufa diqiqamaqaiifaqa faiqi faiqi maridaqa inni nimandaidaqa. Maasa qikoofa Anutufa nari amaaku maasara afaarinau mi afaarirana faqa inni naundura asoosana faqa inni nimianifeera qimannimidaqa.

*Pauroofa Kooroosee maqannaasara dufi dufi qidanoo.*

<sup>3</sup> Maaqanda inniara innaaru qidaqa maqee maqee maasa karaambaifa Yisuna asauku mundirana akoonna maa maqanasaaqari innaaru qunafa Anutuna afusaa inniara dufi dufi qidaqa innaaru qimannisaidaqa. <sup>4</sup> Maaqanda innee Kooroosee maqanaa akaqausa Anutuna asauku mundiranasaa atooqaga marianara iriseeqa innee Anutuna ufa irimaria fasiqa anaaseesa aiqamausara nidimarifaqa dadaaqi marianara minara faqa iriseeqa Anutuna dufi dufi qimamaqaidaqa. <sup>5</sup> Anutuna anoona ufa amiqira fasaasa ufa faiqi moo fannoo indaaru inni maqusai qimannimufaqa mi ufana naaru kambiqaaninna oosana irimariafanoo. Innee naaru mareefandinna ainaina Anutufa innaarunai quqasee afeedidanoo. Innee mina innaarunai mararree qimasee asasammasee afeesidaqa Yisuna saqarikidaqa mina aidimariafanoo.

<sup>6</sup> Innee indaaru Anutufa nari amaaku maasara afaarinoo arunara innee mi afaarirana iriseeqa kai mi fasaasa ufana aiqama maqa maqaq daraanidanoo naundurakinaa amiqi amiqirana faiqi aanaaseeki kambigaidanoo. <sup>7</sup> Eepafaraasafa maasa moodaa saikimarifa asauku mundirana amiqira saikimarifa qini qimanasaa inniki fimarufa maridanoo mifa kai mi fasaasa ufana inni Kooroosee maqannaasa qimannimufaqa iriqau. <sup>8</sup> Mifa inniara Anutuna maraquna fannoo aiqamausara aidirana inni nimufanoo qimaqimifaqa iriqa.

*Pauroofa Kooroosee maqannaasara Anutuna iriranamau fuaqeera qimannimidanoo.*

<sup>9</sup> Maasa indaaru mi ufana iriseeqa miqooqari inniara innaaru qidaqa. Maasa inniara Anutuna iriranamau fifandinnanara inni naundurai qumbiqaanifeera innaaru qidaqa. Anutuna maraquna fannoo nimi irirana faqa iriranamau fira irirana faqa inni naundurai qumbiqaanifeera minara faqa innaaru qimannisaidaqa. <sup>10</sup> Innee miqi marifaqa Karaambaifa undee kai imarifaranoo mifa maqee maqee inni marirafa amiqira marira maridaqa amiqisaa kambigaaqeera Anutuna irirafa faqa firaqoo inniki kambigaaqanoo.

<sup>11</sup> Anutuna idaaqira eeraarirafa minasaqari aninna afeekafa aiqama inni faqa afeeka nimaqa innee oosana oosana mandainaina ummaara fannoo innisaa kambigainaqa ubiqafi reendenidaqa asasammasee maraaqeera. <sup>12</sup> Anutufa nari areenara maqusaki innaarunai nari nimianinna ainaina afeedimarina quqaseenoo innee ooru marasee miqoo mariaqeera inni mandainaina doo afaqaseenoo innee minara faqa iriseeqa innaarunai nikonara asasammasee dufi dufi qimamaqaaqa. <sup>13</sup> Maasa manda marira asukunaki marunanoo maasa rafaqaqafuqisaifaqa marunanoo Anutufa qumareeqeenoo nari faiqi uqanna ququsaki quqannisaiifaqa amiqiranaki maridaqa. <sup>14</sup> Mi faiqinannai uqanna maasa mandainaina numoo minniqiseenoo minakinaana mara idukuqiseenoo.

*Yisufa Anutunara mudukatia kooroomanniminu.*

<sup>15</sup> Anutufa kukeeqarafa marifanoo asauku mundirafa mina amaaku mina amammaana ususeenoo maridanoo nari akoonna oori afiri marasee mina nirana mina marirana mina maraquna maasaki doo andeeqasee nari akoonara kooroo idanoo. Mi asauku mundirafa aiqama ainaina Anutufa auquqoona urinaaqararafa maridanoo. <sup>16</sup> Mina asauku mundiranasaa Anutufa aiqama ainaina innaarunai marina faqa maqasaa marina faqa akooqoo maria ainainausa faqa kukeeqara ainainauqa faqa Anutuna amiqira qangirooqqa faqa misa namuqaa afaanaqqa faqa nari rakisirausa faqa nari uriqararaua faqa nari faiqi firaasa faqa mi aiqama ainainausa asauku mundiranannai Anutufa auquseenoo mina aummooki mara quqanau. Mina amooqimasee minaindikiaqeera Anutufa minannai auqusee nari aminau.

<sup>17</sup> Asauku mundirafa sia maqee kaifau marida ooqai marufa maa maqanasaa ainaina sia maruqoo marufa marinau. Doo maqa faqa minasaa mari ainainausa faqa innaaruna faqa minakinaa ainainauqa faqa asauku mundiranaki kai ookaamambida maridanoo. <sup>18</sup> Asauku mundirafa nari ufa irimariasasaa rakisidanoo qimannimidanoo. Mifa misara

nari adakee qidanoo nariara misa nikiqafee qidanoo rakisinnimaqaidanoo. Mifa aiqama ainaina uriqararafaikirara kuqirausa findiffimari aana afisufa maridanoo nari mina ufa iri mariasara nari adakee qimarisara misa kafaa minasaaqaraana aiqama kaqi marira kasirana maraidaqa minara aiqama ainaina uriqararafa maridanoo. <sup>19</sup> Anutufa nari kai nari amaakuara asasamaseenoo qini daanna ramafi urinaaqaramafi mariannee qufanoo maridanoo. <sup>20</sup> Anutufa qufanoo nari amaaku fannoo aiqama ainaina maqasaa qaraana faqa innaarunaindaraana faqa maramareenoo nari akoona aaqa munu moodaaqoo quqasoofanoo aqoondikamma nimaqanau. Nari amaaku asauku mundirafa nari fidika adioonannai asoorana quqasoofaqa moodaanaki kiqa maridaqa. Miqunara asauku mundirafa aiqama ainaina uriqararafa maridanoo.

<sup>21</sup> Ooqai indaaruu innee Anutuna namuqaakama amaqaqau. Inni oosana fannoo manda marira marufanoo inni irirafa manda irirana kai irimarunara Anutufa inni futee aquseenoo namuqaakamma nimaqanau. <sup>22</sup> Innee minni marufanoo Anutufa maqee inni mareegeenoo nari aaqa quqaseenoo moodaanaki kinau. Nari amaaku nari afaaqa uqanna kuqiranannai kai inni moodaanaki aqoondikamma nimaqanau. Anutufa sia fifaufau miqinau. Inni marirafa nirafa amiqira marira andeeqara nira nuaqeera miqinau. Yisufa inni mareegeenoo Anutuna afusaa kooroomasainaqa inniki sia moo nifasaasa ufa marianifeera nuqu siaisa mariaqeera minara Anutufa inni aqoondikamma nimaqanau. <sup>23</sup> Ooqai indaaruu Yisuna amiqira fasaasa ufa iriseeqa naaquqarana taikaseeqa innaarunai firara asasida maridaqa. Miqida mi nimuqusa idaagirana sia kaifaa rufiarana maraqa. Inni irirafa maqee maqee Yisuna mapukusee mina faakanara maqi masee mundiqa mariiaqa. Mi amiqira fasaasa ufana aiqama maqa maaqai qimannimisooafaqa qinee Pauroosa mina rumbara faiqi maridaqa mina saika faiqi maridaqa.

*Pauroofa nariara Yisuna aiku asuaku ainainamannisee mari fee qidanoo.*

<sup>24</sup> Qinee Yisuna aufakiana qimannimunnana minara qinee Roomma maqanna rumberanaki maridaqa, innisaara faqa rumbaqa maridaqa. Qinee sia minara doori runidaqa, doori quqasee asasida maridaqa. Yisufa nari aiku oosana mariasara aunirira saqarisaa aupurarana maranau. Mina aupurannaki qinee faqa keeqeqa ookaamabiqqa rumbaqa maridaqa aupuraidaqa Yisunaindi fee qimasee kaqi asasidaqa.

<sup>25</sup> Yisufa nari aiku oosana mariasara Anutuna adakara foora mariaafoo qida nuqu raidanoo. Anutufa qufaqa qinee Pauroosa mi nidaka saikirana saikimaruna fasiqausa maridaqa inni dadaaqiaqeera aiqama maqannai ooqai Anutuna ufa kukeeqara ufa amiqimmandee kooroo iaqeera mi saikanaki Anutufa qini quqaqisaifaqa maridaqa. <sup>26-27</sup> Anutuna ufa kukeeqara ufa maaqi qinoo maridanoo. Anutuna asauku mundirafa Yisufa inni faiqi faiqi naundurui maridanoo. Mina oosana maaqimminoo maridanoo kasoqaqee innee faqa innaarunai ooruree Anutuna ainaina adiafaa ira ainaina mina uriqararana afaaqa areenarana kaaqa qarana mareefaranoo. Anutuna kukeeqara ufa doo miqinoo maridanoo. Mifa mi ufanara maaqi qinoo. Maa qini amiqira kukeeqara ufa uriqarara kukeeqara ufa aiqama maqannaasa iriaqeera qini qiku qisauku mariasa kooroomannisaanauree qinoo. Anutuna asauku mundirafa faiqi faiqi naundurui mariranara faqa innaarunai mina faqa ooru mariranara faqa mi ufaqandara ooqindari kukeeqeena maqee kamuqoo doo kooroomasee nari aiku asauku qimannimino.

<sup>28</sup> Maasa maa namusa asauku mundiranara aiqamausa qimannidaqa. Maasa aiqama fasiqa anaasee aaquqimannimaqaidaqa naamuaqidaqa amiqira iriranannai asauku mundiranasa atooqemariasa sia faiqi aanaaqiara foora iaqeera faiqi firaasara foora mafiqqa Yisunaki mapukusee mariaqeera qimannimidaqa. <sup>29</sup> Maa namusakiqari qinee Pauroosa firaqoo kadaapiridaqa qimudaanaiqidaqa fuki faaki qidaqa qimannimidaqa. Sia qeeqa afeekannaifau miqidaqau Yisuna afeekannai miqidaqa faiqi firaasara foora mariaqeera miqidaqa.

## 2

<sup>1</sup> Qinee Pauroosa inniara kadaapi rimarunnana iriaqeera inni qimannimidaqa sia inni Kooroosee maqannaara kaifau kadaapiridaqau Raodiseea maqusanaasa akaqausa Yisuna ufa irimariasa faqa innee aiqama sia qini doori qiqafee mariasa inniara kadaapiridaqa. <sup>2</sup> Minara inni nimuqusa sia iani paasoosammasee mariaqeera innee moodaanaki kammani nariara nariara ridaqa innee Anutuna ufa amiqimasee iriseeqa innee nifaaqa quqasee Anutunaki mapukuaqeera inniara kadaapi ridaqa. Innee amiqimasee Anutuna afeeka kukeeqara ufa uqeerasee iriaqeera. Mi kukeeqara afeeka ufafa asauku mundirafa nari uqanna maridanoo. <sup>3</sup> Asauku mundirafa Anutufinnai fimaria irira kooqiara foora maridanoo. Anutuna aiqama irirafa oosana oosana adiafaaira irirafa anoona qira irirafa fira qumiasanara foora Yisunaki mandaaqanoo maridanoo. Sia maa maqanasaqaraa



munnimma ainaina mararara iranau qidau innaarunai fimaria irirana faqa maaqoo nariara nariara nimuqusira nidiranara minara kai qidaqa. Innee faqa mina maraaqera kadaapiridaqa.

<sup>4</sup> Kuqaa anoona afeeka irirana asauku mundiranasaa maridanoo. Qinee minara irisee maa ufana inni qimannimidaqa. Innee rakisidaqa qafaqaqaa sia moo fannoo innaarunai fimaria aanara unna qimaseenoo inni nikaru qiandoora mifa amiqimasee naakapainaga kuqaammifoo qimasee fifoora qimannimidaqa. <sup>5</sup> Qinee kaqi maaqoo maridaqa inni marirana asasamannimaqaidaqa. Inni marirana amiqira marira maridaqa ufa qaindusi mariasa mariafanoo asasamannimaqaidaqa inni irirafa asauku mundiranasaa amiqimasee mapukinoo marinara asasamannimaqaidaqa. Qinee Pauroosa nianai marunanoo qini maraquna fannoo inni faqa maridanoo. Qinee inni faqa maridaqara foora qinee maqee maqee inniara iridaqa rakisinnimaqaidaqa.

*Asauku mundirafa aiqama ainaina tia uriqararafa uqanna maridanoo.*

<sup>6</sup> Inni Kooroosee maqannaasa akaqausa Anutuna asauku mundirana Yisunara maasa karaambaigee qimasee umaraafanoo doo innee maqee minasaa mundaqa maridaqa nuaqa. <sup>7</sup> Innee saqari atukara foora mapukusee Yisunaki mariaqa, sia rafauraki aqufuaqa afeekaikamasee aaku aakumafi Yisuna faakanasaa mundaqa mariaqa. Maasa qimannimiamannamau kai inni irirafa Yisunaki maqee maqee afeekaikiaga. Inni irirafa maqee maqee Anutunara dufi dufi qimarifanoo inni naundurari qumbiqafi irairaiiani. Innee miqi kai iqa Yisunasaa mundaqa maridaqa nuaqa.

<sup>8</sup> Innee amiqimasee eerairiaqa faiqi moo fannoo unna ufa qira iriranannai inni rarisameeqee nari aiku oosanaqi quqaandoora. Miqira fasiqa mina ufa fannoo irirana faqaa fasiqara foora ufa qiannoo. Mi ufafa faiqi anaasee nikaru qira ufa oosana siai ufafa fifau maqasaa ufa afaana manika fannoo innaaruna faqa maqa faqa rakisidaqee qimari ufana. Sia asauku mundiranasaa oosana areemari ufafa maridanoo. Miqira ufara amiqimasee eerairiaqa. <sup>9</sup> Sia asauku mundirafa fifau afaannafau maridanoofau. Anutuna aiqama afeeka marira irirafa muduka tia uqanna Yisunaki maqasaa qumu marinau. <sup>10</sup> Innee minasaa maridaqa sia Yisuna marirana kai maree mariafanoo Anutuna marirafa minaki marina mina faqa maree mariafanoo. Afaannuqa rakisirausa uriqararasa mariafanoo faiqi moo fannoo misara anoonee qinaqa sia misara iridaqa rufiaaqa Yisufa kai misoo maasoo uriqararafa maridanoo misa faqa maasa faqa uriqaranoo maridanoo rakisinnimaqaidanoo.

<sup>11</sup> Yuda maqannaasa fainanduqirana oosana aanaaqi faiqi akoonaiqi fainanduqu nimaqasee misara Isaraee maqannaasaki maridaqa Anutuna faiqinamukiaqee qimarusa maridaqa. Qinee Pauroosa mi oosanna kikiqa usidaqa maaqi qianaura. Innee Kooroosee maqannaasa asauku mundirana ufa irisee sia faiqi moo nisaukukoo innee fainanduqusee minaindikiaqee qidaqa. Asauku mundirafa inni faiqi faiqi marirana manda marirana nirana aiqama uqanna nari maraqusoofaqa minaindikiaqa mariafanoo. Asauku mundirafa maa manda maqanasaaqaraa nifaaga qikairi faqa uturuqu aqira foora masoofaqa doo mina turuqiara foora yanannai asauku mundiranaindi kammambi mariafanoo.

(Yuda maqannaasa oosana maaqimminoo maridanoo. Faiqi moo fannoo misa amaana maqaki keeqararee qimaseenoo anirainaga misa mina qumaree nammariki keeqammamaqaidaqa. Keeqammamaqaidaqa maaqi qidaqa. Maa fasiqafa kuqiranara foora keeqafinoo kuqiarafuora mafinoo findifinoo. Doo miqooqari amaana maqaki maqee maqee fidaqa.)

<sup>12</sup> Qinee Pauroosa minara inni Kooroosee maqannaasara maaqi qidaqa Yisufa aunirira saqarisaa kuqufufaqa inneeqa nifaaga namufaqa kuqirana ameeraameeriga Yisufa kuqiranakiqari findifufaqa innee faqa kuqirana ameeraa meeriranaki qari findifiga fuka marirana mara maree findifi mariafanoo. Inni irirafa Yisunasaa mundunara mi ainaina kambiqafi maridanoo.

<sup>13</sup> Anutufa nari ufa Isaraee maqannaasa Mooseena sandufa qimanniminu. Innee nianai maridaqa sia Anutuna ufa irimariafanoo innee faiqi faiqi mariafanoo manda iriramau fimariafanoo. Innee inneeqa irirana Yisunasaa mundusoofanoo Anutufa minara inniara nari amaakusaimbaqa kuqiqau maqi qidanoo kaifaa inniara nari amaakusaimbaqa kuqiranakiqari findi fiqa minasaa mundufiqa marifanoo fee qimaseenoo maasa maqasaa mandainaina taikaqiseenoo sia naruanaree qinau. <sup>14</sup> Anutuna aaquqira ufa papiqaki marifaqa maasa mina irisee rukiasaida kaqi fimariafanoo Anutufa maasa darira ufa sia maasasaa qinau. Asauku mundirafa aunirira saqarisaa kuqirari marufanoo Anutufa maasa darira ufa oosana oosana qimaseenoo mara mareenoo Yisuna afaaqai munuseenoo aunirira saqarisaa pirimmannai aru atukaranau. Miqunara

Anutufa maasara ufa siaisee qidanoo Mooseena sandufa nimaarusirafa fannoo sia amana inni naruannoo fee qidanoo. <sup>15</sup> Anutuna asaku mundirafa kuqufnoo mi kuqiranannai afaannauqa rakisirausa uriqararausa misa aiqama misa afeeka qumooqkamaseenoo aiqamausa nifusaa nisaurirana nimiseenoo ufoonaridanoo narí amooqimaseenoo maridanoo.

<sup>16</sup> Faiqí akaqausa inni Kooroosee maqannaasa maaqi qimasee qimannimifaqa siammiríaqa. Misa maaqi qifaqa. Innee Mooseena sandufa maree akaqa narana nammari siamma naaqa. Innee aukuaana idooaranara sia irimariafanoo fuka quqoona idooaranara faqa sia irimariafanoo Yuda maqannaasa amaanasaa idooarana mina faqa sia irimariafanoo mandaikammí mariafanoo sia Yisuna aiku oosanaki andeeqasee mariafanoo. Misa mi ufanannai inni rafaafa fifaqa siamma iriaqa. <sup>17</sup> Mi ainainnausa fifau nimanirafa maridanoo sia kuqaa anoonau. Sia moo ainaina kikiqa usuaqa. Asaku mundirafa mifa kuqaa anoonau uqanna maridanoo innee mina faqa moodaanaki ootupamafi mariafanoo miqoo kai mariaqa.

<sup>18</sup> Faiqí akaqausa qummaararara ufannai inni rafaafa firaree qifaqa sia mi ufana iriaqa. Misa fifau inniara unna qimasee maasa daanna reeqa kaqa nisaunaasauriqa nuaqee qiqa misa inniara unna qimaseeqa qangiroouqara nimooqiaqee qidaqa miqi qifaranoo. Misa qainamasee náriara Anutuna ufa iriseeqe qimasee inni rafaafaqifara. Miqira fasiqauqa fifau nári nifaafa nimooqi mariasa maridaqa. Misa nári manda marirana fannoo nári uqannifiqee marifaqa miqimariafanoo. <sup>19</sup> Misa asaku mundirana minniseeqa nári aatata nifiqee firaree qidaqa mi ufanannai inni rafaafaqifaranoo. Asaku mundirafa maasa qikiaqa maridanoo mina adaka maasa maridaqa. Mifa maasa rakisinara amiqimasee moodaanaki maridaqa narí dadaaqa narí dadaaqidaqa Anutuna ufasa innooqafi afeekaikidaqa. Mi fasiqausa nári qummaarannai inni rafaafaqimariasa maasa qikiaqa Yisuna minniseeqa nári aatata fidaqa mi ufanannai inni rafaafaqidaqa.

*Maasa asaku mundirana namuafaqa kuqiaqa mina namuafaqa findifiqa.*

<sup>20</sup> Innee Yisuna aiku oosana mariasa mifa kuqufaqa innee faqa inneeqa irirana namuafaqa kuqiarafoo mafi mariafanoo. Doo innee nanaree afaannauqa karaambaiaqauqa misa ufa irisee rufiaidee kuqira fasiqa fannoo sia mi ainainausara iridanoo doo taikanoo maridanoo doo innee minara iriseeqa faiqí faiqí sandufa oosana oosanannai rafaafaqifaqa sia ooqi undee iqa eedoo qimasee mi mau fuqa. <sup>21</sup> Misa maa unnufanannai inni rafaafaqidaqa. Innee akaqa narana nammari sia naaqa innaarunai fira aana ititeefoora. Innee akaqa narainaina sia uqanna nifaurusaa quqaaqee qidaqa. Akaqa ainaina sia auqaaqa mi manda ainainafa inni naakuandooree qidaqa. Innee miqira unna sandufa sia iriaqa. <sup>22</sup> Fifau maqasaagaraa fasiqa sandufa inni naakapadaqa. Maasa mi naranna namasaanoo sia niranandaki kasooiannoo kaqi aiqaraannoo sia innaaruna aana faqa ititaannoo kaqi aiqaraannoo. <sup>23</sup> Innee mi fasiqausa sandufa iriseeqa unna qimasee irirana faqaasee qifaranoo. Misa maa ufana uqeeradaqa. Innee qangiroouqa nimooqiaqee qidaqa innee inneeqa nifaafa fira apurarana nimisee minannoo innaarunai fuqee qidaqa unna qimariafanoo. Mi unna fasiqausa mi naamuqira ufana sia amana maasa daundurakinaa manda nidirana rafaafa fuannoo, Yisuna saqarikirafa kai amana mina rafaafa fuannoo.

### 3

<sup>1</sup> Asaku mundirafa kuqiranakiqari findifufaqa innee mina faqa findifiqa minara iridaqa inneeqa marira irirana innaarunai asaku mundirafa marinnai ubeekaida mariaqa. Miqoo Anutufa asaku mundirana fira afeeka amufanoo mina aqa maridanoo. <sup>2</sup> Minara inneeqa irirana mirinni mari ainainnasaa rusisee iridaqa maaqoo maqasaa manda ainainara sia iriaqa. <sup>3</sup> Innee kuqirana aannareeqa sia mandainainara iriaqa kuqiarara foora iqa mariaqa. <sup>4</sup> Inni marirafa Yisunasaa mundinoo marifanoo minaindi fannoo Anutunasaa mundinoo maridanoo. Asaku mundirafa innee maa maqanasaa anoonau marirafa faqa marianara mifa narí kooroomasainafa innee mina namuafaqa ooru raifanoo narí afeeka kaqa qara areenarana naida nimiannoo.

*Ooqeenaa marirana faqa fuka marirana faqa doo maqee mi ufafa kooroo inoo.*

<sup>5</sup> Inneeqa maa maqanasaaqaraa nifaafa ainaina adiafaairana arusaifanoo sia inni kaifaa mandoosana uqannifiqaani faiqí fannoo anaasee qummuarimariana faqa anaasee fannoo faiqí qummuarimarina taikaani. Inneeqa nifaafa sia kooroo iaqa. Innee sia inneeqa mandoosana maridaqa maanaqa anaaseera indee indee qiganuqa adiafaa qiqa nuaqa doo mi irirausa taikafuani. Oosana oosana mandainaina marararee qimarifa mifa faqa taikafuani. Innee aiqama ainainara nimukee marina mi irirafa taikaani. Anutuna minniseeqa moo Anutunara foora innaaru qidee qimariasa faqa ainainara

rimariasa faqa moodaanaki unna aatata fimariafanoo. <sup>6</sup> Mi ainainausa moomoo maree mariasa Anutuna ufa rukiaida miqidaqa. <sup>7</sup> Innee misa faqa mi mandirirana maree marusa mariafanoo.

<sup>8-9</sup> Doo maqee afaimma quqaaqa. Maa ainainausa faqa afaimma quqaaqa. Aanooqirana faqa kaukaataqirana faqa aqoonausa nifasaasa qirana faqa aqoonausa niquramaara rirana faqa maqee maqee faiqi fannoo aanaaseera amarauqirana faqa anaasee fannoo faiqiara amarauqirana faqa unna ufa qimasaida nari afasaasa nari afasaasa qira ufa faqa mi ufausa aiqama afaimma quqaaqa. <sup>10</sup> Mi manda irirauusa ooqeenaa irirana marirana afaimma quqasee fuka andeeqara marirana marasee qammunnara foora afisuaqa. Mi fuka marirana Anutufa auqusee nimuna Anutufa kaifaa aiqama kari fukara foora kai mannimidanoo. Miqinanoo maasa marirafa mina amanaikinaqa maasa minara amiqimasee iriaqeera miqidanoo. <sup>11</sup> Fuka mi andeeqara marirana maree mariasa nariara uriqararausee ureeqarausee qimiranara sia minara iridaqa, Yuda maqannaafee aanaamuru fee fainanduqirausee sia fainanduqirausee irirana faqasee fuka anaana maqannaaf fee anoona akoona faqaa fee faiqi faiqi fee fuka andeeqara marirana maree mariasa sia mi ufasara iridaqa. Asauku mundiranara kai kuqaa anoona maridanoo fee qidaqa.

<sup>12</sup> Innee Asauku mundiranara karaambaiqee qimariasa. Anutufa innee rusandeesa-mumaseenoo nari andeeqara marira iriranaki quqanniseenoo inniara rakisidanoo amuqusidanoo. Anutufa miqimarinaqa innee maa reendenira marira ufana kaqi maraqa. Nariara nariara qimudaoo qiaqa. Ufa qirana faqa nirana faqa ireeda kai qimannimiaqa. Fisoo fisoo imariasa naannaraqa mariaqa. Reendenamafi ubiqasee mariasa naannaraqa mariaqa.

<sup>13</sup> Faiqi anaasee inni ritifaqa kaqi irisee nimaqaaqa. Asauku mundirafa inni mandainaina doo mininnisanau. Innikiqari nariara nariara ufa qiraree qimasee asauku mundirana aanna reeqa nariara nariara ufa qirana minnisee aunusaa. <sup>14</sup> Mi andeeqara aiqama ainainna nariqa kai sia amanaikifannoo nariara nariara nimuqusinafa mifa mi aiqama amiqira ainainausa uriqararafa maridanoo moodaanaki suqu quqaseenoo adiafaa irana nimidanoo.

<sup>15</sup> Innee asauku mundiranaki mariasa moodaara foora marianara nariara nariara farafara qirana minnisee asauku mundirana asooarafa inni naundurak rakisimarinaqa moodaanaki kiqa mariaqa. Innee miqiaqee qimaseenoo Anutufa inni rusandeesa-mumasee mareeqee asauku mundiranaki quqanau. Doo Anutunara faqa maqee maqee dufi dufi qiaqa. <sup>16</sup> Asauku mundirafa nimu ufana innee iriseeqa maqee maqee eedoo qidaqa mi mau kai fimarifannoo inni naunduraki mi adiafaairafa qumbiqaan. Innee mi mariranasaa fidaqa iriranannai kai nari andeeqee nari andeeqee iaqa. Fira iriranannai aiqamausa nari aaquqimamaqaina nari aaquqimamaqaina iaqa. Anutuna maraqaqa fannoo amaana idi nimuna mi idina maqee maqee raqa nuaqa. Idi roona auqu Dafidifa mina idi faqa ooqeenausa amaana idi faqa mi idisa maqee maqee raqa nuaqa. Raqa nidaqa Anutunara asasidaqa dufi dufi qidaqa mi idi namusa raqa nuaqa.

<sup>17</sup> Innee inneeqara karaambaiqa Yisuna faiqi namu maridee qimasaidaqa mina aannandaidee qidaqa ufa qimariana ainainimariana andeeqasee mina kai afaqaaqa. Innee karaambaiqa Yisuna maa maqanasaa koorooirauusa maridaqa mifa innandee innandee kai idaq mariaqa aiqama ainaina nari qinnaqoo kai fidaqa ufa qinana auqeenana qafeeqa mina aanna raidee qiaqa. Sia noori runusee miqiaqa inneeqa nikoona Anutuna asamamaqaidaqa susummamaqaaqa. Anutuna asauku mundirana minannai Anutufa aana ruqiqasaiqaqa asasirana Anutuna amiaqa.

*Faiqi anaasee, faiqi naakaparufa.*

<sup>18</sup> Faiqi ninaaqmaaka innee inneeqa nifaqmaaka ooreeqa mariaqa. Karaambaiqa niraamummaaka mina ufa irimaria anaaseesa nari nifaammaaka ooreeqa maridaqa andeeqasee karaambaiqa aatata fidaqa miqimariafanoo.

<sup>19</sup> Anaasee nifaqmaaka innee inneeqa ninaaqmaakara ridaqa nimuqusi marinaqa sia afeeka rakisira rakisinnimaqaaqa sia sukufa qimannimaqaaqa.

<sup>20</sup> Faiqiuqa inniqa ninausa nikausa ufa qinnana aiqama kari sia rukiaraq eedoo kai qiaqa. Karaambaiqa faiqi namu inneeqa ninausa nikausa ufara eedoo qidaqa andeeqasee karaambaiqa aatata fidaqa miqi mariafanoo.

<sup>21</sup> Innee ninausa nikausa inneeqa faiqi namu sia maqee maqee nifairida niqiaqa. Miqifaqa misa quandafi inniara firaaqoo fidaqaafaranoo.

<sup>22</sup> Innee ainainira faiqiuqa mariasa innaarunai inni rakisirafa maridanoo inni saika oosana qafaidanoo. Innee maa maqanasaaqaraa rakisirausara faqa iriaqa aiqama kari misa ufara faqa eedoo qiaqa. Sia nari niqafainnaqoo kai andeeqasee ainainiaqa, kaqiqoo

kaqiiqoo faqa amiqimasee ainainiqa fuaqa. Miqi kai iqa sia faiqi anaasee nifusaa, inni nimoogiranara kai irisee ainainiqa. Innee inneeqa nimuqusa ookiqari karaambaqara naaqqainiqa minara irisee amiqimasee ainainiqa fuaqa.

<sup>23</sup> Inneeqa rakisirana ainainirana inneeqa nidiranannai kai auqaida mariaqa mi ainainna idafa sia maqasaa fasiqa ainainirane qiaqa.

<sup>24</sup> Kasooaaqee maasa innaarunai ooruraananoo minni maasa qeeqa kadaapiriri unana akiqara Karaambaqara fannoo nari oogai qimaqoo ufanasaa kai feefauru nimiannoo. Kaifaa innisaimbaqa aiqama rakisirausa ainainidaqa asasammasee auqaqa. Asauku mundirafa mifa anoona rakisirafa maridanoo mina saikakaimmifoo qimasee sanaasamasee amiqimasee auqaqa. <sup>25</sup> Innee oosana oosana ainainidaqa mandainainira ainainifanoo Anutufa inni ufa nimiannoo. Sia inniara kaqi fifau saika faiqi fee qimasee minninnisaannoo. Inni mandainainirana niqafamaseenoo mina amana kai ufa nimiannoo.

## 4

### *Pauroofa naakaparufa qimannimidanoo.*

<sup>1</sup> Innee faiqisaa rakisirausa inni ainainira fasiqauqa innee andeeqasee amana amana kai misasaa rakisinnisaaqa. Innee faiqisaa rakisirausa maa ufana iriaqa, inni rakisirafa innaarunai marifa inneeqa ainainira faiqi mandaikamma nimaqai fanoo inni faqa ufa nimiannoo.

<sup>2</sup> Innee Kooroosee maqannaa asauku mundirana Yisuna aiku oosana mariasa innee inneeqa ainainidaqa Anutuna ufamau fimarianara minara Anutuna maqee maqee innaaru qimamaqaqa. Sia nifaurunnai kai unna innaaru qiaqa amiqimasee naunduranai innaaru qiaqa. Innaaru qidaqa maqee maqee Anutunara dufi dufi qimamaqaqa.

<sup>3</sup> Innee innaaru qidaqa mai qini Pauroosa saimbaqa maqoo rumbaqa qini faqa mariasara faqa innaaru qimannisaaqa. Oogai asauku mundirafa kukeeqanoo marufanoo maqee kari akoroo inoo marifanoo Anutufa maasa dadaqainnaa mina ufa aiqamai kooroomannimaqaannee qimaseeqa minara faqa innaaruqiaqa. Doo qinee maqee Roomma maqannaa rumbaranaki fifau maridaqa. Asauku mundiranara maqusa maqusa qimannimifannanara Roomma maqannaasa sia maasa amaana ufafau qifoo qimaseeqa qini rumbaranaki quqaqaafaqa maridaqa. Innee minara iriseeqa qiniara faqa innaaruqimaqisaaqa. <sup>4</sup> Oogai tamummaqara fasiqauqa Anutuna asauku mundiranara sia amiqimasee irimariqau ati kai irimarufanoo maqee kamuqoo doo kambiqeenoo kooroo inoo maridanoo. Anutufa qiniara aiqama maqusa maqusa qimannimianne qifaqa minara innee qiniara innaaru qimaqisee mariafaqa qinee miqimannisa.

<sup>5</sup> Innee Kooroosee maqannaa Yisuna aiku oosana mariasa innee Yisuna ufara nikoo nikaa imariasa faqa moodaa maqusaki mariafanoo. Innee misa nifusaa reendenamasee irirana faqaasa naana ramasee nuqa. Innee misa faqa maridaqa innee sia fifau nifaurunnai kai ufa qiaqa, Yisunara qimannimiraree qidaqa deedaqqammaqai fanoo mariani, irifaqa dauni qimannimiaqa. <sup>6</sup> Innee Yisuna ufa irimariasa sia misa rauqisee qimannimiaqa, kasooqaqee fifimmasee adiafaaira ufa qimanniminiaqa irifaranoo. Innee miqimarifaqa faiqi anaasee inni irifaqa andeeqasee anoona ufa kai qimannimiaqa.

### *Pauroofa Kooroosee maqannaa nimandoo ufafa.*

<sup>7</sup> Qini Pauroosa Tikikusafa qini daufakiana inni qimannimiannoo Tikikusanara qini dididanoo mifa karaambaqaindi maridanoo mina ainainira faiqi maridanoo amiqimaseenoo maasa dadaaqidanoo. <sup>8</sup> Qinee Tikikusana maindari aqigaananoo maasa daufakiana qimanniminanoo inni nifeeqaranoo mariannoo. <sup>9</sup> Qinee Ooneesimusana faqa Tikikusana faqa miqanda innee mariannai niqigaanaura. Ooneesimusafa mifa Kooroosee maqannaa maridanoo mifa faqa maasa qikaqaafasaa amiqirafa marifanoo maasa minara faqa nididanoo. Miqanda maqoo oosana oosana ainaina koorooiranara inni qimannimifaranoo.

<sup>10</sup> Aristarakusafa mifa faqa mai qini faqa Roomma maqannaa rumbaranaki maridanoo nimandaidanoo. Baranabasina akaqaafasaa uqanna Marikoofa mai marifa mifa faqa inni nimandaidanoo. Qinee moo akaraki Marikoonara qimannimifannana mifa oonurainiqa innee mina amiqimasee rakisi aisaqa.

<sup>11</sup> Yusatusafa mifa faqa mai maridanoo mina auqu amaranai kirafa mifa faqa inni nimandaidanoo. Yuda maqannaa amaana ufa irimarusa misaqiqari Yusatusafa faqa Marikoofa faqa Aristarakusafa faqa mi namusa kai qini faqa moodaa karida ainainimariasa maridaqa maa maqanasaa Anutuna ququsa firaafaikianifeera mi namusa kai maasa dadaaqidaqa. Misa miqi mariafaqa qinee rumbaranaki marunanoo qimuqusa isooaidanoo.

<sup>12</sup> Eepafaraasafa inni Kooroosee maqannaafa mai maridanoo inni nimandaidanoo. Mifa faqa asauku mundirana Yisuna ainainira faiqi maridanoo, mifa inni Kooroosee maqannaasara andeeqasee Anutuna ufa nimandakusee irisee mi mau andeeqasee fuaqeera afeekaikamasee innaaru qidanoo. Innee kooroosee maqannaasa faiqi firaasara maqi mafi amiqimasee Yisuna aiku oosanaki ooqumarifi afeekaikiqa mariaqeera innaaru qidanoo. Innee miqiaqeera Eepafaraasafa inniara maqee afeekaikamasee innaaru qidanoo. <sup>13</sup> Qinee Pauroosa mi fasiqana Eepafaraasana kadaapirirana qafaidaqa qimannimidaqa. Sia inni Kooroosee maqannaara kaifau qidanoofau, Raoodiseea maqannaafa Qieerapoorisa maqannaafa faqara innaaru qimannisaidanoo.

<sup>14</sup> Rukaafa tutaqa saikimarifa maasa nidimarifa maridanoo mifa faqa inni nimandaidanoo. Deemasafa mifa faqa inni nimandaidanoo.

<sup>15</sup> Innee maa akarana iriseeqa quandafi Yisuna ufa irimariasa Raoodiseea maqannaafa faqa nimandaaga. Yisuna ufa irimariasa faiqi moo auqu Nimafana maaqaki suqimariasa mi nimandarufana mareeqeeqa misa faqa nimifaqa iriaqa. <sup>16</sup> Maa akara ufana innee Kooroosee maqannaafa nimaqeeqa. Innee mina asaana rumaseeqa iriseeqa faiqi moo fannoo mina mara mareenoo munu Raoodiseea maqannaafa Yisuna ufa irimariasa qambaana asaana rinaqa iriaqa irisee mee nári Raoodiseea maqannaafa nimu akarufana kaifaa mi fasiqafa misaindi mareenoo anireenoo inniqa maqannaaki asaana rinaqa misa nimaqaunna ufana faqa iriaqa.

<sup>17</sup> Arakipusafa karaambaiqa ufa irimarifa maridanoo. Innee afeekaikamasee qimamia. Anee sia qumooqukidana aunduaría. Afeekaikamasee auqa. Innee miqi qimaseeqa Arakipusana qimamiaqa.

<sup>18</sup> Faiqi moo fannoo ufa qunnana akararumasaifaqa qeeqa Pauroosa kaqi qeeqa duqu kai akara ridaqa maa akarana rafaafaqafidaqa. Qinee inni nimandaidaga. Qinee Roomma maqannaafa karabusaki kaqi marunnanara innee maqee maqee innaaru qimaqisaaga. Anutufa nari marirana inni niminaqa innee amiqi amiqiaqeera nimiannoo mina maraaga.

## **1 TEESARONIKA** **Teesaroonika Maqanna Indaaru Nimu Akarafa.**

<sup>1</sup> Innee Teesaroonika maqannaasa Anutunaki mariasa karaambaiga Yisuna asauku mundiranaki faqa mariasa, innee Teesaroonika maqannaasa Yisuna ufara suqimariasa qinee Pauroosa faqa Sirasifa faqa Timootifa faqa inni nimandaidaqa, akara rumanni-maqaidaqa. Anutuna kaqi nimira afaairana faqa asoarana nari aundura faqa inni faqa mariani.

*Pauroofa Teesaroonika maqannaasa Anutuna ufamau fimarunara nimooqidanoo.*

<sup>2</sup> Maasa maaqoo marunna namusa inniara iriseeqa maqee maqee Anutufinnai dufi dufi qidaqa, maqee maqee inniara innaaru qimannimaqaidaqa.

<sup>3</sup> Maasa inniara maqee maqee maasa qikoona Anutuna aaqoo auqaidaqa. Innee Yisuna saqarikidaqa miqianara Anutuna ufirira ainainirana maqee maqee imariafanoo. Innee Anutunara faqa faiqi aanaaseera faqa nimuqusa imarinara Anutufinnai kadaapiri mariafanoo. Innee Yisunara اساسمasee afeesira irirafa karaambaiga asauku mundirana Yisunaki atukaramasee marianara minauqara faqa maasa irisee Anutuna aaqoo auqaida inni innaaru qimannimaqaidaqa.

<sup>4</sup> Teesaroonika maqusanaasa qini qikaqaafasaa Anutufa inniara amuqusimarifa inni rusandeesamumasee maroonara maasa iridaqa. <sup>5</sup> Maasa Yisuna aufakiana sia noonnai kaifau inni qimannimidau, Anutuna afeekannai faqa mina naaquqara andeeqara maraqunannai faqa qeeqa faqa mi iriranamau fidaqa minannai faqa inni qimannimifannana minara Anutufa inni rusandeesamunara iridaqa kuqaa fee qidaqa. Maasa inni faqa Teesaroonika maqusai mariafana qifafoosa maridaqa inni dadaaqirara andeeqaseeqa mariafanausa maridaqa innee minara irimariafanoo. <sup>6</sup> Innee maasa andeeqarana qafamasee karaambaiga faqa maasa faqa andeeqarana ameeraameerirana faqa maasa faqa andeeqarana ameeraameeri mariafanoo, inni maqannaasa Yisuna ufa irunara mina akiaqara inni aupurarana firaqoo nimufaqa innee sia minara iriqau naaquqara maraquna nimimaru اساسمasee karaambaiga ufa kai maroosa. <sup>7</sup> Innee Teesaroonika maqannaasa miqiga aiqama aanaamuru Yisuna ufa irimarusa innee andeeqara oosana uqannifiqoonara innee Maseedoonia maqa maaqakina marusa faqa Kirisa maqa maaqakina marusa faqa uqannifiqoosa mariafanoo.

<sup>8</sup> Sia mi maqa maaqa qanda kaifau karaambaiga ufa iriqau, aiqama maqa maaqai innee Teesaroonika maqannaasa Anutuna ufa irufa, mi ufafa aiqamai daraaninoo fifaininuu. Maasa fifau inniara mi maqannaasa fiqum fiqum idaga qimannimiqa nimariafanaqa misa ooqai iriseeqa qimaqimiqa. <sup>9</sup> Ooqai maasa inni Teesaroonika maqusai onuraafanaqa innee maasa اساسمantee oonu qifiqasee amiqimasee maasa ufa irunara faasai mi anaamurusa irimariqau. Innee inneeqa dapi saqari Anutunara foora innaaru qimaruna minnisee quandaki kuqaa anoona kasi mari Anutufinnai ubeekaranara faqa faasai mi anaamurusa iriseeqa minara aiqamausa qimannimimariqau. <sup>10</sup> Innee mifunnai ubeekamafi mina amaaku innaarunaindari qumiranara afeesu afeesirafa kaqi afeesida marunara faasai aanaamuru minara faqa irimariqau. Anutuna amaaku Yisufa kuqiranakinaana mara findifufa, maasa Anutufa kasooqaaqee naruaninnanakinaana Yisufa maasa asumu qumaree marifa innee mifa qumuaninnanara afeesida marunara aiqama aanaamuru faasaimma irisee qimaqimifanoo.

## **2**

*Pauroofa Teesaroonika maqusai maridanoo nari ainaini marunara qimanniminuu.*

<sup>1</sup> Oo Teesaroonika maqannaasa qini qikaqaafasaa uqa. Maasa namu inni maqusai fuafannakari sia kadiqamannisaqiafana, innee minara irimariafanoo. <sup>2</sup> Maasa namu Teesaroonika maqusai fuaneera Firipi maqusai onuraafanaqa mandaikamma nimaqeeqa manda ufa qimunara irimariafanoo. Maasa inni maqusai onuraafanaqa moomoosa aanoqima nimaqoofoqa onumafi iriafanoo Anutufa paasosirana nimufaqa mina ufa inni Teesaroonika maqannaasa qimannimiqaifana. <sup>3</sup> Maasa qimannimirafa faqa sia aaqaranasaa mundinoo maridanoo sia maasa mandainaina maraannanasaa mundinoo maridanoo, sia maasa ufa akaruqiranasaa mundinoo maridanoo. <sup>4</sup> Anutufa maasa nimanamasee inni qimannimiranara eedoo qimasee nari amiqira fasaasa ufa

maasasaa quqasainaqa maasa maqee Anutuna aidiramau kai inni qimannimidaqa. Anutufa maasa firana amanamasee qafeemari fa marifaqa minara irisee andeeqasee qimannimidaqa. Sia faiqi maasa ufa irisee eedoo qiaqeeru qimannimidaqa. Anutufa irisee eedoo qianinnamau kai inni qimannimidaqa.

<sup>5</sup> Maasa Anutuna afusaa maridaqa sia nimoogira ufannaifau inni qimannimi qiafana. Maasa Yisuna ufa qimannimidaqa sia maqandanai oosana ainaina ummuariraree qimasee Yisuna ufa firaagoo qimannimifanausa, andeeqemariafanausa innee minara faqa irimariafanoo. <sup>6</sup> Maasa inni faqa maridaqa inni fee akaqausee sia misa nimoogira ufara randaqiafana. <sup>7</sup> Kuqaa maasa asaku mundirafa nigiqoo fasiqausa maqasaa fasiqauqa maridaqa, maasa minara irisee sia inniara qimooqirane, ainainee qimiaqee qimariqiafana. Ninausa faiqi aanaaqi ireeda rakisi mariandee maasa miqikai mandee ireeda kai inni faqa maridaqa qimannimifanausa sia inni moo ainaina maraqiafana. <sup>8</sup> Maasa inni Teesaroonika maqannaasara firaagoo nimuqusimarunara sia Anutunaindaraa amiqira fasaasa ufa kai naida nimiqa, maasa qeeqa dariranara sia rufiqarai irirana faqa qimuqusa faqa kaqi marirana faqa nimiaqaaida mariqiafana.

<sup>9</sup> Oo qini qikaqaafasaa maasa inni maqusai inni faqa mariafanaqa innee maasa oosana qafamasee irimariafanoo. Maasa narana maree maria saikana kadaapiriga tooqaamu maraafana qafaqa. Maasa Anutunaindaraa amiqira fasaasa ufa qimannimiqa fifi inaqa innisaa oonu munduanaqa innee maasa naranara mamaraida miqidammiafoo qifoora faasaana faqa eendaki faqa qeeqa kai narana maree maria ainainirana kadaapiri mariafanaqa qafaqa.

<sup>10</sup> Maasa innee Teesaroonika maqanna faqa mariafana kamuqoo sia Anutufa kai maasa marirana qafana, innee faqa qifafoofano. Maasa inni Yisunara rimarusa faqa maridaqa maasa anukarana faqa andeeqarana faqa pisoopisooirana faqa sia aaqarana faqa mariafanaqa qifaqee marusa maridaqa. <sup>11</sup> Faiqi nikausa amiqimmandee faiqi rakisidaqa maasa miqi kai iqa inni rakisimariqiafana. <sup>12</sup> Maasa innee mandainaina maroofaqa reendenamma nimaqeeaaafanausa maridaqa. Anutufa inni naaraidanoo kasooqagee innaarunai ooruree nari areenarana faqa nari ququsara faqa mina faqa marasee nari faqa mariaqee qidanoo. Maasa inniara minara iriseega innee maqee mariaqooqari Anutuna aidiramau kai fuaqa, minara fuki faaki qimariqiafana.

<sup>13</sup> Anutuna aufakiana maasasaa quqasoona inni qimannimifaqa innee irisee umaraqau. Innee minara sia faiqi ufafee qimariqau. Anutuna ufafee qimasee umaraqau. Miquna qafamasee maasa Anutunara dufi dufi qidaqa. Kuqaa Anutuna ufa maridanoo innee mina ufa irimariasakina saikidanoo.

<sup>14</sup> Ooqai Yuda maqannaasa nari niqoonausa asaku mundirana Yisuna ufa irimarusa irisooni akiqara kadaapirirana nidafirana nimiqau. Innee Teesaroonika maqannaasa faqa asaku mundirana Yisuna ufa irisoo faqa inniqa niqoonausa nikoqoo faqa miqi undee kai iqa nidafirana apurarana inni nimiqau. <sup>15</sup> Yuda maqannaasa ooqai Anutuna tamummaqara fasiqauqa kuqa nariqau, kafa maa kamuqoo karaambaiqa Yisuna kuqamma arusaqau. <sup>16</sup> Doo kafa maqee maasa mandaikamma qimaqidaqa. Misa Anutuna afusaa firaagoo mandaikidaqa misa kaqa faiqi narimarias maridaqa. <sup>16</sup> Maasa Anutuna ufa faiqi asumu marararufa aanaamuru qimannimimarunaga misa nikoqoifaqa maasa rafaqafirara amanidaqa. Miqidaqa Yuda maqannaasa aaqarafa doo firaafa uriqaranoo maridanoo, doo maqee mandainaina akiqara Anutuna aranaqarafa doo misasaa aqufinoo maridanoo.

*Pauroofa kaifaa Teesaroonika maqusai fuaneerusa minnisana.*

<sup>17</sup> Anutufa misara miqi qimarifaqa qinee Pauroosa maasa qeeqara maaqi qidaqa. Yuda maqanna nifaqasai faqa qusasaa maasa nianai rakeeiqa maridaqa, qifaqa kai nianai rakeeiqa maridanoo. Maasa irirafa inniki marifaqa fuaneera firaagoo amanunanoo sia amanaikifaqa kaqi maridaqa. <sup>18</sup> Qinee Pauroosa faqa qini faqa mariasa Teesaroonika maqusai innee iannai fuaneera amanunanoo sia ifaqa qinee qeeqa kai moomoo kari amanunanoo Sadannafa qini faqa ititai faqa minniseega kaqi Ateensa maqusai maridaqa. <sup>19</sup> Yisufa quminna aukuaana innee Teesaroonika maqannaasa faqa aanaamuru qimanniminausa faqa innee inni andeeqaranannai marifaqa qinee inniara Yisuna afusaa qeeqa faiqiara foora inniara asasianauranoo. <sup>20</sup> Maasa qeeqa qifaqa amooqirana faqa asarirana faqa inniki marinara innee maqee marianara firaagoo iridaqa kumaaraa Timootina aqiqeeqa.

### 3

<sup>1-3</sup> Maasa inni Teesaroonika maqannaasara kisaqasaa munari minari firiafanaisia doo maqee minnisee rakeemasee Ateensa maqusai maasa namu kaqi maridaqa maasa

qikaqa Timootifa maasa faqa Anutuna saikaki marifa amiqira fasaasa ufa asauku mundiranara qimannimi noonifa maasa mina aqigeega innee iannai inni pooduaanifeera innee Yisuna saqarikirana dadaaqianifeera, akaqausa inni nidafrana nimifaqa sia quandaki fuageera Timootina innee iannai aqigeega. Aqiqamasee maasa kaqi Ateensa maqusai maridaqa. Maasa Yisuna ufasaara narirafa marianinnanara Anutufa ooqai maasara minaki fuagee qimaqoo ufafa maridanoo. Innee minara faqa irimariafanoo.

<sup>4</sup>Maasa Teesaroonika maqusaki maridaqa inni qimannimiqa Yisuna ufa saara narirafa kambigaannoo fee qiafannana doo mifa kambiqaidanoo innee minara faqa irimariafanoo. <sup>5</sup>Qinee Pauroosa minara iriseega innee iannai Timootina aqigeega. Qinee inni naufakiana sia uqanna iriqa kisaagasaa mariranara qikooqifaqa munari minariqa Timootina aqigeega. Mifa oonureenoo Yisunasaa mundiranara irianifeera aqigeega, Sadannafa inni nikarimaqasee qafaifanoo qini saika kadiqaannoo fee sia fee kadiqaannoo.

<sup>6</sup>Doo maqee Timootifa oonurandee anireenoo inni adiafaaira naufakiana qifaqa iriqa. Mifa innee Yisuna saqarikirana faqa nariara nariara nimugusirana faqa qimaqiminoo. Mifa innee maasara maqee maqee irimariana faqa maasa inni niqafaqaairana amana amana kai innee maasa qifaqaqaa imarianara Timootifa qimaqimifaqa iriqa. Ooqai maasa qifaqaqaa rumbanoo marifaqa mariunasa. <sup>7</sup>Innee Yisuna saqarikirafa kaqi marinara maqee iriseega qifaqaqaa asafifanoo kadaapirirana faqa aupurarana faqa doo aufaadenoo. <sup>8</sup>Inneeqa marirana mapukuseega karaambaiga afusaa findififaqa maasa qifaqaqaa amiqianoo.

<sup>9</sup>Doo maqee maasa innee mapukusee marianara Anutuna afusaa dufi dufi qianaura. Maasa inniara Anutuna afusaa asasidaqa minara faqa dufi dufi qimamaqaida. <sup>10</sup>Maasa faasaana eendaki inniara Anutufinnai innaaru qidaqa, Anutufa dadaqinaqa inni noori nindafamasee inneeqa Anutuna ufamau firana andeeqa nimifaranoo.

<sup>11</sup>Maasa Anutufa maasa qikoofa nari uqanna, maasa karaambaiga Yisufa faqa maasa aana afisusainaga innee iannai fuanaura. <sup>12</sup>Karaambaiga fannoo innee nariara nariara rirana firaanaikamma nimaqaani, inni aqamausara nidirafa faqa maqee maqee firaanaikiani. Maasa inniara didirafa maqee maqee firaafaikidanoo. Innindi faqa miqi kai inoo maqee maqee firaafaikiani. <sup>13</sup>Miqifanoo Anutufa inni nimugusa mapukusee afeekaikamma nimimianoo. Innisaimbaqa karaambaiga Yisufa nari aiku asauku faqa kafa qumureenoo inni mareeqeenoo andeeqarasa naaquqarusaikama nisainaga maasa qikoona Anutuna afusaa kikiqifaranoo.

## 4

### *Pauroofa Teesaroonika maqannaasara Anutuna aidiramau fuageera naakapaidanoo.*

<sup>1</sup>Oo Teesaroonika maqannaasa qini qikaqaafasaauqa qeeqa ufa maa ufana ati qimannimianaura. Maasa inni faqa mariafanna kamuqoo Anutuna aidiramau firanara qimannimifanaqa mi mau fiffusa doo maqee kaqi mi mau fimariafaqa qinee iridaqa. Karaambaiga Yisufa qimaqimiqoonara doo maqee inni fuki faaki qidaqa sia ooqai andee kai kaqikaqoo Anutuna iriranamau fuaqa, moo faqa moo faqa afeekaikamasee mi mau fuaqa. <sup>2</sup>Inni faqa marianna kamuqoo Karaambaiga Yisuna ufamau fuageera naamuaqira ufa oosana oosana naakapaafannana innee irimariafanoo.

<sup>3</sup>Anutuna irirafa inniara maaqimminoo maridanoo inni andeeqara naaquqarafa marinaqa faiqi anaasee nari ummuari nari ummuarirafa sia inni rumbanoo mariani mandainainaqiqari idukirasa naanna ramasee mariaqee qiaqa. <sup>4</sup>Anutufa inniara maaqiaqee qidanoo. Innee aqamausa inneeqa nifaqara naaquqara uriqarara ainainee qimasee rakisidaqa andeeqara oosana marararee qidaqa nari ummuari nari ummuarirana taika uqanna fuani. <sup>5</sup>Innee sia aamina maqannaasa sia Anutunara irimariasana naanna raaqa misa mandainaina fanandiranaki maridaqa innee sia misa naanna raaqa. <sup>6</sup>Sia inniki moo fannoo miqinoo nari aqoonausee moo maqannaasee mandaikamma nimaqaani. Ooqai maasa inni qimannimifannana maqee kafa naaquqimannimaqaidaqa Karaambaiga fannoo mi umuarira oosannara narirafa maridanoo. <sup>7</sup>Anutufa sia maasara nari ummuari nari ummuariranaki mariaqee maasa daarama nari ququsaki quqeenofau. Maasa kaaqa andeeqaranaki mariaqee maasa daarama quqanau.

<sup>8-9</sup>Faiqi fee anaasee fee moo fannoo maa qinee qunufana minnisainafa sia faiqi ufafau minniseefara Anutufa nari naaquqara andeeqara maraqaqa niminna ufana rukieefaranoo. Innee Teesaroonika maqannaasa Yisuna ufa irimariasana nariara nariara nidiranara innee irimariafaqa fifau qimannimidaga. Anutufa nari kai nari aidi nari aidiranara qimannimifaqa irimariafanoo. <sup>10</sup>Innee Teesaroonika maqusanaasa Yisuna ufa irimariasana Maseedoonia maqa maaqaki maria nikaqaafasaasa mi amiqira oosanna



nimiqoosa mariafanoo. Sia maqee iandee kai kaqikaqoo nariara nariara nidiani moa faqa moo faqa firaanoo nariara nariara nidiani.

<sup>11</sup>Maasa ooqai inni faqa maridaqa qimannimiaafanandee kai qidaqa kafia qimannimidaqa. Maa ainainausasaa nimana mundusaafanoo miqoo kai fuaqa. Aiqaamausa inneeqa ainainiranasaa inneeqa rakisiaqa, aiqaamausa inneeqa narana inneeqa ainaina inneeqa kai maraqa. <sup>12</sup>Innee Yisuna ufa irimariasaa miqi faqa mina ufaa nikoofee mariasa inni nimooqiga andeeqeeaafoo qifaranoo. Innee faqa miqidaqa sia moo ainainara sarauqinana moonasaa oonu mundua.

*Yisufa kafia qumuaninna ufafa.*

<sup>13</sup>Qini qikaqaafasaa uqa anoona ufa siaisa kuqufifa sia findifidammiafoo qimasee ikifaafau qimariana. Innee faqa misa naana reefoo qimasee kuqirausara anoona ufa iriaqee qimasee inni qimannimidaqa. <sup>14</sup>Maasa maaqi qidaqa inni qimannimidaqa. Yisufa kuqufinao kafia minaqigari findifinau. Miqunara maasa maaqi qidaqa Yisuna saqariki mariasa kuqufifanoo Anutufa Yisuna mara findifundee kai inoo misa faqa marafindifumma nimaqaanno. Yisufa qumuaninna aukuaana Yisuna faqa moodaanaki mariaqeera Anutufa marafindifumma nimaqaanno.

<sup>15</sup>Karaambaiga naamuaqimaqoo ufafa maaqimminoo marifaqa qimannimidaqa. Karaambaiga qumuaninna faasaanasaa maasa kaqi marianausa sia kuqirausa noorisaa ooru funauranoo. <sup>16-17</sup>Mi faasaanasaa innaarunaindari Anutuna daambeenda firaqoo ruanno, qangirooqa uriqararafa ufa qianno, Anutuna ukeena fuaqaanno doo miqoo innaarunaindari karaambaiga nari uqanna qumuanoo. Qumurainaga kuqirausa kaqi maru kamuqoo asauku mundirana saqarikida mariusa misa naaree kuqiranakiqari findififaga doo miqoo maasa mikari kaqi mariasa faqa kuqirausa faqa Anutufa moodaanaki afapita qumareenoo uqeerannisainaga asurukina keeqakinaqa aanai ooru karaambaiga paqurimasee mikari mina faqa naaru naaru marianausa. <sup>18</sup>Miqiannanara innee faiqi anaasee faiqi kuqufuafaqa nifaaqa rumbee marifaqa ikiraqee mariana mi ufana qimannimifanoo nifaaqa aufadaani.

## 5

*Yisufa tautumasee qumuaninnanara faasaanara foora mariaqa.*

<sup>1-2</sup>Mi ainainna kambiqaaninna aukuanara maasa fifau akara rumasee qimannimianausa, ooqai doo innee irimariafanoo maaqimminoo marianno, karaambaiga qumuaninna kari ummuara fasiqara foora kukeeqakinoo qumuanoo. <sup>3</sup>Faiqi anaasee maa aukuanara amiqiranaki asoaranaki maridee qimasee kaqi mana manida marifanoo doo miqoo kai rakeemasee fira narirafa tautumannimaqaanno. Sia moo ameeka-masaanno, anaasee innaamunai fimariandee ianno sia aupurarafa sia marianno, marianno.

<sup>4</sup>Innee Teesaroonika maqannaasa qini qikaqaafasaa uqa, innee sia asukunakiara foora nimariasaa mariafanoo. Yisufa qumira faasaana ummuaririra fasiqara foora kambiqafi naqa innee sia tautumasee nisaurifaranoo. <sup>5</sup>Innee aiqaamausa kaaqa qaranaki nimariasaa faasaanara foora nimariasaa mariafanoo sia maasa innaaimbaqa eendakiara foora nimaarunasa sia asukunakiara foora nimariasaa foora maridaqa. <sup>6</sup>Miqunara maasa innaaimbaqa sia faiqeemariasaa naana raqa nifu maqasee mariaqa. Maasa innee faqa sia nammari neemariasaa naana ree furufariaqa kaqi amiqimasee marianausa.

<sup>7</sup>Eendaki faiqi anaasee faiqidaqa eendaki nammari namasee furufaridaqa. <sup>8</sup>Maasa sia miqimarunasa maridaqa kaaqa qaranaindi maridaqa maasa sia nammari namasee furufariaqa nuaqaana kaqi mariaqaana. Maasa qeeqa Yisuna saqarikirana faqa qeeqa nariara nariara rirana faqa mi ainainaqandannai saqari kammandee ukee iriga. Maasa asumu marianafa kasooqaaqee kambiqaaninnanara asasidaqa rakisida maridaqa. Mi asasira afeesiranara pateeuqara foora qikiaqaki afisusee rakiranakiara foora maria.

(Ooqai nikiaga itairiraua suani qikiaqaki daruandoo qimasee pateeuqa nariqa nikiaga itairiranasaa afisimariqau. Ooqai Yisuna aukuaana Roomma maqanna rakira fasiqauqa ainna qafee afisusee rakiranaki nimariqau. Aiqaama ainaina samu sia qikiaqa daruani fee qimasee afisiqu.)

<sup>9</sup>Anutufa sia maasa rusandeesamumasee nari aranaqaranaki quqarareefau qinau. Asauku mundirana karaambaiga Yisunannai asumu marirana maraqqee qimaseenoo maasa rusandeesamumasee maranau. <sup>10</sup>Mi asauku mundirafa minasaimbaqa maasara moodaanaki mariaqeera maasa darirana qimaaqa maqasee kuqufa findifinao maridanoo nari kaifaa qumurainaga kuqiqee kaqi maridee nari faqa mariaqeera maasa qimaaqa maqasee kuqinau. <sup>11</sup>Innee mi irirana iriseeqa soofaari mariasa mi iriranannai nari dadaaqi nari dadaaqidaqa nari amana nari amana mapukuaqa.

*Pauroofa ufa taikaidanoo nimandaaidanoo.*

<sup>12</sup> Oo maasa qikaqaafasaa maasa qeeqa qimuqusa ookiqari inni qimannimidaqa. Inniki Anutuna ufa saiki maria fasiqausa Anutufa mareeqeenoo mi saikanaki uqannisoosara qidaqa, misa inni naamuqaira ufa qimannimiafaqa amiqira fasiqafee qimasee naaquqamasee iriaqa. <sup>13</sup> Misa nari amiqira saikara irisee firaqoo noosaa qiranara rufiada misara nidiya. Innee nariara nariara nidimariyaqaa asoaranaki mariaqa.

<sup>14</sup> Qinee inni naamuqai maruna fasiqausa qimannimidaqa, inni kudi fasiqauqara afeekaikamasee naakapaifaqa misa ainainiyaqa, rufitee maria fasiqa anaaseesa nimana mapukunimaqaqaqa, irirana ooreeqaraura innee dadaaqaqaqa, innee aiqamausa qambaana reendeenidaqa asoamasee qimannimiya fuaqa. <sup>15</sup> Innee maa ainainnara faqa rakisiyaqa, moo fannoo ani mandaikammamaqainana akiaqara sia nari mandaikammaqaqa sia mi oosana mariyani. Innee aiqama kari narinni narinni amiqira oosana kai nari ami nari amiaqa sia inneeqaki kai miqiaqa. Innee aiqama maqannaasaki maridaqa miqimannimaqaqaqa. Inneeqa irirana nimana mi amiqira oosannasaa kai quqaaqa.

<sup>16-18</sup> Innee aiqama kari Yisuna ufa irimariasa اساسida kai mariaqa, aiqama eendaki faasaana innaaru qiya fuaqa. Aiqaqa ainaina tiaki Anutunara dufi dufi kai qiaqa. Innee mi ufamau fidaqa asaku mundirana Yisunaki fidaqa Anutufa inniara fuaqee qimaqoomau fifaranoo.

<sup>19</sup> Naaquqara andeeqara maraquna fannoo inni afeeka niminaqa sia mina rafaqaqa-fuaqa. <sup>20</sup> Anutuna maraquna fannoo faiqi dadaaqaqaqa sia nikoo nikaq iaqa, amiqimasee iriaqa. <sup>21</sup> Innee aiqama amaana ufa sia kaqi iriaqa aiqama ufa aiqumumasee iriseeqa anoona ufa kai iriaqa. <sup>22</sup> Oosana oosana mandainainara eerairiaqa.

<sup>23</sup> Anutufa maasa naundurari asoaranani nimimarifa inni mariranaki naaquqara andeeqara oosana firaqoo nimiani. Mifa kai inni aiqama marirana nipatasaa faqa nimana faqa maraquna faqa aaqarafa sia mariyani anukarafa kai mari mari inanoo asaku mundirafa karaambaiqa Yisufa miqiyaq marinnanaki qumuani. <sup>24</sup> Innee inneeqa mandainainakiqari aniaqera naaree marifa Yisufa sia akoo akaa imarifa maqee maqee dadaaqimarifa maridannoora anukara oosana nimianoo.

<sup>25</sup> Oo Teesaroonika maqannaasa maasa qikaqaafasaa, innee maasara maqee maqee innaaru qiaqa. <sup>26</sup> Innee aiqama inneeqa nikaqaafasaa nimandaidaqa moodaa fidikara foora nimandaqa.

<sup>27</sup> Qinee Pauroosa Karaambaiqa ufa irisee inniara afeekaikida qimannimida innee maa papiqana maraseeqa minakinaa akara ufa aiqama Yisuna ufa irimariasa asaana rumasee qimannimiaqa.

<sup>28</sup> Asaku mundirana Karaambaiqa Yisuna afaarirafa inniki mariyani.

## 2 TEESAROONIKA

### Teesaroonika Maqanna Inaaqianna Nimu Akarafa.

<sup>1</sup> Innee Teesaroonika maqannaasa Anutuna ufa irimariasa innee maasa qikoona Anutuna aiku asauku maqasaa fasiqa anaasee mariasa Anutuna asauku mundirana karaambaifa Yisunaindi faqa mariasa qinee Pauroosa inni akara rumannimaqaidaqa, qaara fasiqa Sirasisa Timootisa faqa inni akara rumannimaqaidaqa.

<sup>2</sup> Innaarunai nikoona Anutuna faqa Anutuna asauku mundirana karaambaifa Yisuna miqanda kaqi nári afaarirana faqa nári naundura asoarana faqa inni nimiani.

*Yisufa kaffaa qumureenoo Anutuna ufa rukiee mariasa naruannoo.*

<sup>3</sup> Oo qini qikaqafasaauga maasa inniara maqee maqee Anutufinai dufi dufi qima-maqaidaqa. Innee Yisuna saqarikirafa firaqoo kambiqainara iriseeqa sia minara dufi dufi qiana aqaannoo. Inniara Anutufinnai dufi dufi qimarunafa andeeqaidanoo. <sup>4</sup> Innee Teesaroonika maqusanaasa Yisuna ufa irimarianasaara narirana faqa oosana oosana aupurarana faqa kaqi maraqa fimariana faqa Yisuna ufa kaqi iriqa fimarianara faqa iriseeqa maaqanna maaqanna fidaqa inni amiqira oosanara amaana maqaki keeqee mariasa qimannimidaqa qeeqa qimooqidaqa.

<sup>5</sup> Anutuna andeeqara narira ufa anoona kasooqaqee maaqi qimasee kambiqaanoo, innee maqee Yisuna ufasaara aupurarana maraqa fimariana akiaqara kasooqaqee maaqimminoo mariannoo. Mi aupurarafa Anutuna marira ququsaki keeqarana amanaikamma nimaqaannoo. <sup>6</sup> Anutufa nari andeeqara oosana maraseenoo inni aupurarana nimimariasa mina akiaqara nári faqa aupurarana nimianoo, innee mina ufasaara aupurarana maremariasa asoarana nimidanoo maasa faqa nimianoo. <sup>7</sup> Karaambaifa Yisufa innaarunaindari nari afeekafaqaa qangiroo namufaqa ida aurunamu faqa kooroira faasaana asoarana maasa nimiseenoo aupurarana misa nimianoo. <sup>8</sup> Miqimmandee kooroomafinoo Yisufa Anutunara sia irimariasa faqa maasa karaambaifa Yisuna amiqira fasaasa ufara nikoo nikaa imariasa narirana nimianoo. <sup>9</sup> Yisufa naaru naaru taikarana misa nimaqaa naaru naaru karaambaifa mariqooqari nianai naadumasaa maridaqa sia mina areenara afeeka qafeefaranoo. <sup>10</sup> Mi faasaanasaa Yisufa maasa faqa aiqama nari aiku asauku amooqirana irirara qumuannoo, aiqama mina ufa irimariasa naaquqarana faqa mararara qumuannoo. <sup>11</sup> Maasa mi ainainafa kambiqaaninnanara iriseeqa maqee maqee inni Teesaroonika maqusanaasara innaaru qidaqa Anutufa inni naundurani naakapaifaqa mina ufamau uqeerara aatata fimariafanoo minara qidaqa. Anutufa inni dadaaqinaqa inni marirafa nirafa uqeerara aana amana kai fuaqera innaaru qidaqa. Anutufa nari afeekannai innee Anutuna ufamau firanara amiqiranee qimariana anoonaikiani, innee mina saqarikira saika faqa anoonaikiani. <sup>12</sup> Innee miqifaqa aiqamausa inni andeeqarana qafamasee Yisuna auqu areenarana amooqifanoo Yisufa quandafi inni nimooqianoo, Anutufa faqa Anutuna asauku mundirafa karaambaifa Yisuna faqa kaqi afaariranannai maa ainainafa mariannoo.

## 2

*Manda fasiqa kambiqafinoo moomoosa nikaruqiannoo.*

<sup>1</sup> Doo maqee qinee Pauroosa Anutuna asauku mundirafa karaambaifa Yisufa innaarunaindari kaffaa qumiranara faqa maasa mina faqa moodaanaki suqu quqaranara faqa qimannimianara. Akaqausa minara doo gumi ifoo qiafaqa innee minara irisee furufariqa munari minari imariafanoo. <sup>2</sup> Karaambaifa qumira faasaanara doo aiqaganuu maqi qifaqa unna ufa qiaafoo qimasee sia dauni munuqi miniqira ufa irisee naundura dapikinaqa ninunuruuqa. Yafee moo fannoo mi ufana qimanniminoo fee, faiqi moo fannoo aqara ufa tamummaqasee qimanniminoo fee, amaana ufa qimannimimari fasiqafa unna qimasee qimanniminoo fee, faiqi moo fannoo unna qimasee maasara pasaki akara rumasee qimaqimi ifoo qinoo fee.

<sup>3</sup> Innee sia moo fannoo nikaru qinna ufana iriaqa. Yisufa qumira faasaana sia kaqi aniannoo maa ainainausa naaree kambiqafinoo qumuannoo. Taikara aukuaana adeedi rainaqa aiqama atinaindari faiqi anaasee firaqoo Anutuna ufa rukiaasee nariqa aatata fifaranoo. Mi aukuaana maqasaa manda fasiqa fannoo idaki fuaninafa kambiqaanoo. <sup>4</sup> Mi manda fasiqafa aiqama maaqanna maaqanna nariqa Anutunee qimaria ainainna faqa aiqama nariqa Anutunara innaaru qimamaqee mariana faqa kuqaa qimariana faqa unna qimariana faqa aiqama namuqaakama nimaqeenoo qaoo qiannoo.

<sup>5</sup> Qinee Pauroosa inni Teesaroonika maqusanaasa faqa maridaqa mi ainainausara inni qimannimifannana sia iridee auni fee. <sup>6</sup> Mandoosana maree mari fasiqanara maqee mi manda fasiqafa faqa narí mandoosana faqa kambiqaaqaa idanoo moo ainainara innee minara irimarianara maqee kari rafaqaqafidanoo narí aukuanasaa mi manda fasiqafa kooroo iannoo. <sup>7</sup> Mi manda fasiqana mandainaina fannoo doo maqee maqasaa fasiqa anaaseeki oosana arasee qumee saikidanoo sia maqee anoonaikannoo minasaa rafaqaqafimari ainaina Anutufa uqeera marainanoo kooroo iannoo. <sup>8</sup> Kooroo inanoo karaambaiqa Yisuna oosunda fannoo mi manda fasiqana kuqammaaruannoo narí areenarana kooroo iranannai faqa narí qumira faasaana mi fasiqana rakeekaama-sainanoo taikaannoo. <sup>9</sup> Mi manda oosana maree mari fasiqana oosana maqimminoo mariannoo, mifa Sadannana firaa afeeka namufaqa anireenoo oosana oosana ainainna faiqi sia auqaqaaqaa ira ainaina faqa unna qimasee narí auqu uqeeree mari ainaina faqa naaquqara ainaina faqa uqeerasee anoonara foora uqannifiqaannoo. <sup>10</sup> Mifa oosana oosana nikaruqira mandainaina uqannifiqainaqa naaru idaki taikeefandinausa minara kuqaa fee qimasee irifara, misa innaarunai asumu marira anoona ufara sia nidimarifaqa sia oonu irianara mina akiqara taikeefaranoo.

<sup>11-12</sup> Minara Anutufa kuqaa anoona ufara sia iri mariasa mandainainara asasi mariasa naruaninnaqoo mareeqee quqararee qimaseenoo moo maraquina aqara maraquina naakunnimaqainaqa mi maraquinafa misa naundurakai saikinaqa unna ufara kuqaa anoona ufee qifaranoo.

*Innee Anutuna areenaranaki mariaqera rusandeesamumaseenoo maranau.*

<sup>13</sup> Innee Teesaroonika maqusanaasa sia miqimariasa karaambaiqa inniara aidimarisa maasa doo inniara maqee maqee Anutufinnai dufi dufi qidaqammu. Anutufa narí maraquina afeekannai faqa innee anoona ufasaa mandaqaranannai faqa inni Teesaroonika maqusanaasa innaarunai asumu marirana faqa Anutuna narí faiqi anaasee kammafi mariaqera faqa oosana aroqooqari rusandeesamumasee inni maraanauree qimaqoofa maqee mareenoo. <sup>14</sup> Sia fifau inni mareenoo maasa amiqira fasaasa ufa inni qimannimifannana minannai innee Anutuna asauku mundirana karaambaiqa Yisuna areenarana raina nimiraree qimaseenoo inni maranau. <sup>15</sup> Oo qini qikaqaafasaa qinee minara irisee qimannimidaqa maasa ooqai inni faqa maridaqa nookiqari qimannimifannana anoona ufana faqa maqooqari pasaki akara rumannimifannana mi anoona ufana faqa innee mi anoona ufanaki mapukufinaqa afeekaikamasee kikiqammafi nisaukuki uaqee iaqa. Sia moo unna ufa iriaqa.

<sup>16-17</sup> Anutuna asauku mundirafa karaambaiqa Yisufa faqa maasa qikoofa Anutufa maasara aidi marifa narí kaqi afaarira oosankiqari naaru naaru paasoosirana faqa naaru kambiqaaninna ainainara asasammasee afeesirana faqa nimuqanda miqanda fannoo inni afeeka niminaqa andeeqara nirana marirana ufaqirana maraaqa, inni nimuqusaki sia Yisuna ufamau firanara naaquqarafa mariyani paasoosirana kai umbiqa nimiani.

### 3

*Pauroofa Teesaroonika maqannaasara nariara innaaruqiaqee qinau.*

<sup>1</sup> Qinee ufa qimannimiseeqa maa ufanannai taikaanaura. Innee Teesaroonika maqusanaasa maasara maaqi qimasee innaaru qiaqa. Maasa karaambaiqa ufa qimannimifanaqa inniki anoona kambiqoondée kai aiqama anaamurunni miqi kai mafinoo dauni daraaninoo anoonaikiani.

<sup>2</sup> Kafa maaqi qimasee maasara innaaru qiaqa, Anutufa maasa manda fasiqauqa nisaukukinaana rafiqaini sia aiqama maqannaasa Yisuna ufa iridammia.

<sup>3</sup> Karaambaiqa fannoo sia miqi marifa amiqimmasee rakisimarifa afeeka mapukirana nimiseenoo aakaqaqindaraa fasiqasaa ititannimaqaannoo. <sup>4</sup> Karaambaiqa fannoo inniara maasa nimuna asoosana nimidanoo innee maqee faqa kasooqaaqee faqa sia manda iriramau fifaranoo maasa qimannimira ufamau kai andeeqasee fifaranoo. <sup>5</sup> Karaambaiqa fannoo Anutunara nidirana inni nimuqusaki quqaani. Anutuna ufamau nimandakufi maqee maqee firana Anutuna asauku mundirafa inni naunduraki quqaani.

*Kadaapi rumasee inneeqa narainaina maraaqee qu ufafa.*

<sup>6</sup> Oo maasa qikaqaafasaaqaa maasa Anutuna asauku mundirana karaambaiqa Yisuna auqu ramasee inni naaquqama nimaqaidaqa, inniki kudoosaapee mariasa innee sia misa naaqa mariaqa rufisee nianai mariaqa misa sia maasa naamuqaira ufamau fimariasa maridaqammia. <sup>7</sup> Innee maasa oosana qafeeusa mariafanoo, maasa inni faqa maridaqa sia kudoosaaparausa mariqiafana innee maasa oosanamau kai fuaqaana innee minara irimariafanoo.

<sup>8</sup> Maasa inni faqa maridaqa sia moona narana maaqa marirana kaqi maree mariqau, feefaurumasaidaqa maree mariqiafana. Maasa inni narainaina kaqi naanoo qimasee eendaki faqa faasaana faqa kadaapi rimariafana tooqaamu darusoofaqa mi narainainna akiaqara imariqau. <sup>9</sup> Maasa inniara iriseeqa miqi qiqiafana, innee mi oosanna qafamasee mi mau kai fuaqeera kadaapiriqiafana, innee narainaina kaqi qimifanoofau amana kai andeeqanoo mariqini, maasa Yisuna ufa qimannimifannana akiaqara marini, innee maasa funnamau fuaqeera kadaapiriqiafana. <sup>10</sup> Maasa inni faqa maridaqa maa ufana qimannimifannana kafaa kafaa qimannimidaqa, faiqi moo fannoo sia ainainifa narana faqa sia naannoo.

<sup>11</sup> Maasa sia fifau inni qimannimidaqa inniki fooroopi mariasa marianara iriseeqa qimannimidaqa misa sia nariqa ainaina imariasa kaqi moosa ainaina deedeepi mariasa marianara iridaqa. <sup>12</sup> Anutuna asauku mundirana karaambaiqa Yisuna auqu ramasee mi fasiqausa fooroopi mariasa naaquqama nimaqaidaqa misa andeeqara mariramau fidaqa nariqa narainaina kadaapirumasee maraaqa.

<sup>13</sup> Qini qikaqaafasaa innee andeeqasee nimariasa faqa qimannimidaqa. Innee inneeqa amiqira nira marira oosana maree mariana sia nikoo nikaamasee minnisaaqa kaqi kai fuaqa. <sup>14</sup> Innee maa akarana asaana rimarifaqa akaqausa mi ufana rukiee mariasa marifaqa innee rufiasee nianai marifaqa misa nisaurirana maraaqa. <sup>15</sup> Sia misa namuqaakama nimaqaaqa nikaqaafaasara foora naaquqama nimaqaaqa.

*Pauroofa doo taikarufa qimaqoofa.*

<sup>16</sup> Karaambaiqa nari kai naundurari asooarana oosana marifa aiqama kari oosana oosana mariranaki inni faqa naundura asooarana nimiannoo. Karaambaiqa inni aiqamausa faqa mariani. <sup>17</sup> Faiqi moo fannoo qini maa ufana akara rumasaifaqa qinee qeeqa qisaukunnai maaqi qimasee rafaqaqafidaqa. Qinee Pauroosa inni nimandaqidaqa. Innee maa akaranara moonaindi fee qifooru aiqama papiqa akara rumasee qeeqa qisaukunnai rafaqaqafidaqa. <sup>18</sup> Anutuna asauku mundirana karaambaiqa Yisuna afaarirafa inniki mariani.

## 1 TIMOOTI Timootina indaaru rumamaqoo akarafa.

<sup>1</sup> Oo Timooti anee kumaaraa marianafa anee qini qimaakuara foora mariananoo. Qinee oogai ani qimamafannana aninna irirafa qufana Yisufinnai quandoona Anutufa faqa nari asauku mundirafa Yisufa faqa maasa asumu maroofa maasa minasaa mudi marunafa mifa qini mara quqaqoosa minara asauku mundirafa Yisufa nari ainainia-neera maqasaa fasiqa diqiqoosa maa papiqana qinee Pauroosa ani akara rumamaqeeqa.

<sup>2</sup> Oo Timooti maasa qikoofa Anutufa faqa maasa karaambaiqa asauku mundirafa Yisufa faqa ani dadaaqiaqa, misa nariqa nifauarana ani amiaqa. Misa ani aundura asoarana faqa amiaqa.

*Pauroofa unna amaana ufa qimariasara Timootina aaquqimamaqoo ufafa.*

<sup>3</sup> Oogai qinee Maseedoonia maaqa maqai fiqa aniara Efeesusa maqusaki mariannee qiafannana maqee faqa miqi kai iqa miqoo mariannee qidaqa. Efeesusa maqusaki mariasa akaqausa fuka unna amaana qimari ufana faiqi anaasee qimannimi mariasa mariafaqa minara anee qaoo qianneera miqoo mariannee qidaqa.

<sup>4</sup> Anee maaqi qimasee qaoo qia. Misa nari uriuqa minnisaafa misa nari nikeeku nikaaku nifaqnausa nifasaasa qimammaree kisaqasaa fimariana minnisaafa. Miqi qimaria ufafa ufa rainarana tinoorirana kai uqeeraidanoo sia Anutuna marirafa nirafa maasaki marina dadaaqidanoo. Anutufa maasara maaqoo fuannaanna sia mi manda dapi ufanannai paqurianaura maasa nari irirana Yisunasaa rusiranannai kai fuanna aanna paqurianaura.

<sup>5</sup> Sia fifau mi unnana qimariasara qaoo qiannee qidaqa faiqi anaasee miqooqaraasa Yisunasaa rusirana sia unna qiaqa kuqaa kai qiaqa, kuqaa anoona uqannasaa mundusee fiqa nari nifaqa qumaararana siaisa aufadamasee nidaqa nari naunduraki ikairi siaisa nidaqa mi qaaramoo ainainakiqari faiqi anaaseera nimuqusirana rirafa kambiqaidanoo. <sup>6</sup> Faiqi anaasee akaqausa mi anoona ainainakiqari quandakiqa fifau fafafu qira ufa nari qimami nari qimami qianannai nariqa ninaakusamarara kaqi runna fimariafanoo. <sup>7</sup> Mi unna amaanna qimariasara paasoosamandee nari faqa sia irimaria ainainnara faqa ufara faqa kaqi paasoosamasee kaqi qimannimidaqa kafa nariara Anutuna sandufa qimannimi marunaasee qidaqa aaqaidaqa.

<sup>8</sup> Anutuna sandufa Mooseenasaaqari qimannimu ufafa amiqira ainaina maridanoo. Faiqi anaasee mina andeeqasee irifanoo amiqira ainaina mariannoo. <sup>9-10</sup> Maasa oosana oosana sandufara maaqi qimiriidaqa. Sia amiqira fasiqa anaaseeruu maridau, ufa rukiee mariasara maridanoo Kaamanna ufa rukiee mariasa faqa Anutuna siaisa faqa Anutuna ufa rukiee mariasa faqa sia Anutunara irimariasara maqasaa ainainara kai irimariasara nari ninausa nikausa kuqa narimariasara faqa faiqi anaasee kuqa nari mariasa faqa faiqi anaasee narinni narinni qummuari mariasa faqa faiqi fannoo aqoonna fasiqa aafeeqara oosana faqa anaasee fannoo aqoonna anaasee aafeeqara oosana faqa faiqi aanaaqi qummuari mariasa faqa unna ufa qimariasara faqa siaasa ufa irimarinaki mafi nari kai raqaseenoo moonara unna ufa qimariasara faqa aiqama anoona ufa rukiee mariasa faqa mi aiqama mandoosanna maraqa nuasara misara kai Anutufa nari sandufa misa qaoo qimaseenoo quqasoofanoo maridanoo. Misa nimaarusira sandufa quqasoofanoo maridanoo, sia mi aqara oosanauqa maree mariasa kaifau nimaarusidanooqafuu oosana oosana ainaina Anutuna mapukira ufa rukiee mariasa faqa nimaarusidanoo.

<sup>11</sup> Mee Anutuna mapukira ufa qunnana mifa maasa Anutuna amiqirana mina areenarana kooroo idanoo. Mina amiqira fasaasa ufa amana kai mi ufafa maridanoo. Mi fasaasa ufana Anutufa qinisaa quqasee anee Timooti qimannimiannee qu ufafa maridanoo.

*Pauroofa Yisunara nari mandoosanara afauoonara dufi dufi qu ufafa.*

<sup>12</sup> Qinee mi saikanaki nimariafananoo maasa karaambaiqa asauku mundirafa qini ainainirana amana kai qimunara dufi dufi qidaqa. Mifa qiniara mi ainainirana amanaikammi ifoo qimaseenoo mara quqaqaisa maridaqa minara faqa maasa karaambaiqa asauku mundirana Yisunara dufi dufi qidaqa. <sup>13-14</sup> Oogai indaaru qinee Pauroosa Yisunara mandufa qimariafanausa mina ainainimaru fasiqausa naru nifaqaa iqa niniaafanausa Yisuna faqa aquraraafanausa maridaqa. Anutufa qiniara sia Yisunara iridanoo fee qimasee sia nari mandoosanara iridanoo fee qimaseenoo sia qini darinoo, qini qifauamaseenoo nari afaairana qinisaa nammariara foora adiaseenoo minasaa qeeqa irirana Yisunasaa rusirana faqa faiqi anaaseera qimuqusirana faqa qiminuu.

Maasa aiqamausa asauku mundirana Yisunaki keeqee mariasa mi nimimaria ainainnaqanda Yisunasaa irirana rusirana faqa faiqi aanaaseera qimuqusirana faqa mi qaara ainainnaqanda qiminau.

<sup>15-16</sup> Maa ufana anoona ufa maridanoo qumaree iri maria ufafa maridanoo asauku mundirafa Yisufa manda oosana maree mariasa asumu maraane qimasee quminau. Qinee Pauroosa mi mandoosanna uriqararasa mariafanano Anutufa sia qini darinoo qifauanau. Asauku mundirafa Yisufa nari kasoomambi qini qifiqaranara firaana firaqoo koorooianifeera mandoosana uriqararasa qini qifauanau. Miqimaseenoo Yisufa qini mareegeenoo akoogoo quqasoofaqa naaru kasooqagee Yisuna mandaqagee naaru marirana maree mariasa qini kikiqususaidanoo qini mandoosana uriqaranoo maruna ririmma qifauamaseenoo minni qisanau. Innindi oorudupinoo maridanoo mina mandaqasaifanoo kaqi inni faqa maraanauree qinau. Qinee minara irisee amooqira ufa maaqi qimasee qianaara.

<sup>17</sup> Naaru naaru mari kaaambaiqafa sia kuquaninafa maasa sia mina qafee marunafa moodaa Anutufa sia mao fannoo marifa uriqararana faqa areenarana faqa naaru naaru minaindi mariannoo.

<sup>18</sup> Oo Timooti anee qini qimaakuara foora marianafa. Qinee maa ufana anisaa quqaidaga. Ooqai tamumqara fasiqauqa qimaqoofa ani qimamira ufa mi mau fidanoo. Ani ainainrafa andeeqara rakiara foora imariannana qini ufa fannoo ani duru feefara foora inoo mariannoo. <sup>19</sup> Amiqira rakirana rakidana ani Yisuna saqarikirana uaqeela, afaaqa qumaara rarana siaina mina faqa uaqeela. Faiqi akaqausa nari naaqoo irirafa qimannimifaqa andeeqasee fidaqa misa nari Yisuna saqarikira irirana munu furufaramaseeqa kurididaqa. <sup>20</sup> Qaara fasiqa Qimeenaeeusafa faqa Areekisandeerafa faqa miqandaqara miqi marufaqa qinee mareeqee Sadanna asaukuki quqaafanaqa misa Anutunara mandufa qirana taikaaqeeera quqaqifana.

## 2

*Pauroofa Yisuna ufara suqinnanaki maaqi qimasee innaaru qiaqee qinau.*

<sup>1-2</sup> Maa ainainna naaree ani aamuqimamisaanana anee faqa Yisuna ufara suqimari-asa faqa suqidaqa innaaru qidaqa maaqimasee innaaru qiaqa. Maa maqanasaa faiqi aanaaseesaa rakisinnimaqee marisara misa amiqimasee rakisinnimaqaaqeeera innaaru qiaqa. Innee kaqigeesa reendeenamasee asoaranaki mariaqeeera misara innaaruqiaqa. Anutuna ufamau fidaqa andeeqara mariranaki mariaqeeera aupuraranaki sia mariaqeeera misara innaaruqiaqa, innee maqee maqee aiqama fasiqauqara faqa maa maqanasaa firaqoo uriqararasa faqa kaamanna uriqararasa faqa Anutuna afusaa Anutufa misa dadaqianifeera innaaruna qiaqa. Misara faqa dufi qirana qiaqeeera qidaqa. <sup>3-4</sup> Misara innaaru qirafa amiqira oosana maridanoo Anutufa maasa asumu marifa minara aididanoo. Mifa aiqama fasiqa anaasee asumu mariranaki ani mariaqeeera qidanoo anoona ufamau fuaqeeera qidanoo misara innaaruqira oosannara Anutufa aididanoo.

<sup>5-6</sup> Moodaa Anutufa kai maridanoo moodaa fannoo kai nari Anutuna faqa faiqi anaasee faqa mara moodaanakikamma nimaqaidanoo. Mi fasiqafa Anutuna asauku mundirafa Yisufa maridanoo faiqi anaasee oonu kafaa marasee nariki quqaanifeera nari afaaqa kuqiranaki quqanau. Maasa mina qafamaseeqa maaqi qidaqa. Oo Anutuna nari aukua maridanoo. Oo mifa kuqaa aiqama fasiqa aanaaseera asumu mariranaki mariaqeeera miqidanoo. <sup>7</sup> Minara faqa qini Pauroosa qeeqa maqusaindari diqiqamasoofaqa qinee aanaamuru aiqama uqannifiqaidaga Yisunasaa irirana rusirana anoona ufa faqa qimannimidaqa. Qinee sia unna qidaqa anoona ufa kai qimannimidaqa.

<sup>8</sup> Yisuna ufara suqimarianaki faiqiara qinee maaqi qimasee naamuqidaqa. Aiqaamai maria fasiqausa aanooqirana siaina, ufa rainarana siaina, nari nisauku anukarasa uqeerasee innaaru qimariasa nari marirana nari nirana minauqara Anutunaindi fee qiaqeeera, aiqama fasiqara miqi mariasee innaaru qiaqeeera qidaqa.

<sup>9</sup> Anaaseera qinee maaqi qidaqa. Aiqama nari nifaaqai mari sira qamunnana amiqimasee nari nifaaqa aanaamususee irirana faqaasaikamambi mariaqee qidaqa. Sia kaaqa firaqoo oosana oosana ainaina nifaaqa auquqa. <sup>10</sup> Niqoonausa dadaqirafa mifa inni nifaaqa auqirafara foora mariani. Anutuna ufa irimaria anaaseesa andeeqara oosana miqiminoo maridanoo. <sup>11</sup> Yisuna ufara suqimaria maqanaki keeqaifaqa anaasee ufa siaina reendeenamandee Anutuna ufa iriaqa. <sup>12</sup> Yisuna ufara suqimaria maqanaki aanaaseeqa sia kikiqa mafqa Anutuna ufa qimannimifaqa. Misa sia faiqi urinaaqarama mariaqa qinee mina qaoo qidaqa misa ufa siainausa mariaqee qidaqa Yisuna ufara suqimaria maqanaki miqiaqee qidaqa. <sup>13</sup> Anutufa Adamana naaree auqeenoo

doo mina inaaqianna Eeuana auqinau. <sup>14</sup> Sadannafa sia faiqi akaruqinau, anaasee kai akaru qimasoofooano Anutuna ufa rukianau. <sup>15</sup> Doo maqee Anutufa sia aiqama aanaaseeuqa mina akiaqara naru taikaannoo faiqi maqaranasaa marifaranoo. Misa nari nifaaqa amiqimmandee aanaamususee maridaqa Yisunasaa irirana rusiseeqa mariaqa faiqi aanaaseera amuqusamasee mariaqa qikairi siaisa anukarausa mariaqa. Miqidaqa noori kandamasee maridaqa kaqi marifaranoo.

### 3

*Pauroofa Yisuna ufara suqimarinausaa rakisirausara naakapamaqoofa.*

<sup>1</sup> Maa ufana anoona ufa kai qinee Pauroosa qimannimianauro. Faiqi moo fannoo Yisuna ufara suqimariasasaa rakisiraree qimarifa amiqira ainainammiannoo.

<sup>2</sup> Yisuna ufara suqimariasasaa rakisimari papatarafa nari nirana marirana sia aaqarafa mariannoo andeeqarafa marida andeeqasee rakisianoo. Miqimarinna fasiqafa moodaa anaasee faqaafa kai mariannoo. Mifa oori runusee marifa mariannoo. Nari aakiranara iri marifa mariannoo. Nari gumiasana aina faqa marirana faqa andeeqasee quqeemarifa. Mi fasiqafa Yisuna ufara suqimariasasaa rakisiranaiki mari fasiqafa aanaamuru maqee maqee mina maqusaki aniraafanoo amiqi amiqidanoo nifqa nari maqaki quqasaida narana firidanoo. Mi fasiqafa Anutuna akarakinaa ufa andeeqasee qimannimi marifa mi oosanausa maree marifa Yisuna ufara suqimariasasaa rakisirafa amanaikiannoo. <sup>3</sup> Mifa sia nammari namasee furufaridanoo marifa faiqi anaasee sia nari marifa mariannoo. Mifa fifira oosana reendeenira oosana kai rimarifa mariannoo. Mi fasiqafa sia kaaqa munnimara rimari fasiqafa mariannoo. <sup>4</sup> Mifa nari faiqi aanaaseera amiqimasee rakisinnimaqee marifa maridanoo. Mi fasiqafa nari faiqi namuara qimannimifaqa eedoo qimasee reendeenamandee auqee marinausa mariaqa. <sup>5</sup> Mi fasiqafa nari faiqi anaasee sia amiqimasee rakisinoo naqimaseenoo fee Yisuna ufara suqimaria maqanaki keeqee mariasasaa rakisianoo fee.

<sup>6</sup> Yisuna ufara suqimariasasaa rakisiranaiki mari fasiqafa sia fukasaa Yisunasaa irirana rusimarina mara quqaa. Miqimari fasiqafa dauni nari oori uqeerasee nari afaaqa mara maree uridanoo amooqinoo dauni aaqaranaki aqufuandoora. Ooqi Sadannafa innaarunai miqimarunara Anutufa ateekanau. Maa fuka fasiqafa Yisuna mandaaqarana miqi kai inoo Anutufa ateekaandoora. <sup>7</sup> Yisuna ufara suqimariasasaa rakisiranaiki mari fasiqanara Yisuna ufara sia irimariasaa faqa minara amiqira fasiqee qimariafa mariannoo. Miqi qimaria fasiqafa sia Sadannana namufaga moodaa madikaki aqufinoo asauruannoo. Doo Yisuna ufara suqimariasasaa rakisimaria fasiqausa oosana doo miqiminoo mariani.

*Pauroofa amaanusasaa rakisimarusa dadaaqimariasara qinau.*

<sup>8</sup> Doo qinee Pauroosa amaana maqasaa rakisirausara qimasee doo maqee misa oorreqara dadaaqirausara qianauro. Amaanusasaa rakisirausa dadaaqimariasara misa marirana nirana andeeqasee noori runusee mariasa mariaqa. Misa faqa sia nammari namasee furufariaqa. Misa faqa sia kaaqa ainainara rimarinausa mariaqa. <sup>9</sup> Misa akarakinaa Anutuna ufa qumareeqa mi mau fidaqa sia nifaaqa umaararaanifeera aufadaqa mariaqeeera mariaqa.

<sup>10</sup> Dadaaqimaria fasiqausa sia kaqi mareeqee dadaaqiranaki quqarafa mariaqa. Misa amanasee qafeenana kai mareeqee dadaaqira saikaki quqaa. <sup>11</sup> Dadaqi maria fasiqausa ninaaqmaaka faqa marirana nirana andeeqasee maridaqa sia munuqi miniqi qimariasaa marifaranoo. Mi anaaseesa noori runusee maridaqa anoona ufa kai qimariasaa mariaqa. <sup>12</sup> Yisuna ufara suqimariasaa amaanusasaa rakisirausa dadaaqimarifa moodaa anaasee faqaafa mariani nari faiqi anaasee amiqimmandee rakisimari mi saikanaki mariani. <sup>13</sup> Amiqimasee kisaagasaa papatara saika auqaaqaa fimariasaa aiqamausa nifusaa uriqararana maridaqa miqidaqa, misa asauku mundirana Yisunasaa irirana rusirana atukarasee mapukirana maridaqa.

*Anutuna kukeeqara ufa anoona Yisufa firaafa maridanoo.*

<sup>14</sup> Qinee Pauroosa maa papiqana akara ridaqa qusasaa inni oonu nindafararee qidaqa. <sup>15</sup> Moo ainaina fannoo qini rafaqaqfimarifaqa maridaqa maa papiqanakinaafa inni Anutuna aiku asaukuki nirana marirana naamuqaqianoo. Anutuna ufara suqiranaki keeqee mariasa misa Anutuna amaana maqara foora maridaqa. Anutuna anoona ufa faakana maridaqa.

<sup>16</sup> Maasa Yisuna ufa irirana anoona ooqaindari kukeeqara ufa marifa Yisufa idaaqirafa firaafa maridanoo, sia amana moo fannoo minara qaoo qirafa.



Yisufa maqasaa fasiqa nifiri kammafinoo koorooinau. Anutuna maraḡuna fannoo minara andeeqarafa maridanoo fee qinuu. Qangirooḡa mina qafaḡau. Faiḡi moomoosa maaḡanna maaḡanna minara qimannimiḡau. Maa maḡa maaḡanaki marusa minara kuḡaammifoo qiqau. Anutufa mina mareeqeenoo innaarunai kuḡaḡoofanoo maridanoo.

#### 4

*Pauroofa kasooḡaqee aaqarufa kambiiḡaannoo fee qimaḡoo ufaḡa.*

<sup>1</sup> Anutuna kaaḡa andeeqara maraḡuna fannoo kasooḡaqee kambiiḡaaninna aukuanara maaḡi qimasee akooḡoo firaḡoo koorooidanoo. Mi kamuḡoo akaḡausa Yisunasaa irirana rusiranasaḡari rakeemaki unna qira afaanna ufa irifaranoo akaḡausa afaanna uḡanna ufamau fifaranoo. <sup>2</sup> Unna qimaria fasiḡausa kai mi unna ufausa faiḡi anaasee Yisuna ufana suḡimariasa qimannimiḡa nifaranoo. Mi unna qira fasiḡausa nāri mandoosanara sia qumaara naridanoo nariḡa naaḡoo irirana doo ida fannoo narinoora foora inoo marifaḡa sia ummaara narifaḡa nisaurifara.

<sup>3</sup> Miḡi maria fasiḡausa unna qimasee anaasee mararanara mandoosanee qimasee akaḡa naranara manda narana sia naaḡee qifaranoo. Anutufa mi oosana oosana narannara faiḡi anaasee naaḡeera auḡu kuḡaḡoofa maridanoo. Mina ufa irimariasa mina anoona irimariasa dufi dufi qimasee naaḡeera kuḡaḡoofa. <sup>4</sup> Anutuna aiḡama auḡu kuḡaḡoo ainainna aiḡama amiḡirafa kai maridanoo sia amana moo naranara mandaikira fee qianaara. Aiḡama ainaina innaaru qimasee dufi dufi qimasee naaḡa. <sup>5</sup> Anutuna ufa faḡa maasa innaaru qirana faḡa mi naranna nukamasainanoo amiḡinoo mariannoo, Anutufa amiḡiranee qiannoo.

*Pauroofa Timootina aakapeenoo andeeḡasee fuanee qu ufaḡa.*

<sup>6</sup> Oo Timooti anee asaku mundirafa Yisuna amiḡira ainainira faiḡi maridana mina ufa irimariasa ani akaḡafasaaḡu qini maa ufausa qimannimia. Yisunasaa mundira ufa faḡa mina anoona ufa faḡa ani ooḡai mi ufanasaa fidana innooḡana marianafa mariananoo. Miḡidana qini maa ufausa aneenna akaḡafasaaḡu qimannimia.

<sup>7</sup> Fifau uri qirana maa maḡanasaaḡaraa uriuḡaki sia minaki aḡufua nianai tati-aaḡa, fifau ufa. Anee Anutuna dadaaḡidana rakiranakiara foora mariananoo minara maḡee maḡee aununu rakisiara foommasee amanamasee qafamasee afeekaikia. <sup>8</sup> Maa maḡanasaaḡaraa amudaani maḡee maḡee afeekaikamasee amanamasee qafarana kaḡikaḡoo maa maaḡanasaa kai amana maridanoo aneenna aundurakinaana maḡee maḡee afeekaikamasee amanamasee qafarana firaḡoo amiḡirafa maridanoo, mifa maḡee marirana faḡa naaru marirana faḡa amidanoo. <sup>9</sup> Mi ufaḡa anoona ufa maridanoo minasaa mundimariafa maridanoo. <sup>10</sup> Minara kai maasa kadaapirida nimudaanai qidaḡa. Maasa qiqaa qimuḡusakinaa irirafa kaḡi marira Anutunasaa mafi munduseeḡa. Mifa aiḡama fasiḡa anaasee asumu maree marifa maridanoo, mina ufasaa rusimariasa kuḡaa misa asumu maree marifa maridanoo.

<sup>11</sup> Mi ufausa amiḡimasee faiḡi anaasee naamuḡaḡa. <sup>12</sup> Oo Timooti anee kumaaraa mariananoo minara faiḡi anaasee irisee sia ani ufa irifoora maa ufana ani qimamidaḡa. Aneenna ufa faḡa aneenna nirana faḡa aneenna faiḡi aanaaseera amuḡusirana faḡa aneenna Yisuna saḡarikirana faḡa aneenna andeeḡasee marirana faḡa amiḡimasee andeeḡasee akooḡoo marinaaḡa qafeeḡa faiḡi anaasee Yisuna ufa irimariasa ani afaḡaidaḡa ani aanna raaḡeera. <sup>13</sup> Oo Timooti qinee anee inannai kasooḡaqee fuanaura. Anee qini qifeesidana maḡee maḡee faiḡi anaasee aiḡamausa nifusaa Anutuna akarakinaa ufa asaana rumasee mina oosana kooroomannimisee mi mau fuaḡee qimasee fuki faaki qia.

<sup>14-15</sup> Ooḡai Yisuna ufara suḡimarusasaa rakisirausa ani sindimeera foora kuḡamaḡeeḡa nisauku ani afaaḡai kuḡasee ani afaaḡooḡa qiqaa Anutuna maraḡuna fannoo afeeka moo amuna afeekaikamasee amanamasee qafamasainaa aiḡamausa aniki doo maridanoo fee qiaḡa. <sup>16</sup> Aneenna nirana mariranasaa faḡa aneenna faiḡi anaasee ufa qimannimiraanasaa faḡa rakisia. Qinee qimamunna ufamau andeeḡasee finana ani nirafa marirafa andeeḡasee marinana anee aneenna faḡa ani ufa irimariasa faḡa asumu mareennaranoo.

#### 5

*Pauroofa Timootina aakapeenoo faiḡi anaasee firaasa adeedaana anaaseeḡu faḡa andeeḡannisaannee qu ufaḡa.*

<sup>1-2</sup> Oo Timooti anee Yisuna ufa irimariasa faḡa maridana sia faiḡi firaasa ufa arua. Faiḡi firaasa ani akasara foora marifana reendeenamandee ufa qimannimia. Kumaaraaḡu faḡa aneenna akaḡafasaaḡa foora kai ufa qimannimia anaasee firaasa faḡa aneenna

anausara foora amiqimasee kai ufa qimannimia. Maanaaqa aanaaseeuqa faqa aneenna asooqmaakara foora andeeqaseenana kai misa faqa ufa qia.

<sup>3</sup> Adeedaana aanaaseeuqa misasaa rakisi mariasa sia marifana anee Yisuna ufara suqimariasaa qimanniminaqa miqira adeedaanaugasaa andeeqara rakisira rakisinni-maqaaga. <sup>4</sup> Adeedaana aanaaseeuqa marifanoo nári ninaiqimara faqa faiqi namufaqa marifana anee qimanniminaqa misa quandafi nári ninausa nitaatoosamara amiqimandee rakisinnimaqaaga. Anee miqidana maana faqa qimannimia, misa Anutuna ufamau fidaqa indaarugaa ainaina mifa mariannoo. Misasaa dadaaqamannisaidaqa nári ninaukoo kadaapi akiaqara nimimariafanoo. Anutufa faqa mi oosannara aqara raidanoo. <sup>5</sup> Adeedaana anaasee moo fannoo maridanoo. Anutuna dufi dufi qidanoo maridanoo minara kai dadaaqiannee qidanoo innaaru qidanoo. <sup>6</sup> Adeedaana aanaaseeuqa oosana moo aaqaidaqa maridaqa nariqa nidimari ainannara kai qiganuasauqa maridaqa misa doo kuqiqa maridaqa miqiqa nidaqa. <sup>7</sup> Anee mi adeedaana anaaseesara qimanniminaqa andeeqasee mariaqa munuqi miniqi qiqani foora.

<sup>8</sup> Mi ufana aiqamausa qimannimia. Maa ufana faqa qimannimia. Moo fannoo Yisuna ufa irimarifa nári aiku asauku faqa nári afaaqasaa aiku asauku faqa narana faqa qamunnaina faqa sia rakisinoo sia dadaaqinannai nári miqinannannai Yisufa saqarikirana nári ateekeenoo aamina fasiqa mandoosana finnaaqaramasee mareenoo miqidanoo.

<sup>9</sup> Oo Timooti ani Yisuna ufara suqimariasasaa rakisirausa mariasa maridana adeedaana anaasee asooqauqa misa náriara naaduma aanaaseesaa rakisiranaiqiqa mariaqa. Sia kaqi qee adeedaanauga mi saikanaki mara quqaa, qaara moo fasiqa niku nisauku taikasee aukana (60) maraqaasa adeedaanaikida asooqaqee mariasa kai mi saikanaki quqasaina maria. Moodaa fasiqasaa amundoo adeedaanafa kai minaki mariani. <sup>10</sup> Mi anaaseefa ooqai afaari marufa marinnana mifa kai minaki mariani nári faiqi namu amiqimasee firimaru aanaaseefa marufa mifa kai mariani, aanaamuru dapi aanaamuru amiqimandee rakisarufa faqa Anutuna ufa maqusa maqusa nida qimannimimarusaa faqa narana maaqa nimimarufa oosana oosana mandainainaki aqumimarusaa dadaaqimarufa, oosana oosana amiqira ainaina eedoo qimasaida auqee marufa miqi maru anaasee asooqausa kai rakisirausaikiqa.

(Mi asooqa adeedaanausa saika Timootina aukana maaqimminoo marinau. Misa fuka anaasee nári nifaagumaaka faiqi namu rakisiaqera qimannimidaqa naakapee mariqau. Aaqamaki kaqirunna fusa andeeqeeqeenoo Anutuna aanai ubeekee mariqau. Mandainainaki aqufusa andeeqasee Anutuna ufa naakapee mariqau.)

<sup>11</sup> Oo Timooti sia kumaaraa adeedaana anaasee maramaree anaasee rakisiranaiqia. Kumaaraa anaasee kaifaa faiqiara riqa asauku mundirana saika nimina minnisee foora.

<sup>12</sup> Misa asauku mundirana saikaki marianauree qima afeekaikamasoona ateekeefoora.

<sup>13</sup> Kumaaraa adeedaana anaasee moomoo suanisaa maaqakiqa fifau nimariafanoo ainainira aukana ainnaaqaree marisa mariafanoo. Misa miqiqa nidaqa manda uriqarara irirana marasee unnuva munuqi miniqi qiqa nidaqa sia qiaqaa ufa qiqa nidaqa. <sup>14</sup> Oo Timooti qinee Pauroosa kumaaraa adeedaana aanaaseera maaqi qidaqa, misa andeeqasee mariaqera. Misa kaifaa moo fasiqa marasee faiqi minasaa maqasee nariqa faiqisaa rakisida andeeqasee mariaqa. Misa miqi marifanoo maasa namuqaa Yisuna ufara nikoqee marisa maasaki randasee sia mandoosana paqurimasee mandufa uqeeraqa. <sup>15</sup> Akaqa adeedaana aanaaseeuqa Anutuna ufakiqari rakeemaki Sadannana afaqee doo fia.

<sup>16-18</sup> Yisuna ufara suqimariasaa misa rakisirausa akaqa adeedaana anaasee naunannaasaa saiasasaa rakisifaranoo, akaqa adeedaana aanaaseera naunannaasaa faqaasasaa sia rakisiraree qidaqa. Mi adeedaanausa nári naunannaasamara nifiqa quqasee rakisifaranoo. Miqifanoo Yisuna ufa suqimariasasaa rakisimaria rakisirausa sia mi umaarana maraaqera.

Doo adeedaana anaasee ufa taikasee kaifaa Yisuna ufara suqimariasara qianaara. Anutuna tamummaqara fasiqa ooqai marusa akaraki ainaini mariasara qidanoo purimakau kikiqusidanoo maaqi qidanoo.

Innee inneeqa purimakau mara maree raisa adi fooqaana nári aikunnai rafarimarinaqa sia naani fee qimasee oori aanaamususaifanoo kaqi nuannoo, innee sia miqiqa akaqana naidanoo afaqa اساسimarinanoo rafariani fee qimariqau.

Mi tamummaqara fasiqausa akara minara kafia maaqi qidanoo.

Ainaini mari fasiqafa nári ainainimarina akiaqara feefauru maraannoo fee qidanoo.

Timooti Yisuna ufara suqimaria maqanaki keeqee mariasa miqi kai iaqera qidaqa.

Yisuna ufara suqimariasasaa rakisirausa amiqimasee Anutuna saika uqeeree mariasa Anutuna ufa kadaapi rumasee asaana rumasee fuki faaki imariasa Yisuna ufara suqimariasasaa ufa amana kai feefauru nimia fiqaramasee aabaara faqa nimia.

<sup>19</sup> Faiqí moo fannoo Yisuna ufara suqimariasasaa rakisiranara anireenoo mi rakisiranara aqaaidanoommifoo qinaqa sia mi moodaa fasiqana ufa iriaqa, nari'ara qidaqinoo. Faiqí qaraqanda fee qaaramoo fee aniree minara qifaqa mina irisee andeeqaaqa.

<sup>20</sup> Yisuna ufara suqimaria maqanaki keegee marifa manda oosana marainaga aiqamausa nifusaa minara qaoo qidaqa ufa qiaqa. Miqimasaifaqa aiqamausa rufiasee sia miqifaranoo.

<sup>21</sup> Oo Timooti qinee Pauroosa Anutuna faqa asauku mundirana faqa naaquqara qangi-rooqqa faqa misauqa nifusaa qinee doori kandamaseeqa ufa ani qimamianaaura. Qinee maqee maa papiqanakinana ufa qimamunnana amiqimmandee mi mau kai fidana Yisuna ufara suqimariasasaa rakirausa nariqa saika amanakai feefauru nimisee andeeqasee nari aqarana aiqamausa nifusaa koorooia. Sia moonara qiqoondifee qimasee mina aaqarana kukeeqaisaa, sia moonara aamoondi fee qimasee minaindi akoooro maisa. Aiqaama misoo maasoo moodaanaki kammasee rakisinnimaqaa.

<sup>22</sup> Anee sia dauni faiqí moo mareeqee Yisuna ufara suqimariasasaa rakisira saikaki quqasee sindimeera foora quqamaqaa. Anee sia moosa mandainainaki aqufua, ainna marirafa ainna afaaqa anukarafa kai mariani.

<sup>23</sup> Timooti anee aranandaki maqee maqee aurimariananoo qinee minara irisee ani qimamidaqa, anee nammari uqanna kai maqee maqee neemariananoo anee sia mina kai naa, maasa maqee maqee neemarunnana uainna nammarina reendenimarina mina kaqikaqoo namasainanoo aurirafa taikaani.

<sup>24</sup> Faiqí akaqausa misa mandainaina fannoo aiqamausa nifusaa akooqoo maridanoo. Miqira mandoosana fannoo nari nifusaa akooqoo misa rarisameegeenoo mandainainaki quqaidanoo. Faiqí akaqausa mandoosana sia dauni qafeefara kasooqaafee akooqoo kambiqainaga qafeefaranoo. <sup>25</sup> Miqi kai inoo amiqira oosana fannoo aiqamausa faiqí nifusaa akooqoo maridanoo. Kukeeqara amiqira oosana faqa sia kisaqaasaa kukeeqanoo mariannoo kasooqaafee mifa faqa akooqoo mariannoo.

## 6

<sup>1</sup> Faiqí moo fannoo Anutuna auquara faqa maasa naamuaqira ufara faqa mandainainee qifoora maa ufana ani qimamianana anee Yisuna ufara suqimaria maqanaki keegee marisa qimannimia. Ainainafaqaasa maa maqanasaa feefauruaree qimasaida ainaini mariasa anee maaqi qimasee misa naamuqia, misa aiqama amiqimasee naaquqama nimaqainaga nari rakisirausa ainainamannimaqaaqa.

<sup>2</sup> Akaqausa ainainafaqaasa misa faqa Yisuna ufa iri mariasa mariafaqa innee misa ainainira faiqi mariasa sia misara faqa moodaa irirana maree marunausee qimasee mandufa nimiaqa. Innee minara iriseeqa andeeqasee fiqaramasee misa ainainamannisaqa. Innee misasaaqarara narana qamunnaina maree mariafanoo misara faqa Yisuna ufa irimariasee qimasee maasa misara didimariasee qimasee amiqimasee misa ainainamannisaqa. Oo Timooti anee mi ufausa Yisuna ufara suqimaria maqanaki keegee mariasa naamuqimasee fuki faaki qia.

*Pauroofa unna amaanufa qimariasara aaquqimannimaqoo ufafa.*

<sup>3</sup> Faiqí moo fannoo maa qinee qunna ufana moo mau kaqirunna fidanoo karaambaiqa asauku mundirana Yisuna anoona ufara qaoo qidanoo Anutuna mapukira ufa siaifa maridanoo kaqirunna ubeekaidanoo, miqi qimari fasiqafa sia moo ainaina qafaidanoo kaqi nari afaaqa kai amooqidanoo miqidanoo. <sup>4</sup> Miqi qimari fasiqafa nari manda iriranani kaqaa kaqikaa ufa oosana oosana ufara fifau rainaidanoo tinoo taanoo ridanoo. Miqira oosana fannoo faiqí aanaaseekina nariara nariara rairaiqirafa uqeeraidanoo ufa rukiarana faqa naraqi naraqira ufa faqa nariara nariara mandirirana irimarianaa faqa maqee maqee tinoori maria ufa rainee mariana faqa uqeeraidanoo. <sup>5</sup> Faiqí akaqausa aaqee mariasa nari nifaurunnoo unna qidaqa. Misa Anutuna ufamau fidaqa firaa munnimma aina maa maqanasaa marararee qimariasaa. Miqi qimariasaa anoona ufa siaisa, irirafa taikarasa mi ufana qidaqa.

<sup>6</sup> Doo kuqaa Anutuna ufa fannoo faiqí ainaina faqaasara foora mannisaidanoo. Faiqí moo fannoo kaiqeeffa Anutuna ufa maree marifa quandaki nari maqee maree mari ainainnara doo qini qimana fee qimari fasiqafa ainainafaqaa fara foora maridanoo. Miqi qimarunara Anutuna ufa fannoo ainainafaqaa faikammamaqeeera foora idanoo. <sup>7</sup> Maasa maa maqa maaqanaki faiqi aanaaqisaa nanee maree aniqiafana kaqi samu aniqiafana. Maasa maa maqa maaqanasaaqari fiqa nanee maree fuanauree, kaqi samumbuanaura.

<sup>8</sup>Maasa qamunna faqa narana faqa maasa qimana kai doo maridanoo, doo fee qimasee nifaafa quqaaga.

<sup>9</sup>Moomoo ainaina munnimmara randeemariasa manda nimaniranaki aqufidaqa. Nári moomoo ainainara munnimmara rimariafa nariqa furufariranara nidimarifa mifa mareeqeenoo nári ufaanaki nári naridaqa. <sup>10</sup>Munnimmara rimariafa mandainaina oosana oosana mandainaina oosana areemarifa maridanoo. Akaqausa ooqai Anutuna ufa irimarusa munnimmara ridaqa Yisuna ufa minnisee nariqa ummaara oosana oosana marasaafanoo mi ummaarafa nári nimuqusa radamidanoo.

*Pauroofa Timootinara amudaanai qimasee andeeqaramau fuannee qu ufafa.*

<sup>11</sup>Oo Timooti anee Anutuna ufa irimarianafa mariananoo, anee munnimma ainainara randee maria iriranamau fimariasara faqa mi manda ainainausara faqa eerairiqa. Innee nimudaanai qimasee andeeqaranara faqa Anutufara foora irirana faqa Yisunasaa mundirana faqa faiqí aanaaseera nimuqusirana faqa kisaagaasaa Anutuna aanara afeekaikirana faqa faiqí anaasee ireeda reendeenamandee kai qimannimirana faqa mi ainainausara nimudaanai qimasee maraaga. <sup>12</sup>Timooti anee Yisuna ufamau fidana nari amani nari amaniara foora amudaanai qimasee rakiranakiara foora urinaaqareenana naaru naaru marirana marasainanoo anindi mariani, mi andeeqara marira niranara Anutufa ani aarameeqee minaki quqeenoo. Ooqai anee Yisunasaa mundufunafa anee moomoosa nifusaa amiqimmandee Yisunara kooroounafa mariananoo mikari Anutufa mi amanirana ani amuqumariananoo.

<sup>13-14</sup>Oo Timooti aiqama ainaina aidoo nimimarina Anutuna afusaa faqa, Piratoona oorisa kooroounafa asaku mundirana Yisuna afusaa faqa qinee aaquqimasee qimamidaqa. Yisuna ufa asaana rumaseenana aiqama eedoo qimasee maraa, mi mau finana ani nirafa marirafa anukarafa sia aaqarafa mariani. Miqi kai ina fifi inana karaambaiqa Yisufa nari qumira aukuaana paquria. <sup>15</sup>Anutufa amiqirafa moodaa rakisirafa aiqama uriqararusa urinaaqararafa aiqama karaambaiqaqauqa karaambaiqa mifa nari kai irisee andeeqara aukuaanee qimaseenoo mi aukuanna kai Yisuna aqiqainanoo mai kafaa kooroomannimaqaannoo. <sup>16</sup>Anutufa mifa kai sia faiqí undee irafa aaduma marifa, mifa kai sia faiqí amana qafaqaairra kaaqa qaranaki marifa, sia moo fannoo mina qafaida sia moo fannoo amana qafaannoo. Mina auqu uqeerarana faqa naaru naaru afeeka marirana faqa minaindi kai maridanoo. Kuqaa.

<sup>17</sup>Oo Timooti anee ainainafaqaasa maaqi qimasee qimannimia. Innee ainainafaqaasa sia inneeqa nifaafa nimooqiqa. Sia innee taikemaria munnimmanasaa inneeqa irirana munduaqa. Inni Anutunasaa kai inneeqa irirana munduaqa. Mifa aiqama ainaina afaaramasee maasa qiqaara raanifee ainaina qimimarinasaa kai inneeqa irirana munduaqa.

<sup>18</sup>Oo Timooti anee ainainafaqaasa mi ufana qimannimisee maa ufana faqa qimannimia. Sia moomoo munnimma ainaina mararara kai iriqa. Innee faiqí anaasee dadaaqiqa amiqira dadaaqirana dadaaqiqa mi dadaaqirana nimimariananaki aniki ainaina moomoora foora mariannoo. Innee afaariqa inneeqa ainaina naida nimiaqa. <sup>19</sup>Innee miqiqa moomoo innaarunai qumiasana moomoo suqusee marasee naaru kambiqainna aukuaana inni faakanaiqiannoo. Miqoo innee kuqaa amiqira marirana marasee marifaranoo.

<sup>20</sup>Oo Timooti qinee moomoo fasiqa anaasee ani asaukuki quqasaanana anee amiqimasee afapita qumaraa. Dapi ufa Anutuna andeeqarufa sia minaki mari ufafa furufarira ufa raiqara ufa faqa akaqausa moo aaqara ufara unna qimasee irirana faqaasa ufa fee qidaqa mi ufausara aiqama anee faqa misa faqa eerairiqa. <sup>21</sup>Akaqausa mi unna irirana faqaasa ufara doo iridaqee qinausa Yisuna ufusaa fimariaqooqari quqasee auiaidaqa. Doo.

Anutuna afaarirafa inni aiqamausaki mariani.

## 2 TIMOOTI

### Timootina inaaqianna rumamaqoo akarafa.

<sup>1</sup> Anutuna ufasaa asauku mundirana Yisufa narí ufara diqiqoosa maqasaa fasiqa Pauroosa maridaqa. Yisufa naaru naaru marirana qima afeekaikammandee qimiraree qimaqoona mifa nariki asauku mundirana Yisunaki maridanoo maasa minaki oonu maridaqa mi naaru marirana maraanaura.

<sup>2</sup> Oo Timooti anee qini qifaaqasaa qimaakuara foora marianafa qinee maa akarana ani rumamaqaidafa. Maasa aiqamausa faqa aiqama ainaina faqa nikoofa Anutufa faqa maasa karaambaiqa asauku mundirafa Yisufa faqa narí afaarirana faqa amuqusifanoo nifauarana faqa aundurai asoosana faqa ani amiani.

*Pauroofa Timootinara dufi dufi qidanoo pooduamamaqanau.*

<sup>3</sup> Qini qikeeku qikaaku sia moo ainaina rafaafafinau Anutuna sandufamau amiqimasee fidaqa maqee maqee Anutunara innaaru qimariqau. Qinee faqa miqi kai masee misa naanna ramasee maqee maqee innaaru qidaqa aniara Timootinara dufi dufi qidaqa. Oo Timooti ani anoofa Eeunisa nammarifa faqa ani ataatoofa Rooisa nammarifa faqa miqanda noori kadamasee Yisunasaa amiqimasee mundaqa mariqau. Maqee anee faqa miqanda naanna ramasee mi oosana kai maree mariana qinee iridaqa qafaidafa. Mi irirafa kaqi aniki marifaqa qinee iridaqa. <sup>4</sup> Qinee ani quqasee fuafannana qiniara anee ikiraqoonnana qinee minara iridaqa qinee faqa aniara didimarifaqa kasooqaqee ani qafamaseeqa firaqoo asasianaurannoo. <sup>5</sup> Qinee aniara firaqoo eendaki faqa faasaana faqa innaaru qimamaqaidafa aniara dufi dufi qidaqa.

<sup>6</sup> Minara qinee maana qimamidaqa ooqai qinee sindimeera foora ani quqamaqaafannoo Anutufa ani amu afaaqooqana anee amiqimasee rakisiinana kuqaa.

<sup>7</sup> Anutuna maraquna maasa qimufa sia maparaairana rufiarana qimidanoo, mina maraquna fannoo afeekaikirana faqa faiqi aanaaseera amuqusifana faqa qeeqa daundurái qimanasaa andeeqasee rakisirana faqa maasa qimidanoo.

<sup>8</sup> Minara irisee maasa karaambaiqara sia asaurua. Qinee Pauroosa minasaara karabusaki marunnaana faqa sia asaurua kaqi paasoosamasee qimannimia. Anee faqa miqi kai inana Anutufa afeeka amiqaina anee faqa Yisuna amiqira fasaasa ufara kaqi auppuranaki keeqaa.

<sup>9-10</sup> Anutufa maasa asumu mareenoo maasa daaramasee mai aniannee qimasee qini faiqi anaasee uqanna mariafaqee qidanoo. Sia maasa oosana moo ainaina amiqirana qafeenoofau maasa asumu mareenoofau. Narí irirana narí afaarirana minannai kai miqinoo. Ooqai maa maqa maagana faqa innaaruna faqa sia maru aukuanna narí mi afaarirana maasara narí asauku mundirana Yisunasaa quqaqoofannoo maqee maa aukuanna maasa asumu maree marifa asauku mundirafa Yisufa maa maqanasaa kooroomafinoo mi afaarirana maasa faiqi faiqi qiminuu. Asauku mundirafa Yisufa kuqirana aru taikaseenoo narí amiqira fasaasa uffannai kaqi marirana faqa naaru naaru marirana faqa koorooinoo marifaqa maridaqa.

<sup>11-12</sup> Qinee sia fifau oosana oosana auppuranana karabusaki maridaqau maraidau, Anutufa diqiqoofaqa maa maqanasaa qinee mina ufa faiqi anaasee naamua qidaqa Yisuna amiqira fasaasa ufa kooroomannimidaqa qimannimunnana auppuranana qeeqa qifaaqasaa maraidafa. Sia qinee minara qisauridaqa. Qinee qeeqa irirana irira fasiqasaa mundusauna maridanoo, qinee minara maana amiqimasee iridaqa, Yisufa narí afaaqooqa qimuna sia kadiqannoo mifa amiqimasee dadaaqinoo fifi inoo narí qumira aukuana paquriannoo. <sup>13</sup> Oo Timooti qini kuqaa anoona ufauqa anee karaambaiqa ufara foora mina afaqamaree fua. Maasa asauku mundirana Yisunaki keeqafi marifannoo mifa Anutuna saqarikirana faqa faiqi aanaaseera nimuqusirana faqa maasa qimidanoo anee minaki maria. <sup>14</sup> Anutufa oosana oosana amiqira irirana anisaa quqaqoona mina naaqugara maraquna fannoo aniki marina mi afeekanannai ma oosana irirana amiqimasee rakisia.

<sup>15</sup> Oo Timooti anee maanara irimariananoo. Misa qini Roomma maqannaa rumbeeqqee karabusaki quqasoofaqa aiqama Asia maqa maaqakina qini qiqoondiuqa qini minnisee quqasee sandamafiqau. Fikeerusafa faqa Qeeramookeeneesafa faqa miqanda faqa quqasee sandaqau. <sup>16-17</sup> Ooneesifoorusafa mifa kai sia qinee karabusaki mariafannana asaurinau. Roomma maqusai firaa taunna marufannoo qini sia dauni paqurinau anireenoo qiniara fiqqu faiqu fumandee randaseenoo paqurimandee moomoo kari qini dadaaqimarinuu. Qinee karaambaiqara mi fasiqana aiku asaukaaru amiqi

amiqi mannisannee qidaqa. <sup>18</sup> Qinee karaambaiqara narí qumira faasaanasaa mi fasiqanara afauaannee qidaqa innaaru qidaqa. Qinee Efeesusu maqusai mariafanano mi fasiqafa Ooneesifoorusafa firaqoo qini dadaaqiufa marifana anee Timooti anee minara irimarianano.

## 2

*Pauroofa Timootinara anee Yisuna amiqira sundiara maqi mariannee qinau.*

<sup>1</sup> Anutuna afaarirana dadaaqirana asauku mundirana Yisunaki mariainainafa marinaqa maasa minaki marianano maasaindi mariannoo. Oo Timooti mi afaarirana maraseenana minasaa mapukina maria. <sup>2</sup> Qinee moomoo fasiqa anaasee nifusaa ufa nimiafannana anee faqa mina irimarianano. Mi ufausa maramareenana andeegara fasiqauqasaa quqasainaqa misa qumareeqa quandafi niqoonausa faiqi anaasee qimannimiaqeera.

<sup>3</sup> Anee faqa asauku mundirana Yisuna rakira faiqiara foora maridana aupuraidana anee faqa kadaapirina fua. Timooti anee rakira fasiqa oosana iria. <sup>4</sup> Sundiaufa rakinaki fidaqa sia kaiqeesea maria marirana maridaqa nariqa aiqama ainaina minniseeqa doo rakira ainainara kai noori faqa irirana minni kai ubeekamasee nari karaambaiga afusaa afeekaikamaseenoo rakirara kai iridaqa. Timooti anee faqa Anutuna saikaki fidana misa naanna raa. <sup>5</sup> Kafaa sandee maria fasiqausa oosana irimariana sia ufamau sandeenana taikara qoo oonu kasoomafinana sia feefauru mareennarano Timooti anee faqa mi ufamau sandeera foora amanamasee qafa. <sup>6</sup> Sia moo fannoo fukasaa narana unakusee naannoo. Narana ummaqi mari fasiqafa mifa kai indaaru unakusee naannoo mina kadaapirirana akiqa mariannoo. Anee faqa Anutuna saikaki kadaapirina fifi inana naaru unakuseena suqaseenana neera foora innarano. <sup>7</sup> Anee mi ufana qunnana irisainano karaambaiga fannoo dadaaqinana mi oosanna irinnarano.

<sup>8</sup> Aneenna aqooki asauku mundirana Yisunara iria, mifa Dafidina ati kuqiranakiqari findifufa maridano. Mina amiqira fasaasa ufa qinee qimannimi marunnana mina kooroidano. <sup>9</sup> Qinee mi amiqira fasaasa ufana qimannimunnarara aupuraidaqa. Misa qiniara mandoosana maree mari fee qimaseeqa qini qumareeqa sainandannai rumba quqeega. Kuqaa qinee sainandannai rumbaqa marida Anutuna ufa fannoo sia rumbano maridano kaqi idukinoo maridano. <sup>10</sup> Qinee minara iriseeqa, Anutufa rusandeesamumasee mareefandinna fasiqa anaasesara irisee misa Yisunara iriaqeera oosana oosana mandainaina aiqama ainaina maraidaqa. Misa faqa asumu mariaqeera faqa naaru areenarana maraaqeera faqa mandainaina kaqi qeeqa qipatasaa maraidaqa. Mi asumu marirana faqa naaru areenarana faqa asauku mundirana Yisunaki kai maridano.

<sup>11</sup> Maa ufafa kuqaa maridano. Maasa Yisuna faqa kuqiqa mina faqa findifuanarano. <sup>12</sup> Maasa mina faqa afeekaikamande fifi inaqa maasa kasooqaqee mina faqa rakisirausa mariana. Maasa minara qaoo qianano mifa maasara faqa qaoo qiannoo. <sup>13</sup> Maasa mina akaru qianano mifa kai amana kai andeeqasee mariannoo. Mifa sia amana narí oosana minnisee maasa mandoosanamau fuannoo, andeeqarafa kai maridano.

*Pauroofa Timootina aakapanau, amiqimasee ainainiannee qinau.*

<sup>14</sup> Timooti mi ufausa ani Yisuna ufara suqimaria maqanaki keeqe mariasa qimannimidana maa ufana faqa Anutuna afusaa oori kandamasee aaquqimannimaqa. Misa sia kai fifau ufara tinoo taanoo riqa rairaiqiqa. Mi oosanafa sia anoonaikidano faiqi anaasee kuridi mariafa mi oosanafa maridano <sup>15</sup> Anee aneennara Anutuna afusaa anee afeekaikamandee maridana saika maree marianano Anutufa aniara maaqi qianifeera oo maa fasiqafa amiqimmandee qini saika uqeeraidano qini anoona ufa amiqimasee andeeqasee qimannimimarifa sia narí saikara oonumafi irinoo asauruanifeera.

<sup>16</sup> Akaqausa ooqai Yisuna ufaki mariusa oosana oosana fifau faafau ufa uqeeree mariafaqa anee minara eerairia. Anutuna andeeqarufa sia minaki mari ufana dapi ufa narí qimami narí qimamira fee qinnufana faqa furufarira ufara faqa anee minara rufisee nianasaa fua. Mi ufafa faiqi anaasee Anutufinnaindaraana mareeqee kaqirunna ubeekemarifa maridano. <sup>17-18</sup> Mi dapi ufana qimannimimariasa ufa fannoo fidika namanara foora firaqoo amaqi naidano firaqoo qaidano mi dapi ufana miqi qifano firaanaiandoora. Miqira ufa qimariasa nuqu Qimeenaiusafa faqa Fireetusafa faqa miqanda anoona ufa qimaria aana minnisee unna qimasee aiqamausa kuqiranakiqari findifirafa ooqai taikanoo maridano fee qidaqa. Miqira ufannai Yisuna ufamau fimariasa akaqausa nikuamannimiafaqa saamuridaqa.

<sup>19</sup> Misa miqira ufa fannoo sia amana Anutuna ufa aruannoo, faakanara foora arufinoo sia kasiannoo. Mi faakannasaa maa ufana akara rinoo maridanoo Karaambaiga nari faiqi aanaaseera iridanoo. Ya faiqi anaasee fee nariara karaambaiqaindi fee qinafa mifa mandoosana ameesuquseenoo andeeqara oosana maraannoo. Anutuna ufa faakanara foora marina oosana miqi mminoo maridanoo.

<sup>20</sup> Ainaina faqaasa maaqaki qafee disa kaafaina piritaina oosana oosana maridanoo. Akaqana siruannai auqirafa maridanoo akaqafa koorannai auqirafa maridanoo akaqafa saqarinnai auqirafa maridanoo akaqafa maqannai auqirafa maridanoo. Akaqana amiqira difaaniki narana saka faiqi nimimariafa maridanoo. Akaqausa mandaikirafa kai madaapeenni marifa maridanoo. <sup>21</sup> Faiqi moo fannoo madaapeenni mari difaanifara foora marifa nari anukamasainanoo ainaina saka neemaria difaanifara foora amiqirafa mariannoo. Miqinanoo mina akoofa mareeqee amiqira saikaki quqaannoo.

<sup>22</sup> Nimuqusa anukarusa maqee maqee karaambaiga aaraidaqa dadaaqiannee qidaqa anee misa faqa misa naanna raidana kumaaraa mandainainara nidiranara eerairiaqa andeeqaranara afeekaikamasee afaqaqa, Yisunasaa irirana rusirana faqa faiqi aanaaseera nimuqusirana faqa naunduraki asooarana faqa afeekaikamasee afaqaqa.

<sup>23</sup> Furufarira ufa, dapi ufa rainarafa minauqara eerairiaqa. Miqi qimariasa aiqama kari aanooqiranaki aqufidaqa. <sup>24</sup> Anutuna ainainira fasiqa fannoo sia ufa rainainnanaki keegaani. Mifa aiqamausara reendeenamandee ireeda kai qimannimiani mifa amiqimasee ireeda kai fifimmasee Anutuna ufa naamuaqiani. <sup>25</sup> Mifa ireeda kai mina ufara qaoo qimariasa andeeqannimaqani. Mifa miqinanoo abee Anutufa dadaaqiannee fee misa quandaki anoona ufai ubeekkeefaranoo fee. <sup>26</sup> Sadannafa nari ufaanaki mara arinoo nari iriranamau quqasooafa fimarufaqa misa anoona ufasaa ubeekkaifanoo nari irirafa kambiqafinaqa Sadannana ufaanakiqari aruruduku fifaranoo.

### 3

#### *Pauroofa taikara aukuanara Timootina qimaminau.*

<sup>1</sup> Oo Timooti anee maa ufana aaqoo iria. Taikara aukuaana manda aukuaana afeeka aukuaana mariannoo. <sup>2</sup> Mi aukuaana mi kamuqoo faiqi nariara kai irifaranoo kaaqa ainainara rimarifaranoo, nariara firaqoo ufa qimarifaranoo, firaqoo nariara nari nimooqimarifaranoo, misa mandufa faiqi anaasee qimannimi marifaranoo, misa nari ninausa nikausa ufa rukieefaranoo, misa nimira ainainara sia dufi dufi qifaranoo kai mareefaranoo, sia Anutunara irifaranoo mana mana kaimmifaranoo. <sup>3-4</sup> Sia faiqi anaasee reendeenama nimaqeeefaranoo. Sia faiqi anaasee nifaueefaranoo. Misa moosara munuqi miniqifaranoo. Kaaqa faiqi narimarisa kaasau fainiara foora kaaqa faiqi narimarifaranoo. Misa andeeqarausara fidiqaammifaranoo. Misa kaaqa faiqira ueeqee mariasa misa irirana siaisa kaqi minaki rakeemasee fimarisa misa kaaqa nari nimooqifa nari nuqu ugeeree mariasa. Misa niqaraa ree mari ainainnara kai riqa Anutunara sia rifaranoo. <sup>5</sup> Misa amaana ufa sia irifaranoo nipatakai qumareefaranoo, anoona amuqusakinaana sia qumareefaranoo. Timooti anee miqi mariasara eerairamandee nianai maria.

<sup>6</sup> Misakiqari akaqa fasiqauqa nariqa unna amaana ufa qianeera furufari maria anaaseesa mandoosana maree maru anaaseesa maaqaki oonureeqa unna amaana ufa qimannimiseenoo misa afapita qumareenoo misa firaafaikinoo marifaqa mi irirana siai anaaseesa nari oosana oosana mandainaina nidudusaa aruqaafanoo inne doo mi mau kai fuagee qifaqa mi mau kai fidaqa. <sup>7</sup> Miqimari anaaseesa Anutuna ufa anoona maqee maqee oosana oosana amaana ufaki randaidaqa sia anoona paquridaqa. <sup>8</sup> Ooqai Mooseefa Isipa maqusai Faraona asaukukinaana Isaraee maqannaasa idukumaree fuaneera qufanoo Faraona afunee fasiqaqanda nuqu Yaneesafa faqa Yambareesafa faqa miqanda Mooseena itita amaqaqau. Maa maqee maria unna amaana ufana qimariasa misa miqanda naanna raidaqa, Anutuna anoona ufa ititaidaga. Misa Anutuna anoona iriranara kadiqaidaga oorudupidaqa misa mi irirafa kuqira foora inoo maridanoo sia kasidanoo. <sup>9</sup> Ooqai Mooseena aukuaana Yaneesasa Yambareesasa miqanda furufarirana aiqamausa qafamasee misa ufa minnisaga. Maa maqee maria unna amaana ufana qimariasa aiqama sia misa ufa irirafa, misa furufarirafa akooqoo marifaqa minniseefara akaqausa kai irifaranoo.

#### *Pauroofa taikara naamuaqira ufa Timootina qimaminau.*

<sup>10</sup> Oo Timooti anee sia miqi marianafa anee qini naamuaqira ufamau kai fimarianafa qini oosana maree marianafa qinee fimarunnaqoo kai anee fimariananoo qinee Yisuna anoona ufamau fimarifannana anee qiqafoonafa mariananoo Anutuna saikasaara

daruafaqa sia rakeemasee minniseeqa reendenamandee kaqi miqoo marunana anee qiqafaananoo. Qinee faiqi aanaaseera qimuqusi mariafannana anee mina faqa qiqafoon-afa mariananoo. Qinee kisaqasaa Anutuna aanara afeekaikirana anee qafaananoo. <sup>11</sup> Qinee Anutuna ufasaara darirana faqa aupurarana faqa mareemarunana anee qafaananoo. Qinee Antiooka maqusa faqa Ikooniumma maqusa faqa Ristara maqusa faqa mi maqusanakiaqa fimariafanaqa misa dariqa fimarufaqa firaago aupuraqa fimarigifana. Anee minara faqa irimariananoo. Karaambaiqa fannoo mi ainainnaki-naana qini asumu mara quqasoofaqa maridaqa.

<sup>12</sup> Aiqama maqasaa qaraasa asaku mundiranasaa irirana rusiseeqa miqooqari Anutuna andeeqara oosana maraifaqa narirana aupurarana mareefaranoo. <sup>13</sup> Mandoosana maree mariasa faqa unnaqi maria fasiqausa faqa nari mandoosana maraqa fidaqa ootupaqa fidaqa miqifaq fi fi faqa firaanaikifaranoo. Misa akaqausa nikaru qiafaqa kafa misa quandaki nari faqa nikaru qifaranoo. <sup>14</sup> Oo Timooti anee sia misa naanna reemariananoo. Qinee Anutuna anoona ufa ani aamuqiafannana amiqimandee qumaroonna mi mau kai amiqimasee fua. Anee yanasaqari fee Anutunaindaraa ufa irira oosana mareenane. Doo miqikaimmasee mi fasiqafa indee kai inana naaru naaru miqi kai ia. <sup>15</sup> Oo Timooti anee aanaaqisaa Anutuna naaqqara akarakinaa ufa irimarianafa mariananoo anee minara faqa iria sia aunua. Mi naaqqara akararfafa asumu marira irirana ani amianoo. Mi asumu marirafa asaku mundiranaki maridanoo.

<sup>16-17</sup> Anutufa qimannimufaqa akara rumaqoo ufa maridanoo Anutuna ufa qimannimimaria fasiqausa mina qumaraifanoo minakinaa ufa fannoo nari naamuqianoo nari aaqaranara qaoo qiannoo, nari eendaandirana andeeqanoo nari andeeqasee firana naamuqianoo. Miqi qimasee Anutuna ufa qimannimimaria fasiqausa andeeqasee amanaikinaqa Anutuna saika oosana oosana uqeraaqa.

## 4

*Pauroofa faiqi anaasee qimannimira oosana Timootina qimaminau.*

<sup>1</sup> Oo Timooti qinee Pauroosa Anutuna afusaa faqa asaku mundirana kuqirasa faqa kaqi mariasa faqa aaquqimannimaqee marina afusaa faqa doori kandamasee ani faqa aaquqimamaqaidafa. Yisufa kaifaa kooroomafi aiqamausa rakisianinannara iriseeqa ani aaquqimamaqaidafa. <sup>2</sup> Anee Yisuna amiqira fasaasa ufara faiqi anaasee qimannimia, nari qanaa fee kaqiqoo fee sandanainai qimasee qimannimia, anee misa iriaqaa iaqee qimasee qimanniminaqa misa iriaqa anee mandoosana maree mariasara qaoo qia, anee faiqi aanaaseera nifeeqaraidana poodua. Anee ubiqafi sanaasamasee faiqi anaasee qimannimia.

<sup>3</sup> Qusasaa sia anoona ufa naamuqirana irifaranoo misa nari manda nidimari ainainna kai afaqee fidaqa nari naaqookinaa manda irirana naamuqimarias misauqa kai moomoo nifqasee inne mi manda irirasa kai qimaqimaaqee qifaranoo. <sup>4</sup> Misa anoona ufara nimeesuqusee kai fifau uriara kai naaqoo rammatini imarias. <sup>5</sup> Timooti misa miqimarifana anee aneenna kasoomambi ubiqafinana misa ani arirane aupurane amimarifana kaqi kai fua. Amiqira fasaasa ufa naamuqira saika maqee maqee marana fua, anee aneenna aiqama saikaki maridana Anutuna ainainira faiqi maridaqee qimasaidana marana fua.

<sup>6</sup> Oo Timooti anee iria doo qini fidika ruqifa qimaqeeqandinnafa doo ani maridanoo. Doo qusasaa misa qini darifaqa qinee maa mariranakiqari doo taikasee fifuananoo. <sup>7</sup> Doo qinee amiqira rakiranakiara foora rakumaree uriqaramafiara foora mafifa. Doo nari amani nari amanira sandaranaki qimudaanaiqimaseeqa sandaqa anifaqa doo taikarana paqurifa. Qinee Anutuna ufa faqa marirana faqa andeeqasee qumaree sandeeqa taikarana aniree paqurifa. <sup>8</sup> Doo maqee sandaqa uriqareemarias feefauru qiniara deedaqinoo maridanoo. Karaambaiqa andeeqasee ufa nimimarifa qumira faasaana andeeqemarias qafee qini qikiaqa afisuannoo. Mikari sia qini kai qimiannoo, moomoosa minara nidimarisina mina koorooranara afeesidaqa nidimarifaqa afeesimarias misa faqa nimianoo.

*Pauroofa Timootina qimaminau, qini qamunna papiqaq maree mini qimia.*

<sup>9</sup> Oo Timooti anee kaqi kaqi mindari aniree qiqafaa. <sup>10</sup> Deemasafa maa maqa maaqanakinana ainainara kaaqa ridanoo qini minniqiseenoo doo Teesaronika maqusai finoo Kareeseenasafo doo Karatia maqa maaqai finoo, Titusafa Dramatia maqa maaqai finoo. <sup>11</sup> Rukaafa sia rumbaranaki marifa kaqi marifa mifa kai qini faqa maridanoo. Anee Marikoona aqiee minisainanoo Anutuna saika qini dadaaqiani. <sup>12</sup> Tikikusafa qini faqa marina qinee doo aqiaqunoo Efeesusa maqusai finoo. <sup>13</sup> Qini suara qamunna



Tarooasa maqusai faiqi moo auqu Karapoosana maaqaki quqaqaafannana anee aninana aimaree ania. Qini papiqauqa faqa qini akara papiqa faqa aimaree mini qimia.

<sup>14-15</sup> Areesandeerafa mifa qainna faqa koopaa faqa auqimarifa mifa nari mandoosana mareeno qini firaqoo mandaikamaqimaqeenoo, mifa firaqoo maasa qimannimira ufara akooqaidanoo anee faqa firaqoo minara eerairia. Anutufa miqimarina akiaqara arirana mina amiannoo.

<sup>16</sup> Qinee Roomma maqannaa kootaki indaaruu kamu mariafananoo sia moo fannoo qini dadaaqinau aiqamausa qini quqaqisee sandamafuqa qeeqaraa kai kooti mariqafana. Qinee Anutunara sia mina akiaqara nimiannee qidaqa. <sup>17</sup> Misa fufanoo Karaambaiqa kai qumee qini pooduqee marufaqa qinee kootaki kikiqamafi Yisuna ufa aiqama amiqimasee aanaamuru aiqama qimannimifanaqa iriqau. Miqimasaafananoo Anutufa kaasau aandau ookinaanara foora qini rafteenoora foora inau. <sup>18</sup> Karaambaiqa fannoo oosana oosana mandainainakinaana qini mareeqeenoo nari innaaruna ququsaki amiqimasee quqaqisaannoo. Mina areenarafa naaru naaru mariani, kuqaa.

*Pauroofa nimandoo ufafa.*

<sup>19</sup> Anee Pisisikira nammarifa faqa nari afaaqi Akuirana faqa nimandaa, Ooneesifoorusafa faqa nari faiqi anaasee faqa nimandaa. <sup>20</sup> Erasatusafa Koorinti maqusai miqoo kasooinoo marinuu Tarooifimusafa aurimarufaqa Mireetusa maqusaki quqaqiafana.

<sup>21</sup> Suara aukwana aniannoo anee naaree amanamasee qafeenana ania. Eeuburusafa faqa Pudeenasafa faqa Rinusafa faqa Karaudiafa faqa maaqoo maria qikaqaafasaasa faqa aiqamausa Timooti ani amandaidaqa.

<sup>22</sup> Karaambaiqa maraquna fannoo ani faqa mariani Anutuna afaarirafa inni aiqamausa faqa mariani.

## **TITUSA**

### **Pauroofa Titusana akara rumamaqoo ufafa.**

<sup>1</sup> Qinee maqasaa fasiqa Pauroosa Anutuna ainainirannai diqigoosa maridaqa. Asaku mundirana Yisuna ufa anindiri irimarunausa maridaqa Titusa animma akara rumamaqaidaqa.

Rusandeesamumasee Anutufa qini qumareegeenoo narisaa mundimariasara mapuku nimaqaaneera qifaqa ufa nimidaqa. Anutufa qiniara misa mareeqee Yisuna kuqaa anoona firaa iriranaki mara quqaannee qifaqa miqidaqa. <sup>2</sup> Mi kuqaa irirafa naaru naaru mariranaki fifandinnaasaa mundinoo mari irirafa maridanoo. Anutufa sia unna qimarifa anoona ufa qimarifa naaru marirana maasa qimirree qinau. Ooqai maa maqa maaqafa sia maru kamuqoo mi kamuqoo kasooqaqee maasa qimirree qima afeekaikinau. <sup>3</sup> Mifa ooqai naaru marirana kasooqaqee qimirree qunara doo maqee maa fasannai andeegara aukuannee qimaqoofa mina anoona Yisufa maa fasannai doo kooroo inoo maridanoo. Anutufa maasa mandainainakinaana qumaree marifa firaaqoo qimaqimina mi ufana qimannimidaqa.

<sup>4</sup> Titusa qinee ani qimamafannana anee aneenna irirana Yisunaki quqoonafa mariananara qinee aniara qini qimaaku fee qidaqa anindiri Yisuna iriranamau fimarunnanaki keeqee marunnanara maa akarana ani rumamaqaidaqa. Yisufa asaku mundirafa maasa asumu maree marifa maridanoo. Mifa faqa mina akoofa Anutufa faqa nari afaarirana faqa nari asoosara faqa ani aaku amaqaani.

*Pauroofa Titusana ainainianeera oosana aakapanau.*

<sup>5</sup> Qinee ufaasu Kareetee afumaki ani Titusana mafi aiseeqa fiqa. Anindiri miqoo maridaqa moomoo ainaina sia andeegaranaki ani mafi aiseeqa anee mina andeegaa. Anee maqasa maqusa Yisuna ufa irimariasasaa rakisiraua paqurimasee misa rakisirauaika. Miqianneera faqa ani mafi quqeeqa.

<sup>6</sup> Qinee Pauroosa aamuqaira ufa indaaru qimamafannana Titusa anee sia aunua doo miqoo kai fua. Qinee maaqi qimasee qimamafannana anee faqa maa ufana qimanniminaqa misa iriseeqa maraqa. Yisuna ufa irimariasasaa rakisiraua sia moo aagarafa misaki mariani. Andeegaraua kai mariaqa, moodaa anaasee faqaafa mariannoo. Mina faiqi namu Yisuna ufa irimarinausa mariaqa sia kaukaata qimarinausa mariaqa, sia ufa rukiee marinausa mariaqa. <sup>7</sup> Yisuna ufa irimariasasaa rakisiraua Anutuna ainainiranasaa rakisiraua marianara sia moo aagarafa misaki mariaqera qidaqa. Misa sia aanooqiraua mariaqa. Sia qusasaa rakimarinausa mariaqa. Sia nammari namasee furufari mariasa mariaqa, sia dauni rakirana uqeeraraua mariaqa, sia ainaina munnimmara kaaqa nimugusiraua mariaqa. <sup>8</sup> Yisuna ufa irimariasasaa rakisiraua afaarimariasa faqa kasimariasa faqa mi marirana marinausa kai mariaqa. Misa andeegaranara kai rimariasa mariaqa. Misa nari naundura faqa nimanara faqa irimarinausa mariaqa. Misa andeegaraua faqa anukaraua faqa nari marirana andeegasee marifaqa mariaqa. <sup>9</sup> Yisuna ufa irimariasasaa rakisiraua misa amiqimasee Anutuna ufa anindiri qimannimafannana irisee qumaree marinausa mariaqa. Misa Anutuna anoona ufannai pooduqainaga akaqausa aqara ufa qinausa iriseeqa quandafi andeegasee nari manda oosana qimannimiaqa.

<sup>10</sup> Titusa anee saiki marianna maqusanakinaa fasiqa anaasee moomoosa Yisuna ufa irisee quandakifaqa noori rumbera andaama aanna ree mariasa marifaqa maaqanda ufa rukiasee moomoosa faqa nifiqeeqeenoo kaqirunna ubeekaidaqa nariqa mandoosanara qimannimiaqee qidaqa. Yuda maqanaasa kaaqa miqi mariasa maridaqa nari ufakiqari Yisuna ufasaa munduseeqa quandaki nari faqa akaqausa faqa nifiqamaree kaaqa kaqirunna ubeekke mariasa maridaqa. <sup>11</sup> Misa ufa taikaani fee qidaqa. Misa faiqi nari anaqa faqa nari faiqi namufaqa mareeqeeqa munnimmara kai iriseeqa nisauruaqaana oosana oosana mandainainaki quqemariasa maridaqa.

<sup>12</sup> Moo Kareetee maqannaasi fasiqa fannoo nariqa ufa qidanoo akara rimaru fasiqa fannoo ooqai kuqufa maaqi qimasee nari maqannaasara qimasee akara rinau. Kareetee maqannaasa maqee maqee unna ufa qimariasa maridaqa, kaaqa mandoosana maraaidaqa fainiara foora imariasa maridaqa. Kudiki mariasa kaaqa narana moomoo neemariasa maridaqa.

<sup>13</sup> Qinee Pauroosa minara maaqi qidaqa. Mi fasiqafa nari maqannaasara doo kuqaa miqi mariasee qinau. Titusa anee faqa minara irisee kooroomasee rakeemasee nimambaina qimasee aranaiqi qimannimia. Miqi qimasainaqa Kareetee maqannaasa sia

kaqirunna fuaqa Anutunasaa saqarikirafa afeekaikamafi maridaqa anoona ufasaqari quandaki unna ufa qimariasa naakapaifaqa sia misa naakaparana iriaqeera. <sup>14</sup> Yuda maqanna uri ufa faqa anoona ufa minnisee mariasa sanda ufa faqa sia iriaqeera nimambaina qimasee qimannimianneera qimamidaqa unna ufa minnisaaqeera. <sup>15</sup> Qikairi siaisa aiqama ainaina qafamaseenoo minakinaa manda oosana sia irirai minakinaa amiqira oosana kai qafamasee minara asassidanoo. Nari maraquina kuqiraua nari marirana irirana putaa irausa anoona ufara sia fee qimasee aiqama ainainara mandaikinoo maridanoo fee qidaqa. Misa nariara maasa Anutunara iridaqee qimariasa. <sup>16</sup> Amiqi mariasa anirarisameeqee mandaki quqemariasa misa nari nookiqari maasa Anutunara iridee qimasaidaqa quandaki nari auqee maria ainainafa moomau fimarifaqa maasa qafamasee unna qidammiafoo qidaqa. Faiqi aanaaseera fidiqaaimariasa ufa rukiee mariasa mi manda fasiqausa maridaqa. Amiqira saikara sia amanaiqi mariasa maridaqa.

## 2

### *Pauroofa faiqi anaasee firaasa naakapaaqee ufa qimanniminu.*

<sup>1</sup> Titusa doo misara qiqa maqee aniara qianaura. Anee Anutuna ufa amana kai qimannimidana mina marirana amana kai Kareetee maqanna fasiqa anaasee qimannimia.

<sup>2</sup> Faiqi firaasa maaqi qimasee qimannimia. Irirana faqaasa mariaqa, noori kadamasee mariaqa nari naundura nimanara oonumafi irimarinausa mariaqa. Nari Yisuna saqarikiranasaa mundufi mariaqa. Nariara nariara uriqarara ainainee qimasee nimuqusirafa mariani. Sia tipuqi mariasa naanna ramasee mariaqa reendeenamandee ubiqasee mariasa naanna raqa mariaqa.

<sup>3-5</sup> Anaasee firaasa faqa miqi kai masee maaqi qimasee qimannimianaqa, misa marirana anukara anaasee kammambiqa mariaqa, misa moosara nifai sanduri mariana sia miqiaqa, sia manda nammarrinnai nidudusaa aruaqa. Misa fuka aanaaseeuqa amiqira oosana uqannifiqasee naakapamasaiifaqa misa nari nifaaqira ruaqeera nari faiqi namuara faqa ruaqeera. Misa nari naundura nimanara iridaqa mariaqeera. Misa anukara anaasee mariaqeera misa amiqimmandee nari nifaaqi faiqi namu qumiasana ainainasaa rakisiraua mariaqeera. Misa afaaridaqa amiqi marinausa mariaqa. Misa nari nifaaqmaaka ufara eedoo qimarinausa mariaqeera Titusa anee qimannimia. Misa miqiaqa marifanoo akaqausa ani nindafeeqa sia Anutuna ufara mandainainee qiaqeera.

<sup>6</sup> Titusa anee miqi kai mandee kumaaraa faqa maa ufana qimanniminaqa, misa faqa nari naundura nimuqusa amiqimasee mariaqa.

<sup>7</sup> Anee aneennara faqa aiqama ainaina amiqimmandee marinaqa misa ani qafeeqa miqimandee mariaqa. Anee kuqaa uqanna oori runusee maridana misa naakapamasee qimannimia. <sup>8</sup> Anee mapukirufa kai qimanniminaqa sia quandafi aniara fifau faafau ufa qiifoo qifaranoo. Anee mapukira ufa qimanniminaqa aniara nikooqee mariasa ani namuqaa faqa kaukaataqira ufa qianneera mina oosanara randeeqa nisaurifaranoo.

<sup>9</sup> Doo aniara qiqa maqee feefauruara ainaini mariasara qianaura. Feefauruara ainainimaria fasiqausa anee maaqi qimasee qimannimia. Misa nari rakisiraua ufara sia rukiaaqa eedoo kai qiaqa. Nari rakisiraua asasiaqee ainainakaimmiaqa. Misa nari rakisiruusa ufa sia ati raqannimiaqa. <sup>10-11</sup> Misa sia nari rakisiraua ainaina qummuariaqa. Maqee maqee amiqira oosana kai maree mariaqa ainainira faiqiuqa andeeqasee marifanoo misasaa rakisirafa misaki afaaq quqasee mariani. Ainaini maria faiqisa miqimandee amiqimmandee maridaqa aiqamausa Anutunara maasa innaarunai asumu marirana nimimarifa mina naakaparanara amiqiraneer qimasee maasa faqa marararee qiaqa. Miqinoo marinara maa kamuqoo Anutuna afaarirana kooroomminoo maridanoo. Minannai aiqama maqannaasa innaarunai asumu marirana nimirafa doo kooroomminoo maridanoo.

<sup>12</sup> Anutuna afaarirafa maanara daakapaidanoo. Oosana oosana ainaina sia Anutufinnai ubeekanoo mari ainainara minnisaaqee qidanoo. Maa maqanasaaqaraa ainainara kaaqa rimariana nimuqusirana doo quqaqee qidanoo. Maasa maa maqanasaa marunnaqoo qeeqa qimanara qeeqa daundurara iriseeqa aiqama ainaina sia maraa qee qidanoo. Anutuna afaarirafa maa maqanasaa marunnaqoo maasa nirana marirana kuqaa kai qiaqee qidanoo. Maasa maa maqanasaa maridaqa Anutuna fooqaa marirana qiaqee qidanoo. <sup>13</sup> Maasa miqiaqa fifi iqa Yisuna innaarunaindari koorooira faasaanara asasammasee maaqoo afeesida mariaqee qidanoo. Mi faasaanna maasa Anutufa, maasa mandainaina numoo arusee innaaruna asumu marirana nimianinafa, Yisufa, Anutuna asaku mundirafa, firaa kaaqa qaranakiqari, qurigararanakiqari koorooianno. <sup>14</sup> Mifa maasa kuqirana nariara maraseenoo maasa sia maraaqeera

maasa kuqiranaki mifa keeqanau. Sia fifaufau kuqinau. Maasa qeeqa mandainainakinaana mareeqeenoo maqee kamuqoo nari kaaqa qara andeeqara fasiqa anaasee kammannimaqaaneera kuqinau. Maasa minaindikuganna iaqeeera, maqee maria kamuqoo amiqira ainaina kai maasa aruqarara rimariasaiamma fuaqeeera kuqinau.

<sup>15</sup>Titusa anee mi ainainna maqee qinee qunna ainainna faiqi anaasee naakapaa. Anutufa ani qimaminara sia rufiaa. Afeekaikamasee qimannimia. Aneenna afeekaikamambinana fuki faaki qidana amiqira oosana andeeqara oosana maraaqeeera qimannimia akaqausa mandoosana mareefoora qaoo qia. Aniara manda faiqi fee kaqikaa faiqi fee qifoora, Anutuna ufasaa afeekaikamafinana andeeqasee qimanniminaqa sia miqiaqa.

### 3

*Pauroofa Yisuna ufa irimarusa andeeqara mariranara naakapanau.*

<sup>1</sup>Titusa anee maa ainainnara faqa maqee maqee Kareetee maqannaasa naaqoo auqaina iriaqa. Misa kaamanna rakisirausara maasa uriqararausee qimasee eedoo kai qiaqa. Aiqama misa amiqira ainainiranara qifaqa kasi kasi kai iaqa.

<sup>2</sup>Maa ainainnara faqa qimannimia. Misa sia mandufa moonara qiaqa. Misa reendeenira oosana faqa aqoondikira oosana faqa kai maraqa nuaqa. Misa aiqama fasiqa aanaaseera reendeenamandee kai aiqama ainaina iaqa.

<sup>3</sup>Ooqai maasa faqa misa naanna raidaqa, furufariaafanusa maridaqa, ufa rukiee mariafanusa maridaqa, maasa kaqiruna ubekeeaafanusa maridaqa, maasa faqa daundurakina qidudusaa arirafa qiga qifaqa rumbeeusa idukuqoosa maridaqa, maa maqanasaa amiqi amiqira ainaina fannoo maasa rumbeeusa maasa faqa aiqama aukuaana qifai sanduriaafanusa maridaqa, moona ainaina qafaafanoo qimuqusidanoo qimukeeusa maridaqa, maasa faqa moosa nindafaafanoo fidiqaamma nimaqee mariafanusa maridaqa, misa faqa maasa qifafoofanoo miqikai inoo fidiqaamma qimaqemariqau. <sup>4</sup>Anutuna maasa asumu maraaninafa nari afaairana faqa nari amuqusiranannai faqa akooroomaseenoo miqoo mifa maasa unnaqira manda ainainakinaana mareeqeenoo kaqinni quqannisanau, manda ququsaki mariafanana.

<sup>5</sup>Sia maasa amiqira saikafau Anutufa qafamaseenoo mina akiqarau maasa asumu maranau nari amuqusiranannai kai maasa asumu maranau. Kaifaa aanaaqi aanaaqi kammafirana mifa nammariara foora maasa findaukamannisanau. Minannai Anutufa maasa asumu maranau.

<sup>6</sup>Anutuna naaquqara andeeqara maraqauna fannoo Yisunannai maasa asumu maraaninnanasaqari maasa unnannai anidanoo firaqoo maasa daakuqimaqaidanoo.

<sup>7</sup>Miqunara Yisuna afaairanannai kai maasa Anutuna afusaa andeeqarusaikiqa maridaqa naaru naaru marirana maridaqa, asasidaqa afeesidaqa maridaqa.

<sup>8</sup>Mi ufana anoona ufa kai qimamidana aninna irirafa minasaa rusimari ufafa maridanoo. Titusa qinee Pauroosa maa ufana faqa ani qimamianana anee Anutuna ufa irimariasai qimannimia. Misa sia fifau faafau ufa kai ida mariaqa. Misa aiqama kari andeeqara ainainiranaki maridaqa auqaaqeeera qimanniminaqa maqee maqee minaki kai mariaqa. Mi ainainirafa aiqama fasiqa anaasee dadaaqi marifa maridanoo, anee mina uqeerasee afeekaikia. <sup>9</sup>Anee Anutuna ufa nimidana narafumau narafumau qinnanaki sia minaki aqufua. Saina aaduma mariani. Moo fannoo nari akeeku akaaku oosana oosana ufa qinafa sia anee minaki aqufuani, anee kaqinni maria. Mooseena sandufasaara tinoo taanoo riqa rakinausakina minaki faqa anee sia aqufua. Maa ainainna auqeamarinakina sia anoona faina fifau dapi ainaina auqee marinnanaki sia minaki aqufua.

<sup>10</sup>Anutuna ufa qimariasaiqari moo fannoo mandoosanara sandanainai qimarinnana qaara kari kai aaquqira ufa qimamia. Kafaa fee qinana doo mina ameesa uqamaqa.

<sup>11</sup>Miqi mari fasiqana irirafa furufarirafa maridanoo. Mina mandoosana fannoo mina aaqarana koorooidanoo nari faqa nari aaqaranara faqa iridanoo.

*Pauroona akara ati rafaaqafira ufa.*

<sup>12</sup>Qinee Pauroosa Arateemasana fee Tikikusana fee anee mariannaqoo niqiaqana ani saikasaa oonu rakisifana anee Nikoopoorisa maqusai kaqi kaqi fua. Suara uqi mari aukuaana qinee Nikoopoorisa maqusa oonu marianauree qidaqa. Anee amanaikinana miqoo oonuree qini paquria.

<sup>13</sup>Anee Kareetee maqa maaqai kaqi maridana Seenaasifa irirana akoofasa marufa faqa Apoorosifa faqa nari finnannai fifana anee faqa miqanda dadaqia. Moo ainainara miqanda sarauqifana kaqi mara nimisee dadaqinaqa amiqimasee fuaqa.

<sup>14</sup>Maasa niqoondi Kareetee maqannaauqa sia nisauku raqandaamasee mariaqeeera naamuqiaqa. Misa maqee maqee maqasaa anoona ainainiranana kasi kasida niqoonausa

faça dadaaқи marinanaki maridaқа nári anoona ainaina auқee marianaki faça maridaқа akaқausa niқoonausa naida nimiaқeera қimannimia. Miқimasainaқа misa saika sia fifau irairaaiani anoona kai kambiқаani.

<sup>15</sup> Aiqamausa qini faça maria fasiqausa ani Titusana amandaidaқа. Yisunasaa mundimariasa anee marianannai mariasa maasara rimariasa anee misa faça nimandaa. Anutuna kaқи nimirafa innisaa faça mariani.

## **FIREEMOONA**

### **Fireemoona Pauroofa akara rumeeqee Fireemoona amaqoo pasafa maridanoo.**

(Fireemoonafa ainana faqaafa Yisuna ufa irimarufa marinau. Mifa nári miqooqaraasa oosana maraseena faiqi akaqa kudi fasiqauqa feefaurumasee nari ainainiranaki quqaqoosa mariqau. Misakiqari moo fannoo mina auqu Ooneesimusafa mariufanoo moo deedeepamaseenoo darifoo qimaseenoo quqasee Roomma maqusai sandanau. Pauroofa karabusaki Roomma maqusai marunnai finau. Oonuroofanoo Pauroofa mina paqurimandeenoo Yisuna fasaasa ufa qimamufanoo irisoofanoo Pauroofa pasa akara rumamisee aqiqoofanoo kafaannai Fireemoonafa nari uriqararafa marunnai finau. Pauroofa Ooneesimusana dadaaqidanoo maaqi Fireemoona akara rumamaqanau.)

<sup>1-2</sup> Oo Fireemoona qinee Pauroosa Yisuna saika ufasaara Roomma maqannaa karabusaki marunausa maridaqa Timootifa maasa qikaqa sia rumbaranaki marifa kaqi marifa qini dadaaqifaqa ani Fireemoona pasa akara rumamaqaidaqa.

Maasa qigoondi moodaa ainainiranaki marianafa Fireemoona ani faqa Yisuna ufara ani maaqaki suqi mariasa faqa maasa qisookifa Afiaa nammarifa faqa maasa Yisuna ufasaara moodaa rakiranara fooraki marifa Arakipusafa faqa inni aiqamausa akara rumannimaqaidaqa.

<sup>3</sup> Anutufa maasa qikoofa faqa karaambaiqa asauku mundirafa Yisufa faqa Anutuna afaarirana faqa nari naundura asoarana faqa inniki nimiani.

*Pauroofa Fireemoona andeeqara oosana amooqidanoo asacidanoo.*

<sup>4</sup> Oo Fireemoona qini qikaqa qinee aiqama kari aniara Anutufinna innaaru qidaqa dufi dufi qidaqa. <sup>5</sup> Anee karaambaiqa Yisuna saqarikiranara faqa Anutuna ufa iri mariasara aidimariannanara faqa maqee maqee iridaqa aniara dufi dufi qidaqa.

<sup>6</sup> Qinee aniara maaqi qimasee innaaru qidaqa. Maasa asauku mundirana faqa moodaa aanna fimariasa amiqi amiqirafa firaafa maridanoo, anee maqee maqee akaqausa faqa Yisuna ufa naida nimiseenana anee maqee maqee mi amiqi amiqirana anoonara irianeera aniara innaaru qidaqa. <sup>7</sup> Oo qini qigoondi qinee ani oosana iriqa, anee Anutuna ufa irimariasara amuqusimarifana amiqi amiqidana asagirana nimimariannanara qinee minara iriseeqa qinee faqa asagirana firaana faqa pooduqarana faqa mareeqa.

*Pauroofa Ooneesimusanara qimudao qimaseenoo Fireemoona akara aminau.*

<sup>8-9</sup> Asauku mundiranaki maaqanda maridaqa qinee ani afasausa maridaqa paasoosamasee aniara andeeqara oosana maraanneera qimamianee qidaqa sia miqianaura nariara nariara rirafa didimarifaqa kaqimma iraanura. Qinee Pauroosa asauku mundirana Yisuna aanaiqikirausa mina ufa akiqara Roomma maqannaasa rumbaranaki marunausa sia qimamianaura kaqimma Ooneesimusanara iraanura. <sup>10</sup> Qinee maaqoo rumbaranaki marunanoo ani ainainira faiqi Ooneesimusafa aniroofaqa Yisuna ufakiana qimamunanoo Yisuna saqarikifaqa qinee minara qini qimaaku fee qimaseeqa mina akausee qidaqa. Mi fasiqanara aniara iraanura. <sup>11</sup> Mina auqu Ooneesimusafa mi auquna oosana maaqi qinoo maridanoo amiqimasee ainainira fee qinoo maridanoo. Ani ainainiranaki sia ainainifa doo maqee qini ainainiranaki nari auqu oosana uqeereenoo kaaqa ainainidanoo ani ainainiranaki faqa kaaqa ainainiannoo.

<sup>12</sup> Doo qinee maqee anee ianannai aqiqeeqa nari faqa qeeqa qimuqusa namufaqa aqigaunanoo finoo. <sup>13</sup> Anee Fireemoonafa maaqoo maridanau qini aqoondiqa aniraifanau narana aina dadaaqini. Anee sia mariannanara Ooneesimusana rafaqa fuanee runaisia anee ianannai aqiqaidaqa. <sup>14</sup> Sia qinee mina rafaqaqafirannai ani dadaaqirana oonu rarisanaura anee aneenna kai iriseenana Ooneesimusana aqiqainanoo oonurandee qinee unannai aniani. Anee eedoo qina kai kafa maraanura sia eedoo qinaqa kaqi marianaura.

<sup>15</sup> Nanaree Ooneesimusafa ani saikakiqari quqasee sandanau fee. Anutufa qumeenni fuki faaki qufanoo fee ani saikakiqari aqamasee quqasee maaqoo Roomma maqusai anireenoo irirana mara maree anirandeenoo naaruara amiqimasee ani faqa marianifeera Anutufa qumee mina aundurai kai saikinoofeeinau. <sup>16</sup> Sia maaqooqari fifau ainainiranaki marifa mariannoo maasa qifaqasaa qikaqa qimuqusimarifa asauku mundiranaki marifa mariannoo. Qinee minara uriqarara ainana firaafee qidaqa. Doo maqee ani ainainirana faqa ani karaambaiqaki mari akaqaafasaafa faqa marinara ani uriqarara ainana fira ainana mariannoo.

<sup>17</sup> Oo Fireemoona anee qiniara ani faqa moodaannaana fimarunaasee qinana qiniara foora Ooneesimusana oonu mareeqee kafa aaneenna saikaki quqaa. <sup>18</sup> Indaaru mifa ani mandaikammamaqeenoo fee mifa ani munnimma mareenoo fee mina akiaqara qinee mina amianauna.

<sup>19</sup> Qinee qeeqa qisaukunnai maa akarana ridaqa qimamidaqa qinee Pauroosa mi munnimmana akiaqara ani amianauna. Qinee fifau ani qimamida anee irimarianano. Qinee marunnanara anee marianano. (Anee ooqai idaki fimarunaqa qinee ani mareeqee kaqi asumu mariranaki mara quqa amaqaafanausa maridaqa.) <sup>20</sup> Oo qini qikaqaafasaa karaambaiqara irisee amiqi amiqimmaqimaqa, anee asauku mundiranaki marianna qikaqaafasana aanna ramasee Ooneesimusana kaifaa mareeqee aaneenna saikaki quqaa.

<sup>21</sup> Qinee maa pasana akara ridaqa aniara sia qinee iraunna ainainna kai qimiannoo fee qidaqa moo faqa moo faqa qimiannoo fee qidaqa. <sup>22</sup> Anee maa pasanakinaa ufa irisee Ooneesimusana kafa quqaidana maaqa deedaqia, qusasaa Anutufa inni innaaru qirana irisee qini idukusainaqa anee innannai fuaunauna.

*Pauroofa ati rafaqaqifira ufa.*

<sup>23-24</sup> Eepafaraasafa asauku mundirana Yisuna ufa akiaqara qini faqa Roomma maqannaasa rumberanaki marifa mifa faqa inni nimandaaidano qini faqa moodaannaana ainaini mariasa Mareekoofa faqa Aristarakusafa faqa Deemasafa faqa Rukaafa faqa misauqa faqa inni nimandaidaqa. <sup>25</sup> Asauku mundirafa Yisufa karaambaiqa mifa kaqi afaarirafa inni aiqamausaki mariani.

## HEEBURU MAQANNAASA

### Heeburu maqannaasa moo maqusai marusa Yisuna ufa irimarusa qimannimira ufa qimaqoona.

*Anutufa nari amaakunnai misa qimanniminai.*

<sup>1</sup> Oogai Anutufa nari marunara moomoo kari moomoo oosanannai faqa nari tamum-maqara fasiqauqannai faqa maasa Isaraee maqanna qikeeku qikaaku nari marunara naamua qimannimimarinai. <sup>2</sup> Maa maqee inaaqianna kamu nari amaakunnai maasa qimaqiminoo. Minannai kai Anutufa maqa faqa innaaruna faqa minakinaa ainain-auqa faqa auquseenoo nari amaaku aiqamausakinaana marasee rusandeesamumasee amianauree quna taikara aukuaana aiqama ainaina saqama anindi kammiannoo fee qimaqoofa maridanoo.

<sup>3</sup> Mifa nari akoona Anutunasaqarara areenarana firaqoo rupannooidanoo mifa Anutuna oori afiri amudaani nari akoofara foora mina amanakai uqanna maridanoo, nari afeekufannai innaaruna faqa maqa faqa aiqama ainaina uqeera afeekaikamaqoofanoo maridanoo. Mifa Anutuna amaaku fannoo faiqi faiqi mandainaina maqasaa qumu anukama rukaseenoo nari akoona aqa innaarunai aiqama ainaina uriqararana asauku uqannai ooru ooqumarinau.

*Yisufa Anutuna amaaku uqanna qangiroo urinnaaqararafa maridanoo.*

<sup>4</sup> Anutufa qangiroo fira nuqu ramaseenoo, nari amaaku auqu fira auqu misa uriqarara auqu ranau. Mina amana kai nari amaaku qangiroo firaqoo urinnaaqararafa maridanoo. <sup>5</sup> Anutufa maaqi qimasee nari amaakuara qinau.

Anee qini qimaaku mariananoo.

Maqee qinee ani akausaikiqa maridaqa.

Anutufa sia qangiroora mi ufana qinau nari amaakuara kai miqi qinau. Anutufa nari amaakuara moo ufa maaqi qimasee qinau.

Qinee mina akausa marianaara.

Mifa qini qimaaku uqanna mariannoo.

Sia qangiroorau miqi qinoofau nari amaaku Yisunara kai miqi qinau.

<sup>6-7</sup> Anutufa nari oogai faiqi maa maqa maaqanaki quqarara maaqi qinau.

Qini qangiroouqa aiqama mina amooqifandia foo qinau.

Anutufa qangiroouqara maaqi qinau.

Anutufa nari qangiroouqara ufaira foora auquqai faqa maridaqa.

Mifa nari ainainira faiqi idauru miqirana qangiroouqa auqusai faqa maridaqa.

<sup>8</sup> Anutufa qangiroouqara miqiaqee qinau nari amaakuara maaqi qinau.

Oo Anutu ani ufa irira qaari naaru naaru mariannoo.

Andeeqarana namu faqa ani ququsaki mariasa rakisida marianafa mariananoo. <sup>9</sup> Anee andeeqara oosanara rimarianafa mariananoo. Anee mandainainara fidiqaa imarianafa mariananoo.

Minara kai ani Anutufa ani aqoonausakinaana rusandeesamumasee maraseenoo firaa-naaikamandoofa maridana asasimariananoo.

<sup>10</sup> Anutufa kafa nari amaakuara maaqi qinau.

Anee karaambaiqa mariananoo oosana aroo aukuaana maa maqa maaqana oosana arasee auqunafa mariananoo.

Anee aneenna asaukunnai innaaruna faqa minaki mari ainainna faqa auqunafa marianafa mariananoo.

<sup>11</sup> Mi ainainausa doo taikafuannoo aneenna kai kaqi marinnaranoo mi ainainausa oogai mariu qamunnara

foora ooqenaafaikamafinoo afauqaaqannoo.

<sup>12</sup> Aiqa qamunna fuka mari ifanoo nauraanaikidanoo faiqi mina raqandaamma quqasee fuka akidaqa. Maa maqa maaqana faqa innaaruna faqa anee auquqoon-afa miqi kai inoo qamunnara foora nauraanaikinana raqandaama quqasee fuka mareennaranoo.

Anee sia qamunnara foora sia nauraanaikinnaranoo anee naaru naaru marianandee kai ina marinnaranoo.

<sup>13</sup> Anutufa nari amaakuara kafa maaqi qinau.

Anee maaqoo qiqa daaqa qisauku uqannai ooqumari finaqa ani namuqaa narusee oonumafi ani aramandunnai quqaanaara.



Sia qangiroora miqi qinau. Nari amaakuara kai miqi qinau. <sup>14</sup> Qangiroouqa naqi fee iqa maridee. Misa aiqama maraquna kai maridaqa Anutuna ainainira ainaina maridaqa. Mifa innaarunaidari niqiqainaqa faiqi anaasee innaarunai fifandinausa dadaaqaqeeera niqiqaidanoo.

## 2

*Asumu maree fandinna ufana amiqimmandee rakisi qumaraaqa.*

<sup>1</sup> Minara maasa anoona ufa irimariafannufana qumareeqa amiqimma rakisi qumaraanauranoo. Sia miqifanoo maasa nammariara foora aufigoo maasa maree fuandoora. <sup>2</sup> Ooqai qangiroo qimannimu ufafa kuqaa anoonaike marinau. Qangiroouqa rirrima innaarunai ureeqarasa maridaqa faiqi moo fannoo misa ufa irisee rukia-soofanoo Anutufa mina akiaqara narinau.

<sup>3</sup> Maqee innaarunai firaafa uriqararafa maasaki ani maridanoo. Mifa maasa qumareeqe asumu marirana qimiraree qidanoo. Maasa mi fira aainannara iriseeqa minniseeqa naqi fee mandee Anutunara rufisee yaifee fuanauree. Sia amana, kaqi darirafa kai firaafa marianno. Karaambaqa nari uqanna oosana arasee nari innaarunaidaraa asumu qimirana nari faiqi namu qimannimisooafa irisee quandaki maasa qimaqimi-afaqa kuqaa fee qimasee iridaqa. <sup>4</sup> Maasa sia misa ufa kai irisee kuqaa fee qidaqa Anutufa misa ufa dadaaqammasooafa faiqi sia amana auqaqaa ira ainainna fira ainaina oosana oosana faiqi anaasee dadaaqimaru ainainna auqusoofaqa maasa mina qafeeqa kuqaa fee qidaqa. Anutufa nari iriranannai kai nari maraqunannai kai oosana oosana fasiqa anaasee dadaaqira akoofasaikirana faiqi anaasee niminau. Miqunnnai faqa maasa innaarunaidaraa asumu marirana qimianinnanara kuqaa fee qidaqa.

*Maasa asumu qimimaruna oosana qu ufafa.*

<sup>5</sup> Maasa naaru fuka anianinna maqa maaganara qidaqa. Anutufa sia qangiroora innee minasaa rakisiaqee qinau. Faiqi faiqi maaqoo qaraasa kai minara rakisiaqee qinau. <sup>6</sup> Ooqeenaa tamummaqarasa akara minara maaqi qidanoo.

Oo Anutu, faiqi nane mariafane anee misara iridane, kaqi fifau fasiqara minaree ani amuqusidanoo fee. <sup>7</sup> Anee faiqi auqeeqeenana qangiroo ameemaani qusa aukwana qusa kamu quqaanano.

Anee kaaqa qarana faqa uriqararana faqa Karaambaqara foora marirana nimianano. Maa maqanasaa ainaina aiqama uqanna uriqararanaikirana Anutufa nimianano.

Tamummaqara fasiqa ufa miqi qimaqoofa maridanoo.

<sup>8</sup> Mi tamummaqara fasiqana ufa maaqi qidanoo.

Anutufa maa maqanasaaqaraa fasiqara innee aiqama ainaina uriqararasa mariaqee qinau.

Sia akaqa ainainara kaifau qinoofau. Aiqama ainainara qinoo. Maasa maqee qafaidaqa sia maqasaa fasiqa faiqifau aiqama ainainara uriqaraidaqau. <sup>9</sup> Maasa quandaki Yisuna kai qafaidaqa. Anutuna afaariranannai kai Yisufa naaru asumu marirana qimiraree qimaseenoo maasa faiqi faiqi kuqirana nari faqa maraani qimaseenoo qangiroo nimeemaani qusakamuqoo qumu maridanoo kuqunnimaqanau. Maqee mifa kaaqa qara qafee faqaafa, kuqaa firaqoo uriqararafa maridanoo. Mifa kuquna faqa aupuroona faqa mina akiaqara innaarunai firaafa maridanoo.

<sup>10</sup> Anutufa aiqama ainaina auqufa rakisinoo fimarifa maridanoo. Mifa aupurarana aidafirana Yisuna afaaqasaa quqoofa sia manda oosana quqanau. Amiqira oosana andeeqara oosana mareenoo miqinau. Anutufa Yisunara andeeqara anoona marianifeera quandafinoo faiqi nari uriqararana naida nimianifeera aunirira saqarisaa aupurarana Anutufa aminau. Nari Yisufa mifa kai faiqi faiqi innaarunai asumu mariaqeeera aana afisufa maridanoo.

<sup>11</sup> Yisufa faiqi faiqi maraseenoo nari mandainaina findaukamaseenoo anukaranaki quqannisee marifa maridanoo. Mifa faqa ninukamaqaisa faqa moodaa nikoona faqaasa marianara Yisufa misara sia asauridanoo qini qikaqaafasaa fee qidanoo. <sup>12</sup> Yisufa minara maaqi qimaqoofa akaraki maridanoo.

Oo Anutu aniara qeeqa qikaqaafasaa qimannimianaura.

Qinee faiqi suquseeqa misa nifusaa ani amooqianaura.

<sup>13</sup> Kafa mo akaraki maaqi qidanoo.

Qinee qeeqa irirana Anutunasaa rusianaura.

Kafaa moo akaraki maaqi qidanoo.

Doo qinee maaqoo maridaqa Anutufa qimu faiqi anaqisa misa saimbaqa maridaqa.

Akarakinaa ufa miqiminoo maridanoo.

<sup>14</sup> Yisufa maqasaa fasiqa anaaseera nari faiqi aanaaqi fee qidanoo. Mi faiqi anaqaasa nimaqi faqaasa fidika faqaasa maa maqanasaaqaraasara Yisufa qidanoo. Yisufa nari uqanna qumureenoo faiqi aanaaqi Mariana aranandaki maasa faiqi faiqi fidika qimaqi mareenoo innooqanau. Mifa sia fifaufau miqinai. Nari kuqiranannai kuqirana rakisirana Sadannana rafaafafuanifeera maasa qimaqi faqa fidika faqa maranau. <sup>15</sup> Yisufa kuqirana rakisirafa Sadannana rafaafafuseenoo aanaaqisaaqari kuqiranara rufiasee rumbaqa maria fasiqa anaaseesa idukunnisaaneera kuqunnimaqanau. <sup>16</sup> Sia Yisufa qangirooouqa dadaaqidanoo. Faiqi faiqi dadaaqidanoo mifa akooqoo maridanoo. Moo akara fannoo minara maaqi qidanoo.

Mifa Abarahaamana aiku asauku dadaaqimarifa maridanoo.

<sup>17</sup> Yisufa nari akaqaafasaaouqa maa maqanasaaqaraasara dadaaqianee qimasee amiqimmandee misara maqi qiara mambiqa amiqimmandee misa aanaiqikianeera miqinai. Sia fifau Anutuna ainainira aanaiqikirafa mariannoo maqee maqee nari akaqaafasaa nifauee marianinafa oori runusee miqoo kai marianinna aanaiqikira uriqararafa mariannoo. Anutufa faiqi anaasee mandainaina minnisaanifeera Yisufa miqinai. <sup>18</sup> Indaaru Yisufa aupurarana aidafirana Sadannafa nimanamandee qafarana faqa doo amanamandee qafamaseenoo uriqaroofa maridanoo. Maqee minara maasa amiqimmandee dadaaqidanoo mifa doo mina oosana qafoofa irufa maridanoo.

### 3

*Yisufa Mooseena uraaqararafa maridanoo.*

<sup>1</sup> Qini qikaqaafasaa innisaimbaqa Karaambaiqa aiku oosana marunasa maridaqa innee faqa qinee faqa Anutufa daarama quqasaifaqa ani mariasa maridaqa. Innee Yisuna qafaafa qafaidaqa oonumafi iriaqa Anutufa aqiqamaqoofa maridanoo. Maasa qimarunna amaana ufana aanaiqikira uriqararafa marianifeera aqiqamaqoofa maridanoo. <sup>2</sup> Ooqai Mooseefa Anutuna aiku asauku Isaraee maqannaasaki aiqama ainaina auqemaruna miqoo kai maridanoo oori runusee andeeqanoo kai marinai. Yisufa miqikai maseenoo nari asauku mundusee aqiqoofa Anutunara iriseenoo mina ainainirana andeeqaidanoo aidimarufanoo marinai.

<sup>3</sup> Faiqi misa fuka maaqa qafamasee sia maaqa amooqidaqa faiqi maaqa usakai fasiqana kai amooqidaqa. Miqikai iqa, sia Mooseena amooqiaqa. Mifa fifau maaqa maridanoo Yisuna kai amiqimasee firaqoo amooqiaqa. Mifa maaqa usakee marifa anoona uqanna maridanoo. <sup>4</sup> Sia maaqa moo fifau kambiqaaidanoo. Aiqama maaqa usakeemarifa kai usakaidanoo. Anutufa mifa aiqama ainaina auqemarifa marifanoo Yisufa Anutuna ameemaanai maaqa usakee marifa marinara Mooseena uraaqaranoo maridanoo. <sup>5</sup> Mooseefa Anutuna aiku asauku Isaraee maqannaasaki maqee maqee miqoo kai maridanoo oori runuseenoo andeeqanoo kai marinai. Mifa Anutuna ainainira faiqi maridanoo. Anutufa qimannimianinna ainainara faiqi anaasee qimannimimarufaqa irimariqau. <sup>6</sup> Yisufa sia kaqi ainainira faiqi maridanoo. Isaraee maqanaasa nikoofa amaaku uqanna maridanoo. Mifa Anutuna aiku asauku maqasaa mariasa rakisinnimaqee marifa miqoo kai mi saikanaki marifa andeeqasee misaa rakisimarifa maridanoo. Maasa naaru naaru Yisuna saqarikidaqa minara asasidaqa paasoosidaqa miqidaqa maasa Anutuna faiqi namu mina aiku oosana marunasa maridaqa sia miqidaqa sia mina aiku asauku marunaiqini.

*Anutuna ufa irimariasa idooaranara naakapaidanoo.*

<sup>7-8</sup> Anutuna naaquqara andeeqara maraquna fannoo maaqi qidanoo.

Innee maqee Anutuna ufa iriaqa inni saimbaqa Isaraee maqanna ninausa nikausa ooqai aadana maqa maaqaki fidaqa ititammasee ufa rukioondee innee siammiaqa. Misa Sinai aadana maqasaa Masaa maqasaa faqa Meeribaa maqasaa faqa nammari sia marunara Anutuna amanamandee qafaida naundaufa naundaufa qiqau.

<sup>9</sup> Minara Anutufa maaqi qinai.

Inni nikausa ninaakusa qini qimanammasee qafararee qimasaida munari minari idaqa qini qimanigau.

Qaara fasiqa aiku asauku taikasee aukuaana aiqama amiqira ainaina quqannifiqaafanaqa qafeeqa mina minniseeqa quandaki moo ainaina kai mareemariqau.

<sup>10</sup> Qinee minara iriseeqa qafamaseeqa maa Isaraee maqannaara qiranaqaidanoo.

Qinee maaqi qimasee niqidaqa.

Misa irirafa fifau faafau qidanoo aaqaidanoo.

Misa kisaaqasaa qini faqa anidaqa sia qini oosana qafeeusa. <sup>11</sup> Qinee minara iranaqaiifaqa maaqi qimasee qimafeekaikiqiafana.

Sia uqanna misa qini faqa anusufiqa adooeefaranoo.

Anutuna ufa miqiminoo marifaqa qinee minara maaqi qidaqa.

<sup>12</sup> Qini qikaqaafasaauqa, innee amiqimandee rakisiyaqa. Moo fannoo nari mandiriranannai faqa nari ufa rukiee marinannai faqa nari amuqusaki marinara kaqi marira Anutuna nimeesa uqamaqeefoora. <sup>13</sup> Maa aukuanasaqa innisaimbaqa kaqikai maridaqa maa ainainnara rakisiyaqa, faasaambaasaana nari pooduge nari pooduge imariana. Innikina moo fannoo nari mandoosana fannoo rarisameegee Anutuna ufara sia irianaki quqaandoora eerairiyaqa. <sup>14</sup> Maasa indaaru paasoosamandee Yisuna qumareeqa. Maqendari maqeesaa paasoosamasee Yisuna qumareeqa mina kai afaqaqa fifi inaga taikainna aukuaana qumarainaqa maasa mina faqa moodaanaki ainaini marunausara maqi mafiqqa mina qumaraanaura.

<sup>15</sup> Anutuna akara maaqi qidanoo,

Innee maqee Anutuna ufa iridee sia fee iridee iriya sia ooqai undee iaqa.

Ooqai inni saimbaqa ninausa nikausa aadana maqa maaqaki Anutuna ufa irisee aanoo qidaqa mandufa qima rukiasae naaqoo siaisa mariundee sia maqee innee miqiaqa.

Anutuna akara miqiminoo marifaqa qinee minara maaqi qidaqa.

<sup>16</sup> Yau yausee Anutuna ufa irisee ufa rukiasae nimeesa uqiaqau. Mooseefa Isipa maqanaindari nifiqee anusa misa kai miqiaqau. <sup>17</sup> Yausaree qaara fasiqa niku nisauku taikasee aukuaana Anutufa aanoomannimaqaannoo fee inau. Faiqi anaasee ufa rukiasae mandoosana maree marusa aadana maqasaa oonuree kuqu taikoosara misara kai aanoo qinau. <sup>18</sup> Anutufa misara maaqi qinau,

Qini faqa anusufinausa sia uqanna qini faqa adooeefaranoo.

Anutufa miqi qimasooafaqa qinee minara maaqi qidaqa. Mifa yausaree miqi qinoo fee. Mifa narufa iriseenoo rukiee marusara miqi qinau. <sup>19</sup> Maqee maasa mina qafamasee maaqi qidaqa. Sia naundura nimuqusa Anutuna ufasaa rusunara minara misa sia fuka maqa maaqaki Kannaa maqa maaqaki adooreanaki fiqau. Kaqi aadana maqa maaqaki kuqiaqau.

#### 4

<sup>1</sup> Maqee maa aukuaana Anutufa maaqi qimasee qima afeekaikamma maasara qinau, Amana innee qinisaimbaqa qini amiqira adoqaranaki ani keeqafiqa qinisaimbaqa qidooaqqee qinau. Doo innisaimbaqa Anutufa aniaqee qimaqoo ufafa taikaandoora doo kaqi mariqoo amiqimasee rakisi qumaraaqa, sia keeqaannoo qimasee minara rufiaqa maasaki moo mandainaina fannoo maasa qumarainaqa maasa sia mina adooreanaki keeqaanoora. <sup>2</sup> Ooqai inni saimbaqa Isaraee maqanna ninausa nikausa Anutuna ufa iriyaqau. Maasa maqee doo irimmaseeqa amiqira fasaasa ufa maridanoo. Indaaru misa mi ufana iriseeqa aqummasaqau. Misa mi ufana naaqoonnai iriseeqa sia naundura nimuqusanai mi ufana qumaraqau. Sia minara kuqaa fee qimasee minasaa irirana rusiyaqau.

<sup>3</sup> Maasa mi fasaasa ufana Anutufa qimafeekaikunara kuqaa fee qimasee minasaa rusiyaqau marunnanara maasa kuqaa Anutuna faqa keeqaidaqa mina adooreanaki adooida adoaaanaura. Mifa minara maaqi qimasee akaraki qinau.

Qinee Anutusa maaqi qimasee aanoo qima afeekaikafannana.

Naaru naaru misa sia uqanna qini idooreanaki qini faqa keeqafi idooeefaranoo.

Anutuna ufa miqiminoo maridanoo qinee minara maaqi qidaqa. Ooqai oosana aroo aukuaana Anutufa kuqaa aiqama ainaina doo auqu taikasee adoamasee nari adooraana faqa quqannimaqasooafaqa irirana rukiasae sia keeqae sia iriyaqau. Anutufa minara iriseenoo sia kaqi fuqqee qinau, kaqi mifa maridanoo sia uqanna amana misa keeqeefaranoo kaqi kai qafa.

<sup>4</sup> Akarakinaa ufa moo qisauku taikasee dinni ani qaara marasee faasaanara maaqi qidanoo.

Anutufa nari kadaapirirana oosana oosana mi faasaana quqasee adoonaau.

<sup>5</sup> Akarakinaa ufa moo idooreanara Anutufa maaqi qinau.

Misa naaru naaru qinee maqa maaqa nimiannanaki, idooraana nimiannanaki sia qini faqa keeqafi idooeefaranoo.

Anutuna ufa miqinoo marifaqa qinee minara maaqi qidaqa. <sup>6</sup> Indaaru marusa misa Anutuna amiqira fasaasa ufa irisee sia mina idooreanaki keeqaqau. Nariqa ufa sia irunnannai sia idooreanaki keeqaqau. Akaqausa Anutuna faqa keeqeefandinausa marianara moo keeqaaninna faasaana quqasee maqee kamuqoo fee qinau. <sup>7</sup> Indaaru aukuanasaqari mi kamuqoo sia Anutuna ufa iriyaqau. Dafidifa kambiqoo aukuanai Anutufa Dafidina qimamufanoo maaqi qimasee akara rinau.

Maqee maa faasaana innee Anutuna ufa iriseeqa sia ititiaqa sia mana mana irirana iriyaqa.

Dafidifa mi ufana akara rinau.

<sup>8</sup> Yoosufa Isaraee maqannaasa nifleegeenoo Yooradanna nammari taqamareenoo nári fuka maqáki idooaranáki quqannisanau. Anutufa sia mi idooaranarau qináu, moora qináu, Yoosufa Anutuna adooaranáki quqannisainanoofau Anutufa sia moo faasaanara qini.

<sup>9</sup> Mi moo faasaanafa kaqi maridanoo, Anutuna ufa irimaria fasiqa anaaseesa maqasaagaaraasa minaki keegeefaranoo. Ooqai indaarú Anutufa aiqama ainaina auquseenoo qisauku dinni ani qaara maraseenoo amiqimasee idooanau. Mina fooqaa idooarafa kaqi marináki Anutuna ufa iri maria fasiqanaaseesa keegeefaranoo. <sup>10</sup> Faiqi anaasee moo fannoo Anutufa mariqoo keeqafinoo idooainafa mi fasiqa anaaseesa nári ummaara afaimma quqaseenoo amiqimma adooeefaranoo. Anutufa nári kadaapirirana minniseenoo idoo oondee mi fasiqa anaaseesa faqa miqikai iqa nári kadaapirirana afaimma quqaseeqa amiqimasee adooeeqa Anutufa undee ifaranoo. <sup>11</sup> Minara maasa sia ufa rukiasee manoo manaa iqanuaqa nimudaanai qimasee Anutuna faqa nári adooeemarináki keeqaqa. Sia moo fannoo maasáki ufa rukiasee innisaimbaqa Isaraee maqanna ninausa níkausa naanna ree kaqinni aqufuaqa.

<sup>12</sup> Anutuna ufa sia fifau ainaina maridanoo, afu maqee marifa kasimarifa maridanoo. Aseema miqirafa kaaqa dinni dinni firaqoo raigarafa naundurái ateekeemariifa maridanoo. Faiqi nimana faqa maraquna faqa moodaanáki marináki miqoo faqa fimarifa. Nimudaani aqumu faqa akikimána faqa ruqiasee miqoo faqa fimarifa maridanoo. Faiqi naunduráki faqa nimuqusáki faqa nidimarína faqa oonumafi irimariana faqa minauqa faqa qafeenoo raine marifa maridanoo.

<sup>13</sup> Sia Anutuna afusaa moo ainaina kukeeqarana amana, sia amana miqiannoo. Aiqaama ainaina faiqi anaasee Anutufa auquqoo ainainausa kai marinara nári afusaa akoosaqa akooqoo uqanna maridanoo. Maasa mi Anutuna afusaa qeeqa marunnanara andeeqaranara faqa aaqaranara faqa ufa qianaura.

*Aiqama aanaiqikirausakiqari Yisufa firaqoo uriqararafa.*

<sup>14</sup> Maasa aanaiqiki maria fasiqausa uriqararafa Anutufa nári mariqoo uqanna keeqafi maridanoo. Mi fasiqafa Yisufa Anutuna amaaku marinara maasa Anutuna amaana ufa qumaraunnana amiqimasee qumaraaqee qidaqa. <sup>15</sup> Maasa aanaiqiki maria fasiqausa uriqararafa maasa daunduráki ummaararee marifaqa maasa kudoosaapee marunnanana sia sia qafee marifa maridanoofau, qafee marifa maridanoo. Sadannafa aiqama ainaina amanamasaifanoo sia mina qumaraifa qafamaqaifa kai maridanoo, minara kai maasara qimudaao qimasee amuqusidanoo.

<sup>16</sup> Minara maasa mifa daruaninnanara faqa sia rufia rufiaqiqa paasoosamasee mifa mari qarinasaa oonu reera foora nári nifaueenoo amuqusianinnanara faqa qimianne qiaqa. Miqoo kaqi nimirafa kaqi dadaaqirafa miqoo maridanoo. Maasa miqoo oonuraananoo Anutuna afauarafa amuqusirafa maasara mariannoo. Maasa ummaara faqa sarauqirana faqa darinnanara mifa dadaaqiannoo.

## 5

<sup>1</sup> Maasa Heeburu maqannaasa faiqi misa aanaiqiki maru fasiqausa uriqarararara randasee paqurimmeeqee faiqi aanaaseesaaroo qianifeera Anutuna ainainiranáki quqaidaqa. Miqooqari mi fasiqafa faiqi anaasee mandainaina rukasainanoo Anutufa sia naruaninnanara iriseenoo maqee maqee amirainaina faqa aandau aruseenoo Anutuna tatufu suqa amirana faqa amidanoo. <sup>2</sup> Mi aanaiqikira fasiqafa faiqi faiqi maridanoo nári faqa amanna marinara faiqi anaasee furufarammasee aqeeqee marianara amuqusinanoo amana dadaaqiannoo. <sup>3</sup> Mi aanaiqikira fasiqafa mifa faqa faiqi kai maridanoo aqeeqee marifa marinara, sia faiqi aanaaseera kai aandau arusee tatufidanoo nári mandainainara faqa rukaanifeera nariara faqa Anutuna tatufuamidanoo. <sup>4</sup> Sia faiqi moo fannoo nariara uriqarara saikáki keeqaanauree qimasee nariara aanaiqiki mariasa uriqararafa maridanoo. Anutufa qifa kai aanaiqiki mariasa uriqararafa maridanoo. Mooseena afasaafa Aaroonafa ooqai miqi kai inau. Anutufa Aaroonaa aaroonanoo aanaiqikináu.

<sup>5</sup> Yisufa asauku mundirafa miqi kai masee sia nári kai nariara uriqarara aanaiqikináu. Anutufa qunara kai miqináu. Mifa maaqi qimasee qimamináu.

Anee qini qimaaku mariananoo.

Maqee faasaana qinee ani akausaikammíqa maridaqa.

<sup>6</sup> Miqi qimasee Anutufa kafa maaqi qináu.

Anee naaru naaru marinafa aanaiqikirafa mariananoo.

Anee Meerakiseedeekana atiara foora marianafa mifara foora naaru naaru marinnaranoo.

(Ooqai Meerakiseedeekafa Sareema maqusanaasa Anutuna faqa faiqí anaasee faqa aanaiqikirafa marinara.)

<sup>7</sup> Yisufa maa maqanasaa Keetaseemanee saqamaki maridanoo aunirira saqarisaa kuquaninnanara Anutunara innaaru qidanoo qaoo qimirinuu. Innaaru qidanoo fraaqoo faaqa rumaseenoo ikiraqaseenoo kuquaninnanara qaoo qimirinoo innaaru qinuu. Anutufa mina reendeenirana qafamaseenoo mina aundura Anutuffinnai ubeekaranara iriseenoo mina innaaruqirana iriseenoo dadaaqinuu. <sup>8</sup> Yisufa nariara sia Anutuna amaaku fee qimasee mana maninuu. Oosana oosana aupuraranannai Anutuna ufara aaqee kai eedoo qira oosana irinuu. <sup>9</sup> Mifa aupuraranakiqari amiqiranaikamambinoo quandafi nari ufara eedoo qimarusa naaru naaru marirana oosanaraseenoo niminuu. <sup>10</sup> Miqimasoofofanoo Anutufa minara maaqi qinuu.

Anee aanaiqiki mariasa uriqararafa marianafa mariananoo. Anee Meerakiseedeekana fooqaafaikamambinana marinnaranoo.

*Innee faiqí irirana maraaqaana faiqí aanaaqiara maqi qimariafanoo.*

<sup>11</sup> Anutuna ufa nari amaakuara miqiminoo marifaqa qinee maa ufana inni qimannimidaqa. Maa ainainna afeeka ainaina maridanoo oosana oosana ainaina faqa inni qimannimianee qimasauunaqa innee anuqimariasaa mariafanoo. <sup>12</sup> Innee faqa maqee faiqí uqannifigaagaana. Innee Anutuna akarakinaa ufa oosana ainaina faqa sia amiqimasee iri mariafanoo. Innee moosa qimannimiaqaqoo sia amanaiki mariafaqa moosa inni qimannimidaqa. Innee ooqai narana uqanna naaqaana mariafanoo innee naamma naidara maqi kaimmimariafanoo sia innooqarausara foora mariafanoo. <sup>13</sup> Naamma neemariasaa faiqí aanaaqi kai mariafanoo sia anoona ainaina manda ainainara rainasee iriaqaamminoo maridanoo. <sup>14</sup> Narana uqanna faiqí anaasee narana maridanoo. Misa doo akoofasa mariafanoo nimaakirisaa quqasee qafaidaqa mandaikinnana qafeeqa amiqirana qafeeqa miqidaqa akoofasa maridaqa. Innee faqa miqiaqaana. Qinee narana kikiqusidaqa amaana ufa qimannimira oosana miqiminoo maridanoo. Akoofasa fannoo iriseenoo rainaidanoo amiqiranara iridanoo mandaikiranara minnisaidanoo. Faiqí aanaaqi fooqaa fasiqa mifa mandaikiranana faqa amiqirana faqa kaqi naannoo.

## 6

*Anutuna ufara irimariasaa kaqi runna firanara aaquqimannimaqara ufa.*

<sup>1-3</sup> Maasa sia maqee marunnaqoo oosanaki kai maria, maqee doori mundusaannaqoo qambaanaira foora fua. Yisuna ufaki oosana ainaina aanaaqi kimarunnana inaaqiannai mafi quqasee doo maqee oorisaa fuanaura. Maasa qeeqa fifau aaqara oosana kadaapiriranannai innaarunai firaree qimarunnana mina minniseeqa Anutunasaa mundufufannana doo maasa minara irimarunafa maridanoo. Nammari nimirana faqa asaku nikiaaqa mundusee nifaaqooqa qirana faqa kuqiranakiqari findifirana faqa naaru naaru idaki fimariana faqa doo irimariafanoo. Sia kafaa kafaa aanaaqiara foora naamma kai naidara foora ooqai iri maru ainainara kai kaifaa kaifaa minara kai iriaqa. Anutufa dadaaqimarinana maasa noorisaa findifinaqa indaarura foora fidaqa maqee maqee Anutuna ufakinaana fuka iriseeqa mi mau fuanaura.

<sup>4</sup> Anutuna ufamau fimariasaa quandaki kaqinni aqufiqa naqi fee mandee aupuramasee quandakinaqa kafaa fifaree. Sia amana miqifara. Misa ooqai Anutuna qoomasaa fimariasaa, misa innaarunaindarara narana naidara foora imariasaa maridaqa Anutuna naaqumasee nifaaqumasee qirana maraquna mareemariasaa. <sup>5</sup> Misa Anutuna ufa amanamandee qafamasee amiqira ainainara irimariafa maridanoo. Kasooqaaqee Yisufa kafaa qumuaninna aukuanaki kambiqaaninna afeeka atiara irimariasaa maridaqa. <sup>6</sup> Misa mi ainainausara nikoqai faqa kaqirunna fidaqa sia amana misa kafaa aupuramasee quandakinaqa kafaa Anutuna aanii ubeekeefaranoo. Misa miqimariasaa Anutuna amaaku kafaa aunirira saqarisaa quqasee pirimma aridaqa miqidaqa aiqamausa nifusaa asaurirana amidaqa miqi mariafanoo.

<sup>7</sup> Anutufa maqa dadaaqidanoo aaku quqasaifanoo ridanoo maqasaa ainaini mariasa dadaaqidanoo narana minakiqari kambiqai faqa neemariafanoo. Miqi kai masee faiqí anaasee Anutuna ufamau fimariasaa misa Anutufa misa amiqi amiqiannoo. <sup>8</sup> Nimmuru faqa mandainaina amuka faqa mi maqanasaa kambiqafinanoo Anutufa qafamaseenoo fifau maqa maridanoo, qusasaa qinee mi maqana aquraraseeqa idakikai aquanauree qinuu. Anutuna ufa minnisee mariasa miqi kai masee ida kai qamataikeefaranoo.

<sup>9</sup> Maasa qi qoondi maasa inniara iridaqa, innee sia mina ufa minnisee mariasa mariafanoo. Innee Anutuna saqarikidaqa innaarunai asumu maree mariasa mariafanoo minakinaa amiqi amiqirana uriqararana innindi miqoo nifeedamma nimaqaqaifanoo maridanoo. <sup>10</sup> Anutufa sia qaarakai marifa maridanoo, andeeqasee amana amana

kai nimimarifa maridanoo. Mifa sia innee kadaapirinnana akiaqara aunuanoo, iridanoo. Innee Anutunara nidinara quandaki inneeqa niqoonausa Yisuna ufa irimariasara amiqimaseenoo nimuqusinaqa kaqi dadaaqifanoo Anutufa minara faqa sia aunidanoo, iridanoo mina akiaqara inni nimiannoo. <sup>11</sup> Maasa inniara maaqiaqeeru inniara ridaqa. Inni Anutunara nidirafa asarirafa kasirafa miqifa fifi inaqa taikainna aukwana kai mafi taikaqa. Innee miqifanoo inni naundurakinaa nidirafa kuqaa anoonaikiannoo. <sup>12</sup> Maasa innee kudoosaapee foora qikooqaidanoo. Akaqausa nari irirana Yisunasaa rusiranannai faqa ubiqasee reendeenamasee marirana niranannai faqa ooqai Anutufa qima afeekaikammasee nimira naundura qumiasana doo maree mariafanoo. Maasa inniara misa naanna ramasee maridaqa naundura qumiasana maraqaera qidaqa.

*Anutufa qima afeekaikamaqoo ufafa afeeka naaruara marianinnufafa.*

<sup>13</sup> Ooqai Anutufa Abarahaamanasaa qima afeekaikammaqoona asauku uqeraseenoo kuqaa miqianauree qimaqoona. Sia mina uriqararafa marunara nari asauku uqeraseenoo yana auqu fee raanauree qusia nari auqu kai ramafeekaikainu. <sup>14</sup> Mifa maaqi qimasee Abarahaamana qimaminoo qinuu.

Qinee qima afeekaikammasee kuqaa amiqi amiqianaura.

Ani aiku asauku akeeku akaaku faiqi maqannimaqifaqa moomoo kambiqafi maa maqanasaa amanaikiga marifaranoo.

<sup>15</sup> Anutufa miqi qimasoofanoo Abarahaamafa mi ufana anoonara kisaqasaa reendeenamasee afeesida marufanoo kasooqaqee uqanna Anutufa qimamu ainainafa koorooinuu.

<sup>16</sup> Faiqi moo fannoo qima afeekaikianee qimaseenoo asauku innaarunai uqeraseenoo nariara urinaaqarara auqu ramaseenoo qima afeekaika maseenoo doo ufa qimaqoofa taikaidanoo. <sup>17</sup> Innaaqianna kambiqee mariasaki Anutuna qima afeekaikira marirana anoona mareefandinausa sia qini Anutusara qeeqa qima afeekaikiranara minnisee maqi qiaqeeru misa qiniara kuqaa uqannee qimasee qiaqeeru kooroomasee sia kai fifau qimafeekaikainu, nari auqu faqa ramaseenoo qimafeekaikainu.

<sup>18</sup> Doo minara iriseeqa qaara ainaina, afeeka ainaina innikina kaqi mariannoo sia taikaannoo. Mi ainaina qanda moo ainaina Anutuna qima afeekaikirafa maridanoo. Moo ainaina Anutuna asauku uqerarafa maridanoo. Mi ainaina qandara Anutufa sia amana unna qirafa mariannoo. Maasa Anutuna saqarikidaqa mina asumu mariranaki mariasa Anutufa maasa aranaiqi fuki faaki qidanoo maasa daikisaa marianinna innaarunai mariranara asasidaqa afeesidaqa mariaqeeru qidanoo.

<sup>19</sup> Maasa Yisunara asasira afeesirafa maasa qimuqusa sandara foora rakisiqumarainaaq mapukufi marifara. Yisunara asasira afeesirafa afeeka sandara foora sia rakeerirafa amiqirafa maridanoo. Maasa maa maqanasaa maaqoo marunnaqooqari mi sandafa firafa Anutuna naaqqara amaana maqaki firaa ititara qammunna tapooqaidanoo Anutufa innaarunai mariqoo kukeeqara maqaki miqoo dinni ati rumbanoo maridanoo dinni ati maasa maqasaa rumbanoo maridanoo maasa atukaramma qimaqaidanoo. <sup>20</sup> Yisufa miqoo maasasaa roo qimasee maasa doorinni indaaruu ooru fufa maridanoo. Mifa miqoo aanaiqikirafa firaa uriqararafa naaru naaru marifa Meerakiseedeekana aanna rarafa maridanoo maasa kaqi dadaaqaidanoo.

## 7

*Ooqai aanaiqiki maru fasiqa Meerakiseedeekana qira ufa.*

<sup>1</sup> Meerakiseedeekafa Sareema maqanna karaambaiqa marinuu. Innaarunai uriqarara Anutuna karaambaiqa aanaiqikirafa faqa marinuu.

(Indaaruu namuqaa karaambaiqa moomoo qumuree Soodooma maqannaasa faqa Koomooru maqannaasa faqa misaqa marusa naruseeqa misa ainaina sipsipa burimakau faiqi anaasee aiqama rumbaidaqa Rootana faqa rumbamaree nifiqee fiqau. Abarahaamafa minara iriseenoo nari ainaini marusa nifiqeenoo nifaqeeufanoo aanai oorumara naru nifaqaaqammamareenoo oonu paqurimaseenoo naru taikkeenoo maindaraasa rumbee ooru fusa faqa misa ainaina burimakau sipsipaina Rootana faqa mareenoo oourandee quminuu.)

Qumimarufanoo aanai Meerakiseedeekafa Abarahaamana paqurimandeenoo afaaqooqa qinuu. <sup>2</sup> Qimasoofanoo Abarahaamafa rakiranaki maraqqoo ainaina raineeqeenoo kaqikaana Anutuna amidee qimaseenoo mina aanaiqikirana Meerakiseedeekafa marufanoo aminuu, Anutunara dufi dufi qida fee qimasee Meerakiseedeekana kaqikaana aminuu. Meerakiseedeekana auqu oosana andeeqara karaambaqee qiqau. Mina maqusa auqu Sareema maqusa mi auquna oosana asoora maqasafee qiqau. Minara mi fasiqafa andeeqarana faqa asoarana faqa karaambaiqa

marinau. <sup>3</sup> Meerakiseedeekana aanaakuna akoona anoona misa oosana sia maasa minara iridaqa, sia akara rumaqoo maridanoo. Mina maqoo aukuaana faqa sia iridaqa mina kuqira aukuanara faqa sia iridaqa. Miqinoo marifaqa maasa Yuda maqannaasa oosana marasee minara Anutuna amaakummi maqi qidaqa naaru naaru marufa maridanoo fee maasa qidaqa. Mifa naaru naaru Anutuna aanaiqikirafa marufa maridanoo fee qidaqa.

<sup>4</sup> Doo Meerakiseedeekana qafaaqa, faiqi uriqararafa faiqi firaafa marufanoo Abarahaamafa maasa qikeeku qikaaku fannoo rakiranaki maroo ainainna mina aminau. Abarahaamana uriqararafa marunara miqinoo rainaminau. <sup>5</sup> Anutufa minara iriseenoo Reefina aiku asauku mareeqeenoo Isaraee maqannaafa faqa Anutunara faqa aanaiqikiranaki quqaseenoo maqi qimasee qimanniminau. Innee inneeqa nikaqaafasaa Isaraee maqanna qimannimifaqa aukuaana aukuaana nari narana ainaina kaqikaana raina nimaqee qinau. Reefina aiku asauku Isaraee maqannaasa aanaiqikimarusa Abarahaamana aiku asauku maridaqa. Nari niqoonausa Isaraee maqannaasa misa faqa Abarahaamana aiku asauku kai maridaqa nari narana ainaina rainasee kaqikaana Reefina aiku asauku nimiqau.

<sup>6</sup> Abarahaamafa Anutufa qima afeekaikamaqoo ufana irimarufa marufanoo uriqararafa marufanoo. Meerakiseedeekafa Anutuna aanaiqikirafa sia Reefina ati marufa maridanoo Abarahaamana uriqararafa maridanoo mina afaaqooqa qinau. Miqi qufanoo rakiranaki maraqoo ainaina kaqikaana raineeqee mina faqa aminau. <sup>7</sup> Nifaaqooqa qimaria fasiqausa sia manda fasiqa fannoo nifaaqooqa qidanoo. Faiqi uriqararafa auqu faqaafa akooqoo marifa mifa kai nifaaqooqa qidanoo, ureeqarusa nifaaqooqa qimannimaqaidaqa. Minara Meerakiseedeekafa Abarahaamana uriqararafa marinau. <sup>8</sup> Abarahaamana amaaku moo mina auqu Reefifa marinau. Reefina aiku asauku aanaiqikirausa faiqi faiqi misa faqa kuqimariasa maridaqa niqoonausa narana ainaina nimufaqo maraqau. Meerakiseedeekafa sia kuqirafa akarakinaa ufa marinara minara naaru naaru fee qimarufa maridanoo Abarahaamana narana ainaina amufanoo maranau.

<sup>9</sup> Indaaru Abarahaamafa nari narana ainaina kaqikaana rainasee Meerakiseedeekana aminau. <sup>10</sup> Reefifa mi kamuqoo sia kambiqanau nari akoona aranandaki maridanoo nari akoona faqa qumee Meerakiseedeekana aminau. Doo maqee aukuaana Meerakiseedeekana amu fasiqana Reefina aiku asauku quandaki nari niqoonausunnai narana ainaina maraidaqa.

<sup>11</sup> Mooseena sandufa faqa Anutuna sandufa faqa miqandufa moodaa ufa marinau. Mi ufafa Reefina aiku asaukusaa aanaiqiki marusakina moodaanaki kusinoo maridanoo aigama sandufa fannoo misasaqari Isaraee maqannaasaki amanaikinau. Reefina aiku asauku aanaiqikira oosana fannoo faiqi anaasee Anutuna afusaa kaaqa andeqara anukarana niminoofau sia moo aanaiqikirafa inaaqianna Meerakiseedeekana fooqaafa kambiqaiqini. Sia Aaroonu aiku asauku Reefina aiku asaukukiqari fuka moo quqeenoo Meerakiseedeekana mina aannaree marina naaru naaru marirana Yisuna kai quqanau. <sup>12</sup> Anutufa ooqeenaa aanaiqikirausa Reefina aiku asauku minniseenoo fuka aanaiqikirana quqararee qidanoo ooqeenaa sandufara Mooseena sandufara faqa sia amanaikannoo, fuka sandufa mina amaaqaki quqasee miqoo kai fuka aanaiqikirana quqaannoo.

<sup>13-14</sup> Maasa karaambaiqa Yisunara fuka aanaiqikiranara qidanoo fuka karaambaiqee qidanoo. Mooseefa Reefina aiku asaukuara qufaqa aanaiqikiqau. Yisufa sia Reefina ati marinau. Yudana ati marinau. Yudana aiku asauku moo fannoo sia aanaiqikira ainainiranaki mariqau, sia uqanna mariqau. Mooseefa faqa sia Yudana aiku asaukuara moora qufanoo misaikana maraqau sia uqanna qinau.

*Fuka aanaiqikirafa Meerakiseedeekana fooqaafa doo ani maridanoo.*

<sup>15</sup> Doo fuka aanaiqikirafa kooroo irana namufaqa fuka sandufa faqa aanaiqikirausa oosana faqa mariannoo. Mifa akooqoo kooroo inoo maridanoo. Mi fuka aanaiqikirafa Meerakiseedeekana fooqaafa animaridanoo. <sup>16</sup> Isaraee maqannaafa sandufa fannoo Reefina aiku asaukuara qufaqa aanaiqikiqau. Yisufa sia faiqi faiqi sandufa ameemaanaifau maridanoofau aanaiqikinau. Mifa naaru marifa sia taikarafa, mi afeekafa kai mina afeeqasoofofano fuka aanaiqikinau. <sup>17</sup> Tamummaqara akara fannoo minara maqi qidanoo.

Anee aanaiqikirafa naaru naaru marinafa marinnaranoo, Meerakiseedeekana fooqaafa marinnaranoo.

Mi tamummaḡara ufafa miḡiminoo maridanoo. <sup>18</sup> Indaarūḡaa sandufa oosana doo mafi Anutufa quḡeenoo mina afeeka fannoo sia amanaikifanoo kai fifau marunara mafi quḡanau.

<sup>19</sup> Mooseena sandufa fannoo moona kaaḡa amiḡira andeeḡarana Anutuna afusaa sia amiaḡaaufanoo mi sandufana mafi quḡanau. Quḡaseenoo doo maḡee fuka ainaina firaaḡoo uriḡarara ainaina Yisunara asasira afeesirana maree mini quḡasoofaḡa minannai kai Anutuna aaḡa uḡanna fuanaura.

<sup>20</sup> Doo kafaa Anutufa fuka aanaikikiranara ḡimafeekaikinau. Ooḡeenaa aanaikiki-rausara sia miḡinoo ḡimafeekaikinau. <sup>21</sup> ḡimafeekaikira ufusaa Yisufa aanaikikirafa kambianau. Miḡimma afeekaikiranara Anutufa maaḡi ḡimasee ḡinau.

ḡinee karaambaikira Anutusa ḡima afeekaikira ufa doo quḡeeḡa.

Sia ḡinee ḡeeḡa iriranannai moosaa fuanaura.

Anee naaru naaru aanaikikirafa marinnaranoo.

<sup>22</sup> Mi ḡima afeekaikira ufafa Yisuna mareeḡeenoo sia ooḡeenaa Anutuna faḡa faiḡi faḡa moodaanaki ḡima afeekaikiranaki quḡanau, aaduma uriḡarara moodaanakikira ufa rakisirafaikamambi marinau.

<sup>23</sup> Yisunara moo irirafa kaḡi maridanoo. Indaarūḡaa aanaikikira fasiḡauḡa moomoo mariḡau. Misakina kuḡufimarufanoo moo fannoo kai aanaikiki mariḡau. <sup>24</sup> Yisufa sia misa naanna ree kuḡuannoo sia mina aanaikikirafa moonasaa mariannoo, narī naaru naaru marinara nariki kai naaru naaru mariannoo. <sup>25</sup> Doo minara maḡee faḡa naaru faḡa minannai Anutufa mariḡoo fimarinausa Yisufa amana mareeḡee narī akoona aaḡa quḡaannoo. Mifa naaru naaru marinara mifa narī akoona aaḡa quḡaseenoo naaru naaru misara narī akoona faḡa ufa ḡinoo dadaaḡiannoo.

<sup>26</sup> Yisufa mifa maasa aanaikikira uriḡararafa maridanoo. Maasa mandainaina oosana oosana manda ainaina akiḡara amana kai Yisufa maridanoo. Mifa andeeḡarana naaḡuḡarafa maridanoo. Minaki sia moo aaḡarafa mandaikirafa maridanoo. Mina manda maḡasaa mariasakinaana aadumasaa Anutufa quḡararee ḡimaseenoo mareeḡeenoo innaarunai uḡeera uriḡararanaki quḡaḡaifanoo maridanoo. <sup>27</sup> Yisufa maḡasaa fasiḡa aanaikikirausa uriḡararaura naanna sia raidanoo. Misa maḡee maḡee faasaambaasaana aandau tatufirana narī mandainaina taikaanifeera tatufirana suḡee mariḡau. Narīndi naaree tatufusaida ḡandafi faiḡi anaasee mandainaina numoo taikaanifeera aukuaana aukuaana tatufusee Anutuna ami mariḡau. Yisufa sia misa naanna raidanoo, Mifa moodaa kari uḡanna narī afaaḡa Anutuna aru aminau. Doo sia kafaa kafaa Anutuna aru amiannoo, doo moodaa kari aru aminoo aiḡamausa numoo taikanau.

<sup>28</sup> Mooseena sandufa fannoo fifau faiḡi faiḡi mareeḡeenoo aanaikikirausa uriḡararaisaki quḡanau. Anutuna ḡima afeekaikirafa narī auḡu ramasee ḡima afeekaikirafa Mooseena sandufa naaree ani marifanoo Anutuna mi ḡimafeekaikirufafa Mooseena sandufa rafaḡaḡuamaḡeenoo Anutuna amaaku uḡanna mareeḡeenoo aanaikikira uriḡararanaki quḡanau, naaru naaru andeeḡarafa marianinnana quḡanau.

## 8

*Yisufa maasa aanaikikirausaki uriḡararafa maridanoo.*

<sup>1</sup> Maasa maa ufana akiḡa maaḡimminoo maridanoo. Maasa aanaikikira uriḡararafa innaaruna uriḡararana Anutufa mariḡoo mina aaḡa mina asauku uḡannai maridanoo. <sup>2</sup> Mifa sia Mooseena aanna raidanoo sia faiḡi usakaḡaa uḡiḡaana maaḡakifau ainainidanoofau. Anutufa usakaḡoo maḡana uḡannakina ainainidanoo. Mi maḡanaki innaarunai Anutufa mari oosiranaki aanaikikirausa uriḡararana ainainirana maraidanoo.

<sup>3</sup> Aiḡama aanaikikira uriḡararaura maḡee maḡee narana aandau arusaida Anutuna tatufu amidaḡa. Mooseefa mi ainainiranaki misa quḡanau. Doo maasa aanaikikira uriḡararafa Yisufa mifa faḡa Anutuna tatufirana amirafa mariannoo. <sup>4</sup> Yisufa maa maḡanasaa marinanoofau sia aanaikikirafa mariḡini. Maaḡoo moomoo aanaikikirausa aandau Anutuna aandau tatufida suḡa amidaḡa. Mooseena sandufamau fi-daḡa miḡidaḡa. <sup>5</sup> Mi aanaikira ainainirafa sia anoona maridaḡa fifau amanda kai maridanoo. Innaarunai mari ainaina fifau amananda kai maridanoo. Mooseefa Sinai maḡa maaḡaki uḡiḡaana maaḡa usakararee qufanoo Anutufa maaḡi ḡimasee ḡimaminoo ḡinau. ḡinee aaḡanasaa uḡafiḡaunna maḡana amana kai andeeḡasee usakaa. <sup>6</sup> Indaaruru maru aanaikikirausa miḡiḡa marufanoo Anutufa maḡee Yisuna firaaḡoo uriḡarara aanaikikira ainainiranaki quḡanau. Anutufa faḡa faiḡi faḡa moodaanakikira Yisunaindi uriḡararafa maridanoo, Mooseena moodaanakikira ufa sandufamau firanasaa mundinoo marunara ureeḡararafa maridanoo. Yisunaindi uriḡarara ḡima afeekaikiranasaa mundinoo marunara uriḡararafa maridanoo.



- <sup>7</sup> Indaaru moodaanakikirafa anoonakinanoofau Anutufa sia moo mara quqaiqini.
- <sup>8</sup> Anutufa Isaraee maqannaara maaqi qimasee akaraki niqira ufa qinau. Qinee karaambaiqa maaqi qidaqa, Doo qusasaa qinee fuka moodaanakikira ufa Isaraee maqanna faqa Yudana aiku asauku faqa qianaara.
- <sup>9</sup> Ooqai misa nikeeku nikaaku faqa moodaanaki kira ufa quqaafannana. Sia miqifau ianaurau, moo kammianaara.
- Mi aukuanai misa Isaraee maqanna nisauku qumaree Isipa maqasaaqari nifiqee fimariafanaqa misa qini moodaanaki kira ufara nikooqoofaqa qini minni qisaqau. Minara misa qini qimaqimufaqa qinee minniseeqa sia iriqiafana.
- <sup>10</sup> Doo maqee ooqeenaa moodaanaki kira ufa minnisee Isaraee maqanna faqa fuka moodaanaki kira ufa maaqi qimasee quqaidafa. Qini fuka moodaanaki kira ufa maaqimminoo maridanoo.
- Qinee karaambaiqa qidaqa. Qinee qusasaa qeeqa sandufa misa nitukuraki quqaanara, quqaseeqa misa nimuqusasaa akara rumaqaanaqa sia aunuqaqera. Qinee misa Anutusa marianaara misa qini faiqi namu marifanoo.
- <sup>11</sup> Sia moo fannoo nari aqoonnara fuki faaki qiannoo. Sia moo fannoo nari aqoonnara Anutunara iriannee qiannoo. Misa aiqamausa uriqararasa faqa ureeqarasa faqa qiniara irifanoo.
- <sup>12</sup> Qinee misa aqainnanara nifauaanaara. Qinee misa numoora siammirianaara aunuanaara.
- <sup>13</sup> Anutufa mi fuka moodaanaki kiranara qidanoo indaaruaanara ooqeenaa fee qidanoo. Ooqeenaa ainaina minnisaifa doo afauqaqeenoo qusasaa taikafuannoo.

## 9

*Ooqeenaa amaana maqara faqa fuka amaana maqa Yisunara qinoo maridanoo.*

(Ooqai indaaru Anutufa nari faqa maqasaaqaraasa faqa moodaanaki kira ufa Mooseena sandufaki quqaofanoo marinoo maqee Yisunasaa fuka moodaanaki kira ufa quqaqaiqanoo maridanoo.)

<sup>1</sup> Indaaruaa moodaanaki kira ufa maru kamuqoo Anutunara innaaruqira sandufa oosana oosana marinau. Faiqi nisaukunai auqara uqiqaana maqa Anutunara amooqimaria maqafa faqa marinau. <sup>2</sup> Mikamuqoo misa uqiqaana maqa usakaseeqa mina aundurai oosuseeqa, dinni oosirafa faiqi aanaiqikirausa keeqemaru maqafa kooqi maqa naaquqara fee qiqau. Qoomauqa faqa Anutuna uqafiqee maru feemu faqa minasaa quqemaru qainda faqa minaki marinau. Dinni oosirafa fiqaramasee naaquqara maqa faiqi minaki sia keeqe mariqau.

<sup>3</sup> Firaq qamunna mi oosiranasaa ititanoo marinau. Mina dinni kooqi maqa marinau. Mina dinnatnai kukeeqaranaki firaqoo naaquqara oosirafa mi atinai marinau. <sup>4</sup> Koora auqimaru qaindafa minaki marinau. Minasaa amiqundimaru ainainna suqee marufa marinau. Moodaanaki kira bookisa minaki faqa marinau. Mifa koora qannunnai rafaqaqirafa marinau. Mi bookisanaki koora auqimaru qafeefa marinau. Mi qafee auduranaki manna fee qimaru ainainafa innaarunaindaraa feemu quqasoofanoo Isaraee maqannaasa aadana maqa maaqaki maridaqa naararoofaqa randasee neemaru feemufa marinau. Ooqai Aaroonafa faqa Isaraee maqannaasa faiqi firaasa faqa nari saunu uqiqaana maqaki quqasoofanoo Aaroonaa saunusaa kai auqmara ururamafinoo misaindisaa sia ururanau. Mi saunufa faqa moodaanaki kira bookisaki quqasoofanoo marinau. Mooseefa Sinai aqaanasaa Anutuna moodaanaki kira ufa qaara oonisaa akara rinau. Mi akara rira ooniqanda faqa mi bookisanaki faqa quqasoofanoo marinau. Mi aiqama ainainausa moodaanaki kira bookisa moo auqu Anutufa nifauara bookisaki mariqau.

<sup>5</sup> Mi bookisana afusaa dinni dinni Anutuna qangiroo nimanaqara maridanoo Anutuna areenarana kooroimaru qangirooqanda mariqau. Miqanda niqoosaqara dinni dinni mi qaindana dinni dinni rafaqaqafinoo marinau. Mi qambaannasaa Anutufa faiqi anaasee mandainainara nifaukeenoo minniseenoo imariqoo ititaidafa. Doo maqee sia mi ainainausara qianaara.

<sup>6</sup> Aanaiqikirausa maaqimasee ooqeenaa uqiqaana maqaki ainaini mariqau. Aanaiqiki marusa kooqi maqaki faasaambaasaana keeqafi nari ainainimariqau. <sup>7</sup> Aanaiqikirausa uriqararafa firaqoo naaquqara maqa aunduraki aukuaana aukuaana moodaa kari kai mi naaquqara maqanaki keeqee marinau. Aiqama aukuaana aukuaana miqikaimma moodaa faasaana kai keeqee marinau. Mifa aandau fidika mara maree minaki Anutuna ami marinau. Nari numoora faqa faiqi anaasee numoora faqa mina akiaqara mi fidikana

ami marinau. Mandainaina sia irirai marainnana akiaqara naruandoo qimasee miqi marinau.

<sup>8</sup> Maaqira ainainana kai Anutuna naaquqara maraquna fannoo maasa moo ufa qimaqimidanoo. Minara maaqi qidanoo, kooqi maqa mifa mariannoo. Mee firaqoo naaquqara oosirannai sia miqoo faiqi fimariaqoo sia miqoo aana maridanoo fee qidanoo. <sup>9</sup> Mi kooqi maqafa maa maqee maria kamuqoora kikiqa usidanoo, mina amananda maridanoo, maaqimminoo maridanoo. Anutuna ami maria ainainafa faqa aandau tatufusee ami mariafa faqa sia amana ami mari fasiqana amuqusa findaukamasainanoo anoonaikiannoo. <sup>10</sup> Anutuna ami maria ainainna faqa aandau tatufusee ami mariafa faqa mi namusa naranara faqa nammariara faqa nammariinnai findaukarana oosana oosana faqa qidaqa. Nipatasaaqaraa ainaina mi ainainafa ufaasu maridanoo. Anutufa fuka ainaina quqaranara minara afeesidanoo ufaasu maridanoo.

<sup>11</sup> Asauku mundirafa doo ani maridanoo. Innarunai marira ainaina asumu faqa doo ani maridanoo. Mi amiqira ainainausa aanaiqikirafa uriqararafa asauku mundirafa doo ani maridanoo. Mooseena ainainimaru uqiqaana maaqafa ureeqaradfa marinau, maqee asauku mundirafa fuka firaa anoona uqiqaana maqaki innarunai ainaini marifa uriqararafa anoona uqanna ani maridanoo. Sia faiqi nisaukunnai auqi maria amaana maqafa maridanoo sia maa maqa maaqanasaaqaraa ainainau maridanoofau. <sup>12</sup> Asauku mundirafa innaruna kooqi maqaki ooru keeqakufanoo firaqoo naaquqaranaki ooru keeqafinoo sia mimmi fidikafau burimakau aanaaqi fidikafau mandainaina akiaqara Anutuna amisee keeqanau. Nari kai nari fidika qumareenoo miqoo Anutufa maruqoo maasara aranaqarafa taikaanifeera amiseenoo minannai kai naaru asumu marirana maasa qimiannee qimasee maranau.

<sup>13</sup> Mooseena uqiqaana maqakinaa sandufara aandau fidikara maaqi qidanoo. Faiqi anaasee mandainaina maraasara ikairifaqaasee qimasee mimmi fidika faqa burimakau akoono fidika faqa ikairi faqaasa akunnimaqaidafa mi idanasaa danda faqa misa nifaaqasasa akusoofanoo Anutufa misara anukarusara maqi qirausa maridammiafoo qidanoo.

<sup>14</sup> Fifau aandau fidika fannoo ririmma faiqi ikairi findaukaidanoo Anutuna asauku mundirana fidikara naqi fee qianauree. Mifa naaru naaru marira maraquna fannoo dadaaqifanoo nari uqanna anoona tatufirana amiranara foora Anutuna aminau. Mina fidika fannoo sia maasa ikairi kai findaukaannoo. Maasa qimana maraquna faqa mina faqa findaukaidanoo maasa mandoosana maree mariana faqa maasa kuqiranaki rarisama quqee mariana faqa Yisuna fidika fannoo mina faqa findaukaidanoo. Miqi mandainafa maasa amana kaqi marira Anutuna ainainamminaura.

<sup>15</sup> Miqimandaifanoo asauku mundirafa Anutufa faqa faiqi faqa moodaanaki kira ufa fuka ufa qima andeeqeeqeenoo quqaidanoo. Anutufa nuqu rainausa misa aniree maraaqeeru. Naaru naaru afeedimari amiqira qumiasana saqama ainainara kasooqaqee innaarunai maraaqeeru qidanoo. Indaaruuqaa moodaanaki kira aukuana sia amana mi amiqira afeedira qumiasana saqamana maree mariqau. Misa mi aukuana kaqi nari mandainaina fannoo faiqi nifaaqa rumbanoo marinau. Maqee asauku mundirana kuqirafa doo mi rumberana nimirara idukinau.

<sup>16</sup> Faiqi moo fannoo afaaqooqa qinafa faiqi mifa kuqinanoo mina afaaqooqa qirafa anoona kooroo iannoo. <sup>17</sup> Mi fasiqafa kaqi marinanoo mi ufafa kaqi miqinoo mariannoo kuqinanoo kai koorooiannoo. <sup>18</sup> Minara Mooseena moodaanaki kira ufa fannoo aandau kuqufanoo miqimanduofanoo doo mi ufana anoona koorooinau.

<sup>19</sup> Mooseefa indaaruuqaa moodaanaki kira ufa mina sandufa oosana oosana faiqi anaasee qimannimiseenoo burimakau mimmi fidika nammari namufaqa mareenoo naneeka amanee faqa taatuqee arira sipsip asaasi faqa qumareenoo fidikaki raaramma qumareenoo sandufa bukamau faqa faiqi anaasee nifaaqasasa faqa akuseenoo maaqi qimasee qimannimainau. <sup>20</sup> Maa andauna kuqina fidika fannoo inni faqa Anutuna faqa moodaanaki kirana mapuku nimaqaidanoo, Anutufa inniara maa moodaanaki kira ufamau fuaqee qidanoo. <sup>21</sup> Miqikai inoo Mooseefa uqiqaana maqa afaaqasasa fidika mi aandau fidikana akinau. Akuseenoo maaqakina Anutufinnai innaaru qimaria ainainasaa faqa aiqama akinau. <sup>22</sup> Miqidanoo Mooseena sandufamau aandau fidikannai kai aiqama ainaina anukee marinau. Faiqi mandainaina faqa fidika teeqiranannai mi manda ainainna anukee marinau.

*Asauku mundirafa kuquna maasa mandainaina maraqunnisanau.*

<sup>23</sup> Uqiqaana maaqaki auqeeamaru ainainafa innaarunai maru ainainna fooqaafa mina amananda maqasaa marinau. Anutufa minara kai iriseenoo qufaqa misa aandau fidikannai aiqama ainaina anukee mariqau. Anoona ainaina innarunai maru anoona

ainaina findaukarana sia aandau fidika amana maridanoo, moo uriqarara ainaina marasee arirafa kai amana maridanoo. Asauku mundirana arirafa mifa kai amana mariannoo.

<sup>24</sup> Asauku mundirafa uqiqaana maqa faiqi nisaukunnai auqamaqoonaki innaarunai marina fooqaanaki miqiranaki sia keeganau, mi maqanaki naaquqara oosiranaki sia keeganau. Mifa andeeqasee innaaruna maqa maaqaki Anutufa maruqoo uqanna keeqafinoo kooroomafinoo maridanoo maasa dadaaqidanoo.

<sup>25</sup> Yuda maqanna aanaiqikirausa misa uriqararafa aandau fidika mara mareenoo naaquqara oosiranaki keeqee marinai, aukuaana aukuaana keeqee marinai. Asauku mundirafa sia moomoo kari nari afaaqa Anutuna aru aminau. <sup>26</sup> Miqiga moomoo kari arifanoofau maqa maaqa oosana aroonakiqari aupuraida marini. Ooqeenaa aukuaana taikarara adeedirama fufanoo maqee aukuaana kai asauku mundirafa moodaa kari kai kooroo mafinoo nari afaaqa Anutuna aru amiseenoo minannai maasa mandainaina rukannisana. <sup>27</sup> Aiqamausa moodaa kari kuquannana amana kai Yisufa moodaa kari kuqinau, aiqamausa moodaa kari kai kuqufiqa miqooqari Anutuna faqa ufa qiranaki fifaranoo. <sup>28</sup> Yisufa mi mau kai finoo moomoosa numoo maraqunnisaanifeera nari afaaqa tatufirafara foora moodaanni Anutuna aru aminau. Mifa kafa koorooiannoo. Sia kafa numoo undaru qumuannoofau. Nari afeesara mariasara qumuree mareeqee asumu mariranaki quqannisarara qumuannoo.

## 10

<sup>1</sup> Yuda maqanna Mooseena sandufa faqa uqaana maqa ainaina faqa innaarunai mari ainainna mina amananda kai maridanoo siara foora inoo maridanoo. Naaru kambigaaninna ainaina amananda oorudupirana amananda kai maridanoo. Mooseena uqaana maqaki Mooseena sandufamau fidaqa moodaa tatufira oosana kai aukuaana aukuaana aandau kai suqa amu mariqau. Doo miqidaqa naqimasee mi sandufana Anutufinnai ani mariasa anooaikamma nimaqaannoo fee, sia amana. <sup>2</sup> Mooseena sandufasaa Anutunara amooqiga innaaru qimariasa kuqaa anukamma nimaqasainaqau misa nari numoora nisaurirana taikaseefau marini, aandau maqee maqee qaindasaa tatufi mariafa faqa sia marini. <sup>3</sup> Aukuana aukuaana aandau tatufirafa mifa faiqi anaasee nari numoora naaqoo auqai faqa maqee maqee aandau tatufidaqa. <sup>4</sup> Burimakau fidika faqa mimmi fidika faqa mifa sia amana uqanna faiqi anaasee mandainaina numoo maraqunnisaannoo.

<sup>5</sup> Miqi marunara asauku mundirafa maa maqanasaa qumiraree qimasee maaqi qimasee Anutuna qimaminai.

Anee aandau arusee qaindasaa tatufiranara, akooqaidanoo,

Anee faiqi qifaaqa deedaqamma qimaqainanoo.

<sup>6</sup> Anee aandau arusee qaindasaa muduka tatufiranara

akooqaidanoo, numoo maraqunanina aandau suqaranara akooqaidanoo Yisufa miqi qimasee Anutuna qimaminai.

<sup>7</sup> Minara Yisufa maaqi qimasee kaifaa Anutuna qimaminai.

Oo Anutu doo qinee maaqoo maridaqa.

Aneenna iriranannai kai qiniara ia.

Mooseena sandufaki qiniara akara rinai. Doo mi mau kai qiniara ia. Yisufa miqi qinoo.

<sup>8</sup> Yisufa miqi qimaqoonara qinee inni maaqi qimasee qimannimianaura. Yisuna indaaruaqa ufa maaqimminoo maridanoo.

Oo Anutu anee aandau arusee suqa amiranara

akooqaidanoo sia maraaqaaidana, faiqi numoo rukaranara

aandau qaindasaa tatufiranara akooqaidanoo.

Yisufa mi andausa tatufimarunara irinoo sandufamau fidaqa miqimariaafoo qimaseenoo kaqi Anutufa minara akoo akaa imarunara qinai.

<sup>9</sup> Yisuna inaaqianna ufa maaqi qidanoo,

Oo, Anutu, doo qinee maaqoo maridaqa.

Aneenna iriranannai kai qiniara ia.

Asauku mundirafa mi ufamau fidanoo. Ooqai aandau tatufimaruna mara aqu taikaseenoo fuka nari amaqi fidika mina amaaqaki quqaseenoo maasara kuqu qimaqanau. <sup>10</sup> Yisufa asauku mundirafa Anutuna aidiramau kai fidanoo nari afaaqa andaura foora Anutuna moodaa kari kai aru aminau. Miqunara kai maasa numoo ikairi findaukama qumaqanau.

<sup>11</sup> Yuda maqannaa aanaiqikirausa faasaambaasaana aiqama faasaana moomoo aandau tatufimariqau. Moo faasaana tatufuna miqikai imariqau, moomoo aandau tatufimaruna faiqi numoo rukarana amana sia maruna fifau kadaapirida tatufimariqau. <sup>12</sup> Asauku mundirafa sia miqinau. Mifa moodaa kari kai moodaa amira aminau. Naaru naaru faiqi numoo taikaaninnana akiaqara aru aminau. Aru amiseenoo innaarunai Anutuna aaqa mina asauku uqannai ooru ooqumarinoo maridanoo. <sup>13</sup> Miqoo maridanoo Yisufa Anutunara nari namuqaa mareeqee aramandunnai quqaaninnanara afeesida maridanoo. <sup>14</sup> Moodaa kari aru amiranannai Yisufa mandainaina ooqai faqa maqee faqa rukannimaqee mariasa naaru naaru kuqaa andeeqarana niminau.

<sup>15</sup> Anutuna naaquqara andeeqara maraquna fannoo asauku mundirana dadaaqida maaqi qidanoo.

<sup>16</sup> Qinee misa faqa moodaanaki kira ufa maaqi qidaqa.

Mi faasaannafa qinee qeeqa qifaaqa aru amianna faasaana aiqarainafa qeeqa sandufa misa nimuqusaki quqasaanaqa misa mi mau kai fida mariaqeera. Misa nitikuraki faqa akara rumasaanaqa sia uqanna aunuaqeera.

<sup>17</sup> Miqi qimaseenoo Anutuna maraquna fannoo maaqi qidanoo.

Qinee maaqooqari sia kafaa misa aaqarana faqa misa mandainaina ikairi faqa siamma irianauna aunuqannamma nimaqasaanura.

<sup>18</sup> Maasa mi ufana irisee minara maaqi. Anutufa maasa mandainaina minnisainna kamuqoo fifau aandau arusaida tatufi mariafa doo taikeennoo.

*Maasa Anutuna aaqa aniaqeera qidanoo.*

<sup>19</sup> Qini qikaqaafasaa Yisufa kuqinoo nari fidika adioonannai maasa sia rufiaidaqa kaqi mana mana nifaafa quqasee Anutuna naaquqara oosiranaki keeqaanura. <sup>20</sup> Mifa fuka aana maasara afisinoo. Kaqi marira aana Anutunasaa ititara qamunna anaqiseenoo afisinoo, nari afaaqara qamunna kikiqa usidanoo. <sup>21</sup> Maasa aanaiqikirafa firaafa mifa Anutuna maaqasaa rakisirafa maridanoo.

<sup>22</sup> Doo maasa minara iriseeqa Anutuna aaqa adeedi aniaqa. Kuqaa aneenna amuqusakiqari Anutunara ridana doo Anutuna aaqa adeedi aniaqa. Aneenna irirana mapukusee minasaa rusirafa doo adeedi ania. Ooqeenaa mandainaina ani aakirana afaimma quqaseenana anukarafa ania. Aneenna afaafa amiqira nammarinnaira foora findaukamasee Anutuna aaqa adeedi ania.

<sup>23</sup> Maasa innaarunai mariranara asasidaqa afeesidaqa kooroo idaqa. Maasa mi asasira afeesirana amiqimmandee qumaraaqa. Anutufa nari qima afeekaikira ufa sia minnisaannoo mifa qumaraannoo minara amiqimmandee rakisi qumaraaqa.

<sup>24</sup> Maasa nariara nariara uriqarara ainainee qimasee nimuqusirafa marianinnanara fuki faaki qimasee nisaukukoo dadaaqira dadaaqirafa kambiiqaani. Nari amiqi amiqirana faqa fuki faaki qimasee nari dadaaqi nari dadaaqiqa.

<sup>25</sup> Akaqausa amaana maqaki maqee suqiranara nikooqaidanoo. Innee sia miqiaqa maqee maqee suqaaqa. Karaambaiqa qumira faasaanara qusararanara irisee nari fuki faaki nari fuki faaki qimasee Anutuna ufara suqaaqa.

<sup>26</sup> Maasa Anutuna anoona ufa iridaqa kaqi iridaqa mandainaina maraqa fifi inaqa moo amiqira ainaina Anutuna amimarinafa sia mi numoona rukaannoo naaru naaru mariannoo. <sup>27</sup> Miqinna fasiqafa naaru kambiiqaaninna ufa iriranara rufiasee afeesianno. Mikari mi fasiqafa ufa qirana iriseenoo firaa idaqemari idanaki qamataikaannoo. Miqimasee Anutuna ufara sia fee qimariasa aiqamausa minaki aupureefarannoo. <sup>28</sup> Mooseena sandufa maru kamuqoo faiqi moo fannoo mi sandufana ameesuqirafa qaara fasiqee qaaramoo fasiqee qafamasee ufa qufanoo sia mina afauee mariqau. Doo mifa kuqimarinau.

<sup>29</sup> Faiqi moo fannoo Anutuna amaakuara akooqainafa mina arirafa firaqoo fiqaranoo mariannoo. Mi fasiqafa Anutuna moodaanaki kira ufa fidikara nari mi fasiqana numoo rukasainnanara qikoo fee qinafa faqa Anutuna afaari mari maraqunara faqa mandufa qinafa, mi fasiqana arirafa sia Mooseena aanna raannoo, fiqaranoo mariannoo. <sup>30</sup> Maasa Anutunara faqa mina ufara faqa iridaqa mifa maaqi qinau. Faiqi mandainaina akiaqara narirafa qinindi maridanoo fee qinau. Mifa kaifaa maaqi qinau. Karaambaiqa nari aiku asauku ufa irisee mandoosana marinanoo naruannoo sia marina sia naruannoo. <sup>31</sup> Mifa miqi qidanoo qinee minara maaqi qidaqa, kaqi marira Anutuna asaukuki aqufinafa firaa narirafa kaaqa naaquqee marifa maridanoo.

<sup>32</sup> Indaaru innee Anutuna ufa iru aukuanna mi aukuannara maqee inni naaqqoo auqaidaga. Mi fasannai Anutunara asasirafa qoomara fooru kaaqa qamannimaqqoofaga qafamasee kadaapi rumasee nidafimaruafa Anutuna ufamau fifufaga sia kudoosapaqau. <sup>33</sup> Akaqa faasaana faiqi anaasee aiqamausa nifusaa ataasa ataasa inni qimanni-maqee mandaikamma nimaqaga. Moo kari faiqi anaasee Yisuna ufa irimariasa nari mariafaqa innee faqa misa ummaara dadaaqaqaa akooqoo oonuree misa nisaukunnai dadaaqaqa amiqimma nimaqaga. <sup>34</sup> Innee karabusaki mariasa dadaaqidaqa narana munu nimirannai misa aupurarana inne faqa maree mariafanoo. Faiqi anaasee aniree aanoomasee inni maaqakinna ainaina aiqama animaree fifuafaqa sia innee minara noori runuafanoo, innee asasa kai mandee mariafanoo. Innee inneeqa maa maqanasaaqaraa qumiasanara fifau oorudupira ainainee qimasee innaarunai uriqarara naaru marira ainainara maridanoo fee qimasee sia ikiraqaafanoo, innee asasimariafanoo.

<sup>35-36</sup> Doo maqee faqa inneeqa paasoosirana sia quqaaga. Mifa marifanoo mina feefauru naaru marirana nimiannoo ubiqafi marirafa inniki mariani. Innee sia ubiqafinaqa sia amana Anutuna iriranamau fifaranoo, sia mina qima afeekaikira marira innaaruna qumiasana mareefaranoo. <sup>37</sup> Anutuna akara ubiqafi mariranara maaqi qidanoo. Kaqikaqqoo qumirafa qusasaa qumuannoo. Sia kisaagaasaa fifau mariannoo doo qumuannoo.

<sup>38</sup> Qini qiku qisauku andeeqarausa mariasa maqee maqee qinisaa irirana rusisee mariqa fifi inaqa mi mariranara kai qini didiannoo. Misa minara nikooqee marinausa misara qini faqa qikooqaannoo.

Anutuna akara maasara miqi qinoo maridanoo. <sup>39</sup> Faiqi akaqausa Anutufinnai fuani qimasee fifi ifaqa aanai oonuree maparaamaki oonurandee quandaki ida aqufidaqa. Maasa sia misa naanna raidaqa. Maasa amiqimmandeeqa Anutuna mandaqaifanoo doo Anutufa maasa asumu maraannoo.

## 11

*Anutunasaa irirana rusimarunara qimaqqoo ufafa.*

<sup>1</sup> Anutunasaa irirana rusimarinausa misa innaarunai kambiqaaninna ainainara asasamandee afeesidaqa. Misa minara kuqaa anoona maridanoo innaarunai maraanuree qida afeesida maridaqa. Misa sia qafeemari ainainnara anoonee qidaqa nifaqa quqasee afeesidaqa. <sup>2</sup> Ooqa marusa miqimmi mariqau. Misa Anutunasaa irirana rusiranannai Anutuna eedoo qirafa misaki marinau.

<sup>3</sup> Ooqai Anutufa nari ufannai maqa faqa innaaruna faqa auqusoofanoo maridanoo. Maasa Anutunasaa irirana rusiranannai mi ufanara kuqaa anoonee qidaqa. Mifa sia akooqoo maru ainainna qumareenoo maqee qafee marunna ainaina auqinau.

<sup>4</sup> Kainafa Anutuna tatufirana suqa amiraree qimaseenoo ureeqarana suqa aminau. Abeerafa Anutunasaa irirana rusi marunannoo nari afasaana Kainana tatufirana uraaqaranau. Abeerafa Anutuna saqariki marunara Anutufa Abeeranara andeeqara fasiqafee qimaseenoo mifa amu ainainara asasinau. Abeerafa ooqai kuqinoo maridanoo mina ufa fannoo kaqi maasa qimaqimidanoo. Innee faqa miqikai mandee Anutuna saqarikaqa. Miqi qidanoo Abeerafa naamua qidanoo.

<sup>5</sup> Faiqi moo auqu Eeookafa Anutuna saqarikiranannai kai sia kuqufufanoo kaqi marufanoo Anutufa mara muru nari unnai quqanau. Misa miqooqaraasa Eeookana irira randoosia minnisaga. Anutufa kaqimma afiqa quqanau. Anutuna akarakinna ufa Eeookanara maaqi qinoo maridanoo. Eeookafa andeeqara fasiqa marunara qini qigaara ree marifaqa asasidaqa. <sup>6</sup> Sia faiqi moo fannoo dapi marirana niranannai Anutuna asasirana maraannoo, minara nari Anutunasaa irirana rusiranannai kai mina asasirana maraannoo. Faiqi anaasee moo fannoo faasa Anutunara kuqaa maridanoommifoo qimarinafa, Anutufa nari andeeqara oosanara randeemariisa amiqira ainaina innaarunai nimiannoommifoo qimarinafa mi ufaqanda qimaria fasiqa aanaaseesa kai Anutufinnai fifaranoo.

<sup>7</sup> Anutufa kasooqafee kambiqaaninna ainainara Nooafa sia qafee marunara aaquqimasoofanoo Nooafa nari irirana Anutunasaa rusimarunara irisee eedoo qimaseenoo firaa sipa auquseenoo nari faqa nari aiku asauku faqa minakimma asumu marinau. Auquseenoo Nooafa minannai aiqamausa maa maqanasaaqaraasa aiqama niqiseenoo rafaqaqafunnimaqanau. Noofa Anutuna mandaqaqaranannai kai Anutufunnaindaraa andeeqarana maraseenoo asumu marinau.

<sup>8</sup> Abarahaamafa faqa Anutunasaa irirana rusi marufa marinau. Anutufa Abarahaamana aaramaseenoo qimaminau. Anee anirainaqa fuka maqa maaqa anindi kianinnana uqafiqaanaura, anee miqoo fua. Miqi qufanoo Abarahaamafa iriseenoo nari irirana Anutunasaa rusiranannai eedoo qimasee nari maqa maaqa minnisee sia qafee maru maqa

maaganaki kaqimbinau. <sup>9</sup> Abarahaamafa miqooqari aanaamuruara foora Anutufa qima afeekaikammaqoo maqa maaganaki oonu marinau, Anutunasaa irirana rusiranannai kai miqinai. Nari maaga uqanna oqai maruna maaga uqannaki marinai. Mi maqa maqana minnisee fuka maqasaa nari faqa Yakooboona faqa Isakeena faqa uqiqaana maqaki kai marusa mariqau. Aandau apatannai auqira uqiqaana maqaki mariqau. Miqanda faqa Anutuna qima afeekaikiranara maree marusa mariqau. Miqanda faqa Anutuna qima afeekaikira ufa irisee mariqau. <sup>10</sup> Anutufa amiqira maqusa naaruara marira maaga tuna rakiqasee auqusee amiraree qufanoo Abarahaamafa uqiqaana maqaki maridanoo afeesida marinai.

<sup>11</sup> Abarahaamafa nari anaaga Saraqanandiri asooqa nauaraiqi mariqau. Saraqana faiqi maqara kamu doo taikafufaqa faiqi siaiqanda mariqau. Mi kamuqoo Anutunasaa irirana rusimarunannai kai ooga faiqi Isakeena maqaqau. Ooqai Anutuna mandaaqee marunnannai kai faiqi maqaqau. Ooqai Anutufa faiqi amianauree qufaqa iriseeqa eedoo qimaseeqa nifaaga quqasee kisaagasaa mariuna maqaqau. <sup>12</sup> Abarahaamafa kuqinoora foora inoo marufafaqa mina faiqi namu kambiqeeqa fasau nukuda miqirausa kambiqaqau.

<sup>13</sup> Abarahaamafa nari faiqi namu moomoosa faqa Anutuna mandaaqaranaki mari-ufaqa kuqigau. Misa sia Anutuna qima afeekaikiranara anoona qafaqau. Nianaindara-ara foora naaqoo kai irisee asammasee kasooqaaqee kuqigau. Nariaraa oo maasa maa maqanasaa aanaamuruara foora iqa mariafaqa asaqiraafaiqiqa maridaqee qigau. <sup>14</sup> Miqira ufa qimariasa moo maqara nariara mararara randaidaqa kooroo idaqa miqi qidaqa. <sup>15</sup> Misa irirafa sia nari ooqeenaa maqa maaqai ubeekaidaqa. Miqinaqau kafa miqoo fuaqini. <sup>16</sup> Misa uriqarara maqara innaarunai maqara randaidaqa ani asaqiraafaira foora maridaqa. Miqi marunara maasa Anutu fee qimasoofoano sia mifa asaurinai. Faasai innaaruna maqusa miqimariana akiaqara nimirara deedaqinoo maridanoo.

<sup>17</sup> Anutufa Abarahaamana amanamandee qafaanee qufanoo Abarahaamafa Anutunasaa irirana rusirafa marunara Anutuna ufa iriseenoo eedoo kai qimaseenoo nari moodaa faiqi nari amuqusuqanna Isakeena kaqi rumbaseenoo qaindasaa quqasee arirarufanoo qaoo qinai. Anutufa faiqi ani aiku asaku moo amiraree qima afeekaikamaqoonara Abarahaamana amuna. Sia minara Abarahaamafa amuqusufanoo nari amaaku rafaaga finau. Kaqi eedoo kai qimasee nari faiqi afiqeenoo arirarinai. <sup>18</sup> Anutufa ooqai Abarahaamana qimamu ufafa maaqimminoo maridanoo. Ani amaaku Isakeenasaaqari ani aruakinausa moomoo qinee qima afeekaikiranara kambiqeefaranoo. <sup>19</sup> Abarahaamafa sia minara iriseenoo nari faiqira amugusinai. Mifa kuqufinanoo Anutufa uqeeraannommifoo qimaseenoo Anutuna ufamau arirarinai. Doo kuqaa Abarahaamafa nari faiqi Isakeena kuqiranakinanara foora maranai.

<sup>20</sup> Abarahaamana amaaku Isakeefa innooqafinoo Anutuna ufa iriseenoo mina saqariki marunara quandaki Yakooboosa Eesausa naaru kambiqaaninnanara amiqi amiqira ainainara nifaagooqa qimannimaqanau.

<sup>21</sup> Isakeena amaaku Yakooboofa innooqeenoo Anutuna saqariki marunara quandaki Isipa maqa maaqaki kisaagasaa marinoo kuqiraridanoo nari amaaku Yooseefaana faiqiqara nifaagooqa qimannimaqanau. Nari saunusaa aqini munduseenoo Anutunara innaaru qinai.

<sup>22</sup> Yakooboona amaaku Yooseefaafa faqa Anutuna saqariki marunara kuqiraridanoo Isaraee maqannasa Isipa maqasaaqari moosaa fifandinanara qimannimidanoo qimanniminai. Moosaa fiqa qini qimudaani faqa maree fuaqa.

<sup>23</sup> Mooseena anakoo misa faqa Anutuna saqariki marusa maridaqa sia Faraonara rufisee mina ufa rukisee Mooseena maqasee kaaga idaaqira faiqi anaqimmifoo qimasee qaaramoo quqoonasaa kukeeqaoofoano marinoo nammari afainni kukeeqasoofoano Faraona araamuna paqurimaseenoo nari faiqira foora firinai.

<sup>24</sup> Mooseefa faqa innooqeenoo Anutuna mandaaqara fasiqa marinai. Minara mifa faiqi kammambinoo Faraona araamuna faiqikiranara akoqoofoano Isipa maqasanaasa minnisanau. <sup>25</sup> Mifa Faraona maaqaki mariasa nari oosana oosana adiafaaira irira ainainee qimarunara mandainainee qimasee minnisee Anutuna faiqi namu Isaraee maqannaasa faqa aupuraanauree qimasee misa faqa finau. <sup>26</sup> Mooseena afu fannoo innaarunai qumiasana ainainasaa afu munduseenoo minara kai rimarufa marufanoo Isipa maqannaasa munnimma ainaina oosana oosana minnimmasanau. Mooseefa Isipa maqannaasa faqa nari aqara adiafaairanaki keeqarara akoqoofoano misa minnisee asaku mundirana kasooqaaqee kambiqaaninnanara irisee mi aupuraranaki keeqera maqi mafinai Isararee maqannaasa misa aupuraranaki dadaaqinoo keeqanau.

<sup>27-28</sup> Mooseefa Anutuna mandaaqarafa marunara naneeka fooqaa saqari amanee mara-maree sipsipa fidikaki raaramma qumaree maaqa kooqimau akusoofoano qangirooqaa

faiqi narimarufa qumureenoo mina qafamaseenoo Israaee maqanna faiqi nifaua-maseenoo sia narinau. Isipa maqanna faiquqa kai narinau. Moosefa narí Anutuna mandaqaranannai minara iriseenoo ainnaaqarara oosana kuradanau. Moosefa Anutuna mandaqarafa maridanoo miqinau. Minara kai Moosefa Faraona aanooqiranara sia rufianau paasooamandee Israaee maqanna Isipa maqasa marusakinaana nifiqee finau. Nifiqee fimarufaq misa dapi ufa qimarufanoo Moosefa kafaa oonurandee aniranara qaoo qimasee nifiqee fimarinau, Anutufa mina oorinni akooqoo maridanoora foora qufanoo andeeqasee nifiqee fimarinau.

<sup>29</sup> Israaee maqanna Anutuna mandaqaranannai Taatuqee nammari fannoo qambaana raineenoo aadanusufufaqa aadana maqasaara foora taqaqau. Isipa maqanna misa naruannee qimasee misa ninaaqiana nammari qambaana aadana maqasa oonu roofanoo nammari fannoo oonu maree ani maree maseenoo aiqama narutaiKANAU.

<sup>30</sup> Israaee maqanna Anutuna mandaqaranannai Yeerikoo maqusa ooni faandaamura rakeemasee ooru rameeqaqee aqufiqa nariqau. Misa qisauku dinni taikasee dinni ani qaara marasee faasaana mi faandaamurana fiq fiq masoofanoo mi faandaamurana rapeemasoofaqa ooreeqa aqufiqa nariqau. <sup>31</sup> Yeerikoo maqusaindaraa anaasee dapi maraganu aanaaseefa mina auqu Raqaba nammari mifa faqa Anutuna mandaqaranannai sia narí maqanna faqa kuqinau. Mi anaaseefa Israaee maqanna nipurara fasiqagara amiqimmandee narana aina niminoo narí maaqa ataufakaqa kukeeqannisanau. Maanara mi anaaseefa narana aina niminoo, narí maqanna naridaqa qini faqa dari maqi qimasee kukeeqannisanau. Minara mi anaaseefa sia Anutuna ufa rukiee marusa faqa kuqinau. Kaqi asumu marinau.

<sup>32</sup> Moomoosara sia qianaara akara kisaqaikiandoora. Akaqausa maaqimasee marifaqa Kideeoonafa faqa Barakafa faqa Samasoonafa faqa Yeefataafa faqa Dafidifa faqa Samueerafa faqa Anutuna tamummaqara fasiqauqa moomoosa faqa misara minniseeqa misa ufara sia ufa qianaara. <sup>33</sup> Anutuna saqarikiranannai akaqausa akaqa maqanna maqusa maqusa naru taikaseeqa uriqaraqa mariqau. Akaqausa Anutuna saqarikiranannai kai andeeqara qoo fiqa Anutuna qima afeekaikira asumu marirana faqa innaarunaindaraa qumiasana kuqiga ooru maraqau. Faiqi akaqausa kaasau kusinara foora firaafa mina auqu raioona misa marunaki namuqaauqo naruani fee qimasee rafuseeqee maramaaqinni raioona marunaki aqufufanoo Anutufa mi aandauna oori rafaafusoofaqa sia nariqau. Misa mi kaasau kusinara auqu raioonee qimariqau. <sup>34</sup> Faiqi akaqausa Anutuna ufa iri mariasa namuqa nisaukuki soofaqa misa mareeqee ida firaana arasee minaki aqunnisoofaqa misa Anutuna saqarikiranannoo mi idana imbasee sia kuqiqau. Namuqa fannoo aseemannai akaqausa naruanerufaqa Anutuna saqarikiranannai quqasee sandaqa.

Faiqi akaqausa sia afeekaikusa Anutuna saqarikiranannai afeekaikamasee moomoo maqanna rakira fasiqau aiqama naru taikasee narirara kaqi mariqau. <sup>35</sup> Anaasee akaqausa narí faiqi namu kuqufufaqa Anutuna saqarikiranannai Anutuna tamummaqara fasiqauqa mara findifumasooofaqa mariqau. Faiqi akaqausa namuqa innee Anutunara minnisaifaqa maasa sia inni naruanara, sia inni ataasa ataasa qimasaida nifaqa rakee ianauranoo fee qufaqa Anutuna saqarikiqa mina minnisaranara qaoo qufaqa ataasa ataasa idaqa narimariqau. Kuqu fasiqausa maaqi qigau Anutufa maasa qumareeqeenoo uriqarara mariranaki quqaanifeera marida saina kuqa. <sup>36</sup> Faiqi akaqausa Anutuna ufamau fimariasa minasaara ataasa ataasa ufa qimaruna maree mariqau. Mandoosana maree mariasa akaqausa qumaraseeqa narí sanda qainnainaina atisa rumbaqaoo sandasamu kaifaa kaifaa naridaqa nifaqa ateeakaateekamma um-mooquki mariqau. Akaqausa sainandannai rumbamaree karabusaki quqemariqau.

<sup>37</sup> Misa akaqausa Anutuna ufasaara maramaree oonisamu kuqa nariqau. Misa akaqausa qumaree keedainnai qambaana tuqu raqaqau. Misa akaqausa qumaree aseemannai narí mariqau. Anutuna ufamau fimarusa minasaara narimariafaqa akaqausa rufiasee narí maaqa minnisee qamunnara randeeqa mimmi apata fee sipsipa apata fee minauqa afisusaidaga munnimma ainaina siaia nariranara rufiasee kaqi dapi nimariqau. Faiqi anaasee fifau narsaaida mandoosana mandoosana nimimariqau.

<sup>38</sup> Maa maqanasaaqaraa irirana faqaasa marirafa mandaikamminoo maridanoo oorudupinoo maridanoo Anutuna ufa irimarusa narunnifaqaa ufaqa misa sandoosa misa irirafa urinaaqaranoo maridanoo. Innaarunai fifandinanara urinaaqaraqa mariasa maridaqa. Minara misa kukeeqaqa nidaqa manda maqa maaqaki aaqana maqa maaqaki ooni aamaraki maqa aamaraki keeqafi rafudamaki iqa nidaqa maaqooqaraasa nariranara rufiadaqa.

<sup>39</sup> Mi fasiqa anaaseesa moodaanaki suqufi maridara foora iqa maridaqa ufa qidaqa. Misa aiqamausa Anutuna saqariki marianannai nuqufaqasaa maridaqa, misa maa

maqanasaa maridaqa sia Anutuna qima afeekaikira ainaina afeeka ainaina mareeqa.  
<sup>40</sup> Anutufa maasara moo firaq irirana iridanoo. Indaarugaasa maasa qifeesammidaqa. Sia misa náriara anoonaikifaranoo. Misa faqa maasa faqa moodaa kari innaarunai mareefandia maqi qidanoo.

## 12

*Innee nifu Yisunasaa mundusee miqoo kai fuaqa.*

<sup>1</sup> Indaaru marusa Anutuna saqarikiusauqaindi maqee maasa qiqafaidaqara foora maridaqa. Maasa maa marirana misa nifusaa narí amani narí amani iqa maridanoo sandeera foora idaq. Maasa indaarugaasa nifusaa narí amani narí amani idaq sandaiddaqa moomoosa nifu qiqafaranara iriseeqa qinee uriqararaisai kianee qi-masee aiqama ainaina qumaararai ainainnara foora maasa mandainaina amiqimasee maasa rakisi qumaree marina afaieeqee maqasaa quqasee doo oori runusee doo oori munduqaannana kai raquramisee doo miqoo kai sanda maqaraasammasee fua.

<sup>2</sup> Oosana arooqooqari fifi inaq maasa saqarikirafa Yisufa kai maridanoo minasaa kai nifu mundusee fua. Yisufa maa maqanasaa maridanoo aunirira saqarisaa arirara qufanoo sia rufiasee minnisana. Sia uqanna minnisana. Kasooqagee kuqiranakiqari findifi innaarunai ququsaki Anutuna aqa marianinnanara iriseenoo mi asafirana iriseenoo aunirira saqarisaa kuqiranara asauriranara siamma irinau fifau ainainee qimasee kaqi finau. Doo minara maqee Anutufa mariqoo mina aqa asaukuqannai ooqumarifi maridanoo.

<sup>3</sup> Doo maasa Yisuna aupuraranara iriaqa. Moomoo manda fasiqa anaasee Yisunara fidiqaa imarufanoo sia kaukaata qinau kaqi mi umaarana mara maree fimarinau. Maasa mi oosannara iriseeqa sia nifaqa kudoosaapamasee Yisuna aana ubeekearanara minnisaaqa. <sup>4</sup> Mandainaina fannoo maasa maqee maqee darimarifaqa mina faqa quandaki rakuqaammidaqa. Mi rakirafa sia inni fidika ruqieenoo kaqi mariafanoo kaqi fuaqa, sia minara kudoosaapaqa. <sup>5</sup> Anutufa inni narí faiqi namuara pooduara ufa qimannimusa aunidee sia fee aunidee. Anutuna akaraki minara maaqi qimaseenoo anoonufa akara ridanoo.

Qini qimaaku, Anutufa ummaara oosana oosanannai ariara foora ani inana sia minara rufiaa amiqimasee iria.

Ani oosana uqafiqaidanoo amiqiraqoo fuanneera miqidanoo. Mifa aniara qaoo qinana sia anee minara kudoosaapaa sia oori runua.

<sup>6</sup> Karaambaiga fannoo mina amuqusi marisa kai naridanoora foora idanoo. Nariara qini faiqi fee qisa kai naridanoora foora idanoo.

Akarakinaa ufa miqiminoo marifaqa qinee minara maaqi qidaqa.

<sup>7</sup> Aneenna aidafira ummaarara qini qikoofa Anutufa dariara maqi qidanoo fee qia. Aneenna aidafirana aupuraranannai Anutunara mina amaaku daridanoo fee qia. Aiqaama faiqi nikausa aikannai qumaree nári faiqi namu mandoosana akiaqara naridaqa. Aiqaama nári faiqi namu mandoosana akiaqara naridaqa. <sup>8</sup> Innee Anutuna fiqi namu faqa sia arirana mareenana sia mina faiqi marinnaranoo, dapi faiqi marinnaranoo.

<sup>9</sup> Maa maqanasaa maasa qikoofa aikannai qumarasee mandoosana akiaqara darifaqa maasa minara rufiidaqa mina aqa maridaqa. Innaarunai qikoofa miqi kai masee dariara foora inaq firaqoo mina aqa maridaqa naaru naaru marianaara. <sup>10</sup> Maa maqanasaaqara qikausa nári iriranannai maasa andeeqa qimaqaidaga aikannai qumaree daridaqa. Anutufa maasa andeeqara oosana maraaqera oosana oosana ummaarannai maasa dariara foora idanoo. Mifa narí andeeqarana naida qimirree qidanoo maasa daridanoo. <sup>11</sup> Anutufa maasa ummaarannai dariara maqi ifaqa maasa sia minara asaidaqa doori runidaqa doo maasa miqoo qeeqa mandainaina akiaqara darirana taikasee andeeqasee marirana asoaranara maridaqa asaidaqa.

*Oosana oosana naakaparafa faqa aaquqirafa faqa mari ufafa.*

<sup>12</sup> Innee nisauku kudoosaapaifaqa raqandaamasee mariasa nisauku uqusee afeekaikira. Aiku aqoori qumooquki mariannana indindi mariannana minnisee mapukufinana aiku ramaseenana kikiqia. <sup>13</sup> Innee andeeqara aatata kai fifanoo aiku arinafa unufuanoo. Unufinana andeeqasee finnarano. Anee manda aatata afiqee finanoo anaku firaqoo mandaikiannoo. Anee andeeqara qoo afiqee finanoo ani aiku aidafimarifa taikafinanoo andeeqasee anee finnarano.

<sup>14</sup> Innee aiqaama mariasa namuafa amiqimmandee asoaranaki marirana amani-qa. Inni mariranakina amiqirafa andeeqarafa kai mariaqa. Sia miqiga karaambaiga sia



qafeefaranoo. <sup>15</sup> Innee amiqimmandee rakisia, innee Anutuna afaariranaki fuanakiqari quandaki kaqinni ubeekke foora. Innee amiqimmandee rakisiaqa sia moo fannoo inniki saakunananda inniki kambiqafinoo aiqamausa sukaqarana nimiani. <sup>16</sup> Innee rakisiaqa. Sia inniki moo fannoo Esauna aanna raaqa. Mifa andeeqarana minnisee Anutuna ufa rukiasee moodaa naranannai kai afasaafa narí qumiasana narí akaqa doo aminau. <sup>17</sup> Amiseenoo miqoo kasooqagee aupuranau. Aupureenoo narí akoo finnai anireenoo afaaqooqara qufanoo mina akoofa qinau. Sia, doo ani akaqa amiqa qufanoo Eesaufa ikiraqoofanoo aukunu qumimarufanoo randoo randoo sianoo sia paqurinau, doo taikambinau. Innee sia Eesauna aanna raaqa sia andeeqarana minnisaqa.

<sup>18</sup> Maqee aukwana innee sia Isaraee maqannaasa naanna raidaqa. Maa maqanasaa Sinai aaqana ameemaanai Anutuna ufa iriqau. Innee innaarunai mari Sinai aaqanara foora maridaqa Anutuna afusaa kikiqiga mariafanoo. Ooqai Isaraee maqannaasa Sinai aaqana ameemaanai anireeqa sia ufa kai nifu qafoona mi aqannasaa ida firaafa qoofaqa qafoona oonamu namufaqa aakuasaa namufaqa asukuna namufaqa rafaafufafaqa aiqamausa qafamaseeqa rufiaqau. <sup>19</sup> Miqunakina ukeena qunaki faiqi ufa moo iriqau. Iriqa rufiasee qiqau. Maasa sia moo kaqikaa ufa irianaara, maasa daaquqafaqa rufieeqa. <sup>20</sup> Mi ufana qidanoo maaqi qinau. Faiqi moo fannoo fee aandau fee maa aqanna auqamasafaqa oonisamu qumaree kuqamma arusaqa. Misa mi ufana irufanoo kaaqa naaquqoofaqa maparaaiqau. <sup>21</sup> Mooseefa faqa Sinai aqannasaa kambiqoo ainainna qafamasoofanoo kaaqa aaquqoofanoo aindiri aindirufanoo qinau. Qinee faqa qafaunoo kaaqa daaquqeenoo daindiri reenoo.

<sup>22</sup> Mi aukwana Isaraee maqannaasa mi naaquqara ainainna nifu qafamasoofanoo nifaaqa ramasoofaqa rufiaqau. Maqee innee sia miqiranaki anifaqa ani maridaqa. Innee Sioona aaqana uqanna kaqi marira Anutuna maqusaki ani mariafanoo. Innaarunai marira Yeerusaree maqusa qangiroo moomoo andandara foora marianaki innee ani mariafanoo. <sup>23</sup> Innee Anutuna ooqa faiqi innaarunai bukaki akara riraua kai kaaqa firaqoo suqimarianaki asasimarianaki ani mariafanoo. Innee Anutufiqoo ari mariafanoo. Mifa aiqamausa ufa irisee andeeqannisee marifa maridanoo. Andeeqara fasiqa kuqufusa innaarunai ooruree anoonakamambiqa innee misa nimana namufaqa andeeqaranaki asairanaki ani mariafanoo. <sup>24</sup> Ooqai Kainafa narí akaqa Abeerana arufanoo mina fidika teeqinuu. Abeerana fidika fannoo Anutunara qini fidika akiaqara anee qiannee qidanoo. Maqee innee Yisuna fidika Abeerana ooriqararana teeqiraqoo ani mariafanoo. Yisuna fidika fannoo Anutunara maasa numoo akiaqara minniqisaannee qidanoo uriqaranoo maridanoo. Innee maqee fuka moodaanaki kira ufa quqee marianaki Yisunaki ani mariafanoo.

<sup>25</sup> Minara innee Yisuna ufa sia sia iriaqa. Amiqimmandee rakisimaree iriaqa. Ooqai Mooseefa maa maqanasaaqaraafa qimannimimarufaqa sia iridaqa kuqimariqau. Maqee innaarunaindaraa fasiqa ufa rukiaanafa anee yaiffee finnaree mina ariranakiqari rukiasee naqi fee innaree. <sup>26</sup> Ooqai Mooseefa maru aukwana Anutufa qufanoo Sinai aqannasaa maqa kasinau. Anutufa minara maaqi qimafeekaikinau. Qinee ooqai maqa kasiafannana, kafaa qinee sia maqa kai kasianaara. Innaaruna faqa kasianaaranoo. <sup>27</sup> Miqunnara maasa maaqi qidaqa iridaqa Anutufa narí aiqama ainaina auqu quqaqoona kafaa aiqama kasimmaseenoo doo mara aqu taikaannoo. Sia kasimari ainainafa mifa kai kaqi mariannoo.

<sup>28</sup> Doo maasa sia kasira ququsaki maridaqa minara maasa susuia. Maasa minara quandakiqa Anutuna aidiranamau kai narí amooqia. Oori kandamasee rufiaqa rufiaqa qiranannai narí amooqia. <sup>29</sup> Maasa Anutufa sia fifau ainaina maridanoo. Ida qamataikannimaqee marifa maridanoo, minara aaqara oosanara rufiaqa, ani faqa ida qamataikaandoora.

## 13

### *Anutuna aidiramau fira naakaparufa.*

<sup>1</sup> Innee asauku mundiranaki marianara nariara nariara moodaa fasiqa anaasee faiqiara foora uriqarara ainainee qimasee sia fifau noonoo kai nimuqusi marinaqa nariara nariara ruaqa asaukunoo auqaidana nariara nariara ruaqa. Miqi kai ida sia taikaaqa. <sup>2</sup> Anaamuru sia oori qafainna maqannaana amiqi mandee narana amiqa maaqa amiaqa. Akaqausa miqidaqa sia irirai qangiroo amiqi amiqiqau. <sup>3</sup> Innee karabusaki mariasara misa faqa karabusaki maridara foora amiqimmandee rakisinni-maqaqa. Asauku mundirana ufasaara aupuree mariasa sia aunuaqa. Innee misa faqa moodaanaki aupuraranara foora nimuqusi marinaqa rakisinnimaqaqa.

<sup>4</sup> Innee aiqamausa faiqi anaasee nimundaranara uriqarara ainainee qiaqa. Faiqi aneese qumummasainafa sia moonaindi quandaki qumaraa. Aiqamausa inneeqa nammari kai neeqa andeeqasee mariaqa. Faiqi anaasee dapi nari maree nari maree qiaqa nuasa faqa qummuariqa nuasa faqa Anutufa ufa iriseenoo naruannoo.

<sup>5</sup> Inni irirafa marirafa munnimma ainainara sia kaaqa rida mariaqa, maqee maree maria ainainnara doo amana maridee qimasee afaaqa quqasee maria. Anutufa minara maaqi qinau.

Qinee sia inni minnisee moosaa fuanaura. Inni faqa

naaru marianauree qinau minara afaaqa quqasee maria.

<sup>6</sup> Maasa mi ufana iriseeqa paasoosamaseeqa maridaqa maaqi qianaurea.

Karaambaqa maasa dadaaqimarifa maridanoo

Minara maasa sia rufiaanaura,

Naqimasee maa maqanasaa qaraasa maasa darifaree. Sia amana darifaranoo.

<sup>7</sup> Ooqai indaaru Anutuna ufa qimannimusara sia aunuaqa. Misa amiqi mariranara faqa misa kuqiranara faqa misa Anutuna saqarikiranara faqa iriseeqa misa nimeer-aameera kai ida mariaqa. <sup>8</sup> Yisufa asauku mundirafa sia minaki oosana oosana irirafa marifa. Eenda faqa maqee faqa naaru naaru faqa amanamana kai andeeqara irira oosana marifa maridanoo. Innee faqa miqiaqa. <sup>9</sup> Akaqausa Anutuna ufara oosana oosana irirana uqeeraidaqa. Innee sia misa naanna reeqa oonuree anireeaiqa. Anutuna afaariranara mi irirafa kai inni nimana mapuku nimaqainaqa mariaqa, mifa andeeqarafa amiqirafa maridanoo. Oosana oosana sandufa moo narana neeqa moo narana sia neeqa mi ufana qimaqoonannai sia inneeqa nimana mapukusee marifaranoo, mi ufana maroosa sia mi ufafa misa nimana mapuku nimaqanau, sia misa dadaaqinau minara innee Anutuna afaariranara iriaqa.

<sup>10</sup> Ooqai Yuda maqanna aanaiqikirausa Anutuna uqiqaana maqa rakisimarusa Anutuna ufamau fidaqa qaindasaa qaraa aandau tatufirana suqee maruna akaqana marasee naqau. Maasa aandau tatufi maria qaindara foora moo maridanoo. Ooqeenaa uqiqaana maqakinaasa sia amana minasaqaraana marasee nooqini. <sup>11</sup> Ooqeenaa uqiqaana maqaki moodaa faasaana moodaanaki kira faasaanasaa misa uriqararafa aandau fidika mareenoo firaa naaqurara maqaki onureenoo qaindasaa teeqimaseenoo raudamaki mi andauna apata amudaani amaqi aiqama sia naqau, mara mareeqa faiqi naambeeqi munu ida aree mariqau.

<sup>12</sup> Mina amanakai Yisufa Yeerusaree maqusa naambeeqi kuqinau. Nari fidikannai faiqi anaasee mandainaina findaukama nisaanifeera miqinau. <sup>13</sup> Maasa faqa Yisuna dadaaqiqa ooqeenaa maaqa naambeeqaira foora Yisufa mariqoo mina asaurirana dadaqi maraanauranoo. <sup>14</sup> Maasa kasooqaqee uqanna maa maqanasaa sia maridanoo. Maasa kasooqaqee kambijaaninna maqusara innaarunaindaraanara rakisidaqa. <sup>15</sup> Doo minara maqee maasa maa maqanasaa maridaqa Yisunannai Anutuna dufi dufi qimaqaidaqa. Maasa aandau tatufirana fooqaafa dufi dufi qirafa maridanoo. Maasa Anutunara kuqaa anoonnee qimaria noonakiqari minara dufi dufi qirafa maqee maqee kambijaqaidanoo. <sup>16</sup> Maa ainainna faqa sia aunuaqa, nari amiqi nari amiqiaqa, inneeqa ainaina innee iriranannoo kai raineeqee niqoonausa nari ami nari amiaqa. Anutufa miqira ainainara amiqira tatufira aandaurea foora maridanoo fee qidanoo qaqaara raidanoo.

<sup>17</sup> Innee inneeqa uriqararausa qinnandee kai iaqa. Misa Anutuna saika maraidaqa inni nimanara maqee maqee rakisidaqa. Anutufa kasooqaqee misa innisaa rakisiranara iraanoo. Innee misa ufara eedoo qifaqa misa asasammasee mi ainainnammifaranoo. Innee misa ufa rukiaifaqa misa nifaaqa qumooqukidaqa nikoo nika ifaranoo. Misa nikoo nika idafa sia inni dadaaqifaranoo.

<sup>18</sup> Innee maasara maqee maqee innaaru qiaqa. Maasa qimana sia moo ainainara iridaqa andeeqaraqoo kai firanara ridaqa inni qimannimidaqa. Innee minara maasara faqa innaaru qiaqa. <sup>19</sup> Qinee qeeqara faqa inni qimannimidaqa. Innee qiniara faqa innaaru qifanoo Anutufa qini dadaa qinaqa innee innannai kaqi kaqi fua.

*Anutufa amiqi amiqimma nimaqaaninnufana.*

<sup>20</sup> Naaru naaru moodaanaki kirana Yisufa asauku mundirafa kuqiranannai mina fidikannai doo mapukuseenoo maridanoo. Anutufa mina kuqiranakinaana uqeereeqeenoo faiqi anaasee rakisirana firaanaikamaqai fanoo maridanoo. Nari kuqiranannai faiqi aanaaseesaa rakisirafa maridanoo. <sup>21</sup> Anutufa asoarana faqaafa innee mina iriranamau fifandinna oosana akoofasaikirana inni nimaqaa fuaqeera. Anutufa asauku mundiranannai maasa faqa mareeqeenoo nari aidira oosanaki nari iriranamau firanaki

quqannisaani. Aiqama amooqirafa faqa kaaqa areenarafa faqa asaku mundiranaindi naaru naaru mariannoo. Kuqaa.

*Ati ufa.*

<sup>22</sup> Oo qini qikaqaafasaa innee maa ufana amiqimasee asaana ruaqa. Dadaaqira ufa maridanoo sia kisaaga akara riqa minara qimannimidaqa. <sup>23</sup> Qinee maa ainainnara faqa qimannimidaqa. Maasa qikaqa Timootifa doo Roomma maqanna karabusaki Yisuna ufasaara rumbaqoofa idukinoo maridanoo. Mifa dauni dauni mai anirainaqa afiqee innee marinnaqoo oonureeqa maaqanda inni niqafaanura.

<sup>24</sup> Innee maasa qimandarana inni uriqararusa faqa aiqama Anutuna ufa irimariasa faqa qimannimiaqa. Itari maqannaasa maaqooqaraasaki mariasa inni nikaqaafasaa mariasa inni nimandaidaqa.

<sup>25</sup> Anutuna afaarirafa inni faqa mariani.

## **YAMEESA**

### **Yameesafa daraanimariasa akara rumannimaqanau.**

<sup>1</sup> Anutuna aiku asauku maaqa maaqa daraaniqa mariasa qinee Yameesasa inni nimandaidaqa. Qinee Anutuna eedoo qira rumbara saikara foora marunna fasiqausa maridaqa. Asauku mundirana Yisuna maasa karaambaiaqa mina faqa eedoo qira rumbara ainainira fasiqara foora maridaqa nimandaidaqa.

*Nimanira ainaina faqa iriranara innaaruqirana faqa mi ufana qimaqoona.*

<sup>2-3</sup> Qini qikaqaafasaaauaqa oosana oosana ummaara ainaina nimanamasee qafarafa innisaa aqufinaqa sia minara maparaaiaqa dufi dufi qimasee Anutufa sia minannai daridanoo, afeekaikamma qimaqaidanoo qimidanoo fee qimasee asasiaqa. Mi nimanira ainainafa inni firaqoo narinaqa inni Anutuna saqarikirafa kaqi kai marinanoo inni mi saqarikirafa mifa inniki sabeenara foora afeekaikamasee mariaqeera mariannoo. <sup>4</sup> Innee miqiga maridaqa Anutuna ufamau kisaagasaa fimarifanoo inni marirafa nirafa muduka kaqi mariaqa sia kaqikaago sia amanaikiaqa kaqi amana kai muduka marianifeera miqiga mariaqa. <sup>5</sup> Inniki akaqausa irirafa sia amanaikinausa Anutunai innaaru qifanoo nimiani. Anutufa paapaa imarifa amiqimasee irirana kaqi nimimarifa maridanoo.

<sup>6</sup> Innee iriranara innaaru qidaqa sia oonumafi qaara irira iriaqa, oonumafi qaara irira irimariasa ufaira foora uqimarifanoo. <sup>7-8</sup> Miqinna fasiqausa sia karaambaiaqindaraana aundurai dadaaqirana mareefaranoo misa yaiffee fuanau yaiffee fuanau qinausa sia moo ainaina mareefaranoo.

*Ainaina faqaasara faqa kudifasiqauqara faqa qimaqoo ufafa.*

<sup>9</sup> Innee Yisuna ufara suqimariasaki Anutuna saqariki marifanoo innikinaana kudi fasiqauqa nisaurimariasa Anutufa inni mara uqeerasee innarunni fuagee qimaqainara noori uqeerasee asasiaqa. Inniki ainaina faqaasa kookuna qaqamara foora ufai fuaga aqusainaga taikaffaranoo. <sup>10-11</sup> Suani qeenoo firaqoo aiqaiqinanoo kookuna aadanusi-nanoo afufeenaarirana kakasinanoo afu qafainanoo amiqi amiqirafa taikafuannoo. Miqi kai inoo ainaina faqaasa onaugee ani uqee idaga miqidaqa doo taikeefaranoo. Miqunara Anutufa ainaina faqaasa sandaaqaindaraana mareeqee maqasaa quqasainaga misa faqa kudifasiqauqa faqa asasiaqa.

*Nimaniranaki andeeqasee kaqikai fimariasara qimaqoo ufafa.*

<sup>12</sup> Faiqi akaqausa nimanamasee qafee mari ainainafa kisaagasaa narimarifaqa Anutuna faqa kaqikai fidaqa miqimaria fasiqa anaaseesa amiqiranaki mariasa maridaqa. Miqinna fasiqa anaaseesa mi nimanirana taikasaifanoo Anutufa ooqai qima afeekaikira feefauru naaru marirana nimianoo nari Anutunara rimariasa kai nimianoo. <sup>13</sup> Nimanira ainaina fannoo faiqi anaasee moo nifaaqasaa aqufinanoo sia Anutunaindari maa mandainainafa aniannoo fee qimasee oonumafi iriannoo. Mandainaina fannoo sia amana Anutuna amanamasee qafaannoo Anutufa faqa sia moo mandainainannai nimanamasee qafaannoo, sia miqidanoo. <sup>14</sup> Faiqi anaasee nari mandainainara nidirafa nari rarisameeqeenoo nari ufaanaki naridanoo. <sup>15</sup> Nari mi manda nidirafa innooqeenoo radiqiffanoo mandoosana kambiqaidanoo. Mandoosana kambiqeenoo innoqafinoo kuqiranaki aqufidanoo.

<sup>16-17</sup> Oo qini qikaqaafasaa maa maqa maaqanaki mariasa, sia Sadannafa nikaru qinnana iriaqa. Aiqama amiqira nimira ainaina idaaqirana kaqi nimira afeeka ainaina innaarunaindari qumidanoo. Anutufa innaarunaindaraa qoomauqaindi auquqoofauqa mindari mi amiqira ainainausa qumidanoo. Anutufa sia suani quqoonara foora oonuree aniree ifa moodaamau kai fimarifa. <sup>18</sup> Anutufa nari iriranannai kai nari anoona ufannai kai maasa nari fukasaa aanaaqi aanaaqikiranaki quqaqiseenoo maasa nari ufini aandau aiqama ainaina uriqararaisai kamafi mariaqeera auquqisanau.

*Anutuna ufa sia naaqoo kai iriaqa nisaukunoo qumaraaqa.*

<sup>19</sup> Oo qini didimari qikaqaafasaa maa ufana naaqoonoo iriaqa. Innee dauni moonufa irisee kasooqagee aneenna ufa qiaqa, sia qusufa qimasee aanooqiaqa. <sup>20</sup> Faiqi anaasee aanooqirafa sia Anutuna andeeqara oosana dadaaqi uqeeraidanoo. <sup>21</sup> Innee inneeqa aiqama manda kudimakira oosana faqa manda nira oosana faqa fatika aqusee mariaqa. Innee inneeqa afeeka minnisee Anutuna aramandunnai madoodoonaga mariaqa, maridaqa Anutufa nari ufa inni nimuqusaki quqeemarina maraqa. Mi ufananoo inni asumu maraannoo.

<sup>22</sup> Sia anutuna ufa naaqoo kai irisee minnisee oo qinee. Anutuna ufa irimarunausee qiaqa. Miqi qidaqa nariqa nikaru qidaqa. Naaqoo iriseeqa nisaukukoo qumaraaqa. <sup>23-24</sup> Anutuna ufa irisee sia qumaree marifa tanukaki qafee mari fasiqafara foora maridanoo moodaannai qafamaseenoo quandaki oori kaqinni ubeekaidanoo nari oori qafai oosana aunimarifa. Anutuna ufa irisee sia qumaree marifa miqirafa maridanoo. <sup>25</sup> Anutuna idaaqira aaquqira ufa faiqi nifaqa idukirafa maridanoo. Faiqi anaasee moo fannoo maqee maqee amiqimmandee minaki qafee marifa sia kaqi fifau irisee aunimarifa irisee qumaree marifa mi fasiqafa nana ainainee auqainanoo Anutufa dadaaqinoo amiqi amiqimmiannoo.

<sup>26</sup> Faiqi anaasee moo fannoo nariara Anutuna ufa irimarunausee qimasaidanoo sia nari afauruara amaakiriara oonumafi iridanoo kaqi oosana oosana mandufa urirara kai qimarifa mi fasiqafa Anutuna saqarikirafa sia maridanoo kaqi fifau marifa maridanoo nari afauru fannoo nari akaru qidanoo. <sup>27</sup> Maasa qikoofa Anutufa maa qaaramoo ainainausa maraanara kuqaa anoona qini saqarikirusammiafoo qidanoo. Moo oosana faiqi faiqi rakisirana faqa moo oosana adeedaana aanaaseeuqa nariqa aupuraranaki mariasa rakisirafa faqa moo oosana maa manda maqa maaqanakina mandosanauqa qifaqai aqufuandoo qimasee eerairinafa faqa mi ainainna namuna maree mariasara kuqaa anoona qini saqariki mariasee qidanoo.

## 2

*Qamunna afaaqainainara sia faiqi raina amana kai amiqi amiqia.*

<sup>1</sup> Qini qikaqaafasaa mariasa. Asauku mundirafa Yisufa maasa karaambaiqa Anutuna kaqa qarana uriqararafa maridanoo. Innee mina ufa iridaqa sia faiqi amiqira nifaqa qafainnana amiqira qamunna qafainnana rainasee amiqira fasiqa fee qimasee minara amiqi amiqia, kafa sia moonna afaaqara manda fasiqa fee qimasee minara akoo akaa iaqa.

<sup>2-4</sup> Innee amaana maqaki suqufi keeqaifanoo moo fasiqa ainaina faqaafa amiqira afaqa qamunna afisirafa asaukuki rinna marinafa keeqaannoo moo fasiqa qamunna anaanaqirafa keeqaannoo, innee amiqira afaqa qamunna faqaanara amiqira fee qimasee amiqira qoo mara quqasaifanoo ooqu mariannoo manda afaqa qamunna faqaanara kaqi kikiannee qifanoo kaqi kikiqinoo mariannoo fee maqasaa fee ooqu mariannoo fee. Innee miqidaqa manda iriranannai faiqi rainee mariafanoo.

<sup>5</sup> Qini qikaqaafasaa mariasa qini ufa iriaqa. Anutufa ainaina siaisara rusandeesamu mandeenoo qafamaseenoo qumareeqeenoo nari saqariki mariasaki uriqararanaki mariaqeera nari innaaruna ququsa maraaqeera ainaina siaisa utaaqamannisaidanoo. Anutufa faasa nariara rimariasara niqafamasee qima afeekaikammasee innaaruna maqa maaqa nimiraree qimaqoofa maridanoo. <sup>6-7</sup> Anutufa miqimasee ainaina siaisa uqeeraifaqa inneeqa ufannai rainannimaqaidaqa unnaqimasee misara maqasaa ooqu mariaqee qimariafanoo. Yafa yafee inni Yisuna ufa irimarias mareeqee ufaki siaasinnai quqaida fee, ainaina faqaasa kai miqidaqa innee aqaqaidaqa misara amiqira qoo ooqu mariaqee qimariafanoo. Anutufa inniara nari amaakundi fee qimaqoofa marifaqa ainaina faqaasa kai miqiasara manda fasiqee qidaqa Yisuna uriqarana aqurraidaqa fidaqaammamaqaidaqa.

<sup>8-9</sup> Anutuna ququsakinaa ufa maaqi qimasee akara rino maridanoo, inneeqa niqoonausara inniqa nifaqara foora nidianinani. Innee mi ufanamau fidaqa andeeqasee fifaranoo. Innee faiqi nifaqa qamunna qafamasee rainee mariana mandosana mareemariafanoo miqimarianara Anutuna sandufa fannoo inni rafaqaqidanoo. <sup>10</sup> Faiqi moo fannoo Anutuna sandufa aiqama qumaree marinafa moodaa kai aaqamasainafa mifa Mooseena sandufa rukiee marifa maridanoo. <sup>11</sup> Anutufa qinau sia innee faiqi anaasee nari qummuari nari qummuari iaqanani. Mifa kai innee sia faiqi anaasee kuqa naruqee qinau. Anee sia anaasee qummuarinana kafa quandaki faiqi arinana Anutuna sandufa rukiee marianafa mariananoo.

<sup>12</sup> Anutuna sandufa sia faiqi rumbee marifa maridanoo faiqi iduki marifa maridanoo Anutufa mi sandufanasaa kasooqaaqee inni ufa iriannoo minara mandainainakiqari idukira kasiqa naanna ramasee andeeqasee maridaqa ufa qiaqa. <sup>13</sup> Innee inneeqa niqoonausara sia nimuqusirana nimifanoo Anutufa faqa inniara faqa sia amuqusirana nimiannoo. Nariqa niqoonausara nimuqusidaqa dadaaqimariasia sia Anutuna ufara rufieefaranoo, amiqimasee marifaranoo.

*Yisuna saqarikirana fifau ufannoo faqa asaukunoo qumararanannai faqa mifa rainaidanoo.*

<sup>14</sup> Qini qikaqafasaa mariasa, faiqi anaasee moo fannoo nariara Yisuna saqariki marunausee qidanoo sia nari marirana akoroo idanoo mi fasiqana saqarikirafa fifau maridanoo. Miqi mandee saqarikinafa amanee naaru naaru marirana amiannoo fee, sia amana amiannoo. <sup>15-16</sup> Qinee minara iridaqa moo ainaina kikiqa usuanaura. Inni nikaqafasaa fee nisoqmaakee kuqaa sarauqimariasara qidaqa misa innee innannai aniree naranaree qamunnaree innaaruu qifaqa innee sia nimiqqa fifau nifaurukoo kai maaqi qia Anutufa inni amiqi amiqiannoo innee oonu qamunna afisusaifanoo inni nifaaqa tootoo qinaqa narana suqasee naaqa. Miqira ufa sia anoona maridanoo fifau ufa maridanoo. Anee kaqi kasinara nipatasaa sarauqi maria ainainna andeeqasee nimiaqaana. <sup>17</sup> Yisuna saqarikirafa miqi kaimminoo maridanoo fifau afaurunoo akaqafasara anee oonu qammunna afisusee narana naa. Miqira ufa sia akaqafasaa dadaidanoo. Miqi kai inoo fifau afaurunoo Yisuna saqarikidee qinafa sia asaukunno Anutuna ufa qumarasee inafa marinana ani Yisuna saqarikirafa kuqinoo maridanoo.

<sup>18</sup> Faiqi anaasee moo fannoo minara qiannoo, anee Yisuna saqarikirana qumaree marianafa mariananoo qinee qisaukunna Anutuna ufa qumaree marunausa maridaqa. Qinee Yameesasa minara maaqi qidaqa. Qinee naqimasee ani Yisuna saqarikirana qafaanaaree asaukunno qumararafa sia marinaqa sia qafaanaura. Qinee Yameesasa qeeqa Yisuna saqarikirana qisaukunna qumararana miqiga inni uqannifiqaanaura. <sup>19</sup> Anee fee aneennaraa kai fee Anutufa moodaa mari fee qimasee mi iriranannai kai anee amiqiranaki maridee qidanee. Oo amana innee afaannauqa ufa moodaamau aamasee qimariasa mariafanoo. Afaannauqa faqa Anutunara moodaa mari fee qidaqa nariqa mandainaina akiqara narifandinnanara iriafanoo naquqaidanoo naindiri raidanoo. <sup>20</sup> Oo furufarira fasiqa anaasee asaukunna dadaaqa qumararafa sia maridanoo Yisuna saqarikirafa nari kai miqoo marida fifau ainainara foora maridanoo. Qinee mi oosannara kafa koorooianaura.

<sup>21</sup> Maasa qifaqnafa Abarahaamafa naqimaseenoo fee Anutuna faqa moodaanaki kinau. Nari asaukunna nari faiqi Isakeena qumareeqeenoo qaindasaa tatufira aandau suqa amianeera quqoonannai Anutuna faqa moodaanaki kinau. <sup>22</sup> Sia fee innee iridee. Abarahaamafa nari Anutuna saqarikirana faqa nari asaukunna qumararana faqa miqandannoo nari dadaaqa nari dadaaqinau. Nari asaukunna qumararafa nari saqarikirana dadaaqufanoo anoonakinoo amiqinau. <sup>23</sup> Minara akarkina kuqaa maaqi qinau, Abarahaamafa Anutuna aamuaqira ufa irisee kuqaa fee qimasee saqarikufanoo Anutufa mina qafamaseenoo oo andeeqara fasiqa mareenoo qinau. Miqi qimaseenoo Anutufa Abarahaamanara qini qigoondi fee qinau. <sup>24</sup> Doo innee Abarahaamana oosana qafamasee iriaqa, faiqi sia nari saqarikiranannai kaifuu Anutuna faqa moodaanaki kidanoofau asaukunna qumararanannai faqa moodaanaki kidanoo.

<sup>25</sup> Yeerikoo anaasee moo Raqaba namarifa dapi nuanaaseefa marinau. Mifa miqi kai inoo nari asaukunna qumarasee iranannai Anutuna faqa moodaanaki kinau. Mifa Anutunara irisee Yuda maqannaa qaaraqanda nipuraraa fasiqaqara nari maaqaki mara kukeeqaseenoo kafa mareeqeenoo moo aatata quqasoofaqa fiqau. <sup>26</sup> Maa ufausa ati minara maaqi qinoo maridanoo. Faiqi amana sia marinanoo apata kai doo iri maridanoo kuqinoo mariannoo. Anutuna saqarikirafa nariara maridanoo miqinoo maridanoo asaku qumarasee inafa sia marinara doo kuqinoo maridanoo.

### 3

#### *Maasa qifauru idati miqirafa minara qimaqoofa.*

<sup>1-2</sup> Qini qikaqafasaa Yisuna ufara suqimariasaqari innikiqari sia moomoosa ufasaa rakisirausaikiqa mariaqa. Maasa ufasaa rakisirausa afeeka ufa Anutufa kasooqagee qimiannoo, kaqi qeesa oorudupinoo nimiannoo. Maasa aiqama aaqemariasaa maridaqa. Faiqi anaasee moo fannoo nari ookiqari sia aqainafa doo mifa anoona paqurimaseenoo doo nari afaaqa ainaina marirana faqa andeeqasee rakisida mariannoo. <sup>3-4</sup> Maasa qainannai qoosa ooki aaku amaqaaseeqa mina uqirausa fidaqa quanda quanda imarifanoo aatata fidanoo. Sipa minara faqa iriaqa firaa ainaina tia maridanoo ooruku namariki fidanoo ufa firaafa fuuqee marifanoo fidanoo minaki mari kiateenafa kaqikaa sitiqa quande marifanoo fidanoo.

<sup>5</sup> Maasa qifauru ririmma kaqikaa ainaina maridanoo firaa ufa tia ririmma uqeeraidanoo. Kaqi idatiara foora firaa qusau nanda utauridanoo. <sup>6</sup> Maasa qifauru idati miqirafa maridanoo nari mariqooqari aiqama mandainaina oosana oosana aiqama maasa qifaaqasasa daraanidanoo. Mi idatifa Sadanna idati qumbisee quandakinoo maasa aiqama marirana nirana qumbiqaraidanoo.

<sup>7</sup> Faiqí ooqai faqa maqee faqa amana kaasau ainaina oosana aandau fee ufini fee noodaanna fee maqamau nimari ainainnee firifanoo reendeeniannoo. <sup>8</sup> Nári nifauru kai faiqí ooqaindari sia reendeenimariafa maridanoo. Sia amana faiqí rafaqaqfirana amana maridanoo sukufa minaki qumbiqanoo maridanoo. <sup>9</sup> Maasa minakiqari maasa qikoona maasa karaambaigara minakiqari dufi dufi qidaqa kafaa quandaki Anutufa nari amana kai maasa qiqoonausa auquqoosa niquraraidaqa. <sup>10</sup> Dufi dufi qirafa faqa niqurararafa faqa moodaa dookiqari kaimma ururaidanoo. Oo qini qikaqaafasaa mariasa mi ainainafa sia andeeqanoo maridanoo. <sup>11</sup> Maqakiqari ururee mari nammari faqa sia moodaa aamaraindari sukaqee marifa faqa amiqimarifa faqa ururaidanoo. <sup>12</sup> Sia faafisa namufaqa keefaadi iraannoo. Sia kamukamuna sanda fannoo faafisa iraannoo. Sia ooruku nammari fannoo faqa nammari uqanna fabaqa iannoo. Maasa nifauru fannoo kai qaaraikidanoo.

(Maaqoo misa saqari sia marifaqa kaqi maaqooqaraa saqari auquraidaqa. Faafisa maaqooqaraasaindi Yuda maqannaasaindi mina fooqaafa asumu faafis maridanoo. Keefaadiara oorifa saqari fee qimariqau. Kamukamunara kareepa fee qimariqau.)

*Sandaqaqindaraa irirana faqa maqasaaqaraa irirana faqa mi irirannara qimaqoo ufa.*

<sup>13</sup> Inniki moo fannoo nariara irirana faqaasee aiqama ufa oosanara irimarunausee qimarifa doo mi fasiqafa nari amiqira mariranannai faqa amiqira qumararanannai faqa reendeenirana namufaqa nari irirana namufaqa koorooianifeera.

<sup>14</sup> Anee aneenna amuqusa ookiqari sukaqarafa faqa rairaiqirafa faqa ainainara kaaqa rirafa faqa urinana anee unna qimariananoo sia aneenna iriranara uriqarar fee qia. <sup>15</sup> Mi irirafa sia innaarunainadari qumidanoo maa maqa maqanasaaqaraafa maridanoo sia innaarunaindaraafa, afaannaindi maridanoo. <sup>16</sup> Rairaiqirafa faqa onititee irafa faqa mariqoo miqoo dapi marirafa faqa mandainaina oosana oosana faqa mariqoo maridanoo.

<sup>17</sup> Innaarunaindaraa irirafa indaaruuqaafa sia ikairi faifa amiqirafa mifa naaree indaaruu doo mina miqooqari asooarana nimirafa faqa fisoo fisooirafa faqa aiqamausara aqoondikirana faqa miqimarifa faiqira qimudaoo qirafa qumbiqanoo maridanoo mi innaarunaindaraa irirafa mifa amiqira narana unakuseenoo afaaridanoora foora amiqira oosana nimimarifa mifa sia qaara ufa qirafa marifa. Mina marirana faqa sia qaaraiki-noo maridanoo. Innaarunaindaraa irirafa miqiminoo maridanoo. <sup>18</sup> Asooemariasa nári amiqira marirana qaamara fooqira asooaranaki ummaquusaafanoo minakiqari amiqimmandee andeeqarafa kambiqaiddanoo.

## 4

*Innee ainainara qoofana qeemariifa sia Anutunasaqaraa irirafau maridanoo.*

<sup>1</sup> Inniki rakirafa faqa tinoorirafa faqa marifa yaindari fee kambiqaiddanoo fee. Inniga naundurakinaa amiqira ainainara rirana faqa mandainainara rirana faqa oosana oosana ainainara naunduraki qoofana qaidaqa rakidanoo. <sup>2</sup> Innee akaqainainara rumamareeqa sia amana maraanaura moonaindi maridanoo qimasaidaqa faiqi narusee maraidaqa. Innee akaqainainara nimukee marifaqa sia amana maraanauree qimasee ufa rainaidaqa rakimariafanoo. Inneeqa rimaria amiqira ainainara Anutunara sia ireeqa sia maree mariafanoo. <sup>3</sup> Innee Anutunara irifaanoo inni manda iriranara iridammunoo qimaseenoo sia nimidanoo. Innee inneeqa nifaaqaroo qira nidirafa marifaqa mi nidiranasaa taikaanifeera Anutunara ireemariafanoo sia nimidanoo.

<sup>4</sup> Innee ummuari mari anaaseena aanna raidaqa innee maanara sia fee iridee, innee Anutuna aqoondi fee qimasaida maa maqa maaqanasaaqaraasa ainaina aqoondikidaqa Anutuna namuqaaki mariafanoo sia fee minara iridee. Faiqi anaasee moo fannoo maa maqa maaqanakinaa ainaina aqoondikiannee qimaseenoo minara kai inoo Anutuna namuqaakidanoo. <sup>5</sup> Anutuna tamummaqara fasiqa akara moo maaqi qimasee anoonufa qidanoo, Anutufa maasaki quqoo maraqunafa maasara narindi kai fee qimaseenoo rairaiqidanoo fee qimaseenoo akara rinuu. <sup>6</sup> Sia rairaiqirana kai Anutufa sia qaara irirana iriaqeera minaindika kai iaqeera maqee maqee dadaaqirana qimidanoo. Anutuna akara minara kaifaa maaqi qidanoo, Anutufa nári nuqu uqeeraida nári nimoqimariasa rafaqaqafidanoo qaoo qidanoo kafaa quandaki reendeeni mariasa afaarimariana faqa fisoo fisoo imariana faqa nimidanoo.

<sup>7</sup> Innee mi ufana irisee inneeqa afeekaikirana minnisee Anutuna aramandunnai ooqumariaqa. Miqi mambiqa Sadannana naakaparana rafaqaqafusee qaoo qifanoo sandaani. <sup>8</sup> Anutufa marinnai aaqa anifanoo mifa quandaki inni naaqa aniannoo. Innee mandoosana maree mariasa inneeqa ikairi nisaukusaa marina nammari uqaqa.

Innee qaara ufa qimarisa inneeqa naundura anukaaqa. <sup>9</sup> Inneeqa naanaindara qirana minnisee ikiraqaaqa innee inneeqa asasirana minniseeqa noori runuqaqa, innee noori kandamasee ikiraqeeqa ikifaafau iaqa. <sup>10</sup> Miqidaqa Anutuna afusa ureeqafifanoo Anutufa inni uqeeraani.

*Yisuna ufa irimariasa sia nari aquraree nari aquraree qiaqa.*

<sup>11</sup> Qini qikaqaafasaa sia narinni narinni naraquraree naraquraree qiaqa. Faiqi anaasee moo fannoo nari akaqaafasaa aqurarara ufa qinafa Anutuna sandufa aqidanoo mina uriqararafaika midanoo. Anee anutuna sandufa aqinana anee sia mi ufana ameemaanai marianafa anee mi ufana uriqararausee qimariananoo. <sup>12</sup> Anutufa kai sandufa nimimarifa sandufa uriqararafa maridanoo. Mifa nari kai faiqi asumu araanoo fee nari kai naru taikaannoo fee. Innee yausee marida fee inneeqa nikaqaafasaa niqida fee urinaaqaraidee.

*Duna moonna auqaaninna ainainnara sia inneeqa nimooqiaqa.*

<sup>13</sup> Innee maaqi qimariafanoo. Maqee fee duna fee qinee moo maqasaa oonureeqa bisinisamasee fee saikamasee fee firaa narana ummaquseeqa moo aukuaana narana moomoo afuqai marinaqa mina akiaqara munnimma moomoo maraanaura. Innee miqi qimariasa qini ufa iriaqa. <sup>14</sup> Innee sia duna faasaana kambigaaaninnara irimariafanoo. Innee nari nimooqidaqa sanapaaruna miqirausa maqa maaqa ititai qafauna dauni rakee idanoo. <sup>15</sup> Innee minara irisee duna moonara maaqi qiaqa Karaambaiqa irirafa miqinoo marinaqa maasa miqianauree maaqianauree qiaqaana. Mina irirafa sia miqinoo marinaqa sia mina maraanaura. <sup>16</sup> Innee sia miqi qimariafanoo maaqi qimariafanoo innee inneeqa nifaqa nimooqimariafanoo firaqoo inneeqa nuqu uqeeree mariafanoo. Miqi maria ufafa aqeeemariafa maridanoo. <sup>17</sup> Doo qinee maqee andeeqara aana uqannifiqeeqa sia mi mau fiqa aaqeefaranoo.

## 5

*Ainaina faqaasa aaquqimannimaqoo ufafa.*

<sup>1</sup> Doo innee kaaqa firaqoo ainainafaqaasa qimannimidaqa qini ufa iriaqa. Innee dinee quqaida noori runimariafa qusasaa innisaa aqufuannoo aqufuaninnanara irisee ikiraqaaqa, ikiraqeeqa ikifaafau iaqa.

<sup>2-3</sup> Inni moomoo ainaina doo putaamma taikkeenoo inni qamunna amiqirana doo qooqoosa gumura neenee taikaseenoo inni koorra munnimma moomoo faqa siuraa moomoo faqa doo taafi aiqama aru finoo mi taafi arirafa quandaki inni mandosana kooroo inoo inni nimaqi ida kai qamataikaannoo. Innee maa maqee kamuqoo taikainna kamuqoo moomoo munnimma ainaina afeedi mariafanoo amuaaqa amuaaqa faqa rusimariafanoo. <sup>4</sup> Inneeqa munnimmara nimugusinaga ainainira faiqiuqa feefauru sia andeeqasee nimimariafanoo. Misa minara faaqari mariafaqa innee sia fee minara iridee. Misa inniara feefaururara faaqarirafa mifa firaqoo ooru fimarifanoo karaambaiqa Anutufa uriqararafa innaarunai mariqoo ooru fifanoo iridanoo. <sup>5</sup> Innee maa maqanasaa maria kamuqoo aiqama ainainna amiqiranaki faqa nari nidimari ainaina moomoo maree marianaki faqa mariafanoo. Rakirafa anidanoo ani aqoonausa kuqa narimariafanoo innee inneeqa nifaqa afeedidaqa narana moomoo naidaqa nainooki mariafanoo. <sup>6</sup> Innee moomoo munnimma faqaasa innee andeeqara fasiqauqa unufannai kootaki narira ufa nimiseeqa kuqa nari mariafaqa misa sia amana qaoo qiafaqa innee kaqi naruafaqa kuqidaqa.

*Karaambaiqa kaffaa qumiranara ubiqafi marida afeesara mariaqa.*

<sup>7</sup> Oo qini qikaqaafasaa Yisuna ufa irimariasa, karaambaiqa kaffaa qumiranara ubiqafi kasoomambi marida afeesara mariaqa. Ququsa akoofa narana ummaqusee sia mulari minari idanoo ubiqafi maridanoo moomoo narana ummaqusaina kambiqaranara ubiqafi afeesida maridanoo mifa aaku afeesara maridanoo aaku maqasaa quminanoo narana kambigaaannoo. <sup>8</sup> Innee miqi kai iqa karaambaiqa qumuaninnanara afeesiaqa, mifa qusasaa qumuannoo minara inneeqa nimana mapukusee maridaqa ubiqafi afeesiaqa.

<sup>9</sup> Oo qini qikaqaafasaa sia nariara nariara munuqi miniqiaqa, miqifanoo Anutufa faqa inni faqa ufa nimiannoo. Maasa ufa andeeqaaninafa Anutufa adeediranoo maridanoo maasaki keeqarara deedaqida maridanoo. Minara nariara nariara sia munuqi miniqiaqa. <sup>10</sup> Qini qikaqaafasaa innee ooqai Anutuna tamummaqara fasiqauqa oosana irimariafanoo. Miqoo mikamuqoo marusa oosana oosana narirana nimufaqa misa qafeeqa ubiqafiqqa kasoomambi maraqau. Innee misa naanna raaqa narifaqa miqiaqa. <sup>11</sup> Anutuna tamummaqara fasiqausa ubiqafi maroonara amiqira fasiqauqee



qidaqa. Innee Yoobannara irimariafanoo, kisaagasaa ubiqafi mariunara mina aanna raaqa. Yoobanna aidafirafa taikoofanoo mina ainainira faiquqa faqa ufai faqa maqa kasirana faqa mina ainaina mara furufammasee taikaqoofanoo Anutufa quandaki firaaqoo amiqi amiqi maisanau. Karaambaiqa Anutufa amuqusirana faqa nifauarana faqa qumbiqarafa marunara amiqi amiqi maisanau.

<sup>12</sup> Qini qikaqaafasaa qini ufa akiaqa maafa maridanoo. Sia inneeqa nimana niqiqaida ufa qiaqa sia innaarunai nisauku uqeerasaida ufa qiaqa sia moo ainaina kikiqususaida ufa qiaqa. Innee andeeqasee eedoo kai qiaqa andeeqasee qaoo kai qiaqa. Innee sia miqifanoo Anutuna ufa innisaa aqufuandoora.

<sup>13</sup> Innikiqari moo fannoo mandainainaki maridanoo fee Anutunara innaaruqiani. Moo fannoo asaidanoo Anutuna amooqira idi raani. <sup>14</sup> Innikiqari moo fannoo auridanoo aurimaria fasiqa anaaseesa amaana maqasaa rakisirausa naaraifaqa misa aniree mi fasiqa anaaseena auriranara innaaru qimasee sauna anoona fooqaana akiaqa amoondunna karaambaiqa auqusaa qimasee adieefaranoo. <sup>15</sup> Misa naundura Yisunasaa mundusee innaaru qidaqa mi innaaruqirafa aurira fasiqa anaasee mara findifuannoo. Karaambaiqa fannoo marafindifidanoo mina aaqarafa marinanoo karambaiqa minnisannoo. <sup>16</sup> Inni nariara nariara manda irira irimariannana akooroomaseenana nariara nariara amiqiaqa. Inni aurirana taikaanifeera nariara nariara innaaru qiaqa. Andeeqara fasiqa innaaruqirafa afeeka ainaina maridanoo. <sup>17</sup> Eeriana oosana ririmma maasara foora faiqi faiqi Anutuna tamummaqara fasiqa fannoo, mifa afeekaikamandee aaku sia ruanifeera innaaru qimasoofoanoo qaara faqa qaara faqa aukuaana faqa moo ati faqa aaku sia rinau. <sup>18</sup> Kafa innaaru qimasoofoanoo inaarunaindari aaku maqasaa qumufannoo narana kambiqanau. <sup>19-20</sup> Qini qikaqaafasaa innikiqari moo fannoo anoona ufara minnisee kaqirunna mandainainaki finanoo moo fannoo andeeqara fasiqa fannoo oonu mina qumareeqeenoo amiqira aanai ubeekainafa mi fasiqafa mandoosana marai fasiqana mara quna kuqiranakinaana uqereeqeenoo kaqi mariraqoo quqaannoo. Mi andeeqara fasiqafa miqinannai moomoo mandoosana akiaqara faqa Anutuna afusaa rafaqafu aisaseenoo aminau.

## 1 PEETOOROO

### Peetooroofa indaaru akara rumannimu ufafa.

<sup>1</sup> Qinee Peetooroosa Anutuna asauku mundirafa Yisufa nari faiqi namuqiğari maa maqanasaa diğiqamağai fasiğausa maa ufana inni akara rumannimağaidağaa.

Innee Anutufa inni rusandeesamumasee qumaroo fasiğaa anaaseesa mariafanoo. Innee maaqooğari asaquakida Isaraee mağa maaqakiğari daraanimafusa Poontusa mağa maaqaki fusa fağa Karatia mağa maaqaki fusa fağa Kapadoosia mağasaa fusa fağa Asia mağasaa fusa fağa Pitinia mağa maaqaki fusa fağa inni aigamausa maa akarana rumannimağaidağaa. <sup>2</sup> Maasa qikoofa Anutufa mağee maa kari nari ianinnanara iriseenoo inni rusandeesamumağoosa mariafanoo. Sia fifaufau rusandeesamuinau.

Asauku mundirana Yisuna fidikannai findaukarausai kiağeera fağa Yisuna ufara eedoo qimasee mi mau fuağeera fağa Yisuna marağunannai kaağa andeeğara fasiğaa anaasee kammafi mariağeera inni rusandeesamumasee maranau. Anutuna afaarirafa fağa asoarana fağa inni naunduray qumbiğafinoo irairaaaminoo mariani.

*Naaru kambiqaaninna ainainara asasammasee afeesiranara qidanoo.*

<sup>3</sup> Karaambaği Yisufa Anutuna asauku mundirana akoonara Anutunara maasa aigamausa dufi dufi qimamağaidağaa. Maasa aağarana akiağara nifauarafa firaafa marinarana nari asauku mundirafa kuğiranakiğari findifinoo fukasaa aanaaği kammafi marirana maasa pağurimma qiminau. Naaru kambiqaaninnanara mağee asasiğa doo mi marirafa maasa qumbiğaqimağaidanoo. <sup>4</sup> Amiği amiğira ainaina Anutufa nari aiku asauku maasaree qimasee innaarunai rafağafimari ainaina maasa mina mararree qidağaa maasa minasaa kai qifu mundusee fidağaa. Mi amiği amiğira ainainausa Anutufa inni innaarunai quğağaqee rakisidanoo sia putaa imariğoo sia nauranaiki mariğoo sia taikemariğoo maridanoo inniara rakisidanoo. <sup>5</sup> Mi ainainausa innindi maridanoo Anutuna afeeka fannoo inneeqa Yisuna mandaağaranannai inni fağa mara afeedamma nimağee mariasa mi ainainausa innindi maridanoo. Innee taikainna aukuaana innaarunai findifi ooru firanara afeesara mariafanoo Anutuna afeeka fannoo innisaa rakisidanoo.

<sup>6</sup> Maa mağee maria kamuğoo oosana oosana inni nimanirafa aupurafa marianno (Anutufa qinanoo marianno) minara innee kaği kaağoo noori runiranaki marifaranoo. Mi nimanira ainainausara iriseeqa asasiğaa. <sup>7</sup> Mi nimanira ainainausa inni Yisuna sağarikirana nimanidanoo anoonaiğinoo marianifeera koorooidanoo. Faiqi maa maqanasaa mariasa kooraa mifa inaaqianna kasooğaqee taikemari ainainafa qumareeqa idaki quğasee tasirisiri masaida apaapu aigama uğanna aigaree marifanoo nari idaağirafa kai suğuffağaa doo minara amiğiranee qidağaa. Doo inniara Anutufa miğikai inoo nimaniranaki quğee marinarana inni Yisuna sağarikirafa sabeenara foora marianifeera inni idakiara foora nimanidanoo. Inni Yisuna sağarikirana mi nimaniranaki fiğaa feekakiğaa marinafa sia fifau kooraa munnimma inaaqianna taikkee mari ainaina kikiğaa usirafau mariannoofau kaağa uğanna uriğarara ainaina marianno. Innee Yisuna sağarikirana afeekakiğaa marifanoo asauku mundirafa Yisufa innaarunaidari koorooinna faasaana innee amooğira ufa fağa areenarafa fağa uqeerarana fağa mikari niminağaa mareefaranoo.

<sup>8</sup> Innee sia Yisuna qafoosa kaği nimuğusi marifağaa minara ririaasa. Innee sia Yisuna qafoosa kaği inneeqa irirafa minasaa rusimariasa mariafanoo mina ufamau fiifaasa. Miğimarianara innee firaagoo kaağa areenarana namuğaa asamariafanoo. Mi asasiranara faiqi sia amana minara ufa qifaranoo uriğarafa maridanoo. <sup>9</sup> Sia fifau asasiğaa mariafanoo Innee inneeqa Yisuna sağarikirana anoona inni nimana qumareeqeenoo innaarunai asumu mariranaki quğaranara asasiğaa mariafanoo.

<sup>10</sup> Ooğai Anutuna tamummağara fasiğauğaa maa inni nimana asumu mariranaki mara quğaannanara irisee firaagoo afigimasee queeəaeəğamasee randağau. Misauğaa kaği tamummağasee kasooğaqee Anutufa misa mandainaina minninnisee amiği amiğira afeeka innaarunai mareefandinna ainaina kaği nimianinnanara oonumafi irisee akara rumasee mi ufana anoona randağau. <sup>11</sup> Misa Anutunara yairee fee miğianoo fee naqimasaifanoo fee miğianoo fee ya fasiğannai fee miğianoo fee qimasee randağaa oonumafi iriğau. Asauku mundirana marağuna fannoo mi tamummağara fasiğausa naakufuğaa maa mağee aukuanara fağa asauku mundirafa firaa aupurarana maraaninnanara fağa mina taikaranaki firaa areenarana maraaninnanara fağa akooroomasee akara riğau. Ooğai sia kambiğoo kamuğoo akara rumasooфанoo maridanoo.

<sup>12</sup> Anutufa sia mi tamummaqara fasiqausa maru kamuqoorau qimanniminau. Maa maqee maria kamuqooru inniara qimannimufaqa irisee akara rumaqoofa maridanoo. Mi tamummaqara fasiqausa minara iridaqa ainainiqau. Misa maa maqee innee irimaria anoona ufanara minara qimasee akara riqau. Mi anoonufana tamummaqara fasiqauqa ooqai akara rumaqoofa doo maa maqee maria aukwana amiqira fasaasa ufa Yisunara qimannimariasaa doo qimannimisaafaqa irimariafanoo. Anutuna naaquqara maraquina fannoo dadaaqifaqa inni maqusa maqusa mariasa daraanimambifaqa qimannimifaqa irimariafanoo. Tamummaqara fasiqauqa ooqai akara rumaqoo anoona ufausa mina maqee irimariafanoo innaarunaindaraa qangirooqau mi ufana misa iriafanoo iriaqaa kai imarifaqa firaqoo Anutufa Yisuna maa maqanasaa arusee afiqoonara randaidaqa. Maasa faqa maa maqanasaa marunau faqa sia mi ainainnana amana maridaqa.

*Yisuna ufamau fimariasaa kaaqa andeeqasee mariaqa.*

<sup>13</sup> Inneeqa nitikurakinaa irirana deedaqammasee mariaqa. Asauku mundirafa Yisufa koorooinna aukunna amiqi amiqirana nimiannoo. Inneeqa naundurui irirana mi amiqi amiqiranasaa munduqarasamaseeqa maridaqa rakisidaqa aufaridaqa mariaqa. <sup>14-15</sup> Innee Anutuna ufara eedoo kai qimasee qumaraqa. Ooqai innee aamina maru kamusaqa maridaqa manda nidimaru ainainna sia maqee kamu kafa minara ootupaqa, innee aiqama marirana andeeqasee mariaqa, Anutufa inni naaree marifa kaaqa andeeqarafa maridanoo mifa indee kai iqa kaaqa andeeqa mariaqa. <sup>16</sup> Ooqeenaa Anutuna tamummaqarau ufa minara maaqimminoo maridanoo. Anutufa qinoo qinee kaaqa andeeqarau maridaqara qiqa innee faqa miqi kai masee kaaqa andeeqarau saikida mariaqa.

Tamummaqarau ufa miqimminoo marufaqa akara rumaqoofa maridanoo.

<sup>17</sup> Anutufa faiqi anaasee aiqamausa irirana qafee marifa maridanoo. Sia manda irirana iriseenoo moo dadaqammamaqeenoo moo firaqoo mandaikamamaqidanoo nari maraana amana kai andeeqasee nimidanoo. Miqi mari Anutunara innaaru qidaqa maasa qikoo fee qidaqa maa mariaqoo noori runusee maridaqa aqaranara rufaidaqa mariaqa. <sup>18</sup> Inni nikeeku nikaaku fifau fafau mandirirana maqeeuna minakinaana inni idukusee mareeqe quqasainara mina akiaqara fira ainaina maridanoo innee irimariafanoo. Mi feefaurirafa sia kooru sirua miqirafa maridanoo mifa taikee marifa maridanoo. <sup>19</sup> Inni idukirana akiaqara feefauru firaafa fiqararafa asauku mundirana fidika maridanoo. Sia teeroo namuana faina kaaqa amiqirana Anutuna aanda tatufimaruna fooqana amiqirana mina kuqiranannai maasa idukinau. Maasa nikeeku nikaaku mandirirana idukinau. <sup>20</sup> Ooqai indaaru Anutufa sia maa maqa maaqana auqiraqoo asauku mundirana kaqi utaaqama nimaqaqoofanoo marinoo maa maqee taikara kamu maasaki doo kooroo inoo maasara aunarira saqarisaa kuqufanoo <sup>21</sup> Anutufa mina kuqiranakinaana uqeereeqeenoo areenaranaki quqanau. Innee minannai Yisunannai Anutunasaa mundaqa mariafanoo kafa minannai kai inneeqa irirana minasaa rusirana faqa naaru innaarunai kambiqaaninna ainainara nidirana faqa minasaa ootupanoo maridanoo.

<sup>22</sup> Maqee innee Anutuna anoona ufa irisee maraafanoo mi ufanannai inni ninukama findaukamaseenoo. Innee inneeqa niqoonau mi ufana irimariasara kuqaa nimuqusidanoo nidimarifaqa minara kaifaa qinee qimannimidaqa inneeqa nimuqusa ookiqari noori kandamasee nariara nariara nimuqusidanoo nidiani. <sup>23</sup> Anutuna akarakinaa ufa fannoo ooqai kaqi marufa maqee marifa naaru naaru kaqi marianinafa innee minannai kafa oorudupi mafi kafa fukasaa aanaaqi kammafi mariafanoo. Sia maaqoo kuqimaria nikoona faiqi namu mariafanoo, Anutuna kasimari akarakinaa ufannai naaru naaru marianinna nikoona faiqi kammafi fukasaa aanaaqi kammambi mariafanoo. <sup>24</sup> Ooqeenaa tamummaqara fasiqa mina akara maaqimminoo marufa maridanoo.

Aiqama faiqi faiqi taatuqee andanda miqiraua mariafanoo, taatuqee andanda qusau aadanusifanoo afufeenaarirafa kakasidanoo. Faiqi areenarafa miqimminoo maridanoo.

<sup>25</sup> Anutuna karaambaiqa ufa fannoo sia miqinoo maridanoo naaru naaru mariannoo.

Mi tamummaqara fasiqana ufa miqinoo marifaqa qinee Peetooroosa minara maaqi qidaqa.

Mi amiqira fasaasa ufafa naaru naaru marira ufa maridanoo mina qimannimariafaqa irimariafanoo. Tamummaqara fasiqana ufa miqimminoo maridanoo.

## 2

*Anutuna ufa naamma anoona miqirafa marinara mina naqafuqa.*

<sup>1</sup> Innee minara iriseeqa inneeqa mandoosana aiqama fatika aqusaqa. Unnaqira ufa faqa nikaru qimasee maree mariana faqa qaaraikimari ufana faqa nariara nariara rairaiqimaria ufana faqa aasaandaana qimaria ufana faqa faiqi anaasee niqimaria ufana faqa mi ufausa sia maqee kamu inniki mariani. <sup>2</sup> Fuka faiqi anaqira foora naamma anoona kai naidanoo innee faqa miqikai iqa fuka faiqi aanaqira foora Anutuna andeqara ufa naamma anoonara fooqaana minara kai kaaqa ruaqa. Mina naqa fifi iqa innooqera foora iqa asumu mariranaki oonuree marifaranoo. <sup>3</sup> Miqiga karaambaiginnai oonuree mina aaga mariaqa. Innee karaambaiga amiqi amiqirana doo namasee qafee mariafanoo adiafaa idanoo dadaaqirafa maridanoo.

<sup>4</sup> Faiqi faiqi misa Anutuna amaana maqa usakee maru faakanara foora Yisunara nikoqoofaqa aunirinasaa arusee minnisaga. Minnisoo fanoo Anutufa qafamaseenoo qinee oogai maa faakannara qutaqamaqaafannana idaaqirafa maridanoo fee qimaseenoo maraseenoo amaana maqa usakararee qimaseenoo marasee kafa rakiqanau. <sup>5</sup> Inneeqa eedoo qimasee Anutuna asaukuki inneeqa nifaqa quqasaifanoo faakana namufaqa rakiqasee usakasainanoo faiqi naunduraki anoona amaana maqa kambigaani. Kambiqainaqa innee minaki Anutuna aanaiqi kirausaikamambi marifaranoo. Maridaqa Anutuna aidirana tatufirana suqa amidara foora amiqira irirana marinara amooqirana amifaranoo. Asauku mundirana Yisunannai miqifaranoo. <sup>6</sup> Ooqeenaa tamummaqara fasiqa moo fannoo faakanara maaqi qimasee akara rumaqoofa maridanoo. Qinee Anutusa rusandeesamumasee utaaqamamaqaafanna faakana idaaqirana maraseeqa Isaraee maqasaa oosanarasee rakiqeeqa. Ya fasiqa anaasee fee irisee mina saqarikinafa sia kadiqaannoo anoonaikiannoo.

Tamummaqara fasiqa ufa miqinoo maridanoo.

<sup>7</sup> Innee Yisuna saqariki mariaa oo Anutuna faakana amiqira qoonda fee qinausa mariafanoo. Sia Yisuna saqariki mariaa Anutuna tamummaqara fasiqa inniara maaqi qidanoo.

Innee maaqa usakaidaqa manda faakane qimasee mareeqee aqusoofanoo figumaree kafa amiqira faakana uriqararafa kammambi maridanoo.

<sup>8</sup> Ooqeenaa tamummaqara fasiqa akra moo maaqimminoo maridanoo.

Maa faakanasaa faiqi moomoosa niku qamaki saamurifaranoo Mi saqarifa misa niku amanniminaqa saamurifaranoo.

Tamummaqarasa ufa miqimminoo maridanoo. Minara moomoosa Anutuna ufa irisee sia maroonara niku amaki saamuriqau. Anutufa misara mi iriranasaa saamurifandiafoo qimaqoona miqiqau.

<sup>9</sup> Innee sia miqi mariaa mariafanoo. Innee Anutufa rusandeesamumasee maree marisa mariafanoo. Innee karaambaiga Anutuna uriqararana aanaiqiki mariaa. Innee naaduma kaaqa andeqara maqanna mariafanoo. Innee Anutuna nari maqannaasa mariafanoo. Mifa inni asukunakinaana naaramasee mareeqee nari idaaqira kaaqa qara andeqaranaki inni quqasaifaqa mariafanoo. Sia fifau minaki mara quqeenoo innee Anutuna idaaqira afeeka ainaina imarianara aiqamausa nifusaa koorooiaqee qimaseenoo inni mara nari kaaqa qara andeqaranaki quqaidanoo. <sup>10</sup> Ooqai sia Anutuna maqannaasa marusa maqee minaindi mariafanoo. Ooqai innee Anutufa maasa qifuaranara qifauaranara qimudaao qiranara innee sia irimariafanoo maqee innee mina maraafanoo inni faqa kukeeqafinoo qumee maridanoo.

*Innee asaqiraafaira foora maridaqa sia mandoosana maraaqa.*

<sup>11</sup> Oo qini qiqoondiqa, qinee Peetooroosa qeeqa qimuqusa ookiqari naamua qidaqa. Innee Yisunara irimariaa maa maqa maaqanaki maridaqa aanaamuruara foora asaqiraafaira foora mariafanoo. Miqiga maridaqa maaqoo faiqi faiqi manda nidimari ainainafa inniara qini maraaqee qinaqa sia eedoo qimasee mina maraaqa. Mi manda ainainausa inni maraqa arimarifa maridanoo innee moo maqannaasara foora mariafanoo sia maraaqa. <sup>12</sup> Innee aamina maqannaaki nidaqa maridaqa inneeqa nirana marirana aiqimasee nifaqa misa inniara mandoosana mareemariasee qimasee inni nindafeeqa oo amiqimasee mariaa qimasee misa faqa quandafi Anutuna amooqiga Yisufa innaarunaindari qumurainaqa amooqifaranoo.

<sup>13-14</sup> Qinee Peetooroosa maanara faqa qimannimidaqa. Maqasaa kaamanna firaa uriqararafa faqa maaqa maaqa uriqararasa faqa karaambaiga Anutufa misa quqanau,

mandoosana mareemariasa narifaqa iriaqeera faqa amiqira oosana maree marisa nimoogira ufa nimaqeera faqa mi uriqararusa karaambaiqa maqasaa quqanau. Innee inneeqara innaarunai karaambaiqa faiqi namu maridee qimasee aiqama maqasaa fasiqa anaaseesaa rakisi mariasa ureeaqa maridaqa misa ufara eedoo kai qiaqa.

<sup>15</sup> Furufari mariasa inni Yisuna ufa irimariasa minara manda dapi ufa inni nima-faqa sia aanoogirana nariranannai rafaqaqafuaqa. Anutufa inniara inneeqa amiqira nira mariranannai mi furufarirana qiqanuasa ufa rafaqaqafuaqeera qidanoo. <sup>16</sup> Innee mandainainaki rumbara fasiqara foora sia nuaqa mandainainakiqari idukira fasiqara foora kaqi nifaqa quqasee andeeqara oosanaki asasida fuaqa. Sia inniqa mandoosana kaifaa maraqqee qimaseenoo unna qimasee faiqi anaasee nifusaa mafi rafaqaqafusee mandoosanakiqari idukirafara foora nuaqa. Anutuna rumbara fasiqa naanna ramasee kaqi nuaqa. <sup>17</sup> Innee sia aiqamausara qini qimana fee qimasee furufariyaqa, aiqamausa nari uriqararana amanasaa mina afusaa rufiaaqa. Aiqaama Yisuna ufa irimariasa niqoonausa Yisuna ufa irimariasa nimuqusinoo nidiani. Innee Anutunara naaquqaani. Kaamanna firaa uriqararanara faqa naaquqaani.

*Innee Yisuna aanna ramaseeqa aupurarana nimifaqa kaqi maraqa.*

<sup>18</sup> Qinee Peetooroosa kafa qimannimidaqa. Innee maqasaa feefauruara ainaini mariasa inni rakisimariasa ufara eedoo qimaseeqa misa ureeaqa maridaqa misara naaquqamasee andeeqaseeqa misa ufamau fuaqa. Sia reendeeni maria rakisirausara kai miqiaqa aano qimarinausara faqa miqi kai iaqa. <sup>19</sup> Innee miqifanoo Anutuna eedoo qira ufa innisaa mariannoo. Inni rakisirausa fifau aanoomasee inni nariquee ummaara nimiqee ifaqa innee inneeqara Anutuna iriranamau fida fee qimasee reendeeniyaqa. Reendeenifanoo Anutufa inni amiqi amiqimannimaqaani.

<sup>20-21</sup> Innee mandoosana maraifanoo inni rakisirausa mina akiqara narifaqa reendeenamasee maraifanoo Anutufa mi reendeenirana akiqara sia inni nimiannoo inniqa mandoosana akiqara maridanoo. Innee amiqimasee marifanoo inni rakisirausa fifau narifaqa fifimmandee maraifanoo Anutufa inniara eedoo qianoo. Fifau narirana fifimmandee marainnana minara kai Anutufa inni naarameeqqeenoo nari ufa irimariasaki quqeenoo. Asauku mundirafa nari kai fifau aupurarana inniara maranau. Yisufa fifau aupurarana maranau. Doo innee mina afaqamareeqa mina aanna ramasee miqiaqa. <sup>22</sup> Mifa sia moo mandoosana maranau. Sia moo unna ufa mina afaurusaa marinau. <sup>23</sup> Misa aqurara ufa amufanoo sia mifa quandafi mina akiqara nari nimirau. Misa aupurarana mina apatasaa quqoofanoo sia mifa misa aano ufa nimirau kaqi nari irirana Anutunasaa andeeqara ufa nimirarunasaa nari irirana quqasee kuqinau. <sup>24</sup> Asauku mundirafa nari kai maasa mandainaina aqarana nari apatasaa mara quqaseenoo doo aunarira saqarisaa kuqirana maree finau. Maasa kuqirausara foora sia mandoosana maraqqeera kuqinau, amiqira oosana kuqira foora iqa marida maraqqeera kuqinau. Mina afaqa ateeqaqoonannai maasa daundura uninoo maridanoo. <sup>25</sup> Innee sipsipa aanda-ura foora furufariqa auiqa nuafanoo doo maqee Anutufa inni nimanasaa rakisimari finnai inni aanda-ura foora rakisimari finnai quqasaifaqa mina afaqee fimariafanoo.

### 3

*Ninaaqmaakara qinoo nifaaqmaakara qinoo.*

<sup>1-3</sup> Qinee Peetooroosa ainaini mariasara nari rakisirausa ureeaqa mariaqqee qunnana innee faiqi ninaaqmaka faqa miqi kai iqa inneeqa nifaaqmaakara eedoo qimasee ureeqarusaikamambi mariaqa. Innee miqifaqa inni nifaaqmaaka akaqausa Anutuna ufara sia fee qimariasa maridaqa sia inni ufa fannoo misa dadaqianoo inni andeeqara marirafa kai uqannifiqaannoo. Innee inneeqa nifaaqmaaka faqa maridaqa andeeqara marirana marasee noori kandamasee marirana faqa marifaqa misa nari nifunnai inni andeeqarana qafeefaranoo. Sia afaqa auqimari ainainnara irisee afaqa amiqi amiqiaqa, akiqaki afaqa auqimariannana faqa afaqa auqimaria oondana faqa siarara faqa qamunnara faqa sia minauqara irisee nifaaqa amiqi amiqiaqa.

<sup>4</sup> Inni nifaaqa amiqi amiqirafa inniqa nimuqusa ookiqari amiqira marira marirafa minannoo kai nifaaqa amiqi amiqiani. Inni nifaaqa mari inanoo asooqaqaaninafa maridanoo, fisoo fisoomasee kasoqqaqee aqumirira oosana fannoo mifa sia asooqaqee mariafa maridanoo minannai kai mara nifaaqa auquaqa. Mi oosannafa Anutuna afusaa amiqira oonda uqanna maridanoo. <sup>5</sup> Ooqai Anutuna ufa irimaru anaaseesa Anutufa innaarunai nimirree quna minara asammasee afeesidaqa maaqimasee nari nifaaqa auqimariqau. Misa nari nifaaqmaakara eedoo qimasee ureeaqa maridaqa minannai nari nifaaqa auqidara foora imariqau. <sup>6</sup> Saraqafa miqimaru anaaseefa marinau. Mifa nari afaaqi Abarahaamana ufara eedoo qimasee qini uriqarara fee qimarinau. Innee

miqimandee amiqira oosana mareeqa sia oosana oosana ainainara rufieeqa Saraqana araamummaakai kamambiqa marifanoo.

<sup>7</sup> Qinee Peetooroosa doo aanaaseeuqara qiqa doo maqee anaasee nifaaqmaqkara qianaura. Anutufa kaqi marirana kaqi nimidanoo aneenna anaaga faqa aneenna faqa mi mariranaki mariafanoo minara aneenna aanaaqara amanna fee qimasee amandakusee mina faqa marie. Innee miqimasee inneeqa ninaaqmaaka faqa marifanoo moo ainaina fannoo sia innee Anutunara innaaru qirana ititaannoo.

*Andeeqara marira akiaqara mandufa aminana amiqira ufa kai naramia.*

<sup>8</sup> Mi ufana atisaa maaqimminoo marifaqa qimannimianaura. Innee Yisuna ufa irimariasa aiqama ainainara moodaa irirafa mariani aiqamausa moodaanaki kai nimuqusa quandaaga. Innee nariara nariara nikaqaafasaara fooru ninduqusiidaqa aiqamausa nariara nariara ruuqa. Innee nariara nariara fiffimmasee remuqeenamasee miqidaqa nariara nariara qimudao qimasee nari dadaaqa nari dadaaqaqa.

<sup>9</sup> Mandoosana aminana sia quandakinana kafaa mandoosana amia. Aqurararufa aminana sia kafaa quandafi nari aquraraa. Mi manda oosanna akiaqara quandaki amiqi amiqirana kai amia. Anutufa amiqi amiqirana kai nimiraree qimasee inni naarama nari ququsaki quqaseenoo innee miqi kai iqa amiqi amiqirana kai mandoosana nimimariasa nimiaqa. <sup>10-11</sup> Ooqeenaa tamummaqara fasiqausa akara maaqimminoo maridanoo.

Faiqi moo fannoo maa maria mariranaki amiqiranaki asasiranaki marianee qimaseenoo doo mi fasiqafa manda nirana taikaseenoo unnuva taikaseenoo manda marirana ameesa uquseenoo amiqira marirannai ubeekaannoo. Miqinna fasiqafa asoora-nara randamareenoo afaqee fidanoo miqinoo fidanoo amiqirana paquriannoo.

<sup>12</sup> Maqasaa fasiqa moo fannoo andeeqasee fimarifanoo Anutufa nari afu minasaa quqaseenoo rakisidanoo mina innaaruqirana maqee maqee iridanoo mariannoo, mandoosana maree mariasara amesuqunnisaidanoo.

Tamummaqarausa ufa miqimminoo maridanoo.

<sup>13</sup> Qinee Peetooroosa kaifaa qimannimidaga. Anee amiqira mariranara minara rumammaree marainanoo ya fasiqa fee manda marirana ani amiannoo fee sia ani amiannoo. <sup>14</sup> Faiqi moo fannoo ani andeeqarana akiaqara ani mandaikamamaqainanoo ani asasirafa firaafa mariannoo. Innee sia faiqiara rufiaaqa sia aiqama ainainara amandirinoo aindiri raani.

<sup>15</sup> Innee maqee maqee inneeqa nimuqusaki asauku mundiranara naaquqainaga mina mareeqe inneeqa karaambaiqaikiaga. Akaqausa inni innaarunai ainainara asasammasee afeesimarianara irifaqa innee faasai Yisuna saqarikiranara deedaqammaqainana misa qimannimiaqa. <sup>16</sup> Sia raigasee qimannimia, ireeda nimandakusee qimannimia. Inni nisakadiki anukarafa kai mariani. Faiqi akaqausa inniara asauku mundirana afaqee mariasee qimasee mandufa nimiseeqa inni amiqi marirana nindafamasee nisaurifanoo. <sup>17</sup> Innee mandoosana maree marifaqa narifanoo amanai kammiannoo. Anutufa eedoo qinaqa amiqira oosana akiaqara fifau narifanoo urigaraannoo.

<sup>18</sup> Asauku mundirafa nari uqanna inniara kuqinuu. Moodaa suanisaa moodaa kari kai aiqamausa mandoosanara kuqinuu. Inni nisauku qumareeqeenoo Anutufinnai quqaaneera amiqirafa maasa manda fasiqa anaaseera kuqunnimaqanuu. <sup>19</sup> Mifa asuku mundirafa mina afaqa kuqufufanoo mina amana fannoo findifinoo kaqi mariranaki finoo kafaa miqooqari ooqai kuqusa nimana rumberanaki marunaki ooqureenoo Anutuna ufa qimanniminuu. <sup>20</sup> Ooqai Nooafa sipa firaana auqidanoo nammari anianinnanara faiqi anaasee minara faqa qimannimarufaqa siammirimaqau. Anutufa faiqi anaasee Nooana ufa iriseeqa mandoosana minniseeqa sipaki keeqaaqeeera nifeesusia doo kooqi ititaseenoo nammari narinuu. Nammari narusa nimana marunaki asauku mundirafa kuqiranakiqari findifinoo ooquree qimanniminuu. Naru nammari dinni qisauku taikasee dinni ani qaaramoo marasee oodaa fasiqa anaasee asumu mara akoonnai quqanuu.

<sup>21</sup> Nooafa sipaki asumu mariunara maasa faqa maqee kamuqoo mina amana kai amaana nammari marasee asumu mariaqee qidaqa. Sia fifau nammari maraanannai nifaaqaindaraa qikairi rukarafa anoona maridanoo. Nammari maree mariana anoona maaqimminoo maridanoo. Aneenna aakirana amuqusa ookiqari Anutunara kuqaa qima afeekaikirafa kamasee nimirafa mifa anoona maridanoo. Mifa kai kuqaa nammari maree mariafa maridanoo. Mifa kai Yisuna kuqiranakinaana findifunannai inni asumu marirana nimidanoo. <sup>22</sup> Yisufa kuqiranakiqari findifinoo innaarunai oorufinoo Anutuna aqa mina asauku uqannai ooqu marifufanoo Anutufa aiqama innaarunai nari qangiroouqa faqa Sadannana afaanauqa faqa misa oosana oosana afeekauqa faqa mareeqeenoo Yisuna aramandunnai quqaqoofanoo maridanoo.

## 4

*Ooqeenaa mandoosana minniseeqa fuka marirana maree mariafanoo.*

<sup>1</sup> Asauku mundirafa afaaqasaa aupurarana narí apatasaa maranau. Innee miqiannee qimasee afeekaikamandee deedaqammasee mariaqa. Yisuna ufasaara nipatasaa nidafirana mareemariasa miqooqari sia mandoosanna maree mariannai ubeekeefaranoo nikoofaana amiqira aanai ubeekeefaranoo.

<sup>2</sup> Nipatasaa nidafirana naruqooqari innee maa maqanasaa maridaqa inniqa nidira mandainaina fannoo sia inni mara quqaannoo, Anutuna irirafa kai inni mareeqee quqaani. <sup>3</sup> Ooqai inni marirafa maaqimminoo marinau. Nári nifaqaee kooroo kooroo iranara faqa, faiqí anaasee nariara nariara kaaqa rirana faqa nammari namasee furufarimariana faqa faiqí anaasee suqufi manda oosana maree mariana faqa moomoosa suqufifaqa nammari neemariana faqa unnaqira anutunara innaaru qimasee mina auqusa mandoosana maree mariana faqa innee minauqaki kai indaaru mariqau. Doo innee ooqaindari kisaqaasaa minaki kai mariusa mariafanoo doo saaqa amanaikiqa mariafanoo maqee sia minaki mariaqa. <sup>4</sup> Ooqai innee faqa misa faqa mandoosana qambaana aqufiqa mariusa mariafanoo doo maqee sia misa faqa fuafaqa misa tautiqa aanooqiqa aasaandaana mandufa inni qimannimaqaidafa. <sup>5</sup> Kasooqaaqee misa faqa Anutuna afusaa nári mandoosanara kooroomasee mina akiqara mareefaranoo. Anutufa kaqi mariasara faqa kuqirausara faqa ufa iriseenoo rainaranara deedaqammasee maridanoo.

<sup>6</sup> Minara kai amiqira fasaasa ufa Yisufa kuqirausa qimannimisooafaq iriqa. Mi kuqirausa kaqi maaqoo marufanoo Anutufa aiqama faiqí anaasee imariandee kai inoo rainannimaqasooafa kuqiqau. Mi kuqirausa nimana Anutufara foora naaru naaru mariranaki mariaqera amiqira fasaasa ufa qimanniminau.

*Nariara nariara andeeqasee riqa inneeqa nimana kai dadaaqaqaa.*

<sup>7</sup> Doo aiqama ainaina taikarafa adeediranoo maridanoo. Innee maqee maqee Anutunara innaaru qiraree qimasee inneeqa nimanara irisaida kai fuafa maqee maqee aufaridaqa mariaqa. Innee sia miqiqa aagara oosana mareeqa naqimasee Anutunara innaaruqifaree. Sia amanaikifara. <sup>8</sup> Aiqaama amiqira ainaina urinaaqararafa maafa maridanoo, sia nifaurunnoo kai unna qimasee nariara nariara ruaqa, nisaukunnoo dadaaqirana faqa nimuqusanai faqa nariara nariara ruaqa. Nariara nariara nimuqusirafa moomoo manda oosana rafaqaqafidanoo.

<sup>9</sup> Innee narí maaqaki narí maaqaki keeqafi narana suqasee naraaree naraareemasaida naa. Anaamuru faqa paqurimandee miqi kai iaqa. Sia aundura rumbee marinana miqia aundura idukinoo marinana miqia. <sup>10</sup> Anutufa afaarinoo oosana oosana ainaina akoofasaikirana niminnana aqoonnana dadaaqianeera niminoo sia inneeqara kai maqeeiaqera niminoo. Innee Anutufa nimimari ainainnasaa amiqira rakisiranara foora rakisidaqa naadu naadu niminna ainaina akoofasaikirana marasee minannai niqoonausa dadaaqaqaa.

<sup>11</sup> Amaana ufa qimannimimari fasiqafa Anutuna ufa kai qimannimiani. Faiqí dadaaqimariasa Anutufa nimimari afeekanannai afeekaikamasee niqoonausa dadaaqaqaa. Miqinanoo aiqama ainainiranaki asauku mundirana Yisunannai Anutuna amooqira ainaina kambiqaquannoo aiqama areenarafa faqa afeeka faqa naaru naaru marianinafa minaindi Yisunaindi kai maridanoo. Kuqaa.

*Yisuna ufamau firanara akiaqara aupurarana mareefandinna oosanara qimaqoofa.*

<sup>12</sup> Oo qini qifaaqasaa qiqoondiuqa, qinee Peetooroosa qimannimidaqa. Innee Yisuna ufara aupurarana maree mariasa sia tautiqaqaa nanee moo manda ainaina maasaki kambiqeenoo fee qimasee munari minari sia iaqa. <sup>13</sup> Kaqi asasa kai iaqa. Maasa asauku mundirana aupurarana naida qimina maraidee kai qimasee asasiaqa. Miqifanoo innaarunaindari mina kaaqa areenarafa faqa kooroomambinaqa maasa asasirana qumbiqaraura mariana. <sup>14</sup> Oo qini qifaaqasaa qiqoondiuqa, qinee Peetooroosa qimannimidaqa. Innee Yisuna ufasaara aupurarana maree mariasa asasiaqa kaaqa areenarana maraquna Anutuna maraquna maasa naakinoo maridanoo fee qimasee asasiaqa. <sup>15</sup> Yisuna auqusaara aupurarana nimifaqa asasiaqa, mandoosana akiaqara aupurarana nimiranara eerairiqa. Innee Yisuna ufa irimariasa innikiqari sia moo fannoo fidika ruqiasainanoo kuquani sandufa rukiarafa faqa sia mariani, unmuarirafa faqa sia mariani, moosa mandainainaki keeqaranara innikiqari moo fannoo sia uqanna mi mandoosanna marasee mina akiaqara aupurarana maraqa. <sup>16</sup> Innee Yisuna ufara aupurarana maraseeqa sia minara nisauruqa, Yisuna auqu maasasaa marinara Anutunara dufi dufi qiaqa.

<sup>17</sup> Anutufa aiqamausa ufa irira aukuaana doo ani maridanoo. Anutufa narí faiqi namu ufa naaree iriannoo. Iridanoo misa faqa aupurarana nimiannoo. Miqi qimasee niminanoo Anutuna ufara nikooqee marisa naqi fee iannoo fee firaqoo uqanna misa ufa nimiannoo. <sup>18</sup> Ooqeenaa tamummaqarausa akara minara maaqimminoo maridanoo.

Andeeqara fasiqauqa nimeekamakida asumu mariranaki keeqaidaqa, Anutunara nikooqee marisa faqa mandoosana mareemariasa faqa naqi fee ifaree, firaqoo mandaikifaranoo.

Tamummaqara fasiqa ufa miqi qimaqoofa maridanoo.

<sup>19</sup> Minara iriseeqa Anutuna iriranasaa aupurarana maree mariasa nári amiqira mariranannai nári nifaqa nári auquqoo fasiqanasaa nári nifaqa amiqimasee quqasee marifaranoo. Inni auqufa ooqai qima afeekaikammaqoofa marifanoo doo miqoo kai fuannoo sia rakeeiannoo.

## 5

*Yisuna ufara suqimariasasaa rakisirausa misa oosanara qimaqoo ufafa.*

<sup>1</sup> Minara inni amaana maqasaa rakisimariasa qimannimidaqa. Qinee Peetooroosa amaana maqasaa rakisimarunausa maridaqa inni qimannimidaqa. Qinee asauku mundirana aupurarana qeeqa qifunnai qafaafanausa maridaqa, kasooqagee in-naarunaindaraa kaaqa qarafa akooroo inaqa qinee faqa akaqana marararee qidaqa inni qimannimidaqa. <sup>2</sup> Innee amaana maqasaa rakisirausa faqa amiqira asumu aandaau rakisidara foora mariaqa Anutufa innee faiqi aanaaseera asumu aandaara foora rakisiaqee qidanoo. Sia nikoo nikaamasee rakisinnimaqaaqa Anutuna iriranamau kai asammasee rakisinnimaqaaqa. Sia feefauruara kai irisee mi rakisira saikana maraaqa naundurakinaana dadaaqianee qimasee maraaqa.

<sup>3</sup> Innee amaana maqasaa rakisimaria fasiqausa sia inneeqara uriqararausee qimasee fuki faaki qiaqa, innee fidaqa quandafi ireeda kai faiqi anaasee nifiqee andeeqaramau kai fuaqa. <sup>4</sup> Innee miqimasee faiqi anaasee rakisifanoo aandaara foora rakisirafa firaafa Yisufa innaarunaindari akooroomafinoo kaaqa areenara qafee inni nikiqasaa quqasee nimiannoo sia areenarafa taikaaninafa naaru naaru kaqi marianinafa.

<sup>5</sup> Miqi kai iqa innee kumaaraauqa faqa inneeqa faiqi firaasa nimeemaanai miqi kai masee ureeqa mariaqa. Innee aiqamausa oorudupi oorudupimafinaqa qamunnara foora afisusee mariaqa. Tamummaqarausa akara minara maaqi qidanoo. Anutufa faiqi anaasee nári nuqu uqereee mariasa rafaqaqfidanoo fifimariasa adifaairana faqa amiqirana faqa nimidanoo.

<sup>6</sup> Tamummaqara fasiqa ufa miqinoo marinara innee minara irisee Anutuna afeeka asauku ameemaanai ureeqa marifanoo narí aukuaana qumureenoo inni uqeraa uriqararanaki quqannisaannoo. <sup>7</sup> Mifa Anutufa inniara amuqusmarifanoo rakisidanoo. Minara inniqa aiqama ainainara naundurakinaa ummaara rufiarana nimukee marina naindiri ree mariana minauqa moodaanaki uqereeqee Yisuna minasaa kai aqusaifanoo dadaaqiannoo.

<sup>8</sup> Innee inneeqa nimanara irisee afarida mariaqa inni namuqaa Sadannafa kaasau fainiara foora fiqú faiqu idanoo yanee nambiqaanau yanee nambiqaanau qidanoo.

<sup>9</sup> Aiqaama maqa maaqaki inni niqoonausa Yisuna ufa irimariasa moodaa karammida aupuree mariafanoo. Minara irisee innee inneeqa Yisuna saqarikamma mapukusee maridaqa Sadannafa aninaqa ititaidaqa mariaqa. <sup>10</sup> Innee maaqoo maqasaa maridaqa kaqikaqoo nidaqirafa mariannoo. Marifanoo kaqi afaarirana akoofa Anutufa inni naaraidanoo narí naaru naaru kaaqa areenarana asauku mundirana namufaqa narí namufaqa inni nimiannoo. Innee maaqoo marifanoo mifa kai inni anoonaikama nimaqaannoo mifa kai naunduraki mapukirana nimiseenoo afeeka faqa afeeka maaqa atuna fooqaana nimiannoo. <sup>11</sup> Aiqaama afeeka rakisinnimaqarafa naaru naaru minaindi mariannoo. Kuqaa.

*Atisaa nimandoo ufafa.*

<sup>12</sup> Qini amiqira qikaqafasaa Sirafanusafa dadaaqifaqa maa kaqikaa akarana rumanni-maqeeqa. Innee Yisuna ufaki mariafaqa qinee qimannimidaqa nifeeqaraidaqa, innee minaki maridaqa kuqaa Anutuna afaariranaki mariafanoo. Innee minaki mapukufi kikiqiaqa.

<sup>13</sup> Yisuna ufa irimariasa Babiroonia maqusa mariasa faqa maridaqa Anutufa misa faqa rusandeesamumasee maroosa maa papiqanaki inni nimandaiddaqa. Qini qimaaku Marikoofa mifa faqa inni nimandaiddanoo. <sup>14</sup> Innee Yisuna ufa irimariasa imariandee narí amooqee narí amooqee iaqa.



Innee asaku mundirana aramuqmaaka faiqinamu inni naundurai asoarafa mari-  
ani.

## 2 PEETOOROO

### Peetooroona inaaqianna akara.

<sup>1</sup> Qini Simoona moo duqu Peetooroosa qinee asauku mundirana Yisuna ainainira faiqi Yisufa maa maqanasaa diqiqamaqoo fasiqausa marunausa maa akarana inni rumannimaqaida. Maasa Anutufa maasa asumu maree marifa asauku mundirafa Yisufa nari andeeqaranannai amiqira oondara fooqaana nari saqarikirana maasa qiminau, inni faqa mi amiqira ainainna niminau.

<sup>2</sup> Innee Anutuna faqa Yisuna maasa karaambaiqara faqa iridaqa mi iriranannai Anutufa nari kaqi nimirana faqa nari asoarana faqa inniki qumbiqafinaqa mariaqa.

*Peetooroofa maasa oosana oosana andeeqara mariranara qimaqoofa.*

<sup>3</sup> Anutufa nari kaaqa qara amiqiranannai maasa daaree marina Yisunara irianara eedoo qinoo doo minannai nari innaarunaidaraa afeeka maasa qimanakai qimifaqa minannai Anutuna andeeqara marirana maa maqanasaa maraanaura. <sup>4</sup> Mi innaarunaidaraa afeekanannai nari kaaqa idaaqira amiqi amiqirana nari qima afeekaikammaqoona maasa qiminau. Mifa qima afeekaikammaqoo kaaqa amiqira ainainannai maasa maa maqanasaa mariafanna mandainainara fanandirana faqa putaairana faqa qima afeekaikammaqoo afeekana mara mareeqa fi ruqiqaki fidaqa Anutuna aunduraindaraa irirana andeeqara mariranaki mariraree qidaqa miqidaqa.

<sup>5-6</sup> Innee innaarunaidaraa andeeqara marirana maridaqa minara kai innee inneeqa Yisuna mandaagaranasaa minasaa afeekaikamasee inneeqa andeeqara marirana minasaa ootupaqa. Ootupamaseeqa Anutuna ufa asaana rumasee amiqimasee irirana faqa minasaa afeekaikamasee ootupaqa. Kafaa miqooqari innee inneeqa nimanara iriseeqa mina faqa afeekaikamasee ootupaqa. Kafaa miqooqari noori kandamasee maridaqa ainainirana faqa afeekaikamasee mina faqa ootupaqa. Kafaa miqooqari Anutuna aanna rarana faqa afeekaikamasee ootupaqa. <sup>7</sup> Kafaa miqooqari nari nikaqaafasaara foori nariara nariara aidirana mina faqa afeekaikamasee ootupaqa. Kafaa miqooqari nariara nariara nimuqisirana mina faqa afeekaikamasee ootupaqa. <sup>8</sup> Mi amiqira ainainausara innee sarauqi mariafanoo. Innee mi ainainausa moo faqa moo faqa maree marifanoo mifaqa inni dadaaqifaqa innee karaambaiqa asauku mundirana Yisuna iriranaki maridaqa sia fifau marifaranoo sia kadiqarusa marifaranoo innee kasi kasidaqa anonaikimariasa marifaranoo. <sup>9</sup> Faiqi moo fannoo mi amiqira ainainausa sia marainafa mina afu dimbarafa sia qafaidanoo nari mandainaina findaukamaisoonara aunuseenoo miqidanoo.

<sup>10</sup> Innee aiqamausa nifusaa maqee maqee moo faqa moo faqa afeekaikamasee Anutufa inni rusandeesamumasee maroonara kooroo iaqa. <sup>11</sup> Innee mi amiqira ainainausa afeekaikamasee inni Yisuna saqarikirana ootupamasaiinoo maasa karaambaiqa asauku mundirafa asumu maree marifa Yisufa mina qafamaseenoo nari naaru marira ququsaki firaa qoo kooqi atu aquseenoo inni naarameeqee minaki quqaannoo.

<sup>12-13</sup> Qinee minara iriseeqa maa ainainausara maqee maqee naaqoo augeemariana iriqa maraaqeeera. Innee sia aunimariafanoo irimariafanoo anona ufasaa afeekaikamafi atooqafi irimariafaqa kaifaa qimannimidaqa. Qinee maaqoo sia kuqidaqa kaqi maridaqa inni kafaa kafaa naaqoo auqaranara andeeqanoo mari ifoo qidaqa. <sup>14</sup> Qinee maa maqanasaa kuqifa qipata qusasaa quqaanauree qidaqa iridaqa. Maasa karaambaiqa asauku mundirafa Yisufa akooqoo daamua qimaqooqoo kai qusasaa quqaanaura. <sup>15</sup> Qinee kaqi maridaqa afeekaikamasee qimannimidaqa kasooqagee kuqufuaanaqa moo ainaina kambiqainafa amiqimasee irisaida narimau fuageera qimannimidaqa.

*Sia Peetooroofa uri ufafau qimanniminau. Qinee qeeqa qifukoo qafaafannanara qidaqee qinai.*

<sup>16</sup> Sia maasa faiqi uri ufafau iriseefau asauku mundirana <sup>17-18</sup> Yisunara maa maqanasaa firaafa innaarunaidari qumunara qidafau maasa qeeqa qifunnai mina uriqaranana qafaafannanara qimannimidaqa. Maasa qeeqa kai mina faqa naaqqara aqanasaa mariafanoo firaa kaaqa qaranakiqari Anutuna ufa qumufaqa maasa iriqiafana, maafa qini didira qimaaku marifaqa qinee minara ridaqa asasidaqa. Mi ufanannai Yisuna auqu firaanaikino kaaqa areenarana aakuamaqooqafa maasa miqoo marida qafeeqa iriqiafana.

<sup>19</sup> Maqee maasa mina qafamaseeqa ooqeenaa tamummaqara fasiqauqa akarara kuqaa fee qimariafannana, maqee anona qafamaseeqa doo kuqaa uqanna anona fee qidaqa. Innee tamummaqara fasiqauqa ufa amiqimasee irifanoo naaqooki keeqainafa

amiqimandee marifaranoo. Misa ufa asukunaki qoomara foora kaaqa qaida maridanoo iqaqarana afeesiannoo duqudeeqiara foora Yisufa inni nimuqusaki kaaqa qaannoo.<sup>20-21</sup> Innee maa ainainna naaree iriaqa. Innee tamummaqara fasiqauqa ufa irimariana sia minakinaa moo ufa fannoo nariara aaduma anoona maridanoo. Si tamummaqara ufa moo fannoo faiqi iriranasaa kambiqaanau. Naaquqara maraqa fannoo mi tamummaqara fasiqausa uqeereqeenoo Anutuna iriranaki quqasoofaqa qafamasee nari maqannaa qimannimisee akara rumaqoofa maridanoo sia nari kai iriaqau.

## 2

*Peetooroofa unna amaana ufa qifandinausara aaquqimaqoo ufafa.*

<sup>1</sup> Ooqai Isaraee maqannaasaki unnaqira tamummaqara fasiqauqa aniree kaqiruna mara ubeekke mariqau. Maqee maa aukuanna misa undee kai iqa unnaqira amaana ufa qimanniminausa inniki kambiqeefaranoo. Mi fasiqausa Yisuna ufa iriusa rakeemaki kaqinni oonuraasauqa maridaqa qumee faiqi kuridinnisee maria unna amaanufana inniki uqeereefaranoo. Yisufa nari kuqu fidikanannai misa kuqiranakinaana feefauru fasiqanara sia irirai nikoqainaga nari kuridirana nari kai mareeqee nari nifaqai quqeefaranoo.

<sup>2</sup> Miqifaqa innikiqari akaqausa misa ufa iriseeqa mi manda fasiqausa naanna ramasee faiqi anaasee qummuarira oosana mandoosana mareefaranoo. Miqifaqa faiqi anaasee akaqausa misauqa niqafamaseeqa quandaki anoona aanara manda aana fee qifaranoo.

<sup>3</sup> Unna qida uqannifiqemariasa kaaqa ainainara rimariasa maridaqa misa unnufa inni qimannimi marifaqa mi unnufannai munnimma aina maree marifaranoo. Ooqindari naaru kisaqasaa misa ufa nimimarifa kuqira ufa misasaa quqasaifanoo mi kuqirafa misara nifeesidanoo. Misa kuridi nimaqee marifa Anutufa sia faiqaidanoo afu maqasee deedaqinoo maridanoo.

<sup>4</sup> Ooqai innaarunaindaraa qangirooqqa akaqausa mandoosana marasoofanoo Anutufa sia nifauanau mareeqee idaki aquseenoo sainandannai rumbaqaosa ufa aukuanara afeesida kaqi maridaqa.

<sup>5</sup> Ooqai indaaruu maru fasiqausa mandoosana marasoofanoo Anutufa sia nifauanau nammari aufiranannai naruseenoo Nooana andeeqara oosana qimannimi maruna faqa nari faiqi namu dinni qisauku taikasee dinni ani qaaraqanda maraseenoo misa namufaga asumu akoonnai quqanau.

<sup>6</sup> Soodooma maqusa faqa Koomoora maqusa faqa Anutufa idannai aiqamausa naru taikanau. Maasa aiqamausa mandoosana akiaqa qafamasee rufiaaqeera naru taikanau.

<sup>7</sup> Rootafa nariara andeeqarafa marinuu misa nariara nariara qummuarirana faqa ufa rukiarana faqa Rootafa qafamaseenoo akooqee marufanoo Anutufa mina kai asumu akoonnai mara quqanau. <sup>8</sup> Mi andeeqara fasiqafa misa qambaana marida faasaambaasaana misa mandufa irinoo misa mandoosana qafee marufanoo amuqusa mandaiki marinuu.

<sup>9</sup> Qinee Peetooroosa minara irisee maaqi qidaqa Anutuna ufa irimaria fasiqausa oosana oosana nimaniranaki aquffanoo Karaambaifa misa mi nimaniranaki dadaaqira oosana iridanoo dadaaqiannoo. Mandoosana maree mariasa narirana ameemaana quqaqaiifaqa maridaqa ufirira faasaanara afeesida rakisira oosanara Anutufa iridanoo maridanoo. <sup>10</sup> Anutuna ufara fidiqaammasee nari manda nipata manda nidiramuu fimariasa misa narira oosanara faqa Anutufa firaqoo iridanoo. Unnaqira amaana ufa uqannifiqee mariasa misa inniki paasoosida aanooqidaqa maridaqa. Innaarunai kaaqa qee mariasara faqa sia naaquqaiifaqa rufiidaqa mandufa kai qangirooqqa faqa nimidaqa. <sup>11</sup> Mi qangiroosa afeeka mi manda fasiqausa afeeka urinaaqaranoo maridaqa mi fasiqausa ufa iriqa sia aanoomasee Anutuna afusaa oonuree misa nariranara qimamidaqa. Anutufa nari kai andeeqaannoo fee qimasee minnisaidafa.

<sup>12</sup> Unna qira amaana ufa uqannifiqee mariasa nariqa kuara fuseena iriranamuu fidaqa innaarunai mari ainainnara sia irimaria ainainnara mandufa qimasaida kaasau aandaara foora ufaanaki narifandinausa kambiqaida miqidaqa. Miqimariasa Anutufa kaasau aandaara foora kaqi naruannoo. <sup>13</sup> Misa kuridirana moomoosa nimifanoo Anutufa mina ati quandeeqee nariqa nimiannoo. Nari manda ainainara nidimarina faasaanasaa kaimma asamandee maraiddaqa. Innee Yisuna ufa irimariasa qoomaqa inni faqa moodaanaki qoomaanduqidaqa nari nikaruqira oosana maraiddaqa inni andeeqee mariasa nisaurirana manduqarana nimidaqa kudimakidaqa miqidaqa. <sup>14</sup> Unna qira amaana ufa uqannifiqee mariasa ummuari mari anaaseena mararee qimasaidaqa randaiddaqa. Misa manda oosanara naararee marisa sia nimuquq idanoo. Unna qira aana uqannifiqee mariasa misa furufari mariasa oonu rarisameeqee ufaana fainnai

ubeekamasai faqa ufaana aridaqa. Mi unnaqirana uqannifiqee mariasa naranara faqa ainainara faqa fanandirana akoofasa maridaqa. Misa Anutuna niqurarara ufa ameemaana mariasa maridaqa. <sup>15</sup> Unna qida amaana ufa uqannifiqee mariasa misa andeeqara aana minniseeqa fifau dapi fukasaa fidaqa. Ooqai Baraamafa Boosoorana amaaku mandoosanna maree maria munnimmanara rumannaraidanoo kaaqa ridanoo namuqa ufa irisee Isaraee maqannaasa nupuka naruanera doonkisa fimarinau. <sup>16</sup> Mina doonki fannoo faiqira maqi ufa qidanoo akoona furufarira oosana rafaqaqafimarinau. Minannai Anutufa Baraamana mandoosana qaoo qinau. Inniki unna qira amaana ufa uqannifiqee mariasa Baraamana aatata fidaqa miqidaqa.

<sup>17</sup> Unna qira amaana uqannifiqee mariasa aadaturu nammari miqiraua maridaqa asuru miqirana ufai fannoo kaqinni sufafaa quqaidanoo. Anutufa firaq asukuna misa afeedama nimaqaidanoo. <sup>18</sup> Mi manda fasiqausa nari nifaqa amooqimariana faqa furufari marianara faqa ufa qidaqa. Faiqi anaasee akaqausa nari mandoosanaiqari findifi aqee kai aanai ubeekararifaqa mi mandoosanna maree mariasa misa mareeqee nari ufaanaki mara naridaqa. Mi fasiqausa nari mandainainara nidiranannai ufaana fufuseeqa minaki mara naridaqa. <sup>19</sup> Unna qira amaana uqannifiqee mariasa aqee kai andeeqara aanai ubeekkee mariasara unna qida uneemaana qimasee maasa manda oosanakinaana idukira oosana uqannifiqaanauree qimasaida nari kai faiqi kuridi maria oosana fannoo nari rumbannimaqaidanoo. Nana ainaina moo mandainaina fannoo faiqi afaqa rumbasainafa doo mi ainainafa kai mina rafaqaqafimari ainainafa maridanoo.

<sup>20</sup> Miqi mariasa akaqausa asauku mundirana, Yisufa asumu maree marifa maasa karaambaiga, misa akaqausa minara irimarianannai minannai maa maqanasaa kuridira mandainaina rafaqaqafiranaakinaana idukunnisaidanoo andeeqara aanai ubeekkee kafaa quandaki kafaa manda ainainaki aqufinausa mi fasiqa anaaseesa indaaru mandainainaki ida afaisaa mariaasa maqee doo firaqqoo uqanna ida gambaanaki mandainainaki aqufuafanoo. <sup>21</sup> Miqimari fasiqa anaaseesa andeeqara aana sia qafaifanoofau amana marini. Misa kaqikaqqoo qafamaseeqa innaarunaindaraa ufa rukiaidaqa kafaa quandaki fimariafanoo firaqqoo mandaikidanoo. <sup>22</sup> Misa ooqeenasa ufamau fidaqa faini nari fidirana kafaa nari naidanoo, kuarara foora afaqa nammari uqsainanoo kafaa oonu dikoomaki doona reeree mareenoo anidanoo misa miqimidaqa.

### 3

*Peetooroofa Yisufa kafaa qumuaninna ufana faqa maa maqa maaqana idaqaaninna ufana qimaqoofa.*

<sup>1-2</sup> Oo qini qifaqqasaa qiqoondiuga qinee indaaru pasa akara rumasee inni nimaqaqifafana kaifaa maa maqee inaaqianna akara rumannimaqaidaqa. Aiqaama akaraqaraki amiqira ufa inni nitikuraki quqarara nikaru qimaria fasiqausara inni naaqqoo auqeeqa ooqeenana naaqqara tamummaqara fasiqausa ufa qianaqa iriaqeeru. Asumu maree marifa maasa karaambaiga mina aauqira ufa nari niqiqoo fasiqausannai inni qimannimu aauqirufana iridaqa sia aunuqa, irida mariaqa. Minara faqa inni naaqqoo auqaida akara ridaqa.

<sup>3</sup> Innee maa indaaruaa ainaina iriaqa, sia iriaqa furufari foora. Taikara aukuna akaqausa nari mandainainara nidirana mara quqemariasaa miqimariasaa kambiqaqifi innira ataasa ataasaida maqi qifaranoo. <sup>4</sup> Yisufa kafaa qumiraree fee qinoo fee. Yaqqoo fee maridanoo fee sia kafaa qumuannoo. Doo maasa qikeeku qikaaku doo kambiqaqi kuqiquu. Oosana aroo aukunnasaaqari aiqama ainaina amana kai fidanoo. <sup>5-6</sup> Qinee Peetooroosa minara maqi qidaqa. Mi aqara ufana qimariasaa maa ainainnara qikoomma irirara qaiqaqee qidaqa unnaqimasaida sia iridaqa. Ooqai Anutufa maa maqa maaqana nammari aufferannai kuridinau. Ooqai indaaru Anutufa qufanoo sia maru ainainnai maa maqa maaqana auqusoofanoo kambiqaqanu. Maa maqa maaqana nammarrinnai auqusoofanoo nammariqari kambiqaqanu. Kafaa miqqooqari nammari aufferannai maa maqa maaqana ooqeenana amiqimmandee kuridinau. <sup>7</sup> Maa maria maqa maaqana faqa innaaruna faqa Anutufa nari ufannai afeedidanoo idannai qamataikaanifeera afeedidanoo. Innaaruna faqa maqa faqa manda oosana maree mariasa faqa Anutufa afeeda maqifaqa marida moodaa kari idaqama taikaanoo fee qidanoo. Minauqara faqa misa qikooqaiqaqee qimasee unnaqidaqa sia iridaqee qidaqa.

<sup>8</sup> Qini qiqoondiuga maa ainaina sia aunuqa amiqimasee iriaqa. Karaambaiga irirafa maqimminoo maridanoo moodaa faasaana faqa moomoo aukuna faqa (wan tauseenna aukuna faqa) amanamana kai fee qinoo maridanoo. Akaqausa karaambaiga ufa anoonara sia dauni kambiqa qimaqaidanoo fee qidaqa noori runidaqa.

<sup>9</sup> Karaambaiqa sia anuqidanoo, maa maqa maaqanakinaa fasiqa anaasee moodaa nari-ranara akooqaidanoo misa aiqama nári mandainaina nimeesuqusee noori Anutufinnai ubeekamafi minni kai fuaqeera minara amiqimasee kisaaqasaa aiqamausa nifeesidanoo. Kisaaga aukuanara faqa qusa aukuanara faqa amanamana kai fee qidanoo amiqimasee nifeesidanoo.

<sup>10</sup> Karaambaiqa kafa qumira faasaana qumuara fasiqara foora tautumasee kam-bigaannoo. Mi faasaannasaa innaaruna firaqoo darara qirana namufaqa doo taikafuannoo. Innaarunaki mari ainainausa quqoona faqa suani faqa fasau faqa aiqama ida qama taikafuannoo, maa maqa maaqana faqa minaki mari ainainafa faqa aiqama qama taikafuannoo. <sup>11</sup> Miqinoo aiqama ainaina idaqama taikaaninnanara irisee innee minara nana oosana faqaasa marifaree fee qidee. Inneeqa rufiaseeqa mariranara naaquqara andeeqara marirana maridaqa Anutuna ufamau fidaqa faiqi anaaseeki andeeqasee mariaqa. <sup>12</sup> Innee Yisufa koorooianinna faasaanara afeesidaqa inneeqa andeeqara mariranannai mi faasaannara kaqi kaqi anianne qimariafanoo. Mi faasaanna innaaruna faqa innaarunai maria fasau namufaqa aiqama ida firaanannai tasirisirimma taikafuannoo. <sup>13</sup> Anutufa fuka innaaruna faqa maqa faqa kuqaa auqu quqannimaqaanauree qima afeekaimmaqoofa maridanoo. Mi fuka maqanasaa andeeqaraisa kai mi fuka maqanasaa maridaqa nifaaga quqasee maasa maqusa uqannee qifaranoo. Maasa mi fuka maqusanara kai afeesida maridaqa.

<sup>14</sup> Qini qiqoondiuqa innee mi faasaannara afeesida maridaqa Anutuna afusaa maridaqa nisakadiki qikairi siaisa mandainaina siaisa mariaqa innee faqa Anutuna faqa noori runirafa sia mi qambaanna mariani asoosana kai mariani.

<sup>15</sup> Anutufa maasa qikaqafasaa Pauroona nári irirana amufanoo maa akarana rumaqoomau qinee faqa mi mau kai fidaqa. Mifa maaqimandee akara rinau. Karaambaiqa sia dauni qumi marina sia fifau kisaaqasaa maridanoo, maasa nariranara akooqaidanoo maasa innaarunai asumu marirana maraageera kisaaqasaa nifeesidanoo. Pauroofa qinnaqoo miqoo kai inni irirafa miqoo kai fuani. <sup>16</sup> Pauroofa nári pasauqaki mi ufanara qidanoo miqi qimasee qimannimidanoo. Mina pasauqaki faiqi irisee sia dadi anoona iriaqaa ira afeeka ufa akaqafa maridanoo. Akaqausa irirana siaisa munuree miniree imariasa mi afeekufana iriqa mara saaeemmeeqee uqiqammeeqee kaqi runna ubeekaidaqa. Sia Pauroonaindi kaifau miqidau aiqama Anutuna ufa akarakinaana miqi kaimmidaga nariqa kai nári kuridirana mara naakida miqidaqa.

<sup>17</sup> Qini qiqoondiuqa qinee mi ainannara aaquqimannimaqaunaqa irimariafanoo. Minara augarida rakisida mariaqa. Ufa rukiee mariasa nári aaqaranannai inni rarisameeqee kaqirunna quqaidaqa. Miqifaqa innee ooqai mariu mariranaki fiqa saamurifaara.

<sup>18</sup> Maasa Karaambaiqa maasa asumu maree marifa asauku mundirafa Yisufa mina amiqira marirana irirana minaki kai fidaqa maqee maqee innooqaqa. Maqee faqa naaru naaru faqa mina amooqira ufa mariani. Kuqaa.

## 1 YOOHANEE

### Yoothaneefa indaaruaa akara rumannimaqoo ufafa.

*Yoothaneefa Yisuna faqa nidanoo aiqummasenoo akara rumaqoo ufafa.*

<sup>1</sup> Qinee kaqi marira ufa anoonara Yisunara akara rumasee qimannimidaqa. Mi kaqi marira ufana Yisufa oogai maa maqa maaqafa sia marunakina marufa maridanoo qinee mi ufanara qimannimidaqa. Maasa mi ufana anoona qifunnai qafeeqa daaqoonnai iriqafana. Maasa qifu qafamasee qisaukunnai akooqoo kaqi marirana anoona marufaqa auqamasee qafeeqa qimannimidaqa.

<sup>2-3</sup> Yisufa mi kaqi marira anoonafa kooroomafufaqa maasa mina qafeeqaramma inni qimannimidaqa. Mifa naaru naaru marirana anoona nari akoona Anutuna faqa marufa maasaki maa maqanasaa kooroomafunara minara inni qimannimidaqa. Maasa mina qafaafanna ainainara iriafanna ainainnara inni faqa qimannimidaqa. Maasa faqa mina akoona Anutufa faqa amaaku asauku mundirana faqa moodaanaki innisaimbaqa mariraree qimasee inni qimannimidaqa. <sup>4</sup> Innee faqa maasa faqa innisaimbaqa naunduraisasirafa qumbiqaanifeera inni maa ufana akara rumannimaqaidaqa.

*Anutufa kaaqa qarafa maridanoo.*

<sup>5-6</sup> Anutuna amaaku ufa moo maasa qimaqimufaqa maasa mina akooroomasee inni qimannimidaqa. Mi ufana maaqi qinoo Anutufa kaaqa qarafa qoomara foora sia kaqikaa asukuna marifa maridanoo. Mi ufana qimaqiminou. Maasa qeeqara Anutuna faqa aqoondi fee qimasee quandaki asukunaki keeqafidaqa maasa ufa faqa marirana faqa unna qidaqa, sia anoonamau fidaqa. <sup>7</sup> Maasa Anutuna aanna reeqa suanisaa rakeeraqoo nunausa moodaanaki marunausa maridaqa nariara nariara aqoondi kammiga maridaqa. Maasa Anutuna aanna reeqa kaaqa qara qoo fimarunano nari amaaku Yisuna fidika fannoo maasa aaqarana numoo aiqama findaukaidanoo.

<sup>8</sup> Maasa nariara sia mandainaina marifaqee qidaqa narakaru narakaru qidaqa Anutuna anoona ufa sia maasaki maridanoo unna ufa kai maasaki maridanoo.

<sup>9</sup> Maasa nari mandainaina oosana Anutuna akooroomma nisainanoo mifa andeeqee marifa maridanoo andeeqa qimaqaannoo mifa maasa numoo taika qiseenoo maasa mandainaina aiqama anukama qisaannoo nari ufamau andeeqasee fimarifa maridanoo mi mau fannoo. <sup>10</sup> Anutufa maasa aiqamausara aaqee mariasee kai qidanoo. Maasa nariara sia aaqee marunaasee qimariana Anutunara unna qimari fee qidaqa miqi qidaqa mina ufa anoona sia maasaki marifaqa miqi qidaqa.

## 2

*Yisufa maasa aaqarana andeeqarufa qimaqoo ufafa.*

<sup>1</sup> Qini faiqi namu sia innee aqaaqeeera maa ufana akara ridaqa. Yisufa asauku mundirafa andeeqarafa Anutuna afusaa maasufa dadaaqa fasiqafa maridanoo faiqi faqa anaasee faqa moo fannoo aqaiifanoo Yisufa minara iriseenoo maasa qikooffinnai oonureenoo maasa aaqarana andeeqa taikaannoo. <sup>2</sup> Anutuna asauku mundirafa mifa kai aandau tatufirafara foora maridanoo. Minannai maqasaa fasiqaa anaasee mandainaina akiaqara taikanniseenoo doo maasa Anutufinnai mafi qisaidanoo. Sia maasaindi kai aiqama anaamurundi minannai kai taikannisaaninafa maridanoo.

<sup>3</sup> Maasa Anutuna ufa iriseeqa mi mau fidaqa kuqaa Anutunara iridee qianauro. <sup>4</sup> Faiqi faqa anaasee faqa moo fannoo Anutuna aqoondi fee qimasee sia Anutuna ufamau finafa mifa unna qimarifa sia anoona ufa minaki marifa maridanoo. <sup>5</sup> Anutuna ufara eedoo qimasee mi mau finafa kuqaa Anutunara rimarifa mifa anoonaikinoo mariannoo. Maasa maaqi qimaseeqa maridaqa kuqaa Anutunaki maridee qianauro. <sup>6</sup> Faiqi faqa anaasee faqa moo fannoo qinee kuqaa Anutunaki maridee qimasee mifa asauku mundirana aanna ranoo marinaqa kuqaa Anutunaki marifa maridanoo, sia asauku mundirana aanna rainafa unna qimarifa maridanoo.

*Yoothaneefa fuka naakaparufa qimaqoofa.*

<sup>7</sup> Qini qifaqasaa qiqoondiuga. Maa ufana sia fuka ufa maridanoo innee oosaindari iri maria ufafa maridanoo. Ooqeenaa ufa irimariafa maridanoo. <sup>8</sup> Maa fuka ufafa ooqeenanasaa ootupamasee inni qimannimidaqa akara ridaqa. Maa fuka ufana anoona asauku mundiranaki kooroo inoo maridanoo inniki faqa koorooma nimaqaidanoo, doo asukuna afaqaidanoo fuka kaaqa qarafa qoomara foora inni qambaana qaidanoo.

<sup>9</sup> Mi fukufana maaqimminoo maridanoo. Moo fannoo nariara Yisuna kaaqa qaranaki maridee qidanoo quandafi nari akaqaafasaara fidiqaa inafa mifa sia kaaqa qaranaki maridanoo asukunaki kaqi maridanoo. <sup>10</sup> Moo fannoo nari akaqaafasaara rinafa mifa faasaana miqiranasaa maridanoo, sia minaki aiku amaki aquufrafa mariannoo. <sup>11</sup> Nari akaqaafasaara fidiqaa imaria fasiqa anaaseesa asukunakiara foora maridaqa, asukunaki nidaqa firannai anirannaira randaidaqa mikimakanidaqa asukuna fannoo misa nifusaa ititanoo marifaqa miqidaqa.

<sup>12</sup> Qini faiqi namu, qinee inniara akara ridaqa. Inni mandoosana Anutufa nari asauku mundiranara iriseenoo doo inni mandoosana akifaara mininnisoonara qinee inni akara rumannimaqaidaqa. <sup>13</sup> Innee faiqi firaasa indaaru Yisuna ufa irusa inni akara rumannimaqaidaqa. Innee Yisunara ooga oosana arooqoogari marinara irimariasa mariafaqa minara inni akara rumannimaqaidaqa. Qinee inni kumaaraauqa faiqi namuara akara rumannimaqaidaqa. Innee aakaqaqindaraa fasiqa uraaqaramafuanara inni akara rumannimidaqa.

<sup>14</sup> Qinee inni faiqi namu faqa akara rumannimaqaidaqa. Innee inneeqa nikoonara Anutunara irimariafaqara akara rumannimaqaidaqa. Innee faiqi firaasa innee Yisunara oosana arooqoogari marinara irimariasa mariafaqa minara inni akara rumannimaqaidaqa. Qinee inni kumaaraauqa faqa akara rumannimaqaidaqa. Innee nimudaanai qimariasa mariafaqa Anutuna ufa inni mariranaki marifa maridanoo innee aakaqaqindaraa fasiqa uraaqaramafuusa marianara inni akara rumannimaqaidaqa.

<sup>15</sup> Innee sia maa maqa maaqanasaqaraa mandirirana mariranara ruqa. Minaki mari ainainnara faqa sia ruqa. Innee maa maqa maaqanasaqaraa manda iriranara rimarifaano Anutunara rirafa sia inniki mariannoo. <sup>16</sup> Maa maqanasaqaraa mandainina oosana maaqimminoo maridanoo. Maasa manda daundurakiqari oosana oosana ainainara randeemarunnanara faqa maasa oosana oosana ainaina qafamasee marararee qimarunnanara faqa maasa nifaqa amooqimariana faqa maa ainainausa aiqama sia maasa qikoofinaindari qumu nari ainainafa maridanoo aiqama maa maqanasaqaraa ainaina kai maridanoo. <sup>17</sup> Maa maqa maaqanaki maria mandirirana marina ainainausa faqa faiqi nidimari mandainainausa faqa doo taikanoo qumidanoo kasoogaqee firaqoo taikaannoo. Faiqi fee anaasee fee moo fannoo Anutuna iriranamau fimarifa sia maa maqa maaqana namufaqa taikaanno, kaqi naaru naaru mariannoo.

*Asauku mundirana namuqaara qimaqoo ufa.*

<sup>18</sup> Qini faiqi namu, taikara aukuna adeediranoo maridanoo. Ooga asauku mundirana namuqa uriqararafa aniannoo fee qimasee qimannimiafannana doo maqee mina namuqa moomoo kooroomafi maridaqa. Maasa mina qafeeqa taikara aukuna adeediranoo maridanoo fee qidaqa. <sup>19</sup> Mi namuqaasa maasaki mariusa rakeemaki namuqaakiqau. Misa maasaki maridaqa sia maasa irirana amiqimasee maroosa marusa. Misa kuqa maasaindi maridau maasaki kaqi marini. Anutufa maasa dadaqianee qimasee misa qumeenni niqifoofaqa maasakiqari rakeemakufaqa fufanoo Anutufa minannoo misa mandoosana kooroo inau.

<sup>20</sup> Innee sia misa naanna ree mariasa mariafanoo asauku mundirafa kuqa nari naaquqara andeeqara maraqunna inni naakunnimaqee marifaqa mariafanoo innee Yisuna anoonufara irimariafanoo. <sup>21</sup> Innee Yisuna anoona ufa sia irifaqau sia akara rini irimarianara akara rumannimaqaidaqa. Sia unna ufa moo fannoo anoona ufakiqari kambiqaidanoo. Innee minara faqa irimariasa mariafanoo.

<sup>22</sup> Yafee unnufa qimarifa maridanoo Yisunara sia Anutuna asauku mundira fee qimarifa mifa unna ufa qidanoo asauku mundirana namuqa maridanoo. <sup>23</sup> Miqi qimarifa sia mina amaakuara kaifau qaoo qidanoofau mina akoona Anutunara faqa qaoo qimarifa maridanoo. Faiqi fee anaasee fee moo fannoo mina amaaku marainafa mina akoona Anutuna faqa maraannoo.

<sup>24</sup> Ooga indaaru Yisuna ufa irusa mifa inni naunduraki marinara amiqimasee rakisiaqa. Yisuna ufa irufa inni naunduraki marinaqa doo innee minannai amaaku faqa nari akoona faqa atukarasee miqandaki marifanoo. <sup>25</sup> Marifanoo asauku mundirafa nari uqanna moo ainaina maa ainaina naaru marirana qimiraree qinau.

<sup>26</sup> Akaqausa inni ueeqasee nikaru qimarifaqa maana minara qimannimidaqa akara rumannimaqaidaqa. <sup>27</sup> Qinee inniara iridaqa asauku mundirafa nari ufa inni naakunnimaqoofanoo maridanoo. Mina ufa fannoo inniki maridanoo sia fifau moo fannoo aana inni uqannifiqaannoo. Mina ufa fannoo nari kai aiqama ainaina anoona ainaina faqa unna ainaina faqa rainasee qimannimidanoo sia moo unna qidanoo. Innee Yisuna ufa irisee eedoo kai qiaqa. Miqidaqa asauku mundiranaki kaqi mariaqee qidaqa.

<sup>28</sup> Oo qini faiqinamu Yisunaki mariafanoo kaqi minaki kai mariaqa. Miqi marifanoo nari innaarunaindari quminaga sia innee nisaurusee kukeeqaaga kaqi nifaaqa quqasee qafaaqa. <sup>29</sup> Innee asauku mundiranara irimariafanoo mifa andeeqeamarifa maridanoo. Innee maanara faqa doo iriaqa, faiqi fee anaasee fee moo fannoo andeeqara oosana marainafa mifa faqa Anutuna faiqiara foora maridanoo.

### 3

*Yoothaneefa maasa Anutuna faiqi namuara qimaqoo ufafa.*

<sup>1</sup> Innee qafaaqa maasa qikoofa Anutufa firaqoo maasara amuqusifanoo rimarifa maridanoo. Maasara firaqoo amuqusifanoo maasara nari faiqi namu fee qidanoo. Maa maqa maaganasaaqarasa Anutunara sia irunnanara mina faiqi namu maasara faqa sia iridaqa. <sup>2</sup> Qini qifaaqasaa qigoondiuga, maqee maria aukunaa Anutuna faiqi namu maridaqa. Kasooqagee innaarunai mina faiqi namu maridaqa nana amigira ainaina fee moo faqa ootupamma qimiannoo fee maasa sia minara iridaqa sia akooqoo maridanoo. Moodaa ainaina kai maasa iridaqa. Asauku mundirafa innaarunaindari koorooinaqa maasa mifara foora mariana. Maasa mina nari uqanna raquramisee qafamasee minara nari fooqaanaikammiana. <sup>3</sup> Maqee maria kamuqoo asauku mundirana asammasee afeesara mariasa minara indee indee idaga nariqa mandoosana findaukaqa fidaqa.

<sup>4</sup> Moo fannoo aaqee marifa Anutuna ufa rukiaidanoo aaqaidanoo. Qaqaqarana oosana oosana fannoo Anutuna ufa rukiarafa maridanoo. <sup>5</sup> Asauku mundirafa sia fifau koorooinau, maasa aaqee marunnana mara aquaneera koorooinau, minaki sia aaqarafa maridanoo innee minara irimariafanoo. <sup>6</sup> Minara maasa asauku mundiranaki mariasa sia kaqi mandainainaki nidaqa. Yafa yafee kaqi mandainainaki nida fee mifa asauku mundiranara sia irifa sia uqanna minara irimarifa maridanoo.

<sup>7</sup> Qini faiqinamu nikaru qimari fasiqafa anireenoo inni ueeqaandoo qimasee maana inni qimannimidaqa ufariaqee qidaqa andeeqara qoo nimariasa andeeqarasa maridaqa asauku mundirana aanna rarausa andeeqarasa mariaqa. <sup>8</sup> Yafa yafee mandaikiraqoo kaqi nimarifa mifa Sadannainai maridanoo, Sadannafa nikaruqirafa maridanoo nikaruqianoo. Ooqai oosana arooqooqari mandainainaki nimarifa Sadannafa maridanoo Anutufa nari amaaku maa ainannara maa maqanasaa koorooinau, Sadannana mandainainirana arutaikaanifeera maa maqanasaa koorooinau.

<sup>9</sup> Yafa yafee Anutuna faiqi maridanoo fee sia mi fasiqafa mandaikiraqoo nidano. Anutuna oosana anoona uqanna minaki maridanoo, Anutufa mina akoofa marinara sia amana mandaikiraqoo fikorianoo. <sup>10</sup> Doo qinee maqee Anutuna faiqi namufaqa Sadannana faiqi namufaqa akooroomasee qimannimidaqa. Faiqi anaasee moo fannoo sia andeeqara qoo nimarifa sia Anutuna faiqi maridanoo, nari akaqaafasara faqa sia uriqarara ainainee qimaseenoo minara sia amuqusimarifa mifa sia Anutuna faiqi maridanoo.

*Yoothaneefa maasara nariara nariara nimuqusiaqee qimaqoo ufafa.*

<sup>11</sup> Ooqai indaaruu maa ufana innee irimarusa mariafanoo mi ufana oosana maaqimminoo maridanoo maasa nariara nariara uriqarara ainainee qimasee nimuqusiani. <sup>12</sup> Maasa sia Kaina aanna raa, mifa Sadannana faiqi maridanoo nari akaqa arinau. Kainafa nanaree nari akaqa arinoo fee inau. Nari auqoo ainaina mandaikufanoo, mina marirafa nirafa eendaandinoo marunara nari akaqa nirafa marirafa andeeqanoo marunara minasaara aanoomaseenoo arinau.

<sup>13</sup> Qini qikaqaafasaauga maa maqa maaqanakinaasa inniara fidiqaqaiifaqa samma innee minara tautiaqa. <sup>14</sup> Kaina oosana maraifaqa misa inniara fidiqaqammarifanoo. <sup>14</sup> Maasa kuqirana minniseega kaqi mariranaki ani maridaqa. Maasa nariara nariara andeeqasee qimuqusunnanara minara maasa kaqi mariranaki animaridaqee qidaqa. Yafa yafee nariara nariara sia andeeqasee amuqusinafa kaqi kuqiranaki maridanoo sia anikeeqaidano. <sup>15</sup> Yafee faiqi moo fannoo nari akaqaafasara fidiqaaqaa imarinafa mifa doo kuqa nari marifa maridanoo. Innee maana iridaqa faiqi kuqa nari mariasa sia naaru marirafa misaki maridanoo. <sup>16</sup> Maasa nariara nariara uriqarara ainainee qimasee nimuqusira oosana maaqimminoo maridanoo. Asauku mundirafa maasara amuqusidanoo nari marirana maasara aunirira saqarisaa quqasee kuqinau. Doo maasa faqa miqi kai iqa maasa qeeqa qikaqaafasaa Yisuna ufa irimariasa mina ufasaara kuqiranaki firariafaqa maasa misa rafaqafunnimaqasee kaqi mariaqee qimasee misa nimaqa maqasee kuqanaura. <sup>17</sup> Moo fannoo ainaina nari amanasaa maqeeifa nari akaqaafasaa sarauqiranaki marina qafamasee qimudaoo qimasee amiraree qimasee nari amuqusirana amuqusinanoo nari amuqusa muqufi rafaqafuseenoo sia dadaaqinoo,



naqimasee miqinna fasiqafa Anutunara qini qimuqusaki maridanoommifoo qiannoo fee. Sia amana maridanoo. <sup>18</sup> Qini faiqi namu, maasa nariara nariara uriqarara ainainee qimasee rirana sia afaurunnai kai qia. Asaukunna anoona ainaina kai narí ami narí ami iranannai kai mina anoona kooroo inoo kambiqaannoo.

*Yoothaneefa maasara Anutuna afusaa paasoosiaqee qimaqoo ufafa.*

<sup>19</sup> Maasa miqiannannanai kuqaa anoonasaa atooqa maridee qianaura. Maasa miqiannanara maaqoo nidaqa maridaqa Anutuna afusaa mirinni maridanoo maasa qifafainaqa paasoosiana. <sup>20</sup> Maasa aaqamasaanoo maasa qimuqusa darinanoo Anutufa qimuqusa uriqararafa maridanoo maasa aiqama ainainara irimarifa maasara amuqusinoo sia daruannoo. <sup>21</sup> Maasa qimuqusirafa sia darinaqa Anutuna afusaa paasoosammiana. <sup>22</sup> Paasoosidaqa maasa nana ainainaree sarau ianna ainainara innaaru qiananoo Anutufa maasa qimiannoo. Maasa mina ufara qimuqusanoo eedoo qimasee Anutuna aidimari oosana maraidaqa iranna ainainara qiananoo mifa qimiannoo. <sup>23</sup> Anutufa maa naakaparufana maasa qimaqiminu. Innee qini qimaaku Yisuna qini qisaku mundiranara inneeqa irirana minasaa nusisee quandaki narí mina ufamau fiqa nariara nariara uriqarara ainainee qimasee nimuqusiagee qinau. <sup>24</sup> Yau yausee Anutuna naakapara ufamau fimarinausa misa Anutunaki marifanoo kafa Anutufa misaki maridanoo. Anutufa narí maraquina nimiqoona minara Anutufa maasa daunduraki maridanoo fee qidaqa.

## 4

*Unna maraquina faqa kuqaa maraquina faqa rainaaninnanara qimaqoo ufafa.*

<sup>1</sup> Qini qifaaqasaa qiqoondiqa. Moomoosa náriara Anutuna maraquina maasaki marisee qimariana sia mina irisee aiqamausara kuqaammifoo qiaqa. Innee misa nimanamasee qafaaqa kuqaa Anutuna maraquina fee moona maraquina fee misaki maridanoo fee. Unna qimaria tamummaqarasa aiqamai daraanamiqa marianara qimannimidaqa. <sup>2</sup> Innee maaqimasee nimanamasee qafaaqa, kuqaa fee Anutuna maraquina misaki maridanoo fee. Ooqai maa maqa maaqafa sia maruqoo Anutufa innaarunai Yisunasaa asaku munduseenoo kasooqagee anee aiqama maqasaaqarasa asumu mareena fee qimaseenoo mina qimaminu. Doo maqee inniki moo fannoo maa akooqooqaraanara Yisunara mifammifoo qinafa mifa Anutuna maraquina faqaafa mariannoo. <sup>3</sup> Moo fannoo aqara ufa qinafa asaku mundiranara sia miqi marifa maqasaa fasiqa faiqi fee qinafa mi fasiqanaki sia Anutuna maraquina marifa maridanoo. Mi fasiqafa asaku mundiranana namuqaa maridanoo. Ooqai maasa mi fasiqanara aniannoo mifoo qifanaqa iriusa mariafanoo maqee doo kooroo mandee ani maridanoo.

<sup>4</sup> Qini faiqi namu innee Anutuna faiqi namu mariafanoo. Unna qira tamummaqara fasiqauqa innee misa urinaaqaramafi mariafa, inniki mari maraquina uriqaranoo maridanoo maa maqa maaqanakinasa maraquina Sadannaindi ureeqanoo maridanoo. <sup>5</sup> Misa maa maqa maaqanakinasa iriranamau ufa qimariafaqa maa maqa maaqanakinasa misa ufa iridaqa moodaa maqannaasa maridaqa. <sup>6</sup> Maasa Anutunaindi maridaqa Anutunara irimari fasiqafa maasa ufa iridanoo. Yau yausee sia Anutunaindi mariafa misa sia maasa ufa iridaqa. Doo maasa miqimandee anoona maraquina faqa unna qira maraquina faqa rainasee iridaqa.

*Maasa nariara nariara nimuqusirana anoona Anutufa maridanoo.*

<sup>7</sup> Oo qini qiqoondiqa, maasa andeeqasee nariara nariara uriqarara ainainee qimasee ruaqa. Nariara nariara nimuqusirafa Anutunasaaqari animari ainainafa maridanoo. Nariara nariara andeeqara amuqusimarifa Anutuna faiqi maridanoo minara irimarifa maridanoo. <sup>8</sup> Faiqi moo fannoo sia andeeqasee amuqusinafa sia Anutunara iridanoo. Nimuqusirana anoona uqanna Anutufa maridanoo. <sup>9</sup> Anutufa narí amuqusira oosana maasa uqaqifiqeenoo. Mifa narí amaaku moodaa faiqi maa maqa maaqanaki aiqamasoofoanoo maasara kaqi marirana mina Yisunannai maraaqee qimasee aiqoofoanoo quminu. <sup>10</sup> Andeeqara amuqusirana anoona maaqimminoo maridanoo. Sia maasa Anutunara uriqarara ainaina fee qimasee rimariqafana. Anutufa naaree maasara amuqusifanoo narí amaaku aiqeenoo minannai maasa mandainaina akiaqara darirree quna mina mara aqunifeera aiqoofoanoo quminu.

<sup>11</sup> Qini qifaaqasaa qiqoondiqa. Anutufa maasara miqimasee firaqoo amuqusunara maasa miqi kai iqa quandaki nariara nariara uriqarara ainainee qimasee qimuqusiani. <sup>12</sup> Sia moo fannoo Anutuna qafosaa maridaqa maasa nariara nariara riranannai Anutufa maasaki maridanoo mina amuqusirana anoona doo maasaki anoonaikinoo maridanoo. <sup>13</sup> Maasa maaqi qimaseeqa Anutunara kuqaa maasaki marifaqa maasa minaki maridee

qianauranoo. Mifa narí maraquna maasa qimunara maasa minaramma iriana. <sup>14</sup> Maasa maa ainanna qafeeqa aiqama qimannimidaqa maasa qikoofa narí amaaku aqiqeenoo maa maqa maaqanasaaqaraasa mandainainaki mariasa qumareeqee uqeer-  
aani fee qimasee aqiqanau. <sup>15</sup> Ya fasiqa anaasee fee maa maqanasaaqari Yisunara kuqaa Anutuna faiqi fee qinafa Anutufa minaki maridanoo mifa faqa nariki maridanoo. <sup>16</sup> Anutufa maasara amuqusirana maasa qeeqa minara iridaqa kuqaa fee qimasee minasaa mundidaqa. Anutufa nimuqusirana anoona marinara yafa yafee nariara nariara andeeqara amuqusiranaki marifa mifa Anutunaki faqa marifa maridanoo, kaifaa Anutufa minaki maridanoo. <sup>17</sup> Anutuna amuqusirafa sia fifau maasaki anoonaikidanoo. Anutuna ufa irira faasaana sia narí afusaa rufiaaqeera paasoosiaqeera mina amuqusirafa maasaki anoonaikidanoo. Maaqoo maria kamuqoo maasa marirafa Yisunaindi miqirafa maridanoo nariara nariara andeeqara nimuqusiranaki anoonaikinoo maridanoo. Nariara nariara andeeqara nimuqusira oosana sia maparaairafa minaki maridanoo. <sup>18</sup> Moonara rufiarafa sia kaqi kambiqaidanoo maasa manda ainaina akiqara daruandoo qimasaida rufiidaqa. Maasa maqasaa didimari fasiqanara sia rufiidaqa maasa didirafa rufiarana afaqasaifanoo didirafa kai maridanoo. Anutufa maasara amuqusimarifanoo maasara ridanoo. Maasa Anutunara rufiidaqa Anutufa maasara rimarina sia iridaqara miqidaqa, Anutufa maasa dari marifaqara foora minara rufiidaqa.

<sup>19</sup> Anutufa indaaru maasara amuqusunara maasa minara irisee kuqaa fee qimasee quandaki Anutunara faqa nariara nariara faqa uriqarara ainainee qimasee ridaqa nimuqusidaqa. <sup>20</sup> Moo fannoo qinee Anutunara uriqarara ainainara rida fee qimasee quandaki narí akaqaafasaara fidiqaa inafa unna qirafa maridanoo. Mifa narí afu qafee marina narí akaqaafasaa ririmma sia amuqusidanoo minau Anutuna sia qafee marina naqimandee fifau amuqusiraree sia amana. <sup>21</sup> Doo minara qinee qidaqa. Asauku mundirafa maa naakaparufana maasa qimaqimiqoona inni qimannimidaqa. Ya fasiqa anaasee fee Anutunara uriqarara ainainee qimasee rinafa mifa quandakinoo narí akaqaafasara uriqarara ainainee qimasee faqa ruannoo.

## 5

*Maa maqa maaqanasaaqaraa mandainaina uriqarara ufa.*

<sup>1</sup> Yafa yafee Yisunara Anutuna asauku mundira fee qinafa mifa Anutuna faiqi mari-  
annoo. Moo fannoo akoonara rinafa mifa mi fasiqana faiqiara faqa ruannoo. <sup>2</sup> Maasa maaqiannanara Anutuna faiqi namuara ridaqee qiana. Anutunara nimuqusinaqa mina ufamau andeeqasee fuannanara Anutuna faiqi namuara ridaqee qiana. <sup>3</sup> Maasa Anutunara ruannana anoona maaqimminoo maridanoo. Mifa naakapainna ufara eedoo qimasee asaukunnai qumaraannanara doo mifa anoona maridanoo. Anutuna naakapara ufa sia firaa qumaara tia maridanoo aufadaidanoo. <sup>4</sup> Maasa Anutuna faiqi namu maa maqa maaqanasaaqaraa mandainaina amana maasa mina uraaqaraana. Maa ainainannai maasa maa maqa maaqanasaaqaraa mandainaina uraaqaraidaqa, Yisuna saqarikiranannai uraaqaraidaqa. <sup>5</sup> Yafasiqa anaasee fee maa maqa maaqanakinaa mandainaina uraaqaraannoo fee. Akoqooqaraana Yisunara Anutuna amaaku fee qinafa mifa maa maqanasaaqaraa mandainaina uraaqaranoo mariannoo.

*Yisunara Anutufa mina amaaku marunara kooroo ufa.*

<sup>6</sup> Maa Yisufa asauku mundirafa narí anoona aranandakiqari fidika nammarisaqari kambiganau sia nammari kaifau nammari namufaqa fidika namufaqa pirirafa kambiqanau. <sup>7</sup> Anutuna maraquina fannoo kuqaa anoona ufa imarufa maridanoo mina kooroinau. <sup>8</sup> Qaaramoo ainaina kooroo imarifa maridanoo. Mi qaaramoo namufa moodaa ainainara kai qidaqa, mi namusa maraquna faqa nammari faqa fidika faqa maridaqa. <sup>9</sup> Maaqoo kootaki ufa qimariasa ufa iridaqa kuqaa fee qidaqa. Faiqi ufa maridanoo Anutuna ufa fannoo faiqi ufa uriqaranoo marinara mifa akoqooqaraana Yisunara qini qimaaku uqannee qimaqoofa marinara maasa minara kuqaa anoonee qimasee iriana. <sup>10</sup> Yafa yafee Yisunara Anutuna amaaku fee qinafa narí aundurakinaafa faqa dadaaqinanoo kuqaa anoonee qiannoo. Yafa yafee Yisunara sia Anutuna faiqi fee qinafa mifa Anutunara unna qimari fasiqafee qidanoo Anutufa narí amaakuara qu ufanara unna fee qidanoo miqi qidanoo. <sup>11</sup> Anutufa narí amaakuara qu ufafa maaqimminoo maridanoo Anutufa naaru naaru kuqaa marirana maasa qiminu, mi marirafa maasaindi mina amaakuki marifa maridanoo. <sup>12</sup> Yafa yafee Anutuna amaaku qumarainafa doo mifa mi marirana namufaqa qumareenoo. Yau yausee sia Anutuna amaaku qumarainausa sia mi marirana faqa qumaraidaqa.

*Sarau inna ainaina Anutuna innaaru qinanoo amiannoo.*

<sup>13</sup> Innee Anutuna amaakuara irirana rusimariasa innee doo naaru marirana doo maree fee qiaqeera maa ufana akara rumannimaqaidaqa. <sup>14</sup> Maasa Anutuna iriranasaa maaqoo moo ainainara innaaru qiananoo kuqaa maasa qimiannoo maasa iridaqa, miqiannanara maasa Anutuna afusaa sia rufiidaqa paasoosamasee innaaru qidaqa. <sup>15</sup> Maasa Anutunara moo ainainara innaaru qiananoo mifa iriannoo. Maasa minara iridaqa iraanna ainainna kuqaa qimiannoo fee qidaqa.

<sup>16</sup> Faiqi moo fannoo moo mandoosana mareemarina sia andeeqasee kuqiranaki fimaria mandoosana marasainanoo mina akaqaafasaa fannoo qafamaseenoo Anutunara innaaru qiananoo mina mandainaina ateeka rukaiseenoo narí marirana amiannoo. Qinee kuqiranaki sia andeeqasee fimaria mandoosannara qidaqa. Andeeqasee kuqiranaki fimaria mandoosana maridanoo moo fannoo mi mandoosanna marinaqa innee sia minara innaaru qiaqa. <sup>17</sup> Aiqama aaqarafa mandoosana maridanoo akaqausa moo mandoosana sia kuqiranaki fimariafa maridanoo.

<sup>18</sup> Maasa maana iridaqa sia Anutuna faiqi namu mandoosana maqee maqee maraqa fidaqa. Anutuna amaaku ititasaifanoo manda fasiqa fannoo sia amana mina mandaikamamaqaannoo.

<sup>19</sup> Maasa maana iridaqa maasa Anutuna ainaina maridaqa. Maa maqa maaqanaki mariasa aiqama manda fasiqa aakaqakinaa fasiqa aramandunnai maridaqa. <sup>20</sup> Maasa maanara iridaqa asauku mundirafa Anutuna amaaku uqanna maasa Anutunara iri-aqeera mina irirana qiminau. Doo maqee maasa Anutuna amaaku asauku mundirana Yisunaki marianara moodaanaki kuqaa anoona Anutunaki maridee qidaqa. Miqiqa maasa anoona Anutunaki faqa anoona asumu mariranaki faqa maridaqee qidaqa.

<sup>21</sup> Qini faiqi namu unna qira Anutufara fooqaa qira ainainara nianasaa rufiaaqa, kuqaa Anutuna inni nimuqusakinaana mara amaaramaseenoo mina amaaqa maqaandoora minara rufiaaqa.

## 2 YOOHANEE

### Yoohaneefa qambaana akara rumannimaqoo ufafa.

<sup>1-2</sup> Oo maa anaasee aneenna faiqi namufaqa qinee faiqi firaasa akara rumanni-maqaidaqa. Qinee faqa Yisuna anoona ufa irimariasa saimbaqa ani aninna faiqi namuara faqa uriqarara ainainee qimasee qimuqusifaqa ridaqa Anutuna kuqaa anoona ufa maqee maasa daundurui maridanoo naaru naaru marianinafa marifaqa minara maasa aniara uriqarara ainainee qimasee qimuqusidanoo.

<sup>3</sup> Maasa qikoofa Anutufa mina amaaku asauku mundirafa Yisufa faqa nari amuqusiranakiqari nari afaarirana faqa nari nifuarana faqa nari asoorarana faqa innisaimbaqa qimiannoo.

*Anoofufara faqa nariara nariara nimuqusirana qimaqoo ufafa.*

<sup>4</sup> Oo maa anaasee ani faiqi namu akaqausa Anutuna naakaparufamau fimariafaqa qinee minara irunanoo qifaqaqaa asacidanoo. <sup>5</sup> Minara qinee ani afeekaikamasee qimamidaqa maasa aiqamausa Yisuna ufa irisee nariara nariara uriqarara ainainee qimasee nimuqusiramau kai fuaqa. Doo mi ufana ani qimamidaqa sia fuka aakaparufau, oogai oosana irimarunnufana ani qimamidaqa. <sup>6</sup> Mi nimuqusirana qinee qunandee mina oosana maaqimminoo maridanoo. Maasa aiqamausa Anutuna naakapara iriramau fuaqee qinau. Mi naakaparufafa oogai oosanaindari irimariafa maaqi qidanoo, innee aiqamausa nariara nariara uriqarara ainainee qimasee nimuqusiranaki mariaqa.

<sup>7</sup> Moomoo nikaru qimariasa ueeqee mariasa maaqanna maaqanna daraaniqa maridaqa. Misa Yisunara asauku mundiranara sia faiqi faiqi kambiqanau foo qidaqa. Miqi maria fasiqausa ueeqee mariasa maridaqa asauku mundirana namuqaa kammidaqa. <sup>8</sup> Innee inneeqa nifaaqasaa rakisiaqa. Maasa ufa oogai anoonaikimarifa sia maqee inniki taikaannoo aneenna maaqoo ainainirana akiaqara naaru innaarunai oorufinana amiqimasee maraanneera qimamidaqa.

<sup>9</sup> Faiqi moo fannoo asauku mundirana ufamau sia fimarifa fiaikatee fimarifa mifa sia Anutuna faiqi mariannoo. Asauku mundirana ufamau kai fimarianafa sia asauku mundirafa kai minaki maridanoo, mina akoofa faqa minaki maridanoo. <sup>10</sup> Oo maa anaasee faiqi moo fannoo maa qinee qunufana sia qimarinafa anirainana sia aneenna maaqaki mara quqaa. Sia minara amiqi amiqia. <sup>11</sup> Anee miqimarinna fasiqana amiqi amiqirufa qinana doo mina mandoosana dadaaqidana miqimariananoo.

*Akara taikarufa qimaqoofa.*

<sup>12</sup> Qinee ufa oosana oosana ani qimamiraree qimaseeqa sia papiqasaa rirana amana marifaqa. Ani maqusai kasooqaaqee firara iridaqa. Minni oonureeqa dooqi qari ani qimamiseeqa nari qimami nari qimamimasee asafaranoo. <sup>13</sup> Ani auna faiqi namu mai mariasa maa qini pasaki inni nimandaqaa.

### 3 YOOHANEE

#### Yoothaneefa inaaqianna akara rumannimaqoo ufa.

<sup>1</sup> Oo Kaiusafa anindiri Yisuna anoona ufa qimarianaki marunannara qinee faiqi firaasa aniara qimuqusimarifaqa maa akarana ani amaqaيداqa.

<sup>2</sup> Qini qifaqasaa qiigoondi. Ani maraquna amiqiranaki doo maridanoo, ani afaaqa faqa aurirana dinee sia marianifeera aneenna aiqama ainaina faqa mina amana kai amiqiranaki marianifeera Anutunara innaaru qidaqa. <sup>3</sup> Oo Kaiusafa ani akaqaafasaa mai anireeqa aniara Yisuna anoona ufamau maqee maqee fimarianaqa qimaqimiyaafaqa mina iriseeqa asaidaqa. Kuqaa anoona maree mariannanara ani oosana koorooifaqa qinee qafeeqa. <sup>4</sup> Qini faiqi namukammafi mariasa kuqaa anoona aatata fimarianara minara kai irisee firaasasirana qimidaqa. Sia moo ainaina mi asasirana amana kai maridanoo.

*Yoothaneefa Kaiusana oosanara amooqu ufa.*

<sup>5</sup> Oo Kaiusafa qini qiigoondi, Yisuna ufa maqusa maqusa qimannimiqanuusa ani maqusaai oonuraafana oosana oosana dadaaqirana amiqimasaida nimimariananoo. Anee sia moo maqannaa fee qimasee minnisaanafa mariananoo. <sup>6</sup> Anee dadaaqimarianausa misa ani aufakiana qimaqimiyaafa iridaqa. Misa aniara maasa maaqooqaraasa amaana maaqaki keeqee mariasa nifusaa anee misara amuqusi mariannanara kooroo ida qiafaqa iridaqa. Anutufa afaarimarifa maridanoo anee faqa mina aanna reenana mi fasiqausa dadaaqinana anee Anutuna ainainira faiqi amana kai maria. <sup>7</sup> Yisuna ufa qimannimiqanuusa innee sia misa niqafaosa moo maqannaa mariafanoo sia aamina maqannaa maqusa maqusa fidaqa misa munnimmaina marasaida naqa fimariqau. Yisuna augusaa mina ufa kai maree fimariqau, misa maasa Yisuna ufa irimariasa faiqara maaqaina kai maraseeqa Anutuna ainainirausaika mafiqa nidaqa misaikana maraidaqa. <sup>8</sup> Maasa Yisuna ufa irimarunusa misa kadaapiriranara iriseeqa misa miqimasee anoona ufa saikimariasa moodaanaki dadaaqiqa maasa saika faqee qimasee maraaqera ani qimamidaqa.

*Yoothaneefa Diootarefeesana mandoosanara qimaqoo ufa.*

<sup>9-10</sup> Qinee qusa akara riqa inni miqooqaraasa amaana maqaki keeqee mariasa nimaqeer. Nimaqaunanoo Diootarefeesafa nari kai nariara uriqararausee qimarifa qini akarakinaa ufa sia irimarifa, kasooqaqee inniki qinee oonureeqa mina oosana inniki marina unna ufa mandufa maasara qimarina unnufa oosana oosana qimarina kooroo ianara. Mifa sia minara kai idanoo Yisuna ufa qimannimiqanuusa miqoo oonuraafanoo sia misa dadaaqidanoo misa ititannimaqaidanoo. Miqooqaraasa amaana maqaki keeqee mariasa quandaki misa dadaaqirree qiafanoo misara faqa quqasee doo fuaqee qidanoo.

<sup>11</sup> Oo Kaiusa qini qifaqasaa qiigoondi, anee manda ainaina qafamasee sia mina ammeemmeerii amiqira oosana qafamaseenana mina ammeemmeerina mina aanna rainanoo amana marianno. Andeeqara oosana maree mariasa misa Anutunaindi maridaqa. Mandainaina maree mariasa misa sia Anutunara irimariasa maridaqa.

<sup>12</sup> Inniki faiqi moo marifa mina auqu Deemeetariusafa minara aiqamausa kuqaa andeeqara fasiqa fee qidaqa. Anoona ufa faqa mi fasiqanara andeeqara fasiqa fee qidanoo. Maasa kuqaa anoona ufa kai qimaruna innee irimariasa mariafanoo sia mi fasiqanara unna qidaqa. Maasa minara amiqira fasiqa fee qidaqa.

*Akara atinni mafi taikarufa.*

<sup>13</sup> Qinee moomoo ufa ani qimamiani qimaseeqa sia amana papiqasaa akara riqa. <sup>14</sup> Kaqikaqoo anee ianannai qinee firaree qidaqa. Oonureeqa amiqimmandee nari qimami nari qimami qianauranoo.

<sup>15</sup> Yisuna asooarafa anifaqa mariani. Ani aqoondiuqa maaqoo qaraasa aiqamausa ani amandaidaqa. Maasa qiigoondiuqa miqoo mariasa nuqu ramasee qimannimia. Maasa misa nimandaidaqa.

## YUDEESA Yudeesafa akara rumaqoo ufa.

<sup>1</sup> Qinee Yudeesa maa pasana akara ridaqa. Qinee Yisuna ainainira faiqi Yameesana akaqa maridaqa. Qinee qeeqa qifasaanara Anutuna asauku mundirana Yisuna eedoo qimasee rumbara faiqiara foora ainaini marunna faiqisa maridaqa akara ridaqa.

<sup>2</sup> Anutufa naaramasee qinee unnannai aniaqee qufaqa eedoo qimariasa inni akara rumannimaqaidaqa. Innee Yisuna asauku mundirana mandaqee mariasa maa pasana akara rumannimaqaidaqa. Innee maasa qikoona Anutuna amuqusiranaki mariasa inni akara rumannimaqaidaqa. Anutuna nifauarafa faqa aundurakinaa asoarana faqa firaqoo inniara amuqusirana faqa firaqoo inni naunduraki maridanoo irairaaiani.

*Unna amaanufa qimannimariasara qimaqoo ufa.*

<sup>3</sup> Oo qini qifaaqasaa qiqoondiuga. Anutufa maasa innaaruna asumu marirana moodaa qimiqaifaqa minaki quqaqisainara akara ruani qimaseeqa minniseeqa moo ufa akara ruanaura. Anutufa moodaa kari nimu ufana maasa qimuna mi ufana rakira ufara foora afeekaikamasee uqeera aindusuaqa minara inni afeekaikamandee akara rumanimaqaidaqa. <sup>4</sup> Faiqi akaqausa Anutunara sia fee qimariasa qumee inniki keeqaifiqa dapikiidaqa. Misa Anutuna afaariranara kaqi nimiranara faqa iriseeqa quandakiqa mi ufana eendaandi iseeqa minannai faiqi aanaaseeki nari ummuari nari ummuari mariana faqa oosana oosana mandainaina faqa unna qimasee Yisunufa fee qimasaidaga uqeerasee. Misa maasa asauku mundirana Yisunara maasa uriqararana maasa karaambaigara qaoo qidaqa rukiidaqa. Ooqai tamummaqara fasiqauqa akarakinaa ufa misa firaq mandainaina akiaqa arirana aqufuaqee qufaqa doo maqee aqufidaqa.

<sup>5</sup> Inni moo ainainara naaqoo auqaidaqa. Ooqai Anutufa Isaraee maqanna Isipa maqusa sandaraana rafiamareenoo aadana maqa maqaqaki quqanau. Quqasoofaqa akaqausa quandaki Anutuna ufa rukiasee kaqirunna ubeekaqau. Miqiuqanoo Anutufa sia nifauanau kaqi narinau. <sup>6</sup> Innee Anutuna qangirooqara faqa sia fee iridee. Ooqai misa firaq uriqaranaki marufaqa mina minnisee nari qimaqoomau akaqausa fufanoo Anutufa sia nifauanau kaqi qumaraseenoo sainandannai rumbbeegeenoo naaru rumbaranaki maqa ameemaanai asukunaki quqaqifaqa maridaqa muanni Anutuna ufa irira faasaanara afeesida maridaqa. Mi faasaannasaa narira ufa qimannimiannoo minara afeesidaqa. <sup>7</sup> Innee Soodooma maqusa faqa Koomoora maqusa faqa misaqa maru maqusanaasa faqa innee iridee. Misa manda qangiroo naanna reeqa nari qimaqoomau fiqa faiqi anaasee nari ummuari nari ummuari iqa faiqi nari aqoonna fasiqa ummuariqa oosana oosana mandainaina faqa maroofanoo Anutufa aiqamausa mi oosanna qafeeqa rufiaqee qimasee naaru marira idaki misa quqanau.

<sup>8</sup> Miqikai masee maa maqee inniki mandoosana uqeeree mariasa ooqeenasaa naanna raidaqa. Maqee inniki mariasa qainamaseeqa Anutuna ufammifoo qimasee mi mau fiqa aqaqamaki nariqa naridaqa. Misa Anutuna aanoora sia rufidaqa mina ufa rukiaseeqa nari qimaqaa aatata fidaqa. Mi mandoosanna maree mariasa innaarunai amiqirausa marianara mandufa qimannimaqaidaqa. <sup>9</sup> Anutuna amiqira qangirooqara ririmma ooqai Mooseefa kuqufufanoo Sadannafa mina iri qumaraanee qufanoo amiqira qangirooqakigari uriqararafa moo fannoo mina auqu Mikaraafa mifa Sadanna faqa ufa rainanau. Ufa rainaidanoo sia inniki ani mariasa naanna ranau. Sia aqira ufa mandufa Sadannara qinau. Anutuna ufara iriseenoo kaqi maqi qimasee reendeenamasee qimaminau. Oo Sadanna Anutufa aniaara qaoo qidanoo. <sup>10</sup> Maa inniki mandoosana uqeeree mariasa sia amiqira qangiroo aanna raidaqa niranagarufa oonumafi irisee kaqi qidaqa. Nari sia qafee maria ainainnara qimasaidaga niqidaqa. Misa kaasau aandau aanna raidaqa. Misa nari irirana irisee aandau oosanamau fidaqa. Mi mau fimariafanoo nari mandoosana fannoo nari naridanoo. <sup>11</sup> Misa narirafa firaqoo mariannoo. Minara irifanoo naaqqaaani. Misa Kaina aatata fidaqa. Kainafa Anutuna ufa rukiye marufa maridanoo nari akaqa arinau. Misa kafa Baraamana manda aatata fidaqa minaki keeqararee qimaseeqa nari rarisee nari rarisee mamaree fidaqa. Baraamafa munnimmaru rumammareenoo unna qimasee Isaraee maqannaasa rarisameeqee mandainainaki quqee marinau. Misa moo fasiqa ooqeenaa fasiqa Kooraana aanna raidee qimasee Mooseenasaaqari rakeemaku aadumarunna nariara moo karaambaigee qimasee fufanoo Anutufa mina faqa mina aiku asauku mina faqa fusa faqa narinau. Maa inniki mandoosana uqeeree mariasa nariqa kai nari narirana mareeqee Anutuna nariranaki quqaseeqa minaki maridaqa. <sup>12</sup> Innee Anutunara qoomaqa sakasee naidaqa neemariifaqa mee inniki mandoosana uqeeree

mariasa nári mandainaina namufaqa anireeqa sia moosara oonumafi iridaqa nifaafa quqaseeqa kaqi náriaraa kai firaqoo narana naidaqa.

Misa ufidaina aukuaana aandaroo aukuaana oonamuara foora aniraifaqa oo aaku asoosara ainaina aniannoommifoo qimariafanoo kaqi aiqareenoo fifanoo ufai fannoo misa mareeqeenoo aqidanoo aaku sia marisa maridaqa, sia andeedqara oosana uqaqifiqeenoo aupurarana kai uqaqifiqeenoo. Mi fasiqausa sia qaqamma irai saqari fara foora maridaqa, irai aukuaana oosana rarakusee qafaafanoo aadana kai maridanoo sia nammari nammariidanoo. <sup>13</sup> Mi fasiqausa mandainaina fannoo nammari qaqaarara foora nári mandainaina akoqooq mandinoo marifaqa sia nisauridaqa eekara arinoo akoqooq maridanoo. Misa mee sandee mari fasauna aanna raidaqa, sandammaree asukunaki munu qimbaidaqa. Anutufa mi fasiqausa maqa maaqa miqi kai masee firaasukunaki meemai afeedama nimaqaifanoo maridanoo.

<sup>14-15</sup> Ooqai Eenookafa mi manda fasiqausara tamummaqaseenoo akara rumaqoofa maridaqa. Adanasaqari moodaannai qisauku oosana taikafufanoo dinni ani moodaa mareenoo qaaraikinoo Eenookafa kambiqaanau. Mi Eenookafa maaqi qimasee tamummaqaseenoo akara rinau. Innee iriaqa Anutufa nári naaquqara andeedqara qangirooqqa moomoosa faqa qumureenoo aiqama maqasaa qaraasa suqusee ufa nimiannoo, mandoosana maree mariasa Anutunara sia irimariasas misa Anutuna ufa rukiasee mandainaina oosana oosana maree marianara Anutufa faqa nári qangirooqqa faqa narirara qumuannoo. Mi manda fasiqausa Anutunara mandufa oosana oosana qiranara Anutufa narirara qumuannoo. Doo Eenookana tamummaqara ufa miqiminoo maridanoo. Eenookafa misara miqi qimasooqqa qinee maa inniki mandoosana uqereee mariasara mi mau fimariafaqa maaqi qidaqa. <sup>16</sup> Mi fasiqausa maqee maqee aiqama ainainara naundaufa naundaufa qida maridaqa. Misa aiqama ainainara amiqira ainainara faqa sia maasa didifaqa mandainaina fee kai qidaqa. Misa nári mandoosanara nidirana aandi aususeeqa nariqa mi mau fidaqa. Misa firaqoo nariara nariara nimooqimariasas maridaqa. Misa nári mandoosanara nidirannai ubeekarara faiqi akaqausa marasee nimooqaidaqa amiqi amiqidaqa misa maasa mandoosanamau fidaqa maasa duqu uqereefaree qidaqa miqidaqa.

*Aaquqimannimaqarufa faqa naakaparufa faqa qimaqoo ufafa.*

<sup>17</sup> Oo qini qiqoondiqa karaambaifa Yisufa asauku mundirana mina faiqi namu ufa qimannimiqoona sia aunuaqa. <sup>18</sup> Misa maaqi qimasee inni qimannimiqau. Taikara aukuaana anirainafa faiqi moomoo kooroomaifiqa nári mandoosanara nidiramau fidaqa inniara naanaidara qifaranoo. <sup>19</sup> Mi fasiqausa faiqi qambaana anireeqa rainee mariasa. Miqi mariasa sia Anutuna maraquna naakirausa maridaqa nariqa faiqi nidiramau kai fimariasas maridaqa. <sup>20</sup> Innee qini qiqoondiqa sia miqimariasas mariafanoo. Innee Yisuna naaquqara ufaki mariasas mariafanoo maaqara foora auqiqqa fifi inafa minaki afeekaikiqqa. Innee Anutuna naaquqara maraqunannai maqee maqee innaaru qiaqa. <sup>21</sup> Maasa karaambaifa Yisufa asauku mundirafa nári nifauarana firaanakiqari maasa sia daruannoo naaru naaru marirana maasa qimiannoo. Innee Yisuna qumiranara afeesidaqa Anutufa inniara nidimarinaki minaki kai mariaqa sia moosaa finana kuridia.

<sup>22-23</sup> Inniki faiqi akaqausa Yisuna mandaaqaranara marammara ridaqa qaara irirana maree mariasa, sia innee miqimariasas aanoomannimaqaaqa nifauamasaiqafa mariaqa. Naaru marira idakinaana Yisuna ufannai kari qinaqa qumareeqee Anutuna afeeka ququsaki quqaaqa. Akaqausa mandoosana maree mariasa faqa nifauarana faqa rufiara ufa faqa qimannimisee qumareeqee Anutuna ququsaki quqaaqa. Innee miqi marifaqa misa mandoosana qafamasee sia minara ruaqa innee faqa minaki fifaara. Misa mandoosana ikairiara rufiasee fidaqaa iaqa.

*Anutunara kai asasiaqee ufa qimaqoofa.*

<sup>24</sup> Anutufa innee mandainainaki aqufirarifanoo mifa amana inni ititannisainafa sia aquffaranoo. Mifa amana inni mareeqeenoo amiqimmandee ninukamasee asasirana inni nimisee nári afaafa areenaranaki naroorisaa amana quqaaninafa. <sup>25</sup> Moodaa Anutufa maasa asumu maree marifa. Maasa karaambaifa Yisufa ani asauku mundirafa minannai maasa amooqirana qimamidaqa afaafa areenarana faqa uriqararana faqa afeeka faqa aiqamausa aniara naaquqarana faqa anindi maridanoo fee qidaqa amooqidaqa. Ooqai indaaruu anindi marinuu maqee anindi maridanoo naaru naaru anindi mariani. Kuqaa.

## UQAFIQOO UFABA

### Naaru kambigaaninnainaina Yoohaneena uqafiqoo ufafa.

<sup>1</sup> Dauni kambigaaninna ainainara Anutufa nari asauku mundirana Yisuna akooroom-mamufanoo mifa quandakinoo nari faiqi namu qimannimianifeera Yoohaneena kooroomma aminau. Asauku mundirafa maa ainainausara nari qangiroo aqigoofanoo qumureenoo Yisuna ainainira faiqi Yoohaneena kooroomma aminau. <sup>2</sup> Yoohaneefa aiqama ainaina qafeemaruna faqa irimaruna faqa qangiroo fannoo qimamuna aiqama maa papiqanaki kooroo inau. Maa ufana Yisufa asauku mundirafa nari akoona Anutuna anoona ufa Yoohaneena qimamufanoo akara rumaqoo ufafa maa akarafa maridanoo. <sup>3</sup> Faiqi moo fannoo maa akarana asaana rinafa asasiannoo. Maa tamummaqara ufana irisee eedoo qinausa misa asasifaranoo. Maa ufanakinaa ainaina koorooinausa qusasaa kambiqainara maa ufana asaana rimariasa faqa eedoo qimariasa faqa asasifaranoo.

*Qisauku dinni taikasee dinni ani qaara marasee maqusakinaasa amaana maqaki keeqee mariasa misa Yoohaneefa nimandoo ufafa.*

<sup>4</sup> Asia maqa maaqaki mariasa amaana maqa qisauku dinni taikasee dinni ani qaara mararanaki keeqee mariasa qinee Yoohaneesa akara rumannimaqaidafa.

Anutufa ooqai marufa maqee faqa kaqi marifa kasoogaqee naaru faqa marianinafa nari afaarirana faqa nari asoosana faqa inni nimidanoo. Anutuna ufa irira qaari oorinni Anutuna maraquina namu qisauku dinni taikasee dinni qaara marasee mariasa miqi kai mandee Anutuna afaarirana faqa asoosana faqa inni nimidaqa. <sup>5-6</sup> Yisufa asauku mundirafa andeeqasee kooroo imarifa Anutuna ooqa faiqi kuqiranakiqari findifufa maa maqa maaqanakinaasa karaambaiqauqa uriqararafa marifa mifa faqa nari afaarirana faqa asoosana faqa inni nimidanoo. Mifa maasara amuqusammidanoo. Mifa nari kuqiranannai maasa mandainainakinaana idukunniseenoo maasa qumareeqeenoo nari akoona Anutuna aanaiqikirausa mariaqee qimaseenoo quqaqisaifaqa maridaqa. Anutuna asauku mundirana Yisuna afaaqa areenarana faqa afeeka faqa firaqoo minaindi marianifeera.

<sup>7</sup> Qafaqa, mifa Yisufa asuruki qumidanoo. Mina faaqaana raquramusa misa faqa kuqiranakiqari findifi qafeefaranoo. Maa maqa maaqanakinaa maqusa maqusa mariasa aiqama minara ikiraqeeqa soofaarifaranoo. Doo kuqaa uqanna miqifaranoo. <sup>8</sup> Anutufa uriqararafa karaambaiqa ooqai marufa maqee faqa kaqi marifa naaru faqa kaqi marianinafa nariara maqi qidanoo. Qinee oosana aroo aukuna mariafanusa naaru taikara aukuna faqa kaqi marianausa maridaqa.

*Yoohaneena afu pisipisamandoofanoo asauku mundirana Yisuna qafanau.*

<sup>9</sup> Yoohaneefa nari qafoo ainainna maaqi qimasee akara rinau. Qinee Yoohaneesa inni nifasausa nauraiqi maridaqa. Qinee innisaimbaqa Yisuna anoonufa qimannimunaqa nari unna Anutufa marifaqa kuqaa qira Anutunara nikoogaifaqa aupurarana faqa narirana faqa innisaimbaqa qimimariafaqa maridaqa. Qinee faqa inne faqa Yisuna ququsaki marunusa maridaqa, maasa mina teeroo quqaranaki maridaqa sia minara aupureeqa mina minniseeqa kaqi minaki doori runusee maraqa fidaqa, qinee Yoohaneesa Anutuna ufa faqa Yisuna koorooira anoonufa faqa qimannimiafannanara Roomma maqannaasa qini karabusa rumberanaki qisoofaqa maridaqa. Ooruku nam-mari qambaana Patamoosa afumaki Roomma maqanna karabusaki mariafanoo Yisufa oosana oosana ainaina kambigaaninnanara qimaqiminau. <sup>10</sup> Karaambaiqa qimaqoo faasaana karabusaki mariafanoo amaanasaa Anutuna maraquina fannoo daakufufanoo inaaqianaindari fira ufireena miqirafa faiqiara foora ufa qinuu. <sup>11</sup> Mi ufafa maaqi qimasee qimaqiminuu. Yoohanees maqee uqafiqaanu ainaina anee papiqaki akara rumasee dinni qisauku taikasee dinni ani qaara marasee maqusanaasa nari amaana maqakiaqa keeqee mariasa akara rumannimaqaa. Efeesusa maqusa amaana maqaki keeqee mariasa faqa Samirana maqusa amaana maqaki keeqee mariasa faqa Peerakamumma maqusa amaana maqaki keeqee mariasa faqa Tiatira maqusa amaana maqaki keeqee mariasa faqa Firadeerafa maqusa amaana maqaki keeqee mariasa faqa Raoodiseea maqusa amaana maqaki keeqee mariasa faqa miqimasee amaana maqanamuara akara rumannimia.

<sup>12</sup> Mi ufana qimaqimisoofaqa qinee yafee inaaqiannaindari qimaqimidanoo fee qimasee quandaki qafaafanoo rambi kuradee mari ainainausa qisauku dinni taikasee dinni ani qaara marasee marufanoo rambi aiqamasaa marida qeemarinuu. <sup>13</sup> Mi rambisa qambainai faiqiara foora kikiqinoo marufaqa qinee qafaqiafana. Mi fasiqana



gamunna kisaaga karaambaigai gamunna maqasaa qumumarufaqa qafaqiafana kooora auqira raitanda karaambaigaindi mina aradauqanna rumbanoo marinau. <sup>14</sup> Mina akiqa asausi qafeeqa eekara asausiara foora kaaqa eekara arinoo marinau. Mina afu fannoo idauru miqirafa qeemarinau. <sup>15</sup> Mina aiku fannoo anukara barasara foora tandi tandi-marinau. Mina ufa fannoo oondainni nammariara foora aiganaiqana imarinau. <sup>16</sup> Mina asaukuqannai asaukuki qisauku dinni taikasee dinni ani qaara marasee fasaunamu uaqee inau. Mina ookiqari qaseema miqirafa raiqarafa afaidarafa animarinau. Mina oori afiri suani qambaana ururee firaqoo qaindee imarinau.

<sup>17</sup> Qinee mina qafamasee kaaqa rufiasee mina aramandunnai maqasaa aqufufiqa kuqiyara foora iqa mariafananoo nari asauku uqannai qinisaa munduseenoo qimaqiminoo qinuu. Oo maa fasiqa sia rufiiaa. Qinee indaarufaasa faqa inaaqianaasa faqa maridaqa. <sup>18</sup> Qinee oogai kaqi mariafanausa maridaqa, qinee kuquafanausa maridaqa doo qiqafa kaqi marunauusa maridaqa naaru naaru marianausa. Qinee kuqiranara rakisirausa uriqararauusa maridaqa mina kooqi kiqa uaqeeiunauusa maridaqa kuqiranaki mariasa mandoosana mareeusa misa mariaqoo faqa uriqararauusa maridaqa mina kooqi kiqa faqa uaqeeidaqa. <sup>19</sup> Yoohanee anee qafa qafeemarianna ainainna irimarianna ainainna aiqama papigaki akara rua. Maqee qafeemarianna ainainna faqa kasooqaqee kambiqaaninna ainainna faqa akara rua. <sup>20</sup> Qini qisauku uqannai qisaukukinaa fasau qisauku dinni taikasee dinni ani qaaraqanda marasee fasau mina kukeeqarana oosana maaqimminoo maridanoo. Qisauku dinni taikasee dinni ani qaaraqanda marasee amaana maqasaa rakisimaria Paatoosa fasau maridaqa. Qisauku dinni taikasee dinni ani qaara marasee rambi kuradee maria ainainna mina kukeeqarana oosana maaqimminoo maridanoo. Maqusa maqusa amaana maqa mifa maridanoo. Qisauku dinni taikasee dinni ani qaaraqanda marasee amaana maqara qidaqa.

## 2

*Efeesusa maqusanaasara ufa Yisufa Yoohaneenasaa qimaqoo ufafa maridanoo.*

<sup>1</sup> Yoohanee anee Efeesusa amaana maqasaa rakisimari paatoona maaqi qimasee akara rumasee qimamia.

<sup>2</sup> Oo Efeesusa maqanna Paatoo dinni taikasee dinni ani qaara marasee fasau nari asaukuki uqirafa ni fasiqafa ni qimamidanoo. Qisauku dinni taikasee dinni ani qaara marasee rambi kuradee mari ainainna qambaana ni mari fasiqafa Efeesusa amaana maqasaa rakisimari paatoo maaqi qimasee qimamidanoo. Qinee anee auqee marianna saikana iridaqa anee kadaapiri mariannanara iridaqa anee sia feefauruara irisaidana maqee maqee kadaapiri marianaqa iridaqa. Anee mandoosana maree mariasara akooqee mariannanara qinee minara faqa iridaqa eedoo qidaqa. Akaqausa nariara unna qimasee Yisufa diqiqoo fasiqausee qufana anee misa faqa amanamasee qafoonanoo misa unna qirana anee paqurunafa mariananoo. <sup>3</sup> Anee reendeenamasee miqoo kai fimarianafa mariananoo. Anee qiniara oosana oosana kadaapiranama marasee sia minnaananoo kaqi marana fimariananoo. <sup>4</sup> Akaqa ainainara kai aniaara aaqeefoo qidaqa. Anee oogai indaaruu unandee sia qiniara amuqusidanoo. <sup>5</sup> Oogai muruqoo amiqiranaki mariunafa doo miaqoo qumuananoo. Inneeqa oosana quandaki oogai undee kai iaqaana. Sia miqifaqa qinee innee marinannai inni rambi mariqooqaraana maraanaqa innee doo imbeefara. <sup>6</sup> Inniki moo oosana qinee amiqira fee qidaqa. Nikooraita unna amaana ufara innee qini daanna raidaqa fidiqaammi mariafanoo. Nikooraita amaana ufa qimariasa aiqama faiqi faqa anaasee faqa moodaanaki maraqa nuafaqa innee misa ninda fee qini daanna ree fidiqaqa imariasa mariafanoo.

<sup>7</sup> Anutuna maraquna fannoo amaana maqaki keeqee mariasa aiqamai qimannimidanoo. Naaqoo faqaasa mina ufa kai iriaqa. Mandainainaki afeekaikamasee rakiranara foora maraqa fifi inaqa uriqaree mariasa qinee misa qimannimianaqa misa Anutuna innaaruna ququsaki keeqafi innaarunai asumu marirana nimira saqari qaqamma neefaranoo.

*Samirana maqusanaasara ufa Yisufa Yoohaneenasaa quqoo ufafa maridanoo.*

<sup>8</sup> Miqi qimaseenoo Efeesusa amaana maqa Paatoonara ufa qimaseenoo quandakufanoo Samirana amaana maqasa Paatoonara Yoohaneena qimaminuu. Yoohanee anee Samirana amaana maqasaa rakisimari Paatoona maaqi qimasee akara rumamia. Oogai indaarufaafa faqa inaaqianaafa faqa oogai kuqufa findifi kaqi marifa Yisufa maa ufana ani qimamidanoo. <sup>9</sup> Qinee inni kadaapiranara iridaqa innee maa maqanasaa ainaina siaisa kudi mariafanoo innaarunai ainaina faqaasa mariafanoo qinee iridaqa. Sadannana faiqi namu akaqausa nariara unna qimasee Yuda maqanna fee qimariasa inniara mandufa oosana oosana qimariana qinee iridaqa. <sup>10</sup> Qini ufasaara kaqikaa qoo

innee apupurarana mareefaranoo innee sia minara rufiaaqa. Innee iriaqa Sadannafa inni nimanamasee qafaaneera karabusaki akaqausa quqaannoo. Inni nidafirafa maa maqanasaa qusasaa mariannoo. Innee kaqi maraqa fifi inaqqa kuqirana paqurinna aukwana qinee naaru marira qafee afsunnimaqaanaura. <sup>11</sup> Anutuna maraqauna fannoo aiqama maqusa amaana maqaki keeqee mariasa qimannimidanoo naaqoo faqaasa mi ufana iriaqa. Andeeqara oosana kaqi maraqa fifi inaqqa Sadannana nimanirana uriqararusaiki mariasa inaaqianna kuqirafa sia misa naruannoo.

*Peerakamumma maqusanaasara ufa Yisufa Yoohaneenasaa quqoo ufafa maridanoo.*

<sup>12</sup> Yisufa miqi qimasee Samirana amaana maqa rakisiranara Yoohaneena qimamiseenoo quandakinoo Peerakamumma amaana maqasaa Paatoona maaqi qimasee qimaminau. Yoohanee anee Peerakamumma amaana maqasaa rakisimari Paatoona maaqi qimasee mina faqa akara rumamia. Qaseema dinni dinni raigirafa ookiqari animari fasiqafa Yisufa maa ufana ani faqa qimamidanoo. <sup>13</sup> Innee Peerakamumma maqusanaasa Sadannana amaana maqa mariaqoo mariasa mariafanoo qinee iridaqa. Innee kuqaa qinisaa atooqee mariasa mariafanoo. Inni maqusai Sadannana amaana maqa mariqoo miqooqaraasa qini qiqaondi moo fasiqa qini Yisusara andeeqasee kooroo qimarina akiaqara Yisufa maa auqu Antipasana kuqa arufafa innee sia minara rufiiosa kaqi kai qini saqariki mariasa mariafanoo. <sup>14</sup> Akaqa ainainara kai inniara aqaaidammiafoo qidaqa. Inniki maqee Baraamafa ooqai mariu fasiqana aanna ree mariafanoo mi fasiqafa Baraamafa marufafa inniki akaqausa mi oosana maraidaqa. Ooqai Mooaba maqusanaasa karaambaiga fannoo Barakafa Anutuna tamummaqara fasiqa moo auqu Baraamana munnimma amiseenoo anee naukarara ufa Isaraee maqanna nimisainaa kuquqa. Miqi qufanoo Anutufa Baraamanara qaoo qufanoo quandakinoo Barakana qimamufanoo Isaraee maqanaasa mindaraasa unna Anutuna oorisa naranara dufi dufi qimasee narana naidaqa mindaraa anaasee naafeeqee mariqau. Innee Peerakamumma amaana maqaki mariasa akaqausa Baraamana oosana maree mariafanoo. <sup>15</sup> Miqi kai masee inniki Nikooraita amaana ufa irimariasa akaqausa mariafanoo. <sup>16</sup> Innee inneeqa mandoosana kafa qandaqa. Sia quandaifaqa qinee innee mariaqoo anireeqa qeeqa dooqi qaseemannai mi mandoosana maree mariasa naruanauranoo.

<sup>17</sup> Anutuna maraqauna fannoo aiqama maqusa amaana maqaki keeqee mariasa qimannimidanoo naaqoo faqaasa iriaqa. Ooqai Isaraee maqannaasa aadana maqa maqakinai nimarufafa kananaana kananaana innaarunaindaraa feemu nimiaafanausa maridaqa. Maa maqee mariaqoo mandainaina faqa rakiraridaqa mina iriaqararusa qinee kukeeqara feemu innaarunai misa nimianaura. Eekara oonisaa nari fuka nuqu akara rirana moodaa kai moodaa kai nimianaura. Mi fuka auquna sia moo fannoo misa oosana iriannoo nari kai mina oosana iriannoo. Doo mi ufana Yisufa Peerakamumma amaana maqasaa Paatoonara Yoohaneena qimaminau.

*Tiatira maqusanaasara ufa Yisufa Yoohaneenasaa quqoo ufafa maridanoo.*

<sup>18</sup> Rambi kuradee maria saqarina qambaana mari Yisufa miqi qimaseenoo quandaki Yoohaneena kafa maaqi qimasee akara rumamaqaa. Anutuna amaaku afu idara foora qeemarifa mina aiku faqa anukanoo mari barasara foora tandi tandi mari aikunannoo mandainaina radamimarifa Yisufa maa ufana inni qimannimidanoo. <sup>19</sup> Innee Tiatira maqusanaasa qini Yisusara nimuqusidanoo qinee iridaqa, innee maqee maqee iriqa kai fimarianara faqa qinee iridaqa, innee qiniara iriseeqa inneeqa maqannaasa dadaaqi-mariafanoo. Innee sia kadaapi dari maqi qimasee minnisee mariafanoo kaqi maraqa fimarianara minara faqa iridaqa. Ooqai innee qini saika ooda maree mariqau, maqee kamu firaqoo maree mariafanoo qinee minara faqa iridaqa. <sup>20</sup> Qinee inni moodaa ainainara kai inni niqidaqa. Innee mi manda anaaseena Yeeseebeera nammarinara saina kaqi marianifee qimariana. Mifa unna qimasee nariara Anutuna ufa maree marunaasee qidanoo. Mi anaaseefa naakapaidanoo qini ufa irimariasa rarisameeqeenoo faiqi faqa anaasee faqa nari ummuari nari ummuariranaki quqaidanoo. Moo unna anutunara innaaru qimasaida narana neemarianaki faqa quqaidanoo. <sup>21</sup> Qinee mi anaaseenara aneenna ummuariranakiqari quandaannee qimasee afeesunaisa maridaqa. <sup>22</sup> Minara mina mareeqee nari rarisaganua fasiqausa saimbaqa manda gaarisaa quqasaanura minaki maridaqa teeroo firaana maraida marifaranoo. Misa nari mandoosana sia apupuramasee quandaifaqa qinee dauni miqianaura. <sup>23</sup> Qinee mi anaaseena ufa irimariasa faqa kuqa narusaanaqa amaana maqaki keeqee mariasa qini oosana irifaranoo. Misa qiniara kukeeqara ainainara irimari fee qiaqeera naruanauranoo. Qinee aiqamausa nari nisaukunna auqainnana akiaqara kai nimianaura.

<sup>24</sup> Innee Tiatira maqusanaasa sia mi manda anaaseena oosana maroosa mariafanoo. Mina oosana mareemariasa Sadannana meemaqoo kukeeqara irirana irimariasa náriara unna qimasee akoofasa fee qidaqa. Qinee sia ummaara moo faqa innisaa quqaanaura. <sup>25</sup> Maana kai qimannimidaqa. Inneeqa amiqira oosana uaqeeiana mina kai maramaree fuaqa, fifi inaqa qinee qumuanna aukuanna mina akiaqara maraqa. <sup>26</sup> Rakiranara foora iqa mandainaina uraqaqararee imariasa qini ufamau fimariasa mi mau fifi inaqa taikara aukuana paquriqa qini qikoofa afeeka qimuna quandaki misa nimi-anaura. <sup>27-28</sup> Niminaqa kasooqaqee naaru misa moo maqannaasa urinaaqaramasee ainna faaqaanannai misa qafeera foora rukamifaranoo. Qinee iqaqara duqudeeqi faqa nimianaura.

<sup>29</sup> Anutuna maraquna fannoo amaana maqaki keeqee mariasa qimannimidanoo naaqoo faqaasa mi ufana iriaqa.

### 3

*Saradisa maqusanaasara ufa Yisufa Yoohaneenasaa quqoo ufafa maridanoo.*

<sup>1</sup> Yisufa miqi qimasee Tiatira amaana maqasaa rakisirana qimamiseenoo quandakinoo Saradisa amaana maqasaa Paatoonara Yoohaneena qimaminau. Yoohanee anee maa ufana akara rumeeqeenana Saradisa amaana maqasaa rakisira Paatoona amaqa. Anutuna maraquna dinni taikasee dinni ani qaaramarasee maraquna qumaree marifa dinni taikasee dinni ani qaaraqanda fasau qumaree marifa Yisufa inni Saradisa maqusanaasa qimannimidaqa. Qinee innee auqemarianara iridaqa. Misa unna qimasee inniara kasimariasee qiafaqa qinee inniara kuqimariasee qidaqa. <sup>2</sup> Innee minara iriseeqa tauti findifuaqa nimuqusa kaqikaqoo kasimariqoo kaaqa kuqifoora dauni findi fuaqa. Inneeqa Anutuna saika mareemariana Anutufa qafaaidanoo mina afusaa sia anoonaikidanoo minara qinee inniara tauti findifi fuaqee qidaqa. <sup>3</sup> Innee ooqai qini ufa irimaria oosannara naaqoo irisee qini ufara faqa irisee eedoo qimasee mi mau fifanoo inneeqa mandoosana quandaqa. Innee sia faiqaranakiqari tauti findiffaqa qinee ummuari mari fasiqafara foora tautumannimaqasee anireeqa naruanaura.

<sup>4</sup> Inniki Saradisa maqusanaasa akaqausa sia qikairi faisa maridaqa. Innee qikairi siaisa qini faqa nifaranoo. Inni amiqira marirana amana kai eekara qamunna afisunnimaqasanaqa qini faqa fifaranoo. <sup>5</sup> Mandainaina fannoo inni maqee maqee rafaqaqimariifaqa mi manda ainainna uriqararausa inni naanna ramasee eekara qamunna afisunnimaqarara qidaqa inni nuqu faqa naaru kaqi marira papiqakinaana sia ateekaanaura kaqi marianifeera qidaqa. Qinee qeeqa qikoona oorisaa faqa mina qangiroo misa noorisaa faqa innee qikairi siaisara qini faqi namu fee qianaura.

<sup>6</sup> Anutuna maraquna fannoo aiqama maqusa amaana maqaki keeqee mariasa qimannimidanoo naaqoo faqaasa mi ufana iriaqa.

*Firadeerafia maqusanaasara ufa Yisufa Yoohaneenasaa quqoo ufafa maridanoo.*

<sup>7</sup> Yisufa miqi qimasee Saradisa amaana maqa Paatoona qimamiseenoo quandaki Firadeerafia amaana maqasaa rakisimarunara Yoohaneena qimaminoo qinau. Yoohanee anee maa ufana akara rumeeqeenana Firadeerafia amaana maqasaa rakisira Paatoona maaqi qimasee amaqa. Ooqai Dafidifa kooqi kiqa uaqeeuna qinee Yisusa maqee mina uaqeeidaqa ani qimamidaqa. Qinee naaquqara andeeqarausa kuqaa anoona oosana oosana mareemarunausa maa ufana inni qimannimidaqa. Qinee kiqannai kooqi ititasaana sia amana moo fannoo atuarana amana maridanoo, kaifaa qinee kooqi atusaananoo moo fannoo sia amana ititaannoo. <sup>8</sup> Innee Firadeerafia maqusanaasara qinee inni aiqamausara amiqimasee iridaqa. Inni noorinni kooqi atuarana quqasaananoo moo fannoo sia amana mina ititaannoo. Inni afeeka kaqikaafa maridanoo innee qini naakapara ufamau fimariasa mariafanoo. Innee maqee maqee qiniara kai iridaqa mariasa mariafanoo. <sup>9</sup> Iriaqa, Sadanna faiqi namu akaqausa mariasa náriara unna qimasee Yuda maqanna fee qimasee qimariasa qinee misa mareeqee inni niramandunnai quqasaanaura. Aiqamausa mina qafeeqa oo Yisufa inniara amuqusifanoo miqidanoo fee qiaqeera.

<sup>10</sup> Qinee inniara reendeenamandee mariaqee qiafanaqa innee miqi mariasa mariafanoo. Miqi mariana akiaqara firaa teeroo maaqanna maaqanna nimanamasee qafaanaura miqianna aukuanna qinee inni mareeqee kaqi atinnai quqasaana asumu marifaranoo. <sup>11</sup> Qinee qusasaa qumuanaura. Innee uriqaraqa mariana amiqimmandee rakisi qumaraqa moo fannoo qumaraandoora. <sup>12</sup> Maa maqanasaa mandainaina qambaanauri uriqararana qinee mina qumareeqee qeeqa qikoona amaana maqaki quqasaananoo mifa faakanaikinoo mariannoo. Qinee mina afaaqasaa qeeqa qikoona Anutuna auqu quqaanaura, qeeqa Anutuna firaa maqusa fuka Yeerusaree auqu faqa

mina afaaqai quqaanaura. Mi maqusafa innaarunaindari qini Anutufinnainadari kasooqaaqee qumuanoo. Qinee qeeqa fuka duqa faqa mi fasiqana afaaqai quqaanaura.  
<sup>13</sup> Anutuna maraquna fannoo aiqama maqusa amaana maqaki keeqee mariasa qimannimidanoo. Naaqoo faqaasa mi ufana iriaqa.

*Raodiseea maqusanaasara ufa Yisufa Yoohaneenasaa quqoo ufafa maridanoo.*

<sup>14</sup> Yisufa miqi qimasee Firadeerafia amaana maqasaa Paatoonara Yoohaneena qimamiseenoo quandaki Raodiseea amaana maqasaa rakisiranara qimaminoo qinuu. Yoohaneane anee Raodiseea amaana maqa rakisira Paatoora faqa maaqi qimasee akara rumamia. Qinee mapukusee marunna fasiqausa Yisusa inni qimannimidaqa. Qinee naaru naaru kuqaa anoona ainaina kai qimarunausa inni qimannimidaqa. Anutufa aiqama ainaina auqimaruna oosana qinee marunausa inni qimannimidaqa. <sup>15</sup> Qinee innee auqee maru ainainnara iridaqa. Innee sia suaru qiqa mariafanoo innee sia idaidiqa mariafanoo Inni oosana amiqirafa marinaqau kaifaa minara faqa irini. <sup>16</sup> Inni oosana suanisaa nammariara foora naunanoo ididi marifaqa fidaqa. <sup>17</sup> Innee unna qimasee inneeqara aiqama ainaina oosana oosana faqaasee qimariafanoo. Inni nifaqa rumbanoo marifaqa mandaikidaqa kudoosaapaqa maridaqa innee sia minara irimariafanoo. Innee kudi mariafanoo nifu qimbarausara foora mariafanoo kaqisamuara foora mariafanoo. <sup>18</sup> Qinee maaqi qimasee inni naamua qidaqa, innee qini koora munnimmara foora feefaurumaseeqa minanna naundurakinaa qumiasana moomoo maraqa. Innee qinisaaqaraa andeeqarana feefaurumasee eekara qamunnara foora marasee inneeqa nisaurirana manda nifaqasaa afisuqa. Inneeqa nifu marasinna minniseeqa qini marasinna foora feefaurumasee inneeqa nifusanara foora narimarinaki akusaifanoo inni nifu amiqiani. <sup>19</sup> Qinee nimuqusi maria fasiqa anaaseera kai mandainainaki keeqaafaqa qao qimasee naridaqa. Innee minara irisee kuqaa noori runusee inneeqa marirana quandaqa.

<sup>20</sup> Iriaqa qinee Yisusa faiqi nimuqusa kooqi afaisaa kikiqammambiqa kooqi ataanee qimasee kukusidaqa. Faiqi moo fannoo qinee kukusiannana irinoo nari kooqi atuqainaqa qinee mina amuqusa ooki keeqafiqa mina faqa naanaura mifa qini faqa naannoo. <sup>21</sup> Qinee maa maqanasaa mandainainakiqari uriqararausa maridaqa qeeqa qikoosandiri nari rakisira qarisaa oofuqaqee idaga. Maa maqanasaa mandainainakiqari rakirara foora uriqarainafa mifa miqi kai inoo qinee rakisira qarisaa innaaruna ququsaki qini faqa oofuqaqee mariannoo.

<sup>22</sup> Anutuna maraquna fannoo aiqama maqusa amaana maqaki keeqee mariasa qimannimidanoo. Naaqoo faqaasa mi ufana iriaqa.

## 4

*Innaarunai mariasa Anutuna amooqida asasimaria ufafa.*

<sup>1</sup> Qinee Yoohaneesa mi ufana irunanoo qifu pisipasifaqa moo ainaina qafeeqa. Innaarunai kooqiara foora atuanoo marifaqa qafeeqa. Minakiqari moo fannoo qimaqimifaqa iriqa mina ufa fannoo qufireena miqirana fuaqaidanoo miqidanoo qimaqiminoo anee mai ururainaqa kasooqaaqee kambiqaaninna ainainna uqafiqaanaura. <sup>2</sup> Miqi qima-soofanoo Anutuna maraquna daakufufaqa kooqiki keeqaki innaarunai ooru fiqiafana. Ooruree qafaafananoo ufa irira qaari ufiqiranasaa moo fasiqa marufaqa qafaqia. Mi fasiqafa Anutufa marinau. Mi qaarifa sia kaiqeesa qaari Anutuna nari rakisimari qaarina marinau. <sup>3</sup> Mi fasiqafa Anutuna oori afiri pupu ooniara foora ooriki takunasoosa imarinau. Oondanda amiqirafa rakisimari qaarina ufiqirana fiq fiq inoo marinau. <sup>4</sup> Mi qaarina ufiqirana atiqara moodaa fasiqa aiku asauku taikasee moo fasiqa asauku qaara faqa qaara faqa oonu marasee fasiqauqa nariqa rakisimari qaarinasaa fiq fiqumma ooqu mariqa mariqau. Misa aiqama uriqararausa koorannai auqira qafee faqaasa eekara qamunna afisirausa nariqa qaarisa Anutuna fiq fiq mafi ooqu marifi mariqau. <sup>5</sup> Anutuna rakisimari qaarina qambaaindari aakuusaa faqa innaarunai qirana faqa darara qirana faqa ruruqirana faqa qaari qambaanaqari ururoofaqa qafaqiafana Anutuna oorinni qisauku dinni taikasee dinni ani qaara marasee qoomanamu Anutuna oorinni qeemarufaqa qafaqiafana. Mi qoomausa Anutuna maraqunauqa marufaqa qafaqiafana.

<sup>6</sup> Anutuna oorinni ooruku nammari miqirafa tanukara foora mandinoo marinau. Mi nammarinasa sia kaqikaqoo dumuna qaisoora marinau amiqirafa uqanna marinau. Anutuna rakisira qaari dinni qaaraqanda dinni qaaraqanda aanda marinau. Noorinni faqa nitafakai faqa aiqama nifaqasasa nifu moomoo marinau. <sup>7</sup> Moo fannoo raioona kaasau pusina fooqaafa firaatia marinau moo aanda burimakau aanaaqi miqirafa marinau moo aanda faiqi noorikira aanda marinau moo aanda quqaumu miqirafa



qangirooquqa moomoosa fiqū fiqū mambufaqa miqoo marusa aiqamausa idi moo raqau, firaa kari maaqi qimasee raqau.

<sup>12</sup> Oo sipsipa aanaaqi anee faiqi arunaki reendeenamasee keeqoonafa ani andeeqarafa kai amanaikinoo marinara

Anutufa uriqararana faqa ainaina moomoo faqa irirana firana faqa afeeka faqa auqu ugeerarana faqa areenarana faqa ani amooqirana faqa ani Yisuna amiannoo.

<sup>13</sup> Misa mi idina ramasoofaqa kafa iriseeqa aiqama innaarunindaraa ainaina faqa maqasaa ainaina faqa ooruku nammarikinaa ainaina faqa maqa ameemaanaindaraana faqa aiqamai Anutufa auquqoo ainainausa moodaanakikammambiqqa maaqi qimasee idi raqau.

Qaarisaa ooqu marinoo marifa sipsipa aanaaqi faqa inniqara nimooqirana faqa nuqu ugeerarana faqa areenarana faqa afeeka faqa naaru naaru innindi marianifee qidaqa idi raidaqa.

<sup>14</sup> Misa miqi qimasee idi roofanoo qaara faqa qaara faqa aandaū namu misa roo idina irisee kuqaa fee qufaqa miqoo uriqararousa marusa noorindari maqasaa rupaitamafu-faqa Yisuna amooqimamaqaaqu.

## 6

### *Papiqa rumbarauru idukunara qu ufafa.*

<sup>1-2</sup> Miqi qimasoofanoo sipsipa aanaaqi fannoo mi papiqana kukuqirana qumareenoo moo sanda rumbaqqoona idukinau. Idukusoofanoo Anutuna aqa qaara faqa qaara faqa aandaū mariunakiqari moo mina ufa fannoo innaarunai miqirafa darara qimaseenoo qimaminqau. Anee anianne qufaqa qinee Yoohaneesa miqoo oonuraafananoo qoosa moo eekara arirafa marinau. Faiqi minasaa ooqufaqqeeu fasiqafa duru faqaafa marinau. Miqooqaraasa qafee afsuamaqqasooofanoo maaqanna maaqanna rakiranannai nari aramandunnai quqararee qimasee finau.

<sup>3</sup> Mifa fufanoo sipsipa aanaaqi mi papiqana sanda moo rumbarana idukinau. Idukusoofanoo Anutuna aqaqari aandaū moo qiniara aniree qafaannee qinau. <sup>4</sup> Qinee oonu qafaafananoo qoosa moo taatuqee arirafa animarinau. Miqooqaraasa qaseema firana raqarana mi qoosanasaa maruna amisee qimamiqau. Anee ooqu maqasaaqaraasaki maa qaseemanannai nirana fundakinaqa rakirana uqeera niminaqa nari ari nari ariaga.

<sup>5-6</sup> Mifa fufanoo mi papiqana rumbarana sipsipa aanaaqi fannoo moo sanda idukinau. Idukusoofanoo Anutuna aqaqari aandaū moo findifinoo qiniara anianne qufaqa oonu qafaafananoo qoosa moo runduqarirafa marinau. Mi qoosanasaa marufa sikeera uqusee marufanoo Anutuna aqaqari aandaū moo ookiqari ufara foora mi fasiqana qimaminau. Aandaroo aukuna maridanoo moodaa faasaana saikiana amana kai raisa nimia. Raisa sia marinaqa kamaa miqi kaimmasee rainasee nimia. Misa fadameena faqa nammari faqa sia anee mina arua saina kaqi nimia, narana ainaina kai aandaroo naruannoo.

<sup>7</sup> Miqi qimasoofanoo sipsipa aanaaqi mi papiqana rumbarana moo idukusoofanoo Anutuna aqaqari aandaū moo fannoo qiniara aniree qafaannee qinau. <sup>8</sup> Qinee Yoohaneesa irisee oonuraafananoo qoosa moo afaqa eeqaku arirafa marinau. Mina ataufakaqa maruna auqu Kuqirafa marinau. Faiqi nimana madikakinaasa faiqiara fooqiara mi fasiqana faqa fidanoo nari dadaaqi nari dadaaqi mariqau. Miqoo innaarunai marusa maaqi qimasee qimamiqau. Innee qoosa faqa faiqi faqa faiqi nimana madikakinaasa faqa maqasaa fasiqaki ooquree duru feefannai faqa aandaroonnai faqa auriranannai faqa kaasau aandaunnai faqa moomoo fasiqa anaasee maqusa maqusa mariasa narida mariaqa.

<sup>9</sup> Misa fufanoo sipsipa aanaaqi mi papiqanasaa rumbarana moo sanda idukinau. Idukusoofaqa qinee miqoo aandaū tatufimaru qaindana marufaqa qafaqiafana. Mi qaindana ameemaanai kuqirousa nimana moomoo marufaqa qafaqiafana. Sia fifau kuqirousa mariqau. Maqasaa maridaqa Anutuna ufa andeeqasee faiqi anaasee qiman-nimunara mina akiaqara narusoosa kuqiqa mariqau. Misa oosana Anutuna ufamau kai fimarunara minara narusoofanoo Anutufa misa nimana mareeqeenoo innaaruna qainda ameemaanai quqanau. <sup>10</sup> Qinee Yoohaneesa qafeemariafanaqa firakari mindari Anutunara nameera qiqa. Oo uriqarara karaambaqqa anee andeeqarafa naaquqarafa anoona ufa kai qimarianafa mariananoo. Yairee fee maqasaaqaraasa ufa iriseenee maasa daruana akiaqara nari narinnaree. <sup>11</sup> Miqi qimasoofaqa innaarunai marusa eekara qamunna marasee aiqama nimisee qimannimiqa. Innee maana afisusee kafa miqoo kaqikaqoo idooaqa. Inni nikaqaafasaa maqasaaqaraasa inni naanna reeqa Anutuna ufasaara kuqifanoo Anutufa mikari inni ufa faqa misa ufa faqa iriannoo.

<sup>12</sup> Miqi qimasoofoano sipsipa aanaaqi mi papiqana rumberana moo sanda idukinuu. Idukusoofoano maqa firaqoo uqanna kasinoo suani afu arusoofanoo runduqarira qamunnaikinoo marinuu. Quqoona faqa aiqama taatuqee arinoo fidikandandinau. <sup>13</sup> Fasau saqari qaamma miqirafa ufai uqifanoo adusa aiqama maqasaa kakasidanoo aiqama fasau maqasaa kakasinau. <sup>14</sup> Innaaruna kudimanda fannoo papiqa fooqaana atindari raqandaamaree mafi aiqama raqandaamma taikanuu. Aaqana aqana nári maruqooqari nári maruqooqari moosa minifi mafi quqaidanoo ooruku nammariki afumauqa faqa miqi kaimminuu. <sup>15-16</sup> Miqimarufa maqasaaqaraa karaambaiqauqa faqa uriqararaura faqa sundiaki kiateenauqa faqa ainaina faqaasa faqa nimudaanai qimarusa faqa faiqi aiqama karabusara fooqaana ainaini mariasa faqa kaiqeesa faqa aaganasaa maru ooni aamaranaki keeqafi kukeeqafiqa aaganara faqa ooniara faqa nameera qimasee qiqau. Innee maasasaa aqufiqa maasa dariqa kukeeqaqimaqaqa. Qaarisaa ooguinarinoo marina afusaara rufiidaqa ititaqimaqaa. Sipsipa aanaaqi aanooqiranasaa faqa ititaqimaqaa. <sup>17</sup> Miqanda fira aanooqira faasaana doo animaridanoo, sia moo fannoo amana misa nifusaa kikiqiannoo.

## 7

*Isaraee maqanna faiqi oosana oosanaikiqara Anutuna akara niqinisaa quqaraura qu ufafa.*

<sup>1</sup> Qinee Yoohaneesa mi ainainna qafamasaafanausa kafa maa ainainna qafeeqa. Qangiroo qaara faqa qaara faqa safasa ati atisaa kikiqiqee maridaqa miqiiqa maridaqa ufai maqasaa maqee maqee uqimari ufaina maqa maqa mandaikianifee qimaseeqa ufai rafaqaqifiisee maridaqa. Miqiiqa mariafanoo sia ufai moo fannoo ooruku nammarisaa fee maqasaa fee saqarisaa fee sia fuaqeenoo. <sup>2-3</sup> Misa miqiiqa maruqa qinee qangiroo moo qafaqafana. Qangiroo moo fannoo suani oosana qaanaidari kaqi marira Anutuna akarainaina uqirafa anireenoo ufai rafaqaqifamaru qangiroosa naaramasee qimanniminoo qinau. Anutufa inniara ufainnai maqa faqa ooruku nammari faqa mandaikamma nimaqaannee qifaqa eekaa kaqikaa qoo kaqi marifaqa qinee Anutuna ainainira faiqiuqa niqinaaqa Anutuna akara rumasaanaqa miqoo maqa faqa ooruku nammari faqa saqariuqa faqa ufai quqasaifanoo firaqoo uqinoo mandaikamannimaqaani. Mi qangiroofa miqi qimasoofaqa Anutuna faiqi namu maqasaaqaraasa niqinaaqa akara rumasoofoanoo moo fannoo asaana rumasee kooroomasee qimaqiminoo qinau.

<sup>4</sup> Isaraeena aiku asaukukiqari aiqama moodaanaki quqaseenoo wan handareeta faqa footi maqi tauseenna faqa (144,000) fifau nukudara foorammiga mariqau. Miqimasee marunaki mi namusa kai niqinaaqa akara rumannimaqaseenoo Anutunaidni marifanoo ufai fannoo sia naruanifeera rumannimaqanau. <sup>5</sup> Isaraee maqaanna faiqi namu niqinaaqa akara rumannimaqaaqoosa misa naadu naadu oosaa oosaa kai mariqau. Yudana aiku asaukukiqari (12,000) tuerufa tauseenna moomoo Anutuna akara niqinaaqa rumannimaqanau.

Reeubeenana aiku asaukukiqari (12,000) tuerufa tauseenna moomoo Anutuna akara niqinaaqa rumannimaqanau.

Kadana aiku asaukukiqari miqi kai maseenoo 12,000 rumannimaqanau.

<sup>6</sup> Aseerana aiku asaukukiqari miqi kai masee 12,000 akara rumannimaqanau.

Napatarina atiuqa marusa miqi kai masee 12,000 akara rumannimaqanau.

Mannaseena aiku asauku marusa miqi kai masee 12,000 akara rumannimaqanau.

<sup>7</sup> Simeeoona atiuqa marusa miqi kai masee 12,000 akara rumannimaqanau.

Reefina aiku asauku marusa miqi kai masee 12,000 akara rumannimaqanau.

Isakeena atiuqa marusa miqi kai masee 12,000 akara rumannimaqanau.

<sup>8</sup> Seeburuna atiuqa marusa miqi kai masee 12,000 akara rumannimaqanau.

Yooseefaana aiku asauku marusa miqi kai masee 12,000 akara rumannimaqanau.

Beensaminna aiku asauku marusa miqi kai masee 12,000 akara rumannimaqanau.

Miqimasee mi qangiroofa Isaraeena aiku asaukukiqari moodaanaki mara ruqau-maseenoo 144,000 fifau nukudara fooru Anutuna akara niqinaaqa akara rumannimaqanau.

*Aiqama aanaamuru Anutuna oorisaa suqu ufafa.*

<sup>9</sup> Qinee Yoohaneesa mina qafamaseeqa quandaki qafaafana moo suqirafa marinuu faiqi anaasee firaqoo qusimariqau. Sia faiqi moo fannoo nisaanarirana amana moomoo uqanna mariqau. Misa aiqama fira maqannaasakiqari faqa kaqikaa maqannaasakiqari faqa aiqama fasiqa anaaseeqari faqa aiqama ufakiqari faqa Anutuna qaari oorinni sipsipa aanaaqi oorisaa aiqama ufa qimarusa kikiqammafiqau. Misa qamunna eekara afisiraura aufaqa saqari asaana uqiraura Anutuna oorisaa kikiqiqau. <sup>10</sup> Miqoo kikiqiqau

maridaqa maaqi qimasee Anutunara firaa kari qimamiqa qiqau. Maasa Anutufa rakisira qaarisaa oqumarifuananoo sipsipa aanaaqi faqa anisaagaraana kai maasa naaru marirana maraidagee qiqau. <sup>11</sup> Miqi qimasooafaq uriqararansa Anutuna rakisira qaari atimau fiq u fiq iqa marusa faqa qaara faqa qaara faqa aandau marusa faqa marufaqa misa fiq u fiq iqa maru qangiroomisa misa kai maqasaa noorindari aqufufafa Anutuna amooqirana qiqau. <sup>12</sup> Kuqaa amooqirana faqa areenarana faqa irirana faqa dufi dufi qirana faqa auqu uqeerarana faqa uriqararana faqa afeeka faqa naaru naaru maasa Anutunaindi kai maridaqa. Kuqaa fee qiqau.

<sup>13</sup> Qaari fiq u fiq uqiranaqiqari uriqararansiqaari moo fannoo quandaki qini Yoohaneesa irammirino qinuu. Maa fasiqa anaaseesa yaindaraasee eekara qamunna afisirausa aiqama ufa qimarusaqiqari ani maridee qufaqa qinee qiqiafana. <sup>14</sup> Sia qinee iridaqa anee qimaqimia qiafanano mifa kooroo qimasee qimaqiminuu. Maa fasiqa anaaseesa Anutuna ufamau fimarusa minasaara narirana maree marusa minaqiqari amiqimasee ani marusa maridaqa. Misa nari ikairi aanaaqi qamunna sipsipa aanaaqi Yisuna fidikaki nari qamunna nammuruqusee eekara arufifaqa afisusee maridaqa. <sup>15</sup> Minara misa faasaana faqa eendaki faqa Anutuna naaqaqara maqaki nari rakisinnimaqee maru qaarina oorisa kikiqammambi eendaki faqa faasaana faqa amooqidaqa. Qaarisaa marifa Anutufa nari kai misa ititannimaqaannoo. <sup>16</sup> Ititannimaqaannoo sia kafia misa naara raannoo, sia nammariara nidiannoo, sia suani ididirafa nifaaqai naruannoo. <sup>17</sup> Sipsipa aanaaqi rakisira qaari gambaana marifa mifa misa rakisirafa marino misa nifiqee munusainaqa kaqi marira nammari maqaqiqari radiqisee ururee mariqoo neefarano. Anutufa misa naukunu rukasaina misa ikiraqarafa taikaannoo.

## 8

*Papiqa moodaa sanda doo iduku ufa.*

<sup>1</sup> Sipsipa aanaaqi fannoo mi papiqanasaa rumbara sanda inaaqianaana idukusoofano innaarunai qiqi ufa daiqimafino kaqikaqoo kasoomafinau. <sup>2</sup> Ufa sia qirafa taika-soofaqa kafia qinee Yoohaneesa qafaafanano qangiroom Anutuna afusaa kikiqammambi marusa dinni qisauku taikasee dinni ani qaara marasee miqimandee qangiroom ukeena moodaa kai moodaa kai amana kai misa niminau.

<sup>3-4</sup> Nimisoofano qangiroom moo fannoo kooru auqimaru qafeena uqirafa anireenoo Anutuna aandau tatufimaru qaindana oorisa kikiqammambinau. Faiqi anaasee innaaru qirafa mi qafeenaki maruna maree aniroofaqa misa amiqira afundimaru ainainna moomoo mi qafeenaki innaaru qirana namufaqa quqasoofano Anutuna oorinni maru qaindanasaa kooru auqimarunasaa idara qoonaki teeqimasooofano idaqaenoo amiqira afundimaru ainainna faqa faiqi anaasee Anutuna ufamau fimariasa innaaruqirana faqa idaqaofano amiqira afunda fannoo Anutuna aikiambuinau. <sup>5</sup> Qangiroom mi qafeena qumareenoo mi qaindanasaaqarara ida auri maru qafeenaki afeeriqi quqaseenoo innaarunaindari maqasaa teeqimmaqinau. Teeqimmaqasoofano innaarunai qirana namufaqa aakuasaa uqirana namufaqa maqa kasirana namufaqa kambiqanau.

*Dinni ani qaraqanda marasee ukeena fuaqoo ufa.*

<sup>6</sup> Miqooqari qangiroom qisauku dinni taikasee dinni ani qaara marasee ufireena faqaasa fuaqarara deedaqiqau.

<sup>7</sup> Fuaqasoofano pupusamu faqa ida namufaqa fidika namufaqa moodaanakikirafa innaarunaindari maqasaa teeqinau. Teeqimasooofano maa maqa maqaanaki qaaramooki oosuseenoo moodaaki idaqaama taikanau, saqari faqa miqoo marinuuqa moomoo qamataikanau. Aiqaama andanda faqa miqoo marinuuqa qamataikaseenoo qaraqandaki kaqi marinuu.

<sup>8</sup> Qamataikasooofano doo mina inaaqiana qangiroom nari ufireena fuaqasoofano firaa aaganara foora ida auri maruna rafaurino innaarunaindari ooruku nammariki aqufinau. <sup>9</sup> Aqufufano ooruku nammari qaaramooki oosuseenoo qaraqandaki kaqi marino moodaaki fidikaikamafino minakinaa noodaannaina kuqu taikafino sipauqa faqa qaara oosiranaki kaqi marinuu, moodaa oosiranaki kuridifinau.

<sup>10-11</sup> Kuridifufano misa ninaaqiana qangiroom moo fannoo nari ufireena fuaqanau. Fuaqasoofano fasau firaafa mina auqu sukaqara fasau fee qiqau, mifa qoomara foora aurimaruna fuka nammariki maqasaa aqufufano qaraqandaki quqaseenoo nammari amiqirafa, moodaaki faiqi anaasee mina namasooofano suka narufaqa moomoo kuqimariqau.

<sup>12</sup> Qinee Yoohaneesa mina qafamasaafanano inaaqiana qangiroom moo fannoo nari ukeena fuaqanau. Fuaqasoofano suani afu qaaramooki oosuseenoo moodaaki amannauna arino qaraqandaki kaqi mariqau. Quqoona faqa fasau faqa moodaanaki



amannauna arinoo qaaraqandaki kaqi qee marinau. Suani faasaanasaqari dinni ati qeemarinau, dinni ati sia qeemarinau eendaki quqoona faqa miqi kai inau.

<sup>13</sup> Qinee mina qafamasaafananoo quqaumu sandaaqai qaqamaree fidanoo firaai kari faiqiara maqi ufa qufaqa iriqiafana. Mifa qinau mandoosana naaquqarafa kambigaannoo qangiroo qaaramoo namu ufireena fuaqefandinausa misa fuaqafandinna kamuqoo maqasaqaraasa firaai mandainaina naaquqaranaki marifaranoo fee qinau.

## 9

<sup>1-2</sup> Quqaumu miqi qimasooфанoo qangiroo moo fannoo nari ufireena fuaqanau. Fuaqa-soofaqa qinee Yoohaneesa qafaafananoo fasau moo innaarunaindari maqasaa aqufufa findifufanoo moo fannoo maqa ameemaanai madika mina kooqi kiga amufanoo mi fasau faiqiara foora findifinoo madika kooqi atuasoofanoo idamuna moomoo firaai idamunara foora minaqiqari ururanau. Urureenoo innaaruna faqa suani afu faqa aiqama ititafinau. <sup>3</sup> Mi idamunnaqiqari pandaaga moomoo qumureenoo maqasaa aqufiqau. Misa farukara foora naruqaqera Anutufa quqanau.

<sup>4</sup> Pandaaga kaaqa andanda saqari amanee neemarusaa marufanoo Anutufa minara qaoo qimaseenoo faiqi kai naruqaqee qufaqa miqimiqau. Sia aiqama fasiqa anaasee naruqaqee qinau. Anutuna akara niqinaaga marinausa sia naruqaqee qinau. <sup>5</sup> Mi pandaagausara faiqi kuqa nariranara qaoo qinau, kaqi aupurarana kai moodaannai qisauku quqoonasaa aupurarana firaana nimiaqee qinau. Mi pandaagausa narirafa faruka naruqoofanoo foora nidafi marinau. <sup>6</sup> Moodaannai qisauku quqoonasaa pandaaga marinnakamuqoo faiqi anaasee kuqiranara randaida sia kuqifara aupuree marifanoo kuqirafa adeediramafinanoo doo miqoo taikasee fuannoo.

<sup>7</sup> Mi pandaagausa rakiranaki namaru qoosausara foora mariqau. Misa nikaqa koora auqira qafeera foora marinau, misa noori faiqi noori fooqaasa mariqau. <sup>8-9</sup> Misa nikaqa asausi misausa nikaqara foora kisaagandauga marinau, misa nifai raionara foora firaai nifai kisaaga marinau. Misa nimuqusa rafaqaqirafa qainnara foora marinau, misa niqoosa ufa fannoo faiqi moomoosa sandaafanoo maqa ririqindee qimarinau. <sup>10</sup> Misa nimeesa ati fannoo farukara foora faiqi raquru nimirarinau. Doo minannai faiqi anaasee moodaannai qisauku quqoonasaa aupurarana nimifaranoo. <sup>11</sup> Misa saideenna uriqararafa maqa ameemaanai madika rakisirafa uriqararafa maridanoo. Yuda maqannaasa ufakiqari moo nuqu Heeburu ufakiqari mina auqu Abadoonnee qimariqau. Kirisa ufakiqari Apoorioonee qimariqau. Mi auquna oosana aiqama ainaina kuridi marinee qimariqau.

<sup>12</sup> Doo miqinoo indaaruga mandainaina taikanau. Qaaraqanda kaqi maridanoo.

<sup>13-14</sup> Pandaaga taikafufanoo qangiroo moo fannoo nari ufireena fuaqanau. Fuaqasoofaqa qinee Yoohaneesa iriafananoo koora auqira qainda Anutuna afusaa marunakiqari ufa moo qufaqa iriqiafana. Mi ufaqa koora auqira qainda aannai qaara faqa qaara faqa marunakiqari kambiqafinoo ufireena fuaqoo qangiroona qimaminoo qinau. Eufarateesa nammariki qangiroo qaara faqa qaara faqa faiqi kuridi maria qangiroo namusa rumbaqa mariasa idukunnisaa. <sup>15</sup> Idukunnisoofaqa maqasaqaraa fasiqa anaasee qaaramoosaa oosuseenoo qaaraqandaki kaqi quqasee moodaaki aiqama naru taikaqau dinni ati firaaqoo kaqi quqanau. Anutufa ooqaindari misa deedaqamma nimufaqa mi aukuanna mi quqoona suaninasaa deedaqamma nimiqoosa nari rakira faiqiuqa faqa mi qangiroo namusa faiqi anaasee moomoo uqanna naru taikaqau. <sup>16</sup> Mi qangiroo namu marusa rakira faiqiuqa tu handareta mirioona marufaqa nindaqiafana (200,000,000). Fifau saqari amanee foora moomoo uqanna qafaqiafana. <sup>17</sup> Qinee Yoohaneesa qifu pispasinoo marufaqa misa qoosauqa faqa misasaa mariasa faqa nindaqiafana. Qoosasaa mariasa nimuqusa itirafa akaqafa taatuqee idauruara foora mariqau akaqafa dirindaasi arirafa mariqau akaqafa tumana arirausa mariqau. Misa qoosauqa nikiqa raioona akiqa miqirausa mariqau, misa nooqi qari idauru namufaqa muna namufaqa nooqi qari urimarinau. <sup>18-19</sup> Misa qoosauqa nooki faqa nimeesaki faqa faiqi narira afeeka maridanoo. Misa nooqi qari idauru namufaqa idamuna namufaqa maa maqana afaagasasa mariasakiqari faiqi anaasee moomoo uqanna narutaikanau. Mi qoosausa nimeesa sakaniara foora faiqi ukaqannimidanoo faiqi aupurarana firaana maraidaqa.

<sup>20</sup> Mi narimaru ainainausa maqasaqaraa fasiqa anaasee moomoo naru taikasoofaqa kaqi mariasa mina qafamasee sia rufieeqa sia nari mandainaina minniseeqa Anutu finnai ubeekkeeqa. Kaqi maqeeidaqa. Misa kaqi kai afaannauqara innaaru qimariqau. Misa koorannai siruannai booroosannai ooninnai saqarinnai Anutunara foora sia faiqi qafeemaria ainainna sia ufa irimaria ainainna sia nimaria ainaina, nisaukukoo auqusaqada minara innaaru qimariqau. <sup>21</sup> Mi kaqimaria fasiqa anaasee sia nari ari

narí arirana minniseeqa, sia aukainaina minniseeqa, sia faiqí anaasee qummuarirana minniseeqa, sia ainaina qummuarirana minniseeqa kaqí kai maridanoo.

## 10

*Qangiroo moo papiqa kaqikaana rumbarana uqirafa quminau.*

<sup>1</sup> Miqimarufaqa qínee nindafaafananoo qangiroo moo amudaanaí qimarufa innaarunaidari quminau. Mina qamunna sia qafaqiafana qoonnamu qamunnara foora kai afisirafa marinau, mina akiqa oondanda fiqú inoo marinau, mina oori afiri suani afu miqirafa daroo daraa imarinau, mina aikuqara saqari aadana kikiqinoo marifaqa idaree mariandee imariqau. <sup>2-3</sup> Mina asaukuki papiqa kaqikaana asaana ruanifeera airiqoofanoo marinau. Mi qangiroofa qumureenoo asauku uqannai aiku ooruku nammarisaa ramaseenoo asaagai aiku maqasaa ramaseenoo raioonara foora firaagoo faaqarufanoo innaarunai qirafa dinni qisauku taikasee dinni ani qaara marasoofanoo innaarunai firaagoo darara qimasee faiqíara maqí ufa moo qimaminau. <sup>4</sup> Qínee Yoohaneesa innaarunai qira ufa irisee akara ruaneeriafananoo innaarunaidari qaoo qinoo qisauku dinni taikasee dinni ani qaraqanda marasee innaarunai qira ufa sia akara rua, amiqimasee kukeeqaa qufaqa kukeeqaqiafana.

<sup>5-6</sup> Mi qangiroofa aiku ooruku nammariki faqa maqasaa faqa roofa asauku innaarunai uqeeraseenoo narí amana aqigamaseenoo qinau. Anutufa naaru naaru marianafa innaaruna faqa maqa faqa ooruku nammarí faqa quqoonafa minaki maru ainainausa auqunafa marianafa ani auqu ramasee maa ufana qidaqa. Sia moo kari faqa Anutufa nifeesida mariannoo. <sup>7</sup> Inaaqianna qangiroo narí ufíreena fuaqasainanoo Anutufa narí ooqai kukeeqaqai doo quqaannoo, ooqai narí tamummaqara fasiqauqa amiqira ufa qimannimuna doo miqoo taikkeenoo miqíannoo.

<sup>8-9</sup> Miqí qimasoofanoo innaarunaidarara ufa faasai qimaqimufa kafia qimaqiminau. Anee qangiroo innai aiku ooruku nammariki faqa maqasaa faqa ramaqai finnai papiqa airirana maqeeina maraa qufaqa qínee Yoohaneesa mifunnai oonuree mi papiqana qimi- annee qiafananoo qimaqiminoonoo qinau. Doo maraseenana namasainanoo aranandaki ooquree aseundammianoo, ookinaa ookasaasa anoonara foora adiafaammianoo. <sup>10</sup> Miqí qimasoofaqa qínee mina asaukukinaa papiqa marasee namasaafananoo dooki ookasaasara foora adiafaainau, qiranandaki ooqureenoo aseundinau.

(Ookasaasa anona naaru kambiqaaninna ainainara irirana adiafaa irafa maridanoo. Oosana oosana mandainaina aupurarana narirana kambiqaaninafa aseundirafa maridanoo.)

<sup>11</sup> Miqí masaafananoo qimaqiminoonoo qinau, anee Yoohaneefa anee kaifaa Anutuna ufa moomoosasaa quqaa moomoo faiqí anaasee faqa moomoo maqusanaasa faqa moomoo ufa qimariasa faqa karaambaiqauqa faqa amiqimasee Anutuna amiqira nifaagooqa faqa manda nifaagooqa faqa misa naaku nimaqainanoo misasaa kambiqaaní.

## 11

*Anutuna marirana qafamasee qu fasiqaqanda.*

<sup>1</sup> Miqí qimasoofanoo moo fannoo anireenoo nimanamaru kannapuna qiminoonoo qinau. Anee maana maree ooruree Yeerusareenni mari maqana Anutuna naaqqara amaana maqa faqa tatufira qainda faqa amanamasee qafamasee akara rua. Mi amaana maqanaki innaaru qimariasa Yisuna ufamau fimariasa minaindi marianara misa faqa nisaana rumasee akara rua. <sup>2</sup> Amaana maqa naambeeai sia amanamandee akara rua mina aamina maqannaasaindi aanaamurundi maridanoo. Misa qaara fasiqa niku nisauku taikasee quqoona faqa qaara quqoona faqa naaqqara maqusa Yeerusaree maqusa aniree nikunnai rafaagafuseefaranoo. <sup>3</sup> Mi kamuqoo mi aukuanna qínee Anutusa qini ufa kooroo qimaria fasiqaqanda soofaara qamunna afisiraqanda niqíqaanaqa qini ufa maqasaa mariasaki kooroo ifaranoo. Miqanda nuqu kooroo imariaqandee qinoo maridanoo.

<sup>4</sup> Miqanda aiqama maqa maaqasaa karaambaiqa Yisuna oorisaagaara qooma miqí-raqanda maridaqa. <sup>5</sup> Faiqí akaqausa miqanda naruannee qimasaafanoo miqanda nookinaa ida fannoo naru taikaidanoo doo miqimasaifanoo miqanda naruanee qinausa kuqu taikēefaranoo. <sup>6</sup> Anutufa mi kooroo ira fasiqaqanda afeeka niminaqa Anutuna ufa maqasaqaraasa qimannimi marinna kamuqoo innaaruna ititasaifanoo aaku sia ruannoo. Mi kamuqoo Anutufa afeeka niminaqa aiqama nammari maa maqa maaqana afaaqasasa mari nammari nári nidiranannai nári iriseeqa arusaifanoo fidikaika kaim- miannoo. Mi afeekanannai nári kai irisee maqa aukarasaifanoo mandainaina oosana oosana kambiqeenoo faiqí anaasee nipatasaa narinoo aupurarana nimiannoo.

<sup>7-9</sup> Mi koorooira fasiqaqanda Anutuna ufa maqasaa fasiqa aiqama qimannimi taika-saifanoo maqa amekaanai madikasaa rakisirafa kaasau aandau fannoo madikakiqari ururee doo miqanda faqa rakuannoo. Rakidanoo miqanda kuqa narusainaqa miqanda iri Yeerusaree maqusa qambaana akooqoo marifaranoo. Ooqai miqoo kai mi maqusanaki karaambaiqa aunirira saqarisaa pirimmannai ariqau. Mi maqusana auqu Yeerusaree marinau. Mandoosana maree maru maqusana kikiqammusidaqa Soodooma faqa Isipa faqee qidaqa. Mi kooroo ira fasiqaqanda iri Yeerusaree maqusa qambaana marifaqa aiqama firaa maqannaasa faqa kaqikaa maqannaasa faqa aiqama aanaamuru mariasa faqa aiqama ufa qimariasa faqa miqanda iri qaaramoo faasaana faqa moo faasaana atisaa faqa miqanda iri qafaiqanoo nikundarara qao qimasaifanoo kaqi mariannoo.

<sup>10</sup> Aiqaama maqasaaqaraasa miqanda kuqiranara irisee asasammasee qoomaqa suqasee namasee susu imarifanoo ainaina nari ami nari amidaqa miqandara maaqi qifaranoo miqandara maasa maqasaaqaraasa aupurana qimimariaqanda doo kuqiqee qimasee asafaranoo. <sup>11</sup> Qaaramoo faasaana aiqaramafinoo Anutufinnaindari kasimari aidoofa qumureenoo miqanda iriki keeqafinaqa kasiqa findiffaqa aiqama miqanda niqafeeinausa nindafeeqa kaaqa rufiteefaranoo. <sup>12</sup> Mi tamummaqara fasiqaqanda findi fifaqa innaarunaindaraa ufa moo fannoo maaqi qimasee miqanda qimannimiannoo inneeqara doo mai innaarunai uruaqa qifanoo asuru fannoo miqanda namuqaa aiqamausa nifusaa mara uqeereeqeenoo innaarunai quqaannoo. <sup>13</sup> Miqanda muru quqasainanoo miqoo kai maqa firaqoo uqanna kasinoo Yeerusaree maqusaki mari maqusa moomoo rambairinoo aqufuanoo. Faiqi seefeena tauseenna (7,000) moomoo uqanna minaki kuqifaranoo. Moomoo uqanna nukundara foora faiqi anaasee kuqifaranoo, moomoo kaqi marifaranoo. Kaqi marinausa mina qafamaseeqa quandaq- iqa innaarunai mari Anutuna afeeka amooqifaranoo. (Qinee Yoohaneesa mi aiqama ainaina innaarunai maridaqa qafaafannana.)

<sup>14</sup> Doo indaruqaaqanda mandainaina doo aru taikkeenoo, moodaa kai dauni aniraan- noo.

*Ukeena fuaqammaree dinni taikasee dinni ani moodaa fuaqasee doo dinni ani qaarai- ufa.*

<sup>15</sup> Qinee Yoohaneesa qifu pisipasamandoofaqa innaarunai maridaqa qafaafananoo qangiroo moo fannoo inaaqianaafa nari ukeena fuaqanau. Fuaqasoofanoo innaarunai mari ufafa maaqi qimasee firaa kari kooroo inau. Doo maqee maaqooqari maqasaa rakisira afeeka maasa karaambaiqa faqa nari asauku mundiranaindi faqa maridanoo mifa naaru naaru mina rakisida mariannoo. <sup>16</sup> Mi ufana qima taikasooofanoo faiqi uriqararasa Anutuna ufa irira qaari fiq fiq iqa marusa noorindari maqasaa aqufufafa Anutuna amooqifa qiqau.

<sup>17</sup> Oo Karaambaiqa Anutu aiqamausa uriqararafa firaafa anee maridana ooqai marunafa maqee marianafa. Doo anee aneenna firaa afeeka kooroomasee maqasaaqaraasa rakisi nimaqee mariannanara maasa minara ani dufi dufi qimamaqaidafa.

<sup>18</sup> Aniara nikooqee mari maqannaasa aniara aanooqirafa qumbiqarasa mariafana ani Anutuna aanooqira aukuaana nimirafa doo ani maridanoo. Kuqiraua findifu masee mandufa nimira aukuaana doo ani maridanoo.

Ani ainainira fasiqa tamummaqaraasa misa kadaapirirana akiaqara nimira aukuaana doo animaridanoo.

Aiqama fasiqa anaasee uriqararasa faqa kaiqeesa faqa ani ufara rufiida naaquqaida mi mau fimarisa faqa misa kadaapirirana amiqira akiaqara nimira aukuaana doo animaridanoo.

Maa maqa maaqana mariasa kuridi mariasa misa kuridira aukuaana doo animaridanoo.

<sup>19</sup> Miqi qimasee uriqararasa Anutuna amooqimasooafa qinee quandaki qafaafananoo Anutuna amaana maqa innaarunai marufa kooqi atuafufafa qafaqiafana. Mi amaana maqanaki Anutuna faqa faiqi faqa moodaanakikira ufa bookisara foora auquqooafa marufafa qafaqiafana. Mi bookisanaki Anutuna ufa oonisaa akararirafa Mooseena ooqai amufa maru bookisana qafaqiafana. Qinee qafaafananoo aakuasaa uqinoo innaarunai qinoo maqa kasinoo firaa pupusamu aqufinau.

## 12

*Aareena fannoo anaasee faiqi nambiqarara qu ufafa.*

<sup>1</sup> Qinee Yoohaneesa miquna qafamaseeqa quandaki moo ainaina qafaqiafana. Innaarunai firaqoo kooroo ira ainaina kikiqusirafa kambiqooafa qafaqiafana, anaasee moo fannoo suani afu miqira kurusa afisusee maru qafaqiafana aikuqara quqoonasaa

ranoo marufaqa qafaqiafana mina akiaqaki afisira qafeesaa qisaukuqara taikasee qiku ooqu qaaraqanda marasee fasaunamu mina qafeesaa qeemaru qafaqiafana. <sup>2</sup> Mi anaaseefa amuaqu uqaikinoo marufa innaamunara aurinoo aupureenoo faaqa rinau.

<sup>3</sup> Faaqa rimarufaqa qinee quandaifi moo ainaina innaarunai mari ainainna kooroo ianinnana qafaqiafana. Qaareena qinaakuna qafaqiafana mina afaaqa aiqama taatuqee arinoo marinau mina akiaqa aambumanamu qisauku dinni taikasee dinni ani qaara marasee akiaqafaqaafa marinau. Aiqama akiaqasaa qafee afisinoo marinau, mina akiaqaqaqa aanai qisaukuqara taikasee marinau. <sup>4</sup> Mina ameesa fannoo innaarunaidaraa fasau moomoo nukudara foorarararamee qeenoo maqai aqimarinau. Mi qaareenafa amuaqu uqaikira anaasee oorisa kikinoo maridanoo faiqi maqasainanoo nambiqarara rakisidanoo. <sup>5</sup> Mi anaaseefa akoonaiqi maqasoofanoo findifinoo qainna auqira samu qumareenoo aiqama aanaamurusaa rakisi nimaqaaninnana maqanau. Mi anaaseefa akoonaiqi maqasoofanoo Anutufa qaareena naandoo qimasee aranaifi rafusueeqeenoo innaarunai narí ufa irira qaarisaa quqasoofanoo marinau. <sup>6</sup> Miqiuafanoo mi anaaseefa quqasee qaareenara rufiasee sandee aadana maqa maaqaki Anutufa deedaqammaqoon-aki oonu marinau. Qaaramoo aukuaana faqa moo aukuaana atisaa faqa Anutufa miqoo rakisinau.

<sup>7</sup> Qinee Yoohaneesa qafeemariafananoo rakirafa innaarunai kambiqanau. Dinni qangiroom karaambaifaqaa mina auqu Mikaraafa Anutuna qangiroom namufaqa dinni qaareena narí manda qangiroom namufaqa maridaqa innaarunai rakimariqau. <sup>8-9</sup> Mikaraafa Anutuna qangiroom namufaqa afeekaikamasee qaareena rafaqaqafuseenoo narí faqa narí qangiroom namufaqa rafuseeqeenoo innaarunaidari maqasaa aqusanau. Anutufa aníara sia maaqooqari maaqoo mariannee qifaqa ani maqasaa rafusueeqee aqida fee qimasee aqusanau. Mi qinaakuna qaareenafa ooqai sakani marufa aiqama maa maqanasaaqaraasa ueeqee marufa marinau. Mina auquara Afaanna firaafa Sadannee qinau.

<sup>10</sup> Mikaraafa Sadanna maqasaa aqusoofaqa qinee Yoohaneesa qifu pisipasamasooafaqa innaarunai maridara fooqaana qafaafananoo ufa moo firaa kari nameera qinau, Anutuna asumu maree mariafa doo animaridanoo. Doo maqee Anutufa narí Karaambaifa afeeka kooroomaseenoo. Doo maqee mina asauku mundirafa narí aanoo doo uqan-nifiqeenoo. Doo maqee maasa qikaqaafasaaqaa maqasaaqaraasa nikuruqirafa eendaki faqa faasaana faqa Anutuna afusaa munuqi miniqi marifa Sadannafa innaarunakiqari aranaifi futeeqa rafusueeqeenoo maqasaa doo aquseenoo. <sup>11</sup> Maasa qikaqaafasaaqaa maqasaa fasiqauqa Anutuna sipsipa aanaaqi kuqu fidikanannai doo Sadannana uraaqaareenoo nári Anutuna anoona ufara kuqunannai faqa mina uraaqaareenoo misa mi ufanara narí mariranara sia anoonee qimasee kaqi kuqiraree qimariasa maridaqa. <sup>12</sup> Ufa firaagoo kai qidanoo qinau. Innaarunaki mari ainainausa innee aiqama asasiaga Sadannafa inniki marifa doo maqai aqufinoo. Innee maqasaa mariasa faqa ooruku nammariqi mari ainainna faqa innee rufiada mariaqa. Afaanna firaafa inniki ooqu finoo mina aanoo firaafa mariannoo narí qusasaa mariannanara iriseenoo mina aanoo firaafa mariannoo fee qinoo.

<sup>13-14</sup> Qinee Yoohaneesa mi ufana iriseeqa quandaki qaareena maqasaa qafeeqa. Qaareena qinaakufa doo maqasaa aqufinoo maridano qafeenoo aanoomaseenoo quandaki faiqi maqoo anaaseena arunaaneera afaqanoo fufanoo Anutufa firaa quqamu aqoosa qaaraaqanda amufanoo qaqamareenoo aadana maqasaa Anutufa deedaqammaqoo maqanasaa aqufinoo asumu marinau. Qaaramoo aukuaana faqa moo atikai marasoofanoo Anutufa rakisimarufanoo qaareena fannoo mi anaaseena aranasaa Anutufa ititeemarinau. <sup>15-16</sup> Qaareena fannoo mi anaaseena qafamasee aanoo qufanoo mina ookiqari nammari moomoo auffmanau. Nammari auffmanoo mi anaaseena mi samuna aruanifeera fufanoo maqa fannoo mi anaaseena soodaqqinoo maqa oo raqafufanoo nammari minaki kai keeganau. <sup>17-18</sup> Qaareena fannoo mina qafuofanoo firaagoo uqanna aranaqoofanoo quandakinoo mi anaaseena ati aiku asauku marusa aiqama Anutuna auuqira sandufamau fimariasa Yisuna kooroo ira anoona ufamau fimariasa faqa naruane qimasee fufa ooruku nammari afainni kikiqinoo marinau.

## 13

*Maa maqanasaaqaraa kaasau aandaufara qu ufafa.*

<sup>1</sup> Qinee Yoohaneesa qifu pisipasamandoo innaarunai maridaqara foorararamee qaareena ooruku nammari afainni kikiqinoo marufaqa qafamasee akara rumaqaafananoo. Mifa miqoo kikiqinoo marufanoo ooruku nammariqi qari kaasau aanda mo fannoo ururoofaqa qafaqiafana. Mi kaasau aandauna aanai qisaukuqara taikasee marinau mina

akiaqa dinni qisauku taikasee dinni ani qaara marasee akiaqafaqaafa marinau. Aiqama aanaisaa karaambaiga qafee afisinoo marinoo aiqama akiaqamau narí Anutunara fidigaaira manda nuquqa akararinoo marinau.

<sup>2</sup> Mi kaasau aandaufa firaa kusina fooqaatia faiqí narimarifa marinau. Mina aiku firaa samaada aikuara foora marinau. Mina oo aamara raiiona oo aamara fooqaafa marinau. Mifa ooruku nammarikiqari ururoofanoo qafamaseenoo qaareena fannoo narí afaaqai maru ainainna mi kaasau aandauna ooruku nammarikinaana aminau. Narí rakisira qaari faqa aiqama maqannaasa rakisirana faqa mi kaasau aandauna amisoofanoo rakisinnimaqanau. <sup>3</sup> Mi kaasau aandaufa marufanoo moo fannoo mina akiaqaki moo arufanoo kuqinoora fooqaana maseenoo aru afaaqana ateeqaqoofa unufufanoo kaifaa findifinoo nammarikiqari ururoofaqa qafaqafana. Aiqama maa maqana afaaqasasa mariasa mifa findifuna qafamasoofanoo naaquqoofaqa aiqama mina ufamau kaimbiqau. <sup>4</sup> Qaareena fannoo firaa uriqarara afeekana kaasau aandau amunara minara aaqee maria fasiqa anaaseesa qaarenara innaaru qidaqa amooqí mariqau. Misa kaasau aandau oorinni faqa innaaru qimasee amooqíqa qíqau. Yafee maa kaasau aandauna amana maridane. Sia uqanna. Yafee mina ariraramasee aruannoo fee, sia moo fannoo amana arifara.

<sup>5</sup> Mi manda kaasau aandaufa aiqamai rakisidanoo mandufa uqanna oosana oosana ufa qimarufanoo Anutufa sia qaoo qínau, qaara fasiqa niku nisauku taikasee moo fasiqa oonu qaara marasee quqoonasaa kaqí maridanoo mina kai qafee marinau. <sup>6</sup> Mi kaasau aandaufa Anutuna faqa mina auqu faqa manda niqurarara niquraree marinau. <sup>7</sup> Mifa Anutuna aiku asauku faqa rakinoo rafaqaqafinau. Mifa kaqikaa maqanna faqa firaa maqanna faqa aiqama ufa qimariasa faqa aiqama maqusaana faqa rakisimarufanoo Anutufa sia qaoo qínau kaqí kai qafanau. <sup>8</sup> Aiqama maa maqa maaqana afaaqasasa mariasa mi kaasau aandaunara Anutufara foora innaaru qimasee amooqífaranoo. Misa narí nuqu kaqí marifandinnausa Yisuna bukaki akara rimariasa misa kai sia amooqífaranoo. Ooqai maa maqa maaqana sia maruqoo Anutuna sipsipa aanaaqí kuquna bukaki nuqu marisa kai sia kaasau aandau amooqífaranoo.

<sup>9</sup> Aiqama naaqoo faqaasa ufa iriaqa. <sup>10</sup> Kasooqaqee kaasau aandau Yisuna ufasaara naruainausara Anutufa ooqai irinai. Kaasau aandau fannoo rumbaainausara faqa ooqai irinai. Mi narira aukunnai Anutuna ufa iri mariasa sia rufiasee minnisaaqa afeekaikamasee uaqee iaqa minasaa mundufi firana faqa kaqí kai fuaga.

<sup>11</sup> Qinee Yoohaneesa mi kaasau aandauna qafamaseeqa quandakufaqa moo kaasau aandau maqikiqari ururoona qafaqafana. Mina aanai qaraqanda sipsipa aanaira foora ururanoo marinau. Mina ufa fannoo qaareena ufa qimarinau. <sup>12</sup> Sipsipa aanaikirafa indaarugaa kaasau aandau oorisa kikiqammambi mina afeeka firaatia maranau. Mifa aiqama maqa afaaqasasa mariasara indaarugaa kaasau aandauna amooqíaqee sia amooqífaqa naruanauree qínau. Mi indaarugaafa kuqiraramasee afaqa ateeqarafa qunufunara innaaru qida amooqíaqee qínau.

<sup>13</sup> Sipsipa aanaikirafa inaaqianna aandau fannoo aiqamausa nifusaa faiqí sia auqaqaa ira ainaina auqínau, aiqamausa nifusaa innaarunaindari ida fannoo maqasaa aqu fuannee qufanoo aqufinau. <sup>14</sup> Mifa indaarugaa kaasau aandau oorisa faiqí sia auqaqaa ira ainaina auqusoofanoo minannai maqasaqaraasa aiqama nikaruqínau. Miqídanoo mifa aiqama maqasaqaraasa qimanniminoo qínau, Innee afaqa ateekasooofanoo kuqiraramandee findifuna amana auqaqa. <sup>15</sup> Misa auqusoofanoo sipsipa Anutufa uqeeqararee qimasee narí namuqaa qumee afeeka amufanoo aanaikira aandau fannoo unnaqimasee narí afeeka fee qimasee aidoo indaarugaa kaasau aandau amana auquqoonaki aidoo fuaqasoofanoo mina amana fannoo faiqiara foora ufa qínnoo nariara sia innaaru qimasee amooqusa kuqa narinau. <sup>16</sup> Sipsipa aanaikira aandau fannoo nariraruqafa aiqama maqannaasa kaiqeesa faqa uriqararasa faqa ainaina faqaasa faqa kudifasiqa faqa rumbee mariasa faqa idukimariasa faqa aiqama narí akara narí nisauku uqannai fee niqinaaqafee akara rumannisanau. <sup>17</sup> Mi akarana sia marinausa sia ainaina nimisee mina akiaqara feefauru mareefaranoo, ainaina faqa sia amana munnimma aqusee mareefara. Mi akarana oosana kaasau aandau mina auqu nambaqa mariannoo.

<sup>18</sup> Irirana faqaasa maa ufana iriaqa. Irirana faqaasa mi nambaqana kaasau aandau nambaqa oosana irifaranoo. Mi nambaqafa faiqí auqu kikiqammusidanoo. Mi nambaqafa maaqimminoo maridanoo. Sikisa handareeta faqa sikisti sikisa faqa maridanoo, (666).

<sup>1</sup> Qinee mi ainainausa qafamaseeqa quandakufaqa qafaafananoo sipsipa aanaaqi kuqufa Yisufa Oorifa aaqanasaa moo auqu Sioona aaqana minasaa kikiqinoo marinau. Oorifa aaqana Yeerusaree maqusa aaqa maridanoo. Mina saimbaqa faiqi moomoo mariqau. Yisuna auqu faqa mina akoona auqu faqa niqinaaqa akara rirausa kai mariqau. Mi fasiqausa nisaanaruafanaqa wan handareeta faqa footi maqi tauseenna faqa Yisuna faqa mariqau, (144,000). Faiqi ooni saqari uqanna auqufiqau. <sup>2</sup> Qinee mina qafaidaqa innaarunaindaraa ufa moo iriqiafana. Firaa kari innaarunai qiara foora qinoo firaa oondaindari nammariara foora aqufidanoora foora qufaqa iriqiafana. Miqimarunakina innaarunaindari piripunna ariufaqa iriqiafana.

<sup>3</sup> Yisuna saimbaqa Oorifa aaqanasaa mariusa wan handareeta faqa footi maqi tauseenna faqa misa aiqama Anutuna qaari oorisa faqa qaara faqa qaara faqa aandau faqa uriqararausa faqa misauqa noorinni ubeekaqa. Noori ubeekaidaqa fuka idi moo raqau sia moo fannoo mi idina irifaranoo Yisuna faqa maru fasiqausa wan handareeta faqa footi maqi tauseenna faqa misa kai mi idina amana reefaranoo Yisuna fidikannoo feefaurirausa kai mi fasiqausa marufaqa qafaqiafana. <sup>4</sup> Mi fasiqausa sia anaasee qummuari marusa amiqira maanaaqara foora andeeqarausa kai maridaqa. Misa sipsipa aanaaqi kuquna Yisuna faqa aiqamai fimarusa misa maqasaa fasiqa nandafiana neera fooridaqa misa Anutunaindi faqa Yisunaindi faqa maridaqa miqidaqa. <sup>5</sup> Sia unna ufa misaki marusa sia aaqarafa misaki marusa.

*Qaaramoo qangiroo qu ufafa.*

<sup>6</sup> Qinee Yoohaneesa miqimaruna qafamasee quandafi qafaafananoo qangiroo moo fannoo innaarunai sandaaqai qaamaree fufaqa qafaqiafana. Mifa amiqira faasaas ufa naaru naaru marira ufa aiqama maa maqanasaaqaraasa firaa maqanaasa faqa kaqikaa maqannaasa faqa aiqama ufa qimariasa faqa aiqama maqannaasa faqa qimannimirara qaamaree finoo firaa kari qinau. <sup>7</sup> Innee Anutunara rufiasee mina afeeka uriqararanara amooqiaqa, doo mifa maqasaa mariasa ufa irirafa doo ani maridanoo. Mifa innaaruna faqa maqa faqa ooruku nammari faqa kaqi nammariuqa faqa minauqa auqufa maridanoo, mina oorisa kumaramafi amooqiaqa.

<sup>8</sup> Mi qangiroofa miqi qimasoofoano qangiroo moo fannoo mina aanaaqianna qaamaree fidanoo Babiroonia maqasara anaasee kikiqa ususee qinau. Manda anaasee Babiroonia maqusa doo maqasaa aqufinoo maqusa naakundu kai saaeemaseenoo. Mi maqannaasa nari deedeepirana faiqi anaasee qummuarirana moomoo uainna nammariara foora aiqama maqannaasa nimufaqa namaseera foora aiqama maqannaasa nimufaqa namaseeqa rufufarammidammia.

<sup>9-10</sup> Doo mi qangiroofa miqi qimasoofoano mina aanaaqianna moo qangiroo fannoo qaamaree finoo firaa kari nameera qimasee aiqamausa qimanniminoo qinau. Kaasau aandau fee nari amana auqiranaree amooqidaqa innaaru qimariasa mina akara niqinaaqa faqa nisaukusaa faqa akara rirausa misa Anutuna aanooqirana uainna nammariara foora nambiqeefaranoo. Anutuna aanooqiranara qidanoo ididimari uainnana kikiqa usidanoo. Sia nammari namufaqa uainna namufaqa asooarana nimifaranoo kaqi uainna kai ididi marina kai nari manda oosana akiaqara aanooqirana idara foora qeemarina nimiannoo. Aiqama kaasau aandau amooqimariasa faqa mina akara maree mariasa faqa misa aiqama Anutuna naaquqara andeeqara qangiroouqa noorisa faqa sipsipa aanaaqi oorisa faqa firaa idaqee marinaki aupuraranaki fifaranoo. <sup>11</sup> Misa aupuraranana nimimari mi idauru munafa naaru naaru ururaidanoo mariannoo. Faasaana faqa eendaki faqa sia asooarana mareefaranoo kaqi miqi kai minoo mariannoo. Kaasau aandau fee mina amana auqiranara innaaruqimariasee mina akara maree mariasee misa aiqama miqi kai mifarannoo.

<sup>12</sup> Mi aukuanai maqasaa Anutuna aiku asauku marianausa mi aupuraranaki reen-deenamafi fifimafi marirana faqa Yisunasaa kaqi kai mundufi marirana faqa miqimandee mi aukuanna Yisuna ufamau fimariasa miqiaqa.

<sup>13</sup> Mi qangiroofa miqi qimasoofoa qini qifu pisipasamasoofoa qinee innaarunaira foora mariafananoo ufa moo qimaqiminau, Yoohanee anee maa ufana akara rua. Maa aukuanasaaqari karaambaiqaki keeqafiqqa kuqifandinausa misa asasifaranoo. Anutuna maraquna fannoo mi ufana irisee dadaaqinoo qinau. Eeoo kuqaa nariqa kadaapi fraana ririseeqa kuqiaqa adooaidaqa asasifaranoo. Nari kadaapirirana anoona kuqiranaki fiqa doo maree fidaqa asasifaranoo.

*Anutufa maa maqa maaqanakinaasa nifiqaseenoo nari ufa irimariasa maraaninna ufafa.*

<sup>14</sup> Qinee Yoohaneesa mi ufana iriseeqa quandafi qafaafananoo eekara asurusaa faiqi moo fannoo faiqi nimaakuara fooqaana ooqufaaqee idanoo kooraa auqira qafee afisirafa

asaukuki paipana afai raiqarana asaukuki uaqeefaqa qafaqiafana. <sup>15</sup> Mi fasiqafa asurusaa ooqumariifi marufanoo Anutuna innaarunai naaquqara amaana maqakiqari qangiroo moo fannoo raudee qumuree mi fasiqana firaa kari aaramaseenoo qinau. Doo narana qanaa marida aneenna paipanannai atekasee maree ania. Doo maqasaa naranara foora akuqanoo maridanoo. <sup>16</sup> Asurusaa marufa mina iriseenoo eedoo qimaseenoo doo narí paipana rauqimareenoo maqasaa aquseenoo narana atekasee maree urinau.

<sup>17</sup> Maroofanoo qangiroo moo fannoo Anutuna naaquqara amaana maqaki innaarunai marunakiqari raudamaki anireenoo narí asaukuki paipana afai raiqarana uqirafa raudoofaqa qafaqiafana.

<sup>18</sup> Anutuna tatufira qaindasaa rakisimarufa qumureenoo paipana uqirafa qumuna aaramasee qimaminau. Anee doo uainna tatimaria sandafa maqasaaqaraasa mandosana doo akuqanoo maridanoo, atekamaree murusee misa fidika saunara foora tati. <sup>19</sup> Mina iriseenoo paipanafaqaafa narí paipana maqasaa uainna sanda ateka mareenoo Anutuna aanooqirana tatimarunaki maqasai murusee naambeeqai aqinau. <sup>20</sup> Aqusoofaqa misa tatisoofanoo fidika kai nammariara foora auginoo faiqí nuka kai ururufanoo nianai uqanna maree finau.

## 15

*Maa maqafa taikainna aukuaana dinni ani qaara marasee qangiroo aupurarana maree anifara.*

<sup>1</sup> Qinee innaarunai mariafana moo innaarunai koorooira ainaina naaquqara ainaina kambigoo qafaqiafana maaqimasee kambiganau. Qisauku dinni taikasee dinni ani qaara marasee qangiroo namu narí nisaukuki Anutuna taikaranaki aupurarana uqirausa aniqau. Mi aupurarana maqasaaqaraasa Anutuna ufa sia irimariasa nimisaifanoo Anutuna aranaqarafa taikaannoo.

<sup>2</sup> Qinee mina qafamasee quandaki ooruku nammariara foora tanuka minasaa maridanoo foora idauru namufaqa marufaqa qafaqiafana. Miqoo ooruku nammari afaisaa faiqí anaasee moomoo Anutuna ufa irimarusa usimariqau. Misa kaasau aandau akarara qaoo qimarusa misa kaasau aandau faqa mina amana auqirana faqa rakiara foora mina uriqararusa mariqau. Anutufa misa piripunna nimufaqa misa <sup>3</sup> Anutuna ainainira faiqí Mooseena faqa sipsipa aanaaqi kuqufa faqa miqanda idi ree mariqau. Maaqi qimasee idi raqau.

Oo Karaambaiqa aiqama afeekafaqaa Anutufa,

Anee aiqamausa rakisi marianna oosanafa faqa anee imarianna oosana faqa idaaqirafa firaafa maridanoo.

Anee aiqama maqasanaasa Karaambaiqa marianafa,

Anee niniunafa andeeqarafa kuqaa marunafa marianafa.

<sup>4</sup> Oo Karaambaiqa yafasiqa fee sia ania ruftaidanoo.

Yafasiqa fee ani uriqararana sia koorooiannoo,

Aneennaraa kai naaquqarafa mariananoo.

Ani andeeqara ainainirafa aiqamausa qafamasee minara aiqama maqanna aniree ani oorisa aniree ani amooqifaranoo.

<sup>5</sup> Misa mi idina ramasoofaqa qinee Yoohaneesa qafaafananoo Anutuna amaana maqa innaarunai atuasoofaqa qafaafananoo minaki ooqai Mooseefa Anutuna uqaana maqa usakaqoofa mina aundurai marufaqa qinee qafaqiafana. <sup>6</sup> Dinni taikasee dinni ani qaara marasee qangirooqaa Anutufa faiqí anaasee nimianinna aupurarana uqirausa faasai nindafaafanau misa Anutuna naaquqara amaana maqakiqari raudaqa. Misa qamunna anukarafa eekara arirafa marinau. Misa kooru auqira raitanda naamma ameemaana rumbarausa animariqau. <sup>7</sup> Ani marufanoo Anutuna aaqa aandau qaara faqa qaara faqa marunakiqari moo fannoo kooru auqimaru qafeesa dinni taikasee dinni ani qaraqanda marasee qafeesa naaru marira Anutuna aanooqirafa qumbiqara qafeeqa aiqama qangirooqaa nisaukuki moodaa moodaa quqasanau. <sup>8</sup> Quqasoofanoo innaarunai amaana maqa idamuna qumbiganau. Anutuna afeeka faqa Anutuna areenarana faqa minasaqari idamuna fannoo mi amaana maqanaki qumbiganau, sia keeqarana amana marinau. Nisauku dinni taikasee dinni ani qaara marasee qangiroo misa aupurarana taikasoofoano miqoo kai amana keeqaaqainau.

## 16

*Naaru kambiqaaninna ainainna kukeeqarana koorooirafa Yisufa Yoohaneena koorooqimamufanoo akara rinau.*

<sup>1</sup> Amaana maqakinaa idamuna qafamaseeqa iriqaafana ufa moo innaarunai maru amaana maqakiqari ufa moo firaa qoo nameera qimaseenoo aupurarana maroo qangiroosa qimanniminau. Doo innee qisauku dinni taikasee dinni ani qaara marasee qafee Anutuna aanooqira qafee maraasa doo innaarunaindari maqasaa muqu teeqiaqa.

<sup>2</sup> Miqi qufanoo indaaruuqaa qangiroom nari qafee mara maree innaarunaindari maqasaa muqu teeqinau. Teeqimasooqaa maqasaa fasiqi anaasee kaasau aandaara innaaru qimarusa mina akara maree marusa misa nifaqaqasasa kaaqa nidafidanoo afundidanoo eefeeda namuana fooqaafa moomoo narinau.

<sup>3</sup> Narusoofanoo kafaa mina aanaaqianna qangiroom moo fannoo nari qafee mareenoo muqu ooruku nammariki teeqimaqusoofanoo kuqira fasiqa fidikara foora kai mandifufanoo kuqira fasiqa fidikara foora maqufufanoo ooruku nammariki marida kasi maria ainainafa aiqama kuqu taikafinau.

<sup>4</sup> Kuqutaikafufanoo miqanda ninaaqiana moo qangiroom fannoo nari qafee mareenoo innaarunaindari nammariki uqannaki muqu teeqimasooqaa fidika kai qumbiqafinau. <sup>5</sup> Qumbiqafufanoo nammarisaa rakisamaru qangiroom fannoo nameera qinau. Oo Anutufa naaquqarafa anukarafa ooqai marunafa maqee marianafa anee fidika naaqee qimasee nimiannanara andeeqarafa mariananoo. <sup>6</sup> Misa maqasaa fasiqa Anutuna ufa irimaria fasiqanaaseesa faqa tamummaqara fasiqauqa faqa fidika ruqiee marianara anee fidika nimianaqa naidaqa. Nari oosanara saanara mina akiaqara fidika naidaqamiafoo qinau. <sup>7</sup> Miqimandoofanoo Anutuna tatufira qaindasaqari ufa moo qinau. Oo Karaambaiqa Anutufa uriqararafa aninna narirafa kuqaa andeeqarafa kai marifa mariananoo.

<sup>8</sup> Mi namusa miqimasooqaa innaaqianna moo qangiroom fannoo suanisaa nari qafeekinaana muqu teeqimasooqaa suani fannoo firaaqoo ididinoo faiqi anaasee firaaqoo idara foora nitakuqinau. <sup>9</sup> Nitakuqufafa aanoomasee quandaki Anutuna auqu ramasee aquraraqau. Mi oosana oosana aupuraranna marasee mi oosannana akoonaa aqurarasee sia nari mandainana minisee Anutuna amooqigau. Kaqi maraqa fimariqau. <sup>10-11</sup> Mi namusa miqi masooqaa qangiroom moo fannoo nari qafeekinaana kaasau aanda qarisaa teeqimasana. Teeqimandoofanoo asukuna fannoo kaasau aanda ququsakinaasa ititannimaqasoofaqa nipatara aupuraidaqa naridaqa nidafirana faqa namuanara faqa aupuraidaqa nifai riqidaqa innaarunai Anutuna aqurara ufa kai qidaqa kaqi furufarammasee nari mandainana kaqi mara maree fimariqau.

<sup>12</sup> Mi namusa miqimasooqaa qangiroom moo fannoo nari qafeekinaana Eufarateesa nammariki teeqimaqusoofanoo mi nammarifa aiqama aadanusinau. Suani oosanaindaraa karaambaiqauqa nari rakira fasiqauqa faqa rakiraramasee aniaqera aadanusinau. <sup>13</sup> Qinee Yoohaneesa mina qafaafananoo afaanna qaaramoo taka fooqaana mandaikirana qafaqiafana. Moo fannoo ooqai maru qaareena ookiqari ururanau moo fannoo indaaruuqaa kaasau aandauna ookiqari ururanau, moo fannoo unna qira tamummaqara fasiqa ookiqari ururanau. <sup>14</sup> Mi qaaramoo takausa oosana oosana ainana sia faiqi auqaaqaa ira ainana auqeeamaru afaannausa faiqi rakisirusaikiga mariqau. Mi qaaramoo afaanna namusa aiqama maqa maaqakina karaambaiqauqa nari sundia namuqaa nifiteeqee rakiranaki quqee mariasa mariqau. Misa Anutuna faqa rakirara masaifanoo Anutufa uriqararafa misa aiqama naru taikaanoo.

<sup>15</sup> Miqimarufanoo Yisufa miqoo qini qimaqimino qinau. Qini ufa iria, qinee ummuarira fasiqara foora ireeda kai innaarunaindari qumuanaura. Nifu maqee marusa faqa qamunna deedaqiraua faqa asasifaranoo, sia kaqisamu fiqa faiqi nifusaa faqa Anutuna afusaa faqa sia nisaufirananoo.

<sup>16</sup> Yisufa miqi qimaqimisooqaa mi taka namusa aiqama karaambaiqa faqa nari sundia namuqaa nifiteeqeenoo Isaraee maqasaa quqasanau. Mi maqa maaqana auqu Heeburu ufakiqari moo auqu Isaraee maqannaasa ufakiqari Aramakeedoona maqa maaqee qimariqau.

<sup>17-18</sup> Miqoo suqu quqasoofanoo innaaqianna qangiroom fannoo nari qafeekinaana ufaisaa muqu teeqinau. Teeqimasooqaa Anutuna qarisaqari amaana maqaki marufa ufa moo firaa kari qinau. Doo taikkeefoo qimasooqanoo aakuusaa uqinoo innaarunai qinoo oosana oosana ufa qinoo maqa naaquqarafa firaaqaa uqanna kasinau. Ooqai oosana arooqooqari sia maqa maaqimasee kasidanoo maana firaaqaa uqanna uriqararafa kasiannoo. <sup>19</sup> Yeerusaree maqusa qaaramoo kamu afoomakinoo aiqama maqusanasa taunna faqa kuridiannoo. Mikari Anutufa Babiroonia maqusara sia auninau. Nari kaafakinaa aanoo qirana idaqee mari nammariara foora adiasee Babiroonia maqannaasa nimisooqaa namasee kuqigau. <sup>20</sup> Aiqaama ooruku nammariki mari afumausa aiqama nammariki ukuqnama taikanau, aiqama aaqana faqa taikanau. <sup>21</sup> Pupuusamu innaarunaindari faiqisaa aqufinau firaa pupusamu moodaa moodaa fifti kiroogaram qaara fasiqa niku nisauku taikasee moo fasiqa asakuqara taikasee sikeera akara kamu



aqufufaqa faiqí anaasee mi firaa pupusamuna qafamasee quandaki Anutuna aqurara ufa kai amiqau.

## 17

*Firaaqoo ummuari maria anaaseesa ninoona aru ufafa.*

<sup>1</sup> Pupusamu taikafufanoo qafee teequsakiqari moo qangiroo fannoo qini daareenoo qinau, Yoohanee anee mai anirainaqá firaaqoo ummuari mari anaaseena kuridirana oosana uqafiqa. Mi anaaseefa firaa taunna kikiqa usidanoo, moomoo nammari mina aqaq maridanoo. Mi moomoo nammarina kikiqa usirafa maridanoo faiqí anaasee moomoo maqusanasaara qidanoo. <sup>2</sup> Maa maqanasaaqaraa karaambaigauqa mi manda anaaseena aafeeqee mariafa maridanoo aiqama maqannaa fasiqa anaasee faqa maa anaaseena ummuarirana uainna nammariara foora neeneesaidaga furufaridaqa.

<sup>3</sup> Miqí qimasee qimaqimisoo fanoo Anutuna mara quna daakufufanoo mi qangiroofa qini mareeqeenoo innaarunaindari maqasaa muqu aadana maqasaa quqaseenoo mi anaaseena uqafiqinanau. Mi anaaseefa taatuqee aanda ukaasau aanda uatufakaqa oogu faaqee marinau. Mi kaasau aandauna afaaqasasa Anutunara fidiqaa ira auqu moomoo mina afaaqasasa akararinoo marinau. Mi aandaufa dinni qisauku taikasee dinni ani qaara marasee akiqa faqaafa marinau, mina aanai qisaukuqara taikasee marinau. <sup>4</sup> Mi anaaseena qamunna sia kaiqeesa afisimariana uriqararansa afisimaru qamunnanda saasaakooná arirana faqa taatuqee arirana faqa afisimarufa aiqama ainaina koorannai auqirana kai afaqa auqirafa marinau. Firaa feefauru aqimari ooninna pupu ooni fooqaana faqa maranoo ninau. Mi anaaseena asaukuki koorá auqira kaafa uqusee marinau. Mi kaafanaki ikairifaqaa ainaina faqa faiqí anaasee narí ummuari narí ummuarirana aiqama mi ainainafa mi anaaseenasaa aniqusirafa mi kaafanaki qumbiqanoo maridanoo. (Faiqí anaasee kikiqa usidanoo kuqaa qira Anutuna minniseeqa unna qira Anutuna amooqimarianara qidanoo.) <sup>5</sup> Mi anaaseena aqinisaa mina auqu akara rinoo maridanoo auqu akooqoo maridanoo oosana kukeeqanoo maridanoo. Mina auqu maaqí qinoo maridanoo Firaa Babiroonia aiqamausa nári naumoosaa feefauru maree mariafa ninoofa faqa kaaqa aanaaseera rimariasa ninoofa faqa maridanoo.

<sup>6</sup> Qinee Yoohaneesa mina akara qafeeqa mi anaaseena oosana qafaunanoo furufaramminoo marifaqa qafeeqa. Mifa Anutuna maqasaaqaraa faiqí anaasee fidika faqa Yisuna ufara afeekaiki mariafa fidika faqa uainna nammariara foora misa narusee misa fidika neeneeseenoora foora furufarinoo nimari anaaseefa. Qinee mina qafamasuanoo firaaqoo daaquqeenoo. Qangiroo fannoo miqiafananoo qiqafeenoo qinau. <sup>7</sup> Anee nanaree aaquqaidanoo fee qinee mi anaaseena faqa mi aandauna faqa oosana kooroo qianamma iria. <sup>8</sup> Anee kaasau aanda qafaanafa ooqai marufa maqee sia maridanoo, mifa qusasaa maqa ameemaanai madikakiqari urureenoo taikaranaki fuanno. Naaru naaru mariranaki fimariasa Anutuna bukaki nuqu akara rinoo maridanoo, ooqai maa maqafa sia maru kamuqoo mi bukanaki misa nuqu akara rumaqoosa maridanoo. Maa maqanasaa mariafa sia mi bukanaki nuqu akara rumaqoosa misa mi manda kaasau aandauna qafeeqa kaaqa naaquqainaga mina ufamau fifaranoo. Ooqai marinoo maqee sia maridanoo kafa kasoqaqee kooroo ianinnanara tautumasee mina ufamau fifaranoo.

<sup>9</sup> Maa ufana irirana faqaasa kai irifaranoo. Mi kaasau taatuqee aandauna akiaqa dinni qisauku taikasee dinni ani qaara marasee akiaqafaqaafa maridanoo. Mi akiaqa namuna faqa dinni qisauku taikasee dinni ani qaara marasee aqana namu kikiqa usinoo maridanoo mi anaaseefa minauqasaa oqufaaqee maridanoo, karaambaigauqaindi faqa miqimasee namu maridaqa. <sup>10</sup> Moodaannai qisauku karaambaigá doo taikafiqau, moodaa kaqí rakisidanoo maridanoo moo fannoo aniraanno anirainanoo qusasaa taikaanno. <sup>11</sup> Mi kaasau aandaufa anaasee minasaa oogu mariufa ooqai marufa maqee sia maridanoo kasoqaqee kafa kambiqaanno. Ooqai indaarú mifa dinni taikasee dinni ani qaaramasee karaambaigá marunaki mariufa taikafufanoo kaifaa kambiqafinoo dinni ani qaaramoo kinanoo mifa qusasaa kuridiranaki fuanno.

<sup>12</sup> Manda kaasau aanda ukaasau aanai qisaukuqara taikarafa miqimandee kai kasoqaqee karaambaigauqa maqasaa moodaa kari kambiqafi maridaqa faiqí anaasee rakisi nimaqee faranoo. Mi namusa nári afeeka manda kaasau aanda naida amisaifanoo mifa misa faqa qusasaa faiqí anaasee rakisi nimaqaanno. <sup>13</sup> Mi karaambaigausa qisaukuqara taikaransa moodaa irirana mariranasaa maridaqa nári afeeka faqa nári uriqararana faqa mi manda kaasau aandauna pooduqida amimarifaranoo. <sup>14</sup> Mi karaambaigausa sipsipa aanaaqí Yisuna aruannee qimasee mina faqa rakifara. Yisufa narí rusandeesamumasee naaramaqaisa afeekaikamandee Yisuna faqa fimariasa nida

saimbaqa mi karaambaiqausa naru taikeefaranoo. Mifa Yisufa aiqama karaambaiqa maridanoo aiqama uriqararousa urinaaqararafa maridanoo minara Yisufa quandaki misa faqa naru taikaannoo.

<sup>15</sup> Mi qangiroofa kafaa mi anaaseenara qimaqiminoo qinau. Mi anaaseefa nammari amuaqusaa oqumaruna anee qafaananoo. Mi nammarifa moomoosa maqusa mariasa moomoo fasiqa anaasee ufa oosana oosana qimariasa kikiqamusinoo mi nammarinasaa maridanoo. <sup>16</sup> Mi qisaukuqarana taikasee aanai nimanasaa karaambaiqauqa mariasa faqa manda kaasau aandau faqa mi umuari mari anaaseenara fidiqaammidaqa mina aiqama ainaina marasaifanoo mifa kaqi samu mariannoo. Misa miqoo mina amaqi namasaifanoo doo idaqaama taikafuannoo. <sup>17</sup> Mi karaambaiqausa sia nariqa kai miqifaranoo. Anutufa qumee fuki faaki qinaqa misa sia irirainni misa nari iriranammifoo qimasee nari afeeka manda kaasau aandau amifaranoo. Anutufa nari ufa anoonaikianinna aukuanara afeesidanoo miqianoo.

<sup>18</sup> Mi anaaseena anee qafaanafa mifa aiqama maaqa maaqa karaambaiqausa rakisi nimaqemari maqusafa maridanoo.

## 18

### *Babiroonia maqusa Anutufa naru taikoo ufa.*

<sup>1</sup> Qinee Yoohaneesa mi ainainasaa qafamasee moo qangiroo qafaqiafana. Anutufa nari afeeka firana amufanoo innaarunaindari maqasaa qumuroofanoo mina areenarafa firaqoo aiqama maqa maaqasaa areeneenoo kaaqa qamaqinau. <sup>2</sup> Mifa firaa kari maaqi qimasee nameera qinau. Mifa doo kuridinoo firaa Babiroonia maqusa doo aqufinoo kuridinoo. Mi nakundunaki afaannauqa faqa nimanauqaindi qikairi faqasaaqau faqa ufiniuqa afaanna ufini kai fidiqaaq irafauqa kai maridanoo. <sup>3</sup> Mi maqusaanaasa nari ummuarirana faiqi anaasee nari deedeepa nari deedeepirana uainna nammariara foora aanaamuru mariasa niminoo innee naaqee qimasooqauq neeneeusa maridaqa. Maqasaaqaraasa aanaamuru karaambaiqauqa Babiroonia faqa ummuaridaqa naafeeqeusa maridaqa. Aiqaama maaqa maaqa pisinisa uqeeree mariasa Babiroonia maqannaasa kaaqa ainaina moomoo irairaimarinanoo minannai munnimma moomoo maree mariasa maridaqa.

<sup>4</sup> Mi qangiroofa miqi qimasoofanoo innaarunaindaraa ufa qinee Yoohaneesa moo iriqaifana. Mifa maaqi qimasee Anutufa ufa irimariasa qimanniminoo qinau.

Oo qini giku qisauku innee mi maqusanakiqari doo aniaqa. Innee sia misa mandosonaki keeqaaqa miqiqqa sia misa nariranaki faqa keeqaaqa.

<sup>5</sup> Mi maqusaanaasa mandainaina fannoo naramuaaqa naramuaqa inoo oorufiifanoo meera innaarunai ooru maridanoo. Anutufa misa mandoosana qafaidanoo iridanoo.

<sup>6</sup> Misa inni mandaikamma nimaqoondee kai innee quandaki nari nimiaqa. Misa inni mandaikamannimaqoona akiaqara innee quandaki qaaraikamandee nimiaqa. Misa manda nammari inni nimunara innee quandaki mi kaafanaki kai idaqainna nammarina firaqoo nimifaqa naqa.

<sup>7</sup> Babiroonia maqannaasa nari nifaqaq areenarana faqa nari moomoo amiqira ainaina faqa nariqa maraqau. Mi ainainna amana kai innee aupurarana faqa ikifaafau qirana faqa misa nimiaqa. Misa nariara uriqararausee qimariana sia maasa keekoopau maridau. Maasa sia ikifaafau qianauree qimariana akiaqara aupurarana faqa ikifaafau qirana faqa nimiaqa.

<sup>8</sup> Misa miqi qimaria mandainaina akiaqara misa firaqoo nidafrana faqa namuana faqa aurirana faqa ikifaafau qirana faqa aandaroo narirana faqa aiqama ainaina moodaa kari misa nifaqaq quqasaaqa. Misa mi maqusafa ida qama taikaannoo. Karaambaiqa Anutufa misa ufa irimarifa afeeka uriqararafa marifa maridanoo.

<sup>9</sup> Mi qangiroofa Babiroonia maqusara kaqi qinoo qinau. Maa maqa maaqanasaaqaraa karaambaiqauqa Babiroonia maqusaindari mandainaina maree mariasa mi maqusaana idaqainna idamuna qafamasee firaqoo ikiraqeeferanoo. <sup>10</sup> Misa mi maqusana aupurarana qafamasee rufisee nianai tatiqaq maridaqa maaqi qimasee faiqira foora mi maqa maaqana qimamifaranoo. Oo mandainaina, Oo naaquqara ainaina maa firaa afeeka maqusa Babiroonia moodaa faasaana kai ani mandoosana akiaqara kuridi taikaananoo.

<sup>11</sup> Maqasaa pisinisa fasiqauqa faqa mi maqusanara ikiraqaida maaqi qifaranoo, sia mi maqannaasa kafaa maasa amiqira ainaina marasee feefauru qimifaranoo. <sup>12</sup> Sia kafaa moo fannoo maasa kooru faqa siruaa faqa firaa feefauru aqimaria oosana oosana ooniuqa faqa marasee feefauru qimifaranoo. Sia kafaa moo fannoo maasa amiqira qamunna oosana oosana saasaakoona arirana faqa fidika arirana faqa marasee

feefauru qimifaranoo. Sia moo fannoo maasa amiqira saqari faqa eereefanta aanainnai auqimaria ainainna faqa firaa feefauru aqimaria saqarinannai auqimaria ainainna faqa booroosannai faqa qainnannai faqa amiqira ooninnai faqa auqimaria ainainna sia kafaa marasee feefauru qimifaranoo. <sup>13</sup> Sia moo fannoo ooruku oosana oosana faqa amiqimasee afundimaru ainainna faqa makaqa nammari faqa fadameena faqa parauaqa faqa raisa faqa burimakau faqa sipsipa faqa qoosa faqa qoosa faqa qoosa mari karana faqa karabusa ainainira faiqi faqa faiqi nimana faqa sia moo fannoo kaifaa mi ainainausa marasee munnimma qimifaranoo.

<sup>14</sup> Pisinisa imaria fasiqausa Babiroonia maqusara maaqi qimasee qifaranoo. Babiroonia maqannaasa innee niqaarree marifaqa adiafaa imarifaqa maree maria ainainausa doo kukeeqafinoo, ani munnimma moomoo faqa ani adiafaairafa kaaqa qaranasaa marina doo taikkeenoo sia kafaa paqurinnaranoo. <sup>15</sup> Pisinisaiki maria fasiqausa Babiroonia maqannaasa amiqira ainaina feefaurumasee minannai firaa munnimma maree marusa mi maqusana aupurarana qafamasee rufiasee nianai tatiqa marida ikiraqeesee soofaaramaseeqa maaqi qifaranoo. <sup>16</sup> Oo maa firaa maqusa mandainaina naaqqarafa kambiqaano maridanoo. Mi maqusafa aanaaseera foora saasaakoon arirana faqa fidika arirana faqa afisirafa kooru auqimaria oondana faqa firaa feefauru aqimaria ooniqa faqa afaaqa auqirafa doo maqee dadi taikafinoo.

<sup>17-18</sup> Miqi qimaseenoo mi qangirooma sipa kiateenara maaqi qinau. Aiqa sipa kiateenauqa faqa nari pooskurauqa faqa nari pasindiauqa faqa aiqama ooruku nammari amuaqumau nidaqa ainaini marusa Babiroonia idamuna qafeeqa nianai tatieeqa ikiraqeeqa maaqi qifaranoo. Sia moo maqusa maa firaa maqusa auqu faqaafa miqirafa maridanoo. <sup>19</sup> Miqi qimaseeqa kookooma afaqa qumaree nikiqa amoondunna kukupamaseeqa maaqi qifaranoo. Oo mandainaina naaqqarafa firaa maqusa auqu faqaafa kukeeqeenoo. Aiqa sipaki nusa ooruku nammari amuaqumau nusa maa maqusanakinaasa ainaina moomoo nimisaida firaa munnimma maree marunausa doo dauni mi aiqama ainainafa qama taikkeenoo.

<sup>20</sup> Mi qangirooma miqi qimaseenoo quandakufanoo Anutuna aiku asauku Babiroonia maqusara qimanniminau. Innee innaarunai mariasa faqa Anutuna aiku asauku faqa Yisufa niqiqoo fasiqausa faqa Anutuna tamummaqara fasiqauqa faqa innee aiqama asasiqa. Mi maqusafa inni nari ifa mina akiaqara Anutufa maqee mi maqusana arifanoo kuridinoo asasiqa.

<sup>21</sup> Miqi qimasoo fanoo qangirooma moo amudaanai qimarufa ooni firaatia minannai mi aukuanna maru fasiqanaaseesa sakuma andaana andaana rimariqau. Mi ooninna foogaa tia rafusu qumareenoo ooruku namariki aranaiqi aqinoo qinau. Mi firaa maqusana auqu faqaana Babiroonia maqusa ooni aqunnana amana kai agusainanoo kukeeqafinaqa sia kaifaa qafeefaranoo. <sup>22</sup> Minaki pipipunna arimariasa faqa kaqikaa ufireena fuaqee mariasa faqa firaa ufireena kookaanuru fuaqee mariasa faqa aiqama musika fuaqee mariasa faqa sia kaifaa mi maqusanaki qafeefaranoo. Oosana oosana ainaini mariasa misa kukusi mariafa sia kafaa irifaranoo, qaindi afai faqa siammirifaranoo. <sup>23</sup> Sia minaki qooma qaannoo sia kafaa nimundarana tutuqirafa mariannoo. Babiroonia maqusai pisinisa imarusa faqa aiqama maqannaasi pisinisa imarusa faqa urinaaqararaua mariqau. Inni aukainaina maraqa nuasa nariqa unnaqira aukainainannai aiqama maqannaasa nikaruqidaqa.

<sup>24</sup> Anutufa nari aiku asauku fidika faqa nari tamummaqara fasiqauqa fidika faqa aiqama maqusana kuqimarusa faqa Babiroonia maqusaki paqurunara narirana nimianoo.

## 19

<sup>1</sup> Mi qangirooma Babiroonia maqusara ufa qimasoo faqa quandafi ufa firaana innaarunai qifu pisipasamasoonaki maridaqa iriqiafana. Mi ufafa faiqi moomoo suqiqa maridara foora qinoo maaqi qiqau. Anutuna amooqiaqa. Faiqi asumu maree mariana faqa kaaqa qarana faqa firaa afeeka faqa maasa Anutunaindi maridanoo. <sup>2</sup> Mifa mi umuari mari anaaseefa maqasaqaraasa putaamannimaqee marunna akiaqara Anutufa mina arinuu. Miqunara mina ufa nimirafa kuqaa andeeqarafa maridanoo. Mi anaaseefa Anutuna ainainira fasiqauqa kuqa narunara Anutufa arinuu. <sup>3</sup> Misa kafaa faaqariqa qiqau. Anutuna amooqiaqa. Mi maqusana, Babiroonia maqusa idamuna fannoo naaru naaru ooru fimariannoo. <sup>4</sup> Miqi qimasoo faqa faiqi firaasa moodaa fasiqa faqa qaara faqa qaara faqa Anutuna qaari fiq fiq iqa marusa faqa aandaq qaara faqa qaara faqa marusa faqa Anutuna oorisa noorindari maqasaa aqufidaqa Anutuna amooqidaqa qiqau, misa kuqaa qidaqa, Anutuna amooqiaqa.

*Sipsipa aanaaqi Yisuna amundara qoomaqa ufa.*

<sup>5</sup> Miqi qimasoofanoo ufa moo Anutuna qaarisaagari qufaqa iriqiafana. Aiqama Anutuna ainainimarusana minara rufilemarusa, kaqiqeesa faqa uriqararusa faqa aiqama maasa Anutunara amooqiaqa. <sup>6</sup> Miqi qimasoofanoo ufa moo faiqi moomoosa suqidara foora firaa oondainni nammari aqufidanoora foora innaarunai qinoora foora miqira ufa fannoo maaqi qinau. Innee aiqamausa Anutuna amooqiaqa. Karaambaiqa maasa uriqarara Anutufa afeeka uqanna mifa nari aiqamai rakisinnimaqarana doo oosana araseenoo uriqaranoo maridanoo. <sup>7-8</sup> Tatufrana aruaninna sipsipa anaaqifa Yisuna amundarafara foora doo animaridanoo, minara maasa susuiqa asasiqa mina uriqararana amooqiaqa. Mina aanaaqara foora Anutufa fuka siara eekara arimaruna aminoo maa siarana iraanee qufanoo irasee deedaqinoo maridanoo. Mi eekara siarafa Anutuna maqasaa fasiqa anaasee andeeqara oosana kikiqamusinoo maridanoo.

<sup>9</sup> Mi ufana qimasoofanoo mi qangiroofa qini Yoohaneesa qimaqiminoo qinau. Yoohane maa ufana akara rua. Maa ufausa Anutuna kuqaa anoona ufa maridanoo. Anutufa sipsipa aanaaqi amundara qoomaqa naaree marisa susuida asamariasa maridaqa. <sup>10</sup> Miqi qimasooafa qini daaquqooafa mi qangiroona aikuki doorindari aqufumafi amooqianeeriafananoo mifa qaoo qimaseenoo qinau. Oo anee sia miqia. Aiqama Yisufa kooroo ira anoona ufa qumaree mariasa ani faqa ani akaqaafasaauqa faqa moodaa ainainimarusana maridaqara anee sia qini qimooqia Anutuna kai amooqia. Yisufa nari maru aukwana nari anoona ufa koorooinau. Mi ufafa kai Yisufa sia kambiqoo aukwana tamummaqara fasiqauqa naakufufafa qimannimufafa akara riqau.

*Eekara qoosasaa marufa nari andeeqaranannai aiqamausa uriqararafaikinau.*

<sup>11</sup> Mi qangiroofa miqi qimasooafa innaarunai marida qafaafananoo innaaruna ra-keemambufafa akooqoo mariqau. Qinee minaki qoosa moo eekara arirana qafaqiafana. Mina ataufakaqa Yisufa oofuqaqee maridanoo mina auqu qaara auqu faqaafa. Moo auqu amiqirafa mapukusee miqoo kai mari fasiqanee qinau. Moo auqu kuqaa ufa qimari fasiqanee qiqau. Nari andeeqara iriranannai kai faiqi anaasee ufa rainannimaqaidanoo minannai kai mandoosana maree mariasa rakirana marannimidanoo. <sup>12</sup> Mina afu idauru miqirafa qeemarinau. Mina akiaqasaa karaambaiqa qafee moomoo afisinoo marinau. Mi fasiqana auqu nari afaaqai akara rinoo maridanoo sia moo fannoo qafaidanoo nari kai qafaidanoo. <sup>13</sup> Mina qamunna afisimarufa fidika aanaaqi marinau. Misa mina auquara Anutuna ufafee qimariqau. <sup>14</sup> Mifa nari qoosasaa aiqaroofanoo mina aanaaqianna Anutuna innaarunaindaraa rakira ammiuqa aiqama nari eekara qoosasaa nariqa qamunna eekara qamunna anukara qamunna afisirausa mina aanaaqianna mina afaqee fiqau. <sup>15</sup> Mina ookiqari aseema raqarafa ani marinau. Minannai aiqama maqannaa rafaafuqannoo, qainna samu uqirafa nidanoo rakisinnimaqannoo. Mifa uriqarara afeeka Anutuna aanoqirafa aranandaki idara foora aiqama maa maqanasagaqaraasa mina ufa sia irimariasa afapita qumareenoo moodaanaki afapita rapidau inanoo faiqi fidika fannoo sauna tatira fara foommiannoo. <sup>16</sup> Mina qamunnaasaa faqa mina aikusaa faqa mina auqu moo maaqi qimasee akara rirafa Karaambaiquqa karaambaiqa uriqararusa uriqararafa maridanoo.

<sup>17</sup> Qinee Yoohaneesa mina qafamaseeqa quandaki qangiroo moo suanisaa kikiqinoo marina qafeeqa. Mifa aiqama ufina innaaruna ameemaanai nimariasa firaa kari nameera qimasee qimanniminoo qinau. Innee suqufiqa Anutuna firaa qoomaqa sakasee naaqa. <sup>18</sup> Innee suqufiqa karaambaiquqa faqa sundiauqa faqa misa kiateenuqa faqa qoosauqa faqa minasaa akaraqa kaasau faqa aiqama fasiqa rumbee mariasa faqa iduki mariasa faqa kaiqeesa faqa uriqararusa faqa Anutufa misa aiqama narusainqa misa nimaqi anireeqa Anutufa qoomaqa sakaseenoo misa nimaqi aniree naaqa.

<sup>19</sup> Suanisaa maru qangiroofa miqi qimasooafa quandafi firaa rakirana qafaqiafana. Manda kaasau aandaau faqa maa maqa maaqanasaa karaambaiquqa faqa nari rakira sundiauqa moomoo faqa suqifi eekara qoosasaa marufa nari ammi sundia namufafa naruannee qimasooafa rakirana uqeerqau. <sup>20</sup> Qoosasaa marufa manda kaasau aandaau uraaqaramafinoo rumba quqaseenoo inaaqianna kaasau aandaau namufafa rumba quqanau. Mi inaaqianna kaasau aandauna moo auqu unna qira tamummaqara fasiqa. Mi unna qira tamummaqarafa indaaruuqa kaasau aandaau oorisaa faiqi sia auqaaqaa ira ainaina auquqoofa mi ainainnannai mifa faiqi anaasee nikaru qufaqa akaqausa niqinaaqa faqa nisauku uqannai faqa manda kaasau aandaau akara maraqau. Akaqausa mi kaasau aandaunara innaaru qimariqau. Eekara qoosasaa nimarufa mifa kaasau aandaau mareeqee unna qira tamummaqara fasiqa faqa kaqi kasi mariafaqa qumareeqee ida farumaki aqinau. Mi idafa firaaqoo aurukandaa kandaa idanoo afunda mandaikammimarinau. <sup>21</sup> Eekara qoosasaa nimarufa nari ookiqari ani maru qaseemafa kaasau aandaau ammi sundiauqa faqa maa maqa maaqana karaambaiqa ammi sundiauqa faqa

aiqama naru taikasoofaqa innaarunai ufiniuqa qumuree aiqama misa nimaqi noofanoo nimuaqafaqa minnisafaqa.

## 20

*Wan tauseenna aukuaana Yisufa rakisiu ufafa.*

<sup>1</sup> Qinee Yoohaneesa miqimaruna qafamasee quandaki innaarunaindarii qangiroo moo fannoo maqa ameemaanaai kiqa faqa kisaafaqaa sainanda faqa asaokuki uqirafa maqai quminau. <sup>2-3</sup> Qumureenoo qaareena qumarana. Mi qaareenna moo auqu ooqeenaa sakani moo auqu Sadannafa moo auqu afaanna. Mi qangiroofa qumareenoo sainandanni rumbaseenoo maqa ameemaanaai madikaki afeeqa aquseenoo rookamandeenoo amusaraseenoo wan tauseenna aukuaana minaki marianne qimasee qiganau. Mi kamugoo sia maa maqa maaqanasaaqaraasa nikaruqianoo. Mi wan tauseenna aukuaana taikasainanoo Anutufa kafa idukusainanoo kaqikaqoo kafa nikaruqianoo.

<sup>4</sup> Qaareena rumbasoofaqa qaari moomoo innaarunai ufinqinoo maru qafaqiafana. Minasaa oogu mariqaa marusara Anutufa innee faiqi anaasee ufa iriaqee qinau. Qinee miquna qafeeqa quandakufaqa faiqi nimana moomoo qafaqiafana. Misa Yisuna anoona ufa faqa Anutuna ufa faqa koorounara narusa nimana marufaqa nindafaqiafana. Misa sia manda kaasau aandaufee mina amanaree innaaru qimarusa mariqau. Misa manda kaasau aandaufee akara niqinaafa faqa nisaukusaa faqa qaooo qimarusa mariqau. Misa kuqiranakiqari findi fiqa asauku mundirana saimbaqa karaambaqika mambiqaa faiqi anaasee rakisifaranoo. Mi uan tauseenna aukuaana minasimbaqa rakisifaranoo qinee qafaqiafana. <sup>5</sup> Akaqausa kasooqagee wan tauseenna aukuaana aiqarammafufanoo Anutufa inaaqiannaasa mara findifuannoo. <sup>6</sup> Indaaru findifiraua Anutufa firaa asirana nimaqaa asisifaranoo. Inaaqianna findi firafa moo auqu inaaqianna kuqirafa mariannoo. Sia indaaru findifiraua urinaaqareefaranoo. Indaaru findifiraua Anutunaindi faqa asauku mundirana aanaiqikirausa maridaqa wan tauseenna aukuaana Yisuna faqa faiqi anaaseesaa rakisifaranoo.

*Sadannana nari aiku asauku faqa idaki aquaninna ufafa.*

<sup>7-9</sup> Mi uan tauseenna aukuaana aiqarainanoo Anutufa Sadanna nari rumberanaki-naana idukusainanoo raudamakinoo aiqama maqasaa mariasa kafa nikaruqianoo. Nikaruqimaseenoo naarainafaqaa moomoosa uqanna anireeqa nukudara foora qumbiqaa aquuffanoo Anutufa aidimari maqasana Yeerusaree maqusa faqa Anutunara rimaria fasiqa anaaseesaa faqa aiqama firaqoo rafusu quqarumasee nariraree qianoo. Aiqama maqannaasa suqimarusara Kookana maqannaasa faqa Makookana maqannaasa faqee qimarifaranoo. Rakunee qimarufanoo innaarunaindarii ida firaafa qumureenoo aiqama naru taikasoofaqa qinee qafaqiafana. <sup>10</sup> Naru taikasoofanoo Anutufa faiqi anaasee nikaru qimaru afaannana rafuseeqeenoo ida farumaki afunda manda marunaki aqinau. Sia nari kai, ooqai manda kaasau aandaufee unna qira tamummaqara fasiqa faqa marunaki afaanna rafusu aqinau. Miqoo misa maridaqa faasaana faqa eendaki faqa aupurarana maridaqa naaru naaru marifaranoo.

*Anutufa taikara faasaana ufa qianinna ufafa.*

<sup>11</sup> Qinee Yoohaneesa miqiqufaqa qafamaseeqa quandaki qafaafananoo firaa qaari ufiquirafa eekara arimarunasaa minasaa ooguqumaru fasiqana faqa qafaqiafana. Mifa kooroo mafufanoo innaaruna faqa maqa faqa mina afusaaqari doo taikkeenoo taikafinau. <sup>12</sup> Qinee miqoo qafaafananoo kuqiraua aiqama kuqiranakiqari findi fiqa Anutuna qaari aaga ufa qiraree qimasee kikiqiga mariqau. Uriqararaua faqa ooruqupiraua faqa amana amana kai Anutuna oorisaa kikiqigau. Innaarunai mariasa mi kuqiraua akara papiqa qairiseenoo nisaana riqau. Papiqa moo kaqi mariasa nuqu papiqa faqa qairisee qafana. Anutufa mi papiqanaki-naana misa manda marirana niraana auqarana qafamaseenoo ufa mina amana kai nimaau. <sup>13</sup> Anutufa qufanoo ooruqu nammari fannoo kuqiraua minaki marusa mareeqeenoo Anutuna afusaa quqasoofanoo kuqirana faqa maqa ameemaanaai kuqirana faqa nariki maria kuqiraua mareeqee Anutuna afusaa quqaaqau. Quqasoofanoo Anutufa aiqama nari mandainaina auqoona akiaqara ufa nimaau. <sup>14</sup> Kuqiranaki mariasa faqa maqa ameemaanaai kuqiranaki mariasa faqa aiqama mareeqeenoo ida farumaki aqinau. Mi ida farumanaki aqimarianara inaaqianna kuqirane qinau. <sup>15</sup> Aiqaqausa asumu maraaninausa papiqaki nuqu marisa misa kaqi marifaranoo mi papiqanaki nuqu sia marinausa misa aiqama mareeqee kaqi kasi marufanoo ida farumaki aiqama aqinau.

## 21

*Fuka innaaruna faqa maqa faqa auquaninna ufafa.*

<sup>1</sup> Maa nauraa maqafa faqa innaaruna faqa ooruku nammari faqa doo taikanau. Taikafufanoo fuka innaaruna faqa maqa faqa ooqeenana amaaqa maqasoofaqa qafaqifafana. <sup>2</sup> Qinee qafaafanoo Anutufa qufanoo fuka naaquqara maqusa fuka Yeerusaree innaarunaidari qumureenoo ooqeenaa Yeerusaree amaaqa maqafufaqa qafaqifafana. Fuka anaasee amundaranara foora afaaqa auqirafa fuka maqasaa quminau. <sup>3</sup> Qumuroofanoo ufa moo fannoo Anutuna innaaruna qaarisaagari maaqi qimasee firaa kari qinuu. Doo maqee Anutuna maqusa faiqiki qumu maridanoo. Mifa misa faqa marinaqa misa mina faiqi anaasee marifaranoo. Anutufa nari uqanna misa faqa marinoo misa Anutufa mariannoo. <sup>4</sup> Mifa aiqamausa naukunu rukaannoo. Sia kafa kugirafa faqa ikifaafau qirafa faqa idaqarafa faqa nidafirafa faqa sia kafa mifauqa mariannoo. Mi ooqeenaa ainainafa doo taikafinoo.

<sup>5</sup> Mi ufafa taikoofanoo qaarisaa marufa qini qimaqiminoo qinuu. Doo qinee maqee aiqama ainaina fuka kai auqu quqaanau. Maa ufausa akara rua, kuqaa anoona ufa maridanoo minasaa mundimaria ufafa maridanoo. <sup>6</sup> Kafa qimaqiminoo qinuu. Doo aiqama ainaina taikkeenoo. Qinee oosana araafanau maridaqa taikaanina aukuaana faqaasa maridaqa. Nammariara nidimarisa fuka maqakiqari ururee mari nammari, kaqi marira nammari asoofara sia feefaurirafa kaqi nimianauranoo. <sup>7</sup> Mandainaina rafaafufusee uriaaqararau qinee maa ainaina nimianau. Qinee misa Anutusa marianau marifaranoo. <sup>8</sup> Maparaa imariasa faqa ueeqee mariasa faqa kaaqa ufa rukiee mariasa faqa faiqi anaasee kuqa narimariasa faqa kaaqa faiqi aanaaseera rimariasa faqa aukainaina maraqa nuusa faqa tumunnai faiqi nimana auqasida minara rufiasida innaaru qimariasa faqa aiqama oosana oosana unna ufa qimariasa faqa mi mardoosana maraqa nuusa misa maqasai ida farumaki marifaranoo. Miqoo ida firafa fasafasainoo mandundi marifa mariannoo. Mi idana auqu inaaqianna kuqirafa maridanoo.

*Fuka Yeerusaree anianinna ufafa.*

<sup>9</sup> Miqi qimasee qimaqimisoofanoo qangiroo moo fannoo qisauku dinni taikasee dinni ani qaara marasee marusakiqari aupurarana maqasaa teeqimariisakiqari moo fannoo aniree qimaqiminoo qinuu. Yoohanee anee mai anirinaqa auniranasaa kuqu sipsipa anaqina mina anaqa amundarana ani uqafiqaanana qafa. <sup>10</sup> Miqi qimasooofanoo Anutuna maraqa fannoo qini daakufufanoo qangiroo fannoo rafusueeqeenoo kisaqa aqanasaa quqaqisanuu. Miqooqari naaquqara maqusa fuka Yeerusaree maqusa innaarunaidari Anutufinnaidari qumuna uqafiqifanuu. <sup>11</sup> Qumimarufanoo faqa qumu marinanoo faqa minakiqari Anutuna kaaqa areenarafa minakiqari takunasoosa imarinuu. Mi fuka maqusafa pupu ooni tanukaidara foora qeemarinuu.

<sup>12</sup> Mi fuka maqusana faandaamurafa ooninnai auquqoofa marinau kisaqa amatooki kamminoo marinau minaki qisaukuqara taikasee qiku ooqu qaaraqanda marasee kooqi marinau, aiqama kooqisaa qangiroo moo fannoo rakisimarinuu. Mi kooqisasaa Isaraeena aiku asauku marusa qisaukuqara taikasee qikunni ooqu qaara marasee nuqu mi kooqisasaa akara rinoo marinau. <sup>13</sup> Suani oosana ururee maruqaannai faandaamurasaa qaaramoo kooqi mi qaannai marinau. Suani keeqee maru qaannai qaaramoo kooqi marinau. Suani dinni ataaqee qaannai qaaramoo kooqi faandaamurasaa marinau. <sup>14</sup> Mi ooni faandaamurana oosanaki qisauku qara taikasee qikunni ooqu qaara marasee firaa oniuqa marinau. Mi oonisasaa sipsipa aanaaqi Yisuna aiku asauku qisaukuqara taikasee qikunni ooqu qaara marasee marusa nuqu mi oonisasaa akara rinoo marinau.

<sup>15</sup> Mi qangiroofa qini qimaqimimaruna asaukuki ruraa koora auqimaruna uqusee mariunannai mi fuka maqusana faqa faandaamura faqa kooqiuqa faqa amanamasee qafanuu. <sup>16</sup> Mi fuka maqusana ataaqeeni faqa mina sandaaqai faqa amana amana kai marinau. Aiqama tu tauseenna faqa maqi handareeta faqa (2,400 kilometer) mina kisaqa miqimaseenoo kisaqa uqanna mi maqusana ati faqa marinau. <sup>17</sup> Mi fuka maqusa faandaamurafa faina maqa qufisara foora auqirafa marinau. Mi qangiroofa faandaamura maqasaagari ammuqunni amanamasee qafamaseenoo sikisti metera amana maridanoo fee qinuu. Kisaqa uqanna marinau. <sup>18</sup> Mi faandaamurafa pupu ooninnai auqirafa marinau, mi maqusanaki maaqauqa koorannai karasakiara foora ruqiaki qafee marufa idaaqirafa uqanna marinau. <sup>19</sup> Faandaamura oosanasa firaa oniuqa marufa firaa feefauru auqasida maree maria oniuqa mi firaa oonisasaa afaaqa auqiqee mariqau. Faandaamura firaa oniuqa qisaukuqara taikasee qikunni ooqu

qaaraqanda marara ooni mapukira ooni nifaaqa auqira ooniuga maridaqa, nuqu faqa ooniuga mariqau.

Moo ooni afaaqa moo auqirafa mina auqu yasapeera marinau. Mifa saqari amanee arirafa amananda tanukaida qeemarufa marinau.

Moo ooni afaaqa auqirafa mina auqu akafata marinau. Mifa dirindaasi ariranasaa indiri ooni arirafa marinau.

Moo ooni auqu eemrarada marinau. Mifa pupu ooni moo saqari amanee arirafa marinau.

<sup>20</sup> Moo ooni auqu saradoonikisa marinau. Mifa pupu ooni moo eekara faqa saapaani ooniara foora irafa faqa marinau.

Moo ooni auqu kananeeriana marinau. Mifa taatuqee saapaani marinau.

Moo ooni auqu koosa marinau. Mifa pupu ooni moo tumana arirafa marinau.

Moo ooni auqu beerira marinau. Mifa arooqa ooni fooqaafa saqari amanee arirafa marinau.

Moo ooni auqu toopasa marinau. Mifa pupu ooni miqirafa tumana arirafa marinau.

Moo ooni auqu karaseedooni moo ooni marinau. Mifa pupu ooni miqirafa saqari amanee arirafa marinau.

Moo ooni auqu tookeesa marinau. Mifa ooni moo saqari amanee arirafa marinau.

Moo ooni auqu ameeetisa marinau. Mifa arooqa ooni miqirafa pannoonaa arirafa amananda qafee marufa marinau.

Faandaamura firaa ooniugara mapukira ooni fee qiqaq misa nuqu miqiminoo maridanoo. Qisakuqara taikasee qikunni ooqu qaaraqanda marasee marinau. <sup>21</sup> Fuka Yeerusaree maqusa qikunni ooqu qaara marasee kooqi marinau. Aiqama kooqi faandaamurasaa maaqa kooqiara foora auqinoo marinau. Ooni firaa qumaree minaki ititee maru oonisa feefauru aqimari oonisa firaa ooniuga oonda firaa fooqaafa marufaqa qafaqiafana. Maqusa qambaana faqa naambeeqai faqa aiqama amiqira koorannai auqirafa amananda qafee marufa marinau.

<sup>22</sup> Qinee Yoothaneesa fuka maqusa Yeerusaree qafamaseeqa naaquqara amaana maqara randeeqa sia marifaqa qafeeqa. Amaana maqa marinoofau fifau mariqini. Karaambaiga Anutufa uriqararafa sipsipa aanaaqi Yisufa faqa miqoo akooqoo marunara amaana maqa sia marinau. <sup>23</sup> Suani faqa quqoonaa faqa marinaqau qafani. Sia mari qafeeqa. Maridanoofau fifau mariqini Anutuna narí firaa areenarafa firaaqoo kaaqa qamaqinoo maridanoo, sipsipa aanaaqi mi maqusana qoomara foora maridanoo.

<sup>24</sup> Aiqama maa maqa maaqanasaaqaraasa mi maqusana kaaqa qaranasaa maridanoo. Misa karaambaigauqa nári amiqira ainainauqa mi maqusanaki munu quqeeffaranoo.

<sup>25</sup> Mi maqusa kooqisa aiqama faasaana atuanoo kai mariannoo eendaki faqa sia ititeffaranoo, sia eenda mariannoo kaaqa qarafa kai mariannoo, minara kooqi sia ititaidaq.

<sup>26</sup> Aiqama maqa maaqasaa mariasa mi amiqira ainaina faqa misa uriqarara ainaina faqa maree aniree mi maqusanaki fuka Yeerusaree maqusaki kai quqeeffaranoo. <sup>27</sup> Sia moo manda ainaina fannoo mi maqusanaki keeqaannoo. Sia moo asaurira ainaina auqee mari fee unna ufa qimari fee sia mi maqusanaki keeqeeffaranoo. Sipsipa aanaaqi fannoo maqasaaqaraasa narí papiqaki nuqu akara rumaqaisa misa kai mi maqusanaki keeqeeffaranoo.

## 22

### *Kaqi marira nammariara qimaqoo ufaa.*

<sup>1</sup> Mi qangiroofa fuka Yeerusaree maqusa uqaqifiqaseenoo nammari miqoo maruna uqaqifiqanau. Mi nammari Anutuna faqa sipsipa aanaaqi Yisuna faqa maru qaarinakiqari qumuree fuka maqusa qambaana ooqu fimarinau. Mi nammari auqu kaqi marira nammari fee qiqaq. Amiqira nammari sia dumuna maqa maru nammari mi nammari mookoofa amanee kai randaidda qumidanoo. <sup>2</sup> Mi nammari dinni dinni afai saqari kambiqaano maridanoo. Mi saqarisa aiqama quqoonasaa qaqamma iraidanoo kai maridanoo. Mina amanee aiqama maqannaasa aurirana teeroo taikannisee marifa mi saqari amaneeffar maridanoo. <sup>3</sup> Moo ainainara Anutufa aqurarainna ainaina sia mi fuka maqusanaki mariannoo, doo taikafuannoo. Anutuna qaari faqa sipsipa aanaaqi qaari faqa mi fuka maqusanaki maridanoo mina aiku asauku mi maqusanaki mariasa mina amooqifaranoo. <sup>4</sup> Misa mina oori qafeefaranoo misa niqinaaqa mina auqu akara rinoo mariannoo. <sup>5</sup> Mi maqusanaki asukuna taikanoo maridanoo sia kafaa mariannoo. Misa sia qoomara suaniara iridaqa fifau maridaqa, Karaambaiga Anutufa misa qooma marinaqa miqooqaraasa karaambaigara foora naaru rakisi nimaqeeffaranoo.

*Yisufa doo qumuaninna ufaa.*

<sup>6</sup>Mi qangirooma mi ainainausa uqaqifiqaseenoo qimaqiminoo qinau. Mi ufausa aiqama qimamunafa kuqaa minasaa mundimariafa marifaqa qimamiqa. Karaambaiqa Anutufa nari maraquna tamummaqara fasiqauqa nimimarifa nari qangirooma niqiqaiifaqa mina ainainira fasiqa aanaaseesa qusasaa kambiqaaninna ainainausa uqannifiqaanifeera mi ainainausa ani uqafiqeeqa.

<sup>7</sup>Yisufa inniara maqasaa mariasara maaqi qidanoo, qinee qusasaa kafa oogu fua-naura. Maa papiqanakinna ufa irisee mi mau fimariasa misa asasifaranoo.

<sup>8</sup>Qinee Yoohaneesa mi ainainna aiqama qafamasee iriseeqa daaquqoofaqa uqaqifiqee mari qangirooma aikuki maqasaa aqufiqa amooqianeeriafananoo mifa qaoo qimasee qinau. <sup>9</sup>Oo sia miqia Anutuna kai amooqia. Qinee ani faqa moodaa ainaini marunausa maridaqa ani afasausa tamummaqara fasiqauqa faqa moodaa ainaini marunausa maridaqa. Maa papiqanakinna ufamau fimariasa misa faqa moodaa ainaini marunausa maridaqa. Sia qini qimooqia Anutuna kai amooqia. <sup>10</sup>Mi qangirooma kafa qimaqiminoo qinau. Yoohaneese anee maa papiqanakinna ufa tamummaqara ufa maridanoo sia qumeeraa, qimannimia. Aiqama maa ainainausa qusasaa kambiqaanoo sia amana quandasee kaifaa kisaqasaa fuannoo, qusasaa doo kambiqaanoo. <sup>11</sup>Anaaseera fanandirana, faiqara fanandirana, miqida nariara nariara rimariasa saina miqidaqa mariaqa, mandoosana mandoosana maree mariasa saina miqidaqa mariaqa. Amiqira oosana maree mariasa saina miqidaqa mariaqa. Maparaammasee amiqira oosana firaqoo maree mariasa saina miqidaqa mariaqa.

<sup>12</sup>Doo iriaqa Yisufa inniara qidanoo. Qinee qusasaa oqufuanaura. Innee maree marianna akiqara uqiraua doo oogu fiqa muqu nimianauranoo. <sup>13</sup>Qinee oosana aroonakiqari marunausa maridaqa. Qinee taikaaninna aukuanna faqaasa maridaqa.

<sup>14</sup>Nari qamunanda nammari uqusee anukara qamunna faqaasa misa kai amana fuka Yeerusaree maqusa kooqiki keeqafiqa kaqi naaru marira saqari qaqamma amana diqisee neefaranoo. Miqimariasa asasifaranoo. <sup>15</sup>Mi maqusana aqoosai kaaqa ufa rukiee mariasa faqa aukainaina maraqa nuasa faqa faiqi anaasee nariara nariara fanandi mariasa faqa faiqi anaasee kuqa nari mariasa faqa saqarinnai faiqi nimana auqusaida innaaru qimariasa faqa unna oosana auqimariasa faqa unna ufa qimariasa faqa misa aiqama aqoosai marifaranoo.

<sup>16</sup>Qinee Yisufa maa ufausa amaana maqaki keeqee mariasa qimannimiaqee qimasee qeeqa qangirooma aqiqeeqa. Qinee Dafidina oosanakiqari minati maridaqa. Qinee kananaana duqudeeqiara maqi kaaqa qeemarunausa maridaqa.

(Yisuna saqariki mariasa aiqama mina aqoonausara fooro mariafanoo misara Yoohaneefa moodaanaki sipsipa aanaaqi Yisuna anaqa fee qidanoo maa papiqanaki qidanoo.) <sup>17</sup>Anutuna maraquna faqa sipsipa aanaaqi Yisuna anaqa faqa aiqamausara mai aniaqee qidaqa. Aiqama maa ufana irimariasa innee faqa quandafi niqoonausa naaraaqa aniaqee qiaqa. Yisufa naaru marira nammari nimianee qidanoo. Aiqama nammariara nidimarisa doo aniree naaqa. Sia feefaurifaranoo, nidimariinausa kaqi naaqa.

#### *Taikara ufa.*

<sup>18</sup>Qinee Yoohaneesa aiqamausa maa papiqanakinna tamummaqara ufa irimariasa doori kandamasee aaquqimannimaqaidaqa faiqi moo fannoo maa papiqanakinna ufa moo nari ufa minasaa ootupamasee qinafa mina akiqara Anutufa maa papiqanakinna aupurana narirana mara mi fasiqana ariranasaa ootupainanoo firaanaikiannoo. <sup>19</sup>Kafa faiqi moo fannoo maa papiqanakinna tamummaqara ufa ati rafaqaqafinanoo minara mi fasiqafa naaru marira saqari qaqama neemariana Anutufa rafaqaqafuannoo sia naannee qiannoo mina naaquqara fuka maqusaki keeqaranara faqa Anutufa rafaqaqafusee qaoo qiannoo. Maa papiqanakinna ufamau sia fuanara qaoo qiannoo.

<sup>20</sup>Qinee maa papiqanakinna ufa qima afeekaikammannimi marunausa Yisusa maaqi qimasee qimannimidaqa kuqaa uqanna qinee qusasaa innee iannai kaifaa oogu fua-naura. Qinee Yoohaneesa minara maaqi qidaqa. Oo karaambaiqa Yisu doo qumuannee qidaqa.

<sup>21</sup>Karaambaiqa Yisuna amiqira afaarirafa inni aiqamausaki mariani.